

Alkitab
Bahasa Batak Simalungun
2007

1 Musa

Panompaon ni Naibata bani Langit pakon Tanoh ampa Haganup Isini

1 ¹ Bani mula ni mulani itompa Naibata ma langit pakon tanoh.

² Tapi seng marrumang anjaha lumei do tanoh on; hagolapan do manrongkob luhung ai, anjaha mayap-ayap do Tonduy ni Naibata i atas bah ai.

³ Dob ai marsahap ma Naibata, “Jadi ma ho na lihar!” Gabe lihar ma tongon.

⁴ Lidah Naibata ma na dob dear na lihar ai; isirang Naibata ma na lihar ai humbani na golap ai.

⁵ Jadi igoran Naibata ma na lihar ai arian, anjaha na golap ai igoran borngin. Bod ma ari, siang ma ari use, ai ma ari na parlobei.

⁶ Dob ai marsahap ma Naibata, “Jadi ma ho hajangkajang iparsitongahan ni sagala bah, bahen parsirangan ni bah humbani bah!”

⁷ Ibahen Naibata ma hajangkajang ai gabe parsirangan ni bah na i toruh ni hajangkajang ai humbani bah na i atas hajangkajang ai. Anjaha jadi ma sonai.

⁸ Igoran Naibata ma hajangkajang ai langit. Bod ma ari, siang ma ari use, ai ma ari na paduahon.

⁹ Marsahap ma use Naibata, “Martumpu ma sagala bah na i toruh ni langit in hubani sada ianan, ase taridah na horah.” Anjaha jadi ma sonai.

¹⁰ Igoran Naibata ma na horah ai tanoh, anjaha partumpuan ni bah ai igoran laut. lidah Naibata ma, domma dear ai.

¹¹ Marsahap ma use Naibata, “Ipantubuhkon tanoh in ma poyon-poyon, suan-suanan na marbatu, ampa hayu na marbuahkon buah na marbatu, marsiboan masamni i tanoh on.” Anjaha jadi ma sonai.

¹² Ipantubuhkon tanoh in ma poyon-poyon, suan-suanan na marbatu marsiboan masamni ampa hayu na marbuahkon buah na marbatu marsiboan masamni. lidah Naibata ma, na dob dear ai.

¹³ Bod ma ari, siang ma ari use, ai ma ari na patoluhon.

¹⁴ Marsahap ma use Naibata, “Jadi ma panondang i hajangkajang ni langit in, bahen parsirangan ni arian pakon borngin, bahen tanda pakon titi ni panorang, ari pakon tahun,

¹⁵ bahen panondang i hajangkajang ni langit in, laho manondangi tanoh on!” Anjaha jadi ma sonai.

¹⁶ Jadi itompa Naibata ma dua panondang bolon; panondang sibanggalan ai manrajai arian, panondang sietekan ai manrajai borngin. Itompa do homa bintang-bintang.

¹⁷ Inahkon Naibata ma sidea hu hajangkajang ni langit ai laho manondangi tanoh on,

¹⁸ laho manrajai arian pakon borngin ampa manirang na liar humbani na golap. lidah Naibata ma, domma dear ai.

¹⁹ Bod ma ari, siang ma ari use, ai ma ari na paompatkon.

²⁰ Marsahap ma Naibata use, “Manjuluri ma ibagas bah in na tinompa na manggoluh, anjaha marhabangan ma manuk-manuk i atas ni tanoh, ibagas hajangkajang ni langit in!”

²¹ Jadi itompa Naibata ma binatang laut na banggal-banggal pakon sagala na tinompa na marhosah na manggoluh ibagas bah, marsiboan masamni, ampa sagala manuk-manuk na marhabong, marsiboan masamni. lidah Naibata ma, domma dear ai.

²² Ipasu-pasu Naibata ma ganupan ai, nini ma, “Manggompari anjaha lambin gargar ma hanim, goki hanim ma bah ni laut in;” lambin bueini ma homa manuk-manuk i atas tanoh on.

²³ Bod ma ari, siang ma ari use, ai ma ari na palimahon.

²⁴ Marsahap ma use Naibata, “Ipantubuhkon tanoh in ma na tinompa na manggoluh, marsiboan masamni, pinahan, binatang na manjulur pakon binatang na i talun marsiboan masamni.” Anjaha jadi ma sonai.

²⁵ Jadi itompa Naibata ma binatang-binatang marsiboan masamni, pakon pinahan marsiboan masamni, ampa sagala binatang na manjulur i atas tanoh on, marsiboan masamni. lidah Naibata ma, domma dear ai.

Panompaon ni Naibata bani Jolma

²⁶ Marsahap ma use Naibata, “Tompa Hita ma jolma songon rupan-Ta, pakon songon parlahouta, ase irajai sidea dengke na i laut, manuk-manuk na i awang-awang, pinahan, pakon ganup tanoh on, ampa sagala binatang na manjulur i atas tanoh on.”

²⁷ Jadi itompa Naibata ma jolma in songon rupa-Ni, songon rupa ni Naibata do itompa sidea; dalahi pakon naboru do sidea itompa.

²⁸ Dob ai ipasu-pasu Naibata ma sidea, nini ma dompak sidea, “Manggompari anjaha lambin manggargar ma hanima, goki hanima ma tanoh on anjaha patunduk ma in; rajai hanima ma dengke na i laut, manuk-manuk na i awang-awang, pakon sagala binatang na manjulur i atas tanoh on.”

²⁹ Marsahap ma use Naibata, “Hubere ma bennima sagala suan-suanan na marbatu bani sab tanoh on, ampa sagala hayu na marbuahkon buah na marbatu, ai ma gabe sipanganonnima.

³⁰ Tapi bani haganup binatang na iatas tanoh on, haganup manuk-manuk na i awang-awang ampa haganup na manjulur i atas tanoh on, sagala na

marhosah, poyon pakon naporon na maratah ma Hubere panganon ni sidea.” Anjaha jadi ma sonai.

³¹ Jadi iidah Naibata ma sagala na tinompa-Ni ai, domma dear tumang. Bod ma ari, siang ma ari use, ai ma ari na paonomkon.

Ari Sabat

2 ¹ Sonai ma pardob ni langit ai, tanoh in ampa haganup isini.

² Jadi dob idobkon Naibata horja na hinorjahon-Ni ai bani ari papituhon, marsaran ma la bani ari na papituhon ai humbani sagala horja na hinorjahon-Ni ai.

³ Ipasu-pasu anjaha ipapansing Naibata ma ari papituhon ai, halani bani ari ai do la marsaran humbani sagala horja panompaon-Ni ai.

⁴ Sonin ma parjadi ni langit pakon tanoh on, sanggah panompaon ai.

Pohon Eden

⁵ Sanggah na itompa Naibata Jahowa langit pakon tanoh on, seng dong ope hayu i talun, seng dong ope suan-suanan itongah juma, halani seng ope iparoh Naibata udan hu tanoh on, anjaha seng dong ope jolma na mangkorjahon tanoh in,

⁶ tapi dong do sabun naik hun tanoh on mangarbahi ganup sisik ni tanoh on;

⁷ bani panorang ia ma itompa Naibata Jahowa jolma humbani orbuk ni tanoh on, anjaha isompulhon hosah hagoluhan hubagas ruang ni igungni. Jadi sonai ma martonduy na manggoluh jolma ai.

⁸ Dob ai ipungkah Naibata Jahowa ma sada pohon i Eden, hampit hapoltakan; hujai ma inahkon jolma na tinompa-Ni ai.

⁹ Ipantubuhkon Jahowa ma marmasam-masam hayu hun tanoh in, na jenges idahon anjaha na mantin panganon, pakon hayu hagoluhan iparsitongahan ni pohon ai, ampa hayu pambotohan ni na madear ampa na masambor.

¹⁰ Dong do sada bah, tubuh i Eden laho mangarbahi pohon ai, hunjai mardangkah do ai gabe ompat bah bolon:

¹¹ Goran ni na parlobei Pison, na mangarbahi ganup tanoh Hawila, pambuatan ni omas ai,

¹² jenges do omas na hun nagori ai. Adong do homa ijai damar Bedolah pakon batu intan Soham.

¹³ Goran ni bah na paduahon Gihon, na mangarbahi ganup tanoh Kus.

¹⁴ Goran ni bah na patoluhon Hidekel, ai ma na mabaor hampit hapoltakan ni Assur. Anjaha bah na paompatkon ai ma Eprat.

¹⁵ Jadi iarahkon Naibata Jahowa ma jolma ai, inahkon ma ia hu pohon Eden laho manlahoi ampa manramotkon ai.

Titah ni Naibata

¹⁶ Dob ai ititahkon Naibata Jahowa bani jolma ai, nini ma, “Boi do panganonmu humbani ganup hayu na i pohon on,

¹⁷ tapi anggo humbani hayu pambotohan ni na madear ampa na masambor in, seng bulih panganonmu; halani ijin ipangan ho hunjai, maningon matei do ho.”

Panompaon ni Naibata bani si Hawa.

Mula ni Partongahjabuan

¹⁸ Dob ai nini Naibata Jahowa ma, “Seng dear jolma in punjung, Hubahen ma bani sada pangurupi, gabe paranguanni.”

¹⁹ Dob ai ijadihon Naibata ma humbani tanoh in sagala binatang na i darat pakon sagala manuk-manuk na i awang-awang. Iboan ma ganupan ai hubani si Adam laho mangidah, atap sonaha bahenonni goran ni ai, anjaha ia in ibahen si Adam goran ni haganup na marhosah ai, lanjar ai do goranni.

²⁰ Jadi ibahen si Adam ma goran ni sagala pinahan-pinahan ai, pakon sagala manuk-manuk na i awang-awang ai, ampa sagala binatang na i darat, tapi bani jolma ai, seng dong jumpahsi pangurupi, gabe parangguan bani.

²¹ Dob ai renges ma modom si Adam ibahen Naibata Jahowa. Jadi ibuat Naibata ma rusukni sada, dob ai itutupkon ma daging hubani ianan ai.

²² Ijadihon Naibata Jahowa ma sada naboru humbani rusuk na humbani si Adam, dob ai itogu ma ia hubani si Adam.

²³ Jadi nini si Adam ma, “On ma da holi-holi humbani holi-holingu anjaha daging humbani dagingku. Naboru ma ia goranon, halani humbani dalahi do ia ibuat.”

²⁴ Halani ai tadingkonon ni dalahi do bapa pakon inangni laho mangkasomani parinangonni, gabe sada daging ma sidea.

²⁵ Ia sidea na dua ai, si Adam pakon parinangonni ai, talanjang do, tapi seng marsihailaan.

Mula ni Dousa

3¹ Ulog do sipandeinan marimbang sagala binatang na i talun, na tinompa ni Naibata Jahowa. Jadi nini ulog ai ma bani naboru ai, “Adong do nani ihatahon Naibata, na so bulih panganon nasiam humbani sagala buah ni hayu na i pohon on?”

² Jadi nini naboru ai ma dompak ulog ai, “Bulih do panganonnami humbani buah ni hayu na i pohon on;

³ tapi anggo pasal buah ni hayu na i parsitongahan ni pohon on, ihatahon Naibata do, ‘Ulang pangan

hanima hunjai anjaha ulang jamah, ase ulang matei hanima.”

⁴ Jadi nini ulog ai ma bani naboru ai, “Seng tongon matei nasiam,

⁵ tapi ibotoh Naibata do, anggo ipangan nasiam hunjai, gabe buha ma mata nasiam, doskon Naibata ma nasiam mambotoh na madear pakon na masambor.”

⁶ Inonoi naboru ai ma, dear do buah ni hayu ai panganon, jenges idahon anjaha siharosuhkononkon, halani boi papentarhon; jadi ibuat ma buahni, ipangan ma, ibere ma homa paramangonni na rap pakonsi ai, gabe ipangan ma.

⁷ Gabe buha ma mata ni sidea haduasi, ibotoh ma na talanjang sidea. Jadi isomot ma bulung ni hayu ara bahen bobat ni sidea.

Papa-papa ampa Bagah-bagah ni Naibata

⁸ Dob ai ibogei sidea ma sora ni Naibata Jahowa, na mardalan-dalan i pohon ai bani parrohni logou malele bod. Jadi marponop ma si Adam pakon parinangonni ai humbani bohi ni Naibata Jahowa i holangkolang ni hayu na i pohon ai.

⁹ Pio-pio ma Naibata Jahowa bani si Adam, nini ma hu bani, “Ija do ho?”

¹⁰ Nini mambalosi, “Hubogei do sora-Mu i pohon in, tapi mabiar do ahu, halani talanjang do ahu, ai do ase marponop ahu.”

¹¹ Nini ma, “Ise patugahkon bam na talanjang ho? Ai dong ipangan ho buah ni hayu na Hularang in panganonmu?”

¹² Nini si Adam ma, “Naboru na binere-Mu ai gabe hasomanku, ia do na mambere buah ni hayu in bangku, gabe hupangan.”

¹³ Nini Naibata Jahowa ma hubani naboru ai, “Ai aha do na binahenmon?” Nini naboru ai ma, “Na ipaoto-oto ulog in do ahu, gabe hupangan.”

¹⁴ Dob ai nini Naibata Jahowa ma bani ulog ai, “Halani ibahen ho sonai, hona papa ma ho i lobei ni sagala pinahan pakon binatang harangan; marhitei boltokmu ma ho manjulur, anjaha orbuk ma panganonmu sadokah manggoluh ho.

¹⁵ Anjaha bahenon-Ku ma partinggilanmu pakon naboru on, ginomparmu hubani ginomparni. Lisatkonon ni ginomparni ma ulumu, tapi pagutonmu do tambihulni.”

¹⁶ Nini ma hubani naboru ai, “Pabueion-Ku ma sitarononmu sanggah boratan rumah ho; borit ma ahapkononmu manubuhkon niombahmu! Paramangonmu ma hasiholanmu na manrajai ho!”

¹⁷ Anjaha hubani si Adam ihatahon ma, “Halani na binalosanmu hata ni parinangonmu, anjaha ipangan ho humbani hayu na Hutitahkon in bam, ‘Ulang pangan hunjai’, hona papa ma tanoh on halani ho. Ngalutan ma ho mansarihon sipanganonmu sadokah manggoluh ho.

¹⁸ Pantubuhkonon ni tanoh in ma bam duri pakon suga-suga, anjaha suan-suanan na i tanoh in ma sipanganonmu.

¹⁹ Turak-turak hadogas ma ho mansarihon sipanganonmu, paima mulak ho gabe tanoh, ai hunjai do ho ibuat; orbuk do ho, halani ai maningon mulak do ho gabe orbuk.”

²⁰ Ibahen si Adam ma goran ni parinangonni ai si Hawa, halani ia do inang ni sagala na manggoluh.

²¹ Dob ai ipauli Naibata Jahowa ma bobak bahen hiau ni si Adam pakon parinangonni ai, iabitkon ma ai bani sidea.

Hona usir hun Pohon Eden

²² Dob ai nini Naibata Jahowa ma, “Tonggor ma, domma doskon sada hun bennami si Adam, mambotoh na madear pakon na masambor; ai pe, jagaon do ase ulang idurdurhon tanganni, anjaha iputikkon humbani hayu hagoluhan ai anjaha ipangan, gabe manggoluh sadokah ni dokahni.”

²³ Jadi iusir Naibata Jahowa ma ia hun pohon Eden ai, ase ihorjai tanoh pambuatanni ai.

²⁴ Iusir ma si Adam, inahkon ma herubim hampit hapoltakan ni pohon Eden ai marhasoman podang na marjimbur-jimbur na mawas-awas, laho manjagai dalam hu hayu hagoluhan ai.

Si Kain pakon si Abel

4 ¹Jadi marsaor ma si Adam pakon si Hawa parinangonni ai; boratan rumah ma ia, anjaha itubuhkon ma si Kain. Dob ai nini ma, “Domma dapot ahu sada anak dalahi marhitei pangurupion ni Jahowa.”

²Itubuhkon ma use si Abel, anggini ai. Parmahan biribiri do anggo si Abel, tapi parjuma-juma do ia si Kain.

³Bani dokah-dokah ni ari, ibuat si Kain ma humbani limbuah ni jumanı bahen galangan hubani Jahowa.

⁴Si Abel pe iboan ma humbani bunga tubuh ni pinahanni ampa humbani taboh-tabohni. Jadi rosuh ma uhur ni Jahowa mangidah si Abel ampa galanganni ai,

⁵tapi anggo si Kain ampa galanganni ai seng iharosuhkon. Jadi milas tumang ma uhur ni si Kain anjaha migar ma bohini.

⁶Nini Jahowa ma bani si Kain, “Mase milas tumang uhurmu anjaha migar bohimu?”

⁷Ai lang dirgak do bohimu, anggo ihorjahon ho na madear? Tapi anggo lang ihorjahon ho na madear, monggop ma dousa in i lobei ni labah in, anjaha hubam do ihasiholhon, tapi ho do patut manrajaisi.”

⁸Dob ai nini si Kain ma bani anggini si Abel ai, “Eta, laho hita hu juma! Dob das sidea i juma, jongjong ma si Kain mandorab anggini ai, lanjar ibunuh.”

⁹ Jadi nini Jahowa ma bani si Kain, “Ija do si Abel anggimin?” Nini ma, “Seng hubotoh, ai ahu siparorot-rorot anggingku?”

¹⁰ Tapi nini ma, “Aha do na binahenmin? Tangar ma doruh-doruh do daroh ni anggimin hu Bangku hun tanoh in.

¹¹ On pe, hona papa ma ho, hona usir hun tanoh in, na pangangang babahni manjalo daroh ni anggimin, humbagas tanganmin.

¹² Anggo ihorjahon ho tanoh in, seng be bereonni gok gogohni hubam; mawat-awat anjaha kahou-kahou mando ho i tanoh on.”

¹³ Nini si Kain ma bani Jahowa, “Banggal do uhum na bangku in, lobih humbani na tarporsan ahu.

¹⁴ Iusir Ham do ahu sadari on hun tanoh on anjaha maningon marponop do ahu humbani bohi-Mu; mawat-awat anjaha kahou-kahou mando ahu i tanoh on, anjaha bunuhon ni sagala na jumpahan ahu ma ahu.”

¹⁵ Tapi nini Jahowa ma hu bani, “Lang sonai. Barang ise na mambunuh si Kain, maningon pitu lompit do abulonni.” Dob ai ibahen Jahowa ma tanda bani si Kain, ase ulang ibunuh atap ise pe ia, na marjumpah pakonsi.

Ginompar ni si Kain

¹⁶ Dob ai laho ma si Kain hun lobei ni Jahowa, anjaha marianan ma ia i tanoh Nod, hampit hapoltakan ni Eden.

¹⁷ Marsaor ma si Kain ampa parinangonni, boratan rumah ma ia anjaha itubuhkon ma si Hanok. Itombei ma sada huta ibahen ma goranni Hanok, mangihutkon goran ni anakni, si Hanok ai.

¹⁸ Dob ai itubuhkon si Hanok ma si Irad, si Irad manubuhkon si Mahujael; si Mahujael manubuhkon si Lamek.

¹⁹ Dua do ibuat si Lamek parinangonni, goranni na sada si Ada, goran ni na sada nari si Silla.

²⁰ Dob ai itubuhkon si Ada ma si Jabal; ia do ompung ni halak siiankon tenda ampa sipahan pinahan.

²¹ Ia goran ni anggini si Jubal do; ia do ompung ni sagala halak siparhusapi ampa siparsarunei.

²² Itubuhkon si Silla ma homa si Tubalkain; ia do ompung ni sagala halak tukang tombaga pakon bos; si Naema do botou ni si Tubalkain.

²³ Nini si Lamek ma hubani parinangonni na dua ai, "Ale Ada pakon ho Silla bogei ma sorangku; hanima parinangon ni si Lamek, tangar ma na huhatahon on! Hubunuh do sada amang-amang halani ugahku, sada parana halani lonsing-lonsing na hu bangku.

²⁴ Anggo pitu hali lompit iabul si Kain, si Lamek maningon pitu puluh pitu hali lompit do."

Si Set pakon si Enos; Pambalosion na Parlobei bani Naibata

²⁵ Marsaor ma use si Adam pakon parinangonni jadi itubuhkon ma sada anak, anjaha ibahen ma goranni si Set, ai nini do, “Ibere Naibata do bangku anak na legan gantih ni si Abel, halani ibunuh si Kain ia.”

²⁶ Tubuh ma homa bani si Set sada anak, ibahen ma goranni si Enos. Ijia ma ipungkah halak mandilo goran ni Jahowa.

Ginompar ni si Adam

5 ¹ On do tarombo ni ginompar ni si Adam. Sanggah na tinompa ni Naibata si Adam, itompa do ia mangusihi rupa ni Naibata;

² dalahi pakon naboru do sidea itompa. Jadi ipasupasu ma sidea, ibahen ma goran ni sidea jolma, bani ari panompaon ni sidea ai.

³ Dob saratus tolu puluh tahun umur ni si Adam, tubuh ma anakni, usih hubani rupani, usih hubani tompa; ibahen ma goranni si Set.

⁴ Dob itubuhkon si Adam si Set, manggoluh ope ia ualuh ratus tahun nari, anjaha itubuhkon do anak pakon boru.

⁵ Siah ratus tolu puluh tahun ma ganup umur ni si Adam manggoluh; dob ai matei ma ia.

⁶ Dob saratus lima tahun umur ni si Set, itubuhkon ma si Enos.

⁷ Ia dokah ni si Set manggoluh dob itubuhkon si Enos, ualuh ratus pitu tahun do, anjaha itubuhkon do anak pakon boru.

⁸ Siah ratus sapuluh dua tahun ma ganup umur ni si Set, dob ai matei ma ia.

⁹ Dob siah puluh tahun umur ni si Enos, itubuhkon ma si Kenan.

¹⁰ Ia dokah ni si Enos manggoluh dob itubuhkon si Kenan, ualuh ratus sapuluh lima tahun do; anjaha itubuhkon do anak pakon boru.

¹¹ Siah ratus lima tahun ma ganup umur ni si Enos, dob ai matei ma ia.

¹² Dob pitu puluh tahun dokah ni si Kenan manggoluh, itubuhkon ma si Mahalaleel.

¹³ Ia dokah ni si Kenan manggoluh, dob itubuhkon si Mahalaleel, ualuh ratus ompat puluh tahun do; anjaha itubuhkon do anak pakon boru.

¹⁴ Siah ratus sapuluh tahun do ganup umur ni si Kenan, dob ai matei ma ia.

¹⁵ Dob onom puluh lima tahun dokah ni si Mahalaleel manggoluh, itubuhkon ma si Jared.

¹⁶ Ia dokah ni si Mahalaleel manggoluh dob itubuhkon si Jared, ualuh ratus tolu puluh tahun do; anjaha itubuhkon do anak pakon boru.

¹⁷ Ualuh ratus siah puluh lima tahun do ganup umur ni si Mahalaleel, dob ai matei ma ia.

¹⁸ Dob saratus onom puluh dua tahun dokah ni si Jared manggoluh, itubuhkon ma si Henok.

¹⁹ Ia dokah ni si Jared manggoluh, dob itubuhkon si Henok, ualuh ratus tahun do; anjaha itubuhkon do anak pakon boru.

²⁰ Siah ratus onom puluh dua tahun do ganup umur ni si Jared; dob ai matei ma ia.

²¹ Dob onom puluh lima tahun umur ni si Henok, itubuhkon ma si Metusala.

²² Marparlahou marhasomankon Naibata do si Henok ai; dob itubuhkon si Metusala, manggoluh ope ia tolu ratus tahun nari; anjaha itubuhkon do anak pakon boru.

²³ Jadi tolu ratus onom puluh lima tahun ma ganup umur ni si Henok.

²⁴ Sai marparlahou marhasomankon Naibata do si Henok; dob ai seng ijin be ia, ai ibuat Naibata do ia.

²⁵ Dob saratus ualuh puluh pitu tahun umur ni si Metusala, itubuhkon ma si Lamek.

²⁶ Dob itubuhkon si Metusala si Lamek, manggoluh ope ia pitu ratus ualuh puluh dua tahun nari; anjaha itubuhkon do anak pakon boru.

²⁷ Siah ratus onom puluh siah tahun ma ganup umur ni si Metusala, dob ai matei ma ia.

²⁸ Dob saratus ualuh puluh dua tahun umur ni si Lamek, itubuhkon ma sada anak;

²⁹ ibahen ma goranni si Noak, ai nini do, "On ma na mangapoh hita bani horjanta ampa halojaon ni tanganta bani tanoh, na pinapaan ni Jahowa."

³⁰ Dob itubuhkon si Lamek si Noak, manggoluh ope ia lima ratus siah puluh lima tahun nari; anjaha itubuhkon do anak pakon boru.

³¹ Pitu ratus pitu puluh pitu tahun do ganup umur ni si Lamek, dob ai matei ma ia.

³² Dob lima ratus tahun umur ni si Noak, itubuhkon ma si Sem, si Ham pakon si Japet.

Hajahaton ni Jolma

6 ¹ Jadi dob mamungkah buei jolma i tanoh on, anjaha tubuhan boru sidea,

² iidah anak ni Naibata ma na jenges do boru ni jolma in, gabe ibuat ma sidea bahen parinangon ni sidea, barang ise na hinarosuhkon ni sidea.

³ Nini Jahowa ma, “Lang be ianan ni Tonduy-Hu jolma in sadokah ni dokahni, ai paruhur daging do ia; saratus dua puluh tahun on mando umurni.

⁴ Adong do bani panorang ia jolma raksasa i tanoh on, sonai homa i pudini ai, ai ma sanggah na pinarayak ni anak ni Naibata boru ni jolma in, gabe itubuhkon anak bani sidea; sidea ma halak na gogoh bani panorang na basaia, halak na tarambilan goranni.

⁵ Dob iidah Jahowa, na lambin roh banggalni hajahaton pakon pingkiran ni uhurni tongtong,

⁶ isol soli Jahowa ma uhur-Ni, halani na tinompa-Ni ai jolma i tanoh on, pusok do uhur-Ni halani ai.

⁷ Nini Jahowa ma, “Sasapon-Ku ma hun tanoh on jolma na dob Hutompa in, jolma age pinahan, sonai homa binatang na manjulur ampa manuk-manuk na i awang-awang in, ai domma Husolsoli uhur-Hu, halani na Hutompa ai.”

⁸ Tapi dapotan idop ni uhur do si Noak i lobei ni Naibata.

Lumba-lumba Pasal Bah na Sumbang

⁹ On ma barita ni si Noak: Halak na bonar anjaha na daulat do si Noak i tongah-tongah ni halak na sansundut pakonsi; marhasoman Naibata do ia manggoluh.

¹⁰ Tolu do anak ni si Noak: Si Sem, si Ham pakon si Japet.

¹¹ Ia tanoh in domma butak i lobei ni Naibata, anjaha gok hajahaton do tanoh in.

¹² Lidah Naibata ma tanoh in, tonggor ma, domma sambor, ai sagala na manggoluh pabutak parlahouni i tanoh in.

¹³ Nini Naibata ma bani si Noak, “Domma Huputuskon paujungkon goluh ni sagala na manggoluh, halani domma igoki hajahaton ni sidea tanoh on. On pe masapkonon-Ku ma sidea rap pakon tanoh on.

¹⁴ Pauli ma bam sada parau humbani hayu goper; bahen ma markamar-kamar paraumu, rohat ma humbagas pakon hun darat.

¹⁵ Sonon ma parpaulimu bani parau in: Ganjangni tolu ratus asta, bolakni lima puluh asta, anjaha gijangni tolu puluh asta.

¹⁶ Bahen ma tingkap bani parau in, anjaha pauli ma ai saasta hun datas; bahen ma labahni hampit lambungni, anjaha martingkat partoruh, partongah ampa pardatas ma bahen parau in.

¹⁷ Ai parohon-Ku ma hu tanoh on bah na sumbang, laho manripaskon sagala na manggoluh pakon na marhosah na i toruh ni langit; maningon rotap do hosah ni sagala na adong i tanoh on.

¹⁸ Tapi pajongjongon-Ku do padan-Ku pakon ho, masukanmu ma parau in, ho pakon anakmu, parinangonmu ampa parinangon ni anakmu na rap pakon ho in.

¹⁹ Pamasuk ma hubagas parau in saparanguan bei humbani sagala na manggoluh, humbani sagala na mardaging, ase bansah rap pakon ho; tunggal pakon boru-boru pamasuk.

²⁰ Humbani ganup masam ni manuk-manuk, humbani ganup masam ni pinahan-pinahan ampa humbani ganup masam ni na manjului i tanoh in, saparanguan, humbani ganupan ai maningon roh do bam, ase bansah.

²¹ Buat ma bam humbani sagala sipanganon na boi panganon; patumpu ma ai bahen bohalmu pakon bohal ni sidea.”

²² Jadi ibahen si Noak ma sonai; haganup songon na tinonahkon ni Naibata hubani sonai do ihorjahon.

Parmasuk ni si Noak hubagas Parau

7 ¹ Dob ai nini Jahowa ma hubani si Noak, “Masuk ma ho hubagas parau in pakon ganup sinrumahmu, ai ho do Huidah na bonar i lobeihu humbani halak na sansundut on.

² Humbani pinahan na panti panganon buat ma bam pitu parangguan, tunggal pakon boru-boruni, tapi saparangguan ma humbani pinahan na so panti panganon, tunggal pakon boru-boruni;

³ sonai homa humbani manuk-manuk na i awang-awang pitu parangguan, tunggal pakon boru-boru, laho pagoluhkon bonihni bani sab tanoh on.

⁴ Halani pitu ari nari parohon-Ku ma udan hu atas tanoh on ompat puluh ari ompat puluh borngin dokahni, anjaha ripaskonon-Ku ma sagala na dong na hutempa in, hun tanoh on.”

⁵ Jadi ibahen si Noak ma ganup, songon na hinatahon ni Jahowa hu bani.

⁶ Onom ratus tahun ma umur ni si Noak, sanggah na roh ai bah na sumbang hu atas tanoh on.

⁷ Masuk ma si Noak hu parau ai rap pakon anakni, parinangonni ampa parinangon ni anakni ai, halani bah na sumbang ai.

⁸ Humbani pinahan na panti panganon pakon humbani pinahan na so panti panganon, humbani

manuk-manuk pakon humbani haganup na manjulur i atas tanoh on,

⁹ roh mar sasaparangguan hubani si Noak hubagas parau ai, tunggal pakon boru-boru, songon na hinatahon ni Naibata hubani si Noak.

¹⁰ Dob salpu na pitu ari ai, roh ma bah na sumbang hu atas tanoh on.

Parroh ni Bah na Sumbang

¹¹ Bani paonomratus-tahunkon goluh ni si Noak, bani bulan dua ari sapuluh pitu, bani na sadari ai ma pultak bah ni luhung bolon anjaha mungkab ma ganup labah ni bah na i langit.

¹² Jadi manalosou ma roh udan hu tanoh on ompat puluh ari ompat puluh borngin dokahni.

¹³ Bani na sadari ai ma masuk si Noak hubagas parau ai rap pakon anakni si Sem, si Ham, si Japet, pakon parinangonni ampa parinangon ni anakni na tolu halak ai,

¹⁴ sidea pakon sagala binatang marsiboan masamni, pakon sagala pinahan marsiboan masamni, pakon sagala binatang na manjulur i atas tanoh on, marsiboan masamni, ampa sagala manuk-manuk marsiboan masamni, sagala manuk-manuk na marambulu pakon na marhabong;

¹⁵ roh ma sidea sagala na manggoluh ampa na marhosah, marparangguan-parangguan hubani si Noak hubagas parau ai.

¹⁶ Ia na masuk ai, ai ma tunggal pakon boru-boru humbani sagala na manggoluh, songon na hinatahon ni Naibata hubani; dob ai itutup Jahowa ma irik i pudini.

¹⁷ Ompat puluh ari do dokahni roh bah na sumbang ai hu tanoh on; naik ma bah ai, iangkat ma parau ai, daoh hu babou ni tanoh on.

¹⁸ Dob lambin martambah-tambah bah ai, anjaha lambin sumbang tumang i atas tanoh on, jadi mumbang-umbang ma parau ai i atas ni bah ai.

¹⁹ Lambin manraja tumang ma bah ai i atas tanoh on, gabe irongkob ma sagala dolog na gijang na i toruh ni langit.

²⁰ Sapuluh lima asta manraja bah ai hu atas, gabe tarrongkob ma sagala dolog-dolog.

²¹ Jadi rotap ma hosah ni sagala na mardaging, na manggoluh i atas tanoh on, manuk-manuk, pinahan-pinahan, binatang-binatang pakon sagala binatang na manjulur, na manjuluri i atas tanoh on, ampa jolma haganupan.

²² Matei ma haganup na marhosah hagoluhan ibagas igungni, haganup na adong bani tanoh na mahorah.

²³ Jadi sasap ma haganup na adong i atas tanoh on, jolma sonai homa pinahan, binatang na manjulur

ampa manuk-manuk na i awang-awang, haganupan ai sasap do hun tanoh on. Pitah si Noak mando na tading manggoluh ampa haganup na rap pakonsi ibagas parau ai.

²⁴ Saratus lima puluh ari do dokah ni bah ai manrajai tanoh on.

Parsurut ni Bah na Sumbang

8 ¹ Dob ai idingat Naibata ma si Noak pakon haganup binatang ampa haganup pinahan, na rap pakonsi ibagas parau ai. Ipabontaskon Naibata ma logou hu tanoh ai, ase surut bah ai.

² Tartutup ma bah tubuh ni luhung bolon ai ampa labah ni bah na i langit. Mangadi ma udan manalosou na hun langit,

³ gabe lambin surut ma bah ai hun tanoh on; sonai ma parsurut ni bah ai, dob salpu saratus lima puluh ari.

⁴ Bani bulan pitu, ari sapuluh pitu, sangkot ma parau ai i atas pakpak ni Dolog Ararat.

⁵ Lambin surut ma bah ai das bani bulan sapuluh; bani bulan sapuluh, ari sada taridah ma pakpak ni dolog-dolog.

⁶ Dob salpu ompat puluh ari, iungkab si Noak ma jandela ni parau na pinaulini ai.

⁷ Ipaluah si Noak ma sada kawak; jadi habang ma ai hujai-hujon, paima horah bah ai hun tanoh on.

⁸ Dob ai ipaluah ma sada asas, laho mangidah atap na dob surut do bah ai hun tanoh on.

⁹ Tapi seng jumpah asas ai tangkolan ni naheini, jadi mulak ma ia hubani si Noak hubagas parau ai, ai bah ope i atas ni ganup sisik ni tanoh on. Ipadurdur si Noak ma tanganni, itangkap ma asas ai, itarik ma hubagas parau ai.

¹⁰ Ipaima ma pitu ari nari, dob ai ipaluah ma use asas ai hun parau ai.

¹¹ Malele bod ari mulak ma asas ai hubani si Noak, anjaha tonggor ma, adong do sada bulung ni hayu jetun na ratah bani pagutni. Ibotoh si Noak ma na dob surut bah ai hun tanoh on.

¹² Ipaima ma use pitu ari nari, dob ai ipaluah ma asas ai; tapi seng mulak be ai hu bani.

¹³ Paonomratussada-tahunkon, bani ari sada bulan sada, domma horah bah ai hun tanoh on. lungkab si Noak ma tayub ni parau ai, gabe iidah ma na dob horah sisik ni tanoh on.

¹⁴ Bani ari dua puluh pitu bulan dua, horah ma tanoh ai.

Galangan Tarima Kasih ni si Noak. Bagah-bagah ni Naibata

¹⁵ Dob ai nini Naibata ma bani si Noak,

¹⁶ “Luar ma ho hun parau in, ho pakon parinangonmu, anakmu pakon parinangon ni anakmu na rap pakon ho.

¹⁷ Sagala binatang na rap pakon ho, sagala na manggoluh: manuk-manuk, pinahan pakon sagala binatang na manjulur, na manjulur i atas tanoh in, suruh ma kaluar rap pakon ho, ase gumayom sidea i atas tanoh in, manggargar anjaha martambah-tambah i atas tanoh in.”

¹⁸ Jadi luar ma si Noak rap pakon anakni, parinangonni ampa parinangon ni anakni ai.

¹⁹ Sagala binatang liar, sagala na manjulur, sagala manuk-manuk ampa sagala na manggulmit i atas tanoh in, marsiboan masamni, luar ma homa hun parau ai.

²⁰ Dob ai ipauli si Noak ma sada anjapanjap bani Jahowa; ibuat ma humbani ganup pinahan na panti pakon humbani ganup manuk-manuk na panti, jadi igalangkon ma galangan situtungon i atas anjapanjap ai.

²¹ Dob ianggoh Naibata uap na misbou ai, nini ma ibagas uhur-Ni, “Lang be papaan-Ku tanoh in halani jolma, ai na jahat do pingkiran ni uhur ni jolma in humbani sietek-etekonni; anjaha seng be ripaskonon-Ku sagala na manggoluh, songon na dob Hubahen in.

²² Sadokah adong tanoh on, seng anjai maronti tidahon pakon pariama, ari borgoh pakon ari milas, logou ni ari pakon musim udan, arian pakon borngin.”

Titah bani Dunia Baru

9¹ Jadi ipasu-pasu Naibata ma si Noak pakon anakni ai, nini ma bani sidea, “Gargar anjaha lambin mabuei ma hanima, goki hanima ma tanoh on.

² Mabi ar anjaha bajoraon ma mangidah hanima sagala binatang na i tanoh on sagala manuk-manuk na i awang-awang, sagala na manjulur i atas tanoh on, ampa dengke na ibagas laut; ondos bani tangannima ma ganupan in.

³ Sagala na manggulmit anjaha na manggoluh, bahen sipanganonnima ma in. Ganupan in Hubere bannima sonai homa suan-suanan simaratah.

⁴ Tapi gulei, na ibagas ope hosahni, ai ma darohni, ulang pangan hanima.

⁵ Anjaha tongon do, sai tungguon-Ku do darohnima, ai ma hosahnima; sai tungguon-Ku do in humbani sagala binatang pakon humbani jolma; humbani dalahi, saninani ai tungguon-Ku hosah ni jolma in.

⁶ Barang ise na manduruskon daroh ni jolma, duruskonon ni jolma ma darohni, ai usih bani rupani do jolma in itompa Naibata.

⁷ Ia hanima, sai gargar lambin bueini ampa roh raratni ma i atas tanoh on, sai lambin gargar ma hanima ijin.”

**Padan ni Naibata ampa Tanda
ni Padan-Ni ai bani Jolma**

⁸ Dob ai marsahap ma Naibata hubani si Noak pakon hubani anakni na rap pakonsi ai, nini ma,

⁹ “Tonggor ma, pajongjongon-Ku ma padan-Ku pakon hanim a ampa ginomparnima i pudinima.

¹⁰ Pakon sagala na tinompa na manggoluh na rap pakon hanim a: manuk-manuk, pinahan pakon binatang liar na i tanoh on, na rap pakon hanim a, sagala na luar hun parau in, sagala binatang na i tanoh on.

¹¹ Pajongjongon-Ku ma padan-Ku pakon hanim a, paboa lang be ripaskonon ni bah na sumbang sagala na mardaging, anjaha lang be masa bah na sumbang mandedahon tanoh on.”

¹² Nini Naibata ma, “On ma tanda ni padan na Hubahen in bannima pakon hubani sagala na tinompa na manggoluh, na rap pakon hanim a marsundut-sundut, sadokah ni dokahni.

¹³ Halibitongan-Kai, na Hubahen bani hambun ai, ai ma tanda ni padan-Ku pakon tanoh on.

¹⁴ Anggo Huparoh hambun hu atas tanoh on, anjaha taridah halibitongan ai bani hambun,

¹⁵ jadi ingaton-Ku ma padan-Ku na hubahen bannima, pakon Hubani sagala na tinompa na manggoluh, sagala na marhosah, anjaha seng be

mangulaki sumbang bah in laho manripaskon sagala na manggoluh.

¹⁶ Anggo dong halibitongan ai bani hambun, kawahkonon-Ku ma ai, anjaha ingaton-Ku ma padan sisadokah ni dokahni na binahen ni Naibata hubani sagala na tinompa na manggoluh, sagala na marhosah, na i atas tanoh on.”

¹⁷ Nini Naibata ma hubani si Noak, “On ma tanda ni padan na Hubahen ai hubani sagala na manggoluh i tanoh on.”

Papa-papa pakon Pasu-pasu ni si Noak bani Anakni

¹⁸ Ia anak ni si Noak na luar hun parau ai, ai ma: Si Sem, si Ham pakon si Japet. Si Ham ai ma bapa ni si Kanaan.

¹⁹ Na tolu on do anak ni si Noak, anjaha humbani sidea do raratjolma hu sab tanoh on.

²⁰ Ipungkah si Noak ma marjuma-juma, itombeima sada pohon anggur;

²¹ iinum ma humbani anggur ai, gabe mabuk ma ia, anjaha tibal lang marhiou ibagas lampolamponi.

²² Lidah si Ham, bapa ni si Kanaan ma bapani na talanjang ai, jadi ipatugah ma bani saninani sidua halak ai, na i darat ai.

²³ Dob ai ibuat si Sem pakon si Japet ma hiou, itampeihon ma ai bani abara ni sidea; jadi mardalan tundal ma sidea, laho manrungkub hatalanjangon

ni bapani sidea, bohi ni sidea pe tundal do, ase ulang iidah sidea hatalanjangon ni bapa ni sidea ai.

²⁴ Dob tarjolma si Noak humbani parmabukonni ai, anjaha ibotoh na binahen ni anakni sianggian ai bani,

²⁵ nini ma, “Hona papa ma si Kanaan, jabolon ni jabolon ma ia bani abangni.”

²⁶ Ambah ni ai nini ma, “Napuji ma Jahowa, Naibata ni si Sem, jabolonni ma anggo si Kanaan.”

²⁷ Ipabolag Naibata ma ianan bani si Japet, marianan ma ia ibagas lampolampo ni si Sem; jabolonni ma anggo si Kanaan.

²⁸ Manggoluh ope si Noak tolu ratus lima puluh tahun nari ipudi ni bah na sumbang ai.

²⁹ Siah ratus lima puluh tahun ma ganup umur ni si Noak; dob ai matei ma ia.

Tarombo ni Bangsa-bangsa; Ginompar ni si Sem, si Ham pakon si Japet

10 ¹ On ma ginompar ni anak ni si Noak: Si Sem, si Ham pakon si Japet; tubuhan anak ma sidea dob salpu bah na sumbang ai.

² Anak ni si Japet, ai ma si Gomar, si Magog, si Madai si Japan, si Tubal, si Mesek pakon si Tiras.

³ Anak ni si Gomar, ai ma si Askenas, si Rifat pakon si Togama.

⁴ Anak ni si Japan, ai ma si Elisa, si Tarsis, halak Kittim pakon halak Dodanim.

⁵ Humbani sidea do merap bangsa-bangsa na i topi laut. Ai ma anak ni si Japet mangihutkon tanoh ni sidea, sahap ni sidea pakon bangsa ni sidea.

⁶ Anak ni si Ham, ai ma si Kus, si Misraim, si Put pakon si Kanaan.

⁷ Anak ni si Kus, ai ma si Seba, si Hewila, si Sapta, si Raema pakon si Sapteka. Anak ni si Raema, ai ma si Seba, pakon si Dedan.

⁸ Itubuhkon si Kus ma si Nimrod; ia ma na parlobei halak siparkuasa i tanoh on.

⁹ Parburu na borani do ia ilobei ni Jahowa; halani ai do ase ihatahon halak, "Parburu na borani ilobei ni Jahowa songon si Nimrod."

¹⁰ Ia parmulaan ni harajaonni, ai ma Babel, Ereka, Akad pakon Kalne i tanoh Sinear.

¹¹ Misir ma ia hun nagori ai hu Assur, ipungkah ma huta Ninive, Rehobot-Ir, Kalah,

¹² pakon Resen i holangkolang ni Nineve pakon Kalah; ai ma huta na banggal ai.

¹³ Itubuhkon si Misraim ma halak Lud, Anam, Lehab, Naftu,

¹⁴ Patrus, Kasluh harohan ni halak Palistim, pakon halak Kaptor.

¹⁵ Ia si Kanaan itubuhkon ma si Sidon, anak bunga tubuhni ai pakon si Het,

¹⁶ pakon halak Jebusi, Amori, Girgasi,

¹⁷ Hewi, Arki, Sini,

¹⁸ Arwadi, Semari, pakon Hamati; use marserak do marga ni halak Kanaan.

¹⁹ Ia tanoh ni halak Kanaan, ai ma hun Sidon nari dompak Gernar das hu Gasar, dompak Sodom, Gumora, Adama pakon Zeboim das hu Lasa.

²⁰ Ai ma anak ni si Ham mangihutkon marga ni sidea, sahap ni sidea, tanoh ni sidea pakon bangsa ni sidea.

²¹ Tubuhan anak ma homa si Sem, bapa ni haganup anak ni si Heber, abang ni si Japet.

²² Anak ni si Sem, ai ma si Elam, si Assur, si Arpaksad, si Lud pakon si Aram.

²³ Anak ni si Aram, ai ma si Uz, si Hul, si Geter pakon si Mas.

²⁴ Itubuhkon si Arpaksad ma si Sela, anjaha si Sela manubuhkon si Heber.

²⁵ Tubuh ma dua anak ni si Heber; goran ni na sada si Peleg halani bani panorangni ma merap jolma, anjaha goran ni anggini si Joktan.

²⁶ Itubuhkon si Joktan ma si Almodad, si Salef, si Hasarmafet, si Jirah,

²⁷ si Hadoram, si Usal, si Dikla,

²⁸ si Hobal, si Abimael, si Seba,

²⁹ si Ofir, si Hewila pakon si Joab; sidea ma ganup anak ni si Joktan.

³⁰ Ia ianan ni sidea singgan Mesa do das hu Sefar, ai ma parbalogan na i hapoltakan.

³¹ Ai ma anak ni si Sem, mangihutkon marga ni sidea pakon bangsa ni sidea.

³² Ai ma haganup ginompar ni si Noak, mangihutkon marga ni sidea pakon bangsa ni sidea; humbani sidea ma merap sagala bangsa i tanoh on ipudi ni bah na sumbang ai.

Manara na i Babel. Pargeor ni Sahap

11 ¹ Samasam hinan do hata i sab tanoh on anjaha sada do parsahapan.

² Sanggah na bungkas sidea hun habinsaran, jumpah sidea ma sada pamah i nagori Sinear, jadi marianan ma sidea ijai.

³ Nini sidea ma samah sidea, “Topa hita ma batu merah anjaha tutung hita ma dear-dear. Tanoh na tinutung ai ma ipakei sidea jadi batu anjaha samasam hirtah ipakei jadi panrohat.”

⁴ Nini sidea ma, “Pungkah hita ma sada huta ampa sada menara banta, na das hu langit pakpakni anjaha bahen hita ma banta sada goran, ase ulang merap hita hu sab tanoh on.”

⁵ Jadi turun ma Jahowa laho mangidah huta ampa manara, na pinauli ni jolma ai,

⁶ dob ai nini ma, “Tonggor ma, sada bangsa anjaha sada sahap do sidea ganup. Pamungkah ni na sihol sibahenon ni sidea ope on; anjaha aha pe lang humbani na dob sinurahon ni sidea, na so tarjadihon sidea.

⁷ Eta, turun ma Hita, geori Hita ma sahap ni sidea ijai, ase ulang marsiarusan sahap be sidea.”

⁸ Sonai ma sidea ipaerap Naibata hunjai hu sab dunia on, jadi maronti ma sidea na pauli huta ai.

⁹ Halani ai ibahen ma goran ni huta ai Babel, halani ijai do igeori Jahowa sahap ni ganup dunia on, hunjai ma ipaerap Jahowa sidea hu sab dunia on.

Ginompar ni si Sem

¹⁰ On ma ginompar ni si Sem. Dob marumur si Sem saratus tahun, itubuhkon ma si Arpaksad, dua tahun dob salpu bah na sumbang ai.

¹¹ Manggoluh ope si Sem lima ratus tahun nari, dob itubuhkon si Arpaksad, anjaha itubuhkon do anak pakon boru.

¹² Dob marumur si Arpaksad tolu puluh lima tahun, itubuhkon ma si Selah.

¹³ Manggoluh ope si Arpaksad ompat ratus tolu tahun nari dob itubuhkon si Selah, anjaha itubuhkon do anak pakon boru.

¹⁴ Dob marumur si Selah tolu puluh tahun, itubuhkon ma si Heber.

¹⁵ Manggoluh ope si Selah ompat ratus tolu tahun, dob itubuhkon si Heber, anjaha itubuhkon do anak pakon boru.

¹⁶ Dob marumur si Heber tolu puluh ompat tahun, itubuhkon ma si Peleg.

¹⁷ Manggoluh ope si Heber ompat ratus tolu puluh tahun nari dob itubuhkon si Peleg, anjaha itubuhkon do anak pakon boru.

¹⁸ Dob marumur si Peleg tolu puluh tahun, itubuhkon ma si Rehu.

¹⁹ Manggoluh ope si Peleg dua ratus siah tahun nari, dob itubuhkon si Rehu, anjaha itubuhkon do anak pakon boru.

²⁰ Dob marumur tolu puluh dua tahun si Rehu, itubuhkon ma si Serug.

²¹ Manggoluh ope si Rehu dua ratus pitu tahun nari, dob itubuhkon si Serug, anjaha itubuhkon do anak pakon boru.

²² Dob marumur si Serug tolu puluh tahun, itubuhkon ma si Nahor.

²³ Manggoluh ope si Serug dua ratus tahun nari, dob itubuhkon si Nahor, anjaha itubuhkon do anak pakon boru.

²⁴ Dob marumur si Nahor dua puluh siah tahun, itubuhkon ma si Terah.

²⁵ Manggoluh ope si Nahor saratus sapuluh siah tahun nari, dob itubuhkon si Terah, anjaha itubuhkon do anak pakon boru.

²⁶ Dob marumur si Terah pitu puluh tahun, itubuhkon ma si Abram, si Nahor pakon si Haran.

²⁷ On ma ginompar ni si Terah. Itubuhkon si Terah ma si Abram, si Nahor, pakon si Haran, anjaha itubuhkon si Haran ma si Lot.

²⁸ Sanggah manggoluh ope bapani, matei ma si Haran i tanoh hatubuhanni, i Ur, i tanoh Kasdim.

²⁹ Mambuat boru ma si Abram pakon si Nahor; goran ni parinangon ni si Abram si Sarai, goran ni parinangon ni si Nahor si Milka, boru ni si Haran, bapa ni si Milka pakon si Jiska.

³⁰ Tapi lambang do si Sarai, seng dong tubuhan tuah ia.

³¹ Dob ai iarahkon si Terah ma si Abram anakni ai, pakon si Lot anak ni si Haran pahompuni ai, ampa si Sarai parumaenni ai, parinangon ni si Abram, anak ni ai, jadi bungkas ma sidea hun Ur, na i tanoh Kasdim, sihol misir hu tanoh Kanaan; das ma sidea hu Haran, lanjar marianan ijai.

³² Jadi dob dua ratus lima tahun umur ni si Terah, matei ma ia i Haran.

Idilo Naibata si Abram

12 ¹ Dob ai nini Jahowa ma hubani si Abram, “Bungkas ma ho hun tanoh hagodanganmu, humbani diha-dihamu ampa hun rumah ni bapamu hu tanoh sipatuduhon-Ku hu bam.

² Hubahen pe ho gabe sada bangsa na banggal; Hupasu-pasu pe ho anjaha Hupabanggal goranmu, ase gabe pasu-pasu ho.

³ Pasu-pasuon-Ku do na mamasu-masu ho, anjaha papaan-Ku na mamapai ho; dapotan pasu-pasu ma marhitei ho haganup bangsa na i tanoh on.”

⁴ Jadi bungkas ma si Abram, songon na hinatahon ni Jahowa bani; bungkas ma homa si Lot rap pakonsi. Marumur pitu puluh lima tahun do si Abram, sanggah na bungkas ai ia hun Haran.

⁵ Iboan si Abram ma si Sarai parinangonni ai, pakon si Lot anak ni saninani ai, ampa sagala arta-arta na sinarini, ronsi halak na nibolini i Haran, jadi misir ma sidea hu tanoh Kanaan. Dob das sidea i tanoh Kanaan,

⁶ ibontas si Abram ma tanoh ai das hu ianan Sikem, das ronsi tombak More. Bani panorang ia domma marianan halak Kanaan i tanoh ai.

⁷ Dob ai ipatalar Jahowa ma diri-Ni bani si Abram, nini ma, “Hubani ginomparmu ma bereon-Ku tanoh on.” Jadi ipajongjong si Abram ma ijai sada anjapanjap bani Jahowa na patalar diri-Ni hu bani.

⁸ Hunjai bungkas ma ia hu pardologan hampit hapoltakan ni Betel ampa hapoltakan ni huta ai; ipauli ma ijai sada anjapanjap bani Jahowa, anjaha ipadilo-dilo ma goran ni Jahowa.

⁹ Dob ai bungkas ma use si Abram laho dompak dangsina.

Si Abram i Tanoh Masir

¹⁰ Masa ma lohei i tanoh ai, jadi tuad ma si Abram hu tanoh Masir, sihol manginsolat ijai, halani lohei maningting do i tanoh ai.

¹¹ Marayak das ia hu tanoh Masir, nini ma bani si Sarai parinangonni ai, “Hubotoh do, puang-puang sijenges rupa do ho.

¹² Anggo iidah halak Masir ho, hatahonon ni sidea ma, ‘Parinangonni do on,’ gabe bunuhon ni sidea ma ahu, tapi anggo ho pagoluhonni do.

¹³ Mahua hatahon ma, botouhu do ho, ase sonang ahu ibahen sidea halani ho, anjaha manggoluh hosahku marhalanohon ni ho.”

¹⁴ Dob das si Abram i tanoh Masir, iidah halak Masir ai ma, na jenges tumang do puang-puang ai.

¹⁵ Dob iidah gamot-gamot ni Parao ia, ipapuji-puji ma ia hubani Parao; jadi iboan ma puang-puang ai hu rumah ni Parao.

¹⁶ Ipadear ma pambahenni hubani si Abram, marhalanohon ni puang-puang ai, gabe dapotsi ma biribiri, lombu, halode, jabolon dalahi pakon jabolon naboru ampa unta.

¹⁷ Jadi ihonahon Jahowa ma sitaronon bolon hubani Parao pakon hasomanni sarumah, halani si Sarai, parinangon ni si Abram ai.

¹⁸ Idilo Parao ma si Abram, nini ma, “Aha do na binahenmon bangku? Mase ma lang ipatugah ho hu bangku, parinangonmu do ia hape?

¹⁹ Mase ma ihatahon ho, botouhu do ia? Sihol buatonku ma ia gabe parinangonku. On pe, na ma parinangonmon, buat ma, dob ai laho ma ho!”

²⁰ Anjaha iparentahkon Parao ma juakjuakni bahen hasomanni pataruhkonsi ampa parinangonni ai ampa haganup na dong bani.

Parsirangan ni si Abram humbani si Lot

13 ¹Jadi tangkog ma si Abram hun Masir hu tanoh Dangsina, ia pakon parinangonni, pakon ganup na adong bani, ampa si Lot rap pakonsi.

² Bayak tumang do si Abram, buei do pinahan, pirak pakon omasni.

³ Inunuti ma dalanni hun Dangsina das hu Betel, ronsi das bani ianan hajongjongan ni lampolamponi hinan, i holangkolang ni Betel pakon Ai,

⁴ hu ianan ni anjapanjap na pinaulini ai hinan ijai; ipadilo-dilo si Abram ma ijai goran ni Jahowa.

⁵ Si Lot pe homa, na dihut rap pakon si Abram, marbiribiri, marlombu ampa marlampolampo do.

⁶ Jadi lang tarsarihon tanoh ai be sidea, anggo rap marianan; ai buei tumang do arta ni sidea, seng boi be rap sidea marianan.

⁷ Halani ai masa ma paringoran i tongah-tongah ni parmahan ni si Abram ampa parmahan ni si Lot. Halak Kanaan pakon halak Perisi do ijia marianan i tanoh in.

⁸ Nini si Abram ma bani si Lot, “Ulang ma adong partinggilan i tongah-tongahmu pakon i tongah-tongahku, ai na marsanina do hita.

⁹ Ai lang i lobeimu do ganup tanoh in? Sirang ma ho humbangku! Anggo hu sambilou ho, hu siamun ahu, anggo hu siamun ho, hu sambilou ahu.”

¹⁰ Jadi itatap si Lot ma, iidah ma jenges do haganup parmarbah ni pamah Jordan ai. Sanggah lape iripaskon Jahowa Sodom pakon Gomora, songon pohon ni Jahowa, songon tanoh Masir do pamah ai das hu Zoar.

¹¹ Ipilih si Lot ma haganup bani, haganup pamah Jordan ai; laho ma si Lot hampit Purba, jadi marsirang ma sidea.

¹² Marianan i tanoh Kanaan do si Abram, tapi si Lot marianan do i huta-huta na i pamah ai, anjaha mosor-osor do ia marlampolampo ronsi das hu Sodom.

¹³ Tapi halak na jahat anjaha pardousa banggal do pangisi ni Sodom ai i lobei ni Jahowa.

Iparatah Naibata Bagah-bagah-Ni

¹⁴ Jadi nini Jahowa ma dompak si Abram dob na sirang ai si Lot humbani, “Tatap ma humbani ianan hajongjonganmin dompak utara pakon dangsina, dompak hapoltakan pakon hasundutan.

¹⁵ Tongon, haganup tanoh na tinatapmin, berehonon-Ku do in hubam, pakon hubani ginomparmu ronsi sadokah ni dokahni.

¹⁶ Anjaha bahenon-Ku do ginomparmu songon orbuk ni tanoh bueini, anjaha anggo tarhira jolma orbuk ni tanoh, tarhirai ma homa ginomparmu.

¹⁷ Misir ma ho, siar ma tanoh in mangihutkon ganjang ampa bolagni, ai hubam do in berehonon-Ku.”

¹⁸ Dob ai iosor si Abram ma lampolamponi, laho ma ia marianan hu tombak Mamre na i Hebron, anjaha ipajongjong ma ijai sada anjapanjap bani Jahowa.

Hamonangan ni si Abram Mangimbang Raja-raja na hun Hapoltakan

14 ¹ Bani panorang sanggah si Amrapel raja ni Sinear, si Ariok raja ni Ellasar, si Kedor-Laomer raja ni Elam pakon si Tideal, raja ni bangsa-bangsa,

² ipungkah sidea ma hamunsuhon hubani si Bera, raja ni Sodom, si Birsa, raja ni Gomora, si Sinab, raja ni Adama, si Semeber, raja ni Seboim, pakon hubani raja na hun Bela, ai ma Zoar.

³ Marsada ma sidea ganup i pamah Siddim, ai ma Laut Garam ai.

⁴ Sapuluh dua tahun dokahni tunduk sidea hubani si Kedorlaomer, tapi pasapuluhtolu-tahunkon manlawan ma sidea.

⁵ Pasapuluhompat-tahunkon roh ma si Kedorlaomer pakon ganup raja hasomanni

ai, italuhon ma halak Refaim i Astarot-Karnaim, halak Susim i Ham, halak Emin i pamah Kiriataim, ⁶ pakon halak Hor, bani pardologan Seir das ronsi El-parah, na i topi ni halimisan ai.

⁷ Dob ai marhusor ma sidea, das ma sidea hu En-Mispat, ai ma Kades, italuhon ma ganup tanoh ni halak Amalek sonai halak Amori, na marianan i Haseson-Tamar.

⁸ Luar ma raja ni Sodom, raja ni Gumora, raja ni Adama, raja ni Seboim pakon raja ni Bela, ai ma Zoar, marsada ma sidea marmunsuh i pamah Siddim,

⁹ dompak si Kedorlaomer, raja ni Elam, si Tideal raja ni bangsa-bangsa ai, si Amrapel raja ni Sinear, pakon si Ariok, raja ni Ellasar, ompat raja imbang ni na lima ai.

¹⁰ Buei tumang do unong-unong aspal i pamah Siddim ai. Sanggah na maporus raja ni Sodom pakon Gumora mardabuhan ma sidea hu bagas, anjaha sagala na tading lintun ma hu dolog.

¹¹ Ibuat sidea ma ganup ugas-ugas ni Sodom pakon Gumora ampa haganup sipanganon ni sidea, dob ai laho ma sidea.

¹² Iboan sidea ma pakon si Lot, anak ni sanina ni si Abram, na marianan i Sodom ronsi ugas-ugasni, jadi laho ma sidea.

Ipaluah si Abram si Lot

¹³ Dob ai roh ma sada halak na maporus ai, ipatugah ma na masa ai hubani si Abram, halak Heber ai, na marianan i tombak Mamre, ai ma halak Amori ai, sanina ni si Eskol pakon si Aner; hasoman sapadan ni si Abram do sidea.

¹⁴ Dob ibogei si Abram barita ai, na dob tartaban anakni ai, iparsinjatai ma jabolonni na dob bajar ai, sagala na tubuh i rumahni, tolu ratus sapuluh ualuh halak bueini, anjaha iayak ma munsuh ai das hu Dan.

¹⁵ Jadi bodari marbagi ma sidea, ia pakon jabolonni ai, mandorab munsuh ai; italuhon ma sidea, anjaha ipardakdak das hu Hoba, na i Utara ni Damaskus.

¹⁶ Iboan ma mulak haganup ugas-ugas ai; si Lot pe, anak ni saninani ai, ampa haganup ugas-ugasni iboan do mulak, sonai homa puang-puang ampa bangsa ai.

Ipasu-pasu si Melkisedek si Abram

¹⁷ Dob mulak si Abram humbani na manaluhon si Kedorlaomer pakon raja-raja hasomanni ai, jadi laho ma raja ni Sodom mangalo-alosi hu pamah Sawe, ai ma pamah raja ai.

¹⁸ Anjaha si Melkisedek pe raja ni Salem luar do mamboan ruti pakon anggur; malim ni Naibata sigijangan ai do ia.

¹⁹ Ipasu-pasu ma si Abram, nini ma, “Ipasu-pasu Naibata Sigijangan in, Sitompa langit ampa tanoh on ma si Abram.

²⁰ Anjaha na puji ma Naibata Sigijangan in, na mangondoskon munsumu hu tanganmu.” Jadi ibere si Abram ma bani saparsapuluh humbani haganup.

²¹ Nini raja Sodom ai ma hubani si Abram, “Bere ma hu bangku halak in, tapi anggo ugas-ugas in buat ma bam.”

²² Tapi nini si Abram ma hubani raja ni Sodom, “Domma pala marbija ahu hubani Jahowa, Naibata Sigijangan in, Sitompa langit pakon tanoh on,

²³ na so buatonku atap aha pe humbani sagala na dong bamu, sangkamata bonang atap sada tali sipatu pe lang, ase ulang ihatahon ham holi, ‘Ahu do mambahen si Abram bayak.’

²⁴ Anggo ahu, aha pe lang pala. Pitah na dob pinangan ni garama-garama on ma, ambah ni ai parbagianan bani si Aner, si Eskol pakon si Mamre, na mangkasomani ahu, palopas ham ma sidea mambuat bagianni bei.”

**Ibagah-bagahkon Naibata Anak bani si
Abram -- Haporsayaon ni si Abram**

15 ¹ Ipudi ni na masa on, roh ma hata ni Jahowa hubani si Abram ibagas sada panonggoran,

nini ma, “Ulang ho mabiar, ale Abram, Ahu do gantarmu; bangga tumang do upahmu.”

² Tapi nini si Abram ma, “Ham Tuhan Jahowa, aha ma bereon-Mu bangku, ai na popor do ahu, si Elieser, na hun Damaskus mando sitean rumahku.”

³ Nini si Abram ope, “Seng dong ginompar ibere Ham bangku; jabolon na tubuh i rumahku ma sitean ahu.”

⁴ Dob ai roh ma hata ni Jahowa hu bani, “Seng ia manean ho, tapi anakmu sandiri do manean ho.”

⁵ Iboan ma ia hu darat, anjaha nini ma, “Torih ma hu langit ai, bilangi ma bintang ai, atap tarbilangi ho do ai.” Ihatahon ma use hu bani, “Sonai ma ginomparmu holi.”

⁶ Porsaya ma si Abram bani Jahowa, anjaha ai ma ihira Jahowa gabe hapintoronni.

Padan ni Naibata ampa si Abram

⁷ Ihatahon ma hu bani, “Ahu do Jahowa na padaratkon ho hun Ur-Kasdim, laho mamberehon tanoh on bam jadi siteanonmu.”

⁸ Nini si Abram ma, “Ham Tuhan Jahowa, hunja ma botohonku, ahu sihol sitean ai?”

⁹ Nini ma hu bani, “Buat ma Bangku sada lombu na marumur tolu tahun, sada hambing na marumur tolu tahun, sada biribiri tunggal na marumur tolu tahun, sada kuhui pakon sada anak ni asas.”

¹⁰ Ibuat ma ganupan ai bani Tuhan, ipardostongah ma ai anjaha ibatur, tapi anggo manuk-manuk ai seng ibolah.

¹¹ Marsogopan ma manuk-manuk panoroh hubani gulei na ginalangkon ai, jadi iosiki si Abram ma ai.

¹² Sanggah na laho sundut mata ni ari, tarpodom ma si Abram, sinok tumang, jadi sogop ma bani hasonggotan pakon hagolapon bolon.

¹³ Dob ai nini Jahowa ma hubani si Abram, “Ulang lang ibotoh ho manginsolat do magira ginomparmu bani na so tanohni; parjabolonon anjaha arsikon ni halak ma sidea ompat ratus tahun dokahni.

¹⁴ Tapi bangsa na marjabolonkon sidea pe uhumon-Ku do, dob ai kaluar ma sidea mararta na mabuei.

¹⁵ Anggo ho parayakonmu ma ompungmu mardamei-damei, dob sayurmatua pe ho tanomon.”

¹⁶ Paompat sundutkon mulak ma sidea, ai lang ope gok hajahaton ni halak Amori.

¹⁷ Dob sundut mata ni ari anjaha golap marimpot-impot, tonggor ma sada pamurunan na martimus ampa sada sipu-sipu na gara montas i holangkolang ni gulei na tinoktokan ai.

¹⁸ Bani ari ai ma marpadan Jahowa pakon si Abram, nini ma, “Hubani ginomparmu do bereon-Ku tanoh on, singgan ni bah Masir das ronsi bah bolon ai, ai ma bah Eprat,

¹⁹ tanoh na niianan ni halak Keni, halak Kenisi pakon halak Kadmoni,
²⁰ halak Het, halak Peresi, halak Refaim,
²¹ halak Amori, halak Kanaani, halak Girgasi pakon halak Jebusi.”

Si Hagar pakon si Ismael

16 ¹ Ia si Sarai, parinangon ni si Abram, seng dong tubuhan tuah. Tapi dong do sada jabolonni naboru, halak Masir, na margoran si Hagar.

² Nini si Sarai ma hubani si Abram, “Ibotoh ham do, ilanglangi Jahowa do tubuhan tuah ahu; dear do parayakonmu jabolonkai, andohar dapotan tuah ahu humbani.” Itangihon si Abram ma hata ni si Sarai ai.

³ Jadi ibuat si Sarai, parinangon ni si Abram ai ma si Hagar, jabolonni boru Masir ai, ibere ma ia hubani si Abram, paramangonni ai, ai ma dob marianan si Abram i tanoh Kanaan sapuluh tahun dokahni.

⁴ Iparayak si Abram ma si Hagar, jadi boratan rumah ma ia. Dob iahapkon domma boratan rumah ia, pis ma matani mangidah si Sarai.

⁵ Nini si Sarai ma hubani si Abram, “Marsapata hu bamu do ahu; hubere do jabolonku hu bamu, hape dob ibotoh na dob boratan rumah ia, gabe pis matani mangidah ahu; Jahowa ma panguhum banta.”

⁶ Nini si Abram ma hubani si Sarai, “Gok bam ma jabolonmin, bahen ma rosuh ni uhurmu hu bani.” Jadi iarsik si Sarai ma jabolonni ai, gabe laho ma ia lintun hun lobeini.

**Parlintun pakon Parmulak
ni si Hagar. Partubuh ni si Ismael**

⁷ Tapi jumpah malekat ni Jahowa ma ia i lambung ni sada bah tubuh i halimisan, ai ma i lambung ni bah tubuh bani dalan laho hu Sur.

⁸ Nini ma, “Roh hunja anjaha laho huja do ho Hagar, jabolon ni si Sarai?” Balosni, “Na lintun do ahu hun lobei ni si Sarai tondokankin.”

⁹ Nini malekat ni Jahowa ma hu bani, “Mulak ma ho hubani tondokanmai, paunduk ma dirimu hu toruh ni kuasani!”

¹⁰ Ambah ni ai nini malekat ni Jahowa ma hu bani, “Buei tumang do bahenonku ginomparmu, gabe seng tarhira halani bueini.”

¹¹ Nini malekat ni Jahowa ma use hu bani, “Tonggor ma, domma boratan rumah ho, tubuhan anak ma ho, bahen ma goranni si Ismael, ai itangihon Jahowa do hasombuhonmu.

¹² Sada jolma na songon halode liar do ia magira. Tanganni mangimbang ganup jolma, anjaha tangan ni ganup jolma mangimbangsi, anjaha marianan ma ia patontang ampa haganup saninani.”

¹³ Jadi ibahen si Hagar ma goran ni Jahowa na mansahapkonsi ai, “Ham do Naibata Sipanatap.” Ai nini do: Tongon, ijon do huidah la, si Tatap ahu.

¹⁴ Halani ai igoran ma parigi ai: Parigi Lachai-Roi, ai ma na i holangkolang ni Kades pakon Bered.

¹⁵ Dob ai itubuhkon si Hagar ma sada anak bani si Abram, jadi ibahen si Abram ma goran ni anakni, na tinubuhkon ni si Hagar ai, si Ismael.

¹⁶ Marumur ualuh puluh onom tahun do si Abram, sanggah na tinubuhkon ni si Hagar si Ismael bani.

Parmubah ni Goran ni si Abram Jadi si Abraham

17 ¹ Jadi dob marumur si Abram siah puluh siah tahun, ipatalar Jahowa ma diri-Ni hu bani, nini ma hu bani, “Ahu do Naibata pargogoh na so tarimbang, sai mardalan i lobei-Hu ma ho, anjaha daulat ma uhurmu.

² Patotapon-Ku ma padan-Ku pakon ho anjaha bahenon-Ku ma ho manggargar tumang.”

³ Jadi manrogop ma si Abram, anjaha marsahap ma Naibata hu bani, nini ma,

⁴ “Anggo Ahu, tonggor ma, on do padan-Ku pakon ho: Paboa bapa ni buei bangsa ma ho.

⁵ Seng be si Abram goranmu, tapi si Abraham ma, ai domma Hupabangkit ho gabe bapa ni buei bangsa.

⁶ Bahenon-Ku do ho manggompari tumang, pabangkiton-Ku do ho gabe ompung parsadaan

ni buei bangsa, anjaha humbam do harohan ni raja-raja.

⁷ Patotapon-Ku do padan-Ku pakon ho pakon hubani ginomparmu marsundut-sundut, ai ma padan sisadokah ni dokahni, paboa Ahu do Naibatamu pakon Naibata ni ginomparmu.

⁸ Anjaha bereon-Ku do hubani ginomparmu magira tanoh panginsolatanmu, ai ma ganup tanoh Kanaan bahen rupeimu sadokah ni dokahni, anjaha Ahu ma gabe Naibata bani sidea.”

⁹ Ambah ni ai nini Naibata ma hubani si Abraham, “Ho pe, sai jolom ma padan-Kin, ho pakon ginomparmu marsundut-sundut.”

Parsunaton Tanda ni Padan

¹⁰ On do padan-Kin sidingatonnima, na Hubahen hubam pakon hubani ginomparmu, “Maningon sunaton do sagala dalahi na i tongah-tongahnima.

¹¹ Maningon sunatonnima do sibur-siburnima bahen tanda ni padan-Ku pakon hanima.

¹² Ganup anak dalahi maningon do sunaton anggo marumur ualuh ari, ai ma sagala dalahi humbani ginomparnima, age jabolon na tubuh i rumahmu atap na binoli ni duit humbani halak na legan, na so humbani ginomparmu.

¹³ Maningon sunaton do ai, na tubuh i rumahmu pakon na binoli ni duitmu. Ai ma padan-Ku bani angkulanima, padan sisadokah ni dokahni.

¹⁴ Tapi dalahi na so isunat, na so binuat sibur-siburni, maningon ripaskonon do ia humbani bangsani, halani iosei padan-Ku.”

Parmubah ni Goran ni si Sarai

¹⁵ Dob ai ihatahon Naibata ma use hubani si Abraham, “Seng be si Sarai diloon goran ni parinangonmu, si Sarah ma goranni.

¹⁶ Ai pasu-pasuon-Ku do ia, anjaha bereon-Ku ma homa bam sada anak humbani; pasu-pasuon-Ku ma ia, ase gabe inang ni bangsa-bangsa ia, anjaha marharorohan humbani do magira raja ni bangsa-bangsa.”

¹⁷ Jadi manrogop ma si Abraham anjaha tartawa, nini ma ibagas uhurni, “Mintor tubuhan anak ma jolma sisaratus tahun, anjaha tubuhan tuah ma tumaram si Sarah na dob marumur siah puluh tahun?”

¹⁸ Nini si Abraham ma hubani Naibata, “Sai manggoluh ma si Ismael i lobeimu!”

¹⁹ Jadi nini Naibata ma, “Tongon do, maningon tubuhkonon ni si Sarah, parinangonmu do bam sada anak, anjaha bahen ma goranni si Isak. Pajongjongon-Ku do padan-Ku pakonsi, padan sisadokah ni dokahni, ampa bani ginomparni i pudini.

²⁰ Pasal si Ismael pe, Hutangihon do ho. Tonggor ma, pasu-pasuon-Ku do ia, tumpakon-Ku do ia

gabe anjaha buei tumang. Sapuluh dua raja do tubuhkononni, anjaha gabe bangsa na banggal do ia bahenon-Ku.

²¹ Tapi pajongjongon-Ku do padan-Ku pakon si Isak, ai ma na itubuhkon si Sarah bam, songon on tahun in.”

²² Jadi dobkonsi parsahapan ni Naibata pakonsi, manaik ma la humbani si Abraham.

Parsunaton

²³ Dob ai ibuat si Abraham ma si Ismael anakni ai, ampa ganup anak na dob tubuh i rumahni, sonai homa ganup halak na binoli ni duitni, ai ma sagala dalahi pangisi ni rumahni, jadi isunat ma sibur-sibur ni sidea bani na sadari ai, songon na hinatahon ni Naibata hu bani.

²⁴ Marumur siah puluh siah tahun do si Abraham, sanggah na tarsunat ai ia.

²⁵ Anjaha si Ismael anak ni ai, marumur sapuluh tolu tahun ma sanggah na isunat sibur-siburni ai.

²⁶ Lanjar bani ari na sasada ai do tarsunat si Abraham pakon si Ismael anakni ai,

²⁷ ampa haganup dalahi pangisi ni rumahni ai, na dob tubuh i rumahni pakon na binoli ni duit humbani halak na legan; tarsunat do sidea rap pakonsi.

Partamueion ni si Abraham

18 ¹ Dob ai ipataridahkon Jahowa ma diri-Ni bani i tombak More, sanggah hundul ia bani labah ni lampolamponi, bani pardeteng ni ari.

² Mangkawah ma ia, gabe ididah ma tolu halak jongjong i lobeini; dob iidah sidea marlintun ma ia humbani labah ni lampolampo ai, manjumpahkon sidea lanjar manrogop ma ia.

³ Nini ma, “Ham Tuhanku, anggo dapotan idop ni uhur do ahu i lobeimu, sai ulang ma laosi ham jabolonmu on.

⁴ Mahua ma nabuat bah otik, ase iburihi nasiam nahei nasiam, dob ai marsaran ma nasiam i toruh ni hayu on,

⁵ ase hualop roti otik, gabe margogoh nasiam use; dob ai toruskon nasiam ma pardalanan nasiam. Ai lang halani in do ase roh nasiam hubani jabolon nasiam on?” Ihatahon sidea ma, “Bahen ma songon na hinatahonmin!”

⁶ Dob ai tarolos ma si Abraham laho hu lampolamponi, hubani si Sarah, nini ma, “Buat ma podas tolu tumba nitak, agu ma ai anjaha masak ma ruti!”

⁷ Marlinton ma si Abraham marayak lombuni, ibuat ma sada anak ni lembu na mombur anjaha na jenges ibere ma ai hubani jabolonni, jadi podas ma ai ipauli sidea.

⁸ Ibuat si Abraham ma dadih na nialhotan pakon dadih na matah sonai homa anak ni lembu na dob pinauli ai, jadi iidangkon ma ai i lobei ni sidea; jongjong do anggo ia i lambung ni sidea, i toruh ni hayu ai, sanggah na mangan ai sidea.

⁹ Dob ai nini sidea ma hu bani, “Ija do si Sarah parinangonmu ai?” Balosni, “Ibagas lampolampo an do ia.”

¹⁰ Jadi nini ma, “Roh do use Ahu marayak ho sonon tahun in; jadi adong ma sada anak bani si Sarah parinangonmin.” Dihut do si Sarah mambogei ai humbani labah ni lampolampo na i pudini ai.

¹¹ Tapi domma sayur matua ia si Abraham pakon si Sarah, domma pala maronti bani si Sarah hasomalan ni puang-puang hinan.

¹² Jadi tartawa ma si Sarah ibagas uhurni, nini ma, “Dob matua pe ahu hape, ase dong bangku sipamalas uhur. Tuanku pe homa domma matua.”

¹³ Jadi nini Jahowa ma hubani si Abraham, “Mase ma tartawa si Sarah anjaha marsahap, ‘Tongon do nani tubuhan anak ahu, dob matua ahu?’

¹⁴ Adong do gatni na so tarpajadi Jahowa? Sonon tahun in, mulak ma Ahu marayak ho, jadi adong ma anak bani si Sarah.”

¹⁵ Nini si Sarah ma mamorsou, “Seng tartawa ahu!” Ai mabiar do ia. Tapi nini Jahowa ma, “Lang, tongon do ho tartawa.”

Pangapiti ni si Abraham bani Huta Sodom

¹⁶ Dob ai misir ma hunjai dalahi-dalahi ai, laho dompak Sodom; dihut do si Abraham laho manaruhkon sidea.

¹⁷ Jadi nini Jahowa ma, “Tor ponopkonon-Ku ma hubani si Abraham na sihol bahenon-Ku?

¹⁸ Ai lang si Abraham do gabe bangsa na banggal anjaha na sangap, anjaha marhiteihonsi dapotan pasu-pasu sagala bangsa na i tanoh on?

¹⁹ Ai Ahu do mamilihsi, ase itonahkon hubani anakni pakon hubani ginomparni i pudini, ase totap sidea mangirikkon dalan ni Jahowa, ase ihorjahon hapintoron pakon uhum, ase ipasaud Jahowa hubani si Abraham, na dob hinatahonni bani.”

²⁰ Jadi nini Jahowa ma, “Banggal tumang do doruh-doruh dompak Sodom pakon Gumora anjaha borat tumang do dousa ni sidea.

²¹ Susur do Ahu ase huidah atap na tongon do ganup na hinorjahon ni sidea ai, romban hubani doruh-doruh na das ai hu Bangku, atap lang, sihol do botohon-Ku ai.”

²² Dob ai manirpang ma hunjai dalahi na dua ai, laho ma sidea dompak Sodom; tapi anggo si Abraham jongjong ope i lobei ni Jahowa.

²³ Ipadohor si Abraham ma, nini ma, “Mintor ripaskononmu ma parpintor rap pakon parjahat?

²⁴ Anggo dong lima puluh halak parpintor ibagas huta ai, mintor ripaskononmu do ai, lang hargaanmu do huta ai halani silima puluh parpintor, na ibagas ai?

²⁵ Daoh ma in humbamu, mambahen sisonin, mamunuh parpintor rap pakon parjahat, gabe doskon halak parjahat halak parpintor! Daoh ma in humbamu. Mintor lang ma pintor Panguhum, siuhumi ganup dunia on?"

²⁶ Jadi nini Jahowa ma, "Anggo jumpah Ahu ibagas huta Sodom lima puluh halak parpintor, sai hargaan-Ku do na sanagori ai halani sidea."

²⁷ Ibalosi si Abraham ma, nini ma, "Tonggor Ham ma, domma hubaranihon marsahap hubani Tuhanku age pe orbuk ampa abuan ahu.

²⁸ Ra hurang do lima halak humbani si lima puluh ai parpintor; mintor ripaskonon-Mu ma ganup huta ai halani na lima ai?" Nini ma, "Lang ripaskonon-Ku ai anggo adong do jumpah Ahu ijai ompat puluh lima halak."

²⁹ Dob ai iulaki si Abraham ope use mangkatahon hatani hu bani, nini ma, "Ra ompat puluh halak hansa jumpah ijai." Nini ma, "Lang kahuaon-Ku sidea halani na ompat puluh halak ai."

³⁰ Nini si Abraham ma, "Ulang ma manringis Tuhan, halani hununut marsahap. Ra pitah tolu puluh halak hansa jumpah ijai." Nini ma, "Lang kahuaon-Ku sidea anggo dapot Ahu tolu puluh halak ijai."

³¹ Nini ma, “Tonggor ma, domma hubaranihon marsahap hubani Tuhanku; ra pitah dua puluh halak hansa dapot ijai.” Nini ma, “Lang ripaskonon-Ku sidea halani na dua puluh halak ai.”

³² Ulang Ham manringis Tuhan halani marsahap ope ahu pitah sahali nari. Ra pitah sapuluh halak hansa jumpah ijai. Nini ma, “Lang ripaskonon-Ku sidea halani na sapuluh halak ai.”

³³ Jadi laho ma Jahowa, dob salpu la marsahap pakon si Abraham; mulak ma homa si Abraham hu iananni.

Hajahaton ni Halak Sodom

19 ¹ Jadi das ma malekat na dua ai hu Sodom bodarini ai; ia si Lot hundul-hundul do i horbangan ni Sodom ai. Dob iidah si Lot sidea, jongjong ma ia mangalo-alo sidea, lanjar manrogop, ² nini ma, “Mahua tului ma nasiam tuanku hu rumah ni jabolon nasiam on; marborngin ma nasiam anjaha burihi nasiam ma nahei nasiam, patar pe toruskon nasiam pardalanan nasiam.” Tapi nini sidea ma, “Lang, marborngin i alaman on ma hanami.”

³ Tapi sai ielek-elek si Lot ma sidea; jadi tului ma sidea hu bani, imasuki ma rumahni. Dob ai ipauli ma sipanganon bani sidea, imasak ma ruti na so niigaran, jadi mangan ma sidea.

⁴ Tapi marayak modom sidea, domma iinggoti dalahi-dalahi ni huta ai, halak Sodom ai rumahni, na maposo ampa na matua, haganup halak parhuta ai, sada pe lang na tading.

⁵ Dilo-dilo do sidea hubani si Lot, “Ija do dalahi in, na tondok bam saborngin on? Arahkon sidea hu bennami, ase itandai hanami sidea!”

⁶ Laho ma si Lot hu darat marayak sidea hu lobei ni labah, tapi itutup do labah ai i pudini,

⁷ nini ma, “Nasiam saninangku, ulang ma bahen nasiam na jahat!

⁸ Tonggor ma, adong do dua borungku, na so haliaban ope, sidea ma huboban hu darat hubani nasiam; bahen nasiam ma hubani sidea harosuh ni uhur nasiam, asal ma ulang ibahen nasiam atap aha hubani halak on, ai na roh do sidea marlinggom hu rumahku.”

⁹ Jadi nini sidea ma, “Laho ma ho!” Nini sidea ope, “Sahalaksi do roh manginsolat hujon, gabe ia sihol manguhumi? On pe parahan do bahenonnam bam, ase bani sidea!” Jadi ionjar sidea ma dalahi ai, ai ma si Lot, ipadohor sidea ma, sihol parseda labah ai.

¹⁰ Jadi isurdukkon halak ai ma tanganni, itarik ma si Lot masuk hu rumah, lanjar itutup ma labah ai.

¹¹ Ipapitung sidea ma mata ni halak na i lobei ni labah ai, dakdanak ampa na magodang, gabe soya ma halojaon ni sidea ai, mangindahi labah ai.

Maluah si Lot

¹² Jadi nini halak ai ma hubani si Lot, “Ise ope ijon sindohormu? Hela, anak atap borumu, ampa na dohor bam i huta on, arahkon ma sidea kaluar hun ianan on.

¹³ Ai sihol ripaskononnami ma huta on, halani banggal ni doruh-doruh dompak sidea ilobei ni Jahowa, halani ai do ase isuruh Jahowa hanami manripaskon huta on.”

¹⁴ Laho ma si Lot marsahapkon sonduk helani sidua halak ai, na sihol mambuat boruni ai, nini ma, “Misir ma hun huta on, ai ripaskononni Jahowa ma huta on.” Tapi na marhuria-huria do ia, ninuhur ni sonduk helani ai.

¹⁵ Sanggah na marlangat-langat ari, ijuljul malekat ai ma si Lot, nini ma, “Jongjong ma, boan ma parinangonmu pakon borumu sidua halak in, na adong ijon, ase ulang dihut ho rasei halani hajahaton ni huta on.”

¹⁶ Halani ipadokah-dokah, itangkap na dua halak ai ma tanganni pakon tangan ni parinangon pakon tangan ni boruni na dua ai, halani sihol paluahon ni Jahowa do ia; iarahkon sidea ma ia anjaha ipasaran i darat ni huta ai.

¹⁷ Dob das hudarat sidea itogu, marsahap ma sahalak, “Paluah dirimu! Ulang kawahkon dompak

pudi, ulang ho marsaran barang ija pe i pamah on, hu dolog ma ho maporus, ase ulang bois ho.”

¹⁸ Nini si Lot ma hubani sidea, “Ulang ma sonai, Tuannami!

¹⁹ Tonggor ma, domma pala dapotan idop ni uhur jabolonmu on i lobeimu, anjaha domma ipatuduh ham bangku halayakon banggal marhitei na ipagoluh ham hosahku. Tapi seng tarbahen ahu maporus hu dolog an, ra tarayak hamagouan ai do ahu, gabe matei ahu holi.

²⁰ Tonggor ma, dohor do huta ai, boi do hujai ahu maporus, etek do homa huta ai. Mahua hujai ma ahu lintun. Ai lang etek do huta ai? Anggo sonai manggoluh ma ahu.”

²¹ Jadi nini ma mambalosi, “Dear, pasal on pe tatapon-Ku do. Seng parsedaon-Ku be huta na hinatahonmai.

²² Ne ma, papodas ma lintun hujai, ai seng tarbahen Ahu mambahen atap aha pe, paima das ho hujai.” Ai do halani ase Zoar huta ai igoran halak.

²³ Domma pala poltak mata ni ari i tanoh on, sanggah na das ai si Lot i Zoar.

Parseda ni Huta Sodom

²⁴ Dob ai iparoh Jahowa ma udan hirtah pakon apuy hu Sodom pakon Gumora, ai ma humbani Jahowa, hun nagori atas.

²⁵ Iboiskon ma huta-huta ampa haganup pamah ai, ronsi haganup pangisi ni huta-huta ai, ampa suansuanan na i tanoh ai.

²⁶ Tapi mangkawah ma parinangon ni si Lot, na mardalan i pudini ai, dampak pudi, gabe salih ma ia gabe batu garam.

²⁷ Misir ma si Abraham sogod patarni ai hubani ianan hajongjonganni hinan i lobei ni Jahowa.

²⁸ Dob ai itatap ma dampak Sodom pakon Gumora pakon haganup tanoh na i pamah ai; jadi iidah ma martimpul timus hun tanoh ai, songon timus ni pamurunan.

²⁹ Sanggah na laho manraseihon huta-huta na i pamah ai Naibata, idingat Naibata ma si Abraham, jadi iarahkon ma si Lot hun tongah-tongah ni halonglongan ai sanggah na ilonglongkon huta na niiankon ni si Lot hinan.

Dousa ni Boru ni si Lot

³⁰ Dob ai tangkog ma si Lot hun Zoar, jadi marianan ma ia rap pakon boruni na dua ai i dolog, halani mabiar do ia tading i Zoar, gabe iiankon ma sada liang, ia rap pakon boruni na dua ai.

³¹ Dob ai nini sikahanan ai ma dampak sianggian ai, “Domma matua bapanta, anjaha seng dong be dalahi i tanoh on na roh hubanta, songon hasomalan i sab dunia on.

³² Bere hita ma minum anggur bapanta, anjaha hasomani hita ma ia modom, ase pagoluh hita ginompar humbani bapanta.”

³³ Jadi ipainumkon sidea ma anggur hubani bapa ni sidea ai bani na saborngin ai. Dob ai laho ma sikahanan ai mangkasomani bapani ai modom; lang ibotoh bapani ai sandihari boruni ai modom anjaha sadihari puho.

³⁴ Patar ni ai nini sikahanan ai ma bani sianggian ai, “Tonggor ma, domma huhasomani na bodari bapa modom. Bere hita ma homa borngin on anggur inumonni, ase laho ho mangkasomanisi modom, ase pagoluh hita ginompar humbani bapanta.”

³⁵ Jadi ibere sidea ma bani na saborngin ai anggur inumon ni bapa ni sidea ai. Jadi laho ma sianggian ai mangkasomanisi modom, anjaha lang ibotoh sadihari boru ni ai modom anjaha sadihari puho.

³⁶ Jadi boratan rumah ma boru ni si Lot ai haduasi humbani bapa ni sidea ai.

³⁷ Dob ai itubuhkon sikahanan ai ma anak sada, ibahen ma goranni si Moab; ia do ompung ni halak Moab ronsi sadari on.

³⁸ Dihut do sianggian ai manubuhkon sada anak, ibahen do goranni si Ben-Ammi; ia do ompung ni halak Amon ronsi sadari on.

Si Abraham pakon si Abimelek Raja ni Gerar

20¹ Dob ai bungkas ma si Abraham hunjai hu tanoh dangsina, laho marianan i holangkolang ni Kades pakon Sur, gabe manginsolat ma ia i Gerar.

² Jadi nini si Abraham ma pasal si Sarah parinangonni ai, “Botouhu do ia.” Jadi isuruh si Abimelek, raja ni Gerar ai ma na mangalop si Sarah.

³ Tapi roh ma Naibata ibagas nipi hubani si Abimelek borngin ni ai, nini ma hu bani, “Marutang hosah ma ho, halani puang-puang na binuatmin, ai na dob marpuang do ia.”

⁴ Tapi seng onggga ope dohor si Abimelek hu bani, jadi nini ma, “Ham Tuhan, mintor bunuhonmu ma bangsa na pintor?

⁵ Ai lang ia do mangkatahon bangku, ‘Botouhu do ia?’ Puang-puang in pe ihatahon do, ‘Botouhu do ia.’ Ase ia hubahen pe sonin, halani bonar ni uhurhu pakon borsih ni tanganku do.

⁶ Dob ai nini Naibata ma hubani ibagas nipi, “Ahu pe, Hubotoh do humbani bonar ni uhurmu do ibahen ho sonin, mambahen hulanglangi ho mardousa dompak Ahu; halani ai do ase lang Hulopas ho manjamahsi.

⁷ Sonari pe paulak ma parinangon ni halak ai, ai nabi do ia; tonggohononni do ho ase manggoluh ho. Tapi

anggo seng ipaulak ho, botoh ma, sai matei do ho pakon ganup na rapkon ho.”

⁸ Jadi girah ma puho si Abimelek patarni ai, idilo ma ganup juakjuakni, ipajojo ma ganup hata ondi bani sidea, jadi mabiar tumang ma sidea.

⁹ Dob ai idilo si Abimelek ma si Abraham, nini ma hu bani, “Aha do na binahenmu bennami, anjaha aha do dousangku hubam, mambahen iparoh ho dousa bolon hu bangku pakon hubani harajaonku? Pambahenan na so malo bahenon, ai do ibahen ho hu bangku.”

¹⁰ Ambah ni ai nini si Abimelek ma use hubani si Abraham, “Aha do na niidahmu, ase ibahen ho sonin?”

¹¹ Jadi nini si Abraham ma, “Nini uhurhu, ra seng dong na mangkabiari Naibata bani ianan on, tontu bunuhon ni sidea ma ahu halani parinangonku.

¹² Anjaha botul botouhu do tongon ia, boru ni bapa, tapi lang tinubuhkon ni inang, ase boi do parinangonku ia.

¹³ Tapi dob ihatahon Naibata ahu bungkas hun rumah ni bapa, jadi huhatahon ma hu bani, ‘On ma tanda ni holong ni uhurmu, sibahenonmu hu bangku, atap huja pe hita das,’ hatahon ma pasal ahu, “Botouhu do ia.”

¹⁴ Jadi ibuat si Abimelek ma biribiri pakon lombu, jabolon dalahi pakon jabolon naboru, ibere ma

ai bani si Abraham; ipaulak ma hubani si Sarah, parinangonni ai.

¹⁵ Dob ai nini si Abimelek ma, “Tonggor ma, tanohku na i lobeimin; iankon ma ija rosuh ni uhurmu!”

¹⁶ Tapi bani si Sarah nini do, “Tonggor ma, domma hubere bani botoumu saribu pirak, bahen pardearan bam pakon hubani ganup na rapkon ho, ase pintor ho i lobei ni ganup halak.”

¹⁷ Dob ai martonggo ma si Abraham hubani Naibata. Jadi ipamalum Naibata ma si Abimelek, parinangon ampa jabolonni puang-puang, gabe tubuhan tuah ma sidea.

¹⁸ Ai domma itutup Naibata ganup parnaibataan na i rumah ni si Abimelek, halani si Sarah parinangon ni si Abraham ai.

Partubuh ni si Isak

21 ¹ Dob ai itatap Jahowa ma si Sarah, songon na hinatahon-Ni ai, anjaha ibahen Jahowa ma hubani songon na pinarbagah-bagah-Ni ai.

² Ai boratan rumah ma si Sarah, anjaha itubuhkon ma sada anak bani si Abraham, bani panorang hatuaonni, domu hubani panorang na dob hinatahon ni Naibata hu bani.

³ Dob ai ibahen si Abraham ma goran ni anakni, na tubuh bani, humbani si Sarah ai, si Isak.

⁴ Jadi isunat si Abraham ma si Isak, anakni ai, bani ari paualuhkon, songon na tinonahkon ni Naibata hu bani.

⁵ Marumur saratus tahun do si Abraham, bani partubuh ni si Isak, anak ni ai.

⁶ Jadi nini si Sarah ma, “Domma ibahen Naibata tartawa ahu; ganup na mambogei, tartawa ma halani ahu.”

⁷ Ambah ni ai ihatahon do, “Ise ma adong hinan na mangkatahon bani si Abraham, pabagodkon anak si Sarah? Hutubuhkon do anak sada bani, sanggah panorang hatuaonni.”

⁸ Dob ai lambin bangga ma dakdanak ai, anjaha sirang minum; jadi marpesta bangga ma si Abraham, bani ari na sirang minum ai si Isak.

⁹ Dob ai iidah si Sarah ma mangapasi anak ni si Hagar, boru Masir ai, na tinubuhkonni bani si Abraham.

¹⁰ Jadi nini ma hubani si Abraham, “Usir ma boru jabolon ai rap pakon anakni ai, halani lang boi rap panean anak ni boru jabolon ai rap pakon si Isak anakkin.”

¹¹ Tapi sogam tumang do uhur ni si Abraham pasal hata ai, halani anakni ai.

¹² Tapi nini Naibata ma dompak si Abraham, “Ulang sogam uhurmu pasal dakdanak in pakon jabolonmin. Tangihon ma ganup na hinatahon ni si

Sarah bam, pitah marhitei si Isak do targoran bam ginompar.

¹³ Sonai homa anak ni jabolonmin, bahenon-Ku do gabe sada bangsa, halani ginomparmu do ia.”

¹⁴ Jadi ipagirah si Abraham ma patarni ai puho, ibuat ma ruti pakon bah satatabu, ibere ma ai bani si Hagar, ipahadangkong ma ai bani abarani ampa bani dakdanak ai, dob ai ipaingkat ma ia pakon dakdanak ai. Laho ma ia, hape kahou ma ia i halimisan Berseba.

¹⁵ Jadi dob bois bah na i tatatabu ai, itibalhon ma dakdanak ai hu toruh ni sada hayu na etek-etek,

¹⁶ anjaha laho ma ia, hundul mandaoh-daoh hunjai, patontang hira-hira sampanah daohni, ai nini, “Seng tarpaidah-idah ahu dakdanak in laho matei.” Jadi hundul ma ia patontang hunjai, ipagogoh ma sorani anjaha tangis.

¹⁷ Jadi itangihon Naibata ma sora ni dakdanak ai, anjaha dilo-dilo ma malekat ni Naibata hun nagori atas hubani si Hagar, nini ma, “Mahua ho Hagar? Ulang ma ho mabiar, ai domma itangihon Naibata sora ni dakdanak ai humbani hatibalan ni ai.

¹⁸ Jongjong ma ho, angkat ma dakdanak ai anjaha abing ma, ai bahenonku do ia gabe sada bangsa na banggal.”

¹⁹ Dob ai iungkab Naibata ma mata ni si Hagar, gabe iidah ma sada bah tubuh. Laho ma ia mannahi bah

hubagas tatabuni ai, anjaha ipainum ma dakdanak ai.

²⁰ Anjaha ihasomani Naibata do dakdanak ai, jadi lambin magodang ma ia; i halimisan do ia marianan, anjaha iguruhon do pamanahon.

²¹ Jadi marianan ma ia i halimisan Paran, anjaha ibuat inangni ma bani sada boru Masir bahen parinangonni.

Parpadanan ni si Abraham pakon si Abimelek

²² Dob ai roh ma ijia hata ni si Abimelek pakon si Pihol, puanglima ni balani hubani si Abraham, nini ma, "Sai ihasomani Naibata do ho bani haganup horjamu.

²³ On pe, bijahon ma bangku i lobei ni Naibata, na so martahi-tahi ho bangku, barang hubani anakku ronsi ginomparhu; tapi songon na dob hubahen bam na madear, sonai ma bahen hu bangku pakon hu tanoh panginsolatanmu."

²⁴ Jadi nini si Abraham ma, "Hubijahon pe."

²⁵ Tapi ihutuk si Abraham do si Abimelek, halani parigi na nirampok ni jabolon ni si Abimelek ai.

²⁶ Nini si Abimelek ma, "Seng hubotoh barang ise na mambahen ai, ho pe homa seng ipatugah ho hu bangku, anjaha seng dong hubogei pasal ai das hubani sadari on."

²⁷ Jadi ibuat si Abraham ma biribiri pakon lombu, ibere ma bani si Abimelek, jadi marbulawan ma sidea na dua.

²⁸ Dob ai ipapulig si Abraham ma pitu anak ni biribiri.

²⁹ Jadi nini si Abimelek ma hubani si Abraham, “Huja do anak ni biribiri na pitu, na pinapuligmon?”

³⁰ Balosni, “Jalo ham ma na pitu anak ni biribiri on hun tanganku, bahen hasaksian bangku, paboa ahu sihurak parigi on.”

³¹ Halani ai do ase Berseba goran ni ianan ai, ai ijai do sidea na dua marbulawan.

³² Ase marpadan ma sidea i Berseba. Dob ai misir ma si Abimelek pakon si Pihol, puanglima ni balani ai, mulak hu tanoh ni halak Palistim.

³³ Dob ai isuan si Abraham ma sada hayu Tamariska i Berseba, anjaha ipadilo-dilo ma ijai goran ni Jahowa, Naibata sisadokah ni dokahni.

³⁴ Dokah do si Abraham manginsolat i tanoh ni halak Palistim.

Ilajou Naibata Haporsayaon ni si Abraham

22 ¹ Jadi dob salpu na masa ai, ilajou Naibata ma si Abraham, nini ma dompaksi, “Abraham!” Nini ma mambalosi, “Ijon do ahu.”

² Dob ai nini ma, “Buat ma anakmu na sasada in, haholongan ni uhurmu, si Isak in, arahkon ma ia hu tanoh Moria, anjaha galangkon ma ia

ijai bahen galangan situtungan bani sada dolog, sipatuduhkonon-Ku bam.”

³ Jadi ipagirah si Abraham ma puho patarni ai, ipalana ma halodeni, iarahkon ma dua halak jabolonni rap pakon si Isak, anakni ai; itaha ma soban ni galangan situtungan ai, dob ai misir ma ia hu ianan, na hinatahon ni Naibata hu bani.

⁴ Patolu-arihon mangkawah ma si Abraham, jadi iidah ma ianan ai humbani na daoh.

⁵ Dob ai nini si Abraham ma bani jabolonni ai, “Ijon ma hanima tading rap pakon halode in; anggo ahu pakon ambia on, laho do hanami hujai, anjaha dob martonggo hanami, mulak ma hanami bennima.”

⁶ Jadi ibuat si Abraham ma soban ni galangan situtungan ai, itampeihon ma bani si Isak anakni ai; ia sandiri mamboban apuy pakon raot sada, jadi rap mardalan ma sidea na dua ai.

⁷ Dob ai marsahap ma si Isak dompak si Abraham bapani ai, nini ma, “Bapa!” Nini ma mambalosi, “Ijon do ahu anaha. Tonggor ma, ijon do apuy pakon soban, tapi ija do biribiri bahen galangan situtungan ai?”

⁸ Nini si Abraham ma, “Sai pasirsiron ni Naibata do bani sada biribiri bahen galangan situtungan, ambia.” Jadi rap mardalan ma sidea na dua ai.

⁹ Dob das sidea bani ianan, ai ma na hinatahon ni Naibata hu bani, ipauli si Abraham ma ijai sada anjapanjap, iatur ma soban ai, dob ai isangkut ma

si Isak anak ni ai, itampeihon ma ia hu atas ni anjapanjap, hu atas ni soban ai.

¹⁰ Dob ai itangkap si Abraham ma tanganni, ibuat ma pisou laho manayat anakni ai.

¹¹ Tapi dilo-dilo ma bani malekat ni Jahowa hun nagori atas, nini ma, “Abraham, Abraham! Ijon do ahu,” nini.

¹² Jadi nini ma, “Ulang mardas tangan ho bani dakdanak in, anjaha ulang bahen barang aha hu bani, ai domma Hubotoh na i habiari ho do Naibata, anjaha lang mangengkar ho mambere anakmu sisada-sada in Bangku.”

¹³ Jadi mangkawah ma si Abraham, iidah ma sada biribiri tunggal i pudini, sangkot tandukni bani sada hayu etek. Laho ma si Abraham hujai, ibuat ma biribiri tunggal ai, anjaha igalangkon ma ai bahen galangan situtungon gantih ni anakni ai.

¹⁴ Dob ai ibahen si Abraham ma goran ni ianan ai, “Jahowa Pasirsirhon;” halani ai ihatahon halak do ronsi sadari on, “I dolog ni Jahowa pasirsiron-Ni.”

¹⁵ Dob ai idilo malekat ni Jahowa ma si Abraham paduahalihon hun nagori atas,

¹⁶ nini ma, “Domma pala Hubijahon bani diring-Ku,” nini Jahowa, “halani ibahen ho sonin, anjaha seng iengkar ho mamberehon anakmu sisada-sada in,

¹⁷ tongon pasu-pasuon-Ku ma ho, anjaha gargar tumang bahenon-Ku ginomparmu, songon bintang

na i langit, songon horsik na i topi ni laut, anjaha teanon ni ginomparmu do huta ni munsumni.

¹⁸ Anjaha dapotan pasu-pasu marhitei ginomparmu sagala bangsa na i tanoh on, halani itangihon ho do sorang-Ku.”

¹⁹ Dob ai mulak ma si Abraham hubani jabolonni ai; misir ma sidea, rap laho hu Berseba, ai marianan i Berseba do si Abraham.

Ginompas ni si Nahor

²⁰ Jadi dob salpu na masa ai, adong ma na patugahkon bani si Abraham, “Tonggor ma, si Milka pe itubuhkon do anak bani si Nahor anggimu ai,

²¹ si Ur ai ma bunga tubuhn, si Bus anggini, si Kemuel, bapa ni si Aram,

²² si Heset, si Haso, si Pildas, si Jidlap pakon si Betuel.”

²³ Si Betuel do na manubuhkon si Rebekka. Na ualuh halak ai do itubuhkon si Milka bani si Nahor, anggi ni si Abraham ai.

²⁴ Dihut do jabolonni, na margoran si Reuma, na pinarjolmani ai tubuhan tuah, ai ma si Tebah, si Gaham, si Tahas pakon si Maaka.

Parmatei ni si Sarah pakon Partanomni

23 ¹ Saratus dua puluh pitu tahun do umur ni si Sarah, ansa ai do dokah ni si Sarah manggoluh.

² Dob ai matei ma si Sarah i Kiriath-Arba, ai ma Hebron, na i tanoh Kanaan. Jadi roh ma si Abraham mandoraki ampa manangisisi.

³ Dob ai jongjong ma si Abraham laho humbani na mateini ai, iparsahapkon ma halak Het, nini ma,

⁴ “Halak roh anjaha halak panginsolat do ahu i tongah-tongah nasiam; bere nasiam ma panimbunan parsandirianku bangku i tongah-tongah nasiam, ase hutanom na mateihai.”

⁵ Ibalosi halak Het do si Abraham, nini sidea ma,

⁶ “Tangihon ma hanami, tuannami. Raja na pinabangkit ni Naibata do ham i tongah-tongahnami on, tanom ma na mateimu hu panimbunannami, tinodoh ni uhurmu. Seng dong hun bennami on na mamandang ham mananom na mateimu hu tanomannami.”

⁷ Dob ai jongjong ma si Abraham, isombah ma parnagori ai, ai ma halak Het,

⁸ nini ma dompak sidea, “Anggo dear ma uhur nasiam, tanomonku na mateihai, tangihon nasiam ma ahu, anjaha pormaloi nasiam ma ahu hubani si Epron, anak ni si Sohar,

⁹ ase ibere hu bangku liang Makpela, bagianni ai na i duru ni jumanai ai. Sai ibere ma hu bangku ai atap sadiha pe hargani, bahen panimbunan parsandirian bangku i tongah-tongah nasiam.”

¹⁰ Ai marianan i tongah-tongah ni halak Het do si Epron. Jadi marbalos ma si Epron, marga Het

ai hubani si Abraham, ibogei haganup halak Het, ganup halak na masuk hun horbangan ni hutani ai, nini ma,

¹¹ “Lang tuannami, tangihon ham ma ahu! Hubere ma juma ai bamu ampa liang na ibagas ai; i lobei ni hasoman sabangsangku ma hubere ai hubamu; tanom ham ma na mateimu ai.”

¹² Jadi isombah si Abraham ma parnagori ai.

¹³ Anjaha marsahap ma ia dompak si Epron ibogei parnagori ai, nini ma, “Tongon, anggo ra do ham manangihon ahu hubere ma bamu boli ni juma ai; jalo ham ma ai humbangku, ase hutanom na mateihai.”

¹⁴ Nini si Epron ma mambalosi si Abraham,

¹⁵ “Eak tuanku, tangihon ham ma ahu! Sanlambar juma, marharga ompat ratus sekel pirak, sadiha ma ai. Tanom ham ma gelah na mateimu ai.”

¹⁶ Ibalosi si Abraham ma si Epron, itimbang ma duit ai nasa buei ni na hinatahon ni si Epron ai i lobei ni ganup halak Het, ompat ratus sekel pirak, duit na laho bani partiga-tiga.

¹⁷ Jadi saud ma juma ni si Epron, na i Makpela, tontang ni Mamre ai, juma ai pakon liang na ibagas ai, ganup hayu na i juma ai, ampa ganup na inggot hujai,

¹⁸ gabe parbagianan ni si Abraham, i lobei ni ganup halak Het, ganup halak na masuk hun horbangan ni hutani ai.

¹⁹ Dob ai itanom si Abraham ma si Sarah, parinangonni ai, hu liang juma Makpela, tontang ni Mamre, ai ma Hebron, na i tanoh Kanaan.

²⁰ Ase ondos ma bani si Abraham juma pakon liang na ibagas ai, bahen tanoman parsandirian bani humbani halak Het.

Parmompo ni si Isak

24 ¹ Ia si Abraham domma ubanon, domma sayur matua, anjaha ipasu-pasu Jahowa do ia bani haganup.

² Dob ai ihatahon si Abraham ma bani jabolonni, situanan i rumahni, na manramotkon ganup na dong bani, “Mahua nahkon ma tanganmu i toruh ni binongei hu,

³ ase hupabija ho hubani Jahowa, Naibata ni nagori atas pakon tanoh on, paboa na so bulih buatonmu humbani boru ni halak Kanaan, panginsolatankin, bahen parinangon ni anakkin,

⁴ tapi maningon laho do ho hu tanoh hagodanganku pakon hubani hade-hadengku, laho manririd bahen parinangon ni anakkin, si Isak.”

⁵ Jadi nini jabolonni ai ma dompaksi, “Naha, porini lang marosuh puang-puang ai mangirikkon ahu hu nagori on, boi do boanonku anakmu in mulak hu tanoh habingkatanmu ai?”

⁶ Nini si Abraham ma dompaksi, “Jaga ma, ase ulang iarahkon ho mulak anakkin hujai!

⁷ Jahowa, Naibata ni nagori atas, na mambobahon ahu kaluar hun rumah ni bapa pakon hun tanoh ni hade-hadengku, na mangkatahon ampa na mambijahon bangku sonon, 'Hubani ginomparmu do berehononku tanoh on. Ia ma na marsuruh malekatni mardalan i lobeimu, laho mambuat boru bani anakku hunjai.'

⁸ Tapi anggo lang ra puang-puang ai mangirikkon ho, maluah ma ho humbani bija na hu bangku in, asal ulang iarahkon ho anakkin mulak hujai."

⁹ Jadi inahkon jabolonni ai ma tanganni hu toruh ni binongei ni si Abraham, tuanni ai, anjaha ibijahon ma pasal ai hu bani.

¹⁰ Ibuat jabolon ai ma sapuluh unta humbani unta ni tuanni ai, ampa bagei ni ugas-ugas na maharga ni tuanni, dob ai bingkat ma ia, laho hu Mesopotamia, hu huta ni si Nahor.

¹¹ Dob ai ipasaran ma unta ai i darat ni huta ai, i lambung ni sada parigi marayak bod ari, bani panorang parroh ni halak parbah.

¹² Jadi nini ma, "Ham Jahowa, Naibata ni si Abraham tuankai, patongon Ham ma langkahku sadari on, sai patuduhkon ma idop ni uhur-Mu bani si Abraham, tuankai.

¹³ Tonggor ma, jongjong do ahu i lambung ni parigi on, anjaha laho kaluar ma boru ni sinkuta on sihol manahui bah.

¹⁴ On pe, anggo huhatahon bani sada halak sidea, 'Mahua pateleng ham hudonmu in ase minum ahu,' gabe ibalosi, 'inum ham ma, hupabosur pe ampa untamu, ai ma namin na tinontuhonmu bani jabolonmu si Isak, ase hubotoh marhitei ai, na dob ibahen ham idop ni uhurmu bani tuankai.'"

¹⁵ Jadi lape ope torus hatani ai ihatahon, tonggor ma, domma kaluar si Rebekka, boru ni si Betuel, anak ni si Milka, parinangon ni si Nahor, abang ni si Abraham, mangabarai hudonni.

¹⁶ Jenges tumang do rupani, sada anak boru, na so onggga ope manandai dalahi; tuad ma ia hu parigi ai, igoki ma hudonni, dob ai tangkog ma ia.

¹⁷ Jadi marlintun ma jabolon ai marayaksi, nini ma, "Mahua bere ham ma bah in otik inumonku humbani hudonmu in."

¹⁸ Nini ma mambalosi, "Minum ma ham tuan!" Jadi tarolos ma ia patoruhkon hudonni ai hu tanganni, lanjar ibere ma ia minum.

¹⁹ Dob salpu ia ibere minum, nini ma, "Hutahui pe bah age bani untamu ronsi sombuh horahni ganup."

²⁰ Dob ai tarolos ma ia manguseihon hudonni ai hu palangka, iulaki ma marlintun hu parigi ai laho manahui bah, jadi itahui ma bah bani ganup untani ai.

²¹ Longang ma dalahi ai mangidahsi, sai sip do ia mardiateihon atap na itumpak Jahowa do langkahni, atap lang.

²² Jadi dob bosur minum unta ai, ibuat dalahi ai ma sada anting-anting omas, satongah sekel boratni, pakon saparanguan golang, sapuluh sekel omas boratni.

²³ Dob ai nini ma, “Atene, boru ni ise do ham? Mahua patugah ham ma bangku! Adong do gatni ianan parbornginan i rumah ni bapanta bennami?”

²⁴ Nini ma mambalosi, “Boru ni si Betuel do ahu, anak ni si Milka, na tinubuhkonni bani si Nahor.”

²⁵ Ambah ni ai ihatahon naboru ai ma, “Anggala ni omei ampa gagaton pe, buei do bennami, parbornginan pe adong do.”

²⁶ Jadi ipaunduk dalahi ai ma dirini marsombah hubani Jahowa,

²⁷ nini ma, “Pinuji ma Jahowa, Naibata ni si Abraham; lang alang idop ni uhur pakon habujuronni hubani tuanku.”

²⁸ Dob ai marlintun ma naboru ai laho patugahkon hata ai hu rumah ni inangni.

²⁹ Adong do sada botou ni si Rebekka, si Laban goranni. Jadi marlintun ma si Laban hu darat manjumpahkon dalahi ai hu parigi nongkan ai.

³⁰ Jadi dob iidah anting-anting ai pakon golang na i tangan ni botouni ai, anjaha dob ibogei hata ni si Rebekka, botouni ai, na mangkatahon, “Sonon-sonon do hata ni halak ai bangku,” mintor laho ma ia marayak dalahi ai, anjaha tonggor ma, jongjong ope ia i lambung ni untani, dohorhon parigi ai.

³¹ Dob ai ihatahon ma, “Eta hita laho, ham na pinasu-pasu ni Jahowa! Mase ma sai jongjong ham i darat on? Domma pala huatur rumah, sonai homa ianan ni unta in.”

³² Jadi iarahkon ma dalahi ai hu rumah, itanggali ma palana ni unta ai, ibere ma anggala ampa gagaton bani unta ai, sonai bah pamurihi ni naheini pakon nahei ni hasomanni ai;

³³ dob ai inahkon ma sipanganon hu lobeini. Tapi nini ma, “Seng mangan ope ahu, anggo lape husahapkon hatangkon. Anggo sonai, hatahon ma!” nini.

³⁴ Jadi nini ma, “Jabolon ni si Abraham do ahu.

³⁵ Tongon ipasu-pasu Jahowa do tuankai, jadi gabe bayak do ia; ibere Naibata do bani biribiri pakon lombu, pirak pakon omas, jabolon dalahi ampa jabolon naboru, unta pakon halode.

³⁶ Ambah ni ai, itubuhkon si Sarah parinangon ni tuankai do sada anak bani tuanku, bani panorang hatuaonni; bani do iberehon ganup na dong ni tuankai.

³⁷ Dob ai ipabija tuankai ma ahu, nini, ‘Lang bulih buatonmu humbani boru ni halak Kanaan, panginsolatankin, bahen parinangon ni anakkin,

³⁸ tapi laho ma ho hu rumah ni bapa, parayak ma hasomanku samarga, mambuat parinangon ni anakkin.’

³⁹ Ningku ma bani tuanku, 'Sonaha ma, anggo lang ra puang-puang ai mangirikkon ahu?'

⁴⁰ Nini ma dompak ahu, 'Jahowa na hubalosi, la do marsuruh malekatni mangkasomani ho ampa manumpak langkahmu, laho mambuat boru bani anakkin humbani hasomanku samarga hun rumah ni bapa.

⁴¹ Maluah ma ho humbani bijamu hu bangku anggo domma das ho hubani hasomanku samarga; anggo lang ibere sidea puang-puang ai bam, maluah ma ho humbani bijamu hu bangku.'

⁴² Jadi dob das ahu sadari on hu parigi ai, ningku ma: Ham Jahowa, Naibata ni si Abraham, tuankai, sai tumpak Ham ma langkah na hulangkahkon on.

⁴³ Tonggor ma, jongjong do ahu i lambung ni parigi on: Anggo adong sada anak boru, na kaluar laho manahui bah, jadi huhatahon bani, 'Bere ham bangku otik bah humbani hudonmu in,'

⁴⁴ jadi ihatahon bangku, 'inum ma, pakon bani untamu hutahui pe bah, ai ma puang-puang, na dob tinontuhon ni Jahowa bani anak ni tuankai.'

⁴⁵ Lang ope salpu huhatahon hata ai ibagas uhurhu, tonggor ma, kaluar ma si Rebekka mangabarai sada hudon, turun ma ia hu parigi ai manahui bah. Jadi huhatahon ma bani, 'Mahua bere ham ma ahu minum.'

⁴⁶ Jadi tarolos ma ia patoruhkon hudonni humbani abarani, nini ma, 'Minum ma ham, hupasobur pe

pakon untamu on.’ Ase minum ma ahu, anjaha ipasobur ma homa unta ai.

⁴⁷ Dob ai husungkun ma ia, ningku ma, ‘Boru ni ise do ham?’ Balosni, ‘Boru ni si Betuel do, anak ni si Nahor, tinubuhkon ni si Milka bani.’ Dob ai hubahen ma sada tintin hu igungni pakon golang hu tanganni.

⁴⁸ Dob ai mangunduk ma ahu marsombah hubani Jahowa, hupuji ma Jahowa, Naibata ni si Abraham, tuankai, na patongonkon langkahku laho mambuat boru ni abang ni tuanku, bani anakni ai.

⁴⁹ Sonari pe, anggo ra do nasiam patuduhkon idop pakon bujur ni uhur bani tuankai, patugah nasiam ma bangku; anggo lang, patugah nasiam homa bangku, ase hubotoh mandompakkon hu siamun atap hu sampilou.”

⁵⁰ Jadi nini si Laban pakon si Betuel ma mambalosi, “Na roh humbani Jahowa do hata in; seng tarhatahon hanami bam, na bajan atap na mader.

⁵¹ Tonggor ma, i lobeimu do si Rebekka, buat ma ia anjaha langkahkon ma, ase gabe parinangon ni anak ni tuanmai ia, songon na hinatahon ni Jahowa.”

⁵² Jadi dob ibogei jabolon ni si Abraham hata ni sidea ai, marsombah ma ia bani Jahowa.

⁵³ Dob ai ipadarat jabolon ai ma ugas pirak, ugas omas ampa hiou, lanjar ibere ma ai bani si Rebekka; sonai homa bani botouni ampa inangni ibere do ugas maharga.

⁵⁴ Dob ai mangan ampa minum ma sidea, ia pakon hasomanni saodoran, lanjar marborngin ma sidea ijai. Patarni puho ma sidea, jadi nini ma, “Palopas nasiam ma hanami mulak bani tuanku.”

⁵⁵ Tapi nini botou pakon inangni ai ma, “Paturut ma siboru ai tading ijon hira-hira sapuluh borngin nari, ai pe ase laho ho.”

⁵⁶ Dob ai nini ma hubani sidea, “Ulang jolomi nasiam ahu, halani Jahowa do na manumpak langkahku. Palopas nasiam ma ahu laho mulak hubani tuanku.”

⁵⁷ Jadi nini sidea ma, “Anggo sonai, idilo hanami ma siboru ai, ase nasungkun hatani.”

⁵⁸ Idilo sidea ma si Rebekka, ihatahon ma hu bani, “Atene, ra do ho bingkak ampa dalahi on?” Ibalosi ma, “Eak, ra do ahu.”

⁵⁹ Jadi ipaingkat sidea ma si Rebekka, botou ni sidea ai, pakon parorotni rap pakon jabolon ni si Abraham ai ampa hasomanni saodoran.

⁶⁰ Ipasu-pasu sidea ma si Rebekka, anjaha ihatahon ma hu bani, “Gabe ma ham botou, marribu-ribu laksa, anjaha ginomparmu ma simada horbangan ni munsuhni.”

⁶¹ Dob ai marugas ma si Rebekka pakon parorotni, manaik ma sidea hu atas unta, anjaha iirikkon ma dalahi ai.

⁶² Tapi na roh do si Isak hun parigi Lachai-Roi, ai i Tanoh Dangsina do ia marianan.

⁶³ Marayak bod ari laho do si Isak hu juma martonggo; jadi mangkawah ma ia, gabe iidah ma roh unta.

⁶⁴ Mangkawah ma homa si Rebekka, jadi iidah ma si Isak, gabe turun ma ia hun unta ai.

⁶⁵ Nini ma hubani jabolon ai, “Ise do dalahi ai, na mardalan i juma ai, na roh manjumpahkon hita?” Nini jabolon ai ma, “Ai ma da tuanku.” Jadi ibuat ma tudung-tudung na manrungkub bohini ai.

⁶⁶ Dob ai ipajojor jabolon ai ma hubani si Isak ganup na hinorjahonni ai.

⁶⁷ Jadi iarahkon si Isak ma si Rebekka hu lampolampo ni si Sarah, inangni ai; ibuat ma si Rebekka bahen parinangonni, anjaha holong do uhurni mangidahsi. Jadi tarapoh ma uhur ni si Isak bani panading ni inangni ai.

Ginompar ni si Abraham na humbani si Ketura

25 ¹ Dob ai iulakkon si Abraham ma mambuat boru, na margoran si Ketura.

² Jadi itubuhkon ma bani si Simran pakon si Joksan, si Medan pakon si Midian, si Jisbak pakon si Suah.

³ Si Joksan do na manubuhkon si Seba pakon si Dedan. Ia ginompar ni si Dedan, ai ma halak Assur, halak Letus pakon halak Leum.

⁴ Anak ni si Midian ai ma si Epa, si Eper, si Hanok, si Abida pakon si Elda. Ai ma ganup ginompar ni si Ketura.

⁵ Dob ai ibere si Abraham ma ganup na dong bani ai hubani si Isak.

⁶ Tapi anggo bani anak ni parinangonni, panggantihi ai, sibere-bere do ibere si Abraham; dob ai ipajae ma sidea humbani si Isak anakni ai hu tanoh na hampit hapoltakan, sanggah bani goluhni ope.

Parmatei ni si Abram pakon Partanomni

⁷ Ia dokah ni umur ni si Abraham manggoluh saratus pitu puluh lima tahun do.

⁸ Dob ai matei sayurmatua ma si Abraham, dob sombuh uhurni bani hagoluhan on, jadi ipatumpu ma ia hubani ompungni.

⁹ Dob ai itanom si Isak pakon si Ismael anakni ai ma ia, hu liang Makpela, hu juma ni si Epron, anak ni si Zohar, marga Het, na hampit hapoltakan ni Mamre, ¹⁰ hu juma, na binoli ni si Abraham humbani anak ni si Het; hujai do itanom si Abraham pakon si Sarah parinangonni ai.

¹¹ Jadi dob matei si Abraham, ipasu-pasu Naibata ma si Isak, anakni ai; ilambung ni parigi Lachai-Roi do marianan si Isak.

Ginompar ni si Ismael

¹² On do ginompar ni si Ismael, anak ni si Abraham, tinubuhkon ni si Hagar boru Masir, jabolon ni si Sara ai.

¹³ On do goran ni anak ni si Ismael mangihutkon partubuh ni sidea: Si Nebayot, bunga tubuh ni si Ismael, dob ai si Kedar, si Abdeel, si Mibsam,

¹⁴ si Misna, si Duma, si Masa,

¹⁵ si Hadad, si Tema, si Jetur, si Napis pakon si Kedma.

¹⁶ Ai ma anak ni si Ismael, anjaha ai ma goran ni sidea mangihutkon hutani pakon parbarung-barungan ni sidea bei, sapuluh dua raja mangihutkon marga ni sidea.

¹⁷ Ia dokah ni si Ismael manggoluh saratus tolu puluh pitu tahun do; dob ai matei ma ia anjaha ipatumpu ma ia hubani ompungni.

¹⁸ Marianan do sidea olat ni Hewila das hu Sur, ai ma hampit hapoltakan ni Masir dompak Assur. Sai marsilawanan do sidea ampa sanina ni sidea.

Si Esau pakon si Jakob

¹⁹ On do ginompar ni si Isak, anak ni si Abraham. Si Abraham marniombahkon si Isak.

²⁰ Marumur ompat puluh tahun do si Isak sanggah na binuatni ai si Rebekka, boru ni si Betuel, halak Aram ai, botou ni si Laban halak Aram ai, bahen parinangonni.

²¹ Dob ai igogohkon si Isak ma manonggohon parinangonni ai bani Jahowa, ai na lambang do ia; jadi itangihon Jahowa ma tonggoni, boratan rumah ma si Rebekka parinangonni ai.

²² Dob ai marsionjaran ma dakdanak ai ibagas parnaibataan. Nini si Rebekka ma, “Anggo sonin do hape, mase pala sonon ahu?” Jadi laho ma ia manungkunkonsi bani Jahowa.

²³ Nini Jahowa ma hu bani, “Dua do bangsa ibagas parnaibataanmu, anjaha dua do marga mandarat hun boltokmu; anjaha gogohan do bangsa na sada humbani na sada nari, anjaha marguru bani sianggian do sikahanan.”

²⁴ Jadi dob jumpah panorangni tubuhan tuah, tonggor ma, sirindu-rindu do na iboltokni ai.

²⁵ Jadi kaluar ma na parlobei ai, gerger do rupani, haganup angkulani songon hiou na marambulu; jadi ibahen ma goranni si Esau.

²⁶ Dob ai kaluar ma anggini, ijolom do tambihul ni si Esau; jadi ibahen ma goranni si Jakob. Marumur onom puluh tahun do si Isak bani na tubuh ai sidea.

²⁷ Jadi lambin banggal ma dakdanak ai; gabe sahalak parburu na pandei ma si Esau, sahalak na marosuh marianan i talun, tapi anggo si Jakob sahalak parlamlam do, na marosuh marianan i barung-barung.

²⁸ Kasian ni si Isak do si Esau, halani marosuh ia mangankon na binuru; tapi kasian ni si Rebekka do anggo si Jakob.

Ijual si Esau hak Sikahananni

²⁹ Dob ai manlompah sipanganon ma sahali si Jakob, jadi roh ma si Esau hun talun, anjaha loja tumang do ia.

³⁰ Nini si Esau ma hubani si Jakob, “Mahua bere ma ahu mangankon sipanganon na gerger in, ai domma loja tumang ahu.” Halani ai do ase margoran si Edom ia.

³¹ Tapi nini si Jakob ma, “Jual ma bangku lobei hak hasikahanonmu!”

³² Nini si Esau ma, “Tonggor ma, na laho matei do ahu; bahen aha ma bangku hak hasikahanon in?”

³³ Nini si Jakob ma, “Anggo sonai, bijahon ma bangku sadari on.” Jadi ibijahon ma bani, anjaha ijual ma hak hasikahanonni ai hubani si Jakob.

³⁴ Dob ai ibere si Jakob ma hubani si Esau sagu-sagu pakon dali na nilompahni ai, jadi mangan ma ia anjaha minum, dob ai jongjong ma ia laho misir. Sonin ma hampung ni uhur ni si Esau bani hak hasikahanonni ai.

Si Isak i Gerar. Bagah-bagah ni Naibata hu Bani

26 ¹ Dob ai masa ma use lohei i tanoh ai, sobali lohei na parlobei ai, na masa sanggah bani goluh ni si Abraham; jadi bungkas ma si Isak hu Gerar, marayak si Abimelek, raja ni halak Palistim.

² Dob ai ipataridahkon Jahowa ma diri-Ni hu bani, nini ma, “Ulang ma ho tuad hu tanoh Masir, tapi iani ma tanoh sipatugahonku ope hubam.

³ Manginsolat ma ho i tanoh on, ase Huhasomani ho, anjaha Hupasu-pasu ho; ai hubam pakon hubani ginomparmu do berehonon-Ku ganup tanoh on, anjaha patotapon-Ku do bija, na Hubijahon hubani si Abraham, bapamu ai.

⁴ Anjaha pabueion-Ku do ginomparmu, songon bintang na i langit, anjaha hubani ginomparmu do berehonon-Ku ganup tanoh on. Ai dapotan pasu-pasu do magira ganup bangsa ni tanoh on marhitei ginomparmu,

⁵ halani itangihon si Abraham do sorang-Ku anjaha ihorjahon uhum-Hu, tonah-Ku, podah-Ku pakon titah-Ku.”

⁶ Ase marianan i Gerar ma si Isak.

Maluah si Rebekka humbani si Abimelek

⁷ Tapi anggo sungkun-sungkun halak parnagori ai pasal parinangonni ai, gabe ihatahon ma, “Botouhu do ia.” Ai mabiar do ia mangkatahon, “Parinangonku do ia,” ase ulang ibunuh parnagori ai ia ninuhurni, halani si Rebekka ai, ai jenges do rupani.

⁸ Hape dob hun dokah ia ijai, itungkir si Abimelek, raja ni halak Palistim ai ma hun jandela, gabe

iidah ma marguro-guro si Isak pakon si Rebekka parinangonni ai.

⁹ Jadi idilo si Abimelek ma si Isak, nini ma, “Tonggor ma, parinangonmu do ia hape. Mase ihatahon ho, ‘Botouhu do ia?’” Jadi ibalosi si Isak ma, “Ase ulang matei ahu holi marhiteihonsi, nini uhurhu.”

¹⁰ Nini si Abimelek ma, “Mase ma sonin ibahen ho bennami? Otik nari mando, ase sihol hasomanan ni sahalak humbani bangsa on parinangonmin, gabe iparoh ho dousa bennami.”

¹¹ Dob ai iparentahkon si Abimelek ma hubani haganup bangsa ai, nini ma, “Barang ise na manggeori dalahi on atap parinangonni maningon marutang hosah do ia.”

Habayakon ni si Isak ampa Parlawananni

¹² Dob ai mardang ma si Isak i nagori ai, jadi jumpahsi ma bani satahun ai saratus hali lompit, ai ipasu-pasu Jahowa do ia.

¹³ Jadi halak na bayak ma ia; lambin dokahni lambin bayak, bayak tumang ma ia.

¹⁴ Bahat do biribirini pakon lombuni, buei do pakon jabolonni. Jadi subil ma halak Palistim mangidahsi.

¹⁵ Haganup parigi, na hinurak ni jabolon ni bapani bani goluh ni si Abraham, itambusi halak Palistim ma anjaha igoki bani tanoh.

¹⁶ Jadi ihatahon si Abimelek ma hubani si Isak, “Laho ma ho hun tongah-tongahnami on, ai daoh do markuasaan ho hun bennami.”

¹⁷ Jadi bungkas ma si Isak hunjai, ipajongjong ma barung-barungni i Habungan Gerar, lanjar ijai ma ia marianan.

¹⁸ Dob ai iulaki si Isak ma mangkurak parigi, na hinurak sanggah bani goluh ni si Abraham, bapani ondi, na dob tinambusan ni halak Palistim, dob matei si Abraham, anjaha ibahen ma goranni mangihutkon goran na binahen ni bapani ondi hinan.

¹⁹ Jadi sanggah na mangkurak ai jabolon ni si Isak i habungan ai, gabe jumpah sidea ma ijai sada parigi na manggoluh.

²⁰ Tapi itinggili parmahan na hun Gerar ma parmahan ni si Isak, nini sidea ma, “Hanami do simada bah on.” Jadi ibahen si Isak ma goran ni parigi ai Esek (partinggilan), halani itinggili sidea ia ijai.

²¹ Dob ai ihurak sidea ma use sada sumur na legan, ai pe iparsurai sidea do; jadi ibahen si Isak ma goran ni parigi ai Sitna (parsuraian).

²² Jadi bungkas ma ia hunjai, ihurak ma use sada parigi na legan, tapi lang be maringor sidea halani ai; halani ai ibahen ma goran ni ai Rehobot (ianan na lumbang), ai nini: Ai ipalumbang Jahowa do banta, anjaha gargar hita itumpak i tanoh on.

²³ Dob ai tangkog ma ia hunjai hu Berseba.

²⁴ Borngin ni ai roh ma Jahowa marayaksi, nini ma, “Ahu do Naibata ni bapamu si Abraham. Ulang ho mabiar, ai Ahu do hasomanmu; pasu-pasuon-Ku do ho anjaha pabueion-Ku do ginomparmu halani si Abraham jabolon-Kin.”

²⁵ Jadi ipauli si Isak ma ijai sada anjapanjap, anjaha ipadilo-dilo goran ni Jahowa. Ipajongjong ma ijai barung-barungni, lanjar ihurak jabolonni ma ijai parigi.

Marpadan si Abimelek pakon si Isak

²⁶ Dob ai iparayak si Abimelek ma ia hun Gerar, rap pakon si Ahusat hasomanni ai, ampa si Pihol puanglima ni balani.

²⁷ Nini si Isak ma hubani sidea, “Mase ma roh nasiam marayak ahu? Ai lang sogam do uhur nasiam bangku, anjaha domma ipalaho nasiam ahu hun tanoh nasiam?”

²⁸ Nini sidea ma mambalosi, “Tangkas do iidah hanami, na ihasomani Jahowa do ho. Halani ai ninuhurnami do, ‘Mahua nabahen ma parbulawanan i tongah-tongahta, hanami pakon ho, anjaha mambahen padan ma hanami pakon ho,

²⁹ paboa na so bahenonmu na masambor bennami, songon hanami na so mangkahua ho, na pitah mambahen na madear hansa, anjaha na

palopaskon ho hinan misir ibagas damei. Sonari na pinasu-pasu ni Jahowa do ho.”

³⁰ Dob ai ipasirsir si Isak ma sipanganon bani sidea, jadi mangan anjaha minum ma sidea.

³¹ Patarni ai girah ma sidea puho, anjaha marbulawan ma sidea. Dob ai ipaingkat si Isak ma sidea ibagas damei.

³² Bani ari ai roh ma jabolon ni si Isak patugahkon hubani pasal parigi na dob hinurak ni sidea, anjaha nini ma hu bani: Domma jumpahan bah hanami.

³³ Jadi ibahen ma goran ni parigi ai Seba. Halani ai Berseba do goran ni huta ai ronsi sadari on.

Mambuat boru si Esau

³⁴ Dob marumur si Esau ompat puluh tahun, ibuat ma si Judit, boru ni si Beri, marga Het, pakon si Basmat, boru ni si Elon, marga Het, bahen parinangonni.

³⁵ Tapi pusok tumang do uhur ni si Isak pakon si Rebekka ibahen sidea.

Si Jakob Ipasu-pasu si Isak songon Anak Sikahanan

27 ¹ Jadi dob matua si Isak, anjaha rambon matani gabe lang marpangidah, jadi idilo ma si Esau, anakni sikahanan ai, nini ma dompaksi, “Ale anakku! Ijon do ahu,” nini mambalosi.

² Nini ma, “Tonggor ma, domma matua ahu, tapi lang hubotoh ari parmateihu.

³ On pe, buat ma parugasmu, parlingkitan pakon siormu, laho ma ho hu talun, buru ma bangku sada binatang harangan.

⁴ Jadi pasirsir ma bangku sipanganon songon na huharosuhkon, dob ai boan ma hu bangku ase hupangan, ase ipasu-pasu tonduyhu ho, paima lape matei ahu.”

⁵ Tapi ibogei si Rebekka do hata ni si Isak ai, na hubani si Esau anakni ai. Dob misir si Esau hu harangan laho marburu binatang harangan sibonanoni ai,

⁶ nini si Rebekka ma hubani si Jakob anakni ai, “Tonggor ma, hubogei do bapamu marsahap hubani abangmu si Esau,

⁷ ‘Boan ma hu bangku sada binatang harangan, anjaha pasirsir ma bangku sipanganon na mantin ase hupangan, ase hupasu-pasu ho i lobei ni Jahowa paima lape matei ahu.’

⁸ On pe, anakku, tangihon ma hatangku, songon na huparentahkon bam.

⁹ Laho ma ho hu sampalan ni biribirinta, buat ma hunjai dua anak ni hambing tunggal na jenges, ase hupasirsir bahen sipanganon ni bapamu, songon na hinarosuhkonni.

¹⁰ Jadi boan ma in hubani bapamu, ase ipangan, ase ipasu-pasu ho, sanggah lape matei ia.”

¹¹ Nini si Jakob ma hubani si Rebekka, inangni ai, “Tonggor ma, na jabuton do si Esau abangkin, tapi anggo ahu lemes do.

¹² Ra ijamah bapa do holi ahu, jadi songon na paoto-otohon ma ahu ninuhurni, gabe na parohkon papa do ahu hu bangku sedo pasu-pasu.”

¹³ Tapi nini inangni ai ma dompaksi, “Hu bangku pe papa na hubam ai, anakku, tangihon ma gelah hatangku, laho ma ho anjaha alop ma bangku hambing ai.”

¹⁴ Jadi laho ma ia mangalop hambing ai, iboan ma hubani inangni. Dob ai ipasirsir inangni ai ma sipanganon, songon na hinarosuhkon ni bapani ai.

¹⁵ Dob ai ibuat si Rebekka ma hiou sijengesan ni si Esau, anakni sikahanan ai, na sinimpani i rumah, jadi isorungkon ma ai hubani si Jakob, anakni sianggian ai.

¹⁶ Hubani tanganni pakon borgokni na lemes ai, ilangkobkon ma bobak ni anak ni hambing tunggal ai.

¹⁷ Dob ai ibere ma sipanganon na mantin pakon ruti na dob pinasirsir ni ai, hubani si Jakob anakni ai.

¹⁸ Sonai ma iparayak bapani ai, nini ma, “Ham bapa!” Balosni, “Ijon do ahu. Ise do ho, anakku?”

¹⁹ Nini si Jakob ma hubani bapani ai, “Si Esau do ahu, anak sikahananmu; domma hubahen songon na hinatahonmu hu bangku. Puho ma ham anjaha

hundul ma, pangan ham ma humbani na huburu on, ase ipasu-pasu tonduymu ahu.”

²⁰ Tapi nini si Isak ma hubani anakni ai, “Anakku, sonaha ma ase sonai podasni dapotan ho?” Ibalosi ma, “Jahowa Naibatamu do mambahen dapotan ahu.”

²¹ Nini si Isak ma hubani si Jakob, “Padohor ma hujon, anakku, ase hujamah ho, barang na tongon do ho anakku si Esau, atap lang.”

²² Ipadohor si Jakob ma hubani si Isak, bapani ai. Dob ijamah ia, ihatahon ma, “Anggo sorani, sora ni si Jakob do, tapi anggo tanganni, tangan ni si Esau do.”

²³ Lanjar do seng itanda ia, ai jabuton do tanganni songon tangan ni si Esau, abangni ai. Jadi ipasu-pasu ma ia.

²⁴ Dob ai nini ma, “Ho do tongon anakku si Esau? Ahu do tongon,” nini.

²⁵ Dob ai nini ma, “Boan ma hujon, ase hupangan humbani na binurumin, anakku, ase ipasu-pasu tonduyhu ho.” Jadi iboan ma hu lambungni sipanganon ai, gabe mangan ma ia; iboan ma pakon anggur hu bani, lanjar iinum ma.

²⁶ Dob ai nini si Isak, bapani ai ma dompaksi, “Mahua padohor ma, anjaha summah ma ahu, anakku.”

²⁷ Jadi ipadohor ma, anjaha isummah ma bapani ai. langgoh si Isak ma bau ni hiouni ai, ipasu-pasu ma

ia, nini ma, “Tonggor ma, usih bani bau ni sampalan na pinasu-pasu ni Jahowa ma bau ni anakku.

²⁸ Sai ibere Naibata ma hubam namur hun nagori atas, pakon tanoh na marminak, ampa gandum pakon anggur buei.

²⁹ Maningon balosan ni sagala bangsa do ho, anjaha sombahon ni sagala marga. Ho ma raja ni saninamu, anjaha marsombah ma hubam ganup anak ni inangmu. Hona papa ma sagala na mamapai ho, anjaha dapotan pasu-pasu ma sagala na mamasu-masu ho.”

³⁰ Jadi dob salpu ipasu-pasu si Isak si Jakob, anjaha ai pe kaluar ia hun lambung ni si Isak, bapani ai, roh ma siluk si Esau abangni ai hun parburuan.

³¹ Ia pe domma ipasirsir sipanganon na mantin, anjaha iboan ma ai hubani bapani. Nini ma dompaksi, “Hundul ma ham bapa, anjaha pangan ham ma humbani na binuru ni anakmu on, ase ipasu-pasu tonduymu ahu.”

³² Tapi nini si Isak, bapani ai ma dompaksi, “Ise do ho?” Nini ma, “Si Esau do ahu, anak bunga tubuhmu.”

³³ Jadi tarsonggot tumang ma si Isak, nini ma, “Anggo sonai, ise do parburu ai, na mamboan binuruni ai hu bangku? Domma hupangan hunjai, sanggah lape roh ho, anjaha domma hupasu-pasu ia, anjaha domma totap hubani pasu-pasu ai.”

³⁴ Dob ibogei si Esau hata ni bapani ai, ipagogoh ma sorani mandoraki, anjaha pusok tumang do uhurni, nini ma dompak bapani ai, “Pasu-pasu ham ma age ahu bapa!”

³⁵ Tapi nini bapani ai ma, “Domma roh anggimu, akal-akal do ibahen mambuat pasu-pasu na hubam.”

³⁶ Dob ai nini ma, “Patut ma ibahen goranni si Jakob, ai domma dua hali ahu iakal-akali. Domma ibuat hinan hak sikahanan humbangku, anjaha sonari ibuat use pasu-pasu na hu bangku. Nini ma, ‘Seng dong be pasu-pasu itebai ham bangku?’”

³⁷ Nini si Isak ma mambalosi si Esau, “Domma hupabangkit ia gabe rajamu, anjaha domma huberehon ganup saninani gabe jabolonni; domma hutumpakkon bani gandum pakon anggur, aha ma tarbahen ahu nuan hubam, anakku?”

³⁸ Dob ai nini si Esau ma dompak bapani ai, “Ai pitah na sada ai do hansa pasu-pasumu, bapa? Sai pasu-pasu ma pakon ahu, bapa!” Jadi ipagogoh si Esau ma sorani tangis-tangis.

³⁹ Dob ai nini si Isak, bapani ai ma mambalosisi, “Tonggor ma, tanoh na so marminak ma iananmu, anjaha na so dapotan namur hun nagori atas.

⁴⁰ Podangmin ma hagoluhanmu, anjaha marguru hubani anggimu ma ho. Tapi anggo sai maruntol ho, sai na tajahononmu do pasanganni humbani borgokmu.”

Sihol Bunuhon ni si Esau si Jakob

⁴¹ Dob ai sogam tumang ma uhur ni si Esau mangidah si Jakob, halani pasu-pasu, na dob pinasu-pasuhon ni bapani ai hu bani, nini ma ibagas uhurni, “Dohor mando ari partangisan ni bapa, ai bunuhonku ma anggingku si Jakob ai.”

⁴² Hape tarbotoh si Rebekka ma hata ni si Esau, anakni sikahanan ai, jadi isuruh ma na mandilo si Jakob, anakni sianggian ai, nini ma hu bani, “Tonggor ma, domma iuhurhon si Esau mambalaskon pambahenanmin, sihol bunuhonni do ho.

⁴³ Sonai pe, anakku, tangihon ma hatangkon, ‘Marugas ma ho, lintun ma ho hubani botouhu, si Laban, hu Haran.

⁴⁴ Tondok bani ma ho piga-piga dokah on, paima mahombun sogam ni uhur ni abangmu,

⁴⁵ paima mahombun ringisni hubam anjaha ihalupahon na binahenmin hu bani, dob ai husuruh pe na mangalopi ho hujai. Mase ma maningon magouan dua sinuan tunas (anak) ahu bani na sadari?”

⁴⁶ Nini si Rebekka ma dompak si Isak, “Domma soganan ahu i hagoluhan on, halani boru Het in. Anggo dihut do use si Jakob mambuat boru Het, songon boru Het in, humbani boru ni parnagori on, bahen aha be manggoluh ahu?”

Parporus ni si Jakob hu Haran

28 ¹ Dob ai idilo si Isak ma si Jakob, ipasu-pasu ma ia, anjaha nini ma marsahap bani, “Ulang buat humbani boru Kanaan parinangonmu.

² Marugas ma ho, misir ma ho hu Padang Aram, hu rumah ni si Betuel, bapa ni inangmu, hunjai ma buat parinangonmu, humbani boru ni si Laban, botou ni inangmu.

³ Sai ipasu-pasu Naibata Pargogoh na so halompouan in ma ho, marginompari anjaha ipabuei ma ho, ase buei bangsa marompung hubam.

⁴ Sai ibere ma hubam pasu-pasu na hubani si Abraham, hubam pakon hubani ginomparmu rap pakon ho, ase ho manean tanoh panginsolatanmin, na binere ni Naibata hubani si Abraham.”

⁵ Jadi ipaingkat si Isak ma si Jakob, laho hu Padang Aram, hubani si Laban, anak ni si Betuel, halak Aram ai, botou ni si Rebekka, inang ni si Jakob pakon si Esau.

Ibuat si Esau Boru ni si Ismael bahen Parinangonni

⁶ Jadi dob iidah si Esau, na dob ipasu-pasu si Isak si Jakob anjaha ipaingkat ia hu Padang Aram, laho mambuat boru bani hunjai, anjaha pinandangni ai ia sanggah na ipasu-pasu ia, “Ulang buat parinangonmu humbani boru Kanaan,”

⁷ anjaha na dob itangihon si Jakob hata ni bapani pakon inangni ai anjaha laho ia hu Padang Aram,
⁸ anjaha dob iidah si Esau, na sogam do uhur ni si Isak bapani ai, mangidah boru Kanaan ai,
⁹ laho ma ia marayak si Ismael, ibuat ma si Mahalat, boru ni si Ismael, anak ni si Abraham, botou ni si Nebayot bahen parinangonni, tambah ni parinangonni hinan.

Nipi ni si Jakob i Betel

¹⁰ Jadi misir ma si Jakob hun Berseba laho hu Haran.
¹¹ Das ma ia hubani sada ianan, jadi marborngin ma ia ijai, halani na dob sundut mata ni ari. Ibuat ma sada batu na ijai ai bahen halang uluni, lanjar ipapodom ma ijai.
¹² Dob ai marnipi ma ia, iidah ma sada andar na pinajongjong hu tanoh anjaha ujungni das ronsi langit; jadi tonggor ma, marhuatas hu toruh do malekat ni Naibata ijai.
¹³ Jongjong do Jahowa i babouni, anjaha nini ma, “Ahu do Jahowa, Naibata ni ompungmu si Abraham pakon Naibata ni si Isak; ia tanoh na pinodomanmon, berehonon-Ku do in hubam pakon hubani ginomparmu.
¹⁴ Anjaha doskon orbuk ni tanoh on do magira buei ni ginomparmu, anjaha manrarat ma ho hu hasundutan pakon hu hapoltakan, hu utara pakon hu dangsina; anjaha dapotan pasu-pasu do

sagala marga na i tanoh on marhitei ho pakon ginomparmu.

¹⁵ Tonggor ma, sai hasomanan-Ku anjaha ramotan-Ku do ho barang huja pe ho laho, anjaha bahenon-Ku do ho mulak hu tanoh on; tonggor, seng anjai tadingkonon-Ku ho, anggo seng ope Hupasaud na Hubagahkon bam.”

¹⁶ Dob ai tarpuho ma si Jakob humbani na modom ai, jadi nini ma, “Tongon tumang, bani ianan on do Jahowa, tapi seng hubotoh hinan.”

¹⁷ Jadi mabiar ma ia, nini ma, “Na jombut tumang do ianan on, seng anjai lang rumah ni Naibata do on, anjaha horbangan ni nagori atas do on.”

¹⁸ Dob ai girah sogod puho ma si Jakob, ibuat ma batu na pinarbantalni ai, ipajongjong ma ai bahen tanda, anjaha iuseihon ma minak hu atasni.

¹⁹ Ibahen ma goran ni ianan ai Betel; Lus do goran ni huta ai na sain dokah.

²⁰ Marbagah-bagah ma si Jakob, nini ma, “Anggo ihasomani anjaha iramoti Naibata do ahu bani dalan sidalananku, anjaha ibere bangku ruti sipanganon ampa hiou sipakeion,

²¹ anjaha mardamei-damei ahu mulak ibobahon hu rumah ni bapa, jadi Jahowa ma Naibatanku bahenonku.

²² Anjaha batu na hupajongjong on bahen tanda, gabe rumah ni Naibata ma on; anjaha haganup na

binere-Mu hu bangku, parsapuluhonku ma in Bamu tongon-tongon.”

Si Jakob i Rumah ni si Laban

29 ¹ Dob ai misir ma si Jakob hunjai, laho ma ia hu tanoh ni halak parhapoltakan.

² Sanggah na manatap-natap ia, iidah ma sada parigi i sampalan, anjaha dong do tolu hulanen biribiri manggompang i lambungni; ai humbani parigi ai do ipasobur halak biribiri ai. Batu bolon do tutup ni parigi ai,

³ anjaha anggo martumpu ma biribiri ijai, igulangkon parmahan ai ma batu ai humbani babah ni parigi ai, ipasibur sidea ma biribiri ai, anjaha inahkon ma use batu ai bani iananni, hu atas ni babah ni parigi ai.

⁴ Nini si Jakob ma hubani sidea, “Nasiam hasoman, hunja do nasiam?” Nini sidea ma, “Hun Haran do hanami.”

⁵ Nini ma hubani sidea, “Itandai nasiam do si Laban anak ni si Nahor?” Balos ni sidea, “Itandai hanami do ia.”

⁶ Nini ma hubani sidea, “Jorgit-jorgit do ia?” Balos ni sidea, “Jorgit-jorgit do; anjaha tonggor ma, si Rahel, boruni ai, roh mangalai biribirini.”

⁷ Nini si Jakob ma, “Tonggor ma, gijang ope ari, seng jumpah ope panorang patumpuhon pinahan;

pasibur nasiam ma biribiri in, dob ai laho ma nasiam pagatkonshi.”

⁸ Tapi nini sidea ma, “Seng tarbahen hanami anggo seng ope martumpu haganup biribiri; dob ai pe ase igulingkon hanami batu in hun babah ni parigi in, anjaha ipasibur hanami biribiri in.”

⁹ Sanggah na marsahap ai ope ia pakon sidea, roh ma si Rahel rap pakon biribiri ni bapani; ai ia do na marmahan ai.

¹⁰ Jadi dob iidah si Jakob si Rahel, boru ni si Laban, botou ni inangni ai pakon biribiri ni si Laban tulangni ai, ipadohor si Jakob ma anjaha igulingkon ma batu ai hun babah ni parigi ai, anjaha ipasibur ma biribiri ni si Laban, botou ni inangni ai.

¹¹ Dob ai isummah si Jakob ma si Rahel, anjaha tangis gogoh-gogoh.

¹² Ipatugah si Jakob ma hubani si Rahel, panogolan ni bapani do ia, anak ni si Rebekka; jadi marlintun ma si Rahel patugahkon hubani bapani.

¹³ Ase dob ibogei si Laban barita ni si Jakob, anak ni botouni ai, marlintun ma ia manjumpahkonshi, idahop ma ia anjaha isummah, anjaha iboan hu rumahni. Jadi ipatugah si Jakob ma hubani si Laban ganup na masa ai.

¹⁴ Nini si Laban ma hu bani, “Tongon, holi-holingu ampa dagingku do ho hape!” Jadi i lambungni ma ia sabulan dokahni.

¹⁵ Dob ai nini si Laban ma hubani si Jakob, “Halani panogolanku do ho, ra do ho horja raja i lambungku? Patugah ma bangku, aha upahmu!”

¹⁶ Dua do boru ni si Laban; goran ni sikahanan si Lea, goran ni si anggian si Rahel.

¹⁷ Biri-birion do mata ni si Lea, tapi jenges do rupa pakon bohi ni si Rahel.

¹⁸ Holong do uhur ni si Jakob mangidah si Rahel, jadi nini ma, “Marhorja raja ma ahu bamu pitu tahun laho mambuat si Rahel, borumu sianggian ai.”

¹⁹ Nini si Laban ma, “Rahanan ma hubam ia hubere, ase hubani halak na legan; i lambungku ma ho.”

²⁰ Ase marhorja raja ma si Jakob pitu tahun laho mambuat si Rahel, anjaha hira piga-piga ari do bani uhurni ai, halani holong ni uhurni mangidahsi.

²¹ Dob ai nini si Jakob ma hubani si Laban, “Bere ham ma hu bangku parinangonkai ase huparayak ia, ai domma jumpah padanta.”

²² Jadi ipatumpu si Laban ma ganup halak na bani ianan ai, anjaha ibahen ma sada pesta.

²³ Tapi dob bodari, ibuat ma boruni si Lea, iboan ma ia hubani si Jakob; jadi ia ma iparayak.

²⁴ Ibere si Laban ma si Silpa, jabolonni naboru ai, hubani si Lea, boruni ai, bahen jabolonni.

²⁵ Tapi patarni ai, tonggor ma, si Lea do hape; jadi nini si Jakob ma hubani si Laban, “Aha do na binahenmu on bangku? Ai lang si Rahel do na sihol

buatonku ase marhorja raja ahu bamu? Mase ma ioto-otoi ham ahu?”

²⁶ Nini si Laban ma, “Seng sonin adat i tanohnami on, parlobei palahoon sianggian humbani sikahanan.

²⁷ Iankon ma ia pitu borngin on, ase hubere bam pakon sianggian ai, anggo marhorja raja ho bangku pitu tahun nari.”

²⁸ Jadi ibahen si Jakob ma sonai, iiankon ma ia pitu borngin. Dob ai ibere si Laban ma hubani boruni si Rahel ai bahen parinangonni.

²⁹ Ibere si Laban ma si Bilha, jabolonni naboru ai, hubani si Rahel boruni ai, bahen jabolonni.

³⁰ Jadi iparayak si Jakob ma homa si Rahel, anjaha holongan do uhurni mangidah si Rahel ase si Lea; marhorja raja ma ia pitu tahun nari bani si Laban.

Anak ni si Jakob

³¹ Tapi dob iidah Jahowa na so ihargahon si Lea, jumpahan tuah ma ia ibahen, tapi lambang do anggo si Rahel.

³² Jadi boratan rumah ma si Lea, itubuhkon ma sada anak, anjaha ibahen ma goranni si Ruben, ai nini do, “Tongon, itatap Jahowa do hasombuhonku; tontu holong ma uhur ni paramangonku bangku.”

³³ Boratan rumah ma ia use anjaha tubuhan anak, jadi nini ma, “Halani itangar Naibata na so

hinaholongan ahu, gabe ibere do hu bangku pakon anak on,” jadi ibahen ma goranni si Simeon.

³⁴ Boratan rumah ma ia use, anjaha tubuhan anak, jadi nini ma, “Parapaton ni paramangonku ma dirini hu bangku sahali on, halani domma hutubuhkan tolu anak bani.” Halani ai do ase ibahen goranni si Levi.

³⁵ Boratan rumah ma ia use anjaha tubuhan anak, jadi nini ma, “Pujionku ma Jahowa sahali on.” Halani ai ibahen ma goranni si Juda. Dob ai maronti ma ia tubuhan tuah.

Anak ni si Jakob na Legan

30 ¹ Dob iidah si Rahel, na lang manubuhkan anak ia bani si Jakob, marsimburu ma ia hubani kakani ai, ihatahon ma hubani si Jakob: Bere bangku anak, anggo lang matei ma ahu.

² Manringis tumang ma si Jakob mangidah si Rahel, nini ma, “Ai ahu gatni gantih ni Naibata, na manjolom boras ni boltokmu?”

³ Tapi nini ma, “Andon si Bilha, jabolonku naboru, parayak ma ia, ase ia manubuhkan anak bani abinganku, anjaha jongjong homa ginompar bangku marhiteihonsi.”

⁴ Jadi ibere ma hubani si Bilha, jabolonni ai bahen parinangonni; gabe iparayak si Jakob ma ia.

⁵ Jadi boratan rumah ma si Bilha, anjaha itubuhkan anak sada bani si Jakob.

⁶ Dob ai nini si Rahel ma, “Domma dapotan hasintongan ahu humbani Naibata, itangihon do pangindoanku, ai ibere do bangku sada anak.” Halani ai ibahen ma goranni si Dan.

⁷ Boratan rumah ma use si Bilha, jabolon naboru ni si Rahel ai, anjaha itubuhkon ma anak paduahon bani si Jakob.

⁸ Jadi nini si Rahel ma, “Pargumpulon ni Naibata do hupargumpulhon dompak kakakkin, gabe monang do ahu.” Halani ai ibahen ma goranni si Naftali.

⁹ Dob iidah si Lea na dob maronti ia tubuhan tuah, ibuat ma si Silpa, jabolon naboruni, ibere ma ia hubani si Jakob bahen parinangonni.

¹⁰ Ase itubuhkon si Silpa, jabolon naboru ni si Lea ma sada anak bani si Jakob.

¹¹ Nini si Lea ma, “Domma roh tuah! Jadi ibahen ma goranni si Gad.”

¹² Dob ai itubuhkon si Silpa, jabolon naboru ni si Lea ma anak paduahon bani si Jakob.

¹³ Nini si Lea ma, “Na martuah do ahu! Ai parhatuahon ni sagala puang-puang ma ahu.” Jadi ibahen ma goranni si Asser.

¹⁴ Sanggah na laho si Ruben bani musim pariama hu juma, jumpahsi ma dudaim i tongah ni juma; jadi ibere ma ai hubani si Lea inangni ai. Nini si Rahel ma hubani si Lea, “Mahua bere ma bangku deba dudaim ni anakmin.”

¹⁵ Nini si Lea ma dompaksi, “Hurang ope gatni, na binuatmin uhur ni pargotongkin? Sihol buatonmu ope dudaim ni anakkin?” Jadi nini si Rahel ma, “Anggo sonai i lambungmu ma ia modom saborngin on, gantih ni dudaim ni anakmin.”

¹⁶ Sanggah na mulak si Jakob hun juma bodarini ai, ialo-alo si Lea ma ia, nini ma, “Maningon hu bangku do ho roh, ai domma huboli ho marhitei dudaim ni anakku.” Jadi rap modom ma sidea bani na saborngin ai.

¹⁷ Itangihon Naibata ma si Lea, boratan rumah ma ia, anjaha itubuhkon ma anak palimahon bani si Jakob.

¹⁸ Nini si Lea ma, “Domma ibere Naibata upahku, halani domma hubere jabolonku naboru hubani pargotongkin.” Jadi ibahen ma goranni si Issasar.

¹⁹ Boratan rumah ma use si Lea, anjaha itubuhkon ma anak paonomkon bani si Jakob.

²⁰ Nini si Lea ma, “Domma isiluahkon Naibata siluah na laingan bangku. Iankonon ni pargotongku ma ahu sahali on, ai domma hutubuhkon bani onom anak.” Jadi ibahen ma goranni si Zebulon.

²¹ Dob ai itubuhkon ma boru sada, jadi ibahen ma goranni si Dina.

²² Tapi idingat Naibata ma use si Rahel; ibalosi Naibata ma pangindoanni, ibuka ma parnaibataanni.

²³ Boratan rumah ma ia, itubuhkon ma sada anak, jadi nini ma, “Domma ibuat Naibata hadorunonku.”

²⁴ Ibahen ma goranni si Josep, nini ma, “Sai itambahi Jahowa ma bangku anak sada nari.”

Habayakon ni si Jakob

²⁵ Jadi dob itubuhkon si Rahel si Josep, nini si Jakob ma hubani si Laban, “Paingkat ham ma ahu, ase laho ahu marayak ianan hatubuhanku pakon tanohku.

²⁶ Bere ham ma bangku parinangonkin pakon niombahkin, ai ma upahku marhorja bamu, ase mulak ahu, ai ibotoh ham do sonaha parhorjangku bamu.”

²⁷ Nini si Laban ma dompaksi, “Sai dapotan idop ni uhur ma ahu i lobeimu. Ai torang do iidah uhurhu, na ipasu-pasu Jahowa do ahu marhitei ho.

²⁸ Hatahon ma sadiha upahmu sibereonku,” nini.

²⁹ Nini si Jakob ma dompaksi, “Ham pe, ibotoh ham do parhorjangku bamu, pakon parjadi ni pinahanmu marhitei panjagaanku.

³⁰ Ai otik do adong bamu paima roh ahu, tapi nuan domma martambah, buei tumang, anjaha ipasu-pasu Jahowa do ham marhitei langkahku. On pe, antigen pe pangkorjahononku na porlu bani rumahku?”

³¹ Jadi nini si Laban ma, “Anggo sonai, aha ma berehononku bam?” Nini si Jakob ma, “Seng

pala barang aha berehononmu bangku; anggo ibalosi ham hatangkon na hu bamu, ulakanku ma marmahan biribirimu pakon manjagaisi.

³² Bontasonku ma sadari on hulanen ni biribirimu, laho papuligkon hunjai ganup pinahan na marrintik pakon na marjolang; sagala sibirong humbani biribiri pakon na marrintik ampa na marjolang humbani hambing, ai ma upahku.

³³ Ase hapintoronku ma na manaksihon ahu, ase anggo roh ham manorih upahku, sagala na so marrintik atap marjolang i tongah-tongah ni hambing, ampa na so birong i tongah-tongah ni biribiri, na tinangko ma ai, anggo jumpah ai bangku.”

³⁴ Nini si Laban ma, “Dear, songon na hinatahonmai ma tongon.”

³⁵ Dob ai ipapulig ma bani na sadari ai hambing tunggal, na marrintik-rintik ampa na marjolang-jolang, sonai homa haganup hambing boru-boru na marrintik-rintik ampa na marjolang-jolang, sagala na adong rupa silopak bani badanni, ampa ganup biribiri na birong; jadi iondoskon ma ganupan ai hubani anakni ase ijaga.

³⁶ Dob ai ibahen si Laban ma holangkolangni dalanan tolu ari humbani si Jakob. Ase iparmahan si Jakob ma biribiri ni si Laban na tading ai.

³⁷ Jadi ibuat si Jakob ma dangkah ni hayu mayang, anturmangun pakon sindulpak, ihuliti ma ai

marjolang-jolang gabe taridah ma silopak ni hayu ai.

³⁸ Ipantibalhon ma dangkah na hinulitanni ai hubagas palangka paniburan ni biribiri ai. Ia biribiri rosuh do marboru-boru sanggah panorang minum.

³⁹ Anggo domma marboru-boru biribiri ai dohorhon dangkah-dangkah ai, gabe itubuhkon ma anak na marjolang-jolang, na marrintik-rintik ampa na marjolang-jolang.

⁴⁰ Dob ai ipapulig si Jakob ma biribiri ai, idompakkon ma ulu ni biribiri ai hubani na marrintik ampa na birong humbani pinahan ni si Laban. Pulig ma ibahen ianan ni pinahan ni ai, lang iparup ampa pinahan ni si Laban.

⁴¹ Anggo marboru-boru biribiri sibanggalan ai, ipantibalhon si Jakob ma dangkah-dangkah ai hubagas palangka i lobei ni biribiri ai, ase marboru-boru dohorhon dangkah-dangkah ai.

⁴² Tapi anggo marpengpeng do biribiri ai, lang ibahen dangkah-dangkah ai hubagas. Jadi bani si Laban ma sagala na marpengpeng, tapi sagala na banggal bani si Jakob do.

⁴³ Jadi bayak nornor ma si Jakob, buei ma biribiri bani, jabolon naboru, jabolon dalahi, unta pakon halode.

Lintun si Jakob humbani si Laban

31 ¹ Dob ai tarboge si Jakob ma sahap-sahap ni anak ni si Laban, na mangkatahon, “Domma ibuat si Jakob ganup arta ni bapanta; marharorohan humbani haadongan ni bapanta do habayakonni ai ganup.

² Ambah ni ai iidah si Jakob do humbani bohi ni si Laban, seng be songon na saindokah ia hubani si Laban.

³ Jadi marsahap ma Jahowa hubani si Jakob, “Mulak ma ho hu tanoh ni ompungmu pakon hu tanoh ni hade-hademu, Huhasomani pe ho.

⁴ Isuruh si Jakob ma mandilo si Rahel pakon si Lea roh hu sampalan hu ianan ni biribirini.”

⁵ Nini ma dompak sidea, “Domma huidah humbani bohi ni bapanta, seng be songon na saindokah ia hu bangku, tapi ihasomani Naibata ni bapa do ahu.

⁶ Ibotoh nasiam do, humbani bois ni gogohku do ahu mangkorja bani bapanta.

⁷ Tapi sai iguak-guaki bapanta ai do ahu anjaha sapuluh hali ma iubah upahku; tapi seng ilopas Naibata ia mangagou ahu.

⁸ Anggo ihatahon na marrintik ma upahmu, jadi marrintik ma ipantubuhkon ganup biribiri ai. Tapi anggo ihatahon, ‘Sijolang ma upahmu,’ jadi sijolang ma ipantubuhkon ganup biribiri ai.

⁹ Ase Naibata do mambuat pinahan ni bapanta, anjaha ibere ai hu bangku.

¹⁰ Bani na sahali sanggah panorang hagarangon ni biribiri ai, mangkawah ma ahu gabe huidah ma bani nipingku tunggal na marrintik, sijolang pakon siganding marboru-borui biribiri ai.

¹¹ Ihatahon malekat ni Naibata ma hu bangku ibagas nipi ai, 'Jakob!' Balosku, 'Ijon do ahu.'

¹² Jadi nini ma, 'Mangkawah ma ho, anjaha tonggor ma, na marrintik, sijolang ampa siganding do sagala tunggal na marboru-borui biribiri ai, ai domma Huidah ganup na binahen ni si Laban bam.

¹³ Ahu do Naibata na i Betel ondi sanggah na mininakanmu ijai batu, anjaha na marbagah-bagah ho Bangku. On pe, misir ma ho, bungkas hun tanoh on, mulak hu tanoh ni hade-hademu.'"

¹⁴ Dob ai nini si Rahel pakon si Lea ma mambalosisi, "Ai adong ope rupei atap siteanon bennami i rumah ni bapanami?

¹⁵ Ai lang halak na legan marga mando hanami parhiraanni? Ai domma ijual hanami, anjaha domma bois ipangan bolinami.

¹⁶ Anjaha sagala habayakon na binuat ni Naibata humbani bapanami, hita pakon anakta hinan do simadasi. On pe, sagala na hinatahon ni Naibata hubam, bahen ma."

¹⁷ Jadi marugas ma si Jakob, ipahundul ma anakni pakon parinangonni hu atas unta.

¹⁸ Iboban ma pakon pinahanni ganup ronsi sagala ugas-ugasni, na niombouni ai, ampa pinahan parbagiananni, na jumpahsi i Padang Aram, laho mangayaki si Isak, bapani ai, hu tanoh Kanaan.

¹⁹ Ia si Laban domma laho manggusting imbulu ni biribirini; jadi itangko si Rahel ma tarapim ni bapani ai.

²⁰ Ase iakal-akali si Jakob do si Laban, halak Aram ai, ai seng ipatugah hubani na laho lintun ai ia.

²¹ Sonin ma lintun ia ampa haganup na dong bani. Misir ma ia mandipari bah Eprat, laho mardalan dompak Dolog Gilead.

Pardamean ni si Jakob pakon si Laban

²² Patolu-arihon tarbotoh si Laban ma, na dob lintun si Jakob ai.

²³ Iarahkon si Laban ma sanina-saninani mangayakisi; papitu-ariankon pe ase jumpahsi ia i Dolog Gilead.

²⁴ Tapi roh ma Naibata bornginni ai ibagas nipi hubani si Laban, halak Aram ai, nini ma hu bani, “Jaga ho, ulang das igilai ho si Jakob ai atap marhitei hata aha pe.”

²⁵ Jadi jumpah si Laban ma si Jakob. Ia si Jakob domma ipajongjong barung-barungni i dolog ai; si Laban pe ampa sanina-saninani domma ipajongjong barung-barungni i Dolog Gilead.

²⁶ Nini si Laban ma hubani si Jakob, “Aha do na binahenmu, ase iakal-akali ho ahu, anjaha iluahon ho borungku songon taban-taban na dapot podang?

²⁷ Mase ma marponop-ponop ho lintun anjaha iakal-akali ho ahu? Mase ma lang ipatugah ho hu bangku, ase hupaingkat honamin marhitei malas ni uhur ampa doding-doding, marhitei gonrang ampa husapi?

²⁸ Ambahni ai seng ipalopas ho ahu manummah pahompungku ampa borungku. Ase na lepak do pambahenanmin.

²⁹ Markuasa do namin ahu mambahen na masambor bam; tapi domma marsahap hu bangku Naibata ni bapamu na bodari, nini, ‘Jaga ho, ulang das igilai ho si Jakob atap marhitei hata aha pe.’

³⁰ On pe, ia sihol laho ho namin, halani siholan ho hu rumah ni bapamu, mase ma itangko ho naibatangku?”

³¹ Dob ai ibalosi si Jakob ma si Laban, nini ma, “Halani na mabiar do ahu, ai ninuhurhu, atap na rampasonmu do nasiborumu in humbangku.

³² Tapi bani ise jumpah naibatamu in, marutang hosah ma ia. Pareksa ham ma i lobei ni hasomanta on ganup ugasmu na dong bangku, anjaha buat ham ma in.” Tapi lang ibotoh si Jakob na dob itangko si Rahel do ai hape.

³³ Jadi masuk ma si Laban hu barung-barung ni si Jakob, hu barung-barung ni si Lea, ampa hu barung-barung ni jabolon puang-puang na dua ai, tapi seng dong jumpahsi. Kaluar ma ia hun barung-barung ni si Lea, laho masuk hu barung-barung ni si Rahel.

³⁴ Tapi domma ibuat si Rahel hinan terapim ai, anjaha ibahen hu toruh ni palana ni unta, anjaha ihunduli. Iugei si Laban ma barung-barung ai ganup, hape seng dong jumpahsi.

³⁵ Nini si Rahel ma hubani bapani ai, “Ulang ma manringis tuanku, halani na so tarbahen ahu jongjong i lobeimu, ai masa do bangku hasomalan ni puang-puang.” Ase age pe ipindah, lanjar do seng jumpahsi terapim ai.

³⁶ Jadi manringis ma si Jakob, igilai ma si Laban, nini ma mambalosi si Laban, “Aha ma panlanggaronku, aha ma dousangku, ase ipardakdak ham ahu?”

³⁷ Domma iugei ham ugas-ugasku ganup, aha ma jumpah ham humbani ugas-ugas ni rumahmu? Tibalhon ham ma ai i lobei ni hasomanku ampa hasomanmu, ase sidea manguhumi hita na dua.

³⁸ Na dua puluh tahun on rap pakon ham do ahu; seng onggga tarposo biribirimu, anjaha seng onggga hupangan tunggal ni biribirimu.

³⁹ Seng onggga hutaruhkon bamu na sinoroh ni binatang, sai hugantihi do ai; sai itunggu ham do humbangku na tinangko ni halak arian atap borngin.

⁴⁰ Sonon do pangahapanku, arian milas ni ari mangankon ahu, borngin borgoh ni ari, anjaha dokahan lang modom do ahu.

⁴¹ Na dua puluh tahun on i rumahmu do ahu; sapuluh ompat tahun hupangkorjahon ham halani borumu na dua in, onom tahun halani pinahanmu, anjaha sapuluh hali ma iubah ham upahku.

⁴² Ambit lang ihasomani Naibata ni bapa, Naibata ni si Abraham anjaha na hinabiaran ni si Isak ahu, ra sonin tumang do palahoonmu ahu; tapi itatap Naibata do hasombuhonku ampa hangaluton ni tanganku, gabe ipaingat ham nabodari.”

⁴³ Jadi nini si Laban ma mambalosi si Jakob, “Borungku do boru in, anakku do anak in, pinahanku do pinahan in anjaha ganup na niidahmin, ahu do simadasi; mintor kahuaonku ma sadari on borungkon atap anak ni sidea na tinubuhkon ni sidea in?

⁴⁴ On pe, bahen hita ma padan, ahu pakon ho, ase in ma jadi saksi i tongah-tongahta.”

⁴⁵ Ibuat si Jakob ma sada batu, ipajongjong ma bahen tanda.

⁴⁶ Dob ai nini si Jakob ma hubani hasomanni ai, “Patumpu hanima ma batu!” Ipambuat sidea ma batu, lanjar ipagugun, lanjar mangan ma sidea i lambung ni gugunan ai.

⁴⁷ Ibahen si Laban ma goran ni ai Jegar-Sahaduta; tapi Galed do ibahen si Jakob goranni.

⁴⁸ Nini si Laban ma, “Gugunan batu on ma jadi saksinta sadari on.” Ai ma halani ase ibahen goran ni gugunan ai Galed

⁴⁹ ampa Mispa, ai nini do, “Jahowa ma na manatap hita anggo sirang bei ma hita.

⁵⁰ Anggo iarsik ho borungkin, barang mambuat boru use ho tambah ni borungkin, ingat ma, age pe seng dong halak i lambungta, tapi Naibata do na gabe saksi banta.”

⁵¹ Ambah ni ai ihatahon si Laban ope hubani si Jakob, “Tonggor ma gugunan pakon tanda na hupajongjong on banta,

⁵² gugunan on ma jadi saksi, ampa tanda on ma jadi saksi banta paboa na so bulih lopusanku gugunan on marayak ho, ho pe, seng malo lopusanmu gugunan pakon tanda on marayak ahu laho mangagou.

⁵³ Naibata ni si Abraham pakon Naibata ni si Nahor, Naibata ni bapa ni sidea ma na gabe panguhum i tengah-tongahta. Jadi marbulawan ma si Jakob hubani Na hinabiaran ni bapa ni si Isak.”

⁵⁴ Dob ai igalangkon si Jakob ma sada galangan i dolog ai, idilo ma hasomanni mangan sagu-sagu. Mangan ma sidea, lanjar marbongin i dolog ai.

⁵⁵ Patarni ai ipagirah si Laban ma puho, isummah ma pahompuni pakon boruni ai, anjaha ipasu-pasu ma sidea; dob ai misir ma ia mulak hu iananni hinan.

Parjumpahan ni si Jakob pakon Malekat ni Naibata

32 ¹ Si Jakob pe itoruskon ma pardalananni, jadi ijumpahkon malekat ni Naibata ma ia.

² Dob iidah si Jakob sidea, nini ma, “Bala ni Naibata do on!” Jadi ibahen ma goran ni ianan ai Mahanaim.

Biar ni si Jakob Pajumpah ampa si Esau; Tonggoni

³ Dob ai isuruh si Jakob ma suruhanni parlobei marayak si Esau, abangni ai hu tanoh Seir, hu nagori Edom.

⁴ Ihatahon ma bani sidea, nini ma, “Sonon ma hatahon hanima hubani tuanku, hubani si Esau. Sonon do hata ni jabolonmu si Jakob, ‘Na manginsolat do ahu i lambung ni si Laban na saindokah.

⁵ Marlombu do ahu, marhalode, marbiribiri, marjabolon dalahi ampa naboru; husuruh do patugahkon ai hubani tuanku, ase idop uhurmu mangidah ahu.’”

⁶ Mulak ma suruhan ai hubani si Jakob, nini ma, “Domma das hanami hubani abangmu, hubani si Esau, anjaha ia pe domma roh manjumpahkon ham rap ampa ompat ratus halak hasomanni.

⁷ Mabiari tumang ma ia anjaha sosak; ibagi ma hasomanni na rapkansi, biribiri, lombu pakon untani gabe dua tumpuan.

⁸ Ai ninuhurni: Anggo roh si Esau hubani tumpuan na sada anjaha ibunuhi, ase maluah tumpuan na tading ai.”

⁹ Dob ai nini si Jakob ma, “Ham Naibata ni ompungku si Abraham, Naibata ni bapangku si Isak, Ham Jahowa, na mangkatahon hu bangku, ‘Mulak ma ho hu tanoh ni hade-hademu, hubahen pe na madear bam.’

¹⁰ Maetektu do namin ahu manjalo ganup idop ni uhur pakon habujuron na binahen-Mu hubani jabolon-Mu on, ai marhasoman tungkotkon hudipari Bah Jordan na ijia, hape nuan domma gabe dua tumpuan.

¹¹ Sai paluah Ham ma ahu humbani tangan ni abang, humbani tangan ni si Esau, ai mabiar do ahu bani, atap na roh do ia laho mambogbog ahu ase matei, sonai homa inangnami in pakon dakdanakni.

¹² Ai Ham do mangkatahon, ‘Sai bahenon-Ku do na madear bam, anjaha bahenon-Ku do ginomparamu songon horsik na i laut, na so tarbilangi halani bueini.’”

Ipaingkat Suruhanni Mamboan Siluah hubani si Esau

¹³ Lanjar ijai do ia marborngin bornginni ai. Dob ai ibuat ma humbani na adong bani, bahen siluah bani si Esau, abangni ai,

¹⁴ ai ma dua ratus hambing boru-boru ampa dua puluh hambing tunggal, dua ratus biribiri boru-boru ampa dua puluh biribiri tunggal,

¹⁵ tolu puluh unta na pabagodkon rap pakon anakni, ompat puluh lembu boru-boru ampa sapuluh lembu tunggal, dua puluh halode boru-boru ampa sapuluh halode tunggal.

¹⁶ londoskon ma ai hubani tangan ni jabolonni, pulig bei satumpuan, lanjar nini ma hubani jabolonni ai, “Parlobei ma hanima mandipar, anjaha marholangkolang ma bahen hanima tumpuan in.”

¹⁷ lhatahon ma bani na parlobei ai, nini ma, “Anggo pajumpah ho ampa abang, si Esau anjaha isungkun ho, ‘Jabolon ni ise do ho? Na laho huja do ho? Anjaha ise do simada on na i lobeimon?’

¹⁸ Jadi balosi ma, ‘Si Jakob, jabolonmu in do simada in, sibere-bereni do in, na tinongosni hubani tuanku si Esau, anjaha irik do ia hun pudinami.’”

¹⁹ Sonai do homa iparentahkon hubani na paduahon, na patoluhon ampa na mangihutkon tumpuan ni pinahan ai, nini ma, “Songon hatangku nongkan ma hatahon hanima hubani si Esau, anggo pajumpah hanima pakonsi,

²⁰ anjaha hatahon hanima homa, ‘Jabolonmu si Jakob hun pudinami ope.’ Halani ninuhurni, ‘Padearonku do lobei uhurni marhitei sibere-bere

na pinaingkat parlobei, dob ai pe ase idahonku bohini, andohar ra ia manjalo ahu.”

²¹ Jadi ipaingkat ma sibere-bere ai parlobei, tapi ia sandiri marborngin do bornginni ai i parbarung-barunganni ai.

**Pargumpulon ni si Jakob pakon
Naibata; Parmubah ni Goranni**

²² Puho ma ia bornginni ai, iarahkon ma parinangonni na dua ai, jabolonni naboru na dua ai pakon anakni na sepuluh sada ai, laho mandipari pandiparan Jabok.

²³ Iarahkon ma sidea anjaha ipadipar bani bah ai, sonai homa sagala na dong bani.

²⁴ Tading ma pitah si Jakob tumang; jadi roh ma sada dalahi margumpul pakonsi das bani na siang ari.

²⁵ Tapi dob iidah lang tolap ia manaluhon si Jakob, ijamah ma popatni gabe ngendul ma popat ni si Jakob sanggah pargumpulanni ai.

²⁶ Dob ai nini ma, “Paluah ma ahu, ai domma laho siang ari.” Tapi nini si Jakob ma, “Seng anjai paluahonku Ham, anggo lang lobei ipasu-pasu Ham ahu.”

²⁷ Nini ma hu bani, “Ise do goranmu?” Ibalosi ma, Si Jakob.

²⁸ Jadi nini ma, “Seng be si Jakob diloon goranmu, si Israel ma, ai iimbang ho do Naibata pakonjolma, anjaha monang do ho.”

²⁹ Isungkun si Jakob ma, “Mahua patugah Ham ma goranmu.” Tapi nini ma, “Mase ma sungkunonmu goranku?” Dob ai ipasu-pasu ma ia ijai.

³⁰ Jadi ibahen si Jakob ma goran ni ianan ai Peniel, ai nini, “Ai domma huidah Naibata padumpar bohi, anjaha ipaluah do hosahku.”

³¹ Sanggah na nilopusanni Peniel ai, poltak ma mata ni ari, tapi mengkat-engkat do ia halani popatni ai.

³² Halani ai do ase lang ipangan halak Israel urat na manutup popat ronsi nuan, halani na dob hona jamah ai pardomuan ni popat ni si Jakob.

Mardear si Jakob pakon si Esau

33 ¹ Dob ai manatap-natap ma si Jakob, jadi iidah ma roh si Esau rap pakonsi ompat ratus halak hasomanni. Jadi ibagihon ma anakni ai hubani si Lea, si Rahel pakon jabolon naboru na dua halak ai.

² Parlobei ma ibahen jabolon naboru na dua ai rap pakon anak ni sidea, ipudi ni sidea si Lea pakon anakni, anjaha si Rahel pakon si Josep parpudi sahalian.

³ Anjaha ia sandiri mardalan i lobei ni sidea, jadi mangunduk ma ia pitu hali das hu tanoh paima das ia hubani abangni ai.

⁴ Tapi marlingkat ma si Esau manjumpahkonsi, idahop ma ia, irohop ma borgokni, anjaha isummah ma ia, anjaha tangis bei ma sidea.

⁵ Dob ai mangkawah ma si Esau, iidah ma puang-puang pakon dakdanak ai, jadi nini ma, "Ise do halak na rapkon ho on?" Balos ni si Jakob, "In ma dakdanak na nilayakkon ni Naibata hubani jabolonmu on."

⁶ Dob ai roh ma hundohor jabolon naboru na dua ai rap pakon anak ni sidea, lanjar manambah ma sidea.

⁷ Si Lea pakon anakni pe roh ma hundohor, lanjar manambah ma homa sidea. Dob ai parpudi sahali roh ma hundohor si Josep pakon si Rahel, lanjar manambah ma homa sidea.

⁸ Nini si Esau ma: Aha do sura-suramu marhitei haganup tumpuan na dob manjumpahkon ahu nongkan? Balosni: Ase dapotan idop ni uhur ahu i lobei ni tuanku.

⁹ Tapi nini si Esau ma: Sungkup do bangku, ambia, bam na dong bam hinan.

¹⁰ Nini si Jakob ma: Ulang ma sonai, anggo maidop do uhurmu mangidah ahu, jalo ham ma sibereberengkon hun tanganku; ai songon na mangidah bohi ni Naibata do ahu mangidah bohimu, anjaha layak do ham hu bangku.

¹¹ Jalo ham ma siluahku na binoan in bamu, ai layak do Naibata bangku anjaha sungkup do ganup bangku. Sai ielek-elek ma ia, gabe ijalo ma.

¹² Dob ai nini si Esau ma: Eta ma hita misir, ahu pe i lobeimu.

¹³ Tapi nini si Jakob ma dompaksi: Ibotoh tuanku do na hurang gogoh ope dakdanak on anjaha dong ope biribiri pakon lembu na pabagodkon rapkon ahu, anjaha sadari gelah naolos-olos, matei ma haganup pinahan in.

¹⁴ Dear ma parlobei tuanku humbangku, jabolonmu on, ai mangiring-iring do ahu, marguru hubani panlangkah ni pinahan na i lobeihu, marguru hubani panlangkah ni dakdanak on, das bani na roh ahu marayak tuanku hu Seir.

¹⁵ Jadi nini si Esau ma: Anggo sonai hutadingkon ma deba humbani hasomankon bahen hasomanmu.” Tapi nini ma, Aha ma porluni ai? Asal ma dapotan idop ni uhur ahu i lobei ni tuanku.

¹⁶ Jadi mulak ma si Esau bani na sadari ai hu Seir.

¹⁷ Tapi laho ma anggo si Jakob hu Sukot, ipauli ma rumahni sada, anjaha ibahen harang ni pinahan; halani ai do ase Sukot goran ni ianan ai.

¹⁸ Jadi das ma si Jakob mardamei-damei hu huta Sikem na i tanoh Kanaan, bani pardalananni hun Padang Aram; ipajongjong ma barung-barungni i lobei ni huta ai.

¹⁹ Iboli ma sanlambar juma hajongjongan ni barung-barungni ai, marharga saratus rupiah, humbani anak ni si Hemor, bapa ni si Sikem.

²⁰ Ipajongjong ma ijai anjapanjap sada, ibahen ma goranni: Naibata do Naibata ni si Israel.

Si Dina pakon si Sikem

34 ¹ Jadi laho ma si Dina, boru ni si Lea na tinubuhkonni bani si Jakob, martandang hubani boru ni parnagori ai.

² lidah si Sikem, anak ni si Hemor, halak Hewi, raja ni nagori ai ma ia, iluahon ma ia, modom ma ia pakonsi lanjar iparseda.

³ Rosuh tumang do uhurni hubani si Dina, boru ni si Jakob ai, holong tumang do uhurni mangidah anak boru ai, gabe ihatahon ma hatani mambuat uhurni.

⁴ Nini si Sikem ma hubani si Hemor bapani ai, “Buat ham ma bangku anak boru on bahen parinangonku.”

⁵ Tarbogei si Jakob ma na dob iparseda si Sikem do boruni, si Dina ai; tapi halani i talun do anakni manjaga pinahanni, ipasip si Jakob do ai paima roh sidea.

⁶ Jadi laho ma si Hemor bapa ni si Sikem ai marayak si Jakob sihol marsahap pakonsi.

⁷ Mulak ma anak ni si Jakob hun talun, dob ibogei sidea na masa ai; borit anjaha marah tumang do uhur ni halak ai, halani na ibahen si Sikem na

masambor i tongah-tongah ni Israel marhitei na pabutakkon boru ni si Jakob, ai seng bulih bahenon sonai.

⁸ Marsahap ma si Hemor hubani sidea, nini ma, “Rosuh do uhur ni anakku si Sikem hubani boru nasiam; mahua bere nasiam ma ia hubani bahen parinangonni.

⁹ Marsitondong-tondongan ma hita; bere nasiam ma boru nasiam bennami, borunami pe buat nasiam ma bani nasiam.

¹⁰ Rapkon hanami ma nasiam marianan; ungkab do tanoh on bani nasiam; iani anjaha mardalani ma nasiam ijin, anjaha totap ma nasiam ijin.”

¹¹ Nini si Sikem ma homa bani bapa ni si Dina ampa hubani botouni, “Idop ma uhur nasiam bangku, hubere pe bani nasiam atap aha na pinindo nasiam.

¹² Humbuei pe ipangindo nasiam bolini pakon sibere-bere, sai bereonku do ai romban hubani hata nasiam, asal ibere nasiam boru ai bangku bahen parinangonku.”

¹³ Jadi akal ma ibahen anak ni si Jakob mambalosi si Sikem pakon si Hemor bapani ai, halani na binutakanni ai si Dina, botou ni sidea ai.

¹⁴ Nini sidea ma hubani na dua halak ai, “Seng tarbalosi hanami hata ai, laho mamberehon botounami hubani halak na so marsunat, ai habadoron do ai bennami.

¹⁵ Pitah ibagas pahara on ra hanami mambalosi pangindoan nasiam, anggo ra nasiam dos pakon hanami, marhitei na marsunat ganup dalahi bani nasiam.

¹⁶ Ai pe ase ra hanami mambere borunami bani nasiam anjaha mambuat boru nasiam, marianan ma hanami rap pakon nasiam, gabe sada bangsa ma hita.

¹⁷ Tapi anggo lang ra nasiam mambalosi hanami ase isunat nasiam, buatonnam ma borunami, dob ai bungkas ma hanami.”

¹⁸ Jadi rosuh ma uhur ni si Hemor pakon si Sikem anakni ai mambogei hata ni sidea ai.

¹⁹ Lang pala mardokah-dokah anak parana ai pasaudkon hata ai, halani rosuh ni uhurni bani boru ni si Jakob ai. Ia do sisangapan humbani ginompar ni bapani.

²⁰ Jadi laho ma si Hemor pakon si Sikem anakni ai hu horbangan ni huta ni sidea, marsahap ma ia hubani dalahi na i huta ni sidea ai, nini ma,

²¹ “Sihol do halak ai marhuan-kuan pakon hita; palopas hita ma sidea marianan i tanoh on, anjaha marhujai-hujon ijon, ai sungkup do lumbang ni tanoh on bahen ianan ni sidea. Boi do buatonta boru ni sidea bahen parinangonta, anjaha boi do bereonta borunta bani sidea.

²² Pitah ibagas pahara on do ase ra halak ai marianan i lambungta anjaha jadi sada bangsa

pakon hita, anggo ganup dalahi na i tongah-tongahta isunat songon sidea na marsunat ai.

²³ Pinahan ni sidea, arta ni sidea pakon ganup na adong bani sidea, ai lang hita ma simada ai? Sai balosi hita ma pangindoan ni sidea ai, ase marianan sidea rap pakon hita.”

²⁴ Jadi ibalosi sidea ma si Hemor pakon si Sikem, anakni ai, ai ma sagala na roh marrapot hu horbangan ni hutani ai; isunat ma ganup dalahi, sagala na roh marrapot hu horbangan ni hutani ai.

²⁵ Bani ari patoluhon, sanggah na borit ai iahap sidea, marsiboan podangni ma dua anak ni si Jakob, ai ma si Simeon pakon si Levi, botou ni si Dina ai, idorab ma huta ai na so panagaman anjaha ibunuhi ma sagala dalahi.

²⁶ Ibunuh sidea ma homa si Hemor pakon si Sikem, anakni ai, marhitei podang; iboan sidea ma si Dina hun rumah ni si Sikem, jadi laho ma sidea.

²⁷ Idorab anak ni si Jakob ma na tarbunuh ai, itaban ma huta ai, halani na binutakanni ai botou ni sidea ai.

²⁸ Ibuat sidea ma biribiri, lombu pakon halode ni sidea ronsi haganup na ibagas huta pakon na i darat;

²⁹ haganup ugas-ugas ni sidea pakon dakdanak ampa parinangon ni sidea, haganup na ibagas rumah ni sidea itaban anjaha idayok sidea ma.

³⁰ Dob ai nini si Jakob ma hubani si Simeon pakon si Levi, “Domma iparoh hanima hasunsahan bangku

marhitei na pasamborhon goranku hubani isi ni nagori on, hubani halak Kanaan pakon halak Peris; otik do bilanganku, ase anggo marsada ni riah sidea mangimbang ahu, tontu talu ma ahu bahenon ni sidea, gabe pusa ma ahu pakon na hugompar.”

³¹ Tapi nini sidea ma, “Talup ma doskon boru jalang bahenonni botounami?”

Si Jakob i Betel

35 ¹ Dob ai nini Naibata ma hubani si Jakob, “Marugas ma ho, laho ma hu Betel, iankon ma ijai, anjaha pauli ma ijai sada anjapanjap hubani Naibata na patalarhon diri-Ni hubam, sanggah na lintun ai ho humbani si Esau, abangmu.”

² Jadi nini si Jakob ma hubani hasomanni sarumah pakon hubani haganup na rapkonsi, “Pangambukkon hanima ma naibata na legan na adong i tongah-tongahnima, manguras ma hanima anjaha ganti hanima ma hiounima.

³ Marugas ma hita tangkog hu Betel, ase hupauli ijai sada anjapanjap hubani Naibata, na mambalosi ahu bani panorang hasosakanku anjaha na mangkasomani ahu barang huja pe ahu laho.”

⁴ Jadi ibere sidea ma hubani si Jakob sagala naibata na legan na adong bani sidea, ronsi anting-anting na bani pinggol ni sidea; dob ai iponopkon si Jakob ma ai hu toruh ni hayu ara na i lambung ni Sikem.

⁵ Dob ai laho ma sidea; jadi sogop ma biar na humbani Naibata bani haganup huta-huta na inggot sidea ai, gabe lang be iayak sidea anak ni si Jakob ai.

⁶ Jadi das ma si Jakob hu Lus na i tanoh Kanaan, ai ma Betel, ia pakon ganup hasomanni saodoran.

⁷ Ipauli ma ijai sada anjapanjap, ibahen ma goran ni ianan ai El-Betel, halani ijai do ipatalar Naibata dirini hu bani, sanggah na lintun ai ia humbani abangni.

⁸ Matei ma si Debora, parorot ni si Rebekka, jadi itanom ma ia i toruh ni hayu ara hampit kehen ni Betel; gabe ibahen ma goran ni hayu ara ai partangisan.

⁹ Dob ai iulaki Naibata ma patalarhon diri-Ni hubani si Jakob, dob roh ia hun Padang Aram, anjaha ipasupasu ma ia.

¹⁰ Ihatahon Naibata ma dompaksi, “Si Jakob do goranmu; seng be si Jakob diloon-Ku goranmu, tapi si Israel ma.” Gabe margoran si Israel mando ia.

¹¹ Ambah ni ai ihatahon Naibata ma bani, “Ahu do Naibata, pargogoh na so tarimbang. Manggompari ma ho anjaha manggargar; sada bangsa anjaha sada hulanen ni bangsa-bangsa marharorohan humbam, anjaha raja-raja mandarat humbani binongeimu.

¹² Anjaha tanoh na dob Hubere hubani si Abraham pakon hubani si Isak, berehonon-Ku do in hubam, anjaha berehonon-Ku do in hubani ginomparamu i pudimu.”

¹³ Dob ai manaik ma Naibata hun lambungni, humbani ianan parsahapanni ai pakon si Jakob.

¹⁴ Ipajongjong si Jakob ma sada batu bani ianan parsahap-sahapanni ai pakon Naibata, iuseihon ma hu atasni galangan siinumon, anjaha iminaki ma ai.

¹⁵ Jadi ibahen si Jakob ma goran ni ianan parsahap-sahapanni ai pakon Naibata Betel.

Parmatei ni si Rahel

¹⁶ Dob ai misir ma sidea hun Betel; jadi sanggah na lang sadiha daoh be sidea hun Eprata, tubuhan tuah ma si Rahel, anjaha payah do ia mangintubuh.

¹⁷ Bani na payah ai ia mangintubuh, nini sibaso ai ma dompaksi: Ulang ma ham mabiar, halani sahali on pe anak do jumpah ham.

¹⁸ Tapi bani na laho rotap hosahni, ai matei do ia, ibahen ma goranni: Ben-Oni; tapi si Benjamin do ibahen bapani goranni.

¹⁹ Ase matei ma si Rahel, itanom ma ia i lambung dalan laho hu Eprata, ai ma Betlehem.

²⁰ Anjaha ipajongjong si Jakob ma sada batu i atas tanomanni ai; ai ma tanda tanoman ni si Rahel ronsi nuan.

²¹ Dob ai misir ma si Israel, ipajongjong ma barung-barungni i dipar ni Migdal-Eder.

Anak ni si Jakob

²² Sanggah na marianan si Jakob i tanoh ai, laho ma si Ruben mangkasomani modom si Bilha, parinangon ni bapani ai, anjaha tarboge i do ai bani si Jakob. Sapuluh dua do anak ni si Jakob.

²³ Anak ni si Lea ai ma: Si Ruben, anak sikahanan ni si Jakob, si Simeon, si Levi, si Juda, si Isasar pakon si Sebulon.

²⁴ Anak ni si Rahel ai ma: Si Josep pakon si Benjamin.

²⁵ Anak ni si Bilha, jabolon naboru ni si Rahel ai ma: Si Dan pakon si Naptali.

²⁶ Anak ni si Silpa, jabolon naboru ni si Lea ai ma: Si Gad pakon si Asser. Ai ma anak ni si Jakob, na tubuh bani i Padang Aram.

²⁷ Das ma si Jakob hubani si Isak bapani ai i Mamre, atap Kiriath-Arba, ai ma Hebron, panginsolatan ni si Abraham pakon si Isak.

²⁸ Ia umur ni si Isak saratus ualuh puluh tahun do.

²⁹ Dob ai rotap ma hosah ni si Isak, matei ma ia, jadi ipatumpu ma ia hubani ompungni, dob sayur matua anjaha sobalan bani hagoluan on, anjaha si Esau pakon si Jakob anakni ai do mananoms i.

Ginompar ni si Esau

36 ¹ On ma ginompar ni si Esau, ai ma si Edom.
² Ibuat si Esau ma parinangonni humbani boru Kanaan: Si Ada boru ni si Elon, marga Het

pakon si Oholibama, boru ni si Ana, anak ni si Zibeon marga Hewi,

³ pakon si Basmat, boru ni si Ismael, botou ni si Nebayot.

⁴ Dob ai itubuhkon si Ada ma bani si Esau si Elipas; si Basmat manubuhkon si Rehuel;

⁵ anjaha si Oholibama manubuhkon si Jehus, si Jaelam pakon si Korah. Ai ma anak ni si Esau, na tubuh bani i tanoh Kanaan.

⁶ Dob ai iboan si Esau ma parinangonni, anakni, boruni, ampa haganup halak na adong i rumahni, pinahanni ronsi haganup artani, na pinaidukni i tanoh Kanaan; jadi bungkas ma ia hu sada tanoh, daoh humbani si Jakob, anggini ai.

⁷ Ai mabueitu do arta ni sidea anggo rap sidea marianan; seng boi tarparmudu tanoh panginsolatan ni ai sidea, halani hinabuei ni pinahan ni sidea.

⁸ Jadi marianan i pardologan Seir ma si Esau, ai ma si Edom.

⁹ On ma ginompar ni si Esau, ompung ni halak Edom i pardologan Seir.

¹⁰ On ma goran ni anak ni si Esau: Si Elipas anak ni si Ada, parinangon ni si Esau; si Rehuel anak ni si Basmat, parinangon ni si Esau.

¹¹ Anak ni si Elipas ai ma: Si Téman, si Omar, si Zefo, si Gaetam pakon si Kenas.

¹² Dihut do si Timna iparjolma si Elipas, anak ni si Esau ai; itubuhkon ma si Amalek bani si Elipas. Ai ma ginompar ni si Ada, parinangon ni si Esau.

¹³ On do anak ni si Rehuel: Si Nahat, si Zera, si Samma pakon si Misa. Ai ma pahompu ni si Basmat, parinangon ni si Esau.

¹⁴ On do anak ni si Oholibama, boru ni si Ana, anak ni si Zibeon, parinangon ni si Esau; itubuhkon ma bani si Esau, si Jehus, si Jaelam pakon si Korah.

¹⁵ On do kopala-kopala ni anak ni si Esau. Humbani si Elipas, anak sikahanan ni si Esau: Kopala Teman, kopala Omar, kopala Zefo, kopala Kemas,

¹⁶ kopala Korah, kopala Gaetam pakon kopala Amalek; ai ma kopala-kopala humbani si Elipas i tanoh Edom; sidea ma anak ni si Ida.

¹⁷ Anjaha on ma anak ni si Rehuel, anak ni si Esau: Kopala Nahat, kopala Zera, kopala Samma pakon kopala Misa; ai ma kopala-kopala humbani si Rehuel i tanoh Edom; sidea ma anak ni si Basmat, parinangon ni si Esau.

¹⁸ On ma anak ni si Oholibama, parinangon ni si Esau: Kopala Jehus, kopala Jaelam pakon kopala Korah; ai ma kopala-kopala humbani si Oholibama, boru ni si Ana, parinangon ni si Esau.

¹⁹ On ma anak ni si Esau, ai ma si Edom, anjaha ai ma kopala-kopala ni sidea.

²⁰ On ma anak ni si Seir, halak Hori, isi ni tanoh ai: Si Lotan, si Sobal, si Zibeon, si Aha,

²¹ si Dison, si Ezer pakon si Disan; on ma kopala-kopala ni halak Hori, sagala anak ni si Seir i tanoh Edom.

²² Anak ni si Lotan ai ma: Si Hori pakon si Heman; botou ni si Lotan ai ma si Timna.

²³ Anjaha on ma anak ni si Sobal: Si Alwan, si Manahan, si Ebal, si Sefo pakon si Onam.

²⁴ Ia anak ni si Zibeon ai ma: Si Aja pakon si Ana. Si Ana on ma na jumpahan bah milas i halimisan, sanggah na marmahan halode ni bapani ia.

²⁵ Anak ni si Ana ai ma si Dison; anjaha si Oholibama ai ma boru ni si Ana.

²⁶ Anak ni si Dison ai ma: Si Hemdan, si Esban, si Jitran pakon si Keran.

²⁷ Anak ni si Ezer ai ma: Si Bilhan, si Zawan pakon si Akan.

²⁸ Anak ni si Disan ai ma: Si Uz pakon si Aran.

²⁹ On ma ganup kopala ni halak Hori: Kopala Lotan, kopala Sobal, kopala Zibeon, kopala Ana,

³⁰ kopala Dison, kopala Eser pakon kopala Disan. Ai ma kopala ni halak Hori, mangihutkon marga ni sidea i tanoh Seir.

³¹ On do raja-raja, na manrajai i tanoh Edom, sanggah seng dong ope raja na manggomgom halak Israel:

³² Si Bela, anak ni si Beor, manggomgom Edom; ia goran ni hutani Dinhaba do.

³³ Matei ma si Bela, jadi si Jobab anak ni si Zerah na hun Bosra ma, gantihni manrajai.

³⁴ Matei ma si Jobab, jadi si Husam na hun tanoh ni halak Teman ma gantihni manrajai.

³⁵ Matei ma si Husam, jadi si Hadad anak ni si Bedad ma gantihni manrajai, na manaluhon si Midian i talun ni halak Moab; Awit do goran ni hutani.

³⁶ Matei ma si Hadad, jadi si Samla na hun Masreka ma gantihni manrajai.

³⁷ Matei ma si Samla, jadi si Saul na hun Rehobot, na i topi ni bah bangga ai ma gantihni manrajai.

³⁸ Matei ma si Saul, jadi si Baal-Hanan anak ni si Akbor ma gantihni manrajai.

³⁹ Matei ma si Baal-Hanan anak ni si Akbor ai, jadi si Hadar ma gantihni manrajai; Pau do goran ni hutani anjaha goran ni parinangonni si Mehetabel, boru ni si Matred, na tinubuhkon ni si Mesahab.

⁴⁰ On ma goran-goran ni kopala-kopala humbani si Esau, mangihutkon sundut, ianan pakon goran ni sidea: Kopala Timna, Alwa, Jetet,

⁴¹ Oholibama, Ela, Pinon,

⁴² Kenas, Téman, Mibsar,

⁴³ Makdiel pakon Iram. Ai ma kopala-kopala ni halak Edom mangihutkon ianan ni sidea i tanoh ginomgoman ni sidea; ai ma si Esau ompung ni halak Edom.

Nipi ni si Josep

37 ¹Tapi anggo si Jakob marianan do i tanoh panginsolatan ni bapani hinan, i tanoh Kanaan.

²On ma barita ni ginompar ni si Jakob. Dob marumur sapuluh pitu tahun si Josep, ase poso ope ia, marmahan pinahan ma ia rap pakon abangni, anak ni si Bilha pakon si Zilpa, parinangon ni bapa ni sidua halak ai. Sai ipadas si Josep do barita ni sidea na bajan bani bapa ni sidea.

³Tapi holongan do uhur ni si Israel mangidah si Josep humbani ganup anakni ai, halani ia ma anakni na tubuh bani, sanggah matua ia; jadi ipadear ma bani sada baju ganjang na jenges tumang.

⁴Dob iidah abangni ai, na holongan do uhur ni bapa ni sidea bani humbani ganup abangni ai, jadi sogam ma uhur ni sidea mangidahsi, anjaha seng be basar parsahap ni sidea bani.

⁵Marnipi ma si Josep, anjaha ipatugah ma nipini ai hubani abangni ai; jadi lambin sogam ma uhur ni sidea mangidahsi.

⁶Nini ma dompak sidea: Tangar nasiam ma nipi na hunipi on.

⁷Tonggor ma, manrahuti radean do hita i tongah juma; dirgak ma jongjong radeanku, jadi roh ma maringgot radean nasiam marsombah hubani radeanku.

⁸ Jadi nini abangni ai ma hu bani: Mintor ho ma manrajai hanami? Anjaha mintor ho ma markuasa hu bennami? Jadi lambin sogamni ma uhur ni sidea mangidahsi halani nipi ampa hatani ai.

⁹ Dob ai marnipi ma ia use, ipatugah ma ai hubani abangni, nini ma, “Tonggor ma, marnipi do ahu use, mata ni ari, bulan ampa sepuluh sada bintang marsombah hu bangku.”

¹⁰ Dob ipatugah ai hubani bapani pakon hubani saninani, hona hata ni bapani ma ia, nini ma dompaksi: Nipi aha ma nipimai, mintor ahu, pakon inangmu ampa abangmu ma roh manrogop, marsombah hubam?

¹¹ Jadi subil ma uhur ni abangni ai mangidahsi, tapi isimpan bapani ai do hata ai ibagas uhurni.

Tarjual si Josep hu Tanoh Masir

¹² Bani na sahali laho ma abangni marmahan biribiri ni bapani dohorhon Sikem.

¹³ Nini si Israel ma hubani si Josep, “Ai lang dohorhon Sikem do abangmu marmahan? Roh ma ho, ase husuruh ho marayak sidea.” Jadi nini si Josep ma, “Ijon do ahu.”

¹⁴ Ihatahon ma hu bani, “Laho ma ho manorih atap na horas do abangmu ampa pinahan ai; dob ai mulak ma ho hu bangku mamboan barita.” Jadi isuruh ma si Josep hun habungan Hebron, das ma ia hu Sikem.

¹⁵ Jumpah sada dalahi ma ia kahou i talun ai; isungkun halak ai ma ia, “Aha do na pinindahanmu?”

¹⁶ Nini ma, “Abang do na hupindahi. Tolong ham ma patugahkon bangku atap ija do sidea marmahan.”

¹⁷ Jadi nini dalahi ai ma, “Domma laho sidea hunjon, ai hubogei do sidea marsahap, ‘Laho ma hita hu Dotan.’” Gabe iirikkon si Josep ma abangni ai, jumpahsi ma sidea i Dotan.

¹⁸ lidah sidea ma ia humbani na daoh, jadi paima das ia hubani sidea, manriah ma sidea laho mamunuhsi.

¹⁹ Marsahap ma sidea samah sidea, “Tonggor ma, domma roh siparnipi ai!

²⁰ On pe, eta ma, bunuh hita ma ia, anjaha dabuhkon hita ma ia hubagas sada humbani godung ai; jadi hatahon hita ma, na dob ipangan binatang panoroh do ia, ase naidah, atap sonaha do holi arti ni nipini ai.”

²¹ Dob ibogei si Ruben ai, sihol ma paluahonni ia humbani tangan ni sidea, nini ma, “Ulang ma bunuh hita ia.”

²² Nini si Ruben ope bani sidea, “Ulang ma duruskon hanima daroh; dabuh hanima ma ia hubagas godung na i halimisan in, tapi ulang mangonai tangan hanima hu bani,” ai sihol do paluahonni ia humbani tangan ni sidea, laho mamboansi mulak hubani bapani.

²³ Jadi dob das si Josep bani abangni ai, itanggali sidea ma bajuni, baju ganjang na jenges tumang, na pinakeini ai.

²⁴ Itangkap sidea ma ia, anjaha idabuhkon hubagas sada godung, tapi lumei do godung ai, seng marisi bah.

²⁵ Dob ai hundul ma sidea laho mangan. Sanggah na manatap-natap sidea, gabe iidah sidea ma sada kafilah ni halak Ismael roh hun Gilead rap pakon unta ni sidea, na mamboan na misbou-misbou, minak morum pakon hamonan bani pardalanan ni sidea mamboan barang-barang ai hu tanoh Masir.

²⁶ Jadi nini si Juda ma hubani saninani ai, “Aha ma untungta anggo ibunuh hita angginta ai anjaha iponopkon hita darohni?”

²⁷ Eta, jual hita ma ia hubani halak Ismael an, ase ulang mangonai tangan hita hu bani, ai angginta anjaha dagingta do ia.” Jadi itangihon saninani ai ma ia.

²⁸ Sanggah na mamontas partiga-tiga, halak Midian ai, itarik sidea ma si Josep hun godung ai hu atas, dob ai ijual sidea ma ia hubani halak Ismael ai, harga dua puluh rupiah; jadi iboan sidea ma si Josep hu tanoh Masir.

²⁹ Mulak ma si Ruben hu godung ai hape lang be i godung ai si Josep jumpahsi, jadi irigati ma bajuni.

³⁰ Mulak ma ia hubani saninani, nini ma, “Lang be ijai ambia ai, huja ma laho ahu?”

Pusok ni Uhur ni si Jakob

³¹ Jadi ibuat sidea ma baju ni si Josep ai, isayat sidea ma sada hambing tunggal, dob ai iguluhon ma baju ai hu daroh ai.

³² Itongoskon sidea ma baju ganjang na jenges tumang ai hubani bapa ni sidea, anjaha martonah: Na jumpah hanami do on, tandai ma, atap baju ni anakmu do on, atap lang.

³³ Itandai si Jakob ma ai, jadi nini ma, “Baju ni anakku do on; domma ipangan binatang panoroh ia, domma tongon isoroh si Josep.”

³⁴ Dob ai irigati si Jakob ma hiouni, inahkon ma hiou guni hu binongeini, anjaha dokah ma ia marhoru, halani anakni si Josep ai.

³⁵ Jadi laho ma anakni pakon boruni mangapohisi, tapi seng ra ia apohon ni sidea nini ma, “Lang, na laho ma ahu marayak anakku hu nagori toruh halani pusok ni uhurhu.” Jadi sai itangisi bapani ma si Josep ai.

³⁶ Tapi ijual halak Midian ai ma si Josep hu tanoh Masir, hubani si Potipar, pagawai istana ni Parao, kopala pangawal ni raja.

Dousa ni si Juda

38 ¹ Bani panorang ia tuad ma si Juda manadingkon saninani, tondok ma ia hubani sahalak Adullam, na margoran si Hira.

² lidah ma ijai sada boru ni halak Kanaan, na margoran si Sua; ibuat ma ia bahen parinangonni anjaha iparayak ma.

³ Boratan rumah ma ia, anjaha itubuhkon ma sada anak, ibahen ma goranni si Er.

⁴ Dob ai boratan rumah ma ia use, anjaha itubuhkon ma sada anak, ibahen ma goranni si Onan.

⁵ Itubuhkon puang-puang ai ma use sada anak, ibahen ma goranni si Sela. Tapi i huta Kesib do si Juda, sanggah tubuh dakdanak ai.

⁶ Ibuat si Juda ma sada naboru bahen parinangon ni si Er, anak bunga-tubuhni ai, si Tamar do goranni.

⁷ Tapi ia si Er, bunga-tubuh ni si Juda ai, jahat do ia bani pangidah ni Naibata, jadi ipamatei Jahowa ma ia.

⁸ Nini si Juda ma dompak si Onan, “Parayak ma parinangon ni abangmu, anjaha pagodang, pajongjong ginompar bani abangmu.”

⁹ Tapi ibotoh si Onan ma na sedo ia simada ginompar holi, halani ai ganup hali iparayak parinangon ni abangni ai, iambungkon ma hu tanoh gogoh ni dagingni, ase ulang jongjong ibahen ginompar bani abangni.

¹⁰ Tapi jahat do pambahenanni ai iidah Naibata, jadi ipamatei ma homa ia.

¹¹ Dob ai nini si Juda ma hubani si Tamar, parumaenni ai, “Songon sahalak na mabalu ma ham lobei marianan i rumah ni bapanta, paima

magodang anakku si Sela ai.” Halani ninuhurni, atap matei homa holi ia songon abangni ai. Laho ma si Tamar marianan i rumah ni bapani.

¹² Bani labang-labang ni ari, matei ma boru ni si Sua parinangon ni si Juda. Jadi dob tarapoh uhur ni si Juda, tangkog ma ia marayak sigunting ambulu ni biribiri hu Timna, ia rap pakon huan-kuanni si Hira na hun Adullam.

¹³ Ibaritahon halak ma hubani si Tamar, “Tonggor ma, na laho do simatuamu dalahi tangkog hu Timna sihol manggusting ambulu ni biribirini.”

¹⁴ Dob ai itanggali puang-puang ai ma hiou habaluonni ai, martudung anjaha marsabing bolag ma ia, jadi laho ma ia hundul hu horbangan ni huta Enaim na bani dalan hu Timna; halani domma iidah banggal si Sela, tapi lalab lang ibere ia hubani si Sela bahen parinangonni.

¹⁵ Dob iidah si Juda ia, iagan ma boru jalang ia, halani itudung-tudungi bohini.

¹⁶ Iparayak ma puang-puang ai hu biding ni dalan ai, nini ma, “Mahua palopas ma ahu roh hubam.” Ai lang ibotoh, parumaenni do hape ia. Nini naboru ai ma, “Aha ma bereonmu bangku, anggo roh ho hu bangku?”

¹⁷ Balosni, “Hutongos pe hubam sada anak ni hambing hambani hambingkai.” Nini puang-puang ai ma, “Ra do ho mambere borotni, paima itongos ho ai?”

¹⁸ Nini ma, “Aha ma borotni bereonku bam?” Ibalosi ma, “Tintin sap pakon horung-korung ampa tungkotmu na i tanganmin ma.” Dob ai ibere ma bani ganupan ai, iparayak ma ia, jadi boratan rumah ma ia humbani.

¹⁹ Jongjong ma puang-puang ai, laho ma ia, itanggali ma tudung-tudungni ai, anjaha ipakei ma hiou habaluonni ai.

²⁰ Dob ai itongoskon si Juda ma anak ni hambing ai marhitei huan-kuanni, halak Adullam ai, laho manobus borot ai humbani tangan ni puang-puang ai, tapi lang jumpahsi be ia ijai.

²¹ Jadi isungkun ma parnagori ai, nini ma, “Ija do boru jalang na hundul-hundul i Enaim i biding dalam ai?” Ibalosi sidea ma “Seng dong ijon boru jalang.”

²² Mulak ma ia hubani si Juda, nini ma, “Seng jumpah ahu ia;” sonai homa parnagori ai mangkatahon, “Seng dong boru jalang ijon.”

²³ Nini si Juda ma, “Paturut ma bani ugas-ugas ai, ase ulang jadi habadoronta ai; domma hutongos anak ni hambing on, tapi lang jumpah ho naboru ai.”

²⁴ Dob dong hira-hira tolu bulan, dong ma na patugahkon hubani si Juda sonon, “Marboru jalang do si Tamar parumaenmu ai, anjaha domma boratan rumah homa ia ibahen parriah-riahonni ai.” Ihatahon si Juda ma, “Boan ma ia hu darat, ase itutung.”

²⁵ Sanggah na binoban ai ia hu darat, marsuruhan ma ia marayak simatuani dalahi mangkatahon, “Humbani dalahi simada ugas on do ahu boratan rumah.” Nini ope homa, “Tandai ma pangkei, ise do simada tintin sap, horung-korung pakon tungkot on?”

²⁶ Jadi itandai si Juda ma ugasni ai, nini ma, “Pintoran do ia ase ahu, halani lang tongon hubere ia hubani si Sela, anak kai.” Tapi lang iparayak si Juda be ia.

²⁷ Bani partoras ni omeini, tarbotoh ma adong sirindu-rindu ibagas parnaibataan.

²⁸ Sanggah na manubuhkon ai ia, surduk ma sada tangan, ijolom sibaso ai ma ai, isangkut ma pakon bonang sigerger, nini ma, “On do na parlobei kaluar.”

²⁹ Hape dob itarik tanganni mulak, kaluar ma anggini; jadi nini sibaso ai ma, “Gogohni in parruntasmu hu darat!” Jadi ibahen ma goranni si Peres.

³⁰ Dob ai kaluar ma anggini na marsangkut bonang sigerger ai tanganni, jadi ibahen ma goranni si Zerah.

Si Josep Bangkit Siramotkon Rumah ni si Potipar

39 ¹ Tapi anggo si Josep iboban ma ia tuad hu Masir; jadi iboli si Potipar, sada halak Masir,

pagawai istana ni Parao, kepala pangawal ni raja ma ia humbani halak Ismael, na mamboan ia tuad hujai.

² Sai ihasomani Naibata do si Josep ai, gabe jadi ma tongtong na hinorjahonni; jadi sai i rumah ni tuanni, halak Masir ai do ia.

³ Jadi dob iidah tuanni, na hinasomanan ni Jahowa do ia, anjaha na itumpak Jahowa do ganup na hinorjahon ni tanganni,

⁴ jumpahan idop ni uhur ma ia i lobei ni tuanni, boi ma ia gabe siparugas i lobeini; iangkat ma ia gabe siramotkon rumahni, anjaha ganup na dong bani iondoskon ma hu tangan ni si Josep.

⁵ Dob na pinabangkitni ai ia gabe siramotkon rumahni ronsi haganup na dong bani, ipasu-pasu Jahowa ma rumah ni halak Masir ai marhalanihon si Josep; pasu-pasu ni Jahowa do na sogop bani ganup na dong bani, i rumah pakon i juma.

⁶ Sabonar haganup na dong bani iondoskon do hu tangan ni si Josep, anjaha marhasomankon si Josep, aha pe lang na ipabotoh-botoh uhurni, sobali ruti na pinanganni ai. Tapi jenges do rupa pakon bohi ni si Josep ai.

Monang si Josep ibagas Parlajouan

⁷ Jadi masa ma dob ai, rosuh ma uhur ni parinangon ni tuanni ai mangidah si Josep, ihatahon ma: Hasomani ma ahu modom!

⁸ Tapi manjua do si Josep, ihatahon ma bani parinangon ni tuanni ai: Tonggor ma, seng dong ipabotoh-botoh tuanku sobali ahu i rumah on, anjaha ganup na dong bani iondoskon do hu tanganku.

⁹ Seng dong sibanggalan kuasani i rumah on sobali ahu, anjaha aha pe lang na so iondoskon hu bangku sobali ham, halani parinangonni ham. Sonaha ma tarbahen ahu mangkorjahon hajahaton na sonin banggalni anjaha mardousa dompak Naibata?

¹⁰ Tapi age pe sai sonai hatani hubani si Josep ari-ari, seng itangihon si Josep ia, sihol modom i lambungni atap marsaor pakonsi.

¹¹ Tapi bani na sadari, laho ma si Josep hu rumah manlahoi lahoanni, anjaha sahalak pe lang dong na i rumah.

¹² Jadi isoroh puang-puang ai ma hiouni, nini ma, “Hasomani ma ahu modom!” Tapi itadingkon si Josep ma hiouni ai i tanganni, lanjar lintun ma ia hu darat.

¹³ Dob iidah na dob itadingkon si Josep ai hiouni i tanganni lanjar lintun ia hu darat,

¹⁴ gabe dilo-dilo ma ia bani parhorja na i rumahni, nini ma hubani sidea, “Tonggor ma, iboan do hujon sada halak Heber, laho mambahen habadoron banta. Roh do ia hu bangku, sihol rap modom pakon ahu, gabe hupagogoh ma sorangku dilo-dilo.

¹⁵ Tapi dob ibogei hupagogoh sorangku dilo-dilo, itadingkon ma hiouni i lambungku, lanjar lintun ma ia hu darat.”

¹⁶ Dob ai ipaturut ma hiou ni si Josep ai i lambungni, paima mulak tuanni hu rumah.

¹⁷ Ipatugah ma songon hata ni ondi hu bani, nini ma, “Roh do nongkan hu bangku jabolon halak Heber ai, na binoanmu hujon laho mambahen habadoron hu bangku.

¹⁸ Tapi dob hupagogoh sorangku dilo-dilo, itadingkon ma hiouni i lambungku, lanjar lintun ma ia hu darat.”

Tartutup si Josep

¹⁹ Jadi dob ibogei si Potipar hata ni parinangonni ai, na hinatahonni ai hu bani, “Sonon-sonon do ibahen jabolonmai hu bangku, gabe manringis tumang ma ia.”

²⁰ Itangkap tuanni ai ma si Josep, iondoskon ma ia hu tutupan ni halak na tinutup ni raja ai. Ase ijai ma si Josep tartutup.

²¹ Tapi ihasomani Jahowa do si Josep, idop do uhur-Ni mangidahsi, anjaha ibahen do dear uhur ni sijaga tutupan ai mangidahsi.

²² Iondoskon sijaga tutupan ai ma ganup na tartutup ibagas tutupan ai hu tangan ni si Josep, ronsi haganupan silahoan ijai, ia do manlahoi.

²³ Seng pala be ipaanu-anu sijaga tutupan ai atap aha pe horja na dob niondoskonni hubani si Josep, halani ihasomani Jahowa do ia, anjaha aha na hinorjahonni itumpaki Jahowa do.

Nipi ni Juakjuak ni Raja Parao Sidua Halak na Tartutup ai

40 ¹ Seng sadiha dokah dob ai, marsalah ma sitahu anggur ni raja Masir ampa simasak rutini dompak tuan ni sidea, raja Masir ai.

² Jadi manringis tumang ma Parao hubani pagawai istanani sidua halak ai, hubani kopala ni sitahu anggur pakon hubani kopala ni simasak ruti ai.

³ Ipatahankon ma sidea i rumah ni kopala pangawal ni raja, ibagas tutupan, ianan ni si Josep tartutup.

⁴ Ipajagahon kopala pangawal ni raja ai ma sidea hubani si Josep, ase iidangi sidea; sonai ma piga-piga dokah tartahan sidea.

⁵ Bani na saborngin marnipi ma sidea haduasi, sitahu anggur pakon simasak ruti ni raja Masir na tartutup ai, ganup sidea marnipi anjaha mararti bei do nipi ni sidea ai.

⁶ Sanggah na iparayak si Josep sidea sogod, iidah ma marhoru sidea.

⁷ Isungkun si Josep ma pegawai istana ai, na rap pakonsi tartutup i rumah ni tuanni ai, nini ma, “Mase songon na marhoru nasiam sadari on?”

⁸ Nini sidea ma dompaksi: Marnipi do hanami, tapi seng dong na boi manorhaisi. Jadi nini si Josep ma dompak sidea: Ai lang humbani Naibata do panorhaion? Patugah ma bangku nipi nasiam ai!

Nipi ni Sitahu Anggur

⁹ Dob ai ibaritahon kopala ni sitahu anggur ai ma nipini ai hubani si Josep, nini ma dompaksi: Huidah do ibagas nippingku sada hayu anggur i lobeihu.

¹⁰ Adong do tolu ranting ni hayu anggur ai, ai pe martunasi hayu ai, mintor mangerbang ma bungani, gok buah na matoras ma tandanni.

¹¹ Itanganku do panginuman ni Parao, hubuati ma buah ai anjaha huporohi hubagas panginuman ni Parao, dob ai hubere ma panginuman ai hu tangan ni Parao.

¹² Nini si Josep ma dompaksi: On do arti ni ai: na tolu ranting ai, tolu ari do ai;

¹³ ibagas na tolu ari on angkaton ni Parao ma ulumu, pasuangonni ma ham hubani jabatanmu, anjaha bereonmu ma use panginuman ai hu tangan ni Parao songon na somal, sanggah sitahu anggurni ham.

¹⁴ Tapi ingat ham ma ahu, anggo domma sonang holi ham, anjaha idop ma uhurmu hu bangku, tarsingatkan ham ma ahu hubani Parao, ase ipadarat ahu hun rumah on.

¹⁵ Ai tarpangus do ahu hun tanoh ni halak Heber, anjaha ijon pe, seng dong atap aha na hubahen, mambahen inahkon sidea ahu hu liang ni tutupan on.

¹⁶ Dob iidah kopala ni simasak ruti ai, dear do panorhaini ai, nini ma dompak si Josep: Ahu pe marnipi do; adong do hujujung tolu raga na martindih-tindih, na marisi ruti i atas ulungku.

¹⁷ Anjaha raga pardatas ai marisi bagei-bagei sipanganon ni Parao, na pinauli ni tukang ruti. Dob ai roh ma manuk-manuk mamangani ai humbani raga na i atas ulungku.

¹⁸ Jadi nini si Josep ma mambalosi: On do artini ai; na tolu raga ai, tolu ari do ai.

¹⁹ Ibagas na tolu ari on, angkaton ni Parao ma ulumu humbamu, gantungkononni ma ham bani hayu, gabe panganon ni manuk-manuk ma dagingmu.

Sintong ni Panorhaion ai

²⁰ Bani ari patoluhon, ai ma ari partubuh ni Parao, ibahen ma pesta bani ganup juakjuakni. Jadi iangkat ma ulu ni kopala ni sitahu anggur pakon ulu ni simasak ruti ai i tongah-tongah ni juakjuakni.

²¹ Jadi ipasuang ma kopala ni sitahu anggur ai hu jabatanni hinan, laho mambere panginuman ai use hu tangan ni Parao.

²² Tapi anggo kopala ni sipauli ruti ai, igantung do, songon panorhai ni si Josep bani sidea.

²³ Tapi seng idingat kopala ni sitahu anggur ai si Josep, ihalupahon do ia.

Nipi ni Parao

41 ¹ Jadi dob salpu girtip dua tahun, marnipi ma Parao, jongjong ma ia i topi ni Bah Nil.

² Taridah ma tangkog hun Bah Nil ai pitu lembu na jenges-jenges janah na mombur-mombur, jadi manggagati ma sidea bani arung-arung ai.

³ Dob ai soluk, tangkog ma pitu lembu na legan hun Bah Nil ai, na bajan-bajan anjaha na merung-merung, jongjong i lambung ni lembu na i topi ni bah ai.

⁴ Jadi ipampangani lembu na bajan-bajan ampa na merung-merung ai ma lembu na jenges-jenges ampa na mombur-mombur ai. Dob ai tarpuho ma Parao.

⁵ Tarpodom ma ia use, anjaha marnipi ma paduahalihon; taridah ma kaluar humbani sangkambona pitu kambuyur gandum na porngis anjaha na jenges.

⁶ Dob ai taridah homa ma tubuh pitu kambuyur gandum na merung anjaha na melus ibahen logou na hun hapoltakan.

⁷ Jadi ibonduti buyur na merung ai ma na pitu kambuyur na porngis anjaha na jenges ai. Jadi tarpuho ma Parao, tonggor ma, nipi do hape.

⁸ Patar ni ai susah tumang ma uhurni. Isuruh ma na mangalopi haganup partondung pakon na pentar na i tanoh Masir. Ipajojor Parao ma nipini ai hubani sidea, tapi sahalak pe lang na boi patorangkon ai hubani Parao.

⁹ Jadi ihatahon kopala ni sitahu anggur ai ma hubani Parao: Huingat do salahku sadari on.

¹⁰ Sanggah na manringis Parao hubani jabolonta, gabe iondoskon ahu pakon kopala ni simasak ruti ondi hu tutupan, na i rumah ni kopala pangawal,

¹¹ jadi marnipi ma hanami bani na saborngin, ahu pakon ia, legan bei do arti ni nipinami ai.

¹² Adong do ijai sada garama, halak Heber hasomannami, jabolon ni kopala pangawal ai, ipatugah hanami ma nipinami ai hu bani, gabe itorhai ma ai bennami, marguru hubani nipinami do itorhai.

¹³ Anjaha songon tinorhaanni ai bennami, sonai do homa tarjadi; mulak do ahu hu jabatanku, targantung do anggo ia.

Itorhai si Josep Nipi ni Parao

¹⁴ Isuruh Parao ma na mangalopi si Josep; jadi podas ma ipaluah sidea ia hun tutupan ai, isuhur ma gumisni anjaha igantihi ma hiouni, dob ai laho ma ia mangadap Parao.

¹⁵ Nini Parao ma dompak si Josep, “Na marnipi do ahu, hape sahalak pe lang na boi manorhaisi.

Tapi hubogei do baritamu, nini halak: anggo adong ibogei ho nipi, mintor ibotoh ho do manorhaisi.”

¹⁶ Nini si Josep ma mambalosi Parao, “Sedo ahu, Naibata do na patugahkon hasonangan hubani Parao.”

¹⁷ Dob ai nini Parao ma dompak si Josep, “Marnipi do ahu, jongjong do ahu i pasir ni Bah Nil;

¹⁸ dob ai kaluar ma pitu lembu na mombur anjaha na jenges rupani humbani Bah Nil ai, anjaha laho manggagati arung-arung ai.

¹⁹ Dob ai siluk ma kaluar pitu lembu na legan, merung anjaha bajan tumang rupani, seng onggga ope huidah na sonai bajanni i sab tanoh Masir.

²⁰ Ipampangani lembu na merung ampa na bajan ai ma hapitusi lembu na mombur na parlobei ai.

²¹ Das ma ganupan ai hu boltokni ibonduti, tapi lanjar do lang adong tanda, na dob i boltokni ai, ai lanjar bajan do rupa ni sidea, songon na bani mulani ai. Jadi tarpuho ma ahu.

²² Huidah ma use ibagas nippingku kaluar hun sangkambona pitu kambuyur gandum na porngis anjaha na dear.

²³ Dob ai tubuh ma use pitu kambuyur na legan, horah, merung anjaha melus ibahen logou na hun hapoltakan.

²⁴ Jadi ibonduti buyur na merung ai ma hapitusi buyur na jenges ai. Domma namin hupatugah

ganupan ai hubani partondung, tapi sahalak pe lang na boi patorangkonsi hu bangku.”

²⁵ Dob ai nini si Josep ma dompak Parao, “Sada do arti ni nipi ni Parao ai. Ipatugah Naibata do hubani Parao, na sihol pamasaon-Ni.

²⁶ Na pitu lembu na dear ai, pitu tahun do ai, anjaha na pitu kambuyur na dear ai, pitu tahun do homa ai; sada do arti ni nipi ai.

²⁷ Na pitu lembu na merung anjaha na bajan ai, na soluk kaluar use, pitu tahun do ai; na pitu kambuyur na lapungon anjaha na melus ai ibahen logou na hun hapoltakan, lohei sipitu tahun do ai.

²⁸ Ai ma na dob huhatahon hubani Parao; ipataridahkon Naibata do hubani Parao na sihol pamasaon-Ni.

²⁹ Tonggor ma masa ma pitu tahun pariama bolon i sab tanoh Masir.

³⁰ Irik hujai masa ma use pitu tahun lohei; gabe halupahonon ni halak ma ganup pariama bolon ai i tanoh Masir, halani bois ma tanoh in bahenon ni lohei ai.

³¹ Lang be botohon ni halak pariama bolon na i tanoh in bahenon ni lohei na soluk ai, ai sabonar bajan tumang do ai.

³² Anjaha mambahen na pala dua hali marnipi Parao, artini ai: domma itotapkon Naibata na masa ai, anjaha podas ma pamasaon-Ni.

³³ On pe, ipindahi Parao ma sada halak na pantas anjaha na pentar maruhur sipabangkitonni patorsahon tanoh Masir.

³⁴ Ihatahon Parao ma pabangkitkon kopala-kopala i nagori on, laho patumpuhon saparlima ni gogoh ni tanoh Masir ibagas na pitu tahun pariama bolon ai.

³⁵ Ipatumpu sidea ma sagala sipanganon ibagas tahun pariama bolon na roh on, anjaha ipagugun hinan ma gandum sikuasaan ni Parao bahen sipanganon i kota-kota, anjaha isimpan ma ai.

³⁶ Jadi bohal ma ai i tanoh on bani lohei sipitu tahun na sihol masa ai i tanoh Masir, ase ulang maseda tanoh on halani lohei ai.”

Parbangkit ni si Josep

³⁷ Dear tumang do ojur ai bani uhur ni Parao pakon juakjuakni ganupan.

³⁸ Jadi nini Parao ma hubani juakjuakni ai, “Boi ma jumpah hita sada halak na songonsi, na niiankon ni Tonduy ni Naibata?”

³⁹ Nini Parao ma dompak si Josep, “Halani domma ipabotohkon Naibata haganupan on bam, seng dong be halak na pantas anjaha na pentar maruhur na songon ho.

⁴⁰ Ondos hubam ma rumahku, anjaha balosan ni bangsangku ma parentahmu; pitah paratas on ma hasurunganku humbam.”

⁴¹ Ambah ni ai nini Parao ma dompak si Josep, “Tonggor ma, domma hupabangkit ho manguasai ganup tanoh Masir.”

⁴² Dob ai itanggali Parao ma tintinni humbani tanganni, inahkon ma ai hubani tangan ni si Josep; isorongkon ma hubani pakean humbani kaen na alus, anjaha ibahen ma horung-korung omas hu borgokni.

⁴³ Ipanaik ma ia hu garetani paidua, anjaha martingting ma sidea i lobeini, “Manrogop ma nasiam! Ase sonai ma ia ipabangkit Parao, markuasa i sab tanoh Masir.”

⁴⁴ Ambah ni ai nini Parao ma hubani si Josep, “Ahu do Parao, tapi anggo lang ibagas botohmu, sahalak pe lang na boi mangangkat tangan atap naheini i sab tanoh Masir.”

⁴⁵ Ibahen Parao ma goran ni si Josep: Zafenat Paneah, anjaha ibere ma hubani si Asnat, boru ni si Potifera, malim i huta On, bahen parinangonni. Dob ai misir ma si Josep manginggoti tanoh Masir.

Si Josep Raja Paidua i Tanoh Masir

⁴⁶ Tolu puluh tahun ma umur ni si Josep sanggah na jongjong ai ia ilobei ni Parao, raja ni Masir. Misir hun lobei ni Parao ma si Josep, laho manginggoti ganup tanoh Masir.

⁴⁷ Ibere tanoh ai ma gogohni marjunjun ibagas na pitu tahun pariama bolon ai.

⁴⁸ Dob ai ipatumpu si Josep ma haganup sipanganon ibagas sipitu tahun ai, na adong i tanoh Masir, isimpan ma ai i kota-kota; gogoh ni juma inggot ni ganup kota, inahkon ma ai hubagas kota ai.

⁴⁹ Jadi songon horsik na i topi ni laut ma hinabuei ni omei na pinajunjun ni si Josep ai, pala iparontihon use manuhati, halani lang be tarsuhati.

⁵⁰ Dob ai tubuh ma dua anak bani si Josep, sanggah lang roh ope tahun lohei ai, ai ma na tinubuhkon ni si Asnat, boru ni si Potifera, malim i huta On.

⁵¹ Ibahen si Josep ma goran ni bunga-tubuhni ai si Manase, halani nini, “Lupa do ahu ibahen Naibata bani haganup hasombuhonkin ronsi rumah ni bapa.”

⁵² Goran ni na paduahon ai ibahen si Efraim, halani nini, “Ai gabe do ahu itumpak Naibata i tanoh hadoyukonkin.”

⁵³ Dob salpu na pitu tahun pariama bolon ai i tanoh Masir,

⁵⁴ mulai ma roh lohei sipitu tahun na ipatugah si Josep hinan. Masa ma lohei bani haganup nagori, tapi i sab tanoh Masir adong do sipanganon.

⁵⁵ Dob loheian haganup tanoh Masir, anjaha mandoraki rayat haganupan mangindo sipanganon hubani Parao, nini Parao ma hubani haganup halak Masir ai, “Laho ma hanima hubani si Josep, bahen ma aha na hinatahonni bennima!”

⁵⁶ Ase dob masa lohei bani sab dunia on, iungkab si Josep ma sagala tuangan anjaha ijual ma gandum hubani halak Masir, halani parah tumang do lohei ai i tanoh Masir.

⁵⁷ Roh ma homa hun sab dunia on halak hu tanoh Masir laho mamboli gandum humbani si Josep, halani parah tumang do lohei ai i sab dunia on.

Parbingkat ni Abang ni si Josep Mula-mula hu Tanoh Masir

42 ¹ Dob itangar si Jakob, adong do gandum i tanoh Masir, nini ma hubani anakni ai, “Mase ma sai marsinonoan hanima?”

² Ambah ni ai nini ma, “Adong do hubogei gandum i tanoh Masir, tuad ma hanima hujai, anjaha boli ma ijai gandum banta, ase manggoluh, ulang matei hita.”

³ Jadi tuad ma sapuluh halak sanina ni si Josep laho mamboli gandum hun tanoh Masir.

⁴ Tapi anggo si Benjamin, anggi ni si Josep ai, lang ipabingkat si Jakob rap pakon abangni ai, ai ninuhurni: Atap marmara holi ia.

⁵ Dob ai das ma anak ni si Israel na mangaldung ai rap pakon pangaldung na legan, ai i tanoh Kanaan pe domma masa lohei.

⁶ Tapi si Josep do manrajai i nagori ai, ia do sijual gandum hubani ganup rayat ni nagori ai. Daskonsi

sanina ni si Josep ai, manrogop ma sidea i lobeini, pala das bohi ni sidea hu tanoh.

⁷ Dob iidah si Josep abangni ai, itanda ma sidea, tapi ipakulah do ia songon halak na legan dampak sidea, anjaha koras do parsahapni dampak sidea, nini ma, “Roh hunja do hanima?” Nini sidea ma, “Hun tanoh Kanaan do, laho mamboli sipanganon.”

⁸ Ase itanda si Josep do abangni ai, tapi anggo ia seng itanda sidea.

⁹ Jadi idingat si Josep ma nipi, na niipini pasal sidea; nini ma dampak sidea, “Parkahap do hanima, na roh do hanima sihol mangidah partoguh na buruk.”

¹⁰ Nini sidea ma dampaksi, “Lang tuannami! Pitah na sihol mamboli sipanganon do ase roh jabolon-jabolonmu on.

¹¹ Anak ni sada halak do hanami ganup; na bujur do hanami, seng onggga parkahap hanami jabolonmu on.”

¹² Nini si Josep ma dampak sidea, “Lang, sihol mangidah partoguh na buruk do hanima ase roh.”

¹³ Nini sidea ma mambalosi, “Sapuluh dua do hanami jabolonmu on marsanina, anak ni sada halak i tanoh Kanaan; tading i lambung ni bapanami do nuan sianggian ai, tapi anggo na sada seng ijin be.”

¹⁴ Dob ai nini si Josep ma dampak sidea, “Songon na dob huhatahon in bannima, parkahap do hanima.

¹⁵ On ma parsubaan bannima. Songon sintongni manggoluh Parao, seng boi laho hanima hunjon, anggo seng roh angginima sianggian ai hujon.

¹⁶ Suruh hanima ma sahalak hun bannima, mangalop angginima ai, patutupkonon ma anggo hanima, ase boi ujion hatanima, atap na bujur do hanima; tapi anggo lang, songon sintongni manggoluh Parao, parkahap do hanima.”

¹⁷ Jadi ipamasuk ma sidea hu tutupan tolu ari dokahni.

¹⁸ Patolu-arihon nini si Josep ma hubani sidea, “Sonon ma bahen hanima ase manggoluh hanima, ai huhabiari do Naibata.

¹⁹ Anggo halak na bujur do hanima, tading ma sahalak hun bannima na marsanina i tutupan on, laho ma anggo hanima, boban ma gandum, bahen panganon ni rumah tangganima bei.

²⁰ Tapi boan hanima ma angginima sianggian ai, ase tarhaporsayai hatanima anjaha ulang matei hanima.” Jadi ibahen sidea ma sonai.

²¹ Tapi marsisolsolan ma sidea, “Tongon do, pardousa do hita dompak angginta ondi, ai iidah hita do pusok ni uhurni, sanggah na ielek-elek hita, hape lang ibalosi hita; halani ai do roh hubanta hasosakan on.”

²² Jadi nini si Ruben ma mambalosi sidea, “Ai lang huhatahon hinan do hubannima, ulang mardousa hanima hubani ambia ai, tapi lang

itangar hanima hatangku; ase sapata ni darohni ai do na manginsonoh hubanta.”

²³ Tapi lang ibotoh sidea na iarusi si Josep do hata ni sidea ai, halani marjurubahasa do sidea.

²⁴ Surut ma si Josep humbani sidea lanjar tangis; dob ai mulak ma ia use marsahap-sahap pakon sidea. Itangkap ma si Simeon hun tengah-tengah ni sidea, anjaha isangkut ma ia i lobei ni sidea.

²⁵ Ihatahon si Josep ma na mannahi gandum hu sumpit ni sidea, paulakkon duit ni sidea hu sumpitni bei, ampa mamberehon bohal i dalan hubani sidea. Jadi ibahen ma sonai hubani sidea.

²⁶ Dob ai inahkon sidea ma gandum ai bani halode ni sidea, jadi misir ma sidea hunjai.

²⁷ Sanggah iungkab sahalak humbani sidea sumpitni laho mambere gagaton hubani halodeini i parbornginan, iidah ma duitni tampei i babah ni sumpitni.

²⁸ Nini ma hubani saninani ai, “Mulak do duitku, andon ibagas sumpitkon.” Jadi malitonduy ma sidea, rusak bei ma sidea marsinonoan, nini sidea ma, “Aha do on, na binahen ni Naibata hubanta?”

Pardas ni Sidea hu Huta ni Sidea

²⁹ Dob das sidea hu tanoh Kanaan, hubani si Jakob bapa ni sidea ai, ibaritahon sidea ma hubani ganup na masa ai bani sidea, nini ma,

³⁰ “Gomos do parsahap ni halak ai, ai ma raja ni nagori ai hu bennami, anjaha ihatahon do hanami parkahap, na mangkahapi tanoh ai.

³¹ Nini hanami ma hu bani, ‘Na bujur do hanami, seng parkahap hanami.

³² Sapuluh dua do hanami jabolonmu on marsanina, anak ni sada halak i tanoh Kanaan; tading i lambung ni bapanami do nuan sianggian ai, tapi anggo na sada seng ijin be.’

³³ Jadi ihatahon halak ai ma, ai ma raja ni nagori ai hu bennami, ‘Hunjon ma botohon na bujur hanima. Tading ma sada humbennima i lambungku; boban hanima ma gandum bahen panganon ni rumah tangganima, misir ma hanima.

³⁴ Dob ai boban hanima ma angginima sianggian ai hu bangku, ase hubotoh seng parkahap, na bujur do hanima hape. Paulakonku ma bannima saninanima ai, anjaha boi ma nunutonnima mangaldung hu tanoh on.”

³⁵ Sanggah na palumeihon sumpitni bei sidea, iidah ma parduitanni ibagas sumpitni bei. Dob iidah sidea pakon bapa ni sidea parduitan ni sidea ai, mabiar ma sidea.

³⁶ Dob ai nini si Jakob, bapa ni sidea ai ma hubani sidea, “Na laho popor mando ahu bahenonnima. Lang ijin be si Josep, lang ijin be si Simeon, si Benjamin pe sihol buatonnima. Ganupan in martumpu hu bangku.”

³⁷ Nini si Ruben ma hubani bapani ai, “Anakku na dua in ma bunuh ham, anggo lang mulak ia huboban bamu; ondoskon ham ma ia hu tanganku, sai na mulak do ia boanonku hubamu.”

³⁸ Nini ma, “Seng bulih tuad anakkin pakon hanima, ai domma matei abangni, sahalaksi mando na tading; atap sonaha dong parmaraan mangonai hubani bani dalan sibontasonnima ai, jadi hu nagori toruh mando ahu na ubanon on taruhkononnima, halani pusok ni uhur.”

Parbingkat ni Anak ni si Jakob Paduahalihon hu Tanoh Masir Rap pakon si Benjamin

43 ¹ Lambin parahni ma lohei ai i nagori ai.
² Jadi dob bois ipangan sidea gandum na binoban ni sidea ai hun tanoh Masir, nini bapa ni sidea ma hubani sidea, “Ulaki hanima ma mangaldung banta otik sipanganon.”

³ Dob ai nini si Juda ma mambalosisi, “Gomos do hata ni halak ai hu bennami, ‘Seng anjai idahonnima be bohingku, anggo lang odor hanima rap pakon angginima ai.’

⁴ Anggo ipabingkat ham angginami in rap pakon hanami, tuad pe hanami mangaldung sipanganon bamu.

⁵ Tapi anggo lang ipabingkat ham ia, seng tuad hanami, ai domma pala ihatahon halak ai hu

bennami, ‘Seng anjai idahonnima be bohingku anggo lang odor hanima rap pakon angginima ai.’”

⁶ Nini si Israel ma, “Mase ma bahenonnima na masambor hu bangku marhitei na patugahkon hubani halak ai, na adong ope angginima in?”

⁷ Nini sidea ma mambalosi, “Sai na isungkuni halak ai do pasal hanami ampa pasal gomparanta, nini do, ‘Manggoluh ope bapanima? Adong ope angginima?’ Jadi ipatugah hanami ma hu bani haganup sonaha na sabotulni. Sonaha ma pambotohnami, na sihol hatahononni, ‘Boan hanima ma tuad angginima ai?’”

⁸ Nini si Juda ma hubani si Israel, bapani ai, “Palopas ham ma ambia on misir rap pakon ahu, ase laho hanami, ase manggoluh hita, ulang matei, age hanami, age ham, sonai homa anaknami.

⁹ Ahu ma manjamini, hun tanganku ma tungguonmu ia; anggo lang huboban ia bamu, anjaha hupajongjong ia i lobeimu, marsapata hu bangku ma ham lalab.

¹⁰ Ai ambit lang marabat hanami, domma pala dua hali hanami mulak.”

¹¹ Dob ai nini si Israel, bapa ni sidea ai ma hubani sidea, “Anggo na maningon do sonai, bahen hanima ma sonon: Boan hanima ma buah siharganan ni tanoh on ibagas sumpitnima bahen siluahnima hubani halak ai, otik minak na morum,

otik manisan, gotah pakon hamonan, pakon buah na legan.

¹² Dua lompit ma boban hanima duit; boan hanima ma mulak duit na pinaulak hubagas babah ni sumpitnima; ra na lepak do ai.

¹³ Boban hanima ma homa angginima in, misir ma hanima mangulaki marayak halak ai.

¹⁴ Naibata pargogoh na so tarimbang in ma mangidopi hanima i lobei ni halak ai, ase ilopas mulak saninanima na tading ai ampa si Benjamin. Tapi anggo ahu, songon halak na popor mando ahu.”

Mangulaki Marhoru Anak ni si Jakob

¹⁵ Ase iboan sidea ma siluah ondi pakon duit lompit dua ampa si Benjamin, dob ai misir ma sidea tuad hu Masir, jadi das ma sidea hu lobei ni si Josep.

¹⁶ Jadi dob iidah si Josep odor do sidea pakon si Benjamin, nini ma hubani siramotkon rumahni, “Arahkon ma halak ai hu rumah, sayat ma sada pinahan anjaha hoseihon, ai maningon mangan halak ai rap pakon ahu tengah ari on.”

¹⁷ Ibahen juakjuak ai ma songon na hinatahon ni si Josep, iarahkon ma halak ai hu rumah ni si Josep.

¹⁸ Mabiari tumang ma halak ai, halani na binoban ai sidea hu rumah ni si Josep. Nini sidea, “Halani duit, na tarihut hubani sibonanonta ondi do gatni, mambahen na iarahkon hita hu rumah on, ase

adong hitei bani mangimbang ampa mandorab hita, mambahen hita gabe jabolon ampa mambuut halodenta ai.”

¹⁹ Idohori sidea ma siramotkon rumah ni si Josep ai, iparsahapkon sidea ma ia i labah ni rumah ai,

²⁰ nini sidea ma, “Santabi, tuannami, na roh do hanami na baruon mangaldung sipanganon.

²¹ Dob das hanami hu parbornginan, iungkab hanami ma sumpitnami, tonggor ma, ijai do ganup duitnami tampei ibabah ni sumpitni bei. Jadi iboban hanami ma ai mulak,

²² anjaha iboan hanami do homa duit na legan, laho mamboli sipanganon. Lang ibotoh hanami atap ise do na mannahkon ai hu sibonanonnami.”

²³ Nini ma mambalosi, “Tenger ma uhur nasiam, ulang nasiam mabiar! Naibata nasiam ampa Naibata ni bapa nasiam do na mannahkon arta na ponop hubagas sumpit nasiam; domma hujalo ia duit nasiam ai.” Dob ai ipadarat ma si Simeon anjaha iboban hubani sidea.

²⁴ Iarahkon ma sidea hu rumah ni si Josep, ibere ma bah, ase iburihi sidea nahei ni sidea, ibere ma homa gagaton hubani halode ni sidea.

²⁵ Ipasirsir sidea ma sibere-bere ai managam parroh ni si Josep tongah ari, ai domma ibogei sidea na mangan ai sidea ijai.

Hasortaon ni si Josep bani sidea

²⁶ Jadi dob roh si Josep hu rumah, iboan sidea ma hubagas, hubani si Josep, sibere-bere na i tangan ni sidea ai, lanjar manrogop ma sidea hu bani, pala das hu tanoh.

²⁷ Dob ai isungkun si Josep ma atap na jorgit-jorgit do sidea, nini ope, “Jorgit ope bapanima na matua, na tinarsingatannima ai? Manggoluh ope ia?”

²⁸ Nini sidea ma, “Jorgit ope jabolonmu, bapanami ai, manggoluh ope ia.” Dob ai manrogop ma sidea hu bani.

²⁹ Mangkawah ma si Josep, iidah ma si Benjamin, anggini ai, hasomanni sainang, nini ma, “On do angginima sianggian ia na tinarsingatannima hu bangku?” Nini ma use, “Idop ma uhur ni Naibata bam, ambia!”

³⁰ Dob ai tarolos ma si Josep laho, halani sihol ni uhurni mangidah anggini ai, ipindahi ma iananni tangis; masuk ma ia hu kamarni, tangis ma ia ijai.

³¹ Dob ai isuhapi ma bohini, kaluar ma ia use, iodohkon ma uhurni, nini ma, “Idangkon hanima ma sipanganon in!”

³² Jadi iidangkon sidea ma sipanganon ai, pulig hubani si Josep, pulig hubani saninani, anjaha pulig hubani halak Masir na rap mangan pakonsi, halani seng malo halak Masir rap mangan pakon halak Heber, ai pantang do ai bani halak Masir.

³³ Hundul ma sidea i lobei ni si Josep, sikahanan mangihutkon hasikahanonni, sianggian mangihutkon hasiangganonni, gabe longang bei ma sidea marsinonoan.

³⁴ langkat siparugas ma sipanganon berean hun lobei ni si Josep, anjaha ibere ma ai hubani sidea; tapi lima hali nasa rupei ni ganup sidea ai do rupei ni si Benjamin. Jadi minum ma sidea anjaha marmalas ni uhur pakonsi.

Pangujian bani Sanina ni si Josep

44 ¹ Dob ai iparentahkon ma hubani siramotkon rumahni, nini ma, “Nahi ma sumpit ni halak on pakon gandum, sadiha na tarboban sidea, anjaha bahen ma duit ni sidea bei, hu babah ni sumpit ni sidea.

² Nahkon ma panginumanku, panginuman perak in, hu babah ni sumpit ni sianggian ai, ampa duit boli ni gandum ai.” Jadi ibahen ma songon na hinatahon ni si Josep ai.

³ Patarni siangkonsi ari, ipabingkat ma sidea rap pakon halode ni sidea.

⁴ Tapi kaluarhonsi sidea hun kota ai, seng sadiha daohni ope, nini si Josep ma hubani siramotkon rumahni, “Misir ma ho, ayaki ma halak ondi, anjaha anggo dob jumpah ho sidea, hatahon ma hubani sidea, ‘Mase ma ibahen hanima na jahat balos ni

na madear? Mase ma itangko hanimu panginuman perak ai?

⁵ Ai lang on do panginuman ni tuanku, anjaha marhitei ai ia manjahai? Na sambor do na binahennima in?"

⁶ Daskonsi ia hubani sidea, ihatahon ma hata nongkan hubani sidea.

⁷ Nini sidea ma mambalosisi, "Mase ma sonai parsahapmu, tuannami? Daoh ma hun bennami jabolonmu mangkorjahon na sonai.

⁸ Tonggor ham, duit na jumpah hanami i babah ni sumpitnami iboban hanami do mulak bamu hun tanoh Kanaan. Sonaha ma panangkonami bani perak pakon omas hun rumah ni tuanta ai?

⁹ Bani ise hun bennami jabolonmu on jumpah panginuman ai, maningon matei ma ia; hanami pe homa gabe jabolon ni tuanta ai ma."

¹⁰ Nini ma mambalosi, "Songon na hinatahon ni nasiam ai ma tongon. Bani ise jumpah ai, ia ma gabe jabolonku, tapi maluah do anggo nasiam."

¹¹ Lolos sidea ma patoruhkon sumpitni bei hu tanoh, anjaha iungkab bei ma sumpitni ai.

¹² Dob ai ipareksa ma, mulai humbani sikahanan marujung bani sianggian, jadi jumpah ma panginuman ai bani si Benjamin.

¹³ Iparrigat sidea ma hiouni, ipantampeihon sidea ma sumpitni hu halodeni, jadi mulak ma sidea hu kota.

¹⁴ Dob das si Juda pakon saninani ai hu rumah ni si Josep, ijai ope ia, jadi manrogop ma sidea hu tanoh i lobeini.

¹⁵ Nini si Josep ma dompak sidea, “Aha do na binahennima on? Ai lang ibotoh hanima na pandei manjahai dojolma na songon ahu on?”

¹⁶ Jadi nini si Juda ma, “Aha ma hatahononnamihubani tuannami, aha ma balosnami, anjaha sonaha ma pamintorinami bani dirinami? Domma ipatalar Naibata hajahaton ni jabolonmu on. Jabolon ni tuannami ma hanami ampa halak na jumpah bani panginuman ai.”

¹⁷ Nini ma mambalosi, “Daoh ma ai humbangku, mangkorjahon na sonai. Bani ise jumpah panginuman ai, ia do na gabe jabolonku, tapi anggo hanima, tangkog ma hanima mardamei-damei hubani bapanima.”

¹⁸ Dob ai ipadohor si Juda ma hu lambungni, nini ma, “Sombahku bamu, tuannami, lopus ma jabolonmu on mangkatahon sangkababah hata hu pinggol ni tuannami, sai ulang ma mintor gajak ringismu bangku jabolonmu, ai doskon Parao sandiri do ham.

¹⁹ Tuannami do manungkun hubani jabolonmu, sonon, ‘Adong ope bapa atap angginima?’

²⁰ Jadi ihatahon hanami ma tongon hubani tuannami, ‘Adong ope bapanami na dob matua, anjaha sada anak sianggianni, tubuh bani panorang

hatuaonni; ia abangni domma matei, ia mando tading na sainang, anjaha haholongan ni bapani do ia.'

²¹ Ham do mangkatahon hubani jabolonmu, 'Boban hanima ma ia tuad hu bangku, ase iidah matangku ia.'

²² Ihatahon hanami do namin bani tuannami, 'Lang tartadingkon dakdanak ai bapani, halani anggo itadingkon bapani, tontu matei ma ia.'

²³ Jadi nimu do hubani jabolonmu, 'Anggo seng tuad angginima sianggian ai rap pakon hanima seng malo be idahonnima bohingku.'

²⁴ Dob mulak hanami hubani jabolonmu bapanami, ipatugah hanami ma hubani hata ni tuannami.

²⁵ Dob ai nini bapanami ma, 'Ulaki hanima ma mangaldung otik sipanganon banta.'

²⁶ Tapi ihatahon hanami ma, 'Seng tarbahen hanami tuad. Anggo dihut angginami sianggian in hasomannami, tuad pe hanami, ai lang malo idahonnami bohi ni raja ai, anggo lang angginami sianggian in hasomannami.'

²⁷ Jadi nini jabolonmu bapanami ai ma hu bennami, 'Ibotoh hanima do, dua do anak bangku itubuhkan parinangonku,

²⁸ na sada domma misir humbangku, anjaha domma huhatahon: Tontu domma isoroh binatang panoroh ia, anjaha ronsi nuan, seng huidah ia.

²⁹ Anggo ibuat hanimu homa dakdanak on hun lobeihu anjaha hona mara ia, tontu hu nagori toruh mando ahu taruhononnima, halani pusok ni uhur.'

³⁰ On pe, anggo das ma ahu hubani jabolonmu, bapanami, hape lang dihut rap pakon hanami dakdanak in, na dob sangkut hubani tonduy ni bapani,

³¹ tontu matei ma ia anggo iidah lang ijin dakdanak in; anjaha hanami jabolonmu ma na patuadkon jabolonmu, bapanami na ubanon ai, hu nagori toruh halani pusok ni uhur.

³² Tapi ahu, jabolonmu on do, na manjamin dakdanak in hubani bapanami, ningku do, 'Anggo lang hupaulak ia hubamu, ahu ma mardousa hubani bapa sadokah manggoluh ahu.'

³³ On pe, ahu jabolonmu on ma, na tading ijon gabe jabolon ni tuannami gantih ni dakdanak in. Janah paturut ma ia mulak rap pakon sanina-saninani.

³⁴ Sonaha ma tarbahen ahu tangkog hubani bapanami anggo lang odor rap pakon dakdanak in? Seng tarnonoi ahu hinamagou na sogop hubani bapangku."

Ipatandahon si Josep Dirini hubani Saninani

45 ¹Jadi lang tartahan si Josep be sihol ni uurni i lobei ni ganup halak na jongjong i lambungni, gabe idilohon ma, "Suruh hanimu ma hu darat haganup halak hun lambungkon." Ase seng

dong halak na jongjong i lambungni, sanggah na pinatandahon ni si Josep dirini hubani saninani ai.

² Dob ai tangis ma ia gogoh, pala tarboge i hubani halak Masir pakon hubani sinrumah ni Parao.

³ Nini si Josep ma dompak saninani ai, “Ahu do si Josep, manggoluh ope bapanta? Tapi lang tarbalosi saninani ai ia, halani gobir ni sidea i lobeini.”

⁴ Dob ai nini si Josep ma dompak saninani ai, “Padohor nasiam ma hu lambungkon!” Jadi ipadohor sidea ma. Nini ma, “Ahu do si Josep, anggi nasiam, na jinual nasiam hu tanoh Masir.

⁵ On pe, ulang ma sunsah anjaha pusok uhur nasiam, halani na jinual nasiam ahu hujon, ai pasirsir hagoluhan nasiam do ase isuruh Naibata ahu parlobei nasiam.

⁶ Ai padua tahun on ope masa lohei i tanoh on, tapi lima tahun nari ope lang adong tidahan atap pariama pe.

⁷ Tapi isuruh Naibata do ahu parlobei nasiam, laho pajonamkon ginompar nasiam i tanoh on, laho paluahkon ampa pagoluhkon buei humbani nasiam.

⁸ On pe, sedo nasiam na marsuruh ahu hujon, Naibata do. Ia do pabangkit ahu gabe bapa bani Parao, gabe kopala ni ganup rumahni, ampa panrajai i sab tanoh Masir.

⁹ Ase papodas nasiam ma tangkog hubani bapa, patugah nasiam ma hu bani, ‘Sonon do hata ni anakmu si Josep, domma ipabangkit Naibata ahu

gabe raja ni ganup tanoh Masir, tuad ma ham marayak ahu, ulang be ipadokah-dokah.

¹⁰ Marianan i tanoh Gosen ma ham, ase dohor i lambungku ham pakon anakmu, ampa pahompumu, ronsi biribiri pakon lombumu ampa haganup na dong bamu.

¹¹ Ahu do mansarihon ham ijai, ai lima tahun nari ope lohei on, ase ulang gabe masombuh ham pakon isi ni rumahmu, ronsi ganup na adong bamu.

¹² Ai mata nasiam pakon mata ni anggingku si Benjamin in do mangidahsi, paboa pamanganku do na manonahkon hata in bani nasiam.'

¹³ Patugah nasiam ma hubani bapa pasal haganup hasangaponku i tanoh Masir on, ampa haganup na niidah nasiam, dob ai papodas nasiam ma tuad hujon rap pakon bapa."

¹⁴ Dob ai irohop ma borgok ni si Benjamin anggini ai, janah tangis; si Benjamin pe sai tangis do manrohop borgokni.

¹⁵ Isummahi si Josep ma ganup abangni ai anjaha inunut tangis; dob ai pe ase marsahap-sahap saninani ai pakonsi.

Ipataridahkon Parao Hasortaonni Manjalo Sidea

¹⁶ Dob tarbogei barita ai hu rumah ni Parao, paboa na dob roh sanina ni si Josep ai, jadi malas ma uhur ni Parao pakon juakjuakni pasal ai.

¹⁷ Jadi nini Parao ma dompak si Josep, “Hatahon ma hubani saninamu, ‘Sonon ma bahen, muati ma ganup pinahanmu anjaha laho ma hu tanoh Kanaan,

¹⁸ alop hanima ma bapanima pakon rumah tangganima, boban hanima ma hu bangku, ase hubere bannima bagian sidearan i tanoh Masir, ase ipangan hanima gogoh ni tanoh on.’

¹⁹ Hatahon ope hubani sidea, ‘Sonon bahen, boan hanima ma gareta hun tanoh Masir hundulan ni anak pakon parinangonnima anjaha boan hanima ma pakon bapanima roh hujon.

²⁰ Anjaha ulang ma pusok uhurnima mangidah ugas-ugasnima, ai hanima do simada atap aha sidearan in sab tanoh Masir on.”

²¹ Jadi ibahen anak ni si Israel ma sonai. Ibere si Josep ma hubani sidea gareta songon na hinatahon ni Parao, ibere ma pakon bohal bani sidea i dalan.

²² Ibere ma hubani ganup sidea sapasang pakean pesta, tapi hubani si Benjamin tolu ratus rupiah pakon lima pasang pakean pesta do iberehon.

²³ Ambah ni ai itongos ma hubani bapani sapuluh halode tunggal, na mamboan barang sidearan na adong i Masir, pakon sapuluh halode boru-boru na mamboan gandum ruti pakon sipanganon hubani bapani ai i tengah dalan.

²⁴ Dob ai ipabingkat ma saninani ai, anjaha sanggah na laho ai sidea, nini ma dompak sidea, “Ulang ma maringori nasiam i tongah dalan.”

²⁵ Jadi tangkog ma sidea hun tanoh Masir, das ma sidea hu tanoh Kanaan, hubani si Jakob bapa ni sidea ai.

²⁶ Ibaritahon sidea ma hu bani, nini ma, “Manggoluh ope si Josep, anjaha ia do na manggomgomi ganup tanoh Masir.” Tapi labuh do hata ai bani uhur ni si Jakob, ai lang ihaporsayai sidea.

²⁷ Tapi dob ihatahon sidea hubani haganup hata ni si Josep, na tinonahkonni ai hubani sidea, anjaha iidah pakon gareta, na tinongos ni si Josep laho mambobansi, gabe malas ma tonduy ni si Jakob, bapa ni sidea ai.

²⁸ Jadi nini si Israel ma, “Dear ma ai, manggoluh ope hape si Josep anakakai! Misir ma ahu ase huidah ia, paima matei ahu.”

Parbungkas ni si Jakob hu Tanoh Masir

46 ¹Ase misir ma si Israel pakon ganup na adong bani. Das ma ia hu Berseba, jadi igalangkon ma galangan hubani Naibata ni bapani, si Isak.

²Dob ai ihatahon Naibata ma hubani si Israel marhitei panonggoran sanggah borngin, nini ma, “Jakob, Jakob! Ijon do ahu, nini mambalosi.”

³ Dob ai nini ma, “Ahu do Naibata, Naibata ni bapamu;” ulang ma ho mabiar tuad hu tanoh Masir, ai gabe bangsa na bolon do ho tumpakonku ijai.

⁴ Huhasomani pe ho tuad hu tanoh Masir, anjaha arahkonon-Ku do ho tangkog magira; anjaha si Josep do na manutup matamu holi.

⁵ Dob ai misir ma si Jakob hun Berseba; anjaha anak ni si Israel do mamboban si Jakob, bapa ni sidea ai, ampa anak ni sidea ronsi parinangon ni sidea, ibagas gareta, na tinongos ni Parao mangalop sidea.

⁶ Iboban sidea ma homa pinahan ronsi ugas-ugas ni sidea, na sinari ni sidea i tanoh Kanaan, jadi das ma sidea hu tanoh Masir, si Jakob ampa ganup ginomparni ai.

⁷ Anak pakon pahompuni dalahi ampa boru pakon pahompuni naboru, haganup ginomparni iboban hu tanoh Masir.

Ginompar ni si Jakob

⁸ On ma goran ni anak ni si Israel na das hu tanoh Masir, ai ma si Jakob pakon anakni ai. Bunga tubuh ni si Jakob ai ma si Ruben.

⁹ Anak ni si Ruben ai ma si Henok, si Palu, si Hesron pakon si Karmi.

¹⁰ Anak ni si Simeon ai ma si Jemuel, si Jamin, si Ohad, si Jakin, si Zohar pakon si Saul, anak ni boru Kanaan ai.

¹¹ Anak ni si Levi ai ma si Gersom, si Kehat pakon si Merari.

¹² Anak ni si Juda ai ma si Er, si Onan, si Sela, si Peres pakon si Zerah; tapi si Er pakon si Onan domma matei i tanoh Kanaan. Anak ni si Peres ai ma si Hesron pakon si Hamul.

¹³ Anak ni si Isasar ai ma si Tola, si Pua, si Job pakon si Simron.

¹⁴ Anak ni si Sebulon ai ma si Sered, si Elon, pakon si Jahleel.

¹⁵ Ai ma anak ni si Lea, na tinubuhkon bani si Jakob i Padang Aram, ampa si Dina, boruni ai. Ganup sidea, anakni pakon boruni, tolu puluh tolu halak do.

¹⁶ Anak ni si Gad ai ma si Zifion, si Haggi, si Suni, si Esbon, si Eri, si Arodi pakon si Areli.

¹⁷ Anak ni si Asser ai ma si Jimna, si Jiswa, si Jiswi pakon si Beria, ampa si Sera, botou ni sidea; anjaha anak ni si Beria ai ma si Heber pakon si Malkiel.

¹⁸ Ai ma anak ni si Zilpa, na binere ni si Laban hubani si Lea, boruni ai; na sapuluh onom halak ai do na tinubuhkonni hubani si Jakob.

¹⁹ Anak ni si Rahel, parinangon ni si Jakob, ai ma si Josep pakon si Benjamin.

²⁰ Tubuh do bani si Josep i tanoh Masir si Manase pakon si Efraim, na tubuh bani humbani si Asnat, boru ni si Potifera, malim i huta On.

²¹ Anak ni si Benjamin ai ma si Bela, si Beker, si Asbel, si Gera, si Naaman, si Ehi, si Ros, si Mupim, si Hupim pakon si Ared.

²² Ai ma ginompar ni si Rahel, na tinubuhkonni bani si Jakob, sapuluh ompat halak ganupan.

²³ Anak ni si Dan ai ma si Husim.

²⁴ Anak ni si Naftali ai ma si Jahzeel, si Guni, si Jezer pakon si Syilem.

²⁵ Ai ma ginompar ni si Bilha, na binere ni si Laban hubani si Rahel, boruni ai, anjaha pitu halak do ganup na tinubuhkonni bani si Jakob.

²⁶ Haganup halak na das hu tanoh Masir rap pakon si Jakob, ai ma ginomparni sandiri, seng ipadihut parinangon ni anakni, haganup onom puluh onom halak.

²⁷ Anak ni si Josep na tubuh bani i tanoh Masir dua halak do. Ase pitu puluh halak ma tumpu ginompar ni si Jakob na das i tanoh Masir.

Panjalo ni si Josep bani si Jakob

²⁸ Dob ai isuruh si Jakob ma si Juda parlobei marayak si Josep, ase roh si Josep hu Gosen manjumpahkon bapani. Jadi das ma sidea hu tanoh Gosen.

²⁹ Jadi ipasang si Josep ma garetani, laho ma ia hu Gosen manjumpahkon si Israel, bapani ai. Dob iidah ia, mintor idahop ma borgok ni bapani ai, anjaha inunut tangis.

³⁰ Nini si Israel ma dompak si Josep: Age matei ahu sonari, ai domma huidah bohimu, domma hubotoh manggoluh ope ho hape.

³¹ Nini si Josep ma dompak saninani pakon dompak isi ni rumah ni bapani: Tangkog ma ahu patugahkon hubani Parao, hatahononku ma hu bani: Domma roh saninangku pakon isi ni rumah ni bapangku, na i tanoh Kanaan hinan, marayak ahu.

³² Halak parmahan biribiri do sidea, ai parpinahanon do hagoluhan ni sidea; iboan sidea do biribiri, lombu ronsi ganup na adong bani sidea.

³³ On pe, anggo ipio Parao nasiam anjaha isungkun: Aha do parhorjaan nasiam?

³⁴ Balosi nasiam ma: Halak parpinahan do jabolonmu on humbani sietek-etekonnami nari ronsi nuan, sonai hanami age ompungnami, ase andohar boi nasiam marianan i tanoh Gosen, halani magigi do halak Masir mangidah halak siparmahan biribiri.

Ipatandahon si Josep Saninani ampa Bapani hubani Parao

47 ¹ Dob ai laho ma si Josep patugahkon hubani Parao, nini ma, “Domma roh bapa pakon saninangku, biribiri pakon lombu ni sidea ampa haganup na dong bani sidea hun tanoh Kanaan; domma das sidea i tanoh Gosen.”

² Iarahkon si Josep do lima halak humbani saninani ai mangadap Parao.

³ Isungkun Parao ma sanina ni si Josep ai, “Aha do horjanima?” Nini sidea ma mambalosi, “Parmahan biribiri do jabolonmu on, sonai hanami age ompungnami.”

⁴ Ambah ni ai nini sidea ma dompak Parao, “Ase roh pe hanami, na sihol manginsolat do hanami i tanoh on, ai lang adong be sampalan ni biribiri ni jabolonmu on, halani parah ni lohei i tanoh Kanaan. Onpe, sai lopas ham ma jabolonmu on marianan i tanoh Gosen.”

⁵ Jadi nini Parao ma hubani si Josep, “Domma roh hape bapa ampa saninamu marayak ho.

⁶ I lobeimu do tanoh Masir; bani tanoh sidearan in ma pajonam bapa pakon saninamu; i tanoh Gosen ma sidea marianan. Anggo dong ibotoh ho halak na pantas humbani sidea, pabangkit ma sidea gabe kopala ni siramotkon pinahanku ganupan.”

⁷ Iarahkon si Josep ma homa si Jakob, bapani ai, mangadap Parao, jadi ipasu-pasu si Jakob ma Parao.

⁸ Nini Parao ma manungkun si Jakob, “Piga tahun ma dokahmu manggoluh?”

⁹ Nini si Jakob ma dompak Parao, “Saratus tolu puluh tahun ma dokah ni panginsolatonku. Otik anjaha borat do tahun ni goluhku, anjaha lang iayak buei ni tahun ni goluh ni ompung bani panginsolatan ni sidea.”

¹⁰ Ipasu-pasu si Jakob ma Parao, dob ai luar ma ia hun lobei ni Parao.

¹¹ Dob ai ipatotap si Josep ma ianan ni bapani pakon saninani ai, ibere ma tanoh parbagianan ni sidea i tanoh Masir, bani ianan sidearan i nagori Ramses, songon na tinonahkon ni Parao.

¹² Iparmudu si Josep ma bapani, saninani pakon isi ni rumah ni bapani ai, marguru hubani buei ni anak ni sidea.

Harentaon na Binahen ni si Josep Sanggah Lohei ai

¹³ Tapi seng dong sipanganon i sab tanoh ai, ai parah tumang do lohei ai, gabe galek ma partanoh Masir pakon partanoh Kanaan ibahen lohei ai.

¹⁴ Ase ipatumpu si Josep ma ganup duit na dapot i tanoh Masir pakon i tanoh Kanaan, ai ma boli ni gandum na binoli ni sidea; dob ai itaruhkon si Josep ma duit ai hu rumah ni Parao.

¹⁵ Jadi dob bois duit hun tanoh Masir pakon hun tanoh Kanaan, marrohan ma ganup partanoh Masir mangadap si Josep, nini ma, “Bere ham ma sipanganon bennami! Mase ma matei hanami i lobeimu, halani na dob bois duitnami?”

¹⁶ Nini si Josep ma, “Boan nasiam ma pinahan nasiam hujon, ase hubere hubani nasiam gandum ganti ni pinahan nasiam ai, anggo na dob bois ma duit nasiam.”

¹⁷ Jadi ipamboan sidea ma pinahan ni sidea hubani si Josep, gabe ibere ma hubani sidea sipanganon gantih ni huda, biribiri, lombu pakon halode. Iparmudu ma sidea ibagas na satahun ai, gantih ni haganup pinahan ni sidea ai.

¹⁸ Dob salpu na satahun ai, roh ma sidea hubani padua-tahunkon, nini ma dompaksi, “Lang tarporsou hanami hu bamu ale tuannami, na dob bois duitnami; pinahannami pe domma ondos hubani tuannami ganupan; seng adong be na tading, na boi ondoskononnami hubani tuannami sobali badan pakon tanohnami.

¹⁹ Mase ma maningon matei hanami i lobeimu, sonai hanami age tanohnami? Boli ham ma hanami pakon tanohnami gantih ni sipanganon, ase gabe jabolon ni Parao hanami pakon tanohnami. Bere ham ma bonih, ase manggoluh hanami, ulang matei, anjaha ulang tarulang tanoh in.”

²⁰ Jadi iboli si Josep ma ganup tanoh Masir bani Parao, ai ijuali halak Masir do jumanai bei, halani parah ni lohei ai, gabe Parao ma simada tanoh ai.

²¹ Ia bangsa ai, iparodihon ma sidea i tanoh Masir humbani ujung na sada hubani ujung na sada nari.

²² Pitah juma ni malim do na so binolini; ai adong do parbagianan bani malim humbani Parao, anjaha humbani parbagianan na binere ni Parao ai do sidea manggoluh; ai ma halani ase lang ijual sidea tanohni.

²³ Nini si Josep ma dompak bangsa ai, “Domma huboli nasiam pakon tanoh nasiam sadari on bani Parao; on ma bonih bani nasiam, suani nasiam ma tanoh in.

²⁴ Tapi humbani gogohni bere nasiam ma saparlima hubani Parao, anjaha na ompat bagian nari, bahen bonih ni juma nasiam ma, bahen panganon nasiam pakon isi ni rumah nasiam, ampa bahen panganon ni anak nasiam.”

²⁵ Nini sidea ma, “Ham do na pagoluhkon hanami; anggo na idop do uhur ni tuannami bennami, sai jabolon ni Parao ma hanami.”

²⁶ Jadi sada aturan ma ai pasal tanoh ibahen si Josep i tanoh Masir das hubani sadari on, saparlima ni gogohni bani Parao; pitah tanoh ni malim tumang do na so Parao simadasi.

Tonah ni si Jakob ase hu Tanoh Kanaan ia Itanom

²⁷ Ase marianan i tanoh Masir ma Israel, i tanoh Gosen, anjaha totap ma sidea ijai; marginompari anjaha roh bueini ma sidea.

²⁸ Anjaha manggoluh ope sapuluh pitu tahun nari si Jakob i tanoh Masir, ase saratus ompat puluh pitu tahun ma umur ni si Jakob.

²⁹ Bani na laho jumpah ajal ni si Israel, idilo ma anakni si Josep, nini ma dompaksi, “Anggo na idop do uhurmu bangku, tampeihon ma tanganmu i toruh ni popatkon, paboa na ra do ho mambahen

idop ni uhur pakon habujuron hu bangku. Ulang ma tanom ahu i tanoh Masir,

³⁰ ai sihol do rap modom ahu pakon ompung. Halani ai maningon boanonmu do ahu hun tanoh Masir on, anjaha tanomonmu ahu i panimbunan ni sidea.”

³¹ Nini si Jakob ma, “Bulawankon ma hu bangku! Jadi ibulawankon ma hu bani.” Dob ai manambah ma si Israel dompak luluan ni podomanni.

Ipasu-pasu si Jakob si Manase pakon si Efraim

48 ¹ Dob salpu na masa on, adong ma na patugahkon hubani si Josep, “Boritan do bapanta!” Jadi iarahkon ma anakni na dua ai, si Manase pakon si Efraim.

² Adong ma na patugahkon hubani si Jakob, “Roh do anakmu si Josep bamu,” gabe iparpala-palai ma hundul i podomanni.

³ Nini si Jakob ma dompak si Josep, “Domma ipatalar Naibata Pargogoh na so tarimbang in diri-Ni hu bangku i huta Lus, i tanoh Kanaan, anjaha ipasu-pasu do ahu.

⁴ Nini do hu bangku, ‘Tonggor ma, Hutumpak pe ho marginompar anjaha Hupabuei pe ho, Hubahen pe ho gabe hulanan ni bangsa-bangsa anjaha Hubere pe tanoh on hubani ginomparmu gabe rupei ni sidea sadokah ni dokahni.’

⁵ On pe, haduasi anakmin, na tubuh bam i tanoh Masir, sanggah lape roh ahu marayak ho hu tanoh

Masir on, ahu do simadasi; ahu do simada si Efraim pakon si Manase usih songon si Ruben pakon si Simeon.

⁶ Tapi ginompar na dob tubuh bam dob sidea, ho ma simadasi; goran ni abang ni sidea in ma panggoranonkon ni sidea bani parbagianan ni sidea.

⁷ Ai sanggah na roh ahu hun Padang Aram, matei do si Rahel i tanoh Kanaan, i tongah dalan dohorhon huta Eprata, lanjar ijai do ia hutanom, bani dalan laho hu Eprata, ai ma Betlehem.”

⁸ Sanggah iidah si Israel anak ni si Josep ai, nini ma, “Ise do on?”

⁹ Nini si Josep ma dompak bapani ai, “Pahompumu do sidea, na binere ni Naibata hu bangku ijon.” Dob ai nini ma, “Togu ma sidea hu lambungkon, ase hupasu-pasu sidea.”

¹⁰ Ia mata ni si Israel domma rambon halani tuani, lang be torang ia marpangidah. Jadi ipadohor si Josep ma sidea hubani bapani, gabe isummah ma sidea anjaha idahop.

¹¹ Nini si Israel ma dompak si Josep, “Domma huidah bohimu, lang pangarapan ni uhurhu, anjaha tonggor ma, dihut do ginomparmu ipataridahkon Naibata hu bangku.”

¹² Dob ai itogu si Josep ma sidea hun abinganni, jadi manrogop ma ia hu tanoh i lobeini.

¹³ Dob ai ijolom si Josep ma sidea haduasi, si Efraim i siamunni tontang sambilou ni si Israel, anjaha si Manase i sambilouni, tontang siamun ni si Israel, jadi ipadohor ma sidea hu bani.

¹⁴ Tapi ipagostong si Israel ma tangan siamunni anjaha inahkon bani ulu ni si Efraim, age pe ia sianggian, anjaha sambilouni bani ulu ni si Manase, ase marsilang do tanganni, age pe si Manase sikahanan.

¹⁵ Dob ai ipasu-pasu si Israel ma si Josep, nini ma, “Naibata, na hinabiaran ni ompung, si Abraham pakon si Isak, Naibata na marmahan ahu sadokah ahu adong ronsi nuan,

¹⁶ Malekat na paluah ahu humbani sagala parmaraan, la ma na mamasu-masu dakdanak na dua on; sai tarambilan ma goranku ampa goran ni ompung si Abraham pakon si Isak marhitei sidea; sai manggargar anjaha lambin bueini ma sidea i tanoh on.”

¹⁷ Tapi dob iidah si Josep, na tinampeihon ni bapani ai tangan siamunni ai hubani ulu ni si Efraim, sogam ma uhurni mangidahsi, gabe ijolom ma tangan ni bapani ai paosorhon humbani ulu ni si Efraim hubani ulu ni si Manase.

¹⁸ Nini si Josep ma dompak bapani, “Lang sonin bapa, ai on do sikahanan, tampeihon ham ma tanganmu siamun hubani uluni.”

¹⁹ Tapi manjua do bapani ai, nini ma, “Hubotoh do, anakku, hubotoh do; ia pe gabe sada bangsa do, anjaha banggal do age ia; age pe sonai, sai na banggalan do anggini magira ase ia, anjaha ginomparni gabe hulanan ni bangsa-bangsa.”

²⁰ Jadi ipasu-pasu ma sidea bani na sadari ai, nini ma, “Ibagas gorannima do mamasu-masu halak Israel, marhitei na mangkatahon: Ibahen Naibata ma ho songon si Efraim pakon si Manase! Ase parlobei ma si Efraim ipasu-pasu humbani si Manase.”

²¹ Dob ai nini si Israel ma dompak si Josep, “Tonggor ma, na laho matei mando ahu, tapi Naibata do mangkasomani hanima, anjaha bobahonon-Ni do hanima mulak hu tanoh ni ompungnima.

²² Anjaha domma hubere sada raboyon, hasurunganmu humbani saninamu, na hubuat humbani halak Amori marhitei podang pakon panahku.”

Pasu-pasu ni si Jakob hubani Anakni

49 ¹ Dob ai idilo si Jakob ma anakni ai, nini ma, “Martumpu ma hanima, ase hupatugah bennima aha na masa bennima magira.

² Martumpu ma hanima anjaha tangar ma, alo anak ni si Jakob! Tangar hanima ma si Israel, bapanima.

- ³ Alo Ruben, ho do bunga tubuhku, gogohku
pakon parmulaan ni kuasanku, sisurungan
bani hamuliaon sisurungan bani hagogohon,
- ⁴ anjaha na marjullak-jullak songon bah; seng be
ho sisurungan, ai inaiki ho do podoman ni
bapamu; ibutaki ho do ai, ipanangkih ho do
podomanku.
- ⁵ Na martinodohon do si Simeon pakon si Levi;
sinjata hakorason do podang ni sidea.
- ⁶ Sai ulang ma saor tonduyhu bani parriahan
ni sidea, sai ulang ma marsada uhurhu
pakon partumpuan ni sidea; ai ibagas ringis
ni sidea ibunuhi do halak, anjaha ibagas
hajungkaton ni sidea itagili do lombu.
- ⁷ Bursik ma ringis ni sidea, ai parah do ai,
ampa gila ni sidea, ai bajan do ai. Bagi-
bagihononku do sidea itongah-tongah ni
ginompar ni si Jakob, anjaha eraponku do
sidea itongah-tongah ni Israel.
- ⁸ Alo Juda, sipujion ni saninamu do ho; odoh
bani tangkuhuk ni munsuhmu do magira
tanganmu; marsombah hu bam do anak ni
bapamu.
- ⁹ Anak ni singa do Juda; domma manaek
ho, anakku, marhitei panorohon.
Manggompang, modom-modom do
ia songon singa tunggal, songon singa
boru-boru; ise ma na pag mamuhoisi?

- ¹⁰ Seng na meret tungkot harajaon humbani si Juda, barang tampuk ni pamarentahan hun holangkolang ni naheini, paima roh si Silo, anjaha la do siirikkonon ni sagala bangsa.
- ¹¹ Tambatonni ma halodeni hu bona ni hayu anggur pakon anak ni halodeni boru-boru hubona ni hayu anggur na pinilih; taptaponni ma hiouni bani anggur anjaha bajuni bani gotah ni hayu anggur.
- ¹² Gerger ma matani halani anggur, saksak ma iponni halani dadih.
- ¹³ Marianan i topi ni laut do si Sebulon, i labuhan ni kapal, sabalog pakon Sidon.
- ¹⁴ Halode simapir holi-holi do si Isasar, na manggompang i holangkolang ni harang;
- ¹⁵ anggo iidah jenges do parsaranan ai anjaha lambut do tanoh ai, ipaunduk ma abarani laho mamorsan, gabe halak parrodi ma ia.
- ¹⁶ Uhumon ni si Dan do bangsani songon sada marga ni Israel.
- ¹⁷ Songon ulog i biding ni dalan na bolon do si Dan magira, sada ulog darih i biding ni dalan, na mamagut tambirik ni huda, gabe madabuh hu pudi na mangajaksi.
- ¹⁸ Hatuahonmu in do na huhasiholhon ale Jahowa!
- ¹⁹ Sosakon ni sipanosak do si Gad, tapi sosakonni do sidea use.

- ²⁰ Mantin do sipanganon ni si Asser; ia do siidangkon sipanganon hasoloan ni raja.
- ²¹ Ursa boru-boru na maluah do si Naftali, siluarhon hata na jenges-jenges.
- ²² Hayu na marbuah na poso do si Josep, hayu na marbuah na poso bani bah tubuh; dangkahni manlangkahi dingding.
- ²³ Ipasoru-soru parsior do ia, itembak anjaha iparburu-buru,
- ²⁴ tapi totap do siorni, anjaha gogoh do botohon ni tanganni, marhitei tangan ni puanglima ni si Jakob, marhitei goran ni Siparmahan, Batu gingging ni si Israel.
- ²⁵ Marhitei Naibata ni bapamu, na mangurupi ho, marhitei Naibata pargogoh na so tarimbang, na mamasu-masuhon bam pasu-pasu na hun langit na i atas, pasu-pasu na hun luhung na i toruh, pasu-pasu na hun bagod panusuan ampa parnaibataan.
- ²⁶ Surungan do pasu-pasu ni bapamu humbani pasu-pasu ni dolog na sadokah ni dokahni, humbani buntu-buntu na sadokah ni dokahni; sai sogop ma in hu ulu ni si Josep, hu sitabolan ni na tarpilih i tongah-tongah ni saninani.
- ²⁷ Gipul sipanoroh do si Benjamin, na mangankon sorohan sogod, anjaha na marbagi taban-taban bodari.

²⁸ Ai ma haganup marga ni Israel na sapuluh dua in; anjaha ai ma na ipatugah bapa ni sidea hubani sidea laho mamasu-masu sidea; ipasu-pasu ma sidea marhitei pasu-pasu na romban hubani ganup sidea.

Tonah ni si Jakob na Parpudi pakon Parmateini

²⁹ Dob ai martonah ma ia nini ma dompak sidea: Sipatumpuon hubani bangsangku do ahu; tanom hanima ma ahu i lambung ni ompungku, i liang na i juma ni si Epron, marga Het ai,

³⁰ i liang na i juma Makpela, tontang ni Mamre, na i tanoh Kanaan, na binoli ni si Abraham rap pakon juma humbani si Epron marga Het ai, gabe tanoman parsandirian.

³¹ Hujai do itanom si Abraham pakon si Sarah, parinangonni ai; hujai do itanom sidea si Isak pakon si Rebekka, parinangonni ai, anjaha ijai do hutanom si Lea.

³² Juma ai pakon liang na ibagas ai, na binoli do ai humbani halak Het.

³³ Jadi dob salpu si Jakob na martonah ai hubani anakni ai, itarik ma naheini hu atas podomanni; rotap ma hosahni, jadi ipatumpu ma ia hubani hasomanni sabangsa.

Sangap ni Pananomoni ni si Jakob

50¹ Dob ai ijombahon si Josep ma dirini hubani bohi ni bapani ai, itangisi anjaha isummahi ma ia.

² Ihatahon si Josep ma juakjuakni, ai ma doktor-doktor, mangkapuri bapani ai; jadi ihapuri doktor-doktor ai ma si Israel.

³ Ompat puluh ari do ai ihorjahon sidea, ai nasai do dokahni porlu mangkapuri. Jadi itangisi halak Masir ma ia pitu puluh ari dokahni.

⁴ Dob salpu panorang na manangisi ai, nini si Josep ma dompak isi ni rumah ni Parao. Anggo na idop do uhur nasiam mangidah ahu, hatahon nasiam ma hubani Parao, sonon,

⁵ “Domma ipabija bapa ahu, nini, ‘Tonggor ma, na laho matei mando ahu; maningon i tanoman, na huhurak bangku i tanoh Kanaan, ijai do ahu tanomonmu. On pe, lopas nasiam ma ahu tangkog ase hutanom bapa, dob ai pe ase mulak ahu.’”

⁶ Dob ai nini Parao ma, “Laho ma ho, tanom ma bapanta in, songon na dob ibijahon ho.”

⁷ Jadi tangkog ma si Josep laho mananom bapani ai; tangkog ma rap pakonsi ganup juakjuak ni Parao, pangintuai-pangintuaini, rumahni pakon ganup pangintuai ni tanoh Masir,

⁸ ronsi ganup isi ni rumah ni si Josep pakon saninani ampa isi ni rumah ni bapani ai; pitah anak, biribiri pakon lembu ni sidea do tading itanoh Gosen.

⁹ Tangkog do homa rap pakonsi gareta pakon siajak huda, gabe ganjang tumang do odoran ai.

¹⁰ Dob das sidea hu pardogeian Atad, na i dipar ni Jordan igogohi sidea ma ijai tangis-tangis; iadongkon si Josep ma partangison bolon pitu ari dokahni hubani bapani ai.

¹¹ Jadi dob iidah isi ni tanoh ai, ai ma halak Kanaan, partangison na i pardogeian Atad ai, nini sidea ma: Partangison bolon do on bani halak Masir. Halani ai do ase ibahen halak goran ni ianan ai Abel-Masir, ai ma na i dipar ni Jordan.

¹² Dob ai ibahen anak ni si Jakob ma hu bani, songon na tinonahkonni hubani sidea.

¹³ Iusung anakni ai ma ia hu tanoh Kanaan, itanom ma ia i liang ni juma Makpela, tontang ni Mamre, na binoli ni si Abraham rap pakon juma ai humbani si Epron, halak Het ai, bahen tanoman parsandirian.

¹⁴ Ase dob itanom sidea bapani sidea ia, mulak ma si Josep hu tanoh Masir, ia pakon saninani, pakon ganup na rap tangkog pakonsi mananom bapani ai.

Ipatenger si Josep uhur ni saninani ai

¹⁵ Dob iidah sanina ni si Josep ai na dob matei bapani sidea ai, nini sidea ma: Atap na sogam do uhur ni si Josep mangidah hita, anjaha balaskononni

do banta sagala na masambor na binahenta bani sanggah lape matei ia.

¹⁶ Jadi martonah ma sidea hubani si Josep, mangkatahon: Nini bapanta sanggah lape matei ia:

¹⁷ Sonon ma hatahon hanima hubani si Josep, “Marpangulaki ma uhurmu mardingat hajahaton ni saninamu pakon dousa ni sidea, ai na sambor do na binahen ni sidea bam. On pe, sasap ma hajahaton ni jabolon ni Naibata ni bapanta ai!” Jadi tangis ma si Josep, dob ihatahon sidea sonai hu bani.

¹⁸ Roh ma homa saninani ai, manrogop ma sidea i lobeini, anjaha nini ma, “Tonggor ma, jabolonmu ma hanami.”

¹⁹ Tapi nini si Josep ma dompak sidea, “Ulang ma nasiam mabiar, ai lang tunduk bani Naibata do age ahu?

²⁰ Na sambor do tongon tahi ni uhur nasiam hu bangku, tapi na madear do hadobanni ibahen Naibata, laho pasaudkon songon na niidah nasiam sadari on, ai ma pagoluhkon sada bangsa na bolon.

²¹ On pe ulang ma mabiar nasiam. Ahu pe na marmudu-muduhon nasiam pakon anak nasiam.” Dob ai iapoh ma sidea pasabouhon uhur ni sidea.

²² Jadi marianan i tanoh Masir ma si Josep, ia pakon isi ni rumah ni bapani; anjaha saratus sapuluh tahun do si Josep manggoluh.

²³ Sompat do iidah si Josep ginompar ni si Efraim ronsi sundut patoluhon, niombah ni si Makir pe, anak ni si Manase, tubuh i abingan ni si Josep do.

²⁴ Dob ai nini si Josep ma dompak saninani ai, “Na matei mando ahu, tapi sai tatapon ni Naibata do nasiam magira, anjaha arahkonon-Ni do nasiam luar hun tanoh on hu tanoh na dob binulawankon-Ni hubani si Abraham, si Isak pakon si Jakob.”

²⁵ Dob ai ipabija si Josep ma anak ni si Israel, nini ma, “Sai tatapon ni Naibata do nasiam magira, jadi maningon boanon nasiam do holi-holingku hunjon.”

²⁶ Jadi matei ma si Josep, marumur saratus sepuluh tahun; ihapuri sidea ma bangkeini anjaha ipamasuk hubagas batang i tanoh Masir.

2 Musa

Panggargar ni Halak Israel pakon Hamarsikonni

1 ¹ On ma goran-goran ni anak ni si Israel, na roh hu tanoh Masir rap pakon si Jakob, ganup rap pakon hasomanni satangga:

² Si Ruben, Simeon, Levi pakon Juda,

³ Isasar, Sebulon pakon Benjamin,

⁴ Dan pakon Naftali, Gad pakon Asser.

⁵ Haganup ginompar ni si Jakob pitu puluh halak do; tapi anggo si Josep domma i tanoh Masir hinan.

⁶ Dob ai matei ma si Josep pakon haganup saninani ampa haganup na sansundut ai.

⁷ Dob ai lambin gargar ma halak Israel, manggompari ma sidea, lambin buei anjaha lambin margogoh tumang, pala gok tanoh ai ibahen sidea.

⁸ Tapi bangkit ma sada raja na baru manggomgom Masir, na so mananda si Josep.

⁹ Nini ma hubani bangsani, “Tonggor ma, domma gabe sada bangsa halak Israel, bueinan anjaha gogohan hun banta.

¹⁰ Eta, akal ma bahen hita, ase ulang lambin ganda sidea; lang tarsibar tubuh hamunsuhon, jadi ihasomani sidea munsuhta mangimbang hita anjaha kaluar sidea hun tanoh on.”

¹¹ Jadi ipabangkit ma mandur manrodi sidea, laho mangarsik-arsik sidea marhitei horja na borat; ipauli sidea ma huta parbohalan bani Parao, ai ma Pitkom pakon Raemses.

¹² Tapi lambin iarsik-arsik sidea, lambin buei anjaha lambin manggargari do, gabe mabiar ma halak Masir mangidah sidea.

¹³ Jadi marhasoman gogoh ma ibahen halak Masir marjabolonkon halak Israel,

¹⁴ iarsik sidea ma goluh ni sidea marhitei horja na borat, pauli simin pakon batu merah, pakon bagei-bagei ni horja i juma; ibagas ganup horja ni sidea ai ipaksa do sidea mangkorjahon ai.

¹⁵ Dob ai ititahkon raja ni Masir ma hubani sibasoh ni halak Heber, goran ni na sada si Sipra, goran ni na sada nari si Pua,

¹⁶ nini ma, “Anggo iurupi hanima boru Heber sanggah tubuhan tuah, pardiateihon hanima ma dakdanak ai; anggo dalahi do ai bunuh ma ia, tapi anggo naboru paturut ma manggoluh.”

¹⁷ Tapi mabiar do sibasoh ai mangidah Naibata, lang ibahen sidea songon na hinatahon ni raja ni Masir hubani sidea, tapi ipagoluh sidea do sagala dakdanak dalahi.

¹⁸ Jadi idilo raja ni Masir ma sibasoh ai, nini ma hubani sidea, “Mase ma sonon pambahennima, ipagoluh hanima do sagala dakdanak dalahi?”

¹⁹ Nini sibasoh ai ma hubani Parao, “Seng songon boru Masir boru Heber; togap-togap do sidea, lape roh sibasoh marayak sidea, domma hinsah sidea.”

²⁰ Halani ai itumpak Naibata ma sibasoh ai; lambin tambah ma bangsa ai anjaha lambin gogoh tumang.

²¹ Halani ihabiari sibasoh ai Naibata, ilayak-layakkon Naibata ma hubani sidea pasu-pasu rumah tangga.

²² Jadi iparentahkon Parao ma hubani rayatni, “Sagala na etek-etek dalahi panggijigkon hanima ma hu Bah Nil in, tapi sagala na etek-etek naboru paturut hanima ma manggoluh.”

Partubuh ni si Musa pakon Haluahonni Marhitei Boru ni Parao

2 ¹ Adong ma sada halak humbani ginompar ni si Levi na mambuat sada boru Levi bahen parinangonni.

² Boratan rumah ma puang-puang ai anjaha itubuhkon ma sada anak. Dob ididah, jenges do dakdanak ai, iponopkon ma ia tolu bulan dokahni.

³ Tapi dob lang tarponopkonsi be ia, ibuat ma sada poti humbani arung-arung, irohat ma ai bani aspal ampa damar, inahkon ma dakdanak ai hubagas poti ai, anjaha itibalhon ma ai hubagas arung-arung na i topi ni Bah Nil ai.

⁴ Tapi jongjong do botouni hun daoh manatap-natap ase ibotoh atap aha do ibahen hu bani.

⁵ Jadi tuad ma boru ni Parao laho maridi hu bah ai, anjaha mardalan-dalan do jabolonni naboru i topi ni Bah Nil ai; ididah ma poti ai i tongah-tongah ni arung-arung, gabe isuruh ma jabolonni mambuat ai.

⁶ Dob iungkap, ididah ma dakdanak ai, anjaha tonggor ma, sai tangis-tangis do dakdanak ai. Idop ma uhurni mangidahsi, anjaha nini ma, “Humbani dakdanak ni halak Heber do on.”

⁷ Dob ai nini botouni ai ma dompak boru ni Parao ai, “Mahua laho ahu mandilo sada puang-puang pangasuh humbani puang-puang ni halak Heber, ase ipainum dakdanak on bamu.”

⁸ Nini boru ni Parao ai ma dompaksi, “Anggo sonai laho ma ho!” Jadi laho ma anak boru ai, idilo ma inang ni dakdanak ai.

⁹ Nini boru ni Parao ai ma, “Boban ma dakdanak on, anjaha pauli-uli ma bangku, hubere pe upahmu.” Jadi iboban puang-puang ai ma dakdanak ai anjaha ipauli-uli ma.

¹⁰ Dob magodang dakdanak ai, itaruhkon ma ia hubani boru ni Parao, anjaha iain ma ia bahen anakni; ibahen ma goranni si Musa, halani nini, “Ai humbani bah do ia hudokdok.”

Pamunuhon ni si Musa pakon Parporusni

¹¹ Bani panorang ia, dob magodang si Musa, laho ma ia sahali marayak saninani, gabe ididah ma

hamarsikon ni sidea. ididah ma sada halak Masir na mangonai tangan bani sada halak Heber, sada humbani saninani.

¹² Itonggor ma hujai-hujon, dob ididah seng adongjolma ijai, ibunuh ma halak Masir ai, anjaha iponopkon ma ia ibagas horsik.

¹³ Luar ma ia patarni ai, tonggor ma, dua halak Heber Martinggili. Nini ma hubani parsalah ai, “Mase ma ibogbogi ho hasomanmu?”

¹⁴ Nini ma mambalosi, “Ise pabangkit ho gabe kopala ampa panguhum bennami? Sihol bunuhonmu gatni ahu, songon na dob binunuhmu halak Masir ai?” Mabiari ma si Musa, nini ma, “Tongon do, domma sar hata ai.”

¹⁵ Dob ibogei Parao hata ai, ipindah ma dalan laho mamunuhsi. Tapi maporus ma si Musa hun lobei ni Parao, marsaran ma ia i tanoh Midian, hundul i lambung ni sada parigi.

¹⁶ Pitu do boru ni malim na i Midian ai; roh do sidea manahui bah, igoki sidea ma ganup palangka laho pasiburhon biribiri ni bapa ni sidea.

¹⁷ Jadi roh ma parmahan, iusir ma sidea; jongjong ma si Musa, iurupi ma sidea pasiburhon biribiri ni sidea ai.

¹⁸ Dob das sidea hubani si Reguel, bapa ni sidea ai, nini ma, “Mase ma sonon podasni hanimasadari on?”

¹⁹ Nini sidea ma, “Adong do sada halak Masir na paluahkon hanami humbani tangan ni parmahan ai, na manahui bah homa bennami, anjaha na pasiburhon biribiri ai.”

²⁰ Nini ma dompak boruni ai, “Ija do ia? Mase itadingkon hanima dalahi ai? Dilo ma ia, ase mangan.”

²¹ Marosuh do si Musa tading i lambung ni halak ai, anjaha ibere ma boruni si Zippora bahen parinangon ni si Musa.

²² Itubuhkon ma sada anak, jadi ibahen ma goranni si Gersom, ai nini, “Panginsolat do ahu i tanoh na legan.”

Itangar Naibata Doruh-doruh ni Halak Israel

²³ Dob ai bani labang-labang ni ari matei ma raja ni Masir. Tapi morong-orong do halak Israel ibagas parjabolonan ni sidea ai anjaha mandoruhi, jadi das ma doruh-doruh ni sidea halani parjabolonan ai hu lobei ni Naibata.

²⁴ Itangar Naibata ma doruh-doruh ni sidea ai, anjaha idingat ma padan-Ni na hubani si Abraham, si Isak pakon si Jakob.

²⁵ Itatap Naibata ma halak Israel, anjaha ipatandahon Naibata ma diri-Ni bani sidea.

Pardilo ni Naibata bani si Musa

3¹ Tapi si Musa do na marmahan biribiri ni si Jetro, tulangni ai, malim ni halak Midian. Bani na sahali ialai ma biribiri ai salpu halimisan ai, das ma ia hu Dolog ni Naibata, hu Horeb.

² Jadi taridah ma bani malekat ni Jahowa, ibagas gajag ni apuy, hun tengah-tengah ni naporon. Dob ai itorih ma, ididah ma apuy gajag ibagas naporon ai, tapi seng mosog naporon ai.

³ Nini si Musa ma, “Laho ma ahu hujai mangidah halongangan bolon ai, mase ma tongon lang mosog naporon ai?”

⁴ Tapi dob ididah Jahowa ia sihol roh mangidah, dilo-dilo ma Naibata hubani hun tengah-tengah ni naporon ai, nini ma, “Musa, Musa!” nini ma, “Ijon do ahu.”

⁵ Dob ai nini ma, “Ulang dohori hujon; tanggali ma sipatumin humbani naheimin, ai tanoh na pansing do hajongjonganmon.”

⁶ Nini ope, “Ahu do Naibata ni bapamu, Naibata ni si Abraham, Naibata ni si Isak pakon Naibata ni si Jakob.” Jadi irongkob si Musa ma bohini, halani biarni mangidah Naibata.

⁷ Dob ai nini Jahowa ma, “Domma tangkas Huidah sahiti ni panaronon ni bangsang-Ku na i tanoh Masir, anjaha domma Hutangar doruh-doruh ni

sidea halani pambahen ni na mangarsik-arsik sidea; domma Hubotoh sitaronon ni sidea.

⁸ Halani ai do ase tuad Ahu paluahkon sidea hun tangan ni halak Masir, anjaha paluarhon sidea hun tanoh on hu tanoh na madear anjaha na lumbang, hu tanoh habaoran ni dadih pakon manisan, hu tanoh ianan ni halak Kanaan, Het, Amori, Peresi, Hewi pakon Jebus.

⁹ On pe, tonggor ma, domma das doruh-doruh ni halak Israel hu Bangku, anjaha domma Huidah homa pangarsikon ni halak Masir hubani sidea.

¹⁰ On pe, laho ma ho, Husuruh ma ho marayak Parao, ase ipadarat ho bangsang-Ku, halak Israel hun tanoh Masir.”

¹¹ Tapi nini si Musa ma dompak Naibata, “Ise ma ahu, ase ahu laho marayak Parao, anjaha padaratkon halak Israel hun Masir?”

¹² Nini ma, “Huhasomani pe ho; on ma tandani bam paboa Ahu do na marsuruh ho; ia dob ipadarat ho bangsa ai hun tanoh Masir, pasangaponnima ma Naibata i atas dolog on.”

¹³ Dob ai nini si Musa ma dompak Naibata, “Tonggor ma, anggo das ma ahu hubani halak Israel anjaha huhatahon dompak sidea, ‘Naibata ni ompung nasiam do marsuruh ahu hubani nasiam,’ gabe ihatahon sidea holi hu bangku, ‘Ise ma goran-Ni? Aha ma balosku dompak sidea?’”

¹⁴ Nini Naibata ma dompak si Musa, “Ahu Adong na Ahu Adong.” Nini ope, “Sonon do hatahononmu hubani halak Israel, ‘Ahu Adong do na marsuruh ahu hubani nasiam.’”

¹⁵ Nini Naibata ope dompak si Musa, “Sonon do hatahononmu hubani halak Israel, ‘Jahowa Naibata ni ompung nasiam, Naibata ni si Abraham, Naibata ni si Isak pakon Naibata ni si Jakob marsuruh ahu hubani nasiam.’ Ai ma goran-Ku sadokah ni dokahni, anjaha sonai ma goran-Ku diloon marsundut-sundut.

¹⁶ Laho ma ho, patumpu ma sagala partua-partua ni Israel, hatahon ma dompak sidea, Jahowa, Naibata ni ompung nasiam, na dob taridah bangku, Naibata ni si Abraham, si Isak pakon si Jakob do na mangkatahon, ‘Domma itatap uhur-Hu nasiam sonai age na ibahen hubani nasiam i tanoh Masir.

¹⁷ Domma Huhatahon sai padaraton-Ku do hanima humbani hamarsikon ni Masir hu tanoh ni halak Kanaan, Het, Amori, Peresi, Hewi pakon Jebus, hu tanoh habaoran ni dadih pakon manisan.

¹⁸ Sai balosan ni sidea do soram; laho ma ho pakon partua-partua ni Israel mangadap raja ni Masir, anjaha hatahon hanima ma dompaksi. Jahowa, Naibata ni halak Heber marjumpahkon hanami; on pe, lopas ham ma hanami laho hu halimisan tolu ari mardalan daohni, ase igalangi hanami Jahowa Naibatanami.

¹⁹ Tapi domma Hubotoh hinan, seng anjai lopason ni raja ni Masir hanima laho, age marhitei tangan na gogoh.

²⁰ Tapi pagostongon-Ku ma tangan-Ku laho mambogbogi Masir marhitei buei halongangan, na sihol bahenon-Ku i tongah-tongah ni sidea; dob ai palopasonni ma hanima laho.

²¹ Dapotan idop ni uhur pe bangsa on humbani halak Masir bahenon-Ku; ase anggo mandarat holi hanima, lang mandarat lumei tumang.

²² Tapi pindoon ni ganup puang-puang ma humbani hombar rumahni pakon humbani tondokanni ugas pirak, ugas omas pakon hiou, sipakeihononnima ma ai hubani anak pakon borunima; sonai ma ayobonnima halak Masir.’”

Hata Sidalian ni si Musa Mangengkar Parsuruh ni Naibata

Tanda Halongangan Sibahenonni Marhatongonkon Parsuruh ni Naibata

4 ¹ Dob ai nini si Musa ma mambalosi, “Tapi tonggor Ham ma, seng haporsayaan ni sidea ahu anjaha seng tangihonon ni sidea sorangku, tapi hatahonon ni sidea do, ‘Seng taridah Jahowa bam!’”

² Nini Jahowa ma dompaksi, “Aha do na i tanganmin?” Balosni, “Tungkot.”

³ Dob ai nini ma, “Gijigkon ma in hu tanoh!” Jadi igijigkon ma ai hu tanoh, lanjar gabe ulog ma; pala lintun si Musa hun lobeini.

⁴ Tapi nini Jahowa ma dompak si Musa, “Surdukkon ma tanganmu anjaha tangkap ma ihurni.” Jadi isurdukkon ma tanganni, itangkap ma anjaha gabe tungkot ma ai i tanganni,

⁵ ase porsaya sidea na dob taridah bam Jahowa Naibata ni ompung ni sidea, Naibata ni si Abraham, Naibata ni si Isak pakon Naibata ni si Jakob.

⁶ Ambah ni ai nini Jahowa ope dompaksi, “Surukkon ma tanganmu hubagas bajumin.” Jadi isurukkon ma tanganni hubagas bajuni; sanggah itarik ai, tonggor ma, domma gadamon tanganni ai, malopak songon salju.

⁷ Dob ai nini ma use, “Ulaki ma surukkon tanganmin hubagas bajumin. Jadi iulakkon ma manurukkon tanganni ai hubagas bajuni; sanggah itarik ai, tonggor ma, domma mulak dear songon dagingni hinan.

⁸ “Anggo lang porsaya sidea bam, anjaha lang itangihon sora ni tanda na parlobei in, sai na porsaya do sidea bahenon ni sora ni tanda na paduahon in.

⁹ Tapi anggo lang itangihon age tanda na dua on, anjaha lang itangihon soram, buat ma bah hun Nil ai, anjaha useihon ma ai hu tanoh na horah; jadi

gabe daroh ma bah na binuatmai hun Bah Nil ai i tanoh na horah ai.”

¹⁰ Tapi nini si Musa ma dompak Jahowa, “Ham Tuhanku, seng halak parsahap-sahap ahu, age i lobei ni on, age olat ni na dob marsahap Ham dompak ahu jabolonmu on; ai borat do pamanganku pakon dilahku.”

¹¹ Dob ai nini Jahowa ma dompaksi, “Ise do na mambahen pamangan ni jolma? Ise do na mambahen ia longah, nengel, marpangidah atap pitung? Ai lang Ahu, Jahowa do?

¹² On pe, laho ma ho, Ahu pe mangkasomani pamanganmu anjaha mangajari ho atap aha sihatahononmu.”

¹³ Tapi nini ma, “Ham Tuhan, suruh Ham ma atap ise na legan.”

¹⁴ Jadi manringis tumang ma Jahowa dompak si Musa, nini ma, “Ai lang saninamu do si Aron, halak Levi ai? Hubotoh na pandei do ia marsahap; tonggor ma homa, domma roh ia marjumpahkon ho, anjaha malas ma uhurni ibagas anggo ididah ho.

¹⁵ Parsahapkon ma ia anjaha nahkon ma ganup hata ai hu pamanganni; Huhasomani pe pamanganmu ampa pamanganni anjaha Huajari pe hanima atap aha sibahenonnima.

¹⁶ Ia pe gantihmu marsahap hubani bangsa ai, ia ma songon pamangan bam anjaha ho songon Naibata bani.

¹⁷ Boan ma tungkot in ibagas tanganmu, parhiteianmu mambahen sagala tanda ai.”

Parmulak ni si Musa hu Tanoh Masir

¹⁸ Dob ai laho ma si Musa mulak hubani si Jetro, tulangni ai, nini ma hu bani, “Mahua lopas ham ma ahu laho mulak hubani saninangku na i tanoh Masir, ase huidah atap na manggoluh ope sidea.” nini si Jetro ma, “Laho ma ho ibagas damei.”

¹⁹ Dob ai nini Jahowa ma dompak si Musa i Midian, “Laho ma ho mulak hu Masir, ai domma matei ganup halak na mantahihon hosahmu.”

²⁰ Dob ai iboan si Musa ma parinangonni pakon anakni, ipahundul ma sidea hubani sada halode, jadi mulak ma ia hu tanoh Masir. Iboan do homa tungkot ni Naibata ai ibagas tanganni.

²¹ Nini Jahowa ma dompak si Musa, “Anggo mulak ho hu tanoh Masir, ingat ma mambahen ganup halongangan na Huondoskon in hubagas tanganmu i lobei ni Parao. Tapi pahengkengon-Ku do uhurni ase ulang ilopas bangsa ai laho.

²² Anjaha hatahon ma dompak Parao, Sonon do hata ni Jahowa, “Anak-Ku sikahanan do Israel,

²³ halani ai Huhatahon ma bam, lopas ma anak-Ku laho ase ipasangap Ahu. Anggo mangengkar ho palopaskonsi laho, tonggor ma, bunuhon-Ku ma bunga tubuhmu.”

²⁴ Tapi i tongah dalan sanggah ibagas sada rumah parbornginan ia, ijumpahkon Jahowa ma ia sihol mambunuhsi.

²⁵ Jadi ibuat si Zippora ma sada batu na marot, isunat ma sibur-sibur ni anakni, igiut ma nahei ni si Musa marhitei ai anjaha nini ma, “Siparunjuk daroh do ho bangku.”

²⁶ Jadi ipaluah Jahowa ma ia. Ihatahon pe ijia “Siparunjuk daroh”, halani parsunaton ai do.

²⁷ Dob ai nini Jahowa ma dompak si Aron, “Laho ma ho manjumpahkon si Musa hu halimisan.” Jadi laho ma ia, gabe jumpahsi ma ia i Dolog ni Jahowa anjaha isummah ma ia.

²⁸ Ipatugah si Musa ma hubani si Aron haganup hata ni Jahowa na hinatahonni, pakon haganup tanda na tinonahkon-Ni bani.

²⁹ Dob ai laho ma si Musa pakon si Aron, ipatumpu sidea ma ganup partua-partua ni halak Israel.

³⁰ Ipatugah si Aron ma haganup hata ai, na hinatahon ni Jahowa dompak si Musa, anjaha ibahen ma ganup tanda ai i lobei ni bangsa ai.

³¹ Jadi porsaya ma bangsa ai; anjaha dob ibogei sidea, na dob iparayak Jahowa halak Israel anjaha itatap hamarsikonni, mangunduk bei ma sidea anjaha manrogop.

Iapasi Parao si Musa

5¹ Dob ai laho ma si Musa pakon si Aron mangadap Parao, nini sidea ma, “Sonon do hata ni Jahowa Naibata ni Israel, ‘Lopas ma laho bangsang-Kin, ase ibahen sidea pesta Bangku i halimisan.’”

² Nini Parao ma mambalosi, “Ise do Jahowa, ase maningon tangihononku sora-Ni palopaskon laho Israel? Seng hupabotoh-botoh Jahowa anjaha halak Israel pe seng hulopas laho.”

³ Nini sidea ma, “Na marjumpah do Naibata ni halak Heber pakon hanami, lopas ham ma hanami laho tolu ari mardalan daohni hu halimisan, ase manggalang hanami hubani Jahowa Naibatani, ase ulang ihonahon bennami sampar atap podang pe.”

⁴ Tapi nini raja ni Masir ma dompak sidea, “Ho Musa pakon ho Aron, mase ma langlangannima bangsa in bani horjani? Laho ma hanima mangkorjahon rodinima.”

⁵ Ambah ni ai nini Parao ma, “Tonggor ma, domma sonin buei ni bangsa in i tanoh on, gabe sihol ope pasaranonnima sidea humbani rodini sidea?”

Ipaborat Parao Sibobanon ni Halak Israel

⁶ Lanjar bani ari ai iparentahkon Parao ma hubani mandur pakon partua-partua ni bangsa ai, nini ma,

⁷ “Ulang be bere hanima anggala hubani bangsa in laho mambahen batu merah songon na somal; sidea sandiri ma patumpuhon anggala bani.

⁸ Tapi anggo buei ni batu merah sibahenon ni sidea songon na somal, tong do pabobankononnima hubani sidea; seng bulih oruannima ai, ai parrayoh do sidea. Halani ai do ase dilo-dilo sidea, ‘Laho ma hita manggalang hubani Naibatanta!’

⁹ Maningon patorikon do horja hubani halak ai silahoan ni sidea, ase ulang ipatangi-tangi hata guak.”

¹⁰ Jadi luar ma mandur pakon partua-partua ni bangsa ai, nini sidea ma hubani bangsa ai, “Sonon do hata ni Parao, ‘Seng ra be ahu mambere anggala hu bennima.

¹¹ Laho ma hanima, pindahi hanima ma bannima anggala atap ija boi jumpah hanima ai, tapi anggo horjanima otik pe lang boi hurang.’”

¹² Jadi mampar ma bangsa ai hu sab tanoh Masir laho patumpuhon panabian gantih ni anggala.

¹³ Sai isosak-sosak mandur ai do sidea, anjaha ihatahon: “Dobkon hanima horjanima siap arian songon na somal sanggah adong ope anggala.”

¹⁴ Jadi hona balbal ma partua ni halak Israel, na niangkat ni mandur ni Parao manjaga sidea, nini ma, “Mase ma lang idobkon hanima sadari on nasa bilangan ni batu merah na dob tinontuhon songon na sain dokah?”

¹⁵ Halani ai laho ma partua ni halak Israel dorak-dorak hubani Parao, nini sidea ma, “Mase ma sonin ibahen ham hubani jabolonmu?

¹⁶ Seng dong be anggala ibere hubani jabolonmu, hape sai ihatahon sidea do bennami, ‘Bahen batu merah!’ Tonggor ma, hona bogbog do jabolonmu; tapi bangsamu do parsalah.”

¹⁷ Tapi nini ma, “Sabonar parrayoh do hanima. Halani ai do ase ihatahon hanima, ‘Laho ma hita manggalang hubani Jahowa.’

¹⁸ Laho ma hanima marhorja! Seng be bereon bannima anggala, tapi maningon bereonnima do atap sadiha bilangan ni batu merah ai.”

¹⁹ Jadi ididah partua ni halak Israel ma hamagouan ni sidea ai, halani hata ai, “Seng bulih hurangannima bilangan ni batu merah sipaulionnima ai siap arian.”

²⁰ Dob ai jumpah sidea ma si Musa pakon si Aron jongjong paimahon sidea sanggah na luar ai sidea hun lobei ni Parao,

²¹ nini sidea ma dompak sidea, “Jahowa ma na mangidah pakon na manguhum hanima, ai ibahen hanima do hanami gabe hagigi ni Parao pakon juakjuakni, anjaha mambere podang hu tangan ni sidea laho mamunuh hanami.”

²² Jadi idompakkon si Musa ma use Jahowa, nini ma, “Ham Tuhan, mase ma ibahen Ham na masambor hubani bangsa on? Mase ma isuruh Ham ahu hujon?

²³ Ai olat ni dob laho ahu mangadap Parao marsahap marhitei goran-Mu, roh jahatni do pambahenni hubani bangsa on, anjaha seng ipaluah Ham bangsa-Mu.”

6¹ Jadi nini Jahowa ma dompak si Musa, “Idahonmu ma sonari na sihol bahenon-Ku hubani Parao, ai marhitei tangan na gogoh lopasonni ma sidea laho, anjaha marhitei tangan na gogoh juaronni ma sidea hun tanohni.”

Iparatah Naibata Bagah-bagah-Ni pakon Pardilo-Ni bani si Musa

² Marsahap ma use Naibata dompak si Musa, nini ma dompaksi, “Ahu do Jahowa.

³ Domma Hupatalar diring-Ku hubani si Abraham, si Isak pakon si Jakob songon Naibata Pargogoh Na So Tarimbang, tapi goran-Ku Jahowa seng ope Hupatalar hubani sidea.

⁴ Domma homa Hupajongjong padan-Ku pakon sidea sihol mamberehon tanoh Kanaan hubani sidea, ai ma tanoh panginsolatan ni sidea.

⁵ Domma homa Hutangihon dorak-dorak ni halak Israel na pinarjabolon ni halak Masir, anjaha domma Huingat padan-Ku.

⁶ Halani ai hatahon ma hubani halak Israel, ‘Ahu do Jahowa, padaraton-Ku do hanima humbani horja rodi ni halak Masir, paluahon-Ku do hanima humbani parjabolonan ni sidea, anjaha tobuson-

Ku do hanima marhitei tangan na gostong pakon marhitei uhum banggal.

⁷ Jaloon-Ku do hanima gabe bangsang-Ku, anjaha Ahu ma gabe Naibatanim; botohonnima ma Ahu do Jahowa Naibatanim na padaratkon hanima humbani horja rodi ni Masir.

⁸ Anjaha arahkonon-Ku ma hanima hu tanoh na dob Hubulawankon berehonon-Ku hubani si Abraham, si Isak pakon si Jakob. Berehonon-Ku ma ai bahen bagiannima. Ahu do Jahowa.’’

⁹ Dob ai ipatugah si Musa ma sonai hubani halak Israel, tapi lang itangihon sidea si Musa halani sosak ni uhur pakon borat ni parjabolongan ai.

¹⁰ Jadi marsahap ma Jahowa dompak si Musa, nini ma,

¹¹ “Laho ma, hatahon ma hubani Parao, raja ni Masir, ase ipalopas halak Israel mandarat hun tanohni.”

¹² Tapi nini si Musa ma i lobei ni Jahowa, “Tonggor Ham ma, seng anjai itangihon halak Israel ahu; sonaha ma tangihonon ni Parao ahu, ai seng pandei ahu marsahap.”

¹³ Jadi marsahap ma Naibata dompak si Musa ampa si Aron, anjaha ibere ma hubani sidea parentah sihatahonon ni sidea hubani halak Israel pakon hubani Parao, raja ni Masir, ase ipadarat halak Israel hun tanoh Masir.

Tarombo ni Musa pakon si Aron

¹⁴ On ma pangku ni sidea mar sasaompung: Anak ni si Ruben, bunga tubuh ni si Israel: Si Henok, si Palu, si Hezron pakon si Karmi; ai ma ginompar ni si Ruben.

¹⁵ Anak ni si Simeon: Si Jemuel, si Jamin, si Ohad, si Jakin, si Zohar pakon si Saul, tinubuhkon ni boru Kanaan; ai ma ginompar ni si Simeon.

¹⁶ On ma goran ni anak ni si Levi mangihutkon partubuh ni sidea, Si Gerson, si Kahat pakon si Marari. Anggo umur ni si Levi saratus tolu puluh pitu tahun do.

¹⁷ Anak ni si Gerson: Si Libni pakon si Simei mangihutkon partubuh ni sidea.

¹⁸ Anak ni si Kahat: Si Amram, si Izhar, si Hebron pakon si Usiel. Anggo umur ni si Kahat saratus tolu puluh tolu tahun do.

¹⁹ Anak ni si Merari: Si Mahli pakon si Musi. On ma ginompar ni si Levi mangihutkon partubuh ni sidea.

²⁰ Jadi ibuat si Amram ma si Jokebed, namboruni ai, bahen parinangonni, gabe itubuhkon ma si Musa pakon si Aron. Anggo umur ni si Amram saratus tolu puluh pitu tahun do.

²¹ Anak ni si Izhar: Si Korah, si Nefeg pakon si Zichri.

²² Anak ni si Usiel: Si Misael, si Elsapan pakon si Sitri.

²³ Jadi ibuat si Aron ma Eliseba, boru ni si Aminadab, botou ni si Nahason bahen parinangonni, gabe

itubuhkon ma si Nadab, si Abihu, si Eleasar pakon si Itamar.

²⁴ Anak ni si Korah: Si Asir, si Elkana, si Abiasap; on ma ompung ni halak Korah.

²⁵ Jadi ibuat si Eleasar, anak ni si Aron ma sada humbani boru ni si Putiel bahen parinangonni, gabe itubuhkon ma si Pinehas; ai ma pangku ni halak Levi sasaompung mangihutkon marga ni sidea bei.

²⁶ Ai ma si Aron pakon si Musa na pinarsahapkon ni Jahowa, na mangkatahon dompak sidea, “Arahkon ma mandarat halak Israel hun tanoh Masir, iatur bala ni sidea bei.

²⁷ Sidea ma na mangkatahon hubani Parao, raja ni Masir, ase iarahkon halak Israel mandarat hun Masir, ai ma si Musa pakon si Aron.”

²⁸ Jadi bani panorang na marsahap Jahowa hubani si Musa i tanoh Masir,

²⁹ nini Jahowa ma dompak si Musa, “Ahu do Jahowa; padas ma hubani Parao, raja ni Masir, haganup na Huhatahon bam.”

³⁰ Tapi nini si Musa ma dompak Jahowa, “Tonggor Ham ma, seng pandei ahu marsahap, sonaha ma ra tangihonon ni Parao ahu?”

Tanda Halongangan na Binahen ni si Musa pakon si Aron i Lobei ni Parao

7 ¹ Jadi nini Jahowa ma dompak si Musa, “Tonggor ma, domma Hupabangkit ho gabe

Naibata ni Parao anjaha si Aron abangmin gabe nabimu.

² Hatahon ma haganup na dob Huparentahkon in bam; anjaha abangmu si Aron ma padaskon ai hubani Parao, ase ipalopas laho halak Israel hun tanohni.

³ Tapi pahengkengon-Ku ma uhur ni Parao, anjaha age pe Hupabuei tanda pakon halongangan-Ku i tanoh Masir,

⁴ seng tangihonon ni Parao hanima; jadi honahonon-Ku ma tangan-Ku hu Masir anjaha padaraton-Ku ma balang-Ku, bangsang-Ku halak Israel hun tanoh Masir marhitei uhum banggal.

⁵ Jadi botohon ni halak Masir ma Ahu do Jahowa, anggo Hupagostong tangan-Ku dompak Masir anjaha Hupadarat halak Israel hun tongah-tongah ni sidea.”

⁶ Jadi ibahen si Musa pakon si Aron ma songon na pinarentahkon ni Jahowa hubani sidea; sonai do ibahen sidea.

⁷ Ualuh puluh tahun ma umur ni si Musa anjaha umur ni si Aron ualuh puluh tolu tahun, sanggah na marsahap ai sidea pakon Parao.

⁸ Dob ai nini Jahowa ma dompak si Musa pakon si Aron,

⁹ “Anggo ihatahon Parao bannima, ‘Patuduhkon hanima ma marhitei sada tanda halongangan,’ jadi

hatahon ma hubani si Aron, ‘Buat ma tungkotmin, gijigkon ma in hu lobei ni Parao, ase gabe ulog in.’”

¹⁰ Dob ai iparayak si Musa pakon si Aron ma Parao, ibahen sidea ma songon na pinarentahkon ni Jahowa. Igijigkon si Aron ma tungkotni ai hu lobei ni Parao pakon hu lobei ni juakjuakni, jadi gabe ulog ma ai.

¹¹ Dob ai idilo Parao ma halak paruhur pakon datu. Jadi sidea pe, datu ni Masir, ibahen ma sonai marhitei tabas ni sidea.

¹² Ipanggijigkon sidea bei ma tungkotni, jadi gabe ulog ma ai; tapi ibondut tungkot ni si Aron ma tungkot ni sidea ai.

¹³ Gabe hengkeng ma uhur ni Parao, seng itangihon sidea songon na dob hinatahon ni Jahowa hinan.

Uhum na Parlobei: Bah Gabe Daroh

¹⁴ Dob ai nini Jahowa ma dompak si Musa, “Na hengkeng do uhur ni Parao, manjua do ia palahohon bangsa in.

¹⁵ Laho ma ho girah sogod hubani Parao, sanggah laho ia hu bah; jumpahkon ma ia hu topi ni bah ai, anjaha jolom ma ibagas tanganmu tungkot na dob gabe ulog ai.

¹⁶ Hatahon ma hu bani, ‘Jahowa, Naibata ni halak Heber do na marsuruh ahu hu bamu mangkatahon: Lopas ma bangsang-Ku laho, ase iidangi Ahu i

halimisan; hape tonggor ma, seng itangihon ho ronsi nuan.'

¹⁷ Sonon do nini Jahowa, 'Botohonmu ma marhitei tanda on, Ahu do Jahowa; tonggor ma, libaskonon-Ku ma tungkot na ibagas tangankon hu bah na i Bah Nil in, jadi mubah ma in gabe daroh,

¹⁸ jadi matei ma nidurung na ibagas Bah Nil in, gabe marbau ma Bah Nil in anjaha gigian halak Masir manginum bah hun Bah Nil in.'"

¹⁹ Dob ai nini Jahowa ma dompak si Musa, "Hatahon ma bani si Aron, 'Buat ma tungkotmin, pagostong ma tanganmin hu atas ni ganup bah na i tanoh Masir, hu atas ni bah bangga ni sidea, bah angkatan ni sidea, bongbongan ni sidea, bah na ipatumpu sidea, ase gabe daroh haganup,' ase daroh ma jumpah i sab tanoh Masir, ibagas ansubah ampa ibagas gusi.'"

²⁰ Jadi ibahen si Musa pakon si Aron ma songon na tinitahkon ni Jahowa, iangkat ma tungkot ai hu atas, ilibas ma bah na i Bah Nil ai i lobei ni Parao pakon i lobei ni juakjuakni, jadi salih ma ganup bah na i Bah Nil ai gabe daroh.

²¹ Matei ma dengke na i Bah Nil, anjaha marbau ma Bah Nil ai, gabe lang tarinum halak Masir be bah hun Bah Nil; anjaha sab do daroh ai bani haganup tanoh Masir.

²² Tapi ibahen datu ni Masir do homa sonai marhitei tabas ni sidea, gabe lanjar hengken ma uhur ni

Parao, seng itangihon sidea, songon na hinatahon ni Jahowa hinan.

²³ Marhusor ma Parao laho mulak hu rumahni, anjaha seng homa iparuhurhon ai.

²⁴ Jadi inggot Bah Nil ma ihurak ganup halak Masir bah bahen inumon, ai seng tarinum sidea bah hun Bah Nil.

²⁵ Pala do gok pitu ari dokahni ai, dob na ilibas Jahowa bah Nil ai.

Uhum na Paduahon: Tohuk (tiklikan)

8 ¹ Dob ai nini Jahowa ma dompak si Musa, “Laho ma ho mangadap Parao anjaha hatahon ma hu bani, ‘Sonon do hata ni Jahowa, lopus ma laho bangsang-Kin, ase isombah sidea Ahu.

² Tapi anggo mangengkar ho manlopas sidea laho, tonggor ma, arsikun-Ku ma ganup gomgomamu marhitei tohuk;

³ gumayon ma Bah Nil in ibahen tohuk, manangkihi anjaha masuk ma hu rumahmu, hu kamar podoman pakon hu podomanmu, hu rumah ni juakjuak pakon bangsamu, hu tataring pakon hudonmu,

⁴ tangkihon ni tohuk ai ma ho, bangsamu pakon juakjuakmu.”

⁵ Dob ai nini Jahowa ma dompak si Musa, “Hatahon ma bani si Aron, ‘Pagostong ma tanganmu rap pakon tungkotmu hu babou ni sagala bah

banggal, bah angkatan pakon bongbongan, anjaha patangkog ma tohuk ai hu tanoh Masir.”

⁶ Jadi ipagostong si Aron ma tanganni hu babou ni bah i tanoh Masir, gabe tangkog ma tohuk ai anjaha irongkob ma tanoh Masir.

⁷ Dob ai ibahen datu ai ma homa sonai marhitei tabas ni sidea, ipatangkog sidea ma tohuk ai hu tanoh Masir.

⁸ Idilo Parao ma si Musa pakon si Aron, nini ma, “Martonggo ma hanima hubani Jahowa ase ipadaoh tohuk in hum bangku pakon hun bangsanku, hulopas pe bangsa in laho manggalang hubani Jahowa.”

⁹ Nini si Musa ma dompak Parao, “Uhurmu ma mangkatahon antigan ma tonggohononku ham, juakjuakmu pakon bangsamu, ase ipadaoh tohuk ai hun bamu pakon hun rumahmu; pitah i Bah Nil tumang ma tading.”

¹⁰ Nini ma, “Patar ma.” nini si Musa ma, “Songon na hinatahonmu ai ma, ase ibotoh ham, paboa seng dong barang ise na songon Jahowa Naibatanami.

¹¹ Maningon misir ma tohuk ai hun bamu, hun rumahmu, humbani juakjuak pakon bangsamu; pitah ibagas Bah Nil mando tading.”

¹² Kaluar ma si Musa pakon si Aron hun lobei ni Parao, jadi dilo-dilo ma si Musa hubani Jahowa halani tohuk, na pinaroh-Ni ai hubani Parao.

¹³ Jadi ibahen Jahowa ma songon na hinatahon ni si Musa, marmateian ma tohuk ai hun rumah, hun alaman pakon hun juma.

¹⁴ Ipatumpu sidea ma ai margugun-gugun, gabe bau ma tanoh ai.

¹⁵ Jadi dob ididah Parao domma hun lunggar, gabe ipahengkeng ma uhurni, seng ra be ia manangihon sidea songon na hinatahon ni Jahowa hinan.

Uhum na Patoluhon: Siranggang

¹⁶ Dob ai nini Jahowa ma dompak si Musa, “Hatahon ma hubani si Aron, ‘Pagostong ma tungkotmin, pukul ma orbuk ni tanoh in, ase gabe siranggang ma in i sab tanoh Masir.’”

¹⁷ Ibahen sidea ma sonai, ipagostong si Aron ma tanganni pakon tungkotni ai, ipukul ma orbuk ni tanoh ai, gabe marrohan ma siranggang hubani jolma pakon pinahan; ganup orbuk ni tanoh ai gabe siranggang ma i sab tanoh Masir.

¹⁸ Ibahen datu ai ma sonai marhitei tabas ni sidea laho parohkon siranggang namin, tapi seng tarpajadi sidea. Jadi isogopi siranggang ai ma jolma pakon pinahan.

¹⁹ Nini datu ai ma dompak Parao, “Jadi-jadian ni Naibata do in.” Tapi lanjar hengken do uhur ni Parao, seng itangihon hata ni sidea, songon na hinatahon ni Jahowa hinan.

Uhum na Paompatkon: Rongit

²⁰ Dob ai nini Jahowa ma dompak si Musa, “Pagirah ma girah sogod puho laho jongjong i lobei ni Parao, sanggah na laho ia hu bah, anjaha hatahon ma hu bani, ‘Sonon do hata ni Jahowa, Lopas ma bangsang-Ku laho, ase isombah sidea Ahu.

²¹ Tapi anggo seng ilopas ho bangsang-Ku laho, tonggor ma, parohon-Ku ma hubam, hu juakjuakmu, hu bangsamu pakon hu rumahmu rongit, ase gok rongit rumah ni halak Masir pakon tanoh ianan ni sidea.

²² Marhasurungan ma bahenon-Ku bani ari ai tanoh Gosen ianan ni bangsang-Ku, seng anjai dong ijai rongit, ase itanda ho Ahu do Jahowa i tengah-tengah ni tanoh in.

²³ Pajongjongon-Ku ma parbalogan i holangkolang ni bangsang-Ku pakon bangsamu. Patar ma masa tanda ai.”

²⁴ Jadi ibahen Jahowa ma sonai; roh ma marhulan-hulan rongit, hu rumah ni Parao, hu rumah ni juakjuak ronsi hu sab tanoh Masir; bois tumang do tanoh ai ibahen rongit ai.

²⁵ Dob ai idilo Parao ma si Musa pakon si Aron, ihatahon ma, “Ne, galangi hanima ma Naibat анима i tanoh on.”

²⁶ Tapi nini si Musa ma, “Lang malo sonai bahenon, ai pantang ni halak Masir do sigalangkononnam

hubani Jahowa Naibatanami; tonggor ma, anggo igalangkon hanami pantang ni halak Masir i lobei ni sidea, ai lang pargijigon ni sidea ma hanami bani batu?

²⁷ Sihol do hanami laho hu halimisan tolu ari pardalanan daohni, laho manggalang bani Jahowa Naibatanami, songon na hinatahon-Ni hu bennami.”

²⁸ Jadi nini Parao ma, “Hulopas pe hanima laho hu halimisan manggalang bani Jahowa Naibatanima, asal ulang madaohtu hanima laho, anjaha tonggohon hanima ahu.”

²⁹ Dob ai nini si Musa ma, “Tonggor ma, luar ma ahu hun lobeimu on, anjaha hutonggohon ma hubani Jahowa, ase ipadaoh rongit in patar humbani Parao, humbani juakjuak pakon humbani bangsani, asal ulang be iguak-guaki Parao hanami, marhitei na lang manlopas bangsa in laho manggalang bani Jahowa.”

³⁰ Luar ma si Musa hun lobei ni Parao, anjaha martonggo ma ia hubani Jahowa.

³¹ Jadi ibahen Jahowa ma songon na hinatahon ni si Musa, ipadaoh ma rongit ai humbani Parao, ididah juakjuak pakon humbani bangsani, sada pe lang na tading.

³² Tapi ipahengkeng Parao do homa uhurni age sahali on, seng ipalopas laho bangsa ai.

Uhum Palimahon: Bunrung ni Pinahan

9¹ Dob ai nini Jahowa ma dompak si Musa, “Laho ma ho marayak Parao, hatahon ma hu bani, ‘Sonon do hata ni Jahowa Naibata ni halak Heber: Lopas ma laho bangsang-Ku, ase isombah sidea Ahu.

² Ai anggo mangengkar ho manlopas sidea laho anjaha ijolomi ho ope sidea,

³ tonggor ma, mangonai ma tangan ni Jahowa hubani pinahanmu na i sampalan, hubani huda, halode, unta, lembu pakon biribiri, hona bunrung na parah tumang.

⁴ Tapi papuligon ni Jahowa do pinahan ni halak Israel ididah pinahan ni halak Masir, gabe seng dong matei ididah pinahan ni Israel age sada.”

⁵ Dob ai ibuhul Jahowa ma panorangni, nini ma, “Patar ma bahenon ni Jahowa na hinatahon-Ni ai i tanoh in.

⁶ Jadi patarni ai, ibahen Jahowa ma sonai; marmateian ma ganup pinahan ni halak Masir, tapi ididah pinahan ni halak Israel seng dong na matei age sada.

⁷ Isuruh Parao ma na manorih, tonggor ma, seng dong na matei age sada ididah pinahan ni Israel. Tapi lanjar hengkenng do uhur ni Parao, seng ilopas laho bangsa ai.”

Uhum na Paonomkon: Sanggul na Birong

⁸ Dob ai nini Jahowa ma dompak si Musa pakon si Aron, “Buat hanima ma sirabun hun tataring gok tangannima, anjaha isaburhon si Musa ma ai dompak langit i lobei ni Parao.

⁹ Gabe orbuk na alus ma ai i sab tanoh Masir, gabe sanggul na birong banijolma pakon pinahan, gabe bayoh na mapultak bani sab tanoh Masir.”

¹⁰ Jadi ibuat sidea ma sirabun hun tataring, laho ma sidea hu lobei ni Parao, isaburhon si Musa ma ai dompak langit, jadi gabe bayoh na mapultak ampa sanggul na birong ma ai banijolma pakon pinahan.

¹¹ Lang tarbahren datu ai be jongjong i lobei ni si Musa, halani bayoh ai, ai hona bayoh do datu ai pakon ganup halak Masir.

¹² Tapi ipahengkeng Jahowa do uhur ni Parao, gabe seng itangihon sidea, songon na hinatahon ni Jahowa hinan hubani si Musa.

Uhum na Papituhon: Udan Sira-sira

¹³ Dob ai nini Jahowa ma dompak si Musa, “Pagirah ma girah sogod puho laho jongjong i lobei ni Parao, hatahon ma hu bani, ‘Sonon do hata ni Jahowa Naibata ni halak Heber: Lopas ma bangsang-Ku laho, ase isombah sidea Ahu.

¹⁴ Anggo sahali on, parohon-Ku ma ganup uhum-Ku hubagas uhurmu, hubani juakjuak pakon hubani

bangsamu, ase itanda ho, na so adong songon Ahu i sab tanoh on.

¹⁵ Sonari pe boi do pagostongon-Ku tangan-Ku laho mangkonahon hubam pakon hubani bangsamu sampar ase bois ho hun tanoh on;

¹⁶ tapi halani on do ase Hupajongjong ho, ase Hupataridahkon hubam gogoh-Ku, anjaha ase tarambilan goran-Ku hu sab tanoh on.

¹⁷ Sai inunut ho ope mangimbang bangsang-Kin, seng ilopas ho sidea laho.

¹⁸ Tonggor ma, sonon patar parohon-Ku ma udan sira-sira na doras tumang, songon na seng onggama masa i tanoh Masir, olat ni ari parjonamni ronsi nuan.

¹⁹ On pe suruh ma na patumpuhon pinahanmu, haganup na dong bam i sampalan halani haganupjolma pakon pinahan na jumpah i sampalan, na so ipatumpu hu rumah, buaton ni udan sira-sira ma ai, gabe matei.

²⁰ Barang ise ididah juakjuak ni Parao na mangkabiari hata ni Jahowa, isuruh ma lintunjabolonne pakon pinahanni hu rumah.

²¹ Tapi barang ise na so mardiateihon hata ni Jahowa, ipaturut ma jabolonne pakon pinahanni i sampalan.”

²² Dob ai nini Jahowa ma dompak si Musa, “Pagostong ma tanganmu dompak langit, ase roh udan sira-sira hu sab tanoh Masir, hubanijolma,

pinahan pakon hubani ganup suan-suanan i tanoh Masir.”

²³ Jadi ipagostong si Musa ma tungkotni dompak langit, gabe iparoh Jahowa ma longgur pakon udan sira-sira, anjaha roh ma homa apuy hu tanoh on. Dob ai iparoh Jahowa ma udan sira-sira hu tanoh Masir,

²⁴ masa ma udan sira-sira, anjaha apuy pe gara do i tongah-tongah ni udan sira-sira ai, jangan tumang, seng ongg a ope sonai masa i sab tanoh Masir, olat ni na dob sada bangsa Masir.

²⁵ Ibasbas udan sira-sira ai ma haganup na i talun i sab tanoh Masir, jolma pakon pinahan; sonai homa ibasbas udan sira-sira ai do sagala suan-suanan na i juma, anjaha sagala hayu na i harangan mangkarumbak do.

²⁶ Pitah i tanoh Gosen, na niinan ni halak Israel, seng masa udan sira-sira.

²⁷ Dob ai isuruh Parao ma na mandilo si Musa pakon si Aron, nini ma dompak sidea, “Domma mardousa ahu sahali on; na pintor do Jahowa, tapi anggo ahu pakon bangsangku parpipot do.

²⁸ Martonggo ma hanima hubani Jahowa, maparahtu do longgur ni Jahowa pakon udan sira-sira in. Hulopas pe hanima laho, ulang tading ijon be hanima.”

²⁹ Nini si Musa ma dompaksi, “Mandaratkonsi ahu hun huta in, paherbangonku ma tanganku dompak

Jahowa; maronti ma sora ni longgur anjaha udan sira-sira in pe seng roh be, ase itanda ham gok bani Jahowa do tanoh on.

³⁰ Tapi anggo ham pakon juakjuakmu hubotoh hinan do na so mabiar nasiam mangidah Naibata Jahowa.

³¹ Ia kapas pakon omei ripas do, ai runsang ope omei, anjaha marbunga kapas.

³² Tapi seng ripas anggo gandum pakon dali, halani pudian do ai.”

³³ Dob ai luar ma si Musa hun lobei ni Parao hu darat ni huta ai, ipaherbang ma tanganni dompak Jahowa; gabe maronti ma sora ni longgur pakon udan sira-sira ai, anjaha udan pe seng roh be use hu tanoh ai.

³⁴ Tapi dob ididah Parao, na dob maronti udan, sira-sira pakon longgur ai, inunuti ma mardousa, ipahengkeng ma uhurni, sonai homa juakjuakni.

³⁵ Lanjar hengken do uhur ni Parao, seng ilopas laho halak Israel songon na hinatahon ni Jahowa hinan marhitei si Musa.

Uhum na Pauuluhkon: Balang

10 ¹ Dob ai nini Jahowa ma dompak si Musa, “Laho ma ho marayak Parao, ai domma Hupahengkeng uhurni pakon uhur ni juakjuakni ase boi Hubahen sagala tandangkon i tongah-tongah ni sidea,

²anjaha ase boi pajojoronmu hubani anak pakon pahompumu magira na Hubahen in hubani halak Masir pakon tandang-Ku na Hupajongjong in i tongah-tongah ni sidea, ase ibotoh hanima, Ahu do Jahowa.”

³Jadi laho ma si Musa pakon si Aron marayak Parao, nini sidea ma dompaksi, “Sonon do hata ni Jahowa, Naibata ni halak Heber, ‘Sadiha dokah on engkaronmu patoruhkon dirimu i lobei-Hu? Palopas ma laho bangsang-Ku ase isombah sidea Ahu.

⁴Tapi anggo mangengkar ho manlopas bangsang-Ku laho, tonggor ma, parohon-Ku ma patar balang hu gomgomanmu,

⁵rungkubonni ma sisik ni tanoh in, gabe seng boi idahon tanoh in; panganonni ma teba-teba ni udan sira-sira in bannima, anjaha gagatonni ma sagala hayunima na dong tubuh i juma,

⁶gokanni ma rumahmu, rumah ni juakjuakmu pakon rumah ni ganup halak Masir, songon na so onggga ididah bapa pakon ompungnima olat ni na dob adong sidea i tanoh on ronsi nuan.” Dob ai marhusor ma si Musa lanjar luar hun lobei ni Parao.

⁷Nini juakjuak ni Parao ma dompaksi, “Sadiha dokah nari gabe siding halak on banta? Lopas ham ma laho halak in, ase isombah sidea Jahowa, Naibata ni sidea in; seng ope iahap ham na dob seda tanoh Masir?”

⁸ Iboan sidea ma si Musa pakon si Aron hu lobei ni Parao. Nini ma dompak sidea, “Laho ma hanima, sombah hanima ma Jahowa, Naibatanimi; tapi ise do nani deba na laho in?”

⁹ Nini si Musa ma, “Haganup do hanami sihol laho, na maposo pakon na matua, odor rap pakon anak ampa borunami, biribiri pakon lombunami, halani pesta ni Jahowa do sipestahononnam ai.”

¹⁰ Nini ma dompak sidea, “Jahowa ma tongon mangkasomani hanima, anggo hulopas hanima rap pakon dakdanaknima laho. Tonggor ma, atap na jahat do sura-suranimi?”

¹¹ Lang sonai, hanima bagian dalahi ma laho marsombah hubani Jahowa, halani sonai do pangindoannima hinan.” Jadi ipalaho ma sidea hun lobei ni Parao.

¹² Dob ai nini Jahowa ma dompak si Musa, “Pagostong ma tanganmu hu babou ni tanoh Masir parohkon balang, ase naik sidea hu tanoh Masir, anjaha igagati sagala suan-suanan ni tanoh in, sagala teba-teba ni udan sira-sira ondi.”

¹³ Jadi ipagostong si Musa ma tungkotni hu babou ni tanoh Masir, gabe iparoh Jahowa ma logou hun hapoltakan hu tanoh ai layur sadari saborngin; patar ni ai iboban logou na hun hapoltakan ai ma balang ai.

¹⁴ Jadi naik ma balang ai hu sab tanoh Masir anjaha sogop hu ganup gomgoman ni Masir, buei tumang,

seng ongg a ope masa balang na sonai i lobei ni ai, anjaha i pudi ni ai pe seng masa be sonai ai.

¹⁵ Ai irongkob sidea do sisik ni ganup tanoh ai, pala golap tanoh ai ibahen, anjaha ipangan ma ganup suan-suanan ni tanoh ampa ganup buah ni hayu, sagala teba-teba ni udan sira-sira ondi; seng dong be na ratah tading bani hayu atap bani suan-suanan i sab tanoh Masir.

¹⁶ Jadi tarolos ma Parao mandilo si Musa pakon si Aron, nini ma, “Domma mardousa ahu dompak Jahowa, Naibatanim a pakon dompak hanima.

¹⁷ Ai pe, sasap ma dousangkin age sahali on, anjaha martonggo ma hanima hubani Jahowa, Naibatanim a, ase ipadaoh humbangku pitah hamatean on gelah.”

¹⁸ Jadi luar ma si Musa hun lobei ni Parao, martonggo ma ia hubani Jahowa.

¹⁹ Jadi iparoh Jahowa ma logou hun hasundutan doras tumang gabe iluahon ma balang ai anjaha isampakkon hu Laut Sigerger; sada balang pe lang tading bani sab gomgoman ni Masir.

²⁰ Tapi ipahengkeng Jahowa do uhur ni Parao gabe seng ipalopas laho halak Israel ai.

Uhum na Pasiahkon: Golap Marimpot-impot

²¹ Dob ai nini Jahowa ma dompak si Musa, “Pagostong ma tanganmu dompak langit, ase masa

na golap marimpot-impot bani tanoh Masir, ase dadap-dadap halak ibahen na golap ai.”

²² Jadi ipagostong si Musa ma tanganni dompak langit, gabe sogop ma na golap marimpot-impot hu sab tanoh Masir tolu ari dokahni.

²³ Seng ididah atap ise hasomanni anjaha seng dong atap ise na mosor humbani iananni na tolu ari ai; tapi bani ganup halak Israel liar do bani ianan ni sidea.

²⁴ Jadi idilo Parao ma si Musa, nini ma, “Laho ma hanima, sombah hanima ma Jahowa; pitah biribiri pakon lombunima ma na tading, tapi anggo anaknima boi do homa laho rap pakon hanima.”

²⁵ Tapi nini si Musa ma, “Ham pe maningon bereonmu do homa hu tangannami galangan sisayaton pakon galangan situtungan, sigalangkononnami hubani Jahowa, Naibatanami.

²⁶ Pinahannami pe maningon laho do rap pakon hanami; sada tambirik pe lang tading, ai hunjai do buatonnami sisombahkononnami hubani Jahowa, Naibatanami, anjaha seng ibotoh hanami barang aha sombahkononnami hubani Jahowa paima das hanami hujai.”

²⁷ Tapi ipahengkeng Jahowa do uhur ni Parao, gabe seng ilopas sidea laho.

²⁸ Dob ai nini Parao ma dompaksi, “Laho ma ho hun lambungkan, jaga ho, seng boi idahonmu be

bohingku; ai sadari ididah ho bohingku maningon matei ma ho.”

²⁹ Nini si Musa ma, “Songon na hinatahonmu ai ma, seng idahonku be bohimu.”

Lumba-lumba Pasal Uhum na Pasapuluhkon

11 ¹ Dob ai nini Jahowa ma dompak si Musa, “Sada nari ope parohon-Ku uhum hubani Parao pakon hu Masir, dob ai palopasonni ma hanima laho hunjon; sanggah na pinalopasni ai hanima laho, juljulonni do hanima hunjon.

² Hatahon hanima ma hu pinggol ni bangsa in, ase ganup dalahi pakon naboru mangindo humbani huan-kuanni ugas pirak pakon ugas omas.”

³ Domma iojur Jahowa hinan, ase maidop uhur ni halak Masir bani bangsa ai. Si Musa pe halak na sangap tumang do i tanoh Masir ididah juakjuak ni Parao pakon ididah bangsa ai.

⁴ Dob ai nini si Musa ma, “Sonon do hata ni Jahowa, ‘Hira-hira tongah borngin bontason-Ku ma tongah-tongah ni Masir.

⁵ Jadi matei ma ganup bunga tubuh i tanoh Masir, humbani bunga tubuh ni Parao, na hundul i paratasni, das hubani bunga tubuh ni jabolon naboru, na i pudi ni pandudaan pakon ganup bunga tubuh ni pinahan.’”

⁶ Jadi masa ma doruh banggal i sab tanoh Masir, na so onggga masa sonai, anjaha seng anjai masa be sonai.

⁷ Tapi anggo bani haganup halak Israel seng mahua baliang, age sada, sonaijolma pakon pinahan, ase itanda ho naha parpalegan ni Jahowa bani halak Israel humbani halak Masir.

⁸ Anjaha tuad ma ganup juakjuakmu marayak ahu, sombahon ni sidea ma ahu, hatahonon ni sidea ma, “Luar ma ham pakon ganup bangsa in na mangirikkon ham.” Dob salpu sonai luar ma ahu. Dob ai luar ma ia hun lobei ni Parao manringis tumang.

⁹ Dob ai nini Jahowa ma dompak si Musa, “Seng anjai tangihonon ni Parao hanima, ase lambin buei halongangan sibahenon-Ku i tanoh Masir.”

¹⁰ Domma ibahen si Musa pakon si Aron ganup halongangan ai i lobei ni Parao; tapi ipahengkeng Jahowa do uhur ni Parao, gabe seng ilopas halak Israel laho hun tanohni.

Parjadi ni Paskahh

12 ¹ Dob ai nini Jahowa ma dompak si Musa pakon si Aron i tanoh Masir,

² “Bulan on ma gabe parmulaan ni bulan bannima, bulan sada ni tahun ma in bannima.

³ Hatahon hanima ma hubani ganup tumpuan ni Israel sonon, ‘Bani ari sapuluh bulan on ganup ma

hanima mambuat sada anak ni biribiri, marguru hubani buei ni tangga ni sidea mar sasaompung, sada biribiri ganup tangga.

⁴Tapi anggo maotiktu sada tangga, gabe seng tarboiskonsi sada anak ni biribiri, ibuat ma ai rap pakon halak romban rumahni marguru hubani buei nijolma; marguru na tarboiskon ganup ma agakonmu anak ni biribiri ai.

⁵Seng martikas, tunggal anjaha marumur satahun do anak ni biribiri ai; maningon humbani biribiri atap humbani hambing do buatonnima ai.

⁶Anjaha maningon pasirsironnima ma ai das bani ari sapuluh ompat bulan on, dob ai sayaton ni ganup tumpuan ni Israel ma ai malele bod.'

⁷Dob ai maningon buaton ni sidea ma humbani daroh ai, anjaha daiskononni ma ai hubani pasihon na dua ai pakon hubani tohang ni rumah parmanganan ni sidea ai.

⁸Anjaha maningon panganon ni sidea ma bornginni ai na pinanggang hubani apuy; maningon panganon ni sidea ma ai rap pakon ruti na so niigaran ampa lowoh na mapaet.

⁹Lang bulih matah panganonnima ai atap ilompah ibagas bah, tapi maningon panggangon do hubani apuy, uluni, hae-haeni pakon bituhani.

¹⁰Lang bulih teba hunjai das hubani patarni. Porini dong na tading hunjai das hubani patarni, maningon rasogon do hubagas apuy.

¹¹ Sonon ma sibahenonnima laho mangankon ai: Margondit ma binongeinima, naheinima marsipatu, tungkotnima ibagas tangannima; mangoelos ma hanima mangankon ai, ai Paskah ni Jahowa do ai.

¹² Ai bontason-Ku ma bani na saborngin ai tanoh Masir, anjaha Bunuhon-Ku ma ganup bunga tubuh ni tanoh Masir, humbanijolma das hubani pinahan; anjaha dabuhon-Ku ma uhum hubani ganup naibata ni Masir: Ahu do Jahowa.

¹³ Daroh ai ma partandaan bannima i rumah na niiankonnima; anggo Huidah daroh ai laosan-Ku ma hanima, seng sogop be bannima uhum hamagouan, sanggah na Hubogbogi ai Masir.

¹⁴ Ari pardingatan ma ari on bannima, bosarhon hanima ma on bani Jahowa, gabe tonah sisadokah-dokahni ma on bani ginomparnima, sibosarhononnima.

¹⁵ Maningon panganonnima do ruti na so niigaran layur pitu ari; bani ari na parlobei maningon ambukkononnima do na migar hun rumahnima, halani maningon raseionkon do atap ise na mangankon na niigaran humbani ari na parlobei das hubani ari na papituhon.

¹⁶ Bahenonnima ma bani ari na parlobei partumpuan na pansing anjaha bani ari papituhon pe bahenon do partumpuan na pansing; aha pe

lang bulih horjaonkon ijai, pitah sipanganonni bei bulih hoseihononnima.

¹⁷ Maningon dalankononnima do pesta ruti na so niigaran ai, ai bani ari na sasada ai do Hubobahon balanima luar hun tanoh Masir. Halani ai maningon ramotkononnima do ari na sasada on torus hubani ginomparnima, songon tonah sisadokah ni dokahni.

¹⁸ Bani bulan sada, ari sapuluh ompat bodari, panganonnnima ma ruti na so niigaran ai das bani ari dua puluh sada bodari.

¹⁹ Manipat pitu ari seng bulih jumpah na migar i rumahnima, ai raseionkon do humbani tumpuan ni Israel atap ise na mangankon na niigaran, barang panginsolat barang pangisi ni tanoh ai pe ia.

²⁰ Seng bulih panganonnnima na niigaran; pangan hanima ma bani ganup ianannima ruti na so niigaran.”

²¹ Dob ai idilo si Musa ma ganup sintua ni Israel, ihatahon ma hubani sidea, “Pilih anjaha buat nasiam ma anak ni biribiri bani nasiam marguru hubani buei ni nasiam satangga, anjaha sayat nasiam ma Paskah in.

²² Buat nasiam ma sarahutan hisop, sornobkon nasiam ma in hubagas daroh na i pinggan, anjaha daiskon nasiam ma daroh na i pinggan ai hubani tohang pakon hubani pasihon na dua ai; anjaha ulang ma luar nasiam hun labah ni rumah nasiam paima siang ari.

²³ Ai mamontas do Jahowa, laho mambogbog Masir; anggo iidah Jahowa daroh na i tohang pakon na i pasihon na dua ai, gabe laosan ni Jahowa ma labah ai, seng lopason-Ni pangagou ai masuk hu rumah nasiam laho mangagou nasiam.

²⁴ Maningon ramotkonon nasiam ma tonah ai, gabe titah ma ai bani nasiam pakon bani anak nasiam sadokah ni dokahni.

²⁵ Anjaha ia dob das nasiam hu tanoh sibereon ni Jahowa hubani nasiam, songon na hinatahon-Ni ai, maningon dalankonon nasiam do horja on.

²⁶ Anjaha anggo ihatahon anak nasiam bani nasiam, ‘Horja ugama aha do on bani nasiam?’”

²⁷ Hatahon nasiam ma, “Galangan Paskah do in hubani Jahowa, halani ilaosi do rumah ni halak Israel i Masir, sanggah binogbogan-Ni ai Masir, tapi ipaluah do anggo rumahta. Jadi unduk ma bangsa ai anjaha marsombah.”

²⁸ Dob ai laho ma halak Israel anjaha ibahen sidea ma songon na tinonahkon ni Jahowa hubani si Musa pakon si Aron, sonai ma ibahen sidea.

Uhum na Pasapuluhkon: Parmatei ni Bunga Tubuh ni Halak Masir.

Pardarat ni Israel

²⁹ Jadi tongah borngin ibunuh Jahowa ma ganup bunga tubuh i tanoh Masir, humbani bunga tubuh

ni Parao nari, na hundul i paratasni ronsi bunga tubuh ni na tartutup, na ibagas tutupan pakon sagala bunga tubuh ni pinahan.

³⁰ Jadi puho ma Parao borngin ni ai, ia pakon ganup juakjuakni ronsi ganup halak Masir; masa ma doruh bolon i Masir, ai seng dong rumah na so dong na matei ijai.

³¹ Jadi idilo ma si Musa pakon si Aron borngin ni ai, nini ma, “Bingkat ma hanima misir hun tongah-tongah ni bangsangku, age hanima age halak Israel; laho ma hanima, sombah hanima ma Jahowa, songon na hinatahonnima in.

³² Boan hanima ma homa biribiri pakon lombunima, songon na hinatahonnima in, laho ma hanima anjaha pasu-pasu hanima ma homa ahu.”

³³ Jadi ijuljul halak Masir ma bangsa ai ase iolos luar hun tanoh ai, ai nini sidea do, “Matei holi hanami ganup.”

³⁴ Jadi iboban bangsa ai ma nitakni, sanggah lape iigari ope rap pakon balanga panggorenganni ibaluti i atas abarani.

³⁵ Jadi ibahen halak Israel ma songon na hinatahon ni si Musa, ipindo sidea ma humbani halak Masir ugas-ugas pirak, ugas-ugas omas pakon hiou.

³⁶ Ai domma iojur Jahowa halak Masir, ase maidop ni uhur sidea hubani bangsa ai, gabe ibere sidea ma pangindoan ni sidea ai. Sonai ma pangayob ni sidea humbani halak Masir.

³⁷ Ase misir ma halak Israel hun Raemeses hu Sukot, hira-hira onom ratus ribu dalahi bueini na mardalan nahei, legan ni naboru pakon dakdanak.

³⁸ Buei do homa halak na legan tangkog rap pakon sidea, sonai homa biribiri, lombu pakon pinahan, buei tumang.

³⁹ Jadi ilompah sidea ma nitak, na binoban ni sidea hun Masir bahen ruti na so niigaran, halani seng iigari hinan ai, ai na nijuljul do sidea hun Masir gabe seng sompat nanggei sidea, anjaha seng dong homa bohal na legan ipasirsir sidea hinan bani sidea.

⁴⁰ Ia dokah ni halak Israel marianan i Masir ompat ratus tolu puluh tahun do.

⁴¹ Jadi dob salpu na ompat ratus tolu puluh tahun ai, bani ari na sasada ai, luar ma ganup bala ni Jahowa hun tanoh Masir.

⁴² Sada borngin na marjaga-jaga do on bani Jahowa laho paluar sidea hun tanoh Masir; jadi borngin marjaga-jaga ma on bani halak Israel ronsi ginompar ni sidea bahen pardingatan bani Jahowa.

Aturan-aturan na Legan Pasal Paskah

⁴³ Nini Jahowa ma dompak si Musa pakon si Aron, “On ma aturan pasal Paskah in: Seng bulih panganon ni halak na legan hunjin;

⁴⁴ tapi sagala jabolon, na binoli ni duit, boi do panganonni hunjin dob isunat hanima ia.

⁴⁵ Halak panginsolat atap halak upahan seng bulih panganonni hunjin.

⁴⁶ Ibagas rumah ma in ipangan, seng bulih bobanonmu humbani gulei in hu darat ni rumah, anjaha seng bulih ponggolhononnima holi-holini age sada.

⁴⁷ Maningon ganup tumpuan ni Israel mambahen sonai.

⁴⁸ Tapi anggo adong halak na legan tondok bam, anjaha sihol horjahononni Paskah ai bani Jahowa, maningon sunaton lobei sagala dalahi na rapkansi; dob ai pe ase bulih dohor ia laho mangkorjahon ai, ase gabe doskon pangisi ni tanoh in ia. Tapi sagala na so marsunat seng bulih mangankon hunjai.

⁴⁹ Sada ma titah hubani pangisi ni tanoh in pakon hubani halak na legan, na manginsolat i tongah-tongahnima.”

⁵⁰ Jadi ibahen haganup halak Israel ma songon na tinonahkon ni Jahowa hubani si Musa pakon si Aron, sonai do ibahen sidea.

⁵¹ Ase bani ari na sasada ai ma iarahkon Jahowa halak Israel luar hun tanoh Masir romban hubani bala ni sidea.

Parpapansing bani Ganup Bunga Tubuh

13 ¹ Dob ai nini Jahowa ma dompak si Musa sonon,

² “Papansing ma Bangku ganup bunga tubuh na parlobei luar hun parnaibataan i tengah-tengah ni halak Israel, humbanijolma pakon humbani pinahan, Ahu do simada ai.”

³ Jadi nini si Musa ma dompak bangsa ai, “Ingat nasiam ma ari on, parluar nasiam hun Masir, hun rumah parjabolonan, ai marhitei tangan na gogoh do ipaluar Jahowa nasiam hunjai; ulang ipangan nasiam na niigaran.

⁴ Sadari on do nasiam luar bani bulan Abib.

⁵ Anjaha ia dob das nasiam ibobahon Jahowa hu tanoh ni halak Kanaan, Heti, Amori, Hewi pakon Jebusi, na dob binulawankon-Ni hubani ompung nasiam, mamberehon bani nasiam tanoh habaoran ni dadih pakon manisan, sai horjahon nasiam ma horja on bani bulan on.

⁶ Pitu ari ma panganon nasiam ruti na so niigaran, anjaha bani ari papituhon ma pesta bani Jahowa.

⁷ Ruti na so niigaran ma panganon bani na pitu ari ai, seng bulih idahon bani nasiam ruti na niigaran, anjaha seng bulih idahon bani nasiam na migar bani sab gomgoman nasiam.

⁸ Patugah ma hubani anakmu bani ari ai sonon, ‘Halani na binahen ni Jahowa do on bangku sanggah parluarhu hun Masir.

⁹ Gabe partandaan ma in bam i tanganmu anjaha gabe pardingatan i holangkolang ni matamu, ase ibagas pamanganmu titah ni Jahowa, ai Jahowa do

mambobahon ho luar hun tanoh Masir marhitei tangan na gogoh.

¹⁰ Maningon horjahononmu ma titah on bani parjumpah ni panorangni ganup tahun.”

¹¹ Ia dob das ho iboban Jahowa hu tanoh ni halak Kanaan songon na dob binulawankon-Ni bam pakon hubani ompungmu, anjaha iberehon ai bam,

¹² maningon ondskononmu ma hubani Jahowa sagala anak na parlobei luar hun partapaan; sagala tunggal bunga tubuh ni pinahanmu Jahowa do homa simadasi.

¹³ Tapi sagala bunga tubuh ni halode maningon tobusonmu do marhitei anak ni biribiri, atap anggo seng tobusonmu ai, maningon ponggolhononmu do borgokni. Sagala bunga tubuh ni jolma i tengah-tengah ni anakmu maningon tobusonmu do.

¹⁴ Anjaha anggo isungkun anakmu ho magira, “Aha do on? Jadi hatahon ma bani: Marhitei tangan na gogoh ibobahon Jahowa do hanami luar hun Masir, hun rumah parjabolonan.

¹⁵ Ai sanggah na manendel Parao palopas hanami laho, jadi ibunuh Jahowa ma sagala bunga tubuh i tanoh Masir, humbani bunga tubuh ni jolma nari das hubani bunga tubuh ni pinahan. Halani ai do ase hugalangkon sagala bunga tubuh tunggal hubani Jahowa, tapi sagala bunga tubuh i tengah-tengah ni anakku hutobus do.

¹⁶ Bahen partandaan ma in ibagas tanganmu anjaha bahen pardingatan i holangkolang ni matamu, ai marhitei tangan na gogoh do Jahowa paluarhon hanami hun Masir.”

Pardalan i Halimisan das Ronsi Laut Sigerger.

Hombun pakon Apuy na Jongjong

¹⁷ Dob ilopas Parao bangsa ai laho, seng ibobai Jahowa sidea hun dalan na hun tanoh ni halak Palistim age pe dohoran do ai; ai nini Naibata do, “Atap manosal holi bangsa in anggo ididah hamunsuhon, gabe mulak sidea holi hu tanoh Masir.”

¹⁸ Halani ai maringgot ma bangsa ai ibobahon Jahowa hun dalan na hu halimisan dompak Laut Sigerger, anjaha marsinjata bei do halak Israel tangkog hun tanoh Masir.

¹⁹ Iboban si Musa do homa holiholi ni si Josep, ai ipabija hinan do halak Israel, nini do, “Sai na parayakon ni Naibata do nasiam, jadi boban nasiam ma holiholingku hunjon.”

²⁰ Jadi misir ma sidea hun Sukot, anjaha marsaran ma sidea i Etkam bani topi ni halimisan ai.

²¹ Anjaha Jahowa do mardalan i lobei ni sidea, arian marhitei hambun na jongjong mambobahon sidea i dalan ai, ia borngin marhitei apuy na jongjong

bahen suluh bani sidea, ase boi sidea mardalan arian pakon borngin.

²² Seng onggga meret hambun na jongjong ai arian, pakon apuy na jongjong ai borngin hambani bangsa ai.

Tarsosak Halak Israel

14 ¹ Dob ai nini Jahowa ma dompak si Musa, ² “Hatahon ma hubani halak Israel, ase marhusor sidea mulak anjaha marsaran tontang ni Pi-Hahiro, i holangkolang ni Migdol pakon laut, tontang ni Baal-Zefon; tontang ni ai ma hanima marsaran, dohorhon laut.

³ Ai hatahonon ni Parao ma pasal halak Israel, ‘Domma kahou sidea i tanoh ai, domma ihapit halimisan ai sidea.’

⁴ Jadi pahengkengon-Ku ma uhur ni Parao, anjaha pardakdakonni ma sidea, gabe marmulia ma Ahu bani Parao pakon bani ganup balani; tandaon ni Masir ma, Ahu do Jahowa.” Jadi ibahen sidea ma sonai.

⁵ Dob tarbotoh bani raja ni Masir na dob lintun bangsa ai, mubah ma uhur ni Parao pakon juakjuakni dompak bangsa ai, nini sidea ma, “Aha do na binahenta on, ilopas hita do laho halak Israel maluah hambani parjabolonanta?”

⁶ I pasang ma gareta porangni anjaha iarah ma bangsani bingkat rapkansi.

⁷ Iboban ma onom ratus garetu porang na pinilih pakon sagala garetu porang na legan na adong i Masir rap pakon tolu halak bei parmunsuh i atas ni ai ganup.

⁸ Ai ipahengkeng Jahowa do uhur ni Parao, raja ni Masir ai, ase ipardakdak halak Israel, age pe domma luar halak Israel binobahon ni sada tangan na gogoh.

⁹ Iayak halak Masir ma sidea, marhitei sagala huda pakon garetu ni Parao rap pakon na mangkundulisi ampa balani, gabe jumpah sidea ma sidea marsaran dohorhon laut i lambung ni Pi-Hahiroh tontang ni Baal-Zefon.

¹⁰ Dob hun dohor Parao, mangkawah ma halak Israel, jadi tonggor ma, halak Masir roh mardakdak sidea, gabe mabiar tumang ma sidea. Jadi mandoruhi ma halak Israel hubani Jahowa,

¹¹ anjaha nini sidea ma dompak si Musa, “Binahen ni na so dong tanoman i Masir gakni, mambahen na iarahkon ho hanami laho matei i halimisan on? Mase ma sonai pambahenmu bennami, iarahkon ho hanami luar hun tanoh Masir?”

¹² Ai lang ihatahon hanami hinan do hubam i tanoh Masir Sonon, ‘Paturut ma hanami iparjabolon halak Masir, ai dearan do hanami iparjabolon halak Masir, humbani na matei i halimisan.’”

¹³ Jadi nini si Musa ma hubani bangsa ai, “Ulang nasiam mabiar, totap ma uhur nasiam, anjaha

tonggor nasiam ma haluahon ni Jahowa sibahenon-Ni hubani nasiam sadari on; ai halak Masir na niidah nasiam sadari on, seng be idahon nasiam sidea sadokah ni dokahni.

¹⁴ Jahowa do marporang mangkopkop nasiam, anjaha siplah nasiam.”

¹⁵ Dob ai nini Jahowa ma dompak si Musa, “Mase ma doruh-doruh ho hu Bangku? Hatahon ma bingkat halak Israel!

¹⁶ Tapi anggo ho angkat ma tungkotmin, pagostong ma tanganmu hu babou ni laut in, laho manirang bahni, ase boi bontason ni halak Israel laut in mardalan bani na horah.

¹⁷ Tapi anggo Ahu, tonggor ma, pahengkengon-Ku ma uhur ni halak Masir, ase ipardakdak sidea halak Israel gabe marmulia Ahu humbani Parao pakon humbani ganup balani, humbani gareta porangni pakon humbani siajak hudani.

¹⁸ Ase ibotoh halak Masir, Ahu do Jahowa, ia dob marmulia Ahu humbani Parao, humbani gareta porangni pakon humbani siajak hudani.”

Parbois ni halak Masir i Laut Sigerger

¹⁹ Dob ai minsah ma malekat ni Naibata na mardalan i lobei ni bala ni Israel, laho ma ia hu pudi ni sidea; minsah ma pakon hambun na jongjong ai hun lobei ni sidea anjaha jongjong hu pudi ni sidea,

²⁰ roh hu holangkolang ni bala ni Masir pakon bala ni Israel. Ia hambun ai golap do salopah anjaha na salopah nari manorangi borngin ai, gabe seng marsidohoran sidea manipat na saborngin ai.

²¹ Jadi ipagostong si Musa ma tanganni hu babou ni laut ai; anjaha surut ma laut ai ibahen Jahowa marhitei logou hapoltakan na doras manipat saborngin ai, gabe horah ma laut ai anjaha bolah bah ai.

²² Masuk ma halak Israel hu tongah-tongah ni laut, hubani na horah ai, anjaha hira dingding ma bah ai i siamun pakon i sambilou ni sidea.

²³ Dob ai iayak halak Masir ma sidea, masuk hun pudu ni sidea, haganup huda ni Parao, gareta porangni pakon siajak hudani hu tongah-tongah ni laut ai.

²⁴ Jadi bani runda marayak siang ari, ikawahkon Jahowa ma bala ni Masir hambani apuy pakon hambun na jongjong ai, anjaha igeori ma bala ni halak Masir ai.

²⁵ Itogong ma galapang ni gareta ni sidea, gabe mogot-ogot ma sidea. Jadi nini halak Masir ma, “Maporus ma hita hun lobei ni Israel, ai Jahowa do marporang i tongah-tongah ni sidea mangimbang halak Masir.”

²⁶ Dob ai nini Jahowa ma dompak si Musa, “Pagostong ma tanganmu hu babou ni laut in, ase mulak suang bah ai langkob hubani halak

Masir, hubani gareta porangni pakon hubani siajak hudani.”

²⁷ Jadi ipagostong si Musa ma tanganni hu babou ni laut ai, gabe mulak suang ma laut ai malele siang ari hubani dalanni hinan, gabe maporus hubagas bah ai ma halak Masir; sonai ma isampakkon Jahowa halak Masir hu tongah-tongah ni laut ai.

²⁸ Mulak suang ma bah ai anjaha irongkob ma gareta porang, siajak huda pakon ganup bala ni Parao, sagala na mangirikkon halak Israel hubagas laut ai, sahalak pe lang tading humbani sidea.

²⁹ Tapi anggo halak Israel mardalan do bani na horah i tongah-tongah ni laut ai, anjaha gabe dingding bani sidea bah ai i siamun pakon i sambilou ni sidea.

³⁰ Sonai ma halak Israel ipaluah Jahowa bani na sadari ai humbani tangan ni halak Masir, gabe ididah halak Israel ma halak Masir matei i topi ni laut ai.

³¹ Jadi ididah halak Israel ma pambahenan banggal na binahen ni Jahowa hubani halak Masir, gabe mabiar ma bangsa ai bani Jahowa; porsaya ma sidea bani Jahowa pakon bani si Musa juakjuak-Ni ai.

Doding Puji-pujian ni Israel

15 ¹ Jadi ijia idodingkon si Musa pakon halak Israel ma doding on bani Jahowa, nini sidea ma, “Mandoding ma ahu bani Jahowa, ai

marmulia tumang do la; huda pakon na mangajaksi isampakkon do hubagas laut.

² Jahowa do hagogohonku pakon dodingku, anjaha la do hatuahon bangku; la do Naibatanku, pasangaponku ma la, Naibata ni bapangkin, patimbulonku ma la.

³ Puanglima do Jahowa, Jahowa do goran-Ni.

⁴ Isampakkon do gareta porang ni Parao pakon balani hubagas laut; anjaha mogap do puanglima pilihanni ibagas Laut Sigerger.

⁵ Isangkobi bah do sidea; mogap do sidea songon batu hu toruh.

⁶ Marmulia marhitei hagogohon do tangan siamun-Mu, Ham Jahowa; tangan siamun-Mu in do, Ham Jahowa, manropuki munsuh in.

⁷ Marhitei hatimbulon ni hasangapon-Mu iraseihon Ham do na manlawan Ham; ipadalan Ham do ringis-Mu mamboiskon sidea songon anggala.

⁸ Marhitei hosah ni igung-Mu bongbong bah in, jongjong gilumbang songon dingding, himpang sagala bah luhung i tongah-tongah ni laut.

⁹ Nini munsuh ai, 'Huayak, hutangkap ma; bagionku ma taban, sombuh uhurhu mangidah sidea; sintakonku ma podangku, boiskonon ni tanganku ma sidea.'

- ¹⁰ Iombuskon Ham hosah-Mu, gabe ilangkobi laut sidea; mogap sidea songon simbora hubagas bah na majangin.
- ¹¹ Ise ma songon Ham, ale Jahowa, i tongah-tongah ni sagala naibata? Ise ma na songon Ham, marmulia ibagas hapansingon, jombut ibagas pambahenan sipujion, na mambahen halongangan?
- ¹² Dob ipagostong Ham tangan-Mu siamun, ibondut tanoh in ma sidea.
- ¹³ Ibobahon Ham do marhitei habujuron-Mu bangsa na tinobus-Mu, itogu-togu Ham do sidea marhitei hagogohon-Mu hubagas ianan hapansingon-Mu.
- ¹⁴ Ibogei sagala bangsa ma in, gabe gobir sidea; godor ma pangisi ni tanoh Palistim.
- ¹⁵ Tarsonggot ma ijia sagala raja ni Edom, hitir-hitir parkuasa ni Moab; mabiar ganup pangisi ni Kanaan.
- ¹⁶ Madabuh ma hubani sidea songgot-songgot pakon biar; halani hinatimbul ni tangan-Mu, jonong sidea songon batu, paima mandipar bangsa-Mu ale Jahowa, paima mandipar bangsa na tinobus-Mu.
- ¹⁷ Ipamasuk Ham do sidea anjaha isuan Ham do sidea hu dolog Parbagianan-Mu; ianan na pinauli-Mu Jahowa, bahen hundulan-Mu,

ianan hapansingon na ipasuk tangan-Mu,
ale Tuhan.

¹⁸ Jahowa do na manrajai ronsi sadokah ni
dokahni.”

¹⁹ Ai sanggah na bongkot huda ni Parao rap pakon
gareta porangni ampa na mangajaksi hubagas laut
ai, ipasuang Jahowa ma bah ni laut ai, manlangkobi
sidea; tapi mardalan bani na horah do halak Israel i
tongah-tongah ni laut ai.

²⁰ Dob ai roh ma si Miryam sada nabi puang-
puang, botou ni si Aron, ibuat ma sada husapi
bani tanganni; anjaha luar ma ganup puang-puang
mangirikonsi marsijolom husapini anjaha manortor.

²¹ Jadi mandoding ma si Miryam marsibalos-
balosan pakon sidea, “Mandoding ma
nasiam bani Jahowa, ai marmulia tumang
do la; isampakkon do huda pakon na
mangajaksi hubagas laut.”

Mara pakon Elim

²² Dob ai ihatahon si Musa ma halak Israel bingkat
hun Laut Sigerger, jadi laho ma sidea hu halimisan
Sur; tolu ari ma sidea mardalan i halimisan, anjaha
seng jumpahan bah sidea.

²³ Dob ai das ma sidea hu Mara, tapi seng tarinum
sidea bah hun Mara, mapaet do ai; halani ai do ase
igoran ia Mara.

²⁴ Jadi marungut-ungut ma bangsa ai dompak si Musa, nini ma, “Aha ma siinumonnami?”

²⁵ Dob ai doruh-doruh ma ia hubani Jahowa, gabe ipatuduh ma bani sada hayu; igijigkon ma ai hubagas bah ai, gabe matobu ma bah ai. Ijai ma ibere bani sidea sada titah pakon aturan, anjaha ijai ma sidea ilajou,

²⁶ nini ma, “Anggo bujur itangihon ho hata ni Jahowa Naibatamu, anjaha ihorjahon ho na pintor bani uhur-Ni, iparimbagaskon ho titah-Ni, anjaha ilahoi ho sagala aturan-Ni, seng pamasaon-Ku bam age sada naborit, na Hupamasa ai bani Masir, ai Ahu do Jahowa panambarimu.”

²⁷ Dob ai das ma sidea hu Elim; adong do ijai bah tubuh sapuluh dua ampa pitu puluh kambona kurma; jadi marsaran ma sidea ijai i lambung ni bah ai.

Manna pakon Ari Sabat

16 ¹ Dob ai bingkat ma sidea hun Elim, gabe das ma ganup tumpuan ni halak Israel hu halimisan Sin, na i holangkolang ni Elim pakon Sinai, bani ari sapuluh lima, bani bulan dua, dob luar sidea hun tanoh Masir.

² Jadi marungut-ungut ma ganup tumpuan ni halak Israel dompak si Musa pakon si Aron i halimisan,

³ nini ma dompak sidea, “Ambit matei ma namin hanami ibunuh tangan ni Jahowa i tanoh Masir,

sanggah na hundul hanami i lambung ni hudon na marisi gulei, sanggah na bosur hanami mangan ruti; ai iarahkon hanima do hanami luar hu halimisan on laho mamunuh ganup tumpuan on marhitei lohei.”

⁴ Dob ai nini Jahowa ma dompak si Musa, “Tonggor ma, parohon-Ku ma udan ruti bannima hun nagori atas; maningon ma luar bangsa in anjaha ipatumpu ma bohal sungkup-sungkup sadari, ase Hulajou sidea atap irikkonon ni sidea do titah-Ku atap lang.”

⁵ Bani ari paonomkon, sanggah na paulihon na binoban ni sidea ai sidea, gabe lompit dua ma ai marimbang na ipatumpu sidea ari-ari.

⁶ Dob ai nini si Musa pakon si Aron ma dompak ganup halak Israel, “Bodari ma botohon nasiam paboa Jahowa do na paluarhon nasiam hun tanoh Masir,

⁷ anjaha girah sogod idahon nasiam ma hasangapon ni Jahowa, ai domma ibogei parungut-unguton nasiam dompak Jahowa. Ai ise ma hanami mambahen pala nasiam marungut-ungut dompak hanami?”

⁸ Anjaha nini si Musa ma, “Anggo ibere Jahowa gulei panganon nasiam bodari anjaha sogod bosur mangan ruti, halani domma ibogei Jahowa ungut-ungut nasiam, na marungut-ungut ai nasiam dompak-Si -- Ise ma anggo hanami? Seng dompak hanami nasiam na marungut-ungut ai, dompak Jahowa do.”

⁹ Dob ai nini si Musa ma dompak si Aron, “Hatahon ma hubani ganup tumpuan ni Israel, ‘Padohor nasiam ma hu lobei ni Jahowa, ai domma ibogei parungut-unguton nasiam in.”

¹⁰ Jadi sanggah na marsahap si Aron hubani ganup tumpuan ni Israel, idompakkon sidea ma dompak halimisan, anjaha tonggor ma, taridah ma hasangapon ni Jahowa ibagas hambun ai.

¹¹ Anjaha nini Jahowa ma dompak si Musa,

¹² “Domma Hubogei parungut-unguton ni halak Israel, hatahon ma hubani sidea, ‘Bodari mangan gulei ma hanima, anjaha sogod bosuran ma hanima mangan ruti, ase ibotoh hanima, Ahu do Jahowa Naibatanima.”

¹³ Bodari ni ai roh ma marhulan-hulan leto anjaha irongkob ma parbarung-barungan ai, anjaha patarni ai marrageian ma namur inggot parbarung-barungan ai.

¹⁴ Anjaha sanggah manaik namur na marrageian ai, tonggor ma, adong ma marrageian bani halimisan ai songon batu ni ambotik na matah paretekni pakon parhibulni.

¹⁵ Dob ididah halak Israel ai, nini sidea ma samah sidea, “Man Hu” (Aha do on?), ai seng ibotoh sidea atap aha ai. Jadi nini si Musa ma dompak sidea, “On ma ruti na binere ni Jahowa hubani nasiam bahen sipanganon.

¹⁶ On ma hata na tinonahkon ni Jahowa, ‘Patumpu nasiam ma hunjin ganup marguru hubani na sungkup panganonni; satumba sahalak boi buaton nasiam hubani hasomanni salampolampo, marguru hubani buei ni bilangan nasiam.’”

¹⁷ Jadi ibahen halak Israel ma sonai, ipatumpu sidea ma, deba buei deba otik.

¹⁸ Tapi dob isuhata, gabe seng lobihan na patumpuhon na buei ai anjaha seng hurangan na patumpuhon na otik ai; ganup patumpuhon marguru hubani na boi panganonni.

¹⁹ Dob ai nini si Musa ma dompak sidea, “Ulang ma itebai atap ise hunjin das hubani patar.”

²⁰ Tapi seng itangihon sidea si Musa; adong do deba manebai hunjai das hubani patarni, gabe gilokon ma ai anjaha marbau; jadi manringis ma si Musa dompak sidea.

²¹ Ipatumpu sidea ma hunjai siap sogod, marguru hubani na sungkup panganonni bei; tapi anggo milas ma ari, malala ma ai.

²² Bani ari paonomkon dua lompit ma ipatumpu sidea ruti ai, dua tumba sahalak; anjaha dob roh partua-partua ni bangsa ai patugahkon ai hubani si Musa,

²³ nini ma dompak sidea, “On do itonahkon Jahowa, ‘Patar ari parsaranan, Sabat na pansing do bani Jahowa, pamasak nasiam hinan ma sipamasakon nasiam anjaha lompah nasiam hinan

ma silompahon nasiam; tapi sagala na lobih, simpan nasiam ma ai bahen sipanganon nasiam patar.”

²⁴ Jadi isimpan sidea ma ai das hubani patarni, songon na tinonahkon ni si Musa, gabe seng ra masik ai atap gilokon ibagas.

²⁵ Nini si Musa ma, “Pangan nasiam ma in sadari on, ari parsaranan ni Jahowa do sadari on; seng jumpah nasiam in sadari on i ladang.

²⁶ Onom ari patumpuon nasiam in, tapi bani ari papituhon, ari Sabat in, seng dong jumpah ijai.”

²⁷ Bani ari papituhon adong do deba humbani bangsa ai na laho patumpuhon, tapi seng dong jumpahsi.

²⁸ Jadi nini Jahowa ma dompak si Musa, “Sadia dokah on engkaronnima mangkorjahon tonah-Ku pakon titah-Ku?

²⁹ Tonggor ma, domma ibere Jahowa hu bennima ari Sabat, halani ai ibere do bannima bani ari paonomkon ruti haporluan dua ari; ganup hanima tading ma bani iananni bei, ulang adong halak na luar humbani iananni bani ari na papituhon ai.”

³⁰ Jadi marsaran ma bangsa ai bani ari papituhon ai.

³¹ Manna ma ibahen halak Israel goranni ai; songon batu ni hatumbar do rumangni, lopak rupani anjaha daini songon ruti na tinanggulian.

³² Dob ai nini si Musa ma, “On do hata na tinonahkon ni Jahowa, ‘Goki hanima ma satumba

hunjai sisimpanon bani ginomparnima, ase ididah sidea ruti na Hupapangankon bannima i halimisan sanggah na Hupaluar in hanima hun tanoh Masir.”

³³ Jadi nini si Musa ma dompak si Aron, “Buat ma sada tapongan, nahkon ma hujai manna gok satumba anjaha pajongjong ma ai hu lobei ni Jahowa, sisimpanon hubani ginompar nasiam.”

³⁴ Songon na tinonahkon ni Jahowa hubani si Musa, ipajongjong si Aron ma ai i lobei ni poti parpadanan ai bahen pardingatan.

³⁵ Ompat puluh tahun do dokahni ipangan halak Israel manna ai, paima das sidea hu tanoh siianonkon ni sidea ai; sai manna ai do ipangan sidea paima das sidea hu parbalogan ni tanoh Kanaan.

³⁶ Ia satumba (*homer*) saparsapuluh ni satapongan (*Efa*) ma ai.

Massa pakon Meriba

17 ¹ Dob ai bingkai ma haganup tumpuan ni halak Israel hun halimisan Sin, marguru hubani pangkatahon ni Jahowa pardalan ni sidea ai, gabe marsaran ma sidea i Papidim; tapi seng dong bah siinumon ni bangsa ai ijai.

² Jadi itinggili bangsa ai ma si Musa, nini sidea, “Bere bennami bah inumonnam!” Nini ma dompak sidea, “Mase ma tinggilan nasiam ahu? Mase ma lajouon nasiam Jahowa?”

³ Tapi horahan bani bah do bangsa ai ijai, gabe marungut-ungut sidea hubani si Musa, nini, “Mase ma patangkogonmu hanami hun Masir, laho mamunuh hanami, anaknami pakon pinahannami marhitei horah?”

⁴ Jadi doruh-doruh ma si Musa hubani Jahowa, nini ma, “Aha ma bahenonku hubani bangsa on? Narus ma pargijigon ni sidea ahu bani batu.”

⁵ Nini Jahowa ma dompak si Musa, “Mamontas ma ho hun lobei ni bangsa in, arahkon ma deba humbani partua ni halak Israel bahen hasomanmu, jolom ma tungkot na nilibaskonmu hu Bah Nil ondi anjaha laho ma ho.

⁶ Tonggor ma, jongjong pe Ahu ijai i lobeimu i atas ni sada batu gingging i Horeb; anjaha libas ma batu gingging ai, ase luar hunjai bah siinumon bani bangsa in.” Jadi ibahen si Musa ma sonai i lobei ni partua ni Israel.

⁷ Jadi ibahen ma goran ni ianan ai Massa (parlajouan) pakon Meriba (partinggilan), halani partinggilan ni halak Israel ampa halani na ilajou sidea ai Jahowa marhitei na mangkatahon, “I tongah-tongahta do nani Jahowa atap lang?”

Hamonangan Marimbang Halak Amalek

⁸ Dob ai roh ma Amalek marmunsuh dompak Israel i Papidim.

⁹ Dob ai nini si Musa ma dompak si Josua, “Pilih ma banta dalahi anjaha misir ma ho mamorang Amalek; patar jongjong ma ahu i pakpak ni dolog-dolog ai manjolom tungkot ni Jahowa ibagas tanganku.”

¹⁰ Jadi ibahen si Josua ma songon na hinatahon ni si Musa hubani; tapi tangkog ma anggo si Musa, si Aron pakon si Hur hu pakpak ni dolog-dolog ai.

¹¹ Sadokah ipaherbang si Musa tanganni hu babou monang ma Israel, tapi anggo lenduk ma tanganni, monang ma Amalek.

¹² Tapi ngayotan ma tangan ni si Musa; jadi ibuat sidea ma sada batu, inahkon ma hu toruhni, gabe hundul ma ia hujai; roh ma si Aron pakon si Hur manungkol tanganni salopah bei, gabe hot ma tanganni paima sundut mata ni ari.

¹³ Jadi ipatunduk si Josua ma Amalek pakon bangsani marhitei mata ni podang.

¹⁴ Dob ai nini Jahowa ma dompak si Musa, “Suratkon ma in bani sada buku bahen pardingatan, anjaha paingat ma in hubani pinggol ni si Josua; ai sai na sasapon-Ku do barita ni Amalek hun toruh ni langit.”

¹⁵ Ipauli si Musa ma sada anjapanjap anjaha ibahen ma goranni: Jahowa do alatan bangku.

¹⁶ Ai nini do, “Jolom paratas ni Jahowa! Porangon ni Jahowa ma Amalek marsundut-sundut.”

Panohuon ni si Jetro hubani si Musa

18¹ Jadi dob ibogei si Jetro, malim ni Midian, tulang ni si Musa, haganup na binahen ni Naibata bani si Musa pakon hubani Israel bangsani ai, ai ma na pinaluar ni Jahowa halak Israel hun Masir,

² iboan si Jetro, tulang ni si Musa ma si Zippora, parinangon ni si Musa, na dob sinuruhni ai mulak,

³ rap pakon anakni na dua ai; goran ni na sada si Gersom, ai nini do, “Panginsolat do ahu i tanoh na legan;”

⁴ anjaha goran ni na sada nari si Elieser, “Ai Naibata ni bapa do pangurupingku anjaha ipaluah do ahu humbani podang ni Parao.”

⁵ Jadi das ma si Jetro, tulang ni si Musa rap pakon anakni ampa parinangonni ai hubani si Musa i halimisan, hu parsarananni i lambung Dolog ni Naibata.

⁶ Itonahkon ma hubani si Musa, “Domma roh ahu, tulangmu, si Jetro, marayak ho odor rap pakon parinangonmu ampa anakmu na dua in.”

⁷ Jadi luar ma si Musa manjumpahkon simatuani ai, manrogop ma ia anjaha isummah ma ia; dob marsisungkunan sidea pasal hahorason ni sidea bei masuk ma sidea hu lampolampo ai.

⁸ Ipajojor si Musa ma hubani simatuani ai ganup na binahen ni Jahowa hubani Parao pakon hubani

halak Masir, halani halak Israel, ronsi ganup hasunsahan na mangonai hubani sidea i tongah dalan pakon na pinaluah ni Jahowa sidea.

⁹Jadi malas ma uhur ni si Jetro halani haganup na madear, na binahen ni Jahowa bani Israel, na pinaluah-Ni ai sidea hun tangan ni halak Masir.

¹⁰Nini si Jetro ma, “Pinuji ma Jahowa, na paluahkon nasiam hun tangan ni halak Masir pakon hun tangan ni Parao, na paluahkon bangsa on humbani pandondon ni tangan ni halak Masir.

¹¹Sonari ma hubotoh na banggalan do Jahowa humbani haganup naibata, ai hata jungkat ni sidea ihonahon do hubani sidea.”

¹²Jadi igalangkon si Jetro, tulang ni si Musa ma sada galangan situtungan pakon galangan sisayaton hubani Naibata. Jadi roh ma si Aron pakon haganup partua ni Israel laho mangan ruti rap pakon tulang ni si Musa i lobei ni Naibata.

Podah ni si Jetro Pahampung Horja ni si Musa

¹³Patarni ai hundul ma si Musa laho manguhum bangsa ai, gabe jongjong ma bangsa ai i lambung ni si Musa humbani sogod ronsi bod.

¹⁴Tapi dob ididah tulang ni si Musa haganup na binahenni ai hubani bangsa ai, nini ma, “Aha do na binahenmon hubani bangsa in? Mase ho tumang hundul anjaha ganup bangsa in jongjong i lambungmu humbani sogod ronsi bod?”

¹⁵ Jadi nini si Musa ma dompak tulangni ai, “Na roh do bangsa in hu bangku laho manungkun uhum humbani Naibata.

¹⁶ Anggo dong parkara ni sidea, roh ma sidea hu bangku, gabe huuhumi ma sidea anjaha hupabotohkon ma paraturan ni Naibata pakon titah-Ni.”

¹⁷ Jadi nini tulang ni si Musa ma dompaksi, “Seng dear na binahenmin.

¹⁸ Mandatei holi ho, age bangsa on na rap pakon ho, ai maborattu do horja on bam, seng tarhorjahon ho tumang on.

¹⁹ On pe tangihon ma hatangkon, hupodahi ma ho anjaha ihasomani Naibata ma ho. Ho ma siholang ni bangsa in i lobei ni Naibata, anjaha na mamboban parkara ni sidea hubani Naibata;

²⁰ singatkon ma hubani sidea paraturan pakon titah, anjaha pabotohkon ma hubani sidea dalan sidalanan ni sidea ampa horja sihorjahonon ni sidea.

²¹ Tapi pindahi ma humbani ganup bangsa in dalahi na pantas maruhur, sihabiari Naibata, dalahi hatengeran ni uhur, na mangkagigihon sisip; ai ma pabangkit bahen pangintuai, manggomgom sidea mar sasaribu, mar sasaratus, marlima-lima puluh ampa mar sasapuluh.

²² Anjaha sidea ma tongtong manguhumi bangsa in; sagala parkara na borat, hubam ma iboban sidea,

tapi sagala parkara na etek, sidea ma manguhumi, gabe roh hampungni ma horjamu, anggo dihut sidea hasomanmu mamorsan.

²³ Anggo ibahen ho sonai, anjaha iparentahkon Naibata bam sonai, jadi tahan ma ho mandalankon ai, mardamei-damei ma homa ganup bangsa in mulak hu iananni bei.”

²⁴ Jadi itangihon si Musa ma hata ni tulangni ai anjaha ibahen ma ganup na hinatahonni ai.

²⁵ Anjaha ipilih si Musa ma dalahi na pantas humbani ganup Israel, ipabangkit ma sidea gabe pangintuai ni bangsa ai, manggomgom mar sasaribu, mar sasaratus, marlima-lima puluh ampa mar sasapuluh.

²⁶ Sidea ma tongtong manguhumi bangsa ai; parkara na borat iboban sidea ma hubani si Musa, tapi parkara na hampung sidea do manguhumi.

²⁷ Dob ai ilopas si Musa ma tulangni ai laho, gabe mulak ma ia hu tanohni.

Das Halak Israel hu Dolog Sinai

19 ¹ Patolubulankon dob luar halak Israel hun tanoh Masir, bani ari ai das ma sidea hu halimisan Sinai.

² Dob misir sidea hun Papidim anjaha das hu halimisan Sinai, marsaran ma sidea i halimisan ai; ijai do marsaran Israel tontang ni dolog ai.

³ Dob ai tangkog ma si Musa marayak Naibata. Idilohon Jahowa ma hubani hun dolog ai, nini ma, “Sonon ma hatahononmu hubani ginompar ni si Jakob anjaha patugahonmu hubani halak Israel,

⁴ ‘Domma ididah hanima na Hubahen in hubani halak Masir, ampa na Hubobahon in hanima songon i atas ni habong ni manuk-manuk nanggordaha das hu Bangku.

⁵ Ai pe anggo itangihon hanima hatang-Ku, anjaha ihorjahon hanima padan-Kin, gabe Ahu ma simada hanima humbani sagala bangsa, ai gok Bangku do ganup dunia on.

⁶ Gabe harajaon malim-malim ma hanima Bangku anjaha sada bangsa na pansing.’ On ma hata sihatahononmu hubani halak Israel.”

⁷ Jadi roh ma si Musa, idilo ma pangintuai ni bangsa ai, anjaha ipadas ma hubani sidea haganup hata ondi, na tinonahkon ni Jahowa hu bani.

⁸ Anjaha sahata do ganup bangsa ai mambalosi, nini sidea ma, “Haganup na hinatahon ni Jahowa ibahen hanami pe.” Jadi mulak ma si Musa padaskon hata ni bangsa ai hubani Jahowa.

⁹ Dob ai nini Jahowa ma dompak si Musa, “Tonggor ma, na roh ma Ahu marayak ho ibagas hambun na hapal, ase ibogei bangsa ai anggo marsahap Ahu pakon ho, ase porsaya sidea age bam sadokah ni dokahni.” Jadi ipatugah si Musa ma hata ni bangsa ai bani Jahowa.

¹⁰ Dob ai nini Jahowa ma dompak si Musa, “Laho ma ho marayak bangsa ai, uras ma sidea sadari on pakon patar, anjaha suruh ma itaptapi sidea hiou ni sidea.

¹¹ Anjaha sirsir ma sidea bani ari patoluhon; ai tuad ma Jahowa bani ari patoluhon i lobei ni ganup bangsa ai hu atas ni Dolog Sinai.

¹² Anjaha bahen ma bolat-bolat bani bangsa ai inggot, hatahon ma, ‘Jaga hanima ase ulang itangkogi hanima dolog in atap ijamah bonani. Sagala na manjamah dolog in maningon matei do;

¹³ seng bulih dais tangan ni atap ise hujin, maningon gijigon barang panahon ia matei; age pinahan, agejolma seng bulih pagoluhon. Tapi anggo marhata ma tarompit, bulih ma sidea tangkog hu dolog in.”

¹⁴ Dob ai tuad ma si Musa hubani bangsa ai, anjaha iuras ma bangsa ai; sidea pe itaptapi ma hiouni.

¹⁵ Nini ma dompak bangsa ai, “Sirsir ma nasiam managam ari patoluhon ai; ulang ma idohori atap ise parinangon.”

Tungguni ni Partuad ni Jahowa hu Dolog Sinai

¹⁶ Bani ari patoluhon, siangkonsi ari, masa ma longgur, hilap pakon hambun hapal i atas dolog ai ampa sora ni tarompit na gogoh tumang, gabe gobir ma ganup bangsa na i parsaranan ai.

¹⁷ Dob ai ibobahon si Musa ma bangsa ai luar hun parsaranan ai laho manjumpahkon Naibata, jadi jongjong ma sidea i bona ni dolog ai.

¹⁸ Jadi gok timus ganup Dolog Sinai ai, ai ibagas apuy do tuad Jahowa hu atasni, manaik ma timusni ai songon timus ni pamurunan, anjaha ganup dolog ai dugur tumang.

¹⁹ Jadi dob lambin gogohni sora ni tarompit ai, marsahap ma si Musa, gabe ibalosi Naibata ma ia marhitei longgur.

²⁰ Tuad ma Jahowa hu Dolog Sinai, hu pakpak ni dolog ai; idilo Jahowa ma si Musa hu pakpak ni dolog ai, gabe tangkog ma si Musa.

²¹ Dob ai nini Jahowa ma dompak si Musa, “Tuad ma ho anjaha palumba ma bangsa ai, ase ulang majomba sidea marayak Jahowa sihol mangidah, gabe matei sidea buei.

²² Sonai homa malim na roh mandohori Jahowa, iuras ma dirini, ase ulang idorab Jahowa sidea.”

²³ Dob ai nini si Musa ma dompak Jahowa, “Seng tarbahen bangsa in tangkog hu Dolog Sinai, ai domma ipalumba Ham hanami, ‘Hondor dolog in anjaha papansing ma in.’”

²⁴ Nini Jahowa ma dompaksi, “Laho ma ho tuad, tangkog ma ho use rap pakon si Aron; tapi sagala malim pakon bangsa in, ulang ma ijomba hondor ai laho marayak Jahowa, ase ulang hona dorab sidea.”

²⁵ Jadi tuad ma si Musa marayak bangsa ai, anjaha ipatugah ma ai hubani sidea.

Titah na Sapuluh in

20 ¹ Dob ai ihatahon Naibata ma ganup hata on, nini ma,

² “Ahu do Jahowa Naibatamu, na paluarhon ho hun tanoh Masir, hun rumah parjabolonanmu.

³ Lang malo ho marnaibata na legan i lobei ni bohing-Ku.

⁴ Lang malo bahenonmu bam gana-gana, barang suman-suman aha pe na i babou i nagori atas, age na i toruh ibagas tanoh ronsi na ibagas bah i toruh ni tanoh.

⁵ Lang malo sombahonmu in atap balosanmu, ai Ahu do Jahowa Naibatamu. Naibata parsimburu, na mambalaskon hajahaton ni bapa hubani anakni ronsi sundut patoluhon pakon paompatkon, sagala na marsogam ni uhur Bangku.

⁶ Tapi maidop do uhur-Hu bani na marribu-ribu, na mangkaholongi Ahu, na mangkorjahon titah-Kin.

⁷ Lang malo sobutonmu goran ni Jahowa Naibatamu ibagas hampung ni uhur, ai seng apitan ni Jahowa barang ise na manobut goran-Ni ibagas hampung ni uhur.

⁸ Ingat ma papansingkon ari Sabat (parsaranan) in.

⁹ Onom ari ma ho marhorja anjaha mangkorjahon sagala horjamu,

¹⁰ tapi anggo ari papituhon in ari parsaranan ni Jahowa Naibatamu do in. Lang malo bahenonmu ijin age horja aha pe, ho atap anakmu, atap borumu, atap jabolonmu dalahi, atap jabolonmu naboru, ronsi pinahanmu atap halak na legan na ibagas hutamu.

¹¹ Ai ibagas na onom ari do itompa Jahowa langit pakon tanoh pakon laut ampa haganup isini, dob ai marsaran ma la bani ari papituhon ai. Halani ai do ase ipasu-pasu Jahowa ari parsaranan-Ni ai anjaha ipapansing.

¹² Maningon pasangaponmu do namatorasmu, ase dokah ho manggoluh i tanoh na binerehon ni Jahowa bam.

¹³ Ulang ho mamunuh.

¹⁴ Ulang ho marbangkis.

¹⁵ Ulang ho manangko.

¹⁶ Ulang ho ra manaksihon ladung dompak hasomanmu.

¹⁷ Lang malo uhur-uhuranmu rumah ni hasomanmu, lang malo uhur-uhuranmu urang rumah ni hasomanmu, barang jabolonni dalahi barang jabolonni naboru, barang lombuni, barang halodeni atap aha pe ugas ni hasomanmu.”

Biar ni Bangsa ai

¹⁸ Jadi dob ididah bangsa ai longgur, hilap, sora ni tarompit pakon dolog na martimus ai, mabiar

anjaha gobir ma bangsa ai, gabe mandaoh-daoh ma sidea jongjong.

¹⁹ Nini sidea ma dompak si Musa, “Ham ma hasomannami marsahap, itangihon hanami pe; tapi ulang ma Naibata marsahap dompak hanami, ase ulang matei hanami.”

²⁰ Tapi nini si Musa ma dompak bangsa ai, “Ulang nasiam mabiar, ai na manlajou nasiam do ase roh Naibata, ase marhabiaran nasiam hu Bani, ase ulang mardousa nasiam.”

²¹ Jadi mandaoh-daoh ma bangsa ai jongjong; tapi anggo si Musa iparayak do na golap ai, ijai do Naibata.

Titah Pasal Anjapanjap

²² Dob ai nini Jahowa ma dompak si Musa, “Sonon ma hatahon hubani halak Israel, ‘Domma ididah hanima na Huparsahapkon in hanima hun nagori atas.

²³ Lang malo bahenonmu angkup-Ku, naibata pirak atap naibata omas, lang malo bahenonmu in bannima.

²⁴ Bahen ma Bangku sada anjapanjap humbani tanoh, anjaha ijai ma galangkononmu galangan situtungonmu, galangan pardameianmu, biribirimu pakon lombumu; bani sagala ianan na Hupasuk bahen pardingatan bani goran-Ku, hujai do parayakon-Ku ho anjaha pasu-pasuon-Ku ho.

²⁵ Tapi anggo sihol bahenonmu Bangku sada anjapanjap humbani batu, ulang humbani batu na binarbar pauli, ai anggo mangonai bosimu hujai gabe butak ma ai.

²⁶ Anjaha ulang ho marandar naik hu anjapanjap-Kin, ase ulang taridah niabitanmu i atasni.”

Titah Pasal Jabolon Dalahi pakon Jabolon Naboru

21 ¹ “Anjaha on ma paraturan siaturhononmu hu lobei ni sidea.

² Anggo iboli ho sada jabolon halak Heber, onom tahun ma dokahni mangkorja ia bam, tapi bani tahun papituhon maningon maluah sonin ma ia.

³ Anggo sahalak ia roh, sahalak ia ma laho; anggo marrumah tangga ia roh, jadi rap pakon parinangonni ma ia laho.

⁴ Anggo marrumah tangga ia ibahen tuanni, gabe itubuhkon bani anak atap boru, tuanni ai ma simada parinangon ai pakon dakdanak ai, pitah ia tumang do na maluah.

⁵ Tapi anggo gomos hata ni jabolon ai mangkatahon: Holong do uhur hubani tuanku, bani parinangonku ampa bani dakdanakku, seng bangku maluah,

⁶ arahkonon ni tuanni ai ma ia hubani Naibata, arahkononni ma ia hu labah atap hu tiang, anjaha turaon ni tuanni ai ma ia pakon tura-tura, gabe jabolonni ma ia lalab.

⁷ Tapi anggo ijual atap ise boruni bahen jabolon, seng bulih maluah ia songon parluah ni jabolon dalahi.

⁸ Anggo seng iharosuhkon tuanni ai ia, dobkonsi ibahen ia parsondukni, maningon lopasonni do ia tobuson; seng bulih jualhononni ia hubani bangsa na legan, halani na dob mangosei ia.

⁹ Tapi anggo ipatunangankon ia hubani anakni, adat parboruon ma bahenonni hu bani.

¹⁰ Anggo ibuat naboru na legan bani sandiri, seng bulih oruanni sipanganonni, hiouni atap hak parrumahtanggaonni.

¹¹ Tapi anggo seng ibahen uhum na tolu ondi hu bani, maluah sonin ma ia, seng pala marduit panobus.

Titah Pasal Pamunuhan pakon Naborit na Binahen hubani Hasoman

¹² Atap ise na mambogbog halak, gabe matei ia, maningon marutang hosah ia.

¹³ Tapi anggo seng na ginompanganni ia, tapi na pinatongon ni Naibata do ia hu tanganni, Ahu pe patuduhkon ianan haporusanni bam.

¹⁴ Tapi anggo sangaja atap ise mamunuh hasomanni marhitei akal-akal, saradonmu ma ia hun anjapanjap-Ku laho mamunuhsi.

¹⁵ Atap ise na mambogbog bapani atap inangni, maningon marutang hosah ia.

¹⁶ Atap ise na mamangus jolma anjaha ijual, barang jumpah i tanganni, maningon marutang hosah ia.

¹⁷ Atap ise na mamurai bapani atap inangni maningon marutang hosah ia.

¹⁸ Anggo maringor dalahi, anjaha ibogbogi na sada imbangni ai bani batu atap itenju ia, tapi seng pala matei ia, tibal hansa bani podomanni,

¹⁹ jadi anggo boi ma ia jongjong use anjaha mardalani martungkot-tungkot i darat, gabe borsih ma na mambogbogsai ai; pitah halojaonni ma igalar ampa partambarni ronsi malum tumang.

²⁰ Atap ise na mambogbog jabolonni dalahi atap jabolonni naboru bani hayu anjaha matei ibagas tanganni, maningon abulon do ia.

²¹ Tapi anggo manggoluh do sadari atap dua ari nari, seng pala abulonni, ai duitni mando ai.

²² Anggo maringor dalahi, gabe tarbogbogsai sada naboru na boratan rumah, pala saburan rudang, tapi seng mahua hosahni, maningon dondaon ia, marguru hubani pangkatahon ni paramangon ni naboru ai hu bani, anjaha maningon galaronni songon na dob tinontuhon ni panguhum.

²³ Tapi anggo tarmara do, maningon hosah do abul ni hosah.

²⁴ Mata abul ni mata, ipon abul ni ipon, tangan abul ni tangan, nahei abul ni nahei,

²⁵ na matutung abul ni na matutung, uga abul ni uga, na marbulistang abul ni na marbulistang.

²⁶ Anggo ilonsing atap ise mata ni jabolonni dalahi atap jabolonni naboru, pala seda matani, maningon sonai tumang paluahonni ia, abul ni matani ai.

²⁷ Anjaha anggo iropangkon ipon ni jabolonni dalahi atap jabolonni naboru, maningon sonai tumang paluahonni ia, abul ni ipon ai.”

Titah Pasal Naborit na Binahen ni Pinahan hubani Jolma

²⁸ “Anggo idugu lembu jonggi sada dalahi atap naboru, pala matei ia, maningon matei gijigon lembu jonggi ai bani batu, anjaha seng bulih panganon guleini, tapi borsih do simada lembu jonggi ai.

²⁹ Tapi anggo pandugu hinan do lembu jonggi ai nasain dokahni, anjaha domma pinalumba hinan simadasi ai hape lang iramotkon, gabe ibunuh lembu jonggi ai sahalak dalahi atap naboru, maningon matei gijigon lembu jonggi ai bani batu, sonai homa simadasi ai maningon bunuhon.

³⁰ Anggo domma ipaporsankon uhum pardearan bani, maningon bereonni do partobus ni hosahni ai ansa na dob pinaporsankon hu bani.

³¹ Atap anak idugu atap boru, uhum nongkan ai ma sibahenon hu bani.

³² Tapi anggo jabolon dalahi atap jabolon naboru idugu lembu jonggi ai, tolu puluh sekel pirak ma

bereon ni simadasi ai hubani tondokanni ai, anjaha maningon matei gijigon bani batu lombu jonggi ai.

³³ Anggo dong barang ise na patanggak godung, atap anggo dong barang ise na mangkurak godung hape lang irungkup, gabe madabuh hujai sada lombu atap halode,

³⁴ maningon bahenon ni simada godung ai ma pardearan, duit ma paulakonni hubani ompungni ai, tapi anggo bangkeini ai bani ma ai.

³⁵ Anggo idugu lombu jonggi ni sada halak lombu jonggi ni hasomanni, pala matei, jualon ni sidea ma lombu jonggi na manggoluh ai anjaha ibagi bolini ai; lombu jonggi na matei ai pe ibagi sidea ma.

³⁶ Tapi anggo domma binotoh hinan pandugu do lombu jonggi ai nasain dokah, hape seng iramotkon simadasi ai, maningon abulonni do, lombu jonggi abul ni lombu jonggi, bani ma anggo na matei ai.”

Titah pasal Tinangko pakon Pambahenan na Bajan na Legan

22 ¹ “Anggo itangko barang ise sada lombu jonggi atap biribiri, lanjar isayat atap ijual, maningon galaronni lima lombu jonggi abul ni sada lombu jonggi anjaha ompat biribiri abul ni sada biribiri.

² Anggo tardapot panangko mambongkar, gabe tarbogbog pala matei, seng siabulon darohni ai.

³ Tapi anggo domma sompat hasiangan ia, siabulon ma darohni. Maningon bereonni dangdang; anggo seng dong bani, jualon ma ia halani tinangkoni ai.

⁴ Anggo dapot manggoluh ibagas tanganni na tinangkoni ai, lompit dua ma galaronni ai, atap lombu jonggi, halode barang biribiri pe ai.

⁵ Anggo ipagagatkon barang ise pinahanni hu juma atap hu pohon anggur ni halak na legan marhitei na paluahkon pinahanni hujai, maningon bereonni dangdang humbani sijengesan ni jumani pakon humbani sijengesan ni pohon anggurni.

⁶ Anggo rarat apuy, pala igagat hondor, gabe matutung radean barang gandum na jongjong ope barang juma ai, maningon dangdangan ni sipanutung ai ma ai.

⁷ Anggo ipaalimihon barang ise duitni atap ugas-ugasni hubani hasomanni, gabe hona tangko hun rumah ni halak ai, maningon dua lompit ma galaron ni panangko ai, anggo tardapot ia.

⁸ Tapi anggo seng dapot panangko ai, maningon dohoran ni simada rumah ai ma Naibata, atap ia do atap lang na paganjang tanganni hubani ugas ni hasomanni ai.

⁹ Sagala parkara partinggilan mangonai lombu jonggi, halode, biribiri, hiou, atap aha pe na magou, gabe ihatahon na mangkatahon: On ma ia, hu lobei ni Naibata ma boanon parkara ni sidea na

dua ai; anjaha dua lompit ma dangdangan ni na sinalahkon ni Naibata hubani hasomanni ai.

¹⁰ Anggo ipaalimihon barang ise bani hasomanni halode barang lembu jonggi barang atap pinahan aha pe, gabe matei barang ugahan barang itangko halak ai, seng dong na mangidahsi,

¹¹ bija i lobei ni Naibata ma manontuhon i tongah-tongah ni sidea atap na so tanganni do laho hu ugas ni hasomanni ai; iharosuhkon simadasi ai ma ai, tapi seng pala mandangdangi na legan ai.

¹² Tapi anggo itangko panangko hun bani, maningon galaronni do ai hubani simadasi.

¹³ Anggo na iparsilbak binatang do ai, iboan ma ai bahen tanda; seng pala dangdanganni na pinarsilbak ai.

¹⁴ Anggo ipinjam sada halak humbani hasomanni atap aha pe gabe ugahan atap matei, anjaha seng ijai dihut simadasi, maningon dangdanganni do.

¹⁵ Tapi anggo ijai do dihut simadasi seng pala dangdanganni, anggo na niongnos do ai, ongnosni ai ma dangdangni.

¹⁶ Anggo idormai barang ise sada anak boru, na so martunangan ope anjaha ihasomani modom, maningon bereonni bolini mintor, anjaha buatonni ia bahen parinangonni.

¹⁷ Tapi anggo mangengkar tumang do bapani ai mambere boruni ai hu bani, maningon galaronni ma duit ansa buei ni boli ni sada anak boru.

Titah Pasal Dousa na Masambor

¹⁸ Seng bulih pagoluhon puang-puang partondung.

¹⁹ Maningon bunuhon do barang ise na pasaor dirini modom hubani pinahan.

²⁰ Barang ise na manggalang naibata na legan, sobali hubani Jahowa tumang, maningon ripasonkon do.”

Titah Pasal Halak na Porlu Siurupan

²¹ “Seng bulih arsikonmu atap sosakanmu halak pardagang, ai halak pardagang hinan do hanima i tanoh Masir.

²² Seng bulih arsikon puang-puang na mabalu atap anak na tading maetek.

²³ Anggo sai iarsik ho sidea, anjaha doruh-doruh sidea hu Bangku, sai na tangihonon-Ku do doruh-doruh ni sidea ai.

²⁴ Jadi gajag ma ringis-Ku anjaha bunuhon-Ku hanima bani podang, gabe mabalu ma parinangonnima anjaha gabe seng marbapa anaknima.

²⁵ Anggo ipapinjamkon ho duit hubani bangsang-Ku, hubani halak na miskin na i lambungmu, ulang ho songon sipabungahon duit hu bani, ulang bahen marbunga duitmu hu bani.

²⁶ Anggo ijalo ho hiou ni hasomanmu bahen borot, maningon paulakonmu ai hubani paima sundut mata ni ari,

²⁷ ai pitah ai do na manrongkobsi, ai do hiou hubani hulingkulingni, bani aha ma ia modom? Anggo sai doruh-doruh ia hu Bangku, sai tangihonon-Ku do ia, ai paridop ni uhur do Ahu.

²⁸ Seng bulih buraanmu Naibata, anjaha seng bulih pasambor-samboronmu pangintuai ni bangsamu.

²⁹ Seng bulih jolomanmu humbani lobih ni gandum ampa anggurmu. Maningon bereonmu hu Bangku bunga tubuhmu.

³⁰ Sonai ma bahen hubani lombumu pakon biribirimu. Pitu ari dokahni rap pakon indungni, bani ari paualuhkon bere ma hu Bangku.

³¹ Maningon halak na pansing hanima Bangku, halani ai seng bulih panganonnima gulei na pinarsilbak ni binatang i ladang, maningon hubani baliang do gijigkononkon ai.”

Titah Pasal Parsaoran hubani Hasoman Jolma

23 ¹ “Seng bulih pararatonmu barita ladung; anjaha seng bulih urupanmu parsalah gabe saksi hagedukon.

² Seng bulih irikkononmu tahi ni halak simbuei laho manjahati, anjaha seng bulih manaksii ho bani sada paringoran, taruyun bani halak simbuei, laho papeolhon uhum.

³ Na miskin pe seng bulih apitanmu bani paringoranni.

⁴ Anggo jumpah ho lombu ni munsumu atap halodeni kahou, maningon mulak toguonmu ai hu bani.

⁵ Anggo ididah ho halode ni halak na mangkagigihon ho tibal halani sibobanonni, seng bulih paturutonmu tibal, maningon pajongjongonmu do in rap pakon sibobanonni.

⁶ Seng bulih papeolonmu uhum bani halak na miskin na i tongah-tongahmu ibagas parkarani.

⁷ Paholang dirimu hun hata ladung, anjaha ulang bunuh halak na bujur pakon parpintor, ai seng ra Ahu mamintori halak parjahat.

⁸ Seng bulih jaloanmu sisip, ai papitung na marpangidah do sisip, anjaha papeol parkara ni halak parpintor.

⁹ Seng bulih hilangonmu halak dagang, ai ibotoh hanima do uhur ni halak dagang, ai halak dagang do hanima hinan i tanoh Masir.

Paraturan Pasal Sabat pakon Pesta-pesta

¹⁰ Onom tahun dodot tidahanmu tanohmu, anjaha patumpuonmu gogohni,

¹¹ tapi papitu-tahunkon maningon pahalangonmu anjaha patalunonmu, ase boi panganon ni na miskin ni bangsamu hunjai, anjaha na tinebahon ni sidea boi panganon ni binatang na i ladang. Sonai ma

homa bahen hu pohon anggurmu pakon hubani hayu jetunmu.

¹² Ibagas na onom ari ma horjahon horjamu, tapi bani ari papituhon maningon marsaran ho, ase boi manggompang lombumu pakon halodemu, anjaha pahosahkon anak ni jabolonmu pakon halak dagang.

¹³ Parimbagaskon hanima ma haganup na hupatugah bannima. Seng bulih ingat-ingatonnima goran ni naibata na legan, anjaha seng bulih bogeion na sonai ai hun pamangannima.

(ay. 14-19; bd. 34:18-26; 3 Mus. 23; 5 Mus. 16)

¹⁴ Tolu hali ibagas satahun maningon marpesta ho Bangku.

¹⁵ Maningon dalankononmu do pesta ruti na so niigaran; pitu ari dokahni panganonmu ruti na so niigaran, songon na dob hutonahkon bam, bani panorang na dob tinontuhon bani bulan Abib, ai bani bulan ai do ho luar hun tanoh Masir. Ise pe lang bulih mangidah bohing-Ku anggo lumei do tanganni.

¹⁶ Sonai homa pesta pariama, limbuah ni na hinorjahonmu, na tinidahkonmu hu juma, ampa pesta patumpuhon gogoh ni juma bani ujung ni tahun, dob ipatumpu ho na hinorjahonmu hun juma.

¹⁷ Tolu hali ibagas satahun maningon taridah sagala dalahi i lobei ni Jahowa.

¹⁸ Seng bulih galangkononmu daroh ni galangan-Ku rap pakon ruti na so niigaran, anjaha seng bulih tebaan taboh-taboh ni pestang-Ku ronsi patarni.

¹⁹ Maningon boanonmu do limbuah ni tanohmu hu rumah ni Jahowa Naibatamu. Seng bulih lompahonmu anak ni hambing ibagas dadih ni indungni.

Bagah-bagah Pasal Pangondingi ni Naibata i Tongah Dalan Laho hu Tanoh Kanaan

²⁰ “Tonggor ma, sai suruhon-Ku do malekat sada i lobeimu, ase iparorot ho i tongah dalan, anjaha ibobahon ho das hu ianan na dob Hupasirsir bam.

²¹ Sai jaga ma dirimu i lobeini, anjaha tangihon sorani, ulang lawan ia, ai seng marpangulaki uurni bani panlanggaronnima, ai ibagas dirini do goran-Ku.

²² Tapi anggo pongkut itangihon ho sorani anjaha ihorjahon ho ganup na huhatahon, jadi Ahu ma gabe munsuh ni munsuhmu ampa imbang ni imbangmu,

²³ ai mardalan ma malekat-Kin i lobeimu anjaha ibobahon ho masuk hu tanoh ni halak Amori, Heti, Peresi, Kanaan, Hewi pakon Jebusi, anjaha ripaskonon-Ku ma sidea.

²⁴ Sabonar ulang ma ho marsombah hubani naibata ni sidea, atap ibalosi ho sidea, atap ibahen ho romban hubani horja ni sidea, tapi maningon

sasapkononmu do sidea anjaha maningon ropukanmu do gana-gana na pinasuk ni sidea.

²⁵ Maningon balosannima do Jahowa Naibatanimu, jadi pasu-pasuonni ma rutimu pakon bahmu anjaha padaohon-Ku ma naborit-naborit hun tengah-tongahnima.

²⁶ Ulang ma adong na saburan rudang barang na lambang i tanohmu; sai na gokan-Ku do bilangan ni ari-arimu.

²⁷ Sai na suruhon-Ku do panonggoting-Ku i lobeimu, anjaha palutuon-Ku sagala bangsa siparayakonnima, anjaha bahenon-Ku do maporus sagala munsumu humbam.

²⁸ Anjaha suruhon-Ku ma uhum hamagouan i lobeimu, ase ipabali halak Hewi, Kanaan pakon Heti hun lobeimu.

²⁹ Seng ibagas satahun pabalion-Ku sidea hun lobeimu, ase ulang gabe halimisan tanoh in, anjaha manggargar binatang harangan manunsahi ho.

³⁰ Marnunut pe pabalion-Ku sidea hun lobeimu, paima manggompari ho anjaha bagionmu tanoh on.

³¹ Anjaha bahenon-Ku ma parbalogan ni tanohmu hun Laut Sigenger das hu laut ni halak Palistim, anjaha hun halimisan das hu bah Eprat; ai ondskonon-Ku do pangisi ni tanoh ai hu tanganmu, ase ipabali ho sidea hun lobeimu.

³² Seng bulih pajongjong padan ho pakon sidea barang naibata ni sidea.

³³ Seng bulih marianan sidea i tanohmu, ase ulang mardousa ho dompak Ahu ibahen sidea; ai anggo ibalosi ho naibata ni sidea, sai na gabe tirangkap ma ai bam.”

Parpadanan ni Jahowa hubani Israel

24 ¹ Dob ai nini ma dompak si Musa, “Tangkog ma hanima hubani Jahowa, ho pakon si Aron, si Nadab pakon si Abihu, ampa sipitupuluh halak pangituai ni Israel, anjaha mandaoh-daoh ma hanima marsombah hu Bangku.

² Si Musa tumang boi mandohori Jahowa, tapi na legan in ulang ma idohori, anjaha bangsa in pe seng bulih tangkog rap pakonsi.”

³ Dob ai roh ma si Musa, ipajojor ma hubani bangsa ai ganup hata ni Jahowa pakon ganup paraturan-paraturan ai. Jadi sahata ma ganup bangsa ai mambalosi, nini sidea ma, “Ganup hata na pinatugah ni Jahowa sai na bahenonnami do.”

⁴ Jadi isuratkon si Musa ma ganup hata ni Jahowa. Girah ma ia puho patarni ai, ipauli ma sada anjapanjap i bona ni dolog ai pakon sapuluh dua tugu mangihutkon marga ni Israel na sapuluh dua ai.

⁵ Dob ai isuruh ma garama humbani halak Israel, ase igalangkon sidea galangan situtungan pakon lembu bahen galangan pardearan bani Jahowa.

⁶ Ibuat si Musa ma satongah daroh ai, ibahen ma ai hubagas batil, anjaha na satongah nari hu anjapanjap ai do ipispiskon.

⁷ Dob ai ibuat ma pustaha parpadanan ai, ibasahon ma ai i lobei ni bangsa ai, jadi nini sidea ma, “Ganup na hinatahon ni Jahowa, sai na bahenonnnami anjaha tangihononnnami do.”

⁸ Ibuat si Musa ma daroh ai, ipispiskon ma hu bangsa ai, anjaha nini ma, “Tonggor ma, on ma daroh parpadanan na pinatotap ni Jahowa hubani nasiam romban hubani haganup hata nongkan.”

⁹ Dob ai tangkog ma si Musa pakon si Aron, si Nadab pakon si Abihu ampa pangintuai ni halak Israel na pitu puluh halak ai,

¹⁰ gabe ididah sidea ma Naibata ni Israel; adong do i toruh ni Nahei-Ni songon batu intan Sapir tompati anjaha songon langit na liar rupani.

¹¹ Anjaha seng isurdukkon tangan-Ni hubani pangintuai ni halak Israel. Ikawahkon sidea ma Naibata, dob ai mangan anjaha minum ma sidea.

Iulaki si Musa Tangkog hu Dolog

¹² Dob ai nini Jahowa ma hubani si Musa, “Tangkog ma ho hu Bangku, hu atas dolog on, paima ma ijin, ase Hubere bam batu panuratan na marisi titah

pakon paraturan na dob Husurati, sipodahkononmu bani sidea.”

¹³ Jadi marugas ma si Musa pakon si Josua juakjuakni ai, gabe tangkog ma si Musa hu Dolog ni Naibata.

¹⁴ Nini ma dompak pangintuai ai, “Tading ma nasiam ijon paima mulak hanami bani nasiam; anjaha tonggor ma, rap pakon nasiam do si Aron pakon si Hur; barang ise na marparkara, hubani sidea ma ia laho.”

¹⁵ Jadi tangkog ma si Musa hu dolog ai, anjaha irungkub hambun ai ma dolog ai.

¹⁶ Sogop ma hamuliaon ni Jahowa hu atas Dolog Sinai, anjaha irungkub hambun ma dolog ai onom ari dokahni; bani ari papituhon idilo ma si Musa humbagas hambun ai.

¹⁷ Songon apuy na marjimbun do rupa ni hamuliaon ni Jahowa i pakpak ni dolog ai ididah halak Israel.

¹⁸ Jadi masuk ma si Musa hubagas hambun ai laho tangkog hu dolog ai. I dolog ai ma si Musa ompat puluh ari ompat puluh borngin dokahni.

Guguan Padearhon Sada Rumah na Pansing

25

¹ Nini Jahowa ma dompak si Musa,
² “Hatahon ma hubani Israel ase iboban sidea Bangku tumpak bahen galangan, humbani ganup halak niojur ni uhurni jaloonnima tumpak ai Bangku.

³ Anjaha on ma tumpak sijaloonnima humbani sidea: Omas, pirak, tombaga,

⁴ bonang na mahonda, sigenger ampa na gerger tumang, kain linnen alus na niangkup, ambulu ni hambing,

⁵ bobak ni biribiri tunggal na tinubar, bobak ni hambing, hayu nangka,

⁶ minak bani lampu, rompah-rompah pakeion mamminaki pakon manutung dahupa,

⁷ mata intan unam pakon mata intan sitatahkonon hubani baju epod pakon tutup tonton.

⁸ Anjaha maningon bahenon ni sidea Bangku sada ianan na pansing, ase marianan Ahu i tongah-tongah ni sidea.

⁹ Romban hubani haganup na Hupatuduhkon in bam, rumang ni rumah ai pakon parugasni haganup, maningon sonai do bahenonnima.”

Poti Parpadanan

(ay. 10-22: pausih 37:1-9)

¹⁰ “Maningon paulion ni sidea ma sada poti humbani hayu nangka, tongah tolu asta ganjangni, tongah dua asta bolagni anjaha dua asta gijangni.

¹¹ Maningon lampisonmu do ai pakon omas pitah, humbagas pakon hun darat lampisonmu ai, anjaha maningon bahenonmu do bibirni marlais-lais omas inggot.

¹² Maningon tuangonmu do hujin ompat pinggol-pinggol omas, sibahenonmu hubani suhi-ni na ompat ai, dua pinggol-pinggol hu na salopah, dua pinggol-pinggol hubani na salopah nari.

¹³ Pauli ma lanja-lanja humbani hayu nangka, anjaha lampis ma ai bani omas.

¹⁴ Anjaha surukkon ma lanja-lanja ai hubagas pinggol-pinggol na longkot bani poti ai laho mangusung poti ai.

¹⁵ Tapi maningon paturutonmu do lanja-lanja ai ibagas pinggol-pinggol ni poti ai, seng bulih buaton hunjai.

¹⁶ Anjaha maningon pamasukonmu do hubagas poti ai surat hasaksian na sihol berehonon-Ku bam.

¹⁷ Maningon paulionmu homa sada langkob pardearan humbani omas pitah; tongah tolu asta ganjangni anjaha tongah dua asta bolagni.

¹⁸ Anjaha maningon paulionmu dua herub humbani omas, humbani omas na tinopa paulionmu ai, hubani na dua tampakan ni langkob pardearan ai.

¹⁹ Nahkon ma sada herub hu tampakan na sada anjaha sada herub hu tampakan na sada nari; marsada rap pakon langkob pardearan ai paulionmu herub ai bani tampakan na dua ai.

²⁰ Paherbangon ni herub ai ma habongni dompak datas laho manrongkob langkob pardearan ai marhitei habong ni sidea, anjaha padompok sidea;

maningon dompak langkob pardearan ai bohi ni herub ai.

²¹ Anjaha nahkononmu ma langkob pardearan ai hu atas ni poti ai, anjaha pamasuk ma hubagas poti ai surat hasaksian siberehonon-Ku bam.

²² Ijai ma parayakon-Ku ho, anjaha marsahap Ahu pakon ho hun datas ni langkob pardearan ai, hun holangkolang ni herub na dua ai, na i babou ni poti parpadanan ai, pasal haganup sitonahkonon-Ku hubam, sipatugahonmu hubani halak Israel.”

Meja Hatibalan ni Ruti

(ay 23-29: pausih bd. 39:10-16)

²³ “Maningon paulionmu do sada meja humbani hayu nangka, dua asta ganjangni, saasta bolagni anjaha tongah dua asta gijangni.

²⁴ Lampisonmu ma ai pakon omas pitah, anjaha bahenonmu martopi omas inggot.

²⁵ Anjaha bahen ma topini santopap bolagni inggot, ampa laisni humbani omas inggot.

²⁶ Tuang ma ompat pinggol-pinggol omas, sibahenonmu hubani suhini na ompat ai, na bani naheini na ompat ai.

²⁷ Maningon dohor i toruh ni lais ai bahenonmu pinggol-pinggol ai bahen panuruan ni lanja-lanja laho mangusung meja ai.

²⁸ Humbani hayu nangka ma lanja-lanja ai paulionmu anjaha lampis ma ai pakon omas anjaha ai ma ipakei mangusung meja ai.

²⁹ Anjaha bahen ma pinggan bolakni, pingganni, batilni pakon mangkukni bahen panguseian ni galangan siinumon; maningon humbani omas pitah do paulionmu ai.

³⁰ Anjaha maningon nahkononmu tongtong i lobei-Hu bani meja ai ruti sigalargonkon.

Parsuluhan

(ay. 31-39: pausih bd. 37:17-24)

³¹ “Anjaha maningon paulionmu sada parsuluhan humbani omas pitah; sangkimpal parsuluhan ai topaonmu ampa badanni, dangkahni, boltokni, tungkulni pakon bungani.

³² Maningon onom dangkahni luar hun lambungni, tolu dangkah hun salopah ni parsuluhan ai, anjaha tolu dangkah humbani na salopah nari;

³³ martolu boltok songon bunga ni buah pala ganup dangkahni ai bahenonmu martungkul anjaha marbunga, anjaha martolu boltok songon bunga ni buah pala ganup dangkah ai bahenonmu, martungkul anjaha marbunga; sonai ma bahenonmu dangkah na onom ai na luar hun parsuluhan ai.

³⁴ Tapi bani parsuluhan ai maningon ompat do bahenonmu boltokni, songon bunga ni buah pala marhasoman tungkul pakon bunga,

³⁵ anjaha santungkul i toruh ni dua dangkah na luar hunjai, santungkul use i toruh ni dua dangkah na luar hunjai anjaha santungkul nari use i toruh ni dua dangkah na luar hunjai; ase bani na onom dangkah, na luar hunjai ai.

³⁶ Ai maningon luar hunjai do tungkulni pakon dangkahni; ganupan ai ipauli humbani sangkimpal omas pitah.

³⁷ Anjaha bahenonmu do pitu suluhni, sibahenon hu atasni ase marsinalsal ai dompak lobeini.

³⁸ Panurturini pakon pangintopini maningon humbani omas pitah do.

³⁹ Humbani satalenta omas pitah do paulionmu ganupan ai, ronsi parugasni ganup.

⁴⁰ Anjaha ingat ma mambahensi usih hubani usihan na nididahmu i dolog ai.”

Lampolampo na Pansing

(ay. 1-14: pausih bd. 36:8-19)

26¹ “Ia lampolampo ai maningon bahenonmu do humbani sapuluh tirei; humbani hiou silopak na alus, na niangkup pakon humbani bonang na mahonda, na gerger ampa na gerger sahalian; bahen ma ai margombaran herub na tinonunkon.

² Ganjangni sada tirei dua puluh ualuh asta, bolagni ompat asta; sisada sibaran do ganup tirei ai.

³ Lima tirei ai ipadomu ma na sada hubani na sada nari; na lima nari use ipadomu na sada hubani na sada nari.

⁴ Anjaha bahenonmu do tali panangkutan na mahonda hu bibir ni tirei na parlobei ai bani pardomuanni, lanjar sonai do bahenonmu bibir ni tirei na paduahon ai bani pardomuanni.

⁵ Lima puluh tali panangkut bahenonmu bani tirei na sada, anjaha lima puluh tali panangkut bahenonmu bani ujung ni tirei ai bani pardomuanni na paduahon ai; patontang ma tali panangkut ai, na sada hubani na sada nari.

⁶ Anjaha maningon bahenonmu do lima puluh hait-kait omas laho padomuhon tirei na sada hubani hasomanni marhitei hait-kait ai, gabe jadi sada lampolampo ma ai.

⁷ Bahen ma homa tirei hambani ambulu ni hambing sinahkonon i atas ni lampolampo ai; sapuluh sada tirei sisonai bahenonmu.

⁸ Ganjang ni sada tirei tolu puluh asta, bolagni ompat asta; sisada sibaran do tirei na sapuluh sada ai.

⁹ Anjaha padomuonmu do pulig lima tirei, pulig na onom tirei nari, anjaha maningon lompitonmu do tirei na paonomkon sangkan i lobei ni lampolampo ai.

¹⁰ Maningon bahenonmu do lima puluh tali panangkutan bani bibir ni tirei na parujung bani pardomuanni, anjaha lima puluh tali panangkutan bani bibir ni tirei na sada nari, bani pardomuanni na paduahon.

¹¹ Maningon bahenonmu do lima puluh hait-kait tombaga, anjaha haitkononmu ma hait-kait ai hubani tali panangkutan ai laho padomuhon lampolampo ai gabe sada.

¹² Anjaha bagian na teba humbani tirei ni lampolampo ai, sisatongah ni tirei na teba ai, gantung i pudi ni lampolampo ai ma ai.

¹³ Anjaha saasta bani na salopah, saasta bani na salopah nari humbani na teba bani ganjang ni tirei ni lampolampo ai maningon gantung ma ai i lambung ni lampolampo ai; bani na salopah on ampa na salopah nari, laho manutup ai.

¹⁴ Pauli ma sada tutup ni lampolampo ai humbani bobak ni biribiri na pinagerger anjaha i atas ni ai tutup humbani bobak ni hambing.

Papan ni Lampolampo

(ay. 15-25: pausih bd. 36:20-30)

¹⁵ Pauli ma papan ni lampolampo ai humbani hayu angka, jongjong.

¹⁶ Sapuluh asta ganjang ni papan ai, anjaha tongah dua asta bolag ni sada papan.

¹⁷ Maningon mardua pasi ganup papan ai, ase boi parapaton na sada hubani na sada nari; maningon sonai ma ganup papan ni lampolampo ai bahenonmu.

¹⁸ Pauli ma papan bani lampolampo ai; dua puluh papan hampit dangsina.

¹⁹ Bahen ma ompat puluh onjolan pirak i toruh ni na dua puluh papan ai, dua onjolan i toruh ni sada papan bani pasini na dua ai; pakon dua onjolan i toruh ni papan na legan bani pasini na dua ai;

²⁰ anjaha bani na salopah nari na hampit utara dua puluh papan,

²¹ rap pakon onjolan pirak na ompat puluh ai, dua onjolan bei i toruh ni sada papan.

²² Hubani pudi-pudi ni lampolampo ai hampit hasundutan bahen ma onom papan.

²³ Dua papan maningon bahenonmu hu suhi-suhi ni lampolampo ai hampit pudi.

²⁴ Maningon dua lapis ma ai hun toruh, tapi mardomu i atas marhitei sada langgu, sonai ma haduasi bani na dua suhi-suhi ai.

²⁵ Ase maningon adong ualuh papan rap pakon onjolan pirakni, sapuluh onom bueini; dua onjolan bei i toruh ni sada papan.

Ransang ni Lampolampo

(ay. 26-30: pausih bd. 36:31-34)

²⁶ Anjaha maningon bahenonmu do ransangni humbani hayu nangka, lima hubani papan na salopah ni lampolampo ai,

²⁷ lima hubani papan na salopah nari ni lampolampo ai, anjaha lima hubani papan bani pudi-pudi ni lampolampo ai hampit hasundutan.

²⁸ Ransang partongah-tongah, na bani parsitongahan ni papan ai, maningon torus hun suhi-suhi na sada hu suhi-suhi na sada nari.

²⁹ Maningon laponmu do papan ai pakon omas, pinggol-pinggolni pe humbani omas do bahenonmu ase hujai ipamasuk ransang ai; ransang ai pe maningon laponmu do pakon omas.

³⁰ Maningon pajongjongonmu do lampolampo ai usih hu bani tiruan na nididahmu i dolog ai.”

Tirei ni Lampolampo

(ay. 31-37: pausih bd. 36:35-38)

³¹ “Dob ai maningon bahenonmu do sada tirei humbani bonang na mahonda, na gerger pakon na gerger sahalian pakon humbani hiou silopak, na alus na niangkup; margombaran herub bahenonmu ai, na tinonunkon jenges hujai.

³² Maningon bahenonmu do ompat tiangni humbani hayu nangka na nilapis pakon omas,

marhait-kait omas, anjaha ipajongjong i atas ni ompat onjolan pirak.

³³ Maningon gantungkononmu do tirei ai hampit toruh bani hait-kait ai, anjaha pamasuk ma hujai, hubagas tirei ai, poti parpadanan ai; anjaha tirei ai ma parholangan bennima i holangkolang ni na panging pakon ianan sipansingan ai.

³⁴ Anjaha nahkon ma langkob pardearan ai hu atas ni poti parpadanan ai ibagas ianan sipansingan ai.

³⁵ Tapi anggo meja ai i darat ni tirei ai do bahenonmu, anjaha parsuluhan ai bani lopah ni lampolampo ai hampit dangsina tontang ni meja ai; ase hampit utara ma bahenonmu meja ai.

³⁶ Anjaha maningon bahenonmu do homa tirei bahen tutup ni labah ni lampolampo ai humbani bonang na mahonda, na gerger, na gerger sahalian pakon humbani kain linnen alus na niangkup, na tinonunkon.

³⁷ Anjaha maningon bahenonmu do lima tiang humbani hayu nangka hubani tirei ai anjaha lapijonmu pakon omas; hait-kaitni omas, anjaha tuang ma lima onjolanni humbani tombaga.”

Anjapanjap ni Galangan Situtungan

(ay. 1-8: pausih bd. 38:1-7)

27¹ “Bahen ma sada anjapanjap humbani hayu nangka, lima asta ganjangni, lima asta

bolagni; maningon marompat suhi anjapanjap ai anjaha tolu asta gijangni.

² Bahen ma tandukni bani suhi-suhi na ompat ai; sada ma ai pakon tandukni ai, anjaha laponmu do ai bani tombaga.

³ Bahen ma parabuananni, sujuk-sujukni, mangkukni, garpuni pakon parapuyanni; humbani tombaga ma ganup pauli parugasni ai.

⁴ Bahen ma homa hondor-hondorni humbani tombaga na iangit, anjaha bahen ma hubani jala ai ompat pinggol-pinggol tombaga hubani suhi-suhi na ompat ai.

⁵ Bahen ma hondor-hondor ai i toruh ni topi ni anjapanjap ai, das hubani parsitongahan ni anjapanjap ai.

⁶ Anjaha maningon bahenonmu do lanja-lanja bani anjapanjap ai, lanja-lanja humbani hayu nangka, anjaha laponmu do ai bani tombaga.

⁷ Pamasukon ma lanja-lanja ai hubagas pinggol-pinggol ai, ase marlanja-lanja ma angkup anjapanjap ai, sanggah mangusung.

⁸ Pauli ma ai marruang, marpapan; songon na dob pinatuduhkon bam i dolog ai, sonai ma bahen.”

Alaman ni Lampolampo

(ay. 9-19: pausih bd. 38:9-20)

⁹ Bahen ma alaman ni lampolampo ai; martirei humbani hiou silopak na alus, na niangkup ma

bahen alaman ai hampit dangsina, saratus asta ganjangni bani na salopah;

¹⁰ dua puluh tiangni anjaha ondolanni dua puluh, humbani tombaga, tapi hait-kait ni tiang ai ampa ransang-ransangni pirak do.

¹¹ Sonai homa mangihutkon ganjangni hampit utara maningon martirei do, saratus asta ganjangni, tiangni dua puluh anjaha onjolanni dua puluh, humbani tombaga; tapi hait-kait ni tiangni ampa ransang-ransangni pirak do.

¹² Anggo buha ni alaman ai hampit hasundutan maningon martirei do, lima puluh asta ganjangni, sapuluh tiangni anjaha sapuluh onjolanni.

¹³ Buha ni alaman ai hampit hapoltakan lima puluh asta do.

¹⁴ Anjaha sapuluh lima asta ganjang ni tirei ai bani salopah hampit horbangan ai, tolu tiangni anjaha tolu onjolanni.

¹⁵ Bani na salopah nari pe sapuluh lima asta ganjang ni tireini, tolu tiangni anjaha tolu onjolanni.

¹⁶ I lobei ni horbangan ni alaman ai maningon adong do tirei dua puluh asta ganjangni humbani bonang na mahonda, na gerger pakon na gerger sahalian pakon humbani hieu silopak na alus, na niangkup anjaha na tinonunkon, tiangni ompat anjaha onjolanni ompat.

¹⁷ Ganup tiang ni alaman ai inggot maningon mardomu marhitei ransang-ransang pirak pakon hait-kait pirak anjaha onjolanni tombaga do.

¹⁸ Ganjang ni alaman ai saratus asta, bolagni lima puluh asta, anjaha gijangni lima asta, martirei humbani bonang na niangkup, tapi onjolanni tombaga do.

Parugas na Pansing pakon Minak ni Parsuluhan

¹⁹ Ganup parugas na pinakei bani lampolampo ai laho mandalankon horja na marbagei-bagei ai, ronsi haganup pakuni pakon ganup paku ni alaman ai maningon humbani tombaga do.

²⁰ Parentahkon ma hubani halak Israel, ase iboban sidea hubam minak jetun pitah na niduda, bahen minak ni parsuluhan ai, ase tongtong gara parsuluhan ai,

²¹ ibagas lampolampo partumpuan ai, i darat ni tirei ai, na i lobei ni poti parpadanan ai; maningon nahitan ni si Aron pakon anakni parsuluhan ai, olat ni bodari ronsi patarni ai i lobei ni Jahowa. Ai ma aturan na totap sadokahni-dokahni bani halak Israel ronsi ginompar ni sidea.”

Aturan Pasal Pakeian ni Malim

28 ¹ “Anjaha hatahon ma si Aron abangmin roh hubam, rap pakon sagala anakni ai luar hun tengah-tengah ni halak Israel, laho mambalosi Ahu

gabe malim Bangku, ai ma si Aron pakon anakni si Nadab, si Abihu, si Eleasar pakon si Itamar.

² Bahen ma pakean na pansing hubani si Aron abangmin bahen hamuliaon pakon bahen jagar-jagar.

³ Hatahon ma hubani haganup halak na pentar maruhur, sagala na dob Hugoki uhurni bani tonduy hapentaran, ase sidea padearhon pakean bani si Aron laho papansingkonsi, ase ia gabe malim Bangku.

(ay. 4-30: pausih bd. 39:1-21)

⁴ On ma pakean sipadearon ni sidea: Sada tutup tonton, sada baju epod, sada baju pardarat, sada baju parbagas na sinulam, sada gotong pakon sada gondit; maningon sidea do paulihon pakean na pansing bani si Aron abangmin pakon bani anakni in, ase ia gabe malim Bangku.

⁵ Buaton ni sidea ma hujai omas, bonang na mahonda, na gerger anjaha na gerger sahalian pakon hiou silopak na alus na niangkup.

Pakeian Jabatan ni Sintua ni Malim

⁶ Anjaha maningon padearon ni sidea do baju epod ai humbani omas, humbani bonang na mahonda, na gerger pakon na gerger sahalian pakon humbani hiou silopak na alus na niangkup.

⁷ Maningon adong dua tutup abara ni epod ai, na mardomu hubani ujungni na dua ai, ase gabe sada.

⁸ Gondit ni epod na i atas ni ai pe, na gabe panangkut ni ai, maningon sarupa pulunganni anjaha mardomu hujai, humbani omas, humbani bonang na mahonda, na gerger, na gerger sahalian pakon humbani hiou silopak na alus na niangkup.

⁹ Maningon buatonmu do dua mata intan Kerisopras anjaha uhirhononmu hujai goran-goran ni anak ni Israel na sapuluh dua ai,

¹⁰ onom goran ni sidea ai bani mata intan na sada, anjaha goran na onom nari hubani mata intan na sada nari, mangihutkon partubuh ni sidea.

¹¹ Songon tuhang uhir na manguhir tintin tokan, sonai ma uhironmu goran ni anak ni Israel hubani batu na dua ai, anjaha marhait-kait omas bahen inggot.

¹² Dob ai bahen ma na dua mata intan ai hubani na dua tutup abara ni epod ai bahen batu pardingatan hubani halak Israel; anjaha maningon bobanon ni si Aron i atas ni abarani na dua ai goran-goran ni sidea i lobei ni Jahowa bahen pardingatan.

¹³ Maningon bahenonmu do hait-kaitni humbani omas,

¹⁴ ampa dua rantei humbani omas pitah, na niangkup songon tali, anjaha haitkon ma rantei na niangkup ai hubani hait-kait ai.

¹⁵ Anjaha bahenonmu do sada tutup tonton panguhumion, na pinauli jenges; dos songon padearhon epod bahenonmu ai, humbani bonang

na mahonda, na gerger ampa na gerger sahalian, pakon humbani hiou silopak na niangkup.

¹⁶ Maningon marompat suhi do ai anjaha dua lapis, sanjongkal ganjangni anjaha sanjongkal bolagni.

¹⁷ Maningon tatahkononmu do hujai ompat ristei batu intan. Bani ristei parlobei, batu intan sardis, topasion pakon samarah;

¹⁸ bani ristei na paduahon, batu intan rubin, sapir pakon diamant;

¹⁹ bani ristei na patoluhon, batu intan opal, achat pakon ametis;

²⁰ bani ristei na paompatkon, batu intan korisolit, unam, pakon jaspis; maningon marpanangkutan omas bahenon batu intan na tinanahkonni ai.

²¹ Maningon adong sapuluh dua batu margoran bei mangihutkon goran-goran ni anak ni Israel; songon tintin tokan ma ai bani na sapuluh dua marga ai, goran ni sidea bei iuhirhon hujai.

²² Anjaha maningon bahenonmu hubani tutup tonton ai rantei songon tali na niangkup humbani omas pitah;

²³ anjaha bahenonmu do hubani tutup tonton ai dua tintin omas, anjaha nahkon ma na dua tintin ai hubani na dua tampakan ni tutup tonton ai.

²⁴ Anjaha maningon nahkononmu do na dua rantei omas ai hubagas na dua tintin na bani ujung ni tutup tonton ai;

²⁵ haduasi ujung ni na dua rantei ai maningon haitkononmu do ai hubani na dua hait-kait ai, anjaha nahkononmu do ai hubani tutup abara ni baju epod ai hampit lobei.

²⁶ Maningon bahenonmu do dua tintin omas anjaha nahkon ma ai bani na dua ujung ni tutup tonton ai, bani topini hampit bagas padompak pakon baju epod ai.

²⁷ Ambah ni ai maningon bahenonmu ope dua tintin omas sinahkononkon hubani na dua tutup abara ni baju epod ai, hampit toruh, dompak lobei, tongon bani pardomuanni, i atas ni gondit ni baju epod ai.

²⁸ Anjaha maningon sangkutkonon ni sidea do tutup tonton ai rap pakon tintinni ai hubani tintin ni baju epod ai marhitei bonang na mahonda, ase longkot ai i atas ni gondit ni baju epod ai anjaha ase ulang boi sirang tutup tonton ai humbani baju epod ai.

²⁹ Jadi sonai ma bahenon ni si Aron goran-goran ni Israel i atas ni pusu-pusu ibagas tutup tonton panguhumion ai, anggo laho ia masuk hubagas ianan na pansing ai, bahen pardingatan tongtong i lobei ni Jahowa.

³⁰ Anjaha maningon bahenonmu do hubagas tutup tonton panguhumion ai Urim pakon Tumim, maningon i atas ni pusu-pusu ni si Aron do ai anggo masuk ia hu lobei ni Jahowa; sonin ma tongtong

boanon ni si Aron panguhumion ni halak Israel i atas ni pusu-pusu i lobei ni Jahowa.”

Baju Pardarat ni Epod

(ay. 31-35: pausih bd. 39:22-26)

³¹ “Anjaha maningon bahenonmu do baju pardarat ni epod ai, humbani bonang na mahonda ganup.

³² I tongah-tongahni ma parborgokanni, martopi na tinonun inggot songon topi ni baju partohonan, ase ulang ra marigat.

³³ Maningon bahenonmu hu rambuni ai inggot, buah ni dalima humbani bonang na mahonda, na gerger anjaha na gerger sahalian pakon giring-giring omas i tongah-tongahni ai inggot,

³⁴ giring-giring omas sada, dob ai buah ni dalima, giring-giring omas sada, dob ai buah ni dalima, sonai ma inggot bani rambu ni baju pardarat ai.

³⁵ Maningon sorungkonon ni si Aron baju-baju ai anggo marugas ia, ase tarbogei sora ni giring-giring ai sanggah masuk ia hu lobei ni Jahowa, hubagas ianan na pansing ai ampa sanggah luar ia, ase ulang matei ia.

Tutup Pardompakan

(ay. 36-38: pausih bd. 39:30-31)

³⁶ Maningon paulionmu homa sada tutup pardompakan humbani omas pitah, anjaha

uhirhononmu hujai songon panguhiron bani tintin tokan: Pinapansing bani Jahowa.

³⁷ Anjaha maningon longkotkononmu do ai marhitei bonang na mahonda hubani gotong ai; maningon i lobei ni gotong ai do ai.

³⁸ Maningon bani pardompakan ni si Aron ma ai, ase boi si Aron mamorsan hahurangan ni ganup galangan na pansing, na dob pinapansing ni halak Israel gabe sibere-bere na pansing ni sidea; maningon totap ma ai i pardompakanni ase dapotan idop ni uhur halak Israel i lobei ni Jahowa.
(ay. 39-42: pausih bd. 39:27-29)

³⁹ Maningon paulionmu do baju parbagas ai humbani hiou silopak na alus, anjaha sada gotong humbani hiou silopak na alus bahenonmu, tapi anggo gonditni maningon humbani na tinonun do bahenonmu.

Pakeian ni Malim Ari-ari

⁴⁰ Bani anak ni si Aron pe maningon paulionmu do baju-baju parbagas, gondit pakon tangkuluk bahen hamuliaon pakon pajagarhon.

⁴¹ Maningon sorungkononmu do ai hubani si Aron abangmin pakon hubani sagala anakni na rapkonsi, anjaha maningon minakanmu do sidea, gokanmu tangan ni sidea anjaha papansingonmu sidea ase sidea gabe malim Bangku.

⁴² Anjaha bahenonmu do bani sidea saluar humbani hiou silopak na alus manrongkob daging ni sidea na talar olat ni ulu ni towod ronsi binongei ganjangni.

⁴³ Maningon pakeion ni si Aron pakon anakni ai do ai laho masuk sidea hubagas lampolampo partumpuan ai atap laho dohoran ni sidea anjapanjap ai sihol marugas bani ianan na pansing ai, ase ulang marsalah sidea gabe matei sidea. Ai ma aturan na hot sadokah ni dokahni bani halak Israel ronsi ginompar ni sidea i pudini.”

Aturan Mangondoskon Jabatan hubani Malim

(ay. 1-35: pausih 3 Mus. 8:1-32)

29 ¹ “Anjaha on ma partureini bahenonmu hubani sidea laho papansingkon sidea gabe malim Bangku: buat ma sada anak ni lembu pakon dua biribiri tunggal na so martikas;

² pakon ruti na so niigaran, ruti gemong na so niigaran na niagu pakon minak pakon lopat na so niigaran na marlapu minak. Maningon humbani itak na alus paulionmu in.

³ Nahkon ma ai hubagas sada raga anjaha ibagas raga ai ma ai galangkon rap pakon anak ni lembu pakon biribiri na dua ai.

⁴ Boan ma si Aron pakon anakni ai dohor hu labah ni lampolampo partumpuan ai, anjaha paridi ma sidea bani bah.

⁵ Anjaha buat ma pakean ai, sorungkon ma ai hubani si Aron, baju-baju parbagas, baju-baju pardarat, baju epod pakon tutup tonton ai, anjaha gonditkon ma bani gondit ni baju epod ai.

⁶ Nahkon ma gotong ai hu atas ni uluni anjaha longkotkon ma sortali hapansingon ai hubani gotong ai.

⁷ Buat ma minak siminakkonon ai anjaha useihon ma ai hubani uluni laho mamminakisi.

⁸ Hatahon ma homa anakni ai roh hun dohor anjaha sorungkon ma baju parbagas ai hubani sidea;

⁹ gonditkon ma gondit ai hubani sidea, hubani si Aron pakon hubani anakni ai, anjaha tangkuluk ai longkotkon ma hubani ulu ni sidea; jadi ondos ma hamalimon ai hubani sidea marhitei aturan sisadokah ni dokahni. Sonin ma parpabangkitmu bani si Aron pakon anakni ai.

¹⁰ Dob ai boban ma lembu jonggi ai hu lobei ni lampolampo partumpuan ai. Itampeihon si Aron pakon anakni ai ma tanganni hu atas ni ulu ni lembu jonggi ai.

¹¹ Anjaha bunuhon ma lembu jonggi ai i lobei ni Jahowa, bani labah ni lampolampo partumpuan ai.

¹² Buat ma deba humbani daroh ni lembu jonggi ai, daiskon ma ai hubani tanduk ni anjapanjap ai marhitei jari-jarimu; tapi duruskon ma daroh na teba ai bani nahei ni anjapanjap ai.

¹³ Buat ma ganup taboh-taboh panutup ni bituha pakon harambuyan na tampei hubani atei-atei pakon hubani piah-piah na dua ai ronsi taboh-taboh na longkot hujai anjaha tutung ma ai i atas anjapanjap ai.

¹⁴ Tapi anggo daging ni lembu jonggi ai, hulingkulingni pakon ginagatni maningon tutungonmu do ai pakon apuy i darat ni parsaranan ai; ai ma na gabe galangan pardousaon.

¹⁵ Dob ai buat ma biribiri tunggal na sada ai, hatahon ma si Aron pakon anakni manampeihon tangan ni sidea hu atas ulu ni biribiri tunggal ai.

¹⁶ Dob ai sayat ma biribiri tunggal ai, buat ma darohni anjaha pispiskon ma ai hubani anjapanjap ai inggot.

¹⁷ Dob ai toktoki ma biribiri tunggal ai, burihi ma bituhani pakon naheini anjaha nahkon ma ai bani gorini pakon hubani uluni,

¹⁸ anjaha tutung ma ganup biribiri tunggal ai i atas ni anjapanjap ai; galangan situtungon ma ai bani Jahowa, uap na misbou, galangan marhitei apuy hubani Jahowa.

¹⁹ Dob ai buat ma biribiri tunggal na sada nari, anjaha itampeihon si Aron pakon anakni ai ma tangan ni sidea hubani ulu ni biribiri tunggal ai.

²⁰ Sayat ma biribiri tunggal ai, buat ma deba darohni, anjaha daiskon ma ai hu pinggol siamun ni si Aron pakon hu pinggol siamun ni anakni

ai, hubani ompuompu ni tangan siamun pakon hubani ompuompu ni nahei siamun ni sidea; dob ai pispiskon ma daroh ai hubani anjapanjap ai inggot.

²¹ Dob ai buat ma deba humbani daroh na i atas ni anjapanjap ai pakon humbani minak siminakkonon ai anjaha pispiskon ma ai hubani si Aron pakon hubani pakeanni, hubani anakni ampa hubani pakean ni anakni ai, ase pansing si Aron pakon pakeanni ai, pansing pakon anakni ronsi pakean ni anakni ai na rap pakonsi.

²² Anjaha maningon buatonmu do homa taboh-taboh ni biribiri tunggal ai, taboh-taboh ni ihurni, taboh-taboh panutup ni bituhani, harambuyan na tampei hubani atei-ateini pakon piah-piah na dua ai ampa taboh-taboh na longkot hujai, ronsi hae-hae lobei hampit siamun, ai biribiri tunggal paondoskon jabatan do ai,

²³ sada ruti, sada ruti gemong na maragu minak, sada lopat humbagas raga isian ni ruti na so niigaran na i lobei ni Jahowa;

²⁴ nahkon ma ganupan ai hu tangan ni si Aron pakon hu tangan ni anakni ai, anjaha itatang ma ai bahen galangan tatangan i lobei ni Jahowa.

²⁵ Dob ai buat ma ai hun tangan ni sidea, anjaha tutung ma ai bahen dahupa i atas anjapanjap ai tambah ni galangan situtungon bahen uap na misbou i lobei ni Jahowa; galangan marhitei apuy ma ai bani Jahowa.

²⁶ Dob ai buat ma tonton ni biribiri tunggal paondoskon jabatan hubani si Aron anjaha tatang ma ai bahen galangan bani Jahowa; ai ma na gabe rupeimu.

²⁷ Sonin ma urasonmu tonton galangan tatangan pakon hae-hae lobei bahen galangan tatangan na tinatang anjaha na niangkat humbani biribiri tunggal paondoskon jabatan hubani si Aron pakon hubani anakni ai.

²⁸ Maningon gabe aturan na hot ma ai hubani halak Israel, bani si Aron pakon bani anakni ronsi sadokah ni dokahni, ai parbagianan ni malim do ai sigalangkonon ni halak Israel humbani galangan pardameian ni sidea; galangan ni sidea do ai bani Jahowa.

²⁹ Ia pakean ni si Aron na pansing ai, ondos bani anakni ma ai use, sipakeion sanggah mamminaki ampa mangondoskon jabatan hubani sidea.

³⁰ Maningon pitu ari dokahni pakeionni pakean ai, atap ise humbani anakni si Aron na gabe malim gantihni, anggo sihol masuk ia hubagas lampolampo partumpuan ai laho marugas ibagas ianan na pansing ai.

³¹ Maningon buatonmu ma biribiri tunggal paondoskon jabatan ai, anjaha lompah ma dagingni ibagas ianan na mapansing ai.

³² Anjaha maningon panganon ni si Aron pakon anakni ai ma juhut ni biribiri tunggal ai rap pakon

ruti na ibagas raga ai, bani labah ni lampolampo partumpuan ai.

³³ Maningon panganon ni sidea do galangan, na mangadongkon pardearan, laho paondoskon jabatan ai bani sidea pakon papansingkon sidea; tapi anggo halak parluar seng bulih panganonni ai, ai na pansing do ai.

³⁴ Anggo adong na teba humbani juhut paondoskon jabatan ai, barang humbani ruti das ronsi patarni, maningon tutungonmu do na teba ai bois ibagas apuy; seng bulih panganon ai, ai na pansing do ai.

³⁵ Sonin ma sibahenonmu hubani si Aron pakon anakni ai, songon na dob hutonahkon ai bam; pitu ari dokahni mangondoskon jabatan ai bani sidea.”

Pasal Galangan Ari-ari

³⁶ “Anjaha ganup ari maningon sayatonmu do sada lombu bahen galangan pardousaon laho pajongjong pardearan. Maningon urasonmu do homa anjapanjap ai marhitei galangan pardearan sigalangkononmu i atasni, anjaha maningon minakanmu do ai laho papansingkonsi; sagala na manjolom anjapanjap ai gabe pansing ma.

³⁷ Pitu ari dokahni bahenonmu galangan pardearan i atas anjapanjap ai. Maningon papansingonmu ai ase gabe pansing sahalian ai.

³⁸ On do na maningon galangkononmu i atas ni anjapanjap ai: Dua anak ni biribiri na marumur satahun ganup ari torus.

³⁹ Sada biribiri galangkononmu sogod, anjaha biribiri na sada nari galangkononmu malele bod.

⁴⁰ Anjaha hasoman ni biribiri na parlobei ai maningon bahenonmu satumba nitak marsaor minak na giniling saparompat hin, ambah ni saparompat hin anggur bahen galangan siinumon.

⁴¹ Ia anak ni biribiri na sada nari sigalangkononmu malele bod, songon panggalangkonmu bani galangan sipanganon pakon galangan siinumon sogod ma panggalangkononmu ijai bahen uap na misbou ampa galangan situtungan bani Jahowa.

⁴² Ai ma galangan situtungan na tongtong bani ginomparnima bani labah ni lampolampo partumpuan ai i lobei ni Jahowa; hujai do jumpahkonon-Ku hanima ase marsahap Ahu pakon ho ijai.

Bagah-bagah ni Naibata

⁴³ Ijai ma Ahu sihol marjumpah ampa halak Israel, jadi gabe pansing ma ianan ai marhitei hamuliaon-Ku.

⁴⁴ Papansingon-Ku ma lampolampo partumpuan ai pakon anjapanjap ai; papansingon-Ku ma homa si Aron pakon sagala anakni gabe malim Bangku.

⁴⁵ I tongah-tongah ni halak Israel do Ahu marianan, ase Ahu gabe Naibata ni sidea.

⁴⁶ Ase ibotoh sidea Ahu do Naibata ni sidea na mambobahon sidea luar hun tanoh Masir, ase marianan Ahu i tongah-tongah ni sidea; Ahu do Jahowa, Naibata ni sidea.”

Anjapanjap Pardahupaan

(ay. 1-5: pausih bd. 37:25-28)

30¹ “Anjaha pauli ma sada anjapanjap panutungan ni dahupa; maningon humbani hayu nangka do paulionmu ai.

² Saasta ganjangni, saasta bolagni; maningon marompat suhi ai, anjaha dua asta gijangni; tandukni pe luar hunjai ma.

³ Lampis ma ai pakon omas pitah, sonai homa tutupni, dingdingni inggot pakon tandukni; maningon bahenonmu homa marlampis omas pitah inggot.

⁴ Bahen ma dua pinggol-pinggol omas i toruh ni laisni ai; maningon bahenonmu do ai bani lambungni na dua ai angkup, bahen panuruan ni lanja-lanja ase boi marhitei ai usungon.

⁵ Bahen ma lanja-lanja ai humbani hayu nangka, anjaha lampis ma ai bani omas.

⁶ Pajongjong ma anjapanjap ai i lobei ni tirei ai, na mangondingi poti hasaksian ai, i lobei ni tutup

pardearan ai, na i babou ni hasaksian ai, hujai ma jumpahkononku ho.

⁷ Maningon manutung dahupa na misbou ma si Aron i atasni; ganup sogod sanggah na padearhon lampu ai ia, maningon manutung dahupa ia.

⁸ Sonai homa anggo sihol nahitan ni si Aron lampu ai sanggah bod ari, maningon tongtong ia manutung dahupa i lobei ni Jahowa torus marsundut-sundut.

⁹ Seng bulih galangkononnima i atasni dahupa na legan, sonai homa galangan situtungan, galangan sipanganon barang manguseihon galangan siinumon hujai.

¹⁰ Maningon si Aron mambahen pardearan i atas tandukni sahali satahun; marhitei daroh ni galangan pardearan maningon bahenonni pardearan sahali satahun torus marsundut-sundut, ai na pansing sahalian do ai bani Jahowa.

Galangan hubani Lampolampo na Pansing

¹¹ Ambah ni ai nini Jahowa ma dompak si Musa:

¹² Anggo ibilangi ho buei ni halak Israel mangihutkon bilangan ni sidea, maningon ganup sidea mambere partobus ni hosahni bani Jahowa sanggah binilanganmin, ase ulang hona papa sidea sanggah na binilanganmin sidea.

¹³ On do na maningon sibereon ni ganup na tarbilang ai: Satongah sekel mangihutkon sekel bani

ianan na pansing ai (*sasekel mararga dua puluh gera*); satongah sekel gabe galangan bani Jahowa.

¹⁴ Ganup na dob tarbilang ai olat ni na marumur dua puluh tahun hu atas maningon mambere galangan bani Jahowa.

¹⁵ Halak na bayak seng bulih gandaanni, anjaha halak na miskin seng bulih oruanni mambere sisatongah sekel ai bahen galangan bani Jahowa pajongjong pardearan bani hosahnima.

¹⁶ Maningon buatonmu duit partobus ai humbani halak Israel anjaha pakeionmu ai bani horja i lampolampo partumpuan ai; ai ma pardingatan i lobei ni Jahowa laho mardingat halak Israel, gabe pardearan bani hosahnima.”

Tong Parburihan

¹⁷ Nini Jahowa ma use dompak si Musa,

¹⁸ “Bahen ma homa sada tong tombaga ampa onjolanni humbani tombaga bahen parburihan. Bahen ma ai i holangkolang ni lampolampo partumpuan pakon anjapanjap ai, anjaha nahi ma bah hujai.

¹⁹ Bah ai ma buaton ni si Aron pakon anakni mamurihi tangan pakon nahei ni sidea.

²⁰ Anggo masuk sidea hubagas lampolampo partumpuan ai, maningon lobei marburih sidea, ase ulang matei sidea; sonai homa anggo idohori sidea anjapanjap ai sihol marugas, manutung

galangan situtungon bahen dahupa hubani Jahowa,

²¹ maningon lobei burihan ni sidea tangan pakon nahei ni sidea, ase ulang matei sidea. Ai ma gabe aturan na totap bani sadokah ni dokahni ronsi bani ginomparni marsundut-sundut.”

Minak Pamminaki

²² Ambah ni ai nini Jahowa ma dompak si Musa,

²³ “Tapi anggo ho, buat ma bam rompah-rompah sijengesan: Hamonan na manjalir lima ratus sekel, kulit manis satongahni, ai ma dua ratus lima puluh sekel pakon hasowor ampa halawas dua ratus lima puluh sekel,

²⁴ anjaha jarangou lima ratus sekel mangihutkon sekel na bani ianan na pansing ai, ampa minak jetun sahin.

²⁵ Masak ma hujai minak na pansing, manambahi minak pulung-pulungan na sinaor mangihutkon hapandeian ni tuhang pulung, minak pamminaki na pansing ma ai.

²⁶ Maningon minakanmu ma marhitei ai lampolampo partumpuan ai, poti parpadanan ai,

²⁷ meja ai ampa ganup parugasni, parpalitaan ai ampa parugasni, anjapanjap pardahupaan ai,

²⁸ anjapanjap panggalangan ni galangan situtungon ai ampa ganup parugasni, tong parburihan ai ronsi onjolanni.

²⁹ Maningon papansingonmu do ai ase gabe pansing sahalian; ganup na manjamah ai sai na gabe pansing do.

³⁰ Maningon minakanmu do si Aron pakon ganup anakni ai, anjaha urasonmu do sidea gabe malim Bangku.

³¹ Hatahon ma hubani halak Israel sonon, 'On ma minak pamminaki na pansing Bangku torus marsundut-sundut.'

³² Seng bulih useihononkon ai bani angkula ni atap isejolma, anjaha seng bulih bahenonmu minak na legan na sonon parmasakni, ai na pansing do ai, anjaha maningon pansing do ai bannima.

³³ Barang ise na mambahen minak na sonin parmasakni, atap na manguseihon ai hubani halak na legan, maningon siapkonon ia humbani bangsani."

Dahupa na Mapansing

³⁴ Dob ai nini Jahowa ma use dompak si Musa, "Buat ma bam rompah-rompah na misbou, gotah ni hamonan, banei batu, mangemange, rompah-rompah pakon dahupa na pitah, dos bei bueini.

³⁵ Masak ma ai bahen dahupa, na sinampur mangihutkon hapandeian ni tuhang pulung, ginaraman, pitah anjaha pansing.

³⁶ Giling ma ai deba lumat sahalian, anjaha nahkon ma deba hunjai hu lobei ni hasaksian ai ibagas

lampolampo partumpuan ai, ase roh Ahu marayak ho hujai; na pansing sahalian ma ai bannima.

³⁷ Ia dahupa simasakonmai, seng bulih bahenonnima sonai parmasakni bannima, maningon pansing do ai bam i lobei ni Jahowa.

³⁸ Barang ise na mambahen sonai, bahen rium-riumann, maningon rotaponkon ia humbani bangsani.”

Ipabangkit Naibata Tukang-Ni:

Si Besaleel pakon si Ahaliab

(ay. 1-6: pausih bd. 35:30-35; ay 7-11: pausih bd. 35:11-19)

31 ¹ Dob ai nini Jahowa ma dompak si Musa,
² “Tonggor ma, domma Hudilo sahalak na margoran si Besaleel, anak ni si Uri, ai ma anak ni si Hur humbani marga Juda.

³ Domma pala Hugoki uhurni bani Tonduy ni Naibata, pakon hapentaran, torus ni uhur ampa habotohon bani haganup horja ai,

⁴ laho mamingkiri hatukangon na laingan, manukangi omas, pirak pakon tombaga,

⁵ homa manguhir anjaha mamijor batu intan, manukangi hubani situkangon na marbagei-bagei ai.

⁶ Anjaha tonggor ma, domma Hupabangkit hasomanni, ai ma si Ahaliab, anak ni Ahisamak humbani marga Dan; domma Hubere homa

hapentaran hubagas uhur ni ganup halak na pentar laho mangkorjahon haganup na dob Hutonahkon ai bam,

⁷ lampolampo partumpuan, poti parpadanan ampa tutup pardearan na i atasni ai, pakon haganup parugas ni lampolampo ai,

⁸ meja ai ampa parugasni, parsuluhan na humbani omas pitah ai ampa ganup parugasni, pakon anjapanjap pardahupaan ai.

⁹ Sonai homa anjapanjap panggalangan ni galangan situtungon ampa parugasni haganup, pakon tong parburihan ampa onjolanni,

¹⁰ pakean tohonan pakon pakean na pansing bani Malim Aron ampa pakean ni anakni laho mangkorjahon hamalimon ai,

¹¹ ronsi minak pamminaki pakon dahupa na misbou hubani ianan na pansing ai; hombar hubani ganup na huhatahon ai hubam, sibahenon ni sidea ai.”

Iparatah Use Titah Pasal Ari Sabat

¹² Dob ai nini Jahowa ma dompak si Musa,

¹³ “Hatahon ma hubani halak Israel, ‘Maningon papansingonnima do Sabat-Ku, ai ai do tanda ni parpadanan Bangku pakon bannima ronsi bani ginomparnima, ase ibotoh hanima, Ahu do Jahowa na papansingkon hanima.

¹⁴ Maningon papansingonnima do Sabat ai, ai na pansing do ai bannima; ganup na pabutakkon

ai, maningon marutang hosah ia; barang ise na mangkorjahon horja ijai maningon rotaponkon do hosahni hun tongah-tongah ni bangsani.

¹⁵ Onom ari do horjaonkon horja, tapi ari papituhon ai, ari parsaranan na pansing ma ai bani Jahowa; barang ise na marhorja bani ari Sabat ai, maningon marutang hosah ia.

¹⁶ Halani ai maningon papansingon ni halak Israel do ari Sabat ai anjaha papansingon ni sidea torus marsundut-sundut, gabe padan na totap sadokah ni dokahni.

¹⁷ Gabe tanda ma ari Sabat ai Bangku pakon bani halak Israel sadokah ni dokahni, ai ibagas na onom ari do itompa Jahowa langit pakon tanoh on, tapi bani ari papituhon ai marsaran ma la anjaha pahosahkon.’”

Ijalo si Musa Dua Batu Panuratan

¹⁸ Jadi dobkonsi Jahowa marsahap pakon si Musa i atas Dolog Sinai, ibere ma bani dua batu panuratan ni hasaksian ai, na sinurat marhitei jari-jari ni Naibata.

Marnaibata na Legan Halak Israel

32 ¹ Dob ididah bangsa ai na madokahtu si Musa ase tuad hun dolog ai, martumpu ma bangsa ai marayak si Aron, nini ma dompaksi, “Eta bahen ma bennami naibata sibobahon hanami,

halani seng ibotoh hanami atap na mahua do si Musa, halak ai, na mambobahon hanami luar hun tanoh Masir.”

² Nini si Aron ma dompak sidea, “Tanggali nasiam ma anting-anting omas bani pinggol ni parinangon nasiam, anak nasiam pakon boru nasiam anjaha boban ma ai bangku.”

³ Jadi itanggali ganup bangsa ai ma anting-anting omas na bani pinggol ni parinangon ni sidea, anak ni sidea pakon boru ni sidea anjaha iboban ma ai bangku.

⁴ Ijalo ma ai hun tangan ni sidea, ibahen ma rumangni marhitei panurat, anjaha ai ma iusihi mambahen sada lombu tuangan; jadi nini sidea ma, “On ma naibatamu, ale Israel, na mambobahon ho tangkog hun tanoh Masir.”

⁵ Dob ididah si Aron ai, ipajongjong ma sada anjapanjap i lobeini, jadi martingting ma ia, nini ma, “Patar ma ari raya bani Jahowa.”

⁶ Jadi ipagirah sidea ma patarni ai puho, igalangkon ma galangan hatarimakasihon; dob ai hundul ma bangsa ai mangan minum anjaha jongjong ma sidea marguro-guroi.

Pangapiti ni si Musa bani Halak Israel

⁷ Dob ai nini Jahowa ma dompak si Musa, “Tuad ma ho, ai domma maruhur magou bangsamin, na binobahonmin tangkog hun tanoh Masir.

⁸Podas ni ai manimbil sidea humbani dalan na dob hupatuduhkon bani sidea. Domma ibahen sidea bani sidea lombu tuangan, domma pala marsombah anjaha manggalang sidea hujai, anjaha ihatahon, ‘On ma naibatamu, ale Israel, na dob mambobahon ho tangkog hun tanoh Masir.’”

⁹Nini Jahowa ma use dompak si Musa, “Domma huidah bangsa on, bangsa na hengken maruhur do on.

¹⁰On pe palopas ma gajag ringis-Ku bani sidea laho mansiapkon sidea; tapi Hubahen pe ho sada bangsa na banggal.”

¹¹Tapi ielek-elek si Musa ma Jahowa, Naibatani, nini ma, “Mase ma gajag ringis-Mu, ale Jahowa mangidah bangsa-Mu, na dob Binobahon-Mu luar hun tanoh Masir, marhitei kuasa bolon pakon marhitei tangan na marhagogohon?

¹²Mase ma maningon hatahonon ni halak Masir sonon, ‘Laho mangagou sidea do ase ibobahon sidea luar, laho mamunuh sidea i atas ni dolog anjaha manripaskon sidea hun atas tanoh on?’ Pahombun Ham ma ringis-Mu na banggal in, marpangulaki ma uhur-Mu pasal hamagouan na sihol pasogopon-Mu hubani bangsa-Mu.

¹³Ingat Ham ma si Abraham, si Isak pakon si Israel jabolon-Mu in, na dob pala marbulawan Ham bani diri-Mu mangkatahon bani sidea, ‘Sai pabueion-Ku do ginomparnima songon bintang na i langit,

anjaha ganup tanoh on na dob Huparbagah ai sai berehonon-Ku do hubani ginomparmu, bahen siteanon ni sidea sadokah ni dokahni.”

¹⁴ Jadi marpangulaki ma uhur ni Jahowa pasal hamagouan na dob Nilumbahon-Ni sibahenon-Ni hubani bangsa-Ni.

Ringis ni si Musa Mangkopkop Goran ni Jahowa

¹⁵ Dob ai marhusor ma si Musa anjaha tuad hun dolog ai rap pakon na dua batu panuratan hasaksian ai bani tanganni, na marsurat hadualopahsi; na salopah on pakon na salopah nari marsurat do.

¹⁶ Na binahen ni Naibata do batu panuratan ai, anjaha surat ai pe surat ni Naibata do, na niuhirhon-Ni hubani batu panuratan ai.

¹⁷ Dob ibogei si Josua sora ni bangsa ai marsurak-surak, nini ma dompak si Musa, “Adong songon sora ni na marporang ibagas parsaranan ai.”

¹⁸ Tapi nini si Musa ma, “Sedo sora ni surak-surak hamonangan ai, atap sora ni doruh-doruh hataluan, tapi sora ni doding na marsibalos-balosan do ai.”

¹⁹ Jadi dob dohor ia hubani parsaranan ai anjaha ididah lombu ai pakon tortor ai, gajag ma ringis ni si Musa, igijigkon ma humbani tanganni batu panuratan ai, gabe mabolah i toruh ni dolog ai.

²⁰ Dob ai ibuat ma lombu na dob pinauli ni sidea ai; itutung ma ibagas apuy, iduda ma lumat tumang,

itirtirhon ma hu atas bah anjaha ipainumkon ma ai bani halak Israel.

²¹ Nini si Musa ma dompak si Aron, “Aha gakni ibahen bangsa on bam, ase iparoh ho dousa na sonai banggalni bani sidea?”

²² Nini si Aron ma, “Ulang ma gajag ringis ni tuanku; ai itanda ham do bangsa on, na bajan do paruhur ni sidea.

²³ Nini sidea do hu bangku, ‘Pauli bennami naibata, na mambobahon hanami, ai seng ibotoh hanami atap na mahua do si Musa, halak ai, na mangarahkon hanami tangkog hun tanoh Masir.’

²⁴ Jadi ningku ma tongon, ‘Barang ise na maromas, itanggali ma anjaha ibere ma ai hu bangku; hugijigkon ma ai hubagas apuy, gabe luar ma lombu on.’”

²⁵ Dob ididah si Musa na so marrantei be bangsa ai, ai domma ipalopas si Aron gabe habadoron i tongah-tongah ni imbang ni sidea,

²⁶ jadi jongjong ma si Musa i horbangan ni parsaranan ai, anjaha nini ma, “Ise hampit Jahowa? Roh ma hu bangku!” Jadi martumpu ma humbani ganup halak Levi.

²⁷ Dob ai nini ma dompak sidea, “Sonon do hata ni Jahowa, Naibata ni Israel, ‘Ganup ma mambahen podangni hu binongeini, mulak-ulak ma nasiam hun horbangan on hu horbangan ai

ibagas parsaranan in, anjaha ganup ma mambunuh saninani, hasomanni pakon sindohorni.”

²⁸ Jadi ibahen halak Levi ma hombar hubani na hinatahon ni si Musa, gabe rasei ma bani na sadari ai hira-hira tolu ribu halak.

²⁹ Nini si Musa ma, “Domma iuras nasiam diri nasiam sadari on bani Jahowa, ai ganup do manlawan anakni pakon saninani, gabe boi ibere pasu-pasu bani nasiam sadari on.”

Iulaki si Musa Mangapiti Bangsani

³⁰ Patarni ai nini si Musa ma dompak bangsa ai, “Banggal tumang do dousa na binahen nasiam ai. Tangkog ma ahu sonari marayak Jahowa, andohar jumpah ahu pardearan pasal dousa nasiam ai.”

³¹ Jadi dob mulak si Musa hubani Jahowa, nini ma, “Ah, banggal tumang do dousa na binahen ni bangsa on; ibahen sidea do bani sidea naibata humbani omas.

³² On pe, sai marpangulaki ma uhur-Mu bani dousa ni sidea ai, anggo lang sasap Ham ma goranku gelah humbani pustaha na dob sinurat-Mu ai.”

³³ Tapi nini Jahowa ma dompak si Musa, “Ise na mardousa dompak Ahu, goranni ai do sasapon-Ku humbani pustahang-Ku.

³⁴ On pe, laho ma ho, arahkon ma bangsa in hu tanoh na dob Huhatahon bam. Tonggor ma, malekat-Kin do mardalan i lobeimu, tapi bani ari

pambalason-Ku, balaskonon-Ku do hubani sidea dousa ni sidea ai.”

³⁵ Jadi iajar Jahowa ma bangsa ai, halani isombah sidea lombu na pinauli ni si Aron ai.

Pusok ni Uhur ni Bangsa ai

33 ¹ Nini Jahowa ma dompak si Musa, “Laho ma ho tangkog hunjon, ho pakon bangsa na dob niarahkonmin luar hu tanoh na dob Hubulawankon hubani si Abraham, si Isak pakon si Jakob, sanggah na Huhatahon: Hubani ginomparmu do bereon-Ku in.

² Husuruh pe sada malekat mambobahon ho, anjaha Huusir pe halak Kanaan, Amori, Heti, Peresi, Hewi pakon Jebusi.

³ Ia ma mambobahon ho hu tanoh habaoran ni dadih pakon manisan ni huramah; ai seng tarbahen Ahu tangkog rap pakon hanima, ai bangsa na hengken maruhur do hanima, ase ulang siap holi hanima Hubahen i tongah dalan.”

⁴ Jadi dob ibogei bangsa ai hata na koras ai pusok ma uhur ni sidea; sada pe lang na mamahei ugasni.

⁵ Ai domma ihatahon Jahowa hinan hata-Ni hubani si Musa, “Hatahon ma hubani halak Israel: Bangsa na hengken maruhur do hanima, ambit tongkin gelah Ahu tangkog pakon hanima, maningon siap do hanima bahenon-Ku. On pe itanggal bei ma

ugas-ugasni humbani dirini, ase Hubotoh aha sibahenon-Ku bannima.”

⁶ Jadi itanggali halak Israel ma ugas-ugas ni sidea bei humbani Dolog Horeb nari.

Si Musa Marsahap Dumpar Bohi ampa Naibata Ibagas Lampolampo

⁷ Jadi ibuat si Musa ma lampolampo ai, ipajongjong ma ai i darat ni parsaranan ai, daoh hun parsaranan ai; ibahen ma goranni Lampolampo Partumpuan. Barang ise na sihol mangindahi Jahowa, maningon luar ia laho hu Lampolampo Partumpuan ai, na i darat ni parsaranan ai.

⁸ Anggo luar si Musa laho hu lampolampo ai, jongjong bei ma haganup bangsa ai, jongjong ganup i labah ni lampolamponi bei anjaha ituludkon ma si Musa, paima masuk ia hubagas lampolampo ai.

⁹ Anggo masuk ma si Musa hubagas lampolampo ai, turun ma hambun na jongjong ai, lanjar jongjong bani labah ni lampolampo ai, jadi marsahap ma Naibata pakon si Musa.

¹⁰ Ase anggo ididah ganup bangsa ai ma hambun na jongjong ai, jongjong bani labah ni lampolampo ai, jongjong ma ganup bangsa ai anjaha marsambah, ganup bani labah ni lampolamponi.

¹¹ Jadi marsahap ma Jahowa pakon si Musa dumpar bohi songon sada halak na marsahap hubani hasomanni; dob ai mulak ma use si Musa hu

parsaranan ai. Tapi anggo si Josua, juakjuakni, anak ni si Nun, anak garama ai, seng meret ia hun tongah-tongah ni lampolampo ai.

¹² Dob ai nini si Musa ma dompak Jahow, “Tonggor ma, domma ihatahon Ham hu bangku: Arahkon ma bangsa on tangkog, tapi seng ipatugah Ham hu bangku, atap ise suruhon-Mu hasomanku, age pe domma ihatahon Ham: Hutanda do ho pakon goranmu, anjaha domma jumpahan idop ni uhur ho i lobei-Hu.

¹³ Sonari pe, anggo tongon ma na dob jumpahan idop ni uhur ahu i lobei-Mu, pabotohkon Ham ma hu bangku jabolon-Mu, ase hutandai Ham, paboa na dob jumpahan idop ni uhur ahu i lobei-Mu; anjaha tonggor ma, rayat-Mu do bangsa on.”

¹⁴ Jadi nini m, “Bohing-Ku ma hasomanmu mardalan anjaha arahkonon-Ku ma ho hu hasonangan.”

¹⁵ Nini si Musa ma dompak Jahowa, “Anggo seng bohi-Mu mambobahon hanami, ulang ma arahkon Ham hanami tangkog hunjon.

¹⁶ Ai marhitei aha ma boi botohon, na dob dapotan idop ni uhur ahu i lobei-Mu, ahu pakon bangsa-Mu? Ai lang marhitei humbani na hinasomanan-Mu hanami mardalan, gabe marhasurungan ahu pakon rayat-Mu humbani ganup bangsa na i atas tanoh on?”

¹⁷ Dob ai nini Jahowa ma dompak si Musa, “Age hata na hinatahonmondi bahenon-Ku do in, halani na dob jumpahan idop ni uhur ho i lobei-Hu anjaha Hutanda ho pakon goranmu.”

¹⁸ Nini si Musa ma, “Pataridahkon Ham ma bangku hamuliaon-Mu.”

¹⁹ Jadi nini Jahowa ma, “Pabontaskonon-Ku ma ganup hatunggungon-Ku hun lobei ni bohimu, anjaha dilohonon-Ku goran ni Jahowa i lobeimu: maridop ni uhur do Ahu hubani siidopan-Ku anjaha marontou ni uhur do Ahu hubani siontouan-Ku.”

²⁰ Tapi nini ope, “Seng tarbahen ho anggo mangidah bohing-Ku, ai seng dongjolma na mangidah Ahu lanjar manggoluh.”

²¹ Nini Jahowa ma, “Tonggor ma, adong do sada ianan i Lambung-Ku, hajongjonganmu i atas dolog batu ai,

²² anjaha sanggah mamontas hamuliaon-Ku, nahkonon-Ku ma ho hubagas rigat ni dolog batu ai, anjaha rongkobon-Ku ho bani tangan-Ku, paima lopus Ahu;

²³ dob ai Hutarik ma tangan-Ku gabe idahonmu ma Ahu hun pudi; tapi bohing-Ku seng boi idahon.”

Si Musa Mangidah Hamuliaon ni Jahowa i Atas Dolog

34 ¹ Dob ai nini Jahowa ma dompak si Musa, “Barbar ma bam dua batu panuratan usih

hubani na parlobei ai, ase Husuratkon hubani batu panuratan ai ganup hata na dob tarsurat bani batu panuratan na parlobei na dob binolahkonmondi.

² Sirsir ma ho girah sogod, ase sogod ma ho tangkog hu Dolog Sinai, laho jongjong ijai i lobei-Hu i pakpak ni dolog ai.

³ Sahalak pe lang bulih tangkog rap pakon ho, anjaha sahalak pe lang boi homa taridah i atas ganup dolog in; age biribiri age lombu seng bulih manggagat dohorhon dolog in.”

⁴ Dob ai ibarbar si Musa ma dua panuratan batu usih hubani na parlobei ai; ipagirah ma sogodni ai puho laho tangkog hu Dolog Sinai, songon na tinonahkon ni Jahowa hu bani, lanjar iboban ma i tanganni panuratan na dua ai.

⁵ Jadi tuad ma Jahowa ibagas sada hambun, lanjar jongjong ma la ijai i lambungni, anjaha idilohon ma goran ni Jahowa.

⁶ Mamontas ma Jahowa hun lobei ni si Musa lanjar dilo-dilo, “Jahowa, Jahowa do Naibata pardear layak anjaha paridop ni uhur, nanget marringis, anjaha gok holong ni uhur-Ni pakon habonaran-Ni,

⁷ na pahotkon holong ni uhur-Ni hubani halak marribu-ribu, anjaha na manasap hajahaton, panlanggaron pakon dousa; tapi sabonar lang ra paluahkon sonin tumang parsalah, anjaha na mambalaskon hajahaton ni ganup bapa hubani

anakni pakon pahompuni ronsi sundut patoluhon pakon paompatkon.”

⁸ Jadi tarolos ma si Musa manrogop hu tanoh lanjar marsombah.

⁹ Anjaha nini ma, “Anggo domma dapotan idop ni uhur ahu i lobei-Mu, ale Tuhan, mahua mardalan ma Tuhan i tongah-tongahnami, age pe bangsa na hengken maruhur bangsa on, anjaha sasap Ham ma hajahatonnami pakon dousanami, anjaha bahen Ham ma hanami rupei-Mu.”

Iparatah Jahowa Padan-Ni hubani Halak Israel

¹⁰ Dob ai nini Jahowa ma, “Tonggor ma, Ahu mambahen padan: I lobei ni bangsamu, bahenon-Ku ma halongangan na so onga masa i sab tanoh on ampa i tongah-tongah ni sagala bangsa parbegu; anjaha ganup bangsa na mangkasomani ho in, mangidah horja ni Jahowa, ai na majangin tumang do na sihol bahenon-Ku marhitei ho.

¹¹ Parimbagaskon ma ibagas uhurmu na Huhatahon in bam sadari on. Tonggor ma, usiron-Ku do hun lobeimu halak Amori, Kanani, Heti, Peresi, Hewi pakon Jebusi.

¹² Jaga ma dirimu ase ulang mambahen padan ho pakon pangisi ni tanoh sisolukonmin, ase ulang gabe tirangkap sidea i tongah-tongahmu.

¹³ Maningon parreongonmu do anjapanjap ni sidea anjaha bolahanmu gana-gana ni sidea anjaha robohonmu sisombahon ni sidea.

¹⁴ Ai seng bulih sombahonmu naibata na legan, ai Jahowa, na margoran Parsimburu, Naibata parsimburu do.

¹⁵ Seng bulih mambahen padan ho pakon pangisi ni tanoh in, ai anggo marbangkis sidea mangirikkon naibata ni sidea, barang manggalang sidea hubani naibata ni sidea gabe idilo ho anjaha ipangan ho humbani na ginalangkonni in,

¹⁶ anjaha anggo ibuat ho humbani boru ni sidea ai bahen parinangon ni anakmu, marbangkis ma boru ni sidea in mangirikkon naibata ni sidea, gabe dihut ma anakmu marbangkis mangihutkon naibata ni sidea ai.

¹⁷ Seng bulih bahenonmu naibata tuangan bam.

(ay. 18-26: pausih bd. 23:14-19; 3 Mus. 23; 5 Mus. 16)

¹⁸ Maningon tongtong ho marari raya sagu-sagu na so niigaran. Pitu ari dokahni panganonmu sagu-sagu na so niigaran, songon na dob hutonahkon in bam bani panorang na dob tinontuhon bani bulan Abib, ai bani bulan Abib do ho luar hun Masir.

¹⁹ Sagala bunga tubuh Ahu do simadasi pakon sagala tunggal humbani pinahanmu, ai ma bunga tubuh humbani lombu pakon biribiri.

²⁰ Maningon tobusonmu do bunga tubuh ni halode marhitei biribiri, tapi anggo seng sihol tobusonmu

ai, maningon ponggolhononmu do borgokni. Maningon tobusonmu do sagala bunga tubuh ni anakmu. Seng bulih atap ise roh hu lobei-Hu marhasoman tangan na lumei.

²¹ Onom ari ma ho marhorja, tapi anggo ari papituhon in maningon marsaran ho; bani musim paninggalaon ampa pariaman pe maningon marsaran ho.

²² Pesta sipitu ari in pe maningon ingatonmu do, ai ma pesta limbah ni pariaman gandum, pakon pesta patumpuhon buah bani ujung ni tahun.

²³ Tolu hali ibagas na satahun maningon roh sagala paramangon na i tengah-tongahnima hu lobei ni Tuhan Jahowa, Naibata ni Israel.

²⁴ Ia dob Huusir bangsa sipajuh begu-begu hun lobeimu, anjaha Hupalumbang tanoh iananmu, sahalak pe lang na manguhur-uhuri tanohmu sadokah tangkog ho sihol mangidah bohi ni Jahowa Naibatamu, sitolu hali in ibagas na satahun.

²⁵ Seng bulih galangkononmu daroh ni galangan Bangku rap pakon sagu-sagu na niigaran, anjaha seng bulih marborngin paturuton galangan pesta Paskah das ronsi patar.

²⁶ Maningon boanonmu do limbah ni tanohmu hu rumah ni Jahowa Naibatamu. Seng bulih lompahonmu anak ni hambing ibagas dadih ni inangni.”

²⁷ Dob ai nini Jahowa ma hubani si Musa, “Suratkon ma hata on, ai marguru hubani hata on do padan na hubahen in bam pakon hubani Israel.”

²⁸ Jadi sai ijai ma si Musa rap pakon Jahowa ompat puluh ari ompat puluh borngin dokahni, seng mangan ruti anjaha minum bah. Isuratkon ma ganup hata ni padan ai, titah na sapuluh ai hu batu panuratan ai.

Marsinalsal Bohi ni si Musa

²⁹ Sanggah tuad si Musa hun Dolog Sinai ai, anjaha ijolom i tanganni na dua batu panuratan hasaksian ai sanggah tuad ia, seng ibotoh si Musa na dob marsinalsal do sisik ni bohini, halani na dob marsahapi ai ia pakon Jahowa.

³⁰ Jadi ididah si Aron pakon ganup halak Israel ma si Musa, hape tonggor ma, domma marsinalsal sisik ni bohini, gabe mabiar ma sidea roh hun dohor hu bani.

³¹ Tapi idilo si Musa ma sidea, gabe mulak ma sidea hu bani, si Aron pakon ganup pangintuai ni tumpuan ai, lanjar marsahap ma si Musa hubani sidea.

³² Jadi dob sonai roh ma hun dohor ganup halak Israel, gabe ipadas si Musa ma hubani sidea ganup hata na ipatugah Jahowa hubani i atas Dolog Sinai.

³³ Dob salpu si Musa marsahap pakon sidea, ibahen ma sada tudung-tudung hubani bohini;

³⁴ tapi anggo masuk use si Musa hu lobei ni Jahowa sihol marsahap pakon-Si, ibuat ma tudung-tudung ai paima luar ia use; anjaha anggo luar ma ia, ihatahon ma hubani halak Israel hata na tinonahkon hu bani.

³⁵ Jadi anggo ididah halak Israel bohi ni si Musa anjaha marsinalsal sisik ni bohini, gabe ipasuang si Musa ma tudung-tudung ai hu bohini paima masuk ia use laho marsahap pakon Jahowa.

Sipaingat Pasal Ari Sabat

35 ¹ Dob ai ipatumpu si Musa ma ganup tumpuan ni halak Israel anjaha nini ma hubani sidea, “On do hata na tinonahkon ni Jahowa sihorjahononnima.

² Onom ari ma horjahon hanima horjanima, tapi anggo ari papituhon in ari Sabat na pansing do in bennima, sipapansingon bani Jahowa; barang ise na marhorja bani ari in, maningon marutang hosah ia.

³ Seng bulih pagara apuy hanima ibagas ganup rumahnima bani ari Sabat in.”

Galangan hubani Lampolampo Partumpuan

⁴ Dob ai ihatahon si Musa ma hubani ganup tumpuan ni halak Israel, “On do hata na tinonahkon ni Jahowa,

⁵ ‘Patumpu hanima ma hun bennima galangan hubani Jahowa; barang ise na rosuh uhurni,

iboban ma galangan hubani Jahowa: Omas, pirak, tombaga,

⁶hiou simahonda pakon sigenger, hiou hasumba, kaen linnen silopak pakon ambulu ni haming,

⁷bobak ni biribiri tunggal na tinubar pakon bobak ni haming, hayu nangka,

⁸minak hubani parpalitaan in pakon minak na morum sipakeion mamminaki pakon manutung dahupa,

⁹batu intan Kerisopras pakon batu intan na tinatah sinahkonon hu baju epod pakon hubani tutup tonton.

¹⁰Barang ise na pantas maruhur i tongah-tongahnima roh bei ma mangkorjahon ganup na tinonahkon ni Jahowa;

(11-19: pausih bd. 31:7-11)

¹¹in ma ianan na pansing in, tendani pakon langit-langitni, hait-kaitni, papanni, ransang-ransangni, tiangni pakon onjolanni,

¹²poti parpadanan in rap pakon lanja-lanjani, langkob pardearan in pakon tireini,

¹³meja in pakon lanja-lanjani ampa ganup parugasni ronsi ruti;

¹⁴parpalitaan in bahen panondangi ronsi parugasni, palitani pakon minak hubani parpalitaan in,

¹⁵anjapanjap pardahupaan in rap pakon lanja-lanjani, minak pamminaki pakon rium-riuman

bahen dahupa na misbou, ampa tirei tutup ni labah bani labah ni ianan na pansing in,

¹⁶ anjapanjap panggalangan ni galangan situtungon rap pakon hondor-hondorni humbani tombaga, lanja-lanjani pakon ganup parugasni, tong parburihan pakon onjolanni,

¹⁷ tirei ni alaman in rap pakon tiangni ampa onjolanni, tirei tutup ni horbangan ni alaman in,

¹⁸ paku hubani ianan na susi in pakon hubani alaman in ampa hubani talini,

¹⁹ pakean tohonan laho marugas ibagas ianan na pansing in, pakean na pansing bani Malim Aron pakon pakean ni anakni laho mangkorjahon hamalimon in.

²⁰ Dob ai luar ma ganup tumpuan ni halak Israel hun lobei ni si Musa.

²¹ Jadi roh bei ma ganup halak na tarojur uhurni pakon ganup na hia-hia tonduyni, iboban bei ma galangan bani Jahowa, ai ma sipakeion paulihon lampolampo partumpuan ai pakon hubani ganup horja ijai ampa hubani pakean na susi ai.

²² Roh bei ma sidea paramangon age parinangon, ganup na marosuh uhur, marsiboban golangni, anting-antingni, tintinni, horung-horungni, ugas-ugas omas marbagei-bagei, ganup manggalangkon omas hubani Jahowa.

²³ Anjaha ganup halak na marnah kaen simahonda pakon sigerger, hasumba, kaen linnen silopak,

ambulu ni hambing, bobak ni biribiri tunggal na tinubar atap bobak ni biribiri, ipamboan ma ai.

²⁴ Ganup na boi manggugui pirak pakon tombaga iboban bei ma ai bahen galanganni hubani Jahowa; anjaha ganup na marnah hayu nangka itaruhkon bei ma ai sipakeion hubani ganup horja tohonan na marbagei-bagei ai.

²⁵ Anjaha sagala parinangon na pentar maruhur manorha bei do pakon tanganni, anjaha iboban bei ma na pinorhani ai, hiou simahonda pakon sigenger, hiou hasumba pakon hiou linnen silopak.

²⁶ Sagala puang-puang na puho uhurni anjaha na marhapentaran manorha imbulu ni hambing.

²⁷ Tapi sagala pangintuai iboban bei ma batu intan unam pakon batu intan na tinatah sinahkonon hu baju epod pakon hu tutup tonton ai,

²⁸ pakon rium-riuman pakon minak hu parpalitaan pakon minak na morum sipakeion laho mamminaki pakon manutung dahupa.

²⁹ Sagala paramangon pakon parinangon, na tarojur uhurni mamboban sibere-bere hubani sagala horja na tinonahkon ni Jahowa sibahenon marhitei si Musa, iboban halak Israel ma ai songon galangan niojur ni uhurni bei hubani Jahowa.”

**Parbangkit ni si Besaleel pakon si Aholiab
Manukangi Ianan na Pansing pakon Parugasni**

(ay. 30-35: pausih bd. 31:1-6)

³⁰ Dob ai nini si Musa ma hubani halak Israel, “Tonggor ma, domma idilo Jahowa sahalak na margoran si Besaleel, anak ni si Uri, in ma anak ni si Hur humbani marga Juda.

³¹ Domma igoki ia marhitei Tonduy ni Naibata, marhitei hapentaran, torus ni uhur pakon hapandeian ibagas ganup horja ai,

³² laho mamingkiri hapandeian na tarsulur, laho manukangi omas, pirak pakon tombaga,

³³ manguhir pakon mamijor batu intan, manukangi hayu pakon mangkorjahon horja na marbagei in.

³⁴ Anjaha domma iberehon Jahowa hubani hapentaran laho mangajari, ia pakon si Aholiab, anak ni si Ahisamak humbani marga Dan.

³⁵ Domma igoki uhur ni sidea bani hapentaran laho mambahen ganup horja sihorjahonon ni tuhang, horja ni kopala tuhang, horja ni sibahen hiou simahonda pakon sigenger, hiou hasumba pakon hiou silopak na alus ampa horja ni sipartonun, ai ma mangkorjahon bagei ni horja pakon mambahen ranggian.”

**Si Besaleel pakon si Aholiab
Mamungkah Horja ni Sidea**

36 ¹Jadi ibahen si Besaleel pakon si Aholiab ma ampa haganup paramangon, na pentar maruhur, na dob manjalo uhur hapentaran pakon hapandeian humbani Jahowa, ase ibotoh mangkorjahon haganup horja pajongjong ianan na pansing ai, romban hubani haganup na tinonahkon ni Jahowa.

²Ai domma idilo si Musa hinan si Besaleel pakon si Aholiab ampa haganup dalahi na pentar maruhur na dob manjalo uhur hapentaran humbani Jahowa pakon haganup na tarojur uhurni roh mangkorjahon horja ai.

³Jadi ijalo sidea ma humbani si Musa haganup galangan ai, na binoban ni halak Israel laho manumpaki horja bani ianan na pansing ai; tapi sai inunut sidea ope ganup sogod mamboban guguan rosuh ni uhurni.

⁴Jadi roh bei ma haganup halak na pentar laho mangkorjahon haganup horja bani ianan na pansing in, ganup humbani horja na nihorjahon ni sidea bei.

⁵Nini sidea ma hubani si Musa, “Mabahattu do guguan na binoban ni bangsa in, lobih humbani na porlu pakean hubani horja na tinonahkon ni Jahowa sibahenon in.”

⁶ Jadi ihatahon si Musa ma martingting i parsaranan ai, “Ulang be sai inunut hita Paramangon age parinangon mambere guguan hubani ianan na pansing in! Jadi iparontihon bangsa ai ma mamboban,

⁷ ai domma sungkup parugas bani haganup horja sihorjaonkon ai, pala lobih.”

Ipajongjong Lampolampo na Pansing

(ay. 8-19: pausih bd. 26:1-14)

⁸ Jadi ipauli sagala halak na pentar maruhur humbani sihorjahon horja ai ma lampolampo ai humbani sapuluh tirei, na binahen humbani hiou silopak na alus na niangkup pakon humbani bonang simahonda, sigenger anjaha na gerger sahalian, margambaran herub na tinonun, humbani kaen na jenges do ipauli ai;

⁹ ganjang ni ganup tirei ai dua puluh ualuh asta, anjaha bolagni ompat asta, sisada sibaran do ganup tirei ai.

¹⁰ Anjaha ipadomu ma lima tirei ai, na sada hubani na sada nari, anjaha na lima nari use ipadomu na sada hubani na sada nari.

¹¹ Anjaha ibahen ma tali panangkutan na mahonda hu bibir ni tirei na parlobei ai bani pardomuanni, lanjar sonai do ibahen bani bibir ni tirei na paduahon ai bani pardomuanni.

¹² Lima puluh tali panangkutan ibahen bani tirei na sada, anjaha lima puluh tali panangkutan ibahen bani ujung ni tirei ai bani pardomuanni na paduahon ai; patontang do tali panangkutan ai na sada hubani na sada nari.

¹³ Ibahen ma lima puluh hait-kait omas, anjaha ipadomu ma tirei na sada hubani na sada nari marhitei hait-kait ai, gabe sada lampolampo ma ai.

¹⁴ Ibahen ma homa tirei humbani ambulu ni hambing bahen langit-langit i atas ni lampolampo ai, sapuluh sada tirei sisonai ibahen.

¹⁵ Ganjang ni ganup tirei tolu puluh asta, anjaha bolag ni ganup tirei ompat asta, sisada sibaran do tirei na sapuluh sada ai.

¹⁶ Ipadomu ma pulig lima tirei, anjaha pulig tirei na onom nari.

¹⁷ Ibahen ma lima puluh tali panangkutan bani bibir ni tirei na parujung bani pardomuanni, anjaha lima puluh tali panangkutan bani bibir ni tirei na sada nari, bani pardomuanni na paduahon.

¹⁸ Ibahen ma lima puluh hait-kait tombaga, laho padomuhon lampolampo ai gabe sada.

¹⁹ Ibahen ma use tutup bani lampolampo ai humbani bobak ni biribiri tunggal na sinolop, i atas ni ai use bobak ni hambing.

(ay. 20-30: pausih bd. 26:15-25)

²⁰ Ibahen ma papan ni lampolampo ai humbani hayu nangka, jongjong ibahen.

²¹ Sapuluh asta ganjang ni papan ai anjaha tongah dua asta bolag ni sada papan.

²² Ganup papan mardua pasi, ase boi parapaton na sada hubani na sada nari, sonai ma ganup papan ni lampolampo ai ibahen.

²³ Sonon ma ibahen papan bani lampolampo ai. Dua puluh papan hampit dangsina.

²⁴ Ibahen do ompat puluh onjolan pirak i toruh ni na dua puluh papan ai, dua bei onjolan i toruh ni sada papan bani pasini na dua ai, pakon dua onjolan i toruh ni papan na legan bani pasini na dua ai.

²⁵ Bani na salopah nari hampit utara ibahen ma dua puluh papan,

²⁶ rap pakon onjolan pirak na ompat puluh ai, dua onjolan bei i toruh ni sada papan.

²⁷ Hubani pudi-pudi ni lampolampo ai hampit hasundutan ibahen do onom papan.

²⁸ Ibahen ma dua papan hu suhi-suhi ni lampolampo ai hampit pudi.

²⁹ Jadi dua lapis ma ai hun toruh mardomu i atas pinadomu ni sada langgu; sonai ma ibahen haduasi bani na dua suhi-suhi ai.

³⁰ Ase ualuh papan ma ijai rap pakon onjolan pirakni; sapuluh onom bueini, dua bei i toruh ni sada papan.

(ay. 31-34: pausih bd. 26:26-30)

³¹ Ibahen ma ransang-ransang humbani hayu nangka, lima hubani papan na salopah ni lampolampo ai,

³² lima ransang-ransang hubani papan na salopah nari ni lampolampo ai, anjaha lima ransang-ransang hubani papan ni lampolampo ai hampit hasundutan.

³³ Ibahen ma ransang partongah-tongah bani partongahan ni papan ai, torus hun suhi-suhi na sada hu suhi-suhi na sada nari.

³⁴ Ilampis ma papan ai bani omas, pinggol-pinggolni pe omas do ibahen bahen panjolom ni ransang-ransang ai, anjaha ilampis do ransang-ransang ai bani omas.

(ay. 35-38: pausih bd. 26:31-37)

³⁵ Ipauli ma sada tirei humbani bonang na mahonda, na gerger pakon na gerger sahalian pakon humbani hiou silopak na alus na niangkup; margombaran herub do ibahen ai, na tinonunkon jenges hujai.

³⁶ Ibahen ma ompat tiangni humbani hayu nangka na nilapis pakon omas, hait-kaitni omas, anjaha ituang ma ompat onjolanni humbani pirak.

³⁷ Ibahen ma homa tirei bahen tutup ni labah ni lampolampo ai humbani bonang na mahonda, na gerger, na gerger sahalian pakon humbani hiou silopak na alus na niangkup, tonunan sampurborna,

³⁸ pakon tiangni na lima ai ampa hait-kaitni; ilapis ma uluni pakon ransang-ransangni bani omas, tapi onjolanni na lima ai humbani tombaga do.

Ipauli Poti Parpadanan

(ay. 1-9: pausih bd. 25:10-22)

37 ¹ Dob ai ipauli si Besaleel ma poti parpadanan humbani hayu nangka, tongah tolu asta ganjangni, tongah dua asta bolagni anjaha tongah dua asta gijangni.

² Ilampis ma ai pakon omas pitah humbagas pakon hun darat anjaha ibahen ma marlais-lais omas inggot.

³ Ituang ma ompat pinggol-pinggol humbani omas hubani suhini na ompat ai, dua pinggol-pinggol hubani na salopah anjaha dua hubani na salopah nari.

⁴ Ibahen ma lanja-lanjani humbani hayu nangka anjaha ilapis ma ai bani omas.

⁵ Isurukkon ma lanja-lanja ai hubagas pinggol-pinggol na longkot bani poti ai laho mangusung poti ai.

⁶ Ibahen ma sada langkob pardearan humbani omas pitah, tongah tolu asta ganjangni anjaha tongah dua asta bolagni.

⁷ Ibahen ma dua herub humbani omas na tinopa; ibahen ma ai hubani na dua tampakan ni langkob pardearan ai.

⁸ Sada herub hubani tampakan na sada, anjaha herub na sada nari, hubani tampakan na sada nari; marsada rap pakon langkob pardearan ai ipauli herub ai bani tampakanni na dua ai.

⁹ Ipaherbang herub ai ma habongni dompak datas laho manrongkob langkob pardearan ai marhitei habong ni sidea, anjaha padompok bohi ni sidea; dompak langkob pardearan ai do bohi ni herub ai.

Parpauli bani Meja

(ay. 10-16: pausih bd. 25:23-39)

¹⁰ Ipauli ma meja ai humbani hayu nangka, dua asta ganjangni, saasta bolagni anjaha tongah dua asta gijangni.

¹¹ Ilampis ma ai bani omas pitah, anjaha ibahen martopi omas inggot.

¹² Ibahen ma topini santopap bolagni inggot, anjaha ibahen ma homa laisni humbani omas.

¹³ Ituang ma pinggol-pinggolni ompat humbani omas, anjaha ibahen ma ai hubani suhi-suhini na ompat ai, na bani naheini na ompat ai.

¹⁴ Dohor i toruh ni lais ai do pinggol-pinggol ai bahen panurukan ni lanja-lanja ai laho mangusung meja ai.

¹⁵ Ibahen ma lanja-lanja ai humbani hayu nangka, anjaha ilapis ma ai bani omas, ai ma ipakei mangusung meja ai.

¹⁶ Ipauli ma parugas sipakeion i atas meja ai: Pinggan bolagni, pingganni, batilni pakon mangkukni bahen panguseian ni galangan siinumon; ipauli ma ai humbani omas pitah.

Parpauli bani Parsuluhan

(ay. 17-22: pausih bd. 25:31-39)

¹⁷ Ipauli ma parsuluhan ai humbani omas pitah, sangkimpal parsuluhan ai itopa, ronsi badanni, dangkahni, boltokni, tungkulni pakon bungani.

¹⁸ Onom dangkahni luar hun lambungni, tolu dangkah hun salopah ni parsuluhan ai anjaha tolu dangkah hun na salopah nari.

¹⁹ Martolu boltok, songon bunga ni buah pala ganup dangkahni ai marhasoman tungkul pakon bunga, martolu boltok songon bunga ni buah pala ganup dangkahni ai marhasoman tungkul pakon bunga; sonai ma ibahen hubani sangkah na onom ai, na luar hun parsuluhan ai.

²⁰ Tapi ompat do boltok ni parsuluhan ai, songon bunga ni buah pala marhasoman tungkul pakon bunga,

²¹ anjaha sada tungkul i toruh ni dua dangkah na luar hunjai, sada tungkul use i toruh ni dua dangkah na luar hunjai, anjaha sada tungkul nari use i toruh ni dua dangkah na luar hunjai, ase bani na onom dangkah na luar hunjai ai.

²² Hunjai do luar tungkul pakon dangkahni, ganupan ai ipauli humbani sangkimpal omas pitah.

²³ Anjaha ipauli ma suluhni na pitu ai, panurturini pakon pangintopini humbani omas pitah.

²⁴ Humbani satalenta omas pitah do parsuluhan ai ipauli ronsi parugasni ganupan.

**Parpauli bani Anjapanjap Pardahupaan, bani
Minak Pamminaki pakon Dahupa**

(ay. 25-28: pausih bd. 30:1-5)

²⁵ Ipauli ma anjapanjap pardahupaan ai humbani hayu nangka, saasta ganjangni, saasta bolagni, ase marompat suhi, anjaha dua asta gijangni; luar hunjai do homa tandukni ai.

²⁶ Ilampis ma ai bani omas pitah, sonai homa tutupni, dingdingni inggot pakon tandukni; ibahen do homa marlais inggot humbani omas pitah,

²⁷ anjaha ibahen do dua pinggol-pinggol omas i toruh ni laisni ai bani lambungni na dua ai angkup, bahen panuruan ni lanja-lanja, ase boi marhitei ai usungon.

²⁸ Humbani hayu nangka do lanja-lanja ai ipauli, anjaha ilampis bani omas.

²⁹ Imasak ma homa minak pamminaki na pansing ai pakon dahupa na misbou na so sinampur, mangihutkon hapandeian ni tuhang pulung.

Ipauli Anjapanjap Panggalangan pakon Parugasni

(ay. 1-7: pausih bd. 27:1-8)

38¹Ipauli ma anjapanjap panggalangan ni galangan situtungon humbani hayu nangka, lima asta ganjangni, lima asta bolagni, ase marompat suhi do, anjaha tolu asta gijangni.

²Ibahren ma ompat tandukni bani suhi-suhini na ompat ai, sada do ai pakon tandukni ai, anjaha ilampis do ai pakon tombaga.

³Anjaha ipauli ma ganup parugas na porlu bani anjapanjap ai: Parabuanni, suyuk-suyukni, mangkukni, garpuni pakon parapuyanni, humbani tombaga do ganup ipauli parugasni ai.

⁴Ibahren ma bani anjapanjap ai sada hondor-hondor humbani jala-jala tombaga na iangit, i toruh ni topini das hubani parsitongahan ni anjapanjap ai.

⁵Ituang ma ompat pinggol-pinggol hubani suhini na ompat ai mardomu hu hondor-hondor tombaga ai bahen panuruan ni lanja-lanja ai.

⁶Ipauli ma lanja-lanja ai humbani hayu nangka anjaha ilapis do ai bani tombaga.

⁷Anjaha ipamasuk ma lanja-lanja ai hubagas pinggol-pinggol na i lambung ni anjapanjap ai, ase boi usungon ai marhitei ai; marruang do anjapanjap ai ipauli humbani papan.

Parpauli bani Tong Parburihan

⁸ Ipauli ma tong parburihan ai humbani tombaga, onjolanni pe humbani tombaga do, ai ma humbani sormin ni puang-puang parugas, na marugas bani labah ni lampolampo partumpuan ai.

Parpauli bani Alaman pakon Tireini

(ay. 9-20: pausih bd. 27:9-19)

⁹ Ipadear ma alamanni, bani lopah pardangsina, “Tirei ni alaman ai saratus asta ganjangni humbani hiou silopak na alus na niangkup,

¹⁰ dua puluh tiangni anjaha onjolanni dua puluh humbani tombaga, tapi hait-kait ni tiangni ampa ransang-ransangni pirak do.”

¹¹ Bani lopah parutara, “Saratus asta ganjang ni tirei ai, tiangni dua puluh, onjolanni dua puluh, humbani tombaga, tapi hait-kait ni tiangni ampa ransang-ransangni pirak do.”

¹² Bani lopah parhasundutan, “Lima puluh asta ganjang ni tireini, tiangni sapuluh, anjaha onjolanni sapuluh, tapi anggo hait-kait ni tiangni ampa ransang-ransangni pirak do.”

¹³ Lima puluh asta do bolag ni alaman ai hampit hapoltakan.

¹⁴ Sapuluh lima asta ganjang ni tireini bani salopah ni horbangan ai, tolu tiangni anjaha tolu onjolanni.

¹⁵ Bani na salopah nari pe sonai do, “Bani hadua lopah ni horbangan ai dong do tirei sapuluh lima asta ganjangni, tolu tiangni anjaha tolu onjolanni

¹⁶ Ganup tirei ni alaman ai inggot humbani hiou silopak na alus na niangkup do.

¹⁷ Tombaga do onjolan ni tiang ai, tapi anggo hait-kaitni pakon ransang-ransangni pirak do, marlapis pirak do uluni, anjaha marransang-ransang pirak do ganup tiang ni alaman ai.

¹⁸ Tapi anggo tirei ni labah ni horbangan ai tonunan sampurborna do, humbani bonang na mahonda, na gerger, na gerger sahalian pakon humbani hiou silopak na alus na niangkup; ganjangni dua puluh asta, gijangni pakon bolagni lima asta do mangihutkon sibaran ni tirei ni alaman ai.

¹⁹ Humbani tombaga do tiangni na ompat ai pakon onjolanni na ompat ai; hait-kaitni, lampis ni uluni pakon ransang-ransangni pirak do.

²⁰ Ganup paku hubani ianan na pansing ai pakon hubani alaman ai inggot humbani tombaga do.”

Buei ni Guguan

²¹ On ma buei ni na pinalaho hubani ianan na pansing ai, lampolampo partumpuan ai, na binilang mangihutkon parentah ni si Musa hubani horja ni halak Levi, binobahon ni si Itamar, anak ni Malim Aron.

²² Si Besaleel, anak ni si Uri, ai ma anak ni si Hur, marga Juda, mangkorjahon haganup na tinonahkon ni Jahowa hubani si Musa

²³ Hasomanni ai ma si Aholiab, anak ni si Ahisamak, marga Dan, sada tuhang anjaha sipartotonun hiou na mahonda, na gerger, na gerger sahalian pakon hiou silopak na alus na niangkup do ia.

²⁴ Haganup omas na pinakei hubani horja laho paulihon ianan na pansing ai, ai ma omas humbani galangan ai, dua puluh siah talenta pakon pitu ratus tolu puluh sekel do, mangihutkon sekel bani ianan na pansing ai.

²⁵ Anjaha pirak na roh humbani kuria ai, humbani sagala na tarbilang saratus talenta pakon saribu pitu ratus pitu puluh lima sekel do mangihutkon sekel bani ianan na pansing ai.

²⁶ Sabeka ganup halak, ai ma satongah sekel mangihutkon sekel bani ianan na pansing ai; humbani ganup halak na masuk bilangan, olat ni na marumur dua puluh tahun hu atas, tumpu onom ratus tolu ribu lima ratus lima puluh halak bueini.

²⁷ Bois do saratus talenta pirak ituang bahen onjolan ni ianan na pansing ai pakon onjolan ni tirei ai, saratus talenta hubani na saratus onjolan ai, ase sada talenta bani sada onjolan.

²⁸ Tapi humbani sisaribu pitu ratus pitu puluh lima sekel pirak ai ipauli ma hait-kait bani tiang ai, ilampis ma uluni pakon ransang-ransangni.

²⁹ Anjaha buei ni guguan tombaga ai pitu puluh talenta dua ribu ompat ratus sekel do.

³⁰ Ipauli ma hunjai onjolan ni labah ni lampolampo partumpuan ai, anjapanjap tombaga ai pakon hondor-hondor tombagani ampa haganup parugas ni anjapanjap ai.

³¹ Sonai homa onjolan ni alaman ai inggot pakon onjolan ni horbangan ni alaman ai ronsi haganup pasuk-pasuk ni ianan na pansing ai pakon haganup pasuk-pasuk ni alaman ai inggot.

Ipauli Pakeian Tohonan

(ay. 1-21: pausih bd. 28:4-30)

39 ¹ Ipauli sidea ma pakean tohonan, sipakeion marugas bani ianan na pansing ai humbani bonang na mahonda, na gerger pakon na gerger sahalian; ipauli homa ma pakean na pansing sipakeion ni si Aron songon na tinonahkon ni Jahowa hubani si Musa.

² Anjaha ipauli ma baju epod ai humbani omas pakon humbani bonang na mahonda, na gerger anjaha na gerger sahalian pakon humbani hiou silopak na alus na niangkup.

³ Itopa sidea ma omas ai marlambar-lambar na nipis, iiris ma ai gabe purada, sitonunonkon saor ni bonang na mahonda, na gerger ampa na gerger sahalian ai, pakon saor ni hiou silopak na alus na niangkup ai, sada tonunan na alus.

⁴ Ibahen sidea ma hubani baju epod ai dua tutup abara, na pinadomu bani tampakanni na dua ai.

⁵ Gondit ni epod na i atas ni ai pe, na gabe panangkut ni ai, dos do pulunganni pakon pardearni, humbani omas, humbani bonang na mahonda, na gerger, na gerger sahalian pakon humbani hiou silopak na alus na niangkup, songon na tinonahkon ni Jahowa hubani si Musa.

⁶ Itukangi ma batu intan unam ai, ililit ma bani tali omas anjaha iuhirhon ma hujai, goran-goran ni anak ni Israel na sepuluh dua ai, songon na manguhir tintin tokan.

⁷ Inahkon ma ai hubani na dua tutup abara ni baju epod ai, gabe batu pardingatan bani anak ni Israel, songon na tinonahkon ni Jahowa hubani si Musa.

⁸ Ipauli ma tutup tonton ai, ai ma sada horja na alus, dos songon na padearhon baju epod ai, humbani bonang na mahonda, na gerger, na gerger sahalian pakon hiou silopak na alus na niangkup.

⁹ Marompat suhi do ai ibahen anjaha dua lapis, sanjongkal ganjangni anjaha sanjongkal bolagni, dua lapis ibahen.

¹⁰ Anjaha itatahkon sidea ma hujai ompat ristei batu intan. Bani ristei na parlobei: Batu intan sardis, topasion pakon samarah;

¹¹ bani ristei na paduahon: batu intan rubin, sapir pakon diamant;

¹² bani ristei na patoluhon: batu intan opal, achat pakon ametis;

¹³ bani ristei na paompatkon: batu intan korisolit, unam pakon jaspis; anjaha marlilit omas ibahen ristei na tinatahkon ai inggot.

¹⁴ Adong do ijai sapuluh dua batu margoran bei mangihutkon goran-goran ni anak ni Israel, songon tintin tokan ma ai bani Israel na sapuluh dua marga ai, goran ni sidea bei iuhirhon hujai.

¹⁵ Anjaha ibahen sidea ma hubani tutup tonton ai rantei songon tali na niangkup humbani omas pitah;

¹⁶ ibahen sidea ma homa dua rantei-rantei omas pakon dua tintin omas, anjaha inahkon sidea ma na dua tintin ai hubani na dua tampakan ni tutup tonton ai.

¹⁷ Anjaha inahkon sidea do na dua tali omas ai hubagas tintin na dua ai, na i tampakan ni tutup tonton ai.

¹⁸ Tapi haduasi ujung ni tali omas na dua ai ihaitkon sidea do hubani rantei-rantei na dua ai, anjaha inahkon ma ai hubani tutup abara ni baju epod ai hampit lobei.

¹⁹ Ibahen sidea ma use dua tintin omas, inahkon ma ai bani na dua tampakan ni tutup tonton ai bani topini hampit bagas na padompak pakon baju epod ai.

²⁰ Ibahen use ope dua tintin omas, anjaha inahkon ma ai hubani na dua tutup abara ni baju epod ai,

hampit toruh dompak lobei, sangkan pardomuanni, i atas ni gondit ni baju epod ai.

²¹ Anjaha isangkutkon sidea ma tutup tonton ai rap pakon tintinni hubani tintin ni baju epod ai marhitei bonang na mahonda, ase longkot ai i atas ni gondit ni baju epod ai, songon na tinonahkon ni Jahowa hubani si Musa.

(ay. 22-26: pausih bd. 28:31-35)

²² Ipauli ma homa baju pardarat ni epod ai, humbani bonang na mahonda do ganupan ai itonun.

²³ I tongah-tongahni do parborgokanni, martopi na tinonun inggot songon topi ni baju partohonan, ase ulang marigat.

²⁴ Ibahen sidea do hubani rambu ni baju pardarat ai buah ni dalima humbani bonang na mahonda, na gerger, na gerger sahalian pakon humbani hiou silopak na alus na niangkup.

²⁵ Ibahen sidea ope homa giring-giring humbani omas pitah, inahkon ma ai hu holangkolang ni buah ni dalima ai inggot bani rambu ni baju pardarat ai;

²⁶ giring-giring omas sada dob ai buah dalima, giring-giring omas sada dob ai buah dalima, sonai ma inggot bani rambu ni baju pardarat ai, sipakeion marugas songon na tinonahkon ni Jahowa hubani si Musa.

²⁷ Ibahen sidea ma homa baju parbagas, itonun humbani hiou silopak na alus, hubani si Aron pakon anakni ai,

(ay. 27-29: pausih bd. 28:39-42)

²⁸ pakon tangkuluk humbani hiou silopak na alus, pakon gotong-gotong humbani hiou silopak na alus, pakon saluar humbani hiou silopak na alus na niangkup,

²⁹ pakon gondit humbani hiou silopak na alus na niangkup, ampa humbani bonang na mahonda, na gerger pakon na gerger sahalian, sada tonunan sampurborna songon na tinonahkon ni Jahowa hubani si Musa.

(ay. 30, 31: pausih bd. 28:36-38)

³⁰ Ibahen sidea do homa sada tutup pardompakan na pansing humbani omas pitah, anjaha iuhirhon hujai songon panguhiron bani tintin tokan: Pinapansing bani Jahowa.

³¹ Ilongkotkon sidea ma hujai tali bonang na mahonda, laho padomuhon ai bani tangkuluk ai i babou, songon na tinonahkon ni Jahowa hubani si Musa.

Pardob ni Horja ai

³² Sonai ma pardob ni ganup horja paulihon ianan na pansing, lampolampo partumpuan ai; ibahen halak Israel do ganup hombar hubani na hinatahon ni Jahowa hubani si Musa, sonai do ibahen sidea.

³³ Iboban sidea ma ianan na pansing ai hubani si Musa, lampolampo ai pakon ganup parugasni, hait-kaitni, papanni, ransang-ransangni, tiangni pakon onjolanni;

³⁴ langit-langitni na humbani bobak ni biribiri tunggal na sinolop, langit-langitni humbani bobak ni haming ampa tirei panutupni,

³⁵ poti hasaksian ai pakon lanja-lanjani ampa langkob pardearan ai,

³⁶ meja ai rap pakon haganup parugasni ampa ruti sigalangonkon;

³⁷ parsuluhan na humbani omas pitah ai pakon suluhni rap pakon tampeianni ronsi haganup parugasni ampa minak hubani parsuluhan ai,

³⁸ anjapanjap omas ai, minak pamminaki ai, dahupa na misbou ai pakon tirei tutup ni labah ni lampolampo ai,

³⁹ anjapanjap tombaga ai pakon hondor-hondor tombagani, lanja-lanjani rap pakon ganup parugasni, tong parburihan ai rap pakon onjolanni,

⁴⁰ tirei ni horbangan ni alaman ai, talini pakon pakuni, ampa haganup parugas sipakeion bani haganup horja ibagas ianan na pansing ai, ai ma lampolampo partumpuan ai;

⁴¹ pakean tohonan marugas ibagas ianan na pansing ai, pakean na pansing bani Malim Aron pakon pakean bani anakni ai laho mangkorjahon hamalimon ai.

⁴² Hombar hubani na tinonahkon ni Jahowa hubani si Musa, sonai do idobkon halak Israel haganup horja ai.

⁴³ Jadi itorih si Musa ma haganup horja ai, anjaha tonggor ma, domma dob ibahen sidea; songon na tinonahkon ni Jahowa hubani si Musa, lanjar sonai do ibahen sidea. Dob ai ipasu-pasu si Musa ma sidea.

Ipajongjong si Musa Lampolampo Partumpuan

(ay. 1-33: pausih bd. 25-31)

40 ¹ Dob ai nini Jahowa ma dompak si Musa,
² “Bani ari sada bulan sada maningon pajongjongonmu do ianan na pansing, lampolampo partumpuan ai.

³ Maningon nahkononmu do hujai poti hasaksian ai, anjaha lingodkononmu poti ai bani tirei ai.

⁴ Maningon boanonmu do meja ai hubagas, anjaha aturonmu siaturonkon i atasni, anjaha maningon boanonmu do parsuluhan ai hubagas anjaha pannahkononmu suluh ai hujai.

⁵ Maningon pajongjongonmu do anjapanjap pardahupaan omas ai i lobei ni poti hasaksian ai, anjaha tirei ai maningon gantungkononmu do i lobei ni labah ni ianan na pansing ai.

⁶ Maningon pajongjongonmu do anjapanjap panggalangan ni galangan situtungan ai i lobei

ni labah ni ianan na pansing, lampolampo partumpuan ai.

⁷ Maningon pajongjongonmu do tong parburihan ai i holangkolang ni lampolampo partumpuan ai pakon anjapanjap ai, anjaha nahkon ma bah hubagas.

⁸ Maningon paulionmu do alaman ai inggot, anjaha gantungkononmu tirei i lobei ni horbangan ni alaman ai.

⁹ Dob ai buat ma minak pamminaki ai, minaki ma ianan na pansing ai pakon ganup na adong ibagas, anjaha urasi ma ai pakon haganup parugasni, ase gabe pansing ma ai.

¹⁰ Maningon minakanmu do anjapanjap panggalangan ni galangan situtungan ai pakon haganup parugasni, maningon urasonmu do anjapanjap ai, ase gabe pansing sahalian anjapanjap ai.

¹¹ Maningon minakanmu do tong parburihan ai pakon onjolanni, maningon urasonmu do ai.

¹² Dob ai boan ma si Aron pakon anakni ai roh hun dohor hu labah ni lampolampo partumpuan ai, anjaha burihi ma sidea bani bah;

¹³ sorungkon ma hubani si Aron pakean na pansing ai, minaki ma ia anjaha urasi ma ia, ase ia mangkorjahon hamalimon Bangku.

¹⁴ Boan ma homa anakni ai hun dohor, anjaha sorungkon ma hubani sidea baju parbagas ai,

¹⁵ anjaha minaki ma sidea songon na mininakanmu bapa ni sidea, ase sidea mangkorjahon hamalimon Bangku; ia pamminakion na bani sidea ai gabe tanda hamalimon do ai bani sidea sadokah ni dokahni torus marsundut-sundut.”

¹⁶ Jadi ipasaud si Musa ma ganup songon na tinonahkon ni Jahowa hu bani, sonai do ibahen.

¹⁷ Anjaha bani bulan sada, tahun paduahon, bani ari parlobei ni bulan ai, ipajongjong ma ianan na pansing ai.

¹⁸ Ipajongjong si Musa ma ianan ai; ibahen ma onjolanni, ipamasuk papanni, ibahen ransang-ransangni anjaha ipajongjong tiangni.

¹⁹ Ipaherbang ma tenda ni lampolampo ai hu atas ni ianan na pansing ai, anjaha inahkon ma tutup ni lampolampo ai hu atasni, songon na tinonahkon ni Jahowa hubani si Musa.

²⁰ Ibuat ma hasaksian ai anjaha inahkon hubagas poti ai, isurukkon ma lanja-lanja ai hubani poti ai anjaha inahkon langkob pardearan ai hu atas ni poti ai.

²¹ Dob ai iboban ma poti ai hubagas ianan na pansing ai, anjaha igantungkon ma tirei ai bahen tutup ni poti hasaksian ai, songon na tinonahkon ni Jahowa hubani si Musa.

²² Ipajongjong ma meja ai hubagas lampolampo partumpuan ai hampit lopah parutara ni ianan na pansing ai i darat ni tirei ai,

²³ anjaha iatur ma ruti i atasni i lobei ni Jahowa, songon na tinonahkon ni Jahowa hubani si Musa.

²⁴ Ipajongjong ma homa parsuluhan ai ibagas ianan na pansing ai tontang ni meja ai hampit lopah pardangsina ni ianan na pansing ai.

²⁵ Inahkon ma suluh ai i atasni i lobei ni Jahowa, songon na tinonahkon ni Jahowa hubani si Musa.

²⁶ Inahkon ma anjapanjap omas ai ibagas lampolampo partumpuan ai i lobei ni tirei ai,

²⁷ anjaha itutung ma dahupa na misbou i atasni songon na tinonahkon ni Jahowa hinan hubani si Musa.

²⁸ Igantungkon ma pakon tirei ai i lobei ni labah ni ianan na pansing ai.

²⁹ Tapi anggo anjapanjap panggalangan ni galangan situtungan ai ipajongjong do bani labah ni ianan na mapansing, lampolampo partumpuan ai, anjaha igalangkon ma i atasni galangan situtungan pakon galangan sipanganon songon na tinonahkon ni Jahowa hinan hubani si Musa.

³⁰ Ipajongjong ma tong parburihan ai i holangkolang ni lampolampo partumpuan ai pakon anjapanjap ai, anjaha ibahen ma bah hujai bahen parburihan;

³¹ bani bah ai ma iburihi si Musa, si Aron pakon anakni ai tangan pakon nahei ni sidea.

³² Anggo masuk sidea hubagas lampolampo partumpuan ai, anjaha anggo roh sidea hun dohor

bani anjapanjap ai, maningon marburih sidea, songon na tinonahkon ni Jahowa hinan hubani si Musa.

³³ Ipauli ma alaman ai inggot ianan na mapansing ai pakon anjapanjap ai, anjaha igantungkon ma tirei ni horbangan ni alaman ai. Jadi sonai ma pardob ni ganup horja ai ibahen si Musa.

Hamuliaon ni Jahowa Manggoki Ianan na Mapansing

³⁴ Dob ai roh ma hambun ai manrungkub lampolampo partumpuan ai, anjaha igoki hamuliaon ni Jahowa ma ianan na mapansing ai,

³⁵ gabe seng tarbahen si Musa masuk hubagas lampolampo partumpuan ai, ai sorap do i atasni hambun ai, anjaha hamuliaon ni Jahowa manggoki ianan na mapansing ai.

³⁶ Layur ibagas pardalanan ni sidea ai, anggo manaik ma hambun ai hun datas ni ianan na pansing ai, bingkat ma halak Israel mardalan;

³⁷ tapi anggo seng manaik hambun ai, seng bingkat sidea, das ronsi ari parnaikni ai.

³⁸ Ai sai i atas ni ianan na mapansing ai do hambun ni Jahowa ai ia arian, anjaha apuy do i atasni anggo borngin, ipaidah-idah ganup ginompar ni Israel, sadokah pardalanan ni sidea ai.

3 Musa

Pasal Galangan Situtungan

1 ¹ Dob ai idilo Jahowa ma si Musa anjaha nini ma dompaksi humbani lampolampo partumpuan ai,

² “Patugah ma hubani halak Israel anjaha hatahon ma hubani sidea, anggo adong atap ise humbennima na sihol manggalangkon galangan hubani Jahowa, maningon humbani pinahan do, humbani lombu barang humbani biribiri do galangkononnima galangannima ai.

³ Anggo humbani lombu do galangan situtungan na sihol galangkononni ai, maningon jonggi na lang martikas do galangkononni, maningon boanonni do ai bani labah ni lampolampo partumpuan ai, ase jumpahan idop ni uhur ia i lobei ni Jahowa.

⁴ Dob ai tampeihononni ma tanganni hu ulu ni galangan situtungan ai, jadi jaloon ma ai halani ia, bahen pardearan bani.

⁵ Dob ai maningon sayatonni ma jonggi ai i lobei ni Jahowa; anjaha maningon bobanon ni anak ni si Aron, malim-malim ai ma daroh ai anjaha pispiskononni ma daroh ai hu anjapanjap ai inggot, ai ma na i lobei ni labah ni lampolampo ai.

⁶ Dob ai maningon bobakonni ma galangan situtungon ai anjaha toktokanni ma ai martoktok-toktok.

⁷ Anjaha pagaraon ni anak ni si Aron, malim-malim ai ma apuy i atas ni anjapanjap ai, anjaha nahkononni ma soban hu atas ni apuy ai.

⁸ Baturon ni anak ni si Aron, malim-malim ai ma sagala tinoktokni, uluni pakon taboh-tabohni ai hu atas ni soban pakon apuy na i atas ni anjapanjap ai.

⁹ Tapi anggo bituha-bituhani pakon hae-haeni maningon burihanni do ai bani bah, dob ai itutung malim ai ma ganupan ai i atas ni anjapanjap ai; galangan situtungon ma ai, galangan apuy, gabe uap na misbou bani Jahowa.

¹⁰ Anggo humbani pinahan etek do galangan situtungon na sihol galangkononni ai, humbani biribiri atap hambing, maningon tunggal na so martikas do galangkononni.

¹¹ Maningon sayatonni do ai i lobei ni Jahowa, i lambung ni anjapanjap ai hampit utara, anjaha maningon pispiskonon ni anak ni si Aron, malim-malim ai ma darohni ai hubani anjapanjap ai inggot.

¹² Dob ai toktokanni ma ai martoktok-toktok, pakon uluni ampa tabohni, anjaha maningon baturonni ma ai hu atas ni soban pakon apuy na i atas ni anjapanjap ai.

¹³ Anggo bituha-bituhani pakon hae-haeni maningon burihanni ai bani bah, dob ai maningon

galangkonon ni malim ai ma haganup ai anjaha tutungonni i atas ni anjapanjap ai; galangan situtungan ma ai, galangan apuy, gabe uap na misbou bani Jahowa.

¹⁴ Anggo humbani manuk-manuk do galangan situtungan sigalangkononni ai hubani Jahowa, maningon galangkononni do ai humbani kuhuy barang humbani anak ni asas.

¹⁵ Maningon bobanon ni malim ai ma ai hu anjapanjap ai, puloskononni ma uluni anjaha tutungonni ma ai i atas ni anjapanjap ai, anjaha darohni ai patirisonni ma hu lambung ni anjapanjap ai.

¹⁶ Maningon padaohonni do buluranni pakon imputni anjaha sampakkononni ma ai hu lambung ni anjapanjap ai hampit hapoltakan hubani ianan ni abuan.

¹⁷ Dob ai bolahanni ma ai bani parhabonganni, tapi seng bulih sirangonni; jadi tutungan ni malim ai ma ai i atas ni anjapanjap ai bani soban na bani apuy ai; galangan situtungan ma ai, galangan apuy, uap na misbou bani Jahowa.”

Pasal Galangan Sipanganon

2¹ “Barang ise manggalangkon galangan sipanganon bani Jahowa, maningon itak na lumat do galanganni ai; useihononni ma hujai minak anjaha nahkononni hu atasni hamonan;

²dob ai boanonni ma ai hubani anak ni si Aron, malim ai. Buatonni ma hunjai sampohul itak na lumat pakon minak ai ampa ganup hamonan ai; tutungon ni malim ai ma ai bahen galangan pardingatan i atas ni anjapanjap ai, gabe galangan apuy, uap na misbou bani Jahowa.

³Tapi na teba humbani galangan sipanganon ai, rupei ni si Aron pakon sagala anakni ai ma ai; ai ma parbagianan na pansing sahalian humbani galangan apuy bani Jahowa.

⁴Anggo sihol galangkononmu galangan sipanganon na dob ipatongka i tataring, maningon humbani itak na lumat do ai, pakon humbani kue na so niigaran marhasoman minak pakon humbani ruti na so niigaran na marlapu minak ma ai.

⁵Anggo galangan sipanganon na ginoreng i balanga do galanganmai, maningon humbani itak na lumat, na so niigaran do ai anjaha marlapu bani minak.

⁶Maningon topikanmu do ai etek-etek, anjaha useihononmu hujai minak; galangan sipanganon ma ai.

⁷Anggo galangan sipanganon na ilompa ibagas hudon do galanganmai, maningon humbani itak na lumat, marsaor minak do bahenonmu ai.

⁸Maningon boanonmu do galangan sipanganon na ipaturei humbani pulungan on hubani Jahowa; maningon boanon do ai bani malim ase ia use mamboan hu anjapanjap.

⁹ Maningon buaton ni malim ai do galangan pardingatan humbani galangan sipanganon ai, anjaha maningon tutungonni do ai i atas anjapanjap ai; ai ma galangan apuy, uap na misbou bani Jahowa.

¹⁰ Tapi na teba humbani galangan sipanganon ai, rupei ni si Aron pakon anakni ma ai, ai ma parbagianan na pansing sahalian humbani galangan apuy bani Jahowa.

¹¹ Sagala galangan sipanganon na sihol galangkononmu bani Jahowa, seng bulih marnamigar bahenonmu; ai sagala na migar barang manisan seng bulih tutungonmu bahen galangan apuy bani Jahowa.

¹² Bahen galangan limbuah boi do boanonmu ai bani Jahowa, tapi seng bulih galangkonon ai bani anjapanjap bahen uap na misbou.

¹³ Maningon garamonmu do ganup galangan sipanganonmu, seng bulih tartading bahenonmu garam parpadanan ni Naibatamu bani galangan sipanganonmu; maningon marhasoman garam do ganup galangkononmu galanganmu.

¹⁴ Anggo igalangkon ho galangan sipanganon humbani limbuah hubani Jahowa, maningon boanonmu do buyur ni omei na nirondang ibagas apuy anjaha na niduda bahen galangan sipanganon humbani limbuah.

¹⁵ Maningon bahenonmu minak hu atasni, anjaha maningon nahkononmu homa hamonan hu atasni; galangan sipanganon ma ai.

¹⁶ Dob ai maningon tutungon ni malim ai ma galangan pardingatan humbani omei na niduda pakon humbani minak ampa haganup hamonan ai bahen galangan apuy bani Jahowa.”

Pasal Galangan Pardameian

3 ¹ “Anggo galangan pardameian galangan ni sada halak, anjaha sihol galangkononni ai humbani lombu tunggal atap boru-boru, seng bulih martikas galangkononni ai hu lobei ni Jahowa.

² Maningon tampeihononni do tanganni hu ulu ni galanganni ai anjaha sayatonni ma ai i lobei ni labah ni lampolampo partumpuan ai; anjaha maningon pispiskonon ni anak ni si Aron, malim-malim ai ma darohni ai hu anjapanjap ai inggot.

³ Anjaha humbani galangan pardameian ai, maningon galangkononni do bahen galangan apuy bani Jahowa,” taboh-taboh na manrongkob bituhani ronsi ganup taboh-taboh na i atas ni bituha ai;

⁴ sonai homa na dua piah-piah ampa taboh-taboh na longkot hujai, na bani binongei ai, sonai homa bongbong daroh na dalngop bani atei-atei, rap pakon piah-piah ma buatonni ai.

⁵ Anjaha maningon tutungon ni anak ni si Aron ma ai i atas ni anjapanjap, i atas ni soban pakon apuy, bahen galangan situtungon; galangan apuy ma ai, uap na misbou bani Jahowa.

⁶ Anggo humbani pinahan etek do galanganni ai bahen galangan pardameian bani Jahowa, tunggal atap boru-boru, maningon na so martikas do galangkononni ai.

⁷ Anggo anak ni biribiri do na sihol galangkononni ai, maningon boanonni do ai hu lobei ni Jahowa.

⁸ Tampeihononni ma tangannni hu ulu ni galanganni ai, anjaha sayatonni ma ai i lobei ni lampolampo partumpuan ai; tapi anggo daroh ni ai maningon pispiskonon ni anak ni si Aron ma ai hu anjapanjap ai inggot.

⁹ Humbani galangan pardameian ai maningon galangkononni do bahen galangan apuy bani Jahowa, “Taboh-taboh, ihurni ganup sirotapon dohor bani hayu tanggurungni, taboh-taboh na manrongkob bituhani ronsi haganup taboh-taboh na i atas ni bituhani ai:

¹⁰ sonai homa dua piah-piah ampa taboh-taboh na longkot hujai na bani binongei ai, sonai homa bongbong daroh na dalngop bani atei-atei ai, rap pakon piah-piah ma buatonni ai.

¹¹ Maningon tutungon ni malim ma ai i atas ni anjapanjap bahen sipanganon ni galangan apuy bani Jahowa.

¹² Anggo hambing galanganni, maningon boanonni do ai hu lobei ni Jahowa.

¹³ Tampeihononni ma tanganni hu uluni anjaha sayatonni ma ai i lobei ni lampolampo partumpuan ai; tapi anggo darohni ai maningon pispiskonon ni anak ni si Aron ma ai hu anjapanjap ai inggot.

¹⁴ Maningon buatonni do deba hunjai galanganni bahen galangan apuy bani Jahowa, ai ma taboh-taboh na manrongkob bituhani ronsi haganup taboh-taboh na i atas ni bituha ai;

¹⁵ sonai homa na dua piah-piah ampa taboh-taboh na longkot hujai na bani binongei ai, sonai homa bongbong daroh na dalngop bani atei-atei ai, rap pakon piah-piah ma buatonni ai.

¹⁶ Maningon tutungon ni malim ma ai i atas ni anjapanjap bahen sipanganon ni galangan apuy gabe uap na misbou bani Jahowa; sagala taboh-taboh Jahowa do simadasi.

¹⁷ Aturan na totap ma on sadokah ni dokahni ronsi ginomparnima bani ganup ianannima, sabonar seng boi do panganonnima taboh-taboh barang daroh.”

Galangan Pardousaon

4 ¹ Dob ai nini Jahowa ma hubani si Musa,
² “Hatahon ma hubani halak Israel, anggo adong barang ise na mardousa ibagas na so tinuntunni

dompak sada titah ni Jahowa, gabe ihorjahon barang aha na so bulih horjaonkonni namin:

³ Anggo malim na dob mininakan do na mardousa ai, gabe iparroh hasalahan hubani bangsa ai, maningon galangkononni do halani dousani na dob hinorjahonni ai sada anak ni lombu na so martikas hubani Jahowa bahen galangan pardousaon.

⁴ Maningon boanonni ma lombu ai hu labah ni lampolampo partumpuan ai, hu lobei ni Jahowa, anjaha tampeihononni ma tanganni hu ulu ni lombu ai, anjaha sayatonni ma lombu ai i lobei ni Jahowa.

⁵ Dob ai buaton ni malim na dob mininakan ai ma humbani daroh ni lombu ai anjaha iboan ma ai hubagas lampolampo partumpuan ai.

⁶ Sornobkonon ni malim ai ma jari-jarini hubagas daroh ai, anjaha pispiskononni ma humbani daroh ai pitu hali i lobei ni Jahowa i lobei ni tirei ni ianan na mapansing ai.

⁷ Maningon lapuhonon ni malim ai homa humbani daroh ai hubani tanduk ni anjapanjap panutungan ni dahupa na misbou ai i lobei ni Jahowa, na ibagas lampolampo partumpuan ai, dob ai ganup daroh na teba ai humbani lombu ai, maningon useihononni do ai hu dasor ni anjapanjap panggalangan ni galangan situtungan na i labah ni lampolampo partumpuan ai.

⁸ Maningon buatonni do ganup taboh-taboh ni lombu galangan pardousaon ai, sonai age taboh-

taboh na manrongkob bituhani ronsi ganup taboh-
taboh na i atas ni bituhani ai;

⁹sonai homa piah-piahni na dua ai pakon taboh-
taboh na longkot hujui na bani binongeini, sonai
homa bongbong daroh na dalngop bani atei-atei ai,
rap pakon piah-piah ma buatonni ai,

¹⁰dos songon na binuatni ai humbani lombu
galangan pardameian, anjaha maningon
galangkonon ni malim ma ai i atas ni anjapanjap
panggalangan ni galangan situtungon.

¹¹Tapi anggo bobak ni lombu ai rap pakon ganup
dagingni, uluni, naheini, bituhani pakon ginagatni,

¹²ganup lombu ai tene maningon boanonni hu
darat ni parsaranan ai, hubani sada ianan na
pansing, hubani pandurusan ni abuan, anjaha
maningon tutungonni do ai i atas soban ibagas
apuy, maningon i atas pandurusan ni abuan do
tutungonni ai.

¹³Anggo ganup tumpuan ni Israel do na mardousa
ai halani na so tinuntunni, anjaha ponop ai humbani
pangidah ni tumpuan ai, gabe ihorjahon sidea na
manlanggar dompak sada titah ni Jahowa, na so
bulih namin horjahononkon, gabe salah sidea,

¹⁴hape talar use hubani tumpuan ai dousa na
hinorjahon ni sidea ai, maningon galangonkon ni
tumpuan ai do sada anak ni lombu bahen galangan
pardousaon, anjaha maningon boanonni do ai hu
lobei ni lampolampo partumpuan ai.

¹⁵ Tampeihonon ni pangintuai ni tumpuan ai ma tangan ni sidea bani ulu ni lombu ai i lobei ni Jahowa, anjaha sayatonni ma lombu ai i lobei ni Jahowa.

¹⁶ Dob ai boanon ni malim na dob mininakan ai ma deba humbani daroh ni lombu ai hu lampolampo partumpuan ai,

¹⁷ anjaha sornobkonon ni malim ai ma jari-jarini hubagas daroh ai, anjaha pispiskononni ma ai pitu hali i lobei ni Jahowa hampit lobei ni tirei ai.

¹⁸ Maningon lapuhononni homa humbani daroh ai hubani tanduk ni anjapanjap, na i lobei ni Jahowa, na ibagas lampolampo partumpuan ai, anjaha ganup daroh na teba ai maningon useihononni do ai hu dasor ni anjapanjap panggalangan ni galangan situtungon, na i labah ni lampolampo partumpuan ai.

¹⁹ Tapi ganup taboh-taboh ai maningon buatonni do hunjai anjaha tutungonni i atas ni anjapanjap ai.

²⁰ Maningon bahenonni do hubani lombu ai, usih songon na binahenni hubani lombu pardousaon ai, maningon sonai do bahenonni ai. Sonai ma bahenon ni malim ai pardearan bani sidea, gabe dapotan hasasapan ni dousa sidea.

²¹ Anjaha maningon boanonni do lombu ai hu darat ni parsaranan ai, anjaha tutungonni ma ai songon na dob tinutungni lombu na parlobei ai, ai ma gabe galangan pardousaon bani tumpuan ai.

²² Anggo mardousa sada raja humbani na so tinuntunni gabe ihorjahon na so bulih namin horjaonkonni, mangihutkon titah ni Jahowa Naibatani, gabe marsalah ia marhitei ai;

²³ anggo domma talar bani dousani na hinorjahonni ai, maningon boanonni do sada hambing tunggal na so martikas bahen galanganni.

²⁴ Tampeihononni ma tanganni hubani ulu ni hambing tunggal ai, lanjar sayatonni ma ai bani ianan panayatan ni galangan situtungan i lobei ni Jahowa, ai ma gabe galangan pardousaon.

²⁵ Dob ai buaton ni malim ai ma deba humbani daroh ni galangan pardousaon ai marhitei jari-jarini, anjaha lapuhononni ma ai hubani tanduk ni anjapanjap panggalangan ni galangan situtungan ai; ia daroh na teba ai useihononni ma ai hu dasor ni anjapanjap panggalangan ni galangan situtungan ai.

²⁶ Tapi anggo taboh-tabohni ai ganup, maningon tutungonni do ai bani anjapanjap, usih songon taboh-taboh ni galangan pardameian. Sonai ma pardearan halani dousani bahenon ni malim ai, gabe dapotan hasasapan ni dousa ma ia.

²⁷ Anggo mardousa sahalak simbuei pangisi ni nagori in halani na so tinuntunni, marhiteihon na manlanggar sada humbani titah ni Jahowa, gabe marsalah ia;

²⁸ jadi anggo domma talar bani dousani na hinorjahonni ai, maningon boanonni sada hambing boru-boru na so martikas bahen galangan halani dousani na dob hinorjahonni ai.

²⁹ Tampeihononni ma tanganni bani ulu ni galangan pardousaon ai, lanjar sayatonni ma ai bani ianan ni galangan situtungan.

³⁰ Dob ai buaton ni malim ma deba humbani darohni ai marhitei jari-jarini, anjaha lapuhononni ma ai bani tanduk ni anjapanjap panggalangan ni galangan situtungan ai, anjaha darohni na teba ai useihononni ma hu dasor ni anjapanjap ai.

³¹ Tapi ganup taboh-tabohni ai maningon buatonni do ai, songon pambuatni bani taboh-taboh ni galangan pardameian, anjaha tutungan ni malim ai ma ai bani anjapanjap ai, bahen uap na misbou bani Jahowa. Sonai ma pardearan bahenon ni malim ai bani, jadi dapotan hasasapan ni dousa ma ia.

³² Anggo anak ni biribiri iboban bahen galangan pardousaonni maningon boru-boru na so martikas do boanonni.

³³ Anjaha tampeihononni ma tanganni bani ulu ni galangan pardousaon ai, lanjar sayatonni ma ai bahen galangan pardousaon bani ianan panayatan ni galangan situtungan ai.

³⁴ Dob ai buaton ni malim ma deba humbani darohni ai marhitei jari-jarini, anjaha lapuhononni ma ai bani tanduk ni anjapanjap panggalangan ni

galangan situtungan ai, anjaha darohni na teba ai useihononni ma hu dasor ni anjapanjap ai.

³⁵ Tapi taboh-tabohni ai ganup maningon do ai, songon pambuatni bani taboh-taboh ni anak ni biribiri humbani galangan pardameian, anjaha maningon tutungan ni malim ma ai bani anjapanjap ai bahen galangan apuy bani Jahowa. Sonai ma pardearan bahenon ni malim ai bani halani dousa na hinorjahonni ai, jadi dapotan hasasapan ni dousa ma ia.”

Aturan Deba Nari Pasal Galangan Pardousaon

5 ¹ “Anggo mardousa sada halak, marhitei na mambogei hata pamuraion, anjaha ia saksi, atap ia sandiri na mambogei ai atap adong na pabotohkon bani, hape seng ipatugah, mangonai ma salah ai bani.

² Atap anggo ijamah sada halak sada barang na mabutak, ai ma bangkei ni binatang na mabutak, atap bangkei ni pinahan na mabutak, atap bangkei ni gilok-gilok na mabutak, age seng ibagas botohni, butak do ia halani ai anjaha marsalah.

³ Atap anggo tarjamahsi habutakon ni jolma, atap habutakon na ijananin pe ai, gabe butak do ia bahenonni ai; age seng ibagas botohni ai lobei, gabe ibotoh use, parsalah ma ia ijai.

⁴ Atap anggo adong sada halak, na tarlanjur bibirni mangkatahon bija laho mangkorjahon na

masambor atap na madear, pasal haganup tene na tarlanjur ibijahonjolma, age seng ibagas botohni ai lobei, gabe ibotoh use, parsalah ma ia ibagas ai.

⁵Anggo marsalah sada halak ibagas ai, maningon sopotkononni do na dob mardousa ia ibagas ai,

⁶anjaha boanonni ma galangan pardousaonni hubani Jahowa halani salah na binahenni ai, sada boru-boru humbani pinahan etek, sada anak ni biribiri atap sada hambing, anjaha malim ai do mambahen pardearan bani halani dousani ai.

⁷Tapi anggo seng sungkup gogohni patukkon sada biribiri, maningon boanonni bahen galanganni hubani Jahowa, halani dousa na binahenni ai, dua kuhuy barang dua anak ni asas, sada bahen galangan pardousaon, na sada nari bahen galangan situtungan.

⁸Anjaha maningon boanonni do ai hubani malim ai, ase igalangkon na parlobei ai bahen galangan pardousaon; maningon puloskononni do uluni hampit tangkuhukni, tapi seng bulih rotap ai.

⁹Dob ai pispiskononni ma deba humbani daroh ni galangan pardousaon ai hu dingding ni anjapanjap ai, tapi daroh na teba ai, tiriskononni ma hu dasor ni anjapanjap ai, ai ma galangan pardousaon.

¹⁰Dob ai maningon galangkononni do na paduahon ai bahen galangan situtungan, mangihutkon aturan, anjaha malim ai ma mambahen bani pardearan

halani dousa na binahenni ai, jadi dapotan hasasapan ni dousa ma ia.

¹¹ Tapi anggo seng sungkup gogohni patukkon dua kuhuy barang dua anak ni asas, maningon boanonni do bahen galanganni halani dousa na hinorjahonni ai, saparsapuluh efa itak na lumat bahen galangan pardousaon, seng bulih nahkononni minak hujai, barang bahenonni hamonan huatasni, halani galangan pardousaon do ai.

¹² Maningon boanonni ma ai hubani malim, anjaha buaton ni malim ai ma sampohul hunjai bahen rupei pardingatan, anjaha tutungonni ma ai i atas ni anjapanjap bahen galangan apuy bani Jahowa, ai ma galangan pardousaon.

¹³ Sonai ma bahenon ni malim ai pardearan bani halani dousa na hinorjahonni ibagas sada pahara ondi, ase dapotan hasasapan ni dousa ia; na lobih ai, rupei ni malim do ai, songon galangan sipanganon ai.”

Galangan Parsalahan

¹⁴ Dob ai nini Jahowa ma hubani si Musa,

¹⁵ “Anggo adong sada halak na mangorui anjaha na mardousa, dompak na ijahanin pe na pinapansing ni Jahowa, tapi seng ituntun, maningon boanonni do bahen galangan parsalahanni hubani Jahowa, sada biribiri tunggal na so martikas humbani

pinahan etek, ansa taksiranmu domu bani sekel pirak, mangihutkon sekel bani ianan na pansing in, ai ma galangan parsalahan.

¹⁶ Anjaha barang sadiha na nioruanni marhiteihon ni dousani humbani ugas na pansing ai maningon pasuangonni do, anjaha maningon tambahanni saparlina hunjai anjaha bereonni ai hubani malim, jadi malim ai ma mambahen pardearan bani, gabe dapotan hasasapan ni dousa ma ia.

¹⁷ Anggo mardousa sada halak gabe ihorjahon na so bulih bahenonni namin mangihutkon titah ni Jahowa, age seng ibotoh ai, parsalah do ia ibagas ai, jadi maningon mangonai papa hu bani,

¹⁸ gabe maningon boanonni ma hubani malim humbani pinahan etek, sada biribiri tunggal na so martikas domu hubani taksiranmu bahen galangan parsalahan, anjaha malim ai ma mambahen pardearan bani halani hakahouon na so niutuskonni ai, anjaha dapotan hasasapan ni dousa ma ia.

¹⁹ In ma galangan parsalahan, halani na dob marsalah ia bani Jahowa.”

Pasal Galangan Situtungan

6 ¹ (5-20) Dob ai nini Jahowa ma hubani si Musa,
² (5-21) “Anggo mardousa sada halak gabe manlanggar ia dompak parentah ni Jahowa marhitei na mangoto-otoi hasomanni marhitei

barang na pinasimpankon atap na pinalimihon hu bani, atap marhitei na manrampok, atap marhitei na manamun hasomanni,

³ (5-22) atap dong jumpahsi na magou gabe iporsou ai, anjaha salah parbijani marhitei atap aha pe gabe boi mardousa ia halani ai,

⁴ (5-23) anggo mardousa ia sonai gabe marsalah, maningon pasuangonni do ugas na dob nirampokni ai, atap na sinamunni ai, atap na dob pinasimpankon ai bani, atap ugas na magou na dob jumpahsi ai,

⁵ (5-24) atap aha pe tene na dob binijahonni ibagas sipaoto-oto, maningon pasuangonni do ai ganup anjaha tambahanni saparlima ni hunjai, anjaha berehononni ma ai hubani simadasi hinan, bani ari panggalangkononni bani galangan parsalahanni ai.

⁶ (5-25) Anjaha maningon do boanonni hubani malim ai bahen galangan parsalahanni bani Jahowa sada biribiri tunggal na so martikas humbani pinahan etek, domu hubani taksiranmu bahen galangan parsalahan.

⁷ (5-26) Jadi malim ai ma mambahen pardearan bani ilobei ni Jahowa, gabe dapotan hasasapan ni dousa ma ia pasal haganup na hinorjahonni na parohkon salah bani.”

⁸ (6-1) Dob ai nini Jahowa ma hubani si Musa,

⁹ (6-2) “Hatahon ma hubani si Aron pakon hubani anakni ai sonon, on do titah pasal galangan

situtungon. Ia galangan situtungon ai maningon tibal do i panggangan ai layur saborngin das hubani patarni, anjaha maningon gara do torus apuy ai i atas ni anjapanjap ai.

¹⁰ (6-3) Maningon sorungkonon ni malim ai ma baju hiou silopakni, sonai homa saluar hiou silopakni hubani badanni, anjaha maningon buatonni do abuan ni galangan situtungon ai, dob bois ipangan apuy i atas anjapanjap ai, anjaha useihononni ma ai i lambung ni anjapanjap ai.

¹¹ (6-4) Dob ai maningon tanggalanni do use pakeanni ai anjaha sorungkononni pakean na legan; dob ai boanonni ma abuan ai hu darat ni parsaranan ai hubani sada ianan na pansing.

¹² (6-5) Anjaha apuy na i anjapanjap ai maningon gara tongtong, seng bulih mintop; maningon pagaraon ni malim do soban ganup sogod i atasni anjaha baturonni i atasni galangan situtungon anjaha tutungonni i atasni taboh-taboh ni galangan pardameian.

¹³ (6-6) Maningon tong-tong gara apuy i atas ni anjapanjap ai, seng bulih mintop.

Pasal Galangan Sipanganon

¹⁴ (6-7) Anjaha on ma aturan pasal galangan sipanganon: Maningon anak ni si Aron do mangondoskonsi i lobei ni Jahowa hu lobei ni anjapanjap ai.

¹⁵ (6-8) Dob ai buatonni ma hunjai sampohul humbani itak ni galangan sipanganon ai, pakon humbani minakni pakon humbani dahupani na i atas ni galangan sipanganon ai, anjaha maningon tutungonni ma ai i atas ni anjapanjap ai bahen uap na misbou, rupei pardingatan bani Jahowa.

¹⁶ (6-9) Tapi teba-tebani ai panganon ni si Aron pakon anak-ni ma ai; ipangan ma ai seng marnamigar bani ianan na susi; i alaman ni lampolampo na pansing ai ma panganon ni sidea ai.

¹⁷ (6-10) Seng bulih patongkaon ai marhasoman na migar; rupei ni sidea ma ai na hubere humbani galangan apuy na hu bangku; pansing tumang do ai, usih songon galangan pardousaon ampa galangan parsalahan ai.

¹⁸ (6-11) Sagala dalahi na i tongah-tongah ni ginompar ni si Aron bulih do mangankon hunjai, in ma aturan sadokah ni dokahni ronsi ginomparnima pasal galangan apuy na bani Jahowa; barang ise na manjamah ai, gabe pansing ma ia.”

¹⁹ (6-12) Nini Jahowa ma hubani si Musa,

²⁰ (6-13) “On ma galangan ni si Aron pakon anakni ai hubani Jahowa bani ari pamminakionni; saparsapuluh efa itak na lumat bahen galangan sipanganon ari-ari, satongahni sogod anjaha na satongah nari bodari.

²¹ (6-14) Ibagas balanga marhasoman minak do ai paulion; anjaha maningon agu botul do ai boanonmu bahen galangan sipanganon, marasantopik ma ai galangkononmu bahen uap na misbou bani Jahowa.

²² (6-15) Malim na dob niminakan, ai ma gantihni humbani anakni, ia do sibahen ai gabe aturan sisadokah ni dokahni ma ai, maningon ganup do ai tutungon bani Jahowa.

²³ (6-16) sagala galangan sipanganon na ginalangkon ni malim, maningon bois do ai tutungon, seng bulih ai panganon.”

²⁴ (6-17) Nini Jahowa ma hubani si Musa,

²⁵ (6-18) “Hatahon ma hubani si Aron pakon hubani anakni ai, on do titah pasal galangan pardousaon. Bani ianan panayatan ni galangan situtungon ai do sayaton galangan pardousaon ai i lobei ni Jahowa, pansing sahalian do ai.

²⁶ (6-19) Malim na manggalangkon galangan pardousaon ai, ia do na mangankon ai; bani ianan na pansing do panganon ai, i alaman lampolampo partumpuan ai.

²⁷ (6-20) Barang ise na manjamah daging ni galangan ai maningon pansing do, anjaha anggo mistak humbani daroh ai hubani sada pakean, maningon burihanmu do na hona mistak ai bani sada ianan na pansing.

²⁸ (6-21) Anjaha hudon tanoh panlompahanni ai, maningon bolahonkon do; tapi anggo ibagas hudon tombaga do ai ilompah, maningon tangkas do ai usahon anjaha burihan ibagas bah.

²⁹ (6-22) Sagala dalahi na i tongah-tongah ni malim ai boi do mangankon ai; pansing sahalian do ai.

³⁰ (6-23) Tapi sagala galangan pardousaon anggo domma pala tarboan humbani darohni ai hubagas lampolampo partumpuan bahen pardearan bani ianan na pansing ai, seng bulih panganon ai, maningon tutungon do ai ibagas apuy.”

Pasal Galangan Parsalahan

7 ¹ “Anjaha on do titah pasal galangan parsalahan, pansing sahalian do ai.

² Maningon bani ianan panayatan ni galangan situtungon ai do sayaton ni sidea galangan parsalahan ai, anjaha daroh ni ai pispiskononkon bani anjapanjap ai inggot.

³ Anjaha ganup taboh-tabohni maningon galangkonon do, taboh-taboh ni ihurni pakon taboh-taboh na manrongkob bituhani,

⁴ piah-piah na dua ai ampa taboh-taboh na longkot hujai na bani binongei ai, sonai homa bongbong daroh na dalngop bani atei-atei maningon rap pakon piah-piah buatonni ai.

⁵ Maningon tutungon ni malim ma ai i atas ni anjapanjap bahen galangan apuy bani Jahowa, ai ma galangan parsalahan.

⁶ Sagala dalahi i tengah-tengah ni malim bulih do mangan hunjai, bani ianan na pansing do panganon ai, pansing sahalian do ai.

⁷ Songon galangan pardousaon ai do galangan parsalahan ai, sisada titah do na dua ai; malim na mambahen pardearan marhitei ai, ia do simada ai.

⁸ Anjaha malim na manggalangkon galangan situtungon ni atap ise pe, ia do simada bobak ni galangan situtungon na ginalangkonni ai.

⁹ Anjaha ganup galangan sipanganon na pinamasak i atas ni tataring, anjaha sagala na ipaturei ibagas balanga atap bani panggangan, malim na manggalangkon ai do simada ai.

¹⁰ Sonai homa ganup galangan sipanganon, na maragu minak atap horah, anak si Aron do ganup simada ai, ganup sidea dos bei.”

Galangan Pardameian

¹¹ “Anjaha on do titah ni galangan pardameian na ginalangkon ni halak bani Jahowa.

¹² Anggo igalangkon ai bahen galangan puji-pujian, maningon galangkononni do hasoman ni galangan puji-pujian ai kuei na lang niigaran maragu minak, ruti na lang niigaran na nilapuan bani minak, pakon

buei humbani itak na lumat na maragu botul pakon minak.

¹³ Rap pakon kuei humbani itak na niigaran maningon galangkononni galanganni, tambah ni galangan pardameian ai bahen galangan puji-pujian.

¹⁴ Anjaha sabagian humbani ganup galangan ai maningon galangkononni do bahen galangan sitatangon bani Jahowa, malim na mamispiskon daroh ni galangan pardameian ai do simada ai.

¹⁵ Anjaha juhut ni galangan pardameianni, na bahen galangan puji-pujianni, maningon bois do panganon bani ari panggalangkononni ai, seng bulih tading hunjai das bani patarni.

¹⁶ Anggo galangan bagah-bagah atap galangan rosuh ni uhur do galangan na ginalangkonni ai, bani ari panggalangkononni ai ma ipangan ai, anjaha na teba hunjai patarni ma ipangan;

¹⁷ tapi na tading humbani juhut ni galangan ai bani ari patoluhon maningon tutungon do hubagas apuy.

¹⁸ Anggo dong na mangankon humbani juhut ni galangan pardameianni bani ari patoluhon, seng tarharosuhkon na manggalangkon ai, seng dapotan ulih ia hunjai; na gabe hagigian do ai, anjaha barang ise na mangankon hunjai, maningon hona papa do.

¹⁹ Anjaha gulei na dob dais bani atap aha na butak, seng bulih panganon, maningon tutungon do ai

hubagas apuy, tapi anggo pasal gulei ai, boi do panganon ni sagala na dob manguras.

²⁰ Tapi barang ise na mangankon juhut ni galangan pardameian na bani Jahowa, hape butak ope ia, maningon rotaponkon do hosahni humbani bangsani.

²¹ Anggo adong atap ise na manjamah barang na butak atap jolma na butak, atap pinahan na butak atap aha pe na legan na butak, sihagigihononkon, anjaha ipangan humbani juhut ni galangan pardameian na bani Jahowa, maningon rotaponkon do jolma ai humbani bangsani.”

Larangan Pasal Mangankon Taboh-taboh pakon Daroh

²² Nini Jahowa ma hubani si Musa,

²³ “Hatahon ma hubani halak Israel, seng bulih panganonnima taboh-taboh ni lombu, biribiri atap hambing pe.

²⁴ Taboh-taboh ni bangkei ni pinahan atap taboh-taboh ni pinahan na pinarsilbak ni binatang boi do pargunahononkon ai, tapi sabonar seng boi anggo panganonnima ai.

²⁵ Ai atap ise na mangankon taboh-taboh humbani pinahan na ginalangkon bahen galangan apuy bani Jahowa, maningon rotaponkon do hosahni hun tengah-tengah ni bangsani.

²⁶ Sonai homa seng bulih panganonnima daroh ni atap aha pe bani ganup ianannima, age daroh ni manuk-manuk atap daroh ni pinahan pe.

²⁷ Barang ise na mangankon daroh, maningon raseionkon ia hun tongah-tongah ni bangsani.”

Parbagianan ni Malim humbani Galangan Pardameian

²⁸ Nini Jahowa ma hubani si Musa,

²⁹ “Hatahon ma hubani halak Israel, barang ise na manggalangkon galangan pardameianni bani Jahowa, maningon ia sandiri do na mamboan galanganni ai bani Jahowa humbani galangan pardameianni.

³⁰ Maningon tanganni sandiri do mamboan galangan apuy bani Jahowa; taboh-taboh rap pakon tontonni do sibonanoni, ase tontonni ai gabe galangan sitatongan, sitatongan i lobei ni Jahowa.

³¹ Tutungon ni malim ai ma taboh-taboh ai bani anjapanjap ai, tapi tontonni ai rupei ni si Aron pakon anakni ma ai.

³² Age hae-hae siamun na parlobei maningon bereonnima do bani malim bahen galangan sitatongan humbani galangan pardameiannima.

³³ Barang ise humbani anak ni si Aron na manggalangkon daroh ni galangan pardameian rap

pakon taboh-tabohni, maningon hae-hae siamun parlobei rupeini.

³⁴ Ai domma Hubuat tonton galangan sitatongan ai, pakon hae-hae parlobei sitatongan ai humbani halak Israel, humbani galangan pardameian ni sidea, anjaha domma hubere ai hubani malim Aron pakon hubani anakni ai, gabe aturan na totap sadokah ni dokahni bani halak Israel.

³⁵ On do rupei na pansing bani si Aron pakon bani anakni ai humbani galangan apuy bani Jahowa, bani ari parbangkit ni sidea gabe malim bani Jahowa.

³⁶ Jahowa do mangkatahon, bereonkon ni halak Israel ai bani sidea bani ari pamminakion ni sidea; gabe aturan na totap ma ai sadokah ni dokahni bani ginompar ni sidea.

³⁷ Ai ma titah galangan situtungon, galangan sipanganon, galangan pardousaon, galangan parsalahan, galangan pangondosonkon ni tohonan pakon galangan pardameian,

³⁸ na tinonahkon ni Jahowa hubani si Aron i Dolog Sinai, bani ari na hinatahonni ai halak Israel manggalangkon galangan ni sidea bani Jahowa i halimisan dohorhon Sinai.”

Parpabangkit bani Malim*(Pausih 2 Musa 29:1-35)*

- 8**¹ Dob ai nini Jahowa ma hubani si Musa,
² “Boan ma si Aron rap pakon anakni ai, pakon pakean ai, pakon minak pamminaki ai, pakon lembu galangan pardousaon ai, pakon biribiri tunggal na dua ai ampa raga na marisi ruti na so niigaran ai,
³ anjaha patumpu ma ganup tumpuan ai hu lobei ni labah ni lampolampo partumpuan ai.”
⁴ Jadi ibahen si Musa ma songon na hinatahon ni Jahowa hu bani, ipatumpu ma tumpuan ai hu lobei ni labah ni lampolampo partumpuan ai.
⁵ Nini si Musa ma hubani tumpuan ai, “On do hata na tinonahkon ni Jahowa sibahenonta.”
⁶ Dob ai ihatahon si Musa ma roh hun dohor si Aron pakon anak ni ai, anjaha iparidi ma sidea ibagas bah.
⁷ Dob ai isorungkon ma bani baju parbagas ai anjaha igonditkon bani gondit ai, isorungkon use ma bani baju pardarat ai anjaha inahkon i atasni baju epod ai, lanjar igonditi ma ia bani gondit ni baju epod ai, anjaha isangkutkon ma ai bani.
⁸ Dob ai inahkon ma hu atasni tutup tonton ai, anjaha hubagas tutup tonton ai ibahen ma Urim pakon Tumim ai.
⁹ Inahkon ma gotong-gotong ai hu uluni, anjaha ilongkotkon ma hu gotong-gotong ai, hampit lobei, tutup pardompakan omas, sortali na pansing ai,

songon na pinarentahkon ni Jahowa hubani si Musa.

¹⁰ Ibuat si Musa ma minak pamminaki ai, anjaha iminaki ma ianan na pansing ai ampa haganup na dong ibagas, anjaha ipapansing ma ai.

¹¹ Ispiskon ma deba hunjai bani anjapanjap ai pitu hali, anjaha iminaki ma anjapanjap ai ampa ganup parugasni, tong parburihan ai ampa onjolanni laho papansingkonsi.

¹² Dob ai iuseihon ma deba minak pamminaki ai bani ulu ni si Aron mamminakisi laho papansingkonsi.

¹³ Ihatahon si Musa ma roh hun dohor anak ni si Aron, jadi isorungkon ma bani sidea baju parbagas ai, igonditkon ma gondit ai bani sidea, anjaha inahkon ma tangkuluk ai bani sidea, songon na tinonahkon ni Jahowa bani si Musa.

¹⁴ Dob ai ihatahon ma hun dohor boanon lombu galangan pardousaon ai; jadi itampeihon si Aron pakon anakni ai ma tangan ni sidea bani ulu ni lombu galangan pardousaon ai.

¹⁵ Isayat si Musa ma ai, ibuat ma daroh ni ai anjaha idaiskon ma ai marhitei jari-jarini bani tanduk ni anjapanjap ai inggot laho manguras anjapanjap ai; daroh na teba ai iuseihon ma hu dasor ni anjapanjap ai laho papansingkonsi mambahen pardearan i atasni.

¹⁶ Ibuat ma ganup taboh-taboh na i atas ni bituha ai, pakon hirei-hirei na bani atei-atei ai, pakon piah-piah na dua ai ronsi taboh-taboh na longkot hujai, lanjar itutung si Musa ma ai bani anjapanjap ai.

¹⁷ Tapi anggo lombu ai ronsi hulingkulingni juhutni pakon ginagatni, itutung ma ai bani apuy idarat ni parsaranan ai, songon na tinonahkon ni Jahowa hubani si Musa.

¹⁸ Dob ai iboan ma hun dohor biribiri tunggal ai bahen galangan situtungan; jadi itampeihon si Aron pakon anakni ai ma tangan ni sidea bani ulu ni biribiri tunggal ai.

¹⁹ Isayat si Musa ma ai, anjaha ipispiskon ma darohni ai bani anjapanjap ai inggot.

²⁰ Itoktoki ma biribiri ai, dob ai itutung si Musa ma uluni, toktokni pakon taboh-tabohni ai.

²¹ Iburihi ma bituhani ai ampa naheini ibagas bah, dob ai itutung si Musa ma ganup biribiri ai i atas ni anjapanjap ai; ai ma galangan situtungan bahen uap na misbou, sada galangan apuy bani Jahowa, songon na tinonahkon ni Jahowa hubani si Musa.

²² Ihatahon use ma boanon hun dohor biribiri tunggal na sada nari, ai ma biribiri tunggal paondoskon tohonan, jadi itampeihon si Aron pakon anakni ai ma tangan ni sidea bani ulu ni biribiri tunggal ai.

²³ Isayat si Musa ma ai, dob ai ibuat si Musa ma deba humbani daroh ai anjaha idaiskon ma ai

hubani pinggol siamun ni si Aron pakon hubani ompu-ompu ni tanganni siamun ampa hubani ompu-ompu ni naheini siamun.

²⁴ Ihatahon use ma roh hun dohor anak ni si Aron, jadi inahkon ma deba humbani daroh ai hubani pinggol siamun ni sidea, pakon hubani ompu-ompu ni tangan siamun ni sidea ampa hubani ompu-ompu ni nahei siamun ni sidea; anjaha ipispiskon si Musa ma daroh na teba ai bani anjapanjap ai inggot.

²⁵ Dob ai ibuat ma taboh-tabohni pakon taboh-taboh ni ihurni, pakon ganup taboh-taboh na bani bituhani, pakon bongbong daroh na longkot bani atei-atei, pakon piah-piah na dua ai ronsi taboh-taboh na longkot hujai pakon hae-hae siamun na parlobei;

²⁶ ibuat ma humbani raga ianan ni ruti na so niigaran na i lobei ni Jahowa sada kuei na so niigaran na i lobei ni Jahowa sada kuei na so niigaran, pakon sada kuei na marsaor minak, pakon sada ruti, jadi itampeihon ma ai hu atas ni sagala taboh-tabohni ampa hu atas ni hae-hae siamun na parlobei.

²⁷ Inahkon ma ganupan ai hu tangan ni si Aron pakon hu tangan ni anakni ai, anjaha itatang ma ai bahen galangan sitatangon i lobei ni Jahowa.

²⁸ Dob ai ibuat si Aron ma ai humbani tangan ni sidea, anjaha itutung ma ai i atas ni anjapanjap ai i atas ni galangan situtungon ai, galangan

mangondoskon tohonan ma ai, uap na misbou, galangan apuy bani Jahowa.

²⁹ Ibuat si Musa ma tonton ni biribiri tunggal pangondoskon ni tohonan ai, anjaha itatang ma ai bahen galangan sitatangon i lobei ni Jahowa; ai ma rupei ni si Musa, songon na tinonahkon ni Jahowa hubani si Musa.

³⁰ Dob ai ibuat si Musa ma deba humbani minak pamminaki ai pakon humbani daroh na i atas ni anjapanjap ai, ipispiskon ma ai hubani si Aron ampa hubani pakeanni, sonai homa hubani anakni ampa hubani pakean ni anakni ai; sonai ma ipapansing si Aron ampa pakeanni, pakon anakni ampa pakean ni sidea.

³¹ Dob ai nini si Musa ma hubani si Aron pakon anakni ai, “Lompah nasiam ma gulei in bani labah ni lampolampo partumpuan in, anjaha ijai ma pangan nasiam gulei in ampa ruti na ibagas raga ianan ni galangan pangondoskon ni tohonan songon na dob itonahkon hu bangku: Si Aron pakon anakni do sipangan in.

³² Anjaha na teba in humbani gulei pakon humbani ruti in maningon tutungon nasiam do in ibagas apuy.

³³ Anjaha seng bulih luar nasiam hun labah ni lampolampo partumpuan in ibagas pitu ari, das bani ari hagogok ni pangondoskon ni

tohonan bani nasiam; ai pitu ari do dokahni pangondosonkon ni tohonan in bani nasiam.

³⁴ Songon na dob binahen sadari on, sonai do itonahkon Jahowa bahenon hu lobeian on laho mambahen pardearan bani nasiam.

³⁵ Maningon tading nasiam i lobei ni labah ni lampolampo partumpuan in arian pakon borngin pitu ari layur, mangkorjahon tonah ni Jahowa, ase ulang matei nasiam; sonai do iparentahkon bangku.”

³⁶ Jadi ibahen si Aron pakon anakni ai ma haganup songon na tinonahkon ni Jahowa hinan marhitei si Musa

Galangan ni si Aron na Parlobei

9 ¹ Anjaha bani ari paualuhkon idilo si Musa ma si Aron ampa anakni ai ampa pangintuai ni Israel, ² anjaha nini ma hubani si Aron, “Buat ham ma sada anak ni lombu bahen galangan pardousaon ampa sada biribiri tunggal bahen galangan situtungan, haduasi ulang martikas, anjaha boan ma ai hu lobei ni Jahowa.

³ Anjaha hatahon ma bani halak Israel, buat nasiam ma sada hambing tunggal bahen galangan pardousaon, ampa sada anak ni lombu ampa sada anak ni biribiri, haduasi ai ganup marumur satahun anjaha seng martikas, bahen galangan situtungan,

⁴ ambah ni ai sada lombu jonggi ampa sada biribiri tunggal bahen galangan pardameian, sigalangankon i lobei ni Jahowa, ambah ni ai use galangan sipanganon, na niagu bani minak; ai sadari on do talar Jahowa bani nasiam.”

⁵ Jadi iboan sidea ma na hinatahon ni si Musa ai, hu lobei ni lampolampo partumpuan ai, anjaha roh bei ma homa hun dohor ganup humpulan ai, lanjar jongjong i lobei ni Jahowa.

⁶ Anjaha marsahap ma si Musa, “On ma sibahenon nasiam iparentahkon Jahowa, ase talar bani nasiam hasangapon ni Jahowa.”

⁷ Jadi marsahap ma si Musa bani si Aron, “Padohor ma bani anjapanjap in, anjaha hoseihon ma bam galangan pardousaon ampa galangan situtungon, laho pajongjong pardearan bam ampa bani rumahmu. Dob ai boan ma galangan ni bangsa in, laho mambahen pardearan bani sidea, songon na pinarentahkon ni Jahowa.”

⁸ Jadi ipadohor si Aron ma hubani anjapanjap ai, anjaha isayat ma anak ni lombu galangan pardousaon ai, ai ma bani dirini sandiri.

⁹ Dob ai iboan anak ni si Aron ai ma daroh ai hu bani, isornopkon ma jari-jarini hubagas daroh ai, anjaha inahkon ma ai bani tanduk ni anjapanjap ai; ia daroh na teba ai iuseihon do ai bani dasor ni anjapanjap ai.

¹⁰ Tapi anggo taboh-taboh ni galangan pardousaon ai ampa piah-piah ampa taboh-taboh na i lambung ni atei-atei ai, itutung ma ai i atas ni anjapanjap ai, songon na pinarentahkon ni Jahowa bani si Musa.

¹¹ Ia juhutni ai ampa hulingkuling ai itutung do ai i darat ni parsaranan ai.

¹² Dob ai isayat ma galangan situtungan ai; iboan anak ni si Aron ai ma daroh ai bani, anjaha ipispiskon ma ai bani anjapanjap ai inggot.

¹³ Iboan sidea ma homa galangan situtungan ai hubani marponggol-ponggol ampa uluni ai; anjaha itutung ma ai bani anjapanjap ai.

¹⁴ Iburihi ma bituha-bituhani ai ampa nahei-naheini ai, dob ai itutung ma ai rap pakon galangan situtungan ai bani anjapanjap ai.

¹⁵ Dob ai igalangkon ma homa galangan ni halak na mabuei ai; ibuat ma hambing tunggal ai, na bahen galangan pardousaon ai bani bangsa ai, isayat ma ai, anjaha igalangkon ma ai gabe galangan pardousaon, songon na parlobei ai.

¹⁶ Anjaha igalangkon ma homa galangan situtungan ai, domu hubani paraturanni hinan.

¹⁷ Dob ai igalangkon ma galangan sipanganon ai; ibuat ma sanggolom hunjai, anjaha igalangkon ma ai bani anjapanjap ai, sobali galangan situtungan sisogod-sogod ai.

¹⁸ Isayat ma homa lembu jonggi ai ampa biribiri tunggal ai, gabe galangan pardameian bani bangsa

ai; iboan anak ni si Aron ai ma daroh ai bani, anjaha ipispiskon ma ai bani anjapanjap ai inggot.

¹⁹ Tapi anggo taboh-taboh ni lembu jonggi ampa hambing tunggal ai, taboh-taboh ni ihurni ai, ampa taboh-taboh na manrongkob bituha-bituha ai, ampa piah-piah ai, ampa taboh-taboh na i lambung ni atei-atei ai,

²⁰ haganupan taboh-taboh ai itampeihon sidea ma huatas ni tonton ai, anjaha itutung sidea ma taboh-taboh ai i atas ni anjapanjap ai.

²¹ Tapi anggo tonton ai ampa hae-hae lobei parsiamun ai, itatang si Aron ma ai gabe galangan sitatongan i lobei ni Jahowa, songon na pinarentahkon ni si Musa.

²² Dob ai ipaherbang si Aron ma tanganni hubani bangsa ai anjaha ipasu-pasu ma sidea; anjaha dob igalangkon galangan pardousaon ai, galangan situtungan ai ampa galangan pardameian ai, tuad ma ia.

²³ Dob ai masuk ma si Musa ampa si Aron hu lampolampo partumpuan ai, anjaha luarhonsi sidea, ipasu-pasu sidea ma bangsa ai, anjaha talar ma hamuliaon ni Jahowa bani haganup bangsa ai.

²⁴ Ai luar do apuy hun lobei ni Jahowa, iboiskon ma galangan situtungan ai ampa taboh-taboh na bani anjapanjap ai. Jadi dob ididah bangsa ai ai, marolob-olob ma sidea, lanjar marrogop.

Marujung Goluh ni Anak ni si Aron Dua Halak

10¹ Ia si Nadab ampa si Abihu, anak ni si Aron ai, ibuat sidea ma pardahupaan ni sidea, inahkon sidea ma apuy hubagas ai, ibahen homa dahupa hu atas ni ai, anjaha igalangkon sidea ma apuy sileban i lobei ni Jahowa, na so onggapinarentahkonni bani sidea.

² Jadi luar ma apuy hun lobei ni Jahowa, lanjar iboiskon ma sidea, gabe matei ma sidea i lobei ni Jahowa.

³ Nini si Musa ma hubani si Aron, “On ma da na hinatahon ni Jahowa hinan, bani halak na mandohori Ahu patalaron-Ku do hapansingon-Ku, anjaha bani sagala bangsa in pasangapon-Ku do goran-Ku.” Jadi sip ma si Aron.

⁴ Idilo si Musa ma si Misael ampa si Elsapan anak ni si Usiel, amang anggi ni si Aron, nini ma hubani sidea, “Padohor hanima ma hujon, usung hanima ma saninanima in humbani ianan na pansing in, hu darat ni parsaranan in.”

⁵ Jadi ipadohor sidea ma, lanjar iusung ma sidea marpakean hu darat ni parsaranan ai, songon na pinarentahkon ni si Musa.

⁶ Nini si Musa ma hubani si Aron pakon hubani si Eleasar ampa si Itamar, anakni ai, “Ulang ma janggai ulunima, anjaha ulang ma parrigat pakeannima, ase ulang matei hanima anjaha ulang sogop ringisni

bani ganup kuria in; tapi anggo saninanima, ai ma haganup halak Israel, boi do sidea tangis halani apuy na dob pinagara ni Jahowa.

⁷ Anjaha ulang ma luar hanima hun labah ni lampolampo partumpuan in, ase ulang matei hanima, ai bannima do minak paminakion ni Jahowa.” Jadi ibahen sidea ma songon na hinatahon ni si Musa ai.

⁸ Jadi nini Jahowa ma hubani si Aron,

⁹ “Ulang ma inum hanima anggur atap siinumon na koras pe, ho ampa anakmu na rap pakon ho ai, sanggah na masuk hanima hubagas lampolampo partumpuan in, ase ulang matei hanima; gabe aturan na totap ma in bennima marsundut-sundut.

¹⁰ Maningon botohonnima do mambotoh manirang na mapansing humbani na so pansing, na butak humbani na so butak,

¹¹ anjaha maningon ajarhononnima do bani halak Israel sagala paraturan na hinatahon ni Jahowa bani sidea marhitei si Musa.”

¹² Dob ai nini si Musa ma hubani si Aron ampa hubani si Eleasar pakon si Itamar, anakni na tading, “Buat hanima ma galangan sipanganon in, na tading humbani galangan apuy bani Jahowa, anjaha pangan hanima ma in lang marantup na migar i lambung ni anjapanjap ai, ai na pansing tumang do in.

¹³ Pangan hanima ma ai bani ianan na mapansing, ai parbagiananmu ampa parbagianan ni anakmu do in, humbani galangan apuy bani Jahowa, ai sonai do iparentahkon bangku.

¹⁴ Tapi tonton ai, na tinatang ai ampa hae-hae lobei ni galangan sitatagon ai, bani ianan na susi ma pangan hanima ai, ho rap pakon anakmu, ampa borumu, ai ibere do ai gabe parbagianan bam ampa bani anakmu, humbani galangan pardameian ni bangsa Israel.

¹⁵ Ia hae-hae na ginalangkon ai ampa tonton na tinatang ai maningon boanon do ai rap pakon taboh-taboh ni galangan apuy ai, laho manatang ai songon galangan sitatagon i lobei ni Jahowa; anjaha gabe parbagianan ma ai bam ampa anakmu tongtong, songon na pinarentahkon ni Jahowa bangku.”

¹⁶ Sanggah na pindah-pindah ai si Musa bani hambing tunggal galangan pardousaon ai, tonggor ma, domma mosog ai. Jadi manggila ma ia bani si Eleasar ampa bani si Itamar, anak ni si Aron na tading ai, nini ma,

¹⁷ “Mase ma lang ipangan hanima galangan pardousaon in bani ianan na mapansing in, ai na mapansing tumang do in, anjaha domma iberehon bennima, laho mambuat hajahaton ni kuria in, laho mambahen pardearan bani sidea i lobei ni Jahowa?

¹⁸ Tonggor ma, seng saud iboan darohni ai hubagas ianan na mapansing ai. Maningon ibagas ianan na mapansing ai do ai patut panganonnima, songon na huparentahkon ai.”

¹⁹ Jadi nini si Aron ma hubani si Musa, “Tonggor ma, domma igalangkon sidea sadari on galangan pardousaon ampa galangan situtungon ni sidea i lobei ni Jahowa; anjaha domma mangonai bangku na sonai ai. Anggo porini hupangan humbani galangan pardousaon ai sadari on, marosuh do Jahowa nani pasal ai?”

²⁰ Jadi dob ibogei si Musa hata ai, sonang ma uhurni.

Pasal Binatang na Mapansing ampa na So Pansing

(Pausih 5 Mus. 14:1-22)

11 ¹ Dob ai nini Jahowa ma hubani si Musa ampa hubani si Aron,

² “Hatahon hanim ma hubani halak Israel, on do pinahan na boi panganonnima, humbani pinahan na i atas tanoh on.

³ Sagala pinahan na martambirik anjaha bolah dua tambirikni ai, anjaha marngayoh-ngayoh homa, boi do panganonnima ai.

⁴ Tapi seng bulih panganonnima humbani na marngayoh-ngayoh tumang atap na marbolah dua tumang tambirikni, umpamani unta, ai marngayoh-

ngayoh do ia namin, tapi seng marbolah anggo tambirikni; maningon butak do ai bennima.

⁵ Sonai homa paes, marngayoh-ngayoh do ai namin, tapi seng marbolah tambirikni; maningon butak do ai bennima.

⁶ Sonai homa ampodi, ai marngayoh-ngayoh do ai namin, tapi seng marbolah tambirikni, maningon butak do ai bennima.

⁷ Sonai homa babuy, ai marbolah do namin tambirikni, tapi seng marngayoh-ngayoh; maningon butak do ai bennima.

⁸ Seng bulih panganonnima humbani juhutni, bangkeini pe seng bulih jamahonnima, maningon butak do ai bennima.

⁹ On do bulih panganonnima humbani haganup na adong ibagas bah: Sagala na maripis anjaha na marsisik na adong ibagas bah, ibagas laut atap ibagas bah banggal, bulih do panganonnima ai.

¹⁰ Tapi sagala na so maripis ampa na so marsisik ibagas laut atap ibagas bah banggal pe, ai ma sagala na manggulmit ibagas bah atap sagala na manggoluh ibagas bah, maningon hagigi do ai bennima.

¹¹ Tongon, maningon hagigi do ai bennima; seng bulih panganonnima sibukni, anjaha bangkeini ai maningon hagigi do ai bennima.

¹² sagala na ibagas bah, na so maripis ampa na so marsisik, maningon hagigi do ai bennima.

¹³ Anjaha on do humbani manuk-manuk na gabe hagigi bennima, seng bulih panganon ai, sihagigihononkon do ai: manuk-manuk nanggordaha, tapi garo-garo pakon lali,

¹⁴ haluhuy silopak, haluhuy sibirong ampa na samasam hujai,

¹⁵ sagala kawak ampa na samasam hujai,

¹⁶ burung unta, langkupa, undan, haluhuy sipiuan ampa na samasam hujai,

¹⁷ sipauk, bongkik pakon boluk,

¹⁸ silogou-logou, onggang ampa kiung laut,

¹⁹ sitanda ulog, siboru tasik ampa na samasam hujai, lingkaboh ampa anrip-anrip.

²⁰ Sagala binatang etek siparhabong, na mardalan marompat nahei, maningon hagigi do ai bennima.

²¹ Tapi humbani binatang etek siparhabong, na mardalan marompat nahei, na boi panganonnima pitah siparhae-hae i atas ni naheini, na pinakeini manlumpat-lumpat i atas tanoh.

²² Hunjai boi do panganonnima on: Masam-masam ni balang habu, masam-masam ni balang horas, balang sahua ampa balang bangkuya.

²³ Tapi sagala binatang etek siparhabong na legan, siompat nahei, maningon hagigi do ai bennima.

²⁴ Anjaha marhitei on gabe butak do hanima, 'Barang ise na manjamah bangkeini, maningon butak do ai ronsi bodari,

²⁵ anjaha barang ise na mangusung bangkei ni sisonai ai, maningon burihanni do pakeanni, anjaha maningon butak do ia ronsi bodari.'

²⁶ Halani ai sagala pinahan na marbolah tambirikni, tapi lang bolah dua tambirikni ai anjaha lang marngayoh-ngayoh, maningon butak do ia bennima; barang ise na manjamah ai maningon butak do ia.

²⁷ Anjaha sagala na mangonjolhon tanganni mardalan humbani binatang na mardalan marompat nahei, maningon butak do ai bennima; barang ise na manjamah bangkeini ai, maningon butak do ai ronsi bodari,

²⁸ anjaha barang ise na mangusung bangkei ni ai, maningon burihanni do hiouni, anjaha butak ronsi bodari; maningon butak do ai bennima.

²⁹ Anjaha on pe, humbani binatang sipanjulur i atas tanoh in, maningon butak do in bennima, "buyut, ubag, boraspati ampa masam-masamni,

³⁰ bindoran, lobar, ilik, polang ampa lahuy.

³¹ Ai ma na mabutak bennima, humbani haganup sipanjulur, barang ise na manjamah ai, anggo domma matei ai, maningon butak do ai ronsi bodari.

³² Anjaha sagala na nidabuhan ni ai, anggo domma matei ai, maningon butak do ai, atap parugas hayu pe ai atap hiou atap hulingkuling atap ranjut, haganup parugas tene na pinakei, maningon

ronjamon do ai hubagas bah, anjaha maningon butak do ai ronsi bodari, dob ai pe ase borsih ai.

³³ Anjaha anggo adong madabuh sisonai hubagas parugas na pinauli humbani tanoh, sagala isini ai butak do ai, anjaha maningon rosakkononnima do ai.

³⁴ Sipanganon aha pe ibagas ai, na boi sipanganon, na dob saor hujai bah, maningon butak do ai, anjaha siinumon, na boi inumon humbani parugas ai, maningon butak do ai.

³⁵ Anjaha sagala na nidabuhan ni bangkei ni sisonai ai, maningon butak do ai; atap parmasakan pe ai atap tataring, maningon rosakkonon do ai, butak do ai, anjaha maningon butak do ai bennima.

³⁶ Tapi anggo bah tubuh atap parigi pe, na marisi bah, pansing do ai; tapi ise na manjamah bangkei na ijai ai, gabe butak do ia.

³⁷ Anggo madabuh bangkei ni sisonai ai bani bonih aha pe, na sihol sisaburhononkon, pansing do ai.

³⁸ Tapi anggo isiramkon bah bani bonih ai, anjaha madabuh bangkei sisonai ai hunjai, gabe butak ma ai bennima.

³⁹ Anggo matei pinahan, na boi sipanganonnima, ise na manjamah bangkeini ai maningon butak do ai ronsi bodari,

⁴⁰ anjaha barang ise na mangankon bangkeini ai, maningon burihanni do pakeanni, anjaha maningon butak do ia ronsi bodari; sonai homa barang ise na

mangusung bangkeini ai, maningon burihanni do pakeanni anjaha butak do ia ronsi bodari.

⁴¹ Sagala sipanjulur na manjulur i atas tanoh in, hagigi do ai, seng bulih panganon ai.

⁴² Sagala na manjulur bani boltokni, sagala siompat nahei na manjulur, atap sibuei nahei, sagala sipanjulur na manjulur i atas tanoh in, seng bulih panganonnima, ai hagigi do ai.

⁴³ Seng bulih gabe hagigi dirinima bahenonnima marhitei sagala gilok-gilok sipanjulur; seng bulih pabutakonnima dirinima marhitei ai, ase ulang gabe butak hanima.

⁴⁴ Ai Ahu do Jahowa Naibat анима, halani ai papansing hanima ma dirinima, ase gabe pansing hanima, ai na pansing do Ahu. Seng bulih pabutakonnima dirinima marhitei atap aha pe sipanjulur, na manjulur i atas tanoh in.

⁴⁵ Ai Ahu do Jahowa, na mamboan hanima tangkog hun tanoh Masir, ase Ahu gabe Naibat анима; halani ai maningon pansing do hanima, ai na pansing do Ahu.

⁴⁶ On ma titah pasal pinahan, pasal manuk-manuk ampa pasal haganup na manggoluh, na manggulmit ibagas bah, ampa haganup binatang-binatang, na manjulur i atas tanoh in,

⁴⁷ ase ibotoh hanima parleganan ni na mabutak humbani na mapansing, ampa parleganan ni

pinahan na bulih panganon humbani pinahan na so bulih panganon.”

Titah bani Puang-puang na Mantubuhkon

12 ¹ Dob ai nini Jahowa ma hubani si Musa,
² “Hatahon ma hubani halak Israel, anggo boratan rumah sada anak boru anjaha itubuhkon sada anak dalahi, maningon butak do ia pitu ari dokahni; songon bani panorang parroh ni pantang ni hiouni, sonai do ia butak.

³ Bani ari pauluhkon maningon sunaton do sibur-sibur ni dakdanak ai.

⁴ Tapi anggo naboru ai maningon tading ope i rumah tolu puluh tolu ari nari dokahni pasalpuhon panorang pangurasion ai hun bani; seng bulih jamahonni barang aha na mapansing, anjaha seng bulih masuk ia hubagas ianan na mapansing ai, paima gok panorang pangurasion ai.

⁵ Tapi anggo naboru tinubuhkonni ai, maningon dua minggu do ia butak, songon bani panorang parroh ni pantang ni hiouni; anjaha onom puluh onom ari ope ia tading i rumah pasalpuhon panorang pangurasion ai.

⁶ Ia dob salpu panorang pangurasion ai, halani anak atap boru, maningon boanonni hubani malim na bani labah ni lampolampo partumpuan ai, sada anak ni biribiri na marumur satahun, bahen galangan situtungan ampa sada anak ni asas

atap sada anak ni anduhur ginti bahen galangan pardousaon,

⁷ase igalangkon malim ai i lobei ni Jahowa, laho mambahen pardearan bani, ase borsih ia humbani darohni na madurus ai. On ma pasal titah bani puang-puang, na manubuhkon anak atap boru.

⁸Tapi anggo seng tarpasirsirsi sada biribiri, ibuat ma dua anak ni anduhur ginti atap dua anak ni asas, sada gabe galangan situtungon anjaha na sada nari gabe galangan pardousaon; malim ai do na mambahen pardearan bani, ase borsih ia.”

Paraturan Pasal Gadam

13 ¹Dob ai nini Jahowa ma hubani si Musa ampa si Aron,

²“Anggo adong bani hulingkuling ni sada halak bayoh, puru barang hurap, anjaha salih ai gabe naborit gadam bani hulingkuling ni angkulani ai, maningon boanon do ia hubani si Aron, malim ai, barang hubani sahalak humbani anakni, malim-malim ai.

³Anggo domma ipareksa malim ai naborit na bani angkulani ai, anjaha domma pala mamontar ambulu bani ianan naboritan ai, anjaha holbapan na boritan ai marimbang hulingkuling na legan ai, jadi naborit gadam ma ai; anggo domma ididah malim ai sonai, patugahonni ma na dob butak do ia.

⁴ Tapi age pe mamontar ai bani hulingkuling ni badanni ai, tapi seng holnohan ai marimbang hulingkuling na legan ai, anjaha ambulu na ijai ai seng marubah gabe lopak, maningon hurungkonon ni malim ai ma ia pitu ari dokahni.

⁵ Papitu-arohon maningon pareksaon ni malim ai do ia, anjaha anggo tong do ididah naborit ai, seng pala rarat naborit ai bani hulingkuling ai, maningon hurungkonon ni malim ai do ia pitu ari nari dokahni.

⁶ Anggo domma iulaki malim mamareksasi paduahalihon bani ari papituhon, anjaha dapotsi lambin surut do ipos-iposni ai, seng lambin manrarat ai bani hulingkuling ai, jadi patugahon ni malim ai ma na borsih do ia, ai bayoh tumang do ai; tapi maningon susionni do pakeanni, jadi gabe pansing ma ia.

⁷ Tapi anggo lambin manrarat do bayoh ai bani hulingkuling ai, dob roh ia patidak dirini bani malim ai laho mangidah atap na borsih do ia, maningon patidakonni do dirini paduahalihon bani malim ai;

⁸ bahenon ni malim ai ma pamareksaan, anjaha anggo lambin manrarat do bayoh ai bani hulingkuling ai, jadi patugahon ni malim ai ma na butak do ia, gadam do ai.

⁹ Anggo taridah tanda ni gadam bani sada jolma, maningon boanon do ia bani malim.

¹⁰ Pareksaon ni malim ai ma ia, anjaha anggo adong do bayoh na malopak bani hulingkuling ai, pala gabe

lopak ambulu ai ibahen, anjaha tubuh daging na so madear bani bayoh ai,

¹¹ gadam na parah do na bani hulingkuling ni dagingni ai, anjaha patugahon ni malim ai ma paboa na butak do ia, seng pala be ihurungkon ia, ai domma butak ia.

¹² Tapi anggo sonon do pangonai ni gadam ai bani hulingkuling ai, itutup gadam ai do huling kuling ni halak na gadamon ai haganup, hun ulu das hu nahei, huja pe ikawahkon malim ai,

¹³ jadi bahenon ni malim ai ma pamareksaan, anjaha anggo haganup do angkulani ai itutup gadam ai, patugahonni ma paboa borsih do ia humbani naborit ai, ai lopak do ai haganup, ase na borsih do ia ai.

¹⁴ Tapi anggo taridah do sibuk na so dear bani, na butak do ia ai.

¹⁵ Anggo domma ididah malim ai sibuk na so dear ai, patugahonni ma paboa butak do ia; ai butak do sibuk na so dear ai, ai gadam do ai.

¹⁶ Tapi anggo tapu do sibuk na dear ai, anjaha gabe lopak use ai, maningon roh do ia bani malim ai.

¹⁷ Pareksaon ni malim ai ma ia, anjaha anggo domma gabe lopak ipos-ipos ai, patugahon ni malim ai ma, na borsih do halak na boritan ai, ai borsih do ia tongon.

¹⁸ Anggo tubuh bayoh bani hulingkuling ni sada halak, dob ai malum use,

¹⁹ hape tubuh use bani ipos-iposni ai bayoh na lopak, atap hurap na malopak magerger, maningon patidakonni do ai bani malim ai.

²⁰ Pareksaon ni malim ai ma ai, anjaha anggo taridah holnohan do ai humbani hulingkuling ai, anjaha domma gabe lopak ambuluni ai, jadi patugahon ni malim ai ma na butak do ia; naborit gadam do ai, na dob tubuh ibagas bayoh ai.

²¹ Tapi anggo domma ipareksa malim ai ia, anjaha jumpahsi ambulu na ijai ai seng lopak anjaha seng holnohan humbani hulingkuling na legan ai, tapi lambin surut do, jadi hurungkonon ni malim ai ma ia pitu ari dokahni;

²² anjaha anggo manrarat do ai bani hulingkuling ai, jadi patugahon ni malim ai ma na butak do ia, ai tanda ni gadam do ai.

²³ Tapi anggo totap do hurap ai, lang lambin manrarat, ipos-ipos ni bayoh do ai; patugahon ni malim ai ma na borsih do ia.

²⁴ Atap anggo ughan hulingkuling ni sada halak halani matutung, anjaha sibuk na so dear na bani na matutung ai gabe magerger malopak atap lopak,

²⁵ maningon pareksaon ni malim ma ai, anjaha anggo mubah do ambulu na ijai gabe lopak, anjaha taridah holnohan do ai marimbang hulingkuling na legan ai, jadi gadam ma ai tongon, na dob tubuh bani ughah na matutung ai, anjaha patugahon ni malim ai ma na butak do ia; naborit gadam do ai.

²⁶ Tapi anggo domma ipareksa malim ai ia, anjaha ia ambulu na bani ianan ai seng lopak anjaha seng holnohan ai taridah marimbang hulingkuling na legan ai, anjaha lambin surut do ai, maningon hurungkonon ni malim ai do ia pitu ari dokahni.

²⁷ Bani ari papituhon pareksaon ni malim ai ma ia; anggo lambin manrarat do ai bani hulingkuling ai, jadi patugahon ni malim ai ma na butak do ia; naborit gadam do ai.

²⁸ Tapi anggo totap do hurap ai, seng lambin manrarat bani hulingkuling ai, anjaha lambin surut do ai, ughal halani matutung ai do ai, anjaha patugahon ni malim ai ma na pansing do ia; iposipos ni na matutung ai do hansa ai.

²⁹ Anggo adong rutu bani sada dalahi atap naboru, bani uluni atap bani gumisni,

³⁰ maningon pareksaon ni malim ma rutu ai, anjaha anggo holnohan do taridah ai marimbang hulingkuling na legan ai, anjaha ambulu na ijai ai magorsing anjaha ranggang-ranggang, jadi patugahon ni malim ai ma na butak do ia; ai gadam do ai, gadam bani ulu atap bani gumis.

³¹ Tapi anggo domma ipareksa malim ai rutu ai, anjaha taridah seng holnohan ai humbani hulingkuling na legan ai, anjaha seng dong ambulu na birong ijai, jadi hurungon ni malim ai ma ia, halak na rutuon ai pitu ari dokahni.

³² Papitu-arohon pareksaon ni malim ai ma rutu ai, anggo seng manrarat rutu ai, anjaha seng dong ambulu na gorsing ibagas ai, anjaha seng holnohan rutu ai marimbang hulingkuling na legan ai,

³³ maningon suhuronna ma uluni, tapi anggo rutu ai seng bulih suhuronna; maningon hurungkona ni malim ai ma halak na rutuon ai pitu ari nari dokahni.

³⁴ Anggo domma ipareksa malim ai rutu ai papitu-arohon, anjaha jumpahsi seng lambin manrarat rutu ai bani hulingkuling ai, anjaha seng holnohan ai marimbang hulingkuling na legan ai, jadi patugahon ni malim ai ma na borsih do ia; iburihi ma pakeanni, jadi borsih ma ia.

³⁵ Tapi anggo manrarat do rutu ai bani hulingkuling ai, dob ipatugah malim ai na borsih do ia,

³⁶ jadi pareksaon ni malim ai ma ia, anjaha anggo manrarat do rutu ai bani hulingkuling ai, seng pala pindahan ni malim ai be atap na gorsing do jambulanni, ai na butak do ia ai.

³⁷ Tapi anggo totap do rutu ai ididah matani, anjaha tubuh do jambulan na birong ijai, na dob malum do rutu ai, borsih ma ia; patugahon ni malim ai ma na dob borsih ia.

³⁸ Anggo hurapon hulingkuling ni sada dalahi atap naboru, lopak idahon,

³⁹ pareksaon ni malim ai ma ai, anjaha anggo seng sai lopak hurap na bani hulingkuling ni daging ai,

hurap tumang do na dob tubuh bani hulingkuling ai, borsih ma ia.

⁴⁰ Anggo marurus jambulan ni sada dalahi pala palpalon, borsih do ia ai.

⁴¹ Anggo marurus jambulanni hampit bohini, gabe salagsagon ia, borsih do ia ai.

⁴² Tapi anggo dong tubuh bani palpalni ai atap salagsagni ai rutu malopak magerger, gadam do na dob tubuh bani palpalni ai atap na bani salagsagni ai.

⁴³ Jadi pareksaon ni malim ai ma ia, anjaha anggo magerger malopak do rutu na bani palpalni atap na bani salagsagni ai, usih songon rupa ni gadam na bani hulingkuling ni daging,

⁴⁴ na gadamon do ia ai, ase butak do ia; patugahon ni malim ai ma na butak do ia, bani uluni ai do naborit ai.

⁴⁵ Halak na gadamon, na marnaborit gadam ai, manigon mamakei baju rigat-rigat do ia, jambulanni jangga-jangga, gumisni manigon tutuponni anjaha dilohononni, 'Na butak, na butak!'

⁴⁶ Sadokah adong bani naborit ai butak do ia, butak do ia ai tongon, anjaha manigon punjung do ia marianan i darat ni parsaranan ai.

⁴⁷ Anggo adong tanda-tanda ni naborit gadam jumpah bani hiou, pakean wol pe ai atap pakean linnen,

⁴⁸ atap bani parugas na tinonun atap na pinauli, humbani linnen pe ai atap humbani wol, atap bani hulingkuling atap bani parugas-parugas na pinauli humbani hulingkuling,

⁴⁹ anggo tar maratah atap magerger do na bani hiou ai, na bani parugas-parugas na tinonun atap na pinauli ai, na bani hulingkuling ai atap na bani parugas-parugas na humbani hulingkuling ai, naborit gadam do ai, anjaha maningon patidakon do ai hubani malim ai.

⁵⁰ Pareksaon ni malim ma naborit ai, anjaha maningon simpanon do ugas-ugas na hona ai pitu ari dokahni, anjaha maningon pareksaonni ma naborit ai bani ari papituhon.

⁵¹ Anggo ididah bani ari papituhon lambin manrarat do naborit ai bani pakean ai, atap bani parugas na tinonun atap na pinauli ai, atap bani hulingkuling ai, bani sagala na pinauli humbani hulingkuling tene, jadi naborit gadam na bajan do ai, butak do ai.

⁵² Maningon tutungonni do pakean ai, atap pe parugas na tinonun atap na pinauli ai, humbani wol pe ai atap humbani linnen, atap pe haganup parugas na humbani hulingkuling ai, na dob hona naborit ai, ai naborit gadam na parah do ai; maningon tutungon do ai.

⁵³ Tapi anggo ididah malim ai, hape seng manrarat naborit ai bani pakean ai, atap bani parugas na

tinonun atap na pinauli ai, atap bani parugas-parugas na humbani hulingkuling ai,

⁵⁴ jadi suruhon ni malim ai ma na mamurihi ugas-ugas na ihonai naborit ai, anjaha papuligonni ma ai use pitu ari dokahni.

⁵⁵ Pareksaon ni malim ai ma ugas-ugas na ihonai naborit ai dob iburihi ai. Anggo seng mubah rupani ididah, age pe seng lambin manrarat naborit ai, butak ma ai; maningon tutungonmu do ai, atap hampit pudi atap hampit lobei pe na ihonai naborit ai.

⁵⁶ Tapi anggo ididah malim ai, dob iburihi na ihonai naborit ai, lambin surut do naborit ai, maningon rigatkononni do na hona naborit ai humbani pakean ai, atap humbani parugas na tinonun atap na pinauli ai.

⁵⁷ Jadi anggo tong ope taridah ai bani pakean ai, atap bani parugas na tinonun atap na pinauli ai, atap bani ugas-ugas na humbani hulingkuling ai, gadam na manrarat do ai, maningon tutungonmu do haganup, na ihonai naborit ai.

⁵⁸ Tapi anggo magou do naborit ai dob hona burihan ai humbani pakean ai, atap humbani parugas na tinonun atap na pinauli ai, atap humbani ugas-ugas hulingkuling ai, maningon ulakan do mamurihi ai, jadi borsih ma ai.

⁵⁹ On ma titah pasal naborit gadam na adong bani pakean wol atap linnen pe, atap bani parugas na

tinonun atap na pinauli, atap bani ugas-ugas na pinauli humbani hulingkuling, laho manontuhon atap na borsih do ai atap na butak.”

Aturan Pangurasion Pasal Naborit Gadam

14¹ Dob ai nini Jahowa ma hubani si Musa,
² “On do titah pasal halak na gadamon bani ari pangurasionni: Maningon boanon do ia bani malim ai;

³ ia malim ai maningon luar do ia hu darat ni parsaranan ai. Jadi dob ididah malim ai, na dob malum do gadam ai humbani na gadamon ai,

⁴ jadi hatahon ni malim ai ma halak siurason ai mambuat bani dua manuk-manuk na manggoluh anjaha na borsih, ampa hayu ares, bonang sigenger ampa isop.

⁵ lhatahon malim ai ma na manayat sada humbani manuk-manuk ai i atas ni sada hudon tanoh, i atas ni bah mardalan.

⁶ Dob ai ibuat ma manuk-manuk na manggoluh ai rap pakon hayu ares, bonang sigenger ampa isop ai, isornobkon ma ai rap pakon manuk-manuk na manggoluh ai hubagas daroh ni manuk-manuk, na sinayat i atas ni bah mardalan ai,

⁷ ipispiskon ma ai pitu hali banijolma siurason ai humbani gadam ai, sonai ma pangurasion bani; dob ai ipaluah ma manuk-manuk na manggoluh ai habang hu talun.

⁸Tapi halak siurason ai, maningon susionni do pakeanni, suhuronni ganup jambulanni anjaha maridi ia ibagas bah, ai pe ase borsih ia. Dob ai boi ma ia masuk hu parsaranan ai; tapi maningon tading ope ia pitu ari nari dokahni i darat ni lampolamponi.

⁹Bani ari papituhon maningon suhuronni do ganup jambulanni, jambulan na bani uluni, gumisni, ampa salibonni, haganup jambulan na adong bani maningon suhuronni do. Dob ai maningon susionni do pakeanni anjaha maridi ia ibagas bah; jadi pansing ma ia.

¹⁰Bani ari pauluhkon buatonni ma dua anak ni biribiri tunggal na so marsining, sada biribiri sisatahun na so marsining ambahni ai tolu parsapuluh efa itak lumat, niagu pakon minak bahen galangan sipanganon ampa satangkar minak.

¹¹Anjaha malim, sidalankon pangurasion ai, boanonni majolma siurason ai rap pakon galangan ai hu lobei ni Jahowa, hu lobei ni labah ni lampolampo partumpuan ai.

¹²Ibuat malim ai ma sada humbani anak ni biribiri tunggal ai, igalangkon ma ai, igalangkon ma ai bahen galangan parsalahan, rap pakon minak na satangkar ai, anjaha itatang ma ai haduasi bahen galangan sitatagon bani Jahowa.

¹³ Ia anak ni biribiri ai maningon sayaton do ai bani panayatan ni galangan pardousaon, ampa galangan situtungon ai, bani ianan na mapansing ai; ai songon galangan pardousaon ai, malim do homa simada galangan parsalahan ai; pansing do ai.

¹⁴ Ibuat malim ai ma humbani daroh ni galangan parsalahan ai, inahkon malim ai ma ai bani bulung ni pinggol parsiamun ni halak siurason ai, ampa bani ompu-ompu ni tanganni siamun, ampa bani ompu-ompu ni naheini siamun.

¹⁵ Ibuat malim ai ma deba humbani minak na satangkar ai, anjaha iuseihon ma ai hubagas tangan sambilouni sandiri;

¹⁶ isornobkon malim ai ma jari-jari ni tanganni siamun hubagas minak na ibagas tangan sambilouni ai, anjaha ipispiskon ma deba minak ai marhitei jari-jarini pitu hali i lobei ni Jahowa.

¹⁷ Anjaha deba humbani minak na tading ibagas tanganni ai, inahkon malim ai ma ai bani bulung ni pinggol parsiamun ni halak siurason ai, ampa hubani ompu-ompu ni tanganni siamun ampa hubani ompu-ompu ni naheini siamun, i atas ni daroh parsalahan ai.

¹⁸ Ia minak na tading ai ope ibagas tangan ni malim ai, inahkon ma ai bani ulu ni halak siurason ai; ase sonai ma malim ai mambahen pardearan bani i lobei ni Jahowa.

¹⁹ Dob ai boanon ni malim ai ma use galangan pardousaon, laho mambahen pardearan bani halak na pauraskon dirini ai humbani habutakonni, anjaha dob salpu ai sayatonni ma galangan situtungan ai.

²⁰ Galangkonon ni malim ai ma galangan situtungan ai ampa galangan sipanganon ai i atas anjapanjap ai, laho mambahen pardearan bani; jadi borsih ma ia.

²¹ Anggo miskin do ia, gabe seng sungkup sibahenonni, ibuat ma anak ni biribiri tunggal sada gabe galangan parsalahan bahen sitatongan laho mambahen pardearan bani; ambahni ai saparsapuluh efa itak lumat na niagu ampa minak bahen galangan sipanganon ampa satangkar minak;

²² sonai homa dua anduhur ginti ampa dua anak ni asas, domu hubani na tarbahensi, sada gabe galangan pardousaon anjaha na sada nari gabe galangan situtungan.

²³ Boanonni ma ai paualuh-arihon bahen pangurasionni hubani malim ai, hu lobei ni labah ni lampolampo partumpuan ai, hu lobei ni Jahowa;

²⁴ ibuat malim ai ma anak ni biribiri galangan parsalahan ai, ampa minak na satangkar ai, anjaha itatang malim ai ma ai gabe galangan sitatongan i lobei ni Jahowa;

²⁵ dob ai isayat ma anak ni biribiri galangan pardousaon ai; ibuat malim ai ma deba humbani

daroh ni galangan parsalahan ai, anjaha inahkon ma ai bani bulung ni pinggolni parsiamun, ampa hubani ompu-ompu ni tanganni siamun ampa hubani ompu-ompu ni nahei siamun ni halak siurason ai.

²⁶ Anjaha iuseihon malim ai ma deba humbani minak ai hubagas tangan sambilouni sandiri,

²⁷ anjaha ipispiskon ma deba humbani minak ai, na bani tanganni sambilou ai, pitu hali i lobei ni Jahowa.

²⁸ Inahkon malim ai ma deba humbani minak na bani tangan siamun ai humbani bulung ni pinggol parsiamun ni halak siurason ai, ampa hubani ompu-ompu ni tanganni siamun, ampa hubani ompu-ompu ni naheini siamun, i atas ni pardarohan ni galangan parsalahan ai;

²⁹ anjaha teba-teba ni minak ai, na bani tangan ni malim ai, inahkon ma ai hu atas ulu ni halak siurason ai, laho mambahen pardearan bani i lobei ni Jahowa.

³⁰ Dob ai galangkononni ma anduhur ginti ai ampa anak ni asas ai, ansa na boi pinasirsirni ai,

³¹ sada gabe galangan pardousaon anjaha na sada nari gabe galangan situtungon, rap pakon galangan sipanganon; sonai ma pajongjongon ni malim ai pardearan i lobei ni Jahowa bani halak siurason ai.

³² In ma titah bani halak na marnaborit gadam, na so tuk pasirsirhon galangan pangurasionni.”

³³ Dob ai nini Jahowa ma hubani si Musa ampa si Aron,

³⁴ “Anggo das ma hanima hu tanoh Kanaan, sibereon-Kai bennima gabe parbagianan, anjaha Hupalopas tubuh naborit gadam bani sada rumah i tanoh parbagianannima ai,

³⁵ jadi maningon roh do halak simada rumah ai laho patuduhkon ai bani malim anjaha hatahononni ma, ‘Adong do tanda-tanda ni gadam taridah bani rumahku.’

³⁶ Paima roh malim ai hujai laho mamareksa rumah ai, ihatahon ma lobei na palumeihon rumah ai, ase ulang gabe butak haganup na adong ibagas rumah ai; dob ai pe ase masuk malim ai, laho mamareksa rumah ai.

³⁷ Anjaha sanggah na mamareksa ai, anggo jumpahsi tanda-tanda na maratah atap na magerger bani dingding ni rumah ai, na holnohan idahon ase dingding na legan ai,

³⁸ jadi luar ma malim ai humbagas rumah ai hulabah ni rumah ai, anjaha itutup ma rumah ai pitu ari dokahni.

³⁹ Papitu-arihon roh ma use malim ai laho mamareksa, anjaha anggo lambin manrarat do naborit ai bani dingding ni rumah ai,

⁴⁰ jadi hatahonon ni malim ai ma na padaratkon batu ai, ianan ni naborit ai, anjaha igijigkon ma ai hu darat ni huta ai bani sada ianan na butak.

⁴¹ Anjaha rumah ai kiskison ma ai hampit bagas inggot, anjaha orbuk pangkiskisan ai ambukkononkon ma ai hu darat ni huta ai, bani ianan na butak.

⁴² Ibuat ma batu na legan panggantih ni batu na dob binuat ai, ampa hapur na legan laho mangkapuri rumah ai use.

⁴³ Tapi anggo mangulaki do roh naborit ai hu rumah ai, dob ipadarat batu ai hunjai, dob ikiskis rumah ai anjaha ikapur use ai,

⁴⁴ maningon laho do malim ai use laho mamareksa ai; anjaha anggo lambin manrarat do naborit ai i rumah ai, naborit gadam na bajan ma ai bani rumah ai; butak ma ai.

⁴⁵ Jadi parsedaon ma rumah ai, batuni ai, parhayuni ampa hapur na bani rumah ai, anjaha maningon padaraton do ai hu darat ni huta ai bani sada ianan na butak.

⁴⁶ Anjaha barang ise halak na masuk hu rumah ai, sadokah tutup ai, maningon butak do ia ronsi bodari.

⁴⁷ Barang ise na modom i rumah ai, maningon burihanni do pakeanni; anjaha barang ise na mangan i rumah ai maningon burihanni do pakeanni.

⁴⁸ Tapi anggo roh malim ai laho mamareksa rumah ai, tapi seng be lambin manrarat naborit ai i rumah ai, dob ihapuri ai, jadi patugahon ni malim ai ma na

borsih do rumah ai; tongon domma malum naborit ai.

⁴⁹ Anjaha laho mangurus rumah ai, ibuat malim ai ma dua manuk-manuk, hayu ares, bonang sigenger ampa isop.

⁵⁰ Sada humbani manuk-manuk ai isayat ma ai i atas ni sada ni sada hudon tanoh, i babou ni bah mardalan.

⁵¹ Dob ai ibuat ma hayu ares, isop, bonang sigenger ampa manuk-manuk na manggoluh ai, isornopkon ma ai hubagas daroh ni manuk-manuk na dob sinayat ai, ampa hubagas bah na mardalan ai; ipispiskon ma ai pitu hali hubani rumah ai.

⁵² Sonai ma pangurasionni bani rumah ai, marhitei daroh ni manuk-manuk ai, marhitei bah mardalan ai, marhitei manuk-manuk na manggoluh ai, marhitei hayu ares ai, isop ampa bonang sigenger ai.

⁵³ Dob ai ipaluah ma manuk-manuk na manggoluh ai hu darat ni huta ai, hu tongah talun, laho mambahen pardearan bani rumah; jadi borsih ma ai.

⁵⁴ In ma titah pasal naborit-naborit gadam, pasal na marutu-rutu,

⁵⁵ pasal gadam na bani pakean ampa rumah,

⁵⁶ pasal bayoh, puru ampa hurap,

⁵⁷ laho patorangkon sadihari butak atap borsih ai. In ma titah pasal naborit gadam.”

Aturan Pasal Habutakon na Masa bani Jolma

15 ¹ Dob ai nini Jahowa ma hubani si Musa
ampa si Aron,

² “Marsahap ma ho pakon halak Israel hatahon ma hubani sidea, anggo marnunut roh bonih bani sada dalahi, gabe butak do ia marhitei partiris ni bonihni ai.

³ Sonon do parbutakni ai marhitei partiris ni bonihni ai; atap marnunut pe roh bonihni ai, atap na dob maronti pe ai, anggo ia butak ma.

⁴ Sagala podoman na pinodoman ni halak na tirisan bonih ai maningon butak do, anjaha sagala ugas-ugas na hinundulanni maningon butak do.

⁵ Barang ise na manjamah podomanni maningon susionni do pakeanni, anjaha paridionni dirini ibagas bah anjaha maningon butak do ia ronsi bodari.

⁶ Barang ise na hundul bani ugas na hinundulan ni halak na tirisan bonih ai, maningon susionni do pakeanni anjaha paridionni dirini ibagas bah, anjaha maningon butak do ia ronsi bodari.

⁷ Barang ise na manjamah angkula ni halak na tirisan bonih ai, maningon susionni do pakeanni anjaha paridionni dirini ibagas bah, anjaha maningon butak do ia ronsi bodari.

⁸ Anggo dais tijur ni halak na tirisan bonih bani sada halak na borsih, maningon susionni do

pakeanni anjaha paridionni dirini ibagas bah, anjaha maningon butak do ia ronsi bodari.

⁹ Anjaha ganup palana na hinundulan ni halak na tirisan bonih ai maningon butak do.

¹⁰ Barang ise na manjamah na dob onggat nibalanni, maningon butak do ronsi bodari.

¹¹ Anjaha barang ise na jinamah ni halak na tirisan bonih, seng parlobei iburihi tanganni ibagas bah, maningon susionni do pakeanni anjaha iparidi dirini ibagas bah, anjaha maningon butak do ia ronsi bodari.

¹² Parugas dapur na humbani tanoh, na jinamah ni halak tirisan bonih ai, maningon bolahkonon do; tapi parugas dapur na humbani hayu maningon burihan do ia ibagas bah.

¹³ Anggo malum ma halak na tirisan bonih ai humbani naboritni ai, maningon hiraonni do bani pitu ari bahen pangurasionni; maningon susionni do pakeanni anjaha paridionni dirini ibagas bah mardalan, dob ai pe ase borsih ia.

¹⁴ Bani ari paualuhkon maningon buatonni do dua anduhur ginti barang dua anak ni asas, anjaha maningon roh do ia hu lobei ni Jahowa, hu labah ni lampolampo partumpuan ai, anjaha iberehon ma ai bani malim ai.

¹⁵ Galangkonon ni malim ai ma ai, sada gabe galangan pardousaon, na sada nari gabe galangan

situtungon; ibahen malim ai ma pardearan bani i lobei ni Jahowa, halani partiris ni bonihni.

¹⁶ Anggo sabur bonih ni sada dalahi, maningon paridionni do dirini ibagas bah, anjaha maningon butak do ia ronsi bodari.

¹⁷ Anjaha sagala hiou atap bobak pe na ihonai bonihni ai, maningon burihanni do ai marhitei bah, anjaha maningon butak do ia ronsi bodari.

¹⁸ Anggo modom sada dalahi rap pakon sada naboru anjaha sabur bonihni, haduasi sidea maningon paridionni do dirini ibagas bah anjaha maningon butak do sidea ronsi bodari.

¹⁹ Anggo roh pantang ni hiou ni sada naboru siganup bulan, maningon butak do ia ibagas pitu ari, anjaha barang ise na manjamahsi, maningon butak do ia ronsi bodari.

²⁰ Anjaha sagala pinodomanni sadokah na butak ai ia maningon butak do ai; anjaha sagala na hinundulanni homa maningon butak do ai.

²¹ Barang ise na manjamah podomanni maningon susionni do pakeanni, anjaha paridionni dirini ibagas bah, anjaha maningon butak do ia ronsi bodari.

²² Barang ise na manjamah ugas na dob onggahinundulanni, maningon susionni do hiouni anjaha maningon paridionni dirini ibagas bah, anjaha maningon butak do ia ronsi bodari.

²³ Anjaha barang ise na manjamah barang aha na tibal i atas podomanni atap bani na dob onggahinundulanni, maningon butak do ia ronsi bodari.

²⁴ Anggo modom sada dalahi rap pakonsi, gabe dais habutakonni ai bani dalahi ai, maningon butak do ia pitu ari dokahni, anjaha ganup podomanni na pinodomanni ai butak do.

²⁵ Anggo dokah roh pantang ni hiou ni sada naboru, seng pitah bani parroh ni pantang ni hiouni hinan, barang hundokah ai marimbang parroh ni pantang ni hiouni hinan, maningon butak do ia sadokah parroh ni pantang ni hiouni ai; maningon butak do ia usih songon bani panorang habutakon na somal.

²⁶ Ganup podoman, na pinodomanni sadokah parroh ni darohni ai, maningon songon podoman habutakon ni ai do ai bani; anjaha sagala na hinundulanni maningon butak do, songon sanggah panorang habutakonni ai.

²⁷ Barang ise na manjamah ai maningon butak do, anjaha maningon susionni do pakeanni, anjaha paridionni dirini ibagas bah, anjaha maningon butak do ia ronsi bodari.

²⁸ Tapi anggo borsih ma ia humbani darohni na sai roh ai, hiraonni ma bani pitu ari dokahni, anjaha dob ai gabe borsih ma ia.

²⁹ Bani ari paualuhkon maningon buatonni ma dua anduhur ginti barang dua anak ni asas, anjaha iboan

ma ai hubani malim ai, hu labah ni lampolampo partumpuan ai.

³⁰ Igalangkon malim ai ma ai, sada gabe galangan pardousaon anjaha pardearan bani i lobei ni Jahowa halani habutakon ni pantang ni houni na roh ai.

³¹ Sonai ma paluahonmu halak Israel humbani habutakon ni sidea, ase ulang matei sidea ibagas habutakon ni sidea ai, marhitei na pinabutak ni sidea ianan-Ku, na i tongah-tongah ni sidea ai.

³² Ai ma titah bani halak na tirisian bonih ampa bani halak na sabar bonihni, gabe butak marhiteihon ni ai;

³³ ampa bani naboru na marnaboritkon pantang ni hiouni, ampa bani halak, dalahi atap naboru na sabar bonihni, ampa bani sada dalahi, na modom i lambung ni naboru na mabutak.”

Ari Pardearan na Banggal

(Pausih bd. 23:26-32; 4 Mus. 29:7-11; Heb. 9:6-14)

16 ¹ Dob ai marsahap ma Jahowa hubani si Musa, dob matei anak ni si Aron na dua ai, sanggah na roh ai sidea hun dohor hu lobei ni Jahowa gabe matei,

² nini Jahowa ma hubani si Musa, “Hatahon ma hubani si Aron, abangmai, ase ulang tongtong ia masuk hubagas ianan na mapansing in, hubagas hirei-hirei ni langkop pardearan in, na i atas ni poti

in, ase ulang matei ia; ai ibagas hambun in do Ahu talar i atas ni langkop pardearan in.

³ Tapi sonon ma parmasuk ni si Aron hubagas ianan na mapansing in, 'Marhitei sada anak ni lembu bahen galangan pardearan ampa marhitei sada anak ni biribiri tunggal bahen galangan situtungon.'

⁴ Maningon pakeionni do baju-baju linnen parbagas na mapansing ai, anjaha saluar linnen ai ma na marrungkub hatalanjangonni ai; margondit ma ia marhitei gondit linnen ai, anjaha ipargotong ma gotong linnen ai; pakean na mapansingdo ai, maningon parlobei maridi do ia ase boi pakeionni ai.

⁵ Dob ai maningon buatonni do hambani tumpuan ni halak Israel dua hambing tunggal bahen galangan pardousaon ampa sada biribiri tunggal bahen galangan situtungon.

⁶ Igalangkon si Aron ma lembu ai bahen galangan halani dousani sandiri, laho mambahen pardearan bani dirini sandiri ampa bani parrumahni.

⁷ Dob ai ibuat ma hambing tunggal na dua ai, anjaha ipajongjong ma ai i lobei ni Jahowa, bani labah ni lampolampo partumpuan ai.

⁸ Idabuh si Aron ma ruji-ruji pasal hambing tunggal na dua ai, sada ruji-ruji bani Jahowa anjaha ruji-ruji na sada nari bani Asasel (*tonduy na jahat i halimisan*).

⁹Igalangkon si Aron ma hambing tunggal na hona ruji-ruji ai bani Jahowa, bahen galangan pardousaon,

¹⁰tapi anggo hambing tunggal na hona ruji-ruji ni Asasel ai, maningon manggoluh do pajongjongon ai i lobei ni Jahowa laho mambahen pardearan marhitei ai, dob ai paluahon ma ai hubani Asasel, na i halimisan.

¹¹Igalangkon si Aron ma galangan lombu pardousaon na bani ai, laho mambahen pardearan bani sandiri ampa bani parrumahni; maningon sayatonni do galangan lombu pardousaon na bani ai.

¹²Dob ai ibuat ma sada batil pardahupaan gok narnar na gara humbani anjapanjap ai na i lobei ni Jahowa, ampa dua nangging dahupa na misbou, na lumat niduda, anjaha iboan ma ai hubagas, hu pudi ni hirei-hirei ai;

¹³inahkon ma dahupa ai bani apuy ai i lobei ni Jahowa, ase irungkub timus ni dahupa ai langkob pardearan ai, na i atas ni hasaksian ai, ase ulang matei ia.

¹⁴Ibuat ma deba daroh ni lombu ai anjaha ipispiskon ma ai marhitei jari-jarini bani lobei-lobei ni langkob pardearan ai, anjaha pitu hali do pispiskononni daroh ai marhitei jari-jarini, bani lobei-lobei ni langkob pardearan ai.

¹⁵ Dob ai isayat ma galangan hambing pardousaon ai, na bani bangsa ai, anjaha iboan ma darohni ai hubagas hirei-hirei ai, anjaha ibahen ma bani darohni ai, songon na binahenni ai bani daroh ni lombu ai; ipispiskon ma ai hubani langkob pardearan ai ampa i lobei ni langkob pardearan ai.

¹⁶ Sonai ma bahenonni pardearan bani ianan na mapansing ai, halani habutakon ni halak Israel, halani panlanggaron ni sidea ampa haganup dousa ni sidea; anjaha sonai ma homa bahenonni hubani lampolampo partumpuan ai, na marianan rap pakon sidea, i tongah-tongah ni habutakon ni sidea ai.

¹⁷ Sahalak pe seng bulih adong ibagas lampolampo partumpuan ai, sanggah na masuk ai ia laho mambahen pardearan ibagas ianan na mapansing ai ronsi na luar ia use. Sonai ma pajongjongonni pardearan bani dirini ampa bani parrumahni ampa bani haganup tumpuan ni halak Israel.

¹⁸ Anjaha maningon luar do ia hu anjapanjap ai, na i lobei ni Jahowa, maningon bahenonni do homa pardearan pasal ai; ibuat ma deba humbani daroh ni lombu ai ampa humbani daroh ni hambing tunggal ai, anjaha ilapuhon ma ai hu tanduk ni anjapanjap ai inggot.

¹⁹ Ipispiskon ma deba hujai humbani daroh ai marhitei jari-jarini pitu hali, laho manguras ampa papansingkon ai humbani habutakon ni halak Israel.

²⁰ Anjaha anggo domma salosei ibahen pardearan bani ianan na mapansing ai ampa bani lampolampo partumpuan ai ampa bani anjapanjap ai, ihatahon ma na mamboan hambing tunggal ai hu lobeini,

²¹ anjaha itampeihon si Aron ma tanganni haduasi bani ulu ni hambing tunggal na manggoluh ai, laho paporsankon hubani haganup hajahaton ni halak Israel, ampa haganup panlanggaron ni sidea, haganup tene dousa ni sidea, maningon nahkononni do ai bani ulu ni hambing tunggal ai, anjaha isuruh ma sada halak na dob sirsir hinan manogu hambing tunggal ai hu halimisan.

²² Hambing tunggal ai ma na mamorsan hajahaton ni sidea hu tanoh na malungun; dob ai ipaluah ma hambing tunggal ai i halimisan.

²³ Dob ai masuk ma si Aron hu lampolampo partumpuan ai, itanggali ma pakean linnen ai, na pinakeini sanggah masuk ia bani ianan na mapansing ai, lanjar itadingkon ma ijai;

²⁴ dob ai paridionni ma dirini ibagas bah bani ianan na mapansing, anjaha ipakei ma pakeanni ari-ari, anjaha dob luar ia, igalangkon ma galangan situtungon bani dirini sandiri ampa galangan situtungon bani bangsa ai, laho mambahen pardearan bani sandiri ampa bani bangsa ai.

²⁵ Ia taboh-taboh ni galangan pardousaon ai maningon tutungonni do ai i atas ni anjapanjap ai.

²⁶ Halak sitogu hambing tunggal ai hu Asasel, maningon susionni do pakeanni anjaha iparidi dirini ibagas bah, anjaha dob ai pe ase bulih masuk ia hubagas parsaranan ai.

²⁷ Ia lombu galangan pardousaon ai ampa hambing galangan pardousaon ai, na dob binoan ai darohni ai hubagas, laho mambahen pardearan ibagas ianan na mapansing ai, maningon boanon do ai hu darat ni parsaranan ai, anjaha hulingkuling ampa juhutni ampa kotoranni ai maningon bois do ai tutungon ibagas apuy.

²⁸ Anjaha halak na manutung ai, maningon susionni do pakeanni anjaha paridionni dirini ibagas bah, anjaha dob ai boi ma ia masuk hubagas parsaranan ai.

²⁹ Anjaha gabe paraturan ma on bennima ronsi sadokah ni dokahni. Bulan pitu ari sapuluh maningon do marpuasa hanima, anjaha seng bulih horjahononnima atap horja aha pe, age pangisi ni tanoh in hinan, atap halak dagang pe na manginsolat i tongah-tongahnima;

³⁰ ai bani ari ai do ibahen pardearan bennima laho manguras hanima; maningon taruras do hanima humbani haganup dousanima i lobei ni Jahowa.

³¹ Gabe ari Sabat na mapansing tumang ma in bennima, anjaha maningon marpuasa do hanima; gabe paraturan ma in sadokah ni dokahni.

³² Ia sidalankon pardearan na sonai ai, ai ma malim na dob niminakan anjaha na dob pinabangkit gabe malim manggantih bapani, anjaha maningon pakeionni do pakean linnen na mapansing ai.

³³ Ia do mambahen pardearan bani ianan na mapansing ai; maningon bahenonni do homa pardearan bani lampolampo na mapansing ai ampa bani anjapanjap ai, anjaha sonai homa bani malim-malim ai ampa haganup bangsa na i kuria ai.

³⁴ On ma gabe paraturan bennima ronsi sadokah dokahni, ai ma mambahen pardearan bani bangsa Israel sahali ibagas satahun. Jadi ibahen si Aron ma, songon na pinarentahkon ni Jahowa hubani si Musa.”

Seng Bulih Manggalang Atap Ija pe Sobali bani ianan Na Mapansing Ai

17 ¹ Dob ai marsahap ma Jahowa hubani si Musa, nini ma,

² “Hatahon ma hubani si Aron ampa anakni ai, ampa hubani haganup halak Israel, on do na pinarentahkon ni Jahowa,

³ Barang ise humbani ginompar ni Israel, na manayat lembu jonggi atap biribiri atap hambing ibagas parsaranan ai, atap i darat ni parsaranan ai pe,

⁴ tapi seng humbani ai hu labah ni lampolampo partumpuan ai, laho manggalangkon ai gabe

galangan bani Jahowa i lobei ni rumah ni Jahowa, maningon marsapata do ai bani halak ai; iuseihon do daroh, jadijolma sisonai ai maningon siapkononkon do hun tengah-tengah ni bangsani.

⁵ Halani ai maningon boanon ni halak Israel do galangan ni sidea, na sihol galangkonon ni sidea i tengah dalan, hu lobei ni Jahowa, hu lobei ni lampolampo partumpuan ai, hubani malim ai, anjaha isayat ma ai gabe galangan pardameian bani Jahowa.

⁶ Anjaha darohni ai ipispiskon malim ai ma ai hu anjapanjap ni Jahowa, i lobei ni labah ni lampolampo partumpuan ai, anjaha tabohni ai itutung ma ai bahen uap na misbou bani Jahowa.

⁷ Seng bulih be galangkonon ni sidea galangan ni sidea bani begu-begu na niirikkon ni sidea marhitei na marsombah hujai. Gabe paraturan na totap ma in bani sidea marsundut-sundut.

⁸ Maningon hatahononmu do hubani sidea, 'Atap ise pe humbani ginompar ni Israel barang humbani halak dagang, na manginsolat i tengah-tengah ni sidea, na manggalangkon galangan situtungan atap galangan sisayaton pe,

⁹ na so mamboan ai hu lobei ni lampolampo partumpuan ai, laho manggalangkon ai bani Jahowa, halak na sonai ai maningon siapkononkon do hun tengah-tengah ni bangsani.'

Seng Bulih Panganon Daroh

¹⁰ Anggo adong humbani ginompar ni Israel atap humbani halak dagang, na manginsolat i tengah-tengah ni sidea, na mangankon daroh, bohing-Ku do tujuhonon-Ku laho mangimbang halak sipangan daroh ai, anjaha siapkonon-Ku do ia hun tengah-tengah ni bangsani.

¹¹ Ai ibagas daroh ai do goluh ni daging ai, anjaha Hubere do ai bennima bani anjapanjap ai laho mambahen pardearan bani tonduynima; ai daroh ai do mambahen pardearan, marhitei goluh na ibagas ai.

¹² Halani ai do ase Huhatahon hubani halak Israel, ise pe lang humbennima bulih mangankon daroh, sonai halak dagang na manginsolat i tengah-tengahnima seng bulih panganonni daroh.

¹³ Sonai homa ganup halak Israel, age halak dagang na manginsolat i tengah-tengah ni sidea, na dapotan buruan sanggah marburu atap manuk-manuk na bulih panganon, maningon iduruskon do darohni ai anjaha irungkub ai bani tanoh,

¹⁴ ai daroh ai do goluh ni sagala daging. Halani ai do ase Huhatahon hubani halak Israel, 'Seng bulih panganonnima daroh ni atap aha pe, ai daroh ai do goluh ni sagala na mardaging; barang ise na mangankon ai, maningon siapkonon-Ku do ai.'

¹⁵ Anjaha barang ise na mangankon na matei-matei barang na sinoroh ni binatang, atap halak parnagori ai pe ia atap panginsolat pe, maningon butak do ia ronsi bodari; dob ai pe ase borsih ia.

¹⁶ Tapi anggo seng isusi pakeanni barang iparidi angkulani, mangonai hubani ma hajahatonni ai.”

Seng Bulih Mambuat Sindohor Gabe Jolmani

18 ¹ Dob ai marsahap ma Jahowa hubani si Musa, nini ma,

² “Hatahon ma hubani halak Israel, ‘Ahu do Jahowa Naibatanim.’

³ Seng bulih bahenonnima, songon na binahen ni halak i tanoh Masir, tanoh panginsolatannima ai hinan, anjaha seng bulih bahenonnima songon na binahen ni halak i tanoh Kanaan hadasannima ai holi bahenon-Ku, seng bulih hanima marparlahou domu hubani hasomalan ni sidea.

⁴ Maningon horjahononnima do titah-Ku anjaha ramotkononnima paraturan-Ku anjaha marparlahou hanima ibagas ai, ai Ahu do Jahowa Naibatanim.

⁵ Halani ai maningon ramotkononnima do paraturan-Ku ampa titah-Ku. Halak na mangkorjahon ai, manggoluh do marhitei ai, Ahu do Jahowa.

⁶ Ise pe lang humbennima bulih mandohori sindohorni na sangkan laho mangkasomanisi modom, Ahu do Jahowa.

⁷ Bapamu atap inangmu seng bulih hasomananmu modom; inangmu do ia, seng bulih hasomananmu modom.

⁸ Seng bulih hasomananmu modom jolma ni bapamu; ai na pabador bapamu do ho marhitei ai.

⁹ Seng bulih ompoanmu botoumu, boru ni bapamu atap boru ni inangmu pe ai, tubuh i rumah atap i darat pe ai, seng bulih hasomananmu ia modom.

¹⁰ Seng bulih ompoanmu pahompumu, na humbani anakmu atap pe na humbani borumu, ai na pabador dirimu do ho marhitei ai.

¹¹ Seng bulih ompoanmu boru ni jolma ni bapamu, na dob tubuh humbani bapamu, ai botoumu do ia, seng bulih hasomananmu ia modom.

¹² Seng bulih ompoanmu namborumu, ai sisada daroh do ia ampa bapamu.

¹³ Seng bulih ompoanmu sanina ni inangmu, ai sisada daroh do ia ampa inangmu.

¹⁴ Seng bulih butakanmu podoman ni sanina ni bapamu, marhitei na mandohori jolmani modom, ai inangmu do ia.

¹⁵ Seng bulih ompoanmu parumaenmu, ai jolma ni anakmu do ia, seng bulih hasomananmu ia modom.

¹⁶ Seng bulih hasomananmu modom jolma ni saninamu, ai na pabador saninamu do ho marhitei ai.

¹⁷ seng bulih ompoanmu sada naboru rap pakon boruni; anjaha seng bulih buatonmu boru ni anakni ai atap boru ni boruni ai bahen jolmamu, ai sisada daroh do hanima; habadoron banggal do ai.

¹⁸ Seng bulih buatonmu gabe jolmamu sanina ni na binuatmu, laho mangkasomanisi modom, sadokah manggoluh ope ia.

Lumba-lumba Pasal Dousa Pardagingon

¹⁹ Seng bulih dohoranmu sada naboru, laho mangkasomanisi modom, sanggah roh pantang ni hiouni.

²⁰ Seng bulih hasomananmu modom jolma ni hasomanmu, gabe butak ho marhiteihonsi.

²¹ Seng bulih ondskononmu age sahalak humbani ginomparmu, laho manggalangkon ai bani Molok, ase ulang gabe butak ibahen ho goran ni Naibatamu, Ahu do Jahowa

²² Seng bulih parjolmaonmu dalahi songon naboru, ai hagigi do ai.

²³ Seng bulih ho saor hubani pinahan aha pe ai, gabe butak do ho marhitei ai. Anjaha naboru pe seng bulih bereonni dirini bani pinahan laho marsaor pakon ai; hagigi do ai.

²⁴ Seng bulih butakonnima dirinima marhitei haganupan ai, ai marhitei na sonai ai do ipabutak bangsa sipajuh begu-begu dirini, ai ma siusironkai i lobeinima.

²⁵ Marhitei ai gabe butak ma tanoh ai, jadi mangonai uhum ma Ahu halani hajahatonni ai, ase iutahkon tanoh ai pangisini ai.

²⁶ Halani ai ramotkon hanima ma paraturan-Ku ampa titah-Ku anjaha ulang ma ihorjahon hanima age aha pe humbani hagigi ondi, pangisi ni tanoh ai pe, age halak dagang na marianan i tongah-tongahnima,

²⁷ ai haganup hagigi ondi, domma ihorjahon pangisi ni tanoh ai hinan, ai ma na parlobei humbennima, gabe butak tanoh ai ibahen.

²⁸ Ase ulang dihut hanima iutahkon tanoh ai, halani dihut hanima mambutaki tanoh ai, songon na dob niutahkonni bangsa parbegu na parlobei humbennima.

²⁹ Ai barang ise na mangkorjahon sada gelah humbani hagigi ondi, maningon siapkononkon do hosahni hun tongah-tongah ni bangsani.

³⁰ Halani ai ramotkon hanima ma paraturan-Ku, ai ma na so bulih horjahononnima humbani adat na masambor ai, ai ma na dob hinorjahon hinan i lobeinima, gabe butak hanima halani ai; Ahu do Jahowa Naibat анима.”

Paraturan domu hubani Goluh Siap Ari

19 ¹Dob ai marsahap ma Jahowa hubani si Musa, nini ma,

²Hatahon ma hubani ganup tumpuan ni halak Israel, “Maningon pansing do hanima, ai pansing do Ahu, Jahowa, Naibatanimi.

³Ganup hanima maningon mabiar do bani inangni ampa bani bapani anjaha maningon ramotkononnima do ari Sabat-Ku, ai Ahu do Jahowa, Naibatanimi.

⁴Seng bulih dompakkononnima gana-gana anjaha seng bulih paulionnima bennima naibata tuangan, ai Ahu do Jahowa, Naibatanimi.

⁵Anjaha anggo igalangkon hanima galangan pardameian bani Jahowa, maningon sintong do panggalangkononnima ijai, ase gabe harusuh hanima.

⁶Maningon panganonnima do ai bani ari ai sanggah igalangkon hanima ai ampa patarni ai; anjaha sagala na tading ronsi ari patoluhon maningon tutungon do ai ibagas apuy.

⁷Anggo ipangan ope hunjai bani ari patoluhon, hagigi do ai, seng tarharosuhkon ai.

⁸Barang ise na mangankon hunjai, mangonai ma bani hajahatonni ai, halani na binutakanni ai na pinapansing ai bani Jahowa, anjaha maningon

rotapkonon do hosahni hun tongah-tongah ni bangsani.

⁹ Anggo ipariamai hanima ladangnima, ulang ma bois ipariamai hanima jumanima das hu duruni, anjaha ulang be ituriangi hanima panabiannima ai.

¹⁰ Anjaha pohon anggurnima pe ulang ma bois-bois ibuat hanima, anjaha ulang ma tangtangi hanima pohon anggurnima, paturut hanima ma ai bani halak na miskin ampa bani halak panginsolat; Ahu do Jahowa, Naibatanimu.

¹¹ Seng bulih hanima manangko, barang marladung, barang marsioto-otoan.

¹² Seng bulih hanima mambijahon na so tongon marhitei goran-Ku, gabe butak ibahen hanima marhitei ai goran ni Naibatanimu ai Ahu do Jahowa.

¹³ Seng bulih odoh-odohonmu barang rampokonmu hasomanmu. Upah ni halak siparombou seng bulih tahan-tahanonmu ronsi patarni.

¹⁴ Seng bulih buraanmu halak na nengel anjaha seng bulih nahkononmu parjombaan i lobei ni halak na mapitung, tapi maningon habiaranmu do Naibatamu, ai Ahu do Jahowa.

¹⁵ Seng bulih papeolonnima uhum i paruhuman; seng bulih martonggor jumbak, halak na masombuh idoruni, ia halak na sangap iapiti; maningon pintor do panguhummu bani hasomanmu.

¹⁶ Seng bulih ho manukas-nukasi i tongah-tongah ni bangsamu, anjaha seng bulih ho jongjong marsaksi dompak daroh ni hasomanmu, ai Ahu do Jahowa.

¹⁷ Seng bulih ho mardomdom bani hasomanmu ibagas uhurmu; maningon pasingatonmu do hasomanmu, ase ulang mardousa ho halani ia.

¹⁸ Seng bulih balaskononmu na jahat, barang mardomdom ho bani anak ni hasomanmu sabangsa, tapi maningon haholonganmu do hasomanmujolma doskon dirimu, ai Ahu do Jahowa.

¹⁹ Maningon ramotkononnima do paraturan-Ku: Seng bulih paturutonmu pinahanmu marboru-boru pakon pinahan na legan masam; seng bulih mardua masam bonih saburhononmu bani jumamu, anjaha seng bulih pakeionmu pakean na pinauli humbani dua masam bonangni.

²⁰ Anggo ihasomani sada dalahi modom sada naboru, jabolon ope ia ai, anjaha domma martunangan bani dalahi na legan, tapi lape hona tobus barang ipaluah ia, maningon uhumon do sidea; tapi seng marutang hosah sidea, halani na so maluah ai ope ia.

²¹ Maningon boanon ni dalahi ai do sada biribiri tunggal bani Jahowa hu lobei ni lampolampo partumpuan ai, bahen galangan parsalahan,

²² anjaha malim ai na mambahen pardearan bani i lobei ni Jahowa marhitei biribiri tunggal, galangan

parsalahan ai, halani dousa na binahenni ai; jadi sasap ma dousa na hinorjahonni ai.

²³ Ia dob masuk hanima hu tanoh ai, anjaha isuan hanima ijai bagei-bagei ni hayu marbuah na boi sipanganon, bahen hanima ma bani buahni songon na bani sibur-sibur; tolu tahun dokahni songon na marsibur-sibur ma ai hira hanima, seng bulih panganonnima ai.

²⁴ Bani tahun paompatkon pansing ma sagala buahni ai, gabe galangan puji-pujian ma ai bani Jahowa.

²⁵ Tapi palima-tahunkon bulih ma panganonnima buahni ai, ase lambin tambah buahni bennima. Ahu do Jahowa Naibatanim.

²⁶ Seng bulih panganonnima atap aha pe na dob marsaor pakon daroh. Seng bulih horjahononnima partondungon atap panjahaion.

²⁷ Seng bulih suhuronnima ulunima lepong inggot, anjaha seng bulih ritiponnima ujung ni gumisnima.

²⁸ Seng bulih raokannima angkulanima halani mateian, atap ibahen hanima tanda-tanda bani badannima; Ahu do Jahowa.

²⁹ Seng bulih butakanmu borumu marhitei na mangojursi gabe boru jalang, ase ulang gok parriah-riahon tanoh in, anjaha gabe gok hajahaton tanoh in.

³⁰ Maningon ramotkononnima do ari Sabat-Ku, anjaha marhabiaran hanima bani ianan-Ku na mapansing in; Ahu do Jahowa.

³¹ Seng bulih dompakkononnima dirinima hubani panieran barang hubani halak sipartondung, seng bulih sungkunonnima sidea, gabe butak holi hanima marhalanohon ni sidea; Ahu do Jahowa, Naibatanimas.

³² Maningon jongjong do ho i lobei ni halak na ubanon, anjaha maningon pasangaponmu do halak na matua, anjaha maningon habiaranmu do Naibata; Ahu do Jahowa.

³³ Anggo manginsolat sada halak dagang i lambungnima, i tanohnima, seng bulih odoh-odohonnimas.

³⁴ Songon sada halak parnagori in i tengah-tongahnimas, maningon sonai do age halak panginsolat i tengah-tongahnimas; maningon haholonganmu do ia songon dirimu, ai halak dagang do age hanima hinan i tanoh Masir; Ahu Jahowa Naibatanimas.

³⁵ Seng bulih geduk pandalankonnimas bani panguhumion, bani ukuran sibar-sibar, timbangan atap suhat-suhat pe.

³⁶ Maningon timbangan na sintong, batu timbangan na sintong, efa na sintong ampa hin na sintong do pakeionnimas; Ahu do Jahowa,

Naibatanima, na mambobai hanima luar hun tanoh Masir.

³⁷ Halani ai ramotkon hanima ma ganup parentah-Ku ampa paraturan-Ku anjaha horjahon hanima ma domu hujai, Ahu do Jahowa.”

Lumba-lumba Dompak na Marnaibata na Legan ampa Goluh na So Porman

(Pausih bd. 18)

20 ¹ Dob ai marsahap ma Jahowa hubani si Musa, nini ma,

² “Hatahon ma hubani halak Israel, barang ise humbani halak Israel atap humbani halak dagang pe, na marianan i Israel, na mangondoskon sada humbani anakni hubani Molok, maningon marutang hosah do ia; maningon dangguran ni parnagori in do ia bani batu.

³ Ahu sandiri mandompakkon bohing-Ku manlawan halak ai, anjaha siapkonon-Ku do ia hun tengah-tengah ni bangsani, halani na binereni ai sada humbani anakni hubani Molok, gabe ipabutak ianan-Ku na mapansing in anjaha ipahiri goran-Ku na mapansing in.

⁴ Anggo ipakulah bangsa parnagori in lang ididah halak ai, sanggah na iondoskon ai sada humbani anakni hubani Molok, anjaha seng ipamatei ia,

⁵ jadi dompakkonon-Ku ma bohing-Ku dompak halak na sonai ai ampa dompak sindohorni, anjaha

siapkonon-Ku do sidea hun tongah-tongah ni bangsani, ia ampa haganup halak na mangirikkonsi, na marbangkis bani Molok.

⁶ Anggo adong halak na laho marsungkun hubani halak panieran atap hubani halak sipartondung, marondos ia bani sidea, dompakkonon-Ku do bohing-Ku dompak halak ai, anjaha siapkonon-Ku do ia hun tongah-tongah ni bangsani.

⁷ Halani ai manguras ma hanima anjaha pansing ma, ai Ahu do Jahowa Naibatanimi.

⁸ Ramotkon hanima ma titah-Ku, anjaha horjahon hanima ma ai; Ahu do Jahowa, na papansingkon hanima.

⁹ Ai ganup halak, na mamapai bapani atap inangni maningon pamateon do; bapani ampa inangni do na pinapaanni, marsapata hu bani ma darohni.

¹⁰ Anggo marbangkis sada dalahi ampa parinangon ni halak na legan, maningon haduasi do bunuhon, siparbangkis ai ampa na binangkisan ai.

¹¹ Anggo adong halak na mangkasomani na binuat ni bapani modom, na manalangi bapani do ia ai; maningon bunuhon do sidea haduasi, marsapata hubani sidea ma darohni.

¹² Anggo ihasomani sada halak parumaenni modom, haduasi sidea maningon bunuhon do; habadoron do na nidalankon ni sidea ai, marsapata hubani sidea ma daroh ni sidea.

¹³ Anggo adong sada dalahi na marjalmahon dalahi, hagigi do na hinorjahon ni sidea na dua ai; maningon bunuhon do sidea, marsapata hubani sidea ma daroh ni sidea.

¹⁴ Anggo ibuat sada dalahi sada naboru ampa inangni ai homa, hajahaton do ai; maningon tutungon ia ampa naboru na dua ai ibagas apuy, ase ulang masa pambahenan hasamboron i tongah-tongahnima.

¹⁵ Anggo adong sada dalahi na marsaor ampa sada pinahan, maningon bunuhon do ia anjaha pinahan ai maningon siapkononnima do.

¹⁶ Anggo adong sada naboru na mandohori pinahan, laho pasaorhon dirini hujai, maningon bunuhonmu do naboru ai rap pakon pinahan ai; maningon bunuhon do sidea, marsapata hubani sidea ma darohni.

¹⁷ Anggo adong na mambuat botouni, ai ma boru ni bapani atap boru ni inangni, gabe marsaor sidea, habadoron do ai, anjaha maningon bunuhon do sidea i lobei ni ginompar ni bangsani; marsaor do ia ampa botouni, ia ma na manaronkon hajahatonni ai.

¹⁸ Anggo rap modom sada halak ampa sada naboru, sanggah parroh ni pantang ni hiouni siganup bulan, anjaha marsaor ia pakonsi, gabe ipatalag na niabitanni ai anjaha naboru ai pe ra pasalargon

ia, maningon haduasi do sidea siapkononkon hun tengah-tengah ni bangsani.

¹⁹ Seng bulih ho marsaor ampa sanina ni inangmu, atap ampa namborumu ai na mansalangi na saboltok do ai; maningon mangonai do bani sidea hajahaton ni sidea.

²⁰ Anggo adong sada dalahi na marsaor ampa jolma ni sanina ni bapani, na pabutakkon podoman ni bapani ai do ia ai; mangonai do bani sidea dousa ni sidea ai, maningon matei popor do sidea.

²¹ Anggo adong sada halak na mambuat jolma ni saninani, habadoron do ai, saninani do na pinabadorni ijai, seng anjai adong dakdanak bani sidea.

²² Halani ai maningon ramotkononnima do titah-Ku ampa paraturan-Ku, anjaha dalankononnima do ai; ase ulang hona utahkon hanima ibahen tanoh sipadasonkai bennima, gabe ianan bennima.

²³ Anjaha ulang ma marparlahou hanima domu hubani hasomalan ni bangsa parbegu, siusiron-Kai hun lobei-lobeinima; ai ai do haganup ihorjahon sidea, ase magigi Ahu mangidah sidea.

²⁴ Tapi hu bennima Ningku do, 'Hanima do sitean tanoh ni sidea ai; Ahu do na manlayak-layakkon ai bennima, gabe siteanon bennima, ai ma tanoh habaoran ni dadih ampa manisani ni huramah. Ahu do Jahowa, Naibatanimi, na papuligkon hanima humbani bangsa-bangsa.'

²⁵ Halani ai maningon bahenonnima do parleganan ni pinahan na pansing humbani na butak, ampa manuk-manuk na pansing humbani na butak, ase ulang butak dirinima marhitei pinahan, manuk-manuk atap marhitei haganup na manjulukur i atas tanoh in, na dob hupapulig paboa butak do ai bennima.

²⁶ Maningon pansing do hanima Bangku, ai na pansing do Ahu Jahowa, anjaha Ahu do na papulig hanima humbani bangsa-bangsa, ase Ahu simada hanima.

²⁷ Sada dalahi atap sada naboru, na gabe paniaran atap sipartondung, maningon bunuhon do sidea. Maningon matei pargijigon do sidea bani batu, marsapata bani sidea ma daroh ni sidea.”

Aturan Sidingaton ni Malim-malim

21 ¹ Dob ai nini Jahowa ma hubani si Musa, “Hatahon ma hubani malim-malim, anak ni si Aron, anjaha patugah ma hubani sidea, seng bulih butakan ni malim dirini bani halak na dob matei i tengah-tengah ni bangsani,

² sobali bani diha-dihani na sangkan: bani inangni, bapani, anakni, boruni, saninani,

³ bani botouni na so laho ope, halani sangkan do bani; bani on boi do butakonni dirini.

⁴ Bani botou na dob marhajabuan seng bulih pabutakonni dirini, gabe butak holi ia marhitei ai.

⁵ Seng bulih lepongon ni malim uluni, atap iritip ujung ni gumisni, atap irariki angkulani.

⁶ Maningon pansing do sidea bani Naibatani, anjaha seng bulih butak bahenon ni sidea goran ni Naibata ni sidea; ai sidea do sigalangkon galangan marhitei apuy bani Jahowa, sipanganon ni Naibata ni sidea; halani ai maningon pansing do sidea.

⁷ Seng bulih sidea marjilmahon boru jalang atap naboru na dob binutakan, sonai homa naboru na dob pinaulak ni dalahini seng bulih buaton ni sidea, ai pansing do malim bani Naibatani.

⁸ Halani ai maningon papansingonnima do ia, ai ia do sigalangkon sipanganon bani Naibatanim; maningon pansing do ia bennima, ai na pansing do Ahu Jahowa, na papansingkon hanima.

⁹ Anggo ipabutak sada boru ni malim dirini marhitei parriah-riahon, na pabador bapani do ia ai; maningon matei do ia tutungon ibagas apuy.”

Aturan Mangankon na Ginalangkon

¹⁰ Tapi anggo sintua ni malim, ai ma kopala i tongah-tongah ni saninani, na dob iuseihon minak pamminakion ai bani uluni, na dob niuras laho mamakei pakean na mapansing ai, seng bulih jangga-jangga bahenonni uluni atap rigatanni pakeanni.

¹¹ Seng bulih dohoranni bangkei ni atap ise pe, age bani bapani atap inangni pe seng bulih pabutakonni dirini.

¹² Seng bulih luar ia humbani ianan na mapansing in, ase ulang gabe butak ibahen ianan na mapansing ni Naibatani, ai domma bani minak pamminakion ni Naibatani; Ahu do Jahowa.

¹³ Maningon anak boru do sibuatonni gabe jolmani.

¹⁴ Naboru na mabalu, atap na dob sinirangkon, atap na dob binutakan atap boru jalang, seng bulih buatonni ai, tapi anak boru, na humbani bangsani do boi buatonni bahen jolmani,

¹⁵ ase ulang gabe butak ginomparni ibahen i tongah-tongah ni bangsani, ai Ahu do Jahowa, na papansingkonsi.”

¹⁶ Dob ai nini Jahowa ma hubani si Musa,

¹⁷ “Hatahon ma hubani si Aron, ise pe lang humbani ginomparmu na martikas, torus marsundut-sundut, na boi roh hun dohor laho manggalangkon sipanganon bani Naibata.

¹⁸ Ise pe lang na martikas na boi roh hun dohor; dalahi na pitung atap na repat, parbohi na penek atap parnahei na marsiganjangi;

¹⁹ dalahi na maponggol naheini atap tanganni pe;

²⁰ dalahi na gundung atap na pengpeng, na palouon matani, na huluson, na hurapon atap na hona kasih.

²¹ Sagala dalahi na martikas humbani ginompar ni si Aron, malim ai, seng bulih roh hun dohor

laho manggalangkon galangan marhitei apuy bani Jahowa. Martikas do ia, halani ai seng bulih roh ia hun dohor, laho manggalangkon sipanganon bani Naibatani.

²² Bulih do ia mangan humbani sipanganon ni Naibatani, humbani na tang mapansing ai ampa na pansing ai,

²³ tapi seng bulih ia masuk hubagas hirei-hirei ai atap dohoranni anjapanjap ai, ai martikas do ia, ase ulang gabe mabutak ibahen ianan-Ku na pansing in; ai Ahu do Jahowa na papansingkon sidea.”

²⁴ Sonai ma ihatahon si Musa hubani si Aron, hubani anakni ai ampa hubani haganup bangsa Israel.

Na Boi Mangankon Galangan na Mapansing

22 ¹ Dob ai nini Jahowa ma hubani si Musa,
² “Hatahon ma hubani si Aron ampa hubani anakni ai, ase pangkei sidea pasal sibere-bere na mapansing, na pinapulig ni sidea ai Bangku, ase ulang gabe mabutak ibahen sidea goran-Ku; Ahu do Jahowa.

³ Hatahon ma hubani sidea, sidingaton ma ai marsundut-sundut: Anggo adong humbani ginomparnima, na roh mandohori sibere-bere na mapansing ai, na pinapulig ni halak Israel hubani Jahowa, tudu sanggah butak ia, maningon siapkononkon do halak na sonai ai hun lobei-Hu; Ahu do Jahowa.

⁴Barang ise humbani ginompar ni si Aron, na gadamon atap na tirisan bonih, seng bulih mangankon sibere-bere na mapansing ai, sadokah seng borsih ope ia. Barang ise na manjamah atap aha pe, na dob butak halani dais ai bani bangkei atap bani halak na sabar bonihni,

⁵atap barang ise na manjamah binatang na manjulur, gabe butak ia halani ai, atap sada halak, na mambahen dalit bani habutakonni ai, halani habutakon aha pe ai na longkot bani halak ai,

⁶halak na manjamah sisonai ai, maningon butak do ronsi bodari anjaha seng bulih panganonni humbani sibere-bere na mapansing ai, anggo seng ope iparidi angkulani ibagas bah.

⁷Ia dob sundut mata ni ari, borsih ma ia; dob ai bulih ma panganonni sibere-bere na mapansing ai, ai sipanganonni do ai.

⁸Pinahan na matei-matei sonin atap na hona soroh, seng bulih panganonni, ai butak do dirini marhitei ai; Ahu do Jahowa.

⁹Maningon do irikkonon ni sidea paraturan-Ku, ase ulang mardousa sidea marhitei ai, anjaha matei sidea marhalanihon ni ai, halani ibutaki sidea ai; Ahu do Jahowa, na papansingkon sidea.

¹⁰Halak na legan seng bulih panganonni na pinapansing ai; halak na manumpang bani malim ai atap gajianni pe seng bulih mangankon na pinapansing ai.

¹¹ Tapi anggo iboli sada malim sada jabolon marhitei duit, bulih do jabolon ai mangankon ai; sonai jabolon na dob tubuh i rumahni, bulih do mangankon sipanganonni.

¹² Anggo laho boru ni sada malim bani halak na legan, seng bulih be panganonni humbani galangan tatangan na dob pinapansing ai.

¹³ Tapi anggo mabalu boru ni sada malim atap hona sirangkon, anjaha seng mardakdanak ia, anjaha domma mulak ia hu rumah ni bapani, bulih do panganonni sipanganon ni bapani, songon bani haposoonni; tapi anggo halak na legan seng bulih mangan hunjai.

¹⁴ Tapi anggo adong halak na mangankon na pinapansing ai humbani na so binotohni, maningon tambahonni saparlima ni hargani ai hujai, anjaha ipaulak ma ai rap pakon na pinapansing ai bani malim ai.

¹⁵ Ia malim-malim ai, seng bulih mabutak bahenon ni sidea sibere-bere na mapansing ni Israel, sitatangon ni sidea ai bani Jahowa,

¹⁶ anjaha ulang ma iparroh sidea hasalahan ampa uhum bani halak Israel, marhitei na ipangan sidea sibere-bere na mapansing ai, ai Ahu do Jahowa, na papansingkon sidea.”

Pinahan na Talup Gabe Galangan bani Jahowa

¹⁷ Dob ai nini Jahowa ma hubani si Musa,

¹⁸ “Hatahon ma hubani si Aron ampa anakni ai ampa bani haganup halak Israel, barang ise humbani halak Israel atap humbani halak dagang i Israel, na mamboan galanganni, galangan bagah-bagah pe ai atap sibere-bere nionjar ni uhurni sihol galangkononni bani Jahowa songon galangan situtungan;

¹⁹ ase gabe harosuh hanima marhitei ai, maningon tunggal na so martikas do galangkononnima humbani lombu, biribiri atap hambing pe.

²⁰ Sagala na martikas seng bulih galangkononnima, ai seng jumpahan idop ni uhur hanima marhitei ai.

²¹ Anggo adong sada halak na mamboan bani Jahowa galangan pardameian humbani lombu atap biribiri, laho manggalari bagah-bagah atap bahen galangan nionjar ni uhur, ulang ma na martikas ai, ase tarharosuhkon ai; seng bulih martikas ai.

²² Anggo pitung do ai atap maponggol holiholini, ugahan atap darangon, hurapon atap baroon, pinahan na sonai seng bulih galangkononnima bani Jahowa atap bahenon ai gabe galangan apuy bani anjapanjap ni Jahowa.

²³ Sada lombu atap biribiri, na maganjangtu atap mapondoktu pagorini, bulih do boanonnima gabe galangan nionjar ni uhur, tapi anggo gabe galangan bagah-bagah seng tarjalo ia.

²⁴ Pinahan na dob tarkasih marhitei na tarlisat, na ipisat, irotap atap isayat, seng

bulih galangkononmu ai bani Jahowa. Seng bulih sonai martikas bahenonnima pinahan i tongah-tongahnima,

²⁵atap bolionnima na sonai humbani halak na legan, laho manggalangkon na sonai gabe sipanganon bani Naibat анима; ai dong do sedani, adong do tikasni, seng tarharosuhkon hanima halani ai.”

²⁶Dob ai marsahap ma Jahowa hubani si Musa, nini ma,

²⁷“Anggo tubuh sada anak ni lembu barang anak ni sada biribiri barang anak ni sada hambing, maningon pitu ari dokahni rap ai pakon indungni; humbani paualuh-arihon pe hu atas ase tarharosuhkon ai gabe galangan apuy bani Jahowa.

²⁸Seng bulih rap sayaton lembu atap biribiri pakon anakni ibagas na sadari.

²⁹Anggo sihol galangkononnima galangan puji-pujian bani Jahowa, galangkon hanima ma ai songon na sapatutni, ase gabe harosuh ma hanima marhitei ai.

³⁰Lanjar bani ari ai do panganonnima ai, seng bulih adong na teba bahenonnima ronsi patar; Ahu do Jahowa.

³¹Halani ai ramotkon hanima ma titah-Ku, anjaha horjahon ma domu hujai, Ahu do Jahowa.

³²Anjaha ulang ma mahiri bahen hanima goran-Ku na pansing in, ase pansing Ahu i tongah-tongah

ni halak Israel; Ahu do Jahowa, na papansingkon hanima,
³³ anjaha na mambahen hanima luar hun tanoh Masir, ase Ahu gabe Naibata bennima; Ahu do Jahowa.”

Aturan Pasal Pesta-pesta

23 ¹ Dob ai nini Jahowa ma hubani si Musa,
² “Marsahap ma ho pakon halak Israel, hatahon ma hubani sidea, ‘On ma panorang pesta bani Jahowa, sitingtingkononnima, gabe partumpuan na mapansing, on ma panorang pesta Bangku:

³ Ibagas na onom ari ma ihorjahon sagala horja, tapi anggo ari papituhon ai ari Sabat siparsaranonkon ma ai, ari partumpuan na mapansing; horja aha pe lang boi horjahononnima ijai bani haganup ianannima, ai ari Sabat do ai bani Jahowa.’

⁴ On do ari raya bani Jahowa, ari partumpuan na mapansing in, sitingtingkononkon bani panorang na dob tinontuhon hinan.

⁵ Bani bulan sada, ari sapuluh ompat, marayak bodari, ijai ma pesta Paskah bani Jahowa.

⁶ Anjaha bani ari sapuluh lima bulan ai, ai ma pesta ruti na so niigaran bani Jahowa, pitu ari dokahni, maningon ruti na so niigaran do panganonnima.

⁷ Ari na parlobei ari partumpuan na mapansing do ai bennima; horja ari-ari aha pe lang bulih horjahononnima bani ari ai.

⁸ Manigon galangkononnima do galangan bani Jahowa pitu ari torus; ari papituhon ai ari partumpuan na mapansing do homa ai bennima, horja ari-ari aha pe lang bulih horjahononnima ijai.”

⁹ Dob ai roh ma hata ni Jahowa hubani si Musa,

¹⁰ “Marsahap ma ho hubani halak Israel, hatahon ma hubani sidea, ‘Anggo das ma hanima hu tanoh ai, na sihol bereonkon-Kai bennima, anjaha marpariama hanima ijai, manigon boanonnima do radeannima na parlobei bani malim,

¹¹ anjaha ia ma na manatang radean ai i lobei ni Jahowa, ase gabe harosuh hanima marhitei ai, bani ari dob ari Sabat do tatangan ni malim ai.’

¹² Anjaha bani ari panatangonnima bani radean ai, manigon galangkononnima do sada anak ni biribiri na so martikas, na marumur satahun bahen galangan situtungan bani Jahowa,

¹³ rap pakon galangan sipanganon hasomanni ai; dua parsapuluh efa itak na lumat, na niagu pakon minak bahen galangan situtungan, uap na misbou bani Jahowa, anjaha galangan siinumon hasomanni ai, ai ma anggur saparompat hin.

¹⁴ Anjaha seng bulih panganonnima ruti atap pinahpah, atap niitak pe das bani ari ai, das bani na

iboan hanima galangannima ai bani Naibat анима; aturan na totap ma ai, torus marsundut-sundut bani haganup ianannima.

¹⁵ Dob ai maningon hiraonnima do olat ni ari dob Sabat ai, olat ni ari dob iboan hanima radean tatangan ai; maningon gok do ai pitu minggu.

¹⁶ Das bani ari dob ari Sabat na papituhon ai lima puluh ari ma ai hiraonnima; jadi maningon galangkononnima do galangan sipanganon na baru bani Jahowa.

¹⁷ Maningon boanonnima do humbani ianannima dua ruti sitatongan, dua parsapuluh efa itak lumat ma ai, masak marhasoman na migar, gabe limbuah bani Jahowa.

¹⁸ Anjaha maningon galangkononnima do hasoman ni ruti ai, pitu anak ni biribiri na so martikas, na marumur satahun, ampa sada anak ni lembu ampa dua biribiri tunggal; gabe galangan situtungon ma ai bani Jahowa, rap pakon galangan sipanganon ampa galangan siinumon pangkasomani ai, sada galangan situtungon uap na misbou bani Jahowa.

¹⁹ Ambahni ai maningon galangkononnima do sada hambing tunggal bahen galangan pardousaon ampa dua anak ni biribiri na marumur satahun bahen galangan pardameian.

²⁰ Anjaha maningon tatangan ni malim ai ma ai rap pakon ruti limbuah ai bahen galangan sitatongan i lobei ni Jahowa rap pakon anak ni biribiri na dua ai;

maningon papansingon do ai bani Jahowa, anjaha gabe rupei ni malim do ai.

²¹ Maningon sitingtingkononnima do ari na sasada ai, maningon mambahen ari partumpuan na mapansing do hanima, horja ari-ari aha pe lang bulih bahenonnima ijai; aturan na totap ma ai lalap bani haganup ianannima torus marsundut-sundut.

²² Anggo ipariamai hanima jumanima, ulang ma pariamai hanima jumanima ai das ronsi duruni, anjaha ulang ma turiangi hanima panabiannima, maningon tadingkonon do ai bani na miskin ampa bani halak dagang, Ahu do Jahowa Naibat анима.”

²³ Dob ai nini Jahowa ma hubani si Musa,

²⁴ “Hatahon ma hubani halak Israel, bani bulan pitu, bani ari parlobei ni bulan ai, maningon marpesta do hanima ijai, sada pardingatan marhasoman sora ni tarompit, sada ari partumpuan na mapansing.

²⁵ Seng bulih horjaonkon barang horja aha ari-ari ijai, anjaha galangonkon do galangan situtungon bani Jahowa ijai.”

²⁶ Dob ai roh ma hata ni Jahowa hubani si Musa,

²⁷ “Bani ari sapuluh bulan pitu ai do ari pardearan, ari partumpuan na mapansing ma ai bennima, anjaha maningon unduk do hanima anjaha maningon galangkononnima do galangan situtungon bani Jahowa.

²⁸ Horja aha pe lang bulih horjahononnima bani ari ai, ai ari pardearan do ai, laho mambahen pardearan bennima i lobei ni Jahowa, Naibatanimi.

²⁹ Tongon, ise na so paundukkon dirini bani ari ai, maningon siapkononkon do ia hun tengah-tengah ni bangsani.

³⁰ Anjaha barang ise na mangkorjahon horja aha pe bani na sadari ai, agouhonon-Ku do ia hun tengah-tengah ni bangsani.

³¹ Horja aha pe seng bulih horjahononnima. Aturan na totap ma in bennima torus marsundut-sundut bani haganup ianannima.

³² Ari Sabat parsaranan na mapansing ma in bennima, anjaha maningon paundukonnima do uhurnima; bani ari pasiahkon bani bulan ai, mulai humbani marayak bodari das hubani bodari patarni ai, ijai ma marari Sabat hanima.”

³³ Dob ai roh ma hata ni Jahowa hubani si Musa,

³⁴ “Hatahon ma hubani halak Israel, bani ari sapuluh lima bulan pitu, ijai ma pesta parlampolampoan bani Jahowa, pitu ari dokahni.

³⁵ Bani ari parlobei, ai ma pesta partumpuan na mapansing, horja ari-ari aha pe lang bulih horjahononnima ijai.

³⁶ Pitu ari padodot maningon galangkononnima galangan situtungan bani Jahowa; ari pauluhkon pesta partumpuan na mapansing do ai bennima, anjaha maningon galangkononnima do galangan

situtungon bani Jahowa. Partumpuan na majombut do ai, aha pe lang horja ari-ari bulih horjahononnima ijai.

³⁷ In ma mata ni pesta bani Jahowa, sitingtingkononnima gabe ari partumpuan na mapansing laho manggalangkon bani Jahowa, galangan apuy, galangan situtungon ampa galangan sipanganon, galangan sisayaton ampa galangan siinumon, ganup bani panorangni bei,

³⁸ sobali ari Sabat bani Jahowa, anjaha sobali sibere-berenima ampa nionjar ni uhurnima, na binerenima bani Jahowa.

³⁹ Halani ai bani ari sapuluh lima bulan pitu, anggo domma ipatumpu hanima gogoh ni tanoh in, maningon bahenonnima do pesta bani Jahowa, pitu ari dokahni, ari parlobei ari parsaranan na majombut do ai, ari paualuhkon pe ari parsaranan na majombut do ai.

⁴⁰ Bani ari parlobei maningon buatonnima do buah ni hayu na madear, ranting ni palem, dangkah ni hayu na tabun ampa baringin, anjaha marmalas ni uhur ma hanima i lobei ni Jahowa pitu ari dokahni.

⁴¹ Maningon pestahononnima do ai bani Jahowa pitu ari ibagas satahun; aturan na totap ma ai bani ginomparnima torus marsundut-sundut, anjaha bani bulan pitu do pestahononnima ai.

⁴² Pitu ari dokahni marianan haniman ibagas lampolampo, sagala partanoh Israel maningon do marianan ibagas lampolampo,

⁴³ ase ibotoh ginomparnima, na dob hubahen halak Israel marianan ibagas lampolampo, sanggah na hupadarat sidea hun tanoh Masir, Ahu do Jahowa Naibataniman.”

⁴⁴ Jadi ipatugah si Musa ma hubani halak Israel pasal panorang pesta ni Jahowa ai.

Pasal Palita na Pinapansing ampa Ruti Sigalargonkon

24 ¹ Dob ai nini Jahowa ma hubani si Musa,
² “Hatahon ma hubani halak Israel, ase iboan bam minak na pitah humbani buah ni jetun na giniling bani panggilingan, ase tarbahen torus manorus gara palita ai.

³ I darat ni hirei-hirei ni poti parpadanan ai, ibagas lampolampo na mapansing ai, ijai ma hoseihonon ni si Aron palita ai i lobei ni Jahowa humbani bodari das bani sogod, aturan na totap ma on torus bani ginomparnima.

⁴ I atas parpalitaan omas na pitah ma tongtong hoseihononni palita ai i lobei ni Jahowa.

⁵ Maningon buatonmu do itak na lumat, anjaha masakonmu hunjai sapuluh dua ruti, ganup ruti dua parsapuluh efa do.

⁶ Maningon tibalhononmu do ai dua gugunan, onom ruti sagugunan, i atas ni meja omas pitah ai i lobei ni Jahowa.

⁷ Anjaha maningon nahkononmu do dahupa na pitah bani ganup gugunan, ase ai songon uap ni ruti ai gabe galangan apuy bani Jahowa.

⁸ Ganup ari Sabat do hoseihononni ai tongtong i lobei ni Jahowa halani bangsa Israel, bahen padan sadokah ni dokahni.

⁹ Gabe rupei ni si Aron ampa anakni do ai, anjaha bani ianan na mapansing do ai panganon ni sidea, halani parbagianan na mapansing tumang do ai bani humbani galangan apuy na bani Jahowa; aturan na totap do ai.”

Uhum Halani Pangapasion Bani Jahowa ampa Panlanggaron na Legan-legan

¹⁰ Bani na sahali luar do anak ni sada boru Israel, tapi halak Masir do anggo bapani, hu tongah-tongah ni halak Israel; jadi martinggil ma anak ni boru Israel ai ampa sada halak Israel i parsaranan ai.

¹¹ Iapasi anak ni boru Israel ai do goran ni Jahowa anjaha iburai. Jadi iboan sidea ma ia hubani si Musa. Ia goran ni inangni si Selomit do, boru ni si Dibri, humbani marga Dan.

¹² Jadi ihurungkon sidea ma ia, paima talar bani sidea rosuh ni Jahowa.

¹³ Jadi nini Jahowa ma hubani si Musa,

¹⁴ “Boan ma sipamurai ai hu darat ni parsaranan in, anjaha sagala halak na manangarsi itampeihon ma tanganni bani uluni, anjaha paturut ma matei ia ipargijig ganup kuria in.

¹⁵ Anjaha hatahon ma hubani halak Israel, ‘Barang ise na mamurai Naibatani maningon porsanonni do dousani ai.’

¹⁶ Barang ise na mangapasi goran ni Jahowa maningon mateihononkon do, haganup do kuria in mampargijigsi; halak panginsolat atap parnagori in pe, anggo irisai goran ni Jahowa, maningon bunuhon do.

¹⁷ Barang ise na mamunuh sada halak, maningon pamateon do ia.

¹⁸ Barang ise na mamunuh sada pinahan, maningon gantihonni do ai, pinahan ganti ni pinahan.

¹⁹ Barang ise na mambahen hasedaon bani hasomanni, maningon sonai do bahenon hu bani,

²⁰ ugah abul ni ugah, mata abul ni mata, ipon abul ni ipon, hasedaon na binahenni bani halak na legan ai do honahononkon bani.

²¹ Barang ise na mamunuh pinahan maningon abulonni do ai, tapi barang ise na mamunuh sada jolma, maningon marutang hosah do ia.

²² Sada do uhum bennima, bani halak dagang age bani parnagori in, ai Ahu do Jahowa Naibatanima.

²³ Sonai ma ihatahon si Musa hubani halak Israel; iboan sidea ma panrisai ai luar hu darat ni parsaranan ai, jadi ipargijig sidea ma ia matei bani batu. Ase ibahen halak Israel ma songon na tinonahkon ni Jahowa hubani si Musa.”

Pasal Tahun Sabat ampa Tahun Parolob-oloban

25 ¹ Nini Jahowa ma hubani si Musa i atas ni Dolog Sinai,

² “Hatahon ma hubani halak Israel, anggo masuk ma hanima hu tanoh sibereon-Kai bennima, maningon marparsaranan Sabat do tanoh ai bani Jahowa.

³ Ibagas onom tahun boi do tidahanmu jumamu, anjaha ibagas onom tahun boi do paborsihonmu ranting ni hayu anggurmu, anjaha ipatumpu buahni,

⁴ tapi papitu-tahunkon maningon marparsaranan Sabat do tanoh ai, ai ma Sabat bani Jahowa; seng bulih tidahanmu jumamu atap paborsihonmu ranting ni hayu anggurmu.

⁵ Ia sagak ni pariamamu seng bulih pariamanmu, anjaha buah ni hayu anggur na so pinaborsihmu pe, seng bulih patumpuonmu; tahun parsaranan Sabat do in bani tanoh in.

⁶ Ia gogoh ni tanoh in sadokah tahun parsaranan Sabat ai, gabe sipanganon ma ai bennima, bam ampa bani jabolonmu dalahi ampa bani jabolonmu

naboru, sonai homa bani halak gajianmu ampa bani halak dagang na marianan i lambungmu;

⁷ dihut do pinahanmu ampa binatang na adong i tanohmu gabe sipangan gogoh ni tanoh in.

⁸ Anjaha maningon hiraonmu do bam pitu tahun Sabat, ai ma pitu hali pitu tahun; ase dokah ni na pitu tahun Sabat ai, ai ma ompat puluh siah tahun.

⁹ Jadi pahataonmu ma tarompit partingting ai, bani ari sepuluh bulan pitu; bani ari pardearan do pahataonmu tarompit ai bani sab tanohmu.

¹⁰ Maningon papansingonmu do tahun palimapuluhkon ai, anjaha tingtingkononkon haluahon i tanoh in, bani haganup na marianan ijin, maningon tahun parolob-oloban do in bennima. Mulak ma ijai hanima ganup hu parbagiananni anjaha ganup hanima hubani sindohorni.

¹¹ Tahun parolob-oloban do tahun palimapuluhkon ai bennima; bani panorang ai seng bulih hanima manabur sonai homa mamariamai sagak-sagakni, atap mambuat buah anggur humbani hayu anggur na so pinauli-uli ai.

¹² Ai tahun parolob-oloban do ai, maningon pansing do ai bennima. Ia sipanganonnima, ai ma gogoh ni ladang na sonin-sonin tubuh.

¹³ Bani tahun parolob-oloban ai, maningon mulak do hanima ganup hu parbagiananni bei.

¹⁴ Anggo ijual ho atap aha bani hasomanmu atap iboli ho atap aha humbani hasomanmu, ulang ma adong na marsisedaan bennima.

¹⁵ Marguru hubani bilangan ni tahun dob salpu tahun parolob-oloban ai do ho mamboli sibolionmu humbani hasomanmu, anjaha marguru hubani bilangan ni pariama do jualonni ai bam.

¹⁶ Anggo buei ope tahunni maningon pabanggalon do bolini, tapi anggo otik mando tahunni maningon paotikon do bolini, ai marguru hubani buei ni pariama do jualonni ai bam.

¹⁷ Seng bulih marsisedaan hanima, tapi maningon marhabiaran do hanima bani Jahowa; ai Ahu do Jahowa Naibatanim.

¹⁸ Halani ai horjahon hanima ma titah-Ku, anjaha ramotkon hanima ma paraturan-Ku anjaha dalankon domu hujai, gabe sonang ma hanima marianan i tanoh in.

¹⁹ Bereon ni tanoh in ma buahni, gabe bosur hanima, anjaha marsonang-sonang hanima marianan ijai.

²⁰ Ra ninuhurnima, 'Aha ma panganonnam i bani tahun papituhon ai? Ai seng bulih manabur hanami, anjaha seng bulih patumpuonnam i gogohni.'

²¹ Pasogopon-Ku do pasu-pasung-Ku bennima bani tahun paonomkon ai, ase ibere ai gogohni sungkup tolu tahun.

²² Anggo manabur hanima bani tahun pauluhkon panganonnima ope omei usang, das bani tahun pasiahkon, paima roh omei bayu, panganonnima do usangni ai.

²³ Seng bulih jualon tanoh ai sipatei-patei, ai Ahu do simada tanoh ai, ia hanima halak dagang anjaha panginsolat do hanima i lambung-Ku.

²⁴ Bani haganup tanoh parbagianannima ai, maningon palopasonnima do tobuson tanoh.

²⁵ Anggo gabe miskin hasomanmu sabangsa, gabe ijual sabagian humbani parbagiananni, jadi na dohor hu bani ma roh manobus na dob jinual ni saninani ai.

²⁶ Tapi anggo dong sada halak, na so adong sipanobus ai bani, hape lambin marpansarian do ia gabe jumpahsi partobusni ai,

²⁷ jadi parkirahononni ma tahun-tahun dob panjualan ai, anjaha teba-teba ni ai ipaulak ma hubani halak panjualanni ai, ase mulak use ai gabe parbagiananni.

²⁸ Tapi anggo seng sungkup jumpahsi na sabuei ni partobusni ai, jadi tading ibagas tangan ni sipamboli ai ma na jinualni ai das bani tahun parolob-oloban ai; bani tahun parolob-oloban ai maluah ma ai, mulak hubani simada ai hinan.

²⁹ Anggo ijual sada halak rumahni ibagas sada huta sipartembok, bulih do tobusonni ai ibagas na

satahun ai dob ijual ai; ibagas na satahun ai do marhak ia manobus ai.

³⁰ Anggo seng itobus ai bani na satahun ai, patei ma rumah na ibagas huta sipartembok ai bani sipamboli ai torus ronsi bani ginomparni; age bani tahun parolob-oloban ai, seng mulak ai.

³¹ Tapi anggo rumah-rumah na ibagas huta, na so martembok ope inggotni ai, hiraon do ai masuk bani ladang ni nagori ai, boi do tobuson ai, anjaha maningon mulak do ai bani tahun parolob-oloban.

³² Tapi anggo pasal huta-huta ni halak Levi, ai ma rumah-rumah na ibagas huta parbagianan ni sidea ai, bulih do tobuson ni malim ai bani sagala panorang.

³³ Anggo adong sada halak Levi na so mandalankon panobusion ai, jadi rumah na ibagas huta parbagiananni, na dob jinualni ai, mulak do ai bani tahun parolob-oloban, ai rumah-rumah na ibagas huta ni halak Levi, parbagianan ni sidea do ai i tongah-tongah ni halak Israel.

³⁴ Tapi anggo sampalan, na masuk hubani huta ni sidea ai, seng bulih jualon ai, ai parbagianan ni sidea do ai lalab.

³⁵ Anggo lambin miskin hasomanmu sabangsa i lambungmu, anjaha seng tarsarihonsi be dirini i lambungmu, maningon tolonganmu do ia, ase age pe halak dagang ia atap panginsolat pe, boi manggoluh i lambungmu.

³⁶ Seng bulih buatonmu humbani bunga ni duit atap untung na banggal, tapi maningon marhabiaran do ho bani Naibatamu, ase boi manggoluh hasomanmu i lambungmu.

³⁷ Seng bulih papinjamkononmu duitmu marbunga hu bani, barang pahudungkononmu bani omeimu laho mambuat untung hunjai.

³⁸ Ai Ahu do Jahowa, Naibatanima, na dob mambobahon hanima luar hun tanoh Masir, laho mamberehon bennima tanoh Kanaan, ase Ahu gabe Naibatanima.

³⁹ Anggo lambin miskin hasomanmu sabangsa i lambungmu, pala ijualhon dirini bam, seng bulih songon jabolon ia pahorjahononmu;

⁴⁰ maningon songon halak sipangan gaji atap panginsolat do ia i lambungmu. Das bani tahun parolob-oloban ai do ia pambalosi bam,

⁴¹ dob ai maningon maluah sonin do ia laho humbam, ia rap pakon dakdanakni, mulak hubani sindohorni, mulak hubani parbagianan ni ompungni.

⁴² Ai sidea pe juakjuak do, na dob Huboan luar hun tanoh Masir; seng bulih jualon sidea songon jabolon.

⁴³ Seng bulih maborattu panrajaionmu bani, tapi maningon habiaranmu do Naibatamu.

⁴⁴ Anggo sihol do marjabolon dalahi atap marjabolon naboru, bulih do bolionmu sidea humbani parbegu na marianan inggot hanima.

⁴⁵ Bulih do homa bolionnima humbani halak panginsolat, na manginsolat i tongah-tongahnima, humbani ginompar ni sidea na marianan i tongah-tongahnima, na dob tubuh i tanohnima; sidea ai bulih do hanima simadasi.

⁴⁶ Bulih do sidea pateankononnima bani anaknima i pudinima, bulih do parjabolononnima sidea tongtong. Tapi samah-samah saninanima, halak Israel, seng bulih makorastu hanima marsirajaan.

⁴⁷ Anggo lambin bayak sada halak dagang atap panginsolat i lambungmu, hape anggo saninamu lambin miskinni do i lambungni, gabe ijualhon dirini bani halak dagang atap panginsolat na i lambungmai, barang hubani ginompar ni halak dagang ai,

⁴⁸ bulih do ia tobuson dob jinualhonni ai dirini. Sahalak humbani saninani bulih do manobussi,

⁴⁹ barang parbapaonkonni barang parsaninaonkonni bulih do tobusonni ia, atap sindohor na legan humbani pangkuni, bulih do tobusonni ia; atap anggo lambin bayak ia, bulih do tobusonni dirini.

⁵⁰ Tapi maningon bahenonni do parkiraan hubani na mambolisi ai, humbani tahun dob ijualhon dirini hu bani das hu tahun parolob-oloban ai,

anjaha partobusni ai maningon domu do ai hubani bilangan ni tahun ai; maningon songon sipangan gaji do parkirahononkon dokahni ai i lambungni.

⁵¹ Anggo buei ope tahunni, maningon domu hujai paulakonni partobusni humbani bolini ai hinan.

⁵² Tapi anggo otik mando tahunni paima jumpah tahun parolob-oloban ai, maningon bahenonni do age parhiraanni ai pakonsi; domu hubani horjani ibagas tahun pangkorjaonkonni ai do paulakonni partobusni.

⁵³ Maningon songon halak gajian do ia i lambungni tahun hu tahun; seng bulih makorastu panrajaionni bani i lobeinima.

⁵⁴ Tapi anggo seng hona tobus ia marhitei dalan na sonai, maningon maluah do ia rap pakon anakni bani tahun parolob-oloban ai.

⁵⁵ Ai juakjuak do Bangku halak Israel; juakjuak do sidea, na dob Hubobahon luar hun tanoh Masir; Ahu do Jahowa Naibatanimia.”

Pasal Pasu-pasu ampa Papa

(Pausih 5 Mus. 28)

26 ¹ Seng bulih paulionnima naibata-naibata bennima, anjaha gana-gana ampa tugu batu seng bulih paulionnima bennima, sonai homa batu na margambar-gambar seng bulih pajongjongonnima i tanohnima laho marsombah hujai; ai Ahu do Jahowa, Naibatanimia.

² Maningon ramotkononnima do ari Sabat-Ku, anjaha mulia ma bennima ianan-Ku na mapansing in; Ahu do Jahowa.

³ Anggo marparlahou hanima ibagas paraturan-Ku anjaha ijolom hanima titah-Ku anjaha domu hujai ihorjahon hanima,

⁴ jadi bereon-Ku ma bennima udan bani panorangni, anjaha bereon ni tanoh in ma gogohni, anjaha hayu na i ladang pe bereonni do buahni.

⁵ Jadi das ma panorang mardogei bennima hubani panorang mambuat buah anggur, anjaha na mambuat anggur das hubani na manabur, bosur ma hanima mangankon sipanganonnima, anjaha sonang marianan i tanohnima.

⁶ Bahenon-Ku do mardamei-damei tanoh in, anjaha sonang ma hanima modom, sahalak pe seng dong panonggoti bennima; siapkonon-Ku do binatang panoroh hun tanoh in, anjaha podang pe seng montas hun tanohnima.

⁷ Pabalionnima do munsuhnima, anjaha rasei do sidea bahenon ni podang i lobeinima.

⁸ Lima halak humbennima mardakdak saratus halak, anjaha saratus halak humbennima mardakdak saloksa; radag do munsuhnima bahenon ni podang i lobeinima.

⁹ Marpanatap do Ahu bennima tumpakon-Ku do hanima mabuei anjaha patotapon-Ku do padan-Ku bennima.

¹⁰ Mangan omei usang do hanima, anjaha paluaronnima do lobei na usang ai ase adong ianan ni omei bayu.

¹¹ Pajongjongon-Ku do ianan-Ku i tongah-tongahnima, anjaha seng magigi Ahu mangidah hanima.

¹² Mardalani do Ahu i tongah-tongahnima, anjaha Ahu do Naibata bennima, anjaha hanima gabe bangsang-Ku.

¹³ Ahu do Jahowa, Naibatania, na dob mambobahon hanima luar hun tanoh Masir, ase ulang be jabolon ni sidea hanima. Huponggolhon do hayu ni pasangannima anjaha Ahu do mambahen totap langkahnima.

¹⁴ Tapi anggo seng ibalosi hanima Ahu anjaha seng ra hanima mandalankon haganup titah in,

¹⁵ anjaha anggo teos do uhurnima bani paraturan-Ku anjaha magigi hanima mangidah uhum-Ku, gabe seng ijolom hanima haganup titah-Ku, anjaha marhitei ai iosei hanima padan na Hubahen ai,

¹⁶ Ahu pe bahenon-Ku ma sonon bennima, "Pasogopon-Ku ma na mabajan bennima, Tirahap ampa pane-pane, na mambahen miloh matanima anjaha melus goluhnima. Sisoya-soya do manabur hanima, ai munsuhnima do na mangankon ai.

¹⁷ Dompakkonon-Ku do bohing-Ku manlawan hanima, ase italuhkon munsuhnima hanima, halak na mangkagigihon hanima do na manrajai hanima,

anjaha maporus do hanima, age pe seng dong na mardakdak hanima.

¹⁸ Anjaha age pe sonai lanjar do seng itangihon hanima Ahu, gabe nunuton-Ku ope mangajar hanima, pitu hali lompit, halani dousanima ai.

¹⁹ Ropukon-Ku do na nienjengkonnima ai, anjaha bahenon-Ku do langitnima songon bosu, anjaha tanohnima in songon tombaga.

²⁰ Soya do halojaon ampa hinorjahonnima, seng bereon ni tanohnima in gogohni, anjaha seng marbuah hayu na i ladang in.

²¹ Anjaha anggo manlawan ope hanima Bangku, anjaha seng ra hanima mambalosi Ahu, jadi nunuton-Ku ope mamukul hanima, pitu hali lompit, domu hubani dousanima ai.

²² Suruhon-Ku do binatang panoroh manlawan hanima, sorohonni do dakdanaknima anjaha parsedaonni pinahannima anjaha paotikonni do bilangannima, gabe malungun ma dalannima.

²³ Anjaha anggo seng tunduk ope hanima bani pangajaran-Ku, tapi ilawan hanima ope tong Ahu,

²⁴ jadi Ahu pe imbangon-Ku do hanima anjaha bogbogan-Ku do hanima, pitu hali, halani dousanima.

²⁵ Parohon-Ku do podang bennima, na manluluhon padan na Hubahen ai, anjaha anggo maporus hanima hubagas hutanima, tongoson-Ku do sampar

hu tongah-tongahnima, anjaha ondoskonon-Ku do hanima hubagas tangan ni munsuh.

²⁶ Anggo Huropukkon ma parbohalannima ai, jadi masakon ni sapuluh naboru ma rutinima ibagas sada parmasakan ruti, anjaha iboan mulak ruti ai bennima martimbangan, seng boi bosur hanima mangan.

²⁷ Anjaha anggo seng ope homa itangihon hanima Ahu, tapi ilawan ope Ahu,

²⁸ jadi Ahu pe manringis do manlawan hanima anjaha ajaron-Ku do hanima, pitu hali lompit, halani dousanima.

²⁹ Maningon panganonnima do daging ni anaknima ampa borunima.

³⁰ Anjaha parsedaon-Ku do buntu-buntu parsombahannima anjaha rumbakkonon-Ku do tiang sinombahnima, anjaha sampakkonon-Ku bangkeinima bani ropuk-ropuk ni naibata-naibatanim, anjaha magigi do Ahu mangidah hanima.

³¹ Parreongon-Ku do huta-hutanima anjaha parsedaon-Ku ianan na mapansing na bennima, anjaha seng ra be Ahu manganggoh misbou ni galangannima.

³² Tongon, Ahu sandiri mambahen tarulang tanoh in, ase tarsonggot munsuhnima, na roh marianan hujai mangidah ai.

³³ Tapi anggo hanima erapkonon-Ku do hu tongah-tongah ni bangsa parbegu, anjaha Ahu mangondamkon podang hun pudinima, ase gabe halimisan tanohnima anjaha mareong ia hutanima.

³⁴ Jadi hamalaskonon ni tanoh in ma tahun-tahun Sabatni ai, sadokah panorang tarulang ai, anjaha i tanoh ni munsuhnima ia hanima; jadi marsaran ma tanoh in, anjaha ihamalaskon Sabatni ai.

³⁵ Sadokah panorang na tarulang ai, marsaran do tanoh ai, ai ma parsaranan, na so tarpasarankonsi bani panorang marsaran ai, na maningon sidalankononnima namin, sanggah marianan hanima ijai.

³⁶ Anjaha halak na tading hun bennima bahenon-Ku do marhabiaran uhur ni sidea i tanoh ni munsuhnima, gabe maporus do sidea halani pardaras ni bulung-bulung na masak, anjaha maporus do sidea songon na niayak ni podang, anjaha mardabuhan sidea age pe seng dong na mangayak.

³⁷ Marsijombaan do sidea, songon sanggah maporus iayak podang, age pe seng dong na mardakdak. Seng manahan hanima manlawan munsuhnima,

³⁸ anjaha maningon magou do hanima i tongah-tongah ni bangsa parbegu, anjaha bois hanima panganon ni tanoh ni munsuhnima.

³⁹ Tapi halak na tading hun bennima, maningon mandatei do halani hajahaton ni sidea i tanoh ni munsuhnima; sonai homa halani hasalahan ni ompungnima na mangonai bani sidea, mambahen mandatei sidea.

⁴⁰ Tapi anggo iundukkon sidea do hajahaton ni sidea ampa hajahaton ni ompung ni sidea ai, ai ma na mangeluk ai sidea hun Bangku, anjaha homa manlawan sidea hu Bangku,

⁴¹ halani ai do ase Hulawan sidea anjaha Huboan sidea hu tanoh ni munsuh ni sidea anggo ipaunduk sidea do uhur ni sidea na so marsunat ai, anjaha mubah sidea humbani hajahaton ni sidea ai,

⁴² jadi mardingat ma Ahu bani padan na Hubahen bani si Jakob, si Isak ampa si Abraham, anjaha tanoh ai pe dingaton-Ku do.

⁴³ Tapi anggo tanoh ai maningon tadingkonon ni sidea do lobei, ase ihamalaskon tanoh ai Sabatni ai sadokah na tarulang ai anjaha sidea seng ijai marianan; sidea sandiri do na maningon mamorsan hajahaton ni sidea, halani na iambukkon sidea ai paraturan-Ku anjaha magigi sidea bani titah-Ku.

⁴⁴ Tapi age pe i tanoh ni munsuhni ai sidea, seng ambukkonon-Ku anjaha hagigihonon-Ku sidea anjaha seng gabe magou tumang Hubahen sidea, marhitei na Humasabkon padan-Ku na hubani sidea ai, ai Ahu do Jahowa, Naibata ni sidea.

⁴⁵ Ingaton-Ku do, halani sidea, padan na Hubahen ai bani ompung ni sidea, na dob Hubobahon luar hun Masir, ibagas pangidah ni bangsa parbegu, ase gabe Naibata ni sidea Ahu; Ahu do Jahowa.”

⁴⁶ In ma paraturan, uhum ampa titah na niadongkon ni Jahowa hubani halak Israel i Dolog Sinai marhitei si Musa.

Pasal Bagah-bagah ampa Parsapuluhan

27 ¹ Dob ai roh ma hata ni Jahowa hubani si Musa,

² “Hatahon ma hubani halak Israel, anggo adong sada halak na mambagahkonjolma bani Jahowa, maronjolan hubani pangasammu,

³ jadi asam ma sada dalahi na marumur dua puluh tahun das hu onom puluh tahun lima puluh sekel pirak, domu hubani sekel na bani ianan na mapansing in.

⁴ Tapi anggo naboru do ai, tolu puluh sekel ma pangasammu bani.

⁵ Anggo marumur halak ai lima tahun das hubani dua puluh tahun, asam ma sada dalahi dua puluh sekel anjaha naboru sapuluh sekel.

⁶ Anggo marumur halak ai sabulan das hubani lima tahun, asam ma ia lima sekel pirak anggo dalahi, tapi anggo naboru do tolu sekel pirak ma.

⁷ Anggo marumur halak ai onom puluh tahun barang i atas ni ai, asam ma ia sapuluh lima sekel

pirak anggo dalahi, tapi anggo naboru do sapuluh sekel pirak ma.

⁸ Tapi anggo miskintu do sada halak laho manggalar domu hubani pangasammu, jadi iboan ma halak na binagahkon ai hu lobei ni malim, ase malim ai ma mambahen asam bani; hubani na boi bahenon ni siparbagah-bagah ai do asamon ni malim ai ia.

⁹ Anggo pinahan do ai, na targalangkon halak ai bani Jahowa, haganup na ginalangkon ni halak ai bani Jahowa pansing do.

¹⁰ Seng bulih gantihonni atap pasamboronni ai, na madear ganti ni na bajan, barang na bajan ganti ni na madear, tapi anggo sihol do tukaronni pinahan hubani pinahan, jadi haduasi ma ai gabe papansingon bani Jahowa.

¹¹ Tapi anggo pinahan na butak do ai, na so bulih galangonkon bani Jahowa, maningon boanonni do ai hu lobei ni malim,

¹² anjaha malim ai ma mangasam ai, domu hubani dearni ampa na hurangni; pangasam ni malim ai do na saud.

¹³ Tapi anggo sihol tobusonni ai, maningon tambahkononni do hujai saparlina ni pangasamon ai.

¹⁴ Anggo ipapansing sada halak rumahni bani Jahowa, jadi asamon ni malim ma ai domu hubani dearni atap hurangni; sonin pangasam ni malim ai, sonai ma totap.

¹⁵ Tapi anggo sihol tobuson ni halak na mapansing ai do rumahni ai, maningon tambahkononni do hujai saparlima ni pangasamon ai, dob ai ia ma use simada ai.

¹⁶ Anggo ipapansing sada halak sabagian humbani tanoh parbagiananni bani Jahowa, jadi domu hubani bonihni do asamonmu ai; anggo sada homer bonihni, jadi lima puluh sekel pirak ma ai.

¹⁷ Anggo humbani tahun parolob-oloban nari do ia papansingkon ladangni ai, jadi totap ma songon pangasammu.

¹⁸ Tapi anggo dob tahun parolob-oloban do ia papansingkon ladangni ai, jadi itimbang malim ai ma argani domu hubani bilangan ni tahun na tading ai das hu tahun parolob-oloban ai, anjaha oruan ma domu hujai humbani pangasamon na dob binahenmai.

¹⁹ Tapi anggo sihol tobuson ni halak na papansingkon ai ladang ai, maningon tambahkononni do hujai saparlima ni pangasammu hinan, ase bani use ai.

²⁰ Tapi anggo seng sihol be uhurni manobus ai, lambin ijual tene ladang ai bani halak na legan, seng bulih be tobusonni ai.

²¹ Ia ladang ai, anggo maluah ma ai bani tahun parolob-oloban, pansing bani Jahowa ma ai, songon ladang na hona haram; gabe parbagianan ni malim ma ai.

²² Anggo ipapansing sada halak bani Jahowa sada ladang na binolini, ase sedo parbagiananni ai,

²³ jadi pare tongkonon ni malim ai hubani nasa buei ni pangasamon das hu tahun parolob-oloban ai, anjaha maningon bereon ni halak ai do bani ari ansa buei ni pangasamon ai songon sibere-bere na mapansing bani Jahowa.

²⁴ Bani tahun parolob-oloban maningon mulak do juma ai hubani halak pambolianni ai, bani halak siparhak ijai mangihutkon parbagianan hinan.

²⁵ Ganup pangasamon ai maningon domu do ai hubani sekel na bani ianan na mapansing ai, dua puluh gera sada sekel.

²⁶ Tapi bunga tubuh ni pinahan, na dob Jahowa simadasi halani parlobei tubuh, ise pe lang bulih marbagah-bagahkon ai, atap lombu atap biribiri pe ai, Jahowa do simada ai.

²⁷ Anggo pinahan na butak do ai, maningon tobusonni do ai marguru hubani pangasammu, anjaha tambahkononni do saporlimani; anggo seng itobus, jadi ijual ma ai domu hubani harga pangasamon ai.

²⁸ Tapi haganup na dob hona haram, na pinapansing ni halak bani Jahowa marhitei na mangkaramkon ai, humbani ugasni, atapjolma pe ai, atap pinahan atap juma humbani parbagiananni, seng bulih jualon atap tobuson be ai; ai sagala na dob hinaramkon pansing tumang do ai bani Jahowa.

²⁹ Anggo adong sada jolma, na dob pinapansing marhitei na mangkaramkon ai, seng bulih tobuson ia, maningon pamateon do ia.

³⁰ Haganup parsapuluhan ni tanoh in, humbani gogoh ni tanoh atap humbani buah ni hayu pe, Jahowa do simada ai, na dob pinapansing do ai bani Jahowa.

³¹ Tapi barang ise na sihol manobus parsapuluhanni, maningon tambahkononni do hujai saparlima ni hargani.

³² Sagala parsapuluhan ni lombu atap biribiri, sagala parsapuluhan ni pinahan, na montas hun toruh ni simambu ni parmahan, na pinapansing do ai bani Jahowa.

³³ Seng pala pareksaon ai atap na jenges do atap na bajan, anjaha homa seng bulih tukaron ai. Anggo adong halak na manukar ai, gabe haduasi ma pinahan ai papansingon, seng bulih tobuson ai.”

³⁴ Ai ma titah, na binere ni Jahowa hubani si Musa i atas ni Dolog Sinai.

4 Musa

Bilangan ni Siimbang Munsuh i Israel

1 ¹ Dob ai marsahap ma Jahowa hubani si Musa i halimisan Sinai, ibagas lampolampo partumpuan ai, bani ari sada bulan dua, padua-tahunkon dob luar sidea hun tanoh Masir, nini ma,

² “Suratkon ma bilangan ni ganup tumpuan ni halak Israel, marmarga-marga, mar sasaompung, domu hubani buei ni goran-goran, sagala dalahi, mar sasahalak;

³ singgan na marumur dua puluh tahun pakon lobih hunjai, sagala na boi laho hu parporangan i Israel, maningon bilanganmu do sidea, ho pakon si Aron marguru hubani hulanan ni sidea.

⁴ Anjaha maningon dong hasomanmu sahalak humbani ganup marga, ai ma gabe pambobai ni sidea na samarga.

⁵ Anjaha on ma goran-goran ni sagala na mangkasomani hanimi, Humbani Ruben, si Elisur, anak ni si Sedeur;

⁶ humbani Simeon, si Selumiel, anak ni si Surisadai;

⁷ humbani Juda, si Nahason, anak ni si Aminadab;

⁸ humbani Isasar, si Natanael, anak ni si Zuar;

- ⁹ humbani Zebulon, si Eliab, anak ni si Helon;
¹⁰ humbani anak ni si Josep: humbani Efraim, si Elisama, anak ni si Amihud; humbani Manase, si Gamaliel, anak ni si Pedasur;
¹¹ humbani Benjamin, si Abidan, anak ni si Gideoni;
¹² humbani Dan, si Ahieser, anak ni si Amisadai;
¹³ humbani Asser, si Pagiel, anak ni si Okran;
¹⁴ humbani Gad, si Eliasap, anak ni si Deguel,
¹⁵ humbani Naftali, si Ahira, anak ni si Enan.
¹⁶ In ma halak na tardilo humbani tumpuan ai, pambobai ni marga-marga ni ompung ni sidea, kopala ni mar sasaribu halak do sidea i Israel.”
¹⁷ Dob ai ipapulig si Musa pakon si Aron ma sagala dalahi na dob ginoranan ai,
¹⁸ anjaha bani ari sada bulan dua, martumpu ma ganup tumpuan ai, laho manuratkon dirini mar samarga, mar sasaompung, romban hubani buei ni goran-goran, singgan ni na marumur dua puluh tahun pakon i atasni ai, mar sasahalak,
¹⁹ songon tinonahkon ni Jahowa hubani si Musa. Jadi ibilangi ma sidea i halimisan dohorhon Sinai.
²⁰ Anak ni si Ruben, bunga tubuh ni si Israel, ginompar ni sidea mangihutkon partubuh ni sidea mar sasamarga, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang:

²¹ na tarbilang humbani marga Ruben ompat puluh onom ribu lima ratus halak.

²² Humbani anak ni si Simeon, ginompar ni sidea, mangihutkon partubuh ni sidea, mar sasamarga, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang:

²³ na tarbilang humbani marga Simeon, lima puluh siah ribu tolu ratus halak.

²⁴ Humbani anak ni si Gad, ginompar ni sidea mangihutkon partubuh ni sidea, mar sasamarga, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang;

²⁵ na tarbilang humbani marga Gad, ompat puluh lima ribu onom ratus lima puluh halak.

²⁶ Humbani anak ni si Juda, ginompar ni sidea mangihutkon partubuh ni sidea mar sasamarga, mar sasaompung, romban hubani buei ni goran-goran, mar sasahalak sagala dalahi na marumur dua puluh tahun pakon i atasni ai, sagala na boi marporang:

²⁷ na tarbilang humbani marga Juda, pitu puluh ompat ribu onom ratus halak.

²⁸ Humbani anak ni si Isasar, ginompar ni sidea mangihutkon partubuh ni sidea, mar sasamarga,

mar sasaompung, romban hubani buei ni goran-goran mar sasahalak, sagala dalahi na marumur dua puluh tahun pakon i atasni ai, sagala na boi marporang:

²⁹ na tarbilang humbani marga Isasar, lima puluh ompat ribu ompat ratus halak.

³⁰ Humbani anak ni si Zebulon, ginompar ni sidea mangihutkon partubuh ni sidea, mar sasamarga, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang;

³¹ na tarbilang humbani marga Zebulon, lima puluh pitu ribu ompat ratus halak.

³² Humbani anak ni si Josep: Humbani anak ni si Efraim, ginompar ni sidea mangihutkon partubuh ni sidea, mar sasamarga, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang;

³³ na tarbilang humbani marga Efraim ompat puluh ribu lima ratus halak.

³⁴ Humbani anak ni si Manase, ginompar ni sidea, mangihutkon partubuh ni sidea, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang,

³⁵ na tarbilang humbani marga Manase, tolu puluh dua ribu dua ratus halak.

³⁶ Humbani anak ni si Benjamin, ginompar ni sidea mangihutkon partubuh ni sidea, mar sasamarga, mar sasaompung romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang,

³⁷ na tarbilang humbani marga Benjamin, tolu puluh lima ribu ompat ratus halak.

³⁸ Humbani anak ni si Dan, ginompar ni sidea, mangihutkon partubuh ni sidea, mar sasamarga, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang,

³⁹ na tarbilang humbani marga Dan, onom puluh dua ribu pitu ratus halak.

⁴⁰ Humbani anak ni si Asser, ginompar ni sidea mangihutkon partubuh ni sidea, mar sasamarga, mar sasaompung, romban hubani buei ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang,

⁴¹ na tarbilang humbani marga Asser, ompat puluh sada ribu lima ratus halak.

⁴² Humbani anak ni si Naftali, ginompar ni sidea, mangihutkon partubuh ni sidea, mar sasaompung,

romban hubani bilangan ni goran-goran, mar sasahalak, sagala dalahi na marumur dua puluh tahun pakon i atasni ai, sagala na boi marporang,
⁴³ na tarbilang humbani marga Naftali, lima puluh tolu ribu ompat ratus halak.

⁴⁴ Ai ma ganupjolma na tarbilang, na binilang ni si Musa pakon si Aron, rap pakon kopala ni halak Israel na sapuluh dua halak ai, ganup sidea ihutan bani sidea na saompung.

⁴⁵ Ase haganup na tarbilang humbani halak Israel, mar sasaompung, singgan ni na marumur dua puluh tahun pakon i atas ni ai, sagala dalahi na boi marporang i Israel,

⁴⁶ sagala na tarbilang ai, onom ratus tolu ribu lima ratus lima puluh halak.

Lahoan ni Halak Levi

⁴⁷ Tapi anggo halak Levi, sidea na samarga, mar sasaompung, seng masuk bani bilangan ni sidea ai.

⁴⁸ Ai domma ihatahon Jahowa hubani si Musa,

⁴⁹ “Pitah marga Levi seng bulih bilanganmu, anjaha seng bulih patumpuon buei ni sidea i tongah-tongah ni halak Israel,

⁵⁰ tapi pabangkit ma halak Levi paturei-turei rumah panumbahan hasaksian ai ronsi ganup parugasni pakon sagala na masuk hujai; maningon sidea do na mangusung lampolampo ai ronsi ganup parugasni,

anjaha sidea do na marugas ijai, anjaha marianan inggot ni lampolampo ai.

⁵¹ Laho bingkat lampolampo ai, maningon halak Levi do na mandayok ai; anggo pajongjongon ma lampolampo ai, halak Levi do na pajongjong ai; anggo adong halak na legan mandohori ai, maningon marutang hosah do ia.

⁵² Maningon mar saran halak Israel ganup bani parsarananni bei, anjaha ganup dohorhon mandera ni sidea bei.

⁵³ Tapi anggo halak Levi maningon inggot ni lampolampo hasaksian ai do sidea mar saran, ase ulang mangonai ringis hubani tumpuan ni halak Israel; ase maningon horjahonon ni halak Levi do sihorjahononni bani lampolampo hasaksian ai.”

⁵⁴ Jadi ibahen halak Israel ma romban hubani haganup na tinonahkon ni Jahowa hubani si Musa, sonai do ibahen sidea.

Paratur ni Ianan ni Halak Israel bani Parsaranan

2 ¹ Dob ai nini Jahowa ma hubani si Musa pakon hubani si Aron,

² “Maningon marsaran halak Israel ganup dohorhon manderani ai, dohorhon partinandaan ni sidea mar sasaompung, anjaha maningon marsaran sidea mandompakkon lampolampo partumpuan ai inggot.

³ Hampit lobei, hampit hapoltakan ni mata ni ari ma marsaran Juda dohorhon manderani rap pakon balani; si Nahason, anak ni si Aminadab do pambobai ni halak Juda ai.

⁴ Anjaha balani na tarbilang ai pitu puluh ompat ribu onom ratus halak do bueini.

⁵ I lambungni marsaran do marga Isasar, anjaha si Natanael, anak ni si Zuar do pambobai ni halak Isasar ai.

⁶ Anjaha balani na dob tarbilang ai, lima puluh ompat ribu ompat ratus halak do bueini.

⁷ Dob ai marga Sebulon, anjaha si Eliab, anak ni si Helon do pambobai ni halak Sebulon ai.

⁸ Anjaha balani na dob tarbilang ai, lima puluh pitu ribu ompat ratus halak do bueini.

⁹ Bahat ni na tarbilang humbani parsaranan Juda saratus ualuh puluh onom ribu ompat ratus halak do bueini, marbanjei-banjei. Sidea do na maningon mardalan parlobei.

¹⁰ Hampit dangsina do mandera ni marga Ruben rap pakon balani, anjaha si Elisur, anak ni si Sedeur do pambobai ni halak Ruben ai.

¹¹ Anjaha balani na tarbilang ai ompat puluh onom ribu lima ratus halak do bueini.

¹² Anjaha i lambungni marsaran do marga Simeon, anjaha si Selumiel, anak ni si Surisadai do pambobai ni halak Simeon ai.

¹³ Anjaha balani na dob tarbilang ai, lima puluh siah ribu tolu ratus halak do bueini.

¹⁴ Dob ai marga Gad, anjaha si Eliasab, anak ni si Rehuel do pambobai ni halak Gad ai.

¹⁵ Anjaha balani na dob tarbilang ai, ompat puluh lima ribu onom ratus lima puluh halak do bueini.

¹⁶ Ganup na tarbilang ai humbani parsaranan Ruben, saratus lima puluh sada ribu ompat ratus lima puluh halak do bueini marbanjei-banjei. Sidea do na maningon bingkat paidua.

¹⁷ Dob ai bingkat ma lampolampo partumpuan ai rap pakon tumpuan ni halak Levi i tongah-tongah ni tumpuan na legan ai; domu hubani partibal ni sidea na marsaran ai, lanjar sonai do sidea bingkat ganup bani iananni bei mangihutkon manderani bei.

¹⁸ Hampit hasundutan do mandera ni marga Efraim rap pakon balani, anjaha si Elisama, anak ni si Amihud do pambobai ni halak Efraim ai.

¹⁹ Anjaha balani na tarbilang ai ompat puluh ribu lima ratus halak do bueini.

²⁰ Anjaha i lambungni marsaran do marga Manase, anjaha si Gamaliel, anak ni si Pedasur do pambobai ni halak Manase ai.

²¹ Anjaha balani na dob tarbilang ai tolu puluh dua ribu dua ratus halak do bueini.

²² Dob ai marga Benjamin, anjaha si Abidan, anak ni si Gideon do pambobai ni halak Benjamin ai.

²³ Anjaha balani na dob tarbilang ai, tolu puluh lima ribu ompat ratus halak do bueini.

²⁴ Ganup na tarbilang ai humbani parsaranan Efraim, saratus ualuh ribu saratus halak do bueini marbanjei-banjei. Sidea do na maningon bingkat paitolu.

²⁵ Hampit utara do mandera ni marga Dan rap pakon balani, anjaha si Ahieser, anak ni si Amisadai do pambobai ni halak Dan ai.

²⁶ Anjaha balani na dob tarbilang ai, onom puluh dua ribu pitu ratus halak do bueini.

²⁷ Anjaha i lambungni marsaran do marga Asser, anjaha si Pagiél, anak ni si Okran do pambobai ni halak Asser.

²⁸ Anjaha balani na dob tarbilang ai ompat puluh sada ribu lima ratus halak do bueini.

²⁹ Dob ai marga Naftali, anjaha si Ahira, anak ni si Enan do pambobai ni halak Naftali.

³⁰ Anjaha balani na dob tarbilang ai, lima puluh tolu ribu ompat ratus halak do bueini.

³¹ Ganup na tarbilang ai humbani parsaranan Dan, saratus lima puluh pitu ribu onom ratus halak; anjaha parpudi do sidea bingkat rap pakon manderani.

³² Ai ma ganup na tarbilang humbani halak Israel mar sasaompung; ganup na tarbilang ibagas parsaranan ai mangihutkon balani na

marbanjei-banjei ai onom ratus tolu ribu lima ratus lima puluh halak do bueini.

³³ Tapi anggo halak Levi seng ibilangi i tongah-tongah ni halak Israel songon na tinonahkon ni Jahowa hinan hubani si Musa.”

³⁴ Jadi ibahen halak Israel ma haganup songon na tinonahkon ni Jahowa hubani si Musa; marsaran ma sidea domu hubani manderani bei; sonai homa bingkat ma sidea mar sasamarga pakon mar sasaompung.

Horja ni Anak ni si Aron

3 ¹ On do ginompar ni si Aron pakon si Musa bani panorang sanggah na marsahap Jahowa hubani si Musa i Dolog Sinai.

² On do goran ni anak ni si Aron: Si Nadab bunga tubuhni, si Abihu, si Eleasar pakon si Itamar.

³ Ai ma goran-goran ni anak ni si Aron, na niminakan gabe malim, na dob pinabangkit mangkorjahon hamalimon.

⁴ Tapi domma matei popor anggo si Nadab pakon si Abihu i lobei ni Jahowa sanggah na binoban ni sidea apuy na legan hu lobei ni Jahowa i halimisan dohorhon Sinai; jadi si Eleasar pakon si Itamar ma mangkorjahon hamalimon ai i lobei ni si Aron bapa ni sidea ai.

Horja ni Halak Levi

⁵ Dob ai nini Jahowa ma hubani si Musa,

⁶ “Hatahon ma roh hun dohor marga Levi, anjaha pajongjong ma sidea i lobei ni Malim Aron, ase marugas sidea bani,

⁷ ase ihorjahon sidea horja na bani si Aron pakon horja na bani ganup tumpuan ai i lobei ni lampolampo ai, sanggah na marugas ai sidea bani lampolampo ai;

⁸ lanjar sidea do na paturei-tureihon sagala parugas ni lampolampo partumpuan ai pakon mandalankon horja na porlu bani halak Israel, sanggah na marugas ai sidea bani lampolampo ai.

⁹ Maningon ondoskononmu do halak Levi in hubani si Aron pakon hubani anakni ai; sidea do na dob niondoskon bani hun tongah-tongah ni halak Israel.

¹⁰ Tapi anggo si Aron pakon anakni ai maningon pabangkitonmu do mangkorjahon hamalimon ni sidea ai, tapi anggo roh hundohor halak na legan, maningon marutang hosah do ia.”

¹¹ Dob ai nini Jahowa ma hubani si Musa,

¹² “Tonggor ma, domma Hutodoh halak Levi hun tongah-tongah ni halak Israel bahen gantih ni sagala bunga tubuh humbani halak Israel, ai ma gantihni, na parlobei luar hun partapaan, ase Ahu simada halak Levi;

¹³ ai Ahu do simada sagala bunga tubuh. Singgan ni ari dob Hubunuh sagala bunga tubuh i tanoh Masir, domma Hupapansing Bangku sagala bunga tubuh i Israel humbanijolma ronsi pinahan; maningon Ahu do simadasi, Ahu do Jahowa.”

Marga-marga ni Halak Levi

¹⁴ Dob ai nini Jahowa ma hubani si Musa i halimisan dohorhon Sinai,

¹⁵ “Bilangi ma halak Levi mar sasaompung pakon mar sasamarga; sagala dalahi na marumur sabulan pakon lobih hunjai maningon bilanganmu do sidea.”

¹⁶ Jadi ibilangi si Musa ma sidea romban hubani hata ni Jahowa songon na dob tinonahkon-Ni ai.

¹⁷ Anjaha on ma goran ni anak ni si Levi: Si Gerson, si Kahat pakon si Merari.

¹⁸ On do goran ni anak ni si Gerson mangihutkon marga ni sidea ai: Si Libni pakon si Sime.

¹⁹ Anak ni si Kahat mangihutkon marga ni sidea, “si Amram, si Jizhar, si Hebron pakon si Usiel.”

²⁰ Anjaha anak ni si Merari mangihutkon marga ni sidea, “si Mahli pakon si Musi. Ai ma marga ni halak Levi mar sasaompung.

²¹ Humbani si Gerson roh marga ni halak Libni pakon marga ni halak Sime; ai ma marga humbani ginompar ni si Gerson.

²² Buei ni bilangan ni sidea, sagala dalahi singgan na marumur sabulan pakon lobih hunjai pitu ribu lima ratus halak do.

²³ Ginompar ni si Gerson, maningon marsaran i pudi ni lampolampo ai hampit hasundutan,

²⁴ anjaha si Eliasap, anak ni si Lael do pambobai ni ginompar ni si Gerson.

²⁵ Anak ni si Gerson ai do haondosan ni lampolampo partumpuan, poti parpadanan, tirei ampa langit-langitni pakon tirei ni labah harorohan hu lampolampo partumpuan ai,

²⁶ sonai homa tirei ni alaman pakon tirei ni labah harorohan hu alaman inggot ni lampolampo ai pakon inggot ni anjapanjap ai ampa tali-talini ambahni ai sagala horja na mardomu hujai.

²⁷ Humbani si Kahat do roh marga ni halak Amram, marga ni halak Jizhar, marga ni halak Hebron pakon marga ni halak Usiel; ai ma marga humbani ginompar ni si Kahat.

²⁸ Ia bilangan ni sagala dalahi singgan ni marumur sabulan pakon i atasni ai ualuh ribu onom ratus halak do, sagala na marugas ibagas ianan na pansing ai.

²⁹ Ia ginompar ni si Kahat maningon marsaran do i lambung ni lampolampo ai hampit dangsina,

³⁰ anjaha si Elisapan, anak ni si Usiel do pambobai ni ginompar ni si Kahat.

³¹ Sidea do haondosan ni poti, meja, parpalitaan, anjapanjap pakon parugas na pansing ai, na pinakei sanggah marugas, sonai homa tirei ai rap pakon ganup parugasni, ambahni ai sagala horja na mardomu hujai.

³² Kopala ni pambobai ni halak Levi ai ma si Eleasar, anak ni Malim Aron, ia do haondosan ni halak, sagala na marugas bani ianan na pansing ai.

³³ Humbani si Merari do roh marga ni halak Mahli pakon marga ni halak Musi, ai ma marga humbani ginompar ni si Merari.

³⁴ Ia buei ni bilangan ni sidea, sagala dalahi na marumur sabulan pakon i atasni ai onom ribu dua ratus halak do.

³⁵ Anjaha si Zuriel, anak ni si Abihail do pambobai ni ginompar ni si Merari, anjaha maningon marsaran do sidea i lambung ni lampolampo ai hampit utara.

³⁶ Maningon anak ni si Merari do haondosan ni papan ni lampolampo ai, ransang-ransangni, tiangni, nahei ni tiang ai pakon ganup parugasni, ambahni ai sagala horja na mardomu hujai;

³⁷ ambah ni ai tiang ni alaman ai inggot pakon naheini, pakuni pakon talini.

³⁸ Halak na marsaran i lobei ni lampolampo partumpuan ai dompak hapoltakan ni mata ni ari, ai ma si Musa, si Aron pakon anakni ai; sidea do na mandalankon horja bani ianan na pansing ai, laho mangugaskon horja haporluan ni halak

Israel. Barang ise halak na legan na roh hun dohor maningon marutang hosah do ia.”

³⁹ Sagala na tarbilang humbani halak Levi, sagala na binilang ni si Musa pakon si Aron, romban hubani na tinonahkon ni Jahowa, mangihutkon margani bei, sagala dalahi na marumur sabulan pakon i atasni ai, dua puluh dua ribu halak do bueini.

⁴⁰ Dob ai nini Jahowa ma hubani si Musa, “Bilangi ma sagala bunga tubuh i tongah-tongah ni halak Israel, singgan na marumur sabulan pakon i atasni ai, anjaha buat ma homa bilangan ni goran-goran ni sidea.

⁴¹ Papulig ma halak Levi Bangku -- Ahu do Jahowa -- gantih ni sagala dalahi bunga tubuh i tongah-tongah ni halak Israel, pakon pinahan ni halak Levi, gantih ni sagala bunga tubuh i tongah-tongah ni pinahan ni halak Israel.”

⁴² Jadi ibilangi si Musa ma sagala bunga tubuh i tongah-tongah ni halak Israel, songon na tinonahkon ni Jahowa hu bani.

⁴³ Anjaha sagala bunga tubuh dalahi na tarbilang ai, mangihutkon bilangan ni goran-goran, singgan ni na marumur sabulan pakon i atasni ai, dua puluh dua ribu dua ratus pitu puluh tolu halak do bueini.

⁴⁴ Dob ai nini Jahowa ma hubani si Musa,

⁴⁵ “Buat ma halak Levi gantih ni sagala bunga tubuh i tongah-tongah ni halak Israel, pakon pinahan ni

halak Levi gantih ni pinahan ni sidea, ase Ahu simada halak Levi, Ahu do Jahowa.

⁴⁶ Bahen partobus ni sidua ratus pitu puluh tolu halak bunga tubuh ni halak Israel, na lobih humbani bilangan ni halak Levi,

⁴⁷ maningon buatonmu do lima sekel pirak tobus ni ganup halak, mangihutkon sekel na bani ianan na pansing ai do buatonmu ai, ai ma dua puluh gera sasekel.

⁴⁸ Maningon bereonmu do pirak partobus ni halak na ganda ai hubani si Aron pakon hubani anakni ai.”

⁴⁹ Jadi ibuat si Musa ma pirak partobus ai humbani halak na ganda, sagala na tinobus ni halak Levi ai.

⁵⁰ Humbani bunga tubuh ni halak Israel do ibuat pirak ai, saribu tolu ratus onom puluh lima sekel, marguru hubani sekel bani ianan na pansing ai.

⁵¹ Dob ai ibere si Musa ma pirak partobus ai hubani si Aron pakon hubani anakni ai, romban hubani hata ni Jahowa, songon na tinonahkon ni Jahowa hubani si Musa.

Horja ni Halak Levi Laho Bingkat Bangsa ai

4 ¹ Dob ai nini Jahowa ma hubani si Musa pakon si Aron,

² “Buat ma bilangan ni anak ni si Kahat hun tongah-tongah ni anak ni si levi, mar sasamarga pakon mar sasaompung,

³ singgan ni na marumur tolu puluh tahun pakon i atasni ai das bani na marumur lima puluh tahun, sagala na boi masuk bani horja, ase idalankon horja bani lampolampo partumpuan ai.

⁴ On ma horja ni anak ni si Kahat ibagas lampolampo partumpuan, na pansing sahalian ai.

⁵ Anggo laho bingkak ma tumpuan ai, masuk ma si Aron pakon anakni ai laho paturunkon tirei parholangan ai, anjaha ibalutkon ma poti hasaksian ai hujai.

⁶ Dob ai inahkon sidea ma hu atasni sada tutup humbani bobak ni hambing, anjaha paherbangonni ma i atasni ai sada hiou na mahonda sahalian, anjaha inahkon ma lanja-lanjani ai hujai.

⁷ Anjaha maningon paherbangon ni sidea ma i atasni meja hatibalan ni ruti sigalangankon ai sada hiou na mahonda, anjaha i atasni ai inahkon ma pinggan batil, mangkuk, pakon serek galangan siinumon; i atasni ai homa ruti sigalangkonon ari-ari;

⁸ i atasni ai maningon paherbangon ni sidea do sada hiou na magerger, anjaha itutupi ma ai bani sada tutup na humbani bobak ni hambing, dob ai inahkon ma hujai lanja-lanjani.

⁹ Anjaha buaton ni sidea ma sada hiou na mahonda, bahen pambaluti ni parpalitaan ai rap pakon palitani pakon panurturini, pangintopini

ronsi ganup parminakanni, ai ma parugas na patorsahon parpalitaan ai.

¹⁰ Nahkonon ni sidea ma ai rap pakon ganup parugasni hubagas sada tutup na humbani bobak ni hambing, anjaha inahkon ma hu atasni sada pangusungan.

¹¹ Anjaha hu atas ni anjapanjap omas ai pe maningon paherbangon ni sidea do sada hiou na mahonda, anjaha itutup ma ai bani tutup humbani bobak ni hambing, anjaha inahkon ma hujai lanja-lanjani.

¹² Buaton ni sidea ma homa ganup parugas tohonan, na pinakei ni sidea ibagas ianan na pansing ai, anjaha ibaluti ma ai bani hiou na mahonda, anjaha itutupi ma ai bani tutup humbani bobak ni hambing, anjaha inahkon ma ai bani sada pangusungan.

¹³ Buaton ni sidea ma abuan ai humbani anjapanjap ai, anjaha ipaherbang ma hu atasni sada hiou na tinubar.

¹⁴ Inahkon ma hu atasni ganup parugas ni anjapanjap ai, na pinakei marugas ijai: Parapuyan, garpu, suyuk-suyuk ampa mangkuk pamispisan, haganup tene parugas ni anjapanjap ai, anjaha ipaherbang ma i atasni sada tutup humbani bobak ni hambing, anjaha inahkon ma hujai lanja-lanjani.

¹⁵ Ia dob ibaluti si Aron pakon anakni ai parugas ni ianan na pansing ai, sanggah na laho bingkat

tumpuan ai, masuk ma anak ni si Kahat laho mangusung ai. Ai ma siusungon ni anak ni si Kahat humbani lampolampo partumpuan ai.

¹⁶ Anjaha si Eleasar, anak ni Malim Aron, ia ma haondosan ni minak na bani parpalitaan ai, na misbou-misbou ai, galangan sipanganon ari-ari pakon minak pamminakion, sonai homa tohonan paturei-turei ganup lampolampo ai ronsi ganup isini, age ianan na pansing ia ronsi ganup parugasni.”

¹⁷ Dob ai nini Jahowa ma hubani si Musa pakon hubani si Aron,

¹⁸ “Ulang ma lopas hanima bois marga ni ginompar ni si Kahat hun tengah-tengah ni halak Levi,

¹⁹ tapi sonon ma bahen hanima hubani sidea, ase manggoluh sidea anjaha ulang matei, sanggah na roh sidea hun dohor bani parugas na pansing ai: Si Aron pakon anakni ai ma masuk hubagas laho patuduhon bani sidea horjani pakon siusungon ni sidea.

²⁰ Tapi seng bulih masuk sidea hubagas laho mangidah ugas-ugas na pansing ai, age tongkin gelah, ase ulang matei sidea.”

²¹ Dob ai nini Jahowa ma hubani si Musa,

²² “Buat ma homa bilangan ni anak ni si Gerson mar sasaompung pakon mar sasamarga,

²³ singgan ni na marumur tolu puluh tahun pakon i atasni ai ronsi na marumur lima puluh tahun

bilangonmu sidea, sagala na boi masuk bani horja ibagas lampolampo partumpuan ai.

²⁴ On do tene horja ni ginompar ni si Gerson, ai ma sihorjahonon pakon siusungon ni sidea,

²⁵ Sidea do na maningon mangusung parmadani ni lampolampo ai pakon lampolampo partumpuan ai rap pakon langit-langitni pakon tutupni na humbani labah harohan hu lampolampo partumpuan ai,

²⁶ pakon tirei ni alaman, pakon tirei tutup ni labah laho hu alaman inggot ni lampolampo ampa anjapanjap ai, ronsi ganup talini, pakon ganup parugas ni tohonan ni sidea; ganup na porlu sibahenon ijai, maningon sidea do mangkorjahon.

²⁷ Maningon romban hubani hata ni si Aron pakon anakni ai horjahonon ni anak ni si Gerson ganup horja ai, pasal ganup siusungon ni sidea pakon pasal ganup sihorjahonon ni sidea; anjaha maningon hanima do mangondoskon bani sidea sagala siusungon ni sidea.

²⁸ Ai ma horja ni ginompar ni anak ni si Gerson ibagas lampolampo partumpuan ai, anjaha maningon marguru bani si Itamar, anak ni Malim Aron do horjahonon ni sidea ai.

²⁹ Anak ni si Merari pe, maningon bilangonmu do, mar sasamarga pakon mar sasaompung,

³⁰ singgan na marumur tolu puluh tahun pakon i atasni ai das ronsi marumur lima puluh tahun bilangonmu sidea, sagala na boi masuk marhorja,

laho mangkorjahon horja ibagas lampolampo partumpuan ai.

³¹ Anjaha on do siondoskonon siusungon ni sidea, na gabe sihorjahonon ni sidea ganup ibagas lampolampo partumpuan ai: Papan ni lampolampo ai, ransang-ransangni, tiangni pakon onjolanni,

³² tiang ni alaman ai inggot pakon onjolanni, pakuni ampa talini, ronsi ganup parugasni ampa ganup sihorjahonon ijai; mangihutkon goranni ondoskononnima parugas ai, laho padaskon bani ganup sidea siusungonni bei.

³³ Ai ma horja ni ginompar ni si Merari pasal haganup sihorjahonon ni sidea ibagas lampolampo partumpuan ai, marguru hubani si Itamar, anak ni Malim Aron.”

³⁴ Jadi ibilangi si Musa, si Aron pakon pambobai ni tumpuan ai ma anak ni si Kahat mar sasamarga pakon mar sasaompung,

³⁵ singgan ni na marumur tolu puluh tahun pakon i atasni ai ronsi na marumur lima puluh tahun, sagala na boi masuk marhorja laho mangkorjahon horja ibagas lampolampo partumpuan ai;

³⁶ anjaha bilangan ni sidea mar sasamarga dua ribu pitu ratus lima puluh halak do.

³⁷ Ai ma bilangan ni ginompar ni si Kahat, sagala na marugas ibagas lampolampo partumpuan ai, na dob binilang ni si Musa pakon si Aron, romban hubani hata ni Jahowa marhitei si Musa.

³⁸ Bilangan ni ginompar ni si Gerson, mar sasamarga pakon mar sasaompung,

³⁹ singgan na marumur tolu puluh tahun pakon i atasni ai ronsi na marumur lima puluh tahun, sagala na boi masuk marhorja, laho mandalankon horja ibagas lampolampo partumpuan ai;

⁴⁰ bilangan ni sidea mar sasamarga pakon mar sasaompung dua ribu onom ratus tolu puluh halak do bueini.

⁴¹ Ai ma bilangan ni ginompar ni si Gerson, sagala na marugas ibagas lampolampo partumpuan ai, na dob binilang ni si Musa pakon si Aron romban hubani hata ni Jahowa.

⁴² Bilangan ni ginompar ni si Merari mar sasamarga pakon mar sasaompung,

⁴³ singgan ni na marumur tolu puluh tahun pakon i atasni ai, das ronsi na marumur lima puluh tahun, sagala na boi masuk marhorja, laho mandalankon horja ibagas lampolampo partumpuan ai,

⁴⁴ bilangan ni sidea mar sasamarga pakon mar sasaompung tolu ribu dua ratus halak do bueini.

⁴⁵ Ai ma halak na tarbilang humbani ginompar ni si Merari, na dob binilang ni si Musa pakon si Aron, romban hubani hata ni Jahowa marhitei si Musa.

⁴⁶ Sagala na tarbilang ai, na dob binilang ni si Musa pakon si Aron ampa pambobai ni halak Israel, mar sasamarga pakon mar sasaompung,

⁴⁷ singgan ni na marumur tolu puluh tahun pakon i atasni ai das ronsi na marumur lima puluh tahun, sagala na boi masuk mandalankon horja parugason pakon horja mangusung ibagas lampolampo partumpuan ai,

⁴⁸ sidea na tarbilang ai ualuh ribu lima ratus ualuh puluh halak do bueini.

⁴⁹ Romban hubani hata ni Jahowa marhitei si Musa, ipatongon ma bani sidea siugaskononni pakon siusungon ni sidea bei; sonai ma ipatongon bani sidea, songon na tinonahkon ni Jahowa bani si Musa.

Parpabali bani Halak na Mabutak

5 ¹ Dob ai nini Jahowa ma hubani si Musa,
² “Hatahon ma hubani halak Israel, ase ipabali sidea hun parsaranan ai sagala halak na gadamon pakon naomal marnipi-nipi ampa haganup halak na butak halani bangkei;

³ age dalahi age naboru, maningon pabalionnima do hu darat ni parsaranan ai, ase ulang ipabutak sidea parsaranannima ai, halani Ahu do marianan i tongah-tongahnima.”

⁴ Jadi ibahen halak Israel ma sonai, ipabali ma halak ai hu darat ni parsaranan ai; ibahen halak Israel ma, romban hubani hata ni Jahowa hubani si Musa.

**Parpasuang bani na Binuat
humbani na So Tiba Dalanni**

⁵ Dob ai nini Jahowa ma hubani si Musa,

⁶ “Patugah ma hubani halak Israel, anggo dong sada halak dalahi atap naboru na mangkorjahon dousa aha pe na hinorjahon ni jolma, ai ma manjahati dompak Jahowa, gabe iparroh sapata bani dirini,

⁷ maningon sopotkononni dousani na binahenni ai, dob ai maningon pasuangonni na binuatni ai, anjaha tambahonni saparlina hujai, anjaha galaronni ai hubani parutanganni ai.

⁸ Tapi anggo seng dong sindohor ni halak ai parpaulakan ni utang ai, hubani Jahowa ma padason utang ai, bahen rupei ni malim, ambah ni biribiri tunggal pardearan ai, na mambahen pardearan bani.

⁹ Anjaha ganup galangan tatangan, sagala na pinapansing ni halak Israel, na binoan ni sidea hubani malim, maningon malim ai do simadasi.

¹⁰ Atap aha na pinapansing ni sada halak, malim ai do simadasi; atap aha na binere ni sada halak bani malim, malim ai do simadasi.”

¹¹ Dob ai nini Jahowa ma hubani si Musa,

¹² “Marsahap ma ho hubani halak Israel anjaha hatahon ma hubani sidea, anggo marriah-riah parinangon ni sada halak, gabe lang hatengeran ia bani paramangonni,

¹³ anjaha pala saor dalahi na legan bani, tapi ponop do na pinabutakni ai dirini, anjaha seng dong na manaksihon dompaksi barang tardapot ia,

¹⁴ gabe sogop hubani uhur parsimburuon, gabe simburu ia mangidah parinangonni ai, halani na dob pinabutakni ai dirini; atap anggo sogop hubani uhur parsimburuon, gabe simburu ia mangidah parinangonni, age pe lang hape ipabutak dirini,

¹⁵ jadi boanon ni dalahi ai ma parinangonni ai hubani malim, anjaha iboan galangan marhalanisi, ai ma saparsapuluh efa itak gandum, tapi seng bulih tiriskononni minak hu atasni ai anjaha seng bulih bahenonni dahupa hujai, ai galangan sipanganon parsimburuon do ai, galangan sipanganon pardingatan laho pasingatkon hajahaton.

¹⁶ Jadi boanon ni malim ai ma ia hun dohor, anjaha ipajongjong i lobei ni Jahowa.

¹⁷ Dob ai buaton ni malim ai ma bah na mapansing ibagas guri-guri tanoh, ibuat ma homa orbuk humbani dasor ni lampolampo ai, anjaha ibahen ma ai hubagas bah ai.

¹⁸ Pajongjongon ni malim ai ma naboru ai i lobei ni Jahowa, anjaha janggaanni ma ulu ni naboru ai, anjaha nahkononni hu tanganni galangan sipanganon pardingatan, ai ma galangan sipanganon parsimburuon. Anjaha ibagas tanganni jolomon ni malim ai ma bah na mapaet na parohkon papa.

¹⁹ Dob ai pabijaon ni malim ai ma puang-puang ai, anjaha ihatahon bani, 'Anggo seng dong barang ise marsaor pakon ho, anjaha anggo seng tongon tardogei pinggol ni dalan ho gabe butak, ho na i toruh ni kuasa ni paramangonmu ope, maluah ma ho humbani papa hinorhon ni bah na paet on.'

²⁰ Tapi anggo tongon do ho tardogei pinggol ni dalan, age pe i toruh kuasa ni paramangonmu ope ho, gabe ipabutak ho dirimu, anjaha saor ho hubani dalahi na legan, sobali paramangonmu,

²¹ jadi, pabijaon ni malim ai ma puang-puang ai marhitei bija bura-bura on, anjaha hatahonon ni malim ai ma hubani puang-puang ai, 'Sai ibahen Jahowa ma ho gabe panginsonohan ni bura pakon papa i tengah-tengah ni bangsamu, ase puhung binongeimu bahenon ni Jahowa, anjaha busungon ia boltokmu,

²² ai masuk ma bah on paparahkon papa hubagas boltokmu, ase busungon boltokmu ibahen anjaha puhung binongeimu.' Anjaha hatahonon ni puang-puang ai ma, 'Nai ma, nai ma tongon.'

²³ Dob ai suraton ni malim ai ma bura ai hubagas sada buku, anjaha apusanni use bani bah na paet ai;

²⁴ painumkononni ma use hubani puang-puang ai bah na mapaet ai na parohkon papa ai, ase masuk hubagas boltokni bah na parohkon papa ai gabe hapaeton.

²⁵ Dob ai buaton ni malim ai ma hun tangan ni puang-puang ai galangan sipanganon parsimburuon ai, anjaha tatang-tatangonni ma galangan sipanganon ai i lobei ni Jahowa, lanjar galangkononni ma ai i atasni anjapanjap ai.

²⁶ Buaton ni malim ai ma sampohul humbani galangan sipanganon ai bahen pardingatan, anjaha itutung ma ai i atas anjapanjap ai, dob ai painumkononni ma anggo bah ai hubani puang-puang ai.

²⁷ Ia dob ipainumkon bah ai bani, anjaha anggo tongon domma ipabutak dirini, anjaha ipahiri paramangonni, masuk ma bah na parohkon papa ai hubani gabe hapaeton, gabe busungon ma boltokni anjaha puhung binongeini, anjaha gabe panginsonohan ni bura ma puang-puang ai i tongah-tongah ni bangsani.

²⁸ Tapi anggo seng ipabutak puang-puang ai dirini anjaha pansing do ia, jadi maluah ma ia anjaha boi boratan rumah.

²⁹ Ai ma titah pasal parsimburuon, anggo tardogei pinggol ni dalan sada puang-puang na marparamangon, gabe butak,

³⁰ barang anggo sogop tonduy parsimburuon bani sada dalahi, gabe marsimburu ia bani parinangonni; jadi pajongjongonni ma puang-puang ai i lobei ni Jahowa, anjaha bahenon ni malim ai ma bani haganup romban hubani titah on.

³¹ Maluah ma anggo dalahi ai humbani hajahaton, tapi manginsonoh do hajahaton ai bani puang-puang ai.”

Titah Sidingaton ni Halak Nasir

6 ¹ Dob ai nini Jahowa ma hubani si Musa,
² “Hatahon ma hubani halak Israel, anggo dong sada dalahi atap naboru na marbagah-bagah, ai ma bagah-bagah ni halak Nasir. Sihol mangondoskon dirini bani Jahowa,

³ manigon paholanganni dirini humbani anggur pakon siinumon na koras, seng bulih inumonni anggur na marraru pakon siinumon na marraru, anjaha seng bulih inumonni buah ni anggur atap panganonni buah ni anggur na baru binuat atap na dob pinahorah.

⁴ Sadokah panorang hanasironni, seng bulih panganonni age aha na pinauli humbani hayu anggur, age na humbani batuni, age na humbani pusukni.

⁵ Sadokah panorang bagah-bagah hanasironni ai, seng bulih dais pisou parsuhur hubani uluni, paima gok panorang ni hanasironni ai bani Jahowa, manigon pansing do ia, manigon paturutonni do ganjang jambulan ni uluni.

⁶ Sadokah panorang ni bagah-bagah ni hanasironni ai, seng bulih dohoranni halak na matei.

⁷ Age halani bapani barang inangni, anggini barang botouni pe, anggo matei sidea, seng bulih butakanni dirini, ai bagah-bagah hanasiron bani Naibatani do i atas uluni.

⁸ Sadokah panorang ni hanasironni ai, pansing do ia bani Jahowa.

⁹ Anjaha anggo matei sompong atap ise i lambungni, gabe butak ibahen ulu hanasironni ai, jadi maningon suhuronni do uluni; bani ari pangurasian, bani ari papituhon ma suhuronni ai.

¹⁰ Bani ari pauluhkon maningon boanonni dua kuhuy barang dua anak ni asas hubani malim, hu labah ni lampolampo partumpuan ai.

¹¹ Hoseihononni malim ai ma sada bahen galangan situtungan, bahen pardearanni, halani na dob mardousa ia binahen ni bangkei ai. Anjaha maningon papansingonni do uluni bani ari na sasada ai.

¹² Hoseihononni ma use panorang hanasironni ai bani Jahowa, anjaha boanonni ma homa sada anak ni biribiri na marumur satahun bahen galangan pardousaon. Tapi seng be hiraon anggo panorang na parlobei ai, halani na dob butak hanasironni ai.

¹³ Anjaha on do titah bani halak Nasir, 'Anggo gok ma panorang hanasironni ai, boanon ma ia hu labah ni lampolampo partumpuan ai;

¹⁴ maningon boanonni do galangan hubani Jahowa, sada anak ni biribiri tunggal na marumur satahun

na so martikas bahen galangan situtungon, sada anak ni biribiri boru-boru na marumur satahun na so martikas bahen galangan pardousaon, pakon sada biribiri tunggal na so martikas bahen galangan pardameian,

¹⁵ pakon sada raga ruti na so niigaran, kuei humbani itak na lumat na marlapu minak, pakon pahpah na so niigaran, na marlapu minak, ambah ni galangan sipanganon ampa galangan siinumon na mardomu hujai.

¹⁶ Dob ai boanon ni malim ai ma ai hun dohor hu lobei ni Jahowa anjaha hoseihononni ma ai bahen galangan pardousaonni pakon galangan situtungonni,

¹⁷ anjaha galangkononni ma biribiri tunggal ai bahen galangan pardameian hubani Jahowa, rap pakon raga na marisi ruti na so niigaran ai; maningon galangkonon ni malim ai do homa galangan sipanganon ai pakon galangan siinumon ai.

¹⁸ Dob ai maningon suhuron ni halak Nasir ai ma ulu hanasironni ai bani labah ni lampolampo partumpuan ai, anjaha buatonni ma jambulan ni ulu hanasironni ai, anjaha inahkon ma ai hubani apuy na i toruh ni galangan pardameian ai.

¹⁹ Anjaha buaton ni malim ai ma hae-hae lobei ni biribiri tunggal ai, anggo domma ilompah, ambahni ai sada kuei na so niigaran, anjaha inahkon ma ai

hu tangan ni halak Nasir ai haduasi, dob isuhur jambulan hanasironni ai.

²⁰ Dob ai tatangon ni malim ai ma ai bahen galangan sitatangon i lobei ni Jahowa; parbagianan na pansing ma ai bani malim, rap pakon tonton ni galangan sitatangon ai pakon hae-hae lobei ni na ginalangkon ai; dob salpu ai bulih ma minum anggur halak Nasir ai.'

²¹ Ai ma titah bani halak Nasir na dob mambahen bagah-bagah; maningon domu hubani hanasironni galanganni ai bani, ambah ni na legan na boi ope galangkononni; romban hubani bagah-bagah na dob binagahkonni, maningon sonai do bahenonni, romban hubani titah ni hanasironni ai."

Pasu-pasu Hamalimon

²² Dob ai nini Jahowa ma hubani si Musa,

²³ "Hatahon ma hubani si Aron pakon anakni ai, sonon ma pamasu-masunima bani halak Israel, hatahon hanima ma bani sidea,

²⁴ 'Sai ipasu-pasu anjaha iramoti Jahowa ma ham.'

²⁵ Isondangkon Jahowa ma bohi-Ni bamu, anjaha maidop ma uhurni mangidah ham.

²⁶ Idompakkon Jahowa ma bohi-Ni bamu, anjaha ibere ma damei bamu.'

²⁷ Sonai ma ampeihonon ni sidea goran-Ku bani halak Israel, anjaha pasu-pasuon-Ku ma sidea."

Sibere-bere ni Kopala ni Halak Israel Sanggah na Mangondoskon Anjapanjap bani Jahowa

7¹ Dob siap ipajongjong si Musa lampolampo ai, anjaha dob iminaki anjaha ipapansing ganup parugasni ai, anjaha dob iminaki anjaha ipapansing anjapanjap ai pakon ganup parugasni ai,

² iboan pambobai ni halak Israel, kopala ni mar sasaompung, kopala ni mar sasamarga, sagala na mambobahon halak na dob binilanganni ai,

³ iboan sidea ma galangan ni sidea hu lobei ni Jahowa: onom gareta na martutup pakon sapuluh dua lembu; dua kopala sada gareta anjaha sada lembu bei ganup kopala; iboan sidea ma ai hu lobei ni lampolampo ai.

⁴ Dob ai nini Jahowa ma hubani si Musa,

⁵ “Jalo ma ganupan ai humbani sidea, ase boi pakeion ai, anjaha ondoskon ma ai bani halak Levi, romban hubani horja ni sidea bei.”

⁶ Jadi ijalo si Musa ma gareta pakon lembu ai, anjaha iondoskon ma ai bani ganup halak Levi.

⁷ Dua gareta pakon ompat lembu iondoskon bani anak ni si Gerson, romban hubani horja ni sidea ai.

⁸ Ompat gareta pakon ualuh lembu iondoskon bani anak ni si Merari romban hubani horja ni sidea, marguru hubani horja ni sidea, na binobahon ni si Itamar, anak ni Malim Aron.

⁹ Tapi anggo bani anak ni si Kahat, seng dong age aha ibere, halani sidea do haondosan ni parugas na pansing ai, ai ma siusungon ni abara.

¹⁰ Jadi igalangkon sagala kopala ai ma galanganni bei, laho mangondoskon anjapanjap ai bani ari pamminakionni, anjaha igalangkon sagala kopala ai ma galanganni i lobei ni anjapanjap ai.

¹¹ Nini Jahowa do hubani si Musa, “Maningon mar sasahalak kopala ai bani panorangni bei mambahen galanganni laho mangondoskon anjapanjap ai.”

¹² Na manggalangkon galanganni bani ari na parlobei, ai ma si Nahason, anak ni si Aminadab, humbani marga Juda.

¹³ Ia galanganni, ai ma sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, domu hubani sekel na bani ianan na pansing ai, haduasi gok bani itak na lumat, na niagu pakon minak bahen galangan sipanganon;

¹⁴ sada pinggan humbani omas, sapuluh sekel boratni, gok dahupa;

¹⁵ sada anak ni lembu, sada biribiri tunggal, sada anak ni biribiri tunggal na marumur satahun bahen galangan situtungan;

¹⁶ sada hambing tunggal bahen galangan pardousaon;

¹⁷ anjaha bahen galangan pardameian, dua lembu, lima biribiri tunggal, lima hambing tunggal pakon

lima anak ni biribiri tunggal na marumur satahun. Ai ma galangan ni si Nahason, anak ni si Aminadab.

¹⁸ Bani ari paduahon iboban si Natanael, anak ni si Zuar, pambobai ni halak Isasar ma galangan ai.

¹⁹ Iboan ma bahen galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, domu hubani sekel na bani ianan na pansing ai, haduasi gok bani itak na lumat, na niagu pakon minak bahen galangan sipanganon;

²⁰ sada pinggan humbani omas, sapuluh sekel boratni, gok dahupa;

²¹ sada anak ni lombu, sada biribiri tunggal, sada anak ni biribiri tunggal na marumur satahun bahen galangan situtungan;

²² sada hambing tunggal bahen galangan pardousaon;

²³ anjaha bahen galangan pardameian, dua lombu, lima biribiri tunggal, lima hambing tunggal pakon lima anak ni biribiri tunggal na marumur satahun. Ai ma galangan ni si Natanael, anak ni si Zuar.

²⁴ Bani ari patoluhon si Eliab, anak ni si Helon, pambobai ni halak Sebulon;

²⁵ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, domu hubani sekel na bani ianan na pansing ai; haduasi gok bani itak

na lumat, na niagu pakon minak bahen galangan sigalangankon;

²⁶ sada pinggan humbani omas, sapuluh sekel boratni, gok dahupa;

²⁷ sada anak ni lembu, sada biribiri tunggal, sada anak ni biribiri tunggal na marumur satahun bahen galangan situtungon;

²⁸ sada hambing tunggal bahen galangan pardousaon;

²⁹ anjaha bahen galangan pardameian, dua lembu, lima biribiri tunggal, lima hambing tunggal pakon lima anak ni biribiri tunggal na marumur satahun. Ai ma galangan ni si Eliab, anak ni si Helon.

³⁰ Bani ari paompatkon si Elisur, anak ni si Sedeur, pambobai ni halak Ruben.

³¹ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, domu hubani sekel na bani ianan na pansing ai; haduasi gok bani itak na lumat, na niagu pakon minak bahen galangan sipanganon;

³² sada pinggan humbani omas, sapuluh sekel boratni, gok dahupa;

³³ sada anak ni lembu, sada biribiri tunggal, sada anak ni biribiri tunggal na marumur satahun bahen galangan situtungon;

³⁴ sada hambing tunggal bahen galangan pardousaon;

³⁵ anjaha bahen galangan pardameian, dua lembu, lima biribiri tunggal, lima hambing tunggal pakon lima anak ni biribiri na marumur satahun. In ma galangan ni si Elisur, anak ni si Sedeur.

³⁶ Bani ari palimahon si Salumiel, anak ni si Surisadai, pambobai ni halak Simeon.

³⁷ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, domu hubani sekel na bani ianan na pansing ai; haduasi gok bani itak na lumat, na niagu pakon minak bahen galangan sipanganon;
³⁸ sada pinggan humbani omas, sapuluh sekel boratni, gok dahupa;

³⁹ sada anak ni lembu, sada biribiri tunggal, sada anak ni biribiri na marumur satahun, bahen galangan situtungon;

⁴⁰ sada hambing tunggal bahen galangan pardousaon;

⁴¹ anjaha bahen galangan pardameian, dua lembu, lima biribiri tunggal, lima hambing tunggal pakon lima anak ni biribiri tunggal na marumur satahun. Ai ma galangan ni si Surisadai.

⁴² Bani ari paonomkon si Eliasap, anak ni si Deguel pambobai ni halak Gad.

⁴³ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, domu hubani sekel na bani

ianan na pansing ai; haduasi gok bani itak na lumat,
na niagu pakon minak bahen galangan sipanganon;

⁴⁴ sada pinggan humbani omas, sapuluh sekel
boratni, gok dahupa;

⁴⁵ sada anak ni lembu, sada biribiri tunggal, sada
anak ni biribiri tunggal na marumur satahun bahen
galangan situtungan;

⁴⁶ sada hambing tunggal bahen galangan
pardousaon;

⁴⁷ anjaha bahen galangan pardameian, dua lembu,
lima biribiri tunggal, pakon lima anak ni biribiri
tunggal na marumur satahun. Ai ma galangan ni si
Eliasap, anak ni si Deguel.

⁴⁸ Bani ari papituhon si Elisama, anak ni si Amihud,
pambobai ni halak Efraim.

⁴⁹ Galanganni sada pinggan pirak, saratus tolu
puluh sekel boratni, sada mangkuk humbani pirak,
pitu puluh sekel boratni, domu hubani sekel na bani
ianan na pansing ai; haduasi gok bani itak na lumat,
na niagu pakon minak bahen galangan sipanganon;

⁵⁰ sada pinggan humbani omas, sapuluh sekel
boratni, gok dahupa;

⁵¹ sada anak ni lembu, sada biribiri tunggal, sada
anak ni biribiri tunggal na marumur satahun bahen
galangan situtungan;

⁵² sada hambing tunggal bahen galangan
pardousaon;

⁵³ anjaha bahen galangan pardameian, dua lembu, lima biribiri tunggal, lima hambing tunggal pakon lima anak ni biribiri tunggal na marumur satahun. Ai ma galangan ni si Elisama, anak ni si Amihud.

⁵⁴ Bani ari paualuhkon si Gamaliel, anak ni si Pedasur, pambobai ni halak Manase.

⁵⁵ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, mardomu hubani sekel na adong bani ianan na pansing ai, haduasi gok bani itak na lumat, na niagu pakon minak bahen galangan sipanganon;

⁵⁶ sada pinggan humbani omas, sapuluh sekel boratni, gok dahupa;

⁵⁷ sada anak ni lembu, sada biribiri tunggal, sada anak ni biribiri tunggal na marumur satahun, bahen galangan situtungan;

⁵⁸ sada hambing tunggal bahen galangan pardousaon;

⁵⁹ anjaha bahen galangan pardameian, dua lembu, lima biribiri tunggal, lima hambing tunggal pakon lima anak ni biribiri tunggal na marumur satahun. Ai ma galangan ni si Gamaliel, anak ni si Pedasur.

⁶⁰ Bani ari pasiahkon, si Abidan, anak ni si Gideoni, pambobai ni halak Benjamin.

⁶¹ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, domu hubani sekel na bani

ianan na pansing ai; haduasi gok bani itak, na niagu pakon minak bahen galangan sipanganon;

⁶² sada pinggan humbani omas, sapuluh sekel boratni, gok dahupa;

⁶³ sada anak ni lembu, sada biribiri tunggal, sada anak ni biribiri tunggal na marumur satahun bahen galangan situtungon;

⁶⁴ sada hambing tunggal bahen galangan pardousaon;

⁶⁵ anjaha bahen galangan pardameian, dua lembu, lima biribiri tunggal, lima hambing tunggal pakon lima anak ni biribiri tunggal na marumur satahun. Ai ma galangan ni si Abidan, anak ni si Gideoni.

⁶⁶ Bani ari pasapuluhkon si Ahieser, anak ni si Amisadai, pambobai ni halak Dan.

⁶⁷ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, mardomu hubani sekel na bani ianan na pansing ai. Haduasi ai gok bani itak, na niagu pakon minak, bahen galangan sipanganon;

⁶⁸ sada pinggan humbani omas, sapuluh sekel boratni, gok dahupa;

⁶⁹ sada anak ni lembu, sada biribiri tunggal, sada anak ni biribiri tunggal na marumur satahun bahen galangan situtungon;

⁷⁰ sada hambing tunggal bahen galangan pardousaon;

⁷¹ anjaha bahen galangan pardameian, dua lembu, lima biribiri tunggal, lima hambing tunggal, pakon lima anak ni biribiri tunggal na marumur satahun. Ai ma galangan ni si Ahieser, anak ni si Amisadai.

⁷² Bani ari pasapuluhsadahon si Pagiël, anak ni si Okran, pambobai ni halak Asser.

⁷³ Galanganni sada pinggan pirak, saratus tolu puluh sekel boratni, sada mangkuk humbani pirak, pitu puluh sekel boratni, mardomu hubani sekel na bani ianan na pansing ai; haduasi gok bani itak na lumat, na niagu pakon minak, bahen galangan sipanganon;

⁷⁴ sada pinggan humbani omas, sapuluh sekel boratni, gok dahupa;

⁷⁵ sada anak ni lembu, sada biribiri tunggal, sada anak ni biribiri tunggal na marumur satahun, bahen galangan situtungan;

⁷⁶ sada hambing tunggal bahen galangan pardousaon;

⁷⁷ anjaha bahen galangan pardameian, dua lembu, lima anak ni biribiri tunggal pakon lima anak ni biribiri tunggal na marumur satahun. Ai ma galangan ni si Pagiël, anak ni si Okran.

⁷⁸ Bani ari pasapuluhduahon si Ahira anak ni si Enan, pambobai ni halak Naftali.

⁷⁹ Galanganni sada pinggan pirak, saratus tolu puluh sekel boratni, sada mangkuk humbani pirak pitu puluh sekel boratni, domu hubani sekel na bani

ianan na pansing ai; haduasi gok bani itak na lumat, na niagu pakon minak bahen galangan sipanganon; ⁸⁰sada pinggan humbani omas, sapuluh sekel boratni, gok dahupa;

⁸¹sada anak ni lombu, sada biribiri tunggal, sada anak ni biribiri tunggal na marumur satahun bahen galangan situtungon;

⁸²sada hambing tunggal bahen galangan pardousaon;

⁸³anjaha bahen galangan pardameian, dua anak ni lombu, lima biribiri tunggal, pakon lima anak ni biribiri tunggal na marumur satahun. Ai ma galangan ni si Ahira, anak ni si Enan.

⁸⁴Ai ma galangan laho mangondoskon anjapanjap ai, bani ari pamminakion ai humbani pambobai ni halak Israel, sapuluh dua pinggan pirak, sapuluh dua mangkuk humbani pirak, sapuluh dua pinggan omas.

⁸⁵Saratus tolu puluh sekel borat ni pinggan ai sada-sada, anjaha pitu puluh sekel borat ni mangkuk ai sada-sada, ase boratni ganup parugas ai dua ribu ompat ratus sekel do, domu hubani sekel na bani ianan na pansing ai.

⁸⁶Sapuluh dua pinggan omas, gok dahupa, sapuluh sekel boratni sada-sada, domu hubani sekel na bani ianan na pansing ai; ase borat ni omas ganup hubani pinggan ai saratus dua puluh sekel.

⁸⁷ Haganup pinahan bahen galangan situtungon, sapuluh dua lembu, sapuluh dua biribiri tunggal, sapuluh dua anak ni biribiri tunggal na marumur satahun, rap pakon galangan sipanganon; anjaha sapuluh dua hambing tunggal bahen galangan pardousaon.

⁸⁸ Buei ni pinahan bahen galangan pardameian, dua puluh ompat anak ni lembu, onom puluh biribiri tunggal, onom puluh hambing tunggal, onom puluh anak ni biribiri tunggal na marumur satahun. Ai ma galangan laho mangondoskon anjapanjap ai, dob siap iminaki.

⁸⁹ Anjaha sanggah na masuk ai si Musa hubagas lampolampo partumpuan ai, sihol marsahap pakon Jahowa, ibogei do sora ni Jahowa marsahap pakonsi, humbani langkob ni pardearan ai, na i atasni poti hasaksian ai, humbani holangkolang ni herub na dua ai; anjaha marsahap do Jahowa pakonsi.

Pasal Parpalitaan Omas

8 ¹ Dob ai nini Jahowa ma hubani si Musa,
² “Marsahap ma ho hubani si Aron anjaha hatahon ma hu bani, anggo ipagara ho palita ai, maningon hu lobei ni parpalitaan ai marsinalsal palita na pitu ai.”

³ Jadi ibahen si Aron ma sonai; hampit lobei ni parpalitaan ai do ipagara palitani, romban hubani tonah ni Jahowa hubani si Musa.

⁴ Sonon do parpaulini bani parpalitaan ai: Itopa do ai humbani omas pitah; age naheini sonai homa bungani, romban hubani tiruan na pinatuduhkon ni Jahowa hubani si Musa, sonai do ipauli parpalitaan ai.

Pamasu-masuon ni Halak Levi

⁵ Dob ai nini Jahowa ma hubani si Musa,

⁶ “Arahkon ma halak Levi hun tongah-tongah ni halak Israel, anjaha urasi ma sidea.

⁷ Anjaha sonon do bahenonmu hubani sidea laho mangurasi sidea, Pispiskon ma hubani sidea bah pangurasion hubani dousa, dob ai suhuron ni sidea ma ganup badan ni sidea, anjaha susionni pakeanni ase borsih sidea.

⁸ Dob ai buaton ni sidea ma sada anak ni lembu rap pakon itak na lumat, na niagu pakon minak bahen galangan sipanganon iringanni ai, dob ai buatonmu ma sada nari anak ni lembu bahen galangan pardousaon.

⁹ Dob ai hatahon ma halak Levi roh hun dohor hu lobei ni lampolampo partumpuan ai, anjaha patumpu ma ganup tumpuan ni halak Israel.

¹⁰ Anggo domma ipatumpu ho halak Israel hu lobei ni Jahowa, tampeihonon ni halak Israel ma tangan ni sidea hubani halak Levi.

¹¹ Anjaha toguon ni si Aron ma halak Levi ai hu lobei ni Jahowa, songon sada galangan sitatangan humbani halak Israel, ase talup sidea mangkorjahon horja ni Jahowa.

¹² Dob ai nahkonon ni halak Levi ma tangan ni sidea hubani ulu ni lombu ai, anjaha galangknonmu ma na sada bahen galangan pardousaon anjaha na sada nari bahen galangan situtungan bani Jahowa, mambahen pardearan bani halak Levi.

¹³ Dob ai maningon pajongjongonmu halak Levi i lobei ni si Aron pakon anakni ai, laho mangondoskon sidea songon galangan sitatangan bani Jahowa.

¹⁴ Sonai ma papuligonmu halak Levi hun tengah-tengah ni halak Israel, ase Ahu simada halak Levi.

¹⁵ Dob ai masuk ma halak Levi ai, ase marugas sidea ibagas lampolampo partumpuan ai, dobkonsi iurasi anjaha iondoskon ho sidea songon galangan sitatangan.

¹⁶ Ai sibere-bere Bangku do sidea hun tengah-tengah ni halak Israel; ai gantih ni na parlobei hun partapaan, sagala bunga tubuh humbani halak Israel do sidea Hubuat Bangku.

¹⁷ Ai Ahu do simada ganup bunga tubuh i tengah-tengah ni halak Israel, age na humbanijolma, age

na humbani pinahan, singgan ni ari dob Hubunuh bunga tubuh i tanoh Masir, domma Hupapansing sidea Bangku,

¹⁸ anjaha domma Hubuat halak Levi gantih ni sagala bunga tubuh i tongah-tongah ni halak Israel.

¹⁹ Domma Hulayak-layakkon halak Levi bahen hasoman ni si Aron pakon anakni ai hun tongah-tongah ni halak Israel laho marugas bani lampolampo partumpuan ai, anjaha mambahen pardearan bani halak Israel, ase ulang masa papa i tongah-tongah ni halak Israel, anggo roh sidea hun dohor bani ianan na pansing ai.”

²⁰ Dob ai ibahen si Musa pakon si Aron ampa haganup tumpuan ni halak Israel ma sonai hubani halak Levi romban hubani haganup na tinonahkon ni Jahowa hubani si Musa pasal halak Levi ai, sonai do ibahen halak Israel hubani sidea.

²¹ Dob ai iurasi halak Levi ma dirini bei humbani dousa, anjaha isusi bei ma pakeanni, anjaha iondoskon si Aron ma sidea songon galangan sitatangon i lobei ni Jahowa, anjaha si Aron do mambahen pardearan bani sidea laho papansingkon sidea,

²² Dob ai masuk ma halak Levi, laho mandalankon horja ni sidea ibagas lampolampo partumpuan ai i lobei ni si Aron pakon anakni ai; songon na tinonahkon ni Jahowa hubani si Musa pasal halak Levi ai, sonai do ibahen hubani sidea.

Panorang Parugason ni Halak Levi

²³ Dob ai nini Jahowa ma hubani si Musa,

²⁴ “On do na mardomu hubani halak Levi: Singgan ni na marumur dua puluh lima tahun pakon i atasni ai, maningon masuk sidea laho mangkorjahon horja ibagas lampolampo partumpuan ai,

²⁵ tapi dob marumur lima puluh tahun, maluah ma sidea humbani horja parugason, seng be marhorja sidea.

²⁶ Boi do namin urupan ni sidea anggini marhorja i lampolampo partumpuan ai, laho mangkorjahon sihorjahononkon, tapi seng be bulih sidea marjabatan. Sonai ma bahenonmu hubani halak Levi, pasal sihorjahonon ni sidea.”

Marpesta Paskah Halak Israel

9 ¹ Dob ai nini Jahowa ma hubani si Musa, i halimisan dohorhon Sinai, padua-tahunkon dob luar sidea hun tanoh Masir, bani bulan sada,

² “Maningon marpesta Paskah halak Israel bani panorang na dob binuhul hinan.

³ Bani ari sapuluh ompat bulan on malele bodari, maningon hoseihononnima do in bani panorang na dob binuhul hinan, maningon romban bani aturanni pakon titahni do ia hoseihononnima.”

⁴ Dob ai ihatahon si Musa ma halak Israel marpesta Paskah.

⁵ Jadi saud ma sidea marpesta Paskah bani ari sapuluh ompat bulan sada malele bodari i halimisan dohorhon Sinai; romban hubani na tinonahkon ni Jahowa hubani si Musa, sonai do ibahen halak Israel.

Aturan hubani Jolma na Marabat Marpesta Paskah

⁶ Tapi adong do dalahi na butak halani bangkei ni jolma, jadi seng be tarbahen sidea marpesta Paskah bani ari ai. Roh ma sidea hu lobei ni si Musa pakon si Aron bani ari na sasada ai;

⁷ ihatahon sidea ma hu bani, “Na butak do hanami binahen ni bangkei ni jolma. Mase ma tarlarang hanami mamboan galangan bani Jahowa bani panorang na dob binuhul i tongah-tongah ni halak Israel?”

⁸ Dob ai ihatahon si Musa ma hubani sidea, “Paima nasiam ijon, ase hutangar lobei barang aha do hatahonon ni Jahowa pasal nasiam.”

⁹ Nini Jahowa ma hubani si Musa,

¹⁰ “Hatahon ma hubani halak Israel: Anggo adong na butak barang ise bannima barang bani ginomparnima halani bangkei, atap sanggah pardalanan na madaoh, tarbahensi do marpesta Paskah bani Jahowa.

¹¹ Bani bulan dua ari sapuluh ompat malele bodari ma sidea marpesta Paskah; maningon panganon ni

sidea ma ai marhasoman ruti na so niigaran pakon lowoh na mapaet.

¹² Seng bulih tebaan ni sidea hunjai ronsi patarni, anjaha seng bulih ponggolhononkon holiholini age sada, maningon romban hubani ganup aturan ni Paskah do pestahonon ni sidea ai.

¹³ Tapi barang ise na pansing anjaha seng ipardalanan ia, hape langlang ia marpesta Paskah, maningon siapkononkon ia hun tongah-tongah ni bangsani, halani na so binoanni galangan bani Jahowa bani panorang na dob binuhul hinan; maningon manginsonoh hubani dousani ai.

¹⁴ Anggo adong panginsolat manginsolat i tongah-tongahnima, na sihol marpesta Paskah hubani Jahowa, maningon dalankononni do ai, romban hubani aturan pakon titah ni Paskah hinan; maningon sada do aturan bennima, bani halak dagang pakon bani pangisi ni tanoh in.”

Hombun pakon Apuy na Jongjong

¹⁵ Dob ai bani ari parjongjong ni lampolampo ai ironkob hambun ai ma lampolampo hasaksian ai, anjaha hambani bodari das ronsi patarni ai, sai ibabou ni lampolampo ai do ai songon rupa ni apuy idahon.

¹⁶ Sonai ma tongtong hambun ai manrongkob ia arian, anjaha bodari songon rupa ni apuy idahon.

¹⁷ Anjaha anggo manaik ma hambun ai hun babou ni lampolampo ai, bingkat ma halak Israel mardalan; anjaha ija marsaran hambun ai, lanjar ijai ma marsaran halak Israel.

¹⁸ Ase marguru hubani hata ni Jahowa do bingkat halak Israel, anjaha marguru hubani hata ni Jahowa do sidea marsaran; sadokah marsaran hambun ai i atasni lampolampo ai, marsaran ma sidea.

¹⁹ Anggo dokah marsaran hambun ai i atasni lampolampo ai, sai ihorjahon halak Israel do parentah ni Jahowa, seng bingkat.

²⁰ Sipata piga-piga ari do hansa hambun ai i atasni lampolampo ai; jadi marsaran ma sidea mardomu hubani hata ni Jahowa, anjaha domu hubani hata ni Jahowa do sidea bingkat use.

²¹ Sipata humbani bodari das ronsi sogod do marsaran hambun ai; anggo manaik ma hambun ai sogod, bingkat ma sidea. Atap arian atap bodari anggo manaik ma hambun ai, bingkat ma sidea.

²² Anggo dua ari barang sabulan barang lobih hunjai, marsaran hambun ai i atasni lampolampo ai, marsaran ma halak Israel, lang bingkat sidea; tapi manaikkonsi hambun ai, bingkat ma sidea.

²³ Romban hubani hata ni Jahowa do sidea marsaran anjaha romban hubani hata ni Jahowa do sidea bingkat use; idalankon sidea do na pinarentahkon ni Jahowa, romban hubani hata ni Jahowa marhiteihon si Musa.

Pamakeion bani Tarompit

10¹ Dob ai nini Jahowa ma hubani si Musa,
² “Bahen ma bam dua tarompit humbani
pirak, topa ma ai humbani sangkimpal pirak, anjaha
pakei ma ai laho patumpuhon kuria ai ampa laho
pabingkatkon tumpuan ai.

³ Anggo haduasi tarompit ai ipahata, maningon
martumpu ma ganup tumpuan ai hu lambungmu i
lobei ni labah ni lampolampo partumpuan ai.

⁴ Tapi anggo sada do ipahata, martumpu ma hu
lobeimu sagala kopala, pambobai ni halak Israel
marribu-ribu.

⁵ Anggo marsora mareta-eta tarompit ai, bingkat
ma tumpuan na marsaran hampit hapoltakan.

⁶ Anggo marsora mareta-eta tarompit ai
paduahalihon, bingkat ma tumpuan na marsaran
hampit dangsina; maningon marsora mareta-eta
lobei tarompit ai, ase bulih sidea bingkat.

⁷ Tapi anggo sihol patumpuhon tumpuan ai,
maningon bulus do marsora tarompit ai, ulang
marsora mareta-eta.

⁸ Anjaha anak ni si Aron, malim-malim ai do na
manompul tarompit ai; aturan na totap ma on
bennima marsundut-sundut.

⁹ Anggo bingkat hanima hu parporangan i
tanohnima mangimbang munsuahnima na
manosak-nosak hanima, mareta-eta ma

pahataonnima tarompit ai, laho mantarsingatkon hanima i lobei ni Jahowa, Naibatanim, anjaha paluahon-Ni ma hanima humbani munsuhnima.

¹⁰ Anjaha sonai homa bani ari malas ni uhurnima, bani pestanima na dob binuhul pakon bani poltak ni bulan, maningon pahataonnima do tarompit ai laho mangondoskon galangan situtungonnima pakon galangan pardameiannima, ase idingat Jahowa hanima, Ahu do Jahowa, Naibatanim.”

Parbingkat ni Halak Israel hun Sinai

¹¹ Jadi padua-tahunkon, bani bulan dua ari dua puluh, manaik ma hambun ai hun datas ni lampolampo hasaksian ai.

¹² Dob ai bingkat ma halak Israel mangihutkon barisan ni sidea mardalan hun halimisan dohorhon Sinai, anjaha marsaran ma use hambun ai i halimisan Paran.

¹³ Ai ma na parlobei sahali sidea bingkat domu hubani hata ni Jahowa marhitei si Musa.

¹⁴ Bingkat ma parlobei mandera ni tumpuan ni halak Juda rap pakon bala ni sidea, anjaha si Nahason, anak ni si Aminadab do pambobai ni bala ni sidea.

¹⁵ Pambobai ni bala ni marga ni halak Isasar, ai ma si Natanael, anak ni si Zuar;

¹⁶ pambobai ni bala ni marga ni halak Zebulon, ai ma si Eliab, anak ni si Helon.

¹⁷ Dob irangrang lampolampo ai, bingkat ma anak ni si Gerson pakon anak ni si Merari, ai ma siusung lampolampo ai.

¹⁸ Dob ai bingkat ma mandera ni tumpuan ni halak Ruben rap pakon bala ni sidea, anjaha si Elisur, anak ni si Sedeur do pambobai ni bala ni sidea.

¹⁹ Anjaha pambobai ni bala ni marga ni halak Simeon, ai ma si Selumiel, anak ni si Zurisadai.

²⁰ Anjaha pambobai ni bala ni marga ni halak Gad, ai ma si Eliasap, anak ni si Deguel.

²¹ Dob ai bingkat ma halak Kahat mangusung ugas-ugas na mapansing ai, anjaha ipajongjong ma lampolampo ai paima roh sidea.

²² Dob ai bingkat ma mandera ni tumpuan ni halak Efraim, rap pakon bala ni sidea, anjaha si Elisama, anak ni si Amihud do pambobai ni sidea.

²³ Anjaha pambobai ni bala ni marga ni halak Manase, ai ma si Gamaliel, anak ni si Pedasur;

²⁴ pambobai ni bala ni marga ni halak Benjamin, ai ma si Abidan, anak ni si Gideoni.

²⁵ Dob ai bingkat ma mandera ni tumpuan ni halak Dan, rap pakon bala ni sidea, ai ma na parpudi humbani ganup tumpuan ai, anjaha si Ahieser, anak ni si Amisadai do pambobai ni bala ni sidea;

²⁶ pambobai ni bala ni marga ni halak Asser, ai ma si Pagiell, anak ni si Okran;

²⁷ pambobai ni bala ni halak Naftali, ai ma si Ahira si anak ni, Enan.

²⁸ Ai ma parhorja bani parbingkat ni halak Israel rap pakon bala ni sidea, anggo bingkat sidea.

Ipataruh si Hobab Sidea i Halimisan

²⁹ Dob ai nini si Musa ma hubani si Hobab, anak ni si Reguel, halak Midian ai, simatua ni si Musa, “Laho bingkat ma hanami hu ianan na dob binagahkon ni Jahowa hinan, ‘Ahu mamberehon ai bennima.’ Rap ma hita laho, marrupe i na dear pe ho ibahen hanami, ai domma iparbagah Jahowa na madear hubani halak Israel.”

³⁰ Tapi nini ma mambalosisi, “Seng dihut ahu laho, mulak hu tanohku pakon hubani saninangku do ahu.”

³¹ Dob ai nini ma, “Ulang tadingkon hanami, ai tangkas do ibotoh ho barang ija parsarankononnami i halimisan, maningon ho ma namin na songon gabe matanami.

³² Anggo bingkat ho rap pakon hanami, atap aha pe na madear na sihol bahenon ni Jahowa bennami, ai do homa sihol bahenonnami hubam.”

³³ Jadi bingkat ma sidea hun dolog ni Jahowa tolu ari mardalan daohni, anjaha poti parpadanan ni Jahowa do mardalan i lobei ni sidea sanggah sitolu ari pardalanan ai, laho mangindahi ianan parsaranan bani sidea.

³⁴ Anjaha hambun ni Jahowa do i babou arian, anggo bingkat sidea hun parsaranan ai.

Tonggo ni si Musa Laho Bingkat pakon Laho Marsaran

³⁵ Anggo sihol bingkat ma poti ai, nini si Musa ma, “Jongjong ma Ham ale Jahowa, ase mambur merap munsuh-Mu anjaha maporus na mangkagigihon Ham i lobei-Mu.

³⁶ Anjaha anggo marsaran ma poti ai, nini ma, ‘Sai mulak ma Ham Jahowa hubani halak Israel na marribu-ribu laksa on.’”

Apuy ni Jahowa

11 ¹ Dob ai marungut-ungut ma bangsa ai, pala ibogei Jahowa pasal hasosakan ni sidea. Jadi dob ibogei Jahowa ai, nahit ma ringis-Ni, anjaha gara ma apuy ni Jahowa i tongah-tongah ni sidea, pala mosog deba bagian pardarat ni parsaranan ai.

² Jadi mandoruhi ma bangsa ai hubani si Musa, anjaha martonggo ma si Musa hubani Jahowa, gabe mintop ma apuy ai.

³ Ibahen ma goran ni ianan ai Tabera, halani na dob gara ai apuy ni Jahowa i tongah-tongah ni sidea.

Hisap ni Bangsa Israel

⁴ Dob ai manomboh ma hisap ni halak na jahil na i tongah-tongah ni sidea; anjaha dihut do halak Israel tangis-tangis use anjaha nini sidea ma, “Ise ma na mambere gulei panganonnami?

⁵Idingat hanami do dengke na pinangannami i tanoh Masir, lang pala marboli, sonai age ansimun, hondi, lowoh, bawang sigenger pakon hosaya-hosaya;

⁶tapi anggo nuan horah do pangahapnami, seng dong ididah matanami sobali manna.

⁷Ia manna ai songon batu ni hatumbar do, anjaha rupani songon bedellion.”

⁸Dob ai mulak-ulak ma bangsa ai mardalan patumpuhon manna, anjaha iduda ma ai ibagas losung atap igiling ibagas panggilingan, anjaha ilompah ma ai ibagas hudon laho mambaen kuei hunjai; anjaha daini songon dai ni kuei ginoreng bani minak do.

⁹Anggo madabuh namur borngin hu parontian ai, madabuh ma pakon manna ai hu atasni.

¹⁰Iboge si Musa ma tangis bangsa ai mar sasaompung, ganup i lobei ni lampolampo; gabe gajag ma ringis ni Naibata, anjaha sogam uhur ni si Musa.

¹¹Nini si Musa ma hubani Jahowa, “Mase ma bajan pambahenan-Mu bani jabolon-Mu? Anjaha mase ma lang jumpahan idop ni uhur ahu i lobei-Mu, mambahen iampeihon Ham siusungon ni ganup bangsa on bangku?

¹²Ai solat hu bangku do ganup bangsa on? Ai ahu do manubuhkon sidea, mambahen hatahonon-Mu bangku, ‘Bahen ma sidea bani tontonmu, songon

pangombah ni parorot bani na etek-etek, das hu tanoh na dob binijahon-Mu hubani ompung ni sidea?’

¹³ Hunja ma buatonku gulei siberehononku bani ganup bangsa on? Tangis-tangis do sidea i lobeihu anjaha ihatahon, ‘Bere bennami gulei panganonnami!’

¹⁴ Seng tarusung ahu sandiri be ganup bangsa on, maborattu do in bangku.

¹⁵ Anggo sonai do bahenon-Mu bangku, rahanan ma ahu bunuh Ham, anggo jumpahan idop ni uhur do ahu i lobei-Mu, ase ulang be hupaidah-idah hadoyukonku.”

Pangintuai Sipitupuluh Halak

¹⁶ Dob ai nini Jahowa ma hubani si Musa, “Patumpu ma Bangku pitu puluh halak humbani pangintuai ni halak Israel na tangkas tinandamu, paboa pangintuai anjaha panuturi ni bangsa ai do sidea, hu lampolampo partumpuan ai, anjaha pajongjongon ma sidea ijai rap pakon ho.

¹⁷ Jadi tuad ma Ahu anjaha marsahap pakon ho ijai; anjaha buaton-Ku ma deba humbani tonduy na sogop bam, anjaha nahkonon-Ku ma ai bani sidea; sidea ma hasomanmu mangusung siusungon ni bangsa in, ase ulang pitah ho sandiri mangusung ai.

¹⁸ Anjaha hatahon ma bani bangsa in, ‘Manguras ma nasiam hubani patar, ase mangan gulei nasiam; ai domma das doruh-doruh nasiam ai bani panangar ni Jahowa, na mangkatahon: Ise ma na mambere gulei panganonnam? Marsonang-sonang hinan do hanami i tanoh Masir. Halani ai bereon ni Jahowa ma bani nasiam gulei, anjaha mangan ma nasiam.’

¹⁹ Seng pitah sadari mangan nasiam hunjai, barang dua ari, barang lima ari, barang sepuluh ari, barang dua puluh ari,

²⁰ tapi girtip sabulan dokahni, das hubani na luar ai humbani igung nasiam, anjaha sobalan nasiam, halani na dob mahiri ibahen nasiam Jahowa, na i tongah-tongah nasiam, anjaha pala tangis-tangis nasiam i lobei ni, mangkatahon, ‘Mase ma luar hita hun tanoh Masir?’”

²¹ Tapi nini si Musa ma, “Pala do onom ratus ribu halak na mardalan nahei buei ni bangsa na i lambungkun, anjaha ihatahon Ham, ‘Bereonku ma gulei bani sidea, anjaha sungkup panganon ni sidea girtip sabulan dokahni.’

²² Maningon sayaton ma ganup biribiri pakon lombu, ase sungkup bani sidea? Barang maningon patumpuon ma ganup dengke hun laut, ase sungkup bani sidea?”

²³ Jadi nini Jahowa ma hubani si Musa, “Na pondoktu do, nini uhurmu, tangan ni Jahowa?

Idahonmu do sonari barang na tongon hatang-Ku bam barang lang.”

²⁴ Dob ai luar ma si Musa, anjaha ipadas ma hubani bangsa ai hata ni Jahowa, ipatumpu ma pitu puluh humbani pangintuani ni bangsa ai anjaha ipajongjong ma sidea inggot lampolampo ai.

²⁵ Dob ai tuad ma Jahowa ibagas hambun ai, anjaha marsahap ma la hu bani, anjaha ibuat ma deba humbani Tonduy na sogop bani, anjaha ibere hubani pangintuai na pitu puluh halak ai; sogopkonsi Tonduy ai bani sidea, manjahai ma sidea, tapi dob ai lang be.

²⁶ Tapi tading do dua halak humbani sidea i parsaranan ai, goran ni na sada si Eldad anjaha goran ni na sada nari si Medad; jadi marsaran ma homa Tonduy ai i atasni sidea ai, masuk do sidea hubani na tarsurat ai, tapi seng dihut sidea hu lampolampo ai, jadi i parsaranan ai do sidea manjahai.

²⁷ Marlinton ma sada garama anjaha nini ma hubani si Musa, “Manjahai do si Eldad pakon si Medad ibagas parsaranan ai.”

²⁸ Dob ai roh ma balos ni si Josua, anak ni si Nun, juakjuak ni si Musa, humbani haposoonni nari, nini ma, ‘Ham tuannami Musa, pandang ma sidea!’

²⁹ Tapi nini si Musa ma hu bani, “Mintor simburu ma ho halani ahu? Gabe nabi ma namin ganup

bangsa ni Naibata, anjaha ilayak-layakkon Jahowa ma Tonduy-Ni sogop hubani sidea.”

³⁰ Dob ai mulak ma si Musa pakon pangintuai ni halak Israel, hu parsaranan ai.

Parroh ni Leto na Marhulan-hulan.

Tanoman ni na Hisapon

³¹ Dob ai roh ma logou ibahen Jahowa, mamboban leto hun laut, anjaha ipandabuhkon ma hu parsaranan ai, hira-hira sadari mardalan daohni hunjon anjaha sadari mardalan daohni hujai, inggot parsaranan ai, hira-hira dua asta gijangni hun tanoh.

³² Jadi laho ma bangsa ai patumpuhon leto ai, layur sadarini ai ampa layur sadari patarni ai; siotikanni humbani sidea patumpuhon sepuluh homer, jadi ijomur sidea ma ai inggot parsaranan ai.

³³ Hape sanggah ihilhili sidea ope gulei ai, sanggah lape ope ibonduti, gajak ma ringis ni Jahowa hubani bangsa ai, ibogbog Jahowa ma sidea marhitei panaronon na parah.

³⁴ Jadi ibahen sidea ma goran ni ianan ai Kibrot-Hattaawa (*tanoman ni na hisapon*), halani ijai do itanom sidea simbuei na hisapon ai.

³⁵ Hun Kibrot-Hattaawa laho ma bangsa ai hu Haserot, jadi marsaran ma sidea i Haserot.

Gadamon si Miryam

12 ¹Dob ai marungut-ungut ma si Miryam pakon si Aron dompak si Musa, halani parinangonni, halak Kus na binuatni ai, ai boru Kus do na binuatni ai bahen parinangonni.

²Anjaha nini sidea ma, “Ai pitah marhitei si Musa do gakni Jahowa mangkatahon hata-Ni? Ai lang dihut do la marhitei hanami mangkatahon hata-Ni?” Jadi ibogei Jahowa ma ai.

³Tapi jolma na lamlam tumang do si Musa lobih humbani sagala jolma na i atas tanoh on.

⁴Dob ai sompong ma marsahap Jahowa hubani si Musa, si Aron pakon si Miryam, “Luar ma hanima na tolu hu lampolampo partumpuan in!” Jadi luar ma sidea hatolusi.

⁵Dob ai tuad ma Jahowa ibagas hambun na jongjong, lanjar jongjong i labah ni lampolampo ai anjaha idilo ma si Aron pakon si Miryam; jadi luar ma sidea na dua.

⁶Jadi nini ma, “Tangar ma hatangkon, anggo dong nabi i tongah-tongahnima, Ahu, Jahowa do patalarhon diring-Ku hubani marhitei pangungkabon, Ahu marsahap bani marhitei nipi.

⁷Seng sonai anggo juakjuak-Ku si Musa; hatengeran do ia ibagas ganup rumah-Ku.

⁸Pamangan hu pamangan do Ahu marsahap pakonsi, dompak bohi bei, seng ibagas hutinta,

sabonar rupa ni Jahowa sandiri do na nididahni. Mase ma lang mabiar hanima marhata ungut-ungut dompak juakjuak-Ku si Musa?"

⁹ Nahit ma ringis ni Jahowa hubani sidea, lanjar laho ma la.

¹⁰ Dob surut hambun ai hun atas ni lampolampo ai, tonggor ma, domma gadamon si Miryam, lopak songon salju; marhusor ma si Aron mandompakkonsi, tonggor ma, domma gadamon si Miryam.

¹¹ Dob ai nini si Aron ma dompak si Musa, "Ham tuannami, ulang ma uhum ham hanami marhitei dousa na binahennami ibagas haotoonami.

¹² Ulang ma ia songon sada halak na matei, na dob satongah masik angkulani bani parluarni humbani boltok ni inangni."

¹³ Dob ai mandoruhi ma si Musa hubani Jahowa, "Ham Naibata, sai pamalum Ham ma ia!"

¹⁴ Tapi nini Jahowa ma hubani si Musa, "Anggo porini itijuri bapani bohini, ai lang maningon bador ia pitu ari dokahni? Maningon tartutup ia pitu ari dokahni i darat ni parsaranan ai, dob ai pe ase bulih ia jaloan use."

¹⁵ Jadi tartutup ma si Miryam pitu ari dokahni i darat ni parsaranan ai, sundat pala bangsa ai mardalan, paima tarjalo use si Miryam.

¹⁶ Dob ai bingkai ma use bangsa ai hun Hasarot, anjaha marsaran ma sidea i halimisan Paran.

Parkahap na Sapuluh Dua Halak

13 ¹ Dob ai nini Jahowa ma hubani si Musa,
² “Suruh ma dalahi mangkahapi tanoh Kanaan, na sihol layak-layakonon-Ku hubani halak Israel; humbani ganup marga mar sasaompung suruhonmu sahalak, ganup ai kopala do i tongah-tongah ni sidea.”

³ Dob ai isuruh si Musa ma sidea hun halimisan Paran, romban hubani hata ni Jahowa, ganupan sidea kopala do i tongah-tongah ni halak Israel.

⁴ Anjaha on ma goran ni sidea, “Si Sammua, anak ni si Sakkur humbani marga Ruben;

⁵ si Safat, anak ni si Hori humbani marga Simeon;

⁶ si Kaleb, anak ni si Jepunne humbani marga Juda;

⁷ si Igeal, anak ni si Josep humbani marga Isasar;

⁸ si Hosea, anak ni si Nun humbani marga Efraim;

⁹ si Palti, anak ni si Rafu humbani marga Benjamin;

¹⁰ si Gadiel, anak ni si Sodi humbani marga Sebulon;

¹¹ si Gadi, anak ni si Susi humbani marga Josep, ai ma humbani marga Manase;

¹² si Ammiel, anak ni si Gemali humbani marga Dan;

¹³ si Setur, anak ni si Mikael, humbani marga Asser;

¹⁴ si Nahbi, anak ni si Wafsi, humbani marga Naftali;

¹⁵ si Gehuel, anak ni si Mahi, humbani marga Gad.

¹⁶ Ai ma goran-goran ni dalahi, na sinuruh ni si Musa mangkahapi tanoh ai, tapi anggo si Hosea anak ni si Nun, igoran si Musa do ia si Josua.

¹⁷ Jadi sanggah na sinuruh ni si Musa sidea laho mangkahapi tanoh Kanaan ai, nini ma hubani sidea, “Tangkog ma nasiam hu tanoh na hampit dangsina ai, tangkog ma nasiam homa hu tanoh pardologan.

¹⁸ Papangkei nasiam ma atap sonaha do tanoh ai ronsi bangsa na marianan ijai, barang na gogoh do atap na galek, barang na otik do atap na buei;

¹⁹ anjaha atap sonaha do tanoh na niianan ni sidea ai, barang na dear do atap na bajan, anjaha atap sonaha do huta na niianan ni sidea ai, barang lampolampo do ai barang huta na marbatar-batar;

²⁰ barang na lambutan do tanoh ai barang dorging, barang tubuhan hayu atap lang. Tenger ma uhur nasiam, anjaha boan nasiam ma humbani buah ni tanoh ai. Tudu do ijai panorang mambuat limbuah ni hayu anggur.”

²¹ Dob ai tangkog ma sidea anjaha ikahapi ma tanoh ai singgan ni halimisan Sin das hu Rehob, das hu dalan na laho hu Hamat.

²² Tangkog do sidea homa dompak tanoh dangsina, anjaha das sidea hu Hebron; ijai do si Ahiman, si Sesai pakon si Talmai, anak ni si Enak jumpah sidea. Ia Hebron pitu tahun do parlobei itombei humbani Zoan na i tanoh Masir.

²³ Dob ai das ma sidea hu hubungan Eskol, anjaha itagil sidea ma ijai saraungan buah ni anggur, anjaha ipausungkon ma ai hubani dua halak na marlanja-

lanja; iboan sidea ope buah ni dalima pakon hayu ara.

²⁴ Lanjar targoran do ianan ai habungan Eskol, halani buah ni anggur na saraungan ai, na tinagil ni halak Israel ijai.

Parmulak ni Parkahap

²⁵ Jadi dob salpu ompat puluh ari mulak ma sidea humbani na mangkahapi tanoh ai.

²⁶ Mulak ma sidea hubani si Musa pakon si Aron pakon hubani ganup tumpuan ni halak Israel, hu halimisan Paran, hu Kades; iboan sidea do barita hubani sidea pakon hubani ganup tumpuan ai, anjaha ipatuduh ma hubani sidea buah ni tanoh ai.

²⁷ Ibaritahon sidea ma hubani si Musa, “Domma das hanami hu tanoh, sinuruhmu sikahapannami, tanoh habaoran ni dadih pakon manisan ni lobah, anjaha on ma buahni ai.

²⁸ Tapi na gogoh tumang do bangsa na marianan i tanoh ai, hutani pe marbatar-batar do anjaha bolon-bolon, anjaha ididah hanami do homa anak ni si Enak ijai.

²⁹ Halak Amalek marianan hampit dangsina, anjaha halak Het, Jebusi pakon Amori marianan i dolog, anjaha halak Kanaan marianan i topi laut ampa dohorhon Jordan.”

³⁰ Tapi ipatenger si Kaleb do uhur ni bangsa ai i lobei ni si Musa, nini ma, “Tangkog ma hita torus anjaha

soluk hita ma tanoh ai; ai tolap do hita patundukkon ai.

³¹ Tapi nini dalahi na rap tangkog pakonsi ma, “Seng tarbahen hita tangkog mandorab bangsa ai, ai gogohan do sidea hun banta.”

³² Dob ai ipararat sidea ma barita na masambor pasal tanoh na kinahapan ni sidea ai, nini ma, “Tanoh na binontas, na kinahapan ai, ai ma tanoh na mansundutkon pangisini, anjaha bangsa na nididahnami ijai, dalahi na ganjang tumang do.

³³ ididah hanami do homa ijai raksasa, anak ni si Enak, ai ma ginompar ni raksasa, hira balang do hanami ninuhurnami, sonai do homa ninuhur ni sidea.”

Hona Uhum Bangsa na Marungut-ungut

14 ¹ Dob ai ipagogoh bangsa ai ma sorani; mandoruhi ma bangsa ai bornginni ai.

² Marungut-ungut ma ganup halak Israel dompak si Musa ampa dompak si Aron; nini ganup tumpuan ai ma hubani sidea, “Ambit matei ma namin hanami i tanoh Masir. Ambit matei ma namin hanami i halimisan on.

³ Mase ma iarahkon Jahowa hanami hu tanoh on, ase matei hanami bahenon ni podang, ase parinangonnami pakon dakdanaknami gabe taban-taban? Ai lang dearan hanami mulak hu Masir?

⁴ Nini sidea ma samah sidea, ‘Angkat hita ma sada pambobai, ase mulak hita hu Masir!’”

⁵ Dob ai marrogop ma si Musa pakon si Aron hu tanoh i lobei ni ganup tumpuan ni halak Israel.

⁶ Tapi anggo si Josua, anak ni si Nun pakon si Kaleb, anak ni si Jepunne, na dihut mangkahapi tanoh ai, irigati sidea ma hiou ni sidea bei.

⁷ Nini sidea ma hubani ganup tumpuan ni halak Israel, “Ia tanoh na dob ibontas, anjaha na ikahapi hanami ai, tanoh na dear tumang do ai.

⁸ Anggo marosuh Jahowa mangidah hita, boanon-Ni do hita masuk hu tanoh ai, anjaha bereon-Ni do ai hu banta, tanoh habaoran ni dadih pakon manisan ni lobah ai.

⁹ Tapi seng bulih manrusuhi nasiam dompak Jahowa, anjaha seng bulih gobir mangidah bangsa na i nagori ai, ai hira ruti do sidea bondutonta, domma surut pangondingi humbani sidea, tapi Jahowa do hasomanta, ulang ma habiari nasiam sidea.”

¹⁰ Jadi sahata ma ganup tumpuan ai margijig sidea bani batu. Tapi marsinalsal ma hamuliaon ni Jahowa ibagas lampolampo partumpuan ai hubani ganup halak Israel.

¹¹ Nini Jahowa ma hubani si Musa, “Sadia dokah on apasan ni bangsa on Ahu? Sadia dokah on seng ra sidea porsaya Bangku age pe domma buei tanda Hubahen i tongah-tongah ni sidea?”

¹² Papaan-Ku ma sidea marhitei sampar anjaha siapkonon-Ku ma sidea, tapi Hubahen pe ho gabe sada bangsa banggalan anjaha gogohan humbani sidea.”

¹³ Dob ai nini si Musa ma hubani Jahowa, “Bogeion ni halak Masir ma barita ai. Domma iarahkon Ham bangsa on luar hun tongah-tongah ni sidea marhitei hagogohon-Mu.

¹⁴ Patugahon ni sidea ma hata ai hubani pangisi ni tanoh on, na dob mambogei homa, Ham i tongah-tongah ni bangsa on, domma pala dumpar bohi bei, ididah ale Jahowa, anjaha hambun-Mu jongjong i babou ni sidea, anjaha Ham mardalan i lobei ni sidea marhitei hambun na jongjong ai arian, anjaha marhitei apuy na jongjong ia borngin.

¹⁵ Anggo ibunuh Ham sonari bangsa on, songon na mambunuh sahalak jolma, jadi hatahonon ni bangsa na mambogei ai ma,

¹⁶ ‘Halani na so tuk do gogoh ni Jahowa mangarahkon bangsa on hu tanoh na dob binulawankon-Ni berehonon-Ni hubani sidea, mambahen na isiapkon sidea i halimisan.’

¹⁷ Sonari pe, sai marmulia ma gogoh ni Tuhan in songon na dob binagahkon-Mu, ai nimu do,

¹⁸ ‘Lumbang do uhur ni Jahowa anjaha paridop ni uhur banggal, marpangulaki do uhur-Ni mangidah hajahaton pakon panlanggaron, tapi seng palopason-Ni maluah humbani uhum anggo

halak parsalah, sai balaskonon-Ni do hajahaton ni sagala bapa hubani anakni ronsi sundut patoluhon pakon paompatkon.'

¹⁹ Marpangulaki ma uhur-Mu mangidah hajahaton ni bangsa on, romban hubani hinabuei ni idop ni uhur-Mu, anjaha romban hubani parontou ni uhur-Mu mangidah bangsa on singgan Masir nari ronsi nuan."

²⁰ Dob ai nini Jahowa ma, "Domma marpangulaki uhur-Hu halani pangindoanmai.

²¹ Tapi tene, songon sintongni manggoluh Ahu, maningon gok hamuliaon ni Jahowa magira sab dunia on,

²² ise pe lang humbani dalahi in, na dob mangidah hamuliaon-Ku pakon tanda na Hubahen i Masir pakon i halimisan, hape domma pala sapuluh hali ilajou sidea Ahu, anjaha lang itangihon sidea sorang-Ku,

²³ seng bulih mangidah tanoh, na dob Hubulawankon hubani ompung ni sidea, ganup tene na dob mangapasi Ahu, seng bulih mangidah tanoh ai.

²⁴ Tapi anggo juakjuak-Ku si Kaleb, halani maruhur na legan ia anjaha gok uhurni mangirikkon Ahu, boanon-Ku do ia masuk hu tanoh na dob niebatanni ai, anjaha ginomparni manean ai."

²⁵ Tapi anggo halak Amalek pakon halak Kanaan marianan do i habungan ai; halani ai bingkat ma

hanima patar, mulak hu halimisan bani dalan laho hu Laut Sigerger.

²⁶ Dob ai nini Jahowa ma hubani si Musa pakon si Aron,

²⁷ “Sadia dokah on sai marungut-unguti bangsa na jahat on dampak Ahu? Domma Hubogei ungut-ungut ni bangsa Israel, sagala na niungut-ungutkon ni sidea dampak Ahu.

²⁸ Hatahon ma hubani sidea, ‘Songon sintongni manggoluh Ahu,’ nini Jahowa, ‘Maningon bahenon-Ku do bennima songon na hinatahonnima ibogei pinggol-Hu.

²⁹ Maningon martibalan do bangkeinima i halimisan on, anjaha haganup hanima na dob tarbilang ai, marguru hubani haganup bilanganni ai, singgan ni na marumur dua puluh tahun pakon i atas ni ai, sagala na marungut-ungut dampak Ahu,

³⁰ seng bulih age sada humbennima masuk hu tanoh na dob Hubulawankon, na gabe ianannima namin, sobali si Kaleb, anak ni si Jepunne pakon si Josua, anak ni si Nun.

³¹ Tapi anggo dakdanaknima, na hinatahonnima, sitabanon ma in, arahkonon-Ku do sidea masuk, ase itanda sidea tanoh na tineoskon ni uhurnima.’

³² Tapi anggo bangkeinima sandiri, maningon martibalan do i halimisan on.

³³ Anjaha anaknima maningon gabe parmahan do i halimisan on ompat puluh tahun dokahni, ase

marsapata hubani sidea pangelukonnima in, paima bois martibalan bangkeinima i halimisan on.

³⁴ Domu hubani bilangan ni ari pangkahapinima bani tanoh ai, ai ma ompat puluh ari, na sadari gabe satahun, maningon ompat puluh tahun ma manginsonoh hajahatonnima ai bennima, ase iahap hanima sogam ni uhur-Hu.

³⁵ Ahu Jahowa tene na dob mangkatahon in, maningon sonin bahenon-Ku hubani ganup tumpuan na jahat on, na martumpu mangimbang Ahu; maningon i halimisan on bois sidea, anjaha ijon sidea marmateian.”

³⁶ Jadi dalahi na sinuruh ni si Musa mangkahapi tanoh ai, anjaha na mulak use, na mambahen marungut-ungut ganup tumpuan ai hu bani, marhitei na pararat barita na bajan pasal tanoh ai, ³⁷ marmateian ma tongon dalahi ai, na pararatkon barita na bajan ai pasal tanoh ai, hona papa i lobei ni Jahowa.

³⁸ Tapi anggo si Josua, anak ni si Nun pakon si Kaleb, anak ni si Jepunne manggoluh do tading humbani dalahi na laho mangkahapi tanoh ai.

Talu Bangsa Israel Ibahen Munsuhni

³⁹ Dob ai ipadas si Musa ma hata ai hubani ganup halak Israel, gabe pusok tumang ma uhur ni bangsa ai.

⁴⁰ Dob ai ipagirah sidea ma sogod laho anjaha tangkog ma sidea hu pakpak ni dolog ai, nini ma, “Tonggor ma, ijon do hanami sihol tangkog hu ianan na dob binagahkon ni Jahowa hinan, ai domma mardousa hanami.”

⁴¹ Tapi nini si Musa ma, “Mase ma sonin panlaosinima bani parentah ni Jahowa? Seng anjai monang nasiam.

⁴² Ulang ma nasiam tangkog, ai lang i tongah-tongah nasiam Jahowa, ase ulang talu nasiam i lobei ni munsuh nasiam.

⁴³ Ai halak Amalek pakon halak Kanaan do ijai i lobei nasiam, gabe marrageian holi nasiam bahenon ni podang, ai halani na dob itundali nasiam Jahowa, seng anjai hasomanan ni Jahowa nasiam.”

⁴⁴ Tapi iutuskon sidea do tangkog hu pakpak ni dolog ai halani hengken ni uhurni, age pe lang meret poti parpadanan ni Jahowa pakon si Musa hun tongah-tongah ni parsaranan ai.

⁴⁵ Jadi tuad ma halak Amalek pakon halak Kanan, na marianan i atas dolog ai, lanjar italuhon anjaha ipardakdak ma sidea das hu Horma.

Galangan Sipanganon pakon Siinumon

15 ¹ Dob ai nini Jahowa ma dompak si Musa,
² “Hatahon ma hubani halak Israel, anggo das ma hanima hu tanoh siannonnima ai, na sihol layak-layakkonon-Ku bennima,

³anjaha sihol galangkononnima humbani lombu barang biribiri, sada galangan apuy atap galangan situtungon atap galangan sisayaton laho manggoki bagah-bagah barang galangan niojur ni uhur bani ari rayanima, laho mambahen uap na misbou hubani Jahowa,

⁴jadi barang ise na sihol manggalangkon galanganni hubani Jahowa, maningon boanonni do bahen galangan sipanganon saparsapuluh efa itak na lumat, na niagu pakon saparompat hin minak,

⁵anjaha maningon boanonmu homa anggur bahen galangan siinumon saparompat hin hasoman ni galangan situtungon barang galangan sisayaton hasoman ni ganup anak ni biribiri.

⁶Atap bani sada biribiri tunggal, maningon pasirsironmu do bahen galangan sipanganon dua parsapuluh efa itak na lumat, na niagu pakon minak sapartolu hin;

⁷anjaha bahen galangan siinumon ai maningon galangkononmu do sapartolu hin anggur, bahen uap na misbou bani Jahowa;

⁸anjaha anggo sihol galangkononmu sada anak ni lombu bahen galangan situtungon barang galangan sisayaton, laho manggoki bagah-bagah barang galangan pardameian hubani Jahowa,

⁹maningon boanonmu do hasoman ni anak ni lombu ai bahen galangan sipanganon tolu

parsapuluh itak na lumat, na niagu pakon minak satongah hin;

¹⁰ anjaha maningon galangkononmu homa anggur bahen galangan siinumon satongah hin, songon galangan apuy, uap na misbou bani Jahowa.

¹¹ Maningon sonai bahenon bani ganup lombu barang biribiri tunggal, bani ganup biribiri boru-boru barang hambing.

¹² Romban hubani bilangan ni pinahan sigalangkononnima ai, maningon sonai bahenonnima bani ganup galangan mangihutkon bilanganni.

¹³ Sagala halak pangisi ni tanoh ai maningon sonai bahenonni laho manggalangkon galangan apuy bahen uap na misbou bani Jahowa.

¹⁴ Anjaha anggo manginsolat sada halak dagang rap pakon hanima barang marianan ia i tengah-tongahnima marsundut-sundut, anjaha sihol galangkononni galangan apuy bahen uap na misbou bani Jahowa, maningon bahenonni do songon na binahennima ai.

¹⁵ Sada do aturan bani tumpuan in, bennima pakon bani halak na manginsolat; aturan na totap do in bani ginomparnima marsundut-sundut; usih songon hanima, maningon sonai do halak dagang i lobei ni Jahowa.

¹⁶ Maningon sisada titah pakon sisada aturan do hanima pakon halak dagang na manginsolat i tongah-tongahnima.”

Galangan Limbua

¹⁷ Dob ai nini Jahowa ma hubani si Musa,

¹⁸ “Hatahon ma hubani halak Israel, anggo das ma hanima, hu tanoh na sihol arahkonon-Ku hanima,

¹⁹ anjaha anggo ipangan hanima ma ruti gogoh ni tanoh ai, maningon galangkononnima do galangan sitatangan bani Jahowa.

²⁰ Humbani limbua ni itak ni gandum, maningon galangkononmu do sada kuei bahen galangan sitatangan; usih songon galangan sitatangan na humbani pardogeian maningon sonai do ia tatanganmu.

²¹ Maningon bereonnima do hubani Jahowa humbani limbua ni itak ni gandumnima bahen galangan sitatangan, torus marsundut-sundut.”

Pasal Dousa na So Tinuntun

²² Tapi anggo kahou hanima, gabe seng ihorjahon hanima ganup tonah on, na ipatugah Jahowa hubani si Musa,

²³ sagala na tinonahkon ni Jahowa bannima marhitei si Musa, singgan ni ari dob martonah Jahowa pakon hu lobeian on torus marsundut-sundut,

²⁴ jadi anggo ponop bani pangidah ni tumpuan ai tarjadi hakahouon ai, maningon galangkonon ni ganup tumpuan ai do sada anak ni lombu bahen galangan situtungon, gabe uap na misbou bani Jahowa, rap pakon galangan sipanganonni pakon galangan siinumonni romban hubani aturan ai; sonai homa sada hambing tunggal bahen galangan pardousaon.

²⁵ Maningon bahenon ni malim ai ma pardearan bani ganup tumpuan ni halak Israel, ase sasap dousa ni sidea ai, ai na so tinuntun do ai; maningon sidea do mamboan galangan ni sidea bahen galangan pardousaon ni sidea, ai ma galangan apuy bani Jahowa ampa galangan pardousaon ni sidea ilobei ni Jahowa halani hakahouon ni sidea ai.

²⁶ Jadi salosei ma dousa ni ganup tumpuan ni halak Israel, age dousa ni halak dagang na manginsolat i tengah-tengah ni sidea, ai kahahouon do ai bani haganup bangsa ai.

²⁷ Anjaha anggo mardousa sada halak halani hakahouonni, maningon boanonni do sada hambing boru-boru na marumur satahun bahen galangan pardousaon.

²⁸ Maningon bahenon ni malim ai do pardearan bani halak na kahou ai, na mardousa i lobei ni Jahowa ibagas na so tinuntun, mambahen pardearan bani, jadi salosei ma dousani.

²⁹ Maningon sada do titah bennima, age bani halak Israel pangisi ni tanoh in, age bani halak dagang na manginsolat i tongah-tongahnima, anggo marsalah ia halani hakahouonni.

³⁰ Anjaha anggo adong sahalak na mardousa halani jungkatni, age pangisi ni tanoh ai ia, age halak dagang na manginsolat i tongah-tongahnima, na mangapasi Jahowa do ia ai, halani ai maningon siapkonon do halak sisonai ai hun tongah-tongah ni bangsani.

³¹ Halani mahiri ibahen hata ni Jahowa, anjaha iosei tonah-Ni, maningon siapkononkon do jolma sisonai ai, maningon manginsonoh hubani do hajahatonni.

Uhum bani Sada Halak na So Papansingkon Ari Sabat

³² Jadi sanggah i halimisan halak Israel, jumpah sidea ma sada dalahi na marsoban-soban bani ari Sabat.

³³ Jadi iboban halak na mangidahsi ai ma ia hubani si Musa, si Aron pakon hubani ganup tumpuan ai.

³⁴ Dob ai ipatutupkon sidea ma ia hubagas tutupan, ai seng ope tangkas ibotoh sidea uhum sidabuhon hu bani.

³⁵ Nini Jahowa ma hubani si Musa, “Maningon marutang hosah do dalahi ai; maningon ganup tumpuan ai manggijigsi bani batu i darat ni tumpuan ai.”

³⁶ Jadi ganup ma tumpuan ai mangarahkonsi luar hu darat ni partumpuan ai, lanjar igijigi sidea ma ia matei bani batu, songon na tinonahkon ni Jahowa hubani si Musa.

Rambu Pardingatan bani Pakeian

³⁷ Dob ai nini Jahowa ma hubani si Musa,

³⁸ “Hatahon ma hubani halak Israel, ase ibahen sidea rambu bani suhi ni pakean ni sidea torus marsundut-sundut, anjaha maningon bahenon ni sidea do bani rambu ni ganup suhi sada tali bonang na mahonda.

³⁹ Gabe rambu pardingatan ma ai bennima; anggo ididah hanima ai, maningon dingatonnima ma titah ni Jahowa anjaha horjahononnima ai, ase ulang iirikkon hanima ojur-ojur ni uhur barang matanima, gabe madabuh hubagas parbangkison halani ai,

⁴⁰ ase idingat anjaha ihorjahon hanima ganup tonah-Ku, gabe pansing hanima bani Naibatanima.

⁴¹ Ahu do Jahowa, Naibatanima, na mangarahkon hanima luar hun Masir, ase Ahu gabe Naibatanima, Ahu do Jahowa Naibatanima.”

Panggeori ni si Kora, si Datan pakon si Abiram

16 ¹ Dob ai martahi-tahi ma si Kora, anak ni si Izhar, anak ni si Kahat, anak ni si Levi rap pakon si Datan pakon si Abiram, anak ni si Eliab pakon si On, anak ni si Pelet, anak ni si Ruben.

² Jongjong ma sidea manggeori dompak si Musa rap pakon dua ratus lima puluh dahali humbani halak Israel, kopala-kopala ni tumpuan ai, halak na tarpilih hu parrapotan anjaha na tarbarita.

³ Jadi martumpu ma sidea mangimbang si Musa pakon si Aron, nini ma dompak sidea, “Na ma lobih tu do pambahennima. Na pansing do ganup tumpuan in, sidea ganup, anjaha i tongah-tongah ni sidea do Jahowa; mase ma pagijang-gijangonnima dirinima manggomgom kuria ni Jahowa?”

⁴ Jadi dob ibogei si Musa hata ai, marrogop ma ia hu tanoh.

⁵ Dob ai nini ma hubani si Kora pakon hubani haganup hasomanni sapartahian, “Patar ma patugahon ni Jahowa barang ise jujungan na pinabangkit-Ni, anjaha ise na pansing, na bulih dohor hu Bani; anjaha ise na pinilih ni Jahowa, ai ma na bulih dohor hu Bani.

⁶ On ma bahen hanima, si Kora pakon ganup hasoman sapartahianni: Buat ma batil pardahupaan;

⁷ nahkon ma apuy hubagas, anjaha bahen ma dahupa hu atasni i lobei ni Jahowa patar; jadi barang ise na pinilih ni Jahowa, ai ma na pansing. Pambahenannima do na malobih tu, hanima ginompar ni si Levi.”

⁸ Nini si Musa ma hubani si Kora, “Tangihon ma hatangkon hanima ginompar ni si Levi.

⁹ Maotiktu ope ninuhurnima, na dob pinapulig ni Naibata ni Israel hanima hun tumpuan ni Israel, ase bulih hanima roh hun dohor hu bani, laho mangkoseihon horja bani ianan ni Jahowa, anjaha jongjong i lobei ni tumpuan in, marugas bani sidea?

¹⁰ Domma ilopas ho roh hun dohor, rap pakon saninamu halak Levi, sihol buatonnima ope hamalimon in?

¹¹ Halani ai, ho pakon ganup hasomanmu sapartahian, na mangimbang Jahowa do hanima in. Ai ise ma si Aron, ase marungut-ungut hanima hubani?”

¹² Dob ai isuruh si Musa ma na mardilo si Datan pakon si Abiram, anak ni si Eliab, tapi nini sidea ma, “Seng ra hanami tangkog hujai.

¹³ Maotiktu ope gakni ninuhurmu, na dob niarahkonmu in hanami luar hun tanoh habaoran ni dadih pakon manisan ni lobah, laho mambunuh hanami i halimisan on? Sihol gakni use pabangkironmu dirimu gabe raja bennami?

¹⁴ Seng dong iboban ho hanami hu tanoh habaoran ni dadih pakon manisan ni lobah, anjaha seng dong ibere ho juma pakon pohon anggur bahen parbagianannami. Sihol use pakon mata ni dalahi pulsitkononmu? Seng ra hanami tangkog hujin.

¹⁵ Jadi nahit ma ringis ni si Musa, anjaha nini ma hubani Jahowa, “Sai ulang ma marpanatap Ham bani galangan sipanganon ni sidea. Seng onnga

age sada halode hubuat humbani sidea, anjaha seng onnga hubahen na masambor hubani atap ise humbani sidea.”

¹⁶ Dob ai nini si Musa ma hubani si Kora, “Patar maningon roh do ho rap pakon hasomanmu sapartahian hu lobei ni Jahowa, ho, sidea pakon si Aron.

¹⁷ Dob ai ganup hanima ibuat bei ma batil panutungan ni dahupani anjaha inahkon ma hu atasni dahupa, dob ai ganup ma mamboan hun dohor batil pardahupaanni hu lobei ni Jahowa, ganup dua ratus lima puluh batil pardahupaan, ho pe pakon si Aron iboan bei ma pardahupaanni.”

¹⁸ Jadi ganup ma mambuat batil pardahupaanni, inahkon ma apuy hu atasni, anjaha ibahen ma dahupa hu atasni ai, dob ai jongjong ma sidea bani labah ni lampolampo ai rap pakon si Musa ampa si Aron.

¹⁹ Domma ipatumpu si Kora hinan haganup tumpuan ai hulabah ni lampolampo partumpuan ai mangimbang sidea. Dob ai taridah ma hamuliaon ni Jahowa bani ganup tumpuan ai.

²⁰ Dob ai nini Jahowa ma hubani si Musa pakon si Aron,

²¹ “Paholang hanima ma dirinima humbani tumpuan in, ase Husiapkon sidea ibagas na tongkin.”

²² Dob ai marrogop ma si Musa pakon si Aron, anjaha nini sidea ma, “Ham Naibata, Naibata ni tonduy ni sagala angkula, anggo mardousa sahalak, mintor ringisan-Mu ma ganup tumpuan in?”

²³ Nini Jahowa ma hubani si Musa,

²⁴ “Hatahon ma hubani tumpuan in, ‘Laho ma hanima hun lambung ni lampolampo ni si Kora, si Datan pakon si Abiram.’”

²⁵ Dob ai laho ma si Musa mangayaki si Datan pakon si Abiram, anjaha iirikkon pangintuai ni halak Israel do ia.

²⁶ Anjaha nini ma hubani tumpuan ai, “Laho ma nasiam hun lampolampo ni parjahat on, anjaha ulang ma ijamah nasiam barang aha pe ugas ni sidea, ase ulang dihut nasiam siap halani dousa ni sidea ai.”

²⁷ Dob ai surut bei ma sidea hun lambung ni lampolampo ni si Kora, si Datan pakon si Abiram. Jadi luar ma si Datan pakon si Abiram, lanjar jongjong i labah ni lampolampo ni sidea rap pakon parinangon ni sidea, anak ni sidea pakon dakdanak ni sidea.

²⁸ Dob ai nini si Musa ma, “Hunjon ma botohon nasiam, paboa Jahowa do na marsuruh ahu mangkorjahon horja on, anjaha sedo humbani uhur-uhuru sandiri.

²⁹ Anggo songon parmateri na somal do parmateri ni halak on, atap anggo songon hinamagou na somal

do mangonai hubani halak on, na so sinuruh ni Jahowa ma ahu tongon.

³⁰ Tapi anggo ijadihon Jahowa na so onnga tarjadi, gabe ipangangang tanoh in babahni anjaha ibondut sidea rap pakon na adong bani sidea, gabe manggoluh sidea tuad hu nagori toruh, jadi botoh nasiam ma, na dob iapasi halak on do Jahowa.”

³¹ Jadi dob siap ihatahon hata ondi, marigat ma tanoh ai i toruh ni sidea.

³² Ipangangang tanoh ai ma babahni lanjar ibondut ma sidea, rumah ni sidea pakon haganup halak na mangirikkon si Kora sonai ganup ugas-ugas ni sidea.

³³ Jadi sonai ma manggoluh tuad sidea hu nagori toruh ronsi ganup ugas-ugas ni sidea, lanjar ironkob tanoh ai ma sidea. Jadi magou ma sidea hun tongah-tongah ni tumpuan ai.

³⁴ Anjaha haganup halak Israel, na inggot bani sidea, lintun bei ma mambogei doruh-doruh ni sidea ai, ai nini sidea do, ‘Ase ulang dihut hita ibondut tanoh in.’

³⁵ Luar ma homa apuy humbani Jahowa, gabe bois ipangan dalahi sidua ratus lima puluh halak ai, na manggalangkon dahupa ai.

Pasal Pardahupaan ni na Dob Matei

³⁶ (17-1) Dob ai nini Jahowa ma hubani si Musa,

³⁷ (17-2) “Hatahon ma si Eleasar, anak ni Malim Aron, mambuat pardahupaan ai humbagas gajag ni apuy ai, tapi apuy ai daoh ma iambukkon ai.

³⁸ (17-3) Ai na pansing do pardahupaan ni halak ai, na matei halani dousa ni sidea; halani ai topaon do ai gabe pamaluti, silampiskononkon bani anjapanjap; domma pala igalangkon sidea ai hu lobei ni Jahowa, halani ai na pansing do ai. Ase gabe tanda ma ai bani halak Israel.”

³⁹ (17-4) Jadi ibuat Malim Eleasar ma pardahupaan tombaga ai, sagala na dob ginalangkon ni halak na dob pinangan ni apuy ai, lanjar itopa ma ai bahen pamaluti ni anjapanjap;

⁴⁰ (17-5) gabe singat-singat ma ai bani halak Israel, ase ulang roh be hun dohor halak na legan, na so humbani ginompar ni si Aron, sihol manutung dahupa i lobei ni Jahowa, ase ulang magou ia songon si Kora pakon hasoman sapartahianni, songon na dob nilumbahonni hinan bani marhitei si Musa.

Marungut-ungut Bangsa ai Uhum pakon Pardearan

⁴¹ (17-6) Patarni ai marungut-ungut ma use tumpuan ni halak Israel hubani si Musa pakon si Aron, nini sidea ma, “Nasiam do na mamunuh bangsa ni Jahowa.”

⁴² (17-7) Jadi dob martumpu tumpuan ai hu lambung ni si Musa pakon si Aron, marhusor ma sidea dompak lampolampo partumpuan ai, jadi tonggor ma, irongkob hambun ma lampolampo ai, anjaha taridah ma hamuliaon ni Jahowa.

⁴³ (17-8) Roh ma si Musa pakon si Aron hu lobei ni lampolampo partumpuan ai.

⁴⁴ (17-9) Nini Jahowa ma hubani si Musa,

⁴⁵ (17-10) “Laho ma hanima hun tengah-tengah ni tumpuan on, ase Huboiskon sidea ibagas na satongkin.” Jadi marrogop ma sidea na dua.

⁴⁶ (17-11) Nini si Musa ma hubani si Aron, “Buat ma pardahupaan in, bahen ma hubagas apuy na hun anjapanjap in, nahkon ma dahupa hu atasni anjaha podas ma ho laho marayak tumpuan in laho mambahen pardearan bani sidea, ai domma pala luar rimas hun lobei ni Jahowa, anjaha domma pala mamungkah masa papa ai.”

⁴⁷ (17-12) Dob ai ibuat si Aron ma pardahupaan ai, songon na hinatahon ni si Musa, jaha marlintun ma ia hu tengah-tengah ni tumpuan ai, hape tonggor ma, domma pala mamungkah masa papa ai i tengah-tengah ni bangsa ai; itutung ma dahupa ai laho mambahen pardearan hubani bangsa ai.

⁴⁸ (17-13) Jongjong ma ia i tengah-tengah ni na matei pakon na manggoluh ai, gabe maronti ma papa ai.

⁴⁹ (17-14) Ia buei ni halak na matei binahen ni papa ai sapuluh ompat ribu pitu ratus halak do, sobali na matei na mangirikkon si Kora.

⁵⁰ (17-15) Mulak ma si Aron hubani si Musa hu lampolampo partumpuan ai, dob maronti papa ai.

Tungkot ni si Musa na Marbunga

17 ¹ (17-16) Dob ai nini Jahowa ma hubani si Musa,

² (17-17) “Hatahon ma hubani halak Israel, anjaha buat ma humbani sidea sada tungkot humbani ganup marga, humbani pambobai ni sidea mar sasaompung gabe sapuluh dua tungkot. Suratkon ma goran ni ganup hubani tungkotni bei,

³ (17-18) tapi anggo goran ni si Aron suratkon ma ai hubani tungkot ni si Levi, ai sada do tungkot bani kopala ni marga ni sidea.

⁴ (17-19) Anjaha patibalon ma ai hubagas lampolampo partumpuan ai i lobei ni poti hasaksian ai, hujai do Ahu somal marayak hanima.

⁵ (17-20) Anjaha tungkot ni halak na Hupilih ai, marbunga ma ai, sonai ma parontihonon-Ku parungut-unguton ni halak Israel, na marungut-ungut dompak hanima.”

⁶ (17-21) Ipadas si Musa ma hata ai hubani halak Israel, jadi ibere haganup pangintuai ni sidea ma ai, ganup sapuluh dua tungkot; anjaha tungkot ni si Aron do i tengah-tengah ni tungkot ni sidea ai.

⁷ (17-22) Dob ai itibalhon si Musa ma tungkot ai i lobei ni Jahowa, ibagas lampolampo hasaksian ai.

⁸ (17-23) Anjaha patarni ai, sanggah na masuk si Musa hubagas lampolampo hasaksian ai, tonggor ma, domma marbunga tungkot ni si Aron na humbani marga Levi, domma tongon martumbor anjaha marbunga na mangerbang anjaha marbuah na matoras.

⁹ (17-24) Iboan si Musa ma ganup tungkot ai luar hun lobei ni Jahowa hu lobei ni ganup halak Israel; ididah sidea ma ai, anjaha ibuat sidea bei ma ganup tungkotni bei.

¹⁰ (17-25) Dob ai nini Jahowa ma hubani si Musa, “Paulak ma tungkot ni si Aron ai hu lobei ni poti hasaksian ai, sisimpanon ijai bahen tanda bani halak sipanggeori, ase maronti bahenonmu parungut-unguton ni sidea ai dompak Ahu, ase ulang matei sidea.”

¹¹ (17-26) Dob ai ibahen si Musa ma sonai; songon na tinonahkon ni Jahowa hubani sonai do ibahen.

¹² (17-27) Dob ai nini halak Israel ma hubani si Musa, “Tonggor ma, na laho rotap ma hosahnami, na laho magou ma hanami, na laho magou mando hanami ganup.

¹³ (17-28) Barang ise na pag roh hun dohor, hu lampolampo ni Jahowa, matei ma ia. Ai maningon haganup do rotap hosahnami nani?”

Jabatan ni Malim pakon Halak Levi

18¹ Dob ai nini Jahowa ma hubani si Aron, “Maningon ho pakon anakmu ampa ginompar ni bapamu, na rap pakon ho do mamorsan hasalahan, na mardomu hubani ianan bani na mapansing ai; ho ampa anakmu na rap pakon ho do mamorsan na mardomu hubani hamalimon.

² Age saninamu humbani marga Levi, marga ni bapamu, maningon boanonmu do hun dohor rap pakon ho, ase sidea mangkasomani ho anjaha marugas bam, sanggah i lobei ni lampolampo hasaksian ai ho rap pakon anakmu.

³ Maningon horjahonon ni sidea do horjamu, pakon horja ni sidea, na mardomu hubani lampolampo ai, tapi seng bulih sidea hun dohor bani parugas na pansing ai barang hu anjapanjap ai, ase ulang matei sidea age hanima.

⁴ Ho do sihasomanan ni sidea mandalankon horja bani lampolampo partumpuan ai, bani haganup horja tene bani lampolampo ai; tapi anggo halak na legan seng bulih hun dohor bennima.

⁵ Maningon hanima do mangkorjahon sihorjahonon bani ianan na pansing ai, pakon sihorjahonon bani anjapanjap ai, ase ulang be mangonai ringis bani halak Israel.

⁶Tonggor ma domma Hubuat halak Levi, saninanima in hun tongah-tongah ni halak Israel, silayak-layak bennima do sidea, na binere hubani Jahowa, ase ihorjahon sidea horja sihorjahonon bani lampolampo in.

⁷Tapi anggo ho pakon haganup anakmu na rap pakon ho, maningon horjahononnima do horja hamalimonnima, na mardomu hubani haganup horja na bani anjapanjap ai pakon na i pudi ni tirei ai; maningon dalankononnima do horja ai, ai silayak-layak na Hulayakkon do bennima jabatan hamalimon in, tapi barang ise halak na legan na roh hun dohor, maningon marutang hosah do.”

Rupe ni Malim humbani Galangan pakon Limbua

⁸Dob ai nini Jahowa ma hubani si Aron, “Tonggor ma, domma Hubere hubam humbani galangan na hu Bangku, ai ma na boi sitebaan; humbani haganup tene na pinapansing ni halak Israel, domma Hubere rupeimu ampa anakmu; gabe aturan na totap ma in ronsi sadokah ni dokahni.

⁹On ma rupeimu humbani na pansing sahalian ai, na so mosog ibahen apuy: Ganup galangan ni sidea, ai ma ganup galangan sipanganon, ganup galangan pardousaon, ampa ganup galangan parsalahan ni sidea, sagala na kinahulhon ni sidea hu Bangku, gabe na pansing sahalian ma ai bam bani anakmu.

¹⁰ Maningon bani ianan na pansing sahalian do ai panganonnima; sagala dalahi bulih do panganonni ai, maningon pansing do ai bam.

¹¹ On pe rupeimu do, Humbani sibere-bere ni sidea na legan, humbani ganup galangan sitatongan ni halak Israel, domma Hubere ai bam, hubani anakmu pakon hubani borumu na rap pakon ho; gabe aturan na totap ma ai sadokah ni dokahni; sagala na niuras ibagas rumahmu, bulih do mangankon hunjai.

¹² Sagala minak sidearan, sagala anggur sijengesan ronsi omei, limbuah na binere ni sidea hubani Jahowa, domma Hubere bam.

¹³ Sagala limbuah ni na adong bani tanoh ni sidea, na binoan ni sidea hubani Jahowa, maningon ho do simadasi; barang ise na dob niuras ibagas rumahmu bulih do mangankon hunjai.

¹⁴ Sagala na hona haram i Israel, maningon ho do simadasi.

¹⁵ Sagala bunga tubuh na manggoluh, na binoan ni sidea hubani Jahowa, humbanijolma atap humbani pinahan, maningon ho do simadasi; tapi tene maningon tobusonmu do anggo bunga tubuh nijolma, anjaha maningon tobusonmu do bunga tubuhni pinahan na butak.

¹⁶ Anggo pasal partubuhni, maningon marumur lobei sabulan ase boi tobusonmu, romban hubani pangasammu, ai ma harga lima sekel pirak, domu

hubani sekel na bani ianan na pansing ai, ai ma dua puluh gera.

¹⁷ Tapi anggo bunga tubuh ni lombu barang biribiri barang hambing seng bulih tobusonmu, ai na pansing do ai, anjaha daroh ni ai maningon pispiskononmu ai bani anjapanjap, anjaha tabohni ai maningon tutungonmu ai bahen galangan apuy, gabe uap na misbou bani Jahowa.

¹⁸ Tapi anggo sibukni maningon ho do simadasi, usih songon tonton ni galangan sitatangon ai ampa songon hae-hae siamun parlobei ai; maningon ho do simadasi.

¹⁹ Haganup galangan na mapansing, na binere ni halak Israel bani Jahowa, domma Hubere bam, hubani anakmu pakon hubani borumu na rap pakon ho; gabe aturan na totap ma ai sadokah ni dokahni; sada parpadanan garam (*padan na so tarosei*) na sadokah ni dokahni ma ai bam, i lobei ni Jahowa pakon bani ginomparmu na rap pakon ho.”

²⁰ Dob ai nini Jahowa ma hubani si Aron, “Seng bulih dapotan tean-teanan ho i tanoh ni sidea, barang marbagian ho i tengah-tengah ni sidea, ai Ahu do parbagiananmu pakon tean-teananmu i tengah-tengah ni halak Israel.”

Parbagianan ni Halak Levi

²¹ Tapi anggo bani halak Levi, tonggor ma, domma Hubere ganup parsapuluhan i Israel bahen tean-

teanni bahen parbagiananni, upah ni horja ni sidea, na hinorjahon ni sidea bani lampolampo partumpuan ai.

²² Halani ai seng bulih be roh hun dohor halak Israel, hu lampolampo partumpuan ai, ase ulang mardousa sidea anjaha matei.

²³ Maningon halak Levi do tene mandalankon horja bani lampolampo partumpuan ai; maningon mangonai hubani sidea do hajahaton ni sidea; aturan na totap ma in sadokah ni dokahni, seng bulih dapotan tean-teanan sidea i tongah-tongah ni halak Israel.

²⁴ Ai parsapuluhan ni halak Israel, na binere ni sidea hubani Jahowa bahen galangan, domma Hubere hubani halak Levi bahen tean-teanan; halani ai do ase Huhatahon hubani sidea, “Seng bulih dapotan tean-teanan sidea i tongah-tongah ni halak Israel.”

²⁵ Dob ai nini Jahowa ma hubani si Musa,

²⁶ “Maningon hatahononmu ope hubani halak Levi, anggo ibuat hanima humbani halak Israel parsapuluhan, na dob Hubere bennima humbani sidea bahen tean-teannima, jadi maningon bereonnima do hunjai galangan hubani Jahowa, parsapuluhan ni parsapuluhan.

²⁷ Anjaha hiraon do bennima galangannima ai, songon omei hun pardogeian anjaha songon anggur na marlobih-lobih hun pangilangan.

²⁸ Sonai homa maningon bereonnima do galangannima bani Jahowa humbani ganup parsapuluhannima, na binuatnima humbani halak Israel; anjaha galangan ai na bani Jahowa, maningon bereonnima do ai hubani Malim Aron.

²⁹ Humbani sagala sibere-bere bennima maningon bereonnima do galangannima bani Jahowa; humbani sagala sidearan hunjai, ai ma na patut maningon sipapansingon hunjai.

³⁰ Halani ai maningon hatahononmu do hubani sidea, ‘Anggo ibere hanima sidearan hunjai, maningon hiraon do na tading ai bani halak Levi, usih songon buah na dapot hun pardogeian pakon songon buah na dapot hun pangilangan.’

³¹ Bulih do homa panganonnima hunjai bani ganup ianan, hanima pakon sinrumahnima, ai upahnima do in halani horjanima ibagas lampolampo partumpuan in.

³² Anjaha seng mardousa hanima halani in, asal ibere hanima hunjai sidearan bahen galangan. Sonai ma bahen hanima, ase ulang butak sibere-bere ni Israel na pansing in, ase ulang matei hanima.”

Pangurasion Marhitei Abuan ni Lumbu Sigerger

19 ¹ Dob ai nini Jahowa ma hubani si Musa pakon hubani si Aron,

² “On ma aturan ni titah na tinonahkon ni Jahowa, hatahon ma halak Israel, ase itogu sidea bam sada lombu boru-boru sigenger na so marbutak barang marsining, anjaha na so onnga ampei pasangan bani.

³ Anjaha maningon ondskononmu ma ai hubani Malim Eleasar, itogu ma ai hu darat ni parsaranan ai, anjaha isayat i lobei ni.

⁴ Buaton ni Malim Eleasar ai ma deba humbani darohni ai marhitei jari-jarini, anjaha ipispiskon ma deba humbani daroh ai dompak lampolampo partumpuan ai pitu hali.

⁵ Itutung ma lombu ai i lobei ni; bobakni, sibukni, pakon darohni rap pakon ginagatni maningon tutungon do;

⁶ dob ai buaton ni malim ai ma hayu ares pakon hisop ampa bonang sigenger anjaha igijigkon ma ai hu tengah-tengah ni panutungan ni lombu ai.

⁷ Dob ai taptapan ni malim ai ma pakeanni anjaha paridionni angkulani ibagas bah, dob ai bulih ma ia masuk hu parsaranan ai, tapi maningon butak do ia ronsi bodari.

⁸ Halak na manutung lombu ai pe, maningon taptaponni do pakeanni bani bah, anjaha paridionni angkulani ibagas bah, anjaha maningon butak do ia ronsi bodari.

⁹ Anjaha ipatumpu sada dalahi na dob niuras ma abuan ni lombu ai, anjaha inahkon ma ai hu darat

ni parsaranan ai bani sada ianan na pansing; anjaha isimpan ma ai ijai bani halak Israel bahen pulungan ni bah pangurasion, ai galangan pardousaon do ai.

¹⁰ Anjaha dalahi na dob patumpuhon abuan ni lombu ai maningon taptaponni ma pakeanni anjaha butak ma ia ronsi bodari, anjaha gabe aturan na totap ma ai bani halak Israel ampa bani halak panginsolat, na manginsolat i tongah-tongah ni sidea.

¹¹ Barang ise na manjamah bangkei ni halak na dob matei, maningon butak ia pitu ari dokahni;

¹² maningon urasonni dirini bani bah ai bani ari patoluhon pakon bani ari papituhon, ase pansing ia; tapi anggo seng iurasi dirini bani ari patoluhon pakon bani ari papituhon, seng anjai borsih ia.

¹³ Barang ise na manjamah halak na dob matei, bangkei ni sada halak na dob matei, anjaha seng iurasi dirini, na pabutak ianan ni Jahowa do ia ai, anjaha maningon siapkononkonjolma sisonai ai hun tongah-tongah ni halak Israel, halani na so pinispiskon ai bah pangurasion ai bani; gabe butak do tong ia, longkot ope tong habutakon ai bani.

¹⁴ On ma aturan anggo matei sada halak ibagas lampolampo, 'Ganup na masuk hubagas lampolampo ai, anjaha ganup na ibagas lampolampo ai, maningon butak do pitu ari dokahni.'

¹⁵ Anjaha sagala gusi, na so marlangkob na sinangkut, butak do ai.

¹⁶ Anjaha barang ise na manjamah i ladang sada halak na matei binahen ni podang barang bangkei ni sada jolma barang holiholi ni sada jolma barang sada tanoman, maningon butak ia pitu ari dokahni.

¹⁷ Maningon buaton ni sidea do bani jolma na butak ai humbani abuan ni galangan pardousaon na dob tinutung ai, anjaha tambahkononkon hujai sada guri-guri bah na mardalan.

¹⁸ Dob ai buaton ni sada dalahi na pansing ma hisop anjaha isornopkon ma ai hubagas bah ai, anjaha ipispiskon ma ai hubani lampolampo ai pakon bani ganup parugas ampa jolma na ibagas ai, pakon hubani jolma na manjamah holiholi ni na matei barang halak na binunuh, barang bangkei barang tanoman;

¹⁹ maningon pispison ni halak na susi ai do halak na butak ai bani ari patoluhon pakon papituhon, anjaha bani ari papituhon maningon urasonni do ia humbani dousani, anjaha taptaponni ma pakeanni anjaha maridi ia ibagas bah, gabe pansing ma ia bodari.

²⁰ Tapi barang ise halak na butak, hape lang ra ia manguras dirini humbani dousa, maningon siapkononkon do ia hun tengah-tengah ni kuria in, ai ianan hapansingon ni Jahowa do binutakanni ijai;

halani na so pinispiskon ai bah pangurasion ai bani, butak do ia.

²¹ Anjaha aturan na totap ma in sadokah ni dokahni bannima; jolma na mamispiskon bah pangurasion ai pe, maningon taptaponni do pakeanni; anjaha barang ise na manjamah bah pangurasion ai, maningon butak ia ronsi bodari.

²² Anjaha barang aha pe na jinamah ni halak na butak ai, maningon butak do ai, anjaha barang ise na manjamah na butak ai, maningon butak do ia ronsi bodari.”

Parmatei ni si Miryam

20 ¹ Dob ai das ma halak Israel, ganup tumpuan ai tene hu halimisan Sin bani bulan sada, anjaha marsaran ma bangsa ai i Kades; matei ma si Miryam ijai, lanjar itanom ijai.

Dousa ni si Musa pakon si Aron

² Dob ai hurangan bah ma tumpuan ai, jadi rongom ma sidea roh marayak si Musa pakon si Aron.

³ Ipungkah bangsa ai ma partinggilan dompak si Musa, nini sidea ma, “Ambit rotap ma namin hosahnami sanggah na matei saninanami i lobei ni Jahowa.

⁴ Mase ma arah-arahonnima kuria ni Jahowa hu halimisan on, ase matei hanami ijon rap pakon pinahannami?

⁵ Anjaha mase ma arahkononnima hanami tangkog hun Masir, laho mamboan hanami bani ianan na masambor on? Seng dong ijon gandum, hayu ara barang hayu anggur barang hayu dalima; gari bah inumon seng dong jumpah.”

⁶ Dob ai laho ma si Musa pakon si Aron hun lobei ni kuria ai, hu labah ni lampolampo partumpuan ai, anjaha marrogop ma sidea. Dob ai taridah ma hamuliaon ni Jahowa bani sidea.

⁷ Dob ai nini Jahowa ma hubani si Musa,

⁸ “Buat ma tungkot ai, patumpu ma kuria in, ho pakon abangmu si Aron, dob ai parsahapkon hanima ma dolog batu ai, i lobei ni mata ni sidea, ase ibere bahni; sonai ma paluaronmu bah hun dolog batu ai hubani sidea; sonai ma bereonmu minum kuria in pakon pinahanni.”

⁹ Dob ai ibuat si Musa ma tungkot ai hun lobei ni Jahowa, songon na tinonahkonni ai hu bani.

¹⁰ Ipatumpu si Musa pakon si Aron ma kuria in hu lobei ni dolog batu ai, anjaha nini ma hubani sidea, “Bogei ma, nasiam sipanggeori! Tarpaluar do bah bani nasiam hun dolog batu on?”

¹¹ Dob ai ipagostong si Musa ma tanganni anjaha ibogbog ma dolog batu ai marhitei tungkotni ai dua hali; jadi luar ma bah buei tumang, gabe minum ma kuria ai ampa pinahanni.

¹² Dob ai nini Jahowa ma hubani si Musa pakon hubani si Aron, “Halani na so porsaya ai hanima

Bangku, laho papansingkon Ahu namin i lobei ni halak Israel, halani ai seng be hanima mangarahkon kuria on das hu tanoh, na dob Hulayak-layakkon bani sidea namin.”

¹³ Ai ma Bah Meriba, halani ijai itinggili halak Israel Jahowa, anjaha la papansing diri-Ni i tongah-tongah ni sidea.

Lang Ilopas Halak Edom Sidea Mamontas hun Tanoh ni Sidea

¹⁴ Dob ai isuruh si Musa ma suruhanni hun Kades marayak raja ni halak Edom, “Sonon do hata ni anggimu halak Israel, ‘Ibotoh ham do ganup sitaronon na idagei hanami;

¹⁵ sonaha ompungnami tuad hu tanoh Masir, anjaha hanami dokah marianan i tanoh Masir, anjaha bajan do pangarsik-arsik ni halak Masir bennami pakon bani ompungnami.’

¹⁶ Jadi doruh-doruh ma hanami bani Jahowa, gabe itangar ma soranami, anjaha isuruh sada malekat, anjaha iarahkon ma hanami luar hun Masir; anjaha tonggor ma, domma i Kades hanami nuan, sada huta bani parbalogan ni tanohmu.

¹⁷ Mahua palopas ham ma hanami mamontas hun nagorimu. Lang pe hanami mardalan hun ladang barang pohon anggurmu, anjaha lang pe iinum hanami bah hun parigi; dalan na bolon in pe idalani hanami, lang pe manirpang hanami hu siamun

barang hu sambilou, paima salpu ibontas hanami nagorimu.”

¹⁸ Tapi nini raja ni Edom ma hu bani, “Seng bulih bontasonmu nagoringku, ase ulang luar ahu mangimbang ho marhasoman podang.”

¹⁹ Dob ai nini halak Israel ma hu bani, “Dalan na bolon in pe dalanannami, anjaha anggo iinum hanami humbani bahmu, hanami pakon pinahannami, igalar hanami pe in; pitah mamontas, mardalan nahei do hanami, seng dong na legan.”

²⁰ Tapi nini ma, “Seng bulih bontasonmu!” Anjaha luar ma raja ni Edom mangolat sidea rap pakon buei balani ni gopas marsinjata.

²¹ Ase sonai ma pangengkar ni raja ni Edom palopas halak Israel mamontas hun nagorini, jadi manlembang ma halak Israel manlembangisi.

Parmatei ni si Aron

²² Dob ai bingkat ma sidea hun Kades, gabe das ma ganup kuria ni halak Israel hu Dolog Hor.

²³ Dob ai nini Jahowa ma hubani si Musa pakon hubani si Aron, i bona ni Dolog Hor, bani parbalogan ni tanoh Edom,

²⁴ “Patumpuon ma anggo si Aron hubani bangsani, seng bulih ia masuk hu tanoh, na dob Hubere bani halak Israel, halani na ilanggar hanima hatang-Ku i lambung ni Bah Meriba.

²⁵ Arahkon ma si Aron pakon si Eleasar, anakni ai, anjaha bobanon ma sidea tangkog hu Dolog Hor;

²⁶ tanggali ma pakeanni ai humbani si Aron, anjaha sorungkon ma ai hubani si Eleasar, anakni ai; patumpuon ma si Aron hubani bangsani anjaha matei ijai.”

²⁷ Jadi ibahen si Musa ma songon na tinonahkon ni Jahowa, tangkog ma sidea hu Dolog Hor, ituludkon ganup na sakuria ai.

²⁸ Dob ai itanggali si Musa ma pakean ai humbani si Aron, anjaha isorungkon ma ai hubani si Eleasar, anakni ai; jadi matei ijai ma si Aron i pakpak ni dolog ai. Dob ai tuad ma si Musa pakon si Eleasar hun dolog ai.

²⁹ Jadi dob ididah ganup kuria ai na dob matei do hape si Aron, gabe itangisi ganup ginompar ni halak Israel ma si Aron, tolu puluh ari dokahni.

Parporangan Dohorhon Horma

21 ¹ Jadi dob ibogei si Arad, raja ni halak Kanaan, na marianan i tanoh dangsina, na dob roh halak Israel hun dalan na hun Atarim, gabe iporang ma halak Israel, pala itaban deba humbani sidea.

² Dob ai marbagah-bagah ma halak Israel hubani Jahowa, “Anggo iondoskon Ham bangsa on hubagas tanganku, sai siapkononku do sagala huta ni sidea ai.”

³ Jadi ibalosi Jahowa ma sora ni halak Israel, iondoskon ma halak Kanaan ai hubani sidea, gabe isiapkon halak Israel ma sidea, ronsi huta ni sidea, anjaha ibaen ma goran ni huta ai Horma.

Ulog Tombaga

⁴ Jadi bingkat ma sidea hun Dolog Hor, laho dompak Laut Sigerger, sihol manginggoti nagori ni halak Edom; gabe lang sabar be bangsa ai i tengah dalan.

⁵ Dob ai marungut-ungut ma bangsa ai hubani Naibata pakon hubani si Musa, “Mase ma arahkonon-Mu hanami tangkog hun Masir, ase matei hanami i halimisan on? Ai seng dong ruti barang bah ijon, ai domma maginei-ginei uhurnami mangidah ruti na magoyak-goyak on.”

⁶ Dob ai isuruh Jahowa ma hu tengah-tengah ni bangsa ai ulog darih, na mamaguti bangsa ai, gabe marmateian ma buei humbani halak Israel.

⁷ Dob ai roh bei ma bangsa ai marayak si Musa anjaha nini ma, “Domma mardousa hanami dompak Jahowa pakon bamu, martonggo ma ham hubani Jahowa, ase ipadaoh hun bennami ulog darih on.” Jadi martonggo ma si Musa mangapiti bangsa ai.

⁸ Dob ai nini Jahowa ma hubani si Musa, “Pauli ma sada ulog darih, anjaha nahkon ma ai bani sada tiang, jadi anggo adong barang ise na pinagut ni

ulog ai anjaha mangkawah hujai, jadi manggoluh ma ia.”

⁹ Dob ai ipauli si Musa ma sada ulog humbani tombaga, anjaha inahkon ma ai hubani sada tiang, jadi anggo adong barang ise na pinagut ni ulog ai, anjaha itonggor dampak ulog tombaga ai, jadi manggoluh ma ia.

Pardalanan Das hu Ladang ni Moab

¹⁰ Dob ai bingkat ma halak Israel hunjai anjaha marsaran ma sidea i Obot.

¹¹ Dob ai bingkat ma use sidea hun Obot anjaha marsaran i Iye Abarim, i halimisan tontang ni Moab, hampit hapoltakan.

¹² Bingkat ma use sidea hunjai, anjaha marsaran ma sidea i habungan Sared.

¹³ Bingkat ma use sidea hunjai anjaha marsaran ma i dipar ni Bah Arnon, na i halimisan, na marsumbul i nagori ni halak Amori, na gabe parbalogan ni Moab pakon Amori.

¹⁴ Halani ai do ase tarsurat ibagas buku porang ni Jahowa, “Wahab i Supa pakon habungan ni Arnon,

¹⁵ pakon raboyon ni habungan, na ampar ronsi ianan ni Ar, anjaha mangunsandei bani parbalogan ni Moab.”

¹⁶ Bingkat ma use sidea hunjai hu Beer, ai ma parigi na hinatahon ni Jahowa hubani si Musa, “Patumpu

ma bangsa in, ase Hubere bah inumon hubani sidea.

¹⁷ Ijia ma idodingkon halak Israel doding on, ‘Sirnip ma ho, alo parigi! Dodingkon ma in marsibalos-balosan!’

¹⁸ Parigi na hinurak ni sagala kopala, na pinungkor ni na sangap ni bangsa in marhitei tungkot ni sidea. Dob ai bingkat ma use sidea hun halimisan ai hu Matana,

¹⁹ hun Matana hu Nahaliel, hun Nahaliel hu Bamot,

²⁰ hun Bamot hu habungan na i ladang ni Moab, na patontang pakon pakpak ni Pisga, panatapan hampit halimisan.”

Hamonangan Maralohon Raja Sihon

²¹ Dob ai isuruh Israel ma suruhanni marayak si Sihon, raja ni halak Amori, nini ma,

²² “Mahua palopas ham ma ahu mamontas hun tanohmu, lang pe manlembang hanami hu ladang barang hu pohon anggur; lang pe iinum hanami bah ni parigi, dalan na bolon in pe idalani hanami paima salpu ibontas hanami nagorimu.”

²³ Tapi seng ipalopas si Sihon halak Israel mamontas hun nagori ni sidea. Ipatumpu ma ganup bangsani, anjaha luar ma mangimbang Israel hu halimisan, anjaha dob das hu Jahas, iporang ma halak Israel.

²⁴ Tapi italuhon Israel do ia marhitei mata ni podang, anjaha isoluk ma nagorini singgan ni Arnon

ronsi Jabok, das hubani halak Amon, ai toguh do parbalogan ni halak Amon.

²⁵ Italuhon Israel ma ganup huta ai, anjaha marianan ma Israel i huta ni halak Amori, i Hesbon pakon ganup dusunni inggot.

²⁶ Ai Hesbon do huta ni si Sihon, raja ni halak Amori, na dob mamorang raja ni halak Moab, anjaha na dob mangayob ganup tanohni hun tanganni das hu Arnon.

²⁷ Halani ai do ase ihatahon pandoding parumpasa, “Roh ma hu Hesbon, gabe pinauli anjaha pinatoguh ma huta ni si Sihon.

²⁸ Ai apuy do luar hun Hesbon, dilah ni apuy hun huta ni si Sihon. Ai ma na mamboiskon Ar i Moab, pangisi ni tanoh Dolog Arnon na i topini.

²⁹ Hona papa ma ho Moab! Magou ma ho, alo halak Kamos! Domma ibahen anakni gabe sidakdakan ni munsuh, anjaha boruni taban-taban bani si Sihon, raja ni halak Amori.

³⁰ Domma itembaki hanami sidea, magou do Hesbon das hu Dibon; domma iparseda hanami ai das hu Noya, pala ronsi Medeba marhitei apuy.”

Hamonangan Marimbang si Og, Raja ni Basan

³¹ Jadi marianan ma halak Israel i tanoh ni halak Amori.

³² Dob ai isuruh si Musa ma na mangkahapi Jaeser; ipatunduk sidea ma ai ampa sagala dusunni, anjaha iusir ma halak Amori na marianan ijai.

³³ Dob ai marhusor ma sidea anjaha tangkog mardalan hu Basan; jadi luar ma si Og, raja ni Basan, manjumpahkon sidea, mambobahon ganup bangsani laho marporang i Edrei.

³⁴ Nini Jahowa ma hubani si Musa, “Ulang ho mabiar mangidahsi, ai domma Huondoskon ia hubagas tanganmu pakon bangsani ronsi nagorini; bahen ma bani songon na dob binahenmu hubani si Sihon, raja ni halak Amori, na marianan i Hesbon.”

³⁵ Jadi ipatunduk sidea ma ia pakon anakni ampa ganup bangsani, sahalak pe lang dong tading bani, anjaha isoluk sidea ma tanoh ni ai.

Mangengkar si Bileam Mangirikkon Suruhan ni Raja Balak

22 ¹ Dob ai bingkat ma halak Israel anjaha marsaran ma sidea bani pamah ni Moab, i dipar ni Jordan, tontang ni Jeriko.

² Jadi dob ididah si Balak, anak ni si Zippor, haganup na dob binahen ni halak Israel hubani halak Amori,
³ gobir tumang ma Moab dompak bangsa ai, halani buei ni sidea; mabiar ma Moab halani halak Israel ai.

⁴ Dob ai nini Moab ma hubani pangintuai ni Midian, “Bois ma dilaton ni tumpuan ai haganup na inggot

banta, songon pandilat ni lembu jonggi bani poyon-poyon na i ladang. Si Balak, anak ni si Zippor do ijia raja i Moab.”

⁵ Dob ai isuruh ma suruhanni marayak si Bileam, anak ni si Beor, hu Petor, na bani Bah Eprat, hu tanoh ni anak ni bangsani, laho mandilos, nini ma, “Tonggor ma, domma luar sada bangsa hun Masir; domma irongkob ganup tanoh in, domma marsaran sidea patontang pakon ahu.

⁶ On pe, roh ma ho, papai ma bangku bangsa on, ai gogohan do sidea ase ahu; ra tartaluhon ahu do bangsa in anjaha tarusir ahu sidea hun tanoh on; ai hubotoh do barang ise na pinasu-pasumu dapotan pasu-pasu do, anjaha barang ise na pinapaanmu hona papa do.”

⁷ Jadi laho ma kopala ni Moab pakon kopala ni Midian rap pakon upah partondungon ibagas tangan ni sidea; das ma sidea hubani huta ni si Bileam, anjaha ipadas sidea ma bani hata ni si Balak.

⁸ Dob ai nini ma hubani sidea, “Marborngin ma nasiam ijon saborngin on, ase hubere balos hubani nasiam, marguru hubani na hinatahon ni Jahowa bangku; jadi tading ma kopala ni Moab rap pakon si Bileam.”

⁹ Dob ai roh ma Naibata marayak si Bileam, nini ma, “Ise do halak on na rap pakon ho?”

¹⁰ Nini si Bileam ma hubani Naibata, “Si Balak, anak ni si Zippor, raja ni Moab, na marsuruh ai bangku, mangkatahon,

¹¹ ‘Tonggor ma, domma luar sada bangsa hun tanoh Masir anjaha irongkob ganup tanoh in; on pe roh ma, papai ma sidea bangku; ra tolap do ahu mamorang sidea ampa mangusir sidea.’”

¹² Tapi nini Naibata ma hubani si Bileam, “Seng bulih laho ho rap pakon sidea anjaha seng bulih papaanmu bangsa in, ai na pinasu-pasu do sidea.”

¹³ Dob ai girah ma si Bileam puho patarni ai, anjaha nini ma hubani raja paidua ni si Balak, “Mulak ma nasiam hu tanoh nasiam, ai manjua do Jahowa manlopas ahu laho rap pakon nasiam.”

¹⁴ Dob ai bingkat ma kopala-kopala ni Moab, anjaha das ma sidea hubani si Balak, nini ma, “Manjua do si Bileam mardalan odor pakon hanami.”

¹⁵ Iulaki si Balak ma use marsuruh kopala-kopala bueinan anjaha sangapan ase na parlobei ai.

¹⁶ Jadi dob das sidea hubani si Bileam, nini sidea ma bani, “Sonon do hata ni si Balak, anak ni si Zippor, ‘Sai ulang ma ho ra langlangan mardalan marayak ahu,

¹⁷ ai sai na marsangap tumang do ho bahenonku, anjaha barang aha pe sihatahononmu hu bangku, sai bahenonku do in. Antong, sai roh ma ho, anjaha papai ma bangku bangsa on.’”

¹⁸ Tapi nini si Bileam ma mambalosi juakjuak ni si Balak, “Porini pe gok rumahni pirak pakon omas ibere si Balak bangku, seng tarlanggar ahu hata ni Jahowa, Naibatangku, laho mangkorjahon pahara na etek barang na banggal.

¹⁹ On pe, ijon ma nasiam saborngin on, ase hubotoh, atap aha pe hata ni Jahowa bangku.”

²⁰ Dob ai roh ma Naibata bornginni ai marayak si Bileam, anjaha nini ma hu bani, “Halani na dob roh halak in marayak ho, laho ma ho mardalan odor pakon sidea; tapi pitah na Huhatahon bam, ai do na bulih bahenonmu.”

Si Bileam Laho Marayak si Balak

²¹ Patarni ai puho ma si Bileam, anjaha ipalanai ma halode boru-boruni, anjaha laho ma ia rap pakon kopala-kopala ni Moab.

²² Tapi gajak ma ringis ni Jahowa halani na laho ai ia; anjaha jongjong ma malekat ni Jahowa i tongah dalan sihol mangolatsi. Tapi ajak do ia bani halodeni, anjaha dua halak jabolonni mangkasomanisi.

²³ Dob ai ididah halode ai ma malekat ni Jahowa jongjong i tongah dalan pakon podang na sintak ibagas tanganni, jadi manlembang ma halode ai hun dalan laho hu ladang, tapi ilonsingi si Bileam ma halode ai paulakkon hu dalan ai namin.

²⁴ Dob ai jongjong ma malekat ni Jahowa bani dalan na i holangkolang ni pohon anggur ai, anjaha parik do angkup.

²⁵ Jadi dob ididah halode ai malekat ni Jahowa, ihapitkon ma ia hu parik ai, gabe magusgus ma nahei ni si Bileam hu parik ai; jadi inunut ma manlonsingi halode ai.

²⁶ Dob ai mardalan ma malekat ni Jahowa hu lobeihon laho jongjong bani ianan na sompit tumang, seng dong dalan parhusoranni hu siamun barang hu sambilou.

²⁷ Dob ididah halode ai malekat ni Jahowa, gompang ma ia i toruh ni si Bileam; jadi roh ma ringis ni si Bileam, gabe ilonsingi ma halode ai bani tungkotni.

²⁸ Ibuha Jahowa ma babah ni halode ai, gabe nini ma hubani si Bileam, "Aha hubahen bamu, ase ilonsingi ham ahu domma pala tolu hali?"

²⁹ Dob ai nini si Bileam ma hubani halode ai, "Halani na iparguro-gurohonmin ahu; ambit adong podang i tanganku, maningon bunuhonku do ho sonari."

³⁰ Nini halode ai ma mambalosi si Bileam, "Ai lang ahu do namin halodemu, na dob niajakmu sadokah ham manggoluh ronsi sadari on? Ai somal do ahu mambahen sonin bamu?" nini si Bileam ma, "Lang namin."

³¹ Dob ai ipatonggor Jahowa ma mata ni si Bileam, jadi ididah ma malekat ni Jahowa jongjong i

tongah dalam manjolom podang na sinintak ibagas tanganni; jadi ipaunduk si Bileam ma uluni, lanjar marrogop ma ia marsombah.

³² Nini malekat ni Jahowa ai ma bani, “Mase ma ilonsingi ho halodemin, domma pala tolu hali? Tonggor ma, Ahu do na luar mangimbang ho, ai salah do na nilangkahkanmin;

³³ ididah halode in do Ahu, gabe manlembang hun lobei-Hu pala tolu hali. Ambit lang manambil ia hun lobei-Hu, domma Hubunuh ho, tapi anggo halode ai pagoluhon-Ku do.”

³⁴ Dob ai nini si Bileam ma hubani malekat ni Jahowa, “Domma mardousa ahu, ai lang na hubotoh ham jongjong i tongah dalam sihol mangolat ahu. On pe, anggo na bajan do on ninuhurmu, age mulak ahu.”

³⁵ Dob ai nini malekat ni Jahowa ma hubani si Bileam, “Laho ma ho rap pakon ganup dalahi in; tapi pitah hata na huhatahon bam, ai do hatahononmu.” Jadi laho ma si Bileam rap pakon gamot-gamot ni si Balak

Panjalo ni Raja Balak bani si Bileam

³⁶ Jadi dob ibogei si Balak na dob roh si Bileam, luar ma ia mangalo-alosi das hu Ir-Moab, na martopihon Arnon, bani parbalogan ni tanohni.

³⁷ Dob ai nini si Balak ma hubani si Bileam, “Ai lang domma husuruh suruhanku marayak ham

laho mangalopi ham namin? Mase ma lang mintor roh ham hu bangku? Na so tolap do gakni ahu pasangapon ham?”

³⁸ Dob ai nini si Bileam ma mambalosi si Balak, “Tonggor ma, domma roh ahu marayak ham! On pe, mintor tarbahren ahu ma mangkatahon barang aha? Hata na ninahkon ni Naibata hubagas pamanganku, ai do na maningon hatahononku.”

³⁹ Dob ai laho ma si Bileam rap pakon si Balak, gabe das ma sidea hu Kiriati-Huzot.

⁴⁰ Dob ai igalangkon si Balak ma lombu pakon biribiri, anjaha itongoskon ma hunjai parbagianan ni si Bileam pakon kopala-kopala na rap pakonsi.

⁴¹ Jadi patarni ai, iarahkon si Balak ma si Bileam tangkog hu Bamot-Baal, anjaha hunjai ma itatap deba humbani bangsa ai.

Panjahaion ni si Bileam na Parlobei Pasal Israel

23 ¹ Dob ai nini si Bileam ma hubani si Balak, “Pajongjong ma bangku ijon pitu anjapanjap, anjaha pasirsir ma bangku ijon pitu lombu pakon pitu biribiri tunggal.”

² Jadi ibahren si Balak ma romban hubani hata ni si Bileam; jadi igalangkon si Balak pakon si Bileam ma sada lombu pakon sada biribiri tunggal i atasni ganup anjapanjap ai.

³ Dob ai nini si Bileam ma hubani si Balak, “Padohor ma jongjong hulambung ni galangan situtungon in,

ase laho ahu, andohar ialo-alo Jahowa ahu; anjaha hata na ija pinatar-Ni bangku, ai do patugahonku bamu.” Dob ai laho ma ia hu sada buntu-buntu na leseng.

⁴ Dob ai pajumpah ma Naibata pakon si Bileam, jadi nini si Bileam ma, “Domma pala hupajongjong pitu anjapanjap anjaha hugalangkon sada lombu pakon sada biribiri tunggal bani ganup anjapanjap ai.”

⁵ Dob ai inahkon Jahowa ma sada hata hu pamangan ni si Bileam, anjaha nini ma, “Mulak ma ho hubani si Balak, anjaha sonon do hatahononmu.”

⁶ Jadi dob mulak ia hubani raja ai, tonggor ma, jongjong ope ia i lambung ni galangan situtungan ai rap pakon ganup kopala-kopala ni Moab.

⁷ Dob ai ipungkah si Bileam ma marsahap, nini ma, “Hun Aram ialopi si Balak, raja ni Moab ahu, humbani dolog na hampit hapoltakan, ‘Roh ma ham, burai ma si Jakob bangku, roh ma ham, papai ma Israel!’

⁸ Naha ma tarbuari ahu na so binuraan ni Naibata? Naha ma tarpapai ahu na so pinapaan ni Naibata?

⁹ Ai hun pakpak ni dolog huidah ia, hun buntu-buntu hutatap ia. Tonggor ma, sada bangsa na pulou marianan, anjaha na so masuk bilangan i tongah-tongah ni bangsa sipajuh begu-begu.

¹⁰ Ise ma na boi mamilangi orbuk ni Jakob, barang na marribu-ribu humbani Israel? Songon parmatei

ni parpintor ma namin parmateihu, anjaha ajalhu songon ajalni ai ma namin.”

¹¹ Dob ai nini si Balak ma hubani si Bileam, “Ai aha do na binahenmu on bangku? Laho mamurai munsuhku do mambahen na husuruh mangalopi ham, hape tonggor ma, sai inunut ham do mamasu-masu sidea.”

¹² Nini si Bileam ma mambalosi, “Ai lang maningon dingaton ni uhurhu do hata na ninahkon ni Jahowa hubagas pamanganku laho mangkatahon?”

Panjahaionni na Paduahon

¹³ Dob ai nini si Balak ma hu bani, “Eta ma hita laho bani ianan na legan, ase boi tataponmu sidea hunjai; pitah sidohoranni ope humbani sidea na nididahmu ai, seng ganup sidea ope na nididahmu ai; jadi burai ham ma sidea bangku hunjai.”

¹⁴ Dob ai iarahkon ma ia hu ladang Zofrim, hu pakpak ni Pisga, anjaha ipajongjong ma use pitu anjapanjap, anjaha igalangkon sada lombu pakon sada biribiri tunggal bani ganup anjapanjap ai.

¹⁵ Nini si Bileam ma hubani si Balak, “Padohor ham ma jongjong hujon, hu lambung ni galangan situtungan on, laho ma anggo ahu hujai mangalo-alo Jahowa.”

¹⁶ Dob ai pajumpah ma Jahowa pakon si Bileam, anjaha inahkon ma hata-Ni hubagas pamanganni,

anjaha nini ma, “Mulak ma ho hubani si Balak anjaha sonon do hatahononmu.”

¹⁷ Dob ai mulak ma ia hu bani, anjaha tonggor ma, jongjong ope ia i lambung ni galangan situtungonni ai rap pakon kopala-kopala ni Moab. Nini si Balak ma hu bani, “Aha do na hinatahon ni Jahowa?”

¹⁸ Dob ai ipungkah ma mangkatahon hatani, nini ma, “Jongjong ma ham, alo Balak, anjaha tonggor ma; patarei ma pinggolmu bangku, ham alo anak ni si Zippor.

¹⁹ Anggo Naibata sedojolma na ra marladung, barang anak nijolma na ra manolsoli dirini. Mintor hatahonon-Ni ma, lang bahenon-Ni sonai?

²⁰ Tonggor ma, domma iparentahkon ahu mamasmu, mintor naha ma tarbahen ahu manlanglangi, anggo domma la mamasmu?

²¹ Seng dong ididah hajahaton bani Jakob, anjaha seng dong hangaluton ididah bani Israel. Jahowa Naibatani do hasomanni, anjaha surak-surak ni sada raja do i tengah-tengahni.

²² Domma iarahkon Naibata sidea luar hun Masir, anjaha songon tanduk ni badak do in bani sidea.

²³ Ai seng marguna partabason mangimbang Jakob, anjaha lang marguna partondungan mangimbang Israel. Hatahononkon do bani panorangni hubani Jakob pakon hubani Israel, ‘Banggal ni in pambahenan ni Naibata.’

²⁴ Tonggor ma, jongjong do bangsa ai songon singa boru-boru, anjaha padirgakonni dirini songon singa tunggal. Seng anjai manggompang ia, anggo lang lobei mangankon sorohan, anjaha isobur daroh ni na binunuhni.”

²⁵ Dob ai nini si Balak ma hubani si Bileam, “Anggo na so tarbahen ham do mamurai sidea, ulang ma sai nunut mamasu-masu sidea.”

²⁶ Nini si Bileam ma mambalosi si Balak, “Ai lang domma huhatahon bamu: Sagala na hinatahon ni Naibata, ai do sibahenonku.”

²⁷ Dob ai nini si Balak ma hubani si Bileam, “Eta ma, ase hubobahon ham bani ianan na legan, ra marosuh do Naibata buraanmu sidea bangku hunjai.”

²⁸ Jadi iarahkon si Balak ma si Bileam hu pakpak ni Peor, ai ma panatapan halimisan.

²⁹ Dob ai nini si Bileam ma hubani si Balak, “Pajongjong ma bangku ijon pitu anjapanjap anjaha pasirsir pitu lembu pakon pitu biribiri tunggal.”

³⁰ Jadi ibahen si Balak ma romban hubani hata ni si Bileam, gabe igalangkon ma sada lembu pakon sada biribiri tunggal bani ganup anjapanjap ai.

Panjahaion ni si Bileam Patoluhalihon Pasal Israel

24 ¹ Jadi dob ididah si Bileam, rosuh do uhur ni Jahowa mamasu-masu Israel, seng laho be ia, songon bani panorang na i lobei ni on,

mangindahi partanda, tapi idompakkon ma bohini hu halimisan.

² Dob ai mangkawah ma si Bileam, gabe ididah ma Israel marlampolampo mar sasamarga. Jadi sogop ma Tonduy ni Naibata hu bani,

³ anjaha ipungkah ma parsahapanni, nini ma, “On ma pangungkabon humbani si Bileam, anak ni si Beor, pangungkabon ni dalahi na dob tonggor matani,

⁴ pangungkabon ni jolma na dob somal mambogei hata ni Naibata, na dob mangidah panonggoran humbani Pargogoh Na So Tarimbang, jolma na madabuh tangkob, tapi gabe marbuha matani.

⁵ Jengesni in lampolampomu in, alo Jakob, sagala iananmu, alo Israel!

⁶ Songon habungan na daoh mangampar, songon pohon i topi ni bah banggal, songon haloe na sinuan ni Naibata, songon hayu ares i topi ni bah.

⁷ Sai tong do mambaor bah hun tahu-tahuni, na tinidahkonni marsulei-sulei bani bah; timbulan do rajani humbani si Agag, anjaha marmulia tumang harajaonni.

⁸ Naibata do na mambobahonsi luar hun Masir, anjaha songon tanduk ni badak do in bani. Bois do panganonni bangsa sipajuh-begu-begu, imbangni ai, anjaha ropukonni holiholi ni sidea, anjaha tolpusonni sidea marhitei panahni.

⁹ Marrogop anjaha manggompang do ia songon singa tunggal anjaha songon singa boru-boru; ise na pag mamuhoisi? Dapotan pasu-pasu ma barang ise na mamasu-masu ho, anjaha hona papa ma barang ise na mamapai ho.”

Panjahaion na Legan

¹⁰ Jadi nahit ma ringis ni si Balak dompak si Bileam, pala ipatopap-topap tanganni; nini si Balak ma hubani si Bileam, “Laho mamurai munsuhku do ham namin ase hudilo, hape tonggor ma, sai inunut ham do mamasu-masu sidea, domma pala tolu hali.

¹¹ On pe podas ma ham maporus mulak bani iananmu hinan. Domma huhatahon, ‘Sai marmulia tumang do bahenonku ham, tapi domma iolat Jahowa hamuliaon hun bamu.”

¹² Jadi nini si Bileam ma hubani si Balak, “Ai lang domma huhatahon hinan age hubani suruhanmu, na sinuruhmu hu bangku:

¹³ Age pe gok rumahni pirak pakon omas ibere si Balak hu bangku, seng tarlanggar ahu hata ni Jahowa, laho mambahen na madear atap na masambor humbani uhur-uhurhu sandiri; barang aha na hinatahon ni Jahowa, maningon ai do hatahononku.

¹⁴ On pe, tonggor ma, na laho ma ahu mulak hubani bangsangku; halani ai, patugahonku ma

bamu pasal aha na sihol bahenon ni bangsa on hubani bangsamu bani panorang na sihol roh.”

¹⁵ Dob ai ipungkah ma mangkatahon parsahapanni, nini ma, “On ma pangungkabon ni si Bileam, anak ni si Beor, pangungkabon ni na dob tonggor matani,

¹⁶ pangungkabon nijolma na dob somal mambogei hata ni Naibata, anjaha na mambotoh pingkiran ni Sitimbulan, na mangidah panonggoran humbani Pargogoh Na So Tarimbang, jolma na dob dabuh tangkob, tapi gabe marbuha matani.

¹⁷ Sai idahonku do la, tapi lang ope anggo nuan; sai tataponku do la, tapi lang ope anggo dohor. Poltak do sada bintang humbani si Jakob anjaha timbul do sada tungkot harajaon humbani Israel; rosakkonon-Ni do pardompakan ni Moab, anjaha ropukon-Ni do ganup ginompar ni si Set.

¹⁸ Solukon-Ni ma Edom, anjaha Seir pe, munsuh-Ni ai, solukon-Ni do, anjaha lambin markuasa ma anggo Israel.

¹⁹ Marhitei humbani si Jakob do dalankononkon panrajaion, anjaha siapkononkon na maporus humbani huta-huta.”

²⁰ Jadi dob ikawahkon halak Amalek, ipungkah ma parsahapanni, nini ma, “Parlobei i tengah-tengah ni bangsa sipajuh begu-begu do namin Amalek, tapi dobni magou do ia.”

²¹ Jadi dob ikawahkon halak Keni, ipungkah ma parsahapanni, nini ma, “Toguh do namin iananmu anjaha ipajonam asarmu i atasni dolog batu,

²² tapi maningon siapkonon do Keni. Sadiha dokah nari ase boanon ni Assur ho hu habuangan?”

²³ Dob ai ipungkah ma parsahapanni, nini ma, “Aih, ise ma na tarbahen manggoluh, anggo ipamasa Naibata na sonai?”

²⁴ Tapi na roh ma kapal hun pasir ni Kittim, anjaha patundukon-Ni ma Assur pakon Heber; tapi ai pe maningon magou do.

²⁵ Dob ai bingkat ma si Bileam, mulak hubani iananni hinan; si Balak pe idalani ma dalanni.

Hona Uhum Halak Israel Halani Parnaibata Sileganon ni Sidea

25 ¹ Sanggah na marianan halak Israel i Sittim, ipungkah bangsa ai ma marriah-riah pakon boru ni halak Moab,

² ai ma na mangontang bangsa ai hu panggalangan ni naibata ni sidea; jadi mangan ma bangsa ai anjaha marsombah hubani naibata ni sidea.

³ Ase mararian ma halak Israel bani Baal-Peor, gabe gajag ma ringis ni Jahowa mangidah halak Israel.

⁴ Nini Jahowa ma hubani si Musa, “Tangkap ma ganup kopala ni bangsa in, anjaha gantungkon ma

sidea bani na talar i lobei ni Jahowa, ase andohar mahombun ringis ni Jahowa hubani Israel.”

⁵ Dob ai nini si Musa ma hubani panguhum ni Israel, “Ganup ma nasiam mamunuh halak na mararihan hubani Baal-Peor.

⁶ Anjaha tonggor ma, roh ma sahalak humbani halak Israel, mamboan hubani saninani, sada boru Midian, ibagas pangidah ni si Musa pakon ibagas pangidah ni ganup kuria ni halak Israel, sanggah na tangis-tangis sidea i lobei ni labah ni lampolampo partumpuan ai.”

⁷ Tapi dob ididah si Pinehas anak ni si Eleasar, anak ni Malim Aron ai, jongjong ma ia anjaha laho hun tongah-tongah ni kuria ai manjolom sada tanja ibagas tanganni.

⁸ Irikkon ma halak Israel ai masuk hubagas kamar podoman anjaha itobak ma sidea haduasi, dalahi halak Israel ai pakon puang-puang ai, sangkan bani boltok ni sidea. Jadi tongkin ni ai maronti ma sampar ai humbani halak Israel.

⁹ Anjaha buei ni na matei binahen ni sampar ai dua puluh ompat ribu halak do.

¹⁰ Dob ai nini Jahowa ma hubani si Musa,

¹¹ “Ia si Pinehas, anak ni si Eleasar, anak ni Malim Aron, domma ipahombun ringis-Hu mangidah halak Israel, halani na sinimburuhonni simburung-Ku i tongah-tongah ni sidea, mambahen lang siap hubahen halak Israel ibagas ringis-Hu.

¹² Halani ai hatahon ma, ‘Tonggor ma, bereon-Ku ma bani padan hadameion-Ku.’

¹³ Maningon ia do ampa ginomparni i pudini jujungan ni padan hamalimon sadokah ni dokahni, halani na sinimburuhonni parkara ni Naibatani, anjaha ibahen pardearan bani halak Israel.

¹⁴ Ia goran ni dalahi hun Israel, na binunuhni ai rap pakon boru Midian ai, ai ma si Simri, anak ni si Salu, sada kopala ni marga Simeon.

¹⁵ Anjaha goran ni boru Midian ai, na matei binunuh ai, ai ma si Kosbi, boru ni si Zur, sada pambobai ni sada marga ni halak Midian.”

Pambalason ni Israel bani Halak Midian

¹⁶ Dob ai nini Jahowa ma hubani si Musa,

¹⁷ “Porang hanima ma halak Midian anjaha taluhon ma sidea,

¹⁸ ai domma imunsuhi sidea hanima marhitei akal-akal ni sidea, bani na niakalan ni sidea hanima pasal Peor pakon pasal si Kosbi, botou ni sidea ai, boru ni pambobai ni halak Midian ai, na binunuh bani ari parragat ni sampar marhalanohon ni Peor ai.”

Pamilangon Paduahalihon bani Halak Israel

26 ¹ Dob maronti sampar ai, marsahap ma Jahowa hubani si Musa pakon hubani si Eleasar, anak ni Malim Aron, nini ma,

² “Suratkon ma bilangan ni ganup tumpuan ni halak Israel, singgan ni na marumur dua puluh tahun pakon lobih hunjai mar sasaompung, ganup dalahi na boi mangimbang munsuh.”

³ Dob ai marsahap ma si Musa pakon Malim Eleasar hubani sidea bani pamah Moab, i topi ni Jordan, tontang ni Jeriko, nini ma,

⁴ “Singgan ni na marumur dua puluh tahun pakon lobih hunjai, maningon bilangan do songon na tinonahkon ni Jahowa hubani si Musa. Halak Israel na dob luar hun tanoh Masir, ai ma:

⁵ Si Ruben, bunga tubuh ni Israel. Anak ni si Ruben, ai ma: Si Henok, marharorohan humbani do halak Henoki; si Palu, harorohan ni halak Palui;

⁶ si Herson, harorohan ni halak Hersoni; si Karmi harorohan ni halak Karmi.

⁷ Ai ma ginompar ni halak Ruben, anjaha bilangan ni sidea ompat puluh tolu ribu pitu ratus tolu puluh halak do bueini.

⁸ Ia anak ni si Palu, ai ma si Eliab.

⁹ Anak ni si Eliab ai ma: Si Nemuel, si Datan pakon si Abiram. Ai ma si Datan pakon si Abiram, na tardilo humbani kuria ai, na mambahen partinggilan dompak si Musa pakon si Aron i tongah-tongah ni halak na sapartahian pakon si Kora, sanggah na manjahati sidea dompak Jahowa.

¹⁰ Jadi ipangangang tanoh ai ma babahni, lanjar ibondut ma sidea rap pakon si Kora, sanggah na bois

ipangan apuy na dua ratus lima puluh halak ai, ase gabe panjoraan ma sidea.

¹¹ Tapi seng matei anggo anak ni si Kora.

¹² Anak ni si Simeon mar sasaompung: Si Nemuel, harorohan ni halak Nemueli; si Jamin, harorohan ni halak Jamini; si Jakim, harorohan ni halak Jakini;

¹³ si Serah, harorohan ni halak Serahi; si Saul, harorohan ni halak Sauli.

¹⁴ Ai ma ginompar ni halak Simeon, dua puluh dua ribu dua ratus halak bueini.

¹⁵ Anak ni si Gad mar sasaompung: Si Zefon, harorohan ni halak Zefoni; si Haggi, harorohan ni halak Haggi; si Suni, harorohan ni halak Suni;

¹⁶ si Osni, harorohan ni halak Osni; si Eri, harorohan ni halak Eri;

¹⁷ si Arod, harorohan ni halak Arodi; si Areli, harorohan ni halak Areli.

¹⁸ Ai ma ginompar ni halak Gad mangihutkon bilangan ni sidea, ompat puluh ribu lima ratus halak bueini.

¹⁹ Ia anak ni si Juda, ai ma: Si Er pakon si Onan; tapi matei do si Er pakon si Onan i tanoh Kanaan.

²⁰ Anak ni si Juda mar sasaompung: Si Sela, harorohan ni halak Selani; si Peres, harorohan ni halak Peresi; si Serah, harorohan ni halak Serahi.

²¹ Ia anak ni si Peres: Si Hesron, harorohan ni halak Hesroni; si Hamul, harorohan ni halak Hamuli.

²² Ai ma ginompar ni halak Juda mangihutkon bilangan ni sidea, pitu puluh onom ribu lima ratus halak bueini.

²³ Anak ni si Isasar mar sasaompung: Si Tola, harorohan ni halak Tolai; si Pua, harorohan ni halak Puai;

²⁴ si Jasub, harorohan ni halak Jasub; si Simron, harorohan ni halak Simroni.

²⁵ Ai ma ginompar ni halak Isasar mangihutkon bilangan ni sidea, onom puluh ompat ribu tolu ratus halak bueini.

²⁶ Anak ni si Sebulon mar sasaompung: Si Sered, harorohan ni halak Seredi; si Elon, harorohan ni halak Eloni; si Jahleel, harorohan ni halak Jahleeli.

²⁷ Ai ma ginompar ni halak Sebulon mangihutkon bilangan ni sidea, onom puluh ribu lima ratus halak bueini.

²⁸ Anak ni si Josep mar saompung: Si Manase pakon si Efraim.

²⁹ Anak ni si Manase: Si Mahir, harorohan ni halak Mahiri; si Mahir do homa bapa ni si Gilead, harorohan ni halak Gileadi.

³⁰ On do anak ni si Gilead: Si Jeser, harorohan ni halak Jeseri; si Helek, harorohan ni halak Heleki;

³¹ si Asriel, harorohan ni halak Asrieli; si Sikem, harorohan ni halak Sikemi;

³² si Semida, harorohan ni halak Semidai; si Hefer, harorohan ni halak Heferi.

³³ Tapi anggo si Zelefad, anak ni si Hefer, lang dong tubuhan anak, pitah boru do hansa, anjaha goran ni boru ai, ai ma: Si Mahala, si Noah, si Hogla, si Milka pakon si Tirsa.

³⁴ Ai ma ginompar ni si Manase; anjaha bilangan ni sidea lima puluh dua ribu pitu ratus halak do bueini.

³⁵ On do ginompar ni si Efraim mar sasaompung: Si Sutelah, harorohan ni halak Sutelah; si Beker, harorohan ni halak Beker; si Tahan, harorohan ni halak Tahani.

³⁶ On do anak ni si Sutelah: Si Eran, harorohan ni halak Erani.

³⁷ Ai ma ginompar ni halak Efraim mangihutkon bilangan ni sidea, tolu puluh dua ribu lima ratus halak bueini. Ai ma anak ni si Josep mar sasaompung.

³⁸ Anak ni si Benjamin mangihutkon ginompar ni sidea: Si Bela, harorohan ni halak Belai; si Asbel, harorohan ni halak Asbeli, si Ahiram, harorohan ni halak Ahirami;

³⁹ si Sefufam, harorohan ni halak Sefufami; si Hufam, harorohan ni halak Hufami.

⁴⁰ Ia anak ni si Bela, ai ma: Si Ard pakon si Naeman, harorohan ni halak Ardi pakon halak Naemani.

⁴¹ Ai ma ginompar ni si Benjamin mangihutkon ginompar ni sidea, anjaha bilangan ni sidea ompat puluh lima ribu onom ratus halak do bueini.

⁴² Anak ni si Dan mangihutkon ginompar ni sidea: Si Suham, harorohan ni halak Suhami. Ai ma ginompar ni si Dan mangihutkon ginompar ni sidea.

⁴³ Bilangan ni ganup halak Suhami onom puluh ompat ribu ompat ratus halak do bueini.

⁴⁴ Anak ni si Asser mangihutkon ginompar ni sidea: Si Jimma, harorohan ni halak Jimmai; si Jiswi, harorohan ni halak Jiswii; si Beria, harorohan ni halak Berii.

⁴⁵ Anak ni si Beria: Si Heber, harorohan ni halak Heberi; si Malkiel, harorohan ni halak Malkieli.

⁴⁶ Ia goran ni boru ni si Asser, ai ma si Serah.

⁴⁷ Ai ma ginompar ni halak Asser mangihutkon bilangan ni sidea, lima puluh tolu ribu ompat ratus halak bueini.

⁴⁸ Anak ni si Naftali mangihutkon ginompar ni sidea: Si Jahzeel, harorohan ni halak Jahzeeli; si Guni, harorohan ni halak Gunii;

⁴⁹ si Jezer, harorohan ni halak Jezeri; si Sillem, harorohan ni halak Sillemi.

⁵⁰ Ai ma ginompar ni halak Naftali mangihutkon ginompar ni sidea, anjaha bilangan ni sidea ompat puluh lima ribu ompat ratus halak do bueini.

⁵¹ Ai ma ganup bilangan ni halak Israel, onom ratus sada ribu pitu ratus tolu puluh halak bueini.”

Pasal Parbagi ni Tanoh

⁵² Dob ai nini Jahowa ma hubani si Musa,

⁵³ “Maningon hubani halak on do bagion tanoh ai bahen parbagiananni mangihutkon bilangan ni goran-goran.

⁵⁴ Hubani na buei maningon pagandaonmu do parbagiananni, hubani na otik maningon paotikonmu do parbagiananni, ganup marguru hubani bilanganni bereon parbagiananni.

⁵⁵ Tapi maningon manjomput na sinurat bagion tanoh ai, maningon marguru hubani goran-goran ni marga mar sasaompung sidea dapotan parbagianan.

⁵⁶ Maningon manjomput na sinurat bagihonon parbagiananni bei, hubani na buei bilanganni pakon hubani na otik bilanganni.”

Bilangan ni Halak Levi

⁵⁷ Anjaha on do bilangan ni halak Levi mangihutkon ginompar ni sidea, “Si Gerson, harorohan ni halak Gersoni; si Kahat, harorohan ni halak Kahati; si Merari, harorohan ni halak Merarii.

⁵⁸ On do ginompar ni si Levi: Halak Libni, halak Hebroni, halak Maheli, halak Musi, halak Korahi. Tapi si Kahat do bapa ni si Amram.

⁵⁹ Ia goran ni parinangon ni si Amram, ai ma si Jokebed, boru ni si Levi, na tinubuhkon ni si Levi i tanoh Masir; anjaha ia use manubuhkon bani si Amram: Si Aron, si Musa pakon si Miryam, botou ni sidea ai.

⁶⁰ Anjaha anak ni si Aron, ai ma: Si Nadab, si Abihu, si Eleasar pakon si Itamar.

⁶¹ Tapi girah do matei si Nadab pakon si Abihu, sanggah na binoban ni sidea apuy na legan hu lobei ni Jahowa.

⁶² Ia buei ni bilangan ni sidea; dua puluh tolu ribu ganup dalahi, singgan ni na marumur sabulan pakon lobih hunjai; lang dihut sidea tarbilang rap pakon halak Israel, halani lang dapotan parbagianan sidea i tongah-tongah ni halak Israel.

⁶³ On do bilangan ni halak Israel, na binilang ni si Musa pakon Malim Eleasar i sampalan ni Moab i lambung ni Jordan, tontang ni Jeriko.

⁶⁴ Anjaha i tongah-tongah ni halak on sahalak pe lang dong be humbani na binilang ni si Musa pakon Malim Aron na ijia, sanggah na binilang ni sidea halak Israel i halimisan Sinai.

⁶⁵ Ai domma ihatahon Jahowa hinan bani sidea, ‘Maningon matei sidea i halimisan. Sada pe lang dong na teba humbani sidea age sahalak, sobali si Kaleb, anak ni Jepunne, pakon si Josua, anak ni si Nun.’”

Hak ni Boru Pasal Tean-teanan

27 ¹ Dob ai roh ma hun dohor boru ni si Zelofat, anak ni si Hefer, anak ni si Gilead, anak ni si Makir, anak ni si Manase, humbani marga Manase, anak ni si Josep. Anjaha on do goran-goran ni boruni

ai: Si Mahala, si Noah, si Hogla, si Milka pakon si Tirza.

² Lanjar jongjong ma sidea i lobei ni si Musa pakon i lobei ni Malim Eleasar pakon i lobei ni sagala pambobai ampa ganup kuria ai, i lobei ni labah ni lampolampo partumpuan ai, nini ma,

³ “Domma matei bapanami i halimisan, tapi seng dihut ia i tongah-tongah ni halak na sapartahian ondi, na manjahati dompak Jahowa, sagala na mangirikkon riah ni si Kora, tapi halani dousani do ia matei, lang martinading anak.

⁴ Mase ma maningon sasap goran ni bapanami hun tongah-tongah ni bangsani, halani lang martinading anak ia? Bere nasiam ma bennami parbagianan i tongah-tongah ni sanina ni bapanami!”

⁵ Dob ai iboan si Musa ma parhara ni sidea ai hu lobei ni Jahowa.

⁶ Jadi nini Jahowa ma hubani si Musa,

⁷ “Sintong do pangindoan ni boru ni si Zelofat in; maningon bereonmu do hubani sidea bagian siteanon i tongah-tongah ni sanina ni bapa ni sidea; maningon ondos do bani sidea bereonmu parbagianan ni bapa ni sidea.

⁸ Anjaha maningon hatahononmu do hubani halak Israel, ‘Anggo adong barang ise na matei lang martinading anak maningon hubani boruni do ondoskononni tean-teananni ai.’

⁹ Tapi anggo seng dong boruni, maningon berehononni do tean-teanan ni ai hubani saninani.

¹⁰ Anjaha anggo seng dong saninani, maningon bereon do tean-teananni ai hubani sanina ni bapani.

¹¹ Anjaha anggo seng dong sanina ni bapani, maningon bereon do tean-teananni ai hubani hade-hadeni sidohoran humbani sidea na samarga, ase ia manean ai. Anjaha gabe aturan ma ai bani halak Israel, songon na tinonahkon ni Jahowa hubani si Musa.”

Si Josua Tarangkat Gabe Panggantih ni si Musa

¹² Dob ai nini Jahowa ma hubani si Musa, “Tangkog ma ho hu atas Dolog Abarim on, anjaha tatap ma tanoh ai, na dob Hubere hubani halak Israel.

¹³ Anjaha anggo domma ididah ho ai, patumpuon ma homa ho hubani bangsamu, songon abangmu si Aron na dob ipatumpu,

¹⁴ halani na nilanggarnima hatang-Ku i halimisan Sin, sanggah na manlawan kuria in, sanggah na maningon papansingonnima namin Ahu marhitei humbani bah ai i lobei ni mata ni sidea. Ai ma Bah Meriba na i Kades, i halimisan Sin.

¹⁵ Nini si Musa ma hubani Jahowa,

¹⁶ ‘Maningon pabangkiton ni Jahowa, Naibata ni tonduy ni sagala daging ma namin sada halak bani sidea,

¹⁷ na luar i lobei ni sidea anjaha na masuk i lobei ni sidea, na mambobahon sidea luar pakon masuk, ase ulang songon biribiri na so marparmahan tumpuan ni Jahowa.'

¹⁸ Dob ai nini Jahowa ma hubani si Musa, 'Arahkon ma bahen hasomanmu si Josua, anak ni si Nun, sada halak na iiankon ni Tonduy, anjaha tampeihon ma tanganmu hu bani.'

¹⁹ Dob ai pajongjong ma ia i lobei ni Malim Eleasar pakon i lobei ni kuria in, anjaha ondoskon ma bani sagala parentahmu i lobei ni mata ni sidea,

²⁰ anjaha bere ma hubani humbani jumbalangmu, ase ganup kuria ni halak Israel mambalosi.

²¹ Anjaha maningon jongjong ia i lobei ni Malim Eleasar, na manungkun i lobei ni pasalsi marhitei uhum ni Urim; maningon marguru hubani hatani sidea luar, anjaha marguru hubani hatani sidea masuk, ia pakon ganup halak Israel ronsi ganup kuria in."

²² Dob ai ibahen si Musa ma songon na hinatahon ni Jahowa hu bani, iarahkon ma si Josua anjaha ipajongjong ia i lobei ni Malim Eleasar pakon i lobei ni kuria ai.

²³ Jadi itampeihon ma tanganni hu bani anjaha itonahi ma ia, songon na ipatugah Jahowa marhitei si Musa.

Titah Pasal Galangan

1. Pasal Galangan Ari-ari

28 ¹ Dob ai nini Jahowa ma hubani si Musa,
² “Padas ma tonah-Ku bani halak Israel,
 anjaha hatahon ma hubani sidea, ‘Ia galangan
 Bangku, songon sipanganon Bangku, ai ma
 galangan apuy, uap na misbou Bangku; maningon
 paruhurhononmu do in, ase igalangkon Bangku
 bani panorang na dob binuhul hinan.’

³ Anjaha hatahon ma hubani sidea, ‘On do galangan
 apuy na maningon galangonkon bani Jahowa:
 Dua anak ni biribiri na marumur satahun na so
 martikas, ganup ari, bahen galangan situtungon na
 manongtong.’

⁴ Biribiri na sada maningon sogod galangkononmu,
 anjaha biribiri na sada nari maningon bodari
 galangkononmu;

⁵ sonai homa saparsapuluh efa itak na lumat
 bahen galangan sipanganon, na niagu pakon minak
 saparompat hin, na giniling humbani buah ni jetun.

⁶ In ma galangan situtungon na manongtong, na
 dob tinaktakkon i Dolog Sinai bahen galangan apuy,
 uap na misbou bani Jahowa.

⁷ Anjaha galangan siinumon na mardomu
 hujai, saparompat hin bani ganup anak ni
 biribiri; maningon bani ianan na pansing ai do

useihononmu galangan siinumon humbani anggur bani Jahowa.

⁸ Anggo anak ni biribiri na sada nari ai, maningon galangkononmu do ai malele bod ari; songon galangan sipanganon sogod rap pakon galangan siinumonni maningon galangkononmu do ai songon galangan apuy, uap na misbou bani Jahowa.”

2. Galangan Ari Sabat pakon Galangan bani Poltak ni Bulan

⁹ Tapi anggo bani ari Sabat maningon dua anak ni biribiri na marumur satahun anjaha na so martikas, pakon dua parsapuluh itak na lumat bahen galangan sipanganon, na niagu pakon minak pakon galangan siinumonni.

¹⁰ In ma galangan situtungan bani ganup ari Sabat, tambah ni galangan situtungan na manongtong pakon galangan siinumonni.

¹¹ Anjaha bani bona ni ganup bulan, maningon galangkononmu do sada galangan situtungan bani Jahowa: Dua anak ni lombu, sada biribiri tunggal, pitu anak ni biribiri na marumur satahun, na so martikas;

¹² sonai homa tolu parsapuluh itak na lumat bahen galangan sipanganon, na niagu pakon minak, hasoman ni ganup anak ni lombu ai; anjaha dua parsapuluh itak na lumat bahen galangan

sipanganon, na niagu pakon minak, hasoman ni ganup biribiri tunggal;

¹³ anjaha saparsapuluh itak na lumat bahen galangan sipanganon, na niagu pakon minak, antup ni ganup anak ni biribiri ai, bahen galangan situtungon, uap na misbou, sada galangan apuy bani Jahowa.

¹⁴ Galangan siinumonni ai ma satongah hin anggur antup ni ganup anak ni lembu, anjaha sapartolu hin antup ni ganup biribiri tunggal, anjaha saparompat hin antup ni ganup biribiri. Ai ma galangan situtungon bani ganup poltak ni bulan manipat satahun.

¹⁵ Ambah ni ai galangonkon do sada hambing tunggal bahen galangan pardousaon bani Jahowa sobali galangan situtungon na manongtong, rap pakon galangan siinumonni.

3. Galangan Sanggah Paskah

¹⁶ Tapi bani ari sapuluh ompat bulan sada, ijai ma pamasaon Paskah bani Jahowa.

¹⁷ Anjaha bani ari sapuluh lima bulan ai masa ma ari raya; pitu ari dokahni maningon panganon ruti na so niigaran.

¹⁸ Bani ari na parlobei ma pamasaon partumpuan na mapansing; seng bulih horjahononnima barang aha horja ari-ari ijai,

¹⁹ tapi maningon galangkononnima do galangan apuy bahen galangan situtungan bani Jahowa: Dua anak ni lembu, sada biribiri tunggal pakon pitu anak ni biribiri na marumur satahun, sagala na so martikas;

²⁰ rap pakon galangan sipanganonni humbani itak na lumat, na niagu pakon minak; maningon galangkononmu tolu parsapuluh efa antup ni ganup anak ni lembu ai, anjaha dua parsapuluh antup ni ganup biribiri tunggal;

²¹ saparsapuluh galangkononmu antup ni ganup anak ni biribiri na pitu ai,

²² sonai homa sada hambing tunggal bahen galangan pardousaon mambahen pardearan bennima.

²³ Maningon galangkononnima do ai sobali galangan situtungan sogod; galangan situtungan na manongtong do ai.

²⁴ Romban hujai maningon galangkononnima ari-ari, ibagas na pitu ari ai, ruti bahen galangan apuy, uap na misbou bani Jahowa; tambah ni galangan na manongtong rap pakon galangan siinumonni.

²⁵ Anggo bani ari papituhon ai, maningon pamaaonnima do tumpuan na mapansing bennima; seng bulih horjahononnima barang aha horja ari-ari ijai.

4. Galangan Sanggah Pentakosta

²⁶ Sonai homa bani ari limbuah, anggo igalangkon hanima galangan sipanganon na bayu bani Jahowa, bani pesta minggunima, maningon pamasaonnima do sada tumpuan na mapansing bannima; seng bulih horjahononnima barang aha horja ari-ari ijai.

²⁷ Maningon galangkononnima do ijai dua anak ni lombu, sada biribiri tunggal, pitu anak ni biribiri na marumur satahun bahen galangan situtungon, uap na misbou bani Jahowa,

²⁸ sonai homa itak na lumat, na niagu pakon minak bahen galangan sipanganon, tolu parsapuluh efa antup ni ganup anak ni lombu, dua parsapuluh antup ni ganup biribiri tunggal,

²⁹ anjaha saparsapuluh antup ni ganup anak ni biribiri na pitu ai;

³⁰ rap pakon sada hambing tunggal bahen pardearan bennima.

³¹ Maningon galangkononnima do ganupan ai sobali galangan situtungon na manongtong pakon galangan sipanganonni; maningon na so martikas do ai rap pakon galangan siinumomni.”

5. Galangan bani Ari Raya Partarompitan

29 ¹ Bani ari sada bulan pitu maningon pamasaonnima do bennima sada tumpuan

na mapansing; seng bulih horjahononnima ijai age aha horja ari-ari, ari partarompitan do ai bennima.

² Maningon galangkononnima do ijai sada anak ni lombu, sada biribiri tunggal, pitu anak ni biribiri na marumur satahun, sagala na so martikas, bahen galangan situtungan, uap na misbou bani Jahowa;

³ sonai homa itak na lumat, na niagu pakon minak bahen galangan sipanganon, tolu parsapuluh efa antup ni lombu ai, dua parsapuluh antup ni biribiri tunggal ai;

⁴ anjaha saparsapuluh antup ni ganup biribiri na pitu ai;

⁵ rap pakon hambing tunggal sada bahen galangan pardousaon, mambahen pardearan bennima;

⁶ sobali galangan situtungan bani poltak ni bulan rap pakon galangan sipanganonni, tambah ni galangan situtungan na manongtong rap pakon galangan sipanganonni ampa galangan siinumonni, romban hubani aturanni, bahen uap na misbou, galangan apuy bani Jahowa.

6. Galangan bani Ari Raya Pardearan

⁷ Bani ari sapuluh bani bulan pitu maningon pamaonnima do bennima sada tumpuan na mapansing, anjaha maningon paudukonnima do uhurnima ijai, horja aha pe lang boi horjahononnima ijai.

⁸ Maningon galangkononnima do ijai sada anak ni lombu, sada biribiri tunggal, pitu anak ni biribiri na marumur satahun, sagala na so martikas, bahen galangan situtungan, uap na misbou bani Jahowa,
⁹ rap pakon itak na lumat, na niagu pakon minak, bahen galangan sipanganon, tolu parsapuluh efa antup ni lombu ai, dua parsapuluh antup ni biribiri tunggal ai,

¹⁰ anjaha saparsapuluh antup ni ganup anak ni biribiri na pitu ai;

¹¹ sonai homa sada hambing tunggal bahen galangan pardousaon sibahen pardearan ai, tambah ni galangan situtungan na manongtong rap pakon galangan sipanganonni, ampa galangan siinumonni.

7. Galangan bani Ari Parlampolampoan

¹² Bani ari sapuluh lima bulan pitu maningon pamasannonima do bennima sada tumpuan na mapansing, age sada horja ari-ari seng bulih horjahononnima ijai, maningon marari-rama hanima bani Jahowa pitu ari dokahni;

¹³ anjaha maningon galangkononnima do sapuluh tolu anak ni lombu, dua biribiri tunggal, sapuluh ompat anak ni biribiri na marumur satahun, sagala na so martikas, bahen galangan situtungan, sada galangan apuy, uap na misbou bani Jahowa;

¹⁴ rap pakon itak na lumat, na niagu pakon minak, bahen galangan sipanganon tolu parsapuluh efa antup ni ganup anak ni lembu na sapuluh tolu ai, dua parsapuluh bani ganup biribiri tunggal na dua ai,

¹⁵ anjaha saparsapuluh antup ni ganup anak ni biribiri na sapuluh ompat ai;

¹⁶ sonai homa sada hambing tunggal bahen galangan pardousaon tambah ni galangan situtungon na manongtong rap pakon galangan sipanganonni ampa galangan siinumonni.

¹⁷ Anjaha bani ari paduahon: Sapuluh dua anak ni lembu, dua biribiri tunggal sapuluh ompat anak ni biribiri na marumur satahun, na so martikas,

¹⁸ rap pakon galangan sipanganonni pakon galangan siinumonni antup ni anak ni lembu ai, antup ni biribiri tunggal pakon antup ni biribiri ai, marguru hubani bilanganni bei, romban hubani aturanni;

¹⁹ sonai homa hambing tunggal bahen galangan pardousaon, tambah ni galangan situtungon na manongtong rap pakon galangan sipanganonni ampa galangan siinumonni.

²⁰ Anjaha bani ari patoluhon: Sapuluh sada anak ni lembu, dua biribiri tunggal, sapuluh ompat anak ni biribiri na marumur satahun, na so martikas,

²¹ rap pakon galangan sipanganonni pakon galangan siinumonni, antup ni lembu ai, antup ni

hambing tunggal pakon anak ni biribiri ai, marguru hubani bilanganni bei, romban hubani aturanni,
²²sonai homa sada hambing tunggal bahen galangan pardousaon, tambah ni galangan situtungon na manongtong rap pakon galangan sipanganonni pakon galangan siinumonni.

²³Anjaha bani ari paompatkon: Sapuluh anak ni lombu, dua biribiri tunggal, sapuluh ompat anak ni biribiri na marumur satahun, na so martikas,

²⁴rap pakon galangan sipanganonni pakon galangan siinumonni, antup ni lombu ai, antup ni biribiri tunggal pakon antup ni anak ni biribiri ai, marguru hubani bilanganni bei, romban hubani aturanni;

²⁵sonai homa sada hambing tunggal bahen galangan pardousaon, tambah ni galangan situtungon na manongtong rap pakon galangan sipanganonni pakon galangan siinumonni.

²⁶Anjaha bani ari palimahon: Siah anak ni lombu, dua biribiri tunggal, sapuluh ompat anak ni biribiri na marumur satahun, na so martikas,

²⁷rap pakon galangan sipanganonni pakon galangan siinumonni, antup ni anak ni lombu ai, antup ni biribiri tunggal pakon antup ni anak ni biribiri ai, marguru hubani bilanganni bei, romban hubani aturanni;

²⁸sonai homa sada hambing tunggal bahen galangan pardousaon, tambah ni galangan

situtungon na manongtong rap pakon galangan sipanganonni ampa galangan siinumonni.

²⁹ Anjaha bani ari paonomkon: Ualuh anak ni lombu, dua biribiri tunggal, sapuluh ompat anak ni biribiri na marumur satahun, na so martikas,

³⁰ rap pakon galangan sipanganonni pakon galangan siinumonni, antup ni anak ni lombu ai, antup ni biribiri tunggal pakon antup ni anak ni biribiri ai, marguru hubani bilanganni bei, romban hubani aturanni;

³¹ sonai homa sada hambing tunggal bahen galangan pardousaon, tambah ni galangan sipanganonni na manongtong rap pakon galangan sipanganonni ampa galangan siinumonni.

³² Anjaha bani ari papituhon: Pitu anak ni lombu, dua biribiri tunggal, sapuluh ompat anak ni biribiri na marumur satahun, na so martikas,

³³ rap pakon galangan sipanganonni pakon galangan siinumonni, antup ni anak ni lombu ai, antup ni biribiri tunggal pakon antup ni anak ni biribiri ai, marguru hubani bilanganni bei, romban hubani aturanni;

³⁴ sonai homa sada hambing tunggal bahen galangan pardousaon, tambah ni galangan situtungon na manongtong rap pakon galangan sipanganonni ampa galangan siinumonni.

³⁵ Anjaha bani ari paualuhkon, ijai ma pamasaon partumpuan ai, age sada horja ari-ari seng bulih horjahononnima ijai,

³⁶ tapi maningon galangkononnima do sada anak ni lombu, sada biribiri tunggal, pitu anak ni biribiri na marumur satahun, na so martikas, bahen galangan situtungon, galangan apuy, uap na misbou bani Jahowa,

³⁷ rap pakon galangan sipanganonni ampa galangan siinumonni, antup ni lombu ai, antup ni biribiri tunggal pakon antup ni anak ni biribiri ai, marguru hubani bilanganni bei, romban hubani aturanni;

³⁸ sonai homa sada hambing tunggal bahen galangan pardousaon, legan ni galangan situtungon na manongtong rap pakon galangan sipanganonni pakon galangan siinumonni.

³⁹ On ma galangan sigalangkononnima bani Jahowa bani ari rayanima, tambah ni bagah-bagahnima pakon sibere-bere niojur ni uhurnima, bahen galangan situtungon, galangan sipanganon, galangan siinumon pakon galangan pardameian bennima.

⁴⁰ Dob ai ipadas si Musa ma hubani halak Israel haganup na dob tinonahkon ni Jahowa hubani si Musa.

8. Pasal Galangan Bagah-bagah humbani Sada Dalahi

30 ¹ Dob ai nini si Musa ma hubani kopala ni halak Israel mar sasamarga, “On do hata na tinonahkon ni Jahowa,

² ‘Anggo domma marbagah-bagah sada dalahi bani Jahowa barang marpadan marhitei bija, paboa maningon oromon ni uhurni atap aha, seng bulih ubahonni hatani, maningon romban hubani haganup hata na luar hun pamanganni bahenonni.’

9. Pasal Galangan humbani Sada Anak boru Barang Parinangon

³ Barang anggo marbagah-bagah sada naboru hubani Jahowa, barang marpadan, paboa maningon oromon ni uhurni barang aha, sanggah i rumah ni bapani, sanggah haposoonni,

⁴ anjaha ibogei bapani do bagah-bagah barang padanni ai pasal sioromon ni uhurni ai, tapi ipasip bapani do ai, maningon totap do sagala bagah-bagahni, anjaha ganup padan pasal sioromon ni uhurni ai maningon totap do.

⁵ Tapi anggo mintor iulangi bapani ai do ai, bani ari na binogeini sagala bagah-bagah ai, barang padanni ai, ai ma pasal sioromon ni uhurni ai, seng asi be bagah-bagah ai, anjaha marpangulaki do uhur ni Jahowa bani, halani na niulangan ni bapani ai do ia.

⁶Tapi anggo domma marparamangon ia, hape marutang bagah-bagah ia barang tarsor pamanganni marpadan pasal sioromon ni uhurni,

⁷anjaha ibogei paramangonni do ai namin, tapi ipasipkon do ai bani ari binogeini ai; halani ai maningon totap do padanni ai, anjaha padan pasal sioromonni ai maningon asi do.

⁸Tapi anggo iulangi paramangonni ai do ia bani ari na binogeini ai, gabe seng asi be bagah-bagahni ai barang padan na dob tarsor luar hun pamanganni pasal sioromon ni uhurni ai; jadi marpangulaki ma uhur ni Jahowa mangidahsi.

⁹*(Tapi anggo bagah-bagah ni sada puang-puang na dob mabalu barang na dob binuangkon do, sagala padan na dob pinadankonni pasal sioromon ni uhurni ai, maningon asi do)*

¹⁰Tapi anggo ibagas rumah ni paramangonni ia marbagah-bagah barang marpadan marhitei bija pasal sioromon ni uhurni,

¹¹anjaha ibogei paramangonni do ai namin, tapi ipasipkon do ai lang iulangi ia, maningon asi do sagala bagah-bagahni ai anjaha sagala padan pasal sioromonni ai maningon asi do.

¹²Tapi anggo iparnalang paramangonni do ai bani ari na binogeini ai, jadi sagala na dob luar hun pamanganni, bagah-bagahni barang padanni pasal sioromon ni uhurni, seng asi be ai, halani

na dob iparnalang paramangonni do ai anjaha marpangulaki ma uhur ni Jahowa mangidahsi.

¹³ Sagala bagah-bagah pakon bija pasal sioromon laho paundukkon uhur, tarbahen paramangonni do patotapkon, tarbahen paramangonni do homa marnalangkon.

¹⁴ Tapi anggo sip do paramangonni das bani ari na legan, jadi na patotapkon do ia ai bani haganup bagah-bagahni pakon bani ganup padanni pasal sioromonni ai, jadi asi ma ai, halani na sip ai do ia bani ari na binogeini ai.

¹⁵ Tapi anggo iparnalang ai dob hundokah ai ibogei, maningon manginsoh do ai bani.

¹⁶ Ai ma aturan na tinonahkon ni Jahowa hubani si Musa pasal pardomuan ni sada dalahi hubani parinangonni, pakon pardomuan ni sada bapa hubani boruni sanggah haposoonni i rumah ni bapani.”

Pambalason ni Halak Israel bani Halak Midian

31 ¹ Dob ai nini Jahowa ma hubani si Musa,
² “Maningon balaskononmu do pambahenan ni halak Midian hubani halak Israel, dob ai patumpuon ma ho hubani bangsamu.”

³ Jadi nini si Musa ma hubani bangsa ai, “Pilih nasiam ma humbani nasiam dalahi na laho marporang mandorab halak Midian, laho

mandalankon pambalason ni Jahowa hubani halak Midian.

⁴ Saribu halak humbani ganup marga ni halak Israel tene pabingkaton nasiam laho marporang.”

⁵ Jadi iarahkon ma humbani halak Israel na marribu-ribu ai, saribu humbani ganup marga, gabe sapuluh dua ribu halak ma na laho marporang ai.

⁶ Ipabangkit si Musa ma sidea saribu halak humbani ganup marga hu parporangan rap pakon si Pinehas, anak ni Malim Eleasar, mamboban parugas na mapansing ampa tarompit na marsora mareta-eta.

⁷ Jadi iporang sidea ma halak Midian, songon na tinonahkon ni Jahowa hubani si Musa, anjaha ibunuh sidea ma sagala dalahi.

⁸ Ambah ni halak na marradagan ai, ibunuh sidea do homa raja-raja ni halak Midian, ai ma: Si Ewi, si Rekem, si Zur, si Hur pakon si Reba, na lima raja ni halak Midian ai; ibunuh sidea do age si Bileam, anak ni si Beor marhitei podang.

⁹ Dob ai iboan halak Israel ma puang-puang ni halak Midian pakon dakdanak ni sidea; iayob ma homa ganup pinahan ni sidea, ugas-ugas ni sidea ampa arta ni sidea haganup.

¹⁰ Haganup huta ni sidea ronsi ganup ianan ni sidea ampa lampolampo ni sidea bois do isurbuy bani apuy.

¹¹ Iboan sidea ma haganup taban-taban ampa rampasan ai marrupajolma pakon pinahan,

¹² iboan sidea ma ai hubani si Musa, hubani Malim Eleasar pakon hubani kuria ni halak Israel, ai ma sagala na tartangkap ai pakon ugas rampasan ampa taban-taban ai, hu parsaranan na i pamah Moab, na i topi ni Jordan, tontang ni Jeriko.

¹³ Luar ma si Musa, Malim Eleasar pakon ganup kopala ni kuria ai mangalo-alo sidea hu darat ni parsaranan ai.

¹⁴ Dob ai marringis ma si Musa hubani pambobai ni bala ai, hubani kopala ni sisaribu halak pakon hubani kopala ni sisaratus halak, sagala na roh mulak hun parporangan.

¹⁵ Nini si Musa ma hubani sidea, "Mase ma pagoluhonnima ganup puang-puang ni sidea in?

¹⁶ Tonggor ma, sidea do sigiutini mambahen marbalik halak Israel humbani Jahowa laho mangirikkon Peor, niajaran ni si Bileam, gabe masa sampar ondi hu kuria ni Jahowa.

¹⁷ Halani ai, bunuh hanima ma sagala dakdanak dalahi, pakon sagala puang-puang na dob onggasaor pakon sada dalahi.

¹⁸ Tapi sagala dakdanak naboru, sagala na so onggasaor hubani sada dalahi, pagoluh hanima ma bennima.

¹⁹ Tapi anggo hanima, maningon mar saran do hanima i darat ni parsaranan ai pitu ari dokahni; barang ise na dob mambunuh jolma anjaha barang ise na dob manjamah jolma na binunuh ai,

maningon urasonnima do dirinima rap pakon halak tangkapannima in bani ari patoluhon pakon bani ari papituhon.

²⁰ Anjaha sagala pakean, sagala parugas humbani hulingkuling, sagala na pinauli humbani imbulu ni hambing pakon sagala ugas-ugas humbani hayu, maningon urasonnima do.”

²¹ Dob ai nini Malim Eleasar ma hubani halak parporang ai, sagala na dob mulak humbani parporangan. On do aturan ni titah na dob tinonahkon ni Jahowa hubani si Musa,

²² “Ia omas, pirak, tombaga, bos, seng pakon simbora,

²³ sagala na tahan ibagas apuy, maningon pabontasonkon do hubagas apuy, ase pitah ai; tapi maningon urason do homa ai marhitei bah pangurasion, anjaha sagala na so tahan ibagas apuy maningon pabontasonkon nasiam do ai humbagas bah.

²⁴ Maningon taptapan nasiam do homa pakean nasiam bani ari papituhon, ase pansing nasiam; dob ai bulih ma nasiam masuk hu parsaranan ai.”

Parbagi bani Taban-taban

²⁵ Dob ai nini Jahowa ma hubani si Musa,

²⁶ “Suratkon ma buei ni taban-taban pakon rampasan humbanijolma pakon pinahan, ho pakon

Malim Eleasar ronsi sagala kopala ni kuria in mar sasaompung.

²⁷ Dob ai bagi dua ma taban-taban ai, satongah bani halak parporang, sagala na bingkat hu parporangan, na satongah nari bani ganup kuria in.

²⁸ Dob ai maningon papuligonnima ma guguan bani Jahowa humbani halak parporang ai, sagala na bingkat hu parporangan, sada humbani lima ratus humbani jolma, lombu, halode pakon biribiri ai;

²⁹ buat ma humbani na satongah parbagianan ni parporang ai anjaha bere ma ai bani Malim Eleasar bahen galangan bani Jahowa.

³⁰ Tapi anggo humbani na satongah parbagianan ni halak Israel, maningon buatonmu sada humbani na lima puluh, humbani jolma, lombu, halode pakon biribiri, na humbani sagala pinahan, anjaha bere ma ai hubani halak Levi, na mangkorjahon horja bani lampolampo ni Jahowa.”

³¹ Jadi ibahen si Musa pakon Malim Eleasar ma, songon na tinonahkon ni Jahowa hubani si Musa.

³² Ia buei ni taban-taban ai na teba humbani sagala na tinaban ni parporang ai, ai ma onom ratus pitu puluh lima ribu biribiri,

³³ pitu puluh dua ribu lombu,

³⁴ onom puluh sada ribu halode.

³⁵ Ia buei ni naboru, na so onggarsaor hubani dalahi, tolu puluh dua ribu halak do bueini.

³⁶ Ia bilangan ni na satongah, parbagianan ni halak na bingkat hu parporangan ai, ai ma tolu ratus tolu puluh pitu ribu lima ratus biribiri,

³⁷ anjaha guguan hubani Jahowa humbani biribiri ai, onom ratus pitu puluh lima biribiri do;

³⁸ lombu tolu puluh onom ribu, anjaha guguan hubani Jahowa hunjai pitu puluh dua.

³⁹ Halode tolu puluh ribu lima ratus, anjaha guguan hubani Jahowa onom puluh sada.

⁴⁰ Jolma na manggoluh sapuluh onom ribu, anjaha guguan bani Jahowa tolu puluh dua halak.

⁴¹ Dob ai ipadas si Musa ma guguan ai bahen galangan, parbagianan ni Jahowa hubani Malim Eleasar, songon na tinonahkon ni Jahowa hubani si Musa.

⁴² Anjaha na satongah nari, na binuat ni si Musa humbani halak parporang ai, anjaha na binerehonni hubani halak Israel,

⁴³ na satongah nari ai, ai ma parbagianan ni kuria ai, tolu ratus tolu puluh pitu ribu lima ratus biribiri,

⁴⁴ tolu puluh onom ribu lombu,

⁴⁵ tolu puluh ribu lima ratus halode

⁴⁶ pakon sapuluh onom ribu jolma.

⁴⁷ Dob ai ibuat si Musa ma humbani na satongah parbagianan ni halak Israel ai, sada humbani lima puluh, na humbani jolma age na humbani pinahan, ibere ma ai hubani halak Levi, na mangkorjahon

horja bani lampolampo ni Jahowa, songon na tinonahkon ni Jahowa hubani si Musa.

Sibere-bere ni Sagala Kopala hubani Jahowa

⁴⁸ Dob ai roh ma hun dohor hubani si Musa sagala pambobai ni na marribu-ribu, kopala ni sisaribu halak pakon kopala ni sisaratus halak,

⁴⁹ nini sidea ma hubani si Musa, “Domma ibilangi juakjuakmu sagala halak parporang na i toruh ni parentahnami, anjaha sahalak pe lang na magou hun bennami.

⁵⁰ Anjaha iboan hanami do nuan galangan hubani Jahowa, ganup humbani na dapotsi, ugas-ugas omas, golang bani nahei, golang bani pargolongan, tintin sap, anting-anting ampa sinongkok, laho mambahen pardearannami i lobei ni Jahowa.”

⁵¹ Dob ai ijalo si Musa pakon Malim Eleasar ma omas ai humbani sidea, sagala ugas-ugas na pinauli.

⁵² Anjaha ganup omas galangan, na binoan ni sidea ai hubani Jahowa, sepuluh onom ribu pitu ratus lima puluh sekel do boratni, ai ma humbani kopala ni sisaribu halak pakon kopala ni sisaratus halak.

⁵³ Sagala halak parporang pe adong do ibuat bagianni bei.

⁵⁴ Dob ai ijalo si Musa pakon Malim Eleasar ma omas ai humbani kopala ni sisaribu halak pakon sisaratus halak, anjaha iboan sidea ma ai hu

lampolampo partumpuan ai bahen pardingatan bani halak Israel i lobei ni Jahowa.

**Marga Ruben pakon Gad Mangindo Tanoh
Parbagianan i Hapoltakan ni Bah Jordan**

32¹ Ia ginompar ni si Ruben pakon si Gad parpinahan na buei tumang do; ididah sidea ma tanoh Jaeser pakon tanoh Gilead, anjaha tonggor ma, ianan na dear do ai bani halak parpinahan.

² Dob ai roh ma ginompar ni si Gad pakon si Ruben, nini sidea ma hubani si Musa, hubani Malim Eleasar pakon hubani kopala ni kuria ai,

³ “Ia Atarot, Dibon, Jaeser, Nimra, Hesbon, Eleale, Sebam, Nebo pakon Beon,

⁴ ai ma tanoh, na dob ipatunduk Jahowa i lobei ni kuria Israel, tanoh na dear do ai bani halak parpinahan; anjaha parpinahan do jabolonmu.

⁵ Ambah ni ai nini sidea ma, Anggo dapotan idop ni uhur do hanami i lobeimu, nabere ma namin tanoh on bani jabolonmu bahen parbagiananni; ulang ma pala mandipar hanami hu dipar ni Bah Jordan.”

⁶ Tapi nini si Musa ma hubani ginompar ni si Gad pakon hubani ginompar ni si Ruben, “Mintor talup ma sanina nasiam laho hu parporangan, tapi nasiam tading ijon marsonang-sonang?

⁷ Mase ma pasangsi-sangsion nasiam uhur ni halak Israel, laho mandipar hu tanoh na dob binere ni Jahowa hubani sidea?

⁸ Usih sonai do pambahen ni bapa nasiam, sanggah na husuruh sidea hu Kades-Barnea laho mangkahapi tanoh ai.”

⁹ Ai dob tangkog sidea das hu habungan Eskol anjaha ikahapi tanoh ai, gabe ipasangsi-sangsi sidea do uhur ni halak Israel, laho masuk hu tanoh, na dob binere ni Jahowa hubani sidea.

¹⁰ Pala gajag ringis ni Jahowa bani ari na sasada ai, anjaha nini marbija,

¹¹ “Seng bulih be dalahi sagala na hubobahon tangkog hun tanoh Masir singgan ni na marumur dua puluh tahun pakon lobih hunjai mangidah tanoh na dob hubijahon hubani si Abraham, si Isak pakon si Jakob, ai lang marsijoloman sidea mangirikkon Ahu;

¹² sada pe lang sobali si Kaleb, anak ni si Jepunne, halak Kenisi ai, pakon si Josua, anak ni si Nun, halani marsijoloman do uhur ni sidea mangirikkon Jahowa.”

¹³ Jadi gajag ma ringis ni Jahowa mangidah Israel, gabe mawat-awat sidea ibahen i halimisan ompat puluh tahun dokahni paima bois ganup na sasundut ai, na mangkorjahon hajahaton i lobei ni Jahowa.

¹⁴ Anjaha tonggor ma, nasiam do use bangkit gantih ni bapa nasiam, sada tumpuan ni ginompar ni

pardousa, laho mangambahi pargajag ni ringis ni Jahowa mangidah halak Israel.

¹⁵ Anggo marbalik use nasiam hun bani, hundokah ope bangsa on paturutonni i halimisan on, anjaha magou ma bangsa on ganup bahenon nasiam.

¹⁶ Dob ai ipadohor sidea ma hu bani, anjaha nini ma, “Sihol pajongjong sopo-sopo do hanami bani pinahannami pakon huta bani anaknami,

¹⁷ tapi gopas pe hanami mambobahon halak Israel paima das sidea iboan hanami hubani iananni, tapi maningon marianan do anaknami ibagas huta na marbatar-batar dompak pangisi ni tanoh on hinan.

¹⁸ Seng sihol mulak hanami hu rumahnami, anggo lape isoluk halak Israel ganup parbagiananni bei.

¹⁹ Ai seng sihol saparbagianan hanami pakon sidea i dipar ni Bah Jordan pakon hujainkonni ai, anggo domma ondos parbagianannami i dipar ni Jordan on hampit hapoltakan.”

²⁰ Dob ai nini si Musa ma hubani sidea, “Anggo ibahen nasiam sonai, anjaha gopas nasiam i lobei ni Jahowa laho hu parporangan,

²¹ anjaha ganupan nasiam na gopas marsinjata, mandipari Jordan i lobei ni Jahowa paima iusir munsuhni hun lobeini,

²² anjaha dob tunduk tanoh ai i lobei ni Jahowa, ai pe ase mulak nasiam, gabe lang marpipot be nasiam i lobei ni Jahowa pakon Israel; anjaha gabe parbagianan nasiam ma tanoh on i lobei ni Jahowa.

²³ Tapi anggo lang ibahen nasiam sonai, tonggor ma, mardousa ma nasiam dompak Jahowa, anjaha botoh nasiam ma, maningon manginsonoh hubani nasiam do dousa nasiam ai.

²⁴ Antong pungkah nasiam ma huta bani anak nasiam pakon sopo-sopo bani biribiri nasiam; tapi bahen nasiam homa na binagahkon nasiam ai.”

²⁵ Dob ai nini ginompar ni si Gad pakon ginompar ni si Ruben ma hubani si Musa, “Maningon bahenon ni jabolonmu on do songon na hinatahon ni tuannami in.

²⁶ Anaknami, parinangonnami, ugas-ugasnami pakon pinahannami maningon tading do ijon ibagas huta ni Gilead;

²⁷ tapi anggo hanami jabolonmu maningon mandipar do sagala na gopas marsinjata hu parporangan i lobei ni Jahowa, songon na dob hinatahon ni tuannami.”

²⁸ Jadi roh ma tonah ni si Musa pasal sidea hubani Malim Eleasar pakon hubani si Josua, anak ni si Nun, pakon hubani ganup kopala ni halak Israel mar sasamarga.

²⁹ Nini si Musa ma hubani sidea, “Anggo mandipar ginompar ni si Gad pakon ginompar ni si Ruben rap pakon nasiam hu dipar ni Jordan, sagala na gopas hu parporangan i lobei ni Jahowa, anjaha tunduk tanoh ai bani nasiam, maningon bereon nasiam do hubani sidea tanoh Gilead bahen parbagianan ni sidea.

³⁰ Tapi anggo lang mandipar halak na gopas marsinjata rap pakon nasiam, maningon i tongah-tongah nasiam sidea marbagian i tanoh Kanaan.

³¹ Jadi roh ma balos ni ginompar ni si Gad pakon ginompar ni si Ruben mangkatahon, “Barang aha na hinatahon ni Jahowa hubani jabolonmu on, maningon sonai do bahenonnami.

³² Maningon gopas bei hanami marsinjata mandipar i lobei ni Jahowa hu tanoh Kanaan, anjaha totap bennami parbagianannami i dipar ni Jordan.”

³³ Jadi ibere si Musa ma hubani ginompar ni si Gad, hubani ginompar ni si Ruben pakon hubani satongah marga Manase, anak ni si Josep, harajaon ni si Sihon, raja ni halak Amori, pakon harajaon ni si Og, raja ni Basan, tanoh ai ampa huta-hutani rap pakon talunni inggot.

³⁴ Dob ai ipauli ginompar ni si Gad ma huta Dibon, Atarot pakon Aroer,

³⁵ Aterot-Sofan, Jaeser, Jogbeha,

³⁶ Bet-Nimra pakon Bet-Haran, sagala huta na marbatar-batar pakon sopo-sopo ni biribiri.

³⁷ Anjaha ginompar ni si Ruben paulihon Hesbon, Eleale, Kiriataim,

³⁸ Nebo pakon Baal-Meon, na pinaubah goranni ampa Sibmah; anjaha ipaubah sidea ma goran ni huta sagala na pinaulini ai.

³⁹ Dob ai laho ma anak ni si Makir, anak ni si Manase hu Gilead, lanjar ipatunduk ma ai, anjaha iusir halak Amori na ijai ai.

⁴⁰ Ibere si Musa ma Gilead hubani si Makir, anak ni si Manase, lanjar marianan ma ia ijai.

⁴¹ Tapi anggo si Jair, anak ni si Manase, laho ma ia patundukkon Dusun-dusun ni sidea, lanjar ibahen ma goranni Dusun ni si Jair.

⁴² Laho ma homa si Nobah, anjaha ipatunduk ma Kenat rap pakon sagala Dusun-dusunni, anjaha igoran ma ai Nobah mangihutkon goranni.

Goran-goran ni Parsaranan ni Halak Israel i Halimisan

33 ¹ On do parsaranan ni halak Israel, sanggah na luar sidea hun tanoh Masir rap pakon bala ni sidea, na binobahon ni si Musa pakon si Aron.

² Dob ai isuratkon si Musa ma parbingkatan ni sidea pakon parsaranan ni sidea romban hubani hata ni Jahowa; anjaha on do parsaranan ni sidea, dob luar sidea.

³ Bingkat do sidea hun Raemeses bani bulan sada, ari sapuluh lima bulan sada; patarni dob salpu Paskah ai bingkat ma halak Israel marhitei tangan na gogoh i lobei ni haganup halak Masir,

⁴ sanggah na mananom sagala bunga tubuhni halak Masir ai, na dob binunuh ni Jahowa hun tongah-

tongah ni sidea; mangonai uhum do homa Jahowa hubani sagala naibata ni sidea.

⁵ Jadi bingkat ma halak Israel hun Raemeses, anjaha marsaran ma sidea i Sukkot.

⁶ Bingkat ma sidea hun Sukkot, anjaha marsaran ma sidea i Etam, ai ma na i topi ni halimisan.

⁷ Bingkat ma sidea hun Etam, dob ai marhusor dompak Pi-Hahiot tontang ni Baal-Zefon; anjaha marsaran ma sidea ilobei ni Migdol.

⁸ Bingkat ma sidea hun Pi-Hahiot, anjaha mandipar ma sidea hun tongah-tongah ni laut hu halimisan, anjaha mardalan ma sidea tolu ari pardalanan daohni i halimisan Etam, dob ai marsaran ma sidea i Mara.

⁹ Bingkat ma sidea hun Mara anjaha das ma hu Elim; i Elim adong do sapuluh dua bah tubuh pakon pitu puluh kambona kurma, anjaha marsaran ma sidea ijai.

¹⁰ Bingkat ma sidea hun Elim anjaha marsaran ma i topi ni Laut Sigerger.

¹¹ Bingkat ma sidea hun Laut Sigerger anjaha marsaran ma i halimisan Sin.

¹² Bingkat ma sidea hun halimisan Sin anjaha marsaran ma i Dofka.

¹³ Bingkat ma sidea hun Dofka, anjaha marsaran ma i Alus.

¹⁴ Bingkat ma sidea hun Alus anjaha marsaran ma i Papidim; seng dong bah bahen inumon ni bangsa ai ijai.

¹⁵ Bingkat ma sidea hun Papidim, anjaha marsaran ma sidea i halimisan dohorhon Sinai.

¹⁶ Bingkat ma sidea hun halimisan dohorhon Sinai, anjaha marsaran ma sidea i Kibrot-Hattaawa.

¹⁷ Bingkat ma sidea hun Kibrot-Hattaawa, anjaha marsaran ma sidea i Haserot.

¹⁸ Bingkat ma sidea hun Haserot, anjaha marsaran ma i Ritma.

¹⁹ Bingkat ma sidea hun Ritma anjaha marsaran ma i Rimon-Peres.

²⁰ Bingkat ma sidea hun Rimon-Peres anjaha marsaran ma i Libna.

²¹ Bingkat ma sidea hun Libna anjaha marsaran ma i Risa.

²² Bingkat ma sidea hun Risa anjaha marsaran ma i Kehelat.

²³ Bingkat ma sidea hun Kehelat anjaha marsaran ma i Har-Safer.

²⁴ Bingkat ma sidea hun Har-Safer anjaha marsaran ma i Harada.

²⁵ Bingkat ma sidea hun Harada anjaha marsaran ma i Makhelot.

²⁶ Bingkat ma sidea hun Makhelot anjaha marsaran ma i Tahat.

²⁷ Bingkat ma sidea hun Tahat anjaha marsaran ma i Tarah.

²⁸ Bingkat ma sidea hun Tarah anjaha marsaran ma i Mitka.

²⁹ Bingkat ma sidea hun Mitka anjaha marsaran ma i Hasmona.

³⁰ Bingkat ma sidea hun Hasmona anjaha marsaran ma i Moserot.

³¹ Bingkat ma sidea hun Moserot anjaha marsaran ma i Bene-Jaakan.

³² Bingkat ma sidea hun Bene-Jaakan anjaha marsaran ma i Hor-Gidgad.

³³ Bingkat ma sidea hun Hor-Gidgad anjaha marsaran ma sidea i Jotbata.

³⁴ Bingkat ma sidea hun Jotbata anjaha marsaran ma i Aberona.

³⁵ Bingkat ma sidea hun Aberona anjaha marsaran ma i Ezion-Geber.

³⁶ Bingkat ma sidea hun Ezion-Geber anjaha marsaran ma i halimisan Sin, ai ma Kades.

³⁷ Bingkat ma sidea hun Kades anjaha marsaran ma i bona ni Dolog Hor, i parbalogan ni Edom.

³⁸ Dob ai tangkog ma Malim Aron hu atas ni Dolog Hor, hinatahon ni Jahowa, anjaha matei ijai, bani tahun paompatpuluhon, dob luar halak Israel hun Masir, bani ari sada bulan lima.

³⁹ Marumur saratus dua puluh tolu tahun do si Aron, sanggah na matei ia i Dolog Hor.

⁴⁰ Ijia ma ibogei halak Kanaan, Raja Arad, na marianan i tanoh Kanaan hampit dangsina, na roh ai halak Israel.

⁴¹ Bingkat ma sidea hun Dolog Hor anjaha marsaran ma i Zalmona.

⁴² Bingkat ma sidea hun Zalmona anjaha marsaran ma i Punon.

⁴³ Bingkat ma sidea hun Punon anjaha marsaran ma i Obot.

⁴⁴ Bingkat ma sidea hun Obot anjaha marsaran ma i Iye-Abarim i parbalogan ni Moab.

⁴⁵ Bingkat ma sidea hun Iye-Abarim anjaha marsaran ma i Dibon-Gad.

⁴⁶ Bingkat ma sidea hun Dibon-Gad anjaha marsaran ma i Almon-Diblataim.

⁴⁷ Bingkat ma sidea hun Almon-Diblataim anjaha marsaran ma bani Dolog Abarim i lobei ni Nebo.

⁴⁸ Bingkat ma sidea hun Dolog Abarim anjaha marsaran ma i pamah Moab na bani topi ni Jordan, tontang ni Jeriko.

⁴⁹ Marsaran ma sidea bani topi ni Jordan singgan ni Bet-Jesimot das hu Abel-Sittim i pamah Moab.

Iparentahkon Jahowa Patundukkon Tanoh Kanaan anjaha Mangusir Pangisi ni Tanoh ai Hinan

⁵⁰ Dob ai nini Jahowa ma hubani si Musa i pamah Moab, na i topi ni Jordan, tontang ni Jeriko.

⁵¹ “Hatahon ma hubani halak Israel, ia dob idipari hanima Jordan masuk hu tanoh Kanaan,

⁵² maningon usironnima do ganup pangisi ni tanoh ai hun lobeinima, anjaha maningon parbolahonnima do ganup gana-gana batu ni sidea, anjaha maningon parsedaonnima do gana-gana tinuang ni sidea, anjaha sagala buntu-buntu panggalangan ni sidea maningon parreongonnima do.

⁵³ Anjaha maningon hanima do na manean tanoh ai anjaha marianan ijai, ai domma Hubere tanoh ai bennima, ase hanima simada ai.

⁵⁴ Anjaha maningon bagionnima do tanoh ai bennima mar sasamarga marhitei na manjomput na sinurat; anggo buei halakni maningon pagandaonmu parbagiananni, anggo otik, paotikonmu ma parbagiananni; barang na ija na tinuduh ni na sinurat ai, ai ma parbagiananni; marguru hubani marganima mar sasaompung dapotan parbagianan hanima.

⁵⁵ Tapi anggo seng iusir hanima pangisi ni tanoh ai hun lobeinima, jadi simasima ni sidea na tinebahonnima ai, gabe duri ma ai ibagas matanima anjaha gabe suga ibagas binongeinima, anjaha sosakonni ma hanima i tanoh na niianannima.

⁵⁶ Anjaha usih songon na husurahon bahenon-Ku hubani sidea, bahenon-Ku bennima.”

Parbalogan ni Tanoh Kanaan

34 ¹ Dob ai nini Jahowa ma hubani si Musa,
² “Marsahap ma ho hubani halak Israel
 anjaha hatahon ma hubani sidea, anggo masuk
 ma hanima hu tanoh Kanaan, *(on ma tanoh ia,
 na gabe parbagianannima, tanoh Kanaan ronsi
 parbaloganni)*

³ bagiannima hampit dangsina singgan ni
 halimisan Sin mangihut-ihut tanoh Edom; ase
 parbalogannima hampit dangsina, ai ma singgan ni
 ujung ni Laut Garam hampit hapoltakan;

⁴ anjaha marlegot ma parbalogan ai hun dangsina
 ni raboyon Akribim, mandipar hu Sin, anjaha
 marujung i dangsina ni Kades-Barnea, dob ai luar
 ma hunjai hu Hazar-Adar, anjaha laho use hu
 Asmon.

⁵ Marlegot use, parbaloganni ai hun Asmon hu Bah
 Masir, anjaha marujung i laut.

⁶ Parbalogannima hampit hasundutan, ai ma laut na
 bolon ai pakon topini ai, ai ma parbalogan hampit
 hasundutan.

⁷ On ma parbalogan hampit utara, Hun laut na
 bolon ai pagistangonnima ma ai hu Dolog Hor,

⁸ anjaha hun Dolog Hor pagistangonnima ma ai das
 hu dalan na hu Hamat, anjaha ujung ni parbalogan
 ai, ai ma i Zedad.

⁹ Dob ai gistang ma parbalogan ai hunjai das hu Zifron, anjaha ujungni, ai ma i Hasar Enan; ai ma parbalogannima hampit utara.

¹⁰ Anjaha parbalogannima hampit hapoltakan, gistang do ai hun Hasar-Enan das hu Sefam;

¹¹ hun Sefam tuad ma parbalogan ai hu Ribla, hampit hapoltakan ni Ain, dob ai tuad use ma parbalogan ai anjaha gistang manopi-nopi Tao Kinneret hampit hapoltakan.

¹² Dob ai tuad ma parbalogan ai hu Jordan, anjaha ujungni bani laut Garam. Ai ma gabe tanohnima pakon parbaloganni inggot.”

Parbagi ni Tanoh Kanaan

¹³ Dob ai nini si Musa ma hubani halak Israel, “On ma tanoh ia, sibagionnima marhitei ruji-ruji, na hinatahon ni Jahowa sibereon hubani na siah marga nari pakon hubani na satongah marga Manase.

¹⁴ Ai domma dapotan parbagianan marga ni Ruben mar sasaompung pakon marga ni halak Gad mar sasaompung pakon satongah marga Manase;

¹⁵ na dua marga pakon na satongah marga nari, domma dapotan parbagianan idipar ni Jordan, tontang ni Jeriko hampit hapoltakan.”

¹⁶ Dob ai nini Jahowa ma hubani si Musa,

¹⁷ “On do goran-goran ni dalahi na marbagi tanoh in bennima, Malim Eleasar pakon si Josua, anak ni si Nun.

¹⁸ Ambah ni ai maningon buatonnima do sada kopala humbani ganup marga laho marbagi tanoh ai.

¹⁹ Anjaha on do goran-goran ni dalahi ai: Humbani marga Juda, si Kaleb, anak ni si Jepunne;

²⁰ humbani marga Simeon, si Samuel, anak ni si Amihud;

²¹ humbani marga Benjamin, si Elidad, anak ni si Kislón;

²² humbani marga Dan, sada kopala, si Buki, anak ni si Jogli;

²³ humbani anak ni si Josep, si Haniel, anak ni si Epod, sada kopala humbani marga Manase;

²⁴ humbani marga Efraim, sada kopala, si Kemuel, anak ni si Siftan;

²⁵ humbani marga Sebulon, sada kopala, si Elisapan, anak ni si Parnah;

²⁶ humbani marga Isasar, sada kopala, si Paltiel, anak ni si Assan;

²⁷ humbani marga Asser, sada kopala, si Ahihud, anak ni si Selomi;

²⁸ humbani marga Naftali, sada kopala, si Pedahel, anak ni si Amihud.

²⁹ Ai ma dalahi, sagala na tinonahkon ni Jahowa mambagihon tanoh Kanaan bani halak Israel.”

Huta ni Halak Levi

35 ¹ Dob ai nini Jahowa ma hubani si Musa bani pamah Moab, dohorhon Jordan, tontang ni Jeriko.

² “Hatahon ma hubani halak Israel, ase ibere sidea huta humbani bagian siteanon ni sidea ai hubani halak Levi bahen ianan ni sidea, anjaha maningon bereonmu do sampalan hubani halak Levi inggot ni huta ai ganup.

³ Bani sidea ma sagala huta ai bahen ianan ni sidea, anjaha sampalanni ai bani pinahan ni sidea ampa bani pinahan ni sidea na marbagei-bagei ai.

⁴ Sampalan ni huta sibereonnima hubani halak Levi ai maningon sibaron do humbani darat ni dingding ni huta ai saribu asta inggot.

⁵ Anjaha maningon sibaronnima darat ni huta ai, hampit hapoltakan dua ribu asta, hampit dangsina dua ribu asta, hampit hasundutan dua ribu asta pakon hampit utara dua ribu asta, ase huta ai do i parsitongahanni; ai ma gabe sampalan ni huta ai bani sidea.

⁶ Ia huta sibereonnima hubani halak Levi, ai ma huta haporusan na onom ai, ai ma sibereonnima bahen haporusan ni sibunuhjolma; ambah ni ai maningon bereonnima ope hubani sidea ompat puluh dua huta.

⁷ Jadi buei ni ganup huta sibereonnima hubani halak Levi ai ma ompat puluh ualuh huta rap pakon sampalanni.

⁸ Ia pasal huta sibereonnima humbani parbagianan ni Israel, bueinan ma ai buat humbani marga na buei parbagiananni, anjaha otikan humbani na otik parbagiananni; ganup marga marguru hubani parbagianan na jinaloni, bereonni humbani hutani hubani halak Levi.”

Huta Haporusan bani Sibunuh Jolma

⁹ Dob ai nini Jahowa ma hubani si Musa,

¹⁰ “Hatahon ma hubani halak Israel, anggo domma idipari hanim Jordan masuk hu tanoh Kanaan,

¹¹ manigon papuligonnima ma bennima huta bahen huta haporusan bennima, ase tarbahen maporus hujai halak na mambunuh jolma, na so iutuskon,

¹² ase haporusan ma huta ai bennima dompak jolma siparlulu, ase ulang matei halak sibunuh jolma ai anggo lape jongjong ia i lobei ni tumpuan ase iuhumi.

¹³ Anjaha humbani huta na binerenima ai, manigon onom ma ai gabe huta haporusan bennima.

¹⁴ Manigon tolu huta ai bereonnima i dipar Bah Jordan, tolu huta nari bereonnima i tanoh Kanaan, bahen huta haporusan.

¹⁵ Na onom huta ai gabe haporusan ma ai bani halak Israel, age bani halak silopah horbou, age bani halak dagang na i tongah-tongahnima, ase tarbahen maporus hujai barang ise na mamunuh jolma na so niutuskonni.”

Uhum hubani Sibunuh Jolma

¹⁶ Tapi anggo ibunuh ia marhitei parugas bosi, pala matei, sibunuh jolma ma ia tongon, maningon marutang hosah do pamunuh ai.

¹⁷ Anjaha anggo ibogbog ia marhitei batu na i tanganni, na boi mambahen matei, gabe matei ia, sibunuh jolma ma ia tongon, maningon marutang hosah do pamunuh ai.

¹⁸ Barang anggo ibogbog ia marhitei palu-palu hayu, na boi mambahen matei, gabe matei ia, sibunuh jolma ma ia tongon, maningon marutang hosah do pamunuh ai.

¹⁹ Maningon jolma siparlulu ai sandiri mamunuh halak pamunuh ai; anggo jumpahsi ia, bulih do bunuhonni ia.

²⁰ Barang anggo itenju ia halani domdom ni uhurni, barang iutuskon manggijigsi gabe matei ia,

²¹ barang itompas ia sanggah ibagas partinggilan, pala matei ia, maningon marutang hosah panompas ai, ai sibunuh jolma do ia; maningon jolma siparlulu ai mamunuh halak pamunuh ai, anggo jumpahsi ia.

²² Tapi anggo sompong itenju ia seng halani partinggilan, barang igijigkon atap aha bani, na so niutuskonni,

²³ barang igijigkon batu, na boi mambahen matei, anjaha idabuhkon ai bani, tapi lang ididah ia, gabe matei ia, tapi seng dong partinggilanni hinan pakonsi anjaha seng isurahon hinan hamagouanni ai;

²⁴ maningon kuria in ma na manguhumi jolma pamunuh ai pakon jolma siparlulu ai, romban hubani uhum nongkan;

²⁵ maningon kuria in paluahkon jolma pamunuh ai hun tangan ni jolma siparlulu ai, maningon kuria in mangarahkonsi mulak hu huta haporusanni hinan; maningon ijai ma ia marianan, paima matei sintua ni malim, na dob niminakan marhitei minak na mapansing.

²⁶ Tapi anggo luar jolma pamunuh ai salpu hun parbalogan ni huta haporusanni ai hinan,

²⁷ anjaha jumpah jolma siparlulu ai ia i darat ni parbalogan ni huta haporusanni ai, gabe ibunuh siparlulu ai halak sipamunuh ai, seng marutang daroh ia ijai.

²⁸ Ai maningon tading ia ibagas huta haporusanni ai, paima matei sintua ni malim ai, tapi dob matei sintua ni malim ai, bulih ma jolma pamunuh ai mulak hu tanoh parbagiananni hinan.

²⁹ Ganupan in maningon gabe titah pakon aturan ma bennima marsundut-sundut bani ganup huta ianannima.

³⁰ Barang ise na mamunuh jolma, maningon bunuhon do pamunuh ai, dob nabogei hata ni na manaksihon; tapi anggo pitah sahalak do na manaksii, seng bulih marutang hosah sada halak uhumon.

³¹ Seng bulih jaloonnima duit partobus ni hosah ni halak sibunuh jolma, na maningon marutang hosah hinan maningon bunuhon do ia.

³² Anjaha seng bulih jaloonnima duit partobus humbani jolma na dob maporus hu huta haporusanni, laho palopaskonsi mulak marianan hu tanohni hinan, i lobei ni parmatei ni sintua ni malim ai.

³³ Ulang ma butaki hanima tanoh na iiankonnnima in; ai daroh do na pabutakkon tanoh in, anjaha lang jumpah pardearan tanoh in, halani daroh na dob niduruskon ijai, sobali marhitei daroh ni jolma na manduruskon ai.

³⁴ Halani ai ulang ma butaki hanima tanoh na niianannima in, ai Ahu do na marianan i tongah-tongah ni ai, ai Ahu, Jahowa do na marianan i tongah-tongah ni halak Israel.

Aturan Partongahjabuan ni Boru Panean

36 ¹ Dob ai roh ma hun dohor kopala ni mar sasaompung humbani ginompar ni halak Gilead, anak ni si Makir, anak ni si Manase, ai ma humbani ginompar ni si Josep, anjaha marsahap ma sidea i lobei ni si Musa pakon i lobei ni sagala kopala pambobai ni halak Israel mar sasaompung,

² nini sidea ma, “Domma martonah Jahowa hubani tuannami, ase iberehon tanoh in hubani halak Israel pakon parbagianan marhitei ruji-ruji; anjaha domma itonahkon Jahowa hinan hubani tuannami, ase iberehon parbagianan ni si Zelofat, saninanami ondi hubani boruni.

³ Tapi anggo laho sidea hubani sada halak humbani marga ni halak Israel na legan ai, gabe habuatan ma parbagianan ni sidea humbani parbagianan ni ompungnami, anjaha itambahkon hubani parbagianan ni marga halahoanni ai, gabe moru ma parbagianannami mangirikkon ruji-ruji hinan.

⁴ Anjaha anggo masa ma tahun parolob-oloban bani halak Israel, jadi tambahonkonni ma parbagianan ni sidea hubani marga halahoan ni sidea ai, jadi moru ma humbani parbagianan ni marga ni ompungnami parbagianan ni sidea.”

⁵ Dob ai nini si Musa ma hubani halak Israel, romban hubani hata ni Jahowa, “Sintong do hata ni halak marga Josep ai.

⁶ On do hata na tinonahkon ni Jahowa pasal boru ni si Zelofehad, 'Bulih do sidea laho hubani ise harosuh ni uhurni, tapi maningon hubani hasoman samarga ni bapa ni sidea do sidea laho,

⁷ ase ulang habuatan parbagianan ni halak Israel humbani marga na sada hubani marga na legan; ai ganup halak Israel maningon bani do longkot parbagianan ni marga ni ompungni.'

⁸ Ase ganup boru na manean parbagianan humbani marga ni halak Israel, maningon laho do ia hubani sada halak humbani ginompar ni bapa ni sidea, ase ganup halak Israel boi manean parbagianan ni bapani,

⁹ ase seng habuatan parbagianan ni marga na sada hubani marga na legan; maningon ganup do halak Israel longkot bani parbagiananni bei.

¹⁰ Romban hubani na tinonahkon ni Jahowa hubani si Musa, sonai do ibahen boru ni si Zelofehat,

¹¹ ai laho do si Mahala, si Tirsa, si Hogla, si Milka pakon si Noah, boru ni si Zelofehat ai hubani anak ni bapanggi ni sidea.

¹² Laho do sidea tongon hubani ginompar ni si Manase, anak ni si Josep, jadi totap ma parbagianan ni sidea ai bani ginompar ni bapani."

¹³ Ai ma ganup tonah pakon aturan, na tinonahkon ni Jahowa marhitei si Musa hubani halak Israel i pamah Moab, i lambung ni Jordan, tontang ni Jeriko.

5 Musa

Musa Paingatkon hubani Halak Israel Pasal Pardalanan ni Sidea das hu Kades

1 ¹ On do hata, na ipatugah si Musa hubani ganup Israel i dipar ni Jordan i halimisan, bani pamah tontang ni Suf, i holangkolang ni Paran, Tofel, Laban, Haserot pakon Disahab.

² Sapuluh sada ari mardalan daohni hun Horeb mangirik-irik Dolog Seir das hu Kades-Barnea.

³ Jadi bani tahun paompatpuluhkon, ari sada, bulan sapuluh sada, marsahap ma si Musa hubani halak Israel, romban hubani ganup na tinonahkon ni Jahowa hu bani, sipadasonni hubani sidea,

⁴ dob tinaluhon ni si Sihon, raja ni halak Amori, na marianan i Hesbon, pakon si Og, raja ni Basan, na marianan i Astarot dohorhon Ederei.

⁵ I dipar ni Jordan, i tanoh Moab ipungkah si Musa pajojorhon titah on, nini ma,

⁶ Roh do hata ni Jahowa Naibatanta in hu banta sanggah i Dolog Horeb, nini do, “Domma sungkup panorangnima marianan i lambung dolog on;

⁷ bingkak ma hanima mardalan, ase das hanima hu tanoh dolog ni halak Amori pakon hubani haganup halak simbalogni i pamah ai, i atas dolog pakon

i habungan, pakon i tanoh dangsina, pakon i topi laut, hu tanoh ni halak Kanaan pakon Libanon, das hu bah bolon ai, ai ma Bah Eprat.

⁸ Tonggor ma, domma Hulayak-layakkon tanoh in i lobeinima, ase masukan anjaha solukonnima, tanoh na dob binulawankon ni Jahowa hinan hubani ompungnima, hubani si Abraham, si Isak pakon si Jakob, laho mamberehon ai hubani sidea pakon hubani ginompar ni sidea.”

⁹ Jadi ningku ma hubani nasiam ijia, “Seng tarbahen sasada ahu mangusung nasiam,

¹⁰ ai domma ipabuei Jahowa, Naibata nasiam in nasiam, domma songon bintang na i langit buei nasiam sadari on.

¹¹ Sai itambahi Jahowa Naibata ni ompung nasiam in ma bilangan nasiam marribu hali bueinan humbani sonari, anjaha sai ipasu-pasu ma nasiam, songon na pinarbagah-bagah-Ni hinan bani nasiam.

¹² Sonaha ma pangusungku sahalak ahu bani halojaon, siporsanon pakon partinggilan nasiam?

¹³ Pilih nasiam ma bani nasiam dalahi na pentar anjaha na pantas maruhur pakon na marpangalaman humbani ganup marga nasiam, ase hupabangkit sidea gabe kopala nasiam.”

¹⁴ Jadi nini nasiam ma mambalosi ahu, “Dear do pasadaonmu hata na hinatahonmu ai.”

¹⁵ Dob ai hubuat ma humbani kopala nasiam mar sasamarga, halak na pentar anjaha na

marpangalaman, lanjar hupabangkit ma sidea bahen kopala bani nasiam, kopala ni sisaribu halak, kopala ni sisaratus halak, kopala ni silima puluh halak pakon kopala ni sisapuluh halak, anjaha songon gamot bani ganup marga nasiam.

¹⁶ Anjaha huparentahkon do hubani panguhum nasiam ijia, “Tangkas ma tangi nasiam bani parhara ni sanina nasiam, anjaha uhum hasintongan ma dabuh nasiam hubani ganup na marsanina pakon hubani halak dagang.

¹⁷ Ulang ma sitonggor jumbak nasiam ibagas paruhuman; maningon dos panangihon nasiam bani halak na banggal pakon bani halak na etek, seng bulih nasiam mabiar mangidah atap ise, ai Naibata do simada paruhuman; tapi parhara na maholtu bani nasiam, boan nasiam hu bangku, ase ahu mamareksasi.”

¹⁸ Anjaha hutonahkon do ijia bani nasiam sagala parhara, na patut bahenon nasiam.

¹⁹ Dob ai bingkat ma hita hun Horeb, anjaha mawat-awat ma hita i halimisan na bolon anjaha na majangin ai, ai ma na dob nididah nasiam, bani dalan laho hu Dolog Amori, songon na tinonahkon ni Jahowa, Naibatanta in hu banta, gabe das ma hita hu Kades-Barnea.

²⁰ Dob ai ningku ma bani nasiam, “Domma das nasiam hu Dolog Amori, na sihol bereon ni Jahowa, Naibatanta in hu banta.

²¹ Tonggor ma, domma ibere Jahowa, Naibatamu, tanoh in i lobeimu, halani ai bingkat ma ham, tean ma tanoh in, songon na dob pinarbagah ni Jahowa, Naibata ni ompungmu hinan; ulang mabiar anjaha ulang ham gobir.

²² Dob ai roh ma nasiam ganup hun dohor hu bangku anjaha nini nasiam, 'Suruh hita ma dalahi parlobeita, ase ikahapi sidea tanoh ai banta, lanjar iboan barita hu banta pasal dalan sibontasonta pakon pasal huta simasukanta.'

²³ Jadi dear do hata ai huahap, lanjar hubuat ma humbani nasiam sapuluh dua halak, sahalak humbani ganup marga.

²⁴ Dob ai bingkat ma sidea tangkog hu dolog, anjaha das ma sidea hu habungan Eskol, lanjar ikahapi ma ai.

²⁵ Iboan sidea ma ibagas tangan ni sidea humbani gogoh ni tanoh ai, anjaha ibere ma ai hu banta, anjaha iboan sidea homa barita banta, nini do, 'Na jenges tumang do tanoh, na nilayak-layakkon ni Jahowa, Naibatanta in banta,'

²⁶ tapi seng ra nasiam tangkog, lambin manggeori do nasiam dompak hata ni Jahowa, Naibata nasiam;

²⁷ anjaha marungut-ungut do nasiam ibagas lampolampo nasiam, anjaha ihatahon nasiam, 'Halani sogam ni uhur-Ni do hape mambahen na iarahkon Jahowa hita luar hun Masir laho

mangondoskon hita hubagas tangan ni halak Amori ase isiapkon hita.

²⁸ Huja ma hita tangkog? Ai domma madotei atei-ateita ibahen saninanta halani barita ai. Banggalan anjaha timbulan do bangsa ai ase hita; huta ni sidea pe banggal anjaha ipatoguh ronsi langit, adong do homa ididah hanami ijai halak Enak.'

²⁹ Jadi ningku do ijia hubani nasiam, 'Ulang nasiam gobir, anjaha ulang mabiar nasiam mangidah sidea.

³⁰ Ai Jahowa, Naibata nasiam do mardalan i lobei nasiam, la sandiri do marporang mangkopkop nasiam, sabonar songon na binahen-Ni ai bani nasiam i Masir i lobei ni panonggor nasiam,

³¹ sonai i halimisan, na dob ididah nasiam do, na dob iombah Jahowa, Naibatamu do ham, songon pangombah ni paramangon bani anakni, bani ganup dalam nidalanan nasiam in, domma pala das nasiam hu ianan on.

³² Tapi age pe sonai hatangku, tong do lang porsaya nasiam bani Jahowa, Naibata nasiam in,

³³ na mardalan i lobei nasiam, mangindahi ianan bani nasiam bahen parsaranan nasiam, borngin ibagas apuy, laho patuduhkon bani nasiam dalam sidalanan nasiam, anjaha arian ibagas hambun.'

³⁴ Tapi dob ibogei Jahowa sora ni hata-hata nasiam ai, gajag ma ringis-Ni, pala marbulawan la,

³⁵ 'Seng anjai idahon ni age sahalak humbani halak na sasundut na jahat on tanoh na dear ai, na

dob pala Hubulawankon mamberehon ai hubani ompungnima,

³⁶ sobali si Kaleb, anak ni si Jepunne; maningon idahonni do ai, hubani pakon hubani ginomparni do berehonon-Ku tanoh na dob nidogeini ai, halani marsijoloman do uhurni mangirikkon Jahowa.'

³⁷ Mangidah ahu pe manringis do Jahowa halani nasiam, pala nini, 'Ho pe lang bulih masuk hujai,

³⁸ tapi anggo si Josua, anak ni si Nun, na marugas i lobeimu, maningon masuk do ia hujai; patenger ma uhurni, ai ia do mambobahon Israel manean tanoh ai.

³⁹ Ambah ni ai, anak nasiam, na hinatahon nasiam, siayoban mando in, pakon anak nasiam, na so mambotoh ope sadari on na madear pakon na masambor, sidea ma masuk hujai, anjaha hubani sidea do ai berehonon-Ku bahen siteanon ni sidea.'

⁴⁰ Tapi bingkak ma nasiam marhusor dompak halimisan dompak Laut Sigerger.

⁴¹ Dob ai nini nasiam ma mambalosi ahu, 'Domma mardousa hanami dompak Jahowa, tapi na sihol tangkog ma hanami marporang romban hubani haganup na dob tinonahkon ni Jahowa, Naibatanta in hu banta. Anjaha ganup nasiam mangkadang sinjata porangni, anjaha gopas nasiam sihol tangkog hu dolog ai.'

⁴² Dob ai roh ma hata ni Jahowa hu bangku, 'Hatahon ma hubani sidea, ulang ma hanima

tangkog, anjaha ulang ma hanima marporang, ai lang i tongah-tongahnima do Ahu, ase ulang talu hanima ibahen munsuhnima.’

⁴³ Jadi hupadas ma hata ai bani nasiam, hape lang itangihon nasiam, lambin manggeori do nasiam dompak hata ni Jahowa anjaha manjahati, lanjar tangkog nasiam hu dolog ai.

⁴⁴ Dob ai luar ma halak Amori na marianan i dolog ai manjumpahkon nasiam lanjar iparleteng nasiam, songon pardakdak ni harinoan, lanjar italuhon nasiam i Seir ronsi Horma.

⁴⁵ Jadi dob mulak nasiam anjaha tangis-tangis i lobei ni Jahowa, seng ra Jahowa manangihon sora nasiam, anjaha lang ipaeleng pinggol-Ni hubani nasiam.

⁴⁶ Jadi hundokah ma nasiam tading i Kades, usih songon partading nasiam ondi ijai.”

Pardalanan i Halimisan das Ronsi Hamonangan Maralohon si Sihon

2 ¹ Dob ai marhusor ma hita anjaha mardalan hu halimisan mandompakkon Laut Sigerger, songon na dob ipatugah Jahowa hu bangku, gabe hundokah iinggoti hita pardologan Seir.

² Dob ai roh ma hata ni Jahowa hu bangku sonon,

³ “Domma sungkup dokahni hanima manginggoti pardologan on, marhusor ma hanima dompak utara.

⁴ Anjaha patugah ma hubani bangsa on, bontasonnima ma nuan parbalogan ni abangnima, ai ma ginompar ni si Esau, na marianan i Seir; jadi mabiar ma sidea mangidah hanima, halani ai ramotkon hanima ma dirinima,

⁵ seng bulih mambahen sindir hanima laho marmunsuh pakon sidea, ai anggo humbani tanoh ni sidea ai seng anjai bereon-Ku bennima age santopap, ai domma Hubere pardologan Seir hubani ginompar ni si Esau bahen parbagiananni.

⁶ Maningon bolionnima do sipanganon humbani sidea, ase bulih hanima mangan; bah pe maningon bolionnima do humbani sidea ase bulih hanima minum.

⁷ Ai domma ipasu-pasu Jahowa Naibatamu ham bani haganup horja ni tanganmu. Ia do manarihon ham sadokah mardalan i halimisan na bolag on, domma pala ompat puluh tahun dokahni, sai ihasomani Jahowa Naibatamu do ham, seng hurangan ham age bani aha.”

⁸ Jadi dob salpu ibontas hita tanoh ni saninanta ai, ai ma ginompar ni si Esau, na marianan i Seir, bani dalan na manadingkon Arabah, Elat pakon Ezion-Geber, mangegot ma use hita mandompakkon halimisan Moab.

⁹ Dob ai roh ma hata ni Jahowa hu bangku, “Seng bulih sosakonmu Moab, anjaha seng bulih mambahen sigiuti hanima laho marporang dompak

sidea, ai anggo humbani tanohni ai seng adong bereon-Ku bahen parbagianan bennima, ai domma Hubere Ar hubani ginompar ni si Lot bahen parbagiananni.”

¹⁰ Bani na basaia halak Emi do marianan ijai, ai ma sada bangsa na bolon, na buei anjaha na ganjang songon halak Enak.

¹¹ Tarhira sidea homa hubani halak Refaim, usih songon halak Enak, jadi igoran halak Moab do sidea halak Emi.

¹² I Seir marianan do na ijia halak Hori, gabe roh ginompar ni si Esau manoluk tanoh ai, anjaha siap sidea ibahen, lanjar marianan ijai ganti ni sidea, usih songon na binahen ni halak Israel hu tanoh parbagiananni, na binere ni Jahowa hubani sidea.

¹³ “Sonari pe bingkat ma nasiam anjaha dipari nasiam ma Bah Sared.” Jadi idipari hita ma Bah Sared ai.

¹⁴ Tapi anggo dokahni hita mardalan hun Kades-Barnea das ronsi na mandipari Bah Sared hita, tolu puluh ualuh tahun do, paima bois ganup sundut parmunsuh hun tongah-tongah ni parlampolampoan in, songon na dob binulawankon ni Naibata hinan hubani sidea.

¹⁵ Ai tangan ni Jahowa do na mangimbang sidea, laho maniapkon sidea hun tongah-tongah ni parsaranan in, paima bois sidea haganup.

¹⁶ Jadi dob bois ganup halak parmunsuh, matei hun tongah-tongah ni bangsa in,

¹⁷ nini Jahowa ma hu bangku,

¹⁸ “Maningon bontasonmu sadari on parbalogan ni Moab dohorhon Ar;

¹⁹ dob ai padohor ma ho pakon halak Amon. Seng bulih sosakonmu sidea, ai anggo humbani tanoh ni halak Amon seng dong bereon-Ku bam bahen parbagiananmu; ai domma Hubere tanoh ai hubani ginompar ni si Lot bahen parbagiananni.”

²⁰ Age nagori ai tarhira do ai hubani halak Refaim, halani halak Refaim marianan ijai na ijia, jadi igoran halak Amon ma sidea halak Samsumi,

²¹ ai ma sada bangsa na bolon, na buei anjaha na ganjang usih songon halak Enak, tapi isasapkon Jahowa do sidea i lobei ni sidea; jadi isoluk halak Amon ma tanoh ni sidea ai, lanjar sidea marianan ijai gantih ni sidea,

²² usih songon na binahen ni Jahowa hubani ginompar ni si Esau, na marianan i Seir, sanggah na siniapkon-Ni halak Hori ai i lobei ni sidea, ase sidea manoluk tanoh ai, anjaha marianan ijai gantih ni sidea das ronsi sadari on.

²³ Sonai homa halak Awi, na marianan i dusundusun das hu Gaza, gabe roh halak Kaftor maniapkon sidea, anjaha lanjar marianan ijai gantih ni sidea.

²⁴ “Bingkat ma hanima, mardalan ma, anjaha dipari hanima ma Bah Arnon. Tonggor ma, domma Huondoskon hubagas tanganmu si Sihon, raja hun Hesbon, halak Amori ai, rap pakon tanohni, pungkah hanima ma manoluk tanoh ai anjaha marmunsuh dompaksi.

²⁵ Bani na sadari on ma Ahu mamungkah mambere uhur hagobiron pakon biar mangidah ho, hubani bangsa na i toruh ni ganup langit, ase hitir anjaha gobir mangidah ho, anggo ibogei sidea baritamu.”

²⁶ Dob ai husuruh ma suruhan hun halimisan Kedemot marayak si Sihon, raja hun Hesbon, mangkatahon hata hadameion sonon,

²⁷ “Lopas ma ahu mamontas hun tanohmu, dalan na bolon in pe irik-irikonku, lang pe manirpang ahu hu siamun barang hu sambilou.

²⁸ Sipanganon maningon marboli do ai jualonmu bangku ase boi hanami mangan, bah pe sonai do maningon marboli do bereonmu hu bangku ase adong inumonnam, pitah lopas ham ma ahu mardalan nahei hun tanohmu,

²⁹ usih songon na binahen ni ginompar ni si Esau bangku, ai ma na marianan i Seir, age halak Moab na marianan i Ar, paima salpu hudipari Bah Jordan das hu tanoh na dob nilayak-layakkon ni Jahowa Naibatanami bennami.”

³⁰ Tapi lang ra si Sihon, raja hun Hesbon, manlopas hita mamontas hun tanohni ai, ai domma ipatendel

Jahowa Naibatamu tonduyni anjaha ipahengkeng uhurni, halani sihol ondskonon-Ni do ia hubagas tanganmu, songon na dob talar masa sadari on.

³¹ Dob ai roh ma hata ni Jahowa hu bangku, “Tonggor ma, domma Hupungkah mangondskon si Sihon rap pakon tanohni ai i lobeimu, halani ai pungkah hanima ma manoluk tanohni ai bahen parbagianannima.”

³² Dob ai luar ma si Sihon manjumpahkon hita hu Jahas, ia pakon ganup bangsani, sihol marmunsuh.

³³ Tapi iondoskon Jahowa, Naibatanta in ma i lobeita, gabe italuhon hita ma ia, pakon anakni ampa haganup bangsani.

³⁴ Jadi tunduk ma ibahen hita ijia ganup hutani, anjaha siap ibahen hita ganup huta, dalahi, naboru pakon dakdanak; sada pe lang ilopas hita tading;

³⁵ pitah pinahan ai iayob hita banta ronsi taban-taban hun huta na ipatundukta ai.

³⁶ Singgan ni Aroer na i topi ni Bah Arnon, pakon singgan ni huta, na i topi ni bah ai das hu Gilead, seng dong huta na so tunduk ibahen hita, haganup do iondoskon Jahowa Naibatanta in hubagas tanganta.

³⁷ Pitah hu tanoh ni halak Amon seng idohori ham, ai ma, hu topi ni Bah Jabok, hu huta na i pardologan ronsi ganup na dob pinandang ni Jahowa, Naibatanta in hinan.

Hamonangan Maralohon si Og, Raja ni Basan

3¹ Dob ai marhusor ma hita anjaha tangkog laho hu Basan; jadi luar ma si Og, raja hun Basan manjumpahkon hita, ia rap pakon ganup bangsani, sihol marmunsuh i Edrei.

² Dob ai roh ma hata ni Jahowa hu bangku, “Ulang ho mabiar mangidahsi, ai domma Huondoskon ia hubagas tanganmu rap pakon ganup bangsani pakon tanohni; maningon bahenonmu do hu bani, songon na dob binahenmu hubani si Sihon, raja ni Amori, na marianan i Hesbon.”

³ Jadi iondoskon Jahowa, Naibatanta in ma tongon age si Og, raja hun Basan rap pakon bangsani hubagas tanganta, gabe saud ma rasei ia ibahen hita, sahalak pe lang dong na tading hun bani.

⁴ Anjaha ipatunduk hita ma ganup hutani ijia, seng dong age sada huta na so tarrampas humbani sidea, onom puluh huta, haganup nagori Argob, gongoman ni si Og i Basan.

⁵ Ganupan ai huta na marbenteng anjaha na martembok na gijang do, marhorbangan anjaha marpating-pating, sobali huta na so martembok buei tumang.

⁶ Isiapkon hita do ganupan ai usih songon na binahenta hubani si Sihon, raja hun Hesbon, ai ma marhitei na maniapkon sagala huta, dalahi, naboru pakon dakdanak.

⁷ Tapi sagala pinahan pakon taban-taban humbani huta ai iayob hita do banta.

⁸ Jadi ibuat hita do ijia tanoh na idipar ni Jordan hun tangan ni dua raja ni Amori, singgan ni Bah Arnon das hu Dolog Hermon.

⁹ Halak Sidon manggorani Hermon ai Sirion, anjaha halak Amori manggoran ai Senir;

¹⁰ haganup huta na i pamah ai, sonai homa Gilead pakon ganup Basan das hu Salha pakon Edrei, huta na masuk hu gomgoman ni si Og i Basan.

¹¹ Pitah si Og, raja hun Basan do na tading humbani simasima ni halak Refaim; tonggor ma, anggo podomanni, podoman bosi do; ai lang i Rabba huta ni halak Amon do ai? Siah asta ganjangni anjaha ompat asta bolagni mangihutkon asta naomal.

Parbagi bani Tanoh na i Hapoltakan ni Bah Jordan

¹² In ma tanoh in na sinolukta ijia; singgan ni Aroer, na i topi ni Bah Arnon pakon satongah pardologan ni Gilead ampa huta-hutani domma hubere hinan hubani halak Ruben pakon halak Gad.

¹³ Tapi lobih-lobih ni tanoh Gilead pakon haganup Basan, gomgoman ni si Og ondi, ai ma haganup nagori Argob, domma hubere hubani satongah marga Manase. (*Haganup nagori Basan ai igoran do tanoh ni halak Refaim*).

¹⁴ Si Jair, anak ni si Manase mambuat ganup nagori Argob ai das hu parbalogan ni halak Gesur pakon

Maaka, anjaha igoran do Basan ai “dusun ni si Jair” mangihutkon goranni sandiri ronsi sadari on.

¹⁵ Hubani si Makir hubere do Gilead,

¹⁶ anjaha hubani halak Ruben pakon Gad hubere do tanoh ai singgan ni Gilead das hu Bah Arnon, pakon parsitongahan ni bah ai gabe parbalogan, das use hu Bah Jabok parbalogan ni halak Amon;

¹⁷ ambah ni ai pamah ai pakon Jordan ampa nagori na masuk hujai, singgan ni Kinneret das hu laut na i pamah ai, ai ma laut garam na i toruh ni raboyon ni Pisga hampit hapoltakan.

¹⁸ Dob ai huhatahon ma ijia hubani nasiam sonon, “Domma ibere Jahowa Naibata nasiam in tanoh on hubani nasiam bahen parbagianan nasiam; sagala nasiam siimbang munsuh maningon mandipar do, gopas marsinjata mambobahon sanina nasiam halak Israel in.

¹⁹ Pitah parinangon nasiam, dakdanak nasiam pakon pinahan nasiam (*hubotoh parpinahan na buei do nasiam*) bulih tading i huta-huta na hu berehon ai bani nasiam,

²⁰ paima marhasongan ibahen Jahowa sanina nasiam, usih songon nasiam, ase dihut sidea manoluk tanoh, sibereon ni Jahowa, Naibata nasiam in hubani sidea i dipar ni Jordan; dob ai bulih ma mulak ganup hu parbagiananni, na dob huberehon bani nasiam.”

²¹ Huhatahon do homa ijia hubani si Josua sonon, “ididah panonggormu do haganup na binahen ni Jahowa, Naibata nasiam in hubani na dua raja on, sonai do homa bahenon ni Jahowa hubani haganup harajaon siparayakonmin.

²² Ulang nasiam mabiar mangidah sidea, ai Jahowa Naibata nasiam do marporang mangkopkop nasiam.”

Seng Bulih si Musa Masuk hu Tanoh Kanaan

²³ Jadi huelek-elek ma ijia Jahowa,

²⁴ “Ale Tuhan Jahowa, domma ipungkah Ham patuduhkon bani jabolon-Mu hatimbulan-Mu pakon tangan-Mu na gogoh in, ai naibata na ijahanin ma i nagori atas barang i tanoh on tarbahensi mambahen songon jadi-jadian-Mu in pakon songon hagogohon-Mu in?

²⁵ Sai lopas Ham ma mandipar ahu, ase huidah tanoh na dear ai i dipar ni Jordan, tanoh pardologan na dear ai rap pakon Libanon.”

²⁶ Tapi manringis do Jahowa mangidah ahu, halani nasiam gabe seng itangihon ahu; jadi nini Jahowa ma hu bangku, “Sungkup ma ai, ulang be nunuti hatamu Bangku pasal hata on.

²⁷ Tangkog ma ho hu atas ni Dolog Pisga anjaha tatap ma tanoh ai dompak hasundutan, dompak utara, dompak dangsina pakon dompak hapoltakan, anjaha tatap ma ai marhitei

panonggormu; tapi seng bulih diparanmu Jordan on.

²⁸ Tapi martonah ma ho hubani si Josua, patenger ma uhurni anjaha pargogohi ma ia; ai mandipar do anggo ia mambobahon bangsa on, anjaha ia do na mambagihon tanoh na dob nididahmin bahen parbagianan ni sidea.”

²⁹ Jadi tading ma hita i pamah, na patontang pakon Bet-Peor.

Ipaingat si Musa Bangsa ai Mangkorjahon Titah ni Jahowa

4 ¹ Sonari pe, alo Israel, sai tangihon ma aturan pakon uhum, sagala na hupodahkon in bani nasiam, anjaha horjahon nasiam ma in, ase manggoluh nasiam anjaha masuk nasiam hu tanoh siteanon nasiam in, na binere ni Jahowa, Naibata ni ompung nasiam hubani nasiam.

² Seng bulih tambahan nasiam hubani hata na dob hutonahkon in bani nasiam, anjaha seng bulih oruan nasiam hunjin, maningon ramotkonon nasiam do tonah ni Jahowa, Naibata nasiam in, na dob hutonahkon bani nasiam.

³ Mata nasiam do mangidah na binahen ni Jahowa hu Baal-Peor; iraseihon Jahowa, Naibata nasiam in do sagala halak, na mangirikkon Baal-Peor,

⁴ tapi nasiam, na marsijoloman hubani Jahowa, Naibata nasiam manggoluh do haganup sadari on.

⁵ Tonggor ma, domma hupodahkon bani nasiam sagala aturan pakon uhum, songon na tinonahkon ni Jahowa, Naibatangku hu bangku, ase bahenon nasiam sonai i tanoh simasukan nasiam ai bahen parbagianan nasiam.

⁶ Antong ramotkon anjaha horjahon nasiam ma in, ai in do hapentaran pakon hapantason nasiam i lobei ni sagala bangsa, ase ia dob ibogei sidea ganup aturan on, gabe ihatahon sidea, “Tongon do, bangsa na pentar anjaha na pantas maruhur do bangsa na bolon on.”

⁷ Ai bangsa na bolon na ija ma na sonin dohor ni naibatani bani, songon Jahowa, Naibatanta in banta, atap sadihari pe idilo hita la?

⁸ Ai bani bangsa na bolon ja ma adong aturan pakon uhum na pintor, songon ganup titah on, na hubere i lobei nasiam sadari on?

⁹ Antong jaga ma dirimu anjaha hargahon ma tonduymu, ase ulang lupa ham bani sagala na dob nididah ni matamu, anjaha ase ulang hallus humbani uhumu sadokah ham manggoluh, anjaha maningon pabotohkononmu do in hubani anakmu pakon pahompumu,

¹⁰ naha bani ari parjongjongan i lobei ni Jahowa, Naibatamu, i Horeb, ihatahon Jahowa hu bangku, “Patumpu ma bangsa in Bangku, ase Hupabogei hon bani sidea hatang-Ku, ase iguruhon sidea marhabiaran hu Bangku sadokah manggoluh

sidea i tanoh on, anjaha iajarhon sidea sonai hubani anak ni sidea.”

¹¹ Jadi roh ma nasiam hun dohor anjaha jongjong i bona ni dolog ai, anjaha marjimbur-jimbur do apuy i dolog ai das hu parsitongahan ni langit, masa hombun na manorap pakon golap na marimpot-impot.

¹² Dob ai roh ma hata ni Jahowa hubani nasiam hun tengah-tengah ni apuy ai; ibogei nasiam do namin anggo sora ni hata ai, tapi seng dong ididah nasiam anggo rupa, pitah sora ai do.

¹³ Dob ai ibaritahon ma hubani nasiam padan binahen-Ni ai, na dob tinonahkon-Ni hubani nasiam bahen sihorjahonon nasiam, ai ma titah na sepuluh in, lanjar isuratkon do in bani dua batu panuratan.

¹⁴ Anjaha iparentahkon Jahowa do hu bangku ijia, mangajarhon hubani nasiam aturan pakon titah, sihorjahonon nasiam i tanoh sidiparan nasiam ai bahen parbagianan nasiam.

¹⁵ Antong pangkei tumang ma jaga nasiam uhur nasiam. Halani na so adong ididah nasiam rupa bani ari ai, sanggah marsahap Jahowa hubani nasiam i Dolog Horeb hun tengah-tengah ni apuy ai,

¹⁶ jaga nasiam ma, ase ulang iagou nasiam diri nasiam marhitei na mambahen bani nasiam gana-gana na niuhir, sipauman ni dalahi atap naboru,

¹⁷ sipauman ni sagala pinahan na i tanoh on, sipauman ni sagala manuk-manuk na marhabong, na habang i toruh ni langit,

¹⁸ sipauman ni sagala na manjulur i atas tanoh, sipauman ni sagala dengke, na ibagas bah, na i toruh ni tanoh.

¹⁹ Anjaha seng bulih mangkawah matamu dompak langit patonggor-tonggor mata ni ari, bulan pakon bintang ronsi ganup bala ni langit, gabe ipadari-dari ham marsombah hujai laho mambalosisi, ai ma na dob tinaktakkon ni Jahowa Naibatamu bahen rupei ni haganup bangsa, na i toruh ni langit.

²⁰ Tapi Jahowa do mambuat anjaha mangarahkon nasiam luar hun liang bos, hun Masir, ase nasiam gabe bangsa parbagianan-Ni, songon na talar sadari on.

²¹ Tapi na manringis tumang do Jahowa mangidah ahu halani hata-hata nasiam, pala marbija la, na so bulih diparanku Jordan, anjaha na so bulih masukanku tanoh na dear in, ai ma na sihol bereon ni Jahowa Naibatamu hu bamu bahen parbagiananmu.

²² Maningon matei ahu tene i nagori on, seng bulih ahu mandipari Jordan, tapi anggo nasiam maningon diparan nasiam do in anjaha solukon nasiam tanoh na dear ai.

²³ Antong pangkei ma ramotkon nasiam diri nasiam, ase ulang ihalupahon nasiam padan, na binahen

ni Jahowa, Naibata nasiam in bani nasiam, anjaha ibahen nasiam gana-gana, sipauman ni barang aha pe, songon na pinandang ni Jahowa, Naibatamu ham.

²⁴ Ai apuy na mangankon do Jahowa, Naibata parsimburu.

²⁵ Anggo tubuhan anak anjaha marpahompu nasiam, anjaha matua nasiam i tanoh ai, hape maruhur magou nasiam marhitei na mambahen gana-gana sipauman ni barang aha, anjaha ihorjahon nasiam sogam ni uhur ni Jahowa, Naibatamu, laho parroh ringis-Ni,

²⁶ diloonku ma sadarion langit pakon tanoh gabe saksi mangimbang nasiam, ase podas tumang nasiam magou hun tanoh, na sihol solukon nasiam nuan bahen parbagiananmu, dob idipari nasiam Jordan in; seng tumaram sadiha dokah nasiam marianan ijai, ai maningon siap tumang do nasiam.

²⁷ Jadi marserak ma nasiam i tongah-tongah ni sagala bangsa bahenon ni Jahowa, gabe otik mando bilangan ni jolma tading humbani nasiam i tongah-tongah ni bangsa sipajuh begu-begu, atap huja nasiam sihol usiron ni Jahowa.

²⁸ Jadi balosan nasiam ma ijai naibata na legan, na pinauli ni tangan ni jolma, hayu pakon batu, na so marpangidah, barang marpambogei, barang mangan, barang marpanganggo pe.

²⁹ Tapi maningon pindahanmu do ijai Jahowa, Naibatamu, anjaha jumpah ham do la, anggo ipindahi ham la humbani ganup uhurmu pakon ganup tonduymu.

³⁰ Anggo tarsosak ham anjaha manginsonoh bamu ganup pahara on bani panorang na roh, mulak ma ham bani Jahowa, Naibatamu, anjaha tangihon ma sora-Ni,

³¹ ai Naibata paridop ni uhur do Jahowa, Naibatamu, seng anjai tadingkonon-Ni ham, atap agouon-Ni ham, atap halupahonon-Ni padan na binahen-Ni hubani ompungmu, na dob binulawankon-Ni hubani sidea.

³² Mahua sungkun ma ari na basaia, ai ma na parlobei hun bamu, singgan ni ari dob itompa Naibatajolma i atas tanoh on, humbani ujung ni langit na sada hu ujung na sada nari, barang onggado masa pahara na sonon banggalni, barang onggatarbogeina sonai.

³³ Ongga do sada bangsa mambogeisora ni Naibata marsahap hun tongah-tongah ni apuy, songon na dob binogei nasiam, hape tong ope manggoluh?

³⁴ Barang onggado isuba sada naibata roh laho mambuat bani sada bangsa hun tongah-tongah ni bangsa na legan, marhitei parlajouan marhitei tanda, marhitei halongangan pakon marhitei parporangan, marhitei tanda na gogoh pakon botohon na toltol, ampa marhitei hajanginon

bolon romban hubani haganup, na binahen ni Jahowa, Naibata nasiam in hubani nasiam i Masir i lobei ni mata nasiam?

³⁵ Ipatuduhkon do bani nasiam, ase ibotoh nasiam, Jahowa do Naibata; seng dong na legan sobali-Si.

³⁶ Ipabogeihon do sora-Ni bamu hun nagori atas, sihol palumbahon ham; anjaha ipataridahkon do bamu apuy-Ni na banggal in i tanoh on, anjaha hata-Ni pe domma ibogei ham hun tengah-tengah ni apuy.

³⁷ Halani na dob hinaholongan-Ni ai ompungmu anjaha pinilih-Ni ai ginomparni i pudi ni sidea, anjaha binobahon-Ni ai ham luar hun Masir marhitei la sandiri, marhitei gogoh-Ni na banggal in,

³⁸ laho mangusir bangsa sibolonan anjaha sigogohan hun bamu i lobeimu, laho pamasukkon ham hujai, laho mamberehon tanoh ni sidea ai hu bamu, songon na talar masa sadari on.

³⁹ Halani ai maningon botohonmu sadari on, anjaha pangkei parimbagaskononmu, paboa Jahowa do Naibata i langit na i babou pakon i tanoh na i toruh on; seng dong na legan.

⁴⁰ Halani ai maningon ramotkononmu do sagala aturan-Ni pakon tonah-Ni, ai ma na hutonahkon in bamu sadari on, ase marhasonangan ham pakon anakmu i pudimu, anjaha ase dokah ham manggoluh i tanoh, na binere ni Jahowa Naibatamu bamu, sadokah manggoluh ham.

Huta Haporusan na i Dipar ni Jordan

⁴¹ Dob ai ipapulig si Musa ma tolu huta i dipar ni Jordan hampit hapoltakan,

⁴² ase tarbahen maporus hujai halak sibunuhjolma, na mamunuh hasomanni na so niutuskonni, anjaha seng sogam uhurni bani hinan, ase marhitei na maporus ia hubani sada humbani huta ai manggoluh hosahni:

⁴³ ai ma, Beser i halimisan, i tanoh hanopan, bani halak Ruben, Ramot i Gilead, bani halak Gad, pakon Golan i Basan, bani halak Manase.

Parlobei ni Panratahion bani Titah

⁴⁴ On ma titah, na dob niaturhon ni si Musa i lobei ni halak Israel.

⁴⁵ On ma hasaksian pakon aturan pakon uhum, na hinatahon ni si Musa hubani halak Israel, dob luar sidea hun Masir,

⁴⁶ i dipar ni Jordan, i pamah tontang ni Bet-Peor, i tanoh ni si Sihon, raja ni halak Amori, na marianan i Hesbon, na dob tinaluhon ni si Musa pakon halak Israel, sanggah na luar sidea hun Masir.

⁴⁷ Lanjar isoluk sidea ma tanohni pakon tanoh ni si Og, raja hun Basan, haduasi raja ni halak Amori, na i dipar ni Jordan hampit hapoltakan,

⁴⁸ singgan ni Aroer, na itopi ni Bah Arnon, das hu Dolog Sirion, ai ma Hermon,

⁴⁹ pakon haganup pamah na i dipar ni Jordan, hampit hapoltakan das hu laut na i pamah ai, i bona ni Dolog Pisga.

**Panratahion bani Panaktakkon ni
Naibata bani Titah na Sapuluh in**

5 ¹ Dob ai ipatumpu si Musa ma haganup halak Israel, nini ma dompak sidea, “Tangihon ma alo Israel, aturan pakon uhum, sihatahononku hubani pinggol nasiam sadari on, ase iguruhon nasiam ma in anjaha iparimbagaskon, laho mangkorjahonsi.

² Domma ibahen Jahowa, Naibatanta in padan hu banta i Dolog Horeb.

³ Seng hubani bapanta Jahowa mambahen padan on, tapi hu banta do, hu banta on, na manggoluh ganup nuan ijon.

⁴ Padumpar bohi do Jahowa, mangkatahon hata-Ni hu banta i atas ni dolog, hun tongah-tongah ni apuy.

⁵ Ahu do ijia jongjong i tongah-tongah, laho patugahkon bani nasiam hata ni Jahowa; mabiar do nasiam mangidah apuy ai, anjaha seng tangkog nasiam hu atas dolog ai, jadi nini ma,
(ay. 6-28; pausih 2 Mus. 20)

⁶ Ahu do Jahowa, Naibatamu, na paluarhon ho hun tanoh Masir, hun rumah parjabolonanmu.

⁷ Lang malo ho marnaibata na legan i lobei ni bohing-Ku.

⁸ Lang malo bahenonmu bam gana-gana barang suman-suman ni atap aha pe na i babou i nagori atas, age na i toruh ibagas tanoh on, ronsi na ibagas bah i toruh ni tanoh.

⁹ Lang malo sombahonmu in atap balosanmu, ai Ahu do Jahowa Naibatamu, Naibata parsimburu, na mambalaskon hajahaton ni bapa hubani anakni ronsi sundut patoluhon pakon paompatkon, sagala na marsogam ni uhur Bangku.

¹⁰ Tapi maidop do uhur-Hu bani na maribu-ribu, na mangkaholongi Ahu, na manramotkon sagala titah-Ku.

¹¹ Lang malo sobutonmu goran ni Jahowa Naibatamu ibagas hampung ni uhur, ai seng apitan ni Jahowa barang ise na manobut goran-Ni ibagas hampung ni uhur.

¹² Ramotkon ma ari Sabat in laho papansingkonsi, songon na tinonahkon ni Jahowa Naibatamu bam.

¹³ Onom ari ma ho marhorja anjaha mangkorjahon sagala horjamu,

¹⁴ tapi anggo ari papituhon in ari parsaranan ni Jahowa Naibatamu do in: Lang malo bahenonmu ijin age horja aha pe, ho atap anakmu atap borumu atap jabolonmu dalahi atap jabolonmu naboru atap lombumu atap halodemu atap pinahanmu na ijahanin pe atap na tondok ibagas hutamu, ase marsaran jabolonmu dalahi pakon jabolonmu naboru usih songon ho.

¹⁵ Maningon ingatonmu do, jabolon do ho na ijia i tanoh Masir, gabe iarahkon Jahowa Naibatamu ho luar hunjai marhitei tangan na gogoh pakon botokon na toltol, halani ai do ase iparentahkon Jahowa Naibatamu ho papansingkon ari Sabat in.

¹⁶ Maningon pasangaponmu ma bapamu pakon inangmu songon na tinonahkon ni Jahowa Naibatamu bam, ase dokah ho manggoluh anjaha marhasonangan ho i tanoh, na binere ni Jahowa Naibatamu bam.

¹⁷ Ulang ho mamunuh.

¹⁸ Ulang ho marbangkis.

¹⁹ Ulang ho manangko.

²⁰ Ulang ho ra manaksihon ladung dompak hasomanmu.

²¹ Lang malo uhur-uhuranmu rumah ni hasomanmu, anjaha lang malo uhur-uhuranmu urang rumah ni hasomanmu, juman barang jabolonni dalahi barang jabolonni naboru barang lombuni barang halodeni atap aha pe ugas ni hasomanmu.”

²² In ma hata in, na hinahaton ni Jahowa bani ganup tumpuan nasiam i atas dolog hun tongah-tongah ni apuy, hambun pakon na golap marimpot-impot marhasoman sora na gogoh, anjaha seng itambahi be. Anjaha isuratkon ma ai bani dua batu panuratan, anjaha ibere ma in bangku.

²³ Tapi dob ibogei nasiam sora hun tongah-tongah ni hagolapan ai, anjaha gara dolog ai ibagas apuy, roh ma nasiam hun dohor hu bangku, ganup kopala nasiam mar sasamarga pakon sintua nasiam,

²⁴ anjaha ihatahon nasiam, “Tonggor ma, domma ipataridahkon Jahowa, Naibatanta in, hu banta hamuliaon-Ni pakon hatimbulon-Ni, anjaha ipabogei-hon hu banta sora-Ni hun tongah-tongah ni apuy, anjaha domma ididah hanami sadari on, Naibata marsahap pakon jolma, hape tong do manggoluh.

²⁵ Sonari pe, mase ma rahanan maningon matei hanami? Ai siap ma hanami panganon ni apuy na bolon on; anggo ipabogei-bogei hanami ope sora ni Jahowa, Naibatanta in, maningon matei do hanami.

²⁶ Ai ise ma humbani sagala na manggoluh, na mambogei hata ni Jahowa, marsahap hun tongah-tongah ni apuy, songon hita na mambogei ai, anjaha tong manggoluh?

²⁷ Ham ma laho hun dohor, anjaha bogei ham ma ganup, na sihol hatahonon ni Jahowa, Naibatanta in; anjaha patugah ham ma bennami ganup na hinatahon ni Jahowa Naibatanta in bamu; sai tangihononnami anjaha horjahononnami do in.”

²⁸ Jadi dob ibogei sora ni hata nasiam ai, na hinatahon nasiam ai bangku, gabe ihatahon Jahowa ma hu bangku, “Domma hubogei hata ni bangsa on,

ai ma na hinatahon ni sidea bam; dear do ganup na hinatahon ni sidea ai.

²⁹ Ambit sonin ma tong paruhuron ni sidea, marhabiaran hu Bangku anjaha iramotkon ganup tonah-Ku, sadokah manggoluh sidea, gabe marhasonangan ma sidea pakon ginompar ni sidea ronsi sadokah ni dokahni.

³⁰ Laho ma ho, patugah ma hubani sidea, ‘Mulak ma hanima hu lampolamponima bei!’

³¹ Tapi anggo ho, jongjong ma ho ijon, i lambungkon, ase Hupatugah bam ganup tonah, aturan pakon uhum, sagala sipodahkonon-Ku bani sidea, ase ibahen sidea ai i tanoh sibereon-Ku bani sidea bahen parbagiananni.

³² Antong haporluhon nasiam ma mangkorjahon, songon na tinonahkon ni Jahowa, Naibata nasiam in bani nasiam, ulang manlembang nasiam hu siamun barang hu sambilou.

³³ Marparlahou ma nasiam ibagas haganup dalan, na dob tinonahkon ni Jahowa, Naibata nasiam in bani nasiam, ase manggoluh nasiam, anjaha marhasonangan nasiam, anjaha dokah nasiam manggoluh i tanoh siteanon nasiam in.”

Holong bani Naibata do Indung ni Sagala Hapintoron

6 ¹ Tapi on do tonah, aturan pakon uhum, na tinonahkon ni Jahowa, Naibata nasiam

in bangku, sipodahkononku bani nasiam, ase horjahonon nasiam in, i tanoh sisolukon nasiam ai, dob mandipar nasiam hujai,

² ase marhabiaran ham bani Jahowa, Naibatamu, anjaha iramotkon ham ganup aturan-Ni pakon tonah-Ni, sagala na dob hutonahkon bamu, ham pakon anakmu age pahompumu, sadokah ham manggoluh ase lambin ganjang umurmu.

³ Antong tangihon ma alo Israel anjaha haporluhon ma mangkorjahon in, ase marhasonangan ham, anjaha ase lambin buei tumang nasiam, songon na dob pinarbagah ni Jahowa Naibata ni ompungmu bamu, i tanoh habaoran ni dadih pakon manisan ni huramah.

⁴ Tangihon ma alo Israel, anggo Jahowa Naibatanta in, sadasi do Jahowa,

⁵ Anjaha maningon haholonganmu do Jahowa Naibatamu humbani sagala uhurmu pakon humbani sagala tonduymu pakon humbani sagala gogohmu.

⁶ Maningon parimbagaskonon nasiam do ganup hata on, sagala na hutonahkon bamu sadari on,

⁷ anjaha maningon gogohanmu do mangajarhon in hubani anakmu, anjaha sahapkononmu do in, sanggah hundul-hundul ham ibagas rumahmu, barang sanggah i pardalanan ham, barang sanggah laho modom ham, barang dob puho ham.

⁸ Anjaha maningon sangkutkononmu do in bahen partinandaan i atas tanganmu, anjaha bahen pardingatan i holangkolang ni matamu.

⁹ Anjaha maningon suratkononmu do in bani tohang ni rumahmu pakon bani horbanganmu.

¹⁰ Anjaha anggo domma das nasiam iboan Jahowa, Naibatamu, hu tanoh na binulawankon-Ni hubani ompungmu, bani si Abraham, si Isak pakon si Jakob, laho mamberehon hu bamu huta na bolon pakon na dear, sagala na so pinungkahmu,

¹¹ pakon rumah na gok marisi sagala ugas-ugas na dear, na so niisimu, pakon parigi na hinurak, na so hinurakmu, sonai pakon anggur pakon hayu jetun, na so sinuanmu, anjaha anggo domma ipangan ham ai anjaha bosur ham,

¹² jadi jaga ham ma dirimu, ase ulang lupa ham bani Jahowa, na dob mangarahkon ham luar hun tanoh Masir, hun rumah parjabolonanmu.

¹³ Maningon habiaranmu do Jahowa, Naibatamu; maningon balosanmu do la, anjaha marbulawan ham marhitei goran-Ni.

¹⁴ Seng bulih irikkonon nasiam naibata na legan, hambani naibata ni bangsa na inggot bani nasiam,

¹⁵ ai Naibata parsimburu do Jahowa Naibata nasiam i tongah-tongah nasiam, ase ulang gajag ringis ni Jahowa, Naibatamu, mangidah ham, gabe isiapkan ham hun sisik ni tanoh on.

¹⁶ Seng bulih lajouon nasiam Jahowa Naibata nasiam, songon na dob nilajou nasiam la i Massa.

¹⁷ Maningon bujur nasiam manramotkon tonah ni Jahowa, Naibata nasiam in, pakon hasaksian-Ni pakon aturan-Ni, sagala na dob tinonahkon-Ni in.

¹⁸ Anjaha maningon horjahononmu do na pintor, na madear i lobei ni Jahowa, ase marhasonangan ham, anjaha masuk ham manean tanoh na dear in, na dob binulawankon ni Jahowa hubani ompungmu.

¹⁹ Ia do mardakdak ganup munsumu hun lobeimu, songon na dob pinarbagah ni Jahowa hinan.

²⁰ Anggo isungkun anakmu ham bani panorang na sihol roh, "Aha do arti ni hasaksian, aturan pakon uhum, na tinonahkon ni Jahowa, Naibatanta in bani nasiam?"

²¹ Jadi hatahononmu ma hubani anakmu, "Jabolon ni Parao do hanami na ijia i Masir, gabe iarahkon Jahowa hanami luar hun Masir marhitei tangan na gogoh,

²² anjaha ibahen Jahowa do tanda halongangan na bolon pakon na majangin i Masir hubani Parao pakon hubani ganup pangisi ni rumahni i lobeinami.

²³ Tapi anggo hanami iarahkon do luar hunjai, laho pamasukkon hanami anjaha mamberehon bennami, na dob binagahkon-Ni hubani ompungnami.

²⁴ Anjaha iparentahkon Jahowa do hanami mangkorjahon ganup uhum on, marhabiaran hubani Jahowa, Naibatunami in, ase marhasonangan hanami tongtong, anjaha ipagoluh hanami songon sadari on.

²⁵ Anjaha gabe hapintoron do on bennami, anggo ihaporluhon hanami, mangkorjahon ganup uhum on i lobei ni Jahowa, Naibatanta in, songon na dob pinarentahkon-Ni ai bennami.”

Parjongjong dompak Pangisi ni Tanoh Kanaan

7 ¹ Anggo domma iboan Jahowa Naibatamu ham masuk hu tanoh simasukonmu bahen parbagiananmu, anjaha buei bangsa sipajuh begu-begu ipabali hun lobeimu, ai ma halak Heti, Girgasi, Amori, Kanan, Peresi, Hewi pakon Jebusi, pitu bangsa bueian anjaha gogohan hun bamu,

² anjaha anggo domma iondoskon Jahowa, Naibatamu sidea hu bamu, anjaha italuhon ham sidea, jadi maningon siapkononmu do sidea; seng bulih ham marpadan pakon sidea, anjaha seng bulih idopanmu sidea.

³ Anjaha seng bulih ham marsibuatan pakon sidea; seng bulih bereonmu borumu bani anak ni sidea, anjaha seng bulih buatonmu boruni bani anakmu.

⁴ Ai padari-darionni do anakmu marbalik humbangku, ase balosanni naibata na legan, jadi

gajak ma ringis ni Jahowa mangidah nasiam, anjaha podas ma nasiam agouon-Ni.

⁵ Tapi maningon sonon do bahenonmu bani sidea; maningon parreongon nasiam do anjapanjap ni sidea, anjaha bolahan nasiam tiang sisombahon ni sidea, anjaha robohon nasiam sinumbah ni sidea, anjaha tutungon nasiam gana-gana ni sidea bani apuy.

⁶ Ai bangsa na pansing do nasiam bani Jahowa, Naibata nasiam; domma ipilih Jahowa Naibatamu ham humbani bangsa na i tanoh on bahen bangsa-Ni sandiri.

⁷ Sedo halani bueinan nasiam humbani bangsa na legan, ase ihaholongi Jahowa nasiam anjaha ipilih nasiam, ai nasiam do namin sietekan humbani sagala bangsa;

⁸ tapi halani holong ni uhur ni Jahowa do mangidah nasiam, anjaha laho patotapkon bulawan-Ni, na dob binulawankon-Ni hubani ompung nasiam, ase iarahkon Jahowa nasiam luar marhitei tangan na gogoh, anjaha itobus ham hun rumah parjabolonan, humbani Parao, raja ni Masir.

⁹ Halani ai botoh nasiam ma, Jahowa do Naibatamu, Naibata na sintong anjaha na bonar, na manramotkon padan pakon idop ni uhur bani halak na mangkaholongisi, pakon na manramotkon tonah-Ni, ronsi marribu-ribu sundut.

¹⁰ Tapi na mambalaskon hubani haganup na mangkagigihonsi marhitei na mangagouhon sidea; seng maralang-alang uhur-Ni mambalaskon jalo-jalo hajahaton ni halak na mangkagigihonsi.

¹¹ Halani ai maningon ramotkononmu do tonah, aturan pakon uhum, sagala na hutonahkon sibahenonmu sadari on.

¹² Jadi halani itangihon nasiam do uhum on, anjaha iramotkon pakon ihorjahon nasiam do in, jadi ramotkonon ni Jahowa ma bamu padan pakon idop ni uhur, na dob binulawankon-Ni bani ompungmu;

¹³ haholongan-Ni ma ham, anjaha pasu-pasuon-Ni, anjaha pabueion-Ni; pasu-pasuon-Ni do age buah ni boltokmu pakon buah ni tanohmu, gandummu, anggurmu, minakmu, rindih ni lombumu pakon biribiri, i tanoh na dob binulawankon-Ni hubani ompungmu, sibereon-Ni hu bamu.

¹⁴ Dapotan pasu-pasu ma ham lobih humbani haganup sagala bangsa; seng dong i tongah-tongah nasiam age sahalak dalahi barang naboru na lambang, age bani pinahan nasiam.

¹⁵ Anjaha padaohon ni Jahowa ma hun bamu sagala naborit, anjaha seng lopason-Ni sampar ni Masir na tinanda nasiam ai mangonai hubani nasiam, tapi hubani na mangkagigihon nasiam do ai mangonai bahenon-Ni.

¹⁶ Maningon bois siapkononmu haganup bangsa, na niondoskon ni Jahowa Naibatamu bamu, anjaha

ulang ma malang-malang uhurmu mangidah sidea; anjaha seng bulih balosanmu naibata ni sidea, ai gabe tirangkap do ai bani nasiam.

¹⁷ Anggo nimu ibagas uhurmu, “Bueinan do bangsa sipajuh begu-begu on humbangku, sonaha ma pangusir hubani sidea?”

¹⁸ Ulang ham gobir mangidah sidea, tapi sai ingat ham ma na binahen ni Jahowa Naibata nasiam hubani Parao pakon hubani haganup halak Masir,

¹⁹ parlajouan na bolon, na nididah ni matamu sandiri, sagala tanda pakon halongangan, tangan na gogoh pakon botokon na toltol, na pinamasa ni Jahowa Naibatamu, laho paluarhon ham; sonai ma bahenon ni Jahowa, Naibatamu, hubani sagala bangsa na hinabiaranmu.

²⁰ Tongoson ni Jahowa Naibatamu ope uhum hamagouan hu tongah-tongah ni sidea, paima siap ganup na tading ai ope pakon na marponop hun lobeimu.

²¹ Ulang ma gobir ham mangidah sidea, ai Jahowa Naibatamu do i tongah-tongahmu, la do na timbul anjaha na jombut.

²² Jahowa Naibatamu do na maniapkon otik-otik sagala bangsa sipajuh begu-begu i lobeimu; seng bulih sidea sahali siap bahenonmu, ase ulang lambin ganda binatang harangan pasari-sarionmu.

²³ Tapi Jahowa Naibatamu do mangondoskon sidea i lobeimu, marhabiaran tumang do sidea bahenon-Ni paima siap tumang sidea.

²⁴ Raja ni sidea pe ondoskonon-Ni do hubagas tanganmu, ase sasap goran ni sidea bahenonmu hun toruh ni langit, seng dong age sahalak na tahan i lobeimu, paima siap sidea bahenonmu.

²⁵ Maningon bois do tutungonmu bani apuy ganagana ni naibata ni sidea, seng bulih oji uhurmu bani pirak atap omas na longkot ijai, barang buatonmu ai bamu, ase ulang hona tirangkap ham bahenon ni ai, ai hagigian ni Jahowa Naibatamu do ai.

²⁶ Halani ai seng bulih boanonmu ugas hagigian hu rumahmu, ase ulang hona papa ham usih songon ugas ai; maningon hasogamkononmu anjaha hagigihononmu do ugas na sonai, barang na dob hona papa do ai.

Golpa-golpa Hatarimakasihon ni Uhur bani Jahowa Pardear Layak in

8 ¹ Sagala titah, na huparentahkon bamu sadari on, maningon porluhon nasiam do mangkorjahon ai, ase manggoluh nasiam anjaha lambin ganda, anjaha masuk nasiam hu tanoh siteanon nasiam ai, na dob binulawankon ni Jahowa hubani ompung nasiam.

² Anjaha maningon ingatonmu do ganup panogunogunon ni Jahowa Naibatamu bamu ibagas na

ompat puluh tahun on bani dalan na i halimisan, ase la patoruh uhurmu, manlanjou ham, laho mananda na ibagas uhurmu barang na ramotanmu do tonah-Ni, barang lang.

³ Anjaha la do patoruh uhurmu, la do paturut ham loheian, anjaha la use mambere ham mangan manna, na so tinandamu hinan, barang tinanda ni ompungmu; ase la pabotohkon bamu, sedo pitah sagu-sagu hagoluhan ni jolma, tapi manggoluh do jolma tene marhitei atap aha pe na luar hun pamangan ni Jahowa.

⁴ Pakeianmu pe seng ra buruk bani angkulamu anjaha naheimu pe seng ra marpura-pura na ompat puluh tahun ai.

⁵ Tandai ma ai ibagas uhurmu, na niajaran ni Jahowa Naibatamu do ham, songon bapa mangajari anakni.

⁶ Halani ai maningon ramotkononmu do titah ni Jahowa Naibatamu, marhitei na mardalan bani dalanni anjaha na marhabiaran Bani.

⁷ Ai Jahowa Naibatamu do na mangarahkon ham hu tanoh na dear, hu tanoh na marbah bolon, marbah tubuh pakon martao, na mabaor i habungan pakon i dolog,

⁸ hu tanoh hatubuhan ni gandum pakon jagul, hayu anggur, hayu ara pakon dalima, tanoh na marhayu jetun anjaha na marmanisan ni huramah;

⁹ tanoh na so pala marhangaluton panganonmu rutimu ijai, anjaha lang hurangan ham atap bani aha

pe, tanoh, na marbosi batuni, anjaha hun dolog-dologni boi do onkalonmu tombaga.

¹⁰ Ia dob mangan ham anjaha bosuran, maningon pujionmu do Jahowa Naibatamu halani tanoh na madear, na dob binere-Ni ai bamu.

¹¹ Jaga ma dirimu, ase ulang lupa uhurmu bani Jahowa Naibatamu, gabe lang iramotkon ham tonah-Ni, uhum-Ni pakon aturan-Ni, na hutonahkon in bamu sadari on,

¹² ase ulang ia dob mangan ham anjaha bosuran, anjaha ipauli ham rumah na jenges, anjaha marianan ijai,

¹³ sonai homa lombumu pakon biribirimu lambin manggargar, anjaha pirak pakon omas lambin bueini bamu, lambin ganda haganup na dong bamu,

¹⁴ gabe gijang uhurmu, anjaha ihalupahon ham Jahowa Naibatamu, na mangarahkon ham luar hun tanoh Masir, hun rumah parjabolonan,

¹⁵ na manogu-nogu ham i halimisan na bolak anjaha na majangin, ianan ni ulog darih pakon gansip golang, tanoh dorging na so marisi bah, na paluarhon bamu bah hun dolog batu na mapir sahalian,

¹⁶ na mambere ham mangan manna i halimisan, na so tinanda ni ompungmu, laho patoruhkon uhurmu, pakon manlajou ham, laho mambahen marhasonangan ham bani ujungni.

¹⁷ Ulang ma hatahon ham ibagas uhurmu, “Gogohku pakon kuasa ni tanganku do na mambere bangku habayakon on.”

¹⁸ Maningon ingaton ni uhurmu do Jahowa Naibatamu, ai la do na mambere gogoh bamu mansari arta, ase ipahot padan-ni, na dob binulawankon-Ni hubani ompungmu, songon sadari on.

¹⁹ Tapi anggo ilupahon uhurmu do Jahowa, Naibatamu, anjaha iirikkon ham naibata na legan, anjaha ibalosi ampa isombah ham ai, hupalumba hinan ma nasiam sadari on, maningon magou tumang ma nasiam.

²⁰ Songon bangsa sipajuh begu-begu, na dob niagou ni Jahowa hun lobei nasiam, usih sonai ma nasiam magou halani na so tinangihon nasiam sora ni Jahowa Naibata nasiam in.

Golpa-golpa Pasal Hapintoron Sandiri

9 ¹ Tangihon ma alo Israel! Diparanmu ma sadari on Jordan laho masuk anjaha patundukkon bangsa, na bolonan anjaha gogohan hun bamu, pakon huta na bolon, na marbatar-batar ronsi langit,

² sada bangsa na bolon anjaha na gijang, ai ma halak Enak, na dob tinandamu anjaha binogeimu baritani sonon: Ise ma na manahan jongjong i lobei ni halak Enak?

³ Botoh ma sadari on, Jahowa Naibatamu sandiri do na mardalan i lobeimu, songon apuy na mangankon; la do maniapkon sidea anjaha la do na patundukkon sidea i lobeimu; jadi pabalionmu ma sidea, anjaha podas ma agouonmu sidea, songon na binagahkon ni Jahowa hinan bamu.

⁴ Ia dob ionjar Jahowa, Naibatamu sidea hun lobeimu, ulang ma hatahon ibagas uhurmu, “Halani hapintoronku do ase iarahkon Jahowa ahu masuk laho manean tanoh on; hape namin halani hajahaton ni bangsa sipajuh begu-begu ai do mambahen ionjar Jahowa sidea hun lobeimu.”

⁵ Sedo halani hapintoronmu barang binahen ni bujur ni uhurmu, mambahen masuk ham laho manean tanoh ni sidea; tapi halani hajahaton ni bangsa sipajuh begu-begu ai do, ase ionjar Jahowa Naibatamu sidea hun lobeimu, anjaha laho patotapkon hata na dob binulawankon ni Jahowa hubani ompungmu, hubani si Abraham, si Isak pakon si Jakob.

⁶ Halani ai botoh ham ma, sedo halani hapintoronmu ase ibere Jahowa Naibatamu bamu tanoh na dear on bahen parbagiananmu ai bangsa na hengken maruhur do ham.

⁷ Ingat ma anjaha ulang ma halupahon, na pinarohmu in ringis ni Jahowa Naibatamu i halimisan, olat ni ari dob luar ham hun tanoh

Masir, das hubani na roh nasiam hu ianan on, sai manggeori do nasiam.

⁸ I Dolog Horeb ope domma iparoh nasiam ringis ni Jahowa, sonin ma ringis ni Jahowa bani nasiam, pala sihol agouon-Ni nasiam.

⁹ Sanggah na naik ai ahu hu atas dolog ai, laho manjalo panuratan batu na dua ai, panuratan parpadanan na binahen ni Jahowa hubani nasiam, tading do ahu ompat puluh borngin i dolog ai, seng mangan ruti barang minum bah ahu.

¹⁰ Jadi ibere Jahowa ma bangku na dua panuratan batu ai, na sinuratkon marhitei jari-jari ni Naibata; anjaha i atasni do tarsurat sagala hata, na dob hinatahon ni Jahowa hubani nasiam i atas dolog hun tengah-tengah ni apuy sanggah bani ari partumpuan ai,

¹¹ Dob salpu na ompat puluh ari ompat puluh borngin ai, ibere Jahowa ma hu bangku na dua panuratan batu ai, ai ma panuratan parpadanan ai.

¹² Dob ai nini Jahowa ma hu bangku, “Jongjong ma ho, podas ma ho tuad hunjon, ai domma maruhur magou bangsamu, na dob niarahkonmu luar hun Masir. Podas ni in sidea manlembang hun dalan na dob Hutonahkon in bani sidea; domma ibahen sidea bani sidea sada gana-gana na tinuang.”

¹³ Ambah ni ai ihatahon Jahowa ma hu bangku, “Domma Huidah parlahou ni bangsa on, anjaha tonggor ma, bangsa na hengken maruhur do on.

¹⁴ Palopas ma Ahu, ase Husiapkon sidea, ase sasap goran ni sidea hun toruh ni langit; anjaha Hubahen pe ho gabe sada bangsa, gogohan anjaha bolonan humbani bangsa on.”

¹⁵ Jadi marhusor ma ahu anjaha tuad hun dolog ai, na gajag ibagas apuy, anjaha na dua panuratan parpadanan ai ibagas haduasi tanganku.

¹⁶ Jadi hutorih ma, anjaha tonggor ma, domma mardousa nasiam dompak Jahowa Naibata nasiam, ibahen nasiam do bani nasiam sada lombu; podasni in tongon nasiam manlembang hun dalan na tinonahkon ni Jahowa hubani nasiam.

¹⁷ Jadi hutangkap ma na dua panuratan batu ai, hugijigkon ma ai hun tanganku na dua on, anjaha hubolahi i lobei nasiam.

¹⁸ Dob ai manrogop ma ahu i lobei ni Jahowa, songon na parlobei ai, ompat puluh ari ompat puluh borngin dokahni, lang mangan ruti barang minum bah ahu, halani ganup dousa nasiam, na binahen nasiam ai, marhitei na mambahen na masambor i lobei ni Jahowa laho paroh ringis-Ni.

¹⁹ Ai mabiar do ahu mangidah ringis pakon gila na niringiskon ni Jahowa hubani nasiam, gabe sihol agouhonon-Ni nasiam. Tapi itangihon Jahowa do ahu age sahali ai.

²⁰ Mangidah si Aron pe manringis tumang do Jahowa, sihol agouon-Ni do ia, tapi ahu do martonggo ijia mangapiti si Aron.

²¹ Jadi hubuat ma barang na mambahen nasiam mardousa ai, ai ma anak ni lembu na binahen nasiam ai, anjaha hututung ma ai ibagas apuy lanjar hubolahi ma ai, anjaha hududa lumat das ronsi songon orbuk, dob ai hutirtirhon ma orbuk ai hu bah na roh hun dolog ai.

²² Gajag use ringis ni Jahowa ibahen nasiam sanggah i Tabera, i Massa pakon i Kibrot-Hattaawa.

²³ Anjaha sanggah na sinuruh ni Jahowa nasiam hun Kades-Barnea, nini do, “Tangkog ma nasiam anjaha soluk nasiam ma tanoh ai, na dob Hubere hubani nasiam, hape ilawan nasiam do hata ni Jahowa, Naibata nasiam, anjaha lang porsaya nasiam Bani, anjaha lang itangihon nasiam sora-Ni.

²⁴ Sai manlawan do nasiam dompak Jahowa olat ni ari dob Hutanda nasiam.”

²⁵ Jadi manrogop ma ahu i lobei ni Jahowa ompat puluh ari ompat puluh borngin dokahni, sai manrogop do ahu, halani na dob hinatahon ni Jahowa sihol agouhonon-Ni nasiam.

²⁶ Dob ai martonggo ma ahu hubani Jahowa, “Ham alo Tuhan Jahowa, ulang ma agou bangsa-Mu pakon parbagianan-Mu, na dob tinobus-Mu marhitei hatimbulon-Mu, na dob niarahkon-Mu luar hun tanoh Masir marhitei tangan na gogoh.

²⁷ Ingat Ham pakon si Jakob, ulang ma Ham manatap dompak hahengkengon ni bangsa on, dompak hajahatonni pakon dousani,

²⁸ase ulang ihatahon halak pangisi ni tanoh, hunja hanami iarahkon Ham. Halani na so boi do Jahowa mangarahkon sidea masuk hu tanoh na dob pinarbagah-Ni ai bani sidea, anjaha halani gigi ni uhur-Ni do mangidah sidea ase iarahkon sidea luar, laho mamunuh sidea i halimisan.

²⁹Sidea do bangsa-Mu pakon parbagianan-Mu, na dob niarahkon-Mu luar marhitei hagogohon-Mu na banggal in pakon marhitei botohon-Mu na gostong in.”

Na Dua Batu na Baru Panuratan ni Titah ai. Parpulig ni Marga Levi

10 ¹Ijia nini Jahowa ma hu bangku, “Lala ma bam panuratan batu songon na parlobei ai, anjaha tangkog ma ho marayak Ahu hu atas dolog on, ambah ni ai bahen ma bam sada poti-poti humbani hayu,

²ase Husuratkon hubani panuratan batu ai hata na bani panuratan batu na parlobei ai, na dob binolahkonmai, dob ai nahkon ma ai hubagas poti-poti ai.”

³Jadi hubahen ma sada poti humbani hayu maranti anjaha hulala ma dua panuratan batu songon na parlobei ai; dob ai tangkog ma ahu hu dolog ai; anjaha panuratan batu na dua ai ibagas tanganku.

⁴Dob ai isuratkon ma hubani panuratan ai, songon panuratkonni bani na parlobei ai, titah na sapuluh

in, na hinatahon ni Jahowa hubani nasiam i atas dolog ai hun tengah-tengah ni apuy, sanggah ari partumpuan ondi, dob ai ibere Jahowa ma ai bangku.

⁵ Dob ai marhusor ma ahu anjaha tuad hun dolog ai, anjaha hunahkon ma panuratan ai hubagas poti na dob hupauli ai; anjaha lanjar ijai ma ai, songon na pinarentahkon ni Jahowa bangku.

⁶ Bingkat ma halak Israel hun Beerot-Bene-Jaakan hu Mosera; ijai do matei si Aron, lanjar tartanom ijai, jadi anakni, si Eleasar ma bangkit malim gantihni.

⁷ Bingkat ma use sidea hunjai hu Gudgodah, anjaha hun Gudgodah hu Jobata, ai ma tanoh na marbah bolon.

⁸ Ijia ma ipapulig Jahowa marga Levi, gabe siusung poti parpadanan ni Jahowa, anjaha jongjong i lobei ni Jahowa, marugas Bani, pakon mamasu-masu marhitei goran-Ni, ronsi sadari on.

⁹ Halani ai seng dapotan parbagianan barang tean-teanan halak Levi rap pakon saninani, Jahowa do tean-teananni songon na hinatahon ni Jahowa Naibatamu hu bani.

¹⁰ Jongjong ma ahu i atas dolog ai, songon na bani ari parlobei ai, ompat puluh ari ompat puluh borngin dokahni, anjaha itangihon Jahowa do ahu age sahali on; seng marosuh la magou ham.

¹¹ Anjaha nini Jahowa ma hu bangku, “Jongjong ma ho, bingkat ma mambobahon bangsa in, ase masuk sidea anjaha isoluk tanoh ai, na dob Hubulawankon hinan hubani ompung ni sidea, laho mamberehon ai bani sidea.”

**Sipaingat Mangkatahon Maruhur
Biar Mangidah Naibata**

¹² Sonari pe, alo Israel, aha do na pinindo ni Jahowa Naibatamu hun bamu, ai lang ase marhabiaran ham bani Jahowa Naibatamu, mardalan ham bani ganup dalanni, haholonganmu la, balosanmu Jahowa Naibatamu humbani ganup uhurmu pakon ganup hosahmu,

¹³ anjaha ramotanmu tonah pakon aturan ni Jahowa, na hutonahkon bamu sadari on bahen hasonanganmu?

¹⁴ Tonggor ma, guru bani Jahowa Naibatamu do langit ni langit, tanoh pakon ganup isini.

¹⁵ Hape pitah hubani ompungmu do Jahowa marosuh ni uhur, ihaholongi do sidea anjaha ipilih do ginompar ni sidea i pudi ni sidea, ai ma nasiam humbani sagala bangsa, songon sadari on.

¹⁶ Antong sunat nasiam ma sibur-sibur ni uhur nasiam, anjaha ulang be hengkenng uhur nasiam.

¹⁷ Ai Jahowa Naibata nasiam, la do Naibata ni sagala naibata, anjaha Tuhan ni sagala tuan, Naibata na

timbul, na gogoh anjaha na jombut, na so sitonggor jumbak anjaha na so ra manjalo sisip.

¹⁸ Ia do pasintong uhum hubani na tading maetek pakon hubani puang-puang na mabalu, holong do uhur-Ni bani halak dagang, anjaha ibere do ia sipanganon pakon parhiouon.

¹⁹ Halani ai haholongi nasiam ma halak dagang, ai halak dagang do age nasiam na ijia i tanoh Masir.

²⁰ Maningon marhabiaran do ham bani Jahowa Naibatamu, maningon ia do balosanmu, anjaha marsijoloman uhumu Bani, anjaha hubani goran-Ni ham marbija.

²¹ Ia do puji-pujionmu, anjaha ia do Naibatamu na dob mambahen bamu habanggalon pakon halongangan on, na dob nididah ni matamu.

²² Pitu puluh do ompungmu tuad hu Masir, hape nuan domma itumpak Jahowa Naibatamu ham, songon bintang na i langit bueini.

Pasu-pasu na Roh humbani Pambalosion, Papa na Roh humbani Pangengkaron

11 ¹ Halani ai maningon haholonganmu do Jahowa Naibatamu, anjaha ramotkononmu pambalosion Bani, age aturan-Ni, uhum-Ni pakon tonah-Ni sadokah ham manggoluh.

² Anjaha maningon tandaonmu do sadari on *(ai sedo hubani anak nasiam na so sampang mananda barang mangidah on ahu marsahap*

pasal pangajarion ni Jahowa Naibata nasiam)
hatimbulon-Ni, tangan-Ni na gogoh in pakon
botokon-Ni na gostong in,

³ tanda halongangan pakon pambahenan-Ni, sagala
na binahen-Ni i Masir hubani Parao raja ni Masir
pakon hubani ganup tanohni;

⁴ pakon na binahen-Ni hubani bala ni Masir, hubani
hudani pakon garetani; sonaha pambahenan-Ni
bah ni Laut Sigerger manlangkobi sidea, sanggah na
iayak-ayak sidea nasiam, gabe magou sidea ibahen
Jahowa ronsi sadari on;

⁵ pakon na binahen-Ni hubani nasiam i halimisan,
paima das nasiam hubani ianan on;

⁶ pakon na binahen-Ni hubani si Datan pakon si
Abiram, anak ni si Eliab, ginompar ni si Ruben,
naha parpangangang ni tanoh ai bani babahni
laho mambondut sidea, rap pakon rumah ni sidea,
lampolamponi, pakon sagala na manggoluh na
mangirikkon sidea, i tongah-tongah ni ganup Israel;

⁷ ai mata nasiam sandiri do mangidah ganup
pambahenan ni Jahowa na bolon in, sagala na
binahen-Ni ai.

⁸ Halani ai sai ramotkon nasiam ma sagala tonah,
na hutonahkon in bamu sadari on, ase margogoh
nasiam anjaha masuk nasiam hu tanoh siteanon
nasiam ai, simasukan nasiam ma ai laho maneansi,

⁹ anjaha ase dokah nasiam manggoluh i tanoh
na dob binulawankon ni Jahowa hubani ompung

nasiam, laho mamberehon hubani sidea pakon hubani ginompar ni sidea, sada tanoh habaoran ni dadih pakon manisan ni huraamah.

¹⁰ Ia tanoh simasukan anjaha siteanon nasiam ai, seng songon tanoh Masir, pandaratan nasiam ai; ia dob isaburhon ham bonihmu hujai, gabe naheimu ibahen ham mangarbahi ai, songon pohon parlowohon;

¹¹ tapi tanoh simasukan anjaha siteanon nasiam ai, tanoh dolog anjaha na marhabungan do ai, mangonsop bah udan na hun langit,

¹² sada tanoh na sinarihon ni Jahowa Naibatamu do ai; tongtong do mangkawahi mata ni Jahowa Naibatamu hujai humbani mula ni tanoh on ronsi ujungni.

¹³ Anjaha anggo tangi nasiam bani tonahku, na hutonahkon in bani nasiam sadari on, gabe holong uhur nasiam bani Jahowa, Naibata nasiam, anjaha ibalosi nasiam la humbani ganup uhurmu pakon ganup hosahmu,

¹⁴ bereon-Ni ma udan bani tanoh nasiam bani panorangni, udan partidahonkon pakon udan parpariamaonkon, ase tarpatumpu ham gandummu, anggurmu pakon minakmu.

¹⁵ Ia homa patubuhkon poyon-poyon i ladangmu hagoluan ni pinahanmu ase mangan ham anjaha bosuran.

¹⁶ Jaga nasiam ma diri nasiam, ase ulang tarpadari-dari uhur nasiam, gabe marbalik nasiam mangirikkon naibata na legan, anjaha marsombah hujai;

¹⁷ jadi gajag holi ringis ni Jahowa mangidah nasiam, gabe itutup langit ase ulang roh udan, tanoh in pe lang ibere gogohni, gabe podas nasiam magou hun tanoh na dear, na binere ni Jahowa bani nasiam.

¹⁸ Antong sai parimbagaskon nasiam ma hatangkon anjaha pamasuk nasiam ma in hubagas uhur nasiam, anjaha sangkutkon nasiam ma in bahen partinandaan i atas tangan nasiam, anjaha bahen pardingatan i holangkolang ni mata nasiam.

¹⁹ Anjaha ajarhon nasiam ma in bani anak nasiam, sahapkon nasiam ma in sanggah hundul-hundul nasiam i rumah nasiam, barang sanggah i pardalanan ham, barang laho modom pe ham, barang dob puho use.

²⁰ Anjaha maningon suratkononmu do in hubani tohang ni rumahmu barang hubani horbanganmu,

²¹ ase lambin ganda ari-ari ni goluhmu pakon ari-ari ni goluh ni ginompar nasiam i tanoh, na dob binulawankon ni Jahowa hubani ompung nasiam, laho mamberehon ai bani sidea, songon dokah ni langit i babou ni tanoh on.

²² Anggo botul-botul iramotkon nasiam ganup titah on, na hutonahkon in bani nasiam laho mangkorjahon ai, ihaholongi nasiam Jahowa,

Naibata nasiam, mardalan nasiam bani ganup dalan-Ni, anjaha marsijoloman nasiam hu Bani,
²³ maningon pabalion ni Jahowa do haganup bangsa sipajuh begu-begu hun lobei nasiam, ase isoluk nasiam bangsa sibolonan anjaha sigogohan humbani nasiam.

²⁴ Sagala tanoh na dob nidoge i ni tapak-tapak ni nahei nasiam, maningon nasiam simadasi, olat ni halimisan ai pakon Libanon, olat ni bah ai, ai ma Eprat, das hu laut hampit hasundutan, ai ma tanoh nasiam.

²⁵ Ise pe lang na manahan jongjong i lobeimu; bereon ni Jahowa Naibata nasiam ma uhur hagobiron pakon biar mangidah nasiam bani ganup tanoh, na sihol dogeion nasiam, songon na binagahkon-Ni bani nasiam.

²⁶ Tonggor ma, ahu papilihkon bani nasiam sadari on pasu-pasu pakon papa-papa;

²⁷ pasu-pasu tene, anggo itangihon nasiam tonah ni Jahowa Naibata nasiam, sagala na hutonahkon in bani nasiam sadari on;

²⁸ tapi papa-papa anggo lang itangihon nasiam tonah ni Jahowa Naibata nasiam, gabe manlembang nasiam hun dalan, na hutonahkon in bani nasiam sadari on, laho mangirikkon naibata na legan, na so tinanda nasiam.

²⁹ Anggo domma das ham iarahkon Jahowa Naibatamu masuk hu tanoh siparayakonmu ai

bahen parbagiananmu, maningon hatahononmu do pasu-pasu on i Dolog Garisim, anjaha papa on i Dolog Ebal

³⁰ Ai lang haduasi do ai i dipar ni Jordan, i pudi ni dalan na hampit hasundutan, i tanoh ni halak Kanaan, na marianan i pamah ai, tontang ni Gilgal, dohorhon baringin na i More?

³¹ Ai diparan nasiam ma Jordan, laho masuk manean tanoh, na dob binere ni Jahowa Naibata nasiam bani nasiam; teanon nasiam ma ai anjaha marianan ma nasiam ijai.

³² Halani ai sai haporluhon nasiam ma manramotkon ganup aturan pakon uhum, na dob hutonahkon in bani nasiam sadari on.

Maningon Sada Ianan do Panggalangan bani Naibata

12 ¹ On do aturan pakon uhum, na patut siporluhonon nasiam mangkorjahonsi i tanoh, na binerehon ni Jahowa Naibata ni ompungmu bamu, bahen parbagiananmu, sadakah nasiam manggoluh i atas tanoh on.

² Maningon parsedaon nasiam do sagala ianan panggalangan bani naibata na legan na bani bangsa sipajuh begu-begu na sihol solukon nasiam ai, na i atas dolog barang i atas raboyon, barang i toruh ni sagala hayu na ratah.

³ Maningon parreongon nasiam do sagala anjapanjap ni sidea, anjaha bolahon nasiam tiang ni sidea, anjaha bois tutungon nasiam sisombahon ni sidea bani apuy; maningon robohon nasiam do gana-gana ni naibata ni sidea, anjaha sasapkonon nasiam goran ni sidea hun tanoh ai.

⁴ Seng bulih sonai bahenon nasiam hubani Jahowa, Naibata nasiam.

⁵ Tapi ianan, na pinilih ni Jahowa Naibata nasiam humbani ganup marga nasiam laho pajonamkon goran-Ni hujai, anjaha marianan ijai, maningon ai do sipindahan nasiam, anjaha maningon hujai do nasiam laho.

⁶ Maningon hujai do boanon nasiam galangan situtungon nasiam pakon galangan sisayaton nasiam, parsapuluhan nasiam pakon galangan sitatangon ni tanganmu, galangan bagah-bagahmu pakon galangan rosuh ni uhurmu, bunga tubuh ni lombumu pakon biribirimu.

⁷ Maningon hujai do homa nasiam mangan i lobei ni Jahowa Naibata nasiam, anjaha marmalas ni uhur nasiam, ham pakon pangisi ni rumah nasiam, mangidah haganup jinolom ni tanganmu, sagala na pinasu-pasu ni Jahowa Naibatamu bamu.

⁸ Seng bulih bahenon nasiam ijai romban hubani haganup na binahenta ijon sadari on, ganup mambahen na pintor bani uhurni bei,

⁹ ai seng das ope nasiam ronsi nuan hu parsaranan, barang hu parbagianan, sibereon ni Jahowa Naibatamu bamu.

¹⁰ Tapi anggo diparan nasiam ma Bah Jordan ai, anjaha marianan nasiam i tanoh na nilayak-layakkon ni Jahowa Naibata nasiam bahen parbagianan nasiam, anjaha marhasonangan nasiam ibahen humbani haganup munsuh nasiam inggot, gabe marsonang-sonang nasiam marianan, ¹¹ jadi maningon hubani ianan, na sihol pilihan ni Jahowa, laho pajonamkon goran-Ni ijai, maningon hujai do boanon nasiam sagala na huparentahkon bamu. Galangan situtungan nasiam pakon galangan sisayaton nasiam, parsapuluhan nasiam pakon galangan sitatungan nasiam pakon ganup galangan bagah-bagah nasiam, sagala na binagah-bagahkon nasiam hubani Jahowa.

¹² Maningon marmalas ni uhur do nasiam i lobei ni Jahowa Naibata nasiam, nasiam pakon anak nasiam pakon boru nasiam, jabolon nasiam dalahi pakon jabolon nasiam naboru ronsi halak Levi na marianan ibagas huta nasiam, ai seng dapotan parbagianan barang tean-teanan sidea.

¹³ Jaga ma dirimu, ase ulang igalangkon ham galangan situtungan nasiam bani ganup ianan na dear ninuhurmu;

¹⁴ tapi bani ianan na sihol pilihon ni Jahowa i tongah-tongah ni sada humbani margamu,

maningon ijai do galangkononmu galangan situtungonmu, anjaha maningon ijai do bahenonmu sagala na hutonahkon in bamu.

¹⁵ Tapi bulih do sayatonmu anjaha panganonmu gulei ibagas hutamu, marguru hubani sir ni uhurmu, romban hubani pasu-pasu ni Jahowa Naibatamu, na binerehon-Ni in bamu ibagas haganup iananmu; halak na butak pakon na borsih, bulih do mangankon hunjai, songon balua barang ura.

¹⁶ Pitah daroh ni ai tene seng bulih panganon nasiam, maningon hu tanoh do ai useihononkon songon bah.

¹⁷ Seng bulih panganon nasiam ibagas huta nasiam parsapuluhan humbani gandummu, barang humbani anggurmu, barang humbani minakmu, barang bunga tubuh humbani lombumu barang humbani biribirimu, barang atap aha pe humbani galangan bagah-bagahmu na dob binagahkonmu, barang galangan rosuh ni uhurmu pakon sitatangan humbani tanganmu.

¹⁸ Maningon i lobei ni Jahowa Naibatamu do panganonmu ai, bani ianan na sihol pilihon ni Jahowa Naibatamu, ham pakon anakmu ampa borumu, jabolonmu dalahi pakon jabolonmu naboru pakon halak Levi na marianan ibagas hutamu; maningon marmalas ni uhur do ham i

lobei ni Jahowa Naibatamu ibagas haganup na hinorjahonmu.

¹⁹ Jaga dirimu ase ulang lang isarihon nasiam halak Levi, sadokah manggoluh ham i atas tanohmu.

²⁰ Anggo ipabolag Jahowa Naibatamu tanohmu, songon na dob pinarbagah-Ni hinan bamu, gabe nimu, 'Sihol mangan gulei ahu,' halani sir uhurhu sihol mangan gulei, bulih do panganonmu gulei marguru hubani gok ni uhurmu.

²¹ Anggo madaohtu ham humbani ianan, na sihol pilihan ni Jahowa Naibatamu, laho pajonamkon goran-Ni ijai, bulih do sayatonmu humbani lombu barang biribirimu, sagala na binere ni Jahowa bamu, songon na dob hutonahkon in bamu; anjaha bulih do ham mangan ibagas hutamu marguru hubani gok ni uhurmu.

²² Tongon tene songon na pinangan ni halak balua pakon urisa, bulih do panganonmu ai, halak na borsih pakon na butak bulih do panganonni ai.

²³ Tapi jaga dirimu, ase ulang ipangan ham daroh ai, ai daroh ai do hosah; halani ai seng bulih panganonmu hosah ai rap pakon dagingni.

²⁴ Seng bulih panganonmu daroh ai, maningon hu tanoh do ai useihononmu songon bah.

²⁵ Seng bulih panganonmu ai, ase marhasonangan ham pakon ginomparmu i pudimu, anggo ihorjahon ham na pintor bani panonggor ni Jahowa.

²⁶ Tapi galanganmu na pansing, na maningon sigalangkononmu, pakon galangan bagah-bagahmu, maningon buatonmu anjaha boanonmu do ai bani ianan na dob pinilih ni Jahowa,

²⁷ anjaha maningon galangkononmu do galangan situtungonmu, dagingni pakon darohni, i atas anjapanjap ni Jahowa Naibatamu; daroh ni galangan sisayatonmu maningon useihononkon do ai hu atas ni anjapanjap ni Jahowa Naibatamu, tapi anggo dagingni bulih do ai panganonmu.

²⁸ Ramotkon anjaha tangihon ham ma ganup hata on, sagala na hutonahkon on bamu, ase marhasonangan ham pakon ginomparmu i pudimu ronsi sadokah ni dokahni, anggo ihorjahon ham na dear pakon na pintor bani uhur ni Jahowa Naibatamu.

²⁹ Anggo domma isiapkan Jahowa Naibatamu i lobeimu bangsa sipajuh begu-begu, na sihol parayakon nasiam laho manoluk sidea, anjaha anggo domma isoluk ham sidea, lanjar marianan ham i tanoh ni sidea ai,

³⁰ jaga ham ma dirimu, ase ulang hona tirangkap ham laho mangirikkon sidea, dob hona siapkon sidea i lobeimu, anjaha ulang sungkun-sungkun ham pasal naibata ni sidea gabe nimu, "Sonaha pambalosi ni bangsa sipajuh begu-begu on mambalosi naibatani, sonai ma homa sihol bahenonku.

³¹ Seng bulih bahenon nasiam sonai bani Jahowa Naibata nasiam; ai sagala pahara na masambor na hinagigihon ni Jahowa, ai do ibahen sidea hubani naibatani; ai gari anak ni sidea pakon boru ni sidea bois do itutung sidea ibagas apuy laho manggalang naibata ni sidea.

³² (13-1) Sagala hata na hutonahkon bani nasiam maningon haporluhonon nasiam do mangkorjahon ai; seng bulih tambahanmu ai, anjaha seng bulih oruanmu hunjai.

Uhum bani Nabi Parladung

13 ¹ (13-2) Anggo jongjong i tengah-tengah nasiam sada nabi barang halak siparnipi, anjaha ibere bamu sada tanda barang halongangan, ² (13-3) anjaha mangasi do tanda barang halongangan, na dob pinatugahni ai hinan bamu, anjaha anggo ihatahon, “Eta ma, irikkon hita ma naibata na legan, na so tinanda nasiam hinan, anjaha marsombah ma hita hujai!”

³ (13-4) Ulang ma tangihon nasiam hata-hata ni nabi na sonai, ai na manlajou nasiam do Jahowa Naibata nasiam, sihol botohon-Ni barang na tongon do nasiam mangkaholongi Jahowa Naibata nasiam humbani ganup uhurmu pakon ganup hosahmu.

⁴ (13-5) Maningon Jahowa Naibata nasiam irikkonon nasiam, anjaha la habiaran nasiam, maningon ramotkonon nasiam tonah-Ni anjaha

tangihonon nasiam sora-Ni, maningon balosan nasiam la anjaha marsijoloman nasiam Bani.

⁵(13-6) Tapi anggo nabi barang halak siparnipi na sonai maningon pamateon do halani iajarhon parbalikon humbani Jahowa Naibata nasiam, na dob mangarahkon nasiam luar hun Masir, anjaha na dob manobus ham hun rumah parjabolonan, mambahen manlembang ham humbani dalan, na tinonahkon ni Jahowa Naibatamu bamu, sidalananmu. Ase maningon paholonganmu do hajahaton ai hun tengah-tengahmu.

**Uhum bani na Mangojur Halak
Manggalang bani Naibata na Legan**

⁶(13-7) Anggo iojur-ojur saninamu ham, hasomanmu sainang, barang anakmu, barang borumu, barang parinangonmu sandiri, barang huan-kuanmu haudungan ni uhurmu, nini, “Eta ma hita mambalosi naibata na legan, na so tinandamu barang na so tinanda ni ompungmu,

⁷(13-8) ai ma naibata ni bangsa na inggot nasiam, na dohor bamu barang na daoh humbamu, humbani ujungni tanoh na sada, das hu ujungni tanoh na sada nari.”

⁸(13-9) Seng bulih balosanmu ia, anjaha seng bulih tangihononmu ia; seng bulih maidop uhurmu mangidahsi, barang piaraonmu ia, barang ponopkononmu ia;

⁹ (13-10) tapi maningon bunuhonmu do ia, tanganmu sandiri patut parlobei mangonai laho mamunuhsi, dob ai pe ase ganup tangan ni bangsa in.

¹⁰ (13-11) Maningon matei ia pargijigonmu bani batu, halani iojur ham marbalik humbani Jahowa Naibatamu, na mangarahkon ham luar hun tanoh Masir, hun rumah parjabolonan.

¹¹ (13-12) Jadi ganup ma Israel mambogeisi, gabe mabiar, gabe lang be inunut mambahen hajahaton na sonai i tengah-tengah nasiam.

Uhum bani Huta na Manombah bani Begu-begu

¹² (13-13) Anggo ibogei ham ibagas sada huta, na binere ni Jahowa Naibatamu bamu bahen iananmu, nini ijai,

¹³ (13-14) “Domma luar deba dalahi paruhur jahat hun tengah-tengahmu, anjaha iajar-ajari do marbalik pangisi ni huta ni sidea, nini do, ‘Eta hita, ase sombah hita naibata na legan, na so tinanda nasiam.”

¹⁴ (13-15) Jadi maningon sungkunonmu, pareksaonmu anjaha tulimatonmu ai; anjaha tonggor ma, anggo sintong do ai, anjaha tongon do masa sihagigihonon ai i tengah-tengah nasiam,

¹⁵ (13-16) maningon bunuhon nasiam do pangisi ni huta ai marhitei mata ni podang, maningon

siapkonon nasiam do ai, sagala na ibagas huta ai pakon pinahanni marhitei mata ni podang,

¹⁶ (13-17) Maningon patumpuon nasiam do ganup taban-taban ai hu tongah-tongah ni alaman bolag, jadi maningon tutungonmu ma huta ai pakon taban-taban ai bani apuy, gabe galangan situtungon bani Jahowa Naibatamu, ase gabe timbunan batu sadokah ni dokahni; seng boi paulion huta ai.

¹⁷ (13-18) Seng bulih age aha longkot bani tanganmu humbani sisiapkonon ai; sai marpangulaki ma uhur ni Jahowa humbani pargajag ni ringis-Ni, anjaha ibere bamu idop ni uhur, anjaha holong atei-Ni mangidah ham, anjaha ipabuei ham songon na binulawankon-Ni bani ompungmu.

¹⁸ (13-19) anggo itangihon ham sora ni Jahowa Naibatamu, anjaha iramotkon ham ganup tonah-Ni, sagala na hutonahkon in bamu sadari on laho mangkorjahon na pintor bani pangidah ni Jahowa Naibatamu.

Larangan Mangkorjahon Hasomalan ni Sipajuh Begu-begu sanggah Mateian

14 ¹ Anak ni Jahowa Naibata nasiam do nasiam. Halani sahalak na matei, seng bulih rarikan nasiam daging nasiam, anjaha seng bulih suhuron nasiam salibon ni mata nasiam.

² Ai bangsa na pansing do ham bani Jahowa Naibatamu, anjaha domma ipilih Jahowa ham, ase ham gabe bangsa-Ni sandiri humbani ganup bangsa na i atas tanoh on.

Pasal Binatang na Pansing pakon na So Pansing

³ Seng bulih panganonmu sagala sihagigihononkon.

⁴ On ma pinahan na bulih panganon nasiam: Lumbu, biribiri pakon hambing,

⁵ ursa, balua, horbou, bedar, badak,

⁶ ganup binatang na martambirik anjaha bolah dua tambirikni ai, pakon na marbituha ulak-ulak i tongah-tongah ni pinahan, bulih do panganonmu.

⁷ Tapi seng bulih panganon nasiam humbani pinahan na marbituha ulak-ulak tumang pakon humbani na marbolah tambirikni tumang, songon: Unta, ampodi pakon sorigala, ai marbituha ulak-ulak do ai namin, tapi lang marbolah anggo tambirikni, halani ai maningon butak do ai bani nasiam.

⁸ Sonai ma homa babuy, ai marbolah do namin tambirikni, tapi lang marbituha ulak-ulak, halani ai maningon butak do ai bani nasiam. Juhutni pe seng bulih panganon nasiam, anjaha bangkeini pe seng bulih jamahon nasiam.

⁹ On do na bulih panganon nasiam humbani ganup na ibagas bah: Sagala na maripis anjaha marsisik, ai ma na bulih panganon nasiam.

¹⁰ Tapi sagala na so maripis anjaha marsisik, seng bulih panganon nasiam; maningon butak do ai bani nasiam.

¹¹ Sagala manuk-manuk na panti bulih do panganon nasiam.

¹² Tapi seng bulih panganon nasiam anggo on: Manuk-manuk nanggordaha, haluhuy bolon pakon lali,

¹³ haluhuy silopak, haluhuy sibirong, haluhuy borngin ronsi masam-masam ni,

¹⁴ kawak ronsi masam-masamni,

¹⁵ manuk-manuk unta, langkupa, undan, haluhuy sipiuan ronsi masam-masamni,

¹⁶ sipauk, bongkik, pakon boluk,

¹⁷ onggang, silogou-logou, pakon kiung laut,

¹⁸ tapi garo-garo, sitanda ulog ronsi masam-masamni, sonai lingkaboh pakon anrip-anrip.

¹⁹ Sonai homa sagala na manjulur humbani na marhabong maningon butak do ai bani nasiam, seng bulih panganon nasiam ai.

²⁰ Sagala manuk-manuk na panti bulih do panganon nasiam.

²¹ Seng bulih panganon nasiam sagala na matei sandiri, hubani halak dagang na marianan ibagas hutamu, bulih do bereonmu, ase boi panganonni ai barang jualonni hubani halak na legan ai bangsa na pansing do ham bani Jahowa Naibatamu. Seng

bulih lompahonmu anak ni hambing ibagas dadih ni inangni.

Pasal Parsapuluhan

²² Maningon parsapuluhonmu do gogoh ni bonih na sinaburhonmu, sagala na dong tubuh i tanohmu ganup tahun.

²³ Anjaha i lobei ni Jahowa Naibatamu, bani ianan na pinilih-Ni bahen ianan ni goran-Ni ijai, maningon ijai do panganonmu parsapuluhan ni gandummu, anggurmu, minakmu pakon bunga tubuh ni lombumu pakon bunga tubuh ni biribirimu, ase marlajar ham tongtong marhabiaran bani Jahowa Naibatamu.

²⁴ Tapi anggo madaohtu dalan ai bamu, pala seng tarboban ham sibobanonmu halani madaohtu ianan ai, na dob pinilih ni Jahowa Naibatamu bahen onjolan ni goran-Ni ijai, anggo ipasu-pasu Jahowa Naibatamu ham,

²⁵ jadi boi do duitkononmu ai, anjaha balutanmu duit ai ibagas tanganmu, anjaha laho ham hu ianan, na dob pinilih ni Jahowa ai,

²⁶ anjaha pakeionmu duit ai bani atap aha sir ni uhurmu, lombu, barang biribiri barang anggur atap siinumon na koras, atap aha tene sir ni uhurmu; maningon mangan ham ijai, i lobei ni Jahowa Naibatamu, anjaha marmalas ni uhur ham rap pakon hasomanmu sarumah.

²⁷ Anjaha ulang ma lang isarihon uhurmu halak Levi, na marianan ibagas hutamu, ai seng dapotan parbagianan barang tean-teanan ia rap pakon ham.

²⁸ Dob salpu tolu-tolu tahun maningon padaratonmu sagala parsapuluhan ni gogoh ni tanohmu bani na satahun ai, anjaha patumpu ham ma ai ibagas hutamu.

²⁹ Jadi roh ma halak Levi, halani lang dapotan parbagianan barang tean-teanan ia, halak dagang, dakdanak na tading maetek, pakon puang-puang na mabalu, ibagas hutamu, ase mangan anjaha bosuran sidea; ase ipasu-pasu Jahowa Naibatamu ham ibagas sagala horja ni tanganmu na binahenmu.

Tahun Sabat

15 ¹ Bani ujung ni ganup pitu-pitu tahun maningon bahenonmu do haluahon.

² Anjaha on do rumang ni haluahon ai: Ganup halak parutangan na mambere pinjaman hubani hasomanni, maningon saloseihononni ai humbani; seng bulih tungguonni utang ni hasomanni barang saninani, ai domma itingtingkon halak tahun haluahon bani Jahowa.

³ Anggo humbani halak dagang bulih do tungguonmu; tapi barang aha idoumu bani saninamu, maningon saloseihonon ni tanganmu do ai.

⁴ Tapi ulang ma adong halak na musil i tongah-tongah nasiam, ai sabonar pasu-pasuon ni Jahowa do ham i tanoh na binere ni Jahowa Naibatamu bamu, bahen parbagianan siteanonmu,

⁵ pitah, asal ma itangihon ham sora ni Jahowa Naibatamu, anjaha ihaporluhon ham mangkorjahon haganup tonah on, sagala na hutonahkon bamu sadari on.

⁶ Ai pasu-pasuon ni Jahowa Naibatamu do ham, songon na dob pinarbagah-Ni hinan bamu, jadi painjamkon ma ham bani buei bangsa sipajuh begu-begu, tapi seng manginjam anggo ham; anjaha gomgomammu ma buei bangsa sipajuh begu-begu, tapi seng rajaanni anggo ham.

⁷ Anggo dong i tongah-tongahmu sahalak na musil humbani saninamu, ibagas hutamu, i tanoh sibereon ni Jahowa Naibatamu bamu, seng bulih pamapironmu uhurmu anjaha tutuponmu tanganmu dompak hasomanmu na musil ai,

⁸ tapi maningon bukaonmu do tanganmu bani, anjaha unjah ham papinjamkon bani marguru hubani sadiha na hurang bani.

⁹ Jaga ham ma dirimu, ase ulang tubuh pingkiran na jahat ibagas uhurmu, mangkatahon, “Domma dohor tahun papituhon, tahun haluahon, gabe sogam panonggormu bani hasomanmu na musil ai, anjaha aha pe lang ibere ham ibagas ai.”

¹⁰ Maningon unjah ham mambere bani, ulang gok gila uhurmu sanggah ma mamberehon ai ham bani; ai halani ai pasu-pasuon ni Jahowa Naibatamu ma ham bani haganup horjamu pakon bani haganup na jinamah ni tanganmu.

¹¹ Ai seng tumaram maronti adong halak na musil i tanoh in; halani ai do ase hutonahkon bamu sonon, “Maningon ringgas do ham mambuha tanganmu hubani saninamu, hubani halak na masombuh pakon halak na musil i tanohmu.”

Parluah ni Jabolon

¹² Anggo tarjual bamu hasomanmu, halak Heber, dalahi atap naboru, maningon onom tahun dokahni ia mangkorja bamu, tapi papitu-tahunkon maningon paluahonmu ia.

¹³ Anjaha anggo ipaluah ham ia hun lambungmu, seng bulih paluahonmu ia marambung tangan;

¹⁴ maningon unjah pamberemu bani humbani biribirimu, humbani pardogeianmu, humbani pangilangan anggurmu; songon na dob pinasu-pasu ni Jahowa Naibatamu ham, maningon sonai bereonmu bani.

¹⁵ Maningon ingatonmu do jabolon do ham na ijia i tanoh Masir, gabe itobus Jahowa Naibatamu ham; halani ai do ase hutonahkon hata on bamu sadari on.

¹⁶ Tapi anggo ihatahon bamu, Seng sihol ahu laho humbamu, halani holong ni uhurni mangidah ham pakon mangidah parrumahmu, ai sonang do ia i lambungmu,

¹⁷ jadi buat ma sada partusuk, anjaha tusuk ma pinggolni bani labah, jadi gabe jabolonmu ma ia lalab. Anjaha jabolonmu naboru pe sonai do bahenonmu.

¹⁸ Ulang ma borat uhurmu, halani paluahonmu ma ia hun lambungmu, ai dua lompit humbani gaji ni sipangan gaji, hinorjahonni bamu na onom tahun ai. Jadi pasu-pasuon ni Jahowa Naibatamu ma ham bani ganup na hinorjahonmu.”

Parpapansing bani Bunga Tubuh ni Pinahan

¹⁹ Sagala bunga tubuh tunggal, humbani lombu pakon biribirimu maningon papansingonmu do ai bani Jahowa Naibatamu; seng bulih pahorjahononmu bunga tubuh ni lombumu, anjaha seng bulih rasiponmu ambulu ni bunga tubuh ni biribirimu.

²⁰ Maningon panganonmu do juhutni ganup tahun i lobei ni Jahowa, Naibatamu, bani ianan na pinilih ni Jahowa, ham pakon parrumahmu.

²¹ Tapi anggo dong do tikasni, mengkat barang pitung, barang tikas aha pe na bajan, seng bulih galangkononmu ai bani Jahowa Naibatamu.

²² Maningon panganonmu do ai ibagas hutamu; halak na butak barang halak na pansing bulih do panganonni ai, songon na mangankon balua barang ura.

²³ Pitah darohni do na so bulih panganonmu; maningon useihononmu do ai hu tanoh, songon bah.

Pesta Paskah

16 ¹ Ramotkon ma bulan Abib, anjaha marpesta paska ma ham bani Jahowa Naibatamu; ai bani bulan Abib do ham iarahkon Jahowa Naibatamu luar hun Masir, borngin-borngin.

² Maningon sayatonmu do bani pesta Paskah lembu pakon biribiri bani Jahowa Naibatamu, bani ianan sipilihon ni Jahowa bahen ianan ni goran-Ni ijai.

³ Seng bulih panganonmu ruti na niigaran bani pesta Paskah ai; maningon pitu ari dokahni panganon nasiam ruti na so niigaran, ruti hasombuhon, ai tarolos do ham luar hun tanoh Masir; ase ipaingat-ingat uhurmu sadokah ham manggoluh ari pardaratmu hun tanoh Masir.

⁴ Halani ai seng bulih taridah bamu na migar bani sab nagorimu pitu ari dokahni, anjaha seng bulih marborngin humbani pinahan na sinayatmu bani bodari ni ari parlobei ronsi patarni ai.

⁵ Seng bulih sayatonmu Paskah ai ibagas sada huta, na sihol bereon ni Jahowa Naibatamu bamu.

⁶ Maningon bani ianan, na sihol pilihon ni Jahowa Naibatamu, bahen ianan ni goranni ijai, sayatonmu Paskah ai, bodari marayak manabad mata ni ari, bani panorang parluarmu hun tanoh Masir.

⁷ Maningon lompahonmu anjaha panganonmu do ai bani ianan, na sihol pilihon ni Jahowa Naibatamu Bani; patarni ai bulih do ham mulak hu lampolampomu hinan.

⁸ Maningon onom ari dokahni panganonmu ruti na so niigaran; anjaha bani ari papituhon partumpuan na majombut ma ai bani Jahowa Naibatamu; seng bulih horjahononmu barang aha pe ijai.

Pesta Pentakosta

⁹ Maningon bilanganmu pitu minggu, pungkah ma mamilang na pitu minggu ai olat ni dob mamungkah madabuh sasabi hubani gandum.

¹⁰ Dob ai marpesta minggu ma ham bani Jahowa Naibatamu, marguru hubani sibere-bere, sibereonmu humbani rosuh ni uhurmu, romban hubani pasu-pasu ni Jahowa Naibatamu bamu.

¹¹ Maningon marmalas ni uhur ma ham i lobei ni Jahowa Naibatamu, ham pakon anakmu pakon borumu, jabolonmu dalahi pakon jabolonmu naboru, halak Levi na ibagas hutamu, halak dagang, na tading maetek, pakon na mabalu na i tongah-tongahmu, bani ianan sipilihon ni Jahowa Naibatamu, bahen ianan ni goran-Ni ijai.

¹² Maningon ingatonmu, jabolon do ham na ijia i Masir, maningon ramotanmu anjaha horjahononmu do aturan on.

Pesta Lampolampo

¹³ Maningon marpesta lampolampo ham pitu ari dokahni, anggo domma ipatumpu ham buah ni pardogeianmu pakon pangilanganmu.

¹⁴ Maningon marmalas ni uhur ham bani pestamu ai, ham pakon anakmu pakon borumu, jabolonmu dalahi pakon jabolonmu naboru, halak Levi, halak dagang, na tading maetek, pakon na mabalu i tengah-tengahmu.

¹⁵ Maningon pitu ari dokahni ham marpesta bani Jahowa Naibatamu bani ianan sipilihon ni Jahowa; ai pasu-pasuon ni Jahowa Naibatamu ma ham bani haganup gogoh ni tanohmu, pakon bani haganup horja ni tanganmu, ase marmalas ni uhur tumang ma ham.

¹⁶ Maningon tolu hali ibagas satahun roh sagala dalahi na i tengah-tengah nasiam hu lobei ni Jahowa Naibatamu, bani ianan sipilihon ni Jahowa, ai ma bani pesta ruti na so niigaran, bani Pesta Minggu, pakon bani Pesta Parlampolampoan. Seng bulih marambung tangan roh barang ise hu lobei ni Jahowa,

¹⁷ ganup tene mambere marguru hubani na tarbere tanganni, romban hubani pasu-pasu, na binere ni Jahowa Naibatamu bamu.

Pasal Panguhumion na Pintor

¹⁸ Maningon pabangkitonmu do panguhum pakon panuturi bani haganup hutamu, na binere ni Jahowa Naibatamu bamu, mangihutkon margamu; sidea ma na manguhumi bangsa in ibagas hasintongan.

¹⁹ Seng bulih papeolonmu uhum; seng bulih ham martonggor jumbak; seng bulih jaloonmu sisip, ai sisip do papitung mata ni paruhur anjaha mamutor hata ni halak parpintor.

²⁰ Maningon hapintoron, pitah hapintoron do parayakonmu, ase manggoluh ham anjaha teanonmu tanoh, na sihol bereon ni Jahowa Naibatamu bamu.

²¹ Seng bulih suanonmu tiang sisombahon atap hayu aha pe, usihan ni sisombahon Asera, dohor hu anjapanjap ni Jahowa Naibatamu, na sihol sipaulionmu ai.

²² Seng bulih homa pajongjongonmu bamu tugu sisombahon, na hinagigihon ni Jahowa Naibatamu.

Uhum halani Parnaibataon na Legan

17 ¹ Seng bulih galangkononmu bani Jahowa Naibatamu lombu barang biribiri na

martikas barang na boritan; ai hagigian do ai bani Jahowa Naibatamu.

²Anggo adong jumpah i tongah-tongahmu ibagas sada huta, na sihol bereon ni Jahowa Naibatamu bamu, sada dalahi barang sada naboru, na mangkorjahon sogam ni uhur ni Jahowa Naibatamu, marhitei na mangosei padan, na binahen-Ni ai,

³gabe laho ma ia mambalosi naibata na legan anjaha marsombah hujai, hu mata ni ari barang hu bulan, barang hubani ganup bala ni langit, na so hutonahkon in,

⁴anjaha tarbortik ai bamu anjaha ibogei pinggolmu; jadi maningon pangkei do pareksaonmu ai anjaha tonggor ma, anggo tongon do masa pahara sihagigihononkon ai i Israel,

⁵jadi maningon boanonmu do luar dalahi barang naboru, na mambahen hajahaton na sonai ai, hu darat ni horbanganmu, anjaha maningon sigijigon do dalahi barang naboru na sonai ai bani batu, ase matei.

⁶Maronjolan hubani hasaksian ni dua barang tolu halak, maningon bunuhon do na dob pinutuskon marutang hosah; tapi anggo maronjolan hubani hatorangan ni sada halak tumang do, seng bulih bunuhon ia.

⁷Maningon tangan ni saksi ai lobei mangonai laho mamunuhsi, dob ai use tangan ni ganup bangsa ai.

Sonai ma bahenonmu maniapkon hajahaton ai hun tengah-tongahmu.

Paruhuman Sigijangan i Lobei ni Rumah ni Naibata

⁸ Anggo mapayahtu pareksaonmu sada pahara bani paruhuman pasal na marsibunuhan hosah, barang na marsurei, barang na marsiugahan, atap pahara na ijahanin pe ibagas hutamu, maningon laho ma ham tangkog hu ianan, na sihol pilihon ni Jahowa Naibatamu;

⁹ laho ma ham hubani malim, halak Levi ai, pakon hubani panguhum bani panorang ai, laho manungkun uhum bani sidea; jadi patugahon ni sidea ma bamu haputusan ai.

¹⁰ Jadi maningon bahenonmu do romban hubani na ipatugah sidea bamu, humbani ianan na sihol pilihon ni Jahowa; anjaha maningon haporluhononmu do mangkorjahon ganup romban hubani na pinodahkon ni sidea bamu;

¹¹ romban hubani podah, na pinodahkon ni sidea bamu, anjaha romban hubani haputusan, na ipatugah sidea bamu, maningon sonai do bahenonmu; seng bulih ham manlembang humbani haputusan, na ipatugah sidea bamu, hu siamun barang hu sambilou.

¹² Anjaha dalahi na marhajungkaton ai, marhitei na lang ra ia mambalosi malim na jongjong marugas ijai i lobei ni Jahowa Naibatamu, barang panguhum

pe, maningon marutang hosah ma dalahi ai; sonai ma siapkononmu hajahaton ai hun Israel.

¹³ Maningon ganup bangsa ai mambogei ai, ase mabiar sidea anjaha ulang be ihorjahon sidea hajungkaton.

Titah Siingaton ni Raja

¹⁴ Anggo masuk ham hu tanoh sibereon ni Jahowa Naibatamu bamu, anjaha anggo isoluk ham ai anjaha marianan ijai, anjaha gabe roh hatamu mangkatahon, 'Sihol pabangkitonku do sada raja manggomgom ahu, usih hubani haganup bangsa sipajuh begu-begu na inggot hu bangku.'

¹⁵ Bulih do tongon pabangkitonmu manggomgom ham sada raja, na pinilih ni Jahowa Naibatamu; maningon hun tongah-tongah ni saninamu pabangkitonmu raja manggomgom ham, seng bulih pabangkitonmu manggomgom ham halak na legan, na so saninamu.

¹⁶ Pitah, seng bulih pabueion ni raja ai huda bani, anjaha seng bulih arahkononni bangsa ai mulak hu Masir, laho pabueihon huda bani, ai domma pala ihatahon Jahowa bani nasiam, 'Seng bulih be nasiam mulak hubani dalan on.'

¹⁷ Anjaha seng bulih pabueionni parinangonni, ase ulang manlembang uhurni; sonai homa seng bulih pajunjunonni bani pirak pakon omas.

¹⁸ Anjaha anggo hundul ma ia bani paratas ni harajaonni, maningon salinonni ma bani hata ni titah on hubani sada buku i lobei ni malim pakon halak Levi.

¹⁹ Maningon titah ai tongtong i lambungni, anjaha pabasa-basaonni ai sadokah manggoluh ia, ase marlajar ia marhabiaran bani Jahowa Naibatani, ase ramotanni ganup hata ni titah pakon aturan laho mandalankon ai;

²⁰ ase ulang ipagijang uhurni i lobei ni saninani, anjaha ase ulang manlembang ia humbani titah ai, barang hu siamun barang hu sambilou, ase dokah ia manggoluh manjujung harajaonni ai, ia pakon ganup anakni i tongah-tongah ni Israel.

Hagoluhan ni Malim pakon Halak Levi

18 ¹ Ia malim, halak Levi ai pakon haganup marga Levi, seng bulih dapotan parbagianan barang siteanon rap pakon Israel; sagala galangan apuy bani Jahowa pakon parbagiananni hinan, ai do panganon ni sidea.

² Seng dong parbagianan ni sidea i tongah-tongah ni sanina ni sidea; Jahowa do parbagianan ni sidea, songon na dob pinarbagah-bagahni bani sidea.

³ Anjaha on do hak ni malim bani bangsa in, bani halak na manggalankon galangan, barang lembu barang biribiri pe ai; maningon bereonni do hubani

malim hae-hae lobei, osangni na dua ai pakon bituha bolon.

⁴ Limbuah humbani gandummu, minakmu pakon limbuah humbani ambulu ni biribirimu maningon bereonmu do hu bani.

⁵ Ai domma ipilih Jahowa Naibatamu ia humbani haganup margamu, ase ia jongjong marugas marhitei goran ni Jahowa, ia pakon anakni sadokah maggoluh.

⁶ Anjaha anggo roh halak Levi humbani sada huta, panginsolatanni ai, humbani ganup Israel, anjaha roh ia humbani gok ni uhurni hu ianan na sihol pilihon ni Jahowa,

⁷ jadi bulih do ia marugas ibagas goran ni Jahowa Naibatani, songon haganup saninani, ai ma halak Levi ai, na jongjong marugas ijai i lobei ni Jahowa.

⁸ Maningon dos do bagian sipanganon bani sidea, sobali na jinaloni humbani panjualon ni ugas-ugas ni ompungni.

Titah Larangan Pasal Parnaibataon na Legan pakon Partondungan

⁹ Ia dob masuk ham hu tanoh sibereon ni Jahowa Naibatamu bamu, seng bulih guruhononmu mangkorjahon sihagigihononkon, na hinorjahon ni bangsa sipajuh begu-begu.

¹⁰ Seng bulih jumpah i tongah-tongah nasiam sada halak, na pabontaskon anakni barang boruni

humbani apuy, barang halak partondung, barang sijujur ari, barang sipartabas, barang parsibalik mata,

¹¹ barang sibahen uti-utian, barang sibahen pangidahan, barang siparsungkun bani begu-begu, barang siparbegu ganjang.

¹² Ai magigi tumang do uhur ni Jahowa mangidah haganup halak na mangkorjahon na sonai; anjaha halani pambahenan hagigian ai usiron ni Jahowa Naibatamu do sidea hun lobeimu.

¹³ Maningon gokan dear do ham i lobei ni Jahowa Naibatamu.

¹⁴ Ia bangsa sipajuh begu-begu sisolukonmu ai, somal do sidea patangi-tangi hata-hata ni sijujur ari pakon partondung, tapi anggo nasiam, seng ilopas Naibata nasiam mambahen na sonai.

Bagah-bagah Pasal Nabi na Banggal in

¹⁵ Nabi sada songon ahu on pajongjongon ni Jahowa Naibatamu hun tongah-tongahmu, humbani saninamu; Ia talup tangihonon nasiam,

¹⁶ romban hubani na pinangindomu hubani Jahowa Naibatamu i Horeb, sanggah ari partumpuan ondi, nimu do, “Seng be tarpabogei-bogei ahu sora ni Jahowa Naibatanku, anjaha lang be tarpaidah-idah ahu apuy na bolon on, ase ulang matei ahu.”

¹⁷ Dob ai roh ma hata ni Jahowa hu bangku, “Dear do hata na hinatahon ni sidea ai.

¹⁸ Ahu ma pajongjongkon bani sidea sada Nabi hun tengah-tengah ni sanina ni sidea, songon ho, anjaha Ahu ma mamberehon hatang-Ku hubagas pamanganni, gabe hatahononni ma hubani sidea sagala na Hutonahkon ai bani.

¹⁹ Jadi barang ise na so ra manangihon hatang-Kai, sagala sihatahononni ibagas goran-Ku, tuntuton-Ku do ai humbani.

²⁰ Tapi anggo dong sada nabi na pagijang uhurni mangkatahon sada hata ibagas goran-Ku, na so Huparentahkon hatahononni, barang na marsahap ibagas goran ni naibata na legan, maningon marutang hosah nabi na sonai ai.”

²¹ Anjaha anggo nini ham ibagas uhurmu, “Hunja ma botohonnam i hata, na so hinatahon ni Jahowa?”

²² Anggo marsahap sada nabi ibagas goran ni Jahowa, hape lang jadi hata ai anjaha lang roh, ai ma hata na so hinatahon ni Jahowa, mangunsagahkon hajungkaton do nabi sisonai ai mangkatahon ai, ulang pala mabiar ham mangidahsi.

Huta Haporusan

19 ¹ Anggo domma rasei ibahen Jahowa Naibatamu bangsa sipajuh begu-begu simada tanoh sibereon ni Jahowa Naibata bamu, gabe isoluk ham tanoh ni sidea ai, anjaha iiani ham huta pakon rumah ni sidea,

² maningon papuligonmu do bamu tolu huta i tanohmu, na sihol bereon ni Jahowa Naibatamu bahen parbagiananmu.

³ Maningon pasirsironmu do dalan hujai, anjaha bagi tolu bahenonmu parbalogan ni tanohmu, sibereon ni Jahowa Naibatamu bamu bahen parbagiananmu, ase boi maporus hujai sibunuh jolma.

⁴ On do uhum bani sibunuh jolma, na maporus hujai ase manggoluh ia: Anggo ibunuh sada halak hasomanni, tapi seng niutuskonni, anjaha seng dong sogam ni uhurni hinan hu bani,

⁵ (*limbagani, laho ma sada halak rap pakon hasomanni hu harangan laho manrobah hayu, iambungkun ma hapakni laho manrobah hayu ai, hape mistak ma mata ni hapak ai humbani songkirni, ihonai ma hasomanni ai lanjar matei*), jadi boi ma ia maporus hu sada humbani huta ai, ase manggoluh ia,

⁶ ase ulang iayak sipambalas ai jolma pamunuh ai ibagas milas ni uhurni, gabe jumpahsi halani daoh ni dalan ai, anjaha ibunuh ia, age pe namin seng patut ope uhum hamatean mangonai bani, halani na so sogam hinan uhurni bani.

⁷ Halani ai do ase huhatahon hu bamu, maningon papuligonmu do bamu tolu huta.

⁸ Anjaha anggo lambin ipabolag Jahowa Naibatamu parbaloganmu, songon na dob binulawankon-Ni

hubani ompungmu, anjaha saud ibere bamu ganup tanoh, na dob pinarbagah-bagah-Ni bereon-Ni hubani ompungmu,

⁹ anggo ihaporluhon ham do mangkorjahon haganup tonah on, na hutonahkon bamu sadari on, laho mangkaholongi Jahowa Naibatamu pakon marparlahou bani dalanni sadokah ham manggoluh, maningon tambahonmu ope tolu nari huta ambah ni na tolu huta ondi,

¹⁰ ase ulang durus daroh ni na so marpipot i tongah-tongah ni tanohmu, na sihol bereon ni Jahowa Naibatamu bamu bahen parbagianan, ase ulang marsapata bamu daroh ai.

¹¹ Tapi anggo sogam uhur ni sada halak mangidah hasomanni, gabe ionggopi ia anjaha idorab, anjaha ihonai ia pala matei, dob ai lintun halak ai hu sada humbani huta ai,

¹² maningon suruhon ni pangintuai ni huta ai ma suruhanni mangalopisi hunjai, anjaha ondoskononni ia hu tangan ni sipambalas ai, ase matei ia ibunuh.

¹³ Seng bulih malang uhurmu mangidahsi, maningon purpurhononmu do sapata ni daroh na so marpipot hun Israel, ase marhasonangan ham.

**Pasal na Paosor-osorhon
Parbalogan pakon Saksi Ladung**

¹⁴ Seng bulih paosor-osoronmu parbalogan ni hasomanmu, na pinasuk ni ompung na lobei ibagas parbagiananmu, na sihol teanonmu i tanoh sibereon ni Jahowa Naibatamu bamu bahen parbagiananmu.

¹⁵ Seng asi sahalak saksi jongjong mangimbang sada halak pasal parkara hajahaton barang dousa, atap na ijahanin pe, na dob hinorjahonni; maningon na sinaksihon ni dua barang tolu saksi do ase sah hata ai.

¹⁶ Anggo jongjong sada saksi parladung mangimbang sada halak laho mangaduhonsi pasal sada panlanggaron,

¹⁷ maningon jongjong ma dua halak na marsalisih ai i lobei ni Jahowa, i lobei ni malim pakon panguhum na marhorja bani panorang ai.

¹⁸ Dob ai tangkas ma pareksaon ni panguhum ai parkara ai, anjaha tonggor ma, anggo sisaksihon ladung do saksi ai, anjaha lepak do pangaduanni ai dompak hasomanni ai,

¹⁹ jadi maningon bahenon nasiam ma bani usih songon na sinurahon ni uhurni sihol bahenonni bani hasomanni ai; sonai ma purpurhononmu hajahaton ai hun tengah-tongahmu,

²⁰ase ibogei halak na legan ai, gabe mabiar sidea, anjaha lang be inunut mangkorjahon hajahaton na sonai ai i tongah-tongahmu.

²¹Seng bulih malang uhurmu mangidahsi, maningon hosah do abul ni hosah, mata abul ni mata, ipon abul ni ipon, tangan abul ni tangan, nahei abul ni nahei.

Pasal Undang-undang Porang

20¹Anggo laho ham hu parporangan mangimbang munsumu, gabe ididah ham huda pakon gareta pakon bala bueinan hun bamu, ulang ma ham mabiar mangidah sidea, ai Jahowa Naibatamu do hasomanmu, la do mangarahkon ham tangkog hun Masir.

²Ia dob lambin roh dohorni nasiam hu parporangan, maningon roh ma hun dohor malim ai anjaha marsahap ma ia hubani bangsa ai,

³nini ma dompak sidea, “Tangihon ma alo Israel! Na barah ma nasiam marporang mangimbang munsum nasiam; ulang ma gobir uhur nasiam, ulang ma nasiam mabiar, ulang ma songgotan anjaha bajoraon nasiam mangidah sidea,

⁴ai Jahowa Naibata nasiam do mardalan rap pakon nasiam laho marporang mangimbang munsum mangkopkop nasiam, laho mambere hamonangan bani nasiam.”

⁵ Anjaha sipanuturi ai pe hatahononni ma hubani bangsa ai sonon, “Barang ise pajongjong rumah na baru, tapi lape ibongkot ai, bulih do ai mulak hu rumahni, ase ulang matei ia i parporangan, gabe halak na legan holi mangingani rumah ai.

⁶ Anjaha barang ise na dob mamungkah sada pohon anggur, hape seng sompat ope ia mangankon buahni, bulih do ia mulak hu rumahni, ase ulang matei ia i parporangan, gabe halak na legan mangankon buahni.

⁷ Anjaha barang ise na dob martunangan pakon sada naboru, tapi seng ialop ope ia hu rumahni, bulih do ia mulak hu rumahni, ase ulang matei ia i parporangan, gabe halak na legan mambuatsi.”

⁸ Anjaha maningon tambahan ni sipanuturi ai ope mangkatahon hatani hubani bangsa ai, “Barang ise na mabiar anjaha gobir uhurni, bulih do ia mulak hu rumahni, ase ulang madotei uhur ni hasomanni ibahen, songon uhurni ai.”

⁹ Ia dob siap sipanuturi ai mangkatahon hatani hubani bangsa ai, hatahononni ma pambobai ni bala mambobahon bangsa ai.

¹⁰ Anggo dohor ma ham bani sada huta laho mamorang ai, maningon usulhononmu do pardameian hujai.

¹¹ Anjaha anggo damei do balosni bamu, anjaha iungkab horbanganni bamu, jadi ganup bangsa isi

ni huta ai maningon mambalosi rodimu anjaha gabe jabolonmu.

¹² Anjaha anggo seng ra sidea mardamei pakon ham, tapi sihol imbangonni ham marporang, maningon hubuon nasiam do huta ai.

¹³ Anggo domma iondoskon Jahowa Naibatamu huta ai hubagas tanganmu, maningon matei tampulonmu ganup dalahi parhuta ai bani podang,

¹⁴ tapi anggo naboru barang dakdanak, pinahan ronsi atap aha pe na ibagas huta ai, ganup taban-tabanni, bulih do ayobonmu bamu; anjaha bulih do panganonmu taban-taban humbani munsuhmu, na dob binere ni Jahowa Naibatamu bamu.

¹⁵ Maningon sonai do bahenonmu bani ganup huta na daoh tumang hun bamu, sagala na so masuk bani huta ni bangsa sipajuh begu-begu na ijon on.

¹⁶ Tapi anggo humbani pangisi ni huta ni bangsa sipajuh begu-begu do ai, na sihol bereon ni Jahowa Naibatamu bahen parbagiananmu, seng bulih pagoluhonmu age sada halak na marhosah,

¹⁷ maningon siap do sidea bahenonmu, halak Het, Amori, Kanaan, Peresi, Hewi pakon Jebusi, songon na tinonahkon ni Jahowa Naibatamu bamu;

¹⁸ ase ulang iajarhon sidea bani nasiam mangkorjahon sagala horja hagigi, na binahen ni sidea pasangap naibata ni sidea, ase ulang mardousa nasiam bani Jahowa Naibata nasiam.

¹⁹ Anggo dokah ham mangkubu sada huta, laho mamorang ai ase tunduk, seng bulih parsedaonmu hayu na ijai marhitei na managilhon hapakmu hujai; bulih do panganonmu buahni, tapi lang bulih anggo robohonmu. Ai jolma do hayu na i ladang ai, ase maningon dihut singgur ai bani pangkubunmu ai?

²⁰ Pitah hayu, na dob binotohmu hinan seng sipanganon buahni, bulih parsedaonmu anjaha robohonmu anjaha pakeionmu bahen pangkubu dompak huta, na marmunsuh pakon ham, paima tunduk huta ai ibahen ham.

Galangan Pardearan hubani Naibata halani Pamunuhon na So Binotoh humbani Sada Halak

21 ¹ Anggo jumpah sada halak na matei hona bogbog i tanoh sibereon ni Jahowa Naibatamu bamu bahen parbagiananmu, toltol i ladang, seng na botoh barang ise na mamunuhsi, ² maningon luar ma pangintuai pakon panguhummu, laho manibar sadiha daohni halak na matei hona bogbog ai hun huta na inggot hujai.

³ Jadi barang huta ja sidohoran hubani na matei ai, maningon buaton ni pangintuai ni huta ai ma sada anak ni lombu, na so onga ope pinakei maninggala, anjaha na so onga ope hatampean ni pasangan.

⁴ Dob ai maningon boanon ni pangintuai ni huta ai ma anak ni lombu ai tuad hu sada

habungan na tongtong marnah bah, na so onggahinorjahon barang nitidahan, anjaha maningon ponggolhononkon ma ijai, i habungan ai, borgok ni anak ni lombu ai.

⁵ Dob ai maningon roh ma hun dohor malim ginompar ni halak Levi, ai domma ipilih Jahowa Naibatamu sidea gabe siparugas Bani, pakon mamasu-masu marhitei goran ni Jahowa, anjaha marguru hubani pangkatahon ni sidea do marhaujungan sagala parsalisihan pakon sagala na marsitobakan.

⁶ Anjaha sagala pangintuai ni huta ai, sidohoran hubani halak na binunuh ai, maningon burihan ni sidea do tangan ni sidea i atas ni lombu, na pinonggolhon ai borgokni i habungan ia,

⁷ anjaha maningon saksihonon ni sidea do, “Seng tangannami manduruskon daroh on, anjaha seng ididah matanami on.”

⁸ Gabe pardearan ma on, bani bangsamu halak Israel, na dob tinobusmu alo Jahowa! Sai ulang ma marsapata daroh na so marpipot in i tongah-tongah ni bangsamu halak Israel! Jadi dapotan pardearan ma sidea marhalanohon ni daroh ai.

⁹ Sonai ma pamurpurhonmu bani sapata ni daroh, na so marpipot ai hun tongah-tongahmu, anggo ihorjahon ham na sintong i lobei ni Jahowa.

Pasal Naboru na Tartangkap i Parporangan

¹⁰ Anggo bingkat ham laho marporang dompak munsumu, anjaha iondoskon Jahowa Naibatamu sidea hubagas tanganmu, gabe adong tarboan humbani sidea ibahen ham,

¹¹ jadi ididah ham i tongah-tongah ni na tarboan ai sada naboru, na jenges rupa gabe marosuh ham mangidahsi, anjaha sihol buatonmu ia gabe parinangonmu,

¹² jadi maningon boanonmu ia masuk hu rumahmu, maningon suhuronni uluni anjaha buatonni sisilonni,

¹³ maningon tanggalonni hiou na pinakeini sanggah na tarboan ai ia, anjaha marianan ma ia i rumahmu, anjaha tangisanni ma bapani pakon inangni sabulan dokahni, dob ai bulih ma parayakonmu ia, gabe paramangonni, anjaha ia gabe parinangonmu.

¹⁴ Tapi anggo seng be marosuh uhurmu mangidahsi, maningon palahoonmu do ia huja rosuh ni uhurni; seng bulih jualonmu ia barang parjabolononmu ia, halani na dob marsaor ham hu bani.

Pasal Hak Sikahanan

¹⁵ Anggo mardua binuat sada halak, na sada ihaholongi anjaha na sada nari ihagigihon, gabe tubuhan tuah ia humbani sidea na dua ai, na

hinaholongan pakon hinagigihonni ai, anjaha na hinagigihon ai do tudu simada anak bunga tubuh ai, ¹⁶ jadi bani ari pamberehononni bani tean-teanan tinadingkonni ai bani anakni ai, seng bulih pabangkitonni gabe bunga tubuhni anak ni na hinaholonganni ai gantih ni anak bunga tubuh ni na hinagigihonni ai,

¹⁷ maningon akuonni do anak bunga tubuh ni na hinagigihonni ai anak bunga tubuhni, marhitei na mamberehon bani dua bagian humbani ganup na dong bani, ai ia do limbuah ni hagogohonni, ia do simada hak sikahanan.

Uhum bani Anak na So Mambalosi Ajar

¹⁸ Anggo adong bani sada halak anak na jungkat anjaha na tarboan-boan uhurni, na so manangihon sora ni bapani barang sora ni inangni, anjaha iajari sidea pe ia, lanjar seng itangihon sidea,

¹⁹ maningon tangkapon ni bapani pakon inangni ma ia, anjaha boanonni ma ia luar hu lobei ni pangintuai ni huta ai, bani horbangan ni huta iananni ai,

²⁰ anjaha nini ma dompak pangintuai ni huta ai, "Anaknami on jungkat, anjaha tarboan-boan uhurni, seng itangihon hatanami, sipapangan magou anjaha siparinum."

²¹ Jadi maningon pargijigon ni sagala dalahi parhuta ai ma ia bani batu ase matei; maningon sonai

siapkononmu hajahaton ai hun tongah-tongahmu; jadi ganup ma halak Israel mambogei ai, gabe mabiar.

Pananomon bani Halak na luhum Matei

²² Anggo mardousa sada halak, anjaha patut ia marutang hosah, gabe saud ia ibunuh, anjaha igantungkon ham ia bani sada hayu,

²³ seng bulih marborngin bangkei ni ai i atas hayu ai, maningon tanomonmu do ia bani na sadari ai, ai na hona papa ni Naibata do halak na targantung; seng bulih pabutakonmu tanoh na binere ni Jahowa Naibatamu bamu bahenonmu parbagiananmu.

Aturan Hahormaton na Marbagei-bagei dompok Hasoman Jolma

22 ¹ Anggo ididah ham lombu barang biribiri ni hasomanmu kahou, seng bulih paturutonmu sonai; maningon toguonmu do ai mulak bani hasomanmu ai.

² Anggo seng dohor ia hun bamu, barang anggo lang itandai ham ia, maningon boanonmu do ai hu rumahmu, anjaha i lambungmu ma ai paima roh pindah-pindah hasomanmu ai; dob ai maningon paulakonmu do ai bani.

³ Maningon sonai do bahenonmu pasal halodeni, lanjar sonai do bahenonmu pasal hiouni, lanjar sonai do bahenonmu pasal ganup ugas na magou

humbani hasomanmu, anjaha na jumpah ham, seng bulih paturutonmu ai.

⁴Anggo ididah ham halode barang lombu ni hasomanmu tompas i dalan, seng bulih paturutonmu ai, maningon urupanmu do ia pajongjongkon ai.

⁵Seng bulih marpakean dalahi naboru, anjaha seng bulih marpakean naboru ia dalahi, ai barang ise na mangkorjahon ai hagigi ni Jahowa Naibatamu do ai.

⁶Anggo jumpah ham asar ni manuk-manuk i tongah dalan barang i atas tanoh, maranak poso barang marisi tolur, anjaha indungni ai manrongkob anakni barang mamodomkon toturni ai, seng bulih buatonmu indungni ai rap pakon anakni ai;

⁷maningon paluahonmu do indungni ai, tapi anggo anakni ai bulih do buatonmu, ase marhasonangan ham anjaha dokah ham manggoluh.

⁸Anggo pajongjong rumah na bayu ham, maningon bahenonmu do hondor-hondor inggot rumahmu ai, ase ulang iampeihon ham utang daroh bani rumahmu, anggo adong halak na madabuh hunjai.

⁹Seng bulih mardua bagei bonih saburhononmu hu pohon anggurmu, ase ulang magou buah ni bonih, na sinaburhonmu ai rap pakon buah ni hayu anggur ai.

¹⁰Seng bulih bahenonmu sapasang maninggala lombu pakon halode.

¹¹ Seng bulih pakeionmu hiou na mardua bagei bonangni, ambulu ni biribiri pakon bonang silopak na alus.

¹² Maningon bahenonmu do bamu rambu hubani haompatsi suhi-suhi ni sabingmu, na pinakeimu manrongkob angkulamu.

Titah Parrumahtanggaon

¹³ Anggo adong sada dalahi mambuat boru, hape dob marsaor ia pakonsi gabe magigi uhurni mangidahsi,

¹⁴ dob ai ipatubuh-tubuh ma hasamboronni anjaha ipabajan-bajan goranni, nini, “Domma namin hubuat boru on bahen parinangonku, hape dob huparayak ia, seng dong jumpah ahu be bani tanda ni haanak boruonni.”

¹⁵ Jadi maningon boanon ni bapa pakon inang ni naboru ai ma boruni ai rap pakon tanda ni haanak boruonni hu lobei ni pangintuai ni huta ai, hu horbangan.

¹⁶ Dob ai hatahonon ni bapa ni naboru ai ma hubani pangintuai ai, Domma hupalaho namin borungkon hubani dalahi on bahen parinangonni, hape magigi ia mangidahsi,

¹⁷ anjaha tonggor ma, ipatubuh-tubuh do hasamboron bani, nini, “Seng dong jumpah ahu bani borumu on tanda ni haanak boruonni,” tapi “ijon do tanda ni haanak boruon ni borungkon.”

Dob ai maningon paherbangon ni sidea ma hiou ai i lobei ni pangintuai ni huta ai.

¹⁸ Dob ai maningon tangkapon ni pangintuai ni huta ai ma dalahi ai, lanjar bogbogon ni sidea ma ia;

¹⁹ dondaon ni sidea ma ia saratus sekel pirak, anjaha bereon ni sidea ma ai hubani bapa ni puang-puang ai, halani na pinasambor-samborni ai goran ni anak boru ni Israel; anjaha maningon totap do ia parinangonni, seng bulih ambukkononni ia sadokah manggoluh.

²⁰ Tapi anggo tongon do ai, seng dong jumpah tanda ni haanak boruonni bani naboru ai,

²¹ jadi maningon toguon ni sidea do luar naboru ai hu labah ni rumah ni bapani, dob ai pargijigon ni hasomanni sahuta ma ia bani batu ase matei, halani na dob mambahen hasamboron ia i Israel marhitei na marriah-riah ia ibagas rumah ni bapani; sonai ma siapkononmu hajahaton ai hun tengah-tengahmu.

²² Anggo tardapot sada dalahi mangkorjahon na masambor pakon sada parinangon ni halak na legan, maningon matei sidea haduasi, dalahi na marsaor hubani naboru ai pakon naboru ai, sonai ma siapkononmu hajahaton ai hun tengah-tengah ni Israel.

²³ Anggo adong sada anak boru na dob martunangan, anjaha pajumpah ma ia pakon sada dalahi na legan i huta ai, lanjar marsaor sidea,

²⁴ maningon haduasi sidea toguon hu darat ni horbangan ni huta ai, anjaha maningon pargijigon sidea bani batu ase matei, naboru ai, halani na so mandoruhi ia age pe ibagas huta; dalahi ai, halani na binutakanni ai parinangon ni hasomanni; sonai ma siapkononmu hajahaton ai hun tengah-tengahmu.

²⁵ Tapi anggo i ladang do jumpah dalahi ai naboru, na dob martunangan ai, gabe itangkap ia anjaha marsaor pakonsi, jadi pitah dalahi na marsaor pakonsi ai do na maningon matei.

²⁶ Tapi seng bulih kahuaonmu naboru ai, ai seng dong bani naboru ai dousa, na boi mambahen matei ia, halani paharani ai usih do ai hubani sada halak, na mandorab anjaha na mamunuh hasomanni;

²⁷ ai i ladang do naboru ai jumpahsi, anjaha age pe mandoruhi naboru na dob martunangan ai, seng dong age sahalak na tarbahen mangurupisi.

²⁸ Anggo jumpah sada halak sada anak boru, na so martunangan ope, gabe itangkap ia anjaha marsaor ia pakonsi, anjaha tardapot sidea,

²⁹ jadi maningon bereon ni dalahi, na marsaor pakon naboru ai ma lima puluh sekel pirak hubani bapa ni naboru ai, anjaha gabe parinangonni ma ia halani na dob binutakanni ai ia, seng bulih ambukkononni ia sadokah manggoluh ia.

³⁰ Seng bulih pagodangon ni sada halak parinangon ni bapani, halani na dob marsaor bapani hu bani.

Halak na So Bulih Masuk hu Kuria ni Jahowa

23 ¹ Halak na kinasih barang na pinaborsih, seng bulih masuk hu kuria ni Jahowa.

² Seng bulih anak salong-salongan masuk hu kuria ni Jahowa; age bani sundut na pasapuluhkon seng bulih ginomparni masuk hu kuria ni Jahowa.

³ Seng bulih halak Amon pakon halak Moab masuk hu kuria ni Jahowa, age sundut na pasapuluhkon seng bulih masuk humbani sidea hu kuria ni Jahowa ronsi sadokah ni dokahni,

⁴ halani lang ialo-alo sidea nasiam marhitei ruti pakon bah bani dalan, sanggah luar nasiam hun Masir, pakon halani na iupahi sidea mangimbang nasiam si Bileam, anak ni si Beor, na hun Petor i Padang Aram laho mamurai nasiam.

⁵ Age pe sonai seng ra Jahowa Naibatamu mambalosi hata ni si Bileam; tapi ipahusor Jahowa Naibatamu do papa ai gabe pasu-pasu bamu, halani holong ni uhur ni Jahowa, Naibatamu mangidah ham.

⁶ Seng bulih pindahanmu hadameion ni sidea barang hasonangan ni sidea sadokah ham manggoluh ronsi sadokah ni dokahni.

⁷ Seng bulih magigi uhurmu mangidah halak Edom, ai saninamu do ia; seng bulih magigi uhurmu

mangidah halak Masir, ai halak dagang do ham na ijia i tanohni.

⁸ Dakdanak na itubuhkon bani sidea bani sundut patoluhon, bulih do masuk hubagas kuria ni Jahowa.

Pasal Hapansingon ni Parsaranan

⁹ Anggo bingkat ham hu parporangan laho mangimbang munsuhmu, maningon ramotanmu do dirimu dompak sagala hajahaton.

¹⁰ Anggo adong i tengah-tengah nasiam sahalak na butak, halani mambur bonihni borngin, maningon luar ia hu darat ni parsaranan ai, seng bulih masuk ia hubagas parsaranan ai;

¹¹ tapi marayak golap ari paridionni ma angkulani ibagas bah, anjaha anggo domma sundut mata ni ari, boi ma ia masuk hu parsaranan ai,

¹² Maningon adong bamu i darat ni parsaranan ai sada ianan, anjaha hujai ma ham hu duru.

¹³ Ambah ni sinjatamu maningon dong bamu sada tajak-tajak, ase anggo laho ham hu duru, hurakonmu ma sada lubang, anjaha rungkubonmu ma ginagatmu ai.

¹⁴ Ai Jahowa Naibatamu do mardalan-dalan i tengah-tengah ni parsarananmu laho paluahkon ham pakon mangondoskon munsuhmu bamu. Halani ai maningon pansing do parsarananmu,

ase ulang adong Idahon-Ni na so patut i
tongah-tongahmu, ase ulang surut la Hun bamu.

**Aturan bani Jabolon na Lintun
pakon Parriah-riahon**

¹⁵ Seng bulih ondoskononmu sada jabolon mulak
hubani tuanni, na dob lintun humbani tuanni hu
bamu;

¹⁶ maningon i lambungmu, i tongah-tongahmu do
ia marianan, bani ianan na pinilihni ibagas sada
humbani hutamu, barang ija sidearan ninuhurni;
seng bulih odaronmu ia.

¹⁷ Seng bulih dong humbani boru ni halak Israel, na
mangondoskon dirini bani ugama parriah-riahon,
anjaha seng bulih dong humbani anak ni halak
Israel, na mangondoskon dirini bani ugama parriah-
riahon.

¹⁸ Seng bulih boanonmu upah parriah-riahon
barang duit boli ni baliang hu rumah ni Jahowa
Naibatamu, laho manggalar atap ija utang
bagah-bagahmu, ai magigi do uhur ni Jahowa
Naibatamu mangidah haduasi ai.

**Pasal na Pabungahon Duit, Pasal
Bagah-bagah pakon na Mambuat
Suan-suanan ni Halak na Legan**

¹⁹ Seng bulih jaloonmu bunga humbani
hasomanmu, barang bunga ni duit, barang bunga

ni sipanganon, barang bunga ni atap aha pe na marbunga ipapinjamkon halak.

²⁰ Humbani halak na legan bulih do jaloonmu bunga, tapi anggo hubani hasomanmu seng bulih pabungahononmu atap aha pe, ase ipasu-pasu Jahowa Naibata sagala na jinamah ni tanganmu, bani tanoh simasukanmu bahen parbagiananmu.

²¹ Anggo marbagah-bagah ham hubani Jahowa Naibatamu, ulang ma ipananget-nanget ham laho manggalari ai, sai tungguon ni Jahowa Naibatamu do ai hun bamu, anjaha gabe dousa do ai bamu.

²² Tapi ambit lang marbagah-bagah ham seng dousa ai bamu.

²³ Maningon ramotkononmu anjaha pasaudonmu do sagala na dob puas humbani pamanganmu, ai na dob binagah-bagahkonmu do ai humbani rosuh ni uhurmu hubani Jahowa Naibatamu, sagala na dob niluarhonmu marhitei pamanganmu.

²⁴ Anggo masuk ham hubagas pohon anggur ni hasomanmu, bulih do panganonmu humbani buah ni anggur ai age sadiha rosuh ni uhurmu, sabosur-bosurmu, tapi sada pe lang bulih balbahulhononmu.

²⁵ Anggo masuk ham hu sisabion ni hasomanmu, bulih do buatonmu buyur ni ai bani tanganmu, tapi seng bulih sabihononmu sasabimu hubani juma ni hasomanmu.

Titah Pasal Parsirang-sirangon

24 ¹Anggo ibuat sada dalahi sada naboru bahen parinangonni, hape sogam use uhurni mangidahsi, halani adong jumpahsi bani sada tikas, maningon suratkononni bani sada surat sirang anjaha bereonni ma ai bani, dob ai usironni ma ia hun rumahni;

²anjaha anggo domma luar ia hun rumahni ai, anjaha laho gabe parinangon ni halak na legan,

³hape magigi homa paramangon na legan ai mangidahsi, gabe isuratkon bani sada surat sirang anjaha ibere ai bani anjaha iusir ia hun rumahni, barang anggo matei dalahi na legan ai, na dob mambuatsi bahen parinangonni,

⁴jadi seng bulih paramangonni na parlobei ai, na dob marsuruhsi mulak, mambuatsi use gabe parinangonni, dob na binutakan ai ia; ai hagigi do ai i lobei ni Jahowa, anjaha seng bulih mardousa bahenonmu tanoh, na dob binere ni Jahowa Naibatamu bamu bahen parbagiananmu.

⁵Anggo baru mambuat boru sada dalahi, seng bulih bingkat ia hu parporangan barang dais ia bani sada horja rodi; maningon maluah ia patorsa-torsa rumahni satahun dokahni, ase marmalas ni uhur ia pakon parinangonni, na binuatni ai.

Titah Panatapan bani Halak na Masombuh

⁶ Seng bulih jaloan bahen gadeian batu pandudaan partoruh barang pardatas, ai hosah do jinaloni ijai bahen gadeian.

⁷ Anggo adong jumpah sada halak, na mamangus sahalak humbani saninani, halak Israel, anjaha iparjabolon ia barang ijual, maningon marutang hosah pamangus ai; sonai ma bahenonmu maniapkon hajahaton ai hun tongah-tongahmu.

⁸ Ramotkon ham ma dirimu dompak naborit gadam, pangkei-pangkei ma horjahon ham ganup na pinodahkon ni malim, halak Levi ai bamu; songon na hutonahkon ai bani sidea, maningon sonai do porluhonon nasiam mangkorjahon ai.

⁹ Sai ingat ham ma na binahen ni Jahowa Naibatamu hubani si Mirjam i tongah dalan, sangah na luar ai nasiam hun Masir.

¹⁰ Anggo ipapinjamkon ham barang aha hubani hasomanmu, seng bulih masukanmu rumahni laho manjalo gadeian hun bani.

¹¹ Maningon i darat do ham jongjong, anjaha dalahi sipanginjam ai luar ma marayak ham, mamboan gadeian ai hu darat.

¹² Tapi anggo halak na musil do ia, seng bulih ham modom rap pakon gadeianni ai;

¹³ maningon paulakonmu hubani gadeianni ai sundutkonsi mata ni ari, ase boi modom ia marhiou

anjaha ipasu-pasu ham, anjaha gabe hapintoronmu do ai i lobei ni Jahowa Naibatamu.

¹⁴ Seng bulih odaronmu halak na marombou, na masombuh ampa na musil, barang na humbani saninamu barang na humbani halak dagang, na marianan i tanohmu ibagas hutamu.

¹⁵ Maningon jalo-jalo ganup ari bereonmu upahni paima sundut mata ni ari, ai na madoyuk do ia anjaha upahni ai do niarapkon ni uhurni, ase ulang dilo-dilo ia hubani Jahowa laho mangaduhon ham, anjaha gabe dousa ai bamu.

¹⁶ Seng bulih marutang hosah bapa halani anakni, anjaha anak pe seng bulih marutang hosah halani bapani, maningon ganup halani dousani bei matei.

¹⁷ Seng bulih papeolonmu uhum hubani halak dagang barang hubani dakdanak na tading maetek, anjaha seng bulih buatonmu hiou ni puang-puang na mabalu bahen gadeian.

¹⁸ Maningon ingatonmu jabolon do ham ijia i tanoh Masir, hape domma itobus Jahowa Naibatamu ham hunjai; halani ai do ase huparentahkon ham mangkorjahon na sonai.

¹⁹ Anggo ipariamai ham sipariamaonmu i jumamu, hape lupa ham bani sada radean i jumamu, seng bulih ham mulak mangalop ai; maningon halak dagang, dakdanak na tading maetek pakon puang-puang na mabalu simada ai, ase pasu-pasuon

ni Jahowa Naibatamu ham bani ganup horja ni tanganmu.

²⁰ Anggo domma iutip ham buah ni hayu jetunmu, seng bulih ulakonmu mangulaki dangkah ni ai; bani halak dagang, dakdanak na tading maetek pakon puang-puang na mabalu ma ai.

²¹ Anggo domma iutip ham buah ni hayu anggurmu, seng bulih ulakanmu mambuat ai; bani halak dagang, dakdanak na tading maetek pakon puang-puang na mabalu ma ai.

²² Maningon ingatonmu, jabolon do ham ijia i tanoh Masir; halani ai do ase huhatahon ham mangkorjahon on.

Aturan ni Uhum Lonsing-lonsing

25 ¹ Anggo martinggil dua halak, anjaha laho sidea hu paruhuman anjaha i dabuh bani sidea uhum, gabe papintoron ma halak parpintor anjaha salahkonon halak parsalah.

² Anjaha anggo patut do silonsingon parsalah ai, maningon hatahonon ni panguhum ai ma ia manowod, anjaha lonsingon i lobeini, romban hubani hajahatonni bueini.

³ Ompat puluh hali do ia bulih lonsingon, ulang lobih; ase ulang mahiri saninamu i lobeimu anggo ilonsingi ia lobih hunjai.

⁴ Seng bulih huntamonmu babah ni lombu sanggah mardogei.

Pasal na Pagodang Puang-puang na Mabalu

⁵ Anggo rap marianan halak na marsanina, hape matei sahalak humbani sidea seng tubuhan anak, seng bulih palahoon puang-puang, parinangon ni halak na matei ai bahen parinangon ni halak na legan, maningon anggini ai do marayaksi bahen parinangonni pajongjong ginompar bani abangni ai.

⁶ Anjaha anak bunga tubuh, na tinubuhkonni ai, maningon marpanggorankon goran ni bapani na matei ai do, ase ulang sasap goranni hun Israel.

⁷ Tapi anggo seng marosuh uhur ni dalahi ai paganjangkon parinangon ni abangni ai, maningon laho ma parinangon ni abangni ai tangkog hu horbangan ni huta ai marayak pangintuai-pangintuai lanjar hatahononni ma, “Mangengkar do anggingku pajongjong goran ni abangni i Israel, seng ra ia paganjang ahu.”

⁸ Dob ai diloon ni pangintuai ni huta ai ma ia laho marsahapkonsi; hape anggo tong do martahan ia mangkatahon, “Seng marosuh uhurhu paganjangkonsi.”

⁹ Jadi laho ma parinangon ni abangni ai hu lambungni i lobei ni pangintuai ai, itanggali naboru ai ma sipatuni humbani naheini anjaha itijuri bohini, lanjar nini ma mambalosi, “Maningon sonin do bahenon hu dalahi, na so ra pajongjong ginompar hubani abangni.”

¹⁰ Anjaha maningon goranon ni halak ma goranni i Israel, “Rumah ni halak, na dob tinanggalan sipatuni.”

Pasal Parlahou na So Patut

¹¹ Anggo martinggil dua dalahi samah sidea, gabe roh parinangon ni na sada sihol paluahkon paramangonni hun tangan ni na mambogbogisi, gabe isurdukkon tanganni anjaha isontap hailaonni, ¹² jadi maningon rotaponmu do tangan ni puang-puang ai, seng bulih maralang-alang uhurmu.

Pasal Suhat-suhat pakon Timbangan na Sintong

¹³ Seng bulih dong dua batu timbangan ibagas ranjutmu, sada na banggal anjaha sada na etek.

¹⁴ Seng bulih mardua tapongan ham ibagas rumahmu, sada na banggal anjaha sada na etek.

¹⁵ Maningon marbatu timbangan na botul anjaha na sintong ham, maningon martapongan na botul anjaha na sintong ham, ase dokah ham manggoluh i tanoh sibereon ni Jahowa Naibatamu bamu.

¹⁶ Ai marbursik-bursik do Jahowa Naibatamu mangidah ganup jolma na mangkorjahon na sonai, mangidah ganup jolma tene na mangkorjahon hagedukon.

Maningon Siapkononkon do Halak Amalek

¹⁷Ingat ma na binahen ni halak Amalek bamu i tongah dalan, sanggah na luar nasiam hun Masir,
¹⁸naha pangadangni bamu i tongah dalan, sanggah na galek anjaha loja ham, anjaha ibunuh sagala na galek na roh mangihut hun pudi, anjaha seng ihabiari Naibata.

¹⁹Halani ai anggo domma marhasonangan ham ibahen Jahowa Naibatamu humbani sagala munsumu inggot i tanoh sibereon ni Jahowa Naibatamu bamu bahen parbagiananmu, maningon siapkononmu ma pardingatan ni halak Amalek hun toruh ni langit; seng bulih halupahononmu ia.

Pasal na Mamboan Limbua ni na Hinorjahon

26 ¹Anggo domma masuk ham hu tanoh sibereon ni Jahowa Naibatamu bamu bahen parbagiananmu, dob isoluk ham tanoh ai anjaha marianan ham ijai,

²maningon buatonmu ma humbani limbua ni ganup gogoh ni tanoh ai, na jumpah humbani tanohmu ai, na dob binere ni Jahowa Naibatamu bamu, anjaha pamasuk ham ma ai hubagas sada tapongan, anjaha boan ham ma ai hubani ianan sipilihon ni Jahowa Naibatamu bahen ianan ni goran-Ni.

³ Dob ai maningon parayakonmu ma malim, na marhorin bani ari ai, anjaha hatahon ham ma hu bani, “Na pabotohkon ma ahu sadari on i lobei ni Jahowa Naibatamu, paboa na dob masuk ahu hu tanoh, na dob binulawankon ni Jahowa hinan hubani ompungnami, bereon-Ni hu bennami.”

⁴ Jadi buaton ni malim ai ma tapongan ai hun tanganmu, anjaha ipeakkon ma ai i lobei ni anjapanjap ni Jahowa Naibatamu.

⁵ Dob ai hatahononmu ma i lobei ni Jahowa, “Halak Aram na madou-adou do anggo bapa; dob ai tuad ma ia hu Masir lanjar manginsolat ijai, otik do bilanganni, hape jadi gabe bangsa na bolon, na gogoh anjaha na buei.

⁶ Tapi roh ma halak Masir mambahen na so uhum bennami, iarsik anjaha iampeihon do bennami horja jabolon na borat.

⁷ Jadi mandoruhi ma hanami bani Jahowa Naibata ni ompungnami, gabe itangihon Jahowa do soranami anjaha marpanatap uhurni bani hasombuhon, hangaluton pakon hasosakan na idagei hanami.

⁸ Dob ai iarahkon Jahowa ma hanami luar hun Masir marhitei tangan na gogoh, pakon botohon na toltol, marhitei songgot-songgot bolon, marhitei tanda pakon halongangan;

⁹ anjaha iboan ma hanami das hu ianan in, anjaha ilayak-layakkon ma bennami tanoh on, tanoh habaoran ni dadih pakon manisan ni huraamah.

¹⁰ Sonari pe, tonggor ma, huboan do limbuah ni gogoh ni tanoh, na binere-Mu in hu bangku, alo Jahowa!” Anjaha tibalhon ma tapongan ai i lobei ni Jahowa Naibatamu anjaha marsombah ma ham i lobei ni Jahowa Naibatamu;

¹¹ anjaha marmalas ni uhur ma ham mangidah haganup na madear, na dob binere ni Jahowa Naibatamu bamu pakon hubani sinrumahmu, ham, pakon halak Levi, pakon halak dagang na i tongah-tongahmu.

Pasal Parsapuluhan

¹² Anggo domma siap ipatumpu ham ganup parsapuluhan ni gogoh ni tanohmu bani tahun patoluhon, ai ma tahun parsapuluhan, jadi maningon bereonmu ma ai bani halak Levi, halak dagang, dakdanak na tading maetek, puang-puang na mabalu, ase mangan sidea ibagas hutamu anjaha bosuran.

¹³ Anjaha hatahononmu ma i lobei ni Jahowa Naibatamu, ‘Domma hubuat ugas na pansing in hun rumah, ambah ni ai domma hubere in hubani halak Levi, halak dagang, dakdanak na tading maetek pakon puang-puang na mabalu, romban hubani ganup tonahmu, na dob tinonahkon-Mu hu bangku;

seng dong huengkar age sada humbani tonah-Mu anjaha seng huhalupahon.

¹⁴ Seng dong hupangan hunjin sanggah pusok ni uhurhu, barang hubuat hunjin sanggah butak ahu, barang hupaingkat hunjin bahen boanon ni na matei; hutangihon do sora ni Jahowa Naibatanku, hubahen do ganup romban hubani na tinonahkon-Mu hu bangku.

¹⁵ Sai manatap ma ham humbani ianan-Mu na pansing in, hun nagori atas, anjaha pasu-pasu Ham ma bangsa-Mu halak Israel pakon tanoh na dob binere-Mu bennami, songon na dob binulawankon-Mu bani ompungnami, tanoh habaoran ni dadih pakon manisan ni huraamah.'

Sipaingat Pangujungi

¹⁶ Sadari on ma Jahowa Naibatamu manonahkon bamu mangkorjahon aturan pakon uhum on; maningon ramotkonon anjaha horjahononmu do in humbani sagala uhumu pakon sagala tonduymu.

¹⁷ Domma iparbagah ham sadari on, paboa maningon Jahowa do Naibatamu, anjaha marparlahou ham bani dalan-Ni, anjaha ramotkononmu aturan-Ni, tonah-Ni pakon uhum-Ni, anjaha maningon tangihononmu sora-Ni.

¹⁸ Jahowa pe ihatahon do ham marbagah-bagah sadari on, paboa ham do bangsa-Ni sandiri, songon

na dob pinarbagah-bagah-Ni hinan bamu, anjaha ramotkononmu do ganup tonah-Ni,

¹⁹ ase la mambahen ham timbul humbani ganup bangsa sipajuh begu-begu, na dob jinadihon-Ni bahen puji-pujian pakon ambilan ampa hamuliaon, anjaha ase ham gabe bangsa na pansing bani Jahowa Naibatamu songon na dob hinatahon-Ni hinan.

Batu Pardingatan pakon Anjapanjap na i Dolog Ebal

27 ¹ Dob ai iparentahkon si Musa pakon pangintuai ni bangsa ai ma hubani bangsa ai, Ramotkon nasiam ma ganup tonah, na dob hutonahkon in bamu sadari on.

² Anggo domma idipari nasiam Jordan, das nasiam hu tanoh sibereon ni Jahowa Naibatamu bamu, maningon pajongjongonmu ma bamu batu na bolon, anjaha lapuonmu ma ai bani hapur,

³ anjaha uhirhononmu ma hujai ganup hata ni titah on, anggo domma mandipar ham masuk hu tanoh sibereon ni Jahowa Naibatamu bamu, tanoh habaoran ni dadih pakon manisan ni huraamah, songon na dob pinarbagah-bagah ni Jahowa Naibata ni ompungmu hinan bamu.

⁴ Anjaha anggo domma idipari nasiam Jordan, maningon pajongjongon nasiam ma batu on songon na dob hutonahkon in bani nasiam sadari

on, i atas ni Dolog Ebal, anjaha lapuon nasiam ma in bani hapur.

⁵Maningon pajongjongonmu homa ijai sada anjapanjap bani Jahowa Naibatamu, sada anjapanjap humbani batu; seng bulih dais hujai parugas bosi.

⁶Maningon humbani batu na so binarbar pajongjongonmu anjapanjap bani Jahowa Naibatamu; anjaha maningon galangknonmu do i atasni galangan situtungan bani Jahowa Naibatamu,

⁷anjaha maningon galangknonmu homa galangan pardameian, anjaha panganonmu ijai, lanjar marmalas ni uhur ma ham i lobei ni Jahowa Naibatamu.

⁸Anjaha maningon torang tumang do uhirhononmu hubani batu ai hata ni titah on.

⁹Dob ai nini si Musa pakon malim na humbani marga Levi ma dompak ganup Israel, Pasonang anjaha tangihon ma alo Israel, sadari on ma nasiam gabe bangsa ni Jahowa Naibatamu.

¹⁰Halani ai sai tangihon ma sora ni Jahowa Naibatamu, anjaha horjahon ganup tonah-Ni pakon aturan-Ni, sagala na hutonahkon in bamu sadari on.

**Pasu-pasu hun Dolog Garisim,
Papa hun Dolog Ebal**

¹¹ Dob ai iparentahkon si Musa ma hubani bangsa ai bani ari ai,

¹² “Anggo domma idipari nasiam Jordan, maningon jongjong ma i atas ni Dolog Garisim manaurhon pasu-pasu hubani bangsa in: Morga Simeon, Levi, Juda, Isasar, Josep pakon Benjamin.

¹³ Anjaha marga on ma na maningon jongjong i atas Dolog Ebal mangkonahon papa: Morga Ruben, Gad, Asser, Sebulon, Dan pakon Naftali.

¹⁴ Dob ai pagogohon ni halak Levi ma sora ni sidea manaurhon hubani ganup bangsa Israel,

¹⁵ Hona papa ma barang ise na mambahen gana-gana, na niuhir barang na tinuang, hagigian ni Jahowa, jadi-jadian ni tangan ni halak na pandei, anjaha ipajongjong ai bani ianan na ponop. Dob ai balosan ni ganup bangsa ai ma. “Amen!”

¹⁶ Hona papa ma barang ise, na marpis ni uhur mangidah bapani barang inangni. Dob ai, hatahonon ni ganup bangsa ai ma. “Amen!”

¹⁷ Hona papa ma barang ise na paosor parbalogan ni hasomanni. Dob ai balosan ni ganup bangsa ai ma. “Amen!”

¹⁸ Hona papa ma barang ise na pakahouhon halak na mapitung i tongah dalan. Dob ai hatahonon ni ganup bangsa ai ma. “Amen!”

¹⁹ Hona papa ma barang ise na papeol uhum bani halak dagang, dakdanak na tading maetek pakon puang-puang na mabalu. Dob ai hatahonon ni ganup bangsa ai ma. "Amen!"

²⁰ Hona papa ma barang ise na paganjang parinangon ni bapani, halani na dob marsaor bapani pakonsi. Dob ai hatahonon ni ganup bangsa ai ma. "Amen!"

²¹ Hona papa ma barang ise na marsaor pakon pinahan aha pe. Dob ai hatahonon ni ganup bangsa ai ma. "Amen!"

²² Hona papa ma barang ise na marsaor pakon botouni, na sada bapa barang na sada inang pakonsi. Dob ai hatahonon ni ganup bangsa ai ma. "Amen!"

²³ Hona papa ma barang ise na marsaor pakon simatuani naboru. Dob ai hatahonon ni ganup bangsa ai ma. "Amen!"

²⁴ Hona papa ma barang ise na mamunuh hasomanni ibagas na ponop. Dob ai hatahonon ni ganup bangsa ai ma. "Amen!"

²⁵ Hona papa ma barang ise manjalo sisip, laho mamunuh sada halak, anjaha na manduruskon darohni na so marpipot. Dob ai hatahonon ni ganup bangsa ai ma. "Amen!"

²⁶ Hona papa ma barang ise na so pajonamkon hata ni titah on marhitei na mangkorjahon ai. Dob ai hatahonon ni ganup bangsa ai ma. "Amen!"

Pasu-pasu pakon Papa

28¹ Anggo tangi tumang ham bani hata ni Jahowa Naibatamu, iharinggaskon uhurmu mangkorjahon ganup titah-Ni, na hutonahkon in bamu sadari on, jadi pabangkiton ni Jahowa Naibatamu ma ham timbulan humbani sagala bangsa na i atas tanoh on.

² Sogop ma bamu ganup pasu-pasu on anjaha ondos bamu, anggo itangihon ham sora ni Jahowa Naibatamu.

³ Pasu-pasuon-Ni ma ham ibagas huta, anjaha pasu-pasuon-Ni ma ham i ladang.

⁴ Pasu-pasuonni ma boras ni boltokmu pakon gogoh ni tanohmu, pasu-pasuon-Ni ma manggargar pinahanmu, lembu pakon biribirimu.

⁵ Pasu-pasuon-Ni ma tapongan pakon pangakuanmu.

⁶ Pasu-pasuon-Ni ma ham laho masuk, anjaha pasu-pasuon-Ni ma ham laho luar.

⁷ Ondoskonon ni Jahowa ma munsuhmu na roh manlawan ham, ase rasei sidea i lobeimu; marhitei humbani sada dalan sidea bingkak mandorab ham, maningon marhitei pitu dalan sidea maporus i lobeimu.

⁸ Hatahonon ni Jahowa ma pasu-pasu mangkasomani ham ibagas sopoumu pakon bani ganup jinamah ni tanganmu, anjaha pasu-

pasuon-Ni ma ham i tanoh, na binere ni Jahowa Naibatamu bamu.

⁹ Pajonamon ni Jahowa ma ham gabe sada bangsa na pansing bani, songon na dob binulawankon-Ni hinan bamu, anggo iramotkon ham tonah ni Jahowa Naibatamu, anjaha marparlahou ham ibagas dalan-Ni.

¹⁰ Anjaha ganup bangsa na i tanoh on mangidah, paboa na dob targoran do ham bani goran ni Jahowa, gabe mabiar sidea mangidah ham.

¹¹ Anjaha tumpakan ni Jahowa ma ham marlobih-lobih bani na madear, bani boras ni boltokmu, bani panggargar ni pinahanmu, bani gogoh ni tanohmu, bani tanoh na dob binulawankon ni Jahowa hinan hubani ompungmu berehonon-Ni hu bamu.

¹² Buhaan ni Jahowa ma bamu parartaan-Ni na madear, ai ma langit ai, laho mambere udan bani tanohmu bani panorang hadearanni, anjaha pasu-pasuon-Ni ma ganup na hinorjahon ni tanganmu, gabe panginjaman ni buei bangsa sipajuh begu-begu ma ham, tapi anggo ham seng anjai manginjam.

¹³ Anjaha pabangkiton ni Jahowa ma ham gabe ulu, lang be ihur; lambin naikni mando ham, seng anjai turun; anggo itangihon ham titah ni Jahowa Naibatamu, sagala na hutonahkon in bamu sadari on, siramotkonon anjaha sihorjahononmu,

¹⁴ anjaha anggo seng manlembang ham hu siamun barang hu sambilou humbani ganup hata, na dob hutonahkon in bamu sadari on, laho mangirikkon naibata na legan anjaha marsombah hujai.

¹⁵ Tapi anggo seng itangihon ham sora ni Jahowa Naibatamu, anjaha anggo seng iramotkon anjaha ihorjahon ham sagala uhum-Ni pakon aturan-Ni, sagala na hutonahkon in bamu sadari on, sogop ma bamu sagala papa on anjaha mangonai bamu.

¹⁶ Hona papa ma ham ibagas huta anjaha hona papa ma ham i ladang.

¹⁷ Hona papa ma taponganmu pakon pangauanmu.

¹⁸ Hona papa ma boras ni boltokmu pakon gogoh ni tanohmu, anak ni lombumu pakon biribirimu.

¹⁹ Hona papa ma ham laho masuk, anjaha hona papa ma ham laho luar.

²⁰ Tongoson ni Jahowa ma hu tongah-tongahmu papa-papa, hageoron pakon hinamagou bani haganup na hinorjahon ni tanganmu, paima siap anjaha magou ham podas, halani hinabajan ni pambahenmu, halani na tinadingkonmu in Ahu.

²¹ Sai mardondon do i tongah-tongahmu sampar bahenon ni Jahowa, paima siap ham hun tanoh siparayakonmu bahen parbagiananmu.

²² Papaan ni Jahowa ma ham marhitei naborit tirahap, pane-pane, rojan, arun, logou ni ari,

hameluson pakon antinganou; sai pardakdakon-Ni do ham paima magou ham.

²³ Anjaha gabe tombaga ma langit na i babou ni ulumu, anjaha gabe bosu tanoh na i toruhmu.

²⁴ Bereon ni Jahowa ma horsik pakon orbuk gantih ni udan hu tanohmu; mangkadabuh ma in bamu hun langit paima magou ham.

²⁵ Bahenon ni Jahowa ma ham marrageian i lobeini munsuhmu; marhitei humbani sada dalan ham bingkat mandorab munsuhmu, hape marhitei humbani pitu dalan ham maporus i lobeini munsuhmu; anjaha gabe hagigian ma ham bani ganup harajaon na i tanoh on.

²⁶ Gabe sipanganon ni sagala manuk-manuk na i awang-awang in pakon binatang na i tanoh on ma bangkeimu; sahalak pe lang na ra mangosiki ai.

²⁷ Papaan ni Jahowa ma ham marhitei puru Masir, marhitei bayoh, hurap pakon hulus na so hatambaran.

²⁸ Papaan ni Jahowa ma ham marhitei podou, hapitungon pakon ratou,

²⁹ gabe dadap-dadap ma ham tongah arian, songon na mapitung dadap-dadap ibagas hagolapan, anjaha seng mardohar ham bani sagala dalanmu; pitah siayakon pakon sirampokan ma ham tongtong, anjaha seng dong na paluahkon ham age sahalak.

³⁰ Mambuat boru ham, tapi halak na legan do marjilmahonsi; pajongjong rumah ham, tapi seng ham marianan ibagas, mamungkah pohon anggur ham, hape seng ham mangankon buahni.

³¹ Sayaton ni halak ma lombumu i lobeini matamu, tapi seng bulih panganonmu ai; rampason ni halak ma halodemu hun lobeimu, anjaha seng paulakonni ai bamu; ondohonkon ma biribirimu hubani munsumu, anjaha sahalak pe lang dong na mangurupi ham.

³² Ondohonkon ma anakmu pakon borumu hubani bangsa na legan ipaidah-idah matamu, anjaha siholan ma ham layur-layur ari hubani sidea, tapi aha pe lang boi bahenonmu.

³³ Anjaha bois ma gogoh ni tanohmu in pakon na hinangalutkonmu in panganon ni bangsa na so tinandamu; pitah siodaron pakon sidogei-dogean ma ham layur,

³⁴ ase podouan ma ham halani haganup sitaronon na nididah ni matamu ai.

³⁵ Papaan ni Jahowa ma ham marhitei puru na jahat bani towodmu pakon bani hae-haemu, na so hatambaran olat ni jampal ni naheimu das hu pakpak ni ulumu.

³⁶ Pabalion ni Jahowa ma ham rap pakon rajamu, na pinabangkitmu manggomgom ham, hubani sada bangsa sipajuh begu-begu, na so tinandamu anjaha

na so tinanda ni ompungmu, jadi balosanmu ma ijai naibata na legan humbani hayu pakon batu.

³⁷ Anjaha gabe hagigian, umpama ni halak pakon sipahiri-hirion ma ham i tongah-tongah ni ganup bangsa atap huja ham sihol pabalion ni Jahowa.

³⁸ Buei do namin boanonmu bonih hu jumamu, tapi otik do ai patumpuonmu; ai bois do ai gagaton ni balang.

³⁹ Pungkahonmu do namin pohon anggur anjaha pauli-ulionmu ai, tapi seng anjai inumonmu anggur ai barang patumpuonmu buahni, ai bois do ai panganon ni gilok-gilok.

⁴⁰ Martubuhan do namin hayu jetun bani ganup tanohmu inggot, tapi seng anjai minakanmu angkulamu bani minak, ai marurus sonin do buah ni hayu jetunmu.

⁴¹ Tubuhan anak pakon boru do namin ham, tapi seng anjai dong tading i lambungmu; ai maningon laho do sidea hu habuangan.

⁴² Sagala hayumu pakon buah ni tanohmu ai maningon tamponok do simadasi.

⁴³ Ia halak dagang na i tongah-tongahmu in lambin dokahni lambin naikni do mangatasi ham, tapi anggo ham lambin dokahni lambin surutni do.

⁴⁴ Ia ma papinjamkon bamu, seng ham papinjamkon bani; ia ma gabe ulu, anjaha ham gabe ihur.

⁴⁵ Sai na sogop do bamu ganup papa-papa on, anjaha pardakdakonni do ham anjaha honaanni paima siap ham, halani na so tinangihonmu sora ni Jahowa Naibatamu, laho manramotkon ganup titah-Ni pakon aturan-Ni, sagala na tinonahkon-Ni ai bamu.

⁴⁶ Maningon gabe tanda pakon halongangan ma in bamu pakon bani ginomparmu sadokah ni dokahni.

⁴⁷ Halani na so binalosanmu Jahowa Naibatamu marhasoman malas ni uhur pakon dear ni uhur, hinorhon ni hinabuei ni ganup na jinalomu ai,

⁴⁸ maningon pambalosi ma ham bani munsuhmu, na sinuruh ni Jahowa mangimbang ham, manaron lohei pakon horah, partalanjangon pakon hahurangan na marbagei-bagei; anjaha nahkonon ni Jahowa ma pasangan bosi hubani borgokmu paima magou ham bahenon-Ni.

⁴⁹ Boanon ni Jahowa ma sada bangsa sipajuh begu-begu humbani na daoh, humbani ujung ni tanoh on manlawan ham, songon parhabang ni manuk-manuk nanggordaha pardorasni, sada bangsa na so niarusanmu parsahapni,

⁵⁰ sada bangsa na reteng bohini, na so maralang-alang mangidah na matua, anjaha na so maridop ni uhur mangidah na maposo,

⁵¹ anjaha bois do panganonni anak ni pinahanmu pakon gogoh ni tanohmu paima siap ham; seng tebaanni bamu gandum, anggur, minak, anak

ni lombu pakon biribirimu, paima siap ham bahenonni.

⁵² Anjaha sosakonni ma ham ibagas ganup hutamu, paima marongrong bahenonni tembokmu na gijang anjaha na toguh ai, na hinatengeran ni uhurmu namin bani sab tanohmu; maningon sosakanni do ham bani haganup hutamu i sab tanohmu, sibereon ni Jahowa Naibatamu bamu.

⁵³ Panganonmu do boras ni boltokmu sandiri, daging ni anakmu pakon borumu, sagala na dob binere ni Jahowa Naibatamu bamu, ibagas pangkubu pakon hasosakan na binahen ni munsuhmu bamu.

⁵⁴ Dalahi siunjahan anjaha siminggalan i tongah-tongahmu, serleng do panonggorni marsimburu mangidah saninani pakon mangidah parinangon haudungan ni uhurni pakon mangidah niombahni na tading manggoluh ope pakonsi,

⁵⁵ gabe seng ibere hubani sidea humbani daging ni anakni sandiri na pinanganni, halani na so adong ai teba age aha bani marhitei pangkubu pakon hasosakan, na binahen ni munsuhmu bamu ibagas hutamu.

⁵⁶ Puang-puang siunjahan anjaha siminggalan i tongah-tongahmu, na so pag manondolhon tapak-tapak ni naheini hu tanoh halani jengesni pakon minggalni, serleng do matani marsimburu

mangidah paramangonni sandiri, mangidah anakni pakon boruni,

⁵⁷ gabe seng ibere hubani sidea humbani anggi-anggi ni na etek-etek, na luar hun partapaan, barang humbani na etek-etek na dob tinubuhkonni, ai sihol do panganonni ai marponop-ponop, halani hurangan ia bani haganup marhitei pangkubu pakon hasosakan, na binahen ni munsuhmu bamu ibagas hutamu.

⁵⁸ Anggo seng iramotkon ham anjaha ihorjahon ham haganup hata ni titah on, na tarsurat ibagas buku on, ase marhabiaran ham bani goran na marmulia anjaha na majombut on, ai ma Jahowa Naibatamu,

⁵⁹ gabe marhasurungan ma papahonon ni Jahowa bamu pakon bani ginomparmu, papa na bolon pakon na manongtong, pakon naborit na parah anjaha mardondon.

⁶⁰ Anjaha tonahkonon-Ni ma use bamu ganup naborit na masa i Masir, na hinabiaranmu ai, ai ma mangonai bamu.

⁶¹ Sagala naborit pakon papa na so tarsurat ibagas buku titah on, honahonon ni Jahowa ma bamu, paima siap ham.

⁶² Jadi otik naman na tading humbani nasiam, age pe usih hubani bintang na i langit hinan hinabuei nasiam, halani na so itangihon nasiam sora ni Jahowa Naibatamu.

⁶³ Anjaha ia sonin hinan malas ni uhur ni Jahowa mangidah nasiam, laho mambahen na madear hubani nasiam pakon pabueihon nasiam, usih sonai ma malas ni uhur ni Jahowa laho mangagou pakon maniapkon nasiam; anjaha orbaton-Ni ma nasiam hun tanoh simasukan nasiam bahen parbagianan nasiam.

⁶⁴ Anjaha pamerapon ni Jahowa ma ham hu tengah-tengah ni sagala bangsa, hun ujung ni tanoh na sada hu ujung ni na sada nari, anjaha balosanmu ma ijai naibata na legan humbani hayu pakon batu, sagala na so tinandamu barang ompungmu hinan.

⁶⁵ Anjaha seng anjai marhasonangan ham i tengah-tengah ni bangsa ai, anjaha seng dong parsaranan bani tapak-tapak ni naheimu, ai bereon ni Jahowa ma bamu uhur na gobir tongtong, pakon mata na motei-otei, pakon tonduy na marpandoleian.

⁶⁶ Gantung mando goluhmu songon bani jambulan i lobeimu; marhabiaran ma ham arian pakon borngin, anjaha seng be tenger uhurmu bani goluhmu.

⁶⁷ Sogod hatahononmu ma, 'Ambit golap ma namin ari' anjaha borngin hatahononmu ma, 'Ambit siang ma namin ari!' Halani biar na mambibiari uhurmu pakon hinamagou na nididah ni matamu.

⁶⁸ Dob ai boanon ni Jahowa ma ham mulak hu Masir ibagas parau, hubani dalan na dob hupatugah hinan bamu, 'Seng anjai idahonmu be in anjaha jualon

ma nasiam ijai hubani munsuhmu bahen jabolon dalahi pakon jabolon naboru, hape seng dong na ra mamboli.'

Parpabayu bani Parpadanan pakon Naibata

29¹ On ma hata ni parpadanan na hinatahon ni Jahowa hubani si Musa sibahenonni hubani halak Israel i tanoh Moab, sobali parpadanan na dob binahenni ai bani sidea i Horeb.

² Dob ai ipatumpu si Musa ma haganup halak Israel anjaha nini ma dompak sidea, "Domma ididah nasiam haganup na dob binahen ni Jahowa i lobeini mata nasiam i tanoh Masir, hubani Parao pakon hubani ganup juakjuakni ampa hubani sab tanohni,
³ 'Ai ma parlajouan bolon, na dob nididah ni mata nasiam, sagala tanda pakon halongangan na bolon in.

⁴ Hape lanjar ope seng ibere Jahowa hubani nasiam uhur na marimbagaskonsi, barang mata na marpangidah, barang pinggol na marpambogei ronsi sadari on.

⁵ Anjaha Ahu do mangiring-iring nasiam ompat puluh tahun dokahni i halimisan, seng buruk hiou nasiam bani angkula nasiam, anjaha seng buruk sipatu bani naheimu;

⁶ seng mangan ruti nasiam, anjaha seng minum anggur barang siinumon na koras nasiam, ase ibotoh nasiam, Ahu do Jahowa Naibata nasiam.'

⁷ Anjaha dob das nasiam hu ianan on, luar ma si Sihon raja ni Hesbon, pakon si Og raja ni Basan sihol manjumpahkon hita laho marmunsuh, tapi talu do sidea ibahen hita;

⁸ ibuat hita do tanoh ni sidea ai, anjaha ibere hita do ai bani halak Ruben, Gad pakon hubani satongah marga Manase bahen parbagiananni.

⁹ Antong ramotkon nasiam ma hata parpadanan in, anjaha horjahon nasiam ma in, ase maruntung nasiam bani haganup sihorjahonon nasiam.

¹⁰ Jongjong do nasiam ganup sadari on i lobeini Jahowa Naibata nasiam, pambobai nasiam, kopala ni marga nasiam, sintua nasiam pakon ganup dalahi hun Israel;

¹¹ dakdanak nasiam, parinangon nasiam, pakon halak dagang na i tengah-tengah ni parsarananmu, sonai homa sitaha soban pakon sitahu bahmu,

¹² ase masuk ham hubagas parpadanan, na binahen ni Jahowa Naibatamu, pakon hubagas parbulawanan, na binahen ni Jahowa Naibatamu bamu sadari on;

¹³ ase la pajonamkon ham sadari on gabe bangsa-Ni, anjaha la ma gabe Naibatamu, songon na dob pinarbagah-Ni hinan bamu, anjaha songon na dob binulawankon-Ni hubani ompungmu, si Abraham, si Isak pakon si Jakob.

¹⁴ Seng pitah hubani nasiam ahu mambahen parpadanan pakon parbulawanan on,

¹⁵ tapi hubani haganup do tene, na jongjong pakon hita i lobei ni Jahowa Naibatanta, pakon bani haganup na so ijon sadari on rap pakon hita.

¹⁶ Ai ibotoh nasiam do naha pariananta ijia i tanoh Masir, anjaha naha pamontasta hun tongah-tongah ni bangsa sipajuh begu-begu na binontas nasiam in.

¹⁷ Anjaha domma ididah nasiam hagigian, na dob hinorjahon ni sidea ai, pakon gana-gana ni sidea na humbani hayu pakon batu, humbani pirak pakon omas na adong bani sidea.

¹⁸ Halani ai sai ulang ma adong i tongah-tongah nasiam dalahi barang naboru, halak na saompung barang na samarga, na marbalik uurni sadari on humbani Jahowa Naibatanta, sihol mambalosi naibata ni sipajuh begu-begu ai; ase ulang adong i tongah-tongah nasiam urat na mantunaskon buah na marrasun pakon na mapaet.

¹⁹ Sai ulang ma adong sada halak, age pe domma ibogei hata ni parbulawanan on, iparhatuah ope dirini ibagas uurni, mangkatahon, “Maningon marhasonangan do ahu, age mardalan ahu ibagas hahengkengon ni uhurhu; na mamboan hamagouan do ia ai hubani tanoh na marbah pakon na horah.”

²⁰ Seng tumaram marpangulaki uhur ni Jahowa mangidahsi, tapi gajak do ringis-Ni pakon parsimburuon-Ni mangidah dalahi na sonai, anjaha maningon manginsonoh do bani haganup papa

na tarsurat ibagas buku on, anjaha siapkonon ni Jahowa do goranni hun toruh ni langit.

²¹ Anjaha maningon papuligon ni Jahowa do homa ia humbani ganup marga ni Israel laho mambahen marhinamagou, romban hubani haganup papa-papa ni parpadanan, sagala na tarsurat ibagas buku titah on.

²² Anjaha sundut na roh, anak nasiam na jongjong i pudi nasiam, pakon halak na legan, na roh hun tanoh na madaoh hatahononni ma, anggo ididah sidea papa pakon naborit, na hinonahon ni Jahowa hu tanoh on:

²³ Domma gabe hirtah pakon garam, matutung ganup tanohni, seng tartidahi, anjaha seng tubuhan aha be, poyon pe seng tubuh, marongrong tene songon Sodom, Gumora, Adama pakon Zeboim, na dob marongrong ibahen Jahowa ibagas ringis-Ni pakon ibagas pargajag ni gila-Ni,

²⁴ hatahonon ni ganup bangsa sipajuh begu-begu ma tene, “Mase ma sonai ibahen Jahowa hu tanoh on? Aha do arti ni pargajag ni ringis na bolon on?”

²⁵ Jadi hatahonon ni halak ma mambalosi, ‘Halani na tinadingkon ni sidea do parpadanan ni Jahowa Naibata ni ompung ni sidea, na binahen-Ni hubani sidea, sanggah iarahkon sidea luar hun tanoh Masir.’

²⁶ Hape laho do sidea use mambalosi naibata na legan anjaha marsombah hujai, naibata na so

tinanda ni sidea, anjaha na so niaturhon hubani sidea.

²⁷ Halani ai gajag do ringis ni Jahowa mangidah tanoh on, gabe manginsonoh hujai haganup papa, sagala na tarsurat ibagas buku on.

²⁸ Jadi isiapkon Jahowa ma sidea hun tanoh ni sidea ibagas gila-Ni pakon pargajag ni ringis-Ni na bolon in, anjaha iambukkon sidea hu tanoh na legan, songon na torang masa sadari on.

²⁹ Sagala rusia na ponop, Jahowa Naibata do simadasi; tapi pangungkabon na pinatalar-Ni ai, hita do simadasi pakon anakta ronsi sadokah ni dokahni, laho mangkorjahon ganup hata ni titah on.”

Parmulak ni Uhur ni Jahowa Mangidah Bangsa-Ni na Mangundukkon Dousani

30 ¹ Anjaha anggo domma sogop bamu magira haganup hata on, pasu-pasu barang papa, na hunahkon i lobeimu, hape ipaulak ham use uhurmu hubagas i tengah-tengah ni ganup bangsa sipajuh begu-begu, pambuangan ni Jahowa Naibatamu bamu,

² anjaha mulak ham pakon anakmu hubani Jahowa Naibatamu, anjaha itangihon ham sora-Ni, romban hubani na hutonahkon in bamu sadari on, humbani ganup uhurmu pakon humbani ganup tonduymu,

³ jadi marpangulaki ma uhur ni Jahowa mangidah habuanganmu, anjaha idop ma uhur-Ni mangidah

ham, anjaha patumpuon-Ni ma ham humbani ganup bangsa, pangerapan ni Jahowa Naibatamu bamu.

⁴Porini pe mallok ham hu ujung ni langit, sai patumpuon ni Jahowa Naibatamu do ham hunjai, anjaha alopon-Ni do ham hunjai,

⁵anjaha boanon ni Jahowa Naibatamu ma ham mulak hu tanoh na dob tinean ni ompungmu hinan, ase teanonmu ai use, anjaha tumpakon-Ni ma ham, mardoharan anjaha bueinan humbani ompungmu.

⁶Dob ai sunaton ni Jahowa Naibatamu ma uhurmu pakon uhur ni ginomparmu laho mangkaholongi Jahowa Naibatamu humbani sagala uhurmu pakon sagala tonduymu, ase manggoluh ham.

⁷Tapi honahonon ni Jahowa Naibatamu ma haganup papa-papa on hubani munsumu pakon imbangmu, sagala na mangayak-ayak ham.

⁸Dob ai mulak ma use ham anjaha tangihononmu ma sora ni Jahowa, anjaha horjahononmu ma ganup tonah-Ni, sagala na hutonahkon in bamu sadari on.

⁹Jadi marlobih-lobih ma ham tumpakon ni Jahowa Naibatamu bani haganup horja ni tanganmu, bani boras ni boltokmu, bani panggargar ni pinahanmu pakon bani gogoh ni tanohmu; ai mangulaki ma marmalas ni uhur Jahowa manumpakkon na madear hu bamu, usih songon malas ni uhur-Ni na ijia mangidah ompungmu,

¹⁰ anggo itangihon ham sora ni Jahowa Naibatamu, laho manramotkon titah-Ni pakon aturan-Ni, sagala na tarsurat ibagas buku titah on, anggo mulak uhurmu hubani Jahowa Naibatamu humbani sagala uhurmu pakon sagala tonduymu.

Dohor do Hata ai

¹¹ Ai titah, na hutonahkon on bamu sadari on seng mapayahtu in bamu anjaha seng madaohtu.

¹² Seng i nagori atas in, mambahen pala hatahononmu, 'Ise ma gantihnami naik hu nagori atas laho mangalop in bennami, ase ibogei hanami in anjaha ihorjahon hanami in?'

¹³ Anjaha seng idipar ni laut hata in, mambahen maningon pala hatahononmu, 'Ise ma gantihnami mandipar laut laho mangalop in bennami, ase ibogei hanami in anjaha ihorjahon hanami in?'

¹⁴ Ai dohor tumang do hata in bamu; ibagas pamanganmu anjaha ibagas uhurmu do in ase boi horjahononmu in.

Pamilihon na Manontuhon

¹⁵ Tonggor ma, domma hupatuduhkon bamu sadari on hagoluan pakon hatuahon, hamatean pakon hamagouan,

¹⁶ marhitei na huhatahon ham sadari on mangkaholongi Jahowa Naibatamu, marhitei na marparlahou ham ibagas dalan-Ni anjaha

iramotkon ham titah-Ni, aturan-Ni pakon uhum-Ni, ase manggoluh ham anjaha lambin bueini, anjaha pasu-pasuon ni Jahowa Naibatamu ham i tanoh siparayakonmu nuan bahen parbagiananmu.

¹⁷ Tapi anggo marbalik uhurmu, anjaha seng ra ham manangihon, tapi ra ham ajar-ajaranni marsombah hubani naibata na legan anjaha mambalosi ai,

¹⁸ na pabotohkon hinan ma bani nasiam sadari on, maningon magou tumang ma nasiam; seng anjai dokah nasiam manggoluh i tanoh siparayakonmu marhitei na mandipari Bah Jordan laho mambuat ai bahen parbagianan.

¹⁹ Diloonku ma sadari on langit pakon tanoh gabe saksingku dompak nasiam, paboa na dob hupatuduhkan bamu hagoluhan pakon hamatean, pasu-pasu pakon papa-papa; halani ai pilih ma hagoluhan, ase manggoluh ham pakon ginomparmu,

²⁰ marhitei na mangkaholongi Jahowa Naibatamu, manangihon sorani, anjaha marsijoloman hu bani; ai hagoluhan do ai bamu anjaha haganjangan ni umur, manggoluh i tanoh na dob binulawankon ni Jahowa hubani ompungmu, hubani si Abraham, si Isak pakon si Jakob, laho mamberehon ai bani sidea.

Si Josua Panggantih ni si Musa

31 ¹ Dob ai inunut si Musa ma mangkatahon hata on hubani ganup Israel,

² nini ma dompak sidea, “Saratus dua puluh tahun ma umurhu sadari on; seng tarbahen ahu be luar pakon masuk. Domma ihatahon Jahowa hu bangku, ‘Seng bulih diparanmu Bah Jordan on.’

³ Jahowa Naibatamu sandiri do mandipar i lobeimu; la do maniapkon bangsa ai i lobeimu, ase solukonmu sidea; anjaha si Josua do mandipar mambobahon ham, songon na dob hinatahon ni Jahowa hinan,

⁴ ‘Jadi bahenon ni Jahowa ma bani sidea, songon na dob hubani si Sihon pakon hubani si Og, raja ni halak Amori, pakon hubani tanoh ni sidea, na dob siniapkon-Ni ai.’

⁵ Ondoskonon ni Jahowa ma sidea hubani nasiam, anjaha maningon bahenon nasiam ma hubani sidea romban hubani tonah, na dob hutonahkon ai hubani nasiam.

⁶ Tenger ma uhur nasiam anjaha marsijoloman, ulang ma mabiar anjaha gobir mangidah sidea, ai Jahowa Naibatamu do hasomanmu mardalan; seng anjai paturuton-Ni anjaha tadingkonon-Ni ham.”

⁷ Dob ai idilo si Musa ma si Josua, anjaha nini ma dompaksi i lobei ni haganup Israel, “Tenger ma uhurmu anjaha marsijoloman; ai das ma ham rap pakon bangsa on masuk hu tanoh, na dob binulawankon ni Jahowa hubani ompung ni sidea, sihol mamberehon ai hubani sidea, anjaha ham ma mambagihon ai hubani sidea bahen parbagiananni.

⁸ Ai Jahowa sandiri do na mardalan i lobeimu, la do mangkasomani ham; seng anjai paturuton-Ni anjaha tadingkonon-Ni ham; ulang ma ham mabiar anjaha ulang ma ham gobir.”

**Pambasaon bani Buku Titah Sahali
Pitu Tahun i Lobei ni Israel**

⁹ Dob ai isuratkon si Musa ma titah on, anjaha iondoskon ma ai hubani malim, ginompar ni si Levi, siusung poti parpadanan ni Jahowa, pakon hubani ganup pangintuai ni Israel.

¹⁰ Dob ai nini si Musa ma dompak sidea, “Bani ujung ni ganup pitu tahun, tudu bani tahun haluahon, bani pesta parlampolampoan,

¹¹ sanggah na roh haganup Israel hulobei ni Jahowa Naibatamu, bani ianan sipilihon-Ni ai, maningon basaon ma titah on i lobei ni haganup Israel, bogeion ni pinggol ni sidea.

¹² Patumpu ma bangsa in, sagala paramangon, puang-puang pakon dakdanak pakon halak dagang na ibagas huta nasiam, ase itangar sidea anjaha iguruhon marhabiaran hubani Jahowa Naibata nasiam, anjaha iporluhon mangkorjahon ganup hata ni titah on,

¹³ anjaha anak ni sidea, na so mambotoh ope, boi mambogei in anjaha mangguruhon marhabiaran hubani Jahowa Naibata nasiam, sadokah nasiam

manggoluh i tanoh siparayakon nasiam, marhitei na mandipari Bah Jordan, bahen parbagiananmu.”

Ilumbahon Parbalikon ni Israel

¹⁴ Dob ai nini Jahowa ma dompak si Musa, “Tonggor ma, domma dohor jumpah ajalmu, na matei mando ho, antong dilo ma si Josua, anjaha jongjong ma hanima ibagas lampolampo partumpuan ai, ase martonah Ahu hu bani.” Jadi laho ma si Musa rap pakon si Josua, anjaha jongjong ma sidea ibagas lampolampo partumpuan ai.

¹⁵ Jadi taridah ma Jahowa ibagas lampolampo ai, marhitei hambun na jongjong; anjaha i lambung ni labah ni lampolampo ai do jongjong hambun ai.

¹⁶ Dob ai nini Jahowa ma dompak si Musa, “Tonggor ma, na laho modom ma anggo ho rap pakon ompungmu; jadi jongjong ma bangsa on anjaha manriah-riah mangirikkon naibata na legan i tongah-tongah ni bangsa simasukan ni sidea ai, tadingkonon ni sidea ma Ahu, anjaha oseion ni sidea ma padan-Ku na Hubahen ai hubani sidea.

¹⁷ Jadi gajag ma ringis-Hu bani ari na sasada ai mangidah sidea, tadingkonon-Ku ma sidea, anjaha ponopkonon-Ku ma bohing-Ku humbani sidea ase bois sidea magou, anjaha mangonai hubani sidea hamagouan pakon hasosakan na marbagei-bagei. Jadi hatahonon ni sidea ma bani ari na sasada ai:

Ai lang mangonai do hamagouan on banta, halani na so i tongah-tongahta Naibatanta?”

¹⁸ Anjaha ponopkonon-Ku ma bohing-Ku bani ari na sasada ai, halani haganup hajahaton, na binahen ni sidea ai, halani na dob marbalik sidea bani naibata na legan.

¹⁹ On pe suratkon hanima ma bennima doding on, anjaha ajarhon ma in bani halak Israel, mamahkon ma ai bani pamangan ni sidea, ase doding on saksi Bangku dompak bangsa on.

²⁰ Halani anggo domma das sidea Huboan masuk hu tanoh, na dob Hubulawankon hinan hubani ompung ni sidea, hu tanoh habaoran ni dadih pakon manisan ni huraamah, anjaha mangan sidea, bosur anjaha mombur, marbalik ma sidea hubani naibata na legan anjaha balosan ni sidea ma ai, mapas ma sidea mangidah Ahu anjaha oseionni ma padan-Ku.

²¹ Jadi anggo mangonai ma bani sidea buei hamagouan pakon hasosakan, doding on ma manaksihon bani sidea, ai seng bulih lupa ai humbani pamangan ni ginompar ni sidea, ai domma torang hinan Hutanda sura-sura, na piningkiran ni uhur ni sidea sadari on, sanggah lape das sidea Huboan hu tanoh, na dob Hubulawankon in.”

²² Jadi isuratkon si Musa ma doding on bani na sadari ai, anjaha iajarhon ma ai bani halak Israel.

²³ Dob ai nini Jahowa ma dompak si Josua, anak ni si Nun, “Tenger ma uhurmu anjaha marsijoloman ma; ai maningon ho do mambobahon halak Israel masuk hu tanoh, na dob Hubulawankon hubani sidea, anjaha Ahu do mangkasomani ho.”

²⁴ Jadi dobkonsi isuratkon si Musa hata ni titah on hubagas sada buku,

²⁵ nini si Musa ma dompak halak Levi, na mangusung poti parpadanan ni Jahowa,

²⁶ “Buat nasiam ma buku titah on, anjaha nahkon nasiam ma in hu lambung ni poti parpadanan ni Jahowa Naibata nasiam, ase gabe hasaksian ai ijai dompak ham.

²⁷ Ai domma hubotoh panlawanongmu pakon hahengkengongmu; tonggor ma, gari sanggah manggoluh ope ahu sonari i tongah-tongah nasiam, domma manggeori nasiam dompak Jahowa, ai lang lambin parahni ma anggo domma matei ahu?

²⁸ Patumpu nasiam ma hu lambungkon haganup pangintuai nasiam mar sasamarga, pakon panuturi nasiam, ase boi husahapkon hata on bani pinggol ni sidea, anjaha hudilo langit pakon tanoh on gabe saksingku dompak sidea.

²⁹ Ai domma torang hinan hubotoh, anggo domma matei ahu, maningon maruhur magou nasiam, anjaha manlembang hun dalan, na hutonahkon in bani nasiam, halani ai mangonai

ma hamagouan bani nasiam bani ari na laho roh, halani na hinorjahon nasiam ai sogam ni uhur ni Jahowa anjaha ipapuhon nasiam ringis-Ni marhitei pambahenan ni tangan nasiam.”

³⁰ Jadi ihatahon si Musa ma ibogei pinggol ni ganup kuria ni halak Israel hata ni doding on das hubani ujungni.

Doding ni si Musa

32 ¹ “Tangar ma, nasiam sagala langit ase marsahap ahu; anjaha tangihon ma ale tanoh hata ni pamanganku.

² Sai songon udan ma madabuh pangajarionku, manektek songon namur hatangku, songon pangonai ni udan paris-paris hubani poyon-poyon, anjaha songon pangonai ni simbur hubani suan-suanan.

³ Ai sihol ambilankononku do goran ni Jahowa; bere nasiam ma hatimbulon bani Naibatanta.

⁴ Batu gingging in, laing do pambahen-Ni, ai pintor do ganup dalan-Ni; sada Naibata hatengeran ni uhur anjaha seng dong hagedukan-Ni, pintor anjaha bonar do la.

⁵ Jahat do pambahenan ni sidea Bani, seng be anak-Ni sidea halani habutakon ni sidea ai; sada sundut na jahat anjaha na geduk do sidea.

⁶ Mintor sonai ma pambalasmu bani Jahowa, ham alo bangsa na oto anjaha na so maruhur? Ai lang la do Bapamu, na manompa ham, na manjadihon anjaha na paulihon ham?

⁷ Ingat ma ari na basaia, pardiateihon tahun na basaia marsundut-sundut; sungkun ma bapamu, ase ipatuduh bamu, partua nasiam ase ipatugah bani nasiam.

⁸ Sanggah na ibagihon Sitimbulan in bani bangsa sipajuh begu-begu parbagianan ni sidea, sanggah na sinirangni ai anak ni jolma in, ijai ma ipajonam parbalogan ni bangsa-bangsa romban hubani bilangan ni Israel.

⁹ Ai Jahowa do simada bangsa-Ni, si Jakob do parbagianan ni tinean-Ni in.

¹⁰ Jumpahsi do ia i tanoh dorging-dorging, i tanoh paraum-aumon i halimisan, la do manjagasi anjaha manarihon, iramotkon do ia songon anak ni matani.

¹¹ Songon panramotkon ni manuk-manuk nanggordaha bani asarni, na mayap-ayap i babou ni anakni, na paherbang habongni, na mambuat sidea, anjaha iusung i atas ni habongni,

¹² sonai ma ibobahon Jahowa sidea, anjaha seng dong naibata na legan hasomanni.

¹³ Ia do mambahen sidea margareta bani ianan na gijang i tanoh in, anjaha ipangan gogoh ni tanoh in; ibahen do ia manirup manisan ni huraamah hun dolog batu pakon minak humbani batu na mapir.

¹⁴ Mantega humbani lombu, pakon dadih humbani biribiri, rap pakon taboh-taboh ni anak ni biribiri, pakon biribiri tunggal hun Basan ampa hambing tunggal, rap pakon gandum simantinan; anjaha daroh ni buah anggur na pitah iinum ham.

¹⁵ Tapi momburhonsi Jesurun, mamistik ma ia, domma mombur ham, bolon anjaha tambos, jadi itadingkon ma Jahowa na manjadihonsi, anjaha teos ia bani dolog batu hatuahonni in.

¹⁶ Sai ipuhoi sidea do la marsimburu marhitei naibata na legan; anjaha ipuhoi do ringis-Ni marhitei horja hagigian.

¹⁷ Manggalang do sidea hubani begu-begu, sedo hubani Naibata, hubani naibata na so tinanda ni sidea, hubani naibata na baru jinadihon, na so hinabiaran ni ompung nasiam.

¹⁸ Dolog batu, na manjadihon ham, itadingkon ham, anjaha itadingkon ham do Naibata na marhangaluton manubuhkan ham.

¹⁹ Dob ididah Jahowa ai, iambukkon ma sidea, halani ringis na pinuhoan ni anakni pakon boruni ai.

²⁰ Dob ai nini ma, 'Ponopkonon-Ku ma bohing-Ku humbani sidea, sihol do Ahu mangidah sonaha hadoban ni sidea use; ai sada sundut na marbalik do sidea, dakdanak na so dong habujuron bani sidea.

²¹ Ipuhoy sidea do Ahu marsimburu mangidah na so naibata; ipuhoy sidea do ringis-Hu marhitei gana-gana ni sidea. Ahu pe papuhoon-Ku ma sidea

marsimburu mangidah na so bangsa in; puhoon-Ku ma ringis ni sidea marhitei bangsa na oto.

²² Ai gajak ma apuy marhiteihon ni ringis-Hu, anjaha manogsogi das hu nagori toruh; bois do ipangan tanoh in pakon gogohni, anjaha gara bahenonni onjolan ni dolog-dolog.

²³ Pagugunon-Ku ma hamagouan bani sidea; anjaha siorhonon-Ku sagala lingkit-Hu hubani sidea.

²⁴ Maningon madotei ma sidea ibahen lohei, anjaha bois ibahen pane-pane pakon sampar; Ahu manongoskon sait ni binatang mangimbang sidea, rap pakon bisa ni na manjulur bani orbuk.

²⁵ I darat podang mamunuh sidea, anjaha ibagas kamar masa hasonggoton, maniapkon anak garama pakon anak boru, na etek-etek rap pakon na dob ubanon.

²⁶ Sihol hatahonon-Ku namin, 'Purpurhonon-Ku ma sidea, ase magou sidea hun pardingatan ni jolma.'

²⁷ Ambit lang apas ni munsuh na huhabiari, ase ulang salah pangarusion ni munsuh ni sidea, ase ulang ihatahon sidea, 'Timbul do tangannami, sedo Jahowa na mambahen ai haganup.'

²⁸ Ai bangsa paruhur na so margagan do sidea, anjaha seng marisi panimbangion uhur ni sidea.

²⁹ Ambit maruhur sidea, arusan ni sidea do on, paruhurhonon ni sidea do ujung ni langkahni.

³⁰ Sonaha ma pardakdak ni na sahalak bani na saribu, anjaha dua halak mambahen maporus

saloksa, ambit lang dolog batu ni sidea na dob manjual sidea, anjaha Jahowa mangondoskon sidea?

³¹ Ai seng songon dolog batunta dolog batu ni sidea, gari munsuhta sandiri marhatongonkon ai.

³² Ai humbani hayu anggur ni Sodom do hayu anggur ni sidea, anjaha hun ladang ni Gumora do; buah anggur ni sidea buah anggur na so marrasun do, mapaet do turdunanni.

³³ Bisa ni ulog do anggur ni sidea, anjaha bisa ni ulog darih na bisa tumang.

³⁴ Ai lang domma tarsimpan ganupan ai i lambung-Ku, tartokan ibagas parugasan-Ku?

³⁵ Bangku do pambalason pakon panguhumon bani panorang sanggah tarlandit nahei ni sidea, ai dohor mando ari hamagouan ni sidea, anjaha podas ma roh pangandungan na tinaktakkon hinan bani sidea

³⁶ Ai pintoran ni Jahowa ma bangsa-Ni anjaha marpangulaki uhur-Ni mangidah jabolon-Ni; halani ididah bois ma gogoh ni sidea, anjaha sada pe lang na tading, paruhur pakon na so maruhur,

³⁷ jadi hatahonon-Ni ma, 'Ija do naibata ni sidea, dolog batu parlingodan ni sidea ai,

³⁸ na mangankon taboh-taboh ni galangan sipotongan ni sidea, pakon na manginum anggur galangan siinumon ni sidea? Palopas ma sidea jongjong laho mangurupi nasiam, sidea ma gabe parlingodan nasiam.'

³⁹ Sonari pe tonggor ma, Ahu, Ahu do la, seng dong Naibata sobali Ahu; Ahu do na mamunuh anjaha Ahu do na pagoluhkon; Ahu do na mangugahi anjaha Ahu do na pamalumkon, anjaha seng dong barang ise na tolap paluahkon humbani tangan-Ku.

⁴⁰ Ai Ahu do na pagostong tangan-Ku dompak langit, anjaha mangkatahon, 'Songon sintong ni manggoluh Ahu sadokah ni dokahni.

⁴¹ Anggo huasah ma podang-Ku na marhilap, anjaha tangan-Ku mandalankon panguhumon, jadi Ahu ma mambahen pambalason hubani munsuh-Ku, anjaha Ahu mambaloskon bani halak na mangkagigihon Ahu.

⁴² Bahenon-Ku ma panah-Ku mabuk ibahen daroh, anjaha podang-Ku mangankon daging pakon daroh ni halak na tartikam pakon na tartangkap, humbani ulu ni raja-raja ni munsuh.

⁴³ Puji ma bangsa-Ni, nasiam bangsa sipajuh begu-begu; ai ibaloskon do daroh ni jabolon-Ni, anjaha la mambahen pambalason hubani munsuh-Ni, anjaha i bahen pardearan hubani tanoh ni bangsa-Ni."

Dohor ma Ajal ni si Musa

⁴⁴ Dob ai roh ma si Musa, anjaha ipajojor ma ganup hata ni doding on, ipabogei-bogei pinggol ni bangsa ai, ia pakon si Josua anak ni si Nun.

⁴⁵ Jadi dob ihatahon si Musa ganup hata on hubani ganup Israel,

⁴⁶ nini ma dompak sidea, “Parimbagaskon nasiam ma ganup hata on, na husaksihon in bani nasiam sadari on, anjaha parentahkon nasiam ma hubani anak nasiam, ase ihaporluhon mangkorjahon ganup hata ni titah on.

⁴⁷ Ai seng hata na lumei tumang in bani nasiam, tapi hagoluhan nasiam do on, anjaha hata on do paganjang ari-ari nasiam i tanoh sisolukon nasiam ai, dob idipari nasiam Bah Jordan.”

⁴⁸ Dob ai nini Jahowa ma dompak si Musa, lanjar bani ari na sasada ai,

⁴⁹ “Tangkog ma ho hu Dolog Abarimon, Dolog Nebo, na i Tanoh Moab, tontang ni Jeriko, anjaha tatap ma hunjai tanoh Kanaan, sibereon-Ku hubani halak Israel bahen parbagiananni.

⁵⁰ Anjaha matei ma ho i atas dolog sitangkoganmai, ase ipatumpu ho hubani bangsamu, usih songon si Aron abangmai, na dob matei i atas ni Dolog Hor, anjaha ipatumpu hubani bangsani,

⁵¹ halani na dob lang hatengeran hanima Bangku i tongah-tongah ni halak Israel, i lambung ni Bah Meriba-Kades i halimisan Sin, anjaha seng ipapansing hanima Ahu i tongah-tongah ni halak Israel.

⁵² Ai bulih do namin tataponmu tanoh in i lobeimu, tapi seng bulih ho anggo masuk hu tanoh, na sihol bereon-Ku hubani halak Israel.”

Pasu-pasu ni si Musa

33 ¹ On ma pasu-pasu, na pinasu-pasuhon ni si Musa, halak ni Naibata, hubani halak Israel, i lobei ni parmateini.

² Nini ma, “Roh do Jahowa hun Sinai, anjaha poltak hun Seir bani sidea, marsinalsal do la hun Dolog Paran, anjaha roh do la hun tongah-tongah ni halak na mapansing marribu-ribu, rap pakon apuy na gajak bani tangan-Ni siamun.

³ Tongon, holong do uhur-Ni mangidah sagala bangsa; sagala na mapansing-Ni ibagas tangan-Ni do, hundul do sidea i lambung ni nahei-Mu, anjaha jumpahan podah humbani hata-Mu.

⁴ Si Musa do manonahkon banta titah, gabe rupei ni kuria ni si Jakob.

⁵ Gabe raja do la i Jerusalem, sanggah martumpu pangintuai ni bangsa in, rap pakon sagala marga ni Israel.

⁶ Sai manggoluh ma si Ruben, ulang ma matei, tapi otik ma bilangan nijolma bani.

⁷ Anjaha sonon do nini pasal si Juda, “Tangihon ma alo Jahowa sora ni si Juda, anjaha boan ma ia mulak hubani bangsani. Marhitei tangan-Mu itinggilhon Ham ma partinggilanni, anjaha hasomanan-Mu do sidea mangimbang munsuhni.”

⁸ Anjaha pasal si Levi, nini do, ‘Tummim pakon Urim-Mu ma bani dalahi haudungan ni uhur-Mu, na

dob nilajou-Mu i Massa, na dob pinartinggilhon-Mu bani Bah Meriba.'

⁹ Na mangkatahon pasal bapani pakon inangni seng parduli ahu bani sidea. Seng ipatanda-tanda saninani anjaha seng ipabotoh-botoh anakni. Ai sidea do na mandalankon hata-Mu, anjaha na manramotkon padan-Mu.

¹⁰ Maningon sidea do mangajarhon uhum-Mu bani si Jakob, pakon titah-Mu bani Israel, sidea do na manutung dahupa sianggohon ni igung-Mu, anjaha mangampeihon galangan situtungan bani anjapanjap-Mu.

¹¹ Pasu-pasu ma, ale Jahowa, gogohni, anjaha harosuhkon ma horja ni tanganni; ponggolhon ma binongei ni na mangimbangi, age halak na mangkagigihonsi, ase ulang boi sidea jongjong.

¹² Pasal si Benjamin, nini do, "Haudungan ni Jahowa, marianan do marsonang-sonang i lambung-Ni; sai lingodan-Ni do ia siap arian, anjaha marianan do ia i holangkolang ni raboyon-Ni."

¹³ Anjaha pasal si Josep, nini do, 'Sai jumpahan pasu-pasu ma tanohni humbani Jahowa, binahen ni sulur ni sibere-bere na hun langit, binahen ni namur, pakon binahen ni bah, na marburak-burak i toruh;

¹⁴ pakon binahen ni surung ni sibere-bere na humbani mata ni ari, ampa buah na matoras, majenges humbani bulan;

¹⁵ humbani dolog-dolog na basaia na gijang, ampa humbani buntu-buntu sadokah ni dokahni;

¹⁶ binahen ni surung ni panumpak ni tanohni pakon hinagokni, pakon idop ni uhur ni na marianan ibagas naporon.” Sai sogop ma ai bani ulu ni si Josep, pakon bani ulu ni na tarpilih humbani saninani!

¹⁷ Marmulia do bunga tubuh ni lombuni anjaha tandukni songon tanduk ni horbou; duguonni ma marhitei ai buei bangsa, ganup sidea, das hu ujung ni tanoh on; in ma halak na marlaksa-laksa humbani Efraim, in ma halak na marribu-ribu humbani Manase.

¹⁸ Anjaha pasal Sebulon, nini do, “Marmalas ni uhur ma ham, ale Sebulon, bani parbingkatmu, pakon ham, ale Isasar ibagas lampolampomu.”

¹⁹ Diloon ni sidea do buei bangsa hu dolog ni sidea, galangkonon ni sidea do ijai galangan hapintoron, ai onsopan ni sidea do habayakon ni laut, pakon arta na ponop ibagas horsik.

²⁰ Anjaha pasal si Gad, nini do, “Pinuji ma Ia, na pabolag ianan bani si Gad. Manggompang do si Gad songon singa boru-boru, iparsilbak do tangan pakon sarib-sarib ni ulu.”

²¹ Ipilih do sijengesan humbani tanoh ai bani, ai ijai do ponop bagian ni puanglima; dob ai roh ma ia hubani pambobai ni bangsa ai, anjaha idalankon ma hapintoron ni Jahowa pakon uhumni rap pakon Israel.

²² Anjaha pasal si Dan, nini do, “Singa na poso do si Dan, na roh luar hun Basan.”

²³ Anjaha pasal si Naftali, nini do, ‘Bosuran do si Naftali bani rosuh ni uhur, anjaha gok pasu-pasu ni Jahowa bani, tao pakon tanoh dangsina ia simadasi.”

²⁴ Anjaha pasal si Asser, nini do, ‘Pinasu-pasu do si Asser i tongah-tongah ni anak dalahi, sai harosuh ni saninani ma ia, anjaha sornopkononni ma naheini hubagas minak.

²⁵ Bosi pakon tombaga ma ransang-ransangmu; anjaha songon ari-arimu, sonai ma hagogohonmu.”

²⁶ Seng dong na songon Naibata, alo Jesurun, na margareta i langit laho mangurupi ham, anjaha ibagas habanggalonni i atas ni hambun na gijang.

²⁷ Naibata sisadokah ni dokahni do haporusan bamu, anjaha i tongah-tongahmu do tangan-Ni na manongtong in. Ia do na mangusir munsuhmu hun lobeimu, anjaha nini do, “Siapkon!”

²⁸ Jadi marsonang-sonang ma Israel marianan, anjaha parigi ni si Jakob seng hona parseda, bani tanoh na gok omei pakon anggur, anjaha langitni mambere namur.

²⁹ Tuahmu in alo Israel! Ise ma na songon ham, sada bangsa na pinaluah ni Jahowa, gantar ni haluahonmu, pakon podang ni hatimbulonmu. Maningon mangunduk bamu munsuhmu, anjaha

dogeihononmu naheimu bani ianan-Ni na gijang in.”

Parmatei ni si Musa

34 ¹ Dob ai tangkog ma si Musa hun pamah Moab hu Dolog Nebo, hu pakpak ni Pisga, tontang ni Jeriko. Dob ai ipatuduhkon Jahowa ma hubani ganup tanoh ai, olat ni Gilead das hu Dan, ² ganup Naftali, tanoh Efraim pakon Manase, ganup tanoh Juda das ronsi laut hampit hasundutan, ³ tanoh Dangsina pakon tanoh na i pamah Jeriko, huta parkurmaan das hu Zoar.

⁴ Dob ai nini Jahowa ma hu bani, “On ma tanoh, na dob Hubulawankon hubani si Abraham, si Isak pakon si Jakob, ningku Do, ‘Hubani ginomparamu do bereon-Ku on.’ Domma Hupatuduhkon on bam, ididah matamu, tapi seng bulih ho mandipar masuk hujai.”

⁵ Jadi matei ma ijai si Musa, juakjuak ni Jahowa i tanoh Moab, songon na dob hinatahon ni Jahowa, ⁶ anjaha Jahowa do mananoms i habungan ai, i tanoh Moab, tontang ni Bet-Peor, anjaha seng dong na mambotoh tanomanni ai ronsi sadari on.

⁷ Anjaha marumur saratus dua puluh tahun ma si Musa bani parmateri ai, seng gombur ope matani anjaha seng surut gogohni.

⁸ Dob ai itangisi halak ma si Musa i pamah Moab tolu puluh ari dokahni; dob ai marujung ma panangision pakon parhoruon bani si Musa.

⁹ Dob ai gok tonduy hapentaran ma uhur ni si Josua, anak ni si Nun, ai domma itampeihon si Musa hinan tanganni bani; jadi itangihon halak Israel ma ia, anjaha ihorjahon romban hubani na tinonahkon ni Jahowa hinan hubani si Musa.

¹⁰ Anjaha seng dong be jongjong i tongah-tongah ni halak Israel sada nabi songon si Musa, na tinanda ni Jahowa dumpar bohi,

¹¹ ibagas haganup tanda pakon halongangan, na sinuruh ni Jahowa bahenonni i tanoh Masir, hubani Parao, hubani ganup juakjuakni pakon bani ganup tanohni,

¹² pakon ibagas haganup tangan na gogoh in pakon ibagas haganup hasonggotan bolon, na binahen ni si Musa i lobei ni ganup Israel.

Josua

Parentah ni Naibata hubani si Josua Laho Patunduk Tanoh Kanaan

1 ¹ Jadi dob matei si Musa, juakjuak ni Jahowa, nini Jahowa ma dompak si Josua, anak ni si Nun, suruh-suruhan ni si Musa,

² “Domma matei si Musa, juakjuak-Kin, on pe bingkat ma ho, dipari ma Jordan on, ho pakon haganup bangsa on, hu tanoh siberehonon-Ku hubani sidea, hubani halak Israel.

³ Ganup ianan sidogeian ni tapak ni naheinima, domma Hubere bannima, songon na dob Huhatahon hubani si Musa hinan.

⁴ Humbani halimisan ai pakon Libanon das hu bah bolon ai, ai ma Bah Eprat, haganup tanoh ni halak Het das hu laut na bolag ai hampit hasundutan, ai ma parbalogannima.

⁵ Seng dong barang ise na tahan jongjong i lobeimu sadokah ho manggoluh; songon pangkasomaning-Ku bani si Musa, hasomanan-Ku do ho; seng anjai paturuton-Ku barang tadingkonon-Ku ho.

⁶ Pir ma tonduymu anjaha totap uhurmu, ai maningon ho do marbagi tanoh on bahen parbagianan ni bangsa on, na dob Hubulawankon

hubani ompung ni sidea, laho mamberehon ai bani sidea.

⁷Asal ma pir tonduymu anjaha totap tumang uhurmu manramotkon anjaha mangkorjahon romban hubani ganup titah in, na dob tinonahkon ni si Musa, juakjuak-Kin, bam. Ulang ho manlembang hunjai, hu siamun atap hu sambilou, ase martuah ho barang huja pe ho laho.

⁸Ulang ma mosor buku ni titah on hun pamanganmu, sai pingkir-pingkiri ma in arian pakon borngin, ase iramotkon anjaha ihorjahon ho romban hubani na tarsurat ibagas in, jadi marulih ma ho bani sagala dalanmu anjaha mardohar ma ho.

⁹Ai lang domma Huhatahon bam, ‘Pir ma tonduymu anjaha totap uhurmu, ulang gobir anjaha mabiar, ai Jahowa Naibatamu do hasomanmu, barang huja pe ho laho?’”

¹⁰Dob ai iparentahkon si Josua ma hubani pambobai ni bangsa ai,

¹¹“Bontas nasiam ma tongah-tongah ni parsaranan in, anjaha hatahon nasiam ma hubani bangsa in, ‘Pasirsir nasiam ma bohal nasiam, ai ibagas tolu ari on ope diparan nasiam ma Jordan on, ase imasuki anjaha isoluk nasiam tanoh sibereon ni Jahowa Naibata nasiam in bani nasiam, bahen parbagianan nasiam.’”

¹² Jaha hubani halak Ruben, Gad pakon satongah marga Manase nini si Josua ma,

¹³ “Ingat nasiam ma hata na tinonahkon ni si Musa, juakjuak ni Jahowa bani nasiam, na mangkatahon, ‘Domma sonang nasiam ibahen Jahowa Naibata nasiam, anjaha ibere bani nasiam tanoh on.

¹⁴ Tading ma parinangon nasiam, anak nasiam pakon pinahan nasiam i tanoh, na dob binere ni si Musa bani nasiam i dipar ni Jordan; tapi sagala siimbang munsuh i tongah-tongah nasiam maningon mandipar ma marsinjata bei i lobei ni sanina nasiam, laho mangurupi sidea,

¹⁵ paima sonang ibahen Jahowa sanina nasiam songon nasiam, anjaha dihut sidea manoluk tanoh, sibereon ni Jahowa Naibata nasiam bani sidea; dob ai mulak ma nasiam hu tanoh parbagianan nasiam, ase nasiam simada ai, ai ma tanoh na binere ni si Musa, juakjuak ni Jahowa, hubani nasiam i dipar ni Bah Jordan hampit hapoltakan.”

¹⁶ Dob ai nini sidea ma mambalosi si Josua, “Ganup na pinarentahkonmu bennami sai bahenonnami do, anjaha barang huja pe hanami suruhonmu, parayakonnami do.

¹⁷ Songon panangihonnami bani si Musa, sonai do tangihononnami ham, asal ihasomani Jahowa Naibatamu ham, songon na hinasomanan-Ni si Musa.

¹⁸Barang ise na mangimbang parentahmu, anjaha seng itangihon hatamu, sagala na pinarentahkonmu bennami, maningon marutang hosah ia; pir ma tonduymu anjaha totap uhurmu.”

Parkahap hu Huta Jeriko

2 ¹Dob ai isuruh si Josua, anak ni si Nun ma dua halak parkahap hun Sittim, nini ma, “Laho ma nasiam, kahapi nasiam ma tanoh ai pakon Jeriko.” Jadi laho ma sidea, imasuki sidea ma rumah ni sada boru jalang, na margoran si Rahap, lanjar modom ma sidea ijai.

²Anjaha dong ma halak na mangkatahon hubani raja ni Jeriko, “Tonggor ma, adong do roh borngin on hujon dalahi humbani halak Israel mangkahapi tanoh on.”

³Jadi isuruh raja ni Jeriko ai ma halak hubani si Rahap, nini ma, “Boan ma hu darat dalahi na roh hubam, na masuk hu rumahmu; ai na mangkahapi ganup tanoh on do ase roh sidea.”

⁴Tapi domma iboan naboru ai hinan dalahi sidua halak ai anjaha iponopkon sidea; jadi nini ma, “Tongon, dong do dalahi roh hu bangku, tapi lang hubotoh barang hunja sidea roh;

⁵tapi marayak laho mangoruk horbangan, dob golap ari, luar ma dalahi ai; seng hubotoh barang huja laho dalahi ai; podas ma ayaki nasiam sidea, sai jumpah nasiam do sidea.”

⁶ Tapi domma ihatahon naboru ai hinan sidea naik hu tayub, anjaha iponopkon sidea hu toruh ni hori, na jinomurni i atas tayub ai.

⁷ Jadi iayak dalahi ai ma sidea bani dalan na laho hu Jordan, das hu pandiparan ai; anjaha ioruk ma horbangan ai dob luar na mangayaki ai.

⁸ Anjaha paima modom sidea, naik ma naboru ai hu tayub marayak sidea.

⁹ Jadi nini ma dompak dalahi ai, “Domma hubotoh, na dob ibere Jahowa do tanoh on bani nasiam, anjaha domma sogop bennami biar mangidah nasiam, anjaha gobir pangisi ni tanoh on i lobei nasiam.

¹⁰ Anjaha domma ibogei hanami naha pangkorahkon ni Jahowa bani bah ni Laut Sigerger i lobei nasiam, sanggah na luar ai nasiam hun tanoh Masir, pakon na binahen nasiam bani raja ni halak Amori na i dipar ni Jordan, bani raja Sihon pakon bani raja Og, ai ma na binoiskon nasiam ai.

¹¹ Jadi dob ibogei hanami ai, madotei ma atei-ateinami, anjaha seng pag be uhur ni barang ise, halani biarni mangidah nasiam, ai Jahowa Naibata nasiam, la do Naibata i nagori atas pakon i nagori tengah on.

¹² On pe, bijahon nasiam ma bangku marhitei Jahowa, paboa songon pangidopingku bani nasiam, sonai ma pangidopi nasiam bani pangisi ni rumah ni

bapa, anjaha bere nasiam ma bangku sada tanda ni habujuron,

¹³ paboa pagoluhon nasiam do bapa, inang, botouhu pakon saninangku ronsi ganup na bani sidea, anjaha paluahon nasiam do hosahnami humbani hamatean.

¹⁴ Jadi nini dalahi ai ma bani, “Hosahnami ganti nasiam hu hamatean! Anggo seng ipatugah-tugah nasiam hatanta on, anjaha anggo ibere Jahowa ma tanoh on bennami, sai bahenonnami do bamu idop ni uhur pakon habujuron.”

¹⁵ Jadi itantan ma sidea marhitei tali humbani jandela, ai bani tembok ni huta ai do ipajongjong rumahni ai, ai marianan i atas ni tembok ai do ia.

¹⁶ Dob ai nini ma dompak sidea, “Dompok dolog ma nasiam laho, ase ulang pajumpah nasiam pakon na mangayak-ayak ai, marponop ma nasiam ijai tolu ari dokahni, paima mulak na mangayak-ayak ai, dob ai nunuti nasiam ma dalan nasiam.”

¹⁷ Dob ai nini dalahi ai ma hu bani, “Maluah ma hanami humbani bulawanmu on, na sinuruhmu bulawankononnami.

¹⁸ Tonggor ma, anggo masuk ma hanami hu tanoh on, maningon sangkutkononmu ma tali na gerger on bani jandela panantananmu bennami; anjaha patumpu ma hu rumahmu bapamu, inangmu, saninamu pakon sagala pangisi ni rumahmu.

¹⁹ Anjaha barang ise na luar hun labah ni rumahmu hu darat, marsapata hu bani ma darohni, maluah do anggo hanami; tapi barang ise na rap pakon ham i rumah on, marsapata hu bennami ma darohni, anggo ikahua tangan ni barang ise ia.

²⁰ Tapi anggo ipatugah-tugah ham hatanta on, maluah ma hanami humbani bulawanmu on, na sinuruhmu bulawankononnamami.”

²¹ Jadi nini ma, “Songon na hinatahon nasiam ai ma tongon.” Dob ai ipalaho ma sidea, gabe bingkak ma sidea. Jadi isangkutkon ma tali na gerger ai hubani jandela ai.

²² Jadi laho ma sidea, gabe das ma sidea hu dolog ai, lanjar ijai ma sidea tolu ari dokahni, paima mulak na mangayak-ayak ai; sai iburu pangayak-ayak ai do namin sidea bani jojur dalan ai, tapi seng jumpah sidea.

²³ Dob ai mulak ma dalahi na dua halak ai, tuad hun dolog ai, mandipar ma sidea, gabe das ma sidea hubani si Josua, anak ni si Nun, anjaha ipajojor sidea ma hubani haganup na masa bani sidea.

²⁴ Nini sidea ma dompak si Josua, “Domma ondos hu tanganta ibere Jahowa ganup tanoh ai, anjaha domma mangunduk ganup pangisi ni tanoh ai ibahen biarni mangidah hita.”

Idipari Sidea Jordan

3¹ Dob ai ipagirah si Josua ma patarni ai puho, jadi bingkat ma sidea hun Sittim das hu Jordan, ia pakon ganup halak Israel, lanjar marborngin ma sidea ijai, sanggah seng ope mandipar sidea.

² Jadi dob salpu tolu ari, ibontas pambobai ai ma tongah-tongah ni parsaranan ai,

³ anjaha iparentahkon ma bani sidea, “Anggo iidah nasiam poti parpadanan ni Jahowa Naibata nasiam, iusung malim, halak Levi ai, bingkat ma nasiam humbani ianan nasiam laho mangirikkon ai.

⁴ Tapi maningon dong hira-hira dua ribu asta holang-holang nasiam hunjai. Seng bulih nasiam hundohor hunjai, ase ibotoh nasiam dalam sidalan nasiam, ai seng onggga ope ibontas nasiam dalam ai na saindokahni.”

⁵ Dob ai nini si Josua ma dompak bangsa ai, “Manguras ma nasiam, ai patar ma bahenon ni Jahowa halongangan i tongah-tongah nasiam.”

⁶ Anjaha nini si Josua ma dompak malim ai, “Usung nasiam ma poti parpadanan in, anjaha mandipar ma nasiam mambobahon bangsa in.” Jadi iusung sidea ma poti parpadanan in i lobei ni bangsa ai.

⁷ Dob ai nini Jahowa ma dompak si Josua, “Sadari on pungkahon-Ku ma patimbul ho i lobei ni ganup Israel, ase ibotoh sidea, ia sonin pangkasomaning-

Ku bani si Musa, lanjar sonai do pangkasomaning-Ku bam.

⁸ Anjaha parentahkon ma hubani malim na mangusung poti parpadanan ai, sonon, ‘Anggo das ma hanima hu topi ni Bah Jordan ai, soh ma hanima jongjong i Jordan ai.’”

⁹ Dob ai nini si Josua ma dompak halak Israel, “Padohor nasiam ma hujon, anjaha tangihon nasiam ma hata ni Jahowa Naibata nasiam.”

¹⁰ Ambahni ai nini si Josua ma, “Hunjon ma botohon nasiam, paboa Naibata na manggoluh in do i tongah-tongah nasiam, paboa na usiron-Ni do hun lobei nasiam halak Kanaan, Het, Hewi, Peresi, Girgasi, Amori pakon Jebusi.

¹¹ Tonggor ma, poti parpadanan ni Tuhan ni sagala tanoh on mandipar i Jordan mambobahon nasiam.

¹² On pe buat nasiam ma bani nasiam sapuluh dua halak humbani marga Israel, sahalak bei humbani ganup marga.

¹³ Anjaha anggo marsaran ma tapak-tapak ni nahei ni malim siusung poti ni Jahowa, Tuhan ni sagala tanoh on, ibagas Bah Jordan ai, suntong ma bah ni Jordan ai, anjaha bah na mabaor hun huluan soh ma gabe songon sada tembok.”

¹⁴ Jadi sanggah na bingkat bangsa ai hun lampolampo ni sidea laho mandipari Jordan, rap pakon malim siusung poti parpadanan ai i lobei ni bangsa ai,

¹⁵ anjaha dob das siusung poti parpadanan ai hu Jordan, anjaha dob dais nahei ni malim siusung poti ai hubani bah ai -- tapi sampur do pasir ni Jordan ai sadokah musim pariama --

¹⁶ jadi soh ma bah ai, na mabaor hun huluan, naik gabe sada timbunan, daoh tumang ronsi huta Adam, na i lambung ni Sartan; tapi anggo bah na mabaor hu laut Arabah, laut Garam ai, lambin horah ma. Jadi mandipar ma bangsa ai tontang ni Jeriko.

¹⁷ Jadi sanggah na mandipar ai ganup halak Israel bani na horah ai, jongjong ma malim siusung poti parpadanan ni Jahowa bani na horah i parsitongahan ni Jordan ai, paima salpu idipari ganup bangsa ai Jordan.

Batu Pardingatan na i Gilgal

4 ¹ Dob salpu idipari ganup bangsa ai Jordan, nini Jahowa ma dompak si Josua,

² “Buat hanima ma bannima humbani bangsa in sapuluh dua halak, sahalak bei humbani ganup marga,

³ anjaha parentahkon ma hubani sidea, ‘Buat hanima ma hunjon, hun tongah-tongah ni Jordan on, humbani hajongjongan ni nahei ni malim, sapuluh dua batu, anjaha boan hanima ma ai hu dipar ai anjaha tibalhon hanima ma ai bani parbornginannima saborngin on.’”

⁴ Dob ai idilo si Josua ma na sapuluh dua halak ai, na pinilihni humbani halak Israel, sahalak bei humbani ganup marga,

⁵ anjaha nini si Josua ma dompak sidea, “Mandipar ma nasiam i lobei ni poti ni Jahowa Naibata nasiam hu tongah-tongah ni Jordan an, iporsan bei ma bani abarani sada batu mangihutkon bilangan ni marga ni halak Israel,

⁶ ase gabe sada tanda ma in i tongah-tongah nasiam. Anggo isungkun anak nasiam magira, ‘Aha do arti ni batu on bani nasiam?’

⁷ Jadi hatahonon nasiam ma bani sidea, na rotap do bah ni Jordan i lobei ni poti parpadanan ni Jahowa. Sanggah na mandipar poti parpadanan ai, rotap ma bah ni Jordan, anjaha batu on ma bahen pardingatan bani halak Israel sadokah ni dokahni.”

⁸ Jadi ibahen halak Israel ma songon na hinatahon ni si Josua hubani sidea. langkat sidea ma sapuluh dua batu hun parsitongahan ni Jordan, songon na hinatahon ni Jahowa hubani si Josua, mangihutkon bilangan ni marga ni Israel; iporsan sidea ma ai hu parbornginan ni sidea, anjaha ipajongjong ma ijai.

⁹ Ipajongjong si Josua ma homa sapuluh dua batu i parsitongahan ni Jordan, bani ianan hajongjongan ni nahei ni malim siusung poti parpadanan ai, anjaha lanjar ijai ope ronsi sadari on.

¹⁰ Tapi anggo malim na mangusung poti parpadanan ai, jongjong do i parsitongahan ni

Jordan ai, paima saud haganup tonah ni Jahowa hubani si Josua, sihatahonon-Ni hubani bangsa ai, romban hubani na tinonahkon ni si Musa hubani si Josua. Jadi tarolos ma bangsa ai mandipar.

¹¹ Jadi dob salpu ganup mandipar bangsa ai, mandipar ma poti ni Jahowa pakon malim ai inonoi bangsa ai.

¹² Mandipar ma pakon halak Ruben, halak Gad pakon satongah marga Manase marsinjata bei mambobahon halak Israel, songon na hinatahon ni si Musa hinan hubani sidea,

¹³ hira-hira ompat puluh ribu siimbang munsuh mandipar i lobei ni Jahowa hu parporangan i pamah Jeriko.

¹⁴ Bani ari ai ipatimbul Jahowa ma si Josua i lobei ni ganup Israel, gabe mabiar ma sidea mangidahsi, songon pangkabiari ni sidea bani si Musa sadokah manggoluh ia.

¹⁵ Dob ai nini Jahowa ma dompak si Josua,

¹⁶ “Hatahon ma malim, na mangusung poti hasaksian ai, ase manaik sidea hun Jordan.”

¹⁷ Jadi nini si Josua ma dompak malim ai, “Manaik ma nasiam hun Jordan in.”

¹⁸ Anjaha dob manaik malim, na mangusung poti parpadanan ni Jahowa hun parsitongahan ni Jordan ai, dob ionjolhon malim ai tapak-tapak ni nahei ni sidea bani na horah, suang ma bah ni Jordan ai bani iananni hinan, sampur bani ganup pasirni.

¹⁹ Tangkog ma bangsa ai hun Jordan bani ari sapuluh bulan sada, anjaha marsaran ma sidea i Gilgal, bani parbalogan hampit hapoltakan ni Jeriko.

²⁰ Anjaha batu na sapuluh dua na binoan ni sidea hun Jordan ai, ipajongjong si Josua ma ai i Gilgal.

²¹ Jadi nini ma dompak halak Israel, “Anggo isungkun anak nasiam magira bapa ni sidea, ‘Aha do arti ni batu on?’

²² Jadi patugah nasiam ma bani anak nasiam, ‘Mardalan bani na horah do Israel mandipari Jordan,

²³ halani ipahorah Jahowa Naibata nasiam do bah ni Jordan i lobei nasiam, paima mandipar nasiam, songon na binahen ni Jahowa Naibata nasiam bani Laut Sigerger, na pinahorah-Ni i lobeita, paima mandipar hita,

²⁴ ase haganup bangsa ni tanoh on mananda tangan ni Jahowa na gogoh in, ase tongtong nasiam mabiar mangidah Jahowa Naibata nasiam.’”

Parsunaton pakon Paskah i Gilgal

5 ¹ Jadi dob ibogei haganup raja ni halak Amori, sagala na i dipar ni Jordan, hampit hasundutan, pakon haganup raja ni halak Kanaan, sagala na i topi ni laut, na dob pinahorah ni Jahowa bah ni Jordan i lobei ni halak Israel, paima mandipar sidea, gabe madotei ma atei-atei ni sidea, anjaha malitonduy ma sidea, i lobei ni halak Israel.

² Ijia ma ihatahon Jahowa hubani si Josua, “Bahen ma bam raot humbani batu, anjaha ulaki ma manunat halak Israel paduhalihon.”

³ Jadi ibahen si Josua ma bani raot humbani batu, anjaha isunat ma halak Israel i atas ni buntu-buntu sibur-sibur.

⁴ Anjaha on do halani ase isunat si Josua sidea: Ganup bangsa ai, na luar hun Masir, ai ma dalahi sagala siimbang munsuh, domma marmateian i halimisan, i tongah dalan, dob luar sidea hun Masir.

⁵ Ai tarsunat do ganup halak na luar ai, tapi sagala halak na itubuhkon i halimisan, i tongah dalan, dob luar sidea hun Masir, seng marsunat.

⁶ Ai ompat puluh tahun dokahni mawat-awat halak Israel i halimisan, paima siap sagala bangsa, dalahi siimbang munsuh, na luar hun Masir, halani na so tinangihon ni sidea sora ni Jahowa; mambahen marbulawan Jahowa hubani sidea, paboa na so bulih idahon ni sidea tanoh, na dob nibulawankon ni Jahowa hubani ompung ni sidea siberehonon-Ni hu banta, tanoh habaoran ni dadih pakon manisan ni huraamah.

⁷ Jadi anak ni sidea ma ipajongjong gantih ni sidea, na sinunat ni si Josua, ai marsibur-sibur do sidea, halani na so isunat sidea i tongah dalan.

⁸ Jadi dob salpu ganup bangsa ai marsunat, tading ma sidea bani ianan ni sidea i parsaranan ai, paima malum iahap sidea.

⁹ Dob ai nini Jahowa ma dompak si Josua, “Sadari on gulangknonon-Ku ma habadoron ni Masir humbani nasiam.” Anjaha sonai ma targoran ianan ai, Gilgal ronsi sadari on.

¹⁰ Jadi sanggah na marsaran ai halak Israel i Gilgal, marhorja Paskah ma sidea bani ari sapuluh ompat bulan ai, bodari-bodari, i pamah Jeriko.

¹¹ Jadi patarni, dob marhorja Paskah ai, bani ari na sasada ai ipangan sidea ma gogoh ni tanoh ai, ai ma ruti na so niigaran pakon gandum na pinahpah.

¹² Jadi marsaran ma roh manna patarni ai, dob ipangan sidea gogoh ni tanoh ai; seng dong be manna bani halak Israel, gabe ipangan sidea ma gogoh ni tanoh bani na satahun ai.

¹³ Sanggah partalar ni Naibata bani si Josua, dohor do si Josua hu huta Jeriko; mangkawah ma ia manatap inggot, gabe iidah ma sada halak jongjong i lobeini, pajolom-jolom podang na sinintak ibagas tanganni. Jadi iparayak si Josua ma ia, nini ma dompaksi, “Hasoman do Ham barang imbang?”

¹⁴ Nini ma dompaksi, “Lang, pambobai ni bala ni Jahowa do Ahu, ai pe ahuh roh.” Jadi manrogop ma si Josua hu tanoh anjaha marsombah, anjaha nini ma dompaksi, “Aha do na sihol hatahonon ni Tuhanku bani juakjuak-Ni?”

¹⁵ Jadi nini pambobai ni bala ni Jahowa ai ma dompak si Josua, “Tanggali ma sipatumu

humbani naheimu, ai na pansing do ianan hajongjonganmon.” Jadi ibahen si Josua ma sonai.

Partalu ni Jeriko

6¹ Tapi tutup tumang do Jeriko jumpah halak Israel; seng dong na luar anjaha seng dong barang ise na masuk.

² Dob ai nini Jahowa ma dompak si Josua, “Tonggor ma, domma Huondoskon hubagas tanganmu huta Jeriko, rajani pakon sagala siimbang munsuh.

³ Maningon inggotannima do huta ai, sagala siimbang munsuh manginggoti huta ai sahali. Sonai ma bahen hanima ibagas na onom ari.

⁴ Anjaha usungon ni pitu malim ma pitu tarompit tanduk ni biribiri tunggal i lobei ni poti ai, tapi papitu-arihon maningon pitu hali inggotannima huta ai, anjaha sompulon ni malim ma tarompit ai.

⁵ Jadi anggo dokah panompul ni sidea bani tarompit tanduk ni biribiri tunggal ai, ibogei hanima honsi sora ni tarompit ai, jadi gogoh ma marsurak ganup bangsa ai, jadi marumbak ma tembok ni huta ai, anjaha manaik ma bangsa ai, ganup mandorab hu lobeini bei.

⁶ Jadi idilo si Josua, anak ni si Nun ma malim-malim, anjaha nini ma dompak sidea, “Usung nasiam ma poti parpadanan in, anjaha suruh nasiam ma pitu malim, mangusung pitu tarompit tanduk ni biribiri tunggal i lobei ni poti ni Jahowa.”

⁷ Anjaha nini ma dompak bangsa ai, “Laho ma nasiam, inggoti nasiam ma huta ai, anjaha suruh nasiam ma parsinjata mardalan i lobei ni poti ni Jahowa.”

⁸ Jadi dob ihatahon si Josua sonai hubani bangsa ai, mardalan ma na pitu malim, na mangusung na pitu tarompit tanduk ni biribiri tunggal ai i lobei ni Jahowa, lanjar manompul tarompit; anjaha poti parpadanan ni Jahowa mangihut hun pudi ni sidea.

⁹ Anjaha mardalan ma parsinjata ai i lobei ni malim na manompul tarompit ai, anjaha mangihut hubani poti ai ma parjaga na hun pudi ai, anjaha tarompit ai marsora torus.

¹⁰ Tapi domma iparentahkon si Josua hinan hubani bangsa ai, “Ulang ma marsurak-surak nasiam, anjaha ulang ma tarbogei sora nasiam, anjaha seng bulih luar age sada hata humbani pamangan nasiam, paima jumpah arini, ahu mangkatahon nasiam marsurak-surak; dob ai pe ase marsurak nasiam.”

¹¹ Jadi iinggoti poti ni Jahowa ma huta ai, sahali maringgot. Dob ai das ma sidea hu parsaranan ai anjaha marborngin i parsaranan ai.

¹² Dob ai ipagirah si Josua ma puho patarni ai, anjaha iusung malim ma poti ni Jahowa.

¹³ Anjaha na pitu malim, na mangusung na pitu tarompit tanduk ni biribiri tunggal ai, mardalan do i lobei ni poti ni Jahowa, torus manompul tarompit,

anjaha parsinjata ai mardalan i lobei ni sidea. Tapi parjaga na hun pudi ai mardalan i pudi ni poti ni Jahowa, anjaha tarompit ai marsora torus.

¹⁴ Padua-arihon pe iinggoti sidea do huta ai sahali, dob ai mulak ma sidea hu parsaranan. Sonai ma ibahen sidea ibagas na onom ari.

¹⁵ Tapi bani ari papituhon ipagirah sidea ma puho, bani parnaik ni sibalikkuning, anjaha iinggoti sidea ma huta ai songon na somal pitu hali; pitah bani ari ai do pitu hali iinggoti sidea huta ai.

¹⁶ Bani na papituhalihon, sanggah na sinompul ni malim ai tarompit ai, nini si Josua ma dompak bangsa ai, “Marsurak ma nasiam, ai domma ibere Jahowa huta in bani nasiam.

¹⁷ Tapi maningon siaponkon do huta in ronsi ganup na ibagas halani Jahowa; pitah si Rahab boru jalang ai do pagoluhon, ia rap pakon haganup na rap pakonsi i rumah, ai iponopkon do suruhan na sinuruhta.

¹⁸ Tapi ramotkon nasiam ma diri nasiam dompak ugas-ugas sisiapkonon ai, ase ulang siap nasiam, ase ulang ibuat nasiam humbani ugas-ugas sisiapkonon ai, gabe siap holi parsaranan ni Israel ibahen nasiam, anjaha iparoh nasiam hamagouan hujai.

¹⁹ Tapi sagala pirak pakon omas, ronsi parugas tombaga pakon bosi, papansingon ma ai bani Jahowa, pamasukon ma ai hu kamar parugasan ni Jahowa.”

²⁰ Jadi marsurak-surak ma bangsa ai anjaha isompul ma tarompit ai. Jadi dob ibogei bangsa ai sora ni tarompit ai, ipagogoh sidea ma marsurak-surak gabe marumbak ma tembok ai, anjaha ipanaik bangsa ai ma huta ai, ganup mandorab hu lobeini, gabe itaban sidea ma huta ai.

²¹ Jadi isiapkon sidea ma sagala na i huta ai, dalahi age naboru, dakdanak pakon na ubanon, ronsi lombu, biribiri pakon halode itampuli bani podang.

²² Tapi hubani na dua halak, na mangkahapi tanoh ai ihatahon si Josua ma, “Masuki nasiam ma rumah ni puang-puang, boru jalang ai, arahkon nasiam ma luar naboru ai pakon ganup na rap pakonsi, songon na binulawankon nasiam bani.

²³ Jadi masuk ma garama parkahap na dua ai, anjaha iarahkon ma luar si Rahab, bapani, inangni, sagala botouni, pakon sagala na rap pakonsi ronsi ganup ginompar ni ompungni, anjaha ipatuduh ma bani sidea sada ianan i darat ni parsaranan ni Israel.

²⁴ Tapi itutung sidea ma huta ai bani apuy pakon ganup na ibagas ai; pitah pirak pakon omas, ronsi parugas tombaga pakon bosi inahkon sidea hu kamar parugasan ni rumah ni Jahowa.

²⁵ Tapi anggo si Rahab, boru jalang ai, pakon ginompar ni bapani, ronsi sagala na rap pakonsi ipagoluh si Josua do; anjaha marianan i tongah-tongah ni Israel do ia ronsi sadari on, halani

na pinonopkonni suruhan, na sinuruh ni si Josua mangkahapi Jeriko.

²⁶ Jadi marbulawan ma si Josua ijia nini ma, “Maningon hona papa ma magira i lobei ni Jahowa, dalahi na jongjong pauli huta Jeriko on. Bunga tubuhni ma gantih ni onjolanni, anjaha sianggianni gantih ni horbangan na pinajongjongni ai.”

²⁷ Jadi sai ihasomani Jahowa do si Josua, anjaha tarmurmur ia i sab tanoh ai.

Dousa ni si Akhan pakon Uhum halani ai; Talu Sidea i lambung ni Huta Ai

7 ¹ Tapi ilanggar halak Israel do parentah pasal ugas sisiapkonon ai, ai ibuat si Akhan, anak ni si Karmi, tinubuhkon ni si Sabdi, anak ni si Sera humbani marga Juda do ugas sisiapkonon ai. Jadi gajag ma ringis ni Jahowa bani halak Israel.

² Dob ai isuruh si Josua ma dalahi hun Jeriko hu Ai dohorhon Bet-Awen hampit hapoltakan ni Betel, anjaha nini ma dompak sidea, “Tangkog ma nasiam, anjaha kahapi nasiam ma tanoh ai.” Jadi tangkog ma dalahi ai, anjaha ikahapi sidea ma huta Ai.

³ Jadi mulak ma sidea hubani si Josua, nini sidea ma dompaksi, “Ulang ma pala ganup bangsa in tangkog, tapi dear ma dua atap tolu ribu halak tangkog, laho manaluhon huta Ai, ulang pala ganup bangsa in loja hujai, ai otik do sidea.”

⁴ Jadi tangkog ma hira-hira tolu ribu halak hujai, hape maporus do sidea ibahen parhuta Ai ai.

⁵ Jadi ibunuh pangisi ni huta Ai ma hira-hira tolu puluh onom halak humbani sidea, anjaha iayak ma sidea singgan horbangan ni huta Ai das hu Sebarim, anjaha ibunuhi sidea bani raboyon ai. Jadi madotei ma atei-atei ni bangsa ai gabe songon bah.

⁶ Dob ai irigati si Josua ma hiouni anjaha manrogop ma ia i lobei ni poti ni Jahowa ronsi bodari, ia pakon pangintuai ni Israel, anjaha inahkon bei ma tanoh bani uluni.

⁷ Dob ai nini si Josua ma, “Ham Tuhan Jahowa, mase ma padiparon-Mu bangsa on hun Jordan ai, laho mangondoskon hanami hu tangan ni halak Amori, ase magou hanami bahenonni? Ambit tading ma namin hanami i dipar ni Jordan ai.

⁸ Ham Tuhan, aha ma hatahononku, dob lintun halak Israel ibahen munsuhni?

⁹ Bogeion ni halak Kanaan pakon ganup pangisi ni tanoh on ma ai, jadi inggotan ni sidea ma hanami, anjaha siapkononni gorannami hun tanoh on; jadi aha ma bahenon-Mu mangkopkop goran-Mu na timbul in?”

¹⁰ Dob ai nini Jahowa ma dompak si Josua, “Jongjong ma ho, mase ma sai manrogop ho?

¹¹ Domma mardousa Israel, ilanggar sidea do padan-Ku, na Huparentahkon ai bani sidea, ibuat sidea do deba humbani ugas sisiapkonon ai,

manangko do sidea anjaha marladung, anjaha inahkon sidea ai hu tengah-tengah ni parugas ni sidea.

¹² Halani ai seng tarbahen halak Israel be martahan i lobei ni munsuh ni sidea, sai na maporus mando sidea i lobei ni munsuh ni sidea, ai sisiapkononkon do sidea. Seng be hasomanan-Ku hanima, anggo seng iboiskon hanima sisiapkonon ai hun tengah-tongahnima.

¹³ Jongjong ma ho, urasi ma bangsa on, anjaha hatahon ma: Urasu hanima ma dirinima bei patar; ai sonon do ihatahon Jahowa, Naibata ni Israel: Adong do sisiapkononkon i tengah-tengahmu ale Israel, seng tarbahen martahan ho i lobei ni munsuhmu, paima ipadaoh hanima sisiapkononkon ai hun tengah-tongahnima.

¹⁴ Roh ma hanima patar mangihutkon margani; anjaha marga, na tinuduh ni Jahowa, roh bei ma mar sasabapa, anjaha na sabapa, na tinuduh ni Jahowa, roh bei ma mar sasahalak.

¹⁵ Anjaha halak, na tinuduh sisiapkonon ai, tutungon ma ia ibagas apuy, ronsi ganup na adong bani, halani na nilanggarni ai padan ni Jahowa, anjaha halani na binahenni ai haboron bani Israel.”

¹⁶ Jadi ipagirah si Josua ma puho patarni ai, anjaha ihatahon ma roh bei halak Israel mar sasamarga, anjaha tartuduh ma marga Juda.

¹⁷ Dob ai ihatahon ma roh bei ganup ompung ni Juda, gabe tartuduh ma ompung Serah, dob ai ihatahon ma roh bei ginompar ni ompung Serah mar sasabapa, gabe tartuduh ma si Sabdi.

¹⁸ Dob ai ihatahon ma roh bei ginompar ni mar sasahalak, gabe tartuduh ma si Akhan, anak ni si Karmi, anak ni si Sabdi, anak ni si Serah humbani marga Juda.

¹⁹ Dob ai nini si Josua ma dompak si Akhan, “Ale ambia, sai pasangap ma Jahowa, Naibata ni Israel, anjaha bere ma puji-pujian Bani; patugah ma bangku aha na binahenmai, ulang porsou hu bangku.”

²⁰ Jadi nini si Akhan ma mambalosi si Josua, “Tongon do, domma mardousa ahu hubani Jahowa, Naibata ni Israel, anjaha sonon do na hubahen ai:

²¹ Huidah i tongah-tongah ni taban-taban ai sada baju Babilon na jenges pakon dua ratus sekel pirak pakon sangkibul omas lima puluh sekel boratni; gabe impol ma matangku mangidah ai, lanjar hubuat, anjaha tonggor ma, tartanom do ai ibagas tanoh i tongah-tongah ni lampolampongu, anjaha pirak ai i toruhni.”

²² Dob ai isuruh si Josua ma suruhanni, marlintun ma sidea hu lampolampo ai; tonggor ma, tartanom do ai ibagas tanoh bani lampolampo ai, anjaha pirak ai i toruhni.

²³ Dob ai ibuat sidea ma ai humbagas lampolampo ai, anjaha iboan ma hubani si Josua hubani ganup halak Israel anjaha itibalhon ma ai i lobei ni Jahowa.

²⁴ Jadi iboan si Josua ma si Akhan, anak ni si Serah ai, pakon pirak, baju ampa omas na sangkibul ai, ronsi anakni pakon boruni, lombuni, halodeni pakon biribirini, lampolamponi pakon sagala na dong bani, anjaha ganup halak Israel hasomanni mangodorhon sidea tangkog hu habungan Ahor.

²⁵ Dob ai nini si Josua ma, “Mase ma iagou ho hanami? Agouon ni Jahowa ma ho sadari on.” Jadi ipargijig ganup halak Israel ma ia bani batu; itutung ma sidea bani apuy, anjaha ipargijig bani batu.

²⁶ Jadi ipajongjong sidea ma i atasni sada timbunan batu na bolon, na adong ope ronsi sadari on. Jadi marpangulaki ma uhur ni Jahowa humbani pargajag ni ringisni. Halani ai targoran do ianan ai habungan Ahor ronsi sadari on.

Partalu ni Huta Ai

8 ¹ Dob ai nini Jahowa ma dompak si Josua, “Ulang ma ho mabiar anjaha bobor! Arahkon ma ganup siimbang munsuh, anjaha bingkat ma ho, tangkog dompak Ai! Tonggor ma, domma Huondoskon hu tanganmu raja ni Ai pakon bangsani, hutani pakon tanohni!

² Anjaha bahen ma hu huta Ai pakon hubani rajani, songon na binahenmu hubani Jeriko pakon hubani

rajani, pitah taban-tabanni pakon pinahanni do na bulih bagionnima bennima; bahen ma sada paronggopan i pudi ni huta ai.”

³ Jadi bingkot ma si Josua pakon ganup siimbang munsuh laho tangkog hu huta Ai; ipilih si Josua ma tolu puluh ribu halak na borani marmunsuh, anjaha isuruh ma sidea bornginni ai.

⁴ Anjaha iparentahkon ma hubani sidea, “Monggop ma nasiam hu pudi ni huta ai; tapi ulang madaohtu nasiam hun huta ai, anjaha tagam ma nasiam ganup.

⁵ Tapi anggo ahu pakon ganup bangsa na rap pakon ahu, dohorannami ma huta ai. Jadi anggo luar ma sidea manjumpahkon hanami songon na parlobei ondi, maporus ma hanami i lobei ni sidea;

⁶ jadi luar ma sidea mangayaki hanami, paima isirang hanami sidea hun huta ai; jadi hatahonon ni sidea ma, ‘Maporus do sidea i lobeita songon na parlobei ondi.’ Anjaha sanggah na maporus ai hanami i lobei ni sidea,

⁷ luar ma nasiam hun paronggopan ai, anjaha soluk nasiam ma huta ai; ai bereon ni Jahowa Naibata nasiam ma huta ai hubagas tangan nasiam.

⁸ Anjaha anggo domma itaban nasiam huta ai, tutung nasiam ma huta ai bani apuy, bahen nasiam ma songon na hinatahon ni Jahowa. Tonggor ma, ahu do mangkatahon in bani nasiam.”

⁹ Jadi isuruh si Josua ma sidea, laho ma sidea hu paronggopan ai, anjaha monggop ma sidea i holangkolang ni Betel pakon Ai, hampit hasundutan ni Ai; tapi marborngin ma anggo si Josua bani na saborngin ai i tongah-tongah ni bangsa ai.

¹⁰ Dob ai patarni ai ipagirah si Josua ma puho pasirsirhon balani ai, anjaha tangkog ma ia rap pakon pangituai ni Israel i lobei ni bangsa ai hu huta Ai.

¹¹ Anjaha ganup siimbang munsuh na rap pakonsi tangkog ma anjaha das hulobei ni huta ai, anjaha marsaran ma sidea hampit utara ni huta Ai; habungan ai do holangkolang ni sidea hun huta Ai.

¹² Anjaha ipapulig ma hira-hira lima ribu halak, anjaha ihatahon ma monggop i holangkolang ni Betel pakon Ai, hampit hasundutan ni huta ai.

¹³ Jadi ipabaris sidea ma bala, na marsaran hampit utara ni huta ai, pakon na monggop ai hampit hasundutan ni huta ai. Tapi i habungan ai do si Josua bani na saborngin ai.

¹⁴ Jadi dob iidah raja ni huta Ai ai, tarolos ma sidea, ipagirah dalahi ni huta ai ma luar manjumpahkon Israel laho marporang, raja ai pakon ganup bangsani bani raboyon ai i lobei ni Arabah, tapi lang ibotoh, na dob adong na monggop i pudi ni huta ai.

¹⁵ Jadi ipahulah si Josua pakon ganup Israel ma talu i lobei ni sidea, anjaha maporus sidea dompak halimisan.

¹⁶ Dob ai itingtingkon ma bani ganup parhuta ai, ase rap sidea mangayak-ayak, jadi iayak-ayak sidea ma si Josua, gabe sirang ma sidea humbani huta ai.

¹⁷ Sahalak pe lang adong na tading i huta Ai pakon i Betel, na so luar mangayak Israel, ngangang do huta ai itadingkon sidea laho mangayaki Israel.

¹⁸ Dob ai nini Jahowa ma dompak si Josua, “Pagostong ma tanja na i tanganmin dompak huta Ai; ai domma Huondoskon huta ai hu tanganmu.” Jadi ipagostong si Josua ma tanja na ibagas tanganni ai dompak huta ai.

¹⁹ Jadi tarolos ma na monggop ai jongjong humbani iananni, anjaha dob na pinagostongni ai tanganni, marpojong ma sidea masuk hubagas huta ai lanjar itaban, anjaha ioloskon sidea ma manutung huta ai.

²⁰ Jadi sanggah na mangkawah dalahi na hun Ai dompak pudi, tonggor ma, domma martimpul timus ni huta ai dompak langit, seng dong be gogoh ni sidea maporus barang dompak ja pe, ai bangsa na maporus dompak halimisan ai pe domma marhusor use mangimbang sidea na mangayak-ayak ai.

²¹ Dob iidah si Josua pakon ganup Israel, na dob itaban na monggop ai huta ai, anjaha na dob martimpul timus ni huta ai, jadi marhusor ma sidea, anjaha ibunuh sidea ma ganup dalahi na hun Ai.

²² Luar ma pakon na legan ai hun huta ai manjumpahkon sidea, gabe tarhapit ma sidea ibahen Israel; jadi roh ma sidea hadualopahsi

mamunuhi sidea ronsi seng dong be na tading humbani sidea age sahalak, na maporus barang na maluah.

²³ Tapi itangkap sidea ma raja ni Ai manggoluh, anjaha iboan ma ia hubani si Josua.

²⁴ Dob bois ibunuhi Israel ganup pangisi ni Ai bani pamah na i halimisan ai, bani iananni sidea mangayak-ayak ai, anjaha bois tumang sidea itampuli bani podang, jadi mulak ma ganup Israel hu huta Ai, anjaha itampuli ma pangisi ni ai bani mata ni podang.

²⁵ Ia haganup na rasei bani na sadari ai, dalahi pakon naboru, sapuluh dua ribu halak do haganup pangisi ni huta Ai.

²⁶ Ai seng ipasuang si Josua ope tanganni, na pagostong tanja ai, paima siap tumang pangisi ni huta Ai.

²⁷ Pitah pinahan pakon taban-taban na hun huta ai ibagi halak Israel bani sidea, romban hubani hata ni Jahowa na tinonahkon-Ni hubani si Josua.

²⁸ Jadi isurbuy si Josua ma huta Ai, anjaha ibahen ma ai gabe timbunan batu sadokah ni dokahni, ronsi sadari on.

²⁹ Anggo raja ni huta Ai ai igantung do bani hayu ronsi bodari, anjaha laho sundutkonsi mata ni ari, ihatahon si Josua ma pasusuron bangkeini ai humbani hayu ai, anjaha igijigkon sidea ma ai hu babah ni horbangan ni huta ai, anjaha ibahen i atas

ni ai sada timbunan batu na bolon, na adong ijai ronsi sadari on.

Anjapanjap na i Dolog Ebal; Panjahaon bani Titah

³⁰ Ijia ipajongjong si Josua ma sada anjapanjap bani Jahowa, Naibata ni Israel, i Dolok Ebal,

³¹ songon na pinarentahkon ni si Musa, juakjuak ni Jahowa hubani halak Israel, songon na tarsurat ibagas buku titah ni si Musa, sada anjapanjap humbani batu na so binarbar, na so hona parugas bos; jadi igalangkon sidea ma i atasni galangan situtungon bani Jahowa, anjaha igalangkon galangan pardameian.

³² Dob ai isuratkon ma ijai hubani batu ai, i lobei ni halak Israel, salinan ni titah ni si Musa, na sinuratni ai.

³³ Anjaha ganup Israel rap pakon pangintuaini, pambobaini pakon panguhumni jongjong angkup i lambung ni poti ai i lobei ni malim marga Levi, na mangusung poti parpadanan ni Jahowa, halak dagang age partanoh ai hinan, satongah i raboyon ni Dolog Garisim, na satongah nari i raboyon ni Dolog Ebal, songon na tinonahkon ni si Musa, juakjuak ni Jahowa, laho mamasu-masu bangsa Israel ijia.

³⁴ Dob ai ibasa ma ganup hata ni titah ai, pasu-pasu pakon papa-papa ai, haganup songon na tarsurat ibagas buku titah ai.

³⁵ Seng dong age sada hata humbani haganup hata, na tinonahkon ni si Musa, na so binasa ni si Josua i lobei ni ganup tumpuan ni Israel, pakon puang-puang pakon dakdanak ampa halak dagang, na manginsolat i tongah-tongah ni sidea.

Akal ni Halak Gibeon

9 ¹ Dob sar barita ai ibogei ganup raja, na i dipar ni Jordan, na i dolog pakon na i hondot das hu Libanon, sagala na i pasir ni Laut Bolag ai, ai ma halak Het, Amori, Kanaan, Peresi, Hewi pakon Jebusi,

² jadi martumpu ma sidea, sauhur laho marporang dompak si Josua pakon Israel.

³ Tapi dob ibogei pangisi ni Gibeon, na binahen ni si Josua hubani Jeriko pakon huta Ai,

⁴ dihut ma sidea mambahen akal, laho ma sidea pasirsir bohal, ibuat sidea ma guni na buruk-buruk sitampeihonon bani halode ni sidea, pakon gusi hulingkuling, ianan ni anggur na dob buruk, marigat anjaha idungkap,

⁵ ampa sipatu na buruk anjaha na nidungkap bani nahei ni sidea; hiou na buruk bahen hiou, anjaha ganup bohal ni sidea mapir anjaha lapukon.

⁶ Dob ai laho ma sidea marayak si Josua hu parsaranan na i Gilgal, anjaha nini ma hubani pakon dompak halak Israel, “Na roh hun tanoh na daoh

do hanami, on pe bahen nasiam ma parpadanan bennami.”

⁷Nini halak Israel ma dompak halak Hewi ai, “Ra i tengah-tongahnami do nasiam marianan; jadi sonaha ma pambahennami parpadanan pakon nasiam?”

⁸Jadi nini sidea ma dompak si Josua, “Jabolonmu ma hanami.” Nini si Josua ma dompak sidea, “Ai ise do nasiam, anjaha hunja do roh nasiam?”

⁹Nini sidea ma hu bani, “Na roh hun tanoh na madaoh tumang do hanami jabolonmu on, halani barita ni Jahowa Naibata nasiam; ai ibogei hanami do barita-Ni pakon haganup na binahen-Ni i tanoh Masir,

¹⁰sonai homa haganup na binahen-Ni hubani na dua raja ni halak Amori, na i dipar ni Jordan, hubani si Sihon raja ni Hesbon, pakon hubani si Og raja ni Basan, na marianan i Astarot.

¹¹Jadi ihatahon pangintuainami pakon sagala pangisi ni tanohnami ma bennami, ‘Boan nasiam ma bani nasiam bohal i dalan, laho ma nasiam manjumpahkon sidea anjaha hatahon nasiam ma hubani sidea, “Jabolon nasiam do hanami, on pe pungkah nasiam ma parpadanan pakon hanami.”

¹²Rutinami on, milas ope iboan hanami hun rumahnami bahen bohalnami bani parbingkatnami hubani nasiam on, tapi anggo nuan domma pala mapir anjaha lapukon.

¹³ Anjaha parnahan ni anggur on bayu ope, sanggah iisi hanami on, hape tonggor ma, domma pala marigat, anjaha ha hiounami pakon sipatunami on, domma pala buruk ibahen pardalanan na daoh tumang.’”

¹⁴ Jadi ijalo halak ai ma humbani bohal ni sidea ai, tapi seng pala marpanungkun sidea hubani Jahowa.

¹⁵ Ibahen si Josua ma pardameian hubani sidea, anjaha ipungkah ma parpadanan bani sidea, laho pagoluhkon sidea; pala marbulawan kopala ni tumpuan ai pasal sidea.

¹⁶ Tapi dob salpu tolu ari, dob ibahen parpadanan ai bani sidea, ibogei sidea ma, dohor do hape sidea i lambung ni sidea, anjaha marianan i tongah-tongah ni sidea.

¹⁷ Jadi bingkat ma halak Israel, gabe das ma sidea hu huta ni sidea patolu-arihon. Huta ni sidea, ai ma: Gibeon, Kafira, Beerot pakon Kiriath-jearim.

¹⁸ Tapi seng ibunuh halak Israel sidea, halani na dob marbulawan ai kopala ni tumpuan ai hubani Jahowa, Naibata ni Israel pasal sidea. Jadi marungut-ungut ma ganup tumpuan ai dompak kopala ai.

¹⁹ Nini sagala kopala ai ma hubani ganup tumpuan ai, “Domma pala marbulawan hanami pasal sidea hubani Jahowa Naibata ni Israel, halani ai seng bulih bunuhonta sidea.

²⁰ On ma bahen hita hubani sidea, napagoluh ma sidea, ase ulang mangonai banta ringis, halani bulawan ai, na dob binulawankonta bani sidea.”

²¹ Nini kopala-kopala ai ma dompak sidea, “Paturut ma sidea manggoluh.” Gabe siparsoban pakon sialop bah ma sidea bani ganup tumpuan in, songon na dob hinatahon ni kopala-kopala ai bani sidea.

²² Jadi idilo si Josua ma sidea, anjaha nini ma dompak sidea, “Mase ma ioto-otoi nasiam hanami, marhitei na mangkatahon, ‘Daoh tumang do hanami humbani nasiam’ hape i tongah-tongahnami do nasiam marianan?

²³ On pe, hona papa ma nasiam, seng be maronti bani nasiam na gabe jabolon, parsoban pakon sialop bah i rumah ni Naibatanku.”

²⁴ Nini sidea ma mambalosi si Josua, “Domma das barita bennami jabolonmu, na tinonahkon ni Jahowa Naibatamu hubani juakjuak-Ni si Musa, sihol berehonon-Ni bani nasiam ganup tanoh on, anjaha siapkononmu ganup pangisi ni tanoh on hun lobei nasiam; jadi mabiar tumang ma hanami pasal hosahnami i lobei nasiam, gabe ibahen hanami sonon.

²⁵ On pe, tonggor ma, ibagas tanganmu do hanami; bahen ham ma na dear, anjaha na pintor ninuhurmu sibahenonmu bennami.”

²⁶ Jadi ibahen ma sonai hubani sidea, ipaluah ma sidea hun tangan ni halak Israel, ase ulang ibunuh sidea.

²⁷ Itotapkon si Josua ma sidea humbani ari ai nari gabe parsoban pakon sialop bah bani tumpuan ai pakon bani anjapanjap ni Jahowa ronsi sadari on bani ianan sipilihonni ai.

Talu Raja ni Halak Amori na Lima ai

10 ¹ Dob ibogei si Adoni-Zedek, raja hun Jerusalem, na dob itaban si Josua huta Ai anjaha isiapkon -- anjaha songon pambahenni hubani Jeriko pakon hubani rajani, lanjar sonai do ibahen hubani huta Ai pakon hubani rajani -- anjaha na dob mardamei pangisi ni Gibeon hubani Israel anjaha lanjar marianan i tongah-tongah ni sidea,

² jadi mabiar tumang ma sidea; ai huta na bolon do Gibeon ai, songon sada huta pamatang, anjaha banggalan ope ai hun huta Ai, anjaha na garang marporang do ganup dalahi ni huta ai.

³ Dob ai ipadas si Adoni-Zedek, raja hun Jerusalem ma tonah on hubani si Hoham, raja hun Hebron, hubani si Piram raja hun Jarmut, hubani si Jafia raja hun Lakis, pakon hubani si Debir raja hun Eglon, nini ma,

⁴ “Tangkog ma nasiam marayak ahu, urupi nasiam ma ahu manaluhon Gibeon, ai domma sidea

mardamei hubani si Josua pakon hubani halak Israel.”

⁵ Jadi martumpu anjaha tangkog ma na lima raja ni halak Amori ai, ai ma raja hun Jerusalem, raja hun Hebron, raja hun Jarmut, raja hun Lakis, raja hun Eglon, sidea pakon haganup bala ni sidea; ihubu sidea ma Gibeon anjaha iporang sidea ma huta ai.

⁶ Dob ai isuruh dalahi na hun Gibeon ma suruhanni hubani si Josua, hu parsaranan na i Gilgal, nini sidea ma, “Ulang ma talluskon tanganmu hun bennami jabolonmu, podas ma nasiam tangkog marayak hanami, paluah anjaha urupi ma hanami, ai domma martumpu mangimbang hanami ganup raja ni halak Amori, sagala na marianan i dolog.”

⁷ Jadi tangkog ma si Josua hun Gilgal, ia pakon haganup siimbang munsuh hasomanni, ronsi sagala na borani marmunsuh.

⁸ Nini Jahowa ma dompak si Josua, “Ulang ma ho mabiar mangidah sidea, ai domma huberehon sidea hubagas tanganmu, seng dong humbani sidea na martahan jongjong i lobei-lobeimu.”

⁹ Jadi sompong ma idorab si Josua sidea; layur sabornginni ai mardalan nahei sidea hun Gilgal.

¹⁰ Anjaha isonggoti Jahowa ma sidea i lobei ni Israel, talu tumang ma sidea ibahen i Gibeon, anjaha iayak ma sidea bani dalan na i raboyon ni Bet-Horon, italuhon das hu Aseka pakon hu Makeda.

¹¹ Jadi sanggah na maporus ai sidea i lobei ni halak Israel, sanggah na i tuadan na i Bet-Horon ai sidea, gabe ipandabuhkon Jahowa ma bani sidea batu na bangga hun nagori atas das hu Aseka, gabe marmateian ma sidea; bueinan do sidea matei, ibahen udan sira-sira ai, ase na matei ibahen podang ni halak Israel.

¹² Ijia ma ihatahon si Josua hubani Jahowa, bani ari sanggah iberehon Jahowa halak Amori hubani halak Israel, nini ma i lobei ni halak Israel, “Soh ma ho mata ni ari i atas ni Gibeon, anjaha ho bulan i atas ni habungan Ayalon!”

¹³ Jadi soh ma mata ni ari ai, anjaha bulan ai pe maronti ma paima sombuh iahap bangsa ai mambalas bani munsuhni ai. Ai lang tarsurat do ai ibagas buku ni halak parpintor? Jadi soh ma mata ni ari ai i parsitongahan ni langit, seng tarudu laho sundut, hira layur sadari.

¹⁴ Seng onga masa songon ari ai, na dob in pakon i pudini, itangihon Naibata sora ni sada halak; ai Jahowa do marporang mangkopkop Israel.

¹⁵ Dob ai mulak ma si Josua pakon ganup Israel hasomanni ai hu parsaranan na i Gilgal.

¹⁶ Tapi domma maporus anggo raja na lima ai, anjaha marponop sidea hubagas liang i Makeda.

¹⁷ Jadi adong ma halak na patugahkon hubani si Josua, nini ma, “Domma dapot raja na lima ai, marponop ibagas liang i Makeda.”

¹⁸ Jadi nini si Josua ma, “Gulang nasiam ma batu bolon hu babah ni liang ai, anjaha hatahon nasiam ma dalahi hujai manjaga sidea.

¹⁹ Tapi ulang ma sohsoh nasiam, ayaki nasiam ma munsuh nasiam, bunuh nasiam ma parjagani na hun pudi, ulang palopas nasiam sidea masuk hu huta ni sidea, ai domma iondoskon Jahowa Naibata nasiam sidea hu tangan nasiam.”

²⁰ Jadi dob talu ibahen si Josua rap pakon halak Israel sidea, bois tumang sidea ibunuhi -- deba hansa humbani sidea maluah anjaha sampang masuk hubagas huta na marbatar-batar --

²¹ jadi mulak ma ganup bangsa ai hu parsaranan, hubani si Josua i Makeda mardamei-damei, sada pe lang na pag paganjang unsumni hubani halak Israel.

²² Dob ai nini si Josua ma, “Ungkap nasiam ma babah ni liang ai; padarat anjaha boan nasiam ma hu bangku raja na lima ai.”

²³ Jadi ibahen sidea ma sonai, iarahkon sidea ma luar hun liang ai hubani si Josua raja na lima ai: Raja hun Jerusalem, raja hun Hebron, raja hun Jarmut, raja hun Lakis pakon raja hun Eglon.

²⁴ Jadi dob iboan sidea luar raja ai hubani si Josua, ipatumpu si Josua ma ganup dalahi ni Israel, ihatahon ma hubani puanglima ni bala, na bingkat rap pakonsi, “Roh ma nasiam, nahkon nasiam ma nahei nasiam hubani tangkuhuk ni raja-raja in!” Roh

bei ma sidea, anjaha inahkon ma naheini hubani tangkuhuk ni sidea.

²⁵ Dob ai nini si Josua ma dompak sidea, “Ulang ma nasiam mabiar, anjaha ulang ma bobor, pir ma tonduy nasiam anjaha totap ma uhur nasiam, ai sonin do bahenon ni Jahowa hubani ganup munsuh nasiam, na mamunsuhi nasiam.”

²⁶ Dob ai ibunuh si Josua ma sidea, anjaha igantungkon sidea hubani lima hayu, anjaha lanjar gantung do sidea bani hayu ai ronsi bodari.

²⁷ Tapi marayak laho matei mata ni ari, ihatahon si Josua ma patoruhon sidea humbani hayu ai, anjaha manggijigkon sidea hubagas liang, parponopan ni sidea hinan. Dob ai inahkon sidea ma batu banggal hu babah ni liang ai, anjaha ijai ope ronsi sadari on.

Italuhon Halak Israel Tanoh na Hampit Dangsina

²⁸ Makeda pe dapot si Josua do bani ari ai, italuhon marhitei podang; isiapkon ma ganup rajani ronsi sagala na manggoluh ibagas huta ai, sahalak pe lang ipalopas maluah, anjaha ibahen do hubani rajani, songon na binahenni hubani raja ni Jeriko.

²⁹ Dob ai bingkat ma si Josua rap pakon halak Israel hun Makeda hu Libna, laho marporang dompak Libna.

³⁰ Huta ai pe ibere Jahowa do hubani tangan ni Israel pakon rajani; anjaha itampuli ganup na marhosah na ibagas huta ai marhitei mata ni

podang, seng dong na maluah age sahalak; anjaha ibahen do hubani rajani, songon na binahenni hubani raja ni Jeriko.

³¹ Dob ai bingkat ma si Josua rap pakon ganup Israel hun Libna hu Lakis, marsaran ma sidea ijai, anjaha iporang ma huta ai.

³² Ibere Jahowa ma homa age Lakis hu tangan ni Israel, gabe itaban ma huta ai padua-arihon; anjaha itampuli sidea ma ganup marhitei podang, sagala na manggoluh ibagas huta ai, usih songon na binahenni hu Libna.

³³ Ijia ma tangkog si Horam, raja hun Geser, laho mangurupi Lakis; tapi italuhon si Josua ma ia rap pakon bangsani, ronsi sahalak pe lang dong na tading.

³⁴ Dob ai bingkat ma si Josua rap pakon ganup Israel hun Lakis hu Eglon; marsaran ma sidea ijai, anjaha iporang ma huta ai.

³⁵ Jadi itaban sidea ma huta ai bani ari ai, anjaha itampuli ma bani podang sagala na manggoluh ibagas huta ai; isiapkon ma bani ari ai, usih songon na binahenni hu Lakis.

³⁶ Dob ai bingkat ma si Josua rap pakon Israel hun Eglon hu Hebron, anjaha iporang ma huta ai.

³⁷ Jadi itaban sidea ma huta ai, italuhon ma ai marhitei mata ni podang, rajani pakon sagala dusunni pakon sagala na manggoluh na ibagas ai; sahalak pe lang ipalopas maluah, usih songon na

binahenni hu Eglon. Isiapkon ma huta ai rap pakon sagala na marhosah na ibagas ai.

³⁸ Dob ai mulak ma si Josua rap pakon Israel hu Debir, anjaha iporang ma huta ai.

³⁹ Itaban sidea ma huta ai ronsi rajani pakon sagala dusunni, ibunuh ma sidea marhitei mata ni podang, anjaha isiapkon ganup sagala na marhosah na ibagas ai, sahalak pe lang ipalopas maluah; songon na binahenni hu Hebron pakon hu Libna ampa rajani, sonai do ibahen hu Debir pakon hubani rajani.

⁴⁰ Sonai ma panaluhon ni si Josua bani haganup tanoh ai, tanoh dolog, tanoh dangsina, tanoh hondot pakon raboyon-raboyon ampa sagala rajani; sahalak pe lang ipalopas maluah, tapi isiapkon do haganup sagala na marhosah, songon na pinarentahkon ni Jahowa, Naibata ni Israel.

⁴¹ Italuhon si Josua ma sidea, hun Kades-Barnea nari das hu Gasa, pakon ganup tanoh Gosen das hu Gibeon.

⁴² Ganup raja-raja ai pakon tanohni itaban si Josua, sahali marporang tumang; ai Jahowa Naibata ni Israel do marporang mangkopkop Israel.

⁴³ Dob ai mulak ma si Josua rap pakon ganup Israel hu parsaranan na i Gilgal.

Hamonangan dompak si Jabin, na hun Hazor

11 ¹Tapi dob ibogei si Jabin, raja hun Hazor, pasal ai, martonah ma ia hubani si Jobab, raja hun Madon, pakon hubani raja hun Simron pakon hubani raja hun Aksap,

²sonai homa hubani raja-raja na i tanoh dolog parutara, pakon na i Arabah i dangsina ni Kinnerot, i tanoh hondot ampa tanoh Dolog Dor martopihon laut;

³hubani halak Kanaan na hun hapoltakan pakon hasundutan, hubani halak Amori, Het, Peresi, Jebusi na i dolog pakon halak Hewi na i bornoh ni Hermon i tanoh Mispa.

⁴Jadi luar ma sidea rap pakon ganup balani, sada bangsa na bolon, songon horsik na i topi ni laut bueini, sonai homa huda pakon gareta buei tumang.

⁵Martumpu ma ganup raja ondi, bingkat ma sidea anjaha marsaran dohorhon bah Merom, laho marmunsuh dompak Israel.

⁶Jadi nini Jahowa ma dompak si Josua, “Ulang ma ho mabiar mangidah sidea, ai patar sonon ondskononmu ma sidea ganup rasei i lobei ni Israel; tagili ma nahei ni hudani anjaha tutung gareta ni sidea bani apuy.”

⁷ Jadi sompong ma roh si Josua rap pakon balani ganup dompak sidea hu bah Merom, anjaha idorab ma sidea.

⁸ Iberehon Jahowa ma sidea hubagas tangan ni Israel, italuhon anjaha iayak ma sidea das hu Sidon na bolon, das hu Misrepot-Maim, anjaha das hu habungan Mispa hampit hapoltakan; ibunuhi ma sidea, ronsi sahalak pe lang dong na tading humbani sidea.

⁹ Jadi ihatahon si Josua ma hubani sidea songon na hinatahon ni Jahowa hu bani, itagili ma nahei ni huda ni sidea anjaha itutung gareta ni sidea bani apuy.

¹⁰ Dob ai mulak ma si Josua ijia, italuhon ma huta Hazor, anjaha ibunuhi rajani bani podang; ai Hazor do na saindokah huta pamatang ni ganup harajaon ai.

¹¹ Anjaha ibunuh ma ganup na manggoluh ibagas huta ai bani podang, siap tumang ibahen sidea, seng dong na tading age sada na marhosah, anjaha isurbuy ma huta Hazor bani apuy.

¹² Itaban si Josua ma ganup huta ni raja-raja ondi pakon ganup raja ni sidea, ibunuhi ma sidea bani podang, siap tumang ibahen sidea, songon na dob tinonahkon ni si Musa, juakjuak ni Jahowa.

¹³ Pitah sagala huta na i atas buntu-buntu do na so sinurbuy ni halak Israel, sobali Hazor; pitah ai do na sinurbuy ni si Josua.

¹⁴ Sagala taban-taban ni huta ai pakon pinahan-pinahan, ibuat halak Israel ma bani sidea; pitahjolma ai do haganup ibunuhi sidea bani podang, paima siap tumang sidea, seng dong na tading na marhosah age sahalak.

¹⁵ Songon na hinatahon ni Jahowa hubani si Musa, juakjuakni ai, sonai do ihatahon si Musa hubani si Josua, anjaha sonai do ibahen si Josua; sada pe langdong na tading ibahen humbani na hinatahon ni Jahowa hubani si Musa.

¹⁶ Jadi isoluk si Josua ma ganup tanoh ai, tanoh dolog ai pakon ganup tanoh dangsina, ganup tanoh Gosen pakon tanoh na i suahni, tanoh Arabah pakon tanoh dolog ni Israel ampa tanoh na i suahni,

¹⁷ hun dolog na sae-sae ai nari, na dompak Seir, das hu Baal-Gad, i habungan ni Libanon i bona ni Dolog Hermon. Ganup do rajani itangkap anjaha ibunuh.

¹⁸ Dokah do si Josua marmunsuh pakon raja-raja ai.

¹⁹ Seng dong age sada huta na ra mardamei pakon halak Israel, sobali halak Hewi na marianan i Gibeon; haganup huta ai italuhon sidea marhitei podang.

²⁰ Ai Jahowa do na pahengkeng uhur ni sidea laho marmunsuh dompak halak Israel, ase siap sidea, ase ulang jumpahan idop ni uhur sidea, ase bois tumang sidea, songon na tinonahkon ni Jahowa hubani si Musa.

²¹ Ijia ma homa roh si Josua maniapkon halak Enak hun tanoh parbalogan, hun Hebron, hun Debir, hun Anab, humbani ganup dolog Juda pakon ganup dolog Israel; siap tumang do sidea ibahen si Josua; rap pakon huta ni sidea.

²² Seng dong tading halak Enak i tanoh ni halak Israel, pitah i Gaza, i Gad pakon i Asdod adong ope na tading.

²³ Ase italuhon si Josua ma ganup tanoh ai, songon na hinatahon ni Jahowa hubani si Musa; ibere si Josua ma tanoh ai hubani halak Israel bahen rupei ni sidea, mangihutkon parbagianan ni sidea mar sasamarga. Dob ai maronti ma hamunsuhon hun tanoh ai.

Goran ni Raja-raja na Talu ai

12 ¹ On do raja-raja ni tanoh ai, sagala na tinaluhon ni halak Israel, na manoluk tanoh ni sidea i dipar ni Jordan, hampit hapoltakan, hun bah Arnon nari das hu Dolog Hermon, pakon ganup tanoh hondot na hampit hapoltakan.

² Si Sihon, raja ni halak Amori, na marianan i Hesbon, na manggomgomi hun Aroer nari i topi ni habungan Arnon, das hu parsitongahan ni habungan ai, ronsi satongah ni Gilead das hu Bah Jabok, parbalogan ni tanoh ni halak Amon,

³ pakon Arabah das hu Tao Kinnerot hampit hapoltakan, anjaha das hu laut ni Arabah, ai ma

laut Garam hampit hapoltakan, bani dalan dompak Bet-Jesimot, anjaha i dangsina i bona ni tuadan Pisga.

⁴ Ambahni ai tanoh ni si Og, raja ni Basan, ai ma tading-tadingan ni halak Refaim, na marianan i Astarot pakon Edrei,

⁵ na manggomgom Dolog Hermon pakon Salka pakon ganup Basan das hu parbalogan ni halak Gesuri pakon halak Maakati pakon satongah ni Gilead das hu parbalogan ni si Sihon, raja hun Hesbon.

⁶ Si Musa, juakjuak ni Jahowa rap pakon halak Israel do na manaluhon sidea; lanjar si Musa, juakjuak ni Jahowa do mambere tanoh ai bahen parbagianan ni halak Ruben, Gad pakon satongah marga Manase.

⁷ Tapi on ma raja-raja ni tanoh ai, na tinaluhon ni si Josua rap pakon halak Israel i dipar ni Bah Jordan hampit hasundutan, hun Baal-Gad, na i habungan ni Libanon nari, das hu dolog na sae-sae, na tangkog dompak Seir. Jadi ibere si Josua ma tanoh ai bahen rupei ni marga ni Israel, mangihutkon parbagianan ni bei,

⁸ na i dolog, na i habungan, na i Arabah, na i raboyon, na i halimisan pakon na i tanoh Dangsinan, tanoh ni halak Het, Amori, Kanani, Peresi, Hewi pakon Jebusi:

⁹ Raja hun Jeriko, sada; raja hun Ai, na i lambung ni Betel, sada;

- ¹⁰ raja hun Jerusalem, sada; raja hun Hebron, sada;
¹¹ raja hun Jarmut, sada; raja hun Lakis, sada;
¹² raja hun Eglon, sada; raja hun Geser, sada;
¹³ raja hun Debir, sada; raja hun Geder, sada;
¹⁴ raja hun Jorma, sada; raja hun Arad, sada;
¹⁵ raja hun Libna, sada; raja hun Adullam, sada;
¹⁶ raja hun Makeda, sada; raja hun Betel sada;
¹⁷ raja hun Tapuah, sada; raja hun Heper, sada;
¹⁸ raja hun Apek, sada; raja hun Lasaron, sada;
¹⁹ raja hun Madon, sada; raja hun Hazor, sada;
²⁰ raja hun Simron-Meron, sada; raja hun Aksap, sada;
²¹ raja hun Taanak, sada; raja hun Megiddo, sada;
²² raja hun Kedes, sada; raja hun Jokneam, na i Karmel, sada;
²³ raja hun Dor, na i nagori Dor, sada; raja ni Goyim, na i Galilea, sada;
²⁴ raja ni Tirsas, sada; ganup tolu puluh sada raja-raja.

Tanoh na So Italuhon ope

- 13** ¹ Jadi dob sayur matua si Josua, nini Jahowa ma hu bani, “Domma sayur matua ho, anjaha buei tumang ope tanoh in sipatundukon.
² On do tanoh, na tading ai ope: Ganup nagori ni halak Palistim pakon ganup tanoh Gesuri,
³ hun bah Sihor nari, na i hapoltakan ni Masir, das hu parbalogan ni Ekron na hampit utara -- masuk

hubani halak Kanaan do hiraon ai --, na lima raja ni halak Palistim ai ma raja hun Gaza, Asdod, Askalon, Gad pakon na hun Ekron; ambah ni ai halak Awi,
⁴ na i Dangsina, ganup tanoh ni halak Kanani, pakon Meara. Na masuk hubani halak Sidon, das hu Apek, hu parbalogan ni halak Amori,
⁵ ambah ni ai tanoh ni halak Gibli, pakon ganup Libanon, dompak hapoltakan, hun Baal-Gad na i bona ni Dolog Hermon nari, das hu Hamat,
⁶ ganup pangisi ni tanoh dolog, hun Libanon nari das hu Misrepot-Maim, ganup halak Sidon. Ahu pe mangusir sidea i lobei ni halak Israel. Ruji-rujihon tumang ma in bahen parbagianan ni Israel, songon na dob huhatahon bam.
⁷ On pe bagihon ma tanoh on bahen parbagianan bani na siah marga pakon bani na satongah marga Manase.”

Parbagianan ni na Tongah Tolu Marga i Dipar ni Jordan

⁸Rap pakon marga Manase na satongah nari, domma ijalo marga Ruben pakon Gad parbagiananni bei, na binere ni si Musa hubani sidea i dipar ni Jordan hampit hapoltakan, songon na binere ni si Musa, juakjuak ni Jahowa hubani sidea,

⁹ Hun Aroer, na i topi ni habungan ni bah Arnon, pakon huta na i tengah-tengah ni habungan ai, pakon haganup pamah Medeba das hu Dibon;

¹⁰ pakon ganup huta ni si Sihon, raja ni halak Amori, na manggomgomi Hesbon das hu parbalogan ni halak Amon;

¹¹ pakon Gilead ampa tanoh ni halak Gesuri pakon Maakati, pakon ganup Dolog Hermon ampa ganup Basan das hu Salka;

¹² ganup gomgoman ni si Og i Basan, na manggomgomi i Astarot pakon i Ederei, ia ma na tading humbani tading-tadingan ni ginompar ni si Refaim, na tinaluhon anjaha na niusir ni si Musa.

¹³ Tapi seng iusir halak Israel anggo halak Gesuri pakon halak Maakati; marianan i tengah-tengah ni halak Israel do halak Gesuri pakon Maakati ronsi sadari on.

¹⁴ Pitah hubani marga Levi do na so ibere parbagianan; galangan situtungan bani Jahowa, Naibata ni Israel do parbagianan-Ni, songon na hinatahon-Ni hinan bani sidea.

¹⁵ Ase domma ibere si Musa hinan parbagianan hubani marga Ruben mar sasapangku!

¹⁶ Ia tanoh ni sidea, ai ma hun Aroer na i topi ni habungan ni bah Arnon pakon huta na i tengah-tengah ni habungan ai, pakon ganup na i lambung ni Medeba,

¹⁷ Hesbon pakon ganup huta na i pamah ai, Dibon pakon Bamot-Baal ampa Bet-Baal-Meon,

¹⁸ Jahas, Kedemot pakon Mefaat,

¹⁹ Kiriataim, Sibma, Zeretsahar na i dolog ni habungan ai,

²⁰ Bet-Peor, raboyon ni Pisga pakon Bet-Jesimot,

²¹ ai ma ganup huta na i pamah ai, pakon ganup harajaon ni si Sihon, raja ni halak Amori, na manrajai i Hesbon, na tinaluhon ni si Musa, ia pakon kopala-kopala ni Midian, ai ma si Ewi, Rekem, Sur, Hur pakon Reba, raja wakil ni si Sihon, marianan i tanoh ai.

²² Sonai homa si Bileam, anak ni si Beor, partondung ai, ibunuh halak Israel do marhitei podang, rap pakon hasomanni na tarbunuh ai.

²³ Jadi parbalogan ni tanoh ni halak Ruben, ai ma Bah Jordan pakon topi-topini ai. Ai ma parbagianan ni halak Ruben mar sasapangku, huta pakon dusun.

²⁴ Anjaha domma ibere si Musa parbagiananni hubani halak Gad, hubani ginompar ni si Gad mar sasapangku.

²⁵ Tanoh ni sidea, ai ma: Jaeser pakon ganup huta na i Gilead, pakon satongah ni tanoh ni halak Amon, das hu Aroer patontang pakon Rabba,

²⁶ anjaha hun Hesbon das hu Ramot-Mispa pakon Betonim anjaha hun Mahanaim das hu parbalogan ni Debir,

²⁷ anjaha i pamah ai Bet-Haram, Bet-Nimra, Sukkot pakon Zafon, teba-teba hun harajaon ni si Sihon, raja hun Hesbon, Jordan pakon topi-topini, das hu ujung ni Tao Kinneret i dipar ni Jordan hampit hapoltakan.

²⁸ Ai ma parbagianan ni halak Gad mar sasapangku, huta pakon dusun.

²⁹ Domma ibere si Musa parbagianan hubani satongah marga Manase, on ma parbagianan ni na satongah marga Manase ai mar sasapangku.

³⁰ Tanoh ni sidea ai mulai hun Mahanaim: ganup Basan, ganup harajaon ni si Og, raja hun Basan, pakon ganup huta ni si Jair na i Basan, onom puluh huta bueini,

³¹ pakon satongah ni Gilead, Astarot, Ederei, huta-huta ni harajaon ni si Og, na i Basan; ibere ma ai hubani si Makir, anak ni si Manase, hubani satongah anak ni si Makir mar sasapangku.

³² Ai ma na binagihon ni si Musa i pamah Moab i dipar ni Jordan, hampit hapoltakan ni Jeriko.

³³ Tapi hu marga Levi, seng dong ibere si Musa parbagianan; Jahowa Naibata ni Israel do parbagianan ni sidea, songon na hinatahon-Ni hubani sidea.

Parbagianan ni si Kaleb

14 ¹ On do parbagianan na jinalo ni halak Israel i tanoh Kanaan, na binagihon ni Malim

Eleasar pakon si Josua, anak ni si Nun pakon kopala ni halak Israel mar sasamarga.

²Marhitei ruji-ruji do ibagihon bani sidea parbagianan ni sidea ai, songon na tinonahkon ni Jahowa marhiteihon ni si Musa, bereon hubani na siah pakon na satongah marga ai.

³Ai domma ibere si Musa parbagianan ni na dua pakon na satongah marga ai i dipar i Jordan, tapi hubani halak Levi seng dong ibere parbagianan i tongah-tongah ni sidea.

⁴Ai gabe dua marga do anak ni si Josep, ai ma si Manase pakon si Efraim; halani ai seng ibere sidea parbagianan bani halak Levi i tanoh ai, pitah huta do bahen ianan pakon sampalan bahen ianan ni pinahan ni sidea ampa ugas-ugas ni sidea.

⁵Songon na tinonahkon ni Jahowa hubani si Musa, sonai do ibahen halak Israel, anjaha ibagi sidea ma tanoh ai.

⁶Dob ai roh ma halak Juda marayak si Josua i Gilgal, gabe nini si Kaleb, anak ni si Jepunne, halak Kenas ai ma hu bani, “Ibotoh ham do hata, na hinatahon ni Jahowa hubani si Musa, juakjuak ni Jahowa, pasal ahu pakon pasal ham i Kades Barnea.

⁷Marumur ompat puluh tahun ma ahu, sanggha na sinuruh ni si Musa, juakjuak ni Jahowa, ahu hun Kades-Barnea, laho mangkahapi tanoh ai; anjaha mulak ma ahu mamboan barita bani songon na domu ibagas uhurhu.

⁸Tapi hasomanku, na rap tangkog pakon ahu mangganggui uhur ni bangsa in, tapi anggo ahu totap do marsijoloman hubani Jahowa Naibatanku.

⁹Jadi marbulawan ma si Musa bani ari ai, nini ma, “Tanoh, na nidalanan ni naheimu, bam ma ai bahen parbagianan bam pakon bani anakmu sadokah ni dokahni, halani totap ni uhurmu bani Jahowa Naibatanku.

¹⁰On pe, tonggor ma, ipagoluh Jahowa do ahu songon na hinatahon-Ni ai, sonari domma ompat puluh lima tahun, dob ihatahon Jahowa hata ondi bani si Musa, sadokah mardalan halak Israel i halimisan. On pe, tonggor ma, ualuh puluh lima tahun ma ahu sadari on.

¹¹Tong ope gogohku sadari on, songon sanggah bani parsuruh ni si Musa bangku; songon gogohku ijia, lanjar sonai ope gogohku sonari laho marporang, laho luar pakon masuk.

¹²Halani ai, bere ma bangku dolog on, songon pangkatahon ni Jahowa bani ari ai, ai ibogei ham sandiri do bani ari ai, halak Enak do ijai, anjaha huta na banggal anjaha na toguh do ai. Ra ihasomani Jahowa do ahu, ase tarusir ahu sidea, songon na hinatahon ni Jahowa.”

¹³Jadi ipasu-pasu si Josua ma ia, anjaha ibere Hebron hubani si Kaleb, anak ni si Jepunne, bahen parbagiananni

¹⁴ Sonai ma Hebron gabe parbagianan ni si Kaleb, anak ni si Jepunne, halak Kenas ai, ronsi sadari on, halani totap ni uhurni bani Jahowa Naibata ni Israel.

¹⁵ Ia goran ni Hebron sapari Kiriath-Arba do; si Arba, ai dojolma sibolongan i tongah-tongah ni halak Enak. Jadi sonang ma tanoh ai humbani hamunsuhon.

Parbagianan ni Marga Juda

15 ¹ On do parbagianan mangihutkon ruji-ruji bani marga ni anak ni si Juda mar sasapangku, das hu parbalogan ni tanoh Edom, halimisan Sin dompak Dangsina, i ujung pardangsina.

² Anjaha parbalogan ni sidea hampit dangsina ai ma: Hun ujung ni Laut Garam, hun teluk na anjur dompak dangsina,

³ hunjai laho hu dangsina ni raboyon Akkrabim, mandipar hu Sin, tangkog i dangsina ni Kades-Barnea, mandipar use hu Hebron, das hu Adar, marlegot use hu Karkar;

⁴ dob ai mandipar hu Asmon, luar i lambung ni bah Masir, anjaha marujung i laut. Ai ma parbalogan nasiam hampit dangsina.

⁵ Parbaloganni hampit hapoltakan: Laut Garam das bani ujung ni Jordan. Anjaha parbaloganni hampit utara: Mulai hun tuktuk ni laut bani babah ni Jordan,

⁶ tangkog ma parbalogan ai hu Bet-Hogla, anjaha mamontas hun utara ni Bet-Araba; dob ai tangkog ma parbalogan ai hu batu ni si Bohan, anak ni si Ruben;

⁷ anjaha tangkog ma parbalogan ai hu Debir, hun habungan Akor, torus hu utara, marlegot dompak Gilgal, tontang ni raboyon Adumim, ai ma na hampit dangsina ni bah ai; dob ai mandipar ma parbalogan ai hu bah En-Semes, anjaha marujung i En-Rogel.

⁸ Dob ai tangkog ma parbalogan ai hu habungan ni anak ni si Hinnom, hampit dangsina ni raboyon ni halak Jebusi, ai ma Jerusalem; dob ai tangkog ma parbalogan ai hu pakpak ni dolog, tontang ni habungan Hinnom hampit laut, na i ujung ni habungan Refaim hampit utara;

⁹ dob ai marlegot ma parbalogan ai hun pakpak ni dolog ai hu sombul ni Bah Neptoa anjaha luar ma hu huta ni Dolog Epron; dob ai marlegot hu Baala, ai ma Kiriath-Jearim.

¹⁰ Dob ai marlegot ma parbalogan ai hun Baala dompak hasundutan hu Dolog Seir, dob ai mandipar hu urung ni Dolog Jearim parutara, ai ma Kesalon, dob ai tuad hu Bet-Semes, anjaha mandipar hu Timna.

¹¹ Luar ma parbalogan ai hu urung ni dolog hampit utara ni Ekron, dob ai marlegot ma parbalogan ai hu Sikron, anjaha mandipar hu Dolog Baala, dob ai luar hu Jabneel, anjaha marujung i laut.

¹² Anjaha parbaloganni hampit laut, ai ma laut na bolon ai pakon pasirni. Ai ma parbalogan ni anak ni si Juda mar sasapangku.

(ay. 13-19: pausih Panguh. 1:10-15)

¹³ Tapi bani si Kaleb, anak ni si Jepunne, ibere ma sabagian i tongah-tongah ni anak ni si Juda, ai ma Kiriati-Arba, romban hubani hata ni Jahowa hubani si Josua, ai ma huta ni si Arba, bapa ni si Enak, ai ma Hebron.

¹⁴ Dob ai iusir si Kaleb ma hunjai na tolu halak Enak ai, ai ma si Sesai, si Ahimon pakon si Talmai, anak ni si Enak.

¹⁵ Dob ai tangkog ma ia hunjai hu pangisi ni Debir, ia goran ni Debir sapari ai ma Kiriati-Seper.

¹⁶ Jadi ihatahon si Kaleb ma, “Barang ise na manaluhon anjaha na manaban Kiriati-Seper, bereonku ma hubani borungku, si Aksa bahen parinangonni.”

¹⁷ Dob ai itaban si Otniel, anak ni si Kenas anggi ni si Kaleb ma huta ai, gabe ibere ma hubani si Aksa bahen parinangonni.

¹⁸ Jadi sanggah na masuk puang-puang ai ielek-elek ma ia mangindo juma sanlambar humbani bapani, lanjar susur ma ia hun halodeni, anjaha nini si Kaleb ma hu bani, “Aha bam?”

¹⁹ Gabe nini ma, “Bere ham bangku pasu-pasu sada; halani domma inahkon ham ahu hu tanoh dangsina,

maningon bereonmu do bangku bah tubuh.” Jadi ibere ma bani bah tubuh i huluan pakon i kehen.

²⁰ On ma parbagianan ni marga ni anak ni si Juda mar sasapangku.

²¹ Huta na masuk hubani marga Juda i tanoh dangsina, i parbalogan hampit Edom, ai ma: Kabseel, Eder, Jagur,

²² Kina, Dimona, Adada,

²³ Kedes, Hazor, Jitnan,

²⁴ Sip, Telem, Bealot,

²⁵ Hazor-Hadata, Kiriote-Hezron ai ma Hazor,

²⁶ Amam, Sema, Molada,

²⁷ Hazor-Gadda, Hesmon, Bet-Pelet,

²⁸ Hasar-Sual, Beerseba pakon dusunni,

²⁹ Baala, Iyim, Esem,

³⁰ El-Tolad, Kesil, Horma,

³¹ Siklag, Matmana, Sansana,

³² Lebaot, Silhim, Ain pakon Rimmon. Haganup huta ai dua puluh siah rap pakon dusunni.

³³ I tanoh hondot: Estaol, Sorea, Asna,

³⁴ Sanoa, En-Ganim, Tapuah, Enam,

³⁵ Jarmut, Adullam, Soko, Aseka,

³⁶ Saaraim, Aditaim, Gedera ampa Gederotaim; sapuluh ompat huta ma ai pakon dusunni.

³⁷ Senam, Hadasa, Migdal-Gad,

³⁸ Dilan, Mispa, Joktel,

³⁹ Lakis, Boskat, Eglon,

⁴⁰ Kabbon, Lakmas, Kitlis,

⁴¹ Gederot, Bet-Dagon, Naama, Makeda; sepuluh onom huta ma ai pakon dusunni.

⁴² Libna, Eter, Asan,

⁴³ Jipta, Asna, Nesib,

⁴⁴ Kegilam Aksib, Meresa; siah huta ma ai pakon dusunni.

⁴⁵ Ekron pakon hutani ampa dusunni,

⁴⁶ hun Ekron das hu laut, ganup na i lambung ni Asdod pakon dusunni.

⁴⁷ Asdod pakon hutani ampa dusunni, Gaza pakon hutani ampa dusunni, das hu bah Masir anjaha laut na bolon parbaloganni.

⁴⁸ I atas dolog: Samir, Jatir, Soko,

⁴⁹ Dana, Kiriath-Sana, ai ma Debir,

⁵⁰ Anab, Estemoa, Anim,

⁵¹ Gosen, Holon, Gilo; sepuluh sada huta ma ai pakon dusunni.

⁵² Arab, Duma, Eshan,

⁵³ Janum, Bet-Tapuah, Apeka,

⁵⁴ Humta, Kiriath-Arba, ai ma Hebron ampa siah huta ma ai pakon dusunni.

⁵⁵ Maon, Karmel, Sip, Juta,

⁵⁶ Jesreel, Jokdeam, Sanoa,

⁵⁷ Kain, Gibeon, Timna, sepuluh huta ma ai pakon dusunni.

⁵⁸ Halhul, Bet-Sur, Gedor,

⁵⁹ Maarath, Bet-Anoth, Eltekon; onom huta ma ai pakon dusunni.

⁶⁰ Kiriath-Baal, ai ma Kiriath-Jearim, pakon Rabba; dua huta ma ai pakon dusunni.

⁶¹ I halimisan: Bet-Araba, Midin, Sekaka,

⁶² Nibsan, Ir, Hamela pakon En-Gedi; onom huta ma ai pakon dusunni.

⁶³ Tapi anggo halak Jebusi na marianan i Jerusalem seng tarusir halak Juda; gabe marianan ma halak Jebusi rap pakon halak Juda i Jerusalem ronsi sadari on.

Parbagianan ni si Manase pakon si Efraim

16 ¹ Parbagianan ni anak ni si Josep mangihutkon ruji-ruji, ai ma: Hun Jordan na i lambung ni Jeriko, hampit hapoltakan ni Bah Jeriko, laho hu halimisan, tangkog hu Jeriko, laho hu dolog dompak Betel.

² Hun Betel laho hu Lus, dob ai mandipar hu tanoh ni halak Arki hu Atarot,

³ anjaha tuad dompak hasundutan hu tanoh ni halak Japleti, das hu tanoh ni Bet-Horon parkehen, dob ai hu Gezer, anjaha marujung i laut.

⁴ Ijalo anak ni si Josep ma parbagiananni, ai ma si Manase pakon si Efraim.

⁵ Ia tanoh ni anak ni si Efraim mar sasapangku, ai ma: Parbalogan ni parbagianan ni sidea hampit hapoltakan: Atarot-Adar das hu Bet-Horon parhuluan,

⁶dob ai laho ma parbalogan ai hu laut; hampit utara ai ma Mikmetat; dob ai hampit hapoltakan marlegot ma parbalogan ai hu Taamat-Silo, anjaha mandipar hunjai hampit hapoltakan hu Janoah,
⁷dob ai hun Janoah tuad hu Atarot pakon hu Naarat, dob ai ihonai Jeriko, anjaha marujung i Jordan.

⁸Hun Tapuah laho ma parbalogan ai dompak hasundutan hu Bah Kana anjaha marujung i laut. Ai ma parbalogan ni marga Efraim mar sasapangku.

⁹Ambah ni ai huta na pinapulig bani halak Efraim, i tongah-tongah ni parbagianan i halak Manase, haganup huta-huta rap pakon dusunni.

¹⁰Tapi seng iusir sidea halak Kansan na marianan i Geser. Jadi marianan ma halak Kanaan i tongah-tongah ni Efraim das ronsi sadari on, tapi hona rodi do sidea.

Parbagianan ni Marga Manase Parhasundutan

17 ¹On ma parbagianan bani marga Manase mangihutkon ruji-ruji, -- ai ia do bunga tubuh ni si Josep: -- Bani si Makir, bunga tubuh ni si Manase, bapa ni si Gilead, ibere Gilead pakon Basan, halani dalahi siimbang munsuh ia.

²Anak ni si Manase na legan pe dapotan do mar sasapangku, ai ma anak ni si Abieser, anak ni si Helek, anak ni Asriel, anak ni si Sekam, anak ni si

Heper pakon anak ni si Semida. Ai ma anak ni si Manase, anak ni si Josep, mar sasapangku.

³ Tapi anggo si Zelofehad anak ni si Heper, anak ni si Gilead, anak ni si Makir, anak ni si Manase, seng dong bani anak, tapi pitah boru do; anjaha on ma goran ni boruni: Si Mahla, Noa, Hogla, Milka pakon Tirza.

⁴ Dob ai laho ma sidea mangadap hu lobei ni Malim Eleasar, pakon hu lobei ni si Josua, anak ni si Nun, pakon hu lobei ni sagala kopala, nini ma, “Itonahkon Jahowa do hubani si Musa, bereon-Ni bennami parbagianan i tengah-tengah ni botounami.” Jadi ibere ma hubani sidea sada parbagianan i tengah-tengah ni sanina ni bapa ni sidea, romban hubani hata ni Jahowa.

⁵ Tapi anggo si Manase dapotan sapuluh parbagianan, sobali tanoh Gilead pakon Basan, na i dipar ni Jordan,

⁶ halani dapotan parbagianan do boru ni si Manase i tengah-tengah ni anakni; anggo tanoh Gilead bani anak ni si Manase na legan do ibere.

⁷ Ia parbalogan ni si Manase ai ma hun Asser das hu Mikmetat, na i hapoltakan ni Sikem; dob ai laho ma parbalogan ai dompak dangsina hu pangisi ni En-Tapuah.

⁸ Masuk hubani si Manase do tanoh Tapuah, tapi anggo Tapuah na bani parbalogan ni Manase masuk bagian ni anak ni si Efraim do.

⁹ Dob ai tuad ma parbalogan ai hu bah Kana, hampit dangsina ni bah ai. Huta-huta na ijai ai, na i tongah-tongah ni huta ni si Manase, masuk hubani Efraim do. Tapi parbalogan ni si Manase mamontas hampit utara ni bah ai anjaha marujung i laut.

¹⁰ Tanoh na hampit dangsina masuk hubani Efraim, anjaha na hampit utara masuk hubani Manase, anjaha laut ai parbaloganni, das hu Asser i utara anjaha hu Isasar i hapoltakan.

¹¹ Masuk hubani si Manase do homa Isasar pakon i Asser: Bet-Sean pakon dusunni, Jibleam pakon dusunni, pangisi ni Dor pakon dusunni, pangisi ni Endor pakon dusunni, pangisi ni Taanak pakon dusunni, pangisi ni Megiddo pakon dusunni; na patoluhon ai tanoh dolog do ai.

¹² Tapi seng tarsoluk halak Manase huta-huta ai, gabe boi torus marianan halak Kanaan i tanoh ai.

¹³ Tapi dob lambin markuasa halak Israel, gabe siparrodi ma ibahen halak Kanaan ai, tapi lang iusir sidea.

¹⁴ Dob ai nini ginompar ni si Josep ma dompak si Josua, “Mase ma pitah sada parbagianan mangihutkon ruji-ruji bereonmu bennami bahen rupeinami, age pe sada bangsa na buei ahu, ai ipasu-pasu Jahowa do hanami ronsi nuan?”

¹⁵ Nini si Josua ma, “Anggo bangsa na buei do nasiam tangkog ma nasiam hu harangan, imas ma

bani nasiam ijai, i tanoh ni halak Peresi pakon Refai, anggo masompittu bani nasiam Dolog Efraim.”

¹⁶ Jadi nini ginompar ni si Josep ma, “Seng sungkup tanoh dolog ai bennami; tapi margareta bosì do haganup halak Kanaan, na marianan i tanoh hornop, ai ma na i Bet-Sean pakon dusunni age na i pamah Jesreel.”

¹⁷ Nini si Josua ma dompak ginompar ni si Josep, hubani Efraim pakon Manase, “Bangsa na buèi do ham, anjaha na banggal do kuasamu, seng dapotan sada parbagianan tumang ham,

¹⁸ tapi dolog ai ma bamu, ai age pe harangan ai, maningon imasonmu do ai, anjaha bamu ma ai das hu pispis sidaohanni. Ai maningon usironmu do sidea, age pe margareta bosì sidea anjaha gogoh.”

Lampolampo ni Naibata i Silo, Parbagi ni Tanoh na Tading ai ijai

18 ¹ Dob ai martumpu ma ganup kuria ni halak Israel hu Silo, anjaha ipajongjong sidea ma ijai lampolampo partumpuan ai, dob tunduk tanoh ai i lobei ni sidea.

² Tapi adong ope pitu marga nari na tading i Israel na so ibagihon ope parbagianan ni sidea.

³ Jadi nini si Josua ma dompak halak Israel, “Sadia dokah on marlansei nasiam laho manoluk tanoh in, na binere ni Jahowa, Naibata ni ompung nasiam, bani nasiam?

⁴ Buat nasiam ma humbani ganup marga tolu halak, ase husuruh sidea manlioti tanoh on, anjaha manurati mangihutkon parbagianan ni sidea bei, dob ai pe ase mulak sidea hu bangku.

⁵ Maningon bagion ni sidea in gabe pitu bagian. Totap do si Juda bani tanohni hampit dangsina, anjaha ginompar ni si Josep totap bani tanohni hampit utara.

⁶ Tapi surati nasiam ma tanoh in gabe pitu bagian, dob ai boan nasiam ma hu bangku, ase hutibalhon ruji-ruji bani nasiam ijon i lobei ni Jahowa Naibatanta.

⁷ Tapi lang marparbagianan halak Levi i tongah-tongah nasiam, ai hamalimon ni Jahowa do parbagianan ni sidea. Ia Gad, Ruben pakon satongah marga Manase domma dapotan parbagianan i dipar ni Jordan hampit hapoltakan, na binere ni si Musa, juakjuak ni Jahowa bani sidea.”

⁸ Jadi bingkak ma dalahi ai, anjaha ihatahon si Josua ma hubani na laho manurati tanoh ai, nini ma, “Laho ma nasiam manlioti tanoh in, surati nasiam ma; dob ai mulak ma nasiam hu bangku, ase hudabuh ruji-ruji bani nasiam ijon, i lobei ni Jahowa i Silo.”

⁹ Dob ai laho ma dalahi ai, ilioti sidea ma tanoh ai, anjaha isurati mangihutkon huta-huta, gabe pitu

bagian hubagas buku; dob ai mulak ma sidea hubani si Josua, hu parsaranan i Silo.

¹⁰ Ase idabuh si Josua ma bani sidea ruji-ruji i Silo i lobei ni Jahowa; ase ijai do ibagi si Josua tanoh ai bani halak Israel mangihutkon parbagianan ni sidea bei.

Parbagianan ni Marga Benjamin

¹¹ Jadi luar ma ruji-ruji ni marga Benjamin mar sasapangku anjaha tanoh mangihutkon ruji-ruji bani sidea, ai ma i holangkolang ni anak ni si Juda pakon si Josep.

¹² Parbalogan ni sidea hampit utara mulai hun Jordan; dob ai tangkog ma parbalogan ai hu urung-urung na i utara ni Jeriko, anjaha tangkog hu dolog dompak hasundutan, anjaha marujung i halimisan Bet-Awen.

¹³ Hunjai mandipar ma parbalogan ai hu Lus, dompak dangsina hu urung-urung ni Lus, ai ma Bet-El; tuad use ma parbalogan ai hu Aterot-Adar, na i dolog, na i dangsina ni Bet-Horon parkehen.

¹⁴ Dob ai marlegot ma parbalogan ai, anjaha marhusor i hasundutan dompak dangsina ni dolog ai, na i dangsina ni Bet-Horon, anjaha marujung i Kiriati-Baal, ai ma Kiriati-Jearim, sada huta ni anak ni si Juda; ai ma pispisni hampit hasundutan.

¹⁵ Anjaha pispisni hampit dangsina mulai hun ujung ni Kiriati-Jearim, hunjai laho ma parbalogan ai hu Epron, hu sumbul ni Bah Nepton;

¹⁶ dob ai tuad ma parbalogan ai hu ujung ni dolog, na i lobei ni habungan Ben-Hinnom, na i habungan ni halak Refaim, hampit utara, tuad use hu habungan Hinnom, i dangsina ni urung-urung Jebusi, dob ai tuad use hu En-Rogel,

¹⁷ dob ai marlegot dompak utara laho hu En-Semes, hunjai laho hu Geliot, ai ma tontang ni tangkogan Adumim; dob ai tuad hu batu ni si Bohan, anak ni si Ruben;

¹⁸ anjaha mandipar hu utara ni urung-urung ni Bet-Araba, dob ai tuad hu Araba.

¹⁹ Dob ai mandipar ma parbalogan ai hu utara ni urung-urung Bet-Hogla, marujung ma parbalogan ai i uruk parutara ni laut Garam, ai ma i ujung pardangsina ni Jordan, ai ma parbalogan pardangsina.

²⁰ Tapi anggo hampit hapoltakan Jordan ai do balogni. Ai ma parbagianan ni halak Benjamin, mangihutkon pangku ni sidea, mangihutkon parbalogan ni sidea inggot.

²¹ Ia huta ni marga Benjamin mar sasapangku ai ma: Jeriko, Bet-Hogla, Emek-Kesis,

²² Bet-Araba, Semaraim, Bet-El,

²³ Awim, Para, Opra,

²⁴ Kapar-Amonai, Ofni pakon Geba. Sapuluh dua huta ma ai pakon dusunni.

²⁵ Gibeon, Rama, Beerot,

²⁶ Mizpa, Kefira, Mosa,

²⁷ Rekem, Jirpeel, Tarala,

²⁸ Sela, Elep pakon Jebus -- ai ma Jerusalem --, Gibeat pakon Kiriath. Sapuluh ompat huta ma ai pakon dusunni. Ai ma parbagianan ni halak Benjamin mar sasapangku.

Parbagianan ni Marga Simeon

19 ¹ Dob ai luar ma ruji-ruji paduahon bani si Simeon, bani marga ni anak ni si Simeon mar sasapangku, anjaha i tongah-tongah ni parbagianan ni si Juda do parbagianan ni sidea ai.

² Na gabe parbagianan ni sidea, ai ma: Berseba, Seba, Malada,

³ Hazar-Sual, Bala, Esem,

⁴ Eltolad, Betul, Horma,

⁵ Ziklag, Bet-Hammakabot, Hazar-Susa,

⁶ Bet-Lebaot pakon Saruhen. Sapuluh tolu huta ma ai pakon dusunni.

⁷ Ain, Rimon, Eter pakon Asan, ompat huta ma ai pakon dusunni;

⁸ ambah ni ai haganup dusun inggot ni huta-huta ai das hu Baalat-Ber, Rama i Tanoh Dangsina. In ma parbagianan ni marga ni anak ni si Simeon mar sasapangku.

⁹ Humbani parbagianan ni anak ni si Juda do parbagianan ni anak ni si Simeon, ai mabolagtu do parbagianan ni anak ni si Juda, jadi dapotan parbagianan ma anak ni si Simeon i tengah-tengah ni parbagianan ni sidea.

Parbagianan ni Marga Sebulon

¹⁰ Dob ai luar ma ruji-ruji patoluhon bani anak ni si Sebulon mar sasapangku, anjaha das hu Sarid parbalogan ni parbagianan ni sidea ai.

¹¹ Dob ai tangkog ma parbalogan ai dompak hasundutan, anjaha torus hu Marala, gabe ihonai Dabeset, dob ai bah tontang ni Jokneam;

¹² hun Sarid laho ma ai dompak hapoltakan das hu parbalogan ni Kislot-Tabor, anjaha luar use hu Daberat, dob ai tangkog use hu Japia.

¹³ Hunjai mandipar dompak hapoltakan hu Gad-Heper, pakon hu Et-Kasim, luar use hu Rimon anjaha marlegot hu Nea;

¹⁴ dob ai marlegot ma parbalogan ai hampit utara hu Hanaton, anjaha marujung i habungan Jipta-El;

¹⁵ dob ai Katat, Nahalal, Simron, Jidala pakon Betlehem. Sapuluh dua huta ma ai pakon dusunni.

¹⁶ Ai ma parbagianan ni anak ni si Sebulon mar sasapangku, huta-hutani ai pakon dusunni.

Parbagianan ni Marga Isasar

¹⁷ Ruji-ruji paompatkon luar hubani anak ni si Isasar mar sasapangku.

¹⁸ Ihamkam tanoh ni sidea ai do: Jesreel, Kesulot, Sunem,

¹⁹ Hafaraim, Sion, Anaharat,

²⁰ Rabbit, Kisjon, Ebez,

²¹ Remet, En-Ganim, En-Hadda pakon Bet-Pases;

²² torus do parbalogan ai hu Tabor Sahazimah, Bet-Semes; anjaha marujung ma parbalogan ai i Jordan. Sapuluh onom huta ma ai pakon dusunni.

²³ In ma parbagianan ni anak ni si Isasar mar sasapangku, hutani pakon dusunni.

Parbagianan ni Marga Asser

²⁴ Dob ai luar ma ruji-ruji palimahon bani marga ni anak ni si Asser mar sasapangku.

²⁵ Ihamkam tanoh ni sidea ai do: Helkat, Hali, Beten, Ahsap,

²⁶ Alamelek, Amad pakon Misal; i hasundutan ihonai do Karmel pakon Sihor-Libnat,

²⁷ dob ai marlegot ma dompak hapoltakan hu Bet-Dagon, ihonai ma Sebulon pakon habungan Jipta-El hampit utara, Bet-Emek pakon Negiel; dob ai torus hampit utara hu Kabul,

²⁸ Ebron, Rehob, Hammon, Kana, das hu Sidon na bolon ai;

²⁹ dob ai marlegot use ma parbalogan ai hu Rama das hu huta Tirus na toguh ai, dob ai marlegot use ma parbalogan ai dompak Hosa anjaha marujung i laut; Aksib,

³⁰ Umma, Afek pakon Rehob; dua puluh dua huta ma ai pakon dusunni.

³¹ Ai ma parbagianan ni marga anak ni si Asser mar sasapangku, huta-hutani pakon dusunni.

Parbagianan ni Marga Naftali

³² Dob ai luar ma ruji-ruji paonomkon bani anak ni si Naftali mar sasapangku.

³³ Anjaha parbaloganni ai ma hun Helep, hun jabi-jabi na i Zanim manlopusi Adami, Nekob pakon Jabneel das hu Lakum anjaha marujung i Jordan;

³⁴ dob ai marlegot ma parbalogan ai dompak hasundutan hu Asnot-Tabor, anjaha luar hunjai hu Hukok, ihonai ma Sebulon hampit dangsina pakon Asser hampit hasundutan, pakon Juda hampit hapoltakan bani Jordan.

³⁵ Ia huta na toguh ai, ai ma: Zidim Zer, Hamat, Rakat, Kinneret,

³⁶ Adama, Rama, Hazer,

³⁷ Kedes, Edrei, En-Hazor,

³⁸ Jiron, Migdal-El, Horem, Bet-Anat pakon Bet-Semes; sapuluh siah huta ma ai pakon dusunni.

³⁹ Ai ma parbagianan ni marga anak ni si Naftali mar sasapangku, huta-hutani pakon dusunni.

Parbagianan ni Marga Dan

⁴⁰ Dob ai luar ma ruji-ruji papituhon bani marga anak ni si Dan mar sasapangku.

⁴¹ Ihamkam tanoh ni sidea ai do: Zora, Estaol, Ir-Semes,

⁴² Salabin, Ayalon, Jitla,

⁴³ Elon, Timnata, Ekron,

⁴⁴ Elteke, Gibeton, Baalat,

⁴⁵ Jihud, Bene-Barak, Gat-Rimon,

⁴⁶ Me-Jarkon, Rakon pakon tanoh tontang ni Japo.

⁴⁷ Tapi masompittu do tanohni ai bani halak Dan; halani ai tangkog ma sidea marporang dompak Lesem itaban anjaha italuhon sidea ma ai bani podang, isoluk sidea ma huta ai anjaha iiani, anjaha gantih ni Lesem, Dan ma goran ni huta ai ibahen sidea, mangihutkon goran si Dan ompung ni sidea.

⁴⁸ Ai ma parbagianan ni marga Dan mar sasapangku, huta-hutani pakon dusunni.

Parbagianan ni si Josua

⁴⁹ Jadi dobkonsi sidea marbagi tanoh ai mangihutkon parbagiananni bei, ibere halak Israel ma parbagianan ni si Josua, anak ni si Nun, i tongah-tongah ni sidea.

⁵⁰ Mangihutkon pangkatahon ni Jahowa ibere sidea ma bani huta na pinindoni, ai ma Timnat-Sera,

na i Dolog Efraim. Jadi ipauli ma huta ai anjaha marianan ijai.

⁵¹ Ai ma parbagianan, na binagihon ni malim Eleasar pakon si Josua, anak ni si Nun, pakon kopala ni marga ni halak Israel mar sasaompung marhitei ruji-ruji i Silo, i lobei ni Jahowa, dohorhon labah ni lampolampo partumpuan ai. Sonai ma pandobkon ni sidea bani parbagi ni tanoh ai.

Huta Haporusan

20 ¹ Dob ai nini Jahowa ma dampak si Josua, ² ase ipatugah hubani halak Israel sonon, “Papulig hanima ma bannima huta haporusan, songon na Hutonahkon hinan hubani si Musa.

³ Ase hujai maporus sibunuhjolma, na so tinuntun barang na so binotoh; gabe huta haporusan ma ai bani nasiam dampak sibalaskon daroh.

⁴ Barang ise na maporus hubani sada humbani huta ai, maningon jongjong ma ia bani babah ni horbangan ni huta ai, mangadu-aduhon parharani hubani pinggol ni pangintuai ni huta ai; dob ai jaloan ni sidea ma ia hu huta ai, anjaha bereonni ianan bani, ase boi ia marianan i lambung ni sidea.

⁵ Anggo ipardakdak sibalaskon daroh ai ia hun pudi, seng bulih ondskonon ni sideajolma sipamunuh ai hubagas tanganni, halani na so tinuntunni do mamunuh hasomanni ai, anjaha lang marmunsuh hinan ia hu bani.

⁶ Maningon marianan i huta ai ma ia lobei, paima jongjong ia i lobei ni rapot paruhuman, paima matei sintua ni malim na marhorja bani panorang ai. Dob ai boi ma mulak sibunuhjolma ai hu hutani pakon hu rumahni, hu huta tinadingkonni ai hinan.”

⁷ Jadi iuras sidea ma Kedes i Galilea, i Dolog Naftali, pakon Sikem i Dolog Efraim, pakon Kiriath-Arba, ai ma Hebron i dolog Juda.

⁸ Anjaha i dipar ni Jordan, dohorhon Jeriko hampit hapoltakan, ipapulig sidea ma Beser i halimisan, bani tanoh na hornop, humbani marga Ruben, pakon Ramot i Gilead humbani marga Gad, pakon Golan i Basan, humbani marga Manase.

⁹ Ai ma huta, na pinapulig bani ganup halak Israel pakon bani halak dagang, na manginsolat i tengah-tengah ni sidea, ase boi maporus hujai sagala sibunuhjolma na so tinuntunni, ase ulang matei ia ibahen sibalaskon daroh paima jongjong ia i lobei ni rapot paruhuman.

Parbagianan ni Halak Levi

21 ¹ Dob ai roh ma kopala ni halak Levi mar sasaompung marayak malim Eleasar pakon si Josua, anak ni si Nun, pakon hampit kopala ni halak Israel mar sasamarga,

² anjaha nini ma dompak sidea i Silo, i tanoh Kanaan, “Domma martonah hinan Jahowa marhitei

si Musa, bereon bennami huta bahen ianan pakon sampalanni hubani pinahannami.

³Jadi ibere halak Israel ma hubani halak Levi humbani parbagianan ni sidea, romban hubani tonah ni Jahowa, ai ma huta-huta pakon sampalanni.

(ay. 4-42 pausih 6:39-66)

⁴Dob ai luar ma ruji-ruji bani ginompar ni si Kahat, gabe dapotan ma halak Levi, ginompar ni si Aron malim ai, marhitei ruji-ruji humbani marga Juda, Simeon pakon Benjamin, sepuluh tolu huta.

⁵Ginompar ni si Kahat na legan ai dapotan marhitei ruji-ruji, humbani ginompar ni marga Efraim, Dan pakon satongah marga Manase, sepuluh huta.

⁶Ginompar ni si Gerson dapotan marhitei ruji-ruji humbani ginompar ni marga Isasar, Asser, Naftali pakon satongah Manase i Basan, sepuluh tolu huta.

⁷Ginompar ni si Merari mar sasapangku dapotan humbani marga Ruben, Gad pakon Sebulon, sepuluh dua huta.

⁸Sonai ma pambere ni halak Israel bani halak Levi huta pakon sampalanni marhitei ruji-ruji, romban hubani na tinonahkon ni Jahowa hubani si Musa.

⁹Jadi ibere sidea ma humbani marga Juda pakon humbani marga Simeon huta-huta on, na ginoranan ni sidea.

¹⁰ Hubani ginompar ni si Aron, ginompar ni si Kahat mar sasapangku, hun tengah-tengah ni halak Levi -- ai hubani sidea do madabuh ruji-ruji na parlobei --

¹¹ ibere sidea ma huta ni si Arba, bapa ni si Enak, ai ma Hebron, i dolog Juda pakon sampalanni inggot.

¹² Tapi anggo ladang ni huta ai pakon dusunni hubani si Kaleb, anak ni si Jepunne do ibere bahen parbagiananni.

¹³ Hubani ginompar ni Malim Aron ibere sidea do Hebron, huta haporusan ni sibunuhjolma ampa sampalanni, Libna ampa sampalanni,

¹⁴ Jatir pakon sampalanni, Estemoa ampa sampalanni,

¹⁵ Holon pakon sampalanni, Debir ampa sampalanni,

¹⁶ Ain ampa sampalanni, Juta ampa sampalanni, pakon Bet-Semes ampa sampalanni; siah huta do ai humbani marga na dua ai.

¹⁷ Humbani marga Benjamin: Gibeon ampa sampalanni, Geba ampa sampalanni,

¹⁸ Anatot ampa sampalanni pakon Almon ampa sampalanni, ompat huta do ai.

¹⁹ Ganupan huta ni malim, ai ma ginompar ni si Aron, sapuluh tolu huta do ampa sampalanni.

²⁰ Ginompar ni si Kahat mar sasapangku, ai ma halak Levi na tading ai humbani ginompar ni si Kahat dapotan huta mangihutkon ruji-ruji humbani marga Efraim.

²¹ Ibere do hubani sidea Sikem, huta haporusan ni sibunuh jolma pakon sampalanni i Dolog Efraim, Geser ampa sampalanni,

²² Kibsaim ampa sampalanni pakon Bet-Horon ampa sampalanni; ompat huta.

²³ Humbani marga Dan: Elteke ampa sampalanni, Gibeton ampa sampalanni,

²⁴ Ajalon ampa sampalanni, Gat-Rimon ampa sampalanni; ompat huta.

²⁵ Humbani na satongah marga Manase: Taanak ampa sampalanni, Jibleam ampa sampalanni, dua huta.

²⁶ Ganup huta ai na bani ginompar ni si Kahat na tading ai, sapuluh do ampa sampalanni.

²⁷ Ginompar ni si Gerson humbani halak Levi mar sasapangku dapotan humbani satongah marga Manase huta haporusan ni sibunuh jolma, ai ma Golan i Basan ampa sampalanni, pakon Beestera ampa sampalanni, dua huta.

²⁸ Humbani marga Isasar: Kisjon ampa sampalanni, Daberat ampa sampalanni.

²⁹ Jarmut ampa sampalanni, En-Ganim ampa sampalanni; ompat huta.

³⁰ Humbani marga Asser: Misal ampa sampalanni, Abdon ampa sampalanni,

³¹ Helkat ampa sampalanni, pakon Rehob ampa sampalanni; ompat huta.

³² Humbani marga Naftali huta haporusan ni sibunuh jolma, ai ma Kedes i Galilea ampa sampalanni, Hamot-Dor ampa sampalanni, pakon Kartan ampa sampalanni; tolu huta.

³³ Ganup huta ai bani ginompar ni si Gersom mar sasapangku sapuluh tolu huta do ampa sampalanni.

³⁴ Ginompar ni si Merari mar sasapangku, halak Levi na tading ai, dapotan humbani marga Sebulon: Jokneam ampa sampalanni, Karta ampa sampalanni,

³⁵ Dimna ampa sampalanni pakon Nahalal ampa sampalanni; ompat huta.

³⁶ Humbani marga Ruben: Beser ampa sampalanni, Jahas ampa sampalanni,

³⁷ Kedemot ampa sampalanni, pakon Mefaat ampa sampalanni; ompat huta.

³⁸ Humbani marga Gad huta haporusan ni sibunuh jolma: Ramot i Gilead ampa sampalanni, Mahanaim ampa sampalanni,

³⁹ Hesbon ampa sampalanni, Jaeser ampa sampalanni; ganup huta ai ompat.

⁴⁰ Ganup huta ai na bani ginompar ni si Merari mar sasapangku, na tading humbani halak Levi mar sasapangku, sapuluh dua huta do mangihutkon ruji-ruji ni sidea.

⁴¹ Jadi ganup huta ni halak Levi i tongah-tongah ni parbagianan ni halak Israel, ompat puluh ualuh huta do ampa sampalanni.

⁴² Ganup huta-huta ai adong sampalanni inggot; sonai do bani ganup huta ai.

Parsaud ni Ganup Bagah-bagah

⁴³ Jadi ibere Jahowa ma hubani halak Israel ganup tanoh, na binulawankon-Ni bereon-Ni hubani ompung ni sidea; ase dob italuhon sidea tanoh ai, marianan ma sidea ijai.

⁴⁴ Ipasonang Jahowa ma sidea inggot, romban hubani ganup na binulawankon-Ni hubani ompung ni sidea, anjaha seng tahan munsuh ni sidea age sada i lobei ni sidea; iondoskon Jahowa do ganup munsuh ni sidea ai hubagas tangan ni sidea.

⁴⁵ Seng dong na tartading age sada humbani ganup hata na madear, na ipatugah Jahowa hubani ginompar ni Israel; haganup do saud.

Parmulak ni na Tongah Tolu Marga na hampit Hapoltakan ai

22 ¹ Ijia idio si Josua ma halak Ruben, Gad pakon satongah marga Manase,

² anjaha nini ma dompak sidea, “Domma ihorjahon nasiam haganup na tinonahkon ni si Musa, juakjuak ni Jahowa hubani nasiam, anjaha itangihon nasiam do ganup sorangku pasal ganup na huhatahon ai bani nasiam.

³ Seng itadingkon nasiam sanina nasiam, domma pala na sain dokahni ronsi sadari on, tapi bujur do

iramotkon nasiam ganup tonah ni Jahowa, Naibata nasiam.

⁴ Domma marhasonangan nuan sanina nasiam ibahen Jahowa Naibata nasiam, romban hubani bagah-bagah-Ni hubani sidea; on pe mulak ma nasiam hu lampolampo nasiam, hu tanoh parbagianan nasiam, na binere ni si Musa, juakjuak ni Jahowa hubani nasiam i dipar ni Bah Jordan.

⁵ Bujur tumang ma nasiam manramotkon segala parentah pakon titah, na tinonahkon ni si Musa, juakjuak ni Jahowa hubani nasiam, ai ma mangkaholongi Jahowa Naibata nasiam, pakon marparlahou bani ganup dalan-Ni anjaha manramotkon tonah-Ni, pakon marsijoloman hu Bani anjaha mambalosi Si humbani gok ni uhur ampa gok ni tonduy nasiam.”

⁶ Dob ai ipasu-pasu si Josua ma sidea, isuruh ma sidea laho marayak lampolampo ni sidea.

⁷ Tapi anggo hubani na satongah marga Manase, domma ibere si Musa parbagianan i Basan, anjaha hubani na satongah nari ibere si Josua rap pakon saninani i hasundutan ni Jordan, hampit laut. Jadi sanggah na sinuruh ni si Josua sidea laho, anjaha ipasu-pasu sidea,

⁸ nini ma dompak sidea, “Mulak ma nasiam hu rumah nasiam mararta na buei, marpinahan na bahat tumang, marpirak, maromas, martombaga, marbosi pakon marhiou na buei tumang; bagi

nasiam ma taban-taban humbani munsuh nasiam rap pakon sanina nasiam.”

Anjapanjap na i Lambung ni Jordan

⁹ Dob ai mulak ma ginompar ni si Ruben, Gad pakon satongah marga Manase, manadingkon halak Israel hun Silo, na i tanoh Kanaan, laho hu tanoh Gilead, marayak tanoh parbagianan ni sidea, na dob ondos bani sidea hinan, romban hubani hata ni Jahowa marhitei si Musa.

¹⁰ Jadi dob das sidea hu nagori dohorhon Jordan na i tanoh Kanaan, ipauli ginompar ni si Ruben, si Gad pakon satongah marga Manase ma ijai sada anjapanjap i topi ni Jordan; banggal tumang.

¹¹ Dob ai tarbogei ma hubani halak Israel, “Tonggor ma, domma ipauli ginompar ni si Ruben, si Gad pakon satongah marga Manase sada anjapanjap tontang ni tanoh Kanaan i nagori dohorhon Jordan, hampir dipar parbagianan ni halak Israel.”

¹² Jadi dob ibogei halak Israel ai, martumpu ma ganup kuria ni halak Israel hu Silo, laho marporang dompak sidea.

¹³ Dob ai isuruh halak Israel ma marayak ginompar ni si Ruben, si Gad pakon satongah marga Manase hu tanoh Gilead, si Pinehas, anak ni Malim Eleasar, ¹⁴ pakon sapuluh kopala hasomanni, sada kopala humbani ganup marga Israel mar sasaompung,

ganup sidea kopala ni sada marga i tongah-tongah ni halak Israel marribu-ribu.

¹⁵ Jadi dob das sidea bani ginompar ni si Ruben, Gad pakon satongah marga Manase i tanoh Gilead, nini sidea ma dompak sidea:

¹⁶ Sonon do hata ni ganup kuria ni Jahowa, “Pangoseion aha do in, na binahen nasiam dompak Naibata ni Israel, ai ma na marbalik nasiam sadari on humbani Jahowa, marhitei na pinajongjong nasiam bani nasiam sada anjapanjap laho manggeori dompak Jahowa?

¹⁷ Maotiktu ope gatni banta hajahaton na i Peor, na so taruras ope hita hunjai ronsi sadari on, gabe masa sampar bani kuria ni Jahowa?

¹⁸ Anjaha sihol marbalik ope nasiam sadari on humbani Jahowa? Anggo manggeori nasiam sadari on dompak Jahowa, manringis ma la patar bani ganup kuria ni Israel.

¹⁹ Tapi anggo butak tanoh parbagianan nasiam in, roh ma nasiam mandipar hu tanoh parbagianan ni Jahowa, hajongjongan ni lampolampo ni Jahowa, ase dapotan parbagianan nasiam i tongah-tongah hami; tapi ulang ma manggeori nasiam dompak Jahowa, sonai homa dompak hanami, marhitei na ipauli nasiam bani nasiam sada anjapanjap, legan humbani anjapanjap ni Jahowa Naibatanta in.

²⁰ Ai lang mangosei do si Akhan anak ni si Sera marhitei ugas sisiaponkon, gabe sogop ringis-Ni

bani ganup kuria ni Israel? Anjaha seng pitahsi matei halani hajahatonni ai.”

²¹ Jadi nini ginompar ni si Ruben, si Gad pakon satongah marga Manase ma mambalosi kopala ni Israel marribu-ribu,

²² “Naibata, Naibata do Jahowa! Naibata, Naibata do Jahowa! Ibotoh do, anjaha Israel pe botohonni do! Anggo na laho manggeori do hanami dompak Jahowa, barang sihol marbalik, ulang ma iurupi Jahowa hanami sadari on.

²³ Anggo na sihol marbalik humbani Jahowa do, ase ipauli hanami sada anjapanjap bennami, barang anggo na sihol manggalangkon galangan situtungon barang galangan sipanganon barang galangan pardameian hanami i atasni, Jahowa ma na mambalaskon ai bennami.

²⁴ Lang, tapi ibahen hanami do on halani biar bani panorang na sihol roh. Ra hatahonon ni ginompar nasiam do bani ginompar nami, ‘Aha do parsauran nasiam bani Jahowa Naibata ni Israel?

²⁵ Bah Jordan on do parbalogan na binahen ni Jahowa parholangannami bani nasiam, alo ginompar ni Ruben pakon Gad; seng parrupe anggo nasiam bani Jahowa.’ Gabe langlangan ni ginompar nasiam ma ginomparnami marhabiaran bani Jahowa.

²⁶ Halani ai ihatahon hanami ma: Pauli hita ma banta sada anjapanjap, seng bahen panggalangan ni galangan situtungan, barang galangan sisayaton, ²⁷ tapi bahen saksi i tongah-tongah nami pakon nasiam, pakon i tongah-tongah ni ginomparta magira, paboa na masuk hanami marhorja i lobei ni Jahowa marhitei galangan situtungan, sisayaton pakon hatarimakasihon nami; ase ulang ihatahon ginompar nasiam magira hubani ginomparnami, “Seng parrupei nasiam bani Jahowa!

²⁸ Anjaha ipingkiri hanami ma, anggo sonai ihatahon sidea magira bennami pakon bani ginomparnami, gabe hatahononnam i ma, ‘Tonggor nasiam ma usihan ni anjapanjap ni Jahowa na dob binahen ni ompungnami, sedo bahen panggalangan ni galangan situtungan barang galangan sisayaton, tapi bahen saksi do i tongah-tongahta.’

²⁹ Daoh ma in hun bennami, anggo manggeori hanami dompak Jahowa, barang marbalik humbani Jahowa sadari on, marhitei na paulihon sada anjapanjap bahen panggalangan ni galangan situtungan, galangan sipanganon barang sisayaton pe, legan humbani anjapanjap ni Jahowa, Naibatanta in, na jongjong i lobei ni lampolampo ni ai.”

³⁰ Jadi dob ibogei malim Pinehas pakon kopala ni kuria ai pakon kopala ni Israel marribu-ribu na rap

pakonsi, hata na hinatahon ni ginompar ni si Ruben, Gad pakon Manase ai, gabe dear ma uhur ni sidea mambogeisi.

³¹ Dob ai nini si Pinehas, anak ni malim Eleasar ma dompak ginompar ni si Ruben, Gad pakon Manase, “Sadari on ma ibotoh hita, paboa i tengah-tongahta do Jahowa, halani seng sihol mosei nasiam dompak Jahowa marhitei humbani pambahenan on. Nasiam do na paluahkon halak Israel sadari on humbani tangan ni Jahowa.”

³² Dob ai mulak ma si Pinehas, anak ni si Eleasar pakon kopala-kopala ai humbani ginompar ni si Ruben pakon si Gad, mulak hun tanoh Gilead, hu tanoh Kanaan, marayak halak Israel, laho mamboan barita ai bani sidea.

³³ Jadi malas tumang ma uhur ni halak Israel mambogei barita ai, ipuji halak Israel ma Naibata, anjaha seng be isura uhur ni sidea laho tangkog mamorang sidea, laho mangagou tanoh, na niianan ni ginompar ni si Ruben pakon si Gad.

³⁴ Dob ai ibahen ginompar ni si Ruben pakon si Gad ma goran ni anjapanjap ai: Saksi; ai nini sidea do, “Gabe saksi ma on i tengah-tongahta, paboa Jahowa do Naibata.”

**Ipatumpu si Josua Bangsa ai, laho
Marhata Partadingan hubani Sidea**

23 ¹Dob ai bani labanglabang ni ari, dob marhasonangan halak Israel ibahen Jahowa dompak ganup munsuh ni sidea inggot, anjaha dob sayur matua si Josua,

²jadi idilo si Josua ma ganup Israel, pangintuaini pakon kopala-kopalani, panguhumni pakon gamotni, nini ma dompak sidea, “Domma sayur matua ahu,

³anjaha domma iidah nasiam sagala na binahen ni Jahowa Naibata nasiam hubani ganup bangsa on mangkopkop nasiam, ai Jahowa Naibata nasiam sandiri do marporang mangkopkop nasiam.

⁴Tonggor ma, domma hubagihon bani nasiam bangsa na teba ai bahen parbagianan ni Israel mar sasamarga, hun Jordan nari -- rap pakon haganup bangsa na dob husiapkon -- das hu laut na bolag ai i hasundutan.

⁵Anjaha Jahowa Naibata nasiam do sihol mardakdak sidea i lobei nasiam, anjaha la do na sihol mangusir hun lobei nasiam, ase nasiam manean tanoh ni sidea, romban hubani бага-bagah ni Jahowa Naibata nasiam hubani nasiam.

⁶Antong totap tumang ma uhur nasiam manramotkon anjaha mangkorjahon haganup na tarsurat ibagas buku titah ni si Musa, ase

ulang manlembang nasiam hu siamun barang hu sambilou,

⁷ase ulang saor nasiam bani bangsa na tading i tengah-tengah nasiam, barang padilo-diloon nasiam goran ni naibata ni sidea, barang marbija marhiteihon ai, barang balosan nasiam ai, barang marsombah nasiam hujai;

⁸tapi marsijoloman hubani Jahowa Naibata nasiam ma nasiam, songon na binahen nasiam das hubani sadari on.

⁹Ai domma iusir Jahowa hun lobei nasiam bangsa na bolon anjaha na markuasa, anjaha sahalak pe lang na tahan jongjong i lobei nasiam das hubani sadari on.

¹⁰Sahalak tumang humbani nasiam mardakdak na saribu halak, ai Jahowa Naibata nasiam sandiri do marporang mangkopkop nasiam, songon na dob pinarbagah-Ni hinan.

¹¹Jaga tumang ma nasiam bani diri nasiam laho mangkaholongi Jahowa Naibata nasiam;

¹²ai anggo marbalik nasiam, anjaha longkot uhur nasiam bani tading-tadingan ni bangsa, na tading i tengah-tengah nasiam, anjaha marsibuatan boru nasiam, anjaha marsaor nasiam pakon sidea anjaha sidea pakon nasiam,

¹³botoh nasiam ma, seng be nunuton ni Jahowa Naibata nasiam mangusir bangsa on hun lobei nasiam; tapi sidea ma gabe siding ampa tirangkap,

gabe lonsing-lonsing i lambung nasiam, gabe duri ibagas mata nasiam, paima siap nasiam hun tanoh na madear on, na dob binere ni Jahowa Naibata nasiam bani nasiam.

¹⁴ Tonggor ma, na laho ma ahu marayak dalan parsadaan ni ganup tanoh on, anjaha botoh nasiam ma humbani sagala uhur pakon tonduy nasiam, na so adong tading age sada hata humbani haganup hata na madear in, na pinarbagah ni Jahowa Naibata nasiam bani nasiam; haganup do saud bani nasiam, seng dong tading age sada hata hunjai.

¹⁵ Tapi songon na sogop bani nasiam haganup hata na madear, na pinarbagah ni Jahowa Naibata nasiam bani nasiam, sonai ma pasogopon ni Jahowa bani nasiam haganupan hamagouan, paima siap tumang nasiam bahenon-Ni hun tanoh na madear on, na dob binere ni Jahowa Naibata nasiam bani nasiam,

¹⁶ anggo ilaosi nasiam padan ni Jahowa Naibata nasiam, na dob tinonahkon-Ni bani nasiam, gabe laho nasiam mambalosi naibata na legan, anjaha marsombah nasiam hujai, jadi gajag ma ringis ni Jahowa bani nasiam, anjaha podas ma nasiam agouon-Ni hun tanoh na madear, na dob binerehon-Ni bani nasiam.”

Parpadanan na Pinabayu i Sikem

24¹ Jadi ipatumpu si Josua ma ganup marga ni Israel hu Sikem, anjaha idilo ma pangintuai ni Israel, kopalani, panguhumni pakon gamotni. Dob jongjong sidea i lobei ni Naibata,

² nini si Josua ma dompak ganup bangsa ai, “Sonon do hata ni Jahowa Naibata ni Israel: I dipar ni Bah Eprat do na ijia marianan ompungnima, si Tara bapa ni si Abraham pakon bapa ni si Nahor, anjaha mambalosi naibata na legan do sidea.

³ Jadi Hubuat ma ompungnima si Abraham hun dipar ni bah ai, ase mardalani ia i sab tanoh Kanaan, anjaha Hupabuei ginomparni. Hubere do bani si Isak,

⁴ anjaha hubani si Isak Hubere do si Jakob pakon si Esau. Anjaha hubani si Esau Hubere do Dolok Seir bahen parbagiananni; tapi tuad hu Masir do anggo si Jakob pakon anakni.

⁵ Dob ai Husuruh ma si Musa pakon si Aron mamapai Masir songon na dob Hubahen ai i tengah-tongahni, dob ai Hupaluar ma hanima.

⁶ Jadi Hupaluar ma ompungnima hun Masir; anjaha das ma hanima hu laut; ipardakdak halak Masir ma ompungnima marhitei garetu pakon siajak huda das hu laut Sigerger.

⁷ Anjaha dob mandoraki sidea hubani Jahowa, gabe ibahen ma hagolapan i holangkolangnima pakon

halak Masir; iparoh ma laut ai hubani sidea anjaha ilangkopi ma sidea; anjaha iidah matanima do na Hubahen ai hubani halak Masir; dob ai hundokah do hanima marianan i halimisan.

⁸Dob ai Huboan ma hanima hu tanoh ni halak Amori, na marianan i dipar ni Jordan; anjaha dob iporang sidea hanima, Huondoskon ma sidea hubagas tangannima, isoluk hanima ma tanoh ni sidea, anjaha Husiapkon ma sidea i lobeinima.

⁹Dob ai roh ma si Balak anak ni si Zippor, raja hun Moab marporang dompak Israel, isuruh ma suruhanni mandilo si Bileam, anak ni si Beor laho mamapai hanima,

¹⁰tapi seng ra Ahu patangi-tangi si Bileam; halani ai hanima ma ipasu-pasu anjaha Ahu paluahkon hanima hun tanganni.

¹¹Jadi dob idipari hanima Jordan, anjaha das hanima hu Jeriko, gabe marmunsuh ma dompak hanima pangisi ni Jeriko, halak Amori, Peresi; Kanaan, Het, Girgasi, Hewi pakon Jebusi; jadi Huondoskon ma sidea hubagas tangannima.

¹²Dob ai Hutongos ma ualtong i lobeinima mangusir sidea i lobeinima, na dua raja ni halak Amori ai sedo marhitei podang barang panah.

¹³Hubere ma bannima sada tanoh, na so hinangalutkonnima, pakon huta na so pinaulinima, ase hanima marianan ijai; anjaha ipangan hanima

do humbani pohon anggur pakon hayu jetun na so sinuannima.

¹⁴ On pe sai habiari nasiam ma Jahowa, anjaha totap ma uhur nasiam mambalosi-Si ibagas putih ni uhur pakon hasintongan; paholang nasiam ma naibata na legan, na binalosan ni ompung nasiam i dipar ni Eprat pakon i Masir, anjaha balosi nasiam ma Jahowa.

¹⁵ Tapi anggo seng marosuh nasiam mambalosi Jahowa, pilih nasiam ma sadari on barang ise sibalosan nasiam, barang naibata na legan na binalosan ni ompung nasiam i dipar ni Bah Eprat, barang naibata ni halak Amori, simada tanoh, na niianan ni nasiam. Tapi anggo ahu pakon hasomanku sarumah, Jahowa do sibalosannami.

¹⁶ Dob ai nini bangsa ai ma mambalosi, “Daoh ma ai hun bennami, anggo mintor tadingkonon nami Jahowa, laho mambalosi naibata na legan;

¹⁷ ai Jahowa Naibatanta do na mangarahkon hita pakon ompungta luar hun tanoh Masir, hun rumah parjabolonan, anjaha na mambahen i lobeita tanda na bolon in, anjaha na manramotkon hita bani ganup dalan na idalani hita, pakon i tongah-tongah ni ganup bangsa na binontasta ai;

¹⁸ anjaha iusir Jahowa do ganup bangsa pakon halak Amori na marianan i tanoh in hun lobeita; halani ai hanami pe Jahowa do sihol balosannami, ai la do Naibatanta.”

¹⁹ Dob ai nini si Josua ma dompak bangsa ai, “Seng tarbahen nasiam mambalosi Jahowa, ai Naibata na pansing do la, Naibata parsimburu, seng marpangulaki uhur-Ni mangidah panlanggaron nasiam pakon mangidah nasiam.

²⁰ Anggo itadingkon nasiam Jahowa anjaha ibalosi nasiam naibata na legan, gabe jadi marbalik ma la mamapai nasiam, siap tumang nasiam ibahen, romban hubani na madear na binahe-Ni bani nasiam.

²¹ Dob ai nini bangsa ai ma dompak si Josua, “Lang! Jahowa do sibalosannami.”

²² Dob ai nini si Josua ma dompak bangsa ai, “Nasiam sandiri do saksi dompak nasiam, paboa na dob ipilih nasiam Jahowa sibalosan nasiam.” Jadi nini sidea ma, “Hanami ma tongon saksi.”

²³ On pe ambungkon nasiam ma naibata na legan na i tengah-tengah nasiam, anjaha paunduk nasiam ma uhur nasiam bani Jahowa Naibata ni Israel.

²⁴ Jadi nini bangsa ia ma dompak si Josua, “Jahowa Naibatanta do sihol balosannami, anjaha sorani do sihol tangihononnamami.”

²⁵ Dob ai ibahen si Josua ma sadarini ai parpadanan bani bangsa ai, anjaha ipatotap ma ai bahen titah pakon aturan i Sikem.

²⁶ Dob ai isuratkon si Josua ma hata ai hubagas buku titah ni Naibata; ibuat ma sada batu na bolon,

anjaha ipajongjong ma ijai, i toruh ni hayu ara, na i lambung ni ianan na susi bani Jahowa.

²⁷ Dob ai nini si Josua ma dompak ganup bangsa ai, “Tonggor ma, batu on ma gabe saksi banta, ai domma ibogei ganup hata ni Jahowa, na pinatugahni banta; gabe saksi ma in dompak nasiam, ase ulang iparnalang nasiam Naibata nasiam.”

²⁸ Dob ai isuruh si Josua ma bangsa ai mulak bani ganup parbagiananni bei.

Parmatei ni si Josua pakon si Eleasar Itanom Holi-holi ni si Josep

²⁹ Dob salpu ganupan ai, matei ma si Josua, anak ni si Nun, juakjuak ni Jahowa, marumur saratus sapuluh tahun.

³⁰ Itanom sidea ma ia ibagas parbagiananni sandiri, i Timnat-Sera, na i Dolog Efraim, hampit utara ni Dolog Gaas.

³¹ Sai ibalosi halak Israel do Jahowa sadokah manggoluh si Josua pakon sadokah manggoluh pangintuai, na dokah manggoluh ope i pudu ni si Josua, sagala na mambotoh haganup pambahenan ni Jahowa, na binahe-Ni hubani Israel.

³² Ia holi-holi ni si Josep, na binoan ni halak Israel hun Masir, itanom sidea ma ai i Sikem, bani tanoh parbagianan, na binoli ni si Jakob humbani anak ni si Hemor, bapa ni si Sikem, mararga saratus Kesita;

anjaha gabe parbagianan ni ginompar ni si Josep ma ai.

³³ Si Eleasar, anak ni si Aron pe matei ma, anjaha itanom sidea ma ia i Gibeas, i huta ni si Pinehas, anakni ai, na binereni bani i Dolog Efraim.

Panguhum

Hamonangan ni Marga Juda pakon Simeon Mangimbang Halak Kanaan

1 ¹ Jadi dob matei si Josua, isungkun halak Israel ma Jahowa, “Ise ma hun bennami parlobei tangkog marporang dompak halak Kanaan?”

² Jadi nini Jahowa ma, “Halak Juda ma tangkog; tonggor ma, domma Hubere tanoh in hubagas tanganni.”

³ Dob ai nini si Juda ma dompak si Simeon, abangni ai, “Tangkog ma ho rapkon ahu hu tanoh parbagiananku, ase marporang hita dompak halak Kanaan, ase huhasomani homa ho laho hu tanoh parbagiananmu.” Jadi laho ma si Simeon rap pakonsi.

⁴ Dob ai tangkog ma halak Juda; jadi iondoskon Jahowa ma halak Kanaan pakon Peresi hubagas tangan ni sidea, gabe iraseihon sidea ma sapuluh ribu halak i Besek.

⁵ Jumpah sidea ma si Adoni-Besek i Besek, jadi iporang sidea ma ia, anjaha italuhon ma halak Kanaan pakon Peresi.

⁶ Maporus ma si Adoni-Besek; ipardakdak sidea ma ia anjaha jumpah, gabe irotap ma ompu-ompu ni tanganni pakon ompu-ompu ni naheini.

⁷ Jadi nini si Adoni-Besek ma, “Pitu puluh raja, na dob nirotap ompu-ompu ni tanganni pakon ompu-ompu ni naheini manjomputi na maperper i toruh ni mejangku; songon na hubahen ai, sonai do ibalaskon Jahowa hu bangku. Iboan sidea ma ia hu Jerusalem anjaha matei ijai.”

⁸ Dob ai marporang ma Juda dompak Jerusalem, italuhon ma ai anjaha iraseihon marhitei podang, anjaha isurbuy ma huta ai.

⁹ Dob ai tuad ma halak Juda, laho marporang dompak halak Kanaan, na marianan i dolog, i tanoh dangsina pakon i tanoh bornoh.

(ay. 10-15 pausih Jos. 15:13-19)

¹⁰ Dob ai bingkat ma halak Juda dompak halak Kanaan, na marianan i Hebron (*Kiriat-Arba do goran ni Hebron ai sapari*), gabe italuhon sidea ma si Sesai, si Ahiman pakon si Talmai.

¹¹ Hunjai bingkat ma sidea hu pangisi ni Debir; ia goran ni Debir sapari Kiriat-Seper do.

¹² Jadi nini si Kaleb ma, “Barang ise na manaluhon Kiriat-Seper anjaha itaban, hubere ma hubani si Aksa, borungkai bahen parinangonni.”

¹³ Jadi itaban si Otniel, anak ni si Kenas, anggi ni si Kaleb ma huta ai, gabe ibere ma hubani si Aksa boruni ai bahen parinangonni.

¹⁴ Sanggah na masuk ai ia, ielek-elek ma ia mangindo juma sanlambar humbani bapani; turun ma ia hun halodeni, jadi nini si Kaleb ma, “Aha bam?”

¹⁵ Jadi nini ma bani, “Bere ham ma bangku pasu-pasu sada; domma ibere ham bangku tanoh dorging, bere ham ma homa bangku bah tubuh.” Jadi ibere si Kaleb ma bani bah tubuh i huluan pakon i kehen.

¹⁶ Dob ai tangkog ma anak ni si Keni, tulang ni si Musa, hun huta parkurmaan rap pakon ginompar ni si Juda hu halimisan Juda, na i tanoh dangsina i lambung ni Arad; bungkas ma sidea, lanjar marianan i tongah-tongah ni bangsani ai.

¹⁷ Dob ai bingkat ma Juda rap pakon si Simeon abangni ai, gabe italuhon sidea ma halak Kanaan, na marianan i Zefat, siap tumang do sidea ibahen. Jadi ibahen ma goran ni huta ai Horma.

¹⁸ Itaban Juda do homa Gaza ampa nagorini, Askalon ampa nagorini, pakon Ekron ampa nagorini.

¹⁹ Sai ihasomani Jahowa do Juda, gabe italuhon ma tanoh dolog ai, tapi seng tarusirsi na marianan i tanoh hornop, ai margareta bosi do sidea.

²⁰ Ibere sidea ma Hebron hubani si Kaleb, songon na tinonahkon ni si Musa hinan; jadi iusir ma hunjai anak ni si Enak na tolu ai.

²¹ Tapi seng iusir ginompar ni si Benjamin halak Jebusi, na marianan i Jerusalem; jadi marianan i Jerusalem do halak Jebusi ai rap pakon ginompar ni si Benjamin ronsi sadari on.

Ginompar ni si Josep Manaluhon Betel

²² Tangkog homa do ginompar ni si Josep dompak Betel, anjaha Jahowa do hasoman ni sidea.

²³ Dob ai ihatahon ginompar ni si Josep ma mangkahapi Betel. Lus do goran ni huta ai sapari.

²⁴ Jadi ididah parkahap ai ma sada halak luar hun huta ai, gabe ihatahon sidea ma hu bani, “Mahua patuduhkon ma bennami dalan hu huta in, mardear layak pe hanami bamu.”

²⁵ Jadi ipatuduhkon ma bani sidea dalan hu huta ai, gabe isiapkon sidea ma huta ai marhitei podang, tapi anggo dalahi ai pakon hasomanni saompung ipaluah do ganup.

²⁶ Bungkas ma dalahi ai hu tanoh ni halak Heti; ipungkah ma sada huta, anjaha ibahen ma goranni Lus, lanjar ai do goranni ronsi sadari on.

Huta ni Halak Kanaan na So Ipatunduk

²⁷ Tapi seng ibuhar si Manase anggo par Betsean ampa dusunni, Taanak pakon dusunni, Dor ampa dusunni, Jibleam ampa dusunni pakon Megiddo ampa dusunni, ai ipahobal halak Kanaan do uhurni marianan i tanoh ai.

²⁸ Tapi dob lambin markuasa Israel, ibahen ma halak Kanaan ai marrodi, seng onga homa buhar sidea.

²⁹ Efraim pe seng ibuhar halak Kanaan, na marianan i Geser, lanjar marianan i tongah-tongah ni sidea do halak Kanaan ai, i Geser.

³⁰ Sebulon pe seng ibuhar par Kitron pakon par Nahalol, lanjar marianan i tongah-tongah ni sidea do halak Kanaan ai, tapi marrodi.

³¹ Asser pe seng ibuhar par Akko, Sidon, Ahlab, Aksib, Helba, Apik pakon Rehob;

³² lanjar marianan do halak Asser i tongah-tongah ni halak Kanaan, ai ma partanoh ai hinan, ai seng hona buhar sidea.

³³ Naftali pe seng ibuhar par Bet-Semes pakon par Bet-Anak, lanjar marianan do i tongah-tongahni halak Kanaan, ai ma partanoh ai hinan, tapi manrodi do par Bet-Semes pakon par Bet-Anak ai bani sidea.

³⁴ Ionjar-onjar halak Amori do ginompar ni si Dan hu dolog, seng ipalopas sidea tuad hu tanoh hanopan.

³⁵ Igogohkon halak Amori ma marianan i Dolog Heres, i Ayalon pakon Salabin; tapi gogoh do tong tangan ni ginompar ni si Josep mangodohkon sidea, gabe hona rodi sidea ibahen.

³⁶ Ia parbalogan ni halak Amori, ai ma hun tangkogan Akrabim das hu Sela torus hu huluan.

Pinsang-pinsang ni Malekat ni Jahowa

2¹ Dob ai tangkog ma malekat ni Jahowa hun Gilgal hu Bokim. Nini ma, “Domma Huarahkon nasiam luar hun Masir, anjaha domma Hupadas nasiam hu tanoh, na Hubulawankon bani ompung nasiam. Anjaha Huhatahon, ‘Seng anjai ubahon-Ku padan na Hubahen ai pakon nasiam ronsi sadokah ni dokahni,

² anjaha nasiam pe, seng bulih mambahen padan pakon parnagori on, maningon parsedaon nasiam do anjapanjap ni sidea.’ Tapi seng itangihon nasiam parentah-Ku. Aha do na binahen nasiam on?

³ Halani ai Huhatahon ma bani nasiam, ‘Seng usiron-Ku sidea hun lobei nasiam, gabe imbang ma sidea bani nasiam, anjaha naibata ni sidea ai gabe tirangkap ma bani nasiam.’”

⁴ Jadi dob ihatahon malekat ni Jahowa hata ai bani ganup halak Israel, ipagogoh bangsa ai ma sorani tangis-tangis.

⁵ Dob ai ibahen sidea ma goran ni ianan ai Bokim, anjaha manggalang ma sidea bani Naibata ijai.

Haadongon ni Israel Sadokah Panorang ni Panguhum

⁶ Dob ai isuruh si Josua ma mulak bangsa ai, gabe laho ma halak Israel ganup hu parbagiananni bei, laho manean tanoh ai.

⁷Sai ibalosi bangsa ai do Jahowa sadokah manggoluh si Josua, anjaha sadokah manggoluh pangintuai-pangintuai ai i pudi ni si Josua, na sampang mangidah haganup horja habanggalon ni Jahowa, na binahen-Ni hubani Israel.

⁸Dob ai matei ma si Josua, anak ni si Nun, juakjuak ni Jahowa, marumur saratus sapuluh tahun.

⁹Jadi itanom sidea ma ia i tanoh parbagiananni, i Timnat-Heres, i Dolog Efraim, hampit utara ni Dolog Gaas.

¹⁰Tapi dob martumpu ganupjolma na sasundut ai hubani ompung ni sidea, jongjong ma i pudi ni sidea sundut na legan, na so mananda Jahowa, barang pambahenan-Ni ai bani halak Israel.

¹¹Dob ai ibahen halak Israel ma sogam ni uhur ni Jahowa, anjaha marsombah sidea bani Baal;

¹²itadingkon sidea ma Jahowa, Naibata ni ompung ni sidea, na paluar sidea hun tanoh Masir, iirikkon sidea ma naibata na legan, ai ma naibata ni bangsa na marianan inggot ni sidea, anjaha marsombah hujai mangalop ringis ni Jahowa.

¹³Halani na tinadingkon ni sidea ai Jahowa, gabe marsombah sidea hu Baal pakon Astarot,

¹⁴jadi gajag ma ringis ni Jahowa dompak Israel, iondoskon ma sidea hu tangan ni panamun, na manamuni sidea, anjaha ijualhon ma sidea hu tangan ni munsuh ni sidea inggot, gabe lang

martahan be sidea jongjong i lobei ni munsuh ni sidea.

¹⁵ Barang huja pe sidea bingkat, sai tangan ni Jahowa do imbang ni sidea hu hamagouan, songon na hinatahon ni Jahowa hinan, anjaha songon na binulawankon ni Jahowa hubani sidea; jadi tarsosak tumang ma sidea.

¹⁶ Dob ai ipabangkit Jahowa ma panguhum, na paluahkon sidea hun tangan ni na manamun sidea.

¹⁷ Age pe sonai seng itangihon sidea panguhum ni sidea ai, ai ibalosi sidea do naibata na legan, anjaha marsombah hujai; podas do sidea manlembang humbani dalan na nidalanan ni ompung ni sidea, na mambalosi titah ni Jahowa; seng ibahen sidea sonai.

¹⁸ Anggo ipabangkit Naibata panguhum bani sidea, ihasomani Naibata do panguhum ai, anjaha ipaluah do sidea hun tangan ni imbang ni sidea sadokah goluh ni panguhum ai; ai marpangulaki do uhur ni Jahowa halani doruh-doruh ni sidea pambahen ni na mangarsik pakon na manosak sidea.

¹⁹ Tapi mateihonsi panguhum ai, marbalik ma use sidea marparlahou na sambor, samboran humbani ompung ni sidea, mangirikkon naibata na legan, mambalosi anjaha marsombah hujai; seng iparontihon sidea pambahenan ni sidea pakon parlahou hahengkengon ni sidea ai.

²⁰ Jadi gajag ma ringis ni Jahowa dompak Israel, anjaha nini Ma, “Halani na nilaosan ni bangsa on padan-Ku, na dob Hutonahkon hubani ompung ni sidea, anjaha seng i tangihon sidea sorang-Ku,

²¹ Ahu pe seng be nunutan-Ku mangusir hun lobei ni sidea, bangsa sipajuh begu-begu, na tading ibahen si Josua bani parmateini ai,

²² ase marhitei sidea Hulajou Israel, barang na ra do sidea bujur mardalan bani dalan ni Jahowa, songon na binahen ni ompung ni sidea, atap lang.”

²³ Jadi ipaturut Jahowa ma bangsa sipajuh begu-begu ai, seng mintor iusir sidea; seng ipadas sidea hubagas tangan ni si Josua.

Bangsa Sipajuh Begu-begu na Tading i Tanoh Kanaan

3 ¹ Tapi on do bangsa sipajuh begu-begu na ipaturut Jahowa, laho manlajou Israel marhitei sidea, ai ma sagala na so mambotoh pasal parporangon i tanoh Kanaan,

² ase marpambotoh marga ni halak Israel pasal parporangon, ase tarajarhonsi parporangon bani sidea, sagala na so marpambotoh pasal ai hinan,

³ ai ma lima raja ni halak Palistim, haganup halak Kanaan, halak Sidon pakon Hewi, na marianan i Dolog Libanon, singgan ni Dolog Baal-Hermon das hu Hamat.

⁴Sidea ma na manlajou Israel, laho mangidah, barang tangihonon ni sidea do titah ni Jahowa, na tinonahkon-Ni bani ompung ni sidea marhitei si Musa.

Panguhum Otniel

⁵Jadi dob marianan halak Israel i tongah-tongah ni halak Kanaan, Heti, Amori, Peresi, Hewi pakon Jebusi,

⁶gabe ibuat ma boru ni sidea bahen parinangon ni sidea, anjaha ibere boru ni sidea bani anak ni sidea, anjaha isombah naibata ni sidea.

⁷Dob ai ihorjahon halak Israel ma sogam ni uhur ni Jahowa, ihalupahon Jahowa, Naibata ni sidea ai, anjaha ibalosi sidea Baal pakon Aserot.

⁸Jadi gajag ma ringis ni Jahowa dompak Israel, gabe ijualhon ma sidea hu tangan ni si Kusan-Risataim, raja hun Mesopotamia; gabe pambalosi ma halak Israel hubani si Kusan-Risataim ualuh tahun dokahni.

⁹Dob ai doruh-doruh ma halak Israel bani Jahowa, gabe ipabangkit Jahowa ma sada sipaluah bani Israel, laho paluahkon sidea, ai ma si Otniel, anak ni si Kenas, anggi ni si Kaleb.

¹⁰Jadi sogop ma bani Tonduy ni Jahowa, gabe iuhumi ma halak Israel; bingkat ma ia marporang, jadi iondoskon Jahowa ma hu tanganni si

Kusan-Risataim, raja ni Mesopotamia ai; ipatunduk tanganni ma si Kusan-Risataim ai.

¹¹ Jadi marhasonangan ma tanoh ai ompat puluh tahun dokahni. Dob ai matei ma si Otniel, anak ni si Kenas ai.

Panguhum Ehud

¹² Tapi iulaki halak Israel ma use mambahen sogam ni uhur ni Jahowa; jadi ipargogohi Jahowa ma si Eglon, raja ni Moab mangimbang halak Israel, halani na hinorjahon ni sidea ai sogam ni uhur ni Jahowa.

¹³ Iarahkon ma halak Amon pakon Amalek, bingkati ma ia, ipatunduk ma Israel anjaha isoluk huta parkurmaan.

¹⁴ Jadi maningon balosan ni halak Israel ma si Eglon, raja ni Moab ai, sapuluh ualuh tahun dokahni.

¹⁵ Jadi doruh-doruh ma halak Israel bani Jahowa, gabe ipabangkit Jahowa ma bani sidea sada sipaluah, ai ma si Ehud, anak ni si Gera, marga Benjamin, matei lopah do tanganni siamun; isuruh halak Israel ma ia mamboan utang sombah hubani si Eglon, raja ni Moab.

¹⁶ Dob ai ipauli si Ehud ma bani sada podang sidua mata, saasta ganjangni; jadi igonditkon ma ai bani binongeini hampit siamun i toruh ni hiouni.

¹⁷ Jadi itaruhkon ma utang sombah ai hubani si Eglon, raja ni Moab; jolma na mombur tumang do si Eglon ai.

¹⁸ Jadi dob ondos isombahon utang sombah ai, isuruh ma mulak siboan utang sombah ai.

¹⁹ Mulak ma anggo ia hun gana-gana na i Gilgal, anjaha nini Ma, “Adong do hata ponopanku bamu, alo rajanami.” Jadi iparentahkon Ma, “Sip.” Dob ai luar ma sagala na jongjong i lambungni.

²⁰ Dob ai iparayak si Ehud ma ia, sanggah hundul ia tumang i kamar pardatas ni panatap-natapanni. Nini si Ehud ma, “Adong do bangku tonah ni Naibata bamu.” Jadi jongjong ma raja ai humbani karosini.

²¹ Ipagostong si Ehud ma tanganni sambilou, iumpat ma podangni humbani binongeini,

²² itikamkon ma ai hu boltokni, gabe masuk ma mata ni podang ai rap pakon suhulni; lanjar irongkop taboh-taboh ai do mata ni podang ai, halani lang iumpat podang ai humbani boltokni; kaluar do ginagatni.

²³ Dob ai luar ma si Ehud hu surambih; ioruk ma labah ni kamar par datas ai lanjar ikunsi.

²⁴ Kaluarhonsi ia, roh ma juakjuak ni raja ai manorih, tapi oruk do labah ai jumpah sidea. Nini sidea ma, “Tontu na hu duru do ia i kamar panatap-natapanni ai.”

²⁵ Jadi ipaima-ima sidea ma pala bulinsah, tapi lanjar seng ibuha raja ai labah ni kamar pardatas

ai. Dob ai ibuat sidea ma anakkunsi, ibuha sidea ma labah ai, jadi tonggor ma, domma tibal tuan ni sidea ai i dasor, matei.

²⁶ Sanggah na paima-imahon ai sidea, domma maporus si Ehud, domma pala ilopusi gana-gana ai, anjaha maluah hu Seira.

²⁷ Dob das ia hujai, isompul ma tarompit i Dolog Efraim, jadi tuad ma halak Israel rap pakonsi hun dolog ai, ia mambobahon sidea.

²⁸ Nini ma dompak sidea, “Irikkon nasiam ma ahu, ai domma iondoskon Jahowa halak Moab munsuh nasiam ai hubagas tangan nasiam.” Jadi tuad ma sidea mangirikkonsi, gabe dapot sidea ma pandiparan ni Jordan, tontang ni Moab, anjaha lang ilopas mandipar age sahalak.

²⁹ Ibunuh sidea ma bani panorang ia, hira-hira sapuluh ribu halak Moab, haganup halak na gogoh anjaha halak parmunsuh, sahalak pe lang na maluah.

³⁰ Sonai ma Moab bani ari ai ipatunduk hu toruh ni kuasa ni halak Israel, anjaha sonang ma tanoh ai ualuh puluh tahun dokahni.

Si Samgar

³¹ Dob ia, bingkat ma si Samgar, anak ni si Anat, na mamunuh halak Palistim pakon simambu ni lembu onom ratus halak; dihut do ia paluahkon Israel.

Si Debora pakon si Barak

4¹ Dob matei si Ehud, iulaki halak Israel ma mambahen sogam ni uhur ni Jahowa.

² Halani ai ijualhon Jahowa ma sidea hu tangan ni si Jabin, raja ni tanoh Kanaan, na marrajai i Hazor. Ia puanglima ni balani, ai ma si Sisera, na marianan i Haroset-Hagoyim.

³ Dob ai doruh-doruh ma halak Israel bani Jahowa; ai adong do siah ratus gareta bosu bani si Sisera anjaha parah tumang do halak Israel iarsik dua puluh tahun dokahni.

⁴ Si Debora, sada nabi naboru, parinangon ni si Lapidot do na gabe panguhum bani halak Israel bani panorang ia.

⁵ Somal do ia hundul i toruh ni kurma Debora, i holangkolang ni Rama pakon Betel i Dolog Efraim; anjaha mangadap ma halak Israel bani laho mangindo uhum.

⁶ Isuruh ma na mandilo si Barak, anak ni si Abinoam hun Kedes na i Naftali, nini ma hu bani: Ai lang Jahowa, Naibata ni Israel do na mamarentahkon sonon: Bingkat ma ho, laho hu Dolog Tabor, anjaha bobahon ma sapuluh ribu halak humbani ginompar ni Naftali pakon Sebulon,

⁷ anjaha juljulonku ma manjumpahkon ho, hu lambung ni Bah Kison, si Sisera, puanglima ni bala

ni si Jabin rap pakon garetani ampa balani, anjaha Ahu mangondoskansi hubagas tanganmu?

⁸ Nini si Barak ma hu bani: Anggo ihasomani ham ahu, ahu pe laho do, tapi anggo seng ihasomani ham ahu, seng laho ahu.

⁹ Nini si Debora ma: Huhasomani pe ham; tapi seng na maningon dapotan puji-pujian bani dalan na nidalamanmu on, ai hu tangan ni sada naboru do ondskonon ni Jahowa si Sisera. Jadi bingkat ma si Debora pakon si Barak hu Kedes.

¹⁰ Iarahkon si Barak ma halak Sebulon pakon Naftali hu Kedes, jadi sapuluh ribu halak tangkog mangirikonsi, sonai pakon si Debora rap pakonsi.

¹¹ Tapi anggo si Heber, halak Keni ai, domma marsirang humbani halak Keni, ginompar ni si Hobab, tulang ni si Musa, anjaha domma ipajongjong lampolamponi das hu hayu ara i Saanim dohorhon Kedes.

¹² Dob ipatugah halak bani si Sisera, na dob tangkog do si Barak, anak ni si Abinoam hu Dolog Tabor,

¹³ jadi ipatumpu si Sisera ma ganup garetani, siah ratus garetu bosi, pakon sagala parporang na rap pakonsi, hun Haroset-Hagoyim hu Bah Kison.

¹⁴ Jadi nini si Debora ma dompak si Barak: Marugas ma, ai ari on ma Jahowa mangondoskon si Sisera hubagas tanganmu. Ai lang Jahowa do na bingkat mambobahon ham? Jadi tuad ma si

Barak hun Dolog Tabor anjaha sapuluh ribu halak mangirikkonsi;

¹⁵ anjaha igeori Jahowa ma si Sisera pakon garetani ampa ganup balani marhitei podang i lobei ni si Barak; jadi tuad ma si Sisera hun garetani anjaha maporus mardalan nahei.

¹⁶ Ipardakdak si Barak ma garetai ai pakon ganup balani ai das hu Haroset-Hagoyim, jadi rasei ma ganup bala ni si Sisera ibahen podang, sahalak pe lang dong na tading.

¹⁷ Tapi maporus do si Sisera mardalan nahei hu lampolampo ni si Jael, parinangon ni si Heber, halak Keni ai, ai mardear do si Jabin, raja ni Hazor pakon ginompar ni si Heber, halak Keni ai.

¹⁸ Luar ma si Jael ai manjumpahkon si Sisera, anjaha nini ma dompaksi: Tului ma ham, ale rajanami, tului ma ham hu rumah, ulang ham mabiar. Jadi tului ma ia hu lampolampo ni naboru ai, anjaha irongkob naboru ai ma ia bani salimut.

¹⁹ Dob ai nini ma dompak puang-puang ai: Bere ma bangku bah otik inumon, ai horahan do ahu. Jadi iungkab naboru ai ma parnahan ni dadih, ibere ma ia minum anjaha isalimuti homa.

²⁰ Nini ope dompak naboru ai: Jongjong ma ham i lobei ni labah ni lampolampo on, anjaha anggo adong halak na roh anjaha na manungkun bamu: Adongjolma ijon? hatahon ham ma: Seng dong.

²¹ Tapi ibuat si Jael, parinangon ni si Heber, marga Keni ai ma pasukan-pasukan ni lampolampo ai sada, ibuat homa parpalu, idohori ma sipsip, dob ai ipakuhon ma pasukan-pasukan ai hu parsuntinganni tolpus hu tanoh, ai domma sinok tumang ia halani lojani, jadi matei ma ia.

²² Sanggah na roh si Barak mandakdaki si Sisera, luar ma si Jael manjumpahkonsi, anjaha nini ma hu bani: Roh ma ham, ase hupatuduhkon bamu dalahi na pinindahanmu ai. Jadi masuk ma ia hubagas lampolampo ai gabe ididah ma si Sisera tibal matei, anjaha pasukan-pasukan ai bani parsuntinganni.

²³ Sonai ma ipatunduk Naibata si Jabin, raja hun Kanaan bani ari na sasada ai, i lobei ni halak Israel.

²⁴ Jadi lambin gogohni ma tangan ni halak Israel mangodohkon si Jabin, raja ni tanoh Kanaan, paima siap si Jabin, raja ni tanoh Kanaan ai ibahen sidea.

Doding ni si Debora

5 ¹ Jadi mandoding ma si Debora pakon si Barak, anak ni si Abinoam bani ari na sasada ai.

² Halani adong pambobai na mambobai Israel, halani rosuh uhur ni bangsa in manggalangkon dirini; puji ma Jahowa!

³ Tangar ma, nasiam raja-raja! Tarehon ma pinggolmu, nasiam siparkuasa! Sihol mandoding ahu bani Jahowa,

mandodingkon psalm bani Jahowa, Naibata ni Israel.

⁴ Ale Jahowa, sanggah luar Ham hun Seir,
sanggah roh Ham hun tanoh ni Edom,
dugur do tanoh, burus langit, hambun pe
manektekkon bahni.

⁵ Dugur do dolog i lobei ni Jahowa ai ma Dolog
Sinai i lobei ni Jahowa, Naibata ni Israel.

⁶ Bani panorang ni si Samgar, anak ni si Anat,
bani panorang ni si Jael, lungun pasar na
bolon, anjaha halak na maningon mardalan,
mardalan humbani dalan na maringgot.

⁷ Seng dong pambobai i Israel, seng dong tongon
paima bangkit ham, Debora, bangkit songon
inang i Israel.

⁸ Dob ipilih Israel naibata na legan, masa ma
porang i horbangan. Seng dong be taridah
gantar age tanja i tongah-tongah ni ompat
puluh ribu halak i Israel.

⁹ Laho do uhurhu hubani puanglima ni Israel,
hubani sidea na mamberehon dirini,
humbani rosuhni i tongah-tongah ni bangsa
in. Puji ma Jahowa.

¹⁰ Nasiam na mangajak halode silopak, nasiam
na hundul i atas ni parmadani, nasiam na
mardalan i dalan, baritahon nasiam ma in.

¹¹ Mangihutkon sora ni sipamursik bani ianan
pambuatan bah, idodingkon halak do ijai,

dear layak ni Jahowa, dear layak-Ni bani
pambobai ni Israel. Tuad ma ijia bangsa ni
Jahowa hu horbangan.

¹² Jongjong ma, jongjong ma, Debora! Jongjong
ma, jongjong ma, dodingkon ma sada
doding! Jongjong ma, Barak! arahkon ma na
tinabanmu in, ham anak ni si Abinoam!

¹³ Jadi tuad ma tading-tadingan ni partuanan,
tuad ma bangsa ni Jahowa hubani
parporangan na borani.

¹⁴ Humbani halak Efraim tuad sidea hu habungan,
mangirikkon ham, halak Benjamin: pakon
balamu; humbani halak Makir tuad
puanglima, anjaha humbani halak Sebulon
siboban tungkot harajaon.

¹⁵ Sonai homa pambobai ni halak Isasar
mangkasomani si Debora, anjaha si Isasar
bujur bani si Barak; mardalan nahei
mangirikkonsi idorab ma hu habungan ai.
I tongah-tongah ni ginompar ni si Ruben,
buei do partimbangan.

¹⁶ Mase sohsoh ham i holangkolang ni harang
ni biribiri, laho manangihon parsulim i
lambung hulanen ni pinahan? I tongah-
tongah ni ginompar ni si Ruben buei do
partimbangan!

¹⁷ Tading i dipar ni Jordan do halak Gilead; anjaha
halak Dan, mase sohsoh sidea i lambung ni

kapal-kapal? Halak Asser hundul i topi ni laut, sohsoh i juruk-jurukni.

¹⁸ Tapi halak Sebulon ai ma bangsa na ra mamberehon hosahni hu hamatean, sonai homa Naftali, bani ianan na gijang i ladang.

¹⁹ Roh ma raja-raja marporang; bani ari ai marporang ma raja-raja ni tanoh Kanaan, i Taanak, dohorhon Bah Megiddo; sada duit pirak pe lang dong rampason ni sidea.

²⁰ Hun langit marporang bintang-bintang, humbani dalan ni sidea iporangi sidea si Sisera.

²¹ Bah nabasaia do Bah Kison mangayubkon sidea, bah nabasaia do Bah Kison. Langkahkon ma, ale tonduyhu, marhagogohon.

²² Bani panorang ai marolob-olob ma tambirik ni huda, halani pamosik ni puanglimani.

²³ Papai ma Meroz, nini malekat ni Jahowa, sabonar papai ma pangisini, halani seng roh sidea mangurupi Jahowa, mangurupi Jahowa mangkasomani parporang na borani.

²⁴ Pinasu-pasu ma si Jael, parinangon ni si Heber, halak Keni ai, lobih humbani sagala naboru, pinasu-pasu ma ia, lobih humbani sagala naboru na ibagas lampolampo.

²⁵ Bah do ipindo, dadih ibere, ibagas mangkuk na maharga ibere bani dadih.

- ²⁶ Idurdurhon ma tanganni mambuat pasuk-pasuk, tanganni siamun mambuat parpalu. Ipalu ma si Sisera, ipuntarhon uluni, iropuki anjaha itolpus ma parsuntinganni.
- ²⁷ Pugul ma ia dabuh i holangkolang ni naheini, matei anjaha tibal ijai; i holangkolang ni naheni dabuh halak ai anjaha matei, bani hadabuhanni ai, ijai ma ia tibal ibogbogi.
- ²⁸ Humbani tingkap manungkir inang ni si Sisera, anjaha mardilo hambani jandela: Mase hun dokah roh garetani? Mase ma hun dokah tarbogei sora ni garetani?
- ²⁹ Sipentaran i tengah-tengah ni nasipuang mambalosisi, ia sandiri marbalos bani:
- ³⁰ Ai lang mandapot taban-taban do sidea anjaha marbagi-bagi ai? Sada barang dua anak boru bani ganup halak, hiou tinubar, na tinaban bani si Sisera, hiou tinubar na sinulam, saparanguan hiou tinubar, na sinulam, bani borgokku songon taban-taban.
- ³¹ Sonin ma siap ganup munsuhmu, ale Jahowa. Tapi anggo na mangkaholongi Ham, songon mata ni ari na poltak bani hagogohonni do. Dob ai sonang ma tanoh ai ompat puluh tahun dokahni.

Parbangkit ni si Gideon Gabe Panguhum

6¹ Dob ai ihorjahon halak Israel ma sogam ni uhur ni Jahowa, gabe iondoskon Jahowa ma sidea hu tangan ni halak Midian, pitu tahun dokahni.

² Halani parah ni pangodoh ni tangan ni halak Midian bani halak Israel, gabe ibahen sidea ma bani sidea parlingodan i dolog, i liang pakon i huta na marbatar-batar dompak halak Midian.

³ Ai martidahkansi halak Israel mintor roh do halak Midian, Amalek pakon halak na hun hapoltakan manosak sidea.

⁴ Ibahen ma parlampolampoanni i tongah-tongah ni sidea, anjaha iagou gogoh ni tanoh ai das hu Gaza, anjaha seng dong itebai sipanganon bani halak Israel, age biribiri, lembu atap halode pe.

⁵ Ai roh do sidea tangkog rap pakon pinahanni ampa lampolamponi, anjaha parrohni ai marbuei-buei do songon balang; seng tarhira buei ni sidea pakon unta ni sidea; roh do sidea laho mansedahon.

⁶ Jadi musil tumang ma halak Israel halani halak Midian ai. Jadi doruh-doruh ma halak Israel hubani Jahowa.

⁷ Dobkansi doruh-doruh halak Israel bani Jahowa halani halak Midian ai,

⁸ jadi isuruh Jahowa ma sahalak nabi marayak halak Israel, nini ma dompak sidea, “Sonon do hata ni Jahowa, Naibata ni Israel, ‘Ahu do na patangkog

hanima hun tanoh Masir, anjaha na paluarhon hanima hun rumah parjabolonan;

⁹Ahu do na paluahkon hanima hun tangan ni halak Masir pakon hun tangan ni ganup halak na mangkilang hanima, Huusir do sidea hun lobei-lobeinima, anjaha Huberehon tanoh ni sidea hu bennima.'

¹⁰Anjaha domma Huhatahon bennima, 'Ahu do Jahowa, Naibatanimi, ulang ma sombah hanima naibata ni halak Amori, simada tanoh niianannima, tapi seng itangihon hanima sorang-Ku.'"

¹¹Dob ai roh ma malekat ni Jahowa, anjaha hundul i toruh ni baringin na i Ofra, rupei ni si Joas, halak Abieser, sanggah mardogei gandum si Gideon, anakni ai bani pangilangan anggur, laho mamonopkon ai i lobei ni halak Midian.

¹²Jadi ipatalar malekat ni Jahowa ma dirini hu bani, anjaha nini ma dompaksi, "Ihasomani Jahowa do ham, ale puanglima na gogoh!

¹³Nini si Gideon ma hu bani, 'Santabi, tuannami, anggo ihasomani Jahowa do hanami, mase ma mangonai ganupan on bennami?' Ija do sagala halongangan, na binaritahon ni ompungnami hu bennami, sanggah na hinatahon ni sidea, 'Ai lang Jahowa do na patangkog hita hun Masir?' Tapi sonari domma ibuangkon Jahowa hanami anjaha iondoskon do hanami hu tangan ni halak Midian.

¹⁴ Dob ai idompakkon Jahowa ma ia, anjaha ihatahon, 'Laho ma ho ibagas hagogohonmon, paluah ma halak Israel hun tangan ni halak Midian.' Ai lang Ahu do na marsuruh ho?

¹⁵ Nini ma hu bani, 'Santabi, tuannami, marhitei aha ma ahu paluahkon halak Israel?' Tonggor ma, hanami na saompung do sietekan bani marga Manase, anjaha ahu do sianggian i rumah ni bapa.

¹⁶ Nini Jahowa ma hu bani, 'Ahu do mangkasomani ho, halani ai maningon taluhononmu do halak Midian, songon na manaluhon sada halak tumang.'

¹⁷ Jadi nini ma hu bani, 'Anggo tongon do dapotan idop ni uhur ahu i lobei-Mu, patuduhkon Ham ma bangku sada tanda, paboa Ham do na marsahap pakon ahu.'

¹⁸ Ulang ma misir Ham hunjon, paima mulak ahu Bamu, mamboan galangan sigalangkononku i lobei-Mu. Jadi nini ma, 'Ijon pe Ahu paima mulak ho.'"

¹⁹ Dob ai masuk ma si Gideon, anjaha ihoseihon ma anak ni hambing sada pakon ruti na so niigaran humbani saefa nitak; inahkon ma gulei ai hubagas tapongan anjaha kuahni ai hubagas mangkuk, dob ai iboan ma ai hu bani, hu toruh ni baringin ai, anjaha iidangkon.

²⁰ Nini malekat ni Naibata ai ma hu bani, "Buat ma gulei in pakon ruti na so niigaran in, nahkon ma in hu atas ni batu on, anjaha useihon ma kuahni ai hu atasni." Jadi ibahen ma sonai.

²¹ Dob ai ituldukkon malekat ni Jahowa ma tungkot na ibagas tanganni ai, anjaha isinggur ma gulei pakon ruti na so niigaran ai bani ujung ni tungkot ai; kaluar ma apuy hun batu ai mangankon gulei pakon ruti na so niigaran ai; dob ai lingod ma malekat ni Jahowa humbani panonggorni.

²² Jadi ibotoh si Gideon ma, malekat ni Jahowa do hape, gabe nini ma, “Ham Tuhan Jahowa! Domma huidah hape malekat ni Jahowa padumpar bohi.

²³ Tapi nini Jahowa ma hu bani, ‘Damei ma bam! Ulang ho mabiar, seng matei ho.’”

²⁴ Dob ai ipajongjong si Gideon ma ijai sada anjapanjap bani Jahowa, anjaha ibahen ma goranni: Jahowa do haluahon. Adong ope anjapanjap ai ronsi sadari on i Ofra, rupei ni halak Abieser ai.

²⁵ Bornginni ai nini Jahowa ma hu bani, “Buat ma sada lembu tunggal ni bapamu pakon lembu tunggal paduahon na marumur pitu tahun, parreong ma anjapanjap ni Baal ni bapamu anjaha roboh ma tiang sisombahon na i lambungni ai.

²⁶ Dob ai pajongjong ma sada anjapanjap bani Jahowa, Naibatamu i atas ni hubuan ai anjaha atur dear-dear, dob ai buat ma lembu tunggal na paduahon ai anjaha galangkon ma galangan situtungan, sobanni ai ma hayu ni tiang sisombahon sirobohonmai.”

²⁷ Dob ai iarahkon si Gideon ma sepuluh halak jabolonni anjaha ibahen ma songon na hinatahon

ni Jahowa hu bani. Tapi halani mabiar ia hubani ginompar ni bapani pakon hubani parhuta ai mandalankon ai arian, gabe borngin ma ibahen.

²⁸ Dob puho parhuta ai girah sogod, tonggor ma, domma mareong anjapanjap ni Baal ai, domma iroboh tiang sisombahon na i lambungni ai anjaha domma igalangkon lombu tunggal na paduahon i atas ni anjapanjap na pinajongjong ai.

²⁹ Dob ai nini sidea ma samah sidea, “Ise do na mambahen on? Dob ipareksa anjaha isungkun, gabe dong ma halak na mangkatahon, ‘Si Gideon, anak ni si Joas do na mambahen in.’

³⁰ Jadi nini parhuta ai ma bani si Joas, ‘Boan ma anakmin hudarat; maningon matei ia bunuhon, halani na pinarreongni ai anjapanjap ni Baal, anjaha halani na nirobohni ai tiang sisombahon na i lambungni ai.’

³¹ Tapi nini si Joas ma dompak sagala halak na manginggotisi ai, ‘Nasiam ma gakni manlawan mangkopkop Baal? Barang sihol nasiam manolongsi? Barang ise na manlawan mangkopkop Baal, maningon matei sogod on. Anggo naibata do ia, ia ma manlawan mangkopkop dirini, dompak halak na marreongkon anjapanjapni.’

³² Jadi bani ari na sada ai, igoran halak ma ia si Jerubbaal, halani nini halak, ‘Paturut ma Baal manlawansi, halani na nireongkonni ai anjapanjap ai.’”

³³ Haganup halak Midian, pakon halak Amalek ampa halak parhapoltakan roh ma sidea rap, idipari sidea ma Jordan anjaha marsaran ma sidea i habungan Jesreel.

³⁴ Jadi isorapi Tonduy ni Jahowa ma si Gideon; isompul ma tarompit mangarahkon halak Abieser mangirikkonsi.

³⁵ Isuruh ma homa suruhanni bani ganup marga Manase laho mangarahkon sidea mangirikkonsi. Sonai homa isuruh ma suruhanni hubani halak Asser, Sebulon pakon Naftali, anjaha sidea pe roh ma mangirikkonsi.

³⁶ Dob ai nini si Gideon ma dompak Naibata, “Anggo Ham ma tongon na sihol paluahkon halak Israel marhitei tanganku, songon na hinatahon-Mu ai,

³⁷ tonggor ma, huherbangkon ma bobak ni biribiri on i pardogeian on. Anggo pitah bobak on do marnamur anjaha horah ganup tanoh na inggot, jadi hubotoh ma, Ham ma tongon na sihol paluahkon halak Israel marhitei tanganku, songon na hinatahon-Mu ai.”

³⁸ Jadi jumpah ma sonai, ai dob puho ia patarni ai, iporoh ma bobak ai, gabe dapotsi ma namur gok sada batil.

³⁹ Dob ai nini si Gideon ma dompak Naibata, “Ulang ma marringis Ham mangidah ahu, anggo marsahap ahu sahali nari gelah; palopas Ham ma ahu, pitah sahali nari mando, mambahen parlajouan pakon

bobak ni biribiri on; pitah bani bobak on ma horah, tapi i atas ni ganup tanoh ai inggot, marnamur.”

⁴⁰ Jadi ibahen Naibata ma sonai bornginni ai; ai pitah bani bobak ai do horah, tapi bani ganup tanoh ai marnamur do.

Si Gideon Mangusir Munsuhni

7 ¹ Dob ai puho ma si Jerubbaal, ai ma si Gideon girah sogod, rap pakon hasomanni ai, jadi marsaran ma sidea i lambung ni bah tubuh Harod; anjaha bala ni Midian marsaran do i utarani, i lambung ni buntu-buntu More, i habungan

² Dob ai nini Jahowa ma dompak si Gideon, “Mabueitu do halak hasomanmin, parhiteian-Ku mamberehon halak Midian hubagas tangan ni sidea, ase ulang ipuji halak Israel dirini dompak Ahu, mangkatahon, ‘Tanganku sandiri do na paluahkon ahu.’

³ On pe tingtingkon ma ase ibogei halak ganupan, ‘Barang ise na mabiar anjaha gobir, mulak ma ia hun Dolog Gilead.’ Jadi mulak ma dua puluh dua ribu halak, tading ma sapuluh ribu.

⁴ Dob ai nini Jahowa ma dompak si Gideon, ‘Mabueitu ope halak ai, arahkon ma sidea tuad hu bah ai, ase Hulajou sidea ijai, jadi barang ise na huhatahon bam: On ma hasomanmu bingkat, jadi ia ma hasomanmu bingkat, tapi barang ise na

Huhatahon bam: Halak on seng bulih hasomanmu bingkat, jadi ulang ma bingkat ai.'

⁵ Jadi iarahkon ma halak ai tuad minum hu bah ai. Nini Jahowa ma dompak si Gideon, 'Barang ise na manirup bah in marhitei dilahni, songon pandilati ni baliang, papulig ma ai, sonai homa na manowod minum.'"

⁶ Ia bilangan ni na manirup ai tolu ratus halak do, anjaha haganup na legan ai manowod do laho minum bah marhitei tanganni.

⁷ Dob ai nini Jahowa ma dompak si Gideon, "Marhitei sitolu ratus halak ai, na manirup ai, Ahu paluahkon hanima anjaha mamberehon halak Midian hu tangannima; tapi sagala halak na legan ai bulih do mulak, ganup hu iananni bei."

⁸ Ibuat ma bohal ni halak ai pakon tarompitni; anjaha isuruh ma haganup halak Israel mulak, ganup hu lampolamponi bei, tapi na tolu ratus ai ijolomi do. Ia parlampolampoan ni halak Midian i bornohni do, i habungan.

⁹ Lanjar bornginni ai ihatahon Jahowa ma hu bani, "Jongjong ma ho, tuad ma ho mandorab parlampolampoan ai, ai domma Huondoskon ai hubagas tanganmu.

¹⁰ Tapi anggo mabiar ho tuad, tuad ma ho lobei pakon si Pura, juakjuakmin hu parlampolampoan ai;

¹¹ jadi bogeionmu ma barang aha sahap-sahap ni sidea; dob ai dapotan gogoh ma tanganmu mandorab parlampolampoan ai.”

¹² Ia halak Midian pakon halak Amalek ampa haganup halak parhapoltakan ai martibalan do i habungan ai, songon balang bueini, anjaha unta ni sidea songon horsik na i pasir ni laut, seng tarbilangi halani bueini.

¹³ Daskonsi si Gideon hujai, adong ma sada halak patugahkon nipini hubani hasomanni, nini, “Tonggor ma, na marnipi do ahu; magulang sada ruti masuk hu parlampolampoan ni halak Midian; daskonsi hu lampolampo on, idorab ma lampolampo on, gabe marumbak anjaha balik; sonai ma reong lampolampo ai.

¹⁴ Dob ai nini hasomanni ai ma mambalosi, ‘Seng bulih lang podang ni si Gideon, anak ni si Joas halak Israel ai do ai; domma iondoskon Naibata halak Midian pakon ganup lampolampo on hubagas tanganni.’”

¹⁵ Jadi dob ibogei si Gideon hata ni nipi ai pakon artini, marrogop ma ia marsombah. Dob ai mulak ma ia hu parlampolampoan ni halak Israel, anjaha nini ma, “Jongjong ma, ai domma iondoskon Jahowa parlampolampoan ni halak Midian hu tangan nasiam.”

¹⁶ Dob ai ibagi si Gideon ma na tolu ratus halak ai gabe tolu hulanen, anjaha ibere ma tarompit sada

bei hubagas ganup tangan ni sidea ampa hudon na lumei sada bei, na marisi suluh damar.

¹⁷ Anjaha nini ma dompak sidea, “Pardiateihon nasiam ma ahu anjaha bahen nasiam ma songon na hubahen. Anggo das ma ahu hu ujung ni parlampolampoan ai, bahen nasiam ma songon na hubahen ai.

¹⁸ Anggo husompul tarompit, ahu ampa ganup halak na rap pakon ahu, sompul nasiam ma homa tarompit inggot ni ganup parlampolampoan ai, anjaha marsurak ma, ‘Bani Jahowa pakon bani si Gideon.’”

¹⁹ Jadi dob das si Gideon rap pakon halak sisaratus hasomanni ai hu ujung ni parlampolampoan ai, bani pamungkah ni runda tongah borngin, sanggah ai pe mulai marjaga sidea, jadi isompul sidea ma tarompit anjaha ibolahkon ma hudon na i tangan ni sidea ai.

²⁰ Jadi rap manompul tarompitni bei ma na tolu hulanan ai anjaha ibolahkon ma hudon ai, ijolom bei ma suluh i tangan sambilouni anjaha tarompit sisompulon ai i tangan siamunni, lanjar marsurak, “Podang halani Jahowa pakon halani si Gideon!”

²¹ Lanjar jongjong bei ma sidea, ganup bani iananni, inggot parlampolampoan ai; gabe lutu ma ganup bala ai, mandoraki anjaha maporus.

²² Sanggah na sinompul ni sitolu ratus halak ai tarompit ai, jadi ipatongon Jahowa ma podang ni

na sada hubani na sada nari i parlampolampoan ai, gabe maporus ma bala ai das hu Bet-Sita, dompak Zesera das hu parbalogan ni Abel-Mehola dohorhon Tabat.

²³ Dob ai iarahkon ma halak Israel hun marga Naftali, hun marga Asser pakon humbani ganup marga Manase, jadi iayak sidea ma halak Midian.

²⁴ Isuruh si Gideon ma homa suruhan hu ganup Dolog Efraim mangkatahon, “Tuad ma nasiam mandorab halak Midian, anjaha soluk nasiam ma hampit bah ai mangimbang sidea das hu Bet-Bara pakon Bah Jordan.” Jadi iarahkon ma ganup halak Efraim, gabe isoluk sidea ma bah ai das hu Bet-Bara, sonai homa Jordan.

²⁵ Itaban sidea ma dua raja ni halak Midian, ai ma si Oreb pakon si Zeeb. Ibunuh sidea ma si Oreb i Dolog batu Oreb anjaha si Zeeb ibunuh ibagas pangilangan anggur Zeeb. Ipardakdak sidea ma halak Midian, iboan sidea ma ulu ni si Oreb pakon ulu ni si Zeeb hubani si Gideon i dipar ni Jordan.

Parungut-ungutan ni Halak Efraim

8 ¹ Dob ai nini halak Efraim ma hu bani, “Mase ma sonai pambahenmu bennami, ai lang iarahkon ham hanami marmunsuh dompak halak Midian? Banggal tumang do hutuk ni sidea bani.

² Tapi nini ma dompak sidea, 'Aha ma na hubahen in anggo na partimbangkon hubani na binahen nasiam?' Ai lang dearan do parturiangan ni halak Efraim humbani pariama buah anggur ni halak Abieser?

³ Hubagas tangan nasiam do iondoskon Naibata raja ni halak Midian, ai ma si Oreb pakon si Zeeb, aha ma na hubahen anggo ipartimbangkon hubani nasiam?" Jadi dob ihatahon sonai, mahombun ma ringis ni sidea dompaksi.

Talu Halak Midian, Tarbunuh Raja-rajani

⁴ Jadi dob das si Gideon hu Bah Jordan, mandipar ma ia rap pakon hasomanni na tolu ratus halak ai, domma loja, tapi sai inunut do mangayak-ayak.

⁵ Nini ma dompak parhuta Sukot, "Tolong nasiam ma mambere otik roti bani halak na mangirikkon ahu on; ai domma latih sidea, anjaha na mangayak-ayak si Zeba pakon si Salmuna raja ni halak Midian do hanami.

⁶ Tapi nini pangintuai ni huta Sukot ma, 'Domma ondos gakni tangan ni si Zeba pakon si Salmuna hubagas tanganmu, ase bereonnami ruti hubani balamu?'

⁷ Dob ai nini si Gideon ma, 'Anggo sonai, ia dob ibere Jahowa si Zeba pakon si Salmuna hubagas tanganku, bogboganku ma angkula nasiam bani duri ampa tatada na hun halimisan.'"

⁸ Dob ai tangkog ma ia hunjai hu Penuel, anjaha ihatahon ma sonai hubani sidea, tapi ibalosi par Penuel ma ia songon parbalos ni par Sukot ai.

⁹ Dob ai nini ma homa dompak par Penuel ai, “Anggo mulak ahu horas-horas, parreongonku ma manara on.”

¹⁰ Tapi anggo si Zeba pakon si Salmuna i Karkor do rap pakon bala ni sidea, hira-hira sapuluh lima ribu halak bueini, ai ma sagala na tading ope humbani ganup bala ni halak parhapoltakan; ai domma rasei saratus dua puluh ribu halak na marsinjatahon podang.

¹¹ Ia si Gideon, tangkog do ia hun dalan ni halak siiani lampolampo hampit hapoltakan ni Nobah pakon Jogbeha, anjaha idorab ma bala ai, na so panagaman ni sidea.

¹² Maporus ma si Zeba pakon si Salmuna, tapi ipardakdak si Gideon ma sidea anjaha dapotsi do na dua raja ni Midian ai, si Zeba pakon si Salmuna, anjaha mambur merap do ganup bala ai ibahen.

¹³ Dob ai mulak ma si Gideon, anak ni si Joas hun parporangan hun tangkogan Heres;

¹⁴ itangkap sidea ma sahalak garama parhuta Sukot ai, isungkuni sidea ma ia; jadi isurati ma goran-goran ni pambobai pakon pangintuai-pangintuai ni Sukot bani si Gideon, pitu puluh pitu halak bueini.

¹⁵ Dob ai laho ma ia hubani parhuta Sukot anjaha nini ma, “Andon ma si Zeba pakon si Salmuna,

marhalanohon ni sidea domma iapasi nasiam ahu, pala ihatahon nasiam, 'Domma gakni ondos hu tanganmu si Zeba pakon si Salmuna, ase bereonnami ruti hubani balamu na loja in?'"

¹⁶ Dob ai itangkapi ma pangintuai ni huta ai, ibuat ma pakon duri ampa tatada na hun halimisan, ijora ma sidea marhitei ai.

¹⁷ Tapi iparreong do manara ni Penuel anjaha ibunuhi parhuta ai.

¹⁸ Dob ai nini ma dompak si Zeba pakon si Salmuna, "Ija do halak na dob binunuh nasiam i Tabor? Balos ni sidea, 'Usih do sidea hu bamu, ganup songon rupa ni anak ni raja-raja.'

¹⁹ Dob ai nini si Gideon ma, 'Saninangku do sidea, anak ni inangku. Songon sintongni manggoluh Jahowa, ambit na ipagoluh nasiam sidea, seng bunuhonku nasiam.'

²⁰ Jadi ihatahon ma hubani si Jeter bunga tubuhni ai, 'Bunuh ma sidea!' Tapi seng ra garama ai manintak podangni, halani mabiar ia, ai poso ope ia.

²¹ Nini si Zeba pakon si Salmuna ma, 'Ham sandiri ma jongjong mamunuh hanami, ai sonin halak, sonai do gogohni.' Jadi jongjong ma si Gideon, ibunuh ma si Zeba pakon si Salmuna; anjaha ibuat ma jagar-jagar na bani borgok ni unta ni sidea."

**Seng Ra si Gideon Pabangkiton Gabe Raja;
Pambahenanni na Legan ampa Parmateini**

²² Dob ai nini halak Israel ma dompak si Gideon, “Rajai ma hanami, age ham, age anakmu, age pahompumu, ai ham do na paluahkon hanami hun tangan ni halak Midian.

²³ Nini si Gideon ma mambalosi sidea, ‘Seng ahu marrajai nasiam, anjaha seng anakku marrajai nasiam, Jahowa do na marrajai nasiam.’

²⁴ Ambah ni ai nini si Gideon ma, ‘Sada do na hupindo humbani nasiam: Ganup ma nasiam mambere bangku anting-anting omas taban-tabanni bei. Ai maranting-anting omas do sidea, ai halak Ismael do sidea.’

²⁵ Nini sidea ma mambalosi, ‘Ra do hanami mamberehon ai.’ Jadi dob ipaherbang sada hiou, ganup ma sidea mannahkon anting-anting taban-tabanni ai hujai.”

²⁶ Ia borat ni anting-anting omas na pinindoni ai saribu pitu ratus sekel omas do, legan ni ugas-ugas na songon bulan sasabi, ugas na i pinggol pakon hiou hasumba na pinakei ni raja-raja ni halak Midian, legan ni horungkorung na i borgok ni unta ni sidea.

²⁷ Dob ai ibahen si Gideon ma ai gabe baju efod, ipajongjong ma ai i hutani i Ofra. Ganup halak Israel

marsombah ma hujai, anjaha gabe tirangkap ma ai bani si Gideon pakon ginomparni.

²⁸ Sonai ma partunduk ni halak Midian ibahen halak Israel, seng boi padurgak uluni bei; jadi marsonang-sonang ma tanoh ai ompat puluh tahun dokahni bani panorang ni si Gideon.

²⁹ Mulak ma homa si Jerubbaal, anak ni si Joas, lanjar marianan i rumahni.

³⁰ Adong do anak bani si Gideon pitu puluh halak, na pinupusni, ai buei do parinangonni,

³¹ sonai homa siampar apeini i huta Sikem itubuhkon do sada anak bani, anjaha ibahen ma goranni si Abimelek.

³² Dob ai matei sayurmatua ma si Gideon anak ni si Joas, anjaha itanom ma i tanoman ni si Joas, bapani ai, i Ofra, tanoh ni halak Abieser.

³³ Dob matei si Gideon, marbalik ma halak Israel, isombah ma Baal, anjaha ibahen ma Baal-Berit gabe naibata ni sidea.

³⁴ Seng idingat halak Israel be Jahowa, Naibata ni sidea, na paluahkon sidea humbani munsuh ni sidea inggot.

³⁵ Seng homa ipataridahkon sidea tarima kasih ni uhurni bani ginompar ni si Jerubbaal, ai ma si Gideon, balos ni ganup na madear, na binahenni hubani halak Israel.

Si Abimelek Irajahon

9¹ Laho ma si Abimelek, anak ni si Jerubbaal, hu Sikon hu bani botou ni inangni, anjaha nini ma dompak sidea pakon dompak ganup marga, ginompar ni na hampit inangni:

² Hatahon nasiam ma hubani ganup parhuta Sikem, “Na ija ma sidearan bani nasiam, pitu puluh halak anak ni si Jerubbaal, marrajai nasiam, atap sahalak marrajai? Anjaha ingat nasiam homa, holi-holi anjaha daroh nasiam do ahu.”

³ Jadi ipatugah botou ni inangni ai ma ganup hata ai hubani parhuta Sikem, gabe muyun ma uhur ni sidea mangihutkon si Abimelek, ai nini sidea do, “Angginta do ia.”

⁴ Dob ai ibere sidea ma pitu puluh duit pirak hun rumah panumbahan ni Baal-Berit, jadi iupahi si Abimelek ma halak na hampung anjaha na jungkat maruhur mangirikkonsi.

⁵ Laho ma ia hu rumah ni bapani i Ofra, ibunuh ma sanina-saninani ai, anak ni si Jerubbaal, pitu puluh halak bueini, i atas ni sada batu; tapi anggo si Jotam, anak sianggian ni si Jerubbaal tading do, halani marponop ia.

⁶ Dob ai martumpu ma ganup par Sikem pakon ganup par Bet-Milo, anjaha laho ma sidea pabangkitkon si Abimelek gabe raja, i lambung ni baringin, na bani batu pardingatan na i Sikem.

Limbaga ni si Jotam

⁷ Dob tarbogeï barita ai hubani si Jotam, laho ma ia jongjong hu pakpak ni Dolog Garisim, anjaha ipagogoh ma sorani dilo-dilo, nini ma dompak sidea, “Tangihon nasiam ma ahu alo parhuta Sikem, ase itangihon Naibata nasiam.”

⁸ Laho ma sahali hayu pabangkit raja bani sidea, nini sidea ma dompak hayu jetun, “Ham ma rajanami!”

⁹ Tapi nini hayu jetun ai ma mambalosi, “Mintor tadingkononku ma minak na bangku, na mambahen ahu tarpuji bani Naibata pakon jolma, ase laho ahu mayap-ayap i atas ni sagala hayu?”

¹⁰ Dob ai nini hayu ai ma dompak hayu ara, “Roh ma ham, rajai ham, rajai ham ma hanami!”

¹¹ Nini hayu ara ai ma mambalosi sidea, ‘Mintor tadingkononku ma tobu-tobungku pakon buahku na madear, ase laho ahu mayap-ayap i atas ni sagala hayu?’

¹² Dob ai nini sagala hayu ai ma dompak hayu anggur, ‘Roh ma ham, rajai ham ma hanami!’

¹³ Nini hayu anggur ai ma mambalosi sidea, ‘Mintor tadingkononku ma buah anggurhu, na pamalaskon uhur ni Naibata pakon jolma, ase laho ahu mayap-ayap i atas ni sagala hayu?’

¹⁴ Dob ai nini sagala hayu ai ma dompak tatada, ‘Roh ma ham, rajai ham ma hanami!’

¹⁵ Nini tatada ai ma mambalosi sagala hayu ai, 'Anggo tongon-tongon do nasiam sihol pabangkit ahu gabe raja nasiam, roh ma nasiam marlinggom i toruh ni linggomku, tapi anggo lang, luar ma apuy hun tatada laho mangankon hayu ares na i Libanon.'

¹⁶ On pe, anggo ibagas hasintongan pakon putih ni uhur do nasiam pabangkit si Abimelek jadi raja, anjaha anggo na madear do na binahen nasiam hubani si Jerubbaal pakon hubani ginomparni, anjaha ibahen nasiam sonai hubani tembal ni pambahenan ni tanganni,

¹⁷ ai lang bapangku do marporang mangkopkop nasiam, anjaha iparnalang hosahni laho paluahkon nasiam hun tangan ni halak Midian;

¹⁸ hape manlawan do nasiam sadari on dompak ginompar ni bapangku, anjaha ibunuh nasiam do anakni pitu puluh halak bueini i atas ni sada batu, anjaha ipabangkit nasiam do si Abimelek, anak ni jabolon naboru ni bapa, gabe raja ni parhuta Sikem, halani sanina nasiam ia.

¹⁹ Anggo ibagas hasintongan pakon putih ni uhur do pambahenan nasiam sadari on hubani si Jerubbaal pakon hu bani ginomparni, marmalas ni uhur ma nasiam mangidah si Abimelek, anjaha marmalas ni uhur ma age ia bani nasiam.

²⁰ Tapi anggo lang, sai roh ma apuy humbani si Abimelek laho mangankon parhuta Sikem sonai homa par Bet-Milo, anjaha sai roh ma apuy hun

parhuta Sikem sonai homa hun par Bet-Milo laho mangankon si Abimelek.”

²¹ Dob ai lintun ma si Jotam, maporus hu Beer, anjaha tading ijai ma ia, halani biarni hubani si Abimelek sanina ai.

Parmatei ni si Abimelek

²² Jadi dob iparentah si Abimelek halak Israel tolu tahun dokahni,

²³ gabe ipapuhu Naibata ma uhur na jahat i tongah-tongah ni si Abimelek pakon parhuta Sikem, gabe martahi-tahi ma parhuta Sikem dompak si Abimelek.

²⁴ laho mambalaskon hubani si Abimelek hajahaton, na binahenni hubani sipitu puluh halak anak ni si Jerubbaal pakon marsapatahon daroh ni sidea hubani si Abimelek, sanina ni sidea ai, na dob mambunuh sidea, pakon hubani parhuta Sikem na mangurupisi mambunuh sanina-saninani ai.

²⁵ Ai domma isuruh parhuta Sikem halak na manggompangisi i atas ni dolog, anjaha irampok sidea sagala na montas humbani sidea i dalan ai. Dong ma halak na patugahkon ai hubani si Abimelek.

²⁶ Sanggah sonai, roh ma si Gaal anak ni si Ebed pakon sanina-saninani pindah hu huta Sikem. Porsaya do parhuta Sikem bani.

²⁷ Laho ma sidea hu juma, laho mamutik buah ni hayu anggur ni sidea, iporohi ma, marpesta ma sidea, masuk ma sidea hu rumah ni naibata ni sidea, mangan minum ma sidea anjaha iburai sidea ma si Abimelek.

²⁸ Jadi nini si Gaal, anak ni si Ebed ai ma, “Ise do si Abimelek, anjaha ise do hita par Sikem, ase jabolonni hita? Ai lang anak ni si Jerubbaal pakon si Zebul, wakilni pe pambalosi do hubani halak Hemor, bapa ni si Sikem? Mase ma gabe jabolonni hita?”

²⁹ Ambit ibagas kuasangku ma namin halak na ibagas huta on, maningon usironku do si Abimelek.” Tapi anggo dompak si Abimelek sonon do nini, “Pabuei ma balamu, anjaha luar ma ham!”

³⁰ Dob ibogei si Zebul, pangulu ni huta ai hata ni si Gaal, anak ni si Ebed ai, manggila ma ia.

³¹ Isuruh ma suruhanni hubani si Abimelek i Aruma mangkatahon, “Tonggor ma, domma roh si Gaal, anak ni si Ebed, pakon saninani hu huta Sikem, anjaha iojur-ojur sidea do parhuta in manlawan ham.

³² On pe, bingkat ma ham borngin, ham pakon halak na rap pakon ham, anjaha monggop ma nasiam i ladang.

³³ Patar, girah sogod, sanggah parpoltak ni mata ni ari, girah ma ham puho anjaha dorab ham ma huta ai; jadi anggo luar ma ia pakon halak na rap pakonsi

mangimbang ham, gabe boi ma bahenonmu bani sidea songon na isura uhurmu.”

³⁴ Halani ai bingkat ma si Abimelek borngin rap pakon halak na rap pakonsi, jadi monggop ma sidea gabe ompat hulanen laho mangimbang huta Sikem.

³⁵ Dob ai luar ma si Gaal, anak ni si Ebed, anjaha jongjong i lobei ni horbangan ni huta ai; jadi luar ma si Abimelek rap pakon halak hasomanni ai hun paronggopan.

³⁶ Dob ididah si Gaal halak ai, nini ma dompak si Zebul, “Tonggor ma, buei ni halak na tuad hun pakpak ni dolog ai. Nini si Zebul ma hu bani, ‘Halino ni dolog do na nididahmu ai songon jolma.’

³⁷ Tapi nini si Gaal ma use, ‘Tonggor ma, tuad do buei halak hun tongah-tongah ni tanoh in, anjaha sada hulanen hun dalan baringin ni partondung.’

³⁸ Nini si Zebul ma mambalosi, ‘Ija do babahmu na mangkatahon: Ise do si Abimelek ase gabe jabolonni hita? Ai lang on do halak na nidorunanmin? Luar ma ho sonari marporang pakon sidea.’

³⁹ Kaluar ma si Gaal mambobahon parhuta Sikem laho marporang mangimbang si Abimelek.”

⁴⁰ Tapi iayak si Abimelek ma ia, gabe lintun ia hun lobeini, anjaha buei ma halak na rasei das hu labah ni horbangan ai.

⁴¹ Dob ai mulak ma si Abimelek hu Aruma; tapi iusir si Zebul ma si Gaal pakon sanina-saninani ai, gabe seng dong be sidea marianan i Sikem.

⁴² Patarni ai laho ma parhuta ai hu juma, anjaha adong ma na patugahkon ai hubani si Abimelek.

⁴³ Dob ai iarahkon ma rayatni, ibagi ma gabe tolu hulanan, jadi monggop ma sidea i ladang. Dob ididah luar parhuta ai hun huta ai, luar ma ia mandorab sidea anjaha ibunuhi ma sidea.

⁴⁴ Si Abimelek pakon hulanan na rap pakonsi mandorab anjaha mangkunduli labah ni horbangan ni huta ai, anjaha na dua hulanan na legan ai mandorab anjaha marraseihon sagala halak na i juma.

⁴⁵ Layur sadari ni ai marporang do si Abimelek mangimbang ai, itaban ma huta ai anjaha iraseihon halak na ibagas ai, dob ai iparseda ma huta ai anjaha isaburi garam hujai.

⁴⁶ Dob ibogei parmanara Sikem ai, masuk ma sidea hubagas liang i toruh ni rumah panumbahan El-Berit.

⁴⁷ Dong ma na patugahkon hubani si Abimelek, na dob martumpu parmanara Sikem ijai.

⁴⁸ Tangkog ma si Abimelek, ia pakon rayat na rap pakonsi hu Dolog Salmon; ibuat si Abimelek ma tangkei, itagili ma dangkah-dangkah ni hayu, iangkat anjaha inahkon ma ai hu abarani anjaha nini ma dompak rayatni na rap pakonsi, “Aha ididah

nasiam hubahen, mintor bahen nasiam ma songon na hubahen ai.”

⁴⁹ Jadi ganup ma rayat ai managili dangkah-dangkah, anjaha iirikkon ma si Abimelek, inahkon sidea ma ai i atas ni liang ai; anjaha itutung sidea ma liang ai i babou ni ulu ni sidea, gabe matei ma homa parmanara Sikem hira-hira saribu halak dalahi pakon naboru.

⁵⁰ Dob ai laho ma si Abimelek hu Tebes; ihubu ma Tebes anjaha itaban.

⁵¹ Adong ma sada manara na toguh i tongah-tongah ni huta ai, jadi maporus ma hujai sagala dalahi pakon naboru ampa ganup parhuta ai, itutup sidea ma labah, jadi laho ma sidea hu tayub ni manara ai.

⁵² Jadi das ma si Abimelek hu manara ai, anjaha iporang ma sidea. Tapi sanggah na das ia hu labah ni manara ai laho manutung ai,

⁵³ jadi idabuhkon sada puang-puang ma hu atas ulu ni si Abimelek sada batu pandudaan, gabe marosak ma pakpak ni uluni.

⁵⁴ Dob ai mintor idilo si Abimelek ma garama siboban sinjatani anjaha nini ma hu bani, “Sintak ma podangmu anjaha bunuh ma ahu, ase ulang ihatahon halak pasal ahu, ‘Naboru do na mambunuhsi.’ Itikam juakjuakni ai ma ia, lanjar matei.”

⁵⁵ Dob ididah halak Israel na dob matei si Abimelek, laho ma sidea, ganup hubani iananni bei.

⁵⁶ Sonai ma pambalaskon ni Naibata bani hajahaton, na binahen ni si Abimelek hubani bapani, marhitei na mambunuh sipitu puluh halak saninani ai;

⁵⁷ sonai homa ganup hajahaton ni halak Sikem ipasuang Naibata hubani ulu ni sidea, gabe manginsonoh hubani sidea papa ni si Jotam, anak ni si Jerubbaal ai.

Panguhum Tola pakon Jair

10 ¹ Dob si Abimelek bangkit ma si Tola, anak ni si Pua, anak ni si Dodo, sada halak Isasar, paluahkon halak Israel, anjaha i Samir do ia marianan, i Dolog Efraim.

² Anjaha dua puluh tolu tahun do iuhumi halak Israel; dob ai matei ma ia, anjaha itanom i Samir.

³ Dobkonsi ia, bangkit ma si Jair, sada halak Gilead, anjaha iuhumi ma halak Israel dua puluh dua tahun dokahni.

⁴ Adong do tolu puluh anakni dalahi na mangajak tolu puluh halode, anjaha adong do huta ni sidea tolu puluh i tanoh Gilead na margoran Hawot-Jair ronsi sonari.

⁵ Matei ma si Jair anjaha itanom ma i Kamon.

Hasosakan humbani Halak Amon

⁶ Dob ai iulaki halak Israel ma mambahen sogam ni uhur ni Jahowa; marsombah ma sidea hubani

Baal pakon Astarot, hubani naibata ni halak Aram, naibata ni halak Sidon, naibata ni halak Moab, naibata ni halak Amon, pakon naibata ni halak Palistim, tapi itadingkon sidea do Jahowa anjaha seng ibalosi sidea la.

⁷ Jadi gajag ma ringis ni Jahowa mangidah Israel, anjaha ijualhon ma sidea hu tangan ni halak Palistim pakon halak Amon.

⁸ Jadi idorun anjaha idogei-dogei sidea ma halak Israel, mulai humbani panorang ai girtip sapuluh ualuh tahun dokahni, haganup halak Israel na i dipar ni Jordan, i tanoh ni halak Amori, na marianan i Gilead.

⁹ Ambahni ai idipari halak Amon do Jordan laho marporang mangimbang halak Juda, halak Benjamin pakon ginompar ni si Efraim homa, gabe tarsosak tumang ma halak Israel.

¹⁰ Jadi doruh-doruh ma halak Israel bani Jahowa, nini ma, “Domma mardousa hanami dompak Ham, halani na itadingkon hanami Naibatunami, anjaha marsombah hanami hubani Baal.

¹¹ Tapi nini Jahowa ma dompak halak Israel, ‘Ai lang Ahu do, na paluahkon hanima humbani halak Masir, halak Amori, halak Amon pakon halak Palistim?’

¹² Halak Sidon, halak Amalek pakon halak Midian pe iodoh-odoh do hanima, jadi doruh-doruh ma hanima hu Bangku, gabe Hupaluah hanima use hun tangan ni sidea.

¹³ Tapi domma itadingkon hanima Ahu anjaha marsombah hanima hubani naibata na legan; halani ai seng ra be Ahu paluahkon hanima.

¹⁴ Laho ma hanima doruh-doruh hubani naibata na dob pinilihnama ai; sidea ma na paluahkon hanima bani panorang hasosakannima in.

¹⁵ Nini halak Israel ma dompak Jahowa, ‘Domma mardousa hanami.’ Bahen Ham ma bennami, romban hubani ganup rosuh ni uhur-Mu; tapi urupi Ham ma hanami sadari on.”

¹⁶ Jadi ipadaoh sidea ma naibata na legan ai hun tengah-tengah ni sidea, anjaha marsombah sidea bani Jahowa, gabe itostos ma uhur-Ni mangidah hasombuhan ni Israel.

¹⁷ Dob ai iarah ma halak Amon hu parporangan, anjaha pajongjong lampolampo ma sidea i Gilead; martumpu ma halak Israel, anjaha pajongjong lampolampo i Mispa.

¹⁸ Dob ai manriah ma pangulu-pangulu ni Gilead, “Barang ise na mammulai parporangan mangimbang halak Amon, ia ma gabe pangintuai ni ganup partanoh Gilead.”

Si Jepta Tardilo Gabe Panguhum

11 ¹ Ia si Jepta, halak Gilead ai, sada puanglima na borani do ia, tapi anak ni sada puang-puang boru jalang do ia; bapa ni si Jepta ai ma si Gilead.

² Sonai homa itubuhkon parinangon ni si Gilead do anak dalahi bani. Dob ganjang anak ni parinangonni ai, iusir sidea ma si Jepta, nini ma hu bani, “Seng panean ho i rumah ni bapanami, ai anak ni naboru na legan do ho.”

³ Jadi maporus ma si Jepta humbani saninani ai, lanjar marianan i tanoh Tob. Dob ai martumpu ma hubani si Jepta halak na hampung maruhur, na laho manamun odor pakonsi.

⁴ Bani dokah-dokah ni ari marmunsuh ma halak Amon mangimbang halak Israel.

⁵ Jadi dob marmunsuh halak Amon pakon halak Israel, laho ma pangintuai-pangintuai ni Gilead mangalopi si Jepta hun tanoh Tob.

⁶ Nini ma dompak si Jepta, “Roh ma ham, ham ma pambobainami ase porang hita halak Amon.

⁷ Nini si Jepta ma dompak pangintuai-pangintuai ni Gilead ai, ‘Ai lang nasiam sandiri do na marsogam ni uhur mangidah ahu, anjaha na mangusir ahu hun rumah ni bapa? Mase ma roh nasiam sonari hu bangku sanggah tarsosak nasiam?’

⁸ Dob ai nini pangintuai-pangintuai ni Gilead ma dompak si Jepta, ‘Sasintongni, roh do hanami use marayak ham, ase ihasomani ham hanami marmunsuh dompak halak Amon, anjaha ase ham gabe pambobai bennami, haganup pangisi ni tanoh Gilead.’

⁹ Nini si Jepta ma dompak pangintuai-pangintuai ni Gilead, 'Jadi anggo mulak ma ahu, ialopi nasiam laho marporang dompak halak Amon, anjaha iberehon Jahowa sidea hu bangku, jadi ahu ma tongon gabe pambobai bani nasiam?'

¹⁰ Jadi nini pangintuai-pangintuai ni Gilead ma dompak si Jepta, 'Jahowa do saksi, na mambogei hita, anggo lang ibahen hanami songon na hinatahonmu ai.'

¹¹ Jadi iirikkon si Jepta ma pangintuai-pangintuai ni Gilead ai, gabe ipabangkit bangsa ai ma ia gabe pambobai ampa puanglima ni sidea. Ihatahon si Jepta ma ganup hatani ai i lobei ni Jahowa i Mispa."

Parsahapan ni si Jepta pakon Halak Amon

¹² Dob ai isuruh si Jepta ma suruhanni hubani raja ni halak Amon, mangkatahon, "Ai dihamu dong bangku, ase roh ham hu bangku laho mamorang tanohku?

¹³ Nini raja ni halak Amon ma dompak suruhan ni si Jepta, 'Halani na binuat ni halak Israel do tanohku sanggah partangkogni ai hun Masir, hun Bah Arnon nari das hu Bah Jabok anjaha das hu Bah Jordan.' On pe paulak ma ganupan ai ibagas damei."

¹⁴ Dob ai isuruh si Jepta ma use suruhanni hubani raja ni halak Amon,

¹⁵ nini ma hu bani, “Sonon do hata ni si Jepta, ‘Seng dong ibuat halak Israel tanoh ni halak Moab age tanoh ni halak Amon.’”

¹⁶ Ai sanggah partangkog ni sidea hun Masir, mardalan do halak Israel i halimisan das hu Laut Sigerger, anjaha das ma sidea hu Kades.

¹⁷ Jadi isuruh halak Israel ma suruhanni hubani raja ni Edom mangkatahon, “Palopas ham ma hanami mamontas hun tanohmu.” Tapi seng itangihon raja ni Edom. Isuruh sidea ma use halak hu bani raja ni tanoh Moab, tapi seng ibalosi. Jadi tading ma Israel i Kades.

¹⁸ Dob ai misir ma sidea mamontas halimisan, manginggoti tanoh Edom pakon tanoh Moab, gabe das ma sidea hampit hapoltakan ni tanoh Moab, anjaha marsaran ma sidea i dipar ni Bah Arnon; tapi seng imasuki sidea tanoh ni Moab, ai Bah Arnon do parbalogan ni tanoh Moab.

¹⁹ Dob ai isuruh halak Israel ma suruhanni hubani si Sihon, raja ni halak Amori, raja i Hesbon; ihatahon halak Israel ma hu bani, “Palopas ham ma hanami mamontas tanohmu on das hu bani ianan siparayakonnami.”

²⁰ Tapi seng tenger uhur ni si Sihon manlopas halak Israel mamontas hun tanohni, jadi ipatumpu si Sihon ma ganup rayatni, marsaran ma ia i Jahas, lanjar marporang mangimbang halak Israel.

²¹ Tapi iondoskon Jahowa, Naibata ni Israel do si Sihon pakon ganup rayatni hu tangan ni halak Israel, lanjar italuhon do sidea; gabe isoluk halak Israel ma ganup tanoh ni halak Amori, na marianan i nagori ai.

²² Sonai ma panoluk ni sidea bani tanoh ni halak Amori, hun Bah Arnon nari das hu Bah Jabok, anjaha hun halimisan nari das hu Bah Jordan.

²³ On pe domma isoluk Jahowa Naibata ni halak Israel halak Amori, halani bangsani halak Israel, hape sihol solukonmu use tanoh in?

²⁴ Ai lang ham do simada atap aha pe na binere ni Kamos, naibatamu ai? Sonai ma, hanami do simada haganup, na sinoluk ni Jahowa Naibatanami.

²⁵ On pe, mintor bujuran ma ham ninuhurmu humbani si Balas, anak ni si Zippor, raja ni Moab? Ongga ma ia maringor ampa halak Israel, barang onggga ma ia marporang dampak sidea?

²⁶ Sanggah na marianan halak Israel i Hesbon ampa i dusun-dusunni, i Aroer ampa i dusun-dusunni pakon bani ganup huta na martopihon Bah Arnon tolu ratus tahun dokahni, mase ma lang irampas nasiam huta ai ijia?

²⁷ Jadi seng marsalah ahu dampak ham, tapi ham do na mambahen na jahat dampak ahu, marhitei na mamorang ahu. Jahowa, Panguhum in, la do na manguhum halak Israel pakon halak Amon sadari on.

²⁸ Tapi seng itangihon raja ni halak Amon hata, na tinonahkon ni si Jepta hu bani.

Bagah-bagah ni si Jepta

²⁹ Dob ai sogop ma Tonduy ni Jahowa hubani si Jepta, gabe misir ma ia mamontas hun tanoh Gilead pakon tanoh Manase, dob ai hun Mispa na i Gilead, anjaha hun Mispa na i Gilead mardalan ma ia torus hu tanoh ni halak Amon.

³⁰ Dob ai marbagah-bagah ma si Jepta hubani Jahowa, nini ma, “Anggo iondoskon Ham halak Amon hubagas tanganku,

³¹ jadi barang aha na luar parlobei hun labah ni rumahku manjumpahkon ahu, sanggah na mulak ahu horas-horas humbani halak Amon, maningon Jahowa ma simada ai, anjaha galangkononku ma ai gabe galangan situtungan.”

³² Dob ai mandipar ma si Jepta dompak halak Amon laho marporang dompak sidea, gabe iondoskon Jahowa ma sidea hu tanganni.

³³ Jadi italuhon ma sidea marhitei hataluon na banggal tumang, hun Aroer nari das hu Minit dua puluh huta bueini anjaha das hu Abel Keramin, gabe tunduk ma halak Amon ai i lobei ni halak Israel.

³⁴ Sanggah na mulak si Jepta hun Mispa hu rumahni, tonggor ma, luar ma boruni manjumpahkonsi mararbap anjaha manortor-nortor; sasada ai do

boruni, sobali ai seng dong anakni dalahi atap naboru bani.

³⁵ Dob ididah boruni ai, iparrigat ma bajuni, lanjar nini ma, “Aih borungku, ham do na mambahen madotei uhurhu anjaha ham do na mambahen maseda ahu; domma hubuha pamanganku marbagah-bagah hubani Jahowa, anjaha seng be tartarik ahu bagah-bagahkai.

³⁶ Tapi nini ma hu bani, ‘Bapa, anggo domma ibuha ham pamanganmu marbagah-bagah hubani Jahowa, bahen ham ma bangku romban hu bani na dob iluarhon ham, ai domma ibahen Jahowa bamu pambalason dompak munsumu, ai ma halak Amon.’

³⁷ Ambahni ai nini ma dompak bapani, ‘Balosi ham ma na hupindohon on; palopas ham ma ahu dua bulan dokahni, ase laho ahu mawat-awat hu dolog, manangisi haanakboruonku rap pakon hasoman-hasomanku.’

³⁸ Nini si Jepta ma mambalosi, ‘Laho ma ho!’ Ipalopas ma ia laho dua bulan dokahni. Jadi laho ma ia rap pakon hasoman-hasomanni manangisi haanakboruonni i atas dolog.”

³⁹ Jadi dob salpu na dua bulan ai, mulak ma ia hubani bapani, anjaha ibahen bapani ma hubani romban hubani na dob binagahkonni ai, gabe seng ongg itanda naboru ai dalahi. Gabe adat ma ai bani halak Israel:

⁴⁰ Ganup tahun laho ma boru ni halak Israel manangisi boru ni si Jepta, halak Gilead ai, ompat-ompat ari dokahni.

Hamonangan ni si Jepta dampak Halak Efraim

12 ¹ Hona arah ma halak Efraim; bingkak ma sidea dampak Zafon anjaha nini sidea ma dampak si Jepta, “Mase ma laho ham marporang mangimbang halak Amon, hape lang iarahkon ham hanami dihut pakon Ham? Halani ai tutungonnami ma rumahmu i atasmu pakon apuy.

² Dob ai nini si Jepta ma dampak sidea, ‘Jobu tumang do ahu marimbang pakon bangsangu dampak halak Amon; huarahkon do nasiam, tapi seng roh nasiam paluahkon ahu hun tangan ni sidea.’

³ Jadi dob huidah, na seng roh nasiam paluahkon ahu, huasamkon ma hosahku, jadi bingkak ma ahu dampak halak Amon, gabe iondoskon Jahowa ma sidea hubagas tanganku. Mase ma tangkog nasiam sadari on laho marmunsuh dampak ahu?”

⁴ Dob ai ipatumpu si Jepta ma ganup halak Gilead, laho marmunsuh dampak halak Efraim. Jadi italuhon halak Gilead ma halak Efraim, halani na hinatahon ni sidea, “Halak na maporus hun Efraim do nasiam!” I tongah-tongah ni halak Efraim pakon halak Manase do halak Gilead ai.

⁵ Jadi iiankon halak Gilead ma pandiparan ni Bah Jordan laho mangimbang halak Efraim. Anggo adong halak na maporus humbani halak Efraim na mangkatahon, “Palopas ma mandipar ahu, jadi nini halak Gilead ma hu bani, ‘Halak Efraim do ham?’ Anggo ihatahon “Lang!”

⁶ nini sidea ma hu bani: “Hatahon ma lobei: Syibolet”. Anggo ihatahon: “sibolet”, jadi seng sintong pangkatahonni, itangkap sidea ma ia anjaha isayat dohorhon ni pandiparan Bah Jordan ai. Adong do na matei bani panorang ia humbani halak Efraim ompat puluh dua ribu halak.”

⁷ Dong do onom tahun si Jepta manguhumi halak Israel. Dob ai matei ma si Jepta, halak Gilead ai, lanjar itanom bani sada huta i tanoh Gilead.

Panguhum Ebsan, Elon pakon Abdon

⁸ Dobkonsi ia, jadi si Ebsan, na hun Betlehem ma na manguhumi halak Israel.

⁹ Adong do tolu puluh niombahni dalahi. Tolu puluh boruni ipalaho bani halak luar, anjaha tolu puluh naboru ialop humbani halak luar bani anakni. Iuhumi ma halak Israel pitu tahun dokahni.

¹⁰ Dob ai matei ma si Ebsan, lanjar itanom ma i Betlehem.

¹¹ Dobkonsi ia, si Elon halak Sebulon ma na manguhumi halak Israel, anjaha iuhumi do halak Israel sapuluh tahun dokahni.

¹² Dob ai matei ma si Elon halak Sebulon ai, lanjar itanom i Ayalon, tanoh Sebulon.

¹³ Dobkonsi ia, si Abdon anak ni si Hillel, halak Piraton ma na manguhumi halak Israel.

¹⁴ Adong do ompat puluh niombahni dalahi anjaha tolu puluh pahompuni dalahi, na mangajak pitu puluh halode. luhumi do halak Israel ualuh tahun dokahni.

¹⁵ Dob ai matei ma si Abdon, anak ni si Hillel, halak Piraton ai, lanjar itanom i Piraton, i tanoh Efraim i dolog ni halak Amalek

Partubuh ni si Simson

13 ¹ Dob ai iulaki halak Israel ma use mambahen sogam ni uhur ni Jahowa, halani ai iondoskon Jahowa ma sidea hu tangan ni halak Palistim, ompat puluh tahun dokahni.

² Jadi adong ma sada halak hun Zora, humbani marga Dan, na margoran si Manoah; lambang do parinangonni, seng tubuhan tuah.

³ Dob ai ipataridahkon malekat ni Jahowa ma dirini hu bani naboru ai, anjaha nini ma hu bani, “Tonggor ma, na lambang do ham, seng tubuhan tuah; tapi boratan rumah ma ham anjaha manubuhkon anak sada.

⁴ On pe, jaga ma dirimu ulang inum ham anggur barang siinumon na pamabukkon, anjaha ulang ma pangan ham barang aha pe na so panti,

⁵ ai tonggor ma, boratan rumah ma ham anjaha manubuhkan anak sada. Seng bulih dais pisou parsuhur bani uluni, ai gabe halak nasir do ia bani Naibata humbani parnaibataan nari; ai pungkahonni ma paluahkon halak Israel hun tangan ni halak Palistim.”

⁶ Dob ai roh ma puang-puang ai mangadu-aduhon ai hu bani paramangonni, “Roh do sada halak ni Naibata bangku, ia rupani songon rupa ni malekat ni Naibata do, jombut tumang; seng husungkun barang hunja do ia, goranni pe seng ipatugah hu bangku.

⁷ Tapi nini do hu bangku, ‘Boratan rumah ma ham anjaha manubuhkan sada anak; on pe ulang ma inum ham anggur barang siinumon na mambahen mabuk anjaha ulang ma pangan ham barang aha pe na so panti, ai gabe halak nasir do bani Naibata dakdanak ai humbani partubuhni das hubani ari parmateini.’

⁸ Dob ai martonggo ma si Manoah hubani Jahowa, nini ma, ‘Ham Tuhanku, sai roh ma namin sahali nari halak ni Naibata, na dob sinuruh-Mu ai bennami, ase iajarhon bennami barang aha do sibahenonnami hubani dakdanak na sihol tubuh in.’”

⁹ Jadi itangihon Naibata ma pangindoan ni si Manoah ai, gabe roh ma use malekat ni Naibata ai hubani naboru ai, sanggah hundul ia i juma,

sanggah seng rap pakonsi si Manoah paramangonni ai.

¹⁰ Dob ai tarolos ma naboru ai patugahkon ai hu bani paramangonni, nini ma hu bani, “Tonggor ma, domma ipataridahkon halak na roh nabaruon ondi use dirini hu bangku.”

¹¹ Jadi jongjong ma si Manoah, iirikkon ma parinangonni ai, anjaha dob das sidea hubani halak ai, nini ma hu bani, “Ham do tongon na dob onga marsahap pakon naboru on? Balosni, ‘Ahu ma da.’

¹² Dob ai nini si Manoah ma, ‘On pe, anggo saud ma holi songon hata-Mu ai, sonaha ma talup pargoluhon ni dakdanak ai, anjaha aha ma sibahenonnami?’

¹³ Jadi nini malekat ni Jahowa ai ma dompak si Manoah, ‘Ganup na dob Hupatugah hubani naboru on maningon pardiateihononni do.’

¹⁴ Seng bulih panganonni sagala na luar humbani hayu anggur; anggur atap siinumon na pamabukkon seng bulih inumonni, anjaha seng bulih panganonni atap aha pe na so panti. Maningon ramotkononni do sagala na dob Huparentahkon hu bani.

¹⁵ Nini si Manoah ma dompak malekat ni Jahowa ai, ‘Sai ra ma Ham jolomannami, ase ihoseihon hanami Bamu anak ni haming sada.’

¹⁶ Jadi nini malekat ni Jahowa ma dompak si Manoah, ‘Age pe ijolomi ham Ahu, seng anjai

panganon-Ku humbani sipanganonmu ai. Tapi anggo sihol galangkononmu sada galangan situtungon, hubani Jahowa ma galangkon ham ai.' Halani seng ibotoh si Manoaah, malekat ni Jahowa do ia hape.

¹⁷ Dob ai nini si Manoaah ma dompak malekat ni Jahowa ai, 'Ise do goran-Mu, ase ipasangap hanami Ham, anggo saud ma holi hata-Mu ai?'

¹⁸ Tapi nini malekat ni Jahowa ai ma hu bani, 'Mase ma sungkunonmu goran-Ku?' Halongangan do ai."

¹⁹ Dob ai ibuat si Manoaah ma sada anak ni hambing rap pakon galangan sipanganon, lanjar igalangkon ma ai bani Jahowa i atas ni batu. Ibahen malekat ai ma sada halongangan ididah si Manoaah pakon parinangonni ai.

²⁰ Ai sanggah na naik dilah ni apuy ai hun anjapanjap ai hu atas, naik ma homa malekat ni Jahowa ai ibagas dilah ni apuy na humbani anjapanjap ai, ididah si Manoaah pakon parinangonni ai, jadi marrogop ma sidea.

²¹ Dobkonsi ai seng onggga be ipataridahkon malekat ni Jahowa ai dirini hubani si Manoaah pakon parinangonni ai. Jadi ibotoh si Manoaah ma, malekat ni Jahowa do la hape.

²² Nini si Manoaah ma dompak parinangonni ai, "Maningon matei mando hita, halani na dob nididahta ai Naibata.

²³ Tapi nini parinangonni ai ma hu bani, ‘Porini sihol bunuhon ni Jahowa hita, seng anjai jaloan-Ni galangan situtungon pakon galangan sipanganon ai hun tanganta, anjaha seng anjai patalaron-Ni ganupan ai hu banta, anjaha seng anjai pabogei honon-Ni na sonai ai hubanta nuan.’”

²⁴ Dob ai itubuhkon naboru ai ma sada anak anjaha ibahen ma goranni si Simson. Lambin banggal ma dakdanak ai, anjaha ipasu-pasu Jahowa do ia.

²⁵ Anjaha ipungkah Tonduy ni Jahowa ma manggorakkonsi i Mahane-Dan, na i holangkolang ni Zora pakon Estaol.

Parrumahtanggaon ni si Simson pakon Hutintani

14 ¹ Tuad ma sahali si Simson hu Timna, gabe ididah ma sada naboru i Timna, boru Palistim.

² Dob ai tangkog ma ia, ipatugah ma hubani bapani pakon inangni, “Adong do huidah sada naboru i Timna, boru Palistim; on pe buat nasiam ma ia gabe parinangonku.

³ Tapi nini bapani pakon inangni ma hu bani, ‘Seng dong gakni boru ni i tongah-tongah ni boru saninamu barang i tongah-tongah ni ganup bangsanta, mambahen laho ho mambuat boru humbani halak Palistim, na so marsunat ai?’ Tapi nini si Simson ma dompak bapani ai, ‘Maningon ia do buatonmu bangku, ai ia do na huharosuhkon.’”

⁴ Tapi seng ibotoh bapa pakon inangni, na roh humbani Naibata do ai, ai na mangindahi siguiti do ia dompak halak Palistim. Ai halak Palistim do na manggomgom halak Israel bani panorang ia.

⁵ Dob ai tuad ma si Simson rap pakon namatorasni, bapani ampa inangni, hu Timna. Jadi dob das sidea hu pohon anggur ni Timna, tonggor ma, roh ma anak ni singa sada maraum manjumpahkonsi.

⁶ Jadi sogop ma hubani Tonduy ni Jahowa, gabe iparsirak ma singa ai songon halak na marsirak anak ni hambing, anjaha aha pe seng dong ibagas tanganni. Tapi seng ipatugah hubani namatorasni na binahenni ai.

⁷ Dob ai tuad ma ia lanjar marsahap-sahap pakon naboru ai, ai rosuh do uhurni mangidah naboru ai.

⁸ Dob salpu piga-piga ari mulak ma ia hujai laho mangalop naboru ai; anjaha sanggah na manirpang ia laho mangidah bangkei ni singa ai, tonggor ma, adong do sahumanan ranggiting bani tangkurak ni singa ai, sonai homa manisan.

⁹ Ihoruk ma ai hubagas tanganni, anjaha ipangan ma turut-turut mardalan; das ma ia hubani namatorasni, ibere ma deba hu bani sidea, lanjar ipangan sidea ma. Tapi seng ipatugah hubani sidea, paboa na humbani tangkurak ni singa do ai ibuat.

¹⁰ Jadi dob das bapa ni si Simson hubani naboru ai, ibahen si Simson ma horja-horja ijai, ai somal do sonai ibahen anak garama.

¹¹ Jadi dob ididah sidea ia, ibuat sidea ma tolu puluh halak bahen pangkasomanini.

¹² Nini si Simson ma dompak sidea, “Adong sada hutintangku bani nasiam; anggo tarpatugah nasiam bangku aha ai, ibagas mata ni pesta sipitu ari on, anjaha dapot nasiam artini ai, bereonku ma bani nasiam tolu puluh pakean parbagas pakon tolu puluh pakean pardarat.

¹³ Tapi anggo seng boi ibere nasiam balosni hu bangku, jadi nasiam ma mambere hu bangku tolu puluh pakean parbagas ampa tolu puluh pakean pardarat. Nini sidea ma hu bani, ‘Patugah ma hutintamu ai, ase ibogei hanami.’

¹⁴ Nini ma dompak sidea, ‘Luar sipanganon humbani siparpangan, anjaha luar na matobu humbani na gogoh.’ Anjaha seng tarpatugah sidea arti ni hutinta ai ibagas tolu ari.”

¹⁵ Bani ari papituhon nini sidea ma dompak parinangon ni si Simson, “Elek-elek ma paramangonmai, ase ipatugah bennami arti ni hutinta ai, ase ulang itutung hanami ho, age pangisi ni rumah ni bapamu bani apuy. Ai lang na sihol mambuat artanami do ho ase iontang hanami?”

¹⁶ Jadi sai tangis-tangis ma parinangon ni si Simson ai i lobeini, nini ma, “Magigi do ham hape mangidah ahu, lang holong uhurmu mangidah ahu; marhutinta do ham hubani hasomanku sabangsa, tapi seng ipatugah ham artini hu bangku. Nini ma

mambalosisi, ‘Gari hubani bapa pakon inang seng hupatugah, lambin bam ma patugahonku?’”

¹⁷ Tapi sai tangis do parinangonni ai i lobeini, sadakah na pitu ari ai sidea marpesta; jadi bani ari papituhon, ipatugah ma bani, halani na motei-otei ai ia, lanjar ipatugah naboru ai ma arti ni nipi ai hubani hasomanni sabangsa.

¹⁸ Dob ai ari papituhon, sanggah lape ope sundut mata ni ari, nini dalahi parhuta ai ma hu bani, “Aha do tobunan ase manisan? Aha do gogohan, ase singa? Nini ma dompak sidea, ‘Ambit lang maninggala nasiam pakon anak ni lombungku, seng anjai dapot nasiam arti ni hutintang kai.’”

¹⁹ Sogop ma Tonduy ni Jahowa hu bani, dob ai laho ma ia hu Askelon, ibunuh ma humbani sidea tolu puluh halak ijai; ibuat ma pakean ni sidea, anjaha ibere ma ai hubani sidea na mandapot arti ni hutinta ai; tapi gajag tumang do ringisni, lanjar mulak ma ia hu rumah ni bapani.

²⁰ Tapi anggo parinangon ni si Simson ai hu bani pangkasomanini, na mangkasomanisi do iberehon.

Ilawan si Simson Halak Palistim

15 ¹ Jadi bani labang-labang ni ari, sanggah musim ni pariama, iparayak si Simson ma use parinangonni ai, iboan do anak ni hambing sada, anjaha nini ma, “Sihol hu kamar do ahu

marayak parinangonku.” Tapi seng ipalopas bapa ni naboru ai ia masuk.

² Nini bapani ai ma, “Huagan ma na dob magigi ho bani, jadi domma hupalaho ia hubani hasomanmu. Ai lang jengesan do anggini ai hun bani, ia ma bam gantihni.

³ Dob ai nini si Simson ma dompak sidea, ‘Anggo sahali on, seng marsalah ahu dompak halak Palistim, anggo huparroh hamagouan hubani sidea.’”

⁴ Dob ai laho ma si Simson, itangkap ma tolu ratus sorigala, ibuat ma tunam, isangkut ma ihur bani ihur, anjaha inahkon ma tunam sada i holangkolang ni na dua sorigala ai.

⁵ Dob ai inahiti ma tunam ai, anjaha ipaluah ma sorigala ai hu juma gandum ni halak Palistim, na so ipariamai ope, gabe matutung ma radean pakon gandum, na so ipariamai ope, sonai homa kobun anggur pakon kobun jetun.

⁶ Nini halak Palistim ma, “Ise do na mambahen on? Nini halak ma mambalosi, ‘Si Simson do, hela ni halak Timna ai, ai ibuat do parinangon ni si Simson anjaha iberehon hubani hasomanni.’ Dob ai laho ma halak Palistim hujai anjaha itutung ma naboru ai pakon bapani.”

⁷ Dob ai nini si Simson ma dompak sidea, “Anggo sonai ibahen nasiam, seng anjai maronti ope ahu, anggo seng hubalaskon ope ai bani nasiam.”

⁸ Jadi ibogbogi, irosaki ma holi-holi ni sidea, parah pambogbogini ai. Dob ai laho ma ia anjaha marianan ibagas sada liang i Dolog batu Etam.

⁹ Dob ai bingkot ma halak Palistim, marsaran ma sidea i Juda anjaha merap das hu Lehi.

¹⁰ Nini halak Juda ma, “Mase ma tangkog nasiam dompak hanami? Nini sidea ma mambalosi, ‘Laho manangkut si Simson do ase tangkog hanami, anjaha mambahen hubani songon na binahenni hu bennami.’”

¹¹ Dob ai tuad ma tolu ribu halak humbani halak Juda hu liang na i Dolog batu Etam, anjaha nini sidea ma dompak si Simson, “Ai lang ibotoh ho, na ginomgom ni halak Palistim do hita? Ai aha do na binahenmon bennami? Tapi nini ma mambalosi sidea, ‘Songon na binahen ni sidea hu bangku, sonai do hubahen bani sidea.’

¹² Nini sidea ma hu bani, ‘Ase roh pe hanami hujon na laho manangkut anjaha mangondoskon ho do hubagas tangan ni halak Palistim.’ Jadi nini si Simson ma mambalosi sidea, ‘Marbulawan ma nasiam bangku, paboa na so nasiam sandiri mandorab ahu.’

¹³ Dob ai nini sidea ma hu bani, ‘Lang, pitah manangkut ho do hansa hanami, dob ai mangondoskon ho hubagas tangan ni sidea, tapi seng anjai bunuhonnam ho.’ Dob ai isangkut sidea

ma ia marhitei dua tali na baru anjaha iboan ma ia hun dolog batu ai.”

¹⁴ Dob das ia hu Lehi, anjaha marsurak-surak halak Palistim manjumpahkansi, jadi sorap ma Tonduy ni Jahowa hu bani, anjaha tali na i pargolanganni ai gabe songon bonang na tinutung ma anjaha sagala panangkutni ai tanggal hun tanganni.

¹⁵ Dob ai jumpahsi ma sada osang-osang ni halode na baru ope, idurdurhon ma tanganni laho manjompot ai, dob ai ipambogbogkon ma ai gabe matei ma saribu halak.

¹⁶ Nini si Simson ma, “Marhitei osang-osang ni halode hubogbogi sidea bois, marhitei osang-osang ni halode saribu halak hubunuh.”

¹⁷ Jadi dob ihatahon sonai, igijigkon ma osang-osang ai hun tanganni; halani ai igoran do ianan ai Ramat-Lehi.

¹⁸ Tapi horahan tumang ma ia, gabe idilo ma Jahowa, nini ma, “Domma ibere Ham haluahon na banggal marhitei ahu jabolon-Mu on, mintor matei horahan ma ahu sonari anjaha madabuh hu tangan ni halak na so marsunat on?”

¹⁹ Jadi ibolah Naibata ma dolog batu na i Lehi, gabe luar ma hunjai bah; jadi dob minum ia mulak ma hosahni anjaha margogoh ma ia. Halani ai igoran ma bah tubuh ai: “Bah tubuh ni halak na dilo-dilo,” na adong i Lehi ronsi sadari on.

²⁰ Jadi adong do dua puluh tahun si Simson manguhumi halak Israel bani panorang ni halak Palistim.

Si Simson i Huta Gasa

16 ¹ Bani na sahali laho ma si Simson hu huta Gasa, ididah ma ijai sada boru jalang, lanjar iparayak ma.

² Dong ma na patugahkon hubani halak parhuta Gasa: Roh do si Simson hubagas huta on, jadi iinggoti anjaha ionggopi sidea ma ia i lambung horbangan ni huta ai layur sabornginni ai, tapi sip do sidea sabornginni ai, ai ninuhur ni sidea, “Patar marayak siang ari ma bunuh hita ia.”

³ Tapi modom do si Simson ronsi tongah borngin: Tongah borngin honsi puho ma ia, ijolom ma haduasi labah ni horbangan ni huta ai, pakon tiangni na dua ai, lanjar idokdok ma rap pakon pating-patingni; itampeihon ma ai hu abarani anjaha iusung ma ai hu pakpak ni dolog na i lobei ni Hebron.

Si Simson pakon si Delila

⁴ Dob ai rosuh ma uhurni mangidah sada naboru i habungan Sorek, goranni si Delila.

⁵ Jadi roh ma raja-raja ni halak Palistim hubani anjaha nini ma, “Sai elek-elek anjaha tulimati ma ia, atap halani aha do hagogohonni na banggal ai,

anjaha marhitei aha do tartaluhon hanami ia ampa manangkutsi laho patundukkonsi; ganup pe hanami mamberehon bam saribu saratus duit pirak.

⁶ Jadi nini si Delila ma dompak si Simson, 'Patugah ma bangku, halani aha do hagogohonmu na banggal in, anjaha marhitei aha do ham sangkuton laho patundukkon ham?'

⁷ Nini si Simson ma mambalosi, 'Anggo isangkut ahu bani pitu tali panah na baru, na so horah ope, gabe galek ma ahu, gabe songonjolma na legan.'"

⁸ Dob ai iboan raja-raja ni Palistim ma hubani pitu tali panah na baru na so horah ope, jadi isangkut naboru ai ma ia bani tali ai.

⁹ Tapi adong do halak na monggop isuruh ibagas kamar, dob ai idilohon naboru ai ma, "Halak Palistim mandorab ham, Simson!" Tapi irotapkon ma tali panah ai songon tali rami na rotap binahen ni apuy. Jadi seng tarbotoh rusia ni hagogohonni ai.

¹⁰ Dob ai nini si Delila ma dompak si Simson, "Tonggor ma, ioto-otoi ham do hape ahu anjaha iladungi ham, on pe patugah ham ma bangku, barang marhitei aha do ham boi sangkuton.

¹¹ Nini ma mambalosisi, 'Anggo isangkut ahu bani tali na baru, na so onnga pinakei ope atap bani horja aha pe, gabe galek ma ahu, gabe songon halak na legan.'"

¹² Dob ai ibuat si Delila ma tali na baru, isangkut ma ia bani tali ai, anjaha idilohon ma, "Halak

Palistim mandorab ham, Simson!” Anjaha halak na monggop ai ibagas kamar do. Tapi irotapkon ma tali ai hun tanganni songon bonang tumang.

¹³ Dob ai nini si Delila ma dompak si Simson, “Ronsi nuan ioto-otoi ham do ahu anjaha iladungi ham; patugah ma bangku naha do manangkut ham. Nini ma hu bani, ‘Anggo idandan ho na pitu pusuk buhit ni ulungku rap pakon tali pasa, dob ai ipakuhon ai hu bani dingding, gabe galek ma ahu, gabe songon halak na legan.’”

¹⁴ Jadi sanggah na modom ia, ibuat si Delila ma na pitu pusuk buhit ai, anjaha idandan ma ai marhitei tali pasa ai, dob ai ipakuhon ma hu dingding. Dob ai idilohon ma, “Halak Palistim mandorab ham, Simson!” Tapi puho ma ia humbani na modom ai, irotapkon ma paku pakon tali pasa ai.

¹⁵ Nini naboru ai ma hu bani, “Mase ma ihatahon ham, ‘Holong do uhurhu bam, hape seng hu bangku uhurmu?’ Domma tolu hali ahu ioto-otoi ham, anjaha lalap seng ipatugah ham hu bangku, ija do tibal ni gogohmu na banggal in.”

¹⁶ Tapi dob sai ielek-elek naboru ai ia siap arian, anjaha isosak-sosak, gabe mandolei ma ia anjaha sihol matei.

¹⁷ Dob ai ipatugah ma hubani ganup ponopan ni uhurni, nini ma hu bani, “Seng onggga dais pisou parsuhur hubani ulungku, ai halak nasir do ahu bani Naibata humbani parnaibataan nari. Porini isuhur

ahu, surut ma gogohku humbangku, gabe galek ma ahu, gabe songonjol ma na legan.”

¹⁸ Jadi dob ididah si Delila, na dob pinatugah bani ganupan ponopan ni uhurni ai, isuruh ma na mandilo raja-raja ni halak Palistim, nini ma dompak sidea, “Roh ma nasiam sahali on, ai domma ipatugah bangku ganup ponopan ni uhurni.” Dob ai tangkog ma raja-raja ni halak Palistim ai bani, lanjar iboan ma duit ai.

¹⁹ Jadi dob sinok mata ni si Simson i abingan ni si Delila, idilo ma sada dalahi, ase isuhur na pitu pusuk buhit ni uluni ai. Dob ai mulai ma galek ia, anjaha surut ma gogohni hun bani.

²⁰ Nini si Delila ma mandilohon, “Halak Palistim mandorab ham, Simson!” Jadi tarpuho ma ia humbani na modom ai, anjaha nini ma, “Luar ma ahu songon na somal, marrunta ma ahu. Seng ibotoh na dob itadingkon Jahowa do ia hape.”

²¹ Dob ai itangkap halak Palistim ma ia, anjaha ipulsitkon ma matani, dob ai iboan ma ia hu Gasa, anjaha irantei bani dua rantei tombaga; ibahen ma ia manduda ibagas tutupan.

²² Tapi mangulaki tubuh ma jambulan ni uluni, dob na isuhur ai.

Parmatei ni si Simson

²³ Dob ai martumpu ma ganup raja-raja ni halak Palistim, sihol manggalangkon sada galangan na

banggal hubani Dagon, naibata ni sidea ai, anjaha marmalas ni uhur, ai nini sidea do, “Domma iondoskon naibatanta hubagas tanganta si Simson munsuhta in.”

²⁴ Jadi dob ididah halak simbuei ai ia, ipapuji-puji sidea ma naibata ni sidea, nini sidea ma, “Domma iondoskon naibatanta hubagas tanganta munsuhta, na parseda tanohta, anjaha na mambunuh buei hasomanta.”

²⁵ Jadi sanggah na marmalas ni uhur ai sidea, nini sidea ma, “Dilo ma si Simson, ase mariah hita ibahen.” Jadi idilo sidea ma si Simson hun rumah tutupan, gabe manortori ma ia i lobei ni sidea; dob ai ipajongjong ma ia i holangkolang ni tiang partunggul ai.

²⁶ Nini si Simson ma hubani dakdanak na manogunogu tanganni, “Lopas ma ahu ase hujamah tiang partunggul ai, onjolan ni rumah ai, ase mangunsandei ahu hujai.”

²⁷ Tapi gok do dalahi ampa naboru i rumah ai; ijai do homa ganup raja-raja ni halak Palistim, anjaha i atas tayub ni rumah ai adong do hira-hira tolu ribu halak dalahi pakon naboru, na manonggor si Simson na manortori ai.

²⁸ Dob ai dilo-dilo ma si Simson hubani Jahowa, nini ma, “Ham Tuhan Jahowa, ingat Ham ma ahu, pargogohi Ham ma ahu pala sahali nari,

Ham Naibata, ase hubalaskon pala sada humbani matangkon hubani halak Palistim.”

²⁹ Dob ai idahop si Simson ma na dua tiang partunggul partongah-tongah ai, onjolan ni rumah ai, lanjar iaitkon, sada bani siamunni, anjaha na sada nari bani sambilouni.

³⁰ Nini si Simson ma, “Age matei ahu rap pakon halak Palistim on.” Jadi unduk ma ia sagogoh-gogohni, gabe marumbak ma rumah ai, anjaha itipa ma raja-raja ampa haganup na ibagas ai, gabe bueinan ma na binunuhni bani parmateini ai, ase na binunuhni sanggah bani goluhni.

³¹ Dob ai tuad ma saninani pakon ganup ginompar ni bapani, ibuat sidea ma ia, iboban ma tangkog anjaha itanom ma i holangkolang ni Zora pakon Estaol ibagas tanoman ni si Manoaah bapani ai. Adong do dua puluh tahun ia manguhumi halak Israel.

Parsombahon ni si Mika bani Gana-gana

17 ¹ Adong ma sada dalahi hun Dolog Efraim, na margoran si Mika.

² Nini ma hubani inangni, “Sisaribu saratus pirak ai, na binuat ni halak hun bamu pala mamurai ham halani ai, anjaha hubogei do homa ai ihatahon ham, tonggor ma, bangku do duit ai, ai ahu do mambuatsi. Jadi nini inangni ai ma, ‘Sai ipasu-pasu Jahowa ma ho anakku.’

³ Dob ai ipaulak ma duit pirak sisaribu saratus ai hu bani inangni. Tapi nini inangni ai ma, ‘Domma hupapansing hinan duit on bani Jahowa marhitei tanganku bani anakku, ase ipauli hunjin sada gana-gana na niuhir pakon sada gana-gana na tinuang; on pe hupaulak ma in bam.’”

⁴ Dob ai ipaulak ma duit ai hubani inangni; ibuat naboru ai ma dua ratus duit pirak anjaha ibere ma ai hubani tukang pirak, gabe ipauli ma hunjai sada gana-gana na niuhir pakon sada gana-gana na tinuang; lanjar i rumah ni si Mika do ai inahkon.

⁵ Adong do rumah panumbahan ni naibata na legan bani si Mika; ipauli ma sada baju efod pakon terapim anjaha ipabangkit ma sada humbani anakni gabe malimni.

⁶ Bani panorang ia seng dong raja bani halak Israel, ganup do marsisombah rosuh ni uhurni bei.

⁷ Adong ma sada parana hun Betlehem na i Juda, humbani marga Juda; sada halak Levi do ia anjaha na manginsolat do ia ijai.

⁸ Jadi laho ma halak ai hun huta Betlehem na i Juda, laho manginsolat atap ija ia holi boi sangkot; bani pardalananni ai das ma ia hu Dolog Efraim hu rumah ni si Mika.

⁹ Isungkun si Mika ma ia, “Roh hunja do ham? Nini ma mambalosi ‘Halak Levi do ahu hun Betlehem na i Juda, anjaha na laho manginsolat do ahu, atap ija holi ahu boi sangkot.’

¹⁰ Dob ai nini si Mika ma hu bani, ‘Tading i lambungku ma ham, gabe bapa pakon malim bangku; hubere pe bamu sapuluh duit pirak satahun, sapasang pakean pakon bohalmu.’ Jadi ibalosi halak Levi ai ma rap pakonsi.”

¹¹ Rosuh do uhur ni halak Levi ai marianan i lambung ni dalahi ai, anjaha usih hubani anakni sandiri do ibahen hubani anak parana ai.

¹² Ipabangkit si Mika ma halak Levi ai; gabe malimni ma anak parana ai anjaha marianan i rumah ni si Mika.

¹³ Jadi nini si Mika ma, “Sonari hubotoh ma, sai tumpakon ni Jahowa do ahu, halani na dob dong halak Levi gabe malim bangku.”

Irampok Halak Dan Gana-gana Sisombahon ni si Mika ai

18 ¹ Bani panorang ai seng dong raja bani halak Israel; anjaha bani ari ai mangindahi parbagiananni do halak Dan bahen iananni, ai das hubani ari ai seng dapotan parbagianan ope sidea i tongah-tongah ni halak Israel.

² Dob ai ipabangkit halak Dan ma lima halak na bisang humbani haganup tumpuan ni sidea, na marasal hun Zora pakon Estaol, laho mangkahapi tanoh ai pakon mantulimatisi, anjaha nini ma dompak sidea, “Laho ma nasiam mamareksai tanoh

in!” Jadi dob das sidea hu Dolog Efraim, hu rumah ni si Mika, marborngin ma sidea ijai.

³ Dohorhonsi sidea hu rumah ni si Mika ai, itanda sidea ma sora ni halak Levi na maposo ai, lanjar tuluy ma sidea hujai anjaha nini hu bani, “Ise do na mamboan ham hujon? Aha do horjamu ijon anjaha mangaha do ham hujon?”

⁴ Nini ma dompak sidea, ‘Sonon-sonon do ibahen si Mika hu bangku; iupahi do ahu gabe malim bani.’

⁵ Dob ai nini sidea ma hu bani, ‘Mahua sungkun ma hubani Naibata, ase ibotoh hanami barang na manjadi do na idalankon hanami on?’

⁶ Nini malim ai ma dompak sidea, ‘Laho ma nasiam ibagas damei!’ Dear do dalan na nilangkahkon nasiam on bani pangidah ni Jahowa.”

⁷ Dob ai laho ma na lima halak ai, gabe das ma sidea hu Lais. ididah sidea ma mardamei-damei do rayat na marianan ijai ai, mangirikkon adat ni halak Sidon, sonang anjaha damei, seng hurangan atap bani aha pe na adong i tanoh on, bayak tumang do sidea; daoh do sidea humbani halak Sidon, anjaha seng dong parsauran ni sidea pakon halak na legan.

⁸ Jadi dob mulak na lima halak ai hubani sanina ni sidea i Zora pakon i Estaol, nini saninani ai ma dompak sidea, “Aha do barita nasiam?”

⁹ Nini sidea ma mambalosi, ‘Bingkat ma hita mandorab sidea, ai domma ididah hanami tanoh ai, anjaha tonggor ma, dear tumang do tanoh ai. Sai

soh soh ope nasiam? Ulang ma marlambat-lambat nasiam manoluk tanoh ai bahen parbagianan nasiam.'

¹⁰ Anggo das ma nasiam hujai, jumpah nasiam ma ijai sada bangsa na marsonang-sonang. Lumbang do tanoh ai hu siamun sambilou, tongon, domma ibere Naibata tanoh ai hubagas tangan nasiam, ai ma sada tanoh na so hurangan pasal aha pe na adong i tanoh on."

¹¹ Jadi bingkat ma hunjai, hun Zora pakon Estaol, onom ratus halak humbani halak Dan, na marsinjata bei laho hu parporangan.

¹² Dob ai tangkog ma sidea lanjar marsaran i Kiriati-Jearim i Juda; halani ai do ase margoran ianan ai parsaranan Dan ronsi sadari on, tibalni hampit hasundutan ni Kiriati-Jearim.

¹³ Hunjai mardalan ma sidea torus hu Dolog Efraim, gabe das ma sidea hu rumah ni si Mika.

¹⁴ Dob ai nini silima halak na dob mangkahapi tanoh ai ma dompak sanina-sanina ni sidea ai ma, "Ibotoh nasiam do, paboa na adong do i rumah on baju efod, terapim, gana-gana na niuhir pakon gana-gana na tinuang? On pe timbang nasiam ma barang aha do sibahenon nasiam."

¹⁵ Jadi tuluy ma sidea hujai, gabe das ma sidea hu rumah ni halak Levi na maposo ai, hu rumah ni si Mika, anjaha isungkun sidea ma barang na sonang do ia.

¹⁶ Ia sionom ratus halak na humbani halak Dan ai, na marsinjata porang ai, jongjong do i lambung ni horbangan.

¹⁷ Tapi silima halak, na dob mangkahapi tanoh ai, masuk ma hubagas, ipambuat ma gana-gana na niuhir, baju efod, terapim pakon gana-gana na tinuang ai. Jongjong do anggo malim ai i horbangan rap pakon sionom ratus halak, na marsinjata porang ai.

¹⁸ Jadi dob masuk sidea hu rumah ni si Mika, anjaha dob ibuat gana-gana na niuhir, baju efod, terapim pakon gana-gana na tinuang ai nini malim ai ma dompak sidea, “Aha do na binahen nasiam in?”

¹⁹ Jadi nini sidea ma hu bani, ‘Sip ham, songom ham pamanganmu, irikkon ham ma hanami, ham ma jadi bapa pakon malim bennami; ija do dearan bamu, gabe malim i rumah ni sada halak, barang malim ham bani sada pangku ampa marga ni Israel?’”

²⁰ Jadi malas ma uhur ni malim ai, ibuat ma baju efod, terapim pakon gana-gana na niuhir ai, lanjar laho ma ia hu tongah-tongah ni na mabuei ai.

²¹ Dob ai marhusor ma sidea lanjar bingklat, ibahen sidea ma hu lobei ni sidea sagala dakdanak, pinahan pakon ugas-ugas na maharga.

²² Dobkonsi tardaoh sidea hun rumah ni si Mika, martumpu ma dalahi parlambung rumah ni si Mika, lanjar iayaki sidea ma halak Dan ai.

²³ Idiloi sidea ma halak Dan ai. Marhusor ma halak Dan ai, lanjar nini ma dompak si Mika, “Aha sihol bam, ase iarahkon ho halak in?”

²⁴ Nini ma mambalosi, ‘Ibuat nasiam do naibatanku, na hupadear in rap pakon malim in, lanjar bingkat nasiam. Aha mando na tading bangku? Aha do homa na hinatahon nasiam bangku: Aha sihol bam?’

²⁵ Nini halak Dan ai ma mambalosi, ‘Ulang be tarbogei soramu bennami, holi adong halak na mandorab ho halani borit ni uurni, gabe rotap hosahmu pakon hosah ni parrumahmu.’”

²⁶ Jadi, dob ai itoruskon halak Dan ma pardalanan ni sidea. Jadi dob ididah si Mika gogohan do sidea hun bani, marhusor ma ia lanjar mulak hu rumahni.

²⁷ Ia halak Dan, na mamboan ugas-ugas, na pinauli ni si Mika ai, sonai homa malimni, irohi sidea ma Lais, ai ma bangsa na marsonang-sonang anjaha na mardamei ai, lanjar italuhon ma sidea marhitei podang anjaha itutung sidea ma hutani.

²⁸ Seng dong na paluahkon sidea, ai holang do huta ai hun Sidon, anjaha seng dong parsauran ni sidea pakon halak na legan, ambahni ai bani habungan do huta ai dohorhon Bet-Rehob. Ipauli sidea ma use huta ai lanjar marianan ijai.

²⁹ Anjaha ibahen sidea ma goran ni huta ai Dan, mangihutkon goran ni si Dan, ompung ni sidea ai, anak ni si Israel; Lais do goran ni huta ai sapari.

³⁰ Ipajongjong halak Dan ai ma gana-gana na niuhir ai bani sidea, anjaha si Jonatan, anak ni si Gersom, anak ni si Musa, ia do gabe malim bani marga Dan pakon bani ginomparni, ronsi ari na tarbuang pangisi ni nagori ai.

³¹ Jadi ipajongjong sidea ma i tongah-tongah ni sidea gana-gana na binahen ni si Mika ai, anjaha ijai do gana-gana ai sadokah adong lampolampo ni Naibata i Silo.

Pambahenan Hasamboron ni Halak Benjamin pakon Uhum Halani ai

19 ¹ Bani panorang ai, sanggah lang dong raja i Israel, adong ma sada halak Levi na mardagang-dagang i bona ni Dolog Efraim; ibuat ma sada naboru na legan bahen inang ni anakni hun Betlehem-Juda.

² Tapi marbangkis ma naboru ai, lanjar laho hun lambungni mulak hu rumah ni bapani, hu Betlehem-Juda, anjaha ijai ma ia hira-hira ompat bulan.

³ Dob ai bingkat ma paramangonni ai mangirikkonsi, laho mangelek-eleksi, ase iboan mulak; juakjuakni pakon saparangguan halode do iboan rap pakonsi. Iarahkon naboru ai ma ia hu rumah ni bapani, anjaha dob ididah bapa ni naboru ai ia, malas ma uhurni manjumpahkonsi.

⁴ Jadi ijolomi tulangni ai, bapa ni naboru ai ma ia, gabe tading ma ia tolu ari i lambungni, rap mangan, minum pakon marborngin ijai.

⁵ Jadi paompat-arihon, ipagirah sidea ma sogod ni ai puho, sihol bingkak namin, tapi nini bapa ni naboru ai ma dompak helani ai, “Paulak lobei gogohmu marhitei ruti sansayat, dob ai pe ase bingkak nasiam.”

⁶ Dob ai hundul ma sidea, rap mangan minum ma sidea haduasi. Dob ai nini bapa ni naboru ai ma dompak dalahi ai, “Mahua balosi ma marborngin anjaha pamalas ma uhurmu.”

⁷ Tapi jongjong ma dalahi ai laho bingkak namin, jadi ielek-elek tulangni ai ma ia, gabe marborngin ma ia use ijai.

⁸ Jadi palima-arihon ipagirah ma puho sogod laho bingkak namin, gabe ihatahon bapa ni naboru ai ma use, “Pasonang ma lobei uhurmu, anjaha tading ma lobei tongkin nari, paima guling ari. Lanjar mangan ma sidea haduasi.”

⁹ Dob ai puho ma dalahi ai sihol bingkak namin, ia pakon parinangonni ampa juakjuakni ai; tapi nini tulangni, bapa ni naboru ai ma, “Tonggor ma domma guling ari, laho bod ma ari, marborngin ma ho ijon anjaha pasonang uhurmu, patar girah ma nasiam puho, laho mandalani dalan nasiam, laho mulak hu rumahmu.”

¹⁰ Tapi seng ra dalahi ai marborngin, marugas ma ia lanjar bingkat, gabe das ma ia tontang ni Jebus, ai ma Jerusalem; odor pakonsi do halode, na marpalana na sapasang ai sonai homa inang ni anakni ai.

¹¹ Sanggah dohor sidea hu Jebus anjaha sanggah laho sundut nari mando mata ni ari, jadi nini juakjuakni ai ma dompak tuanni ai, “Mahua tuluy ma hita hu huta ni halak Jebus an, anjaha marborngin ijai?

¹² Tapi nini tuanni ai ma mambalosi, ‘Seng dear hita tuluy hu huta na legan, na so huta ni halak Israel, tapi mardalan ma hita torus das hu Gibeai.’

¹³ Ambahni ai nini ope dompak juakjuakni ai, ‘Laita mardalan, das bani sada humbani huta ai, ase marborngin i Gibeai ma hita barang i Rama.’”

¹⁴ Lanjar mardalan ma sidea manoruskon pardalanan ni sidea, anjaha sundut ma mata ni ari, dohorhonsi sidea hu Gibeai, ai ma huta ni halak Benjamin.

¹⁵ Dob ai manirpang ma sidea hu Gibeai, lanjar masuk ma sidea sihol marborngin ijai. Daskonsi sidea hu huta ai, hundul-hundul ma sidea i alaman ni huta ai, tapi seng dong na mangarahkon sidea marborngin hu rumahni.

¹⁶ Tapi tonggor ma, roh ma sada halak na matua hun parhorjaanni, hun juma bodarini ai. Hun Dolog

Efraim do asalni, anjaha na manginsolat do ia i Gibeai; halak Benjamin do anggo parhuta ai.

¹⁷ Mangkawah ma ia, gabe ididah ma halak na mardalan ai i alaman ni huta ai, lanjar nini halak na matua ai ma, “Laho huja do ham? Anjaha roh hunja do ham?

¹⁸ Nini ma mambalosi, “Na bani pardalanan do hanami hun Betlehem Juda laho hu dipar ni Dolog Efraim, hunjai do asalhu. Na laho do ahu baru hu Betlehem Juda, anjaha sonari na mardalan do ahu mulak hu rumah, tapi seng dong na mangarahkon ahu hu rumahni.

¹⁹ Adong do namin anggala pakon gagatan bani halodenami, sonai homa ruti pakon anggur bangku pakon bani jabolonmu naboru ampa bani juakjuak na rapkon ahu, jabolonmu on; aha pe seng dong hahurangannami.

²⁰ Dob ai nini halak na matua ai ma, ‘Damei ma bamu! Sagala hahuranganmu ahu pe na manarihon, asal ulang i alaman on ham marborngin.’”

²¹ Jadi iarahkon ma ia masuk hu rumahni, ibere ma gagaton bani halodeni, iburihi sidea ma naheini, dob ai mangan anjaha minum ma sidea.

²² Tapi sanggah na marmalas ni uhur ai sidea, roh ma parhuta ai, halak parjahat, manginggoti rumah ai. Sanggah na ihartuki sidea labah ai nini sidea ma hubani partua simada rumah ai, “Boan ma hu darat halak na roh hu rumahmu in, ase itandai hanami ia.

²³ Jadi luar ma marayak sidea dalahi simada rumah ai, anjaha nini ma dompak sidea, 'Ulang, saninangku, ulang ma bahen nasiam na jahat, halani domma masuk halak on hu rumahku, ulang ma bahen nasiam hasamboron.'

²⁴ Tonggor ma, borungku anak boru ai pakon parinangon ni halak ai ma huarahkon luar; sidea ma parguro-gurohon nasiam, bahen nasiam ma bani sidea aha na dear ninuhur nasiam, tapi ulang ma bahen nasiam pambahenan hasamboron hubani halak on."

²⁵ Tapi seng ra halak ai manangihon hatani ai. Itangkap dalahi ai ma parinangonni ai, iarahkon ma ia hu darat hubani sidea, gabe iparseda sidea ma naboru ai, anjaha ibangkisi layur sabornginni ai das ronsi patarni; dobkonsi siang pe ari, ase ipaluah sidea naboru ai.

²⁶ Marayak siang ari mulak ma naboru ai, tapi dabuh ma ia i lobei ni labah ni rumah ni halak ai tondokan ni tuanni ai; lanjar tibal do ia ijai paima siang ari.

²⁷ Girah do puho tuanni ai, ibuka ma labah sihol hu darat laho manoruskon pardalananni, tapi tonggor ma, tibal do parinangonni ai i lambung labah ni rumah ai, anjaha tampei do tanganni haduasi bani molmolan.

²⁸ Nini ma dompak naboru ai, "Jongjong ho, laho ma hita! Tapi seng marbalos ia." langkat ma ia hu atas ni halode ai, bingkat ma ia mulak marayak iananni.

²⁹ Daskonsi i rumah, ibuat ma pisou, itangkap ma parinangonni ai, itoktok ma holi-holini gabe sapuluh dua ponggol, lanjar ipantongoskon ma ai bani ganup tanoh ni halak Israel.

³⁰ Jadi nini sagala na mangidah ai ma, “Seng onggama masa anjaha seng onggan aidah na masa sonon, dob bingkat halak Israel hun Masir ronsi sadari on. Parimbagaskon ma in, timbang ma, anjaha sahapkon ma.”

Parporangan ni Halak Israel Mangimbang Halak Benjamin

20 ¹ Dob ai luar ma ganup halak Israel, hun Dan das hu Barseba sonai homa hun tanoh Gilead; martumpu ma tumpuan ai, songon sada halak hu lobei ni Jahowa i Mispa.

² Jadi jongjong ma kopala ni ganup bangsa Israel mar sasamarga mambobahon kuria ni bangsa ni Naibata, ompat ratus ribu halak bilanganni, mardalan nahei, na marsinjatahon podang.

³ Ibogei halak Benjamin ma, paboa na dob tangkog halak Israel hu Mispa. Nini halak Israel ma, “Patugah ma sonaha parjadi ni hajahaton ai.

⁴ Nini halak Levi, paramangon ni puang-puang na tarbunuh ai ma mambalosi, ‘Das ma ahu pakon parinangonku hu Gibeaa, huta ni halak Benjamin, sihol marborngin ijai namin.’

⁵ Dob ai jongjong bei ma par Gibe a dompak ahu, anjaha iinggoti sidea ma rumah ai borngin laho mandorab ahu; itahihon uhur ni sidea do sihol mambunuh ahu, anjaha iparseda do parinangonku pala matei.

⁶ Hubuat ma parinangonkai, hutoktoki ma ia anjaha hupantongoskon ma hu ganup tanoh parbagianan ni halak Israel, halani na so adat pakon hasamboron do na binahen ni halak ai i tengah-tengah ni halak Israel.

⁷ Tonggor ma, haganup nasiam halak Israel ijon do nuan. Bere nasiam ma partimbangan nasiam pakon sipasingat nasiam.”

⁸ Jadi jongjong ma ganup bangsa ai, hira sada halak mangkatahon, “Seng bulih barang ise hun banta laho hu lampolamponi, sahalak pe lang bulih mulak hu rumahni.

⁹ On pe, pasal sibahenonta hubani Gibe a, marruji-ruji ma hita laho mamorang sidea.

¹⁰ Buat hita ma sapuluh halak humbani na saratus humbani ganup marga ni Israel, anjaha saratus humbani na saribu, anjaha saribu humbani na salaksa, laho pasirsir bohal hubani na mabuei on, ase rohkonsi sidea bahenon ma hubani Gibe a-Benjamin romban hu bani hasamboron, na binahen ni sidea ai i tengah-tengah ni halak Israel.”

¹¹ Sonai ma martumpu ganup halak Israel mangimbang huta ai, martumpu songon sada halak.

¹² Dob ai isuruh marga-marga ni Israel ma suruhanni hubani marga Benjamin mangkatahon, “Hajahaton aha do na masa i tengah-tengah nasiam in?

¹³ On pe, ondoskon nasiam ma dalahi, paruhur na jahat na i Gibeai, ase ibunuh hanami sidea, laho mamurpurhon sapata ni hajahaton in hun tengah-tengah ni Israel.” Tapi seng itangihon halak Benjamin hata ni sanina-saninani, halak Israel ai.

¹⁴ Lambin martumpu tene halak Benjamin hun huta na legan hu Gibeai, laho marporang dompak halak Israel.

¹⁵ Tarbilang halak Benjamin sadarini ai hun huta na legan ai: dua puluh onom ribu halak, na marsinjatahon podang, seng ipadihut parhuta Gibeai, na tarbilang pitu ratus dalahi na pinilih.

¹⁶ Humbani ganup na mabuei ai adong pitu ratus dalahi na tarpilih, halak parjaluk; ganup do sidea pandei mangumbalangkon batu na so onnga pilit ronsi sada jambulan pe.

¹⁷ Tapi halak Israel, seng ipadihut halak Benjamin, ompat ratus ribu halak do bilanganni, na marsinjatahon podang, haganupan ai halak parporang do.

¹⁸ Bingkat ma halak Israel laho hu Betel, laho manungkun Naibata, nini ma, “Ise do hun bennami mambobahon laho marporang dompak halak Benjamin? Balos ni Jahowa, ‘Halak Juda do na parlobei.’

¹⁹ Jadi girah sogod bingkat ma halak Israel, anjaha marsaran ma sidea mangkubu Gibeaa.”

²⁰ Dob ai luar ma halak Israel laho marporang dompak halak Benjamin; iatur halak Israel ma barisan ni bala ni sidea mangimbang sidea dohorhon Gibeaa.

²¹ Luar homa ma halak Benjamin hun Gibeaa, gabe radag ma sadarini ai dua puluh dua ribu halak Israel ibunuh sidea.

²² Tapi patumpu gogoh ma use bala ni Israel, lanjar iatur sidea ma use barisan ni bala ni sidea bani ianan ni sidea hinan.

²³ Dob ai tangkog ma halak Israel, jadi doruh-doruh ma sidea i lobei ni Jahowa das ronsi bodari; isungkun sidea ma Jahowa, “Bulih ope ulakonnami marporang dompak halak Benjamin, angginami ai? Balos ni Jahowa, ‘Tangkog ma hanima mandorab sidea.’

²⁴ Jadi patarni ai idohori halak Israel ma halak Benjamin.”

²⁵ Luar homa ma halak Benjamin hun Gibeaa manjumpahkon sidea bani ari na paduahon ai; radag use ma halak Israel sapuluh ualuh ribu halak

ibunuhi halak Benjamin; haganupan ai halak na marsinjatahon podang do.

²⁶ Dob ai tangkog use ma halak Israel rap pakon ganup bangsa ai hu Betel anjaha doruh-doruh; hundul ma sidea ijai i lobei ni Jahowa, anjaha marpuasa sadarini ai das ronsi bod ari, lanjar manggalangkon galangan situtungan pakon galangan pardameian i lobei ni Jahowa.

²⁷ Isungkun halak Israel ma Jahowa bani panorang ia, ijai do poti parpadanan ni Naibata,

²⁸ anjaha si Pinehas anak ni si Eleasar, anak ni si Aron do na gabe malim ijai -- nini sidea ma, “Bulih ope ulakonnami bingkak marmunsuh dompak halak Benjamin, angginami ai, barang parontihononnami ma? Nini Jahowa ma mambalosi sidea, ‘Tangkog ma hanimu, patar ondoskonon-Ku ma sidea hubagas tanganmu.’

²⁹ Dob ai isuruh halak Israel ma halak monggop inggot Gibeat.”

³⁰ Jadi tangkog ma halak Israel patolu-ariankon dompak halak Benjamin, anjaha iatur ma barisanni dompak Gibeat songon na dob salpu.

³¹ Luar ma halak Benjamin manjumpahkon bangsa ai; hona pinah ma sidea hun huta ai hu dalan na bolon, na laho dompak Betel sada, na sada nari dompak Gibeat, anjaha ipungkah sidea ma mambunuh halak Israel songon na dob salpu hira-hira tolu puluh halak bani ladang ai.

³² Jadi nini halak Benjamin ma, “Domma radag sidea i lobeita songon bani mungkahni ai.” Tapi domma manriah hinan halak Israel: Lintun ma hita laho maminah sidea hu dalan na bolon.

³³ Dob ai jongjong ma ganup halak Israel hun iananni, anjaha iatur ma barisanni i Baal-Tamar; luar ma homa halak Israel pangonggopi ai humbani iananni hu ianan na lumbang dohorhon Geba hampit hasundutan ni Gibe.

³⁴ Anjaha bingk

³⁵ Jadi italuhon Jahowa ma halak Benjamin na mangimbang halak Israel, gabe radag ma sadarini ai humbani halak Benjamin dua puluh lima ribu saratus halak, ganupan halak na marsinjatahon podang.

³⁶ ididah halak Benjamin ma na dob talu sidea. Maporus ma halak Israel i lobei ni halak Benjamin, ai domma marhatengeran sidea bani halak panggompangi, na sinuruh ni sidea laho mandorab Gibe.

³⁷ Dob ai ioloskon na manggompangi ai ma mandorab Gibe, maju ma sidea, anjaha itampuli ma parhuta ai bani podang.

³⁸ Tanda na dob niriahkon ni halak Israel pakon halak panggompangi ai, ai ma, anggo domma maripul timus na banggal ibahen sidea hun huta ai, ³⁹ maningon marhusor ma sidea marporang. Domma ipungkah halak Benjamin mangonjar halak Israel, anjaha ibunuhi hira-hira tolu puluh halak humbani halak Israel, nini sidea ma, “Domma talu tumang sidea use marimbang hita songon bani parporangan na parlobei ai.”

⁴⁰ Tapi dob mamungkah maripul hu atas tanda timus ai hun huta ai, mangkawah ma halak Benjamin hu pudi; tonggor ma, domma matutung ganup huta ai anjaha apuyni martimpul hu atas.

⁴¹ Dob ai marhusor ma halak Israel, gobir ma halak Benjamin, ai domma ididah sidea dohor ma hamagouan bani sidea.

⁴² Jadi maporus ma sidea hun lobei ni halak Israel dompak halimisan; tapi seng tarlembangi sidea parporangan ai, anjaha halak na roh hun huta ai marraseihon sidea, sagala na i tengah-tengah ni sidea.

⁴³ linggoti sidea ma halak Benjamin, ipardakdak ma sidea anjaha iluntak-luntak das ronsi tontang ni Gibeah hampir hapoltakan.

⁴⁴ Jadi radag ma humbani halak Benjamin sapuluh ualuh ribu halak, ganupan halak na bisang.

⁴⁵ Dob ai marhusor ma sidea, maporus dompak halimisan hu Dolog batu Rimon; lima ribu halak

humbani sidea rasei i dalan na bolon ai, anjaha ipardakdak do sidea das hu Gideon, anjaha ibunuh do humbani sidea dua ribu halak.

⁴⁶ Ase ganupjolma na rasei humbani halak Benjamin sadarini ai dua puluh lima ribu halak do, na marsinjatahon podang, anjaha ganupan ai halak na bisang do.

⁴⁷ Tapi onom ratus halak do na marhusor anjaha na maporus hu halimisan das hu Dolog batu Rimon, lanjar marianan i Dolog batu Rimon ompat bulan dokahni.

⁴⁸ Dob ai mulak ma halak Israel hubani halak Benjamin, anjaha itampuli ma sidea bani podang, jolma pakon pinahan pakon sagala na jumpah sidea. Anjaha sagala huta na dapot sidea itutung sidea do.

Manambat Ginompar ni Halak Benjamin

21 ¹ Tapi domma marbulawan halak Israel i Mispa sonon, “Sahalak pe lang hun banta bulih mambere boruni bahen parinangon ni halak Benjamin.”

² Jadi das ma bangsa ai hu Betel, lanjar tading ma sidea ijai ronsi bodari i lobei ni Naibata, anjaha ipagogoh bei ma sorani doruh-doruh,

³ nini sidea ma, “Mase ma, ale Jahowa, Naibata ni Israel, masa na sonin i tongah-tongah ni halak Israel, pala moru sadari on sada marga hun tongah-tongah ni halak Israel?”

⁴ Dob ai patarni ai ipagirah bangsa ai ma puho, ipauli sidea ma ijai sada anjapanjap, anjaha igalangkon ma galangan situtungon pakon galangan hatarimakasihon.

⁵ Dob ai nini halak Israel ma, “Ise do humbani ganup marga ni halak Israel, na so roh tangkog hu partumpuan on hu lobei ni Jahowa? Ai domma marbulawan sidea pangkei-pangkei, barang ise na so marayak Jahowa hu Mispa, maningon marutang hosah do ia.

⁶ Maidop ma uhur ni halak Israel mangidah halak Benjamin, saninani ai, nini sidea ma, ‘Siap do hape sada marga sadari on humbani halak Israel.’

⁷ Aha do sibahenonta hubani na tading ai, ase dong parinangon ni sidea bei, ai domma marbulawan hita hubani Jahowa, na so bulih bereonta humbani borunta bahen parinangon ni sidea?

⁸ Halani ai do ase ihatahon sidea, ‘Adong do humbani marga ni halak Israel, na so tangkog hu Mispa hubani Jahowa?’ Jadi tonggor ma, seng dong hape barang ise na tangkog hu parsaranan ai, hun Jabes-Gilead, marayak tumpuan ai.”

⁹ Ai sanggah na binilang bangsa ai, tonggor ma, sahalak pe lang adong dalahi ijai humbani par Jabes-Gilead.

¹⁰ Jadi ipabangkit humpulan ai ma hujai sapuluh dua ribu halak sagala na bisang marmunsuh. Iparentahkon ma hubani sidea: Laho ma nasiam,

raseihon nasiam ma par Jabes Gilead bani podang, ronsi puang-puang pakon naetek-etek.

¹¹ On ma sibahenon nasiam: Sagala dalahi pakon puang-puang, na dob hinasomanan ni dalahi modom, maningon siapkononkon do.

¹² Jadi jumpah sidea ma humbani par Jabes Gilead ompat ratus anak boru, na so onggga hinasomanan ni dalahi modom, anjaha iboan sidea ma ai hu parsaranan ai hu Silo, na i tanoh Kanaan.

¹³ Dob ai isuruh ganup humpulan ai ma suruhanni padaskon hata hubani halak Benjamin, na i Dolog batu Rimon, maningtingkon damei hubani sidea.

¹⁴ Jadi mulak ma ijia halak Benjamin, ibere ma hubani sidea naboru, na pinagoluh humbani naboru ni par Jabes Gilead, tapi seng sungkup hubani sidea.

¹⁵ Idop do uhur ni bangsa ai mangidah marga Benjamin, halani na dob binahen ni Jahowa rikah bani marga ni halak Israel.

¹⁶ Dob ai nini sintua ni humpulan ai ma, “Aha ma bahenonta hubani halak na tading ai, ase dong parinangon ni sidea, halani na dob siap ai naboru humbani halak Benjamin?”

¹⁷ Nini sidea ma, ‘Sagala na maluah, ai ma simada parbagianan ni halak Benjamin, ase ulang lanjar sasap sada marga humbani halak Israel.’

¹⁸ Tapi anggo hita seng bulih bereonta borunta bahen parinangon ni sidea. Ai domma marbulawan

halak Israel: Hona papa ma barang ise, na mamberehon boru hubani halak Benjamin.

¹⁹ Jadi nini sidea ma, 'Masa do ganup tahun pesta bani Jahowa i Silo, na i utara ni Betel, na i hapoltakan ni dalan na bolon, na tangkog hun Betel laho hu Sikem pakon dangsina ni Lebona.'

²⁰ Ihatahon sidea ma hubani halak Benjamin, 'Laho ma nasiam monggop i pohon anggur,

²¹ pardiateihon nasiam ma anggo luar ma boru ni par Silo laho manortor-nortor marodor-odor, jadi luar ma nasiam hun pohon anggur ai, anjaha ganup nasiam manluahon sada humbani boru ni par Silo bahen parinangonni, lanjar boan nasiam ma hu tanoh Benjamin.'

²² Dob ai anggo roh bapa ni sidea barang botou ni sidea laho mangaduhon ai bennami, hatahononnamami ma hubani sidea, 'Bere nasiam ma sidea bennami. Ai seng ibuat hanami bani ganup halak na gabe parinangonni marhitei humbani porang; sedo homa nasiam sandiri na mamberehon sidea bani sidea; halani ai seng na marsalah nasiam ibagas ai.'

²³ Jadi ibahen halak Benjamin ma sonai, ipambuat bei ma boru marguru hubani bilangan ni sidea humbani panortor ai, ai ma na nirampas ni sidea; dob ai laho ma sidea mulak hubani parbagianan ni sidea, ipauli sidea ma use hutani lanjar marianan ijai."

²⁴ Laho ma homa halak Israel hunjai bani panorang ai, mulak bei hubani margani pakon bangsani; mulak ma sidea hunjai ganup hu parbagiananni bei.

²⁵ Bani panorang ai seng adong raja i Israel; ganup do marsibahen na pintor domu bani uhurni bei.

Rut

Si Rut, Boru Moab ai, Roh hu Betlehem

1 ¹ Sanggah na manggomgomi panguhum-panguhum ai, masa ma sahali lohei i tanoh ai. Dob ai bungkas ma sada halak hun Betlehem, Juda rap pakon parinangonni ampa anakni dua halak, laho manginsolat hu tanoh Moab.

² Goran ni dalahi ai si Elimelek do, goran ni parinangonni si Naomi, anjaha goran ni anakni na dua ai si Malon pakon si Kilion. Halak Eprata do sidea hun Betlehem Juda; das ma sidea i tanoh Moab, lanjar marianan ijai.

³ Matei ma si Elimelek, paramangon ni si Naomi ai, gabe tading ma ia pakon anakni na dua ai.

⁴ Ibuat sidea ma boru Moab bahen parinangon ni sidea; goran ni na sada si Orpa, goran ni na sada nari si Rut. Dong ma sidea hira-hira sapuluh tahun marianan ijai.

⁵ Matei ma homa sidea haduasi, si Malon pakon si Kilion, gabe punjung ma puang-puang ai dob matei anakni na dua ai pakon paramangonni ai.

⁶ Dob ai bingkat ma puang-puang ai rap pakon parumaenni na dua ai, mulak hun tanoh Moab, ai domma ibogei i Tanoh Moab, na dob marpangulaki

uhur ni Jahowa mangidah bangsa-Ni anjaha ibere sipanganon bani sidea.

⁷ Jadi itadingkon sidea ma ianan panginsolatanni ai, rap pakon parumaenni na dua halak ai, laho mardalan mulak hu tanoh Juda.

⁸ Dob ai nini si Naomi ma hubani parumaenni na dua halak ai, “Laho ma nasiam mulak hu rumah ni inang nasiam bei. Sai idop ma uhur ni Jahowa mangidah nasiam, romban hubani na binahen nasiam hubani na matei ondi pakon hu bangku.

⁹ Sai ilayak-layakkon Jahowa ma bani nasiam, ianan hasonangan ganup i rumah ni paramangonni bei!” Dob ai isummah ma sidea, anjaha ipagogoh bei sorani tangis-tangis.

¹⁰ Nini sidea ma dompak simatuani ai, “Lang, maningon odor do hita mulak bani bangsamu.”

¹¹ Tapi nini si Naomi ma, “Mulak ma nasiam, inang! Mase ma sihol uhur nasiam bingkat rap pakon ahu? Seng anjai tubuh be anakku bahen paramangon nasiam.

¹² Mulak ma nasiam, inang, ai domma matuatu ahu anggo marparamangon ahu use. Porini pe huhatahon, ‘Adong ope pangarapan bangku, anjaha borngin on marparamangon ahu, anjaha tubuhan anak ahu,

¹³ tor tarpaima nasiam ma sidea paima ma godang?’ Tor tarlanglang ma nasiam marrumah tangga? Ulang ma sonai inang, ai paet do na

hudagei halani nasiam, na mangonai ai tangan ni Jahowa hu bangku.”

¹⁴ Ipagogoh sidea ma use sorani anjaha marompot tangis-tangis; isummah si Orpa ma simatuani ai, tapi anggo si Rut irohop do ia.

¹⁵ Nini si Naomi ma, “Tonggor ma, domma mulak abangmu hubani bangsani pakon hubani naibatani; mulak ma ho, irikkon ma abangmai.”

¹⁶ Tapi nini si Rut ma, “Ulang ma sai ajar-ajari ham ahu manadingkon ham, barang sirang hun bamu; ia huja ham laho, hujai do ahu laho, ia huja ham marianan, hujai do ahu marianan; bangsamu mando bangsangku, anjaha Naibatamu mando Naibatangku;

¹⁷ ija ham matei, ijai ma ahu matei, ijai ma ahu tanomon. Sai sonai ma ibahen Jahowa hu bangku, anjaha porini lobih ope, pitah hamatean mando, na boi manirang ahu hun bamu.”

¹⁸ Jadi dob ididah si Naomi, na dob putus uhurni mangirikkonsi, seng inunut be marsahap.

¹⁹ Dob ai inunut sidea na dua ai ma mardalan, paima das sidea hu Betlehem. Dob das sidea hu Betlehem, guntar ma parhuta ai halani sidea; nini naboru-naboru ai ma, “Ai on do si Naomi ondi?”

²⁰ Tapi nini ma dompak sidea, “Ulang be goran nasiam ahu si Naomi, goran nasiam ma ahu si Mara, ai paet tumang do pambahenan ni Pargogoh Na So Tarimbang in hu bangku.

²¹ Bayak do ahu bingkat hunjon, tapi sombuh do ahu mulak ibahen Jahowa. Mase igoran nasiam ahu si Naomi, ai domma isalahkon Jahowa ahu anjaha marhinamagou ahu ibahen Pargogoh Na So Tarimbang in.”

²² Ase sonai ma parmula ni si Naomi rap pakon si Rut, boru Moab, parumaenni ai, hun tanoh Moab. Das ma sidea hu Betlehem sanggah mungkah ni pariama.

Si Rut i Juma ni si Boas

2¹ Tapi adong ma bani si Naomi sada hade-hade mangihutkon paramangonni hinan, na bayak tumang, hasoman samarga ni si Elimelek, na margoran si Boas.

² Nini si Rut, boru Moab ai ma dompak si Naomi, “Mahua lopas ham ma ahu laho hu juma manjomputi buyur ni gandum mangirik-irik halak na maridop ni uhur mangidah ahu.” Nini si Naomi ma, “Laho ma ham, inang.”

³ Dob ai laho ma ia manjomputi buyur ni gandum i juma mangirik-irik sipanabi, anjaha tudu do ia hu juma parbagianan ni si Boas, hasoman samarga ni si Elimelek.

⁴ Tonggor ma, tudu do roh si Boas hun Betlehem, anjaha nini ma dompak sipanabi ai, “Sai ihasomani Jahowa ma nasiam!” Ibalosi sidea ma, “Sai ipasupasu Jahowa ma ham!”

⁵ Dob ai nini si Boas ma dompak juakjuakni, na mammanduri sipanabi ai, “Boru ni ise do ai?”

⁶ Nini juakjuak na mammanduri sipanabi ai ma, mambalosi, “Ai ma boru Moab, na mulak rap pakon si Naomi hun tanoh Moab.

⁷ Nini nongkan, ‘Mahua lopas ham ma ahu manjomputi i holangkolang ni radean mangirik-irik sipanabi in!’ Roh ma ia tongon, jadi sai inunut do humbani na sogod nari ronsi sonari, tongkin pe seng marsaran ia.”

⁸ Dob ai nini si Boas ma dompak si Rut, “Tangar ham ma hatangkon botou, ulang ma ham laho manjomputi bani ladang na legan, ulang ma laho ham hunjon, tapi sai i lambung ni jabolonku naboru in ma ham!

⁹ Sai pardiateihon ham ma juma na sinabi ni sidea, anjaha irikkon ham ma sidea. Domma huhatahon hubani juakjuakku, ase ulang igeori sidea ham. Anggo horahan ham laho ma ham hu gusi ai, inum ham ma humbani na tinahuan ni juakjuak ai.”

¹⁰ Jadi isombah si Rut ma ia, pala dais bohini hu tanoh, lanjar nini ma hu bani, “Aha do dalanni, ase dapotan idop ni uhur ahu i lobeimu, gabe isarihon uhurmu ahu, ahu halak dagang on?”

¹¹ Nini si Boas ma mambalosisi, “Domma hubogei haganup, sagala na binahenmu hubani simatuamu, dobkonsi matei paramangonmu, naha panadingkonmu bani namatorasmu pakon tanoh

hatubuhanmu, gabe laho ham marayak bangsa na so tinandamu.

¹² Sai Naibata ma mambalaskon hu bamu sagala na madear na binahenmu ai, anjaha upah na gok ma bagianmu humbani Jahowa, Naibata ni Israel, na pinarayakmu laho maronding-onding hu toruh ni habong-Ni.”

¹³ Dob ai nini ma, “Banggal do idop ni uhurmu mangidah ahu, ham tuanku! lapohi ham do ahu, anjaha basar do ham hu bangku jabolonmu naboru on, age pe seng jabolonmu naboru ahu namin.”

¹⁴ Bani panorang mangan, nini si Boas ma hu bani, “Roh ma ham, mangan ruti otik, sosahkon ham ma rutimu hubagas na migar in.” Jadi hundul ma si Rut i lambung ni panabi ai, ibere si Boas ma homa hubani gandum na pinahpah, gabe bosur ma ia mangan pala marlobih-lobih.

¹⁵ Jongjongkonsi ia laho manjomputi, nini si Boas ma dompak juakjuakni, “Paturut nasiam ma ia manjomputi i holangkolang ni radean ai, ulang ma gapgapi nasiam ia.

¹⁶ Pampeperhon nasiam homa deba bani humbani radean ai, anjaha tadingkon nasiam, ase ijomputi, anjaha ulang hatai nasiam ia.”

¹⁷ Jadi sai inunut ma manjomputi i juma ai ronsi bod ari; dob ai idogei ma na jinomputanni ai, adong hira-hira satapongan bueini.

¹⁸ Dob ai ijujung ma ai laho mulak hu hutani, ipatuduh ma hubani simatuani na jinomputanni ai; ipadarat ma anjaha ibere ma teba-teba ni sipanganonni ai hu bani.

¹⁹ Nini simatuani ai ma hu bani, “Ija do ho manjomputi sadari on? Anjaha ija do ho marombou? Pinasu-pasu ma dalahi na marpanatap bam.” Jadi ipatugah ma bani simatuani ai barang i ladang ni ise do ia na marhorja ai, nini ma, “Si Boas do goran ni dalahi simada juma panjomputankai sadari on.”

²⁰ Jadi nini si Naomi ma dompak parumaenni ai, “Sai ipasu-pasu Jahowa ma ia. Ai seng ialang Jahowa holong ni uhur-Ni bani halak na manggoluh pakon na dob matei.” Ambahni ai nini si Naomi ma hu bani, “Dalahi ai do sidohoran banta, ia do tama sitobus hita.”

²¹ Nini si Rut, boru Moab ai ope, “Ambah ni ai ihatahon ope hu bangku, ‘Maningon juakjuakku romban-rombananmu, paima dob isabi sidea ganup jumangkai.’”

²² Dob ai nini si Naomi ma dompak si Rut, parumaenni ai, “Dear do ai, inang, anggo rap pakon juakjuakni naboru ai ho laho, ase ulang igeori halak ho i juma ni halak na legan.”

²³ Jadi sai i lambung jabolon naboru ni si Boas ma si Rut manjomputi paima dob pariama limbuah pakon

pariama bolon; jadi tading rap pakon simatuani ma ia.

Dalan-dalan ase Marhatotapan Si Rut

3¹ Dob ai nini si Naomi, simatuani ai ma hu bani, “Ale inang, mintor lang ma pindhanku hatotapanmu, ase marhasonangan ham?

² On pe, ai lang si Boas do simada juakjuak naboru, na hinasomananmu, sidohoran banta? Tonggor ma, na mamurpur omei do ia saborngin on i pardogeian.

³ Halani ai maridi ma ho anjaha maranggir, anjaha sorungkon ma pakeanmu sidearan, anjaha tuad ma ho hu pardogeian; tapi ulang lobei patandahon dirimu hu bani, paima dob ia mangan pakon minum.

⁴ Tapi dob modom ia, papangkei ma ija ia modom; dob ai laho ma ho, papansing ma salimut hampit naheini, lanjar patibal dirimu; jadi patugahonni ma bam barang aha sibahenonmu.”

⁵ Nini ma mambalosi, “Sagala na ipatugah ham ai, sai bahenonku do.”

⁶ Dob ai tuad ma ia hu pardogeian ai, anjaha ibahen ma songon na hinatahon ni simatuani ai bani.

⁷ Jadi dobkonsi mangan pakon minum si Boas, anjaha marmalas ni uhur ia, laho ma ia modom hu lambung ni gugunan ni omei ai; jadi roh ma si Rut sesep-sesep, ipapansing ma salimut hun naheini, lanjar ipatibal ma bani.

⁸ Dob tongah borngin tarsonggot ma dalahi ai, idadap ma inggot, hape tonggor ma, sada naboru modom i lambung naheini.

⁹ Nini ma, “Ise do ham?” Jadi nini ma mambalosi, “Si Rut do ahu, juakjuakmu naboru; sai paherbang ma habongmu hubani juakjuakmu on, ai ham do sitobus ahu.”

¹⁰ Nini ma mambalosi, “Sai ipasu-pasu Jahowa ma ham, inang! Ai dearan ope holong ni uhurmu na parpudi on humbani na parlobei in, marhitei na lang ipairik-irik ham anak garama, barang halak na musil barang halak na bayak pe.

¹¹ On pe, ale inang, ulang ma ham mabiar, sai na bahenonku do barang aha pe na pinangindomu; ai ganup parhuta on hasomanku samarga mambotoh, naboru na jenges marparlahou do ham.

¹² Tongon, ahu do sitobus ham, tapi adong ope sidohoran humbangku.

¹³ Ijon ma ham saborngin on pakon patar; anggo ra do ia manobus ham, dear, age ia manobus, tapi anggo seng marosuh ia manobus ham, songon sintongni manggoluh Jahowa, ahu ma manobus ham.”

¹⁴ Jadi modom ma ia i lambung naheini ai; ninuhur ni si Boas do, “Sai ulang ma ibotoh halak adong naboru roh hu pardogeian on.”

¹⁵ Nini ma, “Boan hujon mandar na pinakeimu in, anjaha tarehon.” Itarehon ma ai, anjaha

isuhati ma onom tumba gandum hubagas, anjaha ipajujungkon ma ai bani; dob ai laho ma ia hu huta.

¹⁶ Jadi dob das ia hu simatuani ai, nini ma, “Sonaha do jadini, inang?” Jadi ipajojor ma hubani haganup na binahen ni halak ai bani.

¹⁷ Ambahni ai nini ope, “Gandum na onom tumba on ibere do hu bangku, ai nini do hu bangku, ‘Seng bulih marambung tangan tumang mulak ham hu simatuamu.’”

¹⁸ Nini si Naomi ma mambalosi, “Pasonang ma uhurmu, inang, paima ibotoh ham naha do hadoban ni hata ai, ai lang tarpasip si Boas ai, anggo lape marhadoban sadari on hata ai.”

Ibuat si Boas si Rut Gabe Parinangonni

4 ¹ Dob ai laho ma si Boas hu horbangan ai anjaha hundul ma ia ijai; jadi tonggor ma, mamontas ma sipartobus, na hinatahon ni si Boas ai. Nini si Boas ma, “Roh ma ho lobei ambia, hundul hujon.” Jadi roh ma ia, lanjar hundul.

² Jadi iarahkon si Boas ma sepuluh halak humbani pangintuai ni huta ai, nini ma, “Hundul ma nasiam hujon.” Jadi hundul ma sidea.

³ Jadi nini ma dompak sipartobus ai, “Sihol jualon ni si Naomi, na mulak hun tanoh Moab ai do, tanoh parbagianan ni si Elimelek, saninanta ondi.

⁴ Jadi hupingkir, maningon patugahonku do hubam hata ai. Tobus ma ai i lobei ni halak parhuta on

pakon i lobei ni pangintuai ni bangsanta. Anggo sihol tobusonmu ai, tobus ma; tapi anggo seng sihol tobusonmu, patugah ma bangku, ai seng dong be sobali ni ho, na patut manobus ai, dob ho ahu mando.” Jadi nini ma, “Ahu ma na manobus.”

⁵ Dob ai nini si Boas ma, “Sadihari itobus ho tanoh ai humbani si Naomi, pagodangonmu ma homa si Rut, boru Moab ai, na mangkabaluhon na matei ondi, laho patotapkon goran ni na matei ondi bani tanoh parbagiananni.”

⁶ Jadi nini sipartobus ai ma, “Anggo sonai do, seng tarbahen ahu manobus ai, ase ulang seda parbagiananku sandiri hubahen. Tobus ma bam, na patut sitobusankai, ai seng tarbahen ahu manobus ai.”

⁷ Sonai do adat bani halak Israel sapari, anggo adong halak na manobus barang na palibei honsi, ase totap hata ai, maningon tanggalon ni na salopah ma sipatuni, laho mamberehon ai bani hasomanni; ai ma adat mansahkon i Israel.

⁸ Ase sanggah na hinatahon ni sipartobus ai hubani si Boas, “Tobus ma ai bam, anjaha tanggali ma sipatuni ai.”

⁹ Dob ai nini si Boas ma dompak pangintuai pakon hubani halak simbuei ai, “Nasiam ma saksi sadari on, paboa na dob hutobus humbani tangan ni si Naomi haganup na tinadingkon ni si Elimelek ondi ronsi haganup na bani si Malon ampa si Kilion.

¹⁰ Ambahni ai pagodangonku ma si Rut, boru Moab ai, parinangon ni si Malon ondi, laho patotapkon goran ni na matei ondi bani parbagiananni, ase ulang sasap goran ni na matei ondi hun tengah-tengah ni hasomanni pakon hun horbangan ni hutani; nasiam do saksi ni ai sadari on.”

¹¹ Dob ai nini halak simbuei na i horbangan ai ma pakon pangintuai-pangintuai ai, “Hanami ma tongon saksi. Sai ibahen Jahowa ma naboru on, na masuk hu rumahmu songon si Rahel pakon si Lea, sidea na dua, na pajongjongkon ginompar ni si Israel. Sai lambin markuasa ma ham i Eprata, anjaha tarambilan ma goranmu i Betlehem.

¹² Ginomparamu pe sai songon ginompar ni si Peres ma, na tinubuhkon ni si Tamar bani si Juda, marhitei ginompar na sihol layak-layakkonon ni Jahowa bamu humbani naboru na poso on.”

¹³ Jadi ibuat si Boas ma si Rut bahen parinangonni. Jadi dob iparayak si Boas ia, boratan rumah ma ia itumpak Jahowa, anjaha itubuhkon ma sada anak.

¹⁴ Dob ai nini naboru-naboru ai ma hubani si Naomi, “Pinuji ma Jahowa, na patuduhkon bamu sadari on sada sipartobus; sai tarambilan ma goran-Ni i Israel.

¹⁵ Ia ma sipasabou uhurmu pakon na manarihon ham bani panorang hatuaonmu; ai parumaenmu, na marholong uhur in bamu, na harganan bamu humbani pitu anak, ia do na manubuhkonsi bamu.”

¹⁶ Dob ai ibuat si Naomi ma na etek-etek ai, laho mangabingsi i abinganni, anjaha ia ma gabe parorotni.

¹⁷ Dob ai roh ma naboru parlambung ni rumahni mambahen goranni, nini ma, “Domma tubuh sada anak bani si Naomi, gabe ibahen ma goranni si Obed, ai ma bapa ni si Isai, bapa ni si Daud.”

Na Lobei ni si Daud

¹⁸ On ma ginompar ni si Peres: Si Peres manubuhkon si Hezron,

¹⁹ si Hezron manubuhkon si Ram, na manubuhkon si Aminadab;

²⁰ si Aminadab manubuhkon si Nahason, na manubuhkon si Salma;

²¹ si Salma manubuhkon si Boas, na manubuhkon si Obed;

²² anjaha si Obed manubuhkon si Isai, na manubuhkon si Daud.

1 Samuel

Partubuh ni si Samuel

1 ¹ Adong ma sada halak hun Ramataim-Zofim, hun Dolog Efraim, na margoran si Elkana, anak ni si Jeroham, anak ni si Elihu, anak ni si Tohu, anak ni si Zuf, halak Efrata.

² Dua do parinangonni, goran ni na sada si Hanna, goran ni na sada nari si Peninna. Tubuhan tuah do si Peninna, tapi anggo si Hanna seng tubuhan tuah.

³ Sai tangkog do halak ai ganup tahun hun hutani laho marsombah pakon manggalang hu bani Jahowa Zebaot i Silo; ijai do anak ni si Eli na dua ai, si Hopni pakon si Pinehas, malim bani Jahowa.

⁴ Bani ari panggalangonkon ni si Elkana, ibere ma hu bani si Peninna, parinangonni ai pakon hu bani ganup anakni ampa boruni rupeini bei;

⁵ tapi anggo hu bani si Hanna lompit do ibere rupeini, ai haholonganni do ia, age pe lambang ia ibahen Jahowa.

⁶ Seda do uhurni ibahen imbangni ai marhitei hata salig-salig, halani na lambang ai ia ibahen Jahowa.

⁷ Sai sonai do masa ganup tahun; barang piga hali ia tangkog hu Rumah ni Jahowa, sai isalig-salig do ia, gabe sai tangis ma ia anjaha seng ra mangan.

⁸ Jadi nini si Elkana, paramangonni ai ma hu bani, “Alo Hanna! Mase sai tangis ham? Anjaha mase lang ra ham mangan? Mase sai horu uhurmu? Ai lang harganan do ahu iahap ham hun bani sepuluh anak?”

⁹ Bani na sahali, dob salpu mangan ampa minum halak i Silo, jongjong ma si Hanna, hundul do anggo Malim Eli bani hundulanni i lambung ni tiang ni Rumah ni Jahowa;

¹⁰ ibagas pusok ni uhurni martonggo ma ia bani Jahowa anjaha tangis-tangis.

¹¹ Dob ai marbagah-bagah ma ia, nini ma, “Ham Jahowa Zebaot, anggo itatap Ham do hasombuhan ni jabolon-Mu naboru on, anjaha idingat Ham do ahu, anjaha seng ihalupahon Ham jabolon-Mu naboru on, tapi ra Ham mambere bani jabolon-Mu naboru on sada anak, jadi bereonku ma ia hu bani Jahowa, sadokah manggoluh ia anjaha seng anjai dais pisou parsuhur bani uluni.”

¹² Sanggah sai na inunut ai martonggo i lobei ni Jahowa, sai ipardiatei si Eli do pamanganni.

¹³ Martonggo ibagas uhurni do si Hanna; pitah bibirni do na mubit-ubit, anjaha sorani seng tarboge; halani ai iagan si Eli do na mabuk ia.

¹⁴ Jadi nini si Eli ma hu bani, “Sadiha dokah on do ham mabuk? Padaoh ma hamabukon in hun bamu!”

¹⁵ Tapi nini si Hanna ma mambalosi, “Lang tuannami, naboru na marpusok ni uhur do ahu; seng na minum anggur barang siinumon na koras ahu on, uhurhu do na huuseihon i lobei ni Jahowa.

¹⁶ Ulang ma iagan ham naboru na jahat jabolonmu naboru on, ai hun bani gok pakon pusok ni uhur na banggal in do ahu marsahap ronsi nuan.”

¹⁷ Nini si Eli ma mambalosi, “Laho ma ham ibagas damei, sai na bereon ni Naibata ni Israel do bamu na pinindomu in hun Bani.”

¹⁸ Jadi nini si Hanna ma, “Sai dapotan idop ni uhur ma tongon jabolonmu naboru on i lobeimu.” Dob ai laho ma naboru ai mannunuti dalanni anjaha mangan, seng be marposi bohini.

¹⁹ Patarni ai girah ma ia puho laho marsombah i lobei ni Jahowa, dob ai mulak ma sidea hu rumah ni sidea i Rama. Iparayak si Elkana ma si Hanna parinangonni ai, jadi idingat Jahowa ma ia;

²⁰ gabe boratan rumah ma ia, anjaha itubuhkan sada anak, anjaha ibahen ma goran ni si Samuel, ai nini do, “Hun bani Jahowa do ia hupindo.”

²¹ Tangkog ma use si Elkana rap pakon ganup parrumahni, laho manggalangkon bani Jahowa galangan tahunan pakon bagah-bagahni.

²² Tapi seng tangkog anggo si Hanna, nini ma dompak paramangonni ai, “Dob pe sirang minum dakdanak on, ase boanonku ia, ase mangadap ia hu lobei ni Jahowa, anjaha tading ia ijai tongtong.”

²³ Nini si Elkana paramangonni ai ma hu bani, “Bahen ma na ija sidearan nini uhurmu; paima ma, ronsi sirang minum ia; sai ipasaud Jahowa ma hata-Ni.” Jadi tading ma naboru ai painumkon anakni ai paima sirang minum ia.

²⁴ Ase dob sirang minum ia, iboan ma ia rap pakon sada anak ni lembu na marumur tolu tahun, sada efa nitak pakon sahadangan anggur; iboan ma ia hu Rumah ni Jahowa i Silo, tapi poso ope dakdanak ai.

²⁵ Isayat sidea ma anak ni lembu ai, anjaha iboan ma dakdanak ai hu bani si Eli.

²⁶ Nini ma, “Santabi, tuannami! Songon sintongni manggoluh ham, tuannami, ahu do naboru na jongjong ijon ijia i lobeimu, martonggo hu bani Jahowa.

²⁷ Dakdanak on do, na hutonggohon ijia, gabe ilayak-layakkon Jahowa hu bangku na pinindo ni uhurhu hun Bani.

²⁸ Halani ai ondoskononku ma ia bani Jahowa. Sai ondos bani Jahowa ma ia, sadokah ia manggoluh.” Jadi lanjar manombah ma sidea bani Jahowa ijai.

Doding Puji-pujian ni si Hanna

2 ¹ Nini si Hanna ma bani tonggoni,
“Marolob-olob do uhurhu ibagas Jahowa;
timbul do tandukku ibagas Jahowa.
Itartawai pamanganku do munsuhku,

halani marmegah ni uhur ahu ibagas
pangurupionmu.

² Seng dong na pansing usih songon Jahowa, seng
dong sobali Ham; seng dong batu gingging
songon Naibatanta.

³ Ulang be sai mangeljeng marsahap, ulang be
luar hata jungkat hun pamangan nasiam;
ai Jahowa ai ma Naibata sibotoh haganup,
anjaha la do sitimbang sagala pambahenan.

⁴ Ropukan-Ni do sior ni puanglima, tapi igonditi
do bani hagogohon halak na sihol jomba.

⁵ Halak na bosur hinan gabe siparombou,
tapi halak na lohean hinan, seng hurang
be sipanganonni. Halak na lambang
mantubuhkan pitu anak, tapi halak na
ramos gabe punjung.

⁶ Jahowa do na mamunuh anjaha la do na
pagoluhkon; la do na manampakkon hu
tanoman anjaha na patangkogkon use.

⁷ Jahowa do sibahen na musil pakon sibahen
na bayak, la do na patoruhkon, la do na
pagijangkon.

⁸ la na papuhohon na musil hun orbuk; la
patimbulhon na masombuh hun hubang,
laho pahundulhon sidea rap pakon raja-raja,
anjaha mamberehon bani sidea paratas
hamuliaon. Ai Jahowa do simada tiang ni

tanoh on, anjaha ipajonam i atas ni tanoh on.

⁹ Ia do manramotkon nahei ni halak na daulat bani; tapi siapkonon-Ni do ibagas hagolapan anggo halak parjahat; ai seng marhitei hagogohonni monang halak.

¹⁰ Sai na ropukkononkon do na mangimbang Jahowa, ipahata longgur-Ni dompak sidea i nagori atas; Jahowa do na manguhum ujung ni dunia on, ibere do hagogohon bani raja-Ni, anjaha ipagijang tanduk ni na niminakan-Ni.”

Hajahaton ni Anak ni si Eli

¹¹ Dob ai mulak ma si Elkana hu rumahni i Rama, tapi marugas bani Jahowa do dakdanak ai i lobei ni Malim Eli.

¹² Tapi halak na jahat do anak ni si Eli ai, seng parduli sidea bani Jahowa,

¹³ sonai homa parbagianan ni malim hun bani bangsa ai. Siap roh halak mamboan galanganni, roh ma juakjuak ni malim ai, sanggah manlompah gulei ai, mamboan garpu sitolu jari ibagas tanganni,

¹⁴ itobakkon ma ai hubagas hudon barang serek barang balanga barang hudon banggal, sagala na longkot hu garpu ai ibuat malim ai ma ai bani. Sonai do ibahen sidea hu bani ganup halak Israel, sagala na roh hu Silo manggalang.

¹⁵ Gari sanggah lape ope itutung taboh-taboh ai, domma roh juakjuak ni malim ai, anjaha nini ma dompak dalahi na manggalang ai, “Bere ma gulei in sigorengon ni malim ai, ai seng ra ia manjalo gulei na nilompah hun bamu, maningon na matah do.”

¹⁶ Anggo ihatahon halak ai bani, “Paturut lobei itutung taboh-taboh ai, dob ai buat ham ma bamu aha sir ni uhurmu.” Gabe ihatahon ma, “Lang, sonari do bereonmu. Anggo lang, marhitei paksa do buatonku in.”

¹⁷ Halani ai banggal tumang do dousa ni anak garama ai i lobei ni Jahowa; ai lambin hiri do galangan sipanganon bani Jahowa ibahen sidea.

¹⁸ Marugas i lobei ni Jahowa do anggo si Samuel, anjaha margonditkon epod hun bani hiou silopak do dakdanak ai.

¹⁹ Ibahen inangni do homa bani sada baju na etek-etek, na binoanni bani siap tahun, sanggah na tangkog ia rap pakon paramangonni laho manggalangkon galangan tahunan.

²⁰ Jadi ipasu-pasu si Eli do si Elkana pakon parinangonni ai, nini ma, “Sai ibere Jahowa ma ginompar bamu hun bani parinangonmu on, gantih ni na dob niondoskonni bani Jahowa.” Dob ai mulak ma sidea hu iananni.

²¹ Jadi itumpak Jahowa ma si Hanna use, gabe boratan rumah ma ia, anjaha itubuhkan ope tolu

anak pakon dua boru; tapi magodang i lobei ni Jahowa do anggo si Samuel.

²² Tapi domma matua tumang anggo si Eli, anjaha ibogei do ganup na binahen ni anakni ai hu bani ganup halak Israel, pakon na hinasomanan ni sidea ai naboru modom, na marugas i lambung labah ni lampolampo partumpuan ai.

²³ Jadi nini ma dompak sidea, “Mase sonin ibahen hanima? Ai hubogei do pambahenannima na jahat in hun bani ganup bangsa in.

²⁴ Ulang sonai anakku! Ai seng barita na madear na hubogei ai, ierap-erapkon bangsa ni Naibata i darat-darat in.

²⁵ Anggo mardousa jolma hu bani hasomanni, Naibata do pangadu-aduanni; tapi anggo dompak Jahowa jolma in mardousa, tor ise ma pangaduanni?” Tapi seng itangihon sidea sora ni bapa ni sidea ai; ai sihol bunuhon ni Jahowa do sidea.

²⁶ Tapi anggo si Samuel na poso ai, lambin magodang ma, marosuh do uhur ni Jahowa pakon jolma mangidahsi.

²⁷ Dob ai roh ma sada halak ni Naibata hu bani si Eli, anjaha nini ma hu bani, “Sonon do hata ni Jahowa, “Ai lang Hupatalar do diring-Ku hu bani ginompar ni ompungmu, sanggah i Masir ope sidea, ibagas rumah ni Parao,

²⁸ anjaha Hupilih ia Bangku hun bani ganup marga ni halak Israel gabe malim laho manggalang bani anjapanjap-Ku, manutung dahupa, mamahei epod i lobei-Hu, anjaha Hubere do hu bani ginompar ni ompungmu haganup galangan situtungon ni halak Israel.”

²⁹ Mase ma hiri ibahen hanima galangan sisayaton pakon galangan sipanganon-Kai, na Huparentahkon ai, anjaha sangapan anakmu hun Bangku ibahen ho, marhitei na pamomburhon dirinima marhitei gori sidearan hun bani ganup galangan, na ginalangkon ni bangsang-Ku halak Israel?

³⁰ Halani ai sonon do hata ni Jahowa, Naibata ni Israel, “Domma Huhatahon hinan ginomparamu pakon ginompar ni bapamu marugas i lobei-Hu ronsi sadokah ni dokahni,” tapi sonari, nini Jahowa do, ‘Daoh ma in hun Bangku. Tapi barang ise na pasangap Ahu marsangap bahenon-Ku; na pahiri Ahu, mahiri bahenon-Ku.”

³¹ Tonggor ma, na roh ma panorangni, rotapon-Ku ma tanganmu pakon tangan ni ginompar ni bapamu, ase ulang adong be na sayur matua ibagas rumahmu.

³² Jadi subil ma uhurmu mangidah ganup na madear, na Hubahen hu bani halak Israel; anjaha seng dong na sayur matua i rumahmu ronsi sadokah ni dokahni.

³³ Anjaha sahalak hansa hunbam, na so Hurotapkon hun bani anjapanjap-Ku, ase bosol matamu anjaha mandolei uhurmu ibahen; tapi ganup ginomparmu na legan ai, maningon matei do bahenon ni podang ni halak.

³⁴ Anjaha on do na sihol masa hu bani anakmu na dua ai, si Hopni pakon si Pinehas, maningon matei sidea ibagas na sadari.

³⁵ Tapi pajongjongon-Ku ma Bangku sada malim hatengeran, na mangkorjahon na romban ibagas uhur-Hu pakon na ibagas tonduy-Hu, anjaha pajongjongon-Ku ma bani sada rumah na totap, ase marugas ia i lobei ni halak, na dob Huminaki sadokah ni dokahni.

³⁶ Anjaha sagala na tading hun bani ginomparmu, maningon roh marsombah hu bani laho mangindo duit barang ruti sangkibul, anjaha nini ma, “Pabangkit ma ahu hu bani horja hamalimon, ase boi panganonku sansayat ruti.”

Ipatalar Naibata Diri-Ni hu bani si Samuel

3 ¹ Sanggah si Samuel, parana ai marugas bani Jahowa i lobei ni si Eli, majarang do hata ni Jahowa, anjaha seng sadiha pangungkabon.

² Bani panorang ai modom-modom ma si Eli bani iananni; matani domma rambon anjaha seng be tarbahensi mangidah.

³ Seng ope mintop palita ni Naibata, anjaha domma modom si Samuel ibagas Rumah ni Jahowa, hajongjongan ni Poti Parpadanan ni Naibata.

⁴ Jadi dilo-dilo ma Jahowa bani si Samuel, gabe ibalosi ma, “Eak, ijon do ahu!”

⁵ Dob ai marlintun ma ia hu bani si Eli, anjaha nini ma, “Tonggor ma, ijon do ahu, idilo ham do ahu.” Tapi ihatahon si Eli ma, “Seng dong hudilo ho, mulak ma ho, modom use.” Jadi mulak ma ia anjaha modom.

⁶ Dob ai iulaki Jahowa ma mardilo, “Samuel!” Jadi jongjong ma si Samuel anjaha laho ma ia hu bani si Eli, anjaha nini ma, “Tonggor ma, ijon do ahu, idilo ham do ahu.” Tapi nini ma, “Seng dong hudilo ho anaha, mulak ma ho, modom use.”

⁷ Tapi seng itanda si Samuel ope Jahowa, anjaha seng ope ipatar bani hata ni Jahowa.

⁸ Dob ai iulaki Jahowa ma mardilo si Samuel patoluhalihon, jadi jongjong ma ia laho marayak si Eli, anjaha nini ma, “Tonggor ma, ijon do ahu, idilo ham do ahu.” Jadi mambotoh ma uhur ni si Eli, Jahowa do hape na mandilo anak parana ai.

⁹ Jadi nini si Eli ma hu bani si Samuel, “Laho ma ho, ulaki ma modom, anggo adong use na dilo-dilo bam, hatahon ma, ‘Marsahap ma Ham ale Jahowa, manangi-nangi do jabolon-Mu on!’” Jadi laho ma si Samuel, iulaki ma modom bani iananni.

¹⁰ Dob ai roh ma use Jahowa, jongjong ijai anjaha dilo-dilo songon nongkan ai, “O Samuel, Samuel!” Jadi nini si Samuel ma, “Marsahap ma Ham, manangi-nangi do jabolon-Mu on!”

¹¹ Nini Jahowa dompak si Samuel, “Tonggor ma, pamasaon-Ku ma sada uhum i Israel, sabonar marnginging do pinggol ni ganup na mambogei ai haduasi.

¹² Bani ari na sasada ai parrohon-Ku ma hu bani si Eli haganup, na dob Huhatahon pasal ginomparni hun bani mungkahni das hu bani ujugni.

¹³ Ai domma Hulumbahon hinan bani, paboa na uhumon-Ku do ginomparni sadokah ni dokahni, halani ibotoh do pangapasi ni anakni ai bani Naibata, hape seng iajar sidea.

¹⁴ Halani ai domma pala marbija Ahu pasal ginompar ni si Eli: Sabonar na so tarungkab be hajahaton ni ginompar ni si Eli marhitei galangan sisayaton barang galangan sipanganon ronsi sadokah ni dokahni.”

¹⁵ Dob ai modom ma si Samuel ronsi siang ari; dob ai iungkab ma labah ni Rumah ni Naibata. Tapi mabiar do si Samuel patugahkon pangungkabon ai bani si Eli.

¹⁶ Jadi idilo si Eli ma si Samuel, nini ma, “Alo Samuel, anakku!” Nini ma mambalosi, “Ijon do ahu.”

¹⁷ Nini si Eli ma, “Aha do hata na pinatugah-Ni ai bam? Ulang ma porsou hu bangku! Sonai ma

bahenon ni Naibata bam, anjaha lobih ni ai ope, anggo iporsou ho hu bangku age sada hata hun bani haganup hata na pinatugah-Ni ai hubam.”

¹⁸ Jadi ipatugah si Samuel ma hu bani ganup hata ai, anjaha aha pe lang iporsou bani. Dob ai nini ma, “Jahowa do la, ibahen ma barang aha na madear nini uhur-Ni.”

¹⁹ Dob ai lambin magodang ma si Samuel, anjaha ihasomani Jahowa do ia, anjaha seng dong hun bani ganup hatani na so saud.

²⁰ Anjaha ganup do halak Israel, hun Dan nari das hu Berseba marhatongonkon si Samuel, Nabi ni Jahowa.

²¹ Dob ai ipagati Jahowa ma patalarhon diri-Ni i Silo, ai ipatar Jahowa do diri-Ni hu bani si Samuel i Silo.

Itaban Halak Palistim Poti Parpadanan

4 ¹ Sogop ma hata ni si Samuel bani ganup halak Israel. Bingkat ma halak Israel manjumpahkon halak Palistim laho marporang; marsaran ma sidea i Eben-Eser, anjaha halak Palistim marsaran i Afek.

² Dob ipatitir halak Palistim bala ni sidea mangimbang halak Israel, marsiporangan ma sidea, talu ma halak Israel ibahen halak Palistim; hona bunuh do ibahen sidea halak Israel ompat ribu halak i parmunsuhan ai.

³ Jadi dob mulak bangsa ai hu parsaranan, nini pangintuai ni halak Israel ma, “Mase ma ipaturut

Jahowa hita sadari on talu ibahen halak Palistim? Alop hita ma hun Silo Poti Parpadanan ni Jahowa, ase roh la hu tongah-tongahta, ase ipaluah hita hun bani tangan ni munsuhta.”

⁴ Dob ai isuruh bangsa ai ma hu Silo na mangalop Poti Parpadanan ni Jahowa Zebaot hunjai, na marparatas bani herubim; anjaha ijai do anak ni si Eli na dua ai, si Hopni pakon si Pinehas, rap pakon Poti Parpadanan ni Naibata.

⁵ Jadi dob das Poti Parpadanan ni Jahowa hu parsaranan ai, marsurak ma gogoh halak Israel, pala dugur tanoh ai ibahen.

⁶ Jadi dob ibogei halak Palistim sora surak-surak ai, nini sidea ma, “Sora surak-surak bolon aha do na i parsaranan ni halak Heber ai?” Jadi dob ibotoh sidea, poti ni Jahowa do hape roh hu parsaranan ai,

⁷ mabiar tumang ma sidea, ai nini sidea do, “Domma roh Naibata hu parsaranan ni sidea ai.” Ambahni ai nini sidea ma, “Magou ma hita, ai seng onggga ope masa sonon i lobei ni on.

⁸ Magou ma hita! Ise ma na boi paluahkon hita hun tangan ni Naibata na marmulia on? In ma Naibata, na mamunuh halak Masir marhitei bagei-bagei ni sampar i halimisan.

⁹ Tenger ma uhur nasiam, anjaha patuduh nasiam ma hadalahion nasiam alo halak Palistim, ase ulang iparjabolon sidea nasiam, songon nasiam na

marjabolon sidea hinan. Patuduh ma hadalahion nasiam anjaha marporang ma!”

¹⁰ Jadi jobu ma halak Palistim marmunsuh, gabe talu ma halak Israel, anjaha maporus sidea ganup hu lampolamponi bei. Hataluan banggal do ai, ai radag do hun bani halak Israel tolu puluh ribu halak bala pardalan nahei.

¹¹ Dapot do homa pakon Poti ni Jahowa; anjaha na dua anak ni si Eli ai, si Hopni pakon si Pinehas matei do.

¹² Marlinton ma sada halak Benjamin hun parmunsuhan ai, anjaha das ma ia hu Silo sadari ni ai, marpaheian na nirigatan anjaha tanoh i atas uluni.

¹³ Jadi dob das ia, tonggor ma, hundul bani hundulanni do si Eli i lambung dalan manatap-natap, ai ihoruhon uhurni do Poti ni Naibata. Anjaha dob das halak ai hu huta ai patugahkon barita ai, mandoraki ma ganup parhuta ai.

¹⁴ Jadi dob ibogei si Eli sora ni doruh-doruh ai, nini ma, “Sora ni hagaoron aha do in?” Mangoelos ma halak ai roh patugahkon hu bani si Eli.

¹⁵ Marumur siah puluh ualuh tahun ma si Eli ijia, anjaha domma rambon matani, seng marpangidah be.

¹⁶ Nini halak ai ma dompak si Eli, “Na roh hun parmunsuhan do ahu anjaha na maporus hun

parmunsuhan do ahu sadari on.” Jadi nini si Eli ma, “Aha do na masa, alo anakku?”

¹⁷ Jadi nini siboan barita ai ma mambalosi, “Domma maporus halak Israel ibahen halak Palistim, talu tumang do bangsa in, si Hopni pakon si Pinehas matei do, anjaha tarboan do poti ni Naibata.”

¹⁸ Jadi dob itaringati poti ni Naibata ai, tinggalak ma si Eli hu pudi hun bani hundulanni i lambung ni horbangan ai; simpok ma borgokni lanjar matei, ai domma matua ia anjaha mombur homa, ompat puluh tahun do halak Israel iuhumi.

¹⁹ Ia parumaenni, ai ma parinangon ni si Pinehas, boratan rumah do ijia, barah ma toras ni omeini. Jadi dob ibogei na dob iboan poti ni Naibata, anjaha na dob matei simatuani dalahi pakon paramangonni, tompas ma ia lanjar mangintubuh; ai sompong do maborit iahap.

²⁰ Marayak laho matei ia, nini naboru na jongjong i lambung ni ai ma hu bani, “Ulang mabiar, ai anak do na tinubuhkonmin!” Tapi seng ibalosi, anjaha seng parduli ia ijai.

²¹ Jadi igoran ma dakdanak ai si Ikabod, arti ni hata ai -- Domma masab hamuliaon hun bani Israel -- halani na dob tartaban poti ni Naibata, pakon halani domma matei simatuani dalahi pakon paramangonni.

²² Ai nini do, “Domma masab hamuliaon hun bani Israel, ai domma tartaban poti ni Naibata.”

Poti Parpadanan i Tanoh ni Halak Palistim

5 ¹ Tapi ibuat halak Palistim ma poti ni Naibata ai, anjaha iboan ma hun Eben-Eser hu Asdod.

² Ase ibuat halak Palistim ma poti ni Naibata anjaha iboan ma ai hu rumah ni Dagon; inahkon sidea ma ai i lambung ni Dagon.

³ Tapi sanggah na pinagirah ni halak Asdod puho patarni ai, tonggor ma, domma tungkap Dagon ai hu tanoh i lobei ni poti ni Jahowa. Jadi ibuat sidea ma Dagon ai, anjaha ipasuang ma ai hu bani iananni.

⁴ Tapi dob ipagirah sidea use puho patarni ai, tonggor ma, domma tungkap use hu Tanoh Dagon ai i lobei ni Poti ni Jahowa; anjaha tipul do ulu ni Dagon ai anjaha tanganni haduasi tibal i molmolan; pitah badan ni Dagon ai mando na tading.

⁵ Halani ai do ase seng bulih dogeion ni sagala malim ni Dagon ronsi haganup na masuk hu rumah ni Dagon ai molmolan ni rumah ni Dagon na i Asdod ronsi sadari on.

⁶ Tapi borat do pangodohkon ni tangan ni Jahowa hu bani halak Asdod; ihirjati do uhur ni sidea anjaha ipatubuh do bayoh bani parhuta Asdod pakon gomgomanni.

⁷ Jadi dob iidah halak Asdod sonai do na masa ai, nini sidea ma, “Seng bulih tading i lambungta Poti

ni Naibata ni halak Israel, ai parah do pangonai ni tangan-Ni hu banta pakon hu Dagon, naibatanta in.”

⁸ Dob ai isuruh sidea ma patumpuhon ganup raja ni halak Palistim, anjaha nini sidea ma, “Aha ma sibahenonta hu bani Poti ni Naibata ni halak Israel?” Nini sidea ma mambalosi, “Hu huta Gad ma na osor poti ni Naibata ni halak Israel ai.”

⁹ Jadi dob ipaosor sidea ai hujai, mangonai ma tangan ni Jahowa hu huta ai, gabe rusak ma sidea; hona papa ma parhuta ai, na ganjang na etek, tubuh do bayoh bani sidea.

¹⁰ Dob ai itongos sidea ma poti ni Naibata ai hu Ekron. Tapi dob das poti ni Naibata hu Ekron, mandoruhi ma parhuta Ekron, nini sidea ma, “Iboan sidea do Poti ni Naibata ni halak Israel hubennami, sihol mamunuh hanami pakon bangsanami.”

¹¹ Dob ai isuruh sidea ma patumpuhon ganup raja ni halak Palistim, nini sidea ma, “Tongos nasiam ma Poti ni Naibata ni halak Israel mulak bani iananni hinan, ase ulang ibunuh hanami pakon bangsanami.” Ai masa do harusakon bolon i sab huta ai. Parah tumang do pangonai ni tangan ni Jahowa ijai.

¹² Halak na so matei, hona bayoh do, anjaha manaik do ronsi langit doruh-doruh ni huta ai.

Parmulak ni Poti ai

6 ¹ Pitu bulan do dokahni poti ni Jahowa i tanoh ni halak Palistim.

² Dob ai ipatumpu halak Palistim ma sagala malim pakon partondung, nini sidea ma, “Aha do sibahenonnami pasal poti ni Jahowa? Patugah nasiam ma bennami marhitei aha tongoskononnami ai hu iananni.”

³ Jadi ihatahon sidea ma, “Anggo sihol tongoskonon nasiam poti ni Naibata ni halak Israel, ulang lumei tumang tongoskon nasiam, tapi maningon padihuton nasiam do sada galangan parsalahan hujai. Jadi malum ma ahapkonon nasiam anjaha torang ma botohon nasiam, barang aha halani mambahen lang surut tanganni hun bani nasiam.”

⁴ Jadi nini sidea ma, “Aha ma galangan parsalahan sipadihutonnami hujai?” Nini sidea ma mambalosi, “Lima bayoh omas pakon lima ubag omas romban hu bani bilangan ni raja ni halak Palistim, ai sada uhum do in, na mangonai bani nasiam ganup pakon bani raja nasiam.

⁵ Maningon bahenon nasiam usihan ni bayoh ampa usihan ni ubag, na mangedahon tanoh in, anjaha bere nasiam ma hasangapon hu bani Naibata ni halak Israel, andohar ipaganggang tangan-Ni hun bani nasiam pakon hun bani tanoh nasiam.

⁶ Mase ma pahengkengon nasiam uhur nasiam songon halak Masir pakon Parao na pahengkengkon uhur ni sidea? Ai lang sonon do? Dob ipapai Jahowa sidea ipalopas sidea ma bangsa ai laho, dob ai bingkat ma sidea.

⁷ On pe, ugaskon nasiam ma pauli sada gareta na baru, anjaha buat nasiam dua lembu na pabagodkon ope, na so onggga ope hona pasangan; pasang nasiam ma lembu ai hu bani gareta ai, tapi boan nasiam ma anakni ai mulak hu rumah.

⁸ Dob ai buat nasiam ma poti ni Jahowa, pajongjong nasiam ma ai hu gareta ai; dob ai ugas omas ai siberehonon nasiam bahen galangan parsalahan, nahkon nasiam ma ai hubagas poti-poti i lambungni. Dob ai palopas nasiam ma laho manuruti dalanni.

⁹ Dob ai pardiateihon nasiam ma, anggo tangkog do ia hun dalan na laho hu tanohni hinan, hu Bet-Semes, torang ma, la do mambahen hamagouan banggal on banta, tapi anggo lang, botoh hita ma, sedo tangan-Ni na mangonai ai hu banta, purini hinan do ai masa banta.”

¹⁰ Jadi ibahen halak ai ma sonai, ibuat sidea ma dua lembu na pabagodkon, anjaha ipasang ma ai hu bani gareta ai; tapi ihurungkon sidea do anakni ai i rumah.

¹¹ Anjaha inahkon sidea ma Poti ni Jahowa ai hu gareta ai ampa poti-poti ai isianni ubag omas pakon usih-usihan ni bayoh ni sidea ai.

¹² Jadi laho ma lombu ai torus mangirikkon dalan na laho hu Bet-Semes; sai dalan na bolon ai do idalani lanjar marumboh-umboh anjaha seng manirpang hu siamun barang hu sambilou; sai raja ni halak Palistim ai do hun pudini das hu parbalogan ni Bet-Semes.

¹³ Tapi ragat ni halak mambuat omei do par Bet-Semes i habungan ai; mangkawah ma sidea jadi iidah sidea ma poti ai, gabe malas ma uhur ni sidea mangidahsi.

¹⁴ Dob ai das ma gareta ai hu juma ni si Josua, par Bet-Semes, anjaha maronti ma ijai. Adong do ijai sada batu na banggal; itahai sidea ma hayu ni gareta ai, anjaha igalangkon sidea ma lombu ai songon galangan situtungan hu bani Jahowa.

¹⁵ Dob ai ipaturun halak Levi ma Poti ni Jahowa ai pakon poti-poti isian ni ugas-ugas omas na i lambung ni ai, anjaha itibalhon ma ai hu bani batu na bolon ai; lanjar igalangkon par Bet-Semes ma sadarini ai hu bani Jahowa galangan sisayaton pakon galangan situtungan.

¹⁶ Jadi dob iidah raja ni halak Palistim na lima ai ai, mulak ma sidea sadari ni ai hu Ekron.

¹⁷ Anjaha on do bayoh omas na pinaingkat ni halak Palistim bahen galangan parsalahan hu bani

Jahowa: Hun Asdod sada, hun Gaza sada, hun Askelon sada, hun Gad sada pakon hun Ekron sada.

¹⁸ Ambah ni ai ubag omas, marguru hu bani bilangan ni ganup huta ni halak Palistim, ginomgom ni raja na lima ai, hun bani huta na marbatar-batar pakon huta na so marparik. Batu banggal, ianan panampeian ni sidea bani poti ni Jahowa, i lambung ni juma ni si Josua, par Bet-Semes ai, ai do hasaksian ni ai ronsi sadari on.

¹⁹ Tapi ibunuh Jahowa ma deba hun bani par Bet-Semes, halani itungkir sidea poti ai; ibunuh ma pitu puluh halak hun bani sidea. Jadi marhoru ma bangsa ai, halani buei hun bani sidea, na hona bunuh ibahen Jahowa.

²⁰ Jadi nini par Bet-Semes ma, “Ise ma na tahan jongjong i lobei ni Jahowa, Naibata na pansing in? Anjaha ise ma haondosanni dob laho hun lambungta?”

²¹ Dob ai isuruh sidea ma suruhanni hu bani par Kirjat-Jearim, nini sidea ma, “Domma mulak poti ni Jahowa itaruhkon halak Palistim; tuad ma nasiam anjaha alop nasiam ma bani nasiam.”

7 ¹ Dob ai roh ma par Kirjat-Jearim, mamboan Poti ni Jahowa tangkog hu rumah ni si Abinadab na i atas ni raboyon; iuras sidea ma si Eleasar, anakni ai manramotkon poti ni Jahowa.

² Anjaha singgan ni partading ni poti ai i Kirjat-Jearim, hundokah do, adong do hira-hira dua puluh

tahun, sai dompak Jahowa do uhur ni ganup halak Israel.

Hamonangan ni Halak Israel Mangimbang Halak Palistim

³ Jadi nini si Samuel ma hu bani ganup halak Israel, “Anggo mulak nasiam hu bani Jahowa hun bani gok ni uhur nasiam, padaoh nasiam ma hun tongah-tongah nasiam naibata na legan pakon Astarot, anjaha marsijoloman ma uhur nasiam bani Jahowa, anjaha pitah-Si ma balosi nasiam, ase ipaluah nasiam hun tangan ni halak Palistim.”

⁴ Jadi ipadaoh halak Israel ma Baal pakon Astarot, anjaha pitah Jahowa mando ibalosi sidea.

⁵ Dob ai nini si Samuel ma, “Patumpu ma haganup halak Israel hu Mispa, ase martonggo ahu hu bani Jahowa halani nasiam.”

⁶ Jadi martumpu ma sidea i Mispa, itahui sidea ma bah anjaha iuseihon sidea ma ai i lobei ni Jahowa, anjaha marpuasa ma sidea bani ari ai, anjaha nini sidea ma, “Domma mardousa hanami bani Jahowa.” Anjaha maruhum ma si Samuel bani sidea i Mispa.

⁷ Tapi dob ibogei halak Palistim, na dob martumpu halak Israel i Mispa, tangkog ma ganup raja ni halak Palistim dompak halak Israel. Jadi dob ibogei halak Israel ai, mabiar tumang ma sidea mangidah halak Palistim.

⁸Jadi nini halak Israel ma hu bani si Samuel, “Ulang ma ham maronti dilo-dilo hu bani Jahowa Naibatanta halani hanami, ase ipaluah hanami hun bani tangan ni halak Palistim.”

⁹Jadi ibuat si Samuel ma sada biri-biri na inuman anjaha igalangkon ma ai songon galangan situtungon bani Jahowa; anjaha dilo-dilo ma si Samuel hu bani Jahowa laho mangapiti halak Israel, gabe ibalosi Jahowa ma ia.

¹⁰Sanggah na manggalangkon galangan situtungon ai si Samuel, manrongoman ma roh halak Palistim laho mamorang halak Israel; tapi marsora ma ponggei ibahen Jahowa gogoh-gogoh sadari ni ai laho mangimbang halak Palistim, gabe geor ma sidea; jadi talu ma sidea mangimbang halak Israel.

¹¹Jadi luar ma halak Israel hun Mispa, lanjar ipardakdak ma halak Palistim ai, anjaha italuhon ma sidea das hu kehen ni Bet-Kar.

¹²Ibuat si Samuel ma sada batu, ipajongjong ma ai i holangkolang ni Mispa pakon Jesanah anjaha ibahen ma goranni: Eben-Eser, ai nini do, “Ronsi sonari iurupi Jahowa do hita.”

¹³Jadi talu ma halak Palistim, anjaha seng roh be sidea hu tanoh ni halak Israel, anjaha sai iodohkon tangan ni Jahowa do halak Palistim sadokah goluh ni si Samuel.

¹⁴Anjaha mulak ma hu bani halak Israel sagala huta, na binuat ni halak Palistim hun bani halak Israel,

singgan ni Ekron das hu Gat; sonai homa tanoh ni sidea ibuat halak Israel ma hun bani tangan ni halak Palistim. Mardamei ma homa halak Israel pakon halak Amori.

Panguhum Samuel

¹⁵ Si Samuel do manguhum halak Israel sadokah manggoluh ia.

¹⁶ Jadi ganup tahun do ia maringgot laho hu Betel, hu Gilgal pakon hu Mispa anjaha iuhumi ma halak Israel bani ganup ianan ai.

¹⁷ Dob ai mulak ma ia hu Rama, ai ijai do rumahni; anjaha ijai pe idalankon do panguhumion bani halak Israel. Anjaha ipauli ma ijai sada anjapanjap bani Jahowa.

Mangindo Raja Halak Israel

8 ¹ Jadi dob sayur matua si Samuel, ipabangkit ma anakni ai manguhumi halak Israel.

² Ia goran ni anak sikahananni si Joel do, anjaha goranni na paduahon ai si Abia do, i Berseba do sidea panguhum.

³ Tapi seng iirikkon anakni ai dalan ni bapani, tapi impolan do sidea bani pirak; ra do sidea manjalo sisip laho papeolhon uhum.

⁴ Jadi martumpu ma ganup pangintuai ni halak Israel hu bani si Samuel i Rama,

⁵ nini sidea ma hu bani, “Tonggor ma, domma sayur matua ham, tapi anggo anakmu seng dong iirikkon sidea dalanmu; on pe pabangkit ham ma bennami sada raja, ase ia manrajai hanami songon na bani ganup bangsa sipajuh begu-begu.”

⁶ Tapi sogam do uhur ni si Samuel bani hata na hinatahon ni sidea ai, “Bere ham ma bennami raja, ase ia manrajai hanami.” Jadi martonggo ma si Samuel hu bani Jahowa.

⁷ Jadi nini Jahowa ma dompak si Samuel, “Tangihon ma sora ni bangsa in pasal haganup na hinatahonni ai bam, ai sedo ho, Ahu do na niambungkon ni sidea ijai, ase ulang Ahu be raja bani sidea.

⁸ Romban hu bani haganup pambahenan na binahen ni sidea singgan ni na Huarahkon sidea luar hun tanoh Masir ronsi sadari on, itangihon sidea do Ahu laho mambalosi naibata na legan, sonai do homa ibahen sidea hubam.

⁹ On pe tangihon ma sora ni sidea ai, asal ma pangkei isaksihon anjaha ipasingatkon ho uhum ni raja na sihol manggomgomi sidea.”

¹⁰ Jadi ipadas si Samuel ma ganup hata ni Jahowa hu bani bangsa ai, na mangindo raja hun bani.

¹¹ Nini ma, “On ma uhum ni raja na sihol manggomgomi nasiam: Buatonni do anak nasiam anjaha bahenonni ma sidea gabe pargareta pakon parhudani, ase marlintun sidea i lobei ni garetani.

¹² Anjaha bahenonni ma sidea kopala ni marsasaribu, pakon kopala ni marlima-lima puluh, anjaha deba maninggala jumanu pakon manabi sisabionni; manukangi parugas hu parporangan ampa parugas ni garetani.

¹³ Buattonni ma pakon boru nasiam laho manggiling minak na morum, barang pardahan barang parmasak.

¹⁴ Buattonni ma juma nasiam pakon anggur nasiam ampa hayu jetun nasiam, sagala sidearan, anjaha berehononni ma ai hu bani juakjuakni.

¹⁵ Buattonni ma parsapuluhan ni gandum nasiam pakon pohon anggur nasiam, anjaha berehononni ma ai hu bani juakjuakni pakon suruh-suruhanni.

¹⁶ Buattonni ma homa jabolon nasiam dalahi pakon jabolon nasiam naboru, sonai homa lembu pakon halode nasiam, sagala sidearan laho mamakei ai bani horjani.

¹⁷ Buattonni ma parsapuluhan ni biri-biri nasiam, anjaha gabe jabolonni ma nasiam.

¹⁸ Jadi bani ari ai mandoruhi ma nasiam halani raja nasiam ai, na pinilih nasiam bani nasiam; tapi seng balosan ni Jahowa nasiam bani ari ai.”

¹⁹ Tapi manjua do bangsa ai manangihon sora ni si Samuel, nini sidea ma, “Lang! Maningon adong do sada raja bennami,

²⁰ ase dos hanami songon haganup bangsa sipajuh-begu-begu, ase rajanami ai ma, na

maruhum bennami anjaha mambobahon hanami hu parmunsuhan.”

²¹ Ase dob ibogei si Samuel ganup hata ni bangsa ai, ipatugah ma ai hu bani Jahowa.

²² Jadi nini Jahowa ma dompak si Samuel, “Tangihon ma sora ni sidea ai, anjaha pabangkit ma bani sidea sada raja.” Dob ai nini si Samuel ma dompak halak Israel, “Laho ma nasiam ganup hu hutani bei.”

Si Samuel Maminaki si Saul gabe Raja

9 ¹ Adong ma sada halak hun Benjamin na margoran si Kis, anak ni si Abiel, anak ni si Zeror, anak ni si Bekorat, anak ni si Afiah, sada halak Benjamin, pararta na buei.

² Adong do sada anakni, na margoran si Saul, ganjang bolon anjaha jenges do ia. Seng dong dalahi sijengesan hun bani i tengah-tengah ni halak Israel, singgan abarani hu atas do hasurunganni hun bani ganup halak Israel.

³ Magou do piga-piga halode boru-boru ni si Kis, bapa ni si Saul ai. Nini si Kis ma dompak si Saul anakni ai, “Arahkon ma sada juakjuak in hasomanmu, jadi bingkat ma ho, anjaha laho ma ho mintor mangindahi halode boru-boru ai.”

⁴ Isiari sidea ma Dolog Efraim, sonai age Tanoh Salisa, hape seng jumpahsi; isiar sidea ma use tanoh

Saalim, tapi seng dong ijai. Isiari sidea ma use Tanoh Benjamin, hape seng jumpahsi.

⁵ Dob das sidea hu tanoh Sup, ihatahon si Saul ma hu bani juakjuakni, na mangkasomanisi ai, “Eta ma hita mulak, atap na dob rusakan do uhur ni bapa mangidah hita ase mangidah halode boru-boru ai.”

⁶ Tapi nini ma mambalosi, “Tonggor ma, adong do sada halak ni Naibata i huta on, anjaha sada halak na sangap do ia; sagala na hinatahonni tongon do. Laho ma hita hujai, ra boi do patugahonni banta pasal dalan sidalananta.”

⁷ Nini si Saul ma dompak juakjuakni ai, “Tonggor ma, porini laho hita, aha ma siboanonta hu bani halak ai? Ai domma bois ruti ibagas ranjutta, anjaha seng dong siluah siboanonta hu bani halak ni Naibata ai. Aha ma dong banta?”

⁸ Dob ai nini juakjuak ai ma use dompak si Saul, “Tonggor ma, adong do bangku saparompat sekel pirak, ai ma hubere hu bani halak ni Naibata ai, ase ipatugah banta dalan sidalananta.”

⁹ Sapari i tanoh Israel, anggo laho sada halak manungkun Naibata, ihatahon ma, “Laita marayak halak na marpanonggoran; ai halak na marpanonggoran do igoran sapari nabi sisonai.”

¹⁰ Nini si Saul ma dompak juakjuakni ai, “Dear do hatamai, eta ma.” Jadi laho ma sidea hu huta, ianan ni halak ni Naibata ai.

¹¹ Sanggah na tangkog sidea bani tangkogan na laho hu huta ai, jumpah sidea ma anak boru na mangalop bah, na laho luar manahui bah, anjaha nini ma dompak sidea, “Ai ijon do halak na marpanonggoran ai?”

¹² Jadi nini sidea ma mambalosi, “Ijon do, tonggor ma, na i lobeimu an do ia. Oloskon ham, in pe roh ia hu huta on, ai sihol manggalang do halak simbuei sadari on i buntu-buntu ai.

¹³ Masukkonsi nasiam hu huta ai, jumpah nasiam ma ia sanggah seng ope tangkog ia hu buntu-buntu ai mangan, ai seng tumaram manganjolma simbuei ai paima roh ia, halani maningon ia do na mamasu-masu galangan ai; dob ai mangan ma sagala na nidilo. On pe tangkog ma nasiam, mintor jumpah nasiam ma ia.”

¹⁴ Jadi tangkog ma sidea hu huta ai. Sanggah na masuk sidea hu huta ai, iidah sidea ma si Samuel manjumpahkon sidea sanggah laho tangkog ia hu buntu-buntu ai.

¹⁵ Tapi domma iungkab Jahowa hinan hu bani si Samuel, sadari i lobei ni parroh ni si Saul,

¹⁶ “Sonon patar suruhon-Ku ma bam sada halak hun Tanoh Benjamin, ase minakanmu ia gabe pambobai ni bangsang-Ku halak Israel, ase ipaluah bangsang-Ku hun tangan ni halak Palistim; ai domma marpanatap uhur-Hu bani bangsang-Ku, ai domma das Bangku doruh-doruh ni sidea.”

¹⁷ Dob iidah si Samuel si Saul ai, nini Jahowa ma hu bani, “On ma halak ia, na dob Hupatugah bam! Ia ma na sihol manggomgom bangsang-Ku.”

¹⁸ Dob ai idohori si Saul ma si Samuel i horbangan ai, anjaha nini ma, “Patugah ham ma bangku, ija do rumah ni halak na marpanonggoran ai?”

¹⁹ Jadi nini si Samuel ma mambalosi si Saul, “Ahu do halak na marpanonggoran ai; palobei nasiam ma hu buntu-buntu ai, ase rap mangan nasiam sadari on pakon ahu; patar pe pabingkatonku ham, anjaha haganup na ibagas uhurmu ai, hupatugah pe bamu.

²⁰ Anggo pasal halode boru-borumu ai do, na magou tolu ari na salpu, ulang pala pusok uhurmu pasal ai, ai domma jumpah. Ai bani ise do jumpah na pinarsinta ni ganup halak Israel? Ai lang bamu do pakon bani ganup ginompar ni bapamu?”

²¹ Nini si Saul ma mambalosi, “Ai lang halak Benjamin do ahu, marga sietekan i tongah-tongah ni halak Israel? Ai lang pangkungku do sietekan hun bani ganup pangku ni marga Benjamin? Mase ma sonai hatahononmu hu bangku?”

²² Dob ai iarahkon si Samuel ma si Saul pakon juakjuakni ai, iarahkon ma sidea hu kamar bolag, anjaha ibahen sidea hundul hampit luluan ni ganup na nidilo ai, tar tolu puluh halak bueini.

²³ Dob ai nini si Samuel ma hu bani sipargulei, “Boan ma hujon lompah na dob hubere bam, na dob huhatahon bam, ‘Papulig on.’”

²⁴ Dob ai iboan sipargulei ai ma hae bona pakon na longkot hujai, anjaha itibalhon ma ai i lobei ni si Saul; jadi nini si Samuel ma, “Tonggor ma, na pinapulig do in bamu, antong pangan ham ma! Na pinapulig hinan do in bamu, paima jumpah panorangni, boi ham mangan pakon na nidilo on.” Jadi mangan ma si Saul rap pakon si Samuel sadari ni ai.

²⁵ Dob tuad sidea hun buntu-buntu ai laho hu huta, ipadear ma podoman bani si Saul i kamar pardatas, dob ai modom ma ia.

²⁶ Dob ai sanggah na naik simarikkuning idilo si Samuel ma si Saul hu kamar pardatas, nini ma, “Puho ma ham, ase hupataruh ham.” Jongjong ma si Saul, rap luar ma sidea haduasi hu dalan, ia pakon si Samuel.

²⁷ Sanggah na tuad ai sidea das hu parbalogan ni huta ai, nini si Samuel ma dompak si Saul, “Hatahon ma juakjuak ai ase ipalobei, anjaha anggo domma hun lobei ia, soh ma ham ijon tongkin, ase hupatugah bamu hata ni Naibata.”

Iminaki si Samuel si Saul gabe Raja

10¹ Dob ai ibuat si Samuel ma sada guri-guri na marisi minak, iuseihon ma ai hu bani uluni, isummah ma ia anjaha ihatahon, “Jahowa do na mamminaki ham gabe pambobai ni bangsa-Ni, halak Israel. Ham ma na manggomgom bangsa ni

Jahowa, anjaha ham ma na paluahkon sidea hun tangan ni munsuh ni sidea inggot. On ma tanda bamu, paboa Jahowa do na mamminaki ham gabe pambobai ni bangsa na niain-Ni ai.

²Anggo domma laho ham holi hun lambungku, jumpah ham ma dua dalahi dohorhon tanoman ni si Rahel, i tanoh Benjamin, i Selsa, anjaha hatahonon ni sidea ma bamu, 'Domma jumpah halode boru-boru na pinindahanmu ai, anjaha tonggor ma, seng be iuhurhon bapanta halode in', tapi rusak do ia pasal nasiam, nini, 'Aha ma bahenonku pasal anakai?'

³Dob ai toruskon ham ma dalanmu hunjai gabe das ma ham hu baringin Tabor, jumpah ham ma ijai tolu halak, na tangkog marayak Naibata hu Betel, sahalak mamboan tolu anak ni hambing, na sada nari mamboan tolu kibul ruti, anjaha na patoluhon mamboan gusi hulingkuling, na marisi anggur.

⁴Jadi tabion ni sidea ma ham anjaha bereonni ma bamu dua kibul ruti, anjaha jalo ham ma ai hun tangan ni sidea.

⁵Dob ai das ma ham hu Gibe-Elohim, ianan ni tangsi ni halak Palistim; anjaha dob das ham hubagas huta ai, pajumpah ma ham pakon satumpuan nabi, na tuad hun buntu-buntu ai mararbab, marsarune, martulila pakon marhusapi, anjaha manjahai ma sidea.

⁶ Jadi sogopan ni Tonduy ni Jahowa ma ham, gabe manjahai ma ham rup pakon sidea, jadi mubah ma ham gabejolma na legan.

⁷ Jadi anggo domma masa tanda ai bamu, bahen ham ma barang aha na jumpah tanganmu, ai hasomanan ni Jahowa ma ham.

⁸ Dob ai palobei ham ma tuad hu Gilgal, anjaha tonggor ma, tuad pe ahu manjumpahkon ham laho manggalangkon galangan situtungan pakon galangan pardameian. Maningon pitu ari dokahni paimaonmu ahu paima roh ahu bamu, ase hupatuduhkon bamu sibahenonmu.”

⁹ Jadi dob tundal ia, laho hun bani si Samuel, gabe ibere Naibata ma bani uhur na legan; anjaha masa ma ganup tanda ai sadari ni ai.

¹⁰ Dob das sidea hu Gibeai, tonggor ma, roh ma satumpuan nabi manjumpahkon; anjaha sogop ma Tonduy ni Naibata hu bani, lanjar manjahai ma ia i tongah-tongah ni sidea.

¹¹ Anjaha dob iidah sagala na mananda si hinan ia manjahai rap pakon nabi-nabi, nini sidea ma samah sidea, “Aha do na masa hu bani anak ni si Kis? Dihut do homa si Saul masuk bani nabi-nabi?”

¹² Jadi nini sahalak na hunjai ai ma, “Ai na sonaha do ge bapa ni sidea?” Halani ai do ase gabe umpama ia, ‘Dihut do homa si Saul masuk bani nabi?’

¹³ Dob maronti ia na manjahai ai das ma ia hu Gibeai.

¹⁴ Dob ai nini tulang ni si Saul ma hu bani pakon hu bani juakjuakni ai, “Ai laho huja do hanima?” Nini ma mambalosi, “Laho mangindahi halode boru-boru namin.” Jadi dob itonggori hanami hape seng jumpah, gabe laho ma hanami hu bani si Samuel.

¹⁵ Dob ai nini tulang ni si Saul ma, “Mahua patugah ma hu bangku barang aha do na hinatahon ni si Samuel ai bennima.”

¹⁶ Jadi nini si Saul ma dompak tulangni ai, “Torang do ipatugah bennami, na dob jumpah do halode ai. Tapi anggo pasal harajaon ai, na hinatahon ni si Samuel ai, seng dong ipatugah hu bani.”

Si Saul Bangkit jadi Raja Marhitei na Manjomput na Sinurat

¹⁷ Dob ai idilo si Samuel ma bangsa ai roh marayak Jahowa hu Mispa.

¹⁸ Jadi nini ma dompak halak Israel, “Sonon do hata ni Jahowa, Naibata ni Israel, ‘Ahu do na mangarahkon halak Israel luar hun tanoh Masir, anjaha Ahu do, na paluahkon hanima hun tangan ni halak Masir ampa sagala harajaon, na mangodohkon hanima.

¹⁹ Tapi domma iambungkon nasiam sadari on Naibata nasiam, na paluahkon nasiam hun bani hamagouan pakon hasosakan nasiam; ai nini nasiam do, ‘Lang! Pabangkit ma bennami sada

raja.' On pe, jongjong ma nasiam i lobei ni Jahowa marsasamarga pakon marsasaribu.'"

²⁰ Dob ai ihatahon si Samuel ma roh hundohor haganup marga ni halak Israel, gabe hona ma marga Benjamin.

²¹ Dob ai ihatahon ma use roh hundohor haganup marga Benjamin marsasapangku, gabe hona ma pangku Matri; anjaha dob ihatahon roh hundohor pangku Matri, marsasahalak, gabe hona ma si Saul, anak ni si Kis. Jadi ipindahi sidea ma ia hape seng jumpah.

²² Jadi iulaki sidea ma use manungkun Jahowa, "Ai roh do ia hujon?" Nini Jahowa ma mambalosi, "Tonggor ma, marponop do ia i tongah-tongah ni parugasan."

²³ Jadi marlintun ma sidea mangalopisi hunjai. Jadi dob jongjong ia i tongah-tongah ni bangsa ai, taridah ma ganjangan do ia hun bani ganup bangsa ai, singgan ni abarani hu atas.

²⁴ Dob ai nini si Samuel ma dompak ganup bangsa ai, "Domma iidah nasiam ia, ia ma ai na dob pinilih ni Jahowa. Seng dong na songonsi i tongah-tongah ni ganup bangsa in." Jadi marsurak ma ganup bangsa ai, anjaha nini sidea ma, "Sai sayur ma manggoluh raja in!"

²⁵ Dob ai ipatugah si Samuel ma hu bani bangsa ai uhum ni harajaon ai; isuratkon ma ai hubagas sada buku, anjaha itibalhon i lobei ni Jahowa. Dob

ai isuruh si Samuel ma ganup bangsa ai hu rumahni bei.

²⁶ Sonai homa si Saul mulak ma hu rumahni hu Gibeia, itaruhkon bala, na dob pinuhoan ni Naibata paruhuran ni sidea.

²⁷ Tapi adong do halak parjahat na mangkatahon, “Sonaha ma parpaluah ni halak on banta?” Mapas do uhur ni sidea mangidahsi; seng ra sidea mamboan siluah bani. Tapi ipakulah si Saul do songon na so ibogei hata ai.

Ipaluah si Saul Huta Jabes

11 ¹ Dob ai tangkog ma si Nahas, halak Ammon ai, anjaha ihubu ma huta Jabes na i Gilead; jadi nini sagala dalahi na i Jabes ma dompak si Nahas, “Bahen ma parpadanan bennami, ase ibalosi hanami rodimu.”

² Jadi nini si Nahas, halak Ammon ai ma hu bani sidea, “Ra pe ahu mambahen parpadanan bani nasiam, asal ma palobei hupulsitkon haganup mata siamun ni nasiam, ase hiri ganup halak Israel.”

³ Nini pangintuai ni Jabes ma hu bani, “Lopas ma hanami marpingkir pitu ari on, ase isuruh hanami suruhannami hu ganup nagori ni halak Israel. Jadi anggo seng dong na roh paluahkon hanami, luar pe hanami marayak ham.”

⁴ Dob das suruhan ai hu Gibea, huta ni si Saul, ipatugah sidea ma hata ai hupinggol ni bangsa ai. Jadi ipagogoh sidea ma sorani doruh-doruh.

⁵ Tonggor ma, roh do tudu si Saul hun ladang mangalai lombu, jadi nini si Saul ma, “Aha do na masa bani bangsa in ase doruh-doruh sidea?” Jadi ituri-turihon sidea ma hu bani hata-hata ni halak Jabes ai.

⁶ Jadi dob ibogei si Saul hata ai, sogop ma Tonduy ni Naibata bani, gajag tumang ma ringisni.

⁷ Ibuat ma sapasang lombu, itoktoki ma ai, anjaha ipantongoskon hu bani ganup tanoh ni Israel marhitei tangan ni suruhanni, anjaha nini ma, “Barang ise na so bingkat mangirikkon si Saul pakon si Samuel, maningon sonin ma bahenon hu bani lombuni!” Jadi sogop ma bajora hun bani Jahowa hu bani bangsa ai, gabe luar ma sidea songon sada halak.

⁸ Sanggah na binilang sidea i Bezek, adong do halak Israel tolu ratus ribu halak anjaha halak Juda tolu puluh ribu halak.

⁹ Dob ai ihatahon sidea ma hu bani suruhan na roh ai, “Sonon ma hatahon nasiam hu bani halak Jabes na i Gilead, ‘Patar bani pardeteng ni mata ni ari dapotan pangurupion ma nasiam.’” Dob roh suruhan ai anjaha ipatugah ai bani halak Jabes, jadi malas ma uhur ni sidea.

¹⁰ Halani ai nini halak Jabes ma, “Patar ma hanami luar marayak nasiam, jadi bahen nasiam ma bannami romban hu bani rosuh ni uhur nasiam.”

¹¹ Patarni ai, ibagi si Saul ma bangsa ai gabe tolu bagian; dob ai, sanggah runda sogod-sogod, idorab sidea ma tongah-tongah ni parsaranan ai, gabe italuhon ma halak Ammon marayak deteng ni ari. Merap ma na tading ai, seng dong age dua halak saodoran.

¹² Dob ai nini bangsa ai ma hu bani si Samuel, “Ise do na mangkatahon, ‘Mintor si Saul ma na manrajai hita?’ Boan ma hujon halak ai, ase ibunuh hanami sidea.”

¹³ Tapi nini si Saul ma, “Seng bulih matei barang ise sadari on, ai sadari on do Jahowa mambahen haluahon bolon bani halak Israel.”

¹⁴ Dob ai nini si Samuel ma hu bani bangsa ai, “Barah, laho ma hita hu Gilgal, ase na paratah ijai harajaon in.”

¹⁵ Jadi laho ma ganup bangsa ai hu Gilgal pabangkitkon si Saul ijai gabe raja i lobei ni Jahowa i Gilgal. Igalangkon sidea ma ijai galangan pardameian i lobei ni Jahowa, jadi marmalas ni uhur bangga ma ijai si Saul pakon haganup dalahi hun bani halak Israel.

Hata Parsirangan ni si Samuel hun bani Bangsa ai

12¹ Dob ai nini si Samuel ma dompak ganup halak Israel, “Tonggor ma, domma hutangihon sora nasiam pasal haganup na hinatahon nasiam hu bangku, anjaha domma hupabangkit sada raja bani nasiam.

² On pe, tonggor ma, raja in ma mambobahon nasiam; domma sayur matua ahu anjaha ubanon, anjaha tonggor ma, i tongah-tongah nasiam do anakku; anjaha ahu do na mambobahon nasiam hun bani haetek-etekonku nari ronsi sadari on.

³ Tonggor ma, ijon do ahu; marbalos ma nasiam dompak ahu i lobei ni Jahowa pakon i lobei ni na mininakan-Ni. Lumbu ni ise ma onggahubuat? Halode ni ise ma onggahubuat? Ise ma na onggahuodoh-odoh? Hun bani tangan ni ise ma onggahu manjalo sisip laho manutup matangku? Patugah nasiam ma ase hupaulak.”

⁴ Dob ai nini sidea ma mambalosi, “Seng onggahilang ham hanami, seng onggaisunsahi ham hanami barang ibuat ham atap aha hun bani atap ise pe.”

⁵ Jadi nini ma dompak sidea, “Jahowa do saksi bani nasiam, anjaha na mininakan-Ni ai do saksi sadari on, paboa na so adong jumpah nasiam age aha ibagas tanganku.” Nini sidea ma, “Ia ma saksi.”

⁶ Dob ai nini si Samuel ma dompak bangsa ai, “Jahowa do saksi, na pabangkit si Musa pakon si Aron anjaha na mangarahkon bapa nasiam tangkog hun tanoh Masir.

⁷ On pe, roh ma nasiam hujon jongjong, ase hupasingat bani nasiam i lobei ni Jahowa, pasal haganup dear layak ni Jahowa, sagala na binahen-Ni bani nasiam pakon bani ompung nasiam.

⁸ Dob das si Jakob hu tanoh Masir, doruh-doruh ma ompung nasiam bani Jahowa, gabe isuruh Jahowa ma si Musa pakon si Aron, ase iarahkon sidea ompung nasiam luar hun tanoh Masir, anjaha ipahundul sidea bani ianan on.

⁹ Tapi ihalupahon sidea ma Jahowa, Naibata ni sidea, gabe ijualhon ma sidea hu tangan ni si Sisera, pambobai bani bala ni si Jabin, raja ni Hazor, pakon hu tangan ni halak Palistim pakon hu tangan ni raja Moab; ai ma na mamorang sidea.

¹⁰ Jadi doruh-doruh ma sidea hu bani Jahowa, anjaha nini ma, ‘Domma mardousa hanami, halani itadingkon hanami Jahowa, anjaha ibalosi hanami Baal pakon Astarot; on pe paluah Ham ma hanami hun bani tangan ni munsuhnami, ase ibalosi hanami Ham.’

¹¹ Jadi isuruh Jahowa ma si Jerub-Baal, si Barak, si Jepta ampa si Samuel, ase ipaluah nasiam hun tangan ni munsuh nasiam inggot, gabe sonang nasiam marianan.

¹² Tapi dob iidah nasiam si Nahas, raja ni halak Ammon roh mangimbang nasiam, gabe ihatahon nasiam hu bangku, 'Lang, maningon adong do raja, na manggomgom hanami, hape Jahowa Naibata nasiam do namin raja nasiam.'

¹³ On pe, andin ma raja in, na pinilih nasiam in, na pinarsinta nasiam in; tonggor ma, domma ipabangkit Jahowa sada raja bani nasiam.

¹⁴ Anggo ihabiari nasiam Jahowa, anjaha ibalosi nasiam la, anjaha itangihon nasiam sora-Ni, anjaha seng ilawan nasiam hata ni Jahowa, anjaha rap nasiam pakon raja nasiam, na marrajai nasiam mangirikkon Jahowa Naibata nasiam, jadi dear ma haganup.

¹⁵ Tapi anggo seng ibalosi nasiam hata ni Jahowa, ilawan nasiam tene hata ni Jahowa, jadi mangonai ma tangan ni Jahowa bani nasiam ampa bani raja nasiam.

¹⁶ On pe padohor nasiam ma jongjong hujon, anjaha idah nasiam ma parsahapan na bolon on, na binahen ni Jahowa i lobei nasiam.

¹⁷ Ai lang marpariama gandum do nuan on? Dilo-dilo ma ahu holi bani Jahowa, gabe parrohon-Ni ma longgur pakon udan, ase itandai anjaha iidah nasiam buei ni hajahaton nasiam, na dob ibahen nasiam i lobei ni Jahowa, marhitei na pinindo nasiam bani nasiam sada raja."

¹⁸ Jadi dilo-dilo ma si Samuel hu bani Jahowa, gabe iparroh Jahowa ma longgur pakon udan bani ari ai. Jadi mabiar tumang ma ganup bangsa ai mangidah Jahowa pakon si Samuel.

¹⁹ Dob ai nini ganup bangsa ai ma dompak si Samuel, “Tonggohon ma hanami jabolonmu hu bani Jahowa Naibatamu, ase ulang matei hanami; ai itambahi hanami ope hajahaton on hu bani dousanami na buei in, ai ma marhitei na mangindo sada raja bennami.”

²⁰ Jadi nini si Samuel ma dompak bangsa ai, “Ulang nasiam mabiar; domma ibahen nasiam sagala hajahaton on, tapi ulang ma manlembang nasiam hun bani na mangirikkon Jahowa, tapi balosi nasiam ma Jahowa hun bani gok ni uhur nasiam.

²¹ Anjaha ulang ma nasiam manlembang mangirikkon naibata na so margagan, na so tarbahen mangurupi barang paluahkon nasiam, halani seng dong kuasani.

²² Halani seng tumaram tadingkonon ni Jahowa bangsa-Ni halani goran-Ni na timbul in, ai domma iharosuhkon Jahowa mambahen nasiam gabe bangsa-Ni.

²³ Ahu pe, sai daoh ma in hun bangku mambahen dousa i lobei ni Jahowa marhitei na maronti martonggo mangkopkop nasiam; sai podahkononku do bani nasiam dalan na dear anjaha na pintor.

²⁴ Tapi sai habiari nasiam ma Jahowa, anjaha balosi nasiam ma la ibagas hasintongan hun bani gok ni uhur nasiam; pardiateihon nasiam ma hinabueini na binahen-Ni hu bani nasiam.

²⁵ Tapi anggo sai inunut nasiam do mambahen na jahat, masabkonon-Ni ma nasiam pakon raja nasiam.”

Porang dompak Halak Palistim

13 ¹ Dob paduatahunkon si Saul manrajai halak Israel,

² ipilih ma bani tolu ribu halak hun bani halak Israel; dua ribu hunjai rap pakon si Saul i Mikmas pakon i tanoh Dolog Betel, anjaha saribu halak rap pakon si Jonatan i Gibeab-Benjamin; isuruh do anggo bangsa na tading ai mulak hu lampolamponi bei.

³ Italuhon si Jonatan ma bala ni halak Palistim, na adong i Geba; ibogei halak Palistim ma ai, na maningtingkon: Domma marbalik halak Heber. Tapi isuruh si Saul ma na manompul tarompet i sab tanoh on.

⁴ Jadi ibogei ganup halak Israel ma, na dob italuhon si Saul bala ni halak Palistim, anjaha na dob bador halak Palistim ibahen halak Israel. Jadi ihara ma bangsa ai mangirikkon si Saul hu Gilgal.

⁵ Martumpu ma halak Palistim laho marporang dompak halak Israel, tolu puluh ribu gareta pakon onom ribu siajak huda anjaha bala songon horsik

na i topi ni laut bueini; tangkog ma sidea anjaha marsaran ma sidea i Mikmas, hampit hapoltakan ni Bet-Aven.

⁶ Jadi dob iidah halak Israel, na dob tarsosak sidea, ai parah do sidea hona asak, marponop ma bangsa ai hubagas liang, hubagas luhung pakon hubagas parigi,

⁷ tapi na legan ai idipari ma Bah Jordan laho hu tanoh Gad pakon Gilead. Tapi i Gilgal ope si Saul, anjaha ganup bangsa ai hitir bei do mangirikkonsi.

⁸ Anjaha ipaima ma pitu ari, das bani panorang na tinonahkon ni si Samuel, tapi lanjar do seng roh si Samuel hu Gilgal, jadi merap ma halak simbuei ai hun lambungni.

⁹ Nini si Saul ma, “Boan ma galangan situtungan pakon galangan pardameian bangku.” Jadi igalangkon ma galangan situtungan ai.

¹⁰ Dobkonsi igalangkon galangan situtungan ai, tonggor ma, roh ma si Samuel, jadi luar ma si Saul manjumpahkonsi anjaha itabi ma ia.

¹¹ Nini si Samuel ma, “Aha do na binahenmu in?” Jadi nini si Saul ma, “Dob huidah merap bangsa in hun bangku, anjaha seng roh ham ibagas ari na dob tinotapkon, anjaha na dob martumpu halak Palistim i Mikmas.

¹² Ningku ma, tuad ma holi halak Palistim mandorab ahu i Gilgal, anjaha seng ope hupindo idop ni uhur

ni Naibata, jadi hupatenger ma uhurhu, anjaha hugalangkon ma galangan situtungan on.”

¹³ Jadi nini si Samuel ma dompak si Saul, “Haotoon do na binahenmu in; seng ibalosi ham parentah ni Jahowa, Naibatamu, na pinarentahkon-Ni bamu; ai sihol do patotapon ni Jahowa harajaonmu, laho manggomgom halak Israel sadokah ni dokahni.

¹⁴ Tapi nuan seng be totap harajaonmu in, domma ipindahi Jahowa sada halak na umbuk bani uhur-Ni; anjaha Jahowa do na pabangkitkoni gabe pambobai ni bangsa-Ni, ai lang ibalosi ham na pinarentahkon ni Jahowa bamu.”

¹⁵ Dob ai bingkak ma si Samuel lanjar tangkog hun Gilgal hu Gibeab-Benjamin. Ibilang si Saul ma halak na rap ope pakoni, hira-hira onom ratus halak bueini.

¹⁶ Anggo si Saul pakon si Jonatan anakni ai ampa bala na rap pakon sidea ai, i Gibeab-Benjamin do marianan; tapi i Mikmas do anggo halak Palistim marsaran.

¹⁷ Dob ai luar ma tolu hulanan panamun hun parsaranan ni halak Palistim ai, sada aroan laho dompak Opra, hu tanoh Sual;

¹⁸ hulanan na sada nari laho dompak Bet-Horon; aroan na sada nari use laho dompak parbalogan, panatapan dompak habungan Seboim, hampit halimisan.

¹⁹ Tapi seng dong jumpah age sada tukang bos i tanoh Israel, ai nini uhur ni halak Palistim, “Ase ulang itopa halak Heber bani podang barang tanja.”

²⁰ Halani ai maningon tuad do ganup halak Israel marayak halak Palistim laho pamarotkon mata ni tinggalani, hapakni barang sasabini;

²¹ anjaha upah tuhangni dua partolu sekel hu bani mata ni tinggala pakon parang, anjaha sapartolu sekel pamarotkon tangkei barang paulihon tobak-tobak.

²² Ase seng dong jumpah bani ari parporangan ai podang barang tanja bani na mangirikkon si Saul pakon si Jonatan; tapi bani si Saul pakon si Jonatan anakni ai adong do.

²³ Anjaha sada hulanan hun bani halak Palistim laho do hu baluran ni Mikmas.

Hamonangan ni si Jonatan Mangimbang Halak Palistim

14 ¹ Bani na sadari ai, nini si Jonatan, anak ni si Saul ma dompak juakjuak siusung sinjatani, “Eta ma hita mandipar hu parsaranan ni halak Palistim na i dipar ai.” Tapi otik pe lang ipatugah pasal ai hu bani bapani.

² Tapi hundul-hundul do anggo si Saul i parbalogan ni Gibe a toruh ni dalima na i Migron, anjaha bala na rap pakonsi adong do hira-hira onom ratus halak.

³ Anggo si Ahia, anak ni si Ahitub, abang ni si Ikabot, anak ni si Pinehas, anak ni si Eli, malim ni Jahowa i Silo marpakeian epod do; tapi seng ibotoh bala ai, na dob laho si Jonatan.

⁴ Tapi i holangkolang ni pandiparan ni si Jonatan laho mandipar hu parsaranan ni halak Palistim ai adong do dua dolog batu padipar-dipar, goran ni na sada Bozes, goran ni na sada nari Sene.

⁵ Dolog batu na sada jongjong hampit utara tontang ni Mikmas, na sada nari i dangsina tontang ni Gibeai.

⁶ Jadi nini si Jonatan ma dompak juakjuak siboban sinjatani, “Eta ma hita mandipar hu parsaranan ni halak na so marsunat ai, andohar iurupi Jahowa hita, ai seng payah bani Jahowa mangurupi marhitei na buei atap na otik.”

⁷ Jadi nini siboban sinjatani ai ma hu bani, “Bahen ma ganup na dear nini u hurmu; tonggor ma, i lambungmu do ahu, songon u hurmu ai do u hurhu.”

⁸ Dob ai nini si Jonatan ma, “Tonggor ma, mandipar ma hita hu bani halak ai, pataridahkon dirinta hu bani sidea.

⁹ Anggo sonon ihatahon sidea banta, ‘Paima nasiam ma hanami ljin,’ jadi soh ma hita i hajongjonganta, anjaha ulang ma hita tangkog marayak sidea.

¹⁰ Tapi anggo ihatahon sidea, ‘Tangkog ma nasiam bennami!’ Jadi tangkog ma hita, ai domma iondoskon Jahowa sidea hubagas tanganta, ai ma gabe partanda banta.”

¹¹ Jadi dob ipataridahkon sidea na dua dirini hu parsaranan ni halak Palistim ai, nini halak Palistim ai ma, “Tonggor ma, domma luar halak Heber hun bani liang parponopan ni sidea na sain dokah.”

¹² Dob ai idilohon halak na i parsaranan ai ma hu bani si Jonatan pakon sibohan sinjatani ai, nini ma, “Tangkog ma nasiam bennami, adong sipatugahonnami otik bani nasiam!” Jadi nini si Jonatan ma hu bani sibohan sinjatani ai, “Irikkon ma ahu tangkog; ai domma iondoskon Jahowa sidea hu tangan ni Israel.”

¹³ Dob ai manggawang ma si Jonatan tangkog hu atas, anjaha sibohan sinjatani ai irik hun pudi. Jadi iribas si Jonatan ma sidea, anjaha sibohan sinjatani ai pamateihon hun pudi. Satongah lambar juma do parmateian ni sidea ai.

¹⁴ Anjaha pamunuhan na parlobei na binahen ni si Jonatan ampa sibohan sinjatani ai ma tar dua puluh halak; ibagas satongah lambar juma do pardiharan ni sidea ai.

¹⁵ Jadi sogop ma hagobiron bani parsaranan ai, i ladang pakon i tongah-tongah ni bala ai ganup; sonai homa halak parjaga pakon panamun ai. Dugur ma homa tanoh ai; panonggot hun bani Naibata do ai.

¹⁶ Anjaha halak parkahap ni si Saul i Gibeab-Benjamin manatap-natap do; gabe iidah sidea ma marhujai-hujon halak simbuei ai.

¹⁷ Jadi nini si Saul ma hu bani bala na rap pakonsi, “Bilang anjaha patae barang ise hun banta na laho.” Jadi ibilang sidea ma, gabe tonggor ma, seng ijai si Jonatan pakon siboban sinjatani.

¹⁸ Dob ai nini si Saul ma dompak si Ahia, “Boan hujon Poti ni Naibata. Ai i tongah-tongah ni halak Israel do ijia poti ni Naibata.”

¹⁹ Jadi sanggah na marsahap ai ope si Saul pakon malim ai, lambin gandani ma hageoron ai i parsaranan ni halak Palistim, gabe nini si Saul ma hu bani malim ai, “Seng pala be.”

²⁰ Dob ai mareta-eta ma si Saul rap pakon bala na rap pakonsi ai, gabe das ma sidea hu parporangan; hape na dob marsitagilan do sidea ijai, geor tumang.

²¹ Halak Heber pe, na dob dokah hasoman ni halak Palistim, na tangkog rap pakon sidea marporang, sidea pe domma gabe hasoman ni halak Israel, iirikkon ma si Saul pakon si Jonatan.

²² Anjaha ganup halak Israel, na marponop i Dolog Efraim, dob ibogei na dob maporus halak Palistim, sidea pe ipardakdak ma munsuh ai i parporangan ai.

²³ Sonai ma panumpak ni Jahowa bani halak Israel sadari ni ai; anjaha das do porang ai hu Bet-Aven.

²⁴ Latih do halak Israel sadari ni ai, ai ipabija si Saul do bangsa ai, nini, “Hona papa ma barang ise na mangan sipanganon das ronsi bodari, ase

mambahen pambalason ahu bani munsuhku!” Halani ai otik pe seng mangan bangsa ai.

²⁵ Jadi das ma ganup bangsa ai hu sada parhuramahan anjaha radag do manisn ni huramah i talun ai.

²⁶ Sanggah na masuk ai bangsa ai hu parhuramahan ai, tonggor ma, mabaor do manisn ai, tapi sahalak pe lang adong na pag mambahen tanganni hu pamanganni; ai mabiar tumang do bangsa ai bani bija ai.

²⁷ Tapi seng ibogei si Jonatan bapani pabijahon bangsa ai, gabe idurdurhon ma ujung ni tungkot na ibagas tanganni ai hubagas asar ni huramah ai, anjaha inahkon ma tanganni hubagas pamanganni, gabe liar ma pangkawahni.

²⁸ Dob ai nini sahalak hun bani bangsa ai ma, “Gogoh tumang do bapanta pabijahon bangsa in, nini do, ‘Hona papa ma barang ise na mangankon sipanganon sadari on.’ Jadi latih ma bangsa ai.”

²⁹ Dob ai nini si Jonatan ma, “Bapangku do mambahen magou tanoh in; tonggor ma, naha liar ni pangkawahku, dob hudai otik manisn ni huramah on.

³⁰ Ai lang daoh dearan ambit ipangan bangsa in namin sadari on hun bani taban-taban na dapot sidea hun bani munsuh ni sidea?” Gabe halani ai seng sadiha banggal hataluan i tongah-tongah ni halak Palistim.

³¹ Jadi italuhon sidea ma sadari ni ai halak Palistim singgan ni Mikmas das hu Ajalon, anjaha latih tumang do bangsa ai.

³² Dob ai ipindahi halak simbuei ai ma taban-taban, ibuat sidea ma biri-biri, lombu pakon anak ni lombu, anjaha isayat ma ai i tanoh ai; anjaha ipangan bangsa ai ma ai rap pakon darohni.

³³ Dob ai ipatugah sidea ma ai hu bani si Saul, “Tonggor ma, domma mardousa bangsa ai dompak Jahowa, halani ipangan sidea gulei marhasoman daroh.” Jadi nini ma, “Domma mardousa nasiam; guling nasiam ma hujon sada batu bolon bangku.”

³⁴ Ambah ni ai nini si Saul ma, “Marserak ma nasiam hu tongah-tongah ni bangsa in, anjaha hatahon ma hu bani sidea, ‘Ganup ma mamboan lombuni barang biri-birini anjaha isayat ma ai ijon, dob ai ipangan ma; anjaha ulang ma nasiam mardousa dompak Jahowa, marhitei na mangankon gulei rap pakon darohni.’” Jadi ganup ma bangsa ai marsiboan lombuni bornginni ai, anjaha isayat ma ijai.

³⁵ Dob ai ipajongjong si Saul ma sada anjapanjap bani Jahowa; ai ma anjapanjap na parlobei na pinajongjongni bani Jahowa.

Si Jonatan Narus Tarbunuh

³⁶ Dob ai nini si Saul ma, “Eta ma hita tuad mardakdak halak Palistim borngin on, anjaha

rampasi hita ma barangni ronsi torang ari; anjaha sahalak pe lang hun bani sidea tebahon hita.” Jadi nini sidea ma, “Bahen ham ma atap aha na dear nini uhurmu.” Tapi nini malim ai ma, “Padohor hita ma hujon bani Naibata.”

³⁷ Jadi isungkun si Saul ma Naibata, “Bulih do ahu tuad mardakdak halak Palistim? Ondoskononmu do sidea hu tangan ni halak Israel?” Tapi seng ibalosi Naibata ia sadari ni ai.

³⁸ Dob ai nini si Saul ma, “Roh ma hujon ganup pangintuai ni bangsa in; papangkei anjaha idah nasiam ma barang sonaha do ase masa dousa in sadari on.

³⁹ Ai songon sintongni manggoluh Jahowa, na manumpak monang halak Israel, age pe bani si Jonatan anakkin jumpah dousa ai, maningon marutang hosah do ia. Ise pe lang hun bani bangsa in na mambalosi.”

⁴⁰ Dob ai nini ma dompak ganup halak Israel, “Jongjong ma nasiam hampit jin, ahu pakon si Jonatan anakkin hampit jon.” Nini bangsa ai ma mambalosisi, “Bahen ham ma barang aha na dear nini uhurmu.”

⁴¹ Jadi nini si Saul ma dompak Jahowa, “Ham Jahowa, Naibata ni Israel, mase ma lang ibalosi Ham jabolonmu sadari on? Anggo ahu do na marsalah barang si Jonatan anakkin, Ham Jahowa, Naibata ni halak Israel, patugah ham ma marhitei Urim; tapi

anggo halak Israel do na marsalah, patugah Ham ma marhitei Tummim.” Jadi hona ma si Jonatan pakon si Saul, tapi maluah ma bangsa ai.

⁴² Dob ai nini si Saul ma, “Dabuh nasiam ma ruji-ruji pasal ahu pakon pasal si Jonatan anakkin!” Jadi hona ma si Jonatan.

⁴³ Dob ai nini si Saul ma dompak si Jonatan, “Patugah ma bangku barang aha do na binahenmin!” Dob ai ipatugah si Jonatan ma bani, “Hudai do otik manisan marhitei ujung ni tungkot na bani tanganku; ijon do ahu, sirsir do ahu matei.”

⁴⁴ Jadi nini si Saul ma, “Sonin do bahenon ni Jahowa bangku, anjaha tambahkonon-Ni ope; maningon matei do ho, Jonatan.”

⁴⁵ Dob ai nini bangsa ai ma dompak si Saul, “Mintor matei ma si Jonatan, na mambahen hamonangan na sonin banggalni i Israel? Daoh ma in! Songon sintongni manggoluh Jahowa, seng bulih marurus jambulan ni uluni age sada hu tanoh, ai marhasomankon Naibata do ia na mangkorjahon ai sadari on.” Jadi bangsa ai mando na paluahkon si Jonatan mambahen lang matei ia.

⁴⁶ Dob ai tangkog ma si Saul hun bani na mardakdak halak Palistim; mulak ma homa halak Palistim hu iananni bei.

Hamonangan ni Pangku ni si Saul

⁴⁷ Jadi dob si Saul manjujung harajaon i Israel, sai marmunsuh do ia dompak haganup munsuhni inggot, dompak Moab pakon halak Ammon, dompak Edom pakon raja na hun Zoba, pakon dompak halak Palistim; barang dompak ja pe idompakkon, sai monang do ia.

⁴⁸ Ibahen do horja habanggalon, italuhon do halak Amalek, anjaha ipaluah do halak Israel hun bani tangan ni halak na manrampas sidea na sain dokah.

⁴⁹ Ia anak ni si Saul on do: Si Jonatan, si Iswi pakon si Malkisua; goran ni boruni na dua ai on do: Goran ni sikahanan si Merab, anjaha goran ni sianggian si Mikal.

⁵⁰ Ia goran ni parinangon ni si Saul si Ahinoam do, boru ni si Ahimas; goran ni pambobai ni balani si Abner do, anak ni si Ner, bapanggi ni si Saul.

⁵¹ Ia si Kis, bapa ni si Saul, pakon si Ner, bapa ni si Abner, ai ma anak ni si Abiel.

⁵² Sai jobu do tong porang dompak halak Palistim sadokah goluh ni si Saul, halani ai ipatumpu si Saul ma hu lambungni sagala halak na garang pakon puanglima, sagala na niidahni.

**Hamonangan ni si Saul dampak Halak
Amalek Parmabuk ni si Saul**

15 ¹ Dob ai nini si Samuel ma dampak si Saul, “Jahowa do marsuruh ahu maminaki ham gabe raja manggomgom bangsa-Ni halak Israel, on pe tangihon ham ma hata ni Jahowa.

² Sonon do hata ni Jahowa Zebaot, ‘Balaskonon-Ku ma na binahen ni halak Amalek hu bani halak Israel, ai ma na iolat sidea i tongah dalam sanggah na tangkog sidea luar hun Masir.’

³ On pe, laho ma ham, anjaha taluhon ham ma halak Amalek, anjaha siapkon ham ma sidea ampa na adong bani sidea; ulang ma hargahon ham sidea, tapi bunuh ham ma dalahi age naboru, dakdanak age na etek-etek, lembu age biri-biri, unta ronsi halode.”

⁴ Dob ai idilo si Saul ma bangsa ai, anjaha ibilang ma sidea i Telaim, dua ratus ribu halak sipardalan, anjaha sapuluh ribu halak hun Juda.

⁵ Dob ai das ma si Saul hu huta ni halak Amalek, anjaha ibahen ma paronggopan i habungan ai.

⁶ Jadi nini si Saul ma dampak halak Keni, “Laho ma, paholang ma, tuad ma nasiam hun tongah-tongah ni halak Amalek, ase ulang husiapkon nasiam rap pakon sidea; ai mardear layak do nasiam bani halak Israel, sanggah tangkog sidea luar hun tanoh

Masir.” Jadi ipaholang halak Keni ai ma dirini hun tengah-tengah ni halak Amalek.

⁷ Jadi italuhon si Saul ma halak Amalek ai, singgan ni Havilla das hu Sur, na hampit hapoltakan ni tanoh Masir.

⁸ Dob ai itangkap ma si Agag, raja ni halak Amalek ai, manggoluh, tapi ganup do bangsa ai isiapkon bani podang.

⁹ Tapi ilaosi si Saul pakon bangsa ai do si Agag, biri-biri sijengesan ampa lembu, pinahan-pinahan na pinamombur ampa biri-biri, seng ra sidea mansiapkon ai; tapi sagala na bajan anjaha na so marharga isiapkon sidea do.

¹⁰ Dob ai roh ma hata ni Jahowa hu bani si Samuel,
¹¹ “Husolsoli do diring-Ku pabangkitkon si Saul gabe raja, ai domma marbalik ia hun Bangku, anjaha seng iramotkon hatang-Ku.” Jadi borit manringis tumang ma uhur ni si Samuel, anjaha dilo-dilo ma ia hu bani Jahowa layur sabornginni ai.

¹² Dob ai ipagirah si Samuel ma puho laho manjumpahkon si Saul girah sogod; anjaha adong do halak na patugahkon hu bani si Samuel, “Domma das si Saul hu Karmel, anjaha tonggor ma, ipajongjong do bani sada tanda pardingatan; dob ai mulak ma ia, mandipar laho tuad hu Gilgal.”

¹³ Jadi dob das si Samuel hu bani si Saul, nini si Saul ma hu bani, “Sai ipasu-pasu Jahowa ma ham; domma hupasaud hata ni Jahowa.”

¹⁴ Tapi nini si Samuel ma, “Sora ni biri-biri na mahua do ai gatni na das hu pinggolhon, anjaha parumboh ni lembu na mahua do na hubogei ai?”

¹⁵ Nini si Saul ma, “Na binoan ni sidea do ai hun bani halak Amalek; ai ipilih bangsa in do biri-biri pakon lembu sidearan bahen sigalangkonon bani Jahowa Naibatamu; na legan ai isiapkon hanami do.”

¹⁶ Dob ai nini si Samuel ma dompak si Saul, “Sungkup ma in! Sihol do patugahonku bamu na hinatahon ni Jahowa bangku na borngin.” Jadi nini ma mambalosi, “Hatahon ham ma!”

¹⁷ Dob ai nini si Samuel ma, “Ai lang sonon do, sanggah etek ham nini uhurmu, ijai do ham gabe pambobai ni marga ni halak Israel? Iminaki Jahowa do ham gabe raja, manggomgom halak Israel.

¹⁸ Anjaha isuruh Jahowa do ham bingkat, nini, ‘Laho ma ho, siapkon ma halak pardousa, halak Amalek ai, anjaha porang ma sidea, ronsi bois sidea ibahen ho.’

¹⁹ Mase ma lang itangihon ham hata ni Jahowa, tapi rahanan ham mangayob taban-taban, anjaha ibahen ham sogam ni uhur ni Jahowa?”

²⁰ Dob ai nini si Saul ma dompak si Samuel, “Hubalosi do sora ni Jahowa. Hudalankon do parentah na niondoskon ni Jahowa bangku. Huboan do hujon si Agag, raja ni halak Amalek ai, anjaha husiapkon do halak Amalek ai.

²¹ Anggo ibuat bangsa in pe hun bani taban-taban ai, biri-biri pakon lombu sidearan hun bani sisiapkonon ai hinan, bahen galangan bani Jahowa Naibatamu do ai i Gilgal.”

²² Dob ai nini si Samuel ma, “Mintor tumaram ma rosuhan uhur ni Jahowa mangidah galangan situtungon pakon galangan sipanganon, hun bani na manangihon sora ni Jahowa? Tonggor ma, dearan do na mambalosi hun bani galangan, pakon na marimbagaskon hun bani taboh-taboh ni biri-biri tunggal.

²³ Ai usih bani dousa partondungon do pangengkaron, anjaha hahengkengon usih bani dousa parsombahon bani naibata na legan. Halani na niambukkonmu in hata ni Jahowa, ambukkonon-Ni ma ham hun bani harajaonmu.”

²⁴ Dob ai nini si Saul ma dompak si Samuel, “Domma mardousa ahu, halani hulanggar hata ni Jahowa pakon hatamu; ai mabiar do ahu mangidah bangsa in, gabe hubalosi sora ni sidea.

²⁵ On pe, sai marpangulaki ma uhurmu mangidah dousangkin, anjaha rap mulak ma hita, ase marsombah ahu bani Jahowa.”

²⁶ Tapi nini si Samuel ma dompak si Saul, “Seng ra mulak ahu rap pakon ham, ai domma iambukkon ham hata ni Jahowa, anjaha domma iambukkon Jahowa ham hun bani na manggomgom halak Israel.”

²⁷ Dob ai marhusor ma si Samuel sihol misir namin, tapi ijolom si Saul ma suhi-suhi ni bajuni, pala marigat.

²⁸ Jadi nini si Samuel ma hu bani, “Domma irotapkon Jahowa Harajaon Israel hun bamu sadari on, anjaha ibere do ai hu bani hasomanmu na dearan paruhuranni hun bamu.

²⁹ Ambah ni ai seng anjai marladung anjaha manosal la, hatengeran ni Israel, ai sengjolma la, gabe ra manosal.”

³⁰ Dob ai nini si Saul ma, “Domma mardousa ahu, tapi pasangap ham ma ahu i lobei ni pangintuai ni bangsangkin pakon i lobei ni halak Israel. Rap mulak ma hita, ase marsombah ahu bani Jahowa Naibatamu.”

³¹ Jadi mulak ma si Samuel mangirikkon si Saul, gabe marsombah ma si Saul bani Jahowa.

³² Dob ai nini si Samuel ma, “Boan nasiam ma hujon si Agag, raja ni halak Amalek in.” Jadi roh ma si Agag hu bani ibagas hinsah ni uhur. Nini si Agag ma, “Tongon domma mandaoh hun bangku paet ni hamateian!”

³³ Dob ai nini si Samuel ma, “Songon podangmu mambahen punu puang-puang, sonin do punu bahenonku inangmu i tongah-tongah ni sagala puang-puang.” Dob ai itoktoki si Samuel ma si Agag i lobei ni Jahowa i Gilgal.

³⁴ Dob ai laho ma si Samuel hu Rama; anjaha si Saul pe laho ma hu rumahni hu Gibeah huta ni si Saul.

³⁵ Jadi seng be marsiidahan si Samuel pakon si Saul das hu bani ari parmateini, tapi pusok do uhur ni si Samuel mangidah si Saul, anjaha manosal do Jahowa, halani ipabangkit ia gabe raja manggomgom halak Israel.

Iminaki si Samuel si Daud gabe Raja

16 ¹ Nini Jahowa ma dompak si Samuel, “Sadiah dokah on marhoru ho pasal si Saul, halani Huambukkon ia, ase ulang be ia raja manggomgom halak Israel? Isi ma tandukmu bani minak, anjaha laho ma ho; sihol suruhon-Ku do ho marayak si Isai, par-Betlehem ai; ai domma Hupilih Bangku sada hun bani anakni ai gabe raja.”

² Dob ai nini si Samuel ma, “Sonaha ma parlangkahku hujai? Anggo ibogei si Saul ai, bunuhonni ma ahu.” Dob ai nini Jahowa ma hu bani, “Buat ma anak ni lembu sada, anjaha hatahon ma, ‘Na laho manggalang bani Jahowa do ahu, ase roh.’

³ Anjaha dilo ma si Isai hu panggalangan ai, dob ai patugahon-Ku bam barang aha na sihol sibahenonmu; maningon minakanmu do Bangku barang ise, na sihol patugahon-Ku bam.”

⁴ Dob ai ibahen si Samuel ma songon na hinatahon ni Jahowa bani, anjaha das ma ia hu Betlehem. Jadi

hirjatan ma pangituai ni huta ai manjumpahkonsi, anjaha nini ma, “Damei do, na hinarohkonmu on?”

⁵ Jadi nini ma, “Damei do; na sihol manggalang bani Jahowa do, ase roh ahu; manguras ma nasiam, anjaha roh ma nasiam mangkasomani ahu hu panggalangan an.” Dob ai iuras ma si Isai pakon ganup anakni ai, lanjar idilo ma sidea hu panggalangan ai.

⁶ Sanggah na masuk ai sidea, iidah ma si Eliab, gabe nini ma ibagas uhurni, ‘Tontu on ma gakni siminakan i lobei ni Jahowa.’

⁷ Tapi nini Jahowa ma dompak si Samuel, “Ulang ma tonggor rupani barang togap ni badanni, ai seng ia sipilihon-Ku; ai seng songon pangidah ni jolma pangidah ni Jahowa; anggo jolma rupa do iidah, tapi anggo Jahowa uhur na ibagas ai do iidah.”

⁸ Dob ai idilo si Isai ma si Abinadab, anjaha ipabontaskon ma ia hun lobei ni si Samuel. Jadi nini ma, “Ia pe seng ipilih Jahowa.”

⁹ Dob ai ipabontaskon si Isai ma si Samma. Tapi nini si Samuel ma, “Ia pe seng ipilih Jahowa.”

¹⁰ Dob ai ipabontaskon si Isai ma anakni na pitu ai i lobei ni si Samuel. Tapi nini si Samuel ma dompak si Isai, “Seng dong hun bani sidea na ipilih Jahowa.”

¹¹ Dob ai nini si Samuel ma dompak si Isai, “Pitah on do anakmu ganupan?” Jadi nini ma, “Tading ope sietekan, anjaha tonggor ma, marmahan biri-biri do ia.” Dob ai nini si Samuel ma dompak si Isai, “Suruh

ma na mangalopisi; ai seng anjai mangan ope hita, anggo seng ope roh ia hujon.”

¹² Jadi isuruh ma na mangalopisi. Tapi magerger do huyumni anjaha jenges do rupani pakon potongan ni angkulani. Nini Jahowa ma, “Jongjongkon ma, minaki ma ia, ai in ma ia.”

¹³ Dob ai ibuat si Samuel ma tanduk parminakanni ai, anjaha iminaki ma ia, i tongah-tongah ni saninani ai. Jadi sogop ma Tonduy ni Jahowa bani si Daud singgan ni na sadari ai nari. Dob ai laho ma si Samuel mulak hu Rama.

¹⁴ Tapi surut ma Tonduy ni Jahowa hun bani si Saul, anjaha marulah ma sada tonduy na jahat, na sinuruh ni Jahowa bani.

¹⁵ Dob ai nini juakjuak ni si Saul ma dompaksi, “Tonggor ma, marulah do sada tonduy na jahat, na sinuruh ni Naibata bamu.

¹⁶ Mahua parentahkon ham ma, ale rajanami, hu bani jabolonmu na i lobeimu, mangindahi sada halak na pandei marhusapi, ase anggo marulah tonduy na jahat na hun bani Naibata ai bamu, jadi igiut ma husapi ai, andohar malum iahap ham.”

¹⁷ Jadi nini si Saul ma dompak jabolonni ai, “Pindahi nasiam ma bangku sada halak na pandei manggiut husapi, anjaha boban ma ia hu bangku.”

¹⁸ Jadi nini sada halak hun bani anak parana ai ma mambalosi, “Tonggor ma, hutanda do sada halak, anak ni si Isai, par-Betlehem, na

mambotoh marhusapi, sada halak na borani anjaha na garang, na pandei marsahap-sahap, anjaha ihasomani Jahowa do ia.”

¹⁹ Jadi isuruh si Saul ma suruhanni hu bani si Isai, nini ma, “Suruh ma hu bangku anakmu si Daud, siparmahan biri-biri ai.”

²⁰ Dob ai ibuat si Isai ma sada halode na mangusung ruti, pakon sada gusi hulingkuling, na marisi anggur ampa sada hambing tunggal, anjaha itongoskon ma ai marhitei si Daud anakni ai hu bani si Saul.

²¹ Jadi das ma si Daud hu bani si Saul anjaha marhorja ma ia i lobeini; holong tumang do uhur ni raja ai mangidahsi, anjaha ipabangkit ma ia gabe siboan sinjata.

²² Jadi isuruh ma suruhanni hu bani si Isai mangkatahon, “Mahua lопас ham ma si Daud marhorja i lobeihu, ai holong do uhurhu mangidahsi.”

²³ Jadi anggo siar ma tonduy na jahat na sinuruh ni Naibata ai bani si Saul, mintor ibuat si Daud ma husapi ai, igiut ma ai; jadi ganggang ma iahap anjaha sonang ma uhurni, anjaha laho ma tonduy na jahat ai hun bani.

Si Daud pakon si Goliat

17 ¹ Jadi ipatumpu halak Palistim ma balani sihol marporang, anjaha martumpu ma sidea i Soko, na i tanoh Juda, anjaha marsaran

ma sidea i holangkolang ni Soko pakon Aseka, dohorhon Epes-Damim.

²Si Saul pe pakon halak Israel martumpu ma, anjaha marsaran ma sidea i habungan Ela, marugas ma sidea marporang laho manjumpahkon halak Palistim.

³Jongjong do halak Palistim bani dolog na salopah anjaha halak Israel jongjong bani dolog na salopah nari, habungan do holangkolangni.

⁴Dob ai luar ma hun bani parsaranan ai sada puanglima, na margoran si Goliat, hun huta Gat, onom asta santopap do ganjangni.

⁵Adong do tangkuluk tombaga i atas uluni, bajuni baju marsisik; borat ni bajuni lima ribu sekel tombaga do.

⁶Panutup ni naheini tombaga do, anjaha adong do tanja tombagani i holangkolang ni sasapni.

⁷Suhul ni podangni nasa basikah; borat ni mata ni tanjani onom ratus sekel do, anjaha siboban gantargantarni mardalan i lobeini.

⁸Jongjong ma ia ijai, anjaha dilo-dilo ma ia hu bani bala ni halak Israel, nini ma dompak sidea, "Mase ma luar nasiam marugas laho marporang? Ai lang halak Palistim do ahu, anjaha nasiam juakjuak ni si Saul? Pilih nasiam ma sada halak, anjaha suruh ma ia tuad hu bangku.

⁹Anggo mangasup ia marsilawanan pakon ahu anjaha talu ahu ibahen, jadi jabolon nasiam ma

hanami, tapi anggo talu ia hubahen anjaha matei ia hubunuh, jadi jabolonnami ma nasiam, anjaha pambalosi ma nasiam bennami.

¹⁰ Ambahni ai nini halak Palistim ai do, domma huapasi sadari on bala ni halak Israel; suruh nasiam ma sada halak bangku, ase marsilajouan hanami.”

¹¹ Jadi dob ibogei si Saul pakon ganup halak Israel hata-hata ni halak Palistim ai, gabe gobir ma sidea anjaha mabiar tumang.

¹² Anggo si Daud ai ma anak ni sada halak Efrata, na i Betlehem-Juda, na margoran si Isai anjaha ualuh do anakni. Domma sayur matua ia bani goluh ni si Saul.

¹³ Laho do anak ni si Isai, hatolusi sibanggalan ai hu parporangan mangirikkon si Saul; ia goran ni anak na tolu ai, na laho hu parporangan ai, on do: Si Eliab, bunga tubuhn, paidua si Abinadab, anjaha paitolu si Samma.

¹⁴ Sianggian do anggo si Daud; jadi dob laho na tolu halak sibanggalan ai mangirikkon si Saul,

¹⁵ mulak do sipata si Daud hun rumah ni si Saul laho marmahan biri-biri ni bapani i Betlehem.

¹⁶ Ia halak Palistim ai, sai roh do ia ganup sogod pakon bodari jongjong mangapasi, ompat puluh ari dokahni.

¹⁷ Nini si Isai ma dompak si Daud anakni ai, “Buat ma bani abangmu saefa hun bani gandum na

pinahpah on pakon ruti na sapuluh on, anjaha boan ma ai podas hu bani abangmu hu parsaranan ai.

¹⁸ Boan ma homa keju na sapuluh kibil on bani pambobai ni sisaribu. Torih ma barang na jorgit-jorgit do abangmai, anjaha boan ma hun bani sidea sada tanda.”

¹⁹ Tapi anggo si Saul pakon sidea ampa ganup halak Israel i habungan Elah do marporang dompak halak Palistim.

²⁰ Ipagirah si Daud ma patarni ai bingkat, anjaha iondoskon ma biri-biri ai hu bani sada halak siparjaga; ibuat ma sibonanoni ai, dob ai laho ma ia, songon na hinatahon ni si Isai hu bani; jadi das ma ia hu parsaranan ai, tudu sanggah luar bala ai marbaris anjaha mansurakkon surak porang.

²¹ Jadi marsiatur balani bei ma halak Israel pakon halak Palistim banjei-banjei, padompak-dompak.

²² Dob ai iondoskon si Daud ma barang na binoanni ai bani halak sijaga ugas-ugas, anjaha marlintun ma ia hu ianan ni bala ai; daskonsi ia hujai, isungkun ma saninani pasal hajorgiton ni sidea.

²³ Sanggah na marsahap ai ia pakon sidea, tonggor ma, tangkog ma puanglima ai, halak Palistim na hun huta Gat ai, na margoran si Goliat, hun tongah-tongah ni bala ni halak Palistim, anjaha ipangkatahon ma hata songon na sain dokah, anjaha ibogei si Daud do ai.

²⁴ Ganup halak Israel, dobkonsi iidah sidea dalahi ai, maporus bei do hun lobeini anjaha mabiar tumang.

²⁵ Dob ai nini dalahi-dalahi ni halak Israel ma, “lidah ham do halak na tangkog ai? Na sihol mangapasi halak Israel do ia ase tangkog. Barang ise na mamunuhsi, bayak tumang ma ia bahenon ni raja in, anjaha bereonni ma boruni hu bani anjaha paluahonni ma ginompar ni bapani hun bani rodi i tengah-tengah ni halak Israel.”

²⁶ Nini si Daud ma dompak dalahi-dalahi na jongjong i lambungni ai, “Aha do bahenon hu bani halak na mamunuh halak Palistim ai, anjaha na padaohkon habadoron ai hun bani halak Israel? Ai ise ma halak Palistim na so marsunat ai, ase apasanni bala ni Naibata na manggoluh in?”

²⁷ Dob ai nini halak na mabuei ai ma hu bani songon hata nongkan, “Sonai ma bahenon hu bani halak na mamunuhsi.”

²⁸ Jadi ibogei si Eliab abangni ai ma parsahapanni ai pakon halak ai, gabe manringis tumang ma si Eliab dompak si Daud, nini ma hu bani, “Mangaha ho roh hujon, anjaha hu bani ise do iondoskon ho biri-biri na otik ai i halimisan? Hubotoh do hatotalonmu pakon hinajahat ni uhumu, ai sihol mangidah na marporang in do ase roh ho.”

²⁹ Nini si Daud ma mambalosi, “Ai aha dong na hubahen on? Ai lang bulih diri marsahap pala sangkababah?”

³⁰ Dob ai marhusor ma ia hun bani laho hu bani na legan, lanjar sonai do isungkun; jadi ibalosi halak na buei ai ma songon nongkan ai.

³¹ Jadi dob ibogei sidea hata na hinatahon ni si Daud ai, ipadas sidea ma ai hu bani si Saul, gabe isuruh ma na mangalopisi.

³² Nini si Daud ma dompak si Saul, “Ulang ma pala gobir uhur ni atap ise halani halak ai; laho pe jabolonmu on manlawan halak Palistim ai.”

³³ Tapi nini si Saul ma dompak si Daud, “Seng mangasup ho mandorab halak Palistim ai laho mangimbangi, ai parana ope ho, tapi anggo ia halak na somal marporang do hun bani sietek-etekonni.”

³⁴ Dob ai nini si Daud ma dompak si Saul, “Somal do jabolonmu on marmahan biri-biri ni bapani; anggo roh singa barang gipul mambuat biri-biri hun bani hulanai,

³⁵ huayak ma ia anjaha hubogbog, anjaha hupaluah ma biri-biri ai hun babahni; jadi anggo sihol jongjong ia mandorab ahu, hutangkap ma gumisni anjaha hubunuh ma ia.

³⁶ Age singa ai barang gipul ai ibunuh jabolonmu on do; maningon sonai do bahenon hu bani halak Palistim na so marsunat ai, halani na dob niapasanni bala ni Naibata na manggoluh in.”

³⁷ Ambahni ai nini si Daud ope, “Jahowa na dob paluahkon ahu hun bani sisilon ni singa ampa

gipul, paluahon-Ni do ahu hun bani tangan ni halak Palistim ai.” Dob ai nini si Saul ma dompak si Daud, “Laho ma ho, sai ihasomani Jahowa ma ho!”

³⁸ Dob ai isorungkon si Saul ma pakeianni hu bani si Daud, inahkon ma tangkuluk tombaga hu atas ni uluni, anjaha ibahen ma ia marbaju partahanan.

³⁹ Isolotkon si Daud ma podangni hu bani pakeianni ai, anjaha ilajou ma mardalan, ai seng onnga ope ilajou sonai. Dob ai nini si Daud ma dompak si Saul, “Seng tarbahen ahu mardalan mamakei na sonon, ai seng onnga ope hulajou.” Jadi itanggali si Daud ma ai hun bani.

⁴⁰ Dob ai ibuat ma tungkotni, anjaha ipilih ma lima batu na landit hun bani bah banggal ai, anjaha inahkon ma ai hubagas hadang-hadanganni; ibuat ma umbalangni, anjaha idohori ma halak Palistim ai.

⁴¹ Roh ma halak Palistim ai mandohori si Daud, anjaha halak na mamboan gantar-gantarni ai i lobei ni.

⁴² Jadi sanggah na mangkawah halak Palistim ai, iidah ma si Daud, gabe mapas ma uhurni mangidahsi, ai parana ope ia, magerger do huyumni anjaha jenges rupani.

⁴³ Dob ai nini halak Palistim ai ma dompak si Daud, “Ai baliang do gatni ahu, ase roh ho mamboan tungkot hu bangku?” Dob ai iapasi halak Palistim ai ma si Daud marhitei naibatani.

⁴⁴ Nini halak Palistim ai do hu bani si Daud, “Roh ma ho hu bangku, ase hubere dagingmin hu bani manuk-manuk na i awang-awang pakon hu bani binatang na i ladang.”

⁴⁵ Tapi nini si Daud ma dompak halak Palistim ai, “Ia ho da, roh do ho hu bangku mangunsagahkon podang pakon tanja ampa gantar-gantar; tapi anggo ahu roh do hubam mangunsagahkon goran ni Jahowa Zebaot, Naibata ni bala ni halak Israel, na niapasanmin.

⁴⁶ Ondoskonon ni Jahowa ma ho sadari on hubagas tanganku, ase hubunuh ho, anjaha husirang ulumin hunbam; anjaha bereonku do bangkei ni bala ni halak Palistim sadari on hu bani manuk-manuk na i awang-awang pakon hu bani binatang na i ladang, ase ibotoh ganup tanoh on adong do Naibata ni Israel,

⁴⁷ ase ganup tumpuan on mananda, na so pala marhitei podang barang tanja Jahowa pamonangkon, ai Jahowa do simada parporangan, anjaha ondoskonon-Ni do hanima hubagas tangannami.”

⁴⁸ Jadi hoseihonsi halak Palistim ai, anjaha miut laho manjumpahkon si Daud namin, mintor mangolos ma si Daud hu ianan pardoraban ai manjumpahkon halak Palistim ai.

⁴⁹ Ipoluk si Daud hadang-hadanganni ai, ibuat ma sada batu hunjai, anjaha iumbalangkon ma ai, gabe

ihonai ma pardompakan ni halak Palistim ai; masuk ma batu ai hubagas pardompakanni, jadi tompas ma ia dabuh hu tanoh.

⁵⁰ Sonai ma italuhon si Daud halak Palistim ai marhitei umbalang pakon batu, ihonai do halak Palistim ai, gabe matei ma ia, age pe seng dong podang ibagas tangan ni si Daud.

⁵¹ Dob ai marlintun ma si Daud anjaha jongjong ma ia i atas ni halak Palistim ai; ibuat ma podangni, anjaha iumpat ma ai hun bani sarungni, ibunuh ma ia anjaha itampul ma uluni. Jadi dob iidah halak Palistim, na dob matei do puanglima ni sidea ai, maporus bei ma sidea.

⁵² Mintor roh ma halak Israel pakon Juda lanjar marsurak-surak, anjaha iayak sidea ma halak Palistim ai das hu Gat pakon hu horbangan ni Ekron, gabe radag ma bangkei ni halak Palistim ai i dalan laho hu Saaraim das hu Gat pakon Ekron.

⁵³ Mulak ma halak Israel hun bani na mardakdak halak Palistim ai, anjaha itaban sidea ma parsaranan ni sidea ai.

⁵⁴ Dob ai ibuat si Daud ma ulu ni halak Palistim ai, anjaha iboan ma ai hu Jerusalem, tapi anggo sinjatani ai itibalhon ma ibagas lampolamponi.

⁵⁵ Sanggah iidah si Saul si Daud luar manjumpahkon halak Palistim ai, nini ma dompak si Abner pambobai ni bala ai, “Anak ni ise do anak garama ai, ambia Abner?” Nini si Abner ma mambalosi,

“Songon sintongni mangggoluh ham, rajanami, seng hubotoh.”

⁵⁶ Dob ai nini raja ai ma, “Papangkei ma barang anak ni ise do anak garama ai.”

⁵⁷ Jadi dob mulak si Daud hun bani na mamunuh halak Palistim ai, iarahkon si Abner ma ia hulobei ni si Saul, anjaha ibagas tanganni do ulu ni halak Palistim ai.

⁵⁸ Nini si Saul ma hu bani, “Anak ni ise do ho, anak parana?” Jadi nini si Daud ma mambalosi, “Anak ni jabolonmu, si Isai, par Betlehem ai do ahu.”

Parhuan-huanon ni si Jonatan pakon si Daud

Sogam ni Uhur ni si Saul Mangidah si Daud

18 ¹ Jadi dob salpu si Daud marsahap pakon si Saul, tarsangkut ma uhur ni si Jonatan bani si Daud, anjaha ihaholongi si Jonatan ma ia songon dirini sandiri.

² Lanjar ijalo si Saul ma ia sadari ni ai, anjaha seng ilopas be ia mulak hu rumah ni bapani.

³ Jadi ibahen si Jonatan ma parpadanan bani si Daud, halani holong do uhurni mangidahsi songon dirini sandiri.

⁴ Itanggali si Jonatan ma bajuni anjaha iberehon ma ai hu bani si Daud, pakon baju porangni ampa podangni, panahni pakon gonditni.

⁵ Anjaha huja pe laho si Daud marporang isuruh si Saul sai monang do ia; gabe ipabangkit si Saul ma ia gabe puanglima. Anjaha rosuh do uhur ni ganup bangsa ai mangidahsi, sonai homa age juakjuak ni si Saul.

⁶ Sahali sanggah na mulak sidea, sanggah na mulak si Daud hun bani na manaluhon halak Palistim, roh ma naboru-naboru hun bani ganup huta ni halak Israel mandoding anjaha manortor-nortor mangalo-alo Raja Saul marhasoman tambur, surak-surak pakon parugas musik.

⁷ Jadi mandoding ma naboru ai marsibalos-balosan, nini ma, “Marribu-ribu do italuhon si Saul, tapi marlaksa-laksa do anggo si Daud.”

⁸ Jadi marah tumang ma si Saul, anjaha seng marosuh ia mambogei hata ai, nini ma, “Hu bani si Daud ihatahon sidea marlaksa-laksa, hape hu bangku marribu-ribu hansa; pitah harajaon in mando hape na so bani?”

⁹ Jadi hun bani ari ai nari subil ma uhur ni si Saul mangidah si Daud.

¹⁰ Patarni ai siar ma tonduy na jahat ai, na sinuruh ni Naibata hu bani si Saul, gabe ratou ma ia ibagas rumahni; tapi marhusapi do si Daud songon na sain dokah, anjaha pajolom-jolom tanja do anggo si Saul.

¹¹ Dob ai ipantomkon si Saul ma tanjani ai, ai nini uhurni, “Hupantom ma si Daud hu dingding ai!” Tapi idiharhon si Daud do, pala dua hali.

¹² Jadi mabiar ma si Saul mangidah si Daud, ai ihasomani Jahowa do ia, tapi minsah do la anggo hun bani si Saul.

¹³ Halani ai ipadaoh si Saul ma si Daud ai hun lambungni, anjaha ipabangkit ma ia gabe pambobai ni sisaribu; luar masuk do ia i lobei ni bangsa ai.

¹⁴ Sai monang do ia bani sagala dalanni, ai ihasomani Jahowa do ia.

¹⁵ Jadi dob iidah si Saul sai marhamonangan do ia, gabe lambin mabiar ma ia mangidahsi.

¹⁶ Tapi holong do uhur ni ganup halak Israel pakon Juda mangidah si Daud, ai luar masuk do ia i lobei ni sidea.

Si Daud gabe Hela ni si Saul

¹⁷ Dob ai nini si Saul ma dompak si Daud, “Tonggor ma, ijon do borungku sikahanan, si Merab; hubere pe ia bahen parinangonmu; tapi gabe halak na garang ma ho bangku anjaha porangkon ma porang ni Jahowa.” Ai nini uhur ni si Saul, ‘Ulang ma tanganku sandiri mangonai hu bani, tapi tangan ni halak Palistim ma patundukkonsi.’

¹⁸ Jadi nini si Daud ma dompak si Saul, “Ise ma ahu, anjaha aha ma pangkungku pakon ginompar

ni bapa i Israel, ase maningon gabe hela ni raja in ahu?"

¹⁹ Tapi dob jumpah panorangni, bereon si Merab, boru ni si Saul ai hu bani si Daud, gabe hu bani si Adriel par-Mehola ai do ia iberehon bahen parinangonni.

²⁰ Tapi holong do uhur ni si Mikal, boru ni si Saul ai mangidah si Daud; jadi adong ma na patugahkon ai hu bani si Saul, gabe rosuh ma ia mambogei hata ai.

²¹ Ai nini uhur ni si Saul do, 'Hubere ma ia hu bani, ase gabe tirangkap ia bani, anjaha halak Palistim patundukkonsi.' Halani ai nini si Saul ma dompak si Daud paduahalihon, "Gabe helangku ma ho sadari on."

²² Jadi ihatahon si Saul ma hu bani juakjuakni, "Marsahap ma nasiam hu bani si Daud marponop-ponop, hatahon nasiam ma, 'Tonggor ma, rosuh do uhur ni raja in mangidah ho, anjaha ganup juakjuakni mangkaholongi ho; on pe balosi ma gabe hela ni raja in.'"

²³ Jadi ipatugah juakjuak ni si Saul ma hata ai hu bani si Daud. Tapi nini si Daud ma, "Na urah do gakni nini uhur nasiam gabe hela ni raja diri? Ai halak na musil anjaha na dorun do ahu."

²⁴ Jadi ipatugah juakjuak ni si Saul ma hata ai hu bani, "Sonon do hata ni si Daud."

²⁵ Dob ai nini si Saul ma, "Sonon do sihatahonon nasiam hu bani si Daud, 'Seng mangindo boli raja in,

pitah saratus sibur-sibur ni halak Palistim do, bahen pambalason hu bani munsuh ni raja in.” Ai nini uhur ni si Saul, ase matei si Daud marhitei tangan ni halak Palistim.

²⁶ Jadi dob ipatugah juakjuak ni si Saul hata ai hu bani si Daud, marosuh ma uhurni gabe hela ni raja ai. Tapi taram nape jumpah padan,

²⁷ bingkat ma si Daud rap pakon balani, lanjar ibunuh ma dua ratus halak Palistim. Iboan si Daud ma sibur-sibur ni sidea ai, anjaha iberehon ma hu bani raja ai. Jadi ibere si Saul ma boruni, si Mikal gabe parinangonni.

²⁸ Jadi dob iidah anjaha iahap si Saul, na ihasomani Jahowa do si Daud ai, anjaha halak Israel pe ganup mangkaholongisi,

²⁹ lambin tambah ma biarni dompak si Daud. Ase munsuh ni si Saul do si Daud sadokah manggoluh ia.

³⁰ Sadihari pe luar halak Palistim marporang, banggalan do tong hamonangan ni si Daud marimbang haganup juakjuak ni si Saul, gabe tarmurmur tumang ma goranni.

Maporus si Daud hun lobei ni si Saul

19 ¹ Dob ai ihatahon si Saul ma hu bani si Jonatan anakni ai pakon hu bani juakjuakni, ase ibunuh sidea si Daud; tapi rosuh tumang do

uhur ni si Jonatan anak ni si Saul ai mangidah si Daud.

² Jadi ipatugah si Jonatan ma ai hu bani si Daud, nini ma, “Ipindah i uhur ni bapangku si Saul, ase sihol mamunuh ho; halani ai jaga ma ho bani dirimu patar girah sogod, marponop ma ho, ulang taridah.

³ Tapi anggo ahu luar ma ahu anjaha jongjong i lambung ni bapa i ladang parponopanmai, anjaha barang aha na hu idah ijai, hupatugah pe ai bam.”

⁴ Dob ai itarsingatkan si Jonatan ma gabei ni si Daud na madear ai hu bani si Saul bapani ai, nini ma hu bani, “Ulang ma mardousa raja in halani si Daud, ai seng adong dousani bamu, tapi jenges sahalian do pambahenanni bamu.

⁵ Lasamkon do hosahni laho mamunuh halak Palistim ondi, anjaha hatuahon bolon do ibahen Jahowa hu bani ganup halak Israel. lidah ham do ai, anjaha marmalas ni uhur ham; mase ma sihol mardousa ham bani daroh, na so marpipot marhitei na mamunuh si Daud, seng marhala?”

⁶ Jadi itangihon si Saul ma sora ni si Jonatan ai, marbija ma ia, “Songon sintongni manggoluh Jahowa, seng bulih bunuhon ia.”

⁷ Jadi idilo si Jonatan ma si Daud, anjaha ipatugah ma hu bani ganup hata ondi. Dob ai iarahkon si Jonatan ma si Daud hu bani si Saul, anjaha i lobei ni ma ia songon na sain dokah.

⁸ Tapi masa ma use parporangan; bingkak ma si Daud laho mamorang halak Palistim, gabe talu tumang ma sidea ibahen, lanjar maporus ma sidea ibahen.

⁹ Dob ai roh ma use tonduy na jahat hun bani Jahowa hu bani si Saul, sanggah hundul ia i rumahni pajolom-jolom tanja ibagas tanganni; marhusapi do anggo si Daud.

¹⁰ Isuba si Saul ma mamantom si Daud hu bani dingding marhitei tanjani; tapi idiharhon si Daud do, gabe pantik ma tanja ai hu dingding. Maporus ma si Daud, gabe maluah ma ia.

¹¹ Bornginni ai isuruh si Saul ma suruhanni hu rumah ni si Daud laho marjaga, ase boi bunuhon ia patarni ai. Tapi roh ma si Mikal, parinangonni ai patugahkon hu bani, "Anggo seng ipaluah ham hosahmu borngin on, maningon bunuhon ma ham patar."

¹² Dob ai itantan si Mikal ma si Daud hun jandela hu toruh; maporus ma ia gabe maluah.

¹³ Ibuat si Mikal ma gana-gana terapim, anjaha irageihon ma ai hu podomanni; halanguluni bobak ni hambing ibahen, anjaha isabingi ma ai bani hiou.

¹⁴ Dob ai isuruh si Saul ma suruhanni mangalop si Daud. Tapi nini si Mikal ma, "Boritan do ia."

¹⁵ Dob ai isuruh si Saul ma use suruhanni manorih si Daud, nini ma, "Boan ma ia hu bangku i atas ni podomanni, ase hubunuh ia."

¹⁶ Jadi dob roh suruhan ai, tonggor ma gana-gana terapim do hape i podomanni, anjaha bobak ni hambing tunggal halang uluni.

¹⁷ Nini si Saul ma dompak si Mikal, “Mase ma sonin pangoto-otoimu bangku, anjaha ipalopas ho munsuhku laho, gabe maluah ia?” Jadi nini si Mikal ma dompak si Saul, “Nini hu bangku, ‘Lopas ahu laho, mase ma rahanan bunuhonku ho?’”

¹⁸ Tapi maporus do anggo si Daud gabe maluah ia, anjaha das ma ia hu bani si Samuel i Rama, anjaha ipatugah ma bani haganup, na binahen ni si Saul hu bani. Jadi laho ma ia pakon si Samuel, gabe marianan ma sidea i Nayot.

¹⁹ Jadi adong ma na patugahkon hu bani si Saul, “Tonggor ma, i Nayot na i Rama do si Daud marianan.”

²⁰ Jadi isuruh si Saul ma suruhanni mangalopi si Daud; gabe iidah sidea ma tumpuan ni nabi na manjahai, anjaha si Samuel do kopala ni sidea. Jadi sogop ma Tonduy ni Naibata hu bani suruhan ni si Saul, gabe manjahai ma age sidea.

²¹ Dob ipatugah na masa ai hu bani si Saul, gabe isuruh ma suruhanni na legan, gabe manjahai ma age sidea; dob ai isuruh si Saul ma suruhanni patoluhalihon, tapi sidea pe manjahai do.

²² Dob ai ia sandiri pe laho ma hu Rama, gabe das ma ia hu parigi bolon na i Seku; sungkun-sungkun

ma ia, “Ija do si Samuel pakon si Daud?” Nini halak ma, “Tonggor ma, i Nayot, na i Rama do ia.”

²³ Dob ai laho ma ia hujai, hu Nayot, na i Rama, gabe sogop ma age hu bani Tonduy ni Naibata; anjaha sanggah na mardalan ai ia, manjahai ma ia, ronsi das ia hu Nayot na i Rama.

²⁴ Ia pe itanggali ma pakeianni, anjaha manjahai ma ia i lobei ni si Samuel, anjaha tibal ia salang-salang layur sadari sabornginni ai. Halani ai do ase ihatahon halak, “Dihut do homa si Saul i tonggah-tonggah ni nabi-nabi?”

Parbulawanan ni si Jonatan pakon si Daud

20 ¹ Dob ai lintun ma si Daud hun Nayot na i Rama. Dob das ia hu bani si Jonatan, nini ma, “Aha dong na hubahen? Aha salahku? Aha do salahku i lobei ni bapanta, ase sihol bunuhonni ahu?”

² Tapi nini si Jonatan ma, “Daoh ma in! Seng dong ibahen bapa atap aha pe, na banggal age na etek, anggo lang ope ipatugah hu bangku. Mase ma ponopkonon ni bapa ia on hun bangku? Seng tongon sonai.”

³ Dob ai nini si Daud ma mambalosi, “Torang do ibotoh bapanta, na dob jumpahan idop ni uhur do ahu i lobeimu.” Gabe nini uhurni, ‘Seng bulih botohon ni si Jonatan hata on, ase ulang pusok uhurni. Tapi tongon do, songon sintongni

manggoluh Jahowa, anjaha manggoluh pakon ho, pitah sanlangkah mando holangkolangku hun bani hamateian.'

⁴ Dob ai nini si Jonatan ma dompak si Daud, "Aha gakni pinindo ni uhurmu, si bahenonku bam?"

⁵ Nini si Daud ma dompak si Jonatan, "Tonggor ma, patar ma poltak ni bulan, somalni rap pakon rajanta do ahu mangan, tapi palopas ma ahu laho, ase marponop ahu i ladang das ronsi patolu bornginkon.

⁶ Porini sungkun-sungkun bapanta pasal ahu, jadi hatahon ma, 'Gomos do ipindo si Daud hun bangku, ase podas ia laho hu Betlehem, hutani ai; ai adong do parsombahon tahunan ijai rap pakon pangkuni ganup.'

⁷ Anggo ihatahon, 'Dear!' Artini tanda na dear ma ai. Tapi anggo manggila do ia, botoh ma, na dob putus do uhurni mambahen na jahat.

⁸ On pe patidak ma idop ni uhurmu hu bani jabolonmon, ai domma pala mambahen padan ho hu bani jabolonmon i lobei ni Jahowa. Tapi anggo adong salahku, ho ma rahanan mamunuh ahu; mase ma pala boanonmu ahu hu bani bapanta?"

⁹ Dob ai nini si Jonatan ma, "Daoh ma in hun bangku! Anggo hubotoh, na dob putus do uhur ni bapa mambahen na jahat bam, mintor lang ma patugahonku ai bam?"

¹⁰ Jadi nini si Daud ma dompak si Jonatan, “Ise ma patugahkon hu bangku, anggo manggila bapanta marbalos hubam?”

¹¹ Dob ai nini si Jonatan ma dompak si Daud, “Eta hita laho hu ladang!” Jadi laho ma sidea hu ladang.

¹² Nini si Jonatan ma dompak si Daud, “Jahowa, Naibata ni halak Israel ma saksi! Anggo domma hupapangkei bapa patar barang haduan, tonggor ma, anggo dear do uhurni hu bani si Daud, mintor suruhonku ma na patugahkon ai bam.

¹³ Tapi anggo sihol uhur ni bapa mambahen na masambor bam sonai ma bahenon ni Jahowa hu bani si Jonatan, lobih ope tene, anggo seng hupatugah ai bam, ase boi sonang ho laho. Sai ihasomani Jahowa ma ho songon na hinasomananni bapa na sain dokah.

¹⁴ Sanggah manggoluh ope ahu, patuduhkon ma hu bangku idop ni uhur ni Jahowa, ase ulang matei ahu,

¹⁵ anjaha ulang ma rotapkon idop ni uhurmu hun bani ginomparhu ronsi sadokah ni dokahni. Anggo isiapkon Jahowa ma ganup munsuh ni si Daud hun bani sab tanoh on,

¹⁶ ulang ma siap goran ni si Jonatan hun rumah ni si Daud, anjaha Jahowa ma na manluluhon munsuh ni si Daud.”

¹⁷ Dob ai iulaki si Jonatan ma pabijahon si Daud halani holong ni uhurni mangidahsi; ai holong do uhurni bani songon holong ni uhurni bani dirini.

¹⁸ Dob ai nini si Jonatan ma hu bani, “Patar ma poltak ni bulan; jadi sungkunon ni halak ma pasal ho, ai lumei do hundulanmu.

¹⁹ Haduan ope sipalgeinan na so ijai ho; jadi laho ma ho hu bani ianan parponopanmu hinan, sanggah sihol bunuhonni ho; anjaha hundul ma ho i lambung ni batu na gugun na ijai ai.

²⁰ Panahkononku ma tolu lingkit hu lambungni ai, songon na manembak sada alatan ahu pakulahonku.

²¹ Dob ai suruhonku ma sada anak garama, ningku ma, ‘Laho ma ho ne, mangidah lingkit ai.’ Anggo huhatahon hu bani anak garama ai, ‘Tonggor ma, hampit jon do lingkit ai, buat ma!’ Jadi roh ma ho, ai songon sintongni manggoluh Jahowa, damei do bam, seng dong mara.

²² Tapi anggo huhatahon hu bani anak garama ai, ‘Tonggor ma, hampit jadui do lingkit ai!’ Anggo sonai, mintor laho ma gelah ho, halani Jahowa do na marsuruh ho.

²³ Tapi anggo pasal na sinahapkonta on, ho pakon ahu, pasal on Jahowa do saksi i tongah-tongahta ronsi sadokah ni dokahni.”

Si Jonatan Narus Ibunuh bapani

Sirang si Jonatan hun bani si Daud

²⁴ Dob ai marponop ma si Daud i tongah ladang. Jadi dob jumpah poltak ni bulan, hundul ma raja ai sihol mangan.

²⁵ Hundul ma raja ai bani hundulanni songon na sain dokah, bani hundulan i lambung ni dingding; si Jonatan hundul patontang pakonsi, si Abner i lambung ni si Saul; tapi lumei do anggo ianan ni si Daud.

²⁶ Seng dong isahapkon si Saul bani sadari ni ai, ai dapot uhurni, 'Adong do na masa bani; seng pansing ia, ai seng manguras ope ia.'

²⁷ Tapi patarni ai, paduaarihon dob poltak bulan, lanjar lumei do ianan ni si Daud. Jadi nini si Saul ma dompak si Jonatan anakni ai, "Mase ma lang roh si Daud, anak ni si Isai ai mangan nantuari barang sadari on?"

²⁸ Nini si Jonatan ma mambalosi, "Gomos do ielekeleke ahu, ase laho ia hu Betlehem.

²⁹ Nini, 'Palopas ma ahu laho, ai manggalang do hanami na saompung ibagas huta ai, anjaha abang sandiri do na manonahkon ahu; on pe anggo dapotan idop ni uhur do ahu, laho ma ahu mangidah na si abang; halani ai do ase seng roh ia mangan rap pakon raja in.'"

³⁰ Jadi gajag ma ringis ni si Saul mangidah si Jonatan, nini ma hu bani, “Anak magou, na so siat hata do ho! Ai lang hubotoh do na dob ipilih ho do anak ni si Isai mambahen hadorunonmu pakon hadorunon ni inangmu na manubuhkon ho?”

³¹ Ai sadokah manggoluh anak ni si Isai ai i tanoh on, seng anjai totap ho barang harajaonmu. On pe suruh ma na mangalopisi hu bangku, ai anak sibunuhon do ia.”

³² Nini si Jonatan ma mambalosi bapani ai, “Mase ma maningon bunuhon ia? Aha salahni?”

³³ Jadi ipantomkon si Saul ma tanja ai hu bani sihol mamunuhsi. Hunjai ibotoh si Jonatan ma na dob putus uhur ni bapani ai sihol mamunuh si Daud.

³⁴ Dob ai laho ma si Jonatan hun bani na mangan-mangan ai, manringis tumang ia, seng mangan ia paduaarihon dob poltak bulan ai, ai pusok do uhurni halani si Daud, marhiteihon na dob pinahiri ni bapani ai ia.

³⁵ Patarni ai laho ma si Jonatan hu ladang bani panorang na dob pinadankonni ai hu bani si Daud, sada dakdanak na etek-etek do hasomanni.

³⁶ Nini ma dompak juakjuakni ai, “Marlintun ma ho, pindahi ma lingkit sisiorhononku.” Dob ai marlintun ma juakjuakni ai, gabe isiorhon ma sada lingkit humbabouni.

³⁷ Dob das juakjuak ai bani ianan ni lingkit na siniorhon ni si Jonatan ai, dilo-dilo ma si Jonatan

hun pudi ni juakjuakni ai, nini ma, “Ai lang hampit jadui do lingkit ai?”

³⁸ Jadi idilohon si Jonatan ma hu bani juakjuak ai, “Podas, ulang ho mantadi-mantadi!” Ibuat juakjuak ni si Jonatan ai ma lingkit ai, lanjar iboan ma ai mulak hu bani tuanni.

³⁹ Tapi anggo juakjuak ai seng ibotoh ai; pitah si Jonatan ampa si Daud do na marsibotohan pasal hata ai.

⁴⁰ Iondoskon si Jonatan ma sinjatani ai hu bani juakjuak hasomanni ai, anjaha nini ma hu bani, “Laho ma ho, boan ma in hu huta.”

⁴¹ Jadi dob laho juakjuak ai, roh ma si Daud hun lambung ni gugunan batu ai, manrogop ma ia pala dais bohini hu tanoh, anjaha isombah ma ia tolu hali; dob ai marsisummahan ma sidea lanjar tangis bei, marompot tumang.

⁴² Dob ai nini si Jonatan ma dompak si Daud, “Laho ma ho mardamei-damei. Pasal na pinadankonta padua-dua, marhitei bija ibagas goran ni Jahowa, Jahowa do saksi i tongah-tongahta, i tongah-tongah ni ginomparhu pakon ginomparmu sadokah ni dokahni.” (20-43) Dob ai bingkati ma si Daud; si Jonatan pe mulak ma hu hutani.

Si Daud i Huta Nob

21 ¹ Dob ai das ma si Daud hu Nob, hu bani Malim Ahimelek. Tapi songgotan ma

si Ahimelek manjumpahkon si Daud, jadi nini ma hu bani, “Mase punjung sahalak ham, seng dong hasomanmu age sahalak?”

² Dob ai nini si Daud ma dompak malim Ahimelek, “Itonahkon rajanta do sada hata hu bangku, anjaha nini do hu bangku, ‘Seng bulih botohon ni atap ise pasal hata na hutonahkon in bam. Domma hutotapkon ianan parjumpahan hu bani hasomanku.’

³ On pe, aha do na dong bamu? Bere ham ma bangku lima ruti, atap aha pe na dong ijon.”

⁴ Nini malim ai ma mambalosi si Daud, “Seng dong ruti na somal bangku, pitah ruti na mapansing hansa; asal ma tarpadaoh halak dirini hun bani naboru.”

⁵ Jadi nini si Daud ma mambalosi malim ai, “Tongon tumang, domma dua ari daoh do naboru hunbennami, sanggah bingkat ahu; pansing do tong badan ni halak ai, age pe pardalanan na somal; ai lang daoh mapansingan badan ni sidea sadari on?”

⁶ Dob ai ibere malim ai ma hu bani ruti na pansing ai; ai seng dong ruti ijai sobali ni ruti sigalangkonon ai, ai ma ruti na binuat hun lobei ni Jahowa, laho manggantihon ai marhitei ruti na milas bani ari ibuat ruti ai.

⁷ Tapi adong do ijai sadari ni ai sahalak hun bani jabolon ni si Saul, na tartutup i lobei ni Jahowa, si

Doeg do goranni, halak Edom, kopala ni parmahan ni si Saul.

⁸ Dob ai nini si Daud ma dompak si Ahimelek, “Atap adong do iponopkon ham ijon tanja barang podang? Ai seng sampang huboan podangku barang sinjatanku, halani mangolos mandalankon hata ni raja ai.”

⁹ Nini malim ai ma mambalosi, “Podang ni Goliat, halak Palistim ai, na binunuhmu i habungan Elah, tonggor ma, ijon do ibaluti ibagas hiou, i pudi ni baju epod; anggo sihol buatonmu ai, buat ma, ai seng dong na legan sobali ai ijon.” Nini si Daud ma, “Seng dong na usih hujai, bere ham ma in bangku.”

Si Daud Rap pakon Raja Akis

¹⁰ Dob ai bingkak ma si Daud, maporus sadari ni ai hun lobei ni si Saul, anjaha laho ma ia hu bani si Akis raja ni Gat.

¹¹ Tapi nini juakjuak ni si Akis ma hu bani, “Ai lang on do si Daud, raja ni nagori ai? Ai lang pasal ia do mandoding marsibalos-balosan sidea sanggah na manortor ai: Marribu-ribu do italuhon si Saul, tapi marlaksa-laksa do italuhon si Daud.”

¹² Iparuhurhon si Daud do hata ai, gabe mabiar tumang ma ia bani si Akis, raja ni huta Gat ai.

¹³ Jadi ipalegan ma parlahouni i lobei ni sidea, anjaha ipapodou-podou ma dirini; margonrang-

gonrang ma ia bani labah ni horbangan ai, anjaha dehdehan tijurni hu bani gumisni ibahen.

¹⁴ Dob ai nini si Akis ma hu bani juakjuakni ai, “Tonggor ma, podouan do halak in; mase ma ibobahon hanima ia bangku?”

¹⁵ Ai hurangan gakni ahu bani halak na podouan, ase iboan hanima halak in, laho patuduhkon podouni ai bangku? Tor halak sisonon ma masuk hu rumahku?”

Si Daud i Adullam

22 ¹ Dob ai laho ma si Daud hunjai, anjaha maporus ma ia hu liang Adullam. Jadi dob ibogei abangni pakon ganup ginompar ni bapani ai, gabe tuad ma sidea manjumpahkonsi hujai.

² Dob ai martumpu ma hu bani sagala halak na tarsosak, sagala halak siparutang pakon sagala halak na marborit ni uhur; gabe ia ma gabe pambobai bani sidea. Adong do ompat ratus halak hasomanni ai.

³ Dob ai laho ma si Daud hunjai hu Mispa na i tanoh Moab, anjaha nini ma hu bani raja ni halak Moab ai, “Palopas ma bapa pakon inang marianan i tengah-tengah nasiam, paima hubotoh barang aha sibahenon ni Naibata hu bangku.”

⁴ Jadi iarahkon ma sidea hu lobei ni raja ni halak Moab, anjaha marianan ma sidea i lambungni sadokah si Daud marbatar-batar i atas dolog.

⁵ Dob ai nini nabi Gat ma dompak si Daud, “Ulang be ham marbatar-batar i dolog, laho ma ham hu tanoh Juda.” Jadi laho ma si Daud, gabe das ma ia hu harangan Heret.

Hona Bunuh Malim-malim na i Nob

⁶ Dob ai tarboge i ma hu bani si Saul barita pasal si Daud pakon pasal halak hasomanni ai. I Gibeon do hundul-hundul si Saul ijia, i toruh ni hayu jabi-jabi na i atas ni buntu-buntu, anjaha tanjani ibagas tanganni; haganup juakjuakni jongjong do i lambungni.

⁷ Dob ai nini si Saul ma dompak juakjuakni na jongjong i lambungni, “Tangar nasiam ma, nasiam halak Benjamin; mintor tumaram ma bereon ni anak ni si Isai ai bani ganup nasiam juma barang pohon anggur? Mintor tumaram ma pabangkitonni ganup nasiam bahen kopala ni sisaribu barang kopala ni sisaratus?”

⁸ Mase ma martahi-tahi nasiam ganup mangimbang ahu? Sada pe lang dong na patugahkon bangku sanggah na mambahen parpadanan anakku pakon anak ni si Isai ai, sada pe lang dong na marpusok ni uhur nasiam pasal ahu, anjaha sada pe lang nasiam patugahkon hu bangku na dob ipajabu anakku juakjuakku mangimbang ahu, anjaha ionggopi ahu, songon na dob talar sadari on.”

⁹ Dob ai nini si Doeg halak Edom ai ma, na jongjong ijai rap pakon juakjuak ni si Saul, “Huidah do anak ni si Isai ai roh hu Nob, hu bani si Ahimelek, anak ni si Ahitub.”

¹⁰ Isungkun do hu bani Jahowa pasal langkahni, ibere do bohal bani, anjaha ibere do bani podang ni si Goliat halak Palistim ai.

¹¹ Dob ai isuruh raja ai ma na mandilo Malim Ahimelek, anak ni si Ahitub pakon ganup ginompar ni bapani, na adong i Nob; jadi roh ma sidea ganup hu bani raja ai.

¹² Nini si Saul ma, “Tangihon ma, ale anak ni si Ahitub!” Ibalosi ma, “Tonggor ma, ijon do ahu, tuannami.”

¹³ Dob ai nini si Saul ma hu bani, “Mase ma martahitahi hanima mangimbang ahu, ho pakon anak ni si Isai, tandani ibere ho do bani ruti pakon podang, anjaha isungkun ho Jahowa pasalsi, gabe iimbang ahu, anjaha ionggopi ahu, songon na torang taridah sonari?”

¹⁴ Dob ai ibalosi si Ahimelek ma raja ai, “Ise ma hun bani ganup juakjuakmu hatengeran songon si Daud, ai ma hela ni rajanami, kopala ni pangawalmu, anjaha marsangap i rumahmu?”

¹⁵ Ai sahali on pe nani ahu parlobei sahali manungkun Naibata pasal langkahni? Sabonar lang! Ulang ma ihonahon rajanami hata ai bangku

pakon bani ganup ginompar ni bapa; ai ganup hata on, otik pe lang ibotoh juakjuakmu.”

¹⁶ Tapi nini raja ai ma, “Maningon matei ho, Ahimelek, ho pakon ganup ginompar ni bapamu.”

¹⁷ Dob ai nini raja ai ma dompak pangawal na jongjong i lambungni, “Padohor hujon, bunuh ma Malim ni Jahowa in! Ai dihut do tangan ni sidea mangurupi si Daud, anjaha ibotoh sidea do na maporus ia, hape seng ipatugah ai bangku.” Tapi seng ra juakjuak ni raja ai manlaluhon tanganni, laho manikam malim ni Jahowa.

¹⁸ Dob ai nini raja ai ma dompak si Doeg, “Roh ho hujon, tikam ma malim-malim in.” Dob ai marhusor ma si Doeg, halak Edom ai, anjaha itikam ma malim-malim ai. Ibunuh ma bani na sadari ai ualuh puluh lima dalahi, siparbaju epod na hun bani hiou silopak.

¹⁹ Ibunuh do homa parhuta Nob, huta ianan ni sagala malim ai, marhitei podang, dalahi pakon naboru, dakdanak pakon na etek-etek, lombu, halode pakon biri-biri, ibunuh do ganupan ai marhitei podang.

²⁰ Tapi maluah do sada anak ni si Ahimelek, anak ni si Ahitub, si Abyatar do goranni; jadi maporus ma ia hu bani si Daud.

²¹ Jadi dob ibaritahon si Abyatar hu bani si Daud, na dob ibunuh si Saul malim ni Jahowa,

²² nini si Daud ma dompak si Abyatar, “Domma hubotoh namin bani ari ai, na ijai do si Doeg, halak Edom ai, anjaha na maningon patugahonni do ai hu bani si Saul. Marsapata hu bangku do ganup hosah ni ginompar ni bapamu.

²³ I lambungku ma ho, ulang ho mabiar, ai barang ise na manahihon hosahmu, tahinononni do homa hosahku, sonang do ho i lambungku.”

Si Daud i Kegila pakon i Halimisan Sip

23 ¹ Dong ma na patugahkon hu bani si Daud, “Tonggor ma, iporang halak Palistim do Kegila, anjaha iayob sidea do sagala pardogeian.”

² Jadi isungkun si Daud ma Jahowa, “Bulih do ahu laho manaluhon halak Palistim?” Dob ai nini Jahowa ma hu bani si Daud, “Laho ma ho, taluhon ma halak Palistim anjaha paluah ma Kegila.”

³ Tapi nini hasoman-hasoman ni si Daud ai ma hu bani, “Tonggor ma, gari ijon, i tanoh Juda, mabiar do hita, lambin naha ma anggo laho hita hu Kegila laho mandorab bala ni halak Palistim?”

⁴ Jadi iulaki si Daud ma sahali nari manungkun Jahowa, gabe ibalosi Jahowa ma ia, nini ma, “Misir ma ho laho hu Kegila, ai Ahu sandiri do na mangondoskon halak Palistim hubagas tanganmu.”

⁵ Dob ai laho ma si Daud pakon hasomanni ai hu Kegila, iporang sidea ma halak Palistim ai, anjaha iboan ma pinahan ni sidea; talu tumang do sidea

ibahen, gabe maluah ma par-Kegila ai ibahen si Daud.

⁶Sanggah na maporus si Abyatar, anak ni si Ahimelek marayak si Daud hu Kegila, iboan do baju epod ai ibagas tanganni.

⁷Dob ai tarbogei ma hu bani si Saul na roh ai si Daud hu Kegila. Jadi nini si Saul ma, “Domma iondoskon Jahowa ia hubagas tanganku; ai domma ihurungkon dirini marhitei na masuk ia hubagas sada huta na marhorbangan anjaha na marpating-pating.”

⁸Jadi idilo si Saul ma ganup bangsa ai laho marporang, tuad hu Kegila, laho mangkubu si Daud pakon hasomanni ai.

⁹Tapi dob ibotoh si Daud, na dob isura-surahon si Saul mambahen na so madear bani, jadi nini ma dompak Malim Abyatar: “Boan hujon baju epod in!”

¹⁰Dob ai nini si Daud ma, “Ham Jahowa, Naibata ni Israel: Domma torang ibogei jabolonmu, sihol roh si Saul hu Kegila, laho parsedahon huta in halani ahu.

¹¹Tumaram do ondoskonon ni par-Kegila ahu hu tanganni? Tumaram do si Saul tuad, songon na dob binogei ni jabolon-Mu on? Ham Jahowa, Naibata ni Israel, patugah Ham ma hu bani jabolon-Mu on.” Jadi nini Jahowa ma, “Roh do ia!”

¹²Dob ai nini si Daud ma use, “Tumaram do ondoskonon ni par-Kegila ahu pakon hasomankin hubagas tangan ni si Saul?” Jadi nini Jahowa ma, “Ondoskonon ni sidea do!”

¹³ Dob ai misir ma si Daud rap pakon hasomanni sionom ratus halak ai, itadingkon ma Kegila, anjaha lajang ma ia hujai-hujon. Dob ipatugah halak hu bani si Saul, domma maluah si Daud hun Kegila, seng be saud ia laho.

¹⁴ Jadi tading i parbatar-bataran ma si Daud i halimisan, i pardologan ni halimisan Sip. Ipindahi si Saul do ia ganup ari, tapi seng ibere Naibata ia hubagas tanganni.

¹⁵ Tapi mabiar do si Daud, halani na dob bingkat si Saul sihol mamunuhsi. Ia si Daud i halimisan Sip do, i Hores.

¹⁶ Tapi bingkat ma si Jonatan, anak ni si Saul, laho ma ia marayak si Daud hu Hores, anjaha ipatotap ma uhurni ibagas Naibata.

¹⁷ Nini ma hu bani, "Ulang ma ho mabiar, ai seng tumaram jumpah tangan ni bapa, si Saul in ho, maningon ho do bangkit gabe raja manggomgom halak Israel, anjaha ahu raja paduahon; bapa, si Saul pe torang do in ibotoh."

¹⁸ Jadi marpadan ma sidea na dua i lobei ni Jahowa; tading i Hores do anggo si Daud, tapi mulak do si Jonatan hu rumahni.

¹⁹ Dob ai tangkog ma halak Sip marayak si Saul hu Gibe, nini ma, "Ai lang marponop do si Daud i lambungnami i atas dolog, i Hores, bani buntu-buntu Hakila, na hampit dangsina ni Jesimon?"

²⁰ On pe, anggo marosuh do uhurmu, ham rajanami, sai tuad ma ham, ase iondoskon hanami ia hubagas tangan ni raja in.”

²¹ Nini si Saul ma, “Sai ipasu-pasu Jahowa ma nasiam, halani holong do uhur nasiam mangidah ahu.

²² Laho ma nasiam, papangkei nasiam ma use, ase ibotoh anjaha iidah nasiam torang ianan parsaranan ni naheini, anjaha ise na dob mangidahsi ijai; ai adong do na patugahkon bangku halak siparakal do ia.

²³ Pindahi anjaha papangkei nasiam ma sagala ianan parponopan, atap ija ia marponop, anjaha mulak ma nasiam hu bangku, anggo domma tontu, ase huirikkon nasiam. Anjaha anggo i nagori ai do ia, sai na jumpah ahu do ia i tongah-tongah ni na marribu-ribu i Juda.”

²⁴ Dob ai misir ma sidea, i lobei sidea ma si Saul hu Sip. Tapi anggo si Daud ampa hasomanni ai i halimisan Maon do, bani tanoh hanopan hampit dangsina ni Jesimon.

²⁵ Dob ai bingkat ma si Saul pakon balani ai mangindahisi. Adong ma na patugahkon ai bani si Daud; halani ai laho ma ia hu dolog batu na i halimisan Maon ai. Dob ibogei si Saul ai, iayaki ma si Daud hu halimisan Maon.

²⁶ Mardalan ma si Saul bani salopah ni dolog ai anjaha si Daud ampa hasomanni bani na salopah

nari ni dolog ai. Mangolos do namin si Daud maporus hun lobei ni si Saul, hape roh ma si Saul ampa balani ai manghubu si Daud ampa hasomanni ai sihol manangkapsi.

²⁷ Tapi roh ma sada suruhan marayak si Saul, nini ma, “Podas ma ham roh, ai domma masuk halak Palistim hu tanohta.”

²⁸ Dob ai mulak ma si Saul hun bani na mardakdak si Daud ai, bingkat ma ia mamorang halak Palistim ai. Halani ai do ase isobut halak goran ni ianan ai: Dolog batu parbansahan.

²⁹ (24-1) Dob ai tangkog ma si Daud hunjai, lanjar marianan i dolog-dolog ni Enggedi.

Panramotkon ni si Daud bani si Saul i Enggedi

24 ¹ (24-2) Jadi dob mulak si Saul hun bani na mardakdak halak Palistim ai, ipatugah halak ma hu bani, “Tonggor ma, i halimisan Enggedi do si Daud.”

² (24-3) Dob ai iarahkon si Saul ma tolu ribu halak pilihan hun bani ganup halak Israel, jadi laho ma ia mangindahi si Daud pakon hasomanni ai i lambung ni dolog batu parbedaran.

³ (24-4) Das ma ia hu harang ni biri-biri i lambung ni dalan ai, adong do ijai sada liang; masuk ma si Saul hubagas; uhurni sihol hu duru tongkin ijai. Tapi hundul do si Daud pakon hasomanni ai bani pamurnangan ni liang ai.

⁴ (24-5) Jadi nini hasoman ni si Daud ai ma hu bani, “Domma jumpah ari, na hinatahon ni Jahowa bamu, ‘Tonggor ma, Ahu do mangondoskon munsuhmu hubagas tanganmu, anjaha bahen ma bani romban hu bani rosuh ni uhurmu.” Dob ai jongjong ma si Daud, anjaha isayat ma asok-asok suhi-suhi ni mantel ni si Saul ai.

⁵ (24-6) Dob ai dosak-dosak ma taroktok ni si Daud, halani na dob sinayatni ai suhi-suhi ni mantel ni si Saul ai.

⁶ (24-7) Nini ma dompak hasomanni ai, “Daoh ma ai hun bangku ibahen Jahowa, mambahen na sonai hu bani tuanku na dob mininakan ni Jahowa, anjaha mangonai tangan hu bani, ai na dob mininakan ni Jahowa do ia.”

⁷ (24-8) Iulangi si Daud ma hasoman ai marhitei hata ai, seng ibere sidea mardas tangan hu bani si Saul. Dob ai ijongjongkon si Saul ma, itadingkon ma liang ai laho mannunuti dalanni.

⁸ (24-9) Dob ai ijongjongkon si Daud ma homa laho luar hun bagas liang ai, anjaha dilo-dilo ma ia hun pudu ni si Saul, “Ham Raja, tuannami!” Jadi dob mangkawah si Saul dompak pudu, manrogop ma si Daud marsombah hu bani raja ai, bohini das hu tanoh.

⁹ (24-10) Nini ma hu bani si Saul, “Mase ma itangihon ham hata bolah-bolah ni halak na

mangkatahon, 'Tonggor ma, manguhurhon na masambor do si Daud hu bamu?'

¹⁰ (24-11) Tonggor ma, panonggormu sandiri mangidah sadari on, na dob niondoskon ni Jahowa ham sadari on hubagas tanganku ibagas liang ai; adong do deba namin mangkatahon ahu mamunuh ham, tapi hura motkon do ham, ai nini uhurhu, 'Seng bulih mangonai tangan ahu hu bani tuanku, ai na dob mininakan ni Jahowa do ia.'

¹¹ (24-12) Tapi, ham bapa! Tonggor ham ma suhi-suhi ni bajumu ibagas tanganku; marhitei na husayat suhi-suhi ni bajumu, tapi lang hubunuh ham, boi do botohon anjaha idahonmu, na so adong hajahaton barang na ilat ibagas uhurhu; seng dong dousangku dompak ham. Tapi ham do na mandarami ahu sihol mamunuh ahu.

¹² (24-13) Jahowa do na manguhumi hita, anjaha Jahowa ma na mambalaskon ahu bamu; tapi na so bulih do anggo tanganku mangonai bamu.

¹³ (24-14) Songon na hinatahon ni umpasa ni na matua sapari, 'Hun bani halak parjahat roh hajahaton,' tapi anggo tanganku seng bulih mangonai bamu.

¹⁴ (24-15) Mangayak-ayak ise do ase luar raja ni Israel? Ise do na pinardakdakmu? Baliang na matei-matei do, barang hutu ni baliang sangkamata?

¹⁵ (24-16) Halani ai Jahowa ma Panguhum, la ma na manguhumi hita, la ma na mangidah on, la ma

na mantinggilhon partinggilanku, anjaha la ma na paluahkon ahu hun bani tanganmu.”

¹⁶ (24-17) Jadi dobkonsi ihatahon si Daud hata ai hu bani si Saul, gabe nini si Saul ma, “Soram do in, Daud, anakku?” Jadi ipagogoh si Saul ma sorani doruh-doruh.

¹⁷ (24-18) Nini ma dompak si Daud, “Pintoran do ho hun bangku; na dear do ibahen ho hu bangku, tapi anggo ahu na jahat do hubalaskon hubam.

¹⁸ (24-19) Domma ipatalar ho sadari on dear ni pambahenanmu bangku, ai ma marhitei na so binunuhmin ahu, sanggah na niondoskon ni Jahowa ahu hubagas tanganmu.

¹⁹ (24-20) Ai porini jumpah halak munsuhni, mintor tumaram ma palopasonni ia laho marsonang-sonang? Sai ibalaskon Jahowa ma na madear hubam, balas ni na binahenmin hu bangku sadari on.

²⁰ (24-21) On pe, tonggor ma, torang do hubotoh na maningon gabe raja do ho, anjaha na maningon totap do harajaon Israel ibagas tanganmu.

²¹ (24-22) Halani ai bulawankon ma marhitei goran ni Jahowa, paboa na so siapkononmu ginomparhu i pudingku hun rumah ni bapa.”

²² (24-23) Jadi ibulawankon si Daud ma ai hu bani si Saul. Dob ai laho ma si Saul hu rumahni; tapi anggo si Daud pakon hasomanni ai tangkog ma hu parbatar-bataran na i dolog ai.

Si Nabal pakon si Abigail

25 ¹ Matei ma si Samuel, jadi martumpu ma ganup halak Israel, itangisi sidea ma ia, anjaha itanom ma ia dohorhon rumahni i Rama. Tapi misir ma anggo si Daud, tuad hu halimisan Paran.

² Adong ma sada halak Maon, na marparusahaan i Karmel. Halak na bayak tumang do ia; adong do tolu ribu biri-biri anjaha saribu hambingni. Sanggah manrasip biri-biri do ia i Karmel.

³ Ia goran ni dalahi ai si Nabal do, anjaha goran ni parinangonni si Abigail. Na pentar do naboru ai anjaha jenges; tapi anggo dalahi ai na jungkat anjaha na jahat do paruhuranni; ginompar ni si Kaleb do ia.

⁴ Ibogei si Daud ma i halimisan, na manrasip biri-biri do si Nabal ai.

⁵ Jadi isuruh si Daud ma sapuluh anak garama, nini ma dompak anak garama ai, "Tangkog ma hanima hu Karmel marayak si Nabal, padas hanima ma tabingku bani.

⁶ Sonon ma hatahon hanima bani, 'Damei ma bamu, damei ma bani rumahmu anjaha damei ma bani ganup na dong bamu.

⁷ Hubogei do na manrasip biri-biri do ham; na rap pakon hanami do parmahanmu, seng ongg

isunsahi hanami sidea, anjaha seng onggamagouan atap aha pe sidea, sadokah sidea i Karmel.

⁸ Sungkun ham ge parhorjamu, patugahon ni sidea do pasal ai bamu. On pe holong ma uhurmu mangidah anak garama on, ai tudu sanggah ari na madear do hanami roh. Mahua bere ham ma hu bani jabolonmu on pakon hu bani anakmu si Daud na adong tudu ibagas tanganmu.”

⁹ Dob das hasoman ni si Daud ai hujai, ipatugah sidea ma ganupan ai hu bani si Nabal marhitei goran ni si Daud; jadi ipaima sidea ma.

¹⁰ Nini si Nabal ma mambalosi hasoman ni si Daud ai, “Ise do si Daud? Ise do anak ni si Isai? Buei do sonari jabolon na lintun hun bani tuanni.

¹¹ Mintor buatonku ma rutingku pakon bahku ampa pinahanku na dob husayat bani panrasipanku laho mamberehon ai bani halak na so hubotoh hunja rohni?”

¹² Dob ai marhusor ma hasoman ni si Daud sihol mulak, anjaha dob das sidea, ipatugah ma ganupan hata ai hu bani si Daud.

¹³ Nini si Daud ma dompak hasomanni ai, “Ganup ma marsigonditkon podangni bei!” Jadi ganup ma sidea marsigonditkon gonditni; si Daud pe igonditkon ma podangni; dob ai iirikkon sidea ma si Daud, ompat ratus halak bueini, tapi tading do dua ratus halak manjaga ugas-ugas.

¹⁴ Tapi ipatugah sahalak siparhorjani ma hu bani si Abigail, parinangon ni si Nabal ai, nini ma, “Isuruh si Daud do suruhanni hun halimisan, laho padaskon hata harosuhni hu bani tuanta, tapi isorgangi do sidea.

¹⁵ Na dear tumang do pambahenan ni halak ai bennami, seng onggah ikahua hanami, anjaha seng onggah magouan atap aha pe hanami sadokah rap hanami pakon sidea marmahan i sampalan.

¹⁶ Songon tembok do sidea bennami borngin pakon arian sadokah hanami marmahan i lambung ni sidea.

¹⁷ Halani ai paruhurhon ham anjaha timbang ham ma, barang aha sibahenonmu; ai domma iputuskon uhum hamagouan dompak tuanta pakon ganup isi ni rumahni ganupan; paruhur na jahat do tuanta, seng tarparsahapkon age ise ia.”

¹⁸ Dob ai tarolos ma si Abigail, ibuat ma dua ratus ruti pakon dua gusi hulingkuling anggur, lima biri-biri na dob pinamasak, lima tumba gandum na dob pinahpah, saratus kue na maragu buah kurma; inahkon ma ganupan ai hu atas ni halode.

¹⁹ Dob ai ihatahon ma hu bani jabolonni, “Parlobei ma hanima laho, mintor roh pe ahu hun pudinima.” Tapi seng ipatugah ai hu bani paramangonni si Nabal.

²⁰ Jadi sanggah na mangajak halode ai ia tuad, lingod ibahen dolog-dolog ai, sompong tuad ma

si Daud pakon hasomanni mandompakkonsi; jadi pajumpah ma ia pakon sidea.

²¹ Tapi domma ihatahon si Daud hinan, “Soya-soya do hape na hujaga ganup na dong bani ai i halimisan gabe seng magouan atap aha ia; tapi ibalaskon do na jahat bangku balos ni na madear.

²² Sonai ma ibahen Naibata hu bani si Daud, lobihni ai ope, anggo adong na manggoluh tading palopasonku hun bani ganup na adong bani paima siang ari, sahalak dalahi pe lang.”

²³ Tapi dob iidah si Abigail si Daud ai, tarolos ma ia turun hun datas halode ai, anjaha manrogop ma ia i lobei ni si Daud anjaha isombah ma ia.

²⁴ Idabuhkon ma dirini i lobei ni nahei ni si Daud anjaha nini ma, “Ahu do tuannami, na marsalah ai; lopas ham ma jabolonmu naboru on mangkatahon hata i lobeimu, anjaha tangar ham ma hata ni jabolonmu naboru on.

²⁵ Ulang ma iparuhurhon tuanku parlahou ni si Nabal na jahat ai, ai songon goranni ai do ia; si Nabal do goranni, anjaha gok haotoon do ia. Tapi anggo ahu, jabolonmu naboru on, seng dong huidah hasoman ni tuanku na sinuruhmu ai.

²⁶ On pe, tuannami, songon sintongni manggoluh Jahowa, anjaha manggoluh homa pakon ham, na dob niolatan ni Jahowa madabuh hubagas utang daroh, anjaha mangurupi dirimu marhitei tanganmu sandiri: Sai songon si Nabal ma

munsuhmu pakon halak na mansura-surahon hamagouan hu bani tuannami.

²⁷ On pe, sibere-bere na binoan ni jabolonmu naboru hu bani tuannami, mahua nabere ma in bani halak na saodoran pakon tuannami.

²⁸ Sai marpangulaki ma uhurmu mangidah salah ni jabolonmu naboru on; ai sai na pajonamon ni Jahowa do bani tuannami rumah na totap, halani parporangan ni Jahowa na nidalankonmu, anjaha sadokah ham manggoluh, seng dong jumpah na masambor ibagas ham.

²⁹ Anggo adong halak na jongjong marburu ham barang mantahihon hosahmu, sai simpan ma namin hosah ni tuannami ibagas balut-balutan ni halak, na manggoluh i lambung ni Jahowa, Naibatamu.

³⁰ Anjaha anggo domma ibahen Jahowa hu bani tuannami haganup na madear na hinatahon-Ni hu bamu, anjaha ipabangkit ham gabe pambobai ni halak Israel,

³¹ sai ulang ma gabe urat ni pusok ni uhur barang panosalan ni uhur ai bamu, halani na manduruskon daroh ham seng pala marhala, anjaha na niurupanmu dirimu marhitei tanganku sandiri. Anjaha anggo domma ibahen Jahowa na madear hu bani tuannami, sai ingat ham ma jabolonmu naboru on.”

³² Dob ai nini si Daud ma dompak si Abigail, “Pinuji ma Jahowa, Naibata ni Israel, na marsuruh ham sadari on manjumpahkon ahu.

³³ Pinuji ma homa hapantasonmu, sonai homa ham, halani na niolatmu ai ahu sadari on madabuh hubagas utang daroh pakon mangurupi diringku marhitei tanganku sandiri.

³⁴ Tapi songon sintongni manggoluh Jahowa, Naibata ni Israel, na mangolat ahu mambahen na masambor bamu; ai ambit lang podas ham roh manjumpahkon ahu, seng dong be dalahi na tading bani si Nabal paima siang ari.”

³⁵ Jadi ijalo si Daud ma siluah na binoanni ai, anjaha nini ma hu bani, “Mulak ma ham ibagas damei hu rumahmu. Tonggor ma, domma hubalosi pangindoanmu, anjaha domma marpangulaki uhurhu mangidah ham.”

³⁶ Jadi dob das si Abigail hu bani si Nabal, mangan minum do ia i rumahni songon sada raja, marmalas ni uhur do ia anjaha mabuk tumang. Halani ai aha pe lang ipadas hu bani, age hata sangkababah, paima siang ari.

³⁷ Patarni dobkonsi malum mabuk ni si Nabal ai, ipatugah parinangonni ai ma bani ganup hata ai. Jadi mintor soh ma mardalan pusu-pusuni ibagas angkulani, gabe songon batu ma ia.

³⁸ Anjaha pala ope sapuluh ari nari ase itompas Jahowa si Nabal, jadi matei ma ia.

³⁹ Jadi dob ibogei si Daud na dob matei si Nabal, nini ma, “Pinuji ma Jahowa na mambalaskon hu bani si Nabal pangapasion na bangku anjaha na mangolat ahu hun bani na mangkorjahon hajahaton. Domma ibalikkon Jahowa hu bani uluni hajahaton ni si Nabal.” Dob ai isuruh si Daud ma suruhanni mangkatahon hatani hu bani si Abigail, sihol mambuatsi bahen parinangonni.

⁴⁰ Dob das suruhan ni si Daud ai hu bani si Abigail i Karmel, marsahap ma sidea pakonsi, nini ma, “Isuruh si Daud do hanami bamu, laho mangalopi ham bahen parinangonni.”

⁴¹ Dob ai jongjong ma ia, manrogop ma ia, bohini das hu tanoh, anjaha nini ma, “Tonggor ma, ra do ahu jabolonmu naboru on gabe jabolon, laho mamurihi nahei ni juakjuak ni tuannami.”

⁴² Dob ai mangolos ma si Abigail marugas, iajak ma halodeni, anjaha naboru suruh-suruhanni na lima ai do mangkasomanisi; iirikkon sidea ma suruhan ni si Daud ai, jadi gabe parinangonni ma ia.

⁴³ Tapi domma ibuat si Daud homa si Ahinoam na hun Jesreel, jadi duasi ma sidea gabe parinangonni.

⁴⁴ Tapi domma iberehon si Saul si Mikal, boruni ai, parinangon ni si Daud ai, hu bani si Paltiel, anak ni si Lais na hun Gallim.

Iramotkon si Daud si Saul Paduahalihon

26¹ Roh ma halak Sip marayak si Saul hu Gibeia, nini sidea ma, “Ai lang i buntu-buntu Hakila do si Daud marponop, hampit hapoltakan ni Jesimon?”

² Dob ai bingkat ma si Saul tuad hu halimisan Sip odor rap pakon tolu ribu halak, na pinilih hun bani halak Israel, laho mangindahi si Daud i halimisan Sip.

³ Jadi marsaran ma si Saul i buntu-buntu Hakila, i lambung dalan hampit hapoltakan ni halimisan; tapi anggo si Daud marianan do i halimisan. Jadi dob iidah na dob roh si Saul mangirikkonsi hu halimisan,
⁴ isuruh si Daud ma parkahap, gabe torang ma ibotoh, na dob roh si Saul ai.

⁵ Jadi misir ma si Daud anjaha das ma ia hu parsaranan ni si Saul; iidah si Daud ma ianan parpodoman ni si Saul rap pakon si Abner, anak ni si Ner, pambobai ni balani ai. Modom i tongah-tongah ni parsaranan ai do anggo si Saul anjaha halak simbuei ai marsaran manginggotisi.

⁶ Dob ai nini si Daud ma hu bani si Ahimelek, halak Het ai, pakon hu bani si Abisai, anak ni si Seruja, anggi ni si Joab, “Ise do na ra hasomanku tuad hu parsaranan ni si Saul?” Jadi nini si Abisai ma, “Ahu ma tuad hasomanmu.”

⁷ Jadi das ma si Daud pakon si Abisai hu ianan ai borngin-borngin; modom do ijai si Saul i tongah-tongah ni parsaranan ai, anjaha pantik do tanjani hu tanoh i lambung uluni; anjaha modom do si Abner pakon halak ai ganupan manginggotisi.

⁸ Dob ai nini si Abisai ma dompak si Daud, “Domma iondoskon Naibata imbangmu hubagas tanganmu sadari on; halani ai lopas ham ma ase hupantom ia bani tanjangkon hu tanoh, sahali mamantom seng pala mardua hali.”

⁹ Tapi nini si Daud ma dompak si Abisai, “Ulang bunuh ia! Ise ma na mamunuh na mininakan ni Jahowa, gabe lang hona uhum ia?”

¹⁰ Nini si Daud ma, “Songon sintongni manggoluh Jahowa, Jahowa ma na mamunuhsi, barang roh ajalni gabe matei, barang bingkat ma ia hu parporangan gabe matei.

¹¹ Daoh ma in hun bangku, halani Jahowa, anggo mintor ahu mangonai tangan hu bani na mininakan ni Jahowa; on pe buat ma tanjani, na i lambung ni uluni ai, pakon gusi ai ase laho hita.”

¹² Dob ai ibuat si Daud ma tanjani pakon gusi na i lambung ni uluni si Saul ai; jadi laho ma sidea. Sada pe lang na mangidah ai, barang na mambotoh ai, barang na tarpuho; ai tarpodom do sidea ganup, halani sinok do sidea haganup ibahen Jahowa.

¹³ Dob ai mandipar ma si Daud hu lopah ai, jongjong ma ia i pakpak ni dolog ai mandaoh-daoh, tar daoh do parholangan ni sidea ai.

¹⁴ Dob ai dilo-dilo ma si Daud hu bani bala ai pakon hu bani si Abner anak ni si Ner, nini ma, “Ai lang balosanmu ahu Abner?” Nini si Abner ma mambalosi, “Ai ise do ho na dilo-dilo hu bani raja in?”

¹⁵ Nini si Daud ma dompak si Abner, “Ai lang dalahi do ham? Ise ma na songon ham i Israel? Mase ma lang ijaga ham tuanmu, raja in? Ai roh do sahalak hun bani bala in sihol mangagou raja in, tuanmu in.

¹⁶ Seng dear in na binahenmu in. Songon sintongni manggoluh Jahowa, talup do ham matei, ai lang iramotkon ham tuanmu, na mininakan ni Jahowa. On pe tonggor ma, ija do tanja pakon gusi ianan ni bah na i lambung ni uluni ai?”

¹⁷ Jadi itanda si Saul ma sora ni si Daud ai, lanjar nini ma, “Soramu do in, alo Daud anakku?” Nini si Daud ma, “Sorangku ma da, rajanami.”

¹⁸ Nini ma, “Mase ma ipardakdak tuanku jabolonni? Ai aha dong na hubahen? Anjaha hajahaton aha adong ihorjahon tanganku?”

¹⁹ On pe, tangar ham ma, rajanami hata ni jabolonmu, ‘Anggo Jahowa do, na mangojur ham mangimbang ahu, sai ijalo ma sada galangan; tapi anggojolma do: Sai hona papa ma ia i lobei ni Jahowa, halani na niusirni ai ahu sadari on,

ase ulang dapotan ahu hun bani parbagianan ni Jahowa,' anjaha nini, 'Laho ho, marsombah hu bani naibata na legan.'

²⁰ On pe, ulang ma namin durus darohku daoh hun lobei ni Jahowa; ai luar do raja ni halak Israel mangindahi hosahku songon sada halak, na marburu dayok rimba i atas dolog."

²¹ Dob ai nini si Saul ma, "Domma mardousa ahu; mulak ma ho, Daud anakku, seng be bahenonku na masambor bam, ai harga do hosahku iahap ho sadari on; tonggor ma, haotoon do na hubahen anjaha kahou tumang do ahu."

²² Nini si Daud ma mambalosi, "Tonggor ma, ijon do tanja ni raja in, isuruh ma sada halak hun bani anak garama in mangalop.

²³ Jahowa ma na mambalaskon bani ganup hita romban hu bani hapintoran-Ni pakon habonaran-Ni; domma namin iondoskon Jahowa ham sadari on hubagas tanganku, tapi seng ra ahu mardas tangan hu bani na mininakan ni Jahowa.

²⁴ Ai songon harga ni hosahmu in bangku sadari on, sai sonin ma harga ni hosahku i lobei ni Jahowa, anjaha sai ipaluah ma ahu hun bani sagala hasosakan."

²⁵ Dob ai nini si Saul ma dompak si Daud, "Sai dapotan pasu-pasu ma ho, Daud, anakku! Sai na saud do in bahenonmu anjaha jadi do." Dob ai

inunuti si Daud ma dalanni, anjaha si Saul pe mulak ma hu bani iananni.

Si Daud i Tongah-tongah ni Halak Palistim

27¹ Jadi nini si Daud ma ibagas uhurni, “Sai na matei do ahu barang antigan bahenon ni si Saul; dearan ma nini uhurhu maporus ahu hu tanoh ni halak Palistim, tontu anggo sonai maronti ma si Saul mangindahi ahu i tanoh Israel, gabe maluah ma ahu hun bani tanganni.”

² Dob ai bingkat ma si Daud, laho ma ia pakon hasomanni sionom ratus halak ai hu bani si Akis, anak ni si Maoh, raja ni Gat.

³ Jadi marianan ma si Daud rap pakon si Akis i Gat, ia pakon hasomanni, ganup rap pakon rumah tanggani, anjaha si Daud rap pakon parinangonni na dua ai, si Ahinoam na hun Jesreel, pakon si Abigail, parinangon ni si Nabal hinan, halak Karmel ondi.

⁴ Jadi dob ibotoh si Saul, na dob maporus si Daud hu Gat, gabe seng be inunut mangindahisi.

⁵ Sahali nini si Daud ma dompak si Akis, “Sapala domma jumpahan idop ni uhur ahu i lobeimu, mahua bere ham ma sada huta bangku, ase ijai marianan ahu; mase ma pala marianan juakjuakmu rap pakon ham i huta pamatang?”

⁶ Jadi ibere si Akis ma bani sadari ni ai huta Ziklag. Halani ai ronsi sadari on raja hun Juda do simada huta Ziklag.

⁷ Ia dokah ni si Daud marianan i tanoh ni halak Palistim satahun ompat bulan do.

⁸ Dob ai tangkog ma si Daud ampa hasoman-hasomanni, idorab sidea ma halak Gesur, Girsi pakon halak Amalek, ai sidea do siiani tanoh ai hun bani sapari nari, hun Sur das hu tanoh Masir.

⁹ Jadi italuhon si Daud ma tanoh ai, seng ipalopas age sahalak pe na manggoluh, dalahi age naboru, tapi itaban do biri-biri, lombu, halode, unta pakon hiou, dob ai mulak ma ia hu bani si Akis.

¹⁰ Isungkun si Akis ma ia, “Hunja nasiam martaban sadari on?” Nini si Daud ma mambalosi, “Hun dangsina ni tanoh Juda, atap: Hun dangsina ni tanoh ni halak Jeremeli, atap: Hun dangsina ni tanoh ni halak Keni.”

¹¹ Tapi lang ipalopas si Daud manggoluh dalahi atap naboru boanon hu Gat, ai nini uhurni, “Ase ulang iparpatugah sidea pasal hanami, ‘Sonon do pambahenan ni si Daud.’” Ase sonai ma pambahenan ni si Daud sadokah marianan ia i tanoh ni halak Palistim.

¹² Tenger do uhur ni si Akis bani si Daud, ai nini uhurni, “Domma magigi uhur ni bangsa ni halak Israel mangidahsi, halani ai gabe juakjuakku ma ia lalab.”

Si Saul pakon Paniaran Naboru na i Endor

28¹ Bani panorang ai ipatumpu halak Palistim ma balani laho marporang dompak halak Israel. Jadi nini si Akis ma dompak si Daud, “Botoh ma, ham do hasomanku bingkat laho marporang, ham rap pakon hasomanmu.”

² Nini si Daud ma mambalosi si Akis, “Dear, ase ibotoh ham naha gogoh ni juakjuakmu on.” Jadi nini si Akis ma dompak si Daud, “Antong ham ma pangawalhu sadokah manggoluh ahu.”

³ Tapi domma matei anggo si Samuel, domma itangisi ganup halak Israel ia, anjaha itanom i Rama, i hutani. Domma ipalaho si Saul paniaran pakon partondung hun tanohni ai.

⁴ Domma martumpu halak Palistim, anjaha marsaran sidea i Sunem; si Saul pe domma ipatumpu ganup halak Israel, anjaha marsaran i Gilboa.

⁵ Jadi dob iidah si Saul bala ni halak Palistim ai mabiar ma ia, gobir tumang uhurni.

⁶ Isungkun si Saul ma Jahowa, tapi seng ibalosi Jahowa ia, barang marhitei nipi barang marhitei urim, barang marhitei nabi pe.

⁷ Dob ai nini si Saul ma dompak juakjuakni, “Pindahi nasiam ma bangku paniaran naboru, ase laho ahu hu bani laho manungkunsi.” Nini juakjuakni ai ma

mambalosi, “Tonggor ma, andai i Endor adong do sada halak paniaran naboru.”

⁸ Dob ai ilagei ma rupani, ipakei ma hiou na legan; laho ma ia rap pakon hasomanni dua halak, mangindahisi; das ma sidea borngin-borngin hu bani naboru ai. Jadi nini ma, “Patugah ma na sasintongni bangku marhitei na siar bamu, anjaha pahuta ham ma bangku halak na sihol patugahonku bamu.”

⁹ Nini naboru ai ma hu bani, “Tonggor ma, ibotoh ham do na binahen ni si Saul, ai ma sonaha paniapkonni bani halak paniaran pakon partondung hun nagori on. Mase ma sihol sidingonmu ahu, ase matei ahu?”

¹⁰ Mintor marbija ma si Saul marhitei goran ni Jahowa, nini ma, “Songon sintongni manggoluh Jahowa, seng marsalah ham ibagas pahara on!”

¹¹ Dob ai nini naboru ai ma, “Ise ma pahutaonku bamu?” Nini ma, “Pahuta ma si Samuel bangku!”

¹² Dob ibogei naboru ai goran Samuel ai, gogoh ma ia mandoruh anjaha nini naboru ai ma hu bani si Saul, “Mase ma paoto-otoonmu ahu? Si Saul do hape ham.”

¹³ Nini raja ai ma hu bani, “Ulang ham mabiar! Aha dong iidah ham?” Nini naboru ai ma dompak si Saul, “Huidah sada tonduy tangkog hun tanoh.”

¹⁴ Nini si Saul ma hu bani, “Sonaha rupani?” Nini naboru ai ma, “Adong sada halak na matua tangkog

hu atas, marbaju-baju mantel do ia.” Jadi ibotoh si Saul ma, si Samuel do ai. Mintor marsombah ma ia, bohini das hu tanoh.

¹⁵ Nini si Samuel ma dompak si Saul, “Mase ma isunsahi ham ahu, marhitei na ipahuta ham ahu?” Nini si Saul ma mambalosi, “Sosak tumang do ahu; iporang halak Palistim do ahu, anjaha itadingkon Naibata do ahu, seng be ibalosi ahu barang marhitei nabi atap nipi pe, halani ai do ase hudilo ham, ase ipabotohkon ham bangku atap aha do sibahenonku.”

¹⁶ Dob ai nini si Samuel ma, “Tapi mase ma ahu sungkunonmu, anggo Jahowa pe domma sirang hun bamu anjaha gabe imbangmu?

¹⁷ Domma ibahen Jahowa bamu songon na dob hinatahon-Ni marhitei ahu; domma ibuat Jahowa hun bamu harajaon ai, anjaha iberehon hu bani halak na legan, hu bani si Daud.

¹⁸ Halani na so itangihon ham hata ni Jahowa, anjaha seng idaskon ham hu bani halak Amalek pargajag ni uhur-Ni, ai ma halani ase sonin pambahenan ni Jahowa bamu sadari on.

¹⁹ Ambahni ai ondskonon ni Jahowa ma halak Israel pakon ham hu tangan ni halak Palistim; patar ma parayakonmu ahu pakon anakmu. Bala ni halak Israel pe ondskonon ni Jahowa ma hubagas tangan ni halak Palistim.”

²⁰ Jadi mintor tompas ma si Saul langkop hu tanoh, mabiar tumang ia halani hata ni si Samuel ai; anjaha seng margogoh ia, halani seng mangan ia layur sadari saborngin.

²¹ Mintor roh ma naboru ai hu bani si Saul, anjaha iidah ma rusak tumang ia; nini ma hu bani, “Tonggor ma, ibalosi jabolonmu naboru on do ham; huasamkon do hosahku, anjaha hubalosi do hatamu na hinatahonmu bangku.

²² Halani ai tangihon ham ma hata ni jabolonmu naboru on; hupasirsir ma otik ruti bamu; pangan ham ma, ase adong gogohmu laho mannunuti dalanmu.”

²³ Tapi manjua do ia, nini ma, “Seng sir uhurhu mangan!” Tapi halani sai ielek-elek juakjuakni pakon naboru ai ia, gabe ibalosi ma sidea. Jongjong ma ia dob ai hundul ma ia hu podom-podoman.

²⁴ Adong do bani naboru ai sada anak ni lombu na pinamombur i rumahni, podas ma isayat ai; ibuat ma nitak, iagu ma ai anjaha imasak ma ruti na so niigaran hunjai.

²⁵ Dob ai iidangkon ma ai hulobei ni si Saul pakon juakjuakni ai; jadi mangan ma sidea. Dob ai bingkat ma sidea mardalan bani na saborngin ai.

**Seng Saud Dihut si Daud
Marporang dompak Halak Israel**

29 ¹ Ipatumpu halak Palistim ma balani haganup i Apek; anjaha halak Israel marsaran do i lambung bah tubuh na i Jesreel.

² Sanggah na mamontas puanglima ni halak Palistim mambobahon balani marsasaratus pakon marsasaribu, anjaha si Daud pe pakon hasomanni mardalan do hampit pudi rap pakon si Akis,

³ jadi nini raja-raja ni halak Palistim ai ma, “Aha do horja ni halak Heber on ijon?” Jadi nini si Akis ma dompak raja-raja ni halak Palistim ai, “Andai do si Daud, juakjuak ni si Saul, raja ni halak Israel; domma hira-hira dua tahun ia i lambungku, anjaha seng dong salah jumpah bani sadokah ia rap pakon ahu ronsi sadari on.”

⁴ Tapi manggila ma raja-raja ni halak Palistim bani, nini sidea ma bani, “Suruh ham ma halak ai mulak, ase mulak ia bani ianan na dob tinuduhkonmu bani. Ulang ma dihut ia rap pakon hita marporang, ase ulang ia jadi imbang sanggah masa porang. Halani marhitei aha ia boi mardear pakon tuanni, anggo lang marhitei ulu ni halak na rap pakon hita on?”

⁵ Ai lang si Daud do na pinuji ni halak marhitei doding-doding, ‘Marribu-ribu do italuhon si Saul, tapi marlaksa-laksa do italuhon si Daud!’”

⁶ Dob ai idilo si Akis ma si Daud, nini ma hu bani, “Songon sintongni manggoluh Jahowa, na bonar maruhur do ho, anjaha dear do huahap anggo dihut ho rap pakon bala on, halani seng dong jumpah ahu na lang bujur ibagas ho, singgan ni parrohmu hu bangku ronsi sadari on. Tapi seng dear uhur ni raja-raja ni halak Palistim mangidah ho.

⁷ Halani ai mulak ma ho, mulak ma ho mardamei-damei, ase ulang seda uhur ni raja-raja ni halak Palistim ibahen ho.”

⁸ Nini si Daud ma dompak si Akis, “Aha dong na hubahen? Aha dong na salah iidah ham bani juakjuakmu, singgan ni dob roh ahu hu lobeimu ronsi sadari on, mambahen na so bulih dihut ahu marporang dompak munsuh ni tuanku?”

⁹ Jadi nini si Akis ma mambalosi si Daud, “Hubotoh do, na bujur do ho bangku, songon malekat ni Naibata. Tapi domma ihatahon raja-raja ni halak Palistim, ‘Seng bulih ia rapkon hita dihut marporang.’

¹⁰ Halani ai patar girah ma ho laho pakon rayat ni tuanmu, na dihut rap pakon ho hujon; patar siangkorsi ari, laho ma hanima.”

¹¹ Jadi patarni ai girah sogod, bingkak ma si Daud rap pakon hasomanni, mulak hu tanoh ni halak Palistim. Tapi halak Palistim laho ma dompak Jesreel.

Parporangan ni si Daud dompak Halak Amalek

30¹Jadi bani ari patoluhon, sanggah das si Daud pakon hasomanni hu Ziklag, domma hape imasuki halak Amalek tanoh Dangsina pakon Ziklag. Domma italuhon sidea Ziklag anjaha domma mosog ibahen ai.

²Itaban sidea do naboru ganup, ganup na ibagas huta ai, na etek pakon na bangga; ise pe lang na ibunuh, tapi iluahon do sidea, anjaha inunuti sidea ma dalanni.

³Daskonsi si Daud pakon hasomanni ai hu huta ai, domma mosog hapeni ganup anjaha parinangon pakon anak ampa boru ni sidea domma iboan halak.

⁴Jadi ipagogoh si Daud pakon hasomanni ai ma sorani tangis-tangis, pala seng dong be gogoh ni sidea tangis.

⁵Parinangon ni si Daud sidua halak ai pe iboan do, ai ma si Ahinoam na hun Jesreel pakon si Abigail, parinangon ni si Nabal na hun Karmel hinan.

⁶Susah tumang do uhur ni si Daud, halani domma adong sahap ni halak laho manggijikisi bani batu, halani borit ni uhur ni halak ganup, marhitei na tarboan ai anakni pakon boruni. Tapi ipatenger si Daud ma uhurni bani Jahowa, Naibatani ai.

⁷Nini si Daud ma dompak Malim Abyatar, anak ni si Ahimelek ai, “Boan ma baju epod in bangku!”

Mintor iboan si Abyatar ma baju epod ai hu bani si Daud.

⁸ Jadi isungkun si Daud ma Jahowa, nini ma, “Dear do pardakdakonku panamun ai? Jumpah ahu ope sidea?” Nini Jahowa ma mambalosisi, “Pardakdak ma, sai jumpah ho ope anjaha tarpaluah ho ope halak ai.”

⁹ Mintor bingkat ma si Daud rap pakon sionom ratus halak hasomanni ai, das ma sidea i Bah Besor. Tading ma deba ijai, dua ratus halak.

¹⁰ Rap pakon siompat ratus halak ai iayak si Daud ma panamun ai; tapi sidua ratus halak ai, na dob lojatu laho mandipari bah Besor ai, tading ma.

¹¹ Dob ai jumpah ma sada halak Masir i ladang, lanjar iboan sidea ma ia hu bani si Daud. Ibere sidea ma bani ruti panganonni pakon bah inumonni;

¹² ambahni ai sansayat ruti na maragu buah ara pakon dua kibil anggur. Jadi dob mangan ia, mulak ma gogohni, ai seng mangan ruti pakon minum bah ia tolu ari tolu borngin dokahni.

¹³ Dob ai nini si Daud ma hu bani, “Ise do tuanmu? Anjaha parja do ho?” Nini ma mambalosi, “Halak Masir do ahu, jabolon ni sada halak Amalek. Itadingkon tuanku do ahu, halani boritan ahu tolu ari na salpu.

¹⁴ Na manrampas do hanami hu tanoh ni halak Kereti hampit Dangsina, sonai homa tanoh Juda

pakon tanoh ni si Kaleb hampit Dangsinan, anjaha isurbuy hanami do huta Ziklag.”

¹⁵ Dob ai nini si Daud ma hu bani, “Ra do ho mangarahkon hanami hu bani panamun ai?” Nini ma mambalosi, “Anggo ra ham marbija marhitei goran ni Naibata, paboa na so bunuhonmu ahu, anjaha na so ondokononmu ahu bani tuanku, ra do ahu manaruhkon ham hu bani panamun ai.”

¹⁶ Jadi iarahkon ma ia hujai; domma hape merap sidea haganup bani ianan ai, mangan minum anjaha manortori, halani taban-taban na buei ai, na nirampas ni sidea hun tanoh ni halak Palistim pakon tanoh Juda.

¹⁷ Dob ai idorab si Daud ma sidea mulai siangkonsi ari das ronsi bodari; sahalak pe lang dong na maluah hun bani sidea sobali ni ompat ratus halak anak garama na mangajak unta laho maporus.

¹⁸ Ipaluah si Daud ma haganup na binuat ni halak Amalek ai; ipaluah ma homa parinangonni na dua ai.

¹⁹ Seng dong na magou hun bani sidea, na etek barang na magodang, anak barang boru, taban-taban barang atap aha pe, na binuat ni munsuh ai; haganup do mulak iboan si Daud.

²⁰ Dob ai ibuat si Daud ma biri-biri pakon lembu haganup, ialai-alai sidea ma ai i lobeini, anjaha nini ma, “On ma taban-taban ni si Daud.”

²¹ Jadi das ma si Daud hu bani sidua ratus halak na malojatu ondi mangirikkon si Daud, na tading i Bah Besor; jadi luar ma sidea laho manjumpahkon si Daud pakon hasomanni na rap pakonsi ai. Dob dohor si Daud hu bani halak ai, isungkun ma sidea atap na horas-horas do sidea.

²² Dob ai nini halak na so margagan ampa halak na jahat na dihut mangirikkon si Daud ai ma, “Halani na so dihut ai sidea pakon hita, seng bulih bereon bani sidea hun bani taban-taban na binuatta in, sobali ni parinangonni pakon anakni; bulih do buaton ni sidea ai, anjaha laho sidea mannunut dalanni.”

²³ Dob ai nini si Daud ma, “Ulang ma sonai bahen nasiam, o saninangku, pasal ugas-ugas ai na dob binere ni Jahowa hu banta. Ia do na manramotkon hita, anjaha iondoskon do panamun ai hubagas tanganta, na roh mangimbang hita.

²⁴ Ise ma na ra manangihon nasiam ibagas parhara on? Songon rupei ni halak na tuad hu parporangan, maningon sonai do rupei ni halak na tading manjaga parugas; maningon dos do bagian ni ganup.”

²⁵ Jadi olat ni ari ai nari hu atas gabe uhum pakon aturan ma ai itotapkon bani halak Israel ronsi sadari on.

²⁶ Dob das si Daud i Ziklag, ipantongoskon ma hun bani taban-taban ai hu bani pangintuai-pangintuai na i tanoh Juda, na marhuan-huan pakonsi, nini ma,

“On ma sibere-bere bani nasiam hun bani taban-taban, na dapot hun bani munsuh ni Jahowa.”

²⁷ Ai ma na i Betel, na i Ramat hampit dangsina, na i Jatir,

²⁸ na i Aroer, na i Sipmot, na i Estemos,

²⁹ na i Karmel, na i huta ni halak Jerameli, na i huta ni halak Keni,

³⁰ na i Horma, na i Bor-Asan, na i Atak,

³¹ na i Hebron pakon na bani ganup ianan, na binontas ni si Daud rap pakon hasomanni ai.

Parmatei ni si Saul

31 ¹ Jadi marporang ma halak Palistim pakon halak Israel; maporus ma halak Israel hun lobei-lobei ni halak Palistim, anjaha radag ma sidea i atas ni Dolog Gilboa.

² Iasak halak Palistim ma si Saul pakon anakni ai, anjaha ibunuh sidea ma si Jonatan, si Abinadab pakon si Malkisua, anak ni si Saul ai.

³ Jobu tumang do parporangan ai inggot ni si Saul, anjaha domma torang ia taridah bani halak siparpanah; jadi luha parah ma ia ibahen parpanah ai.

⁴ Jadi nini si Saul ma dompak na mamboan sinjatani, “Sintak ma podangmu, tobak ma ahu, ase ulang roh halak na so marsunat ai manobak anjaha pahirihon ahu.” Tapi seng ra na mamboan sinjatani ai, halani mabiar tumang do ia. Dob ai ibuat si Saul ma

podangni ai, anjaha ijombahon ma dirini hu bani podang ai.

⁵ Dob iidah siboan sinjatani ai na dob matei si Saul ai, ia pe idabuhkon ma dirini hu bani podangni ai, jadi matei ma ia pakonsi.

⁶ Sonai ma parmateri ni si Saul pakon anakni na tolu ai pakon juakjuakni siboan sinjatani ai ampa haganup hasomanni bani na sadari ai.

⁷ Jadi dob iidah halak Israel, na marianan i dipar ni habungan ai pakon na i dipar ni Jordan, na dob maporus halak Israel, anjaha na dob matei si Saul pakon anakni ai, itadingkon sidea ma huta ni sidea laho maporus. Dob ai roh ma halak Palistim marianan ijai.

⁸ Patarni ai, sanggah na roh halak Palistim ai mangayob ugas-ugas ni na matei ai, jumpah sidea ma si Saul pakon anakni na tolu ai ragei i atas ni Dolog Gilboa.

⁹ Ibuat sidea ma uluni, anjaha itanggali ma sinjatani, dob ai isuruh sidea ma halak hu sab Tanoh Palistim, laho mambaritahon hamonangan ai hu Rumah ni Naibata ni sidea pakon hu bani bangsani haganup.

¹⁰ Itibalhon sidea ma sinjatani ibagas rumah ni Astarot; tapi anggo bangkeini igantungkon sidea ma bani tembok ni huta Betsan.

¹¹ Tapi dob ibogei parhuta Jabes na i Gilead barita pasal na binahen ni halak Palistim ai hu bani si Saul,

¹² mintor bingkat ma ganup halak na garang, mardalan ma sidea layur sabornginni ai, anjaha ipaturun sidea ma bangkei ni si Saul pakon bangkei ni anakni ai hun tembok ni huta Betsan; dob ai mulak ma sidea hu Jabes anjaha irasog ma ijai.

¹³ Dob ai ibuat sidea ma holi-holini, itanom ma ai i toruh ni jabi-jabi na i Jabes, anjaha marpuasa ma sidea pitu ari dokahni.

2 Samuel

Ijalo si Daud Barita Pasal Parmatei ni si Saul ampa si Jonatan

1 ¹Jadi dob matei si Saul, anjaha si Daud pe domma mulak hun bani na mantaluhon halak Amalek, anjaha dua ari ma ia i Ziklag,

²jadi bani ari patoluhon, tonggor ma, roh ma sada halak hun bani parsaranan ni si Saul, marigat hiouni anjaha tanoh i atas ni uluni. Daskonsi ia hu bani si Daud, manrogop ma ia anjaha marsombah.

³Nini si Daud ma hu bani, “Na roh hunja do ho?” Nini ma hu bani, “Na maporus do ahu hun parsaranan ni halak Israel.”

⁴Dob ai nini si Daud ma hu bani, “Aha do na masa? Patugah ma bangku.” Nini halak ai ma, “Domma maporus bangsa ai hun parporangan, buei do hun bani bangsa ai na matei, anjaha si Saul pakon anakni si Jonatan domma matei.”

⁵Nini si Daud ma hu bani anak parana, na mamboan barita ai hu bani, “Sonaha pambotohmu, na dob matei si Saul pakon anakni si Jonatan?”

⁶Jadi nini anak garama, siboan barita ai ma hu bani, “Tudu ahu i Dolog Gilboa; mangunsandei do si Saul

bani tanjani, anjaha manrohan gareta porang pakon siparhuda mangasaksi.

⁷ Marhusor ma ia, iidah ma ahu, dob ai idilo ma ahu. Ningku ma mambalosi, 'Ijon do ahu!'

⁸ Nini ma hu bangku, 'Ai ise do ho?' Ningku ma bani, 'Halak Amalek do ahu.'

⁹ Dob ai nini ma hu bangku, 'Roh ma ho hujon, tobak ma ahu, ai domma margonggong namin huahap, tapi ibagas ope hosahku.'

¹⁰ Jadi hupadohor ma hu bani, anjaha hubunuh ma ia, halani tangkas do hubotoh, seng anjai manggoluh be ia anggo domma pala runggang; dob ai hubuat ma sortali na i uluni ai pakon golang-golang na bani tanganni, anjaha huboan do ai nuan bani tuannami."

¹¹ Dob ai ijolom si Daud ma bajuni, lanjar irigati ma ai; sonai do homa ibahen halak na rap pakonsi ai.

¹² Dob ai tangis-tangis ma sidea, anjaha marpuasa ronsi bodari, halani si Saul pakon si Jonatan, anakni ai, pakon halani bangsa ni Jahowa ampa halak Israel na radag ibahen podang.

¹³ Dob ai nini si Daud ma hu bani anak parana na mamboan barita ai bani, "Hunja do ho?" Nini ma mambalosi, "Anak ni sada halak panginsolat do ahu, halak Amalek."

¹⁴ Nini si Daud ma hu bani, "Mase ma lang mabiar ho mardas tangan hu bani na mininakan ni Jahowa?"

¹⁵ Dob ai idilo si Daud ma sada hun bani anak garama, nini ma, “Roh ma ho, bunuh ma ia!” Jadi ibunuh ma ia.

¹⁶ Tapi nini si Daud do hu bani, “Marsapata hubam ma darohmu; pamanganmu do gabe saksi dompak ho, ai nim do, ‘Ahu do mamunuh na mininakan ni Jahowa.’”

Tangis-tangis ni si Daud halani si Saul pakon si Jonatan

¹⁷ Dob ai itangiskon si Daud ma tangis-tangis on pasal si Saul pakon si Jonatan, anakni ai,

¹⁸ anjaha ihatahon maningon ajarhononkon do ai hu bani halak Juda; tonggor ma, tarsurat do ai ibagas buku ni halak na bonar.

¹⁹ Domma matei tarpantom hamuliaonmu,
o Israel, tarpantom i atas buntu-buntu.
Sonaha do parmateri ni halak na borani ai?

²⁰ Ulang patugah in i Gat, ulang mungmungkon in bani dalan-dalan i Askalon, ase ulang marmegah-megah boru ni halak Palistim, ase ulang marsurak-surak boru ni halak na so marsunat ai.

²¹ Nasiam Dolog-dolog Gilboa! Ulang be namin turun namur barang udan bani nasiam, nasiam juma panggalangan. Ai ijin do mambuk gantar ni puanglima, gantar ni si Saul, senjata ni halak na mininakan.

- ²² Na so ongg a mulak do namin panah ni si Jonatan hun bani daroh ni halak na timbul, hun bani taboh-taboh ni puanglima, anjaha podang ni Saul pe namin seng mulak, anggo lang dapotan.
- ²³ Ham Saul ampa Jonatan, na hinaholongan anjaha haudungan ni uhur! Sanggah manggoluh barang matei seng marsirang sidea; dorasan do sidea hun bani manuk-manuk nanggordaha, anjaha gogohan do sidea hun bani singa.
- ²⁴ Nasiam boru Israel tangisi nasiam ma si Saul, na mangkioui nasiam jenges bani sitora sigenger, na mambahen pakeian nasiam marjagar-jagar hun bani omas.
- ²⁵ Sonaha do parmateri ni puanglima i tongah-tongah ni parporangan! Si Jonatan matei tarpantom i atas buntu-buntu.
- ²⁶ Pusok do uhurhu halani ham, o Jonatan saninangku, holong tumang do ham bangku. Tobunan do holong ni uhurmu bangku hun bani holong ni naboru.
- ²⁷ Sonaha do parmateri ni puanglima pakon parmasab ni sinjata porang!

Si Daud gabe Raja ni Halak Juda

2 ¹ Jadi dob salpu ai, isungkun si Daud ma Jahowa, nini ma, “Bulih do ahu tangkog bani sada huta

i Juda?” Dob ai nini Jahowa ma hu bani, “Laho ma ho!” Nini si Daud ma, “Hu huta ja do ahu laho?” Nini ma mambalosi, “Hu Hebron.”

²Jadi tangkog ma si Daud hujai rap pakon parinangonni na dua halak ai, si Ahinoam na hun Jesreel, pakon si Abigail, parinangon ni si Nabal hinan, na hun Karmel.

³Iboan si Daud ma homa hasomanni na rap pakonsi ai, ganup rap pakon rumah tanggani bei, jadi marianan ma sidea i dusun-dusun ni Hebron.

⁴Dob ai roh ma halak Juda, iminaki sidea ma ijai si Daud gabe raja ni marga Juda. Dob ipatugah sidea hu bani si Daud, “Halak Jabes na i Gilead do na mananom si Saul.”

⁵Isuruh si Daud ma suruhanni hu bani halak Jabes na i Gilead, mangkatahon hu bani sidea, “Sai dapotan pasu-pasu ma nasiam halani idop ni uhur, na dob binahen nasiam hu bani si Saul, tuan nasiam, anjaha itanom nasiam ia.

⁶Sai ibere Jahowa ma idop ni uhur-Ni pakon habonaron-Ni bani nasiam; anjaha ahu pe bahenonku do na madear bani nasiam, halani pambahenan nasiam ai.

⁷Antong patotap nasiam ma uhur nasiam, anjaha patuduhkon nasiam ma haboranion nasiam; ia si Saul raja nasiam ai domma matei, anjaha domma iminaki halak Juda ahu gabe raja ni sidea.”

Si Daud pakon si Isboset Marsiporangan

⁸ Tapi roh ma si Abner, anak ni si Ner, pambobai ni bala ni si Saul, ibuat ma si Isboset, anak ni si Saul, anjaha iboan ma ia hu Mahanaim;

⁹ anjaha irajahon ma ia manggomgomi Jesreel, Efraim, Benjamin pakon ganup Israel.

¹⁰ Ompat puluh tahun do umur ni si Isboset, anak ni si Saul ai, sanggah na bangkit ai ia manggomgom Israel, anjaha dua tahun do ia manrajai; pitah marga Juda do na mangirikkon si Daud.

¹¹ Ia dokah ni si Daud raja i Hebron manggomgom marga Juda pitu tahun onom bulan do.

¹² Bingkat ma si Abner, anak ni si Ner rap pakon juakjuak ni si Isboset, hun Mahanaim laho hu Gibeon.

¹³ Bingkat ma homa si Joab, anak ni si Seruya rap pakon juakjuak ni si Daud, gabe pajumpah ma sidea i bongbongan Gibeon; jadi marsaran ma sidea, na sada hampit lopah on na sada nari hampit lopah na sada nari ni bongbongan ai.

¹⁴ Nini si Abner ma dompak si Joab, "Mahua ma jongjong bei anak parana in anjaha marsilajouan sidea i lobeita!" Nini si Joab ma, "Dear!"

¹⁵ Dob ai jongjong bei ma sidea, bilanganni sapuluh dua halak Benjamin hun bani si Isboset, anak ni si Saul, anjaha sapuluh dua halak hun bani si Daud.

¹⁶ Dob ai ganup ma marsitangkap ulu ni imbangni, anjaha marsitobakkon podangni hu bani tonton ni imbangni; jadi rap matei dabuh ma sidea. Halani ai do ase igoran ianan ai, na dohor hu Gibeon ai, Helkat-Hasurim (*ladang pisou*).

¹⁷ Jobu tumang do parporangan ai sadari ni ai; jadi talu ma si Abner pakon halak Israel ibahen juakjuak ni si Daud.

¹⁸ Adong do tolu anak ni si Seruya ijai, ai ma si Joab, si Abisai pakon si Asahel, na lingkak mardalan songon balua na i ladang.

¹⁹ Jadi sai ipardakdak si Asahel ai do si Abner, seng ra ia manilah hu siamun barang hu sambilou, sai torus do ipardakdak si Abner.

²⁰ Mangkawah ma si Abner dompak pudi, dob ai nini ma, “Ai lang ham do in Asahel?” Nini ma mambalosi, “Ahu ma da!”

²¹ Dob ai nini si Abner ma hu bani, “Manilah ma ham hu siamun barang hu sambilou anjaha tangkap ma sada hun bani anak parana in, anjaha buat ma sinjatani ai!” Tapi seng ra si Asahel manlembang hun pudi ni.

²² Iulaki si Abner ma use marsahap hu bani si Asahel, “Manlembang ma ham hun pudingku! Mase ma maningon bunuhonku ham tompas hu tanoh? Sonaha pangkawahkonku bani si Joab saninamu ai?”

²³ Tapi manjua do ia laho manlembang, halani ai itobakkon si Abner ma ujung ni tanjani ai hu boltokni, pala tolpus; jomba ma ia ijai, lanjar matei. Anjaha ganup halak na das bani parjomba pakon parmataan ni si Asahel ai marsaran ma.

²⁴ Tapi sai inunut si Joab pakon si Abisai do mangayak si Abner ai; anjaha sanggah na laho sundut mata ni ari, das ma sidea hu buntu-buntu Amma, na patontang pakon Gia, bani dalan na laho hu halimisan Gibeon.

²⁵ Dob ai martumpu ma halak Benjamin mangirikkon si Abner, gabe sada hulanan, anjaha jongjong ma sidea bani sada buntu-buntu.

²⁶ Dob ai nini si Abner ma dompak si Joab, "Sai nunuton ni podang in ope manraseihon? Ai lang ibotoh ham paet do hadobanni in? Sadia dokah nari, ase parentahkononmu bani bangsa in maronti hun bani na mardakdak saninani?"

²⁷ Dob ai nini si Joab ma, "Songon sintongni manggoluh Jahowa, ambit lang ihatahon ham sonai, das ronsi patar seng maronti halak na mabuei in hun bani na mardakdak saninani."

²⁸ Jadi isompul si Joab ma tarompet, gabe maronti ma bangsa ai ganupan, seng be ipardakdak halak Israel, seng iporang be.

²⁹ Ia si Abner pakon hasomanni ai mardalan ma sidea torus sabornginni ai manlopusi hanopan ai;

idipari sidea ma Bah Jordan, ibontas ma habungan Biteron, dob ai das ma sidea hu Mahanaim.

³⁰ Mulak ma si Joab hun bani na mardakdak si Abner; dob ipatumpu bangsa ai ganup, moru ma hun bani juakjuak ni si Daud sapuluh siah halak ambah ni si Asahel.

³¹ Tapi adong do tolu ratus onom puluh halak ibunuh juakjuak ni si Daud hun bani halak Benjamin pakon hasoman ni si Abner.

³² Iusung sidea ma si Asahel anjaha itanom ma ia i tanoman ni bapani i Betlehem. Dob ai mardalan ma si Joab pakon hasomanni ai torus sabornginni ai; siangkonsi ari das ma sidea i Hebron.

3¹ Dokah do marnunut porang ai i tongah-tongah ni ginompar ni si Saul pakon ginompar ni si Daud; lambin dokah lambin gogohni ma si Daud, tapi lambin galekni do anggo ginompar ni si Saul.

Anak ni si Daud

² Sanggah i Hebron si Daud, tubuh ma piga-piga anak bani: Bunga tubuhn si Ammon, na pinupus ni si Ahinoam, na hun Jesreel;

³ anakni paduahon si Kileab, na pinupus ni si Abigail, parinangon ni si Nabal hinan, na hun Karmel; na patoluhon si Absalom, na pinupus ni si Maaka, boru ni si Talmai, raja hun Gesur;

⁴ anakni paompatkon si Adonia, na pinupus ni si Hagit; anakni na palimahon si Sepatya, na pinupus ni si Abital;

⁵ anakni na paonomkon si Jitream, na pinupus ni si Eglā, parinangon ni si Daud. Ai ma anak, na itubuhkon bani si Daud i Hebron.

Partinggilan ni si Abner pakon si Isboset

⁶ Sadokah masa porang i tongah-tongah ni ginompar ni si Saul pakon ginompar ni si Daud, lambin markuasa ma si Abner i rumah ni si Saul.

⁷ Adong ma sada parinangon ni si Saul, na margoran si Rispa, boru ni si Aya. Sahali nini si Isboset ma dompak si Abner, “Mase iparayak ham parinangon ni bapa?”

⁸ Jadi manringis tumang ma uhur ni Abner halani hata ni si Isboset ai, nini ma, “Ulu ni baliang ni Juda do ahu? Das bani sadari on bujur do pambahenku hu rumah ni si Saul, bapamu ondi, hu bani saninani pakon hu bani huan-huanni, anjaha seng huondoskon ham hu tangan ni si Daud, hape pag do ham sadari on manalahkon ahu halani panlangkahku dompak naboru ai?”

⁹ Sonon ma bahenon ni Naibata hu bani si Abner, age lobih tene ibahen hu bani, anggo seng hubahen songon na binulawankon ni Jahowa hu bani si Daud,

¹⁰ ai ma paminsahkon harajaon ai hun bani rumah ni si Saul, anjaha pajonamkon hotak harajaon ni

si Daud i Israel pakon i Juda, singgan ni Dan ronsi Berseba.

¹¹ Sangkababah hata pe lang ibalosi si Isboset ai si Abner, halani biar ni uhurni mangidahsi.

¹² Dob ai isuruh si Abner ma suruhanni marayak si Daud, mangkatahon bani, “Ise do simada tanoh in? Marpadan ma ham pakon ahu, sai na hasomanan ni tanganku do ham laho mangarahkon ganup Israel bamu.”

¹³ Jadi nini ma, “Dear! Ra do ahu marpadan pakon ham; tapi dong sada na huparsinta hun bamu, ai ma na so bulih idahonmu bohingku, anggo seng iboan ham lobei si Mikal, boru ni si Saul ondi, anggo sihol ham roh mangidah bohingku.”

¹⁴ Ambahni ai isuruh si Daud ma suruhanni marayak si Isboset, anak ni si Saul ondi, mangkatahon bani, “Bere ma hu bangku parinangonku si Mikal in, na hubuat bahen parinangonku marhitei saratus sibur-sibur ni halak Palistim.”

¹⁵ Dob ai isuruh si Isboset ma na mangalop naboru ai hun bani paramangonni, ai ma si Paltiel, anak ni si Lais.

¹⁶ Lanjar itaruhkon paramangonni ai do ia, anjaha inunut tangis i pudi ni das hu Bahurim. Dob ai nini si Abner ma hu bani, “Laho ma ho mulak!” Jadi mulak ma ia.

¹⁷ Dob ai manriah ma si Abner pakon pangintuai-pangintuai ni halak Israel, nini ma, “Domma dokah iparsinta nasiam si Daud gabe raja nasiam.

¹⁸ Antong pasaud nasiam ma ai sonari, ai domma ihatahon Jahowa hu bani si Daud, ‘Maningon marhitei tangan ni si Daud, jabolon-Kin, paluahon-Ku bangsang-Ku halak Israel hun tangan ni halak Palistim pakon hu tangan ni ganup munsuh ni sidea.’”

¹⁹ Sonai homa do ihatahon si Abner hu bani halak Benjamin. Dob ai laho ma si Abner hu bani si Daud i Hebron, laho mangkatahon hu bani barang aha na dob pinutuskon ni halak Israel pakon ganup ginompar ni si Benjamin.

²⁰ Jadi dob das si Abner hulobei ni si Daud i Hebron odor pakon dua puluh halak hasomanni, ibahen si Daud ma ambangan ni si Abner pakon hasomanni ai.

²¹ Dob ai nini si Abner ma dompak si Daud, “Laho ma ahu sihol patumpuhon bani tuanku, raja in, haganup halak Israel, ase marpadan sidea pakon tuanku, ase ham ma manggomgom haganup romban hu bani rosuh ni uhurmu.” Jadi ihatahon si Daud ma laho si Abner, gabe laho ma ia ibagas damei.

Ibunuh si Joab si Abner

²² Tudu ijia roh ma juakjuak ni si Daud pakon si Joab hun partabanan, anjaha buei do iboan sidea taban-taban. Tapi lang be i lambung ni si Daud i Hebron si Abner ai, ai domma ihatahon si Daud ia mulak mardamei-damei.

²³ Jadi dob das si Joab rap pakon ganup bala hasomanni ai, dong ma na patugahkon hu bani si Joab sonon, 'Roh do si Abner, anak ni si Ner, mangadap raja in anjaha ibere do ia use laho ibagas damei.'

²⁴ Dob ai iparayak si Joab ma raja ai, nini ma, "Aha do na binahenmu in? Tonggor ma, roh do hape si Abner hu lobeimu; mase ma ipaturut ham ia laho ibagas damei?"

²⁵ Ai lang ibotoh ham do paruhuron ni si Abner, anak ni si Ner ai; ase roh pe ia na sihol mangoto-otoi ham do, sihol mambotoh sagala pambahenanmu do?"

²⁶ Dob ai luar ma si Joab, itadingkon ma raja ai; isuruh ma suruhanni mangayaki si Abner, gabe iboan sidea ma ia mulak hun parigi na i Sira; tapi seng ibagas botoh ni si Daud ai.

²⁷ Jadi dob mulak si Abner hu Hebron, iarahkon si Joab ma ia manirpang hu tongah-tongah ni horbangan ai, ipakulah sihol dong husipkononni padua-dua hape itobak ma ia ijai, hona boltokni,

lanjar matei, laho mambalaskon daroh ni si Asahel saninani ai.

²⁸ Jadi dob ibogei si Daud na masa ai, nini ma, “Seng marsalah ahu pakon harajaonkin i lobei ni Jahowa sadokah ni dokahni pasal daroh ni si Abner, anak ni si Ner ai.

²⁹ Sai marsapata hu bani ulu ni si Joab ma ai pakon hu bani ganup ginompar ni bapani; ulang ma maronti namin hun bani ginompar ni si Joab na rojanon, na gadamon, na tempang martungkot-tungkot, na matei ibuat podang pakon na hurangan sipanganon.”

³⁰ Ase ibunuh si Joab pakon si Abisai, anggini ai pe si Abner, halani na binunuhni ai do si Asahel, anggi ni sidea ai, i Gibeon sanggah marporang.

³¹ Dob ai nini si Daud ma hu bani si Joab pakon hu bani haganup na rap pakonsi ai, “Rigati nasiam ma hiou nasiam bei, anjaha sorungkon nasiam ma hiou guni, anjaha tangis ma nasiam mardalan i lobei ni si Abner!” Raja Daud sandiri pe mardalan do hun pudi ni na mangusung ai.

³² Jadi laho mananom si Abner ai sidea i Hebron, ipagogoh raja ai ma sorani tangis i lambung ni tanoman ni si Abner; tangis do homa halak simbuei ai.

³³ Itangisi raja ai ma si Abner, nini ma, “Mintor songon parmateri ni halak na oto ma parmateri ni si Abner?

³⁴ Seng hona sangkut tanganmu, seng hona bayang naheimu; songon halak na matei ibunuh panamun, sonai do hape parmateimu.” Dob ai tangis ma use simbuei ai halanisi.

³⁵ Dob ai roh ma halak simbuei ai mangelek-elek si Daud ase mangan namin, sanggah siang ope ari; tapi nini si Daud ma marbija, “Sai ibahen Naibata ma sonai hu bangku, age itambahi ope, anggo hupangan ruti barang aha na legan, anggo lape sundut mata ni ari.”

³⁶ Jadi dob iidah halak simbuei ai, dear ma uhur ni sidea pasal ai, rosuh do uhur ni ganup na mabuei ai mangidah ganup na binahen ni raja ai.

³⁷ Jadi mangahap ma haganup halak Israel sadari ni ai, na so ibagas botoh ni raja ai hona bunuh si Abner, anak ni si Ner ai.

³⁸ Dob ai nini raja ai ma hu bani juakjuakni, “Ai lang ibotoh nasiam sada halak pamimpin, na bolon matei sadari on i Israel?

³⁹ Tapi anggo ahu magalektu ope, age pe domma iminaki gabe raja, tapi halak on, anak ni si Seruya, gogohan do sidea hun bangku. Sai ibalaskon Jahowa do hu bani sibahen hajahaton, romban hu bani hajahatonni.”

Matei Tarbunuh si Isboset

4¹ Dob ibogei si Isboset, anak ni si Saul ai, na dob matei si Abner i Hebron, miloh ma hinsah ni uhurni, anjaha tarsonggot ganup halak Israel.

² Tapi adong do dua halak hasoman ni anak ni si Saul ai, ai ma pambobai ni balani; goran ni na sada si Baana, anjaha goran ni na sada nari si Rekab, anak ni si Rimmon, halak Beerot, hun bani marga Benjamin. Masuk hu Benjamin do ihira Beerot ai;

³ na maporus do halak Beerot ai hu Gitaim, lanjar manginsolat sidea ronsi sadari on.

⁴ Ambahni ai adong do bani si Jonatan, anak ni si Saul ai, sada anak, na repat naheini duasi. Lima tahun do umurni sanggah roh barita pasal si Saul ampa si Jonatan ai hun Jesreel. Jadi iangkat na marorotsi ma ia laho maporus, gabe madabuh ma ia lanjar repat. Ia goranni si Mepiboset do.

⁵ Dob ai laho ma na dua anak ni si Rimmon, halak Beerot ai, si Rekab pakon si Baana, gabe masuk ma sidea hira-hira tongah arian hu rumah ni si Isboset, tudu sanggah modom arian ia.

⁶ Jadi masuk ma sidea hu parsitongahan ni rumah ai, ipakulah songon na mangalop gandum. Tonggor ma, adong do sada naboru ijai na mangkoseihon gandum, gabe itobak sidea ma boltokni, gabe boi ma si Rekab pakon si Baana anggini ai masuk torus hu rumah ai.

⁷ Sanggah na masuk ai sidea hubagas rumah ai, tudu modom ia bani podomanni ibagas kamar podomanni, gabe ibunuh sidea ma ia anjaha itampul sidea ma uluni. Iboan sidea ma uluni ai, dob ai laho ma sidea mandalani hanopan ai torus sabornginni ai;

⁸ iboan sidea ma ulu ni si Isboset ai hu bani si Daud i Hebron. Nini sidea ma dompak raja ai, “Andon ma ulu ni si Isboset, anak ni si Saul, imbang-imbangmu ai, na mangindahi hosahmu; Jahowa do na mambalaskon tuannami, raja in sadari on hu bani si Saul pakon hu bani ginomparni.”

⁹ Tapi nini si Daud ma mambalosi si Rekab pakon si Baana anggini ai, anak ni si Rimmon halak Beerot ai, “Songon sintongni manggoluh Jahowa, na paluahkon tonduyhu hun bani ganup hasosakan;

¹⁰ halak na mamboan barita bangku, ‘Domma matei si Saul!’ Na mangagan sibuan barita na madear ia, hutangkap do ia anjaha hubunuh i Ziklag, ai ma upah na hubere bani halani baritani ai.

¹¹ Samintolah halak parjahat ma, na mamunuh sada halak na bonar i rumahni, mintor lang ma tungguonku darohni hun tangannima, anjaha siapkononni hanima hun tanoh on?”

¹² Dob ai ihatahon si Daud ma juakjuakni mambunuh sidea; itampul ma tangan ni sidea pakon nahei ni sidea anjaha igantungkon ma sidea dohorhon bongbongan na i Hebron. Ibuat sidea ma

homa ulu ni Isboset, anjaha itanom ma ai ibagas tanoman ni si Abner i Hebron.

Si Daud gabe Raja ni Ganup Halak Israel

(ay. 1-10: pausih 1 Kron. 11:1-9)

5¹ Dob ai roh ma ganup marga ni halak Israel hu Hebron marayak si Daud, nini ma hu bani, “Tonggor ma holi-holimu anjaha dagingmu do hanami.

² Domma dokah, sanggah manggoluh ope si Saul manggomgom hanami, ham do na mangarahkon hanami luar pakon masuk; anjaha domma ihatahon Jahowa bamu, ‘Ho do na maningon gabe parmahan ni bangsang-Ku halak Israel, anjaha maningon gabe pambobai ni halak Israel.’”

³ Sonai homa roh do ganup pangintuai-pangintuai ni halak Israel, hu bani raja ai hu Hebron; jadi marpadan ma Raja Daud pakon sidea i Hebron i lobei ni Jahowa, anjaha iminaki sidea ma si Daud gabe raja manggomgom halak Israel.

⁴ Marumur tolu puluh tahun do si Daud, sanggah na bangkit gabe raja ia, anjaha ompat puluh tahun do ia manrajai.

⁵ Pitu tahun onom bulan do ia manrajai Juda i Hebron, anjaha tolu puluh tolu tahun ia manrajai Israel pakon Juda i Jerusalem.

**Itaban si Daud Huta Jerusalem anjaha
ibahen ai gabe Huta Pamatang**

⁶ Sanggah na laho raja ai pakon balani hu Jerusalem, uhurni sihol mamorang halak Jebus, na mangingani tanoh ai, nini sidea ma hu bani, “Seng bulih ham masuk, tapi maningon usiron ni halak na mapitung pakon halak na tempang do ham, artini: Seng bulih masuk si Daud hujon!”

⁷ Tapi italuhon si Daud ma benteng Sion, ai ma huta ni si Daud sisonari.

⁸ Bani ari na sasada ai ihatahon si Daud do, “Barang ise na sihol manaluhon halak Jebusi ai, maningon hun lubang ni bah ai ma ia masuk.” Magigi tumang do si Daud mangidah halak na tempang ampa na mapitung, halani ai do ase ihatahon halak, “Halak na mapitung pakon halak na tempang seng bulih masuk hu rumah.”

⁹ Jadi marianan ma si Daud ibagas benteng ai, anjaha igoran ma ai huta ni si Daud; dob ai ipauli si Daud ma batat-batat inggot, singgan ni Milo dompak bagas.

¹⁰ Dob ai lambin timbul ma si Daud, ai ihasomani Jahowa, Naibata Zebaot do ia.

(ay. 11-25: pausih 1 Kron. 14:1-16)

¹¹ Isuruh si Hiram raja hun Tirus ma suruhanni marayak si Daud, mamboan hayu ares pakon

tuhang hayu ampa tuhang batu laho manuhangi rumah ni si Daud.

¹² Jadi mangahap ma si Daud, na dob pinatotap ni Jahowa do ia gabe raja i Israel, anjaha na dob pinatimbul-Ni do harajaonni halani bangsa-Ni halak Israel.

¹³ Dob ai itambahi si Daud ope naboru i Jerusalem bahen parinangonni dob roh ia hun Hebron; jadi tubuh ope bani si Daud anak pakon boru.

¹⁴ Anjaha on do goran-goran ni anakni, na itubuhkon i Jerusalem: Si Samua, si Sobab, si Natan, si Salomo,

¹⁵ si Jibhar, si Elisua, si Nepeg, si Japia,

¹⁶ si Elisama, si Eliada pakon si Elipelet.

Hamonangan ni si Daud dompak Halak Palistim

¹⁷ Tapi dob ibogei halak Palistim, na dob iminaki si Daud gabe raja manggomgom Israel, tangkog ma ganup halak Palistim sihol marburu si Daud. Jadi dob ibogei si Daud barita ai, tuad ma ia hu benteng ai.

¹⁸ Manrohan ma halak Palistim, anjaha merap ma sidea i habungan Refaim.

¹⁹ Dob ai isungkun si Daud ma Jahowa, nini ma, “Bulih do ahu tangkog mangimbang halak Palistim, anjaha ondoskonon-Mu do sidea hubagas tanganku?” Jadi ihatahon Jahowa ma hu bani si

Daud, “Tangkog ma ho, ai sai na ondoskonon-Ku do halak Palistim hubagas tanganmu.”

²⁰ Dob ai das ma si Daud hu Baal-Perasim, anjaha italuhon si Daud ma sidea ijai, nini ma, “Domma ipaerap Jahowa munsuhku i lobeihu songon parmerap ni bah marbanggal.” Halani ai do ase igoran ianan ai Baal-Perasim, artini Tuhan na pamerapkon.

²¹ Ipantadingkon halak Palistim ma ijai gana-gana ni sidea, jadi ibuat si Daud ampa balani ai ma ai.

²² Iulaki halak Palistim ma use tangkog, anjaha merap ma sidea i habungan Refaim.

²³ Dob isungkun si Daud use Jahowa, nini ma mambalosi, “Seng bulih ho tangkog manjumpahkon sidea, tapi hun pudi ma sidea dorab, anjaha hun hayu baka ai ma ho roh mangimbang sidea.

²⁴ Anggo ibogei ho ma gurojob ni halak mardalan i ujung ni hayu baka ai, jomba ma sidea; ai sanggah ai ma luar Jahowa mardalan i lobeimu laho manaluhon bala ni halak Palistim.”

²⁵ Jadi ibahen si Daud ma sonai romban hu bani tonah ni Jahowa hu bani; gabe italuhon ma halak Palistim singgan ni Geba nari das hu Geser.

Poti Parpadanan Iboban hu Jerusalem

(ay. 1-11: pausih 1 Kron. 13)

6¹ Dob ai iulaki si Daud ma use patumpuhon ganup na pinilih i Israel, tolu puluh ribu halak bueini.

² Dob ai bingkat ma si Daud rap pakon hasomanni ai hu Baale-Juda, laho mamboan tangkog hunjai Poti Parpadanan ni Jahowa, na ginoran romban hu bani goran ni Jahowa Zebaot, na marparataskon herubim.

(ay. 3-16: pausih 4 Mus. 4:4-15)

³ Dob ai iangkat sidea ma Poti ni Naibata ai huatas ni sada gareta na baru, anjaha iboan sidea ma ai hun rumah ni si Abinadab, na i atas ni buntu-buntu ai; si Usa pakon si Ahio, anak ni si Abinadab ai do manogu gareta na baru ai.

⁴ Si Usa mardalan romban hu bani Poti Parpadanan ni Jahowa ai, anjaha si Ahio mardalan i lobei ni.

⁵ Ia si Daud pakon ganup ginompar ni halak Israel manortori do i lobei ni Jahowa hun bani sagala gogohni, marhasoman doding pakon na pahatahon arbab, sordam, tambur, ogung pakon mungmung.

⁶ Jadi dob das sidea hu pardogeian Nakon, isurdukkon si Usa ma tanganni hu Poti ni Jahowa ai anjaha itagangi ma ai, halani sihol tompas lombu ai.

⁷ Jadi manringis tumang ma Jahowa mangidah si Usa; ibunuh Jahowa ma ia ijai i lambung Poti ni Naibata halani lanseini.

⁸ Seda tumang do uhur ni si Daud halani parsirangan na binahen ni Jahowa ai bani si Usa, jadi ibahen ma goran ni ianan ai Peres-Usa (*panontapkon bani si Usa*), ronsi sadari on.

⁹ Jadi mabiar ma si Daud mangidah Jahowa bani na sadari ai, nini ma, “Sonaha ma pamboan bani Poti ni Jahowa das bani iananku?”

¹⁰ Halani ai seng be ra si Daud mamboan Poti ni Jahowa ai hu huta ni si Daud, tapi ihatahon si Daud ma na manaruhkon poti ai hu rumah ni si Obed-Edom, halak Gat ai.

¹¹ Tading i rumah ni si Obed-Edom, halak Gat ai ma Poti ni Jahowa tolu bulan dokahni; jadi ipasu-pasu Jahowa ma si Obed-Edom pakon ganup isi ni rumahni.

(ay. 12-16: pausih 1 Kron. 15)

¹² Adong ma halak na patugahkon hu bani si Daud, “Ipasu-pasu Jahowa do rumah ni si Obed-Edom ampa haganup na dong bani halani Poti ni Naibata.” Jadi laho ma si Daud mamboan Poti ni Naibata tangkog hun rumah ni si Obed-Edom hu huta ni si Daud marhasoman malas ni uhur.

¹³ Jadi dob manlangkah halak siusung Poti ni Jahowa onom langkah daohni igalangkon ma sada

lombu jonggi pakon sada anak ni lombu na pinamombur.

¹⁴ Tapi manortori do si Daud hun bani gogohni i lobei ni Jahowa; margonditkon baju epod do si Daud ai.

¹⁵ Sonai ma pamboan ni si Daud pakon ganup halak Israel bani Poti ni Jahowa marhasoman olob-olob pakon sora ni tarompet.

¹⁶ Jadi dob das Poti ni Jahowa ai hu huta ni si Daud, manungkir ma si Mikal, boru ni si Saul ondi hun jandela, jadi iidah ma Raja Daud marinjak-injak anjaha manortori i lobei ni Jahowa; gabe mapas ma uhurni mangidahsi.

(ay. 17-19: pausih 1 Kron. 16)

¹⁷ Dob iboan masuk Poti ni Jahowa, inahkon ma ai bani iananni, i tongah-tongah ni lampo-lampo, na dob pinajongjong ni si Daud hinan; dob ai igalangkon si Daud ma galangan situtungon pakon galangan pardameian i lobei ni Jahowa.

¹⁸ Jadi dobkonsi igalangkon si Daud galangan situtungon ai pakon galangan pardameian ai, ipasu-pasu si Daud ma bangsa ai marhitei goran ni Jahowa Zebaot,

¹⁹ anjaha isuruh ma na mamberehon hu bani ganup bangsa ai, hu bani ganup halak Israel, dalahi age naboru, ganup sada be i ruti, santoktok gulei ampa kuei na maragu buah anggur. Dob ai mulak ma ganup bangsa ai hu rumahni bei.

²⁰ Tapi sanggah mulak si Daud sihol mamasu-masu isi ni rumahni namin, luar ma si Mikal boru ni si Saul ondi manjumpahkon si Daud, nini ma, “Tunggungni ai pangulah ni raja ni Israel sadari on, na patoruh dirini sadari on i lobei ni boru ni juakjuakni, songon sada halak na so mambotoh maila, ijanggai dirini!”

²¹ Tapi nini si Daud ma mambalosi si Mikal ai, “Napuji ma Jahowa, na mamilih ahu bahen gantih ni bapamu pakon ginomparni, na pabangkit ahu gabe pambobai ni bangsa ni Jahowa, halak Israel, i lobei ni Jahowa do ahu sihol manortori;

²² lobih hunjai ope patoruhonku diringku, anjaha sihol ope lambin etekni diringku bahenonku i lobei-Ni; tapi bani naboru-naboru na hinatahonmai, lambin marmulia do ahu bahenon ni sidea.”

²³ Tapi anggo si Mikal, boru ni si Saul ondi, lanjar do seng tubuhan tuah das bani parmateini.

Sura-sura ni si Daud Sihol Pajongjong Rumah Panumbahan

7 ¹ Jadi dob marianan raja ai ibagas rumahni, anjaha marhasonangan ia ibahen Jahowa hun bani sagala munsuhni inggot,

² nini raja ai ma dompak Nabi Natan, “Tonggor ma, marianan i rumah na hun bani hayu ares do ahu, tapi Poti ni Jahowa marianan ibagas lampo-lampo do.”

³ Dob ai nini si Natan ma dompak raja ai, “Laho ma ham, mambahen sagala na ibagas uhurmu, ai Jahowa do hasomanmu.”

Jahowa Mambagahkon Totap ni Harajaonni

⁴ Tapi bornginni ai roh ma hata ni Jahowa hu bani si Natan,

⁵ “Laho ma ho, patugah ma hu bani juakjuak-Ku si Daud. Sonon do hata ni Jahowa, ‘Sihol pajongjongonmu Bangku sada rumah bahen ianan-Ku?’

⁶ Seng onnga marianan Ahu ibagas rumah singgan ni ari dob Huboan halak Israel tangkog hun Masir ronsi sadari on, tongtong do Ahu minsah-insah bani lampo-lampo siianan-Ku.

⁷ Sadokah Ahu mardalan rap pakon halak Israel, onnga ma Ahu mangkatahon sangkababah hata hu bani sada panguhum ni halak Israel, na Huparentahkon marmahan bangsang-Ku, halak Israel, sonon, ‘Mase ma lang ipauli hanima Bangku sada rumah hun bani hayu ares?’

⁸ On pe, sonon ma hatahon hu bani juakjuak-Ku si Daud ai. Sonon do hata ni Jahowa Zebaot, ‘Ahu do na mambuat ho hun bani parmahanan, hun bani na mangirikkon biri-biri, ase ho gabe raja manggomgom bangsang-Ku halak Israel;

⁹ anjaha Ahu do na mangkasomani ho barang huja pe ho laho, anjaha Husiapkon do ganup munsuhmu

i lobeimu; bahenon-Ku do goranmu tarambilan tumang songon goran ni halak na bolon i tanoh on.

¹⁰ Anjaha pasirsiron-Ku do sada ianan bani bangsang-Ku halak Israel, anjaha suanon-Ku do sidea hujai, ase marianan sidea ijai, anjaha seng hona geor be; anjaha seng be nunuton ni halak sibahen gogoh mangkilang sidea songon na dob in,

¹¹ olat ni na dob Hupabangkit panguhum mamarentah bangsang-Ku halak Israel, Ahu do na mambere hasonangan bam i lobei ni sagala munsumu. Ambahni ai ibagahkon Jahowa do bamu, patotapon ni Jahowa do ginomparmu magira.

¹² Anggo domma jumpah ajalmu, anjaha martumpu ho hu bani ompungmu, pajongjongon-Ku ma ginomparmu, anak na pinupusmu, anjaha patotapon-Ku ma harajaonni.

¹³ Maningon ia do na pajongjongkon sada rumah ibagas goran-Ku, anjaha pajonamon-Ku do paratas ni harajaonni ronsi sadokah ni dokahni.

¹⁴ Ahu do gabe Bapa bani, anjaha ia gabe anak Bangku. Anggo mardousa ia, lonsingon-Ku ma ia marhitei lonsing-longsing ni jolma;

¹⁵ tapi seng minsahkonon-Ku hun bani idop ni uhur-Hu songon na dob Hupaminsah hun bani si Saul, na dob Huusir ai hun lobeimu.

¹⁶ Maningon totap do ginomparmu pakon harajaonmu ronsi sadokah ni dokahni i lobei-Hu; paratasmu pe totap do ronsi sadokah ni dokahni.”

Tonggo Hatarimakasihon ni si Daud

¹⁷ Romban hu bani haganup hata ai, romban hu bani haganup pangungkabon ai, ihatahon si Natan ma sonai hu bani si Daud.

¹⁸ Dob ai masuk ma Raja Daud, hundul ma ia i lobei ni Jahowa, jadi nini ma, “Ise ma ahu, Ham Tuhan Jahowa, anjaha ise ma ginomparhu, ase iboan Ham ahu das hujon?

¹⁹ Anjaha maotiktu ope ai nini uhur-Mu, Ham Tuhan Jahowa, halani ai marbagah-bagah do homa Ham hu bani ginompar ni juakjuak-Mu pasal na sihol masa magira, anjaha ipatuduhkon Ham do bangku sundut na sihol roh, Ham Tuhan Jahowa.

²⁰ Anjaha aha ope tambahni ai boi hatahonon ni si Daud bamu? Ai itandai Ham do juakjuak-Mu on, Ham Tuhan Jahowa.

²¹ Halani hata-Mu, anjaha romban hu bani uhur-Mu ibahen Ham haganup habanggalon on, laho pabotohkon in hu bani juakjuak-Mu.

²² Halani ai timbul do Ham. Ham Tuhan Jahowa; ai seng dong na songon Ham, anjaha seng dong Naibata sobali Ham, romban hu bani haganup na binogei ni pinggolnami.

²³ Anjaha bangsa na legan ja ma songon bangsa-Mu halak Israel adong i tanoh on, Naibata sandiri manlangkah laho manobussi bahen bangsa-Ni, laho mambahen tarambilan goran-Ni, na mambahen bani sidea habanggalon pakon hajombuton marhitei na mangusir sada bangsa pakon naibatani hun lobei ni bangsa-Ni.

²⁴ Anjaha domma ipajonam Ham Bamu bangsa-Mu halak Israel, bahen bangsa-Mu ronsi sadokah ni dokahni, anjaha Ham, alo Jahowa gabe Naibata ni sidea.

²⁵ Antong, Ham Naibata Jahowa, patotap Ham ma hata na dob pinarbagah-bagah-Mu pasal juakjuak-Mu pakon ginomparni ronsi sadokah ni dokahni, anjaha bahen Ham ma romban hu bani bagah-bagah-Mu;

²⁶ ase timbul goran-Mu ronsi sadokah ni dokahni, marhitei na mangkatahon, 'Jahowa Zebaot do Naibata ni halak Isrel; anjaha ginompar ni juakjuak-Mu si Daud jonam i lobei-Mu.'

²⁷ Ham do alo Jahowa Zebaot, Naibata ni halak Israel, na patalarhon bani juakjuak-Mu: Pajongjongon-Ku do sada rumah bam; halani ai do ase pag juakjuak-Mu on manggogohkon tonggo on Bamu.

²⁸ Halani ai, Ham Tuhan Jahowa, Ham do Naibata, anjaha sintong do hata-Mu, anjaha domma

ibagahkon Ham hu bani juakjuak-Mu on hata na madear on.

²⁹ On pe, sai pasu-pasu Ham ma ginompar ni juakjuak-Mu on, ase totap sidea i lobei-Mu ronsi sadokah ni dokahni; ai Ham do na marbagah-bagahkon ai, anjaha marhitei pasu-pasu-Mu dapotan pasu-pasu ginompar ni juakjuak-Mu on ronsi sadokah ni dokahni.”

Parporangan ni si Daud pakon Bangsa Simbalog

(Pausih 1 Kron. 18)

8 ¹ Jadi dob salpu ai, italuhon si Daud ma halak Palistim, anjaha tunduk sidea ibahen; ibuat do panggomgomion hun bani tangan ni halak Palistim.

² Italuhon do homa halak Moab, anjaha isibar sidea bani tali; ihatahon do sidea manlangkob hu tanoh; dua tali isibaron hu bani sidea na laho sibunuhon, sada tali bani halak sipagoluhon. Ase gabe jabolon ma halak Moab bani si Daud anjaha manggalar sohei.

³ Italuhon si Daud do homa si Hadadezer, anak ni si Rehob, raja hun Soba, sanggah na laho ia use pajongjongkon kuasani i Euftrat.

⁴ Ibuat si Daud do hun bani saribu pitu ratus halak siajak huda pakon dua puluh ribu balani sipardalan nahei; irimpongi si Daud do ganup huda sitarik garetai, pitah saratus tumang itebai.

⁵ Anjaha sanggah roh halak Aram hun Damaskus sihol mangurupi si Hadadezer, raja ni Soba ai, ibunuh si Daud ma dua puluh dua ribu hun bani halak Aram ai.

⁶ Dob ai ipajongjong si Daud ma bentengni i tanoh Aram inggot ni Damaskus; gabe jabolon ma sidea bani si Daud anjaha manggalar sohei. Sai itumpaki Jahowa do si Daud, barang huja pe ia manlangkah.

⁷ Dob ai ibuat si Daud ma gantar-gantar omas, na pinaboan-boan ni juakjuak ni si Hadadezer, anjaha iboan ma ai hu Jerusalem.

⁸ Hun Tebah ampa hun Berotai, ai ma huta ni si Hadadezer, ibuat Raja Daud do buei tumang tombaga.

⁹ Dob ibogei si Tou, raja ni Hamat, na dob italuhon si Daud ganup bala ni si Hadadezer,

¹⁰ isuruh si Tou ma anak ni si Joram marayak Raja Daud, laho manungkun pasalsi anjaha mamasumasusi, halani na dob pinorangni si Hadadezer, anjaha italuhon ia, ai munsuh ni si Tou do si Hadadezer; iboan ma siluahni ugas-ugas pirak, omas pakon tombaga.

¹¹ Ai pe ikahulhon Raja Daud do hu bani Jahowa rap pakon pirak ampa omas na dapotsi hun bani ganup bangsa sipajuh begu-begu, na dob tinaluhonni ai,

¹² hun Aram, hun Moab, hun bani halak Ammon, halak Palistim, halak Amalek pakon hun bani taban-

taban, na dapot hun bani si Hadadezer, anak ni si Rehob, raja hun Soba.

¹³ Jadi lambin tarambilan ma goran ni si Daud. Sanggah na mulak ai ia, italuhon ma sapuluh ualuh ribu halak Edom i habungan Garam.

¹⁴ Ipabangkit ma wakilni i Edom; bani haganup Edom ipabangkit do wakilni, jadi gabe jabolon bani si Daud ma ganup halak Edom. Sai itumpaki Jahowa do barang huja pe laho si Daud.

¹⁵ Ase si Daud do na manggomgom Israel ganup, anjaha idalankon si Daud do uhum pakon hapintoron hu bani ganup bangsa ai.

¹⁶ Si Joab, anak ni si Seruya do pambobai ni bala, anjaha si Josafat anak ni si Ahilud do wakil ni raja.

¹⁷ Si Sadok, anak ni si Ahitub, pakon si Abiatar anak ni si Ahimelek, sidea do malim; si Seruya juru tulis,

¹⁸ si Benaya, anak ni si Joyada, pambobai ni pangawal, anjaha anak ni si Daud gabe malim.

Si Daud pakon si Mepiboset

9 ¹ Nini si Daud ma manungkun, “Adong ope nani tading-tadingan ni Raja Saul, ase hupatuduhkon bani idop ni uhur, halani si Jonatan?”

² Jadi adong ma sada juakjuak i rumah ni si Saul hinan, na margoran si Siba, gabe tardilo ma ia hulobei ni si Daud. Dob ai nini raja ai ma hu bani, “Atene, ho do na margoran si Siba?” Nini ma mambalosi, “Ahu ma da, jabolonmu!”

³ Nini raja ai ma, “Atene, adong ope tading-tadingan ni si Saul, ase hubahen bani idop ni uhur na hun bani Naibata?” Nini si Siba ma mambalosi raja ai, “Adong ope sada anak ni si Jonatan, repat do naheini duasi.”

⁴ Dob ai nini raja ai ma hu bani, “Ija do ia?” Nini si Siba mambalosi raja ai, “Tonggor ma, i Lodebar do ia, tondok bani si Makir, anak ni si Ammiel.”

⁵ Dob ai isuruh Raja Daud ma suruhanni laho mangalopi hun rumah ni si Makir, anak ni si Ammiel na hun Lodebar.

⁶ Jadi dob das si Mepiboset anak ni si Jonatan, anak ni si Saul hu bani si Daud, manrogop ma ia manombahsi. Tapi nini si Daud ma, “Mepiboset!” Nini ma mambalosisi, “Ijon do ahu, jabolonmu!”

⁷ Nini si Daud ma hu bani, “Ulang ma ho mabiar, ai sihol bahenonku do bam idop ni uhur, halani si Jonatan bapamu ondi, anjaha sihol paulakonku do bam ganup tanoh ni si Saul ompungmu ondi, anjaha rapkon ahu ma ho tongtong mangan.”

⁸ Jadi marsombah ma ia, lanjar nini ma, “Ise ma ahu jabolonmu on, ase pala ma dompakkononmu baliang na matei songon ahu on?”

⁹ Dob ai idilo raja ai ma si Siba, juakjuak ni si Saul, anjaha nini ma hu bani, “Sagala na bani si Saul pakon na bani rumahni hinan domma hubere hu bani anak ni tuanmu.

¹⁰ Halani ai maningon horjahononmu do tanoh ai bani, ho pakon anakmu ampa jabolonmu, anjaha

patumpu ma gogohni, ase adong hagoluhon ni anak ni tuanmu. Ia si Mepiboset, anak ni tuanmu, maningon rapkon ahu ma ia tongtong mangan. Adong do bani si Siba sepuluh lima anak pakon dua puluh jabolon.”

¹¹ Dob ai nini si Siba ma dompak raja ai, “Songon na pinarentahkon ni tuanku, raja in hu bani jabolonni, maningon sonai do bahenon ni jabolonmu on.” Ase rap mangan ma si Mepiboset ampa si Daud, songon sada hun bani anak ni raja ai.

¹² Adong do bani si Mepiboset sada anak na etek-etek, na margoran si Mika. Tapi ganup na marianan i rumah ni si Siba jabolon ni si Mepiboset do.

¹³ Ase marianan i Jerusalem ma si Mepiboset ai tongtong do ia rap mangan pakon raja ai; tapi repeat do naheini.

Parporangan ni si Daud dompak Halak Ammon ampa Halak Aram

10 ¹ Dob sonai, matei ma raja ni halak Ammon, jadi si Hanun, anakni ai ma bangkit raja gantihni.

² Nini si Daud ma, “Dear do patuduhkononku habasaron ni uhurhu hu bani si Hanun, anak ni si Nahas, songon bapani ondi na basar bangku.” Jadi isuruh si Daud ma suruhanni laho mangapohisi halani panading ni bapani ai. Tapi dob das juakjuak ni si Daud ai hu tanoh ni halak Ammon,

³ nini raja-raja ni halak Ammon ma dompak tuanni, si Hanun, “Sihol pasangapkon bapamu ma tumaram si Daud, nini uhurmu, ase isuruh bamu na mangapoh? Ai lang halani na laho mardiateihon huta on do pakon mangkahapisi ampa sihol mantedahonsi do, ase isuruh si Daud juakjuakni marayak ham?”

⁴ Dob ai itangkap si Hanun ma juakjuak ni si Daud ai, anjaha ihatahon ma suhuron gumis ni sidea salopah, anjaha ihorot ma hiou ni sidea das hu bani hundulan ni sidea, dob ai ipalaho ma sidea.

⁵ Dob tarboge ai bani si Daud, isuruh ma suruhanni manjumpahkon sidea, ai bador tumang do dalahi-dalahi ai. Nini raja ai ma dompak sidea, “Tading ma nasiam lobei i Jeriko paima ganjang use gumis nasiam, dob ai pe ase mulak nasiam.”

⁶ Tapi dob iidah halak Ammon na dob hagigi sidea bani si Daud, jadi isuruh halak Ammon ma suruhanni laho manggaji halak Aram na hun Bet-Rehob pakon halak Aram na hun Soba, dua puluh ribu halak tentara na mardalan nahei, anjaha hun bani Raja Maacha saribu halak, pakon sapuluh dua ribu halak hun Tob.

⁷ Dob iboge ai si Daud ai, jadi isuruh ma si Joab pakon ganup balani na garang ai.

⁸ Jadi luar ma halak Ammon, ipatitir ma balani i lobei ni horbangan ni huta ai; tapi halak Aram na

roh hun Soba ampa na hun Rehob, halak na hun Tob ampa na hun Maacha, pulig do jongjong bei i talun.

⁹ Jadi dob iidah si Joab sai ia do isosak munsuh ai hun lobei pakon hun pudu, ipapulig ma deba hun bani halak pilihan na i Israel, anjaha iatur ma sidea mangimbang halak Aram ai;

¹⁰ anjaha balani na tading ai iondoskon ma ai hu bani anggini si Abisai anjaha iatur ma ai marimbang dompak halak Ammon ai.

¹¹ Anjaha nini ma, “Anggo gogohan halak Aram, gabe seng tarimbang ahu sidea, roh ma ho mangurupi ahu; anggo gogohan halak Ammon, gabe lang tarimbang ho sidea, roh ma ahu mangurupi ho.

¹² Tenger ma uhurmu, imbang hita ma sidea mangkopkop bangsanta pakon mangkopkop huta ni Naibatanta; anjaha ipasaud Jahowa ma rosuh ni uhur-Ni.”

¹³ Dob ai laho ma si Joab pakon bala hasomanni ai mandorab halak Aram, gabe maporus ma sidea i lobei ni.

¹⁴ Jadi dob iidah halak Ammon, na dob maporus halak Aram ai, maporus ma pakon sidea hun lobei ni si Abisai, anjaha masuk hubagas huta ai. Dob ai mulak ma si Joab hun bani na mangimbang halak Ammon ai, anjaha das ma ia hu Jerusalem.

¹⁵ Tapi dob iidah halak Aram na dob talu sidea ibahen halak Israel, martumpu ma sidea ganup.

¹⁶ Dob ai ihatahon si Hadadezer ma luar halak Aram, na i dipar ni Bah Euftrat gabe das ma sidea hu Helam, anjaha si Sobah, pambobai ni bala ni si Hadadezer do na mambobahon sidea.

¹⁷ Dob tarbotoh ai bani si Daud, gabe ipatumpu ma ganup halak Israel; idipari sidea ma Bah Jordan, gabe das ma sidea hu Helam. Halak Aram pe iatur ma balani laho marporang manjumpahkon si Daud.

¹⁸ Tapi maporus ma halak Aram marimbang halak Israel; ibunuh si Daud ma hun bani halak Aram pitu ratus tentara pargareta, ompat puluh ribu siajak huda, sonai homa si Sobah ugahan lanjar matei do ijai.

¹⁹ Jadi dob iidah ganup raja, na unduk na saindokah hu bani si Hadadezer, na dob talu sidea ibahen halak Israel, mardamei ma sidea hu bani halak Israel anjaha tunduk bani sidea. Jadi mabiar ma halak Aram laho mangurupi halak Ammon use.

Parbangkison ni Raja Daud hu bani si Batseba

11 ¹ Bani tahun na irik hujai, bani panorang hasomalan ni raja-raja bingkak marporang, isuruh si Daud ma si Joab pakon balani na rapkonsi, ampa haganup halak Israel; jadi isiapkon sidea ma halak Ammon anjaha ihubu do huta Rabba. Tapi tading i Jerusalem do anggo si Daud.

² Dob ai bani na sahali malele bod ari, jongjong ma si Daud hun podomanni, anjaha mardalan-dalan ma

ia i atas ni tayub ni rumah ni raja ai, gabe iidah ma hun datas ni tayub ai sada naboru na maridi; jenges tumang do naboru ai.

³ Dob ai isuruh si Daud ma na manungkun pasal naboru ai, gabe ipatugah ma bani, “Ai lang si Batseba do ai, boru ni si Eliam, parinangon ni si Uria, halak Heti ai?”

⁴ Jadi isuruh si Daud ma suruhanni mangalopisi; jadi dob das ia hu lobei ni; gabe ihasomani ma ia modom; baru manguras dirini ope ia hun bani habutakonni, dob ai mulak ma ia hu rumahni.

⁵ Boratan rumah ma naboru ai; dob ai isuruh ma na patugahkon ai hu bani si Daud, nini ma, “Domma boratan rumah ahu.”

⁶ Dob ai isuruh si Daud ma suruhanni mamboan tonahni hu bani si Joab, “Suruh hu bangku si Uria marga Heti in.” Jadi isuruh si Joab ma si Uria marayak si Daud.

⁷ Jadi dob das si Uria hu bani, isungkuni si Daud ma ia pasal si Joab, pasal sonaha do balani ai, anjaha sonaha do pardalanan ni parporangan ai.

⁸ Dob ai nini si Daud ma hu bani si Uria, “Tuad ma ho hu rumahmu anjaha burihi ma lobei naheimu!” Jadi dob luar si Uria hun rumah ni raja ai, irik ma roh hun pudi ni sibere-bere ni raja ai.

⁹ Hape modom do si Uria i lambung labah ni rumah ni raja ai rap pakon ganup juakjuak ni tuanni ai, seng tuad ia laho hu rumahni.

¹⁰ Jadi adong ma na patugahkon hu bani si Daud, seng tuad si Uria laho hu rumahni. Dob ai nini si Daud ma dompak si Uria, “Ai lang baru ope ho roh hun pardalanan? Mase ma lang tuad ho laho hu rumahmu?”

¹¹ Tapi nini si Uria ma dompak si Daud, “Poti Parpadanan ai, halak Israel pakon halak Juda marianan ibagas lampo-lampo do; anjaha tuanku si Joab marlampo-lampo sonin i ladang; tor ra ma ahu masuk hu rumahku laho mangan, minum pakon modom rap pakon parinangonku? Songon sintongni manggoluh ham, manggoluh pakon tonduymu, seng ra ahu mambahen na sonai.”

¹² Dob ai nini si Daud ma dompak si Uria, “Tading ijon ma ho lobei sadari on, patar pe ho husuruh mulak.” Jadi tading ma si Uria i Jerusalem bani na sadari ai pakon patarni.

¹³ Dob ai iontang si Daud ma ia, ase mangan ia i lobei ni anjaha minum, pala mabuk ia ibahen. Tapi bodarini ai luar ma ia laho modom hu podomanni rap pakon juakjuak ni tuanni, seng tuad ia laho hu rumahni.

¹⁴ Jadi patarni ai isurat si Daud ma sada surat hu bani si Joab, anjaha si Uria do ibahen panongosanni.

¹⁵ Isurat do ibagas suratni ai, “Nahkon ma si Uria bani parporangan sijobuanni, dob ai surut ma nasiam hun pudi ni, ase hona ia anjaha matei.”

¹⁶ Jadi sanggah na laho mangkubu huta ai si Joab ipatuduh ma si Uria bani ianan na dob binotohni hinan adong halak na garang ijai.

¹⁷ Dob ai luar ma dalahi ni huta ai laho marsiporangan pakon si Joab. Matei ma deba hun bani juakjuak ni si Daud, matei do homa si Uria, halak Heti ai.

¹⁸ Dob ai isuruh si Joab ma suruhanni patugahkon hu bani si Daud pasal haganup pardalanan ni parporangan ai.

¹⁹ Ihatahon ma homa hu bani suruhanni ai, “Anggo domma salpu ipatugah ho pardalan ni parporangan ai hu bani raja ai,

²⁰ anjaha anggo manggila raja ai, gabe hatahon ma bani, ‘Mase ma sonai dohorni nasiam hu huta ai marporang? Ai lang ibotoh nasiam na maningon mamodili do sidea hun tembok ai?’

²¹ Ise do na mamunuh si Abimelek, anak ni si Jerubbaal sapari? Ai lang sada naboru do na mandabuhkon losung bani hundatas tembok ai ase matei ia i Tebes? Mase ma sonai dohorni laho nasiam hu tembok ai?” Jadi hatahon ma, “Domma matei homa juakjuakmu si Uria, halak Heti ai.”

²² Jadi laho ma suruhan ai, das ma sidea anjaha ipatugah ma hu bani si Daud haganup na tinonahkon ni si Joab hu bani.

²³ Nini suruhan ai ma hu bani si Daud, “Gogohan do halak ai ase hanami, gabe iayak hanami das hu

ladang; tapi iusir hanami ma sidea mulak das hu labah ni horbangan ai.

²⁴ Jadi ipanahi parpanah ai ma juakjuakmu hun tembok ai, gabe matei ma hun bani juakjuak ni raja in, matei do pakon juakjuakmu si Uria.”

²⁵ Dob ai nini si Daud ma bani suruhan ai, “Sonon ma sihatahononmu hu bani si Joab, ‘Ulang ma mandolei ho halani na masa ai; ai biakni do sonin sonai parpangan ni podang; gogohi nasiam ma mamorang huta in, anjaha parseda nasiam!’ Patenger ma uhurni!”

²⁶ Jadi dob ibogei parinangon ni si Uria, na dob matei paramangonni ai, gabe itangisi ma sinondukni ai.

²⁷ Dob salpu panorang pusok ni uhurni ai, isuruh si Daud ma suruhanni mangalopisi hu rumahni; gabe parinangonni ma ia anjaha itubuhkan ma bani sada anak. Tapi sogam do uhur ni Jahowa mangidah pambahenan ni si Daud ai.

Isuruh Naibata do Nabi Natan Manguhum si Daud

12 ¹ Dob ai isuruh Jahowa ma si Natan hu bani si Daud. Dob das ia, nini ma hu bani, “Adong ma dua halak bani sada huta, na sada bayak, na sada nari masombuh.

² Buei tumang do biri-biri pakon lembu ni na bayak ai.

³ Tapi na masombuh ai seng dong bani sobali sada anak ni biri-biri na binolini, ipainum do ai, jadi gabe bangga ma ai rapkon anakni; somal do ai mangan hun pangananni, minum hun panginumanni anjaha modom i abinganni, usih songon boruni do ai ibahen.

⁴ Dob ai roh ma sada halak hu bani na bayak ai. Halani rugi iahap na bayak ai mambuat sada hun bani biri-birini barang lombuni ai bahen ambangan ni halak pardalan-dalan na roh marayaksi ai, gabe ibuat ma anak ni biri-biri ni halak na masombuh ai, anjaha ihoseihon ma ai bani halak na roh marayaksi ai.”

⁵ Jadi gajag tumang ma ringis ni si Daud mangidah dalahi ai, nini ma dompak si Natan, “Songon sintongni manggoluh Jahowa maningon marutang hosah do dalahi, na mangkorjahon na sonai ai;

⁶ anjaha maningon ompat hali lompit do pasuangonni biri-biri ai, halani sonai pambahenni, anjaha halani seng dong idop ni uhurni.”

⁷ Dob ai nini si Natan ma dompak si Daud, “Ham do halak ai! Sonon do hata ni Jahowa, Naibata ni halak Israel, ‘Ahu do na mamminaki ho gabe raja manggomgom halak Israel, anjaha Ahu do na paluahkon ho hun bani tangan ni si Saul;

⁸ domma Hubere bam rumah ni tuanmu, pakon parinangon ni tuanmu hubagas abinganmu, anjaha domma Huberehon bam ginompar ni Israel pakon

Juda; anjaha anggo porini maotiktu do ai, sihol tambahan-Ku ope namin bam barang sadiha nari.

⁹ Mase ma mapas uhurmu bani hata ni Jahowa, laho mangkorjahon sogam ni uhur-Ni? Ibunuh ho do si Uria, halak Heti ai marhitei podang, ibuat ho do parinangonni ai bahen parinangonmu, anjaha ibunuh ho do ia marhitei podang ni halak Ammon.

¹⁰ On pe seng be mosor podang hun rumahmu sadokah ni dokahni, halani na dob niapasanmai Ahu, anjaha ibuat ho parinangon ni si Uria, halak Heti ai bahen parinangonmu.'

¹¹ Sonon do hata ni Jahowa, 'Tonggor ma, Ahu sandiri parrohkon bam hamagouan hun bani ginomparmu sandiri, anjaha buaton-Ku do parinangonmu hun lobei ni matamu, anjaha Hubere hu bani halak na legan, ase ihasomani parinangonmai modom i lobei ni mata ni ari.

¹² Ai na hinorjahonmai bani na ponop, patalaron-Ku ma ia i lobei ni ganup halak Israel pakon i lobei ni mata ni ari.'"

¹³ Dob ai nini si Daud ma dompak si Natan, "Domma mardousa ahu hu bani Jahowa!" Jadi nini si Natan ma dompak si Daud, "Antong, domma isasap Jahowa dousamu ai, seng be matei anggo ham.

¹⁴ Tapi tene, halani na dob manrisai munsuh ni Jahowa marhitei pambahenanmu on, maningon matei do anak na sihol tubuh bamu ai."

¹⁵ Dob ai mulak ma si Natan hu rumahni. Tapi ilonsing Jahowa ma na etek-etek ai, na tinubuhkan ni parinangon ni si Uria bani si Daud, gabe boritan ma ia.

¹⁶ Dob ai iparayak si Daud ma Naibata halani dakdanak ai; marpuasa ma ia, mulakkonsi ia, marbaju guni ma ia lanjar tibal bani tanoh layur bornginni ai.

¹⁷ Dob ai roh ma pangintuai ni rumahni ai marayaksi, ielek-elek ma ia ase jongjong hun tanoh ai, tapi seng ra ia, anjaha seng ra ia mangan rap pakon sidea.

¹⁸ Papituarihon matei ma dakdanak ai, tapi mabiar do juakjuak ni si Daud patugahkon na dob matei na etek-etek ai, ai nini uhur ni sidea do, “Tonggor ma, sanggah manggoluh ope dakdanak ai, iparsahapkon hanami do ia, hape seng itangihon soranami; ai lang bahenonni ma ra na masambor bani anggo na hatahon bani, domma matei na etek-etek ai?”

¹⁹ Jadi dob iidah si Daud marsihusipan juakjuakni ai, ibotoh ma na dob matei na etek-etek ai, gabe nini si Daud ma dompak juakjuak ai, “Atene, domma matei na etek-etek ai?” Nini sidea na mambalosi, “Domma matei tongon.”

²⁰ Dob ai jongjong ma si Daud hun tanoh ai, marsuhap anjaha iminaki ma dirini, igantihi ma pakeianni, dob ai masuk ma ia hu Rumah ni Jahowa laho martonggo; jadi dob mulak ia hu rumahni,

ihatahon ma na pasirsirhon sipanganon bani, lanjar mangan ma ia.

²¹ Jadi nini juakjuakni ai ma hu bani, “Aha do na binahenmu on? Sanggah manggoluh ope na etek-etek ai, marpuasa do ham anjaha tangis, tapi dob matei na etek-etek ai jongjong do ham anjaha mangan.”

²² Nini ma mambalosi, “Sanggah manggoluh ope na etek-etek ai, marpuasa do ahu anjaha tangis, ai nini uhuru, ise mambotoh atap marpangulaki uhur ni Jahowa mangidah ahu, andohar manggoluh na etek-etek ai.

²³ Tapi nuan domma matei ia, mase marpuasa ope ahu? Ai tarbahen ahu be paulakkonsi? Ahu mando marayaksi, tapi anggo ia seng tumaram be mulak hu bangku.”

²⁴ Jadi dob iapohi si Daud uhur ni si Batseba parinangonni ai, iparayak ma ia, anjaha modom rap pakonsi. Jadi tubuhan anak ma ia, anjaha ibahen ma goran ni si Salomo. Holong do uhur ni Jahowa mangidahsi.

²⁵ Londoskon ma ia bani Nabi Natan; igoran ma ia si Jedidia (artini na hinaholongan ni Jahowa) marhalanohon ni Jahowa.

**Hamonangan ni si Daud
Mangimbang Halak Ammon**

(ay. 26-31: pausih 1 Kron. 20:1-3)

²⁶ Sai iporangi si Joab do Rabba huta ni halak Ammon, gabe dapotsi ma huta pamatang ai.

²⁷ Dob ai isuruh si Joab ma suruhanni hu bani si Daud, nini ma, “Domma huporang Rabba anjaha domma hutaban homa huta na bani bah ai.

²⁸ Antong patumpu ma teba-teba ni bala in, anjaha hubu ham ma huta ai lanjar taluhon ham, ase ulang ahu manaban ai anjaha goranku tarambilan ijai.”

²⁹ Dob ai ipatumpu si Daud ma ganup bala ai anjaha bingkat ma ia hu Rabba mamorang huta ai lanjar ipatunduk.

³⁰ Ibuat ma sortali ni raja ni sidea hun bani uluni; ia boratni sada talenta omas do, anjaha adong do sada mata intan ijai; anjaha inahkon ma ai bani ulu ni si Daud. Iboan do homa taban-taban buei hun huta ai.

³¹ Tapi iboan ma halak simbuei na ibagas huta ai, ipahorjahon ma sidea manjolom gargaji, pangongkal bosi, baliung, pakon manuang batu; sonai ma ibahen hu bani haganup huta ni halak Ammon. Dob ai mulak ma si Daud pakon ganup bala ai hu huta Jerusalem.

Si Amnon pakon si Tamar, Botou ni si Absalom

13 ¹Ia si Absalom anak ni si Daud ai, adong do sada botouni na jenges, na margoran si Tamar. Rosuh do uhur ni si Amnon, anak ni si Daud ai mangidahsi.

²Halani oji ni uhurni hu bani botouni si Tamar ai, gabe boritan ma ia, ai anak boru ope ia, anjaha lang tarbahen iahap si Amnon mandohorisi.

³Tapi adong ma sada huan-huan ni si Amnon, na margoran si Jonadab, anak ni si Simea, abang ni si Daud; halak na pentar tumang do si Jonadab ai.

⁴Dob ai nini ma hu bani, “Mahua ham, ase lambin tambah ari lambin merungni ham, alo anak ni rajanami! Ai lang tarpatugah ham do aha halani hu bangku?” Nini si Amnon ma hu bani, “Holong do uhuruhani si Tamar, botou ni si Absalom ai.”

⁵Jadi nini si Jonadab ma hu bani, “Modom ma ham hu podomanmu, anjaha pakulah ham ma boritan. Anggo roh bapanta manorih ham, hatahon ma hu bani, ‘Mahua suruh ham ma namin si Tamar botouhu ai mambere ahu mangan ruti, anjaha i lobeihu ma namin ihoseihon ai, ase hupaidah-idah anjaha hupangan ai hun bani tanganni.’”

⁶Dob ai modom ma si Amnon, ipakulah ma boritan. Jadi dob roh raja ai manorihsi, nini si Amnon ma dompak raja ai, “Ambit roh ma namin si Tamar

botouhai ase ipaturei dua ruti i lobeihu, anjaha mangan ahu hun bani tanganni.”

⁷ Dob ai isuruh si Daud ma na mangalopi si Tamar hu rumah, nini ma, “Mahua laho ma ho hu rumah ni si Amnon, botoumai, anjaha paturei ma bani sipanganon.”

⁸ Dob ai laho ma si Tamar hu rumah ni si Amnon botouni ai, anjaha tibal do ia bani podomanni jumpahsi; ibuat ma nitak, iagu ma ai, anjaha ipaturei ma ruti i lobei ni, dob ai imasak ma.

⁹ Dob ai iangkat ma balanga ai anjaha ipalumei i lobei ni, tapi manjua do ia mangan. Dob ai nini si Amnon ma, “Hatahon ma luar hagianup halak ai hun lambungkon!” Jadi luar ma ganup sidea hun lambungni.

¹⁰ Dob ai nini si Amnon ma dompak si Tamar, “Boan ma sipanganon in hu kamar ase mangan ahu hun tanganmu!” Jadi ibuat si Tamar ma ruti na pinaulini ai, anjaha iboan ma hu bani si Amnon, botouni ai, hubagas kamar.

¹¹ Tapi dob iboan ai hundohor hu lambungni, ase mangan ia, itangkap ma ia, anjaha nini ma hu bani, “Roh ma ho botou, modom hu lambungkon.”

¹² Tapi nini ma hu bani, “Ulang ma sonai botou! Ulang ma dohori ahu; ai seng bulih horjahonon sonin i Israel. Ulang ma bahen habadoron na sonin!

¹³ Anjaha ahu, huja ma boanonku habadoronku? Anjaha ho pe gabe songon sada halak na oto ma i

Israel. Mahua parsahapkon rahanan raja in; ai seng tumaram juaonni mamberehon ahu bam.”

¹⁴ Tapi seng ra ia manangihon ia; halani gogohan ia hun bani, ipaksa ma ia anjaha ihasomani ma ia modom.

¹⁵ Dob ai magigi tumang ma si Amnon mangidahsi, banggalan gigini mangidahsi, ase holongni hinan hu bani. Dob ai nini si Amnon ma hu bani, “Jongjong ho, ne laho!”

¹⁶ Tapi nini ma hu bani, “Lang sonai botou; banggalan ope hasalahan on, anggo mintor sonari ipalaho ho ahu, hun bani na legan na binahenmai hu bangku.” Tapi seng ra ia mambalosisi.

¹⁷ Idilo ma anak parana juakjuakni ai, nini ma, “Usir ma naboru on hun lambungkon hu darat, anjaha oruk labah in i pudi ni!”

¹⁸ Tapi baju ganjang do bajuni; ai sonai do pamahei ni boru ni raja sadokah anak boru hun bani sapari nari. Jadi ionjar juakjuakni ai ma ia hu darat, anjaha ioruk ma labah ai i pudi ni.

¹⁹ Inahkon si Tamar ma abuan hu bani uluni, irigati ma baju ganjang na pinaheini ai; inahkon ma tanganni hu atas uluni, laho ma ia, anjaha tangis gogoh-gogoh.

²⁰ Dob ai nini si Absalom botouni ai ma hu bani, “Ai adong na masambor ibahen si Amnon botoumai bam? Sip ma ho botou; botoumu do ia, ulang ma parimbagaskon in!” Jadi marianan i rumah ni si

Absalom ma si Tamar, punjung anjaha marpusok ni uhur.

²¹ Jadi dob ibogei Raja Daud na masa ai ganup, marah tumang ma ia. Tapi seng ra ia mangkahua anakni si Amnon ai, halani anak sikahananni ia.

²² Tapi seng marsihataan si Absalom pakon si Amnon pasal hata na bajan atap na madear pe; ai sogam do uhur ni si Absalom bani si Amnon, halani na pinarsedani ai si Tamar, botouni ai.

Pambalason ni si Absalom bani si Amnon

²³ Dob salpu dua tahun adong ma horja manrasip biri-biri i Baal-Hazor dohor hu Efraim, jadi idilo si Absalom ma ganup anak ni raja ai.

²⁴ Iparayak si Absalom ma raja ai, nini ma, “Tonggor ma, adong do horja manrasip biri-biri bani juakjuakmu on, mahua ra ma namin raja in pakon juakjuakni roh hujai mangkasomani juakjuakmu on.”

²⁵ Tapi nini raja ai ma dompak si Absalom, “Lang anakku, ulang ma pala laho hanami haganup, ase ulang susah ho ibahen hanami.” Sai ielek-elek do namin ia, tapi lanjar do seng ra raja ai laho, tapi ipasu-pasu do ia.

²⁶ Dob ai nini si Absalom ma, “Anggo lang, mahua lopas ham ma si Amnon, abang ai laho rap pakon hanami.” Nini raja ai ma hu bani, “Mase ma pala dihut ia laho rap pakon ho?”

²⁷ Tapi sai inunut si Absalom do manglelek-eleksi ase ilopas si Amnon laho rap pakon sagala anak ni raja ai.

²⁸ Dob ai iparentahkon si Absalom ma hu bani juakjuakni, “Ingat, anggo mamungkah malas ma uhur ni si Amnon ibahen anggur, anjaha huhatahon bennima, ‘Bunuh hanima ma si Amnon, maningon bunuhonnima do ia.’ Ulang hanima mabiar, ai ahu do na mangkatahon hanima. Totap anjaha tenger ma uhurnima!”

²⁹ Jadi ibahen juakjuak ni si Absalom ma hu bani si Amnon songon na hinatahon ni si Absalom ai. Jadi jongjong bei ma ganup anak ni raja ai; iajak bei ma ganup halodeni laho maporus.

³⁰ Sanggah i tongah dalan ope sidea, das ma barita ai hu bani si Daud, “Domma ibunuh si Absalom ganup anak ni raja in, seng dong na tading age sada hun bani sidea.”

³¹ Dob ai jongjong ma raja ai, irigati ma paheianni, anjaha ilangkobkon ma dirini hu tanoh; haganup juakjuakni jongjong manginggotisi marpaheian na nirigatan.

³² Dob ai nini si Jonadab, anak ni si Simea, abang ni si Daud ai ma, “Ulang ma nini uhur ni tuannami, na dob matei ganup anak parana, anak ni raja in, sahalak si Amnon do na matei; hun bani ari ai nari, sanggah na pinaksa ni si Amnon si Tamar, botou ni si Absalom, sonai do sura-surani.

³³ On pe ulang ma pala mintor nini uhur ni raja in na dob matei ganup anak ni raja in. Lang, pitah si Amnon do hansa na matei.”

³⁴ Tapi maporus do anggo si Absalom. Jadi sanggah manatap-natap parana parjaga, gabe iidah ma buei halak roh manginsuah hun dalan na laho hu Horonaim.

³⁵ Dob ai nini si Jonadab ma dompak raja ai, “Tonggor ma, domma roh anak ni raja in; songon na hinatahon ni juakjuakmu on, sonai do tongon.”

³⁶ Jadi salpuhonsi ia na marsahap ai, tonggor ma, domma roh anak ni raja ai, ipagogoh bei ma sorani tangis-tangis; raja ai pe pakon ganup juakjuakni manggogoh bei do tangis-tangis.

³⁷ Tapi anggo si Absalom domma maporus laho marayak si Talmai, anak ni si Amihut, raja hun Gesur. Tapi sai tong do pusok uhur ni si Daud paingat-ingat anakni ai.

³⁸ Ase maporus hu Gesur do si Absalom, anjaha tading ma ia ijai tolu tahun dokahni.

³⁹ Dob ai masihol ma uhur ni Raja Daud hu bani si Absalom, ai domma sabou uhurni mardingat si Amnon na dob matei ai.

Parmulak ni si Absalom

14 ¹ Jadi dob ibotoh si Joab, anak ni si Seruya na dob masihol uhur ni raja ai mangidah si Absalom,

² jadi isuruh si Joab ma hu Tekoa mangalopi sada puang-puang na pantas maruhur hunjai, anjaha nini ma dompaksi, “Pakulah ma pusok uhurmu, anjaha pahei ham ma paheian pusok ni uhur, ulang ma marminak ham, tapi pakulah ham ma songon sada naboru na dob dokah manangisi na mateini.

³ Dob ai laho ma ham marayak raja ai, anjaha hatahon ham ma hu bani romban hu bani hata on.” Iajari si Joab ma ia pasal hata sihatahononni.

⁴ Dob das naboru na hun Tekoa ai hu bani raja ai, manrogop ma ia anjaha marsombah, nini ma, “Urupi ham ma, rajanami!”

⁵ Nini raja ai ma hu bani, “Aha gatni bam?” Jadi nini ma, “Sada naboru na dob mabalu do ahu, domma matei paramangonku.

⁶ Adong do bani jabolonmu naboru on dua anak, jadi martinggil ma sidea na dua i ladang, anjaha sahalak pe lang dong na manolahi sidea, marsibunuhan ma sidea gabe matei ma sahalak.

⁷ Dob ai roh ma ganup hade-hade mangimbang jabolonmu naboru on, nini sidea ma, ‘Boan hujon halak sibunuh anggini ai, ase ibunuh hanami ia bahen abul ni anggini na binunuhni ai; sonai ma sihol bunuhon ni sidea homa sipanean ai.’ Sihol sasapkononkon ni sidea do mata ni aringku na tading ai, ase ulang adong teba bani paramangonkon goran barang sima-sima i atas tanoh on.”

⁸ Dob ai nini raja ai ma dompak naboru ai, “Laho ma ham mulak hu rumahmu, hubere pe parentah pasal ham.”

⁹ Nini naboru na hun Tekoa ai ma dompak raja ai, “Tuan, rajanami, manginsonoh hu bangku pakon hu bani ginompar ni bapa ma hajahaton ai; tapi borsih ma raja in pakon paratasni.”

¹⁰ Dob ai nini raja ai ma, “Anggo adong barang ise na mangkatahon na sonaha ope bamu, boan ham ia hu lobeihu, ase ulang be inunut manunsahi ham.”

¹¹ Dob ai nini ma, “Sai mardingat ma raja in bani Jahowa, Naibatamu, ase ulang be idalankon sipambalas ai be pamunuhon, anjaha anakakai ulang isiapkon.” Nini raja ai ma mambalosi, “Songon sintongni manggoluh Jahowa, seng anjai marurus sada jambulan ni anakmu ai hu tanoh.”

¹² Dob ai nini naboru ai ma, “Santabi rajanami, lopas ham ma jabolonmu naboru on mangkatahon hata sangkababah hu bani tuanku.” Nini ma, “Hatahon ma!”

¹³ Nini naboru ai ma, “Mase ma sonai paruhuranmu dompak bangsa ni Jahowa? Marhitei haputusan ni raja in, domma iuhum ham dirimu, halani seng ipalopas raja in mulak halak na pinabalini.

¹⁴ Tongon maningon matei do hita ganup, anjaha usih do hita bani bah na durus hu tanoh, na so tarpatumpu be; tapi lang mintor ibuat Naibata hosah ni sada halak, tapi ipingkiri do dalan-dalan

ase ulang lanjar bali hun bani halak na dob bali hinan.

¹⁵ On pe, ase roh pe ahu mangkatahon hatangku hu bani raja in, halani ipambiarbiari halak do ahu; jadi nini uhur ni jabolonmu naboru on ma, ‘Marsahap ma ahu hu bani raja in, atap ra raja in mandalankon pangindoan ni jabolonni naboru on.’

¹⁶ Tontu ra do raja in manangihon anjaha paluahkon jabolonni naboru on hun bani tangan ni halak na sihol mangagou ahu rap pakon anakku hun bani parbagianan ni Naibata.

¹⁷ Ambahni ai nini uhur ni jabolonmu naboru on do, ‘Andohar hata ni tuanku, raja in, pasonang uhurhu; ai songon malekat ni Naibata do tuanku, na mambotoh aha na madear atap na masambor; sai ihasomani Jahowa Naibata ma ham.’”

¹⁸ Dob ai nini raja ai ma mambalosi naboru ai, “Ulang ma porsou bangku hata na sihol sungkunonku bam.” Nini naboru ai ma, “Antong, marsahap ma hita, rajanami.”

¹⁹ Dob ai nini raja ai ma, “Ai lang si Joab do na manranggi haganupan in?” Nini naboru ai ma mambalosi, “Songon sintongni manggoluh ham, tuannami anjaha rajanami, seng dong manlembang hu siamun barang hu sambilou hun bani na hinatahon ni tuanku; juakjuakmu si Joab do na mangkatahon ahu, ia do na mangaturhon ganup hata ai hubagas pamangan ni jabolonmu naboru on.

²⁰ Mambahen marlimbaga pe parsahapan ai lanjar binahen ni juakjuakmu si Joab do, tapi na pantas maruhur do tuannami songon pantas ni uhur ni sada malekat ni Naibata, na mabotoh haganup na masa i tanoh on.”

²¹ Dob ai nini raja ai ma dompak si Joab, “Tonggor ma, domma hubahen romban hu bani hatamon; antong, laho ma ho, boan ma mulak garama ai, si Absalom ai.”

²² Jadi manrogop ma si Joab anjaha marsombah, ipasu-pasu ma raja ai, anjaha nini ma, “Sadari on ma hubotoh, na dob dapotan idop ni uhur do ahu, juakjuakmu i lobeimu, alo rajanami, halani ibahen raja in romban hu bani pangindoan ni juakjuakni.”

²³ Dob ai laho ma si Joab hu Gesur, anjaha iboan ma si Absalom hu Jerusalem.

²⁴ Tapi nini raja ai ma, “Mulak ma lobei ia hu rumahni, seng bulih ope idahonni bohingku.” Jadi mulak ma si Absalom hu rumahni, tapi anggo bohi ni raja ai seng boi ope idahonni.

²⁵ Tapi seng dong bani sab Israel na sonai tarmurmurni halani jengesni songon si Absalom; hun bani jampal ni naheini das hu pakpak ni uluni, seng dong tikasni.

²⁶ Anjaha sanggah iparasipkon jambulan ni uluni (*ai somal do ai iparasipkon bani ujung ni ganup tahun, anggo maborattu ma ai bani, iparasipkon ma ai*),

itimbang do jambulan ni uluni ai, dua ratus sekel boratni bani timbangan ni raja ai.

²⁷ Dob ai tubuh ma bani si Absalom tolu anak, anjaha sada boru na margoran si Tamar; sada naboru sijenges rupa do ia.

²⁸ Dua tahun ma si Absalom marianan i Jerusalem, tapi lanjar seng onggong dong iidah bohi ni raja ai.

²⁹ Jadi isuruh si Absalom ma na mangalopi si Joab, laho marsuruhsi hu bani raja ai, tapi seng ra roh si Joab hu bani. Dob ai isuruh ma use paduahalihon, tapi lanjar do seng ra ia roh.

³⁰ Dob ai nini ma dampak juakjuakni, “Tonggor nasiam ma, i lambung ni jumangku do juma ni si Joab, anjaha margandum do ia ijai; laho ma nasiam anjaha surbuy nasiam ma juma ai.” Jadi isurbuy juakjuak ni si Absalom ma juma ai.

³¹ Jadi laho ma si Joab marayak si Absalom hu rumahni, nini ma hu bani, “Mase ma isurbuy juakjuakmu jumangkai?”

³² Dob ai nini si Absalom ma dampak si Joab, “Tonggor ma, domma husuruh na mangalopi ham, mangkatahon, ‘Roh ma ham hujon, ase husuruh ham marayak raja in, laho manungkunsi.’ Mase ma roh ahu hun Gesur? Rahanan do bangku, ijai ope ahu sonari. On pe sihol do idahonku bohi ni raja in; anggo marsalah ope ahu, ibunuh raja in ma lah ahu.”

³³ Dob ai laho ma si Joab marayak raja ai, anjaha ipatugah ma ai bani; jadi idilo ma si Absalom. Daskonsi ia hu bani raja ai, manrogop ma ia marsombah i lobei ni raja ai; jadi isummah raja ai ma si Absalom.

Panggeori ni si Absalom

Maporus Raja Daud

15 ¹ Dob salpu ai ihatahon si Absalom ma pasirsirhon bani gareta pakon huda, ambah ni ai lima puluh halak na mardalan i lobei ni.

² Somal do si Absalom puho girah sogod; anjaha jongjong ma ia i lambung dalan i horbangan ai; anjaha anggo adong halak na marparkara roh marayak raja ai mangindo uhum, iparsahapkon si Absalom ma ia, nini ma, “Hun huta ja do ham?” Anjaha anggo lhatahon, “Na roh hun marga na sonon do jabolonmu i Israel.”

³ Jadi nini si Absalom ma hu bani, “Torih ma, dear anjaha sintong do namin parkara in, tapi seng tumaram adong i lambung ni raja in na manangihon ham.”

⁴ Ambahni ai nini si Absalom ope, “Ambit ahu ma namin panguhum, ipabangkit halak i nagori on! Jadi ganup na marsalisih barang na marparkara hu bangku ma roh, gabe papintoronku ma uhum hu bani.”

⁵ Anjaha anggo adong halak na roh hundohor laho marsombah hu bani, isurdukkon ma tanganni laho manogusi, anjaha isummah ma ia.

⁶ Sonai ma ibahen si Absalom hu bani ganup halak Israel, na roh hu bani raja ai mangindo uhum; sonai ma ibahen si Absalom laho mambuat uhur ni halak Israel.

⁷ Dob salpu ompat tahun, nini si Absalom ma hu bani raja ai, “Mahua lopas ham ma ahu laho hu Hebron ase hugalar bagah-bagahku na dob hubagahkon hu bani Jahowa.

⁸ Ai domma marbagah-bagah hinan juakjuakmu on, sanggah marianan ope ahu i Gesur, i tanoh Aram, ningku do, ‘Anggo sonang do ahu mulak iarahkon Jahowa hu Jerusalem, boanonku do sada galangan bani Jahowa.’”

⁹ Dob ai nini raja ai ma hu bani, “Antong laho ma ho ibagas damei.” Jadi bingkak ma ia laho hu Hebron.

¹⁰ Tapi isuruh si Absalom ma parkahap hu ganup marga ni halak Israel mangkatahon, “Anggo ibogei nasiam sora ni tarompit, hatahon nasiam ma, ‘Domma bangkit raja si Absalom i Hebron!’”

¹¹ Laho do dua ratus halak na niontang hun Jerusalem rap pakon si Absalom, saluju do sidea na laho ai, aha pe lang ipabotoh-botoh sidea pasal na masa ai.

¹² Sanggah na manggalang ai ia, ihatahon si Absalom ma si Ahitopel, halak Gilo ai, panuturi ni

si Daud, roh hun hutani ai ma Gilo. Jadi lambin gomosni ma parbulawanan ai, anjaha halak simbuei pe lambin bueini do na hampit si Absalom.

¹³ Dob ai roh ma sada halak sibosan barita hu bani si Daud, nini ma, “Domma hampit si Absalom ganup uhur ni halak Israel!”

¹⁴ Jadi nini si Daud ma dompak ganup juakjuakni, na rap pakonsi i Jerusalem, “Eta, laho ma hita maporus, ai seng dong tumaram haluahon banta hun bani si Absalom. Podas ma hita laho ulang sompat jumpahsi hita, gabe iagou hita anjaha ibunuhi pangisi ni huta on marhitei podang.”

¹⁵ Nini juakjuak ni raja ai ma mambalosisi, “Barang aha na pinangindo ni uhur ni raja in, si bahenon ni juakjuakmu on do.”

¹⁶ Dob ai bingkak ma raja ai odor rap pakon ganup pangisi ni rumahni. Tapi itadingkon raja ai do sapuluh nasipuang manjagai rumahni.

¹⁷ Jadi dob luar raja ai rap pakon halak simbuei ai na mardalan nahei mangirikkonsi, marsaran ma sidea dohorhon rumah pangampis.

¹⁸ Dob ai mamontas ma ganup juakjuakni ai hun lambungni; sonai homa ganup halak Kereti pakon Peleti (*ai ma pangawal*) pakon ganup halak Gat, sionom ratus tentara ai.

¹⁹ Dob ai nini raja ai ma dompak si Itai, halak Gat ai, “Mase ma pala bingkak ham rap pakon hanami? Mulak ma ham anjaha tading ma ham rapkon raja

ai; ai bangsa na legan do ham, ambahni ai, na binuang hun nagorimu.

²⁰ Nantuari ope ham roh, mintor patut ma arahkononku ham sadari on mawat-awat rap pakon hanami, ai na laho ma ahu anjaha lang hubotoh atap dampak ja. Mulak ma ham, anjaha arahkon ma saninamu. Sai ipatuduhkon Jahowa ma bamu idop ni uhur-Ni pakon habonaron-Ni.”

²¹ Nini si Itai ma mambalosi, “Songon sintongni manggoluh Jahowa, anjaha manggoluh homa tuanku anjaha rajanami, barang ija ham rajanami, manggoluh barang matei, maningon ijai do pakon juakjuakmu on.”

²² Dob ai nini si Daud ma dampak si Itai, “Antong, palobei ma!” Jadi dihut ma si Itai, halak Gat ai laho rap pakon hasomanni ampa dakdanak na rap pakonsi.

²³ Anjaha tangis bei do gogoh-gogoh ganup pangisi ni nagori ai, sanggah na mamontas ai ganup na mabuei ai; idipari raja ai ma Bah Kidron, anjaha halak na mabuei ai pe haganup, inunut ma mardalan dampak halimisan.

²⁴ Tonggor ma, si Sadok pakon si Abyatar pe roh do rap pakon halak Levi, na mangusung Poti Parpadanan ni Naibata; ipatibal sidea ma poti ni Naibata, paima luar ganup halak simbuei ai hun huta ai.

²⁵ Tapi nini raja ai ma dompak si Sadok, “Boan ma mulak poti ni Naibata in hu huta! Anggo jumpahan idop ni uhur do ahu i lobei ni Jahowa, sai arahkonon-Ni do ahu mulak, anjaha pataridahkonon-Ni do on pakon ianan-Ni use bangku.

²⁶ Tapi anggo ihatahon, ‘Seng marosuh Ahu mangidah ho,’ tonggor ma, ijon do Ahu, ibahen ma hu bangku domu hu bani rosuh ni uhur-Ni.”

²⁷ Dob ai nini raja ai ma dompak Malim Sadok, “Mulak ma ham pakon si Abyatar ibagas damei hu huta ai, rap pakon anak nasiam na dua ai, si Ahimas anakmu, pakon si Jonatan, anak ni si Abyatar.

²⁸ Tonggor ma, hupaima pe bani pandiparan na laho hu halimisan, paima roh barita bangku hun bani nasiam.”

²⁹ Jadi iboan si Sadok pakon si Abyatar ma poti ni Naibata mulak hu Jerusalem, anjaha tading ijai ma sidea.

³⁰ Dob ai itangkogi si Daud ma tangkogan ni Dolog Jetun ai, tangis turut-turut mardalan, lang marsipatu anjaha irongkob uluni; anjaha ganup halak na mabuei ai na rap pakonsi irongkob bei do uluni, tangkog ma sidea anjaha tangis turut-turut mardalan.

³¹ Anjaha adong ma na patugahkon hu bani si Daud, dihut do si Ahitopel na marbulawan ai pakon si

Absalom. Jadi nini si Daud ma, “Ham Jahowa, sai sundati Ham ma tahi ni si Ahitopel.”

³² Jadi dob das si Daud hu pakpak ni dolog ai, ija somal halak manambah Naibata, tonggor ma, roh ma si Husai, halak Arki ai manjumpahkonsi, marpaheian na marigat anjaha tanoh i atas uluni.

³³ Nini si Daud ma hu bani, “Na pasusahkon ahu do ho, anggo ahu do iirikkon ho.

³⁴ Tapi anggo mulak ho hu huta ai, anjaha ihatahon ho hu bani si Absalom, ‘Juakjuakmu ma ahu ale rajanami; juakjuak ni bapamu do ahu na saindokah, tapi anggo nuan juakjuakmu ma ahu, jadi boi ma sundatanmu tahi-tahi ni si Ahitopel dompak ahu.

³⁵ Ambahni ai, Malim Sadok pakon Abyatar do hasomanmu ijai; anjaha haganup hata na binogeimu i rumah ni raja ai, patugah ma ai hu bani Malim Sadok pakon Abyatar.

³⁶ Tonggor ma, ijai do rap pakon sidea anak ni sidea na dua ai: si Ahimas, anak ni si Sadok pakon si Jonatan, anak ni si Abyatar; marhitei sidea boi do patugahon nasiam bangku sagala na binogei nasiam.”

³⁷ Jadi das ma si Husai, huan-huan ni si Daud ai hu huta ai; si Absalom pe masuk ma hu Jerusalem.

Raja Daud Iladungi si Siba

16 ¹ Jadi tuadkonsi otik si Daud hun pakpak ni dolog ai, tonggor ma, roh ma si Siba,

juakjuak ni si Mepiboset, manjumpahkonsi rap pakon saparangguan halode na marpalana, na mamboan dua ratus ruti, saratus turdun anggur na pinahorah, saratus kamata buah-buahan pakon anggur sada gusi hulingkuling.

² Nini raja ai ma dompak si Siba, “Bahen ahamu do in?” Jadi nini si Siba ma, “Halode in bahen ajakan ni nasipuang, ruti in pakon buah-buahan in sipanganon ni parana-parana in, anjaha anggur in bahen inumon ni na latih i halimisan.”

³ Dob ai nini raja ai ma, “Ija do anak ni tuanmu?” Jadi nini si Siba, “Tonggor ma, tading do ia i Jerusalem, ai nini uhurni do, ‘Sadari on ma paulakon ni halak Israel bangku harajaon ni ompungku.’”

⁴ Dob ai nini raja ai ma dompak si Siba, “Tonggor ma, ho ma simada haganup na bani si Mepiboset ai.” Dob ai nini si Siba ma, “Manombah ma ahu bamu, sai dapotan idop ni uhur ma ahu i lobeimu, alo rajanami!”

Si Simeai Mamurai Raja Daud

⁵ Dob das raja ai hu Bahurim, tonggor ma, luar ma hunjai sada halak hun bani pangku ni si Saul, na margoran si Simeai, anak ni si Gere; sanggah na roh ia hundohor inunut ma mamurai.

⁶ Igijigi ma si Daud bani batu, sonai homa ganup juakjuak ni si Daud, age pe ganup halak simbuei

ai pakon ganup halak, pauanglima-puanglima mardalan i siamun pakon i sambilou ni raja ai.

⁷ Nini si Simei do bani bura-burani ai, “Laho, laho ma ho, alo dalahi sisibur daroh, ho dalahi na so margagan!

⁸ Domma ibalaskon Jahowa bam ganup daroh ni ginompar ni si Saul, na sinolukmu manrajai; anjaha domma ibere Jahowa harajaon in hu tangan ni si Absalom anakmai. Tongor ma, domma manginsonoh bam pambahenanmu, ai dalahi sisibur daroh do ho.”

⁹ Dob ai nini si Abisai, anak ni si Seruya ma dompak raja ai, “Mase ma buraan ni baliang na mateian tuannami? Palopas ham ma ahu mandipar, ase hutampulhon uluni ai.”

¹⁰ Tapi nini raja ai ma, “Ai aha partalianku bani nasiam, alo anak ni si Seruya? Ase mamurai pe ia, halani na hinatahon ni Jahowa do hu bani, ‘Burai ma si Daud!’ Halani ai, ise ma na pag mangkatahon, ‘Mase ma bahenonmu sonai?’”

¹¹ Ambahni ai nini si Daud ma dompak si Abisai pakon dompak juakjuakni, “Tonggor ma, gari anakku, na hupupus sandiri mantahihon hosahku, samintolah anak ni halak Benjamin on ma lang? Paturut ma ia mamurai! Na hinatahon ni Jahowa do ia ai.

¹² Andohar marpangulaki uhur ni Jahowa mangidah salahku, anjaha ibalaskon bangku na madear gantih ni papani on sadari on.”

¹³ Jadi inunut si Daud pakon hasomanni ai ma dalanni, anjaha si Simei ai inunut ma homa mardalan bani raboyon na padipar-dipar pakonsi anjaha lang maronti ia mamurai, manggijigi bani batu pakon manampakkon orbuk hu bani.

¹⁴ Dob ai das ma raja ai hu Bah Jordan rap pakon ganup simbuei ai na rap pakonsi, latih tumang. Ijai marsaran ma ia, pahosahkon.

Si Absalom i Jerusalem

¹⁵ Ia si Absalom pakon ganup halak simbuei ai, halak Israel, das ma hu Jerusalem anjaha si Ahitopel rap pakon sidea.

¹⁶ Anjaha dob das si Husai, halak Arki, huan-huan ni si Daud ai, hu bani si Absalom, nini si Husai ma hu bani, “Sai horas ma raja in! Sai horas ma raja in!”

¹⁷ Nini si Absalom ma dompak si Husai, “Sonin do parholong ni ateimu hu bani huan-huanmu? Mase ma lang laho ho rap pakon hasomanmu?”

¹⁸ Nini si Husai ma mambalosi si Absalom, “Lang, in na pinilih ni Jahowa pakon halak simbuei ampa ganup halak Israel, ia do simada ahu, anjaha rapkonsi do ahu.

¹⁹ Ambahni ai hu bani ise do ahu patut pambalosi? Ai lang hu bani anak ni raja in?

Songon pambalosingku bani bapamu, sonai do pambalosingku bamu.”

²⁰ Dob ai nini si Absalom ma dompak si Ahitopel, “Patugah pingkiranmu, aha do sibahenonta?”

²¹ Nini si Ahitopel ma dompak si Absalom, “Parayak ma parinangon ni bapamu, na tinadingkon ni bapamu, manramotkon rumah in; jadi bogeion ni ganup halak Israel ma, na dob butak ham bani bapamu, gabe lambin gogohni ma uhur ni halak na rap pakon ham.”

²² Dob ai ipajongjong sidea ma sada lampo-lampo bani si Absalom i atas ni tayub ai; jadi iparayak si Absalom ma parinangon ni bapani ai, ipaidah-idah ganup halak Israel.

²³ Ia aturan, na niaturhon ni si Ahitopel bani panorang ai, usih do ai, songon na dob sinungkunkon hu bani Jahowa; sonai do ganup aturan ni si Ahitopel bani pangahap ni si Daud, ampa si Absalom.

Pingkiran ni si Ahitopel Isundati si Husai

17 ¹ Dob ai nini si Ahitopel ma dompak si Absalom, “Palopas ma ahu mamilih sapuluh dua ribu halak, ase bingkat ahu mardakdak si Daud borngin on,

² ase hudorab ia, sanggah loja anjaha dayuk-dayuk ope tanganni, ase bajoraon ia hubahen, gabe

maporus ganup halak simbuei na rap pakonsi ai.
Raja ai tumang pe hubunuh,

³dob ai huboan ma ganup bangsa ai mulak
bamu, songon tunangan na roh hu rumah hu bani
paramangonni. Ai sahalak do hansa sibunuhonmu,
tapi seng sikahuaon anggo halak na mabuei ai
ganup.”

⁴Jadi rosuh ma si Absalom bani hata ai, sonai homa
uhur ni ganup pangintuai ni halak Israel.

⁵Tapi nini si Absalom ma, “Dilo ma homa si
Husia, halak Arki ai, ase tangar hita atap naha do
pangkatahonni pasal ai.”

⁶Dob roh si Husai hu bani si Absalom, nini si
Absalom ma hu bani, “Sonon do hata ni si Ahitopel,
dear do bahenonta songon na hinatahonni ai?
Anggo lang, naha ma hatamu?”

⁷Jadi nini si Husai ma dompak si Absalom, “Seng
dear aturan na niaturhon ni si Ahitopel anggo sahali
on.”

⁸Ambah ni ai nini si Husai ma, “Itanda ham do
bapamu pakon hasoman-hasomanni, puanglima do
sidea; gilani songon gipul na i ladang na magouan
anak. Anjaha halak na somal marporang do
bapamu, halani ai seng tumaram rap marborngin
ia pakon halak simbuei ai.

⁹Tonggor ma, tontu marponop do ia nuan bani sada
liang barang bani sada ianan na legan. Anjaha anggo
mintor bani mula ni on matei deba na hun banta,

mintor hatahonon ni na mambogeisi ma, ‘Domma talu halak na mangirikkon si Absalom!’

¹⁰ Gabe mintor gobir holi halak na garang, na barani songon singa; ai ganup do halak Israel mambotoh puanglima do bapanta anjaha halak na borani do hasomanni ai.

¹¹ Halani ai anggo ahu marpandapot, maningon patumpuon do lobei hu lambungmu, ganup halak Israel olat ni Dan das hu Berseba, songon horsik na i topi ni laut bueini, anjaha maningon ham sandiri mambobahon sidea.

¹² Anggo jumpah hita ma ia bani sada ianan, barang ija pe jumpah hita ia, mintor dorab hita ma ia, songon pardabuh ni namur hu tanoh, anjaha tontu sahalak pe lang na manggoluh be, ia age halak na rapkonsi ai pe.

¹³ Tapi porini surut ia hu bani sada huta, nahkonon ni hagianup halak Israel ma tali hu huta ai, anjaha rintak hita ma ai das hu habungan, ronsi sada batu etek-etek pe lang jumpah ijai.”

¹⁴ Dob ai nini si Absalom pakon ganup halak Israel ma, “Dearan do pandapot ni si Husai, halak Arki ai, ase pandapot ni si Ahitopel. Tapi Jahowa do na mangatur ai, laho manundati tahi ni si Ahitopel sidearan ai, ase tarparroh Jahowa hamagouan hu bani si Absalom.”

¹⁵ Dob ai nini si Husai ma dompak Malim Sadok pakon dompak Malim Abyatar, “Sonon, sonon do

iaturhon si Ahitopel hu bani si Absalom pakon hu bani pangintuai ni halak Israel, tapi sonon do huaturhon.

¹⁶ On pe podas ma suruh nasiam halak laho patugahkon hu bani si Daud, 'Ulang ham marborngin bani pandiparan i halimisan, tapi podas ma ham mandipar, ase ulang hona bondut raja in pakon halak simbuei ai na rap pakonsi.'"

¹⁷ Tapi anggo si Jonatan pakon si Ahimas, jongjong do i lambung ni parigi Rogel paimahon. Dob ai laho ma sada jabolon naboru patugahkon ai bani sidea, ase sidea laho patugahkon ai hu bani Raja Daud; ai seng bulih taridah sidea masuk hu huta ai.

¹⁸ Hape iidah sada na maposo do sidea ai, anjaha ipatugah ma ai hu bani si Absalom; dob ai podas ma sidea na dua ai laho, gabe das ma sidea hu rumah ni sada halak paramangon i Bahurim; adong do sada bani parigi i alamanni, jadi tuad ma sidea hubagas.

¹⁹ Dob ai ibuat anjaha iherbangkon naboru ai ma apei i atas ni parigi ai, lanjar itirtirhon gandum ijai gabe seng dong be na mambotoh ai.

²⁰ Dob das juakjuak ni si Absalom hu bani naboru ai i rumah, nini sidea ma, "Ija do si Ahimas pakon si Jonatan?" Jadi nini naboru ai ma hu bani sidea, "Domma idipari sidea bah ai." Jadi dob ipindah sidea, hape lanjar seng jumpah, mulak ma sidea hu Jerusalem.

²¹ Dob laho halak ai manaik ma sidea hun parigi ai, lanjar laho mamboan barita ai hu bani Raja Daud. Nini sidea ma hu bani Raja Daud, “Bingkat ma nasiam, podas ma dipari nasiam bah in, ai sonon do iaturhon si Ahitopel mangimbang nasiam.”

²² Jadi bingkat ma si Daud pakon ganup halak simbuei na rap pakonsi ai, anjaha idipari sidea ma Bah Jordan ai; siangkonsi ari sahalak pe lang dong be na tading na so mandipari Bah Jordan ai.

²³ Tapi dob iidah si Ahitopel na so idalankon aturan ai, ipalanai ma halodeni, lanjar bingkat ma ia mulak hu rumahni, hu hutani. Dob ipatorsa ganup pasal rumahni ai, idoloskon ma dirini; matei ma ia anjaha itanom bani tanoman ni bapani.

Si Daud i Mahanaim

²⁴ Dob ai das ma si Daud hu Mahanaim. Si Absalom pe idipari ma Bah Jordan rap pakon ganup halak Israel.

²⁵ Si Amasa do ipabangkit si Absalom gabe pambobai ni bala ai, gantih ni si Joab. Ia si Amasa, ai ma anak ni sada paramangon, na margoran si Jitera, halak Ismael, na mambuat si Abigal, boru ni si Nahas, anggi ni si Seruya, inang ni si Joab.

²⁶ Dob ai marsaran ma halak Israel pakon si Absalom i tanoh Gilead.

²⁷ Jadi dob das si Daud hu Mahanaim, roh ma si Sobi, anak ni si Nahas, hun Rabba, huta ni halak

Ammon pakon si Mahir, anak ni si Amiel hun Lodebar, ampa si Barsillai halak Gilead hun Rogelim, ²⁸ iboan sidea ma podoman, hudon pakon pinggan, gandum, omei, nitak, pinahpah, hasang, dali, ²⁹ manisan ni huraamah, mantega, biri-biri pakon keju ni lembu bahen panganon ni si Daud pakon hasomanni ai, ai nini uhur ni sidea, ‘Tontu domma loheian, latih anjaha horahan halak simbuei ai i halimisan.’

Parmatei ni si Absalom

18 ¹ Dob ai ipabaris si Daud ma simbuei ai rap pakonsi, anjaha ipabangkit ma bani sidea kopala ni sisaribu pakon kopala ni sisaratus.

² Dob ai ipabangkit si Daud ma bala ai, sapartolu binobahon ni si Joab, sapartolu binobahon ni si Abisai, anak ni si Seruya, anggi ni si Joab, anjaha sapartolu nari binobahon ni si Itai, halak Gat ai. Nini si Daud ma hu bani simbuei ai, “Maningon dihut do ahu rap pakon nasiam.”

³ Tapi nini simbuei ai ma, “Seng bulih ham bingkat. Porini pe maporus hanami, seng parduli sidea bennami; age matei pe satongah hunbannami, seng parduli sidea bannami, tapi dos do hargamu pakon sapuluh ribu na songon hanami on. Rahanan ma hun huta ham roh mangurupi hanami.”

⁴ Nini raja ai ma hu bani sidea, “Barang aha sidearan nini uhur nasiam, ai do bahenonku.” Jadi jongjong

ma raja ai i lambung ni horbangan ai, anjaha luar ma bala ai mar sasaratus pakon mar sasaribu.

⁵ Dob ai martonah ma raja ai hu bani si Joab, si Abisai pakon si Itai, “Harga ma bahen nasiam anaha ai, si Absalom.” Anjaha ganup do simbuei ai mambogeisi sanggah na martonah ai raja ai hu bani kopala-kopala ai pasal si Absalom.

⁶ Ase luar ma bala ai hu ladang manjumpahkon halak Israel, jadi marsiporangan ma sidea i harangan Efraim.

⁷ Jadi talu ma ijai halak Israel ibahen hasoman ni si Daud; anjaha banggal tumang do hataluan ai ijai sadari ni ai, pala matei dua puluh ribu halak.

⁸ Rarat do parporangan ai bani sab talun ai, anjaha daoh do bueinan bala ai ibondut harangan ai sadari ni ai ase ipangan podang.

⁹ Tudu pajumpah ma si Absalom pakon juakjuak ni si Daud. Mangajak halode do ia, anjaha mamontas ma halode ai hun toruh ni dangkah ni sada jabi-jabi na banggal, jadi alit ma jambulanni bani jabi-jabi na banggal ai, jadi gayung-gayung ma ia i holangkolang ni langit pakon tanoh, ai torus do lintun halode na i toruh ni ai.

¹⁰ Adong ma sahalak na mangidah ai gabe ipatugah ma ai hu bani si Joab, nini ma, “Huidah do si Absalom gayung-gayung bani sada jabi-jabi.”

¹¹ Nini si Joab ma hu bani halak na patugahkon ai bani, “Aha, iidah ho ia? Mase ma lang mintor

ibunuh ho ia ijai ase manlabab hu tanoh? Mintor bereonku ma namin bam sapuluh sekel pirak pakon sada gondit.”

¹² Tapi nini halak ai ma hu bani si Joab, “Porini pe itimbang hubagas tanganku saribu sekel pirak seng anjai mangonai tangan ahu hu bani anak ni raja ai; ai itangar hanami do martonah raja ai bamu, bani si Abisai pakon bani si Itai, ‘Harga ma bahen nasiam, anaha ai, si Absalom!’

¹³ Porini martahi-tahi ahu mambuat hosahni, seng tumaram ponop ai hun bani raja ai, anjaha ham pe ra do marlopas diri.”

¹⁴ Dob ai nini si Joab ma, “Anggo sonai do, seng tarpaima-ima ahu ho.” Ibuat ma tolu tanja, ipantomkon ma ai hu pusu-pusu ni si Absalom, sanggah manggoluh ope ia gayung-gayung bani jabi-jabi ai.

¹⁵ Roh ma sapuluh garama sibuan senjata ni si Joab, iinggoti sidea ma si Absalom, itampul ma ia lanjar matei.

¹⁶ Isompul si Joab ma tarompet, jadi mulakan ma bala ai hun bani na mardakdak halak Israel; ai domma iparentahkon si Joab bani sidea ase ulang inunut be.

¹⁷ Dob ai ibuat sidea ma si Absalom, idabuhkon sidea ma ia hubagas sada godung ibagas harangan ai, anjaha ipagugun sidea ma batu, gijang tumang i

atas ni. Tapi ganup halak Israel ai domma maporus hu rumahni bei.

¹⁸ Ia si Absalom sanggah manggoluh ope ia, domma ibuat anjaha ipajongjong bani sada tugu, ai ma i habungan Raja, ai nini do, “Seng dong anakku, na manjujung goranku.” Igoran do tugu ai mangihutkon goranni, lanjar margoran do ai ronsi sadari on: Tugu ni si Absalom.

¹⁹ Dob ai nini si Ahimas, anak ni si Sadok ma, “Palopas ham ma ahu marlintun, laho mamboan barita ai hu bani raja ai, ai ma na dob ipintori Jahowa do ia marimbang munsuhi.”

²⁰ Nini si Joab ma hu bani, “Seng dear ho siboan barita sadari on; santorap nari ma ho mamboan barita, tapi sadari on seng bulih siboan barita ho, halani matei anak ni raja in.”

²¹ Dob ai nini si Joab ma hu bani halak Kus ai, “Laho ma ho, patugah ma hu bani raja in, aha na niidahmu!” Mintor isombah halak Kus ai ma si Joab lanjar laho ma ia.

²² Tapi iulaki si Ahimas, anak ni si Sadok ai ma, marsahap hu bani si Joab, “Barang sonaha pe, palopas ham ma homa ahu marpojong mangirikkon halak Kus ai.” Nini si Joab ma, “Mase sihol marlintun ho ambia, ai seng tumaram dapotan upah ho halani barita on?

²³ Barang sonaha pe, nini, sihol do laho ahu.” Jadi nini si Joab ma hu bani, “Antong, pojong ma!”

Jadi marlintun ma si Ahimas, hun dalan na bani habungan ni Bah Jordan ai, gabe i lobei ma halak Kus ai.

²⁴ Tapi hundul-hundul do si Daud i holangkolang ni horbangan na dua ai; tapi mardalan-dalan do parjaga ai i atas tayub ni horbangan ai dohor hu tembok. Sanggah mangkawah ia, iidah ma sada halak marlintun.

²⁵ Jadi idilohon parjaga ai ma laho patugahkon ai hu bani raja ai, nini raja ai ma, “Anggo sahalaksi do, tontu barita na madear do na binoanni.” Sanggah na lambin dohorni ia roh,

²⁶ iidah parjaga ai ma roh sada halak na legan marlintun, gabe dilo-dilo ma parjaga ai dompak horbangan ai, nini ma, “Tonggor ma, roh marlintun use sada halak na legan, sahalaksi hansa.” Nini raja ai ma, “Ia pe sibohan barita na madear do.”

²⁷ Dob ai nini parjaga ai ma, “Songon parlinton ni si Ahimas, anak ni si Sadok do huidah parlinton ni na parlobei ai.” Nini raja ai ma, “Halak na bujur do ia anjaha barita na madear do na binoanni ai.”

²⁸ Dob ai dilo-dilo ma si Ahimas hu bani raja ai, nini ma, “Domma jorei!” Lanjar manrogop ma ia manombah hu bani raja ai, anjaha nini ma, “Pinuji ma Jahowa, Naibatamu, na maniapkon halak na manggeori dompak tuannami.”

²⁹ Dob ai nini raja ai ma, “Naha, horas do anaha ai, si Absalom?” Nini si Ahimas ma mambalosi, “Sanggah

na sinuruh ni si Joab ahu, lutu do huidah, tapi seng hubotoh na masa ai.”

³⁰ Dob ai nini raja ai ma, “Surut ho otik, jongjong ma ijai.” Jadi surut ma ia otik lanjar jongjong ijai.

³¹ Tonggor ma roh ma halak Kus ai, jadi nini ma, “Barita na madear do huboan, alo rajanami! Ai ipaluah Jahowa do ham sadari on hun bani tangan ni halak na manggeori dompak ham.”

³² Nini raja ai ma hu bani halak Kus ai, “Naha, horas do anaha ai, si Absalom?” Nini halak Kus ai ma mambalosi, “Sai songon na hu bani parana ai ma namin, sogop hu bani sagala munsuh ni tuannami pakon hu bani sagala na jongjong mangimbang ham, na sihol mangagou ham.”

³³ Jadi seda tumang ma uhur ni raja ai, laho ma ia hu atas, hu kamar, na ibabou ni horbangan ai, anjaha tangis ma ia; sanggah na laho ai ia hujai nini ma, “Alo ambia Absalom, ambia, ambia, Absalom! Dearan ma namin ahu matei, gantiham ambia Absalom! Ambia! Ambia!”

Hona Hata Raja Daud Ibahen si Joab, halani Mapusoktu Uhurni Mangidah si Absalom

19 ¹ Adong ma na patugahkon hu bani si Joab, “Tonggor ma, sai tangis anjaha mandoruhi do raja ai halani si Absalom.

² Ase gabe pusok ni uhur do hamonangan bani na sadari ai bani ganup bangsa ai; ai sar do ibogei

bangsa ai bani na sadari ai: Pusok do uhur ni raja ai halani anakni ai.”

³ Ase marponop-ponop ma halak na mabuei ai bani na sadari ai masuk hu huta, songon parmasuk ni halak na maila, na maporus hun parporangan.

⁴ Pala do irongkob raja ai bohini anjaha ipagogoh sorani tangis-tangis, “Alo ambia Absalom! Absalom! Anakku! Anakku!”

⁵ Dob ai laho ma si Joab marayak raja ai hu rumahni, nini ma, “Bador do ibahen ham sadari on bohi ni juakjuakmu, na paluahkon hosahmu pakon hosah ni anakmu, borumu, pakon hosah ni nasipuang.

⁶ halani na hinaholonganmu jolma na mangkagigihon ham, anjaha ihagigihon ham halak na mangkaholongi ham. Ai ipatidak ham do sadari on, na so parduli do ham bani sipambobai pakon bani juakjuak; ai torang do huidah sadari on, asal manggoluh si Absalom, age matei hanami ganup sadari on, malas do uhurmu.

⁷ On pe, jongjongkon ham ma, luar ma ham, anjaha marsahap ma ham otik pamalas uhur ni juakjuakmu; ai hubijahon ma hu bani Jahowa, anggo seng luar ham, sahalak pe lang tumaram na ra tading mangkasomani ham saborngin on; jadi hasedaon bangga ma in bamu, parahan hun bani hasedaon na dob mangonai bamu hun bani sietek-etekonmu nari das hu bani sonari.”

⁸Jadi ijongjongkon raja ai ma laho hundul hu horbangan. Dob ai tarboge ma hu bani ganup simbuei ai, “Tonggor ma, hundul do raja i horbangan.” Jadi roh ma ganup simbuei ai hu bani raja ai. Tapi maporus do halak Israel ganup hu rumahni bei.

Parmulak ni si Daud

⁹Dob ai marsisolsolan ma ganup halak simbuei ai i tongah-tongah ni ganup marga ni halak Israel, nini sidea ma, “Raja ai do na paluahkon hita hun bani munsuhta, anjaha ia do na paluahkon hita hun bani tangan ni halak Palistim, hape maningon maporus ia nuan hun tanohta on halani si Absalom.

¹⁰Ia si Absalom, na dob iminaki hita manggomgomi hita, domma matei i parporangan. Ai pe mase ma malang-malang hita mangkatahon ase mulak raja ai?” Das ma sahap-sahap ni ganup halak Israel ai bani raja ai.

¹¹Dob ai isuruh Raja Daud ma suruhanni marayak si Sadok pakon si Abyatar malim ai, mangkatahon hu bani sidea, “Hatahon nasiam ma hu bani pangintuai ni halak Juda, ‘Mase ma parpudi nasiam laho mangalop raja in mulak hu rumah?’

¹²Saninangku do nasiam, sisada holi-holi pakon sisada daging do hita. Antong mase ma nasiam parpudi mangalopi raja in mulak?’

¹³ Hu bani si Amasa pe hatahon nasiam ma, ‘Ai lang sisada holi-holi pakon sisada daging do ho pakon ahu?’ Maningon sonai do bahenon ni Naibata hu bangku, tambah ope hunjai tene, anggo seng ho pambobai ni balangku hu lobeian on gantih ni si Joab.”

¹⁴ Jadi hona ma uhur ni ganup halak Juda, sauhur ma sidea marsuruh na mangkatahon hu bani raja ai, “Mulak ma ham pakon ganup juakjuakmu.”

¹⁵ Mulak ma raja ai, anjaha das ma ia hu Bah Jordan; anjaha halak Juda pe laho ma hu Gilgal mangalo-alo raja ai, laho padiparhon raja ai bani Bah Jordan.

¹⁶ Sonai homa si Simei, anak ni si Gera, halak Benjamin ai, na hun Bahurim, juakjuak ni ginompar ni si Saul, rap pakon anakni sapuluh lima halak pakon jabolonna dua puluh halak, gabe das ma sidea hu Bah Jordan ai, i lobei ni raja ai; tarolos ma ia tuad rap pakon halak Juda ai manjumpahkon raja ai.

¹⁷ Adong do saribu halak Benjamin hasomanni, ambah ni ai si Siba.

¹⁸ Idipari sidea ma pandiparan ai, laho padiparhon sinrumah ni raja ai, laho mambuat uurni. Dob ai roh ma si Simei, anak ni si Gera, manrogop hulobei ni raja ai, sanggah na laho mandipari Bah Jordan ai ia,

¹⁹ anjaha nini ma hu bani raja ai, “Sai ulang ma ihira tuannami hajahaton ai atap ipaingat ham hasalahan na binahen ni jabolonmu on, sanggah

na luar tuannami hun Jerusalem, anjaha ulang ma iparimbagaskon raja in hata ai ibagas uhurni.

²⁰ Ai domma torang iahap jabolonmu on, na dob mardousa ahu ijai; halani ai, tonggor ma, ahu do na parlobei roh tuad sadari on hun bani ganup ginompar ni si Josep, laho mangalo-alo tuannami.”

²¹ Dob ai nini si Abisai, anak ni si Seruya ma mambalosi, “Mintor lang ma talup marutang hosah si Simeai halani on, ai domma pala iburai na mininakan ni Jahowa?”

²² Tapi nini si Daud ma, “Ai aha do partalianku bani nasiam, alo anak ni si Seruya, ase gabe sibolis nasiam bangku sadari on? Tor bulih ma matei sada halak Israel sadari on? Ai hubotoh, sabonar sadari on do ahu bangkit jadi raja manggomgom Israel.”

²³ Dob ai nini raja ai ma hu bani si Simeai, “Seng bulih ho matei!” Pala marbija raja ai bani.

²⁴ Si Mepiboset pe, pahompu ni si Saul, tuad do mangalo-alo raja ai; seng iburihi naheini, seng isuhur gumisni anjaha seng itaptapi paheianne olat ni parporus ni raja ai, das hu bani parmula kni mardamei-damei.

²⁵ Sanggah roh ia hu Jerusalem laho manjumpahkon raja ai, jadi nini raja ai ma hu bani, “Mase ma lang dihut ho laho rapkon ahu alo Mepiboset?”

²⁶ Nini ma mambalosi, “Ham tuannami anjaha rajanami, ioto-otoi juakjuakku do ahu; ai ningku do

namin hu bani, 'Palanai ma sada halode in bahen ajakanku, ase laho ahu rap pakon raja ai.' Ai na repat do jabolonmu on,

²⁷ tapi domma ipasambor-sambor homa jabolonmu on i lobei ni tuannami anjaha rajanami. Tapi usih songon malekat ni Naibata do tuannami; halani ai bahen ham ma aha na dear, nini uhurmu.

²⁸ Aijolma na patut marutang hosah do namin ganup ginompar ni bapa i lobei ni tuannami, raja in; hape ibahen ham do jabolonmu on hu tongah-tongah ni halak na sapanganan pakon ham. Aha be dong hak bangku padas pangindoanku bani raja in?"

²⁹ Dob ai nini raja ai ma hu bani, "Mase sonin sahap-sahapmu ope? Domma huputuskon, ho pakon si Siba marbagi tanoh ai."

³⁰ Nini si Mepiboset ma hu bani raja ai, "Age pe ibuat ganupan ai, asal ma mulak tuannami mardamei-damei hu rumahni."

³¹ Si Barsilai ai pe, halak Gilead ai, tuad do hun Rogelim; laho do ia pakon raja ai hu Jordan, laho manaruhkonsi hu dipar ni Bah Jordan ai, lanjar marsirang ijai.

³² Halak na dob matua tumang do si Barsilai ai, ualuh puluh tahun ma umurni; ia do na marmuduhon raja ai, sadokah marianan ia i Mahanaim, ai halak na bayak tumang do ia.

³³ Nini raja ai ma hu bani si Barsilai, “Maningon ham do hasomanku laho, ase huparmudu-mudu ham i lambungku i Jerusalem.”

³⁴ Nini si Barsilai ma hu bani raja ai, “Sadiha dokah nari tumaram manggoluh ahu, ase pala tangkog ahu rap pakon raja in hu Jerusalem?

³⁵ Marumur ualuh puluh tahun ma ahu sadari on; sonaha ma pambahenku manirang na madear hun bani na masambor? Sonaha be tarbahen juakjuakmu on mandai na pinanganni barang na niinumni? Tor tarpatangi-tangi ahu be sora ni pandoding dalahi barang pandoding naboru? Ambahni ai mase ma gabe siporsanon ope jabolonmu on bani tuannami, raja in?

³⁶ Sihol do taruhkonon ni juakjuakmu otik raja in hu dipar ni Bah Jordan. Mase ma pala sonai pambalas ni raja in hu bangku?

³⁷ Palopas ham ma mulak juakjuakmu on, ase matei ahu ibagas hutanku, i lambung tanoman ni bapa pakon inang. Tapi tene, tonggor ma, ijon do juakjuakmu si Kimham, ia ma rahanan mandipar rap pakon tuannami, anjaha bahen ham ma bani barang aha rosuh ni uhurmu.”

³⁸ Jadi nini raja ai ma, “Antong si Kimham ma hasomanku mandipar, ase hubahen bani barang aha na pinarsinta ni uhurmu; anjaha sagala na pinangindo ni uhurmu hun bangku, sai na bahenonku do bamu.”

³⁹ Jadi idipari halak simbuei ai ma Bah Jordan. Anjaha dob mandipar homa raja ai, isummah ma si Barsilai anjaha ipasu-pasu, dob ai mulak ma ia hu hutani.

⁴⁰ Raja ai pe inunut ma dalanni hu Gilgal, anjaha si Kimham do hasomanni; ganup halak Juda pakon satongah halak Israel dihut manaruhkon raja ai.

⁴¹ Dob ai roh ma ganup halak Israel hu bani raja ai, nini ma hu bani, “Mase ma ra ham tangkoon ni saninanami halak Juda anjaha ipadipar raja in pakon parrumahni ampa ganupan juakjuakni hu dipar ni Bah Jordan?”

⁴² Jadi nini ganupan halak Juda ma mambalosi halak Israel, “Halani dohoran raja in bennami. Mase ma manggila nasiam halani ai? Ongga ipangan hanami atap aha hun bani raja in? Atap adong sibere-bereni bannami?”

⁴³ Tapi nini halak Israel ma mambalosi halak Juda, “Sapuluh hali bueinan haknami bani raja in, hanami do sikahanan; mase ma mapas uhur nasiam mangidah hanami? Ai lang hanami do parlobei mansahapkon ase mulak naboan rajanta? Tapi korasan do halak Juda marsahap hun bani halak Israel.”

Si Seba Manlawan Raja Daud

20 ¹ Dob ai adong ma ijai sada halak na so margagan na margoran si Seba, anak ni si

Bikri, halak Benjamin; isompul ma tarompét, anjaha nini ma, “Seng dong parrupei hita bani si Daud, anjaha seng dong siteanonta hun bani si Daud, anak ni si Isai ai! Mulak ma ganup halak hu lampo-lamponi bei, o Israel!”

² Jadi marbalik ma ganup halak Israel hun bani si Daud laho mangirikkon si Seba, anak ni si Bikri. Tapi anggo halak Juda totap do sidea mangirikkon raja ni sidea, olat ni Jordan das hu Jerusalem.

³ Jadi dob das si Daud i rumahni i Jerusalem, ibuat raja ai ma naboru sisapuluh ai, na tinadingkonni hinan manramotkon rumah, ipajagahon ma sidea ibagas sada rumah anjaha iparmudu do sidea, tapi lang iparayak be sidea. Jadi tarhurung ma sidea ijai das bani ari parmatei ni sidea, songon halak na mabalu.

⁴ Dob ai nini Raja Daud ma hu bani si Amasa, “Tingtingkon ma ase martumpu halak Juda hu lambungku ibagas na tolu ari on, anjaha ho pe roh ma hujon.”

⁵ Jadi laho ma si Amasa marhara patumpuhon Juda. Tapi dob salpu panorang na dob tinonahkon bani,

⁶ nini si Daud ma hu bani si Abisai, “Ra bueinan do mara hu banta bahenon ni si Seba, anak ni si Bikri, hun bani na binahen ni si Absalom. Antong laho ma ho mambobahon juakjuak ni tuanmu, pardakdak ma ia, ase ulang sompat jumpahsi

huta na marbatar-batar gabe buei hasunsahan holi ibahen banta.”

⁷ Jadi luar ma mangirikkon si Abisai; si Joab, halak Kreti pakon Peleti ampa halak na borani-borani; bingkat ma sidea ganup hun Jerusalem mardakdak si Seba, anak ni si Bikri ai.

Parmatei ni si Amasa

⁸ Tapi dob das sidea hu batu na bolon ai, dohorhon Gibeon, roh ma si Amasa manjumpahkon sidea. Ia si Joab marpaheian baju porang do, anjaha i atas ni ai adong do sada gondit rap pakon podang ibagas sarungni, na sinangkutkon hu binongeini, hape peut ma anjaha madabuh hu tanoh.

⁹ Dob ai nini si Joab ma hu bani si Amasa, “Naha, horas-horas do ho, ambia?” Anjaha itangkap si Joab ma si Amasa bani gumisni marhitei tangan siamunni laho manummahsi.

¹⁰ Tapi lang marjaga si Amasa bani podang na bani tangan sambilou ni si Joab; itobakkon si Joab ma ai bani badanni, gabe usei ma bituhani hu tanoh, seng pala ipaduahali manobaksi; jadi matei ma ia. Dob ai inunut si Joab pakon si Abisai anggini ai ma mardakdak si Seba, anak ni si Bikri ai.

¹¹ Tapi sahalak hun bani juakjuak ni si Joab jongjong do i lambung ni si Amasa, dob ai nini ma, “Barang ise na hampit si Joab anjaha na mangirikkon si Daud, iihutkon ma si Joab!”

¹² Tapi tibal margulu-gulu darohni do si Amasa i dalan na bolon ai. Anjaha ganup na mamontas, na mangidahsi sonto ma; jadi dob iidah halak ai, maronti ma ganup halak simbuei ai ijai, isarad ma si Amasa hun dalan na bolon ai hu ladang anjaha ironkobkon ma sada hiou bani.

¹³ Jadi dob ipaholang ia hun dalan na bolon ai, itoruskon halak na mabuei ai ma mangirikkon si Joab, laho mardakdak si Seba, anak ni si Bikri.

Partalu ni si Seba

¹⁴ Ia si Seba ibontas do ganup marga ni halak Israel das hu Abel-Bet-Mahaka, anjaha ganup na hampitsi domma martumpu anjaha iirikkon ia.

¹⁵ Jadi roh ma ganup halak na rap pakon si Joab, anjaha ihubu ma ia i Abel-Bet-Mahaka; ipagugun sidea ma tanoh das hu tembok ni huta ai, jadi ganup ma sidea parsedahon tembok ai ase marosou ai.

¹⁶ Jadi dilo-dilo ma sada puang-puang na pantas hun huta ai, “Tangar! Tangar nasiam ma! Patugah nasiam ma hu bani si Joab, Padohor ma hujon, adong hatahononku bamu!”

¹⁷ Jadi ipadohor ma hu bani, lanjar nini naboru ai ma, “Ham do in Joab?” Balosni, “Eak.” Dob ai nini ma hu bani, “Tangar ma sora ni jabolonmu naboru on!” Jadi nini ma mambalosi, “Hutangar do.”

¹⁸ Dob ai nini naboru ai ma, “Somal do nabasaia ihatahon halak sonon, ‘Maningon marpanungkun lobei hu Abel,’ jadi jorei ma ganup.

¹⁹ Hanami do sidameinan anjaha sibujuran i Israel; hapeni isura-surahon ham do mamunuh sada huta ampa sada inang i Israel; mase ma sihol bondutonmu parbagianan ni Jahowa?”

²⁰ Dob ai nini si Joab ma mambalosi, “Palis, palis, ahu mintor sihol mamondut barang mangagou.

²¹ Seng sintong sonai. Adong do sada halak hun Dolog Efraim, na margoran si Seba, anak ni si Bikri, na manggeori dompak Raja Daud. Bere nasiam ia gelah bangku, ase surut ahu hun huta on.” Jadi nini naboru ai ma hu bani si Joab, “Tonggor ma, sampakkononkon do holi uluni bamu hu lopah ni tembok on.”

²² Dob ai laho ma naboru ai hu bani halak simbuei ai patugahkon hapentaronni ai. Itampul sidea ma ulu ni si Seba, anak ni si Bikri ai, anjaha igijigkon sidea ma ai hu bani si Joab. Jadi isompul ma tarompet, gabe merap ma sidea hun huta ai, ganup mulak hu lampo-lamponi bei. Mulak ma homa si Joab hu Jerusalem marayak raja ai.

Gamot-gamot ni Raja Daud

²³ Si Joab do pambobai ni ganup bala ni Israel, anjaha si Benaya, anak ni si Joyada, pambobai ni halak Kreti pakon Peleti.

²⁴ Si Adoram kopala ni halak siparrodi, anjaha si Josafat, anak ni si Ahilud, wakil ni raja ai.

²⁵ Si Seya jurutulis, anjaha si Sadok pakon si Abyatar malim.

²⁶ Anjaha si Ira, halak Jair ai pe, malim do homa bani si Daud.

Pambalason ni Halak Gibeon bani Ginompar ni si Saul

21 ¹ Dob ai masa ma lohei sanggah bani goluh ni si Daud tolu tahun dokahni. Ipindah i si Daud ma bohi ni Jahowa, gabe nini Jahowa ma, “Halani sapata ni daroh na bani si Saul pakon na bani ginomparni do ai, ai ma halani na binunuhni halak Gibeon.”

² Jadi idilo raja ai ma halak Gibeon. Ia halak Gibeon ai seng hun bani ginompar ni halak Israel, tapi sima-sima ni halak Amori do sidea; age pe domma ibulawankon halak Israel pagoluhkon sidea, tapi isurahon si Saul do sihol maniapkon sidea, halani pongut ni uhurni bani halak Israel pakon Juda.

³ Jadi nini si Daud ma hu bani halak Gibeon, “Aha ma bahenonku bani nasiam? Anjaha aha ma bahenonku pardearan, ase ra nasiam mamasu-masu rupei ni Jahowa?”

⁴ Dob ai nini halak Gibeon ma hu bani, “Seng pahara pirak barang omas paharanami pakon si Saul barang ginomparni, anjaha seng ipangindo

uhurnami bunuhon barang ise i Israel.” Jadi nini ma, “Aha do nini uhur nasiam bahenonku bani nasiam?”

⁵Jadi nini sidea ma hu bani raja ai, “Halak na mamboiskon hanami anjaha na mansurahon maniapkon hanami, ase ulang adong be ianannami i sab tanoh Israel,

⁶bere ham ma pitu hun bani anakni, ase igantungkon hanami sidea i lobei ni Jahowa, i Gibeon bani dolog ni Jahowa.” Jadi nini raja ai ma, “Hubere pe sidea.”

⁷Tapi ihaholongi raja ai do si Mepiboset, anak ni si Jonatan, pahompu ni si Saul, halani bulawanni bani Jahowa, na binulawankon ni si Daud hu bani si Jonatan, anak ni si Saul.

⁸Ibuat raja ai ma haduasi anak ni si Rispa, boru ni si Aya, na tinubuhkonni bani si Saul, ai ma si Armoni pakon si Mepiboset; ambahni ai na lima anak ni si Merab, boru ni si Saul na tinubuhkonni bani si Adriel, anak ni si Barsilai, halak Mehola;

⁹anjaha ibere ma sidea hu tangan ni halak Gibeon anjaha igantungkon ma sidea i atas dolog i lobei ni Jahowa, anjaha rap matei do sidea na pitu ai. Tarbunuh do sidea ai sanggah parmulaan ni pariama, sanggah parmulaan ni pariama gandum.

¹⁰Dob ai ibuat si Rispa, boru ni si Aya ma hiou guni, ihembangkon ma ai bahen apeini i dolog batu ai, hun parmulaan ni pariama das bani na roh udan

bani sidea hun langit; seng ipalopas roh manuk-manuk na i awang-awang bani sidea arian, atap binatang harangan pe borngin.

¹¹ Dob dong na patugahkon hu bani si Daud, na binahen ni si Rispa, boru ni si Aya, parinangon ni si Saul ai,

¹² laho ma si Daud anjaha ibuat ma holi-holi ni si Saul pakon holi-holi ni anakni si Jonatan, hun bani halak na i Jabes-Gilead, na tinangko ni sidea hun alaman bolag ni Betsan, ai ijai do igantungkon halak Palistim sidea sanggah na tinaluhon ni halak Palistim si Saul i Dolog Gilboa.

¹³ Iboan ma hujai holi-holi ni si Saul pakon holi-holi ni si Jonatan anakni ai. Dob ai ipatumpu sidea ma holi-holi ni na targantung ai,

¹⁴ anjaha rap itanom ma ai rap pakon holi-holi ni si Saul ampa si Jonatan anakni ai, i tanoh Benjamin i Sela, ibagas tanoman ni si Kis bapani ai; ibahen sidea ma haganup na hinatahon ni raja ai. Dob ai marpangulaki ma use uhur ni Naibata mangidah tanoh ai.

Porang dompak Halak Palistim

¹⁵ Dob ai marporang ma use halak Palistim dompak halak Israel; tuad ma si Daud rap pakon juakjuakni, jadi marsiporangan ma sidea pakon halak Palistim ai, pala loja si Daud.

¹⁶ Jadi roh ma si Jisbi-Benob, sada hun bani ginompar ni halak na ganjang bolon ai, borat ni tanjani tolu ratus sekel tombaga, anjaha dong do igonditkon sada podang na baru, sihol mambunuh Raja Daud nini uhurni.

¹⁷ Tapi roh ma si Abisai, anak ni si Seruya mangurupisi, idorab anjaha ibunuh ma halak Palistim ai. Pala do ibijahon juakjuak ni si Daud ijia hu bani, “Seng bulih be ham bingkak odor rap pakon hanami hu parporangan, ase ulang mintop ibahen ham palita ni Israel.”

¹⁸ Dob salpu ai adong ma use hamunsuhon i Gob dompak halak Palistim; ijia ibunuh si Sibekai, halak Husat ai ma si Sap; ginompar ni halak na ganjang bolon ai do homa ia.

¹⁹ Dob salpu ai adong ma use hamunsuhon i Gob dompak halak Palistim, gabe ibunuh si Elkana, anak ni si Jaare-Oregim, parhuta Betlehem ai ma si Goliat parhuta Gat ai; ia suhul ni tanjani na sabasikah do.

²⁰ Dob salpu ai adong ma use hamunsuhon i Gat; adong ma ijai sada dalahi na ganjang, onom bei do jari-jari ni tanganni pakon naheini, gabe dua puluh ompat bilanganni; ia pe ginompar ni halak na ganjang bolon ai do.

²¹ Sai iapas-apasi do halak Israel, gabe ibunuh si Jonatan, anak ni si Simei, abang ni si Daud ma ia

²² Na ompat halak ai ma ginompar ni halak na ganjang bolon na i Gat; matei do sidea ibahen si Daud pakon juakjuakni ai.

Doding Puji-pujian ni si Daud

(ay. 1-51: pausih Ps. 18)

22 ¹ Dob ai ihatahon si Daud ma hu bani Jahowa hata ni doding on, bani ari sanggah na pinaluah ni Jahowa ia hun bani tangan ni ganup munsuhni pakon hun bani tangan ni si Saul.

² Nini ma, “Jahowa do batu gingging bangku, batar-batarhu pakon na paluahkon ahu.

³ Naibatanku, batu ginggingku, hatengeran ni uhur bangku, gantarhu pakon tanduk ni haluahonku, paronding-ondinganku pakon haporusanku, pangurupi bangku, na mangurupi ahu hun bani odoh-odoh.

⁴ Sai dilo-dilo do ahu bani Jahowa, na talup sipujion in, gabe maluah ma ahu hun bani munsuhku.

⁵ linggoti gilumbang ni hamateian do ahu, isonggoti bah hajahaton.

⁶ Isangkut rantei ni nagori toruh do ahu, siding hamateian tagang dompak ahu.

⁷ Hudilo ma Jahowa bani hasosakankai; Naibata do hudilo. Gabe itangihon do sorangku

hun rumah-Ni, anjaha das do doruhku hu pinggol-Ni.

⁸ Jadi dugur ma tanoh on, onjolan ni langit pe hitir, anjaha murdug do halani marah-Ni.

⁹ Luar ma timus hun igung-Ni, pakon apuy na mangankon hun bani pamangan-Ni; narnar na gara marjimbur hun bani.

¹⁰ Iondun ma langit, tuad ma la; golap marimpot-impot do i toruh ni nahei-Ni.

¹¹ Mangajak herub do la, anjaha habang mayab-ayab bani habong ni logou.

¹² Ibahen do hagolapan bahen lampo-lampo-Ni inggot Bani, bah na mamirong pakon hambun na mahapal.

¹³ Marjimbur do gara ni apuy hun bani haliharon na i lobei-Ni.

¹⁴ Ipahata Jahowa do longgur hun langit, anjaha ipabogeihon sigijangan ai do sora-Ni.

¹⁵ Ipanahkon do panah-Ni ase mambur merap sidea, ibahen do mardejeb-dejeb hilap mardakdak sidea.

¹⁶ Gabe taridah ma holbung ni laut, anjaha talag onjolan ni dunia on, halani pangasupi ni Jahowa, halani pangunsong ni hosah ni igung-Ni.

¹⁷ Idurdurhon do tangan-Ni hun datas laho manangkap ahu, irintak do ahu hun bah marbanggal.

- ¹⁸ Ipaluah do ahu hun bani munsuhku na gogoh,
hun bani na marsogam ni uhur bangku, na
gogohan hun bangku.
- ¹⁹ Idorab sidea do ahu bani ari hasunsahanku;
tapi Jahowa do arihanku.
- ²⁰ Itogu do ahu bani ianan na lumbang; ipaluah
do ahu, halani rosuh do uhur-Ni mangidah
ahu.
- ²¹ Ibalaskon Jahowa do hu bangku romban
hu bani hapintoranku, romban hu bani
haborsihon ni tanganku ipasuang bangku.
- ²² Ai huirikkon do dalan ni Jahowa, anjaha lang
manjahati ahu, marbalik hun bani Naibata.
- ²³ Ai tongtong do i lobeihu sagala uhum-Ni,
anjaha titah-Ni seng hupadaoh hun bangku.
- ²⁴ Bujur do ahu i lobei-Ni, anjaha hujaga do
diringku dompak hajahaton.
- ²⁵ Jadi ibalaskon Jahowa ma hu bangku romban
hu bani hapintoranku, romban hu bani
hapansingonku, niidah-Ni ai.
- ²⁶ Bani halak na bonar, bonar do Ham; bani halak
na bujur, bujur do Ham.
- ²⁷ Ipatuduhkon Ham do hapansingon-Mu bani
halak na pansing, tapi gila do uhur-Mu bani
halak pargeduk.
- ²⁸ Ipaluah Ham do bangsa na toruh maruhur, tapi
ipatoruh Ham do paruhur na gijang.

- ²⁹ Ai Ham do alo Jahowa, palita bangku, anjaha ipalihar Ham do hagolapanku.
- ³⁰ Ai marhasomankon Ham tardorab ahu do bala ni munsuh, anjaha mangunsagahkon Naibatanku tarlumpati ahu tembok.
- ³¹ Gokan dear do dalan ni Naibatanku, pitah do hata ni Jahowa; la do gantar ni ganup halak, na martenger ni uhur Bani.
- ³² Ai ise ma Naibata, sobali Jahowa? Anjaha ise ma batar-batar sobali Naibatanta?
- ³³ Naibata do haporusanku na toguh, anjaha ipajorei do dalanku.
- ³⁴ la do mambahen naheihu songon nahei ni ursa tini, anjaha ipajongjong do ahu jorgit i atas buntu-buntu.
- ³⁵ la do mangajari tanganku marmunsuh gabe pandei tanganku manintak panah tombaga.
- ³⁶ Ibere Ham do bangku gantar ni haluahon-Mu, anjaha halayakon-Mu do patimbulhon ahu.
- ³⁷ Ipalumbang Ham do ianan panlangkahanku, anjaha seng tarlandit naheihu.
- ³⁸ Sai hupardakdak do munsuhku anjaha siap sidea hubahen, anjaha seng mulak ahu, paima rasei sidea.
- ³⁹ Huropuki anjaha husiapkon do sidea, radag do sidea i toruh ni naheihu.

- ⁴⁰ Igonditkon Ham do bangku hagogohon
mangkorjahon hamunsuhon, ipaunduk Ham
do munsuhku bangku i toruhku.
- ⁴¹ Ipamundur Ham do munsuhku i lobeihu, gabe
siap hubahen na marsogam ni uhur bangku.
- ⁴² Sai mangkawah do sidea, tapi seng dong na
paluahkon; doruh-doruh do sidea bani
Jahowa, tapi seng itangihon sidea.
- ⁴³ Jadi hulumati ma sidea songon orbuk ni tanoh,
hulotloti sidea songon hubang i alaman.
- ⁴⁴ Domma ipaluah Ham ahu hun bani partinggilan
dompok bangsangku; ipabangkit Ham
do ahu gabe kopala ni bangsa sipajuh
begu-begu; bangsa na so hutanda pe ibalosi
do ahu.
- ⁴⁵ Roh do bangsa na legan marsombah bangku;
ijin ibogei sidea pasal ahu, mintor ibalosi
sidea do ahu.
- ⁴⁶ Mandatei do iahap bangsa na legan, gobir do
sidea luar hun batar-batarni.
- ⁴⁷ Manggoluh do Jahowa; sai tarpuji ma
batu ginggingkin, anjaha sai timbul ma
Naibatanku, batu gingging ni hatuahonku.
- ⁴⁸ Naibata do na mambere pambalason bangku,
anjaha na patundukkon bangsa-bangsa
bangku,
- ⁴⁹ Ham do na paluahkon ahu hun bani munsuhku;
Ham do tongon na patimbulhon ahu

mangimbang sipanlawan dompak ahu;
Ham do na paluahkon ahu hun bani jolma
sibahen gogoh.

⁵⁰ Halani ai pujionku ma Ham, alo Jahowa, i
tongah-tongah ni bangsa sipajuh begu-begu,
anjaha dodingkononku ma goran-Mu.

⁵¹ Ia do sibere hatuahon hu bani raja-Ni, anjaha
ipatuduhkon do idop ni uhur-Ni hu bani na
mininakan-Ni, hu bani si Daud pakon hu
bani ginomparni ronsi sadokah ni dokahni.”

Hata Parpudi hun bani si Daud

23 ¹ On ma hata na parpudi hun bani si Daud,
“Nini si Daud anak ni si Isai ma, ai ma
halak na pinatimbul daoh hu atas, ai ma halak na
mininakan ni Naibata ni si Jakob, halak parpsalm,
haudungan i Israel;

² Tonduy ni Jahowa do marsahap ibagas ahu, anjaha
ibagas pamanganku do hata-Ni.

³ Domma marsahap Naibata ni si Jakob, nini Batu
Gingging ni Israel do hu bangku, ‘Barang ise na
sintong panrajaionni bani jolma, na manrajai ibagas
biar mangidah Jahowa,

⁴ marsinalsal ma ia songon sindar sogod-sogod,
songon mata ni ari bani langit na so marhombun,
na mambahen martumbor poyon-poyon hun tanoh
dob salpu udan.’

⁵ Ai lang sonai do tene parjongjong ni ginomparhu i lobei ni Jahowa? Ai domma ibahen padan sisadokah ni dokahni bangku, iatur ibagas haganup anjaha iramotkon. Halani ai mintor lang ma tumpakan-Ni haganup, bahen haluahon pakon siharosuhkononkon bangku?

⁶ Tapi anggo halak na so margagan, songon suga-suga na niambungkon do sidea haganup, seng dong halak na ra manjamah;

⁷ nai ma, seng dong na ra manjamah sidea, anggo seng mamakei bosi pakon pordah ni tanja, anjaha bois sidea imosogi ibagas apuy.

Puanglima ni si Daud

(ay. 8-39: pausih 1 Kron. 11:10-41)

⁸ On do goran-goran ni puanglima ni si Daud: Si Isbaal, halak Hakmoni, kopala ni tolu halak pambobai; idiharhon do tanjani dompak ualuh ratus halak na binunuhni santorap.

⁹ Dob ia, ai ma si Eleasar, anak ni si Dodo, halak Ahohi; sada hun bani pambobai sitolu halak ai do ia. Rap pakon si Daud do ia i Pas-Dammim, sanggah na roh halak Palistim, na roh martumpu hujai laho marporang, sanggah na mundur ai halak Israel,

¹⁰ martahan do anggo ia, anjaha itampuli ma halak Palistim das bani na loja tanganni, das bani na longkot tanganni ai bani podang ai; hamonangan banggal do na binahen ni Jahowa sadarini ai. Dob

ai marmulakan ma halak simbuei ai mangirikonsi, mambuati ugas-ugas ni na binunuh ai mando.

¹¹ Dob ai si Samma, anak ni si Age, halak Harar. Bani na sahali martumpu ma halak Palistim i Lehi, adong do ijai sanlambar juma gok dali. Sanggah na mundur ai halak simbuei hun lobei ni halak Palistim,

¹² gabe roh ma ia jongjong hu tongah-tongah ni juma ai martahankon ai, anjaha ibunuhi ma halak Palistim ai; sonai ma ibere Jahowa sada hamonangan bolon.

¹³ Sahali roh ma tolu halak hun bani na tolu puluh halak kopala-kopala ai marayak si Daud hu liang Adullam, sanggah parmulaan ni pariamas, anjaha tudu do marsaran bala ni halak Palistim i hondot Refaim.

¹⁴ Bani parbatar-bataran do ijia si Daud, anjaha bala ni halak Palistim i Betlehem do ijia.

¹⁵ Tubuh ma sir ni uhur ni si Daud, jadi nini ma, “Ise ma na ra mambere bah inumonku hun parigi na i Betlehem, na i lambung ni horbangan ai?”

¹⁶ Dob ai ilondas na tolu puanglima ai ma parsaranan ni halak Palistim ai, anjaha itahui ma bah hun parigi na i Betlehem dohorhon horbangan ai, anjaha iboan ma ai das hu bani si Daud; tapi seng ra ia manginum ai, iuseihon do ai bahen galangan bani Jahowa,

¹⁷ anjaha nini ma, “Daoh ma in hun bangku, ham Jahowa, mambahen na sonin. Mintor inumonku

ma daroh ni halak na laho mangasamkon hosahni? Halani ai seng ra ia manginum ai. Ai ma na binahen ni na tolu puanglima ai.”

¹⁸ Ia si Abisai, anggi ni si Joab, anak ni si Seruya, kopala ni sitolu puluh halak pambobai ai do ia; idiharhon do tanjani dompak tolu ratus halak laho mambunuh sidea, gabe tarambilan ma ia i tengah-tengah ni na tolu puluh halak ai.

¹⁹ Ia do simurmuran hun bani na tolu puluh halak ai, halani ai ia do gabe kopala ni sidea; tapi seng ope songon sitolu halak ai ia.

²⁰ Si Benaya pe, anak ni si Joyada, sahalak na pangkar anjaha sibuei pambahenan do ia, parhuta Kabsel. Ibunuh do dua puanglima ni Moab; tuad do ia bani sada godung laho mamunuh sada singa sanggah musim salju.

²¹ Ia do homa na mamunuh sada halak Masir, na ganjang bolon. Adong do tanja bani tangan ni halak Masir ai; tapi tuad ma si Benaya manjumpahkonsi mamboan sada tungkot, irampas ma tanja ai hun tanganni, anjaha ibunuh ma ia marhitei tanjani ai sandiri.

²² Ai ma na binahen ni si Benaya, anak ni si Joyada, mambahen sangap ia i tengah-tengah ni puanglima na tolu puluh halak ai.

²³ Sangap do ia i tengah-tengah ni na tolu puluh halak ai, tapi seng ope anggo songon sitolu halak ai. Jadi ibahen si Daud ma ia gabe kopala ni pangawal.

²⁴ Masuk hu bani na tolu puluh halak ai do si Asahel, anggi ni si Joab; si Elkanan anak ni si Dodo, hun Betlehem;

²⁵ si Sama hun Harod; si Elik, hun Harod;

²⁶ si Heles, hun Pelet; si Ira, anak ni si Ikes, hun Tekoa;

²⁷ si Abieser, hun Anatot; si Sibikai, hun Husa;

²⁸ si Salmon, hun Ahoah; si Maharai, hun Netopa;

²⁹ si Heleb, anak ni si Baana, hun Netopa; si Ittai, anak ni si Ribai, hun Gibeon-Benyamin;

³⁰ si Benaya, hun Piraton; si Hidai hun habungan Gaas;

³¹ si Abialbon, hun Bet-Araba; si Asmawet, hun Bahurim;

³² si Elyaba hun Saalbon; si Jasen halak Gun; si Jonatan,

³³ anak ni si Samma, hun Harar; si Ahiam anak ni si Sarar, hun Harar;

³⁴ si Elifeled, anak ni si Ahasbai, hun Mahaka; si Eliam, anak ni si Ahitopel hun Gilo;

³⁵ si Hesro, hun Karmel; si Parai, hun Arab;

³⁶ si Yigal anak ni si Natan, hun Soba; si Bani, hun Gad;

³⁷ si Sele, halak Ammon; si Naharai hun Beerot, siusung sinjata ni si Joab, anak ni si Seruya;

³⁸ si Ira, hun Jattir, si Gareb hun Jattir,

³⁹ si Uria, halak Het; tolu puluh pitu halak ganupan.

**Si Daud Mamilangi Halak
Israel; Uhum bani Halani Dousani ai**

24 ¹ Dob ai mangulaki ma use Jahowa marringis mangidah halak Israel, gabe iojur ma si Daud mangimbang sidea, nini ma, “Laho ma ho, bilangi ma halak Israel pakon halak Juda!”

² Jadi nini raja ai ma hu bani si Joab, pambobai ni bala na rap pakonsi ai, “Siari ma ganup marga ni halak Israel, olat ni Dan das hu Berseba, anjaha bilangi ma halak simbuei in, ase hubotoh bilangan ni bangsa ai.”

³ Tapi nini si Joab ma hu bani raja ai, “Sai itambahi Jahowa Naibatamu ma bangsa on saratus lompit nari hun bani na adong nuan, anjaha sai sampang ma iidah panonggor ni tuanku ai; tapi mase ma ipangindo uhur ni tuanku mambahen na sonon?”

⁴ Tapi parhata sada do raja ai dompak si Joab pakon kopala-kopala ni bala ai. Jadi laho ma si Joab pakon kopala-kopala ni bala ai hun lobei ni raja ai, laho mamilangi halak Israel.

⁵ Idipari sidea ma Bah Jordan, ipungkah ma hun Aroer pakon hun huta na iparsitongahan ni pamah ai, dompak Gad pakon Jaeser.

⁶ Dob ai das ma sidea hu Gilead pakon hu Kades, na i tanoh ni halak Het, dob ai das ma sidea hu Dan, anjaha hun Dan maringgot ma sidea laho hu Sidon;

⁷ dob ai das ma sidea hu benteng Tirus pakon bani ganup huta-huta ni halak Hewi ampa halak Kanaan; dob ai laho ma sidea hu tanoh Dangsina ni tanoh Juda, hu Berseba.

⁸ Sonai ma isiari sidea sab tanoh ai, anjaha dob salpu siah bulan dua puluh ari, mulak ma sidea use hu Jerusalem.

⁹ Ibere si Joab ma bilangan ni bangsa na binilangan ai hu bani raja ai, “I Israel adong do ualuh ratus ribu halak, i Juda lima ratus ribu halak na mangasup manintak podang.”

¹⁰ Tapi bukbak ma taroktok ni si Daud dob ibilangi bangsa ai. Jadi nini si Daud ma hu bani Jahowa, “Banggal tumang do dousangku marhitei pambahenankai. On pe, Ham Jahowa, sasap Ham ma hajahaton ni jabolon-Mu on; ai haotoon banggal do na hubahen on.”

¹¹ Jadi dob puho si Daud patarni ai, roh ma hata ni Jahowa hu bani Nabi Gad, halak na marpanonggoran ai bani si Daud, nini ma,

¹² “Laho ma ho, hatahon ma hu bani si Daud, ‘Sonon do hata ni Jahowa, tolu marbagei sipatuduhkonon-Ku bam; pilih ma sada hunjai sibahenon-Ku hu bam.’”

¹³ Jadi laho ma si Gad marayak si Daud patugahkon hata ai hu bani, nini ma, “Iparsinta uhurmu roh lohei maningting tolu tahun hu tanohmu, atap maningon maporus ham ayak-ayakon ni munsuhmu tolu bulan

i tanohmu, atap masa tolu ari sampar i tanohmu? On pe pingkir anjaha putuskon ham ma, aha balos sibonanonku bani Jahowa na marsuruh ahu.”

¹⁴ Dob ai nini si Daud ma hu bani si Gad, “Rusak tumang do uhurhu; dearan ma hanami madabuh hu tangan ni Jahowa, ai banggal do idop ni uhur-Ni; tapi ulang ma madabuh ahu hu tangan ni jolma.”

¹⁵ Jadi ipamasa Jahowa ma sampar hu bani halak Israel hun bani sogod ai nari das hu bani panorang na dob binuhul; gabe matei ma hun bani bangsa ai, olat ni Dan das hu Berseba pitu puluh ribu halak.

¹⁶ Tapi dob ipagostong malekat ai tanganni hu Jerusalem laho mangagou huta ai, marulang hape namin ma Jahowa pasal hamagouan ai, anjaha nini ma hu bani malekat, na parrohkon hamagouan ai, “Sae ma in! Parontihon ma tanganmin! Tudu do malekat ai ijia i lambung ni pardogeian ni si Arapna, halak Jebusi ai.”

¹⁷ Jadi dob iidah si Daud malekat na mamunuh bangsa ai, nini ma hu bani Jahowa, “Tonggor ma, ahu do na mardousa, anjaha ahu do na mambahen hajahaton on, tapi biri-biri on, aha ma adong ibahen sidea? Mangonai bangku ma namin tangan-Mu pakon bani ginompar ni bapa.”

¹⁸ Dob ai roh ma si Gad marayak si Daud bani na sadari ai, nini ma hu bani, “Tangkog ma ham, pasuk ham ma sada anjap-anjap hu bani Jahowa bani pardogeian ni si Arapna, halak Jebusi ai.”

¹⁹ Jadi tangkog ma si Daud, songon na hinatahon ni si Gad, domu hu bani na pinarentahkon ni Jahowa.

²⁰ Sanggah na manatap-natap si Arapna iidah ma roh raja ai pakon juakjuakni marayaksi; si Arapna pe luar ma, anjaha marrogop ma ia marsombah hu bani raja ai.

²¹ Jadi nini si Arapna ma, “Halani aha do ase roh tuannami anjaha rajanami hu bani jabolonmu?” Nini si Daud ma, “Sihol mamboli pardogeian in hunbam, laho pajongjong sada anjap-anjap bani Jahowa, ase andohar laho sampar on hun bani bangsa on.”

²² Dob ai nini si Arapna ma hu bani si Daud, “Ibuat tuanku ma in, anjaha igalangkon ham ma ijin barang aha harosuh ni uhurmu; andon lombu bahen galangan situtungon, pakon parugas mardogei ampa pasangan ni lombu bahen soban.

²³ Ganupan on, rajanami, sihol sombahkonon ni juakjuakmu hu bani raja in. Lanjar ihatahon si Arapna ma hu bani raja ai, ‘Sai idop ma uhur ni Jahowa Naibatamu bamu.’”

²⁴ Tapi nini raja ai ma hu bani si Arapna, “Lang, maningon gok do harga ni ai bolionku hunbam, ai seng sihol ahu manggalangkon bani Jahowa Naibatanku, na so marboli bangku.” Jadi iboli si Daud ma pardogeian ai pakon lombu ai marharga lima puluh sekel pirak

²⁵ Dob ai ipajongjong si Daud ma sada anjap-anjap bani Jahowa ijai, anjaha igalangkon ma galangan situtungon pakon galangan pardameian i atas ni. Jadi marpangulaki ma uhur ni Jahowa mangidah pangisi ni tanoh in, anjaha ipadaoh ma sampar ai hun Israel.

1 Raja-raja

Si Adonia Marsura-sura jadi Raja

1 ¹ Jadi sayur matua ma Raja Daud; anjaha age pe isabingi ia bani hiou, seng ra malas angkulani.

² Jadi nini juakjuakni ma hu bani, “Dear ma pinindahan bani tuannami sada anak boru, na jongjong i lobei ni raja in marugas, anjaha bahen ham ma ia modom i abinganmu, ase malas iahap tuannami.”

³ Jadi ipindahi sidea ma sada anak boru na jenges i sab tanoh Israel, gabe jumpah sidea ma si Abisag na hun Sunem, anjaha iboan ma naboru ai hu bani raja ai.

⁴ Jenges tumang do naboru ai; ia ma gabe siparugas bani raja ai laho patorsa-torsahonsi, tapi seng iparayak raja ai ia.

⁵ Jadi roh ma si Adonia, anak ni si Hagit, pagijang-gijang dirini, nini ma, “Ahu do patut gabe raja!” Halani ai ipasirsir ma bani gareta pakon huda ampa lima puluh halak na mardalan i lobeini.

⁶ Seng onggga ipinsang bapani ai ia marhitei na mangkatahon, “Mase sonin ibahen ho?” Ambah ni ai sada halak sijenges rupa do ia, anjaha tinodohkon ni si Absalom do ia.

⁷ Manriah ma ia pakon si Joab, anak ni si Seruya pakon Malim Abyatar, jadi iirikkon sidea ma si Adonia anjaha iurupi do ia.

⁸ Tapi anggo Malim Sadok, si Benaya anak ni si Joyada, Nabi Natan, si Simei, si Rei pakon ganup pangawal ni si Daud seng hampit si Adonia.

⁹ Dob ai igalangkon si Adonia ma biribiri, lembu pakon pinahan na pinamombur i lambung ni Batu Sohelet, dohorhon ni Parigi Rogel, anjaha idilo do haganup anggi ni anak ni raja ai pakon halak Juda, gamot-gamot bani raja ai;

¹⁰ tapi anggo Nabi Natan, si Benaya, sagala puanglima pakon si Salomo anggini ai, seng idilo.

Si Salomo Bangkit gabe Raja

¹¹ Dob ai nini si Natan ma bani si Batseba, inang ni si Salomo, “Atene, ai lang ibotoh ham, na dob bangkit raja do si Adonia, anak ni si Hagit, anjaha tuanta si Daud seng dong ibagas botohni ai?

¹² Halani ai hupasingat ma ham, ase maluah hosahmu pakon hosah ni anakmu si Salomo.

¹³ Laho ma ham marayak Raja Daud, anjaha hatahon ham ma bani, ‘Ai lang domma pala ibijahon ham hu bani juakjuakmu naboru on,’ nimu, ‘Maningon si Salomo, anakmin do gabe raja gantihku, anjaha maningon ia hundul bani paratashu? Mase ma si Adonia nuan bangkit raja?’

¹⁴ Tonggor ma, sanggah na marsahap ai holi ham pakon raja ai, roh pe ahu masuk hun pudimu pasahkon hatamu ai.”

¹⁵ Jadi masuk ma si Batseba marayak raja ai hu kamar. Tapi domma matua tumang raja ai, anjaha si Abisag na hun Sunem do marugas i lobeini.

¹⁶ Mangunduk ma si Batseba marsombah hu bani raja ai, gabe nini raja ai ma, “Aha sihol bam?”

¹⁷ Jadi nini ma hu bani, “Tuannami, domma ibijahon ham bani jabolonmu naboru on i lobei ni Jahowa, Naibatamu, nimu, ‘Maningon si Salomo, anakmin do gabe raja gantihku, anjaha maningon ia do hundul bani paratashu.’

¹⁸ Hape nuan, tonggor ma, si Adonia do bangkit raja, age pe seng ibagas botoh ni tuannami anjaha rajanami in.

¹⁹ Domma igalangkon buei lombu, pinahan na pinamombur pakon biri-biri, anjaha idilo do haganup anak ni raja in, Malim Abyatar pakon si Joab, pambobai ni bala in; tapi anggo si Salomo, juakjuakmu, seng idilo.

²⁰ Mangkawah hu bamu do, alo rajanami, mata ni ganup halak Israel, ase ipabotohkon ham bani sidea, barang ise do na hundul bani paratasmu i pudimu.

²¹ Anggo lang sonai, ra, anggo modom ma holi tuannami, raja in rap pakon ompungta, gabe tarhira ma holi ahu pakon anakku si Salomo sipanlawan.”

²² Jadi sanggah na marsahap ai ope ia pakon raja ai, roh ma masuk Nabi Natan.

²³ Ipatugah sidea ma ai bani raja ai, “Ijon do Nabi Natan.” Jadi dob das ia hu lobei ni raja ai, manrogop ma ia i lobei ni raja ai.

²⁴ Nini si Natan ma, “Ham rajanami, adong do ihatahon ham, ‘Maningon si Adonia do gabe raja gantihku, anjaha maningon ia do hundul bani paratashu?’

²⁵ Ai domma pala tuad ia sadari on, anjaha domma igalangkon lombu, pinahan na pinamombur pakon biri-biri buei tumang, anjaha idilo do ganup anak ni raja in, si Joab, pambobai ni bala in, pakon Malim Abyatar; tonggor ma, mangan minum do sidea i lobeini, anjaha nini sidea do, ‘Sai horas, horas ma Raja Adonia!’

²⁶ Tapi anggo ahu juakjuakmu on, Malim Sadok, si Benaya anak ni si Joyada, pakon juakjuakmu si Salomo, seng dong idilo.

²⁷ Ai ham do na mangaturhon ai, tuannami anjaha rajanami? Tapi tene, seng dong ope ipabotohkon ham hu bani jabolonmu on, barang ise do na maningon hundul bani paratas ni tuannami anjaha rajanami bahen gantihmu.”

²⁸ Dob ai nini Raja Daud ma mambalosi, “Dilo ma si Batseba roh hu bangku.” Jadi roh ma ia, anjaha jongjong ma ia i lobei ni raja ai.

²⁹ Jadi marbija ma raja ai, nini ma, “Songon sintongni manggoluh Jahowa, na paluahkon hosahku hun bani ganup hasosakan,

³⁰ maningon romban hu bani na dob hubijahon bam i lobei ni Jahowa, Naibata ni halak Israel, ‘Maningon si Salomo, anakmin do manrajai gantihku, anjaha maningon ia do hundul bani paratashu manggantih ahu; maningon sonai do bahenonku sadari on.’”

³¹ Jadi manrogop ma si Batseba lanjar isombah ma raja ai, nini ma, “Sai manggoluh ma tuannami Raja Daud sadokah ni dokahni.”

³² Dob ai nini Raja Daud ma, “Dilo nasiam ma hu bangku Malim Sadok, Nabi Natan pakon si Benaya, anak ni si Joyada.” Jadi roh ma sidea hu lobei ni raja ai.

³³ Nini raja ai ma hu bani sidea, “Arahkon nasiam ma juakjuak ni tuan nasiam, anjaha pahundul nasiam ma anakku si Salomo hu bani halodengku, anjaha boban nasiam ma ia hu Gihon;

³⁴ anjaha iminaki Malim Sadok pakon Nabi Natan ma ia ijai gabe raja manggomgomi halak Israel; dob ai sompul nasiam ma tarompet, anjaha olobkon nasiam ma, ‘Sai dokah ma manggoluh Raja Salomo!’

³⁵ Dob ai roh ma nasiam use tangkog mangirikkonsi, ase roh ia anjaha hundul bani paratashu; ai maningon ia do gabe raja gantihku; ai domma ia hutodoh gabe panggomgomi bani Israel pakon Juda.”

³⁶ Dob ai nini si Benaya anak ni si Joyada ma mambalosi raja ai, “Amen! Sai sonai ma homa pangkatahon ni Jahowa, Naibata ni tuannami.

³⁷ Songon na hinasomanan ni Jahowa tuannami na saindokah, sai sonai ma pangkasomani-Ni bani si Salomo, anjaha sai ibahen ma paratasni ai timbulan ase paratas ni tuannami, Raja Daud.”

³⁸ Jadi tuad ma Malim Sadok, Nabi Natan, si Benaya anak ni si Joyada, halak Kereti pakon Peleti, ipahundul sidea ma si Salomo bani halode ni Raja Daud, laho mangarahkonsi hu Gihon.

³⁹ Dob ai ibuat Malim Sadok ma tanduk parminakan hun bani lampolampo na ijai ai, anjaha iminaki sidea ma si Salomo. Dob ai isompul sidea ma tarompet, anjaha ganup ma bangsa ai mangkatahon, “Sai dokah ma manggoluh Raja Salomo!”

⁴⁰ Lanjar tangkog ma ganup halak simbuei ai mangirikkonsi, manompul sarunei anjaha marmalas uhur bangga, pala marigat tanoh ai ibahen sora ni sidea.

⁴¹ Jadi ibogei si Adonia pakon ganup na nidiloni ai ma ai, topat dobkonsi sidea mangan. Dob ibogei si Joab sora ni tarompet ai, nini ma, “Aha do arti ni na gosou ai i huta ai?”

⁴² Sanggah na marsahap ai ope sidea, tonggor ma, roh ma si Jonatan, anak ni Malim Abyatar; nini si Adonia ma, “Masuk ma ho, ai jolma

hatengeran ni uhur do ho, tontu barita na madear do sihatahononmu.”

⁴³ Nini si Jonatan ma mambalosi si Adonia, “Lang, domma ipabangkit tuanta, Raja Daud si Salomo gabe raja.

⁴⁴ Domma isuruh raja ai mangkasomanisi, Malim Sadok, Nabi Natan, si Benaya anak ni si Joyada, halak Kereti pakon Peleti; domma ipahundul sidea ia bani halode ni raja ai;

⁴⁵ domma iminaki Malim Sadok pakon Nabi Natan ia i Gihon; marmalas ni uhur do sidea tangkog hunjai, gabe lutu pala huta ai. In ma sora ni surak-surak na binogeimu ai.

⁴⁶ Hundul do si Salomo bani paratas harajaon ai.

⁴⁷ Ambah ni ai marrohan do juakjuak ni raja ai mangkorasi Raja Daud tuanta ai, nini, ‘Sai ibahen Naibata ma goran ni si Salomo murmuran ase goranmu, anjaha paratasni timbulan ase paratasmu.’ Anjaha raja ai pe manrogop do bani podomanni,

⁴⁸ anjaha nini do homa, ‘Pinuji ma Jahowa, Naibata ni halak Israel, na manlayak-layakkon sahalak hun bani ginomparhu hundul sadari on bani paratashu, anjaha sampang ope matangku mangidahsi.”

⁴⁹ Jadi gobir ma ganup halak na nidilo ni si Adonia, jongjong bei ma sidea, anjaha laho ganup marayak dalanni bei.

⁵⁰ Mabiari tumang do si Adonia bani si Salomo; jongjong ma ia anjaha laho, idahop ma tanduk ni anjapanjap ai.

⁵¹ Adong ma na patugahkon hu bani si Salomo, “Tonggor ma, mabiari do si Adonia bani raja in; halani ai idahop do tanduk ni langgatan ai, anjaha nini do, ‘Sai ra ma namin Raja Salomo marbija hu bangku sadari on, paboa na so bunuhonni ahu jabolonni marhitei podang.’”

⁵² Dob ai nini si Salomo ma, “Anggo halak hatengeran do ia naidah, seng anjai marurus jambulanni age sada hu tanoh; tapi anggo tardapot hajahaton bani, maningon matei do ia.”

⁵³ Dob ai isuruh Raja Salomo ma na mangalopisi hun anjapanjap ai. Jadi roh ma ia manrogop hu lobei ni Raja Salomo; anjaha nini ma hu bani, “Laho ma ho mulak hu rumahmu!”

Parmatei ni Raja Daud

2 ¹ Jadi dob lambin dohorni ajal ni si Daud, martonah ma ia hu bani anakni si Salomo, nini ma,

² “Na laho mando ahu marayak dalan ni haganup jolma na i atas tanoh on. Tenger ma uhurmu anjaha margogoh ma ho,

³ anjaha jolom ma paraturan ni Jahowa Naibatamu, mardalan ma ho bani dalan-Ni, ramotkon titah-Ni, uhum-Ni pakon hasaksian-Ni, songon na tarsurat

bani titah ni si Musa, ase maruntung ho bani ganup silahoanmu pakon bani ganup sidalananmu;

⁴ ase ipatotap Jahowa hata-Ni, na dob pinarbagah-bagah-Ni hu bangku, 'Anggo iramotkon anakmu do dalan ni sidea, marhitei na marparlahou sidea i lobei-Hu ibagas hasingtongan hun bani gok ni uhur ni sidea pakon hun bani gok ni tonduy ni sidea, seng anjai rotap hunbam dalahi, na hundul bani paratas ni Israel.'

⁵ Ambah ni ai ibotoh ho do na binahen ni si Joab, anak ni si Seruya hu bangku, naha pambahenni hu bani dua halak pambobai ni bala ni Israel, ai ma hu bani si Abner, anak ni si Ner pakon si Amasa, anak ni si Jeter, ai ma na binunuhni, ibalaskon do sanggah damei daroh ni halak, na dob madurus sanggah porang, anjaha ilapuhon daroh na so marpipot bani gondit na i binongeihi, pakon bani sipatu na bani naheihu.

⁶ Antong bahen ma romban hu bani hapentaranmu, tapi ulang ma palopas uluni na ubanon ai marsonang-sonang tuad hu nagori toruh.

⁷ Tapi maridop ni uhur ma ho hu bani anak ni si Bersillai, halak Gilead ai, lopas ma sidea saor hu bani halak na rap mangan pakon ho, ai sonai do pangalo-alo ni sidea bangku, sanggah na maporus ahu i lobei ni si Absalom abangmondi.

⁸ Anjaha tonggor ma, i lambungmu do homa si Simei, anak ni si Gera, halak Benjamin na

hun Bahurim, na mamurai ahu parah bani ari parporushu hu Mahanaim; tapi sanggah tuad ia manjumpahkon ahu hu Bah Jordan, hubijahon do bani marhitei goran ni Jahowa, ningku do, 'Seng anjai bunuhonku ho marhitei podang!'

⁹Tapi ulang ma lang hona uhum ia ipaturut ho, ai halak na maruhur do ho, ibotoh ho do, aha sibahenonmu bani, maningon marabul daroh do bahenonmu uluni na ubanon ai tuad hu nagori toruh."

¹⁰Dob ai modom ma si Daud rap pakon ompung-ompungni, anjaha itanom ma ia i huta ni si Daud.

¹¹Ia dokah ni si Daud manggomgom halak Israel ompat puluh tahun do, pitu tahun dokahni ia manrajai i Hebron, anjaha tolu puluh tolu tahun i Jerusalem.

¹²Ase si Salomo ma na hundul bani paratas ni si Daud, bapani ai, anjaha lambin jonamni do harajaonni ai.

Hona Bunuh si Adonia

¹³Dob ai roh ma si Adonia, anak ni si Hagit, marayak si Batseba, inang ni si Salomo. Jadi nini ma, "Damei do na hinarohkonmon?" Balosni, "Damei do."

¹⁴Dob ai nini ma use, "Adong do sihatahononku bamu." Nini si Batseba, "Hatahon ma!"

¹⁵Nini ma, "Ibotoh ham do, ahu do simada harajaon in, anjaha ganup halak Israel mangarap, ahu do

gabe raja; tapi nuan domma minsah harajaon in bani anggingku, halani Jahowa do na patuduhkon ai bani.

¹⁶ On pe adong do sada pangindoanku bamu, ulang paila ham ahu." Nini ma hu bani, "Patugah ma!"

¹⁷ Dob ai nini si Adonia ma, "Mahua parsahapkon ham ma lobei Raja Salomo, ai seng anjai juaonni ham, ase ibere bangku si Abisag na hun Sunem ai bahen parinangonku."

¹⁸ Jadi nini si Batseba ma, "Dear, huparsahapkon pe raja ai, pasal ai."

¹⁹ Dob ai laho ma si Batseba marayak Raja Salomo, sihol marsahap pakonsi pasal si Adonia. Jadi jongjong ma raja ai manjumpahkonsi anjaha mangunduk ma ia bani; dob ai hundul ma ia bani paratasni, anjaha isuruh raja ai ma homa na mambuat hundulan bani inangni, jadi hundul ma ia bani siamunni.

²⁰ Dob ai nini ma, "Adong do otik sipangindoanku bam; ulang ma tulak ahu." Dob ai nini raja ai ma hu bani, "Patugah ham ma pangindoanmu ai inang, seng anjai tulakonku ham."

²¹ Nini ma, "Mahua bere ma si Abisag, na hun Sunem bahen parinangon ni si Adonia saninamai!"

²² Nini si Salomo ma mambalosi inangni ai, "Mase ma pitah si Abisag na hun Sunem ipangindo ham? Pangindo ham ma homa harajaon in bani; ai ia do

abangku, anjaha hapitsi do Malim Abyatar pakon si Joab, anak ni si Seruya.”

²³ Dob ai ibijahon si Salomo ma ibagas goran ni Jahowa, “Sai ibahen Jahowa ma hu bangku sonai, anjaha lobih ope tene, anggo seng matei si Adonia halani on.

²⁴ On pe, songon sintongni manggoluh Jahowa, na patotapkon ahu anjaha na pahundul ahu bani paratas ni bapa, si Daud, anjaha na pajongjong bangku sada rumah, songon na pinarbagah-bagah-Ni ai: Maningon sadari on do matei si Adonia.”

²⁵ Dob ai isuruh si Salomo ma si Benaya anak ni si Joyada, itikam ma ia, lanjar matei.

²⁶ Tapi anggo hu bani Malim Abyatar, nini raja ai ma, “Laho ma ho hu Anatot, hu ladangmu; patut do namin marutang hosah ho. Tapi seng bunuhonku ope ho sadari on, halani na niusungmu Poti ni Tuhan Jahowa i lobei ni bapa, si Daud, anjaha halani na rap marsitaronon do ho pakon bapa na ijia.”

²⁷ Jadi ibuangkon si Salomo ma si Abyatar, ase ulang be malim ni Jahowa ia, gabe saud ma hata ni Jahowa, na dob nilumbahon-Ni hinan pasal ginompar ni si Eli i Silo.

Hona Bunuh si Joab

²⁸ Dob das barita ai hu bani si Joab (*ai domma marbalik si Joab mangirikkon si Adonia, tapi seng marbalik ia mangihutkon si Absalom*), mintor

maporus ma ia hu lampolampo ni Jahowa, irohop ma tanduk ni anjapanjap ai.

²⁹ Dob ipatugah halak hu bani Raja Salomo, “Domma maporus si Joab hu lampolampo ni Jahowa, anjaha tonggor ma, i lambung ni anjapanjap ai do ia.” Gabe isuruh si Salomo ma si Benaya, anak ni si Joyada, nini ma, “Laho ma ho, tobak ma ia!”

³⁰ Jadi dob das si Benaya hu lampolampo ni Jahowa, nini ma hu bani, “Sonon do hata ni raja in, ‘Luar ma ho!’” Tapi nini ma, “Lang, ijon ma ahu matei.” Jadi ipatugah si Benaya ma use hata ai hu bani raja ai, “Sonon do hata ni si Joab, anjaha sonon do balosni hu bangku.”

³¹ Nini raja ai ma mambalosi, “Bahen ma songon na hinatahonni ai, tobak ma ia anjaha tanom, ase mapurpur hun bangku pakon hun bani ginompar ni bapa sapata ni daroh na so marpipot, na niduruskon ni si Joab, age pe seng marhala.

³² Jahowa ma mambalaskon hu bani pambahenanni na masambor ai, ai ma na tinobakni ai dua halak na ubanon, na daoh dearan marparuhuran hun bani, anjaha ibunuh do sidea marhitei podang seng ibagas botoh ni bapa, si Daud, ai ma si Abner anak ni si Ner, pambobai ni bala ni Israel pakon si Amasa, anak ni si Jeter, pambobai ni bala ni Juda.”

³³ Ase marsapata ma daroh ni sidea hu bani ulu ni si Joab pakon hu bani ginomparni ronsi

sadokah ni dokahni; tapi anggo hu bani si Daud, pakon ginomparni ronsi pangisi ni rumahni pakon paratasni, sai jumpahan damei ma hun bani Jahowa ronsi sadokah ni dokahni.

³⁴ Jadi tangkog ma si Benaya, anak ni si Joyada, itobak ma ia lanjar matei; gabe itanom ma ia ibagas rumahni i halimisan.

³⁵ Dob ai ipabangkit raja ai ma si Benaya anak ni si Joyada gabe gantihni, mambobahon bala ai, homa ipabangkit raja ai ma Malim Sadok gantih ni si Abyatar.

Hona Bunuh si Simei

³⁶ Dob ai isuruh raja ai ma na mangalopi si Simei, nini ma hu bani, “Pajongjong ma bam sada rumah i Jerusalem, ase ijai ho marianan, anjaha seng bulih ho luar hunjai barang huja pe.

³⁷ Anjaha botoh ma, sadihari ho luar mandipari Bah Kidron ai, maningon matei do ho; marsapata hubam ma darohmu.”

³⁸ Nini si Simei ma hu bani raja ai, “Dear do na hinatahonmu ai; songon hinatahon ni tuannami, sonai do bahenon ni jabolonmu on.” Jadi marianan i Jerusalem ma si Simei, hundokah do.

³⁹ Hape dob salpu tolu tahun, lintun ma dua halak jabolon ni si Simei hu bani si Akis, anak ni si Maaka, raja ni Gat. Jadi adong ma na patugahkon hu bani si Simei, “Tonggor ma, i Gat do jabolonmu ai.”

⁴⁰ Jadi laho ma si Simei, ipalanai ma halodeni, sihol bingkat hu Gat marayak si Akis mangindahi jabolonni ai. Jadi dob das si Simei, iboan ma jabolonni ai mulak hun Gat.

⁴¹ Jadi adong ma na patugahkon hu bani si Salomo, na dob laho si Simei hun Jerusalem hu Gat, anjaha mulak use.

⁴² Dob ai isuruh raja ai ma na mangalopi si Simei, anjaha nini ma hu bani, “Ai lang domma pala hupabija ho bani Jahowa, anjaha husaksihon bam sonon, ‘Sadihari ho luar anjaha laho barang huja, botoh hinan ma, maningon matei do ho?’ Anjaha ihatahon ho do bangku ijia, ‘Dear do hatamu ai, domma hubogei.’

⁴³ Mase ma lang idingat ho bulawanmu bani Jahowa pakon na huparentahkon ai bam?”

⁴⁴ Ambahni ai, nini raja ai ma hu bani si Simei, “Ho pe, ibotoh ho do ibagas uhurmu sagala hajahaton, na binahenmu hu bani bapa, si Daud. Halani ai Jahowa ma na mambalaskon hajahatonmai bam.”

⁴⁵ Tapi dapotan pasu-pasu ma Raja Salomo, anjaha jonam ma paratas ni si Daud i lobei ni Jahowa ronsi sadokah ni dokahni.

⁴⁶ Dob ai ihatahon raja ai ma si Benaya. Anak ni si Joyada, luar laho manobaksi, gabe matei ma ia. Jadi totap ma harajaon ai ibagas tangan ni si Salomo.

**Si Salomo Mambuat Boru ni Raja Parao;
Panggalangonni bani Buntu-buntu**

3 ¹ Dob ai martondong ma si Salomo hu bani Parao, raja ni Masir, ai ibuat do boru ni Parao bahen parinangonni, anjaha iboan hu huta ni si Daud, paima idobkon pajongjong rumahni, rumah ni Jahowa pakon tembok ni huta Jerusalem inggot.

² Manggalang bani buntu-buntu ope halak na mabuei ai, halani seng dong ope ipajongjong rumah bani goran ni Jahowa das bani panorang ai.

³ Holong do uhur ni si Salomo mangidah Jahowa, anjaha marparlahou do ia bani aturan ni bapa ni si Daud; tapi i buntu-buntu ope ia manggalang pakon manutung dahupa.

Si Salomo Manggalang i Gibeon pakon Nipini

(ay. 4-5: pausih 2 Kron. 1:7-12)

⁴ Sahali laho ma raja ai hu Gibeon laho manggalang ijai, ai buntu-buntu bolon do ijai. Saribu galangan situtungon igalangkon si Salomo bani anjapanjap ai.

⁵ I Gibeon ma talar Jahowa hu bani si Salomo ibagas nipi borngin-borngin. Nini Naibata ma, “Pangindo ma, barang aha do sihol bereon-Ku bam.”

⁶ Dob ai nini si Salomo ma, “Domma ipatidak Ham idop ni uhur banggal hu bani juakjuak-Mu, bapa, si Daud, halani marparlahou ia i lobei-Mu ibagas hasintongan, hapintoron pakon bonar ni paruhuran

dompak Ham; anjaha domma ipatotap Ham bani idop ni uhur na banggal on, anjaha ibere Ham do bani sada anak na hundul bani paratasni sadari on.

⁷ On pe, Ham Jahowa, Naibatanku, domma ipabangkit Ham jabolon-Mu on gabe raja gantih ni bapa, Raja Daud, tapi danak ope ahu, seng hubotoh ope ruhut ni na i darat barang na ibagas huta pe.

⁸ I tengah-tengah ni bangsa-Mu do jabolon-Mu on, ai ma na pinilih-Mu, sada bangsa na bolon, na so tarhira barang tarbilangi halani bueini.

⁹ Halani ai, bere Ham ma hu bani jabolon-Mu on uhur na pantas laho manggomgom bangsa-Mu in, ase hubotoh manirang na madear hun bani na masambor; ai mintor ise ma mangasup manggomgom bangsa-Mu na banggal on?"

¹⁰ Jadi rosuh ma uhur ni Jahowa, halani sonai pangindoan ni si Salomo.

¹¹ Jadi nini Naibata ma hu bani, "Halani in do ipangindo ho, seng ipangindo ho ganjang ni umur, barang habayakon, barang hosah ni munsumu, tapi uhur do ipangindo ho laho mangarusi uhum,

¹² tonggor ma, bahenon-Ku ma romban hu bani hatamai. Bereon-Ku ma bam uhur na pentar anjaha na pantas, ase ulang adong na songon ho i lobeimu barang na sihol tubuh ope i pudimu.

¹³ Ambah ni ai, na so pinangindomai pe, bereon-Ku do bam, ai ma habayakon pakon hasangapon,

ase ulang adong be na songon ho raja, sadokah ho manggoluh.

¹⁴ Anjaha anggo sai tong do ho marparlahou bani dalan-Ku, iramotkon ho titah-Ku pakon parentah-Ku, songon parlahou ni bapamu si Daud, jadi tumpakon-Ku ma ho sayur matua.”

¹⁵ Dob ai puho ma si Salamo, tonggor ma, nipi do hape. Jadi dob das ia hu Jerusalem, jongjong ma ia i lobei ni Poti Parpadanan ni Jahowa, igalangkon ma galangan situtungon pakon galangan pardameian, anjaha ibere mangan ganup juakjuakni.

Hapentaran ni si Salomo Manguhum

¹⁶ Ijia roh ma dua halak boru jalang hu lobei ni raja ai, jongjong ma sidea i lobei ni.

¹⁷ Nini sahalak hun bani naboru ai ma, “Santabi tuannami! Ia ahu pakon naboru on marianan do ibagas sada rumah; jadi tubuhan tuah ma ahu i lambung ni i rumah ai.

¹⁸ Dob ai patoluarihon dob tubuhan tuah ahu, tubuhan tuah ma homa naboru on; hanami na dua hansa, seng dong halak na legan i rumah ai, sobali hanami na dua.

¹⁹ Matei ma anak ni naboru on borngin, halani tardondonisi.

²⁰ Jadi puho ma ia tongah borngin, iangkat ma anakku hun lambungku, sanggah modom

jabolonmu naboru on, anjaha iabing ma ai, anakni na matei ai inahkon ma hu abinganku.

²¹ Jadi sanggah puho ahu sogod-sogod laho painumkon anaknai, gabe tonggor ma, domma matei ia. Tapi dob hupapangkei sogod, tonggor ma, seng anakku na hutubuhkan ai hape ai.”

²² Tapi nini naboru na legan ai ma, “Lang, anakku do na manggoluh in, tapi anakmu do na matei in.” Nini na parlobei ai ma, “Lang, anakmu do na matei in, tapi anakku do na manggoluh in.” Sonai ma sidea marsurai i lobei ni raja ai.

²³ Dob ai nini raja ai ma, “Na sada on mangkatahon, ‘On do anakku na manggoluh on, anakmu do na matei in.’ Tapi na sada on mangkatahon, ‘Lang, anakmu do na matei in, anakku do na manggoluh on.’”

²⁴ Nini raja ai ma, “Buat nasiam bangku sada podang!” Jadi ibuat sidea ma sada podang bani raja ai.

²⁵ Dob ai nini raja ai ma, “Ponggol dua nasiam ma dakdanak na manggoluh in, anjaha bere nasiam ma, samponggol hu bani na sada on, anjaha na samponggol nari hu bani na sada an.”

²⁶ Jadi nini naboru paranak na manggoluh ai ma hu bani raja ai, ai holong tumang do uhurni ibagas mangidah anakni ai, “Sombahku bamu, tuannami, bere ma bani dakdanak na manggoluh in, sabonar ulang ma ibunuh ham ia.” Tapi nini naboru na

sadanari ai ma, “Ulang bam, ulang bangku, iponggol ma in!”

²⁷ Dob ai nini raja ai ma mambalosi, “Bere nasiam ma dakdanak na manggoluh in bani naboru on, ulang bunuh nasiam ai, on do inangni.”

²⁸ Sar ma panguhumion ni raja ai hu sab Israel, gabe mabiar ma sidea mangidah raja ai, ai iidah sidea hapentaran ni Naibata do ibagas panguhumion na dong bani ai.

Gamot-gamot ni si Salomo

4 ¹ Jadi Raja Salomo ma manggomgom haganup Israel.

² Anjaha on ma juakjuak bolonni: Si Asarya, anak ni si Sadok, malim;

³ si Elihorep pakon si Ahia, anak ni si Sisa, juru tulisni; si Josafat, anak ni si Ahilud, panuturuni;

⁴ si Benaya, anak ni si Joyada, pambobai ni bala; si Sadok pakon si Abyatar, malim;

⁵ si Asarya, anak ni si Natan, kopala ni gamot-gamot; si Sabud, anak ni si Natan, malim anjaha huan-huan ni raja ai;

⁶ si Ahisar, pangintuai ni rumah bolon; si Adoniram, anak ni si Abda, kopala ni panrodi.

⁷ Ambahni ai ipabangkit si Salomo do sapuluh dua halak juakjuakni na mangatur ganup halak Israel, laho pasirsirhon sipanganon hu bani raja ai pakon

hu bani pangisi ni rumahni; ganup sidea marhorin pasirsirhon haporluan sabulan ibagas satahun.

⁸ On ma goran-goran ni sidea: Anak ni si Hur i Dolog Efraim;

⁹ anak ni si Deker, i Makas, i Saalbim, i Betsemes, i Elon pakon i Bethanan;

¹⁰ anak ni si Hesed i Arubod, masuk hu bani do homa Soko pakon ganup tanoh Heper;

¹¹ anak ni si Aminadab, bani ganup tanoh buntu Dor, si Tapat, boru ni si salomo do parinangonni;

¹² si Baana, anak ni si Ahilud i Taanak, Megiddo pakon ganup Betsean, ai ma dohorhon Sartan i kehen ni Jesreel, hun Betsean, das hu Abelmehola, das hu dipar ni Jokmeam;

¹³ anak ni si Geber, i Ramot na i Gilead; masuk hu bani do huta ni si Jair, anak ni si Manasse na i Gilead; masuk hu bani do homa nagori Argob, na i Basan, onom puluh huta, martembok anjaha manransang-ransang tombaga;

¹⁴ si Ahinadab, anak ni si Iddo i Mahanaim;

¹⁵ si Ahimaas, i Naftali; ibuat do si Basmat boru ni si Salomo bahen parinangonni;

¹⁶ si Baana, anak ni si Husni, i Asser pakon i Bealot;

¹⁷ si Josafat, anak ni si Parua, i Isasar;

¹⁸ si Simeai anak ni si Ela, i Benjamin;

¹⁹ si Geber, anak ni si Uri i Gilead, tanoh ni si Sihon, raja ni halak Amori pakon si Og, raja ni Basan; sahalak do na mamarentah tanoh ai.

²⁰ Buei tumang do halak Juda pakon Israel, songon horsik na i topi ni laut hinabueini; mangan minum anjaha marmalas ni uhur do sidea.

Habanggalon ni si Salomo

²¹ (5-1) Si Salomo do na manggomgom ganup harajaon singgan ni Bah Euftrat das hu tanoh ni halak Palistim, das hu parbalogan ni tanoh Mesir; iboan sidea do sohei anjaha pambalosi do sidea bani si Salomo sadokah goluhni.

²² (5-2) Bohal na porlu bani si Salomo ibagas sadari, ai ma tolu puluh kor nitak na lumat pakon onom puluh kor nitak na somal,

²³ (5-3) sapuluh lembu na pinamombur, dua puluh lembu na hun sampalan, saratus biri-biri, legan ni ursa, bedar, balua pakon pinahan marbagei-bagei na pinamombur.

²⁴ (5-4) Ai igomgomi do ganup tanoh na hampit dipar ni Bah Euftrat, singgan ni Tipsa das hu Gasa, igomgomi do haganup raja na hampit dipar ni bah ai; mardamei do ia ampa na inggotsi ganup.

²⁵ (5-5) Jadi marhasonangan ma Juda pakon Israel marianan, ganup i toruh ni hayu anggurni bei pakon i toruh ni hayu arani, singgan ni Dan das hu Berseba, sadokah manggoluh Raja Salomo.

²⁶ (5-6) Ambah ni ai adong do ompat puluh ribu huda sitarik gareta pakon sapuluh dua ribu bala parhuda.

²⁷ (5-7) Anjaha juakjuakni sipangatur ondi pasirsirhon bohal bani Raja Salomo pakon bani haganup halak na roh mangan ampa raja Salomo, ganup sabulan bei, seng dong na hurang.

²⁸ (5-8) Sonai homa gandum pakon gagaton bani huda sitarik gareta pakon huda ajakan, iboan sidea do bani ianan na mangkaporluhon ai, ganup romban hu bani na dob pinarentahkon bani.

²⁹ (5-9) Anjaha ilayak-layakkon Naibata do hu bani si Salomo hapentaran pakon pangarusion na bagas tumang pakon buei pambotoh, usih songon horsik na i topi ni laut bueini,

³⁰ (5-10) gabe i atasi hapentaran ni si Salomo ma hapentaran ni sagala halak parhapoltakan pakon hapentaran ni halak Masir.

³¹ (5-11) Pentaran ia tene hun bani ganup jolma, pentaran hun bani si Etan halak Esrahi, pakon si Heman, si Kalkol ampa si Darda anak ni si Mahol, gabe tarmurmur ma ia bani ganup bangsa sipajuh begu-begu inggot.

³² (5-12) Adong do tolu ribu umpamani, anjaha saribu lima do buei ni dodingni.

³³ (5-13) Ibotoh do mansahapkon pasal hayu, hun bani hayu ares na i Libanon das hu bani isop na dong tubuh bani tembok; ibotoh do homa mansahapkon pasal pinahan-pinahan, manuk-manuk, gilok-gilok pakon dengke.

³⁴ (5-14) Jadi marrohan ma halak hun bani ganup bangsa sihol mambogei hapentaran ni si Salomo, hun bani ganup raja na i tanoh on, na mambogei barita ni hapentaranni ai.

**Parpadanan ni si Salomo pakon Raja Hiram
Pasal Parhayu ni Rumah Panumbahan**

(ay. 15-36: pausih 2 Kron. 2)

5 ¹ (5-15) Dob ai isuruh si Hiram, raja ni Tirus ma juakjuakni marayak si Salomo, dob ibogei, na dob iminaki ia gabe raja ganti ni bapani; ai holong do uhur ni si Hiram mangidah si Daud sadokah manggoluh ia.

² (5-16) Jadi martonah ma si Salomo hu bani si Hiram, nini ma,

³ (5-17) “Ibotoh ham do, na so tarbahen bapangku si Daud pajongjong sada rumah bani goran ni Jahowa, Naibatani, halani hamunsuhon hun bani munsuhni inggot, paima mangunduk sidea ganup ibahen Jahowa hu toruh ni jampal ni naheini.

⁴ (5-18) Tapi anggo nuan domma marhasonangan ahu inggot ibahen Jahowa Naibatanku; seng dong be imbang barang hasunsahan.

⁵ (5-19) Halani ai marsura-sura do ahu pajongjong sada rumah bani goran ni Jahowa Naibatanku, songon na pinarbagah ni Jahowa hu bani bapa, si Daud, sanggah na hinatahon-Ni, ‘Anakmu, na sihol pahundulon-Ku bani paratasmu bahen ganti mu,

maningon ia do pajongjong sada rumah bani goran-Ku.'

⁶ (5-20) Antong, hatahon ham ma halak na manroboh bangku hayu ares hun Libanon, husuruh pe juakjuakku mangkasomani juakjuakmu, anjaha hubere pe upah ni juakjuakmu songon na hinatahonmu; ai ibotoh ham do, seng dong i tongah-tongahnami na mambotoh manroboh hayu, songon halak Sidon."

⁷ (5-21) Jadi dob ibogei si Hiram hata ni si Salomo ai, malas tumang ma uhurni, nini ma, "Pinuji ma Jahowa sadari on, halani na dob binereni hu bani si Daud sada anak na pentar, manggomgom bangsa na bolon on."

⁸ (5-22) Dob ai isuruh si Hiram ma suruhanni marayak si Salomo, mangkatahon, "Domma hubogei tonah na pinadasmu; sirsir do ahu mambahen ganup sura-sura ni uhurmu, ai ma pasal hayu ares pakon hayu ingul ai.

⁹ (5-23) Juakjuakku pe patuadkon hayu ai hun Libanon hu laut; dob ai husuruh pe na manrakitkon ai i laut das bani ianan na sihol hatahononmu bangku, ase ijai ipadarat ai anjaha ijalo ham; tapi maningon bahenonmu do na pinangindo ni uhurhu, ai ma mambere bohal bani pangisi ni rumahku."

¹⁰ (5-24) Jadi ibere si Hiram ma hu bani si Salomo hayu ares pakon hayu ingul ansa pinindoni ai,

¹¹ (5-25) anjaha si Salomo pe ibere ma hu bani si Hiram dua puluh ribu kor gandum anjaha dua puluh bat minak na pinoroh. Sonai ma ibere si Salomo ganup tahun hu bani si Hiram.

¹² (5-26) Ilayak-layakkon Jahowa do hapentaran hu bani Raja Salomo, songon na pinarbagah-Ni hinan hu bani; anjaha mardamei do si Salomo pakon si Hiram, mambahen parpadanan do sidea na dua.

¹³ (5-27) Dob ai iharah Raja Salomo ma parrodi hun ganup Israel, buei ni parrodi ai tolu puluh ribu halak do.

¹⁴ (5-28) Jadi isuruh raja ai ma sidea margantih-gantih hu Libanon, sapuluh ribu ibagas sabulan; sabulan ma sidea i Libanon dob ai dua bulan i rumahni bei; si Adoniram do kopala ni parrodi ai.

¹⁵ (5-29) Ambahni ai adong do bani si Salomo pitu puluh ribu halak siparlanja anjaha ualuh puluh ribu halak sibarbar batu i dolog;

¹⁶ (5-30) sobalini ai adong ope mandur na pinabangkit ni Raja Salomo mangatur horja ai, tolu ribu tolu ratus halak, na mardiateihon halak na marhorja ai.

¹⁷ (5-31) Isuruh raja ai do homa sidea mangkurak batu na banggal anjaha na maharga, sibarbaron bahen onjolan ni rumah panumbahan ai.

¹⁸ (5-32) Jadi rap marhorja ma tukang ni Raja Salomo rap pakon tukang ni Raja Hiram ampa

halak Gebal mambarbar hayu pakon batu bahen haporluan ni rumah panumbahan ai.

Parjongjong ni Rumah Panumbahan

(Pausih 2 Kron. 3:1-13)

6¹ Bani tahun paompatratus-ualuhpuluhkon dob luar halak Israel hun tanoh Masir, anjaha paompattahunkon dob si Salomo manggomgom halak Israel, bani bulan Siw, ai ma bulan paduahon, ipungkah raja ai ma pajongjong Rumah ni Jahowa.

² Ia rumah na pinajongjong ni Raja Salomo ai hu bani Jahowa onom puluh asta do ganjangni, tolu puluh asta bolagni anjaha tolu puluh asta gijangni.

³ Anggo surambih na i lobei ni rumah panumbahan ai, dua puluh asta do ganjangni mangihutkon bolag ni rumah ai, anjaha bolagni sapuluh asta mangihutkon ganjang ni rumah ai.

⁴ Anjaha ibahen do jendela bani rumah ai na marjaring-jaring na sosot.

⁵ Sonai homa ipadear do bani tembok ni rumah ai surambih, inggot rumah ai, inggot ni pamurnanganni ai pakon pudi-pudini ai, ibahen do kamarni inggot.

⁶ Surambih partoruh ai lima asta do bolagni, partongah-tongah ai, onom asta do bolagni, anjaha na patoluhon ai pitu asta do bolagni; ibahen do rumah panumbahan ai martangga hambing inggot,

ase ulang pala tiang-tiangni ai inahkon hu tembok ni rumah ai.

⁷ Sanggah na pajongjongkon rumah ai, batu na dob binarbar i pangkurakan ai do ipasang, ase ulang tarboge i be sora ni parpalu, tangkei, barang parugas bosi na legan, sanggah na pajongjongkon ai.

⁸ Ia labah laho hu surambih partoruh ai hampit dangsina ni rumah ai do halani ai maningon marandar do halak laho hu surambih partongah-tongah, anjaha hun surambih partongah-tongah hu na patoluhon.

⁹ Dob siap ipajongjong rumah ai, ipadear ma langit-langitni hun bani tiang pakon papan hayu ares.

¹⁰ Ia surambih na pinauli ai inggot ni rumah ai ganup, lima asta do gijangni anjaha hayu ares do ipakei padomuhon ai hu rumah ai.

¹¹ Dob ai roh ma hata ni Jahowa hu bani si Salomo sonon,

¹² “Ia pasal rumah na pinajongjongmon, anggo marparlahou ho ibagas sagala titah-Ku, ibalosi ho uhum-Hu, iramotkon ho sagala parentah-Ku anjaha marparlahou ho ibagas ai, patotapon-Ku ma bam bagah-bagah-Ku, na dob Huparbagah hu bani bapamu, si Daud.

¹³ Jadi marianan ma Ahu i tongah-tongah ni halak Israel, anjaha seng tadingkonon-Ku bangsang-Ku halak Israel.”

¹⁴ Ase dob siap ipajongjong si Salomo rumah ai,

¹⁵ ilampis ma dingding ni rumah ai hunbagas bani hayu ares, hun dasor ni rumah ai das hu gulang-gulang ni langit-langit ai, ilampis ma ai bani hayu hunbagas; anjaha dasor ni rumah ai ilampis ma ai bani hayu ingul.

¹⁶ la sidua puluh asta na i pudi ni rumah ai ilampis do ai bani papan hayu ares hun dasorni nari das hu bani gulang-gulangni, anjaha ipadear ma ai hampit bagas gabe kamar pudi-pudi, gabe ianan na tang ma pansing.

¹⁷ la ianan na ma pansing na i lobei ni ianan na tang ma pansing ai, ompat puluh asta do ganjangni.

¹⁸ la hayu ares na hampit bagas ni rumah ai, maruhir mutik-mutik pakon bunga-bunga na mangerbang do; ganupan ai hun bani hayu ares do, seng dong taridah age sada batu.

¹⁹ Ipadear do ianan na tang ma pansing ai i parsitongahan ni rumah ai, bahen hajongjongan ni Poti Parpadanan ni Jahowa.

²⁰ la ianan na tang ma pansing ai dua puluh asta do ganjangni, dua puluh asta bolagni anjaha dua puluh asta gijangni, anjaha ilampis do ai bani omas pitah. Sonai homa, ibahen do sada anjapanjap hun bani hayu ares,

²¹ i lobei ni ianan na tang ma pansing ai, anjaha ilampis do ai bani omas.

²² Ilampis do ganup rumah panumbahan ai bani omas, haganup rumah ai.

²³ Ibaheŋ ma bani ianan na tang ma pansing ai dua herub hun bani hayu jetun, sapuluh asta gijangni.

²⁴ Lima asta do ganjang ni habong ni herub na sada, anjaha lima asta ganjang ni habong ni na sada nari, ase sapuluh asta ma hun bani ujung ni habong ni na sada hu bani na sada nari.

²⁵ Lanjar sapuluh asta do homa herub na legan ai; sisada ukuran pakon sisada turpa do herub na dua ai.

²⁶ Sapuluh asta do gijang ni herub na sada, sonai do homa herub na legan ai.

²⁷ Inahkon ma herub ai hu bani ianan na tang parbagas ai; herbang do habong ni herub ai, gabe ihonai habong ni na sada ma dingding na salopah, anjaha habong ni na sada nari mangonai bani habong ni salopah nari, marsihonaan do habong ni sidea na legan ai iparsitongahan ni rumah ai.

²⁸ Anjaha ilampis do herub ai bani omas.

²⁹ Iuhirhon do bani dingding ni rumah ai inggot gambaran ni herub, palem pakon bunga-bunga na mangerbang, bani kamar parbagas pakon pardarat.

³⁰ Ilampis do dasor ni rumah ai bani omas bani kamar parbagas pakon pardarat.

³¹ Ibaheŋ do labah hamasukan hu bani ianan na tang ma pansing ai hun bani hayu jetun; tohang pakon pasihonni ai manjadihon silima suhi.

³² Haduasi bulung ni labah ai iuhir do bani gambaran ni herub, palem pakon bunga-bunga na

mangerbang; anjaha ilampis do ai bani omas, sonai homa herub pakon palem ai ilampis do bani omas.

³³ Sonai homa ibahen do bani hamasukan hu ianan na susi ai, tiang hun bani hayu jetun marompat suhi.

³⁴ Anjaha dua bulung ni labahni hun bani hayu ingul; bulung ni na sada tarjadi hun bani dua papan na boi marputor, anjaha bulung ni na sada nari pe dua papan na boi marputor do.

³⁵ Iuhir do i atas ni Herubim, palem pakon bunga na mangerbang; anjaha ilampis ma ai bani omas, tipis ibahen bani uhiran ai.

³⁶ Ibahen do alaman parbagas ai mardinding hun bani tolu ristei batu na binarbar pakon sanristei tiang hun bani hayu ares na ihotam.

³⁷ Paompattahunkon bani bulan Siw ipamasuk ma onjolan ni rumah ni Jahowa ai,

³⁸ anjaha pasapuluh-sadatahunkon bani bulan Bul, ai ma bulan paualuhkon, siap ma rumah ai bani haganup bagianni romban hu bani ranggianni hinan; ase pala do pitu tahun ia na paulihon ai.

Rumah ni Raja Salomo

7 ¹ Tapi sapuluh tolu tahun do dokahni Raja Salomo pajongjongkon rumahni, ai pe ase siap ibahen ganup.

² Ipajongjong do homa rumah harangan Libanon, ganjangni saratus asta, bolagni lima puluh asta, anjaha gijangni tolu puluh asta; ipajongjong do ai

bani tolu ristei tiang na hun bani hayu ares, anjaha i atas ni tohang na hun bani hayu ares.

³ Anjaha itutup do ai bani hayu ares i babou ni kamar na i atas ni tiang na ompat puluh lima ai, sapuluh lima sanristei.

⁴ Ambahni ai adong do jendela patitir, tolu ristei, patontang bei.

⁵ Ganup labah ai pakon jendela ai marompat suhi do, marjaring-jaring, anjaha patontang do labah ai, tolu ristei.

⁶ Ipadear do homa sada surambih na martiang, lima puluh asta ganjangni, tolu puluh asta bolagni; anjaha i lobei ni ai adong ope surambihni martiang anjaha marandar.

⁷ Ambahni ai ipaturei do sada kamar bolag paratas, iananni manguhum, ai ma paruhuman; ilampis do dasorni das hu bani langit-langitni bani hayu ares.

⁸ Rumahni pe, na niiananni ai, bani alaman na legan ipudi ni kamar ai, sonai do parpaulini. Ipaturei si Salomo do homa sada rumah bani boru ni Parao, na binuatni bahen parinangonni, sonai do homa parpaulini.

⁹ Ganupan ai ipaturei hun bani batu na maharga, na binarbar mangihutkon ukuranni, na ginargaji hunbagas pakon hun darat, hun dasorni nari das hu tayub, hun bani alaman ni Rumah ni Jahowa das hu alaman bolag.

¹⁰ Ia onjolanni ai batu na maharga do, batu na banggal, batu sialuh asta pakon sisapuluh asta,

¹¹ anjaha i atas ni ai batu na maharga, na binarbar marukuran, pakon hayu ares.

¹² Ia alaman bolag ai adong do tembokni inggot hun bani tolu ristei batu na binarbar pakon sanristei tiang hun bani hayu ares; sonai do homa alaman parbagas ni Rumah ni Jahowa pakon surambih ni rumah ai.

Tiang Tombaga

(ay. 15-21: pausih 2 Kron. 3:15-17)

¹³ Dob ai isuruh Raja Salomo ma na mangalopi si Hiram hun Tirus.

¹⁴ Anak ni sada na mabalu do ia hun marga Naftali, tapi anggo bapani halak Tirus do, tuhang tombaga, gok hapentaran, pambotoh anjaha na pandei maruhur do ia manukangi parugas hun bani tombaga. Roh ma ia hu bani Raja Salomo laho mangkorjahon ganup silahouanni ai.

¹⁵ Ituang ma dua tiang tombaga. Sapuluh ualuh asta do gijang ni tiang na sada, anjaha sapuluh dua asta do gijang ni tali ukuran ni lilitni ai; ompat jari do hapalni anjaha marruang do ai, tiang na paduahon ai pe sonai do.

¹⁶ Ipaturei do homa dua uluni, na tinuang hun bani tombaga, anjaha inahkon ma ai hu atas ni tiang ai; lima asta do gijang ni ganup uluni.

¹⁷ Dob ai ipaturei ma dua bayu-bayuan pakon rantei-rantei hu ulu ni tiang ai, sada bani ulu na sada, anjaha sada bani ulu na sada nari.

¹⁸ Ibahen ma homa buah ni dalima, dua ristei inggot bani bayu-bayuan ai bahen parrongkob ni uluni na i atas ni tiang ai; sonai do homa parpaturei bani na paduahon ai.

¹⁹ Ia ulu na i atas ni tiang ai, usih do ai bani bunga pansur na mangerbang, ompat asta gijangan hun bani surambih ai.

²⁰ I atas ni tiang na dua ai do ulu ai anjaha i babou ni na gemong ai, na i lambung ni bayu-bayuan ai; adong do dua ratus buah ni dalima ijai, dua ristei inggot; sonai do homa pakon ulu na legan ai.

²¹ Dob ai ipajongjong ma tiang ai bani surambih ni rumah panumbahan ai; tiang na pinajongjong hampit siamun ai, ibahen ma goran ni Jakin, anjaha tiang na pinajongjong hampit sambilou ai, ibahen ma goran ni Boas.

²² Sonai ma pardob ni horja bani tiang ai.

Bongbongan Tuangan

(ay. 23-26: pausih 2 Kron. 4:2-5)

²³ Dob ai ipaturei ma sada bongbongan tuangan, sapuluh asta hun topi na sada hu topi na sada nari, bongkou poupouni, lima asta gijangni anjaha tolu puluh asta lilitni inggot.

²⁴ Anjaha inggot ni bongbongan ai, i toruh ni topini ai, adong do jagar-jagar hun bani mutik ni bunga-bunga, tolu puluh asta lilitni inggot. Dua ristei do mutik ni bunga-bunga ai, anjaha rap pakon bongbongan ai do ituang.

²⁵ Jonam do ai i atas ni sapuluh dua lembu, tolu dampak utara, tolu dampak pastima, tolu dampak dangsina, tolu dampak hapoltakan, anjaha i atas ni sidea do bongbongan ai; dampak bagus do anggo ihur ni sidea.

²⁶ Ia hapalni santopak do; bibirni songon bibir ni panginuman, songon bunga ni bunga pansur; siat dua ribu bat.

Tong Parburihan

(ay. 27-39: pausih 2 Kron. 4:6, 10)

²⁷ Ipadear ma homa sapuluh tong parburihan hun bani tombaga, ganup parburihan ai ompat asta do ganjangni, ompat asta bolagni anjaha tolu asta do gijangni.

²⁸ Sonon do parpadearni bani parburihan ai: Marlais do ai inggot, anjaha marpetak-petak do laisni ai.

²⁹ Anjaha bani petak-petak ni lais ai adong do gambaran ni singa, lembu pakon herub, sonai homa bani lais ai. Hampit datas pakon hampit toruh ni singa pakon lembu ai adong do jagar-jagar.

³⁰ Ambahni ai ganup parburihan ai adong do ompat galapangni hun bani tombaga anjaha asni pe tombaga do, marabara do suhi-suhini na ompat ai; na tinuang do ai, anjaha ganup ai marjagar-jagar do.

³¹ Hampit bagas ni laisni ai do babahni, anjaha saasta hu atas; bongkou do babahni ai, usih bani tonjolan ni tiang ibahen, tongah dua asta bagasni. Maruhiran do babahni ai; marompat suhi do petak-petak ai, lang bongkou.

³² I toruh ni petak-petakni ai do galapangni na ompat ai; mardomu do as ni galapang ai hu bani parburihan ai; anjaha tongah dua asta do gijangni ganup galapang ai.

³³ Songon galapang ni gareta do ipadear galapang ai; asni, lingkarni, jari-jarini, kopala kambingni, ituang do ganupan ai.

³⁴ Adong do ompat abara bani haompatsi suhi-suhi ni parburihan ai; marsada do abara ai bani parburihan ai.

³⁵ Bongkou do hampit ulu ni parburihan ai, satongah asta gijangni; bani ulu ni parburihan ai do sijolomanni, anjaha sada do ai hu bani petak-petak na i laisni ai.

³⁶ Anjaha iuhirhon do bani sijolomanni pakon hu bani petak-petak ni laisni ai gombaran ni herub, singa pakon palem marguru hu bani parsiatni ijai, anjaha marjagar-jagar do ai inggot.

³⁷ Sonai ma parpadearni bani na sapuluh parburihan ai, dos tuanganni, sada sibaranni pakon sada turpani.

³⁸ Ambahni ai ipadear ma sapuluh hudon hun bani tombaga, siat ompat puluh bat sada hudon; ompat asta do tahar ni ganup hudon ai anjaha i atas ni ganup parburihan na sapuluh ai adong do hudon sada.

³⁹ Dob ai inahkon ma parburihan ai, lima hampit siamun ni rumah ai, na lima nari hampit sambilouni; tapi anggo bongbongan ai inahkon ma hampit siamun ni rumah ai, hampit anggonini.

Parugas ni Rumah Panumbahan

(ay. 40-47: pausih 2 Kron. 4:11-18)

⁴⁰ Ipadear si Hiram ma homa hudon, sujuk-sujuk pakon mangkuk. Ase siap ma horja ni si Hiram, na hinorjahonni bani Raja Salomo i Rumah ni Jahowa;

⁴¹ na dua tiang ai, na dua ulu na i atas ni tiang ai, na dua bayu-bayuan panrongkob ni ulu na dua na i atas ni tiang ai;

⁴² sonai homa na ompat ratus buah ni dalima ai, na longkot hu bani bayu-bayuan ai, dua ristei buah ni dalima bani sada bayu-bayuan bahen panrongkob ni na dua ulu na i atas ni tiang na dua ai;

⁴³ na sapuluh parburihan pakon na sapuluh hudon na i atas ni parburihan ai;

⁴⁴ bongbongan ai pakon na sapuluh dua lembu na i toruh ni bongbongan ai;

⁴⁵ hudon, sujuk-sujuk pakon mangkuk ai. Ganup parugas ai, na pinauli ni si Hiram bani Raja Salomo i Rumah ni Jahowa, hun bani tombaga na pinolas do ipauli.

⁴⁶ Bani pamah ni Bah Jordan, i holangkolang ni Sukot pakon Sartan do ipatuangkon Raja Salomo ganupan ai, ibagas tuangan na hun bani tanoh halampung.

⁴⁷ Ipaturut Raja Salomo do ganup ugas ai lang itimbang, halani bueini; ase seng na botoh sadiha borat ni tombaga ai.

Parugas Omas na ibagas Rumah Panumbahan

(ay. 48-51: pausih 2 Kron. 4:19--5:1)

⁴⁸ Ihatahon Raja Salomo ma homa na paulihon sagala parugas, na ipakei ibagas Rumah ni Jahowa: Ai ma anjapanjap omas pakon meja omas hatibalan ni ruti sigalargonkon;

⁴⁹ parpalitaan omas, lima hampit siamun anjaha lima hampit sambilou, i lobei ni ianan na tang ma pansing ai, hun bani omas pitah; jagar-jagarni, palitani pakon guntingni hun bani omas;

⁵⁰ mangkuk, pisou, batil, balanga pakon pardahupaan hun bani omas pitah; engsel ni labah ni ianan na tang ma pansing ai pakon engsel ni labah ni ianan na ma pansing ai hun bani omas do.

⁵¹ Ase sahei ma ganup horja ni Raja Salomo bani Rumah ni Jahowa. Jadi ibahen si Salomo ma hubagas rumah ai sagala na dob niuras ni bapani si Daud, ai ma pirak, omas pakon parugas-parugas, inahkon ma ai i kamar parartaan ni Rumah ni Jahowa.

Iboan Poti Parpadanan ai hu Rumah Panumbahan

(ay. 1-11: pausih 2 Kron. 5)

8 ¹ Dob ai ipatumpu Raja Salomo ma pangintuai ni halak Israel pakon ganup pambobai ni halak Israel mar sasamarga pakon mar sasaompung roh hu lobei ni Raja Salomo i Jerusalem, laho mamboan Poti Parpadanan ni Jahowa tangkog hun huta ni si Daud, ai ma Sion.

² Jadi martumpu ma hu lobei ni Raja Salomo haganup dalahi i Israel bani pesta ai, bani bulan Etanim, ai ma bulan papituhon.

³ Jadi dob martumpu haganup pangintuai ni halak Israel, iangkat malim ai ma poti ai.

⁴ Dob ai iboan sidea ma tangkog poti ni Jahowa, lampolampo partumpuan pakon ganup parugas na ma pansing, na ibagas lampolampo ai hinan, jadi iboan malim pakon halak Levi ai ma ai tangkog.

⁵ Jadi jongjong ma Raja Salomo rap pakon ganup tumpuan ni halak Israel, na roh martumpu hu lobeini, i lobei ni poti ai, anjaha igalangkon ma

biri-biri pakon lombu, sonai ma bueini, gabe seng tarbilang barang tare tong sidea.

⁶Jadi das ma iboan malim ai Poti Parpadanan ni Jahowa hu bani iananni, hu ianan na tang ma pansing, i toruh ni habong ni herub na dua ai.

⁷Ai ipaherbang herub ai do habongni i babou ni ianan ni poti ai, gabe rungkub ma poti ai pakon lanja-lanjan ai ibahen herub ai.

⁸Sonai do parganjang ni lanja-lanja ai, gabe taridah ma ujung ni lanja-lanja ai hun ianan na ma pansing na i lobei ni ianan na tang ma pansing ai; tapi seng taridah ai hun darat, anjaha ijai do ai das ronsi sadari on.

⁹Seng dong atap aha ibagas poti ai, sobali na dua batu panuratan ai, na ninahkon ni si Musa hujai sanggah i Horeb, sanggah na binahen ni Jahowa parpadanan bani halak Israel, bani na luar sidea hun Tanoh Masir.

¹⁰Jadi dob luar malim ai hun bani ianan na ma pansing ai, roh ma hambun manggoki rumah ni Jahowa,

¹¹pala seng tahan malim ai jongjong marugas halani hambun ai, ai hamuliaon ni Jahowa do manggoki Rumah ni Jahowa.

Sipaingat ni Raja Salomo

(ay. 12-53: pausih 2 Kron. 6:1-40)

¹² Nini si Salomo ma ijia, “Jahowa do na mannahkon mata ni ari i langit, tapi domma ihatahon, sihol marianan do la ibagas na golap.

¹³ Domma hupajongjong sada rumah Bamu, bahen ianan-Mu, sada ianan Bamu marparatas ronsi sadokah ni dokahni.”

¹⁴ Dob ai marhusor ma raja ai idompakkon ma ganup tumpuan ni halak Israel anjaha ipasu-pasu, anjaha jongjong bei do ganup tumpuan ni halak Israel ai.

¹⁵ Nini raja ai ma, “Pinuji ma Jahowa, Naibata ni halak Israel, na dob pasaudkon marhitei tangan-Ni na binagahkon-Ni marhitei pamangan-Ni hu bani bapa si Daud, sanggah na hinatahon-Ni,

¹⁶ ‘Singgan ni ari dob Huarahkon luar bangsang-Ku halak Israel hun tanoh Masir, seng onggah Hutodoh sada huta bani ganup marga ni halak Israel laho pajongjongkon sada rumah ijai; tapi domma Hupilih si Daud laho manggomgomi bangsang-Ku halak Israel.’

¹⁷ Tapi domma namin isura-surahon uhur ni bapa si Daud sihol pajongjongkon sada rumah bani goran ni Jahowa, Naibata ni halak Israel.

¹⁸ Tapi nini Jahowa do hu bani bapa, si Daud, ‘Halani domma isura-surahon uhurmu sihol pajongjong

sada rumah bani goran-Ku, dear do namin sura-sura ni uhurmai;

¹⁹ tapi seng bulih anggo ho pajongjong rumah ai, maningon anakmu na pinupusmai do pajongjong sada rumah bani goran-Ku.'

²⁰ Domma ipasaud Jahowa bagah-bagah na dob hinatahon-Ni ai; ai domma ahu ipabangkit gantih ni bapa, si Daud, anjaha hundul bani paratas ni Israel, songon na pinarbagah ni Jahowa hinan, anjaha domma hupajongjong sada rumah bani goran ni Jahowa, Naibata ni Israel.

²¹ Anjaha domma hupajongjong ijon sada ianan bani poti in, ianan ni titah parpadanan in, na binahen-Ni hu bani ompungta, sanggah iarahkon sidea luar hun tanoh Masir."

Tonggo ni Raja Salomo

²² Dob ai jongjong ma Raja Salomo i lobei ni anjapanjap ni Jahowa mandompakkon ganup tumpuan ni halak Israel, anjaha ipaherbang ma tanganni dompak langit.

²³ Nini ma, "Ham Jahowa Naibata ni halak Israel! Seng dong Naibata na songon Ham i nagori atas barang i nagori tengah, na mambahen parpadanan anjaha na maridop ni uhur bani jabolon-Mu, na marparlahou i lobei-Mu hun bani gok ni uhurni,

²⁴ na pasaudkon hu bani bapa, si Daud, hata na dob pinarbagah-bagah-Mu hu bani jabolon-Mu; Ham

do na mangkatahon ai, anjaha marhitei tangan-Mu ipasaud Ham ai sadari on.

²⁵ On pe, Ham Jahowa, Naibata ni Israel, pasaud Ham ma hu bani jabolon-Mu si Daud, bapa ondi na dob pinarbagah-bagah-Mu hu bani, sanggah na hinatahon-Mu, 'Seng anjai rotap hunbam sada halak i lobei-Hu, na hundul bani paratas ni Israel, asal ma iramotkon anakmu parlahouni, marparlahou sidea i lobei-Hu songon ho, na dob marpalahou i lobei-Hu.'

²⁶ On pe, Ham Naibata ni Israel, pasaud Ham ma hata-Mu, songon na dob pinarbagah-Mu hu bani jabolon-Mu si Daud, bapa ondi.

²⁷ Tapi tene, tor ra ma Naibata marianan i atas tanoh on? Tonggor ma, gari langit ni langitang seng tarhamkamsi Ham; samintolah ma rumah na hupajongjong on?

²⁸ Tapi sai manatap ma Ham hu bani tonggo ni jabolon-Mu on pakon hu bani elek-elekni, Ham Jahowa Naibatanku, sai tangihon Ham ma dilo-dilo pakon tonggo na tinonggohon ni jabolon-Mu i lobei-Mu sadari on;

²⁹ sai tonggor ma panonggor-Mu arian pakon borngin hu bani rumah on, ianan na dob hinatahon-Mu, 'Maningon ijai do marianan goran-Ku' sai tangihon Ham ma tonggo na tinonggohon ni jabolon-Mu on bani ianan on.

³⁰ Sai tangihon Ham ma elek-elek ni jabolon-Mu on pakon bangsa-Mu halak Israel, anggo martonggo sidea bani ianan on; sai tangihon Ham ma in bani ianan-Mu marparatas, i nagori atas; sai tangihon Ham ma, anjaha marpangulaki ma uhur-Mu.

³¹ Anggo mardousa sada halak bani hasomanni, pala ipabija ia halani ai, anjaha saud ia roh marbija hu lobei ni anjapanjap-Mu on, i rumah panumbahan on,

³² jadi tangihon Ham ma ai i nagori atas, anjaha bahen Ham ma na madear hu bani jabolon-Mu, tapi uhum Ham ma na marsalah, marhitei mambalaskon pambahenanni bani, anjaha pintori Ham ma parpintor, marhitei na mambalaskon bani romban hu bani hapintoranni.

³³ Tapi anggo talu bangsa-Mu halak Israel ibahen munsuhni halani mardousa sidea Bamu, anggo mulak sidea use Bamu anjaha isaksihon goran-Mu, martonggo anjaha mangelek-elek sidea use ibagas rumah panumbahan on:

³⁴ Sai tangihon Ham ma ai i nagori atas, anjaha sasap Ham ma dousa ni bangsa-Mu halak Israel, anjaha boan Ham ma sidea use bani tanoh na binere-Mu hu bani ompung ni sidea.

³⁵ Anggo tartutup langit anjaha seng roh udan halani mardousa sidea Bamu, anggo martonggo sidea bani ianan on, anjaha isaksihon sidea goran-

Mu, anjaha mulak sidea hun bani dousa ni sidea, halani domma ipatunduk Ham sidea,

³⁶ sai tangihon Ham ma ai i nagori atas, anjaha sasap Ham ma salah ni jabolon-Mu halak Israel (*ai Ham do siajarhon bani sidea dalam-Mu na dear in, na talup sidalanan ni sidea*) anjaha bere Ham ma udan bani tanoh-Mu, na dob binere-Mu bani bangsa-Mu, bahen siteanon ni sidea.

³⁷ Anggo masa lohei i tanoh in, sonai homa sampar, borou, antinganou, balang barang gilok-gilok; anggo ihubu munsuh sidea ibagas huta ni sidea, barang sitaronon ampa naborit na ijahanin in pe masa;

³⁸ sagala tonggo pakon pangindoan, na binahen ni marsasahalak barang ganup bangsa-Mu halak Israel, halani na dob mananda bei bani sambor ni hauhuronni, gabe roh sidea paherbang tanganni dompak rumah panumbahan on,

³⁹ sai tangihon Ham ma i nagori atas, bani paratas-Mu in, anjaha marpangulaki ma uhur-Mu, bahen anjaha balaskon Ham ma bani ganup romban hu bani dalanni bei, marguru hu bani pananda-Mu bani hauhuron ni ganup sidea, ai pitah Ham do na mananda hauhuron ni jolma manisia,

⁴⁰ ase marhabiaran sidea sadokah manggoluh sidea bani tanoh na binere-Mu bani ompung ni sidea.

⁴¹ Sonai homa age halak na legan, na so hun bani bangsa-Mu halak Israel, na roh hun tanoh na madaoh halani goran-Mu,

⁴² ai bogeion ni sidea do goran-Mu na banggal in, pakon tangan-Mu na gogoh anjaha na gostong in; anggo roh ia anjaha martonggo ibagas rumah on,

⁴³ sai tangihon Ham ma i nagori atas, bani paratas-Mu in anjaha bahen Ham ma romban hu bani haganup na pinangindo ni halak na legan ai Bamu, ase ibotoh haganup bangsa na i tanoh on goran-Mu anjaha ihabiari Ham songon bangsa-Mu halak Israel, anjaha ase ibotoh sidea, na marpanggoranan Bamu do rumah na hupajongjong on.

⁴⁴ Anggo luar bangsa-Mu laho marporang dompak munsuh ni sidea, barang sonaha pe parsuruh-Mu bani sidea, anjaha roh sidea martonggo bani Jahowa hu huta na dob pinilih-Mu pakon hu rumah na dob hupajongjong bani goran-Mu,

⁴⁵ sai tangihon Ham ma tonggo pakon pangindoan ni sidea i nagori atas, anjaha pasintong Ham ma uhum bani sidea.

⁴⁶ Anggo mardousa sidea ai, seng dongjolma na so mardousa, anjaha manringis Ham bani sidea, anjaha iondoskon Ham sidea bani munsuh, gabe tarbuang sidea hu tanoh ni munsuhni daoh barang dohor,

⁴⁷ dob ai ipaulak sidea uhur ni sidea hubagas i tanoh habuangan ni sidea, anjaha ipaubah sidea

uhur ni sidea, anjaha martonggo sidea Bamu i tanoh habuangan ni sidea ai, nini, 'Domma mardousa hanami, domma marsalah hanami, anjaha hajahaton do horjanami'

⁴⁸ anggo mulak sidea Bamu hun bani gok ni uhur ni sidea pakon hun bani gok ni tonduy ni sidea i tanoh ni munsuh ni sidea, na mambuankon sidea, anjaha martonggo sidea Bamu, dompak tanoh ni sidea, na binere-Mu hu bani ompung ni sidea, dompak huta na pinilih-Mu, pakon dompak rumah, na hupauli bani goran-Mu,

⁴⁹ sai tangihon Ham ma i nagori atas, bani paratas-Mu in, tonggo pakon pangindoan ni sidea, anjaha pasintong Ham ma uhum bani sidea,

⁵⁰ anjaha sasap Ham ma dousa ni bangsa-Mu, na mardousa dompak Ham, sonai homa ganup panlanggaron ni sidea, na binahen ni sidea Bamu; anjaha bahen Ham ma, ase dapotan idop ni uhur sidea i lobei ni halak na mambuankon sidea, anjaha iidopi sidea,

⁵¹ ai bangsa-Mu pakon parbagianan-Mu do sidea, na dob niarahkon-Mu luar hun tanoh Masir, hunbagas panlalaan bosi.

⁵² Sai tonggor ma panonggor-Mu manatap elek-elek ni jabolon-Mu pakon elek-elek ni bangsa-Mu halak Israel, sai tangihon Ham ma sidea pasal haganup na pinangindo ni sidea Bamu.

⁵³ Ai domma pala ipapulig Ham sidea hun tongah-tongah ni ganup bangsa na i tanoh on, bahen parbagianan-Mu, songon na dob pinarbagah-Mu marhitei juakjuak-Mu si Musa, sanggah na niarahkon-Mu ompungnami luar hun tanoh Masir, Ham Tuhan Jahowa.”

Pasu-pasu ni si Salomo

⁵⁴ Jadi dobkonsi itonggohon Raja Salomo bani Jahowa haganup tonggo pakon pangindoan ondi, jongjong ma ia hun lobei ni anjapanjap ni Jahowa, ai ijai do ia manrogop anjaha paherbang tanganni dompak langit;

⁵⁵ jadi jongjong ma ia, anjaha ipasu-pasu ma ganup tumpuan ni halak Israel marhitei sora na gogoh, nini ma,

⁵⁶ “Pinuji ma Jahowa, na mambere hasonangan hu bani bangsa-Ni halak Israel, romban hu bani ganup na pinarbagah-Ni ai; seng dong na labuh hun bani haganup hata na madear, na dob pinarbagah-Ni ai marhitei si Musa juakjuak-Ni ai.

⁵⁷ Sai ihasomani Jahowa, Naibatanta in ma hita, songon na dob hinatahon ni ompungta; sai ulang ma itadingkon barang iambungkon hita;

⁵⁸ sai itarik ma uhurta hu Bani, ase marparlahou hita bani ganup dalan-Ni, anjaha iramotkon hita tonah-Ni, titah-Ni pakon uhum-Ni, na dob tinonahkon-Ni hu bani ompungta.

⁵⁹ Anjaha ganup hata pangindoan, na dob husombahkon on hu bani Jahowa, sai tong ma in namin i lobei ni Jahowa arian pakon borngin, anjaha ipasintong ma uhum bani jabolon-Ni pakon bani bangsa-Ni halak Israel, songon na talup ganup ari;

⁶⁰ ase ganup bangsa ni tanoh on mambotoh, Jahowa do Naibata, anjaha sobali-Si seng dong.

⁶¹ Halani ai sai gok bani Naibata Jahowa in ma ganup uhur nasiam, marparlahou ma nasiam ibagas titah-Ni, anjaha ramotkon nasiam ma ganup parentah-Ni, songon sadari on.”

Ujung ni Pamongkotan ai

(ay. 62-66: pausih 2 Kron. 7:4-10)

⁶² Dob ai igalangkon raja ai rap pakon bangsa ai ma galangan i lobei ni Jahowa.

⁶³ Igalangkon si Salomo ma galangan pardameian hu bani Jahowa, dua puluh dua ribu lembu pakon saratus dua puluh ribu biri-biri. Sonai ma pangondoskon ni si Salomo pakon ganup bangsa ai bani rumah panumbahan ai bani Jahowa.

⁶⁴ Bani ari na sasada ai ma iuras raja ai parsitongahan ni alaman na i lobei ni Rumah ni Jahowa, ai ijai do igalangkon galangan situtungon pakon galangan sipanganon pakon taboh-taboh ni galangan pardameian, halani maetektu do anjapanjap tombaga na i lobei ni Jahowa, bahen

panggalangan ni galangan situtungan, pakon galangan sipanganon pakon taboh-taboh ni galangan pardameian.

⁶⁵ Sonai ma pamestahon ni Raja Salomo bani pesta ai ijia, rap pakon ganup halak Israel, sada tumpuan bolon, na roh hun Hamat nari das hu Bah Masir, hu lobei ni Jahowa Naibatanta, pitu ari dokahni.

⁶⁶ Bani ari paualuhkon isuruh ma mulak halak simbuei ai; ipasu-pasu sidea ma raja ai, lanjar mulak ma sidea hu rumah ni bei ibagas malas pakon sonang ni uhur halani haganup na madear, na binahen ni Jahowa hu bani Raja Daud, juakjuak-Ni ai, pakon hu bani halak Israel, bangsa-Ni ai.

Bagah-bagah pakon Lumba-lumba ni Naibata

(ay. 1-9: pausih 2 Kron. 7:11-22)

9 ¹ Dob ipajongjong Raja Salomo Rumah ni Jahowa pakon rumah bolon ai ampa haganup na legan, na pinarsintani paulionni,

² ipataridahkon Jahowa ma diri-Ni hu bani Raja Salomo paduahalihon, songon na dob pinatalarni diri-Ni bani i Gibeon.

³ Dob ai nini Jahowa ma hu bani, “Domma Hutangihon tonggo pakon pangindoanmu, na sinombahkonmu Bangku; domma Hupapansing rumah on, na pinajongjongmon, bahen ianan ni goran-Ku ronsi sadokah ni dokahni; sai dompak jai do mata pakon uhur-Hu tongtong.

⁴On pe, anggo marparlahou do ho i lobei-Hu, songon parlahou ni bapamu, si Daud, hun bani gok pakon pintor ni uhurmu, ihorjahon ho romban hu bani na Hutitahkon bam, anjaha iramotkon ho aturan-Ku pakon uhum-Hu,

⁵jadi pajonamon-Ku ma paratas ni harajaonmu manggomgom halak Israel sadokah ni dokahni, songon na dob Hubagahkon hu bani bapamu si Daud, ningku, 'Seng anjai rotap hunbam sada halak i lobei-Hu, na hundul bani paratas ni Israel.'

⁶Tapi anggo marbalik hanima hun bani na mangirikkon Ahu, ho pakon ginomparmu, anjaha seng iramotkon hanima titah-Ku pakon aturan-Ku, na dob Hupajongjong i lobeinima, tapi laho hanima mambalosi naibata na legan anjaha marsombah hujai,

⁷jadi siapkonon-Ku ma Israel hun tanoh, na dob Huberehon bani sidea; anjaha rumah, na dob Hupapansing bani goran-Ku, padaohon-Ku ma in hun lobei ni bohing-Ku; gabe umpama pakon salig-salig ma Israel i tongah-tongah ni sagala bangsa.

⁸Gabe gugunan batu ma rumah on; ganup halak na mamontas hunjin gabe longang ma anjaha manrisai, nini sidea ma, 'Mase ma sonon ibahen Jahowa hu bani tanoh on pakon hu rumah on?'

⁹Dob ai nini ma, 'Halani na tinadingkon ni sidea do Jahowa, Naibata ni sidea ai, na mangarahkon ompung ni sidea luar hun Tanoh Masir, gabe

marpangunsandeian sidea bani naibata na legan, marsombah sidea hujai anjaha ibalosi; halani ai do ase iparoh Jahowa ganupan on hu bani sidea.”

Sibere-bere ni si Salomo hu bani Raja Hiram

(ay. 10-28: pausih 2 Kron. 8)

¹⁰ Jadi dob salpu na dua puluh tahun ai sadokah ai ma ipajongjong Raja Salomo rumah na dua ai, ai ma Rumah ni Jahowa pakon rumah bolon ai,

¹¹ anjaha si Hiram, raja hun Tirus do na mamberehon hu bani Raja Salomo hayu are pakon ingul ampa omas, barang sadiha nini uhurni ijia ma ibere Raja Salomo hu bani Raja Hiram dua puluh huta i Nagori Galilea.

¹² Dob ai bingkak ma Raja Hiram hun Tirus laho manorih huta ai, na dob binere ni Raja Salomo hu bani, hape lang ipangan uhurni ai.

¹³ Jadi nini ma, “Huta aha ma, na dob bineremu on bangku, saninangku?” Halani ai igoran ma ai nagori Kabul ronsi sadari on.

¹⁴ Anjaha itongoskon Raja Hiram ma bani Raja Salomo saratus dua puluh talenta omas.

Horja Rodi na Binahen ni si Salomo

¹⁵ Sonon do ruhut ni panrodion, na tinampeihon ni Raja Salomo, laho paulihon Rumah ni Jahowa, rumah bolon, Milo, tembok ni Jerusalem pakon na patoguhkon Hazor, Megiddo pakon Geser.

¹⁶ Ai tangkog do sapari Parao, raja ni Masir manaluhon Geser, lanjar isurbuy bani apuy; ibunuhi do halak Kanaan, na marianan i huta ai, ibere ma huta ai bahen parpaingkatni bani boruni, parinangon ni Raja Salomo.

¹⁷ Dob ai ipajongjong Raja Salomo ma use huta Geser pakon Bet-Horon parbornoh.

¹⁸ Baalat pakon Tamar i halimisan na i tanoh Juda,

¹⁹ ambahni ai sagala huta panimpanan, na adong bani si Salomo, huta partumpuan ni gareta porang pakon huta ni bala siparhuda, pakon sagala na hinarosuhkon ni Raja Salomo sipajongjongon ni i Jerusalem, i Libanon pakon bani haganup tanoh, na ginomgomanni ai.

²⁰ Sagala halak na tading hun bani halak Amori, Heti, Peresi, Hewi, pakon Jebusi, na so hun bani halak Israel,

²¹ pakon ginompar ni sidea, simasima ni sidea i tanoh in, na so siap hinan ibahen halak Israel, hu bani sidea ma itampeihon Raja Salomo horja rodi ronsi sadari on.

²² Tapi anggo hu bani halak Israel seng dong itampeihon raja Salomo horja rodi, gabe tentara do sidea, gabe gamot-gamot, kopala, puanglima, kopala ni bala pargareta pakon bala siparhuda.

²³ On ma kopala, na mambobahon horja na hinatahon ni raja Salomo: lima ratus lima

puluh halak, na mangonjapkon halak simbuei ai mangkorjahon horjani bei.

²⁴ Jadi dob tangkog boru ni Raja Parao hun huta ni Raja Daud, masuk hu rumahni, na dob pinajongjong ni raja ai bani, mintor ipajongjong Raja Salomo ma Milo.

²⁵ Tolu hali ibagas satahun igalangkon Raja Salomo galangan situtungon pakon galangan pardameian i atas ni anjapanjap, na dob pinajongjongni ai bani Jahowa, anjaha manutung dahupa do homa ia i lobei ni Jahowa. Sonai ma pandobkonni bani rumah panumbahan ai.

Parkapalon ni Si Salomo

²⁶ Isuruh Raja Salomo do homa na paturei kapal i Ezion-Geber, dohor hu Elat, i topi laut ni Sigerger, i tanoh Edom.

²⁷ Dob ai isuruh Raja Hiram ma juakjuakni siparhorja i kapal, halak na somal i laut, mangkasomani juakjuak ni si Salomo;

²⁸ jadi laho ma sidea hu Opir, anjaha iboan sidea ma hunjai omas ompat ratus dua puluh talenta, ipadas sidea ma ai bani Raja Salomo.

Parroh ni Raja Naboru na hun Seba

10 ¹ Jadi dob ibogei raja naboru na hun Seba barita ni raja Salomo ampa goran ni Jahowa,

roh ma ia laho mangujisi marhitei sungkun-sungkun na bagas.

²Jadi das ma ia hu Jerusalem rap pakon bala buei tumang, sonai homa unta na mamboban na misbou marbagei-bagei, omas buei tumang pakon mata intan na maharga. Dob das ia hu bani si Salomo, ipatugah ma hu bani ganup na ibagas uhurni.

³Jadi ibalosi Raja Salomo ma ganup sungkun-sungkunni ai, seng dong na ponop bani raja ai, na so boi patorangonni bani.

⁴Jadi dob iidah raja naboru na hun Seba ai ganup hapentaran ni Raja Salomo pakon rumah na pinajongjongni ai,

⁵sipanganon na bani mejani, parhundul ni juakjuakni, pangidangi ni siparugas pakon pakeian ni sidea, sitahu anggurni, pakon galangan situtungon na ginalangkon bani Rumah ni Jahowa, jadi mali tonduy ma ia.

⁶Jadi nini ma hu bani raja ai, “Sintong do hape barita ai, na hubogei i tanohku pasal ham pakon hapentaranmu,

⁷tapi seng iparhatongon uhurhu lobei barita ai paima roh ahu hujon, anjaha matangku sandiri mangidah ai, hape, tonggor ma, satongahni pe lang na binaritahon ni halak ai bangku; i atasi hapentaranmu pakon artamu do hape barita na hubogei ai.

⁸ Martuah ma na sipuang, martuah ma juakjuakmu on, na jongjong tongtong i lobeimu pabogei-bogei hapentaranmu.

⁹ Pinuji ma Jahowa Naibatamu, na mardear ni uhur mangidah ham, na pabangkitkon ham bani paratas ni harajaon ni Israel! Halani holong ni uhur ni Jahowa mangidah halak Israel sadokah ni dokahni, ai do ase ipabangkit ham gabe raja, laho mandalankon uhum pakon hapintoran.”

¹⁰ Jadi ibere ma hu bani raja ai saratus dua puluh talenta omas, na misbou-misbou buei tumang pakon mata intan na maharga; seng onggga be roh na misbou-misbou na sonai bueini, songon na binere ni raja naboru na hun Seba hu bani Raja Salomo.

¹¹ Sonai homa kapal ni Raja Hiram, na mamboan omas hun Opir, iboan do homa hun Opir hayu jati buei tumang pakon mata intan.

¹² Dob ai isuruh raja ai ma patureihon hun bani hayu jati ai parugas i rumah panumbahan pakon rumah ni raja ai, sonai homa husapi pakon sordam bani sipandoding; seng onggga roh barang taridah hayu na sonai, ronsi sadari on.

¹³ Raja Salomo pe ibere do bani raja naboru na hun Seba ai ganup na hinarosuhkon ni uhumni pakon pangindoanni, sobali sibere-bere ni raja ai sandiri hu bani. Dob ai mulak ma ia hu tanoh ni sandiri rap pakon juakjuakni.

Hasangapon pakon Habayakon ni Raja Salomo

(ay. 26-29: pausih 2 Kron. 1:14-17)

¹⁴ Ia borat ni omas na roh hu bani Raja Salomo ibagas satahun onom ratus onom puluh onom talenta omas do,

¹⁵ sobali omas, na dapotsi hun bani partiga-tiga pakon sohei ni boniaga ni partiga-tiga, pakon hun bani haganup raja ni Tanoh Arab ampa hun bani wakil na i nagori ai.

¹⁶ Isuruh Raja Salomo ma na patureihon dua ratus gantar hun bani omas pitah, pala do onom ratus sekel omas ilampiskon bani sada gantar.

¹⁷ Ipaturei do homa tolu ratus gantar-gantar na etek hun bani omas pitah, tolu kati omas do ilampiskon bani sada gantar-gantar; ipannahkon Raja Salomo ma ai bani rumah harangan Libanon.

¹⁸ Ipaturei raja ai ma homa sada paratas bolon hun bani gading, anjaha ilampis do ai bani omas pitah,

¹⁹ onom do talkah ni paratas ai, anjaha gepong do ulu ni paratas ai hampit pudi; bani siamun sambilou ni hundulan ai adong do tampeian ni tangan, anjaha adong do dua usihan ni singa jongjong i lambung ni tampeian ni tangan ai.

²⁰ Adong do homa sapuluh dua usihan ni singa i atas ni na onom talkah ai i siamun sambilou. Seng onggga ope ibahen halak na sonai ai bani harajaon na ijahanin pe.

²¹ Haganup panginuman ni Raja Salomo hun bani omas do, anjaha haganup parugas ni rumah ibagas harangan Libanon hun bani omas pitah do; seng dong na hun bani pirak, ai songon na so maharga do pirak sanggah panorang ni Raja Salomo.

²² Ai adong do kapal hun Tarsis bani raja ai i laut rap pakon kapal ni Raja Hiram; sahali tolu tahun roh do kapal Tarsis mamboan omas, pirak, gading, bodat pakon uou.

²³ Ase timbulan do Raja Salomo hun bani haganup raja ni tanoh on pasal habayakon pakon hapentaran.

²⁴ Haganup pangisi ni tanoh on marsura-sura sihol mangidah bohi ni Raja Salomo anjaha mambogei hapentaranni, na binere ni Naibata hubagas uhurni.

²⁵ Ganup sidea mamboan siluahni, parugas pirak pakon omas, pakeian, senjata na marbagei-bagei, na misbou, huda pakon halode, ganup tahun.

²⁶ Anjaha ipatumpu-tumpu Raja Salomo ma gareta pakon bala siajak huda; adong do bani saribu ompat ratus gareta pakon sepuluh dua ribu bala siparhuda, na ninahkonni bani huta ianan ni gareta porang pakon i Jerusalem i lambung ni raja ai.

²⁷ Ipabuei raja ai ma pirak i Jerusalem songon batu bueini pakon hayu ares songon jambu na dong tubuh i tanoh hondot bueini.

²⁸ Ia harohan ni huda na bani raja ai hun tanoh Masir pakon hun Koa do; ialop saudagar ni raja ai do ai hunjai, igalar kontan.

²⁹ Marharga onom ratus sekel pirak do sada gareta iboli hun Masir, anjaha saratus lima puluh sekel harga ni sada huda; anjaha marhitei saudagar ni raja ai ijual ma ai hu bani raja-raja ni halak Het pakon halak Aram.

Marnaibata na Legan Raja Salomo

11 ¹ Buei do naboru hun bani bangsa na legan na iharosuhkon Raja Salomo sobali boru ni Parao ai ma boru Moab, Ammon, Edom, Sidon pakon Het.

² Ai ma hun bani bangsa sipajuh begu-begu; pasal ai domma ihatahon Jahowa hinan hu bani halak Israel, 'Seng bulih hanima marayak sidea, anjaha sidea pe seng bulih hu tongah-tongahnima, ai sai dari-darion ni sidea do uhurnima mangirikkon naibata ni sidea; hape hu bani naboru-naboru na sonai do longkot uhur ni si Salomo.'

³ Adong do bani raja ai pitu ratus parinangon, ai ma panak boru-panak boru pakon tolu ratus siparorotni; jadi taruyun ma uhurni ibahen parinangonni ai.

⁴ Jadi dob sayur matua Raja Salomo, itarik parinangonni ai ma uhurni mangirikkon naibata na

legan, gabe seng be gok dear ni uhurni bani Jahowa Naibatani, songon paruhuran ni si Daud bapani ai.

⁵ Irikkon si Salomo do marsombah hu bani naibata ni halak Sidon, na margoran Astarte pakon Milkom, gana-gana ni halak Ammon.

⁶ Ihorjahon si Salomo do sogam ni uhur ni Jahowa, seng longkot be uhurni mangirikkon Jahowa, songon si Daud, bapani ai.

⁷ Ipadear si Salomo ma ijia sada ianan panggalangan bani Kamos, gana-gana ni halak Moab, i atas dolog hampit hapoltakan ni Jerusalem, ampa bani Molok, gana-gana ni halak Ammon.

⁸ Sonai do ibahen bani ganup parinangonni na hun bani bangsa na legan, na manutung dahupa pakon na manggalang bani naibata ni sidea bei.

⁹ Jadi manringis ma Jahowa hu bani Raja Salomo, halani marbalik uhurni hun bani Jahowa, Naibata ni halak Israel, na dob patalarhon diri-Ni hu bani, pala dua hali.

¹⁰ Domma pala ilumbahon bani pasal ai, na so bulih irikkononni naibata na legan; tapi seng iramotkon tonah ni Jahowa.

¹¹ Halani ai nini Jahowa ma hu bani si Salomo, “Halani sonin pambahenanmu, seng iramotkon ho padan na Hubahen in, pakon titah-Ku, na Hutonahkon in bam, maningon rampason-Ku do harajaon in hunbam, anjaha bereon-Ku bani juakjuakmu.

¹² Tapi seng bahenon-Ku ope ai sanggah goluhmu, halani si Daud bapamondi; hun bani tangan ni anakmu pe rampason-Ku ai.

¹³ Seng haganup harajaon ai rampason-Ku; berehonon-Ku do sada marga hu bani anakmu, halani juakjuak-Ku si Daud pakon halani Jerusalem, na Hupilih in.”

Imbang-imbang ni si Salomo

(ay. 41-43: pausih 2 Kron. 9:29-31)

¹⁴ Dob ai ipapuho Jahowa ma sada halak imbang ni Raja Salomo, ai ma si Hadad, halak Edom, hun bani ginompar ni Raja Edom do ia.

¹⁵ Ai sanggah marporang Raja Daud i Edom, anjaha si Joab, pambobai ni bala ai tangkog laho mananom halak na matei marporang, ibunuh do haganup dalahi na i Edom.

¹⁶ Onom bulan do ijai marianan si Joab rap pakon ganup halak Israel paima isiapkon ganup dalahi na i Edom.

¹⁷ Tapi maporus do ijia si Hadad hu tanoh Masir, ia rap pakon deba halak Edom, juakjuak ni bapani; etek ope ijia si Hadad.

¹⁸ Bingkat ma sidea hun Midian, anjaha das ma sidea hu Paran; iarahkon sidea ma piga-piga halak hun Paran bahen hasoman ni sidea, gabe das ma sidea hu tanoh Masir hu bani Parao, raja ni Masir, na

mamberehon bani sada rumah, bohal pakon tanoh sihorjaonkonni.

¹⁹ Jumpahan idop ni uhur banggal do si Hadad hun bani Parao, pala ibere anggi ni parinangonni sandiri bani, ai ma anggi ni si Tahpenes, raja naboru ai.

²⁰ Dob ai itubuhkan anggi ni si Tahpenes ma bani sada anak, na margoran si Genubat, na pinagodang-godangni i rumah ni Parao. Marianan i rumah ni Parao ma si Genubat rap pakon anak ni Parao.

²¹ Jadi dob ibogei si Hadad i tanoh Masir, na dob modom si Daud rap pakon ompungni, na dob matei homa si Joab, pambobai ni bala ai, gabe nini si Hadad ma hu bani Parao, “Lopas ham ma ahu mulak hu tanohku.”

²² Nini Parao ma hu bani, “Aha dong na hurang bam i lambungku, ase isura uhurmu sihol mulak hu tanohmu?” Jadi nini ma, “Seng dong namin, tapi age sonai sai lopas ham ma ahu laho.”

²³ Ambahni ai ipapuhoh Jahowa ma use sahalak nari imbangni, ai ma si Reson, anak ni si Eliada, na maporus sapari hun bani tuanni, ai ma si Hadad-Eser, raja ni Soba.

²⁴ Ipatumpu-tumpu ma halak hu lambungni, anjaha ia do pambobai ni gerombolan ai, sanggah na ibunuhi Raja Daud pangisi ni Soba; jadi laho ma sidea hu Damaskus, lanjar marianan ijai, anjaha bangkit raja ma ia i Damaskus.

²⁵ Imbang ni halak Israel do ia sadokah goluh ni Raja Salomo, sambor do pambahenanni songon si Hadad; magigi do uhurni masuk hu gongoman ni Israel, gabe ia ma manrajai Aram.

²⁶ Sonai homa si Jerobeam, anak ni si Nebat, marga Efraim hun Sareda, gamot ni Raja Salomo; inangni sada naboru, na dob mabalu, na margoran si Serua, ia pe manggeori do dompak raja ai.

²⁷ Anjaha on do halani, ase manggeori ia dompak raja ai: Ipajongjong Raja Salomo do ijia milo, anjaha itambusi lombang ni huta ni si Daud, bapani ai.

²⁸ Sada halak na magogoh do si Jerobeam ai, anjaha dob iidah si Salomo ringgas ni anak garama ai marhorja, ipabangkit ma ia gabe kopala ni parrodi na hun bani ginompar ni si Josep.

²⁹ Ijia sanggah luar sahali si Jerobeam hun Jerusalem, jumpah Nabi Ahia na hun Silo ma ia i tongah dalan. Marmantel na baru do ia, anjaha sidea na dua ai do i ladang ai.

³⁰ Jadi ijolom si Ahia ma mantel na baru, na pinaheini ai, iribakkon ma ai gabe sapuluh dua ribak.

³¹ Dob ai nini ma hu bani si Jerobeam, “Buat ma bamu sapuluh ribak, ai sonon do hata ni Jahowa, Naibata ni Israel, ‘Tonggor ma, buaton-Ku ma harajaon in hun bani tangan ni si Salomo, anjaha bereon-Ku ma bam sapuluh marga.

³² Pitah samarga mando tading bani, halani juakjuak-Ku si Daud, pakon halani huta Jerusalem, na dob Hupilih ai hun tongah-tongah ni ganup marga ni halak Israel,

³³ halani na dob tinadingkonni ai Ahu, gabe marsombah ia bani Astarte, naibata ni halak Sidon, bani Kamos naibata ni halak Moab, pakon bani Milkom, naibata ni halak Ammon, anjaha seng marparlahou ia bani dalan-Ku, seng ihorjahon na pintor bani matang-Ku, anjaha seng iramotkon titah-Ku pakon uhum-Hu, songon si Daud, bapani ai.

³⁴ Tapi seng buaton-Ku ganup harajaon ai hun bani; paturuton-Ku do ia raja sadokah goluhni, halani si Daud juakjuak-Ku, na dob Hupilih ai, na manramotkon parentah-Ku pakon titah-Ku na dobni in;

³⁵ tapi buaton-Ku do harajaon ai hun tangan ni anakni, anjaha berehonon-Ku ma bam sepuluh marga.

³⁶ Tapi bereon-Ku ma hu bani anakni sada marga, ase tongtong adong sada palita bani si Daud juakjuak-Kai, i lobei ni bohing-Ku i Jerusalem, huta na dob Hupilih Bangku, bahen hajongjongan ni goran-Ku.

³⁷ Antong Ahu do na pabangkitkon ho, ase rajaamu ganup romban hu bani harosuh ni

uhurmu, anjaha ho ma gabe raja manggomgom halak Israel.

³⁸ Anjaha anggo itangihon ho ganup, na Hutitahkon in bam, anjaha marparlahou ho bani dalan-Ku, anjaha ihorjahon ho na pintor bani matang-Ku marhitei na manramotkon parentah-Ku pakon titah-Ku, songon na binahen ni juakjuak-Ku si Daud, jadi hasoman-Ku ma ho anjaha pajongjongon-Ku ma bam sada rumah na jonam tongtong, songon na dob Hubahen hu bani si Daud, anjaha ondoskonon-Ku ma bam Israel.

³⁹ Jadi paetekon-Ku ma ginompar ni si Daud marhalanohon ni ai, tapi seng lalab.”

⁴⁰ Halani ai ipindahi Raja Salomo ma sihol mambunuh si Jerobeam; jadi maporus ma ia hu Masir, hu bani si Sisak, raja ni Masir, anjaha i Masir ma ia paima matei Raja Salomo.

⁴¹ Barita ni si Salomo na legan ai, pakon ganup na binahenni ampa hapentaranni, ai lang tarsurat do ai bani buku Barita ni si Salomo?

⁴² Ia dokah ni Raja Salomo gabe raja i Jerusalem manggomgom ganup halak Israel ompat puluh tahun do.

⁴³ Dob ai modom ma Raja Salomo rap pakon ompungni, anjaha itanom ma ia i huta ni si Daud, bapani ai; jadi si Rehabeam, anakni ai ma gabe raja gantihni.

Bolah Dua Harajaon ai

(ay. 12-19: pausih 2 Kron. 10; ay. 21-24 pausih: 2 Kron. 11:1-4)

12¹ Laho ma si Rehabeam hu Sikem, ai domma roh ganup halak Israel hu Sikem laho manrajahonsi.

² Dob ibogei si Jerobeam, anak ni si Nebat, barita ai (*ai i tanoh Masir ope ia, ai hujai do ia maporus marhalanohon ni si Salomo*), jadi mulak ma ia hun tanoh Masir.

³ Ai domma isuruh sidea hinan na mangalopsi, jadi roh ma si Jerobeam pakon ganup tumpuan ni halak Israel, nini sidea ma hu bani si Rehabeam,

⁴ “Borat do pasangannami ibahen bapanta ondi. On pe pahampung ham ma rodi, na pinaporsankon ni bapanta ondi pakon pasangan na borat, na tinampeihonni bennami, ase ibalosi hanami ham.”

⁵ Nini ma hu bani sidea, “Mulak bei ma lobei nasiam, dob ai tolu ari nari roh ma nasiam hu bangku.” Jadi laho ma bangsa ai.

⁶ Jadi ipanriahkon Raja Rehabeam ma partua-partua, hasoman sapanriah ni Raja Salomo, bapani ondi, sanggah manggoluh ia, nini ma, “Naha do balosku nini uhur nasiam bani bangsa on?”

⁷ Nini sidea ma mambalosisi, “Anggo ra ham martoruh ni uhur sadari on hu bani bangsa on, anjaha itangihon ham sidea, anjaha marsahap na

lamlam laho mambalosi sidea, jadi ra ma sidea mambalosi ham tongtong.”

⁸ Tapi iambukkon raja ai do pingkiran, na hinatahon ni partua-partua ai bani, jadi manriah ma ia pakon halak siposonan, hasomanni magodang, na marhorja i lobeini.

⁹ Nini ma hu bani sidea, “Sonaha do balos iahap nasiam hu bani bangsa on, na mangkatahon hu bangku sonon, ‘Sai pahampung ham ma pasangan, na pinaporsankon ni bapanta ondi bennami?’”

¹⁰ Jadi nini halak na maposo, na rapkonsi magodang ai ma hu bani, “Maningon sonon do hatahononmu hu bani bangsa on, na mangkatahon bamu, ‘Borat do pasangannami ibahen bapanta ondi, tapi anggo ham pahampung ham ma ai,’ sonon ma hatahon ham hu bani sidea, ‘Banggalan do didihilhu hun bani hae-hae ni bapa.’”

¹¹ On pe, borat pe pasangan, na pinaporsankon ni bapa ondi bani nasiam, tapi anggo ahu paboratonku ope pasangan nasiam ai; anggo bapa ondi lonsing-lonsing do ibahen mangajari nasiam, tapi anggo ahu gansip golang do bahenonku mangajari nasiam.”

¹² Jadi patoluarihon roh ma si Jerobeam pakon ganup bangsa ai marayak si Rehabeam, songon na dob pinadankon ni raja ai, “Roh ma nasiam hu bangku use patoluarihon.”

¹³ Koras do balos ni raja ai bani bangsa ai, ai iambukkon do pingkiran, na binere ni partua-partua ai bani.

¹⁴ Jadi nini raja ai ma hu bani sidea romban hu bani pangajari ni halak na maposo ai, “Borat pe pasangan, na pinaporsankon ni bapa ondi bani nasiam, ia bapa, lonsing-lonsing do ibahen mangajari nasiam, tapi boratan ope pasangan, na sihol paporsanonku bani nasiam; tapi anggo ahu gansip golang do bahenonku mangajari nasiam.”

¹⁵ Ase seng ibalosi raja ai pangindoan ni bangsa ai, ai Jahowa do na mangaturhon ai, ase saud hata-Ni, na dob nilumbahon ni Jahowa hinan marhitei si Ahia na hun Silo hu bani si Jerobeam, anak ni si Nebat ai.

¹⁶ Jadi dob iidah ganup halak Israel, na so itangihon raja ai pangindoan ni sidea ai, nini sidea mambalosi raja ai, “Aha ma parbagiananta bani si Daud? Seng dong siteanonta hun bani anak ni si Isai. Mulak bei ma hu rumahni, o Israel! Rumahmu ma pasari-sari, Daud!” Jadi mulak bei ma halak Israel hu rumahni bei.

¹⁷ Tapi si Rehabeam do na manrajai halak Israel, na marianan i huta-huta ni Juda.

¹⁸ Dob ai isuruh Raja Rehabeam ma si Adoram, kopala ni sipanrodi, hape ipargijig ganup halak Israel ma ia bani batu pala matei. Jadi tarolos ma Raja

Rehabeam manaik hu garetani laho maporus hu Jerusalem.

¹⁹ Jadi marbalik ma halak Israel hun bani ginompar ni si Daud ronsi sadari on.

²⁰ Jadi dob tarbogei hu bani ganup halak Israel, na dob mulak si Jerobeam, isuruh sidea ma suruhanni mangalopsi hu tumpuan ai, ipabangkit sidea ma ia gabe raja manggomgom ganup Israel. Seng dong na mangirikkon ginompar ni si Daud, sobali marga Juda tumang.

²¹ Dob das si Rehabeam i Jerusalem, ipatumpu ma ganup ginompar ni Juda pakon marga Benjamin, saratus ualuh puluh ribu halak parmunsuh na pinilih, laho marmunsuh dompak ginompar ni Israel, sihol pasuangkon harajaon ai namin hu bani si Rehabeam, anak ni si Salomo.

²² Tapi roh ma hata ni Naibata hu bani si Semaya, halak ni Naibata, sonon,

²³ “Hatahon ma hu bani si Rehabeam, anak ni si Salomo, raja hun Juda, hu bani ganup ginompar ni Juda ampa Benjamin ampa hu bani teba-teba ni bangsa ai.

²⁴ Sonon do hata ni Jahowa, ‘Seng bulih nasiam tangkog anjaha seng bulih nasiam marporang dompak sanina nasiam, ai ma halak Israel. Mulak ma nasiam ganup hu rumahni bei, ai na marharorohan hun Bangku do na masa on.’” Jadi

itangihon sidea ma hata ni Jahowa, laho ma sidea mulak romban hu bani hata ni Jahowa.

Ipauli si Jerobeam Anak ni Lombu Bahen Sisombahon

²⁵ Dob ai ipatoguh si Jerobeam ma huta Sikem i Dolog Efraim, lanjar marianan ijai; bingkak ma ia hunjai anjaha ipatoguh ma huta Penuel.

²⁶ Tapi nini si Jerobeam ma ibagas uhurni, “Tontu mulak do holi use harajaon ai hu bani ginompar ni si Daud.

²⁷ Anggo sai tangkog do bangsa on mamboan galangan hu Rumah ni Jahowa i Jerusalem, tontu mulak do holi uhur ni sidea bani tuan ni sidea hinan, ai ma hu bani si Rehabeam, raja hun Juda, anjaha bunuhon ni sidea ma ahu, ase boi mulak sidea hu bani si Rehabeam, raja hun Juda.”

²⁸ Dob ai manriah ma raja ai anjaha ibahen sidea ma dua lombu omas, anjaha ihatahon ma hu bani halak simbuei ai, “Sahei ma in, nasiam na tangkog in hu Jerusalem. Tonggor ma Naibata nasiam on, o Israel, na mangarahkon nasiam tangkog hun tanoh Masir.”

²⁹ Ipajongjong ma ai sada i Betel, anjaha na sada nari inahkon ma i Dan.

³⁰ Jadi gabe parbingkasan ni dousa ma ai, ai laho do bangsa ai hu bani gana-gana na i Betel sonai homa das hu bani na sada nari na i Dan.

³¹ Ipauli do homa panumbahan i buntu-buntu, anjaha ipabangkit do homa malim hun tongah-tongah ni ganup bangsa ai, na so hun bani halak Levi.

³² Anjaha iadongkon si Jerobeam do homa pesta bani bulan ualuh ari sapuluh lima mangusihi pesta na adong i Juda, anjaha igalangkon do galangan bani anjapanjap ai; sonai do homa ibahen i Betel, manggalang do ia bani lombu na pinadearni ai. Anjaha ipahorjahon ma i Betel malim-malim, na pinabangkitni ai, bani rumah panumbahan na i buntu-buntu.

³³ Jadi manggalang ma ia i atas ni anjapanjap, na binahenni ai i Betel, bani ari sapuluh lima bulan ualuh, bani bulan, na dob pinilihni ai romban hu bani rosuh ni uhurni; anjaha ibahen do sada pesta bani halak Israel, lanjar ia do manggalang bani anjapanjap ai ampa manutung dahupa.

Ilumbahon Sada Nabi Uhum bani Anjapanjap na i Betel

Panlanggaronni pakon Parmateini

13 ¹ Tonggor ma, roh ma sada halak ni Naibata hun Juda hu Betel ihatahon Jahowa, tudu sanggah jongjong si Jerobeam i lambung ni anjapanjap ai manutung dahupa.

² Dob ai dilo-dilo ma nabi ai dompak anjapanjap ai padas hata ni Jahowa, nini ma, “O anjapanjap, anjapanjap, sonon do hata ni Jahowa, ‘Tonggor ma tubuh do magira sada anak bani ginompar ni si Daud, na margoran si Josia; galangkononni do i atasmu malim-malim ni rumah panumbahan na i atas buntu-buntu, na manutung dahupa i atasmu, anjaha tutungonni do holi-holi ni jolma i atasmu.”

³ Anjaha ibahen do sada tanda halongangan bani na sadari ai, nini do, “On ma partinandaanni paboa Jahowa do na mangkatahon hata on, ‘Tonggor ma, mabolah ma anjapanjap on, anjaha sabar ma abuan na i atas ni.”

⁴ Dob ibogei raja ai hata ni halak ni Naibata ai, na dilo-dilo dompak anjapanjap na i Betel ai, ituldukkon si Jerobeam ma tanganni hun datas anjapanjap ai, lanjar nini ma, “Tangkap nasiam ia!” Hape mintor jorgong ma tanganni, na tinuldukkonni ai dompaksi, seng tartariksi be.

⁵ Mabolah ma homa anjapanjap ai lanjar sabar ma abuan ai hun anjapanjap ai, romban hu bani partinandaan na dob hinatahon ni halak ni Naibata ai marhitei hata ni Jahowa.

⁶ Dob ai nini raja ai ma mambalosi halak ni Naibata ai, “Martonggo ma ham marsombah hu bani Jahowa, Naibatamu, mangapiti ahu, ase suang use tangankon.” Jadi martonggo ma halak ni Naibata ai

bani Jahowa, gabe suang ma tanganni ai songon na saindokah.

⁷ Nini raja ai ma hu bani halak ni Naibata ai, “Laho ma hita hu rumah pahosahkon tongkin; sihol bereonku do bamu homa sibere-bere.”

⁸ Tapi nini halak ni Naibata ai ma hu bani raja ai, “Porini pe ibere ham bangku satongah ni rumahmu, seng ra ahu laho rap pakon ham, anjaha seng ra ahu mangan ruti barang minum bah bani ianan on;

⁹ ai sonon do iparentahkon Jahowa hu bangku, ‘Seng bulih panganonmu ruti barang inumonmu bah, barang mulak ho hu bani dalan, na dob nidalananmu.’”

¹⁰ Jadi mulak ma ia hun bani dalan na legan, seng be hun bani dalanni hinan marayak huta Betel.

¹¹ Tapi adong do sada nabi na matua marianan i Betel. Jadi roh ma anakni patugahkon bani pasal ganup na binahen ni halak ni Naibata ai bani na sadari ni ai i Betel, sonai homa hata, na hinatahonni ai bani raja ai, ipatugah sidea do hu bani bapani ai.

¹² Nini bapa ni sidea ai ma hu bani sidea, “Hun dalan ja ia mardalan?” Jadi ipatuduhkon anakni ai ma bani dalan na nidalanan ni halak ni Naibata, na roh hun Juda ai.

¹³ Jadi nini ma hu bani anakni ai, “Palanai nasiam ma halode in bangku!” Dobkonsi ipalanai sidea halode ai bani, iajak ma ai.

¹⁴ lirikkon ma halak ni Naibata ai, gabe jumpahsi ma ia mangunsandei i bona ni jabi-jabi, anjaha nini ma hu bani, “Atene, ham do halak ni Naibata na roh hun Juda ai? Nini, “Ai ma da.”

¹⁵ Dob ai nini ma hu bani, “Laho ma hita hu rumah mangan ruti.”

¹⁶ Tapi nini ma, “Seng tarbahen ahu mulak pakon ham barang masuk hu rumahmu rap pakon ham; sonai homa seng bulih ahu mangan ruti barang minum bah rap pakon ham bani ianan on;

¹⁷ ai domma roh hata ni Jahowa mangkatahon hu bangku, ‘Seng bulih panganonmu ruti ijai barang inumonmu bah, barang mulak ho hun bani dalanmu hinan.’”

¹⁸ Jadi nini ma hu bani, “Ahu pe nabi do songon ham, anjaha domma roh hata ni sada malekat bangku marhitei hata ni Jahowa mangkatahon, ‘Arahkon ma ia mulak hu rumahmu, ase mangan ruti ia pakon minum bah.’” Tapi marladung do ia ai bani.

¹⁹ Jadi mulak ma ia rap pakonsi, anjaha mangan ruti ma ia i rumahni pakon minum bah.

²⁰ Sanggah hundul sidea bani meja, roh ma hata ni Jahowa bani nabi, na mangarahkonsi mulak;

²¹ jadi idilohon ma hu bani halak ni Naibata, na roh hun Juda ai, nini ma, “Sonon do hata ni Jahowa, halani na so tinangihonmai hata ni Jahowa, anjaha

seng iramotkon ho tonah, na tinonahkon ni Jahowa Naibatamu,

²² tapi mulak do ho anjaha mangan ruti pakon minum bah bani ianan, na dob hinatahonni bam, 'Seng bulih ho mangan ruti barang minum bah ijai', halani ai, seng bulih das bangkeimu hu tanoman ni ompungmu."

²³ Jadi dob mangan ruti pakon minum ia, ipalanai ma halode bani nabi, na niarahkonni ai mulak.

²⁴ Jadi bingkak ma ia, gabe pajumpah ma ia pakon singa i tongah dalan, gabe ibunuh ma ia. Tibal do bangkeini ai i dalan ai, anjaha halodeni ai jongjong i lambungni; singa ai pe jongjong do i lambung ni bangkei ai.

²⁵ Tonggor ma, roh ma halak mamontas, gabe iidah sidea ma bangkei ai tibal i tongah dalan, anjaha singa ai jongjong i lambung ni bangkei ai. Roh ma sidea patugahkon na masa ai hu huta, na niianan ni nabi na matua ai.

²⁶ Dob ibogei nabi, na mangarahkonsi ai mulak hun dalan pasal na masa ai, nini ma, "Halak ni Naibata do ia, na seng manangihon hata ni Jahowa, halani ai do ase iondoskon Jahowa ia hu bani singa, na manoroh anjaha na mamunuhsi, romban hu bani hata ni Jahowa, na dob nilumbahon-Ni hinan hu bani."

²⁷ Dob ai nini ma hu bani anakni ai, "Palanai hanima ma bangku halode in!" Jadi ipalanai sidea ma ai.

²⁸ Jadi laho ma ia anjaha jumpahsi ma bangkeini ai tibal i dalan, anjaha halode ai pakon singa ai jongjong i lambung ni bangkei ai. Seng ipangan singa ai bangkei ai anjaha seng isoroh halode ai.

²⁹ Dob ai iangkat nabi ai ma bangkei ni halak ni Naibata ai, anjaha itampeihon ma ai hu halode ai, lanjar iboan ma ai mulak hu huta ai, laho manangisi pakon mananomsu.

³⁰ Inahkon ma bangkei ai hu tanomanni sandiri; itangisi ma ia, nini ma, "Ai, saninangku!"

³¹ Jadi dob itanom sidea ia, nini nabi ai ma hu bani anakni ai, "Anggo matei ahu, tanom hanima ma ahu bani tanoman ni halak ni Naibata ai; tibalhon ma holi-holingu i lambung ni holi-holini.

³² Ai maningon saud do hata na nidilohonni marhitei hata ni Jahowa dompak anjapanjap na i Betel, dompak ganup rumah panumbahan na i buntu-buntu, na ibagas huta-huta ni Samaria."

³³ Dob salpu na masa ai, lanjar seng mulak do si Jerobeam hun bani dalanni na masambor ai, tapi iulaki do use pabangkitkon halak hun tongah-tongah ni ganup bangsa ai; barang ise na ra, ipabangkit ma ai gabe malim bani rumah panumbahan na i buntu-buntu.

³⁴ Gabe parbingkasan ni dousa ma ai bani ginompar ni si Jerobeam, ase siap sidea anjaha malobur hun tanoh on.

Ilumbahon Nabi Ahia Uhum bani Si Jerobeam

14 ¹ Bani panorang ai boritan ma si Abia, anak ni si Jerobeam.

² Dob ai nini si Jerobeam ma hu bani parinangonni, “Bingkat ma ho, pasamak hioumu, ase ulang ibotoh halak, parinangon ni si Jerobeam do ho, anjaha laho ma ho hu Silo; tonggor ma, ijai do Nabi Ahia, na mangkatahon hinan bangku, paboa ahu do gabe raja manggomgom bangsa on.

³ Lanjar boan ma sepuluh ruti, kuei pakon sada gusi manisan ni huramah laho marayaksi, ase ia patugahkon bam pasal hosah ni dakdanak on.”

⁴ Jadi ibahen parinangon ni si Jerobeam ma sonai; bingkat ma ia laho hu Silo, anjaha masuk hu rumah ni si Ahia. Tapi anggo si Ahia ai seng be marpangidah, ai domma rambon matani halani tuani.

⁵ Tapi nini Jahowa ma hu bani si Ahia, “Tonggor ma, na roh do parinangon ni si Jerobeam laho manungkun hunbam pasal anakni, ai boritan do ia.” Sonon ma hatahon hu bani. Sanggah na masuk ai ia, hiouni domma ipasamak,

⁶ nini si Ahia ma sanggah na binogeini ai panlangkahni ai roh hun labah, “Masuk ma ho, alo parinangon ni si Jerobeam! Mase ipasamak ho rupamu? Domma isuruh ahu mangkatahon hata na koras bam.

⁷ Laho ma ho, patugah ma hu bani si Jerobeam, sonon do hata ni Jahowa, Naibata ni Israel, 'Halani na dob Hupatimbul do ho hun tongah-tongah ni bangsa in, anjaha Hupabangkit ho gabe pambobai ni bangsang-Ku halak Israel,

⁸ pala Hubuat harajaon in hun bani ginompar ni si Daud, anjaha Hubere in hubam; hape seng songon paruhuran ni juakjuak-Ku si Daud paruhuranmu, na manramotkon sagala titah-Ku anjaha na mangirikkon Ahu hun bani gok ni uhurni, pitah na pintor ibagas uhur-Hu do ihorjahon,

⁹ tapi jahat do pambahenanmu, lobih hun bani sagala raja na parlobei hunbam; ibahen ho do bam naibata na legan pakon gana-gana na tinuang, laho mamuhoi ringis-Hu, anjaha iambukkon ho do Ahu hu pudi ni gurungmu.

¹⁰ Halani ai, tonggor ma, parohon-Ku ma hamagouan hu bani ginompar ni si Jerobeam, anjaha siapkonon-Ku do hun bani si Jerobeam sagala dalahi, na etek pakon na banggal i Israel, anjaha masap tumang do bahenon-Ku ginompar ni si Jerobeam, songon halak na mamuruni tompoh-tompoh, paima masap tumang ia.

¹¹ Barang ise na matei hun bani si Jerobeam ibagas huta, maningon bois panganon ni baliang; anjaha barang ise na matei i ladang, maningon bois paguton ni manuk-manuk na i awang-awang; ai Jahowa do mangkatahon ai.

¹² Halani ai bingkat ma ho laho hu rumahmu; daskonsi naheimu hubagas huta ai, matei ma dakdanak ai.

¹³ Tangisan ni ganup halak Israel do ia, anjaha tanomonni; pitah ia do hun bani si Jerobeam na dear tanomon, halani adong ope jumpah bani, na hinarosuhkon ni Jahowa, Naibata ni Israel, i rumah ni si Jerobeam.

¹⁴ Tapi pajongjongon ni Jahowa ma bani sada raja na manggomgom Israel, na mansiapkon ginompar ni si Jerobeam.

¹⁵ Anjaha bogbogan ni Jahwoa ma Israel, gabe guling-guling songon arung-arung na meol-eol ibagas bah, anjaha painsahon-Ni Israel hun tanoh na madear on, na dob binere-Ni hu bani ompung ni sidea hu dipar ni Bah Euftrat, halani Asera na binahen ni sidea, gabe ipuhoi ringis ni Jahowa.

¹⁶ Anjaha ondskonon-Ni ma Israel halani dousa na binahen ni si Jerobeam, pakon halani na tinoguni ai halak Israel mambahen dousa.”

¹⁷ Dob ai bingkat ma parinangon ni si Jerobeam laho hu Tirsa. Daskonsi ia hu molmolan ni rumahni, matei ma dakdanak ai.

¹⁸ Itanom sidea ma ia, anjaha ganup halak Israel manangisi, romban hu bani hata ni Jahowa, na dob pinatugah hinan marhitei Nabi Ahia, juakjuak-Ni ai.

¹⁹ Barita na legan pasal si Jerobeam, naha parporangonni anjaha naha panrajaionni, tonggor

ma, tarsurat do ai ibagas buku barita ni raja-raja ni Israel.

²⁰ Ia dokah ni si Jerobeam manrajai dua puluh tahun do. Dob ai modom ma ia pakon ompungni, anjaha si Nadab anakni ai ma raja manggantihsi.

Panrajaion ni si Rehabeam

(ay. 21-31: pausih 2 Kron. 12)

²¹ Tapi si Rehabeam, anak ni Raja Salomo do marrajai i Juda. Ompat puluh sada tahun do umur ni si Rehabeam sanggah na bangkit raja ia, anjaha sapuluh pitu tahun do dokahni manrajai i Jerusalem, huta na pinilih ni Jahowa hun bani ganup marga ni Israel bahen ianan ni goranni. Goran ni inangni si Naama do, boru Ammon.

²² Dob ai ihorjahon halak Juda ma sogam ni uhur ni Jahowa, ipuhoi ma simburu-Ni marhitei dousa, na binahen ni sidea ai, lobih hun bani ganup na binahen ni ompung ni sidea.

²³ Ai dihut do sidea padearhon bani sidea rumah panumbahan i buntu-buntu gana-gana pakon Asera i atas ni sagala buntu-buntu na gijang, pakon i toruh ni sagala hayu na tabun;

²⁴ anjaha adong do homa na marjolmahon dalahi i tanoh ai; ibahen sidea do romban hu bani hajahaton, na hinorjahon ni bangsa sipajuh begu-begu, na dob pinabali ni Jahowa i lobei ni halak Israel.

²⁵ Bani tahun palimahon dob raja si Rehabeam, tangkog ma si Sisak, raja hun Masir mandorab Jerusalem.

²⁶ Iayob do ugas-ugas hun rumah ni Jahowa pakon hun rumah ni raja ai, sabonar iayob do haganup; iayob do homa ganup gantar omas, na pinauli ni Raja Salomo.

²⁷ Dob ai ipauli Raja Rehabeam ma gantih ni ai gantar hun bani tombaga, anjaha iondoskon ma ai hu tangan ni pambobai ni bala, na marjaga i lambung ni labah ni rumah ni raja ai.

²⁸ Barang piga hali pe raja ai masuk hu Rumah ni Jahowa, sai iusung parjaga ai do ai, dob ai iboan ma mulak hu kamar jaga.

²⁹ Barita na legan ai pasal si Rehabeam pakon ganup na binahenni, ai lang tarsurat do ai ibagas buku Barita ni Raja-raja Juda?

³⁰ Anjaha sai adong do tong porang i tongah-tongah ni si Rehabeam pakon si Jerobeam sadokah manggoluh sidea.

³¹ Dob ai modom ma si Rehabeam rap pakon ompungni, anjaha itanom ma ia ibagas huta ni si Daud. Ia goran ni inang ni Naama do, boru Ammon. Jadi si Abia, anakni ai ma bangkit raja manggantihsi.

Panrajaion ni si Abia

(ay. 1-8: pausih 2 Kron. 13)

15 ¹ Pasapuluh-ualuhtahunkon dob raja si Jerobeam, anak ni si Nebat, bangkit raja ma si Abia i Juda.

² Tolu tahun do ia manrajai i Jerusalem; si Maaka do goran ni inangni, boru ni si Absalom.

³ Anjaha ihorjahon do ganup dousa, sagala na hinorjahon ni bapani na i lobei ni; seng gok daulat ni uhurni bani Jahowa Naibatani, songon uhur ni ompung ni si Daud.

⁴ Tapi halani si Daud do, ase ibere Jahowa, Naibatani ai, bani sada palita i Jerusalem, ai ma marhitei na pabangkitkon anakni manggantihsi, anjaha totap Jerusalem ibahen;

⁵ halani ihorjahon si Daud do na pintor ibagas uhur ni Jahowa, anjaha seng manlembang ia hun bani ganup na tinonahkon-Ni bani sadokah manggoluh ia, sobali pasal si Uria, halak Heti ai.

⁶ Tapi sai tong do adong porang i tengah-tengah ni si Rehabeam pakon si Jerobeam sadokah manggoluh bei sidea.

⁷ Barita na legan ai pasal si Abia pakon ganup na binahenni ai, ai lang tarsurat do ai ibagas buku Barita ni Raja-raja ni Juda? Anjaha sai tong do adong porang i tengah-tengah ni si Abia pakon si Jerobeam.

⁸ Dob ai modom ma si Abia rap pakon ompungni, anjaha itanom ma ia i huta ni si Daud. Jadi si Asa, anakni ai ma manggantihsi.

**Hadaulaton ni si Asa.
Parpadananni pakon si Benhadad**

*(ay. 11-15: pausih 2 Kron. 14:1-4; 15:16-18; ay.
16-24: pausih 2 Kron. 16:1-6; 11:14)*

⁹ Paduapuluhtahunkon dob raja i Israel si Jerobeam, bangkit raja ma si Asa manggomgom Juda.

¹⁰ Ompat puluh sada tahun do dokahni manrajai i Jerusalem. Goran ni ompung ni si Maaka do, boru ni si Absalom.

¹¹ Ihorjahon si Asa do na pintor bani uhur ni Jahowa, songon si Daud ompungni ai.

¹² Ai ipalaho do sagala dalahi, na marjolmahon dalahi hun tanoh ai, anjaha ipadaoh do sagala gana-gana, na pinadear ni ompungni.

¹³ Ipaturun do homa ompung ni si Maaka hun bani pangkat harajaon, halani ipadear sada gana-gana bani sisombahon Ashera; irumbakkon si Asa ma gana-gana ai anjaha itutung ma ai i topi ni Bah Kidron.

¹⁴ Tapi seng ipadaoh anggo rumah panumbahan na i buntu-buntu. Sai tong do anggo uhur ni si Asa marsijoloman hu bani Jahowa sadokah manggoluh ia.

¹⁵ Sonai homa iboan do pirak, omas pakon parugas, na dob pinapansing ni bapani pakon na pinapansingni sandiri hu Rumah ni Jahowa.

¹⁶ Sai tong do adong porang i tengah-tengah ni si Asa pakon si Baesa raja hun Israel, sadokah manggoluh bei sidea.

¹⁷ Ai tangkog do si Baesa, raja ni Israel, mandorab Juda, anjaha ibatar-batari do Rama, ase ulang tarbahren atap ise luar barang masuk marayak si Asa, raja ni Juda.

¹⁸ Dob ai ibuat si Asa ma ganup pirak pakon omas na tading ai ope hun bani arta na i Rumah ni Jahowa, sonai homa arta na i rumah ni raja ai, jadi iondoskon ma ai hu bani juakjuakni; dob ai isuruh si Asa ma sidea marayak si Benhadad, anak ni si Taberimon, tinubuhkon ni si Hesion, raja hun Aram, na marianan i Damaskus, nini ma,

¹⁹ “Marpadan ma hita, songon bapanta na marpadan samah sidea, Tonggor ma, hutongos do bamu siluah pirak pakon omas; on pe rotapkon ham ma padanmu pakon si Baesa, raja hun Israel, ase surut ia hun bangku.”

²⁰ Dob ai itangihon si Benhadad ma hata ni Raja Asa, gabe isuruh ma pambobai ni balani mandorab huta-huta ni Israel, italuhon ma huta Lyon, Dan, Abel-Bet-Maahat, ganup tanoh Kinerot pakon ganup tanoh Naftali.

²¹ Dob ibogei si Baesa na masa ai, maronti ma ia mambatar-batari Rama, gabe mulak ma ia hu Tirsa.

²² Dob ai iharah Raja Asa ma ganup Juda, sahalak pe lang na halaosan, jadi iusung sidea ma batu ni Ramah pakon parhayuni, na dob pinakei ni si Baesa ai, anjaha ipadear ma huta Geba-Benyamin pakon Mispa marhitei ai.

²³ Barita na legan ai pasal si Asa, kuasani haganup pakon ganup na binahenni ampa huta na pinajongjongni, ai lang tarsurat do ai ibagas buku Barita ni Raja-raja Juda? Tapi dob matua ia maborit do naheini.

²⁴ Dob ai modom ma si Asa rap pakon ompungni, anjaha itanom ma ia rap pakon ompungni i huta ni si Daud, ompungni ai. Jadi si Josafat, anakni ai ma manrajai gantihni.

Panrajaion ni si Nadab pakon si Baesa

²⁵ Tapi si Nadab, anak ni si Jerobeam do bangkit raja i Israel, paduatahunkon dob raja si Asa i Juda, anjaha dua tahun do ia manrajai i Israel.

²⁶ Anjaha ihorjahon do sogam ni uhur ni Jahowa, anjaha songon parlahou ni bapani do parlahouni pakon pardousaonni, na mambahen Israel mardousa.

²⁷ Dob ai martahi-tahi ma dompaksi si Baesa, anak ni si Ahia, hun bani ginompar ni si Isasar, anjaha ibunuh si Baesa ma ia i Gibeton, ai ma huta

na masuk hu bani halak Palistim; tudu sanggah mangkubu huta Gibeton ai si Nadab pakon ganup halak Israel.

²⁸ Ibunuh si Baesa do ia, patolutahunkon dob si Asa raja i Juda, anjaha si Baesa ma bangkit raja manggantihsi.

²⁹ Dob bangkit raja ai, isiapkon ma ganup ginompar ni si Jerobeam; seng dong tading age sahalak na marhosah hun bani si Jerobeam ipaturut, sabonar isiapkon do ganup, romban hu bani hata ni Jahowa, na dob nilumbahon-Ni hinan marhitei juakjuak-Ni si Ahia, na hun Silo,

³⁰ halani dousa ni si Jerobeam na hinorjahonni ai, pakon halani na pinadari-darini ai halak Israel mambahen dousa, pakon halani na pinuhoanni ai ringis ni Jahowa, Naibata ni Israel.

³¹ Barita na legan ai pasal si Nadab pakon ganup binahenni ai, ai lang tarsurat do ai ibagas buku Barita ni Raja-raja ni Israel?

³² Sai tong do adong porang i tengah-tengah ni si Asa pakon si Baesa, raja hun Israel, sadokah manggoluh bei sidea.

³³ Patolutahunkon dob raja si Asa i Juda, bangkit raja ma si Baesa, anak ni si Ahia, manggomgom ganup Israel i Tirsa dua puluh ompat tahun dokahni.

³⁴ Ihorjahon do sogam ni uhur ni Jahowa, anjaha songon parlahou ni si Jerobeam do parlahouni

pakon pardousaonni, na mambahen Israel mardousa.

Nabi Jehu Manlumbahon Uhum bani Si Baesa

16 ¹ Jadi roh ma hata ni Jahowa hu bani si Jehu, anak ni si Hanani, palumbahon si Baesa, nini ma,

² “Halani domma Hupatimbul ho hun bani orbuk, anjaha Hupabangkit ho gabe pambobai ni bangsang-Ku halak Israel, hape iirikkon ho do dalan ni si Jerobeam, anjaha iojur-ojur ho do bangsang-Ku halak Israel mardousa, laho papuho ringis-Ku marhitei hun bani dousa ni sidea,

³ tonggor ma, siap tumang do bahenon-Ku si Baesa pakon ginomparni, usih hu bani ginompar ni si Jerobeam, anak ni si Nebat.

⁴ Barang ise na matei hun bani si Baesa ibagas huta, maningon bois do panganon ni baliang, anjaha barang ise na matei i ladang, maningon bois do paguton ni manuk-manuk na i awang-awang.”

⁵ Barita na legan ai ope pasal si Baesa, na binahenni pakon kuasani, ai lang tarsurat do ai ibagas buku Barita ni Raja-raja Israel?

⁶ Dob ai modom ma si Baesa rap pakon ompungni, anjaha itanom ma ia i Tirsa, gabe si Ela, anakni ai ma bangkit raja manggantihsi.

⁷ Ambah ni ai roh do hata ni Jahowa marhitei Nabi Jehu, anak ni si Hanani dompak si Baesa pakon

ginomparni ai, ai ma halani haganup hajahaton, na hinorjahonni dompak Jahowa, ibagas na usih ai ia songon ginompar ni si Jerobeam, anjaha halani na siniapkonni ai ginompar ni si Jerobeam.

Si Ela Ibunuh si Simri

⁸Paduapuluh-onomtahunkon dob raja si Asa i Juda, bangkit raja ma si Ela, anak ni si Baesa manggomgom halak Israel i Tirsa, dua tahun dokahni.

⁹Tapi martahi-tahi do juakjuak ni si Simri, kopala ni na satongah gareta porangni mangimbangsi. Sanggah na marmabuk-mabuk ia minum anggur i rumah ni si Arsa, siramotkon rumah ni raja ai i Tirsa, ¹⁰masuk ma si Simri anjaha ibunuh ma ia matei paduapuluh-pitutahunkon dob raja si Asa i Juda, anjaha ia ma bangkit raja manggantihsi.

¹¹Dob bangkit raja ia, dobkonsi hundul ia bani paratasni ai, ibunuh ma ganup ginompar ni si Baesa; seng dong tading ibahen age sada dalahi hun bani hade-hadeni barang huan-huanni.

¹²Sabonar siap do ibahen si Simri ganup ginompar ni si Baesa, romban hu bani hata ni Jahowa, na nilumbahon-Ni hinan hu bani si Baesa marhitei Nabi Jehu,

¹³halani haganup dousa ni si Baesa pakon halani dousa ni si Ela, anakni ai, na hinorjahon ni sidea ai, anjaha na niojur-ojur ni sidea halak Israel

mardousa, gabe ipuhoi ringis ni Jahowa, Naibata ni Israel, marhitei gana-gana ni sidea ai.

¹⁴ Barita na legan ai pasal si Ela pakon ganup na binahenni ai, ai lang tarsurat do ai bani buku Barita ni Raja-raja Israel?

Panrajaion ni si Simri

¹⁵ Paduapuluh-pitutahunkon dob raja si Asa i Juda, bangkit raja ma si Simri pitu ari dokahni i Tirsa; tapi anggo bala ai sanggah mangkubu huta Gibeton do, ai ma na masuk hu bani halak Palistim.

¹⁶ Jadi dob ibogei bala na i parsaranan ai hata na mangkatahon, “Martahi-tahi do si Simri, anjaha domma ibunuh raja ai, jadi ipabangkit ganup bala ni Israel ma si Omri, pambobai ni bala ai, gabe raja manggomgom Israel bani parsaranan ai.”

¹⁷ Dob ai tangkog ma si Omri pakon ganup halak Israel hun Gibeton, gabe ihubu sidea ma Tirsa.

¹⁸ Tapi dob iidah si Simri, na dob talu huta ai, masuk ma ia hu parbatar-bataran ni rumah ni raja ai, itutung ma rumah ni raja ai i babouni, gabe matei ma ia,

¹⁹ halani dousani, na hinorjahonni ai, marhitei na mambahen sogam ni uhur ni Jahowa, pakon na mangirikkon dalan ni si Jerobeam ampa mangkorjahon dousa songon na hinorjahonni ai, gabe mardousa Israel ibahen.

²⁰ Barita na legan ai pasal si Simri pakon partahitahian na binahenni ai, ai lang tarsurat do ai ibagas buku barita ni Raja-raja Israel?

Panrajaion ni si Omri

²¹ Marbolah dua do bangsa Israel ijia; satongah bangsa ai mangirikkon si Tibni, anak ni si Ginat, laho pabangkitkonsi gabe raja, na satongah nari mangirikkon si Omri.

²² Tapi italuhon bangsa na mangirikkon si Omri do bangsa na mangirikkon si Tibni, anak ni si Ginat, jadi dob matei si Tibni, gabe si Omri ma bangkit raja.

²³ Patolupuluh-sadatahunkon dob raja si Asa i Juda, bangkit raja ma si Omri manggomgom Israel, sapuluh dua tahun dokahni; onom tahun do ia manrajai i Tirsa.

²⁴ Dob ai iboli ma Dolog Samaria hun bani si Semer marharga dua talenta pirak; ipajongjong ma sada huta i atas dolog ai, anjaha ibahen ma goran ni huta, na pinajongjongni ai, Samaria, mangirikkon goran ni si Semer, simada dolog ai hinan.

²⁵ Ihorjahon si Omri do sogam ni uhur ni Jahowa, anjaha jahatan do ia hun bani ganup jolma na i lobei ni.

²⁶ Ai mardalan do ia bani ganup dalan ni si Jerobeam, anak ni si Nebat, pakon bani ganup dousani ai, gabe mardousa halak Israel ibahen

hinorhonni ai, anjaha ipapuhō ringis ni Jahowa, Naibata ni Israel, marhitei gana-gana ni sidea ai.

²⁷ Barita na legan ai pasal si Omri, na binahenni pakon hagogohon na binahenni, ai lang tarsurat do ai bani buku barita ni Raja-raja Israel?

²⁸ Dob ai modom ma si Omri rap pakon ompungni, anjaha itanom ma ia i Samaria; jadi si Ahab, anakni ai ma gabe raja manggantihsi.

Panrajaion ni si Ahab. Mungkah ni Pambalosion bani Baal

²⁹ Patolupuluh-ualuhtahunkon dob raja si Asa i Juda, bangkit raja ma si Ahab, anak ni si Omri, manggomgom Israel i Samaria, dua puluh dua tahun dokahni.

³⁰ Ihorjahon si Ahab, anak ni si Omri ai do sogam ni uhur ni Jahowa, bueinan hun bani ganupjolma na i lobei ni.

³¹ Maotiktu ope nini uhurni na mardalan bani dousa ni si Jerobeam, anak ni si Nebat ai. Ibuat ma si Isebel, boru ni si Et-Baal, raja ni halak Sidon bahen parinangonni; laho do ia homa mambalosi baal, anjaha marsombah hujai.

³² Ipajongjong do sada anjapanjap bani baal, i rumah panumbahan ni baal, na pinaulini i Samaria.

³³ Ipadear si Ahab do homa sada sisombahon Ashera. Lobihan ope si Ahab mamuhoi ringis ni

Jahowa, Naibata ni Israel, marimbang hun bani haganup raja ni Israel, na i lobei ni.

³⁴ Sanggah panorangni ipajongjong si Hiel na hun Betel do huta Jeriko. Matei ma si Abiram, bunga tubuhn, sanggah na mambahen onjolanni; matei ma si Segub, anakni sianggian, sanggah na padearhon horbanganni romban hu bani hata ni Jahowa, na hinatahon-Ni hinan marhitei si Josua, anak ni si Nun.

Si Elias i Bah Karit

17 ¹ Dob ai nini si Elias, halak Tisbi, na hun Tisbi, na i tanoh Gilead ai ma hu bani si Ahab, “Songon sintongni manggoluh Jahowa, Naibata ni Israel anjaha ahu jongjong i lobei-Ni, seng anjai roh namur barang udan ibagas piga-piga tahun on, anggo seng palobei ahu mangkatahon.”

² Dob ai roh ma hata ni Jahowa hu bani,

³ “Laho ma ho hunjon dompak hapoltakan, marponop ma ho i lambung ni Bah Karit, na hampit hapoltakan ni Bah Jordan.

⁴ Hun bani bah ai ma ho minum, anjaha domma Huhatahon kawak marmuduhon ho ijai.”

⁵ Dob ai laho ma ia anjaha ibahen ma romban hu bani hata ni Jahowa; laho ma ia anjaha marianan ma ia i lambung ni Bah Karit, na hampit hapoltakan ni Bah Jordan.

⁶Jadi manrohan ma bani kawak mamboan ruti pakon gulei sogod-sogod, sonai homa bodari, anjaha hun bani bah ai do ia minum.

Si Elias i Huta Sarpat

⁷Dob piga-piga dokah horah ma bah ai, halani seng roh be udan i tanoh ai.

⁸Jadi nini Jahowa ma hu bani,

⁹“Bingkat ma ho laho hu Sarpat, na i Tanoh Sidon, anjaha ijai ma ho marianan; tonggor ma, domma Huhatahon sada naboru na mabalu ijai marmuduhon ho.”

¹⁰Jadi bingkat ma ia laho hu Sarpat; daskonsi ia hu horbangan ni huta ai, tonggor ma, adong ma sada ijai naboru na mabalu marsoban-soban. Idilohon ma hu bani mangkatahon, “Mahua alop ham ma bangku bah otik ibagas tatabu on, ase minum ahu.”

¹¹Sanggah na laho ai ia mangalap bah ai, idilohon ma use hu bani mangkatahon, “Mahua boan ham ma homa bangku santopik ruti.”

¹²Jadi nini ma, “Songon sintongni manggoluh Jahowa, Naibatamu, seng dong ruti bangku age sada, sobalitik sampohul ibagas hudon on, ambahni ai minak otik ibagas guri-guri on; tonggor ham ma, na marsoban-soban do ahu, ase laho ahu patureihon nitak ai bangku pakon bani anakku, ase mangan hanami, dob ai matei.”

¹³ Tapi nini si Elias ma hu bani, “Ulang ham rusak, laho ma ham, bahen ham ma songon na hinatahonmu ai; tapi paturei ham lobei bangku sada ruti na etek, anjaha boan ham ma ai bangku, dob ai paturei ham ma bamu pakon bani anakmu.”

¹⁴ Ai sonon do hata ni Jahowa, Naibata ni Israel, “Nitak na ibagas hudon ai seng anjai bois, anjaha minak na ibagas guri-guri ai seng anjai hurang, das bani ari parohon ni Jahowa udan hu atas tanoh on.”

¹⁵ Dob ai laho ma naboru ai, ibahen ma songon na hinatahon ni si Elias, gabe adong ma sipanganon bani, bani si Elias pakon bani dakdanak ai ganup ari.

¹⁶ Ia itak na ibagas hudon ai seng ra bois, anjaha minak na ibagas guri-guri ai seng ra hurang, romban hu bani hata ni Jahowa, na hinatahon-Ni marhitei si Elias.

Ipagoluh si Elias Anak ni na Mabalu

¹⁷ Dob salpu na masa ai, boritan ma anak ni naboru, tondokanni ai; parah tumang do naboritni ai lanjar rotap ma hosahni.

¹⁸ Nini naboru ai ma hu bani si Elias, “Aha do na binahenmu bangku, ham halak ni Naibata? Na roh do ham hape hu bangku laho pasingatkon dousangku pakon mamunuh anakku?”

¹⁹ Dob ai nini si Elias ma hu bani, “Boan ham ma bangku anakmu in.” Dob ai ibuat si Elias ma anakni ai hun bani abinganni, lanjar iboan ma ia

hu babou, hu kamar iananni, anjaha itibalhon ma ia bani podomanni.

²⁰ Dob ai dilo-dilo ma ia hu bani Jahowa, nini ma, “Ham Jahowa, Naibatangku! Dihut do hape naboru, tondokankon marhinamagou ibahen Ham marhitei na mamunuh anakni?”

²¹ Dob ai ipapodom ma dirini tolu hali i atas ni dakdanak ai lanjar dilo-dilo bani Jahowa, nini ma, “Mahua paulak Ham ma hosah ni dakdanak on hu bani.”

²² Jadi itangihon Jahowa ma sora ni si Elias, gabe mulak ma hosah ni dakdanak ai hu bani, lanjar manggoluh ma ia.

²³ Dob ai ibuat si Elias ma dakdanak ai, anjaha iboan ma hun kamar pardatas hu toruh, anjaha ibere ma ia hu bani inangni, lanjar nini si Elias ma, “Tonggor ma, domma manggoluh anakmu on.”

²⁴ Nini naboru ai ma hu bani si Elias, “Sonari pe hubotoh, halak ni Naibata do ham, anjaha sintong do hata ni Jahowa, na luar hun pamanganmu.”

Si Obaja, Juakjuak ni si Ahab, Pajumpah pakon si Elias

18 ¹ Dob ai bani labang-labang ni ari roh ma use hata ni Jahowa hu bani si Elias, ai ma patolutahunkon, nini ma, “Laho ma ho, pataridahkon ma dirimu hu bani si Ahab, ai sihol tongosonku ma udan hu tanoh in.”

² Dob ai laho ma si Elias pataridahkon dirini hu bani si Ahab, tapi masa do ijia lohei maningting i Samaria.

³ Dob ai idilo si Ahab ma si Obaja, siramotkon rumahni. Tapi marhabiaran tumang do si Obaja mangidah Jahowa,

⁴ ai sanggah na siniapkon ni si Isebel nabi ni Jahowa, ibuat si Obaja do saratus halak nabi, anjaha iponopkon ma sidea lima-lima puluh halak ibagas sada liang, anjaha ipasirsir do ruti pakon bah bani sidea.

⁵ Nini si Ahab ma hu bani si Obaja, “Siari hita ma tanoh on mangindahi bah tubuh pakon bah anak-anak andohar jumpah hita poyon-poyon, ase manggoluh huda pakon halode on, ase ulang tarpaksa siap deba hun bani pinahan in.”

⁶ Jadi ibagi sidea ma tanoh ai sisiaranni; sahalak si Ahab mardalan bani dalan na sada, anjaha sahalak si Obaja mardalan bani dalan na sada nari.

⁷ Jadi sanggah i tongah dalan si Obaja, tonggor ma, pajumpah ma ia pakon si Elias; dob itanda si Obaja ia manrogop ma ia, anjaha nini ma, “Ham do in hape, ham tuannami Elias?”

⁸ Ibalosi ma ia, “Ahu ma da. Laho ma ho, patugah ma bani tuanmu, ‘Tonggor ma, domma ijon si Elias.’”

⁹ Jadi nini ma, “Aha gakni dousangku, ase ondoskononmu jabolonmu on hu tangan ni si Ahab, laho mamunuh ahu?”

¹⁰ Songon sintongni manggoluh Jahowa, Naibatamu, seng dong bangsa barang harajaon, na so tinongos ni tuanku suruhanni hujai laho mangindahi ham; anggo ihatahon sidea, 'Seng ijon ia' gabe ipabija raja ai ma harajaon barang bangsa ai, paboa na so jumpah sidea ham.

¹¹ Hape sonari ihatahon ham, 'Laho ma ho, patugah ma hu bani tuanmu: Tonggor ma, ijon do si Elias.'

¹² Lahohonsi holi ahu hun bamu, ra usungon ni Tonduy ni Jahowa ma ham barang huja lang hubotoh; jadi anggo domma hupatugah hu bani si Ahab, hape lang jumpahsi ham, tontu bunuhonni ma ahu, age pe sai marhabiaran do ahu jabolonmu on mangidah Jahowa hun bani hadakdanakonku nari.

¹³ Ai lang dong do na patugahkon hu bani tuannami, na hubahen sanggah na binunuh ni si Isebel nabi ni Jahowa, ai ma na huponopkon ai nabi ni Jahowa, saratus halak, lima-lima puluh halak ibagas sada liang, anjaha hupasirsir bani sidea ruti pakon bah?

¹⁴ Hape sonari ihatahon ham, 'Laho ma ho patugah bani tuanmu: Tonggor ma, ijon do si Elias'; maningon bunuhonni do ahu."

¹⁵ Dob ai nini si Elias ma, "Songon sintongni manggoluh Jahowa Zebaot, anjaha ahu jongjong i lobei-Ni, maningon patalaronku do diringku hu bani sadari on."

¹⁶ Dob ai laho ma si Obaja manjumpahkon si Ahab, anjaha ipatugah ma barita ai hu bani; jadi laho ma si Ahab manjumpahkonsi.

Si Elias Pajumpah pakon si Ahab

¹⁷ Jadi dob pajumpah si Ahab pakon si Elias, nini si Ahab ma hu bani, “Domma ijon hape ham siagou Israel?”

¹⁸ Nini ma mambalosi, “Seng ahu na mangagou Israel, ham do pakon ginompar ni bapamu, marhitei na tinadingkon nasiam titah ni Jahowa laho mangirikkon baal.

¹⁹ On pe, suruh ham ma na patumpuhon ganup halak Israel marayak ahu, hu Dolog Karmel rap pakon ganup nabi ni Baal, na ompat ratus lima puluh halak ai, pakon nabi ni sombahon Ashera, na ompat ratus halak ai, na mangan bani meja ni si Isebel.”

Si Elias i Dolog Karmel

²⁰ Dob ai isuruh si Ahab ma na maningtingkon ai hu bani ganup halak Israel, anjaha ipatumpu ma homa ganup nabi ai hu Dolog Karmel.

²¹ Dob ai ipadohor si Elias ma hu bani ganup bangsa ai, nini ma, “Sadia dokah nari sai mengkat-engkat nasiam angkup bei? Anggo Jahowa do Naibata, la ma irikkon nasiam; tapi anggo baal do, ia ma irikkon

nasiam.” Tapi sangkababah hata pe lang ibalosi bangsa ai ia.

²² Dob ai nini si Elias ma hu bani bangsa ai, “Sahalak ahu mando na tading nabi ni Jahowa; tapi nabi ni baal ompat ratus lima puluh halak nari.

²³ Bere nasiam ma bennami dua lembu jonggi, paturut ma ipilih sidea sada lembu jonggi bani sidea, itoktoki ma ai lanjar itampeihon bani soban ai, tapi ulang inahkon apuy hujai; tapi ahu ma na patorsatorsahon lembu jonggi na sada nari ai, anjaha manampeihon ai bani soban ai, anjaha lang pe hunahkon apuy hujai.

²⁴ Dob ai dilo nasiam ma goran ni naibata nasiam, ahu pe hudilo ma goran ni Jahowa. Anjaha Naibata na marbalos marhitei apuy, ai ma Naibata na sintong.” Dob ai sahata ma ganup bangsa ai mambalosi, “Dear ma ai!”

²⁵ Dob ai nini si Elias ma hu bani nabi ni baal ai, “Pilih nasiam ma bani nasiam sada lembu jonggi, anjaha parlobei ma nasiam patureihon ai, ai buei do nasiam; anjaha dilo nasiam ma goran ni naibata nasiam, tapi ulang nahkon nasiam apuy hujai.”

²⁶ Ibuat sidea ma lembu jonggi, na binere bani sidea ai, ipaturei sidea ma ai, anjaha ipadilo-dilo sidea ma goran ni baal hun bani sogod nari das tongah arian, sai nini sidea do, “Ham baal, balosi hanami!” Tapi seng dong sora, barang na mambalosi. Jadi

marinjaki ma sidea inggot ni anjapanjap, na pinauli ni sidea ai.

²⁷ Jadi dob tongah ari ipahiri-hiri si Elias ma sidea, nini ma, “Pagogoh nasiam ma sora nasiam dilo-dilo, ai naibata do ia, ra sanggah marpingkir-pingkir do ia, barang paholangkon diri barang mardalani, barang na sanggah modom do ia, ase puho ia.”

²⁸ Dob ai ipagogoh sidea ma sora ni sidea dilo-dilo, anjaha irariki ma angkulani marhitei podang pakon tanja mardingat hasomalan ni sidea, pala sab daroh angkula ni sidea.

²⁹ Jadi dob salpu tongah ari, gabe siaran ma sidea das bani panorang panggalangonkon bani galangan sipanganon, tapi seng dong sora barang na mambalosi barang na manangihon.

³⁰ Dob ai nini si Elias ma hu bani ganup bangsa ai, “Padohor nasiam ma hu bangku!” Jadi ipadohor ganup bangsa ai ma hu bani, anjaha ipadear si Elias ma anjapanjap ni Jahowa, na dob majomba ai.

³¹ Ibuat si Elias ma sepuluh dua batu, mangihutkon bilangan ni marga ni anak ni si Jakob, haondosan ni hata ni Jahowa na ijia, sanggah na hinatahon-Ni, “Maningon si Israel do goranmu.”

³² Ipaturei ma sada anjapanjap bani goran ni Jahowa hun bani batu ai, anjaha ihurak ma sada bondar inggot anjapanjap ai, hira-hira dua tumba bonih bolagni.

³³ latur ma soban ai, itoktoki ma lombu jonggi ai, anjaha itampeihon ma ai bani soban ai.

³⁴ Dob ai nini ma, “Goki nasiam ma ompat gusi bah, anjaha useihon nasiam ma ai bani galangan situtungon ai pakon bani soban ai.” Jadi ibahen ma sonai. Nini ma use, “Bahen nasiam ma sonari paduahalihan.” Jadi ipaduahali sidea ma. Ihatahon use ma, “Bahen nasiam ma sonari patoluhalihan.” Jadi ipatoluhali sidea ma.

³⁵ Pala mardalan bah ai inggot anjapanjap ai, bondar ai pe gok bah do.

³⁶ Jadi dob jumpah panorang panggalangonkon bani galangan sipanganon, ipadohor Nabi Elias ma, anjaha nini ma, “Ham Jahowa, Naibata ni si Abraham, si Isak pakon si Israel, sai pabotohkon Ham ma sadari on, paboa Ham do Naibata i Israel, anjaha ahu do juakjuak-Mu, anjaha marhitei hata-Mu do hubahen ganupan on.

³⁷ Sai balosi Ham ma ahu, Ham Jahowa, balosi Ham ma ahu, ase ibotoh bangsa on, Ham do Naibata, alo Jahowa, anjaha sai pasuang Ham ma uhur ni sidea.”

³⁸ Dob ai madabuh ma apuy ni Jahowa, anjaha bois ma ipangan galangan situtungon, soban, batu pakon tanoh ai, anjaha idilat do homa pakon bah na ibagas bondar ai.

³⁹ Jadi dob iidah ganup bangsa ai ai, manrogop ma sidea, nini ma, “Jahowa do Naibata na sintong, Jahowa do Naibata na sintong!”

⁴⁰ Dob ai nini si Elias ma hu bani sidea, “Tangkapi nasiam ma nabi ni baal in, ulang adong na maluah hun bani sidea age sahalak!” Jadi itangkapi ma sidea. Dob ai itogu si Elias ma sidea tuad hu Bah Kison, lanjar itampuli ma sidea ijai.

⁴¹ Dob ai nini si Elias ma hu bani si Ahab, “Tangkog ma ham mangan anjaha minum, ai domma hubogei sora ni udan na doras.”

⁴² Jadi dob tangkog si Ahab laho mangan pakon minum, tangkog ma si Elias hu atas ni Dolog Karmel; manrogop ma ia hu tanoh, anjaha ibahen ma bohini hu holangkolang ni towodni.

⁴³ Dob ai nini ma hu bani suruhanni, “Tangkog ma ho, tatap ma dompak laut.” Jadi tangkog ma ia manatap, anjaha nini ma, “Seng dong age aha.” Dob ai ihatahon si Elias ma use, “Laho ma ho use!” Jadi laho ma suruhan ai, pitu hali sonai.

⁴⁴ Papituhalihon nini ma, “Tonggor ma, sada hambun na etek-etek songon tangan ni jolma manaik hun laut.” Dob ai nini si Elias ma, “Tangkog ma ho, hatahon ma hu bani si Ahab, ‘Pasang ma garetamu anjaha tuad ma ham, ase ulang haolatan ham ibahen udan.’”

⁴⁵ Dob ai seng sadiha dokah nari mamirong ma langit ai ibahen hambun pakon haba-haba, gabe roh ma udan, doras tumang. Ipasang si Ahab ma garetani anjaha laho ma hu Jesreel.

⁴⁶ Jadi roh ma tangan ni Jahowa manogu si Elias; igonditi ma binongeini anjaha marpojong ma ia i lobei ni si Ahab das hu Jesreel.

Si Elias Maporus hu Dolog Horeb

19 ¹ Dob ai ipatugah si Ahab ma ganup na binahen ni si Elias pakon naha pamunuhni bani ganup nabi ai marhitei podang.

² Dob ai isuruh si Isebel ma suruhanni marayak si Elias mangkatahon hu bani, “Sai sonin ma ibahen Naibata bangku, lobih ope tene, anggo seng hubahen hosahmu patar, usih songon na binahenmu hu bani hosah ni ganup sidea ai.”

³ Jadi mabiar ma ia, gabe bingkat ma ia mardalan paluahkon hosahni. Daskonsi ia i Berseba, na i tanoh Juda, itadingkon ma juakjuakni ijai.

⁴ Tapi laho ma ia hu halimisan, sadari mardalan daohni; dob das ia hujai, hundul ma ia marlinggom i toruh ni sada hayu tatada, anjaha ipangindo uhurni ma sihol matei, nini ma, “Sungkup ma in Ham Jahowa, buat Ham ma hosahku, ai seng dearan paruhuranku hun bani ompungku.”

⁵ Dob ai ipatibal ma bani lanjar modom i toruh ni sada hayu tatada; tapi tonggor ma, roh ma sada malekat manggiutsi, anjaha nini ma hu bani, “Puho ma ham, mangan ma!”

⁶ Jadi mangkawah ma ia, gabe iidah ma tibal hampit uluni sada ruti na ginoreng pakon sada gusi marisi

bah. Dob mangan pakon minum ia iulaki ma use modom.

⁷ Dob ai roh ma malekat ni Jahowa manggiutsi paduahalihon, anjaha nini ma, “Puho ma ham, mangan ma, ase ulang madaohtu iahap ham sidalananmu ai.”

⁸ Dob ai puho ma ia, mangan ma ia anjaha minum, lanjar mardalan ma pinargogohan ni sipanganon ai ompat puluh ari ompat puluh borngin dokahni das hu Horeb, Dolog ni Naibata.

Ipatalar Naibata Diri-Ni i Horeb

⁹ Masuk ma ia ijai hubagas sada liang, lanjar marborngin ma ia ijai; dob ai tonggor ma, roh ma hata ni Jahowa hu bani, nini ma, “Aha do horjamu ijon, Elias?”

¹⁰ Nini ma, “Na manringis do ahu mangkopkop horja ni Jahowa, Naibata Zebaot; ai domma itadingkon halak Israel parpadanan-Mu, domma irumbakkon sidea anjapanjap-Mu, anjaha domma ibunuhi sidea nabi-Mu marhitei podang, sahalak ahu mando na tading; anjaha ipindahi sidea do hosahku sihol mambuat ai.”

¹¹ Dob ai nini Jahowa ma, “Luar ma ho, anjaha jongjong ma ho bani dolog in i lobei ni Jahowa. Tonggor ma, mamontas ma Jahowa, anjaha torbanon ni ampilaos ma dolog-dolog in, anjaha bolahonni ma dolog batu i lobei ni Jahowa, tapi

seng Jahowa ope ibagas ampilaos ai; dob salpu ampilaos ai roh ma lalou, tapi seng Jahowa ope ibagas lalou ai;

¹² dob salpu lalou ai roh ma apuy, tapi seng Jahowa ope ibagas apuy ai; dob salpu apuy ai roh ma logou na anget-anget.”

¹³ Dob ibogei si Elias ai, irungkub ma bohini bani mantelni; luar ma ia lanjar jongjong i babah ni liang ai. Dob ai tonggor ma, roh ma sada sora mangkatahon hu bani, “Aha do horjamu ijon, Elias?”

¹⁴ Nini ma, “Na manringis do ahu mangkopkop horja ni Jahowa, Naibata Zebaot; ai domma itadingkon halak Israel parpadanan-Mu, domma irumbakkon sidea anjapanjap-Mu, anjaha domma ibunuhi sidea nabi-Mu marhitei podang, sahalak ahu mando na tading; anjaha ipindahi sidea do hosahku sihol mambuat ai.”

¹⁵ Tapi nini Jahowa ma hu bani, “Mulak ma ho hun bani dalanmu hinan hu halimisan Damaskus. Daskonsi ho, minaki ma si Hasael gabe raja manggomgom Aram;

¹⁶ minaki ma pakon si Jehu, anak ni si Nimsi gabe raja manggomgom Israel; minaki ma homa si Elisa, anak ni si Safat, hun Abel-Mehola, gabe nabi manggantih ho.

¹⁷ Jadi barang ise na maluah hun bani podang ni si Hasael, bunuhon ni si Jehu ma ai, anjaha barang ise

na maluah hun bani podang ni si Jehu, bunuhon ni si Elisa ma ai.

¹⁸ Ambah ni ai tading ope Hubahen i Israel pitu ribu halak, na so manowod, marsombah hu baal anjaha na seng onga manummahsi.”

Tardilo si Elisa

¹⁹ Dob ai bingkat ma si Elias hunjai, gabe jumpahsi ma si Elisa, anak ni si Safat, tudu sanggah maninggala ia rap pakon sapuluh dua pasang lembu i lobei ni, ia do manjolom pasangan na pasapuluhduahon. Mamontas ma si Elias hun lambungni lanjar isabeihon ma mantelni ai hu bani.

²⁰ Mintor itadingkon si Elisa ma lembu ai, anjaha marlintun ma ia mangirikkon si Elias, anjaha nini ma, “Mahua lopas ham ma ahu lobei manummah bapa pakon inang, ase huirikkon ham!” Dob ai nini si Elias ma hu bani, “Laho ma, tapi mulak da; ingat na hubahen ai bam!”

²¹ Dob ai laho ma ia, ibuat ma lembu na sapasang ai anjaha isayat ma ai, lanjar pasangan ni lembu ai do ibahen malompah gulei ai; ibere ma gulei ai panganon ni halak na ijai ai. Dob ai bingkat ma ia mangirikkon si Elias gabe juakjuakni.

**Parporangan ni si Ahab pakon Raja
Benhadad, na hun Damaskus**

20¹Tapi ipatumpu si Benhadad, Raja Aram ma ganup balani; tolu puluh dua raja do hasomanni, sonai homa huda pakon gareta porang; jadi tangkog ma ia, ihubu ma Samaria anjaha iporang.

²Dob ai isuruh ma suruhanni marayak si Ahab raja ni Israel hu huta ai,

³anjaha nini ma hu bani, “Sonon do hata ni si Benhadad, ‘Perakmu pakon omasmu ahu do simadasi; parinangonmu sijengesan pakon dakdanakmu ahu do homa simadasi.’”

⁴Nini raja Israel ma mambalosisi, “Songon na hinatahonmu ai ma tongon tuannami anjaha rajanami, ham do simada ahu pakon ganup na adong bangku.”

⁵Dob ai iulaki suruhan ai ma roh use, nini sidea ma, “Sonon do hata ni si Benhadad, ‘Domma husuruh namin mangkatahon bamu, Bere ma hu bangku perakmu, omasmu, parinangonmu pakon dakdanakmu’

⁶tapi patar sonon suruhonku ma juakjuakku marayak ham, ase irungkapi sidea rumahmu pakon rumah ni juakjuakmu, anjaha sagala ugas, na hinarosuhkon ni sidea, buaton anjaha boanon ni sidea ma ai.”

⁷ Dob ai idilo raja ni Israel ma ganup pangintuai ni nagori ai, ihatahon ma, “Botoh anjaha tonggor nasiam ma, habadoronta do hape, na pinindahan ni halak on; halani isuruh do suruhanni hu bangku mangindo parinangonku, dakdanakku, pirakku pakon omasku, anjaha seng hujua mamberehon ai bani.”

⁸ Dob ai nini ganup pangintuai ai pakon bangsa ai ma hu bani, “Ulang ma patangar-tangar ham ai, anjaha ulang ma hadearhon ham!”

⁹ Jadi nini raja ai ma hu bani suruhan ni si Benhadad, “Hatahon nasiam ma hu bani tuannami, raja in, ‘Haganup na pinindomu na parlobei hun bani juakjuakmu, sai na bahenonku do in, tapi anggo pasal on, seng tarbalosi ahu in.’” Dob ai mulak ma suruhan ai padaskon balos ai.

¹⁰ Iulaki si Benhadad ma use suruhanni mangkatahon hu bani, “Sai sonai ma ibahen Naibata bangku, lobih ope tene, anggo sungkup do orbuk ni huta Samaria on manggoki tangan ni ganup bangsa, na mangirikkon ahu.”

¹¹ Dob ai nini raja Israel ma mambalosi, “Hatahon ma bani, ‘Halak na mangkalhal podangni, ulang ma manganjang, songon na dob patibal podangni.’”

¹² Jadi dob ibogei Raja Benhadad hata ai, tudu sanggah minum anggur ia pakon raja-raja ai ibagas lampolamponi, nini ma hu bani juakjuakni, “Inggoti

nasiam ma huta in!” Jadi mintor iinggoti sidea ma huta ai.

¹³ Dob ai tonggor ma, roh ma sada nabi marayak si Ahab, raja ni Israel, nini ma, “Sonon do hata ni Jahowa, ‘Domma iidah ho munsumu na buei on? Tonggor ma, ondskonon-Ku ma in sadari on hubagas tanganmu, ase ibotoh ho, Ahu do Jahowa.’”

¹⁴ Dob ai nini si Ahab ma, “Marhitei ise?” Nini nabi ai ma, “Sonon do hata ni Jahowa, ‘Marhitei juakjuak ni raja-raja urung.’” Nini raja ai ma use, “Ise na parlobei bingkak?” Nini nabi ai ma, “Ham do.”

¹⁵ Dob ai ibilang raja ai ma juakjuak ni raja-raja urung ai, duaratus tolu puluh dua halak bueini, dob ai ibilang ma homa ganup bangsa Israel, pitu ribu halak.

¹⁶ Dob ai luar ma sidea tengah arian, sanggah na minum-minum si Benhadad i lampolanponi rap pakon raja-raja na tolu puluh dua halak ai, na hinarahni ai.

¹⁷ Dob ai luar ma parlobei juakjuak ni raja-raja urung ai. Isuruh si Benhadad ma suruhanni mangipa-ipa, jadi nini sidea ma hu bani, “Adong do halak na roh hun Samaria.”

¹⁸ Nini raja ai ma, “Barang na sihol mardamei sidea ase luar, barang sihol marporang, tangkapi nasiam ma sidea manggoluh.”

¹⁹ Jadi luar ma sidea hun huta ai, ai ma juakjuak ni raja-raja urung ai pakon bala ai hun pudi ni sidea.

²⁰ Ibunuh sidea bei ma imbangni, gabe maporus ma halak Aram ai; ipardakdak halak Israel ma sidea, tapi maluah do si Benhadad na marhuda ai rap pakon deba halak siajak huda.

²¹ Jadi luar ma homa raja ni Israel, anjaha iayob ma huda pakon gareta porang, anjaha buei tumang do halak Aram na rasei ibahen.

²² Dob ai roh ma nabi ai marayak raja ni Israel, nini ma hu bani, “Laita! Marjaga ma ham, pingkir ham ma barang aha sibahenonmu, halani tahun na roh on, roh do raja ni Aram mamorang ham.”

²³ Nini juakjuak ni Raja Aram do hu bani raja ai, “Naibata dolog-dolog do naibata ni sidea ai, ai do ase gogohan sidea ase hita; tapi porang hita ma sidea i tanoh hondot, tontu talu ma sidea ibahen hita.

²⁴ Halani ai sonon ma bahen ham, ‘Paturun ham ma raja-raja ai, ganup hun jabatanni hinan, anjaha bahen ham ma puanglima gantih ni sidea;

²⁵ tapi patumpu ham ma bamu bala songon balamu na dob rasei ai, sonai homa huda pakon gareta; jadi porang hita ma sidea i tanoh hondot, anjaha tongon, sai na monang do hita.’” Itangihon si Benhadad do hata ni sidea, anjaha ibahen ma sonai.

²⁶ Dob salpu na satahun ai, iharah si Benhadad ma halak Aram, anjaha tangkog ma ia hu Afek, laho marporang dompak Israel.

²⁷ Anjaha halak Israel pe iharah ma anjaha iparbohali, jadi bingkat ma sidea manjumpahkon halak Aram; marsaran ma halak Israel patontang pakon sidea songon dua hulanan haming na etek-etek, tapi igoki halak Aram do tanoh ai.

²⁸ Jadi roh ma sada halak ni Naibata marayak raja ni Israel, nini ma dompaksi, “Sonon do hata ni Jahowa, ‘Halani ihatahon halak Aram, Naibata ni dolog-dolog do Jahowa, sedo Naibata ni tanoh hondot, halani ai ondskonon-Ku ma hubagas tanganmu halak na mabuei on, ase itanda nasiam, Ahu do Jahowa.’”

²⁹ Jadi marsaran ma sidea patontang-tontang pitu ari dokahni. Papitu arihon marsiporangan ma sidea, gabe ibunuh halak Israel ma saratus ribu halak Aram, bala pardalan nahei ibagas sadari.

³⁰ Maporus ma na tading ai hu huta Afek, tapi idabuhi tembok ni huta ai ma dua puluh ribu halak hun bani na tading ai. Si Benhadad pe maporus do, masukni ma huta ai hun rumah na sada hu rumah na sada nari.

³¹ Marsahap ma juakjuakni hu bani, “Tonggor ma, ibogei hanami do barita ni raja ni Israel, raja paridop ni uhur do sidea; palopas ham ma hanami marbaju

guni pakon margotongkon tali laho luar marayak raja ni Israel andohar ipalopas ham manggoluh.”

³² Dob ai luar ma sidea marhiou guni, anjaha margotong-gotong tali, marayak raja ni Israel, anjaha nini sidea ma, “Nini juakjuakmu si Benhadad; mahua palopas ham ma ahu manggoluh.” Jadi nini raja ai ma, “Manggoluh ope ia? Saninangku do ia.”

³³ Iahap sidea tugah-tugah na madear do ai, mintor itangkap sidea ma hatani ai, “Anggimu ma tongon si Benhadad!” Dob ai nini ma, “Laho ma nasiam, boan nasiam ma ia hujon.” Jadi luar ma si Benhadad marayak raja ai, lanjar ihatahon raja ai ma ia naik hu garetu.

³⁴ Dob ai nini si Benhadad ma hu bani raja ai, “Hupaulak ma bamu huta, na nirampas ni bapa ondi hun bani bapanta; anjaha pajongjong ham ma bamu rumah partiga-tigaan i Damaskus, songon na binahen ni bapa i Samaria. Tapi anggo ahu, paluah ham ma ahu maronjolan bani padan on.” Jadi marpadan ma sidea, dob ai ilopas ma ia laho.

Uhum hu bani si Ahab, Halani na Pinaluahni ai si Benhadad

³⁵ Dob ai roh ma sada halak hun bani nabi-nabi ai, mangkatahon hu bani hasomanni marhitei hata ni Jahowa, “Mahua lonsingi ma ahu!” Tapi manjua do halak ai manlonsingisi.

³⁶ Dob ai nini nabi ai ma hu bani, “Halani na so tinangihonmai sora ni Jahowa, tonggor ma, anggo laho holi ho, hun lambungku, sorohon ni singa ma ho.” Jadi lahohonsi ia hun lambungni, pajumpah ma ia pakon singa, anjaha isoroh ma ia.

³⁷ Dob ai jumpahsi ma sada halak na legan, jadi nini ma hu bani, “Mahua lonsingi ma ahu!” Jadi ilonsingi halak ai ma ia, pala ugahan ia.

³⁸ Dob ai laho ma nabi ai mangambat raja ai hu tongah dalan, anjaha ipalegan ma rupani marhitei na mambahen pambalut bani matani.

³⁹ Jadi sanggah mamontas raja ai, doruh-doruh ma ia hu bani raja ai, nini ma, “Bingkat do jabolonmu on hu parporangan; jadi tonggor ma, roh ma sada halak, iboan ma bangku sada halak na tartaban anjaha nini ma, ‘Jaga halak on; anggo lintun ia, maningon hosahmu ganti ni hosahni, barang maningon galaronmu pirak sada talenta.’

⁴⁰ Hape sanggah na porlu tumang horja ni jabolonmu on, sompong seng ijin be ia.” Dob ai nini raja ai ma hu bani, “Sonai ma uhum bam; songon putusanmai ma!”

⁴¹ Dob ai mangolos ma ia mananggali pambalutni hun bani matani, gabe itanda raja ai ma ia, ai ma sada hun bani nabi-nabi ai.

⁴² Dob ai nini nabi ai ma hu bani, “Sonon do hata ni Jahowa, ‘Halani na pinaluahmu ai hun bani tanganmu halak ai, na sihol siapkonon-Kai,

maningon hosahmu gantih ni hosahni, anjaha bangsamu gantih ni bangsani.”

⁴³ Dob ai mulak ma raja ni Israel hu rumahni, hu Samaria, ibagas gila pakon pusok ni uhur.

Pambunuhon ni si Ahab bani si Nabot, Laho Mambangkuhon Pohon Anggurni

21 ¹ Dobkonsi na masa ai, tarjadi ma sonon: Adong do pohon anggur bani si Nabot, halak Jesreel ai, i lambung rumah ni si Ahab, Raja Israel.

² Dob ai nini si Ahab ma hu bani si Nabot, “Mahua bere ma bangku pohon anggurma, ase adong panuan-nuanan ni lowohnami, halani dohorni ai hu rumahku; hubere pe bam pohon anggur sidearan gantihni ai, barang pirak nasa arga ni pohonmai, anggo ai do dearan nini uhurmu.”

³ Tapi nini si Nabot ma hu bani si Ahab, “Ipandang Jahowa do bereonku bamu tading-tadingan ni bapa.”

⁴ Jadi mulak ma si Ahab hu rumahni, mandolei anjaha gok ringis, halani hata ni si Nabot, na hun Jesreel ai, hu bani, ai nini do, “Seng ra ahu mambere bamu tading-tadingan ni bapa.” Ipatibal raja ai ma bani i podoman, anjaha bohini dompak dingding, anjaha seng ra ia mangan.

⁵ Dob ai roh ma si Isebel, parinangonni ai hu bani, nini ma hu bani, “Mase ma sonin pusok ni uhurmu, anjaha seng ra ham mangan?”

⁶ Jadi nini ma hu bani, “Marsahap do ahu pakon si Nabot halak Jesreel ai, ningku do hu bani, ‘Mahua bere ma pohon anggurmin bolionku; barang, anggo rosuhan uhurmu, hubere pe pohon anggur na legan gantihni’ jadi nini ma mambalosi, ‘Seng ra ahu mambere bamu pohon anggurhai.’”

⁷ Dob ai nini si Isebel parinangonni ai ma hu bani, “Ai lang ham do nuan na manrajai Israel? Hundul ma ham, mangan ma ham, anjaha tenger ma uhurmu, hubere pe bamu pohon anggur ni si Nabot, halak Jesreel ai.”

⁸ Dob ai ibahen ma surat ibagas goran ni si Ahab, anjaha itokan ma ai marhitei tokanni, anjaha itongoskon ma surat ai hu bani pangintuai-pangintuai pakon halak na sangap-sangap, hasoman ni si Nabot ai.

⁹ Anjaha sonon do hata ni suratni ai, “Tingtingkon nasiam ma sada ari puasa, anjaha hatahon nasiam ma si Nabot hundul i luluan ni tumpuan ai,

¹⁰ anjaha pahundul nasiam ma homa dua halak paruhur jahat padompak-dompak pakonsi, ase sidea marsaksihon dompaksi, ‘Domma iapasi ho Naibata pakon raja in.’ Dob ai togu nasiam ma ia hudarat, anjaha pargijig nasiam ma ia bani batu, ase matei ia.”

¹¹ Jadi roh ma halak na i huta ai, ai ma partua-partua pakon halak na sangap-sangap ai, na marianan rapkonsi ibagas huta ai, mandalankon songon na

hinatahon ni si Isebel ibagas surat, na tinongosni ai bani sidea.

¹² Itingtingkon sidea ma sada ari puasa, anjaha ihatahon ma si Nabot hundul i luluan ni tumpuan ai.

¹³ Dob ai roh ma na dua halak paruhur na jahat ai, jadi hundul ma ia padompak-dompak pakonsi; dob ai marsaksihon ma halak paruhur na jahat ai dampak si Nabot i lobei ni bangsa ai, nini ma, “Domma iapasi si Nabot on Naibata pakon raja in.” Dob ai iarahkon sidea ma ia hu darat ni huta ai, anjaha ipargijig sidea ma ia bani batu lanjar matei.

¹⁴ Isuruh sidea ma na patugahkon hu bani si Isebel, “Domma matei si Nabot ipargijig.”

¹⁵ Jadi dob ibogei si Isebel, na dob matei si Nabot hona pargijig bani batu, nini si Isebel ma hu bani si Ahab, “Jongjong ma ham, buat ma bamu pohon anggur ni si Nabot, halak Jesreel ai, na jinuani mamberehon bolionmu ai, ai lang manggoluh be si Nabot, domma matei ia.”

¹⁶ Jadi dob ibogei si Ahab, na dob matei si Nabot, jongjong ma ia, sihol laho hu pohon anggur ni si Nabot, halak Jesreel ai, laho mambangkuhon ai.

Ilumbahon si Elias Papa ni Naibata hu bani si Ahab

¹⁷ Tapi roh ma hata ni Jahowa hu bani si Elias, halak Tisbi ai, nini ma,

¹⁸ “Jongjongkon ma anjaha tuad ma ho marayak si Ahab, raja Israel, na marianan i Samaria. Tonggor ma, ibagas pohon anggur ni si Nabot do ia nuan, ai domma tuad ia hujai laho mambanguhon ai.

¹⁹ Hatahon ma hu bani, ‘Sonon do hata ni Jahowa: Ai lang domma mambunuh ho, anjaha manrampas homa?’ Ambahni ai hatahon ma hu bani, ‘Ia ijin idilati baliang daroh ni si Nabot, maningon ijai do dilaton ni baliang darohmu.’”

²⁰ Nini si Ahab ma hu bani si Elias, “Domma tardapot ahu ibahen ham, o munsuhku!” Nini si Elias ma mambalosi, “Domma tardapot ahu tongon, ai domma ibahen ho dirimu, laho mangkorjahon sogam ni uhur ni Jahowa.

²¹ Tonggor ma, parohon-Ku ma bam hamagouan; siapkonon-Ku ma ginomparmu, siapkonon-Ku ma hun bani si Ahab sagala dalahi na poso barang na dob matua i Israel,

²² anjaha bahenon-Ku ma ginomparmu songon ginompar ni si Jerobeam, anak ni si Nebat, pakon ginompar ni si Baesa, anak ni si Ahia, halani na pinapuhomai ringis-Ku, anjaha halani na niojurmai halak Israel mambahen dousa.

²³ Anjaha hu bani si Isebel sonon do hata ni Jahowa, ‘Maningon bois holi panganon ni baliang si Isebel i lambung tembok ni Jesreel.’

²⁴ Barang ise na matei hun bani si Ahab ibagas huta, maningon bois panganon ni baliang, anjaha barang

ise na matei i ladang, maningon bois panganon ni manuk-manuk na i awang-awang.

²⁵ Ai seng dongjolma songon si Ahab, na mamberehon dirini laho mangkorjahon sogam ni uhur ni Jahowa, na pinaojur-ojur ni si Isebel, parinangonni ai.

²⁶ Ai jahat tumang do pambahenanni marhitei na niirikkonni ai naibata na legan, songon na binahen ni halak Amori hinan, ai ma na dob pinabali ni Jahowa hinan hun lobei ni halak Israel.”

²⁷ Tapi dob ibogei si Ahab hata ondi, irigati ma hiouni, anjaha isorungkon ma hiou guni, anjaha marunduk ni uhur ia mardalan.

²⁸ Dob ai roh ma hata ni Jahowa hu bani si Elias, halak Tisbi ai, nini ma,

²⁹ “Domma iidah ho, na pinaunduk ni si Ahab ai dirini i lobei-Hu? Halani na pinaundukni ai dirini i lobei-Hu, seng be parohon-Ku hamagouan ai sanggah manggoluh ia, sanggah goluh ni anakni pe parohon-Ku hamagouan ai bani ginomparni.”

Si Ahab pakon si Josafat Marsada Riah Mangimbang Halak Aram

(ay. 2-35: pausih 2 Kron. 18:2-34)

22 ¹ Dob ai marsonang-sonang ma sidea tolu tahun dokahni, seng dong porang i tonggah-tonggah ni Aram pakon Israel.

² Tapi patolutahunkon tuad ma si Josafat, raja ni Juda, marayak raja ni Israel.

³ Nini raja ni Israel ma hu bani juakjuakni, “Ai lang ibotoh nasiam, hita do simada Ramot-Gilead? Hape sai soh do hita, mase ma lang irampas hita in hun tangan ni raja ni Aram?”

⁴ Dob ai nini raja ai ma hu bani, “Atene, ra do ham harahonku marmunsuh dampak Ramot-Gilead?” Nini si Josafat ma hu bani raja ni Israel, “Ia sonin ham, sonai do ahu, sonin bangsamu, sonai do bangsangu, anjaha sonai hudamu, sonai do homa hudangu.”

⁵ Ambah ni ai nini si Josafat ma hu bani raja ni Israel, “Mahua sungkun ham ma lobei Jahowa!”

⁶ Jadi ipatumpu raja Israel ma nabi-nabi, hira-hira ompat ratus halak bueini, anjaha nini ma hu bani sidea, “Atene, bulih do ahu tangkog hu Ramot-Gilead marporang, barang lang?” Nini sidea ma, “Bulih do, sai na ondskonon ni Tuhan in do sidea hubagas tangan ni raja in.”

⁷ Tapi nini si Josafat ma, “Ai seng adong be ijon age sahalak nabi ni Jahowa, ase marsungkun hita hu bani?”

⁸ Nini raja ni Israel ma hu bani si Josafat, “Adong do namin ijon sahalak, tarsungkun hita do namin Jahowa marhiteihonsi, ai ma si Mika, anak ni si Jimla; tapi sogam do uhurhu bani, ai seng onggga na madear panjahaionni pasal ahu, sai hamagouan

do.” Tapi nini si Josafat ma, “Ulang ma sonai hata ni raja in.”

⁹ Idilo raja ni Israel ma sahalak hun bani juakjuakni, nini ma bani, “Alop podas si Mika, anak ni si Jimla.”

¹⁰ Tapi hundul bani paratasni do raja ni Israel pakon si Josafat, raja ni Juda, mamahei baju harajaon i horbangan ni Samaria; anjaha ganup nabi ai manjahai i lobei ni sidea.

¹¹ Ia si Sedekia, anak ni si Kenana, domma ibahen hinan bani tanduk bosi, anjaha nini ma, “Sonon do hata ni Jahowa, ‘Marhitei on duguonmu ma halak Aram, ronsi siap sidea bahenonmu.

¹² Haganup nabi-nabi ai sonai do panjahaion ni sidea, nini sidea do, “Tangkog ma ham hu Ramot-Gilead, sai monang do ham, anjaha ondoskonon ni Jahowa do sidea hubagas tangan ni raja in.”

¹³ Ia suruhan, na mangalopi si Mika ai, ihatahon do hu bani sonon, “Tonggor ma, sahata do nabi-nabi ai mangkatahon na madear hu bani raja in; halani ai hatamu pe, sai songon hata ni sidea ai ma, sai hatahon ham ma na madear.”

¹⁴ Tapi nini si Mika, “Songon sintongni manggoluh Jahowa, barang aha na pinatugah ni Jahowa hu bangku, ai do hatahononku.”

Panjahaion ni si Mika

¹⁵ Jadi dob das ia hulobei ni raja ai, nini raja ai ma hu bani, “Atene Mika, bulih do hanami laho

hu Ramot-Gilead marporang barang lang?” Nini ma mambalosi, “Bulih do ham tangkog, anjaha monang do ham, ai ondoskonon ni Jahowa do sidea hubagas tangan ni raja in.”

¹⁶ Dob ai nini raja ai ma hu bani, “Singgan piga hali do pabijaonku ham, paboa na so hatahononmu bangku, sobali hasintongan marhitei goran ni Jahowa?”

¹⁷ Dob ai nini si Mika ma, “Domma hutatap ganup Israel merap i atas dolog, songon biri-biri, na so adong parmahanni.” Jadi nini Jahowa ma, “Seng dong tuan ni sidea; ganup ma mulak hu rumahni ibagas damei.”

¹⁸ Nini raja ni Israel ma hu bani si Josafat, “Ai lang domma huhatahon bamu, seng anjai tumaram dear panjahaionni pasal ahu, sobali hamagouan?”

¹⁹ Jadi nini si Mika ma, “Halani ai tangihon ham ma hata ni Jahowa, ‘Huidah do Jahowa hundul i atas ni paratas-Ni, anjaha ganup bala ni nagori atas jongjong i lambung-Ni, hampit siamun pakon hampit sambilou-Ni.’”

²⁰ Jadi nini Jahowa ma, “Ise do na ra pakahouhon si Ahab, ase tangkog ia gabe dabuh ia dohorhon Ramot-Gilead?” Dob ai marsiluarhon hatani bei ma sidea.

²¹ Dob ai luar ma sada tonduy, lanjar jongjong i lobei ni Jahowa, anjaha nini ma, “Ahu ma pakahouhonsi.” Nini Jahowa ma hu bani, “Marhitei aha?”

²² Nini ma mambalosi, “Luar ma ahu gabe tonduy sipaoto-oto ibagas pamangan ni ganup nabini.” Nini Jahowa ma hu bani, “Pakahou ma ia, anjaha maningon monang do ho; laho ma ho, anjaha bahen ma sonai.

²³ On pe, tonggor ma, domma ibere Jahowa tonduy sipaoto-oto hubagas pamangan ni ganup nabi on; domma ilumbahon Jahowa roh hamagouan bamu.”

²⁴ Dob ai roh ma hundohor si Sedekia, anak ni si Kenana, itompas ma huyum ni si Mika, lanjar ihatahon, “Sonaha, domma minsah Tonduy ni Jahowa hun bangku, laho marsahap marhitei ho?”

²⁵ Nini si Mika ma mambalosi, “Idahonmu do ai bani ari parporusmu hun bani kamar na sada hu bani kamar na sada nari sihol marponop namin.”

²⁶ Dob ai nini raja ni Israel ma, “Tangkap ma si Mika, anjaha boan ma ia mulak hu bani si Amon, kopala ni huta ai pakon hu bani si Joas, anak ni raja ai;

²⁷ anjaha hatahon ma, ‘Sonon do hata ni raja in: Nahkon nasiam ma halak on hu tutupan, anjaha bere nasiam ma ia mangan ruti pakon minum otik-otik, paima mulak ahu mardamei-damei.’”

²⁸ Dob ai nini si Mika ma, “Anggo mulak ham marsonang-sonang, na so tongon ma Jahowa marsahap marhitei ahu.” Anjaha nini ope, “Tangar ma, nasiam ganup bangsa!”

²⁹ Dob ai tangkog ma raja ni Israel pakon si Josafat, raja ni Juda hu Ramot-Gilead.

³⁰ Jadi nini raja ni Israel ma hu bani si Josafat, “Hupalegan ma rupangku laho hu parporangan, tapi anggo ham lanjar pakei ham ma pakeianmu.” Jadi palegan rupa ma raja ni Israel laho hu parporangan.

³¹ Tapi domma iparentahkon raja ni Aram hinan hu bani kopala ni gareta porangni sitolu puluh dua halak ai, “Ulang ma porang nasiam halak na etek barang halak na banggal, pitah raja ni Israel hansa.”

³² Jadi dob iidah kopala-kopala ni gareta porang ai si Josafat, nini uhur ni sidea ma, “Tontu ia do raja Israel!” Jadi marhusor ma sidea laho mamorangsi; tapi mandoruhi ma si Josafat.

³³ Jadi dob iidah kopala-kopala ni gareta porang ai, na so ia do hape raja ni Israel, surut ma sidea hun bani na mardakdaksi.

³⁴ Tapi adong ma sada halak, na manembakkon panahni gijig-gijig borngin, gabe hona ma raja ni Israel i holangkolang ni gonditni pakon bajuni. Jadi nini ma hu bani sais ni garetani, “Pahusor gareta on, anjaha boan ma ahu luar hun parporangan on, ai domma ugahan ahu.”

³⁵ Tapi halani lambin jobuni do porang ai bani na sadari ai, jadi itaronkon raja ai ma jongjong ibagas garetani mandompakkon halak Aram ai, paima matei ia bodarini ai; mabaor do daroh ni ugah ni raja ai bani dasor ni gareta ai.

³⁶ Anjaha marayak sundut mata ni ari tarboge i ma sora tingting i parsaranan ai, sonon, “Mulak bei ma, ganup hu hutani pakon tanohni bei,

³⁷ ai domma matei raja in.” Das ma sidea hu Samaria, anjaha i tanom sidea ma ia i Samaria.

³⁸ Anjaha sanggah iburihi sidea gareta ai i lambung ni bongbongan, na i Samaria, roh ma baliang mandilati darohni, anjaha roh do pakon boru jalang maridi hujai, romban hu bani hata ni Jahowa, na dob nilumbahon-Ni hinan.

³⁹ Barita na legan ai pasal si Ahab pakon ganup na binahenni pakon rumah na pinadearni hun bani gading, sonai homa ganup huta na pinungkahni ai, ai lang tarsurat do ai ibagas buku barita ni raja-raja Israel?

⁴⁰ Ase modom ma si Ahab rap pakon ompungni, anjaha si Ahasya, anakni ai ma bangkit raja gantihni.

Pasal si Josafat pakon si Ahasya na hun Israel

(ay. 41-54: pausih 2 Kron. 20:31--21:1)

⁴¹ Ia si Josafat, anak ni si Asa, bangkit raja do ia i Juda, paompattahunkon, dob raja si Ahab i Israel.

⁴² Marumur tolu puluh lima tahun do si Josafat sanggah bangkit raja ia, anjaha dua puluh lima tahun do dokahni manrajai ia i Jerusalem. Ia goran ni inangni, ai ma si Asuba, boru ni si Silhi.

⁴³ Sai marparlahou do ia bani ganup dalan ni si Asa, bapani ai, seng manlembang ia hunjai, ibahen

do na pintor bani uhur ni Jahowa. (22-44) Tapi seng iparseda ope ianan panumbahan na i buntu-buntu, sai manggalang anjaha manutung dahupa ope halak na mabuei ai bani ianan panumbahan na i buntu-buntu.

⁴⁴ (22-45) Anjaha mardear do si Josafat pakon raja ni Israel.

⁴⁵ (22-46) Barita na tading ai ope pasal si Josafat pakon kuasani, na nidalankonni ai, pakon naha parporanganni, ai lang tarsurat do ai ibagas buku Barita ni Raja-raja Juda?

⁴⁶ (22-47) Sonai homa simasima ni halak na marjilmahon dalahi, na tading ope sanggah goluh ni si Asa, bapani ai, isiapkan do hun tanoh in.

⁴⁷ (22-48) Seng dong raja ijia i Edom, wakil do manrajai ijai.

⁴⁸ (22-49) Isuruh si Josafat do na paulihon kapal Tarsis, sipabangkiton hu Opir mangalop omas namin; tapi seng saud laho sidea, ai mangkaseda do kapal ai i Ezyon-Geber.

⁴⁹ (22-50) Ijia ma ihatahon si Ahasya, anak ni si Ahab hu bani si Josafat, "Mahua lopas ham ma juakjuakku rap pakon juakjuakmu marlayar bani kapal in" tapi seng ra si Josafat.

⁵⁰ (22-51) Dob ai modom ma si Josafat rap pakon ompungni, anjaha i tanom ma ia i lambung ni ompungni i huta ni si Daud, ompungni ai; anjaha si Joram, anakni ai ma bangkit raja manggantihsi.

⁵¹ (22-52) Ia si Ahasya, anak ni si Ahab, bangkit raja do ia manggomgom Israel i Samaria, pasapuluh-pitutahunkon dob raja si Josafat i Juda, anjaha dua tahun do ia manrajai Israel.

⁵² (22-53) Ihorjahon do sogam ni uhur ni Jahowa, sai mardalan do ia bani dalan ni bapani pakon inangni pakon dalan ni si Jerobeam, anak ni si Nebat, na mambahen Israel mangkorjahon dousa.

⁵³ (22-54) Ibalosi do homa baal, anjaha marsombah do ia hujai, gabe ipuhoi ringis ni Jahowa, Naibata ni Israel, usih tumang songon na binahen ni bapani ai.

2 Raja-raja

Ilumbahon si Elias Parmatei ni si Ahasya

1 ¹Jadi dob matei si Ahab, marbalik ma halak Moab hun bani halak Israel.

²Bani na sahali madabuh ma si Ahasya hun jaring-jaring ni kamarni pardatas i Samaria, pala boritan ia. Dob ai isuruh ma suruhanni, nini ma hu bani sidea, “Laho ma nasiam manungkun Baal-Sebub, naibata ni Ekron, atap na malum do ahu hun bani naboritkon.”

³Tapi domma marsahap hinan malekat ni Jahowa hu bani si Elias, halak Tisbi ai, “Bingkat ma ho manjumpahkon suruhan ni raja ai, na hun Samaria, anjaha hatahon ma hu bani sidea, ‘Seng dong gakni Naibata i Israel, ase laho nasiam manungkun Baal-Sebub, naibata ni Ekron?’

⁴Halani ai, sonon do hata ni Jahowa, ‘Seng bulih turun be ho hun bani podoman hatibalanmin, tapi maningon matei ma ho.’” Dob ai laho ma si Elias.

⁵Jadi dob mulak suruhan ai hu bani raja ai, nini ma hu bani sidea, “Mase mulak nasiam?”

⁶Nini sidea ma mambalosisi, “Adong do sada halak na manjumpahkon hanami, anjaha nini do hu bannami, Mulak ma nasiam hu bani raja na

marsuruh nasiam, hatahon nasiam ma hu bani: Sonon do hata ni Jahowa, 'Seng dong gak ni Naibata i Israel, ase isuruh ho na manungkun Baal-Sebub, naibata ni Ekron? Halani ai seng bulih be ho turun hun podoman hatibalanmin, tapi maningon matei ma ho.'"

⁷ Dob ai nini ma hu bani sidea, "Sonaha do rupa ni halak na manjumpahkon nasiam ai pakon na patugahkon hata on bani nasiam?"

⁸ Nini sidea ma mabalosisi, "Marhiou na marambulu do halak ai, anjaha margondit hulingkuling do ia bani binongeini." Jadi nini ma, "Si Elias, halak Tisbis ai do ai."

⁹ Dob ai isuruh raja ai ma hu bani pambobai ni silima puluh halak rap pakon balani silima puluh halak ai. Jadi tangkog ma ia hu bani si Elias, na hundul-hundul i atas ni sada buntu-buntu, nini ma hu bani, "Ham halak ni Naibata, ihatahon raja in, 'Turun ma ham!'"

¹⁰ Tapi nini si Elias ma mambalosi pambobai ni silima puluh halak ai, "Anggo halak ni Naibata do ahu, sai madabuh ma apuy hun nagori atas, anjaha ipangan ma ho pakon balamu silima puluh halak in." Jadi madabuh ma apuy hun nagori atas, anjaha ipangan ma ia pakon balani silima puluh halak ai.

¹¹ Dob ai isuruh raja ai ma use pambobai ni silima puluh halak rap pakon balani lima puluh halak. Tangkog ma ia, anjaha nini ma hu bani, "Ham halak

ni Naibata, sonon do parentah ni raja in, ‘Podas ma ham tuad!’”

¹² Tapi nini si Elias ma mambalosi sidea, “Anggo halak ni Naibata do ahu, sai madabuh ma apuy hun nagori atas, anjaha ipangan ma ho pakon balamin silima puluh halak in!” Jadi madabuh ma apuy hun nagori atas, anjaha ipangan ma ia pakon balani silima puluh halak ai.

¹³ Dob ai iulaki raja ai ma use marsuruh pambobai ni silima puluh halak rap pakon balani lima puluh halak. Dob das pambobai ni silima puluh halak ai i atas, marrogop ma ia marsombah i lobei ni si Elias, anjaha ielek-elek ma ia, “Ham halak ni Naibata, harga ma bahen ham hosahku pakon hosah ni jabolonmu, silima puluh halak on.

¹⁴ Tonggor ma, madabuh do apuy hun nagori atas, anjaha ipangan haduasi pambobai ni silima puluh halak ai, on pe harga ma bahen ham hosahkon.”

¹⁵ Dob ai nini malekat ni Jahowa ma hu bani si Elias, “Tuad ma ham rap pakonsi; ulang ma ham mabiar mangidahsi.” Jadi bingkat ma ia tuad rap pakon pambobai ai marayak raja ai,

¹⁶ anjaha nini ma hu bani, “Sonon do hata ni Jahowa, Halani isuruh ho suruhanmu manungkun hu bani Baal-Sebub, naibata ni Ekron ai, seng dong be gak ni Naibata i Israel, na boi panungkunan? Halani ai seng boi be ho turun hun bani podoman hatibalanmin, maningon matei ma ho.”

¹⁷ Jadi matei ma ia, romban hu bani hata ni Jahowa, na dob nilumbahon ni si Elias hinan. Jadi bangkit raja ma anggini si Joram manggantihsi, halani seng dong anak ni si Ahasya. Ai masa padua tahunkon dob gabe raja si Joram anak ni si Josafat i Juda.

¹⁸ Barita na legan ai pasal si Ahasya pakon na binahenni, ai lang tarsurat do ai ibagas buku Barita ni Raja-raja Israel?

Tarangkat si Elias hu Nagori Atas

2 ¹ Sanggah na sihol alopon ni Jahowa si Elias hu nagori atas marhitei halisungsung, bingkat ma si Elias pakon si Elisa hu Gilgal.

² Dob ai nini si Elias ma hu bani si Elisa, “Tading ma ho ijon, ai isuruh Jahowa do ahu laho hu Betel.” Tapi nini si Elisa ma, “Songon sintongni manggoluh Jahowa, anjaha manggoluh homa ham, seng anjai tadingkononku ham.” Jadi tuad ma sidea hu Betel.

³ Dob ai luar ma susian ni nabi na i Betel marayak si Elisa, nini sidea ma hu bani, “Domma ibotoh ham na sihol angkaton ni Jahowa ma tuanmu sadari on hun lambungmu?” Jadi nini ma, “Eak, domma hubotoh, sip ma nasiam!”

⁴ Nini si Elias ma use hu bani, “Mahua tading ma ho ijon Elisa, ai isuruh Jahowa do ahu hu Jeriko.” Tapi nini si Elisa ma, “Songon sintongni manggoluh Jahowa, anjaha manggoluh homa ham, seng anjai tadingkononku ham.” Jadi das ma sidea hu Jeriko.

⁵ Dob ai roh ma susian ni nabi na i Jeriko marayak si Elisa, nini sidea ma hu bani, “Domma ibotoh ham, na sihol angkaton ni Jahowa ma tuanmu sadari on hun lambungmu?” Jadi nini ma, “Eak, domma hubotoh, sip ma nasiam!”

⁶ Nini si Elias ma use hu bani, “Mahua tading ma ho ijon, ai isuruh Jahowa do ahu hu Jordan.” Tapi nini ma, “Songon sintongni manggoluh Jahowa, anjaha manggoluh homa ham, seng anjai tadingkononku ham.” Jadi rap mardalan ma sidea na dua ai.

⁷ Dihut do homa lima puluh halak hun bani susian ni nabi ai laho, tapi mandaoh-daoh do sidea jongjong hun bani sidea, sanggah na das ai na dua nabi ai i topi ni Bah Jordan.

⁸ Dob ai ibuat si Elias ma mantelni, isorpih ma ai, dob ai ibogbogkon ma hu bah ai, gabe manilah ma bah ai hu bornoh pakon hu buntu, jadi boi ma sidea na dua mandipar bani na horah.

⁹ Jadi dob mandipar sidea, nini si Elias ma hu bani si Elisa, “Pangindo ma hu bangku barang aha do sibahenonku bam, paima tarangkat ahu hunbam.” Nini si Elisa ma, “Dua lompit ma namin hun bani tonduymu sogop hu bangku.”

¹⁰ Nini si Elias ma mambalosisi, “Na borat tumang do na pinindomai; ai pe anggo iidah ho do tarboan ahu hun lambungmu, sai dapot ho ma ai, tapi anggo seng iidah ho ahu, seng dapot ho ai.”

¹¹ Jadi sanggah na mardalan ai sidea anjaha marsahapi, tonggor ma, roh ma sada gareta apuy pakon huda apuy, manirang sidea na dua. Jadi naik ma si Elias hu nagori atas marhitei halisungsung.

¹² Dob iidah si Elisa ai, dilo-dilo ma ia, “Bapa! bapa! Gareta ni Israel pakon siajak hudani!” Dob ai seng iidah be ia. Dob ai ibuat ma hiouni anjaha iribaki ma ai bolah dua.

¹³ Ibuat ma mantel ni si Elias na madabuh ai hu bani; mulak ma ia, anjaha jongjong ma ia i topi ni Bah Jordan.

¹⁴ Dob ai ibuat ma mantel ni si Elias na dob madabuh ai, ilibaskon ma ai hu bani bah ai, anjaha nini ma, “Ija do nani Jahowa, Naibata ni si Elias?” Jadi dob ilibas bah ai manilah ma bah ai hu bornoh pakon hu buntu; jadi mandipar ma si Elisa.

¹⁵ Jadi dob iidah susian ni nabi na i Jeriko hun dipar bah ai na masa ai, nini sidea ma, “Domma sogop tonduy ni si Elias hu bani si Elisa.” Dob ai ialo-alo sidea ma ia, anjaha manrogop hu tanoh laho manombahsi.

¹⁶ Dob ai nini sidea ma hu bani si Elisa, “Tonggor ma, adong do na mangkasomani juakjuakmu on lima puluh halak na gogoh; mahua ma na suruh sidea mangindahi tuanmu; ra iboan Tonduy ni Jahowa do ia, anjaha idabuhkan ia use i atas ni sada dolog atap bani sada habungan.” Tapi nini si Elisa ma, “Ulang suruh nasiam sidea.”

¹⁷ Tapi halani sai iompot sidea mangelek-eleksi, jadi nini ma, “Suruh nasiam ma sidea!” Jadi isuruh sidea ma lima puluh halak mangindahi tolu ari dokahni, tapi seng jumpah sidea ia.

¹⁸ Jadi sanggah na mulak ai sidea hu bani, si Elisa i Jeriko ope ia ijia tading, nini ma hu bani sidea, “Ai lang domma huhatahon hinan bani nasiam, ‘Ulang suruh nasiam sidea laho?’”

Halongangan na Masa bani Bah na i Jeriko

¹⁹ Dob ai nini dalahi na i huta ai ma bani si Elisa, “Tonggor ma, dear do namin parianan ni huta on, songon na boi idahon ni tuannami; tapi lang dear bah, anjaha seng lambut tanoh on.”

²⁰ Nini ma, “Boan nasiam ma hu bangku sada pinggan na bayu, nahkon nasiam ma hubagas garam.” Jadi iboan sidea ma hu bani pinggan ai.

²¹ Dob ai laho ma ia hu sumbul ni bah ai, anjaha iuseihon ma garam ai hujai, lanjar nini ma, “Sonon do hata ni Jahowa, domma dear bah on Hubahen; seng roh be hamateian barang na saburan rudang hunjon.”

²² Jadi dear ma bah ai inumon ronsi sadari on, romban hu bani hata na hinatahon ni si Elisa.

Dakdanak na Jungkat i Betel

²³ Dob ai tangkog ma si Elisa hunjai laho hu Betel; jadi sanggah na tangkog ai ia hu huta ai, luar ma

dakdanak hun huta ai manreheisi, nini sidea ma, “Tangkog ma ho, alo palpal ulu! Tangkog ma ho, alo palpal ulu!”

²⁴ Dob ai marhusor ma si Elisa; jadi dob iidah sidea, ipapai ma sidea marhitei goran ni Jahowa. Dob ai luar ma dua gipul hun harangan ai, anjaha iparsilbak ma ompat puluh dua halak hun bani dakdanak ai.

²⁵ Hunjai laho ma ia hu Dolog Karmel, anjaha hunjai mulak ma ia hu Samaria.

Raja Joram Marporang dompak Halak Moab

3 ¹ Ia si Joram, anak ni si Ahab, bangkit ma gabe raja manggomgom Israel i Samaria pasapuluh-ualuhtahunkon dob gabe raja si Josafat i Juda, anjaha sapuluh dua tahun do ia manrajai.

² Ihorjahon do sogam ni uhur ni Jahowa, tapi seng songon bapani barang inangni; ai ipadaoh do ganagana Baal, na pinauli ni bapani hinan.

³ Tapi longkot do uhurni hu bani dousa ni si Jerobeam, anak ni si Nebat, na mambahen Israel mardousa; seng surut ia hunjai.

⁴ Ia si Mesa, raja ni Moab, sipiara biri-biri do; maningon galaronni do utang sombah hu bani raja ni Israel ibagas satahun saratus ribu anak ni biri-biri pakon ambulu ni saratus ribu biri-biri tunggal.

⁵ Tapi dob matei si Ahab marbalik ma raja ni halak Moab hun bani raja ni halak Israel.

⁶ Halani ai luar ma ijia Raja Joram hun Samaria, jadi iharah ma ganup halak Israel.

⁷ Anjaha isuruh ma suruhanni marayak si Josafat, raja ni Juda, nini ma hu bani, “Domma marbalik raja ni Moab hun bangku; ra do ham laho pakon ahu mamorang Moab?” Jadi nini ma, “Ra do ahu, ia sonin bangsamu sonai do bangsangku, ia sonin hudamu sonai do homa hudangku.”

⁸ Dob ai nini ma, “Hun dalan ja do hita tangkog?” Balos ni si Joram, “Hun dalan na i halimisan Edom.”

⁹ Jadi bingkak ma raja ni Israel, pakon raja ni Juda ampa raja ni Edom. Jadi dob pitu ari sidea mardalan na maringgot ai, hurangan bah ma bala ai pakon pinahan na mangirikkon sidea ai.

¹⁰ Dob ai nini raja ni Israel ma, “Domma idilo Jahowa hape raja na tolu on hujon laho mangondoskon sidea hubagas tangan ni halak Moab.”

¹¹ Jadi nini si Josafat ma, “Ai seng dong nabi ni Jahowa ijon, ase sungkun hita Jahowa marhiteihonsi?” Jadi ibalosi sahalak juakjuak ni Raja Israel ma ia, “Ijon do si Elisa, anak ni si Safat, siuseihon bah hu bani tangan ni si Elias.”

¹² Nini si Josafat ma, “Bani do tongon hata ni Jahowa.” Jadi rap tuad ma raja ni Israel, si Josafat pakon raja ni Edom marayaksi.

¹³ Jadi nini si Elisa ma hu bani raja ni Israel, “Aha pardomuanku bam? Laho ma ham marayak nabi ni amangmu pakon inangmu.” Tapi nini raja ni Israel

ma hu bani, “Ulang sonai, ai Jahowa do na mandilo raja na tolu on laho mangondoskon sidea hubagas tangan ni Moab.”

¹⁴ Dob ai nini si Elisa ma, “Songon sintongni manggoluh Jahowa Zebaot, anjaha ahu jongjong marugas i lobei-Ni, ambit ulang si Josafat, raja ni Juda na hutatap, seng tataponku barang na kawahkononku ham.

¹⁵ On pe, boan nasiam ma bangku sahalak parhusapi.” Jadi sanggah na marhusapi ai parhusapi ai, sogop ma tangan ni Jahowa hu bani.

¹⁶ Jadi nini ma, “Sonon do hata ni Jahowa, ‘Hurak nasiam ma lubang i habungan on!’

¹⁷ Ai sonon do hata ni Jahowa, Seng idahon nasiam roh udan barang logou, tapi maningon gok bah do habungan on, ase minum nasiam pakon bala nasiam ampa pinahan nasiam.

¹⁸ Maotiktu ope ai, nini uhur ni Jahowa; ondoskonon-Ni ope halak Moab ai hubagas tangan nasiam.

¹⁹ Maningon patundukon nasiam sagala huta na pinatoguh anjaha maningon robohon nasiam do sagala hayu na marbuah; maningon tambusan nasiam do haganup bah tubuh, anjaha tarulang bahen nasiam ganup juma na lambutan marhitei batu.

²⁰ Patarni ai, hira-hira panorang panggalangonkon bani galangan sipanganon, tonggor ma, roh ma bah hun Edom, gabe gok bah ma tanoh ai.”

²¹ Dob ibogei ganup halak Moab barita ai, na dob tangkog raja-raja ai laho marporang dompak sidea, mintor iharah ma sagala na dob boi mamboan sinjata, hun bani siposonan das hu bani sitorasan, anjaha ipaodor ma sidea jongjong i parbalogan.

²² Jadi sanggah puho sidea girah sogod, anjaha marsinalsal mata ni ari bani bah ai, iidah halak Moab ma bah i lobei ni sidea, gerger songon daroh.

²³ Jadi nini sidea ma, “Daroh do ai; tontu na marsiporangan do raja-raja ai, anjaha marsibunuhan. Halani ai, alo halak Moab, ayob ma taban-taban ai!”

²⁴ Tapi daskonsi sidea hu parsaranan ni halak Israel, luar ma halak Israel anjaha idorab ma sidea, gabe maporus ma sidea, anjaha inunut mambunuhi halak Moab ai.

²⁵ Iparseda sidea ma huta-huta, anjaha hu bani sagala juma na lambutan ipanggijigkon sidea bei ma batu, ronsi rungkub ai; itambusi sidea do sagala bah tubuh, anjaha iroboh sagala hayu na marbuah; pitah huta Kir-Hereset mando na tading martembok. Roh ma hujai parumbalang manginggoti lanjar manaluhon ai.

²⁶ Jadi dob iidah raja ni Moab, na so boi be ia monang, iharah ma pitu ratus halak siparpodang mandorab raja ni halak Edom, tapi seng tolap.

²⁷ Jadi ibuat ma anak bunga tubuhn, sirajahonon holi manggantihsi, gabe igalangkon ma ia bahen galangan situtungon i atas ni tembok ai. Jadi sogop ma songgot banggal bani Israel; surut ma sidea hun bani, anjaha mulak hu tanohni.

Minak ni Puang-puang na Mabalu

4 ¹ Dob ai roh ma sada naboru, parinangon ni sada susian ni nabi-nabi mangadu-adu hu bani si Elisa, “Domma matei juakjuakmu, paramangonku; anjaha ibotoh ham do, marhabiaran do juakjuakmu ondi bani Jahowa. Hape roh ma siparidou ai laho mambuat anakku na dua ai gabe jabolonni.”

² Jadi nini si Elisa ma hu bani, “Aha ma bahenonku bamu? Patugah ham ma bangku, atap aha dong bamu i rumah!” Nini ma, “Seng dong bani jabolonmu naboru on i rumah, sobali sada gusi na marisi minak otik.”

³ Dob ai nini si Elisa ma, “Laho ma ham mangindo hudon na lumei hun bani hasoman na dohorhon rumahmu, tapi ulang maetektu.

⁴ Masuk ma ham hu rumahmu rap pakon anakmu, anjaha tutup ham ma labah ai i pudimu, dob ai

useihon ham ma minak ai hubagas ganup hudon ai; dob gok sada, palambung ham ma ai.”

⁵ Dob ai laho ma naboru ai hun bani, anjaha ioruk ma labah ai i pudi ni pakon i pudi ni anakni ai; ia do mangisi hudon ai anjaha anakni ai mamberei hudon ai.

⁶ Jadi dob gok hudon ai ganup, nini ma hu bani anakni ai, “Boan hujon sada nari hudon in! Tapi nini ma hu bani, ‘Seng dong be hudon na legan.’ Jadi maronti ma minak ai manjalir.”

⁷ Dob ai laho ma naboru ai patugahkon ai hu bani halak ni Naibata ai, jadi nini ma, “Laho ma ham, jual ma minak ai, anjaha galar ma utangmu ai; na lobih ai bahen hagoluhanmu pakon hagoluhan ni anakmu ma ai.”

Naboru na hun Sunem pakon Anakni

⁸ Bani na sadari laho ma si Elisa hu Sunem; adong do ijai marianan sada naboru na bayak, na mangarahkonsi mangan. Barang piga hali montas ia hunjai, sai tuluy do ia hunjai laho mangan.

⁹ Jadi nini ma hu bani paramangonni, “Tonggor ma, huahap halak na ma pansing ni Naibata do halak ai, na tongtong tuluy hu banta.

¹⁰ Bahen hita ma bani sada kamar pardatas, na etek-etek, na mardingding papan, anjaha nahkon hita ma bani ijai sada podoman, meja, kursi ampa lampu, ase anggo tuluy ia hu banta, boi ia marianan ijai.”

¹¹ Bani na sadari roh ma ia hujai; masuk ma ia hu kamar pardatas ai, anjaha ipatibal ma bani laho pahosahkon.

¹² Nini ma hu bani si Gehasi, suruh suruhanni ai, “Dilo ma naboru par-Sunem ai!” Jadi dob idilo jongjong ma ia i lobei ni.

¹³ Ai domma ihatahon hinan hu bani si Gehasi, “Hatahon ma bani, tonggor ma, domma pala sonin pangkalojahonmu bannami, aha ma boi bahenonku balosni ai bamu? Adong do siapitan pasal ham i lobei ni raja in atap i lobei ni pambobai ni balani?” Jadi nini ma mambalosisi, “Sonang do marianan i tengah-tengah ni bangsangku ahu.”

¹⁴ Dob ai nini ma, “Aha do na talup bahenon bani?” Jadi nini si Gehasi ma, “Seng dong anakni, anjaha domma matua paramangonni.”

¹⁵ Nini ma, “Dilo ma ia!” Jadi dob idilo ia, jongjong ma ia i labah.

¹⁶ Dob ai nini si Elisa ma, “Sonon tahun in, adong ma anak siurdo-urdohononmu.” Jadi nini ma mambalosi, “Ham tuan, halak ni Naibata, ulang ma ladungi jabolonmu naboru on!”

¹⁷ Dob ai boratan rumah ma naboru ai, anjaha itubuhkon ma sada anak bani panorangni bani tahun na mangihut hujai, songon na dob hinatahon ni si Elisa hinan hu bani.

¹⁸ Dob magodang dakdanak ai, laho ma ia bani na sadari marayak bapani hu parpariamaan.

¹⁹ Jadi nini ma hu bani bapani, “Ulungku! Ulungku!” Nini bapani ai ma hu bani sada suruh-suruhanni, “Boan ma ia bani inangni.”

²⁰ Jadi iombah ma ia mamboansi hu bani inangni; hundul ma ia bani abingan ni inangni ronsi tongah ari, dob ai matei ma ia.

²¹ Dob ai iboan ma ia hu atas, anjaha itibalhon ma ia bani podoman ni halak ni Naibata ai, ioruk ma labah ai, dob ai luar ma ia.

²² Idilo ma paramangonni, anjaha nini ma, “Suruh ham ma bangku sahalak suruhan, ambahni ai sada halode boru-boru, ase podas ahu laho marayak halak ni Naibata, dob ai mulak use.”

²³ Nini paramangonni ai ma, “Mase ma laho ham marayaksi sadari on? Ai seng poltak ni bulan barang ari Sabat sadari on.” Nini ma mambalosi, “Tenger ma uhurmu!”

²⁴ Dob ai ipasang ma palana ni halode boru-boru ai, anjaha nini ma hu bani suruh-suruhanni, “Bosik ma, ulang marsaran-saran, anggo seng ahu mangkatahon bam.”

²⁵ Jadi bingkat ma sidea, anjaha das hu bani halak ni Naibata ai i Dolog Karmel. Jadi dob iidah halak ni Naibata ai ia roh, nini ma hu bani si Gehasi, suruh-suruhanni ai, “Tonggor ma, andai ma roh naboru par-Sunem ai.

²⁶ On pe, marlintun ma ho manjumpahkonsi, anjaha hatahon ma hu bani, ‘Horas do ham? Horas

do paramangonmu? Horas do dakdanak ai?" Jadi nini ma mambalosi, "Horas do."

²⁷ Jadi dob das ia hu dolog ai hu bani halak ni Naibata, idahop ma naheini, tapi roh ma si Gehasi manjuarhonsi. Jadi nini halak ni Naibata ai ma, "Paturut ma ia, ai pusok tumang do uhurni; iponopkon Naibata do ai hun bangku, seng martugah-tugah la pasal ai bangku."

²⁸ Dob ai nini naboru ai ma, "Ai adong hupangindo anak hun bani tuannami? Ai lang huhatahon hinan do, 'Ulang ma oto-otoi ham ahu!'"

²⁹ Nini ma hu bani si Gehasi, "Gonditkon ma gonditmu, jolom ma tungkotku ibagas tanganmu, anjaha laho ma ho hujai. Anggo pajumpah ho pakon halak ulang balosi, anjaha tampeihon ma tungkotkon bani bohi ni dakdanak ai!"

³⁰ Tapi nini inang ni dakdanak ai ma, "Songon sintongni manggoluh Jahowa, anjaha manggoluh pakon hosahmu, seng anjai tadingkononku ham." Jadi bingkat ma si Elisa mangirikkonsi.

³¹ I lobei si Gehasi ma sidea, anjaha itampeihon ma tungkot ai bani bohi ni dakdanak ai, tapi seng dong sora barang tanda paboa na manggoluh ia. Jadi mulak ma ia manjumpahkon si Elisa laho patugahkon ai bani, nini ma, "Seng bodak dakdanak ai!"

³² Dob masuk si Elisa hu rumah ai, iidah ma dakdanak ai tibal matei i podomanni.

³³ Masuk ma ia, anjaha ioruk ma labah i pudi ni sidea na dua, anjaha martonggo ma ia hu bani Jahowa.

³⁴ Dob ai ipapodom ma dirini i atas ni dakdanak ai, ibahen ma pamanganni hu atas pamangan ni dakdanak ai, matani hu atas matani, tanganni hu atas ni tanganni; jadi sanggah na ipapodom dirini hu atasni gabe mamungkah malas ma angkula ni dakdanak ai.

³⁵ Dob ai jongjong ma ia, anjaha mardalan hujai hujon i rumah ai, dob tangkog ia use hu atas ipaunduk ma dirini bani, marbarsi ma dakdanak ai pitu hali lanjar ipabodak ma matani.

³⁶ Idilo si Elisa ma si Gehasi, anjaha nini ma hu bani, “Dilo ma naboru par Sunem in!” Jadi idilo ma ia. Daskonsi ia hu bani nini ma, “Na, togu ham ma anakmu on.”

³⁷ Roh ma ia, manrogop ma ia bai naheini unduk das hu tanoh; dob ai itogu ma dakdanak ai, anjaha laho ma ia hu darat.

Lowoh na So Sipanganon gabe Tarpangan

³⁸ Dob ai mulak ma use si Elisa hu Gilgal, tudu sanggah masa lohei i nagori ai. Jadi sanggah na hundul-hundul ai susian ni nabi ai i lobei ni, nini ma hu bani suruh-suruhanni ai, “Hodohon ma hudon na banggal ai bani apuy ai, anjaha lompah ma lowoh bani susian ni nabi on.”

³⁹ Dob ai laho ma sada halak hu juma manalong lowoh gabe jumpahsi ma andor ni ansimun harangan, jadi iputiki ma hunjai ansimun harangan, gok hiouni; dob mulak ia, iirisi ma ai hubagas hudon panlompahan ai.

⁴⁰ Jadi isonduki ma ai bahen panganon ni halak ai. Tapi sanggah mangankon na nilompah ai sidea, nini ma doruh-doruh, “Ham halak ni Naibata, hamateian do hape ibagas hudon on! Seng tarpangan sidea ai.”

⁴¹ Tapi nini si Elisa ma, “Boan nasiam ma hujon nitak!” Itirtirhon ma ai hubagas hudon ai, anjaha nini ma, “Sonduki ma ai hu bani halak ai, ase mangan sidea!” Anjaha seng dong be mara ibagas hudon ai.

Itamuei Saratus Halak

⁴² Adong ma sada halak na roh hun Baal-Salisa, mamboan bani halak ni Naibata ai ruti limbuah, dua puluh hibul ruti topung gandum pakon buah gandum na pinalumat ibagas sumpit. Dob ai nini si Elisa ma, “Bere ma in bani halak na mabuei in, ase mangan sidea.”

⁴³ Nini suruh-suruhanni ai ma mambalosi, “Naha ma parpangidangu on bani saratus halak?” Tapi nini ma, “Bere ma in hu bani sidea, ase mangan sidea, ai sonon do hata ni Jahowa, ‘Maningon mangan do sidea, anjaha adong ope teba.’”

⁴⁴ lidangkon ma ai hu bani sidea. Mangan ma sidea anjaha adong ope teba, romban hu bani hata ni Jahowa.

Parmalum ni si Naeman na Gadamon ai

5 ¹ Ia si Naeman, pambobai ni bala ni raja ni halak Aram, halak na sangap do ia i lobei ni tuanni anjaha marmulia tumang, ai itumpakkon Jahowa do hamonangan bani halak Aram, marhiteihonsi. Sada puanglima na tarmurmur do ia, tapi gadamon do ia.

² Sahali sanggah laho halak Aram manrampas, iboan sidea ma sahalak naboru na etek-etek hun tanoh Israel, gabe ibahen ma ia suruh-suruhan ni parinangon ni si Naeman.

³ Nini naboru ai ma hu bani parinangon ni tuanni ai, “Ambit i lambung ni nabi na i Samaria ai tuannami, sai na malum do bahenonni gadam ai.”

⁴ Dob ai roh ma si Naeman patugahkon barita ai hu bani tuanni, nini ma, “Sonon do hata ni naboru na hun tanoh Israel ai.”

⁵ Jadi nini raja Aram ai ma, “Antong bingkat ma ham, hutongos pe sada surat hu bani Raja Israel.” Dob ai bingkat ma ia, iboan ma sepuluh talenta pirak pakon onom ribu sekel omas ampa sepuluh baju na marharga.

⁶ Dob ai ipadas ma surat ai bani Raja Israel, sonon do hatani, “Anggo das ma surat on bamu, botoh ham ma, na husuruh do marayak ham si

Naeman juakjuakkon, ase pamalumonmu ia hun bani gadamni.”

⁷Jadi dob ibasa Raja Israel surat ai, irigati ma pakeianni anjaha nini ma, “Ai Naibata ahu, na boi pamateihon atap pagoluhkon, ase ihatahon raja ai ahu pamalumkon halak on hun bani gadamni? Halani ai botoh anjaha tonggor nasiam ma, na mangindahi paringoran do ia hun bangku.”

⁸Tapi dob ibogei si Elisa, halak ni Naibata, na dob irigati raja ni Israel pakeianni, isuruh ma suruhanni hu bani raja ai mangkatahon, “Mase irigati ham pakeanmu? Mahua roh ma namin ia hu bangku, ase ibotoh na adong do sada nabi i Israel.”

⁹Jadi roh ma si Naeman rap pakon hudani ampa garetani, anjaha marsaran ma ia i lobei ni labah ni si Elisa.

¹⁰Dob ai isuruh si Elisa ma suruhanni mangkatahon hu bani, “Laho ma ham maridi pitu hali i Bah Jordan, ase suang dagingmu anjaha pansing ham.”

¹¹Jadi manringis ma si Naeman, misir ma ia anjaha nini ma, “Tonggor ma, huagan do luar ia manjumpahkon ahu anjaha jongjong lanjar idilo goran ni Jahowa Naibatani, anjaha iawas-awaskon tanganni bani naborit on gabe malum gadam on.

¹²Ai lang dearan do Bah Abana pakon Parpar na i Damaskus ase haganup bah na i Israel? Ai lang tarbahen ahu maridi ijai ase pansing ahu?” Jadi marhusor ma ia lanjar laho ibagas ringis.

¹³ Roh ma juakjuakni mandohorisi anjaha nini ma, “Bapa, ambit ihatahon nabi ai ham mangkorjahon atap aha na borat, ai seng bahenonmu ai? Samintolah ma na hinatahonni ai bamu, ‘Maridi ma ham, ase pansing ham!’”

¹⁴ Jadi tuad ma ia, anjaha isornobkon ma dirini pitu hali hubagas Jordan, romban hu bani hata ni halak ni Naibata ai, gabe suang ma dagingni songon daging ni dakdanak na etek-etek, anjaha pansing ma ia.

¹⁵ Dob ai mulak ma ia hu bani halak ni Naibata ai, pakon ganup juakjuakni; daskonsi ia jongjong ma ia i lobei ni, anjaha nini ma, “Tonggor ma, sonari ma hubotoh, na so adong naibata i sab tanoh on, sobali i Israel. On pe, jalo ham ma sibere-bere on hun bani juakjuakmu on.”

¹⁶ Tapi nini ma, “Songon sintongni manggoluh Jahowa, anjaha ahu jongjong marugas i lobei-Ni, seng ra ahu manjalo atap aha pe.” lelek-elek ma ia ase ijalo ai, tapi manjua do ia.

¹⁷ Dob ai nini si Naeman ma, “Anggo lang, mahua na bere ma bani juakjuakmu on tanoh boratan dua halode, ai seng ra be jabolonmu on hulobeian on manggalangkon galangan sisayaton hu bani naibata na legan, sobali hu bani Jahowa.

¹⁸ Pitah ibagas pahara on, sai marpangulaki ma uhur ni Jahowa mangidah juakjuakmu on. Anggo masuk tuanku hu rumah ni Rimon laho marsombah

ijai, anjaha ipatatangkon dirini hu bani tanganku, anjaha manrogop pakon ahu i rumah ni Rimon, sai marpangulaki ma uhur ni Jahowa mangidah juakjuakmu on ibagas pahara on.”

¹⁹ Dob ai nini si Elisa ma hu bani, “Laho ma ham ibagas damei!” Tapi dob misir ia, tar daoh otik,

²⁰ nini si Gehasi, suruh-suruhan ni si Elisa, halak ni Naibata ai ma ibagas uhurni, “Tonggor ma, ihaholongi tuanku si Elisa do si Naeman halak Aram ai, marhitei na so jinaloni ai hun bani aha na binoanni ai. Songon sintong ni manggoluh Jahowa, huayaki ma ia, ase hujalo hun bani otik.”

²¹ Jadi iayaki si Gehasi ma si Naeman. Dob iidah si Naeman halak na mangayakisi ai, turun ma ia hun bani garetani manjumpahkonsi, lanjar nini ma, “Naha damei do?”

²² Nini ma mambalosi, “Damei do! Na isuruh tuanku do ahu mangkatahon bamu, ‘Tonggor ma, na roh do tongkin on hu bangku dua anak garama, susian ni nabi hun Dolog Efraim; mahua bere ham ma bani sidea sada talenta pirak pakon dua lambar pakeian na marharga.’”

²³ Nini si Naeman ma, “Anggo dear uhurmu, na ma dua talenta.” Sai ielek-elek do ia; dob ai inahkon ma dua talenta pirak hubagas dua ranjut-ranjut pakon dua lambar pakeian na marharga, anjaha ibere ma ai boanon ni dua juakjuakni, jadi iusung sidea ma ai i lobei ni si Gehasi.

²⁴ Jadi dob das ia hu buntu-buntu ai, ibuat ma ai hun bani sidea, anjaha inahkon ma ai hubagas sada rumah; isuruh ma halak ai mulak, jadi laho ma sidea.

²⁵ Dob ai masuk ma si Gehasi, anjaha jongjong i lobei ni tuanni, jadi nini si Elisa ma hu bani, “Roh hunja ho Gehasi?” Nini ma mambalosi, “Roh hunja pe lang.”

²⁶ Tapi nini ma hu bani, “Ai lang rap pakon ho do ahu ibagas tonduy sanggah tuad halak ai hun bani garetani laho manjumpahkon ho? Ari panjaloonkon duit pakon hiou ma on gakni, nini uhurmu, laho mamboli pohon jetun, pohon anggur atap biri-biri, lembu atap jabolon dalahi ampa jabolon naboru?

²⁷ Halani ai longkot hubam pakon hu bani ginomparmu ma gadam ni si Naeman ronsi sadakah ni dokahni.” Dob ai luar ma si Gehasi hun lobei ni, domma gadamon lopak songon salju.

Tangkei na Mumbang

6 ¹ Dob ai nini susian ni nabi-nabi ai ma hu bani si Elisa, “Tonggor ma, ianannami na i lobeimu on, mapisottu do in bannami.

² Lopas ham ma hanami laho hu Bah Jordan sihol mangalop tiang sada bei hunjai, anjaha lopas ham ma hanami padearhon ianan bannami.” Jadi nini ma mambalosi, “Laho ma nasiam!”

³ Dob ai nini sada halak ma, “Mahua dihut ma ham laho rap pakon juakjuakmu on.” Nini ma mambalosi, “Dihut pe ahu.”

⁴ Jadi laho ma ia rap pakon sidea. Daskonsi sidea hu Jordan, iroboh sidea ma hayu.

⁵ Sanggah manroboh hayu sahalak hun bani sidea, madabuh ma mata ni tangkei ai hubagas bah, gabe mandoruhi ma ia, nini ma, “Ham tuannami! Na pininjam do ai.”

⁶ Tapi nini halak ni Naibata ai ma, “Huja do ai madabuh?” Dob ai ipatuduhkon ma ianan ai bani, iponggol ma sada hayu anjaha igijingkon ma ai hujai gabe mumbang ma bosi ai.

⁷ Dob ai nini ma, “Buat ma ai!” Jadi idurdurhon ma tanganni laho mambuat ai.

Pambahenan ni si Elisa Mangimbang Halak Aram

⁸ Bani na sahali sanggah marporang raja ni halak Aram pakon Israel, manriah ma ia pakon juakjuakni, nini ma, “Bani ianan na ijai ai ma nasiam manggompangi sidea.”

⁹ Tapi isuruh halak ni Naibata ai ma na palumbahon raja ni Israel, nini ma, “Jaga ulang montas ham hun bani ianan ai, ai ijai do halak Aram manggompangi.”

¹⁰ Dob ai isuruh raja ni Israel ma balani bani ianan, na nilumbahon ni halak ni Naibata ai bani. Sonai ma parlumbani bani, gabe maluah ia, seng pitah sahali barang dua hali tumang.

¹¹ Jadi manggila ma raja ni Aram halani ai; idilo ma juakjuakni anjaha nini ma hu bani sidea, “Seng ra nasiam patugahkon hu bangku, atap ise hun banta on na hampit Raja Israel?”

¹² Dob ai nini sahalak hun bani juakjuakni ai ma mambalosi, “Seng dong tuannami anjaha rajanami; tapi si Elisa, nabi na i Israel ai do na patugahkon hu bani raja ni Israel ganup hata na hinatahonmu ibagas kamar podomanmu.”

¹³ Nini raja ai ma, “Laho anjaha pindahi nasiam ma, barang ija do ia, ase husuruh halak na manangkapsi.” Dong ma halak na patugahkon bani, “Tonggor ma, i Dotan do ia.”

¹⁴ Dob ai ipabingkat raja ai ma hujai huda, garetapakon buei bala. Daskonsi sidea bornginni ai, iinggoti sidea ma huta ai.

¹⁵ Jadi sanggah na puho girah sogod parhorja ni halak ni Naibata ai laho hu darat namin, tonggor ma, iinggoti buei bala marhasoman huda pakon garetapakon huta ai. Nini juakjuakni ai ma hu bani, “Ham tuannami, aha ma sibahenonnam?”

¹⁶ Tapi nini ma, “Ulang ho mabiar, ai bueinan do na mangkasomani hita hun bani na mangkasomani sidea.”

¹⁷ Dob ai martonggo ma si Elisa, nini ma, “Ham Jahowa, sai patonggor ma mata ni juakjuakkon, ase torang marpangidah.” Jadi ipatonggor Jahowa ma

mata ni juakjuak ai, gabe iidah ma, gok do dolog ai bani huda ampa gareta apuy inggot si Elisa.

¹⁸ Jadi sanggah tuad sidea manjumpahkonsi, martonggo ma si Elisa hu bani Jahowa, nini ma, “Bahen Ham ma pitung mata ni bangsa on!” Jadi pitung ma mata ni sidea ibahen Jahowa, romban hu bani hata ni si Elisa.

¹⁹ Dob ai nini si Elisa ma hu bani sidea, “Seng on dalan ai, anjaha seng in huta ai, irikkon nasiam ma ahu, ase huarahkon nasiam hu bani halak na pinindahan nasiam ai.” Jadi iarahkon ma sidea hu huta Samaria.

²⁰ Dob das sidea hu Samaria, nini si Elisa ma, “Ham Jahowa, buha Ham ma mata ni halak on, ase marpangidah sidea; anjaha tonggor ma, i tengah-tengah ni Samaria do sidea.”

²¹ Dob iidah raja ni Israel sidea, nini ma hu bani si Elisa, “Hubunuh ma sidea, bapa?”

²² Nini ma mambalosi, “Seng bulih bunuhonmu sidea. Mintor bunuhonmu ma halak na tinabanmu marhitei podangmu barang panahmu? Pasirsir ham ma ruti pakon bah bani sidea, ase mangan anjaha minum sidea, ase mulak sidea hu bani tuan ni sidea.”

²³ Dob ai ipasirsir raja ai ma bani sidea parpanganon bangga; anjaha dob mangan pakon minum sidea, isuruh ma sidea mulak hu bani tuan ni sidea. Olat

ni ai seng roh be halak Aram manrampok hu tanoh Israel.

Hona Ondam si Elisa Sihol Bunuhon ni Raja ai

²⁴ I pudi ni na masa ai ipatumpu si Benhadad, raja ni Aram ma ganup balani; tangkog ma ia, anjaha ihubu ma Samaria.

²⁵ Jadi masa ma lohei maningting i Samaria, sanggah pangkubun ai, gabe marharga ma sada ulu ni halode ualuh puluh sekel pirak, anjaha saparompat tumba indahan ni kuhuy lima puluh sekel pirak.

²⁶ Jadi sanggah mardalan-dalan sahali raja ni Israel i atas tembok, doruh-doruh ma sahalak naboru hu bani raja ai, nini ma, “Urupi ham ma ahu, rajanami.”

²⁷ Tapi nini ma mambalosi, “Anggo seng Jahowa mangurupi ham, hunja ma tarbahren ahu mangurupi ham? Hun pardogeian barang hun pangilangan anggur?”

²⁸ Ambahni ai isungkun raja ai ma ia, “Aha bamu?” Nini ma mambalosi, “Nini naboru ai do bangku, ‘Bere ma anakmin, ase rap pangan hita sadari on, patar pangan hita pe anakku.’

²⁹ Halani ai ilompah hanami ma anakku, anjaha ipangan hanami ma ia. Patarni ai ningku ma hu bani, ‘Bere ma anakmin, ase pangan hita!’ Tapi iponopkon do anakni ai.”

³⁰ Jadi dob ibogei raja ai hata ni naboru ai, irigati ma pakeianni, sanggah na mardalan-dalan ia i atas tembok ai. lidah bangsa ai ma, adong do hape pakeian guni bani angkulani hampit bagas.

³¹ Anjaha nini ma, “Maningon sonai ma bahenon ni Naibata hu bangku anjaha lobih ope, anggo totap ope ulu ni si Elisa, anak ni si Safat, bani abarani sadari on.”

³² Tapi hundul-hundul do si Elisa ibagas rumahni, anjaha partua-partua ai hundul i lambungni. Jadi isuruh raja ai ma sada halak hun lambungni marayaksi. Tapi sanggah seng das ope suruhan ai hu bani si Elisa, domma ihatahon hinan hu bani partua-partua ai, “Seng ibotoh nasiam, na dob sinuruh ni pamunuh ai do suruhanni laho manampul ulungku? On pe anggo roh suruhan ai, oruk nasiam ma labah in, anjaha onjar nasiam ma ia mulak bani labah in. Ai lang domma tarbogei gurojob ni nahei ni tuanni hun pudini?”

³³ Sanggah na marsahapi ai ope suruhan ai pakon sidea, tonggor ma, roh ma homa raja ai tuad hu bani, anjaha nini ma, “Tonggor ma, marharorohan hun bani Jahowa do hamagouan on! Benaha be marnalom ni uhur ahu bani Jahowa?”

Ilumbahon si Elisa Urah Sibolion

7 ¹ Tapi nini si Elisa ma, “Tangar nasiam ma hata ni Jahowa! Sonon do hata ni Jahowa, ‘Sonon

patar, marharga sasekel ma satapongan topung, anjaha dua tapongan andolei sada sekel homa i horbangan ni Samaria.”

² Dob ai nini puanglima sipanrabin raja ai ma hu bani halak ni Naibata ai, “Tonggor ma, porini pe ibahen Jahowa jandela i langit, naha ma bulih jadi ai?” Tapi nini ma, “Idahonmu do ai marhitei panonggormu, tapi seng dihut ho mangankon ai.”

Maporus Halak Aram

³ Adong ma ompat halak na gadamon i lambung horbangan ni huta ai. Nini sidea ma samah sidea, “Aha ma gunani ijon hita ronsi matei hita?

⁴ Porini masuk pe hita hu huta, lohei do masa i huta in, matei do holi hita ijai, anjaha porini soh hita ijon, matei do hita homa. Halani ai laho ma hita hu parsaranan ni halak Aram; anggo ipaturut sidea hita manggoluh, jadi manggoluh ma hita; anggo ibunuh sidea hita, matei pe dear.”

⁵ Samun ari bingkat ma sidea hu parsaranan ni halak Aram, tapi daskonsi sidea hu topi ni parsaranan ni halak Aram ai, tonggor ma, sahalak pe lang dong ijai.

⁶ Ai domma ipabogeihon Tuhan in hu bani bala ni halak Aram sora ni gareta pakon huda, sora ni buei bala, gabe nini sidea ma samah sidea, “Tonggor ma, domma iupahi Raja Israel mangimbang hita raja-

raja ni halak Het pakon raja-raja ni halak Masir laho mandorab hita.”

⁷ Halani ai laho ma sidea maporus sanggah samun ari, anjaha itadingkon sidea do lampolampo ni sidea, hudani, halodeni pakon parsaranan ai songon haadongonni hinan, maporus ma sidea marsipaluah hosahni bei.

⁸ Jadi dob masuk na gadamon ai hu topi ni parsaranan ai, imasuki sidea ma sada lampolampo ai, mangan ma sidea anjaha minum, ibuat sidea ma pirak, omas pakon pakeian, anjaha laho ma sidea mamonopkon ai; dob ai mulak ma sidea, imasuki sidea ma lampolampo na legan, ibuat sidea ma ugas-ugas hunjai, dob ai laho ma sidea mamonopkon ai.

⁹ Dob sonai nini sidea ma samah sidea, “Seng patut sonin pambahenta. Ari ni barita na madear do ari on. Anggo sip hita ronsi patar, tontu marsalah ma hita ijai, halani ai laho ma hita mamboan barita ai hu rumah ni raja ai.”

¹⁰ Jadi dob das sidea hu huta ai, dilo-dilo ma sidea hu bani sijaga horbangan ni huta ai, anjaha ibaritahon sidea ma hu bani, nini ma, “Domma das hanami hu parsaranan ni halak Aram, hape tonggor ma, seng dong sahalak jolma taridah, barang sora ni jolma tarboge ijai, huda ampa halode tambat do ijai, anjaha lampolampo ai pe songon haadonganni hinan.”

¹¹ Dob ai idilohon sijaga horbangan ai ma barita ai, anjaha adong ma na patugahkon ai hu rumah ni raja ai.

¹² Jadi puho ma raja ai bornginni ai, anjaha nini ma hu bani juakjuakni, “Pabotohkononku ma hu bani nasiam, na sihol bahenon ni halak Aram hu banta. Ibotoh sidea do, masa lohei banta, halani ai do ase luar sidea hun parsaranan ni sidea marponop i ladang, ai nini uhur ni sidea do, ‘Anggo luar sidea hun huta ai, tangkap hita ma sidea manggoluh, anjaha masuki hita ma huta ai.’”

¹³ Jadi marbalos ma sahalak hun bani juakjuakni, “Mahua na buat ma piga-piga huda na tading ai, ai adong ope piga-piga nari na tading (*atap masa bani sidea songon na bani halak Israel na tading on ijon, atap masa bani sidea songon na bani ganup halak Israel, na dob rasei ai*); sidea ma na suruh laho papangkeihon!”

¹⁴ Jadi ibuat sidea ma dua gareta pakon huda, lanjar isuruh raja ai ma sidea marayak bala ni halak Aram, nini ma, “Laho ma nasiam papangkeihon!”

¹⁵ Jadi iayaki sidea ma bala ai ronsi Jordan; tonggor ma, gok do ganup dalan ai bani pakeian ampa parugas, ai ma na pinangambukkon ni halak Aram ai sanggah na maporus ai sidea. Dob ai mulak ma suruhan ai, patugahkon barita ai hu bani raja ai.

¹⁶ Jadi luar ma bangsa ai, irampas sidea ma parsaranan ni halak Aram, jadi saud ma satapongan

topung marharga sada sekel, anjaha dua tapongan andolei sada sekel do homa hargani, songon na dob hinatahon ni Jahowa.

Parmatei ni Juakjuak ni Raja ai

¹⁷ Tapi domma isuruh raja ai hinan puanglima sipanrabinsi ai, manjaga horbangan ai, tapi idoge halak ma ia i horbangan ai gabe matei, romban hu bani hata ni halak ni Naibata, na dob nilumbahonni hinan, sanggah tuad raja ai marayaksi.

¹⁸ Halani sanggah na hinatahon ni halak ni Naibata ai hu bani raja ai, “Marharga ma dua tapongan andolei sada sekel ampa sada tapongan topung sada sekel sonon patar i horbangan ni Samaria.”

¹⁹ Gabe nini puanglima ai do mambalosi halak ni Naibata ai, “Tonggor ma, porini pe ibahen Jahowa jandela i langit, sonaha ma boi jadi ai?” Tapi nini do, “Tonggor ma, idahonmu do ai namin marhitei panonggormu, tapi seng dihut ho mangankon ai.”

²⁰ Jadi sonai ma masa hu bani, ai idoge halak do ia i horbangan ai, gabe matei ma ia.

Boru Sunem ai Sanggah Masa Lohei

8 ¹ Tapi domma marsahap hinan si Elisa hu bani naboru, paranak na dob pinagoluhni ai, sonon, “Bingkat ma ham, bungkas rap pakon parrumahmu, manginsolat atap ija marosuh ham, ai domma

ihatahon Jahowa roh lohei, anjaha tongon do masa i nagori ai, pitu tahun dokahni.”

²Jadi bingkak ma naboru ai anjaha ibahen ma romban hu bani hata ni halak ni Naibata ai, gabe bingkak ma ia pakon parrumahni, anjaha manginsolat ma i tanoh ni halak Palistim pitu tahun dokahni.

³Tapi dob salpu na pitu tahun ai, mulak ma naboru ai hun tanoh ni halak Palistim; anjaha laho ma ia mangadu-adu hu bani raja ai laho mangindo mulak rumahni pakon juman.

⁴Tudu sangah marsahapi do raja ai pakon si Gehasi, juakjuak ni halak ni Naibata ai, nini, “Pajojor ma hu bangku ganup horja habanggalon na binahen ni si Elisa!”

⁵Anjaha sangah na binaritahonni ai hu bani raja ai, na pinagoluhni ai na dob matei, roh ma naboru simada anak na dob pinagoluh ai mangadu-adu hu bani raja ai laho mangindo mulak rumahni pakon juman. Jadi nini si Gehasi ma, “Tuannami anjaha rajanami! On ma naboru ai, anjaha on ma anakni na pinagoluh ni si Elisa.”

⁶Anjaha ipatae raja ai ma ia, gabe ipajojor naboru ai ma pasal ai bani. Dob sonai isuruh raja ai ma sada halak pangulu pakonsi, nini ma, “Paulak ma hu bani haganup rupeini hinan, sonai homa ulih ni tanohni singgan ni parbungkasni hinan hun nagori on ronsi sonari.”

Si Elisa i Damaskus

⁷ Sanggah das si Elisa hu Damaskus, tudu do si Benhadad, raja ni Aram boritan. Dob adong na patugahkon bani, “Roh do halak ni Naibata ai hu huta on!”

⁸ Nini raja ai ma hu bani si Hasael, “Buat ma siluah, laho ma ham manjumpahkon halak ni Naibata ai anjaha sungkun ma Jahowa marhiteihonsi sonon, ‘Malum ope gakni huahap hun bani naborit on?’”

⁹ Dob ai laho ma si Hasael manjumpahkonsi, iboan ma hu bani sagala ugas na maharga na adong i Damaskus, boratan ompat puluh unta. Dob das ia hu lobei ni si Elisa, nini ma, “Isuruh anakmu si Benhadad, raja ni Aram do ahu bamu manungkun, ‘Malum ope gakni huahap hun bani naborit on?’”

¹⁰ Dob ai ihatahon si Elisa ma hu bani, “Laho ma ham, patugah ma hu bani, ‘Maningon malum do ahapkononmu!’ Tapi tene domma ipatalar Jahowa bangku, maningon matei do ia.”

¹¹ Dob ai kawah ma si Elisa dompaksi, pala songgotan ia. Salpu ai tangis ma halak ni Naibata ai.

¹² Jadi nini si Hasael ma, “Mase tangis tuan nami?” Nini ma mambalosi, “Halani domma hubotoh hamagouan na sihol bahenonmu hu bani halak Israel; surbuyonmu do bani apuy huta ni sidea na marbatar-batar ai, bunuhonmu do anak garama ni

sidea marhitei podang, ropukonmu do na etek-etek ni sidea anjaha lapahonmu do naboru ni sidea na boratan rumah.”

¹³ Dob ai nini si Hasael ma, “Ise ma ahu juakjuakmu on, baliang on, ase bahenonni ma pahara na sonin banggalni?” Nini si Elisa ma mambalosi, “Domma ipataridahkon Jahowa hu bangku paboa ham do bangkit raja manggomgom Aram.”

¹⁴ Dob ai misir ma ia hun bani si Elisa, anjaha das ma ia hu bani tuanni, na mangkatahon hu bani, “Aha do ihatahon si Elisa bamu?” Jadi nini ma mambalosi, “Ihatahon do hu bangku, paboa maningon malum do ahapkononmu.”

¹⁵ Tapi patarni ai ibuat ma salimut, isornobkon ma ai hubagas bah anjaha irungkubkon ma ai hu bohini, gabe matei ma ia. Jadi si Hasael ma bangkit manggantihsi.

Si Joram Raja ni Juda

(ay. 16-22: pausih 2 Kron. 21:2, 5-10)

¹⁶ Palimatahunkon dob manrajai si Joram, anak si Ahab, raja ni Israel bangkit raja ma si Joram, anak ni si Josafat, raja ni Juda.

¹⁷ Marumur tolu puluh dua tahun do ia bangkit raja ai, anjaha ualuh tahun do dokahni manrajai i Jerusalem.

¹⁸ Anjaha dalan ni Raja-raja Israel do iirikkon, songon na binahen ni ginompar ni si Ahab, ai boru

ni si Ahab do parinangonni. Ihorjahon do sogam ni uhur ni Jahowa.

¹⁹ Tapi seng ra Jahowa mangagou Juda halani si Daud juakjuak-Ni ai, songon na pinarbagah-Ni ai hinan bani, paboa bereon-Ni do sada suluh bani pakon hu bani anakni tongtong.

²⁰ Bani panorangni marbalik do Edom hun bani panggomgomion ni Juda, anjaha ipabangkit sidea do sada raja bani sidea.

²¹ Jadi bingkat ma si Joram hu Zair rap pakon ganup garetani; borngin-borngin laho ma ia pakon kopala-kopala ni garetan porang mandorab halak Edom, na manginggoti sidea ai, gabe maporus ma bangsa ai hu lampolamponi bei.

²² Tapi age pe sonai lanjar marbalik do Edom hun bani panggomgomion ni Juda das hu bani sadari on. Dob ai marbalik ma homa Libna bani panorang ai.

²³ Barita na legan pasal si Joram pakon ganup na binahenni, ai lang tarsurat do ai ibagas buku Barita ni Raja-raja Juda.

²⁴ Dob ai modom ma si Joram pakon ompungni, anjaha tartanom ma ia i lambung ni ompungni, i huta ni si Daud, jadi si Ahasya, anakni ai ma bangkit raja manggantihsi.

Si Ahasya, Raja ni Juda

²⁵ Pasapuluh-duatahunkon dob manrajai si Joram, anak ni si Ahab, raja ni Israel, bangkit raja ma si Ahasya, anak ni si Joram, manggomgom Juda.

²⁶ Marumur dua puluh dua tahun do si Ahasya, sanggah na bangkit ai ia gabe raja, anjaha satahun do ia manrajai i Jerusalem. Ia goran ni inangni, si Atalya do, pahompu ni si Omri, raja ni Israel.

²⁷ Ia pe iirikkon do dalan ni ginompar ni si Ahab, ihorjahon do sogam ni uhur ni Jahowa, songon ginompar ni si Ahab, ai hela ni ginompar ni si Ahab do ia.

²⁸ Bingkat do ia pakon si Joram, anak ni si Ahab, marporang dampak si Hasael, raja ni Aram i Ramot-Gilead, ija si Joram luha ibahen halak Aram.

²⁹ Dob ai mulak ma Raja Joram hu Jesreel, laho patambarhon luhani, na binahen ni halak Aram ai i Ramot, sanggah marporang ia dampak si Hasael, raja ni Aram. Jadi tuad ma si Ahasya, anak ni si Joram, raja ni Juda, sihol manungkir si Joram, anak ni si Ahab, i Jesreel, ai boritan do ia.

Si Jehu gabe Raja ni Israel

9¹ Dob ai idilo si Elisa ma sahalak hun bani susian ni nabi, nini ma hu bani, “Gonditi ma binongeimu, anjaha boan ma guri-gurimu na marisi

minak ibagas tanganmu, anjaha laho ma ho hu Ramot-Gilead.

² Anggo das ma ho hujai pindahi ma ijai si Jehu, anak ni si Josafat, anak ni si Nimsi; masuk ma ho anjaha hatahon ma ia jongjong hun tongah-tongah ni hasomanni, anjaha arahkon ma ia hu kamar partongah-tongah.

³ Dob ai buat ma guri-guri na marisi minak, anjaha useihon ma hu uluni, anjaha hatahon ma, sonon do hata ni Jahowa, 'Huminaki ma ham gabe raja manggomgom Israel!' Dob ai ungkab ma labah ai, anjaha maporus ma ho, ulang marsaran-saran."

⁴ Dob ai laho ma anak garama, susian ni nabi ai, hu Ramot-Gilead.

⁵ Jadi dob das ia, tonggor ma, hundul-hundul ma jumpahsi pambobai-pambobai ni bala ijai, anjaha nini ma, "Adong do hata sihatahononku bamu, ham puanglimanami!" Dob ai nini si Jehu ma, "Hu bani ise hun bannami on?" Jadi nini ma, "Hu bamu, ham puanglimanami!"

⁶ Jadi jongjong ma ia anjaha masuk hu rumah ai. Dob ai iuseihon anak garama ai ma minak ai hu bani uluni, anjaha nini ma hu bani, "Sonon do hata ni Jahowa, Naibata ni Israel, 'Ahu do maminaki ho gabe raja manggomgom bangsang-Ku, ai ma Israel.

⁷ Maningon siap do bahenonmu ginompar ni si Ahab, tuanmu ai, ase Hubalaskon hu bani si Isebel

daroh ni jabolon-Ku, ai ma nabi-nabi, pakon daroh ni haganup jabolon ni Jahowa.

⁸ Maningon siap do ganup ginompar ni si Ahab; sasapkonon-Ku do hun bani si Ahab sagala dalahi, na poso pakon na magodang i Israel.

⁹ Maningon siap do bahenon-Ku ginompar ni si Ahab, usih songon ginompar ni si Jerobeam, anak ni si Nebat, anjaha songon ginompar ni si Baesa, anak ni si Ahia.

¹⁰ Anjaha maningon bois do si Isebel panganon ni baliang i ladang ni Jesreel, anjaha ise pe lang na mananomsu.” Dob ai iungkab ma labah ai lanjar maporus ma ia.

¹¹ Dob luar si Jehu hu bani juakjuakni, nini sidea ma hu bani, “Damei do? Mase roh halak na podouan in bamu?” Jadi nini ma mambalosi sidea, “Itandai nasiam do dalahi ai pakon hasahaponni?”

¹² Nini sidea ma, “Seng tongon ai; patugah ham ma bannami!” Jadi nini ma, “Sonon do hatani hu bangku, ‘Sonon do hata ni Jahowa: Huminaki do ho gabe raja ni Israel.’”

¹³ Jadi tarolos ma sidea ganup mambuat pakeianni bei, anjaha ipaherbang ma ai i toruh ni bahen tutup ni talkah ni andar ai, isompul sidea ma tarompet anjaha isurakkon ma, “Domma bangkit raja si Jehu!”

¹⁴ Jadi ibahen si Jehu, anak ni si Josafat, anak ni si Nimsi ai ma partahi-tahian mangimbang si Joram.

Tapi anggo si Joram pakon haganup halak Israel marjaga-jaga do i Ramot-Gilead dompak si Hasael, raja ni Aram.

¹⁵ Anjaha domma mulak hinan Raja Joram laho patambarhon dirini hun bani ugah, na binahen ni halak Aram bani, sanggah na marporang ia dompak si Hasael raja ni Aram. Dob ai nini si Jehu ma, “Anggo sonai ma uhur nasiam, ulang ma lopas nasiam age sahalak laho hun huta on patugahkon na masa on hu Jesreel.”

Parmatei ni si Joram pakon si Ahasya

¹⁶ Dob ai inaiki si Jehu ma garetani, anjaha laho ma ia hu Jesreel, ai ijai do tibal si Joram. Anjaha si Ahasya pe, raja ni Juda, domma tuad manonggor si Joram.

¹⁷ Tapi jongjong ma parjaga ai i atas manara i Jesreel, anjaha dob iidah roh bala ni si Jehu, nini ma, “Huidah do roh sada hulanan ni bala!” Dob ai nini si Joram ma, “Buat ma sada parhuda anjaha suruh ma ia manjumpahkon sidea lanjar manungkun, ‘Damei do?’”

¹⁸ Jadi bingkat ma sahalak siajak huda manjumpahkonsi, anjaha nini ma, “Sonon do hata ni raja in, ‘Damei do?’” Jadi nini si Jehu ma, “Aha porluni bam damei atap lang? Husor hudamu, irikkon ahu!” Dob ai marsahap ma sipanjaga ai, nini

ma, “Domma das namin suruhan ai bani sidea, tapi seng mulak ia.”

¹⁹ Dob ai isuruh ma siajak huda na legan, na mangkatahon bani sidea, dob das ia, “Sonon do hata ni raja ai, ‘Damei do?’” Jadi nini si Jehu ma, “Aha porluni bam damei atap lang? Husor hudamu irikkon ahu!”

²⁰ Dob ai ipatugah siparjaga ai ma use, nini ma, “Das do namin suruhan ai bani sidea, tapi seng mulak ia. Songon pangajak ni halak na mabuk do pangajakni.”

²¹ Nini si Joram ma, “Pasang garetal!” Ipasang ma garetani, dob ai bingkat ma si Joram, Raja Israel, rap pakon si Ahasya, Raja Juda, ganup bani garetani bei, luar ma sidea manjumpahkon si Jehu, gabe pajumpah ma sidea pakonsi i ladang ni si Nabot, halak Jesreel ai.

²² Jadi dob iidah si Joram si Jehu, nini ma, “Damei do Jehu?” Nini ma mambalosi, “Sonaha ma pardameini, sadokah inunut inangmu si Isebel mangkorjahon parbangkison pakon ujar-ujaran?”

²³ Dob ai ipahusor si Joram ma hudani sihol maporus, anjaha nini ma hu bani si Ahasya, “Partahi-tahion do hape Ahasya!”

²⁴ Tapi isintak si Jehu ma panahni, ipanah ma si Joram gabe hona ma holangkolang ni sasapni anjaha itolpus lingkitni ai ma pusu-pusuni, gabe tompas ma ia ibagas garetani ai.

²⁵ Nini si Jehu ma hu bani si Bidekar, juakjuakni ai, “Angkat nasiam ma ia anjaha gijigkon ma ia hu ladang ni si Nabot, halak Jesreel ai, halani ingat ma, sanggah na margareta ondi hita rap, i pudi ni si Ahab, bapani ondi, sanggah na nilumbahon ni Jahowa hata on pasalsi,

²⁶ ‘Tongon, halani domma Huidah nantuari daroh ni si Nabot pakon anakni, nini Jahowa, maningon balaskonon-Ku do in bam i ladang on.’ Halani ai buat ma ia, gijigkon ma ia hu ladang ai, romban hu bani hata ni Jahowa.”

²⁷ Dob iidah si Ahasya, Raja Juda ai, maporus ma ia dompak Bet-Hagan. Tapi iayak si Jehu ma ia, anjaha nini ma, “Ia pe maningon bunuhon do!” Ipanah sidea ma ia i atas garetani i tangkogan Gur, dohorhon Jibleam. Maporus ma raja ai hu Megiddo, gabe matei ijai.

²⁸ Dob ai igaretahon juakjuakni ma ia hu Jerusalem, anjaha itanom ma ia bani tanomanni rap pakon ompungni i huta ni si Daud.

²⁹ Pasapuluh-sadatahunkon dob raja si Joram, anak ni si Ahab, ijai ma mulai si Ahasya manggomgom Juda.

Parmatei ni si Isebel

³⁰ Jadi das ma si Jehu hu Jesreel. Dob ibogei si Isebel ai, ipajenges ma matani, iugasi ma jambulanni, anjaha manungkir-nungkir ma ia hun jandela.

³¹ Jadi dob imasuki si Jehu horbangan ai, nini si Isebel ma, “Damei do, Simri, sibunuh tuanni?”

³² Dob ai mangkawah ma ia dompak jandela ai, anjaha nini ma, “Ise do hampit ahu? Ise do?” Jadi dob mangkawah dua tolu halak juakjuak ni raja ai dompaksi,

³³ nini ma, “Dabuhkon nasiam ma ia hunjin hu toruh!” Jadi idabuhkon sidea ma ia hu toruh, gabe marbirsak ma deba hun bani darohni ai hu tembok pakon hu bani huda ai, gabe idogei-dogei huda ai ma ia.

³⁴ Dob sonai laho ma ia hu rumah mangan minum, dob ai nini ma, “Torih nasiam ma lobei naboru pinapaan ni Naibata ai, anjaha tanom nasiam ma ia, ai boru ni raja do ia.”

³⁵ Tapi dob laho sidea sihol mananomsinamin, hape seng dong jumpah sidea be sobali tangkurakni pakon tapak-tapak ni naheini ampa tanganni.

³⁶ Dob mulak sidea patugahkon ai bani si Jehu, gabe ibalosi ma, “Sonai do hata ni Jahowa, na dob nilumbahon-Ni hinan marhitei juakjuak-Ni si Elias, halak Tisbi ondi, sanggah na hinatahon-Ni, ‘Maningon i ladang ni Jesreel bois panganon ni baliang daging ni si Isebel,

³⁷ anjaha bangkei ni si Isebel ai, maningon gabe hubang ma ai i Jesreel, gabe seng tarhatahon halak be: On do si Isebel.’”

Isiapkon si Jehu Ganup Ginompar ni si Ahab

10¹ Tapi adong do pitu puluh anak ni si Ahab i Samaria. Jadi isurat si Jehu ma surat, anjaha itongos ma ai hu Samaria, hu bani pangintuai-pangintuai pakon hu bani siramotkon anak ni si Ahab, nini,

² “Ia dob das surat on bani nasiam, mangidah halani pakon nasiam do anak ni tuan nasiam, anjaha adong do bani nasiam gareta pakon huda, sonai homa huta na marbatar-batar pakon sinjata,

³ pilih nasiam ma sidearan pakon sitalupan hun bani anak ni tuan nasiam, anjaha pahundul nasiam ma ia bani paratas ni bapani, anjaha marporang ma nasiam mangkopkop ginompar ni tuan nasiam.”

⁴ Tapi mabiar tumang ma sidea, nini ma, “Tonggor ma, gari na dua raja ai seng tahan i lobei ni, lambin sonaha ma partahanta?”

⁵ Dob ai isuruh kopala ni rumah bolon pakon kopala ni huta rap pakon pangintuai-pangintuai ampa siparramotkon ai ma suruhanni hu bani si Jehu, nini ma, “Juakjuakmu do hanami, anjaha sagala sihatahononmu bannami, sai bahenonnami do. Seng ra hanami pabangkitkon atap ise gabe raja, bahen ham ma barang aha na madear nini uhurmu.”

⁶ Dob ai itongos ma hu bani sidea surat na paduahon, nini ma, “Anggo hampit ahu do nasiam,

anjaha anggo ra do nasiam mambalosi ahu, buat nasiam ma ulu ni anak ni tuan nasiam, anjaha roh ma nasiam hu bangku hu Jesreel sonon patar. Ia anak ni raja na pitu puluh halak ai, rap pakon halak na marsangap ni huta ai do, ai do na pagodang-godangkon sidea.”

⁷ Jadi dob das surat ai bani sidea, itangkap sidea ma anak ni raja ai, ibunuh ma sidea na pitu puluh halak ai, inahkon ma ulu ni sidea hubagas raga anjaha itongos ma ai hu bani si Jehu i Jesreel.

⁸ Dob das suruhan ai anjaha ipatugah bani, “Domma iboan sidea ulu ni anak ni raja ai, nini ma, ‘Nahkon nasiam ma ai gabe dua gugunan i lambung ni labah ni horbangan ai ronsi patar.”

⁹ Dob ai patarni ai, sanggah na luar ia, jongjong ma ia, anjaha nini ma hu bani ganup halak simbuei ai, “Seng marsalah nasiam. Ahu do na martahi-tahi dompak tuanku, anjaha na mambunuhsi; tapi ise do na mambunuh haganup on?

¹⁰ Botoh nasiam ma, na so adong labuh hun bani hata ni Jahowa, na hinatahon ni Jahowa pasal ginompar ni si Ahab; ai ipasaud Jahowa do, na dob hinatahon ni juakjuak-Ni si Elias.”

¹¹ Jadi ibunuh si Jehu ma ganup na tading hun bani ginompar ni si Ahab i Jesreel, sonai homa ganup halak na pinasangapni, huan-huanni pakon malimni, sahalak pe lang tading ibahen.

¹² Dob ai bingkat ma ia laho hu Samaria. I tongah dalan, sanggah das ia hu Bet-Eked ianan ni parmahan,

¹³ pajumpah ma si Jehu pakon sanina ni si Ahasya, raja ni Juda, jadi nini ma, “Ise do ham?” Nini sidea ma mambalosi, “Sanina ni si Ahasya do hanami, anjaha tuad do hanami laho marayak anak ni raja in pakon anak ni inangni.”

¹⁴ Nini si Jehu ma, “Tangkap ma sidea manggoluh.” Jadi itangkap ma sidea manggoluh, lanjar ibunuh, dob ai isampakkon ma sidea hubagas parigi na i Bet-Eked, ompat puluh dua halak, anjaha sahalak pe lang dong na maluah hun bani sidea.

¹⁵ Jadi dob bingkat ia hunjai, pajumpah ma ia pakon si Jonadab, anak ni si Rehab, na roh manjumpahkonsi; jadi itabi ma ia anjaha nini ma hu bani, “Bonar do uhurmu hu bangku, songon bonar ni uhurhu bamu?” Nini si Jonadab ma mambalosi, “Eak!” Nini si Jehu ma, “Anggo sonai do, bere ma tanganmin bangku!” Jadi isurdukkon ma tanganni. Itarik si Jehu ma ia hu atas, rap pakonsi hu atas gareta ai.

¹⁶ Anjaha nini ma, “Rap ma hita laho, ase iidah ham ringisku halani Jahowa.” Jadi rap ma sidea laho margareta.

¹⁷ Jadi dob das ia hu Samaria, ibunuh ma haganup simasima ni si Ahab i Samaria, siap tumang do

sidea ibahen, romban hu bani hata ni Jahowa, na hinatahon-Ni hu bani si Elias.

Isiapkon si Jehu Malim-malim ni Baal

¹⁸ Dob ai ipatumpu si Jehu ma bangsa ai, anjaha nini ma hu bani sidea, “Hurang do pambalosi ni si Ahab bani Baal, tapi bujuran do si Jehu mambalosi.

¹⁹ Halani ai dilo nasiam ma hu lambungku sagala nabi ni baal, sagala na marugas bani pakon sagala malim-malim; sahalak pe lang bulih tading, ai sihol bahenonku do panggalangan bolon hu bani Baal; barang ise na so dihut, maningon marutang hosah do ia.” Tapi akal-akal ni si Jehu do ai ase ibahen sonai, ase boi siapkononni sagala sisumbah baal ai.

²⁰ Dob ai iparentahkon si Jehu ma, “Tingtingkon nasiam ma sada tumpuan na majombut bani baal!” Jadi itingtingkon sidea ma ai.

²¹ Anjaha isuruh si Jehu ma suruhanni hu sab Israel, jadi roh ma ganup siparugas bani baal, sahalak pe lang dong na tading, na so roh hujai. Imasuki sidea ma rumah ni baal ai, gabe gok tumang ma rumah ni baal ai.

²² Nini ma hu bani sijaga rumah pakeian, “Boan ma hudarat pakeian bani haganup siparugas bani baal ai!” Jadi ipadarat ma pakeian ai bani sidea.

²³ Jadi masuk ma si Jehu rap pakon si Jonadab, anak ni si Rehab, hu rumah ni baal ai, “Pangkei ma nasiam

ase ulang adong juakjuak ni Jahowa ijon i tengah-tengah nasiam, tapi pitah sibalosi Baal hansa!”

²⁴ Jadi masuk ma ia manggalangkon galangan pakon galangan situtungan. Tapi domma iatur si Jehu hinan ualuh puluh halak i darat, anjaha domma iparentahkon, “Barang ise na palopaskon maluah hun bani sidea, na dob huondoskon ai hubagas tangan nasiam, maningon hosahni do dangdang ni hosahni ai.”

²⁵ Jadi siapkonsi ia na manggalangkon galangan situtungan ai, nini si Jehu ma hu bani bala ai pakon pambobaini, “Masuk ma nasiam anjaha bunuhi ma sidea, sahalak pe lang bulih maluah!” Jadi dob itampuli sidea haganup marhitei podang, ipanggijigkon bala pakon pambobai ai ma sidea hu darat, dob ai masuk ma sidea hu kamar parbagas ni rumah ni baal ai,

²⁶ gabe ipadarat sidea ma Ashera na ibagas rumah ni baal ai, anjaha itutung sidea ma ia.

²⁷ Iropuki sidea ma gana-gana baal ai, iropuki sidea ma rumah ni baal ai, anjaha ibahen ma ai gabe ianan ni tompoh ronsi sadari on.

²⁸ Ase sonai ma paniapkon ni si Jehu bani baal hun Israel.

²⁹ Tapi seng itundalhon si Jehu anggo dousa ni si Jerobeam, anak ni si Nebat, na mambahen Israel mardousa, ai ma lombu omas na i Betel pakon i Dan.

³⁰ Dob ai nini Jahowa ma hu bani si Jehu, “Halani dear pambahenanmu, ai ma marhitei na mandalankon na pintor bani pangidah-Ku, anjaha ibahen ho do hu bani ginompar ni si Ahab romban hu bani haganup na ibagas uhur-Hu, maningon anakmu do ronsi sundut na paompatkon hundul bani paratas ni Israel.”

³¹ Tapi seng marsijoloman uhurni si Jehu manramotkon titah ni Jahowa, Naibata ni Israel, hun bani gok ni uhurni; seng itundalhon dousa ni si Jerobeam, na mambahen Israel mardousa.

³² Bani ari ai ipungkah Jahowa ma paetekkon Israel. Italuhon si Hasael ma sidea bani ganup tanoh parbalogan ni Israel;

³³ hampit hapoltakan ni Bah Jordan ganup tanoh Gilead, tanoh ni halak Gad, Ruben pakon Manasse, singgan ni Aroer na i lambung ni habungan Arnon, ai ma Gilead pakon Basan.

³⁴ Barita ni si Jehu na tading ai pakon ganup na binahenni ampa haganup hagarangonni, ai lang tarsurat do ai ibagas buku barita ni Raja-raja Israel?

³⁵ Dob ai modom ma si Jehu rap pakon ompungni, gabe itanom sidea ma ia i Samaria. Jadi si Joahas, anakni ai ma bangkit raja manggantihsi.

³⁶ Ia dokah ni si Jehu manrajai Israel i Samaria dua puluh ualuh tahun do.

Hona Bunuh si Atalya

Si Joas Bangkit Raja

11 ¹Jadi dob iidah si Atalya, inang ni si Ahasya, na dob matei anakni ai, marhosei ma ia anjaha ibunuh ma ganup ginompar ni raja ai.

²Tapi ibuat si Joseba, boru ni Raja Joram, botou ni si Ahasya ma si Joas, anak ni si Ahasya, anjaha iluahon ma ia hun tongah-tongah ni anak ni raja ai, sagala sibunuhon hinan, anjaha inahkon ma ia hu kamar podoman rap pakon parorotni. Sonai ma iponopkon ia hun bani si Atalya, gabe seng saud hona bunuh ia.

³Jadi rapkonsi ma ia marponop i rumah panumbahan ai, onom tahun dokahni, anjaha si Atalya do manrajai i tanoh ai.

⁴Tapi papitutahunkon isuruh si Joyada ma na mangalopi pambobai ni bala, kopala ni sisaratus halak pakon kopala ni tentara pangawal, ihatahon ma sidea masuk hu Rumah ni Jahowa marayaksi, marpadan ma ia pakon sidea, anjaha ipabija ma sidea ibagas Rumah ni Jahowa, anjaha ipatuduhkan ma bani sidea anak ni raja ai.

⁵Iparentahkon ma hu bani sidea, “On ma sibahenon nasiam, ‘Sapartolu hun bani nasiam, siparjaga bani ari Sabat, maningon marjaga ibagas rumah ni raja in,

⁶anjaha na sapartolu nari marjaga i lambung ni horbangan Sur, anjaha na sapartolu nari use, ai ma na i lambung ni horbangan ipudi ni tentara pangawal, sidea ma na marjaga i lambung ni rumah panumbahan, margantih-gantih,

⁷rap pakon na dua bagian nari hun bani nasiam, ai ma na so martugas bani ari Sabat, maningon marjaga sidea i Rumah ni Jahowa, i lambung ni raja ai;

⁸maningon inggotan nasiam do raja ai, ganup marsinjata ibagas tanganni bei, anjaha barang ise na manosak odoran ai, maningon marutang hosah. Maningon hasomanan nasiam do raja ai anggo luar barang masuk ia.”

⁹Jadi ibahen pambobai ni sisaratus halak ma romban hu bani na pinarentahkon ni Malim Joyada, iarahkon bei ma hasomanni siparjaga bani ari Sabat rap pakon na so martugas bani ari Sabat, anjaha roh ma sidea marayak Malim Joyada.

¹⁰Anjaha ipambere malim ai ma hu bani pambobai ni sisaratus halak tanja pakon gantar, na adong bani Raja Daud hinan, na sinimpan i Rumah ni Jahowa.

¹¹Anjaha jongjong ma pangawal ai, ganup pajolom-jolom sinjatani ibagas tanganni, hampit siamun ni rumah panumbahan ai ronsi hampit sambilou ni rumah panumbahan ai, i lambung ni anjapanjap ai pakon i lambung ni rumah ai, inggot raja ai.

¹² Dob ai iarahkon ma anak ni raja ai hu darat, inahkon ma sortali ai hu atas ni uluni, anjaha ibere ma bani buku hasaksian ai. Sonai ma parpabangkit ni sidea bani gabe raja; iminaki sidea ma ia, martopap ma sidea anjaha mangolobkon bei, “Horas ma raja in!”

¹³ Jadi dob ibogei si Atalya sora olob-olob ni pangawal pakon halak simbuei ai, laho ma ia hu Rumah ni Jahowa, hu bani halak simbuei ai;

¹⁴ anjaha dob ipapangkei, tonggor ma, jongjong do raja ai i lambung ni tiang ai, domu bani hasomalan hinan anjaha pambobai ai pakon partarompot ai i lambung ni raja ai, anjaha ganup parnagori ai marmalas ni uhur, anjaha pahata tarompot. Jadi irigati si Atalya ma pakeianni anjaha dilo-dilo, “Tahitahi!”

¹⁵ Dob ai iparentahkon Malim Joyada ma hu bani pambobai ni sisaratus halak, pambobai ni bala ai, nini ma hu bani sidea, “Arahkon ma ia luar hun holangkolang ni odoran in, anjaha bunuh bani podang barang ise na mangirikkonsi! Ai domma ihatahon malim ai hinan, ‘Seng bulih matei ia i Rumah ni Jahowa.’”

¹⁶ Jadi mangonai tangan ma sidea bani, sanggah mardalan ia hun dalan hamasukan ni huda hu rumah ni raja ai, ijai ma ia ibunuh.

¹⁷ Dob ai ibahen si Joyada ma sada padan i tonggah-tonggah ni Jahowa pakon raja ampa halak simbuei

ai, paboa maningon bangsa ni Jahowa do sidea, sonai homa i tengah-tengah ni raja ai pakon halak simbuei.

¹⁸ Dob ai masuk ma ganup halak simbuei parnagori in hu rumah ni baal, anjaha iparreong sidea ma ai, iropuki sidea ma anjapanjapni pakon gana-ganani, anjaha ibunuh sidea ma si Mattan, malim ni baal ai, i lobei ni anjapanjap ai. Dob ai isuruh malim ai ma na manjaga i lobei ni Rumah ni Jahowa.

¹⁹ Dob ai iarahkon ma pambobai ni sisaratus halak, pangawal pakon ganup halak simbuei na i nagori in; ibobahon sidea ma raja ai tuad hun Rumah ni Jahowa, mardalan manlopusi horbangan ni sipangawal, laho hu rumah ni raja ai, anjaha hundul ma ia bani paratas harajaon.

²⁰ Jadi marmalas ni uhur ma ganup bangsa parnagori in; anjaha sonang do huta ai, dob matei tarbunuh si Atalya marhitei podang ibagas rumah ni raja ai.

²¹ (12-1) Marumur pitu tahun do si Joas, sanggah na bangkit raja ia.

Raja Joas Pajengskon Rumah Panumbahan

12 ¹ (12-2) Papitutahunkon dob jadi raja si Jehu, ijai ma bangkit raja si Joas, anjaha ompat puluh tahun do ia manrajai i Jerusalem; si Sibia do goran ni inangni, hun Berseba.

² (12-3) Ihorjahon si Joas do rosuh ni Jahowa sadokah manggoluh ia, ai Malim Joyada do mangajarisi.

³ (12-4) Tapi seng iparseda anggo ianan parsumbahan na i atas buntu-buntu, sai manggalang anjaha manutung dahupa ope halak simbuei i atas ianan parsumbahan na i buntu-buntu.

⁴ (12-5) Nini si Joas ma hu bani malim-malim ai, “Sagala duit, na binoan hu Rumah ni Jahowa songon sibere-bere na pinapansing, ai ma duit, na binere ni halak bahen guguan, sonai homa sagala duit, na binoan ni sada halak hun bani niojur ni uhurni hu Rumah ni Jahowa,

⁵ (12-6) bulih do jaloan ni malim ai, ganup malim hun bani na tinandani, anjaha ipakei ma ai padearhon rumah ai, atap ija na porlu sipadearon.”

⁶ (12-7) Ai domma pala dua puluh tolu tahun dob raja si Joas, tapi seng dong ope hun bani na maseda ipadear malim ai i rumah ai.

⁷ (12-8) Jadi idilo Raja Joas ma Malim Joyada pakon malim-malim na legan, nini ma hu bani sidea, “Mase ma seng ipadear nasiam ope na maseda i rumah ai? Halani ai seng bulih simpanon nasiam duit na ijalo nasiam hun bani na tinanda nasiam, maningon berehon nasiam do ai, laho padearhon na maseda i rumah ai.”

⁸ (12-9) Jadi ibalosi malim ai ma hata ai, na so jaloon ni sidea be duit hun bani halak simbuei ai, anjaha seng be sidea padearhon na maseda ai bani rumah ai.

⁹ (12-10) Dob ai ibuat Malim Joyada ma sada poti, anjaha ituhak ma tutupni ai, inahkon ma poti ai i lambung ni anjapanjap ai hampit siamun laho masuk halak hu Rumah ni Jahowa; anjaha inahkon malim na marjaga i lambung ni molmolan ai ma hujai ganup duit na binoan hu Rumah ni Jahowa.

¹⁰ (12-11) Dob iidah sidea na dob buei ma duit ibagas poti ai, roh ma jurutulis ni raja ai rap pakon sintua ni malim ai, ibilang anjaha ibaluti sidea ma ibagas parduitan duit na dapot i rumah panumbahan ai.

¹¹ (12-12) londoskon sidea ma duit na dob tinimbang ai hu bani kopala ni sibobahon horja ai, na niangkat mardimata Rumah ni Jahowa, ase sidea ma na mambere gaji hu bani tuhang, na marhorja i Rumah ni Jahowa,

¹² (12-13) pakon hu bani tuhang batu pakon sibarbar batu, sonai homa mamboli parhayu pakon batu na dob binarbar laho padearhon na maseda i Rumah ni Jahowa, haganup tene harugian na porlu, laho padearhon Rumah ni Jahowa.

¹³ (12-14) Tapi seng ipauli sidea bani Rumah ni Jahowa pinggan pirak, pisou, mangkuk parburihan,

tarompet, barang parugas omas atap pirak pe hun bani duit na binoan hu Rumah ni Jahowa,

¹⁴ (12-15) tapi ibere do ai bani halak parhorja hansa na padearhon Rumah ni Jahowa.

¹⁵ (12-16) Anjaha seng pala mambahen parhiraan sidea pakon halak haondosan ni duit ai, na padaskon ai hu bani parhorja, ai martenger ni uhur do sidea samah sidea.

¹⁶ (12-17) Tapi anggo duit hun bani galangan parsalahan pakon hun bani galangan pardousaon, seng iboan ai hu Rumah ni Jahowa, ai bani malim do ai.

Parporangan ni si Joas pakon si Hasael; Matei Tarbunuh Ia

¹⁷ (12-18) Tangkog ma ijia si Hasael, raja hun Aram, laho marporang dompak Gat, anjaha talu do ai ibahen. Dob ai idompakkon si Hasael ma bohini laho tangkog hu Jerusalem;

¹⁸ (12-19) jadi ibuat si Joas, raja hun Juda ma sagala sibere-bere, na pinapansing ni ompung ni si Josafat, si Joram pakon si Ahasya, raja-raja ni Juda pakon sibere-bere pinapansing ni sandiri ampa omas na jumpah i parartaan ni Rumah ni Jahowa pakon na i rumah ni raja ai, anjaha itongoskon ma ai hu bani si Hasael, raja ni Aram, gabe mundur ma ia hun Jerusalem.

¹⁹ (12-20) Barita na tading ai ope pasal si Joas pakon ganup na hinorjahonni, ai lang tarsurat do ai ibagas buku barita ni Raja-raja ni Juda?

²⁰ (12-21) Jadi mambahen partahi-tahian ma juakjuakni mangimbangsi, anjaha ibunuh sidea ma si Joas i rumah Milo.

²¹ (12-22) Juakjuak ni si Josahar, anak ni si Simeat, pakon si Josabad, anak ni si Somer do na mambunuhsi; anjaha itanom sidea ma ia i lambung ni ompungni, i huta ni si Daud, anjaha si Amasia, anakni ai ma bangkit raja manggantihsi.

Si Joahas Raja ni Israel

13 ¹ Paduapuluh-tolutahunkon dob manrajai si Joas, anak ni si Ahasya i Juda, bangkit raja ma si Joahas, anak ni si Jehu, manggomgom Israel i Samaria, sapuluh pitu tahun dokahni.

² Ihorjahon do sogam ni uhur ni Jahowa, ai iirikkon do dousa ni si Jerobeam, anak ni si Nebat, na mambahen Israel mardousa, seng ipasurut dirini mangkorjahon ai.

³ Halani ai gagaj ma ringis ni Jahowa mangidah Israel, anjaha iondoskon ma sidea hubagas tangan ni si Hasael, raja hun Aram, pakon hubagas tangan ni si Benhadad, anak ni si Hasael, sadokah panorang ai.

⁴ Jadi ielek-elek si Joahas ma idop ni uhur ni Jahowa, anjaha itangihon Jahowa ma ia, ai itatap uhur-Ni do

harajaon ni Israel, naha pangarsik-arsik ni Raja Aram bani sidea.

⁵ Halani ai ibere Jahowa ma sada sipaluah hu bani Israel, gabe maluah ma sidea hun bani tangan ni halak Aram, gabe marianan ma halak Israel ibagas lampolamponi bei songon na saindokah.

⁶ Tapi age pe sonai, seng surut sidea hun bani dousa ni ginompar ni si Jerobeam, mardalan ibagas ai do sidea; sonai homa sisumbahon Ashera ipaturut sidea do jongjong i Samaria.

⁷ Ai seng dong be bala ni si Joahas itebai Jahowa bani, sobali ni lima puluh halak bala siparhuda, sapuluh gareta porang, pakon sapuluh ribu bala na mardalan nahei, ai domma siap sidea ibahen raja ni Aram, anjaha domma iluntak-luntak sidea songon orbuk.

⁸ Barita na legan ai ope pasal si Joahas pakon ganup na binahenni ampa hagarangonni, ai lang tarsurat do ai ibagas buku barita ni Raja-raja ni Israel?

⁹ Dob ai modom ma si Joahas rap pakon ompungni, anjaha itanom sidea ma ia i Samaria; anjaha si Joas, anak ni ai ma bangkit raja manggantihsi.

Si Joas Raja ni Israel

¹⁰ Patolupuluh-pitutahunkon dob manrajai si Joas i Juda, bangkit raja ma si Joas, anak ni si Joahas manggomgom Israel, i Samaria, sapuluh onom tahun dokahni.

¹¹ Ihorjahon do homa sogam ni uhur ni Jahowa; seng ipasurut dirini hun bani ganup dousa ni si Jerobeam, anak ni si Nebat, na mambahen Israel mardousa, sai mardalan do ia ibagas ai.

¹² Barita na legan ai pasal si Joas, ronsi haganup horjani ampa hagarangonni sanggah na marporang ai ia dompak si Amasia, raja ni Juda, ai lang tarsurat do ai ibagas buku barita ni Raja-raja ni Israel?

¹³ Jadi modom ma si Joas rap pakon ompungni, anjaha si Jerobeam ma hundul bani paratas ni; anjaha itanom ma si Joas i Samaria i lambung ni raja-raja ni Israel.

Panjahaion ni si Elisa Sanggah Laho Matei Ia

Halongangan na Masa bani Tanomanni

¹⁴ Sanggah boritan si Elisa, ai ma naborit na mamboansi matei, roh ma si Joas raja ni si Israel, manonggorsi, anjaha tangis ma ia i lobei ni, nini ma, “O bapa, bapa! Gareta porang pakon bala ni Israel!”

¹⁵ Nini si Elisa ma hu bani, “Buat ma sada panah pakon lingkit!” Jadi ibuat ma sada panah pakon lingkit.

¹⁶ Dob ai nini si Elisa ma hu bani raja ni Israel, “Tarik ma panah in!” Gabe itarik ma ai. Dob ai itampeihon si Elisa ma tanganni hu atas ni tangan ni raja ai.

¹⁷ Anjaha nini ma, “Buha ma jendela hampit hapoltakan!” Jadi ibuha ma ai. Dob ai nini ma,

“Panahkon ma!” Jadi ipanahkon ma. Dob ai nini si Elisa ma, “In ma panah hamonangan hun bani Jahowa pakon panah hamonangan dompak halak Aram! Ai taluhononmu do halak Aram i Afek, anjaha siap do sidea bahenonmu.”

¹⁸ Dob ai nini ma use, “Buat ma lingkit in!” Dob ai ibuat ma ai. Nini ma hu bani raja ni Israel, “Libaskon ma in hu tanoh!” Jadi ilibaskon ma ai tolu hali, dob ai maronti ma ia.

¹⁹ Dob ai manringis ma halak ni Naibata mangidahsi, nini ma, “Lima barang onom hali namin, ilibaskon ham ai, ase bois namin italuhon ham halak Aram. Tapi sonari tolu hali hansa taluhononmu halak Aram.”

²⁰ Dob ai matei ma si Elisa anjaha itanom ma ia. Jadi roh ma garambolan ni halak Moab hu nagori ai siap bona ni tahun.

²¹ Sanggah mananom sada halak na matei sidea, tonggor ma, iidah sidea ma roh garambolan, gabe tarolos ma sidea mandanggurhon na matei ai hubagas tanoman ni si Elisa, hape dob dais halak ai bani holi-holi ni si Elisa, mulak manggoluh ma ia lanjar jongjong ma.

Hamonangan ni si Joas Mangimbang Halak Aram

²² Sai isosak-sosak si Hasael, raja ni Aram do halak Israel sadokah manggoluh si Joahas.

²³ Tapi marpangulaki ma uhur ni Jahowa mangidah sidea, anjaha idop do uhur-Ni mangidah sidea, marpanatap do uhur-Ni mangidah sidea, halani padan na binahen-Ni ai hu bani si Abraham, si Isak pakon si Jakob, anjaha seng marosuh la mangidah hamagouan ni sidea, barang mangambukkon sidea hun lobei-lobei ni ronsi panorang ai.

²⁴ Dob ai matei ma si Hasael, raja ni Aram, gabe si Benhadad, anakni ai ma bangkit raja manggantihsi.

²⁵ Jadi irampas si Joas, anak ni si Joahas ma use hun bani si Benhadad, anak ni si Hasael, sagala huta na binuatni ai hinan hun bani si Joahas, bapani ai marhitei porang; pala tolu hali italuhon si Joas ia, gabe mulak ma huta ai hu bani Israel ibahen.

Si Amasia, Raja ni Juda

14 ¹ Paduatahunkon dob manrajai i Israel si Joas, anak ni si Joahas, bangkit raja ma si Amasia, anak ni si Joas manggomgom Juda.

² Marumur dua puluh lima tahun do ia sanggah na bangkit raja ai, anjaha dua puluh siah tahun do ia dokahni manrajai i Jerusalem; ia goran ni inangni, si Joaddin do, hun Jerusalem.

³ Ihorjahon do na pintor bani uhur ni Jahowa, tapi seng songon si Daud ompungni ai; usih songon pambahen ni si Joas, bapani ai do ganup pambahenanni.

⁴ Tapi seng iparseda panumbahan na i atas buntu-buntu; sai manggalang anjaha manutung dahupa ope halak simbuei i atas ni panumbahan na i atas buntu-buntu.

⁵ Dob lambin totap harajaonni ai ibagas tanganni, ibunuh ma juakjuakni, na mambunuh raja ondi, ai ma bapani.

⁶ Tapi seng ibunuh anggo anak ni sipamunuh ai, romban hu bani parentah ni Jahowa, na tarsurat ibagas buku titah ni si Musa, na mangkatahon, ‘Seng bulih matei bunuhon bapa halani anakni, barang anak bunuhon halani bapani; tapi ganup halak maningon bunuhon do halani dousani sandiri.’

⁷ Isiapkon do halak Edom i habungan garam, salaksa bueini; idorab anjaha isoluk do Sela, anjaha ibahen ma goranni Joktel, sonai do goranni ronsi sadari on.

Italuhon si Joas si Amasia

⁸ Isuruh si Amasia ma ijia suruhanni marayak si Joas, anak ni si Joahas, anak ni si Jehu, raja ni Israel, nini ma hu bani, “Barah, marsiujian ma hita!”

⁹ Tapi isuruh si Joas, raja ni Israel ma suruhanni marayak si Amasia, raja ni Juda, nini ma, “Isuruh hayu na marsuga na i Libanon ma sipanririt marayak hayu ares na i Libanon, nini ma, ‘Mahua bere ma borumu bahen parinangon ni anakku, hape mamontas ma binatang na i Libanon gabe idogei-dogei ma hayu na marsuga ai.’

¹⁰ Domma tongon italuhon ham halak Edom, gabe ipagijang ham uhurmu. Hamalaskon ham ma hamurmuronmu! Mase ma jombaonmu hamagouan, gabe dabuh ham rap pakon halak Juda?”

¹¹ Tapi seng ra si Amasia manangihon ai. Jadi tangkog ma si Joas raja ni Israel, jadi marsiujian ma sidea, ia pakon si Amasia, raja ni Juda i lambung ni Betsemes na i tanoh Juda.

¹² Tapi talu ma Juda ibahen Israel, gabe maporus ma sidea ganup hu rumahni bei.

¹³ Homa tartangkap do i Bet-Semes si Amasia, raja ni Juda, anak ni si Joas, anak ni si Ahasya ibahen si Joas, raja ni Israel, anjaha iboan ma ia hu Jerusalem. Dob ai iparreong ma tembok ni Jerusalem singgan ni horbangan parsuhi Efraim das hu horbangan parsuhi-suhi, ompat ratus asta ganjangni.

¹⁴ Anjaha ibuat ma ganup omas pakon pirak ronsi ganup parugas na jumpah ibagas Rumah ni Jahowa pakon na ibagas kamar parartaan, na i rumah ni raja ai, sonai homajolma gabe jaminan, dob ai mulak ma ia hu Samaria.

¹⁵ Barita na legan ai ope pasal si Joas, pakon haganup na binahenni ampa hagarangonni sanggah marmunsuh ia dompak si Amasia, raja hun Juda, ai lang tarsurat do ai ibagas buku barita ni raja-raja ni Israel?

¹⁶ Dob ai modom ma si Joas rap pakon ompungni, anjaha tartanom ma ia i Samaria rap pakon raja-raja ni Israel. Jadi si Jerobeam anakni ai ma bangkit raja manggantihsi.

¹⁷ Tapi anggo si Amasia, anak ni si Joas, raja ni Juda, manggoluh ope sapuluh lima tahun nari dob matei si Joas, anak ni si Joahas, raja ni Israel.

¹⁸ Barita na legan ai ope pasal si Amasia, ai lang tarsurat do ai ibagas buku Barita ni Raja-raja ni Juda?

¹⁹ Dob ai ibahen halak ma partahi-tahian mangimbangi i Jerusalem, gabe maporus ma ia hu Lakis. Tapi isuruh sidea ma halak na mangirikkonsi hu Lakis, anjaha ibunuh sidea ma ia ijai.

²⁰ Dob ai iboan sidea ma ia i atas ni huda, gabe itanom ma ia i Jerusalem, i lambung ni ompungni, i huta ni si Daud.

²¹ Dob ai ibuat halak Juda ma si Asarya, na marumur sapuluh onom tahun ope, jadi ipabangkit ma ia gabe raja gantih ni si Amasia bapani ai.

²² Ia do na patoguhkon Elat, anjaha na pasuangkon ai mulak hu bani Juda, dob modom raja ai pakon ompungni.

Jerobeam na Paduahon na hun Israel

²³ Pasapuluh-limatahunkon dob bangkit raja i Juda si Amasia, anak ni si Joas, bangkit raja ma si

Jerobeam, anak ni si Joas, manggomgom Israel i Samaria, ompat puluh sada tahun dokahni.

²⁴ Tapi ihorjahon do sogam ni uhur ni Jahowa, seng ipadaoh uhurni hun bani dousa ni si Jerobeam, anak ni si Nebat, na mambahen Israel mardousa.

²⁵ Ipasuang do parbalogan ni Israel, singgan ni Hamat das hu Laut Araba, romban hu bani hata ni Jahowa, Naibata ni Israel, na dob pinarbagah-Ni hinan marhitei hun bani juakjuak-Ni si Jona, anak ni si Amitai, ai ma nabi na hun huta Gad-Hefer.

²⁶ Ai domma itatap Jahowa hasombuhan ni Israel na parngit sahalian ai, ai domma siap na maposo sonai homa na magodang, anjaha seng dong be sipangurupi bani Israel.

²⁷ Tapi seng onnga ilumbahon Jahowa, paboa sihol siapkonon-Ni do goran ni Israel hun toruh ni langit, halani ai iurupi do sidea marhitei tangan ni si Jerobeam, anak ni si Joas ai.

²⁸ Barita na tading ope pasal si Jerobeam pakon haganup na hinorjahonni ampa hagarangonni, naha parporangonni, naha pambahenni laho pasuangkon bani Israel huta Damaskus pakon Hamat, na masuk hu Juda hinan, ai lang tarsurat do ai ibagas buku barita ni raja-raja ni Israel?

²⁹ Dob ai modom ma si Jerobeam rap pakon ompungni, raja-raja ni Israel, jadi si Sakarya, anak ni ai ma bangkit raja manggantihsi.

Si Asarya (*si Usia*) Raja ni Juda

15 ¹Paduapuluh-pitutahunkon dob gabe raja i Israel si Jerobeam, bangkit raja ma i Juda, si Asarya anak ni si Amasia.

²Marumur sapuluh onom tahun do ia sanggah bangkit raja ia, anjaha lima puluh dua tahun do ia manrajai i Jerusalem; goran ni inangni, si Jekolyah do, hun Jerusalem.

³Ihorjahon do rosuh ni uhur ni Jahowa, songon na binahen ni si Amasia, bapani ai.

⁴Pitah panumbahan na i atas buntu-buntu do na so iparreong; sai tong ope manggalang anjaha manutung dahupa halak simbuei i atas ni panumbahan, na i atas ni buntu-buntu.

⁵Jadi ibogbog Jahowa ma raja ai, gabe gadamon ma ia das ronsi parmateini, gabe punjung ma ia marianan ibagas sada rumah, gabe si Jotam anak ni raja ai ma manrajai rumahni ampa manguhum bangsa parnagori in.

⁶Barita na legan ope pasal si Asarya pakon haganup na binahenni, ai lang tarsurat do ai ibagas buku Barita ni Raja-raja ni Juda?

⁷Dob ai modom ma si Asarya rap pakon ompungni, gabe itanom sidea ma ia i lambung ni ompungni, i huta ni si Daud, anjaha si Jotam anakni ai ma manrajai manggantihsi.

Si Sakarya Raja ni Israel

⁸ Patolupuluh-ualuhtahunkon dob raja i Juda si Asarya, bangkit raja ma si Sakarya, anak ni si Jerobeam, manggomgom Israel i Samaria, onom bulan dokahni.

⁹ Ihorjahon do sogam ni uhur ni Jahowa usih songon na binahen ni ompungni. Seng ipadaoh uhurni hun bani dousa ni si Jerobeam, anak ni si Nebat, na mambahen Israel mardousa.

¹⁰ Martahi-tahi ma si Sallum, anak ni si Jabes dompaksi, lanjar ibunuh ma raja ai i Jibleam, gabe ia ma bangkit raja manggantihsi.

¹¹ Barita na legan ope pasal si Sakarya, tonggor ma, tarsurat do ai ibagas buku Barita ni Raja-raja ni Israel.

¹² On do hata, na binagahkon ni Jahowa hinan hu bani si Jehu, “Maningon anakmu do ronsi sundut paompatkon hundul i atas paratas ni Israel.” Jadi saud ma sonai.

Si Sallum Raja ni Israel

¹³ Patolupuluh-siahtahunkon dob gabe raja i Juda si Usia, bangkit raja ma si Sallum, anak ni si Jabes, anjaha pitah sabulan do dokahni manrajai i Samaria.

¹⁴ Ai tangkog do si Menahem, anak ni si Gadi hun Tirsah, anjaha das ma ia hu Samaria, ibunuh ma

si Sallum, anak ni si Jabes i Samaria, gabe ia ma bangkit raja manggantihi.

¹⁵ Barita na legan ai ope pasal si Sallum pakon partahi-tahian na binahenni ai, tonggor ma, tarsurat do ai ibagas buku barita ni Raja-raja ni Israel.

¹⁶ Ijai ma iparseda si Menahem huta Tapuah, anjaha ibunuhi ganup pangisini pakon nagori na masuk hujai, singgan ni Tirsas, halani seng ra sidea mangungkab horbanganni. Ibunuhi do sidea anjaha ilapah do ganup naboru na boratan rumah.

Si Menahem Raja ni Israel

¹⁷ Patolupuluh-siahtahunkon dob gabe raja i Juda si Asarya, bangkit raja ma si Menahem, anak ni si Gadi, manggomgom Israel i Samaria, sapuluh tahun dokahni.

¹⁸ Ihorjahon do sogam ni uhur ni Jahowa; seng ipadaoh uhurni sadokah manggoluh ia hun bani dousa ni si Jerobeam, anak ni si Nebat, na mambahen Israel mardousa.

¹⁹ Roh do si Pul, raja ni Assur, mamorang tanoh ai, jadi ibere si Menahem ma saribu talenta pirak hu bani si Pul, ase iurupi ia pajonamkon harajaon ai bani.

²⁰ Halak Israel do ihatahon si Menahem manggugui duit ai, ai ma lima puluh sekel pirak sahalak,

siberehonon hu bani raja ni Assur. Dob ai mulak ma Raja Assur, seng tading ia i nagori ai.

²¹ Barita na legan ai ope pasal si Menahem rap pakon ganup na hinorjahonni, ai lang tarsurat do ai ibagas buku barita ni Raja-raja ni Israel?

²² Dob ai modom ma si Menahem rap pakon ompungni, gabe si Pekaya, anakni ai ma bangkit raja manggantihsi.

Si Pekaya Raja ni Israel

²³ Palimapuluhtahunkon dob gabe raja i Juda si Asarya, bangkit raja ma si Pekaya, anak ni si Menahem, manggomgom Israel i Samaria, dua tahun dokahni.

²⁴ Ihorjahon do sogam ni uhur ni Jahowa; seng ipadaoh uhurni hun bani dousa ni si Jerobeam, anak ni si Nebat, na mambahen Israel mardousa.

²⁵ Dob ai martahi-tahi ma si Peka, anak ni si Remalya, puanglima ai mangimbangsi, rap pakon lima puluh halak hun Gilead hasomanni, ibunuh ma ia i Samaria, ibagas benteng rumah ni raja ai, sonai homa si Argob pakon si Arye; dob ibunuh, ia ma raja manggantihsi.

²⁶ Barita na legan ai ope pasal si Pekaya pakon ganup na binahenni, tonggor ma, tarsurat do ai ibagas buku barita ni Raja-raja Israel.

Si Peka Raja ni Israel

²⁷ Palimapuluh-duatahunkon dob gabe raja i Juda si Asarya, bangkit raja ma si Peka, anak ni si Remalya, manggomgom Israel i Samaria, dua puluh tahun dokahni.

²⁸ Ihorjahon do sogam ni uhur ni Jahowa; seng ipadaoh uhurni hun bani dousa ni si Jerobeam, anak ni si Nebat, na mambahen Israel mardousa.

²⁹ Sanggah panorang ni si Peka, raja ni Israel, roh ma si Tiglat-Pileser raja ni Assur, itaban ma Lyon, Abel-Bet-Maahat, Janoa, Kedes, Hazor, Gilead, Galilea pakon ganup tanoh Naftali, anjaha ibuang ma pangisini ai hu Assur.

³⁰ Dob ai martahi-tahi ma si Hosea, anak ni si Ela mangimbang si Peka, anak ni si Remalya, ibunuh ma ia, gabe ia ma bangkit raja manggantihsi, paduapuluhtahunkon dob raja si Jotam, anak ni si Usia.

³¹ Barita na legan ai ope pasal si Peka pakon ganup na binahenni, tonggor ma, tarsurat do ai ibagas buku barita ni Raja-raja Israel.

Si Jotam Raja i Juda

(ay. 32-36, 38: pausih 2 Kron 27)

³² Paduatahunkon dob gabe raja i Israel si Peka, anak ni si Remalya, bangkit raja ma i Juda si Jotam, anak ni si Usia.

³³ Marumur dua puluh lima tahun do ia sanggah na bangkit raja ai, anjaha sapuluh onom tahun do ia marrajai i Jerusalem. Goran ni inang ni si Jerusa do, boru ni si Sadok.

³⁴ Ihorjahon do rosuh ni uhur ni Jahowa, romban hu bani na binahen ni si Usia bapani ai.

³⁵ Pitah panumbahan na i atas buntu-buntu seng iparreong; sai manggalang anjaha manutung dahupa ope halak simbuei i atas panumbahan na i atas buntu-buntu. Ia do na padearhon horbangan parhuluan bani Rumah ni Jahowa.

³⁶ Barita na legan ai ope pasal si Jotam pakon ganupan na hinorjahonni, ai lang tarsurat do ai ibagas buku barita ni Raja-raja ni Juda?

³⁷ Bani panorang ai ma ipungkah Jahowa marsuruh si Resin, raja ni Aram pakon si Peka, anak ni si Remalya mangimbang Juda.

³⁸ Dob ai modom ma si Jotam rap pakon ompungni, anjaha itanom ma ia i lambung ni ompungni, i huta ni si Daud, ompungni ai. Jadi si Ahas, anakni ai ma bangkit raja manggantihsi.

Si Ahas Raja ni Juda

16 ¹ Pasapuluhpitutahunkon dob gabe raja si Peka, anak ni si Remalya, bangkit raja ma i Juda si Ahas, anak ni si Jotam.

² Marumur dua puluh tahun do si Ahas sanggah na bangkit raja ai ia, anjaha sapuluh onom tahun do

dokahni manrajai i Jerusalem; seng dong ihorjahon rosuh ni Jahowa, Naibatani, songon ompungni si Daud,

³ tapi sai mardalan do ia bani dalan ni raja-raja ni Israel. Ia pe itutung do anakni bahen galangan romban hu bani adat hagigian ni bangsa-bangsa, na pinabali ni Jahowa i lobei ni halak Israel.

⁴ Ambahni ai manggalang anjaha manutung dahupa do ia bani ianan panumbahan, na i atas buntu-buntu, i atas dolog pakon i toruh ni ganup hayu na ratah.

⁵ Ijia ma tangkog si Resin, raja ni Aram, pakon si Peka, anak ni si Remalya, raja ni Israel, laho marporang dompak Jerusalem, gabe ihubu sidea ma si Ahas, tapi seng tartaluhon sidea ia.

⁶ Bani panorang ia ipasuang raja ni Edom ma Elat mulak hu bani Edom, anjaha ipabali halak Juda hun Elat; roh ma halak Edom hu Elat, lanjar marianan ijai ronsi sadari on.

⁷ Tapi isuruh si Ahas ma suruhanni marayak Tiglat-Pileser, raja hun Assur, nini ma hu bani, “Jabolonmu anjaha anakmu do ahu. Tangkog ma ham, anjaha paluah ham ma ahu hun bani tangan ni Raja Aram, pakon hun bani tangan ni Raja Israel, na roh tangkog mangimbang ahu.”

⁸ Ibuat si Ahas ma pirak pakon omas na jumpah ibagas Rumah ni Jahowa pakon ibagas kamar

parartaan ni rumah ni raja ai, anjaha itongoskon ma ai bahen siluah hu bani raja ni Assur.

⁹Jadi ibalosi raja ni Assur ma pangindoanni ai; tangkog ma Raja Assur marporang dompak Damaskus lanjar italuhon, anjaha pangisini ai ibuangkon ma hu Kir, anjaha ibunuh do anggo si Resin.

Parubahan na Binahen ni si Ahas i Rumah Panumbahan

¹⁰Dob ai laho ma si Ahas manjumpahkon Tiglat-Pileser, raja ni Assur hu Damaskus. Jadi dob iidah sada anjapanjap i Damaskus, itongoskon Raja Ahas ma sibaran pakon usihan ni anjapanjap ai palgei-palgei hu bani Malim Uria.

¹¹Jadi ipauli Malim Uria ma sada anjapanjap romban hu bani haganup na tinongos ni Raja Ahas hun Damaskus, sonai do ipauli Malim Uria, taram lape roh Raja Ahas hun Damaskus.

¹²Dob roh raja ai hun Damaskus, anjaha iidah anjapanjap ai, gabe ipadohor ma hu bani anjapanjap ai, lanjar naik ma ia hu atas.

¹³Dob ai itutung ma galangan situtungonni pakon galangan sipanganonni, iuseihon ma galangan siinumonni, anjaha ipispiskon ma daroh ni galangan hatarimakasihonni hu bani anjapanjap ai.

¹⁴Anjaha anjapanjap tombaga, na i lobei ni Jahowa, iosor ma ai hun lobei ni rumah ai, hun bani ianan

na i holangkolang ni anjapanjap na baru ai pakon Rumah ni Jahowa, anjaha inahkon ma ai hampit utara ni anjapanjap ai.

¹⁵ Dob ai iparentahkon Raja Ahas ma hu bani Malim Uria, “Maningon i atas ni anjapanjap na bolon in do tutungonmu galangan situtungon sogod pakon galangan sipanganon bodari, galangan situtungon ni ganup bangsa pangisi ni tanoh in pakon ganup galangan sipanganon ampa galangan siinumon ni sidea; anjaha maningon pispiskononmu do hu atas ni ganup daroh ni galangan situtungon pakon galangan sisayaton, tapi pasal anjapanjap tombaga ai marpingkir ope ahu.”

¹⁶ Jadi ibahen Malim Uria ma ganup romban hu bani na hinatahon ni Raja Ahas.

¹⁷ Isuruh Raja Ahas ma homa na manrampingkon lais-lais ni hajongjongan ni parburihan ai, anjaha iosor ma parburihan ai hun datas ni, ipatoruh ma homa bongbongan ai hun datas ni lembu tombaga ai, na i toruh ni ai, anjaha ibahen ma dasor batu hajongjonganni.

¹⁸ Sonai homa surambih ari Sabat, na pinauli i rumah panumbahan pakon labah hamasukan ni raja hun darat laho hu Rumah ni Jahowa, ipaubah do ai laho mambuat uhur ni Raja Assur.

¹⁹ Barita na legan ai ope pasal si Ahas pakon ganup na hinorjahonni, ai lang tarsurat do ai ibagas buku Barita ni Raja-raja Juda?

²⁰ Dob ai modom ma si Ahas rap pakon ompungni, anjaha itanom rap pakon ompungni i huta ni si Daud, jadi si Hiskia anakni ai ma bangkit raja manggantihsi.

Si Hosea Raja ni Israel

17 ¹ Pasapuluh-duatahunkon dob gabe raja i Juda si Ahas, bangkit raja ma si Hosea, anak ni si Ela manggomgom Israel i Samaria, siah tahun dokahni.

² Ihorjahon do sogam ni uhur ni Jahowa, tapi seng songon raja-raja ni Israel na parlobei hun bani.

³ Tangkog ma si Salmanasar, raja ni Assur mangimbangi; tapi ipaunduk ma dirini mambalosisi anjaha igalar ma bani sohei.

⁴ Tapi dob tardapot Raja Assur si Hosea mambahen partahi-tahian (*ai isuruh do suruhanni marayak Raja So, raja ni Masir, anjaha seng be ibere sohei hu bani Raja Assur, songon na somal ganup tahun ibahen*), isuruh ma na manangkapsi, anjaha irantei ma ia ibagas tutupan.

⁵ Dob ai iporang Raja Assur ma ganup tanoh ai, anjaha das ma ia hu Samaria, anjaha ihubu ma huta ai tolu tahun dokahni.

⁶ Pasiahtahunkon dob raja si Hosea, italuhon Raja Assur ma Samaria, anjaha ibuangkon ma halak Israel hu Assur; ihatahon ma sidea marianan i Halah

pakon i topi ni Bah Habor, ai ma bah na i tanoh Gosan ampa i huta-huta ni halak Madai.

Sababni ase Magou Harajaon ni Israel

⁷ Masa pe sonai, halani na dob mardousa do halak Israel dompak Jahowa, Naibata ni sidea, na mangarahkon sidea tangkog hun tanoh Masir, hun bani kuasa ni Parao, raja ni Masir, anjaha marsombah sidea hu bani naibata na legan;

⁸ anjaha iirikkon sidea do adat ni halak sipajuh begu-begu, na dob pinabali ni Jahowa hun lobei ni halak Israel, pakon hasomalan na tinombei ni raja-raja ni Israel.

⁹ Marponop-ponop do halak Israel mambahen na so talup i lobei ni Jahowa, Naibata ni sidea. Ipauli sidea do panumbahan i atas buntu-buntu, ibagas ganup huta ni sidea, singgan ni manara parjagaan ronsi huta na binatar-bataran.

¹⁰ Ipajongjong sidea do bani sidea tiang sisombah-sombahon pakon Ashera bani ganup buntu-buntu na gijang pakon i toruh ni ganup hayu na tabun.

¹¹ Manutung dahupa do sidea ijai i atas ni ganup buntu-buntu, usih songon pambahenan ni bangsa sipajuh begu-begu, na dob pinabali ni Jahowa hun lobei ni sidea. Ihorjahon sidea do horja hajahaton, laho mamuhoi ringis ni Jahowa;

¹² marsombah do sidea hu bani gana-gana, age domma ilumbahon Jahowa pasal ai bani sidea, “Seng bulih horjahononnima na sonin!”

¹³ Domma ipalumba Jahowa homa Israel pakon Juda marhitei sagala nabi-Ni pakon sagala halak na marpanonggoran, nini, “Paubah hanima ma uhurnima hun bani dalannima na bajan in, anjaha ramotkon hanima ma tonah-Ku romban hu bani ganup titah, na dob Hutitahkon hu bani ompungnima, anjaha na dob Hutongoskon bannima marhitei hun bani juakjuak-Ku, nabi-nabi in.”

¹⁴ Tapi seng ra sidea manangihon, lambin ipahengkeng sidea do uhurni usih songon hengken ni uhur ni ompung ni sidea, na so porsaya bani Jahowa Naibata ni sidea.

¹⁵ Anjaha iteoskon uhur ni sidea do titah-Ni pakon padan na binahen-Ni ai hu bani ompung ni sidea, pakon lumba-lumba na nilumbahon-Ni hu bani sidea. lirikkon sidea do gana-gana na so margagan, gabe ihorjahon homa na so margagan, anjaha itiru sidea do homa parlahou ni bangsa inggot ni sidea, age pe domma iparentahkon Jahowa hu bani sidea, ase ulang songon sidea marparlahou sidea.

¹⁶ Tapi itadingkon uhur ni sidea do ganup tonah ni Jahowa, Naibata ni sidea, anjaha ibahen sidea do bani sidea dua gana-gana lombu na tinuang; ipauli sidea do sada Ashera, anjaha isombah sidea do

ganup bala na i langit, sonai homa ibalosi sidea do baal.

¹⁷ Itutung sidea do anakni pakon boru ni sidea bahen galangan, ihorjahon sidea do panjahaion pakon partondungon, anjaha ijualhon sidea do dirini mangkorjahon sogam ni uhur ni Jahowa, laho mamuhoi ringis ni Jahowa.

¹⁸ Jadi manringis tumang ma Jahowa mangidah Israel, gabe ipadaoh ma sidea hun lobei-Ni; seng dong na tading sobali marga Juda tumang.

¹⁹ Halak Juda pe homa seng iramotkon sidea tonah ni Jahowa Naibata ni sidea, tapi iirikkon sidea do hasomalan na tinombei ni halak Israel sandiri.

²⁰ Halani ai iambukkon Jahowa ma ganup ginompar ni Israel, ipatoruh ma sidea anjaha iondoskon hubagas tangan ni panrampok, paima iambukkon sidea ganup hun lobei ni.

²¹ Ai dob isirangkon Israel dirini hun bani ginompar ni si Daud, anjaha irajahon sidea si Jerobeam, anak ni si Nebat, gabe marbalik ma Israel hun bani Jahowa ibahen si Jerobeam, anjaha iojur sidea mambahen dousa banggal.

²² Jadi ihorjahon halak Israel ma ganup dousa ni si Jerobeam, na binahenni ai, anjaha seng ipasurut sidea dirini hunjai,

²³ paima ipadaoh Jahowa Israel hun lobei ni, songon na dob nilumbahon-Ni marhitei juakjuak-Ni, ai ma

nabi-nabi-Ni. Sonai ma parbuang ni halak Israel hun tanohni hu Assur ronsi sadari on.

Halak Samaria

²⁴ Dob ai iboan Raja Assur ma halak hun Babel, Kutah, Awa, Hamat, pakon Separwaim, gabe ihatahon ma sidea marianan i huta Samaria gantih ni halak Israel, isoluk sidea ma Samaria anjaha marianan ibagas huta-huta ai.

²⁵ Tapi bani mungkahni marianan ma sidea ijai, seng marhabiaran sidea, bani Jahowa, gabe itongos Jahowa ma singa hu tongah-tongah ni sidea, na mambunuhi deba hun bani sidea.

²⁶ Dob ai nini sidea ma hu bani raja ni Assur, “Bangsa sipajuh begu-begu, na binoan anjaha nisolutkonmu in marianan ibagas huta na i Samaria, seng ibotoh sidea titah ni Naibata ni tanoh ia, halani ai itongos do singa hu tongah-tongah ni sidea, anjaha tonggor ma, domma ibunuhi sidea, halani na so binotoh ni sidea titah ni Naibata ni tanoh in.”

²⁷ Dob ai iparentahkon raja ni Assur ma, “Arahkon nasiam ma hujai sada halak hun bani malim, na dob binuangkon nasiam hunjai, ase laho ia marianan hujai, anjaha iajarhon titah ni Naibata ni tanoh ai.”

²⁸ Jadi roh ma sada halak hun bani malim na binuangkon ai hun Samaria, anjaha marianan ma ia i Betel, anjaha iajarhon ma bani sidea naha marhabiaran hu bani Jahowa.

²⁹ Tapi ganup bangsa ai marsibahen naibatani, anjaha ipannahkon ma ai hubagas rumah panumbahan na i atas buntu-buntu, na pinauli ni halak Samaria, ganup bangsa ibagas huta na niianan ni sidea bei.

³⁰ Halak Babel paulihon Sukot-Benot, halak Kut paulihon Nergal, halak Hamat paulihon Asima,

³¹ halak Awa paulihon Nibhas pakon Tartak; anjaha halak Separwaim manutungi anakni ibagas apuy hu bani Adrammelek pakon hu bani Anamelek, ai ma naibata ni halak Separwaim.

³² Ihabiari sidea do homa Jahowa, gabe ipabangkit sidea ma hun tengah-tengah ni sidea sahalak gabe malim bani rumah panumbahan na i atas ni buntu-buntu, na manggalang bani sidea i rumah panumbahan na i atas buntu-buntu ai.

³³ Marhabiaran do sidea bani Jahowa, tapi ibalosi sidea do homa naibata ni sidea, romban hu bani hasomalan ni ganup bangsa sipajuh begu-begu, harorohan ni sidea ai.

³⁴ Ronsi sadari on ibahen sidea romban hu bani hasomalan ni sidea sapari. Seng marhabiaran sidea hu bani Jahowa, anjaha seng iirikkon sidea ruhut barang aturan barang titah atap parentah, na pinarentahkon ni Jahowa hu bani ginompar ni si Jakob, na ginoranan-Ni Israel.

³⁵ Ibahen Jahowa do padan bani sidea, anjaha iparentahkon bani sidea, "Seng bulih marhabiaran

hanima bani naibata na legan, barang marsombah
hanima hujai barang balosannima ai barang
manggalang hanima hujai,

³⁶ tapi maningon marhabiaran do hanima bani
Jahowa, na mangarahkon hanima luar hun tanoh
Masir marhitei hagogohon bolon pakon tangan na
gostong, maningon hu bani do hanima manggalang.

³⁷ Anjaha aturan-Ni pakon uhum-Ni pakon
titah-Ni ampa parentah-Ni, na sinuratkon-Ni
bannima, maningon tulimat do hanima tongtong
mangkorjahon ai. Seng bulih hanima marhabiaran
bani naibata na legan,

³⁸ anjaha seng bulih halupahononnima padan
na Hubahen in bannima. Seng bulih hanima
marhabiaran bani naibata na legan,

³⁹ tapi maningon habiarannima do Jahowa
Naibat анима, ase la paluahkon hanima hun bani
tangan ni ganup munshunnima.”

⁴⁰ Tapi age pe sonai, seng ra sidea manangihon, sai
ihorjahon sidea do romban hu bani hasomalan ni
sidea sapari.

⁴¹ Ase marhabiaran do bangsa on bani Jahowa,
tapi isombah sidea do homa gana-gana ni sidea;
sonai homa anak ni sidea pakon pahompu ni sidea,
songon na binahen ni bapa ni sidea, sonai do ibahen
sidea ronsi sadari on.

Si Hiskia, Raja ni Juda

18 ¹Patolutahunkon dob gabe raja i Israel si Hosea, anak ni si Ela, bangkit raja ma i Juda si Hiskia, anak ni si Ahas.

²Marumur dua puluh lima tahun do ia sanggah na bangkit raja ai, anjaha dua puluh siah tahun do ia manrajai i Jerusalem; ia goran ni inangni si Abi do, boru ni si Sakarya.

³Ihorjahon do rosuh ni uhur ni Jahowa, usih songon na binahen ni si Daud ompungni ondi.

⁴Ia do na parseda panumbahan na i atas buntu-buntu, na mambolahi gana-gana, na manroboh Ashera pakon na manrosaki ulog tombaga, na pinauli ni si Musa, ai ronsi panorang ai, sai manutung dahupa do halak Israel hujai, anjaha igoran do ai Nehustan.

⁵Marhatengeran do ia hu bani Jahowa, Naibata ni Israel, anjaha seng dong songonsi raja hun bani raja-raja ni Juda na i pudi ni, barang raja na parlobei hun bani.

⁶Sai marsijoloman do uhurni hu bani Jahowa, seng ipadaoh uhurni hun Bani, anjaha iramotkon do tonah-Ni, na binerehon ni Jahowa hu bani si Musa.

⁷Halani ai sai ihasomani Jahowa do ia; barang huja pe ia manlangkah sai manjadi do. Ilawan do raja ni Assur, seng ra ia mambalosisi.

⁸ Italuhon do halak Palistim das ronsi Gasa pakon nagorini, singgan ni manara panjagaan das hu huta na binatar-bataran.

⁹ Paompattahunkon dob gabe raja si Hiskia, ai ma papitutahunkon dob gabe raja i Israel si Hosea, anak ni si Ela, tangkog ma si Salmanasar raja ni Assur marporang dompak Samaria, anjaha ihubu ma ia, ¹⁰ anjaha dob salpu tolu tahun itaban ma ai. Paonomtahunkon dob raja si Hiskia, ai ma pasiahtahunkon dob raja si Hosea, raja ni Israel, ijai ma tartaban Samaria.

¹¹ Ibuangkon Raja Assur ma halak Israel hu Assur, anjaha ibahen ma sidea marianan i Hala, pakon bani Bah Habor, bani bah ni tanoh Gosan pakon i huta-huta ni halak Madai,

¹² halani na so tinangihon ni sidea sora ni Jahowa, Naibata ni sidea, tapi ilanggar do padan-Ni pakon ganup na tinonahkon ni si Musa juakjuak ni Jahowa; seng itangihon anjaha ibalosi sidea ai.

Si Sanherib Mamorang Juda. Maluah Jerusalem Marhitei Dalan Halongangan

(ay. 13-37: pausih 2 Kron. 32:1-19; Jes. 36)

¹³ Pasapuluhompattahunkon dob gabe raja si Hiskia, tangkog ma si Sanherib, raja ni Assur, marporang dompak ganup huta ni Juda na marbatar-batar, anjaha italuhon ma ai.

¹⁴ Dob ai isuruh si Hiskia, raja ni Juda ma suruhanni hu Lakis marayak raja ni Assur, nini ma hu bani, “Domma mardousa ahu, surut ma ham hun bangku; barang aha na pinabobankonmu bangku, sai galaronku do ai.” Jadi ipabobankon raja ni Assur ma hu bani si Hiskia raja ni Juda tolu ratus talenta pirak pakon tolu puluh talenta omas.

¹⁵ Jadi ibere si Hiskia ma ganup pirak na jumpah ibagas Rumah ni Jahowa pakon na ibagas kamar parartaan ni rumah ni raja ai.

¹⁶ Bani panorang ia ma iliklik si Hiskia raja ni Juda sagala omas hun labah ni Rumah ni Jahowa pakon hun bani tiang na nilampisni sandiri, anjaha ibere ma ai hu bani raja ni Assur.

¹⁷ Tapi isuruh Raja Assur ma Tartam, Rabsaris pakon Rabsake rap pakon buei bala hun Lakis hu Jerusalem marayak Raja Hiskia. Jadi tangkog ma sidea, anjaha das ma sidea dohorhon bondar ni bongbongan parhuluan ai, i lambung ni dalan na bolon hu ladang pamurihan.

¹⁸ Dob dilo-dilo sidea hu bani raja ai, mintor luar ma marayak sidea si Eliakim, anak ni si Hilkia, siramotkon rumah ai, pakon si Sebna, jurutulis ai, ampa si Joah, anak ni si Asap panuturi ai.

¹⁹ Nini Rabsake ai ma hu bani sidea, “Hatahon nasiam ma hu bani si Hiskia, sonon do hata ni raja na bolon in, raja ni Assur, ‘Ai aha do hatengeran, na pinangunsagahkonmin?

²⁰ Nini uhurmu gakni sungkup ma hata ni bibir tumang gabe haputusan ampa kuasa hamunsuhon? On pe, hu bani ise do ho marhatengeran, ase pag ho marbalik hun bangku?

²¹ Tonggor ma, marhatengeran do ho hu bani tungkot tolong na marosak, ai ma Masir, na manolpusi tangan ni jolma na martungkotkonsi. Sonai do pambahen ni Parao, raja ni Masir, hu bani haganup halak na marhatengeran hu bani.'

²² Tapi anggo ihatahon ho hu bangku, 'Marhatengeran hu bani Jahowa Naibatunami do hanami, ai lang la do ai, na dob iparseda si Hiskia panombahanni na i buntu-buntu, sonai anjapanjapni, anjaha na mangkatahon hu bani Juda pakon hu Jerusalem, 'Maningon i lobei ni anjapanjap on do nasiam marsombah i Jerusalem?'

²³ On pe, martaruh ma ho pakon tuanku Raja Assur, hubere ma bam dua ribu huda, naha sungkup do tarbere ho halak na mangajak ai?

²⁴ Naha ma panahanmu mangimbang sahalak gelah hun bani juakjuak ni tuanku sietekan? Marhatengeran hu Masir do ho tene, halani gareta pakon bala siajak hudani?

²⁵ Ambahni ai, na so marhasoman Jahowa gakni ahu laho tangkog hu tanoh on, laho maniapkon on? Jahowa do mangkatahon hu bangku, 'Tangkog ma ho hu tanoh on, anjaha siapkon ma in!'"

²⁶ Dob ai nini si Eliakim, anak ni si Hilkia pakon si Sebna ampa si Joah ma hu bani Rabsake ai, “Mahua hata Aram ma hatahon ham hu bani juakjuakmu on, ai iarusi hanami do in; ulang ma hatahon ham hata Jahudi bannami i lobei ni halak na mabuei, na i atas tembok in.”

²⁷ Tapi nini Rabsake ai ma hu bani sidea, “Ai hu bani tuanmu gakni pakon hubam ahu isuruh tuanku mangkatahon hata on, ai lang dihut do hu bani dalahi na i atas tembok in, na maningon mangankon ginagatni anjaha na manginum bah niinumni rap pakon hanima?”

²⁸ Dob ai jongjong ma Rabsake ai ipagogoh ma sorani mangkatahon ibagas hata Jahudi, “Tangihon nasiam ma hata ni raja na bolon on, raja ni Assur!”

²⁹ Sonon do hata ni raja ai, “Ulang ma ra nasiam paoto-otoon ni si Hiskia, ai lang tolapsi paluahkon nasiam hunbagas tanganku.

³⁰ Anjaha ulang ma ra nasiam ojur-ojuron ni si Hiskia marhatengeran bani Jahowa, marhitei na mangkatahon, ‘Sai paluahon ni Jahowa do hita, seng anjai ondoskonon-Ni huta on hubagas tangan ni Raja Assur.’

³¹ Ulang ma tangihon nasiam hata ni si Hiskia, ai sonon do hata ni Raja Assur, Mardamei ma nasiam pakon ahu, anjaha luar ma nasiam manjumpahkon ahu, ase ganup nasiam bulih mangan hun bani hayu

anggurni pakon hun bani jambuni, anjaha ganup nasiam bulih minum hun bani parigini,

³² paima roh ahu mangalop nasiam hu tanoh na songon Tanoh nasiam on, hu tanoh hatubuhan ni gandum pakon anggur, hu tanoh na lobihan bani ruti pakon pohon anggur, bani hayu jetun pakon manisan ni huramah, ase manggoluh nasiam, ulang matei. Sai ulang ma tangihon nasiam si Hiskia, ai paoto-otohon nasiam do ia anggo ihatahon, 'Sai paluahon ni Jahowa do hita!'

³³ Naha, mintor tarpaluah naibata ni bangsa sipajuh begu-begu ma nagori ni sidea bei hun tangan ni Raja Assur?

³⁴ Ija do naibata ni Hamat pakon Arpad? Ija do naibata ni Separwaim, Hena pakon Iwa? Ai tarpaluah sidea do Samaria hun tanganku?

³⁵ Ise ma hun bani naibata ni nagori ondi na tolak paluahkon tanoh ni sidea hun tanganku? Mintor tarpaluah Jahowa ma Jerusalem hun bani tanganku?"

³⁶ Jadi sip bei ma halak na mabuei ai, anjaha sakkababah hata pe lang ibalosi sidea ia, ai domma iparentahkon raja ai, "Ulang balosi nasiam ia!"

³⁷ Dob ai roh ma si Eliakim, anak ni si Hilkia, haondosan ni rumah ai, pakon si Sebna jurutulis ai ampa si Joah, anak ni si Asap, panuturi ai, marayak si Hiskia marhiou na marigat, laho patugahkon hu bani haganup hata ni Rabsake ai.

Ipatenger Nabi Jesayas Uhur ni si Hiskia

(Pausih Jes. 37; 2 Kron. 32:20-23)

19 ¹ Jadi dob ibogei Raja Hiskia hata ai, irigati ma hiouni, isorongkon ma hiou guni, dob ai laho ma ia hu Rumah ni Jahowa.

² Dob ai isuruh ma si Eliakim, siramotkon rumahni ai, pakon si Sebna, jurutulisni ai rap pakon malim situaan, marhiou guni marayak Nabi Jesayas, anak ni si Amos.

³ Nini sidea ma hu bani, “Sonon do hata ni si Hiskia, ‘Ari hasosakan, paminsangon pakon habadoron do ari on; jumpah ma namin panorangni tubuh na etek-etek, tapi seng dong gogoh laho manubuhkon.

⁴ Ra ibogei Jahowa Naibatamu do ganup hata ni Rabsake ai, na sinuruh ni tuanni, Raja Assur, laho mangapasi Naibata na manggoluh in, andohar ibalaskon hata na hinatahonni ai, na dob binogei ni Jahowa Naibatamu; antong martonggo ma ham mangapiti simasima na manggoluh in ope.”

⁵ Jadi dob das juakjuak ni Raja Hiskia hu bani si Jesayas,

⁶ nini si Jesayas ma hu bani sidea, “Sonon ma hatahon nasiam hu bani tuan nasiam, sonon do hata ni Jahowa, ‘Ulang ho mabiar pasal hata na dob binogeimu, na dob niapaskon ni juakjuak ni Raja Assur hu Bangku.

⁷ Tonggor ma, Ahu do na mamberehon bani sada tonduy, ase ibogei barita, gabe mulak hu tanohni, ase Ahu mambahen rasei ia marhitei podang ibagas tanohni sandiri.”

**Iulaki Sanherib Marsahap bani si
Hiskia, ase Mangunduk Ia**

⁸ Mulak ma Rabsake, anjaha jumpahsi ma Raja Assur marporang dampak Libna; ai domma ibogei hinan, na dob misir raja ai hun Lakis.

⁹ Anjaha dob i bogei si Sanherib pasal si Tirhaka, raja ni Etiopia, “Tonggor ma, domma bingkat ia laho marmunsuh dampak ham, isuruh ma use suruhanni hu bani si Hiskia mangkatahon,

¹⁰ Sonon ma hatahon nasiam hu bani si Hiskia raja ni Juda, ‘Ulang ma ra ho paoto-otoon ni Naibatamu, na pinangunsagakonmin marhitei na mambagahkon, na so ondskononkon Jerusalem hubagas tangan ni Raja Assur.’

¹¹ Tonggor ma, domma ibogei ho na binahen ni Raja Assur hu bani ganup nagori, naha paniapkonni bani ai ganup. Mintor tumaram ma maluah ia ho?

¹² Tarpaluah naibata ni bangsa-bangsa ai do sidea, ai ma bangsa-bangsa, na siniapkon ni ompungku: Gosan, Haran, Resep, pakon ginompar ni si Eden na marianan i Tilasar?

¹³ Ija do raja ni Hamat, raja ni Arpad, raja hun huta Separwain, raja hun Hena pakon raja hun Iwa?”

Tonggo ni si Hiskia

¹⁴ Jadi ijalo si Hiskia ma surat ai hun tangan ni suruhan ai, anjaha ibasa ma ai; dob ai tangkog ma ia hu Rumah ni Jahowa, anjaha ipaherbang raja ai ma surat ai i lobei ni Jahowa,

¹⁵ anjaha martonggo ma ia hu bani Jahowa, nini ma, “Ham Jahowa, Naibata ni Israel, na marparatas bani herubin, sahalak Ham do Naibata ni haganup harajaon na i atas tanoh on, Ham do na manompa langit pakon tanoh on!

¹⁶ Paeleng Ham ma Jahowa pinggol-Mu, anjaha tangar ma! Ungkap Ham ma panonggor-Mu, anjaha tonggor ma! Tangar Ham ma hata ni Sanherib ai, na sinuruh hujon, laho mangapasi Ham, Naibata na manggoluh in.

¹⁷ Tongon do, Ham Jahowa, domma isiapkon raja ni Assur ganup bangsa sipajuh begu-begu pakon tanoh ni sidea.

¹⁸ Anjaha domma igijigkon hubagas apuy naibata ni sidea ai, ai seng tongon naibata ai, tapi bahen-bahenan ni tangan ni jolma do, hayu pakon batu, halani ai do ase isiapkon ai.

¹⁹ On pe, Ham Jahowa, Naibatanami, sai paluah Ham ma hanami hun tanganni, ase itanda haganup harajaon na i atas tanoh on, paboa Ham tumang hansa Naibata, Ham Jahowa.”

Lumba-lumba Paduahalihan Pasal Haluahon ni Jerusalem

²⁰ Dob ai isuruh si Jesayas, anak ni si Amos ma na mangkatahon hu bani si Hiskia, “Sonon do hata ni Jahowa, Naibata ni Israel, ‘Domma Hutangihon tonggomu na hu Bangku pasal Sanherib, raja ni Assur.

²¹ On do hata na tinonahkon ni Jahowa pasalsi, ‘Pis do uhur-Ni mangidah ho, i apasi anak boru, boru Sion in do ho; iupir-upirhon boru ni Jerusalem do uluni i pudimu.

²² Ise do na nirehean pakon na niapasanmin? Dompok ise do na pinamalingmin soram, anjaha ipatingkal ho matamu? Dompok na Pansing ni Israel do!

²³ Marhitei suruhanmu iapasi ho do Jahowa, anjaha ihatahon ho, ‘Rap pakon garetangku na buei in, laho do ahu naik hu atas ni dolog, daoh masuk hu Libanon; huroboh do hayu aresni sigijangan pakon hayu marantini sijengesan. Humasuki do das ronsi suhi-suhini sidaohan, hu tombakni sipotpotan.

²⁴ Huhurak do parigi anjaha huinum do bah na legan, anjaha huarsik do marhitei tapak-tapak ni naheihu ganup bah ni Masir.’

²⁵ Seng ope i bogei ho, na dob sonai hutotapkon hun bani ari nabasaia, sipamasaonku sonari, ai ma ase i

siapkan ho huta na marbatar-batar gabe tambusan batu,

²⁶ anjaha pangisini ai, na so margogoh ai, gabe tarsonggot anjaha gaor, gabe songon suan-suanan na i ladang anjaha songon poyon-poyon na galek, songon poyon i atas rumah, anjaha songon gandum na horahan.

²⁷ Tapi hubotoh do parjongjongmu pakon parhundulmu, pardaratmu pakon parmasukmu ampa pangoga-ogamu dompak Ahu.

²⁸ Halani mangoga ho dompak Ahu anjaha das hu pinggol-Hu hajungkatonmu, bahenon-Ku ma halihir-Hu hu igungmu pakon kokang-Ku hu pamanganmu, anjaha paulakon-Ku ho hun dalan harorohanmu.

²⁹ Anjaha on ma partinandaan bamu alo Hiskia: Panganonmu ma tahun on omei sagak pakon bani tahun na paduahon; tapi patolutahunkon martidah ma hanima anjaha marpariama, manuan hayu anggur anjaha mangankon buahni.

³⁰ Anjaha simasima na maluah hun bani ginompar ni Juda, marurat ma use hu toruh anjaha marbuah dompak datas;

³¹ ai hun Jerusalem do luar sada simasima, anjaha hun Dolog Sion sada hulanan na pinaluah. Ringis ni Jahowa Zebaot do sijadihon ai.

³² Halani ai sonon do hata ni Jahowa pasal raja ni Assur. Seng anjai masuk ia hubagas huta on, barang

panahkononni sada lingkit hujon, barang roh ia hulobei ni huta on margantar, barang bahenonni hubuan inggot huta on.

³³ Maningon hun bani dalan harorohanni ai ia mulak, tapi seng anjai masuk ia hubagas huta on, nini Jahowa.

³⁴ Ai sihol ondingan-Ku do huta on laho paluahkon on, halani Ahu sandiri pakon halani juakjuak-Ku si Daud.”

Parluah ni Jerusalem

³⁵ Anjaha bani bornginni ai, luar ma malekat ni Jahowa, gabe ibunuh ma i parsaranan ni Raja Assur saratus ualuh puluh lima ribu halak. Jadi dob puho sidea girah patarni ai, tonggor ma, haganupan ai domma gabe bangkei.

³⁶ Dob ai bingkat ma Sanherib, raja ni Assur mulak hu hutani, anjaha marianan ma ia i Ninive.

³⁷ Jadi sanggah na manumbah ia ibagas rumah ni Nisrok, naibatani ai, ibunuh anak ni si Adramelek pakon si Sareser ma ia bani podang, dob ai, maporus ma sidea hu tanoh Ararat. Jadi si Asarhaddon, anak ni ai ma gabe raja manggantihsi.

Naborit ni si Hiskia ampa Parmalumni

(bd. 20: pausih Jes. 38; 39; 2 Kron. 32:24-33)

20¹ Boritan ma si Hiskia bani panorang ia, narus-narus matei. Jadi roh ma marayaksi

Nabi Jesayas, anak ni si Amos, anjaha nini ma hu bani, “Sonon do nini Jahowa, ‘Paturei ma rumahmu, ai matei ma ho, seng anjai manggoluh be ho.”

²Jadi ipagoling si Hiskia ma bohini dompak dingding, martonggo ma ia hu bani Naibata, nini ma,

³“Dingat Ham ma Ham Jahowa, naha ahu marparlahou i lobei-Mu ibagas hasintongan pakon gok ni paruhuran, huhorjahon do aha na madear i lobei ni bohi-Mu.” Anjaha gogoh-gogoh do tangis si Hiskia ai.

⁴Tapi paima luar si Jesayas hun alaman partongah-tongah ai, roh ma hata ni Jahowa hu bani,

⁵“Mulak ma ho, anjaha hatahon ma hu bani si Hiskia, pambobai ni bangsang-Kin, sonon do hata ni Jahowa, Naibata ni si Daud, ompungmai, ‘Domma Hutangar tonggomai, domma Huidah iluhmai; tonggor ma, pamalumon-Ku ma ho, patoluarianhon tarbahen ho ma tangkog hu Rumah ni Jahowa.

⁶Tambahon-Ku ma sepuluh lima tahun nari ari-ari ni goluhmu. Paluahon-Ku ma ho pakon huta on hunbagas tangan ni Assur, anjaha ondingan-Ku do huta on halani Ahu pakon halani juakjuak-Ku si Daud.”

⁷Dob ai nini si Jesayas ma, “Boan hujon jambu na nilintok.” Jadi dob iboan ai, anjaha inahkon bani bayoh ni raja ai, gabe malum ma iahap.

⁸ Nini si Hiskia ma hu bani si Jesayas, “Aha ma tandani, paboa na pamalumon ni Jahowa do ahu, anjaha na maningon tangkog ma ahu patoluarohon hu Rumah ni Jahowa?”

⁹ Jadi nini si Jesayas ma, “On ma tanda hun bani Jahowa bamu, paboa na maningon bahenon ni Jahowa bamu, aha na dob binagahkon-Ni: Hu lobei ma laho halinoh ai sapuluh garis barang dompak pudi sapuluh garis?”

¹⁰ Nini si Hiskia ma mambalosi, “Pahara na urah do ai laho halinoh ai sapuluh garis hu lobei. Lang, maningon dompak pudi do laho halinoh ai sapuluh garis.”

¹¹ Jadi dilo-dilo ma Nabi Jesayas hu bani Jahowa, gabe ipaulak Jahowa ma halinoh ai sapuluh garis dompak pudi bani jam mata ni ari ni si Ahas.

Suruhan na hun Babel

¹² Bani panorang ai isuruh si Merodak-Baladan, anak ni si Baladan, raja hun Babel ma suruhanni mamboan surat pakon siluah hu bani si Hiskia; ai ibogei do na boritan si Hiskia.

¹³ Jadi malas tumang do uhur ni si Hiskia mangidah sidea, gabe ipatuduhkon ma bani sidea ganup rumah parartaanni, pirak, omas, morum-moruman, minak na misbou, parsinjataanni, sagala na jumpah ibagas rumah parartaanni; seng dong na ibagas

rumahni barang ibagas ganup harajaonni ai, na so ipatuduhkon si Hiskia hu bani sidea.

¹⁴ Dob ai roh ma Nabi Jesayas marayak Raja Hiskia, jadi nini ma hu bani, “Aha do na hinatahon ni halak in? Anjaha hunja do sidea roh marayak ham?” Nini si Hiskia ma mambalosi, “Hun tanoh na daoh do sidea na roh in, hun Babel.”

¹⁵ Nini ma, “Aha do na ni idah ni sidea i rumahmu?” Nini si Hiskia ma mambalosi, “I idah sidea do ganup na ibagas rumahku, seng dong ibagas rumah parartaanku, na so hupatuduh hu bani sidea.”

¹⁶ Dob ai nini si Jesayas ma hu bani si Hiskia, “Tangar ma hata ni Jahowa!

¹⁷ ‘Tonggor ma, na roh ma panorangni, tarboan ma ijai hu Babel sagala na ibagas rumahmu pakon sagala na pinatumpu ni ompungmu ronsi sadari on; seng dong na tading,’ nini Jahowa.

¹⁸ Anjaha deba hun bani anakmu sandiri, na dob tubuh bamu, tarboan do; anjaha gabe sisuruh-suruhon ma sidea ibagas rumah ni raja Babel.”

¹⁹ Dob ai nini si Hiskia ma hu bani si Jesayas, “Dear do hata ni Jahowa na hinatahonmu ai.” Ai nini uhurni do, “Asal mardamei anjaha marhatotapon ahu sadokah manggoluh!”

²⁰ Barita na legan ai ope pasal pambahenanni pakon ganup kuasani pakon parpaulini bani bongbongan ampa bondar gabe masuk bah hubagas huta ai, ai

lang tarsurat do ai ibagas buku Barita ni Raja-raja Juda?

²¹ Dob ai modom ma si Hiskia rap pakon ompungni, anjaha si Manasse anakni ai ma gabe raja manggatihsi.

Si Manasse Raja ni Juda

21 ¹ Sapuluh dua tahun do umur ni si Manasse sanggah na bangkit raja ai ia, anjaha lima puluh lima tahun do ia manrajai i Jerusalem. Si Hepsiba do goran ni inangni.

² Ihorjahon do sogam ni uhur ni Jahowa, romban hu bani pambahenan hagigian ni bangsa sipajuh begu-begu na pinabali ni Jahowa hun lobei ni Israel.

³ Ai iulaki raja ai do paulihon panumbahan na i atas buntu-buntu, na dob pinarseda ni si Hiskia, bapani ai; anjaha ipajongjong do anjapanjap bani baal, i bahen do sada Ashera, songon na binahen ni si Ahab, raja ni Israel, isombah do ganup bala ni langit anjaha ibalosi do ai.

⁴ Ipajongjong do anjapanjap sisonai ai ibagas rumah ni Jahowa; pasal ai domma ihatahon Jahowa hinan, 'I Jerusalem do pajonamon-Ku goran-Ku.'

⁵ Ipajongjong do anjapanjap bani ganup bala ni langit bani alaman ni Rumah ni Jahowa na dua ai.

⁶ Itutung do anakni bahen galangan, ihorjahon do hadatuon pakon partondungan, anjaha ipiara do

halak paniaran pakon sipanjahai. Buei do sogam ni uhur ni Jahowa ihorjahon, laho mamuhoi ringis-Ni.

⁷ Anjaha ipauli do gana-gana Ashera, anjaha inahkon ma ai i Rumah ni Jahowa; pasal ai domma ihatahon Jahowa hinan hu bani si Daud pakon hu bani si Salomo anakni ai, 'Pajonamon-Ku do goran-Ku sadokah ni dokahni ibagas rumah on pakon i Jerusalem na dob hupilih in hun bani ganup marga ni Israel;

⁸ anjaha seng be paosoron-Ku nahei ni Israel hun tanoh na dob Hulayak-layakkon hu bani ompung ni sidea, asal ma ihaporluhon mangkorjahon romban hu bani na dob Hutonahkon hu bani sidea, pakon romban hu bani haganup titah na dob tinonahkon ni juakjuak-Ku si Musa hu bani sidea.'

⁹ Tapi seng itangihon sidea hata ai, ai kahou do sidea ibahen si Manasse, gabe bueinan do ihorjahon sidea hajahaton ase bangsa na dob niraseihon ni Jahowa ilobei ni halak Israel.

¹⁰ Ai do ase ilumbahon Jahowa marhitei nabi-nabi, juakjuak-Ni ai, nini,

¹¹ "Halani ihorjahon si Manasse, raja ni Juda, sagala hagigian on, anjaha ihorjahon do hajahaton bueinan hun bani ganup halak Amori na parlobei hun bani, anjaha ibahen homa Juda mardousa marhitei gana-ganani ai,

¹² halani ai sonon do hata ni Jahowa, Naibata ni Israel, 'Tonggor ma, parohon-Ku ma hamagouan hu

Jerusalem pakon hu Juda, pala marnginging pinggol ni ganup halak na mambogei ai haduasi.

¹³ Anjaha pagistangon-Ku do hu atas ni Jerusalem tali sibar-sibar na hu Samaria hinan pakon batu sibar-sibar na hu bani rumah ni si Ahab, anjaha apusan-Ku do Jerusalem songon pangapus ni halak bani pinggan, dob iapus gabe ipalangkob.

¹⁴ Anjaha buangkonon-Ku do simasima ni parbagianan-Ku, anjaha ondoskonon-Ku do sidea hubagas tangan ni munsuh ni sidea, gabe taban pakon sirampason ni ganup munsuh ni sidea,

¹⁵ halani na binahen ni sidea ai sogam ni uhur-Hu, anjaha pinuhoanni ai ringis-Ku, singgan ni parluar ni ompung ni sidea hun Masir ronsi sadari on.

¹⁶ Ambahni ai buei do daroh ni halak na so marpipot iduruskon si Manasse, pala gok Jerusalem ibahen hun ujung na sada hu ujung na sada nari, sobali dousa ni na mambahen Juda mardousa, gabe ihorjahon sidea sogam ni uhur ni Jahowa.”

¹⁷ Barita na legan ai pasal pambahenan ni si Manasse pakon ganup na hinorjahonni, ai lang tarsurat do ai ibagas buku Barita ni Raja-raja Juda?

¹⁸ Dob ai modom ma si Manasse rap pakon ompungni, gabe itanom ibagas pohon ni rumah ni ai, ibagas pohon ni si Usa; gabe si Amon, anakni ai ma gabe raja manggattihsi.

Si Amon Raja ni Juda

¹⁹ Dua puluh dua tahun do umur ni si Amon sanggah na bangkit ai ia gabe raja, anjaha dua tahun do ia manrajai i Jerusalem. Si Mesulemet do goran ni inangni, boru ni si Harus, hun Jotba.

²⁰ Ihorjahon do sogam ni uhur ni Jahowa, songon na binahen ni si Manasse, bapani ai.

²¹ lirikkon do ganup dalan na nidalanan ni bapani, ibalosi do naibata na legan na binalosan ni bapani, marsombah do ia hujai;

²² itadingkon do Jahowa, Naibata ni ompungni, anjaha seng mardalan ia ibagas dalan ni Jahowa.

²³ Jadi mambahen partahi-tahian ma juakjuak ni si Amon dompaksi, gabe ibunuh sidea ma raja ai ibagas rumahni.

²⁴ Tapi ibunuh bangsa parnagori in ma haganup halak na martahi-tahi ai dompak Raja Amon. Jadi ipabangkit bangsa parnagori in ma si Josia, anakni ai gabe raja manggantihsi.

²⁵ Barita na legan ai ope pasal si Amon ampa ganup nahinorjahonni, ai lang tarsurat do ai ibagas buku Barita ni Raja-raja Juda?

²⁶ Jadi itanom ma ia ibagas tanomanni, ibagas pohon ni si Usa, anjaha si Josia, anakni ai ma bangkit raja manggantihsi.

Si Josia Raja ni Juda**Parjumpah ni Buku Titah**

(Pausih 2 Kron. 34:1-28)

22¹ Ualuh tahun do umur ni si Josia sanggah na bangkit ai ia gabe raja, anjaha tolu puluh sada tahun do ia gabe raja i Jerusalem. Si Jedida do goran ni inangni, boru ni si Adaya hun Boskat.

² Ihorjahon do rosuh ni uhur ni Jahowa, anjaha i irikkon do ganup dalan ni si Daud ompungni ai, anjaha seng marinpang ia hu siamun barang hu sambilou.

³ Dob marumur Raja Josia sapuluh ualuh tahun, isuruh raja ai ma si Safan, anak ni si Asalya, anak ni si Mesullam, jurutulis ai, hu Rumah ni Jahowa, nini ma,

⁴ “Tangkog ma ham marayak sintua ni Malim Hilkia, ase ihira buei ni duit na binoan hu Rumah ni Jahowa, na pinatumpu-tumpu ni halak sijaga pintu hun bani bangsa in;

⁵ anjaha ibere ma ai hu bani halak haondosan ni horja i Rumah ni Jahowa, lanjar isuruh ma sidea mamberehon ai hu bani halak siparhorja i Rumah ni Jahowa, na mangumban rumah ai,

⁶ ai ma hu bani tuhang hayu, hu bani halak sipauli rumah ai, hu bani tuhang batu pakon hu bani

halak siboli parhayu pakon batu na binarbar laho pabayuhon rumah ai.

⁷ Tapi seng pala mambahen parhiraan sidea pakon halak haondosan ni duit ai, ai maningon marsihatengeran do sidea.”

⁸ Dob ai nini si Hilkia, sintua ni malim ai ma hu bani si Safan, jurutulis ai, “Jumpah ahu do buku titah i Rumah ni Jahowa.” Jadi ibere si Hilkia ma buku ai hu bani si Safan, anjaha ibasa ma ai.

⁹ Jadi laho ma si Safan, jurutulis ai hu bani raja ai, patugahkon barita ai hu bani raja ai, “Domma ibuat juakjuakmu duit na jumpah i rumah ai, anjaha na ondskon do ai hu bani halak haondosan ni horja i Rumah ni Jahowa.”

¹⁰ Ambahni ai nini si Safan jurutulis ai ope hu bani raja ai, “Ibere Malim Hilkia do sada buku hu bangku.” Jadi ibasa si Safan ma buku ai i lobei ni raja ai.

¹¹ Jadi dob ibogei raja ai hata ni buku titah ai, irigati ma hiouni.

¹² Dob ai iparentahkon raja ai ma hu bani si Hilkia, malim ai, hu bani si Ahikam, anak ni si Safan, si Akbor, anak ni si Mikaya, pakon hu bani si Safan, jurutulis ai, ampa si Asaya, siparugas bani raja ai,

¹³ “Laho ma nasiam, sungkun nasiam ma Jahowa pasal ahu, pasal bangsa in, pakon pasal ganup Juda, halani hata ni buku na jumpah on, ai banggal tumang do ringis ni Jahowa na gajak dompak hita,

halani na so itangihon ompungta hata ni buku on, laho mangkorjahon romban hu bani ganup na tarsurat ijon dampak hita.”

¹⁴ Dob ai laho ma Malim Hilkia, si Akbor, si Safan pakon si Ahikam, si Asaya marayak nabi naboru Hulda, parinangon ni si Sallum, siramotkon pakeian ai, anak ni si Tikwas, anak ni si Harhas. Marianan do ia i Jerusalem, bani huta na baru ai; jadi marsahap ma sidea pakonsi.

¹⁵ Dob ai nini si Hulda ma hu bani sidea, “Sonon do hata ni Jahowa, Naibata ni Israel, Hatahon ma hu bani halak na marsuruh nasiam hu bangku,

¹⁶ Sonon do hata ni Jahowa, ‘Tonggor ma, parohonku ma hamagouan hu huta on pakon hu banijolma pangisini in, romban hu bani haganup hata ni buku on, na dob binasa ni Raja Juda.

¹⁷ Halani na dob tinadingkon ni sidea ai Ahu, anjaha manutung dahupa sidea hu bani naibata na legan, laho mamuhoi ringis-Ku marhitei ganup pambahenan ni tangan ni sidea, halani ai maningon gajak do ringis-Ku dampak ianan on, anjaha seng be tarintopi.

¹⁸ Tapi anggo hu bani Raja Juda, na marsuruh nasiam laho manungkun hu bani Jahowa,’ sonon ma hatahon nasiam hu bani, sonon do hata ni Jahowa, Naibata ni Israel, ‘Anggo pasal hata na dob binogeimin,

¹⁹ halani na dob mangahap uhurmu, anjaha ipaunduk ho uhurmu i lobei ni Jahowa, sanggah na ibogei ho hata, na dob Hulumbahon in dompak huta on, pakon dompak pangisini, paboa na maningon gabe halimisan do in, anjaha sibursikkonon ni halak, anjaha na dob irigati ho hioumu anjaha tangis ho i lobei-Hu, Ahu pe domma hutangihon ho,' nini Jahowa.

²⁰ Halani ai, tonggor ma, Ahu sandiri do na patumpuhon ho hu bani ompungmu, gabe sonang do patumpuon hubagas tanomanmu, ase seng sampang idahon ni matamu haganup hamagouan, na sihol parohon-Ku hu huta on.” Jadi iboan sidea ma hata ai hu bani raja ai.

Habayuon na Binahen ni si Josia

(Pausih 2 Kron. 34:29-36:5)

23 ¹ Dob ai isuruh raja ai ma na patumpuhon hu lobei ni, haganup pangintuai ni Juda pakon Jerusalem.

² Dob ai tangkog ma raja ai hu Rumah ni Jahowa rap pakon ganup dalahi na hun Juda ampa pangisi ni Jerusalem pakon malim ampa nabi, haganup bangsa ai, na etek na godang, gabe ibasa ma ibogei sidea sagala hata ni buku parpadanan, na jumpah i Rumah ni Jahowa.

³ Dob ai jongjong ma raja ai i lambung tiang ai, anjaha ibahen ma padan i lobei ni Jahowa,

paboa maningon irikkononni do Jahowa, anjaha ramotkononni titah-Ni, hasaksian-Ni pakon aturan-Ni, hun bani gok ni uhurni pakon gok ni tonduyni, anjaha dalankononni do hata ni padan ai, na tarsurat ibagas buku ai. Haganup do bangsa ai mangeakkon padan ai.

⁴ Dob ai iparentahkon raja ai ma si Hilkia, sintua ni malim ai pakon malim paidua pakon sijaga pintu, ase ipadarat sidea hun Rumah ni Jahowa ganup parugas, na pinauli bani baal pakon bani Ashera pakon bani ganup bala ni langit; itutung ma ai i darat ni Jerusalem bani ladang Kidron, anjaha iboan ma abuanni hu Betel.

⁵ Anjaha ilopaskon raja ai ma malim-malim ni naibata na legan ai, na pinabangkit ni Raja-raja Juda, laho manutung dahupa bani panumbahan na i atas buntu-buntu, ibagas huta-huta ni Juda pakon inggot ni Jerusalem; sonai homa na manutung dahupa hu bani baal, hu bani mata ni ari, bulan bintang pakon ganup bala ni langit.

⁶ Anjaha ipadarat ma Ashera ai hun bani Rumah ni Jahowa, hu darat ni Jerusalem, hu habungan ni Bah Kidron, lanjar itutung ma ai i habungan ni Bah Kidron, anjaha isaburhon ma abuanni ai hu tanoman ni halak simbuei.

⁷ Ambahni ai iparreong do rumah, ianan ni dalahi marjolmahon dalahi, na dohor hu Rumah ni

Jahowa, partonunan ni naboru, manonun hiou lampolampo bani Ashera.

⁸ Dob ai ihatahon ma roh ganup malim hun huta ni Juda, anjaha ihatahon ma butakan panumbahan na i atas buntu-buntu, panutungan ni malim bani dahupa, singgan ni Geba das hu Berseba; anjaha iparseda do panumbahan ni begu juma na i horbangan, na jongjong bani dalan masuk i horbangan Josua, kopala ni huta ai, hampit sambilou, anggo masuk halak hu horbangan ni huta ai.

⁹ Tapi anggo malim ni sisumbah-sumbahan, seng bulih sidea manggalang i atas ni anjapanjap ni Jahowa na i Jerusalem, tapi bulih do sidea mangan ruti na so niigaran i tongah-tongah ni saninani.

¹⁰ Ibutaki do homa parapuyan na i habungan Ben-Hinnom, ase ulang tarbahren barang ise be manutung anakni barang boruni bahen galangan hu bani Moloooh.

¹¹ Anjaha ipadaoh do huda na pinapulig ni Raja-raja Juda laho pasangapkon mata ni ari, na i lambung labah hamasukan hu Rumah ni Jahowa, hu kamar ni Netan-Melek siparugas ai, na marianan i rumah na rapat hujai; anjaha itutung ma gareta ni mata ni ari ai bani apuy.

¹² Sonai homa anjapanjap na i atas tayub ni kamar pardatas ni si Ahas, na pinauli ni Raja-raja Juda, pakon anjapanjap, na pinauli ni si Manasse bani

alaman ni Rumah ni Jahowa na dua ai, iparseda do ai anjaha iropuki, anjaha isaburhon ma abuanni ai hu Bah Kidron.

¹³ Ibutaki raja ai do panumbahan na i atas buntu-buntu na hampit hapoltakan ni Jerusalem, na hampit dangsina ni Dolog Jetun, na pinauli ni si Salomo raja ni Israel, bani Astarot, gana-gana ni halak Sidon, pakon bani Kamos gana-gana ni halak Moab, ampa bani Milkom, gana-gana ni halak Ammon, haganupan ai ibutaki raja ai do.

¹⁴ Iropuki do tiang sisombah-sombahon anjaha iroboh do sisombahon Ashera, anjaha igoki do hajongjonganni ai bani holi-holi ni na matei.

¹⁵ Sonai homa anjapanjap na i Betel, ianan panumbahan na pinauli ni si Jerobeam, anak ni si Nebat, na mambahen Israel mardousa, age anjapanjap on ampa panumbahan na i buntu-buntu ronsi batu-batuni irosaki do gabe orbuk; itutung do homa sisombahon Ashera ai.

¹⁶ Sanggah na marhusor ai si Josia, iidah ma tanoman ai i dolog ai; isuruh ma na mambuat holi-holi ai hun tanoman ai, anjaha itutung ma ai i atas ni anjapanjap ai laho pabutakkon ai, romban hu bani hata ni Jahowa, na dob pinatugah ni halak ni Naibata, na dob palumbahon pasal ai.

¹⁷ Dob ai nini raja ai ma, “Patung aha do na huidah ai ijai?” Jadi nini parhuta ai ma hu bani, “Tanoman ni halak ni Naibata do ai, na roh hun

Juda, na palumbahon pasal na binahenmu on hu bani anjapanjap na i Betel.”

¹⁸ Nini raja ai ma, “Paturut ma ai; ulang ma dong na mangkahua holi-holini!” Jadi seng be ikahua sidea holi-holini ai, rap pakon holi-holi ni nabi ai, na roh hun Samaria.

¹⁹ Ambah ni ai iparreong si Josia do ganup rumah ni sisumbahon na i atas buntu-buntu na i huta Samaria, sagala pinauli ni Raja-raja Israel, laho mamuhoi ringis ni Jahowa; ibahen do hujai romban hu bani na binahenni i Betel.

²⁰ Dob ai isayati ma ganup malim ni rumah panumbahan na i atas buntu-buntu ai, na adong ijai, i atas ni anjapanjap ai, anjaha itutung ma holi-holi ni jolma i atas ni. Dob ai mulak ma ia hu Jerusalem.

²¹ Dob ai nini raja ai ma hu bani halak simbuei ai, “Marpesta paska ma nasiam bani Jahowa, Naibata nasiam, songon na tarsurat ibagas buku parpadanan on.”

²² Ai seng onga be marpesta paska sidea sonai singgan panorang ni panguhum na manguhumi halak Israel, barang sadokah panorang ni Raja-raja Israel, barang Raja-raja Juda pe.

²³ Pasapuluhualuhtahunkon dob manrajai si Josia, ai pe ase marpesta paska sidea hu bani Jahowa i Jerusalem.

²⁴ Ipadaoh Raja Josia ma homa haganup halak na siar-siaran, partondung, terapim, gana-gana

ampa haganup sihagigihononkon, na dapot idahon i tanoh Juda pakon i Jerusalem, laho pasaudkon hata ni titah ai, na tarsurat ibagas buku, na jumpah Malim Hilkia ibagas Rumah ni Jahowa.

²⁵ Anjaha seng dong songonsi age sada raja na parlobei hun bani, na paubahkon uhurni hu bani Jahowa hun bani gok ni uhurni, hun bani gok ni tonduyni pakon hun bani gok ni gogohni, romban hu bani titah ni si Musa; sonai homa seng dong be songonsi raja na bangkit i pudi ni.

²⁶ Age pe sonai seng marpangulaki uhur ni Jahowa hun bani pargajag ni ringis-Ni na banggal ai; sai gajag do ringis-Ni dompak Juda, halani haganup pambahenan ni si Manasse na mamuhoi Ringis-Ni ai.

²⁷ Dob ai nini Jahowa ma, “Age Juda padaohon-Ku do hun lobei ni bohing-Ku, songon Israel na dob Hupadaoh, anjaha ambukkonon-Ku do huta on na dob Hupilih on, ai ma Jerusalem pakon rumah na dob pala namin huhatahon pasal ai: Ijai do marianan goran-Ku!”

²⁸ Barita na legan ai ope pasal si Josia pakon ganup na hinorjahonni, ai lang tarsurat do ai ibagas buku Barita ni raja-raja ni Juda?

²⁹ Bani panorangni ai tangkog do Parao Neko, raja ni Masir, laho marporang dompak raja ni Assur das hu Bah Euftrat; laho ma Raja Josia manjumpahkonsi,

tapi italuhon Parao Neko do raja ai i Megiddo, dobkonsi iidah ia.

³⁰ Dob ai iboan juakjuakni ma bangkei ni raja ai i atas gareta, hun Megiddo hu Jerusalem, anjaha itanom ma ia ibagas tanomanni. Dob ai ipabangkit bangsa parnagori in ma si Joahas, anak ni si Josia, anjaha iminaki ma ia pabangkitkonsi gabe raja, gantih ni bapani ai.

Si Joahas Raja ni Juda

³¹ Marumur dua puluh tolu tahun do si Joahas sanggah na bangkit raja ai ia, anjaha tolu bulan do ia marrajai i Jerusalem; si Hamutal do goran ni inangni, boru ni si Jeremia, hun Libna.

³² Ihorjahon do sogam ni uhur ni Jahowa, songon na binahen ni ompungni.

³³ Dob ai ihatahon Parao Neko ma na manranteisi i Ribla, i tanoh Hamat, ase ulang be manrajai ia i Jerusalem, anjaha hona dangdang ma pangisi ni tanoh ai ibahen saratus talenta pirak pakon sada talenta omas.

³⁴ Dob ai ipabangkit Parao Neko ma si Eliakim, anak ni si Josia gabe raja gantih ni bapani ai, anjaha ipaubah ma goranni gabe si Joyakim; tapi anggo si Joahas iboan do hu tanoh Masir, lanjar matei ijai do ia.

Si Joyakim Raja ni Juda

³⁵ Ibere si Joyakim ma pirak pakon omas ai hu bani Parao; tapi pangisi ni tanoh ai do ihatahon manggugui pirak siberehononni ai, na hinatahon ni Parao ai. Ganup pangisi ni tanoh ai manggugui pirak pakon omas ai romban hu bani gogohni bei, siberehonon hu Parao Neko.

³⁶ Marumur dua puluh lima tahun do si Joyakim sanggah na bangkit raja ai ia, anjaha sapuluh sada tahun do ia manrajai i Jerusalem; goran ni inangni si Zebuda do, boru ni si Pedaya, hun Ruma.

³⁷ Ihorjahon do sogam ni uhur ni Jahowa, usih songon na binahen ni ompungni.

Ujung ni Goluh ni si Joyakim

(Pausih 2 Kron. 36:6-13)

24 ¹ Bani panorang ai tangkog ma si Nebukadnesar, raja ni Babel, jadi mangaku tunduk ma si Joyakim bani tolu tahun dokahni; dob ai marbalik ma ia anjaha mangalo dompaksi.

² Dob ai isuruh Jahowa ma dompaksi garombolan ni halak Kasdim pakon garombolan ni halak Aram pakon garombolan ni halak Moab pakon garombolan ni halak Ammon, isuruh sidea mangimbang Juda laho parsedahon ai, romban hu bani hata ni Jahowa, na hinatahon-Ni marhitei nabi, juakjuak-Ni ai.

³ Masa do sonai hu bani halak Juda halani ringis ni Jahowa, laho padaohkon sidea hun lobei ni bohi-Ni, halani dousa ni si Manasse, romban hu bani ganup na hinorjahonni ai.

⁴ Sonai homa halani daroh na so marpipot na niduruskonni ai; ai igoki do Jerusalem bani daroh ni halak na so marpipot. Seng ra be Jahowa manasap ai.

⁵ Barita na legan ai ope pasal si Joyakim ampa haganup na hinorjahonni, ai lang tarsurat do ai ibagas buku Barita ni Raja-raja Juda?

⁶ Dob ai modom ma si Joyakim rap pakon ompungni, anjaha si Joyakin, anakni ai ma bangkit raja manggantihsi.

⁷ Seng be luar raja ni Masir hun tanohni, ai domma ipatunduk raja ni Babel ganup tanoh na masuk hu bani raja ni Masir hinan, singgan ni Bah Masir das hu Bah Euftrat.

Si Joyakin Raja ni Juda

⁸ Marumur sapuluh ualuh tahun do si Joyakin sanggah bangkit raja ia, anjaha tolu bulan do dokahni manrajai i Jerusalem; si Nehusta do goran ni inangni, boru ni si Elnatan, hun Jerusalem.

⁹ Ihorjahon do sogam ni uhur ni Jahowa, usih songon na binahen ni bapani.

¹⁰ Bani panorang ai tangkog ma bala ni si Nebukadnesar, raja ni Babel dompak Jerusalem, lanjar ihubu ma huta ai.

¹¹ Roh do si Nebukadnesar sandiri, raja ni Babel, hu huta ai, sanggah ihubu balani huta ai;

¹² gabe luar ma si Joyakin, raja ni Juda marayak raja ni Babel rap pakon inangni pakon juakjuakni pakon pambobai ni balani ampa siramotkon rumahni; lanjar iboban raja hun Babel ma ia pauluhtahunkon dob bangkit raja ia.

¹³ Iboan do homa ganup arta na i rumah ni raja ai; anjaha itanggali do omas ai hun bani haganup parugas na pinauli ni si Salomo, raja ni Israel, ibagas Rumah ni Jahowa, songon na dob nilumbahon ni Jahowa hinan.

¹⁴ Anjaha iboan ma hu habuangan haganup pangisi ni Jerusalem, haganup kopala-kopala, haganup halak parkuasa, sapuluh ribu halak na tarbuang, haganup tuhang hayu pakon tuhang bos; sahalak pe lang na tading sobali halak sisombuhan i tanoh in.

¹⁵ Jadi ibuangkon ma si Joyakin hu Babel rap pakon inang ni raja ai, parinangon ni raja ai, haganup siramotkon rumahni ampa halak na markuasa i nagori in, ibuangkon raja ai ma sidea hu habuangan, hun Jerusalem hu Babel.

¹⁶ Haganup halak siimbang munsuh, pitu ribu halak bueini sonai homa tuhang hayu pakon tuhang bos,

saribu halak bueini, ampa haganup puanglima na gogoh, iboan raja ni Babel ma haganupan ai laho mambuankon ai hu Babel.

¹⁷ Dob ai ipabangkit raja ni Babel ma si Matanya, bapanggi ni si Joyakin ai, gabe raja manggantihsi, anjaha ipaubah ma goranni gabe si Sedekia.

Si Sedekia Raja ni Juda

Parseda ni Harajaon ai

¹⁸ Marumur dua puluh sada tahun do si Sedekia sanggah na bangkit raja ai ia, anjaha sapuluh sada tahun do dokahni ia marrajai i Jerusalem; si Hamutal do goran ni inangni, boru ni si Jeremia, hun Libna.

¹⁹ Ihorjahon do sogam ni uhur ni Jahowa, usih songon na binahen ni si Joyakin.

²⁰ Ai halani ringis ni Jahowa do, ase masa sonai hu Jerusalem pakon hu Juda, laho mangambukkon sidea hun lobei ni bohini. Dob ai marbalik ma si Sedekia mangimbang raja ni Babel.

Partalu ni Jerusalem ampa Habuangan hu Babel

(ay. 1-26: pausih 2 Kron. 36:17-20; Jer. 39:1-10; 52:4-27)

25 ¹ Anjaha pasiahtahunkon dob bangkit raja ia, bani bulan sapuluh, ari sapuluh, roh ma si Nebukadnesar, raja ni Babel, rap pakon balani marporang dompak Jerusalem, anjaha ihubu sidea

ma huta ai, ipauli sidea ma batar-batar inggot huta ai.

²Jadi tarhubu ma huta ai das ronsi pasapuluh-sadatahunkon, dob manrajai si Sedekia.

³Ari siah bulan ompat masa ma lohei na parah i huta ai, pala seng dong be ruti panganon ni bangsa parnagori in.

⁴Dob ai ibahen ma sada dalan halopusan ibagas tembok ni huta ai; maporus ma raja ai pakon ganup siimbang munsuh borngin-borngin hun horbangan na i holangkolang ni tembok na dua ai, na i lambung pohon ni raja ai, tapi ihubu halak Kasdim do huta ai inggot. Laho ma sidea dompak Arabah.

⁵Tapi iayak bala ni halak Kasdim do raja ai, anjaha dapot ma ia i pamah ni Jeriko; anjaha ganup balani ai merap ma hun lambungni.

⁶Itangkap sidea ma raja ai, anjaha iboan ma ia hu bani raja ni Babel i Ribla, na mandabuh uhum bani.

⁷Ibunuh sidea ma anak ni si Sedekia i lobei ni matani; tapi ipitungkon do mata ni si Sedekia haduasi, anjaha irantei ma ia. Sonai ma ia iboban hu Babel.

⁸Ari papituhon bulan lima, ai ma pasapuluh-siahtahunkon dob manrajai Raja Nebukadnesar, raja ni Babel, roh ma si Nebusaradan, kopala ni pangawal, juakjuak ni Raja Babel, hu Jerusalem.

⁹ Itutung ma Rumah ni Jahowa, pakon rumah ni raja ai ampa ganup rumah na i Jerusalem; itutung ma ganup rumah na banggal.

¹⁰ Iparreong ganup bala ni halak Kasdim, na rap pakon kopala ni pangawal ai ma tembok, inggot ni Jerusalem ai.

¹¹ Ia bangsa na teba ai, na tading ope ibagas huta ai, pakon sagala halak na lintun ai marayak raja ni Babel rap pakon na teba ai hun bani halak na mabuei ai, iboan si Nebusaradan, kopala ni pangawal ai ma ganupan ai hu habuangan.

¹² Tapi itadingkon kopala ni pangawal ai do deba hun bani halak sisombuhan na i nagori ai, gabe sihorjai pohon anggur ampa sihorjai juma.

¹³ Anjaha iparrosak halak Kasdim ai do tiang tombaga na i Rumah ni Jahowa, pakon onjolan ampa bongbongan tombaga, na i Rumah ni Jahowa, lanjar iboan ma tombaga ai hu Babel.

¹⁴ Sonai homa hudon, sonduk, pisou, mangkuk pakon sagala parugas hun bani tombaga, na pinakei marugas i rumah panumbahan, dihut do iboban.

¹⁵ Sonai homa balanga panutungan ni dahupa pakon mangkuk pamispisan, sagala na hun bani omas pakon sagala na hun bani pirak, ibuat kopala ni pangawal ai do.

¹⁶ Sonai homa tiang na dua ai pakon bongbongan na sada ampa onjolanni ai, na pinauli ni si Salomo

bani Rumah ni Jahowa, sabonar na so tartimbang do buei ni tombaga ni ganup parugas ai.

¹⁷ Sapuluh ualuh asta do gijang ni sada tiang, anjaha ulu ni tiang na i atas ni ai pe tombaga do; lima asta do gijang ni ulu ni tiang ai; adong do jala-jala pakon buah ni dalima inggot ulu ni tiang ai. Usih hujai do tiang na paduahon ai, pakon jala-jala ai.

¹⁸ Anjaha iboan kopala ni pangawal ai do sintua ni Malim Seraya, pakon si Sefanya, malim paidua, ampa sitolu halak sijaga labah ai.

¹⁹ Iboan do homa hunbagas huta ai sada halak siramotkon rumah, ai ma na mangopalai halak siparmunsuh, pakon lima halak hasoman sapanriah ni raja ai, na jumpah ibagas huta ai; sonai homa jurutulis ni sipambobai ni bala ai, na mandilo halak parnagori ai gabe tantara; sonai homa onom puluh halak hun bani bangsa parnagori ai, na jumpah ibagas huta ai.

²⁰ Iboan si Nebusaradan, kopala ni pangawal ai ma sidea hu raja ni Babel i Ribla.

²¹ Ihatahon raja ni Babel ma sidea bunuhon i Ribla, i tanoh Hamat. Sonai ma parbuang ni Juda hun tanohni.

Si Gedalya Bangkit Manrajai

(ay. 22-26: pausih Jer. 40:5, 7-9; 41:1-7; 43:5-7)

²² Tapi pasal bangsa na tading ai ope i tanoh Juda, na tinadingkon ni si Nebukadnesar, raja hun Babel,

ipabangkit ma si Gedalya, anak ni si Ahikam, anak ni si Safan manggomgom sidea.

²³ Jadi dob ibogei pambobai ni bala pakon bala ni sidea, na dob ipabangkit raja ni Babel si Gedalya, roh ma sidea marayak si Gedalya hu Mispa, ai ma si Ismael anak ni si Netania, pakon si Johanan, anak ni si Korea, pakon si Seraya, anak ni si Tanhumet halak Netopat ai, pakon si Jaasania anak ni halak Maahat ai, rap pakon halak hasoman ni sidea ai.

²⁴ Dob ai marbulawan ma si Gedalya hu bani sidea pakon hu bani halak hasoman ni sidea ai, nini ma, “Ulang ma nasiam mabiar mangidah gamot-gamot ni halak Kasdim; marianan ma nasiam i nagori on, anjaha balosi nasiam ma raja ni Babel, jadi sonang ma nasiam.”

²⁵ Tapi papitubulankon roh ma si Ismael, anak ni si Netania, anak ni Elisama, hun bani ginompar ni raja ai, rap pakon sapuluh halak hasomanni, gabe idorab anjaha ibunuh sidea ma si Gedalya pakon halak Jahudi ampa halak Kasdim na rap pakonsi i Mispa.

²⁶ Dob ai bingkat ma ganup rayat ai, na etek na banggal, pakon pambobai ni bala ai, maporus ma sidea hu Masir, ai mabiar do sidea hu bani halak Kasdim.

Dapotan Idop ni Uhur si Joyakin

(ay. 27-30: pausih Jer. 52:31-34)

²⁷ Dob ai patolupuluh-pitutahunkon dob tarbuang si Joyakin, raja ni Juda, ari dua puluh pitu, bulan sapuluh dua, iidopi si Evil-Merodak, raja ni Babel ma si Joyakin raja ni Juda bani tahun parlobei ni parrajaionni, gabe ipadarat ma ia hun tutupan.

²⁸ Basar do ia hu bani, anjaha gijangan do ibahen paratas ni hun bani paratas ni raja-raja na rap pakonsi i Babel.

²⁹ Bulih do tanggalonni pakeian tutupanni ai, anjaha sapanganan do ia tongtong rap pakon raja ai sadokah manggoluh ia.

³⁰ Anjaha siap arian do ibere raja ai bani bohalni, na dob tinotapkon hinan, barang sadia na porlu bani, sadokah manggoluh ia.

1 Kronika

Tarombo humbani si Adam das hubani si Abraham

(ay. 1-23: pausih 1 Musa 10; ay.

24-27: pausih 1 Mus. 11:10-26)

- 1** ¹ Si Adam, si Set, si Enos;
² si Kenan, si Mahalel, si Jared;
³ si Henok, si Metusala, si Lamek;
⁴ si Noak, si Sem, si Ham ampa si Japet.
⁵ Anak ni si Japet: Si Gomer, si Magog, si Madai, si Javan, si Tubal, si Mesek pakon si Tiras.
⁶ Anak ni si Gomer: Si Askenas, si Ripat pakon si Togarma.
⁷ Anak ni si Javan: Si Elisa, si Tarsis, si Kittim pakon si Rodanim.
⁸ Anak ni si Ham: Si Kus, si Misraim, si Put pakon si Kanaan.
⁹ Anak ni si Kus: Si Seba, si Havilla, si Sabta, si Raema pakon si Sabteka. Anak ni si Raema: Si Seba pakon si Dedan.
¹⁰ Si Kus do bapa ni si Nimrod; ia do na parlobei parkuasa i tanoh on.
¹¹ Si Misraim do bapa ni halak Lud, Anam, Lehab, Naftu,

¹² si Patrus, si Kasluh, harorohan ni halak Palistim pakon halak Kaptor.

¹³ Si Kanaan do bapa ni si Sidon, bunga tubuhnai ai pakon si Het,

¹⁴ pakon si Jebusi, si Amori, si Girgasi,

¹⁵ si Hevi, si Arki, si Sini,

¹⁶ si Arwadi, si Semari pakon si Hamati.

¹⁷ Anak ni si Sem: Si Elam, si Assur, si Arpaksad, si Lud, si Aram, si Us, si Hul, si Geter pakon si Mesek.

¹⁸ Si Arpaksad do bapa ni si Sela, anjaha si Sela bapa ni si Heber.

¹⁹ Tubuh ma dua anak bani si Heber, goran ni na sada ai ma si Peleg, halani bani panorangni do marbagi tanoh on, anjaha si Joktan do goran ni anggini.

²⁰ Si Joktan do bapa ni si Almodad, si Selef, si Hasarmawet, si Jera,

²¹ si Hadoram, si Usal, si Diklah,

²² si Ebal, si Abimael, si Seba,

²³ si Ofir, si Havilah pakon si Jobab; in ma ganup anak ni si Joktan.

²⁴ Ginompar ni si Sem: si Arpaksad, si Selah,

²⁵ si Heber, si Peleg, si Rehu,

²⁶ si Serug, si Nahor, si Tarah,

²⁷ si Abram, ai ma si Abraham.

Ginompar ni si Abraham

²⁸ Anak ni si Abraham si Isak pakon si Ismael.

²⁹ On ma ginompar ni sidea: Bunga tubuh ni si Ismael, si Nebajot; dob ai si Kedar, si Adbeel, si Mibsam,

³⁰ si Misma, si Duma, si Masa, si Hadad, si Tema,

³¹ si Jetur, si Napis, si Kedma. Ai ma anak ni si Ismael.

³² Anak ni si Ketura, parinangon ni si Abraham: Si Simran, si Joksan, si Medan, si Midian, si Jisbak pakon si Suak. Anak ni si Joksan: si Seba pakon si Dedan.

³³ Anak ni si Midian: Si Efa, si Efer, si Hanok, si Abida pakon si Elda. Ai ma ganup ginompar ni si Ketura.

³⁴ Si Abraham do bapa ni si Isak. Anak ni si Isak: si Esau pakon si Israel.

³⁵ Anak ni si Esau: Si Elifas, si Rehuel, si Jeus, si Jaelam pakon si Korah.

³⁶ Anak ni si Elifas: Si Teman, si Omar, si Zefi, si Gaetam, si Kenas, si Timna pakon si Amalek.

³⁷ Anak ni si Rehuel: Si Nahat, si Zera, si Samma pakon si Missa.

³⁸ Anak ni si Seir: Si Lotan, si Sobal, si Sibeon, si Ana, si Dison, si Eser pakon si Disan.

³⁹ Anak ni si Lotan: Si Hori pakon si Homam; anjaha si Timna do botou ni si Lotan.

⁴⁰ Anak ni si Sobal: Si Alian, si Manahat, si Ebal, si Sefi pakon si Onam. Anak ni si Zibeon: Si Ayah pakon si Anah.

⁴¹ Anak ni si Anah: Si Dison. Anak ni si Dison: Si Hamran, si Esban, si Jitran pakon si Heran.

⁴² Anak ni si Eser: Si Bilhan, si Zaavan pakon si Jaakan. Anak ni si Disan: Si Us pakon si Aran.

Panggongomi bani Edom

⁴³ On do goran ni raja-raja, na manrajai tanoh Edom, paima adong raja na manggomgomi Israel: Si Bela, anak ni si Beor, anjaha Dinhaba do goran ni hutani.

⁴⁴ Dob matei si Bela, si Jobab anak ni si Zerah, na hun Bosra ma gantihni manrajai.

⁴⁵ Dob matei si Jobab, si Husam, na hun tanoh ni halak Temani ma gantihni manrajai.

⁴⁶ Dob matei si Husam, si Hadad, anak ni si Bedad, ma manjadi raja manggantihkonsi; ia ma na manaluhon halak Midian i tanoh ni halak Moab, Awit do goran ni hutani.

⁴⁷ Dob matei si Hadad, si Samla na hun Masreka ma gantihni manrajai.

⁴⁸ Dob matei si Samla, si Saul, na hun Rehobot, na i topi ni bah Euftrat ma gantihni manrajai.

⁴⁹ Dob matei si Saul, si Baal-Hanan, anak ni si Akbor ma gantihni manrajai.

⁵⁰ Dob matei si Baal-Hanan, si Hadad ma gantihni manrajai; Pahi do goran ni hutani, anjaha goran ni parinangonnni si Mehetabel do, boru ni si Matred, boru ni si Mezahab.

⁵¹ Dob matei si Hadad, bangkit ma na manggomgomi Edom: Kopala Timna, Alwa, Jetet,

⁵² Ohalibama, Ela, Pinon,

⁵³ Kenas, Teman, Mibzar,

⁵⁴ Magdiel pakon Iram. In ma kopala-kopala ni Edom.

Ginompar ni si Juda

2 ¹ On do anak ni si Israel: Si Ruben, si Simeon, si Levi, si Juda, si Isasar, si Sebulon,

² si Dan, si Josep, si Benyamin, si Naftali, si Gad pakon si Asser.

³ Anak ni si Juda: Si Er, si Onan pakon si Sela; boru ni si Sua, halak Kanaan ai do manubuhkon na tolu halak on bani. Tapi anggo si Er, bunga tubuh ni si Juda, na jahat do ia i lobei ni Jahowa, halani ai do ase matei ia ibahen Jahowa.

⁴ Itubuhkon si Tamar, parumaenni ai do homa bani, si Perez pakon si Zerah; ase lima halak do ganup anak ni si Juda.

⁵ Anak ni si Perez: si Hesron pakon si Hamul.

⁶ Anak ni si Zerah: Si Simri, si Etan, si Heman, si Kalkol pakon si Dara, lima halak haganup.

⁷ Anak ni si Karmi: Si Ahar, na manunsahi Israel, halani ibuat ugas sisiapokonon.

⁸ Anak ni si Etan: Si Asarya.

⁹ Anak na tubuh bani si Hesron: Si Jerahmel, si Ram pakon si Kalubai.

¹⁰ Si Ram, ai ma bapa ni si Aminadab, anjaha si Aminadab ai ma bapa ni si Nahason, kopala ni halak Juda.

¹¹ Si Nahason, ai ma bapa ni si Salma, anak ni si Salma si Boas;

¹² anak ni si Boas si Obed, anak ni si Obed si Isai.

¹³ Anak ni si Isai: Si Eliab, bunga tubuhni, si Abinadab anak paduahon; si Simea na patoluhon,

¹⁴ si Natanael na paompathon, si Raddai na palimahon;

¹⁵ si Osem na paonomhon ampa si Daud na papituhon.

¹⁶ Botou ni sidea ai ma si Seruya pakon si Abigail. Anak si si Seruya: Si Abisai, si Joab pakon si Asahel, tolu halak.

¹⁷ Si Abigail manubuhkon si Amasa; anjaha bapa ni si Amasa, ai ma si Jeter, halak Ismail.

¹⁸ Ia si Kaleb, anak ni si Hesron, adong do anak bani humbani parinangonni, si Asuba pakon si Jeriot; anjaha anakni ai, ai ma si Jeser, si Sobab pakon si Ardon.

¹⁹ Dob matei si Asuba, ibuat si Kaleb ma si Efrata bahen parinangonni, na manubuhkon bani si Hur.

²⁰ Si Hur ai ma bapa ni si Uri, anjaha si Uri ai ma bapa ni si Besaleel.

²¹ Dob ai iparayak si Hesron ma boru ni si Makir, bapa ni si Gilead, ibuat ma ai bahen parinangonni, sanggah marumur ia onom puluh tahun anjaha itubuhkon naboru ai ma si Segub.

²² Anjaha si Segub, ai ma bapa ni si Jair; adong do bani dua puluh tolu huta i tanoh Gilead.

²³ Tapi ibuat halak Gesur pakon halak Aram ma huta-huta ni si Jair, sonai homa Kenat pakon dusunni, onom puluh huta. On ma ganup anak ni si Makir, bapa ni si Gilead.

²⁴ Dob matei si Hesron i Kaleb-Efrata, itubuhkon si Abia, parinangon ni si Hesron ma si Ashur, bapa ni si Tekoa.

²⁵ Anak ni si Jerahmel, bunga tubuh ni si Hesron: Si Ram, bunga tubuhni, si Buna, si Oren, si Osem pakon si Ahya.

²⁶ Adong ope sada nari parinangon ni si Jerahmel, na margoran si Atara, ia do inang ni si Onam.

²⁷ Anak ni si Ram, bunga tubuh ni si Jerahmel: Si Maas, si Jamin pakon si Eker.

²⁸ Anak ni si Onam: Si Sammai pakon si Jada. Anak ni si Sammai: Si Nadab pakon si Abisur.

²⁹ Goran ni parinangon ni si Abisur, ai ma si Abihail, na manubuhkon bani si Aban pakon si Molid.

³⁰ Anak ni si Nadab: Si Seled pakon si Appaim; matei pono do si Seled.

³¹ Anak ni si Appaim: Si Isei. Anak ni si Isei: Si Sesan. Anak ni si Sesan: Si Ahlai.

³² Anak ni si Jada, anggi ni si Sammai: Si Jeter pakon si Jonatan; matei pono do anggo si Jeter.

³³ Anak ni si Jonatan: Si Pelet pakon si Sasa. Ai ma ginompar ni si Jerahmel.

³⁴ Seng adong anak bani si Sesan, pitah boru do; tapi adong ma sada halak Masir, jabolon ni si Sesan, na margoran si Jarha.

³⁵ Jadi ibere si Sesan ma boruni hubani si Jarha, jabolonni ai bahen parinangonni, gabe itubuhkan ma bani si Attai.

³⁶ Si Attai ai ma bapa ni si Natan, si Natan bapa ni si Sabad.

³⁷ Si Sabad bapa ni si Eflal, anjaha si Eflal bapa ni si Obed.

³⁸ Si Obed bapa ni si Jehu, anjaha si Jehu bapa ni si Asarya.

³⁹ Si Asarya bapa ni si Heles, anjaha si Heles bapa ni si Elasa.

⁴⁰ Si Elasa bapa si Sismai, anjaha si Sismai bapa ni si Sallum.

⁴¹ Si Sallum bapa ni si Jekamiah, anjaha si Jekamiah bapa ni si Elisama.

⁴² Anak ni si Kaleb, anggi ni si Jerahmel: Si Mesa, bunga tubuhnai, ai ma bapa ni si Zif. Anak ni si Mesa: si Hebron.

⁴³ Anak ni si Hebron: si Korah, si Tapuah, si Rekem pakon si Sema.

⁴⁴ Si Sema ai ma bapa ni si Raham, bapa ni si Jorkeam; anjaha si Rekem ai ma bapa si Sammai.

⁴⁵ Anak ni si Sammai: Si Maon; anjaha si Maon do bapa ni si Betzur.

⁴⁶ Si Efa pe, parinangon ni si Kaleb, itubuhkon do si Haran, si Mosa pakon si Gases.

⁴⁷ Anak ni si Jadai: si Regam, si Jotam, si Gesan, si Pelet, si Efa pakon si Saaf.

⁴⁸ Tapi anggo si Maaka, parinangon ni si Kaleb, itubuhkon do si Seber pakon si Tirhana.

⁴⁹ Itubuhkon do homa si Saaf, bapa ni si Madmanna ampa si Sewa, bapa ni si Makbena pakon bapa ni si Gibeai; anjaha boru ni si Kaleb ai ma si Aksa.

⁵⁰ Ai ma ginompar ni si Kaleb. Anak ni si Hur, bunga tubuh ni si Efrata: Si Sobal bapa ni si Kiryat-Jearim.

⁵¹ Si Salma, bapa ni si Betlehem anjaha si Hareb, bapa ni si Betgader.

⁵² Anak ni si Sobal, bapa ni si Kiryat-Jearim: Si Haroe pakon satongah halak Menuhoti.

⁵³ Ginompar ni si Kiryat-Jearim: Halak Jitri, halak Puti, halak Sumati pakon halak Misrai; humbani sidea do roh ni halak Zori pakon halak Estaoli.

⁵⁴ Anak ni si Salma: Si Betlehem, halak Netofati, si Atrot-Bet-Joab pakon satongah ni halak Manahati ampa halak Zori.

⁵⁵ Ia ginompar ni sibotoh surat, na marianan i Jabes, ai ma halak Tirhati, halak Simeati pakon halak

Sukati. Ai ma halak Keni, na roh hubani si Hamat, bapa ni ginompar ni si Rekab.

Ginompar ni si Daud

3 ¹ On do anak ni si Daud, na tubuh bani i Hebron: Bunga tubuhni si Amnon humbani si Ahinoam, boru Jesreel; paidua si Daniel humbani si Abigail, boru Karmel.

² Paitolu si Absalom, na tinubuhkon ni si Maaka, boru ni si Talmai, raja hun Gesur; paiompat si Adonia, na marinangkon si Haggit;

³ pailima si Sifatya humbani si Abital; paionom si Jitream, humbani parinangonni si Eglā.

⁴ Na onom ai ma na tubuh bani i Hebron, sanggah ijai ia manrajai pitu tahun onom bulan; tapi tolu puluh tolu tahun do dokahni ia manrajai i Jerusalem.

⁵ On do anak na tubuh bani i Jerusalem: Si Simea, si Sobab, si Natan pakon si Salomo; na ompat ai humbani si Batseba, boru ni si Amiel.

⁶ Ambah ni ai si Jibhar, si Elisama, si Elipelet,

⁷ si Nogah, si Nepeg, si Japia,

⁸ si Elisama, si Eliada pakon si Elipelet, siah halak.

⁹ In ma haganup anak ni si Daud, sobali anak ni parinangonni na legan; anjaha si Tamar do botou ni sidea.

¹⁰ Anak ni si Salomo: Si Rehabeam; anak ni ai si Abia, anak ni ai si Asa, anak ni ai si Josafat.

¹¹ Anak ni ai si Joram, anak ni ai si Ahasya, anak ni ai si Joas,

¹² Anak ni ai si Amasya, anak ni ai si Asarya, anak ni ai si Jotam,

¹³ anak ni ai si Ahas, anak ni ai si Hiskia, anak ni ai si Manasse,

¹⁴ anak ni ai si Amon, anak ni ai si Josia.

¹⁵ Anak ni si Josia: Bunga tubuhnya si Johanan, paidua si Jojakim, paitolu si Sedekia, paiompat si Sallum.

¹⁶ Anak ni si Jojakim: Si Jekonja, anak ni ai si Sedekia.

¹⁷ Anak ni si Jekonja, na tarbuang ai: Si Sealtiel,

¹⁸ Si Malkiram, si Pedaya, si Senasar, si Jekamya, si Hosama pakon si Nedabya.

¹⁹ Anak ni si Pedaya: Si Serubabel pakon si Simej; anak ni si Serubabel: Si Mesulan, si Hananya pakon si Selomit botou ni sidea.

²⁰ Anak ni si Mesulam: Si Hasuba, si Ohel, si Berekyah, si Hasadya pakon si Jusab-Hesed, lima halak.

²¹ Anak ni si Hananya: Si Polatya, si Jesaya, si Refaya, si Arnan, si Obaja ampa si Sekanya.

²² Anak ni si Sekanya: Si Semaya, si Hattus, si Jigeal, si Bariah, si Nearyah pakon si Safat, onom halak.

²³ Anak ni si Nearyah: Si Elyonai, si Hiskia pakon si Asrikam, tolu halak.

²⁴ Anak ni si Elyonai: Si Hodavyah, si Eliasib, si Pelaya, si Akub, si Johanan, si Delaya pakon si Anani, pitu halak.

Ginompar ni si Juda pakon si Simeon

4¹ Anak ni si Juda: Si Perez, si Hesron, si Karmi, si Hur pakon si Sobal.

² Si Reaya, anak ni si Sobal, ai ma bapa ni si Jahat, anjaha si Jahat ai ma bapa ni si Ahumai pakon si Lahad. Ai ma ginompar ni halak Sereati.

³ Anjaha on do anak ni si Hur: Si Etam, si Jesreel, si Jisma ampa si Jidbas; anjaha si Haslelponi do goran ni botou ni sidea.

⁴ Ambah ni ai si Penuel, bapa ni si Gedor, anjaha si Eser, bapa ni si Husa. Ai ma anak ni si Hur, bunga tubuh ni si Efrata, bapa ni si Betlehem.

⁵ Ia si Ashur, bapa ni si Tekoa, dua do parinangonni, si Helea pakon si Naara.

⁶ Itubuhkon si Naara do bani: Si Ahusam, si Heper, si Temmi, si Ahastari, ai ma anak ni si Naara.

⁷ Anak ni si Helea: Si Seret, si Sohar pakon si Etnan.

⁸ Si Koa ai ma bapa ni si Anub, si Hasobeba pakon ginompar ni si Aharhel, anak ni si Harum.

⁹ Sangapan do si Jabes humbani saninani; ibahen inangni do goranni si Jabes, ai nini do: Borit tumang do huahap manubuhkonsi.

¹⁰ Idilo si Jabes do goran ni Naibata ni halak Israel, nini, "Sai pasu-pasu Ham ma ahu anjaha pabolag Ham ma tanohku; anjaha sai itumpak tanganmu ma ahu, anjaha padaoh Ham ma hamagouan

humbangu, anjaha ulang ma sogop sitaronon bangku.” Jadi ibere Naibata ma na pinangindoni ai.

¹¹ Si Kelub, sanina ni si Suha do bapa ni si Mehira, ai ma bapa ni si Eston.

¹² Si Eston do bapa ni si Betrapa, si Pasea pakon si Tehina bapa ni si Irnahas. Ai ma halak na hun Reka.

¹³ Anak ni si Kenas: Si Otniel pakon si Seraya; anak ni si Otniel ai ma si Hatat pakon si Meonotai.

¹⁴ Si Meonotai ai ma bapa ni si Opra; anjaha si Seraya ai ma bapa ni si Joab, bapa ni halak na marianan i habungan Tuhang, ai tuhang do sidea.

¹⁵ Ia anak ni si Kaleb, anak ni si Jepunne, ai ma: Si Iru, si Ela pakon si Naham; anak ni si Ela si Kenas.

¹⁶ Anak ni si Jehallelel: Si Sip, si Sipa, si Tirlya pakon si Asarel.

¹⁷ Anak ni si Esra: Si Jeter, si Mered, si Eper pakon si Jalon. On ma anak ni si Bitiah, boru ni Parao, parinangon ni si Mered; boratan rumah ma ia anjaha itubuhkon ma si Miryam, si Sammai pakon si Jisba, bapa ni si Estamoa.

¹⁸ Anjaha parinangonni, boru Jahudi ai, manubuhkon si Jered, bapa ni si Gedor; si Heber, bapa ni si Soko pakon si Jekutiel bapa ni si Sanoa.

¹⁹ Anak ni parinangon ni si Hodia, botou ni si Naham, ai ma bapa ni si Kehila, halak Garmit pakon si Estemoa halak Maahati.

²⁰ Anak ni si Simon: Si Ammon, si Rinnah, si Benhanan pakon si Tilon. Anak ni si Jishi: Si Sohet pakon si Bensohet.

²¹ Anak ni si Sela, anak ni si Juda ai: Si Er, bapa ni si Leka pakon si Lada, bapa ni si Maresa ampa ginompar ni halak sitonun hiou silopak na i Betasbea.

²² Ambahni ai si Jokim pakon dalahi na i Koseba ampa si Joas pakon si Sarap, na onggga manrajai i Moab, dob ai mulak hu Betlehem, tapi barita na basaia mando ai.

²³ Sidea ai do sitopa hudon, na marianan i Netaim pakon Gedera; ijai do sidea marianan i lambung ni raja ai mangkorjahon horjani.

Ginompar ni si Simeon

²⁴ Anak ni si Simeon: Si Nemuel, si Jamin, si Jarib, si Sera pakon si Saul.

²⁵ Anak ni si Saul: Si Sallum; anak ni ai si Mibsam, bapa ni si Misma.

²⁶ anak ni si Misma: Si Hamuel; anak ni ai si Sakkur, bapa ni si Simeï.

²⁷ Sapuluh onom halak do anak ni si Simeï, anjaha onom do boruni, tapi seng sadia ramos anggo anggini ai, seng songon panggargar ni ginompar ni si Juda haganup ginompar ni sidea.

²⁸ Marianan do sidea i Berseba, Molada, Hazarsual,

²⁹ Bilha, Esem, Tolad,

³⁰ Bethuel, Horma, Ziklag,

³¹ Betmarkabot, Hasarsusim, Bet-Birei pakon i Saharaim. Ai ma huta ni sidea das bani panorang ni Raja Daud.

³² Anjaha dusun ni sidea ai ma: Etam, Ain, Rimmon, Tohen pakon Asan, lima huta,

³³ ampa ganup dusun ni sidea ai, inggot ni huta-huta ai das hu Baal. Ai ma huta ianan ni sidea pakon tarombo ni sidea.

³⁴ Anjaha si Mesobab, si Jamle, si Josa, anak ni si Amasia,

³⁵ si Joel, si Jehu, anak ni si Josibya, anak ni si Seraya, bapa ni si Asiel,

³⁶ Si Elioenai, si Jakoba, si Jesohaya, si Asaya, si Adiel, si Jesimiel, si Benaya,

³⁷ si Sisa anak ni si Sipi, anak ni si Allon, anak ni si Jedaya, anak ni si Simri, anak ni si Semaya,

³⁸ ganup sidea na dob ginoranan ai, raja do sidea i tongah-tongah ni pangkuni, anjaha gargar tumang do ginompar ni ompung ni sidea.

³⁹ Halani ai merap ma sidea das hu Geran, das hu hapoltakan ni pamah ai, laho mangindahi sampalan bani biri-biri ni sidea.

⁴⁰ Jadi jumpah sidea ma sampalan na lambutan anjaha na dear, anjaha lubang do tanoh ai, sonang anjaha damei; ginompar ni si Ham do ijai marianan parlobei.

⁴¹ Roh do sidea, ai ma na dob tarsurat goran ni sidea ai, bani panorang ni si Hiskia, raja ni Juda, iparseda ma lampo-lampo ni ginompar ni si Ham, anjaha iraseihon ma halak Maon, na jumpah ijai. Bois tumang do sidea ronsi sadari on, anjaha sidea do marianan ijai gantih ni sidea, ai sungkup do ijai panampalan bani biri-biri ni sidea.

⁴² Bungkas do homa humbani sidea, humbani ginompar ni si Simeon, lima ratus halak laho hu dolog Seir, anjaha si Platia, si Nearya, si Repaya pakon si Usiel, anak ni si Ishi do pambobai ni sidea.

⁴³ Iboiskon sidea do sima-sima ni halak Amalek na maluah ai, anjaha ijai do sidea marianan ronsi sadari on.

Marga na i Dipar ni Bah Jordan: Ruben, Gad pakon Manasse Satongah

5¹ Ia anak ni si Ruben, bunga tubuh ni si Israel -- *(ai ia do namin anak bunga tubuh, tapi halani na binutakanni podoman ni bapani, gabe minsah ma hak hasintuaonni ai hubani anak ni si Josep, anak ni si Israel)*, seng masuk hubagas buku tarombo sidea songon anak sikahanan;

² age pe sangapan si Juda i tongah-tongah ni saninani, anjaha humbani marharorohan sada raja, tapi anggo hak hasintuaon hubani si Josep do dabuhni.

³ Ia anak ni si Ruben, bunga tubuh ni si Israel, ai ma: Si Hanok, si Pallu, si Hesron pakon si Karmi.

⁴ Anak ni si Joel: Si Semaya, anak ni ai si Gog, anak ni ai si Simei.

⁵ anak ni ai si Mika, anak ni ai si Reayah, anak ni ai si Baal,

⁶ anak ni ai si Beera, na binoan ni si Tiglat-Pilneser, raja hun Assur hu habuangan; ia do sada kopala ni marga Ruben.

⁷ Saninani mar sasaompung, mangihutkon buku tarombo: Kopalani, si Jekiel pakon si Sakaria,

⁸ pakon si Bela anak ni si Asas, anak ni si Sema, anak ni si Joel, na marianan i Aroer das hu Nebo pakon Baalmeon.

⁹ Marianan do homa ia hampit hapoltakan das hubani pispis ni halimisan, na hampit dipar ni bah Euftrat, ai buei tumang do pinahan ni sidea i tanoh Gilead.

¹⁰ Anjaha bani panorang ni si Saul marporang do sidea dompak halak Hagari, gabe rasei sidea ibahen; anjaha isoluk sidea ma lampo-lampo ni sidea i sab nagori hampit hapoltakan ni Gilead.

¹¹ Patontang pakon sidea marianan do halak Gad i tanoh Basan das hu Salka.

¹² Si Joel do kopalani, si Sapam paidua, dob ai si Janai pakon si Sapat i Basan.

¹³ Ia sanina ni sidea mangihutkon ginompar ni ompung ni sidea bei, ai ma: Si Mikael, si Mesullam,

si Seba, si Jorae, si Jakan, si Sia pakon si Heber, pitu halak.

¹⁴ On do anak ni si Abihail, anak ni si Huri, anak ni si Jaroah, anak ni si Gilead, anak ni si Mikael, anak ni si Jesisai, anak ni si Jahdo, anak ni si Bus.

¹⁵ Si Ahi, anak ni si Abdiel, anak ni si Guni do kopala ni ginompar ni ompung ni sidea.

¹⁶ Marianan do sidea i Gilead, i Basan pakon i dusun-dusunni pakon i tanoh sampalan ni Saron das hu pispisni.

¹⁷ Ganupan ai ipamasuk hu bagas buku tarombo bani panorang ni si Jotam, raja ni Juda pakon bani panorang ni si Jerobeam, raja ni Israel.

¹⁸ Ia ginompar ni si Ruben, si Gad pakon satongah marga Manasse adong do bani sidea halak siimbang munsuh, na manghadang tanja pakon podang, pakon sisintak panah ampa halak na somal marmunsuh, ompat puluh ompat ribu pitu ratus onom puluh halak, na sirsir marporang.

¹⁹ Iporang sidea do halak Hagari, Jetur, Napis, pakon Nodab,

²⁰ anjaha sanggah dapotan pangurupion sidea mangimbang sidea, gabe ondos ma hu bagas tangan ni sidea halak Hagari ai pakon haganup na rap pakon sidea, ai dilo-dilo do sidea hubani Naibata i parporangan ai, anjaha itangihon do elek-elek ni sidea ai, halani marhatengeran do sidea Bani.

²¹ Anjaha iboan sidea ma pinahan ni sidea, lima puluh ribu unta, dua ratus lima puluh ribu biri-biri, dua ribu halode, ambahni ai saratus ribujolma na manggoluh.

²² Ai buei tumang do na rasei, ai humbani Naibata do parporangan ai. Anjaha isoluk sidea ma ianan ni sidea ai das ronsi panorang habuangan.

²³ Ginompar ni satongah marga Manasse marianan do i tanoh ai, singgan ni Basan das hu Baal-Hermon, das hu Seir pakon dolog Hermon ai buei tumang do sidea.

²⁴ Anjaha on do kopala ni ginompar ni ompung ni sidea: Si Eper, si Jesei, si Eliel, si Asriel, si Jeremia, si Hodawya ampa si Jahdiel, puanglima na gogoh, halak na tarbarita, anjaha kopala ni ginompar ni ompung ni sidea.

²⁵ Tapi mardousa ma sidea dompak Naibata ni ompung ni sidea, anjaha marbangkis sidea mangirikkon naibata ni bangsa, pangisi ni tanoh ai, na niagou ni Naibata i lobei ni sidea.

²⁶ Jadi ipuhoi Naibata ni halak Israel ma tonduy ni si Pul, raja ni Assur pakon tonduy ni si Tiglat-Pilneser, raja ni Assur, gabe ibuangkon ma halak Ruben, Gad pakon satongah marga Manasse, anjaha iboan ma sidea hu Hala, Habor, Hara pakon hu bah Gosan, ronsi sadari on.

Ginompar ni si Levi

6 ¹ Ia anak ni si Levi, ai ma: Si Gersom, si Kahat pakon si Merari.

² Anak ni si Kahat: Si Amram, si Jishar, si Hebron pakon si Usiel.

³ Anak ni si Amram: Si Aron, si Musa pakon si Miryam. Anak ni si Aron: si Nadab, si Abihu, si Eleasar pakon si Itamar.

⁴ Si Eleasar ai ma bapa ni si Pinehas, si Pinehas bapa ni si Abisua,

⁵ si Abisua bapa ni si Buki, si Buki bapa ni si Usi,

⁶ si Usi bapa ni si Seraya, si Seraya bapa ni si Merayot,

⁷ si Merayot bapa ni si Amarya, si Amarya bapa ni si Ahitub,

⁸ si Ahitub bapa ni si Sadok, si Sadok bapa ni si Ahimas,

⁹ si Ahimas bapa ni si Asarya, si Asarya bapa ni si Johanan,

¹⁰ si Johanan bapa ni si Asarya (*ia do na mangkorjahon hamalimon i rumah na pinajongjong ni si Salomo i Jerusalem*),

¹¹ si Asarya bapa ni si Amarya, si Amarya bapa ni si Ahitub,

¹² si Ahitub bapa ni si Sadok, si Sadok bapa ni si Sallum,

¹³ si Sallum bapa ni si Hilkia, si Hilkia bapa ni si Asarya,

¹⁴ si Asarya bapa ni si Seraya, anjaha si Seraya bapa ni si Josadak.

¹⁵ Tapi anggo si Josadak tarboan do hu habuangan, sanggah na binuangkon ni Jahowa halak Juda pakon Jerusalem marhitei si Nebukadnesar.

¹⁶ Anak ni si Levi: Si Gersom, si Kahat pakon si Merari.

¹⁷ On do goran-goran ni anak ni si Gersom: Si Libni pakon si Simeï.

¹⁸ Anak ni si Kahat: Si Amram, si Jishar, si Hebron pakon si Usiel.

¹⁹ Anak ni si Merari: Si Mahli pakon si Musi. On do ginompar ni si Levi marsasaompung.

²⁰ Anak ni si Gersom ai ma si Libni, anak ni ai si Jahat, anak ni ai si Simma,

²¹ anak ni ai si Joah, anak ni ai si Iddo, anak ni ai si Sera, anak ni ai si Jearterai.

²² anak ni si Kahat si Aminadab, anak ni ai si Kora, anak ni ai si Asir,

²³ anak ni ai si Elkana, anak ni ai si Abiasap, anak ni ai si Asir,

²⁴ anak ni ai si Tahat, anak ni ai si Uriel, anak ni ai si Usia, anak ni ai si Saul.

²⁵ Anak ni si Elkana: Si Amasai pakon si Ahimot,

²⁶ anak ni ai si Elkana, anak ni ai si Sopai, anak ni ai si Nahat,

²⁷ anak ni ai si Eliab, anak ni ai si Jeroham, anak ni ai si Elkana, anak ni ai si Samuel.

²⁸ Anak ni si Samuel: Si Joel, bunga tubuhni pakon si Abia.

²⁹ anak ni si Merari: Si Mahli. Anak ni ai si Libni, anak ni ai si Simei, anak ni ai si Usa,

³⁰ anak ni ai si Simea, anak ni ai si Hagia, anak ni ai si Asaya.

³¹ On do na pinabangkit ni si Daud, mandalankon pandodingon i Rumah ni Jahowa, singgan ni dob jonam poti parpadanan ijai.

³² Jadi marugas ma sidea i lobei ni lampo-lampo partumpuan ai mandalankon pandodingon das ronsi na pinauli ni si Salomo Rumah ni Jahowa i Jerusalem; marhorin do sidea marugas.

³³ On ma sidea na marugas ai pakon anak ni sidea. Humbani anak ni si Kahat: Si Heman, pandoding ai, anak ni si Joel, anak ni si Samuel,

³⁴ anak ni si Elkana, anak ni si Jeroham, anak ni si Eliel, anak ni si Toah,

³⁵ anak ni si Zup, anak ni si Elkana, anak ni si Mahat, anak ni si Amasai,

³⁶ anak ni si Elkana, anak ni si Joel, anak ni si Asarya, anak ni si Sepanya,

³⁷ anak ni si Tahat, anak ni si Asir, anak ni si Abiasap, anak ni si Korah,

³⁸ anak ni si Jishar, anak ni si Kahat, anak ni si Levi, anak ni si Israel.

³⁹ Ia si Asap, saninani ai, na jongjong i siamunni, ai ma si Asap, anak ni si Berekia, anak ni si Simea,

⁴⁰ anak ni si Mikael, anak ni si Maaseya, anak ni si Malkia.

⁴¹ anak ni si Etni, anak ni si Serah, anak ni si Adaya,

⁴² anak ni si Etan, anak ni si Simma, anak ni si Simei,

⁴³ anak ni si Jahat, anak ni si Gersom, anak ni si Levi.

⁴⁴ Anjaha anak ni si Merari, anggi ni sidea ai, na jongjong hampit sambilou, ai ma: Si Etan, anak ni si Kisi, anak ni si Abdi, anak ni si Maluk,

⁴⁵ anak ni si Hasabya, anak ni si Amasya, anak ni si Hilkia,

⁴⁶ anak ni si Amsi, anak ni si Bani, anak ni si Semer,

⁴⁷ anak ni si Mahli, anak ni si Musi, anak ni si Merari, anak ni si Levi.

⁴⁸ Anjaha sanina ni sidea, halak Levi ai, domma ipabangkit mandalankon ganup horja na i Rumah ni Jahowa.

⁴⁹ Tapi anggo si Aron ampa anakni ai, sidea do situtung dahupa i atas ni anjap-anjap panggalangan ni galangan situtungon pakon i atas ni anjap-anjap panggalangan ni dahupa ampa sidalankon sagala horja ibagas kamar na pansing sahalian ai, ampa mambahen pardearan bani Israel, romban hubani haganup na tinonahkon ni si Musa, juakjuak ni Naibata.

⁵⁰ On do ginompar ni si Aron. Si Eleasar do anakni, anak ni ai si Pinehas, anak ni ai si Abisua,

⁵¹ anak ni ai si Buki, anak ni ai si Usi, anak ni ai si Seraya,

⁵² anak ni ai si Merayot, anak ni ai si Amarya, anak ni ai si Ahitub,

⁵³ anak ni ai si Sadok, anak ni ai si Ahimas.

Huta ni halak Levi

(ay. 54-81: pausih Jos. 21)

⁵⁴ Anjaha on do ianan ni sidea, ianan parlampolampoan bani tanoh parbagianan ni sidea. Hubani ginompar ni si Kahat -- (ai sidea do mandapot bagian na parlobei),

⁵⁵ ibere ma Hebron i tanoh Juda ampa sampalan na inggot hujai.

⁵⁶ Tapi anggo ladang ni huta ai ampa dusunni ibere sidea do hubani si Kaleb, anak ni si Jepunne.

⁵⁷ Ibere sidea do homa hubani ginompar ni si Aron huta haporusan: Hebron pakon Libna ampa sampalanni, Jatir pakon Estemoa ampa sampalanni,

⁵⁸ Hilen ampa sampalanni pakon Debir ampa sampalanni,

⁵⁹ Asan ampa sampalanni pakon Bet-semes ampa sampalanni.

⁶⁰ Anjaha humbani marga Benyamin: Geba ampa sampalanni, Alemet ampa sampalanni pakon Anatot ampa sampalanni. Anjaha ganup huta ai, na binere hubani ginompar ni sidea, sepuluh tolu huta do.

⁶¹ Tapi hubani anak ni si Kahat, na tading ai, domu hubani sidea mar sasaompung, ibere do marhitei ruji-ruji sapuluh huta, humbani marga Efraim, Dan ampa satongah marga Manasse.

⁶² Hubani ginompar ni si Gersom, domu hubani sidea mar sasaompung, ibere do sapuluh tolu huta humbani marga Isasar, marga Asser, marga Naptali pakon humbani satongah marga Manasse i Basan.

⁶³ Hubani ginompar ni si Merari, domu hubani sidea mar sasaompung, ibere do marhitei ruji-ruji sapuluh dua huta humbani marga Ruben, marga Gad pakon marga Sebulon.

⁶⁴ Ibere halak Israel ma huta-huta ai ampa sampalanni hubani halak Levi.

⁶⁵ Ibere sidea do homa marhitei ruji-ruji humbani marga Juda, humbani marga Simeon pakon humbani marga Benyamin huta-huta on, ipatugah sidea do goran-goranni.

⁶⁶ Tapi anggo ginompar ni si Kahat dapotan huta parbagianan do humbani marga Efraim.

⁶⁷ Ibere do hubani sidea huta haporusan: Sikem pakon sampalanni i dolog Efraim, Geser ampa sampalanni,

⁶⁸ Jokmeam ampa sampalanni, Bethoron ampa sampalanni,

⁶⁹ Ayalon ampa sampalanni, Gat-rimon ampa sampalanni,

⁷⁰ Anjaha humbani satongah marga Manasse: Aner ampa sampalanni pakon Jibleam ampa sampalanni, hubani ginompar ni si Kahat na tading ai.

⁷¹ Ia hubani ginompar ni si Gersom ibere do humbani satongah marga Manasse: Golan i Basan ampa sampalanni, pakon Astarot ampa sampalanni.

⁷² Humbani marga Isasar: Kison ampa sampalanni, Deberat ampa sampalanni,

⁷³ Ramot ampa sampalanni pakon Anem ampa sampalanni.

⁷⁴ Humbani marga Asser: Misal ampa sampalanni, Abdon ampa sampalanni,

⁷⁵ Helkat ampa sampalanni pakon Rehob ampa sampalanni.

⁷⁶ Humbani marga Naptali: Kades i Galilea ampa sampalanni, Hammon ampa sampalanni pakon Kiryataim ampa sampalanni.

⁷⁷ Hubani ginompar ni si Merari, na tading ai, ibere do humbani marga Sebulon: Rimmon ampa sampalanni pakon Tabor ampa sampalanni.

⁷⁸ Anjaha i dipar ni Jordan, dohorhon Jeriko hampit hapoltakan ni Jordan, humbani marga Ruben: Beser, na i halimisan ampa sampalanni, Jasa ampa sampalanni,

⁷⁹ Kedemot ampa sampalanni pakon Mepat ampa sampalanni.

⁸⁰ Humbani marga Gad: Ramot i Gilead ampa sampalanni, Mahanaim ampa sampalanni,

⁸¹ Hesbon ampa sampalanni pakon Jaeser ampa sampalanni.

Ginompar ni si Isasar, si Benyamin pakon si Naftali

7 ¹ Anak ni si Isasar: Si Tola, si Pua, si Jasub pakon si Simron, ompat halak.

² Anak ni si Tola: Si Usi, si Repaya, si Jeriel, si Jahmai, si Jibsam pakon si Samuel, kopala ni ginompar ni bapa ni sidea humbani si Tola, siparmunsuh na borani mangihutkon sundut ni sidea; bilangan ni sidea bani panorang ni si Daud dua puluh dua ribu onom ratus halak do bueini.

³ Anak ni si Ussi: Si Jisraya. Anak ni si Jisraya: Si Mikael, si Obaja, si Joel pakon si Jissia, lima halak ganupan sidea kopala do.

⁴ Anjaha hasoman ni sidea mangihutkon ginompar ni ompung ni sidea, adong do tolu puluh onom ribu halak siparporang, ai buei do parinangon pakon anak ni sidea.

⁵ Anjaha sanina ni sidea humbani ganup ginompar ni si Isasar, halak siparporang na borani, ualuh puluh pitu ribu halak do bueini mangihutkon na tarsurat i buku register.

⁶ Anak ni si Benyamin: Si Bela, si Beher pakon si Jedihael, tolu halak.

⁷ Anak ni si Bela: Si Esbon, si Usi, si Usiel, si Jerimot pakon si Iri, lima halak, kopala ni ginompar ni bapani, halak siparporang na borani; dua puluh dua ribu tolu puluh ompat halak do bueini mangihutkon na tarsurat i buku register.

⁸ Si Elieser, si Elioenai, si Omri, si Jeremot, si Abia, si Anatot, pakon si Alemet. Ganupan ai anak ni si Beher.

⁹ Anjaha bilangan ni sidea i buku register mangihutkon partubuhni, mangihutkon ginompar ni bapani, halak siparporang na borani, dua puluh ribu dua ratus halak do.

¹⁰ Anak ni si Jediael: Si Bilhan. Anak ni si Bilhan: Si Jeus, si Benyamin, si Ehud, si Kenaana, si Zetan, si Tarsis pakon si Ahisahar.

¹¹ Ganupan ai anak ni si Jediael, mangihutkon kopala ni ginompar ni bapani, halak siparporang na borani, sapuluh pitu ribu dua ratus halak buen, na sirsir marporang.

¹² Tapi si Supim pakon si Hupim, ai ma anak ni si Ir, anjaha si Husim anak ni si Aher.

¹³ Anak ni si Naftali: Si Jahziel, si Guni, si Jeser pakon si Sallum, ginompar ni si Bilha.

Ginompar ni si Manasse, si Efraim pakon si Asser

¹⁴ Anak ni si Manasse: Si Asriel, na tinubuhkon ni parinangonni, boru Aram ai; itubuhkon ma use si Makir, bapa ni si Gilead.

¹⁵ Anjaha ibuat si Makor ma boru humbani si Hupim pakon si Supim. Goran ni botouni si Maaka; goran ni botouni na paduahon si Selopehad; pitah boru do itubuhkon si Selopehad.

¹⁶ Dob ai itubuhkon si Maaka, parinangon ni si Makir ma sada anak, anjaha ibahen ma goranni si Peres, anjaha goran ni anggini si Seres do; anjaha anakni si Ulam pakon si Rekem do.

¹⁷ Anak ni si Ulam: Si Bedan. Ai ma ginompar ni si Gilead, anak ni si Makir, anak ni si Manasse.

¹⁸ Anjaha botouni, si Hammolehet, manubuhkon si Ishod, si Abiezer pakon si Mahla.

¹⁹ Anak ni si Semida: Si Ahyan, si Sekem, si Likhi pakon si Aniam.

²⁰ Anak ni si Efraim: Si Sutela, anak ni ai si Bered, anak ni ai si Tahat, anak ni ai si Eleada, anak ni ai si Tahat,

²¹ anak ni ai si Sabad, anak ni ai si Sutela, si Eser pakon si Elead, na binunuh ni halak Gad, parnagori ai halani tuad sidea laho manangko pinahan ni sidea.

²² Dokah do si Efraim, bapa ni sidea, marpusok ni uhur, gabe roh ma saninani mangapohsi.

²³ Dob ai iparayak ma parinangonni gabe boratan rumah ma ia, itubuhkon ma sada anak anjaha ibahen ma goranni si Beria, halani masa hasosakan ibagas rumahni.

²⁴ Ia boruni, ai ma si Seerah, ai ma na paulihon Bethoron parbuntu pakon parbornoh ampa Usensera.

²⁵ Anak ni si Beria: Si Repa, anak ni ai si Rosep, anak ni ai si Tela, anak ni ai si Tahan,

²⁶ anak ni ai si Laedan, anak ni ai si Amihud, anak ni ai si Elisama,

²⁷ anak ni ai si Nun, anak ni ai si Josua.

²⁸ Ia parbagianan pakon ianan ni sidea ai ma Betel pakon dusunni na masuk hujai, hampit hapoltakan Naaran, hampit hasundutan Geser pakon dusunni, Sikem pakon dusunni, das hu Aya pakon dusunni;

²⁹ sonai homa i lambung ni ginompar ni si Manasse, Betsean ampa dusunni, Taanak ampa dusunni, Megiddo ampa dusunni, Dor ampa dusunni. Ijai ma marianan anak ni si Josep, anak ni si Israel.

³⁰ Anak ni si Asser: Si Jimna, si Jiswa, si Jiswi, si Beria anjaha botou ni sidea, si Serah do.

³¹ Anak ni si Beria: Si Heber pakon si Malkiel, ai ma bapa ni si Birsait.

³² Anak ni si Heber: Si Japlet, si Semer pakon si Hotan, anjaha si Sua do botou ni sidea.

³³ Anak ni si Japlet: Si Pasah, si Bimhal pakon si Aswat; ai ma anak ni si Japlet.

³⁴ Anak ni si Semer: Si Ahi, si Rohga, si Jehubba pakon si Aram.

³⁵ Anak ni si Hotan, anggini ai: Si Sopa, si Jimna, si Seles pakon si Amal.

³⁶ Anak ni si Sopa: Si Sua, si Harneper, si Sual, si Beri, si Jimra,

³⁷ si Beser, si Hod, si Samma si Silsa, si Jitram, pakon si Bera.

³⁸ Anak ni si Jeter: Si Jepunne, si Pispa pakon si Ara.

³⁹ Anak ni si Ulla: Si Arah, si Haniel pakon si Risia.

⁴⁰ Ganupan ai ginompar ni si Asser, kopala ni ginompar ni ompungni, halak siparporang na borani anjaha na tarpilih, kopala ni raja-raja. Bilangan ni sidea na boi marporang, ibagas buku register dua puluh onom ribu halak do.

Ginompar ni si Benyamin

Ginompar ni si Saul

8 ¹ Anak ni si Benyamin ai ma si Bela, ai ma bunga tubuhni, na paduahon si Asbel, na patoluhon si Arak.

² na paompatkon si Noha, na palimahon si Rapa.

³ Anak ni si Bela: si Addar, si Gera, si Abihud.

⁴ si Abisua, si Naaman, si Ahoah,

⁵ si Gera, si Sepupan pakon si Huram.

⁶ On do anak ni si Ehud (sidea ai ma kopala ni na mar sasaompung sanggah bani na marianan i Geba anjaha tarbuang sidea hu Manahat,

⁷ anjaha si Naaman, si Ahia pakon si Gera do na mambuankon sidea). Si Usa pakon si Ahihud ai ma anakni.

⁸ Si Saharaim pe, tubuh do anak bani i ladang Moab, dob iusir si Husim pakon si Bara, parinangonni ai;

⁹ itubuhkon si Hodes, parinangon ni ai do homa bani anak: Si Jobab, si Sibia, si Mesa, si Malkam,

¹⁰ si Jeus, si Sahia pakon si Mirmah. Ai ma anakni, kopala ni mar sasaompung.

¹¹ Tubuh do homa anak bani humbani si Husim: Si Abitub pakon si Elpaal.

¹² Anak ni si Elpaal: Si Heber, si Misham pakon si Semed, na paulihon Ono pakon Lod ampa dusunni.

¹³ Si Beria pakon si Sema, sidea do kopala ni mar sasaompung bani pangisi ni Ayalon, na mangusir pangisi ni Gad.

¹⁴ Saninani: Si Sasak, si Jeremot,

¹⁵ si Sebaja, si Arad, si Eder,

¹⁶ si Mikael, si Jispa pakon si Joha, ai ma anak ni si Beria.

¹⁷ Si Sebaja, si Mesullam, si Hiski, si Heber,

¹⁸ si Jismerai, si Jislia pakon si Jobab, ai ma anak ni si Elpaal.

¹⁹ Si Jakim, si Sihri, si Sabdi,

²⁰ si Elienai, si Silletai, si Eliel,

²¹ si Adaya, si Beraya, si Simrat, ai ma anak ni si Simei.

²² Si Ispan, si Eber, si Eliel,

²³ si Abdon, si Sihri, si Hanan,

²⁴ si Hananya, si Elam, si Antotiah,

²⁵ si Jipdeya pakon si Peniel, ai ma anak ni si Sasak.

²⁶ Si Samserai, si Seharya, si Atalya,

²⁷ si Jaeresya, si Elia pakon si Sihri, ai ma anak ni si Jeroham.

²⁸ Ai ma kopala ni mar sasaompung mangihutkon partubuhni; kopala do sidea, marianan i Jerusalem.

²⁹ Tapi marianan i Gibeon do bapa ni si Gibeon ai ma si Jehiel, anjaha si Maaka do goran ni parinangonni.

³⁰ Ambahni ai si Abdon do bunga tubuhni; dob ai si Sur, si Kis, si Baal, si Ner, si Nadab,

³¹ si Gedor, si Ahyo, si Seher pakon si Miklot.

³² Si Miklot, ai ma bapa ni si Simea; sidea pe i Jerusalem do marianan rap pakon saninani, patontang.

³³ Si Kis, ai ma anak ni si Ner; anak ni si Kis si Saul; anak ni si Saul si Jonatan, si Malhisua, si Abinadab pakon si Esbaal.

³⁴ Anak ni si Jonatan: Si Meribbaal: anak ni si Meribbaal si Mika.

³⁵ Anak ni si Mika: si Piton, si Melek, si Tarea pakon si Ahas.

³⁶ Anak ni si Ahas: si Joadas, anjaha anak ni si Joadas: si Alemet, si Asmawet pakon si Simri; anak ni si Simri si Mosa.

³⁷ Anak ni si Mosa, si Binea, anak ni ai si Rapah; anak ni ai si Asel.

³⁸ Onom do anak ni si Asel, anjaha on ma goran-goranni: Si Asrikam, si Bohru, si Jismael, si Searya,

si Obaja pakon si Hanan; ganupan ai anak ni si Asel do.

³⁹ Anak ni si Esek anggini ai: Si Ulam, bunga tubuhni, si Jehus paidua pakon si Elipelet paitolu.

⁴⁰ Anak ni si Ulam, ai ma halak na borani marporang anjaha na pandei mamanah; buei do anak pakon pahompuni, saratus lima puluh halak. Ai ma ganup ginompar ni si Benyamin.

Pangisi ni Jerusalem

9¹ Ganup halak Israel tarsurat do ibagas buku tarombo, anjaha tonggor ma, domma tarsurat sidea ibagas buku ni raja-raja ni Israel. Tapi anggo halak Juda tarbuang do hu Babel halani pangoseionni.

² Ia pangisi ni tanoh ai hinan, ai ma na marianan bani parbagiananni bei pakon ibagas hutani bei, ai ma halak Israel, malim, halak Levi pakon siparugas i rumah panumbahan.

³ Marianan do i Jerusalem deba humbani halak Juda, Benyamin, Efraim pakon Manasse.

⁴ Humbani halak Juda: si Utai anak ni si Amihud, anak ni si Omri, anak ni si Imri, anak ni si Bani, na humbani anak ni si Peres, anak ni si Juda.

⁵ Humbani halak Siloni: Si Asaya, bunga tubuhni pakon anakni ai.

⁶ Humbani anak ni si Sera: Si Jehuel pakon sanina ni sidea, onom ratus siah puluh halak bueini.

⁷ Humbani ginompar ni si Benyamin: Si Sallu, anak ni si Mesullam, anak ni si Hodavia, anak ni si Hassenua,

⁸ si Jibneya anak ni si Jeroham, si Ela anak ni si Ussi, anak ni si Mihri, pakon si Mesullam anak ni si Sepatya, anak ni si Regual, anak ni si Jibniyah,

⁹ ampa sanina ni sidea mar sasaompung, siah ratus lima puluh onom halak bueini. Ganupan ai kopala ni mar sasaompung bani ginompar ni ompung ni sidea.

¹⁰ Humbani malim: Si Jedaya, si Joyarib, si Jakim,

¹¹ pakon si Asarya, anak ni si Hilkia, anak ni si Mesullam, anak ni si Sadok, anak ni si Merayot, anak ni si Ahitub, kopala i Rumah ni Naibata,

¹² pakon si Adaya, anak ni si Jeroham, anak ni si Pashur, anak ni si Malkia, pakon si Maasai, anak ni si Adiel, anak ni si Jahsera, anak ni si Mesillemit, anak ni si Immer;

¹³ ambah ni ai sanina ni sidea, kopala ni ginompar ni ompung ni sidea saribu pitu ratus onom puluh halak bueini, halak na pandei mandalankon horja i Rumah ni Naibata.

¹⁴ Humbani halak Levi: Si Semaya, anak ni si Hassub, anak ni si Asrikam, anak ni si Hasabya na humbani ginompar ni si Merari;

¹⁵ pakon si Bakbakar, si Heres, si Golal, si Matanya anak ni si Mika, anak ni si Sihri, anak ni si Asap;

¹⁶ pakon si Obaja, anak ni si Semaya, anak ni si Galal, anak ni si Jedutun pakon si Berekyia, anak ni si Asa, anak ni si Elkana, na marianan i huta ni halak Netopati.

¹⁷ Sijaga horbangan: si Sallum, si Akub, si Talmon, si Ahiman pakon saninani. Si Sallum do kopalani,

¹⁸ anjaha ronsi nuan marjaga do sidea bani horbangan raja hampit hapoltakan. Ai ma sijaga horbangan ni parsaranan ni halak Levi.

¹⁹ Si Sallum, anak ni si Kore, anak ni si Abyasap, anak ni si Korah, rap pakon saninani humbani ginompar ni ompungni, halak Korahi, ai do simada horja manjaga labah ni lampo-lampo ai, usih songon ompung ni sidea bani parsaranan ni Jahowa manjaga labah harorohan.

²⁰ Anjaha si Pinehas, anak ni si Eleasar do kopala ni sidea sapari; ihasomani Jahowa do ia.

²¹ Si Sakarya, anak ni si Meselamyia do sijaga labah bani lampo-lampo partumpuan ai.

²² Ganup sidea, na tarpilih ai gabe si jaga labah, dua ratus sepuluh dua halak do. Tarsurat do sidea bani buku tarombo mangihutkon huta-huta. Si Daud pakon si Samuel, na marpanonggoran ai do na pabangkithon sidea bani tohonan ni sidea.

²³ Sidea pakon anak ni sidea do tongtong bani Rumah ni Jahowa, ai ma rumah lampo-lampo ai, laho manjagai ai.

²⁴ Mangihutkon desa na ompat ai do jongjong sijaga horbangan ai, hampit purba, hampit pastima, hampit utara pakon hampit dangsina.

²⁵ Anjaha sanina ni sidea, na marianan i huta ni sidea, maningon roh do ganup papituarihon, mangihutkon horin ni sidea laho marugas rap pakon sidea,

²⁶ tapi siompat halak kopala ni sijaga horbangan ai, totap do bani jabatanni. Deba halak Levi ipabangkit do gabe sijaga kamar pakon arta ni Rumah ni Naibata.

²⁷ Inggot Rumah ni Naibata ai do sidea marborngin; ai sidea do haondosan ni parrundaonkon, anjaha sidea do siungkab labah ganup sogod.

²⁸ Deba humbani sidea manramotkon parugas tohonan ai, ai maningon bilangan do ai sanggah pamasukkon ampa padaratkon.

²⁹ Deba nari humbani sidea ipabangkit manramotkon parugas, ai ma ganup parugas na mapansing ai, sonai homa manramotkon nitak na lumat ai, anggur, minak, dahupa pakon rium-riuman.

³⁰ Na legan, ai ma humbani anak ni malim, marmasak minak humbani rompah-rompah ai.

³¹ Anjaha si Matitya humbani halak Levi, bunga tubuh ni si Sallum, halak Korahi ai, ia do ondosan ni na patureihon kuei na ginoreng.

³² Ambahni ai deba humbani sanina ni sidea, humbani ginompar ni si Kahat do haondosan ni ruti sigalangkonon, sipasirsiron ganup ari Sabat.

³³ Anjaha on ma sipandoding, kopala ni halak Levi mar sasaompung, na marianan i kamar ni rumah panumbahan, na maluah humbani parugason na legan, ai marlahoan do sidea arian pakon borngin.

³⁴ Ai sidea do kopala ni halak Levi mar sasaompung, mangihutkon partubuh ni sidea; marianan i Jerusalem do sidea.

Pangisi ni Gibeon; Taronbo ni si Saul

³⁵ I Gibeon do marianan bapa ni si Gibeon, ai ma si Jehiel, anjaha si Maaka do goran ni parinangonni.

³⁶ Bunga tubuhni si Abdon, dob ai si Sur, si Kis, si Baal, si Ner, si Nadab,

³⁷ si Gedor, si Ahyo, si Sakarya pakon si Miklot.

³⁸ Ia si Miklot, ai ma bapa ni Simea; sidea pe i Jerusalem do marianan rap pakon saninani, patontang.

³⁹ Anak ni si Ner, ai ma si Kis, anak ni si Saul; anak ni si Saul: Si Jonatan, si Malhisua, si Abinadab pakon si Esbaal.

⁴⁰ Anak ni si Jonatan ai ma si Meribaal, anakni ai si Mika.

⁴¹ Anak ni si Mika: Si Piton, si Melek, si Tarea pakon si Ahas.

⁴² Anak ni si Ahas si Jaera; anak ni ai si Alemat, si Asmawet pakon si Simri, na maranakkon si Mosa.

⁴³ Anak ni si Mosa si Binea, anak ni ai si Repa, anak ni ai si Eleasa, anak ni ai si Asel.

⁴⁴ Onom do anak ni si Asel, na margoran: Si Asrikan, si Bohru, si Jismael, si Searya, si Obaja pakon si Hanan, ai ma anak ni si Asel.

Parmatei ni si Saul

(Pausih 1 Sam. 31)

10¹ Dob ai marporang ma halak Palistim dompak halak Israel, gabe maporus ma halak Israel i lobei ni halak Palistim, anjaha marradagan i dolog Gilboa.

² Ipardakdak halak Palistim ma si Saul pakon anakni ai, anjaha ibunuh halak Palistim ma si Jonatan, si Abinadab pakon si Malhisua, anak ni si Saul ai.

³ Lambin jobuni ma porang ai dompak si Saul, anjaha jumpah halak siparpanah ai ma ia, ugahan ma ia ibahen halak siparpanah ai.

⁴ Dob ai nini si Saul ma dompak siusung sinjatani, “Sintak ma podangmu anjaha tikamhon ma hu bangku, ase ulang roh halak na so marsunat on mandorun ahu.” Tapi seng ra juakjuak siusung sinjatani ai, ai biar tumang do ia. Dob ai ibuat si Saul ma podangni, lanjar ijombahon ma dirini hujai.

⁵ Dob iidah juakjuak siusung sinjatani ai, na dob matei si Saul, ijombahon ma homa dirini, lanjar matei.

⁶ Jadi matei ma si Saul, ia pakon anakni na tolu halak ai, ampa ganup ginomparni; rap matei do sidea.

⁷ Dob iidah halak Israel, na marianan i pamah ai, na dob maporus halak Israel anjaha na dob matei si Saul pakon anakni ai, itadingkon sidea ma huta ni sidea lanjar maporus. Jadi roh ma halak Palistim marianan ijai.

⁸ Patarni ai sanggah roh halak Palistim laho manrampasi na rasei ai, jumpah sidea ma si Saul pakon anakni ai tibal i dolog Gilboa.

⁹ Jadi dob irampas sidea anjaha ibuat uluni pakon sinjatani, ipaebangkon sidea ma ai i tanoh ni halak Palistim inggot, laho patugahkon na masa ai bani gana-gana ni sidea, pakon hubani bangsa ai.

¹⁰ Dob ai inahkon sidea ma sinjatani ai hubagas rumah ni naibata ni sidea, tapi anggo uluni igantungkon ma i rumah ni naibata Dagon.

¹¹ Jadi dob ibogei haganup parhuta Jabes-Gilead sagala na binahen ni halak Palistim ai hubani si Saul,

¹² bingkak ma ganup halak siimbang munsuh, ibuat sidea ma bangkei ni si Saul pakon bangkei ni anakni ai, iboan ma ai hu Jabes anjaha itanom sidea ma holi-holi ni sidea i toruh ni jabi-jabi na i Jabes, anjaha marpuasa ma sidea pitu ari dokahni.

¹³ Jadi matei ma si Saul halani pangoseionni, na binahenni dompak Jahowa, halani na so niramotkonni hata ni Jahowa, anjaha halani na marsungkun ia hubani naboru partondung, laho mangindahi pangungkabon,

¹⁴ seng hubani Jahowa isungkun. Halani ai ibunuh Jahowa ma ia, anjaha ipatongon ma harajaon ai hubani si Daud anak ni si Isai.

Si Daud Bangkit Raja, Itaban Jerusalem

(Pausih 2 Sam. 5:1-10)

11 ¹ Dob ai martumpu ma ganup Israel marayak si Daud i Hebron, nini ma, “Tonggor ma, sisada holi-holi ampa sisada daging do hanami pakon ham.

² Bani panorang na salpu, age sanggah si Saul ope raja, ham do na mambobahon Israel luar pakon masuk; anjaha Jahowa, Naibatamu do mangkatahon bamu, ‘Ho do na maningon marmahan bangsang-Ku halak Israel, ho do maningon gabe raja bani sidea.”

³ Jadi roh ma ganup pangintuai ni Israel marayak raja ai i Hebron, anjaha marpadan ma si Daud pakon sidea i Hebron i lobei ni Jahowa; jadi iminaki sidea ma si Daud gabe raja manggomgom Israel, romban hubani hata ni Jahowa hinan marhitei si Samuel.

⁴ Dob ai bingkat ma raja Daud rap pakon ganup Israel hu Jerusalem, ai ma Jebus; halak Jebus do na marianan i tanoh ai hinan.

⁵ Ihatahon pangisi ni Jebus ma hubani si Daud, “Seng tumaram masuk ho hujon.” Hape italuhon si Daud do benteng Sion, ai ma huta ni si Daud.

⁶ Ai domma ihatahon si Daud hinan, “Barang ise na parlobei, na mamunuh halak Jebusi ai, gabe kopala ma ia anjaha pambobai.” Si Joab, anak ni si Seruya do na parlobei manangkih hu atas, halani ai ma ase ia bangkit gabe pambobai.

⁷ Jadi marianan ma si Daud ibagas benteng ai; halani ai do ase igoran benteng ai huta ni si Daud.

⁸ Dob ai ibatar-batari ma huta ai inggot, hun Milo nari torus maringgot, anjaha si Joab do padearhon na legan ai ibagas huta ai.

⁹ Dob ai lambin banggalni ma kuasa ni si Daud, ai ihasomani Jahowa Zebaot do ia.

Puanglima ni si Daud

(Pausih 2 Sam. 23:8-39)

¹⁰ On do kopala ni puanglima ni si Daud, na manungkolisi pajonam harajaonni, rap pakon ganup halak Israel, na pabangkitkonsi gabe raja, romban hubani hata ni Jahowa pasal Israel.

¹¹ On do bilangan ni puanglima ni si Daud: Si Jasobeam, anak ni si Hahmoni, kopala ni na tolu ai;

idiharhon do tanjani dompak tolu ratus halak, na binunuhni bani sada panorang.

¹² Dob ai si Eliasar, anak ni si Dodo, halak Ahohi; masuk hubani puanglima sitolu halak ai do ia.

¹³ Ia do hasoman ni si Daud i Pas-Dammim, sanggah na martumpu ijai halak Palistim. Adong do ijai sanlambar juma gok andolei. Sanggah na maporus bangsa ai i lobei ni halak Palistim,

¹⁴ laho ma ia jongjong i tengah-tengah ni juma ai, laho manjaga ai, anjaha italuhon ma halak Palistim ai. Ipaluah Jahowa do sidea marhasoman hamonangan bolon.

¹⁵ Tuad do tolu halak humbani sitolu puluh kopala ai, hu dolog batu, hubani si Daud, hu liang Addulam; anjaha bala ni halak Palistim marsaran do i pamah Repaim

¹⁶ Ibagas benteng do ijia si Daud, anjaha bala ni halak Palistim i Betlehem do.

¹⁷ Tubuh ma sir ni uhur bani si Daud, nini ma, “Ise ma nani na ra mambere bah inumonku hun parigi na i Betlehem, na i lambung ni horbangan ai?”

¹⁸ Jadi isungsung na tolu puanglima ai ma parsaranan ni halak Palistim, itahui sidea ma bah humbani parigi na i Betlehem, na i lambung ni horbangan ai, anjaha iboan sidea ma ai hubani si Daud. Tapi seng ra si Daud manginum ai, iuseihon ma ai bani Jahowa,

¹⁹ anjaha nini ma, “Daoh ma in humbangku ibahen Naibatangku mambahen na sonin. Mintor ma ahu manginum daroh ni halak on?” Ai hosah ni sidea do isoyahon sidea laho mangalop bah on. Halani ai seng ra ia manginum ai. Ai ma na binahen ni puanglima sitolu halak ai.

²⁰ Si Abisai pe, anggi ni si Joab, kopala do bani sitolu puluh halak ai. Idiharhon do tanjani dompak tolu ratus halak, anjaha ibunuhi ma sidea, gabe tarmurmur ma ia i tongah-tongah ni sitolu puluh halak ai.

²¹ Ia do simulianan humbani na tolu puluh halak ai, anjaha ia do kopala ni sidea; tapi seng taratasisi anggo sitolu halak ai.

²² Si Benaya pe, anak ni si Joyada, sada halak na borani anjaha sihorjahon buei pambahenan, hun Kabsel do ia; ia do na manaluhon na dua anak ni si Ariel, na hun Moab ai. Masuk do ia homa anjaha ibunuh sada singa ibagas sada godung, bani sada ari, sanggah turun salju.

²³ Anjaha ibunuh do homa sada halak Masir, sada halak na bolon tumang lima asta ganjangni. Adong do ibagas tangan ni halak Masir ai sada tanja ansa sabang ni partonun; tapi tuad ma si Benaya manjumpahkonsi pakon sada tungkot, irampas ma tanja ai humbani tangan ni halak Masir ai, lanjar ibunuh ma ia marhitei tanjani sandiri.

²⁴ Ai ma na binahen ni si Benaya, anak ni si Joyada, gabe tarambilan ma ia i tengah-tengah ni na tolu puluh halak ai.

²⁵ Marsangap do ia i tengah-tengah ni na tolu puluh halak ai, tapi seng taratasisi anggo sitolu halak ai. Jadi ipabangkit si Daud ma ia gabe kopala ni pangawalni.

²⁶ Puanglima na legan ai: Si Asahel, anggi ni si Joab; si Elkana, anak ni si Dodo, na hun Betlehem;

²⁷ si Sammot na hun Harod; si Heles halak Peloni;

²⁸ si Ira, anak ni si Ikkes, halak Tekoa; si Abieser halak Anatot;

²⁹ si Sibbekai, halak Husati; si Ilai, halak Ahoah;

³⁰ si Maharai, halak Netopati; si Heled, anak ni si Bahanas, halak Netopati;

³¹ si Itai, anak ni si Ribai hun Gibeas, halak Benyamin; si Benaya, halak Piratoni;

³² si Hurai, hun bah Gas; si Abiel, halak Araba;

³³ si Asmawet, hun Bah-Arum; si Eliahba, halak Saalboni;

³⁴ anak ni si Hasem, halak Gisonni; si Jonatan, anak ni si Sage, halak Harari;

³⁵ si Ahiam, anak ni si Sahar, halak Harari; si Elipal, anak ni si Ur;

³⁶ si Heper, halak Meherati; si Ahia, halak Peloni;

³⁷ si Hesro, halak Karmeli; si Naharai, anak ni si Esbai;

³⁸ si Joel, sanina ni si Natan; si Mibhar, anak ni si Hagri;

³⁹ si Selek, halak Amoni; si Naharai, halak Beroti, siusung sinjata ni si Joab, anak ni si Seruya;

⁴⁰ si Ira, halak Jitri; si Gareb, halak Jitri;

⁴¹ si Uria, halak Heti; si Sabad, anak ni si Ahlai;

⁴² Si Adina, anak ni si Sisa, halak Ruben, pambobai ni halak Ruben, tolu puluh halak hasomanni;

⁴³ si Hanan, anak ni si Maaka; si Josafat, halak Miteni;

⁴⁴ si Usia, halak Astarot; si Sama pakon si Jehiel, anak ni si Hotam, halak Aroer;

⁴⁵ si Jediael, anak ni si Simri pakon si Joha anggini ai, halak Tisi;

⁴⁶ si Eliel, halak Mahawi; si Jeribai pakon si Josawi anak ni si Elnaam; si Jitma, halak Moab;

⁴⁷ si Eliel, si Obed, si Jaasiel halak Zoba.

Pangihut ni si Daud i Ziklag

12 ¹ On ma halak na roh marayak si Daud hu Ziklag, sanggah na maningon marponop ope ia i lobei ni si Saul, anak ni si Kis. Masuk do sidea hu bilangan ni puanglima, na mangurupisi i parporangan,

² halak siparpanah, na pandei mangumbalang marsiamun pakon marsambilou ampa mamanahkon panah. Humbani halak Benjamin sanina ni si Saul:

³ Si Ahieser, kopala ai, pakon si Joas, anak ni si Seemas halak Gibeas: ambahni ai si Jesiel pakon si Pelet, anak ni si Asmawet; si Beraka pakon si Jehu halak Anatot;

⁴ si Jismaya, halak Gibeon, sada puanglima i tongah-tongah ni sitolupuluh halak ai, lanjar ia do pambobai ni sitolupuluh halak ai; ambah ni ai si Jeremia, si Jahasiel, si Johanan, si Josabad halak Gedera,

⁵ Si Elusai, si Jerimot, si Bealya, si Semarya, si Sepatya, halak Harip,

⁶ si Elkana, si Jissia, si Asarel, si Joeser pakon si Jasobeam halak Korah;

⁷ si Joela pakon si Sebatya, anak ni si Jerobeam hun Gedor.

⁸ Age humbani halak Gad adong do na mamulig marayak si Daud hu dolog batu i halimisan, halak na borani, halak siparporang na tarlatih, na pandei manjолоm gantar pakon tanja, siparbohi songon bohi ni singa, anjaha lingkat songon balua i atas ni dolog.

⁹ Si Ezer na parlobei, si Obaja paidua, si Eliab paitolu,

¹⁰ si Masmana paiompat, si Jeremia pailima,

¹¹ si Attai paionom, si Eliel paipitu,

¹² si Johanan paiualuh, si Elisabet paisiah,

¹³ si Jeremia paisapuluh, si Mahbanai paisapuluh-sada.

¹⁴ Haganupan ai humbani ginompar ni si Gad, kopala-kopala ni bala; sietekan sanggup manlawan saratus halak anjaha sibanggalan manlawan saribu halak.

¹⁵ Sidea ma na mandipari Jordan bani bulan sada, sanggah sampur ganup topini, anjaha ipardakdak ganup na marianan i pamah ai, maporus dompak hapoltakan pakon hasundutan.

¹⁶ Roh do homa humbani halak Benjamin pakon halak Juda marayak si Daud hu benteng dolog batu ai.

¹⁷ Luar do si Daud manjumpahkon sidea, nini ma mambalosi sidea, "Anggo ibagas damei do nasiam na roh in laho mangurupi ahu, ra do ahu marsada ni uhur pakon nasiam; tapi anggo roh do nasiam, laho mantahihon ahu bani munsuhku, age pe seng dong na salah ihorjahon tanganku, Naibata ni ompungta ma na mangidah anjaha na mamapai nasiam."

¹⁸ Jadi sogop ma Tonduy ni Naibata hubani si Amasai, pambobai ni si tolu puluh halak ai, nini ma: juakjuakmu do hanami, alo Daud, anjaha hasomannami do ham, ale anak ni si Isai! Damei, damei ma bamu, damei ma homa bani na mangurupi ham! Ai iurupi Naibatamu do ham. Jadi ijalo si Daud ma sidea, gabe ibahen ma sidea pambobai ni balani.

¹⁹ Humbani Manasse pe adong do deba na lintun hubani si Daud, sanggah roh ia pakon halak Palistim

laho marporang dompak si Saul. Tapi seng saud ia mangurupi sidea, ai dob manriah kopala ni halak Palistim, isuruh sidea ma ia mulak, ai nini sidea do: Ulunta do holi na marmara anggo lintun ia hubani si Saul, tuanni ai.

²⁰ Sanggah na laho mulak ia hu Ziklag, lintun ma hubani halak Manasse: Si Adna, si Josabad, si Jadiel, si Mikael, si Josabad, si Elihu pakon si Siletai, ai ma pambobai ni halak Manasse mar sasaribu.

²¹ Sidea do na mangurupi si Daud mangimbang hulanen ni halak sipanamun, ai puanglima do sidea haganupan anjaha pambobai ni bala.

²² Ai ari-ari do ijai adong na roh hubani si Daud laho mangurupisi, pala gabe sada bala na banggal, songon bala ni Naibata.

Bala ni si Daud i Hebron

²³ On do bilangan ni halak siparporang, na gopas marsinjata, na roh marayak si Daud hu Hebron, laho mangalihkon harajaon ni si Saul hubani si Daud romban hubani hata ni Jahowa.

²⁴ Halak Juda siusung gantar pakon tanja onom ribu ualuh ratus halak, na gopas marsinjata hu parporangan.

²⁵ Humbani halak Simeon, halak na pag marporang, pitu ribu saratus halak.

²⁶ Humbani halak Levi ompat ribu onom ratus halak.

²⁷ Si Joyada, pambobai ni ginompar ni si Aron, tolu ribu pitu ratus halak do hasomanni.

²⁸ Si Sadok, sada halak na maposo anjaha na borani, rap pakon sindohorni, dua puluh dua halak kopala-kopala.

²⁹ Humbani halak Benyamin, sanina ni si Saul, tolu ribu halak do; ai ronsi nuan buei ope humbani sidea na mangirikkon ginompar ni si Saul.

³⁰ Humbani halak Efraim dua puluh ribu ualuh ratus halak, parporang na borani, halak na tarbarita bani ginompar ni ompung ni sidea.

³¹ Humbani satongah marga Manasse sapuluh ualuh ribu halak, pala tarsurat goran ni sidea, ase roh sidea laho pabangkithon si Daud gabe raja.

³² Humbani ginompar ni si Isasar, na pandei pasal ari, na mambotoh barang aha maningon sibahenon ni Israel, dua ratus halak pambobai, anjaha ganup sanina ni sidea unduk do bani hata ni sidea.

³³ Humbani Sebulon, na bingkat hu parporangan, na gopas bei marsinjatahon bagei ni sinjata porang, lima puluh ribu halak, na roh marodor humbani bulat ni uhurni.

³⁴ Humbani Naftali saribu halak pambobai, anjaha hasoman ni sidea, na marsinjatahon gantar pakon tanja, tolu puluh pitu ribu halak.

³⁵ Humbani ginompar ni si Dan, dua puluh ualuh ribu onom ratus halak, sirsir bingkat hu parporangan.

³⁶ Humbani si Asser ompat puluh ribu halak siparporang, na sirsir marporang.

³⁷ Humbani halak Ruben pakon Gad ampa satongah marga Manasse hun dipar ni bah Jordan saratus dua puluh ribu halak do, na iparsinjatai marhitei bagei-bagei ni sinjata porang.

³⁸ Ganup halak siparporang ai, ipabaris mangihutkon ruhut parporangan roh humbani gok ni uhurni hu Hebron, laho pabangkithon si Daud gabe raja manggomgomi ganup halak Israel; na legan ai pe sauhur do laho pabangkithon si Daud gabe raja.

³⁹ Ijai ma sidea rap pakon si Daud tolu ari dokahni, mangan minum, ai domma ipasirsir sanina ni sidea ai hinan bani sidea.

⁴⁰ Age halak na dohor bani sidea das hu Isasar, Sebulon pakon Naftali, roh do mamboan sipanganon i atas ni halode, unta, pakon lembu, ai ma: Sipanganon humbani nitak, kuei humbani buah ni jambu marsampur buah ni anggur, anggur pakon minak, lembu pakon biri-biri buei tumang, ai malas do uhur ni Israel.

Ialop Poti Parpadanan ai hun Kiryat-Jearim

(Pausih 2 Sam. 6:1-11)

13 ¹Dob ai marriah ma si Daud pakon pambobai ni sisaribu halak pakon sisaratus halak ampa ganup kopala tene.

² Nini si Daud ma dompak ganup tumpuan ni Israel ai: Anggo dear uhur nasiam anjaha harosuh ni Jahowa Naibatanta ai, mahua suruh hita ma na marayak saninanta, sagala na tading ai i sab tanoh ni Israel, ase rap sidea use marayak malim pakon halak Levi ibagas huta parbagianan ni sidea, ase martumpu sidea hu lambungta,

³ ase mulak boan hita hu tongah-tongahta poti ni Naibatanta; ai seng pindah-pindah uhurta hujai sanggah goluh ni si Saul.

⁴ Jadi sauhur ma tumpuan ai mambahen sonai, ai ganup do halak simbuei ai marhatongonkon hata ai.

⁵ Jadi ipatumpu si Daud ma haganup Israel, singgan ni bah Sihor i Masir das ronsi Hamat, laho mangalop poti ni Naibata hun Kiryat-Jearim.

⁶ Tangkog ma si Daud rap pakon ganup Israel hu Baala, ai ma Kiryat-Jearim, i tanoh Juda, laho mamboan tangkog hunjai poti ni Naibata, na margoran mangihutkon goran ni Jahowa, na marparatas i babou ni Herubim.

⁷ Jadi iboan sidea ma poti ni Naibata i atas ni sada gareta na bayu hun rumah ni si Abinadab; si Usa pakon si Ahio do na manogu gareta ai.

⁸ Tapi anggo si Daud pakon haganup Israel marompot do manortori i lobei ni Naibata, marhasoman doding, husapi, arbab, tambur, ogung pakon tarompet.

⁹ Sanggah das sidea hu pardogeian Kidon, idurdurhon si Usa ma tanganni laho manjolomi poti ai, halani tartolsu lombu ai.

¹⁰ Jadi manringis tumang ma Jahowa mangidah si Usa, ibunuh ma ia, halani na nidurdurhonni ai tanganni manjolom poti ai, gabe matei ma ia ijai i lobei ni Naibata.

¹¹ Jadi pusok tumang ma uhur ni si Daud halani sonai panontapkon ni Jahowa bani si Usa, gabe igoran ma ianan ai Perez-Uza ronsi sadari on.

¹² Jadi mabiar tumang ma si Daud mangidah Naibata bani na sadari ai, nini ma: Sonaha ma pambahenku mamboan poti ni Naibata das hubangku?

¹³ Halani ai seng ilopas si Daud boanon poti ai hu huta ni si Daud, tapi inahkon ma ai hu rumah ni si Obed-Edom, halak Gad ai.

¹⁴ Jadi tading i rumah ni si Obed-Edom ma poti ai, tolu bulan dokahni, anjaha ipasu-pasu Jahowa ma rumah ni si Obed-Edom pakon ganup na adong bani.

Parjongjong ni Rumah ni si Daud

Hamonanganni dompak Halak Palistim

(Pausih 2 Sam. 5:11-25)

14 ¹ Dob ai isuruh si Hiram, raja hun Tirus ma suruhanni marayak si Daud mamboan hayu

ares pakon tuhang batu ampa tuhang hayu, laho paulihon sada rumah bani raja ai.

²Jadi iahap si Daud ma, na dob pinajonam ni Jahowa do ia gabe raja i Israel, ai lambin timbulni do harajaonni ai halani bangsani halak Israel.

³Ibuat si Daud ope boru bahen parinangonni i Jerusalem, gabe tubuh ope bani si Daud anak pakon boru.

⁴On do goran-goran ni anak na tubuh bani i Jerusalem: Si Sammua, si Sobab, si Natan, si Salomo,

⁵si Jibhar, si Elisua, si Elipelet,

⁶si Noga, si Nepeg, si Japia,

⁷si Elisama, si Beelyada pakon si Elipelet.

⁸Jadi dob ibogei halak Palistim, na dob iminaki si Daud gabe raja manggomgom ganup Israel, tangkog ma ganup halak Palistim laho mardakdak si Daud. Dob ibogei si Daud barita ai, luar ma ia manjumpahkon sidea.

⁹Marrohan ma halak Palistim, anjaha marsaran ma sidea i pamah Repaim.

¹⁰Dob ai isungkun si Daud ma Naibata, nini ma: Bulih do ahu tangkog mandorab halak Palistim, anjaha ondskononmu do sidea hu bagas tanganku? Nini Jahowa ma hubani: Tangkog ma ho, ai domma huondskon sidea hu bagas tanganmu.

¹¹Jadi dob das sidea hu Baal-Perasim, italuhon si Daud ma sidea ijai. Nini si Daud ma: Domma

mambur merap munsuhku ibahen Jahowa marhitei tanganku, songon parmerap ni bah na marbanggal. Halani ai do ase igoran ianan ai Baal-Perasim.

¹² Itadingkon sidea ma naibata-naibata ni sidea, gabe iparentahkon si Daud ma, ase ipuruni ai ibagas apuy.

¹³ Iulaki halak Palistim ma use roh, anjaha marsaran ma sidea i pamah ai.

¹⁴ Dob ai isungkun si Daud ma use Naibata, gabe ibalosi Naibata ma ia: Seng bulih ho tangkog mangayak sidea, tapi dorab ma sidea hun pudi ni sidea, anjaha humbani hayu baka ai ma ho roh mandorab sidea.

¹⁵ Anggo ibogei ho ma sora ni na marbaris i punsu ni hayu baka ai, luar ma ho mamorang sidea, ai Naibata do mardalan i lobeimu, laho manaluhon bala ni halak Palistim.

¹⁶ Jadi ibahen si Daud ma sonai romban hubani na pinarentahkon ni Naibata bani, gabe ipatunduk ma halak Palistim, singgan ni Gibeon das hu Geser.

¹⁷ Jadi sar ma barita ni si Daud hubani haganup nagori, anjaha ipasogop Jahowa ma biar mangidah raja ai hu bagas uhur ni ganup bangsa sipajuh begu-begu.

Ialop Poti Parpadanan ai hu Jerusalem

15 ¹ Ipauli si Daud ma bani rumah i huta ni si Daud, anjaha ipasirsir ma sada ianan bani

poti ni Jahowa, anjaha ipajongjong ma sada lampo-lampo bani poti ai.

² Ijia ma ihatahon si Daud: Seng bulih usungon ni atap ise poti ni Naibata, sobali ni halak Levi; ai domma ipilih Jahowa sidea mangusung poti ni Jahowa, anjaha marugas Bani ronsi sadokah ni dokahni.

³ Jadi ipatumpu si Daud ma ganup Israel hu Jerusalem, laho mamboan poti ni Jahowa tangkog bani iananni, na pinasirsir hinan ijai.

⁴ Ipatumpu si Daud do homa ginompar ni si Aron pakon halak Levi.

⁵ Humbani ginompar ni si Kahat: Si Uriel, kopalani, ampa saninani, saratus dua puluh halak bueini.

⁶ Humbani ginompar ni si Merari: Si Asaya, kopalani, ampa saninani dua ratus dua puluh halak bueini.

⁷ Humbani ginompar ni si Gersom: Si Joel, kopalani, ampa saninani, saratus tolu puluh halak bueini.

⁸ Humbani ginompar ni si Elisapan: Si Semaya, kopalani, ampa saninani, dua ratus halak bueini.

⁹ Humbani ginompar ni si Hebron: Si Eliel, kopalani, ampa saninani, ualuh puluh halak bueini.

¹⁰ Humbani ginompar ni si Usiel: Si Aminadab, kopalani, ampa saninani, saratus sapuluh dua halak bueini.

¹¹ Dob ai idilo si Daud ma malim Sadok pakon si Abyatar ampa halak Levi, ai ma: Si Uriel, si Asaya, si Joel, si Semaya, si Eliel, pakon si Aminadab.

¹² Jadi nini ma dompak sidea: Nasiam do pambobai ni halak Levi mar sasaompung; halani ai papansing nasiam ma diri nasiam pakon sanina nasiam, ase boi iboan nasiam poti ni Jahowa, Naibata ni Israel, tangkog bani iananni na dob hupasirsir ai.

¹³ Halani seng dihut nasiam bani na parlobei ondi, parah do pambogbog ni Jahowa Naibatanta in banta, halani seng ipindahi hita la songon na patut.

¹⁴ Jadi manguras bei ma malim pakon halak Levi, laho mamboan poti ni Jahowa, Naibata ni Israel ai tangkog.

¹⁵ Jadi iusung halak Levi ma poti ni Naibata marlanja-lanja bani abarani, songon na tinonahkon ni si Musa hinan, romban hubani hata ni Jahowa.

¹⁶ Dob ai ihatahon si Daud ma hubani kopala ni halak Levi, ase ipasirsir sanina ni sidea pandoding marhasoman parsora na laingan, husapi, arbab pakon sordam, ase ipahata ai laho pariahkon sora pakon patanda malas ni uhur.

¹⁷ Jadi ipabangkit halak Levi ma si Heman, anak ni si Joel, anjaha humbani saninani si Asap, anak ni si Berekyia; humbani ginompar ni si Merari, sanina ni sidea ai, si Etan, anak ni si Kusaya;

¹⁸ anjaha hasoman ni sidea use, sanina ni sidea humbani pangku na paduahon: si Sakarya, si Jaasiel, si Semiramot, si Jahiel, si Uni, si Eliab, si Benaya, si Maaseya, si Matitya, si Elipelehu, si Mikneya, si Obed-Edom ampa si Jegiel, sijaga horbangan ai.

¹⁹ Sipandoding: Si Heman, si Asap pakon si Etan, pahatahon ogung tombaga.

²⁰ Si Sakarya, si Asiel, si Semiramot, si Jehiel, si Uni, si Eliab, si Maaseya pakon si Benaya mangguit husapi, parsora na gijang.

²¹ Si Matitya, si Elipelehu, si Mikneya, si Obed-Edom, si Jehiel pakon si Asasya manggesek arbab, parsora na bongor, laho mambobahon doding.

²² Si Henanya, kopala ni halak Levi, ia do kopala ni sipangusung ai; ia do na mangatur pangusungon ai, ai na pandei do ia pasal ai.

²³ Si Berekya pakon si Elkana, sijaga horbangan ai, i lambung ni poti ai.

²⁴ Si Sebanya, si Josafat, si Netaneel, si Amasai, si Sakarya, si Benaya pakon si Elieser, malim-malim ai, sidea do sisompul tarompet i lobei ni poti ni Naibata; si Obed-Edom pakon si Jehia pe, sijaga horbangan ai, dihut do i lambung ni poti ai.

²⁵ Dob ai laho ma si Daud pakon pangintuai ni halak Israel ampa kopala ni si saribu halak, sihol mamboan poti parpadanan ni Jahowa tangkog hun rumah ni si Obed-Edom ibagas malas ni uhur banggal.

²⁶ Halani itumpak Naibata do halak Levi siusung poti parpadanan ni Jahowa ai, igalangkon sidea ma pitu lembu jonggi na poso pakon pitu biri-biri banggal.

²⁷ Marpakeian mantel na humbani hiou silopak do si Daud, sonai homa ganup halak Levi siusung poti ai

ampa sipandoding, sonai homa si Hananya kopala ni parusung ai; ambah ni ai marbaju Epod, na humbani hiou silopak do si Daud.

²⁸ Ase ganup do halak Israel mamboan poti parpadanan ni Jahowa ai tangkog, marhasoman olob-olob pakon sora ni tanduk, tarompet ampa arbab, anjaha gogoh ibahen marhata husapi pakon ogung.

²⁹ Anjaha sanggah na das ai poti ni Jahowa hu huta ni si Daud, manungkir ma si Mikal, boru ni si Saul hun jandela, jadi iidah ma raja Daud manontori anjaha marinjaki, gabe pis ma matani mangidahsi.

16 ¹ Jadi dob masuk iboan sidea poti ni Naibata, ipajongjong ma ai i tongah-tongah ni lampolampo, na dob pinajongjong ni si Daud ai. Dob ai igalangkon sidea ma galangan situtungan pakon galangan pardameian i lobei ni Jahowa.

² Dob salpu igalangkon si Daud galangan situtungan pakon galangan pardameian ai, ipasu-pasu raja ai ma bangsa ai marhitei goran ni Jahowa,

³ anjaha ibere ma bani ganup halak Israel, dalahi pakon naboru, sada bei ruti, santoktok gulei pakon sada kuei na maragu manisan.

⁴ Ambahni ai ipabangkit raja ai ma siparugas i lobei ni poti ni Jahowa humbani deba halak Levi, laho mamuji-muji, mangkatahon tarima kasih ampa pasangapkon Jahowa, Naibata ni Israel.

⁵ Si Asap do kopala, si Sakarya na paduahon, dob ai si Jegiel, si Semiramot, si Jehiel, si Matitya, si Eliab, si Benaya, si Obed-Edom pakon si Jegiel, ai ma sijolom parugas na laingan, husapi pakon arbab; si Asap do sipahata ogung;

⁶ anjaha Malim Benaya ampa Jahasiel do sisompul tarompet tongtong i lobei ni poti parpadanan ni Naibata.

⁷ Bani ari ai do parlobei sahali iparentahkon si Daud si Asap ampa saninani, mandodingkon doding puji-pujian bani Jahowa.

Doding Puji-pujian ni si Daud

(ay. 8:36: pausih Ps. 105:1-15; Ps. 96:1-13; Ps. 106:1, 47-48)

⁸ Puji nasiam ma Jahowa, dilo ma goran-Ni,
pabotohkon nasiam ma pambahenan-Ni i
tongah-tongah ni sagala bangsa!

⁹ Dodingkon ma la, dodingkon ma puji-pujian,
patugah ma ganup horja halongangan-Ni ai!

¹⁰ Pasangap ma goran-Ni na mapansing in, sai
marmalas ni uhur ma sagala sipindahi
Jahowa!

¹¹ Pindahi nasiam ma Jahowa pakon hagogohan-
Ni, tongtong ma pindahi nasiam bohi-Ni!

¹² Paingat-ingat nasiam ma halongangan na
binahen-Ni ai, tanda halongangan-Ni pakon
uhum na luar hun pamangan-Ni,

- ¹³ nasiam ginompar ni Israel, jabolon-Ni, nasiam anak ni si Jakob, na pinilih-Ni!
- ¹⁴ Ia Jahowa, Ia do Naibatanta, sab do uhum-Ni i dunia on.
- ¹⁵ Sai idingat do tongtong padan-Ni ai, hata, na hinatahon-Ni bani marribu-ribu sundut,
- ¹⁶ padan na binahen-Ni hubani si Abraham, pakon bulawan na binulawankon-Ni hubani si Isak.
- ¹⁷ Ipajongjong do ai bani si Jakob gabe uhum, bani Israel gabe padan sisadokah ni dokahni.
- ¹⁸ Nini do, “Hubam do berehonon-Ku tanoh Kanaan, gabe tanoh parbagianan bam.”
- ¹⁹ Sanggah otik ope bilangan ni sidea, hulanan na etek-etek anjaha manginsolat ijai,
- ²⁰ minsah-insah hun bangsa hu bangsa, humbani sada harajaon hu harajaon na legan,
- ²¹ seng ilopas age sahalak mangarsik sidea, ipapai do raja tene marhalanohon ni sidea.
- ²² “Ulang kahua hanima halak na mininakan-Ku, anjaha ulang bahen na masambor bani nabing-Ku!”
- ²³ Dodingkon ma Jahowa, nasiam ganup tanoh, ambilankon ma haluahon-Ni ganup ari!
- ²⁴ Baritahon ma hamuliaon-Ni ai i tongah-tongah ni halak sipajuh begu-begu, anjaha halongangan-Ni ai i tongah-tongah ni sagala bangsa.

- ²⁵ Ai bangga do Jahowa, talup tumang pujion, la do sihabiaran, na mangatasi sagala naibata na legan.
- ²⁶ Ai gana-gana do naibata ni sagala bangsa sipajuh begu-begu; tapi Jahowa do na manjadihon langit.
- ²⁷ Hajombuton pakon hamuliaon do i lobei-Ni; hagogohon pakon malas ni uhur bani ianan-Ni.
- ²⁸ Bere ma bani Jahowa, nasiam marga humbani sagala bangsa, bere nasiam ma bani Jahowa hamuliaon pakon hagogohon!
- ²⁹ Bere ma bani Jahowa hamuliaon ni goran-Ni, boan ma galangan, anjaha roh ma nasiam hu lobei-Ni! Sombah ma Jahowa marpakeian na mapansing!
- ³⁰ Hitir ma i lobei-Ni, ganup tanoh on! Jonam ma tongon dunia on, seng anjai dugur.
- ³¹ Marmalas ni uhur ma langit, anjaha marolob-olob tanoh on; patugah ma i tongah-tongah ni halak sipajuh begu-begu: Jahowa do Raja!
- ³² Marhasak ma laut pakon ganup isini, marolob-olob ma ladang pakon ganup na ibagas ai.
- ³³ Jadi marolob-olob ma hayu na i harangan i lobei ni Jahowa, ai roh do la manguhum tanoh on.

³⁴ Puji nasiam ma Jahowa, ai layak do la; ronsi sadokah ni dokahni do idop ni uhur-Ni.

³⁵ Anjaha hatahon ma, “Urupi hanami, Ham Naibata Siurupi hanami, patumpu anjaha paluah ma hanami humbani bangsa sipajuh begu-begu, ase ipuji hanami goran-Mu na mapansing in, anjaha marmegah-megah hanami, ibagas pamujinami Bamu.

³⁶ Pinuji ma Jahowa, Naibata ni Israel, humbani sadokah ni dokahni ronsi sadokah ni dokahni! Anjaha ganup ma bangsa mangakatahon: Amen. Puji-pujian ma bani Jahowa.”

³⁷ Jadi itotapkon si Daud ma si Asap pakon saninani ai ijai, i lobei ni poti parpadanan ni Jahowa, laho marugas tongtong i lobei ni poti ai, na patut sihoseionkon ari-ari;

³⁸ sonai homa si Obed-Edom pakon saninani onom puluh ualuh halak bueini. Ia si Obed-Edom, anak ni si Jedutun pakon si Hosa, rap sijaga horbangan do.

³⁹ Anjaha itotapkon ma Malim Sadok rap pakon saninani, malim-malim ai, i lobei ni Rumah ni Jahowa, na i dolog-dolog ai, i Gibeon,

⁴⁰ laho manggalangkon galangan situtungan hubani Jahowa, bani anjap-anjap ni galangan situtungan ai, siap sogod pakon bodari, romban hubani na tarsurat bani titah ni Jahowa, na pinarentahkon-Ni hubani Israel.

⁴¹ Hasoman ni sidea si Heman pakon si Jedutun, pakon na tading humbani na pinilih-Ni ai, na torang tarsurat goranni, laho padaskon puji-pujian bani Jahowa, ai totap do ronsi sadokah ni dokahni idop ni uhur-Ni ai.

⁴² Adong do homa tarompet pakon husapi bani sidea bahen parangguan ni musik ampa parugas na laingan, laho mandodingkon doding, bahen hasangapon bani Jahowa. Ia anak ni si Jedutun, sijaga horbangan do.

⁴³ Dob ai mulak ma ganup halak na mabuei ai hu rumahni bei, anjaha si Daud pe mulak ma, laho mamasu-masu parrumahni.

(Pausih 2 Sam. 7)

Ibagahkon Naibata Hatotapon ni Harajaon ai bani si Daud

17 ¹ Sanggah hundul-hundul sahali si Daud ibagas rumahni, nini si Daud ma dompak nabi Natan, “Tonggor ma, marianan do ahu ibagas rumah na humbani hayu ares, tapi anggo poti parpadanan ni Jahowa i toruh ni lampolampo do.”

² Nini si Natan ma dompak si Daud, “Pasaud ham ma sagala na ibagas uhurmu ai, hasomanan ni Naibata do ham!”

³ Tapi bornginni ai roh ma hata ni Naibata hubani si Natan,

⁴“Laho ma ho, hatahon ma hubani juakjuak-Ku si Daud: Sonon do hata ni Jahowa: Seng bulih ho pajongjong Bangku sada rumah bahen ianan-Ku.

⁵Ai seng onga ope Ahu marianan ibagas rumah singgan ni ari dob Huarahkon tangkog halak Israel ronsi sadari on, sai minsah-insah do Ahu tong humbani lampolampo na sada hubani lampolampo na sada nari, humbani ianan na sada hubani ianan na sada nari.

⁶Barang ija pe Ahu minsah-insah rap pakon ganup halak Israel, mintor onga ma Huhatahon age sangkababah hata hubani atap ise humbani panguhum ni Israel, na Huhatahon marmahan bangsang-Ku: Mase ma lang ipauli hanima Bangku sada rumah humbani hayu ares?

⁷On pe hatahon ma hubani juakjuak-Ku si Daud: Sonon do hata ni Jahowa Zebaot: Ahu do na mangarahkon ho, hun parmahanan, humbani na mangirik-irik biribiri, ase ho gabe kopala manggomgom bangsang-Ku halak Israel.

⁸Ahu do mangkasomani ho barang huja pe ho manlangkah, anjaha domma Husiapkon ganup munsuhmu i lobeimu; anjaha bahenon-Ku do goranmu tarambilan, songon goran ni sada halak na sangap i tanoh on.

⁹Ambahni ai, tontuhonon-Ku ma sada ianan bani bangsang-Ku halak Israel, anjaha suanhonon-Ku ma sidea ijai, ase marsonang-sonang sidea ijai

marianan, seng marhabiaran be, anjaha seng be sunsahan ni halak parjahat songon na dob salpu in.

¹⁰ Singgan ni ari dob Hupabangkit panguhum manggomgomi bangsang-Ku halak Israel, anjaha patundukon-Ku do sagala munsuhmu. Tapi, pabanggalon-Ku do anggo ho, anjaha pajonamon-Ku do ginomparmu.

¹¹ Tapi dob gok ari-arimu laho martumpu hubani ompungmu, pajongjongon-Ku ma ginomparmu i pudimu, sada humbani anakmu, pajonamon-Ku ma harajaonni.

¹² Ia do na paulihon sada rumah Bangku, anjaha pajonamon-Ku do paratasni ronsi sadokah ni dokahni.

¹³ Ahu do gabe Bapa bani, anjaha ia gabe anak-Ku, seng osoron-Ku humbani idop ni uhur-Hu, songon na dob Huosor ai humbani halak na i lobeimu.

¹⁴ Maningon totap do ia bahenon-Ku ibagas rumah-Ku pakon ibagas harajaon-Ku ronsi sadokah ni dokahni; paratasni pe totap do ronsi sadokah ni dokahni.”

¹⁵ Romban hubani hata ai, anjaha romban hubani haganup pangungkabon ai do si Natan marsahap hubani si Daud.

Tonggo Tarima kasih humbani si Daud

¹⁶ Dob ai masuk ma si Daud hundul hu lobei ni Jahowa, jadi nini ma, “Ise ma ahu, Ham Jahowa

Naibatanku, anjaha ise ma ginomparhu, ase sonai pambobai-Mu bangku?

¹⁷ Maotiktu ope on nini uhur-Mu, Ham Naibata; ibere Ham ope bagah-bagah hubani ginompar ni juakjuak-Mu hubani panorang na sihol roh, anjaha ipatuduhkon Ham do bangku sundut na sihol roh, Ham Jahowa Naibata.

¹⁸ Aha ope sihatahonon ni si Daud Bamu marhalanohon ni parpasangap-Mu ai bani juakjuakmu? Itanda ham do tene juakjuak-Mu.

¹⁹ Ham Jahowa, halani juakjuak-Mu anjaha romban hubani rosuh ni uhur-Mu do ibahen Ham ganup habanggalon on, ibahen na ipabotohkon Ham ai hubani juakjuak-Mu.

²⁰ Ham Jahowa, seng adong na songon Ham, anjaha seng adong Naibata sobali Ham romban hubani haganup na binogeinami marhitei pinggolnami.

²¹ Anjaha ija ma adong sada bangsa na legan i tanoh on songon bangsa-Mu halak Israel, na pala Naibata sandiri bingkat martobussi bahen bangsa-Ni, laho mambahen tarambilan goran-Mu marhitei halongangan banggal anjaha na majangin, marhitei na mangusir bangsa sipajuh begu-begu hun lobei ni bangsa-Mu, na tinobus-Mu hun tanoh Masir.

²² Anjaha domma itotapkon Ham bangsa-Mu halak Israel gabe bangsa-Mu ronsi sadokah ni dokahni, anjaha Ham, Jahowa, gabe Naibata ni sidea.

²³ Ai pe Ham Jahowa, sai patotap Ham ma hata na dob pinarbagah-bagah-Mu ai pasal juakjuak-Mu pakon pasal ginomparni ronsi sadokah ni dokahni, anjaha bahen Ham ma romban hubani na dob pinarbagah-bagah-Mu ai.

²⁴ Nai ma, saud ma ai, anjaha sai timbul ma goran-Mu ronsi sadokah ni dokahni, ase ihatahon halak: Jahowa Zebaot, Naibata ni Israel, la do Naibata bani Israel, anjaha totap do ginompar ni juakjuak-Mu si Daud i lobei-Mu.

²⁵ Ai domma ipatalar Ham, Naibatanku, hubani pinggol ni juakjuak-Mu on, paboa pajongjongon-Mu do ginompar bani. Halani ai do ase pag juakjuak-Mu on martonggo i lobei-Mu.

²⁶ Ai pe Ham Jahowa, Ham do Naibata anjaha domma ibagahkon Ham bani juakjuak-Mu na madear on.

²⁷ Halani ai sai pasu-pasu Ham ma ginompar ni juakjuak-Mu, ase totap ia i lobei-Mu ronsi sadokah ni dokahni; ai barang ise na pinasu-pasu-Mu, Ham Jahowa, ai do na dapotan pasu-pasu ronsi sadokah ni dokahni.

(Pausih 2 Sam. 8)

Hamonangan ni si Daud

18 ¹ Jadi dob salpu ai, italuhon si Daud ma halak Palistim anjaha ipatunduk do sidea anjaha

irampas do Gat pakon dusunni humbani tangan ni halak Palistim.

² Italuhon do homa halak Moab, gabe rayat do sidea hubani si Daud anjaha manggalar sohei.

³ Sonai homa si Hadareser, raja hun Soba, dohorhon Hamat, italuhon si Daud do, sanggah na tangkog ia pajonamhon harajaonni i topi ni Bah Eprat.

⁴ Irampas si Daud do humbani saribu gareta porang, pitu ribu bala siparhuda pakon dua puluh ribu bala sipardalan nahei; irimpong si Daud do ganup huda sitarik gareta ai, pitah saratus tumang do itadingkon.

⁵ Tapi roh ma halak Aram hun Damaskus sihol mangurupi si Hadareser, raja hun Soba, gabe ibunuh si Daud ma halak Aram ai, dua puluh dua ribu halak.

⁶ Dob ai ipadear si Daud ma tangsi i tanoh Aram, inggot Damaskus, jadi gabe rayat ni si Daud ma halak Aram anjaha mambere sohei, ai sai itumpak Jahowa do si Daud monang barang huja pe ia manlangkah.

⁷ Ibuat si Daud ma gantar omas, na niusung ni juakjuak ni si Hadareser, anjaha iboan ma ai hu Jerusalem.

⁸ Ibuat si Daud do homa hun Tibhat pakon hun Kun, ai ma huta ni si Hadareser, buei tumang tombaga; hunjai ma ipauli si Salomo use laut tombaga ai, tiang na dua ai pakon parugas tombaga ai.

⁹ Jadi dob ibogei si Tou, raja ni Hamat, na dob italuhon si Daud ganup bala ni si Hadareser, raja hun Soba,

¹⁰ isuruh ma anakni si Hadoram marayak Raja Daud laho manabisi pakon mangkorasisi, halani na pinorangni ai si Hadareser anjaha tinaluhonni ia, ai marsimunsuhan do si Hadareser pakon si Tou. Itongos do sagala bagei ni parugas omas, pirak pakon tombaga.

¹¹ Ai pe ipapansing Raja Daud do bani Jahowa, rap pakon pirak, omas, na dob binuatni humbani ganup bangsa sipajuh begu-begu, humbani halak Edom, Moab, Ammon, Palistim pakon Amalek.

¹² Ambahni ai italuhon si Abisai, anak ni si Seruya do halak Edom i Habungan Garam, sapuluh ualuh ribu halak bueini.

¹³ Ipadear ma tangsi i Edom jadi gabe rayat ni si Daud ma ganup halak Edom, ai sai itumpak Jahowa do si Daud monang barang huja pe ia manlangkah.

Gamot-gamot ni si Daud

¹⁴ Jadi irajai si Daud ma ganup halak Israel, anjaha ipajongjong ma uhum pakon hasintongan bani ganup bangsani ai.

¹⁵ Si Joab, anak ni si Seruya do kopala ni bala; si Josapat, anak ni si Ahilud panuturi;

¹⁶ si Sadok, anak ni si Ahitub, pakon si Ahimelek, anak ni si Abyatar do malim; si Savsa juru-tulis;

¹⁷ si Benaya, anak ni si Joyada do kopala ni Kreti pakon Pleti, tapi anak ni raja ai do gamot siatasan i lambung ni raja ai.

Porang dompak Halak Ammon ampa Halak Aram

(Pausih 2 Sam. 10)

19 ¹Dob salpu ai, matei ma si Nahas, raja ni halak Ammon, jadi anakni ma manrajai gantihni.

²Jadi nini si Daud ma, “Sihol do patuduhonku dear ni paruhuronku hubani si Hanun, anak ni si Nahas, ai bapani ai pe dear do paruhuronni bangku.” Jadi isuruh si Daud ma suruhanni laho mangapohisi, halani panading ni bapani ai. Dob das juakjuak ni si Daud ai hubani si Hanun, hu nagori ni halak Ammon, laho mangapohisi,

³nini kopala-kopala ni halak Ammon ma dompak si Hanun, “Laho pasangaphon bapamu ma gakni, nini uhurmu si Daud, ase isuruh sipangapoh bamu? Ai lang sihol mamareksa, mangagou anjaha mangkahapi tanoh on do ase isuruh juakjuakni ai marayak ham?”

⁴Jadi itangkap si Hanun ma juakjuak ni si Daud, anjaha isuruh ma na manuhur sidea pakon na mangkorot hiou ni sidea das hubani hundulanni, gabe sonai ma sidea ipalaho.

⁵Jadi adong ma na laho patugahkon hubani si Daud pasal halak ai, gabe isuruh ma halak na

manjumpahkon sidea, ai bador tumang do halak ai ibahen. Nini raja ai ma, “Tading ma nasiam i Jeriko, paima ganjang gumis nasiam, dob ai pe ase mulak nasiam.”

⁶ Dob iidah halak Ammon, na dob sogam uhur ni si Daud mangidah sidea ibahen sidea, gabe itongos si Hanun ampa halak Ammon ma saribu talenta pirak, laho mangupahi gareta porang pakon bala siparhuda hun Mesopotamia, hun Aram-Maakah pakon hun Soba.

⁷ Lupahi sidea ma tolu puluh dua ribu gareta porang ampa raja hun Maakah rap pakon balani. Jadi roh ma sidea anjaha marsaran ma i lobei ni Medeba. Marodor ma homa halak Ammon hun hutani bei laho hu parporangan.

⁸ Dob ibogei si Daud ai, isuruh ma si Joab pakon ganup bala na borani-borani ai.

⁹ Jadi luar ma halak Ammon, anjaha marsihap ma sidea laho marporang i lobei ni horbangan ni huta ai, pulig do jongjong i ladang raja-raja na roh ai.

¹⁰ Jadi dob iidah si Joab, sai ia do idorab munsuh ai hun lobei pakon hun pudi, gabe ipilih ma humbani garama pilihan na i Israel, anjaha ipaodor ma sidea manjumpahkon halak Aram.

¹¹ Balani na tading ai iondoskon ma ai hubani si Abisai, anggini ai, anjaha ipaodor ma sidea mandompakkon halak Ammon.

¹² Nini ma, “Anggo gogohan halak Aram ai humbangku, roh ma ho mangurupi ahu, tapi anggo gogohan halak Ammon ai humbam, roh pe ahu mangurupi ho.

¹³ Tenger ma uhurmu, anjaha asamkon hita ma hosakta mangkopkop bangsanta pakon mangkopkop huta ni Naibatanta; anjaha sai ibahen Jahowa ma rosuh ni uhur-Ni.”

¹⁴ Jadi idohori si Joab pakon bala na rapkonsi ai ma halak Aram laho mamorang sidea, gabe maporus ma sidea hun lobeini.

¹⁵ Jadi dob iidah halak Ammon, na dob maporus do hape halak Aram, maporus ma pakon sidea hun lobei ni si Abisai, anggi ni si Joab ai, anjaha surut ma sidea hubagas huta ai; dob ai mulak ma si Joab hu Jerusalem.

¹⁶ Jadi dob iidah halak Aram, na dob talu sidea ibahen halak Israel, isuruh sidea ma suruhanni marharah hubani halak Aram, na i dipar ni Bah Eprat, anjaha si Sofah, pambobai ni bala ni si Hadareser do mambobahon sidea.

¹⁷ Jadi dob dong na patugahkon ai hubani si Daud, ipatumpu ma ganup halak Israel, anjaha idipari ma Bah Jordan ai; dohorhonsi ia hubani sidea, ipaodor ma balani dompak sidea. Jadi dob ipatitir si Daud balani ai mandorab halak Aram, marsidoraban ma sidea.

¹⁸ Tapi maporus ma halak Aram i lobei ni Israel; ibunuh si Daud ma humbani halak Aram pitu ribu halak bala pargareta pakon ompat puluh ribu halak bala na mardalan nahei; ibunuh do homa si Sofah pambobai ni bala ni sidea ai.

¹⁹ Jadi dob iidah juakjuak ni si Hadareser, na dob talu sidea ibahen halak Israel, mardamei ma sidea pakon si Daud anjaha unduk sidea bani. Dob ai seng ra be halak Aram mangurupi halak Ammon.

Partalu ni Huta Rabba

(ay. 1-3: pausih 2 Sam. 11:1; 12:26-31)

20¹ Dob salpu satahun, sanggah panorang ni raja-raja bingkat marmunsuh, ibobahon si Joab ma bala ai, anjaha isiapkon ma tanoh ni halak Ammon; dob ai roh ma ia mangkubu huta Rabba, tapi tading i Jerusalem do anggo si Daud. Jadi italuhon si Joab ma huta ai anjaha iboiskon.

² Ibuat si Daud ma sortali ni raja ai humbani uluni; satalenta omas do boratni, anjaha adong do sada mata intan ijai; inahkon ma ai bani ulu ni si Daud, anjaha buei tumang do taban-taban iboan hun huta ai.

³ Anjaha halak pangisi ni huta ai, iboan do, anjaha ibahen ma horjani sidea manjolom gargaji, gaer-gaer bosi pakon hapak; anjaha sonai do homa ibahen si Daud hubani ganup huta ni halak Ammon.

Dob ai mulak ma si Daud rap pakon ganup bala ai hu Jerusalem.

Parporangan ni si Daud dampak Halak Palistim

(ay. 4-8: pausih 2 Sam. 21:18-22)

⁴ Dob salpu ai tubuh ma use parporangan i Geser dampak halak Palistim; ibunuh si Sibekkai, halak Husati ai do ijia si Sipai, ai ma sada humbani raksasa ai, gabe tunduk ma halak Palistim ai.

⁵ Dob ai tubuh ma use parporangan dampak halak Palistim, gabe ibunuh si Elhanan, anak ni si Jair ma si Lakmi, sanina ni si Goliat, halak Gat ai; ia suhul ni tanjani ansa basikah do.

⁶ Tubuh use ma parporangan i Gat; adong do ijai sada raksasa, onom bei do jari-jari ni tanganni pakon naheini, gabe dua puluh ompat ma ganup; ia pe ginompar ni raksasa do.

⁷ Jadi sanggah na iapasini ai halak Israel, gabe ibunuh si Jonatan, anak ni si Simea, abang ni si Daud ma ia.

⁸ Ganupan sidea ai ginompar ni raksasa do i Gat; jadi matei ma sidea ibunuh si Daud pakon juakjuakni ai.

**Pamilangon ni si Daud bani Halak
Israel ampa Pangkorhonni ai**

(Pausih 2 Sam. 24)

21 ¹ Dob ai jongjong ma sibolis mangimbang Israel, gabe iojur-ojur ma si Daud mamilangi halak Israel.

² Jadi nini si Daud ma dompak si Joab pakon dompak kopala-kopala ni bala, “Laho ma nasiam, bilangi nasiam ma halak Israel, singgan ni Berseba das hu Dan, anjaha boan nasiam ma bangku bilangan ni sidea ai.”

³ Tapi nini si Joab ma, “Sai itambahi Jahowa ma bangsani saratus lompit nari humbani sisonari! Tapi tene, ham tuannami anjaha rajanami, ai lang ganup do sidea juakjuak ni tuannami? Mase ma isurahon tuannami sonai? Mase ma bahenon marsalah halak Israel?”

⁴ Tapi parhata sada do raja ai dompak si Joab. Jadi bingkat ma si Joab manlioti ganup Israel, dob ai mulak ma ia hu Jerusalem.

⁵ Ibere si Joab ma bilangan ni bangsa na binilanganni ai hubani si Daud. Ia buei ni ganup halak Israel sisintak podang sajuta saratus ribu halak do; buei ni halak Juda sisintak podang ompat ratus pitu puluh ribu halak do.

⁶ Tapi anggo halak Levi pakon Benjamin seng dihut ibilangi, ai magigi do si Joab bani parentah ni raja ai.

⁷ Sogam do homa uhur ni Naibata pasal pahara ai, gabe hona papa-Ni do Israel.

⁸ Jadi nini si Daud ma dompak Naibata, “Banggal tumang do dousangku, halani hubahen na sonai. Tapi sai marpangulaki ma uhur-Mu mangidah hasalahan ni juakjuak-Mu on, ai haotoon banggal do na hubahen ai.”

⁹ Dob ai nini Jahowa ma dompak si Gad, nabi ni si Daud ai,

¹⁰ “Laho ma ho, anjaha hatahon ma hubani si Daud: Sonon do hata ni Jahowa; tolu pahara Hutuduhkan bam, pilih ma sada hunjai, sibahenon-Ku bam.”

¹¹ Jadi dob das si Gad hubani si Daud, nini ma, “Sonon do hata ni Jahowa. Pilih ma na ija bam:

¹² barang tolu tahun lohei, barang tolu bulan ho pardakdakon ni munsuhmu anjaha panganon ni podang ni munsuhmu ho, barang tolu ari podang ni Jahowa, ai ma masa sampar i nagori on, anjaha malekat ni Jahowa mangagou i sab tanoh ni Israel. Halani ai putuskon ma, atap aha balos siboanonku hubani na marsuruh ahu.”

¹³ Dob ai nini si Daud ma dompak si Gad, “Sunsah tumang do uhurhu, tapi dearan ma ahu madabuh hubagas tangan ni Jahowa, ai banggal tumang do idop ni uhur-Ni, seng ra ahu madabuh hu tangan ni jolma.”

¹⁴ Jadi ipamasa Jahowa ma sampar i tongah-tongah ni Israel, gabe rasei ma pitu puluh ribu halak humbani halak Israel.

¹⁵ Dob ai isuruh Naibata ma malekat-Ni hu Jerusalem, laho mangagou ijai; tapi sanggah na laho mangagou ai la, mangahap ma la, gabe isololi ma diri-Ni anjaha nini ma dompak malekat sipangaggou ai, “Sungkup ma! Pasurut ma tanganmu!” Tapi jongjong do malekat ni Jahowa ai i lambung pardogeian ni si Ornan, halak Jebusi ai.

¹⁶ Dob ai mangkawah ma si Daud, gabe iidah ma malekat ni Jahowa jongjong i tongah-tongah ni langit pakon tanoh on, pajolom-jolom podang na sinintak ibagas tanganni dompak Jerusalem. Jadi manrogop ma si Daud rap pakon pangintuaini ai, marbaju guni bei do sidea.

¹⁷ Jadi nini si Daud ma dompak Naibata, “Ai lang ahu do mangkatahon bilangan bangsa on? Ahu do na mardousa, anjaha ahu do sidalankon hajahaton in. Ai aha ma adong, na binahen ni biribiri in? Ham, Jahowa Naibatangku, hu bangku pakon hubani ginompar ni bapa ma mangonai tangan-Mu, tapi ulang ma hubani bangsa-Mu.”

¹⁸ Dob ai iparentahkon malekat ni Jahowa ma si Gad mangkatahon hubani si Daud, ase tangkog ia laho pajongjongkon bani Jahowa sada anjapanjap bani pardogeian ni si Ornan, halak Jebusi ai.

¹⁹ Jadi tangkog ma si Daud romban hubani hata ni si Gad, na dob ipatugahsi marhitei goran ni Jahowa.

²⁰ Sanggah marhusor si Ornan, ididah ma malekat ai, gabe marponop ma ia rap pakon anakni na ompat ai, ai tudu sanggah mardogei gandum do si Ornan.

²¹ Sanggah na roh si Daud hubani si Ornan, manatap-natap do si Ornan, gabe iidah ma si Daud; laho ma ia hun pardogeian ai anjaha manrogop ma ia hubani si Daud.

²² Dob ai nini si Daud ma dompak si Ornan, “Mahua bere ma hu bangku pardogeianmu ai, ase hupajongjong ijai anjapanjap bani Jahowa. Sadiha gakni arga na sapatutni ase laho sampar in humbani bangsa in.”

²³ Tapi nini si Ornan ma dompak si Daud, “Buat ham ma in, anjaha ibahen tuannami anjaha rajanami ma barang aha rosuh ni uhurni. Tonggor ma, hubere pe lombu in bahen galangan situtungon pakon gareta pardogeian in bahen sobanni ampa gandum in bahen galangan sipanganon; ganupan ai hubere pe.”

²⁴ Tapi nini Raja Daud ma dompak si Ornan, “Lang sonai, maningon bolion do songon arga na patut; ai seng ra ahu mambuat na adong bam bani Jahowa, barang manggalangkon galangan situtungon na so pala marboli.”

²⁵ Dob ai ibere si Daud ma hubani si Ornan boli ni partapakan ai onom ratus sekel omas.

²⁶ Dob ai ipajongjong si Daud ma ijai sada anjapanjap bani Jahowa, anjaha igalangkon ma galangan situtungan pakon galangan hatarimakasihon, anjaha dilo-dilo ma ia bani Jahowa, gabe ibalosi Jahowa ma ia marhitei apuy, na pinaroh-Ni hun langit hu atas ni anjapanjap panggalangan ni galangan situtungan ai.

²⁷ Dob ai ihatahon Jahowa ma hubani malekat ai, ase ipasuang podangni hubagas sarungni.

²⁸ Jadi dob iidah si Daud ijia, na dob binalosan ni Jahowa ia i pardogeian ni si Ornan, halak Jebusi ai, gabe ijai ma ia tongtong manggalang.

²⁹ Ia lampolampo ni Jahowa, na pinauli ni si Musa na ijia i halimisan, ampa anjapanjap panggalangan ni galangan situtungan, i dolog na i Gibeon do ijia jongjong.

³⁰ Tapi seng tarbahren si Daud laho hujai, laho mangindahi Naibata, halani biar ni uhurni bani podang ni malekat ni Jahowa.

Iparsirsir na Porlu laho Pajongjong Rumah Panumbahan

22 ¹ Dob ai nini si Daud ma, “Maningon ijon do hajongjongan ni Rumah ni Naibata Jahowa ampa anjap-anjap bahen panggalangan ni galangan situtungan bani Israel.”

² Dob ai ihatahon si Daud ma use martumpu ganup halak panginsolat na i tanoh Israel, anjaha

idilo ma sibarbar batu na mambarbar batu, laho pajongjongkon Rumah ni Naibata.

³ Iparsirsir si Daud do homa buei tumang bosi bahen paku ni labah horbangan pakon bahen panghapit, sonai homa tombaga buei tumang, pala seng tartimbang boratni;

⁴ sonai homa hayu ares, seng tarbilangi bueini, ai buei tumang do hayu ares iboan halak Sidon pakon Tirus hubani si Daud.

⁵ Ai nini uhur ni si Daud do, “Ia anakku si Salomo poso anjaha seng marpangalaman ope, tapi anggo rumah sipaulion ai bani Jahowa maningon banggal tumang do, gabe hatimbulon ampa hamuliaon i sab tanoh on; halani ai maningon bahenon tagang-tagang hinan hujai. Jadi buei tumang do na itagang si Daud sanggah lape matei ia.”

⁶ Dob ai idilo ma si Salomo anakni ai, anjaha iparentahkon ma bani pajongjongkon sada rumah bani Jahowa, Naibata ni Israel.

⁷ Nini si Daud ma dompak si Salomo, “Alo anakku, iparsinta uhurhu do namin sihol pajongjongkon sada rumah bani goran ni Jahowa, Naibatanku.”

⁸ Tapi roh ma hata ni Jahowa mangkatahon hu bangku, “Domma buei daroh iduruskon ho, anjaha idalankon ho do parporangan banggal; halani ai seng bulih ho pajongjongkon sada rumah bani goran-Ku, ai domma buei daroh iduruskon ho hu tanoh i lobei-Hu.

⁹ Tonggor ma, tubuh do bam sada anak, sada halak pardamei do ia. Maningon mardamei do ia bahenonku dompak haganup munsuhni inggot; maningon si Salomo do goranni bahenon, ai hadameian pakon hasonangan do bereon-Ku bani Israel, sadokah goluhni.

¹⁰ Maningon ia do pajongjong sada rumah bani goran-Ku. Ia do gabe anak Bangku, anjaha Ahu gabe Bapa bani, anjaha pajonamon-Ku do paratas ni harajaonni i Israel ronsi sadokah ni dokahni.

¹¹ On pe, anakku, sai hasomanan ni Jahowa do ho, ase saud jongjong Rumah ni Jahowa Naibatamu bahenonmu, songon na dob pinarbagah-Ni hinan pasal ho.

¹² Anjaha sai ibere Jahowa ma bam hapentaran pakon hauhuron, ase anggo ipabangkit ma ho manggomgom Israel, ase boi idalankon ho titah ni Jahowa, Naibata.

¹³ Tongon, sai mardohar do ho, anggo ihaporluhon uhurmu mangkorjahon titah pakon uhum, na tinonahkon ni Jahowa marhitei si Musa hubani halak Israel. Tenger ma uhurmu anjaha marsijoloman, ulang mabiar anjaha gobir!

¹⁴ Tonggor ma, age ibagas hasunsahan ahu na sain dokah, domma hupasirsir hinan bani Rumah ni Jahowa saratus ribu talenta omas pakon sajuta talenta pirak, anjaha tombaga pakon bosi seng

tarbilangi halani bueini; parhayu pakon batu pe domma hupasirsir. Maningon tambahanmu ope ai.

¹⁵ Ambahni ai maningon buei do siparhorja porlu bam: Sibarbar batu, tukang batu, tukang hayu, pakon buei tumang halak na pandei pasal horja na marbagei-bagei ai,

¹⁶ ai ma mangkorjahon omas, pirak, tombaga pakon bosu, seng tarbilangi bueini. Marugas ma ho, anjaha horjahon ma. Sai hasomanan ni Jahowa do ho!”

¹⁷ Iparentahkon si Daud do homa ganup kopala ni halak Israel, laho mangurupi si Salomo anakni ai, nini do,

¹⁸ “Ai lang Jahowa Naibata nasiam do mangkasomani nasiam? Ai lang la mambahen mardamei nasiam inggot? Ai iondoskon do pangisi ni tanoh on hubagas tanganku; anjaha domma tunduk tanoh in i lobei ni Jahowa pakon i lobei ni bangsa-Ni.

¹⁹ Halani ai pasirsir nasiam ma pingkiran nasiam pakon uhur nasiam mangindahi Jahowa, Naibata nasiam! Marugas ma nasiam, pauli nasiam ma ianan na mapansing ni Jahowa, Naibata, ase boi boanon poti parpadanan ni Jahowa, pakon parugas na mapansing ni Naibata hu rumah sipaulion bani goran ni Jahowa.”

Aturan Parugasonkon pakon Parbagi ni Halak Levi ampa Malim

23 ¹Jadi dob matua si Daud anjaha sobalan uhurni bani hagoluhan on, ipabangkit ma anakni, si Salomo, manggomgomi Israel.

²Ipatumpu si Daud ma ganup kopala ni Israel, malim pakon halak Levi.

³Ibilangi ma halak Levi singgan ni na marumur tolu puluh tahun pakon i atasni ai, tumpu tolu puluh ualuh ribu halak bueini.

⁴Dua puluh ompat ribu halak hunjai mandalankon horja i rumah ni Jahowa, onom ribu gamot-gamot ampa panguhum.

⁵ompat ribu halak sijaga horbangan, anjaha ompat ribu halak use pandoding, sibere puji-pujian hubani Jahowa, marhasoman parugas na dob pinauli laho mamuji-muji.

⁶Anjaha iranggi si Daud do sidea marhorin-horin mangihutkon anak ni si Levi, ai ma si Gersom, si Kahat pakon si Merari.

⁷Na masuk hubani si Gersom: Si Laedan pakon si Simei.

⁸Anak ni si Laedan: Si Jehiel, kopala ai, si Setam pakon si Joel, tolu halak.

⁹Anak ni si Simei: Si Selomit, si Hasiel, pakon si Haran, tolu halak. Ai ma kopala humbani si Laedan mar sasaompung.

¹⁰ Anjaha anak ni si Simei: si Jahat, si Sisa, si Jeus pakon si Beria; halak ai ma anak ni si Simei, ompat halak.

¹¹ Si Jahat do kopala, si Sisa paduahon; tapi si Jeus pakon si Beria seng buei anakni, halani ai gabe sisada ompung anjaha sisada horin do sidea.

¹² Anak ni si Kahat: Si Amram, si Jisehar, si Hebron pakon si Usiel, ompat halak.

¹³ Anak ni si Amram: Si Aron pakon si Musa. Ipapulig hinan do anggo si Aron, laho marugas ibagas na panging sahalian, ase ia pakon anakni ma tongtong na manutung dahupa i lobei ni Jahowa, marugas bani Jahowa, anjaha mamasu-masu ibagas goran-Ni sadokah ni dokahni.

¹⁴ Ia anak ni si Musa, halak ni Naibata ai, ietong do sidea hubani marga Levi.

¹⁵ Anak ni si Musa: Si Gersom pakon si Elieser.

¹⁶ Anak ni si Gersom: Si Subael, kopala.

¹⁷ Anak ni si Elieser: Si Rehabya, kopala; seng dong anak ni si Elieser na legan, tapi buei tumang do anak ni si Rehabya.

¹⁸ Anak ni si Jisehar: Si Selomit, kopala.

¹⁹ Anak ni si Hebron: Si Jeria, kopala, si Amarya paidua, si Usiel paitolu pakon si Jakmeam paiompat.

²⁰ Anak ni si Usiel: Si Mika, kopala, anjaha si Jisia paidua.

²¹ Anak ni si Merari: Si Mahli pakon si Musi; anak ni si Mahli: Si Eleasar pakon si Kis.

²² Sanggah matei si Eleasar, seng dong anak itadingkon, pitah boru do, anjaha anak ni si Kis, botou ni sidea do na mambuat sidea.

²³ Anak ni si Musi: Si Mahli, si Eder pakon si Jeremot, tolu halak.

²⁴ Ai ma ginompar ni si Levi mar sasaompung, kopala ni mar sasaompung ai, songon na tarsurat mangihutkon bilangan ni goran ni na marumur dua puluh tahun pakon i atasni, na mandalankon horja parugason i Rumah ni Jahowa.

²⁵ Nini si Daud do, “Ai domma ibere Jahowa, Naibata ni Israel damei bani bangsa-Ni, anjaha marianan la i Jerusalem ronsi sadokah ni dokahni.

²⁶ Halani ai seng pala be pausung-usungon ni halak Levi lampolampo ai pakon sagala parugasni.

²⁷ Ai mangihutkon parentah ni si Daud na parpudi, ia sibilangan humbani halak Levi, ai ma singgan na marumur dua puluh tahun pakon i atasni ai.

²⁸ Horjani, ai ma mangurupi ginompar ni si Aron mandalankon horja i Rumah ni Jahowa, manjagai alamanni kamar-kamar, pangurasion ni haganup parugas na mapansing pakon sagala horja parugason ibagas Rumah ni Naibata.

²⁹ Ambahni ai mangkoseihon ruti sigalangkonon, nitak na lumat bahen galangan sipanganon, ruti na so niigaran, galangan sigorengon, galangan na

maragu minak, sonai homa sagala sitimbangan pakon sisuhaton.

³⁰ Anjaha maningon jongjong do sidea ganup sogod, mangkatahon tarima kasih pakon mamuji Jahowa, sonai homa bodari.

³¹ Ambahni ai sanggah manggalangkon galangan situtungon hubani Jahowa, bani ari Sabat, bani poltak ni bulan pakon bani ari raya, na dob binuhul hinan bueini, mangihutkon hasomalan ni sidea tongtong i lobei ni Jahowa.

³² Maningon dalankonon ni sidea do horja bani lampolampo partumpuan pakon horja bani ianan na mapansing ai, anjaha maningon hasomanan ni sidea do anak ni si Aron, hasoman samorga ni sidea ai, marugas i Rumah ni Jahowa.”

Parbagi bani Malim-malim

24 ¹ On do pambagian ni ginompar ni si Aron. Anak ni si Aron: si Nadab pakon si Abihu, si Eleasar pakon si Itamar.

² Tapi matei popor do si Nadab pakon si Abihu parlobei humbani bapa ni sidea; gabe si Eleasar pakon si Itamar do na mangabing hamalimon ai.

³ Jadi ibagi si Daud ma sidea marhitei pangurupion ni si Sadok, na humbani ginompar ni si Eleasar, pakon si Ahimelek, na humbani ginompar ni si Itamar, romban hubani horinni bei, mandalankon horjani.

⁴ Halani bueinan do jumpah kopala humbani ginompar ni si Eleasar ase humbani ginompar ni si Itamar, gabe iranggi ma sidea sonon: Sapuluh onom halak humbani ginompar ni si Eleasar bahen kopala ni sidea mar sasaompung anjaha humbani ginompar ni si Itamar ualuh halak bahen kopala ni sidea mar sasaompung.

⁵ Tapi marhitei ruji-ruji do parranggi ni sidea ai, dos bei homa ibahen ai; adong do kopala ni ianan na mapansing ai, sonai homa kopala ni parugas i lobei ni Naibata, humbani ginompar ni si Eleasar pakon humbani ginompar ni si Itamar.

⁶ Si Semaya, jurutulis ai, anak ni si Netaneel, halak Levi ai, ia do na manurati goran ni sidea i lobei ni raja ai, kopala-kopala ai, malim Sadok pakon si Ahimelek, anak ni si Abyatar, pakon i lobei ni kopala ni malim ampa halak Levi mar sasaompung; margantih-gantih do ibahen horin ni ginompar ni si Eleasar pakon horin ni ginompar ni si Itamar.

⁷ Ruji-ruji na parlobei madabuh bani si Joyarib, na paduahon bani si Jedaya;

⁸ na patoluhon bani si Harim, na paompatkon bani si Seorim,

⁹ na palimahon bani si Malkia, na paonomkon bani si Miyamin,

¹⁰ na papituhon bani si Hakos, na pauluhkon bani si Abia,

¹¹ na pasiahkon bani si Jesua, na pasapuluhkon bani si Sekanya,

¹² na pasapuluhsadahon bani si Eliasib, na pasapuluhduahon bani si Jakim,

¹³ na pasapuluhtoluhon bani si Hupa, na pasapuluhompatkon bani si Jesebeab,

¹⁴ na pasapuluhlimahon bani si Bilga, na pasapuluhonomkon bani si Immer,

¹⁵ na pasapuluhpituhon bani si Hesir, na pasapuluhualuhkon bani si Hapises,

¹⁶ na pasapuluhsiahkon bani si Petaya, na paduapuluhkon bani si Jeheskel.

¹⁷ na paduapuluhsadahon bani si Jakin, na paduapuluhduahon bani si Gamul,

¹⁸ na paduapuluhtoluhon bani si Delaya, na paduapuluhompatkon bani si Maasya.

¹⁹ Ai ma horin ni sidea, laho mandalankon horja ni sidea bei, laho masuk hu Rumah ni Jahowa, mangihutkon aturan ni si Aron, bapa ni sidea ai, songon na tinonahkon ni Jahowa bani.

Ginompar ni halak Levi na legan ai

²⁰ Anjaha pasal halak Levi na legan ai: Humbani anak ni si Amram, si Subael; humbani anak ni si Subael, si Jedaya;

²¹ humbani anak ni si Rehabya, si Jisia, kopala;

²² humbani halak Jishari, si Selomot; humbani anak ni si Selomot, si Jahat;

²³ humbani anak ni si Hebron, si Jeria, kopala, si Amarya paidua, si Usiel paitolu, si Jekamean paiompat;

²⁴ humbani anak ni si Usiel, si Mika; humbani anak ni si Mika, si Samir;

²⁵ anggi ni si Mika, si Jisia; humbani anak ni si Jisia, si Sakarya.

²⁶ Anak ni si Merari: Si Mahli pakon si Musi, pakon anak ni anakni si Jaasia.

²⁷ Anak ni si Merari, na humbani si Jaasia: Si Soham, si Sakkur pakon si Ibri.

²⁸ Humbani si Mahli: Si Eleasar, seng dong anakni.

²⁹ Humbani si Kis, anak ni si Kis, si Jerameel.

³⁰ Anak ni si Musi: Si Mahli, si Eder pakon si Jerimot. Ai ma ginompar ni halak Levi mar sasaompung.

³¹ Pasal sidea pe idalankon do ruji-ruji, usih songon sanina ni sidea, ginompar ni si Aron, i lobei ni Raja Daud, si Sadok, si Ahimelek pakon i lobei ni kopala ni malim ampa halak Levi mar sasaompung.

Pandoding i Rumah Panumbahan

25 ¹ Ambahni ai ipapulig si Daud rap pakon pambobai ni bala ai ma hubani horja ai, anak ni si Asap, anak ni si Heman, pakon anak ni si Jedutun, na igoki Tonduy sanggah mangguit husapi, arbab pakon sordam. Anjaha on ma bilangan ni dalahi na mandalankon tohonan ai.

² Humbani anak ni si Asap: Si Sakkur, si Josep, si Netanya, si Asarela; ai ma anak ni si Asap, na binobahon ni si Asap, na igoki Tonduy, sanggah marmusik romban hubani panogu-noguan ni raja ai.

³ Humbani si Jedutun, anak ni si Jedutun: si Gedalya, si Seri, si Jesaya, si Simeï, si Hasabya, si Matitya, onom halak, na binobahon ni bapa ni sidea si Jedutun, na igoki Tonduy sanggah marhusapi laho mamuji-muji pakon mangkatahon tarima-kasih hubani Jahowa.

⁴ Humbani si Heman, anak ni si Heman: Si Bukia, si Matanya, si Usiel, si Sebuël, si Jerimot, si Hananyah, si Hanani, si Eliata, si Gidalti, si Romamtieser, si Josbekasa, si Maloti, si Hotir pakon si Mahasiot.

⁵ Ai ma ganup anak ni si Heman, halak na marpanonggoran bani raja ai, romban hubani hata ni Jahowa, laho patimbulhon tanduk hatuahon; ai ibere Naibata do hubani si Heman sapuluh ompat anak pakon tolu boru.

⁶ Ganupan sidea binobahon ni bapa ni sidea, si Asap, si Jedutun pakon si Heman, sanggah mandoding i Rumah ni Jahowa, marhasoman ogung, husapi pakon arbab, laho mandalankon horja i Rumah ni Naibata, ibagas pangatur ni raja ai.

⁷ Ia bilangan ni sidea rap pakon sanina ni sidea, na niajaran mandoding hubani Jahowa, haganup na pandei, dua ratus ualuh puluh ualuh halak do.

⁸ Tapi mandabuh ruji-ruji do sidea pasal horja ni sidea, na etek age na bangga, guru age susian.

⁹ Ruji-ruji na parlobei madabuh hubani si Josep; na paduahon hubani si Gedalia, hubani pakon saninani ampa anakni, sapuluh dua halak;

¹⁰ na patoluhon hubani si Sakkur, anakni pakon saninani, sapuluh dua halak;

¹¹ na paompatkon hubani si Jisri, anakni pakon saninani, sapuluh dua halak;

¹² na palimahon hubani si Netanya, anakni pakon saninani, sapuluh dua halak;

¹³ na paonomkon hubani si Bukiah, anakni pakon saninani, sapuluh dua halak;

¹⁴ na papituhon hubani si Jesarela, anakni pakon saninani, sapuluh dua halak;

¹⁵ na paualuhkon si Jesaya, anakni pakon saninani, sapuluh dua halak;

¹⁶ na pasiahkon si Matanya, anakni pakon saninani, sapuluh dua halak;

¹⁷ na pasapuluhkon si Simei, anakni pakon saninani, sapuluh dua halak;

¹⁸ na pasapuluhsadahon si Asarel anakni pakon saninani, sapuluh dua halak;

¹⁹ na pasapuluhduahon si Hasabya, anakni pakon saninani, sapuluh dua halak;

²⁰ na pasapuluhtoluhon si Subael, anakni pakon saninani, sapuluh dua halak;

- ²¹ na pasapuluhompatkon si Matitya, anakni pakon saninani, sapuluh dua halak;
- ²² na pasapuluhlumahon si Jeremot, anakni pakon saninani, sapuluh dua halak;
- ²³ na pasapuluhonomkon si Hananya, anakni pakon saninani, sapuluh dua halak;
- ²⁴ na pasapuluhpituhon si Josbekasa, anakni pakon saninani, sapuluh dua halak;
- ²⁵ na pasapuluhualuhkon si Hanani, anakni pakon saninani, sapuluh dua halak;
- ²⁶ na pasapuluhsiahton si Maloti anakni pakon saninani, sapuluh dua halak;
- ²⁷ na paduapuluhkon si Eliata, anakni pakon saninani, sapuluh dua halak;
- ²⁸ na paduapuluhkadangon si Hotir, anakni pakon saninani, sapuluh dua halak;
- ²⁹ na paduapuluhduahon si Gidalti, anakni pakon saninani, sapuluh dua halak;
- ³⁰ na paduapuluhtoluhon si Mahasiot, anakni pakon saninani, sapuluh dua halak;
- ³¹ anjaha na paduapuluhompatkon si Romamtieser, anakni pakon saninani, sapuluh dua halak.

**Sijaga Horbangan, Siramotkon
Ugas-ugas pakon Sipangatur**

26 ¹ Pasal parbagi ni sijaga horbangan.
Humbani ginompar ni si Korah: Si

Meselemya, anak ni si Kore, humbani, ginompar ni si Abiasap.

² Anak ni si Meselemya ai ma: Si Sakarya, bunga tubuhni, si Jediael paidua, si Sebaya paitolu, si Jatniel paiompat.

³ si Elam pailima, si Johanan paionom, Isi Elyoenai paipitu.

⁴ Anak ni si Obed-Edom ai ma: Si Semaya bunga tubuhni, si Josabad paidua, si Joah paitolu, si Sahar paiompat, si Netaneel pailima.

⁵ si Amiel paionom, si Isasar paipitu, si Peuletai paiualuh, ai ipasu-pasu Naibata do ia.

⁶ Anak ni si Semaya pe tubuhan anak do, na manrajai ginompar ni ompungni, ai halak na margogoh do sidea.

⁷ Anak ni si Semaya ai ma: Si Otni, si Repael, si Obed pakon si Elsabad, anjaha anggi ni sidea, ai ma si Elihu pakon si Semakya, halak na pantas.

⁸ Ganupan ai ginompar ni si Obed-Edom rap pakon anak ni sidea, sanina ni sidea, halak na pantas mandalankon jabatan ni; onom puluh dua halak humbani ginompar ni si Obed-Edom.

⁹ Anak ni si Meselemya pe ampa saninani, halak na pantas do, tumpu sapuluh ualuh halak.

¹⁰ Anak ni si Hosa, ginompar ni si Merari, ai ma: Si Simri, kopalani, age pe seng ia bunga tubuhni, ipabangkit bapani do ia gabe kopala;

¹¹ si Hilkia paidua, si Tebalya paitolu, si Sakarya paiompat. Ganup anak pakon anggi ni si Hosa sapuluh tolu halak do.

¹² Ganup parbagian ni sijaga horbangan on, na binagi domu hubani kopalani, adong do horjani usih songon saninani, ai ma marugas i Rumah ni Jahowa.

¹³ Idabuh sidea do ruji-ruji dos bani na etek pakon bani na banggal, mar sasaompung, bani ganup horbangan ai.

¹⁴ Ruji-ruji ni horbangan parhapoltakan madabuh hubani si Selemya. Idabuh sidea do homa ruji-ruji bani anakni, si Sakarya, sada panuturi na maruhur, gabe madabuh bani ruji-ruji ni horbangan parutara.

¹⁵ Madabuh do bani si Obed-Edom horbangan na hampit dangsina, anjaha bani anakni, rumah parugasan.

¹⁶ Bani si Supim pakon si Hosa, ai ma horbangan na hampit hasundutan, i lambung ni horbangan Salehet, bani dalan na laho tangkog ai. Patontang do panjagaan ai.

¹⁷ Hampit hapoltakan onom halak ganup ari, hampit utara ompat halak ganup ari; anjaha hampit dangsina ompat halak ganup ari; anjaha i lambung ni rumah parugasan dua-dua halak do,

¹⁸ anjaha bani Parbar hampit hasundutan, ompat halak bani dalan na bolon anjaha dua halak bani Parbar.

¹⁹ On ma parbagi ni halak sijaga horbangan humbani ginompar ni si Korah pakon ginompar ni si Merari.

²⁰ Ia halak Levi, sanina ni sidea, sidea do haondosan ni ugas-ugas i Rumah ni Naibata ampa ugas-ugas humbani sibere-bere na pinapansing.

²¹ Ginompar ni si Laedan halak Gersom ai, kopalani humbani si Laedan, halak Gersom ai, ai ma si Jehiel.

²² Anak ni si Jehiel ai ma: Si Setam pakon si Joel saninani ai, ai ma haondosan ni ugas-ugas ni Rumah ni Jahowa.

²³ Humbani ginompar ni si Amram, si Jisehari, si Hebron pakon si Usiel, ai ma:

²⁴ Si Subael, anak ni si Gersom, anak ni si Musa, kopala ni siramotkon ugas-ugas.

²⁵ Saninani: Humbani si Elieser, anak ni ai si Rehabya, anak ni ai si Jesaya, anak ni ai si Joram, anak ni ai si Sikri, anak ni ai si Selomit.

²⁶ Ia si Selomit pakon saninani, ai ma haondosan ni sagala ugas-ugas, humbani sibere-bere na pinapansing, ai ma na pinapansing ni Raja Daud, ampa kopala ni mar sasaompung, kopala ni sisaribu pakon sisaratus halak ampa kopala ni bala.

²⁷ Ipapansing sidea do taban-taban na dapot i parporangan, laho patorsahon rumah panumbahan.

²⁸ Sonai homa haganup na dob pinapansing ni si Samuel, halak na marpanonggoran ai, pakon si Saul

anak ni si Kis, pakon si Abner anak ni si Ner, ampa si Joab anak ni si Seruya; sagala ugas-ugas na dob pinapansing ondos do bani si Selomit pakon hubani saninani.

²⁹ Humbani ginompar ni si Jisehari, si Kenaya pakon saninani do ipabangkit, mangkorjahon horja pardarat bani halak Israel, songon gamot-gamot ampa panguhum.

³⁰ Humbani ginompar ni si Hebron: Si Hasabya ampa saninani, saribu pitu ratus halak bueini, halak na pantas; sidea do na mangatur halak Israel, hampit hasundutan ni Jordan, mandalankon ganup horja bani Jahowa ampa siugashonon bani raja ai.

³¹ Humbani halak Hebron: si Jerya do kopala *(ia pasal ginompar pakon marga ni halak Hebron, ipareksa do bani paompatpuluh-tahunkon, dob gabe raja si Daud, gabe jumpah ma i tengah-tengah ni sidea halak na pantas i Jaeser, na i Gilead)*

³² pakon saninani, dua ribu pitu ratus halak bueini, halak na pantas, kopala ni mar sasaompung; ipabangkit Raja Daud ma sidea mangatur halak Ruben, Gad pakon satongah marga Manasse, mandalankon sagala horja bani Naibata ampa siugasonkon bani raja ai.

Kopala Porang pakon Gamot Bolon na Legan

(ay. 2-15: pausih bd. 11:31)

27¹ On ma halak Israel mangihutkon bilangan ni sidea, kopala ni mar sasaompung, kopala ni sisaribu pakon sisaratus halak, sonai homa sagala gamot-gamot na marugas bani raja ai ibagas sagala horja bani ganup bagian, na margantih-gantih sasabulan ibagas na satahun; anjaha ganup bagian dua puluh ompat ribu halak do bueini.

² Kopala ni parbagian na parlobei bani bulan sada, ai ma si Jasobeam, anak ni si Sabdiel; dua puluh ompat ribu halak do bueini na masuk hu parbagianan ai.

³ Humbani ginompar ni si Perez do ia, kopala ni haganup pambobai ni bala do ia bani bulan sada.

⁴ Ia kopala ni parbagianan bani bulan dua ai ma si Dodai, halak Ahohi, anjaha masuk hubani parbagiananni do kopala Miklot; dua puluh ompat ribu halak do masuk bani parbagiananni ai.

⁵ Kopala na patoluhon bani bulan tolu, ai ma si Benaya, anak ni malim Joyada; dua puluh ompat ribu halak do masuk bani parbagiananni ai.

⁶ Si Benaya, ai ma sahalak humbani puanglima na tolu puluh halak ai, lanjar ia do kopala ni na tolu puluh halak ai; anjaha masuk hubani parbagiananni ai do anakni, si Amisabad.

⁷ Na paompatkon, bani bulan ompat, ai ma si Asahel, anggi ni si Joab, anjaha si Sebaya, anakni

ai do manggantihsi; dua puluh ompat ribu halak do masuk hubani parbagiananni ai.

⁸ Na palimahon bani bulan lima, ai ma kopala Samhud, halak Jisrahi; dua puluh ompat ribu halak do masuk hubani parbagiananni ai.

⁹ Na paonomhon bani bulan onom, ai ma si Ira, anak ni si Ikkes, halak Tekoa; dua puluh ompat ribu halak do masuk hubani parbagiananni ai.

¹⁰ Na papituhon, bani bulan pitu, ai ma si Heles, halak Peloni, humbani ginompar ni si Efraim; dua puluh ompat ribu halak do masuk hu parbagiananni ai.

¹¹ Na pauluhkon, bani bulan ualuh, ai ma si Sibbekai, halak Husati, humbani halak Serahit, dua puluh ompat ribu halak do masuk hubani parbagiananni ai.

¹² Na pasiahkon bani bulan siah, ai ma si Abieser, hun Anatot, humbani ginompar ni si Benyamin; dua puluh ompat ribu halak do masuk hubani parbagiananni ai.

¹³ Na pasapuluhkon bani bulan sapuluh, ai ma si Mahar ai na hun Netofa, humbani halak Serahit, dua puluh ompat ribu halak do masuk hubani parbagiananni ai.

¹⁴ Na pasapuluhsadahon bani bulan sapuluh-sada, ai ma si Benaya, halak Piratoni, humbani ginompar ni si Efraim; dua puluh ompat ribu halak do masuk hubani parbagiananni ai.

¹⁵ Na pasapuluhduahon bani bulan na pasapuluhduahon, ai ma si Heldai, halak Netofati, humbani ginompar ni si Otniel; dua puluh ompat ribu halak do masuk hubani parbagiananni ai.

¹⁶ Ia kopala ni marga ni Israel sada-sada ai ma: Bani marga Ruben, si Elieser, anak ni si Sikri; bani marga Simeon, si Sepatya, anak ni si Maaka;

¹⁷ bani marga Levi, si Hasabya, anak ni si Kemuel; bani ginompar ni si Aron, si Sadok;

¹⁸ bani marga Juda, si Elihu, sada humbani sanina ni si Daud; bani marga Isasar, si Omri, anak ni si Mikael;

¹⁹ bani marga Sebulon, si Jismaya, anak ni si Obaja; bani marga Naftali, si Jerimot, anak ni si Asriel;

²⁰ bani ginompar ni Efraim si Hosea, anak ni si Asasya; bani na satongah marga Manasse, si Joel, anak ni si Pedaya;

²¹ bani satongah marga Manasse na i Gilead, si Jiddo, anak ni si Sakaria; bani marga Benyamin, si Jehasiel, anak ni si Abner;

²² bani marga Dan, si Asareel, anak ni si Jeroham. Ai ma kopala ni marga ni Israel.

²³ Tapi lang dihut ibilangi si Daud halak na marumur i toruh ni dua puluh tahun, halani na dob iparbagah Jahowa, pabueionni do halak Israel, songon bintang na i langit.

²⁴ Domma namin ipungkah si Joab, anak ni si Seruya, mamilangi, tapi seng dob ope ibahen; ai sogop do papa bani halak Israel marhalanihon ai,

halani ai do ase seng isuratkon bilangan ai hu bagas buku barita ari-ari ni Raja Daud.

²⁵ Ia haondosan ni ganup ugas-ugas ni raja ai, ai ma si Asmawet, anak ni si Adiel; anjaha haondosan ni ugas-ugas na i talun, na i kota, na i huta pakon na i benteng, ai ma si Jonatan, anak ni si Usia;

²⁶ haondosan ni halak siparhorja i juma, na manlahoi tanoh ai, ai ma si Esri, anak ni si Helub;

²⁷ haondosan ni pohon anggur, ai ma si Simeï, halak Rama; haondosan ni anggur na sinimpan i pohon anggur, ai ma si Sabdi halak Sipmi;

²⁸ haondosan ni hayu jetun pakon hayu ara na i habungan, ai ma si Baal-Hanan, halak Geder ai, anjaha haondosan ni minak, ai ma si Joas;

²⁹ haondosan ni lembu na manampal i Saron, ai ma si Sitrai, halak Saron; haondosan ni lembu na i habungan, ai ma si Sapat, anak ni si Adellai;

³⁰ haondosan ni unta, ai ma si Obil, halak Ismael; haondosan ni halode boru-boru, ai ma si Jehdeya, halak Meronot;

³¹ haondosan ni biri-biri ampa hambing, ai ma si Jasis, halak Hagari. Ai ma ganup gamot haondosan ni ugas-ugas ni Raja Daud.

³² Ia si Jonatan, mangkela ni si Daud, ai ma panuturini, sada dalahi na pantas maruhur anjaha na pentar; ia si Jehiel, anak ni si Hakmoni, ai ma hasoman ni anak ni raja ai.

³³ Si Ahitopel pe panuturi ni raja ai do, anjaha si Husai, halak Arki ai, ai ma huan-huan ni raja ai.

³⁴ Na manggantih si Ahitopel, ai ma si Joyada, anak ni si Benaya, pakon si Abyatar. Si Joab, ai ma kopala ni bala ni raja ai.

Iondoskon si Daud Use Horja Pajongjongkon Rumah Panumbahan bani si Salomo

28 ¹ Ipatumpu si Daud ma haganup kopala ni Israel hu Jerusalem, kopala ni ganup marga, kopala ni siparbagian na marugas i lobei ni raja ai, kopala ni sisaribu halak pakon sisaratus halak, gamot haondosan ni ugas-ugas pakon pinahan ni raja ai ampa anakni, sonai homa sipangidangi i rumah ni raja ai, ronsi puanglima pakon ganup halak siparkuasa.

² Dob ai jongjong ma Raja Daud, anjaha nini ma, “Tangar nasiam ma ahu, nasiam saninangku pakon bangsangku! Iparsinta uhurhu do namin sihol pajongjongkon sada rumah bahen parsaranan ni poti parpadanan ni Jahowa, lanjar sidogeian bani nahei ni Naibatanta; domma pala hupasirsir sagala parhayuni.

³ Tapi nini Naibata ma hubangku, ‘Seng bulih ho pajongjong sada rumah bani goran-Ku, ai halak siparporang do ho, na mandurushon buei daroh.’

⁴ Age pe sonai, domma ipilih Jahowa Naibata ni Israel ahu humbani ganup ginompar ni bapa, ase

gabe raja ahu manggomgom Israel ronsi sadokah ni dokahni; ai domma ipilih si Juda gabe pambobai, anjaha humbani ginompar ni si Juda, bapa do ipilih, anjaha humbani ginompar ni bapa, ahu do iharosuhkon uhur-Ni pabangkiton gabe raja manggomgom ganup Israel.

⁵ Anjaha humbani ganup anakku, ai buei do anak ilayak-layakkon Jahowa bangku, domma ipilih anakku si Salomo, laho mangkunduli paratas ni harajaon ni Jahowa manggomgom Israel.

⁶ Anjaha domma pala ihatahon hu bangku, 'Maningon anakmu si Salomo do pauli rumah-Ku pakon alaman-Ku, ai domma Hupilih ia gabe anak-Ku, anjaha Ahu gabe Bapani.

⁷ Pajonamon-Ku do harajaonni ronsi sadokah ni dokahni, anggo torus totap uhurni mangkorjahon tonah-Ku pakon uhum-Hu, songon sonari.'

⁸ On pe, i lobei ni ganup Israel, ai ma tumpuan ni Jahowa pakon ibagas panangar ni Naibatanta: Ramotkon anjaha pareksa nasiam ma ganup tonah ni Jahowa Naibata nasiam, ase tarteian nasiam tanoh na dear on, anjaha tarpateankon nasiam ai hubani anak nasiam i pudi nasiam ronsi sadokah ni dokahni.

⁹ Ia ho, ale anakku Salomo, sai tanda ma Naibata ni bapamu, anjaha balosi ma ia humbani gok ni uhurmu pakon humbani gok ni atei-ateimu, ai ipareksa Jahowa do sagala uhur na ibagas, anjaha

iarusi do sagala sura-sura ni uhur. Anggo ipindah ho la, sai na jumpah ho do la; tapi anggo itadingkon ho la, ambungknonon-Ni do ho ronsi sadokah ni dokahni.

¹⁰ Antong parimbagaskon ma, ai domma ipilih Jahowa ho, laho pajongjongkon sada rumah na mapansing; sai margogoh ma ho laho pasaudkon ai.”

¹¹ Dob ai ibere si Daud ma hubani anakni si Salomo usihan ni surambih pakon rumah panumbahan ai, rumah panimpanan ni ugas-ugas, kamar pardatas ampa kamar parbagas pakon kamar hajongjongan ni tutup pardearan ai;

¹² sonai homa usihan ni haganup na piningkirhonni ibagas uhurni, pasal alaman ni Rumah ni Jahowa, pasal haganup kamar na inggot ai, pasal panimpanan ni ugas-ugas i Rumah ni Naibata pakon ugas-ugas na pinapansing;

¹³ pasal ianan ni malim pakon halak Levi siparbagian, pakon pasal haganup ugas-ugas sipakeion bani horja i Rumah ni Jahowa.

¹⁴ Ibere ma homa hubani omas ansa borat ni na porlu bani sagala parugas bani ganup horja; pakon pirak ansa borat ni na porlu bani sagala parugas bani ganup horja;

¹⁵ ambahni ai omas ansa borat ni na porlu bani parpalitaan omas ai ampa palita omasni, martimbangan bei do ganup parpalitaan pakon

palitani; usih hujai do age pasal parpalitaan pirak mangihutkon timbanganni, na porlu bani ganup parpalitaan ampa palitani, romban hubani horja ni ganup parpalitaan;

¹⁶ ambahni ai omas ansa borat ni na dob tinontuhon bani ganup meja ni ruti sigalangkononkon, sonai homa pirak bani ganup meja na humbani pirak;

¹⁷ ambahni ai ope omas na pitah bani garpu, mangkuk pakon batil; sonai homa bani pinggan omas, ansa borat ni na porlu bani ganup pinggan; sonai homa pinggan pirak ansa borat ni na porlu bani ganup pinggan.

¹⁸ Sonai homa omas na pitah bani anjap-anjap panutungan ni dahupa, ansa borat ni na dob tinontuhon; sonai homa usihan ni gareta Herubim omas ai, na paherbangkon habongni manrungkub poti parpadanan ni Jahowa.

¹⁹ Ganupan ai tarsurat jinalo humbani tangan ni Jahowa, laho mangajarhon ai pasaudkon usihan ai.

²⁰ Dob ai ihatahon si Daud ma hubani anakni si Salomo, “Tenger ma uhurmu, anjaha totap laho pasaudkon ai; ulang ma ho mabiar barang gobir! Ai Naibata Jahowa, Naibatanku do na mangkasomani ho, ai seng anjai tumaram tarikon-Ni tangan-Ni humbam barang tadingkonon-Ni ho, paima salosei bahenonmu ganup horja parugason i Rumah ni Jahowa.

²¹ Tonggor ma, domma jorei parhorinan ni malim pakon halak Levi, laho mandalankon ganup jabatan i Rumah ni Naibata; hasomanmu do homa bani sagala horja ganup halak na ringgas, na pantas maruhur mandalankon jabatanni; ambahni ai sagala kopala pakon ganup bangsa in sai unduk bei do in mandalankon parentahmu.”

Guguan Pajongjong Rumah Panumbahan

29 ¹ Dob ai nini Raja Daud ma dompak ganup tumpuan ai, “Ia si Salomo anakkin, na dob pinilih ni Naibata sandiri, poso ope ia anjaha seng marpangalaman, tapi borat do ia horja ai; ai seng bahen haporluan ni jolma rumah on, tapi bani Naibata do.

² Halani ai domma hupasirsir humbani ganup gogohku parugas hubani Rumah ni Naibatanku, ai ma omas bani parugas omas, pirak bani parugas pirak, tombaga bani parugas tombaga, bosi bani parugas bosi pakon hayu bani parugas hayu, ambahni ai batu soham sitatahkonon bani intan, batu sibirong ampa na marrupa-rupa, bagei-bagei ni mata intan na maharga ampa batu marmar buei tumang.

³ Ambahni ai, halani malas ni uhurhu mangidah Rumah ni Naibatanku, omas ampa pirak na dong bangku, berehononku do ai bahen guguan bani

Rumah ni Naibatanku, tambah ni haganup, na dob hupasirsir hinan hubani rumah na mapansing ai,
⁴ ai ma tolu ribu talenta omas, omas na hun Opir, pakon pitu ribu talenta pirak, na dob pinapitah, silampiskononkon bani dingding ni kamarni.

⁵ Omas bani parugas na humbani omas, pirak bani parugas na humbani pirak, pakon bani haganup na pinauli ni tukang. On pe, ise do nuan na marosuh, mamberehon sibere-bereni sadari on bani Jahowa?”

⁶ Jadi mangaku bei ma kopala ni mar sasaompung, kopala ni ganup marga ni Israel, kopala ni sisaribu halak pakon sisaratus halak ampa kopala bani horja ni raja ai.

⁷ Ibere sidea do guguan bani Rumah ni Naibata lima ribu talenta pakon sepuluh ribu darik omas, sepuluh ribu talenta pirak, sepuluh ualuh ribu talenta tombaga, anjaha saratus ribu talenta bosi.

⁸ Anjaha barang ise simada intan, ipadas do ai hu parugasan na i Rumah ni Jahowa, na ibagas panjagaan ni si Jehiel, halak Gerson ai.

⁹ Tapi malas bei do uhur ni bangsa ai, halani ringgas bei do sidea na margugu ai, ai humbani gok ni uhurni bei do sidea na margugu ai bani Jahowa; age Raja Daud malas tumang do uhurni.

Doding Puji-pujian ni si Daud

- ¹⁰ Halani ai ipuji si Daud ma Jahowa i lobei ni ganup tumpuan ai, nini ma, “Pinuji ma Ham alo Jahowa, Naibata ni Israel, Bapanami humbani sadokah ni dokahni ronsi sadokah ni dokahni.
- ¹¹ Ai gok Bamu do, alo Jahowa, habanggalon pakon hasangapon, hagogohon pakon hamuliaon, hamonangan ampa hajombuton; ai Ham do simada haganup na i nagori atas ampa na i tanoh on, ai Ham do simada harajaon, alo Jahowa, anjaha ipatimbul Ham do diri-Mu mangatasi haganup.
- ¹² Marharorohan hun Bamu do habayakon pakon hamuliaon, anjaha Ham do manggomgomi haganup. Gok Bamu do hagogohon pakon kuasa; gok Bamu do patimbulhon ampa pagogohkon ganupan ai.
- ¹³ On pe tarima kasih ma Bamu, Ham Naibatanami, anjaha ipuji hanami ma goran-Mu na marmulia in.
- ¹⁴ Ai ise ma ahu, anjaha aha ma bangsangkin, ase boi hanami margugu humbani nionjar ni uhur sonin? Ai marharorohan hun Bamu do ganup, anjaha na humbani tangan-Mu in do na binerenami in Bamu.

- ¹⁵ Ai halak dagang do hanami i lobei ni bohi-Mu anjaha panginsolat, songon bapanami, usih songon halinoh tumang do ari-arinami i atas tanoh on, seng dong siarapkonon.
- ¹⁶ Ham Jahowa Naibatanami, haganup guguan, na dob ipasirsir hanami laho pajongjong sada rumah bani goran-Mu na mapansing in, marharorohan hun Bamu do in, anjaha Ham do simada in ganup.
- ¹⁷ Torang do hubotoh, alo Naibatanku, Ham do siuji uhur, anjaha hasintongan do rosuh ni uhur-Mu; ibagas sintong ni uhurhu do hugalangkon ganupan on, anjaha domma huidah bangsa-Mu in, na tumpu ijon nuan, humbani malas ampa nionjar ni uhurni do sidea mambere Bamu.
- ¹⁸ Ham Jahowa, Naibata ni ompungnami si Abraham, si Isak pakon si Israel, sai patotap Ham ma ronsi sadokah ni dokahni hauhuron ampa pingkiran na sonai ibagas uhur ni bangsa-Mu, anjaha togu-togu Ham ma uhur ni sidea Bamu!
- ¹⁹ Anjaha bere Ham ma bani anakku si Salomo uhur na totap manjolom tonah-Mu pakon aturan-Mu, laho mangkorjahon ganupan ai pakon pajongjongkon rumah panumbahan on; domma pala hupasirsir parugas hujai.”

Parbangkit ni si Salomo, Parmatei ni si Daud

²⁰ Dob ai nini si Daud ma dompak ganup tumpuan ai, “Sai puji nasiam ma Jahowa, Naibata nasiam.” Jadi ganup tumpuan ai ipuji ma Jahowa, Naibata ni ompung ni sidea, ipaunduk sidea ma uluni, manrogop ma sidea i lobei ni Jahowa pakon i lobei ni raja ai.

²¹ Dob ai igalangkon sidea ma galangan sisayaton bani Jahowa, anjaha patarni ai igalangkon sidea ma bani Jahowa galangan situtungon saribu lembu, saribu biri-biri tunggal, saribu anak ni biri-biri rap pakon galangan siinumoni, ambahni ai galangan sisayaton buei tumang bani ganup Israel;

²² jadi mangan anjaha minum ma sidea bani na sadari ai i lobei ni Jahowa ibagas malas ni uhur banggal. Anjaha ipabangkit sidea ma padua-halihan si Salomo, anak ni si Daud, gabe raja i lobei ni Jahowa anjaha si Sadok gabe malim.

²³ Jadi hundul ma si Salomo i atas paratas ni Jahowa gabe raja, gantih ni si Daud bapani ai; mardohar do ia, anjaha ganup Israel mangunduk do bani.

²⁴ Haganupan kopala ronsi puanglima ampa ganup anak ni raja Daud mangunduk do bani raja Salomo.

²⁵ Dob ai ipasangap Jahowa ma si Salomo, gabe timbul tumang i lobei ni ganup Israel, anjaha ilayak-layakkon do bani hamuliaon ni harajaon, na so

ongga jinujung ni barang ise humbani raja na parlobei manggomgom Israel.

²⁶ Ase si Daud, anak ni si Isai do raja manggomgom ganup Israel.

²⁷ Ia dokahni manggomgom Israel, ompat puluh tahun do; i Hebron do ia manrajai pitu tahun, anjaha i Jerusalem tolu puluh tolu tahun.

²⁸ Dob ai matei sayur matua ma raja ai, dob sombuh uhurni bani hagoluhan on, bani habayakon pakon bani hamuliaon; jadi si Salomo, anakni ai ma bangkit raja manggantihsi.

²⁹ Tapi anggo barita ni Raja Daud, humbani bonani ronsi ujungni, tonggor ma, tarsurat do ai ibagas buku Barita ni Nabi Samuel, Nabi Natan ampa ibagas buku Barita ni Nabi Gad.

³⁰ sonai homa ganup barita ni panrajaionni pakon kuasani ampa ganup na masa hu bani pakon bani Israel, ampa hubani haganup harajaon ni ganup nagori na legan ai.

2 Kronika

Galangan ampa Tonggo ni si Salomo

(ay. 1-6: pausih 1 Raj. 3:1-4; ay. 7-12: 1 Raj. 3:5-15)

1 ¹ Dob ai lambin totap ma si Salomo, anak ni si Daud, ibagas harajaon ai, ai Jahowa Naibatani do mangkasomanisi ampa na mambahensi timbul tumang.

² Marsahap ma si Salomo hubani ganup Israel, hubani kopala ni sisaribu pakon sisaratus halak, hubani panguhum pakon hubani pambobai bani sab tanoh Israel, kopala ni mar sasaompung.

³ Dob ai laho ma si Salomo ampa ganup tumpuan, na rap pakonsi ai, hu buntu-buntu na i Gibeon, ai ijai do lampolampo partumpuan ni Naibata, na pinauli ni si Musa, juakjuak ni Naibata i halimisan.

⁴ Tapi anggo poti parpadanan ni Naibata, domma iboan si Daud tangkog hun Kiryat-Jearim, hubani ianan na dob pinasirsir ni si Daud hujai, ai domma ipajongjong sada lampolampo bahen iananni i Jerusalem.

⁵ Sonai homa anjapanjap tombaga na pinauli ni si Bezalel, anak ni si Uri, anak ni si Hur, ijai do i lobei ni lampolampo ni Jahowa. Isungkun si Salomo ampa tumpuan ai ma Jahowa.

⁶Jadi manggalang ma si Salomo ijai i lobei ni Jahowa i atas ni anjapanjap tombaga na i lobei ni lampolampo partumpuan ai; igalangkon ma i atasni saribu galangan situtungan.

⁷Bornginni ai talar ma Naibata bani si Salomo, anjaha nini ma dompaksi, “Pangindo ma barang aha sibereon-Ku bam.”

⁸Nini si Salomo ma dompak Naibata, “Domma ibahen Ham idop ni uhur banggal hubani bapa, si Daud, anjaha domma ipabangkit Ham ahu gabe raja gantihni.

⁹On pe, Ham Naibata Jahowa, sai pasaud Ham ma bagah-bagah-Mu na bani bapa, si Daud, ai domma pala ipabangkit Ham ahu gabe raja, manggomgom sada bangsa, na songon orbuk ni tanoh bueini.

¹⁰Halani ai, bere Ham ma bangku hapentaran ampa parbinotohan, naha marparlahou i lobei ni bangsa on; ai ise ma na boi manguhum bangsa-Mu, na sain banggalni?”

¹¹Nini Naibata ma mambalosi si Salomo, “Halani sonin pangindoan ni uhurmu, anjaha seng ipangindo uhurmu habayakon, arta, hamuliaon, barang hosah ni munsuhmu, seng homa ganjang ni umur ipindo ho, tapi hapentaran ampa parbinotohan do ipindo ho, ase ibotoh ho manguhum bangsang-Kin, songon na dob Hupabangkit ho manrajai ai,

¹² halani ai layak-layakkonon-Ku ma bam hapentaran ampa parbinotohan. Ambah ni ai bereon-Ku do hubam habayakon, arta ampa hamuliaon; lang adong na sonai ai bani raja-raja na parlobei humbam, anjaha ise pe lang raja, na roh hun pudimu, dong na sonai ai bani.”

Habayakon ni si Salomo

(ay. 14-17: pausih 1 Raj. 10:26-29)

¹³ Dob ai mulak ma si Salomo hun buntu-buntu na i Gibeon, hun lobei ni lampolampo partumpuan na i Gibeon hu Jerusalem, anjaha irajai ma halak Israel.

¹⁴ Ipatumpu si Salomo ma gareta ampa halak siajak huda; dong ma bani saribu ompat ratus gareta ampa sapuluh dua ribu halak siajak huda. Inahkon ma ai hubagas huta ianan ni gareta ampa i Jerusalem i lambung ni raja ai.

¹⁵ Dob ai ipabuei raja ai pirak ampa omas i Jerusalem, songon batu bueini, sonai homa hayu ares songon jambu na dong tubuh i tanoh bornoh bueini.

¹⁶ Ia harorohan ni huda na bani si Salomo, ai ma hun Masir ampa hun Koa do, partiga-tiga ni raja ai do mangalop ai hun Koa, surduk borot mangihutkon harga na i tiga.

¹⁷ Marharga onom ratus sekel pirak do iparoh sidea sada gareta hun Masir, anjaha saratus lima puluh sekel do harga ni sada huda; lanjar sidea do na

padalankon ai hubani raja-raja ni halak Het pakon halak Aram.

Parpadanan ni si Salomo pakon Raja Hiram

(Pausih 1 Raj. 5:15-30)

2¹ Dob ai iparentahkon si Salomo ma pajongjongkon sada rumah bani goran ni Jahowa pakon sada rumah harajaon bani sandiri.

² Itotapkon si Salomo ma pitu puluh ribu halak sipanaruhi, ualuh puluh ribu halak sibarbar batu i atas dolog, anjaha tolu ribu onom ratus halak mandur bani sidea.

³ Dob ai isuruh si Salomo ma suruhanni marayak si Hiram, raja hun Tirus, nini ma, “Songon na binahenmu hubani bapa, si Daud, ai ma na manongosi hayu ares bani, laho pajongjongkon sada rumah bahen iananni, sonai ma bahen ham hu bangku.

⁴ Tonggor ma, sihol do pajongjongkonku sada rumah bani goran ni Jahowa, Naibatangku, anjaha papansingkon Bani, laho mamboan hu lobei-Ni dahupa na misbou, ruti sigalangkonon na manotap, pakon galangan situtungon sogod ampa bodari bani ari Sabat, bani poltak ni bulan ampa bani pesta ni Jahowa, Naibatanami, songon na dob tinotapkon sadokah ni dokahni bani Israel.

⁵ Anjaha rumah panumbahan sipajongjongonkai, maningon bangga do, ai banggalan do Naibatanami humbani sagala naibata na legan.

⁶ Tapi tene ise ma na boi pajongjong sada rumah Bani, ai gari langit ni langitan seng tarhamkamsi la? Ise ma ahu, ase ahu pajongjong sada rumah Bani? Pitah laho manutung dahupa namin i lobei-Ni.

⁷ On pe suruh ham ma bangku sada halak na pandei mangkorjahon omas, pirak, tombaga, bosi, hiou saholat sigenger pakon hiou saholat simahonda, sonai homa na pandei manguhir, laho mangkasomani siparhorja na pandei, na adong i lambungku i Juda pakon i Jerusalem, ai ma na pinabangkit ni bapa, si Daud.

⁸ Tongoshon ham ma homa bangku hayu ares, sampinur pakon ingul hun Libanon, ai hubotoh, na pandei do juakjuakmu pauli hayu i Libanon. juakjuakku pe mangkasomani juakjuakmu,

⁹ laho pasirsirhon parhayu bangku, buei tumang, ai rumah na sihol paulionkai, maningon bangga anjaha jombut do.

¹⁰ Anjaha tonggor ma, bereonku do hubani juakjuakmu, ai ma sipanrobah hayu, na pauli parhayu ai, dua puluh ribu kor gandum, dua puluh ribu kor andolei, dua puluh ribu bat anggur ampa dua puluh ribu bat minak.”

¹¹ Dob ai nini si Hiram, raja hun Tirus ma ibagas surat na tinongoskonni ai hubani si Salomo, “Halani

holong ni uhur ni Jahowa bani bangsa-Ni, ai do ase ipabangkit ham gabe raja manggomgomi sidea.”

¹² Ambah ni ai nini si Hiram do, “Pinuji ma Jahowa, Naibata ni Israel, na manompa langit pakon tanoh, na mamberehon bani raja Daud sada anak na pentar, na pantas maruhur anjaha na pandei martimbang, na marsura-sura pajongjong sada Rumah bani Jahowa ampa sada rumah harajaon bani sandiri.

¹³ Halani ai, husuruh do sada halak na pentar, na pandei martimbang, ai ma si Hiram-Abi,

¹⁴ anak ni sada naboru, humbani ginompar ni si Dan, tapi anggo bapani halak Tirus do. Na pentar do ia mangkorjahon omas, pirak, tombaga, bosu, batu pakon hayu, hiou saholat na gerger, hiou saholat na mahonda, hiou silopak na alus ampa hiou na tinubar, na pandei manguhir ampa mamingkiri bagei-bagei ni horja na laingan na niondoskon hu bani, laho mangkasomani halak na pentar, na adong bamu ampa bani tuanku, bapanta si Daud.

¹⁵ Antong itongoskon tuanku ma hubani juakjuakni gandum pakon andolei minak pakon anggur, na dob pinarbagahni ai;

¹⁶ ase irobok hanami hayu i Libanon barang sadiha na porlu bamu, hanami pe mamboan ai marrakit-rakit i laut hu Joppe, anjaha ham ma use mamboan ai tangkog hu Jerusalem.”

¹⁷ Dob ai ibilang si Salomo ma ganup halak dagang na adong i tanoh Israel, mangihutkon pamilangon na binahen ni bapani, si Daud, bani sidea; jadi jumpah ma saratus lima puluh tolu ribu onom ratus halak bueini.

¹⁸ Jadi ipapulig ma hunjai pitu puluh ribu halak sipanaruhi, ualuh puluh ribu halak sibarbar batu i dolog, anjaha tolu ribu onom ratus halak gabe mandur, na mangatur halak simbuei marhorja.

Ipajongjong si Salomo Rumah Panumbahan

(Pausih 1 Raj. 6:7, 15-22)

3 ¹ Dob ai ipungkah si Salomo ma pajongjong Rumah ni Jahowa i Jerusalem, i atas dolog Moria; ijai do ipatalar Jahowa diri-Ni hubani si Daud, bapani ai, ai ma ianan, na tinotapkon ni si Daud hinan, bani pardogeian ni si Ornan, halak Jebusi ai.

² Ipungkah ma pajongjongkon ai bani bulan dua paompat-tahunkon, dob manrajai ia.

³ Anjaha on do onjolan na binahen ni si Salomo, laho paulihon Rumah ni Naibata: Ganjangni onom puluh asta, mangihutkon ukuran sisapari, anjaha bolagni dua puluh asta.

⁴ Tapi anggo surambih na i lobei ai, dua puluh asta do ganjangni mangihutkon bolag ni rumah panumbahan ai; gijangni dua puluh asta do. Ilampis do ai humbagas bani omas pitah.

⁵ Kamar bolag ai pe ilampis do humbagas bani sampinur, dob ai ilampis ma ai use bani omas pitah; anjaha i atas ni ai iuhir ma palm pakon bunga na marrantei-rantei.

⁶ Ipanlongkothon do hu rumah ai batu na marharga bahen jagar-jagar. Ia omas ai, omas hun Parvaim do.

⁷ Ilampis do rumah ai bani omas: Tiang-tiangni, molmolanni, dingdingni pakon labahni; anjaha iuhirhon do Herub bani dingdingni ai.

⁸ Ipauli do kamar na pansing sahalian; ganjangni dua puluh asta mangihutkon bolag ni rumah panumbahan ai, anjaha bolagni pe dua puluh asta do; ilampis ma ai bani omas pitah, onom ratus talenta bueini.

⁹ Borat ni pakuni lima puluh sekel omas. Ilampis do kamar pardatas ai bani omas.

¹⁰ Ibahen do dua Herub na tinuang ibagas ianan na mapansing sahalian ai, anjaha ilampis do ai bani omas.

¹¹ Ia habong ni Herub na dua ai dua puluh asta do. Habongni na sada, lima asta ganjangni, dais bani dingding ni rumah ai, anjaha habongni na sada nari lima asta homa, dais hubani habong ni Herub na sada nari.

¹² Sonai homa do sada habong ni Herub na paduahon ai, lima asta ganjangni, anjaha dais do bani dingding ni rumah ai, anjaha habong ni na sada

nari ai, lima asta ganjangni, dais bani habong ni Herub na legan ai.

¹³ Habong ni Herub na dua ai mangerbang do, dua puluh asta ganjangni. Jongjong do sidea bani naheini sandiri, anjaha bohi ni sidea mandompakkon rumah ai.

¹⁴ Ipauli do homa tirei sada humbani hiou saholat na mahonda, hiou saholat na gerger, hiou hasumba pakon hiou silopak na alus, anjaha isulam do hujai Herub.

¹⁵ Ibahen ma homa i lobei ni rumah ai dua tiang, tolu puluh lima asta gijangni, anjaha uluni i atasni lima asta gijangni.

¹⁶ Ibahen ma homa rantei songon sinongkok, anjaha inahkon ma ai hu atas ni tiang ai; ipaturei ma saratus buah ni dalima, anjaha inahkon ma ai bani rantei-rantei ai.

¹⁷ Dob ai ipajongjong ma tiang ai i lobei ni rumah ai, sada hampit siamun, na sada nari hampit sambilou; na hampit siamun ai Jakin do ibahen goranni, anjaha na hampit sambilou ai Boas.

Parugas-parugas i Rumah Panumbahan

(Pausih 1 Raj. 7:23-51)

4 ¹ Ipauli do homa sada anjapanjap tombaga, dua puluh asta ganjangni, dua puluh asta bolagni anjaha sapuluh asta gijangni.

² Dob ai ipauli ma laut tuangan ai; gemong do ai, sapuluh asta hun bibir na sada hu na sada nari, gijangni lima asta, anjaha tolu puluh asta do ganjang ni panlilitini inggot.

³ Anjaha i toruh ni bibirni ai adong do gambaran ni lombu, tolu puluh asta ganjangni, inggot laut ai; dua baris do lombu ai, rap ituang pakon laut tuangan ai.

⁴ Jongjong do ai i atas ni sapuluh dua lombu, tolu mandompakkon utara, tolu mandompakkon hasundutan, tolu mandompakkon dangsina, tolu mandompakkon hapoltakan; i atas ni lombu ai do inahkon laut tuangan ai, anjaha dompak bagas do ihur ni lombu ai.

⁵ Ia hapalni santopak do; bibirni ai songon bibir ni panginuman do, songon bunga ni silundat, siat do ijai tolu ribu bat.

⁶ Ipauli do homa sapuluh tong parburihan, anjaha inahkon ma ai lima hampit siamun, lima hampit sambilou, ijai ma iburihi sidea sipakeion bani galangan situtungan; ia laut ai bahen parburihan ni malim do.

⁷ Ipauli do homa sapuluh parpalitaan omas, mardomu hubani na dob niaturhon hinan, anjaha inahkon ma ai hubagas rumah panumbahan ai, lima hampit siamun anjaha lima hampit sambilou.

⁸ Ipauli do homa sapuluh meja, anjaha inahkon ma ai hubagas rumah panumbahan ai, lima hampit

siamun anjaha lima hampit sambilou. Ipauli do homa saratus mangkuk pangurasan omas.

⁹ Ipadear do homa alaman bani malim ampa alaman bolag, sonai homa labah laho hu alaman ai ipauli do, anjaha ilampis ma ai bani tombaga.

¹⁰ Ia laut ai inahkon do ai hampit suhi-suhi paranggoni ni rumah ai.

¹¹ Ipauli si Huram do homa hudon, suyuk-suyuk ampa mangkuk pangurasan. Jadi salosei ma ibahen si Huram horja silahoanni ai bani Raja Salomo pasal Rumah ni Naibata:

¹² Na dua tiang ai ampa na dua ulu na i atas ni tiang na dua ai; na dua jala-jala ai, na manrungkub na dua ulu na i atas ni tiang ai;

¹³ siompat ratus buah ni dalima, na bani jala-jala na dua ai, dua baris buah dalima bani sada jala-jala, bahen panrungkub ni ulu na dua i atas ni tiang na dua ai.

¹⁴ Ipauli do homa panatang ampa tong na i atas ni ai,

¹⁵ pakon laut na sada ai, ampa lombu sisapuluh dua na i toruh ni ai.

¹⁶ Sonai homa hudon, suyuk-suyuk pakon garpu ampa haganup parugas na masuk hujai ipauli si Huram-Abi humbani tombaga bani Raja Salomo, ai ma haporluan bani Rumah ni Jahowa.

¹⁷ Bani pamah ni Jordan do isuruh raja ai tuangon ai bani tuangan na humbani tanoh halampung, i holang-kolang ni Sukot pakon Sartan.

¹⁸ Buei tumang do parugas na pinauli ni si Salomo ai, pala seng tartimbang borat ni tombaga ai.

¹⁹ Ihatahon si Salomo do homa paulihon ganup parugas na i Rumah ni Naibata; anjapanjap omas, meja ni ruti sigalangkonon ai,

²⁰ parpalitaan ai ampa palitani humbani omas pitah, sipagaraon i lobei ni kamar na pansing sahalian ai, songon na dob tinonahkon hinan,

²¹ pakon bungani, palitani ampa rasipni humbani omas pitah;

²² ambah ni ai pisou, mangkuk pangurason, pinggan pardahupaan, ampa balanga parapuyan humbani omas pitah; sonai homa engsel ni rumah ai, na bani labah parbagas laho hu kamar na pansing ai pakon na bani labah ni kamar na pansing ai humbani omas do.

5 ¹ Jadi saloseihonsi ganup horja, na hinorjahon ni si Salomo bani Rumah ni Jahowa, iboan si Salomo ma hubagas ganup parugas, na dob niuras ni bapani, si Daud, anjaha inahkon ma pirak, omas ampa haganup parugas ai hu kamar parartaan ni Rumah ni Naibata.

Pamongkotan bani Rumah Panumbahan

(Pausih 1 Raj. 8:1-11)

² Dob ai ipatumpu si Salomo ma pangintuai ni halak Israel pakon ganup pambobai ni halak Israel mar sasamarga ampa pambobai ni mar sasaompung hu Jerusalem, laho mamboan tangkog poti parpadanan ni Jahowa hun huta ni si Daud, ai ma Sion.

³ Jadi martumpu ma hu lobei ni raja ai sagala dalahi i Israel bani ari pesta na bani bulan pitu.

⁴ Jadi dob roh ganup pangintuai ni Israel, iangkat halak Levi ma poti parpadanan ai,

⁵ iboan sidea ma poti ai tangkog pakon lampolampo partumpuan ai ampa ganup parugas na mapansing, na i lampolampo ai hinan. lusung malim ampa halak Levi ma ai tangkog.

⁶ Tapi anggo Raja Salomo ampa ganup tumpuan ni halak Israel ai, na martumpu i lambungni, jongjong do i lobei ni poti ai, anjaha manggalangkon biribiri ampa lembu, sonai ma bueini, pala lang tarbilang barang taretong.

⁷ Jadi das ma iboan malim ai poti parpadanan ni Jahowa hubani iananni, hubagas kamar parpudi ni rumah panumbahan ai, ai ma hubagas kamar na pansing sahalian ai, hu toruh ni habong ni Herub na dua ai,

⁸ anjaha ipaherbang Herub ai do habongni na dua ai hu babou ni hajongjongan ni poti ai, lanjar irungkub Herub ai do poti ai ampa lanja-lanjani.

⁹ Sonai ma ganjang ni lanja-lanjani ai, pala boi idahon ujungni hun kamar na mapansing ai, i lobei ni kamar parpudi ai; tapi anggo hun darat seng taridah. Lanjar ijai do ai ronsi sadari on.

¹⁰ Seng dong atap aha ibagas poti ai, sobali na dua batu panuratan ai, na ninahkon ni si Musa hujai sanggah i Horeb, sanggah na marpadan Jahowa hubani halak Israel, sanggah na luar sidea hun tanoh Masir.

¹¹ Tapi sanggah na luar ai malim ai hun kamar na mapansing ai, haganup malim na ijai ai domma manguras bei hinan, seng mangihutkon parbagiananni bei,

¹² sonai homa pandoding na humbani halak Levi, si Asap, si Heman, si Jedutun, anak ni sidea ampa sanina ni sidea, jongjong do sidea haganup, marpakeian hiou silopak na alus, anjaha manjolom tambur, arbap ampa husapi hampit hapoltakan ni anjapanjap ai, anjaha saratus dua puluh malim na manompul tarompit.

¹³ Anjaha sanggah na manompul tarompit ampa na mandoding ai sidea, songon sada sora do ai bogeion, laho mamuji ampa mangkatahon tarima kasih bani Jahowa; anjaha sanggah na tarbogei doding ai, marhasoman tarompit, arbap pakon

parsora na laingan na legan, bahen puji-pujian bani Jahowa, “Ai pardear layak do la, ai ronsi sadokah ni dokahni do idop ni uhur-Ni, jadi gok ma Rumah ni Jahowa ai ibahen hambun,

¹⁴ gabe seng be tahan malim ai jongjong marugas ibahen hambun ai; ai hamuliaon ni Jahowa do manggoki Rumah ni Naibata.

Hata sipaingat ni si Salomo bani Halak Simbuei

(Pausih 1 Raj. 8:12-53)

6 ¹ Dob ai nini si Salomo ma, “Domma ipatugah Jahowa hinan, sihol marianan do la bani ianan na golap.

² Domma hupauli Bamu sada Rumah bahen ianan-Mu, bahen onjolan ni paratas-Mu ronsi sadokah ni dokahni.”

³ Dob ai mangkawah ma raja ai inggot anjaha ipasupasu ma ganup tumpuan ni halak Israel ai, sanggah na jongjong ijai ganup tumpuan ni halak Israel ai.

⁴ Anjaha nini ma, “Pinuji ma Jahowa, Naibata ni Israel, na pasaudkon marhitei tangan-Ni, ai ma na dob binagahkon-Ni, marhitei pamangan-Ni hubani bapa si Daud, sanggah na hinatahon-Ni,

⁵ ‘Humbani ari na dob Huarahkon luar bangsang-Ku hun tanoh Masir, seng onggga ope Hupilih sada huta i tongah-tongah ni ganup marga Israel, ase ijai ipajongjong sada rumah ianan ni goran-Ku,

anjaha seng dong Hupilih sada raja, manggomgom bangsang-Ku halak Israel.

⁶Tapi domma Hupilih anggo Jerusalem, ase ijai jonam goran-Ku, anjaha domma Hupilih si Daud, ase ia manggomgom bangsang-Ku, halak Israel.'

⁷Domma namin isura-surahon bapa, si Daud, sihol paulihon sada rumah bani goran ni Jahowa, Naibata ni Israel,

⁸tapi nini Jahowa do hubani bapa, si Daud, 'Isura-surahon ho do pajongjongkon sada rumah bani goran-Ku, dear do sura-suramai.

⁹Tapi seng bulih ho pajongjongkon rumah ai; anakmu, na luar humbani binongeimu do na maningon pajongjongkon rumah ai bani goran-Ku.'

¹⁰Domma ipasaud Jahowa nuan hata-Ni, na dob hinatahon-Ni ai, ai domma ipabangkit ahu ganti ni bapa, si Daud, anjaha domma hundul ahu bani paratas ni Harajaon Israel, songon na dob binagahkon ni Jahowa, anjaha domma hupajongjong sada rumah bani goran ni Jahowa, Naibata ni Israel,

¹¹anjaha domma hunahkon hujai poti ai, ianan ni titah parpadanan, na binahen ni Jahowa hubani halak Israel."

Tonggo ni si Salomo Mangondoskon Rumah ai bani Jahowa

¹² Dob ai jongjong ma raja ai i lobei ni anjapanjap ni Jahowa i lobei ni ganup tumpuan ni halak Israel, anjaha ipaherbang ma tanganni.

¹³ Domma ibahen si Salomo sada parambilanan humbani tombaga, anjaha inahkon do ai hu tongah-tongah ni alaman, lima asta do ganjangni, lima asta bolagni anjaha tolu asta do gijangni. Jadi jongjong ma ia hu atasni, manrogop ma ia i lobei ni ganup tumpuan ni halak Israel, anjaha ipaherbang ma tanganni dompak langit.

¹⁴ Dob ai nini ma, “Ham Jahowa, Naibata ni Israel! Seng dong Naibata usih songon Ham, age i nagori atas, age i tanoh on, na patotapkon parpadanan pakon idop ni uhur bani jabolon-Mu, na marparlahou i lobei-Mu humbani gok ni uhurni.

¹⁵ Ham do na pasaudkon hubani bapa, jabolon-Mu si Daud, na dob binagahkon-Mu hu bani; nai ma tongon, Ham do na mambagahkon ai marhitei pamangan-Mu, anjaha marhitei tangan-Mu ipasaud Ham do ai sadari on.

¹⁶ Ai pe, Ham Jahowa, Naibata ni Israel, sai pasaud Ham ma hubani jabolon-Mu, bapa, si Daud, hata na dob binagahkon-Mu hu bani, sanggah na hinatahon-Mu, ‘Seng anjai hurang bam sada dalahi i lobei-Hu, na hundul bani paratas ni Israel, asal ma ra

anakmu mardiateihon dalan ni sidea, marparlahou ibagas titah-Ku, songon ho marparlahou i lobei-Hu.'

¹⁷ Ai pe, Ham Jahowa, Naibata ni Israel, sai pasaud Ham ma hata-Mu, na dob hinatahon-Mu hubani jabolon-Mu, si Daud.

¹⁸ Tapi, sihol do tongon Naibata marianan rap pakonjolma i tanoh on? Tonggor ma, gari langit ni langitan seng tarhamkamsi Ham, samintolah rumah na hupauli on ma?

¹⁹ Tapi sai manatap ma Ham hubani tonggo ni jabolon-Mu on ampa hubani elek-elekni, Ham Jahowa, Naibatanku. Sai tangihon ma dilo-dilo pakon tonggo, na tinonggohon ni jabolon-Mu on i lobei-Mu.

²⁰ Sai kawah ma panonggor-Mu hu rumah on arian pakon borngin, hubani ianan, na dob binagahkon-Mu, ase ijai bahenon-Mu marianan goran-Mu; ase tangihonon-Mu tonggo na tinonggohon ni jabolon-Mu bani ianan on.

²¹ Sai tangihon Ham ma tongon elek-elek ni jabolon-Mu pakon bangsa-Mu, halak Israel, na tinonggohon ni sidea bani ianan on. Sai tangihon Ham ma in tongon humbani ianan-Mu marparatas, hun nagori atas; anjaha anggo itangar Ham ai, marpangulaki ma uhur-Mu.

²² Anggo mardousa sada halak dompak hasomanni, anjaha ipabija ia halani ai, gabe saud ia marbija i lobei ni anjapanjap-Mu ibagas rumah on,

²³ sai tangihon Ham ma hun nagori atas, anjaha dalankon Ham ma uhum bani jabolon-Mu, marhitei na mansalahkon parsalah, ase manginsonoh pambahenanni bani uluni sandiri, tapi mamintori halak parpintor, anjaha mambahen bani domu hubani hapintoranni.

²⁴ Anjaha porini talu bangsa-Mu, halak Israel, ibahen munsuhni, halani mardousa sidea Bamu, tapi anggo mulak sidea anjaha isaksihon sidea goran-Mu, martonggo anjaha mangelek-elek sidea i lobei ni bohi-Mu i rumah on,

²⁵ sai tangihon Ham ma hun nagori atas, anjaha marpangulaki ma uhur-Mu mangidah dousa ni bangsa-Mu halak Israel, anjaha boan Ham ma use sidea hu tanoh, na binerehon-Mu hubani sidea pakon hubani ompung ni sidea.

²⁶ Porini tartutup langit, gabe seng roh udan, halani mardousa sidea dompak Ham, dob ai martonggo sidea bani ianan on, anjaha mulak sidea humbani dousa ni sidea, halani na dob ipatoruh Ham sidea,

²⁷ sai tangihon Ham ma hun nagori atas, anjaha marpangulaki ma uhur-Mu mangidah dousa ni jabolon-Mu pakon bangsa-Mu halak Israel, halani na dob niajarhon-Mu bani sidea dalan na madear, sidalanan ni sidea, anjaha bere Ham ma udan hu tanoh-Mu, na dob binere-Mu hubani bangsa-Mu bahen parbagiananni.

²⁸ Anggo masa lohei i tanoh on, anggo masa sampar, masak juma barang antinganouon, masa balang atap tamponok; anggo isosak munzuhni sidea ibagas huta ni sidea, anggo masa sitaronon na ijahanin pe barang naborit na ijahanin pe,

²⁹ ai pe, barang aha na tinonggohon barang na pinindo ni sada halak barang ganup bangsa-Mu halak Israel, halani na dob mangahap sidea ganup bani lonsing-lonsing pakon na maborit, gabe ipaherbang tanganni dompak rumah on,

³⁰ sai tangihon Ham ma hun nagori atas, ianan-Mu marparatas, marpangulaki ma uhur-Mu, anjaha bere Ham ma bani sidea ganup domu hubani dalanni bei, songon pananda-Mu bani uhur ni sidea, ai Ham tumang do hansa, na mananda uhur ni jolma manisia;

³¹ ase ihabiari sidea Ham, anjaha marparlahou sidea ibagas dalan-Mu, sadokah sidea manggoluh i tanoh, na dob binerehon-Mu hubani ompung ni sidea.

³² Sonai homa halak na legan, na so humbani bangsa-Mu halak Israel, na roh hun tanoh na daoh, halani goran-Mu na timbul in pakon tangan-Mu na gogoh in, ampa botohon-Mu na gostong in, anggo roh ia anjaha martonggo dompak rumah on,

³³ sai tangihon Ham ma hun nagori atas, ianan-Mu marparatas, anjaha bahen Ham ma romban hubani pangindoan ni halak na legan ai Bamu,

ase andohar ganup bangsa, na i atas tanoh on, mananda goran-Mu anjaha ihabiari Ham, songon bangsa-Mu halak Israel, anjaha ase ibotoh sidea, ia rumah na hupajongjong on, marpanggorani bani goran-Mu do on.

³⁴ Anggo bingkak bangsa-Mu hu parporangan dompak munsuh ni sidea, hun dalan na ijahanin pe isuruh Ham sidea, anjaha martonggo sidea Bamu mandompakkon huta on, na dob pinilih-Mu on, anjaha mandompakkon rumah on, na dob hupajongjong bani goran-Mu,

³⁵ sai tangihon Ham ma tonggo ni sidea pakon pangindoan ni sidea hun nagori atas, anjaha patotap Ham ma uhum bani sidea.

³⁶ Porini mardousa sidea dompak Ham, ai seng dongjolma age sada na so mardousa, anjaha manringis Ham dompak sidea, anjaha iondoskon Ham sidea bani munsuhni, gabe tarbuang sidea hu tanoh na daoh atap na dohor,

³⁷ anggo ipaulak sidea uhumni dompak bagas i tanoh habuangan ni sidea ai, anjaha ipaubah sidea uhum ni sidea, anjaha martonggo sidea Bamu i tanoh habuangan ni sidea anjaha nini, 'Domma mardousa hanami, domma ihorjahon hanami hajahaton, anjaha domma manggeori hanami,'

³⁸ anggo mulak sidea hu Bamu humbani gok ni pingkiran ni sidea pakon humbani gok ni uhum ni sidea i tanoh habuangan ni sidea, anjaha

martonggo sidea dompak tanoh ni sidea, na dob binere-Mu hubani ompung ni sidea pakon dompak huta na dob pinilih-Mu pakon dompak rumah na dob hupauli bani goran-Mu,

³⁹ sai tangihon Ham ma hun nagori atas, ianan-Mu marparatas, tonggo pakon pangindoan ni sidea, anjaha patotap Ham ma uhum bani sidea, anjaha marpangulaki ma uhur-Mu bani dousa ni sidea ai, na hinorjahon ni bangsa-Mu dompak Ham.

⁴⁰ Ai pe, Ham Naibatanku, sai kawah ma panonggor-Mu, anjaha tangi ma pinggol-Mu mambalosi tonggo bani ianan on.

⁴¹ Ai pe, Ham Naibata Jahowa, sai jongjong ma Ham marayak parsaranan-Mu on, Ham pakon poti ni hamuliaon-Mu. Sai bahen Ham ma malim-Mu, Ham Naibata Jahowa, marpakeian hatuahon, anjaha bahen Ham ma na niidopan-Mu marmalas ni uhur ibagas dear layak-Mu.

⁴² Ham Naibata Jahowa, ulang ma tulak Ham bohi ni na mininakan-Mu. Sai ingat Ham idop ni uhur-Mu, na binagahkon-Mu hubani si Daud jabolon-Mu.”

Partalar ni Hamuliaon ni Jahowa

(ay. 4-10: pausih 1 Raj. 8:62-66)

7¹ Jadi saloseihonsi si Salomo na martonggo ai, roh ma apuy hun nagori atas hu toruh, mamboiskon galangan situtungon pakon galangan

sisayaton ai, anjaha igoki hamuliaon ni Jahowa ma rumah panumbahan ai,

² pala seng tahan sagala malim ai masuk hu Rumah ni Jahowa, halani igoki hamuliaon ni Jahowa do rumah panumbahan ai.

³ Jadi dob iidah ganup halak Israel roh apuy ai hu toruh, anjaha hamuliaon ni Jahowa sogop hu rumah panumbahan ai, manrogop ma sidea i dasor, martonggo anjaha mamuji-muji Jahowa, nini, “Pardear layak do la, anjaha ronsi sadokah ni dokahni do idop ni uhur-Ni.”

⁴ Dob ai igalangkon raja ai rap pakon ganup bangsa ai ma galangan sisayaton i lobei ni Jahowa.

⁵ Igalangkon raja ai ma galangan dua puluh dua ribu lembu pakon saratus dua puluh ribu biribiri. Sonai ma pamongkot ni raja ai pakon ganup bangsa ai bani Rumah ni Naibata.

⁶ Jongjong bei ma malim ai marugas bani iananni; sonai homa halak Levi sijolom parugas musik ni Jahowa, na hinatahon ni raja Daud paulion, laho mambere puji-pujian bani Jahowa, marhitei doding “Ai ronsi sadokah ni dokahni do idop ni uhur-Ni ai.” Jadi malim, na i dipar ni sidea ai pe, manompul tarompit do, anjaha ganup bangsa ai jongjong bei.

⁷ Anjaha iuras si Salomo ma alaman parbagas ai, na i lobei ni Rumah ni Jahowa; ai ijai do igalangkon galangan situtungon ai pakon taboh-taboh ni galangan pardameian ai, halani lang siat

galangan situtungon pakon galangan sipanganon ampa taboh-taboh ai bani anjapanjap tombaga, na binahen ni si Salomo.

⁸ Dob ai marpesta ma si Salomo ijai pitu ari dokahni rap pakon ganup halak Israel, sada tumpuan na bolon tumang; singgan dalan laho hu Hamat das ronsi Bah Masir, marrohan bei do.

⁹ Anjaha bani ari paualuhkon marpartumpuan na majombut ma sidea, ai pitu ari do panggalangan bani anjapanjap ai, anjaha na marpesta ai pe pitu ari do.

¹⁰ Paduapuluh-arihon bani bulan pitu, isuruh ma sidea mulak hu rumahni bei, marmalas ni uhur anjaha sonang, halani haganup na madear, na binahen ni Jahowa hubani ni Daud pakon hubani si Salomo ampa hubani halak Israel bangsa-Ni ai.

Ipataridahkon Jahowa Diri-Ni Padua-halihan bani si Salomo

(ay. 11-22: pausih 1 Raj. 9:1-9)

¹¹ Jadi siap ma ibahen si Salomo Rumah ni Jahowa pakon rumah ni raja ai; haganup na sinurahon ni si Salomo, sibahenonni bani Rumah ni Jahowa pakon bani rumahni sandiri, jadi do.

¹² Dob ai ipataridahkon Jahowa ma diri-Ni bornginni ai hubani si Salomo, nini ma hu bani, “Domma Hutangihon tonggomu, anjaha domma Hupilih ianan on Bangku bahen rumah panggalangan.

¹³ Anggo Hututup langit ai, gabe seng roh udan, barang Huparentahkon balang, laho mamboiskon tanoh in, barang Huhatahon roh sampar hu tongah-tongah ni bangsang-Ku,

¹⁴ gabe ipaunduk bangsang-Ku, na targoran bani goran-Ku uhurni, anjaha martonggo sidea mangindahi bohing-Ku, anjaha mulak sidea humbani dalan ni sidea na bajan ai, jadi tangihonon-Ku ma ai hun nagori atas, sasapon-Ku ma dousa ni sidea ai, anjaha pamalumon-Ku ma tanoh ni sidea ai.

¹⁵ Kawah ma matang-Ku, anjaha tangi ma pinggol-Hu hubani tonggo, na tinonggohon bani ianan on.

¹⁶ On pe domma Hupilih anjaha Hupapansing rumah on, ase ijai goran-Ku ronsi sadokah ni dokahni; matang-Ku pakon uhur-Hu pe sai ijai do bani sagala panorang.

¹⁷ Tapi ho, anggo marparlahou ho i lobei-Hu, songon bapamu si Daud, anjaha ihorjahon ho haganup, romban hubani na Hutonahkon in bam, anjaha iramotkon ho aturan-Ku pakon uhum-Hu,

¹⁸ jadi patotapon-Ku ma paratas ni harajaonmin, romban hubani na dob Huparbagah hubani bapamu si Daud, sanggah na Huhatahon, 'Seng anjai hurang bam sada dalahi panggomgomi bani Israel.'

¹⁹ Tapi anggo marbalik hanima anjaha itadingkon hanima aturan-Ku pakon tonah-Ku, na Hunahkon i

lobeinima, gabe laho hanima mambalosi naibata na legan anjaha marsombah hujai,

²⁰ jadi siapkonon-Ku ma hanima hun tanoh-Ku, na Hubere in hu bennima, anjaha rumah on, na dob Hupapansing bani goran-Ku, padaohon-Ku ma in hun lobei ni bohing-Ku, anjaha bahenon-Ku ma in gabe umpama ampa sipahiri-hirion i tongah-tongah ni ganup bangsa.

²¹ Anjaha ganup halak na manlaosi rumah na timbul on, longang ma anjaha sungkun-sungkun, ‘Mase ma nani sonai ibahen Jahowa hu tanoh on pakon hu rumah on?’

²² Jadi nini halak ma mambalosi, ‘Halani na tinadingkon ni sidea do Jahowa, Naibata ni ompung ni sidea, na mangarahkon sidea luar hun tanoh Masir, anjaha marsijoloman sidea bani naibata na legan, marsombah anjaha mambalosi sidea hujai, halani ai do, ase iparoh Jahowa bani sidea haganup hamagouan on.’”

Horja Pambangunan ampa Horja Rodi, na Binahen ni si Salomo

(Pausih 1 Raj. 9:10, 17-28)

8 ¹ Jadi dob salpu na dua puluh tahun ai, ai ma dokahni si Salomo pajongjong Rumah ni Jahowa pakon rumahni sandiri,

² *(ipauli si Salomo do homa huta, na pinaulak ni si Hiram hubani si Salomo, anjaha isuruh halak Israel ijai marianan),*

³ Iaho ma si Salomo hu Hamat-Soba, anjaha italuhon ma ai.

⁴ Ibatar-batari ma huta Tadmor, na i halimisan, pakon ganup huta parbohalan, na pinajongjongni i Hamat.

⁵ Ibatar-batari ma homa Bethoron pardolog pakon Bethoron parbornoh, martembok, marhorbangan ampa marransang-ransang.

⁶ Sonai homa Baalat pakon ganup huta parbohalan, na adong bani si Salomo, sonai age ganup sinurasurahonni sipajongjongonni i Jerusalem, i Libanon ampa bani ganup tanoh gomgomanni ai.

⁷ Haganup halak, simasima ni halak Heti, Amori, Peresi ampa Jebusi, ai ma na so humbani halak Israel,

⁸ ginompar ni sidea, na tading ipudi ni sidea i tanoh in, na so siniapkon ni halak Israel, sidea ma na marrodi ibahen si Salomo, anjaha sonai do ronsi sadari on.

⁹ Tapi anggo humbani halak Israel seng adong age sahalak na hona rodi ibahen si Salomo; gabe halak siparporang do sidea ibahen, gabe kopala ni balani pakon kopala ni gareta porangni pakon siajak hudani.

¹⁰ Lanjar sidea do juakjuak bolon ni si Salomo, na mamarentah bangsa ai, dua ratus lima puluh halak bueini.

¹¹ Dob ai iboan si Salomo ma tangkog boru ni Parao hun huta ni si Daud hu rumah na pinaulini ai bani, ai nini do, “Seng dear marianan parinangonku i rumah ni si Daud, raja ni Israel, ai pansing do ianan ai, halani onga ijai poti ni Jahowa.”

¹² Ijai ma igalangkon si Salomo galangan situtungon hubani Jahowa i atas anjapanjap ni Jahowa, na pinajongjongni ai,

¹³ ganup bani arini bei igalangkon romban hubani tonah ni si Musa, ai ma bani ari Sabat, bani poltak ni bulan pakon bani pesta sitolu hali satahun: Pesta ruti na so niigaran, pesta sisaminggu pakon pesta parlampolampoan.

¹⁴ Romban hubani aturan, na binahen ni si Daud bapani ai, itontuhon raja ai ma parbagianan ni malim bani horjani bei, sonai homa horja ni halak Levi, ai ma mamuji pakon marugas mangurupi malim, songon na dob tinonahkon bani sidea ganup ari; sonai homa horja bani sijaga horbangan mangihutkon parbagianan bani ganup horbangan, ai sonai do parentah ni si Daud, halak ni Naibata ai.

¹⁵ Seng manlembang sidea humbani na dob pinarentahkon ni raja ai hubani malim pakon halak Levi ai, pasal atap aha pe ronsi pasal arta-arta ai.

¹⁶ Sonai ma pardob ni ganup horja ni si Salomo, singgan ni parjongjong ni onjolan ni Rumah ni Jahowa das hubani na dob rumah panumbahan ai marhitei si Salomo.

Parkapalon ni si Salomo

¹⁷ Dob ai laho ma si Salomo hu Ezion-Geber pakon hu Elat, na i topi ni Laut Sigerger, i tanoh ni halak Edom.

¹⁸ Itongos si Hiram do bani kapal marhitei juakjuakni pakon halak na somal marlayar i laut. Laho do sidea hu Opir rap pakon juakjuak ni si Salomo, anjaha iboan sidea do hunjai omas ompat ratus lima puluh talenta bueini, anjaha iboan ma ai bani raja Salomo.

Parroh ni Raja Naboru na hun Seba

(Pausih 1 Raj. 10)

9¹ Jadi ibogei raja naboru na hun Seba ma barita ni si Salomo, gabe roh ma ia hu Jerusalem, laho mangujisi marhitei sungkun-sungkun na bagas, marhasoman pangiring na bolon pakon unta na mamboan marbagei-bagei na misbou pakon buei omas ampa mata intan. Jadi dob das ia hubani si Salomo, ipatugah ma bani haganup, na adong ibagas uhurni.

²Jadi ibalosi si Salomo ma ganup sungkunsungkunni ai; anjaha seng dong na ponop bani si Salomo, na so pinatorangni hu bani.

³Dob iidah raja naboru na hun Seba ai hapentaran ni si Salomo, rumah na pinaulini,

⁴sipanganon na i mejani, parhundul ni juakjuakni, pangidangi ni siparugas ampa pakeian ni sidea, sitahu anggur ampa pakeian ni sidea ronsi galangan situtungon, na ginalangkonni i Rumah ni Jahowa, gabe malitonduy ma ia.

⁵Jadi nini ma dompak raja ai, “Sintong do hape barita na hubogei i tanohku, ai ma pasal ham ampa hapentaranmu.

⁶Tapi seng iparhatongon uhuru lobei barita ai, paima roh ahu, anjaha iidah matangu sandiri ai; hape tonggor ma, satongah humbani habanggalon ni hapentaranmu seng ibaritahon hu bangku; ilobihi ham do barita na hubogei ai.

⁷Martuah ma parinangonmu, martuah ma pakon juakjuakmu, na marugas tongtong i lobeimu pabogei-bogei hapentaranmu.

⁸Pinuji ma Jahowa Naibatamu, na marosuh mangidah ham, gabe ipabangkit ham bani paratas-Ni, gabe raja bani Jahowa Naibatamu. Halani holong ni uhur ni Naibatamu bani Israel, anjaha sihol patotapon-Ni ai ronsi sadokah ni dokahni, mambahen ipabangkit Naibata ham gabe

raja manggomgom sidea, ase idalankon ham uhum pakon hapintoran.”

⁹ Dob ai ibere naboru ai ma hubani raja ai saratus dua puluh talenta omas pakon rium-riuman, rompah buei tumang ampa mata intan; seng onggabe roh rium-riuman, rompah sonai bueini, songon na binere ni raja naboru na hun Seba ai bani Raja Salomo.

¹⁰ Ambahni ai iboan juakjuak ni si Hiram pakon juakjuak ni si Salomo do, ai ma sialop omas hun Opir, hayu jati ampa mata intan.

¹¹ Ihatahon raja ai ma paulion andar bani Rumah ni Jahowa ampa bani rumah ni raja ai, sonai homa husapi pakon tulila bani sipandoding; seng dong onggataridah hayu na sonai ai na saindokah i tanoh Juda.

¹² Raja Salomo pe, ibere do bani raja naboru na hun Seba ai, sagala na pinarsintani ampa na pinindoni, lobih humbani na binereni hubani raja ai. Dob ai mulak ma ia rap pakon juakjuakni hu tanohni.

Pansarian pakon Habayakon ni Raja Salomo

¹³ Ia borat ni omas, na roh hubani si Salomo ibagas satahun, onom ratus onom puluh onom talenta omas do,

¹⁴ sobalini na binoan ni partiga-tiga ampa saudagar; anjaha ganup raja ni halak Arab ampa halak na

bayak i tanoh ai mamboan omas pakon pirak hubani si Salomo.

¹⁵ Ihatahon Raja Salomo ma paulihon dua ratus gantar omas na banggal; pala do onom ratus sekel omas ilampiskon bani sada gantar.

¹⁶ Ambahni ai tolu ratus gantar omas na etek; ai tolu ratus sekel omas do ilampiskon bani sada gantar ai. Hu rumah harangan Libanon do inahkon raja ai ai.

¹⁷ Ipauli raja ai do homa sada paratas gading, anjaha ilampis do ai bani omas pitah.

¹⁸ Onom do talkah ni paratas ai, anjaha adong do sada tampeian ni nahei humbani omas longkot hubani paratas ai, anjaha bani angkup lopah hundulan ai adong do tampeian ni tangan anjaha jongjong do dua singa i lambung ni tampeian ni tangan ai.

¹⁹ Anjaha sapuluh dua singa do jongjong bani talkah na onom ai, angkup lopah; seng dong onggga na sonai ai ipauli bani harajaon na ijahanin pe.

²⁰ Sonai homa haganup panginuman ni Raja Salomo humbani omas do, anjaha haganup parugas ni rumah harangan Libanon ai pe humbani omas pitah do, ai songon na so marguna do pirak bani uhur ni halak sanggah bani panorang ni si Salomo.

²¹ Ai laho do kapal ni raja ai hu Tarsis rap pakon juakjuak ni si Hiram; sahali ibagas tolu tahun roh do kapal Tarsis mamboan omas, pirak, gading, bodat ampa uou.

²² Ase timbulan do Raja Salomo humbani haganup raja ni tanoh on pasal habayakon ampa hapentaran.

²³ Sihol do idahon ni ganup raja na i tanoh on bohi ni si Salomo, laho mambogei hapentaranni, na dob binere ni Naibata hubagas uhurni.

²⁴ Ganup sidea marsiboan siluahni, ai ma parugas pirak ampa omas, pakeian sinjata pakon rium-riuman, huda pakon halode, siap tahun.

²⁵ Adong do bani si Salomo ompat ribu parianan bani huda pakon gareta, pakon sepuluh dua ribu halak siajak huda, na ninahkonni ibagas huta pargaretaan ampa i Jerusalem i lambung ni raja ai.

²⁶ Ia do manggomgom ganup raja singgan ni Bah Eprat das hu tanoh ni halak Palistim das hu parbalogan ni Masir.

²⁷ Jadi ipatumpu raja ai ma pirak i Jerusalem songon buei ni batu, anjaha hayu ares songon jambu tubuh i tanoh bornoh bueini.

²⁸ Ia harohan ni huda hubani si Salomo, ai ma hun Masir ampa hun haganup nagori na inggot ai.

Parmatei ni si Salomo

(ay. 29-31: pausih 1 Raj. 11:41-43)

²⁹ Ia barita na tading ai ope pasal si Salomo, humbani mungkahni das hubani ujungni, ai lang tarsurat do ai ibagas Barita ni Nabi Natan pakon ibagas Buku Panjahaion ni si Ahia na hun Silo, ampa ibagas Buku Pangungkabon ni si Jedi, halak

na marpanonggoran ai dompak si Jerobeam, anak ni si Nebat?

³⁰ Ompat puluh tahun do dokahni si Salomo manggomgom ganup halak Israel, i Jerusalem.

³¹ Dob ai modom ma si Salomo rap pakon ompungni, anjaha itanom ma ia ibagas huta ni si Daud, bapani ai. Jadi si Rehabeam, anakni ai ma bangkit raja manggantihsi.

Bolah Dua Harajaon ai

(Pausih 2 Raj. 12:1-19)

10 ¹ Dob ai laho ma si Rehabeam hu Sikem, ai domma roh ganup halak Israel hu Sikem sihol manrajahonsi.

² Jadi dob ibogei si Jerobeam, anak ni si Nebat barita ai, *(ai i Masir do ia, hujai do ia maporus halani Raja Salomo)*, gabe mulak ma ia hun Masir;

³ ai domma isuruh sidea hinan suruhanni mandilosi. Dob ai roh ma si Jerobeam rap pakon ganup Israel, marsahap ma sidea rap pakon si Rehabeam, nini ma,

⁴ “Borat do pasangannami ibahen bapanta. Ai pe pahampung ham ma rodi na borat, na binahen ni bapanta ai pakon pasangan na borat, na tinampeihonni ai bennami, ase ra hanami unduk bamu.”

⁵ Tapi nini ma dompak sidea, “Roh ma nasiam hu bangku tolu ari nari.” Jadi laho ma bangsa ai.

⁶ Dob ai manriah raja Rehabeam rap pakon partua-partua, hasoman ni si Salomo, bapani ai, sapanriahan, sanggah bani goluhni, nini ma, “Naha do podah nasiam bangku, laho mambalosi bangsa on?”

⁷ Jadi nini sidea ma hu bani, “Anggo basar ham bani bangsa on anjaha ihatahon ham hata na lamlam bani sidea, jadi pambalosi ma sidea bamu sadokah ham manggoluh.”

⁸ Tapi seng itangihon podah, na pinodahkon ni partua-partua ai bani, jadi laho ma ia manriah rap pakon halak siposonan, hasomanni magodang, na marugas i lobeini.

⁹ Dob ai nini ma dompak sidea, “Aha do podah nasiam, bahen balosta hubani bangsa on, na mangkatahon bangku, ‘Pahampung ham ma pasangan, na tinampeihon ni bapanta bannami?’”

¹⁰ Jadi nini halak siposonan, hasomanni magodang ai ma bani, “Sonon ma hatahon ham hubani bangsa on, na mangkatahon bamu: Borat do pasangan, na binahen ni bapanta bannami, pahampung ham ma ai hubannami, ‘Banggalan do didihilhu ase haehae ni bapa.

¹¹ Borat pe pasangan na tinampeihon ni bapa bani nasiam, lambin boratni ope ai bahenonku; ia bapa lonsing-lonsing do ibahen maminsang nasiam, tapi anggo ahu gansip golang do bahenonku maminsang nasiam.’”

¹² Jadi patolu-arohon roh ma si Jerobeam rap pakon ganup bangsa ai marayak si Rehabeam, songon na hinatahon ni raja ai hinan, “Roh ma nasiam use hu bangku patolu-arohon.”

¹³ Jadi koras ma balos ni raja ai bani sidea; seng ibalosi raja ai podah ni partua-partua ai,

¹⁴ tapi ihatahon ma bani sidea romban hubani podah ni halak siposonan ai, “Borat pe pasangan na tinampeihon ni bapa bani nasiam, tapi lambin boratni ope ai bahenonku; ia bapa lonsing-lonsing do ibahen maminsang nasiam, tapi anggo ahu gansip golang do bahenonku maminsang nasiam.”

¹⁵ Ase seng ibalosi raja ai pangindoan ni bangsa ai; ai sonai do panaktakkon ni Naibata, ase ipasaud Jahowa hata-Ni, na dob hinatahon-Ni marhitei si Ahia, na hun Silo, hubani si Jerobeam, anak ni si Nebat.

¹⁶ Jadi dob iidah ganup Israel, na so binalosan ni raja ai pangindoan ni sidea, nini bangsa ai ma mambalosi raja ai, “Aha ma rupeita bani si Daud? Seng dong siteanonta humbani anak ni si Isai. Laita, alo Israel, ganup mulak hu lampolamponi bei! On pe, rumahmu sandiri ma paingat-ingat, alo Daud!” Dob ai mulak ma ganup Israel, hu lampolamponi bei.

¹⁷ Tapi halak Israel, na marianan i huta Juda, si Rehabeam do manrajai sidea.

¹⁸ Sanggah isuruh si Rehabeam si Adoram, kopala ni sipatumpu guguan, ipargijig halak Israel ma ia matei bani batu; tarolos ma Raja Rehabeam naik hubagas garetani, laho maporus hu Jerusalem.

¹⁹ Sonai ma parbalik ni Israel humbani ginompar ni si Daud ronsi sadari on.

Si Rehabeam Ilanglangi Nabi Semaya Marmunsuh dampak Israel

(ay. 1-4: pausih 1 Raj. 12:21-24)

11 ¹Jadi dob das si Rehabeam i Jerusalem, ipatumpu ma ganup ginompar ni Juda pakon Benjamin, saratus ualuh puluh ribu halak siparmunsuh na pinilih, sihol marmunsuh dampak Israel, laho pasuangkon harajaon ai bani si Rehabeam.

²Tapi roh ma hata ni Jahowa hubani si Semaya, halak ni Naibata ai, sonon,

³“Hatahon ma hubani si Rehabeam, anak ni si Salomo, raja ni Juda pakon hubani ganup Israel, na i Juda ampa na i Benjamin.

⁴Sonon do hata ni Jahowa, ‘Seng bulih nasiam tangkog, laho marporang dampak sanina nasiam. Mulak ma nasiam ganup hu rumahni bei, ai hun Bangku do harorohan ni ai.’” Itangihon sidea do hata ni Jahowa, mulak ma sidea, seng saud laho sidea manjumpahkon si Jerobeam.

Panrajaion ni si Rehabeam

⁵ Marianan i Jerusalem do si Rehabeam. Jadi ipauli ma huta i Juda bahen partahanan,

⁶ ai ma Betlehem, Etam, Tekoa,

⁷ Bet-Sur, Soko, Adullam,

⁸ Gat, Maresa, Sip,

⁹ Adoraim, Lakis, Aseka,

¹⁰ Sorea, Ayalon ampa Hebron; ai ma huta na marbatar-batar i Juda pakon i Benjamin.

¹¹ Ipatoguh do sagala benteng ai, anjaha inahkon hujai puanglima, ambahni ai bohal, minak pakon anggur.

¹² Inahkon do homa hubagas ganup huta ai gantar pakon tanja, anjaha toguh tumang do sagala huta ai ibahen. Ase mambalosi hubani do Juda pakon Benjamin.

Maporus Malim pakon Halak Levi hu Jerusalem

¹³ Dob ai martumpu ma malim pakon halak Levi na i sab Israel, humbani ganup ianan, na niiankon ni sidea, laho marayak si Rehabeam.

¹⁴ Ai itadingkon halak Levi do tanoh ni sidea ampa ugas-ugas ni sidea, gabe laho ma sidea hu Juda pakon Jerusalem. Ai ipabali si Jerobeam ampa anakni ai do sidea hun jabatan hamalimon i lobei ni Jahowa,

¹⁵ anjaha ipabangkit ma malimni, i rumah panumbahan na i buntu-buntu, bani begu-begu juma pakon bani lumbu na pinaulini ai.

¹⁶ Mangihut do homa hubani halak Levi humbani ganup marga ni halak Israel, halak na mangindahi Jahowa, Naibata ni Israel, humbani gok ni uhur ni sidea; roh do sidea hu Jerusalem manggalang hubani Jahowa, Naibata ni ompung ni sidea.

¹⁷ Ipatoguh sidea ma harajaon ni Juda anjaha ipatotap sidea ma panrajaion ni si Rehabeam, anak ni si Salomo, tolu tahun dokahni; ai tolu tahun do sidea mardalan bani dalan ni si Daud ampa si Salomo.

Parinangon ampa Anak ni si Rehabeam

¹⁸ Dob ai ibuat si Rehabeam ma si Mahalat, boru ni si Jerimot, anak ni si Daud, tinubuhkon ni si Abihail, boru ni si Eliab, anak ni si Isai, gabe parinangonni.

¹⁹ Jadi itubuhkon ma bani anak: Si Jehus, si Semarya pakon si Saham.

²⁰ Dob ai ibuat use ma si Maeka, boru ni si Absalom, na manubuhkon bani: Si Abia, si Atai, si Sisa pakon si Selomit.

²¹ Tapi holongan do uhur ni si Rehabeam mangidah si Maeka, boru ni si Absalom ase mangidah haganup parinangonni pakon binuatni na legan, ai adong do sapuluh ualuh parinangonni anjaha onom puluh

binuatni na legan anjaha itubuhkon ma bani dua puluh ualuh anak pakon onom puluh boru.

²² Ipabangkit si Rehabeam do si Abia, anak ni si Maeka, gabe pambobai anjaha kopala i tengah-tengah ni saninani, ai ia do sihol pabangkitonni gabe raja.

²³ Anjaha pantas do pambahenanni, marhitei na nierapni deba humbani anakni hu sab tanoh Juda pakon Benjamin ibagas ganup huta na binatar-bataranni ai, anjaha ibere do bani sidea sipanganon marlobih-lobih anjaha iririd do bani sidea parinangon.

Raja Sisak Mamorang Juda. Parmatei ni si Rehabeam

(Pausih 1 Raj. 14:21-31)

12 ¹ Dob lambin jonam harajaon ni si Rehabeam anjaha gogoh, itadingkon ma titah ni Jahowa, ia rap pakon ganup halak Israel.

² Halani ai, palima-tahunkon dob raja si Rehabeam, tangkog ma raja Sisak, raja ni Masir, mandorab Jerusalem, halani na dob mardousa sidea dompak Jahowa,

³ rap pakon saribu dua ratus gareta porang pakon onom puluh ribu halak siajak huda. Anjaha seng habilangan anggo halak simbuei, na roh rap pakonsi hun tanoh Masir: halak Libia, Suki pakon Etiopia.

⁴ Dob ai italuhon ma ganup huta na pinatoguh i Juda, pala das ia hu Jerusalem.

⁵ Dob ai roh ma nabi Semaya marayak si Rehabeam pakon kopala-kopala hun Juda, na dob martumpu hu Jerusalem halani si Sisak, anjaha nini ma dompak sidea, “Sonon do hata ni Jahowa: Domma itadingkon hanima Ahu, Ahu pe tadingkonon-Ku ma hanima laho padaskon hubagas tangan ni si Sisak.”

⁶ Jadi ipaunduk kopala-kopala ni halak ni Israel pakon raja ai ma uhurni, nini sidea ma, “Bonar do Jahowa.”

⁷ Dob iidah Jahowa na dob ipaunduk sidea uhur ni sidea, roh ma hata ni Jahowa hubani si Semaya sonon, “Domma ipaunduk sidea uhur ni sidea, halani ai seng be magou sidea bahenon-Ku, podas ma bereon-Ku haluahon bani sidea, anjaha seng be useihonon-Ku ringis-Hu hu Jerusalem marhitei tangan ni si Sisak.

⁸ Tapi maningon unduk do sidea bani, ase ibotoh sidea aha do artini na mambalosi Ahu pakon na mambalosi harajaon na i tanoh on.”

⁹ Ase tangkog ma raja Sisak hun Masir mandorab Jerusalem; ibuat ma arta hun Rumah ni Jahowa pakon arta na i rumah ni raja ai, sabonar haganup do ibuat ronsi gantar omas, na pinauli ni si Salomo.

¹⁰ Dob ai ihatahon Raja Rehabeam ma paulihon gantar-gantar tombaga bahen gantihni, anjaha

iondoskon ma ai hu tangan ni pambobai ni bala, na marjaga i lambung ni rumah ni raja ai.

¹¹ Barang piga hali pe raja ai masuk hu Rumah ni Jahowa, sai roh do parjaga ai mangusung gantar-gantar ai, dob ai ipaulak ma use ai hu kamar jaga.

¹² Halani na pinaundukni ai uhurni surut ma ringis ni Jahowa hun bani, gabe seng siap tumang ia ibahen; ambahni ai adong ope na madear i Juda.

¹³ Ase i Jerusalem do si Rehabeam marianan anjaha manrajai. Marumur ompat puluh sada tahun do si Rehabeam sanggah na bangkit raja ia, anjaha sapuluh pitu tahun do ia manrajai i Jerusalem, ai ma huta, na pinilih ni Jahowa hubani ganup marga Israel, bahen ianan ni goran-Ni. Ia goran ni inang ni raja ai si Naema do, boru Ammon.

¹⁴ Dob ai ihorjahon raja ai ma hajahaton, ai seng idompakkon uhurni mangindahi Jahowa.

¹⁵ Tapi anggo barita ni si Rehabeam, humbani mulani ronsi ujungni, ai lang tarsurat do ai ibagas Buku Barita ni Nabi Semaya, ampa si Iddo, halak na marpanonggoran ai? Tapi sai marnunut do tong hamunsuhon i holangkolang ni si Rehabeam ampa si Jerobeam.

¹⁶ Dob ai modom ma si Rehabeam rap pakon ompungni, anjaha itanom ma ia ibagas huta ni si Daud; si Abia, anakni ai ma gabe raja manggantihsi.

Talu Israel Ibahen Juda

(Pausih 1 Raj. 15:1-8)

13 ¹ Pasapuluhualuh-tahunkon dob raja si Jerobeam, bangkit raja ma si Abia i Juda.

² Tolu tahun dokahni manrajai ia i Jerusalem. Goran ni inangni si Mikaya do, boru ni si Uriel, hun Gibea. Dob ai tubuh ma hamunsuhon i holangkolang ni si Abia pakon si Jerobeam.

³ Si Abia do na mamungkahkon hamunsuhon ai marhasoman bala ompat ratus ribu halak pilihan, halak siparporang na borani. Si Jerobeam pe ipaodor ma balani mangimbangi, ualuh ratus ribu halak, halak na somal marmunsuh.

⁴ Dob ai tangkog ma si Abia hu atas ni Dolog Semaraim, na i pardologan ni Efraim, nini ma, “Tangar ma hatangkon ale Jerobeam ampa ganup Israel!

⁵ Atene, ai lang ibotoh nasiam, na dob ibere Jahowa, Naibata ni Israel do harajaon ni Israel hubani si Daud ronsi sadokah ni dokahni, hubani pakon hubani ginomparni, pala marhasoman garam padan-Ni ai?

⁶ Tapi manlawan ma si Jerobeam, anak ni si Nebat, juakjuak ni si Salomo, anak ni si Daud, manggeori dompak tuanni,

⁷ anjaha martumpu do hu lambungni dalahi na hampung maruhur anjaha na so margagan,

mangimbang si Rehabeam, anak ni si Salomo, sanggah poso ope si Rehabeam, gabe seng pag ia mangimbang sidea.

⁸Hape isurahon nasiam do nuan sihol manlawan harajaon ni Jahowa, na ibagas tangan ni anak ni si Daud, halani na buei ai nasiam, anjaha na i lambung nasiam ai lombu omas, na pinauli ni si Jerobeam, bahen naibata na legan bani nasiam.

⁹Ai lang domma iusir nasiam malim ni Jahowa, ginompar ni si Aron pakon halak Levi, anjaha ipabangkit nasiam malim nasiam sandiri mangihutkon aturan ni bangsa sipajuh begu-begu? Ganup na roh mamboan sada lombu poso-poso pakon pitu biribiri tunggal, laho mangindo pabangkitkansi, ai do ipabangkit nasiam gabe malim bani naibata na legan.

¹⁰Tapi Jahowa do Naibatanami, seng itadingkon hanami la, anjaha anak ni si Aron do na marugas bani Jahowa songon malim, anjaha halak Levi mandalankon horjani.

¹¹Ganup sogod pakon ganup bodari do sidea manutung galangan situtungan bani Jahowa, sonai homa na misbou marbagei-bagei, inahkon sidea do homa ruti sigalangkonon ai i atas meja na humbani omas pitah ai; anjaha iuras sidea do ganup bodari parpalitaan omas ai, ase gara palitani ai ganup bodari; ai ibalosi hanami do parentah ni Jahowa,

Naibatanami, tapi anggo nasiam domma itadingkon nasiam la.

¹² Tonggor ma, Naibata do na mambobahon hanami pakon malim-Ni sipartarompit, na sinompul ni sidea manlawan nasiam. Nasiam ginompar ni Israel, ulang ma marporang nasiam dompak Naibata ni ompung nasiam, ai seng anjai monang nasiam.”

¹³ Tapi ihatahon si Jerobeam ma bala sipangonggopi roh hun pudi ni sidea, gabe hampit lobei ni Juda ma hulanan ni si Jerobeam, anjaha sipangonggopi ai hun pudi ni sidea.

¹⁴ Jadi sanggah na marhusor ai halak Juda, tonggor ma, turtar ma porang dompak sidea hun lobei pakon hun pudi. Jadi doruh-doruh ma sidea hubani Jahowa, anjaha malim manompul tarompitni bei.

¹⁵ Dob ai marsurak porang ma halak Juda gogoh-gogoh. Jadi dob marsurak halak Juda ai, italuhon Naibata ma si Jerobeam pakon ganup halak Israel i lobei ni si Abia pakon halak Juda.

¹⁶ Maporus ma halak Israel i lobei ni Juda, anjaha iondoskon ma sidea hubagas tangan ni sidea.

¹⁷ Bajan tumang do pamunuhon ni si Abia pakon bangsani ai bani sidea. Radag do humbani halak Israel lima ratus ribu halak na tarpilih.

¹⁸ Talu tumang do halak Israel ijia, tapi lambin margogoh ma anggo halak Juda, halani

marpangunsandeian sidea hubani Jahowa, Naibata ni ompung ni sidea.

¹⁹ Iyak si Abia ma si Jerobeam anjaha itaban ma piga-piga huta hun bani: Betel pakon dusunni, Jesana pakon dusunni, Epron pakon dusunni.

²⁰ Seng mulak margogoh be si Jerobeam sadokah goluh ni si Abia. Dob ai itompas Jahowa ma ia, lanjar matei.

²¹ Tapi lambin mardohar do si Abia; ibuat ma sapuluh ompat naboru bahen parinangonni, anjaha tubuh ma bani dua puluh dua anak pakon sapuluh onom boru.

²² Barita na legan pasal si Abia, na binahenni pakon na sinahapkonni, tarsurat do ai ibagas Buku Barita ni Nabi Iddo.

Panrajaion ni si Asa

(ay. 1-5: pausih 1 Raj. 15:11-12)

14 ¹ Dob ai modom ma si Abia rap pakon ompungni, anjaha itanom ma ia i huta ni si Daud; jadi si Asa, anakni ai ma bangkit raja gantihni.

² Ihorjahon si Asa do na dear jaha na hinarosuhkon ni Jahowa, Naibatani ai.

³ Ipadaoh do anjapanjap panggalangan bani naibata na legan pakon panumbahan na bani buntu-buntu, ibolahi do gana-gana anjaha irobohi do tiang sisombahon.

⁴ Iparentahkon ma halak Juda mangindahi Jahowa, Naibata ni ompung ni sidea, anjaha mangkorjahon titah-Ni pakon tonah-Ni.

⁵ Ipadaoh do homa humbani ganup huta ni Juda sagala panumbahan na bani buntu-buntu pakon tiang sisombahon. Jadi sonang ma harajaon ai ibagas panrajaionni.

⁶ Ipauli do huta na marbatar-batar i Juda, halani sonang do tanoh ai, anjaha seng masa hamunsuhon dompaksi bani tahun-tahun ai, ai itumpak Jahowa do ia marsonang-sonang.

⁷ Ai nini raja ai do dompak halak Juda, "Pauli hita ma huta on anjaha patoguh hita tembokni inggot anjaha marmanara, marhorbangan pakon marpating-pating, ai hita ope simada tanoh on. Halani ipindahi hita do Jahowa, Naibatanta, gabe ipindahi do hita, gabe ibere do banta damei inggot." Jadi ipungkah sidea ma, anjaha manjadi do.

⁸ Adong do bani si Asa bala tolu ratus ribu halak humbani Juda, na margantar-gantar ampa na martanja, pakon dua ratus ualuh puluh ribu halak humbani Benjamin, na margantar-gantar pakon siparpanah; ganupan ai halak siparmunsuh na borani do.

⁹ Dob ai bingkat ma mandorab sidea si Sera, halak Etiopia ai, rap pakon balani sajuta halak pakon tolu ratus gareta porang, pala das ia hu Maresa.

¹⁰ Jadi bingkat ma si Asa manjumpahkonsi, anjaha ipaodor ma balani i pamah Sepata dohorhon Maresa.

¹¹ Dob ai dilo-dilo ma si Asa hubani Jahowa, Naibatani, nini ma, "Ham Jahowa, seng dong sobali Ham, na boi mangurupi halak na so margogoh marimbang halak na gogoh. Sai urupi Ham ma hanami, Ham Jahowa, Naibatanami; ai marpangunsandeian Bamu do hanami, anjaha mangunsagahkon goran-Mu do hanami bingkat mangimbang halak na mabuei on. Ham Jahowa, Ham do Naibatanami, ise pe langjolma na margogoh mangimbang Ham."

¹² Dob ai italuhon Jahowa ma halak Etiopia ai i lobei ni si Asa pakon Juda, gabe maporus ma halak Etiopia ai.

¹³ Ipardakdak si Asa pakon bangsa hasomanni ai ma sidea das hu Gerar, anjaha sonai ma bueini halak Etiopia radag, gabe sada pe lang dong tading manggoluh; ai marosak do sidea i lobei ni Jahowa pakon i lobei ni balani ai. Buei tumang do taban-taban jumpah halak Juda.

¹⁴ Italuhon sidea do homa ganup huta inggot ni Gerar, ai sogop do biar humbani Jahowa bani sidea. Irampas sidea do ganup huta; buei tumang do taban-taban ijai.

¹⁵ Sonai homa lampolampo ni siparpinahan iparreong sidea do, gabe ibuat sidea ma buei

tumang biribiri pakon unta; dob ai mulak ma sidea hu Jerusalem.

**Pambahenan ni si Asa dompak
Parnaibataon na Legan**

(ay. 16-18: pausih 1 Raj. 15:13-15)

15 ¹ Dob ai sogop ma Tonduy ni Naibata hubani si Asarya, anak ni si Oded.

² Jadi laho ma ia marayak si Asa anjaha nini ma hu bani, “Tangihon ma ahu, ham Asa pakon ganup Juda ampa Benyamin. Ihasomani Jahowa do nasiam, anggo marsijoloman nasiam hu Bani. Anggo ipindahi nasiam la, sai na jumpah nasiam do la; tapi anggo itadingkon nasiam la, sai tadingkonon-Ni do nasiam.

³ Dokah do halak Israel seng marnaibata na sintong, anjaha seng marmalim sipangajari anjaha seng martitah.

⁴ Tapi anggo tarsosak sidea, mulak do sidea hubani Jahowa, Naibata ni Israel, ipindahi sidea do la, anjaha jumpah sidea do la.

⁵ Bani panorang ai seng marhasonangan halak kaluar pakon masuk, ai masa do hageoron bolon i tongah-tongah ni ganup pangisi ni tanoh ai.

⁶ Marsidoraban do ijia bangsa dompak bangsa, anjaha huta dompak huta; ai isonggoti Naibata do sidea marhitei buei hasosakan.

⁷ Tapi anggo nasiam, tenger ma uhur nasiam anjaha ulang ma galek tangan nasiam, ai sai na dapotan upah do horja nasiam.”

⁸ Jadi dob ibogei si Asa hata ai pakon panjahaion ai, na hinatahon ni Nabi Asarya, anak ni si Oded ai, gabe tenger ma uhurni, anjaha ipadaoh ma sagala gana-gana sihagigihononkon hun ganup tanoh Juda pakon Benyamin ampa humbani huta-huta, na tinaluhonni i Dolog Efraim, anjaha ipabayu do anjapanjap ni Jahowa, na i lobei ni surambih ni Rumah ni Jahowa.

⁹ Dob ai ipatumpu ma ganup Juda pakon Benyamin sonai homa ganup halak Efraim, Manasse ampa Simeon, na manginsolat i tongah-tongah ni sidea; ai buei tumang do humbani halak Israel mandipar hu bani, dob iidah sidea, Jahowa Naibatani do mangkasomanisi.

¹⁰ Jadi martumpu ma sidea hu Jerusalem bani bulan tolu, pasapuluhlma-tahunkon dob manrajai si Asa.

¹¹ Manggalang ma sidea bani na sadari ai hubani Jahowa humbani taban-taban na binoan ni sidea ai, pitu ratus lembu pakon pitu ribu biribiri.

¹² Iparatah sidea ma padanni laho mangindahi Jahowa, Naibata ni ompung ni sidea, humbani gok ni uhurni pakon humbani gok ni tonduy ni sidea.

¹³ Anjaha barang ise na so mangindahi Jahowa, Naibata ni Israel, maningon marutang hosah do,

dakdanak barang na magodang, dalahi barang naboru.

¹⁴ Pala do marbulawan sidea hubani Jahowa marhasoman sora na gogoh, anjaha marhasoman olob-olob, tarompit pakon tanduk.

¹⁵ Marmalas ni uhur do ganup Juda pasal bulawan ai; ai humbani gok ni uhur ni sidea do sidea marbulawan, anjaha humbani gok ni uhur ni sidea do ipindahi sidea la, gabe jumpah sidea ma la tongon, anjaha ibere Jahowa ma bani sidea hasonangan inggot.

¹⁶ Age si Maaka, inangni ai, ipaturun Raja Asa do humbani jabatan harajaon, halani na pinaulini ai sada gana-gana bani sisombahon Ashera. Dob ai ireongkon si Asa ma gana-gana ai, anjaha itutung i habuangan ni Bah Kidron.

¹⁷ Tapi seng ipadaoh anggo panumbahan na i buntu-buntu humbani Israel; age pe tong do namin marsijoloman uhur ni si Asa bani Jahowa sadokah manggoluh ia.

¹⁸ Iboan do homa hubagas Rumah ni Naibata sibere-bere na mapansing, na humbani bapani pakon sibere-bere na mapansingni sandiri, omas, pirak, pakon parugas marbagei-bagei.

¹⁹ Anjaha seng dong masa hamunsuhon das ronsi patolupuluhlima-tahunkon dob manrajai si Asa.

Parpadanan ni si Asa pakon Halak Aram Mangimbang Israel

Parmatei ni si Asa

(ay. 11-14: pausih 1 Raj. 15:23-24)

16¹ Patolupuluhonom-tahunkon dob manrajai si Asa, tangkog ma si Baesa, raja ni Israel mandorab Juda, anjaha ipatoguh ma Rama, ase ulang boi atap ise hujai-hujon marayak si Asa, raja ni Juda.

² Dob ai ibuat si Asa ma humbani parartaan na i Rumah ni Jahowa pakon na i rumah ni raja ai omas pakon pirak, anjaha itongoshon ma ai hubani si Benhadad, raja ni Aram, na marianan i Damaskus, nini ma,

³ “Domma adong hinan i tongah-tongahta parpadanan, sonai homa i tongah-tongah ni bapanta; tonggor ma, na manongos pirak pakon omas do ahu bamu; ai pe, putushon ham ma padanmu pakon si Baesa, raja hun Israel, ase surut ia humbangku.”

⁴ Jadi itangihon si Benhadad ma hata ni raja Asa ai, anjaha isuruh ma pambobai ni balani mandorab huta-huta ni Israel, gabe itaban sidea ma huta Lyon, Dan, Abelmaim pakon ganup huta parbohalan na i Naptali.

⁵ Dob ibogei si Baesa ai, maronti ma ia patoguhkon Rama, ipasaran ma horjani ai.

⁶ Dob ai iharah raja Asa ma ganup Juda, anjaha ibuat sidea ma ganup batu pakon parhayu ni huta Rama, na pinakei ni si Baesa patoguh Rama, anjaha ipakei raja ai ma ai pauli huta Geba pakon Mispa.

⁷ Ijia ma roh Nabi Hanani marayak si Asa, raja ni Juda, anjaha nini ma hu bani, “Halani marpangunsandeian ham hubani raja Aram, seng marpangunsandeian ham hubani Jahowa, Naibatamu, maluah ma bala ni raja Aram hun tanganmu.

⁸ Ai lang buei tumang do bala ni halak Etiopia pakon halak Libia na ijia marhasoman buei tumang gareta porang pakon bala siparhuda? Tapi halani na marpangunsandeian ham bani Jahowa, iondoskon Jahowa do sidea hubagas tanganmu.

⁹ Ai manatap manonggor do mata ni Jahowa hu sab tanoh on, laho mambere gogoh hubani halak paruhur na marsijoloman hu Bani. Halani ai, horja haotoon do na binahenmu on, ai hunjon hujanan masa ma hamunsuhon tong dompak ham.”

¹⁰ Jadi manringis ma si Asa bani halak na marpanonggoran ai, ibayangkon ma ia ibagas tutupan, ai manggila do ia bani halani pahara ai; ambahni ai iarsik si Asa do piga-piga halak ijia humbani bangsa ai.

¹¹ Tonggor ma, barita ni si Asa humbani mungkahni das hubani ujungni, tarsurat do ai ibagas Buku ni Raja-raja Juda pakon Israel.

¹² Patolupuluhsiah-tahunkon dob marrajai ia boritan ma si Asa bani naheini anjaha parah tumang do naboritni ai; age sanggah naboritan ai, seng ipindahih uhurni Jahowa, tapi sipanambari do.

¹³ Dob ai modom ma si Asa rap pakon ompungni; paompatpuluhsada-tahunkon dob manrajai ia, matei ma ia.

¹⁴ Itanom ma ia ibagas tanoman na pinahurakkonni bani sandiri i huta ni si Daud. Itibalhon ma ia bani apeini, na dob nigokan marhitei rium-riuman na marbagei-bagei, na pinasirsir ni tukang pulung; anjaha ipagara sidea do homa apuy bolon laho pasangapkonsi.

Panrajaion pakon Kuasa ni si Josafat

17 ¹ Dob ai si Josafat, anakni ai ma bangkit raja manggantihsi, anjaha ipongutkon do mangimbang Israel.

² Ibagihon do bala bani ganup huta ni Juda na pinatoguh ai, pakon pangawalan i Juda ampa i huta-huta ni Efraim, sagala na tinaluhon ni si Asa, bapani ai.

³ Ihasomani Jahowa do si Josafat, ai marparlahou do ia songon parlahou ni si Daud, ompungni ai, bani mungkahni hinan; seng marsungkun ia bani Baal.

⁴ Sai ipindahi uhurni do Naibata ni bapani anjaha marparlahou do ia domu hubani tonahni, seng songon pambahen ni halak Israel ibahen.

⁵ Jadi ipatotap Jahowa ma harajaonni ibagas tanganni; ganup do halak Juda mambere sohei bani si Josafat; gabe bayak anjaha sangap tumang ma ia.

⁶ Lambin pongkut do uhurni mardalan bani dalan ni Jahowa; ambahni ai ipadaoh do panumbahan na i buntu-buntu pakon sisombahon Ashera hun Juda.

⁷ Patolu-tahunkon dob raja ia, isuruh ma pangopalai: Si Benhail, si Obaja, si Sakaria, si Nataneel pakon si Mikaya, laho mangajari i huta-huta ni Juda,

⁸ anjaha hasoman ni sidea humbani halak Levi: Si Semaya, si Netanya, si Sebaya, si Asael, si Semiramot, si Jonatan, si Adonia, si Tobia pakon si Tob-Adonia, ambahni ai malim Elisama pakon si Joram.

⁹ Jadi mangajari ma sidea i Juda, iboan sidea do buku titah ni Jahowa; isiari sidea do ganup huta ni Juda inggot anjaha iajari ma halak simbuei ai.

¹⁰ Jadi sogop ma biar humbani Jahowa hubani haganup harajaon inggot ni Juda, gabe seng dong na mambahen parporangan dompak si Josafat.

¹¹ Deba humbani halak Palistim mambahen siluah do hubani si Josafat pakon pirak bahen sohei, sonai homa halak Arab iboan do bani pinahan, pitu ribu

pitu ratus biribiri tunggal, ampa pitu ribu pitu ratus hambing tunggal.

¹² Jadi lambin dokah lambin timbul ma si Josafat. Ipauli ma i Juda benteng-benteng pakon huta parbohalan.

¹³ Buei tumang do bohal ipatumpu i huta-huta ni Juda, anjaha adong do tentarani, halak na borani-borani i Jerusalem.

¹⁴ Anjaha on do bilangan ni sidea mar sasaompung. Humbani si Juda, kopala ni mar sasaribu: Kopala Adna rap pakon tolu ratus ribu halak tentara na borani-borani;

¹⁵ hasomanni kopala Johanan, rap pakonsi dua ratus ualuh puluh ribu halak;

¹⁶ hasomanni use, ai ma si Amasya, anak ni si Sikri, na mangondoskon dirini hubani Jahowa humbani gok ni uhurni, rap pakonsi dua ratus ribu halak tentara na borani-borani.

¹⁷ Humbani Benjamin, si Elyada, halak na borani ai, rap pakon dua ratus ualuh puluh ribu halak, na marpanah ampa margantar-gantar.

¹⁸ Ambahni ai si Josabat rap pakon saratus ualuh puluh ribu halak, na gopas bingkak hu parporangan.

¹⁹ Ai ma siparugas bani raja ai, sobali na binagihon ni raja ai hubagas huta-huta na pinatoguh bani sab Juda.

Parpadanan ni si Josafat pakon si Ahab

(Pausih 1 Raj. 22)

18¹ Jadi dob bayak anjaha sangap si Josafat, ipungkah ma martondong hubani si Ahab.

² Dob piga-piga tahun tuad ma ia hu Samaria hubani si Ahab. Dob ai ihatahon si Ahab ma sayaton bani raja ai pakon bani hasomanni buei biribiri pakon lembu, dob ai iojur ma ia tangkog mangimbang Ramot-Gilead.

³ Nini si Ahab, raja ni Israel ai ma bani si Josafat, raja ni Juda, “Ra do ham tangkog rap pakon ahu hu Ramot-Gilead?” Nini ma mambalosi, “Ia sonin ham, sonai do ahu, ai sonin bangsamu sonai do homa bangsanku. Dihut pe ahu rap pakon ham bingkat hu parmunsuhan.”

⁴ Ambahni ai nini si Josafat do dompak raja ni Israel, “Mahua ma sungkun hita lobei hata ni Jahowa.”

⁵ Dob ai ipatumpu raja ni Israel ma nabi-nabi ompat ratus halak, anjaha isungkun ma sidea, “Bulih do ahu bingkat marporang dompak Ramot-Gilead, barang sabonar na so bulih do?” Nini sidea ma, “Bingkat ma, ondoskonon ni Naibata ma huta ai hubagas tangan ni raja in.”

⁶ Tapi nini si Josafat ma, “Ai seng adong be ijon age sada nabi ni Jahowa, ase ia sungkun hita?”

⁷ Nini raja ni Israel ma dompak si Josafat, “Adong ope ijon sada halak nari, marhiteihonsi tarsungkun

do Jahowa, tapi sogam do uhurhu mangidahsi, ai seng dong onga na madear panjahaionni bangku, pitah hamagouan do tong, ai ma si Mika, anak ni si Jimla.” Nini si Josafat ma, “Ulang ma sonai hata ni raja in.”

⁸ Dob ai idilo raja ai ma sada halak siramotkon rumahni, nini ma, “Alopi ma podas hujon si Mika, anak ni si Jimla.”

⁹ Sanggah na hundul ai raja ni Israel pakon si Josafat, raja ni Juda, bani pardogeian, bani labah ni horbangan ni Samaria, ganup hundul bani paratasni bei marpakeian harajaon, anjaha ganupan nabi ai manjahai i lobei ni sidea,

¹⁰ ipadear si Sedekia, anak ni si Kenana ma bani sada tanduk bosi, anjaha nini ma, “Sonon do hata ni Jahowa: Marhitei on ma duguonmu halak Aram, ronsi siap sidea bahenonmu.”

¹¹ Ganupan nabi ai sonai do panjahaion ni sidea, nini sidea do, “Tangkog ma ham hu Ramot-Gilead, sai na monang do ham; sai na ondskonon ni Jahowa do ai hubagas tangan ni raja in.”

¹² Tapi nini suruhan, na sinuruh mangalopi si Mika ai ma hu bani, “Tonggor ma, sahata do nabi-nabi ai mangkatahon na madear hubani raja ai, on pe hatahon ham ma songon hata ni sidea ai ganup, anjaha ambilankon ham ma na madear.”

¹³ Tapi nini si Mika ma, “Songon sintongni manggoluh Jahowa, barang aha na hinatahon ni Naibatanku, ai do hatahononku.”

¹⁴ Jadi dob das ia hu lobei ni raja ai, nini raja ai ma hubani, “Atene Mika, bulih do hanami tangkog hu Ramot-Gilead barang sabonar na so bulih do?” Nini ma mambalosi, “Tangkog ma nasiam, sai na monang do nasiam! Sai na ondos do sidea hubagas tangan nasiam.”

¹⁵ Tapi nini raja ai ma hu bani, “Maningon piga hali on do ham pabijaonku, paboa na so hatahononmu hubangku sobali hasintongan marhitei goran ni Jahowa?”

¹⁶ Dob ai nini si Mika ma, “Domma hutatap haganup Israel, mambur merap i atas ni dolog, songon biribiri na so marparmahan. Anjaha nini Jahowa do, ‘Seng martuan be ganupan in; mulak bei ma ganup ibagas damei!’”

¹⁷ Dob ai nini raja ni Israel ma dompak si Josafat, “Ai lang domma hupatugah hinan bamu, na so tumaram madear panjahaionni hubangku, tapi pitah hamagouan do?”

¹⁸ Nini si Mika ma, “Seng sonai! Tangihon ma hata ni Jahowa. Huidah do Jahowa hundul i atas paratas-Ni, anjaha ganup bala ni nagori atas jongjong i siamun-Ni pakon i sambilou-Ni.

¹⁹ Nini Jahowa ma, ‘Ise ma na ra mangojur-ojur si Ahab, raja ni Israel, ase tangkog ia hu Ramot-Gilead,

ase matei ia ijai? Dob ai marsihatahon hatani bei ma sidea.'

²⁰ Dob ai luar ma sada tonduy anjaha jongjong i lobei ni Jahowa, nini ma, 'Ahu ma na mangojur-jursi.' Nini Jahowa ma hubani, 'Marhitei aha?'

²¹ Nini ma mambalosi, 'Luar ma ahu gabe tonduy sipaoto-oto ibagas pamangan ni ganup nabini.' Dob ai nini Jahowa ma, 'Ho ma na mangojursi, anjaha monang ma ho, luar ma ho anjaha bahen ma sonai!'

²² On pe, tonggor ma, domma inahkon Jahowa tonduy sipaoto-oto ibagas pamangan ni nabi-nabimu on, ai domma ilumbahon Jahowa hinan roh hamagouan on bamu."

²³ Dob ai roh ma hun dohor si Sedekia, anak ni si Kenana, itompas ma huyum ni si Mika, anjaha nini ma, "Hun dalan ja minsah Tonduy ni Jahowa humbangku, laho marsahap hubam?"

²⁴ Nini si Mika ma mabalosi, "Tonggor ma, sampang ope idahonmu bani ari ai, sanggah na laho ho hu kamar parbagas laho manrogop."

²⁵ Dob ai nini raja ni Israel ma, "Tangkap nasiam ma si Mika, anjaha boan nasiam ma ia mulak hubani si Amon, walikota ai, pakon hubani si Joas, anak ni raja in,

²⁶ anjaha hatahon ma, 'Sonon do hata ni raja in: Nahkon nasiam ma ia hu tutupan, anjaha bere nasiam ma bani ruti pakon bah otik-otik, paima mulak ahu mardamei-damei.'"

²⁷ Nini si Mika ma, “Anggo marsonang-sonang do ham mulak, tongon ma, seng Jahowa na marsahap marhitei ahu. Tangar ma, nasiam bangsa-bangsa haganup.”

²⁸ Dob ai tangkog ma raja ni Israel pakon si Josafat, raja ni Juda hu Ramot-Gilead.

²⁹ Jadi nini raja ni Israel ma dompak si Josafat, “Paubah rupa ma ahu laho hu parporangan, tapi anggo ham pakeianmu hinan ma pakei ham.” Ase paubah rupa ma raja ni Israel, jadi laho ma sidea hu parporangan.

³⁰ Tapi domma iparentahkon raja ni Aram hinan hubani kopala ni gareta porangni, “Seng bulih dorabon nasiam atap ise, na etek barang na banggal, pitah raja ni Israel do.”

³¹ Jadi dob iidah kopala ni gareta porang ai si Josafat, nini uhur ni sidea ma, “Seng tarbahen lang ai do raja ni Israel.” Jadi iinggoti sidea ma ia laho mandorabsi. Mandoruhi ma si Josafat, iurupi Jahowa ma ia, anjaha ipaundur Naibata ma sidea humbani.

³² Dob iidah kopala ni gareta porang ai, sedo hape ia raja ni Israel, surut ma sidea humbani.

³³ Tapi adong ma sada halak na manembakkon panahni songon gijig-gijig borngin, gabe ihonai ma raja ni Israel bani pardomuan ni baju partahanan ai. Dob ai nini ma dompak sais ni gareta ai, “Husor,

boan ma ahu hun parporangan on, ai domma ugahan ahu.”

³⁴ Halani na lambin garani do porang ai bani na sadari ai, lanjar jongjong do raja ai, itungkol ibagas garetani padompak-dompak pakon halak Aram layur ronsi bod ari; tapi sanggah parsundut ni mataniari matei ma ia.

Nabi Jehu Manolsoli Raja Josafat

19 ¹ Tapi anggo si Josafat, raja ni Juda, jorgit do das hu rumahni i Jerusalem.

² Dob ai kaluar ma manjumpahkonsi Nabi Jehu, anak ni si Hanani, anjaha nini ma dompak Raja Josafat, “Ai bulih do ninuhurmu urupan halak parjahat barang haholongan halak na marsogam ni uhur bani Jahowa? Manggila tumang do Jahowa halani ai mangidah ham.

³ Tapi adong ope tene jumpah na madear bamu, ai isiaphon ham do sisombahon Ashera na i nagori on anjaha ipabulat ham do uhurmu mangindahi Naibata.”

Parpatorsa ni si Josafat bani Paruhuman

⁴ Marianan i Jerusalem do si Josafat. Dob ai iulaki ma use bingkai manorih bangsa ai hun Berseba das hu Dolog Efraim, anjaha iarahkon ma sidea mulak hubani Jahowa, Naibata ni ompung ni sidea.

⁵ Dob ai ipabangkit ma panguhum i nagori ai, ibagas ganup huta ni Juda na pinatoguh, huta hu huta,

⁶ anjaha nini ma dompak panguhum ai, “Pangkei ma nasiam bani sibahenon nasiam, ai seng bani jolma nasiam manguhum, tapi bani Jahowa do; i lambung nasiam do la, sanggah na manguhum ai nasiam.

⁷ Ai pe, sai sogop ma bani nasiam biar mangidah Jahowa; jaga ma nasiam bani na binahen nasiam, ai seng masa uhum hagedukon bani Jahowa, Naibatanta, barang na martonggor jumbak, barang na manjalo sisip.

⁸ Age i Jerusalem ipabangkit si Josafat do deba halak Levi pakon malim ampa kopala ni mar sasaompung i Israel, laho mandalankon panguhumion ni Jahowa ampa na mamutus pahara bani halak na marianan i Jerusalem.”

⁹ Iparentahkon do bani sidea, “Maningon sonai do bahenon nasiam ibagas biar mangidah Jahowa, ibagas habujuron ampa humbani bulat ni uhur.

¹⁰ Anggo tarboan hu lobei nasiam sada pahara humbani sanina nasiam, na marianan i huta ni sidea bei, ai ma pasal daroh na durus, titah barang tonah, aturan barang uhum, maningon ajaran nasiam do sidea, ase ulang marsalah sidea bani Jahowa, gabe sogop ringis-Ni hubani nasiam barang hubani sanina nasiam.

¹¹ Tonggor ma, Sintua ni malim Amarya do kopala nasiam bani ganup horja ni Jahowa; anjaha si Sebaya, anak ni si Ismael, kopala ni ginompar ni Juda bani ganup horja ni raja in, anjaha halak Levi gabe gamot-gamot i lobei nasiam. Ai pe, jimot ma nasiam marhorja, sai hasomanan ni Jahowa do halak sidear uhur.”

Hamonangan ni si Josafat Marimbang Halak Moab pakon Halak Ammon

20 ¹Jadi dob salpu ai, roh ma halak Maob pakon Ammon anjaha hasoman ni sidea, halak Meunim, marporang dompak si Josafat.

²Dob ai roh ma halak na patugahkon barita ai hubani si Josafat, “Roh do mandorab ham buei bala hun dipar ni laut, hun Edom, anjaha tonggor ma, domma das sidea i Haseson-Tamar, ai ma Engedi.”

³Jadi gobir ma si Josafat, anjaha iputuskon ma ibagas uhurni mangindahi Jahowa, anjaha isuruh ma na maningtingkon, ase marpuasa ganup Juda.

⁴Dob ai martumpu ma ganup Juda mangindo pangurupion bani Jahowa; roh do homa halak hambani ganup huta ni Juda mangelek-elek Jahowa.

⁵Dob ai jongjong ma si Josafat i tongah-tongah ni tumpuan ni Juda pakon Jerusalem, i Rumah ni Jahowa, i lobei ni alaman na baru ai,

⁶ nini ma, “Ham Jahowa, Naibata ni ompungnami, Ham do Naibata i nagori atas, anjaha Ham do na manggomgomi ganup harajaon ni bangsa sipajuh begu-begu; ibagas tangan-Mu do kuasa pakon hagogohon, anjaha ise pe lang na tahan i lobei-Mu.

⁷ Ai lang domma iusir Ham, alo Naibatnami, isi ni tanoh on hun lobei ni bangsa-Mu halak Israel, anjaha ai lang domma ilayak-layakkon Ham tanoh on bani ginompar ni si Abraham, huan-huan-Mu in, ronsi sadokah ni dokahni?

⁸ Domma marianan sidea ijin, anjaha domma pala ipajongjong bani goran-Mu sada rumah na mapansing, ai ninuhur ni sidea,

⁹ Anggo sogop bannami hamagouan, podang, papa, sampar barang lohei, maningon jongjong do hanami i lobei ni rumah on pakon i lobei ni bohi-Mu, ai marianan ibagas rumah on do goran-Mu, anjaha dilo-dilo Bamu ibagas hasosakannami, gabe tangihonon-Mu anjaha urupan-Mu do hanami.

¹⁰ Anjaha sonari, tonggor Ham ma, roh do halak Ammon pakon Moab ampa halak na hun dolog Seir, ai ma halak na so manlopas halak Israel mamontas hun tanoh ni sidea, sanggah na roh sidea hun tanoh Masir; tapi ilembangi do sidea, anjaha seng isiapkan sidea.

¹¹ Tonggor Ham ma, sihol mambahen na masambor do sidea bennami nuan, roh do sidea sihol mangusir

hanami hun parbagianan-Mu, na dob binere-Mu bannami.

¹² Ham Naibatanami, ai seng mambalas Ham dompak sidea? Ai seng margogoh hanami mangimbang bala na buei on, na roh mangimbang hanami. Seng ibotoh hanami barang aha na sihol bahenonnami, tapi mangkawah dompak Ham do matanami.”

¹³ Sanggah ai jongjong do ganup halak Juda i lobei ni Jahowa, rap pakon na etek-etek ni sidea, parinangon ni sidea ampa anak ni sidea,

¹⁴ jadi sogop ma Tonduy ni Jahowa i tongah-tongah ni tumpuan ai hubani si Jehasiel, anak ni si Sakaria, ai ma anak ni si Benaya, ai ma anak ni si Jehiel, ai ma anak ni si Matanya, halak Levi humbani ginompar ni si Asap,

¹⁵ anjaha nini ma, “Tangar nasiam ma, nasiam halak Juda ganup ampa nasiam isi ni Jerusalem ampa ham Raja Josafat! Sonon do hata ni Jahowa hubani nasiam, ‘Ulang nasiam mabiar, anjaha ulang ma gobir nasiam dompak hulanan na bolon ai, ai seng nasiam suhut bani porang on, tapi Naibata do.’

¹⁶ Patar ma nasiam bingkat mandorab sidea; tonggor ma, tangkog do sidea hun tangkogan Sis, anjaha jumpah nasiam ma sidea bani ujung ni habungan ai i lobei ni pamah Jeruel.

¹⁷ Sabonar seng pala nasiam marporang bani parporangan on; jongjong ma nasiam soh, anjaha

idah nasiam ma hamonangan, na sihol bereon ni Naibata bani nasiam, nasiam halak Juda pakon Jerusalem. Ulang ma nasiam mabiar anjaha ulang gobir! Patar jumpahkon nasiam ma sidea, anjaha sai hasomanan ni Naibata do nasiam.”

¹⁸ Jadi marrogop ma si Josafat, pala dais bohini hu tanoh, anjaha ganup halak Juda ampa isi ni Jerusalem pe manrogop bei do i lobei ni Jahowa, laho martonggo bani Jahowa.

¹⁹ Dob ai jongjong bei ma halak Levi humbani ginompar ni si Kahat pakon humbani ginompar ni si Korah, laho mamuji Jahowa, Naibata ni Israel, marhasoman sora na gogoh tumang.

²⁰ Jadi patarni ai girah ma sidea sogod bingkat hu pamah Tekoa, anjaha sanggah na bingkat ai sidea, jongjong ma si Josafat anjaha nini ma, “Tangihon nasiam ma ahu, nasiam halak Juda anjaha nasiam isi ni Jerusalem! Porsaya ma nasiam bani Jahowa Naibata nasiam, ase totap nasiam; haporsayai nasiam ma nabi-Ni, ase monang nasiam.”

²¹ Dob ai manriah ma raja ai pakon halak sipandoding bani Jahowa, anjaha ipuji ma la marpakeian hapansingon, sanggah na mardalan ai sidea i lobei ni bala ai, anjaha nini ma, “Mangkatahon tarima kasih ma nasiam bani Jahowa, ai ronsi sadokah ni dokahni do idop ni uhur-Ni.”

²² Jadi sanggah mamungkah sidea marolob-olob pakon mamuji-muji, ihatahon Jahowa ma roh halak sipanggompangi hun parponopan, mandorab halak Ammon, Moab, pakon halak na hun dolog Seir, ai ma na roh mamorang Juda namin, gabe italuhon ma sidea.

²³ Ai roh do halak Ammon ampa halak Moab manlawan pangisi ni dolog Seir, siap tumang do sidea ibahen, anjaha dob isiapkon sidea pangisi ni Seir ai, marsibunuhan ma sidea samah sidea.

²⁴ Jadi dob das halak Juda hu panatapan na i halimisan ai, itatap sidea ma dompak munsuh na buei ai, hape tonggor ma, marrageian do bangkei i tanoh ai, sada pe lang maluah.

²⁵ Jadi dob roh si Josafat rap pakon bangsani, laho mambuat taban-taban, jumpah sidea ma pinahan buei tumang, ugas-ugas, pakeian, ampa barang na maharga, anjaha marsibuat na bani bei ma, pala seng tarboan sidea be. Tolu ari sidea marbagi taban-taban, sonai ma bueini.

²⁶ Paompat-arihon martumpu ma sidea i pamah pamuji-mujian, ai ijai do ipuji sidea Jahowa; halani ai do ase ibahen halak goran ni ianan ai Pamah Pamuji-mujian ronsi sadari on.

²⁷ Dob ai mulak ma sidea ganup, halak Juda pakon pangisi ni Jerusalem ibobahon si Josafat; marmalas ni uhur do sidea na mulak ai, ai domma malas uhur ni sidea mangidah munsuh ni sidea ibahen Jahowa.

²⁸ Masuk ma sidea hu Jerusalem marhasoman arbab, sordam pakon tarompit, laho hu Rumah ni Jahowa.

²⁹ Anjaha sogop ma biar na humbani Naibata hubani haganup harajaon na i nagori ai, dob ibogei sidea, Jahowa do na marporang dompak munsuh ni Israel.

³⁰ Jadi sonang ma harajaon ni si Josafat, ai ibere Naibatani do hu bani hasonangan inggot.

Ujung ni Panrajaion ni si Josafat

(ay. 31-bd. 21:1: pausih 1 Raj. 22:41-51)

³¹ Sonai ma panrajaion ni si Josafat bani Juda. Marumur tolu puluh lima tahun ia sanggah bangkit raja, anjaha dua puluh lima tahun do ia manrajai i Jerusalem. Goran ni inangni si Asuba do, boru ni si Silhi.

³² Mardalan do ia bani dalan ni bapani, si Asa, anjaha lang manlembang ia hunjai; ihorjahon do na pintor bani uhur ni Jahowa.

³³ Tapi panumbahan na bani buntu-buntu seng iparseda ope, ai seng marsijoloman ope uhur ni halak na mabuei ai bani Naibata ni ompung ni sidea.

³⁴ Barita na tading ai ope humbani si Josafat, humbani mungkahni das bani ujungni, tonggor ma, tarsurat do ai ibagas buku Barita ni si Jehu, anak ni si Hanani, ai ma na sinuratkonni hubagas Buku ni Raja-raja Israel.

³⁵ Dob salpu ai, mardos ni uhur ma si Josafat, raja ni Juda pakon si Ahasya, raja ni Israel, ai ma sada halak sihorjahon na jahat.

³⁶ Mardos ni uhur do ia pakonsi paulihon kapal, na marlayar hu Tarsis. I Ezeon-Geber do itukangi sidea kapal ai.

³⁷ Tapi roh ma si Elieser, anak ni si Dodia hun Maresa, manjahai dompak si Josafat, nini ma, “Halani mardos ni uhur ham pakon si Ahasya, parsedaon ni Jahowa do holi na hinorjahonmu in. Jadi marropukan ma kapal ai, gabe seng tarbahensi marlayar hu Tarsis.”

Panrajaion ni si Joram na Mabajan

(Pausih 2 Raj. 8:16-22)

21 ¹ Dob ai modom ma si Josafat rap pakon ompungni, anjaha itanom ma ia i lambung ni ompungni i huta ni si Daud. Jadi si Joram, anakni ai ma bangkit raja gantihni.

² Adong do saninani, anak ni si Josafat, ai ma: Si Asarya, si Hehiel, si Sakarya, si Asaryahu, si Mikael pakon si Sepatya; ganupan ai anak ni si Josafat, raja ni Juda ai.

³ Ibere bapa ni sidea do bani sidea buei sibere-bere pirak, omas pakon arta na maharga, sonai homa huta na pinatoguh i Juda; tapi anggo harajaon ai hubani si Joram do ibere, ai ia do bunga tubuhni.

⁴ Jadi dob ondos bani si Joram harajaon ni bapani ai, anjaha lambin markuasa ia, ibunuh ma ganup saninani ai bani podang, sonai homa deba humbani kopala-kopala ni Israel.

⁵ Marumur tolu puluh dua tahun do si Joram, sanggah na bangkit raja ai ia, anjaha ualuh tahun do dokahni ia manrajai i Jerusalem.

⁶ Mardalan do ia bani dalan ni raja-raja Israel, songon na binahen ni ginompar ni si Ahab; ai boru ni si Ahab do parinangonni. Anjaha ihorjahon do sogam ni uhur ni Jahowa.

⁷ Tapi seng ra Jahowa mangagou ginompar ni si Daud, halani padan na dob binahen-Ni hubani si Daud, anjaha halani na dob binagahkon-Ni ai hu bani pakon hubani ginomparni, mambere panondang ronsi sadokah ni dokahni.

⁸ Sanggah bani panorang ni si Joram mamulig ma halak Edom humbani gongoman ni Juda, lanjar ipabangkit sidea ma sada raja manggomgom sidea.

⁹ Dob ai mandipar ma si Joram rap pakon puanglimani ampa haganup garetani, jadi jongjong ma ia bornginni ai mamboiskon halak Edom, na manginggotisi ai, ampa kopala ni garetaporangni.

¹⁰ Tapi age sonai lanjar mamulig do halak Edom humbani gongoman ni Juda ronsi sadari on. Mamulig do homa ijia Libna, ai domma itadingkon raja ai Jahowa, Naibata ni ompung ni sidea.

¹¹ Ambahni ai ipauli do panumbahan i buntu-buntu, i tanoh pardologan ni Juda; ibobahon do pangisi ni Jerusalem hubani parnaibataon na legan anjaha ipakahou do Juda.

¹² Tapi das ma hubani sada surat humbani nabi Elia, na mangkatahon, “Sonon do hata ni Jahowa, Naibata ni ompungmu, si Daud: Halani na so mardalan ai ham ibagas dalan ni bapamu si Josafat, atap ibagas dalan ni si Asa, raja ni Juda,

¹³ tapi mardalan do ham bani dalan ni raja-raja Israel, anjaha ibobahon ham do Juda ampa pangisi ni Jerusalem hubani parnaibataon na legan, songon ginompar ni si Ahab, na mambobai Israel hu parnaibataon na legan, ambahni ai ibunuh ham do saninamu, ginompar ni bapamu, na dearan maruhur ase ham,

¹⁴ tonggor ma, pasogopon ni Jahowa ma sada hamagouan bolon bani bangsamu, hubani anakmu, hubani parinangonmu ampa hubani haganup na dong bamu.

¹⁵ Anjaha ham sandiri honaan ni naborit na parah do, ai ma naborit ibagas boltokmu, pala martahun-tahun, ronsi mandarat boltokmu halani naborit ai.”

¹⁶ Dob ai ipuhoi Jahowa ma ringis ni halak Palistim ampa halak Arab, na marianan dohorhon halak Etiopia, mangimbang si Joram.

¹⁷ Tangkog ma sidea dompak Juda, anjaha imasuki ma, itaban sidea ma sagala ugas-ugas na jumpah

i rumah ni raja ai, sonai homa anakni ampa parinangonni, gabe seng dong be tading anak bani, sobali si Joahas, anakni sianggian ai.

¹⁸ Ambahni haganupan ai, ipapai Jahowa ma ia marhitei naborit ibagas boltokni, na so tartambari.

¹⁹ Dob lambin dokah, ai ma dob salpu dua tahun, mandarat ma bituhani halani naborit ai, gabe matei ma ia ibagas sitaronon na parngit tumang. Seng pala ipagara bangsani bani apuy laho pasangapkonsi, songon apuy, na pinagara bani ompungni.

²⁰ Marumur tolu puluh dua tahun do ia sanggah na bangkit raja, anjaha ualuh tahun do dokahni manrajai i Jerusalem. Dob ai matei ma ia, sada pe lang na marpusok ni uhur. Itanom sidea ma ia i huta ni si Daud, tapi seng i tanoman ni raja-raja.

Raja Ahasia; Matei Ibunuh si Jehu

(ay. 1-6: pausih 2 Raj. 8:25-29)

22 ¹ Dob ai ipabangkit pangisi ni Jerusalem ma si Ahasia, anakni sianggian ai, gabe raja manggantihsi, ai ganup abangni domma ibunuh panrampok, na roh pakon halak Arab hu tangsi ni tentara ai. Jadi bangkit raja ma si Ahasia, anak ni si Joram, raja ni Juda.

² Marumur ompat puluh dua tahun do si Ahasia, sanggah na bangkit raja ia, anjaha satahun tumang

do ia manrajai i Jerusalem. Goran ni inangni si Atalya, pahompu ni si Omri.

³ Ia pe mardalan do bani dalan ni ginompar ni si Ahab, ai inangni do panuturini, laho mangkorjahon hajahaton.

⁴ Ihorjahon do sogam ni uhur ni Jahowa, usih songon na binahen ni ginompar ni si Ahab; ai dob matei bapani, sidea do gabe panuturini bahen hamagouanni.

⁵ Lirikkon do homa riah ni sidea, ai do ase bingkat ia rap pakon si Joram, anak ni si Ahab, raja ni Israel, laho marporang dompak si Hasael, raja ni Aram hu Ramot-Gilead. Tapi ugahan do si Joram ibahen halak Aram.

⁶ Dob ai mulak ma ia hu Jesreel, laho patambarhon ugahni, na mangonai hu bani i Ramot, sanggah na marporang ia dompak si Hasael, raja ni Aram. Dob ai tuad ma si Ahasia, anak ni si Joram, raja ni Juda, laho manonggor si Joram, anak ni si Ahab, i Jesreel, ai boritan do ia.

⁷ Tapi marharorohan humbani Naibata do parrohni ai, parohkon hamagouan hubani si Ahasia. Ai dob das ia hujai, bingkat ma ia pakon si Joram manjumpahkon si Jehu, anak ni si Nimai, na dob mininakan ni Naibata, laho mamboiskon ginompar ni si Ahab.

⁸ Anjaha sanggah na mandalankon uhum ai si Jehu hubani ginompar ni si Ahab, jumpahsi do kopala-

kopala ni Juda pakon anggi ni sanina ni si Ahasia, anjaha ibunuh ma sidea.

⁹ Ipindah i ma pakon si Ahasia, gabe tartangkap ma ia, sanggah na marponop ia i Samaria, anjaha tarboan ma ia hubani si Jehu, dob ai ibunuh ma. Itanom sidea ma ia, ai nini sidea, “Pahompup ni si Josafat do ia, na mangindah i Jahowa humbani bulat ni uhurni.” Anjaha seng dong be humbani ginompar ni si Ahasia, na sanggup mandalankon harajaon ai.

Pamunuhon ni Raja Naboru Atalya

(ay. 10-12: pausih 2 Raj. 11:1-3)

¹⁰ Tapi dob ididah si Atalya, inang ni si Ahasia, na dob matei anakni ai, laho ma ia, anjaha ibunuh ma ganup ginompar ni raja Juda.

¹¹ Tapi ibuat si Josabat, boru ni raja Joram ai ma si Joas, anak ni si Ahasia, anjaha iluahan ma ia hun tengah-tengah ni anak ni raja ai, ai ma sibunuhon ai hinan, anjaha ibahen ma ia rap pakon parorotni hu sada kamar podoman. Jadi iponopkon si Josabat, boru ni Raja Joram ampa parinangon ni malim Joyada ma anak ai *(ai botou ni si Ahasia do ia)* hun lobei ni si Atalya, gabe seng saud tarbunuh ia.

¹² Marponop ma ia rap pakonsi ibagas rumah panumbahan ai onom tahun dokahni, sanggah si Atalya manggomgomi tanoh ai.

Malim Joyada Pabangkit si Joas Gabe Raja

(Pausih 2 Raj. 11:4-20)

23 ¹ Tapi papitu-tahunkon iboranihon si Joyada ma uhurni, gabe ibahen ma parpadanan pakon kopala-kopala ni bala, sirajai sisaratus: Si Asarya anak ni si Jerohan, si Ismail anak ni si Johanan, si Asarya anak ni si Obed, si Maaseya anak ni si Adaya pakon si Elisapat anak ni si Sikri.

² Dob ai isiar sidea ma ganup tanoh Juda, anjaha ipatumpu ma halak Levi humbani ganup huta ni Juda pakon kopala ni mar sasaompung i Israel, jadi roh ma sidea hu Jerusalem.

³ Jadi mambahen parpadanan ma ganup tumpuan ai ibagas Rumah ni Naibata rap pakon raja ai. Nini si Joyada ma hubani sidea, “Tonggor ma, anak ni raja in! Ia ma na maningon manrajai, songon na hinatahon ni Jahowa pasal anak ni si Daud.

⁴ On ma na maningon sibahenon nasiam: Sapartolu humbani nasiam, malim pakon halak Levi, na marhorin ari Sabat, marjaga ma i lambung rumah ni raja ai;

⁵ sapartolu i rumah ni raja ai, anjaha sapartolu nari bani horbangan Jesod; anjaha bangsa ai haganup i alaman ni Rumah ni Jahowa.

⁶ Anjaha ise pe lang na bulih masuk hu Rumah ni Jahowa sobali ni malim ampa halak Levi siparugas; sidea bulih do masuk, ai na susi do sidea; tapi

haganup halak simbuei ai maningon irikkonon ni sidea do aturan ni Jahowa.

⁷ Maningon inggotan ni halak Levi do raja ai, ganup marsijolom sinjatani bei ibagas tanganni; anjaha barang ise na masuk hu rumah panumbahan ai, maningon bunuhon do ia. Hasomani nasiam ma raja ai, anggo luar ia barang masuk.”

⁸ Jadi ibahen halak Levi ampa ganup halak Juda ma romban hubani na pinarentahkon ni malim Joyada; ganup sidea roh rap pakon hasomanni, ai ma na marhorin bani ari Sabat ampa na so marhorin bani ari Sabat; ai lang ibere malim Joyada mulak siparhorin ai.

⁹ Anjaha ipambere malim Joyada ma hubani kopala-kopala ai tanja, gantar na banggal pakon gantar na etek, na adong bani raja Daud hinan, na sinimpan ibagas Rumah ni Naibata.

¹⁰ Dob ai ipajongjong ma ganup bangsa ai gabe pangawal ni raja ai, ganup manjolom sinjata, hampit siamun ni rumah ai, inggot ni anjapanjap ai ampa rumah ai.

¹¹ Dob ai iarahkon sidea ma anak ni raja ai luar, inahkon ma sortali ai hu atas uluni, ibere ma bani titah ai, anjaha ipabangkit sidea ma ia gabe raja; si Joyada pakon anakni ai do na mamminakisi, anjaha iolobkon sidea ma, “Sai horas ma raja in!”

¹² Jadi dob ibogei si Atalya sora ni halak na mabuei ai, marrohan anjaha mamuji-muji raja ai, laho ma ia marayak halak simbuei ai hu Rumah ni Jahowa.

¹³ lidah ma ijai jongjong raja ai bani tiang na bani labah harorohan, anjaha kopala-kopala pakon partarompit do i lambung ni raja ai, anjaha ganup bangsa pangisi ni nagori ai marmalas uhur lanjar manompul tarompit; anjaha pandoding ai marhasoman parugas musikni do na mambobahon pamuji-mujian ai. Dob ai irigati si Atalya ma hiouni, anjaha irik ihatahon, “Tahi-tahi! Tahi-tahi!”

¹⁴ Tapi iparentahkon malim Joyada ma kopala-kopala, na pinabangkit mangopalai bala ai, nini ma dompak sidea, “Arahkon nasiam ma ia hu darat ni alaman lobei-lobei ai; barang ise na mangirikkonsi, bunuhon do bani podang!” Ai nini malim ai do, “Ulang bunuh nasiam ia ibagas Rumah ni Jahowa.”

¹⁵ Dob ai itangkap sidea ma ia; anjaha dob das ia hu horbangan huda ni rumah ni raja ai, ibunuh sidea ma ia ijai.

¹⁶ Dob ai marpadan ma si Joyada pakon bangsa ai ganup ampa raja ai, paboa maningon bangsa ni Jahowa do sidea.

¹⁷ Dob ai masuk ma ganup halak simbuei ai hu rumah ni Baal lanjar iparseda ma ai; iropuki sidea ma anjapanjap pakon gana-ganani, anjaha si Matan, malim ni Baal ai, ibunuh sidea ma i lobei ni anjapanjap ai.

¹⁸ Dob ai iangkat si Joyada ma sipanjaga bani Rumah ni Jahowa humbani malim-malim ampa halak Levi, songon na dob niadongkon ni si Daud hinan marhorin-horin bani Rumah ni Jahowa, ase sidea manggalangkon galangan situtungon bani Jahowa, romban hubani na tarsurat ibagas titah ni si Musa, marhasoman malas ni uhur ampa pandodingon, mangihutkon aturan na binahen ni si Daud.

¹⁹ Isuruh ma sijaga horbangan ni Rumah ni Jahowa, ase ulang masuk hujai barang ise na butak binahen ni atap aha pe.

²⁰ Dob ai iarahkon ma kopala-kopala, halak na sangap-sangap, halak sigomgom halak simbuei ai ampa haganup bangsa pangisi ni nagori ai; iarahkon sidea ma raja ai tuad hun Rumah ni Jahowa, mardalan ma sidea hun horbangan na hampit huluan hu rumah ni raja ai. Jadi ipahundul sidea ma raja ai bani paratas harajaon ai.

²¹ Jadi marmalas ni uhur ma ganup bangsa pangisi ni nagori ai; anjaha sonang ma homa huta ai dob hona bunuh si Atalya marhitei podang.

Panggomgomion ni si Joas

(Pausih 2 Raj. 12)

24 ¹ Marumur pitu tahun do si Joas, sanggah na bangkit raja ai ia, anjaha ompat puluh tahun do dokahni ia manrajai i Jerusalem; goran ni inangni, ai ma si Sibya, hun Berseba.

² Ihorjahon si Joas do rosuh ni uhur ni Jahowa, sadokah manggoluh Malim Joyada.

³ Ibuat si Joyada ma dua naboru bahen parinangonni, gabe tubuhan anak pakon boru ma ia.

⁴ Dob salpu ai tubuh ma uhur ni si Joas sihol mangumban Rumah ni Jahowa.

⁵ Ipatumpu ma malim pakon halak Levi, nini ma dompak sidea, “Laho ma nasiam marayak huta-huta ni Juda, anjaha patumpu nasiam ma pirak humbani ganup halak Israel, laho mangumban Rumah ni Naibata nasiam ganup tahun; anjaha oloskon nasiam ma horja ai,” tapi seng ra halak Levi ai mangoloskon.

⁶ Dob ai idilo raja ai ma Sintua ni malim Joyada, nini ma dompaksi, “Mase ma lang iojur ham halak Levi, ase iboan sidea hun Juda pakon hun Jerusalem guguan, songon na tinitahkon ni si Musa, juakjuak ni Jahowa, hubani halak Israel bahen haporluan ni lampolampo hasaksian in?”

⁷ Ai domma hona bongkar Rumah ni Naibata ibahen anak ni si Atalya na jahat ondi, anjaha ganup parugas na mapansing na i Rumah ni Jahowa, domma ipakei manggalang bani Baal.

⁸ Dob ai ihatahon raja ai ma mambahen sada poti, anjaha itibalhon ma ai idarat ni horbangan ni Rumah ni Jahowa.

⁹ Anjaha ihatahon ma na maningtingkon i Juda pakon i Jerusalem, ase iboan bei bani Jahowa guguan na tinitahkon ni si Musa, juakjuak ni Naibata bani halak Israel i halimisan.

¹⁰ Jadi marmalas ni uhur ma ganup kopala-kopala pakon ganup bangsa ai, iboan sidea ma guguan ni bei, ipandabuhkon ma ai hubagas poti ai ronsi gok.

¹¹ Ia dob jumpah adanganni, boanon ni halak Levi poti ai hubani gamot-gamot ni raja ai, anjaha iidah sidea domma buei duit ibagas, jadi roh ma jurutulis ni raja ai pakon wakil ni sintua ni malim, ipalumei ma poti ai anjaha ipaulak ma use ai bani iananni ai. Jadi sonai ma ibahen sidea marnombas-nombas, gabe buei ma duit tumpu.

¹² Dob ai iondoskon raja ai pakon si Joyada ma ai hubani halak haondosan ni horja, laho paulihon Rumah ni Jahowa; sidea ma na manggaji tukang batu pakon tukang hayu, laho mangumban Rumah ni Jahowa, sonai homa tukang bosi pakon tombaga, laho paulihon Rumah ni Jahowa.

¹³ Jadi marhorja bei ma tukang ai, anjaha dear do pardalan ni pangumbanon ai marhitei tangan ni sidea; mulak ma rumah panumbahan ai ibahen sidea songon haadongonni hinan, anjaha toguh ibahen.

¹⁴ Jadi siaphonsi horja ni sidea, iboan sidea ma duit na tading ai hu lobei ni raja ai pakon si Joyada; hunjai ma ipauli parugas bani Rumah ni Jahowa,

ai ma parugas bani horja parugason ampa laho manggalangkon galangan situtungan, pakon batil ampa parugas humbani omas ampa pirak. Dob ai igalangkon sidea ma tongtong galangan situtungan i Rumah ni Jahowa sadokah manggoluh si Joyada.

¹⁵ Jadi dob sayur matua si Joyada anjaha sobalan ia bani hagoluhan on, matei ma ia; saratus tolu puluh tahun ma umurni, sanggah na matei ai ia.

¹⁶ Itanom sidea ma ia i huta ni si Daud, i lambung ni raja-raja, halani na madear, na binahen ni ai i Israel, sonai homa bani Naibata ampa bani rumah panumbahan ai.

¹⁷ Dob matei si Joyada, roh bei ma kopala-kopala ni Juda marsombah hubani raja ai; itangihon raja ai do pangindoan ni sidea ai.

¹⁸ Dob ai itadingkon sidea ma Rumah ni Jahowa, Naibata ni ompung ni sidea, gabe ibalosi sidea ma sisombahon Ashera ampa gana-gana. Jadi roh ma ringis ni Naibata hubani Juda ampa hubani Jerusalem halani dousa ni sidea ai.

¹⁹ Isuruh Jahowa ma nabi bani sidea, laho mangarahkon sidea mulak hubani Jahowa; gogoh do sidea ipaingat, tapi seng iparimbagaskon sidea.

²⁰ Dob ai sogop ma Tonduy ni Naibata hubani si Sakaria, anak ni Malim Joyada; jongjong ma ia i lobei ni bangsa ai anjaha nini ma dompak sidea, "Sonon do hata ni Naibata: Mase ma ilanggar nasiam titah ni Jahowa, na mambahen gabe seng

marhasonangan nasiam? Halani na tinadingkon nasiam ai Jahowa, ai do ase itadingkon nasiam.”

²¹ Hape gabe marbulawan ma sidea mangimbangsi, pala ipargijig sidea ia bani batu iparentahkon raja ai, i alaman ni Rumah ni Jahowa.

²² Ase domma lupa Raja Joas bani holong ni si Joyada, bapa ni si Sakaria hu bani, ai ibunuh do anakni. Sanggah na laho matei ia, nini si Sakaria ma, “Naibata ma na mangidah anjaha na mambalaskon ai!”

²³ Jadi bani ujung ni tahun ai, tangkog ma bala ni halak Aram marporang dompaksi, pala das sidea hu Juda ampa hu Jerusalem, anjaha isiapkon sidea ma ganup kopala-kopala ni bangsa ai, anjaha sagala taban-taban na jumpah sidea, itongoskon ma ai bani raja ni Damaskus.

²⁴ Age pe otik bala ni halak Aram na roh ai, iondoskon Jahowa do hubagas tangan ni sidea sada bala bolon tumang, halani na tinadingkon ni sidea ai Jahowa, Naibata ni ompung ni sidea. Sonai ma halak Aram pasaudkon uhum bani si Joas.

²⁵ Jadi dob laho sidea manadingkonsi, parah tumang do ugahni ai itadingkon, marbulawan ma juakjuakni mangimbangsi, halani daroh ni anak ni Malim Joyada, anjaha ibunuh sidea ma ia i atas podomanni. Jadi matei ma ia, anjaha itanom sidea ma ia i huta ni si Daud, tapi seng i tanoman ni raja-raja.

²⁶ Ia halak na marbulawan mangimbangsi ai, ai ma: Si Sabad, anak ni si Simeat boru Ammon, pakon si Josabad, anak ni si Simrit boru Moab.

²⁷ Tapi anggo pasal anakni pakon buei ni sohei na pinaporsankonni, ampa parpaulini ai bani Rumah ni Naibata, tonggor ma, tarsurat do ai ibagas buku Barita ni Raja-raja. Jadi si Amasia, anakni ai ma bangkit raja manggantihsi.

**Hamonangan ni si Amasia dompak
Edom pakon Partaluni dompak Israel**

(Pausih 2 Raj. 14:1-20)

25 ¹ Marumur dua puluh lima tahun do si Amasia, sanggah na bangkit ai ia gabe raja, anjaha dua puluh siah tahun do dokahni manrajai i Jerusalem; ia goran ni inangni, ai ma si Joaddan, hun Jerusalem.

² Ihorjahon do harosuh ni Jahowa, tapi seng humbani bulat ni uhurni.

³ Jadi dob totap harajaon ai ibagas tanganni, ibunuh ma juakjuakni, na mambunuh raja, bapani ondi.

⁴ Tapi anggo anak ni sidea seng ibunuh, romban hubani na tarsurat ibagas buku titah na binahen ni si Musa, songon na tinonahkon ni Jahowa hu bani, “Seng bulih matei sada halak halani anakni, anjaha seng bulih matei sada anak halani bapani, tapi ganup do maningon matei halani dousani sandiri.”

⁵ Dob ai ipatumpu si Amasia ma halak Juda, anjaha ipaodor ma mar sasaompung bahen kopala ni sisaribu pakon sisaratus halak bani sab Juda pakon Benjamin. Ibilangi ma sidea olat ni na marumur dua puluh tahun ampa lobih hunjai, gabe jumpahsi ma tolu ratus ribu halak na pinilih, na gopas marporang, na boi manjolom tanja pakon gantar-gantar.

⁶ Ambahni ai iupahi ope humbani Israel saratus ribu halak bala na borani marhitei saratus talenta pirak.

⁷ Tapi roh ma sada halak ni Naibata marayaksi, nini ma, “Ham rajanami, ulang ma lopas ham bingkat bala ni halak Israel rap pakon ham, ai seng tarhasomani Jahowa halak Israel ampa ganup halak Efraim.

⁸ Tapi anggo ninuhurmu monang do ham marhitei dalan na sonon, talu ma ham bahenon ni Naibata i lobei ni munsuh; ai markuasa do Naibata mangurupi barang mandabuhkon.”

⁹ Nini si Amasia ma dompak halak ni Naibata ai, “Tapi sonaha ma sisaratus talenta, na dob hubere ai hubani bala ni Israel?” Nini halak ni Naibata ai ma mambalosi, “Boi do Naibata mambere bamu lobih hunjai.”

¹⁰ Dob ai ipapulig si Amasia ma bala na roh hu bani hun Efraim, ase mulak sidea hu hutani. Tapi manggila tumang ma sidea bani Juda; ibagas gila mulak ma sidea hu huta ni sidea.

¹¹ Tapi iboranihon si Amasia ma dirini mambobahon balani hu parporangan, das ma ia hu Pamah Pargaraman, anjaha ibunuh ma humbani halak Seir salaksa halak.

¹² Ambahni ai itangkap halak Juda ope salaksa halak manggoluh, iboan sidea ma sidea hu pakpak ni sada dolog batu, anjaha idabuhkon ma sidea hun pakpak ni dolog batu ai, gabe maropuk ma sidea haganup.

¹³ Tapi anggo bala, na pinaulak ni si Amasia, na so pinalopasni laho rap pakonsi marporang, idorab sidea ma huta-huta ni Juda olat ni Samaria das hu Bet-Horon, anjaha ibunuh sidea ma tolu ribu halak hunjai anjaha buei taban-taban iboan.

¹⁴ Dob mulak si Amasia humbani na manaluhon halak Edom, iboan ma naibata ni halak Seir, ipajongjong ma ai, isombah ma anjaha igalangi ma ai.

¹⁵ Jadi manringis tumang ma Jahowa mangidah si Amasia, anjaha isuruh ma bani sada nabi, na mangkatahon dompaksi, “Mase ma dompakkonon nasiam naibata ni sada bangsa, na so boi paluahkon bangsani sandiri humbani tangan nasiam?”

¹⁶ Sanggah na marsahap ope ia, nini raja ai ma hu bani, “Ai adong ipabangkit hanami ho gabe panuturi ni raja? Sip! Mase rahanan tarbunuh ho?” Jadi sip ma nabi ai, pitah on mando ihatahon, “Domma huidah, na dob iputuskon Naibata, sihol

mangagou ham, halani sonin pambahenanmu, anjaha lang ibalosi ham podahku.”

¹⁷ Dob ai manriah ma si Amasia, raja ni Juda, anjaha isuruh ma suruhanni marayak si Joas, anak ni si Joahas, anak ni si Jehu, raja ni Israel, nini ma, “Eta, marsidohoran ma lobei hita!”

¹⁸ Tapi isuruh si Joas, raja ni Israel ma suruhanni marayak si Amasia, raja ni Juda, mambalosi, “Isuruh hayu na marduri i Libanon ma sipanririt marayak hayu ares na i Libanon, nini ma, ‘Bere ma borumin bahen parinangon ni anakku;’ hape roh ma binatang na i atas dolog Libanon, idorab ma hayu na marduri ai lanjar idogei-dogei.

¹⁹ Nini uhurmu, ‘Tonggor ma, domma hutaluhon halak Edom,’ gabe ipagijang ham uhurmu, sihol mambuat puji-pujian. Mahua tading ma ham rahanan i rumahmu, mase rahanan jombaonmu hamagouan, gabe rasei ham, ham rap pakon Juda?”

²⁰ Tapi seng ra si Amasia manangihon ai, ai marharorohan humbani Naibata do ai, laho mangondoskon sidea hubagas tangan ni munsuh, halani na pinindahan ni sidea naibata ni halak Edom.

²¹ Jadi tangkog ma si Joas, raja ni Israel, gabe marsisubaan ma ia pakon si Amasia, raja ni Juda, i Betsemes, na i tanoh Juda.

²² Tapi talu ma halak Juda ibahen halak Israel, gabe maporus ma sidea ganup hu lampolampo ni sidea bei.

²³ Tapi tartangkap ma si Amasia, raja ni Juda, anak ni si Joas, anak ni si Joahas, i Betsemes, ibahen si Joas, raja ni Israel, gabe iboan ma ia hu Jerusalem, anjaha irongrongkon ma tembok ni Jerusalem, olat ni Horbangan Efraim das hu Horbangan Parsuhi-suhi, ompat ratus asta ganjangni.

²⁴ Ibuat do homa haganup omas pakon pirak ampa haganup na jumpah i Rumah ni Naibata, na niramotkon ni si Obed-Edom; ibuat do homa arta na i rumah ni raja ai, ambahni ai halak gabe borot, dob ai mulak ma ia hu Samaria.

²⁵ Tapi anggo si Amasia, anak ni si Joas, raja ni Juda, manggoluh ope sepuluh lima tahun nari dob matei si Joas, anak ni si Joahas, raja hun Israel.

²⁶ Barita na legan ai ope pasal pambahenan ni si Amasia, hun mungkahni das hu ujungni, ai lang tarsurat do ai ibagas buku Barita ni Raja-raja Juda ampa Israel?

²⁷ Olat ni na dob surut si Amasia humbani Jahowa, ibahen halak ma partahi-tahian mangimbangi i Jerusalem, gabe maporus ma ia hu Lakis. Tapi isuruh sidea ma halak na mangirikkonsi hu Lakis, gabe ibunuh ma ia ijai.

²⁸ Dob ai iboan ma ia i atas ni huda, anjaha itanom ma ia i lambung ni ompungni, ibagas huta ni si Daud.

Panrajaion ni si Usia

(Pausih 2 Raj. 14:21, 22; 15:1-7)

26 ¹ Dob ai ibuat ganup bangsa Juda ma si Usia, marumur sapuluh onom tahun ope, anjaha ipabangkit sidea ma ia gabe raja, gantih ni si Amasia, bapani ai.

² Ia do na patoguhkon huta Elat, anjaha mulak bani Juda ibahen, dob modom raja ai rap pakon ompungni.

³ Marumur sapuluh onom tahun do si Usia, sanggah na bangkit raja ia, anjaha lima puluh dua tahun do dokahni manrajai Jerusalem; goran ni inangni si Jekolia do, hun Jerusalem.

⁴ Ihorjahon do rosuh ni Jahowa, songon na binahen ni si Amasia, bapani ai.

⁵ Sai iporluhon uhurni do mangindahi Jahowa sadokah manggoluh si Sakaria, na mangajarisi marhabiaran bani Naibata, anjaha sadokah ipindahi Jahowa, itumpak Naibata do ia.

⁶ Ai bingkat do ia marporang dompak halak Palistim, anjaha irumbakkon do tembok ni huta Gat, tembok ni huta Jabne ampa tembok ni huta Asdod; anjaha itombe i ma huta-huta i tanoh inggot ni Asdod pakon bani ianan na legan i tanoh ni halak Palistim.

⁷ Itumpak Naibata do ia mangimbang halak Palistim ampa halak Arab, na marianan i Gur-Baal ampa mangimbang halak Maoni.

⁸ Manggalar sohei do halak Ammon hubani si Usia, gabe tarambilan ma goranni das hu Masir, ai lambin margogoh do ia.

⁹ Ambahni ai ipauli si Usia do menara i Jerusalem, i atas ni Horbangan Parsuhi-suhi, i atas ni Horbangan Habungan ampa bani ganup suhi-suhi, anjaha ipatoguh ma ai.

¹⁰ Ipauli do homa menara i halimisan anjaha ihurak buei parigi, ai buei do pinahan i tanoh bornoh ampa i pamah, ambahni ai adong do bani parhorja i juma ampa i pohon anggur, i tanoh dolog ampa i tanoh na lambutan, ai rosuh do uurni marjuma-juma.

¹¹ Ambahni ai buei do bala ni si Usia na tarlatih marporang, na bingkak hu parporangan marbanjei-banjei mangihutkon buei ni bilangan ni sidea, na tinontuhon ni si Jehiel, jurutulis ai ampa si Maseya panuturi ai, na binobahon ni si Hananya, sada humbani kopala-kopala ni raja ai.

¹² Bilangan ni ganup kopalani mar sasaompung, humbani puanglima dua ribu onom ratus halak do.

¹³ Sidea do mambobahon bala, tolu ratus pitu ribu lima halak bueini, na gopas marporang anjaha gogoh tumang, laho mangurupi raja ai mangimbang munsuh.

¹⁴ Ihatahon si Usia ma paulihon bani haganup bala ai gantar-gantar, tanja, tangkuluk, baju partahanan, panah pakon batu ni umbalang.

¹⁵ Ipauli do homa i Jerusalem parugas porang, na tinukangan ni halak na pandei-pandei, na ninahkon hubani menara ampa hubani suhi-suhi, laho manembakkon panah ampa batu bolon. Jadi tarambilan tumang ma ia das hubani na daoh, ai dapotan pangurupion na tarsulur do ia, gabe markuasa tumang ma ia.

Gadamon Raja Usia ampa Parmateini

¹⁶ Tapi dob markuasa ia, gijang ma uhurni gabe hamagouanni; ai mardousa do ia dompak Jahowa, Naibatani, ai imasuki do Rumah ni Jahowa, laho manutung dahupa i atas anjapanjap pardahupaan.

¹⁷ Ilikkon Malim Asarya do ia namin hubagas rap pakon ualuh puluh malim ni Jahowa na markuasa.

¹⁸ Ilanglangi sidea do Raja Usia, nini sidea ma bani, “Ham Usia! Seng patut ham manutung dahupa bani Jahowa, tapi pitah malim, anak ni si Aron do, na dob niuras hubani horja on. Luar ma ham humbani ianan na mapansing on, ai na salah do na binahenmu in. Seng tumaram marmulia ham bahenon ni Naibata Jahowa marhitei in.”

¹⁹ Dob ai manggila ma si Usia, anjaha ijolom ma batil pardahupaan ai ibagas tanganni laho manutung dahupa. Tapi sanggah manggila

ope ia dompak malim ai, tubuh ma gadam i pardompakanni i lobei ni malim-malim ai ibagas Rumah ni Jahowa i lambung ni anjapanjap pardahupaan ai.

²⁰ Dob ai marhusor ma Sintua ni malim Asarya ampa haganup malim ai mandompakkonsi, hape, tonggor ma, domma gadamon ia bani pardompakanni. Jadi tarolos ma sidea palahohonsi hunjai; ia pe tarolos ma laho hu darat, halani na dob nilonsing ni Naibata ia.

²¹ Jadi lanjar gadamon ma Raja Usia das hubani parmateini, gabe punjung ma ia marianan ibagas sada rumah halani na gadamon ai, ai ipabali do homa ia hun Rumah ni Jahowa. Jadi si Jotam, anakni ai ma haondosan ni rumah ni raja ai, pakon na manguhum ganup bangsa na i tanoh ai.

²² Barita na legan ai ope humbani si Usia, humbani mungkahni das hubani ujungni, Nabi Jesaya, anak ni si Amos do manuratkan.

²³ Dob ai modom ma si Usia rap pakon ompungni, anjaha itanom sidea ma ia rap pakon ompungni i juma pananoman ni raja-raja, ai nini sidea do, “Na gadamon do ia.” Jadi si Jotam, anakni ai ma bangkit raja manggantihsi.

Panrajaion ni si Jotam

(Pausih 2 Raj. 15:32-36, 38)

27¹ Marumur dua puluh lima tahun do si Jotam, sanggah na bangkit raja ia, anjaha sapuluh onom tahun do dokahni ia manrajai i Jerusalem; ia goran ni inangni, ai ma si Jerusa, boru ni si Sadok.

² Ihorjahon do rosuh ni Jahowa, songon haganup na binahen ni si Usia, bapani ai, tapi seng masuk anggo ia hubagas Rumah ni Jahowa. Tapi tong ope maruhur jahat anggo bangsa ai.

³ Ipauli do Horbangan Pardatas i Rumah ni Jahowa, anjaha buei do na pinaulini bani tembok Opel,

⁴ Ipungkah do homa huta i atas dolog ni Juda, anjaha i harangan ipauli do benteng pakon menara.

⁵ Marporang do ia dompak raja ni halak Ammon, anjaha italuhon do sidea, gabe manggalar sohei ma bani halak Ammon, bani na satahun ai saratus talenta pirak, saloksa kor gandum pakon saloksa kor andolei. Sonai do homa pambere ni halak Ammon bani tahun paduahan ampa patoluhon.

⁶ Jadi lambin markuasa ma si Jotam, ai dear do dalanni i lobei ni Jahowa, Naibatani.

⁷ Barita na legan ai ope humbani si Jotam, pakon haganup parporanganni ampa pambahenanni, tonggor ma, tarsurat do ai ibagas Buku ni Raja-raja Israel ampa Juda.

⁸ Marumur dua puluh lima tahun do ia, sanggah na bangkit raja, anjaha sapuluh onom tahun do ia manrajai i Jerusalem.

⁹ Dob ai modom ma si Jotam rap pakon ompungni, anjaha itanom sidea ma ia i huta ni si Daud. Jadi si Ahas, anakni ai ma bangkit raja manggantihsi.

Panrajaion ni si Ahas na Mabajan

(Pausih 2 Raj. 16)

28 ¹ Marumur dua puluh tahun do si Ahas, sanggah na bangkit raja ia, anjaha sapuluh onom tahun do dokahni manrajai i Jerusalem. Tapi seng ihorjahon rosuh ni Jahowa, songon si Daud ompungni ai,

² tapi mardalan do ia bani dalan ni raja-raja ni Israel. Ipauli do gana-gana tuangan bani Baal;

³ manutung dahupa do ia i Hubungan Ben-Hinnom, anjaha itutung do anakni bahen galangan, romban hubani adat na masambor bani bangsa sipajuh begu-begu, na pinabali ni Jahowa hun lobei ni halak Israel.

⁴ Manggalang anjaha manutung dahupa do homa ia i atas ni panumbahan na i dolog-dolog, i buntu-buntu ampa i toruh ni sagala hayu na tabun.

⁵ Halani ai, ipadas Jahowa, Naibatani ma ia hubagas tangan ni raja Aram; italuhon sidea ma ia, anjaha itaban buei humbani rayatni lanjar iboan hu

Damaskus. Iondoskon do homa ia hubagas tangan ni raja Israel, gabe talu tumang ibahen.

⁶ Ibunuh si Peka, anak ni si Remalya do humbani halak Juda ibagas na sadari saratus dua puluh ribu halak; haganup ai halak na somal marmunsuh do, halani na tinadingkon ni sidea Jahowa, Naibata ni ompung ni sidea.

⁷ Sonai homa si Sikri, puanglima na hun Epraim ai, ibunuh do si Maaseya, anak ni raja ai, pakon si Asrikam siramotkon rumahni, ampa si Elkana panuturi ni raja ai.

⁸ Ambahni ai ibuangkon halak Israel do humbani sanina ni sidea ai dua ratus ribu naboru, anak ampa boru, ambahni ai buei tumang taban-taban ibuat sidea, anjaha iboan sidea hu Samaria.

⁹ Tapi adong ma sada ijai nabi ni Jahowa, na margoran si Oded; luar ma ia manjumpahkon bala na mulak ai hu Samaria, nini ma dompak sidea, “Tonggor ma, halani manringis do Jahowa Naibata ni ompung nasiam hubani halak Juda, ase iondoskon sidea hubagas tangan nasiam; hape ibagas gila ibunuh nasiam sidea, pala das hu nagori atas doruh-doruh ai.

¹⁰ Sonari isurahon nasiam ope patundukkon halak Juda ampa Jerusalem bahen jabolon dalahi ampa jabolon naboru nasiam. Ai lang borat tumang do age salah nasiam dompak Jahowa, Naibata nasiam?

¹¹ Halani ai, tangihon nasiam ma ahu, anjaha paulak nasiam ma jolma na tartangkap in, na binoan nasiam humbani hasoman sabangsa nasiam, ai domma manggila Jahowa mangidah nasiam.”

¹² Dob ai jongjong ma deba kopala-kopala humbani halak Efraim, ai ma: Si Asarya anak ni si Johanan, si Berekyia anak ni si Mesilemot, si Hiskia anak ni si Salum, pakon si Amasa anak ni si Hedlai, ijumpahkon sidea ma bala na mulak hun parporangan ai,

¹³ nini ma dompak sidea, “Seng bulih boanon nasiam hujon na tartangkap in, ai na mambahen marsalah do hita dompak Jahowa marhitei sura-sura nasiam in, manambahi dousa ampa salahta sisonari; ai lang domma banggal salahta, anjaha gajag ringis ni Jahowa dompak Israel?”

¹⁴ Dob ai iberehon bala na marsinjata ai ma halak na tartaban ai ampa taban-taban ai i lobei ni kopala-kopala ampa tumpuan ai.

¹⁵ Jadi jongjong ma dalahi-dalahi na ginoranan ondi manjalo halak na tarboan ai; iparhioui sidea ma sagala na so marhiou humbani taban-taban ai, ibere ma sidea hiou, sipatu, sipanganon ampa siinumon, iminaki ma sidea, ipahundul ma hu halode sagala halak na galek, anjaha iboan ma sidea hu Jeriko, hu huta parhalambiran ai, hubani sanina ni sidea. Dob ai mulak ma sidea hu Samaria.

¹⁶ Ijia isuruh Raja Ahas ma suruhanni marayak raja Assur, andohar iurupi ia.

¹⁷ Ai iulaki halak Edom do use roh mamunuhi halak Juda, anjaha iboan do homa buei halak hu habuangan.

¹⁸ Sonai homa halak Palistim idorab do huta-huta ni Juda, na i tanoh bornoh ampa na i tanoh Dangsina, anjaha italuhon sidea ma Betsemes, Ayalon, Gederot pakon Soko ampa dusunni, Timna ampa dusunni, pakon Gimso ampa dusunni, lanjar marianan ma sidea ijai.

¹⁹ Ai ipatoruh Jahowa do Juda halani si Ahas, raja ni Juda, ai sambor do pambahenanni i Juda, anjaha seng bujur ia dompak Jahowa.

²⁰ Jadi roh ma mangimbangsi si Tiglat-Pilneser, raja ni Assur, isosak-sosak ma ia, seng iurupi ia.

²¹ Ai domma ibuat si Ahas namin ugas-ugas hun Rumah ni Jahowa, hun rumah ni raja ai ampa humbani kopala-kopala, anjaha ibere ai hubani raja ni Assur, hape lanjar do lang iurupi ia.

²² Tapi inunut raja Ahas do marjahat dompak Jahowa bani panorang hasosakanni ai.

²³ Ai manggalang do ia hubani naibata ni Damaskus, na manaluhonsi, nini, “Halani naibata ni raja-raja Aram do manolongi sidea, dihut ma ahu manggalang hujai, andohar dihut ahu iurupi sidea,” hape gabe hadabuhan do ai bani ampa bani ganup halak Israel.

²⁴ Dob ai ipatumpu si Ahas ma parugas ni Rumah ni Naibata anjaha ibolahi ma ai; itutup ma labah ni Rumah ni Jahowa, anjaha ipauli ma bani anjapanjap bani ganup suhi-suhi ni Jerusalem.

²⁵ Ipauli do homa bani ganup huta ni Juda panumbahan i buntu-buntu, panggalangan bani naibata na legan, gabe ipuhoi ma marhitei ai ringis ni Jahowa, Naibata ni ompungni.

²⁶ Barita na legan ai ope pasalsi, na binahenni humbani mungkahni das hubani ujungni, tarsurat do ai ibagas Buku ni Raja-raja Juda ampa Israel.

²⁷ Dob ai modom ma si Ahas rap pakon ompungni, anjaha itanom sidea ma ia i huta Jerusalem; seng itanom sidea ia hu tanoman ni raja-raja Juda. Jadi si Hiskia, anakni ai ma bangkit raja manggantihsi.

Iuras Raja Hiskia Rumah Panumbahan

(Pausih 2 Raj. 18-20; Jes. 36-39)

29 ¹ Marumur dua puluh lima tahun do si Hiskia, sanggah na bangkit raja ia, anjaha dua puluh siah tahun do dokahni manrajai i Jerusalem. Goran ni inangni si Abia do, boru ni si Sakarya.

² Ihorjahon do rosuh ni Jahowa, romban hubani haganup na binahen ni ompungni si Daud.

³ Mintor ihatahon do ungkabon labah ni Rumah ni Jahowa, anjaha ipabayu ma ai bani bulan sada, bani tahun parlobei dob gabe raja ia.

⁴ Ihatahon ma roh malim ampa halak Levi, anjaha ipatumpu ma sidea i alaman hampit hapoltakan,

⁵ anjaha nini ma dompak sidea, “Tangihon nasiam ma ahu, nasiam halak Levi. Uras nasiam ma diri nasiam, anjaha uras nasiam ma Rumah ni Jahowa, Naibata ni ompung nasiam, anjaha padarat nasiam ma sagala na butak hun rumah na mapansing in.

⁶ Ai bangga do dousa ni ompungta, anjaha ihorjahon sidea do sogam ni uhur ni Jahowa, Naibatanta; itadingkon sidea do la, anjaha ipadaoh sidea do bohi ni sidea humbani ianan ni Jahowa, itundali do ai.

⁷ Ambahni ai ikunsi sidea do labah ni surambih ai, iintopi sidea do suluh, seng be itutung sidea dahupa, anjaha seng be igalangkon sidea galangan na mapansing hubani Naibata ni Israel.

⁸ Halani ai, do ase roh ringis ni Jahowa hubani Juda ampa Jerusalem, gabe ibahen ma sidea hirjat-hirjaton, marhabiaran ampa gabe siapas-apason, songon na boi idahon nasiam marhitei panonggor nasiam.

⁹ Ai tonggor nasiam ma, rasei do ompungta ibahen podang anjaha anakta pakon borunta ampa parinangonta tarbuang do halani ai.

¹⁰ Isurahon uhurhu do sonari sihol mambahen padan bani Jahowa, Naibata ni Israel, ase andohar surut humbanta pargajag ni ringis-Ni.

¹¹ Halani ai, nasiam anakku, ulang ma nasiam lansei, ai nasiam do na pinilih ni Jahowa jongjong i lobei-Ni, laho marugas Bani, anjaha nasiam do siparugas Bani ampa situtung dahupa Bani.”

¹² Dob ai jongjong ma halak Levi: Si Mahat, anak ni si Amasi pakon si Joel, anak ni si Asarya humbani ginompar ni si Kahat; humbani ginompar ni si Merari: Si Kis, anak ni si Jehallelel; humbani ginompar ni si Gersom: Si Joah, anak ni si Sima pakon si Eden, anak ni si Joah.

¹³ Humbani ginompar ni si Elisapan: Si Simri pakon si Jehiel; humbani ginompar ni si Asap: Si Sakarya pakon si Matanya.

¹⁴ Humbani ginompar ni si Heman: Si Jehiel pakon si Simej; humbani ginompar ni si Jedutun: Si Semaya pakon si Usiel.

¹⁵ Ipatumpu sidea ma sanina ni sidea ai, anjaha iuras sidea ma diri ni sidea; dob ai masuk ma sidea romban hubani tonah ni raja ai, sihol manguras Rumah ni Jahowa romban hubani hata ni Jahowa.

¹⁶ Masuk ma malim ai hubagas Rumah ni Jahowa laho manguras ai, anjaha ipadarat sidea ma sagala na mabutak, na jumpah sidea ibagas Rumah ni Jahowa, hu alaman ni Rumah ni Jahowa; ibuat halak Levi ma ai, anjaha iboan sidea ma ai hu Bah Kidron.

¹⁷ Bani ari sada bulan sada do ipungkah sidea na manguras ai, anjaha paualuharihon bani bulan ai masuk ma sidea hu surambih ni Jahowa, laho

manguras surambih ni Jahowa, anjaha iuras sidea ma Rumah ni Jahowa ibagas na ualuh ari ai; bani ari sapuluh onom bulan sada salosei ma horja ni sidea.

¹⁸ Dob ai masuk ma sidea marayak Raja Hiskia, nini ma, “Domma iuras hanami ganup Rumah ni Jahowa, anjapanjap panggalangan ni galangan situtungan ampa ganup parugasni, meja hatibalan ni ruti sigalangkonon ampa ganup parugasni.

¹⁹ Ambahni ai sagala parugas, na dob niambukkon ni Raja Ahas sadokah manrajai ia, sanggah na mardousa ai ia, domma ipasirsir anjaha iuras hanami, anjaha tonggor ham ma, ganupan ai domma i lobei ni anjapanjap ni Jahowa.”

²⁰ Dob ai ipagirah Raja Hiskia ma puho, anjaha ipatumpu ma kopala-kopala ni huta ai, laho tangkog hu Rumah ni Jahowa.

²¹ Anjaha iboan sidea do pitu lembu jonggi, pitu biribiri tunggal, pitu anak ni biribiri pakon pitu hambing tunggal bahen galangan pardousaon bani parrumah ni raja ai, bani ianan na mapansing ai ampa bani Juda. Dob ai ihatahon raja ai ma dompak ginompar ni si Aron, ai ma malim-malim ai, ase igalangkon sidea ai iatas anjapanjap ni Jahowa.

²² Isayat sidea ma lembu ai, ibuat malim ai ma darohni, anjaha ipispiskon ma ai bani anjapanjap; biribiri tunggal ai pe isayat ma, anjaha darohni ai ipispiskon bani anjapanjap; anak ni biribiri tunggal

ai pe isayat ma, anjaha darohni ai pe ipispiskon ma bani anjapanjap.

²³ Dob ai iboan ma use hambing tunggal bahen galangan pardousaon hu lobei ni raja ai ampa hu lobei ni tumpuan ai, anjaha itampeihon sidea ma tanganni hu atasni.

²⁴ Isayat malim ai ma ai, anjaha ibahen ma darohni ai gabe galangan pardousaon i atas ni anjapanjap ai, laho mambahen pardearan bani haganup Israel; ai ihatahon raja ai do manggalangkon galangan situtungan pakon galangan pardousaon ai bani ganup halak Israel.

²⁵ Ipajongjong raja ai ma homa halak Levi ibagas Rumah ni Jahowa marhasoman arbap, sordam pakon husapi mangihutkon tonah ni si Daud, pakon si Gad, halak na marpanonggoran bani raja ai, ampa Nabi Natan; ai tonah ni Jahowa do ai marhitei pamangan ni nabi.

²⁶ Jongjong ma tongon halak Levi pajolom-jolom parugas musik ni si Daud, anjaha malim-malim manjolom tarompit.

²⁷ Dob ai ihatahon si Hiskia ma na manggalangkon galangan situtungan i atas ni anjapanjap. Jadi sanggah ipungkah na manggalangkon galangan situtungan ai, ipungkah homa ma mandodingkon doding puji-pujian bani Jahowa rap pakon tarompit ihasomani parugas musik ni si Daud, raja ni Israel.

²⁸ Manrogop ma ganup tumpuan ai, anjaha pandoding mandoding, partarompitni martarompit; sai inunuti sidea ma mambahen sonai haganup, paima dob galangan situtungan ai.

²⁹ Jadi saloseihonsi na manggalang ai, manrogop ma raja ai ampa haganup halak na rap pakonsi, lanjar martonggo ma sidea.

³⁰ Dob ai ihatahon Raja Hiskia ampa kopala-kopala ai ma halak Levi mandodingkon puji-pujian bani Jahowa, domu hubani na hinatahon ni si Daud ampa si Asap, halak na marpanonggoran ai. Jadi marmalas ni uhur ma sidea mandodingkon puji-pujian, manrogop ma sidea anjaha martonggo.

³¹ Dob ai nini si Hiskia ma, “Domma iuras nasiam use diri nasiam bani Jahowa, padohor nasiam ma, boan nasiam ma galangan sisayaton ampa galangan puji-pujian hu Rumah ni Jahowa.” Jadi iboan tumpuan ai ma galangan sisayaton ampa galangan puji-pujian; anjaha sagala na tarojur uhurni mamboan galangan situtungan.

³² Ia buei ni galangan situtungan, na binoan ni tumpuan ai, ai ma pitu puluh lembu, saratus biribiri tunggal, pakon dua ratus anak ni biribiri. Ganupan ai bahen galangan situtungan bani Jahowa;

³³ ambahni ai sibere-bere na mapansing, onom ratus lembu ampa tolu ribu biribiri.

³⁴ Tapi maotiktu do malim, gabe seng tarbobaki sidea ganup galangan situtungan ai, gabe halak

Levi, anggi ni sidea ai ma na mangurupi sidea paima dob horja ai, paima iuras malim na legan ai homa dirini; ai bujuran do halak Levi manguras humbani buei malim.

³⁵ Ambahni ai buei tumang do homa ijai galangan situtungan ampa taboh-taboh ni galangan pardameian ampa galangan siinumon hasoman ni galangan situtungan. Sonai ma gabe mulak dear use horja ai i Rumah ni Jahowa.

³⁶ Jadi marmalas ni uhur ma si Hiskia ampa haganup bangsa ai, halani haganup na dob binahen ni Naibata bani bangsa ai; ai podas do masa ganupan ai.

Pamestahon ni si Hiskia bani Pesta Paskah

30 ¹ Dob ai isuruh si Hiskia ma suruhanni hubani ganup Israel pakon Juda, itongos ma homa surat hu Efraim pakon Manasse, ase roh bei sidea hu Rumah ni Jahowa i Jerusalem, laho marpesta Paskah bani Jahowa, Naibata ni Israel.

² Ai domma manriah hinan raja ai rap pakon kopala-kopala ampa ganup tumpuan ai i Jerusalem, laho marpesta Paskah bani bulan dua.

³ Ai lang tarbahen sidea mamestahon ai bani panorangni hinan, halani na so sungkup ope bilangan ni malim manguras dirini, sonai homa halak simbuei ai seng ope tumpu i Jerusalem.

⁴ Rosuh do uhur ni raja ai ampa ganup tumpuan ai bani riah ai.

⁵ Jadi mardos ni uhur ma sidea maningtingkon ai hu sab Israel, olat ni Berseba das hu Dan, ase roh bei sidea hu Jerusalem marpesta Paskah bani Jahowa, Naibata ni Israel, ai domma dokah seng riap sidea marpesta, romban hubani na tarsurat.

⁶ Dob ai bingkat ma suruhan mamboan surat tangan ni raja ai ampa kopala-kopalani maningtingkon hu sab Israel, ampa hu Juda, romban hubani na pinarentahkon ni raja ai, “Nasiam halak Israel, mulak ma nasiam hubani Jahowa, Naibata ni si Abraham, si Isak pakon si Israel, ase mulak la hubani jolma, simasima nasiam, na maluah humbani tangan ni raja Assur.

⁷ Ulang ma nasiam songon ompung ampa sanina nasiam na mardousa dompak Jahowa, Naibata ni ompung ni sidea, gabe iondoskon sidea hu hamagouan, songon na niidah nasiam nuan.

⁸ Ai pe, ulang ma pahengkeng nasiam uhur nasiam, songon na binahen ni ompung nasiam, tapi ondoskopon nasiam ma diri nasiam bani Jahowa, anjaha roh ma nasiam hubani ianan hapansingon-Ni, na dob pinapansing-Ni ronsi sadokah ni dokahni, anjaha balosi nasiam ma Jahowa, Naibata nasiam, ase surut humbani nasiam pargajag ni ringis-Ni.

⁹ Ai anggo mulak nasiam bani Jahowa, jumpahan idop ni uhur ma sanina nasiam ampa anak nasiam humbani na mambuankon sidea, anjaha mulak ma sidea hu tanoh on. Ai paridop ni uhur anjaha pardear layak do Jahowa, Naibata nasiam, anjaha seng anjai padaohon-Ni bohi-Ni humbani nasiam, anggo mulak nasiam hu Bani.

¹⁰ Jadi mardalan ma suruhan ai hun huta na sada hu huta na sada nari i tanoh Efraim pakon Manasse das hu Sebulon; tapi ipartawai halak do sidea anjaha iapasi.

¹¹ Otik do hansa halak hun Asser, Manasse ampa Sebulon, na paunduk uurni anjaha roh hu Jerusalem.

¹² Tapi itumpaki tangan ni Jahowa do Juda, ibere do bani sidea sada ni uhur, laho mangkorjahon parentah ni raja ai ampa kopala-kopala ai, romban hubani hata ni Jahowa.

¹³ Jadi martumpu ma i Jerusalem buei tumang halak, laho mamestahon pesta ruti na so niigaran bani bulan dua; banggal tumang do tumpuan ai.

¹⁴ Jadi marhorja ma sidea, anjaha ireongkon sidea ma anjapanjap na adong i Jerusalem, sonai homa anjapanjap panutungan ni dahupa iparpadaoh sidea do, ipanggijigkon hu habungan Kidron.

¹⁵ Dob ai isayat sidea ma biribiri Paskah bani ari sapuluh opat bulan dua. Jadi maila ma malim ampa

halak Levi, iuras sidea ma dirini, laho mamboan galangan situtungan hubagas Rumah ni Jahowa.

¹⁶ Jadi jongjong ma sidea bani hajongjonganni bei hinan romban hubani titah ni si Musa, halak ni Naibata. Ispiskon malim ai ma daroh ai, na jinalo ni sidea hun tangan ni halak Levi.

¹⁷ Ai buei do halak i tumpuan ai, na so manguras dirini ope, halani ai maningon sayaton ni halak Levi biribiri Paskah, laho manguras halak na so hona uras ope, ase pansing sidea bani Jahowa.

¹⁸ Ai buei tumang do humbani na martumpu ai, sibueinan, ai ma hun Efraim, Manasse, Isasar ampa Sebulon, seng manguras ope; age sonai ipangan sidea do Paskah ai, seng romban hubani na tarsurat ai. Jadi martonggo ma si Hiskia mangapiti sidea, nini ma, "Pardear layak do Jahowa, sai marpangulaki ma uhur-Ni

¹⁹ mangidah halak na mangindahi humbani gok ni uhurni Naibata Jahowa, Naibata ni ompungni, age pe seng romban ai hubani pangurasion na sapatutni bani ianan na mapansing."

²⁰ Jadi itangihon Jahowa do tonggo ni si Hiskia ai, anjaha ipamalum do bangsa ai.

²¹ Sonai ma halak Israel na martumpu i Jerusalem, marpesta ruti na so niigaran pitu ari dokahni ibagas malas ni uhur banggal; anggo halak Levi ampa malim, mamuji-muji Jahowa do ari-ari marhasoman hinsah ni uhur i lobei ni Jahowa.

²² Jadi mangkatahon hata tarima kasih ma si Hiskia hubani halak Levi, na mandalankon horja ai bani Jahowa ibagas pantas ni uhur. Ipestahon sidea ma pesta ai pitu ari dokahni, ai ma marhitei na manggalankon galangan pardameian ampa mamuji-muji Jahowa, Naibata ni ompung ni sidea.

²³ Dob ai mardos ni uhur ma ganup tumpuan ai, sihol marpesta ope pitu ari nari; saud ma sidea marpesta pitu ari nari ibagas malas ni uhur.

²⁴ Ai domma ilayak-layakkon si Hiskia, raja ni Juda, hubani tumpuan ai, saribu lembu jonggi pakon pitu ribu biribiri bahen sigalangkonon; anjaha kopala-kopala ai pe domma ilayak-layakkon hubani tumpuan ai saribu lembu jonggi ampa salaksa biribiri. Anjaha malim pe domma buei tumang na manguras dirini.

²⁵ Jadi marmalas ni uhur ma ganup tumpuan ni Juda, sonai homa malim, halak Levi, haganup tumpuan, na roh hun Israel, halak dagang, na roh hun Israel ampa halak dagang, na marianan i Juda.

²⁶ Masa do malas ni uhur banggal i Jerusalem; ai olat ni panorang ni si Salomo, anak ni si Daud, raja ni Israel, seng onggama masa sonai i Jerusalem.

²⁷ Dob ai jongjong ma malim ampa halak Levi mamasu-masu bangsa ai, anjaha itangihon Naibata do sora ni sidea, ai das do tonggo ni sidea ai bani ianan na mapansing i nagori atas.

31 ¹ Jadi dob marujung haganup ai, bingkak ma ganup halak Israel, na adong ijai marayak huta-huta ni Juda; irosaki ma ganup gana-gana, anjaha irobok sisombakon Ashera, iparreong ma panumbahan na i buntu-buntu pakon anjapanjap i sab Juda pakon Benjamin, i Efraim ampa i Manasse, bois tumang do ganup ibahen. Dob ai mulak ma halak Israel ganupan hu hutani bei, ganup hu parbagiananni bei.

² Dob ai iatur si Hiskia ma use horin ni malim ampa halak Levi, mangihutkon parhorinan hinan, ganup romban hubani jabatanni, age malim age halak Levi, ai ma pasal na manggalangkon galangan situtungan ampa galangan pardearan, laho marugas bani horbangan ni alaman ni Rumah ni Jahowa, laho mamuji ampa mangkatahon tarima kasih.

³ Ia tumpak ni raja ai, humbani na adong bani sandiri, ai ma hubani galangan situtungan, galangan situtungan sogod ampa bodari, galangan situtungan ari Sabat, poltak ni bulan ampa panorang pesta, songon na tarsurat ibagas buku titah ni Jahowa.

⁴ Anjaha iparentahkon raja ai ma hubani bangsa ai, na marianan i Jerusalem, ase ibere bei guguan ni hubani malim ampa halak Levi, ase bulat uhur ni sidea mangkorjahon titah ni Jahowa.

⁵ Jadi sar ma hata ai, ipabuei halak Israel ma mamboan limbuah humbani omei, anggur, minak,

manisan ampa humbani haganup atap aha pe gogoh ni tanoh ai; buei tumang do iboan sidea parsapuluhan ni atap aha pe.

⁶ Anjaha halak Israel ampa Juda, na marianan ibagas huta ni Juda, iboan sidea do parsapuluhan humbani lombu ampa biribiri, sonai homa parsapuluhan humbani sibere-bere na mapansing, na dob pinapansing hubani Jahowa, Naibata ni sidea, pala margugun-gugun.

⁷ Bani bulan tolu do ipungkah sidea pagugunkon ai, anjaha bani bulan pitu pe ase marpunsa.

⁸ Jadi dob masuk si Hiskia ampa kopala-kopala ai manonggor gugunan ai, ipuji sidea ma Jahowa ampa bangsa-Ni halak Israel.

⁹ Dob ai isungkun si Hiskia ma malim ampa halak Levi pasal guguan ai.

¹⁰ Nini si Asarya ma, ai ma ginompar ni si Sadok, mambalosi, “Olat ni dob ipungkah sidea mamboan guguan hu Rumah ni Jahowa, mangan do hanami, sungkupan do hanami anjaha buei do teba, ai ipasupasu Jahowa do bangsa-Ni, gabe tading bennami guguan on.”

¹¹ Dob ai ihatahon si Hiskia ma sidea paulihon kamar parbohalan ibagas Rumah ni Jahowa; jadi ipauli sidea ma ai.

¹² Dob ai ipamasuk sidea ma hujai guguan ai sintong-sintong, parsapuluhan ai ampa sibere-bere na pinapansing ai. Ia kopala haondosan ni ganupan

ai, ai ma si Hananya, halak Levi, ampa si Simei, anggini ai, kopala paidua.

¹³ Anjaha si Jehiel, si Asasya, si Nahat, si Asahel, si Jerimot, si Josabad, si Eliel, si Jismakya, si Mahat ampa si Benaya, ai ma sipamareksa, na mangurupi si Hananya ampa si Simei anggini ai, ai ma na pinabangkit ni Raja Hiskia ampa si Asarya, kopala ni Rumah ni Naibata.

¹⁴ Anjaha si Kore, anak ni si Jimna, halak Levi ai do, sijaga horbangan na hampit hapoltakan ai, ia do sipamareksa sibere-bere nionjar ni uhur hubani Naibata, laho mambagihon guguan, na dob tinontuhon bani Jahowa, ampa sibere-bere na mapansing tumang.

¹⁵ Anjaha si Eden, si Minyamin, si Jesua, si Semaya, si Amarya pakon si Sekanya do na bujur-bujur mangurupisi i huta ni malim-malim, laho mambagihon parbagianan ai hubani sanina ni sidea ai, romban hubani horinni bei, dos na matua-matua age na etek;

¹⁶ pitah humbani dalahi, olat ni na marumur tolu puluh tahun hu atas, ai ma na masuk hubagas Rumah ni Jahowa, romban hubani horja siganup ari sihorjahonon ni sidea bani jabatanni bei, mangihutkon parhorinan ni sidea bei.

¹⁷ Ia malim isuratkon ma goran ni sidea, mangihutkon ginompar ni sidea mar sasaompung;

ia halak Levi, olat ni na marumur dua puluh tahun hu atas, mangihutkon parbagianan ni sidea bei.

¹⁸Tarsurat do goran ni sidea rap pakon ganup dakdanak ni sidea na etek-etek, parinangon ni sidea, ganup pangku ai, tulimat do idaptarhon.

¹⁹Anjaha bani ginompar ni si Aron, ai ma malim-malim ai, na marianan i sampalan ni huta ni sidea, adong do bani sidea, halak na dob tarsurat goranni, bani ganup huta, na mambagihon parbagianan bani ganup dalahi i tongah-tongah ni malim ampa hubani haganup na tarsurat humbani halak Levi.

²⁰Sonai ma ibahen si Hiskia i sab Juda; sai ihorjahon do na madear, na pintor ampa na bujur i lobei ni Jahowa, Naibatani.

²¹Anjaha sagala horja na pinungkahni ai mandalankon parugason i Rumah ni Jahowa, ai ma romban hubani titah ampa parentah, laho mangindahi Naibatani, ihorjahon do ai humbani gok ni uhurni, gabe manjadi do.

Pamorangon ni si Sanherib pakon Parmisirni

(Pausih 2 Raj. 18:13-20, 21; Jes. 36-39)

32¹Jadi dob salpu na masa ai ampa na pataridahkon horja hasintonganni si Hiskia ai, roh ma si Sanherib, raja ni Assur, masuku ma Juda anjaha ihubu huta na pinatoguh; isura uhurni do sihol manaban ai.

² Jadi dob iidah si Hiskia, na dob roh si Sanherib marsura-sura sihol marporang dompak Jerusalem,

³ manriah ma raja ai rap pakon kopala-kopalani ampa puanglima, sihol mambongbong bah tubuh na i darat ni huta ai; jadi iurupi sidea ma ia.

⁴ Ai martumpu do buei halak, gabe ibongbong sidea ma sagala bah tubuh ampa bah bolon, na mardalan hun tanoh ai, nini sidea do, “Mase ma buei bah jumpahon ni raja Assur, anggo roh ia?”

⁵ Dob ai ipatenger raja ai ma uhurni, ipatoguh ma sagala tembok na dob marongrong, ipauli ma menara i atasni, anjaha i daratni ai ipauli ma tembok na legan; anjaha Milo, na i huta ni si Daud ai, ipatoguh do. Ipauli do homa buei tumang tanja ampa gantar-gantar.

⁶ Anjaha ipabangkit do kopala-kopala porang mambobahon bangsa ai, anjaha ipatumpu ma sidea hu lambungni i alaman dohorhon horbangan ni huta ai, anjaha marsahap ma ia patengerhon uhur ni sidea,

⁷ “Tenger ma uhur nasiam anjaha marsijoloman, ulang ma nasiam mabiar, anjaha ulang ma gobir uhur nasiam i lobei ni raja Assur barang i lobei ni ganup balani na rap pakonsi, ai gogohan do sihasomani hita ase ia.

⁸ Tangan na mardaging do hasomanni, tapi anggo hasomanta Jahowa Naibatanta do, na mangurupi anjaha na mambobahon parporanganta.” Jadi

tenger ma uhur ni bangsa ai halani hata ni si Hiskia, raja ni Juda ai.

⁹ Dob ai roh ma si Sanherib, raja ni Assur, na mangkubu huta Lakis rap pakon ganup balani, isuruh ma juakjuakni hu Jerusalem marayak si Hiskia, raja ni Juda, ampa haganup halak Juda, na i Jerusalem, nini ma,

¹⁰ “Sonon do hata ni si Sanherib, raja ni Assur, ‘Marhatengeraan hubani aha do nasiam, ase marianan ope nasiam i Jerusalem, ibagas huta na hinubu inggot?

¹¹ Ai lang si Hiskia do na pakahouhon nasiam, laho mangondoskon nasiam hu hamatean, lohei ampa horah, anggo ihatahon hubani nasiam, “Jahowa Naibatanta do na paluahkon hita humbani tangan ni raja Assur?”

¹² Ai lang ia, si Hiskia do, na dob na padaohkon panumbahanni na i buntu-buntu ampa anjapanjapni, hape ihatahon ope hubani Juda ampa Jerusalem, “I lobei ni anjapanjap na sada on do nasiam marsombah, anjaha i atasni on do nasiam manutung dahupa?”

¹³ Ai lang ibotoh nasiam barang aha na dob hubahen ampa na binahen ni ompung hubani haganup bangsa ni tanoh na legan? Ai adong do naibata ni bangsa ni tanoh ai, na boi paluahkon nagori ni sidea hun tanganku?

¹⁴ Ise ma humbani haganup naibata ni bangsa sipajuh begu-begu, na siniapkon ni ompung, na boi paluahkon bangsani hun tanganku? Mintor mubah ma gakni Naibata nasiam, tarpaluah-Si ma nasiam hun tanganku?

¹⁵ Ai pe, ulang ma ra nasiam sonai paoto-otoon ni si Hiskia, barang pakahouonni! Ulang ma haporsayai nasiam ia! Ai lang adong age sada naibata ni ganup bangsa-bangsa barang harajaon ai, na boi paluahkon bangsani hun tanganku barang hun tangan ni ompung. Samintolah Naibata nasiam ai ma, mintor tarpaluah-Si ma nasiam hun tanganku?"

¹⁶ Lambin inunut juakjuakni ai ope mangkatahon hatani mangapasi Naibata Jahowa ampa si Hiskia, juakjuak-Ni ai.

¹⁷ Ambahni ai domma isurat hinan sada surat laho mangapasi Jahowa, Naibata ni Israel, ampa mangkatahon hatani hu Bani, "Songon naibata ni bangsa-bangsa ni tanoh na legan ai seng tarpaluahsi bangsani hun tanganku, sonai ma seng tarpaluah Naibata ni si Hiskia bangsa-Ni humbani tanganku."

¹⁸ Anjaha idilohon sidea do ai gogoh ibagas hata Jahudi hubani pangisi ni Jerusalem, na i atas ni tembok ai, mambibiari ampa mambahen gobir sidea, ase andohar boi taluhononni huta ai.

¹⁹ Sonai ma parsahap ni sidea dompak Naibata ni Jerusalem, songon parsahap ni sidea dompak

naibata ni bangsa sipajuh begu-begu, ai ma naibata na tinukangan ni tangan ni jolma tumang.

²⁰ Dob ai martonggo ma Raja Hiskia ampa Nabi Jesaya, anak ni si Amos, halani hata ai anjaha doruh-doruh dompak nagori atas.

²¹ Dob ai isuruh Jahowa ma sada malekat-Ni maniapkon ganup puanglima, raja-raja ampa kopala-kopala i parsaranan ni raja Assur. Dob ai mulak ma ia, mela tumang hu tanohni. Jadi dob mulak ia hu rumah ni naibatani, roh ma piga-piga anakni sandiri mamunuhsi marhitei podang.

²² Ase Jahowa do na paluahkon si Hiskia ampa pangisi ni Jerusalem hun tangan ni si Sanherib, raja ni Assur, ampa hun tangan ni haganup munsuhni; anjaha sonang ma sidea ibahen inggot.

²³ Jadi buei ma halak na maboban sibere-bere hubani Jahowa i Jerusalem ampa na maharga hubani si Hiskia, raja ni Juda, gabe timbul ma ia olatni ai iidah sagala bangsa sipajuh begu-begu.

Gijang ni Uhur ni si Hiskia; Parmateini

²⁴ Boritan ma ijia si Hiskia pala laho matei; dob ai martonggo ma ia hubani Jahowa, ibalosi Jahowa ma ia anjaha ibere ma bani sada tanda halongangan.

²⁵ Tapi seng maruhur tarima kasih si Hiskia pasal idop ni uhur na jinaloni ai, ai ipagijang do uhurni. Halani ai, roh ma ringis hu bani, hubani Juda ampa Jerusalem.

²⁶ Dob ai ipaunduk si Hiskia ma uhurni, halani gijang ni uhurni ai, ia ampa pangisi ni huta Jerusalem, gabe seng be saud sogop ringis ni Jahowa bani sidea, sanggah bani goluh ni si Hiskia.

²⁷ Bayak tumang do si Hiskia anjaha sangap; ipadear ma bani kamar parartaan, ianan ni pirak, omas, mata intan, rium-riuman, gantar-gantar ampa marbagei-bagei parugas na maharga.

²⁸ Ipauli do homa rumah panimpanan ni gogoh ni tanoh ai, omei, anggur pakon minak, sonai ampa harang ni pinahan.

²⁹ Ambahni ai ipauli ma bani huta-huta; buei tumang do pinahanni, ai ma biribiri pakon lombu, ai ibere Naibata do arta bani buei tumang.

³⁰ Si Hiskia do homa na mambongbong harohan ni Bah Gihon na parbuntu, anjaha ipadalan ma ai hun toruh ni tanoh hu huta ni si Daud na hampit hasundutan. Mardohar do si Hiskia bani ganup horjani.

³¹ Tapi dob roh suruhan ni raja hun Babel, ai ma na sinuruh marayaksi, laho manungkun tanda halongangan na dob masa i nagori ai, jadi itadingkon Naibata ma ia, laho manlajousi anjaha laho mangidah haganup atap aha na adong ibagas uhurni.

³² Ia barita na legan pasal si Hiskia ampa pambahenanni na dear ai, tonggor ma, tarsurat do ai ibagas Buku Pangungkabon ni Nabi Jesaya, anak

ni si Amos, ampa ibagas Buku ni Raja-raja Juda pakon Israel.

³³ Dob ai modom ma si Hiskia rap pakon ompungni, anjaha itanom sidea ma ia i raboyon ni tanoman ni ginompar ni si Daud, anjaha roh bei ma ganup halak Juda ampa pangisi ni Jerusalem pasangapkon raja ai bani parmateini ai. Jadi si Manasse, anakni ai ma bangkit raja manggantihsi.

Panrajaion ni si Manasse

(Pausih 2 Raj. 21)

33¹ Marumur sapuluh dua tahun do si Manasse sanggah na bangkit raja ai ia, anjaha lima puluh lima tahun do dokahni ia manrajai i Jerusalem.

² Dob ai ihorjahon raja ai ma sogam ni uhur ni Jahowa, romban hubani hagigi, na hinorjahon ni bangsa sipajuh begu-begu, na dob pinabali ni Jahowa i lobei ni halak Israel.

³ Ai iulaki raja ai do paulihon panumbahan i buntu-buntu, na dob pinarreong ni si Hiskia, bapani ai, anjaha ipajongjong do anjapanjap bani Baal anjaha ipauli sisombahon Ashera; isombah do ganup bala na i langit, anjaha ibalosi do ai.

⁴ Anjaha ipajongjong do anjapanjap ibagas Rumah ni Jahowa, pasal ai domma ihatahon Jahowa namin, “I Jerusalem do ianan ni goran-Ku ronsi sadokah ni dokahni.”

⁵ Ambah ni ai ipauli do anjapanjap bani haganup bala ni langit i alaman ni Rumah ni Jahowa na dua ai.

⁶ Itutung do homa anakni i habungan Ben-Hinnom, ihorjahon do partondungan, uti-utian, tabas-tabas, ipakei do jolma hasiaran ni begu-begu ampa sipanjahai. Buei tumang do ihorjahon sogam ni uhur ni Jahowa laho mamuhoi ringis-Ni.

⁷ Ipajongjong do gana-gana batu ni naibata na legan, na pinaulini ai, hubagas Rumah ni Naibata; pasal ai do na hinatahon ni Naibata hubani si Daud ampa hubani si Salomo, anakni ai, “Ibagas rumah on do ampa i Jerusalem, na dob Hupilih ai humbani ganup marga ni Israel, patotapon-Ku goran-Ku ronsi sadokah ni dokahni.

⁸ Anjaha seng be paosoron-Ku nahei ni Israel, hun tanoh na dob Hutotapkon hubani ompung nasiam, asal ma iporluhon uhur ni sidea mangkorjahon haganup na dob Huparentahkon hubani sidea, ganupan titah, aturan pakon uhum ai, na binere marhitei si Musa.”

⁹ Tapi ipakahou si Manasse do halak Juda ampa isi ni Jerusalem, gabe ihorjahon sidea ma hajahaton, hasamboron humbani bangsa sipajuh begu-begu, na dob nisiapkon ni Jahowa i lobei ni halak Israel.

¹⁰ Roh do namin hata ni Jahowa hubani si Manasse ampa hubani ganup bangsa-Ni, tapi seng iparimbagaskon sidea.

¹¹ Halani ai, iparoh Jahowa ma dompak sidea kopala-kopala ni bala ni raja Assur, ai ma na manangkap si Manasse marhitei hait-kait, irantei ma ia bani rantei tombaga, anjaha iboan sidea ma ia hu Babel.

¹² Jadi dob tarsosak ia, ielek-elek ma Jahowa, Naibatani, anjaha ipaunduk botul ma uhurni i lobei ni Naibata ni ompungni.

¹³ Martonggo ma ia hu Bani, jadi marpangulaki ma uhur ni Naibata mangidahsi, itangihon ma tonggoni ai, anjaha iboan ma ia mulak hu Jerusalem, hu harajaonni ai hinan. Jadi mangahap ma si Manasse, Jahowa do hape Naibata.

¹⁴ Dob ai ipauli ma tembok hampit darat, i huta ni si Daud, hampit hasundutan ni Gihon, i habungan ai, laho masuk hu Horbangan Dengke; ipatorus ma ai manginggoti Opel, anjaha gijang tumang do ai ibahen. Ambahni ai inahkon do kopala-kopala ni bala marianan i ganup huta na pinatoguh i Juda.

¹⁵ Dob ai ipadaoh ma naibata na legan ampa ganagana humbagas Rumah ni Jahowa ampa haganup anjapanjap na pinajongjong i dolog ianan ni Rumah ni Jahowa ampa na i Jerusalem; iambukkon ma ai hu darat ni huta ai.

¹⁶ Ipajongjong ma use anjapanjap ni Jahowa, anjaha igalangkon ma i atasni galangan pardameian ampa puji-pujian, anjaha iparentahkon ma Juda mambalosi Jahowa, Naibata ni Israel.

¹⁷ Tapi tong ope bangsa ai manggalang i panumbahan na i buntu-buntu, tapi pitah hubani Jahowa, Naibata ni sidea ai mando.

¹⁸ Tapi horja ni si Manasse na legan ai, ampa tonggoni hubani Naibatani ampa hata sipaingat ni nabi, na marsahap dompaksi ibagas goran ni Jahowa, Naibata ni Israel, tonggor ma, tarsurat do ai ibagas buku Barita ni Raja-raja Israel.

¹⁹ Sonai homa tonggoni ampa sonaha panangihon ni Naibata bani elek-elekni ai ampa haganup dousani ampa hajahatonni ampa tapak hajongjongan ni panumbahan na i buntu-buntu, na pinaulini ai, pakon sisombahon Ashera ampa gana-gana, paima ipaunduk uhurni, tonggor ma, tarsurat do ai ibagas buku Barita ni Halak na Marpanonggoran.

²⁰ Dob ai modom ma si Manasse rap pakon ompungni, gabe itanom sidea ma ia ibagas rumahni; jadi si Amon, anakni ai ma bangkit raja manggantihsi.

Panrajaion ni si Amon

(Pausih 2 Raj. 21)

²¹ Marumur dua puluh dua tahun do si Amon, sanggah na bangkit raja ai ia, anjaha dua tahun do dokahni ia manrajai i Jerusalem.

²² Ihorjahon do sogam ni uhur ni Jahowa, songon na binahen ni si Manasse, bapani ai: Manggalang

do si Amon hubani ganup gana-gana, na pinauli ni si Manasse, bapani ai, anjaha marsombah do ia hujai.
²³ Tapi seng ipaunduk si Amon uhurni i lobei ni Jahowa, songon na pinaunduk ni si Manasse, bapani ai, uhurni, tapi lambin ipabuei si Amon do tene salahni.

²⁴ Dob ai marbulawan ma juakjuakni mangimbangi, anjaha ibunuh ma ia ibagas rumahni sandiri.

²⁵ Tapi roh ma bangsa pangisi ni nagori ai, ibunuh sidea ma halak na marbulawan mangimbang Raja Amon; jadi ipabangkit pangisi ni nagori ai ma si Josia, anakni ai, gabe raja manggantihsi.

Habayuon na Binahen ni si Josia

(Pausih 2 Raj. 22 pakon 23)

34 ¹ Marumur ualuh tahun do si Josia, sanggah na bangkit raja ai ia, anjaha tolu puluh sada tahun do dokahni ia manrajai i Jerusalem.

² Ihorjahon do rosuh ni uhur ni Jahowa, anjaha mardalan do ia bani dalan ni si Daud, ompungni ai; seng manirpang ia hu siamun barang hu sambilou.

³ Ai pauuluh-tahunkon dob manrajai ia, sanggah poso ope ia, ipungkah ma mangindahi Naibata ni si Daud, ompungni ai, anjaha pasapuluhdua-tahunkon ipungkah ma manguras Juda ampa Jerusalem humbani panumbahan na i buntu-buntu,

sisombahon Ashera ampa gana-gana na niuhir ampa na tinuang.

⁴ Ibolahi sidea do anjapanjap ni Baal i lobei ni raja ai; anjaha anjapanjap pardahupaan na i atas ni ai iparreongkon do, anjaha iropuki do sisombahon Ashera ampa gana-gana na niuhir ampa gana-gana na tinuang ai; ibahen ma ai gabe abuan anjaha itirtirhon ma hu atas ni tanoman ni halak na manggalang hujai.

⁵ Itutung do homa holi-holi ni malim i atas ni anjapanjap ni sidea ai. Sonai ma pangurupion pakon pangurasni bani Juda ampa Jerusalem.

⁶ Age huta-huta ni Manasse, Efraim, Simeon das hu Naptali, isiari ma ai inggot,

⁷ iparreong ma anjapanjapni, iropuki ma sisombahon Ashera ampa gana-gana, anjaha irobok ma anjapanjap pardahupaan i sab tanoh ni Israel. Dob ai mulak ma ia hu Jerusalem.

⁸ Pasapuluhualuh-tahunkon dob manrajai ia, sanggah na manguras tanoh ampa rumah panumbahan ai ia, isuruh ma si Sapan, anak ni si Asalya, pakon si Maaseya, kopala ni huta ai, pakon si Joa, anak ni si Joahas, juru tulis ai, laho mangumban Rumah ni Jahowa, Naibatani ai.

⁹ Jadi das ma sidea bani si Hilkia, sintua ni malim ai, anjaha ipadas sidea ma bani duit, na binoan hu rumah ni Naibata, na pinatumpu-tumpu ni halak

Levi, sijaga labah ai, humbani halak sima-sima ni Israel ampa humbani ganup Juda ampa Jerusalem.

¹⁰ Ipadas sidea ma ai use bani tukang sipareksa Rumah ni Jahowa; anjaha sidea use mambere ai hubani halak na mangkorja i Rumah ni Jahowa, laho mangumban ampa patoguhkon rumah ai.

¹¹ Ibere sidea do ai hubani tukang batu ampa tukang hayu, laho mamboli batu na binarbar ampa parhayu bahen tutup tiang pakon tiang bani rumah ai, ai ma sagala na pinaturut ni raja-raja Juda maseda.

¹² Bujur bei do dalahi ai mangkorjahon horja ai. Ia kopalani ai ma: Si Jahat pakon si Obaja halak Levi ai humbani ginompar ni si Merari, pakon si Sakaria ampa si Mesulam humbani ginompar ni si Kahat, ai ma sipamareksa. Anjaha halak Levi, haganup sidea na pandei manjolom parugas musik,

¹³ sidea do kopala ni halak sipanarui ampa na mambobahon ganup halak sihorjahon horja na marbagei-bagei ai; adong do homa deba humbani halak Levi ai jurutulis, panuturi ampa sijaga horbangan.

¹⁴ Jadi dob ipadarat sidea duit, na binoan hu Rumah ni Jahowa, jumpah Malim Hilkia ma buku titah ni Jahowa, na ibere marhitei si Musa.

¹⁵ Dob ai nini si Hilkia ma hubani si Sapan, jurutulis ai, “Domma jumpah ahu buku titah ibagas Rumah ni Jahowa.” Ibere si Hilkia ma buku ai hubani si Sapan.

¹⁶ Iboan si Sapan ma buku ai hubani raja ai, ambahni ai ipatugah ope hubani raja ai: Haganup na pinarentahkon hubani juakjuakmu, ihorjahon sidea do.

¹⁷ Domma iuseihon sidea duit na jumpah ai ibagas Rumah ni Jahowa, anjaha domma ipadas ai hubani halak sipamareksa ampa siparhorja ai.

¹⁸ Dob ai ipatugah si Sapan, jurutulis ai ma hubani raja ai, “Ibere Malim Hilkia do bangku sada buku.” Jadi ibasa si Sapan ma buku ai i lobei ni raja ai.

¹⁹ Jadi dob ibogei raja ai hata ni buku titah ai, irigati ma pakeianni.

²⁰ Dob ai ihatahon raja ai ma hubani si Hilkia pakon si Ahikam, anak ni si Sapan, pakon si Abdan, anak ni si Mika, pakon si Sapan jurutulis ai, pakon si Asaya, juakjuak ni raja ai, nini ma,

²¹ “Laho ma nasiam, sungkun nasiam ma Jahowa pasal ahu ampa pasal jolma na tading i Israel ampa i Juda, pasal hata ni buku na jumpah ai, ai banggal tumang do ringis ni Jahowa na niuseihon-Ni banta, halani na so ihorjahon ompungta hata ni Jahowa, sihorjahononkon namin romban hubani sagala na tarsurat ibagas buku on.”

²² Dob ai laho ma si Hilkia rap pakon na sinuruh ni raja ai, marayak nabi naboru, si Hulda, parinangon ni si Salum, anak ni si Tokhat, anak ni si Hasra, sijaga pakeian. Tapi marianan do si Hulda i Jerusalem bani

ianan ni naboru ai, jadi marsahap ma sidea pasal ai hu bani.

²³ Dob ai nini si Hulda ma dompak sidea, “Sonon do hata ni Jahowa, Naibata ni Israel, “Patugah nasiam ma hubani dalahi na marsuruh nasiam marayak ahu:

²⁴ Sonon do hata ni Jahowa: Tonggor ma, parohon-Ku ma hamagouan hu huta on pakon hubani pangisini ai, romban hubani haganup papa-papa na tarsurat ibagas buku ai, ai ma na dob binasa i lobei ni raja ai.

²⁵ Halani na tinadingkon ni sidea ai Ahu, anjaha manutung dahupa sidea hubani naibata na legan, laho mamuhoi ringis-Hu marhitei haganup pambahenan ni tangan ni sidea ai, halani ai maningon useihonon-Ku do ringis-Ku hu ianan on, anjaha seng be tarintopi.

²⁶ Tapi anggo dompak raja ni Juda na marsuruh nasiam laho manungkun Jahowa, sonon ma hatahon nasiam hu bani, ‘Sonon do hata ni Jahowa, Naibata ni Israel: la pasal hata na dob binogeimu ai,

²⁷ halani na dob mangahap uhurmu, anjaha ipaunduk ho uhurmu i lobei ni Naibata, dob ibogei ho hata na nilumbahon-Ni ai dompak huta on ampa dompak pangisini ai, anjaha ipaunduk ho do uhurmu i lobei ni bohing-Ku, irigati ho hioumu

anjaha tangis ho i lobei-Hu, Ahu pe domma Hutangihon ho,' nini Jahowa.

²⁸ Tonggor ma, patumpuon-Ku ma ho hubani ompungmu, ase marsonang-sonang ho patumpuonni hubagas tanomanmu, anjaha seng sampang idahon ni matamu ai, haganup hamagouan na sihol parohon-Ku hu huta on ampa hubai pangisini ai." Jadi iboan sidea ma balos ai bani raja ai.

²⁹ Dob ai isuruh raja ai ma na patumpuhon haganup partua ni Juda ampa Jerusalem.

³⁰ Dob ai tangkog ma raja ai hu Rumah ni Jahowa, rap pakon haganup dalahi ni Juda ampa pangisi ni huta Jerusalem, malim-malim ampa halak Levi, haganup bangsa ai na banggal ampa na etek; anjaha ibasa ma itangar sidea haganup hata ni Buku Parpadanan, na jumpah ibagas Rumah ni Jahowa.

³¹ Dob ai jongjong ma raja ai bani iananni ai, anjaha ibahen ma parpadanan i lobei ni Jahowa, paboa maningon irikkononkon Jahowa anjaha ramotkonon parentah-Ni, hasaksian-Ni ampa tonah-Ni humbani gok ni uurni ampa humbani gok ni tonduyni, laho mandalankon hata ni parpadanan ai, na tarsurat ibagas buku ai.

³² Dob ai ihatahon raja ai ma jongjong laho mangundukkon parpadanan ai haganup halak na adong i Jerusalem ampa i Benjamin. Jadi ibahen

pangisi ni Jerusalem ma romban hubani hata ni parpadanan ni Naibata ni ompung ni sidea.

³³ Dob ai ipadaoh si Josia ma haganup sihagigihononkon humbani ganup nagori na niianan ni halak Israel, anjaha ibahen ma haganupjolma na adong i Israel, mambalosi bani Jahowa, Naibata ni sidea. Jadi sadokah manggoluh raja ai, seng surut sidea humbani Jahowa, Naibata ni ompung ni sidea.

Pamestahon ni si Josia bani Pesta Paskah

(Pausih 2 Raj. 23:23-30)

35 ¹ Dob ai marpesta Paskah ma si Josia hubani Jahowa i Jerusalem, anjaha isayat sidea ma biribiri Paskah bani ari sapuluh ompat bulan sada.

² Ihatahon raja ai ma malim ai mangkorjahon jabatan ni sidea, anjaha ipatenger ma uhur ni sidea mangkorjahon horja i Rumah ni Jahowa

³ Anjaha ihatahon do homa hubani halak Levi, siajari ganup Israel, anjaha na dob pinapansing ai bani Jahowa, “Nahkon nasiam ma poti na mapansing in hubagas rumah na dob pinajongjong ni si Salomo, anak ni si Daud, raja ni Israel; seng pala be boratan abara nasiam mangusung in. Halani ai, balosi nasiam ma Jahowa, Naibata nasiam, ampa bangsa-Ni halak Israel.

⁴ Sirsir ma nasiam marugas mangihutkon horin nasiam, mar sasaompung romban hubani aturan ni si Daud, raja ni Israel, ampa si Salomo anakni ai.

⁵ Anjaha jongjong ma nasiam ibagas ianan na mapansing ai romban hubani parbanjei ni ginompar ni sanina nasiam humbani bangsa ai, anjaha mardomu hubani parbanjei ai homa halak Levi mar sasaompung.

⁶ Dob ai sayat nasiam ma biribiri Paskah ai, manguras ma nasiam, pasirsir nasiam ma bani sanina nasiam, bahen nasiam ma romban hubani hata ni Jahowa marhitei si Musa.”

⁷ Dob ai ilayak-layakkon si Josia ma hubani halak na mabuei ai anak ni biribiri pakon anak ni hambing, gabe galangan Paskah bani ganupjolma na ijai, tolu puluh ribu bueini ampa tolu ribu lembu; ganupan ai humbani arta ni raja ai do.

⁸ Kopala-kopalani pe sirsi do mamberehon hubani bangsa ai, hubani malim ampa hubani halak Levi. Si Hilkia, si Sakarya ampa si Jehiel, kopala bani rumah panumbahan ai, ibere sidea do bani malim bahen galangan Paskah dua ribu onom ratus biribiri ampa tolu ratus lembu.

⁹ Si Kananya pe, si Semaya pakon si Netaneel, saninani ai, pakon si Hesabya, si Jehiel ampa si Josabad, kopala ni halak Levi, ibere do hubani halak Levi bahen galangan Paskah lima ribu biribiri ampa lima ratus lembu.

¹⁰ Sonai ma pangaturni bani horja ai: Jongjong ma malim bani ianan ni sidea, sonai homa halak Levi mar sasahorin, romban bani parentah ni raja ai.

¹¹ Dob ai isayat sidea ma biribiri Paskah ai, anjaha ipispiskon malim ai ma daroh na jinalo ni sidea ai hubani tangan ni sidea; anjaha halak Levi ai mambobaki galangan Paskah ai.

¹² Dob ai ipalegan sidea ma galangan situtungon ai, laho mambagihon ai mangihutkon banjei-banjei ni halak na mabuei mar sasaompung, laho manggalangkon ai bani Jahowa, songon na tarsurat bani buku ni si Musa. Sonai do homa ibahen sidea hubani lumbu ai.

¹³ Dob ai ipanggang sidea ma biribiri Paskah ai bani apuy mangihutkon aturan, anjaha ilompah sidea ma anggo galangan na mapansing ai ibagas hudon, serek pakon balanga, dob ai iboan ma ai podas hubani halak na mabuei ai.

¹⁴ Dob ai ipasirsir sidea ma bani sidea sandiri ampa bani malim ai; ia malim ai, ai ma ginompar ni si Aron, pongut do sidea manggalangkon galangan situtungon ai ampa taboh-taboh ai ronsi bodari; halani ai ipasirsir halak Levi ai ma bani sidea sandiri ampa bani malim, anak ni si Aron ai.

¹⁵ Ia sipandoding, ai ma ginompar ni si Asap, jongjong do bani ianan ni sidea bei, romban hubani aturan na binahen ni si Daud, si Asap, si Heman pakon si Jedutun, halak na marpanonggoran bani

raja ai; halak sijaga horbangan, manjaga bani ganup horbangan. Seng pala misir sidea humbani horjani bei, ai sanina ni sidea, halak Levi ai do na pasirsirhon bani sidea.

¹⁶ Atur do parugason bani Jahowa sadarini ai, ai ma na marpesta Paskah ai ampa na manggalangkon galangan situtungon ai bani anjapanjap ni Jahowa, romban hubani na pinarentahkon ni raja Israel.

¹⁷ Jadi marpesta Paskah ma halak Israel, na adong ijai, ampa marpesta ruti na so niigaran, pitu ari dokahni.

¹⁸ Seng dong onggaga pesta Paskah na sonai ipamasa i Israel, olat ni panorang ni si Samuel; seng dong onggaga ope pesta Paskah na sonai ai ipamasa raja-raja ni Israel, songon na pinamasa ni si Josia, malim, halak Levi, haganup Juda ampa Israel na ijai, ronsi pangisi ni Jerusalem.

¹⁹ Pasapuluhualuh-tahunkon dob manrajai si Josia, ijai ma masa pesta Paskah ai.

Parmatei ni si Josia

²⁰ Dob salpu haganupan ai, dob iumban si Josia rumah panumbahan ai, tangkog ma si Neko, raja ni Masir, sihol marporang dompak Karkemis, na bani Bah Eprat. Jadi bingkak ma si Josia manjumpahkonsi.

²¹ Tapi isuruh ma suruhanni manjumpahkon si Josia, nini ma, “Aha adong paharanta, ham raja ni

Juda? Seng sihol mandorab ham ahu sadari on, tapi mandorab ginompar ni munsuhku, na mamunsuhi ahu do; anjaha Naibata do na mamarentahkon mangoloskon ai. Parontihon ma mangimbang Naibata, na mangkasomani ahu, ase ulang magou ham bahenonni.”

²² Age pe sonai seng ra si Josia surut humbani, tapi iboranihon ma dirini laho marporang dompaksi. Seng ra ia manangihon hata ni si Neko; na marharorohan humbani pamangan ni Naibata do hape ia, gabe saud ma na marporang ai i Pamah Magiddo.

²³ Jadi ipanah siparsior ma Raja Josia, dob ai nini raja ai ma dompak juakjuakni, “Boan nasiam ma ahu hunjon, ai parah tumang do ugahku.”

²⁴ Dob ai iangkat juakjuakni ma ia hun gareta porang, anjaha inahkon ma ia hubani gareta na legan, anjaha iboan ma ia hu Jerusalem. Dob ai matei ma ia, anjaha itanom ibagas tanoman ni ompungni. Pusok do ganup uhur ni Juda ampa Jerusalem halani parmateri ni si Josia.

²⁵ Si Jeremia pe ibahen do sada doding tangis-tangis bani si Josia; anjaha ganup pandoding dalahi age pandoding naboru manaringati si Josia ibagas doding tangis-tangis ni sidea ronsi sadari on. Gabe aturan do ai i Israel, tonggor ma, tarsurat do ai ibagas Buku Tangis-tangis.

²⁶ Barita na legan ai ope pasal si Josia ampa hadaulaton ni uhurni, na domu hubani na tarsurat ibagas Buku Titah ni Jahowa,

²⁷ ampa pambahenanni, na parlobei pakon na parpudi, tonggor ma, tarsurat do ai ibagas Buku ni Raja-raja Israel ampa Juda.

Raja-raja ni Juda na Parpudi

Parseda ni Huta Jerusalem

(Pausih 2 Raj. 23:31-37; 24; Jer. 52)

36 ¹ Dob ai roh ma bangsa pangisi ni nagori ai, ibuat sidea ma si Joahas, anak ni si Josia, ipabangkit ma ia gabe raja i Jerusalem, ganti ni bapani ai.

² Marumur dua puluh tolu tahun do si Joahas, sanggah na bangkit raja ai ia, anjaha tolu bulan do dokahni manrajai i Jerusalem.

³ Ai ipaturun raja ni Masir do ia i Jerusalem, anjaha idonda do isi ni tanoh ai saratus talenta pirak ampa sada talenta omas.

⁴ Dob ai ipabangkit raja ni Masir ma si Eliakim, anggini ai, gabe raja manggomgom Juda ampa Jerusalem, anjaha iubah ma goranni gabe si Joyakim, tapi anggo si Joahas abangni ai, iboan Raja Neko do ia hu tanoh Masir.

⁵ Marumur dua puluh lima tahun do si Joyakim, sanggah na bangkit ia gabe raja, anjaha sapuluh

sada tahun do ia manrajai i Jerusalem; ihorjahon do sogam ni uhur ni Jahowa, Naibatani.

⁶ Dob ai tangkog ma si Nebukadnesar, raja ni Babel, mangimbangsi, irantei ma ia, laho mamboansi hu Babel.

⁷ Iboan si Nebukadnesar do deba humbani parugas na i Rumah ni Jahowa, anjaha inahkon hubagas rumahni i Babel.

⁸ Barita na legan ai ope pasal si Joyakim, ampa hasamboron na binahenni ai, ampa hajahaton na legan na jumpah bani, tonggor ma, tarsurat do ai ibagas buku Barita ni Raja-raja Israel ampa Juda. Jadi si Joyakin, anakni ai ma bangkit raja manggantihsi.

⁹ Marumur sepuluh ualuh tahun do si Joyakin, sanggah na bangkit raja ai ia, anjaha tolu bulan sepuluh ari do dokahni manrajai i Jerusalem; ihorjahon do sogam ni uhur ni Jahowa.

¹⁰ Tapi marayak bona ni tahun, isuruh Raja Nebukadnesar ma suruhanni mamboansi hu Babel rap pakon parugas na maharga, na adong i Rumah ni Jahowa, anjaha ipabangkit ma si Sedekia, sanina ni bapani, gabe raja manggomgom Juda ampa Jerusalem.

¹¹ Marumur dua puluh sada tahun ma si Sedekia, sanggah na bangkit raja ai ia, anjaha sepuluh sada tahun do dokahni manrajai i Jerusalem.

¹² Ihorjahon do sogam ni uhur ni Jahowa, Naibatani, anjaha seng ipaunduk dirini i lobei ni Nabi Jeremia na padaskon hata ni Jahowa bani.

¹³ Ambahni ai manlawan do ia dompak Raja Nebukadnesar, na dob pabijahonsi hubani Naibata; ipahengkeng do uhurni, ase ulang mulak bani Jahowa, Naibata ni Israel.

¹⁴ Sonai homa kopala-kopala ni malim ampa halak na mabuei ai, seng dong na bujur humbani sidea, ihorjahon sidea do hasamboron ni bangsa-bangsa sipajuh begu-begu, ibutaki sidea do Rumah ni Jahowa, na pinapansing-Ni i Jerusalem.

¹⁵ Girah anjaha gati do namin isuruh Jahowa, Naibata ni ompung ni sidea, palumbahon sidea marhitei suruhan-Ni, ai harga do bangsa-Ni pakon rumah ianan ai bani uhur-Ni,

¹⁶ hape iapasi sidea do suruhan ni Naibata, teos uhurni bani hata sipaingat-Ni anjaha ipartawai nabi-Ni; gabe gajak tumang ma ringis ni Jahowa hubani bangsa-Ni, seng tartambari be.

¹⁷ Halani ai, ihatahon Jahowa ma tangkog raja ni halak Kaldea mandorab sidea, mamunuh anak garama ni sidea marhitei podang ibagas rumah panumbahan ni sidea na mapansing ai, anjaha seng maralang-alang ia mangidah anak boru pakon garama, na matua barang na ubanon; haganup do sidea ipadas hubagas tanganni.

¹⁸ Anjaha ganup parugas i Rumah ni Naibata, na bangga atap na etek, ampa arta na i Rumah ni Jahowa, age na i rumah ni raja ai ampa kopala-kopalani, haganupan ai tarboan do hu Babel.

¹⁹ Itutung sidea do Rumah ni Naibata, anjaha iparreong tembok ni Jerusalem; isurbuy do ganup rumah-rumah na bangga na ijai ai bani apuy, anjaha iparseda ganup parugasni na maharga.

²⁰ Anjaha sagala na maluah humbani podang ibuangkon do hu Babel, gabe jabolon bani raja ai ampa anakni, das hubani parjongjong ni Harajaon Parsi,

²¹ Iaho pasaudkon ganup hata ni Jahowa marhitei pamangan ni si Jeremia, paima ipasuang bani tanoh ai ganup tahun Sabatni; ai sadokah na tarulang ai, marsaran do tanoh ai, laho manggoki sipitu puluh tahun ai.

Ipalopas si Kores Mulak Halak Juda hun Habuangan

(ay. 22:23; pausih Esr. 1:1-3)

²² Tapi bani tahun na parlobei, dob manrajai si Kores, raja ni Parsi, ase sintong saud hata ni Jahowa marhitei pamangan ni si Jeremia, ipuhoi Jahowa ma tonduy ni si Kores, raja ni Parsi, maningtingkon hu sab gomgomanni, pala marhasoman surat ibahen:

²³ Sonon do hata ni si Kores, raja ni Parsi, “Domma ondos hu bangku ganup harajaon na i tanoh on,

ibere Jahowa Naibata na i surga, anjaha isuruh do ahu pajongjong sada rumah Bani i Jerusalem, na i tanoh Juda. Barang ise humbani nasiam, na masuk hubani bangsa-Ni, sai ihasomani Jahowa, Naibatani ai ma ia.” Tangkog ma ia!

Esra

Kores Raja ni Persia Manlopas Halak Juda Mulak pakon Paulihon Rumah Panumbahan

1 ¹ Bani tahun parlobei ni panrajaion ni si Kores, raja ni Persia, ase saud masa hata ni Jahowa marhitei pamangan ni si Jeremia, ipuhoi Jahowa ma tonduy ni si Kores, raja ni Persia, ase isuruh maningtingkon hu sab gomgomanni, pala marhasoman surat ai ibahen.

² Sonon do hata ni si Kores, raja ni Persia, “Domma ondos bangku ganup harajaon ni tanoh on ibere Jahowa, Naibata ni nagori atas, anjaha la do marsuruh ahu pajongjong Bani sada rumah i Jerusalem, na i tanoh Juda.

³ Barang ise humbani nasiam, na masuk bani bangsa-Ni ai, sai ihasomani Naibatani ma ia, anjaha laho ma ia tangkog hu Jerusalem, na i tanoh Juda, ase ipajongjong rumah ni Jahowa, Naibata ni Israel; la do Naibata na marianan i Jerusalem.

⁴ Anjaha barang ise na tading ope bani haganup ianan panginsolatanni ai, songon halak dagang, iurupi ma hasomanni na saianan ai marhitei pirak, omas, ugas-ugas pakon pinahan, legan ni sibere-

bere niojur ni uhur bani rumah ni Naibata, na i Jerusalem.”

⁵ Dob ai jongjong bei ma kopala-kopala ni Juda pakon Benjamin mar sasaompung, sonai homa malim ampa halak Levi, ganup na pinuhoan ni Naibata tonduyni tangkog, laho pajongjong rumah ni Naibata na i Jerusalem;

⁶ anjaha ganupjolma na marianan inggot sidea mangurupi sidea marhitei parugas pirak, omas, ugas-ugas, pinahan pakon arta na maharga, sobali ganup sibere-bere niojur ni uhur.

⁷ Ipadarat Raja Kores ma homa parugas ni rumah ni Jahowa, na dob binoan ni si Nebukadnesar hun Jerusalem, anjaha na ninahkonni hubagas rumah ni naibatani.

⁸ Ihatahon si Kores, raja ni Persia ai do padaraton ni si Miteridat, siramotkon arta ai, anjaha ia mamilangi ai hubani si Sesbasar, kopala ni halak Juda. bd.

⁹ Anjaha on ma bilanganni ai: Tolu puluh pinggan omas, saribu pinggan pirak, dua puluh siah pisou,

¹⁰ tolu puluh panginuman omas, ompat ratus sapuluh panginuman pirak ampa parugas na legan saribu.

¹¹ Ganup parugas omas pakon pirak lima ribu ompat ratus do. Haganupan ai iboan si Sesbasar tangkog, sanggah na tarboan ai na tarbuang ai tangkog hun Babel hu Jerusalem.

Goran-goran ni na Mulak*(Pausih Neh. 7:5-73)*

2¹ Anjaha on do ginompar ni Juda mar sasanagori, na tangkog hun habuangan, na tarbuang hu Babel ibahen si Nebukadnesar, raja hun Babel, anjaha mulak hu Jerusalem pakon hu Juda, ganup hu hutani bei.

² Roh do sidea rap pakon si Serubabel, si Jesua, si Nehemia, si Seraya, si Reelaya, si Mordahai, si Bilsan, si Mispar, si Bigwai, si Rehum pakon si Baana. Bilangan ni dalahi humbani bangsa Israel:

³ ginompar ni si Paros: dua ribu saratus pitu puluh dua;

⁴ ginompar ni si Sepatya: tolu ratus pitu puluh dua;

⁵ ginompar ni si Arak: pitu ratus pitu puluh lima;

⁶ ginompar ni si Pahat-Moab, ai ma ginompar ni si Jesua-Joab: dua ribu ualuh ratus sapuluh dua;

⁷ ginompar ni si Elam: saribu dua ratus lima puluh ompat;

⁸ ginompar ni si Sattu: siah ratus ompat puluh lima;

⁹ ginompar ni si Sakai: pitu ratus onom puluh;

¹⁰ ginompar ni si Bani: onom ratus ompat puluh dua;

¹¹ ginompar ni si Bebai: onom ratus dua puluh tolu;

¹² ginompar ni si Asgad: saribu dua ratus dua puluh dua;

- ¹³ ginompar ni si Adonikam: onom ratus onom puluh onom;
- ¹⁴ ginompar ni si Bigwai: dua ribu lima puluh onom;
- ¹⁵ ginompar ni si Adin: ompat ratus lima puluh ompat;
- ¹⁶ ginompar ni si Ater, ai ma humbani si Hiskia, siah puluh ualuh;
- ¹⁷ ginompar ni si Besai: tolu ratus dua puluh tolu;
- ¹⁸ ginompar ni si Jora, “saratus sapuluh dua;
- ¹⁹ ginompar ni si Hasum: dua ratus dua puluh tolu;
- ²⁰ ginompar ni si Gibar: siah puluh lima;
- ²¹ ginompar hun Betlehem: saratus dua puluh tolu;
- ²² ginompar hun Netopa: lima puluh onom;
- ²³ ginompar hun Anatot: saratus dua puluh ualuh;
- ²⁴ ginompar hun Asmavet: ompat puluh dua;
- ²⁵ ginompar hun Kiriath-Arim, Kapira pakon Beerot: pitu ratus ompat puluh tolu;
- ²⁶ ginompar hun Rama pakon Geba: onom ratus dua puluh sada;
- ²⁷ dalahi hun Mikmas: saratus dua puluh dua,
- ²⁸ dalahi hun Betel ampa Ai: dua ratus dua puluh tolu;
- ²⁹ ginompar hun Nebo: lima puluh dua;
- ³⁰ ginompar ni si Magbis: saratus lima puluh onom;
- ³¹ ginompar ni si Elam na legan ai: saribu dua ratus lima puluh ompat;
- ³² ginompar ni si Harim: tolu ratus dua puluh;

³³ ginompar hun Lod, Hadid pakon Ono: pitu ratus dua puluh lima;

³⁴ ginompar hun Jeriko: tolu ratus ompat puluh lima;

³⁵ ginompar ni si Sena: tolu ribu onom ratus tolu puluh.

³⁶ Malim-malim: Ginompar ni si Jedaya humbani ginompar ni si Jesua: siah ratus pitu puluh tolu;

³⁷ ginompar ni si Immer: saribu lima puluh dua;

³⁸ ginompar ni si Pashur: saribu dua ratus ompat puluh pitu;

³⁹ ginompar ni si Harim: saribu sapuluh pitu;

⁴⁰ Halak Levi: Ginompar ni si Jesua pakon si Kadmiel, humbani ginompar ni si Hodaya: pitu puluh ompat.

⁴¹ Pandoding: Ginompar ni si Asap: Saratus dua puluh ualuh.

⁴² Sijaga horbangan: Ginompar ni si Salum, ginompar ni si Ater, ginompar ni si Talom, ginompar ni si Akub, ginompar ni si Hatita pakon ginompar ni si Sobai, ganupan ai saratus tolu puluh siah.

⁴³ Juakjuak i rumah panumbahan: Ginompar ni si Siha, ginompar ni si Hasupa, ginompar ni si Tabaot,

⁴⁴ ginompar ni si Keros, ginompar ni si Siaha, ginompar ni si Padom,

⁴⁵ ginompar ni si Lebana, ginompar ni si Hagaba, ginompar ni si Akub,

⁴⁶ ginompar ni si Hagab, ginompar ni si Salmai,
ginompar ni si Hanan,

⁴⁷ ginompar ni si Gidel, ginompar ni si Gahar,
ginompar ni si Reaya,

⁴⁸ ginompar ni si Resin, ginompar ni si Nekoda,
ginompar ni si Gasam,

⁴⁹ ginompar ni si Ussa, ginompar ni si Pasea,
ginompar ni si Besai,

⁵⁰ ginompar ni si Asna, ginompar ni si Mehunim,
ginompar ni si Nepusim,

⁵¹ ginompar ni si Bakbuk, ginompar ni si Hakupa,
ginompar ni si Harhur,

⁵² ginompar ni si Baslut, ginompar ni si Mehida,
ginompar ni si Harsa.

⁵³ ginompar ni si Barkos, ginompar ni si Sisera,
ginompar ni si Temah,

⁵⁴ ginompar ni si Nesia ampa ginompar ni si Hatipa.

⁵⁵ Ginompar ni juakjuak ni si Salomo: Ginompar
ni si Sotai, ginompar ni si Soperet, ginompar ni si
Peruda,

⁵⁶ ginompar ni si Jaala, ginompar ni si Darkon,
ginompar ni si Gidel,

⁵⁷ ginompar ni si Sepatya, ginompar ni si Hatil,
ginompar ni si Poheret-Hasebaim, ginompar ni si
Ami.

⁵⁸ Haganup juakjuak na i rumah panumbahan ai
pakon ginompar ni juakjuak ni si Salomo tolu ratus
siah puluh dua do.

⁵⁹ On do na tangkog hun Tel-Mela, Tel-Harsa, Kerub, Addan pakon Immer, tapi seng tarpatugah sidea atap na masuk hubani Israel do ompung ni sidea barang ginompar ni sidea.

⁶⁰ Ginompar ni si Delaya, ginompar ni si Tobia, ginompar ni si Nekoda, onom ratus lima puluh dua.

⁶¹ Anjaha humbani anak ni malim: Ginompar ni si Habaya, ginompar ni si Hakos, ginompar ni si Barsilai, na mambuat boru humbani boru ni si Barsilai, halak Gilead ai, anjaha marpanggorani hubani goran ni sidea.

⁶² Sidea ai ma na mangindahi surat hatorangan ni partubuh ni sidea, hape lang jumpah sidea, jadi ipadarat ma sidea humbani hamalimon songon halak na butak.

⁶³ Nini panrajai ai do dompak sidea, na so bulih do sidea mangan humbani sipanganon na mapansing sahalian, paima dong sada malim, na manaksihon marhitei Urim pakon Tummim.

⁶⁴ Buei ni tumpuan ai ganup ompat puluh dua ribu tolu ratus onom puluh halak do.

⁶⁵ sobali jabolon dalahi ampa jabolon naboru, sipitu ribu tolu ratus tolu puluh pitu halak ai; anjaha adong do bani sidea pandoding dalahi ampa naboru dua ratus halak bueini.

⁶⁶ Huda ni sidea pitu ratus tolu puluh onom do, anjaha huda ni sidea (*pirah ni halode*) dua ratus ompat puluh lima.

⁶⁷ Unta ni sidea ompat ratus tolu puluh lima, halode ni sidea onom ribu pitu ratus dua puluh.

⁶⁸ Deba humbani kopala ni mar sasaompung, dob das sidea hu rumah ni Jahowa na i Jerusalem, martumpak ma sidea humbani rosuhni bei hu rumah ni Naibata, laho pajongjongkon ai bani tapakni hinan;

⁶⁹ romban hubani gogoh ni sidea do ibere sidea hubani kas ni horja ai onom puluh sada ribu darik omas, lima ribu kati pirak, pakon saratus pakeian ni malim.

⁷⁰ Laho ma malim-malim, halak Levi, sonai homa deba humbani bangsa ai, pandoding, sijaga horbangan, ampa juakjuak na i rumah panumbahan marianan hu huta-huta ni sidea, sonai homa halak Israel na legan ai i huta-huta ni sidea.

Iulaki Sidea Manggalang ampa Paulihon Rumah Panumbahan

3 ¹ Jadi dob jumpah bulan pitu, anjaha marianan ibagas hutani bei halak Israel, martumpu ma bangsa ai ris hu Jerusalem.

² Jadi jongjong ma si Jesua, anak ni si Josadak, rap pakon saninani malim-malim ai, ampa si Serubabel, anak ni si Sealtiel, rap pakon saninani, anjaha ipauli sidea ma anjapanjap panggalangan bani Naibata ni Israel, laho manggalangkon i atas ni galangan

situtungon, songon na tarsurat ibagas buku titah ni si Musa, halak ni Naibata.

³Jadi ipajongjong sidea ma anjapanjap ai bani iananni hinan tapi marmunsuh-munsuh do sidea dompak bangsa-bangsa ni nagori ai, anjaha igalangkon sidea ma galangan situtungon i atas ni hubani Jahowa, galangan situtungon sogod pakon bodari.

⁴Marpesta lampolampo do sidea homa, songon na tarsurat ai, anjaha igalangkon sidea do galangan situtungon siganup ari mangihutkon bilanganni, romban hubani aturan hinan bueini ganup ari,

⁵ambahni ai galangan situtungon siganup ari, galangan bani poltak ni bulan ampa bani ganup pesta, na dob tinontuhon bani Jahowa, pakon galangan ni ganup halak, na binagahkonni humbani rosuh ni uhurni hubani Jahowa.

⁶Olat ni ari sada bulan pitu ipungkah sidea ma manggalangkon galangan situtungon hubani Jahowa. Tapi seng ipajongjong ope anggo rumah ni Jahowa.

⁷Halani ai ibere ma duit hubani tukang batu pakon tukang hayu ampa sipanganon, siinumon pakon minak hubani halak Sidon ampa Tirus, ase iboan sidea hayu ares hun Libanon hu laut, ai ma hu Joppe, romban hubani parentah ni si Kores, raja ni Persia, hubani sidea.

⁸Tapi padua-tahunkon dob das sidea hu rumah ni Naibata i Jerusalem, bani bulan dua, ipungkah si Serubabel, anak ni si Sealtiel ma horja ai rap pakon si Jesua, anak ni si Josadak, ampa na tading humbani sanina ni sidea, ai ma malim pakon halak Levi ampa haganup na dob mulak hun habuangan hu Jerusalem. Ipabangkit sidea ma halak Levi olat ni na marumur dua puluh tahun hu atas mardimata horja ai i rumah ni Jahowa.

⁹Jongjong do homa ijai si Jesua rap pakon anakni ampa saninani pakon si Kadmiel ampa anakni, ampa halak Juda, rap mardimata siparhorja i rumah ni Naibata, rap pakon anak ni si Henadad ampa halak Levi, anak ni sidea ampa sanina ni sidea.

¹⁰Jadi dob itibalhon tukang batu onjolan ni rumah ni Jahowa, jongjong ma malim marpakeian bei pajolom-jolom tarompit, pakon halak Levi, ginompar ni si Asap, marhasoman parugas, laho mamuji-muji Jahowa, romban hubani aturan, na binahen ni si Daud, raja ni Israel.

¹¹Jadi mandoding ma sidea marsibalos-balosan mamuji ampa mangkatahon tarima kasih hubani Jahowa, ai pardear layak do la, anjaha ronsi sadokah ni dokahni do idop ni uhur-Ni mangidah Israel. Jadi ipagogoh bangsa ai ma sorani, laho mamuji-muji Jahowa, halani na dob itibalhon batu onjolan ni rumah ni Jahowa ai.

¹² Tapi buei do humbani malim pakon halak Levi ampa kopala ni mar sasaompung, halak partua-partua, na sampang mangidah rumah panumbahan na parlobei ondi, na tangis gogoh-gogoh, dob ididah sidea itibalhon batu onjolan ni rumah panumbahan ai; tapi buei do halak na pagogoh sorani marolob-olob humbani malas ni uhurni,

¹³ gabe seng tarsirang sora olob-olob, malas ni uhur humbani sora tangis-tangis ni bangsa ai, ai gogoh tumang do sora ni bangsa ai marolob-olob, pala tarbogei sora ai humbani na daoh.

Parlawanan Dompak Halak Israel Sanggah na Paulihon Huta Jerusalem Use Sidea

4 ¹ Jadi dob ibogei munsuh ni halak Juda pakon Benjamin, na dob ipauli halak na mulak hun habuangan ai use sada rumah panumbahan bani Jahowa, Naibata ni Israel,

² roh ma sidea marayak si Serubabel pakon kopala ni mar sasaompung, nini ma dompak sidea, “Hasoman nasiam ma hanami paulihon, ai hanami pe isombah hanami do Naibata nasiam in, usih songon nasiam, anjaha manggalang do hanami tongtong hu Bani olat ni panorang ni si Asar-Hadon, raja ni Assur, na marsuruh hanami tangkog hujon.

³ Tapi nini si Serubabel pakon si Jesua ampa na tading humbani kopala ni halak Israel mar sasaompung ai ma dompak sidea, ‘Seng talup

rap nasiam pakon hanami paulihon rumah panumbahan bani Naibata; pitah hanami sandiri do na paulihon bani Jahowa, Naibata ni Israel, songon na pinarentahkon ni Raja Kores, raja ni Persia, bennami.’”

⁴ Jadi jondo ma halak Juda ibahen pangisi ni nagori ai, ipambiar-biari ma sidea paulihon ai,

⁵ anjaha ibere ma sisip bani menteri ni raja, laho mangimbang sidea, manlanglangi sura-sura ni sidea ai, sadokah manggoluh si Kores, raja ni Persia, das ronsi harajaon ni si Darius, raja ni Persia.

⁶ Anjaha dob bangkit raja si Ahasveros, bani mungkah ni harajaonni ai ope, itongos sidea ma surat pangaduan dompak pangisi ni Juda ampa Jerusalem.

⁷ Age sanggah harajaon ni si Artasasta manongos surat do si Bislam, si Mitredat, si Tabeel ampa hasoman ni sidea sahorja hubani si Artasasta, raja ni Persia; tarsurat do surat ai ibagas hata Aram rap pakon alimanni.

⁸ Hata Aramni: Si Rehum, wali negara ai pakon si Simsai, jurutulis ai, manongoskon sada surat pasal Jerusalem hubani raja Artasasta, sonon,

⁹ “Ia hanami: Si Rehum, wali negara ai, pakon si Simsai jurutulis ai, pakon hasoman ni sidea na legan ai, panguhum-panguhum, panrajai-panrajai, gamot-gamot, halak Persia, halak na hun Erek, halak Babel, halak na hun Susan, ai ma halak Elamit,

¹⁰ ampa bangsa na legan, na binoban ni si Asnapar na bolon anjaha na sangap ondi, anjaha na binahenni marianan i huta-huta ni Samaria pakon i propinsi na legan, na i dipar ni Bah Eprat,

¹¹ anjaha on do hata ni surat, na tinongos ni sidea bani, 'Marayakkon Raja Artasasta! Hanami juakjuakmu, halak na marianan i propinsi, na i dipar ni bah in, tabi ma bamu.'

¹² Tontu domma ibotoh raja in, ia halak Jahudi na roh tangkog hu bennami, domma laho hu Jerusalem. Ipauli sidea do nuan huta panggeori ampa na jahat ai, domma pala laho dob tembokni anjaha ipauli do onjolanni,

¹³ On pe, ibotoh raja in ma, anggo ipauli ma use huta ai anjaha dob tembokni, seng anjai galaron ni sidea be balasting, sohei barang gogoh ni tanoh in, gabe marharugian ma bahenon ni sidea raja-raja in.

¹⁴ Tapi halani mangankon garam hanami hun rumah ni raja in, anjaha seng patut patoggor-tonggoronnamo bador raja in, halani ai do ase itongos hanami surat on laho pagolpahon,

¹⁵ ase ipareksa ma buku pardingatan ni ompung-ompung na lobei. Jadi jumpah ham ma bani buku pardingatan ai, anjaha botohonmu, ia huta on huta panggeori do, sibahen hasunsahan bani raja-raja pakon nagori-nagori, anjaha humbani sapari nari pe sai masa do hageoron ibagas huta ai. Halani ai do ase iparseda huta ai.

¹⁶ Mardomu hujai ipabotohkon hanami ma bani raja in, anggo ipauli use huta ai anjaha dob use tembokni ai, seng anjai adong be tading bamu gomgomon i dipar ni bah banggal in.

¹⁷ Itongos raja ai ma balosni, 'Hubani si Rehum, wali negara ai, pakon si Simsai, jurutulis ai, pakon hasoman ni sidea na legan ai, na marianan i Samaria pakon bani ianan na legan i dipar ni bah banggal ai, tabi ma bani nasiam.'

¹⁸ Ia surat, na tinongos nasiam bennami, domma ibasa tulimat i lobeihu.

¹⁹ Mintor huparentahkon ma, ase ibahen pamareksaan, gabe jumpah ma, panggeori do tongon huta ai dompak raja-raja humbani sapari nari, anjaha sai masa do hageoron pakon panlawanon ibagas ai.

²⁰ Anjaha raja-raja parkuasa pe adong hinan do na mamarentah i huta Jerusalem, na manggomgom ganup tanoh, na i dipar ni bah banggal in, anjaha manggalar balasting, sohei pakon gogoh ni tanoh do halak bani sidea.

²¹ On pe, parentahkon nasiam ma, ase iparontihon na marhorja ai, ase ulang ipauli use huta ai, paima roh use parentahku.

²² Ai pe, jaga ma nasiam, ulang lansei pasal ai, ase ulang lambin banggalni hasedaon ai, na mambahen rugi raja-raja."

²³ Jadi dob ibasa salinan ni surat ni Raja Artasasta ai i lobei ni si Rehum pakon si Simsai, jurutulis ai, ampa hasoman ni sidea na legan ai, gabe ilanglangi ma sidea marhitei paksa pakon gogoh.

²⁴ Jadi tarlanglang ma horja na bani rumah ni Jahowa na i Jerusalem ai; anjaha soh do ai ronsi padua-tahunkon dob manrajai si Darius, raja ni Persia.

Iulaki Pajongjong Rumah Panumbahan pakon Pardobni

5 ¹ Tapi anggo Nabi Haggai pakon Sakaria, anak ni si Iddo, manjahai ma sidea marhitei goran ni Naibata ni Israel, simada sidea ai, hubani halak Juda, na i tanoh Juda pakon Jerusalem

² Jadi marugas ma si Serubabel, anak ni si Sealtiel, pakon si Jesua, anak ni si Josadak, gabe ipungkah sidea ma use pajongjongkon rumah ni Naibata na i Jerusalem; nabi ni Naibata do hasoman ni sidea, na patengerhon uhur ni sidea.

³ Lanjar bani panorang ai roh ma marayak sidea si Tatnai, panrajai i nagori, na i dipar ni bah bangga ai, pakon si Setarbosnai ampa hasoman ni sidea ai, nini ma dompak sidea, “Ise marsuruh nasiam pajongjong rumah panumbahan on ampa mandobkon tembokni in?”

⁴ Anjaha ise do goran-goran ni halak na pajongjongkon rumah panumbahan in?”

⁵ Tapi itatap panonggor ni Naibata ni sidea do pangintuai ni halak Juda, gabe seng ilanglangi sidea, paima das pangaduan ai hubani si Darius, anjaha roh balosni marhitei surat.

⁶ Salinan ni surat ni si Tatnai, panrajai i nagori, na i dipar ni bah banggal ai, pakon si Setarbosnai ampa hasoman ni sidea panrajai i nagori na i dipar ni bah banggal ai, na tinongos ni sidea hubani Raja Darius, ⁷ itongos sidea ma bani lapuran, sonon ma tarsurat ijai, “Bani Raja Darius, damei ma bamu!

⁸ Na pabotohkon ma hanami hubani raja in, ia hanami domma laho hu tanoh Juda, hu rumah ni Naibata na banggal in. Ipajongjong do nuan ai humbani batu na banggal-banggal, anjaha ilampis bani hayu; jorei do mardalan horja ai anjaha manjadi marhitei tangan ni sidea.

⁹ Domma isungkuni hanami pangintuai ai, anjaha ihatahon hanami sonon bani sidea, ‘Ise marsuruh nasiam pajongjong rumah panumbahan on anjaha mandobkon tembokni in?’

¹⁰ Isungkun hanami do homa goran-goran ni sidea, sipabotohkononnami bamu; halani ai do ase isuratkon hanami goran-goran ni dalahi, na mambobahon sidea.

¹¹ Tapi on do balos ni sidea bennami, ‘Jabolon ni Naibata sigomgom langit pakon tanoh on do hanami, anjaha na mangulaki do hanami pajongjongkon rumah panumbahan on, na dob

pinauli hinan sapari, ai ma na pinauli anjaha na nidobkon ni sada raja ni Israel na sangap.

¹² Tapi halani ipuhoi ompungnami ringis ni Naibata sigomgom langit, gabe iondoskon ma sidea hubagas tangan ni si Nebukadnesar, raja ni Babel, halak Kasdim, na parsedahon rumah panumbahan on, anjaha bangsa in ibuangkon do hu Babel.

¹³ Tapi bani tahun parlobei ni panrajaion ni si Kores, raja ni Babel, iparentahkon si Kores ma, ase ipajongjong rumah panumbahan on bani Naibata.

¹⁴ Age parugas omas pakon pirak, na ibuat si Nebukadnesar hun rumah panumbahan na i Jerusalem, anjaha na binobanni hu rumah panumbahan na i Babel, ipadarat raja Kores ma ai hun rumah panumbahan na i Babel, anjaha ibere hubani sada halak, na margoran si Sesbasar, na dob niangkatni gabe panrajai.

¹⁵ Nini ma dompaksi, "Buat ma parugas on, nahkon ma in hu rumah panumbahan na i Jerusalem, anjaha hatahon ma, ase ipajongjong use rumah ni Naibata bani hajongjonganni hinan."

¹⁶ Jadi roh ma si Sesbasar ai, ipatibal ma batu onjolan ni rumah ni Naibata na i Jerusalem; anjaha olat ni panorang ai ronsi sonari marnunut do ipauli, tapi seng ope dob.

¹⁷ Ai pe, anggo dear do ninuhur ni raja in, ihatahon ma na mamareksai arsip harajaon na i Babel, laho mangidah atap na tongon do iparentahkon

Raja Kores, pajongjongon use rumah ni Naibata i Jerusalem, anjaha itongoskon raja in ma bennami haputusanni pasal on.”

6¹ Dob ai iparentahkon Raja Darius ma, ase ibahen pamareksaan i Babel, i rumah arsip, ianan panimpanan ni surat-surat pardingatan,

² jadi jumpah ma i Akmeta, i benteng na i tanoh Madai, sada surat na margulung, sonon do hata na tarsurat ijai,

³ “Bani tahun parlobei ni panrajaion ni Raja Kores, iparentahkon Raja Kores ma pasal rumah ni Naibata na i Jerusalem. Maningon pajongjongon do rumah panumbahan ai use bani iananni, bahen panggalangan ni galangan sisayaton pakon galangan situtungan; onom puluh asta do bahenon gijangni anjaha onom puluh asta ia bolagni;

⁴ marbatu na binarbar tolu ristei anjaha hayu sanristei; harugian hujai hun kas harajaon do buaton.

⁵ Ambahni ai homa parugas omas pakon pirak na hun rumah ni Naibata hinan, na binuat ni si Nebukadnesar hun rumah panumbahan na i Jerusalem, anjaha binobanni hu Babel, maningon paulakon do, pasuangan hu rumah panumbahan na i Jerusalem, hubani iananni hinan; maningon hu rumah ni Naibata do ai nahkonon.

⁶ Halani ai, ham alo Tatnai, panrajai i tanoh, na i dipar ni bah bangga, pakon si Setarbosnai, na i dipar ni bah bangga, padaoh ma dirimu hunjai;

⁷ paturut ma mardalan horja na bani rumah panumbahan ai; paturut ma panrajai ni Juda pakon pangintuai ni halak Juda pajongjongkon rumah ni Naibata bani hajongjonganni hinan.

⁸ Ambahni ai domma huparentahkon pasal sibahenon nasiam hubani pangintuai ni halak Juda, laho pajongjongkon rumah ni Naibata; harugian hujai, sigalaron hubani halak ai, gok ma anjaha seng mutir-mutir, buaton humbani arta ni harajaon, ai ma humbani pandapotan ni nagori, na i dipar ni bah bangga.

⁹ Anjaha atap aha na porlu: Lumbu poso-poso, biribiri tunggal, anak ni biribiri sigalangkonon bani Naibata sigomgom langit, gandum, garam, anggur atap minak, sibereon ma ai hubani sidea domu hubani pangkatahon ni malim na i Jerusalem, siap arian, ulang marnarotap,

¹⁰ ase tarbahen sidea manggalangkon galangan na misbou bani Naibata sigomgom langit, lanjar mangindo parhorasan bani raja in ampa bani anakni.

¹¹ Ambahni ai on ope parentah humbangku; atap ise na mangubah haputusan on, maningon buaton ma sada tiang humbani rumahni, anjaha hujai

ma ia gantungkononni, anjaha rumahni ai gabe panimbunan ni tompoh-tompoh bahenon.

¹² Tapi anggo Naibata, na mambahen jonam goran-Ni ijai, sai ipantunggalingkon ma raja atap bangsa, na pag mardas tangan, laho mangubah atap parseda rumah ni Naibata na i Jerusalem. Ahu, Raja Darius do na mambahen parentah on; podas ma ipasaud on.”

Pardob ni Horja ai; Pamongkoton pakon Pesta Paskah na Parlobei

¹³ Jadi podas ma ipasaud si Tatnai, panrajai na i dipar ni bah bangga, pakon si Setarbosnai ampa hasoman ni sidea parentah ai, romban hubani hata, na hinatahon ni Raja Darius.

¹⁴ Jadi mintor itoruskon pangintuai ni halak Juda ma pajongjongkon ai, anjaha dob ma, romban hubani hata ni Nabi Haggai pakon Sakaria, anak ni si Iddo. Dob do ibahen sidea horja ai, romban hubani hata ni Naibata ni Israel, romban hubani parentah ni si Kores pakon si Darius ampa si Artasasta, raja ni Persia.

¹⁵ Jadi dob ma rumah panumbahan ai ari tolu bulan Adar, paonom-tahunkon dob manrajai Raja Darius.

¹⁶ Dob ai marpesta ma halak Israel, malim, halak Levi, ampa halak na legan, na mulak hun habuangan, laho mangondoskon rumah

panumbahan ai hubani Naibata marhasoman malas ni uhur.

¹⁷ Sanggah na mangondoskon rumah panumbahan ai sidea bani Naibata, igalangkon sidea ma saratus lembu tunggal, dua ratus biribiri tunggal, ompat ratus anak ni biribiri, anjaha sapuluh dua hambing tunggal bahen galangan pardousaon, mangihutkon bilangan ni marga ni halak Israel.

¹⁸ Anjaha iranggi sidea ma malim ai mangihutkon horin ni sidea, anjaha halak Levi ai mangihutkon horin ni sidea hubani horja parsombahon bani Jahowa i Jerusalem, romban hubani na tarsurat ibagas buku ni si Musa.

¹⁹ Anjaha bani ari sapuluh ompat bulan sada marpesta Paskah ma halak na mulak hun habuangan ai.

²⁰ Ai domma iuras malim pakon halak Levi diri ni sidea bei; ganup do sidea pansing. Jadi isayat sidea ma biribiri Paskah ai hubani ganup halak na mulak hun habuangan ai, hubani sanina ni sidea, malim ai, ampa hubani sidea sandiri.

²¹ Jadi ipangan halak Israel, na mulak hun habuangan ai ma ai, sonai homa ganup halak na papulig dirini humbani habutakon ni bangsa sipajuh begu-begu, na i nagori ai, laho manombah Jahowa, Naibata ni Israel.

²² Anjaha marpesta ruti na so niigaran ma sidea pitu ari dokahni marhasoman malas ni uhur; ai domma

ipasurdung Jahowa uhur ni raja Assur dompak sidea, gabe itumpaki sidea ibagas horja bani rumah ni Naibata, ai ma Naibata ni Israel.”

**Parmulak ni Hulanan na Paduahon humbani
na Tarbuang Binobahon ni si Esra**

7¹Jadi dob salpu ai, sanggah panrajaion ni si Artasasta, raja ni Persia, tangkog ma hun Babel si Esra, ai ma anak ni si Seraya, anak ni si Asarya, anak ni si Hilkia,

²anak ni si Salum, anak ni si Sadok, anak ni si Ahitub,

³anak ni si Amarya, anak ni si Asarya, anak ni si Merayot,

⁴anak ni si Seraya, anak ni si Ussi, anak ni si Buki,

⁵anak ni si Abisua, anak ni si Pinehas, anak ni si Eleasar, anak ni si Aron, sintua ni malim ai.

⁶Tangkog ma si Esra ai hun Babel. Sibotoh surat do ia, na pentar pasal titah ni si Musa, na binere ni Jahowa, Naibata ni Israel. Ibere raja ai do bani ganup na pinindoni, ai tangan ni Jahowa Naibatani do manogu-nogusi.

⁷Tangkog do homa deba hu Jerusalem humbani halak Israel, humbani malim ampa halak Levi, humbani pandoding, humbani sijaga horbangan ampa siparugas i rumah panumbahan, ai ma papitu-tahunkon dob manrajai Raja Artasasta.

⁸Jadi das ma ia i Jerusalem bulan lima, papitu-tahunkon dob manrajai raja ai.

⁹ Ai ari sada bulan sada do ia mamungkah tangkog hun Babel, anjaha ari sada bulan lima do ia das i Jerusalem, ai tangan ni Jahowa, Naibatani na layak ai do i babouni.

¹⁰ Ai humbani gok ni uhurni do ibahen si Esra, mamareksa titah ni Jahowa anjaha mandalankon ai, sonai homa mangajarhon titah pakon uhum i Israel.

¹¹ Anjaha on do hata ni surat, na pinadihut ni Raja Artasasta hubani si Esra, malim anjaha sibotoh surat, na pentar pasal titah ni Jahowa pakon aturan-Ni, na hubani halak Israel ai.

¹² “Ahu Artasasta, raja ni sagala raja, hubani si Esra malim in, sibotoh surat na pentar ibagas titah ni Naibata na i surga.

¹³ Domma hubahen parentah, sagala na marosuh uhurni ibagas harajaonku humbani bangsa Israel, malim atap halak Levi pe na sihol laho hu Jerusalem, bulih do laho rap pakon ham.

¹⁴ Ai na sinuruh ni raja in pakon panuturini sipitu halak ai do ham, laho mambahen pamareksaan pasal Juda pakon Jerusalem, domu hubani titah ni Naibatamu, na adong bamu.

¹⁵ Ampa mamboan pirak pakon omas, na binere ni raja in pakon panuturini humbani rosuhni hubani Naibata ni Israel, na marianan i Jerusalem,

¹⁶ pakon ganup pirak pakon omas guguan, na jumpah ham bani ganup tanoh Babel, rap pakon guguan, na binere ni halak simbuei ampa malim-

malim humbani rosuhni, tumpak ni sidea bani rumah ni Naibatani na i Jerusalem.

¹⁷ Halani ai podas ma bolihon ham duit ai hubani lombu jonggi, biribiri tunggal, anak ni biribiri rap pakon galangan sipanganon ampa galangan siinumon hasomanni ai, anjaha galangkon ham ma ai i atas anjapanjap ni rumah ni Naibata nasiam na i Jerusalem.

¹⁸ Pasal pirak pakon omas na lobih ai, bulih do pakeion nasiam ai marguru hubani timbangan ni uhur nasiam, romban hubani rosuh ni Naibata nasiam.

¹⁹ Anjaha parugas, na dob binerehon bamu, hubani horja i Rumah ni Naibatamu, maningon ondskononmu do ai hu lobei ni Naibata i Jerusalem.

²⁰ Anjaha porini adong ope na porlu hubani rumah ni Naibata, na maningon sigalaronmu ope, galar ham ma ai humbani kas harajaon.

²¹ Anjaha ahu, Artasasta raja in, mamarentahkon hubani ganup bendahara, i dipar ni bah banggal. Barang aha na pinindo ni Malim Esra, na pentar pasal titah ni Naibata na i surga, mintor podas ma ai ipadalan,

²² sibar saratus talenta pirak, saratus kor gandum, saratus bat anggur, saratus bat minak, anjaha garam seng pala marbilangan suhatanni.

²³ Barang aha na pinarentahkon ni Naibata na i surga, gok ma ai idalankon, laho manumpaki rumah ni Naibata na i surga, ase ulang sogop ringis-Ni hubani harajaon ni raja in pakon hubani anakni.

²⁴ Ambah ni ai botoh nasiam ma, seng bulih paporsanonkon sohei, ongkos barang guguan hubani malim, halak Levi, pandoding, sijaga horbangan ampa siparugas i rumah panumbahan, hubani ganup siparhorja na i rumah ni Naibata tene.

²⁵ Tapi anggo ham, Esra, domu hubani hapentaran ni Naibatamu, na adong bamu, pabangkit ma panrajai pakon panguhum, na manguhumi ganup bangsa ai, na i dipar ni bah banggal, ai ma ganup halak, na dob mambotoh titah ni Naibatamu; anjaha sagala na so mambotoh ai ope, ajari ma.

²⁶ Barang ise na so mambalosi titah ni Naibatamu pakon titah ni raja in, maningon koras do uhumon ia, marhitei utang hosah barang na tarbuang, barang na hona donda atap na itutup.

²⁷ Pinuji ma Jahowa, Naibata ni ompungta, na mamuhoi uhur na sonai ai ibagas uhur ni raja ai, laho pajengeskon rumah ni Jahowa na i Jerusalem,

²⁸ anjaha ibahen ahu jumpahan idop ni uhur i lobei ni raja ai, pakon panuturini pakon i lobei ni haganup juakjuakni na sangap. Jadi tenger ma uhurhu, ai tangan ni Jahowa, Naibatanku do i

babouhu, anjaha hupatumpu ma humbani Israel sipambobai, na sihol rap tangkog pakon ahu.”

Pangugasion bani Parbingkaton ai

8¹ On do goran ni kopala ni sidea mar sasaompung pakon tarombo ni sidea, na tangkog rap pakon ahu hun Babel, sanggah panrajaion ni Raja Artasasta.

² Humbani ginompar ni si Pinehas si Gersom; humbani ginompar ni si Itamar si Daniel; humbani ginompar ni si Daud si Hattus,

³ anak ni si Sekanya; humbani ginompar ni si Paros: Si Sakaria rap pakon dalahi hasomanni saompung, saratus lima puluh halak bueini;

⁴ humbani ginompar ni si Pahat-Moab: Si Elioenai, anak ni si Seraya, rap pakon hasomanni, dua ratus halak dalahi;

⁵ humbani ginompar ni si Sattu: Si Sekanya, anak ni si Jehasiel, rap pakon hasomanni, tolu ratus dalahi;

⁶ humbani ginompar ni si Adin: Si Ebed, anak ni si Jonatan, rap pakon hasomanni, lima puluh halak dalahi;

⁷ humbani ginompar ni si Elam: Si Jeraya, anak ni si Atalya, rap pakon hasomanni, pitu puluh halak dalahi;

⁸ humbani ginompar ni si Sepatya: Si Sebaya, anak ni si Mikael, rap pakon hasomanni, ualuh puluh halak dalahi;

⁹ humbani ginompar ni si Joab: Si Obaja, anak ni si Jehiel, rap pakon hasomanni, dua ratus sapuluh ualuh halak;

¹⁰ humbani ginompar ni si Bani: Si Selomit, anak ni si Josipya, rap pakon hasomanni, saratus onom puluh halak dalahi;

¹¹ humbani ginompar ni si Bebai: Si Sakaria, anak ni si Bebai, rap pakon hasomanni, dua puluh ualuh halak dalahi;

¹² humbani ginompar ni si Asgad: Si Johanan, anak ni si Hakkatan, rap pakon hasomanni, saratus sapuluh halak dalahi;

¹³ humbani ginompar ni si Adonikam, ai ma na roh humpudi, anjaha on do goran ni sidea: Si Elipelet, si Jehiel pakon si Semaya rap pakon hasomanni, onom puluh halak dalahi;

¹⁴ humbani ginompar ni si Bigwai: Si Utai pakon si Sakkur rap pakon hasomanni, pitu puluh halak dalahi;

¹⁵ Jadi hupatumpu ma sidea i topi ni bah banggal na mardalan hu Ahawa, anjaha marsaran ma hanami ijai tolu ari dokahni. Jadi sanggah na hupardiatei halak na mabuei ai pakon malim, seng dong jumpah ahu ijai humbani anak ni si Levi.

¹⁶ Halani ai husuruh ma na mangalop si Elieser, si Ariel, si Semaya, si Elnatan, si Jarib, si Natan, si Sakaria pakon si Mesulam, ai ma kopala-kopala,

pakon si Jaiarib ampa si Elnatan, ai ma halak na maruhur.

¹⁷ Jadi hupabangkit ma sidea marayak si Iddo pambobai i huta Kasipia, anjaha huhatahon ma hubani sidea, aha sihatahonon ni sidea hubani si Iddo pakon hubani saninani siparugas i rumah panumbahan i huta Kasipia, ai ma, ase itongos bennami siparugas i rumah ni Naibata.

¹⁸ Jadi iboan ma bennami (halani tangan ni Jahowa na layak ai do i babounami) sada dalahi na pentar humbani ginompar ni si Makli, anak ni si Levi, anak ni si Israel, ai ma si Serebya pakon anakni ampa saninani, sapuluh ualuh halak;

¹⁹ sonai homa si Hasabya anjaha hasomanni si Jesaya humbani ginompar ni si Merari, rap pakon saninani ampa anak ni sidea, dua puluh halak bueini;

²⁰ ambahni ai dua ratus dua puluh halak siparugas i rumah panumbahan, ai ma na tinotapkon ni si Daud pakon kopala-kopala gabe suruh-suruhan ni halak Levi; ganupan sidea tarsurat bei do goranni.

²¹ Dob ai hutingtingkon ma ijai, i topi ni Bah Ahawa ai sada parpuasaon, laho paundukkon uhur nami i lobei ni Naibata nami, mangindohon humbani pardalan na lihar bennami, bani anaknami ampa ugas-ugasnami.

²² Ai maila do ahu mangindohon humbani raja ai bala pakon bala siparhuda, laho mangondingi

hanami dompak munsuh i tongah dalan; ai domma pala ihatahon hanami dompak raja ai sonon, 'Tangan ni Naibatanami do i babou ni ganup na mangindahi-Si gabe hadearon-Ni tapi gogoh-Ni pakon ringis-Ni do mangimbang ganup halak na manadingkon-Si.'

²³ Jadi marpuasa ma hanami anjaha mangelek-elek pangurupion ni Naibata pasal ai, anjaha itangihon do elek-eleknami ai.

²⁴ Dob ai hupapulig ma sapuluh dua halak humbani kopala-kopala ni malim, ai ma si Serebya pakon si Hasabya, anjaha sapuluh halak humbani sanina ni sidea mangkasomani sidea.

²⁵ Anjaha hutimbang hubani sidea pirak, omas pakon parugas, sibere-bere hu rumah ni Naibatanta, ai ma na nilayak-layakkon ni raja ai, panuturini, raja-raja ampa haganup halak Israel, bahen galangan.

²⁶ Buei ni na hutimbang ai bani sidea pirak onom ratus lima puluh talenta, parugas pirak saratus talenta pakon omas saratus talenta;

²⁷ ambahni ai, dua puluh panginguman omas na marharga saribu darik omas, pakon dua mangkuk tombaga na marhillong, dos jengesni pakon omas.

²⁸ Dob ai ningku ma dompak sidea, 'Na pansing do nasiam bani Jahowa, parugas ai pe na pansing do; anjaha pirak pakon omas ai sibere-bere humbani

rosuh ni uhur do ai bani Jahowa, Naibata ni ompung nasiam.'

²⁹ Jaga anjaha ramotkon nasiam ma in paima ipatimbangkon nasiam in i lobei ni sintua ni malim pakon halak Levi ampa kopala ni halak Israel mar sasaompung i Jerusalem, ibagas kamar ni Rumah ni Jahowa.

³⁰ Jadi ijalo malim pakon halak Levi ma pirak, omas pakon parugas, na dob tinimbang ai, laho mamboan ai hu Jerusalem, hu rumah ni Naibatanta."

Parbingkat anjaha Pardas i Jerusalem

³¹ Jadi bingkat ma hanami hun Bah Ahawa ari sapuluh dua bulan sada, laho mardalan hu Jerusalem; tangan ni Jahowa do i babounami, anjaha ipaluah do hanami hun tangan ni munsuh pakon humbani panrampok i tongah dalan.

³² Dob das hanami i Jerusalem marsaran ma hanami tolu ari ijai.

³³ Paompat-arihon itimbang hanami ma pirak, omas pakon parugas-parugas ai ibagas rumah ni Naibatanta, laho mamberehon ai hubani Malim Maremot, anak ni si Uria, hasoman ni si Eleasar, anak ni si Pinehas, hasoman ni sidea ai dua halak Levi, si Josabad, anak ni si Jesua, pakon si Noaya, anak ni si Binui.

³⁴ Ganupan ai ihira anjaha itimbang ma, anjaha isuratkon borat ni haganup.

³⁵ Bani panorang ai, iboan halak na dob tarbuang, na dob mulak hun habuangan ai ma galangan situtungon hubani Naibata ni Israel, sapuluh dua lombu manguras ganup Israel, siah puluh onom biribiri tunggal, pitu puluh pitu anak ni biribiri, anjaha sapuluh dua hambing tunggal bahen galangan pardousaon; ganupan ai bahen galangan situtungon bani Jahowa.

³⁶ Dob ai ipadas sidea ma surat parentah ni raja ai hubani wakil ni raja ai pakon hubani panrajai i dipar ni bah bangga ai; jadi ibere sidea ma tumpakni hubani bangsa ai ampa hubani Rumah ni Naibata.

Paraturan na Binahen ni si Esra bani Halak na Mambuat Boru humbani Halak Sipajuh Begu-begu

9 ¹ Dob salosei ganupan ondi, roh ma pangintuai-pangintuai marayak ahu, nini ma, “la bangsa Israel, malim-malim ampa halak Levi seng ipapulig sidea dirini humbani bangsa-bangsa na i nagori-nagori ai ampa humbani hasamboron na hinorjahon ni sidea; humbani halak Kanaan, Het, Peres, Jebusi, Amon, Moab, Masir pakon Amori.

² Ai ibuat sidea do boru ni sidea bahen parinangon ni sidea ampa parinangon ni anak ni sidea, gabe agu bonih na mapansing ai rap pakon bangsa-bangsa sipajuh begu-begu na i nagori-nagori ai; anjaha kopala-kopala pakon sipambobai do na parlobei na mandalankon hajahaton ai.”

³ Jadi dob hutangar ai, hurigati ma pakeianku pakon mantelhu, hutariki jambulan ni ulungku ampa gumisku, anjaha jut uhurhu hundul.

⁴ Jadi marrohan ma hu lambungku haganup halak, na marhabiaran bani hata ni Naibata ni Israel, halani panlanggaron ni halak, na mulak hun habuangan ai; tapi anggo ahu jut do uhurhu hundul ronsi panorang panggalangon bodari.

⁵ Tapi bani panorang panggalangonkon bodarini ai jongjong ma ahu humbani parpuasaonkai, marpakeian ampa marmantel na marigat, manrogop ma ahu anjaha hupaherbang ma tanganku haduasi hubani Jahowa, Naibatanku,

⁶ dob ai ningku ma, “Ham Naibatanku, maila do ahu anjaha mabiar padirgak bohingku dompak Ham. Ham Naibatanku, ai domma isalpuhi hajahatonnami ulunami, anjaha salahnami sundol das hu nagori atas.

⁷ Humbani panorang ni ompungnami nari ronsi sadari on ibagas salah banggal do hanami, anjaha halani salahnami do, ase ipadas hanami, raja-rajanami, age malim-malimnami hubagas tangan ni raja-raja ni nagori-nagori ai, hubani podang, hu habuangan, bahen sitabanon pakon hubani habadoron na talar, songon na masa sadari on.

⁸ Tapi anggo nuan jumpahan idop ni uhur do hanami humbani Jahowa, Naibatanami, ai itebai ope manggoluh simasima bennami, anjaha ibere do

bennami arihan ibagas ianan-Ni na mapansing in, ase ipalihar Naibatanami matanami, anjaha iapohi hanami otik ibagas parjabolonannami.

⁹ Ai jabolon do hanami tongon; age pe sonai seng itadingkon Naibatanami hanami ibagas parjabolonannami ai, tapi ijuljul do raja ni Persia maridop ni uhur bennami, gabe ibere hanami otik marhosah, laho pajongjong rumah ni Naibatanami anjaha paulihon na maseda ijai, anjaha ibere do bennami sada tembok paronding-ondingan i Juda pakon i Jerusalem.

¹⁰ Ai pe, aha ma hatahononnnami, Ham Naibatanami dob on? Ai domma itadingkon hanami titah-Mu,

¹¹ ai ma na tinonahkon-Mu marhitei humbani pamangan ni juakjuak-Mu, sagala nabi, Nimu, 'la tanoh, sisolukonnima ai, tanoh na butak do ai. Butak do ai ibahen bangsa-bangsa marhitei hasamboron ni sidea ai; gok do ai humbani ujung hu ujung ibahen habutakon ni sidea ai.'

¹² Halani ai ulang ma bere hanima borunima hubani anak ni sidea, anjaha ulang ma buat hanima boru ni sidea hubani anaknima. Antigan pe lang bulih tumpakonnima sidea mardamei-damei anjaha sonang, ase lambin margogoh hanima, anjaha ipangan hanima hadearon ni tanoh in, anjaha teanonnnima in das hubani ginomparnima ronsi sadokah ni dokahni.

¹³ Anjaha mardingat haganup na dob sogop bennami, halani pambahenannami na bajan ai pakon halani salahnamami na buei ai, anjaha mangidah na hurang ope panguhum-Mu bennami, ham Naibatanami, domu hubani hajahatonnamami, anjaha sonai bueini ope simasima, na manggoluh ibere Ham bennami,

¹⁴ mintor patut ma namin ulakannami mangosei titah-Mu anjaha marsibuatan boru hanami pakon bangsa sihagigihononkon on? Ai lang patut ma manringis Ham bennami anjaha siap hanami bahenon-Mu, sada pe lang tading atap maluah?

¹⁵ Ham Jahowa, Naibata ni Israel, na bonar do Ham, ai tading do hun bennami simasima, na manggoluh songon na talar sadari on. Tonggor Ham ma, jongjong do hanami i lobei-Mu ibagas hasalahannami; ise pe lang na tahan jongjong i lobei-Mu ibagas pambahenan na sonon.”

10 ¹Jadi sanggah martonggo ope si Esra anjaha mambahen pansopotkonon bani dousa, tangis anjaha manrogop i lobei ni Rumah ni Naibata, martumpu ma hu lambungni humbani halak Israel sada tumpuan na banggal tumang, dalahi, naboru pakon dakdanak doruh-doruh do bangsa ai.

² Dob ai roh ma balos ni si Sekanya, anak ni si Jehiel, humbani ginompar ni si Elam, nini ma dompak si Esra, “Domma mangosei padan hanami hubani

Naibatunami, halani ra hanami marhajabuan pakon naboru na legan humbani bangsa pangisi ni nagori on; tapi tene adong ope siarapkonon bani Israel age sonari.

³ Halani ai mambahen padan ma hita hubani Naibatanta, laho palahohon sagala naboru on ampa dakdanak ni sidea romban hubani rosuh ni uhurni, tuannami, ampa rosuh ni sagala na marhabiaran bani titah ni Naibatanta; maningon romban hubani titah ai do bahenon.

⁴ Jongjongkon ham ma, ai ham do sidalankon ai, anjaha ihasomani hanami pe ham, tenger ma uhurmu, horjahon ham ma ai!”

⁵ Dob ai jongjong ma si Esra, anjaha ipabija ma pangintuai-pangintuai ni malim, halak Levi pakon ganup Israel, paboa na maningon bahenon ni sidea do songon na dob hinatahon ai. Jadi marbija ma sidea.

⁶ Dob ai laho ma si Esra hun lobei ni rumah ni Naibata, masuk ma ia hu kamar ni si Johanan, anak ni si Eliasib, anjaha ijai ma ia sabornginni ai, seng mangan ruti barang minum bah ia; ai pusok do uhurni, halani pangoseion ni halak, na mulak hun habuangan ai.

⁷ Dob ai isuruh ma maningtingkon i Juda pakon Jerusalem hubani haganup halak na tarbuang, na dob mulak ai, maningon martumpu sidea hu Jerusalem;

⁸anjaha barang ise na so roh hujai ibagas tolu ari, romban hubani haputusan ni sipambobai pakon pangintuai-pangintuai, maningon siapkonon do sagala ugas-ugasni, anjaha maningon pabalion ia humbani tumpuan ni halak na tarbuang ai.

⁹Jadi martumpu ma ganup dalahi hun Juda pakon Benjamin hu Jerusalem ibagas na tolu ari ai, ai ma ari dua puluh bulan siah. Hundul ma ganup bangsa ai i alaman ni rumah ni Naibata, hitir-hitir halani parsahapan ai pakon halani udan doras.

¹⁰Dob ai jongjong ma Malim Esra, nini ma dompak sidea, “Banggal do dousa nasiam, ai ibuat nasiam do boru na legan, gabe itambahi nasiam do marhitei ai salah ni Israel.

¹¹Ai pe, sopotkon nasiam ma dousa nasiam ai hubani Jahowa, Naibata ni ompung nasiam, anjaha horjahon nasiam ma rosuh-Ni, sirang ma nasiam humbani bangsa ni tanoh on pakon humbani naboru na legan.”

¹²Jadi ibalosi tumpuan ai ma ganup marhitei sora na gogoh, “Ai ma tongon; songon hatamu ai ma horjahononnam.

¹³Tapi buei tumang do bangsa on, anjaha musim udan ma, seng tartahan halak jongjong i darat on. Anjaha seng horja sisadari barang sidua ari on, ai banggal tumang do panlanggaronnam.

¹⁴Mahua kopalanami ma tading ganti ni ganup tumpuan in; jadi maningon ganup ma halak na i

hutanta, na dob mambuat boru na legan roh bani panorang na dob tinontuhon rap pakon pangintuai pakon panguhum ni ganup huta ai, ronsi surut hun banta ringis ni Naibata, halani dousa on.”

¹⁵ Pitah si Jonatan, anak ni si Asael, pakon si Jehasia, anak ni si Tikwa do na manlawan ai, anjaha si Mesulam pakon si Sabbetai, halak Levi ai mangapiti sidea.

¹⁶ Jadi ibahen halak na tarbuang ai ma sonai. Ipilih si Esra ma deba halak, kopala-kopala ni mar sasaompung humbani ganup ginompar ni ompungni bei, anjaha ganup sidea tarsobut goranni, martumpu ma sidea ari sada bulan sapuluh, laho mamareksa pahara ai.

¹⁷ Jadi marujung ma parsahapan ai ibahen sidea pasal ganup dalahi na mambuat boru na legan ronsi ari sada bulan sada.

¹⁸ Jumpah ma humbani anak ni malim, na mambuat boru na legan, humbani ginompar ni si Jesua, anak ni si Josadak, pakon sanina ni si Maaseya, si Elieser, si Jarib pakon si Gedalya;

¹⁹ pala do ipadankon sidea, maningon paulakon ni sidea do parinangon ni sidea ai, anjaha galangkonon ni sidea sada biribiri tunggal bahen galangan parsalahan.

²⁰ Humbani ginompar ni si Immer: Si Hanani pakon si Sebaya;

²¹ humbani ginompar ni si Harim; Si Maaseya, si Elia, si Semaya, si Jehiel pakon si Usia;

²² humbani ginompar ni si Pasur: Si Elioenai, si Maaseya, si Ismael, si Nataneel, si Josabad pakon si Eleasa;

²³ humbani halak Levi: Si Josabad, si Simeï, si Kelaya (*ai ma si Kelita*), si Petaya, si Juda pakon si Elieser,

²⁴ humbani pandoding: Si Eliasib; humbani sijaga horbangan: Si Salum, si Telem pakon si Uri.

²⁵ Humbani halak Israel: Humbani anak ni si Paros: Si Ramya, si Jissia, si Malkia, si Miyamin, si Eleasar, si Hasabya pakon si Benaya;

²⁶ humbani ginompar ni si Elam: Si Matanya, si Sakaria, si Jehiel, si Abdi, si Jeremot pakon si Elia;

²⁷ humbani ginompar ni si Sattu: Si Elioenai, si Eliasib, si Matanya, si Jeremot, si Sabat pakon si Asisa;

²⁸ humbani ginompar ni si Bebai: Si Johanan, si Hananya, si Sabai, si Altai;

²⁹ humbani ginompar ni si Bani: Si Mesulam, si Malluk pakon si Adaya, si Jasub, si Seal pakon si Jeremot;

³⁰ humbani ginompar ni si Pahat-Moab: Si Adna, si Helal, si Benaya, si Maaseya, si Matanya, si Besaleel, si Binui pakon si Manase;

³¹ humbani ginompar ni si Harim: Si Elieser, si Jisia, si Malkia, si Semaya, si Simeon,

³² si Benjamin, si Malluk pakon si Semarya;

³³ humbani ginompar ni si Hasum: Si Matnai, si Matata, si Sabad, si Elipelet, si Jeremai, si Manase pakon si Sime;

³⁴ humbani ginompar ni si Bigwai: Si Maadai, si Amram, si Joel,

³⁵ si Benaya, si Bedeya, si Keluhu,

³⁶ si Wanya, si Meremot, si Eliasib,

³⁷ si Matanya, si Matnai, si Jasai;

³⁸ humbani ginompar ni si Binui: Si Sime,

³⁹ si Helemya, si Natan, si Adaya,

⁴⁰ si Maknadbai, si Sasai, si Sarai,

⁴¹ si Asareel, si Selemya, si Semarya,

⁴² si Salum, si Amarya, si Josep;

⁴³ humbani ginompar ni si Nebo: Si Jehiel, si Matitya, si Sabad, si Sebina, si Jadai, si Joel, si Benaya.

⁴⁴ Haganup sidea mambuat boru na legan, anjaha ipalaho sidea ma sidea rap pakon dakdanak ni sidea.

Nehemia

Tonggo ni si Nehemia Mangkopkop Israel

1 ¹ Barita ni si Nehemia, anak ni si Hakalya. Masa do bani bulan siah, paduapuluh-tahunkon, tudu sanggah i huta Susan ahu, ibagas rumah ni raja ai, ² jadi roh ma si Hanani, sada humbani saninangku, rap pakon piga-piga dalahi hun Juda; jadi husungkun ma sidea pasal halak Jahudi, sagala na maluah, na tading humbani halak na tarbuang, pakon pasal Jerusalem.

³ Dob ai nini sidea ma hu bangku, “Ia simasima ni halak, na tading humbani halak na tarbuang, marhasunsahan banggal do i nagori ai anjaha madorun; ai mareong do tembok ni Jerusalem, anjaha seda do horbanganni ibahen apuy.”

⁴ Jadi dob hubogei barita ai, hundul ma ahu anjaha tangis, pusok uhurhu piga-piga dokah; marpuasa ma ahu anjaha martonggo i lobei ni Naibata na i surga.

⁵ Ningku ma, “Ham Jahowa, Naibata na i surga, Naibata na timbul anjaha sihabiaran, na tongtong mardingat padan idop ni uhur hubani na mangkaholongi-Si anjaha na mandalankon titah-Ni.

⁶Sai tangi ma pinggol-Mu anjaha tonggor panonggor-Mu manangihon tonggo ni juakjuak on, na hutonggohon nuan i lobei-Mu borngin pakon arian, laho mangapiti halak Israel jabolon-Mu, sonai homa pangakuan dousa, na binahennami dompak Ham. Ahu pe, sonai homa ginompar ni bapa, mardousa do.

⁷Bajan tumang do hanami marparlahou dompak Ham; seng ihorjahon hanami titah, aturan pakon uhum, na tinonahkon-Mu hubani si Musa juakjuak-Mu.

⁸Sai dingat Ham ma hata, na tinonahkon-Mu hubani si Musa, juakjuak-Mu, nimu, 'Anggo mangosei hanima, erapkonon-Ku do hanima hu tongah-tongah ni sagala bangsa

⁹Tapi anggo mulak uhurnima, iramotkon anjaha ihorjahon hanima titah-Ku, porini pe domma mambur hanima das bani ujung ni langit, sai patumpuon-Ku do hanima hunjai, anjaha mulak hanima boanon-Ku hu ianan, na dob Hupilih bahen ianan ni goran-Ku.'

¹⁰Jabolon-Mu do sidea tongon anjaha bangsa-Mu, na dob pinaluah-Mu marhitei hagogohon-Mu na banggal pakon marhitei tangan-Mu na gogoh.

¹¹Ham Tuhan, sai tangi ma pinggol-Mu manangihon tonggo ni juakjuak-Mu on pakon tonggo ni jabolon-Mu, sagala na marosuh marhabiaran bani goran-Mu; sai manumpak ma

Ham bani langkah ni juakjuak-Mu on sadari on, sai jumpahan idop ni uhur ma ahu bahen Ham i lobei ni raja in! Sitahu anggur ni raja in do ahu.”

Si Nehemia Isuruh Raja Artasasta Laho hu Jerusalem

2¹ Bani bulan Nisan, paduapuluh-tahunkon dob manrajai Raja Artasasta, tudu sanggah adong anggur i lobeini, hubuat ma anggur ai anjaha hubere ma hubani raja ai. Seng onga pusok uhurhu na saindokah i lobeini.

² Dob ai nini raja ai ma hu bangku, “Mase sai pusok idahon bohimu? Ai boritan ho?” Domma torang naborit ni uhur do on. Jadi mabiar tumang ma ahu.

³ Ningku ma dompak raja ai, “Sai manggoluh ma raja in ronsi sadokah ni dokahni. Mase ma lang pusok uhurhu, anggo maseda huta, ianan ni tanoman ni ompung diri, anjaha horbanganni maseda ibahen apuy.”

⁴ Dob ai nini raja ai ma hu bangku, “Ai aha gakni pangindoanmu?” Jadi martonggo ma ahu hubani Naibata na i surga.

⁵ Dob ai ningku ma hubani raja ai, “Anggo dear ninuhur ni raja in, anjaha jumpahan idop ni uhur juakjuakmu i lobeimu, suruh ham ma ahu hu Juda, hu huta ianan ni tanoman ni ompung, ase hupauli ai.”

⁶ Dob ai nini raja ai ma hu bangku, anjaha puangbolon tudu hundul i lambungni, “Sadiha dokah gakni pardalananmai anjaha antigan ho boi mulak?” Jadi iharosuhkon raja ai ma marsuruh ahu, dob hutotapkon panorangni bani.

⁷ Tapi ningku ma dompak raja ai, “Anggo dear uhur ni raja in, ibere ma namin hu bangku surat-surat sibonanonku hubani panrajai na i dipar ni bah banggal, ase ipalopas sidea ahu montas, paima das ahu hu Juda.

⁸ Ambah ni ai sada surat hubani si Asap, sijaga harangan ni raja in, ase ibere hu bangku hayu bahen tutup tiang ni horbangan ni benteng ni rumah panumbahan ai pakon bahen parhayu ni rumah siiananku.” Dob ai ibere raja ai ma hu bangku na hupindo ai, ai tangan ni Naibata na layak ai do i babouhu.

⁹ Dob ai das ma ahu hubani panrajai na i dipar ni bah banggal, jadi hubere ma bani sidea surat ni raja ai. Marhasoman pambobai ni bala pakon siajak huda hinan ahu ipabingkat raja ai.

¹⁰ Tapi dob ibogei si Sanballat, halak Horoni ai, pakon si Tobia, juakjuak ai, ai ma halak Amon, barita ai, sogam tumang ma uhur ni sidea, halani roh sada halak, laho mansarihon hadoharon ni halak Israel.

Ipungkah si Nehemia Horjani i Jerusalem

¹¹ Jadi das ma ahu i Jerusalem. Dob adong tolu ari ahu ijai,

¹² marugas ma ahu bornginni ai rap pakon piga-piga dalahi; tapi bani ise pe lang hupatugah na ninahkon ni Naibata ai hubagas uhurhu, na sihol bahenonku hu Jerusalem. Seng dong pinahan bangku age sada sobali na huhunduli ai.

¹³ Dob ai luar ma ahu bornginni ai hun horbangan habungan laho hu parigi naga ampa hu horbangan parnapuan, anjaha hupareksa ma tembok ni Jerusalem, na dob pinarreong ampa horbanganni, na dob maseda ibahen apuy.

¹⁴ Dob ai hutoruskon ma hu horbangan bah tubuh pakon hu bongbongan ni raja ai. Tapi sungkod do hudangkai mardalan, anggo i atas ahu.

¹⁵ Lanjar borngin ni ai do ahu tangkog hun habungan ai laho mamareksa tembok ai; dob ai mulak ma ahu anjaha das use hu huta manlopusi horbangan habungan ai.

¹⁶ Tapi seng ibotoh pangintuai-pangintuai ai, barang huja ahu na laho ai atap aha na hubahen ai; ai seng hupatugah ope ai hubani halak Jahudi, malim, halak na sangap, pangintuai ampa hubani halak na legan, ai ma sihorjahon horja ai.

¹⁷ Dob ai ningku ma dompak sidea, “Domma ididah nasiam hasunsahan na mangonai banta,

ai ma sonaha parrumbak ni Jerusalem anjaha horbanganni pe mosog do. Laita, pajongjong hita ma use tembok ni Jerusalem, ase ulang madorun be hita.”

¹⁸ Dob ai hubaritahon ma bani sidea naha panogunogu ni tangan ni Naibata na layak in bangku, sonai homa hata ni raja ai, na hinatahonni bangku. Jadi nini sidea ma, “Marugas ma hita paulihon!” Jadi marsipagogoh tanganni bei ma sidea mangkorjahon horja na madear ai.

¹⁹ Tapi dob itangar si Sanballat, halak Horoni ai, pakon si Tobia, juakjuak, halak Amon ai, pakon si Gesem halak Arab ai, barita ai, manrisai anjaha marmapas ni uhur ma sidea bennami, nini sidea ma, “Aha do na binahennima in? Na manggeori do hanima dompak raja in?”

²⁰ Tapi ningku ma dompak sidea, “Naibata na i surga, la do na manumpaki hanami pasaudkon on, anjaha hanami, jabolon-Ni, marugas ma hanami, laho pajongjongkon; tapi anggo nasiam, seng dong marbagian barang marhak barang marpardingatan i Jerusalem.”

Iulaki Pajongjong Tembok pakon Horbangan ni Jerusalem

3 ¹ Dob ai marugas ma Sintua ni malim Eliasib rap pakon malim, saninani ai, jadi ipauli sidea ma Horbangan Biribiri. Ipapansing sidea ma ai anjaha

ipajongjong labahni; ipapansing sidea ma ai das hu Manara Mea, das hu Manara Hananel.

² I lambung ni sidea paulihon halak Jeriko. I lambung ni sidea use si Sakkur, anak ni si Imri.

³ Tapi ginompar ni si Senos do pajongjong Horbangan Dengke; ipauli sidea ma tutup tiangni, ipadear homa labahni, parkunsianni pakon ransang-ransangni.

⁴ I lambung ni sidea mangumban si Meremot, anak ni si Uria, anak ni si Hakos. I lambung ni si Mesulam, anak ni si Berekia, anak ni si Mesesabeel, mangumban. I lambung ni sidea mangumban si Sadok, anak ni si Baana.

⁵ I lambung ni sidea use mangumban halak Tekoa; tapi halak na sangap humbani sidea seng ra mangunduk laho mangkorjahon horja ni Tuhan ni sidea.

⁶ Ia bani horbangan ni huta parbagas ai, si Joyada, anak ni si Pasea, ampa si Mesulam, anak ni si Besodeia do na mangumban; ipauli sidea ma tutup tiangni, ipadear homa labahni, parkunsianni pakon ransang-ransangni.

⁷ I lambung ni sidea mangumban si Melatia, halak Gibeon, pakon si Jadon, halak Meronot, rap pakon dalahi hun Gibeon pakon hun Mispa, ai ma na i toruh ni gomgoman ni panrajai, na i dipar ni bah bangga ai.

⁸ I lambung ni sidea mangumban si Usiel, anak ni si Harhaya, sada humbani tukang omas, i lambungni use mangumban si Hananya, anak ni sada halak sibahen rium-riuman; ipadear sidea ma Jerusalem das hu tembok na lumbang ai.

⁹ I lambung ni sidea use mangumban si Repaya, anak ni si Hur, na manrajai satongah distrik Jerusalem.

¹⁰ I lambung ni sidea mangumban si Jedaya, anak ni si Harumap, tontang ni rumahni; i lambungni use mangumban si Hattus, anak ni si Hasabneya.

¹¹ Bagian na paduahon iumban si Malkia, anak ni si Harim pakon si Hasub, anak ni si Pahat-Moab, das hu Manara Panloburan.

¹² I lambung ni sidea mangumban si Salum, anak ni si Hallohes, na manrajai satongah distrik Jerusalem, ia rap pakon boruni.

¹³ Si Hanun pakon par Sanoa mangumban Horbangan Habungan; ipajongjong sidea ma ai use anjaha ibahen labahni, parkunsianni ampa ransang-ransangni, anjaha ipadear sidea do homa tembok ai saribu asta, das hu Horbangan Parnapuan.

¹⁴ Si Malkia, anak ni si Rehab, na manrajai distrik Betkerem, mangumban Horbangan Parnapuan; ipauli ma ai use, ibahen labahni, parkunsianni pakon ransang-ransangni.

¹⁵ Horbangan Bah Tubuh iumban si Salum, anak ni si Kolhose, na manrajai distrik Mispa; ipauli ma ai use, itayubi, ibahen labahni, parkungsianni pakon ransang-ransangni; ipauli do homa tembok ni Bongbongan Siloa, na i pohon ni raja ai, das hu Tangga Haming na manud hun huta ni si Daud.

¹⁶ Dob ia, si Nehemia, anak ni si Asbuk, na manrajai satongah distrik Betsur, mangumban das ronsi tontang ni tanoman ni si Daud, das hu bongbongan na pinauli ai, das homa hu rumah ni puanglima-puanglima ai.

¹⁷ Dob ai mangumban halak Levi: Si Rehum, anak ni si Bani, dob ai si Hasabiah, na manrajai satongah distrik Kegila, ipauli use bani distrikni.

¹⁸ Dob ai, saninani mangumban: Si Baai, anak ni si Henadad, na manrajai satongah distrik Kegila.

¹⁹ I lambungni, si Eser, anak ni si Jesua na manrajai Mispa, mangumban bagian na legan, tontang ni tangkogan na hu rumah parsinjataan hampit suhi-suhi ai.

²⁰ Dob ai iumban si Baruk, anak ni si Sabbai ma bagian na legan, hun suhi-suhi ai das hu labah ni rumah ni si Eliasib, sintua ni malim ai.

²¹ Dob ai iumban si Meremot, anak ni si Uria ma bagian na legan, hun labah ni rumah ni si Eliasib das hu ujung ni rumah ni si Eliasib.

²² Dob ai, mangumban do malim-malim, halak na marianan i Pamah Jordan.

²³ Dob sidea mangumban do si Benjamin pakon si Hasub tontang ni rumah ni sidea. Dob sidea si Asarya, anak ni si Maaseya, anak ni si Ananya mangumban i lambung ni rumahni sandiri.

²⁴ Dob ai iumban si Binnui, anak ni si Henadad, bagian na legan, hun rumah ni si Asarya das hu suhi-suhi ai ampa suhi-suhi na sada nari ai.

²⁵ Si Palal, anak ni si Usai, mangumban tontang ni suhi-suhi ai ampa manara ai, na gijangan humbani rumah ni raja ai, dohorhon alaman ni tutupan ai. Dob ai si Pedaya, anak ni si Paris,

²⁶ anjaha siparugas na i rumah panumbahan, na marianan i Opel, mangumban das hu tontang ni Horbangan Bah i hapoltakan ampa manara na gijang ai.

²⁷ Dob sidea iumban halak Tekoa ma bagian na legan, tontang ni manara na gijang ai das hu tembok Opel.

²⁸ I babou ni Horbangan Huda mangumban malim-malim, ganup tontang ni rumahni bei.

²⁹ Dob sidea si Sadok, anak ni si Immer, mangumban tontang ni rumahni sandiri. Dob ai si Semaya, anak ni si Sekanya, sijaga Horbangan Hapoltakan.

³⁰ Dob ai iumban si Hananya, anak ni si Selemya, pakon si Hanun, anak paonomkon ni si Salap do bagian na legan. Dob ai si Mesulam, anak ni si Berekia, mangumban tontang ni kamarni.

³¹ Dob ai si Malkia, sada humbani tukang omas ai, mangumban das hu rumah ni siparugas i rumah panumbahan ampa partiga-tiga, tontang ni Horbangan Panjagaan ampa kamar pardatas ni suhi-suhi ai.

³² Anjaha i holangkolang ni kamar pardatas ni suhi-suhi ai ampa Horbangan Biribiri ai mangumban tukang omas ampa partiga-tiga.

Itoruskon Horja ai Age pe Adong na Mangimbang

4 ¹ Jadi dob ibogei si Sanballat na paulihon tembok ai hita, manggila ma ia anjaha manringis tumang, anjaha ipahiri-hiri ma halak Jahudi.

² Nini ma i lobei ni saninani ampa bala ni Samria, “Aha do na sihol bahenon ni halak Jahudi, na so margogoh ai? Na sihol pasuangkon do sidea? Na sihol manggalang do sidea? Ai mintor tardobkon sidea ma ai ibagas sadari? Sihol huaron ni sidea use batu-batu ai hun timbunanni ai, na dob minosogan?”

³ Anjaha i lambungni do si Tobia, halak Amon ai, nini ma, “Paturut inunut sidea paulihon ai, anggo inangkih sada baliang harangan holi ai, reongkononni ma tembok batu ni sidea ai.”

⁴ “Tangar Ham ma, Ham Naibatanami! Hona apas do hanami, balaskon Ham ma hubani ulu ni sidea pangkirion ni sidea ai, anjaha ondoskon Ham ma

sidea gabe sirampason i tanoh pambuangan ni sidea.

⁵ Ulang ma marpangulaki uhur-Mu bani hasalahan ni sidea, anjaha ulang ma sasap Ham dousa ni sidea hun lobei-Mu; ai domma ipuhoi sidea ringis-Mu i lobei ni halak sipanukangi ai.

⁶ Tapi inunut hanami do pajongjongkon tembok ai, anjaha domma mardomu ganup tembok ai satongah gijang. Ai sada do uhur ni bangsa ai marhorja.”

⁷ Dob ibogei si Sanballat, si Tobia, halak Arab ai, halak Amon pakon halak Asdod, na manjadi do pangumbanon ni tembok ni Jerusalem, anjaha mamungkah tutup bungbungni, marah tumang ma sidea;

⁸ jadi marbulawan ma sidea haganup roh laho mamorang Jerusalem, anjaha mambahen hageoron ijai.

⁹ Tapi martonggo ma hanami hubani Naibatanami, anjaha iadongkon hanami ma parjaga mangimbang sidea, arian borngin, laho mandingdingi hanami dompak sidea.

¹⁰ Tapi nini halak Jahudi ma, “Domma surut gogoh ni halak sipanarui, anjaha buei ope junjunan; seng tolak be hanami mandobkon tembok ai.”

¹¹ Anjaha munsuh mangkatahon, “Seng bulih botohon ni sidea, anjaha seng bulih idahon ni sidea, paima das hita hu tongah-tongah ni sidea,

laho manraseihon sidea anjaha manlanglangi horja ni sidea.

¹² Sanggah roh halak Jahudi, na marianan i lambung ni munsuh ni sidea ai, ihatahon sidea do bennami, domma pala sapuluh hali. Humbani ganup ianan, na niianan ni sidea, sihol roh sidea mangimbang hita.”

¹³ Jadi ipajongjong hanami ma bangsa ai mangihutkon margani bani ianan sitoruhan i pudi ni tembok ai pajolom-jolom podang, tanja pakon panah.

¹⁴ Jadi dob hutulimati, jongjong ma ahu, anjaha ningku ma dompak halak na sangap pakon dompak kopala ampa simasima ni bangsa ai, “Ulang ma nasiam mabiar mangidah sidea. Dingat nasiam ma Jahowa, na banggal anjaha na majombut, anjaha marporang ma nasiam mangkopkop sanina nasiam, anak nasiam, boru nasiam, parinangon nasiam ampa rumah nasiam.”

¹⁵ Dob tarburintik bani munsuhnami, na dob ibotoh hanami ganupan ai, anjaha na dob isundati Naibata tahi-tahi ni sidea ai, mulak ma hanami ganup hu tembok ai, ganup hu horjani bei.

¹⁶ Olat ni ari ai, satongah humbani juakjuakkai mangkorjai horja ai, anjaha na satongah nari pajolom-jolom tanja, gantar, panah, ampa baju bosi, anjaha kopala-kopala ai jongjong i pudi ni ganup ginompar ni Juda.

¹⁷ marhorja i atas ni tembok ai. Anjaha halak sipanarui sonon ma pangkorjani, tanganni sada ipakei mangkorja, tanganni na sada nari manjolom sinjatani.

¹⁸ Tapi sagala siparhorja ai mangkalhal podangni bani binongeini sanggah na marhorja ai. Anjaha dalahi sisompul tarompit i lambungku.

¹⁹ Ningku ma dompak halak na sangap, dompak kopala ampa dompak simasima ni bangsa ai, “Buei do horja ai anjaha bolag, anjaha kerap do hita i atas tembok ai, padaoh-daoh bei.

²⁰ Barang hun ianan ja ibogei nasiam sora ni tarompit, maningon roh ma nasiam manjumpahkon hanami martumpu hujai. Naibatanta do marporang mangkopkop hita.”

²¹ Jadi ihorjai hanami ma horja ai, anjaha satongah humbani sidea pajolom-jolom tanja humbani girah sogod nari das ronsi na mulgap bintang.

²² Ambah ni ai ningku ma dompak bangsa ai bani panorang ai, “Maningon ganup do rap pakon juakjuakni bei marborngin i Jerusalem, ase marjaga hita borngin anjaha marhorja arian.”

²³ Tapi age ahu, age saninangku, age juakjuakku, age halak siparjaga na mangirikkon ahu, seng onggaitanggali hanami pakeiannami; ganup do manjolom sinjatani ibagas tanganni.

**Aturan na Binahen ni si Nehemia
bani Halak na Miskin**

5 ¹ Tapi masa ma doruh-doruh i tongah-tongah ni halak na miskin ampa parinangon ni sidea dompak sanina ni sidea, halak Jahudi.

² Adong do deba na mangkatahon, “Buei do hanami sapanganan, ai buei do anak pakon borunami; bere bennami gandum, ase mangan anjaha manggoluh hanami.”

³ Adong do homa na mangkatahon, “Maningon gadeihononnami ma jumanami, pohon anggurnami pakon rumahnami ase dapotan gandum halani lohei.”

⁴ Anjaha adong use na mangkatahon, “Domma ipinjam hanami duit bahen galar ni balasting ni jumanami pakon pohon anggurnami hubani raja in.

⁵ Ai pe, ia sibuknami songon sibuk ni saninanami do, anaknami songon anak ni sidea; hape tonggor ma, maningon ondskononnami ma hape anaknami ampa borunami gabe jabolon, anjaha deba humbani borunami domma gabe jabolon, tapi seng margogoh hanami mangkahua ai, ai halak na legan do simada jumanami ampa pohon anggurnami.”

⁶ Jadi manringis tumang ma ahu dob hubogei doruh-doruh ampa adu-aduan ni sidea ai.

⁷ Jadi dob hutimbang-timbang ibagas uhurhu, huhata ma halak na sangap ampa kopala-kopala. Ningku ma dompak sidea, “Domma manjalo bunga ni duit hape nasiam humbani sanina nasiam?” Jadi hubahen ma sada tumpuan banggal mangimbang sidea,

⁸ anjaha ningku ma dompak sidea, “Hita do na dob manobus saninanta halak Jahudi, sagala na dob tarbuang hubani bangsa sipajuh begu-begu, romban hubani gogohta; tapi nasiam sandiri do nuan manjual sanina nasiam, anjaha hu banta do sidea tarjual.” Jadi sip ma sidea, seng tarbalosi sidea.

⁹ Dob ai ningku ma, “Seng dear na binahen nasiam in. Ai lang patut marhabiaran hubani Naibatanta nasiam namin marparlahou halani pangapasion ni bangsa sipajuh begu-begu, munsuhta ai?

¹⁰ Ahu pe, age saninangku ampa juakjuakku domma ipapinjamkon hanami pirak pakon omei bani sidea. Balihon hita ma utang ai.

¹¹ Paulak nasiam ma hubani sidea sadari on juma ni sidea, pohon anggur ni sidea, pohon jetun ni sidea ampa rumah ni sidea, ronsi bunga ni duit, sonai homa gandum, anggur ampa minak, na pinainjamkon nasiam hubani sidea.”

¹² Dob ai nini sidea ma, “Ra pe hanami paulakkon ai, anjaha aha pe lang tungguonnami humbani sidea. Ra do hanami mambahen songon na hinatahonmu

ai.” Dob ai hudilo ma malim lanjar hupabija ma sidea, ase ibahen sidea romban hubani hata ai.

¹³ Hupaspas ma partontonan ni bajungku. Ningku ma, “Sai sonin ma paspason ni Naibata ganup halak hun rumahni ampa humbani artani na so mandalankon hata on. Sai hona paspas ma ia anjaha buangon.” Dob ai nini ganup tumpuan ai ma, “Amen,” anjaha ipuji sidea ma Naibata. Ibahen bangsa ai ma songon na binagahkon ai.

Uhur ni si Nehemia na So Marpambuat

¹⁴ Ambahni ai olat ni parbangkitku gabe panrajai bani sidea i tanoh Juda, olat ni tahun paduapuluhkon das hubani patolupuluh-tahunkon panrajaion ni Raja Artasasta, sapuluh dua tahun dokahni, seng onggahupangan upah parbagianan ni panrajai, saninangku pe sonai do.

¹⁵ Ia panrajai na i lobeihu borat do ipaporsankon sidea hubani bangsa ai, ai itunggu do humbani sidea sipanganon pakon anggur, ambahni ai ompat puluh ompat sekel pirak; sonai homa juakjuak ni sidea patuan-tuankon do dompak bangsa ai. Tapi anggo ahu seng sonai hubahen, halani biar mangidah Naibata.

¹⁶ Sonai homa horja i tembok ai, ahu sandiri do manangani anjaha seng dong juma hudapot; anjaha ganup juakjuakku tumpu do bani horja ai.

¹⁷ Anjaha halak Jahudi pakon sagala kopala, saratus lima puluh halak bueini, ambahni ai halak na roh humbani bangsa sipajuh begu-begu, na inggot bennami, mangan i mejangku do.

¹⁸ Na maningon sipasirsiron ibagas sadari, ai ma sada lombu jonggi, onom biribiri na pinamombur; sonai homa manuk-manuk ipasirsir do bangku, anjaha ganup sapuluh ari marbagei-bagei anggur buei tumang; age sonai seng adong hutunggu sipanganon parbagianan ni sada panrajai, halani borat hinan do horja rodi bani bangsa ai.

¹⁹ “Dingat Ham ma ahu, Ham Naibatangku, balos ni haganup na hubahen ai hubani bangsa ai.”

Parsiap ni Tembok ai Ibagas Parlawanan

6 ¹Jadi dob tarburintik hubani si Sanballat, si Tobia, pakon si Gesem, halak Arab ai, ampa hubani munsuh na legan, na dob siap hupauli tembok ai, anjaha seng dong be bungbungni na tading age sada ijai, tapi tongon seng ope marlabah hubahen horbanganni ronsi panorang ai,

²isuruh si Sanballat ampa si Gesem ma na mangkatahon hu bangku, “Roh ma ham, anjaha marjumpah bani huta na i habungan on ma hita.” Tapi sihol mambahen na jahat do sidea hu bangku.

³Jadi husuruh ma suruhanku hubani sidea mangkatahon, “Borat tumang do nuan horjangku, halani ai seng tarbahen ahu tuad. Mase ma

rahanan maronti horja on, halani na hutadingkon on marayak nasiam?"

⁴ Anjaha pala do ompat hali sonai isuruh sidea suruhanni hu bangku, tapi sonai do balosku bani sidea.

⁵ Dob ai isuruh si Sanballat ma palimahalihon sonai hu bangku suruhanni mamboan surat na buha ibagas tanganni.

⁶ Tarsurat do ibagas sonon, "Sar do barita i tongah-tongah ni bangsa sipajuh begu-begu, anjaha si Gesem pe ihatahon do sonai, ia ham pakon halak Jahudi sihol marbalik do, halani ai do gan, ase ipajongjong ham tembok in; anjaha ham marsura-sura gabe raja ni sidea, nini barita ai.

⁷ Domma pala ipabangkit ham nabi laho maningtingkon pasal ham i Jerusalem, paboa domma adong sada raja i Juda. Ai pe sai na das do barita on holi hubani rajanta ai, halani ai roh ma ham, ase rap manriah hita."

⁸ Tapi husuruh ma hubani na mangkatahon, "Seng tongon masa songon na hinatahonmu ai, tukas-tukasmu do in, tubuh humbagas uhurmu tumang."

⁹ Ai ganup do sidea mambibiari hanami, ninuhur ni sidea, "Parontihonon ni tangan ni sidea ma horja ai, gabe sundat ma. Halani ai, Ham Naibata, sai lambin pargogohi ham ma tanganku!"

¹⁰ Jadi sanggah laho ahu hu rumah ni si Semaya, anak ni si Delaya, anak ni si Mehetabel, hape na

pinapulig do ia, nini ma, “Martumpu ma hita hu rumah ni Naibata, hubagas rumah panumbahan ai, anjaha tutup hita ma rumah panumbahan ai; ai na laho roh do sidea sihol mambunuh ham, borngin on tene sihol roh sidea mambunuh ham.”

¹¹ Tapi ningku ma, “Mintor ra ma maporus dalahi na songon ahu on? Anjaha ise ma na songon ahu on masuk hu rumah panumbahan lanjar boi manggoluh? Seng ra ahu masuk hujai.

¹² Ai torang do ididah uhurhu, sedo Naibata na marsuruhsi ai, ihatahon pe panjahaionni ai palumbahon ahu, halani na dob iupahi si Tobia pakon si Sanballat do ia,

¹³ ase mabiar ahu namin ninuhurni, gabe hubahen sonai, ase mardousa ahu, gabe boi pasambor-samboron ni sidea goranku, laho pabadorhon ahu.

¹⁴ Ham Naibatanku, dingat Ham ma pambahenan, na binahen ni si Tobia ampa si Sanballat on, sonai homa nabi naboru, si Noaja, ampa nabi na legan, na sihol mambibiari ahu.”

¹⁵ Jadi dob ma tembok ai ari dua puluh lima bulan Elul, ibagas lima puluh dua ari.

¹⁶ Dob ibogei haganup munsuhnami barita ai, gabe mabiar ma ganup bangsa sipajuh begu-begu na inggot bennami, anjaha gobir ma sidea, iahap sidea Naibatanta do na manumpak mambahen saud horja on.

¹⁷ Manongos surat do homa ijia buei halak na sangap i Juda hubani si Tobia, anjaha humbani si Tobia pe roh do surat hubani sidea,

¹⁸ ai buei do i Juda na saparbulawanan pakonsi, halani na marsimatua do ia hubani si Sekanya, anak ni si Arak, anjaha si Johanan, anakni ai, mambuat boru ni si Mesulam, anak ni si Berekia.

¹⁹ Ambah ni ai ipatugah-tugah sidea do pambahenanni na madear i lobeihu, anjaha hatangku ipadas hu bani. Itongos si Tobia do surat bangku sihol mambibiari ahu.

Panjagaan bani Jerusalem

7 ¹ Jadi siapkonsi napauli tembok ai, anjaha dob hupansang labah ai, anjaha dob pinabangkit sijaga horbangan, sipandoding ampa halak Levi,

² huondoskon ma bani si Hanani anggingkai, ampa hubani si Hananya, kopala ni benteng ai, ase iparentah sidea Jerusalem, ai paruhur sintong do sidea anjaha marhabiaran bani Naibata, lobihan humbani buei halak.

³ Ningku ma dompak sidea, “Seng bulih buhaon horbangan ni Jerusalem, paima milas ari, anjaha sanggah bani iananni ope jongjong parjaga ai, maningon tutupon do labah ni horbangan ai, anjaha pangkei marpating-pating bahenon. Anjaha pabangkit ma parjaga humbani halak pangisi ni

Jerusalem, ganup bani parjagaanni, ganup tontang ni rumahni.

**Bilangan ni Halak na Mulak hun Habungan
Binobahon ni si Serubabel**

(ay. 6-73: pausih Esr. 2)

⁴ Bolag anjaha lubang do huta ai, tapi otik do jolma pangisini anjaha seng dong ope rumah ipauli.

⁵ Dob ai ipuhoi Naibatanku ma uhurhu, laho patumpuhon halak na sangap pakon kopala-kopala ampa bangsa ai, laho pasuratkon sidea hubagas buku partingkian. Jadi jumpah ahu ma buku partingkian ni sidea na parlobei tangkog, anjaha jumpah ahu do tarsurat ijai:

⁶ On ma jolma pangisi ni nagori ai, na tangkog hun habuangan, na binuangkon ni si Nebukadnesar, raja hun Babel, gabe mulak ma sidea hu Jerusalem ampa hu Juda, ganup hutani bei.

⁷ Roh do sidea rap pakon si Serubabel, si Jesua, si Nehemia, si Asaria, si Ramia, si Nahamani, si Mordahai, si Bilsan, si Misperet, si Bigwai, si Nehum ampa si Baana. Bilangan ni dalahi humbani bangsa Israel:

⁸ Ginompar ni si Paros dua ribu saratus pitu puluh dua halak.

⁹ Ginompar ni si Sepatya tolu ratus pitu puluh dua halak.

¹⁰ Ginompar ni si Arak onom ratus lima puluh dua halak.

¹¹ Ginompar ni si Pahat-Moab, ai ma ginompar ni si Jesua ampa si Joab, dua ribu ualuh ratus sapuluh ualuh halak.

¹² Ginompar ni si Elam saribu dua ratus lima puluh ompat halak.

¹³ Ginompar ni si Sattu ualuh ratus ompat puluh lima halak.

¹⁴ Ginompar ni si Sakai pitu ratus onom puluh halak.

¹⁵ Ginompar ni si Binui onom ratus ompat puluh ualuh halak.

¹⁶ Ginompar ni si Bebai onom ratus dua puluh ualuh halak.

¹⁷ Ginompar ni si Asgad dua ribu tolu ratus dua puluh dua halak.

¹⁸ Ginompar ni si Adonikam onom ratus onom puluh pitu halak.

¹⁹ Ginompar ni si Bigwai dua ribu onom puluh pitu halak.

²⁰ Ginompar ni si Adin onom ratus lima puluh lima halak.

²¹ Ginompar ni si Ater, humbani si Hiskia, siah puluh ualuh halak.

²² Ginompar ni si Hasum tolu ratus dua puluh ualuh halak.

²³ Ginompar ni si Besai tolu ratus dua puluh ompat halak.

- ²⁴ Ginompar ni si Harip saratus sapuluh dua halak.
- ²⁵ Ginompar ni si Gibeon siah puluh lima halak.
- ²⁶ Dalahi na hun Betlehem ampa Netopa saratus ualuh puluh ualuh halak.
- ²⁷ Dalahi na hun Anatot saratus dua puluh ualuh halak.
- ²⁸ Dalahi na hun Bet-Asmavet ompat puluh dua halak.
- ²⁹ Dalahi na hun Kiriath-Jearim, Kapira ampa Beerot, pitu ratus ompat puluh tolu halak.
- ³⁰ Dalahi na hun Rama ampa Gaba onom ratus dua puluh sada halak.
- ³¹ Dalahi na hun Mikmas saratus dua puluh dua halak.
- ³² Dalahi na hun Betel ampa Ai saratus dua puluh halak.
- ³³ Dalahi hun Nebo na paduahon lima puluh dua halak.
- ³⁴ Ginompar ni si Elam na paduahon saribu dua ratus lima puluh ompat halak.
- ³⁵ Ginompar ni si Harim tolu ratus dua puluh halak.
- ³⁶ Dalahi na hun Jeriko tolu ratus ompat puluh lima halak.
- ³⁷ Dalahi na hun Lod, Hadit ampa Ono pitu ratus dua puluh sada halak.
- ³⁸ Ginompar ni si Sena tolu ribu siah ratus tolu puluh halak.

³⁹ Malim-malim: Ginompar ni si Jedaya, ai ma ginompar ni si Jesua, siah ratus pitu puluh tolu halak.

⁴⁰ Ginompar ni si Immer saribu lima puluh dua halak.

⁴¹ Ginompar ni si Pashur saribu dua ratus ompat puluh pitu halak.

⁴² Ginompar ni si Harim saribu sapuluh pitu halak.

⁴³ Halak Levi: Ginompar ni si Jesua, ai ma si Kadmiel ampa anak ni si Hodeva, pitu puluh ompat halak.

⁴⁴ Sipandoding: Ginompar ni si Asap saratus ompat puluh ualuh halak.

⁴⁵ Sijaga horbangan: Ginompar ni si Salum, ginompar ni si Ater, ginompar ni si Talmon, ginompar ni si Akub, ginompar ni si Hatita, ginompar ni si Sobai, saratus tolu puluh ualuh halak.

⁴⁶ Sipangurupi i rumah panumbahan: Ginompar ni si Siha, ginompar ni si Hasupa, ginompar ni si Tabaot,

⁴⁷ ginompar ni si Keros, ginompar ni si Siya, ginompar ni si Padon,

⁴⁸ ginompar ni si Lebana, ginompar ni si Hagaba, ginompar ni si Salmai,

⁴⁹ ginompar ni si Hanan, ginompar ni si Gidel, ginompar ni si Gahar,

⁵⁰ ginompar ni si Reaya, ginompar ni si Resin, ginompar ni si Nekoda,

⁵¹ ginompar ni si Gasam, ginompar ni si Usa,
ginompar ni si Pasea,

⁵² ginompar ni si Besai, ginompar ni si Meunim,
ginompar ni si Nepisim,

⁵³ ginompar ni si Bakbuk, ginompar ni si Hakupa,
ginompar ni si Harhur,

⁵⁴ ginompar ni si Baslut, ginompar ni si Mehida,
ginompar ni si Harsa,

⁵⁵ ginompar ni si Barkos, ginompar ni si Sisera,
ginompar ni si Tema,

⁵⁶ ginompar ni si Nesia, ginompar ni si Hatipa.

⁵⁷ Ginompar ni juakjuak ni si Salomo: Ginompar ni si
Sotai, ginompar ni si Soperet, ginompar ni si Perida,

⁵⁸ ginompar ni si Jaala, ginompar ni si Darkon,
ginompar ni si Gidel,

⁵⁹ ginompar ni si Sepatya, ginompar ni si Hatil,
ginompar ni si Poheret-Hesebaim, ginompar ni si
Amon.

⁶⁰ Haganup sipangurupi i rumah panumbahan
ampa ginompar ni juakjuak ni si Salomo tolu ratus
siah puluh dua halak.

⁶¹ Anjaha on do halak na tangkog hun Tel-Mela,
Tel-Harsa, Kerub-Adon pakon Immer, tapi lang
tarpatorang sidea ginompar ni ompung ni sidea
barang ginompar ni sidea sandiri, atap na masuk hu
Israel do sidea.

⁶² Ginompar ni si Delaya, ginompar ni si Tobia, ginompar ni si Nekoda, onom ratus ompat puluh dua halak.

⁶³ Anjaha humbani malim: Ginompar ni si Habaya, ginompar ni si Hakos, ginompar ni si Barsilai, ai ma na mambuat sada boru ni si Barsilai, halak Gilead ai bahen parinangonni, lanjar goran ni sidea ai ma panggoranini.

⁶⁴ Ipindahi sidea do surat hatorangan, paboa na dihut sidea tarsurat ibagas partingkian, tapi lang jumpah ijai, halani ai ipadarat ma sidea humbani hamalimon ai, songon halak na mabutak;

⁶⁵ anjaha ihatahon panrajai ai ma bani sidea, paboa na so bulih panganon ni sidea humbani sipanganon na mapansing sahalian ai, paima bangkit sada malim na mar Urim pakon Tumim.

⁶⁶ Tumpuan ai ganup ompat puluh dua ribu tolu ratus onom puluh halak do bueini,

⁶⁷ sobali jabolon dalahi ampa jabolon naboru ni sidea, ai ma pitu ribu tolu ratus tolu puluh halak bueini; anjaha adong do pandoding bani sidea dua ratus ompat puluh lima halak, dalahi ampa naboru.

⁶⁸ Huda ni sidea pitu ratus tolu puluh onom, anjaha huda ni sidea (*pirah ni halode*) dua ratus ompat puluh lima do bueini;

⁶⁹ unta ni sidea ompat ratus tolu puluh lima, anjaha halode ni sidea onom ribu pitu ratus dua puluh do.

⁷⁰ Deba humbani kopala ni mar sasaompung itumpaki do horja ai. Sipanrajai ai, ibere do bani parartaan ai saribu darik omas, lima puluh batil ampa lima ratus tolu puluh pakeian ni malim.

⁷¹ Anjaha deba nari humbani kopala ni mar sasaompung mambere bani parartaan ni horja ai dua puluh ribu darik omas ampa dua ribu dua ratus mina pirak.

⁷² Anjaha na binere ni halak simbuei na legan ai dua puluh ribu darik omas, dua ribu mina pirak ampa onom puluh pitu pakeian ni malim.

⁷³ Anjaha marianan ibagas hutani bei ma malim, halak Levi, sijaga horbangan, pandoding, deba humbani halak simbuei, sipangurupi i rumah panumbahan ampa haganup Israel. (8-1) Jadi dob jumpah bulan pitu das ma halak Israel hu huta ni sidea bei.

Si Esra Mambasa Buku Titah

Pesta Lampolampo

8 ¹ (8-2) Dob ai martumpu ma ganup bangsa ai marsada ni uhur hu alaman na i lobei ni Horbangan Bah; ihatahon sidea ma hubani si Esra, sibotoh titah ai, ase iboan buku titah ni si Musa, na binere ni Jahowa hubani halak Israel.

² (8-3) Jadi iboan Malim Esra ma titah ai hu lobei ni tumpuan ai, hu lobei ni dalahi ampa naboru pakon

haganup halak na boi mangarusi ai, ai ma ari sada bulan pitu.

³ (8-4) Jadi ibasa ma hunjai bani alaman ai i lobei ni Horbangan Bah ai humbani girah sogod nari das hu tongah ari i lobei ni dalahi ampa naboru pakon halak na boi mangarusi ai, anjaha tangi do haganup halak simbuei ai bani hata ni buku titah ai.

⁴ (8-5) Tapi anggo si Esra, sibotoh titah ai, jongjong do bani anjapanjap hayu, na dob pinasirsir hinan hubani horja ai, anjaha i lambungni jongjong do hampit siamun si Matitya, si Sema, si Anaya, si Uria, si Hilkia ampa si Maaseya; anjaha hampit sambilou, si Pedaya, si Misael, si Malkia, si Hasum, si Hasbadana, si Sakaria ampa si Mesulam.

⁵ (8-6) Dob ai ibuka si Esra ma buku ai i lobei ni panonggor ni ganup halak simbuei ai; anjaha sanggah na binuhani ai, jongjong ma ganup bangsa ai.

⁶ (8-7) Dob ai ipuji si Esra ma Jahowa, Naibata na banggal in, anjaha ganup bangsa ai mambalosi, "Amen, Amen," anjaha gostong tangan ni sidea dompak datas; ipaunduk sidea ma dirini, manrogop ma sidea marsombah hubani Jahowa.

⁷ (8-8) Sonai homa si Jesua, si Bani, si Serabya, si Jamin, si Akub, si Sabetai, si Hodia, si Maaseya, si Kelita, si Asarya, si Josabad, si Hanan, si Pelaya ampa halak Levi, iajarhon sidea do titah ai bani bangsa ai, anjaha soh bei do bangsa ai bani iananni.

⁸ (8-9) Jojor do ibasa sidea humbani buku ai, humbani titah ni Jahowa, anjaha ipatorang sidea do ai, gabe iarusi bangsa ai ma.

⁹ (8-10) Dob ai roh ma si Nehemia, sipanrajai ai, ampa si Esra, malim anjaha sibotoh surat ai, ampa halak Levi, siajari bangsa ai, nini sidea ma dompak ganup bangsa ai, “Na pansing do ari on bani Jahowa Naibata nasiam; ulang ma pusok uhur nasiam anjaha tangis nasiam!” Ai tangis-tangis do bangsa ai, dob itanggar sidea hata ni titah ai.

¹⁰ (8-11) Dob ai nini ma dompak sidea, “Laho ma nasiam, pangan nasiam ma na mantin-mantin, anjaha inum nasiam ma anggur na matobu, anjaha tongos nasiam ma parbagianan bani ganup na so dong ope pinasirsir bani, ai na pansing do ari on bani Tuhanta; anjaha ulang ma marhoru nasiam, ai malas ni uhur ibagas Jahowa, ai do gogoh bani nasiam.”

¹¹ (8-12) Sonai homa halak Levi ipasabou do ganup uhur ni bangsa ai, marhitei na mangkatahon, “Sip bei ma nasiam, ai na pansing do ari on, ulang ma marhoru nasiam!”

¹² (8-13) Dob ai laho ma ganup bangsa ai, mangan ampa minum, anjaha manongoskon deba hunjai ampa marmalas ni uhur, halani iarusi sidea hata ai, na pinatorang bani sidea.

¹³ (8-14) Bani ari paduahon martumpu ma kopala ni mar sasaompung humbani ganup bangsa ai,

rap pakon malim ampa halak Levi, hubani si Esra, sibotoh titah ai, laho mangguruhon hata ni titah ai.

¹⁴ (8-15) Jadi jumpah sidea ma tarsurat ibagas titah, na tinonahkon ni Jahowa marhitei si Musa, paboa maningon marianan do halak Israel ibagas lampolampo sadokah pesta bani bulan papituhon,

¹⁵ (8-16) anjaha maningon patugahon ampa tingtingkonon ni sidea do bani ganup huta ni sidea ampa i Jerusalem, “Laho ma nasiam hu dolog, anjaha boan nasiam ma hunjai dangkah ni hayu jetun harangan, sampinur lambei ampa na legan na tabun, laho padearhon lampolampo, songon na tarsurat ai.”

¹⁶ (8-17) Jadi luar ma bangsa ai, iboan sidea ma ai, anjaha ipauli sidea ma ai, anjaha ipauli sidea ma lampolampo bani sidea, ganup i atas tayub ni rumahni, i alaman ampa i alaman ni rumah ni Naibata, ampa i alaman ni Horbangan Bah pakon i alaman ni Horbangan Efraim.

¹⁷ (8-18) Jadi ganup tumpuan ni halak na mulak hun habuangan ai mambahen parlampolampoan, anjaha marianan ma sidea ibagas lampolampo ai; olat ni panorang ni si Josua, anak ni si Nun das ronsi ari ai, seng onggga ope sonai ibahen halak Israel. Jadi banggal tumang do malas ni uhur ai.

¹⁸ (8-19) Anjaha ganup ari, humbani ari na parlobei das hubani ari parpudi, ibasa si Esra ma humbani buku titah ni Naibata. Pitu ari do sidea marpesta;

anjaha bani ari na paualuhkon ma mata ni partumpuan ai, romban hubani titah ai.

Tonggo Mansopotkon Salah humbani Bangsa ai

9¹ Jadi bani ari dua puluh ompat bani bulan ai, martumpu ma bangsa Israel, marpuasa anjaha marhiou guni, anjaha manjujung tanoh.

² Domma ipapulig halak Israel hinan dirini humbani ganup halak na legan; jadi jongjong ma sidea mansopotkon dousani ampa hajahaton ni ompung ni sidea.

³ Sanggah na jongjong sidea bani ianan ni sidea ai, ibasahon ma bani sidea humbani buku titah ni Jahowa, Naibata ni sidea ai, saparompat ari dokahni; saparompat ari nari isopotkon sidea ma dousani anjaha martonggo hubani Jahowa, Naibata ni sidea.

⁴ Bani ianan ni halak Levi jongjong ma si Jesua; si Bani, si Kadmiel, si Sebanya, si Buni, si Serebya, si Bani pakon si Hanani; doruh-doruh ma sidea hubani Jahowa, Naibata ni sidea.

⁵ Roh use ma hata ni halak Levi: Si Jesua, si Kadmiel, si Bani, si Hasabneya, si Serebya, si Hodia, si Sebanya ampa si Petaya mangkatahon, "Jongjong ma nasiam anjaha puji nasiam ma Jahowa Naibata nasiam humbani sadokah ni dokahni ronsi sadokah ni dokahni!" Jadi ipuji sidea ma goran-Ni na

marmulia in, na mangatasi sagala pamujion ampa parpasangap,

⁶“Sasada Ham do Naibata, ale Jahowa! Ham do na manompa langit ampa langit ni langit ampa ganup balani, tanoh ampa na i atasni, laut ronsi ganup isini; anjaha Ham do na marmudu-muduhon ai ganup, anjaha ganup bala na i langit marsombah Bamu.

⁷Ham do Jahowa Naibata na mamilih si Abram, anjaha na mangarahkansi luar hun Ur, na i Kasdim, anjaha ibahen Ham do goranni si Abraham.

⁸Anjaha jumpah Ham do uhurni marsijoloman i lobei-Mu, anjaha marpadan do Ham pakonsi, mamberehon hubani ginomparni tanoh ni halak Kanaan, Het, Amori, Peresi, Jebusi ampa Girgasi. Anjaha ipasaud Ham do bagah-bagah-Mu, ai na bonar do Ham.

⁹Anjaha itatap Ham do hasombuhon ni ompungnami i Masir, anjaha itangihon Ham do doruh-doruh ni sidea i laut Sigerger.

¹⁰Anjaha ipamasa Ham do tanda ampa halongangan mangimbang Parao, pakon haganup juakjuakni ampa haganup bangsa isi ni tanohni, ai ibotoh Ham do jungkatni dompak sidea. Sonai ma gabe tarambilan goran-Mu ibahen Ham, songon na talar ronsi sadari on.

¹¹Tolah do laut ai ibahen Ham i lobei ni sidea, gabe mandipar sidea mardalan bani na horah i tongah-

tongah ni laut ai; tapi halak na mardakdak sidea isampakkon Ham do hubagas luhung, songon sada batu hubagas bah marbanggal.

¹² Anjaha iarahkon Ham do sidea marhitei hambun na jongjong arian, anjaha marhitei apuy na jongjong borngin, laho manrigap dalan sidalanan ni sidea.

¹³ Turun do Ham hu atas Dolog Sinai, anjaha marsahap pakon sidea hun nagori atas, anjaha ibere Ham do bani sidea uhum na sintong ampa titah na botul, aturan ampa parentah na dear.

¹⁴ Ipabotohkon Ham do bani sidea ari Sabat-Mu na mapansing in, anjaha ibere Ham do bani sidea tonah, aturan ampa titah marhitei pamangan ni si Musa, juakjuak-Mu.

¹⁵ Ibere Ham do bani sidea ruti hun nagori atas pasabou lohei ni sidea, anjaha iparoh Ham do bah humbani batu gingging pasombuh horah ni sidea. anjaha iparentahkon Ham do sidea masuk, laho manean tanoh in, na binulawankon-Mu, paboa berehonon-Mu do ai bani sidea.

¹⁶ Tapi jungkat do pambahenan ni sidea, ompungnami ai, ipahengkeng sidea do uhurni, anjaha seng ibalosi sidea parentah-Mu.

¹⁷ Mangengkar do sidea mambalosi, anjaha seng idingat sidea halongangan na binahen-Mu i tongah-tongah ni sidea, tapi ipahengkeng sidea do uhurni, anjaha ipabangkit sidea do sada pambobai, laho mulak hu parjabolonan ni sidea i Masir. Tapi

Naibata sisasap dousa do Ham, paridop ni uhur anjaha pardear layak, nanget manringis anjaha parholong ni uhur banggal, anjaha seng itadingkon Ham sidea.”

¹⁸ Age pe sanggah na binahen ni sidea bani sidea sada lombu tuangan, anjaha ihatahon sidea, on do Naibatamu, na mangarahkon ho mandarat hun Masir, anjaha age pe buei idalankon sidea pangapasion,

¹⁹ tapi seng itadingkon Ham sidea i halimisan, halani idop ni Uhur-Mu na banggal in; hambun na jongjong, na mambobai sidea arian i tongah dalan, sonai homa apuy na jongjong borngin, na manrigap dalan sidalanan ni sidea ai, seng meret humbani sidea.

²⁰ Ibere Ham do Tonduy-Mu na dear in, laho mangajari sidea, anjaha seng isonto Ham manna-Mu humbani pamangan ni sidea, anjaha ibere Ham do bah pasombuh horah ni sidea.

²¹ Pala do ompat puluh tahun iparmudu-mudu Ham sidea i halimisan, anjaha aha pe lang na hurang bani sidea; seng ra buruk hiou ni sidea, anjaha seng butong nahei ni sidea.

²² Ibere Ham do bani sidea harajaon ampa bangsa, anjaha ibagi-bagi Ham do sidea hubani ganup suhi, ase isoluk sidea tanoh ni si Sihon, raja ni Hesbon, ampa tanoh ni si Og, raja ni Basan.

²³ Anjaha ipabuei Ham do anak ni sidea, songon bintang na i langit, anjaha iboan Ham do sidea das hu tanoh, na dob binagahkon-Mu hinan in hubani ompung ni sidea, paboa maningon masukan anjaha teanon ni sidea do in.

²⁴ Imasuki anak ni sidea ma in anjaha itean; anjaha ipatunduk Ham do i lobei ni sidea pangisi ni tanoh in, ai ma halak Kanaan, anjaha ipadas Ham do sidea hubagas tangan ni sidea, sonai homa raja ni sidea age bangsa-bangsa na i tanoh in, ase boi bahenon ni sidea mangihutkon rosuh ni sidea bani sidea.

²⁵ Ipatunduk sidea do huta na marbatar-batar ampa tanoh na napu, isoluk sidea do rumah na gok arta na marbagei-bagei, sonai homa parigi na hinurak, pohon anggur, pohon jetun ampa hayu na marbuah buei tumang; mangan ma sidea, bosur anjaha mombur, anjaha marmalas ni uhur sidea marhitei dear layak-Mu na buei in.

²⁶ Tapi lambin lepak do sidea marparlahou anjaha manggeori do dompak Ham; itundali sidea do titah-Mu, anjaha ibunuhi nabi-Mu, na palumbahon sidea, laho mangarahkon sidea mulak hu Bamu; buei do pangapasion ihorjahon sidea.

²⁷ Halani ai ipadas Ham do sidea hubagas tangan ni munsuh ni sidea, na manosak sidea; sanggah na tarsosak ai doruh-doruh do sidea Bamu, anjaha itangihon Ham do sidea hun nagori atas; anjaha romban hubani idop ni uhur-Mu na buei in, ibere

Ham do bani sidea halak sipaluah, na paluahkon sidea hun tangan ni munsuh ni sidea.

²⁸ Tapi dob sonang sidea, iulaki sidea do use mangkorjahon sogam ni uhur-Mu, gabe ipadas Ham do sidea hubagas kuasa ni munsuh ni sidea, gabe irajai ma sidea; tapi anggo mulak use uhur ni sidea anjaha doruh-doruh sidea Bamu, itangihon Ham do use sidea hun nagori atas, anjaha gati do ipaluah Ham sidea, romban hubani idop ni uhur-Mu na buei in.

²⁹ Ipalumba Ham do sidea, laho paulakkon sidea hubani titah-Mu. Tapi lambin lepak do sidea marparlahou anjaha seng itangihon sidea titah-Mu, anjaha inunut sidea do mardousa dompak titah-Mu, na maningon horjahonon ni sada halak namin, ase boi ia manggoluh; hape manggeori do sidea, ipahengkeng uhurni anjaha seng ra sidea manangihon.

³⁰ Dokah do ianju-anju Ham sidea, anjaha ipalumba Ham do sidea marhitei Tonduy-Mu, marhitei nabi-Mu, tapi seng ra sidea manangihon. Halani ai do ase iondoskon Ham sidea hubagas tangan ni bangsa, na i tanoh ni halak sipajuh begu-begu.

³¹ Halani idop ni uhur-Mu na buei in, seng lanjar bois sidea ibahen Ham, anjaha seng itadingkon Ham sidea, ai Naibata paridop ni uhur anjaha pardear layak do Ham.

³² Ai pe, ale Naibatanami, Naibata na timbul, na gogoh anjaha na majombut na tongtong mardingat padan ampa idop ni uhur, Ulang ma mapas uhur-Mu mangidah ganup hasombuhon, hubani ompungnami ampa hubani ganup bangsa-Mu olat ni panorang ni Raja Assur ronsi sadari on.

³³ Tapi tongon bonar do Ham pasal haganup na mangonai bennami; ai sintong do pambahenan-Mu, age pe jahat pambahenannami.

³⁴ Rajanami, pambobainami, malimnami ampa ompungnami seng ihorjahon sidea titah-Mu, anjaha seng iparimbagaskon sidea parentah-Mu ampa lumba-lumba-Mu, na dob binerehon-Mu bani sidea.

³⁵ Seng ibalosi sidea Ham ibagas harajaon ni sidea, age pe buei dear ni layak-Mu, na binere-Mu bani sidea, age pe lubang anjaha lambut tanoh, na binerehon-Mu ai bani sidea, anjaha seng ipaubah sidea uhur ni sidea humbani horja ni sidea na sambor ai.

³⁶ Tonggor ma, jabolon do hanami nuan ibagas tanoh, na binere-Mu hubani ompungnami, ase panganonni namin buahni ampa gogohni; tonggor ma, jabolon do hanami.

³⁷ Anjaha gogoh ni tanoh na buei ai, laho do ai bani raja, na pinabangkit-Mu manggomgom hanami halani dousanami, sidea do homa na markuasa bani

angkulanami ampa pinahannami, domu hubani rosuh ni sidea, anjaha sosak tumang do hanami.”

³⁸ (10-1) Maronjolan hubani ganupan ai mambahen padan na totap ma hanami, anjaha isuratkon hanami do ai anjaha maneken do pambobainami, halak Levi ampa malimnami.

Hawajiban ni Bangsa Pasal Titah

10 ¹ (10-2) Halak na mambahen panekenanni: Si Nehemia, panrajai ai, anak ni si Hakalya ampa si Sedekia,

² (10-3) si Seraya, si Asarya, si Jeremia,

³ (10-4) si Pashur, si Amarya, si Malkia,

⁴ (10-5) si Hattus, si Sebanya, si Malluk,

⁵ (10-6) si Harim, si Meremot, si Obaja,

⁶ (10-7) si Daniel, si Gineton, si Baruk,

⁷ (10-8) si Masullam, si Abia, si Miyamin,

⁸ (10-9) si Maasya, si Bilgai ampa si Semaya; ai ma malim.

⁹ (10-10) Halak Levi: Si Jesua, anak ni si Asanya, si Binnui humbani anak ni si Hanadat, ampa si Kadmiel;

¹⁰ (10-11) anjaha sanina ni sidea, si Sebanya, si Hodia, si Kelita, si Pelaya, si Hanan,

¹¹ (10-12) si Mika si Rehob, si Hasabya,

¹² (10-13) si Sakur, si Serebya, si Sebanya,

¹³ (10-14) si Hodia, si Bani, si Beninu.

- ¹⁴ (10-15) Kopala-kopala ni bangsa ai: Si Paros, si Pahad-Moab, si Elam, si Sattu, si Bani,
¹⁵ (10-16) si Buni, si Asgat, si Bebai,
¹⁶ (10-17) si Adonia, si Bigwai, si Adin,
¹⁷ (10-18) si Ater, si Hiskia, si Assur,
¹⁸ (10-19) si Hodia, si Hasum, si Besai,
¹⁹ (10-20) si Harib, si Anatot, si Nebai,
²⁰ (10-21) si Magpias, si Mesulam, si Hesir,
²¹ (10-22) si Mesesabeel, si Sadok, si Jadua,
²² (10-23) si Pelatya, si Hanan, si Anaya,
²³ (10-24) si Hosea, si Hananya, si Hasub,
²⁴ (10-25) si Halohes, si Pilha, si Sobek,
²⁵ (10-26) si Rehum, si Hasabna, si Maaseya,
²⁶ (10-27) si Ahia, si Hanan, si Anan,
²⁷ (10-28) Si Maluk, si Harim pakon si Baana.
²⁸ (10-29) Anjaha bangsa na tading ai, malim, halak Levi, sijaga horbangan, sipandoding, siparugas i rumah panumbahan ampa haganup halak, na papulig dirini humbani bangsa na i tanoh ni sipajuh begu-begu romban hubani titah ni Jahowa, parinangon ni sidea, anak ni sidea, boru ni sidea, sagala na marpambotoh ampa sagala na marpangarusion,
²⁹ (10-30) pasadahon dirini hubani sanina ni sidea, na sangap ni sidea, anjaha marbulawan ampa marbija ma sidea, pboa maningon marparlahou sidea ibagas titah ni Naibata, na dob binerehonni marhitei si Musa, juakjuak ni Naibata, anjaha

laho mandalankon jimot-jimot tonah ni Jahowa, parentah-Ni ampa paraturan-Ni.

³⁰ (10-31) Tambah ni ai seng bulih bereonnami borunami hubani bangsa na i tanoh in, barang buaton ni anaknami boru ni sidea.

³¹ (10-32) Anjaha anggo ipamboan bangsa na i nagori ai tiga-tiga ni sidea atap omei na ija pe in bani ari Sabat laho manjual ai, seng bulih bolionnami humbani sidea bani ari Sabat atap bani ari na mapansing; anjaha maningon paturutonnami do tanoh in halong bani tahun papituhon, anjaha utang aha pe lang bulih tungguon.

³² (10-33) Ambah ni ai ibahen hanami ope aturan, na mangihut on, sidalankononnami: Maningon bereonnami ganup tahun sapartolu sekel manumpaki horja i rumah ni Naibata,

³³ (10-34) pakeion bani ruti sigalangkonon, bani galangan sipanganon ari-ari, bani galangan situtungon ari-ari, bani ari Sabat, bani poltak ni bulan, bani pesta-pesta, bani parugas-parugas na mapansing, bani galangan pardousaon laho mambahen pardearan bani halak Israel, ampa bani ganup horja i rumah ni Naibatanta.

³⁴ (10-35) Ambah ni ai manjomput na sinurat do hanami: Malim, halak Levi, ampa bangsa ai, pasal soban sibonanon hu rumah ni Naibatanta, mangihutkon partubuhnami mar sasaompung, bani panorang na dob tinontuhon ganup tahun, bahen

situtungonkon i atas ni anjapanjap ni Jahowa, Naibatanta ai, songon na tarsurat ibagas buku titah ai.

³⁵ (10-36) Sonai homa maningon boanonnami do ganup tahun limbuah ni tanohnami ampa limbuah ni buah ni hayu siganup tahun hu rumah ni Jahowa.

³⁶ (10-37) Sonai homa bunga tubuhnami ampa bunga tubuh ni pinahannami, songon na tarsurat ibagas buku titah, ambah ni ai bunga tubuh ni lombunami ampa biribirinami, maningon boanonnami do hu rumah ni Naibatanta, hubani malim, na marugas i rumah ni Naibatanta.

³⁷ (10-38) Maningon boanonnami do homa limbuah ni nitaknami, ampa guguanami, buah ni haganup hayu, anggur ampa minak hubani malim, hubagas kamar ni rumah ni Naibatanta; sonai homa saparsapuluh ni gogoh ni tanohnami hubani halak Levi, ai halak Levi do na patumpuhon parsapuluhan ai bani ganup huta parjumaannami.

³⁸ (10-39) Malim pe, ginompar ni si Aron, maningon ijai do, sanggah na patumpuhon parsapuluhan ai halak Levi, anjaha maningon boanon ni halak Levi ai do saparsapuluh ni parsapuluhan ai hu rumah ni Naibatanta, hu kamar ni rumah parbohalan.

³⁹ (10-40) Ai maningon hubagas kamar ai do boanon ni halak Israel ampa halak Levi guguan gandum, anggur pakon minak, ai ijai do parugas na mapansing ampa malim siparugas ampa

sijaga horbangan pakon sipandoding: seng bulih tadingkononnami rumah ni Naibatanta.

**Halak na Baru Marianan i
Jerusalem ampa i Huta na Legan ai**

(ay. 3-9: pausih 1 Kron. 9:2-17)

11 ¹I Jerusalem do marianan pambobai ni bangsa ai; manjomput na sinurat ma bangsa na tading ai, laho manontuhon satangga humbani na sepuluh na tading ai, laho manontuhon satangga humbani na sepuluh marianan i Jerusalem, huta na mapansing ai, anjaha na siah tangga nari i huta na legan.

²Ipasu-pasu bangsa ai ma ganup dalahi, na rosuh uhurni marianan i Jerusalem.

³On do pambobai ni nagori ai, na marianan i Jerusalem; tapi na i huta-huta ni Juda ganup do marianan i parbagiananni bei, ibagas huta ni sidea bei, halak Israel, malim, halak Levi, siparugas i rumah panumbahan, ampa ginompar ni juakjuak ni si Salomo.

⁴I Jerusalem marianan do deba humbani ginompar ni si Juda anjaha deba humbani ginompar ni si Benjamin. Humbani ginompar ni si Juda, Si Ataya, anak ni si Usia, anak ni si Sakaria, anak ni si Amarya, anak ni si Sepatya, anak ni si Mahalaleel, ai ma na humbani ginompar ni si Peres.

⁵ Ambah ni ai si Maaseya, anak ni si Baruk, anak ni si Kolhose, anak ni si Hasaya, anak ni si Adaya, anak ni si Joyarib, anak ni si Sakaria, anak ni si Siloni.

⁶ Ganup ginompar ni si Peres, na marianan i Jerusalem, ompat ratus onom puluh halak do, halak na borani-borani.

⁷ On do ginompar ni si Benjamin: Si Sallu, anak ni si Mesulam, anak ni si Joed, anak ni si Pedaya, anak ni si Kolaya, anak ni si Maaseya, anak ni si Itiel, anak ni si Jesaya.

⁸ Anjaha dob ai: Si Gabai, si Sallai, siah ratus dua puluh ualuh halak.

⁹ Si Joel, anak ni si Sikri do kopala ni sidea; anjaha si Juda, anak ni si Hassenua do wakil kopala bani huta ai.

¹⁰ Humbani malim: Si Jedaya, anak ni si Joyarib, si Jakin,

¹¹ si Seraya, anak ni si Hilkia, anak ni si Mesulam, anak ni si Sadok, anak ni si Merayot, anak ni si Ahitub, kopala i Rumah ni Naibata,

¹² ambahni ai sanina ni sidea, na mandalankon horja i rumah panumbahan ai, uluh ratus dua puluh dua halak; sonai homa si Adaya, anak ni si Jeroham, anak ni si Pelaya, anak ni si Amsi, anak ni si Sakaria, anak ni si Pashur, anak ni si Malkia,

¹³ ampa saninani, kopala ni mar sasaompung, dua ratus ompat puluh dua halak, ambahni ai si Amasai,

anak ni si Asariel, anak ni si Aksai, anak ni si Mesillemot, anak ni si Immer,

¹⁴ ampa sanina ni sidea, halak na borani, saratus dua puluh ualuh halak; kopala ni sidea si Sabdiel, anak ni si Hagedolim.

¹⁵ Humbani halak Levi: Si Semaya, anak ni si Hasub, anak ni si Asrikam, anak ni si Hasabya, anak ni si Buni,

¹⁶ pakon si Sabbetai, ampa si Josabad, humbani kopala ni halak Levi na mangatur horja i darat bani rumah ni Naibata.

¹⁷ Ambahni ai si Matanya, anak ni si Mika, anak ni si Sabdi, anak ni si Asap, ai ma pambobai, na mammulai mandodingkon puji-pujian sanggah martonggo; ambahni ai si Bakbukya, kopala paidua humbani saninani; ambahni ai si Abda, anak ni si Sammua, anak ni si Galal, anak ni si Jedutun.

¹⁸ Haganup halak Levi i huta na mapansing ai, dua ratus ualuh puluh ompat halak.

¹⁹ Sijaga horbangan: Si Akkub, si Talmon ampa sanina ni sidea, ai ma sijaga horbangan, saratus pitu puluh dua halak.

²⁰ Tapi halak Israel, na tading ai, pakon malim ampa halak Levi, marianan do i huta ni Juda, ganup bani parbagiananni bei.

²¹ Ia siparugas i rumah panumbahan marianan i Opel do; anjaha si Siha ampa si Gispa do na mangopalai siparugas na i rumah panumbahan.

²² Kopala ni halak Levi i Jerusalem ai ma si Ussi, anak ni si Bani, anak ni si Hasabya, anak ni si Matanya, anak ni si Mika. Ia ginompar ni si Asap, sipandoding ai, mandalankon horja pandodingon do i rumah ni Naibata.

²³ Ai adong do aturan humbani raja ai pasal sidea, ai ma horin, na dob itotapkon sidalankonon ni pandoding ai ganup ari.

²⁴ Ia si Petahya, anak ni si Mesesabeel, humbani ginompar ni si Serah, anak ni si Juda, ai ma wakil ni raja ai bani ganup pahara, na mardomu hubani bangsa ai.

²⁵ Ambahni ai humbani ginompar ni si Juda, adong do deba na marianan i dusun ampa i juma ni sidea, ai ma i Kiriath-Arba ampa dusunni, i Dibon ampa dusunni, i Kabseel ampa dusunni,

²⁶ i Jesua, i Molada, i Bet-Pelet,

²⁷ i Hasar-Sual, i Berseba ampa dusunni,

²⁸ i Ziklag, i Mekona ampa dusunni,

²⁹ i En-Rimon, i Sorea, i Jarmut,

³⁰ i Sanoa, i Adullam ampa dusunni, i Lakis ampa jumani, i Aseka ampa dusunni: Marianan do sidea olat ni Berseba das hu habungan Hinnom.

³¹ Ia ginompar ni si Benjamin marianan do olat ni Geba, i Mikmas, i Aya, i Betel ampa dusunni,

³² i Anatot, Nob, Ananya,

³³ Hazor, Rama, Gitaim,

³⁴ Hadid, Seboim, Neballad,

³⁵ Lod pakon Ono, i habungan ni tukang hayu ai.

³⁶ Anjaha deba humbani halak Levi, na i Juda, ipadomu bani Benjamin.

Partingkian ni Malim-malim ampa Halak Levi

12 ¹ On ma malim-malim ampa halak Levi, na tangkog rap pakon si Serubabel, anak ni si Sealtiel, ampa si Jesua, Si Seraya, si Jeremia, si Esra, ² si Amarya, si Malluk, si Hattus, ³ si Sekanya, si Rehum, si Meremot, ⁴ si Iddo, si Geneton, si Abia, ⁵ si Miyamin, si Maaja, si Bilga, ⁶ si Semaya, si Joyarib, si Jedaya, ⁷ si Sallu, si Amok, si Hilkia ampa si Jedaya. Ai ma kopala ni malim ampa sanina ni sidea bani panorang ni si Jesua.

⁸ Halak Levi, ai ma: Si Jesua, si Binnui, si Kadmiel, si Serebya, si Juda ampa si Matanya, ai ma sibobahon doding puji-pujian ampa sanina ni sidea.

⁹ Anjaha si Bakbukya ampa si Unni, sanina ni sidea, jongjong do patontang pakon sidea bani horja ai.

¹⁰ Ia si Jesua, ai ma bapa ni si Joyakim, si Joyakim bapa ni si Eliasib, si Eliasib bapa ni si Joyada.

¹¹ si Joyada bapa ni si Jonatan, si Jonatan bapa ni si Jadua.

¹² Sanggah bani panorang ni si Joyakim, kopala ni malim mar sasaompung, ai ma: Humbani si Seraya, si Meraya; humbani si Jeremia, si Hananya;

¹³ humbani si Esra, si Mesulam; humbani si Amarya si Johanan;

¹⁴ humbani si Malluk, si Jonatan; humbani si Sebanya, si Josep;

¹⁵ humbani si Harim, si Adna; humbani si Merayot, si Helkai;

¹⁶ humbani si Iddo, si Sakaria; humbani si Gineton, si Mesulam;

¹⁷ humbani si Abia; si Sikri; humbani si Miyamin ampa humbani si Moadia, si Piltai;

¹⁸ humbani si Bilga, si Sammua; humbani si Semaya, si Jonatan;

¹⁹ humbani si Joyarib, si Matenai; humbani si Jedaya, si Ussi;

²⁰ humbani si Salai, si Kallai; humbani si Amok, si Heber;

²¹ humbani si Hilkia, si Hasabya; humbani si Jedaya, si Netaneel.

²² Humbani halak Levi, bani panorang ni si Eliasib, si Joyada, si Johanan ampa si Jadua do tarsurat kopala ni mar sasaompung, sonai malim-malim das hubani harajaon ni si Darius, halak Persia ai.

²³ Kopala ni halak Levi mar sasaompung, tarsurat do ibagas buku barita das ronsi panorang ni si Johanan, anak ni si Eliasib.

²⁴ Kopala ni halak Levi ai ma: Si Hasabya, si Serebya ampa si Jesua anak ni si Kadmiel pakon sanina ni sidea, na patontang pakon sidea jongjong,

laho mamuji-muji ampa mangkatahon tarima kasih, romban hubani parentah ni si Daud, halak ni Naibata, marbanjei-banjei.

²⁵ Si Matanya, si Bakkukya, si Obaja, si Mesulam, si Talmon pakon si Akkub, ai ma sijaga horbangan, marjaga i lambung ni kamar parartaan, na i lambung ni horbangan ai.

²⁶ Manggoluh do sidea ai sanggah panorang ni si Joyakim, anak ni si Jesua, anak ni si Josadak, ampa sanggah panorang ni si Nehemia, panrajai ai, ampa malim Esra, sibotoh titah ai.

Pesta Tembok ni Huta Jerusalem

²⁷ Sanggah na laho mamestahon tembok ni Jerusalem ai, ipindahi sidea ma halak Levi bani ganup ianan ni sidea laho mangarahkon sidea hu Jerusalem, laho mamestahon tembok ai marhasoman malas ni uhur, marhasoman tarima kasih ampa doding, marhasoman arbap, sordam ampa husapi.

²⁸ Roh ma martumpu ginompar ni halak sipandoding hun tanoh inggot ni Jerusalem ampa hun huta-huta ni halak Netopati.

²⁹ Sonai homa hun Bet-Gilgal ampa hun talun Geba pakon Asmavet; ai inggot ni Jerusalem do ipauli halak sipandoding ai huta ni sidea.

³⁰ Jadi iuras malim ampa halak Levi ai ma dirini; iuras sidea ma homa bangsa ai, horbangan ai pakon tembok ai.

³¹ Dob ai huhatahon ma kopala ni Juda naik hu tembok ai, anjaha huangkat ma dua tumpuan banggal sipandoding, na mardalan marodor. Sada laho dompak siamun i atas tembok ai hu horbangan parnapuan.

³² Irik hubani sidea mardalan ma si Hosaya ampa satongah kopala ni Juda.

³³ Sonai homa si Asarya, si Esra, si Mesulam,

³⁴ si Juda, si Benjamin, si Semaya ampa si Jeremia,

³⁵ ampa deba humbani anak ni malim marhasoman tarompit: Si Sakaria, anak ni si Jonatan, anak ni si Semarya, anak ni si Matanya, anak ni si Mikaya, anak ni si Sakkur, anak ni si Asap;

³⁶ ambah ni ai sanina ni sidea: Si Semaya, si Asareel, si Milalai, si Gilalai, si Maai, si Netaneel, si Juda ampa si Hanani rap pakon parugas musik ni si Daud, halak ni Naibata ondi; si Esra, sibotoh titah ai do mardalan i lobei ni sidea.

³⁷ Bani horbangan bah tubuh ai, tontang ni sidea, inaiki sidea ma andar ni si Daud; ijai ma naik tembok ai hu atas, hun lambung rumah bolon ni si Daud; anjaha mardalan ma sidea das hu horbangan bah hampit hapoltakan.

³⁸ Tumpuan pandoding na paduahon ai laho ma dompak sambilou, irik hubani sidea do ahu

mardalan rap pakon satongah bangsa ai, i babou ni manara pamurunan ai das hu tembok na lumbang ai,

³⁹ hun lambung ni horbangan Efraim, horbangan Na Matua ampa horbangan Dengke ai, ampa hun lambung ni manara Hananeel ampa manara Meeya das hu horbangan Biribiri; anjaha i horbangan Parjagaan ma sidea maronti.

⁴⁰ Dob ai jongjong ma tumpuan pandoding na dua ai i rumah ni Naibata, sonai homa ahu ampa satongah kopala-kopala na rapkon ahu ai,

⁴¹ ampa malim-malim: Si Eliakim, si Maseya, si Miyamin, si Mikaya, si Elioenai, si Sakaria ampa si Hananya, martarompit bei;

⁴² ambah ni ai si Maaseya, si Semaya, si Eleasar, si Ussi, si Johanan, si Malkia, si Elam ampa si Eser. Anjaha mandoding ma sipandoding ai binobahon ni si Jisrahya.

⁴³ Igalangkon sidea ma galangan bangga bani ari na sasada ai anjaha marmalas ni uhur, ai ipamalas Naibata do uhur ni sidea marhitei malas uhur bangga; parinangon ampa dakdanak pe marmalas uhur do, pala tarboge i das bani na daoh malas ni uhur ni Jerusalem ai.

Pansarihon bani Guguan

⁴⁴ Lanjar bani panorang ai ma homa ipabangkit sidea halak, na manramotkon kamar panimpanan

ni arta, guguan, limbuah pakon parsapuluhan, laho patumpuhon hujai guguan bani malim ampa halak Levi, na dob tinontuhon marhitei titah, mangihutkon buei ni juma ni ganup huta; ai malas do uhur ni Juda mangidah malim ampa halak Levi siparugas ai.

⁴⁵ Idalankon sidea do parsombahon bani Naibata ni sidea ampa horja pangurasion ai, sonai homa halak sipandoding ampa sijaga horbangan, romban hubani parentah ni si Daud pakon si Salomo, anakni ai.

⁴⁶ Ai humbani sapari nari, olat ni si Daud, sai ginompar ni si Asap do kopala ni pandoding, mambobahon doding puji-pujian ampa tarima kasih bani Naibata.

⁴⁷ Halani ai, sanggah panorang ni si Serubabel ampa si Nehemia ganup halak Israel mamberehon guguan siganup ari hubani halak sipandoding ampa sijaga horbangan; ibere sidea do homa sibere-bere na panging bani halak Levi, anjaha halak Levi mambere parbagianan ni ginompar ni si Aron.

Pongut ni Uhur ni si Nehemia

Pasal Titah

13 ¹ Bani panorang ai ibasa sidea do buku titah ni si Musa itangar bangsa ai; anjaha jumpah

do tarsurat ijai, paboa na so bulih do masuk halak Amon, ampa halak Moab hu tumpuan ni Naibata,
² ai seng ialo-alo sidea halak Israel mamboan ruti ampa bah, tapi lambin iupahi sidea do si Bileam mangimbang halak Israel, laho mamapai sidea, hape ipahusor Naibata do papa ai gabe pasu-pasu.

³ Jadi dob ibogei sidea titah ai, ipapulig sidea ma ganup halak na legan hun Israel.

⁴ Tapi i lobei ni on, ipasirsir si Eliasib, malim ai, na pinabangkit manramotkon kamar ni rumah ni Naibata, na martondong hubani si Tobia,

⁵ do sada kamar bani, ai ma kamar parnahan ni galangan sipanganon, dahupa, parugas, parsapuluhan ni gandum, anggur pakon minak hinan, na binoan ni halak bahen parbagianan ni halak Levi, halak sipandoding ampa sijaga horbangan, ambah ni ai tumpak hubani malim.

⁶ Sanggah masa ganupan ai, seng i Jerusalem be ahu, ai patolu-tahunkon dob manrajai si Artasasta, Raja Babel ai, mulak ma ahu hubani raja ai, anjaha dob piga-piga dokah mangindo mulak ma ahu use hubani raja ai.

⁷ jadi das ma ahu hu Jerusalem, gabe huidah ma hasamboron na binahen ni si Eliasib, laho manatap si Tobia, ai ma na pinasirsirni ai hubani sada kamar i alaman ni rumah ni Naibata.

⁸Jadi manringis tumang ma ahu, pala hupanggijigkon ganup parugas ni rumah ni si Tobia hu darat ni kamar ai.

⁹Dob ai huparentahkon ma, ase iuras kamar ai, anjaha hupasuang ma hujai use parugas-parugas ni rumah ni Naibata, galangan sipanganon ampa dahupa.

¹⁰Tarbortik do homa hu bangku, paboa na so ibere parbagianan ni halak Levi bani sidea, gabe lintun mulak halak Levi ampa halak sipandoding, na mandalankon horja ai, ganup hu jumani bei.

¹¹Mangonai hata ma ahu dompak kopala-kopala ai, ningku ma, “Mase ma tarulang rumah ni Naibata?” Dob ai hupatumpu ma sidea, anjaha hupasuang sidea use bani horjani hinan.

¹²Jadi iboan halak Juda ma use parsapuluhan ni gandum, anggur ampa minak hu rumah parartaan ai.

¹³Anjaha hupabangkit ma bendahara ni rumah parartaan ai, ai ma malim Selemya, si Sadok juru tulis ai, pakon si Pedaya halak Levi; pangurupi ni sidea si Hanan, anak ni si Sakkur, anak ni si Matanya, ai hatengeran ni uhur do sidea; horja ni sidea, ai ma na mambagi-bagihon hubani sanina ni sidea.

¹⁴Ingat Ham ma ahu, ale Naibatanku, marhalani on, anjaha ulang ma sasap Ham pambahenanku na madear in, na hubahen bani rumah ni Naibatanku ampa horja na mardomu hujai.

¹⁵ Bani panorang ai, huidah ma i Jerusalem halak na marhorja i kilang anggur bani ari Sabat, na pahutahon gandum, na pausungkon bani halode; sonai homa anggur, buah ni anggur, buah ni hayu ara ampa bagei-bagei ni siusungon, na binoan ni sidea hu Jerusalem bani ari Sabat. Anjaha hupalumba do homa bani ari ai na manjual sipanganon.

¹⁶ Sonai homa halak Tirus, na marianan i huta ai, iboan sidea do dengke ampa marbagei-bagei barang-barang, anjaha ijual sidea do ai bani ari Sabat hubani halak partanoh Juda ampa par Jerusalem.

¹⁷ Jadi mangonai hata ma ahu hubani halak na sangap ni Juda, anjaha ningku ma bani sidea, “Pambahenan na masambor ja do, na binahen nasiam on, gabe ipabutak nasiam ari Sabat?

¹⁸ Ai lang sonai do pambahenan ni ompungta, gabe iparoh Naibata haganup na masambor hu banta ampa hu huta on? Hape lambin itambahi nasiam ope use papa bani Israel, marhitei pambutaki nasiam bani ari Sabat.”

¹⁹ Jadi mamungkahkonsi samun ari i lobei ni horbangan ni Jerusalem marayak ari Sabat, huhatahon ma tutupon horbangan ni Jerusalem, anjaha huparentahkon ma, na so bulih bukaon ai paima salpu ari Sabat ai. Anjaha husuruh ma deba juakjuakku jongjong i atas ni horbangan ai, ase

ulang adong na pamasukkon sibonan hubagas huta ai sanggah ari Sabat.

²⁰ Marborngin ma sahali dua hali saudagar, sijual barang na marbagei-bagei i darat ni Jerusalem.

²¹ Tapi hupalumba ma sidea, ningku ma dompak sidea, “Mase marborngin nasiam i darat ni tembok in? Anggo ibahen nasiam use sonai, maningon tangkapon do nasiam.” Jadi olat ni ari ai, seng onggabe roh sidea bani ari Sabat.

²² Dob ai huparentahkon ma hubani halak Levi, ase marsiuras dirini bei sidea, anjaha ase roh sidea manjaga horbangan ai, laho papansingkon ari Sabat. Ingat Ham ma homa ahu, marhalanihon ni on, ale Naibatanku, anjaha ramotkon Ham ma ahu romban hubani buei ni idop ni uhur-Mu.

²³ Ambah ni ai huidah do bani panorang ai ijia, deba halak Jahudi, na mambuat boru hun Asdod, Amon ampa Moab;

²⁴ anjaha satongah humbani anak ni sidea mamakei hata Asdod, seng ibotoh sidea be marsahap Jahudi, tapi sahap ni bangsa on atap bangsa ai do.

²⁵ Jadi mangonai hata ma ahu dompak sidea, hupapai ma sidea; hupabija deba humbani sidea anjaha hutarik jambulan ni sidea; hupabija ma sidea ibagas goran ni Naibata, ningku ma, “Seng bulih buaton nasiam boru ni sidea bani anak nasiam atap bani nasiam sandiri.

²⁶ Ai lang domma mardousa si Salomo, raja ni Israel, marhalanohon ni naboru na sonai ai? Seng dong raja songonsi i tongah-tongah ni buei bangsa, ai ihaholongi Naibata do ia, anjaha ipabangkit Naibata do ia gabe raja ni ganup Israel; hape ia pe mardousa do ipadari-dari naboru na legan.

²⁷ Mintor nasiam ma siihutonkon laho mangkorjahon hasamboron na sonai banggalni, pangoseion i lobei ni Naibatanta, marhitei na mambuat boru na legan?"

²⁸ Anjaha sada humbani anak ni si Joyada, anak ni sintua ni malim Eliasib, ai ma hela ni si Sanballat, halak Horoni ai, huusir do ia hun lambungku,

²⁹ Ale Naibatanku, dingat Ham ma sidea, ai ipabutak sidea do hamalimon ampa parpadanan ni malim pakon halak Levi.

³⁰ Dob ai huuras ma sidea humbani ganup aturan-aturan ni halak na legan, anjaha hupatotap use parhorinan ni malim ampa halak Levi, ganup bani horjani bei.

³¹ Ambah ni ai pambereon bani soban bani panorang na dob tinotapkon, sonai homa pasal limbuah. Ham Naibatanku, dingat Ham ma manumpakkon na madear bangku, balasni ai!

Ester

Isirangkon Puangbolon Vasti

1 ¹ Dob ai masa ma bani panorang ni si Ahasveros, ai ma si Ahasveros na manrajai olat ni India das hu Etiopia, saratus dua puluh pitu propinsi,

² bani panorang ai, sanggah na hundul Raja Ahasveros bani hotak harajaonni, i huta Pamatang Susan,

³ patolu-tahunkon dob manrajai ia, ibahen raja ai ma sada pesta mangan-mangan bani haganup kopala ampa juakjuakni; martumpu ma hu lobei ni kopala ni bala ni Persia pakon Madai ampa na sangap-sangap pakon panrajai ni propinsi-propinsi ai,

⁴ anjaha ipatidak ma bani panorang ai hinabuei ni habayakon ampa hamuliaon ni harajaonni ampa hajagaron ni hatimbulonni, piga-piga dokah, ai ma saratus ualuh puluh ari.

⁵ Jadi dob salpu ari ai, ibahen raja ai ma use pesta mangan-mangan bani haganup halak simbuei, na marianan i huta Pamatang Susan, halak na magodang ampa na etek, pala pitu ari dokahni i alaman na i pohon ai, dohorhon rumah ni raja ai.

⁶ Ipanggantungkon do ijai tirei silopak, sijolang ampa na mahonda, ilongkotkon marhitei tali linnen na alus ampa hiou na tinubar hubani golang pirak ampa hubani tiang marmar; podom-podoman humbani omas ampa pirak pe ipajongjong do bani dasor, na pinauli humbani alabaster, marmar silopak, batu mutiara ampa marmar na birong.

⁷ Siinumon iidangkon bani panginuman omas, panginuman omas na palegan-legan tompati, anjaha buei tumang do anggur humbani gudang ni raja ai, domu hubani hinalayak ni raja ai.

⁸ Parminumonkon pe maraturation do, seng dong paksaan; ai domma iaturhon raja ai hinan hubani kopala-kopala na i rumahni ai, ase ibahen romban hubani rosuh ni ganup halak.

⁹ Si Vasti pe, puangbolon ai, ibahen do pesta mangan-mangan bani naboru-naboru i rumah bolon ni Raja Ahasveros.

¹⁰ Bani ari papituhon, sanggah na marmegah-megah raja ai binahen ni anggur ai, iparentahkon raja ai ma hubani si Mehuman, si Bista, si Harbona, si Bigta, si Abagta, si Setar pakon si Karkas, juakjuak sipitu halak, na dob pinaborsih ai, siparugas i lobei ni Raja Ahasveros,

¹¹ ase iboan sidea Puangbolon Vasti marsortali harajaon hu lobei ni raja ai, laho patuduhkon hajengesonni hubani bangsa ai ampa kopala-kopala; ai jenges tumang do tongon rupani.

¹² Tapi mangengkar do Puangbolon Vasti mambalosi hata ni raja ai, halani ai gajag ma pala ringisni ibagas uhurni.

¹³ Dob ai nini raja ai ma dompak halak paruhur, na mambotoh manjujur ari (ai sonai hinan do hasomalan ni raja ai, iarihkon do parkarani hubani halak na pandei marundang-undang ampa manguhum,

¹⁴ anjaha halak sidohoran bani, ai ma si Karsena, si Satar, si Admata, si Tarsis, si Neres, si Marsena pakon si Memukan, ai ma kopala-kopala ni halak Persia ampa Madai sipitu halak ai, ai ma halak na bolas masuk hubani raja ai, ai ma halak sipalobeion ibagas harajaon ai),

¹⁵ “Mangihutkon undang-undang, aha do na patut sibahenon hubani Puangbolon Vasti, ai iengkar do parentah ni Raja Ahasveros, na pinadasni ai bani marhitei juakjuakni ai?”

¹⁶ Jadi nini si Memukan na mambalosi i lobei ni raja ai ampa kopala-kopala ai, “Seng pitah dompak raja ai tumang marsalah Puang bolon Vasti, dihut do dompak ganup kopala-kopala ampa ganup bangsa, na marianan bani ganup nagori, na ginomgoman ni Raja Ahasveros.

¹⁷ Ai sar ma pambahenan ni puangbolon ai holi bani ganup naboru, gabe pis ma holi mata ni sidea dompak paramangonni, ai hatahonon ni sidea ma,

‘Iparentahkon Raja Ahasveros do mamboan si Vasti hu lobeini, tapi seng ra roh ia.’

¹⁸ Mulai sadari on pag ma parinangon ni kopala-kopala ni Persia ampa Madai, dob ibogei parlahou ni puangbolon, mangengkar ganup kopala-kopala, siirikkon raja in, gabe masa ma buei pangapasion ampa ringis.

¹⁹ Anggo dear nini uhur ni raja in, ipadalan raja in ma sada paraturan harajaon, sipamasukon hubani undang-undang ni halak Persia ampa Madai, na so bulih paubahon, paboa na so bulih be roh si Vasti hu lobei ni Raja Ahasveros, anjaha pangkat hapuangbolononni ai ondskonon ni raja in ma ai bani halak na legan, na dearan parlahouni hun bani.

²⁰ Anggo sar ma holi parentah ai, na binahen ni raja in, i sab harajaonni na bolag in, gabe hormat ma sagala naboru dompak paramangonni, na banggal age na etek.”

²¹ Jadi rosuh ma raja ai mambogei hata ai, sonai homa kopala-kopala ai, gabe ibahen raja ai ma romban hubani hata ni si Memukan ai.

²² Dob ai ipantongoskon ma surat hu ganup nagori ginomgoman ni raja ai, hubani ganup nagori ibagas suratni, hubani ganup bangsa ibagas sahapni, mangkatahon, “Ganup dalahi, ia do tuan ibagas rumahni,” anjaha imungmungkon ma ai ibagas sahap ni bangsani bei.

Si Ester Bangkit Gabe Puangbolon

2¹ Jadi dob salpu barita ondi, dob mahombun ringis ni Raja Ahasveros, idingat ma si Vasti ampa pambahenanni ampa haputusan na dob nidalankonni bani.

² Dob ai roh ma hata ni juakjuak ni raja ai, sipangidangi bani, “Dear ma namin riridon bani raja in anak boru, sijengesan rupa.

³ Ipabangkit raja in ma namin halak bani ganup nagori ginomgomanni in, ase ipatumpu ganup anak boru sijengesan rupa hu huta Susan, hu rumah na niiankon ni naboru-naboru ai, na jinaga ni si Hega, juakjuak ni raja in, anjaha ibere ma hubani sidea minak siparanggirhonon ni sidea.

⁴ Anjaha anak boru, na hinarosuhkon ni raja in, ai ma gabe puangbolon ganti ni si Vasti.” Marosuh do raja ai mamboge i hata ai, jadi ibahen ma sonai.

⁵ Jadi adong ma ijia i Susan, i huta pamatang ai, sada halak Jahudi, na margoran si Mordahai, anak ni si Jair, anak ni si Simei, anak ni si Kis, halak Benjamin,

⁶ na dihut tarbuang hun Jerusalem, rap pakon halak na tarbuang, sanggah tarboan si Jekonya raja ni Babel.

⁷ Ia ma bapa na pagodang-godangkon si Hadasa, ai ma si Ester, boru ni amang tuani, ai seng dong be bapa barang inangni; dear do parangkulaon ni anak boru ai anjaha jenges homa rupani. Jadi dob matei

bapani ampa inangni iain si Mordahai ma ia gabe boruni.

⁸Jadi dob sar hata ampa titah ni raja ai, anjaha domma buei anak boru ipatumpu hu huta Pamatang Susan, ibagas panjagaan ni si Hega, tarboan ma homa si Ester hu rumah ni raja ai, ibagas panjagaan ni si Hega, siramotkon naboru-naboru ai.

⁹Jadi rosuh ma uhurni mangidah anak boru ai, gabe jumpahan idop ni uhur ma ia i lobeini; jadi tarolos ma ia pasirsirhon minak siparanggirhononni sonai homa sipanganon parbagiananni ampa pitu naboru pilihan hun rumah ni raja ai pangkasomanini. Dob ai ipatongon ma hubani ampa hubani naboru pangkasomanini ai ianan sidearan ibagas rumah partumpuan ni naboru-naboru ai.

¹⁰Tapi lang ipatugah si Ester bangsani atap hasusuranni, ai domma itonahkon si Mordahai hinan hu bani, ase ulang ipatugah ai.

¹¹Anjaha ganup ari do mardalan-dalan si Mordahai i lobei ni rumah partumpuan ni naboru-naboru ai, laho mangidah atap na sonang do si Ester, anjaha aha do na sihol bahenon hu bani.

¹²Ai anggo jumpah ma horin ni sada anak boru laho masuk hu lobei ni Raja Ahasveros, dob idalani panorang siparanggironkon ni naboru-naboru sisapuluh dua bulan ai, ai ansai do dokah ni paranggiron ni sidea ai, onom bulan maranggir

minak mir, onom bulan nari minak balsem ampa na morum-morum na legan na somal pinakei ni naboru-naboru,

¹³ dob ai pe ase bulih ia masuk hu lobei ni raja ai; ibere ma hubani barang aha harosuhni siboanonni hun rumah partumpuan ni naboru-naboru ai hu rumah ni raja ai.

¹⁴ Bodari masuk ma ia, anjaha patarni mulak use hu rumah partumpuan ni puang-puang na paduahon, na ibagas panjagaan ni si Saasgas, juakjuak ni raja ai, na manramotkon naboru-naboru ai; seng bulih be ia roh hu lobei ni raja ai, legan ma anggo marosuh uhur ni raja ai mangidahsi, anjaha idilo goranni.

¹⁵ Jadi dob jumpah horin ni si Ester, boru ni si Abigail ai, amangtua ni si Mordahai, na dob niainni gabe boruni, laho masuk hu lobei ni raja ai, seng dong age aha ipangindo sobali na hinatahon ni si Hega, juakjuak ni raja ai, siramotkon naboru-naboru ai. Jadi ganup ma halak na mangidah si Ester ai, rosuh uhurni mangidahsi.

¹⁶ Jadi iboan ma si Ester hu lobei ni Raja Ahasveros, hu rumah ni raja ai, bulan sapuluh, ai ma bulan Tebet, papitu-tahunkon dob gabe raja ia.

¹⁷ Jadi holongan ma uhur ni raja ai mangidah si Ester humbani ganup puang-puang na legan ai, bueinan do ia jumpahan idop ni uhur ampa rosuh ni uhur i lobei ni raja ai, ase ganup anak boru ai;

ipajujungkon raja ai ma bani sada sortali harajaon, laho pabangkitkonsi gabe raja, gantih ni si Vasti.

¹⁸ Ibahen raja ai ma sada pesta banggal bani ganup pambobai ampa juakjuakni, pesta banggal halani si Ester ai. Ambahni ai iparentahkon raja ai ma, ase ipahampung balasting ni nagori-nagori ai, anjaha marsilayak-layak ia romban hubani habayakon ni raja ai.

Si Mordahai Palumbahon Raja ai Dompak na Mantahihonsi

¹⁹ Sanggah na patumpuhon anak boru ai paduahalihon, hundul-hundul do si Mordahai i horbangan ni raja ai.

²⁰ Ia si Ester seng ipatugah hasusuranni ampa bangsani, songon na tinonahkon ni si Mordahai hu bani; songon na hinatahon ni si Mordahai ai do ibahen si Ester, usih songon sanggah na pinagodang-godangni ia.

²¹ Bani panorang ai sanggah hundul-hundul si Mordahai i horbangan ni raja ai, manriah ma dua halak juakjuak ni raja ai, si Bigtan pakon si Teres, sijaga labah, gabe ipindahi sidea ma dalan laho mambunuh Raja Ahasveros.

²² Tarboge ma ai hubani si Mordahai, gabe ipatugah ma ai hubani si Ester, puangbolon ai, anjaha si Ester use patugahkon ai hubani raja ai i atas goran ni si Mordahai.

²³ Jadi dob ipareksa parkara ai, anjaha sonai do tongon, gabe igantung ma sidea haduasi hubani hayu. Anjaha isuratkon do ai ibagas buku Barita ni Raja ai.

Si Haman Sihol Mambunuh Ganup Halak Jahudi

3 ¹ Dob na masa ai ipasangap Raja Ahasveros ma si Haman, anak ni si Hamedata, halak Agagi ai, ipatimbul ma ia, anjaha gijangan ibahen hundulanni humbani ganup kopala-kopala, hasomanni ai.

² Anjaha ganup juakjuak ni raja ai, na i horbangan ni rumah ni raja ai, marsombah do hubani si Haman, manrogop i lobeini; ai sonai do parentah ni raja ai pasalsi, tapi anggo so Mordahai seng ra manowod, marsombah hu bani.

³ Dob ai nini juakjuak ni raja ai ma, na jongjong i horbangan ni rumah ni raja ai, dompak si Mordahai, “Mase ma langgaronmu parentah ni raja in?”

⁴ Jadi dob sai sonai ihatahon sidea piga-piga ari hu bani, hape seng itangihon hata ni sidea ai, ipatugah sidea ma ai hubani si Haman, laho mangidah, barang na tarpartahankon si Mordahai do pandapotni ai; ai ihatahon do hubani sidea, halak Jahudi do ia.

⁵ Jadi dob ididah si Haman, na so manowod anjaha marsombah si Mordahai hu bani, gabe manringis tumang ma si Haman.

⁶ Tapi mahiritu, ninuhurni, anggo pitah hubani si Mordahai tumang ia mangonai tangan; ai domma ipatugah halak hinan hu bani, masuk bangsa ja si Mordahai, halani ai itahihon si Haman ma sihol mamboiskon ganup halak Jahudi na ibagas harajaon ni si Ahasveros rap pakon si Mordahai.

⁷ Bani bulan sada, ai ma bulan Nisan, pasapuluhdua-tahunkon dob manrajai si Ahasveros, padalan ruji-ruji ma halak, ai ma Pur, i lobei ni si Haman, laho manjujur ari na madear, pala marbulan-bulan dokahni, gabe dapot ma bulan sapuluh dua, ai ma bulan Adar.

⁸ Dob ai nini si Haman ma dompak Raja Ahasveros, “Adong do sada bangsa, na marianan merap anjaha pulig-pulig i tongah-tongah ni bangsa-bangsa bani sab nagori gomgomanmu; legan do titah ni sidea humbani titah ni ganup bangsa na legan ai, anjaha titah ni raja in pe seng iihutkon sidea, halani ai seng patut paturuton ni raja in sidea sonai.

⁹ Anggo dear ninuhur ni raja in, mahua ma ibahen surat na mangkatahon, ase ibunuh sidea; hugalar pe sapuluh ribu talenta pirak hubani gamot-gamot ni raja in, ase inahkon sidea ai hubagas parartaan ni raja in.”

¹⁰ Dob ai ibuat raja ai ma tintin tokanni ai humbani tanganni, ibere ma ai hubani si Haman, anak ni si Hamedata, halak Agagi, imbang ni halak Jahudi ai.

¹¹ Dob ai nini raja ai ma dompak si Haman, “Ondos bam ma pirak in, sonai homa bangsa ai, anjaha bahen ma sonaha na dear ninuhurmu.”

¹² Jadi idilo ma jurutulis ni raja ai, ari sapuluh tolu bulan sada, gabe ibahen ma surat marguru hubani pangaturhon ni si Haman hubani pangintuai-pangintuai ni raja ai pakon hubani sipanrajai mar sasanagori ampa hubani kopala mar sasabangsa, hubani ganup nagori ibagas suratni bei ampa hubani ganup bangsa ibagas sahapni bei; tarsurat do ai ibagas goran ni Raja Ahasveros anjaha itokan bani tintin token ni raja ai.

¹³ Ipantongoskon ma surat ai marhitei suruhan hu ganup nagori ginomgoman ni raja ai, isini, ase iraseihon, ibunuh anjaha ilangkon ganup halak Jahudi, na maposo pakon na matua, dakdanak pakon naboru-naboru, ibagas sada ari, ai ma ari sapuluh tolu bulan sapuluh dua, ai ma bulan Adar, anjaha rampason do homa arta-arta ni sidea.

¹⁴ Salinan ni surat ai, gabe paraturan ma ai bani ganup nagori, anjaha tingtingkononkon ma bani ganup bangsa, ase sirsir bei ma bani ari na dob binuhul ai.

¹⁵ Suruhan-suruhan ai pe tarolos bei ma laho, songon pangkatahon ni raja ai, tapi itingtingkon ma paraturan ai anggo i huta Pamatang Susan. Hundul ma raja ai ampa si Haman minum anggur, tapi songgotan do anggo parhuta Susan.

**Parpala-palai ni Si Mordahai
Laho Paluahkon Halak Jahudi**

4¹ Dob tarbotoh si Mordahai ganup na masa ai, irigati si Mordahai ma hiouni, inahkon ma bani baju guni pakon abuan, anjaha luar ma ia hu tongah-tongah ni huta ai, mandoruh gogoh anjaha tangis-tangis.

² Jadi das ma ia hu labah ni horbangan ni rumah ni raja ai, tapi seng bulih masuk atap ise hu horbangan ni rumah ni raja ai marbaju guni.

³ Age bani ganup nagori, hadasan ni hata ampa paraturan ni raja ai, masa do doruh bangga i tongah-tongah ni halak Jahudi pakon parpuasaon, partangison pakon doruh-doruh, anjaha buei halak na patibalhon dirini bani abuan marpakeian baju guni.

⁴ Jadi dob roh naboru-naboru pangkasomani ni si Ester ampa juakjuakni patugahkon ai bani, gabe pusok tumang ma uhur ni puangbolon ai; itongos ma pakeian sisorungkonon ni si Mordahai, ase itanggali baju guni ai, tapi seng ra ia manjalo ai.

⁵ Dob ai idilo si Ester ma si Hatah, sada humbani juakjuak ni raja ai, na hinatahonni marugas i lobeini, anjaha isuruh ma ia marayak si Mordahai, ase ibotoh atap aha do na masa, anjaha aha do halani ai.

⁶ Jadi luar ma si Hatah manjumpahkon si Mordahai hu alaman ni huta na i lobei ni rumah ni raja ai.

⁷ Jadi ipatugah si Mordahai ma hubani si Hatah ganup na masa hubani ampa buei ni pirak, na pinarbagah ni si Haman bereonni hu parartaan ni raja ai, anggo bulih sedahononni halak Jahudi.

⁸ Ibere si Mordahai ma homa hubani salinan ni paraturan, na dob pinadalan i Susan laho mansedahon sidea, ase ipatuduh ai hubani si Ester anjaha ipatorang ai hu bani, anjaha mangkatahonsi laho hubani raja ai, mangindohon idop ni uhurni, anjaha manglek-eleksi mangkopkop bangsani ai.

⁹ Dob ai laho ma si Hatah, patugahkon hubani si Ester hata ni si Mordahai ai.

¹⁰ Dob ai marsahap ma si Ester dampak si Hatah, anjaha ipadas ma hubani tonah sipadason hubani si Mordahai.

¹¹ Ganup juakjuak ni raja ampa pangisi ni nagori-nagori ginomgoman ni raja ai torang do mambotoh, barang ise dalahi atap naboru na masuk hu lobei ni raja ai i alaman parbagas ai, na so nidiloni, sada do titahni, ai ma marutang hosah, legan ma anggo isurdukkon raja ai tungkot harajaon omas ai bani. Anjaha ahu domma pala tolu puluh ari lang tardilo hu lobei ni raja in.

¹² Jadi ipadas sidea ma hata ni si Ester ai hubani si Mordahai.

¹³ Dob ai roh ma use balos ni si Mordahai hubani si Ester, “Ulang ma ninuhurmu boi ho maluah humbani halak Jahudi, halani na marianan ho i rumah ni raja in.

¹⁴ Anggo sip ho bani panorang na sonon, sai roh do pangurupion ampa haluahon hubani halak Jahudi humbani ianan na legan, tapi anggo ho ampa ginompar ni bapamu magou ma. Ambahni ai, ise mambotoh ai, atap halani panorang on do, ase das harajaon in bam?”

¹⁵ Dob ai itonahkon si Ester ma hubani si Mordahai,

¹⁶ “Laho ma ham patumpuhon haganup halak Jahudi, na adong i huta Susan, anjaha marpuasa ma nasiam manonggohon ahu, anjaha ulang nasiam mangan pakon minum tolu ari on, arian pakon borngin. Ahu pe pakon naboru-naboru pangkasomaningku marpuasa do songon nasiam. Dob ai pe ase laho ahu hubani raja in, age pe marlawanan namin ai dompak undang-undang; anjaha anggo matei ahu, matei ma hape.”

¹⁷ Dob ai laho ma si Mordahai anjaha ibahen ma romban hubani haganup na dob tinonahkon ni si Ester hu bani.

Si Ester i Lobei ni Raja

5 ¹ Patolu-arihon marpakeian harajaon ma si Ester, anjaha jongjong ma ia i alaman parbagas tontang rumah ni raja ai, anjaha raja ai hundul do

bani hotak harajaonni ibagas rumahni, tontang ni horbangan ni rumah ni raja ai.

² Dob ididah raja ai si Ester, puangbolon ai, jongjong i alaman, rosuh ma uhur ni raja ai mangidah si Ester, jadi isurdukkon raja ai ma hubani si Ester tungkot harajaon omas na ibagas tanganni ai. Dob ai ipadohor si Ester ma, lanjar ijamah ma ujung ni tungkot harajaon ai.

³ Nini raja ai ma dompaksi, “Aha do na porlu bam Puang-bolon Ester, anjaha aha do sura-suramu? Das ronsi satongah ni harajaonku sai bereonku do bam.”

⁴ Dob ai nini si Ester ma, “Anggo dear ninuhur ni raja in, roh ma raja in rap pakon si Haman sadari on mangan sipanganon na dob hupasirsir.”

⁵ Nini raja ai ma, “Alop hanima ma podas si Haman, ase ipadas hanami sura-sura ni si Ester.” Ase laho ma raja ai rap pakon si Haman, hu pesta na pinasirsir ni si Ester.

⁶ Nini raja ai ma dompak si Ester dob sombuh ia minum anggur, “Aha do na pinangindo ni uhurmu, sai bereon do ai bam, anjaha aha sura-suramu ronsi satongah ni harajaon in, sai pasaudon do.”

⁷ Dob ai nini si Ester ma mambalosi, “Pangindoanku ampa sura-surangku on do:

⁸ Anggo maidop do uhur ni raja in bangku, anjaha dear uhur ni raja in mambere pangindoanku ampa pasaudkon sura-surangku, roh ma raja in ampa si Haman hu pesta na sihol pasirsironku anjaha patar

ma bahenonku ai romban hubani pangkatahon ni raja in.”

⁹ Dob ai luar ma hunjai si Haman bani ari na sasada ai marolob-olob anjaha marmalas ni uhur. Tapi dob ididah si Haman si Mordahai i horbangan ni rumah ni raja ai, seng jongjong atap mabiar ia mangidahsi, gabe manringis tumang ma si Haman mangidah si Mordahai ai.

¹⁰ Tapi iodohkon si Haman do lobei pusu-pusuni, lanjar mulak hu rumah; dob ai isuruh ma na mangalopi huan-kuanni ampa si Seres, parinangonni ai.

¹¹ Jadi ipajojor si Haman ma bani sidea banggal ni habayakonni, buei ni anakni, ampa pambahen ni raja ai pasangapkonsi ampa na dob pinagijangni ai ia gijangan humbani kopala-kopala ampa juakjuak ni raja ai.

¹² Ambahni ai nini si Haman do, “Seng dong age sahalak ihatahon Puangbolon Ester roh hu pesta na pinasirsirni ai sobali ahu; age patar sahalak ahu do idilo mangan rap pakon raja ai.

¹³ Tapi haganupan ai seng boi pasombuh uhurhu, sadokah huidah ope si Mordahai, halak Jahudi ai, hundul i horbangan ni rumah ni raja ai.”

¹⁴ Dob ai nini si Seres, parinangonni ai, ampa huan-kuanni ai ma dompaksi, “Mahua napasuk ma sada tiang lima puluh asta gijangni, anjaha patarni ai napatugah ma hubani raja ai, ase igantungkon si

Mordahai hujai; dob ai boi ma ham marmalas ni uhur rap pakon raja ai, laho hu pesta ai.” Rosuh ma uhur ni si Haman mambogei hata ai, jadi isuruh ma na mamasuk tiang ai.

Marsangap si Mordahai

6¹ Bornginni ai seng tarpodom raja ai; jadi ihatahon ma boanon buku pardingatan pasal na masa ari-ari, anjaha ibasa ma ai i lobei ni raja ai.

² Jadi jumpah ma tarsurat parpalumba ni si Mordahai pasal si Bigtan pakon si Teres, ai ma juakjuak ni raja sidua halak ai, sijaga labah ai, na dob mansurahon sihol mambunuh Raja Ahasveros.

³ Dob ai nini raja ai ma, “Hasangapon atap habanggalon aha do na dob hubahen hubani si Mordahai balasni ai?” Nini juakjuak siparugas ai ma mambalosi, “Aha pe seng onga nabahen bani.”

⁴ Dob ai nini raja ai ma, “Ise do na i alaman ai?” Tudu do si Haman masuk hu alaman pardarat ni rumah ni raja ai, sihol mangkatahon hubani raja ai, ase igantungkon namin si Mordahai bani hayu, na dob pinajongjong bani.

⁵ Nini juakjuak ni raja ai ma dompaksi, “Tonggor ma, si Haman do na jongjong i alaman pardarat ai.” Nini raja ai ma, “Hatahon ma masuk ia!”

⁶ Masukkonsi si Haman, nini raja ai ma dompaksi, “Aha do na talup bahenon hubani dalahi harosuh

ni uhurhu, laho pasangapkonsi?” Marpingkir ma si Haman ibagas uhurni, “Mintor ise ma nani halak harosuh ni raja in, na sihol pasangaponni lobih humbangku?”

⁷ Dob ai nini si Haman ma dompak raja ai, “la dalahi, na hinarosuhkon ni raja in sihol pasangapkonsi,

⁸ bobanon ma namin bani pakeian harajaon, na dob somal ipakei raja in, ampa huda na dob somal ihunduli raja in, anjaha nahkonon ma namin sortali harajaon hu atas ni uluni.

⁹ Anjaha bereon ma namin pakeian ampa huda ai hu tangan ni sahalak humbani kopala-kopala ni raja in, humbani halak sisangapan, ase isorungkon pakeian ai hubanijolma harosuh ni uhur ni raja in, na sihol pasangaponni ai, anjaha ipahundul ma ia hu atas ni huda ai, anjaha itingtingkon i lobeini, ‘Sonon do talup bahenon hubanijolma, na hinarosuhkon ni raja in laho pasangapkonsi.’”

¹⁰ Dob ai ihatahon raja ai ma hubani si Haman, “Papodas ma, buat ma pakeian ampa huda songon na hinatahonmai, dob ai bahen ma sonai dompak si Mordahai, halak Jahudi ai, na hundul-hundul i horbangan ni rumah ni raja in, anjaha ulang hurangi age otik humbani na dob hinatahonmai.”

¹¹ Jadi ibuat si Haman ma pakeian ampa huda ai, anjaha isorungkon ma ai hubani si Mordahai, ipahundul ma ia hu atas huda ai, anjaha itingtingkon

ma i lobeini, “Sonon do talup bahenon hubani jolma na hinarosuhkon ni raja in, laho pasangapkonsi.”

¹² Dob ai mulak ma si Mordahai hu horbangan ni rumah ni raja ai. Tapi tarolos ma si Haman mulak hu rumahni, pusok tumang uhurni anjaha martudung-tudung.

¹³ Dob ai ibaritahon si Haman ma hubani si Seres, parinangonni ai ampa hubani ganup huan-kuanni ai, haganup na masa hu bani. Jadi nini huan-kuanni na maruhur ai ampa si Seres, parinangonni ai ma dompaksi, “Anggo halak Jahudi do si Mordahai, parbingkasanni mulai madabuh ma ham, seng anjai monang be ham marimbangsi, tapi maningon dabuh mando ham i lobeini.”

¹⁴ Sanggah na marsahap ai ope sidea pakonsi, das ma juakjuak ni raja ai, anjaha mangolos ma sidea mamboan si Haman hu pesta na dob pinasirsir ni si Ester.

Ipaulgap si Ester Partahi-tahion ni Si Haman

7 ¹ Jadi dob roh raja ai pakon si Haman, laho marmangan-mangan hubani si Ester, puangbolon ai,

² nini raja ai ma homa dompak si Ester bani ari paduahon ai, sanggah na minum anggur ai sidea, “Aha do na pinangindomu, ale Puangbolon Ester? Sai bereonku do ai bam. Aha do tongon sura-sura

ni uhurmu? Ronsi satongah ni harajaonku, sai na pasaudon do ai!”

³ Dob ai nini Puangbolon Ester ma mambalosi, “Anggo na tongon do jumpahan idop ni uhur ahu i lobeimu, ale rajanami, anjaha anggo dear uhur ni raja in, mahua pagoluh ham ma hosahku romban hubani pangindoanku, sonai homa bangsangku romban hubani elek-elekku.

⁴ Ai domma tarjual hanami, ahu pakon bangsangku, ase boisonkon, bunuhon ampa parnalangonkon. Ambit porini tarjual hanami pitah songon jabolon dalahi atap jabolon naboru, sai na pasiponku do ai; ai seng marnidok ope siandungonnami ai, laho manunsahi raja in marhalanohon ni ai.”

⁵ Dob ai nini Raja Ahasveros ma dompak Puangbolon Ester, “Ai ise ma ai anjaha ija ma ia, na marsura-sura mambahen na sonai ibagas uhurni?”

⁶ Ibalosi si Ester ma, “Imbang anjaha munsuh ai? Si Haman, na jahat on do.” Dob ai malitonduy ma si Haman i lobei ni raja ai ampa i lobei ni puangbolon ai.

⁷ Jongjong ma raja ai ibagas ringisni humbani na minum anggur ai, lanjar laho ma ia hu pohon na i lambung ni rumah ai. Tapi torus jongjong do si Haman mangindohon hubani Puangbolon Ester andohar ipagoluh hosahni, ai domma torang ididah, na dob iputuskon raja ai pasogopkon hamagouan bani.

Targantung si Haman

⁸ Dob ai sanggah mulak raja ai hun pohon na i lambung ni rumah ai hubagas rumah parminuman anggur ai, ijombahon si Haman ma dirini tudu hu atas bantal hundulan ni si Ester, gabe ihatahon raja ai ma, “Sihol do homa hape butakanni puangbolon in i lambungku, ibagas rumahku sandiri?” Dob luar hata ai humbani pamangan ni raja ai, mintor irongkop sidea ma bohi ni si Haman.

⁹ Dob ai nini si Harbona ma, sada halak humbani juakjuak, na marugas bani raja ai, “Ambahni ai, tiang na pinasirsir ni si Haman bani si Mordahai, na mambahen maluah raja in marhitei hatani, domma homa ipajongjong ibagas rumah ni si Haman, lima puluh asta gijangni.” Dob ai nini raja ai ma, “Gantungkon hanima ma ia hujai!”

¹⁰ Jadi igantungkon sidea ma si Haman bani tiang na dob pinajongjongni hinan bani si Mordahai. Dob ai mahombun ma ringis ni raja ai.

Ilopas Raja Ahasveros Halak Jahudi Mangimbang Munsuh ni Sidea

8 ¹ Lanjar bani ari na sasada ai ibere Raja Ahasveros ma hubani Puangbolon Ester rumah ni si Haman, munsuh ni halak Jahudi ai. Si Mordahai pe bulih ma masuk hu lobei ni raja ai, ai domma

ipatugah si Ester, naha partuturan ni si Mordahai hu bani.

² Dob ai ibuat raja ai ma tintin tokanni, na binuatni humbani si Haman, gabe ibere ma ai hubani si Mordahai, lanjar iangkat si Ester ma si Mordahai, mangopalai rumah ni si Haman.

³ Dob ai iulaki si Ester ma use mangkatahon hatani hubani raja ai; manrogop ma ia hubani naheini anjaha ielek-elek ma ia marhasoman iluh, ase isundati raja ai partahi-tahion na jahat na binahen ni si Haman, halak Agagi ai, dompak halak Jahudi.

⁴ Jadi isurdukkon raja ai ma tungkot omas harajaon ai hubani si Ester, gabe jongjong ma si Ester i lobei ni raja ai,

⁵ anjaha nini ma, “Anggo dear ninuhur ni raja in, anjaha anggo jumpahan idop ni uhur ahu i lobeini, anjaha anggo bonar homa hata on bani raja in, anjaha rosuh uhur ni raja in mangidah ahu, mahua ibahen ma namin surat, manulak hata ni surat ni si Haman, anak ni si Hamedata, halak Agagi ai, na sinuratni ai laho mangagou halak Jahudi, na adong i sab nagori ni raja in.

⁶ Ai sonaha ma panaronkonku paidah-idah hamagouan, na mangonai hubani bangsangku? Sonaha ma panaronkonku paidah-idah parbois ni bangsangku?”

⁷ Dob ai nini Raja Ahasveros ma dompak Puangbolon Ester ampa dompak si Mordahai,

halak Jahudi ai, “Tonggor ma, domma pala hubere rumah ni si Haman hubani si Ester, anjaha si Haman domma igantungkon bani hayu ai, halani sihol mardastangan ia bani halak Jahudi.

⁸ Bulih do hanima mambahen surat pasal halak Jahudi barang sonaha na madear ninuhurnima ibagas goran ni raja in, anjaha itokan ma ai bani tintin ni raja in; ai surat, na dob sinurat ibagas goran ni raja in, anjaha itokan marhitei tintin tokan ni raja in, seng bulih mubah.”

⁹ Jadi tarpio ma ijia juru tulis ni raja ai bulan tolu, ai ma bulan Siwan, ari dua puluh tolu. Jadi isurat sidea ma haganup romban hubani pangaturhon ni si Mordahai pasal halak Jahudi hubani kopala-kopala, panrajai ampa pambobai ni nagori-nagori hun India das hu Etiopia, saratus dua puluh pitu propinsi, bani ganup propinsi ibagas suratni ampa bani ganup bangsa ibagas sahapni, sonai homa hubani halak Jahudi ibagas suratni ampa sahapni.

¹⁰ Isurat sidea ma ai ibagas goran ni Raja Ahasveros, lanjar itokan bani tintin tokan ni raja ai. Dob ai ipantongoskon ma surat ai marhitei suruhan siajak huda na lingkak-lingkat, na somal pinakei bani raja ai, na dob niajar humbani ianan ni huda ni raja ai hinan.

¹¹ Marhitei ai ilopas raja ai ma halak Jahudi, na adong bani ganup huta martumpu, laho martahankon hosah ni sidea, homa mansedahon,

mamunuh ampa mangagou ganup hulanen
parsinjata ni ganup bangsa atap nagori, na sihol
mandorab sidea rap pakon dakdanak ampa
parinangon ni sidea, sonai homa manrampas
ugas-ugas ni sidea,

¹² bani sada ari bani sab nagori ni Raja Ahasveros, ai
ma ari sapuluh tolu bulan sapuluh dua, bani bulan
Adar.

¹³ Salinan ni surat ai, na tinotapkon gabe paraturan
bani ganup nagori ai, maningon tingtingkononkon
do ai bani ganup bangsa, ase sirsir halak Jahudi bani
ari na dob tinotapkon ai, laho manlawan munsuh ni
sidea.

¹⁴ Ia suruhan ai, na mangajak huda na lingkat-
lingkat ai, na somal pinakei bani horja ni raja ai,
mangolos ma sidea bingkat, iparentahkon raja ai,
anjaha i huta Pamatang Susan do iluarhon parentah
ai.

¹⁵ Luar ma anggo si Mordahai hun lobei ni raja ai
marpakeian harajaon humbani sitora na mahonda
ampa kain linen alus, marsortali omas na banggal
ampa marmantel kain linen na alus pakon sitora
na gerger, anjaha ganup pangisi ni huta Susan
marolob-olob anjaha marmalas ni uhur.

¹⁶ Poltak ma anggo bani halak Jahudi haliharon,
malas ni uhur, hasonangan ampa hamuliaon.

¹⁷ Jadi bani ganup nagori ampa bani ganup huta
hadasan ni hata ampa parentah ni raja ai, masa ma

malas ni uhur ampa olob-olob i tongah-tongah ni halak Jahudi, pesta ampa ari malas ni uhur. Anjaha buei halak humbani bangsa na i nagori ai masuk Jahudi, ai sogop do biar dompak Jahudi bani sidea.

Panlawanon ni Halak Jahudi Dompak Munsuh ni Sidea

9¹ Bani bulan sapuluh dua, ai ma bulan Adar, bani ari sapuluh tolu bulan ai, bani ari pandalankonon bani hata ampa parentah ni raja ai, bani ari na niarapkon ni munsuh ni halak Jahudi manaluhon sidea (*tapi balik gabe halak Jahudi manaluhon halak na magigi bani sidea*), bani ari ai,² martumpu-tumpu ma halak Jahudi ibagas huta ni sidea i sab nagori ni Raja Ahasveros, laho mardastangan bani halak na sihol mangagou sidea. Anjaha ise pe lang na tahan jongjong i lobei ni sidea, ai sogop do biar mangidah sidea bani haganup bangsa.

³ Haganup kopala ni nagori-nagori ai ampa panrajai pakon haganup gamot ni harajaon ai mangurupi halak Jahudi, ai sogop do bani sidea biar dompak si Mordahai.

⁴ Ai timbul do si Mordahai i rumah ni raja ai, anjaha sar do baritani bani haganup nagori ai, ai lambin dokah, lambin timbul do si Mordahai.

⁵ Jadi italuhon halak Jahudi ma ganup munsuh ni sidea ai marhitei podang, ibunuhi anjaha iagou ma

sidea, sabonar rosuh ni uhurni do ibahen sidea hubani halak na mandomdomi sidea.

⁶ I huta Pamatang Susan pe ibunuh anjaha iagou halak Jahudi do lima ratus dalahi;

⁷ ibunuh sidea do homa si Parsandata, si Dalpon, si Aspata,

⁸ si Porata, si Adalia, si Aridata,

⁹ si Parmasta, si Arisai, si Aridai pakon si Wayesata,

¹⁰ ai ma na sepuluh anak ni si Haman, anak ni si Hamedata, munsuh ni halak Jahudi ai, tapi seng ikahua anggo ugas-ugas ni sidea.

¹¹ Lanjar bani ari na sasada ai das ma bilangan nijolma na binunuh ibagas huta Susan hubani raja ai.

¹² Dob ai nini raja ai ma dompak Puangbolon Ester, “Domma ibunuh halak Jahudi i huta Pamatang Susan lima ratus dalahi, sonai homa anak ni si Haman na sepuluh ai. Aha gakni ibahen sidea i tanoh ni raja na legan in? Aha ope pangindoanmu? Maningon bereon do ai bam. Anjaha aha ope sihol ni uhurmu? Maningon pasaudon do ai!”

¹³ Dob ai nini si Ester ma, “Anggo dear ninuhur ni raja in, sai ipalopas raja in ma age patar halak Jahudi na i huta Susan, mandalankon romban hubani parentah sisadari on. Nalopas ma ase igantungkon anak ni si Haman na sepuluh ai bani hayu.”

¹⁴ Jadi ihatahon raja ai ma, ase ibahen sonai; ipadalan ma parentah i Susan, gabe igantungkon ma anak ni si Haman na sepuluh ai.

¹⁵ Age bani ari sapuluh ompat bulan Adar martumpu-tumpu do halak Jahudi na i huta Susan, anjaha ibunuhi sidea ma tolu ratus halak i Susan; tapi seng dais anggo tangan ni sidea bani ugas-ugas ni sidea.

¹⁶ Ia halak Jahudi na legan ai, na i nagori ni raja ai, martumpu-tumpu do pagoluhkon hosah ni sidea, gabe seng tarkahua munsuh sidea; ibunuhi sidea ma pitu puluh lima ribu halak na mangkagigihon sidea, tapi seng dais anggo tangan ni sidea bani ugas-ugas ni sidea.

¹⁷ Ai ma na masa bani ari sapuluh tolu bulan Adar, anjaha bani ari sapuluh ompat marsaran ma sidea, gabe ibahen sidea ma ai ari marpesta-pesta ampa marmalas ni uhur.

Parmulaan ni Pesta Purim

¹⁸ Tapi anggo halak Jahudi na i Susan martumpu-tumpu do ari sapuluh tolu ampa ari sapuluh ompat, anjaha marsaran ma bani ari sapuluh lima, gabe ibahen sidea ma ari ai ari marpesta-pesta ampa marmalas ni uhur.

¹⁹ Halani ai anggo halak Jahudi na marianan i dusundusun, ari sapuluh ompat bulan Adar do ibahen sidea ari malas ni uhur, ari marpesta-pesta ampa ari bosar anjaha marsipiring-piringan do sidea bani ari ai samah sidea.

²⁰ Dob ai isuratkon si Mordahai ma na masa ai anjaha itongoskon ma surat-surat hubani halak Jahudi, na marianan bani haganup nagori ni Raja Ahasveros, na dohor sonai homa na daoh,

²¹ laho mamarentahkon bani sidea, ase marpesta sidea ganup bani ari sapuluh ompat ampa ari sapuluh lima bulan Adar,

²² bahen ari pardingatan pasal hamonangan ni halak Jahudi marimbang munsuh ni sidea; ai bani ari ai do martukar pusok ni uhur gabe malas ni uhur ampa partangison gabe ari bosar; maningon bahenon ni sidea ma ari ai gabe ari marpesta-pesta ampa malas ni uhur, anjaha maningon marsipiring-piringan ma sidea samah sidea anjaha marsiberebere bani halak na musil.

²³ Jadi iundukkon halak Jahudi ma mandalankon songon na dob pinungkah ni sidea ai, ampa songon na sinuratkon ni si Mordahai ai bani sidea.

²⁴ Ai domma pala itahihon si Haman, anak ni si Hamedata, halak Agagi ai, munsuh ni ganup halak Jahudi ai, na sihol mangagou sidea; domma pala ipadalan tondung, ai ma Pur, sihol mamboiskon ampa manraseihon sidea;

²⁵ ai sanggah na masuk si Ester hu lobei ni raja ai, ibere raja ai ma surat parentah, ase tahi-tahi hamagouan, na pinadalanni dompak halak Jahudi, itulak ai mulak mangonai bani sidea sandiri, gabe igantung ma ia pakon anakni bani hayu.

²⁶ Halani ai do ase ibahen sidea goran ni ari ai Purim, mangihutkon goran Pur. Halani ai, domu hubani ganup na tarsurat ibagas surat ai, ampa na nididah ni sidea ibagas na masa ai, ampa na mangonai hubani sidea.

²⁷ Itotapkon anjaha iundukkon halak Jahudi ma sada aturan, bani sidea pakon ginompar ni sidea ampa halak na pasadahon dirini bani sidea, paboa na so bulih langgaron ni sidea ai, maningon marari bosar sidea sidua ari ai ganup tahun romban hubani hata ni surat ai ampa panorang na dob binuhul hinan.

²⁸ Anjaha maningon dingaton anjaha bosarhononkon ari ai bani ganup sundut, bani ganup rumah tangga, bani ganup nagori ampa huta, anjaha na so bulih do masab ari Purim on hun tengah-tengah ni halak Jahudi, anjaha na so bulih do maronti pardingatan bani ari on humbani ginompar ni sidea.

²⁹ Anjaha Puangbolon Ester pe, boru ni si Abigail, ibahen ma surat kuasa rap pakon si Mordahai, halak Jahudi ai, laho patoguhkon surat na paduahon ai pasal pesta Purim ai.

³⁰ Ipantongoskon ma surat ai hubani haganup halak Jahudi, na marianan bani sisaratus dua puluh pitu propinsi ni nagori gomgoman ni Raja Ahasveros ai, marhasoman hata damei ampa hasintongan,

³¹ ase ibosarhon sidea ari Purim on bani panorang na dob binuhul hinan, songon na dob tinitahkon ni si Mordahai, halak Jahudi ai ampa Puangbolon Ester bani sidea, anjaha songon na dob tinontuhon ni sidea bani sidea sandiri ampa bani ginompar ni sidea, pasal parpuasaon ampa partangison ni sidea ai.

³² Parentah ni Puangbolon Ester patotapkon aturan-aturan ni pesta Purim on, anjaha isuratkon ma ai ibagas sada buku.

Kuasa ampa Hasangapon ni si Mordahai

10 ¹ Dob ai ipaporsankon Raja Ahasveros ma balasting sigalaron ni halak na marianan i darat ampa i tanoh na martopihon laut.

² Haganup hagogohon ampa kuasa ni pambahenanni ai, sonai homa haganup hatimbulon pakon hasangapon ni si Mordahai, na pinadas ni raja ai hu bani, ai lang tarsurat do ai ibagas buku barita ari-ari ni raja-raja Madai ampa Persia?

³ Ia si Mordahai, halak Jahudi ai, ia do wakil ni Raja Ahasveros; sangap do ia i tongah-tongah ni halak Jahudi, anjaha haudungan ni buei saninani, ai iporluhon uhurni do hadearan ni bangsani, anjaha sai hata damei do isahapkon bani ganup bangsani.

Job

Hadaulaton ampa Hadoharon ni si Job

1 ¹ Adong ma sapari sada halak i tanoh Us, na margoran si Job; na daulat anjaha na bujur do paruhuran ni halak ai, sada halak sihabari Naibata, anjaha ipadaoh do uhurni humbani hajahaton.

² Tubuh do bani pitu anak ampa tolu boru.

³ Adong do bani pitu ribu biribiri, tolu ribu unta, lima ratus pasang lembu, ampa lima ratus pasang halode boru-boru, ambahni ai buei tumang jabolonni; ia do sisangapan humbani haganup halak na i hapoltakan.

⁴ Somal do anakni ai mambahen pesta i rumahni bei, marhorin-horin; isuruh sidea do homa mandilo botou ni sidea sitolu halak ai, laho mangan ampa minum rap pakon sidea.

⁵ Anjaha anggo domma salpu pesta ai, isuruh si Job ma mangalopi sidea, laho manguras sidea; ipagirah ma sogod puho, anjaha igalangkon ma galangan situtungan, domu hubani buei ni sidea ganupan. Ai ninuhur ni si Job do, "Atap na mardousa do anak kai, anjaha itundali Naibata ibagas uhurni." Sonai ma tongtong ibahen si Job.

Parlajouan na Parlobei

⁶ Bani na sadari roh bei ma anak ni Naibata jongjong hu lobei ni Jahowa, anjaha sibolis ai pe roh do hu tongah-tongah ni sidea.

⁷ Dob ai nini Jahowa ma dompak sibolis ai, “Roh hunja do ho?” Nini sibolis ai ma mambalosi Jahowa, “Roh hun paradou-adouan i tanoh ai, roh medang-edang, madou-adou hunjai.”

⁸ Ihatahon Jahowa ma hubani sibolis ai, “Ipardiateihon ho do juakjuak-Ku si Job ai? Seng dong songonsi marparuhuran i tanoh ai, daulat, pintor, mabiar mangidah Naibata, anjaha ipadaoh do uhurni humbani hajahaton.”

⁹ Nini sibolis ai ma mambalosi Jahowa, “Ai lang na marpambuat do pangkabiari ni si Job ai bani Naibata?

¹⁰ Ai lang iramotkon Ham do ia ampa rumahni inggot ampa haganup na dong bani? Horja ni tanganni pe itumpak Ham do manjadi, anjaha na dongni pe martambah do i tanoh ai.

¹¹ Tapi porini idurdurhon Ham tangan-Mu laho mambuat haganup na bani ai, mintor buraanni do Ham torang-torang.”

¹² Dob ai nini Jahowa ma dompak sibolis ai, “Tonggor ma, ondos bani tanganmu ma ganup na bani ai, tapi seng bulih dais tanganmu anggo bani

sandiri.” Dob ai luar ma sibolis ai hun lobei ni Jahowa.

¹³ Dob ai bani na sadari, sanggah mangan anjaha minum anggur anak ampa boruni ai ibagas rumah ni sikahanan ai,

¹⁴ roh ma sada suruhan marayak si Job, nini ma, “Maninggala do nongkan horbou ai, anjaha halode boru-boru ai manampal i lambungni.

¹⁵ Dob ai roh ma halak Seba mandorab sidea laho mangayob, anjaha itampuli do jabolon-jabolon ai bani podang; pitah ahu mando na maluah mamboan barita bamu.”

¹⁶ Sanggah na mangkatahon ai ope ia, roh ma siluk halak na legan mangkatahon, “Madabuh do apuy ni Naibata hun langit, anjaha bois do ipangan apuy ai biribiri ampa jabolon-jabolon ai; pitah ahu mando maluah mamboan barita bamu.”

¹⁷ Sanggah mangkatahon ai ope ia, roh ma siluk halak na legan Mangkatahon, “Roh do halak Kasdim tolu hulanen, idorab sidea ma unta ai lanjar iboan; itampuli sidea do jabolon-jabolon ai, pitah ahu mando na maluah mamboan barita bamu.”

¹⁸ Sanggah na mangkatahon ai ope ia, roh ma siluk halak na legan mangkatahon, “Tudu mangan pakon minum anggur do anakmu ampa borumu i rumah ni sikahanan ai.

¹⁹ Jadi tonggor ma, roh ma halisungsung na marpuyuh-puyuh hun halimisan manondol

suhi-suhi ni rumah na ompat ai, gabe idabuhi ma dakdanakmu ai lanjar matei, pitah ahu mando na maluah mamboan barita bamu.”

²⁰ Dob ai jongjong ma si Job, irigati ma hiouni anjaha isuhur jambulan ni uluni; manrogop ma ia anjaha martonggo.

²¹ Jadi ihatahon ma, “Talanjang do ahu luar hun boltok ni inangku, anjaha talanjang do ahu mulak use. Jahowa do na mambere, Jahowa do na mambuat, pinuji ma goran ni Jahowa.”

²² Ibagas hagianupan ai seng mardousa si Job barang marhutuk ia bani Naibata.

Parlajouan na Paduahon

2 ¹ Dob ai bani na sadari use roh bei ma anak ni Naibata jongjong hu lobei ni Jahowa, anjaha sibolis ai pe roh do hu tongah-tongah ni sidea jongjong i lobei ni Jahowa.

² Dob ai nini Jahowa ma dompak sibolis ai, “Roh hunja do ho?” Jadi nini sibolis ai ma mambalosi Jahowa, “Roh hun paradou-adouan i tanoh ai, roh medang-edang hunjai.”

³ Dob ai nini Jahowa ma dompak sibolis ai, “Domma ididah ho juakjuak-Ku si Job ai? Ai seng dong halak na marparuhuran songonsi i tanoh ai, daulat, pintor, sada halak na mangkabiari Naibata, anjaha ipadaoh do uhurni humbani hajahaton. Sai tong do

ia marsijoloman hubani hadaulatonni, age pe iojur ho Ahu mangagousi, seng marhala.”

⁴ Dob ai nini sibolis ai ma mambalosi Jahowa, “Hulingkuling gantih ni hulingkuling. Sagala na dong banijolma in ra do ia mambere gantih ni hosahni.

⁵ Tapi porini idurdurhon Ham tanganmu, laho manjamah holiholini ampa dagingni mintor buraanni do Ham torang-torang.”

⁶ Dob ai nini Jahowa ma dompak sibolis ai, “Tonggor ma, ondos hubagas tanganmu ma ia; pitah hosahni ulang kahua.”

⁷ Dob ai luar ma sibolis ai hun lobei ni Jahowa, gabe hona puru na parah ma si Job ai ibahen, hubani jampal ni naheini das humbani pakpak ni uluni.

⁸ Dob ai ibuat si Job ma sanga-sanga mangkabusi dagingni, lanjar ihundulhon ma dirini ibagas abuan.

⁹ Dob ai nini parinangonni ai ma dompaksi, “Sai tong ope marsijoloman uhurmu bani hadaulatonmu? Burai ma Naibata, ase matei ho!”

¹⁰ Tapi nini ma dompaksi, “Songon hata ni naboru na lontong do parsahapmu. Domma ijalo hita na matobu humbani Naibata, ia na mapaet seng jaloonta?” Ibagas haganupan ai seng mardousa si Job marhitei parsahapni.

Tolu Halak Hasoman ni si Job na Roh Manorihsi

¹¹ Jadi dob ibogei hasoman ni si Job haganupan sitaronon na mangonai hubani ai, roh bei ma sidea,

ganup humbani iananni bei, si Elipas hun Teman, si Bildad hun Sua ampa si Sopar hun Naama, anjaha manriah ma sidea laho hujai, laho manorih ampa mangapohisi.

¹² Jadi dob itatap sidea ia humbani na daoh, seng itanda sidea be ia, gabe ipagogoh sidea ma sorani tangis-tangis, iparrigat ma hiouni bei, anjaha ipasaburhon sidea ma orbuk dompak babou ampa bani uluni.

¹³ Dob ai hundul ma sidea rap pakonsi i tanoh pitu ari pitu borngin dokahni, seng dong na marsahap pakonsi, halani ididah sidea parah ni sidageionni ai.

Tangis-tangis ni si Job

3 ¹ Dob sonai ibuha si Job ma pamanganni anjaha iburai ma ari partubuhni.

² Nini ma mangkatahon,

³ “Masab ma lah namin ari partubuhku, ampa borngin ai na mangkatahon, ‘Domma solat sada anak dalahi.’

⁴ Golap ma lah, ari ai! Ulang ma namin ipindahi Naibata na i babou ai, barang marsinalsal panondang bani.

⁵ Sai idorab hagolapan ampa halotiron ma namin ai. Sai irungkub hambun mangitom, anjaha isonggoti samon arian.

⁶ Borngin ai, sai halotiron ma namin manrampas ai! Ulang ma namin marmalas ni uhur ai

i tongah-tongah ni ari ni tahun, ulang ma namin masuk hira hubagas bilangan ni bulan.

⁷ Borngin ai, borngin na lang martuah ma namin ai; ulang ma namin tarboge i sora olob-olob ijai.

⁸ Sai hona papa ma namin ai ibahen sipapai ari, na mambotoh mamuhoi naga.

⁹ Sai sogop ma namin bintang buha siang arini; tarpaima-ima namin bani na siang, tapi lang jumpahan, anjaha ulang ma namin onggah ididah sibalik huning,

¹⁰ halani lang itutup labah ni partapaan bangku, anjaha lang iponopkon sitaronon hun matanku.

¹¹ Mase ma lang matei ahu tubuhkansi, rotap namin mintor hosahku mandaratkansi hun partapaan?

¹² Mase ma mintor sirsir abingan manjalo ahu, ampa adop gabe boi ahu minum?

¹³ Ambit lang sonai namin, tibal ma ahu sonari marsaran, modom ahu marsonang-sonang,

¹⁴ rapkon raja-raja ampa parkuasa ni dunia on, sipauli tugu bani dirini sidea,

¹⁵ barang rapkon halak na sangap sibuei omas, na manggoki rumahni bani pirak.

¹⁶ Barang mase ma lang ahu namin songon anak na lang gokan umur, na tinanomkon, songon

na etek-etek na lang onggang mangidah na
siang?

¹⁷ Ijai maronti ma halak parjahat oga-oga, ijai
marsaran ma halak na bois gogohni.

¹⁸ Ijai sonang ma halak na tartutup, lang
tangaronni be sora ni mandur.

¹⁹ Ijai sarupa do halak na etek pakon na banggal,
anjaha mardeka do jabolon humbani tuanni.

²⁰ Mase ma ibere na siang bani halak na
masombuh, pakon hagoluhan bani halak na
marhoru?

²¹ Na siholan bani hamatean, tapi lang roh,
na mangindahi ai lobih humbani halak
sipindahi ponopan;

²² halak na marmalas uhur, na marolob-olob
tene, porini jumpahsi tanoman,

²³ mase ma ibere na siang bani halak na ponop
dalanni, na dob hona runggang ibahen
Jahowa?

²⁴ Ai hoih-hoih do sipanganon siap ari bangku,
anjaha tangis-tangisku mabaor songon bah.

²⁵ Ai na huhabiari, ai do sogop bangku, anjaha na
huharusakkon, ai do mangonai bangku.

²⁶ Seng dong bangku damei, lang homa sonang
ahu; seng dong parsaranan bangku,
marrohan tong hasunsahan.”

**Sahap ni si Elipas: Seng Dong
na Marsitaronon, na So Marsalah**

- 4** ¹ Dob ai nini si Elipas, halak Teman ai ma mambalosi,
- ² “Anggo dong na marsahap dompak ham, sogam do uhurmu? Tapi ise ma na mangasup mangorom marsahap?
- ³ Tonggor ma, buei ma halak na dob niajaranmu, anjaha ipargogohi ham do tangan na galek.
- ⁴ Halak na jomba ipajongjong ham do marhitei hatamu, anjaha nahei ni halak na rebad-rebad ipatoguh ham do.
- ⁵ Tapi nuan dob mangonai on bamu, gabe mandolei ham; dob mangonai on bamu, gabe gamang ham.
- ⁶ Ai lang biarmu dompak Naibata hatengeran ni uhurmu, anjaha habonaran ni langkahmu pangarapanmu hinan?
- ⁷ Dingati ham ma, nantigan ma onggamagou halak na so marsalah? Barang ija onggamasab na pintor maruhur?
- ⁸ Songon na dob huidah, halak sitinggalahon hajahaton ampa sitidahkan hamagouan, ai do pariamoonni.
- ⁹ Mogap do sidea ibahen hosah ni Naibata, anjaha bois sidea ibahen panompul ni ringisni.

- ¹⁰ Paraum ni singa, sora ni singa panoroh, ipon ni singa poso-poso, iropangi do.
- ¹¹ Magou do singa halani hurang sorohan, anjaha anak ni singa boru-boru merap do.
- ¹² Roh do bangku hata, sipsip, anjaha ijalo pinggolhu do husipni ai.
- ¹³ Sanggah mamingkir-mingkiri alatan borngin, sanggah rengesni modomjolma,
- ¹⁴ sogop ma bangku biar pakon gobir, na mambahen hitir ganup holiholingku.
- ¹⁵ Montas do sada Tonduy hun lobeihu; manimbora ma ambulu ni badanku.
- ¹⁶ Soh ma ia, tapi seng tartandai ahu rupani. Dong do na jongjong i lobeihu, anjaha hubogei ma sora na husip-husip:
- ¹⁷ Mintor boi ma sahalakjolma pintor i lobei ni Naibata? Mintor boi ma sada dalahi pansing i lobei ni Sitompasi?
- ¹⁸ Tonggor ma, gari bani juakjuak-Ni seng tenger uurni, anjaha bani malekat-Ni ididah hakahouon,
- ¹⁹ samintolah ma banijolma na marianan ibagas rumah tanoh halampung, na marbona humbani orbuk, na boi pisatkonon songon ngitngit?
- ²⁰ Holangkolang ni sogod pakon bodari iagou, iropuki sidea; magou do sidea sadokah ni dokahni, seng dong na mansahapkon.

²¹ Ai lang, anggo iparreong ma lampolampo ni goluh ni sidea, matei ma sidea, tapi seng ibagas hapentaran.”

Sahap ni si Elipas (*Sambatni*)

- 5** ¹ “Dilo ham ma, adong do na sihol mambalosi ham? Hubani ise, humbani halak na pansing ai sihol mangadu-adu ham?
- ² Tongon, pandoleianni do mamunuh halak na oto, anjaha simburu do pamatei halak na bodoh.
- ³ Huidah do halak na oto manjulur uratni, tapi sompong melus iananni.
- ⁴ Daoh do anakni humbani hatuahon, hona dogei-dogei sidea i horbangan, anjaha seng dong na paluahkon sidea.
- ⁵ Halak na loheian do mangankon na sinabini, gari hun tongah-tongah ni runga-runga ibuat do ai; anjaha halak na horahan do manginum na dong bani.
- ⁶ Ai seng humbani orbuk roh ni hasedaon, anjaha seng humbani tanoh roh ni hasunsahan.
- ⁷ Tapijolma do na manubuhkon sitaronon, songon dilah ni apuy habang dompak datas.
- ⁸ Porini ahu, Naibata do hupindahi, hubani Naibata do ondoskononku parniahapanku.

- ⁹ Ia do sibahen pambahenan na banggal na
so tarpareksa, ampa halongangan na so
tarhira.
- ¹⁰ Ia do sibere udan hu tanoh in, anjaha la do
sitongos bah hu juma.
- ¹¹ Ia do na patimbulhon halak na musil, anjaha
na mangangkat hu hatuahon halak na pusok
uhur.
- ¹² Ia do parsedahon tahi-tahi ni siparakal-akal,
gabe seng manjadi hinorjahon ni tangan ni
sidea.
- ¹³ Ia do manangkap halak na pentar ibagas akal
ni sidea sandiri, ibahen soya tahi-tahi ni
siparakal-akal.
- ¹⁴ Dorabon ni na golap do sidea arian,
anjaha dadap-dadap sidea arian songon
borngin-borngin.
- ¹⁵ Tapi ipaluah do halak na maetek humbani
podang, anjaha halak na musil humbani
tangan ni halak na gogoh.
- ¹⁶ Gabe marpangarapan ma halak na galek, tapi
ipasip do halak parjahat.
- ¹⁷ Tonggor ma, martuah ma jolma na niajar
ni Naibata, halani ai ulang ma teoskon
pinsang-pinsang ni Sitimbulan in!
- ¹⁸ Ia do mangugahi, lanjar la do mambaluti:
la do mambogbog, lanjar tangan-Ni do
pamalumkon.

- ¹⁹ Onom hali ho tarsosak, la do paluahkon
ho: papituhalihon seng mangonai be
hamagouan bam.
- ²⁰ Sanggah lohei, la do paluahkon ho humbani
hamatean, sanggah porang, humbani kuasa
ni podang.
- ²¹ Ondingan-Ni do ho humbani lonsing-lonsing
ni dilah, anjaha seng pala habiaranmu
hasedaon porini pe roh.
- ²² Tawa do ho mangidah hasedaon ampa lohei,
anjaha seng pala habiaranmu binatang na i
tanoh in.
- ²³ Ai ibagas padan do ho pakon batu na i talun,
binatang na i harangan pe mardamei do
pakon ho.
- ²⁴ Jadi botohonmu ma, ibagas hasonangan do
lampolampomu; anjaha anggo ipareksa ho
alamanmu, aha pe lang dong na magou.
- ²⁵ Botohonmu do homa, lambin gargarni do
dakdanakmu, anjaha ginomparmu songon
suan-suanan na i tanoh in.
- ²⁶ Palobei sayur matua do ho ase surukonmu
tanoman, songon omei na sinopouhon bani
panorangni.
- ²⁷ Tonggor ma, sonai ma domu hubani
pamareksaannami! Tangar ma ai, anjaha
paratei-ateihon ma!”

Balos ni si Job**Hiranan Ia Mangidah Hasomanni**

- 6** ¹ Dob ai nini si Job ma mambalosi,
² “Ah, ambit tangkas ma namin itimbang
pusok ni uhurhu, anjaha ganup sitarononku
itibalhon bani timbangan!
- ³ Ra boratan ma ai nuan humbani horsik na i
topi ni laut, halani ai do ase lepak-lepak
parsahapku.
- ⁴ Ai marpantikan do bangku panah ni Pargogoh
Na So Tarimbang in, ionsop tonduyhu do
bisani; songgot-songgot ni Jahowa marodor
manunsahi ahu.
- ⁵ Tumaram ma marlingik halode harangan anggo
sungkup do poyon-poyon sampalonni?
Barang marumboh lembu anggo sungkup
do gagatonni?
- ⁶ Mintor tarpangan ma na so mardai lang pala
margaram? barang mardai do silopak ni
tolur?
- ⁷ Magigi do ahu manjamah ai; songon sipanganon
na maginei do ai bangku.
- ⁸ Ah, sai jumpah ma namin na hupindo, anjaha
ibere Naibata ma namin sura-surangku.

- ⁹ Ambit marosuh ma namin uhur ni Naibata
manropuki ahu, anjaha idurdurhon
tangan-Ni manrotapkon hosahku!
- ¹⁰ Na boi gabe apoh-apoh bangku, anjaha
marolob-olob ope ahu ibagas na maborit
na so maralang-alang, ai ma, halani seng
huparnalang hata ni Na Mapansing in.
- ¹¹ Ai aha ope gogohku, ase mangarap ope ahu?
Anjaha aha ope siarapkononku, ase boi
marsabar ni uhur ahu?
- ¹² Ai doskon gogoh ni batu gogohku, barang
tombaga angkulangku?
- ¹³ Tongon, seng dong be pangurupion bangku,
anjaha na boi haluahon bangku domma
mandaoh humbangku.
- ¹⁴ Halak na lang padalan holong atei bani
hasomanni, ai ma na manalduskon biar
dompok Pargogoh Na So Tarimbang in.
- ¹⁵ Seng hatengeran saninangku, ai songon bah
etek, songon bah na marbanggal do sidea,
- ¹⁶ bah na gombur ibahen es, anjaha salju mabaor
malala hubagas;
- ¹⁷ na marsik sanggah logo ni ari, anjaha anggo
milas ari horah do iananni.
- ¹⁸ Marlegot-legot do pardalanni, laho hu
halimisan, lanjar magou.

- ¹⁹ Manatap-natap do kafilah na hun Tema
dompak jai, anjaha saudagar na hun Seba
mangarap hunjai.
- ²⁰ Hiranana do sidea bani pangarapan ni sidea ai,
roh sidea hujai, gabe tarbador do sidea.
- ²¹ Usih hujai do hanima nuan bangku, ididah
hanimahonsi otik na majangin mabiar ma
hanima.
- ²² Ongga huhatahon, 'Bere otik bangku?' Barang,
'Boan hanima siluah bangku humbani
artanima?'
- ²³ Barang, 'Paluah ma ahu humbani tangan
ni sipanunsahi?' Barang, 'Tobus ma ahu
humbani tangan ni sipangunsagakon
gogoh?'
- ²⁴ Ajari hanima ma ahu, ase sip ahu; patugah
hanima bangku, ija ahu kahou.
- ²⁵ Margogoh tumang do hata hasintongan. Tapi
aha ma arti ni hutuk-hutuknima in?
- ²⁶ Ai na sihol maminsang parsahapan do
uhurnima? Doskon logou do hiraon sahap ni
sada halak na marpandoleian?
- ²⁷ Dakdanak na tading maetek pe ra do hanima
marruji-rujihon, sonai homa manjualhon
hasomannima pe.
- ²⁸ Ai pe, dompakkon hanima ma ahu; ai seng ra
ahu marladung i lobeinima.

- ²⁹ Parimbagaskon hanima ma, ulang masa na so pintor. Nai ma, parimbagaskon hanima ma, totap do hapintoronku.
- ³⁰ Ai adong na lepak bani dilahku? Mintor seng ma nani ibotoh pamanganku mangahap na ija na salah?”

Sambat ni Balos ni Si Job

Borat ni Goluh on

- 7** ¹ “Ai lang borat do horja ni jolma i tanoh on, anjaha lang songon ari-ari ni sada halak gajian do ari-arini?
- ² Songon jabolon na mangindo marlinggom-linggom, songon sada gajian na paima-imahon gajini,
- ³ sonai do itontuhon bangku bulan hamagouan, anjaha borngin hangaluton do ipasirsir bangku.
- ⁴ Anggo laho modom ahu, ningku do, ‘Antigan pe ahu puho?’ Tapi borngin ai pe ngolngol do, loja ahu, marguling-guling ahu das bani na siang ari.
- ⁵ Bingaon anjaha lingkorangan badanku ganup, maripos-ipos hulingkulingku, dob ai malala use.

- ⁶ Podasan do habang ari-aringku ase tuldak,
anjaha magou-magou sonin, seng dong
siarapkonon.
- ⁷ Ingat ma, sahali tumang do goluhkon; seng
idahon ni matangku be na madear.
- ⁸ Panonggor ni na manorih ahu, seng be idahonni
ahu, pindahan ni panonggormu ma ahu,
hape seng ijin be ahu.
- ⁹ Songon hambun na habang lanjar salpu, sonai
do halak turun hu nagori toruh, seng
tarbahensi tangkog be hunjai.
- ¹⁰ Seng anjai mulak be ia hu rumahni, seng
itandai iananni be ia.
- ¹¹ Ai ma ase seng tartutup ahu pamanganku,
marsahap uhurhu halani hasosakan ni
uhurhu, tangis uhurhu halani hasosakan ni
tonduyhu.
- ¹² Ai laut ahu barang naga, ase ibahen Ham na
marjaga ahu?
- ¹³ Anggo ihatahon uhurhu, 'Apeihu ma na
mangapoh ahu, podomanku pahampung
orong-orongku,'
- ¹⁴ jadi isonggoti Ham do ahu marhitei nipi, anjaha
mabiar ahu ibahen marhitei panonggoran,
- ¹⁵ gabe dearan huahap mandolos, dearan matei
ase paboan-boan sitaronon on.

- ¹⁶ Domma sobalan ahu, seng sihol be ahu
manggoluh lalab; paluah ma ahu, ai doskon
sahali marhosah do ari-aringku.
- ¹⁷ Ai aha ma namin jolma in, ase pala patimbulon-
Mu ia, anjaha pardiateihonon-Mu ia?
- ¹⁸ Iparayak Ham do ia ganup sogod, anjaha ganup
tongkin ilajou Ham ia.
- ¹⁹ Sadiha dokah on, ase padaohon-Mu
panonggor-Mu humbangku, anjaha
paluahon-Mu ahu, ase sompat ahu
mamondut tijurhu?
- ²⁰ Anggo mardousa ahu, aha ma tarbahen ahu
dompok Ham, alo Sijaga manisia? Mase
ma ahu ibahen Ham gabe sitembakonmu?
Mase ma gabe siporsanon ahu, Bamu?
- ²¹ Mase ma lang isasap Ham panlanggaronku,
anjaha ibuat Ham hajahatonku? Ai
laho modom ma ahu hubagas tanoh;
pindahanmu ma ahu, tapi lang ijin be ahu.”

Sahap ni Si Bildad

Sintong do Uhum ni Naibata

- 8** ¹ Dob ai nini si Bildad na hun Sua ma
mambalosi,
- ² “Sadia dokah on nunutonmu sonai marsahap,
anjaha songon logou madoras parsahap ni
pamanganmu?

- ³ Mintor ra ma Naibata papeol uhum? Barang ra ma Pargogoh Na So Tarimbang in papeol hapintoron?
- ⁴ Anggo mardousa anakmu dompak-Si, jadi ihonahon ma bani sidea hajahaton ni sidea ai.
- ⁵ Anggo ra ho mangindahi Naibata, anjaha mangindo idop ni uhur ho humbani Pargogoh Na So Tarimbang in,
- ⁶ anggo pitah uhumu anjaha bonar, sai hehe do la manatap ho, pasuangono-Ni do use ianan ni hapintoronmu.
- ⁷ Age pe etek pamungkahanni, sai banggal tumang do hadoharonmu bani ujungni.
- ⁸ Mahua papangkei ma sundut na basaia, anjaha pardiateihon ma podah na jumpah ompung ni sidea.
- ⁹ Ai jolma sinantuari do hita, seng dong na binotohta, anjaha halinoh tumang do ari-arinta i tanoh on.
- ¹⁰ Ai lang sidea do siajari ho, na patugahkon bam, anjaha na manluarhon hata podah hun bagas uhur ni sidea?
- ¹¹ Tumaram ma tubuh arung-arung, anggo lang adong paya-paya? Mintor tarbahen ma dulas ganjang poyon-poyon bah, anggo seng dong bah?

- ¹² Sanggah martumbor ope, lape isabi, tapi melus do ai, parlobei humbani poyon-poyon na legan.
- ¹³ Sonai do dalan ni ganup na mangkalupahon Naibata, maningon magou do pangarapan ni halak parjahat.
- ¹⁴ Mapuntar do hatengeran ni uhurni, doskon asar ni lawah-lawah do pos ni uhurni.
- ¹⁵ Mangunsandei ia bani rumahni, hape seng tahan jongjong ia, marsijoloman ia hujai, hape seng totap.
- ¹⁶ Gok gotah do ia namin ibagas milas ni mata ni ari, anjaha manggargar dangkahni i babou ni pohonni.
- ¹⁷ Manjulur do andorni bani timbunan batu, anjaha itolpusi longkit-longkit ni batu.
- ¹⁸ Tapi anggo niruntun ia humbani iananni, parnalangonni ai ma ia, nini, 'Seng onga huidah ho.'
- ¹⁹ Tonggor ma, ai ma olob-olob ni goluhni, anjaha humbani orbuk ai martumbor use halak na legan.
- ²⁰ Tonggor ma, seng tumaram ambungkonon ni Naibata halak na daulat maruhur, barang tumpakon-Ni tangan ni parjahat.
- ²¹ Gok tawa do use pamanganmu bahenon-Ni, anjaha bibirmu gok parolob-oloban.

²² Pailaon-Ni do halak na marsogam ni uhur bam,
anjaha boiskonon-Ni do lampolampo ni
parjahat.”

Balos ni si Job Bani si Bildad

Seng dong Atap Ise na Pintor i Lobei ni Naibata

- 9** ¹ Dob ai nini si Job ma mambalosi,
² “Torang do hubotoh, sintong do sonai; anjaha
sonaha ma tarbahenjolma in pintor i lobei
ni Naibata?
- ³ Anggo mardabuh-dabuh uhurni pakon-Si,
humbani na saribu, sahali pe lang mangasup
ia mambalosi-Si.
- ⁴ Paruhur na pentar do la, anjaha surung Bani
hagogohon. Ise ma na pahengkeng uhurni
dompak-Si lanjar boi marsonang-sonang?
- ⁵ Ia do na paosor dolog, seng ibagas botoh ni
sidea. Ia do na pabalikkon ai ibagas ringis-Ni.
- ⁶ Ia do na mambahen rebad tanoh on humbani
iananni, meleng-eleng tiang partunggulni.
- ⁷ Ia do na marsahap hubani mata ni ari gabe
seng poltak, anjaha ihurung do bintang
marhasoman token.
- ⁸ Ia sandiri do na paherbang langit, anjaha
mardalan la i atas gilumbang ni laut.

- ⁹ Ia do na manjadihon bintang pariama pakon
bintang sidongdong, bintang hala pakon
bintang pardangsina.
- ¹⁰ Ia do na mambahen habanggalon na so
tardadap, ampa tanda halongangan na so
tarbilang.
- ¹¹ Tonggor ma, la montas hun lambungku, tapi
lang huidah, la lopus hun lobeihu, tapi lang
huahapkon.
- ¹² Anggo la manontapkon, ise ma na boi
mangolati? Ise ma na pag mangkatahon
Bani, 'Aha do na binahe-Mu in?'
- ¹³ Seng ra Naibata pahombunkon ringis-Ni,
manombah do age siurupi si Rahab Bani.
- ¹⁴ Sonaha ma boi balosanku la, tarpilihi ahu ma
hata sibaloskononku Bani?
- ¹⁵ Age pe pintor ahu, seng tarbalosi ahu la,
maningon mangindo holong ni atei ahu
humbani Siuhum ahu.
- ¹⁶ Anggo dilo-dilo ahu, anjaha itangihon ahu,
lanjar seng iparhatongon uhurhu, na dob
tinangihon-Ni ai sorangku.
- ¹⁷ Ai iropuki do ahu marhitei habahaba, anjaha
ipabuei ugahku seng marhala;
- ¹⁸ seng ilopas ahu pahosahkon, tapi ibosuri do
ahu bani hapaeton.

- ¹⁹ Anggo pasal sigogohan do, la ma ai;
anggo pasal uhum do, ise ma na boi
mangaduhon-Si?
- ²⁰ Age pintor ahu, pamanganku sandiri do
mamapai ahu; age pe lang marsalah ahu,
dong do tong na simbei tuduhkonon-Ni.
- ²¹ Seng dong pamandangan ahu; seng masuk
hira bangku hosahku, sobalan ma ahu bani
goluh on.
- ²² Dob do hape ganup, halani ai ningku do,
'Rap imasabkon do na so marpipot ampa
siparjahat.'
- ²³ Anggo sompong lonsing-lonsing-Ni mamunuh,
tawa do la mangidah pandoleian ni jolma na
so marpipot.
- ²⁴ Domma iondoskon tanoh on bani tangan ni
parjahat, ipapitung do mata ni panguhumni;
anggo seng la mambahen ai, tor ise ma?
- ²⁵ Dorasan do ari-aringku salpu humbani
siparlintun; habang do ai, seng sampang
mangidah hadoharon.
- ²⁶ Podas do ai salpu songon solu hotang, songon
haluhuy na manangkis sorohanni.
- ²⁷ Anggo huhatahon, 'Hulupahon ma
hasombuhonku, hupadaoh ma posi ni
bohingku, minar ma bohingku!'

- ²⁸ Mintor bajoraon ma ahu halani sitarononku,
halani hubotoh, seng tumaram seng
marpipot ahu hatahononmu.
- ²⁹ Siparsalah do ahu, mase ma anggo sonai
nunutonku loja soya-soya?
- ³⁰ Age pe huparidi diringku bani salju, anjaha
hupaborsih tanganku marhitei sabun,
- ³¹ usobkonon-Ni do ahu hubagas rawang, anjaha
magigi pakeianku mangidah ahu.
- ³² Ai sengjolma la songon ahu, gabe tarbalosi ahu
la, gabe rap hanami laho hu paruhuman.
- ³³ Seng dong sipanolahi i tongah-tongahnami, na
mangampeihon tanganni bennami na dua.
- ³⁴ Sai ipadaoh ma namin humbangku simambu-
Ni, anjaha songgot-songgot-Ni ulang
ipambibiari ahu,
- ³⁵ ase boi ahu marsahap Bani, seng pala mabiar;
tapi seng sonai ope ahu nuan, lang tenger
uhurhu.

**Balos ni si Job hubani si Bildad: Aha do Nani
Sura-sura ni Naibata ase Buei Sitaronon?**

- 10** ¹ “Domma sobalan ahu bani hagoluhan on;
hupapuas ma tangis-tangisku, marsahap
ibagas hapaeton ni tonduyhu.
- ² Hatahononku ma hubani Naibata, ‘Ulang ma
papai Ham ahu! Pabotohkon Ham ma
bangku, mase ma gilaan-Mu ahu?’

- ³ Ai marguna do Bamu, ase mangarsik-arsik Ham,
ase ibuang Ham jadi-jadian ni tangan-Mu,
tapi itumpaki Ham riah ni halak parjahat?
- ⁴ Tor parmata songonjol ma Ham? Tor songon
pangidah ni manisias do pangidang-Mu?
- ⁵ Tor songon ari-ari ni manisiasimatei-matei ma
ari-ari-Mu, barang bilangan ni tahunmu
doskon tahun ni sada halak dalahi,
- ⁶ ase sonai pangindahi-Mu bani salahku, anjaha
ipareksai Ham dousangu,
- ⁷ age pe domma ibotoh Ham hinan seng parjahat
ahu, anjaha seng dong halak na boi
paluahkon ahu hun tangan-Mu?
- ⁸ Domma itompa anjaha ijadihon tangan-Mu
ahu, gok jengesni, tapi sonari sihol
parsedaon-Mu ahu?
- ⁹ Dingat Ham ma na dob binahen-Mu ai ahu
humbani tanoh halampung, anjaha
paulakon-Mu ma ahu use gabe orbuk?
- ¹⁰ Ai lang domma iuseihon Ham ahu songon
dadih, anjaha songon dadih nialhotan ahu
ibahen Ham?
- ¹¹ Ihioui Ham do ahu bani hulingkuling pakon
sibuk, anjaha isirat Ham ahu marhitei
holiholi ampa urat-urat.
- ¹² Ilayak-layakkon Ham do bangku goluh ampa
idop ni uhur, anjaha iramotkon panatap-Mu
do ahu.

- ¹³ Tapi iponopkon Ham do on ibagas uhur-Mu,
hubotoh sonon do sura-sura-Mu:
- ¹⁴ Anggo mardousa ahu, iingat Ham do ai,
anjaha seng paluahon-Mu ahu humbani
hajahatonkai.
- ¹⁵ Anggo marsalah ahu, magou ma ahu! Anggo
pintor ahu, seng tarpadurgak ahu ulungku,
ai domma gok habadoron ahu, paidah-idah
sitarononku.
- ¹⁶ Porini pe na padurgak, mintor dorabon-Mu
do ahu songon singa, anjaha ulakan-Mu do
patuduhkon kuasa-Mu bangku.
- ¹⁷ Mardapot-dapot saksi-Mu idilo Ham
manalahkon ahu, anjaha ipaganda Ham
ringis-Mu dompak ahu; iparoh Ham do bala
mandorab ahu.
- ¹⁸ Mase ma padaraton-Mu ahu hun partapaan?
Mase ma lang mintor rotap hosahku, ase
ulang dong mata na mangidah ahu?
- ¹⁹ Doskon halak na so onnga adong do ahu, na
mintor iusung hun partapaan hu tanoman.
- ²⁰ Ai lang otik do ari-ari ni goluhku? Mahua
paturut Ham ma ahu, ase boi marmalas ni
uhur ahu tongkin,
- ²¹ paima laho ahu, anjaha seng sinmulak-mulak
be, hu tanoh na golap anjaha na lotir,
- ²² hu nagori na lotir anjaha na geor, na liar ijai
doskon na golap.”

Marsahap si Sopar

**Ipaunduk si Job ma namin Dirini i
Lobei ni Naibata Sibotoh Haganup**

- 11** ¹ Dob ai nini si Sopar, halak Naama ai ma mambalosi,
² “Mintor lang ma balosan halak sibuei sahap, anjaha tumaram ma pintor halak siher tep bibir?
³ Mintor boi ma sahap-sahapmin pasip halak, anjaha manrehei hape seng dong na pabador ho?
⁴ Nim do, ‘Pitah do podahku, anjaha bujur do ahu i lobei-lobei-Mu.’
⁵ Tapi tene, ambit marsahap ma namin Naibata, ibuha namin pamangan-Ni dompak ho,
⁶ anjaha ipatugah bam rusia ni hapentaran-Ni, ai ipaganda ai do pangarusion. Botoh ma, na marpangulaki ope uhur ni Naibata bam pasal hajahatonmu.
⁷ Mintor tardadap ho ma rusia ni Naibata? Mintor tararusi ho ma hagokdearon ni Pargogoh Na So Tarimbang in?
⁸ Gijangan do ai ase langit, aha ma boi ibahen ho? Bagasan do ai ase nagori toruh, aha ma ibotoh ho?

- ⁹ Ganjangan do sibar-sibar-Ni humbani tanoh on,
anjaha bolagan humbani laut.
- ¹⁰ Anggo montas la laho manrantei, anjaha
idilo hu paruhuman, ise ma na boi
manlanglangi-Si?
- ¹¹ Ai itandai do halak sipakulah-kulah, ididah
hajahaton, seng pala lobei ipareksa.
- ¹² Ai boi do halak na lontong dapotan uhur, atap
anak ni halode salih gabejolma?
- ¹³ Anggo ipasirsir ho uhurmu, anjaha ipaherbang
ho tanganmu dompak-Si
- ¹⁴ (anggo adong hajahaton ibagas
tanganmu, padaoh ma ai, anjaha
ulang paturut hagedukon marianan ibagas
lampolampomu),
- ¹⁵ ijai ma tarbahen ho padirgak bohimu, seng
pala bador; totap ma uhurmu, anjaha seng
marhabiaran.
- ¹⁶ Lupa ma ho bani sitarononmu; songon bah na
dob salpu mabaor, pardingatmu ijai.
- ¹⁷ Jadi siangan ma goluhmu humbani tongah ari,
hagolapanni ai, songon golap sogod-sogod
hansa.
- ¹⁸ Martenger ni uhur ma ho, ai adong do
pangarapanmu; dob mangkawah ho inggot,
sonang ma ho modom.

- ¹⁹ Patibalonmu ma dirimu, seng dong na mambibiari; anjaha buei ma halak na mangindahi holong ni atei bam.
- ²⁰ Tapi horlom do mata ni halak parjahat, seng dong haporusanni; sada mando pangarapanni, ai ma rotap ni hosahni.

Balos ni si Job

- 12** ¹ Dob ai Nini si Job ma Mambalosi,
² “Nai ma tongon, hanima ma tongon na sintong, anjaha rap pakon hanima masab hapentaran.
- ³ Ahu pe paruhur do usih songon hanima; seng pala talu ahu marimbang hanima. Ise ma na so mambotoh na sonai ai?
- ⁴ Gabe sipartatawaan do ahu bani huan-kuanku, ahu sidilo Naibata, na bonar anjaha na daulat maruhur.
- ⁵ Mapas do tongon uhur ni halak na mardohar mangidah halak na masombuh, anjaha ijullakkon ope halak na sihol tarlandit naheini.
- ⁶ Mardamei-damei do lampolampo ni halak panrampok, anjaha sonang do halak na pagajag-gajag ringis ni Naibata, na mamboan naibatani ibagas tanganni.

- ⁷ Mahua sungkun ma namin pinahan, ase
sidea mangajari ho; manuk-manuk na i
awang-awang, ase sidea patugahkon bam.
- ⁸ Atap parsahapkon namin binatang na i tanoh,
ase ai mangajari ho, ampa dengke na ibagas
laut patorangkon ai bam.
- ⁹ Ise ma na so mambotoh pasal haganupan ai,
paboa tangan ni Jahowa do sijadihon ai?
- ¹⁰ Ibagas tangan-Ni do hosah ni sagala na
manggoluh, pakon tonduy ni sagala jolma.
- ¹¹ Ai lang pinggol do na mananda hata, anjaha
langit-langit mandai sipanganon?
- ¹² Bani halak na matua do jumpah hapentaran,
anjaha pangarusion bani halak siganjang
umur.
- ¹³ Bani Naibata do hapentaran pakon hagogohon,
Bani do uhur pakon pangarusion.
- ¹⁴ Tonggor ma, anggo la manrumbakkon, seng
be tarpauli, anggo itutup sada halak, ise pe
lang na boi paluahkon.
- ¹⁵ Tonggor ma, anggo ijolomi bah, marsik do,
anjaha anggo ipaluah ai, maseda tanoh
ibahen.
- ¹⁶ Bani do hagogohon pakon hapentaran,
la do sibotoh halak na kahou ampa na
pakahouhon.
- ¹⁷ Ipalaho do parkuasa ni harajaon mangambe,
anjaha maoto panguhum ibahen.

- ¹⁸ Itanggali do gari ni raja-raja, anjaha iranteihon
do rantei bani binongei ni sidea.
- ¹⁹ Ipalaho do malim mangambe, anjaha
idabuhkan siparkuasa.
- ²⁰ Ipadaoh do hapandeian marsahap humbani
halak na hinatengeran, anjaha ibuat do uhur
humbani halak na matua.
- ²¹ Iuseihon do hahirion bani na sangap-sangap,
anjaha itanggali do gondit ni halak na gogoh.
- ²² Ipatalar do na ponop ibagas hagolapan, anjaha
iboan hubani haliharon na lotir ni na lotir.
- ²³ Ipatimbul do bangsa-bangsa, dob ai iagou use;
ipararat bangsa-bangsa, dob ai ipalaho use.
- ²⁴ Ibuat do uhur humbani pambobai ni bangsa i
tanoh on, anjaha ipakahou sidea i halimisan
na so adong dalan.
- ²⁵ Dadap-dadap do sidea ibagas hagolapan na
lang marhaliharon, anjaha rebad-rebad
sidea songon halak na mabuk.

Balos ni si Job hubani si Sopar

Iondoskon si Job Langkahni bani Naibata

13 ¹ “Tonggor ma, haganup ai domma ididah
matangku, domma ibogei pinggolhu, anjaha
iarusi do ai.

² Aha na binotohnima, ai pe hubotoh do, seng
taluh ahu marimbang hanima.

- ³ Tapi sihol do ahu marsahap pakon Pargogoh Na
So Tarimbang in, anjaha sihol do uhurhu
marsisungkunan pakon Naibata.
- ⁴ Anggo hanima, ladung do ibahen hanima
palemes-lemeskon, panambari na so
marguna do hanima ganup.
- ⁵ Dearan hanima namin sip, ai ma gabe
hapentaran bannima.
- ⁶ Tangar hanima ma hatoranganku, anjaha
pardiateihon hanima ma panlawanan ni
bibirhu.
- ⁷ Mintor sahapkononnima ma na so sintong, laho
mangapiti Naibata? Anjaha hatahononnima
ma sipaoto-oto, laho mangkombari-Si?
- ⁸ Sihol hampit Naibata hanima, anjaha hanima
marnagodangkon pahara-Ni?
- ⁹ Mintor tumaram ma sonang hanima anggo
ipareksa hanima? Barang tartipu hanima ma
la, songon sada halak na manipu hasomanni
jolma?
- ¹⁰ Borat do panguhum-Ni bannima, anggo
songon sipangapit-apiti hanima.
- ¹¹ Mintor lang ma songgotan ni hamuliaon-Ni
hanima, anjaha biar dompak-Si manjombai
hanima?
- ¹² Hata sipaingatnima ai, doskon abuan do ai;
partahanannima ai, partahanan tanoh
halampung.

- ¹³ Sip ma hanima anjaha palopas hanima ma ahu marsahap; paturut roh bangku atap aha pe ai.
- ¹⁴ Sihol boanonku do sibukku i holangkolang ni iponku, anjaha nahkononku tonduyhu ibagas tanganku.
- ¹⁵ Tonggor ma, sihol bunuhon-Ni do ahu, seng dong siarapkononku; tapi sihol patidakonku do dalanku hu lobei-Ni.
- ¹⁶ Age on hatuahon do bangku, na so bolas ai halak parjahat roh hu lobei-Ni.
- ¹⁷ Tangar ma hatangku pangkei-pangkei, anjaha itangihon pinggolnima ma hatoranganku.
- ¹⁸ Tonggor ma, domma sirsir hinan hatoranganku, anjaha hubotoh pintoran-Ni do ahu.
- ¹⁹ Mintor adong ma na pag mangaduhon ahu, ase sip namin ahu anjaha matei?
- ²⁰ Pitah na dua pahara on ulang bahen Ham bangku, jadi seng ponopkononku be bohingku hun lobei ni bohi-Mu:
- ²¹ Padaoh Ham ma tangan-Mu humbangku, anjaha ulang ma hirjaton ahu ibahen songgot-songgot-Mu.
- ²² Dob ai dilo Ham ma ahu, sai balosanku do; atap lopas Ham ahu marsahap, anjaha balosi Ham ahu.

- ²³ Sadiha ma gakni buei ni hajahatonku ampa dousangku? Pabotohkon Ham ma bangku panlanggaronku ampa dousangku.
- ²⁴ Mase ma ponopkonon-Mu bohi-Mu, anjaha ihira Ham ahu songon imbang-Mu?
- ²⁵ Sihol songgoton-Mu ope sada bulung ni hayu na matangtang, anjaha pardakdakon-Mu sada anggala ni omei na dob masak,
- ²⁶ ase ipaporsankon Ham bangku na mapaet, anjaha manginsonoh bangku hajahaton ni haposoonku,
- ²⁷ ase ibayangkon Ham naheihu, itulimati Ham ganup dalanku, anjaha ibahen Ham ambat-ambat i lobei ni tapak-tapak ni naheihu?
- ²⁸ Age pe domma bois diri songon hayu na burburon, anjaha songon hiou na pinangan ni ngitngit?”

Sambat ni Balos ni si Job hubani si Sopar

Dob Matei Seng Dong be Pangarapan

- 14** ¹ “Ia jolma na dob tubuh humbani naboru, otik do umurni, tapi buei do hasunsahanni.
- ² Songon bunga-bunga do ia pondang, dob ai melus, songon halinoh do parmagouni, seng dong hatotaponni.

- ³ Hape pala ma tatapon-Mu jolma na sonai ai,
anjaha iboan Ham ia hu paruhuman, hu
lobei-Mu?
- ⁴ Ise ma na boi parohkon sada halak na pansing
humbani na mabutak? Sahalak pe lang
dong.
- ⁵ Halani domma binuhul ari-arini, anjaha
itotapkon Ham bilangan ni bulanni, ibahen
Ham balogni, na so bulih sidiparanni,
- ⁶ padaoh Ham ma panonggor-Mu hun bani,
ase jumpahan hasonangan ia, ase
tarhamalaskonsi ari-arini songon halak
gajian.
- ⁷ Adong ope siarapkonon bani hayu, age domma
iroboh, martumbor do use, anjaha seng
maronti martunas.
- ⁸ Age pe domma matua uratni ibagas tanoh,
anjaha matei pe tutuhoni,
- ⁹ mintor martunas do use dobkonsi hona bah,
anjaha manranting use songon na baru
sinuan.
- ¹⁰ Tapi mateihonsi jolma in, lanjar tibal sonin,
anjaha rotapkonsi hosahni, huja be ia?
- ¹¹ Songon bah na manguap hun tao, songon
binanga na marsik anjaha horah dobni.
- ¹² Sonai ma modom manisias, seng be puho,
sadokah adong ope langit seng bodak be ia,
atap puho humbani na modom.

- ¹³ Ambit ra ma namin Ham mamonopkon ahu i nagori toruh, iondingkon Ham ahu paima mombun ringis-Mu, anjaha ibahen Ham namin buhulni bangku, dob ai mardingat Ham use bangku.
- ¹⁴ Anggo matei sada jolma, tumaram ma ia manggoluh? Ambit tongon sonai, marpangarapan do ahu bani ganup ari-ari ni paruntolonku, paima roh ari ni haluahonku.
- ¹⁵ Anggo mardilo Ham mintor balosanku do Ham, tontu siholan Ham bani jadi-jadian ni tangan-Mu.
- ¹⁶ Jadi bilangan-Mu ma langkah-langkahku, tapi seng pardiateihonon-Mu dousanku.
- ¹⁷ Domma tartokan panlanggaronku ibagas ranjut, anjaha irungkub Ham do hajahatonku.
- ¹⁸ Tapi maningon marumbak do age dolog, anjaha dolog batu mosor humbani iananni,
- ¹⁹ mangkaturtur batu ibahen bah, anjaha bah marbanggal mangayubkon tanoh; sonai do iparseda Ham pangarapan ni jolma in.
- ²⁰ Ipatunduk Ham do ia ronsi sadokah ni dokahni, gabe salpu ia, ipaubah Ham do bohini, dob ai ipalaho Ham ia.
- ²¹ Marmulia pe anakni, seng ipabotoh-botoh, gabe madorun pe sidea, seng iahapkon.

²² Pitah borit ni angkulani mando iahapkon, pasal ia tumang mando itangipkon tonduyni.”

Marsahap si Elipas

Ipartahankon, Maningon Magou do Halak na Ilat

15 ¹ Dob ai nini si Elipas, halak Teman ai ma mambalosi,

² “Patut ma sada halak na maruhur marbalos marhitei habotohon na soya-soya, anjaha ipaburnang dirini marhitei logou na hun purba?

³ Patut ma maminsang ia marhitei parsahapan na so marguna, atap marhitei hata na so marhagogohon?

⁴ Tapi anggo ho, ilangkon ho do biar dompak Naibata, anjaha iorui ho tonggo i lobei ni Naibata.

⁵ Ai hajahatonmu sandiri do mangajari pamanganmu, anjaha ipilih ho do hata ni halak na pantas.

⁶ Pamanganmu sandiri manguhum ho, seng ahu; bibirmu sandiri manaksii dompak ho.

⁷ Ai ho dojolma na parlobei tubuh? Barang parlobei do ho jadi humbani dolog-dolog?

⁸ Ongga do ho manangi-nangi i karapatan ni Naibata, gabe marhiteihon ai marhapentaran ho?

- ⁹ Aha ma na binotohmu, na so binotohnami? Aha
ma na niarusanmu, na so niarusannami?
- ¹⁰ Bennami pe dong do halak na dob ubanon
anjaha sayur matua, torasan humbani
bapamu.
- ¹¹ Hurang maharga do iahap ho pangapohon ni
Naibata, barang hata na lamlam na dob
ondos bam?
- ¹² Mase ma ipaboan-boan uhurmu ho, anjaha
mase ma jawar-jawar pangkawahmu,
- ¹³ gabe pag ho marringis dampak Naibata, anjaha
sonai toal ni parsahap ni pamanganmu?
- ¹⁴ Aha majolma manisiasa boi borsih ia? Barang
tubuh ni sada naboru, gabe boi bonar ia?
- ¹⁵ Tonggor ma, seng marhatengeran Naibata bani
halak na pansing na rap pakon-Si, anjaha
langit ai pe seng pansing bani panonggor-Ni.
- ¹⁶ Lambin naha ma dampak sada halak paruhur
magou anjaha na masik-masik, jolma na
manibur hajahaton songon bah?
- ¹⁷ Sihol patuduhonku do bam, tangihon ma ahu,
anjaha barang aha na dob huidah, sihol do
baritahononku,
- ¹⁸ ai ma na dob ipatugah halak na pentar, na dob
binogeini humbani ompung ni sidea, lang
ihurang-hurangi,

- ¹⁹ bani sidea tumang iondoskon tanoh in, anjaha
seng dong halak partoloh manginsolat i
tongah-tongah ni sidea.
- ²⁰ Sadokah manggoluh halak parjahat parngit do
pandageianni, manipat bilangan ni tahun na
dob binuhul bani siunsagakon gogoh.
- ²¹ Sora songgot-songgot maraloling tong ibagas
pinggolni; sanggah hadoharonni roh
pangagou bani.
- ²² Seng ihaporsayai, paboa tarbahensi ope
maluah hun hagolapan, ai domma
itontuhon, sipanganon ni podang mando ia.
- ²³ Sai madou-adou do ia mangindahi sipanganon
atap ija do ai. Ai ibotoh, domma sirsir bani
ari hagolapan.
- ²⁴ Pusok uhurni ibahen hasunsahan ampa
hasosakan; idorab do ia, songon raja na dob
gopas hu parporangan.
- ²⁵ Halani na dob pinagostongni ai tanganni
mangimbang Naibata, anjaha oga-oga ia
dompak Pargogoh Na So Tarimbang ai,
- ²⁶ marpojong ia dompak-Si marhitei borgok na
durgak, marhitei gantar na hapal latapni.
- ²⁷ Halani domma iminaki bohini, anjaha inahkon
taboh-taboh bani hae-haeni,
- ²⁸ anjaha marianan ia ibagas huta na dob
tarulang, ibagas rumah na so patut siianan,
na dob tinontuhon sireongkononkon;

- ²⁹ seng anjai bayak ia, seng anjai totap
haadonganni, anjaha seng anjai ganda
artani i tanoh on.
- ³⁰ Seng anjai maluah ia humbani hagolapan,
melus do tumborni ibahen dilah ni apuy,
anjaha mapurpur do bungani ibahen logou.
- ³¹ Ulang ma marhatengeran ia bani na lumei,
laho paoto-otohon dirini, ai sisoya-soya do
upah ni pambahenanni ai.
- ³² Seng jumpah ope panorangni domma bois ia,
anjaha seng ra be ratah dangkahni.
- ³³ Songon hayu anggur mardabuhan buahni,
seng mabei ope, anjaha songon hayu jetun
mangkarurus bungani.
- ³⁴ Ai seng anjai manggargar ginompar ni halak
silupahon Naibata, anjaha boiskonon ni
apuy do lampolampo ni halak sijalo sisip.
- ³⁵ Boratan rumah do sidea bani hangaluton,
anjaha itubuhkon hamagouan, ijullak-
jullakkon uhur ni sidea do sipaoto-oto.”

**Balos ni si Job. Si Job Martenger ni Uhur bani
Naibata, Age Seng Dong Pangarapanni**

16 ¹ Dob ai nini si Job ma mambalosi,
² “Domma buei hubogei parsahapan na
sonai, pangapoh sigandai hasunsahan do
hanima.

- ³ Sadihari pe marujung hata sisoya-soya in? Aha
gakni mangonjar uhurmu marbalos sonai
bangku?
- ⁴ Ahu pe tarbahren do marhata-hata songon
hania, anggo songon partibalhon
partibalnima; buei hata-hata na mantin
hatahononku bannima, anjaha mupir-upir
ulungku bahenonku bannima.
- ⁵ Tarbahren ahu do patenger uhurnima marhitei
pamanganku, anjaha apoh-apoh ni bibirhu
palamlam pangahapnima.
- ⁶ Anggo marsahapi ahu, seng lambin lamlamni
pangahapanku, anjaha anggo sip ahu,
lambin hampungni do?
- ⁷ Tapi sonari, domma ibuat Naibata ganup gogoh
humbangu, maseda ganup sindohorhu.
- ⁸ Idorab ham do ahu, gabe hasaksian do ai
dompok ahu, iaduhon hamerungonku do
ahu songon na boi idahon bani bohingku.
- ⁹ Iparrigat anjaha imunsuhi ringis-Ni do ahu,
harat-harat ipon la dompak ahu, anjaha
imbangku pamarot panonggor dompak ahu.
- ¹⁰ Ipangangang halak do babahni dompak ahu,
itompas sidea huyumku marhasoman
panreheion, sauhur sidea mangimbang ahu.
- ¹¹ Iondoskon Naibata do ahu bani halak
pargeduk, anjaha ipadas do ahu hubagas
tangan ni halak parjahat.

- ¹² Sonang hinan do ahu, tapi sompong do
iropukkon ahu; itangkap do borgokku
anjaha itompaskon, anjaha ipajongjong do
ahu bahen panonjolanni.
- ¹³ Marngongos-ngongos do sior-Ni hun
lambungku, anjaha seng maralang-alangan
la manolpus piah-piahku; iuseihon do
pogungku hu tanoh.
- ¹⁴ Martambah-tambah do panluhai-Ni bangku,
anjaha idorab do ahu songon pandorab ni
puanglima.
- ¹⁵ Domma husorungkon hiou bani angkulangku,
anjaha domma hutibalhon gogohku bani
orbuk.
- ¹⁶ Bosol do bohingku halani tangis-tangis, anjaha
golap do pangidah ni matangku,
- ¹⁷ age pe seng dong longkot hajahaton ibagas
tanganku, anjaha pitah do partonggongku.
- ¹⁸ O ale tanoh, ulang rungkub darohku,
anjaha ulang ma jumpah parsaranan bani
doruh-doruhku.
- ¹⁹ Gari nuan, tonggor ma, i surga do saksingku,
anjaha na mangapiti ahu i nagori atas.
- ²⁰ Irehei hasoman-hasomanku do ahu; gok iluh
mangkawah do matangku dompak Naibata,
- ²¹ ase iapiti dalahi on i lobei ni Naibata, anjaha
ipintori halak on dompak hasomanni.

²² Halani lang piga tahun nari be, seng boi lang, dalananku dalan na so tarulaki be.”

Balos ni si Job Paduahalihon bani si Elipas

Seng Dong Siarapkononni humbani Goluh on

17 ¹ “Domma mandatei tonduyhu, domma mintop ari-aringku, domma ranggak tanoman bangku.

² Hape tong ope rehe-rehe bagianku, anjaha matangku manaron panreheion ni sidea.

³ Ham ma gabe jaminan bangku i lambung-Mu, anggo lang, ise ma na ra gabe jaminan bangku?

⁴ Ai domma ilingodkon Ham panimbangion humbani uhur ni sidea, halani ai seng tumaram pamonangon-Mu sidea.

⁵ Barang ise na mantahihon hasomanni laho mambuat untung, maningon horlom mata ni anakni holi.

⁶ Domma ibahen Ham ahu gabe umpama ni deba, gabe halak sitijuran ni deba do bohingku.

⁷ Horlom do matangku halani pusok ni uhurhu, anjaha ganup pagoringku doskon halinoh tumang.

⁸ Pala tarsonggot halak parpintor halani ai, anjaha sungkun-sungkun halak na so marpipot pasal halak parjahat.

- ⁹ Tapi tene tong do marsijoloman uhur ni
parpintor mandalani dalanni, lambin
tambah tene gogoh ni halak siborsih tangan.
- ¹⁰ Mulak-ulak pe hanima roh, halak na pentar
lang jumpah ahu i tongah-tongahnima.
- ¹¹ Domma sayop ari-aringku, domma seda
sura-surangku, pangindoan ni uhurhu.
- ¹² Sihol do bahenon ni sidea borngin gabe arian,
dohoran mando na siang humbani na golap.
- ¹³ Porini pe marpangarapan ahu hujai, nagori
toruh mando rumahku, anjaha ibagas
hagolapan huamparhon apeihu.
- ¹⁴ Dilo-dilo pe ahu hubani tanoman ai, ‘Bapa!’
Ampa hubani goya ai, ‘Inang!’ Atap, ‘Botou!’
- ¹⁵ ija ma pangarapan-pangarapankai? Anjaha
tuahkai, ise ma na boi patuduhkon ai?
- ¹⁶ Turun do ai rapkon ahu hu nagori toruh, rap do
hanami tuad hubagas orbuk.

Marsahap si Bildad Paduahalihon:

Maningon Magou do Halak Parjahat

18 ¹ Dob ai nini si Bildad na hun Sua ma
mambalosi,

- ² “Antigan pe ase marsaran ho na marsahapi
in? Pardiateihon, anjaha lopas ma hanami
sonari marsahap.

- ³ Mase ma songon pinahan hanami hiraon? Mase
ma songon halak na oto hanami iahap ho?
- ⁴ Ho sandiri do na marsirak dirimu ibagas
ringismu; tumaram ma tarulang tanoh
on halani ho, barang mosor dolog batu
humbani iananni?
- ⁵ Tongon tene, maningon mintop do parsuluhan
ni halak parjahat, anjaha seng marsinalsal
dilah ni apuyni.
- ⁶ Haliharon ai golap do ibagas lampolamponi,
anjaha suluhni i babouni mintop.
- ⁷ Hona sosak do langkah-langkahni na gogoh ai,
anjaha tahi-tahini mangonai hubani sandiri.
- ⁸ Naheini sandiri patongon-tongonkonsi hubagas
tirangkap, anjaha mardalan ia i babou ni
siding ni godung.
- ⁹ Hona gansip do tambihulni ibahen ragom,
anjaha siding manjorotisi.
- ¹⁰ Hona taon do siding bani ibagas tanoh, anjaha
hona baen godung i abalanni.
- ¹¹ Hamagouan do manonggotisi inggot, anjaha
ipardakdak ia bani langkah-langkahni.
- ¹² Sihol-siholan do hasedaon mambondutsi,
anjaha hamagouan ai tagang
mandabuhkonsi.
- ¹³ Domma bois ibahen naborit hulingkulingni,
anjaha bunga tubuh ni hamatean
mamangani pagorini.

- ¹⁴ Hona sarad do ia humbani lampolamponi,
hatengeran ni uhurni hinan, anjaha
tarboban hu lobei ni raja sipanonggoti.
- ¹⁵ Halak na legan mando marianan ibagas
lampolamponi, anjaha hirtah itirtirhon bani
iananni.
- ¹⁶ Horah do uratni hun toruh, anjaha melus
dangkahni hun datas.
- ¹⁷ Masab do pardingatan bani hun tanoh on,
anjaha seng hona singatan be goranni i
alaman.
- ¹⁸ Hona onjar do ia hun haliharon hu hagolapan,
anjaha ipabali do ia hun tanoh on.
- ¹⁹ Seng tubuhan anak barang pahompu ia i
tongah-tongah ni bangsani, sabonar seng
dong simasimani tading bani iananni.
- ²⁰ Songgotan tumang ma halak na maposo
mangidah ari hamagouanni ai, anjaha gobir
halak na matua.
- ²¹ Tongon, sonai ma masa bani rumah ni halak
pargeduk, anjaha sonai do ianan ni halak na
so mananda Naibata.”

Balos ni si Job na Paduahalihon bani si Bildad**Age pe Sonai, Totap do si
Job Marpangarapan bani Naibata**

- 19** ¹ Dob ai nini si Job ma mambalosi,
² “Sadiha dokah on sai pusokannima
uhurhu, anjaha ripukonnima ahu bani
hata-hata?
- ³ Domma sapuluh hali ahu isalig-saligi hanima,
anjaha seng maila hanima mangarsik-arsik
ahu.
- ⁴ Porini pe tongon ahu marsalah, ai lang
mangonai bangku do salahkai?
- ⁵ Atap sihol hanima mangunsagah dompak
ahu, anjaha papintoronnima ahu marhitei
panreheion?
- ⁶ Botoh hanima ma, Naibata do na paunduk ahu,
anjaha na mangkonahon siding-Ni bangku.
- ⁷ Tonggor ma, hudorakkon pe, ‘Pangkilangon!’
Tapi seng dong na mambalosi. Mangindo
pangurupion ahu, tapi seng dong na
mamintori.
- ⁸ Domma irungga dalanku, gabe seng tarbontas
ahu, anjaha irungkubkon do hagolapan bani
dalanku.

- ⁹ Domma itanggali humbangku hamuliaonku,
anjaha domma ibuat sortalingku humbani
ulungku.
- ¹⁰ Domma iripuki ahu bani haganup, magou
mando ahu, anjaha domma iurbat
pangarapanku songon pangurbat-Ni bani
sada hayu.
- ¹¹ Domma gajag ringis-Ni dompak ahu, anjaha
doskon munsuh-Ni do ahu ihira.
- ¹² Marsada uhur do marrohan bala-Ni, roh sidea
mandorab ahu, anjaha ihubu sidea do
lampolampongku inggot.
- ¹³ Seng huidah be saninangku, anjaha seng
itandai hasomanku magodang be ahu.
- ¹⁴ Seng itandai sindohorhu be ahu, anjaha
domma ihalupahon huan-kuanku ahu.
- ¹⁵ Juakjuakku naboru pe ihira do ahu songon
halak, songon halak na legan do ahu iahap
sidea.
- ¹⁶ Ia hudilo juakjuakku, seng ibalosi ahu,
maningon mangelek-elek mando ahu bani.
- ¹⁷ Oyakon do parinangonku manganggoh
hosahku, age saninangku manganggoh
baungku.
- ¹⁸ Gari dakdanak pe mandoruni ahu, anggo hehe
ahu ipambebeoti sidea do ahu.

- ¹⁹ Magigi do haganup huan-kuanku na sangkan mangidah ahu, anjaha halak na huhaholongi marbalik mangimbang ahu.
- ²⁰ Tardos bani holiholingku mando hulingkuling pakon sibukku, pitah siratanku mando na so hona.
- ²¹ Holong, holong ma uhurnima bangku, nasiam hasomanku, ai domma mangonai tangan ni Jahowa bangku.
- ²² Mase ipardakdak hanima ahu, songon pardakdak ni Naibata? anjaha seng sobalan ope hanima na mangarsik ahu ai?
- ²³ Ambit isuratkon ma namin hatangkai, anjaha iuhir ibagas pustaha.
- ²⁴ Anjaha ilatapkon namin bani panurat bosi pakon simbora, bani dolog batu bahen pardingatan sadokah ni dokahni.
- ²⁵ Tapi torang do hubotoh, manggoluh do Sipagoluh ahu, anjaha la parpudi jongjong i atas orbuk.
- ²⁶ Anjaha dobkonsi malantur hulingkulingkon, anjaha tanggal ahu humbani dagingku, idahonku ma Naibata.
- ²⁷ Tongon, ahu sandiri ma mangidah-Si gabe hatuahonku, matangku sandiri mangidah-Si, seng halak na legan. Itutung-tutung piah-piahku ibagas diringku halani siholni.

- ²⁸ Anggo ihatahon hanima, ‘Sonaha ma bahenonta mardakdaksi, anjaha padapot bonsir ni pahara on bani?’
- ²⁹ Marhabiaran ma hanima bani podang, ai mangonai do ringis bani halak siparsalah, ase ibotoh hanima adong do hape Sipanguhum.”

Hata ni si Sopar na Paduahon:

Seng Dokah Hasangapon ni Halak na Ilat Podas do Magou

- 20** ¹ Dob ai nini si Sopar na hun Naama ma mambalosi,
- ² “Iojur pingkiranku do ahu marbalos, anjaha margilumbang do ai ibagas diringku.
- ³ Ai hubogei do pangajaran na pahirihon ahu, tapi marbalos do tonduy ai ibagas uhurhu, nini,
- ⁴ ‘Ai seng ibotoh ho, humbani sapari nari ope, singgan ni dongjolma inahkon i atas tanoh on,
- ⁵ paboa tongkin tumang do surak-surak ni halak parjahat, anjaha tongkin tumang malas ni uhur ni halak silupahon Naibata?’
- ⁶ Age pe ronsi langit naik gijang ni uhurni, anjaha uluni das bani hambun na i atas ai,

- ⁷ maningon masab do ia songon ginagatni
sandiri sadokah ni dokahni, halak na ongg
mangidahsi, mangkatahon, 'Ai ija do ia?'
- ⁸ Songon nipi do ia habang, gabe seng jumpah be;
masab do ia songon panonggoran borngin.
- ⁹ Mata na ongg mangidahsi, seng idahonni be
ia, anjaha iananni hinan pe seng idahonni
be ia.
- ¹⁰ Anakni pe maningon mangindo holong atei
ni halak na musil, anjaha tanganni sandiri
paulakkon na nirampokni.
- ¹¹ Age pe gok hagogohon hinan holiholini,
maningon tibal do ai holi rapkonsi ibagas
orbuk.
- ¹² Age pe tobu hajahaton ai ibagas pamanganni,
anjaha iponopkon ai i toruh ni dilahni,
- ¹³ isimpan pe ai, anjaha seng ra ia palahohon ai,
iongom-ongom pe ai ibagas pamanganni,
- ¹⁴ salih do na pinanganni ai ibagas boltokni, jadi
bisa ni ulog darih ibagas dirini.
- ¹⁵ Habayakon na dob binondutni ai, lang boi
lang utahkononni use, Naibata sandiri
padaratkon ai hun bagas boltokni.
- ¹⁶ Domma ionsop bisa ni ulog darih, gabe dilah ni
ulog darih mamunuhsi.
- ¹⁷ Seng bulih ia mangkamalaskon minak na buei,
barang manisan atap dadih na mabaor
songon bah.

- ¹⁸ Maningon paulakonni buah ni na
hinalojahonni, seng bulih bondutonni ai;
humbani untung ni partiga-tigaonni, seng
jumpahan malas ni uhur ia hunjai.
- ¹⁹ Halani na dob pinisatni anjaha ipaturutni
sonin halak na musil, anjaha na nirampasni
rumah, na so pinaulini.
- ²⁰ Ai seng ra sombuh uhur hautni ai, anjaha seng
tarpaluahsi dirini marhitei artani ai.
- ²¹ Haganup do ibangkuhon hisapni ai, halani ai
seng totap hauntunganni.
- ²² Age pe bayak tumang ia, sai tarsosak do ia,
anjaha mangonai do bani hamagouan na
gok.
- ²³ Laho manggoki boltokni ai, suruhon ni Naibata
do bani gajag ni ringis-Ni ai, anjaha iudankon
do ai bahen sipanganonni.
- ²⁴ Maluah pe ia humbani sinjata bosi, sai na
tolpuson ni sior tombaga do ia,
- ²⁵ mandarat do sior ai humbani gurungni, ujungni
ai mandarat humbani poguni; sogop do bani
hagobiron.
- ²⁶ Lotir ni na lotir ipasirsir mamboiskon artani;
apuy na so nipagara nijolma mambondutsi,
aha na teba ibagas lampolamponi bois
mosog.
- ²⁷ Patalaron ni langit ai do hajahatonni, anjaha
tanoh on jongjong mangimbangsi.

- ²⁸ Maningon bobanon ni halak do arta na ibagas rumahni, masab ganup bani ari panringison ni Naibata.
- ²⁹ Ai ma rupei ni halak parjahat humbani Naibata, tean-teanan na tinontuhon ni Naibata bani.

Balos ni si Job na Paduahalihon bani si Sopar:

**Songon na Totap do Idahon Hadoharon
ni Halak Silupahon Naibata**

- 21** ¹ Dob ai nini si Job ma mambalosi,
² “Tangi ma hanima bani hatangku, ai ma gabe pangapoh bangku hun bannima.
- ³ Sabar ma hanima, ase marsahap ahu, anggo salpu ma ahu marsahap, age pe nunut hanima manrehei.
- ⁴ Bani jolma do ahu na adu-adu ai? Mase ma lang unduk uhurhu?
- ⁵ Dompakkon hanima ma ahu, anjaha hirjat ma, anjaha songom hanima ma pamangannima.
- ⁶ Anggo hudingat ai, jadi gobir do ahu, manorgi ambulu ni angkulangku.
- ⁷ Mase ma manggoluh halak parjahat, das bani na sayur matua anjaha lambin margogoh?
- ⁸ Marsonang-sonang dakdanakni i lambungni, anjaha sambuh paidah-idah ginomparni.

- ⁹ Marsonang-sonang do rumah ni sidea, seng marhabiaran, anjaha seng onnga mangonai simambu ni Naibata bani sidea.
- ¹⁰ Manggargar jonggini, jadi-jadi maranaki lombuni, seng onnga molei.
- ¹¹ Isuruh sidea anakni mardalani doskon hulanan ni biribiri, anjaha manortor-nortori anakni.
- ¹² Mandoding sidea marpangiring gonrang ampa husapi, anjaha marolob-olob sidea pabogei-bogei tarompit.
- ¹³ Manggoluh sidea ibagas na marsonang-sonang, anjaha ibagas damei tuad sidea hu nagori toruh.
- ¹⁴ Nini sidea dompak Naibata, 'Laho hun bennami! Seng marosuh hanami pabotoh-botoh dalan-Mu!
- ¹⁵ Ise ma la Pargogoh Na So Tarimbang in, ase pabalos-balosannami la? Anjaha aha ma untung bennami, anggo martonggoi hanami Bani?'
- ¹⁶ Tonggor ma, lang ibagas tangan ni sidea hadoharon ni sidea. Sai daoh ma humbangku pingkiran ni halak parjahat.
- ¹⁷ Ai gati do mintop suluh ni halak parjahat, anjaha sogop hamagouan bani sidea? Ai gati do iparoh Naibata hinamagou bani sidea ibagas Ringis-Ni?

- ¹⁸ Songon anggala do sidea i lobei ni alogo,
anjaha songon omei lapung pinurpurhon ni
habahaba.
- ¹⁹ Isimpan Naibata do papani bani ginompar ni
sidea. Sai bani sidea sandiri ma namin ai
ibalaskon Naibata, ase mangahap sidea ijai.
- ²⁰ Sai sompat ma namin ididah mata ni sidea
sandiri hamagouan ni sidea ai, sidea
sandiri ma namin minum humbani ringis ni
Pargogoh Na So Tarimbang in.
- ²¹ Ai ia ope na sari bani ginomparni, dob matei ia,
dobkonsi gok bilangan ni bulanni?
- ²² Aijolma do na mangajarhon parbinotohan
bani Naibata, la, siuhumi parnagori atas?
- ²³ Adong deba na matei ibagas hadoharon,
marsonang-sonang anjaha mardamei-
damei,
- ²⁴ sanggah gok taboh-taboh angkulani, anjaha
gok utok-utok ope holiholini.
- ²⁵ Adong deba nari matei marpusok ni uhur
tumang, seng onggamandai hasonangan.
- ²⁶ Hape rap sidea modom ibagas orbuk, anjaha
gilokni manrungkub sidea.
- ²⁷ Tonggor ma, hubotoh do pingkirannima in,
ampa sura-suranima na sihol mangodoh
ahu.

- ²⁸ Nini hanima, ‘Ija do nuan rumah ni halak siparkuasa, anjaha ija do rumah ni halak parjahat?’
- ²⁹ Naha, ai lang onga isungkun hanima halak sipardalan daoh, anjaha seng tarporsou hanima hasaksian ni sidea ai,
- ³⁰ paboa seng marmara halak parjahat bani ari hamagouan, anjaha bansah sidea bani ari pambalason?
- ³¹ Ise ma na mangkutuksi pasal parlahouni i lobeini? Anjaha ise ma na mambalaskon bani, domu hubani na binahenni ai?
- ³² Dob itaruhkon ia hu tanoman, ibahen do parjaga bani tanomanni.
- ³³ Lampot marradagan i atasni tanoh himpal ni habungan ai, ganup jolma mangihut hun pudini, anjaha halak na dob parlobei humbani seng tarhira.
- ³⁴ Mase ma nunutonnima mangapoh ahu? Ah, soyani in pangapohnima bangku, anjaha balosnima ai, na so sintong hansa ai.”

Sahap ni si Elipas na Patoluhalihon:

**Sai Ra ma namin Mubah Uhur ni si
Job humbani Dousani na Banggal ai**

22

¹ Dob ai nini si Elipas na hun Teman ma mambalosi,

- ² “Mintor dong ma nani guna ni jolma bani Naibata? Lang, bani dirini tumang do marguna halak na maruhur.
- ³ Mintor adong ma tumaram gunani bani Pargogoh Na So Tarimbang in, anggo pintor ho? Atap mintor adong ma untung-Ni hunjai, anggo ipadaulat ho parlahoumu?
- ⁴ Mintor tumaram ma pinsangon-Ni ho anggo halani hadaulatonmu, anjaha masuk hu paruhuman rap pakon ho?
- ⁵ Ai lang bangga do hajahatonmu? Anjaha lang marsibar hasalahanmu?
- ⁶ Ibuat ho do humbani saninamu sikoram lang marhala, anjaha ibuat ho do hiau ni halak na talag-talag.
- ⁷ Bani halak na mandatei seng ibere ho bah, anjaha seng ibere ho sipanganon bani halak na loheian.
- ⁸ Halak simada gogoh do simada tanoh in, anjaha halak na sangap do marianan ijai.
- ⁹ Lumei do halak na mabalu ipalaho ho, anjaha tangan ni halak na tading maetek iripuki ho.
- ¹⁰ Halani ai do ase hona taon siding inggot bam, anjaha mangonai bam songgot-songgot na so niarapkon,
- ¹¹ gabe golap sinalsalmu, gabe aha pe lang ididah ho, anjaha irungkub bah marbanggal ho.

- ¹² Ai lang i langit pardatas do marianan Naibata?
Tonggor ma, bintang sigijangan, gijangni in
ai!
- ¹³ Hape nim, 'Aha ma ipabotoh-botoh Naibata?
Boi ma la manguhum hun hambun na golap
ai?
- ¹⁴ Hambun do na manrungkubsi, gabe lang boi la
mangidah; mardalan bani lopah ni langit do
la.'
- ¹⁵ Sihol mandalani dalan sinabasaia do ho, na
dob nidalanan ni halak parjahat,
- ¹⁶ na niraseihon i lobei ni panorang ni sidea,
anjaha bah marbanggal mangayubkon
palasni?
- ¹⁷ Na mangkatahon bani Naibata, 'Laho hun
bennami!' ampa, 'Aha ma na boi bahenon
ni Pargogoh Na So Tarimbang in bennami?'
- ¹⁸ Hapeni namin, la do manggoki rumah ni sidea
bani na madear. Tapi daoh ma humbangku
pingkiran ni parjahat.
- ¹⁹ Idahon ni halak parpintor ma ai, gabe malas
uhurni, anjaha halak na so marpipot
manrehei sidea.
- ²⁰ Tongon, domma rasei hape imbangta, anjaha
tading-tadinganni bois ipangan apuy.
- ²¹ Mahua mardear ma ho pakon Naibata, ase
mardamei ho, marhitei ai gabe sogop
pasu-pasu bam.

- ²² Sai jalo ma pangajaran humbani pamangan-Ni,
anjaha parimbagaskon ma hata-Ni.
- ²³ Anggo martoruh ni uhur ho mulak
bani Pargogoh Na So Tarimbang in,
anjaha ipadaoh ho hagedukon ai hun
lampolampomu,
- ²⁴ anggo iambungkon ho omas ai hubagas orbuk,
ampa omas na hun Opir ai hu tongah-tongah
ni batu na ibagas binanga,
- ²⁵ anjaha anggo Pargogoh Na So Tarimbang in ma
gabe omas bam, pakon gabe arta pirak bam,
- ²⁶ tongon, gabe marmalas ni uhur ma ho ibagas
Pargogoh Na So Tarimbang in, anjaha boi
dirgak mangkawahkon Naibata.
- ²⁷ Martonggo ma ho hu Bani, jadi tangihonon-Ni
ma ho; anjaha galari ma bagah-bagahmu.
- ²⁸ Atap aha pe isurahon ho, jadi ma ai, anjaha na
lihar ma manondangi dalanmu ganup.
- ²⁹ Ai Naibata do patoruh sigijang uhur, tapi iurupi
do halak sitoruh uhur.
- ³⁰ Ia do paluahkon halak na so marpipot; anjaha
ho pe boi do maluah marhitei haborsihon ni
tanganmu.”

Balos ni si Job:**Isurahon si Job Martahankon Diri i Lobei ni Naibata**

- 23** ¹ Dob ai nini si Job ma mambalosi,
² 'Age sadari on adu-adu ope ahu, borat
do pandondon ni tangan-Ni bangku na
morong-orong on.
- ³ Ambit hubotoh ma namin, ija la boi
jumpahkononku, ambit boi ma namin das
ahu bani paratas-Ni.
- ⁴ Patibalonku ma hu lobei-Ni paharanku, anjaha
gok balos bahenonku pamanganku.
- ⁵ Sihol botohonku, naha balos-Ni bangku, anjaha
intehononku barang aha sihatahonon-Ni
bangku.
- ⁶ Mintor marhitei gogoh-Ni na banggal in
ma imbangon-Ni ahu? Lang tene, sai na
pardiateihonon-Ni do ahu.
- ⁷ Marsibalosan ma ijai halak parpintor pakon-Si,
gabe maluah ma ahu humbani Siuhum ahu
ronsi sadokah ni dokahni.
- ⁸ Tapi tonggor ma, porini laho ahu dompak
purba, seng ijai la; dompak hasundutan,
seng jumpah ahu la ijai;
- ⁹ hupindahi la i utara, seng dong huidah la, laho
ahu hu dangsina, seng ijai la.

- ¹⁰ Tapi ibotoh do dalan na hudalani, anjaha anggo iuji ahu, gabe doskon omas ahu luar.
- ¹¹ Totap do naheihu mardalan bani bokas-Ni, dalan-Ni do huihut-ihut, seng manlembang ahu.
- ¹² Seng onggah hulanggar titah na luar hun pamangan-Ni, huparimbagaskon do hata na luar hun pamangan-Ni.
- ¹³ Seng mubah-ubah la, ise ma na boi pagolingkon-Si? Aha na sinurahon-Ni, ai do ipasaud.
- ¹⁴ Sai na paujungon-Ni do na dob pinutuskon-Ni bangku, anjaha buei ope na sonai ai ibagas uhur-Ni.
- ¹⁵ Halani ai do ase songgotan ahu i lobei-Ni, anggo hupingkiri ai, hitir-hitir do ahu mangidah-Si.
- ¹⁶ Naibata do na patunduk uhurhu, anjaha Pargogoh Na So Tarimbang in do mangkirjati ahu.
- ¹⁷ Tapi seng magou jomba ahu binahen ni halotiron, barang halani hagolapon na manrungkub bohingku.”

Sambat ni Balos ni si Job:**Ipardiateihon Naibata do
Sitaronon ni Halak na Niarsik-arsik**

- 24** ¹ “Mase ma nani lang idalankon Pargogoh
Na So Tarimbang in panorang paruhuman?
Mase ma lang ididah na mananda-Si ari
panguhumon-Ni?
- ² Sai ipaosor halak parjahat do parbalogan,
irampas do hulanan ni pinahan anjaha
iparmahan songon rupeini.
- ³ lalai sidea do halode ni na tading maetek,
ipasikoramkon sidea lombu ni na mabalu.
- ⁴ Ijullakkon do halak na musil humbani dalan, na
madorun i nagori ai marsiponopkon dirini
bei.
- ⁵ Tonggor ma, songon halode harangan i
halimisan laho sidea bani horja ni sidea,
pindah-pindah bani sipanganon; humbani
tanoh hondot jumpahan sipanganon sidea
bani anakni.
- ⁶ Borngin isabi sidea juma ni halak, anjaha
buat-buat sidea hun pohon anggur ni
parjahat.
- ⁷ Talag, seng marhiou, ipapodom sidea dirini,
anjaha seng marsabing sidea bani borgoh ni
ari.

- ⁸ Taptap sidea ibahen udan dolog, dolog
batu ipangunsandei, halani seng dong
panisioanni.
- ⁹ Irapas sidea do na tading maetek hun abingan
ni inangni, anjaha igadeihon dakdanak ni
halak na musil.
- ¹⁰ Talag-talag do sidea laho, seng marhiou;
anjaha age pe loheian itarui do radean.
- ¹¹ Maningon i holangkolang ni tembok sidea
mamoroh minak, ibagas pangilangan anggur
sidea marhorja, anjaha horahan sidea.
- ¹² Humbani huta ai tarboge i orong-orong ni halak
na laho matei, anjaha dilo-dilo tonduy ni
halak na ugahan bani pangurupion, tapi lang
itangihon Naibata tonggo ni sidea.
- ¹³ Adong do halak na legan gabe imbang ni na
siang, seng itanda sidea dalan ni Naibata,
anjaha seng totap sidea bani dalanni ai.
- ¹⁴ Marayak siang ari jongjong ma halak pamunuh,
laho mamunuh halak na musil ampa halak
na masombuh, anjaha borngin suruk-suruk
songon panangko.
- ¹⁵ Halak parbangkis paimahon samon ari, nini
uhurni, 'Seng dong na mangidah ahu!'
Palegan rupa do ia.
- ¹⁶ Masuk do ia ibagas golap ari hu rumah, ia
arian i rumah do sidea marhurung; seng
iharosuhkon sidea na liar.

- ¹⁷ Na lotir ai do sogod bani sidea, ai marhuan-
kuan do sidea pakon songgot-songgot na
ibagas na golap ai,
- ¹⁸ podas do sidea lintun marayak siang ari. Hona
papa do parbagianan ni sidea i tanoh in,
seng dompakkononni be pohon anggurni.
- ¹⁹ Songon logou ni ari ampa milas ari mambahen
sintak bah salju, sonai do nagori toruh bani
halak pardousa.
- ²⁰ Lupahonon ni abingan ni inangni do ia,
pampanganon ni gilok-gilok, anjaha seng
dong be na mardingatsi; ripukkononkon do
hajahaton ai songon hayu.
- ²¹ Ihilang sidea naboru na lambang, anjaha seng
layak bani naboru na mabalu.
- ²² Tapi tene sai ipaganjang Naibata do goluh ni
halak parkuasa marhitei gogohni; jongjong
do sidea use sanggah sosak goluh ni sidea.
- ²³ Ibere do bani hatotapon, itungkoli do sidea;
tapi ipardiatei panonggorni do dalan ni
sidea.
- ²⁴ Tongkin timbul do sidea, hape tongkin nari
domma mogap; matei do sidea songon
halak na legan; isabi do sidea songon buyur
ni omei.
- ²⁵ Anggo seng sonai, ise ma na pag mangkatahon
seng sintong hatangku, anjaha manlangkon
hatangku?"

Sahap ni si Bildad na Patoluhalihon:

Seng Dong Jolma na Pintor i Lobei ni Naibata

- 25** ¹ Dob ai nini si Bildad na hun Sua ma mambalosi,
- ² “Bani Naibata do panrajaion pakon panonggotion; la do sibahen damei ibagas langit-Ni na gijang ai.
- ³ Mintor tarbilangi ma bala-Ni? Ise ma na so ihonai panondang-Ni?
- ⁴ Sonaha ma parjadini boi pintor jolma i lobei ni Naibata? Sonaha ma tarbahen pansing tubuh ni sada naboru?
- ⁵ Tonggor ma, gari bulan seng lihar sinalsalni, anjaha bintang pe, seng pansing bani panonggorni.
- ⁶ Samintolah jolma ma na doskon gilok-gilok in, barang anak ni jolma, na doskon goya in?”

Balos ni si Job na Patoluhalihon bani si Bildad:

Ise ma na Boi Mandadap Habanggalon ni Naibata?

- 26** ¹ Dob ai nini si Job ma mambalosi,
- ² “Dear ni pambahenmin tene, mangurupi halak na so margogoh, anjaha itungkol ho do tangan na so margolle!

- ³ Dear ni pamodahimin bani halak na hurang
uhur, anjaha bueini in pingkiran na bagas
ipabotohkon ho!
- ⁴ Ise do na pabotohkon parsahapan on bam?
Anjaha tonduy ni ise do na luar humbam?
- ⁵ Mangidah-Si gobir do tonduy ni na dob matei,
na i toruh ni laut bolag ampa na mangingani
ai.
- ⁶ Tidak do nagori toruh i lobei ni Naibata, anjaha
urung habeguon seng martutup.
- ⁷ Ia do na paherbangkon langit parutara i atas ni
na lumei, anjaha ia do manggantungkan
tanoh i atas ni na lang.
- ⁸ Ia do na manampin bah ibagas hambunni,
anjaha seng marigat hambun ai ibahen.
- ⁹ Ia do na manrungkub bohi ni paratas-Ni, anjaha
ipaherbang i atas ni hambun-Ni.
- ¹⁰ Ia do mamasuk parbalogan ni bah inggot,
tontang parbalogan ni na siang pakon na
golap.
- ¹¹ Rebad-rebad do tiang ni langit, anjaha
songgotan halani ondam-ondam-Ni.
- ¹² Ipaminop do laut marhitei hagogohon-Ni,
anjaha marhitei hapentaran-Ni ipatunduk
Rahab.
- ¹³ Marhitei hosah ni siang ibahen langit, anjaha
tanganni mamantom ulog na lingkat.

- ¹⁴ Tonggor ma, sisi ni dalanni tumang ope in,
anjaha sada husip tumang ope na binogeita
in hun Bani. Ise ma na mangasup mangarusi
longgur ni hagogohonni ai?”

**Sahap ni si Job na Parpudi: Seng Dong
Pangarapan bani Halak Parjahat**

- 27** ¹ Dob ai inunut si Job ma mangkatahon
hatani, nini ma,
² “Songon sintongni manggoluh Naibata,
na mambuat humbangku hapintoronku,
Pargogoh Na So Tarimbang in, na mambahen
paet tonduyhu,
³ sadokah ibagas ahu ope hosahku, anjaha hosah
na humbani Naibata ibagas igungku,
⁴ seng anjai bibir ni pamanganku mangkatahon
na so tongon, barang pamanganku pe
mangkatahon sipaoto-oto.
⁵ Antigan pe lang ra ahu mangkatahon
paboa sintong hanima; ronsi matei ahu
hupartahankon, paboa seng dong salahku.
⁶ Poltik do hujolom hapintoronku, seng
paluahonku ai; seng pala isolsoli uhurhu ahu
age sada, pasal ari-ari ni goluhku.
⁷ Songon na bani halak parjahat ma namin
mangonai bani munsuhku, anjaha songon
bani halak pargeduk ia imbangku.

- ⁸ Ai aha ma pangarapan ni halak parjahat, anggo itarik Naibata hosahni?
- ⁹ Tumaram ma tangihonon ni Naibata doruh-doruhni, anggo roh hasosakan bani?
- ¹⁰ Mintor boi ma ia marmalas ni uhur mangidah Pargogoh Na So Tarimbang in? Mintor tarbahensi ma tongtong martonggo bani Naibata?
- ¹¹ Ahu ma mangajari hanima pasal pambahenan ni Naibata; seng ponopkononku bannima sura-sura ni Pargogoh Na So Tarimbang in.
- ¹² Hanima pe namin domma ididah hanima sandiri ai. mase ma sai inunut hanima mangkatahon na soya-soya?
- ¹³ On do rupei na pinatongon ni Naibata banijolma parjahat, ampa tean-teanan na jinalo ni halak siunsagahkon gogoh humbani Naibata.
- ¹⁴ Anggo tambah dakdanakni, panganon ni podang do ai, anjaha ginomparni hurangan sipanganon.
- ¹⁵ Simasimani na tading ai buaton ni sampar do, anjaha seng tangisan ni na mangkabaluhon sidea ai sidea.
- ¹⁶ Ipagukguk pe pirak songon orbuk bueini, anjaha ipatumpu pe pakeian songon tanoh halampung bahatni,

- ¹⁷ ipatumpu do tongon, tapi halak parpintor
do na marhiouhon ai, anjaha halak na so
marpipot marbagi pirakni.
- ¹⁸ Rumahni ipauli doskon rumah ni lawah-lawah,
songon sopo-sopo, na pinauli ni halak
parjaga.
- ¹⁹ Bayak do ia laho modom, tapi seng tarulakisi
be, ipabodak matani, hape aha pe seng
dong be.
- ²⁰ Songgot-songgot do mandorabsi songon
bah marbanggal, anjaha halisungsung
manluahonsi borngin.
- ²¹ Habahaba na hun purba do mamboansi, anjaha
ipurpurhon ia daoh humbani iananni.
- ²² Seng maralang-alang ipanahkon Naibata
sior-Ni bani, maningon podas ia maporus
manlembangi tangan-Ni.
- ²³ Martopap tangan ma halak halanisi, anjaha
marsiuul-siuul halak humpudini.”

Sahap ni si Job na Parpudi (*sambatni*):

Seng Tardadap Jolma Hapentaran ai

28 ¹ “Tongon, adong do tambang pirak, pakon
ianan papitahkon omas.

² Hun bagas tanoh do ibuat bosi, anjaha batu
ilobur mambuat tombaga.

- ³ Hagolapan ai pe talu do ibahen jolma, ipareksa
do das hubani sibagasan batu na ponop
ibagas na golap ampa ibagas na lotir
sahalian.
- ⁴ Ihurak sidea do lubang hu toruh, na daoh sirang
humbani ianan ni jolma; gantung sidea seng
marsidoge-i-dogeian, daoh humbani jolma
mambung-ambung sidea.
- ⁵ Ia tanoh, harohan ni sipanganon do in, tapi
partoruhni ai marbalik ibahen songon
pambahen ni apuy.
- ⁶ Marisi mata intan sapir do batu-batuni ampa
marisi omas homa.
- ⁷ Dalan hujai seng ibotoh manuk-manuk panoroh,
anjaha seng ididah mata ni haluhuy ianan ai.
- ⁸ Seng onggga idoge-i nahei ni binatang ai, anjaha
seng ibontas singa.
- ⁹ Dolog batu pe ijolom tangan ni jolma do, anjaha
marbalik onjolan ni dolog ibahen.
- ¹⁰ Ituhak do dalan ibagas dolog batu, anjaha
matani mangidah ganup barang na maharga.
- ¹¹ Ibongbong do sumbul ni bah, anjaha na ponop
sahalian ipadarat bani na liar.
- ¹² Tapi hapentaran ai ija do boi jumpahon ai?
Anjaha ija do nani ianan ni pangarusion?
- ¹³ Seng ibotoh jolma in dalan hujai, anjaha seng
jumpah ai i tanoh ni halak na manggoluh on.

- ¹⁴ Nini luhung, 'Seng ibagas ahu ia.' Laut mangkatahon, 'Seng i lambungku ia.'
- ¹⁵ Seng tarboli ai age marhitei omas pitah, anjaha pirak pe seng boi pakeion pambolini.
- ¹⁶ Seng tarboli ai bani omas Opir, barang bani batu soham atap sapir pe.
- ¹⁷ Omas barang kasa seng boi bahenon hadosanni, anjaha seng boi tukaran ai bani barang omas na majenges.
- ¹⁸ Seng tarpados simatah pakon kristal hujai; harganan do hapentaran ase mutiha.
- ¹⁹ Batu intan na hun Etiopia pe seng tarpados hujai, anjaha seng tarasam ai bani omas pitah.
- ²⁰ Hunja do anggo sonai harohan ni hapentaran ai? Anjaha ija do ianan ni pangarusion?
- ²¹ Lingod do ai humbani panonggor ni ganup halak na manggoluh, anjaha ponop humbani manuk-manuk na i awang-awang.
- ²² Nagori toruh pakon hamatean mangkatahon, 'Domma ibogei hanami namin burintikni.'
- ²³ Naibata do na mambotoh dalan hujai, anjaha la do na mambotoh iananni.
- ²⁴ Ia do na manatap ronsi ujung ni dunia on, anjaha ididah do ganup na itoruh ni langit.
- ²⁵ Sanggah na binahen-Ni ai timbangan ni logou, anjaha tinontuhon-Ni ai ukuran ni bah,

- ²⁶ sanggah binahen-Ni ai aturan pasal udan,
anjaha itontuhon pardalan ni hilap,
²⁷ ijai do ai ididah anjaha ipatorang, ipajonam
anjaha itulimati.
²⁸ Tapi anggo bani jolma in, sonon do nini,
‘Tonggor ma, biar mangidah Jahowa
do hapentaran, anjaha surut humbani
hajahaton do pangarusion.’”

Sahap ni si Job na Parpudi (*sambatni*)

**Panorangni Mardohar anjaha
Marsangap Sisapari ai**

- 29** ¹ Dob ai inunut si Job ma mangkatahon
hatani, nini ma,
² “Ah, ambit songon bani bulan-bulan sinabaruon
ondi ma namin partibalhu, songon bani
panorang sanggah Naibata manramotkon
ahu,
³ sanggah na gara ope suluh-Ni i babou ni
ulungku, anjaha ibagas sinalsal-Ni hudalani
na golap,
⁴ songon panorang haposoonku ondi, sanggah
na ihasomani Naibata ope ahu ibagas
lampolampongku;
⁵ sanggah na rapkon ahu ope Pargogoh Na So
Tarimbang in, sanggah na marloulou ope
dakdanakku bangku;

- ⁶ sanggah na marparidian dadih ondi naheihu,
anjaha dolog batu na i lambungku
marjullak-jullakkon bah minak bangku.
- ⁷ sanggah na luar baru on ahu hu horbangan
ni huta in, anjaha husuruh na pasirsirhon
hundulanku ibagas tiga,
- ⁸ marponop parana-parana dob ididah ahu,
anjaha halak partua hehe lanjar jongjong;
- ⁹ maronti raja-raja marsahap, anjaha
marsisongom pamanganni bei,
- ¹⁰ sip sora ni na sangap-sangap, anjaha dilahni
longkot bani langit-langitni.
- ¹¹ Pinggol na mambogei sorangku, mangkatahon
sangap ahu, anjaha mata na mangidah ahu,
mangakui ahu bujur,
- ¹² halani hupaluah do halak na masombuh, na
mangindo pangurupion, pakon na tading
maetek, na so adong pangadu-aduanni.
- ¹³ Jadi pasu-pasu ni halak na sihol magou sogop
hu bangku, anjaha uhur ni naboru na
mabalu marolob-olob hubahen.
- ¹⁴ Hapintoron do husorungkon, gabe hiou do
ai bangku; habonaron jadi baju ampa
gotong-gotong do ai bangku.
- ¹⁵ Gabe mata do ahu bani halak na mapitung,
anjaha nahei bani halak na tempang.

- ¹⁶ Bapa do ahu bani halak na musil, anjaha parkara ni halak na so hutandai pe hupajorei do.
- ¹⁷ Huropangi do ipon ni halak parjahat, anjaha rampasanni husontapkon hun pamanganni.
- ¹⁸ Halani ai nini uhurhu do, 'Bani asarhu do ahu matei, anjaha pabueionku ari-aringku songon horsik.
- ¹⁹ Mangumparpar do uratku bani bah, anjaha namuron do rantingku borngin.
- ²⁰ Tongtong do ratah hasangaponku i lambungku, anjaha ganda gogoh ni siorhu ibagas tanganku.'
- ²¹ Tangi do halak bangku, anjaha tarpaima-ima, anjaha sip mambogei hatoranganku.
- ²² Dob marsahap ahu seng dong be na mansual, manjalir do hatangkai bani sidea.
- ²³ Tarpaima-ima do sidea bangku songon bani udan, anjaha ipangangang sidea do pamanganni songon sabah langit na mangkasiholhon udan.
- ²⁴ Basar do ahu bani sidea sanggah mandolei sidea, anjaha minar ni bohingku seng ihirjati sidea.
- ²⁵ Anggo martandang ahu bani sidea, hampit luluan do ahu hundul, songon raja hundul i tongah-tongah ni balani, songon halak siapohi na marhoru ni uhur."

Sahap ni si Job na Parpudi (*sambatni*)**Hasombuhonni Sisonari**

- 30** ¹ “Hape sonari, halak siposonan humbangku manartawai ahu, bapa ni sidea hurang tunggung hinan huahap mangkasomani baliang sijaga biribiringku.
- ² Tapi aha ma gunani bangku gogoh ni tangan ni sidea ai? Ai bani sidea pe domma salpu hagogohon ai.
- ³ Marhalanohon ni na hurang ampa lohei, gabe laho do sidea manggagat hu tanoh horah ampa halimisan,
- ⁴ laho mambuat pahu hun tongah-tongah ni poyon-poyon, ampa suhat panganon ni sidea.
- ⁵ Hona usir do sidea hum bagas huta, anjaha hona surak do sidea songon halak panangko.
- ⁶ Ibagas lombang bagas mando sidea marianan, Ibagas lubang-lubang atap ibagas liang ni dolog batu.
- ⁷ I tongah-tongah ni rambah sidea doruh-doruh, i toruh ni tatada manggompang.
- ⁸ Halak na oto anjaha na mahiri do sidea, na binogbogan luar hun nagori on.

- ⁹ Hape sonari gabe sidoding-dodingkonon ni sidea do ahu, gabe siparumpamahonon ni sidea.
- ¹⁰ Magigi do sidea bangku, mandaoh-daoh sidea humbangku; anjaha itijuri do ahu bani bohingku.
- ¹¹ Halani domma itanggali Naibata tali ni lampolampongu anjaha ipatoruh ahu, seng malang be sidea i lobeihu.
- ¹² Hampit siamunku mandurgak halak na janglas-janglas, ikaiskon ahu, ipajunjun sidea dompak ahu hamagouan ni sidea.
- ¹³ Iparseda sidea do dalanku, anjaha ipabanggal sidea hamagouanku, anjaha ise pe lang na mangulangi sidea.
- ¹⁴ Songon humbani buntas ni partoguh sidea roh mandorab ahu, hun tongah-tongah ni haruntason ai sidea marrohan.
- ¹⁵ Songgot-songgot do manlingkubi ahu; songon pinurpurhon ni alogo hasangaponku, anjaha hasonanganku masab songon hambun.
- ¹⁶ Halani ai usei do uhurhu ibagas, anjaha ari-ari panaronon manjorot ahu.
- ¹⁷ Songon tinobak do hulingkulingku borngin, anjaha borit ni angkulangu seng marnamaronti.
- ¹⁸ Isontap Naibata do hiouhu ibagas hagogohon, gabe tarsongkik ahu binahenmu ai.

- ¹⁹ Domma isampakkon Naibata ahu hubagas
hubang, gabe doskon orbuk pakon abuan
do ahu.
- ²⁰ Doruh-doruh do namin ahu Bamu, tapi seng
itangihon Ham ahu; jongjong do ahu i
lobei-Mu, tapi seng marpanatap Ham
dompak ahu.
- ²¹ Mubah do Ham bangku gabe na so paridop ni
uhur; ipardakdak tangan-Mu na margogoh
in do ahu.
- ²² langkat Ham do ahu laho mamurpurhon
bani logou, anjaha ipaturut Ham do ahu
ihabangkon habahaba.
- ²³ Tongon, hubotoh do, sihol bobanon-Mu do
ahu hu hamatean, hu rumah, partumpuan
ni sagala na manggoluh.
- ²⁴ Tapi tene, ai lang durdurhonon ni halak na laho
mogap do tanganni, anjaha doruh-doruh
bani parmaraanni ai?
- ²⁵ Ai lang tangis do ahu mangidah halak na
susah? Ai lang horu do uhurhu mangidah
halak na musil?
- ²⁶ Na madear do namin hupaima-ima, tapi
hasedaon do roh, na siang do namin
huarapkon, tapi hagolapan do das.
- ²⁷ Bulinsah do uhurhu ibagas, seng ra soh; ari
hamagouan do mandorab ahu.

- ²⁸ Birong do ahu mardalani, tapi seng binahen ni mata ni ari; jongjong do ahu i tongah-tongah ni tumpuan, anjaha tangis mangindo pangurupion.
- ²⁹ Domma gabe hasoman ni baliang harangan ahu, gabe huan-kuan ni burung unta.
- ³⁰ Gabe birong do hulingkulingku anjaha mardabuhan humbangku, anjaha horah do holiholingku halani milasni.
- ³¹ Mubah do sora ni husapingku gabe tangis-tangis, anjaha sora ni tulilangku gabe doruh-doruh.”

Sahap ni si Job na Parpudi (*panutup*):

Ipatorang Seng Marsalah Ia

- 31** ¹ “Domma marpadan ahu pakon matangku, seng anjai mangkawah ahu dompak anak boru.
- ² Aha do nani rupei bereon ni Naibata na i atas in, barang parbagianan bahenon ni Pargogoh Na So Tarimbang hun nagori atas?
- ³ Ai lang hamagouan do bani halak pargeduk, anjaha hasedaon bani sihorjahon hajahaton?
- ⁴ Seng nani ididah Naibata dalanku, anjaha na so ihira do nani ganup langkah-langkahku?

- ⁵ Ambit marsipakulah-kulah namin parlahouhu,
anjaha naheihu mangolos mangkorjahon
sipaoto-oto,
- ⁶ itimbang ma namin ahu bani timbangan na
sintong, tontu akuon-Ni ma, na so marsalah
ahu.
- ⁷ Anggo manlembang langkah-langkahku
humbani dalan hasintongan, iihutkon
uhurhu rosuh-rosuh ni matangku, anjaha
longkot bani tanganku habadoron,
- ⁸ halak na legan ma mangankon na hutidahkon,
anjaha iorbati na dob husuan.
- ⁹ Anggo onga tartarik uhur hubani sada naboru,
anjaha mangonggopi ahu i lambung labah ni
hombar rumahku,
- ¹⁰ parinangonku ma panduda bani halak na
legan, anjaha halak na legan mambangkisisi.
- ¹¹ Ai pantang do na sonai ai, tongon, hajahaton
na patut siuhumon ni panguhum.
- ¹² Ai apuy do ai, na manggagat ronsi nagori
toruh, anjaha talup mammosogkon ganup
na husari.
- ¹³ Anggo onga lang pintor hubahen bani
juakjuakku dalahi barang naboru, ai ma
sanggah marsalisih sidea pakon ahu,
- ¹⁴ aha ma na sihol bahenonku porini roh Naibata?
Anggo ibahen parturiakan, aha ma balosku
Bani?

- ¹⁵ Ai lang la, na manjadihon ahu i partapaan
do homa na manjadihonsi? Ai lang lanjar
sasadasi do na manjadihon hanami ibagas
partapaan?
- ¹⁶ Anggo onnga lang hubere pangindoan ni halak
na musil, atap motei-otei hubahen mata ni
naboru na mabalu,
- ¹⁷ atap sahalak ahu mangankon rotingku, anjaha
seng dihut na tading maetek mangankon ai,
- ¹⁸ ai humbani haposoonni ahu do na songon
bapani na pagodangkonsi, anjaha
humbani partapaan ni inangni ahu do na
mangiring-iringsi;
- ¹⁹ anggo onnga huidah sada halak lajang-lajang
lang marhiou, barang sada halak na musil
lang marsiluban,
- ²⁰ anggo lang hupamalas binongeini, anjaha
anggo lang malas ia halani bobak ni
biribiringku,
- ²¹ anggo onnga mangonai tangan ahu bani sada
halak na tading maetek, halani adong
huidah na mangurupi i horbangan,
- ²² tanggal ma lah abarangku humbani sasapku,
anjaha tanganku sirang humbani ringringni.
- ²³ Ai mabiar do ahu tong bani uhum ni Naibata,
anjaha seng tahan ahu mangkawahkon
hatunggunon-Ni.

- ²⁴ Anggo onga omas hubahen pangarapanku,
anjaha dompak omas pitah ningku, 'Ho do
hatengeranku';
- ²⁵ anggo onga marmalas uhur ahu, halani buei
artanku, barang buei na sinari ni tanganku;
- ²⁶ anggo onga hukawah-kawahkon mata ni
ari sonaha parsinalsalni ai, barang bulan
sanggah bani rondangni mardalan,
- ²⁷ gabe tartarik uhurhu marponop-ponop, anjaha
husummah tanganku padaskon sombahku;
- ²⁸ hajahaton do on, talup siuhumon ni panguhum,
ai domma huparnalang Naibata na i atas ijai.
- ²⁹ Anggo onga marsombuh-sombuh ahu
mangidah hamagouan ni munsuhku, barang
marolob-olob ahu anggo maseda ia,
- ³⁰ seng onga hulopas pamanganku mardousa
marhitei na mangindohon ase matei hona
papa ia.
- ³¹ Anggo seng isaksihon hasomanku na
salampolampo: Ise na so bosur binahen ni
guleini?
- ³² Seng onga marborngin panginsolat i
alaman; huungkab do labahku bani halak
pardalan-dalan.
- ³³ Anggo onga hurungkub dousangku, ase
ulang ididah halak, barang huponopkon
hajahatonku ibagas uhurhu,

- ³⁴ halani mabiar ahu mangidah halak na mabuei,
anjaha gobir ahu bani pangapasion nijolma
marsundut-sundut, gabe sip ahu anjaha
seng luar hun rumah.
- ³⁵ Ah, ambit adong ma namin sada halak na ra
mambogei hatangku. Tonggor ma, tanda
tanganku! Ibalosi Pargogoh Na So Tarimbang
in ma namin ahu! Ah, ambit dong ma namin
pangaduan na sinurat ni imbangku dompak
ahu!
- ³⁶ Tongon, sai tampeihononku do ai i atas
abarangku, anjaha sangkutkononku bangku
songon sortali.
- ³⁷ Patorangonku ma sada-sada langkahku Bani,
anjaha doskon raja adaponku la.
- ³⁸ Anggo doruh-doruh jumangku mangaduhon
ahu, anjaha ganup noranni tangis-tangis;
- ³⁹ anggo hupangan gogohni seng margalar,
anjaha simadasi hulopas matei loheian,
- ⁴⁰ dear ma tubuh bangku duri gantih ni gandum,
barang poyon-poyon gantih ni jagul.”
Marujung ma sahap ni si Job.

Sahap ni si Elihu na Parlobei: Seng Tahan be la Sip

32 ¹ Dob ai maronti ma sitolu halak ai marsahap
pakon si Job, halani sai ipintori dirini.

² Jadi gajag ma ringis ni si Elihu, anak ni si
Barakel, halak Busi ai, humbani ginompar ni si Ram;

manringis tumang do ia bani si Job, halani sai ipintori dirini i lobei ni Naibata.

³ Manringis homa do ia bani huan-kuan ni si Job sitolu halak ai, halani seng tarbalosi sidea si Job, age pe domma ipatorang sidea parsalah do si Job.

⁴ Ai domma ngolngolan hinan si Elihu laho mangkatahon hatani hubani si Job, halani torasan halak ai humbani.

⁵ Tapi dob ididah si Elihu lang tarbalosi sitolu halak ai si Job, manringis tumang ma ia.

⁶ Dob ai nini si Elihu, anak ni si Barakel, halak Busi ai ma Mambalosi, “Poso ope namin ahu, tapi nasiam domma ubanon, halani ai malang anjaha mabiar do ahu patorangkon pingkiranku bani nasiam.

⁷ Ningku ibagas uhurhu, ‘Na matua ma lobei mangkatahon hatani, anjaha sigijangan umurni mangajarhon hapentaran.

⁸ Tapi tonduy na ibagasjolma in, ai ma hosah ni Pargogoh Na So Tarimbang in, ai ma mambere pangarusion bani.

⁹ Seng sai halak na matua tong sipentaran, anjaha seng halak na ubanon tong na mambotoh na sintong.’

¹⁰ Halani ai do ase huhatahon, ‘Tangar nasiam ma ahu, sihol do homa patugahonku hapentaranku.

- ¹¹ Tonggor ma, domma ngolngolan ahu paima-
imahon hata nasiam, sai hupatangi-tangi
do sipaingat nasiam, paima jumpah nasiam
balos na hona.
- ¹² Huparimbagaskon do namin hata nasiam
ai, hape, tonggor ma, seng dong na
mantaluhon si Job, seng dong humbani
nasiam, na mambalosi hatani.
- ¹³ Ulang ma ninuhur nasiam, domma jumpah
hanami hapentaran; Naibata ma na
manaluhonsi,jolma seng mangasup.
- ¹⁴ Seng dompak ahu hatani na hinatahonni ai,
anjaha seng marhitei sahap nasiam ai ia
balosanku.
- ¹⁵ Domma humationg, seng tarbahen be
marbalos, domma jut sidea mangkatahon
sihatahononni.
- ¹⁶ Mintor soh ma ahu, halani na so marsahap ai
be sidea, halani na jonong ai sidea jongjong,
lang marbalos?
- ¹⁷ Ahu pe sihol marbalos do, ahu pe sihol do
patugahonku pingkiranku.
- ¹⁸ Ai domma gok bangku sahap, sai iajar tonduy
na ibagas ahu do ahu.
- ¹⁹ Tonggor ma, doskon anggur na so binuha do
tontonku, doskon gusi bobak na baru na
sihol pultak.

- ²⁰ Halani ai maningon marsahap do ahu, ase luas
huahap, maningon buhaanku do bibirhu
laho marbalos.
- ²¹ Seng martonggor jumbak ahu, barang sihol
mamuji-muji atap ise.
- ²² Ai seng hubotoh naha palemes-lemes
parsahapan, halani anggo sonai, tontu
podas do ahu masab ibahen Sitompa ahu.”

Isambat si Elihu Parsahapanni:

Bagei-bagei do Dalan ni Naibata Marsahapkon Jolma

- 33** ¹ “Tapi, tangar ham ma sahapkon, ale Job,
bogei ma ganup hatangku!
- ² Tonggor ma, domma huungkab pamanganku,
domma marsahap dilahku ibagas
pamanganku.
- ³ Humbani bujur ni uhurhu do huhatahon
hatangkon, anjaha torang patugahon ni
bibirhu parbinotohan.
- ⁴ Tonduy ni Naibata do na dob manjadihon ahu,
anjaha hosah ni Pargogoh Na So Tarimbang
do pagoluhkon ahu.
- ⁵ Anggo boi ibahen ham, balosi ham ma ahu;
dear ma balosi ham ahu, marugas ma ham.

- ⁶ Tonggor ma, songon ahu sonai do ham i
lobei-lobei ni Naibata, ahu pe humbani
sangkipal tanoh halampung do ijadihon.
- ⁷ Tonggor ma, ulang pala mabiar ham mangidah
ahu, seng borat pangodohkonku bamu.
- ⁸ Nimu nongkan hubogei, anjaha sora ni hatamu
hutangar,
- ⁹ 'Borsih do ahu, seng marpipot; pitah do ahu,
anjaha seng dong hajahaton ibagas diringku.
- ¹⁰ Tonggor ma, na mangindahi sindir do la
dompok ahu, munsuh-Ni do ahu ihira.
- ¹¹ Inahkon do naheihu hubagas bayangan, anjaha
itulimati do ganup dalanku.'
- ¹² Tonggor ma, ibagas on ma lang bujur ham, ai
ma balopku bamu. Banggalan do Naibata
asejolma.
- ¹³ Mase ma marhutuk ham dompak-Si, nimu,
'Sada pe lang humbani hatangkai na ibalosi!'
- ¹⁴ Ia Naibata, tongon marsahap do la sahali dua
hali, seng iparimbagaskonjolma.
- ¹⁵ Marhitei nipi, marhitei panonggoran borngin,
sanggha rengesjolma modom, sanggha
modom-modom bani podomanni,
- ¹⁶ ijai do iungkab pinggol nijolma, anjaha ihirjati
sidea marhitei lumba-lumba-Ni,
- ¹⁷ laho paholangkonjolma humbani hasalahan,
laho manjorajolma humbani pangenjengon,

- ¹⁸ Iaho paluahkon tonduyni humbani tanoman,
anjaha goluhni ulang magou ibahen podang.
- ¹⁹ Ambahni ai ipalumba do ia marhitei naborit
sanggha tibal bani podomanni, sanggha
maborit iahap das ronsi holiholini.
- ²⁰ Pala gineian iahap mangidah sipanganon,
anjaha sobalan ia bani sipanganon
harosuhni hinan.
- ²¹ Marherut sibukni, seng haidahon be, anjaha
holiholini, na so taridah hinan, boi bilangan.
- ²² Dohor-dohor mando hosahni hu tanoman,
anjaha goluhni bani malekat pamunuh.
- ²³ Porini adong hasomanni sada malekat,
pangapiti, sada humbani na saribu, na
patorangkon bani jolma ai ukumanni,
- ²⁴ jadi maidop ma uhur-Ni bani, anjaha
hatahonon-Ni ma, 'Tobus ma ia, ase ulang
tuad ia hu tanoman, ai domma jumpah Ahu
tobus ni tonduyni,
- ²⁵ jadi suang ma jorgit angkulani lobih humbani
haposoonni hinan; mulak poso ma ia.'
- ²⁶ Martonggo ma ia bani Naibata, jadi balosan
ni Naibata ma ia; pataridahkonon-Ni ma
bani bohi-Ni ibagas malas uhur, anjaha
pasuangen-Ni ma hapintoron-Ni hubani
jolma.
- ²⁷ Jadi mandoding-doding ma ia i lobei ni jolma,
nini ma, "Domma mardousa ahu, anjaha

hupapeol uhum, tapi seng hona balos ai bangku.

²⁸ Ipaluah do tonduyhu, ase ulang tuad hu tanoman, anjaha marmalas uhur goluhku mangidah haliharon.’

²⁹ Tonggor ma, ganup na sonai ai, ibahen Naibata, dua barang tolu hali bani jolma manisia,

³⁰ laho mamboan tonduyni mulak humbani tanoman, ase marmalas uhur ia ibagas sinalsal ni hagoluhan on.

³¹ Parimbagaskon ham ma on, ale Job, tangihon ham ma ahu! Sip ma ham, ase hutoruskon mangkatahon hatangku.

³² Anggo adong ope sihatahononmu, bere ham ma balosmu bangku; marsahap ma ham, ai isura uhurhu do mamintori ham.

³³ Tapi anggo seng dong be, tangar ham ma ahu; sip ma ham, ase huajarhon bamu hapentaran.”

Sahap ni si Elihu na Paduahalihon:

Seng Anjai Lang Pintor Pambahenan ni Naibata

34 ¹ Dob ai nini si Elihu ma use,
² “Bogei nasiam ma hatangku, nasiam siparuhur, anjaha nasiam na pentar-pentar, tangihon nasiam ma!

- ³ Pinggol do sipareksa hata, songon langit-langit
na mandai sipanganon.
- ⁴ Na sintong ai ma pilih hita banta; rap manandai
ma hita barang aha na dear.
- ⁵ Ai nini si Job do, 'Bujur do ahu, tapi seng bujur
pambahen ni Naibata bangku.
- ⁶ Age pe bujur ahu parladung do ahu ihira; seng
hatambaran be ugahku, age seng marsalah
ahu.'
- ⁷ Tor ise ma dalahi songon si Job, na manibur
apas-apas songon bah,
- ⁸ na mardalan saodoran pakon halak sihorjahon
na so sintong, anjaha na marparsaoran
pakon halak parjahat?
- ⁹ Ai nini do, 'Seng adong gunani bani sada dalahi,
margoluh na madear ia i lobei ni Naibata.'
- ¹⁰ Halani ai, tangihon nasiam ma ahu,
nasiam halak na maruhur, pantang do
hatahononkon, Naibata mambahen
hajahaton, Pargogoh Na So Tarimbang
mangkorjahon hagedukon.
- ¹¹ Tapi romban hubani pambahenan ni jolma do
ibalaskon hu bani, anjaha romban hubani
dalan ni ganup halak ihonahon bani.
- ¹² Tongon tene, seng anjai lang sintong
pambahenan ni Naibata, anjaha seng anjai
papeolon ni Pargogoh Na So Tarimbang
hasintongan.

- ¹³ Ise nani siondoskon tanoh on Bani, anjaha ise do na pajonamkon ganup dunia on?
- ¹⁴ Anggo porini tubuh uhur-Ni mangimbangjolma, itarik use tonduy-Ni ampa hosah-Ni,
- ¹⁵ mintor rotap ma hosah ni ganup na manggoluh, anjaha mulak bani orbukjolma in.
- ¹⁶ Anggo maruhur ham, bogei ma on, tangihon ham ma na huhatahon on,
- ¹⁷ 'Mintor tarbahen sada halak, na magigi bani uhum ma manrajai? Mintor tarpapai ham ma la, parpintor anjaha Pargogoh Na So Tarimbang in?'
- ¹⁸ la, na boi mangkatahon bani sada raja, 'Ho na so margagan!' bani halak na sangap, 'Ho halak parjahat!'
- ¹⁹ la, na so sitonggor jumbak bani raja-raja, na so mangkira sangapan na bayak humbani na musil, ai jadi-jadian ni tangan-Ni do ganupan ai.
- ²⁰ Sompong matei sidea, tengah borngin. Isonggoti bangsa ai, gabe masab sidea, isontapkon do halak na gogoh, seng pala marhasoman tangan.
- ²¹ Ai itulimati panonggor-Ni do dalan ni ganupjolma, anjaha ididah do sagala langkah-langkahni.

- ²² Seng dong na golap barang na lotir; na
tarbahren parponopan ni halak sihorjahon
hajahaton.
- ²³ Ai seng dong ibuhul ari bani jolma, laho hu
paruhuman i lobei ni Naibata.
- ²⁴ Ia do na manripuki halak na markuasa, lang
pala palobei ipareksa, anjaha ipabangkit
halak na legan bahen gantihni.
- ²⁵ Halani torang do ibotoh pambahenan ni sidea,
idabuhkon do sidea borngin, gabe maripuk
ma sidea.
- ²⁶ Ibogbog do sidea halani hajahaton ni sidea,
bani ianan na boi idahon ni halak,
- ²⁷ halani itundali sidea Ia, anjaha seng
iparuhurhon sagala dalan-Ni,
- ²⁸ laho mambalaskon bani sidea doruh-doruh ni
halak na musil, ai itangihon do doruh-doruh
ni halak na masombuh.
- ²⁹ Anggo sip Ia, ise boi mansalahkon? Anggo
iponopkon bohi-Ni, ise ma na mangindahi-
Si? Ijagai do sada bangsa atap sada
halak,
- ³⁰ ase ulang halak parjahat manrajai, gabe hona
sidingni bangsa ai.
- ³¹ Sonon ma patut hatahonon ni halak bani
Naibata, 'Gijang hinan do uhurhu, seng
bangku be mangkorjahon hasamboron,

- ³² ajarhon Ham ma bangku na so dapot uhurhu hinan; anggo marsalah ahu, seng bahenonku be ai.'
- ³³ Ningon romban hubani pingkiranmu gakni namin la mambalas, halani na tinulakmu ai la? Ham do na maningon manontuhon, sedo ahu, anjaha na binotohmu, ai ma hatahon ham!
- ³⁴ Halak na maruhur hatahononni ma bangku, anjaha halak na pentar, na manangar ahu, hatahononni ma,
- ³⁵ 'Seng maruhur si Job na marsahap ai, seng marpanimbangion hatani ai.'
- ³⁶ Dear namin tarlajou si Job ronsi ujungni, halani songon parjahat do ia na marbalos ai.
- ³⁷ Halani itambahi ope hajungkaton bani dousani ai, marhilei do ia i tongah-tongahta, anjaha buei sahap-sahapni dompak Naibata."

Sahap ni si Elihu na Patoluhon:

Marguna do Habujuron bani Jolma, Tapi bani Naibata?

- 35** ¹ Dob ai nini si Elihu ma use,
² "Ai sintong ma ai ninuhurmu? Nimu,
'Marhapintoran do ahu i lobei ni Naibata,'

- ³ gabe isungkun ham, 'Aha ma gunani ai
bangku? Aha ma hasurunganku anggo seng
mardousa ahu?'
- ⁴ Ahu, ahu ma mambalosi ham, ampa
huan-kuanmu na rapkon ham.
- ⁵ Mangkawah ma ham dompak langit, anjaha
idah ham ma hambun ai, na gijangan ase
ham.
- ⁶ Anggo mardousa ham, aha do na binahenmu
bani Naibata? Anggo lambin bueini
panlanggaronmu, aha ma ibahen ham Bani?
- ⁷ Anggo pintor ham, aha pamberemu Bani? Atap
aha dong ijalo hun bamu?
- ⁸ Bani jolma na songon ham tumang mangonai
hajahatonmu, anjaha bani anak ni sada
jolma marguna hapintoronmu.
- ⁹ Doruh-doruh do namin halak binahen ni buei
ni pangarsikon, anjaha doruh-doruh do
sidea mangindo pangurupion halani kuasa
ni halak na sangap-sangap.
- ¹⁰ Tapi seng dong na mangkatahon, 'Ija do
Naibata Sitompa ahu, na mambere doding
bangku borngin,
- ¹¹ na mangajari hita lobihan humbani binatang na
i tanoh on, anjaha na papentar hita lobihan
humbani manuk-manuk na i awang-awang?'
- ¹² Dilo-dilo pe sidea, tapi seng ibalosi, halani
hajungkaton ni halak parjahat.

- ¹³ Tongon, seng itangihon Naibata dilo-dilo na lumei, seng ikawahkon Pargogoh Na So Tarimbang in na sonai ai.
- ¹⁴ Lambin naha ma anggo ihatahon ham, seng ididah ham la? Botoh ham ma, domma das i lobei-lobei-Ni parkaramu. Paima ham ma putusan-Ni.
- ¹⁵ Sonari, halani seng marbalos ope Naibata ibagas ringisni, anjaha seng sadiha ipardiatei ope salah,
- ¹⁶ ibuha si Job do pamanganni mangkatahon hata na lumei, anjaha ipabuei sahap-sahap na so marpanimbangion.

Sahap ni si Elihu na Paompatkalihon:

Parlajouan ai ma Dalan hu Hamubahon

- 36** ¹ Dob ai itoruskon si Elihu ma mangkatahon,
- ² “Sabar ham tongkin, ase huajari ham, ai adong ope sihatahononku halani Naibata.
- ³ Humbani na daoh ma aloponku pambotohku, laho patidakkon habonaron ni Sitompa ahu.
- ⁴ Tongon, seng mangguak-guaki hatangkon, halak na gok marpambotoh do hasomanmu na marsahap on.
- ⁵ Tonggor ma, na banggal do Naibata, anjaha seng dong maruhur apas la age bani ise,

na timbul tumang do la marhitei gogoh ni hapentaran-Ni.

⁶ Seng paturuton-Ni manggoluh halak parjahat, tapi pasintongonni do uhum bani halak na masombuh.

⁷ Seng padaohonni panonggor-Ni humbani halak na bonar, tapi ipahundul do sidea hu paratas rap pakon raja ronsi sadokah ni dokahni, gabe timbul ma sidea.

⁸ Porini tarsangkut sidea bani rantei, anjaha jorot ibagas tali sitaronon,

⁹ jadi pabotohkonon-Ni ma bani sidea pambahenan ni sidea ampa hasalahanni, ai ma na marparlahou hajungkaton sidea.

¹⁰ Ibuha do pinggol ni sidea bani pangajarion, anjaha iparentahkon, ase mubah uhur ni sidea humbani hajahaton.

¹¹ Anggo ra sidea manangihon anjaha mambalosi, jadi mardohar ma sidea ronsi ujung ni goluhni, anjaha tahun-tahun ni sidea marhasonangan.

¹² Tapi anggo seng ra sidea manangihon, magou ma sidea hona tembak, matei ma sidea seng sampang dapotan uhur.

¹³ Manggila ma ijai halak sipakulah-kulah; seng ra sidea mangindo pangurupion sanggah isangkut sidea.

- ¹⁴ Matei bani haposoonni do sidea, anjaha gok habutakon do goluh ni sidea.
- ¹⁵ Tapi ipaluah do halak na masombuh marhitei hasombuhonni, anjaha ibuha do pinggol ni sidea marhitei hasosakan.
- ¹⁶ Ham pe sihol paluahon-Ni do humbani hasosakan, hu tanoh na lumbang, na so adong sipangkirjati bamu, anjaha pasirsiron-Ni do mejamu gok sipanganon na mantin.
- ¹⁷ Talup do hape mangonai bamu uhum songon bani halak parjahat; uhum pakon habonaron do na manjoroti ham in.
- ¹⁸ Jaga ase ulang itarik pangajaran in ham hu panrisaion, anjaha ulang kahou uhurmu binahen ni banggal ni panobusion.
- ¹⁹ Boi ma doruh-doruhmu in paluahkon ham humbani hasosakan, barang golgolmu mangunsagahkon gogohmu?
- ²⁰ Halani ai ulang ma ihasiholhon ham borngin, na mambahen mapurpur bangsa humbani iananni.
- ²¹ Jaga ham, ulang ma manlembang ham dompak hajahaton, ai halani ai do ase iuji ham marhitei sitaronon.
- ²² Tonggor ma, timbul do Naibata ibagas hagogohon-Ni; ise ma pangajari usih hu Bani?

- ²³ Ise ma na mangaturhon dalan Bani? barang ise
ma na boi mangkatahon, 'Hagedukon do na
binahe-Mu in?'
- ²⁴ Ingat ham ma patimbul pambahenan-Ni, na
pinuji-puji ni jolma manisia.
- ²⁵ Ganup do jolma mangidah ai, humbani na
daoh ididah jolma na galek in ai.
- ²⁶ Tonggor ma, na timbul do Naibata, seng
tardadap hita la; seng tartulimati bilangan
ni tahun-Ni.
- ²⁷ Ia do manarik tektek ni bah dompak datas.
Ia do na mambahen udan marhitei
hombun-Ni,
- ²⁸ ai ma use na niuseihon ni hambun ai, anjaha
mardabuhan bani halak simbuei.
- ²⁹ Adong ma halak na boi mangarusi parmerap
ni hambun, ampa parlonggur ni
lampolampo-Ni?
- ³⁰ Tonggor ma, ierap do hilap-Ni inggot bani,
anjaha irungkub do dasor ni laut.
- ³¹ Marhitei ai do la manguhumi bangsa-bangsa,
marlobih-lobih do sipanganon ibere.
- ³² Igoki do tangan-Ni bani hilap, anjaha
ipasarohkon do ai bani imbang-Ni.
- ³³ Sora ni longgur-Ni patugahkon parroh-Ni,
parringis do la dompak halak parjahat."

Ujung ni Sahap ni si Elihu:**Hamuliaon ni Naibata na Ibagas Alam**

- 37** ¹ “Tongon tene, pala do manlobuk taroktokku halani ai, anjaha lumpat humbani iananni.
- ² Tangar, tangar nasiam ma pardorom ni sora-Ni, ampa sora na luar hun pamangan-Ni.
- ³ Ipaturut do sora-Ni ai marguling-guling i toruh ni ganup langit in, anjaha hilap-Ni ai das hu ujung ni tanoh on.
- ⁴ Irik hujai mardorom ponggei-Ni, marsora la marhitei sora ni hajombuton-Ni, anjaha seng ijolomi hilapni sanggah tarbogei sora-Ni.
- ⁵ Marsangap do Naibata marhitei ponggei-Ni na jombut tumang, la do mambahen habanggalon, na so tararusi hita.
- ⁶ Ia do mangkatahon hubani salju, ‘Turun ho hu tanoh!’ hubani udan habahaba ampa udan, ‘Gobas ma!’
- ⁷ Ia do na manokan ganup tangan nijolma, ase ganup jolma na tinompa-Ni manandai pambahenan-Ni.
- ⁸ Laho do binatang-binatang hu parponopanni, anjaha manggompang ibagas liangni.

- ⁹ Roh do halisungsung humbani kamarni, anjaha na borgoh roh humbani logou.
- ¹⁰ Marhitei hosah ni Naibata roh es, himpang gabe bah na bolag.
- ¹¹ Boratan do hambun ibahen bani udan, la do mangerapkon hambun-Ni na marisi hilap ai.
- ¹² la do pahusor-husorhon hambun ai marguru bani panogu-Ni, laho pasaudkon na pinarentahkon-Ni bani sidea i sab dunia on.
- ¹³ Barang bahen uhuman bani dunia-Ni, barang bahen tuah mambahen ipalopas ai masa.
- ¹⁴ Tangar ham ma in Job, soh ham lobei, anjaha parimbagaskon ham ma halongangan, na binahen ni Naibata.
- ¹⁵ Ai ibotoh ham do, naha pangondoskon ni Naibata parentah-Ni bani sidea, anjaha naha ase marsinalsal hambun-Ni marhitei hilap?
- ¹⁶ larusi ham do parmayap-ayap ni hambun ai ampa horja halongangan ni Parpambotoh Na Gokan Dear in?
- ¹⁷ Ham, na dob mohopan ibahen pakeianmu, anggo masip tanoh on halani logou na hun dangsina,
- ¹⁸ ham do hasoman-Ni paherbangkon langit ai, jonam songon sormin na tinuang?
- ¹⁹ Ajarhon ham ma bennami sihatahononnamni bani; aha pe lang tarpajojor hanami halani hagolapan ni uhurnami.

- ²⁰ Adong do nani na palumbahonsi, anggo sihol marsahap ahu? Adong do nanijolma na marsura-sura sihol magou ia?
- ²¹ Tongon sonari seng naidah sinalsal ni mata ni ari, halani ilingodi hambun sinalsalni in; sompong montas ma logou, gabe torang ma use ibahen.
- ²² Hun utara do roh sinalsal na maromas, hamuliaon na majombut do manginggoti Naibata.
- ²³ Pargogoh Na So Tarimbang in seng tarjumpahi hita ia; parhagogohon banggal do la anjaha parhabonaron, seng ra la papeolhon uhum.
- ²⁴ Halani ai, talup do la habiaran nijolma; seng kawahkonon-Ni halak na mangahap pentar ia.”

Balos ni Naibata na Parlobei bani si Job:

Hagogohon-Ni Ibagas na tinompa-Ni ampa Ibagas Parmuduon-Ni

- 38** ¹ Dob ai roh ma balos ni Naibata hubani si Job marhitei habahaba, nini ma,
- ² “Ise do in, na sihol pagolap uhur ni Naibata marhitei hata na so marpanimbangion?
- ³ Mahua gonditi ma binongeimu songon dalahi, ase husungkun ho, anjaha ajari ma Ahu.

- ⁴ Ija do ho, sanggah Hubahen onjolan ni dunia
on? Patugah ma Bangku, anggo na maruhur
do ho.
- ⁵ Ise do na mambahen sibaranni? Ai lang ibotoh
ho do gakni ai! Ise do na pagistang tali
panibar i atasni?
- ⁶ I atas aha do ipajonam tiang partunggulni,
anjaha ise do na patibal batu parsuhini,
- ⁷ sanggah rap mandoding bintang sogod-sogod
anjaha marolob-olob ganup anak ni
Naibata?
- ⁸ Ise do na manutup laut bani labah, sanggah
pultak bahni hun partapaan,
- ⁹ sanggah Hujadihon hambun gabe hiouni, pakon
hagolapan gabe hiou ampanni?
- ¹⁰ Sanggah na Hutontuhon parbaloganni, anjaha
na Hubahen ransang-ransang ampa labahni,
- ¹¹ anjaha ningku, 'Sibar jon do ho bulih roh, seng
bulih lopusanmu, anjaha ijon do maningon
marsaran gunsang ni gilumbangmu!'
- ¹² Ongga do ho sadokah goluhmu mangkatahon
siang ari, barang patugahkon hubani sibalik
huning iananni,
- ¹³ ase ijolom ujung ni tanoh on, anjaha iusir
hunjai halak parjahat?
- ¹⁴ Salih ma ai songon tanoh halampung na hona
token, anjaha iset songon hiou.

- ¹⁵ Itarik do humbani halak parjahat haliharon
ni sidea, anjaha iponggolhon tangan na
mangondam.
- ¹⁶ Ongga do ho masuk hu sombul ni laut, anjaha
ongga idalani ho tondolan ni luhung ai?
- ¹⁷ Ongga do ididah ho buha labah ni hamatean,
atap onga do ididah ho horbangan ni
halotiron?
- ¹⁸ Ongga do tartatap ho habolagon ni dunia on,
patugah, anggo ibotoh ho do ganupan ai.
- ¹⁹ Ija do dalan laho hu ianan ni haliharon, anjaha
ija do ianan ni hagolapan,
- ²⁰ ase boi boanonmu ai mulak bani iananni,
anjaha ibotoh ho do dalan laho hu rumahni?
- ²¹ Ibotoh ho do hap ai, ai ijia do ho tubuh, anjaha
domma buei bilangan ni ari-arimu!
- ²² Domma onga ho hu kamar panimpanan
ni salju, anjaha domma onga ididah ho
gudang ni sira-sira,
- ²³ na Hutagangi bani panorang hasosakan, bani
panorang marsimunsuhan ampa porang?
- ²⁴ Ija do dalan hu ianan parbolahan ni logou,
barang ianan parserakan ni logou
hapoltakan hu tanoh in?
- ²⁵ Ise do mambahen bondar bani bah udan,
anjaha ise do mambahen dalan bani hilap,
- ²⁶ laho mangarbahi tanoh na so marisi jolma,
ampa halimisan na so marisi jolma,

- 27 laho pabosur tanoh dorging-dorging
anjaha horah-horah, anjaha mambahen
martumbor poyon-poyon na maratah?
- 28 Naha, ai marbapa do udan, anjaha ise do na
manubuhkon tektek ni namur?
- 29 Ise do na manubuhkon es, anjaha ise do na
manjadihon salju?
- 30 Gabe mapir do bah ai songon batu, anjaha sisik
ni luhung ai marhimpang.
- 31 Mangasup do ho mamudun tali ni bintang hala,
barang mangkarhari tali ni bintang pariama?
- 32 Boi do paluaronmu bintang na marlinang-
linang bani panorangni bei, barang boi do
togu-togunmu bintang gipul ampa anakni?
- 33 Ibotoh ho do undang-undang ni langit? Ho do
na manontuhon kuasani i tanoh on?
- 34 Boi do pagijangonmu soram das hu hambun
ai, anjaha ra do udan mapor mambalosi ho?
- 35 Ai ho do marsuruh, ase laho hilap ai, anjaha
ihatahon bam, 'Tonggor ma, andon ma
hanami roh!'
- 36 Ise do na mannahkon hapentaran ibagas
hambun ai, anjaha ise do na mambere uhur
bani hambun na marganjang ai?
- 37 Ise do na boi mamilangi hambun ai
marhasoman hapentaran, anjaha boi
manguseihon gusi ni langit ai,

- ³⁸ sanggah mapir tanoh ai songon bosì, anjaha rapat bei ulbakni?
- ³⁹ Ai ho do na marburu sipanganon ni singa boru-boru, barang na pabosurhon lohei ni anak ni singa,
- ⁴⁰ sanggah modom sidea ibagas liangni, barang sanggah mangonggopi ibagas naporon?
- ⁴¹ Ise ma na pasirsirhon sipanganon bani kawak, sanggah siok-siok anakni hubani Naibata, sanggah mordong ia halani seng dong sipanganon?”

Sambatni

- 39** ¹ Ibotoh ho do sadihari maranak bedar? Ongga do ipardiatei ho sanggah laho marmurik urisa boru-boru?
- ² Ibotoh ho do bilangan ni bulanni rambong, anjaha ibotoh ho do panorangni manunas?
- ³ Iundukkon bani, jadi tubuh ma anakni, dob ai salpu ma pangarouonni ai.
- ⁴ Lambin gogohni ma anakni anjaha marbanggal ibagas naporon; dob ai laho ma sidea, seng simulak-mulak bani indungni.
- ⁵ Ise do na pajalang halode liar? Ise do na mangkarhari tali ni halode na lingkak?
- ⁶ Bani do Hubere tanoh pamah bahen rumahni, anjaha tanoh garam bahen iananni.

- ⁷ Ipartawai do haramion ni kota, seng itangihon
sorgang ni sais.
- ⁸ Mawat-awat do ia i dolog mangindahi
sampilanni, anjaha ipindahi do poyon-
poyon simaratah.
- ⁹ Ai ra do badak ai gabe parhorjamu! Mintor ra
ma ia marborngin i lambung ni palangkamu?
- ¹⁰ Mintor mangasup ma ho manambat badak
laho maninggala, barang tumaram ma
balosanni ho manisir i habungan?
- ¹¹ Boi ma marnalom ni uhur ho bani halani na
margogoh tumang ai ia, barang tarondoskon
ho ma bani horjamu?
- ¹² Tenger do uhurmu bani laho manarui
gandummu, barang patumpuhon ai bani
pardogeianmu?
- ¹³ Jenges do pamerper ni habong ni burung unta;
tapi siparholong atei do ia?
- ¹⁴ Itolurhon toturni hu tanoh, anjaha ipaturut do
tanoh ai mamosahi ai;
- ¹⁵ lupa do ia, na boi ai posah bahenon ni nahei,
anjaha na boi lotlotan ni binatang.
- ¹⁶ Lang maruhur holong ia bani anakni, hira seng
ia simadasi; seng iuhurhon atap sisoya-soya
holi halojaanni ai,
- ¹⁷ halani seng ibere Naibata bani hapentaran,
anjaha marrupe i bani panimbangan.

- ¹⁸ Sanggah iperperhon habongni laho lintun,
ipartawai do huda ampa na mangajaksi.
- ¹⁹ Ai ho do sibere gogoh bani huda? Ho do na
mannahkon jumbakni hubani borgokni?
- ²⁰ Ho do mambahen lumpat-lumpat ia songon
balang? Jangin do parihei-iheionni.
- ²¹ Kais-kais do ia i tanoh habungan anjaha
malas uhurni, ibagas hagogohon luar do ia
manjumpahkon sinjata.
- ²² Ipartawai do habiaran, seng haru uhurni, seng
manlembang ia mulak mangidah podang.
- ²³ Mardapar-dapar pe sarung ni sior i babouni,
marhilap lombing pakon tanja;
- ²⁴ marah anjaha maranjak do ia, ikaisi tanoh,
seng tartagangi, dob marhata tarompet.
- ²⁵ Marhatahonsi tarompet marihei-ihei ma ia,
humbani na daoh ope domma taranggohsi
uap ni parporangan, sonai homa sora gogoh
ni puanglima ampa surak-surak.
- ²⁶ Halani hapentaranmu do ase habang hu atas
haluhuy, anjaha iherbangkon habongni
dompok dangsina?
- ²⁷ Halani parsuruhmu do ase habang manuk-
manuk nanggordaha dompak datas, anjaha
ibahen asarni bani ianan na gijang?
- ²⁸ I atas dolog batu do iananni pakon asarni, i
ujung ni dolog batu ampa i pakpak ni dolog.

²⁹ Hunjai do itungkir-tungkir sorohanni, daoh do panatap ni matani.

³⁰ Daroh do isopsop anakni, anjaha ija halak na tartampul ijai do ia.

Ipaunduk si Job Uhur ni i Lobei ni Naibata

40 ¹ Dob ai marsahap ma Jahowa hubani si Job,
² “Sihol do partinggilhonon ni halak siparhutuk, Pargogoh Na So Tarimbang in? Ibalosi siaduhon Naibata in ma on?”

³ Dob ai nini si Job ma mambalosi Jahowa,

⁴ “Aha pe lang ahu; naha ma ningku mambalosi Ham? Hututup ma gelah pamanganku bani tanganku.

⁵ Domma marsahap ahu sahali, seng ulakanku be ai; dua hali tene, tapi seng nunutonku be ai.”

Sambat ni Parsahapan ni Naibata

Pargogoh Na So Tarimbang do Naibata

⁶ Dob ai roh ma balos ni Jahowa hubani si Job humbani habahaba, nini ma,

⁷ “Gonditi ma binongeimu songon dalahi; adong do sungkunon-Ku bam, anjaha patorang ma hu Bangku.

⁸ Sihol parsedaonmu do uhum-Hu? Sihol salahkononmu do Ahu ase pintor ho?

- ⁹ Ai partangan songon tangan ni Naibata do ho?
Mintor tarbahen ho ma marsora longgur
songon-Si?
- ¹⁰ Pajagar ma dirimu marhitei hamuliaon ampa
hatimbulon, marhiou hatunggungan ampa
hasangapon ma ho.
- ¹¹ Pataridahkon ma gajag ni ringismu, pardiatei
ma haganup sigijang maruhur anjaha
patoruh ma ai.
- ¹² Kawahkon ma ganup halak na jungkat maruhur
anjaha patunduk ma ai, anjaha lotloti ma
halak parjahat bani iananni.
- ¹³ Ponopkon ma sidea hubagas orbuk, anjaha
tambatkon ma bohi ni sidea bani ianan na
ponop.
- ¹⁴ Jadi dihut ma Ahu homa mamuji ho, halani
tangan siamunmu sandiri mambere
hamonangan bam.

Biak ni Huda Nil

- ¹⁵ Tonggor ma huda Nil, na hujadihon songon
panjadihon-Ku bam; poyon-poyon do igagat
usih songon lombu.
- ¹⁶ Tonggor ma, ibagas binongeini do
hagogohonni, anjaha ibagas urat-urat ni
boltokni do habetengonni.

- ¹⁷ Boi do ibahen gonggong ihurni songon hayu ares, anjaha mardandan do urat-urat ni hae-haeni.
- ¹⁸ Songon pipa tombaga do holiholini, anjaha gorini songon balok bosi.
- ¹⁹ Ia do jadi-jadian ni Naibata na parlobei, na jinadihon-Ni gabe raja i tengah-tengah ni hasomanni.
- ²⁰ Dolog do panampalan bani, ianan ni binatang-binatang marguro-guro.
- ²¹ I toruh ni batang ni hayu na marbunga do ia rosuh marlinggom, marponop i tengah-tengah ni arung-arung ampa paya-paya.
- ²² Batang ni hayu na marbunga do manlinggomisi, anjaha bulung ni tolong do manrungkubsi.
- ²³ Marbanggal pe bah seng gobir ia, totap do uhurni age pe roh bah ansa banggal ni Jordan mandorabsi.
- ²⁴ Ise ma na boi manangkapsi hun lobeini?
Barang mannahkon halihir hubagas igungni?

Biak ni Buaya

41 ¹ (40-25) Tumaram ma boi toguonmu buaya marhitei hail, barang odohkononmu dilahni bani tali?

- ² (40-26) Tumaram ma boi halihironmu igungni
marhitei hotang, barang tupukonmu
huyumni bani hail bosì?
- ³ (40-27) Tumaram ma ia ninuhurmu ra
mambahen pangindoan bam, barang
marhata na lamlam bam?
- ⁴ (40-28) Tumaram ma ra ia marpadan pakon ho,
gelah ra ia lalab jadi jabolonmu?
- ⁵ (40-29) Tumaram ma boi parguro-gurohononmu
ia songon manuk-manuk, barang
tambatkanonmu ia bahen guro-guro ni
borumu?
- ⁶ (40-30) Tumaram ma ra halak pardengke
mantiga-tigahonsi? Barang ra ma halak
partiga-tiga marbagi ai?
- ⁷ (40-31) Mangasup do ho manomtomkon
lombing hubani hulingkulingni, barang uluni
bani pantom-pantom?
- ⁸ (40-32) Lajou ma sahali manangkapsi! Ingat
ma parporanganni! Tontu lang be ra ho
manlajousi.”

Sambatni Pasal Buaya ai

- ⁹ (41-1) Tonggor ma, labuh do pangarapanmai,
mangidahsi pe domma malitonduy ho.
- ¹⁰ (41-2) Ise pe lang na pag mangkeheisi; i
lobei-Hu ise na tahan jongjong?

- ¹¹ (41-3) ise ma na dob mamberehon Bangku,
ase hubalas ai bani? Haganup na i toruh ni
langit, Ahu do simadasi.
- ¹² (41-4) Seng pasipon-Ku pasal pagorini ai,
barang gogohni na surung ai, barang
potongan ni badanni ai.
- ¹³ (41-5) Ise ma na onggga mananggali pakeianni?
Ise ma na pag manroroh hubagas iponni
sidua baris ai?
- ¹⁴ (41-6) Ise ma na onggga mambuha osangni ai?
Jangin do inggot iponni ai.
- ¹⁵ (41-7) Gurungni tarjadi humbani gantar na
patitir, marrapat-rapat songon na tinokan.
- ¹⁶ (41-8) Rapat do na sada bani na sada nari,
logou pe seng siat hun holangkolangni.
- ¹⁷ (41-9) Ganup longkot bani na legan,
marsirapitan seng hasirangan.
- ¹⁸ (41-10) Anggo marbarisi ia kaluar sinalsal,
anjaha matani songon salibon ni sibalik
huning.
- ¹⁹ (41-11) Humbani babahni kaluar rigapan na
marjilam-jilam, anjaha abab mandarat
hunjai.
- ²⁰ (41-12) Humbani bungbung ni igungni kaluar
timus, songon humbani hudon na gurgur, na
ginorgoran marhitei ranggas-ranggas.
- ²¹ (41-13) Hosahni boi pagara arang, anjaha gajag
ni apuy kaluar humbani babahni.

- ²² (41-14) Marianan do hagogohon bani
tangkuhukni, anjaha songgot-songgot
mardalan i lobeini.
- ²³ (41-15) Sibuk ni badanni toguh, songon na
tinuang bani, seng tardugur.
- ²⁴ (41-16) Mapir do atei-ateini songon batu,
mapir tene songon batu ni pandudaan na
partoruh.
- ²⁵ (41-17) Anggo hehe ia bajoraon do halak na
garang, malitonduy halani biarni.
- ²⁶ (41-18) Podang pe lang tolak bani, age tanja,
gijig-gijig atap anak ni panah pe.
- ²⁷ (41-19) Doskon anggala do ietong bosi, anjaha
tombaga doskon hayu masik-masik.
- ²⁸ (41-20) Seng maporus ia bahenon ni anak
ni panah, doskon anggala do bani batu ni
umbalang.
- ²⁹ (41-21) Doskon hayu ni omei do ihira
antuk-antuk, anjaha itatawai do parngingis
ni tanja.
- ³⁰ (41-22) Boltokni doskon sanga-sanga na marot,
anjaha bogasni ibagas hubang doskon bogas
ni gareta pardogei.
- ³¹ (41-23) Bah na i toruh gurgur ibahen songon
bah na ibagas hudon, anjaha laut ai doskon
serek panlompahan ni tambar.

- ³² (41-24) Limbasni i pudini mirlak-irlak
itadingkon, anjaha doskon uban sisik ni bah
ai idahon.
- ³³ (41-25) Seng dong usihanni anggo i darat, na
tinompa na so marhabiaran do ia.
- ³⁴ (41-26) Mapas uhurni mangidah sagala na
gijang, ia do raja bani sagala binatang
panoroh.”

Si Job Paunduk anjaha Manolsoli Uhurni

- 42** ¹ Dob ai nini si Job ma mambalosi Jahowa,
² “Sonari pe ase hubotoh marguru Bamu do
ganup, anjaha seng tarlanglangi sura-sura ni
uhur-Mu age sada.
- ³ Ise do in, na sihol pagolap uhur ni Naibata,
marhitei hata na so marpanimbangion?
Halani ai do ase husahapkon na so huarusi,
pahara na gok halongangan bangku, na so
hubotoh.”
- ⁴ Boge, sihol marsahap do Ahu, adong do sihol
sungkunonku bam, ase ho patorangkon
Bangku.
- ⁵ Domma namin huboge, barita pasal Ham,
tapi anggo sonari matangku sandiri ma
mangidah Ham.
- ⁶ Halani ai jora ma ahu, anjaha husolsoli do
diringku hundul ibagas orbuk ampa abuan.

Si Job Mangulaki Mardohar

⁷ Dobkonsi ihatahon Jahowa hata ai hubani si Job, nini Jahowa ma dompak si Elipas na hun Teman, “Domma gajag ringis-Hu dompak ho ampa dompak huan-kuanmu sidua halak ai; ai lang sintong pangkatahonnima pasal Ahu, songon pangkatahon ni juakjuak-Ku si Job ai.

⁸ Halani ai buat hanima ma pitu lembu jonggi ampa pitu biribiri tunggal, anjaha laho ma hanima marayak juakjuak-Ku si Job ai, anjaha galangkon hanima ma bannima galangan situtungan laho manguras dirinima, ase itonggohon juakjuak-Ku si Job hanima, ai ra do Ahu manangihon tonggoni gabe seng honahonon-Ku be bannima domu hubani haotoon na binahennima ai, ai lang sintong pangkatahonnima pasal Ahu, songon pangkatahon ni juakjuak-Ku si Job ai.”

⁹ Dob ai laho ma si Elipas na hun Teman pakon si Bildad na hun Sua pakon si Sopar na hun Naama, anjaha ibahen sidea ma romban hubani hata ni Jahowa na bani sidea; anjaha itangihon Jahowa do tonggo ni si Job ai.

¹⁰ Dob ai ipasuang Jahowa ma hadoharon ni si Job, sanggah na martonggo ai ia mangapiti huan-kuanni ai, anjaha dua lumpit ma ganda ipasuang Naibata hubani si Job sagala na dong bani hinan.

¹¹ Dob ai roh bei ma sagala saninani, botouni ampa haganup na manandasi hinan, lanjar mangan rapkonsi ibagas rumahni; ipataridahkon sidea ma bangga ni uhur ni sidea bani, anjaha iapoh sidea ma ia pasal haganup hinamagou na pinasogop ni Jahowa bani; anjaha ganup sidea mambere bani sada duit kesita ampa sada bei tintin omas.

¹² Dob ai ipasu-pasu Jahowa ma si Job lebih humbani mungkahni hinan, gabe adong ma bani sapuluh ompat ribu biribiri, onom ribu unta, saribu pasang horbou ampa saribu halodeni boru-boru.

¹³ Tubuh ma use pitu anakni ampa tolu boruni.

¹⁴ Goran ni boruni sikahanan ai ma si Jemima, goran ni paidua si Kesia, goran ni paitolu si Kerenhapuk.

¹⁵ Bani sab nagori ai, seng dong jumpah naboru songon hinajenges ni boru ni si Job ai; ibere si Job do parbagianan bani sidea songon na bani botou ni sidea.

¹⁶ Dob ai manggoluh ope si Job ai saratus ompat puluh tahun nari; sompat ope ididah anakni ampa pahompuni ompat sundut.

¹⁷ Dob ai matei sayur matua ma si Job dob sombuh iahap bani hagoluhan on.

Psalmen

Hatuahon ni Halak Parpintor ampa Hamagouan ni Halak Parjahat

- 1** ¹ Martuah ma halak na so ra mangihutkon riah
ni halak parjahat, na so ra jongjong bani
dalan ni pardousa, anjaha na so ra hundul
bani tumpuan ni halak siparrisai.
- ² Tapi titah ni Jahowa do harosuh ni uhurni, sai
titah-Ni ai do ipingkiri arian pakon borngin.
- ³ Songon hayu do ia na sinuan i topi ni bah
mardalan, na marbuah bani musimni,
bulungni pe seng ra melus, anjaha sagala
hinorjahonni manjadi do.
- ⁴ Seng sonai anggo halak parjahat, tapi songon
lapa-lapa hinabangkon ni logou do sidea.
- ⁵ Halani ai seng tahan halak parjahat i lobei ni
paruhuman, sonai homa pardousa ibagas
humpulan ni halak parpintor.
- ⁶ Ai itanda Jahowa do dalan ni halak parpintor,
tapi sai maseda do dalan ni halak parjahat.

**Panrajaion ni Naibata ampa
Mesias Siparmonang in**

- 2** ¹ Mase sai oga-oga bangsa sipajuh begu-
begu, anjaha na so marnidok ipingkiri
bangsa-bangsa?
- ² Jongjong do raja-raja ni tanoh on, anjaha
manriah do na sangap-sangap, laho
mangimbang Jahowa pakon na mininakan-
Ni.
- ³ “Rutuskon hita ma gari ni sidea, anjaha
ambukkon hita ma tali ni sidea hun banta.”
- ⁴ Ipartatawai na marhotak i nagori atas ai do
sidea, anjaha mapas do Tuhan bani sidea.
- ⁵ Lanjar marsahap ma la dompak sidea ibagas
ringis-Ni, anjaha isonggoti sidea ibagas
gila-Ni.
- ⁶ “Ahu do pabangkit rajang-Ku i Sion, dolog-Ku na
ma pansing in.”
- ⁷ Patugahonku ma na dob tinotapkon ni Jahowa:
Domma ihatahon Jahowa bangku, “Anak-Ku
do ho, sadari on do ho Hutubuhkon!
- ⁸ Pindo ma hun Bangku, ase Hubere sagala
bangsa gabe tean-teanan bam, anjaha ujung
ni tanoh on, ho simadasi.
- ⁹ Ropukan-Mu do sidea marhitei simambu bosi,
anjaha rosakkononmu do songon hudon
tanoh.”

- ¹⁰ Ai pe, nasiam sagala raja, paruhurhon nasiam
ma ai, sai ra ma nasiam paingaton, nasiam
sagala panguhum ni tanoh on.
- ¹¹ Balosi nasiam ma Jahowa marhasoman
biar, anjaha summah nasiam ma nahei-Ni
marhasoman hitir,
- ¹² ase ulang roh ringis-Ni gabe magou nasiam
i tongah dalan, ai urah do gajag ringis-Ni.
Martuah do sagala na marhatengeran Bani.

Nalom ni Uhur bani Jahowa Ibagas Parmaraan

- 3** ¹ Psalm ni si Daud, sanggah maporus ia
humbani anak ni si Absalom. (3-2) Ham
Jahowa, bueini in imbangku, buei ni in na
puho manlawan ahu.
- ² (3-3) Buei do na mangkatahon pasal ahu,
“Seng dong be pangurupion bani humbani
Naibata.”
- ³ (3-4) Tapi Ham do Jahowa gantar bangku
inggot, hatunggungan do Ham, sipadirgak
ulungku.
- ⁴ (3-5) Hupagogoh do sorangku mandilo Jahowa,
gabe itangihon do ahu hun dolog-Ni na ma
pansing in. Sela.
- ⁵ (3-6) Hupatibal diringku lanjar tarpodom,
tarpuho use, ai Jahowa do manatang ahu.
- ⁶ (3-7) Seng mabiar ahu mangidah marribu-ribu
halak, na roh manlawan ahu inggot.

⁷ (3-8) Jongjong ma Ham Jahowa, urupi ma ahu,
Ham Naibatanku. Ai domma irosakkon
Ham osang-osang ni imbangku, anjaha
iropangi Ham ipon ni parjahat.

⁸ (3-9) Bani Jahowa do haluahon, sai sogop ma
pasu-pasu-Mu bani bangsa-Mu. Sela.

Mardamei Ibagas Jahowa

4 ¹ Bani pambobai koor. Marhasoman husapi.
Psalm ni si Daud. (4-2) Anggo dilo-dilo
ahu, balosi Ham ma ahu, Ham Naibata,
Sipintori ahu. Domma ipalumbang Ham
ahu ibagas hasosakanku, sai maidop ma
uhur-Mu bangku anjaha tangihon Ham ma
tonggongku.

² (4-3) Nasiam dalahi, sadiha dokah nari mapas
uhur nasiam pasambor samborhon
hasangaponku, sadiha dokah nari
haholongan nasiam na so marguna anjaha
pindahan nasiam ladung? Sela.

³ (4-4) Botoh nasiam ma, domma ipilih Jahowa
sada haholongan-Ni Bani. Itangihon Jahowa
do anggo hudilo la.

⁴ (4-5) Boi do manggila, tapi ulang mardousa.
Marpingkir-pingkir ma nasiam ibagas uhur
bani podoman nasiam, tapi sipsip ma
nasiam. Sela.

- ⁵ (4-6) Galangkon ma galangan na sintong, anjaha ajamkon ma Jahowa.
- ⁶ (4-7) Buei do na mangkatahon, “Ise ma na manumpakkon na madear banta?” Sondangkon Ham ma sinalsal ni bohi-Mu bennami, Ham Jahowa.
- ⁷ (4-8) Bueinan do malas ni uhur ibere Ham hubagas uhurhu, marimbang malas ni uhur ni sidea sanggah pariama omei pakon pariama anggur na junah.
- ⁸ (4-9) Ibagas damei hupatibal diringku lanjar sinok, ai Ham do hansa Jahowa na mambahen sonang ahu marianan.

Tonggo Sogod

- 5** ¹ Bani pambobai koor. Marhasoman tulila. Psalm ni si Daud. (5-2) Sai tangihon Ham ma hatangku, Ham Jahowa, anjaha pardiateihon Ham ma hoih-hoih ni uhurhu.
- ² (5-3) Tangihon Ham ma dilo-dilongku Ham Rajangku anjaha Naibatangku, ai hu Bamu do ahu martonggo.
- ³ (5-4) Ham Jahowa, girah sogod do itangihon Ham sorangku, girah sogod do ahu marugas marayak Ham anjaha manatap-natap.
- ⁴ (5-5) Ai sedo Naibata na mangkarosuhkon hagedukon ia Ham, seng boi tondok paruhur na geduk i lambung-Mu.

- ⁵ (5-6) Seng tahan sigijang uhur i lobei ni
panonggor-Mu, sogam do uhur-Mu bani
sagala sihorjahon hajahaton.
- ⁶ (5-7) Iparseda Ham do sagala halak sisahapkon
ladung, ihagigihon Ham do siduruskon
daroh pakon panipu.
- ⁷ (5-8) Tapi anggo ahu, halani banggal ni idop ni
uhur-Mu, sai masukanku do rumah-Mu,
manrogop do ahu dompak rumah-Mu na
pansing in, marhasoman biar Bamu.
- ⁸ (5-9) Ham Jahowa, togu Ham ma ahu ibagas
hapintoron-Mu, halani imbang-imbangu,
pahornop Ham ma dalan-Mu i lobeihu.
- ⁹ (5-10) Ai seng dong na sintong ibagas pamangan
ni sidea, na ilat do pingkiranni ibagas,
songon tanoman na tanggak do tolonan ni
sidea, ipalandit-landit do dilahni.
- ¹⁰ (5-11) Salahkon Ham ma sidea, Ham Naibata,
sai madabuh ma sidea halani tahi-tahi ni
sidea, ambukkon Ham ma sidea halani buei
ni panlanggaronni, ai dompak Ham do sidea
manlawan.
- ¹¹ (5-12) Tapi sai na marmegah-megah do sagala
na marlingod Bamu, marolob-olob do
sidea sadokah ni dokahni, halani Ham do
parlingodan bani sidea. Sai marolob-olob do
ibagas Ham na mangkaholongi goran-Mu.

¹² (5-13) Ai Ham do Jahowa na mamasu-masu na pintor maruhur; iliotkon Ham do idop ni uhur-Mu hubani sidea songon gantar.

Tonggo bani Panorang Hasosakan

- 6** ¹ Bani pambobai koor. Marhasoman husapi. Domu hubani na pauuluhkon. Psalm ni si Daud. (6-2) Ham Jahowa, ulang uhum Ham ahu ibagas ringis-Mu, ulang bogbog Ham ahu ibagas gila-Mu.
- ² (6-3) Maidop ma uhur-Mu bangku, Ham Jahowa, halani hagalekonku; pamalum Ham ma ahu Jahowa, ai hitir-hitir do holi-holingku.
- ³ (6-4) Rusak tumang do tonduyhu ibagas, tapi Ham Jahowa, sadiha dokah nari do?
- ⁴ (6-5) Marulak-ulakan ma uhur-Mu, Ham Jahowa, paluah Ham ma tonduyhu, sai paluah Ham ma ahu, halani idop ni uhur-Mu.
- ⁵ (6-6) Halani bani hamatean seng dong halak na mardingat Ham, i nagori toruh, ise ma na mamuji Ham?
- ⁶ (6-7) Loja do huahap ibahen hoih-hoihku, siap borngin do bonsot podomanku hubahen, marhitei iluhku marbah do tilamku hubahen.

- ⁷ (6-8) Solong do matangku halani pusok ni uhurhu, roh galekni do ai halani halak na manosak ahu.
- ⁸ (6-9) Surut ma nasiam humbangku, sagala sihorjahon hajahaton, ai itangihon Jahowa do sora ni tangis-tangisku.
- ⁹ (6-10) Domma itangihon Jahowa hoihku; ijalo Jahowa do tonggongku.
- ¹⁰ (6-11) Sai tarbador anjaha tarsonggot tumang do sagala munsuhku; tarolos do sidea surut, tarmela sompong.

Mangindo Pamintorion ni Naibata

- 7** ¹ Doding adu-adu ni si Daud, nidodingkonni bani Jahowa, halani hata ni si Kus, marga Benjamin. (7-2) Ham Jahowa Naibatanku, hu Bamu do ahu marlingod, sai paluah Ham ma ahu humbani ganup na mangayak-ayak ahu, anjaha bansah ma bahen Ham ahu;
- ² (7-3) ase ulang iparsirak ahu songon pambahenan ni singa, anjaha isarad seng dong na paluahkon.
- ³ (7-4) Ham Jahowa Naibatanku, anggo hubahen on, anjaha ihorjahon tanganku na so sintong,
- ⁴ (7-5) anggo hubahen na jahat hubani halak na mardamei-damei manggoluh rap pakon

ahu, anjaha huodoh-odoh na manosak ahu
seng marhala,

⁵ (7-6) sai ipardakdak munsuhku ma ahu ronsi
dapot, irojati goluhku hu tanoh, anjaha
igijigkon bani orbuk hasangaponku. Sela.

⁶ (7-7) Jongjong ma Ham, Jahowa, ibagas
ringis-Mu, jongjong ma Ham mangimbang
gila ni na manosak ahu, puho ma Ham
mangurupi ahu, ai Ham do siparentahkon
uhum.

⁷ (7-8) Sai iinggoti hulanan ni bangsa ma Ham,
anjaha marparatas ma Ham i babou, i atas
ni sidea.

⁸ (7-9) Jahowa do na manguhum sagala
bangsa-bangsa. Luluhon Ham ma ahu Ham
Jahowa, romban hubani hapintoronku,
romban hubani habujuron na jumpah
bangku.

⁹ (7-10) Sai mangadi ma hajahaton ni parjahat;
tapi sai pargogohi Ham ma halak parpintor!
Ai Ham do siuji uhur pakon piah-piah, Ham
Naibata parpintor.

¹⁰ (7-11) Naibata do gantar bangku, sipaluah na
pintor uhur.

¹¹ (7-12) Panguhum na pintor do Naibata, anjaha
Naibata na manggila ganup ari.

- ¹² (7-13) Anggo seng ipaubah halak uhurni,
asahonni ma podangni, pasangonni ma
siorni laho manembak.
- ¹³ (7-14) Dompakkononni ma hubani sinjata
pamunuh, nahit ma panahni ibahen.
- ¹⁴ (7-15) Tonggor ma, solat ma bani hagedukon,
boratan rumah ma ia bani hamagouan,
anjaha itubuhkon ladung.
- ¹⁵ (7-16) Ihurak do godung anjaha bagas ibahen,
tapi ia sandiri do madabuh hubagas godung
na binahenni ai.
- ¹⁶ (7-17) Hajahaton na binahenni mulak dabuh
bani uluni, anjaha odoh-odohni mulak
manipa tangkurakni.
- ¹⁷ (7-18) Pujionku do Jahowa halani hapintoron-
Ni, anjaha dodingkononku do goran-Ni
Jahowa Sitimbulan in.

Jolma na Galek in Gabe Tinompa Sisurungan

- 8** ¹ Bani pambobai koor. Domu hubani Gitit.
Psalm ni si Daud. (8-2) Ham Jahowa,
Tuhannami, sangapni in goran-Mu bani
sab tanoh on, Ham do na mannahkon
hamuliaon-Mu bani langit.
- ² (8-3) Humbani pamangan ni dakdanak pakon
na inuman iadongkon Ham do hagogohon
halani munsuh-Mu, laho pasipkon
imbang-Mu ampa sipambalas.

- ³ (8-4) Anggo hukawahkon langit-Mu pakon horja
ni jari-jari-Mu, bulan pakon sagala bintang
na pinauli-Mu,
- ⁴ (8-5) mintor aha ma nanijolma in ase pala
ingaton-Mu ia, ampa anak ni manisia in ase
ihargahon Ham ia?
- ⁵ (8-6) Ijadihon Ham do ia otik toruhan humbani
Naibata, anjaha isortalihon Ham do hubani
hamuliaon pakon hatunggungan.
- ⁶ (8-7) Ipabangkit Ham do ia mamarentah
jadi-jadian ni tangan-Mu, ipatunduk Ham do
haganup hu toruh ni naheini:
- ⁷ (8-8) biribiri pakon lombu haganup, ampa
binatang harangan;
- ⁸ (8-9) manuk-manuk na i awang-awang pakon
dengke na i laut, haganup tene na manjuluk
i longkit-longkit ni laut.
- ⁹ (8-10) Ham Jahowa Tuhannami, sangapni in
goran-Mu bani sab tanoh on.

Panguhum pakon Sipaluah do Jahowa

- 9** ¹ Bani pambobai koor. Inggouni: Almaut Laben.
Psalm ni si Daud. (9-2) Sai pujionku do
Ham Jahowa humbani gok ni uhurhu, sai
baritahononku do sagala halongangan na
binahen-Mu in.

- ² (9-3) Marmalas ni uhur anjaha marolob-olob do
ahu Bamu, dodingkononku do goran-Mu,
Ham Sitimbulan in;
- ³ (9-4) halani ai manginsurut do munsuhku,
mangkajurgang anjaha bois i lobei-Mu.
- ⁴ (9-5) Tongon, Ham do sipatorsa uhum ampa
paharangku, hundul bani hotak-Mu do Ham
manguhumi, Ham panguhum na pintor.
- ⁵ (9-6) Hona hata do ibahen Ham sipajuh
begu-begu, iagouhon Ham parjahat, anjaha
isasap Ham do goran ni sidea sadokah ni
dokahni.
- ⁶ (9-7) Bois do munsuh in, marongrong lalab,
maseda do sagala huta ibahen Ham, magou
pardingat bani sidea.
- ⁷ (9-8) Tapi, ia Jahowa totap do marparatas ronsi
sadokah ni dokahni; ipajongjong do hotak-Ni
laho manguhumi.
- ⁸ (9-9) Ia do manguhum dunia on ibagas
hapintoron, anjaha ipapintor uhum bani
sagala bangsa sintong-sintong.
- ⁹ (9-10) Ase Jahowa do batar-batar bani na hona
doron, anjaha batar-batar bani panorang
hasosakan.
- ¹⁰ (9-11) Halani ai martenger ni uhur Bamu do
sagala na mananda goran-Mu, ai seng onga
itadingkon Ham sagala na mangindahi Ham,
ale Jahowa.

- ¹¹ (9-12) Dodingkon ma Jahowa, na marparatas i Sion, ambilankon ma pambahenan-Ni bani sagala bangsa;
- ¹² (9-13) ai la do siluluhon daroh, anjaha seng lupa la bani dilo-dilo ni halak na madoyuk.
- ¹³ (9-14) Maidop ma uhur-Mu bangku, Ham Jahowa, kawahkon Ham ma hadoyukonku halani na mandomdomi ahu; Ham do na mandokdok ahu humbani horbangan ni hamatean,
- ¹⁴ (9-15) ase hubaritahon sagala puji-pujian Bamu bani horbangan ni boru Sion, anjaha marolob-olob ahu halani parpaluah-Mu.
- ¹⁵ (9-16) Tarrobung do sipajuh begu-begu bani godung na binahenni, anjaha sangkut naheini bani siding na tinaonni ponop.
- ¹⁶ (9-17) Ipatandahon Jahowa do diri-Ni, idalankon do uhum, marhitei pambahenan ni tangan-Ni tarsangkut parjahat. Higajon. Sela.
- ¹⁷ (9-18) Sai turun do hu nagori toruh halak parjahat, haganup sipajuh begu-begu na mangkalupahon Naibata.
- ¹⁸ (9-19) Seng anjai lalab hona lupahon halak na masombuh, anjaha seng lalab magou pangarapan ni halak na hona dorun.

¹⁹ (9-20) Jongjong ma Ham Jahowa, ase ulang sai mangeljeng jolma in, sai hona uhum ma sipajuh begu-begu i lobei-Mu.

²⁰ (9-21) Pasogop Ham ma songgot-songgot bani sidea, Ham Jahowa, ase iahapkon sipajuh begu-begu jolma do sidea. Sela!

Jahowa do Sipaluah Halak na Masombuh

10 ¹ Mase mandaoh-daoh Ham jongjong, ale Jahowa, marponop Ham bani panorang hasosakanku?

² Halani enjeng ni parjahat, pusok do iahap na masombuh. Sai tardapot ma sidea bani hajahaton na niranggini ai.

³ Ai ihamogahkon parjahat do sura-sura ni uhurni, ipuji-ipuji untungni, anjaha iapasi Jahowa.

⁴ Nini parjahat do marhasoman pangunsong ni igungni, “Seng anjai marlulu la, seng dong Naibata,” sonai do pingkiranni.

⁵ Manjadi do sagala langkahni tongtong; magijangtu do humbani uhuman-Mu; iunsongkon igungni dompak imbangni.

⁶ Nini ibagas uhurni, “Seng anjai morot ahu, seng anjai mangonai bangku hasunsahan marsundut-sundut.”

⁷ Gok do bura-bura pakon sipaoto-oto ampa panokohon pamanganni; hagedukon pakon hajahaton do i toruh ni dilahni.

- ⁸ Sai manggompangi do ia bani huta-huta;
bani ianan na ponop ibunuhi halak na so
marpipot, matani mangkahapi halak na
galek.
- ⁹ Marponop do ia manggompangi songon singa
ibagas naporon, manggompangi ia laho
manangkap halak na masombuh. Itangkap
do halak na masombuh laho pamasukkonsi
hubagas sidingni.
- ¹⁰ Ipaunduk do dirini mardalan, jadi dapot
sisilonni na gogoh ai ma halak na galek.
- ¹¹ Nini ibagas uhurni, “Ihalupahon Naibata do ai,
iponopkon bohi-Ni, seng anjai idahon-Ni ai
ronsi sadokah ni dokahni.”
- ¹² Jongjong ma Ham Jahowa, ale Naibatanku,
surdukkon Ham ma tangan-Mu, ulang ma
lupa Ham bani halak na masombuh!
- ¹³ Mase ma mapas parjahat bani Naibata, anjaha
nini ibagas uhurni, “Seng anjai luluhonon-Ni
ai?”
- ¹⁴ ididah Ham do ai tene, itatap Ham do halojaon
pakon hasunsahan laho manangani ai.
Bamu do marondos halak na galek, Ham do
panolong bani halak na tading maetek.
- ¹⁵ Ponggolhon Ham ma botohon ni halak parjahat
pakon halak na jungkat, balaskon Ham ma
hajahatonni, ase ulang adong be ia.

- ¹⁶ Jahowa do raja sadokah ni dokahni; magou do sipajuh begu-begu humbani tanoh-Ni.
- ¹⁷ Domma itangihon Ham Jahowa pangindoan ni uhur ni halak na masombuh, ipatotap Ham do uhur ni sidea, anjaha ipatiur Ham do pinggol-Mu,
- ¹⁸ laho pasintong uhum bani halak na tading maetek pakon na nidorun, ase ulang inunutjolma na i tanoh on mambibiari.

Jahowa do Parlingodan bani Halak Parpintor

- 11** ¹ Bani pambobai koor. Humbani si Daud. Marlingod bani Jahowa do ahu, mase ma ihatahon nasiam hu bangku, “Habang ma ho hu dolog songon manuk-manuk!”
- ² Ai tonggor ma, domma isintak parjahat siorni, ipasang panahni bani talini, laho manembak ibagas na golap halak sipintor uhur.
- ³ Anggo maseda palas, aha ma boi ibahen halak parpintor?
- ⁴ Marianan do Jahowa ibagas rumah-Ni na pansing ai, i nagori atas do paratas ni Jahowa; manatap do panonggor-Ni, sai ipareksa pangkirdop ni mata-Ni do anak nijolma in.
- ⁵ Jahowa do siuji halak parpintor pakon parjahat; idomdomi do halak na mangkarosuhkon odoh-odoh.

⁶ Iudan-udan halak parjahat marhitei apuy pakon hirtah, logou na milas do parbagianan bani panginumanni.

⁷ Ai pintor do Jahowa anjaha ihaholongi do hapintoron; idahon ni halak parpintor do bohi-Ni.

Tonggo Mangindo Pangurupion Marimbang Halak Parjahat

12 ¹ Bani pambobai koor. Domu hubani na paualuhkon. Psalm ni si Daud. (12-2) Urupi Ham ma, ale Jahowa, ai seng dong be halak na daulat; lambin otik do halak na bujur uhur i tongah-tongah ni anak ni jolma.

² (12-3) Sai ladung do isahapkon samah sidea, marbibir na landit anjaha mardua uhur do sidea marsahap.

³ (12-4) Sai ijabir Jahowa ma sagala bibir na landit, pakon haganup dilah na toal marsahap,

⁴ (12-5) na mangkatahon, “Monang do hanami ibahen dilahnami, bibirname do mangkasomani hanami, ise ma nani tuannami?”

⁵ (12-6) Mangidah hasosakan ni halak na madoyuk pakon hoih ni halak na masombuh, ai do ase jongjong Ahu sonari, nini Jahowa, “Berehonon-Ku ma haluahon bani halak na mangarapkonsi.”

⁶ (12-7) Sagala hata ni Jahowa hata na sintong do ai, usih songon pirak na nilala ibagas balanga, anjaha ipapitah pitu hali.

⁷ (12-8) Ham Jahowa, sai parorot Ham ma sidea, sai ondingi Ham ma hanami marimbang bangsa on ronsi sadokah ni dokahni.

⁸ (12-9) Inggot marhujai-hujon do halak parjahat, sanggah manomboh hajahaton i tengah-tengah ni anak nijolma.

Uhur na Kawah-kawah bani Pangurupion ni Jahowa

13 ¹ Bani pambobai koor. Psalm ni si Daud.
(13-2) Sadiha dokah nari, Ham Jahowa, halupahonon-Mu ahu lalab? Sadiha dokahnari ponopkonon-Mu bohi-Mu humbangku?

² (13-3) Sadiha dokah nari sai tong marpingkir uhurhu, sai sunsah uhurhu ibagas layur-layur ari? Sadiha dokah nari sai pagijang diri munsuhku dompak ahu?

³ (13-4) Sai mangkawah ma Ham, balosi Ham ma ahu, Ham Jahowa, Naibatanku! Palihar Ham ma matanku, ase ulang lanjar matei modom ahu;

⁴ (13-5) ase ulang ihatahon munsuhku, “Domma hupatunduk ho,” ase ulang gabe marsurak munsuhku, anggo rebad-rebad ahu.

⁵ (13-6a) Ia ahu, bani idop ni uhur-Mu do ahu
marhatengeran, marolob-olob do uhurhu,
mangidah haluahon na hun Bamu.

⁶ (13-6b) Mandoding ma ahu bani Jahowa halani
pambahenan-Ni na madear bangku.

Haotoon ni Jolma na Marnalangkong Naibata

(Pausih: Psalm 53)

- 14** ¹ Bani pambobai koor. Humbani si Daud.
Nini halak na oto do ibagas uhurni, “Seng
dong Naibata.” Bajan anjaha sambor do
pambahenan ni sidea, sahalak pe lang
sibahen na madear.
- ² Manatap-natap do Jahowa hun nagori atas,
paidah-idah anak ni jolma laho mangidah
atap dong do na maruhur, sipindahi Naibata.
- ³ Haganup do sidea kahou, haganupan seng
margagan, sahalak pe lang sibahen na
madear, sahalak pe lang dong.
- ⁴ Seng marpambotoh nani sagala halak
sihorjahon na jahat, na mangankon
bangsang-Ku songon na mangan ruti, anjaha
na so onggamardilo Jahowa?
- ⁵ Tapi maningon tarsonggot do sidea use, ai
ihasomani Jahowa do ginompar ni halak
parpintor.
- ⁶ Iparseda nasiam pe sura-sura ni halak na
madoyuk, tapi Jahowa do parlingodanni.

⁷ Ah, sai roh ma haluahon bani Israel hun Sion!
 Anggo suang ma ibahen Jahowa bangsa-Ni,
 marolob-olob ma Jakob anjaha marmalas ni
 uhur Israel.

Ise do na Boi Dohor bani Naibata?

15 ¹ Psalm ni si Daud. Ham Jahowa, ise do na
 boi tondok bani lampolampo-Mu? Ise do na
 malo marianan bani dolog-Mu na pansing
 in?

² Ai ma halak na so panurakon bani parlahouni,
 sidalankon hapintoron, halak siluarhon na
 pintor ibagas uurni;

³ na so manrisai marhitei dilahni, na so
 mangkorjahon na jahat dompak hasomanni,
 anjaha na so parohkon habadoron bani
 sinkutani;

⁴ na mangkagigihon halak na pinabali, tapi na
 pasangapkon halak na mangkabiari Jahowa,
 na so mosei ia humbani bijani age rugi ia
 marhitei ai;

⁵ na so ra paanakkon duitni laho mangonsop,
 na so ra manjalo sisip laho mangimbang
 na so marsalah. Halak na mangkorjahon na
 sonai ai, seng anjai targompang sadokah ni
 dokahni.

Hatuahon ni Halak na Daulat

- 16** ¹ Miktam. Humbani si Daud. Parorot Ham ma ahu Naibata, ai marlingod hu Bamu do ahu.
- ² Ningku do dompak Jahowa, “Ham do Tuhanku, seng dong na pasonangkon ahu sobali Ham.”
- ³ Halak na ma pansing na i nagori on, marmulia do sidea, marosuh uhur hubani sidea.
- ⁴ Buei do sitaronon ni halak sisombah na legan, tapi seng ra ahu dihut manggalangkon galangan daroh ni sidea ai, nai ma, gari goran ni sidea seng sobuton ni bibirhu.
- ⁵ Jahowa do parbagianan bangku ampa panginumanku; Ham do sitotapkon parbagiananku.
- ⁶ Tongon do tali sibar-sibar mangonai bangku bani ianan na madear, nai ma, dear tumang do parbagiananku.
- ⁷ Pujionku do Jahowa, na mamodahi ahu, age borngin iajari piah-piahku do ahu.
- ⁸ Tongtong do hubahen Jahowa i lobei ni matangku; anggo i siamunku la, seng anjai jurgang ahu.
- ⁹ Halani ai malas do uhurhu anjaha marolob-olob tonduyhu, pamatangku pe marianan do bani na sonang.

- ¹⁰ Ai seng anjai ondoskonon-Mu tonduyhu
hu nagori toruh, anjaha seng paturuton-
Mu halak na daulat Bamu mangidah
hamarsikon.
- ¹¹ Sai patugahon-Mu do bangku dalan hagoluhan;
gok do malas ni uhur i lobei ni bohi-Mu,
anjaha hatuahon do i siamun-Mu sadokah
ni dokahni.

**Tonggo ni Halak na Pinarburu
na So Ingkat Marsalah**

- 17** ¹ Tonggo ni si Daud. Tangihon Ham ma,
alo Jahowa, hapintoronku. Tangihon Ham
ma elek-elekku! Parimbagaskon Ham ma
tonggongku, na luar humbani bibir na so
manipu.
- ² Humbani bohi-Mu roh pamintorion bangku,
panonggor-Mu do mangidah na sintong.
- ³ Anggo ipapangkei Ham uhurhu, ipareksa Ham
borngin, anggo iuji Ham ahu, seng anjai
jumpah Ham hajahaton bangku; seng onggga
tarlopus parsahapku.
- ⁴ Ia pasal parlahou nijolma, domu hubani hata
na luar hun pamangan-Mu, hujagai do
diringku dompak pambahenan ni halak
sipangodoh-odoh.
- ⁵ Bokas-Mu do iirikkon langkah-langkahku, seng
ongga jiris naheihu.

- ⁶ Sai Ham do hudilo, ai ibalosi Ham do ahu,
ale Naibata. Paeleng Ham ma pinggol-Mu
bangku, tangihon Ham ma hatangkon.
- ⁷ Patuduhkon Ham ma idop ni uhur-Mu na gok
halongangan in, Ham, alo Sipaluah halak na
marlingod bani tangan-Mu siamun dompak
imbang ni sidea.
- ⁸ Ramotkon Ham ma ahu songon anak ni mata;
ponopkon Ham ma ahu i toruh ni linggom ni
habong-Mu,
- ⁹ dompak halak parjahat na sihol mangagou ahu,
dompak munsuhku na manloulou ahu,
- ¹⁰ Itutup sidea do uurni, marhitei pamanganni
isahapkon hagijangon;
- ¹¹ igompangi sidea do ahu, tarloulou do ahu
nuan, sai ipardiateihon mata ni sidea do ahu
laho mangompaskon ahu hu tanoh.
- ¹² Usih do ia hubani singa na laho manoroh,
songon anak ni singa na monggop bani
ianan na ponop.
- ¹³ Jongjong ma Ham Jahowa, dompakkon Ham
anjaha ompaskon Ham ma ia, paluah Ham
ma goluhku humbani parjahat marhitei
podang-Mu,
- ¹⁴ marhitei tangan-Mu, Ham Jahowa, humbani
jolma, ai ma halak paruhur dunia sadokah
ia manggoluh, na dob ginokan-Mu
boltokni marhitei arta-Mu, na riris homa

marniombah, na boi martading-tadingan
bani na i pudini.

¹⁵ Tapi anggo ahu marhitei hapintoron idahonku
do bohi-Mu, hubosuri diringku sanggah na
puho ahu bani rupa-Mu.

**Doding Tarima Kasih ni Raja
Daud halani Hamonanganni**

18 ¹ Bani pambobai koor. Humbani juakjuak ni
Jahowa, ai ma si Daud, na manluarhon hata
ni doding on bani Jahowa, bani panorang
ipaluah Jahowa ia humbani tangan ni
munsubni pakon humbani tangan ni si Saul,
(18-2) nini, “Holong tumang do uhurhu
bamu Jahowa, hagogohonku.

² (18-3) Jahowa, dolog batu bangku, batar-
batarhu, na paluahkon ahu, Naibatangku,
batu gingging anjaha parlingodanku,
gantarhu, tanduk haluahonku pakon
benteng bangku.

³ (18-4) “Pinuji ma Jahowa!” ningku mandilohon,
ai ipaluah do ahu humbani munsubku.

⁴ (18-5) linggoti gilumbang ni hamatean do ahu,
anjaha bah hamatean manonggoti ahu;

⁵ (18-6) isangkut tali ni nagori toruh do ahu,
siding ni hamatean tagang dompak ahu.

⁶ (18-7) Ibagas hasosakankai hudilo ma Jahowa,
dilo-dilo ma ahu bani Naibatangku. Gabe

itangihon do sorangku humbani rumah-Ni,
anjaha das do doruhkai hu pinggol-Ni.

⁷ (18-8) Munjei anjaha dugur ma tanoh on,
onjolan ni dolog pe murdug ma, munjei
halani ringis-Ni.

⁸ (18-9) Maripul do timus humbani igung-Ni,
haluar apuy na mangankon humbani
pamangan-Ni, narnar na gara marjimbur
hun Bani.

⁹ (18-10) londun ma langit, turun ma la, lotir do i
toruh ni nahei-Ni.

¹⁰ (18-11) Mangajak herub do la, anjaha habang
mayap-ayap bani habong ni logou.

¹¹ (18-12) Na golap do ibahen manrungkub-Si,
lampolampo-Ni inggot ni bah na mamirong
ampa hambun na hapal.

¹² (18-13) Humbani sinalsal na i lobei-Ni luar do
hambun-Ni, ambolas pakon gara ni apuy.

¹³ (18-14) Marhata ma longgur ibahen Jahowa i
langit, ipamaling Na Timbul in ma sora-Ni.

¹⁴ (18-15) Isiorhon ma panah-Ni laho pamerap
sidea, ibahen do mardejep-dejep hilap laho
mardakdak sidea.

¹⁵ (18-16) Jadi taridah ma holbung ni bah, mulgap
ma onjolan ni dunia on, halani pangasupimu
Jahowa, halani pangombus ni hosah ni
igung-Mu.

- 16 (18-17) Idurdurhon do tangan-Ni hun babou
manangkap ahu, idokdok do ahu humbani
bah banggal.
- 17 (18-18) Ipaluah do ahu humbani munsuhku na
gogoh, humbani halak na mandondoni ahu,
sigogohan humbangu.
- 18 (18-19) Idorab sidea do ahu bani ari
hasunsahanku, tapi Jahowa do
hatundalanku.
- 19 (18-20) Itogu do ahu bani ianan na lumbang,
ipaluah do ahu, ai marosuh do la bangku.
- 20 (18-21) Ibahen Jahowa do hu bangku romban
hubani hapintoronku, romban hubani
haborsihon ni tanganku ipasuang hu
bangku,
- 21 (18-22) ai huihutkon do dalan ni Jahowa, seng
dong manjahati ahu, marbalik humbani
Naibatanku.
- 22 (18-23) Sai tong do i lobei ni matanku sagala
aturan-Ni, anjaha seng hupadaoh titah-Ni
humbangu.
- 23 (18-24) Seng dong sihataon bangku i lobei-Ni,
hujaga do diringku dompak hajahaton.
- 24 (18-25) Halani ai ibalos Jahowa do hu bangku
romban hubani hapintoronku, romban
hubani haborsihon ni tanganku i lobei-Ni.
- 25 (18-26) Hubani na bujur uhur, bujur do Ham,
hubani halak parpintor, pintor do Ham.

- ²⁶ (18-27) Bani halak paruhur na pansing ipatidak
Ham do hapansingon-Mu, tapi marah do
uhur-Mu dompak halak pargeduk.
- ²⁷ (18-28) Ipaluah Ham do bangsa na madoyuk,
tapi ipatoruh Ham do mata na toal.
- ²⁸ (18-29) Ai Ham do, alo Jahowa, mambahen
palitangku marsinalsal; Jahowa Naibatangku
do palihar hagolapanku.
- ²⁹ (18-30) Marhasoman Ham tardorab ahu
do hulanan ni bala, mangunsagahkon
Naibatangku tarlumpat ahu do tembok.
- ³⁰ (18-31) Gokan dear do dalan ni Naibata, pitah
do hata ni Naibata, la do gantar ni ganup
halak, na marlingod hu Bani.
- ³¹ (18-32) Ai ise ma Naibata sobali Jahowa, ise
batar-batarta sobali Naibatanta?
- ³² (18-33) Naibata do na manggonditkon
hagogohon bangku, anjaha ipatorsa do
dalanku.
- ³³ (18-34) la do mambahen naheihu songon
nahei ni ursa boru-boru, anjaha ipajongjong
do ahu i atas buntu-buntu.
- ³⁴ (18-35) la do mangajari tanganku marmunsuh,
gabe pandei tanganku manintak sior
tombaga.
- ³⁵ (18-36) Ibere Ham do bangku gantar ni
hatuahon-Mu, itungkoli tangan siamun-Mu

do ahu, anjaha halayakon-Mu pabanggal
ahu.

³⁶ (18-37) Ipalumbang Ham do ianan
panlangkahanku, anjaha seng tarsimpok
mata ni ari ni naheihu.

³⁷ (18-38) Hupardakdak do munsuhku ronsi
dapot sidea, seng mulak ahu paima rasei
sidea.

³⁸ (18-39) Huropuki do sidea, gabe seng
tarbahensi be jongjong, radag do sidea i
toruh ni naheihu.

³⁹ (18-40) Igonditkon Ham do bangku hagogohon
laho marporang, ipatunduk Ham do
imbangku hu toruhku.

⁴⁰ (18-41) Ipaundur Ham do munsuhku i
lobeihu, anjaha siap do hubahen sagala na
mandomdomi ahu.

⁴¹ (18-42) Dilo-dilo sidea, tapi seng dong na
paluahkon, hubani Jahowa homa, tapi seng
itangihon sidea.

⁴² (18-43) Jadi hulumati ma sidea songon orbuk
sihabangkonon ni logou, hulotloti ma sidea
songon hubang i tongah dalan.

⁴³ (18-44) Ipaluah Ham do ahu humbani
paringoran ni bangsa-bangsa, anjaha
ipabangkit Ham do ahu gabe kopala ni
bangsa-bangsa, bangsa na so hutanda pe
marsombah do hu bangku;

- ⁴⁴ (18-45) ibogei honsi pasal ahu, mintor itangihon do ahu, halak silegan pe tunduk do sidea papuji-puji ahu.
- ⁴⁵ (18-46) Mandatei do halak silegan, hitir-hitir do sidea luar humbani bentengni.
- ⁴⁶ (18-47) Manggoluh do Jahowa, sai tarpuji ma batar-batarhin, sai timbul ma Naibata ni hatuahonku,
- ⁴⁷ (18-48) Naibata sibere pambalason hu bangku, anjaha na patundukkon bangsa-bangsa bangku.
- ⁴⁸ (18-49) Na paluahkon ahu humbani munsuhku, nai ma, na pagijangkon ahu mangimbang sagala na manlawan ahu, na paluahkon ahu humbani halak sipangodoh-odoh.
- ⁴⁹ (18-50) Halani ai pujionku do Ham Jahowa i tongah-tongah ni sagala bangsa, anjaha dodingkononku do goran-Mu.
- ⁵⁰ (18-51) Ia do sibere hatuahon banggal bani raja-Ni, anjaha sibere idop ni uhur bani na mininakan-Ni, ai ma hubani si Daud ampa hubani ginomparni ronsi sadokah ni dokahni.”

**Hamuliaon ni Naibata, na Pinatalar
ni Panompaon-Ni pakon Titah-Ni**

19 ¹ Bani pambobai koor. Psalm ni si Daud.
(19-2) Haganup do langit mambaritahon

hamuliaon ni Naibata, anjaha hajangkajang
mangambilankon pambahenan ni tangan-Ni.

² (19-3) Ari na sada patugahkon ai bani ari na
sada nari, borngin na sada padaskon ai bani
borngin na sada nari;

³ (19-4) seng marhasoman hata, seng
marhasoman sahap, anjaha seng tarboge
sorani,

⁴ (19-5) age sonai torus do sorani bani sab tanoh
on anjaha sahapni das hu ujung ni dunia on.
Ijai ipauli do lampolampo bani mata ni ari,

⁵ (19-6) na mandarat humbani kamarni songon
siparunjuk, anjaha na marolob-olob songon
puanglima marayak sidalananni.

⁶ (19-7) Poltak do ia humbani ujung ni langit na
sada, anjaha mardalan das bani ujung ni na
sada nari, aha pe lang na ponop humbani
milasni.

⁷ (19-8) Gokan dear do titah ni Jahowa, boi
pahinsah uhur; sintong do hasaksian ni
Jahowa; iparuhuri do na bulus uhur.

⁸ (19-9) Pintor do titah ni Jahowa, boi pamalas
uhur; pitah do titah ni Jahowa, ipalihar do
pangidah.

⁹ (19-10) Biar dompak Jahowa ai do na pansing,
anjaha totap ronsi sadokah ni dokahni;
aturan ni Jahowa ai do na sintong, anjaha
pintor do haganupan.

- ¹⁰ (19-11) Harganan do ai ase omas, ase buei
omas na pinapitah, tobunan do ai ase
manisan ni lobah, humbani tobu-tobu ni
huraamah.
- ¹¹ (19-12) Juakjuak-Mu pe dapotan sipasingat do
marhitei ai; dapotan upah banggal do halak
na mangkorjahon ai.
- ¹² (19-13) Hakahouon -- ise ma na mangartihon
ai? Paluah Ham ma ahu humbani salah na
ponop!
- ¹³ (19-14) Ramotkon Ham ma juakjuak-Mu
humbani gijang ni uhur, ase ulang irajai ahu,
jadi seng be dong sihataon bangku, gabe
borsih ma ahu humbani panlanggaron na
banggal.
- ¹⁴ (19-15) Sai harosuhkon Ham ma hata ni
pamanganku ampa pamingkir-mingkirion ni
uhurhu, Ham Jahowa, batar-batarhu ampa
sipaluah ahu.

Tonggo Mangapiti Raja

- 20** ¹ Bani pambobai koor. Psalm ni si Daud.
(20-2) Sai ibalosi Jahowa ma ham bani
panorang hasosakan, goran ni Naibata ni si
Jakob ma manramotkon ham!
- ² (20-3) Sai itongos ma bamu pangurupion
humbani ianan na ma pansing in, janah sai
itungkol ma ham hun Sion.

- ³ (20-4) Sai mardingat ma la bani galanganmu,
anjaha sai iharosuhkon ma galangan
situtunganmu. Sela.
- ⁴ (20-5) Sai ibere ma hu bamu harosuh ni
uhurmu, anjaha ipasaud ma sura-suramu,
- ⁵ (20-6) ase marsurak-surak hanami halani
hamonanganmu, anjaha manaikkon
mandera mangunsagakon goran ni
Naibatanta; sai ipasaud Tuhan ma sagala
pangindoanmu.
- ⁶ (20-7) Sonari pe hubotoh, paboa sai ipamonang
Jahowa do na mininakan-Ni, sai ibalosi do
ia humbani surga-Ni na pansing in, marhitei
haluahon, na binahen ni tangan siamun-Ni
na gogoh in.
- ⁷ (20-8) Ia sidea gareta pakon huda do
iunsagakon, tapi anggo hita goran ni
Jahowa Naibatanta do pangajamanta.
- ⁸ (20-9) Rebad do sidea anjaha mangkatompas,
tapi anggo hita puho do use anjaha jongjong
totap.
- ⁹ (20-10) Ham Jahowa, urupi Ham ma raja in,
balosi Ham ma hanami, sadihari dilo-dilo
hanami Bamu.

Doding Tarima Kasih halani Hamonangan ni Raja

21 ¹ Bani pambobai koor. Psalm ni si Daud.
(21-2) Ham Jahowa, marmalas ni uhur

do raja in halani hagogohon-Mu, anjaha marolob-olob tumang do ia mangidah haluahon na hun Bamu.

² (21-3) Ibere Ham do hubani pinindo ni uhurni, anjaha seng itulak Ham pangindoan ni bibirni. Sela.

³ (21-4) Ai ialo-alo Ham do ia marhasoman pasu-pasu na banggal, igotongkon Ham do bani sortali omas.

⁴ (21-5) Ipindo do hagoluhan hun Bamu; ibere Ham do hu bani umur na ganjang ronsi sadokah ni dokahni.

⁵ (21-6) Timbul do hasangaponni halani pangurupion na hun Bamu, hatunggungan pakon hahormaton ibere Ham do hu bani.

⁶ (21-7) Ibahen Ham do ia gabe pasu-pasu torus, ipasabou Ham do ia marhitei malas ni uhur ni bohi-Mu.

⁷ (21-8) Ai martenger ni uhur bani Jahowa do raja in, anjaha halani idop ni uhur ni Tang Sitimbulan in, seng anjai rebeh ia.

⁸ (21-9) Sai na jumpah tangan-Mu do munsuh-Mu; anjaha sai na jumpah tangan siamun-Mu do na mandomdomi Ham.

⁹ (21-10) Doskon pamurunan do sidea bahenon-Mu bani panorang paroh-Mu, Ham Jahowa, bani parringis-Mu bonduton-Mu do sidea, anjaha panganon ni apuy do sidea.

- ¹⁰ (21-11) Boiskonon-Mu do niombah ni
sidea hun tanoh on, ginomparni hun
tongah-tongah ni jolma manisia.
- ¹¹ (21-12) Anggo ipingkiri sidea na jahat dompak
Ham, anggo iranggihon tahi-tahi seng anjai
saud ai.
- ¹² (21-13) Sai na maporus do sidea bahenon-Mu;
tembakon-Mu do bohi ni sidea marhitei
sior-Mu.
- ¹³ (21-14) Jongjong ma Ham, ale Jahowa, ibagas
hagogohon-Mu, ase ipuji anjaha idodingkon
hanami kuasa-Mu.

Ham Naibatanku, Mase Itadingkon Ham Ahu?

- 22** ¹ Bani pambobai koor. Inggouni: Balua
manlele siang. Psalm ni si Daud. (22-2) Ham
Naibatanku, mase ma itadingkon Ham ahu,
mandaoh Ham humbani elek-elekku pakon
humbani sora ni doruh-doruhku?
- ² (22-3) Ham Naibatanku, dilo-dilo do ahu arian,
tapi seng ibalosi Ham, borngin pe, tapi seng
jumpah ahu hasonangan.
- ³ (22-4) Tapi Ham do Na Pansing in, na marhotak
i atas ni sipujion ni Israel.
- ⁴ (22-5) Ham do ihatengerhon ompungnami,
tenger do uhur ni sidea Bamu, gabe ipaluah
Ham do sidea.

- ⁵ (22-6) Hu Bamu do sidea dilo-dilo, gabe maluah do sidea; porsaya do sidea Bamu, jadi seng tarbador sidea;
- ⁶ (22-7) tapi anggo ahu goya mando, seng bejolma, siapason ni halak, sidorunon ni halak na mabuei.
- ⁷ (22-8) Haganup na mangidah ahu pahiri-hiri ahu, ipambebeoti do ahu anjaha iupir-upirhon uluni,
- ⁸ (22-9) “Bani Jahowa ma ia marondos, ase ipaluah ia, anggo na marosuh do tongon la bani!”
- ⁹ (22-10) Ham do na manogu ahu humbani partapaan, Ham do patenger uhurhu mangonsop bagod ni inang;
- ¹⁰ (22-11) humbani partubuhku nari Ham do parondosanku, humbani partapaan nari Ham do Naibatangku.
- ¹¹ (22-12) Sai ulang ma mandaoh-daoh Ham humbangku, ai dohor do hasosakan, seng dong sipangurupi.
- ¹² (22-13) Buei do lombu jonggi manlioti ahu, anjaha horbou ni Basan mangurup ahu.
- ¹³ (22-14) Ipangangang bei do babahni dompak ahu, songon singa na manoroh anjaha maraum.

- 14 (22-15) Durus do ahu songon bah,
mangkasirang holi-holingku, uhurhu pe
songon lilin do, malala ibagas diringku.
- 15 (22-16) Horah do tolonanku songon sanga-
sanga, anjaha dilahku longkot do bani
langit-langitku; bani orbuk ni hamatean do
iparagei Ham ahu.
- 16 (22-17) Ai ilioti baliang do ahu, anjaha hulanen
ni parjahat manginggoti ahu, itobaki do
tanganku pakon naheihu.
- 17 (22-18) Boi do hubilangi haganup holi-holingku,
pasombuhkon do sidea mangidah ahu.
- 18 (22-19) Ibagi sidea do hiouhu, manjomput na
sinurat do sidea pasal baju-bajungku.
- 19 (22-20) Tapi Ham Jahowa, ulang ma Ham
mandaoh-daoh; Ham hagogohonku, oloskon
Ham ma mangurupi ahu!
- 20 (22-21) Sai paluah Ham ma hosahku humbani
podang, tonduyhu na lungunan on humbani
sisilon ni baliang.
- 21 (22-22) Sai paluah Ham ma ahu humbani
babah ni singa, anjaha bansah bahen Ham
humbani tanduk ni horbou jalang.
- 22 (22-23) Ambilankononku ma goran-Mu
bani saninangku, pujionku ma Ham i
tongah-tongah ni kuria in.
- 23 (22-24) Nasiam na mangkabiari Jahowa, puji
nasiam ma la; haganup ginompar ni si Jakob,

pasangap ma la, mabiar ma nasiam Bani,
nasiam ginompar ni Israel.

²⁴ (22-25) Ai seng onnga ipahiri anjaha magigi la
bani hadoyukon ni na madoyuk, anjaha seng
ongga iponopkon bohi-Ni hu bani, itangihon
do sanggah dilo-dilo Bani.

²⁵ (22-26) Hun Bamu do harohan ni puji-pujianku
i tongah-tongah ni kuria na banggal in,
galaronku ma bagah-bagahku i lobei ni
sagala na mangkabiari-Si.

²⁶ (22-27) Sai na mangan anjaha maningon bosur
do halak na masombuh; maningon mamuji-
muji Jahowa do halak na mangindahi-Si. Sai
hinsah do uhur ni sidea sadokah ni dokahni.

²⁷ (22-28) Dingaton ni sagala ujung ni tanoh on
ma ai anjaha mulak bani Jahowa; sagala
bangsa sipajuh begu-begu maningon
manrogop do i lobei-Ni.

²⁸ (22-29) Ai Jahowa do simada harajaon, anjaha
la do na mamarentah sagala bangsa.

²⁹ (22-30) Nai ma, maningon marsombah do hu
Bani sagala na sangap-sangap ni tanoh on,
anjaha maningon do manrogop hu lobei-Ni
sagala na dob tuad hubagas orbuk ampa
halak na so manggoluh be tonduyni.

³⁰ (22-31) Sai balosan ni ginompar ni na i pudi do
la, baritahononkon do pasal Jahowa bani
sundut na roh.

³¹ (22-32) Ambilankonon do hapintoron-Ni bani sagala bangsa na laho tubuh ope, paboa la do na pasaudkonsi.

Jahowa Siparmahan Ahu

23 ¹ Psalm ni si Daud. Jahowa do siparmahan ahu, seng anjai hurangan ahu.

² Ipatudu do ahu bani sampalan na mombur, anjaha itogu-togu do ahu hu bah parsaranan.

³ Ipahisar do tonduyhu, itogu do ahu bani dalan hapintoron halani goran-Ni in.

⁴ Age pe mardalan ahu bani lombang bagus ni hagolapan, seng mabiar ahu, ai Ham do mangkasomani ahu; tungkot-Mu pakon simambu-Mu do na mangapohi ahu.

⁵ Ham do na mangidangi ahu i lobei ni munsuhku, iminaki Ham do ulungku anjaha sirnib do panginumanku.

⁶ Dear layak ampa idop ni uhur do mangirik-irik ahu sadokah goluhku; janah sihol do marianan ahu i rumah ni Jahowa sadokah ni dokahni.

Parmasuk ni Raja ni Hamuliaon

24 ¹ Humbani si Daud. Sada Psalm. Jahowa do simada tanoh on pakon haganup isini, dunia on pakon sagala na mangiankonsi.

- ² Ai la do pajonamkonsi i atas ni laut, anjaha ipatotap do i atas ni bah mardalan.
- ³ Ise do na boi tangkog hu dolog ni Jahowa? Ise do na boi jongjong bani ianan-Ni na pansing in?
- ⁴ Partangan na borsih ampa paruhur na pitah, halak na so mandompakkon tonduyni bani na so margagan, ampa halak na so ra marbija laho manipu.
- ⁵ Ia ma na manjalo pasu-pasu humbani Jahowa pakon hapintoron humbani Naibata na paluahkonsi.
- ⁶ Ai ma sundut na sungkun-sungkun pasal Jahowa, na mangindahi bohi-Mu, Ham Naibata ni Jakob. Sela.
- ⁷ Pagijang ma ulunima, ale sagala horbangan, tarangkat ma hanima, ale labah na basaia, ase masuk raja ni hamuliaon.
- ⁸ Ise ma nani Raja ni hamuliaon in? In ma Jahowa, na Gogoh anjaha Puanglima, Jahowa Puanglima i parporangan.
- ⁹ Ipagijang ma ulunima, ale sagala horbangan, tarangkat ma hanima, ale labah nabasaia, ase masuk raja ni hamuliaon in.
- ¹⁰ Ise ma nani raja ni hamuliaon in? In ma Jahowa Zebaot, Ia do Raja ni hamuliaon. Sela.

Pangindoan Pasal Hasasapan ni Dousa ampa Panramotion

- 25** ¹ Humbani si Daud. Hu Bamu do Jahowa, hudompakkon tonduyhu.
- ² Ham Naibatanku, hu Bamu do ahu martenger ni uhur, ulang ma lopas Ham ahu tarbador, ulang ma marsurak-surak munsuhku mangidah ahu.
- ³ Tongon, seng anjai tarbador sagala na marnalom ni uhur Bamu; tapi maningon tarbador do halak pangeluk na so ingkat marhala.
- ⁴ Ham Jahowa, pabotohkon Ham ma hu bangku dalan Mu, ajarhon Ham ma hu bangku lapang-Mu.
- ⁵ Sai togu Ham ma ahu ibagas hasintongan-Mu, ajari Ham ma ahu; ai Ham do Naibata ni hatuahonku, Ham do hupanalom ganup ari.
- ⁶ Sai ingat Ham ma, ale Jahowa, sagala dear ni layak-Mu pakon idop ni uhur-Mu, ai humbani nabasaia nari do in.
- ⁷ Sai ulang ma padingat-dingat Ham dousa haposoonku pakon panlanggaronku, sai ingat Ham ma ahu romban hubani idop ni uhur-Mu, halani dear ni layak-Mu, Ham Jahowa.
- ⁸ Layak anjaha bonar do Jahowa, halani ai ipatuduh do dalan na pintor bani pardousa.

- 9 Itogu-togu do halak na madoyuk mardalan
ibagas hasintongan, anjaha iajarhon do
dalan-Ni bani halak na masombuh.
- 10 Sagala dalan ni Jahowa idop ni uhur do ai ampa
hasintongan, bani halak na manramotkon
padan-Ni pakon hasaksian-Ni.
- 11 Halani goran-Mu, Ham Jahowa, sasap Ham ma
dousangku, ai banggal do in.
- 12 Ise do halak na mangkabiari Jahowa? Hubani
do ajarhonon-Ni dalan sipilihon-Ni.
- 13 Tonduy-Ni marianan do bani hasonangan,
anjaha ginomparni do manean tanoh on.
- 14 Udung do uhur ni Jahowa bani na mangkabiari-
Si, ipabotohkon do padan-Ni bani
sidea.
- 15 Sai mangkawah do matangku dompak Jahowa,
ai la do paluahkon naheihu humbani siding.
- 16 Dompakkon Ham ma ahu, maidop ma uhur-Mu
bangku, ai lungunan anjaha madoyuk do
ahu.
- 17 Palumbang Ham ma ahu humbani hasosakan
ni uhurhu, paluah Ham ma ahu humbani
hasunsahanku.
- 18 Kawahkon Ham ma hadoyukonku pakon
hangalutonku, sasap Ham ma haganup
dousangku.
- 19 Tonggor Ham ma, buei do munsuhku, anjaha
parah do pandomdomini sidea bangku.

- ²⁰ Ramotkon Ham ma tonduyhu anjaha paluah
Ham ma ahu, ulang tarbador ahu, ai Bamu
do ahu marlingod.
- ²¹ Sai hapansingon ampa hapintoron ma
manramotkon ahu, ai Bamu do ahu
marhatengeran.
- ²² Ham Naibata, sai paluah Ham ma Israel,
humbani haganup hasosakanni.

Tonggo ni Halak na Daulat Ibagas Hasosakan

- 26** ¹ Humbani si Daud. Luluhon Ham ma ahu,
Ham Jahowa, ai ibagas hadaulaton do
ahu marparlahou; bani Jahowa do ahu
marhatengeran, seng molei-olei ahu.
- ² Uji Ham ma ahu, ale Jahowa, anjaha suba
ma, pareksa Ham ma piah-piahku pakon
pusu-pusungku.
- ³ Ai tongtong do i lobeihu idop ni uhur-Mu,
anjaha romban hubani hasintongan-Mu do
ahu marparlahou.
- ⁴ Seng onggah hundul ahu pakon siparladung,
anjaha seng marsaor ahu pakon
sipakulah-kulah.
- ⁵ Sogam do uhurhu mangidah humpulan ni halak
parjahat, anjaha seng ra ahu sahundulan
pakon sibahen na jahat.

- ⁶ Huburihi do tanganku tanda lang marsalah,
anjaha huinggoti do anjapanjap-Mu, Ham
Jahowa,
- ⁷ laho pabogei hon sora puji-pujian, laho
mambaritahon haganup halongangan na
binahen-Mu.
- ⁸ Ham Jahowa, huhaholongi do hajongjongan
ni rumah-Mu, ianan hasogopan ni
hamuliaon-Mu.
- ⁹ Ulang ma masabkon Ham tonduyhu rap
pakon pardousa, atap goluhku rap pakon
siduruskon daroh,
- ¹⁰ ai ma halak na buei longkot hajahaton bani
tangan ni sidea, anjaha gok sisip tanganni
siamun.
- ¹¹ Tapi anggo ahu, ibagas hadaulaton do
marparlahou, paluah Ham ma ahu, maidop
ma uhur-Mu bangku.
- ¹² Jongjong bani dalan hanopan do naheihu,
sai pujionku do Jahowa ibagas sagala
parhumpulan.

Sonang Ibagas Pandingdingi ni Naibata

27 ¹ Humbani si Daud. Jahowa do panondang
pakon haluahon bangku, mintor bani ise
ma mabiar ahu? Jahowa do batar-batar ni
goluhku, bani ise ma ahu gobir?

- ² Sanggah roh parjahat mandorab ahu laho mangankon dagingku, ai ma imbangku pakon munsuhku, jadi mangkatompas anjaha marrageian ma sidea.
- ³ Anggo roh bala mamorang ahu, seng mabiar uhurhu, age roh porang dompak ahu, sai tenger do uhurhu.
- ⁴ Sada do hupindo humbani Jahowa, ai do na hupindahi, ase boi ahu marianan i rumah ni Jahowa sadokah manggoluh ahu, laho paidah-idah hinajenges ni Jahowa, laho marsombah i rumah-Ni.
- ⁵ Ai iondingi do ahu ibagas lampolampo-Ni bani ari hamagouan; bani parponopan ibagas lampolampo-Ni ai, ipagijang do ahu hu atas dolog batu,
- ⁶ gabe mandirgak ma ulungku nuan i atas ni munsuhku na manginggoti ahu; halani ai galangkononku ma galangan ibagas lampolampo-Ni, ai ma galangan puji-pujian, mandoding anjaha mamuji-muji ma ahu bani Jahowa.
- ⁷ Tangihon Ham ma, ale Jahowa, sorangku na hudilohon on, maidop ma uhur-Mu bangku, anjaha balosi Ham ma ahu.
- ⁸ Ihusipkon uhurhu, sonon do Nimu, “Pindahi hanima ma bohing-Ku!” Bohi-Mu ma tongon na hupindahi, alo Jahowa.

- ⁹ Ulang ma ponopkon Ham bohi-Mu dompak ahu, ulang ma tulak Ham juakjuak-Mu ibagas ringis-Mu; Ham do pangurupingku, ulang ma pabali Ham ahu, anjaha ulang ma tadingkon Ham ahu, Ham Naibata ni hatuahonku.
- ¹⁰ Domma itadingkon bapa pakon inang ahu, tapi itampin Jahowa do ahu.
- ¹¹ Ajarhon Ham ma bangku dalan-Mu, ale Jahowa, togu Ham ma ahu bani dalan hanopan halani imbang-imbangku.
- ¹² Ulang ma ondskon Ham ahu hubagas ringis ni munsuhku, ai jongjong do mangimbang ahu saksi parladung, sisompulhon hajahaton.
- ¹³ Totap do hubotoh, sai idahonku do hinadear ni Jahowa, i tanoh ni halak na manggoluh.
- ¹⁴ Parhanalom ma Jahowa, pagomos anjaha patoguh ma uhurmu. Nai ma, parhanalom ma Jahowa.

Naibata do Gantar Bangku

28 ¹ Humbani si Daud. Hu Bamu do ahu dilo-dilo, ale Jahowa, dolog batungku; ulang sai sip Ham dompak ahu, ase ulang ahu doskon na manuruk tanoman, anggo sai sip Ham dompak ahu.

² Tangihon Ham ma sora ni elek-elekku, anggo dilo-dilo ahu Bamu, anggo hupaherbang

tanganku hubani ianan-Mu na pansing sahalian in.

- ³ Ulang ma sarad Ham ahu rap pakon halak parjahat ampa sihorjahon hagedukon, na basar marsahap dompak hasomanni, hape hajahaton do ibagas uhurni.
- ⁴ Balaskon Ham ma hubani sidea romban bani pambahenan ni sidea pakon domu hubani jahat ni ulahni; balaskon Ham ma romban hubani horja ni tangan ni sidea; paulak Ham ma bani sidea na hinorjahon ni sidea.
- ⁵ Ai seng parduli sidea bani pambahenan ni Jahowa, sonai homa horja ni tangan-Ni; parsedaon-Ni ma sidea anjaha seng be paulion-Ni.
- ⁶ Na puji ma Jahowa, ai domma itangihon sora ni elek-elekku.
- ⁷ Jahowa do gogohku pakon gantarhu; hu Bani do mangarap uhurhu gabe iurupi do ahu. Halani ai marolob-olob do uhurhu, anjaha hupuji ma la marhitei dodingku.
- ⁸ Jahowa do pargogoh bani bangsa-Ni, anjaha batar-batar hatuahon do la bani na mininakan-Ni.
- ⁹ Paluah Ham ma bangsa-Mu anjaha pasu-pasu ma pusaka-Mu; sai parmahani anjaha ombah Ham ma sidea ronsi sadokah ni dokahni.

Hamuliaon ni Jahowa Ibagas Longgur

- 29** ¹ Psalm ni si Daud. Bere nasiam ma bani Jahowa, nasiam parnagori atas, bere nasiam ma bani Jahowa hamuliaon pakon hagogohon.
- ² Bere nasiam ma bani Jahowa hamuliaon ni goran-Ni; manrogop ma nasiam i lobei ni Jahowa marpakeian na ma pansing.
- ³ Sora ni Jahowa do i atas ni sagala bah, Naibata ni hamuliaon do parohkon longgur. Jahowa do i atas ni bah na bolag.
- ⁴ Gok hagogohon do sora ni Jahowa; gok do hajombuton bani sora ni Jahowa.
- ⁵ Sora ni Jahowa do mamonggolhon hayu ares; nai ma, Jahowa do na mamonggolhon hayu ares i Libanon.
- ⁶ Ibahen do sidea manlumpat-lumpat songon anak ni lembu, Libanon ampa Sirion songon anak ni horbou jalang.
- ⁷ Sora ni Jahowa do manjimburhon apuy.
- ⁸ Sora ni Jahowa do mambahen dugur halimisan, idugur Jahowa do halimisan Kades.
- ⁹ Sora ni Jahowa do mambahen mangarou balua, anjaha leseng do ibahen tombak. Anjaha i rumah ni Jahowa haganup do mangkatahon, "Hamuliaon!"

- ¹⁰ Marhotak do Jahowa i atas ni bah marbanggal,
marhotak do Jahowa songon Raja sadokah
ni dokahni.
- ¹¹ Jahowa do mambere gogoh bani bangsa-Ni,
Jahowa do mamasu-masu bangsa-Ni ibagas
damei.

Doding Tarima Kasih halani Maluah

- 30** ¹ Psalm. Doding pamongkoton ni Rumah
Panumbahan. Humbani si Daud. (30-2)
Sihol do patimbulonku Ham Jahowa, ai
Ham do na mandokdok ahu humbani
ianan na bagas, anjaha seng ipalopas Ham
marmegah-megah munsuhku mangidah
ahu.
- ² (30-3) Ham Jahowa, Naibatangku, hu Bamu do
ahu dilo-dilo, jadi ipamalum Ham do ahu.
- ³ (30-4) Ham Jahowa, domma ipanaik Ham
tonduyhu hun nagori toruh, domma
ipagoluh Ham use ahu, maluah humbani na
manuruk tanoman.
- ⁴ (30-5) Dodingkon nasiam ma Jahowa, nasiam
hinaholongan-Ni, puji ma goran-Ni na
pansing in!
- ⁵ (30-6) Ai tongkin do panomboh ni ringis-Ni,
sadokah manggoluh do anggo idop ni
uhur-Ni, bodari sogop partangison, patarni
masa parolob-oloban.

- ⁶ (30-7) Tapi anggo ahu sanggah sonang onggahuhatahon, “Seng anjai targompang ahu.”
- ⁷ (30-8) Ham Jahowa, marhitei dear layak-Mu ipatotap Ham do ahu i atas ni dolog na toguh; hape ijin iponopkon Ham bohi-Mu mintor tarsonggot ahu.
- ⁸ (30-9) Hu Bamu do ahu dilo-dilo, Ham Jahowa, hubani Naibatangku do ahu mangelek-elek.
- ⁹ (30-10) Aha ma laba-Mu marhitei darohku, anggo tuad ahu hu tanoman? Boi ma pujion ni orbuk Ham atap patugahonni habujuron-Mu?
- ¹⁰ (30-11) Tangihon Ham ma Jahowa, maidop ma Ham bangku, Ham Jahowa, sai Ham ma pangurupi bangku!
- ¹¹ (30-12) Domma ipaubah Ham tangisku gabe tortor bangku. Domma itanggali Ham pusok ni uhurhu, anjaha igonditkon Ham do bangku malas ni uhur,
- ¹² (30-13) ase mandoding-doding tonduyhu Bamu anjaha lang masip. Ham Jahowa, Naibatangku, sadokah ni dokahni do Ham pujionku.

Tonggo Ibagas Hasosakan

31 ¹ Bani pambobai koor. Psalm ni si Daud.
 (31-2) Hu Bamu do ahu, alo Jahowa, marhatengeran, ulang ma lopas Ham ahu

lalab bador; paluah Ham ma ahu marhitei
hapintoron-Mu!

² (31-3) Paeleng Ham ma pinggol-Mu hu bangku,
tarolos ma Ham paluahkon ahu. Ham ma
bangku dolog-batu paronding-ondingan,
gabe benteng na toguh laho paluahkon ahu;

³ (31-4) ai Ham do tongon dolog batungku pakon
bentengku, halani goran-Mu iring-iring
anjaha togu Ham ma ahu.

⁴ (31-5) Sai paluah Ham ma ahu humbani siding,
na ponop itaon halak laho manangkap ahu,
ai Ham do haporusanku.

⁵ (31-6) Hubagas tangan-Mu do huondoskon
tonduyhu, ai domma itobus Ham ahu, ale
Jahowa, Ham Naibata hatengeran ni uhur.

⁶ (31-7) Ihagigihon Ham do na manombah
sisombahon na so margagan, tapi anggo
ahu tenger do uhur hubani Jahowa.

⁷ (31-8) Marolob-olob anjaha marmalas ni uhur
do ahu bani idop ni uhur-Mu, ai ikawahkon
Ham do hadoyukonku, anjaha ibotoh Ham
do hasosakan ni tonduyhu.

⁸ (31-9) Seng iondoskon Ham ahu hubagas tangan
ni munsuh, ipajongjong Ham do nahei
hubani na lumbang.

⁹ (31-10) Maidop ma uhurmu bangku, ale
Jahowa, ai tarsosak do ahu; halani pusok ni

uhur holok do matangu, galek do tonduyhu
pakon pamatangu.

¹⁰ (31-11) Bois do gogohku ibahen horu ni uhur,
ampa ari-ari ni goluhku ibahen holsohku;
surut do gogohku ibahen panlanggaronku,
seng margolle be holi-holingku.

¹¹ (31-12) Parbileian do ahu i lobei ni na manosak
ahu, ampa bani halak romban rumahku;
tarsonggot do na mananda ahu, manimbil
bei do na mangidah ahu i dalan.

¹² (31-13) Ihalupahon ahu songon halak na matei,
marosak do ahu songon sanga-sanga.

¹³ (31-14) Hubogei do husip-husip ni buei halak,
“Habiaran inggot!” Rap manriah do sidea
manguhurhon ahu, mambahen ranggian do
sidea laho mambuat goluhku.

¹⁴ (31-15) Tapi anggo ahu, Bamu do ahu
martenger ni uhur, ale Jahowa, ningku do,
“Ham do Naibatangu.

¹⁵ (31-16) Marguru Bamu do goluhku, paluah
Ham ma ahu humbani tangan ni munsuhku
pakon humbani na mangayak-ayak ahu.

¹⁶ (31-17) Sondangkon Ham ma bohi-Mu bani
juakjuak-Mu, paluah Ham ma ahu marhitei
idop ni uhur-Mu.

¹⁷ (31-18) Ham Jahowa, ulang lopas Ham ahu
bador, hu Bamu do ahu dilo-dilo; tarbador

ma namin halak parjahat, anjaha masip
tuad hu nagori toruh.

¹⁸ (31-19) Sai sip ma sagala bibir parladung, na
jungkat marsahap dompak halak parpintor,
gok hatoalon ampa pangapasion.

¹⁹ (31-20) Banggalni in dear ni layak-Mu, na
pinasirsir bani halak na mangkabiari Ham,
na binahen-Mu bani halak na martenger ni
uhur Bamu, i lobei ni anak ni jolma.

²⁰ (31-21) Iondingi Ham do sidea marhitei
pangondingion ni bohi-Mu dompak tahi-tahi
ni jolma, iponopkon Ham do sidea bani
lampolampo dompak sorgang-sorgang ni
dilah.

²¹ (31-22) Napuji ma Jahowa, ai tarlobih do idop
ni uhur-Ni bangku bani panorang hasosakan.

²² (31-23) Tapi anggo ahu, hupingkir hinan
do ibagas biarhu: Domma tarbuang ahu
humbani panonggor-Mu. Hape itangihon
Ham do elek-elekku, sanggah dilo-dilo ahu
Bamu.

²³ (31-24) Sai haholongi nasiam ma Jahowa,
nasiam sagala na hinaholongan-Ni! Jahowa
do manramotkon sagala halak na bujur,
tapi mardapot-dapot do ibalaskon dompak
sigijang uhur.

²⁴ (31-25) Sai margogoh anjaha totap ma uhur nasiam, sagala na marpangarapan bani Jahowa.”

Hatuahon ni Halak na dob Sinasap Dousani

32 ¹ Humbani si Daud. Doding podah. Martuah ma halak na dob sinasap panlanggaronni, na dob nirungkub dousani.

² Martuah ma halak anggo seng ihira Jahowa bani hajahaton, anjaha seng dong sipakulah-kulah ibagas tonduyni.

³ Ai sadokah huhasipkon dousangku, reong do holi-holingu ibahen tangisku ganup ari.

⁴ Ai sai idondoni tangan-Mu do ahu arian pakon borngin, jadi horah ma darohku songon pambahen ni milas ni logou ni ari. Sela.

⁵ Hupabotohkon ma Bamu dousangku, anjaha seng huponopkon hajahatonku, ningku do, “Sopotkononku ma panlanggaronku hubani Jahowa, jadi isasap Ham do utang ni dousangku.”

⁶ Halani ai martonggo ma hu Bamu sagala na daulat maruhur, sanggah adong ope panorang boi marjumpah; roh pe sompong bah marraja, seng anjai das ai hu bani.

⁷ Ham do parlingodanku, iramotkon Ham do ahu humbani hasosakan, haluahon do iinggotkon Ham bangku. Sela.

- ⁸ Huajari anjaha hupodahi pe ho pasal dalam sidalananmu, huparmaloi anjaha iiring-iring pangkawahku pe ho.
- ⁹ Ulang ma nasiam songon huda atap halode na so maruhur, na so ra dohor bam anggo lang pinaksa ni tali pakon kokang.
- ¹⁰ Buei do siandungan ni parjahat, tapi barang ise na martenger ni uhur bani Jahowa, inggotkonon-Ni do bani idop ni uhur.
- ¹¹ Marmalas ni uhur anjaha marolob-olob ma sagala parpintor ibagas Jahowa; marmegah-megah ma ganup paruhur na pintor.

**Puji-pujian ampa Pambalosion bani
Jahowa Sipanompa ampa Sipanrajai in**

- 33** ¹ Marolob-olob ma nasiam halak parpintor ibagas Jahowa, patut do mamuji-muji paruhur na bujur.
- ² Puji ma Jahowa marhasoman husapi, dodingkon nasiam ma la marhitei husapi sisapuluh tali.
- ³ Dodingkon nasiam ma Bani doding na baru, giut nasiam ma tali husapi marhasoman tarompit.
- ⁴ Ai pintor do hata ni Jahowa, anjaha sintong do sagala pambahenan-Ni.

- ⁵ Holong do uhur-Ni bani hapintoron ampa
uhum. Idop ni uhur ni Jahowa do manggoki
tanoh on.
- ⁶ Marhitei hata ni Jahowa do ijadihon langit,
anjaha marhitei hosah ni pamangan-Ni
sagala bala-Ni.
- ⁷ Ipatumpu do bah ni laut songon bongbongan,
ibahen do laut bolag ai markamar-kamar.
- ⁸ Sai marhabiaran bani Jahowa ma ganup tanoh
on, anjaha gobir ma i lobei-Ni ganup
sindunia on.
- ⁹ Ai marsahap la gabe jadi ma, ai mamarentah la
gabe adong ma.
- ¹⁰ Jahowa do mansedahon riah ni bangsa
parbegu, seng asi ibahen pingkiran ni
bangsa-bangsa.
- ¹¹ Tapi ranggian ni Jahowa totap do sadokah
ni dokahni, pingkiran ni uhur-Ni pe
marsundut-sundut do.
- ¹² Martuah ma bangsa na mambahen Jahowa
Naibatani, ai ma bangsa pinilih-Ni gabe
parbagianan Bani.
- ¹³ Manatap-natap do Jahowa hun nagori atas,
ikawahkon ganup anak nijolma in.
- ¹⁴ Humbani ianan-Ni marparatas tonggor do la
bani haganup na mangiankon tanoh on.
- ¹⁵ Ia do na manjadihon uhur ni sidea, la
mardiateihon sagala horja ni sidea.

- ¹⁶ Seng monang raja marhitei buei ni bala, seng maluah puanglima marhitei surung ni gogoh.
- ¹⁷ Taroto do halak na mangajamkon gogoh ni huda, ai marhitei gogohni na buei ai seng boi ia paluahkon.
- ¹⁸ Tonggor ma, dompak na mangkabiari-Si do mata ni Jahowa, dompak halak na marpangarapan bani idop ni uhur-Ni,
- ¹⁹ laho paluahkon tonduy ni sidea humbani hamatean, anjaha laho pagoluhkon sidea bani musim lohei.
- ²⁰ Marhatengeran bani Jahowa do tonduynami, la do pangurupi pakon gantar bennami.
- ²¹ Ai marhiteihon-Si do malas uhurnami; ai bani goran-Ni na pansing in do hanami marhatengeran.
- ²² Sai sorap ma, Ham Jahowa, idop ni uhur-Mu bennami, songon na niarapkonnamini hun Bamu.

Iramotkon Tuhan do Siminik-Ni

34 ¹ Humbani si Daud, Sanggah Ipapodou-podou Dirini i lobei ni si Abimelek, gabe lusir la Lanjar Laho. (34-2) Sai pujionku do Jahowa bani sagala panorang, tongtong do puji-pujian-Ni ibagas pamanganku.

- ² (34-3) Marhitei Jahowa do marmegah-megah
tonduyhu, ibogei halak na madoyuk ma ai
gabe malas ma uhurni.
- ³ (34-4) Hasomani nasiam ma ahu pabanggalhon
Jahowa, sai rap ma hita patimbulhon
goran-Ni in.
- ⁴ (34-5) Hupindahi do Jahowa, anjaha ibalosi
do ahu; ipaluah do ahu humbani sagala
habiaranku.
- ⁵ (34-6) Mangkawah ma nasiam hu Bani, ase
minar nasiam, gabe lang tarmela bohi
nasiam.
- ⁶ (34-7) Dilo-dilo do halak na masombuh on,
itangihon Jahowa do ia, anjaha ipaluah do ia
humbani haganup hasosakanni.
- ⁷ (34-8) Marjaga do malekat ni Jahowa inggot
bani na mangkabiari-Si, anjaha ipaluah do
sidea.
- ⁸ (34-9) Dai anjaha tonggor nasiam ma dear
ni layak ni Jahowa, martuah ma halak na
martenger ni uhur Bani.
- ⁹ (34-10) Habiari nasiam ma Jahowa,
nasiam sagala na pansing, ai seng anjai
marhahurangan sagala na mangkabiari-Si.
- ¹⁰ (34-11) Anak ni singa hurangan do anjaha
loheian, tapi seng anjai hurangan bani
sagala na madear halak na mangindahi
Jahowa.

- 11 (34-12) Roh ma, nasiam anak, tangihon nasiam
ma hatangku, ase huajarhon bani nasiam
biar dompak Jahowa.
- 12 (34-13) Ise halak na sihol mangkaholongi goluh
on, na mangkarosuhkon mangidah ari na
madear?
- 13 (34-14) Jaga ma dilahmu dompak hajahaton,
ampa bibirmu humbani hata tipu.
- 14 (34-15) Surut ma ho humbani na masambor,
horjahon na madear, pindahhi damei anjaha
parayak ma ai.
- 15 (34-16) Dompok halak parpintor do mata ni
Jahowa, anjaha pinggol-Ni dompak dilo-dilo
ni sidea.
- 16 (34-17) Ilawan bohi ni Jahowa do sihorjahon
na jahat, laho mamboiskon hun tanoh on
pardingat ni sidea.
- 17 (34-18) Anggo dilo-dilo halak parpintor, sai
itangihon Jahowa do, anjaha ipaluah do
sidea humbani haganup hasosakanni.
- 18 (34-19) Dohor do Jahowa bani halak paruhur
na marosak, anjaha ipaluah partonduy na
maropuk.
- 19 (34-20) Buei pe sitaronon ni halak parpintor,
tapi ipaluah Jahowa do ia humbani
haganupan ai.
- 20 (34-21) Ia do manramotkon ganup holi-holini,
ase ulang maponggol age sada.

- ²¹ (34-22) Sai hamatehonon ni parjahat do
hajahaton, anjaha maningon marutang do
na mandomdomi halak parpintor.
- ²² (34-23) Jahowa do sitobus tonduy ni juakjuak-
Ni, anjaha seng anjai marutang sagala na
martenger ni uhur Bani.

Tonggo Mangindo Pangurupion humbani Munsuh

- 35** ¹ Humbani si Daud. Ham Tuhan, imbang
Ham ma na mangimbang ahu, porang Ham
ma na mamorang ahu.
- ² Jolom Ham ma gantar etek pakon gantar bolon,
jongjong ma Ham mangurupi ahu.
- ³ Ondamkon Ham ma tanja pakon tangkei
dompok na mangayak ahu, hatahon Ham
ma bani tonduyhu, “Ahu do sipaluah ho.”
- ⁴ Bahen Ham ma maila anjaha tarbador na
manguhurhon hosahku, bahen Ham ma
surut anjaha maila na manranggihon
hamagouanompok ahu.
- ⁵ Paturut Ham ma sidea songon lapa-lapa
niombus ni logou, anjaha malekat ni Jahowa
ma mardakdak sidea.
- ⁶ Sai golap ma dalan ni sidea anjaha landit, anjaha
malekat ni Jahowa ma marburu sidea.
- ⁷ Ponop anjaha seng marhala itaon sidea siding ni
sidea bangku, anjaha seng marhala ihurak
sidea do godung mambuat hosahku.

- ⁸ Sai sogop ma bani hasedaon na so ingkat
binotohni, siding na tinaonni na ponop
ai ma manangkapsi, sai majomba ma ia
hubagas godungni ai.
- ⁹ Tapi marolob-olob do tonduyhu ibagas
Jahowa, anjaha marmegah-megah halani
pangurupi-Ni.
- ¹⁰ Haganup holi-holingku mangkatahon, “Ham
Jahowa, ise ma na songon Ham, na
paluahkon halak na madoyuk humbani
halak sigogohkonni, halak na musil ampa na
madorun humbani panrampok?”
- ¹¹ Marrohan do saksi na jahat-jahat, isungkuni do
ahu pasal na so hubotoh.
- ¹² Na jahat do ibahen bangku balos ni na madear,
tarpunjung do ahu halani ai.
- ¹³ Tapi anggo ahu, sanggah boritan sidea hinan,
hupakei do pakeian pusok ni uhur, huarsik
do diringku marhitei puasa, anjaha unduk
do ahu martonggo,
- ¹⁴ songon dompak huan-kuanku ampa
saninangku sonai do hubahen pangabangku,
marpakeian pusok ni uhur, unduk songon na
mateian inang, sonai do unduk ahu.
- ¹⁵ Hape dob targompang ahu, megah ma sidea,
anjaha martumpu-tumpu laho mangimbang
ahu; halak na so hutanda mandorab

ahu, anjaha seng marnamangadi sidea mangapasi ahu.

¹⁶ Seng maralang-alang sidea pahirihon ahu, ipangesnges do iponni dompak ahu.

¹⁷ Ham Jahowa, piga dokah on do sai paidah-idahon-Mu sonin? Paluah Ham ma tonduyhu humbani siparaum, sonai homa hosaku humbani anak ni singa.

¹⁸ Sai pujionku do Ham i tongah-tongah ni Kuria na bangga, anjaha pasangaponku do Ham i tongah-tongah ni jolma na mabuei.

¹⁹ Sai ulang ma lopas Ham marmalas ni uhur imbangku, siparladung, mangidah ahu, na mangkasogamkon ahu na so ingkat marhala, na pahirdop-hirdop matani.

²⁰ Ai seng dong damei isahapkon sidea, iranggi do panipuon dompak halak parsip i nagori in.

²¹ Ipangangang sidea do babahni dompak ahu, anjaha nini, “E, e, e, domma ididah matanami.”

²² Domma ididah Ham ai, Ham Tuhan, sai ulang ma Ham sip, sai ulang ma Ham mandaoh-daoh humbangku, ale Jahowa.

²³ Jongjong ma Ham anjaha roh ma Ham mambela pakarangku, Ham Naibatangku anjaha Tuhanku!

²⁴ Pintori Ham ma ahu romban hubani hapintoron-Mu, Ham Jahowa Naibatangku,

ase ulang marmogah-mogah sidea
mangidah ahu,

²⁵ ase ulang ihatahon sidea ibagas uhurni, “E,
e, domma das sura-surangku!” ase ulang
ihatahon sidea, “Domma ibondut hanami
ia!”

²⁶ Sai maila anjaha tarbador ma sagala na
mangkamalaskon hamagouanku. Sai
marhiou hailaon ampa habadoron ma halak
na pajuntul-juntulhon dirini dompak ahu.

²⁷ Sai marolob-olob anjaha marmalas ni uhur ma
halak na mangkasiholi hapintoronku, sai
tongtong ma ihatahon sidea, “Timbul do
Jahowa, na mangkarosuhkon haluahon ni
juakjuak-Ni.”

²⁸ Sai patugah-tugahon ni dilahku do hapintoron-
Mu, anjaha puji-pujian ma Bamu ganup
ari.

Hapitungon ni Halak Pardousa ampa Hatuahon ni Parpintor

36 ¹ Bani pambobai koor. Humbani si Daud,
juakjuak ni Naibata. (36-2) Marhusipi do
dousa ibagas uhur ni parjahat; seng dong
biar dompak Naibata bani parjahat.

² (36-3) Ai iipuk-ipuk do dirini ibagas uhurni,
paboa seng anjai tardapot hajahatonni atap
hagigihononkon ia.

- ³ (36-4) Guak pakon ladung do hata-hata
ni pamanganni; domma mangadi ia
mandalankon horja hasintongan ampa na
madear.
- ⁴ (36-5) Na jahat do hansa ipingkiri i podomanni,
idompakkon do dalan na masambor; seng
ihagigihon hajahaton.
- ⁵ (36-6) Ham Jahowa, sundol do ronsi langit idop
ni uhur-Mu, anjaha hasintongan-Mu das do
bani hambun.
- ⁶ (36-7) Songon dolog ni Naibata do toguh ni
hapintoron-Mu, anjaha songon bah ni laut
na so tarsibar do panguhum-Mu. Ham do
sipaluahjolma pakon pinahan, ale Jahowa.
- ⁷ (36-8) Mantin ni in idop ni uhur-Mu Ham
Naibata, i linggom ni habong-Mu do
marlingod anak nijolma;
- ⁸ (36-9) ibosuri sidea do dirini bani taboh-taboh
ni rumah-Mu, ipainum Ham do sidea
humbani bah harosuh-Mu,
- ⁹ (36-10) ai i lambung-Mu do bah tubuh
hagoluan, ibagas haliharon-Mu ididah
hanami haliharon.
- ¹⁰ (36-11) Torus ma patuduhkon Ham idop ni
uhur-Mu bani na mananda Ham, ampa
hasintongan-Mu bani sibujur uhur.

- ¹¹ (36-12) Sai ulang ma mangonai bangku
tunjang-tunjang ni sigijang uhur, sai ulang
ma iusir tangan ni halak parjahat ahu.
- ¹² (36-13) Gobir anjaha mangkatompas do
sihorjahon hajahaton, ijombahon do sidea,
anjaha seng tarbahensi be jongjong.

Lang Totap Hasonangan ni Parjahat

- 37** ¹ Humbani si Daud. Ulang ma ho marah
dompak halak parjahat, anjaha ulang ma
sogam uhurmu bani na mangkorjahon
hagedukon;
- ² ai doras do sidea melus songon poyon-poyon,
anjaha hurleh songon tulmok na maratah.
- ³ Martenger ni uhur bani Jahowa ma ho anjaha
horjahon ma na madear. lankon ma tanoh
in, anjaha ramotkon habujuron.
- ⁴ Hamalaskon ma Jahowa, jadi bereon-Ni ma
hubam harosuh ni uhurmu.
- ⁵ Ondoskon ma dalanmu bani Jahowa anjaha
hatengerhon la, ase la patorsahon.
- ⁶ Jadi papoltakon-Ni ma hapintoronmu songon na
lihar, anjaha habonaronmu songon tongah
arian.
- ⁷ Sip ma ho i lobei ni Jahowa, anjaha pahamot
la; ulang ma sogam uhurmu mangidah
halak na mardohar dalanni, mangidah halak
sihorjahon panipuon.

- ⁸ Ampogi ma ringis, tadingkon gila, ulang
marsogam ni uhur, ai mambobai
huhajahaton do hansa in.
- ⁹ Ai maningon masab do sihorjahon hajahaton,
tapi halak na martenger ni uhur bani Jahowa
do sitean tanoh on.
- ¹⁰ Tongkin nari gelah seng dong be parjahat in,
anggo ipardiatei ho iananni, seng jumpah be
ia;
- ¹¹ tapi na lamlam maruhur do sitean tanoh in,
anjaha hamalaskonon ni uhur ni sidea do
hadameion na gok.
- ¹² Sai martahi-tahi do parjahat dompak halak
parpintor, anjaha ngesnges iponni ibahen
dompaksi.
- ¹³ Tartawa do Jahowa mangidahsi, ai domma
ididah paroh ni ajalni.
- ¹⁴ Isintak halak parjahat do podang anjaha
ipasang siorni, laho manjombahon halak
na madoyuk pakon na masombuh, laho
manayat halak na bujur maruhur.
- ¹⁵ Hape podangni manobak pusu-pusuni sandiri,
anjaha siorni mangkaponggol.
- ¹⁶ Rahanan do na otik, na dong bani halak
parpintor, ase na marsulei-sulei bani halak
parjahat,
- ¹⁷ ai ripukkononkon do botohon ni halak parjahat,
tapi itungkol Jahowa do halak parpintor.

- 18 Ibotoh Jahowa do ari ni halak na daulat, anjaha totap do sadokah ni dokahni siteanon ni sidea.
- 19 Seng anjai tarbador sidea sanggah roh hasosakan, anjaha bosuran do sidea bani musim lohei.
- 20 Tongon do, maningon magou do halak parjahat, anjaha songon hajagaron ni ladang do munshuh ni Jahowa, masab do sidea songon timus.
- 21 Manraih do parjahat, tapi seng ipaulak; tapi paridop ni uhur anjaha pardear layak do halak parpintor.
- 22 Tongon do, halak na pinasu-pasu-Ni do manean tanoh in, tapi halak na binuraan-Ni maningon magou do.
- 23 Jahowa do sibobai langkah ni dalahi, anjaha itumpak do dalan ni na hinarosuhkon-Ni.
- 24 Targompang pe ia, seng lanjar gayap, ai Jahowa do na manungkol tanganni.
- 25 Danak do ahu sapari, domma matua sonari, tapi seng onggah huida tartading halak parpintor, anjaha mangindo-indo sipanganon ginomparni.
- 26 Sai maridop ni uhur do ia bani ganup panorang anjaha paraihkon; parhiteian ni pasu-pasu do ginompar-Ni.

- ²⁷ Surut ma ho humbani na jahat, horjahon na madear, ase totap ho ronsi sadokah ni dokahni.
- ²⁸ Ai holong do atei ni Jahowa bani uhum, anjaha seng itadingkon halak niidopan-Ni. Ramotkonon-Ni do sidea sadokah ni dokahni, tapi ginompar ni halak parjahat maningon bois do.
- ²⁹ Teanon ni halak parpintor do tanoh in, anjaha tongtong do sidea marianan ijin.
- ³⁰ Mamodahkon hauhuron do pamangan ni halak parpintor, anjaha dilahni mangkatahon na sintong.
- ³¹ Iparimbagaskon do titah ni Naibatani ibagas uhurni, anjaha seng anjai tarlandit langkahni.
- ³² Sai igompangi halak parjahat do halak parpintor, sihol do bunuhonni ia.
- ³³ Tapi seng anjai bereon ni Jahowa ia hubagas tanganni, anjaha seng paturutonni ia hona uhum sanggah i paruhuman ia.
- ³⁴ Ajamkon ma Jahowa anjaha ramotkon dalan-Ni, jadi patimbulon-Ni ma ho manean tanoh in, anjaha idahonmu ma parbois ni halak parjahat.
- ³⁵ Ongga do huidah sada halak parjahat na tarlobih, na podas marbanggal songon hayu ares;

- ³⁶ dob mamontas ahu use, hape seng dong be,
hupindahi, hape seng dapot be.
- ³⁷ Sai pardiatei ma habujuron anjaha horjahon na
pintor, sai hadameion do dobni bani halak
sisonai.
- ³⁸ Tapi boiskonon-Ni do haganup halak
sipangosei, anjaha siapkonon-Ni do
ginompar ni halak parjahat.
- ³⁹ Tapi humbani Jahowa do haluahon ni halak
parpintor, la do parlingodan ni sidea
sangghah hasosakan.
- ⁴⁰ Jahowa do sipangurupi pakon na paluahkon
sidea, la do na paluahkon sidea humbani
tangan ni halak parjahat, ipabansah do
sidea halani marlingod sidea Bani.

Tonggo Ibagas Naborit na Parah

(Pausih: Psalm 6)

- 38** ¹ Psalm ni si Daud. Bahen pardingatan.
(38-2) Ham Jahowa, ulang ma pinsang Ham
ahu ibagas ringis-Mu, ulang ma ajar Ham
ahu ibagas gila-Mu!
- ² (38-3) ai mangkapantik do hu bangku
panah-Mu, anjaha idondoni tangan-Mu do
ahu.
- ³ (38-4) Seng be dong na jorgit bani angkulanku
halani ringis-Mu, seng marhasonangan be
holi-holinku halani dousanku.

- ⁴ (38-5) Ai isalpui dousangku do ulungku, anjaha songon pangodoh ni siboanon na borat do ai bangku.
- ⁵ (38-6) Bau masik anjaha marnanah do ugahku, halani haotoonku.
- ⁶ (38-7) Gundung mando ahu anjaha unduk mardalan, martudung-tudung do ahu mardalan ari-ari.
- ⁷ (38-8) Ai milas do sab binongeihi, seng be dong na jorgit bani dagingku.
- ⁸ (38-9) Mandatei anjaha marosak do huahap, morong-orong do ahu halani parborit ni pusu-pusungku.
- ⁹ (38-10) Ham Jahowa, talar do i lobei-Mu sagala pangindoanku, anjaha hoih-hoihku pe seng ponop ai hun Bamu.
- ¹⁰ (38-11) Sai mulbag-ulbag do pusu-pusungku, anjaha moru gogohku; haliharon ni mata pe seng dong be bangku.
- ¹¹ (38-12) Huan-huan pakon diha-dihangku padaoh diri humbangku, anjaha sindohorhu mandaoh-daoh jongjong.
- ¹² (38-13) Na manguhurhon hosahku, manaon jarot bangku, anjaha halak na mangindahi hamagouanku mansahapkon hasedaon bangku, layur-layur ari do sidea manranggihon tipu.

- 13 (38-14) Tapi anggo ahu nengel mando, seng marpambogei, songon halak na longah do ahu, na so pabuha pamanganni.
- 14 (38-15) Tongon, songon halak na so marpambogei mando ahu, na so dong balos ibagas pamanganni.
- 15 (38-16) Ibagas ai Ham do hupanalom, ale Jahowa; Ham ma na marbalos, ale Jahowa Naibatanku.
- 16 (38-17) Nini uhurhu, "Gendo ulang marmalas ni uhur sidea mangidah ahu, ulang mangeljeng sidea halani na tarlandit ai naheihu."
- 17 (38-18) Ai narus do ahu sihol targompang, anjaha sitarononku jonjon do i lobeihu.
- 18 (38-19) Tongon, husopotkon do salahku, anjaha huhoruhon do dousanku.
- 19 (38-20) Tapi margogoh do na mamunsuhi ahu, anjaha buei do sidea na mandomdomi ahu seng marhala.
- 20 (38-21) Ibalaskon sidea do na jahat balas ni na madear, anjaha ilawan ahu halani huorluhon na madear.
- 21 (38-22) Ulang ma tadingkon Ham ahu, Ham Jahowa, ulang ma mandaoh-daoh Ham humbangku, Ham Naibatanku!
- 22 (38-23) Papodas Ham ma mangurupi ahu, Ham Tuhan, haluahonku!

Tonggo Ibagas Paruntolon

- 39** ¹ Bani pambobai koor. Bani si Jedutun.
 Psalm ni si Daud. (39-2) Nini uhurhu,
 “Jagaonku ma parlahouhu, ase ulang
 mardousa ahu marhitei dilahku; bahenonku
 do huntam bani pamanganku, sadokah
 jongjong halak parjahat i lobeihu.
- ² (39-3) Hupalongah do diringku, seng marsahap,
 sip do ahu age pasal na madear tapi lambin
 gunsang do pangahapanku;
- ³ (39-4) lambin milas pusu-pusungku ibagas,
 lambin gara do huahap sanggah na
 marpingkir-pingkir ahu; jadi ningku ma
 marhitei dilahku,
- ⁴ (39-5) ‘Patugah Ham ma, ale Jahowa, ajalhu
 bangku, pakon sibar-sibar ni ari-aringku, ase
 hubotoh na galek do ahu.’
- ⁵ (39-6) Tongon do, domma itotapkon Ham
 ari-aringku piga-piga totap tumang, dokah ni
 umurhu hira na lang do i lobei-Mu; doskon
 sangombus hosah do hansa jolma in, age pe
 totap jongjong. Sela.
- ⁶ (39-7) Songon halinoh do hansa jolma in
 mardalani, iparsurai na so marguna; sai
 patumpuhon do ia, hape seng ibotoh, atap
 ise mambuat ai use.

- ⁷ (39-8) Sonari aha do sipaimaonku, Ham Tuhan?
Hu Bamu do ahu martenger ni uhur.
- ⁸ (39-9) Paluah Ham ma ahu humbani ganup
panlanggaronku, ulang ma paturut Ham ahu
ipahiri-hiri halak na oto.
- ⁹ (39-10) Longah mando ahu, seng hubuha
pamanganku, ai Ham do siaturhon ai.
- ¹⁰ (39-11) Padaoh Ham ma lonsing-lonsing
humbangu, madamor do ahu ibahen
pangodoh ni tangan-Mu.
- ¹¹ (39-12) Anggo iajar Hamjolma in marhitei
pinsang-pinsang halani hasalahanni, gabe
iparseda Ham do hinajengesni songon
ginagat ni ngitngit; doskon sangombus
hosah do hansajolma in. Sela.
- ¹² (39-13) Sai tangihon Ham ma tonggongku,
ale Jahowa, paeleng Ham ma pinggol-Mu
bani doruh-doruhku, ulang ma sip Ham
mangidah iluhku, ai partoloh do ahu i
lambung-Mu, anjaha panginsolat songon na
lobeihu ganup.
- ¹³ (39-14) Padaoh Ham ma pangkawah-Mu
humbangu, ase suang ahu marmalas ni
uhur, paima misir ahu, anjaha lang dong be.”

Tonggo Tarima Kasih ampa Pangindoan

40 ¹ Bani pambobai koor. Humbani si Daud.
Sada Psalm. (40-2) Marpangarapan tumang

do uhur hubani Jahowa; jadi ipaeleng do diri-Ni hu bangku, anjaha itangihon do dilo-dilongku.

² (40-3) Idokdok do ahu humbani godung hamagouan, humbani hubang na malhot; ipajongjong do naheihu hu atas ni dolog batu, ipatotap do langkahku.

³ (40-4) Ibere do doding na bayu hubagas pamanganku, doding puji-pujian bani Naibatanta. Idahon ni buei halak ma ai, gabe mabiar anjaha martenger ni uhur bani Jahowa.

⁴ (40-5) Martuah ma halak na mambahen Jahowa hatengeran ni uhurni, na so ra marbalik mangirikkon sigijang uhur, atap hubani sihorjahon ladung.

⁵ (40-6) Buei do halongangan ampa ranggian-Mu, na dob binahen-Mu bennami, Ham Jahowa Naibatanku; seng adong na songon Ham. Porini sihol ambilankononku atap baritahononku ai, seng targorani ibahen bueini.

⁶ (40-7) Seng marosuh uhur-Mu bani galangan sisayaton ampa bani galangan sipanganon, tapi domma ibere Ham bangku pinggol na buha. Galangan situtungan pakon galangan pardousaon seng ipindo uhur-Mu.

- ⁷ (40-8) Jadi ningku ma, “Tongon, roh ma ahu,
bani buku na ginulung in do tarsurat pasal
sibahenonku.”
- ⁸ (40-9) Mangkorjahon rosuh-Mu ai do na
huharosuhkon, Ham Naibatanku, anjaha
ibagas uhurhu do titah-Mu.
- ⁹ (40-10) Domma huambilankon hapintoron-Mu
bani humpulan banggal, tongon, seng tutup
bibirhu, Ham Jahowa, ibotoh Ham do ai.
- ¹⁰ (40-11) Seng huponopkon hapintoron-Mu
ibagas uhurhu, hupatugah-tugah do
habujuron-Mu pakon pangurupion-Mu,
seng huporsou idop ni uhur-Mu pakon
hasintongan-Mu bani humpulan banggal.
- ¹¹ (40-12) Ham Jahowa, sai ulang ma buat
Ham parontou ni uhur-Mu humbangku,
dear layak-Mu pakon hasintongan-Mu ma
manramotkon ahu tongtong.
- ¹² (40-13) Ai hasunsahan do na manlioti ahu, seng
tarbilang bueini; domma idorab salahku
ahu, gabe seng boi ahu marpangidah,
bueinan do ai ase jambulan ni ulungku, gabe
jut ma uhurhu.
- ¹³ (40-14) Sai ra ma Ham Jahowa, paluahkon ahu,
oloskon Ham ma, Jahowa, mangurupi ahu.
- ¹⁴ (40-15) Sai maila anjaha tarbador ma bahen
Ham, sidea na manguhurhon hosahku, sai

surut ma hu pudi anjaha tarbador, sidea na mangkarosuhkon hamagouanku.

¹⁵ (40-16) Sai hirjat-hirjaton ma sidea anjaha tarbador, sagala na manggorahon bangku, “Eee, eee!”

¹⁶ (40-17) Sai marolob-olob anjaha marmegah-megah ma ibagas Ham, sagala na mangindahi Ham; sai tongtong ma ihatahon sagala na mangkasiholi pangurupion-Mu, “Banggal do Jahowa!”

¹⁷ (40-18) Madoyuk anjaha masombuh do ahu, tapi idingat Tuhan do ahu. Ham do pangurupi ampa sipaluah bangku; Ham Naibatanku, ulang ma padokah-dokah Ham.

Tonggo Mangindo Hajorgiton

- 41** ¹ Bani pambobai koor. Psalm ni si Daud.
 (41-2) Martuah ma halak na marpanatap bani halak na galek; bani panorang hasosakan, sai paluahon ni Jahowa do ia.
² (41-3) Jahowa do na manramotkon ampa na pagoluhkonsi, anjaha martuah do ia bahenon-Ni i tanoh on; seng anjai ondoskonon-Ni ia hu tangan ni munsuhni.
³ (41-4) Jahowa do na manatangi bani podomanni sanggah boritan, mubah do ibahen haganup pangandunganni.

- ⁴ (41-5) Ningku do, “Ham Jahowa, maidop ma uhur-Mu bangku, pamalum Ham ma ahu, ai dompak Ham do ahu mardousa.”
- ⁵ (41-6) Isahapkon imbangku do na jahat dompak ahu: Sadihari do ia matei, ase magou goranni?
- ⁶ (41-7) Anggo dong halak na manorih ahu, ladung do isahapkon; na sambor do ipatumpu-tumpu uurni, anjaha i darat isahap-sahapkon ma ai.
- ⁷ (41-8) Ganup na marsogam ni uhur bangku marhusip-husip pasal ahu, na jahat do ipingkir-pingkiri sidea dompak ahu.
- ⁸ (41-9) Domma mangonai bani naborit na parah, anjaha ia, na tibal-tibal ai, seng anjai hehe be.
- ⁹ (41-10) Gari huan-kuanku, hatengeran ni uhurhu, na rap mangan pakon ahu, iangkat do naheini laho mantadahkon ahu.
- ¹⁰ (41-11) Tapi Ham Jahowa, sai idop ma uhur-Mu bangku, pajongjong Ham ma ahu, ase mambalas ahu bani sidea.
- ¹¹ (41-12) Marhitei on botohonku ma, pabo na marosuh do Ham bangku, anggo seng be marsurak-surak imbangku dompak ahu.
- ¹² (41-13) Anjaha ahu, ibagas hasintongankai, itatang Ham do ahu, anjaha ipajongjong Ham do ahu hu lobei-Mu tongtong.

- ¹³ (41-14) Napuji ma Jahowa, Naibata ni Israel, humbani na basaia ronsi sadokah ni dokahni. Amen, amen.

(Buku Paduahon: Psalm 42-72)

**Sihol ni Uhur bani Naibata ampa
bani Rumah-Ni na Pansing ai**

- 42** ¹ Bani pambobai koor. Doding podah humbani ginompar ni si Korah. (42-2) Songon pangkasiholi ni urisa bani bah mardalan, sonai do pangkasiholi ni tonduyhu Bamu, Ham Naibata.
- ² (42-3) Horahan do tonduyhu bani Naibata, bani Naibata na manggoluh in; antigen pe das ahu, ase huidah bohi ni Naibata?
- ³ (42-4) Iluhku do sipanganon bangku arian pakon borngin, halani manipat ari do ipangkatahon halak bangku, “Ija do Naibatamu?”
- ⁴ (42-5) Ai ma na sihol ingatonku anjaha huuseihon uhurhu ibagas, ai ma na rap ai ahu pakon halak na mabuei marayak rumah ni Naibata, marhasoman sora olob-olob ampa puji-pujian pakon halak na laho marpesta.
- ⁵ (42-6) Mase sai unduk ho tonduyhu anjaha rusak ibagas diringku? Arapkon ma Naibata,

ai sai na pujionku ope la, Sipaluah bangku
anjaha Naibatanku!

⁶ (42-7) Unduk do tonduyhu ibagas diringku,
halani ai, sai huingat do Ham hun tanoh
Jordan pakon hun pardologan Hermon,
humbani Dolog Misar.

⁷ (42-8) Marsiarahan do bah mardalan na
manjadihon pardosong ni sampuran-Mu;
ganup ombak pakon gilumbang-Mu
manangkobi ahu.

⁸ (42-9) Arian itongos Jahowa idop ni uhur-Ni,
anjaha bornginni mandoding ma ahu Bani,
sada tonggo bani Naibata ni hagoluhanku.

⁹ (42-10) Ningku ma dompak Naibata, batu
ginggingku, "Mase ma lupa Ham bangku?
Mase ma maningon martujung-tujung ahu
mardalan halani odoh-odoh ni munsuhku?"

¹⁰ (42-11) Songon na hona tikam do holi-holingku,
ibahen na ipahiri-hiri imbangku ahu, ai
manipat ari do ihatahon sidea bangku, "Ija
do Naibatamu?"

¹¹ (42-12) Mase sai unduk ho tonduyhu anjaha
rusak ibagas diringku? Arapkon ma Naibata,
ai sai na pujionku ope la, Sipaluah bangku
anjaha Naibatanku.

Sambat ni Psalm 42

- 43** ¹ Pintori Ham ma ahu, ale Naibata, patorsa Ham ma parkarangku marimbang bangsa na so daulat; paluah Ham ma ahu humbani halak panipu pakon pargeduk.
- ² Ai Ham do Naibata parlingodanku, mase ma itulak Ham ahu? Mase ma maningon martujung-tujung ahu mardalan halani odoh-odoh ni munsuhku?
- ³ Tongos Ham ma haliharon-Mu ampa hasintongan-Mu; ase itogu anjaha ibobai ahu bani dolog-Mu na pansing in ampa hubani ianan-Mu;
- ⁴ gabe boi das ahu hu anjapanjap ni Naibata, hubani Naibata ni hamegahonku, ase marolob-olob ahu anjaha hupuji Ham marhitei husapi, Ham Jahowa Naibatanku!
- ⁵ Mase ma sai unduk ho tonduyhu anjaha rusak ibagas diringku? Arapkon ma Naibata, ai sai na pujionku ope la, Sipaluah bangku, anjaha Naibatanku.

Doding Tangis-tangis ni Bangsa na Hona Dorun

- 44** ¹ Bani pambobai koor. Doding podah humbani ginompar ni si Korah. (44-2) Ham Naibata, domma ibogei pinggolnami sandiri ibaritahon ompungnami bennami, pasal

pambahenan na binahen-Mu bani goluh ni sidea, bani panorang na basaia.

² (44-3) Marhitei tangan-Mu iusir Ham do bangsa sipajuh begu-begu, tapi isuankon Ham do ia sidea; iboiskon Ham do bangsa-bangsa, tapi ipararat Ham do ia sidea.

³ (44-4) Ai sedo marhitei podang ni sidea dapot sidea tanoh in, sedo botohonni mambahen monang sidea; tapi tangan siamun-Mu pakon botohon-Mu ampa haliharon ni bohi-Mu do tene, ai iharosuhkon Ham do sidea.

⁴ (44-5) Ham do Rajangku, ampa Naibatangku, na manongos haluahon bani Jakob.

⁵ (44-6) Marhitei Ham ijuar hanami munsuhnami, marhitei goran-Mu ilotloti hanami do imbangnami.

⁶ (44-7) Ai sedo bani siorhu ahu marpangajaman, anjaha sedo podangku pamonang ahu.

⁷ (44-8) Ham do paluah hanami humbani sagala imbangnami, Ham do mambahen tarbador na mandomdomi hanami.

⁸ (44-9) Ibagas Naibata do marmogah-mogah hanami ari-ari, anjaha pujionnami do goran-Mu sadokah ni dokahni. Sela.

⁹ (44-10) Hape sonari itulak Ham do hanami, anjaha ipaturut Ham hanami bador; seng bingkak Ham mangkasomani balanami.

- 10 (44-11) Ibahen Ham do hanami manginsurut
humbani munsuhnami, gabe irampas na
mandomdomi hanami do hanami.
- 11 (44-12) londoskon Ham do hanami songon
biribiri sisayaton, ierap Ham do hanami i
tongah-tongah ni bangsa sipajuh begu-begu.
- 12 (44-13) Ijual Ham do bangsa-Mu seng pala
marboli, anjaha seng maruntung Ham
humbani harga ni sidea.
- 13 (44-14) Ibahen Ham do hanami sipahiri-hirion
ni simbalognami, parbileian pakon siapason
ni halak na marianan inggot hanami.
- 14 (44-15) Ibahen Ham do hanami gabe umpama
i tongah-tongah ni sipajuh begu-begu,
siupirhonon ni ulu i tongah-tongah ni
bangsa-bangsa.
- 15 (44-16) Jongjong do i lobeihu habadoronku
ari-ari, anjaha hailaon do manrungkub
bohingku,
- 16 (44-17) halani sora ni na mangapasi pakon
na manrisai, halani pangkawah ni munsuh
pakon na mandomdomi ahu.
- 17 (44-18) Ganupan ai domma mangonai
bennami, tapi seng lupa hanami Bamu,
anjaha seng mangeluk hanami humbani
padan-Mu.

- 18 (44-19) Seng marbalik uhurnami, anjaha
seng manlembang langkahnami humbani
dalan-Mu;
- 19 (44-20) age sonai iropuki Ham do hanami bani
ianan ni sorigala, anjaha irungkubkon Ham
do hagolapan bennami.
- 20 (44-21) Porini ihalupahon hanami goran
ni Naibata, anjaha ipaherbang hanami
tangannami bani Naibata silegan,
- 21 (44-22) mintor lang ma pareksaon ni Naibata
ai? ai la do na mananda rusia ni uhur.
- 22 (44-23) Tongon, halani Ham do ibunuhi hanami
manipat ari, doskon biribiri sisayaton do
hanami ihira sidea.
- 23 (44-24) Puho ma Ham, mase sai modom Ham
Tuhan? Puho ma Ham anjaha ulang ma
tulak Ham hanami sadokah ni dokahni.
- 24 (44-25) Mase ma iponopkon Ham bohi-Mu,
lupa Ham bani hasombuhon ampa
hasosakannami?
- 25 (44-26) Ai unduk do tonduynami das bani
orbuk, longkot bani tanoh do boltoknami.
- 26 (44-27) Marugas ma Ham mangurupi hanami,
anjaha paluah Ham ma hanami halani idop
ni uhur-Mu.

Doding bani Parunjukon ni Raja

- 45** ¹ Bani pambobai koor. Inggouni: Bunga silundat. Humbani ginompar ni si Korah. Doding podah. Doding marsihaholongan. (45-2) Marsual-sual do humbagas uhurhu hata na madear, pajojoronku ma dodingku bani raja in; Songon mata pena do dilahku ibagas tangan ni halak na pandei manurat.
- ² (45-3) Ham do sijengesan i tongah-tongah ni anak ni jolma, hajengeson do inahkon bani bibirmu, tongon, Naibata do mamasu-masu ham tongtong.
- ³ (45-4) Solotkon ham ma podangmu bani binongeimu, ham puanglima, hamuliaonmu pakon jumbalangmu!
- ⁴ (45-5) Ibagas jumbalangmu, maju ma ham marhamonangan mangkopkop hasintongan ampa hapintoron. Ajaran ni tangan siamunmu ma ham mandalankon pambahenan na marhajombuton.
- ⁵ (45-6) Marot-marot ma panahmu, tunduk ma bangsa-bangsa i lobeimu, anjaha madatei ma uhur ni munsuh ni raja in.
- ⁶ (45-7) Hotakmu, tuannami, totap do ronsi sadokah ni dokahni, tungkot hapintoron do tungkot harajaonmu.

- ⁷ (45-8) Holong do uhurmu bani hapintoron,
magigi do ham bani hajahaton, halani ai
do, tuannami, ase iminakkon Naibatamu
minak malas ni uhur bamu, marhasurungan
humbani hasomanmu.
- ⁸ (45-9) Mir, aloe pakon kassia do mammorumi
hioumu ganupan; malas do uhurmu ibahen
parugas sigiuton na hun rumah bolon
gading;
- ⁹ (45-10) boru ni raja do deba humbani
siparugasmu; i siamunmu do jongjong
puangbolon marpakeian omas na hun opir.
- ¹⁰ (45-11) Tangihon ham ma, ale boru ni raja
in, tonggor ham ma, paeleng ham ma
pinggolmu, halupahon ham ma bangsamu
pakon rumah ni bapamu!
- ¹¹ (45-12) Sai iharosuhkon raja in ma
hinajengesmu, ai ia do tuanmu, tunduk ma
ham manombah hu bani.
- ¹² (45-13) Roh do boru Tirus mamboan siluahni,
anjaha na sangap-sangap humbani bangsa
ai marsombah mambuat uhurmu.
- ¹³ (45-14) Marpakeian jenges do boru ni raja in,
na binuat bani omas do pakeianni.
- ¹⁴ (45-15) Marpakeian na hinarawang do
ia ibobahon bani raja in, anak boru
mangirikkon, huan-kuanni mangkasomanisi;

- ¹⁵ (45-16) marhasoman malas ni uhur ampa olob-olob ibobahon ma ia, masuk hu rumah bolon ni raja in.
- ¹⁶ (45-17) Sai anakmu ma na manggantih na lobeimu, ham ma na pabangkit sidea gabe panrajai bani sab nagori on.
- ¹⁷ (45-18) Baritahononku ma goranmu bani halak marsundut-sundut, halani ai pujion ni sagala bangsa ma ham sadokah ni dokahni.

Naibata do Batar-batar Banta

- 46** ¹ Bani pambobai koor. Humbani ginompar ni si Korah. Inggouni: Alamot. Sada doding. (46-2) Naibata do haporusan ampa hagogohon banta, pangurupi banggal tongon bani panorang hasosakan.
- ² (46-3) Halani ai seng anjai mabiar hita, age pe mosor tanoh on, anjaha munjom dolog hu tongah-tongah ni laut,
- ³ (46-4) age pe marhasak anjaha marguboh bahni, anjaha dugur dolog ibahen gunsangni. Sela!
- ⁴ (46-5) Adong sada bah bolon, bahni pamegahkon huta ni Naibata, ianan tang na pansing bani Sitimbulan in.
- ⁵ (46-6) Naibata do i tongah-tongahni, seng anjai doyuk huta in, manlele siang ope domma iurupi Naibata ia.

- ⁶ (46-7) Geor pe sagala bangsa anjaha dugur
sagala harajaon, tapi marsora honsi la
malala ma tanoh on.
- ⁷ (46-8) Jahowa Zebaot do hasomanta, Naibata ni
si Jakob do batar-batar banta. Sela.
- ⁸ (46-9) Eta, roh ma nasiam mangidah horja ni
Jahowa, na parohkon songgot-songgot i atas
tanoh on,
- ⁹ (46-10) na pasohkon parmunsuhan das hu ujung
ni tanoh on, na mambahen marpongolan
sior, maropuk tanja, na manutungi gareta
porang ibagas apuy.
- ¹⁰ (46-11) Parontihon hanima ma, anjaha tanda
ma, paboa Ahu do Naibata, na timbul i
tongah-tongah ni bangsa-bangsa, timbul i
tanoh on.
- ¹¹ (46-12) Jahowa Zebaot do hasomanta, anjaha
Naibata ni si Jakob do batar-batar. Sela.

Naibata do Raja ni Ganup Tanoh on

- 47** ¹ Bani pambobai koor. Humbani ginompar
ni si Korah. Sada Psalm. (47-2) Nasiam
sagala bangsa, martopap-topap ma nasiam;
puji nasiam ma Naibata marhitei doding
olob-olob.
- ² (47-3) Ia Jahowa, na timbul na majombut in, la
do Raja Bolon bani sab dunia on.

- ³ (47-4) Ipatunduk do bangsa-bangsa hubagas kuasanta, ampa suku ni bangsa hutoruh ni naheita.
- ⁴ (47-5) Ipilih do banta na gabe siteanonta, hatimbulon bani si Jakob, na hinaholongan-Ni in. Sela.
- ⁵ (47-6) Domma naik Naibata marhasoman olob-olob, Jahowa marhasoman sora ni tarompit.
- ⁶ (47-7) Dodingkon nasiam ma Naibata, dodingkon ma; dodingkon nasiam ma Rajanta in, dodingkon ma!
- ⁷ (47-8) Ai Naibata do Raja ni sab tanoh on, dodingkon nasiam ma doding puji-pujian.
- ⁸ (47-9) Raja do Naibata bani bangsa-bangsa, hundul do Naibata i atas paratas-Ni na pansing in.
- ⁹ (47-10) Martumpu do na sangap-sangap ni sagala bangsa songon bangsa ni Naibata ni si Abraham, Naibata do simada gantar ni tanoh on, timbul tumang do la.

Naibata do Batar-batar bani Huta Sion

48 ¹ Sada doding. Psalm humbani ginompar ni si Korah. (48-2) Banggal do Jahowa anjaha sipujion botul ibagas huta ni Naibatanta, dolog-Ni na pansing in.

- ² (48-3) Na jenges manjurjur hubabou, ai ma malas ni uhur ni sab tanoh on, Dolog Sion in, daoh hampit utara, ai ma huta ni sada raja na bolon.
- ³ (48-4) Naibata ibagas rumah-Ni patandahon diri-Ni songon batar-batar.
- ⁴ (48-5) Tonggor ma, martumpu do raja-raja, marsada ni uhur laho mandorab.
- ⁵ (48-6) Ijin ididah sidea longang ma sidea, anjaha bajoraon lanjar maporus.
- ⁶ (48-7) Godor-godor ma sidea ijai, mangarou songon naboru na laho tubuhan tuah.
- ⁷ (48-8) Marhitei logou na hun hapoltakan, irosaki Ham do kapal na hun Tarsis.
- ⁸ (48-9) Songon na dob binogeinami, sonai do ididah hanami bani huta ni Jahowa Zebaot, ibagas huta ni Naibatanta, na patotapkon ai ronsi sadokah ni dokahni. Sela.
- ⁹ (48-10) Idingat hanami do idop ni uhur-Mu, Ham Naibata, ibagas rumah-Mu.
- ¹⁰ (48-11) Songon goran-Mu, Ham Naibata, sonai do hamuliaon-Mu das hu ujung ni tanoh on, gok hapintoron do tangan-Mu siamun.
- ¹¹ (48-12) Marmalas ni uhur do Dolog Sion, marolob-olob do boru Juda halani panguhumion-Mu.
- ¹² (48-13) Inggoti nasiam ma Sion anjaha lioti nasiam ma, bilangi nasiam ma manarani.

¹³ (48-14) Papangkei nasiam ma tembokni,
bontas nasiam ma benteng-bentengni, ase
boi ituri-turihon nasiam bani sundut na
mangihut.

¹⁴ (48-15) Tongon, Naibata on do Naibata ronsi
sadokah ni dokahni, la do na manogu-nogu
hita.

Hamagouan do Ujung ni Halak na Mangunsagah bani Habayakon

- 49** ¹ Bani pambobai koor. Humbani ginompar
ni si Korah. Sada Psalm. (49-2) Tangihon
ma on, ale sagala bangsa, pardiateihon ma,
nasiam ganup isi ni dunia on,
- ² (49-3) age na sombuh, sonai na sangap, age na
bayak sonai na musil haganup,
- ³ (49-4) sihol hatahonon ni pamanganku do
hauhuron, anjaha hapentaran do pingkiran
ni uhurhu.
- ⁴ (49-5) Tarehononku do pinggolhu dompak
umpama, anjaha patalaronku ma rusiangku
marhitei husapi.
- ⁵ (49-6) Mase ma pala mabiar ahu bani ari
hasunsahan, sanggah hajahaton ni halak na
mardakdak ahu manginggoti ahu.
- ⁶ (49-7) ai ma na martenger ni uhur bani na dong
bani, anjaha na mangeljengkon habayakon
ni sidea?

- ⁷ (49-8) Tongon, ise pe lang na boi manobus
dirini, barang targalarisi partobusni bani
Naibata,
- ⁸ (49-9) ai hargatu do partobus ni tonduyni ai,
anjaha seng targoki sadokah ni dokahni,
- ⁹ (49-10) ase boi ia tongtong manggoluh, anjaha
seng mangidah tanoman.
- ¹⁰ (49-11) Nai ma, idahonni do, matei do age
halak na maruhur, na lontong pakon na jijing
pe maseda do rombang, anjaha na dong
bani sidea tading bani na legan.
- ¹¹ (49-12) Tanoman do rumah ni sidea lalab,
ianan ni sidea marsundut-sundut, age pe
marpanggorani hubani sidea tanoh in.
- ¹² (49-13) Ia jolma in, ibagas hasangaponni,
seng totap, usih songon pinahan do sidea
iboiskon.
- ¹³ (49-14) Ai ma na mangonai bani halak na
mangunsagah bani dirini, ai ma ujung ni
halak na marosuh bani buei ni sahapni
sandiri. Sela.
- ¹⁴ (49-15) Songon biribiri do sidea ipaharang hu
nagori toruh, hamatean do na marmahan
sidea; torus do sidea turun hu tanoman,
malantur angkula ni sidea; nagori toruh do
gabe ianan bani sidea.

- ¹⁵ (49-16) Tapi Naibata do na manobus tonduyhu humbani kuasa ni nagori toruh. Tongon, la do na mandokdok ahu. Sela.
- ¹⁶ (49-17) Ulang rusak ho anggo lambin bayak sada halak, anggo lambin martambah hamuliaon ibagas rumahni,
- ¹⁷ (49-18) ai bani parmateini holi seng boanonni ai, anjaha hamuliaonni seng tuad mangirikkonsi.
- ¹⁸ (49-19) Age pe nini uhurni, sanggah goluhni sangap ia, age dapotan puji-pujian sada halak halani mardohar ia,
- ¹⁹ (49-20) maningon parayakonni do ompung-ompungni, na so mangidah haliharon be sadokah ni dokahni.
- ²⁰ (49-21) Jolma ibagas hasangaponni, tapi lang maruhur, usih do ia songon pinahan siraseihononkon.

Parsombahan na Sintong

- 50** ¹ Psalm ni si Asap. Naibata, Naibata Jahowa marsahap anjaha mardilo bani tanoh on, humbani hapoltakan das hu hasundutan.
- ² Hun Sion, pakpak ni hajengeson, marsinalsal Naibata.
- ³ Na roh ma Naibatanta anjaha seng sip la, apuy na margajag-gajag do i lobei-Ni, anjaha haba-haba na gogoh manlioti-Si.

- ⁴ Idilo do langit na i babou, sonai tanoh laho
manguhumi bangsa-Ni,
- ⁵ “Pahumpul ma Bangku halak na Huhaholongi,
na mambahen parpadanan Bangku marhitei
galangan.”
- ⁶ Langit mambaritahon hapintoron-Ni, ai Naibata
sandiri do panguhum.
- ⁷ Tangihon ma, ale bangsang-Ku, ase marsahap
Ahu; ale Israel, sihol saksihonon-Ku do
bannima, “Naibata, Naibatamu do Ahu.”
- ⁸ Sedo halani galangan sisayatonmu ase
Hupinsang ho; galangan situtungonmu
tongtong do i lobei-Hu.
- ⁹ Seng porlu buaton-Ku lombu hun rumahmu
atap hambing tunggal humbani harang ni
pinahanmu,
- ¹⁰ ai Ahu do simada binatang na i harangan,
pinahan na marribu-ribu na adong i atas
dolog.
- ¹¹ Hutanda do sagala manuk-manuk na i
awang-awang, anjaha saguru Bangku do
sagala na manggulmit i talun.
- ¹² Porini pe loheian Ahu, seng pala hatahonon-Ku
bam, ai gok Bangku do dunia on ampa
sagala isini.
- ¹³ Mintor panganon-Ku ma nani daging ni
lombu jonggi, atap inumon-Ku ma daroh ni
hambing tunggal?

- 14 Galangkon ma bangga ni uhur bani Naibata,
anjaha galari ma bagah-bagahmu bani
Sitimbulan in;
- 15 anjaha dilo ma Ahu bani ari hasosakan, ase
Hupaluah ho anjaha ipuji ho Ahu.
- 16 Tapi bani parjahat ihatahon Naibata do,
“Aha do hakmu pajojorhon titah-Ku,
anjaha manobut-nobut padan-Ku marhitei
babahmu?
- 17 Hape ho do mangkagigihon sipaingat, anjaha
ho do manundali hatang-Ku!
- 18 Anggo ididah ho panangko, marosuh do ho
mangkasomanisi, anjaha sapanriah do ho
rap pakon parbangkis.
- 19 Ipalopas ho do pamanganmu mansahapkon
hajahaton, ampa dilahmu mandandan
panipuon.
- 20 Sai hundul-hundul do ho mangkatai saninamu,
sai ipahiri ho do anak ni inangmu.
- 21 Sonai do ibahen ho, tapi sai sip do Ahu; jadi
iagan ho doskon ho Ahu. Ahu do manguhum
ho anjaha patidakon-Ku ma ai i lobei ni
matamu.
- 22 Parimbagaskon ma ai, ale sihalupahon Naibata,
ase ulang roh Ahu manoroh, gabe ise pe
lang boi paluahkon.
- 23 Ise na manggalangkon bangga ni uhur, ai do na
pasangapkon Ahu, anjaha ise na mardalan

ibagas hapintoron, hubani do patalaron-Ku hatuahon-Ku.”

Tonggo Mansopotkon Dousa ampa Pangindoan Pasal Habayuon ni Uhur

- 51** ¹ Bani pambobai koor. Psalm humbani si Daud. (51-2) Sanggah na roh Nabi Natan mangayakisi, dob idohori si Batseba. (51-3) Maidop ma uhur-Mu bangku, Ham Naibata, romban hubani dear ni layak-Mu, sasap Ham ma panlanggaronku romban hubani buei ni idop ni uhur-Mu.
- ² (51-4) Burihi Ham ma ahu pansing tumang humbani hajahatonku, anjaha paborsih Ham ma ahu humbani dousangku.
- ³ (51-5) Ai mangahap do ahu bani panlanggaronku, anjaha tongtong do sonson i lobeihu dousangku.
- ⁴ (51-6) Bamu, Bamu tumang do ahu mardousa, anjaha na jahat bani panonggor-Mu do huhorjahon, ase taridah pintor do Ham bani parsahap-Mu, anjaha pitah Ham bani panguhumion-Mu.
- ⁵ (51-7) Tongon, ibagas hagedukon do ahu tubuh, anjaha ibagas dousa ijalo inang ahu.
- ⁶ (51-8) Tongon, hasintongan na ibagas uhur do iharosuhkon Ham, anjaha ibagas na ponop ipabotohkon Ham hauhuron bangku.

- ⁷ (51-9) Uras Ham ma ahu humbani dousangku
marhitei hisop, ase borsih ahu, burihi Ham
ma ahu, ase lopakkan ahu marimbang salju.
- ⁸ (51-10) Sai pabogeihon Ham ma hu bangku
malas ni uhur pakon hamegahon,
ase marolob-olob holi-holi na dob
nirosakan-Mu.
- ⁹ (51-11) Ponopkon Ham ma bohi-Mu humbani
dousangku, anjaha sasap Ham ma ganup
hajahatonku.
- ¹⁰ (51-12) Tompa Ham ma uhur na borsih ibagas
diringku, Ham Naibata, anjaha bere Ham ma
bangku tonduy na baru anjaha na totap.
- ¹¹ (51-13) Ulang ma pabali Ham ahu hun
lobei-Mu, anjaha ulang ma buat Ham
Tonduy-Mu Na Pansing in humbangku.
- ¹² (51-14) Pasuang Ham ma bangku malas ni uhur
halani pangurupion-Mu, anjaha tungkoli
Ham ma ahu marhitei tonduy pambalasion.
- ¹³ (51-15) Ase huajarhon dalan-Mu bani
sipanlanggar, ase mulak halak pardousa hu
Bamu.
- ¹⁴ (51-16) Sai paluah Ham ma ahu humbani
sapata ni daroh, Ham Naibata, Naibata
ni hatuahonku, ase ipuji dilahku
hapintoron-Mu.
- ¹⁵ (51-17) Buha Ham ma bibirhu, Ham Tuhan, ase
iambilankon pamanganku puji-pujian-Mu.

- ¹⁶ (51-18) Ai seng iharosuhkon Ham galangan
sisayaton, anjaha porini huboban galangan
situtungan, seng anjai hadearhonon-Mu ai.
- ¹⁷ (51-19) Galangan na hinarosuhkon ni Naibata,
ai ma tonduy na marosak; uhur na maropuk
anjaha na marosak seng itulak uhur-Mu,
Ham Naibata.
- ¹⁸ (51-20) Bahen Ham ma na madear hu Sion
romban hubani idop ni uhur-Mu, pauli Ham
ma tembok ni Jerusalem.
- ¹⁹ (51-21) Jadi ijai ma harosuhkonon-Mu galangan
na sintong, galangan situtungan ampa
galangan sirasogon; ijai ma galangonkon
lombu jonggi i atas anjapanjap-Mu.

Uhum bani Halak Parjahat

- 52** ¹ Bani pambobai koor. Doding podah
humbani si Daud, (52-2) sanggah roh si
Doeg, halak Edom ai patugahkon bani si
Saul, nini hu bani, “Domma das si Daud
hu rumah ni si Ahimelek.” (52-3) Mase
marmegah-megah ho ibagas hajahaton,
ale puanglima, parkuasa na mabisang,
manlawan halak na daulat ganup ari?
- ² (52-4) Hamagouan do iuhurhon ho, songon
pisou parsuhur do marot ni dilahmu, ho ale
sihorjahon pangoto-otoion.

- ³ (52-5) Holongan do uhurmu bani na jahat ase
bani na madear, bani hata ladung ase hata
hasintongan. Sela.
- ⁴ (52-6) Sai iharosuhkon ho do bagei ni hata
hasedaon, sonai age dilah panipuon.
- ⁵ (52-7) Tapi reongkonon ni Naibata do ho
sadokah ni dokahni, tangkapon-Ni anjaha
saradon-Ni do ho humbani lampolampomu,
dokdokon-Ni do hun tanoh ni halak na
manggoluh. Sela.
- ⁶ (52-8) Idahon ni halak parpintor ma ai lanjar
mabiar, tatawaan ni sidea ma ia, nini,
- ⁷ (52-9) “Tonggor ma halak an, na so mambahen
Naibata batatarni, na martenger ni
uhur bani buei ni habayakonni, anjaha na
mangenjeng ibagas hajahatonni.”
- ⁸ (52-10) Tapi anggo ahu songon hayu jetun na
ratah do i rumah ni Naibata; martenger ni
uhur do ahu bani idop ni uhur ni Naibata
ronsi sadokah ni dokahni.
- ⁹ (52-11) Sai pujionku do Ham, ai Ham do sibahen
ai, ronsi sadokah ni dokahni, halani ipasaud
Ham ai; sai baritahononku do goran-Mu
halani hadearonni, i lobei ni halak na
niidopan-Mu.

Haotoon ni Jolma na Marnalangkon Naibata

(Pausih: Psalm 14)

- 53** ¹ Bani pambobai koor. Loguni: Mahalat.
 Doding podah humbani si Daud. (53-2)
 Nini halak na oto do ibagas uhurni, “Seng
 dong Naibata.” Bajan anjaha sambor do
 pambahen ni sidea, sahalak pe lang sibahen
 na madear.
- ² (53-3) Manatap-natap do Jahowa hun nagori
 atas dompak anak ni jolma, mangidah atap
 dong do na maruhur, sipindahi Naibata.
- ³ (53-4) Haganup do sidea kahou, haganupan
 seng margagan, sahalak pe lang sibahen na
 madear, sahalak pe lang dong.
- ⁴ (53-5) Seng marpambotoh nani sagala halak
 sihorjahon hajahaton, na mangankon
 bangsang-Ku songon na mangan ruti, anjaha
 na so onnga mardilo Jahowa?
- ⁵ (53-6) Tapi maningon tarsonggot do sidea
 use, age pe seng dong na manonggoti, ai
 Naibata do na mangerap holi-holi ni halak
 na mangkubu ho, sai na tarbador do sidea,
 ai domma iambukkon Naibata sidea.
- ⁶ (53-7) Ah, sai roh ma haluahan ni Israel, hun
 Sion! Anggo suang ma ibahen Naibata
 bangsa-Ni, marolob-olob ma Jakob anjaha
 marmalas ni uhur Israel.

Tonggo Mangindo

Partolongan Marimbang Munsuh

- 54** ¹ Bani pambobai koor. Marhasoman husapi.
 Doding podah humbani si Daud, (54-2)
 sanggah roh halak Sipi hubani si Saul
 mangkatahon, “Ai lang i lambungnami
 do marponop si Daud?” (54-3) Ham
 Naibata, paluah Ham ma ahu, halani
 goran-Mu, pintori Ham ma ahu marhitei
 hagogohon-Mu.
- ² (54-4) Tangihon Ham ma tonggongku, Ham
 Naibata! Paeleng Ham ma pinggol-Mu
 manangihon sahap ni pamanganku!
- ³ (54-5) Ai hehe do halak na jungkat mangimbang
 ahu, anjaha sihorjahon paksa mangindahi
 hosahku; seng mardingat sidea bani
 Naibata. Sela.
- ⁴ (54-6) Tonggor ma, Naibata do pangurupi
 bangku, Tuhan do siramotkon hosahku.
- ⁵ (54-7) Balaskon Ham ma hajahaton in bani
 imbang-imbangku, siapkon Ham ma sidea
 halani hasintongan-Mu.
- ⁶ (54-8) Marhasoman malas ni uhur boanonku ma
 galangan hu Bamu, pujionku ma goran-Mu,
 Ham Jahowa, ai dear do in,

⁷ (54-9) ai ipaluah do ahu humbani sagala hasosakan, anjaha sombuh matangu mangidah sagala munsuhku.

Tonggo Mangindo

Pangurupion Marimbang Munsuh

55 ¹ Bani pambobai koor. Doding podah humbani si Daud marhasoman husapi. (55-2) Tangihon Ham ma tonggongku, Ham Naibata, anjaha ulang ma tulak Ham elek-elekku.

² (55-3) Ingat Ham ma ahu anjaha balosi Ham ma; mawat-awat do ahu ibagas doruh-doruhku.

³ (55-4) Bulinsah do ahu halani parsurak ni munsuh, halani panosak ni parjahat; ai sai manggulang hamagouan do sidea bangku, anjaha ibagas gila do sidea mammunsuhi ahu.

⁴ (55-5) Mangirput do uhurhu ibagas, anjaha songgot-songgot ni hamatean mandorab ahu.

⁵ (55-6) Biar pakon hagobiron do manrohi ahu, anjaha hasonggoton manrungkub ahu,

⁶ (55-7) pala huhatahon, “Ah, ambit marhabong ma ahu songon asas, habang ma ahu mayap-ayap mangindahi parsaranan.”

⁷ (55-8) Tongon, daoh ma ahu maporus, marborngin i halimisan. Sela.

- ⁸ (55-9) Tarolos ma ahu mangindahi ianan
parlingodan, dompak logou sibungkar
hasowor ampa haba-haba.
- ⁹ (55-10) Geori Ham ma sidea Tuhan, bolah Ham
ma riah ni sidea. Ai huidah do paksa pakon
parsalisihan ibagas huta ai.
- ¹⁰ (55-11) Arian pakon borngin manrunda sidea i
atas tembokni; hajahaton ampa hasunsahan
masa ibagas ai.
- ¹¹ (55-12) Hasamboron do i tengah-tengahni,
anjaha seng misir humbani alamanni
panokohon pakon panipuon.
- ¹² (55-13) Sedo munsuh na pahiri ahu, ambit ai
hutaron namin; sedo halak pardomdom na
roh mangimbang ahu, ambit ai marponop
ahu hun lobeini.
- ¹³ (55-14) Tapi ho do, jolma na doskon ahu,
huan-kuanku, hatengeran ni uhurhu;
- ¹⁴ (55-15) ho, hasomanku saparsaoran, ho,
hasomanku saodoran hu rumah ni Naibata.
- ¹⁵ (55-16) Sai hamatean ma mandorab sidea,
manggoluh ma sidea susur hu nagori toruh;
ai hajahaton do manggoki rumah ampa
paruhuron ni sidea.
- ¹⁶ (55-17) Tapi anggo ahu, bani Naibata do ahu
dilo-dilo. Jadi Jahowa ma na paluahkon ahu.

- 17 (55-18) Bodari, sogod ampa tongah arian
dilo-dilo do ahu, doruh-doruh, anjaha
itangihon do sorangku.
- 18 (55-19) Paluahon-Ni do tonduyhu mardamei-
damei humbani halak na mandorab ahu, ai
buei tumang do sidea na manlawan ahu.
- 19 (55-20) Sai tangaron ni Naibata do anjaha
patoruhon-Ni do sidea; la na marparatas
humbani nabasaia. Sela. Halani seng ra
sidea paubahkon uhurni, anjaha seng
marhabiaran sidea bani Naibata.
- 20 (55-21) Ilaluhon do tanganni laho mangimbang
hasomanni, mangeluk do ia humbani
parpadanan.
- 21 (55-22) Landitan do pamanganni humbani
mantega, tapi hamunsuhon do ibagas
uhurni; lamlaman do hatani ase minak, tapi
songon podang na sinintak do sidea.
- 22 (55-23) Ompaskon ma bani Jahowa holsoh
ni uhurmu, jadi la ma na mansarihon ho;
seng anjai paturuton-Ni halak parpintor
marhasunsahan lalab.
- 23 (55-24) Tapi anggo Ham, ale Naibata, sai
patuadon-Mu do sidea hubagas godung
hamagouan; halak sionsop daroh pakon
panipu seng anjai das ronsi partongahan
ni umurni. Tapi anggo ahu hu Bamu do
marhatengeran.

Tenger ni Uhur bani Naibata Ibagas Hasosakan

- 56** ¹ Bani pambobai koor. Inggouni: Asas bani hayu Teberinta na madaoh. Humbani si Daud, sanggah itangkap halak Palistim ia i huta Gat. (56-2) Maidop ma uhur-Mu bangku, Ham Naibata, ai sihol atahon ni jolma do ahu, ganup ari iporang anjaha isosak sidea do ahu.
- ² (56-3) Sihol atahon ni imbangku do ahu ganup ari, buei do sidea na mangimbang ahu.
- ³ (56-4) Sanggah mabiar ahu, sai hu Bamu do ahu martenger ni uhur.
- ⁴ (56-5) Mangunsagahkon Naibata sai pujionku do hata-Ni, Naibata do huajamkon, seng mabiar ahu, mintor kahuaon ni jolma ma ahu?
- ⁵ (56-6) Ari-ari do ipabalik sidea hatangku; sagala pingkiran ni sidea dompak ahu sihol pasamborhon do.
- ⁶ (56-7) Martumpu-tumpu do sidea manggompangi, ipardiatei do langkah-langkahku laho manguhurhon hosahku.
- ⁷ (56-8) Seng anjai maluah sidea halani hajahatonni na buei in. Sampakkon Ham ma bangsa-bangsa in ibagas ringis-Mu, Ham Naibata!

- ⁸ (56-9) Domma isuratkon Ham parawat-awatanku, domma ipatumpu Ham iluhku hubagas tatabu-Mu; ai lang domma ibukuhon Ham ai?
- ⁹ (56-10) Maningon surut do hu pudi sagala munsuhku anggo dilo-dilo ahu; tangkas do hubotoh paboa Naibata do mangkasomani ahu.
- ¹⁰ (56-11) Mangunsagahkon Naibata, pujionku do hata-Ni, mangunsagahkon Jahowa pujionku do hata-Ni.
- ¹¹ (56-12) Marhatengeran bani Naibata do ahu, seng mabiar ahu, mintor kahuanon ni jolma ma ahu?
- ¹² (56-13) Ham Naibata, marutang bagah-bagah do ahu Bamu, sai galaronku do galangan banggal ni uhurhu hu Bamu,
- ¹³ (56-14) ai domma ipaluah Ham hosahku humbani hamatean, sonai homa naheihu pe humbani partolsuan, gabe boi mardalan ahu i lobei ni Naibata, ibagas sondang hagoluhan.

Nalom ni Uhur bani Naibata Age Ibagas Parmaraan

57 ¹ Bani pambobai koor. Inggouni: Ulang parseda. Doding podah humbani si Daud. Sanggah lintun ia humbani si Saul, hubagas liang. (57-2) Maidop ma uhur-Mu bangku,

Ham Naibata, maidop ma uhur-Mu bangku:
ai Bamu do marlingod tonduyhu, anjaha
bani linggom ni habong-Mu do ahu
marlingod, paima salpu parmaraan.

² (57-3) Dilo-dilo do ahu bani Naibata na timbul
in, hubani Naibata siluluhon ahu.

³ (57-4) Marsuruhan do la hun nagori atas anjaha
paluahon-Ni do ahu; pabadoron-Ni do
halak na sihol mangatah ahu. Sela. Sai
tongoson ni Naibata do idop ni uhur-Ni
ampa hasintongan-Ni.

⁴ (57-5) Tibal do ahu i tongah-tongah ni singa, na
sihol mangatah anak ni jolma; iponni doskon
tanja ampa panah, anjaha dilahni songon
podang na niasah.

⁵ (57-6) Pagijang Ham ma diri-Mu, Ham Naibata,
hu atas ni sagala langit, anjaha hu sab tanoh
on hamuliaon-Mu.

⁶ (57-7) Itaon sidea do jarot bani langkah-
langkahku, anjaha tonduyhu domma unduk;
ihurak sidea sada godung i lobeihu, tapi
sidea sandiri do madabuh hubagas. Sela.

⁷ (57-8) Sonang do uhurhu, Ham Naibata, sonang
do uhurhu; sihol do ahu mandoding, sihol
do ahu mamuji-muji.

⁸ (57-9) Puho ma ale tonduyhu, puho ma arbap
pakon husapi; sihol do puhoanku buha
siang.

- ⁹ (57-10) Pujionku ma Ham i tongah-tongah ni sagala bangsa, ale Tuhan, dodingkononku ma Ham i tongah-tongah ni sagala marga,
- ¹⁰ (57-11) ai sundol do hu langit idop ni uhur-Mu, anjaha hasintongan-Mu das hu awang-awang.
- ¹¹ (57-12) Pagijang Ham ma diri-Mu, Ham Naibata, hu atas ni sagala langit; hu sab tanoh on hamuliaon-Mu.

Lumba-lumba dompak Siparkuasa na So Sintong

- 58** ¹ Bani pambobai koor. Inggouni: Ulang parseda. Doding podah humbani si Daud. (58-2) Tongon do nani domu hubani uhum hanima marsahap, ale siparkuasa, anjaha sintong-sintong do iuhumi hanima anak ni jolma in?
- ² (58-3) Lang, hajahaton do idalankon hanima ibagas uhurnima, anjaha igoki hanima tanoh in bani paksa.
- ³ (58-4) Domma manlembang halak parjahat humbani partubuhni nari, domma kahou humbani partapaan nari halak sihatahon ladung.
- ⁴ (58-5) Bisa na dong bani sidea, doskon bisa ni ulog, anjaha usih do sidea songon ulog darih na nengel, na mamitut pinggolni,

- ⁵ (58-6) na so manangihon sora ni sipanubut,
sora ni sipanabas na pandei.
- ⁶ (58-7) Ham Naibata, ropangi Ham ma ipon ni
sidea ibagas babahni, rosaki Ham ma ngadol
ni anak ni singa, Ham Jahowa.
- ⁷ (58-8) Sai salpu ma sidea songon bah na laho
horah; sai melus ma sidea songon poyon na
i topi dalan.
- ⁸ (58-9) Sai mahansur ma sidea songon langkitang
na manjulur, songon rudang na masabur
bani sada naboru seng sompat mangidah
mata ni ari.
- ⁹ (58-10) Lape milas hudon ni sidea ibahen apuy
ni duri-duri, na matah atap na masak,
domma ipurpurhon Naibata sidea.
- ¹⁰ (58-11) Marmalas ni uhur ma halak parpintor,
mangidah pambalason ai; burihanni ma
naheini ibagas daroh ni parjahat.
- ¹¹ (58-12) Jadi hatahonon ni jolma ma, “Dapotan
upah do tongon parpintor, tongon, dong do
Naibata na manguhum i atas tanoh on.”

Tonggo Mangindo

Pangurupion Marimbang Munsuh

59 ¹ Bani pambobai koor. Inggouni: Ulang
parseda. Doding podah humbani si Daud,
sanggah isuruh si Saul ia manjaga rumahni
laho mamunuhsi. (59-2) Paluah Ham ma ahu

humbani munsuhku, Ham Naibata; ondingi
Ham ma ahu marimbang sagala imbangku.

² (59-3) Paluah Ham ma ahu humbani sihorjahon
hajahaton, anjaha paluah Ham ma ahu
humbani siduruskon daroh.

³ (59-4) Ai tonggor ma, iuhurhon sidea do
goluhku; halak siparkuasa mandorab ahu,
age pe seng dong panlanggaronku, seng
dong dousangku, Ham Jahowa.

⁴ (59-5) Age pe seng marsalah ahu, roh do sidea
mandorab domma sirsir bei. Hehe ma Ham
manjumpahkon ahu anjaha kawah ma Ham!

⁵ (59-6) Ham Jahowa, Naibata Zebaot, Naibata ni
Israel! Hehe ma Ham marlulu bani bangsa
parbegu! Ulang ma maidop Ham dompak
halak partahi-tahi na jahat in. Sela.

⁶ (59-7) Mulak do sidea ganup bodari,
mangorongi songon baliang, iinggoti sidea
do huta in.

⁷ (59-8) Tonggor ma, buei do sahap-sahap ni
babahni; podang do longkot bani dilahni, ise
ma na patangi-tangi ai!

⁸ (59-9) Tapi Ham Jahowa, tartawa do Ham
mangidah sidea, mapas do Ham mangidah
sipajuh begu-begu ganup.

⁹ (59-10) Ham Pargogohku, hu Bamu do ahu
mangkawah, ai Ham do Naibata, batar-batar
bangku.

- ¹⁰ (59-11) Naibatangku paridop ni uhur, in
do na mangalo-alo ahu; Naibata do
mambahen marmalas ni uhur ahu mangidah
imbang-imbangu.
- ¹¹ (59-12) Ulang ma mintor bunuh Ham sidea,
Ase ulang lupa bangsangku; pamerap Ham
ma sidea marhitei hagogohon-Mu, dob ai
tompaskon Ham ma sidea, Ham Tuhannami,
gantarnami.
- ¹² (59-13) Halani dousa ni pamanganni,
sahap-sahap ni bibirni, bahen Ham ma
sidea tardapot ibagas hatoalonni, halani
pamuraion pakon ladung, na hinatahonni.
- ¹³ (59-14) Boiskon Ham ma sidea ibagas
ringis-Mu, boiskon Ham ma sidea, ronsi lang
dong be sidea, ase ibotoh halak, Naibata do
hape na manggomgom Jakob, das hu ujung
ni tanoh on. Sela.
- ¹⁴ (59-15) Mulak do sidea ganup bodari,
mangorongi songon baliang, iinggoti sidea
do huta in.
- ¹⁵ (59-16) Maor-aor do sidea mangindahi
sipanganon, marmungut-mungut, anggo
lang bosur sidea.
- ¹⁶ (59-17) Tapi anggo ahu sai dodingkononku
do hagogohon-Mu, janah olobkononku
do sogod idop ni uhur-Mu; ai Ham do

batar-batar anjaha haporusanku sanggah tarsosak.

- ¹⁷ (59-18) Ham pargogohku, Ham do dodingkononku, Ham do Naibata batar-batar bangku, Naibatanku na maridop ni uhur bangku.

Tonggo Mangindo Pangurupion Ibagas Hataluon

60 ¹ Bani pambobai koor. Inggouni: Silundat. Hasaksian. Doding podah humbani si Daud, (60-2) sanggah na marmunsuh ia dompak halak Aram na hun Mesopotamia pakon halak Aram na hun Soba, sanggah na mulak si Joab anjaha italuhon halak Edom i pamah pargaraman, sapuluh dua ribu halak bueini. (60-3) Ham Naibata, domma itulakkon Ham hanami anjaha ilontas Ham partahanannami. Domma igilai Ham hanami, sai suang ma use bahen Ham hanami.

- ² (60-4) Domma dugur ibahen Ham tanoh in anjaha mabolah, padear Ham ma bolah-bolahni in, ai domma mambal-ambal in.

- ³ (60-5) Domma ipaidahkon Ham na majangin bani bangsa-Mu, domma ipainumkon Ham bennami anggur na pamabukkon.

- ⁴ (60-6) Domma ibere Ham bani sidea,
na marhabiaran Bamu, sada tanda,
parbansahan bani sidea dompak sior. Sela.
- ⁵ (60-7) Ase boi maluah na hinaholongan-
Mu, paluah Ham ma marhitei tangan
siamun-Mu, anjaha balosi Ham ma hanami.
- ⁶ (60-8) Domma marsahap Naibata ibagas
rumah-Ni na ma pansing! Marhasoman
surak-surak sihol do bagion-Ku Sikem anjaha
sibaron-Ku pamah Sukot.
- ⁷ (60-9) Ahu do simada Gilead, Manase pe Ahu do
simadasi; Efraim ai ma tudung ni ulung-Ku,
anjaha Juda tungkot ni harajaon-Ku;
- ⁸ (60-10) Moab do mangkuk parburihan Bangku,
anjaha hu Edom Husampakkon sipatung-Ku;
marsurak hamonangan do Ahu pasal
Palistim.
- ⁹ (60-11) Ise ma nani na mamboan Ahu hu huta
na toguh ai, ise ma na manogu Ahu das hu
Edom?
- ¹⁰ (60-12) Ai lang domma itulak Ham hanami, ale
Naibata, anjaha seng ra Ham, ale Naibata,
mangkasomani balanami?
- ¹¹ (60-13) Sai bere Ham ma partolongan bennami
dompak imbangnami, ai sisoya-soya do
partolongan nijolma.

- ¹² (60-14) Marhasoman Naibata tardalankon hita do horja habanggalon, anjaha la sandiri do na manrojati imbangta.

Tonggo ni Halak na Tarbuang Mangkopkop Raja

- 61** ¹ Bani pambobai koor. Marhasoman husapi. Humbani si Daud. (61-2) Tangihon Ham ma, ale Naibata, elek-elekku; parimbagaskon Ham ma tonggongku.
- ² (61-3) Humbani ujung ni tanoh on do dilo-dilo ahu Bamu ibagas uhurhu; togu Ham ma ahu hu dolog batu, na magijangtu bangku.
- ³ (61-4) Ai Ham do parlingodan bangku, batar-batar na toguh dompak munsuh.
- ⁴ (61-5) Sihol do ahu marianan bani lampolampo-Mu sadokah ni dokahni, sihol do ahu marlingod i toruh ni linggom ni habong-Mu. Sela.
- ⁵ (61-6) Tongon, Ham Naibata, itangar Ham do bagah-bagahku, domma ibere Ham hu bangku parbagianan ni sihabiari goran-Mu.
- ⁶ (61-7) Tambahi Ham ma ganjang ni ari-ari hubani goluh ni raja in, sai marsundut-sundut ma tahun ni goluhni.
- ⁷ (61-8) Sai marhotak ma ia i lobei ni Naibata sadokah ni dokahni, idop ni uhur ampa hasintongan ma bahen Ham manramotkonsi.

- ⁸ (61-9) Ase hudodingkon ma goran-Mu tongtong, anjaha hugalari bagah-bagahku ganup ari.

Sonang i Lambung ni Naibata

62 ¹ Bani pambobai koor. Hubani si Jedutun. Psalm humbani si Daud. (62-2) Pitah

mangkawah bani Naibata tumang do mambahen marhasonangan tonduyhu, humbani do roh haluahonku.

- ² (62-3) Pitah la do dolog batu pakon hatuahon bangku, la do batar-batar bangku, seng anjai tompas ahu.

- ³ (62-4) Piga dokah nari do sai dorab-dorab hanima bani sada halak, sihol manrumbakkonsi, ee hanima haganup, songon bani dingding na sihol jomba, bani tembok na sihol tompas?

- ⁴ (62-5) Manriahi do sidea laho manjulakkonsi humbani hagijangonni, rosuh do sidea bani ladung; marhitei pamanganni mamasu-masu sidea, hape mamapai do sidea ibagas uhurni. Sela.

- ⁵ (62-6) Pitah bani Naibata do ho marhasonangan, ale tonduyhu, ai hun Bani do roh pangarapanku.

- ⁶ (62-7) Pitah la do dolog batu pakon hatuahon bangku, la do batar-batarhu, seng anjai tompas ahu.

- ⁷ (62-8) Bani Naibata do maronjolan hatuahonku
pakon hamuliaonku, batu gingging
hagogohon bangku, ianan parlingodanku, ai
ma Naibata.
- ⁸ (62-9) Sai hu Bani ma nasiam martenger ni
uhur, ale jolma, lungkari ma uhur nasiam i
lobei-Ni, Naibata do haporusan banta. Sela.
- ⁹ (62-10) Hosah tumang do anak ni jolma,
sipaoto-oto anak ni manisia, ibagas
timbangan mintor do sidea bonggal hu atas,
hampungan do sidea humbani hosah tene.
- ¹⁰ (62-11) Ulang ma nasiam marpangajaman
bani kuasa, ulang homa mängenjeng bani
barang rampasan! Martambah-tambah pe
habayakon, ulang ma dompak jai uhumu!
- ¹¹ (62-12) Sahali marhata Naibata, dua pahara
na tartangar ahu: Gok bani Naibata do
hagogohon,
- ¹² (62-13) anjaha gok Bamu do Tuhan, idop
ni uhur: Ham do mambalaskon bani
pambahenanni.

Sihol ni Uhur bani Naibata

63 ¹ Psalm ni si Daud sanggah i halimisan Juda
ia. (63-2) Ale Naibata, Ham do Naibatanku,
na hupindahi, horahan do tonduyhu Bamu,
siholan do dagingku Bamu songon tanoh na
dorging anjaha na horah, na so marbah.

- ² (63-3) Sonai do i rumah-Mu na pansing in mangkawah ahu Bamu, sihol mangidah hagogohon-Mu ampa hamuliaon-Mu.
- ³ (63-4) Ai idop ni uhur-Mu dearan do ai ase hagoluhan; sai pujion ni bibirhu do Ham.
- ⁴ (63-5) Sonai ma, sihol do pujionku Ham sadokah ahu manggoluh, marhitei goran-Mu hupaherbang do tanganku dompak datas.
- ⁵ (63-6) Bosur do tonduyhu songon pambahen ni taboh-taboh ampa utok-utok ni holi-holi, marhitei bibir na marolob-olob mamuji-muji pamanganku.
- ⁶ (63-7) Sanggah hudingat Ham bani podomanku, marpingkir-pingkir pasal Ham sadokah runda borngin,
- ⁷ (63-8) Ham do pangurupi bangku ijai, anjaha tarbahen ahu marolob-olob ibagas linggom ni habong-Mu.
- ⁸ (63-9) Sai longkot do uhurhu Bamu, tangan-Mu siamun do na manjolom ahu.
- ⁹ (63-10) Tapi anggo sidea na manguhurhon hosahku, sai turun do sidea hu nagori toruh.
- ¹⁰ (63-11) Ondoskonon do sidea bani mata ni podang, gabe panganon ni sorigala do sidea.
- ¹¹ (63-12) Tapi raja in marmalas ni uhur do ibagas Naibata; Marolob-olob do sagala na marbulawan hu Bani, ai sipasipon do babah ni halak sihatahon ladung.

Uhum ni Naibata bani Munsuh Sipartahi-tahi

- 64** ¹ Bani pambobai koor. Psalm ni si Daud. (64-2) Tangihon Ham ma, alo Naibata, sorangku marhitei tangis-tangisku, ramotkon Ham ma goluhku humbani songgot-songgot ni munsuh!
- ² (64-3) Sai dingdingi Ham ma ahu dompak riah ni parjahat, dompak hageoron, na binahen ni halak na jungkat,
- ³ (64-4) na pamarot dilahni songon podang, na papinsur hatani na marbisa songon panah,
- ⁴ (64-5) laho manembak halak na so marsalah humbani parponopan; sompong do sidea manembak seng maralang-alang.
- ⁵ (64-6) Putus do uhur ni sidea mangkorjahon hajahaton, manriah do sidea manaon siding ponop-ponop, nini sidea, "Ise ma mangidah ai?"
- ⁶ (64-7) Hajahaton do ipingkiri sidea, ponop ibahen sidea ranggian ni sidea. Ah, ise ma na boi mandadap parbagas ampa uhur ni sideajolma?
- ⁷ (64-8) Tapi itembak Naibata do sidea marhitei panah; na so panagaman do sidea ihonai.
- ⁸ (64-9) Majomba do sidea ibahen halani sahap-sahap ni sidea, mupir-upir do sagala na mangidah sidea.

- ⁹ (64-10) Jadi mabiar ma haganup halak;
baritahonon ni sidea ma pambahenan ni
Naibata, anjaha mangahap sidea bani na
binahen-Ni.
- ¹⁰ (64-11) Marmalas ni uhur ma halak parpintor
ibagas Jahowa, anjaha hu Bani ma ia
marlingod, sai marmegah-megah ma
haganup sipintor uhur.

**Doding Banggal ni Uhur halani
Pasu-pasu ni Naibata**

- 65** ¹ Bani pambobai koor. Psalm ni si Daud.
Sada doding. (65-2) Ham do na patut
sipujion, ale Naibata, i Sion, anjaha Bamu do
sigalaron bagah-bagah.
- ² (65-3) Ham sitangihon tonggo, Bamu do roh
sagala na manggoluh.
- ³ (65-4) Hasalahan do na manrungkub ahu;
panlanggaronnami Ham do na manasap in.
- ⁴ (65-5) Martuah ma halak na pinilih-Mu,
na pinalopas-Mu roh dohor marianan i
alaman-Mu. Sai bosur ma hanami ibahen
hinadear ni rumah-Mu, rumah-Mu na
pansing in.
- ⁵ (65-6) Marhatunggungan, domu hubani
hapintoron, ibalosi Ham do hanami, ale
Naibata ni hatuahonnam, hatengeran ni

sagala ujung ni tanoh on pakon laut na madaoh,

⁶ (65-7) na pajonamkon sagala dolog marhitei hagogohonni, na margonditkon hagogohon,
⁷ (65-8) na mambahen laut minop ampa parhasak ni gilumbangni, sonai homa halutuon ni bangsa-bangsa.

⁸ (65-9) Jadi mabiar ma halak na i ujung ni tanoh on mangidah halongangan-Mu, anjaha hapoltakan ampa hasundutan marolob-olob do ibahen Ham.

⁹ (65-10) Itohu Ham do tanoh in, anjaha marbah ibahen Ham, Ham do na mambahen bayak nornor in. Gok bah do bah tubuh ni Naibata, Ham do na pasirsir omei bani sidea. Tongon, sonon ma ibahen Ham pasirsirhonsi:

¹⁰ (65-11) Ham do na mangarbahi paninggalaanni, Ham do na manlumati olbakni. Ham do pagaburhon ai marhitei bah udan, anjaha Ham do na mamasu-masu suan-suananni.

¹¹ (65-12) Ham do na mansortalii partahunan marhitei dear layak-Mu, manektekkon minak do sagala bokas-Mu;

¹² (65-13) mombur do sampalan na i pamah, anjaha raboyon margonditkon olob-olob;

¹³ (65-14) marpakeian hulanan ni biribiri do sompalan, habungan-habungan

marhiouhon omei; marsurak-surak do sidea,
mandoding-doding tene.

**Doding Puji-pujian bani
Naibata na Paluahkon Israel**

66 ¹ Bani pambobai koor. Sada Psalm. Sada
doding. Marolob-olob ma bani Naibata,
nasiam haganup tanoh on.

² Dodingkon nasiam ma hamuliaon ni goran-Ni;
sombahkon nasiam ma Bani puji-pujian na
marmulia.

³ Hatahon nasiam ma bani Naibata, “Banggalni in
sagala horja-Mu! Pangkorhon ni timbul ni
hagogohon-Mu, ningon do marsombah hu
Bamu sagala munsuh-Mu.

⁴ Ganup tanoh on marsombah do hu Bamu, sai
dodingkononni do Ham, dodingkononni do
goran-Mu. Sela.”

⁵ Roh anjaha tonggor nasiam ma pambahenan
ni Naibata; gok kuasa do pambahenan-Ni
dompak anak ni jolma.

⁶ Ipaubah do laut gabe na horah, mardalan
nahei sidea mandipari bah mardalan; ijai
marmalas ni uhur do hita marhiteihon-Si,

⁷ na manrajai tongtong marhitei hagogohon-Ni,
na mangkawahkon sagala bangsa marhitei
panonggor-Ni, ase ulang mangingjeng halak
panggeori. Sela.

- ⁸ Puji ma, ale sagala bangsa, Naibatanami,
pabogeihon nasiam ma puji-pujian Bani!
- ⁹ Ia na mambahen hosahnami manggoluh, anjaha
seng ilopas naheinami tartolsu.
- ¹⁰ Tongon, domma iuji Ham hanami, alo Naibata,
domma ilobur Ham hanami songon na
manlobur pirak.
- ¹¹ Domma itogu Ham hanami hubagas jaring,
parrahut na poltik inahkon Ham bani
binongeinami.
- ¹² Ipaturut Ham do jolma margareta i atas
ulunami, domma masuk hanami hubagas
apuy pakon bah; tapi ipadarat Ham do
hanami bani na lumbang.
- ¹³ Masukanku ma rumah-Mu mamboan
galangan situtungan, galaronku ma Bamu
bagah-bagahku,
- ¹⁴ ai ma na niluarhon ni bibirhu, anjaha
pinarbagah ni pamanganku sanggah
tarsosak ahu.
- ¹⁵ Galangan situtungan na pinamombur
padasonku do Bamu, marhasoman misbou
ni galangan biribiri tunggal; sai pasirsironku
do Bamu lombu pakon hambing tunggal.
Sela.
- ¹⁶ Roh ma, tangar ma, nasiam haganup na
mangkabiari Naibata, ase hubaritahon
pambahen ni Naibata bani tonduyhu.

- ¹⁷ Hu Bani do dilo-dilo ahu marhitei pamanganku,
anjaha puji-pujian domma sirsir i atas
dilahku.
- ¹⁸ Ambit adong hajahaton hukawahkon ibagas
uhurhu, tontu seng tangihonon ni Tuhan
ahu.
- ¹⁹ Tongon, domma itangihon Naibata ahu,
domma iparuhurhon sora ni tonggongku.
- ²⁰ Napuji ma Naibata, na so manulak tonggongku,
sonai homa idop ni uhur-Ni hu bangku.

Maningon Sagala Bangsa do Mamuji Naibata

- 67** ¹ Bani pambobai koor. Marhasoman
husapi. Sada Psalm, sada doding. (67-2)
Naibata ma na mangidopi hanami anjaha
na mamasu-masu hanami, la ma na
manondangkon bohi-Ni hu bennami,
- ² (67-3) ase ibotoh halak na i tanoh on dalan-Mu,
anjaha ibotoh sagala bangsa hatuahon-Mu.
- ³ (67-4) Sai pujion ni sagala bangsa do Ham, ale
Naibata, sai pujion ni sagala bangsa do Ham.
- ⁴ (67-5) Sai marmalas ni uhur anjaha marolob-
olob do sagala bangsa, halani Ham do
na manguhum bangsa-bangsa ibagas
hapintoron, anjaha Ham do na manogu-
nogu sagala bangsa i atas tanoh on.
Sela.

- ⁵ (67-6) Sai pujion ni sagala bangsa do Ham, ale Naibata, sai pujion ni sagala bangsa do Ham.
- ⁶ (67-7) Domma ibere tanoh gogohni, ipasu-pasu Jahowa, Naibatanta do hita.
- ⁷ (67-8) Ipasu-pasu Jahowa do hita, jadi mabiar ma ganup ujung ni tanoh on mangidah-Si.

Doding Puji-pujian Pasal Hamonangan ni Naibata

- 68** ¹ Bani pambobai koor. Psalm ni si Daud. Sada doding. (68-2) Jongjong do Naibata, mambur merap ma munsu-Ni, anjaha maporus na mandomdomi-Si hun lobei-Ni.
- ² (68-3) Songon timus na niombuskon, sonai do iombuskon sidea; songon lilin malala bani apuy, sonai do bois sagala parjahat i lobei ni Naibata.
- ³ (68-4) Tapi parpintor marmalas ni uhur anjaha marolob-olob do i lobei ni Naibata, anjaha marsurak-surak do sidea ibagas malas ni uhur.
- ⁴ (68-5) Dodingkon nasiam ma Naibata, puji nasiam ma goran-Ni. Bahen nasiam ma dalan Bani na margareta i halimisan. Jahowa do goran-Ni, marolob-olob ma nasiam i lobei-Ni.
- ⁵ (68-6) Ia do Bapa ni na tading maetek, anjaha Panguhum bani na mabalu. Ia do Naibata i rumah-Ni na pansing in.

- ⁶ (68-7) Naibata do na pajabuhon halak na tarpunjung, na padaratkon halak na tartutup hu hadoharon, tapi sipanlawan tading do bani tanoh dorging-dorging.
- ⁷ (68-8) Ham Jahowa, sanggah na luar Ham i lobei ni bangsa-Mu, sanggah langkah-langkah Ham i halimisan. Sela.
- ⁸ (68-9) Dugur do tanoh on, langit manguseihon udan i lobei ni Naibata; age Dolog Sinai duyug do i lobei ni Naibata, Naibata ni Israel.
- ⁹ (68-10) Layak do Ham mambere udan, Ham Naibata, anjaha ipahisar Ham do tanoh parbagianan-Mu sanggah loja.
- ¹⁰ (68-11) Marianan do ijai siminik-Mu, iparmudu Ham do, ale Naibata, halak na madoyuk marhitei dear layak-Mu.
- ¹¹ (68-12) Tuhan manluarhon hata-Ni; doskon bala na buei do naboru siparambilan na mader.
- ¹² (68-13) Raja-raja ni sagala bala, maporus do sidea. Inang i rumah marbagi taban-taban.
- ¹³ (68-14) Sai sohsoh nasiam i holangkolang ni harang-harang? Habong ni asas domma ilampis bani pirak, ambuluni maromas na gorsing.
- ¹⁴ (68-15) Sanggah ipaerap Pargogoh Na So Tarimbang in sagala raja ijai, turun ma salju i atas ni Dolog Salmon.

- 15 (68-16) Dolog ni naibata-naibata, ai ma Dolog Basan, dolog sibuei pakpak do Dolog Basan ai.
- 16 (68-17) Mase ma serleng matanima, hanima ale dolog sibuei pakpak, mangidah dolog na pinilih ni Jahowa gabe ianan-Ni? Tongon, Jahowa do mangiankon ai sadokah ni dokahni.
- 17 (68-18) Gareta ni Naibata marlaksa-laksa anjaha marhagogohon; Tuhan roh hun Sinai masuk hu rumah-Ni na ma pansing.
- 18 (68-19) Domma tangkog Ham hu atas, mamboan taban-taban; domma ijalo Ham parsombahon marrupa jolma, gari halak sipanlawan tunduk do Bamu, Ham Naibata Jahowa.
- 19 (68-20) Napuji ma Tuhan in ganup ari! Ia do na mangusung hita, Naibata do hatuahonta. Sela.
- 20 (68-21) Naibata banta, ai ma Naibata parbansahan, gok bani Jahowa Naibata do haluahon humbani hamatean.
- 21 (68-22) Tongon, sai rosakan ni Naibata do ulu ni munsuh-Ni, tangkurak ni halak sihorjahon hajahaton.
- 22 (68-23) Domma ihatahon Tuhan, "Hun Basan do sidea paulakon-Ku, boanon-Ku do sidea mulak hun laut na bagus,

- ²³ (68-24) ase marburih naheimu ibagas daroh,
anjaha dilah ni baliangmu marrupe
humbani munsuh.”
- ²⁴ (68-25) Domma ididah halak odoran-Mu, Ham
Naibata, parmasuk ni Naibatanku ampa
Rajangku hubagas ianan na ma pansing in.
- ²⁵ (68-26) I lobei mardalan pandoding, i pudi ni
parhusapi, i tongah-tongah anak boru na
manggual tambur.
- ²⁶ (68-27) Marhitei koor ipuji sidea Naibata,
Tuhan in, sidea na humbani bah tubuh ni
Israel.
- ²⁷ (68-28) Ijai do si Benjamin, sianggian,
panrajai ni sidea, pangintuai ni Juda
rapkon hulananni, pangintuai ni Sebulon,
pangintuai ni Naptali.
- ²⁸ (68-29) Tongos Ham ma hagogohon-Mu, ale
Jahowa; patuduhkon Ham ma gogoh-Mu,
Ham Naibata, Ham na dob mangkopkop
hanami.
- ²⁹ (68-30) Halani rumah-Mu, na i Jerusalem,
marrohan do raja-raja na manaruhkon
sibere-bere hu Bamu.
- ³⁰ (68-31) Sorgangi Ham ma binatang na bani
arung-arung ai, hulanani ni lembu jonggi
ampa anak ni lembu ni bangsa-bangsa;
rojati Ham ma na impolan bani pirak,

paerap Ham ma bangsa na mangkarosuhkon porang.

³¹ (68-32) Roh ma parkuasa hun Masir, halak Etiopia pe manurdukkon tanganni hubani Naibata.

³² (68-33) Nasiam sagala harajaon na i tanoh on, dodingkon nasiam ma Naibata, puji nasiam ma Tuhan! Sela.

³³ (68-34) Ia na margareta i langit, langit na basaia; Tonggor ma, pagomohon-Ni ma sora-Ni, sora-Ni na maling in.

³⁴ (68-35) Tanda ma hagogohon ni Naibata! Hamuliaon-Ni do manggomgom Israel, anjaha kuasa-Ni mangatasi hambun.

³⁵ (68-36) Marhajombuton do Naibata manrajai humbani ianan-Ni na ma pansing in; Naibata ni Israel do ia, ia do sibere kuasa ampa hagogohon hubani bangsa-Ni. Napuji ma Naibata!

Tonggo ni Halak na Mampongkutkon Harosuh ni Naibata

69 ¹ Bani pambobai koor. Inggouni: Bunga silundat. Humbani si Daud. (69-2) Paluah Ham ma ahu, alo Naibata, ai domma das ronsi bibirhu bah.

- ² (69-3) Mogap do ahu hubagas hubang na bagas, seng dong hajongjongan; tinob do hu toruh hubagas bah, anjaha iayubkon arus do ahu.
- ³ (69-4) Loja do ahu halani doruh-doruhku, marsohal tolonanku; marholok do matangku halani paima-imahon bani Naibatanku.
- ⁴ (69-5) Bueinan do humbani jambulanku sidea, na mardomdom bangku seng marhala; na gogoh-gogoh do sidea na sihol mansedahon ahu, na manlawan marhitei ladung; age na so hurampas ipaksa do ahu paulakkon.
- ⁵ (69-6) Ham Naibata, ibotoh Ham do haotoonku, anjaha salah na hubahen seng ponop hum Bamu.
- ⁶ (69-7) Sai ulang ma bador halani ahu sagala na marpangarapan Bamu, Ham Naibata Zebaot. Sai ulang ma maila halani ahu, sagala na mangindahi Ham, alo Naibata ni Israel.
- ⁷ (69-8) Ai halani Ham do ahu bilei; anjaha hailaon do manrungkub bohingku.
- ⁸ (69-9) Jadi halak na legan do ahu bani saninanku, halak na so tinanda bani anak ni inang.
- ⁹ (69-10) Ai pongkut ni uhur bani rumah-Mu do mangankon ahu, anjaha ompas hu bangku risa-risa ni na manrisai Ham.

- 10 (69-11) Huarsik do tonduyhu marhitei na marpuasa, hape gabe habileion do ai bangku.
- 11 (69-12) Husorungkon do bangku pusok ni uhur, tapi gabe umpama do ahu ibahen sidea.
- 12 (69-13) Gabe sihata-hataon ni halak na hundul i horbangan do ahu, sisalig-saligan bani halak parmabuk.
- 13 (69-14) Tapi anggo ahu, hu Bamu do ahu martonggo, Ham Jahowa, bani panorang na dearhonsi, Ham Naibata, sai tangihon Ham ma ahu romban hubani idop ni uhur-Mu na banggal in, ampa pangurupimu na totap in.
- 14 (69-15) Sai paluah Ham ma ahu humbagas hubang, ase ulang mogap ahu; sai paluah Ham ma ahu humbani na mandomdomi ahu, humbagas laut na bagas.
- 15 (69-16) Sai ulang ma mayub ahu ibahen bah banggal, ulang ma ibondut luhung ahu, barang itutup parigi babahni i babouhu.
- 16 (69-17) Sai tangihon Ham ma ahu, ale Jahowa, domu hubani banggal ni idop ni uhur-Mu, dompakkon Ham ma ahu romban hubani banggal ni holong ni atei-Mu.
- 17 (69-18) Ulang ma ponopkon Ham bohi-Mu dompak juakjuak-Mu; ai rusak do ahu, oloskon Ham ma mangurupi ahu.

- 18 (69-19) Roh ma Ham hundohor bani tonduyhu,
paluah Ham ma in; sai paluah Ham ma ahu
halani munsuhku.
- 19 (69-20) Itanda Ham do hahirionku, habileian
pakon habadoronku; ilobei ni panonggor-Mu
do ganup imbangku.
- 20 (69-21) Habadoron ai do mambahen rosak
uhurhu, anjaha mandolei do ahu. Tarpaima-
ima do ahu bani halak parholong atei, hape
seng dong, sonai age bani sipangapohi,
hape seng jumpah.
- 21 (69-22) Rasun do ibere sidea panganonku,
anjaha sanggah na horahan ahu, na migar
do ipainumkon bangku.
- 22 (69-23) Sai gabe jarot ma meja ni sidea i
lobeini, anjaha horja-horja ni sidea gabe
tirangkap.
- 23 (69-24) Sai solong ma mata ni sidea, ulang
marpangidah; hitir-hitir ma binongei ni
sidea bahen Ham lalab.
- 24 (69-25) Useihon Ham ma bani sidea ringis-Mu,
anjaha gajag ni gila-Mu ma manoroh sidea.
- 25 (69-26) Sai halong ma bahen Ham huta ni
sidea, anjaha ulang be marisi lampolampo
ni sidea.
- 26 (69-27) Ai iayak-ayak sidea do halak na
niajar-Mu, anjaha ipabanggal sidea do
naborit ni halak na niugahan-Mu.

- ²⁷ (69-28) Tambahkon Ham ma na salah bani
 salah ni sidea, ulang ma dapotan hapintoron
 sidea hun Bamu.
- ²⁸ (69-29) Sai sasap ma goran ni sidea humbani
 buku hagoluhan, ulang ma tarsurat sidea
 rap pakon halak parpintor.
- ²⁹ (69-30) Tapi anggo ahu, madoyuk do anjaha
 marsik do; haluahon na hun Bamu ma, alo
 Naibata, na mandingdingi ahu.
- ³⁰ (69-31) Pujionku ma goran ni Naibata marhitei
 doding, anjaha pasangaponku ma la
 marhitei doding puji-pujian;
- ³¹ (69-32) ai do harosuh ni Jahowa lobih humbani
 anak ni lombu, lobih humbani lombu jonggi
 na martanduk anjaha na martambirik.
- ³² (69-33) Tonggor ma, nasiam ganup na
 masombuh, malas ma uhur nasiam; nasiam
 sipindahi Naibata, sai mulak ma hinsah uhur
 nasiam.
- ³³ (69-34) Ai itangihon Jahowa do na masombuh,
 anjaha seng mapas la bani na tarbuang.
- ³⁴ (69-35) Sai ipuji langit pakon tanoh ma la, sonai
 age laut pakon sagala na manjulur ibagas.
- ³⁵ (69-36) Ai Naibata do sihol paluahkon Sion,
 anjaha pajongjongon-Ni do sagala huta ni
 Juda; marianan ma sidea ijai anjaha sidea
 simadasi;

³⁶ (69-37) ginompar ni juakjuak-Ni maneansi use, anjaha na mangkaholongi goran-Ni mangiankon ai.

Tonggo Mangindo Partolongan

(Pausih: Ps. 40:14-18)

- 70** ¹ Bani pambobai koor. Humbani si Daud. Sanggah na mamboan galangan dahupa. (70-2) Ham Naibata, tarolos ma Ham paluahkon ahu, Ham Jahowa, podas Ham ma mangurupi ahu.
- ² (70-3) Sai tarbador anjaha maila ma siuhurhon hosahku. Sai surut ma hu pudi anjaha tarbador ma sagala na mangkamalaskon hamagouanku.
- ³ (70-4) Sai manginsurut ma sidea halani tarbador, sidea na mangkatahon, “Eeh, mahua do, mahua do!”
- ⁴ (70-5) Sai marolob-olob anjaha marmalas ni uhur ma ibagas Ham sagala na mangindahi Ham, sai tongtong ma hatahonon ni na mangkasiholi hatuahon-Mu, “Banggal do Jahowa!”
- ⁵ (70-6) Tapi madoyuk do ahu anjaha masombuh; Ham Naibata, papodas Ham ma roh hu bangku! Ham do pangurupi anjaha sipaluah bangku; Ham Jahowa, ulang ma padokah-dokah Ham.

**Tonggo Mangindo Pangapition
bani Panorang Matua**

- 71** ¹ Bamu do, Ham Jahowa ahu marlingod,
ulang lopas Ham ahu bador lalab.
- ² Pabansah Ham ma ahu halani hapintoron-Mu,
anjaha paluah Ham ma ahu; paeleng Ham
ma pinggol-Mu bangku, anjaha urupi Ham
ma ahu.
- ³ Ham ma gabe dolog batu parlingodan bangku,
benteng na toguh bahen haluahonku;
tongon, Ham do dolog batu ampa
batar-batar bangku.
- ⁴ Ham Naibatanku, sai paluah Ham ma ahu
humbani tangan ni parjahat, humbani
tangan ni pargeduk pakon sibahen paksa.
- ⁵ Ham do pangarapanku Tuhan; Ham
Jahowa, hatengeran ni uhurhu humbani
sietek-etekonku nari.
- ⁶ Ham do pangunsandeianku humbani partapaan
nari, humbani boltok ni inang nari Ham
do pangurupi bangku, Ham do tongtong
sipujionku.
- ⁷ Gabe halongangan do ahu bani buei halak,
halani Ham do haporusanku na toguh.
- ⁸ Sai gok do pamanganku bani puji-pujian Bamu,
gok hahormaton Bamu manipat ari.

- ⁹ Ulang ma ambukkon Ham ahu dob matua;
bani na lambin bois gogohku, ulang ma
tadingkon Ham ahu.
- ¹⁰ Ai ipahata-hata munsuhku do ahu, halak na
manguhurhon hosahku manriahi,
- ¹¹ nini sidea, “Domma itadingkon Naibata ia,
ayak-ayak anjaha tangkap ma ia, seng dong
be na paluahkonsi.”
- ¹² Ham Naibata, sai ulang ma ganggang Ham
humbangu, Ham Naibatangu, papodas
Ham ma mangurupi ahu.
- ¹³ Sai maila anjaha magou ma sidea na
mamunsuhi ahu; sai tarbador anjaha
masese ma sidea na mangindahi
hamagouanku.
- ¹⁴ Tapi anggo ahu, tongtong do marpangarapan,
anjaha papuji-pujionku do Ham.
- ¹⁵ Sai baritahononkon ni pamanganku do
hapintoron-Mu, sonai haluahon na hun
Bamu ari-ari, ai seng tarbilangi ahu ai.
- ¹⁶ Roh do ahu, mangunsagahkon hagogohon
ni Jahowa, mambaritahon hapintoron,
hapintoron-Mu tumang.
- ¹⁷ Ham Naibata, Ham do mangajari ahu
humbani sietek-etekon nari, ronsi sonari
sai huambilankon do halongangan na
binahen-Mu.

- ¹⁸ Age ronsi matua ahu anjaha lopak ubanku,
Ham Naibatanku, ulang ma tadingkon
Ham ahu; ase huambilankon pambahenan
ni tangan-Mu bani sundut on, sonai
hagogohon-Mu bani ginompar na sihol roh.
- ¹⁹ Age hapintoron-Mu, na das ronsi langit ai, Ham
Naibata, Ham sibahen halongangan banggal,
ise ma na songon Ham, ale Naibata?
- ²⁰ Ham, na dob padageihon bennami hasosakan
pakon parmaraan, sai pagoluhon-Mu do
hanami use, sai panaikon-Mu do hanami
use humbagas luhung-luhung ni tanoh on.
- ²¹ Sai tambahan-Mu do habanggalonku, anjaha
sai apohon-Mu do ahu.
- ²² Jadi ahu pe, sai pujionku do Ham marhitei
arbap, halani hasintongan-Mu, ale Naibata;
sai dodingkononku do Ham marhitei husapi,
Ham na ma pansing ni Israel.
- ²³ Marolob-olob do bibir hubani na mandoding-
doding ahu Bamu, age tonduyhu na dob
pinaluah-Mu.
- ²⁴ Dihut do dilahku, mansahap-sahapkon
hapintoron-Mu ari-ari, ai domma maila
anjaha tarbador na manguhurhon
hamagouanku.

Tonggo Mangkopkop Raja

- 72** ¹ Humbani si Salomo. Ham Naibata, sai bere
Ham ma panguhumion-Mu bani raja, pakon
hapintoron-Mu bani anak ni raja,
² ase ibotoh manguhum bangsa-Mu ibagas
hapintoron, ampa halak na madoyuk domu
hubani uhum.
³ Sai mamboan hadameion ma sagala dolog bani
bangsa in, anjaha buntu-buntu mamboan
hapintoron.
⁴ Sai ipintori ma halak na madoyuk i tongah-
tongah ni bangsa in. Sai ipaluah ma
sagala halak na masombuh, anjaha iropuki
sipangodoh-odoh.
⁵ Sai songon mata ni ari ma dokah ni umurni,
anjaha songon bulan ma ia layur
marsundut-sundut.
⁶ Songon udan na madabuh bani poyon-poyon
ma ia, songon udan neinei na mangarbahi
tanoh.
⁷ Sai martumbor ma hapintoron bani panorangni,
anjaha gok hadameion, ronsi seng dong be
bulan.
⁸ Manggomgomi ma ia hun laut das hu laut,
humbani Bah Eprat das hu tampilan ni
tanoh on.

- 9 Marsombah ma hubani imbang-imbangni,
anjaha sagala munsuhni mandilat tanoh.
- 10 Raja ni Tarsis pakon sagala pulou mamboan
sibere-bere bani, raja Seba pakon Etiopia
mambere sohei.
- 11 Manrogop ma sagala raja manombahsi, anjaha
ganup bangsa mangidangisi.
- 12 Tongon, sai paluahonni do halak na masombuh,
na mangindo pangurupion ni halak na
madoyuk ampa halak na so dong pangurupi
bani.
- 13 Maidop do uhurni bani halak na malumat
pakon na musil, anjaha paluahonni do
tonduy ni halak na masombuh.
- 14 Paluahonni do hosah ni sidea humbani
panokohon pakon pangkilangon, harga
tumang do daroh ni sidea bani panonggorni.
- 15 Sai manggoluh ma ia, anjaha ibere ma hubani
omas na hun Seba; anjaha sitonggoonkon do
ia tongtong, ganup panorang sipasu-pasuon
do ia.
- 16 Sai junah ma omei i tanoh in, das bani pakpak
ni dolog; martumbor ma buahni songon
Libanon, anjaha manggargar ma buyurni
songon poyon na i talun.
- 17 Sai totap ma goranni lanjar, sadokah dong
mata ni ari sai tarbarita ma goranni; sai
dapotan pasu-pasu ma marhiteihonsi sagala

- bangsa, anjaha parhatuahon ni sidea ma ia.
 Napuji ma Jahowa Naibata ni Israel,
¹⁸ sahalak-Si do sibahen halongangan.
¹⁹ Anjaha na puji ma goran-Ni na marmulia in
 sadokah ni dokahni, gok hamuliaon-Ni ma
 sab tanoh on. Amen, alo Amen.
²⁰ Marpunsa ma tonggo ni si Daud, anak ni si Isai.

**Uhur na Sungkun-sungkun
 Pasal Hadoharon ni Halak Parjahat**

(Pausih: Ps. 37; 49; Buku Job)

- 73** ¹ Psalm ni si Asap. Tongon, mardear layak
 do Naibata bani Israel, bani halak na borsih
 maruhur.
² Tapi anggo ahu, narus do jiris naheihu, narus do
 ahu targompang.
³ Ai simburu do uhur hubani sigijang uhur,
 mangidah marhasonangan halak parjahat.
⁴ Seng borit-boritan sidea, jorgit anjaha tambos
 do angkula ni sidea.
⁵ Seng mangonai bani sidea sunsah ni hajolmaon,
 anjaha seng ihonai na marsik sidea songon
 halak na legan.
⁶ Halani ai marsinongkok gijang ni uhur do sidea,
 anjaha marhiouhon panipuon.
⁷ Halani hamomburonni marsual-sual do
 hajahaton humbani sidea, linir do na
 masambor humbani uhur ni sidea.

- ⁸ Manrisai do sidea, anjaha mansahap-sahapkon
hajahaton, marhasoman pangenjengon
idalankon ondang-ondang.
- ⁹ Ipatanggak sidea do babahni das hu langit,
anjaha maor-aor do dilahni i tanoh on.
- ¹⁰ Halani ai marbalik do bangsa in mangirikkon
sidea, anjaha isobur hata ni sidea ai songon
bah.
- ¹¹ Sai ihatahon sidea do, “Sonaha ma pambotoh
ni Naibata? Ai dong habotohon ni Na Timbul
in?”
- ¹² Tonggor ma, sonai do halak parjahat,
marsonang-sonang lalab, lambin junjun
habayakonni.
- ¹³ Jadi soya-soya do hape hupaborsih uhurhu,
huburihi tanganku tanda lang marpipot.
- ¹⁴ Ai marsitaranon do ahu ari-ari, anjaha hona
pinsang ahu siap sogod.
- ¹⁵ Porini ningku, “Songon sidea ma parsahapku,
tonggor ma, ginompar ni anakmu do na
hutahihon ijai.”
- ¹⁶ Tapi sanggah marpingkir-pingkir ahu, laho
mangarusi ai, gabe naborit do ai bani
panonggorhu,
- ¹⁷ paima masuk ahu hubani ianan ni Naibata na
pansing in, laho manangkas-nangkasi ujung
ni sidea.

- 18 Tongon, bani ianan na landit do ipajongjong
Ham sidea, ipaturut Ham do sidea madabuh
hubagas hakahouon.
- 19 Ibagas sangkidop mata do sidea magou, bois
anjaha masab do sidea, majangin tumang.
- 20 Masab do sidea songon nipi sanggah puho,
anjaha lupa do halak bani rupani.
- 21 Sanggah marmongot-mongot uhurhu, anjaha
songon na itobak-tobak piah-piahku,
- 22 maoto do ahu anjaha seng marpangarusion,
songon na so maruhur do ahu i lobei-Mu.
- 23 Tapi sai tongtong do ahu rapat pakon Ham,
ijolom Ham do tanganku siamun.
- 24 Itogu Ham do ahu marhitei sura-sura-Mu,
anjaha jaloan-Mu do ahu hu hasangapon.
- 25 Ise ma hasomanku i nagori atas? Sobali Ham
seng dong iharosuhkon uhurhu i tanoh.
- 26 Age pe lambin melus badanku pakon uhurhu,
batar-batar bani uhurhu ampa rupeihi, ai
ma Naibata sadokah ni dokahni.
- 27 Tongon, sai na magou do na paganggang dirini
hun Bamu, sai boiskonon-Mu do sagala na
marbalik hun Bamu.
- 28 Tapi anggo ahu, hatuahon do bangku na
dohor ai bani Naibata; Jahowa do hubahen
hatengeran ni uhurhu, sai baritahononku do
pambahenan-Ni ganup.

Tonggo Tangis-tangis Pasal Parseda ni Rumah Panumbahan

- 74** ¹ Doding podah humbani si Asap. Mase ma, Ham Naibata, itulak Ham hanami lalab, gajag ringis-Mu dompak biribiri na pinarmahan-Mu?
- ² Sai ingat Ham ma kuria-Mu, na binangkuhon-Mu humbani sapari nari, na tinobus-Mu gabe bangsa parbagianan-Mu; Dolog Sion on, na niianan-Mu.
- ³ Tujuhon Ham ma langkah-Mu dompak na dob dokah maseda in, haganup do iparseda munsuh i rumah na pansing in.
- ⁴ Marsurak do imbang-Mu bani ianan partumpuan, ipajongjong sidea do mandera bahen partinandaan.
- ⁵ Songon halak na mangalbangkon hapakni i harangan laho manrimbas hayu anak, sonai do sidea idahon;
- ⁶ hapak pakon martil do ipangantukkon sidea bani uhir-uhiran-Mu, ase mangkaseda;
- ⁷ isurbuy sidea do rumah-Mu na pansing in, ibutaki sidea ianan ni goran-Mu das ronsi onjolanni.
- ⁸ Nini sidea do ibagas uhurni, “Boiskon hita ma haganup.” Domma isurbuy sidea haganup rumah panumbahan i nagori on.

- 9 Partanda bennami seng dong ididah hanami
be, seng dong be nabi, anjaha seng ibotoh
hanami atap piga dokah on.
- 10 Piga dokah nari, Ham Naibata, sai mapas
munsuh in? Maningon pahirion ni munsuh
mando goran-Mu lanjar?
- 11 Mase ma itarik Ham tangan-Mu? Mase ma
marlompit tangan Ham?
- 12 Tapi Rajangku do Naibata humbani nabasaia,
la do mambahen haluahon i tanoh on.
- 13 Ham do mambolah laut marhitei gogoh-Mu,
irosaki Ham do ulu ni naga ibagas bah.
- 14 Ham do manrosaki ulu ni naga, ibere Ham do
ai panganon ni binatang na i halimisan.
- 15 Ham do parohkon bah tubuh pakon bah
banggal, Ham do pahorah bah banggal na so
ongga horah.
- 16 Ham do simada arian pakon borngin; Ham do
pajonamkon na lihar pakon mata ni ari.
- 17 Ham do manotapkon parbalogan ni tanoh;
Ham do mangadongkon musim logou ni ari
pakon musim udan.
- 18 Ingat Ham ma: Munsuh do na pahirihon
in, Ham Jahowa, ampa bangsa na oto
mangapasi goran-Mu.
- 19 Ulang ma padas Ham hosah ni kuhuy-Mu bani
binatang; ulang ma lalab lupa Ham bani
goluh ni siminik-Mu na marsik in.

- ²⁰ Dingat Ham ma padan in; ai gok pangkilangon do longkit-longkit ni nagori on.
- ²¹ Ulang ma paturut Ham bador halak na niodoh-odoh; lopas Ham ma halak na masombuh pakon na madoyuk mamuji goran-Mu.
- ²² Jongjongkon Ham ma, ale Naibata, dalankon Ham ma kuasa-Mu! Ingat Ham ma parpahiri ni na oto in Bamu.
- ²³ Ulang ma lupa Ham bani parsurak ni munsuh-Mu, bani oga-oga ni imbang-Mu na tongtong martimburak in.

Naibata, Panguhum na Pintor

- 75** ¹ Bani pambobai koor. Inggouni: Ulang parseda. Psalm humbani si Asap. Sada doding. (75-2) Ipuji hanami do Ham, ale Naibata, ipuji hanami do Ham, anjaha sidilo goran-Mu do mambaritahon halongangan na binahen-Mu.
- ² (75-3) Tongon, bani panorang na hutotapkon, dalankononku do uhum ibagas hasintongan.
- ³ (75-4) Dugur pe tanoh on ampa na mangiankonsi, tapi anggo Ahu domma totap hubahen onjolanni. Sela.
- ⁴ (75-5) Ningku do dompak sigijang uhur, “Ulang gijang uhurmu!” anjaha dompak halak

parjahat, “Ulang pagijang tandukmu! Ulang pagijang tandukmu,

⁵ (75-6) ulang hatahon hajungkaton dompak Batu Gingging in.”

⁶ (75-7) Ai sedo hun hapoltakan atap hun hasundutan, sedo hun halimisan roh ni hatimbulon;

⁷ (75-8) ai Naibata do panguhum, la do patoruh na sada, la patimbul na sada nari.

⁸ (75-9) Tongon, i tangan ni Jahowa do panginuman, marisi anggur na gurgur, na niraruan; painumkonon-Ni ma in, ningon inumon ni sidea ronsi paradni, maningon minum ganup halak parjahat i tanoh on.

⁹ (75-10) Tapi anggo ahu marolob-olob do sadokah ni dokahni, dodingkononku do Naibata ni si Jakob.

¹⁰ (75-11) Upokkonon-Ni do ganup tanduk ni halak parjahat, tapi pagijangon do ia tanduk ni halak parpintor.

Naibata Panguhum ni Tanoh on

76 ¹ Bani pambobai koor. Marhasoman husapi. Psalm humbani si Asap. Sada doding. (76-2) Tarbarita do Naibata i Juda, timbul do goran-Ni i Israel.

² (76-3) Adong do i Salem lampolampo-Ni, anjaha i Sion ianan-Ni.

- ³ (76-4) Ijai do iponggolhon panah na marapuy.
Sonai gantar, podang pakon parugas
marmunsuh. Sela.
- ⁴ (76-5) Marhidoratan anjaha marmuliaan do
Ham, humbani dolog sisadokah ni dokahni.
- ⁵ (76-6) Hona taban do halak na barani
marmunsuh, renges do sidea modom,
anjaha sagala puanglima lenduk tanganni.
- ⁶ (76-7) Halani asup-asup-Mu, alo Naibata ni si
Jakob, renges do modom pargareta sonai ge
hudani.
- ⁷ (76-8) Jombut tumang do Ham, mintor ise ma
na pag jongjong i lobei-Mu bani panomboh
ni ringis-Mu?
- ⁸ (76-9) Hun nagori atas do ipabogei hon Ham
uhur-Mu, gabe mabiar ma tanoh on anjaha
jonong,
- ⁹ (76-10) bani panorang ni Naibata jongjong
mandabuh uhum, laho paluahkon na
madoyuk i tanoh on. Sela.
- ¹⁰ (76-11) Tongon, ringis ni jolma pe gabe
puji-pujian do Bamu, anjaha igonditkon
Ham do Bamu teba-teba ni ringis ni sidea.
- ¹¹ (76-12) Bahen ma bagah-bagahmu anjaha
galari ma ai bani Jahowa Naibatamu. Nasiam
sagala na manginggotisi, padas nasiam ma
sombah-sombah Bani Na Majombut in.

¹² (76-13) Ia do na paunduk paruhuron ni na sangap-sangap, marjumbalang do la bani parkuasa ni tanoh on.

**Apoh-apoh halani Taringat
bani Pambahen ni Naibata**

77 ¹ Bani pambobai koor. Bani si Jedutun. Psalm humbani si Asap. (77-2) Bani Naibata do laho sorangku, dilo-dilo do ahu hu Bani, bani Naibata do laho sorangku, ase itangihon ahu.

² (77-3) Bani ari hasosakanku hupindahi do Tuhan; sai herbang do tanganku borngin seng marnamangadi; seng ra tarapoh tonduyhu.

³ (77-4) Taringat do ahu bani Naibata, gabe morong ma ahu; marpingkir-pingkir, gabe hurleh ma tonduyhu. Sela.

⁴ (77-5) Ipaturut Ham do bodak matangku, gabe bulinsah ma ahu, seng boi marsahap.

⁵ (77-6) Sai hupinghiri do panorang na basaia, taringat do ahu bani tahun na dob dokah salpu.

⁶ (77-7) Marsahap-sahap do ahu ibagas uhurhu borngin, marpingkir-pingkir do ahu anjaha manulimati tonduyhu.

- ⁷ (77-8) Mintor sadokah ni dokahni ma nani mangambukkon Tuhan, seng ulakan-Ni be nani maridop ni uhur?
- ⁸ (77-9) Sadokah ni dokahni ma nani rotap idop ni uhur-Ni, anjaha mintor masab ma bagah-bagah-Ni lanjar?
- ⁹ (77-10) Mintor lupa ma nani Naibata marontou ni uhur, atap na dob tarkunsi ma nani holong ni atei-Ni halani ringis-Ni? Sela.
- ¹⁰ (77-11) Jadi ningku do, "On do na papusok uhurhu, na mubah ai pambahenan ni Na Tang Sitimbulan in."
- ¹¹ (77-12) Sai dingatonku do pambahenan ni Jahowa; sai dingatonku do halongangan, na binahen-Mu humbani na basaia.
- ¹² (77-13) Sai sahap-sahapkononku do sagala lahoan-Mu, anjaha sai hupingkir-pingkiri do pambahenan-Mu.
- ¹³ (77-14) Ham Naibata, pansing do dalan-Mu; ise ma sisombahon, na marhabanggalon songon Naibata?
- ¹⁴ (77-15) Ham do Naibata sihorjahon halongangan, domma ipataridahkon Ham gogoh-Mu bani bangsa-bangsa.
- ¹⁵ (77-16) Domma ipaluah Ham bangsa-Mu marhitei tangan-Mu, anak ni si Jakob pakon si Josep. Sela.

- ¹⁶ (77-17) Domma ididah sagala bah Ham, ale Naibata, domma ididah bah Ham, gabe godor, anjaha luhung pe hitir-hitir.
- ¹⁷ (77-18) Manguseihon bah do sagala hambun, mardobur longgur i awang-awang, anjaha panah-Mu mardejeb-dejeb.
- ¹⁸ (77-19) Marnunut do maraloling longgur-Mu, hilap-Mu pasiang dunia on, dugur anjaha duyug do tanoh on.
- ¹⁹ (77-20) Mardalan do Ham hun laut, bah bangga pasar-Mu, tapi ise pe lang manandai bokas-Mu.
- ²⁰ (77-21) Ham do na manogu bangsa-Mu songon hulanan ni biribiri, marhitei tangan ni si Musa pakon si Aron.

Podah humbani na dob Masa

- 78** ¹ Doding podah humbani si Asap. Tangihon nasiam ma, ale bangsangku, podahku, tarehon ma pinggol nasiam hubani hata ni pamanganku.
- ² Sihol do buhaonku pamanganku mangkatahon umpama, sihol do patalaronku rusia humbani panorang na basaia.
- ³ Na dob binogeinami ampa binotohnami, na tinuri-turihon ni na lobeita hu bennami.
- ⁴ Seng bulih ponopkononnami ai bani niombah ni sidea, tapi maningon baritahononkon

do bani sundut na mangihut; ai ma
pambahenan sipasangap Jahowa, pakon
hagogohon-Ni, ampa halongangan na
binahen-Ni ai.

⁵ Domma ipajongjong sada hasaksian bani Jakob,
ibere sada titah bani Israel, itonahkon do
bani ompungta pasal ai, ase ipabotohkon ai
bani niombah ni sidea,

⁶ ase ibotoh sundut na mangihut ai, ase ginompar
na sihol tubuh ai jongjong mambaritahon ai
bani niombahni,

⁷ ase ibahen sidea Naibata hatengeran ni
uhur ni sidea. Anjaha ulang ihalupahon
pambahenan ni Naibata, na banggal ai, tapi
ihorjahon ma titah-Ni,

⁸ ase ulang sidea gabe doskon ompung ni sidea,
ai ma sundut siparbalik anjaha sipanggeori,
sundut na so totap uhurni, anjaha tonduyuni
seng totap bujur dompak Naibata.

⁹ Anak ni si Efraim, marsinjatahon sior,
manginsurut do bani parporangan.

¹⁰ Seng iramotkon sidea parpadanan binahen
ni Naibata, anjaha mangengkar do sidea
mardalan domu hubani titah-Ni.

¹¹ Lupa do sidea bani pambahenan-Ni na banggal
ai, pakon bani tanda halongangan, na dob
pinatuduhkon-Ni bani sidea.

- 12 I lobei ni mata ni ompung ni sidea ibahen do
halongangan, i tanoh Masir, bani talun Soan.
- 13 Ibolah do laut, laho padiparhon sidea,
ibongbong do bah songon bongbongan.
- 14 Ibobahon do sidea marhitei hambun arian,
marhitei sondang ni apuy borngin.
- 15 Ibolah do dolog batu i halimisan, ibere do
sidea sombuh minum songon humbani bah
banggal;
- 16 Iparoh do bah humbani dolog batu, anjaha
ibahen do bah mabaor songon bah
mardalan.
- 17 Tapi sai inunut sidea do mardousa dampak-Si,
iimbang do la Na Tang Sitimbulan in i
halimisan.
- 18 Sai ilajou sidea do Naibata ibagas uhurni,
itunggu sidea do sipanganon pasombuh
hisapni.
- 19 Marungut-ungut do sidea dampak Naibata,
nini, "Mintor mangasup ma Naibata
pasirsirhon sipanganon i halimisan?"
- 20 Tongon, ibogbog do dolog batu gabe mabaor
bah, marbanggal binanga, tapi mintor
tarbahen-Si ma mambere ruti atap
pasirsirhon gulei bani bangsa-Ni?
- 21 Halani ai, dob ibogei Jahowa ai, manggila
ma la, gajag ma apuy mandorab Jakob,
marjimbur gila dampak Israel,

- 22 halani seng porsaya sidea bani Naibata, anjaha
seng tenger uhurni bani pangurupi-Ni.
- 23 Jadi ibere ma parentah bani hambun na i atas,
anjaha ibuha labah ni langit.
- 24 Ipaturun ma bani sidea udan manna, anjaha
ibere ma bani sidea gandum nagori atas.
- 25 Ruti ni malekat do ipangan ganup sidea, bohal
do itongos bani sidea laho pabosurhon.
- 26 Ibahen do logou hapoltakan marombus i langit,
anjaha iparroh logou dangsina marhitei
gogoh-Ni.
- 27 Ipaturun do bani sidea gulei songon orbuk
bueini, anjaha manuk-manuk na marhabong
songon horsik na i topi ni laut.
- 28 Ipandabuhkon hu tongah-tongah ni parsaranan
ni sidea, inggot bani ianan ni sidea.
- 29 Mangan do sidea anjaha bosuran, na pinindo
ni uhur ni sidea ibere do bani sidea.
- 30 Lape sombuh ope sidea mansuhuni
hisap-hisapni, ongom ope sidea bani
sipanganon,
- 31 jadi gajag ma ringis ni Naibata mandorab sidea,
ibunuh ma buei na sangap-sangap ni sidea,
anjaha rasei na maposo ni Israel.
- 32 Age pe sonai ganup na masa ai, inunut sidea
do mardousa, anjaha seng ihaporsayai
halongangan na binahen-Ni.

- ³³ Jadi iboiskon ma ari-ari ni sidea gabe na lang
 ampa tahun ni sidea gabe hasonggotan.
- ³⁴ Anggo roh la mambunuh sidea, ipindahi sidea
 ma la, mulak ma sidea pindah-pindah bani
 Naibata.
- ³⁵ Idingat sidea ma, Naibata do hape dolog
 batu bani sidea, anjaha Naibata, Na Tang
 Sitimbulan in do sipaluah bani sidea.
- ³⁶ Tapi ipalemes-lemes do parsahap ni Bani,
 anjaha iladungi la marhitei dilahni.
- ³⁷ Seng totap uhur ni sidea Bani, anjaha seng
 totap sidea bani padan-Ni.
- ³⁸ Tapi la, siparontou ni uhur, isasap do dousa ni
 sidea, seng iboiskon sidea. Gati do iampogi
 ringis-Ni, anjaha seng ganup ringis-Ni
 ipadalan.
- ³⁹ Ai idingat, daging do sidea, logou na
 mangombus anjaha seng mulak be.
- ⁴⁰ Gatini in sidea mamuhoi ringis-Ni i
 halimisan, anjaha manunsahi-Si bani tanoh
 dorging-dorging ai!
- ⁴¹ Iulak-ulak sidea do manlajou Naibata, anjaha
 ipusoki uhur ni Na Pansing ni Israel.
- ⁴² Seng mardingat be sidea bani hagogohon-Ni,
 bani ari na pinaluah-Ni sidea humbani
 imbangni;
- ⁴³ sanggah binahen-Ni tanda i Masir, ampa
 halongangan-Ni bani talun Soan.

- ⁴⁴ Ipaubah do bahni gabe daroh, ampa binangani,
gabe lang tarinum.
- ⁴⁵ Itongos do bani sidea rongit laho
mamboiskonsi, ampa tiktikan laho
mansedahon.
- ⁴⁶ Bani tamponok do ibere suan-suanan ni sidea,
anjaha hinorjahonni bani balang.
- ⁴⁷ Matei do anggur ni sidea ibahen sira-sira, ampa
hayu ara ni sidea ibahen namur na borgoh.
- ⁴⁸ Rasei do pinahan ni sidea ibahen bunrung,
anjaha marmateian hulanan ni biribirini
ibahen sampar.
- ⁴⁹ Itongos do bani sidea apuy ni ringis-Ni,
gila, marah ampa hasosakan, malekat
sipangagou na marhulan-hulan.
- ⁵⁰ Ipaturut do mardalan ringis-Ni, seng iramotkon
tonduy ni sidea humbani hamatean, tapi
iondoskon do goluh ni sidea hubani sampar.
- ⁵¹ Ibogbog do ganup bunga tubuh ni Masir, ai ma
limbuah ni gogoh ni sidea, bani lampolampo
ni si Ham.
- ⁵² Ipaingkat do bangsa-Ni songon biribiri, anjaha
ibobai sidea songon hulanan i halimisan.
- ⁵³ Sonang do sidea iiring-iring, seng pala
marhabiaran, tapi anggo munsuhni rungkub
do ibahen laut.

- ⁵⁴ Ibobahon do sidea hu tanoh-Ni na pansing in,
hubani dolog na binangkuhon-Ni marhitei
tangan-Ni siamun.
- ⁵⁵ Iusir do hun lobei ni sidea bangsa sipajuh
begu-begu, ibagihon do tanoh pusaka bani
sidea, anjaha sagala marga ni Israel ibahen
do marianan bani lampolampo ni sidea.
- ⁵⁶ Tapi ilajou sidea do use Naibata, anjaha
iimbang Na Tang Sitimbulan in, anjaha seng
iramotkon hasaksian-Ni.
- ⁵⁷ Marbalik do sidea, mosei songon ompung ni
sidea, mubah do sidea songon sior panipu.
- ⁵⁸ Iparoh sidea do ringis-Ni marhitei buntu-buntu
panombahan ni sidea, ipatubuh do
simburu-Ni marhitei gana-gana ni sidea.
- ⁵⁹ Ibogei Naibata ma ai, gabe marah ma la,
iambukkon ma ganup Israel.
- ⁶⁰ Ipahalong ma rumah-Ni i Silo, ai ma ianan-Ni i
tengah-tengah ni jolma.
- ⁶¹ Ilopas do hagogohon-Ni tartaban, anjaha
iondoskon hajagaron-Ni bani tangan ni
imbang-Ni.
- ⁶² Iondoskon do bangsa-Ni bani podang, anjaha
marah do la bani bangsa niain-Ni.
- ⁶³ Anak garama ni sidea bois ipangan apuy, seng
dong be na mandoding-doding bani boru ni
sidea.

- ⁶⁴ Rasei do malim ni sidea ibahen podang, anjaha
na mangkabaluhon sidea seng tangis be.
- ⁶⁵ Jadi puho ma Tuhan songon humbani na
modom, songon puanglima na tarjolma
humbani na minum anggur.
- ⁶⁶ Manginsurut do imbang-Ni ibogbog, anjaha
bador sidea ibahen sadokah ni dokahni.
- ⁶⁷ Iambukkon do lampolampo ni si Josep, anjaha
seng ipilih marga Efraim.
- ⁶⁸ Tapi marga Juda do ipilih, Dolog Sion na
hinaholongan-Ni ai,
- ⁶⁹ Ipajongjong do ianan-Ni na pansing in
songon gijang ni langit, songon tanoh, na
pinajonam-Ni sadokah ni dokahni.
- ⁷⁰ Ipilih do si Daud, juakjuak-Ni ai, ibuat do ia
humbani na marmahan biribiri.
- ⁷¹ Humbani na mangala-alai biribiri na inuman
ialop ia, laho marmahan Jakob bangsa-Ni in,
pakon Israel parbagianan-Ni.
- ⁷² Jadi iparmahan ma sidea humbani pintor ni
uhurni, anjaha ibobahon sidea marhitei
hapentaran ni tanganni.

Tangis-tangis ni Bangsa na Tarpisat

(Pausih: Ps. 74)

79 ¹ Psalm humbani si Asap. Ham Naibata,
domma imasuki sipajuh begu-begu tanoh
pusaka-Mu domma ibutaki sidea rumah

panumbahan-Mu na pansing in, domma
marumbak Jerusalem ibahen.

² Ipamberehon sidea do bangkei ni juakjuak-Mu
panganon ni manuk-manuk na i awang-
awang, anjaha daging ni hinaholongan-Mu
bani binatang harangan.

³ Ipanduruskon do daroh ni sidea songon bah
inggot Jerusalem, anjaha sahalak pe lang
dong na mananomsi.

⁴ Gabe habadoron do hanami bani bangsa
simbalognami, gabe hahirion pakon
siapason bani halak na manginggoti hanami.

⁵ Sadiha dokah nari, Ham Jahowa, manggila Ham
lalab, anjaha marjimbur-jimbur gila-Mu
songon apuy?

⁶ Useihon Ham ma ringis-Mu bani sipajuh
begu-begu, na so mananda Ham ampa
harajaon na so mandilo goran-Mu!

⁷ Ai domma itolon sidea si Jakob, anjaha iparseda
iananni.

⁸ Ulang ma hira Ham bennami hajahaton ni
na lobeinami! Podas ma idop ni uhur-Mu
tongoskon Ham manjumpahkon hanami, ai
mandatei tumang do hanami.

⁹ Sai urupi Ham ma hanami, Ham Naibata
ni haluahonnami, halani hamuliaon ni
goran-Mu! Paluah Ham ma hanami, sasap
Ham ma dousanami halani goran-Mu!

- ¹⁰ Mase ma hatahonon ni sipajuh begu-begu, “Ija do Naibata ni sidea?” Pabotohkon Ham ma bani sipajuh begu-begu i lobei ni matanami pambalason bani daroh ni juakjuak-Mu, na niduruskon in.
- ¹¹ Sai das ma hu lobei-Mu doruh-doruh ni na tartaban, romban hubani hagogohon ni tangan-Mu paturut Ham ma manggoluh na sahira bunuhon hinan.
- ¹² Balas Ham ma hubani bangsa simbalognami, pitu hali lompit bani abingan ni sidea, apas-apas na niapaskon ni sidea Bamu, Ham Tuhan.
- ¹³ Tapi anggo hanami, bangsa-Mu ampa biribiri na pinarmahan-Mu, sai Ham do pujionnami sadokah ni dokahni, anjaha baritahononnami do puji-pujian Bamu, marsundut-sundut.

Tonggo Mangindohon ase Suang Israel

80 ¹ Bani pambobai koor. Inggouni: Silundat. Hasaksian humbani si Asap. Sada Psalm. (80-2) Ham Siparmahan Israel, tangar, tangar Ham ma; Ham, na mambobahon Josep songon biribiri, Ham na marhotak bani herubim, roh ma Ham marsinondang.

- ² (80-3) i lobei ni Efraim, Benjamin pakon
Manase! Puhoi Ham ma gogoh-Mu anjaha
roh ma paluahkon hanami.
- ³ (80-4) Ham Naibata Zebaot, pasuang Ham ma
hanami, sondangkon Ham ma bohi-Mu, ase
maluah hanami.
- ⁴ (80-5) Ham Jahowa Naibata Zebaot, piga dokah
nari manringis Ham dompak tonggo ni
bangsa-Mu?
- ⁵ (80-6) Ipapangankon Ham do bani sidea ruti
iluh, anjaha ipainumkon Ham do bani sidea
iluh marlobih-lobih.
- ⁶ (80-7) Ibahen Ham do hanami gabe mula ni
partinggihan bani simbalognami, anjaha sai
iapasi munsuhnami do hanami.
- ⁷ (80-8) Ham Naibata Zebaot, pasuang Ham ma
hanami, sondangkon Ham ma bohi-Mu, ase
maluah hanami.
- ⁸ (80-9) lorbat Ham do sada hayu anggur hun
Masir, iusir Ham do bangsa-bangsa, laho
manuankon ai hujai.
- ⁹ (80-10) Ham do pajorei tanoh in i lobei ni, jadi
marurat ma ia anjaha igoki tanoh in.
- ¹⁰ (80-11) Rungkub do dolog ibahen halinohni,
hayu ares ni Naibata ibahen ranting-
rantingni.
- ¹¹ (80-12) Iherbangkon do dangkahni das hu laut,
anjaha tumborni das hu Bah Eprat.

- ¹² (80-13) Mase ma iparseda Ham hondorni, gabe uhur-uhur ni pamontas mambuatisi?
- ¹³ (80-14) Iguyang aili na hun harangan do ia, anjaha igagati binatang na i talun.
- ¹⁴ (80-15) Ham Naibata Zebaot, marpangulaki ma uhur-Mu, manatap ma Ham hun nagori atas; pardiatei Ham ma hayu anggur-Mu on,
- ¹⁵ (80-16) anjaha pajongjong Ham ma in, na sinuan ni tangan-Mu siamun in.
- ¹⁶ (80-17) Domma itutung sidea in bani apuy, domma iroboh; sai magou ma sidea marhitei pangondam ni panonggor-Mu.
- ¹⁷ (80-18) Tangan-Mu ma na manramotkon halak parsiamun-Mu, anak nijolma na pinabanggal-banggal-Mu.
- ¹⁸ (80-19) Seng anjai manginsurut hanami hun Bamu; pagoluh Ham ma hanami ase goran-Mu idilo hanami.
- ¹⁹ (80-20) Ham Jahowa Naibata Zebaot, pasuang Ham ma hanami, sondangkon Ham ma bohi-Mu, ase maluah hanami.

**Puji-pujian ampa Ojur-ujur
Pambalosion bani Naibata**

81 ¹ Bani pambobai kor. Marhasoman Gitit. Humbani si Asap. (81-2) Olobkon ma Naibata, hagogohonta in, marsurak ma bani Naibata ni si Jakob.

- ² (81-3) Mandoding ma, pahata tambur, giut ma husapi na laingan ampa arbap.
- ³ (81-4) Sompul ma tanduk bani poltak ni bulan, bani bulan tula, ari pestanta in.
- ⁴ (81-5) Ai aturan do in bani Israel, parentah ni Naibata bani si Jakob.
- ⁵ (81-6) Sada paraturan do in ibahen bani si Josep, sanggah na bingkak la mandorab Masir. Hubogei do sora na so hutanda hinan:
- ⁶ (81-7) Hubuat do siporsanon humbani abaramu, anjaha maluah do tanganmu humbani karanjang.
- ⁷ (81-8) Dilo-dilo do ho sanggah hasosakan gabe Hupaluah; marbalos do Ahu bam humbani hambun na marlonggur; Hulajou do ho ilambung ni Bah Meriba. Sela.
- ⁸ (81-9) Tangar ma, ale bangsang-Ku, sihol do paingaton-Ku ho; ale Israel, sai ra ma ho manangihon!
- ⁹ (81-10) Lang malo dong naibata na legan i tongah-tongahmu, ulang sombah naibata ni bangsa na legan.
- ¹⁰ (81-11) Ahu do Jahowa Naibatamu, na patangkog ho hun Masir; patanggak ma pamanganmu ase Hugoki!
- ¹¹ (81-12) Tapi seng itangihon bangsang-Ku sorang-Ku, anjaha seng ibalosi Israel Ahu.

- ¹² (81-13) Jadi Hupaturut ma ia bani hengken ni uhurni, gabe iihut-ihut ma rosuh ni uhurni.
- ¹³ (81-14) Ambit Ahu itangihon bangsang-Ku, anjaha Israel mardalan bani dalan-Ku:
- ¹⁴ (81-15) Podas ma patundukon-Ku munsuhi, anjaha dompakkonon-Ku tangan-Ku bani imbangni.
- ¹⁵ (81-16) Halak na mandomdomisi maningon marsombah do hu bani, anjaha panorangni ronsi sadokah ni dokahni.
- ¹⁶ (81-17) Bahenon-Ku do sidea mangan gandum sijengesan, anjaha pabosuron-Ku sidea bani manisan na hun dolog batu.

Naibata do Panguhum bani Sagala Panguhum

- 82** ¹ Psalm humbani si Asap. Jongjong do Naibata bani humpulan ni naibata-naibata, mandabuh uhum do la bani naibata-naibata.
- ² Piga dokah nari pagedukonnima uhum, anjaha apitannima parjahat? Sela.
- ³ Papintor hanima ma uhum bani halak na malumat ampa na tading maetek, ondingi hanima ma halak na madoyuk ampa na musil.
- ⁴ Paluah ma halak na malumat pakon na masombuh. paluah hanima ma sidea humbani tangan ni parjahat.

- ⁵ Seng dong na binotoh ampa pangartian ni sidea, bani na golap do sidea mardalan, dugur ma onjolan ni tanoh on.
- ⁶ Domma namin Huhatahon, “Naibata-naibata do hanima, anak ni Na Tang Sitimbulan in do hanima ganup.”
- ⁷ Age pe sonai maningon do matei hanima songonjolma, anjaha targompang songon sada halak na sangap.
- ⁸ Jongjong ma Ham, ale Naibata, uhum Ham ma tanoh on, ai Ham do simada sagala bangsa.

**Tonggo Mangindo Pangurupion
Mangimbang Munsuh**

- 83** ¹ Sada doding. Psalm humbani si Asap.
(83-2) Ham, Naibata, ulang ma sai sip Ham, ulang ma ipanengel-nengel Ham, ulang ma sai soh Ham, ale Naibata!
- ² (83-3) Ai tonggor ma, sai manggeori do munsuh-Mu, na mandomdomi Ham, sai ipadorgak do uluni.
- ³ (83-4) Sai mambahen ranggi-ranggian do sidea mangimbang munsuh-Mu, anjaha manriahi sidea manlawan halak na niondingan-Mu.
- ⁴ (83-5) Nini sidea, “Eta, boiskon hita ma sidea songon sada bangsa, ase ulang be dong na mardingat Israel.”

- ⁵ (83-6) Tongon, marsada ni uhur do sidea
manriah, anjaha marpadan do sidea
manlawan Ham:
- ⁶ (83-7) Lampolampo ni Edom pakon Moab, halak
Ismael pakon halak Hagar;
- ⁷ (83-8) Gebal pakon Amon ampa Amalek, halak
Palistim pakon par Tirus;
- ⁸ (83-9) dihut do Assur hasoman ni sidea, gabe
panungkoli bani ginompar ni si Lot. Sela.
- ⁹ (83-10) Bahen Ham ma bani sidea songon na
bani halak Midian, songon na bani si Sisera,
ampa si Jabin i lambung ni Bah Kison,
- ¹⁰ (83-11) ai ma na bois dohorhon Endor, gabe
napu ni juma ni sidea.
- ¹¹ (83-12) Bahen Ham ma dompak na sangap ni
sidea songon na bani si Oreb pakon si Zeb,
anjaha ganup raja ni sidea songon si Zeba
pakon si Salmuna,
- ¹² (83-13) na mangkatahon ai, “Buat hita ma
sagala ianan ni Naibata banta!”
- ¹³ (83-14) Ham Naibata, bahen Ham ma sidea
songon tompoh-tompoh, songon lapa-lapa i
lobei ni logou.
- ¹⁴ (83-15) Songon apuy, na manutung harangan,
songon gara ni apuy, na mamonsongkon
dolog,

- ¹⁵ (83-16) sonai ma usir Ham sidea marhitei
halisungsung-Mu, anjaha songgoti Ham
sidea marhitei haba-haba-Mu.
- ¹⁶ (83-17) Gok ma bohi ni sidea bahen Ham bani
habadoron, ase pindah-pindah sidea bani
goran-Mu, Ham Jahowa.
- ¹⁷ (83-18) Sai bador anjaha tarsonggot ma sidea
sadokah ni dokahni, maila anjaha magou
ma sidea,
- ¹⁸ (83-19) ase andohar ibotoh sidea, pitah Ham
do na margoran Jahowa, Na Tang Sitimbulan
i sab tanoh on.

Hatuahon ni Halak na Marianan i rumah ni Naibata

- 84** ¹ Bani pambobai koor. Marhasoman Gitit.
Humbani ginompar ni si Korah. Sada Psalm.
(84-2) Jenges ni in rumah ianan-Mu, Ham
Jahowa Zebaot!
- ² (84-3) Masihol anjaha ayak do tonduyhu bani
alaman ni Jahowa. Marolob-olob do uhurhu
pakon dagingku manjumpahkon Naibata na
manggoluh in.
- ³ (84-4) Dingis pe jumpahan jabu do, sonai
layang-layang dapotan asar do, bahen ianan
ni anakni ilambung ni anjapanjap-Mu.
Ham Jahowa Zebaot, Rajangku anjaha
Naibatangku.

- ⁴ (84-5) Martuah do halak na marianan i
rumah-Mu, sai Ham do pujion ni sidea. Sela.
- ⁵ (84-6) Martuah do halak, na marhagogohon
ibagas Ham, na marugas laho hu rumah-Mu.
- ⁶ (84-7) Anggo ibolus sidea lombang Baka, gabe
ianan bah tubuh do ai bani sidea; tongon,
udan mula-mula do na mangarbahisi.
- ⁷ (84-8) Lambin ganda do gogoh ni sidea, paima
das sidea hu lobei ni Naibata i Sion.
- ⁸ (84-9) Ham Jahowa Zebaot, tangihon Ham ma
tonggongku, paeleng Ham na pinggol-Mu,
Ham Naibata ni si Jakob. Sela.
- ⁹ (84-10) Kawahkon Ham ma gantarnami, ale
Naibata, anjaha tatap Ham ma bohi ni na
mininakan-Mu!
- ¹⁰ (84-11) Tongon, dearan do sadari i alaman-Mu
ase saribu ari bani ianan na legan; rahanan
do sijaga labah ahu i rumah ni Naibatangku
ase marianan i lampolampo ni parjahat.
- ¹¹ (84-12) Ai mata ni ari ampa gantar do Naibata
Jahowa; la do sibere idop ni uhur ampa
hasangapon; seng iampogi na madear bani
halak na bujur marparlahou.
- ¹² (84-13) Ham Jahowa Zebaot, martuah do jolma
na marhatengeran Bamu.

Tonggo Mangindohon ase Mulak Suang Israel

- 85** ¹ Bani pambobai koor. Humbani ginompar ni si Korah. Sada Psalm. (85-2) Ham Jahowa, idop do uhur-Mu ijia bani tanoh-Mu, ipasuang Ham do use si Jakob.
- ² (85-3) Isasap Ham do hajahaton ni bangsa-Mu, irungkub Ham do dousa ni sidea haganupan. Sela.
- ³ (85-4) Ipahombun Ham do ringis-Mu, anjaha iampogi Ham do gajag ni gila-Mu.
- ⁴ (85-5) Sai pasuang Ham ma hanami, Ham Naibata ni haluahonnami, parontihon Ham ma ringis-Mu dampak hanami.
- ⁵ (85-6) Lanjar do Ham manringis dampak hanami, anjaha toruskonon-Mu do ringis-Mu marsundut-sundut?
- ⁶ (85-7) Ai lang be ulakan-Mu pagoluh hanami, ase marmalas ni uhur bangsa-Mu ibagas Ham?
- ⁷ (85-8) Patidak Ham ma hu bennami, Ham Jahowa, idop ni uhur-Mu, anjaha useihon Ham ma bennami pangurupion-Mu.
- ⁸ (85-9) Sai tangihononku do atap aha na hinatahon ni Naibata Jahowa, ai hadameion do hata-Ni dampak bangsa-Ni pakon bani na hinaholongan-Ni, asal ma ulang mulak sidea bani haotoon.

- ⁹ (85-10) Tongon, donok do pangurupi-Ni bani na mangkabiari-Si, tongon, marianan do hamuliaon-Ni bani tanohnami.
- ¹⁰ (85-11) Idop ni uhur pakon hasintongan sai pajumpah do, anjaha hapintoron pakon hadameion marsisummahan.
- ¹¹ (85-12) Hasintongan martumbor hun tanoh, anjaha hapintoron manatap hun atas langit.
- ¹² (85-13) Tongon, Jahowa sandiri do mambere na madear, anjaha tanohnami mambere gogohni.
- ¹³ (85-14) Hapintoron do mardalan i lobei-Ni, anjaha hadameion mangirikkon langkah-langkah-Ni.

Tonggo bani Panorang Hasosakan

- 86** ¹ Tonggo ni si Daud. Paeleng Ham ma pinggol-Mu, Ham Jahowa, balosi Ham ma ahu, ai doyuk janah sombuh do ahu.
- ² Ramotkon Ham ma tonduyhu, ai na daulat do ahu. Sai paluah Ham ma juakjuak-Mu na martenger ni uhur hu Bamu!
- ³ Ham do Naibatanku idop ma uhur-Mu bangku, ai hu Bamu do ahu dilo-dilo ganup ari.
- ⁴ Sai pamalas Ham ma uhur ni juakjuak-Mu, ai hu Bamu do Tuhan, hudompakkon tonduyhu.

- ⁵ Ai pardear layak do Ham, Tuhan, anjaha
marpangulaki do uhur-Mu, buei do idop ni
uhur-Mu bani haganup na mandilo Ham.
- ⁶ Tangihon Ham ma, ale Jahowa, tonggongku,
anjaha pardiateihon Ham ma elek-elekku.
- ⁷ Bani panorang hasosakanku, sai Ham do hudilo,
ai ibalosi Ham do ahu.
- ⁸ Seng dong na doskon Ham i tongah-tongah ni
naibata-naibata, Ham Tuhan, anjaha seng
dong na doskon pambahenan-Mu.
- ⁹ Sai roh do sagala bangsa, na jinadihon-Mu;
marsombah do sidea hu lobei-Mu, Ham
Tuhan, anjaha pasangapon ni sidea do
goran-Mu.
- ¹⁰ Ai timbul do Ham, sibahen halongangan, pitah
Ham do Naibata hansa.
- ¹¹ Sai ajarhon Ham ma dalan-Mu hu bangku,
Ham Jahowa, ase mardalan ahu ibagas
hasintongan-Mu; sai pabulat Ham ma
uhurhu laho mangkabiari goran-Mu.
- ¹² Ham Tuhan Naibatanku, sihol do pujionku
Ham humbani gok ni uhurhu, anjaha
pasangaponku goran-Mu sadokah ni
dokahni.
- ¹³ Ai bangga do idop ni uhur-Mu bangku, ipaluah
Ham do ahu humbani nagori toruh.

- ¹⁴ Ham Naibata, roh do na jungkat maruhur
mangimbang ahu, hulanen ni parjahat sihol
mamunuh ahu, seng parduli sidea Bamu.
- ¹⁵ Tapi Ham do Tuhan, Naibata paridop ni uhur
janah parholong, Ham, na lambat manringis,
parontou ni uhur banggal janah parsintong.
- ¹⁶ Dompakkon Ham ma ahu anjaha maidop
uhur-Mu bangku. Bere Ham ma gogoh-Mu
bani juakjuak-Mu, anjaha paluah Ham ma
anak ni jabolon-Mu naboru.
- ¹⁷ Bahen Ham ma bangku tanda hadearon, ase
maila halak sidomdomi ahu, mangidah na
dob iurupi anjaha iapohi Ham ahu, Ham
Jahowa.

Sion, Huta ni Naibata

- 87** ¹ Humbani ginompar ni si Korah. Sada
Psalm. Sada doding. I atas ni dolog na ma
pansing do ipajonam in.
- ² Holongan do uhur ni Jahowa mangidah
horbangan ni Sion humbani sagala ianan ni
Jakob.
- ³ Na mulia-mulia do ibaritahon pasal Ham ale
huta ni Naibata. Sela.
- ⁴ Hutarsingati do Masir pakon Babel hubani na
mananda Ahu; sonai Palistim, Tirus ampa
Etiofia: sagala on do itubuhkon ijai.

- ⁵ Tapi pasal Sion hatahononkon do, “Haganup do tubuh ijai, anjaha la, Na Tang Sitimbulan in do patotapkonsi.”
- ⁶ Hiraon ni Jahowa do sanggah mantingkihon bangsa-bangsa: On do itubuhkan ijai. Sela.
- ⁷ Anjaha dodingkonon ni sidea do marhasoman tortor: Ibagas Ham do bah tubuhku ganup.

Tonggo Sanggah Marsitaronon Banggal

- 88** ¹ Sada doding. Psalm humbani ginompar ni si Korah. Bani pambobai koor. Inggouni: Almahalat. Doding podah humbani si Heman, halak Esrahi. (88-2) Ham Jahowa, Naibata ni hatuahonku, dilo-dilo do ahu arian, anjaha hu lobei-Mu do ahu roh borngin.
- ² (88-3) Sai das ma tonggongku hu lobei-Mu, sai paeleng Ham ma pinggol-Mu bani doruh-doruhku.
- ³ (88-4) Domma sampur uhur hubani sitaronon, domma darngos goluhku bani nagori toruh.
- ⁴ (88-5) Doskon halak na manuruk tanoman mando ahu, songon paramangon na so margolle.
- ⁵ (88-6) Doskon na dob matei do ahu ihira, songon halak na dob tarbunuh ragei ibagas tanoman, ai ma halak na so nidingat-Mu be, na dob sirang humbani kuasa-Mu.

- ⁶ (88-7) Domma ipatibal Ham ahu hubagas
godung sibagasan, hubagas hagolapan,
hubagas luhung tene.
- ⁷ (88-8) Sai idondoni ringis-Mu do ahu, anjaha
sagala gilumbang-Mu mangodohkon ahu.
Sela.
- ⁸ (88-9) Domma ipaganggang Ham humbangku
sagala huanku, domma ibahen Ham hagigi
ahu bani sidea, tarhurung do ahu anjaha
seng boi mandarat.
- ⁹ (88-10) Domma marholok matangku halani
hadoyukon, Ham do Jahowa hupadilo-dilo
ganup ari, hupaherbang do tanganku hu
Bamu.
- ¹⁰ (88-11) Ai mambahen halongangan do Ham
bani na dob matei? Ai puho do halinoh
mamuji Ham? Sela.
- ¹¹ (88-12) Ai ambilankononkon do idop ni uhur-
Mu ibagas tanoman atap hasintongan-Mu i
nagori toruh?
- ¹² (88-13) Ai botohon ni halak ope halongangan-
Mu bani ianan na golap, atap hapintoron-Mu
bani ianan parlupaan?
- ¹³ (88-14) Tapi ahu, hu Bamu do ahu dilo-dilo,
Ham Jahowa, anjaha sogod-sogod do
tonggongku roh manjumpahkon Ham.

- ¹⁴ (88-15) Mase ma itulak Ham ahu, ale
Jahowa, anjaha iponopkon Ham bohi-Mu
humbangu?
- ¹⁵ (88-16) Madoyuk do ahu anjaha narus-narus
matei humbani hadakdanakonku, manaron
do ahu bani songgot-songgot-Mu, mandolei
ahu ibahen.
- ¹⁶ (88-17) Ibontas milas ni ringis-Mu do ahu, bois
do ahu ibahen panonggoti-Mu.
- ¹⁷ (88-18) linggoti sidea do ahu songon bah
ganup ari, idorab ahu inggot.
- ¹⁸ (88-19) Ipaganggang Ham do humbangu huan
pakon hasomanku, sagala halak na hutanda
ibagas hagolapan do.

**Tonggo ase Ipatotap Jahowa
Bagah-bagah-Ni bani si Daud**

- 89** ¹ Doding podah humbani si Etan, halak
Esrahi. (89-2) Sai dodingkononku do idop
ni uhur ni Jahowa sadokah ni dokahni,
pabotohkononku do hasintongan-Mu
marhitei pamanganku, marsundut-sundut.
- ² (89-3) Ai nimu do, “Totap do idop ni uhur-Hu
sadokah ni dokahni, anjaha songon jonam
ni langit do hasintongan-Ku.”
- ³ (89-4) Domma Hubahen padan bani na pinilih-
Ku, domma Hubijahon bani juakjuak-Ku si
Daud.

- ⁴ (89-5) Patotapon-Ku do ginomparamu sadokah ni dokahni, anjaha hotakmu pajongjongon-Ku marsundut-sundut. Sela.
- ⁵ (89-6) Jadi pujion ni langit ma halongangan-Mu, Ham Jahowa, sonai hasintongan-Mu bani tumpuan ni halak na ma pansing.
- ⁶ (89-7) Ai ise ma i langit na doskon Jahowa, ise ma parnagori atas na songon Jahowa?
- ⁷ (89-8) Sihabiaran do Naibata i tengah-tengah ni malekat na ma pansing, anjaha jombut bani sagala ma manlioti-Si.
- ⁸ (89-9) Ham Jahowa, Naibata Zebaot, ise ma na songon Ham? Markuasa do Ham, ale Jahowa, anjaha hasintongan-Mu manginggoti Ham.
- ⁹ (89-10) Ham do na manggomgom gunsang ni laut, anggo naik gilumbangni Ham do na paminopkon.
- ¹⁰ (89-11) Ham do na manropuki Rahab songon halak na tinampul, ipaerap Ham do munsuh-Mu marhitei tangan-Mu na gogoh in.
- ¹¹ (89-12) Gok Bamu do nagori atas, gok Bamu do homa tanoh on; dunia on pakon sagala isini, Ham do na pajonamkon.
- ¹² (89-13) Utara pakon dangsina Ham do na manompasi; Tabor pakon Hermon marolob-olob halani goran-Mu.

- 13 (89-14) Marbotokon na gogoh do Ham, gogoh do tangan-Mu anjaha timbul siamun-Mu.
- 14 (89-15) hapintoron pakon uhum do onjolan ni hotak-Mu, idop ni uhur pakon hasintongan do jongjong i lobei-Mu.
- 15 (89-16) Martuah ma bangsa na mambotoh marolob-olob, na mardalan ibagas sondang ni bohi-Mu, Ham Jahowa.
- 16 (89-17) Marhitei goran-Mu do marolob-olob sidea ganup ari, anjaha marhitei hapintoron-Mu timbul sidea.
- 17 (89-18) Ai Ham do hamuliaon ni gogoh ni sidea. anjaha marhitei rosuh-Mu gijang tanduknami.
- 18 (89-19) Ai Jahowa do simada gantarnami, humbani na pansing ni Israel do rajanami.
- 19 (89-20) Na ijia marsahap do Ham marhitei panonggoran hubani hinaholongan-Mu, Nimu, "Domma Huondoskon sortali bani sada puanglima, domma Hupabangkit sada na pinilih humbani bangsa in."
- 20 (89-21) Domma jumpah Ahu juakjuak-Ku si Daud, domma Huminaki ia marihitei minak-Ku na ma pansing;
- 21 (89-22) tungkolon ni tangan-Ku do ia, tongon, pargogohan ni botokon-Ku do ia.

- ²² (89-23) Seng anjai dorabon ni munsuh ia,
anjaha seng anjai odoh-odohon ni parjahat
ia.
- ²³ (89-24) Tapi rosakan-Ku do munsuhni i
lobei ni, anjaha raseihonon-Ku do na
mandomdomisi.
- ²⁴ (89-25) Hasintongan ampa idop ni uhur-Hu do
mangkasomanisi, anjaha marhitei goran-Ku
pagijangon do tandukni.
- ²⁵ (89-26) Bahenon-Ku do tanganni manguasai
laut, tanganni siamun manguasai bah
mardalan.
- ²⁶ (89-27) Dilohononni do hu Bangku, “Bapangku
do Ham, Naibatangku ampa batu gingging
ni hatuahonku!”
- ²⁷ (89-28) Tongon, bahenon-Ku do ia anak
sikahanan, timbulan humbani raja-raja na i
tanoh on.
- ²⁸ (89-29) Ronsi sadokah ni dokahni do
patotapon-Ku idop ni uhur-Hu bani, anjaha
totap do padan-Ku bani.
- ²⁹ (89-30) Patongtongon-Ku do ginomparni ronsi
sadokah ni dokahni, anjaha hotakni sadokah
dong langit.
- ³⁰ (89-31) Anggo itadingkon anak-anakni titah-Ku,
anjaha seng marpangabak sidea bani
aturan-Ku,

- ³¹ (89-32) anggo ibutaki sidea tanoh-Ku, anjaha
parentah-Ku seng idalankon,
- ³² (89-33) jadi luluhonon-Ku do panlanggaron
ni sidea ai marhitei lonsing-lonsing, ampa
hajahaton ni sidea ai marhitei libas-libas,
- ³³ (89-34) tapi anggo idop ni uhur-Hu seng anjai
osoron-Ku hun bani, anjaha hasintongan-Ku
seng anjai oseion-Ku.
- ³⁴ (89-35) Seng elukkonon-Ku padan-Ku, anjaha
na luar humbani pamangan-Ku seng anjai
ubahon-Ku.
- ³⁵ (89-36) Domma onggam marbulawan ahu
marhitei hapansingon-Ku, seng anjai
marladung Ahu bani si Daud.
- ³⁶ (89-37) Totap do sadokah ni dokahni
ginomparni, anjaha songon mata ni ari
hotakni i lobei-Hu;
- ³⁷ (89-38) manongtong do ia songon bulan,
jonam sadokah dong langit. Sela.
- ³⁸ (89-39) Hape sonari itulak anjaha iambukkon
Ham do, manringis do Ham dompak na
mininakan-Mu.
- ³⁹ (89-40) Iparnalang Ham do padan na dompak
juakjuak-Mu, hiri do das hu tanoh ibahen
Ham sortalini.
- ⁴⁰ (89-41) Iruntas Ham do sagala tembokni,
marumbak ibahen Ham batar-batarni.

- ⁴¹ (89-42) Isamun halak pamontas do ia, gabe siapason bani bangsa simbalogni.
- ⁴² (89-43) Ipagijang Ham do tangan siamun ni imbangni, marmalas ni uhur do ganup munsuhni ibahen Ham.
- ⁴³ (89-44) Marbalik do ibahen Ham mata ni podangni, seng tahan ia jongjong bani parmunsuhan.
- ⁴⁴ (89-45) lilohkon Ham do sinalsalni, anjaha hotakni itunggalingkon Ham hu tanoh.
- ⁴⁵ (89-46) Ipapondok Ham do ari-ari ni haposoonni, anjaha irungkub Ham ia bani habadoron. Sela.
- ⁴⁶ (89-47) Sadiha dokah nari, Ham Jahowa, ponopkonon-Mu lalab diri-Mu, anjaha gajag lalab songon apuy ringis-Mu?
- ⁴⁷ (89-48) Ingat Ham ma, tongkin ni in goluh on, sonaha podasni salpujolma tinompa-Mu in?
- ⁴⁸ (89-49) Ija ma dongjolma manggoluh na so idahonni hamatean, anjaha na boi paluahkon tonduyi hun tangan ni nagori toruh? Sela.
- ⁴⁹ (89-50) Ija do nuan, Tuhan, hinalayak-Mu ondi, na dob binijahon-Mu bani si Daud marhitei hasintongan-Mu?

- ⁵⁰ (89-51) Ingat Ham ma, Tuhan, habadoron ni
juakjuak-Mu; hupausung-usung do bani
tontonku apas-apas ni bangsa-bangsa,
⁵¹ (89-52) ai ma niapaskon ni sidea, Ham Jahowa;
ipahiri sidea do bokas ni na mininakan-Mu.
⁵² (89-53) Napuji ma Jahowa sadokah ni dokahni!
Amen! nai ma amen!

**Elek-elek ni Jolma na Laho Salpu in i
Lobei ni Naibata na Manongtong in**

- 90** ¹ Tonggo ni si Musa, juakjuak ni Naibata.
Ale Tuhan, Ham do haporusannami
marsundut-sundut.
- ² Paima tubuh dolog-dolog, paima iadongkon
tanoh pakon dunia on, domma adong hinan
Ham, ale Naibata, humbani sadokah ni
dokahni ronsi sadokah ni dokahni.
- ³ Suang do jolma in gabe orbuk ibahen Ham,
Nimu, “Mulak ma hanima, ale anak ni
jolma!”
- ⁴ Ai saribu tahun bani pangidah-Mu doskon ari
nantuari na dob salpu do ai, songon sada
horin borngin-borngin.
- ⁵ layub Ham do sidea, salpu songon nipi do sidea.
Songon poyon-poyon na maratah do sidea:
- ⁶ sogod martumbor anjaha marbunga, hape
bodari melus anjaha maloslos.

- ⁷ Tongon, bois do hanami halani ringis-Mu,
anjaha binahen ni gila-Mu magou do
hanami.
- ⁸ Ipatalar Ham do hajahatonnami i lobei-Mu,
anjaha dousanami na ponop bani haliharon
ni bohi-Mu.
- ⁹ Tongon, salpu do ganup ari-arinami ibahen
ringis-Mu, anjaha tahun-tahun ni goluhnami
masab songon sada hoih.
- ¹⁰ Tahun ni goluhnami sibar pitu puluh do,
anggo margogoh das ualuh puluh tahun;
bueinan do ai marhangaluton anjaha
marhasunsahan, ai podas tumang do ai
salpu, songon na habang do hanami.
- ¹¹ Ise ma na mananda banggal ni ringis-Mu,
anjaha ise ma na marhabiaran Bamu domu
hubani gajag ni gila-Mu?
- ¹² Ajari Ham ma hanami mamilangi ari-arinami,
ase dapotan uhur na pentar hanami.
- ¹³ Marpangulaki ma uhur-Mu, Ham Jahowa!
Sadiha dokah nari? Maidop ma uhur-Mu
bani juakjuak-Mu.
- ¹⁴ Pabosur Ham ma hanami sogod-sogod bani
idop ni uhur-Mu, ase boi marolob-olob
anjaha marmalas ni uhur hanami bani ganup
ari-ari ni goluhnami.

- ¹⁵ Pamalas Ham ma uhurnami nansa dokah ni ari
niarsik-Mu hanami, nansa dokah ni tahun
hamagouan na nidageinami.
- ¹⁶ Patarlar Ham ma sagala horja-Mu bani
juakjuak-Mu, ampa hamuliaon-Mu bani
ginomparni.
- ¹⁷ Sai sogop ma hu banta habasaron ni Tuhan
Naibatanta, anjaha ipatotap ma horja ni
tanganta, tongon, sai ipatotap ma horja ni
tanganta.

Sonang Ibagas Pangondingion ni Naibata

- 91** ¹ Barang ise na hundul ibagas pangondingion
ni Na Timbul in, anjaha marianan bani
linggom ni Pargogoh Na So Tarimbang in,
- ² ia do na boi marsahap bani Jahowa:
Haporusanku anjaha batar-batarhu,
Naibatanku, anjaha hatengeran ni uhurhu.
- ³ Tongon, ai la do na paluahkon ho humbani
sambil ni parsambil pakon humbani
pangagou ni sampar.
- ⁴ Ia do na manrungkub ho bani ambulu-Ni,
anjaha i toruh ni habong-Ni jumpah ho
haporusanmu; hasintongan-Ni do gantar
parlingodan.
- ⁵ Seng pala habiaranmu songgot-songgot
borngin, barang sior na habang arian;

- ⁶ barang sampar na mawat-awat bani na golap,
ampa naborit na mangagou tengah ari.
- ⁷ Age radag saribu halak i lambungmu anjaha
salaksa i siamunmu, seng tumaram
mangonai anggo hubam.
- ⁸ Asal mangkawah matamu, gabe idahonmu ma
pambalason dompak parjahat.
- ⁹ Ai ibahen ho do Jahowa haporusanmu, anjaha
Na Timbul in gabe batar-batarmu.
- ¹⁰ Seng anjai mangonai be bam hasamboron,
barang hamagouan seng be roh mandohori
lampolampomu.
- ¹¹ Ai suruhon-Ni do malekat-Ni halani ho, ase
iramotkon ho bani sagala dalanmu;
- ¹² sai tatang-tatangon ni sidea do ho, ase ulang
antuk naheimu bani batu.
- ¹³ Dogeionmu do singa pakon ulog na marbisa,
rojatanmu do anak ni singa ampa naga.
- ¹⁴ Halani marpangunsandeian ia Bangku, jadi
paluahon-Ku ma ia, patimbulon-Ku ma ia
halani na tinandani goran-Ku.
- ¹⁵ Diloondi do Ahu jadi balosan-Ku ma ia;
paluahon-Ku do ia anjaha marmulia
bahenon-Ku.
- ¹⁶ Sai pabosuron-Ku do ia sayur matua, anjaha
pataridahkonon-Ku hatuahon-Ku bani.

Puji-pujian bani Jahowa halani hapintoron-Ni

- 92** ¹ Sada Psalm. Doding bani Ari Sabat.
 (92-2) Na madear do mamuji Jahowa
 ampa mandodingkon goran-Mu, Ham ale
 Sitimbulan,
² (92-3) mangambilankon idop ni uhur-Mu sogod
 ampa hasintongan-Mu borngin,
³ (92-4) marhasoman parugas sisapuluh tali
 pakon arbap, iirikkon sora ni husapi.
⁴ (92-5) Ai ipamalas Ham do uhurhu, Ham Jahowa
 marhitei pambahenan-Mu, marolob-olob
 do ahu mangidah jadi-jadian ni tangan-Mu.
⁵ (92-6) Banggal ni in pambahenan-Mu, Ham
 Jahowa, bagus tumang do pingkiran-Mu.
⁶ (92-7) Jolma na bodoh seng iarusi anjahajolma
 na lontong seng iartihon ai.
⁷ (92-8) Age pe martumbor parjahat songon
 poyon-poyon, anjaha marbunga sagala
 sihorjahon na masambor, sisedahonon do
 sidea sadokah ni dokahni.
⁸ (92-9) Tapi anggo Ham, ale Jahowa, timbul do
 ronsi sadokah ni dokahni.
⁹ (92-10) Tongon, munsuh-Mu, Ham Jahowa,
 tongon, munsuh-Mu magou do; mambur
 kerap do sagala sihorjahon hajahaton.

- ¹⁰ (92-11) Tapi ipagijang Ham do tandukku
songon tanduk ni ursa, iminaki Ham do ahu
bani minak na bayu;
- ¹¹ (92-12) sombuh do matangku mangidah
pardabuh ni munsuhku, anjaha megah
pinggolhu manangar parmagou ni siimbang
ahu.
- ¹² (92-13) Halak parpintor martumbor do songon
kurma, anjaha martunas songon hayu ares i
Libanon.
- ¹³ (92-14) Sidea na sinuan i rumah ni Jahowa,
sai marbunga do sidea bani alaman ni
Naibatanta;
- ¹⁴ (92-15) marbuah do sidea age dob matua,
tongtong tabun anjaha maratah,
- ¹⁵ (92-16) laho mangambilankon, “Pintor do
Jahowa, Batu Ginggingku, anjaha seng dong
hagedukon Bani.”

Jahowa, Raja Siparkuasa

93 ¹ Jahowa do Raja, marpakeian hamuliaon
do Ia. Marpakeian anjaha margonditkon
hagogohon do Jahowa. Tongon, ipajonam
do dunia on, seng anjai dugur.

- ² Totap do paratas-Mu humbani nabasaia,
humbani mula ni mulani domma dong Ham.

- ³ Marbanggal do bah, Ham Jahowa, maling do pardosong ni bah, doras tumang do parhasakni.
- ⁴ Gogohan marimbang parhasak ni bah marbanggal. gogohan marimbang pargilumbang ni laut, lobih markuasaan do Jahowa i nagori atas.
- ⁵ Hasaksian-Mu, tongon do tarhatengerhon, hapansingon do na patut bani rumah-Mu, Ham Jahowa ronsi sadokah ni dokahni.

Naibata do Sipambalas na Bonar

- 94** ¹ Ham Naibata Jahowa sipambalas, Ham Naibata, sipambalas, roh ma Ham ibagas sondang-Mu!
- ² Jongjong ma Ham, ale Sipanguhum tanoh on, balaskon Ham ma pambahenan ni sigijang uhur.
- ³ Piga dokah on parjahat in, Ham Jahowa, piga dokah on, sai marsurak-surak parjahat in?
- ⁴ Sai hata hajungkaton do isahapkon sidea, sai toal do parsahap ni ganup sihorjahon hajahaton.
- ⁵ Sai irojati sidea do bangsa-Mu, Ham Jahowa, sai iodoh-odoh do parbagianan-Mu.
- ⁶ Ibunuhi sidea do na mabalu pakon halak panginsolat, anjaha isongkiki halak na tading maetek,

- 7 nini, "Seng ididah Jahowa in, anjaha seng sai ipabotoh-botoh Naibata ni si Jakob."
- 8 Botoh ma, ale halak na oto i tongah-tongah ni bangsa in, anjaha hanima halak na lontong, antigan pe maruhur hanima?
- 9 Ia, sisuan pinggol, mintor ma lang marpanangar? Ia, sijadihon mata, mintor ma lang marpangidah?
- 10 Ia, siajar bangsa-bangsa, mintor ma lang manguhum? Ia, sipangajarijolma, mintor ma lang marpambotoh?
- 11 Jahowa do sitanda pingkiran nijolma; tongon, haganupan ai logou do.
- 12 Martuah do halak ni niajar-Mu, Ham Jahowa, anjaha na pinodahan-Mu marhitei titah-Mu.
- 13 laho pasonangkonsi bani ari na jahat, ronsi siap ihurak tanoman bani parjahat.
- 14 Halani, seng anjai tulakon ni Jahowa bangsa-Ni, anjaha seng tadingkonon-Ni parbagianan-Ni.
- 15 Tongon, sai mulak hu hapintoron do uhum, anjaha ihutkonon ni sagala na pintor uhur do in.
- 16 Ise ma nani hasomanku laho mangimbang parjahat? Ise ma nani sipangurupi bangku manlawan sihorjahon hajahaton?

- ¹⁷ Ambit lang Jahowa sipangurupi bangku, narus
ma marianan tonduyhu bani ianan na
malungun.
- ¹⁸ Anggo hupingkir, “Jiris ma naheihu, jadi
itungkol parontou ni uhur-Mu do ahu, Ham
Jahowa.”
- ¹⁹ Sanggah lutu pingkiranku ibagas, jadi
apoh-apoh-Mu do pasonang uhurhu.
- ²⁰ Mintor sapanriah ma Ham pakon halak
sihunduli hotak hamagouan, na mamingkiri
hamagouan marsipakulah-kulahkon
habonaron?
- ²¹ Iparburu sidea do hosah ni parpintor, anjaha
idabuh uhum bani daroh na so marpipot.
- ²² Tapi Jahowa do batar-batar bangku, anjaha
Naibatangku dolog batu, haporusan bangku.
- ²³ Ia do mambalaskon bani sidea hajahaton
ni sidea ai; boiskonon-Ni do sidea halani
hajahaton ni sidea. Tongon, boiskonon ni
Jahowa Naibatanta do sidea.

Ojur-ojur Pasangap Jahowa ampa Mambalosi-Si

- 95** ¹ Eta, dodingkon hita ma Jahowa, olobkon
hita ma dolog batu, hatuahonta in.
- ² Roh ma hita hu lobei-Ni marhasoman
puji-pujian, olobkon hita ma la marhitei
doding.

- ³ Ai Naibata na bangga do Jahowa, Raja Na
Bolon, siatasi sagala naibata-naibata.
- ⁴ Ibagas kuasa-Ni do luhung ni tanoh, anjaha gok
Bani do pakpak ni dolog.
- ⁵ Ia do simada laut anjaha Ia do na manompa
ai, anjaha tanoh darat, tangan-Ni do na
manjadihon ai.
- ⁶ Masuk ma hita, manrogop anjaha marsombah;
manrogop ma hita i lobei ni Jahowa,
Sitompa hita.
- ⁷ Ai Ia do Naibatanta, anjaha hita bangsa
pinarmahan-Ni, biribiri tinogu-togu ni
tangan-Ni. Ah, sadari on ma namin itangihon
hanima sora-Ni!
- ⁸ Ulang ma pahengkeng hanima uhurnima,
songon na i Meriba, songon bani ari na i
Massa, i halimisan,
- ⁹ sanggah ni lajou ni ompungnima Ahu,
niuji ni sidea ai Ahu, age pe dob ididah
pambahenan-Ku.
- ¹⁰ Ompat puluh tahun dokahni sai sogam do
uhur-Hu bani bangsa on, jadi ningku ma,
“Bangsa paruhur na kahou do sidea, seng
itandai sidea dalan-Ku.”
- ¹¹ Halani ai marbija do Ahu ibagas ringis-Ku: Seng
malo masuk sidea bani parsaranan-Ku.

Puji-pujian bani Jahowa, Raja Siuhum Tanoh on

- 96** ¹ Dodingkon nasiam ma sada doding na bayu bani Jahowa, dodingkon nasiam ma Jahowa, ale ganup tanoh on!
- ² Dodingkon nasiam ma Jahowa, puji ma goran-Ni; ambilankon nasiam ma hatuahon-Ni, ganup ari!
- ³ Baritahon nasiam ma i tongah-tongah ni sipajuh begu-begu hamuliaon-Ni, i tongah-tongah ni bangsa-bangsa halongangan binahen-Ni ai.
- ⁴ Ai banggal do Jahowa, talup tumang sipujion, marjumbalang do Ia i atas ni sagala naibata.
- ⁵ Ai na lang do naibata ni bangsa-bangsa, tapi Jahowa do sijadihon langit.
- ⁶ Hasangapon ampa hamuliaon do i lobei-Ni, hagogohon pakon hatunggungan do bani ianan-Ni na ma pansing in.
- ⁷ Bere nasiam ma bani Jahowa, ale bangsa-bangsa, bere nasiam ma bani Jahowa hamuliaon pakon hagogohon.
- ⁸ Bere nasiam ma bani Jahowa hamuliaon ni goran-Ni, boan nasiam ma galangan, masuk ma nasiam bani alaman-Ni!
- ⁹ Manrogop ma nasiam i lobei ni Jahowa marpakeian na ma pansing, hitir-hitir ma i lobei-Ni, ale ganup tanoh on!

- ¹⁰ Hatahon ma i tongah ni bangsa parbegu,
 “Jahowa do Raja; la do na pajonamkon
 dunia on, seng anjai dugur; uhumon-Ni do
 sagala bangsa ibagas hapintoron.”
- ¹¹ Marmalas ni uhur ma langit anjaha marolob-
 olob ma tanoh on, marhasak ma laut pakon
 pangisini.
- ¹² Marmalas ni uhur ma ladang ampa ganup
 na ijai, age sagala hayu na i harangan
 marolob-olob ma,
- ¹³ i lobei ni Jahowa, ai tongon roh ma la
 manguhum tanoh on. Uhumon-Ni ma dunia
 on ibagas hapintoron ampa bangsa-bangsa
 ibagas hasintongan-Ni.

Raja na Marjumbalang do Jahowa

- 97** ¹ Jahowa do Raja. Marsurak-surak ma tanoh
 on, marmalas ni uhur ma sagala pulou!
- ² Hombun ampa na golap marimpot-impot do
 manginggoti-Si, hapintoron pakon uhum do
 onjolan ni hotak-Ni.
- ³ Mardalan do apuy i lobei-Ni, laho mamboiskon
 imbang-Ni inggot.
- ⁴ Hilap-Ni do manondangi dunia on, ididah tanoh
 ma ai gabe dugur.
- ⁵ Dolog-dolog malala songon lilin i lobei ni
 Jahowa, i lobei ni Tuhan ni sab tanoh on.

- ⁶ Langit mangambilankon hapintoron-Ni, anjaha sagala bangsa mangidah hamuliaon-Ni.
- ⁷ Maila do sagala sisombah gana-gana, halak na marmogah-mogah bani sisombahonni; ningon marsombah Bani do sagala naibata-naibata.
- ⁸ Mambogei ai marmalas ni uhur ma Sion, marolob-olob boru Juda, halani panguhum-Mu, ale Jahowa.
- ⁹ Ai Ham do, ale Jahowa, Sitimbulan i atas ni sab tanoh on. Gijang tumang do Ham i atas ni sagala naibata.
- ¹⁰ Ihaholongi Jahowa do na mangkagigihon na masambor. Ia do na manramotkon tonduy ni na hinaholongan-Ni, anjaha ipaluah do sidea humbani tangan ni parjahat.
- ¹¹ Marsinalsal do na liarh bani halak parpintor, anjaha malas ni uhur bani sibujur uhur.
- ¹² Marmalas ni uhur na nasiam, ale parpintor, ibagas Jahowa, anjaha puji nasiam ma goran-Ni na pansing in.

Ojur-ojur Mangolobkon Jahowa, Sipaluah in

98 ¹ Sada Psalm. Dodingkon nasiam ma sada doding na bayu bani Jahowa, ai ia do sibahen halongangan; tangan siamun-Ni do na mangurupi-Si, sonai age botohon-Ni na pansing in.

- ² Domma ipabotohkon Jahowa hatuahon-Ni,
i lobei ni bangsa-bangsa ipatalar do
hapintoron-Ni.
- ³ Idingat do idop ni uhur-Ni ampa hasintongan-Ni
bani ginompar ni Israel. Ganup ujung ni
tanoh on mangidah haluahon na humbani
Naibatanta.
- ⁴ Olobkon ma Jahowa, ale sab tanoh on,
marmogah-mogah ma, marsurak anjaha
mandoding ma nasiam!
- ⁵ Puji ma Jahowa marhasoman husapi,
marhasoman husapi ampa doding na
gomos,
- ⁶ marhasoman tarompit pakon sora ni tanduk,
marsurak ma i lobei ni Raja Jahowa.
- ⁷ Mardorom ma laut pakon sagala isini, sonai
dunia on ampa na mangiankonsi.
- ⁸ Martopap-topap ma bah mardalan,
marolob-olob ma rap-rap sagala dolog,
- ⁹ i lobei ni Jahowa, ai roh do la laho manguhum
tanoh on. Uhumon-Ni ma dunia on marhitei
hapintoron ampa sagala bangsa marhitei
hasintongan.

Jahowa, Raja Na Pansing anjaha Na Pintor

99 ¹ Jahowa do Raja, hitir ma sagala bangsa;
marhotak do la bani herubim, dugur ma
tanoh on.

- ² Banggal do Jahowa i Sion, anjaha timbul do la i atas ni sagala bangsa.
- ³ Ipuji sidea ma goran-Mu na timbul anjaha matunggung in! Pansing do la!
- ⁴ Ham Raja siparkuasa, sihaolongi uhum, Ham do patotapkon uhum; Ham do na pamasa hapintoron pakon uhum bani Jakob.
- ⁵ Pagijang nasiam ma Jahowa Naibatanta in, manrogop ma nasiam bani sidogeian ni nahei-Ni! Pansing do la.
- ⁶ Si Musa pakon si Aron, na i tengah-tengah ni malim-Ni, ampa si Samuel na i tengah-tengah ni na mandilo goran-Ni, dilo-dilo do sidea bani Jahowa, jadi ibalosi do sidea.
- ⁷ Humbagas hambun na jongjong do la marsahap bani sidea; idalankon sidea do hasaksian-Ni, ampa titah na binerehon-Ni bani sidea.
- ⁸ Ham Jahowa Naibatanami, ibalosi Ham do sidea, Naibata parontou ni uhur do Ham bani sidea, age pe Siparlulu Ham bani salah ni sidea.
- ⁹ Pagijang nasiam ma Jahowa Naibatanta, manrogop ma nasiam bani dolog-Ni na pansing in! Tongon, pansing do Jahowa Naibatanta.

Ojur-ojur Mamuji Jahowa, Paridop Uhur in

100 ¹ Psalm bani galangan hatarimakasihon.
Puji ma Jahowa, ale sab tanoh on!

² Balosi nasiam ma Tuhan in ibagas malas ni uhur,
roh ma nasiam hu lobei-Ni marhasoman
olob-olob.

³ Botoh nasiam ma, Jahowa, la do Naibata. la
do na manompa hita, la do simada hita,
bangsa-Ni anjaha biribiri na pinarmahan-Ni.

⁴ Masuki nasiam ma horbangan-Ni marhitei
hatarimakasihon, sonai alaman-Ni marhitei
puji-pujian. Martarima kasih ma nasiam
Bani, puji nasiam ma goran-Ni!

⁵ Ai pardear layak do Jahowa, ronsi sadokah
ni dokahni do idop ni uhur-Ni, anjaha
marsundut-sundut do hasintongan-Ni.

Panrajaion ni Raja na Pintor

101 ¹ Humbani si Daud. Sada Psalm. Sihol do
dodingkononku pasal habujuron ampa
uhum; Bamu, ale Jahowa, sihol do ahu
mamuji-muji.

² Sihol paruhurhononku do parlahou
na sintong. Antigan do Ham roh marayak
ahu? Sihol do marparlahou na sintong ahu i
tongah ni jabungku.

- ³ Seng ra ahu mannahkon na masambor i lobei ni matangku; magigi do ahu bani horja panlanggaron, seng dais sisonai bangku.
- ⁴ Daoh do humbangku uhur hagedukon, na masambor seng hutanda.
- ⁵ Halak na marhata tundal bani hasomanni, hupasip do, halak parmata na epes ampa sigijang uhur, seng huharosuhkon.
- ⁶ Sai mangkawah do matangku dompak sibujur uhur ni nagori in, ase marianan sidea rapkon ahu; halak na mardalan bani hadaulaton, ai do siparugas bangku.
- ⁷ Seng bulih marianan i rumahku sihorjahon panipuon; halak sihatahon ladung, seng boi jongjong i lobei ni panonggorhu.
- ⁸ Siap sogod do husiapkon parjahat na i nagori in, laho mamboiskon hun huta ni Jahowa sagala sihorjahon hajahaton.

Tonggo Mangkopkop Sion

102 ¹ Tonggo ni sada halak na madoyuk ibagas hagelokkonni, anjaha iuseihon tangisni ai i lobei ni Jahowa. (102-2) Ham Jahowa, tangihon ham ma tonggongku, sai das ma Bamu dilo-dilongku.

- ² (102-3) Ulang lingodkon Ham bohi-Mu humbangku sanggah hasosakanku. Paeleng

Ham ma pinggol-Mu hu bangku; sanggah
hudilo Ham, balosi Ham ma ahu podas.

³ (102-4) Ai magou do ari-ari ni goluhku songon
timus, anjaha gara do holi-holingku songon
parapuyan.

⁴ (102-5) Mosog do pusu-pusungku anjaha
melus songon poyon-poyon, gabe lupa ahu
mangan sipanganonku.

⁵ (102-6) Halani gogoh ni pangorongku, longkot
do holi-holingku bani hulingkulingku.

⁶ (102-7) Songon onggang na i halimisan ahu,
songon langkupa i tongah-tongah ni na
mareong.

⁷ (102-8) Seng ra tarpodom ahu, songon
manuk-manuk na punjung bani tayub do
ahu.

⁸ (102-9) Manipat ari do ahu irisai munsuhku,
halak na manggila dompak ahu, mamapai
marhitei goranku.

⁹ (102-10) Hupangan do abuan songon
ruti, anjaha husaorhon do iluhku bani
siinumonku.

¹⁰ (102-11) halani ringis-Mu pakon gila-Mu;
iangkat Ham do ahu, dob ai iambalhon Ham.

¹¹ (102-12) Songon halinoh na manabad do
goluhku, anjaha melus do ahu songon
poyon-poyon.

- ¹² (102-13) Tapi anggo Ham Jahowa, sadokah ni dokahni do marparatas, anjaha goran-Mu tardingat do marsundut-sundut.
- ¹³ (102-14) Jongjongkon Ham ma, maidop ma uhur-Mu bani Sion, ai domma jumpah panorangni mangkaholongisi, tongon, domma das panorang na binuhul hinan.
- ¹⁴ (102-15) Ai holong do uhur ni juakjuak-Mu bani batuni, anjaha pusok uurni mangidah parreongni.
- ¹⁵ (102-16) Jadi habiaran ni bangsa parbegu ma use goran ni Jahowa, ampa raja-raja na i tanoh on hamuliaon-Mu,
- ¹⁶ (102-17) anggo ipajongjong Jahowa ma use Sion, ipataridahkon diri-Ni ibagas hamuliaon-Ni;
- ¹⁷ (102-18) idompakkon diri-Ni bani tonggo ni halak na so mardiha-diha, anjaha seng mapas uhur-Ni bani elek-elek ni sidea.
- ¹⁸ (102-19) Suratkon ma ai bani sundut na roh, anjaha bangsa na sihol jadi ope, pujion ni ma Jahowa,
- ¹⁹ (102-20) halani marpanatap do la dompak toruh humbani ianan na ma pansing na gijang ai, marpanatap Jahowa hun nagori atas hu tanoh on,

- ²⁰ (102-21) laho manangihon hoih-hoi na
tartutup, laho paluahkon halak na dob
ondos hu hamatean,
- ²¹ (102-22) ase ibaritahon halak goran ni Jahowa
i Sion ampa puji-pujian-Ni i Jerusalem,
- ²² (102-23) bani na martumpu ijai bangsa-bangsa
ampa harajaon laho mambalosi Jahowa.
- ²³ (102-24) Ia do na mamonggolhon gogohku
i tengah dalan, anjaha ipapondok do
ari-aringku.
- ²⁴ (102-25) Ningku, “Ham Naibatangku, ulang
alop Ham ahu bani partongahan ni goluhku,
Ham pargoluh na marsundut-sundut.
- ²⁵ (102-26) Sapari Ham do na pajonamkon tanoh
on, anjaha jadi-jadian ni tangan-Mu do
sagala langit.
- ²⁶ (102-27) Haganupan ai laho salpu do, tapi
totap do anggo Ham; laho buruk do ai
haganup songon hiou, songon sakei-sakei
igantih Ham sidea, jadi masab ma sidea.
- ²⁷ (102-28) Tapi anggo Ham totap do, seng
marpunsa tahun-Mu.
- ²⁸ (102-29) Sai sonang do marianan ginompar ni
juakjuak-Mu, anjaha totap do i lobei-Mu
ginompar ni sidea.”

Puji-pujian bani Jahowa, Paridop Uhur in

- 103** ¹ Humbani si Daud. Puji ma Jahowa,
ale tonduyhu, anjaha humbani gok ni
uhurhu mamuji goran-Ni na pansing in!
- ² Puji ma Jahowa, ale tonduyhu, anjaha ulang ma
halupahon ganup dear layak-Ni!
- ³ Ia do na manasap sagala dousamu, anjaha na
pamalumkon sagala naboritmu;
- ⁴ na paluahkon goluhmu humbani hamagouan,
na mansortalihon bam dear layak ampa
idop ni uhur,
- ⁵ na pabosurhon sura-suramu marhitei na
madear, ase mulak bayu haposoonmu
songon manuk-manuk nanggordaha.
- ⁶ Jahowa, na mambahen hapintoron, anjaha na
pasintongkon uhum bani halak na hona
doron,
- ⁷ Ia do na pabotohkon dalan-Ni bani si Musa,
hubani anak ni Israel pambahenan-Ni.
- ⁸ Paridop ni uhur anjaha pardear layak do
Jahowa, nanget manringis anjaha paridop ni
uhur banggal.
- ⁹ Seng torus la manggila, anjaha seng marah la
ronsi sadokah ni dokahni.
- ¹⁰ Seng ibahen hu banta romban hubani
dousanta, anjaha seng ibalaskon banta
romban hubani hajahatonta.

- 11 Tapi songon gijang ni langit hun tanoh on,
sonai do banggal ni idop ni uhur-Ni bani
sagala na mangkabiari-Si.
- 12 Songon daoh ni hapoltakan humbani
hasundutan, sonai do ipadaoh
panlanggaronta hun banta.
- 13 Songon idop ni uhur ni bapa bani niombahni,
sonai do idop ni uhur ni Jahowa bani sagala
na mangkabiari-Si.
- 14 Ai ibotoh do sonaha tompanta, idingat do,
orbuk do anggo hita.
- 15 Ia jolma in, songon poyon-poyon do, marbunga
do ia songon bunga na i talun;
- 16 montas honsi logou seng dong be ia, anjaha
seng natandai be iananni.
- 17 Tapi anggo idop ni uhur ni Jahowa totap do
ronsi sadokah ni dokahni bani sagala na
mangkabiari-Si, anjaha hasintongan-Ni
marnini marnono,
- 18 bani na manramotkon padan binahen-Ni,
pakon na mardingat parentah-Ni laho
mandalankon ai.
- 19 Domma ipajonam Jahowa paratas-Ni i surga,
anjaha panggomgomion-Ni manrajai
haganup.
- 20 Puji ma Jahowa, nasiam sagala malekat-Ni,
nasiam, sagala puanglima na margogoh,
sipasaud hata-Ni!

²¹ Puji ma Jahowa, nasiam sagala bala-Ni, nasiam sagala siparugas Bani, sipasaud harosuh ni uhur-Ni!

²² Puji ma Jahowa, ale jadi-jadian-Ni, bani ganup ianan ni harajaon-Ni! Puji ma Jahowa, ale tonduyhu!

**Puji-pujian Mardingat Panompaon
ampa Pambahenan ni Jahowa**

104 ¹ Puji ma Jahowa, ale tonduyhu! Ham Jahowa Naibatangku, banggal tumang do Ham, hasangapon pakon hamuliaon do pakeian Bamu.

² Haliharon do isabingkon Ham Bamu songon salimut, ipaherbang Ham do langit songon tenda.

³ Ibahen Ham do loteng-Mu i babou ni bah, hambun do ibahen Ham gareta-Mu, anjaha mardalan-dalan do Ham i atas ni habong ni logou.

⁴ Ibahen Ham do logou gabe suruhan-Mu, apuy na marjilam-jilam gabe siparugas-Mu.

⁵ Domma ipajonam Ham tanoh on bani palasni, seng anjai dugur be sadokah nidokahni.

⁶ Bah bagas na hampar do manrungkubsi, tinob do sagala dolog ibahen bah.

⁷ Maporus do ai ibahen pangasupi-Mu, tarolos do sidea lintun ibahen sora ni longgur-Mu;

- ⁸ gabe timbul ma dolog, matornoh lombang bani
ianan na dob tinotapkon-Mu bani sidea.
- ⁹ Domma itotapkon Ham parbolatan bani bah na
so malo lopusanni, seng anjai rungkubonni
be tanoh.
- ¹⁰ Ham do na patubuh bah tubuh i lombang-
lombang, na mambahen mabaor bahni i
holangkolang ni dolog-dolog,
- ¹¹ na mambere minum sagala binatang na i talun,
anjaha halode jalang sombuh horahni ijai;
- ¹² marasari do i topi ni manuk-manuk na i
awang-awang, na patangarhon dodingni
hun ranting-ranting.
- ¹³ Ham do na painum dolog humbani loteng-Mu,
anjaha bosur do tanoh on marhitei
hombun-Mu.
- ¹⁴ Ham do patubuhkon poyon-poyon bani
pinahan, ampa suan-suanan sihorjahonon ni
jolma, mambahen mandarat ruti humbagas
tanoh,
- ¹⁵ ampa anggur laho pamalas uhur ni jolma,
pakon minak na mambahen marminak bohi
pakon ruti na pagogohkon uhur ni jolma.
- ¹⁶ Bosur do ganup hayu ni Jahowa, hayu ares na i
Libanon, na sinuan-Ni ai;
- ¹⁷ ijai do marasari manuk-manuk, tanda ulog
marjabu bani tusam.

- 18 Dolog na gijang do ianan bani bedar, anjaha
dolog batu haporusan bani sorigala.
- 19 Ham do mambahen bulan laho manotapkon
panorang, mata ni ari ibotoh do ianan
hasundutanni.
- 20 Ia dongkon Ham do na golap jadi tubuh ma
borngin, ai ma panorang mandarat sagala
binatang harangan.
- 21 Singa ajar-ajar maraum mangindahi sisorohon,
ipangindo sipanganonni humbani Naibata.
- 22 Anggo poltak ma mata ni ari, mulak bei ma
sidea, manggompang ibagas liangni.
- 23 Kaluar ma jolma manohu horjani, mandalankon
lahoanni ronsi bod ari.
- 24 Buei tumang do jadi-jadian-Mu, Ham
Jahowa, haganupan in ipauli Ham marhitei
hapentaran, gok do tanoh on bani na
tinompa-Mu.
- 25 Tonggor ma, laut na ampar bolag tumang,
ijai do gumayom, seng habilangan,
binatang-binatang na etek age na banggal.
- 26 Ijai do manjuluri binatang laut na majombut,
sonai age Leviatan na jinadihon-Mu,
marguro-guro do ijai.
- 27 Haganup, Bamu do marpangarapan, ase ibere
Ham sipanganonni bei bani panorangni.

- ²⁸ Anggo ibere Ham bani sidea, boi ma sidea
patumpuhon; anggo ibuha Ham tangan-Mu,
bosur ma sidea bani na madear.
- ²⁹ Anggo iponopkon Ham bohi-Mu, tarsonggot
ma sidea; anggo ibuat Ham hosahni, matei
ma sidea, mulak bani orbukni hinan.
- ³⁰ Anggo itongos Ham Tonduy-Mu, tartompa ma
sidea, anjaha bayu ma rupa ni tanoh on
ibahen Ham.
- ³¹ Ronsi sadokah ni dokahni do hamuliaon ni
Jahowa, malas do uhur ni Jahowa mangidah
jadi-jadian-Ni.
- ³² Mangkawah la bani tanoh on gabe dugur ma,
ijamah dolog gabe martimus ma.
- ³³ Sai dodingkononku do Jahowa sadokah
goluhku, sai dodingkononku do Naibatangku
sadokah dong ahu.
- ³⁴ Sai marosuh ma la bani dodingku, marmalas ni
uhur do anggo ahu ibagas Jahowa.
- ³⁵ Sai bois ma sagala pardousa hun tanoh on,
anjaha ulang be dong halak parjahat. Puji
ma, Jahowa ale tonduyhu! Haleluya!

**Puji-pujian halani Panogu-noguon
ni Jahowa bani Bangsa-Ni**

105 ¹ Puji nasiam ma Jahowa, dilo ma
goran-Ni, pabotohkon nasiam ma

pambahenan-Ni i tongah-tongah ni
 bangsa-bangsa!

² Dodingkon nasiam ma la, dodingkon ma
 puji-pujian Bani, sahapkan nasiam ma
 ganup horja halongangan-Ni in.

³ Marmogah-mogah ma nasiam ibagas goran-Ni
 na pansing in; marmalas ni uhur ma sagala
 sipindah Jahowa.

⁴ Pindahi nasiam ma Jahowa pakon hagogohon-
 Ni, pindahi nasiam ma tongtong bohi-Ni.

⁵ Paingat-ingat nasiam ma sagala halongangan na
 binahen-Ni, tanda halongangan-Ni pakon
 uhum niluarhon ni pamangan-Ni,

⁶ nasiam, ale ginompar ni si Abraham, juakjuak-Ni
 in, nasiam, ale anak ni si Jakob, na pinilih-Ni
 in!

⁷ la Jahowa, la do Naibatanta, sab do bani dunia
 on uhum-Ni.

⁸ Idingat do tongtong padan na binahen-Ni,
 hata na niluarhon-Ni hubani marribu-ribu
 sundut,

⁹ ai ma padan binahen-Ni bani si Abraham ampa
 bulawan-Ni bani si Isak.

¹⁰ Ipajongjong do ai bani si Jakob gabe aturan,
 bani Israel gabe padan sadokah ni dokahni;

¹¹ nini, "Hu bam do berehonon-Ku tanoh Kanaan;
 gabe tean-teanan tanoh parbagiananmu."

- 12 Sanggah seng sadiha ope bilangan ni sidea,
otik hansa anjaha panginsolat ijai;
- 13 marbungkas-bungkas humbani bangsa hu
bangsa, humbani sada harajaon hu harajaon
na legan,
- 14 seng ibere age sahalak mangarsik sidea, ipapai
do tene raja-raja marhalanohon ni sidea:
- 15 Nini, "Ulang kahua hanima halak na niminakan-
Ku, ulang bahen hanima na jahat bani
nabing-Ku."
- 16 Sanggah na ipamasa lohei bani tanoh in,
anjaha na binolahkon-Ni sagala parbohalan
ni sipanganon.
- 17 Isuruh ma sada halak parlobei ni sidea, ai ma si
Josep na tarjual songon jabolon.
- 18 Naheini igari bosi janah borgokni irantai bosi
- 19 paima das nidok ni hata-Ni, gabe saud hata ni
Jahowa.
- 20 Isuruh raja ma na paluahkonsi, sirajai
bangsa-bangsa mangkatahon paluahon ia;
- 21 ipabangkit ma ia gabe tuan i rumahni, ampa
panggomgom bani sagala artani,
- 22 laho mangajari gamot-gamotni mangihutkon
rosuhni, ampa mamodahkon hauhuron bani
pangintuai-pangintuai.
- 23 Dob ai roh ma Israel hu Masir, manginsolat ma
si Jakob i tanoh ni si Ham.

- 24 Ibahen ma bangsa-Ni ai manggargar tumang,
gogohan humbani imbangni.
- 25 Ipagoling ma uhur ni sidea laho mandomdomi
bangsa-Ni, mambahen akal-akal bani
juakjuak-Ni.
- 26 Dob ai isuruh ma si Musa, juakjuak-Ni ai, pakon
si Aron, na pinilih-Ni ai.
- 27 Ipamasa sidea ma partanda ni Jahowa i tanoh
Masir ampa halongangan i tanoh ni si Ham.
- 28 Iparoh ma na golap gabe lotir ma, tapi seng
iparuhurhon sidea hata-Ni.
- 29 Ipaubah do bah ni sidea gabe daroh, gabe
matei ma sagala dengke ni sidea.
- 30 Gumayom ma tiktikan i tanoh ni sidea, pala das
hu kamar ni raja-raja ni sidea.
- 31 Marsahap ma la, jadi marrohan ma siranggang,
rongit bani sab nagori ni sidea.
- 32 Itongos do bani sidea udan sira-sira, gok jirlam
ni apuy do tanoh ni sidea.
- 33 Iparseda ma pohon anggur pakon hayu ara
ni sidea, marpongolan do hayu bani sab
nagori ni sidea.
- 34 Marsahap ma la, marrohan ma balang ampa
tamponok na so habilangan,
- 35 jadi ipampangani ma sagala suan-suanan i
tanoh ni sidea, iboiskon ma gogoh ni juma
ni sidea.

- ³⁶ Ibogbog ma sagala bunga-tubuh i nagori
ni sidea, pamungkah ni gogoh ni sidea
ganupan.
- ³⁷ Dob ai iboan ma sidea mandarat marnah omas
pakon pirak, seng dong humbani marga ni
sidea na targompang.
- ³⁸ Malas ma uhur ni Masir dob haluar sidea, ai
sogop do bani sidea biar mangidah Israel.
- ³⁹ Ipaherbang ma hambun manrongkob bani
sidea, sonai apuy laho paliharhon borngin.
- ⁴⁰ Mangindo sidea, gabe iparoh ma leto, anjaha
ipabosur ma sidea mangan ruti na hun
nagori atas.
- ⁴¹ Ibuha ma dolog batu, jadi marbaoran ma bah,
mardalan i halimisan songon binanga,
- ⁴² halani idingat do hata-Ni na pansing in, ai ma
na hubani si Abraham, juakjuak-Ni in.
- ⁴³ Ipadarat do bangsa-Ni ai ibagas malas ni uhur,
na pinilih-Ni ai marhasoman olob-olob.
- ⁴⁴ Ibere ma bani sidea tanoh ni sipajuh begu-begu
- ⁴⁵ ase iramotkon sidea aturan-Ni, anjaha
iparahouhon titah-Ni. Haleluya!

**Totap ni Idop ni Uhur ni Naibata
hansi pe sai Mangosei Israel**

106 ¹ Haleluya! Puji ma Jahowa, ai pardear
layak do la, anjaha ronsi sadokah ni
dokahni do idop ni uhur-Ni.

- ² Ise do na boi mambaritahon sagala
pambahenan ni Jahowa, anjaha pabogeihon
puji-pujian-Ni?
- ³ Martuah ma halak na manramotkon uhum, na
mandalankon hapintoron tongtong.
- ⁴ Ingat Ham ma ahu, ale Jahowa, domu hubani
pangkaholongi-Mu bani bangsa-Mu, tohu
Ham ma ahu rap pakon haluahon na hun
Bamu;
- ⁵ ase hupaidah-idah hadearon ni na pinilih-Mu,
ase marolob-olob ibagas olob-olob ni
bangsa-Mu, anjaha mamuji-muji rap pakon
pusaka-Mu.
- ⁶ Domma mardousa hanami songon
ompungnami, domma marsalah anjaha
domma manjahati hanami.
- ⁷ Ompungnami i Masir seng iartihon halongangan
na binahen-Mu, seng idingat sidea buei
ni hinalayak-Mu, tapi manlawan do sidea
dompok Sitimbulan in i lambung ni laut
arung-arung.
- ⁸ Tapi ipaluah do sidea halani goran-Ni, laho
pabotohkon hagogohon-Ni.
- ⁹ Iporjat do laut arung-arung, gabe horah ma,
ipadalan ma sidea humbani luhung ni bah
songon na bani halimisan.

- 10 Ipaluah do sidea humbani tangan ni halak pardomdom, anjaha itobus sidea humbani tangan ni munsuh.
- 11 Irungkub bah do imbang ni sidea, sahalak pe lang na tading.
- 12 Jadi porsaya ma sidea bani hata-Ni, anjaha idodingkon puji-pujian Bani.
- 13 Tapi podas-podas do sidea lupa bani pambehanan-Ni, seng ra sidea marguru bani rosuh-Ni.
- 14 Isuhun-suhuni sidea do hisap-hisapni i halimisan, anjaha ilajou do Naibata i tanoh dorging.
- 15 Ibere do bani sidea na hinarosuhkon ni sidea, tapi ibahen do sobalan tonduy ni sidea.
- 16 Simburu do sidea bani si Musa i parlampolampoan ai, sonai homa bani si Aron na pinapansing bani Jahowa,
- 17 Jadi ipangangang tanoh ma babahni mamondut si Datan, anjaha irungkub humpulan ni si Abiram.
- 18 Apuy pe gara ma bani hulanan ni sidea, anjaha jirlam ni ai mangankon parjahat ai.
- 19 Ipauli sidea do sada anak ni lombu i Horeb anjaha isombah sidea ma gana-gana na tinuang ai.

- ²⁰ Igantihkon sidea do hasangapon ni Naibata,
bani gana-gana ni lombu sipangan
poyon-poyon.
- ²¹ Lupa do sidea bani Naibata na paluahkon
sidea, na mambahen habanggalon i tanoh
Masir,
- ²² halongangan na i tanoh ni si Ham ai ampa
pambahenan na majangin i lambung ni laut
arung-arung.
- ²³ Jadi ihatahon Jahowa ma boiskonon sidea,
ambit ulang si Musa, pinilih-Ni ai, jongjong
mangapiti sidea, pahombun ringis-Ni, ase
ulang iboiskon sidea.
- ²⁴ Itulak uhur ni sidea do tanoh harosuh ai, seng
porsaya sidea bani hata-Ni.
- ²⁵ Marmungut-mungut do sidea ibagas
lampolampo ni sidea, seng itangihon sidea
sora ni Jahowa.
- ²⁶ Jadi ipatoltol ma tangan-Ni dompak sidea, laho
manraseihon sidea i halimisan.
- ²⁷ laho mangamburhon ginompar ni sidea, i
tongah-tongah ni sipajuh begu-begu, anjaha
mangerap sidea bani nagori-nagori.
- ²⁸ Ipadohor sidea do dirini bani Baal-Pear, anjaha
ipangan sidea do galangan bani na matei.
- ²⁹ Ipuhoi sidea do ringis ni Jahowa marhitei
pambahenanni, jadi sogop ma sampar i
tongah-tongah ni sidea.

- ³⁰ Jadi jongjong ma si Pinehas, idalankon ma
uhum, gabe sonto ma sampar ai,
- ³¹ anjaha ihira ma ai gabe hapintoronni,
marsundut-sundut ronsi sadokah ni
dokahni.
- ³² Dob ai ipuhoi sidea do ringis-Ni bani Bah
Meriba, gabe mangonai hasedaon bani si
Musa halani sidea;
- ³³ ai sai igitiki sidea do uhurni, gabe tarlopus
bibirni marsahap.
- ³⁴ Seng iboiskon sidea sagala bangsa, songon na
dob hinatahon ni Jahowa hubani sidea.
- ³⁵ tapi ipasaor-saor sidea do dirini bani
sipajuh begu-begu, anjaha iguruhon do
pambahenan ni sidea.
- ³⁶ Ibalosi sidea do sisombahon ni sidea, ai ma
gabe siding bani sidea.
- ³⁷ Igalangkon sidea do anak ni sidea pakon boru
ni sidea, bani setan-setan.
- ³⁸ Iduruskon sidea do daroh na so marpipot,
ai ma daroh ni anak pakon boru ni sidea,
ginalangkon ni sidea bani sisombahon
ni halak Kanaan, gabe mabutak tanoh in
ibahen sapata ni daroh.
- ³⁹ Ipabutak sidea do dirini marhitei parlahouni,
gabe marbangkis sidea marhitei horjani.
- ⁴⁰ Jadi gara ma ringis ni Jahowa dompak
bangsa-Ni, gabe magigi la bani pusaka-Ni.

- ⁴¹ Iondoskon ma sidea hu tangan ni sipajuh
begu-begu, gabe halak na mandomdomi
sidea ma manggomgomi sidea.
- ⁴² Iodoh-odoh munsuh ni sidea ma sidea, gabe
tunduk ma sidea hu toruh ni tanganni.
- ⁴³ Gati tumang do ipaluah sidea, tapi sai ilawan
sidea do rosuh-Ni, gabe mogap halani
hajahatonni.
- ⁴⁴ Tapi itatap Jahowa do hasosakan ni sidea,
sanggah na itangar doruh-doruh ni sidea.
- ⁴⁵ Idingat ma padan-Ni na bani sidea, anjaha
isolsoli uhur-Ni domu hubani banggal ni
idop ni uhur-Ni.
- ⁴⁶ Jadi dapotan idop ni uhur ma sidea ibahen,
humbani halak na manaban sidea.
- ⁴⁷ Paluah Ham ma hanami, ale Jahowa,
Naibatanami, pahumpul Ham ma hanami
humbani sipajuh begu-begu, ase martarima
kasih hanami bani goran-Mu na pansing in,
anjaha marmegah-megah hanami mamuji
Ham.
- ⁴⁸ Na puji ma Jahowa, Naibata ni Israel, humbani
sadokah ni dokahni ronsi sadokah ni
dokahni, anjaha haganup ma bangsa
mangkatahon, "Amen! Haleluya!"

Doding Puji-pujian ni Halak na Pinaluah ni Jahowa

107 ¹ Puji ma Jahowa, ai pardear layak do la;
tongon ronsi sadokah ni dokahni do idop
ni uhur-Ni.

² Sonai ma sihatahononkon ni halak na pinaluah
ni Jahowa, na pinaluah-Ni humbani
odoh-odoh ni hasosakan,

³ na pinahumpul-Ni humbani sagala nagori, hun
hapoltakan pakon hun hasundutan, hun
utara pakon hun dangsina.

⁴ Sidea na mawat-awat i halimisan, bani ianan
na lungun, na seng dapotan dalan hu huta
siiankonon,

⁵ na horahan loheian, pala madotei uhurni
ibagas,

⁶ tapi na dilo-dilo bani Jahowa ibagas
hasosakanni, gabe ipaluah sidea humbani
harusakan ni sidea,

⁷ ibobahon sidea bani dalan na pintor, ase das
sidea bani huta siianonkon.

⁸ Ningon pujion ni sidea do Jahowa, halani idop
ni uhur-Ni ampa halongangan na binahen-Ni
bani anak ni jolma,

⁹ halani ipasombuh do tonduy na horahan,
anjaha ipabosur tonduy na loheian bani na
madear.

- 10 Sidea na hundul bani na golap ampa na
golap marimpot-impot, na hona gari bani
hamarsikon ampa bosì,
- 11 halani ilanggar sidea hata ni Naibata, anjaha
mapas bani podah ni Sitimbulan in,
- 12 gabe ipatoruh uhur ni sidea marhitei halojaon,
mangkatargompang sidea seng dong na
mangurupi,
- 13 tapi na dilo-dilo bani Jahowa ibagas
hasosakanni, gabe ipaluah sidea humbani
harusakon ni sidea,
- 14 ipadarat sidea humbani na golap marimpot-
impot, anjaha irotapi gari ni sidea.
- 15 Ningon pujion ni sidea do Jahowa, halani idop
ni uhur-Ni ampa halongangan na binahen-Ni
bani anak ni jolma,
- 16 halani na dob pinarseda-Ni ai horbangan
tombaga anjaha irosaki oruk-oruk bosì.
- 17 Sidea na marsik halani parlahouni na
masambor, anjaha hona bogbogan halani
hajahatonni,
- 18 na mangkagigihon sagala sipanganon, pala
domma das bani horbangan ni hamatean,
- 19 tapi na dilo-dilo bani Jahowa ibagas
hasosakanni, gabe ipaluah sidea humbani
harusakon ni sidea.
- 20 itongos hata-Ni anjaha ipamalun sidea, ipaluah
sidea humbani tanoman.

- ²¹ Ningon pujion ni sidea do Jahowa, halani idop
ni uhur-Ni ampa halongangan na binahen-Ni
bani anak ni jolma,
- ²² ningon galangkonon ni sidea do galangan
puji-pujian, anjaha baritahononni
pambahenan-Ni ai marhitei olob-olob.
- ²³ Sidea na markapal i laut, na marboniaga
mandipari bah bolag,
- ²⁴ na mangidah jadi-jadian ni Jahowa, ampa
halongangan na binahen-Ni ibagas laut,
- ²⁵ marsahap ma la, gabe roh ma logou haba-haba,
marbanggal gilumbang;
- ²⁶ naik sidea songon na hu langit, turun use hu
toruh, hu na bagas, magou uhurni halani
hasosakan,
- ²⁷ mirdong sidea anjaha rebad-rebad songon
halak na mabuk, magou haganup
hapandeian ni sidea,
- ²⁸ tapi na dilo-dilo bani Jahowa ibagas
hasosakanni, gabe ipaluah sidea humbani
harusakon ni sidea,
- ²⁹ ipasoh ma haba-haba ai gabe sonang, minop
homa pakon gilumbang.
- ³⁰ gabe marmalas ni uhur sidea halani na minop
ai, anjaha iboban sidea das bani labuhan na
sinintani.

- ³¹ Ningon pujion ni sidea do Jahowa, halani idop
ni uhur-Ni ampa halongangan na binahen-Ni
bani anak ni jolma,
- ³² ningon patimbulon ni sidea la i tongah-
tongah ni tumpuan ni bangsa in, anjaha
maningon pujion do la bani harungguan ni
pangintuai-pangintuai.
- ³³ la do na paubahkon bah mardalan gabe
halimisan, pakon tanoh na gokan bah gabe
tanoh dorging;
- ³⁴ tanoh na lambutan gabe tanoh garam, halani
hajahaton ni halak na marianan ijai.
- ³⁵ la do na paubahkon halimisan gabe tao, tanoh
dorging gabe hatubuhan ni bah.
- ³⁶ Ibahen do ijai marianan halak na loheian,
anjaha ijai ma itombe sidea huta siiankonon
ni sidea.
- ³⁷ Isuani sidea ma juma anjaha ipungkah pohon
anggur, na mambere ganup tahun gogohni.
- ³⁸ Ipasu-pasu do sidea manggargar, anjaha
pinahanni seng hurang ibahen.
- ³⁹ Tapi lambin moru ma sidea anjaha roh toruhni,
halani pandorunon, sitaronon pakon
hasombuhon.
- ⁴⁰ la na parohkon hahirion bani halak na
sangap-sangap, la do pakahou sidea bani
halimisan na so dong dalan.

- ⁴¹ Tapi halak na sombuh ipagijang do humbani
hadoyukon, anjaha ipabuei do ginompar ni
sidea marhulan-hulan.
- ⁴² ididah halak parpintor ma ai gabe marmalas
ni uhur, tapi sagala sihorjahon hajahaton
itutup bei ma babahni.
- ⁴³ Barang ise na pantas maruhur, iparimbagaskon
ma ai, anjaha iparuhurhon ma pangidopi ni
Jahowa.

Doding Puji-pujian ampa Tonggo Elek-elek

(ay. 2-6: pausih Ps. 57:8-12)

- 108** ¹ Sada doding. Psalm humbani si Daud.
(108-2) Sirsir do uhurhu, Ham Naibata,
sihol do ahu mandoding, Sihol do ahu
mamuji-muji. Puho ma ale tonduyhu,
² (108-3) puho ma ale arbap pakon husapi,
sihol puhoanku do buha siang ari.
- ³ (108-4) Sihol pujionku do Ham, ale Jahowa,
i tongah-tongah ni bangsa-bangsa, sihol
dodingkononku do Ham i tongah-tongah ni
marga-marga.
- ⁴ (108-5) Ai gijangan do marimbang langit idop ni
uhur-Mu, anjaha hasintongan-Mu das do
ronsi hambun.
- ⁵ (108-6) Patimbul Ham ma diri-Mu mangatasi
langit, Ham Naibata, anjaha hu sab tanoh
on hamuliaon-Mu,

- ⁶ (108-7) ase maluah halak na hinaholongan-Mu.
 Paluah Ham ma marhitei tangan siamun-Mu,
 anjaha balosi Ham ma ahu.
- ⁷ (108-8) Domma marsahap Naibata ibagas
 rumah-Ni na ma pansing: Sihol do Ahu
 marsurak-surak, sihol do bagion-Ku Sikem,
 anjaha pamah Sukot sibaron-Ku.
- ⁸ (108-9) Ahu do simada Gilead, Ahu do
 simada Manase; Efraim ai ma tangkuluk
 bani ulung-Ku, anjaha Juda tungkot ni
 harajaon-Ku.
- ⁹ (108-10) Moab ai ma mangkuk parburihan-Ku,
 hu Edom husampakkon sipatung-Ku,
 marsurak hamonangan do Ahu pasal
 Palistim.
- ¹⁰ (108-11) Ise do nani mambobai ahu hu huta na
 toguh ai? Ise do manaruhkon ahu das hu
 Edom?
- ¹¹ (108-12) Ai lang Ham do, ale Naibata, na dob
 manulak hanami, anjaha lang ra Ham luar,
 ale Naibata, mangkasomani hanami?
- ¹² (108-13) Bere Ham ma pangurupion bennami,
 dompak imbangnami, ai soya-soya do
 pangurupi ni jolma.
- ¹³ (108-14) Marhasoman Naibata tardalankon
 hita do horja habanggalon, anjaha la sandiri
 do manrojati imbangta.

Tonggo bani Sada Halak na Pinarburu

109 ¹ Bani pambobai koor. Humbani si Daud.
Sada Psalm. Ham Naibata, sipujionku,
ulang ma sip Ham!

² Ai ngangang do dompak ahu babah ni parjahat
pakon panipu, marsahap do sidea dompak
ahu marhasoman dilah siparladung.

³ Marhitei hata domdom iinggoti sidea ahu,
anjaha iporangi sidea do ahu seng marhala.

⁴ Balos ni holong ni uhurhu iaduhon sidea do
ahu, tapi anggo ahu sai martonggo do.

⁵ Ihonahon sidea do bangku hajahaton balos
ni na madear, anjaha domdom balos ni
pangkaholongingku.

⁶ Pahehe Ham ma parjahat dompaksi, anjaha
halak sipanukas jongjong i siamunni.

⁷ Bani na iuhumi ia, sai luar ma ia songon
parjahat, anjaha tonggoni sai gabe dousa
ma.

⁸ Sai roh otikni ma umurni, anjaha halak na legan
ma mambuat pangkatni.

⁹ Sai tading maetek ma niombahni, anjaha
mabalu ma jolmani.

¹⁰ Sai mambur merap ma niombahni gabe
sipangindo-indo, daoh sirang humbani
rumahni na dob pinarreong.

- 11 Sai ihabus sipabungahon duit ma sagala na
dong bani, anjaha halak na legan mangayob
na hinalojahonni.
- 12 Sai ulang ma dong na marholong ni atei bani,
sai ulang ma dong na maridop ni uhur bani
niombahni na tading maetek.
- 13 Sai ripas ma ginomparni, anjaha sai sasap ma
goranni bani sundut na mangihut.
- 14 Sai taringat ma dousa ni na lobeini bani
Jahowa, anjaha ulang ma hona sasap dousa
ni inangni.
- 15 Tongtong ma ai i lobei ni panonggor ni Jahowa,
anjaha masab ma hun tanoh on pardingatan
pasalsi,
- 16 halani lang idingat mambahen idop ni uhur,
tapi ipardakdak do halak na madoyuk
pakon na masombuh, sonai age paruhur na
madotei sihol mambunuh sidea.
- 17 Holong do uhurni bani bura-bura, sai
mangonai ma ai hu bani; seng marosuh ia
mamasu-masu, sai daoh ma ai hun bani.
- 18 Marpakeian bura-bura do ia, sai itorusi ma ia
songon bah, anjaha songon minak hubagas
holi-holini;
- 19 sai songon sabling na sinabingkon ma ai bani,
anjaha songon gondit na tongtong longkot
bani binongeiini.

- ²⁰ Ai ma namin upah humbani Jahowa hubani
sagala na manlawan ahu, pakon humbani
parsahap na masambor dompak ahu.
- ²¹ Tapi anggo Ham, ale Jahowa, Tuhanku, apiti
Ham ma ahu halani goran-Mu! Paluah Ham
ma ahu, romban hubani idop ni uhur-Mu.
- ²² Ai doyuk anjaha masombuh do ahu, anjaha
uhurhu maborit do ibagas.
- ²³ Magou do ahu songon halinoh bani panorangni
marganjang, anjaha ipirpirhon do ahu
songon balang.
- ²⁴ Reod-reod do towodku halani marpuasa,
merung do dagingku seng martaboh.
- ²⁵ Siapas-apason mando ahu bani sidea,
mangidah ahu, iupir-upirhon do uluni.
- ²⁶ Urupi Ham ma ahu, Ham Jahowa Naibatanku,
paluah Ham ma ahu romban hubani idop ni
uhur-Mu,
- ²⁷ ase ibotoh sidea tangan-Mu do in, Ham,
Jahowa, do sibahen in.
- ²⁸ Mamurai do sidea, tapi Ham do na mamasu-
masu. Sai bador ma sidea na manlawan
ahu, tapi marmalas ni uhur ma anggo
juakjuak-Mu on.
- ²⁹ Sai marpakeian hahirion ma sagala na
manukas-nukasi ahu, anjaha habadoron ma
manrungkub sidea songon salimut.

- ³⁰ Sai sihol do pujionku Jahowa marhitei
pamanganku, anjaha pujionku ma la i
tongah-tongah ni halak na mabuei.
- ³¹ Ai la do na jongjong i siamun ni halak na
masombuh, laho paluahkonsi humbani
halak na manguhum hosahni.

Raja Malim na Pinabangkit ni Jahowa

- 110** ¹ Humbani si Daud. Sada Psalm. Nini
Jahowa do hubani tuanku; Hundul ma ho
husiamun-Kon, paima Hubahen munsumu
gabe sidogeian ni naheimu.
- ² Tungkot kuasamu surdukkonon ni Jahowa
do hun Sion: Mamarentah ma ham i
tongah-tongah ni munsumu!
- ³ Marurup ma bangsamu roh humbani megah ni
uhurni bani ari parporanganmu, marpakeian
na ma pansing songon namur hubani
abingan ni buha siang ari, roh balamu na
maposo hu bamu.
- ⁴ Domma marbija Jahowa anjaha seng anjai
solsolan-Ni diri-Ni: Malim do ho ronsi
sadokah ni dokahni domu songon si
Melkisedek.
- ⁵ Tuhan do i siamunmu, irosaki do raja-raja bani
arini manringis.

⁶ Manguhum do la itongah-tongah ni bangsa-bangsa, gabe radag ma bangkei; irosaki do ulu bani sampalan bolag.

⁷ Humbani bah na i topi dalan do la minum, marhitei ai gabe dirgak ma uluni.

Puji-pujian bani Jahowa halani Pambahenan-Ni

111 ¹ Haleluya! Pujionku do Jahowa humbani gok ni uhurhu, i lolouan ni halak parpintor ampa bani partumpuan.

² Banggal do pambahenan ni Jahowa, patut sidingaton ni sagala na mangkarosuhkon-Si.

³ Hamuliaon pakon hasangapon do pambahenan-Ni, anjaha hapintoron-Ni totap do ronsi sadokah ni dokahni.

⁴ Ipajongjong do pardingatan bani halongangan-Ni; paridop ni uhur anjaha pardear layak do Jahowa.

⁵ Ibere do sipanganon bani na mangkabiari-Si, idingat do padan na binahen-Ni ronsi sadokah ni dokahni.

⁶ Hagogohan ni pambahenan-Ni ipatugah do bani bangsa-Ni, marhitei na mambere bani sidea pusaka ni sipajuh begu-begu.

⁷ Hasintongan pakon hapintoron do pambahenan ni tangan-Ni, tarhatengerhon do sagala titah-Ni;

- ⁸ totap do ai ronsi sadokah ni dokahni,
sidalankonon ibagas hasintongan ampa
hapintoron.
- ⁹ Domma itongos haluahon bani bangsa-Ni,
ipatotap do padan-Ni ronsi sadokah ni
dokahni, na pansing janah majombut do
goran-Ni.
- ¹⁰ Biar mangidah Jahowa do parmulaan ni
hauhuron, dapotan pangarusion na madear
do sagala na mandalankonsi; totap do
barita-Ni ronsi sadokah ni dokahni.

Hatuahon ni Halak Parpintor

112 ¹ Haleluya! Martuah ma halak na
marhabiaran bani Jahowa, na marosuh
tumang bani titah-Ni.

- ² Markuasa do ginomparni i tanoh on, dapotan
pasu-pasu do sundut ni halak parpintor.
- ³ Hadoharon ampa habayakon do manggoki
rumahni, anjaha hapintoronni totap do
ronsi sadokah ni dokahni.
- ⁴ Marsinalsal do na lihar ibagas na golap bani
halak parpintor; sidear layak, parholong atei
do halak parpintor.
- ⁵ Martuah do halak paridop ni uhur ampa na
ra papinjamkon, anjaha na mandalankon
horjani domu hubani aturan.

- ⁶ Seng anjai dugur ia lalab, gabe sitarsingatan do halak parpintor sadokah ni dokahni.
- ⁷ Seng mabiar ia bani barita na masambor, totap do uhurni marhatengeran bani Jahowa.
- ⁸ Totap do uhurni, seng mabiar ia, ronsi malum uhurni mangidah munsuhni.
- ⁹ Layak do ia marsibere-bere bani halak na masombuh; hapintoronni manongtong do anjaha tandukni timbul do ibagas hamuliaon.
- ¹⁰ ididah parjahat ma ai, gabe marborit ni uhur; patungosngoson do iponni ibahen, hape magou, gabe na lang do sura-sura ni halak parjahat.

**Puji-pujian bani Jahowa Sihopkop
Halak na Masombuh**

113 ¹ Haleluya! Puji nasiam ma, ale juakjuak ni Jahowa, puji nasiam ma goran ni Jahowa!

- ² Na puji ma goran ni Jahowa, humbani sonari ronsi sadokah ni dokahni.
- ³ Humbani hapoltakan ni mata ni ari das hu hasundutan, sai tarpuji ma goran ni Jahowa.
- ⁴ Timbul do Jahowa i atas ni sagala bangsa, i atas ni sagala langit do hamuliaon-Ni.
- ⁵ Ise ma doskon Jahowa, Naibatanta, i nagori atas atap i tanoh on,

- ⁶ na marparatas i babou, anjaha na manatap-natap dompak toruh?
- ⁷ Na pajongjong halak na madorun humbani orbuk, anjaha na pagijangkon halak na masombuh humbani hubang,
- ⁸ laho pahundulhonsi rap pakon halak na sangap, rap pakon halak na sangap ni bangsa-Ni.
- ⁹ Ia do mambahen boratan rumah parinangon na lambang, gabe inang sibuei anak, gok malas ni uhur.

Kuasa ni Jahowa Parandang Dalan bani Bangsa-Ni

- 114** ¹ Sanggah mandarat Israel hun Masir, ginompar ni si Jakob humbani bangsa na legan.
- ² ibahen ma Juda gabe ianan-Ni na ma pansing, anjaha Israel gabe gomgoman-Ni.
- ³ ididah laut ma ai gabe maporus, anjaha Jordan surut hu pudi.
- ⁴ Dolog-dolog manlumpat-lumpat songon biribiri tunggal, buntu-buntu songon anak ni biribiri.
- ⁵ Aha do na masa bam, ale laut, ase maporus ho, anjaha ho, ale Jordan, ase surut ho hu pudi?
- ⁶ Hanima ale dolog-dolog, ase manlumpat-lumpat hanima songon biribiri tunggal, anjaha hanima buntu-buntu songon anak ni biribiri?

- ⁷ Hitir ma, ale tanoh, i lobei ni Tuhan, i lobei ni bohi ni Naibata ni si Jakob,
⁸ na paubahkon dolog batu gabe bah mardalan ampa batu gingging gabe bah tubuh.

Naibata do hansa Sipasangapon

- 115** ¹ Seng bennami, ale Jahowa, seng bennami, tapi bani goran-Mu ma bere Ham hasangapon, halani idop ni uhur-Mu, halani hasintongan-Mu.
² Mase ma hatahonon ni sipajuh begu-begu, “Ija do Naibata ni sidea?”
³ Ia Naibata i nagori atas do, ipasaud do sagala rosuh ni uhur-Ni.
⁴ Sisombah-sombahon ni sidea, ai pirak pakon omas, na pinauli ni tangan ni jolma.
⁵ Dong do babahni, tapi seng boi marsahap; dong do matani, tapi seng marpangidah.
⁶ Dong do pinggolni, tapi seng marpanangar; dong do igungni, tapi seng marpanganggoh.
⁷ Dong do tanganni, tapi seng boi manjamah; dong do naheini, tapi seng boi mardalan; seng luar sora humbani tolonanni.
⁸ Sai songon sidea ma halak na paulihonsi, sagala halak na martenger ni uhur hujai.
⁹ Ale Israel, porsaya ma bani Jahowa! Ia do pangurupi bani sidea pakon gantar bani sidea.

- ¹⁰ Ale ginompar ni si Aron, porsaya ma bani Jahowa! Ia do pangurupi bani sidea pakon gantar bani sidea.
- ¹¹ Nasiam sihabiari Jahowa, porsaya ma bani Jahowa! Ia do pangurupi bani sidea pakon gantar bani sidea.
- ¹² Idingat Jahowa do hita, pasu-pasuon-Ni, pasu-pasuon-Ni do ginompar ni Israel, pasu-pasuon-Ni do ginompar ni si Aron.
- ¹³ Pasu-pasuon-Ni do na mangkabiari Jahowa, dakdanak rap pakon na magodang.
- ¹⁴ Sai martambah ma nasiam ibahen Jahowa, nasiam pakon anak nasiam.
- ¹⁵ Sai pinasu-pasu ma nasiam humbani Jahowa, sitompa langit pakon tanoh on.
- ¹⁶ Nagori atas Jahowa do simadasi, tapi tanoh on ibere do bani jolma manisia.
- ¹⁷ Sedo na dob matei mamuji Jahowa, sedo halak na dob tuad hu nagori toruh.
- ¹⁸ Tapi hita, hita do na mamuji Jahowa, humbani sonari ronsi sadokah ni dokahni. Haleluya!

Doding Puji-pujian ni Sada Halak na Pinaluah humbani Mara ni Hamatean

116 ¹ Holong do uhur hubani Jahowa, halani itangihon do sorangku ampa elek-elekku.

- ² Halani ipaeleng do pinggol-Ni dompak ahu,
sai padilo-diloonku do la sadokah ahu
manggoluh.
- ³ Ililiti rantei ni hamatean do ahu, anjaha biar
nagori toruh do mandorab ahu; mandagei
hasunsahan ampa sitaronon do ahu.
- ⁴ Tapi hudilo ma goran ni Jahowa: Ham Jahowa,
paluah Ham ma tonduyhu!
- ⁵ Paridop ni uhur do Jahowa anjaha parpintor,
parholong do Naibata.
- ⁶ Jahowa do siramotkon halak paruhur sisaluju;
galek hinan do ahu, tapi ipaluah do ahu.
- ⁷ Mulak ma ho sonang, ale tonduyhu, ai domma
ibahen Jahowa na madear bam!
- ⁸ Tongon, domma ipaluah Ham ahu humbani
hamatean, matangku humbani iluh ampa
naheihu humbani partolsuan.
- ⁹ Boi ma ahu mardalan i lobei ni Jahowa, bani
tanoh ni halak na manggoluh.
- ¹⁰ Totap do ahu porsaya, age pe huhatahon,
“Tarpisat tumang do ahu.”
- ¹¹ Bani na tarsosak ahu, ningku do, “Haganup do
jolma sipangkiran-kirani.”
- ¹² Naha ma pambalasku bani Jahowa, halani
haganup pambahenan-Ni bangku?
- ¹³ Panginuman haluahon ma huangkat, anjaha
goran ni Jahowa ma hudilo.

- ¹⁴ Bagah-bagahku bani Jahowa, hugalar ma,
hugalar i lobei ni haganup bangsa-Ni.
- ¹⁵ Harga do bani panonggor ni Jahowa, hamatean
ni halak na hinaholongan-Ni.
- ¹⁶ Tongon, Ham Jahowa, juakjuak-Mu do ahu,
juakjuak-Mu tene, anak ni jabolon-Mu
naboru, domma itanggali Ham garingku.
- ¹⁷ Bamu ma galangkononku galangan puji-pujian,
anjaha goran ni Jahowa ma padilo-diloonku.
- ¹⁸ Bagah-bagahku bani Jahowa, hugalari ma,
hugalari ma i lobei ni haganup bangsa-Ni,
- ¹⁹ i alaman ni rumah ni Jahowa, i tongah-
tongahmu, ale Jerusalem. Haleluya.

Talup do Pujion ni Sagala Bangsa Jahowa

117 ¹ Puji ma Jahowa, nasiam sagala sipajuh
begu-begu, pasangap ma la, nasiam
sagala bangsa!

² Ai banggal do idop ni uhur-Ni banta, anjaha
hasintongan-Ni ronsi sadokah ni dokahni.
Haleluya.

Doding Puji-pujian halani Pangurupion ampa Haluahon na humbani Jahowa

118 ¹ Puji ma Jahowa, ai pardear layak do la,
tongon ronsi sadokah ni dokahni do idop
ni uhur-Ni!

- ² Sai ihatahon Israel ma, “Tongon, ronsi sadokah ni dokahni do idop ni uhur-Ni.”
- ³ Sai ihatahon ginompar ni si Aron ma, “Tongon, ronsi sadokah ni dokahni do idop ni uhur-Ni.”
- ⁴ Sai ihatahon sihabiari Jahowa ma, “Tongon, ronsi sadokah ni dokahni do idop ni uhur-Ni.”
- ⁵ Humbani hasosakanku do ahu dilo-dilo bani Jahowa; itangihon Jahowa do ahu anjaha ipalumbang.
- ⁶ Jahowa do mangkasomani ahu, seng mabiar ahu Tor aha ma bahenon nijolma bangku?
- ⁷ Jahowa do hasomanku, Sipangurupi bangku, ai do ase boi ahu mangkawah bani na mandomdomi ahu.
- ⁸ Dearan do marhaporusan bani Jahowa, ase martenger ni uhur banijolma.
- ⁹ Dearan do marhaporusan bani Jahowa, ase martenger ni uhur bani halak na sangap-sangap.
- ¹⁰ Sagala parbegu manginggoti ahu; mangunsagahkon goran ni Jahowa, siap do sidea hubahen.
- ¹¹ Iinggoti sidea do ahu, tongon iinggoti sidea do ahu; mangunsagahkon goran ni Jahowa; siap do sidea hubahen.

- 12 linggoti sidea do ahu songon huraamah; gajag
do sidea songon apuy bani duri-duri;
mangunsagahkon goran ni Jahowa siap do
sidea hubahen.
- 13 Ijullakkon, ijullakkon sidea do ahu ase
targompang, tapi Jahowa do na mangurupi
ahu.
- 14 Gogohku pakon dodingku ai ma Jahowa; la do
na paluahkon ahu.
- 15 Sora olob-olob pakon hatuahon do maraloling
bani lampolampo ni halak parpintor. Siamun
ni Jahowa do sibahen hamonangan.
- 16 Siamun ni Jahowa do na timbul, siamun ni
Jahowa do sibahen hamonangan.
- 17 Seng anjai matei ahu, tapi manggoluh do, ase
hubaritahon pambahenan ni Jahowa.
- 18 Iajar, iajar Jahowa do ahu tongon, tapi seng
iondoskon bani hamatean.
- 19 Ungkab nasiam ma bangku labah ni
hapintoron, sihol masukanku do ai, sihol do
pujionku Jahowa,
- 20 On do horbangan marayak Jahowa, halak
parpintor do na masuk hujai.
- 21 Hupuji ma Ham halani ibalosi Ham do ahu,
anjaha Ham do gabe haluahon bangku.
- 22 Batu na niambukkon ni tuhang, ai do gabe
palas parsuhi.

- ²³ Marhitei Jahowa do masa ai, halongangan do ai bani matanta.
- ²⁴ Ari on do na jinadihon ni Jahowa. marolob-olob anjaha marmalas ni uhur ma hita halani ai.
- ²⁵ Ham Jahowa, urupi Ham ma! Ham Jahowa, sai manumpak ma Ham!
- ²⁶ Pinasu-pasu ma na roh marhitei goran ni Jahowa. Ipasu-pasu hanami ma nasiam hun rumah ni Jahowa.
- ²⁷ Jahowa do Naibata, la do na manondangi hita. Atur nasiam ma galangan pesta das hu tanduk ni anjapanjap!
- ²⁸ Naibatanku do Ham, Ham do sipujionku. Ham Naibatanku, Ham do sipatimbulonku.
- ²⁹ Puji ma Jahowa, ai pardear layak do la, tongon ronsi sadokah ni dokahni do idop ni uhur-Ni.

Kuasa ni Hata ni Naibata

Alep = A

- 119** ¹ Martuah ma halak na daulat marparlahou, na mardalan bani titah ni Jahowa.
- ² Martuah ma halak na manramotkon hasaksian-Ni, na mangindahi la humbani gok ni uhurni.
- ³ na so mangkorjahon hajahaton, tapi na mardalan bani dalan-Ni.

- ⁴ Domma itonahkon Ham parentah-Mu, ase
dalankononkon ai pongkut.
- ⁵ Sai totap ma namin langkahku, laho
mandalankon aturan-Mu.
- ⁶ Tongon, seng anjai tarbador ahu, anggo
hupardimata ganup aturan-Mu.
- ⁷ Sai pujionku do Ham humbani putih ni uhurhu,
anggo huguruhon titah-Mu na pintor in.
- ⁸ Sai dalankononku do uhum-Mu, sai ulang ma
tadingkon Ham ahu.

Bet = B

- ⁹ Marhitei aha do boi borsih langkah ni sada
garama? Marhitei na iramotkon hata-Mu.
- ¹⁰ Humbani gok ni uhurhu do Ham hupindahi,
ulang ma paturut Ham ahu kahou humbani
parentah-Mu.
- ¹¹ Ibagas uhurhu do husimpan hata-Mu, ase
ulang mardousa ahu Bamu.
- ¹² Sai tarpuji ma Ham Jahowa, ajarhon Ham ma
bangku aturan-Mu!
- ¹³ Marhitei bibirhu do hubaritahon sagala
titah-Mu, na luar humbani pamangan-Mu.
- ¹⁴ Marmalas ni uhur do ahu bani dalan ni
hasaksian-Mu, lobih humbani sagala
habayakon.
- ¹⁵ Sai hupingkir-pingkiri do aturan-Mu, anjaha
pardimatahononku dalan-Mu.

¹⁶ Aturan-Mu do na huhamalaskon, seng lupa
ahu bani hata-Mu.

Gimel = G

¹⁷ Bahen Ham ma na madear bani juakjuak-Mu,
ase manggoluh ahu, anjaha hudalankon
hata-Mu.

¹⁸ Sai buha Ham ma matangku, ase huidah
halongangan ni undang-undang-Mu.

¹⁹ Panginsolat do ahu i tanoh on, sai ulang ma
ponopkon Ham parentah-Mu hu bangku.

²⁰ Madotei do uhurhu, halani siholan bani
titah-Mu bani ganup panorang.

²¹ Ipalumba Ham do halak na jungkat, sai
hona papa do na manimbil humbani
parentah-Mu.

²² Buat Ham ma humbangku habadoron pakon
hahirion, ai hudalankon do hasaksian-Mu.

²³ Age pe hundul na sangap-sangap manriah
mangimbang ahu, sai uhum-Mu do ipingkiri
juakjuak-Mu,

²⁴ Tongon hasaksian-Mu do malas ni uhurhu,
gabe panuturi bangku.

Dalet = D

²⁵ Longkot do tonduyhu bani orbuk pagoluh Ham
ma ahu romban hubani hata-Mu.

- ²⁶ Domma hubaritahon dalanku anjaha itangihon
do ahu, podahkon Ham ma bangku sagala
aturan-Mu.
- ²⁷ Paruhuri Ham ma ahu pasal pardalan
ni aturan-Mu, ase hupingkir-pinghiri
halongangan-halongangan-Mu.
- ²⁸ Maseda do uhurhu halani marhoru, pajongjong
Ham ma ahu romban hubani hata-Mu.
- ²⁹ Dalam ladung padaoh Ham humbangku, anjaha
marhitei titah-Mu idopi Ham ma ahu.
- ³⁰ Dalam hasintongan do hupilih, titah-Mu do
huhasiholi.
- ³¹ Longkot do ahu bai hasaksian-Mu, Ham
Jahowa, ulang ma paila Ham ahu.
- ³² Dalam ni parentah-Mu do dalanku, ai
ipalumbang Ham do uhurhu.

He = H

- ³³ Patuduh Ham ma bangku, ale Jahowa, pardalan
ni uhum-Mu, ase hudalankon ai ronsi
ujungni.
- ³⁴ Paruhuri Ham ma ahu ase hramotkon
undang-undang-Mu, anjaha hudalankon ai
humbani gok ni uhur.
- ³⁵ Sai togu Ham ma ahu bani dalan ni
parentah-Mu, ai ai do na huharosuhkon.
- ³⁶ Sai pasurdung Ham ma uhurhu dompak
hasaksian-Mu, ulang dompak paruntungan

- ³⁷ Palembang Ham ma matangku humbani na mangkawahkon na so margagan, sai pagoluh Ham ma ahu marhitei hata-Mu.
- ³⁸ Patotap Ham ma bani juakjuak-Mu bagah-bagah-Mu. ai ma bani halak sihabiari Ham.
- ³⁹ Sai padaoh Ham ma hahirion na huhabiari, ai na madear do titah-Mu.
- ⁴⁰ Tonggor ma, ihasiholi uhurhu do aturan-Mu, sai pagoluh Ham ma ahu halani hapintoron-Mu.

Vau = H

- ⁴¹ Sai sogop ma bangku idop ni uhur-Mu, ale Jahowa, sonai hatuahon-Mu romban hubani bagah-bagah-Mu,
- ⁴² ase boi balosanku halak na pahiri ahu, ai tenger do uhur hubani hata-Mu.
- ⁴³ Ulang ma buat Ham hata hasintongan in humbani pamanganku, ai titah-Mu do na huarapkon.
- ⁴⁴ Sai ramotkononku do undang-undang-Mu tongtong, tongon, ronsi sadokah ni dokahni.
- ⁴⁵ Sai mardalani bani na lumbang ma ahu, ai parentah-Mu do na hupindahi.
- ⁴⁶ Sai sahapkononku do hasaksian-Mu i lobei ni raja-raja, anjaha seng maila ahu.
- ⁴⁷ Sai marmalas ni uhur do ahu bani parentah-Mu, huhaholongi do botul.

⁴⁸ Hupaherbang do tanganku bani parentah-Mu
na huhaholongi, anjaha hupingkir-pingkiri
do aturan-Mu.

Sain = S

⁴⁹ Sai ingat Ham ma hata na bani juakjuak-Mu, na
binahen-Mu gabe pangarapanku.

⁵⁰ On do na pasabou uhurhu ibagas hadoyukonku:
bagah-bagah-Mu do na pagoluhkon ahu.

⁵¹ Sai iapas-apasi halak na jungkat do ahu,
tapi seng manlembang ahu humbani
undang-undang-Mu.

⁵² Idingat uhurhu do titah-Mu na humbani na
basaia, ale Jahowa, jadi sabou ma uhurhu.

⁵³ Parah do gilangku mangidah halak parjahat,
sitadingkon undang-undang-Mu.

⁵⁴ Doding do bangku ganup aturan-Mu, ibagas
rumah panginsolatanku.

⁵⁵ Sai hudingat do borngin goran-Mu, ale Jahowa,
anjaha hudalankon do undang-undang-Mu.

⁵⁶ On do na dob ondos bangku, ai ma
manramotkon aturan-Mu.

Chet = Ch

⁵⁷ Rupeiuhu do Ham, ale Jahowa, domma
hupadankon marimbagaskon hata-Mu.

- 58 Humbani gok ni uhurhu do hupindahi bohi-Mu,
ma idop ma uhur-Mu bangku romban
hubani bagah-bagah-Mu.
- 59 Hupingkir-pingiri do dalanku, gabe hupaulak
do langkahku hubani hasaksian-Mu.
- 60 Tarolos do ahu anjaha seng hupadokah-dokah,
laho mandalankon parentah-Mu.
- 61 Siding ni halak parjahat manlioti ahu, tapi seng
lupa ahu bani undang-undang-Mu.
- 62 Tongah borngin puho do ahu laho mamuji
Ham, halani titah-Mu na pintor in.
- 63 Hasoman do ahu bani sagala na mangkabiari
Ham, sonai age bani sagala sidalankon
aturan-Mu.
- 64 Idop ni uhur do manggoki tanoh on,
Ham Jahowa, ajarhon Ham ma bangku
aturan-Mu.
- 65 Na madear do ibahen Ham bani juakjuak-Mu,
ale Jahowa, romban hubani hata-Mu.
- 66 Hauhuron pakon habotohon ma ajarhon Ham
bangku, parentah-Mu do na huhatengerhon.
- 67 Paima lape marsitaronon ahu kahou do ahu,
tapi sonari hata-Mu do na huirikkon.
- 68 Dear do Ham anjaha sibahen na madear,
ajarhon Ham ma hu bangku uhum-Mu.
- 69 Ipatubuh-tubuh halak na jungkat do ladung
dompak ahu, tapi hupardiatei do aturan-Mu
humbani gok ni uhur.

- ⁷⁰ Seng marpangahap uhur ni sidea songon taboh-taboh, tapi malas do uhur hubani undang-undang-Mu.
- ⁷¹ Hadearon na bangku na marsitaranon ai ahu, ase uhum-Mu huguruhon.
- ⁷² Rahanan do bangku titah ni pamangan-Mu, humbani omas atap pirak na marribu-ribu.

Jod = J

- ⁷³ Tangan-Mu do manjadihon pakon na paulihon ahu; paruhuri Ham ma ahu ase huguruhon parentah-Mu.
- ⁷⁴ Halak na mangkabiari Ham mangidah ahu gabe malas ma uhurni, ai hata-Mu do na huarapkon.
- ⁷⁵ Hubotoh do, ale Jahowa, pintor do titah-Mu, anjaha ibagas hasintongan-Mu do ipatunduk Ham ahu.
- ⁷⁶ Sai idop ni uhur-Mu ma na mangapoh ahu, romban hubani bagah-bagah-Mu na bani juakjuak-Mu.
- ⁷⁷ Sai sogop ma hu bangku holong ni uhur-Mu, ase manggoluh ahu, ai titah-Mu do malas ni uhurhu.
- ⁷⁸ Sai maila ma halak na jungkat, ai iodoh-odoh sidea do ahu seng marhala; tapi anggo ahu aturan-Mu do na hupingkir-pingiri.

- ⁷⁹ Sai mulak ma hu bangku halak na mangkabiari
Ham, Pakon na mambotoh hasaksian-Mu.
- ⁸⁰ Sai pitah ma uhur hubani uhum-Mu, ase ulang
tarbador ahu.

Kat = K

- ⁸¹ Horahan do tonduyhu bani hatuahon-Mu,
hata-Mu do na huarapkon.
- ⁸² Kawah do matangku mangkasiholi bagah-
bagah-Mu, nini, "Antigan pe apohon-Mu
ahu?"
- ⁸³ Tongon, songon gusi hulingkuling na hona
timus do ahu; tapi seng lupa bani uhum-Mu.
- ⁸⁴ Sadia dokah nari ma ari-ari ni juakjuak-Mu?
Antigan pe dabuhon-Mu uhum bani na
marburu ahu?
- ⁸⁵ Ihurak halak na jungkat do godung bangku,
ai ma halak na so domu bani titah-Mu
marparlahou.
- ⁸⁶ Sagala parentah-Mu sintong do; ipardakdak
sidea do ahu seng marhala, urupi Ham ma
ahu.
- ⁸⁷ Narus-narus ma bois ahu ibahen sidea i nagori
on; tapi anggo ahu seng hutadingkon
aturan-Mu.
- ⁸⁸ Domu hubani idop ni uhur-Mu sai pagoluh
Ham ma ahu, ase hura motkon hasaksian ni
pamangan-Mu.

Lamed = L

- ⁸⁹ Ronsi sadokah ni dokahni do, ale Jahowa,
hata-Mu; totap do in i nagori atas.
- ⁹⁰ Marsundut-sundut do hasintongan-Mu; Ham
do na pajonam ai i tanoh on, jadi totap ma.
- ⁹¹ Domu hubani aturan-Mu totap do ai ronsi
sadari on, ai ganupan ai juakjuak-Mu do.
- ⁹² Ambit lang titah-Mu na pahinsah uhurhu,
domma magou ahu halani hadoyukonku.
- ⁹³ Ronsi sadokah ni dokahni seng lupa ahu bani
aturan-Mu, ai marhitei ai do ahu ipagoluh
Ham.
- ⁹⁴ Bamu do ahu, paluah Ham ma ahu, ai
aturan-Mu do na hupindahi.
- ⁹⁵ Sai igompangi halak parjahat do ahu
laho masedahon ahu; tapi anggo ahu
hasaksian-Mu do huparimbagaskon.
- ⁹⁶ Bani haganup, age naha dearni dong do
ujungni huidah; tapi anggo titah-Mu seng
marpunsa.

Mem = M

- ⁹⁷ Holong tumang do uhur hubani titah-Mu;
manipat ari do hupingkiri ai.
- ⁹⁸ Pentaran do ahu maruhur humbani munsuhku
ibahen parentah-Mu, ai tongtong do ai
mangkasomani ahu:

- ⁹⁹ Pandeian do ahu humbani sagala gurungku, ai
hasaksian-Mu do hupingkir-pingkiri.
- ¹⁰⁰ Maruhuran do ahu humbani partua-partua, ai
aturan-Mu do huparuhurhon.
- ¹⁰¹ Humbani sagala dalan na masambor sai
huambang do naheihu, ase tarbalosi ahu
hata-Mu.
- ¹⁰² Seng manlembang ahu humbani titah-Mu, ai
Ham do na mamodahi ahu.
- ¹⁰³ Tobuni in hata-Mu bani langit-langitku,
tobunan humbani manisan bani
pamanganku.
- ¹⁰⁴ Halani aturan-Mu do mambahen maruhur
ahu, halani ai magigi do ahu bani sagala
dalan ladung.

Nun = N

- ¹⁰⁵ Hata-Mu do rigapan bani naheihu, anjaha
panondang bani dalanku.
- ¹⁰⁶ Domma marbija ahu anjaha pasaudonku do
ai, sai dalankononku do titah-Mu na pintor
in.
- ¹⁰⁷ Marsitaronon tumang do ahu, ale Jahowa,
pagoluh Ham ma ahu domu hubani
hata-Mu.
- ¹⁰⁸ Harosuhkon Ham ma, ale Jahowa, galangan
na humbani pamanganku; ajarhon Ham ma
bangku titah-Mu.

- ¹⁰⁹ Tongtong do ibagas parmaraan tonduyhu, tapi
seng huhalupahon undang-undang-Mu.
- ¹¹⁰ Sai itaon halak parjahat do siding bangku, tapi
seng manlembang ahu humbani aturan-Mu.
- ¹¹¹ Hasaksian-Mu do hubahen pusakangku
sadokah ni dokahni, halani malas ni uhurhu
do ai.
- ¹¹² Huungkab do uhurhu laho mangkorjahon
aturan-Mu, tongtong ronsi sadokah ni
dokahni.

Samech = S

- ¹¹³ Magigi do uhur hubani halak simolei-olei, tapi
holong do uhur hubani titah-Mu.
- ¹¹⁴ Parlingodan ampa gantarhu do Ham, hata-Mu
do na huarapkon.
- ¹¹⁵ Surut ma humbangku, ale halak parjahat; sihol
dalankononku do parentah ni Naibatangku.
- ¹¹⁶ Tungkoli Ham ma ahu romban hubani
bagah-bagah-Mu ase manggoluh ahu;
anjaha ulang ma paila Ham ahu ibagas
pangarapanku.
- ¹¹⁷ Jolom Ham ma ahu, ase maluah ahu, gabe
aturan-Mu ma tongtong hukawahkon.
- ¹¹⁸ Itulak Ham do ganup halak na manirpang
humbani uhum-Mu, ai ladung do na
piningkiran ni sidea.

- 119 Songon tasik ni bosì do ihira Ham sagala
parjahat na i tanoh on, halani ai do ase
huhaholongi hasaksian-Mu.
- 120 Manorgi do ambulungku halani biarni
mangidah Ham, gobir do uhurhu mardingat
paruhuman-Mu.

Ain = A

- 121 Hudalankon do uhum pakon hapintoron,
ulang ma ondoskon Ham ahu hubani na
mangodoh-odoh ahu.
- 122 Apiti Ham ma juakjuak-Mu bahen hadearonni;
ulang ma itokoh-tokoh halak na jungkat ahu.
- 123 Siholan do matanku mangkawah dompak
pangurupion-Mu, ampa dompak
bagah-bagah-Mu na pintor in.
- 124 Bahen Ham ma bani juakjuak-Mu romban
hubani idop ni uhur-Mu; anjaha aturan-Mu
ajarhon Ham ma bangku.
- 125 Juakjuak-Mu do ahu, paruhuri Ham ma ahu,
ase huarusi hasaksian-Mu.
- 126 Domma jumpah panorangni bani Jahowa
mandalankon uhum; domma seda ibahen
sidea titah-Mu.
- 127 Halani ai holong do uhur hubani parentah-Mu,
lobih humbani omas ampa humbani omas
pitah.

128 Halani ai do ase sintong ahu marparlahou
romban bani ganup aturan-Mu, anjaha
magigi ahu bani dalan ladung.

Pe = P

129 Halongangan do hasaksian-Mu, halani ai do
ase ijolom tonduyhu ai.

130 Panangkasion bani hata-Mu do na paliharhon,
anjaha na mamparuhuri halak na bulus.

131 Hupangangang do pamanganku, hosah-hosah
do ahu, ai parentah-Mu do na huhasiholhon.

132 Dompakkon Ham ma ahu anjaha maidop ma
uhur-Mu bangku, romban hubani na patut
bani ma mangkaholongi goran-Mu.

133 Sai patotap Ham ma langkahku bani
bagah-bagah-Mu, anjaha ulang ma paturut
Ham hajahaton manrajai ahu.

134 Paluah Ham ma ahu humbani odoh-odoh ni
jolma, ase hura motkon aturan-Mu.

135 Sai sondangkon Ham ma bohi-Mu bani
juakjuak-Mu, anjaha ajarhon Ham ma
bangku uhum-Mu.

136 Iluh na marpansur do mabaor humbani
matangku, halani na so saud idalankon
titah-Mu.

Zade = Z

- ¹³⁷ Pintor do Ham, ale Jahowa, anjaha sintong do uhum-Mu.
- ¹³⁸ Domma itonahkon Ham hasaksian-Mu ibagas hapintoron, anjaha ibagas hasintongan botul.
- ¹³⁹ Pongut ni uhurhu do mamboiskon ahu, ai ihalupahon lawanku do hata-Mu.
- ¹⁴⁰ Pitah tumang do hata-Mu, holong do uhur ni juakjuak-Mu bani.
- ¹⁴¹ Etek do ahu anjaha madorun, tapi seng lupa ahu bani aturan-Mu.
- ¹⁴² Hapintoron-Mu pintor do ai ronsi sadokah ni dokahni, anjaha hasintongan do undang-undang-Mu.
- ¹⁴³ Hasosakan ampa hasunsahan do mangonai bangku, tapi parentah-Mu do na huhamegahkon.
- ¹⁴⁴ Pintor do hasaksian-Mu ronsi sadokah ni dokahni; paruhuri Ham ma ahu, ase manggoluh ahu.

Kop = K

- ¹⁴⁵ Dilo-dilo do ahu humbani gok ni uhur, balosi Ham ma ahu, ale Jahowa, sihol ramotkononku do aturan-Mu,

- 146 Dilo-dilo do ahu Bamu, paluah Ham ma ahu!
sai dalankononku do hasaksian-Mu.
- 147 Paima buha siang dilo-dilo do ahu; bani
hata-Mu do ahu mangarap.
- 148 Puho do ahu sanggah marhorin parrunda;
bagah-bagah-Mu do hupingkir-pingiri.
- 149 Sai tangihon ma sorangku romban hubani
idop ni uhur-Mu, ale Jahowa, domu hubani
uhum-Mu, pagoluh Ham ma ahu.
- 150 Madohor ma halak parjahat sipardakdak ahu;
daoh do sidea humbani titah-Mu.
- 151 Dohor do Ham, ale Jahowa, hasintongan do
sagala parentah-Mu.
- 152 Domma dokah hubotoh pasal hasaksian-Mu;
ipajonam Ham do ai ronsi sadokah ni
dokahni.

Resch = R

- 153 Tatap Ham ma hadoyukonku anjaha paluah
Ham ma ahu! Ai seng lupa ahu bani
undang-undang-Mu.
- 154 Tinggilhon Ham ma partinggilanku, anjaha
tobus Ham ma ahu; pagoluh Ham ma ahu
romban hubani bagah-bagah-Mu.
- 155 Daoh do humbani halak parjahat haluahon, ai
seng ipindahi sidea aturan-Mu.

- 156 Banggal do holong ni uhur-Mu, ale Jahowa;
pagoluh Ham ma ahu romban hubani
titah-Mu.
- 157 Buei do halak na marburu pakon na
mangimbang ahu, tapi seng manimbil ahu
humbani hasaksian-Mu.
- 158 Mangidah halak na marbalik magigi do
uhurhu, halani na so idalankon sidea
hata-Mu.
- 159 Tonggor Ham ma, aturan-Mu do na
huhaholongi, ale Jahowa; pagoluh Ham ma
ahu romban hubani idop ni uhur-Mu.
- 160 Rimpun ni hata-Mu ai ma hasintongan, ronsi
sadokah ni dokahni do uhum-Mu na pintor
in.

Schin = Sch

- 161 Raja-raja do na marburu ahu seng marhala;
tapi hata-Mu tumang do ihabiari uhurhu.
- 162 Marmalas ni uhur do ahu halani hata-Mu,
songon halak na dapotan buei taban-taban.
- 163 Sogam do uhur hubani ladung anjaha
huhagigihon do ai, tapi holong do uhur
hubani undang-undang-Mu.
- 164 Pitu hali ibagas sadari hupuji Ham, halani
uhum-Mu na pintor in.

- 165 Damei na sumurung do rupei ni halak na
mangkaholongi titah-Mu, seng anjai tartolsu
sidea.
- 166 Mangarap do uhur hubani pangurupion-Mu,
ale Jahowa; parentah-Mu do hubalosi.
- 167 Iramotkon tonduyhu do hasaksian-Mu, anjaha
holong tumang do uhur hubani ai.
- 168 Huramotkon do aturan-Mu pakon
hasaksian-Mu, ai talar do i lobei-Mu sagala
dalanku.

Tau = T

- 169 Paturut Ham ma dilo-dilongku das i lobei-Mu,
ale Jahowa, paruhuri Ham ma ahu romban
hubani hata-Mu.
- 170 Sai das ma elek-elekku hu Bamu, paluah Ham
ma ahu romban hubani bagah-bagah-Mu.
- 171 Sai mabaor ma puji-pujian humbani bibirhu,
halani iajarhon Ham do bangku aturan-Mu.
- 172 Sai idodingkon dilahku ma hata-Mu, ai pintor
do sagala parentah-Mu.
- 173 Sai tangan-Mu ma na mangurupi ahu, ai
aturan-Mu do na hupilih.
- 174 Siholan do ahu bani hatuahon-Mu,
ale Jahowa. anjaha titah-Mu do na
huhamegahkon.
- 175 Sai manggoluh ma tonduyhu anjaha ham ma
ipuji; titah-Mu ma na mangurupi ahu.

¹⁷⁶ Kahou do ahu songon biribiri na magou,
pindahi Ham ma juakjuak-Mu, ai seng lupa
ahu bani parentah-Mu.

DODING LAHO TANGKOG HU RUMAH PANUMBAHAN

**Tonggo Mangindo Haluahon
humbani Bangsa Sipartinggal**

120 ¹ Doding laho tangkog. Bani Jahowa
do ahu dilo-dilo sanggah tarsosak ahu,
anjaha ibalosi do ahu.

² Ham Jahowa, paluah Ham ma tonduyhu
humbani bibir siparladung, humbani dilah
sipangoto-otoi.

³ Aha ma berehononni bam, aha ma
tambahkononni bam, ale dilah sipangoto-
otoi?

⁴ Panah ni puanglima na marot, ampa narnar ni
hayu tatada na gara.

⁵ Magou ma ahu, na manginsolat i Mesek, anjaha
na marianan i lampolampo ni halak Kedar.

⁶ Madokahtu ma ai marianan ahu, i lambung ni
halak na mangkagigihon damei.

⁷ Marosuh do ahu bani damei, tapi marsahapkonsi
ahu, mintor ipindahi sidea do partinggalan.

**Tenger ni Uhur bani Panjagaion ni
Jahowa, Sijaga Israel**

- 121** ¹ Doding laho tangkog. Sai kawah-kawah
do matangku dampak dolog; hunja do
nani roh pangurupion bangku?
- ² Pangurupion bangku roh humbani Jahowa,
sitompa langit pakon tanoh.
- ³ Seng palopason-Ni jiris naheimu, anjaha seng
tartunduh Sijaga ho.
- ⁴ Tonggor ma, seng tartunduh, anjaha modom
Sijaga Israel.
- ⁵ Jahowa do sijaga ho, Jahowa do
parlinggomanmu bani tanganmu
siamun.
- ⁶ Arian seng doiton ni mata ni ari ho, sonai age
bulan borngin.
- ⁷ Jahowa do na manjagai ho, humbani sagala
parmaraan, sai jagaon-Ni do tonduymu.
- ⁸ Jahowa do manjagai ho laho luar ampa laho
masuk, humbani sonari ronsi sadokah ni
dokahni.

Tonggo Mangkopkop Jerusalem

- 122** ¹ Doding laho tangkog. Humbani si Daud.
Malas do uhurhu, sanggah ihatahon
halak bangku, “Laho ma hita hu rumah ni
Jahowa.”

- ² Jongjong do nuan naheinami, bani
horbanganmu, ale Jerusalem.
- ³ Ale Jerusalem, na pinajongjong songon kota, na
niatur gabe mardomu.
- ⁴ Tangkog do hujai sagala marga, marga ni
Jahowa, aturan do ai bani Israel laho mamuji
goran ni Jahowa.
- ⁵ Tongon, ijai do ipajongjong hotak paruhuman,
hotak bani ginompar ni si Daud.
- ⁶ Pindo nasiam ma damei bani Jerusalem;
mardamei ma sagala na mangkaholongi ho.
- ⁷ Sai damei ma masa ibagas tembokmu, na
sonang ibagas rumah bolonmu.
- ⁸ Halani saninangku pakon huan-kuanku, sai
pindohononku do damei ibagas ho.
- ⁹ Halani rumah ni Jahowa Naibatanta, sai
pindahanku do na madear bam.

**Mangkawah Dompok Jahowa Laho
Mangindo Idop ni Uhur-Ni**

- 123** ¹ Doding laho tangkog. Bamu do
hudompakkon pangkawah ni matangku,
Ham siparhotak i nagori atas.
- ² Tonggor ma, songon mata ni juakjuak
mangkawah bani tangan ni tuanni, songon
mata ni juakjuak naboru mangkawah
bani tangan ni na marsuruhsi, sonai
do mangkawah matanami bani Jahowa

Naibatanami, paima maidop uhur-Ni
bennami.

³ Maidop ma uhur-Mu bennami, ale Jahowa,
maidop ma uhur-Mu; domma sobalan
hanami bani risa-risa.

⁴ Sobalan tumang do tonduynami ibahen
apas-apas ni sigijang uhur, ampa parpahiri
ni halak na jungkat.

Puji-pujian bani Jahowa,

Sipaluah Israel

124 ¹ Doding laho tangkog. Humbani si Daud.
Ambat lang Jahowa mangkasomani hita,
sonai ma patut hatahonon ni Israel. Ambat
lang Jahowa mangkasomani hita,
² sanggah roh halak mangimbang hita,
³ sai bondutonni do hita manggoluh, sanggah
gajag ringis ni sidea dompak hita;
⁴ ayubkonon ni bah do hita, anjaha landaon ni
bah marbanggal,
⁵ langkoban ni bah marhasak do tonduyta,
tongon.
⁶ Na puji ma Jahowa na so mangondoskon hita,
gabe sisorohon ni ipon ni sidea.
⁷ Maluah do tonduyta songon manuk-manuk
humbani sambil ni parsambil, rotap do
sambil, gabe maluah hita.

⁸ Pangurupion banta, ai ma ibagas goran ni Jahowa, na manompa langit pakon tanoh on.

Hatotapon ni Halak na Martenger ni Uhur bani Jahowa

125 ¹ Doding laho tangkog. Halak na martenger ni uhur bani Jahowa, songon Dolog Sion do, lang dugur, ronsi sadokah ni dokahni do totap.

² Jerusalem, dolog do manginggotisi, sonai ma Jahowa manginggoti bangsa-Ni, sonari ronsi sadokah ni dokahni.

³ Tungkot harajaon ni halak parjahat seng totap ai i atas tanoh parbagianan ni halak parpintor, ase ulang idurdurhon halak parpintor tanganni bani hagedukon.

⁴ Bahen Ham na madear, ale Jahowa, bani halak parbujur, bani halak paruhur na bulus.

⁵ Tapi halak, na marbalik hubani dalan na geduk, sai iboiskon Jahowa ma namin, rap pakon halak parjahat. Damei ma bani Israel.

Apoh-apoh Ibagas Sitaranon

126 ¹ Doding laho tangkog. Sanggah na ipaulak Jahowa na tarbuang hun Sion, usih bani halak na marnipi do hita.

- ² Ijia gok tawa do pamanganta, gok surak-surak
dilahta. Ijia isahapkon halak do i tongah-
tongah ni parbegu, “Banggal do tongon na
binahen ni Jahowa bani sidea!”
- ³ Banggal do tongon na binahen ni Jahowa banta,
marmalas ni uhur ma hita.
- ⁴ Pasuang Ham ma hanami, ale Jahowa, songon
binanga i Tanoh Dangsina.
- ⁵ Halak na mariluh-iluh laho manabur,
marolob-olob do laho manabi.
- ⁶ Mardalan-dalan pe sidea anjaha tangis paboan-
boan bonih sisaburhononkon tongon, roh
do sidea marolob-olob mamboan radeanni.

**Margantung bani Pasu-pasu
ni Jahowa do Ganupan**

- 127** ¹ Doding laho tangkog. Humbani
si Salomo. Anggo seng Jahowa na
pauli rumah, soya-soya do halojaon ni
halak na manukangi; anggo seng Jahowa
na manramotkon huta, sisoya-soya do
parrundaon ni halak parjaga.
- ² Sisoya-soya do age girah hanima puho anjaha
dokah borngin ase modom, mangankon ruti
na hinalojahon bani na hinaholongan-Ni do
ibere sanggah modom.
- ³ Tonggor ma, silayak-layak ni Jahowa do anak,
sada upah do buah ni partapaan.

⁴ Songon lingkit ibagas tangan ni puanglima,
sonai do anak ibagas haposoon.

⁵ Martuah ma dalahi na manggoki parlingkitanni
bani sisonai, seng tumaram maila ia anggo
marsahap pakon imbangni i horbangan.

**Pasu-pasu bani Rumah Tangga
ni Halak Sihabiari Jahowa**

128 ¹ Doding laho tangkog. Martuah ma
ganup na mangkabiari Jahowa, na
mardalan bani dalan-Ni.

² Na hinorjahon ni tanganmu sai panganonmu
do; martuah do ho anjaha sonang.

³ Parinangonmu songon hayu anggur na ramos
ibagas rumahmu, anakmu songon tunas ni
hayu jetun manlioti mejamu.

⁴ Tonggor ma, sai sonai do dapotan pasu-pasu
halak, na marhabiaran bani Jahowa.

⁵ Sai pasu-pasuon ni Jahowa do ho hun Sion, ase
paidah-idahonmu hinadear ni Jerusalem
sadokah ari-ari ni goluhmu.

⁶ anjaha idahonmu do anak ni anakmu. Damei
ma bani Israel!

**Bador do Sidomdomi Sion na
So Tarkahua halani Jahowa**

- 129** ¹ Doding laho tangkog. Gati do isosak
halak ahu humbani haposoonku nari,
sonai ma patut hatahonon ni Israel,
² “Gati do isosak halak ahu humbani haposoonku
nari, tapi seng tarkahua sidea ahu.”
³ Bani gurungku do maninggala paninggala,
marbaluran na ganjang-ganjang do ibahen.
⁴ Tapi Jahowa parpintor in do, manrotapi tali ni
parjahat.
⁵ Maningon maila do anjaha surut hu pudi, sagala
na mandomdomi Sion.
⁶ Songon poyon na dob tubuh i tayub do sidea,
domma melus lape iorbat;
⁷ seng anjai dais tangan ni panabi hujai, barang
tangan ni sirahuti radean,
⁸ anjaha seng hatahonon ni halak na montas;
Pasu-pasu ni Jahowa ma bani nasiam!
Ipasu-pasu hanami ma nasiam marhitei
goran ni Jahowa!

Doruh-doruh humbani Hasosakan na Bagas

- 130** ¹ Doding laho tangkog. Humbani
hasosakan bagas do ahu, doruh-doruh
Bamu, ale Jahowa.

- ² Ham Tuhan, tangihon Ham ma sorangku,
sai ipardiatei pinggol-Mu ma sora ni
elek-elekton.
- ³ Anggo ihira Ham ganup dousa, ale Jahowa, ise
ma na tahan jongjong, ale Jahowa?
- ⁴ Tapi Bamu do hasasapan ni dousa, ase ihabiari
halak Ham.
- ⁵ Mangarap do ahu bani Jahowa, mangarap do
tonduyhu, hata-Ni do na hupaima-ima.
- ⁶ Siholan do tonduyhu bani Tuhan, lobih humbani
sihol ni parjaga bani siang ni ari, bani siang
ni ari tongon.
- ⁷ Arapkon ma Jahowa, ale Israel! Ai bani Jahowa
do idop ni uhur, anjaha buei do haluahon
Bani.
- ⁸ Tongon, la do na paluahkon Israel, humbani
haganup dousani.

Hasonangan ni Tonduy na dob Jumpahan Damei

- 131** ¹ Doding laho tangkog. Humbani si Daud.
Ham Jahowa, seng gijang uhurhu, seng
mangenjeng pangkawah ni matangu;
seng habanggalon na huayak-ayak, barang
hatimbulon na mangatasi diringku.
- ² Tapi tene, hupaminop anjaha hupasip do
tonduyhu; songon dakdanak na dob
pinainum bani abingan ni inangni, sonai do
tonduyhu ibagas.

³ Arapkon ma Jahowa, ale Israel, humbani sonari ronsi sadokah ni dokahni.

Pamilih ni Jahowa bani si Daud ampa Sion

- 132** ¹ Doding laho tangkog. Mardingat ma Ham, ale Jahowa, bani si Daud, ampa bani haganup halojaonni,
- ² na dob marbulawan bani Jahowa, na dob marpadan bani Parkuasa ni Jakob:
- ³ Tongon, seng masukanku lampolampo ni rumahku, seng naikanku iananku modom,
- ⁴ tongon, seng lopasonku matangku tartunduh, atap tarpitpit langkop ni matangku,
- ⁵ paima jumpah ahu sada ianan bani Jahowa, sada rumah bani Parkuasa ni Jakob.
- ⁶ Tongon, domma ibogei hita pasal poti parpadanan ai i Eprata, domma dapot hita ai i talun Jaar.
- ⁷ Masuki hita ma rumah-Ni, manrogop ma hita bani sidogeian ni nahei-Ni.
- ⁸ Jongjong ma Ham, ale Jahowa, laho ma Ham bani ianan parsaranan-Mu, Ham pakon poti hagogohon-Mu.
- ⁹ Malim-Mu marpakeian hapintoron do, anjaha hinaholongan-Mu marsurak-surak.
- ¹⁰ Halani si Daud juakjuak-Mu, ulang ma tulakkon Ham bohi ni na mininakan-Mu.

- 11 Domma marbija Jahowa bani si Daud, tongon,
seng mangeluk la hunjai, “Humbani
ginompar-Mu do pahundulon-Ku bani
paratas-Mu.
- 12 Anggo iramotkon anakmu padan-Ku ampa
hasaksian-Ku na Huajarhon bani sidea,
anak ni sidea pe hundul do bani paratasmu
sadokah ni dokahni.”
- 13 Tongon, domma ipilih Jahowa Sion, ipindo
uhur-Ni do marhundulan ijai:
- 14 On do parsaranan-Ku ronsi sadokah ni
dokahni, ijon do Ahu sihol marianan, in do
Huharosuhkon.
- 15 Parbohalanni sai pasu-pasuon-Ku do, halak na
masombuhni pabosuron-Ku do bani ruti.
- 16 Malimni bahenon-Ku do marpakeian haluahon,
na hinaholonganni marolob-olob ibagas
malas ni uhur.
- 17 Ijai patubuhon-Ku do sada tanduk bani si
Daud, pasirsiron-Ku sada suluh bani na
mininakan-Ku.
- 18 Munsuhni bahenon-Ku do marhiou habadoron,
tapi bani uluni marlinang-linang do sortalini.

Hinajenges ni Parsaoran ni na Marsanina

133 ¹ Doding laho tangkog. Humbani si Daud.
Tonggor ma, naha dearni ampa naha
jengesni, anggo rap hundul na marsanina.

² Usih bani minak na maharga, na bani ulu ai,
na manjalir hu jambek, humbani jambek
ni si Aron, na mangkatektek hu rambu ni
pakeianni.

³ Usih bani namur Dolog Hermon, na sogop bani
Dolog Sion. Ai hujai do ipasorap Jahowa
pasu-pasu-Ni hagoluhan ronsi sadokah ni
dokahni.

Parsombahon bani Jahowa Borngin-borngin

134 ¹ Doding laho tangkog. Roh ma, puji ma
Jahowa, ale haganup juakjuak ni Jahowa,
na jongjong marugas i rumah ni Jahowa
ganup borngin.

² Paherbang nasiam ma tangan nasiam dompak
ianan na ma pansing in, anjaha puji ma
Jahowa!

³ Ipasu-pasu Jahowa ma ho hun Sion, la na
manompa langit pakon tanoh on.

Puji-pujian bani Jahowa na Banggal in, Siatasi Sagala Naibata-naibata

135 ¹ Haleluya! Puji ma goran ni Jahowa, puji
ma, ale juakjuak ni Jahowa,

² nasiam na jongjong i rumah ni Jahowa, i alaman
ni rumah ni Naibata.

- ³ Puji nasiam ma Jahowa, ai pardear layak do Jahowa; dodingkon nasiam ma goran-Ni, ai jenges do in.
- ⁴ Ai Jakob do ipilih Jahowa Bani, sonai Israel bahen parbagianan-Ni.
- ⁵ Tongon hubotoh do: Banggal do Jahowa: Tuhannami, iatasi do sagala naibata-naibata.
- ⁶ Sagala na hinarosuhkon ni Jahowa, ipasaud do i langit pakon i tanoh on, ibagas laut pakon ibagas ianan na bagas-bagas:
- ⁷ Ipanaik do hambun hambani ujung ni tanoh on, ibahen do hilap bani udan, ipadarat logou hambani kamar-Ni;
- ⁸ ibogbog do bunga tubuh ni Masir,jolma sonai age pinahan;
- ⁹ itongos do tanda pakon halongangan hu tengah-tengah ni Masir, laho mangimbang Parao pakon sagala juakjuakni;
- ¹⁰ ibogbog do buei bangsa-bangsa, anjaha ibunuh raja-raja na markuasa;
- ¹¹ ai ma si Sihon, raja ni halak Amori, si Og, raja ni Basan, ampa haganup Raja Kanaan;
- ¹² ibere do tanoh ni sidea bahen parbagianan, parbagianan ni halak Israel bangsa-Ni in.
- ¹³ Ham Jahowa, ronsi sadokah ni dokahni do goran-Mu! Ham Jahowa, marsundut-sundut do pardingatan Bamu.

- ¹⁴ Tongon, ipintori Jahowa do bangsa-Ni,
marulak-ulakan do uhur-Ni dompak
juakjuak-Ni.
- ¹⁵ Sisombahon ni parbegu ai ma pirak pakon
omas, jadi-jadian ni tangan ni jolma.
- ¹⁶ Dong do babahni, tapi seng boi marsahap,
dong do matani, tapi seng marpangidah;
- ¹⁷ dong do pinggolni, tapi seng marpanangar,
tongon, seng dong hosah ibagas babahni.
- ¹⁸ Sai songon sidea ma halak na paulihonsi,
sagala halak na martenger ni uhur hujai.
- ¹⁹ Ale rumah ni Israel, puji ma Jahowa! Ale rumah
ni si Aron, puji ma Jahowa!
- ²⁰ Ale rumah ni si Lepi, puji ma Jahowa! Ale
sihabiari Jahowa, puji ma Jahowa.
- ²¹ Tarpuji ma Jahowa hun Sion, la na marianan i
Jerusalem! Haleluya!

**Puji-pujian bani Jahowa Mardingat
Haganup Pambahenan-Ni**

136 ¹ Puji ma Jahowa, ai pardear layak do
la, tongon, ronsi sadokah ni dokahni do
idop ni uhur-Ni.

² Puji ma Naibata ni sagala naibata, tongon, ronsi
sadokah ni dokahni do idop ni uhur-Ni.

³ Puji ma Tuhan ni sagala tuan, tongon, ronsi
sadokah ni dokahni do idop ni uhur-Ni;

- ⁴ na mambahen, sahalak-Si, halongangan
banggal, tongon, ronsi sadokah ni dokahni
do idop ni uhur-Ni;
- ⁵ na manompa langit marhitei hapentaran,
tongon, ronsi sadokah ni dokahni do idop ni
uhur-Ni;
- ⁶ na paherbang tanoh i atas ni bah, tongon, ronsi
sadokah ni dokahni do idop ni uhur-Ni;
- ⁷ na manjadihon panondang na bolon, tongon,
ronsi sadokah ni dokahni do idop ni uhur-Ni;
- ⁸ mata ni ari, na manrajai na siang, tongon, ronsi
sadokah ni dokahni do idop ni uhur-Ni;
- ⁹ bulan pakon sagala bintang na manrajai
borngin, tongon, ronsi sadokah ni dokahni
do idop ni uhur-Ni;
- ¹⁰ na mamunuh bunga tubuh ni Masir, tongon,
ronsi sadokah ni dokahni do idop ni uhur-Ni;
- ¹¹ na mambobahon Israel luar hun tengah-tengah
ni sidea, tongon, ronsi sadokah ni dokahni
do idop ni uhur-Ni;
- ¹² marhitei tangan na gogoh pakon botokon na
gostong, tongon, ronsi sadokah ni dokahni
do idop ni uhur-Ni;
- ¹³ na mambahen marbolah Laut Arung, tongon,
ronsi sadokah ni dokahni do idop ni uhur-Ni;
- ¹⁴ na padiparhon halak Israel hun tengah-
tengahni, tongon, ronsi sadokah ni dokahni
do idop ni uhur-Ni;

- 15 na mangogapkon Parao pakon balani hubagas
Laut Arung, tongon, ronsi sadokah ni
dokahni do idop ni uhur-Ni;
- 16 na mambobahon bangsa-Ni i halimisan,
tongon, ronsi sadokah ni dokahni do idop ni
uhur-Ni;
- 17 na mantaluhon raja-raja na banggal, tongon,
ronsi sadokah ni dokahni do idop ni uhur-Ni;
- 18 na mamunuh raja-raja na sangap, tongon,
ronsi sadokah ni dokahni do idop ni uhur-Ni;
- 19 si Sihon, raja ni halak Amori, tongon, ronsi
sadokah ni dokahni do idop ni uhur-Ni;
- 20 pakon si Og, raja ni Basan, tongon, ronsi
sadokah ni dokahni do idop ni uhur-Ni;
- 21 na mamberehon tanoh ni sidea bahen
parbagianan; tongon, ronsi sadokah ni
dokahni do idop ni uhur-Ni;
- 22 gabe parbagianan ni Israel, juakjuak-Ni in,
tongon, ronsi sadokah ni dokahni do idop ni
uhur-Ni;
- 23 na mardingat hita bani haetekonta, tongon,
ronsi sadokah ni dokahni do idop ni uhur-Ni;
- 24 na paluah hita humbani imbangta, tongon,
ronsi sadokah ni dokahni do idop ni uhur-Ni;
- 25 na mambere sipanganon bani sagala
mardaging, tongon, ronsi sadokah ni
dokahni do idop ni uhur-Ni.

- ²⁶ Mangkatahon tarima kasih ma nasiam bani
Naibata ni surga, tongon, ronsi sadokah ni
dokahni do idop ni uhur-Ni.

Pardingatan bani Panorang Hamarsikon na i Babel

- 137** ¹ I topi ni bah na i Babel, ijai do
hundul-hundul anjaha tangis hanami,
sanggah mardingat hanami bani Sion.
- ² Bani hayu baringin na ijai ai, igantungkon
hanami do husapinami.
- ³ Ai ijai do ipindo na manaban hanami
pabogeihononnami dodingnami, anjaha
halak na mangarsik-arsik hanami mangindo
doding malas uhur, “Dodingkon hanima ma
bennami sada doding Sion!”
- ⁴ Sonaha ma boi dodingkononnami doding bani
Jahowa i tanoh ni halak na legan?
- ⁵ Anggo lupa ahu bam, ale Jerusalem, age melus
ma tanganku siamun;
- ⁶ longkot ma dilahku bani langit-langitku, anggo
lang huingat ho, anggo lang Jerusalem
hubahen i atas ni ganup malas ni uhur.
- ⁷ Ingat Ham ma, ale Jahowa, ginompar ni Edom,
na mangkatahon bani ari partaban ni
Jerusalem, “Parseda, parseda ma, das bani
palas-palasni!”

- ⁸ Ale boru Babel, ho na parsedahon! Martuah
ma halak na mambalaskon bam, sagala na
binahenmu bennami.
- ⁹ Martuah ma halak na manangkap anakmu,
anjaha na manampakkon ai bani dolog batu.

**Doding Tarima Kasih bani Jahowa,
Sitatap Halak na Malumat**

- 138** ¹ Humbani si Daud. Tarima kasih do
hatahononku Bam, ale Jahowa,
humbani gok ni uhurhu; dodingkononku do
Ham i lobei ni parnagori atas.
- ² Manrogop do ahu dompak rumah-Mu na
pansing in, pujionku do goran-Mu, halani
idop ni uhur-Mu ampa hasintongan-Mu,
ai ipabanggal Ham do goran-Mu ampa
bagah-bagah-Mu mangatasi haganup.
- ³ Sanggah dilo-dilo ahu, ibalosi Ham do ahu;
itambahi Ham do gogoh bani tonduyhu.
- ⁴ Sai Ham ma pujion ni ganup raja-raja ni tanoh
on, ale Jahowa, anggo ibogei sidea ma hata
ni pamangan-Mu.
- ⁵ Dodingkonon ni sidea do pasal dalan ni Jahowa,
ai banggal do hasangapon ni Jahowa.
- ⁶ Tongon, timbul do Jahowa, tapi itatap do halak
na malumat; halak sigijang uhur, humbani
na daoh pe domma itanda.

⁷ Mardalan pe ahu i tongah-tongah ni hasosakan,
Ham do na pagoluh ahu; iolatkan Ham
do tangan-Mu dompak gila ni munsuhku,
anjaha ipaluah Ham do ahu marhitei
tangan-Mu siamun.

⁸ Jahowa do na pasaloiseihon bangku. Ham
Jahowa, ronsi sadokah ni dokahni do idop
ni uhur-Mu. Ulang ma tadingkon Ham
jadi-jadian ni tangan-Mu.

Naibata do Siiani Haganup ampa Sibotoh Haganup

139 ¹ Bani pambobai koor. Sada Psalm
humbani si Daud. Ham Jahowa, ipareksa
Ham do ahu, anjaha itanda Ham do.

² Ibotoh Ham do atap na hundul atap na jongjong
ahu; iarusi Ham do pingkiranku humbani na
daoh.

³ Pardalanku atap parpodomku itulimati Ham do,
haganup do dalanku ibotoh Ham.

⁴ Tongon seng dong hata bani dilahku, sabonarni,
ganup do ibotoh Ham, ale Jahowa.

⁵ Hun pudi pakon hun lobei iinggoti Ham do ahu,
inahkon Ham do tangan-Mu bangku.

⁶ Halongangan botul do bangku habotohan in,
magijangtu, seng tardungdung ahu.

⁷ Huja ma ahu laho manimbili tonduy-Mu, anjaha
huja ma ahu lintun manlembangi bohi-Mu?

- ⁸ Porini naik ma ahu hu nagori atas, ijai do Ham;
Porini hubahen podomanku i nagori toruh
ijai do Ham.
- ⁹ Porini hupakei bangku habong ni buha siang ari,
sihol sogop ahu hu ujung ni laut,
- ¹⁰ ijai pe tangan-Mu do na manangkap ahu,
anjaha ijolomi tangan siamun-Mu do ahu.
- ¹¹ Porini huhatahon, “Na golap ma manrungkub
ahu, anjaha gabe borngin ma na lihar in
bangku!”
- ¹² Jadi hagolapan ai pe seng golap Bamu;
marsinondang do borngin songon arian, na
golap usih songon na lihar.
- ¹³ Ai Ham do na manjadihon piah-piahku, itonun
Ham do ahu ibagas partapaan ni inang,
- ¹⁴ Ham do pujionku, halani halongangan
do parjadingku; halongangan do
pambahenan-Mu, anjaha torang do ai
ididah tonduyhu.
- ¹⁵ Seng ponop holi-holingku i lobei-Mu, sanggah
na ijadihon ahu bani na ponop, sanggah na
itonun ahu i partapaan ni inang.
- ¹⁶ Sanggah solat ope ahu domma ididah
panonggor-Mu, domma tarsurat ganupan ai
ibagas buku-Mu, domma ibuhul ari-aringku
sanggah lape adong age sada.
- ¹⁷ Mahol do bangku pingkiran-Mu, Ham Naibata!
Buei tumang do bilanganni.

- ¹⁸ Porini sihol hiraonku, bueian do ai ase
horsik; anggo puho ahu tong ope ahu i
lambung-Mu.
- ¹⁹ Ambit ibunuh Ham ma, ale Naibata, halak
parjahat; anjaha ambit surut ma humbangku
halak sionsop daroh,
- ²⁰ na manlawan dompak Ham marhitei akal-akal,
na jongjong mangimbang Ham ibagas
hajahaton.
- ²¹ Mintor lang ma sogam uhurhu, ale Jahowa,
mangidah halak na marsogam ni uhur
Bamu; anjaha mintor lang ma magigi ahu,
mangidah halak na manlawan dompak
Ham?
- ²² Das do sogam ni uhurhu mangidah sidea,
munnsuh do sidea bangku.
- ²³ Pareksa Ham ma ahu, ale Naibata, anjaha
tanda Ham ma uhurhu! Uji Ham ma anjaha
tanda Ham ma pingkiranku!
- ²⁴ Kawahkon Ham ma atap dong mardalan ahu
bani dalan hamagouan; togu Ham ma ahu
bani dalan sisadokah ni dokahni.

**Tonggo Mangindo Panramotion
Marimbang Parjahat**

140 ¹ Bani pambobai koor. Psalm humbani
si Daud. (140-2) Sai paluah Ham ma
ahu, ale Jahowa, humbanijolma parjahat;

humbani halak sipangodoh-odoh, sai
parorot Ham ma ahu,

² (140-3) ai ma halak, na mamingkiri hajahaton
ibagas uhurni, na patubuh-tubuhkan
hamunsuhon ari-ari.

³ (140-4) laroti sidea do dilahni songon ulog, bisa
ni ulog darih do i toruh ni bibir ni sidea. Sela.

⁴ (140-5) Sai parorot Ham ma ahu, ale Jahowa,
dompok tangan ni parjahat, anjaha
ramotkon Ham ma ahu humbani halak
sipangodoh-odoh, na mamingkiri ase jiris
naheihu.

⁵ (140-6) Halak sigijang uhur manaon siding
bangku, ipaherbang do puhot bani dalanku,
anjaha inahkon sidea do tirangkap i dalam
padapot ahu. Sela.

⁶ (140-7) Ningku do bani Jahowa, “Naibatanku
do Ham, tangar Ham ma, ale Jahowa, sora
ni elek-elekku.”

⁷ (140-8) Ham Jahowa, Tuhanku, pangurupi na
margogoh bangku, Ham do na mangondingi
ulungku bani ari parporangan.

⁸ (140-9) Ulang ma palopas Ham, ale Jahowa,
sura-sura ni parjahat, ulang ma pasaud Ham
riah ni sidea. Sela.

⁹ (140-10) Ulang ma mandirgak ulu ni halak na
manginggoti ahu, sai mangonai ma bani
sidea hajahaton ni bibir ni sidea.

- ¹⁰ (140-11) Sai mangkadabuh ma narnar bani sidea; sai madabuh ma sidea hubagas lubang, ase ulang tarjongjongkorsi be.
- ¹¹ (140-12) Halak sipanukas-nukasi, sai ulang ma totap i nagori on; Halak sipangodoh-odoh, sai hamagouan ma na mardakdak sidea.
- ¹² (140-13) Tongon, hubotoh do, Jahowa do na pasintongkon uhum bani halak na madoyuk, anjaha na mamintori halak na masombuh.
- ¹³ (140-14) Tongon, sai pujion ni halak parpintor do goran-Mu, anjaha halak sibujur uhur do marianan i lobei-Mu.

Tonggo Mangindo Panramotion humbani na Jahat

141 ¹ Psalm humbani si Daud. Ham Jahowa, dilo-dilo do ahu Bamu, tarolos ma Ham roh bangku; tangar Ham ma sorangku sanggah dilo-ilo ahu Bamu!

- ² Doskon dahupa ma tonggongku i lobei-Mu, anjaha panatang ni tanganku songon galangan bodari.
- ³ Bahen Ham ma, ale Jahowa, panjaga bani pamanganku, anjaha ramotkon Ham ma labah ni bibirhu.
- ⁴ Sai ulang ma lopas Ham teleng uhur hubani na jahat, laho mandalankon horja hajahaton rap pakon halak sihorjahon na masambor;

ulang ma lopas Ham ahu mangan humbani sipanganon ni sidea na mantin.

⁵ Anggo ibogbog anjaha iuhum halak parpintor ahu, holong do ai bangku, tapi minak ni halak parjahat ulang ma dais bani ulungku, ai mangimbang hajahaton ni sidea do tongtong tonggongku.

⁶ Anggo iondoskon sidea bani halak na manguhum sidea, jadi botohon ni sidea ma na sintong do hata ni Jahowa.

⁷ Songon hayu na itaha, mangkamistak ompak-ompak i tanoh, sai sonai ma merap holi-holi ni sidea bani babah ni nagori toruh.

⁸ Tapi Bamu do, ale Tuhan Jahowa, mangkawah matangku; Bamu do ahu maporus, ulang ma useihon Ham tonduyhu.

⁹ Ramotkon Ham ma ahu humbani jarot, na tinaon ni sidea bangku, ampa humbani tirangkap ni parjahat.

¹⁰ Sai madabuh ma raprap halak parjahat hubagas godung ni sidea, tapi anggo ahu lopus ma hunjai.

Tonggo ni Halak Tartutup

142 ¹ Doding podah humbani si Daud, sanggah ibagas liang ia. Sada tonggo.
(142-2) Maling do sorangku dilo-dilo bani

Jahowa, gogoh do sora ni elek-elekku bani Jahowa.

² (142-3) Huuseihon do susah ni uhurhu hu lobei-Ni, hupabotohkon do hasosakanku Bani.

³ (142-4) Galek do tonduyhu ibagas diringku, tapi Ham do na pabotoh-botoh langkahku. Bani dalan sibontasonku, itaon sidea do siding ponop bangku.

⁴ (142-5) Mangkawah ahu dompak siamun, tonggor ma, sahalak pe seng dong na parduli bangku; seng dong be haporusan bangku, seng dong be na manungkun pasal goluhku.

⁵ (142-6) Hu Bamu do ahu dilo-dilo, ale Jahowa, ningku, “Ham do parlingodanku, rupeihu bani tanoh ni halak na manggoluh.”

⁶ (142-7) Pardiateihon Ham ma doruh-doruhku, ai galek tumang do huahap; paluah Ham ma ahu humbani na marburu ahu, ai gogohan do sidea ase ahu.

⁷ (142-8) Paluah Ham ma ahu humbani tutupan, ase hupuji goran-Mu; halak parpintor do na sihol manlioti ahu, anggo ibahen Ham na madear bangku.

**Tonggo Mangindo Haluahon
ampa Panogu-noguon**

143 ¹ Psalm ni si Daud. Ham Jahowa,
tangihon Ham ma tonggongku, tangar
Ham ma elek-elekku; romban hubani
hasintongan ampa hapintoron-Mu, balosi
Ham ma ahu.

² Ulang ma boan Ham juakjuak-Mu hu
paruhuman, ai seng dong halak na
manggoluh pintor i lobei-Mu.

³ Ai iparburu munsuh do tonduyhu, idogei-dogei
do goluhku hu tanoh; inahkon do ahu bani
ianan na golap, songon halak na dob dokah
matei.

⁴ Mandatei do tonduyhu ibagas diringku, jorgong
do pusu-pusungku ibagas.

⁵ Hudingat do ari na dob salpu, hupingkiri sagala
pambahenan-Mu, anjaha ipahusor-husor
uhurhu do jadi-jadian ni tangan-Mu.

⁶ Hupaherbang do tanganku hu Bamu, siholan do
tonduyhu Bamu songon tanoh horah-horah.
Sela.

⁷ Oloskon Ham ma mambalosi ahu, ale Jahowa,
madotei do tonduyhu; ulang ma ponopkon
Ham bohi-Mu bangku, ase ulang usih
songon halak na manuruk tanoman ahu.

- ⁸ Patangarhon Ham ma bangku sogod-sogod idop ni uhur-Mu, Bamu do ahu martenger ni uhur. Pabotohkon Ham ma bangku dalan na patut sidalananku, ai Bamu do hudompakkon tonduyhu.
- ⁹ Paluah Ham ma ahu humbani munsuhku, ale Jahowa, Bamu do ahu maporus.
- ¹⁰ Ajari Ham ma ahu, mambahen harosuh-Mu, ai Ham do Naibatanku; Tonduy-Mu na madear in ma manogu ahu bani dalan na hornop.
- ¹¹ Halani goran-Mu, ale Jahowa, pagoluh Ham ma ahu; halani hapintoron-Mu, paluah Ham ma tonduyhu humbani hasosakan.
- ¹² Halani idop ni uhur-Mu, boiskon Ham ma munsuhku, anjaha ripaskon Ham ma sagala na manosak-nosak tonduyhu, ai juakjuak-Mu do ahu.

Tonggo ni Sada Raja bani Jahowa

Mangindo Hamonangan ampa Hadoharon

- 144** ¹ Humbani si Daud. Napuji ma Jahowa, dolog batu bangku, na mangajari tanganku marporang, sonai jari-jaringku marmunsuh;
- ² hagogohon ampa batar-batar bangku, bentengku ampa Sipaluah ahu, gantarhu

ampa hatengeran ni uhurhu, na
patundukkon bangsa-bangsa hu toruh ni
kuasanku.

³ Ham Jahowa, aha ma jolma in, ase ipardiatei
Ham ia, anjaha anak ni jolma in, ase idingat
Ham ia?

⁴ Doskon logou tumang do jolma, ari-arini usih
songon halinoh na mamontas.

⁵ Ale Jahowa, ondun Ham ma langit-Mu anjaha
turun ma Ham; jamah Ham ma dolog-dolog
in, ase martimus.

⁶ Sampakkon Ham ma hilap-Mu anjaha paerap
Ham ma sidea; siarhon Ham ma panah-Mu
anjaha pardakdak Ham ma sidea.

⁷ Surdukkon Ham ma tangan-Mu hun datas, rotap
Ham ma ahu, anjaha paluah Ham ma ahu
humbani bah marbanggal, humbani kuasa
ni halak na legan,

⁸ na tongtong manluarhon hata ladung babahni.
anjaha tangan siamunni tangan panipuon
do.

⁹ Ham Naibata, sihol dodingkononku do doding
na bayu Bamu, anjaha sihol pujionku do
Ham marhitei husapi sisapuluh tali.

¹⁰ Ham sibere hamonangan bani raja-raja,
anjaha na paluahkon si Daud, juakjuak-Mu,
humbani podang hamagouan,

- ¹¹ rotap anjaha paluah Ham ma ahu humbani
kuasa ni bangsa na legan, na tongtong
manluarhon ladung babahni, anjaha tangan
siamunni tangan panipuon do.
- ¹² Sai songon suan-suanan ma anakta, na dulas
marganjang bani haposoonni, anjaha
borunta songon basikah parsuhi, na
niuhirhon bani rumah bolon.
- ¹³ Sai gok ma tuanganta, padaratkon bagei-bagei
ni sipanganon, marribu-ribu ma biribirinta,
marlaksa-laksa bani sampalanta.
- ¹⁴ Sai mombur-mombur ma lombunta, ulang
mahua-mahua, ulang molei, anjaha ulang
ma dong na tangis i alamanta.
- ¹⁵ Martuah ma bangsa na sonin untungni,
martuah ma bangsa, na mar-Naibatahon
Jahowa.

Puji-pujian bani Habanggalon ni Naibata

- 145** ¹ Doding puji-pujian ni si Daud. Sihol do
patimbulonku Ham, ale Naibatanku,
Raja in, anjaha sihol pujionku do goran-Mu
lalab ronsi sadokah ni dokahni.
- ² Ganup ari do pujionku Ham, anjaha
pasangaponku do goran-Mu lalab ronsi
sadokah ni dokahni.
- ³ Banggal do Jahowa, anjaha sipujian tongon,
seng tardodou hatimbulon-Ni.

- ⁴ Marsipatugahan do sundut-sundut pasal
pambahenan-Mu, anjaha ipatugah do
horja-Mu na banggal in.
- ⁵ Hinajenges ni hamuliaon-Mu do isahapkon
sidea, anjaha halongangan-Mu do na
hupingkir-pingkiri.
- ⁶ Hagogohon ni halongangan-Mu do ihata-
hatahon sidea, anjaha habanggalon-Mu do
ibaritahon sidea.
- ⁷ Pardingatan bani buei ni dear layak-Mu
do patugah-tugahon ni sidea, anjaha
hapintoron-Mu do olobkononni.
- ⁸ Paridop ni uhur anjaha parholong atei do
Jahowa, nanget manringis anjaha parontou
ni uhur banggal.
- ⁹ Pardear layak do Jahowa bani haganup anjaha
holong do atei-Ni bani ganup jadi-jadian-Ni.
- ¹⁰ Ham do ipuji sagala jadi-jadian-Mu, ale Jahowa,
anjaha hinalongan-Mu do pasangapkon
Ham.
- ¹¹ Hamuliaon ni harajaon-Mu do ibaritahon
sidea, anjaha kuasa-Mu do isahapkon,
- ¹² Iaho pabotohkon bani anak nijolma
hagogohon-Mu, pakon hamuliaon ampa
hasangapon-Mu.
- ¹³ Harajaon-Mu ai ma harajaon sisadokah ni
dokahni, anjaha panggomgomion-Mu
marsundut-sundut do.

- ¹⁴ Jahowa do manatang ganup halak na sihol jurgang, anjaha ipajongjong do halak na dob ipatunduk.
- ¹⁵ Ganup do mata mangkawah dompak Ham, anjaha Ham do na mambere sipanganonni bani panorangni.
- ¹⁶ Ham do na mambuha tangan-Mu, anjaha Ham do na pabosur sura-sura ni sagala na manggoluh.
- ¹⁷ Pintor do Jahowa bani sagala dalan-Ni, anjaha paridop ni uhur bani sagala jadi-jadian-Ni.
- ¹⁸ Dohor do Jahowa bani sagala na mandilo-Si, bani haganup na mandilo-Si ibagas hasintongan.
- ¹⁹ Sura-sura ni na mangkabiari-Si isuhuni do, itangar do doruh-doruh ni sidea anjaha ipaluah do sidea.
- ²⁰ Jahowa do na manramotkon sagala ma mangkaholongi-Si, tapi sagala halak parjahat iboiskon do.
- ²¹ Puji-pujian bani Jahowa do sahapkonon ni pamanganku, anjaha sagala na manggoluh ipuji ma goran-Ni na pansing in, lalab ronsi sadokah ni dokahni.

Pitah Naibata hansa Tarhatengerhon

146 ¹ Haleluya. Puji ma Jahowa, ale tonduyhu!

- ² Sai pujionku do Jahowa sadokah ahu
manggoluh, sai dodingkononku do Naibata
sadokah dong ahu. *
- ³ Ulang ma marhatengeran nasiam bani halak na
sangap-sangap, bani anak ni jolma, na seng
dong pangurupion bani. *
- ⁴ Rotapkonsi hosahni mulak ma ia hu tanoh, jadi
bani ari ai magou ma ganup sura-surani. *
- ⁵ Martuah ma halak, na mambahen Naibata ni si
Jakob gabe pangurupini, na marpangarapan
bani Jahowa Naibatani,
- ⁶ ai ma Sitompa langit pakon tanoh sonai
laut ronsi ganup isini; na manramotkon
hasintongan ronsi sadokah ni dokahni. *
- ⁷ na mamintori halak na niodoh-odoh, na
mambere sipanganon bani halak na loheian.
Jahowa do na paluahkon halak na tartutup.
- ⁸ Jahowa do na mangungkab mata ni na
mapitung, Jahowa do na pajongjong
halak na dob ipatunduk, Jahowa do na
mangkaholongi halak parpintor. *
- ⁹ Jahowa do na manramotkon halak panginsolat;
isarihon do halak na tading maetek pakon
na mabalu, tapi ipapelet do dalan ni halak
parjahat. *
- ¹⁰ Jahowa do manrajai ronsi sadokah ni dokahni.
Marsundut-sundut do Naibatamu, ale Sion.
Haleluya!

**Puji-pujian bani Jahowa na Marpanatap bani
Bangsa ampa Sagala na Mangkabiari-Si**

- 147** ¹ Haleluya. Dear do mandoding bani
Naibatanta, tongon, jenges anjaha talup
do puji-pujian sisonai.
- ² Jahowa do na pajongjong Jerusalem; la do na
pahumpul halak Israel na merap in.
- ³ la do na pamalumkon uhur na marosak, anjaha
na mambaluti ugah ni sidea.
- ⁴ la do na manotapkon bilangan ni bintang.
anjaha idilo do ganup bani goranni.
- ⁵ Banggal do Tuhanta anjaha margogoh tumang,
seng tarsibar hapentaran-Ni.
- ⁶ Jahowa do panotap bani halak na masombuh,
tapi ipatoruh do halak parjahat das hu
tanoh.
- ⁷ Dodingkon ma bani Jahowa doding puji-pujian,
dodingkon ma Naibatanami marhitei husapi,
- ⁸ ai la do na manrungkub langit marhitei
hombun, la na pasirsir udan bani tanoh, na
patubuhkan poyon-poyon bani dolog-dolog;
- ⁹ na mambere gagaton bani pinahan, sonai bani
anak ni kawak, na siok-siok hu Bani.
- ¹⁰ Seng dear uhur-Ni mangidah hagogohon ni
huda, seng ihadearhon hae-hae ni dalahi.

- ¹¹ Marosuh do Jahowa bani halak na mangkabiari-Si, na marpangarapan bani idop ni uhur-Ni.
- ¹² Puji ma, ale Jerusalem, Jahowa; pasangap ma Naibatamu, ale Sion!
- ¹³ Ai la do na patoguh oruk-oruk ni horbanganmu, ipasu-pasu do anakmu i tongah-tongahmu.
- ¹⁴ Ibahen do nagorimu mardamei, ipabosur do ho bani gandum na mataboh.
- ¹⁵ Ia do na manongos hata-Ni hu tanoh on, doras do mardalan tonah-Ni.
- ¹⁶ Ia do na mambere salju songon wol, anjaha na manaburhon namur songon abuan.
- ¹⁷ Ia do na manampakkon sira-sira-Ni songon batu ranggisgis, ise do na tahan bani borgohni?
- ¹⁸ Itongos do hata-Ni gabe malala ma ai; ibahen do logou-Ni mangombus, jadi mabaor ma bah.
- ¹⁹ Ipatugah do hata-Ni bani si Jakob, paraturan-Ni ampa titah-Ni bani Israel.
- ²⁰ Seng ibahen na sonai bani ganup bangsa, anjaha titah-Ni seng ibotoh sidea. Haleluya.

**Puji-pujian bani Jahowa
humbani Sagala na Tinompa**

148 ¹ Haleluya. Puji ma Jahowa hun nagori atas, puji ma la bani ianan na i babou.

- ² Puji ma la, nasiam haganup malekat-Ni, puji ma la nasiam ganup bala-Ni.
- ³ Puji ma la, ale mata ni ari ampa bulan; puji ma la sagala bintang na marsinalsal.
- ⁴ Puji ma la, ale langit ni langitan, ampa nasiam bah na i atas ni langit.
- ⁵ Sai ipuji sidea ma goran ni Jahowa, halani marsahap la, gabe jadi ma sidea.
- ⁶ la do na patotap sidea ronsi sadokah ni dokahni, ibere do bani sidea aturan, na so boi langgaron.
- ⁷ Puji ma Jahowa hun tanoh on, hanima dengke bolon na i laut ampa luhung na bagas;
- ⁸ ale apuy pakon sira-sira, salju pakon hambun na manorap, sonai haba-haba na pasaudkon hata-Ni;
- ⁹ ale dolog-dolog pakon buntu-buntu, hayu na marbuah ampa ganup hayu ares;
- ¹⁰ ale binatang pakon ganup pinahan, sagala na manjuluk pakon manuk-manuk na marhabong;
- ¹¹ ale raja-raja ni tanoh on ampa sagala bangsa, ale na sangap-sangap ampa panguhum na i tanoh on;
- ¹² ale nasiam garama pakon anak boru, nasiam na matua rap pakon dakdanak.
- ¹³ Talup do sidea mamuji goran ni Jahowa, ai pitah goran-Ni do na timbul, anjaha

hamuliaon-Ni do na mangatasi tanoh pakon langit.

- ¹⁴ Ia do na patimbul tanduk bani bangsa-Ni, gabe puji-pujian bani ganup na hinaholongan-Ni, bani ginompar ni Israel, bangsa na rapat hu Bani. Haleluya.

Puji-pujian bani Jahowa na Pamong Israel

149 ¹ Haleluya. Dodingkon nasiam ma bani Jahowa sada doding na bayu, puji-pujian hu Bani ibagas kuria ni halak na daulat.

- ² Marmalas ni uhur ma Israel mangidah na manompasi, marsurak-surak ma anak ni Sion mangidah rajani.

- ³ Sai ipuji sidea ma goran-Ni marhitei tortor, sai idodingkon sidea ma la marhasoman tambur ampa husapi.

- ⁴ Ai marosuh do Jahowa mangidah bangsa-Ni, anjaha irudangi halak na toruh maruhur marhitei haluahon.

- ⁵ Sai marolob-olob ma halak na daulat ibagas hamuliaon, sai marmalas ni uhur ma sidea i atas podomanni!

- ⁶ Puji-pujian bani Naibata ma ibagas pamangan ni sidea, anjaha podang sidua mata ibagas tanganni,

- ⁷ laho mandalankon pambalason bani sipajuh begu-begu, ampa uhum bani sagala bangsa,

- ⁸ laho manangkuti raja-raja ni sidea marhitei
rantei, ampa na sangap-sangapni marhitei
gari bosi,
⁹ ase ipasaud bani sidea uhum na dob tarsurat.
Hasangapon ma on bani sagala na
hinaholongan-Ni. Haleluya.

Puji-pujian bani Jahowa
Marhitei Parugas na Laingan

- 150** ¹ Haleluya. Puji ma Naibata bani ianan
Ni na ma pansing, puji ma la ibagas
hajangkajang ni hagogohon-Ni!
² Puji nasiam ma la, halani pambahenan-Ni na
banggal in; puji ma la halani hagogohon-Ni
na tarlobih in!
³ Puji nasiam ma la marhasoman sora ni tarompit,
⁴ Puji ma la marhasoman tambur pakon tortor,
puji ma la marhasoman sarunei pakon
sordam!
⁵ Puji ma la marhasoman ogung na marolol puji
ma la marhitei ogung na marliting!
⁶ Sagala na marhosah, sai ipuji ma Jahowa!
Haleluya.

Podah

- 1** ¹ On do podah ni si Salomo, anak ni si Daud,
raja ni Israel,
² ase ibotoh halak hapentaran pakon pangajaran,
ase iarusi hata hapantason,
³ ase tarjalosi pangajaran na madear, hapintoron,
uhum pakon habonaron,
⁴ laho mambere hapantason bani halak sibulus
uhur, habotohon pakon panimbangion bani
anak garama.
⁵ Halak na pentar pe itangihon ma ai, ase tambah
habotohon bani, anjaha halak na maruhur
dapotan pangajarion,
⁶ laho mangartihon podah pakon limbaga, hata ni
halak na pentar pakon hutinta ni sidea.

Bona ni Hapentaran

- ⁷ Biar mangidah Jahowa do parmulaan ni
habotohon; halak na bodoh teos do uhurni
bani hapentaran pakon pangajaran.
⁸ Tangihon ma, ale anakku, pangajarion ni
bapamu, ulang ma buangkon podah ni
inangmu.
⁹ Ai rudang na majenges do ai bani ulumu, anjaha
sinongkok bani borgokmu.

Lumba-lumba dompak na Pakahouhon

- ¹⁰ Ale anakku, anggo iajar-ajari pardousa ho,
ulang ma tangihon.
- ¹¹ Porini ihatahon sidea, “Eta, irikkon ma hanami
monggop laho manduruskon daroh,
gompangi hita ma halak na so marpipot, age
seng dong halani.
- ¹² Bolur hita ma sidea songon pambahen ni
nagori toruh, manggoluh anjaha hibul,
songon halak na dob tuad hu tanoman.
- ¹³ Bagei ma arta na maharga dapot hita holi, boi
ma igoki hita jabunta bani barang rampasan.
- ¹⁴ Dihut do ho marbagian rap pakon hanami,
sisada parduitan do hita haganup.”
- ¹⁵ Ale anakku, ulang ma ho ra sadalanan pakon
sidea, padaoh ma naheimu humbani dalan
ni sidea;
- ¹⁶ ai dompak hasamboron do marlintun nahei ni
sidea, tarolos do sidea manduruskon daroh.
- ¹⁷ Ai soya do itaon puhot i lobei ni mata ni
manuk-manuk,
- ¹⁸ anjaha sidea ai, daroh ni sidea sandiri do
nionggopanni, anjaha hosahni sandiri do
ginompanganni.
- ¹⁹ Sonai do masa bani halak na hisapan bani
pansarian, hosahni sandiri do hona buat.

Dilo-dilo Hapentaran ai

- ²⁰ Dilo-dilo do hapentaran ai i alaman, ipamaling
do sorani i tiga;
- ²¹ bani ianan na ramei taur-taur do la, anjaha
bani horbangan ni huta ai iluarhon hatani.
- ²² Piga dokah nari do, ale halak na oto, holong
uhurnima bani haotoon? Piga dokah nari
do, ale halak siparrehei, marosuh hanima
manrehei, anjaha halak na oto magigi bani
habotohon?
- ²³ Dompakkon hanima ma pangajaranku, tonggor
ma, useihononku do Tonduyhu, anjaha
pabotohkononku do hatangku bennima.
- ²⁴ Halani dilo-dilo ahu, tapi seng ra hanima
manangihon, husurdukkon tanganku, tapi
sahalak pe lang na parduli,
- ²⁵ itulak hanima do tene haganup podahku,
anjaha seng pot hanima bani pangajarionku,
- ²⁶ halani ai partatawaonku do hanima bani
hamagouannima, anjaha mandoruni bani
pangonai ni songgot-songgot bennima,
- ²⁷ bani na mangonai bennima songgot-songgot
songon haba-haba, bani na roh bennima
hasedaon songon halisungsung, bani na
sogop bennima hasosakan ampa hagobiron.

- ²⁸ Jadi dilo-dilo ma sidea bangku, tapi seng
hubalosi, pindah-pindah sidea bangku, tapi
seng jumpah sidea ahu.
- ²⁹ Halani magigi sidea bani habotohon, anjaha
seng ipilih biar bani Jahowa,
- ³⁰ seng pot sidea bani podahku, anjaha itulak
ganup pangajarionku,
- ³¹ halani ai, maningon panganon ni sidea do
buah ni parlahouni, anjaha bosur sidea bani
ranggianni.
- ³² Ai panundalion ni halak na oto do gabe
hamatean bani, anjaha halanseion ni halak
na lontong parsedahon dirini.
- ³³ Tapi atap ise na manangihon ahu, marsonang-
sonang do ia marianan, seng anjai gobir ia
dompok songgot-songgot ni hamagouan.

Pasu-pasu bani Halak Siirikkon Hapentaran in

- 2** ¹ Ale anakku, anggo ijalo ho hatangku anjaha
iparimbagaskon ho titahku,
- ² tangi ho bani hapentaran anjaha itareihon ho
uhurmu dompak pangarusion,
- ³ tongon, anggo dilo-dilo ho bani pangarusion,
ipamaling ho soram mangindo hauhuron,
- ⁴ anggo ipindahi ho ai songon na mangindahi
pirak, anjaha i torihi ho ai songon bani arta
na ponop,

- ⁵ jadi arusanmu ma biar dompak Jahowa, anjaha jumpah ho habotohon pasal Naibata.
- ⁶ Ai Jahowa do sibere hapentaran, humbani pamanganni do roh habotohon pakon hauhuron;
- ⁷ Ia do sipasirsir pangurupion bani halak parpintor, Ia do gantar bani halak na bujur marparlahou.
- ⁸ Ijaga do pardalan ni uhum, anjaha iramotkon do dalan ni halak na daulat Bani.
- ⁹ Jadi arusanmu ma hapintoron pakon uhum, habonaron pakon sagala dalan na dear;
- ¹⁰ ai roh ma hapentaran hubagas uhumu, anjaha mantin ma habotohon bani tonduymu;
- ¹¹ uhur hapantason ma manramotkon ho, anjaha pangarusion siparjaga bam.
- ¹² Paluahonni do ho humbani dalan hamagouan, humbani halak sisahapkon na masambor,
- ¹³ halak na manundalhon dalan hasintongan, laho mardalan bani dalan hagolapan,
- ¹⁴ na marosuh mangkorjahon na marsambor anjaha na marmalas uhur bani tahi-tahi na jahat,
- ¹⁵ halak na marlegot-legot pardalanni, na mardalan bani dalan hakahouan.
- ¹⁶ Paluahonni do ho humbani parinangon ni halak, humbani parinangon na legan simantin sahap,

- ¹⁷ na manadingkon hasoman haposoonni hinan,
na mangkalupahon padan ni Naibatani.
- ¹⁸ Ponop do rumahni hu hamatean, sonai age
dalanni hu nagori toruh.
- ¹⁹ Sagala na laho hu bani, seng mulak be, anjaha
seng dapotsi be dalan hagoluhan.
- ²⁰ Mardalan ma ho bani dalan ni halak na bujur,
anjaha totap ma ho bani dalan ni halak
parpintor.
- ²¹ Tongon halak parpintor do siiankon tanoh
on, anjaha halak na daulat totap marianan
ibagas,
- ²² tapi halak parjahat ripasonkon do hun tanoh
ai, anjaha halak sipangosei iorbat do hunjai.

Ojur-ojur Marparlahouhon Hadaulat

- 3** ¹ Ale anakku, ulang ma ho lupa bani podahku,
sai paruhurhon ma parentahku,
- ² ai tambahkononni do bam ari na madear, umur
na ganjang ampa hadoharon na gok.
- ³ Holong ampa hasintongan ulang ma laho
humbam, parsinongkok ma ai anjaha
suratkon ma bani atei-ateimu.
- ⁴ Jadi dapotan idop ni uhur ma ho ampa na
madear i lobei ni Naibata ampa jolma.
- ⁵ Tenger ma uhurmu bani Jahowa humbani gok ni
uhurmu, ulang ma ho marpangunsandeian
bani pingkiranmu sandiri.

- ⁶ Bani haganup dalanmu ingat ma la, jadi la ma papintor dalanmu.
- ⁷ Ulang na dob maruhur ho ninuhurmu, habiari ma Jahowa, anjaha padaoh dirimu humbani hajahaton.
- ⁸ Gabe tambar ma ai bani dagingmu, anjaha hahisaron bani holi-holimu.
- ⁹ Pasangap ma Jahowa marhitei habayakonmu ampa marhitei limbah ni sagala pansarianmu;
- ¹⁰ jadi gok ma tuanganmu bani gandum, anjaha sampur kilangmu ibahen anggur.
- ¹¹ Ale anakku, ulang ma mapas uhurmu bani pangajarion ni Jahowa, anjaha ulang sogam uhurmu bani uhuman-Ni.
- ¹² Ai hinaholongan-Ni do ipinsang Jahowa songon bapa dompak anak, na hinarosuhkon ni uhur-Ni.

Seng dong na Mangatasi Hapentaran

- ¹³ Martuah dojolma na dapotan hapentaran, ampajolma na jumpahan pangarusion,
- ¹⁴ ai na mandapot ai dearan do ai humbani na mandapot pirak, harganan do ai humbani omas.
- ¹⁵ Harganan do ai ase mutiha, anjaha sagala na hinarosuhkonmu seng taratasisi ai.

- ¹⁶ Umur na ganjang do bani tangan siamunni,
bani tangan sambilouni habayakon pakon
hamuliaon.
- ¹⁷ Dalanni, ai ma dalan harosuh, anjaha damei do
sagala nilangkahkonni.
- ¹⁸ Hayu hagoluhan do ai bani halak na jumpahan
ai, anjaha martuah do halak, na manjolomsi.
- ¹⁹ Jahowa do na pajonam dunia on marhitei
hapentaran; langit ai marhitei uhur
panimbangion.
- ²⁰ Marhitei habotohonni mapultak luhung ni laut,
anjaha hambun manektekkon namur.
- ²¹ Ale anakku, ulang magou ai humbani
panonggormu; ramotkon ma hauhuron
ampa partimbangan,
- ²² ase gabe hagoluhan ai bani tonduymu, anjaha
hajagaron bani borgokmu.
- ²³ Gabe sonang ma ho bani dalanmu, anjaha
naheimu seng anjai tarantuk.
- ²⁴ Bani na hundul ho seng anjai songgotan, anggo
ipatibal ho dirimu, sonang do parpodommu.
- ²⁵ Ulang pala rusak ho halani songgot-songgot na
sompong parrohni, atap halani hamagouan
na mangonai bani halak parjahat;
- ²⁶ ai Jahowa do hatengeran ni uhur bam,
ramotkonon-Ni do naheimu humbani jarot.

Hata Golpa-golpa ampa Lumba-lumba

- ²⁷ Ulang ma ho manjua mambahen na madear
bani halak na hurangan, anggo tuk do
gogohmu mandalankon ai.
- ²⁸ Ulang ma hatahon bani hasomanmu, “Laho
ma, sahali nari ma ho roh, patar pe hubere,
hape adong do bam.”
- ²⁹ Ulang ma uhurhon na jahat dompak
hasomanmu, na marianan martenger ni
uhur rap pakon ho.
- ³⁰ Ulang ho marsalisih dompak halak seng
marhala, anggo seng dong ibahen na jahat
bam.
- ³¹ Ulang ma ho simburu bani halak sipangodoh-
odoh anjaha ulang ma ihutkon dalanni;
- ³² ai hagigi do halak sipanlawan bani Jahowa, tapi
saor do la bani halak parpintor.
- ³³ Papa ni Jahowa do mangonai bani rumah
ni parjahat, tapi ianan ni parpintor
ipasu-pasu-Si do.
- ³⁴ Halak na pahiri-hirihon ipahiri do, tapi maidop
do uhur-Ni bani halak sitoruh uhur.
- ³⁵ Hamuliaon do siteanon bani halak siparuhur,
tapi habadoron do parbagianan ni halak na
oto.

**Sipaingat ni Bapa bani Anak, ase
Ipindahi Hapentaran**

- 4** ¹ Tangar ma, ale anakku, pangajarion ni bapanima, paruhurhon ma, ase dapotan pangarusion.
- ² Ai ajaran na madear do sihol bereonku bennima, podahkai ulang ma tadingkon hanima.
- ³ Sanggah poso ope ahu i lobei ni bapa, etek anjaha anak sasada i lambung ni inang,
- ⁴ iajari do ahu, nini hu bangku, “Sai marsijoloman bani hatangku ma uhurmu, dalankon parentahku, ase manggoluh ho.”
- ⁵ Pindahi ma hapentaran, pindahi hauhuron, ulang lupa ho pasal ai, ulang ho manlembang humbani hata ni pamanganku.
- ⁶ Ulang ma tadingkon ai, ase iramotkon ho, haholongi ma ai, ase ijaga ho.
- ⁷ Parjadi ni hapentaran, ai ma, sari ma hapentaran, sari ma hauhuron marhitei sagala na dong bam.
- ⁸ Harga ma bahen ai, jadi patimbulonni ma ho, rohop ma ai, ase ipasangap ho.
- ⁹ Nahkononni do bani ulumu rudang na majenges, anjaha sortali na majagar do berehononni bam.

- ¹⁰ Tangihon ma, ale anakku anjaha jalo ma hatangku, ase tambah ari-ari ni goluhmu.
- ¹¹ Sihol do ajarhononku bam dalam hapentaran, anjaha togu-toguonku ho bani dalam na pintor.
- ¹² Bani pardalanmu, seng dong na mangolat langkah-langkahmu, anjaha marlintun pe ho, seng anjai tartolsu.
- ¹³ Jolom ma ho bani podah ulang paluah, ramot bahen, ai hagoluhan do ai bam.
- ¹⁴ Dalam ni parjahat ulang masuki, anjaha ulang ma dalani dalam ni halak na jahat.
- ¹⁵ Lembangi ma ai, ulang montas hunjai, simbili ma ai, toruskon dalammu.
- ¹⁶ Seng tarpodom sidea anggo lang palobei manjahati, seng ra sinok matani, anggo lang lobei dong na targompang ibahen.
- ¹⁷ Hajahaton do ruti bani sidea, anjaha pangodoh-odohon anggur ni sidea.
- ¹⁸ Tapi dalam ni halak parpintor songon sinalsal sogod-sogod do, lambin torang marsinondang paima tengah ari.
- ¹⁹ Dalam ni halak parjahat lotir do, seng ibotoh sidea ija partolsuan.
- ²⁰ Ale anakku, parimbagaskon ma hatangku, bani sahapku ma pateleng pinggolmu.
- ²¹ Ulang ma sasap ai humbani matamu, simpan ma ai ibagas uhurmu.

- ²² Tongon, hagoluhan do ai bani na jumpahan ai,
tambar bani haganup angkulani.
- ²³ Tang siporlunan, jaga ma uhurmu, ai hunjai do
luar hagoluhan.
- ²⁴ Ambukkon ma humbam pamangan
siparladung, anjaha sahap na marputor-
putor daoh ma ai humbam.
- ²⁵ Pintor ma panonggor ni matamu hu lobei,
anjaha dompak lobei ma pangkawahmu.
- ²⁶ Pardiатеihon ma panlangkah ni naheimu, ase
tarjamin ganup dalanmu.
- ²⁷ Ulang ma manlembang hu siamun atap hu
sambilou, pasurut ma naheimu humbani
hajahaton.

Lumba-lumba dompak Puang-puang Parbangkis

- 5** ¹ Ale anakku, paruhurhon ma hapentaran na
humbangku, anjaha pateleng pinggolmu
hubani hauhuron na humbangku,
- ² ase tarramotkon ho uhur panimbangion, anjaha
bibirmu manjolom habotohon.
- ³ Mantektekkon manisan do bibir ni boru jalang,
anjaha landitan do tolonanni ase minak;
- ⁴ tapi dobni paetan do ai ase pogu, marot songon
podang sidua mata.
- ⁵ Naheini tuad hu hamatean, anjaha langkah-
langkahni manuju nagori toruh;

- ⁶ seng ipardulihon dalan hu hagoluhan, kahou do
panlangkahni, seng panagamanni.
- ⁷ Ai pe, ale anakku, tangihon hanima ma ahu,
ulang ma manlembang hanima humbani
hata ni pamanganku.
- ⁸ Padaoh ma dalanmu hun bani, anjaha ulang ma
dohori labah ni rumahni,
- ⁹ ase ulang ibere ho gogohmu bani halak na
legan, ampa ari-ari ni goluhmu bani halak
na so parholong,
- ¹⁰ ase ulang halak na legan marbosur-bosur
humbani pansarianmu, anjaha na
hinangalutkonmu laho hu rumah na legan,
- ¹¹ gabe morong-orong ho bani ujungni, bani
parreong ni dagingmu pakon angkulamu,
- ¹² gabe ihatahon ho, "Mase ma nani huhagigihon
pangajaran, anjaha itulak uhurhu
pinsang-pinsang?
- ¹³ Mase ma lang hutangihon sora ni gurungku,
anjaha mase ma lang hupateleng pinggolhu
bani na mangajari ahu?
- ¹⁴ Otik nari mando ase magou tumang ahu, i
tongah-tongah ni humpulan ni kuria in."
- ¹⁵ Minum ma ho humbani parigimu sandiri,
humbani bah na mabaor humbani bah
tubuhmu.
- ¹⁶ Ulang ma manjalir bah na hun parigimu hu
darat, gabe bah na mardalan i alaman!

- ¹⁷ Ho ma gelah parsimada ijai, ulang dong halak na legan hasomanmu.
- ¹⁸ Sai pinasu-pasu ma bah tubuhmu, anjaha malas ma uhurmu bani parinangon sanggah haposoonmu, na laingan songon ursa, na majenges songon balua.
- ¹⁹ Sai hajengesonni ma na pabosurhon ho, anjaha marsombuh-sombuh ma ho marhitei holongni.
- ²⁰ Mase ma, ale anakku, mabuk ho bani parinangon ni halak, anjaha irohoh ho naboru na legan?
- ²¹ Ai talar do dalan ni ganup halak i lobei ni Jahowa, anjaha ipardiatei do ganup langkah-langkahni.
- ²² Hajahatonni sandiri do na manangkap parjahat, anjaha ipardiatei do ganup langkah-langkahni.
- ²³ Matei do ia halani itulak pangajaran, anjaha halani bangga ni haotoonni kahou do ia.

**Hata Lumba-lumba bani Halak Sijamini
Hasomanni, bani Halak Siparrayoh
ampa bani Halak Pargeduk**

- 6** ¹ Ale anakku, anggo ra ho manjamin hasomanmu, pala marjabat tangan ho mangkopkop halak na legan.

- ² Jadi anggo sangkut ho marhitei sahap ni
bibirmu, tartangkap ibahen hata ni
pamanganmu,
- ³ on ma bahen, ale anakku, paluahkon dirimu,
ai domma madabuh ho hubagas tangan
ni hasomanmu. Laho ma, patoruh dirimu,
elek-elek ma hasomanmai!
- ⁴ Ulang ma lopas matamu modom, atap
salibonmu tartunduh;
- ⁵ sai paluah ma dirimu, songon balua hun tangan
ni parburu, songon manuk-manuk hun
tangan ni parsambil.
- ⁶ Laho ma bani porkis, ale parrayoh, pardiatei ma
pambahenanni, anjaha maruhur ma!
- ⁷ Age pe lang dong bani sidea pangulu, mandur
atap raja,
- ⁸ ipasirsir do sipanganonni bani musim logou ni
ari, ipatumpu do sipanganonni bani musim
sabion.
- ⁹ Sadiha dokah ho modom-modom, ale parrayoh?
Andigan pe ho puho humbani na modom?
- ¹⁰ Nim, "Tongkin nari modom, tongkin nari
tartunduh, tongkin nari tibal-tibal anjaha
marlompit tangan,"
- ¹¹ jadi roh ma bam hamiskinon songon panamun,
anjaha hahurangan songon halak parsinjata.

- ¹² Jolma na so margagan, halak sihorjahon
hajahaton, ai ma na mansahap-sahapkon
hata ladung,
¹³ ai ma na pahirdop-hirdop matani, sibere
partanda marhitei naheini, anjaha na
patuduhkon marhitei jari-jarini,
¹⁴ ai ma na manranggihon na masambor
marhitei akal-akal ampa na torus manuan
paringoran.
¹⁵ Halani ai sompong do roh hasedaon bani;
podas do ia maropuk, seng hatambaran.
¹⁶ Na onom on ihasogamkon Jahowa, na pitu on
tene ihagigihon:
¹⁷ Mata na mangenjeng, dilah siparladung, ampa
tangan siduruskon daroh na so marpipot,
¹⁸ uhur na paranggi-ranggi hajahaton, ampa
nahei na sihap marlintun bani na masambor,
¹⁹ saksi palsu siluarhon ladung, ampa na manuan
parbolah-bolahan i tongah-tongah ni na
marsanina.

Lumba-lumba Pasal Parbangkison

- ²⁰ Ale anakku, ramotkon ma parentah ni bapamu,
anjaha ulang ma ambukkon pangajaran ni
inangmu.
²¹ Sangkutkon ma ai tongtong ibagas uhurmu,
anjaha parsinongkok bani borgokmu.

- ²² Anggo mardalani ho, ai ma na manogu-nogu
ho, anggo modom ho, ai ma na manjagai ho;
anjaha anggo puho, ai ma na marsahapkon
ho.
- ²³ Ai suluh do titah ai, anjaha pangajaran
ai panondang; dalan hu hagoluhan do
pinsang-pinsang ampa lumba-lumba,
- ²⁴ na manjaga ho humbani naboru na jahat,
humbani naboru na legan silandit dilah.
- ²⁵ Ulang oji ho mangidah hajengesonni ibagas
uhurmu, anjaha ulang ma tartangkap ho
ibahen hirdop ni matani.
- ²⁶ Ai halani boru jalang rugi do halak sansayat
ruti, tapi halani parinangon ni halak na legan
magou tonduy na maharga ai.
- ²⁷ Ai boi do halak mamboan apuy bani abinganni,
anjaha hiouni ai seng mosog?
- ²⁸ Atap tarbahen halak do mardalan i atas ni
narnar, anjaha naheini ai seng matutung?
- ²⁹ Sonai do halak na mandohori parinangon ni
hasomanni; seng anjai lang hona uhum na
manjamahsi.
- ³⁰ Ai lang bador do panangko, anggo manangko
ia laho pasombuh hisapni, halani loheian ia?
- ³¹ Anggo tardapot ia, maningon paulakonni do
pitu hali lumpit, ronsi haganup ugas-ugas na
i rumahni maningon berehononni do.

- ³² Tapi halak na lontong do halak sihorjahon
parbangkison; na mansedahon dirini do
halak na mangkorjahon ai.
- ³³ Pukul-pukul pakon habadoron do rupeini,
anjaha seng tarsasap be habadoronni ai.
- ³⁴ Ai parsimburuon do mamuhoi ringis ni dalahi,
anjaha seng maralang-alangan uhurni bani
ari pambalason.
- ³⁵ Pardearan aha pe lang martarima bani, sadiha
pe ibere ho, seng ra ia manjalosi.

**Marjaga ma dompak Akal-akal
ni Naboru Parbangkis**

- 7** ¹ Ale anakku, ramotkon ma hatangku, anjaha
simpan ma bahen parentahku;
- ² jaga ma parentahku ase manggoluh ho, ampa
titahku songon anak ni matamu.
- ³ Sangkutkon ma ai bani jari-jarimu, bani uhurmu
ma suratkon ai.
- ⁴ Hatahon ma bani hapentaran, “Botouhu do
ham” anjaha huanmu ma goran hauhuron
ai,
- ⁵ ase ia ma na manramotkon ho dompak
parinangon ni halak, dompak parinangon na
legan siparsahap na landit.
- ⁶ Mangkawah do ahu sahali humbani jendela ni
rumahku, humbani jaring-jaringni ai,

- ⁷ gabe huidah ma sahalak na so maruhur, dapot
panonggorhu ma sada garama, na so
marpangartian,
- ⁸ montas i pasar, dohorhon suhi-suhi ni rumahni,
mardalan bani dalan hu rumahni ai,
- ⁹ sanggah samun ari, sanggah bodari, sanggah
borngin anjaha golap ari.
- ¹⁰ Anjaha tonggor ma, sada naboru roh
manjumpahkonsi, marpakeian boru jalang,
maruhur akal-akal.
- ¹¹ Seng marhatontuan panlangkahni, garang do
ia, seng tarsohkonsi be naheini i rumahni;
- ¹² tongkin ia i alaman, tongkin nari domma i
tiga, bani ganup sirpang ni dalan do ia
manggompangi.
- ¹³ Itangkap ma parana ai anjaha isummah,
marhasoman bohi na so maila iparsahapkon
ma ia, nini,
- ¹⁴ “Marutang galangan banggal ni uhur do ahu,
sadari on do hugalar bagah-bagahku.
- ¹⁵ Ai do ase luar ahu manjumpahkon ham, laho
mangindahi bohimu, gabe jumpah do ham.
- ¹⁶ Domma huamparhon apei bani podomanku,
marhasoman linnen Masir sibagei rupa.
- ¹⁷ Domma hupamisbou podomanku marhitei mir,
aloe ampa kulit manis.
- ¹⁸ Laho ma hita pasombuh-sombuh uhurta ronsi
patar.

- ¹⁹ Ai seng i rumah dalahingku, bani pardalanan
na madaoh do ia nuan.
- ²⁰ Iboan do ranjut parduitanni, bani bulan tula pe
ia mulak.”
- ²¹ Taroto do ia ibahen marhitei buei ni hatani,
teleng do uhurni marhitei landit ni
parsahapni.
- ²² lihutkon ma ia torus songon lombu na tinogu
hu pamotongan, songon ursa na masuk
hubagas jarot,
- ²³ ronsi hona tiham atei-ateini ibahen tanja;
songon manuk-manuk do ia mandorab
sambil, seng ibotoh hosahni sandiri do na
niagouni ijai.
- ²⁴ Ai pe, ale anakku, tangihon ma ahu anjaha
paruhurhon ma hata ni pamanganku.
- ²⁵ Ulang ma manirpang uhurmu dompak dalanni
ai, ulang ma kahou ho bani dalanni.
- ²⁶ Ai buei ma halak matei na niraseihonni, anjaha
bahat ma na nibunuhni.
- ²⁷ Dalam manuju dompak nagori toruh do
rumahni, tuad hu kamar ni hamatean.

Dilo-dilo ampa Hasaksian ni Hapentaran

8 ¹ Ai lang dilo-dilo do hapentaran ai, anjaha
hauhuron ai pamaling sorani?

² I atas, bani buntu-buntu, i lambung ni dalan,
bani sirpang do ia jongjong,

- ³ bani horbangan, bani dalan masuk hubagas
huta, bani horbangan hudarat do ipamaling
sorani, nini,
- ⁴ “Bennima do, ale dalahi, dilo-dilo ahu, anjaha
taur-taur bennima, ale anak ni jolma.
- ⁵ Guruhon hanima ma habotohon, ale halak
na bodoh, anjaha hanima, gabe halak na
maruhur ma.
- ⁶ Tangihon ma, ai sihol mansahapkon na maharga
do ahu, sihol manluarhon hasintongan do
bibirhu;
- ⁷ ai hasintongan do sihol hatahonon ni
pamanganku; tapi magigi do bibir hubani na
masambor.
- ⁸ Pintor do haganup sahap ni pamanganku; seng
dong na geduk atap na lepak ijai.
- ⁹ Haganupan ai sintong do bani siparuhur, anjaha
bonar bani halak na marpambotoh.
- ¹⁰ Jalo ma pangajaranku, rahanan humbani pirak,
sonai homa habotohon, dearan humbani
omas pitah.
- ¹¹ Harganan do hapentaran ase mutiha, anjaha
haganup na hinarosuhkon ni halak seng
taratasisi ai.
- ¹² Ahu, hapentaran ai, marianan do i lambung ni
hapandeian, jumpahan habotohon pakon
hapandeian do ahu.

- ¹³ Biar bani Jahowa, magigi do ai bani na masambor, uhur hagijangon ampa pangenjengon, parlahou na masambor ampa parsahap na margoling-goling, magigi do ahu pasal ai.
- ¹⁴ Ahu do simada panuturion pakon na pasaudkon ai, Ahu do simada hauhuron pakon hagogohon.
- ¹⁵ Marhitei ahu do manggomgomi raja-raja, anjaha itotapkon siparkuasa hapintoron.
- ¹⁶ Marhitei ahu do manrajai sipanggomgomi, sonai homa na sangap-sangap ampa haganup panguhum na pintor.
- ¹⁷ Holong do uhur hubani sagala na mangkaholongi ahu, anjaha halak sipindahi ahu, sai jumpahsi do ahu.
- ¹⁸ Bangku do habayakon pakon hamuliaon, arta na manotap pakon hapintoron.
- ¹⁹ Dearan do buahku humbani omas, humbani omas pitah tene, sonai age pansarianku humbani pirak pilihan.
- ²⁰ Bani dalan hapintoron do ahu mardalan, bani dalan habonaran do langkahku,
- ²¹ laho manlayak-layakkon parbagianan bani na mangkaholongi ahu, laho manggoki parartaan ni sidea.

- ²² Jahowa do manompa ahu bani mungkah ni
panompaon-Ni, gabe parmulaan ni horja-Ni
bani na basaia.
- ²³ Bani panorang sapari ai do ahu iadongkon,
bani mulani, paima adong tanoh on.
- ²⁴ Seng dong ope laut domma itubuhkan
ahu, seng dong ope bah tubuh na
marburlak-burlakkon bah,
- ²⁵ sanggah lape ipasuk sagala dolog, anjaha
sanggah lape adong buntu-buntu, domma
itubuhkan ahu;
- ²⁶ sanggah lape iadongkon tanoh on tene, ampa
ladangni, sonai age orbuk na parlobei i
tanoh on.
- ²⁷ Sanggah la pajongjongkon langit ai, ijai do ahu,
sanggah na binolat-Ni ai hajangkajang i atas
ni laut ai,
- ²⁸ sanggah ninahkon-Ni ai hambun i atas, sanggah
pinaroh-Ni ai bah na marburlak-burlak hun
toruh,
- ²⁹ sanggah na binahen-Ni ai parbolatan ni laut,
ase ulang ilanggar bah ai parentah-Ni,
sanggah na pinasuk-Ni ai onjolan ni tanoh
on, ijai do ahu, anak hinaholongan-Ni,
- ³⁰ i lambung-Ni ijia, megah ni uhur-Ni ahu ganup
ari, marguro-guro tongtong i lobei-Ni,
- ³¹ marguro-guro do ahu i sab dunia on, anjaha
malas do uhur hubanijolma manisiasia.

- ³² Ai pe, ale anakku, tangihon ma ahu, martuah do halak siramotkon dalanku.
- ³³ Tangihon hanima ma pangajaranku, ase pentar hanima, sai ulang ma lansei pasal ai.
- ³⁴ Martuah ma halak sitangihon ahu, na marjaga ganup ari bani labahku, anjaha sipanramotkon bani horbanganku.
- ³⁵ Halak na jumpahan ahu, hagoluhan do jumpahsi anjaha gabe harosuh bani Jahowa.
- ³⁶ Tapi na so jumpahan ahu, dirini do pinarsedani, sagala na magigi bangku, hamatean do hinaholonganni ijai.”

Ontangan humbani Hapentaran ampa Haotoon

- 9** ¹ Ia hapentaran ai domma ipajongjong rumahni, ipasuk do basikahni na pitu ai,
- ² isayat do pinahanni, irarui anggurni, anjaha ipasirsir do mejani.
- ³ Isuruh do juakjuakni naboru martaur humbani ianan na gijang i huta ai,
- ⁴ “Barang ise na so marpambotoh, roh ma ia hujon!” Bani halak na oto ihatahon,
- ⁵ “Roh ma, pangan hanima ma indahanku anjaha inum ma anggurhu, na dob hurarui.
- ⁶ Tadingkon hanima ma haotoon ase manggoluh anjaha mardalan ma hanima bani dalam pangarusion.”

- ⁷ Halak sipinsang sipanrisai dapotan habadoron,
anjaha halak sihata parjahat pasambor dirini
sandiri do.
- ⁸ Ulang ma pinsang sipanrisai, ase ulang
mardomdom ia bam, halak siparuhur ma
pinsang, gabe haholonganni ma ho.
- ⁹ Bere ma bani siparuhur, ase lambin maruhur
ia, ajari ma halak parpintor, ase tambah
habotohonni.
- ¹⁰ Biar mangidah Jahowa do mula ni hapentaran,
anjaha panandaion bani Na Pansing ai, ai do
pangarusion.
- ¹¹ Ai marhitei ahu do ganjang ari-arimu anjaha
tambah bam tahun ni goluhmu.
- ¹² Anggo pentar ho, bam do hapentaranmai;
tapi anggo manrisai ho, ho sandiri do na
mangahapkon ai.
- ¹³ Ia haotoon doskon naboru na garang do
ai, seng dong pangartianni, seng dong
binotohni.
- ¹⁴ Bani labah ni rumahni do ia hundul-hundul,
bani ianan sigijangan i huta ai,
- ¹⁵ dilo-dilo bani halak na mamontas, na
mannunuti pardalananni, nini,
- ¹⁶ “Barang ise na bodoh, singgah ma hujon!” Bani
halak na oto ihatahon,

¹⁷ “Matobu do bah tinangko-tangko, anjaha mantin do ruti na pinangan marponop-ponop.”

¹⁸ Tapi seng ibotoh adong do hamatean ijai, anjaha ibagas nagori toruh do niontangni ai.

Podah Pasal Hapentaran ampa Hadaulaton

10 ¹ Podah ni si Salomo. Anak na maruhur pamalas uhur ni bapani, tapi anak na bodoh papusok uhur ni inangni,

² Arta na dapot humbani hajahaton, seng marguna, tapi hapintoron do na paluahkon humbani hamatean.

³ Seng ipaturut Jahowa loheian parpintor, tapi anggo hisap ni halak parjahat isundati do.

⁴ Tangan parrayoh mangkorhon hamiskinon, tapi tangan na ringgas mambahen bayak.

⁵ Halak na ringgas patumpu-tumpuhon bani musim milas, ai ma siparuhur; tapi halak na modom-modom musim sabion, parohkon habadoron.

⁶ Pasu-pasu do sogop bani ulu ni halak parpintor, tapi gok hagedukon do babah ni halak parjahat.

⁷ Mardingat halak parpintor parohkon pasu-pasu, tapi bau do barita ni halak parjahat.

- ⁸ Halak siparuhur ra do manjalo pangajaran,
tapi halak parsahap haotoon maningon
madabuh do.
- ⁹ Sonang do halak na pitah marparlahou, tapi
halak na geduk marparlahou sai tardapot
do.
- ¹⁰ Halak na paserleng matani parohkon na
maborit, tapi halak na torang-torang
maminsang mangkorhon hadearon.
- ¹¹ Bah hagoluhan do pamangan ni halak
parpintor, tapi gok hagedukon do pamangan
ni halak parjahat.
- ¹² Domdom do mamuhoi paringoran, tapi
irungkub holong ai do sagala hasalahan.
- ¹³ Bani bibir ni halak na pantas do dapot
hapentaran, tapi lonsing-lonsing do patut
mangonai bani gurung ni halak na hurang
uhur.
- ¹⁴ Halak na pentar pagugun habotohon, tapi
pamangan ni halak na bodoh ai ma
hamagouan na mangondam.
- ¹⁵ Arta ni halak na bayak, huta na toguh do ai
bani, tapi hasedaon do hamiskinon ai bani
halak na masombuh.
- ¹⁶ Pansarian ni halak parpintor mambobai hu
hagoluhan, tapi na sinari ni halak parjahat
hubagas dousa.

- ¹⁷ Mardalan bani dalan hagoluhan do halak siramotkon pangajaran, tapi kahou do halak na so parduli bani pinsang-pinsang.
- ¹⁸ Halak pardomdom, ai ma parbibir ladung, tapi halak sipangkatai ai ma halak na bodoh.
- ¹⁹ Lang tarbahren lang dong salah bani hata na buei, tapi halak na manrantei bibirni ai ma na pandei.
- ²⁰ Doskon pirak pilihan do dilah ni halak parpintor, tapi pingkiran ni halak parjahat seng sadiha hargani.
- ²¹ Bibir ni halak parpintor do sipambobai bani buei halak, tapi matei do halak na bodoh ibagas haotoonni.
- ²² Pasu-pasu ni Jahowa do mambahen bayak, anjaha seng pala marhasoman halojaon.
- ²³ Gurou-gurou do bani halak na oto mandalankon hajahaton, tapi hapentaran do rosuh ni halak na maruhur.
- ²⁴ Na hinabiaran ni halak parjahat, ai do sogop hu bani, tapi ibere do bani halak parpintor, na pinindo ni uhurni.
- ²⁵ Anggo montas haba-haba, bois do parjahat, tapi totap do lalab halak parpintor.
- ²⁶ Doskon na migar bani ipon ampa timus bani mata, sonai do parrayoh bani na marsuruhsi.
- ²⁷ Biar bani Jahowa do paganjang umur, tapi ari-ari ni halak parjahat ipapondok do.

- ²⁸ Pangarapan ni halak parpintor paroh malas ni uhur, tapi na lang do pinaima-ima ni halak parjahat.
- ²⁹ Batar-batar do Jahowa bani halak na daulat, tapi hamagouan do bani halak sihorjahon hajahaton.
- ³⁰ Seng anjai dugur halak parpintor, tapi halak parjahat seng iankononni tanoh in.
- ³¹ Pamangan ni halak parpintor patubuh hapentaran, tapi dilah pargeduk maningon rotapon do.
- ³² Bibir ni halak parpintor mambotoh na madear, tapi pamangan ni parjahat mansedahon do.

Sambatni

- 11** ¹ Timbangan palsu hagigi do ai bani Jahowa, tapi batu timbangan na sintong do harosuh-Ni.
- ² Masa gijang ni uhur, masa ma habadoron, tapi hapentaran do jumpah bani sitoruh uhur.
- ³ Habonaron ni halak parpintor, ai do pambobai bani sidea, tapi hagedukon ni halak sipangosei do na parseda sidea.
- ⁴ Seng marguna habayakon bani panorang mardalan uhuman, tapi hapintoron do na paluahkon humbani hamatean.

- ⁵ Hapintoron ni halak na daulat do mambahen dalanni hornop, tapi tompas do parjahat ibahen hajahatonni.
- ⁶ Hapintoron ni halak parpintor do paluahkon sidea, tapi hona tangkap do halak sipangosei ibahen hisapni.
- ⁷ Anggo matei halak parjahat magou do pangarapanni, anjaha sinta-sinta ni halak na so pintor gabe na lang.
- ⁸ Maluah do halak parpintor humbani parmaraan, anjaha halak parjahat do masuk hujai, gantihni.
- ⁹ Marhitei pamangan ni halak parjahat madabuh hasoman hubagas hamagouan, tapi marhitei habotohon ipaluah halak parpintor.
- ¹⁰ Anggo mardohar halak parpintor masa do olob-olob ibagas huta, tapi halak parjahat, marsurak-surak ma parhuta anggo roh hamagouan bani.
- ¹¹ Marhitei pasu-pasu bani halak parpintor timbul do huta, tapi marumbak do ai marhitei pamangan ni halak parjahat.
- ¹² Siapasi hasomanni, ai ma halak na so marpangartian, tapi halak na marpambotoh masip do.
- ¹³ Halak na hujai-hujon pahata-hata halak, mambahen tarbotoh rusia, tapi ponop do ai ibahen halak hatengeran ni uhur.

- ¹⁴ Anggo seng dong be sipambobai, maseda ma bangsa, tapi dear ma ai anggo buei halak sipanuturi.
- ¹⁵ Harugian do ai manjamini halak na legan, tapi sonang do halak na so ra manjamini.
- ¹⁶ Parinangon siparbasar dapotan hormat, tapi bador do naboru na magigi bani na bonar.
- ¹⁷ Dirini do pinadearni anggo layak halak, tapi halak na kejam parseda dirini sandiri.
- ¹⁸ Halak siparjahat jumpahan pansarian sipaoto-oto, tapi halak na manidahkon hapintoron, dapotan untung na totap.
- ¹⁹ Halak na totap jongjong bani hapintoron jumpahan hagoluan, tapi siayaki hajahaton sai matei do.
- ²⁰ Hagigi ni Jahowa do paruhur na geduk, tapi marosuh do la bani halak na so panurakon parlahouni.
- ²¹ Sintong tumang, seng anjai lang hona uhum halak parjahat, tapi sai maluah do ginompar ni halak parpintor.
- ²² Songon tintin omas na bani unsum ni babuy, sonai do naboru na majenges, na so maradat.
- ²³ Sinta-sinta ni halak parpintor parohkon hadearon, tapi niarapkon ni halak parjahat uhumon do.

- ²⁴ Halak na unjah marsibere-bere, lambin bayakni, tapi halak na sai pagugun-gugunkon, lambin miskin do.
- ²⁵ Halak pardear layak dapotan layak-layak, anjaha halak na ra mambere siinumon, jumpahan siinumon do.
- ²⁶ Halak sitahan-tahan gandum iburai halak do, tapi pasu-pasu do sogop bani ulu ni sipanjual.
- ²⁷ Halak siparayak na madear, gabe harosuh do, tapi sipindahi na masambor, sai roh do ai bani.
- ²⁸ Halak na marhatengeran bani habayakonni madabuh do, tapi halak parpintor martumbor do songon bulung-bulung na maratah.
- ²⁹ Halak na manggeori rumah tanggani, logou do teanonni, anjaha halak na oto gabe jabolon ni na pentar.
- ³⁰ Buah ni habonaran ai ma hayu hagoluhan, tapi na mandalankon na so uhum goluh do iparseda.
- ³¹ Tonggor ma, halak parpintor dapot pambalason do i tanoh on, samintolah ma halak parjahat ampa pardousa, lang?

Sambatni

- 12** ¹ Halak na mangkarosuhkon sipaingat,
ai ma siharosuhkon habotohon, tapi na
mangkagigihon pinsang-pinsang, ai ma
jolma na bodoh.
- ² Halak sidear uhur gabe harosuh do bani Jahowa,
tapi halak paruhur jahat hona uhum-Ni do.
- ³ Seng anjai totap jolma sihorjahon hajahaton,
tapi jonam do urat ni halak parpintor.
- ⁴ Parinangon na madear sortali do ai bani
paramangonni, tapi na sambor parlahouni
gilok-gilok na harat-harat do ai ibagas
holi-holini.
- ⁵ Pingkiran ni halak parpintor sintong do ai, tapi
riah ni halak parjahat ladung do.
- ⁶ Riah ni halak parjahat sihol manduruskon
daroh, tapi pamangan ni halak parpintor
paluahkon do.
- ⁷ Hona dabuhkon do halak parjahat gabe seng
dong be, tapi totap do anggo rumah ni halak
parpintor.
- ⁸ Domu hubani hapentaranni do tarpuji sada
dalahi, tapi parakal-akal hona apasan do.
- ⁹ Dearan do gabe halak na maetek, na
mannunuti horjani sandiri, humbani na
pajuntul-juntulhon diri, hape hurangan
sipanganon.

- 10 Ibotoh halak parpintor do uhur ni pinahanni,
tapi uhur ni halak parjahat kejam do.
- 11 Halak sihorjaon jumanis sungkupan do bani
sipanganon, tapi halak na paihut-ihut na so
marguna, halak na bodoh do.
- 12 Sura-sura ni halak parjahat sihol mambahen
hajahaton, tapi urat ni halak parpintor
parohkon buah.
- 13 Hona tangkap do halak parjahat marhitei lepak
ni parsahapni, tapi sai maluah do halak
parpintor humbani hasosakanni.
- 14 Marhitei buah ni parsahapni do bosuran
halak bani na madear, anjaha hinorjahon ni
tanganni mulak hu bani.
- 15 Dalam ni halak na bodoh, pintor do ai ninuhurni,
tapi halak na manangihon sipaingat, ai ma
na maruhur.
- 16 Halak na bodoh mintor do ipataridahkon
gilani, tapi halak na maruhur irungkub do
apas-apas na hu bani.
- 17 Saksi na sintong manluarhon na sintong, tapi
saksi palsu mansahapkon ladung.
- 18 Sahap ni halak sihampung parsahap songon
paniham ni podang do, tapi songon tambat
do dilah ni halak na maruhur.
- 19 Bibir na sintong totap do lalab, tapi dilah
sipaoto-oto tongkin do ai hansa.

- ²⁰ Akal-akal do marianan ibagas uhur ni halak partahi-tahi, tapi malas ni uhur do bani halak sisuan damei.
- ²¹ Seng anjai mangonai hamagouan bani halak parpintor, tapi halak parjahat igoki hasunsahan do.
- ²² Hagigi ni Jahowa do bibir siparladung, tapi marosuh do la bani sihorjahon hasintongan.
- ²³ Halak na pentar masip do ia pasal habotohonni, tapi halak na bodoh maningtingkon haotoonni.
- ²⁴ Tangan ni halak na ringgas do na marrajai, tapi halak parrayoh gabe sisuruh-suruhan.
- ²⁵ Holsoh ibagas uhur patundukjolma, tapi parsahap na basar pahinsah uhur.
- ²⁶ Halak parpintor dapotan sampalan, tapi dalam ni halak parjahat mambahensi kahou.
- ²⁷ Halak parrayoh seng dapotan buruanni, tapi lambin bayak do anggo halak na ringgas.
- ²⁸ Bani dalam hapintoron do jumpah hagoluan, tapi dalam na masambor manuju hu hamatean.

(Sambatni)

13 ¹ Anak na pentar itangihon do pangajaran ni bapani, tapi halak sipanrisai seng ipardulihon pinsang-pinsang.

- ² Humbani buah ni pamanganni do panganon ni halak hadearon, tapi halak sipangeluk hisapan do bani odoh-odoh.
- ³ Halak sirajai pamanganni, goluhni do niramotkonni, tapi halak siganjang dilah maseda do.
- ⁴ Sai marsura-surai do halak parrayoh, hape soya-soya do; tapi halak na ringgas sai dapotan do bani pinarsinta ni uhurni.
- ⁵ Magigi do halak parpintor bani hata ladung, tapi halak parjahat sambor anjaha butak do pambahenanni.
- ⁶ Hapintoron do na manramotkon halak na daulat marparlahou, tapi hajungkaton do na mambahen madabuh pardousa.
- ⁷ Adong do halak na pakulah bayak ia, age pe seng dong bani, dong homa, ibahen ia songon na miskin, hape marnah na dong do.
- ⁸ Habayakonni do ipakei na bayak manobus hosahni, tapi halak na musil seng tarpaluahsi dirini.
- ⁹ Sondang ni halak parpintor marsinalsal do, tapi miloh do suluh ni halak parjahat.
- ¹⁰ Uhur hagijangon patubuhkon paringoran, tapi hapentaran do jumpah bani halak na ra manangihon podah.
- ¹¹ Habayakon na tarolos-olos pinagugun sai surut do, tapi na pinaiduk-iduk lambin tambah do.

- ¹² Pangarapan na so dapot, paborit uhur; tapi
sinta-sinta na dapot, hayu hagoluhan do ai.
- ¹³ Halak na so parduli bani hata, parseda dirini
do, tapi sihabiari titah dapotan upah do.
- ¹⁴ Podah ni halak na pentar, ai ma bah hagoluhan,
na boi paluahkon humbani siding ni
hamatean.
- ¹⁵ Hapentaran na sintong parohkon holong, tapi
dalan ni halak sipargeduk gabe hasedaon do
bani.
- ¹⁶ Halak na pentar mandalankon ganup horjani
ibagas partimbangan, tapi halak na bodoh
paidahkon haatoonni.
- ¹⁷ Suruhan na jahat parohkon hamagouan, tapi
suruhan hatengeran ni uhur mamboan
hamalumon.
- ¹⁸ Hasombuhon pakon habadoron do sogop
bani halak situlak pangajaran, tapi
gabe marsangap do halak sitangihon
pinsang-pinsang.
- ¹⁹ Sinta-sinta na dapot, tuah do ai bani tonduy,
tapi sirang humbani hajahaton hagigi do ai
bani na oto.
- ²⁰ Marsaor pakon halak na pentar, parohkon
hapentaran, tapi maseda do halak na
marhasomankon halak na oto.
- ²¹ Hamagouan do na mardakdak pardousa, tapi
hadoharon do upah bani halak parpintor.

- ²² Halak sidear uhur martading-tadingan do ronsi pahompuni, tapi habayakon ni halak pardousa ipagugun do ai bani halak parpintor.
- ²³ Ladang tinombe ni halak na miskin mambere gogohni buei, tapi gati do magou ai halani hagedukon.
- ²⁴ Halak na malang manlonsingkon hotang, anakni do nihagigihonni ijai, tapi na holong uhur bani, ipagirah do mangajarsi.
- ²⁵ Halak parpintor bosur-bosur do mangan, tapi lumei do boltok ni halak parjahat.

14 ¹ Hapentaran ni naboru mambahen dear rumah tanggani, tapi na oto iparseda do marhitei tanganni sandiri.

- ² Halak na mardalan bani dalan na pintor, mabiar do ai bani Jahowa, tapi halak na geduk pardalanni, mapas do la bani.
- ³ Pamangan ni halak na oto do lonsing-lonsing bani gurungni, tapi bibir ni halak na pentar ai do marramotkonsi.
- ⁴ Anggo seng dong lombu na maninggala, lumei do tuangan, tapi buei do sipariamaan marhitei lombu jonggi na gogoh.
- ⁵ Saksi na sintong seng ra marladung, tapi ladung do iluarhon saksi palsu.

- ⁶ Halak sipanrisai mangindahi hapentaran, hape soya do; tapi halak na maruhur urah do dapotan habotohon.
- ⁷ Simbili ma halak na bodoh, ai seng dong jumpah so hata hapentaran hun bani.
- ⁸ Hapentaran ni siparuhur ai ma: ibotoh do dalanni; tapi haotoon ni halak na bodoh pakahouhon do.
- ⁹ Mapas do uhur ni halak na oto bani galangan pardousaon, tapi marosuh do halak parpintor bani ai.
- ¹⁰ Uhur ai do na mambotoh na maborit ibagas dirini, malas ni uhurni pe seng boi ahapkonon ni na legan.
- ¹¹ rumah ni halak parjahat maningon marumbak do, tapi mardohar do lampolampo ni halak parpintor.
- ¹² Adong do dalan, pintor do ai ninuhur ni halak, hape ujungni gabe dalan hamatean do.
- ¹³ Ibagas tawa pe dong do pusok ni uhur, anjaha bani malas ni uhur mangihut horu ni uhur.
- ¹⁴ Marhitei ulahni sihol ipabosur siparbalik uhurni, tapi sidear uhur marhitei pambahenanni na madear.
- ¹⁵ Halak na bodoh porsaya do bani sagala sahap, tapi halak na maruhur itimbangi do langkah-langkahni.

- ¹⁶ Marhabiaran do halak na maruhur anjaha
isimbili do hajahaton, tapi halak na bodoh
seng marrantei marparlahou anjaha raus.
- ¹⁷ Halak parringis ihorjahon do habodohon,
anjaha ihagigihon halak do partahi-tahi.
- ¹⁸ Halak na oto marrupei bani haotoon, tapi
habotohon do sortali ni siparuhur.
- ¹⁹ Tunduk do halak na jahat bani sidear uhur,
anjaha halak na jungkat mangindo-indo bani
labah ni parpintor.
- ²⁰ Age sindohorni magigi do mangidah halak na
masombuh, tapi buei do huan-kuan bani
halak na bayak.
- ²¹ Pardousa do halak na mangapasi hasomanni,
tapi martuah do halak na marholong ni atei
bani na madoyuk.
- ²² Mintor lang ma kahou halak siuhurhon
hajahaton? Tapi idop ni uhur ampa bujur ni
uhur do rupei ni sipingkirhon na madear.
- ²³ Ibagas sagala hangaluton adong do untung, tapi
sahap simarinjaja parohkon hahurangan.
- ²⁴ Sortali ni siparuhur, ai ma hapentaranni;
tapi bani halak na oto haotoonni do jadi
rudangni.
- ²⁵ Sipaluah hosah do saksi na sintong, tapi
sipangagou do siluarhon ladung.

- ²⁶ Biar bani Jahowa do patubuh tenger ni uhur
na toguh, anjaha bani anakni pe adong do
haporusan.
- ²⁷ Biar mangidah Jahowa do bah tubuh
hagoluhan, na mambahen tarsimbili siding
ni hamatean.
- ²⁸ Hinabuei ni rayat do hamuliaon bani raja, tapi
parsurut ni rayat hasedaon ni na markuasa
do ai.
- ²⁹ Halak na nanget manringis ai ma sibuei
partimbangan, tapi halak na urah manggila
pabanggal haotoon.
- ³⁰ Sipahisar angkula do uhur na lamlam, tapi
mangkarat bani holi-holi do uhur simburu.
- ³¹ Siodoh-odoh halak na maetek, sipahiri na
manompasi do ia ai; tapi na mangkaholongi
halak na masombuh, ai ma na pasangapkon
Naibata.
- ³² Marhitei hajahatonni do maseda halak
parjahat, tapi nalom do uhur ni parpintor
age bani parmateini.
- ³³ Ibagas uhur ni halak na maruhur marianan
do hapentaran, tapi seng dong jumpah ai
ibagas uhur ni na bodoh.
- ³⁴ Habonaran do patimbul sada bangsa, tapi
dousa do na mambahen maseda halak.

³⁵ Harosuh ni raja do juakjuak na pantas maruhur,
tapi mangonai do ringisni bani sihorjahon
na masambor.

15 ¹ Balos na lamlam pahombun ringis, tapi
hata na kasar mamuhoi gila,

² Dilah ni halak na maruhur mantektekton
habotohon, tapi haotoon do puas humbani
pamangan ni halak na bodoh.

³ Dompak sab dunia on do pangkawah ni Jahowa,
ipardiatei do halak parjahat ampa sidear
uhur.

⁴ Dilah na lamlam, ai ma hayu hagoluhan; tapi
dilah siparladung mambahen maborit uhur.

⁵ Halak na oto magigi do bani pangajaran ni
bapani, tapi halak na marimbagaskon
pinsang-pinsang, ai ma siparuhur.

⁶ I rumah ni halak parpintor buei do arta, tapi
masese do pansarian ni halak parjahat.

⁷ Bibir ni halak na pentar manuan habotohon,
tapi seng sonai anggo uhur ni halak na
bodoh.

⁸ Galangan ni halak parjahat hagigi do ai bani
Jahowa, tapi marosuh do la bani tonggo ni
halak parpintor.

⁹ Hagigi ni Jahowa do dalan ni halak parjahat,
tapi holong do uhur-Ni bani halak siparayak
hapintoron.

- 10 Pangajaran na parah do mangonai bani halak sipanlembang, anjaha maningon matei do na mangkagigihon pinsang-pinsang.
- 11 Nagori toruh ampa naraka, talar do ai i lobei ni Jahowa, samintolah uhur ni jolma ma lang.
- 12 Halak parrisa seng marosuh ia ipaingat, seng ra ia marayak halak na pentar.
- 13 Uhur na megah mambahen bohi minar, tapi marhitei uhur na marhoru galek do tonduy.
- 14 Uhur na pantas mangindahi habotohon, tapi babah ni halak na bodoh mansahapkon haotoon.
- 15 Bani halak na marhoru sambor do sagala panorang, tapi bani halak siparmalas uhur hira ari pesta do tongtong.
- 16 Rahanan na otik marhasoman biar bani Jahowa, ase mararta na buei, tapi marhasunsahan.
- 17 Rahanan do na mangankon lowoh ibagas holong, ase mangankon lombu na mombur ibagas domdom.
- 18 Halak parringis mamuhoi paringoran, tapi halak parsabar mangintopi partinggilan.
- 19 Dalan ni halak parrayoh songon hondor duri do, tapi hornop do anggo dalan ni halak parpintor.
- 20 Anak na pentar pamalas uhur ni bapani, tapi halak na oto mapas do ia bani inangni.

- ²¹ Haotoon, malas ni uhur do ai bani na hurang uhur, tapi halak na pantas maruhur, pintor do pardalanni.
- ²² Sundat do ranggian anggo hurang panriahan, tapi saud do ai anggo buei sipamodahi.
- ²³ Malas ni uhur do ai bani halak anggo hona balosni, anjaha jengesan ai, sangkababah hata na topat bani panorangni.
- ²⁴ Dalam hagoluan bani halak na maruhur manuju dompak datas, laho manimbili nagori toruh ai.
- ²⁵ rumah ni sigijang uhur iparseda Jahowa do. tapi ipatotap do parbalogan ni naboru na mabalu.
- ²⁶ Hagigi ni Jahowa do riah ni halak parjahat, tapi pansing do hata na madear i lobei-Ni.
- ²⁷ Na parsedahon rumahni sandiri do halak sibuat untung na so tiba dalanni, tapi sai manggoluh do halak sihagigihon sisip.
- ²⁸ Uhur ni halak parpintor ipingkiri do balos sibereonni, tapi humbani pamangan ni halak parjahat marjullak-jullak do hajahaton.
- ²⁹ Daoh do Jahowa humbani halak parjahat, tapi itangihon do tonggo ni halak parpintor.
- ³⁰ Pangkawah na basar pamalas uhur, anjaha barita na madear pahisar holi-holi.

- ³¹ Halak na ra manangihon podah na madear,
marianan do ia i tengah-tengah ni halak na
maruhur.
- ³² Halak na manulak podah, dirini do iparseda,
tapi na manangihon pangajaran dapotan
hapentaran.
- ³³ Biar bani Jahowa ai ma pangajaran, na
mambahen pentar, anjaha toruh ni uhur do
parlobei ni hasangapon.

(Sambatni)

- 16** ¹ Bani jolma do uhur panimbangion, tapi
humbani Jahowa do roh sisahapkonon ni
dilah.
- ² Haganup dalanni borsih do ninuhur ni halak,
tapi Jahowa do siantan uhur.
- ³ Ondoskon ma bani Jahowa sagala horjamu, ase
saud haganup sura-suramu.
- ⁴ Haganup do ijadihon Jahowa domu hubani
sura-sura-Ni, age parjahat ai, ase hona
uhum.
- ⁵ Hagigi ni Jahowa do halak sigijang uhur; tongon
seng anjai lang hona uhum ia.
- ⁶ Marhitei holong ampa habujuron do salosei
hasalahan, anjaha marhitei biar bani Jahowa
boi do tarsimbili halak hajahaton.

- ⁷ Anggo marosuh Jahowa mangidah parlahou ni sada halak, munsuhni pe ipadamei do hu bani.
- ⁸ Rahanan do na otik ibagas hapintoron, ase pansarian na buei, na so tiba dalanni.
- ⁹ Uhur ni jolma marpingkir-pingkir pasal dalanni, tapi Jahowa do na manontuhon langkahni.
- ¹⁰ Haputusan na humbani Naibata do bani bibir ni raja, bani paruhuman seng anjai lepak sahapni.
- ¹¹ Kilo ampa timbangan na sintong, Jahowa do simadasi; la do na mangadongkon haganup batu timbangan.
- ¹² Hagigi ni raja, ai ma mangkorjahon hajahaton, ai marhitei hapintoron do totap paratasni.
- ¹³ Harosuh ni raja, ai ma bibir hasintongan, anjaha parsahap na sintong do ihaholongi.
- ¹⁴ Ringis ni raja, suruhan hamatean do ai, tapi mahombun do ai ibahen halak na pentar.
- ¹⁵ Minar ni bohi ni raja pagoluhkon, anjaha halayakonni doskon hambun na manorap bani logou ni ari.
- ¹⁶ Jumpahan hapentaran, dearan do ai humbani omas, dapotan hauhuron, harganan humbani pirak.
- ¹⁷ Dalan ni halak parpintor daoh do ai humbani hajahaton, anjaha na mangkargahon goluhni, ijaga do langkah-langkahni.

- ¹⁸ Parlobei ni hasedaon ai ma gijang ni uhur,
anjaha pangenjengon do parlobei ni
hadabuhon.
- ¹⁹ Dearan do martoruh ni uhur rapkon na
masombuh, ase marbagi taban-taban rap
pakon halak na jungkat.
- ²⁰ Halak na marimbagaskon hata, dapotan
na madear, anjaha martuah do halak na
marhatengeran bani Jahowa.
- ²¹ Halak siparuhur igoran do ai na pentar, anjaha
mantin ni panluar mambahen margogoh
podah.
- ²² Bah tubuh hagoluhan do uhur hapantason
bani parsimada ai, tapi haotoon do ajar ni
halak na bodoh.
- ²³ Uhur ni na pentar papandei pamanganni,
anjaha itambah do podah bani bibirni.
- ²⁴ Songon manisan ni lobah do hata na lamlam,
mantin bani uhur, anjaha tambar bani
holi-holi.
- ²⁵ Adong do dalan, pintor do ai ninuhur ni halak,
hape ujugni gabe hamatean do.
- ²⁶ Lohei ni si parhorja manjuljulsi marhorja, ai
pamanganni do sipamaksa bani.
- ²⁷ Halak parjahat paranggi-ranggi hamagouan,
anjaha songon apuy na gara do bibirni.
- ²⁸ Halak sipanggeori pabolag paringoran, anjaha
siparrisai manirang na marhuan.

- ²⁹ Dalahi sipangodoh-odoh pakahou hasomanni,
anjaha ibobai do ia bani dalan na so madear.
- ³⁰ Halak na pahirdop-hirdop matani, sipingkiri
na masambor do ai, anjaha sipangemngem
pamanganni, ai ma sihorjahon hajahaton.
- ³¹ Uban, ai ma sortali hamuliaon, jumpah do ai
marhitei goluh na pintor.
- ³² Dearan do parsabar humbani puanglima,
anjaha na marrajai dirini humbani
sipatunduk huta.
- ³³ Ihursuk-hursuk pe ruji-ruji ibagas abingan, tapi
humbani Jahowa do roh haputusan.

(Sambatni)

- 17** ¹ Dearan do sansayat ruti na mapir
marhasoman uhur na sonang, humbani
rumah na gok gulei marhasoman
paringoran.
- ² Jabolon na pentar do sirajai anak paruhur na
bajan, anjaha dapotan tean-teanan do ia
rap pakon saninani.
- ³ Balanga panlalaan manguji pirak, liang
panloburan manguji omas, tapi Jahowa do
siuji uhur.
- ⁴ Halak parjahat patangi-tangi sahap na
masambor, halak siparladung manareihon
pinggolni bani hata na parsedahon.

- ⁵ Sipahiri-hiri halak na masombuh, pahirihon na manompasi do, anjaha na marmegah-megah pasal hamagouan ni hasomanni, lang tarbahren lang hona uhum do.
- ⁶ Sortali ni halak na matua ai ma pahompuni, anjaha hamuliaon ni anak ai ma bapa ni sidea.
- ⁷ Seng domu bani halak na oto sahap na mantin, samintolah hata ladung ma patut bani na sangap?
- ⁸ Mata intan do sisip, ninuhur ni sibere ai, iagan maruntung ma ia bani sagala langkah-langkahni.
- ⁹ Halak sirungkub hasalahan, ai ma siadongkon uhur na marsihaholongan, tapi halak na pararatkon sahap-sahap manirang na marhuan do.
- ¹⁰ Margogohan do sada hata pinsang-pinsang bani halak na maruhur, ase saratus lonsing-lonsing bani halak na bodoh.
- ¹¹ Halak parjahat pitah mangindahi parlawanan do, tapi suruhan na mabajan do isuruh mangimbangsi.
- ¹² Rahanan do pajumpah pakon gipul na magouan anak, humbani na pajumpah ampa halak na oto ibagas habodohonni.

- ¹³ Halak na mambalaskon na jahat bani na
 madear, seng morot be na masambor hun
 rumahni.
- ¹⁴ Sitolkas bah binongbong do halak sibahen
 paringoran, halani ai, paima pultak
 paringoran, intopi ma ai.
- ¹⁵ Halak na mamintori parjahat ampa halak
 sisalahkan na bujur, haduasi do ai hagigi
 bani Jahowa.
- ¹⁶ Aha ma gunani duit bani tangan ni halak na
 bodoh, laho mamboli hapentaran, hape
 seng dong uhur bani?
- ¹⁷ Bani sagala panorang do marholong atei
 huan-kuan, gabe sanina ibagas hasosakan
 do ia, ase tubuh.
- ¹⁸ Jolma na hurang uhur, urah do marjabat
 tangan, laho mambere jaminan bani
 hasomanni.
- ¹⁹ Halak na marosuh bani paringoran,
 siharosuhkon dousa do ai, anjaha na
 mambahen gijang hu atas labah ni rumahni,
 ai ma sipindahi hamagouan.
- ²⁰ Halak paruhur na geduk, seng jumpahan na
 madear, anjaha halak pardilah na lekluk,
 madabuh hubagas hamagouan.
- ²¹ Halak siparanak na bodoh, pusok ni uhur do ai
 bani, seng marmalas ni uhur bapa ni halak
 na oto.

- ²² Uhur na megah paminar bohi, tapi tonduy na marosak pamerung angkula.
- ²³ Sisip na hunja pe ijalo parjahat do, laho papeol pardalan ni uhum.
- ²⁴ Bani panonggor ni halak na maruhur dong do hapentaran, tapi anggo mata ni na oto maor do ronsi ujung ni tanoh on.
- ²⁵ Borit ni uhur do bani bapa anak na oto, anjaha pusok ni uhur bani na manubuhkonsi.
- ²⁶ Mandonda halak parpintor seng dear, manlonsing halak na sangap salah tumang do ai.
- ²⁷ Halak siantan parsahap, ai ma na marpambotoh, anjaha halak partonduy na lamlam siparuhur do ai.
- ²⁸ Halak na bodoh pe, anggo masip gabe songon siparuhur do, anggo sai itutup pamanganni, tarhira do ia halak na pentar.

(Sambatni)

18 ¹ Halak na papulig dirini, sisuhuni rosuhni sandiri, siimbang sagala uhur hapantason do ai.

- ² Seng marosuh halak na bodoh bani habotohon, tapi pitah bani na patugah-tugahkon pingkiranni do hansa.

- ³ Anggo masa hajahaton, roh ma hahirion,
anjaha habadoron do mangihut bani horja
hasamboron.
- ⁴ Bah na bagas do sahap ni pamangan nijolma;
bah tubuh hapentaran, bah na mardalan do
ai.
- ⁵ Seng dear mangapiti halak parjahat, laho
mansalahkan halak parpintor ibagas
paruhuman.
- ⁶ Bibir ni halak na bodoh paroh paringoran,
anjaha pamanganni dilo-dilo do bani
lonsing-lonsing.
- ⁷ Pamangan ni halak na oto hamagouan do ai
bani, anjaha bibirni, siding bani dirini.
- ⁸ Hata ni siparhusip-husip mantin-mantin do ai,
anjaha masuk-masuk hubagas uhur.
- ⁹ Halak na lansei bani horjani, dos do ai pakon
halak siparseda dirini.
- ¹⁰ Benteng na toguh do goran ni Jahowa,
haporusan do ai bani halak parpintor, gabe
seng mahua be.
- ¹¹ Arta ni halak na bayak, huta na pinatoguh
do ai bani, anjaha tembok na gijang do ai,
ninuhurni.
- ¹² Anggo lape madabuh, gijang do uhur nijolma,
tapi toruh ni uhur do parlobei ni hamuliaon.

- ¹³ Halak na mintor marsampang, hape lape torang ibogei, haotoon do ai bani anjaha habadoron.
- ¹⁴ Tonduy na hinsah mambahen tahan halak manaron, tapi uhur na mandolei, ise ma na boi pahisar ai?
- ¹⁵ Uhur ni halak na pantas jumpahan habotohon, anjaha pinggol ni halak na maruhur pindah-pindah bani hapentaran.
- ¹⁶ Sibere-bere nijolma do palumbang langkah-langkahni, anjaha ai do manogu-nogusi hu lobei ni halak na sangap.
- ¹⁷ Songon na pintor do halak, na parlobei mangadu-adu bani parkarani, paima roh imbangni na mansalahkonsi.
- ¹⁸ Marjomput na sinurat mangujungi parsalisihan, anjaha mambahen haputusan bani paringoran ni halak na gogoh.
- ¹⁹ Sanina na hona tipu, songon benteng na so tardohori do ai, anjaha parsalisihan songon pating-pating situtup rumah bolon.
- ²⁰ Humbani buah ni pamanganni do bosur boltok ni halak, bosuran do ia ibahen buah ni bibirni.
- ²¹ Hamatean barang hagoluhan marguru bani kuasa ni dilah do, anjaha halak na mambotoh manramotkonsi, ai do na mangankon buahni.

- ²² Halak na dapotan parinangon, jumpahan na madear do, jumpahan idop ni uhur do ia humbani Jahowa.
- ²³ Mangelek do sahap ni halak na masombuh, tapi halak na bayak koras do parsampangni.
- ²⁴ Adong do hasoman na parsedahon, tapi adong do homa hasoman na sangkanan humbani sanina.

(Sambatni)

- 19** ¹ Dearan do halak na masombuh, na pitah marparlahou, humbani halak parbibir ladung, age pe bayak ia.
- ² Anggo seng marhasoman pamingkirion, seng marguna haringgason, anjaha halak na mangolos-olos mandalankon horjani, maningon lepak do.
- ³ Haotoon ni jolma do parseda dalanni, hape dompak Jahowa marungut-ungut uhurni.
- ⁴ Habayakon do pabuei huan-kuan, tapi halak na masombuh, gari diha-dihani manadingkonsi.
- ⁵ Saksi palsu seng tarbahen lang hona uhum, anjaha sisahapkon ladung seng anjai maluah.
- ⁶ Buei do halak na mamuji-muji na sangap, anjaha ganup do halak gabe huan ni halak siparlayak,

- ⁷ Halak na masombuh, saninani pe haganup
sogam do uhurni bani, samintolah ma
diha-dihani lang padaoh diri hun bani?
- ⁸ Halak na jumpahan uhur hapantason, holong
do uhurni bani goluhni, halak siramotkon
pangarusion dapotan tuah do.
- ⁹ Saksi palsu seng anjai lang hona uhum, anjaha
sisahapkon ladung magou do.
- ¹⁰ Lang patut halak na oto marsonang-sonang
manggoluh, lobih hunjai seng patut jabolon
manrrajai raja-raja.
- ¹¹ Hapentaran ni jolma mambahensi nanget
manringis, anjaha hamuliaon do ai bani,
manalpuhon hasalahan,
- ¹² Songon paraum ni singa do ringis ni raja,
tapi dear ni uhurni songon namur na bani
poyon-poyon.
- ¹³ Hasedaon ni bapa do anak na oto, anjaha
naboru siparingor songon tiris na manektek
torus.
- ¹⁴ Rumah pakon arta, ai ma tading-tadingan
humbani na matoras, tapi humbani Jahowa
do parinangon na maruhur.
- ¹⁵ Harayohon mambahen dokah modom, anjaha
uhur na rahanan soh mambahen gayuran.
- ¹⁶ Halak na mandalankon parentah, ai ma na
manramotkon goluhni, tapi maningon matei
do na so parduli bani langkah-langkahni.

- ¹⁷ Na papinjamkon bani Jahowa do halak, na maridop ni uhur bani halak na masombuh, anjaha la do na mambaloskon ai bani.
- ¹⁸ Ajar ma anakmu, ai adong ope arapan, tapi ulang roh uhurmu pamatehonsi.
- ¹⁹ Halak siparringis bangga, ia sandiri do na manaron, anggo sihol urupanmu ia, paparahkon do ai.
- ²⁰ Tangihon ma podah, anjaha jalo ma sipaingat, ase lambin pentarni ho use.
- ²¹ Buei do ranggian ibagas uhur ni jolma, tapi sura-sura ni Jahowa do na saud.
- ²² Hisap-hisap ni jolma pindah-pindah bani paruntungan; tapi dearan do masombuh humbani na gabe siparladung.
- ²³ Biar bani Jahowa do na pagoluhkon, bosur do halak anjaha sonang modom, seng mangonai hamagouan bani.
- ²⁴ Domma ipohul siparrayoh indahanni, tapi rayohan do ia mannahkon ai hu pamanganni.
- ²⁵ Maningon lonsingon do sipanrisai, ase maruhur halak na oto, tapi anggo halak na pantas, ipinsang gelah domma jumpahan habotohon.
- ²⁶ Ise na mangarsik bapani anjaha iusir-usir inangni, ai ma anak sibahen hasamboron ampa habadoron.

- ²⁷ Anggo iparontihon ho, ale anakku,
manangihon podah, jadi kahou ma ho
humbani hauhuron.
- ²⁸ Saksi paruhur jahat mapas do bani uhum,
anjaha mantin do hagedukon bani
pamangan ni halak parjahat.
- ²⁹ Sisir do uhum bani halak sipanrisai, sonai
lonsing-lonsing bani gurung ni halak na oto.

(Sambatni)

- 20** ¹ Sipatubuh panrisaion do anggur, sibahen
mabuk minuman koras, anjaha ise na
sompat rebad-rebad ibahen, seng maruhur
be.
- ² Songon paraum ni singa do ondam-ondam ni
raja, barang ise na mamuhoi ringisni, na
parseda dirini sandiri do.
- ³ Hasangapon do ai bani dalahi mandaoh
humbani paringoran, tapi halak na oto
marosuh do martinggil.
- ⁴ Halani borgoh ari, seng ra siparrayoh
maninggala; sihol ma ia namin marpariama,
hape aha pe lang adong.
- ⁵ Songon bah bagus do uhur nijolma ibagas, tapi
halak na pentar tardodousi do ai.
- ⁶ Buei dojolma patugah-tugahkon hadearonni,
tapi halak hatengeran ni uhur, ija do jumpah
ai?

- ⁷ Marparlahou na pitah do halak parpintor;
martuah do anakni i pudini.
- ⁸ Raja na hundul bani hotak paruhuman,
mamurpurhon sagala hajahaton marhitei
pangkawahni.
- ⁹ Ise ma na barani mangkatahon, “Domma
hupaborsih uhurhu, pansing do ahu
humbani dousangku?”
- ¹⁰ Timbangan na palegan-legan, suhat-suhata na
palegan-legan, haduasi do ai hagigi bani
Jahowa.
- ¹¹ Age marhitei pambahenanni, tartanda do
dakdanak, atap na borsih atap na pintor
biakni.
- ¹² Pinggol na marpanangar pakon mata na
marpangidah, Jahowa do na manjadihon ai
haduasi.
- ¹³ Ulang ma harosuhkon na modom-modom, ase
ulang miskin ho; ungkab ma matamu, gabe
sungkupan sipanganon ma ho.
- ¹⁴ “Sambor do, sambor do,” nini sipamboli, hape
dob misir ia, ipuji do dirini.
- ¹⁵ Age adong omas, buei age mutiha, tapi arta
siharganan ai ma bibir na marpambotoh.
- ¹⁶ Buat ma hiouni, ai ijamini do halak na legan,
gadeihon ma ai, halani iampuni halak
sileban.

- ¹⁷ Mantin do bani halak sipanganon na tinangko,
hape dobni gabe gok ranggisgis do
pamanganni.
- ¹⁸ Saud do sura-sura marhitei panriahan, halani
ai marhitei partimbangan ma dalankon
porang.
- ¹⁹ Halak na hujai-hujon pahata-hatahon,
mambahen tarbotoh rusia, halani ai ulang
ma marhuan pakon halak siher tep bibir.
- ²⁰ Halak na mamurai bapani atap inangni, sai
na mintop do suluhni ibagas na golap
marimpot-impot.
- ²¹ Tean-teanan na tarolos-olos ipatumpu, dobni
seng marpasu-pasu ai.
- ²² Ulang hatahon, "Hubalaskon ma hajahaton ai!"
Hatengerhon ma Jahowa, sai urupan-Ni do
ho.
- ²³ Hagigi ni Jahowa do timbangan na palegan-
legan, anjaha kilo palsu seng dear
ai.
- ²⁴ Jahowa do na manontuhon langkah-langkah
ni jolma; naha ma jolma boi mangarusi
dalanni?
- ²⁵ Siding do ai bani jolma, mapodastu
mangkatahon bagah-bagah; hape dob
ibagakon pe ase iuhurhon ai.

- ²⁶ Mapurpur do halak parjahat ibahen raja na pantas, anjaha galapang do ipadalan hun datas ni sidea.
- ²⁷ Suluh ni Jahowa do tonduy ni jolma, na mamareksa haganup lompit-lompit ni uhurni.
- ²⁸ Halayakon ampa hasintongan do na manramotkon raja; anjaha totap do paratasni marhitei uhur holong.
- ²⁹ Hamuliaon bani garama, ai ma gogohni, tapi ubanni do hasangapon bani na matua.
- ³⁰ Lonsing-lonsing na mardaroh padaoh hajahaton, anjaha bogbog-bogbog paborsih uhur parbagas.

(Sambatni)

- 21** ¹ Songon bah na bani bondar do uhur ni raja ibagas tangan ni Jahowa; ibobai do ai dompak ja rosuh ni uhur-Ni.
- ² Haganup dalanni, pintor do ai ninuhur ni halak, tapi Jahowa do siuji uhur.
- ³ Na mandalankon hapintoron pakon uhur, rosuhan do uhur ni Jahowa bani ai humbani na mangidah galangan.
- ⁴ Mata na mangeljeng pakon uhur hagijangon, ai ma suluh bani parjahat, dousa do ai.

- ⁵ Uhur haponguton mambahen halak
marlobih-lobih, tapi halak na tarolos-olos
marhahurangan do.
- ⁶ Halak na patumpu arta marhitei sahap ladung,
na marleilei logou anjaha na mangindahi
hamatean do ai.
- ⁷ Panokohon ni halak parjahat, ai do na
parseda sidea sandiri, ai manjua do sidea
mangkorjahon hasintongan.
- ⁸ Mareluk-eluk do dalan ni halak parjahat, tapi
pintor do dalan ni halak siparuhur na pitah.
- ⁹ Rahanan do marianan bani suhi-suhi ni tayub,
ase rap marianan i rumah ampa naboru
sipartinggil.
- ¹⁰ Uhur ni halak parjahat marosuh bani na
masambor, gari hasomanni seng harga bani.
- ¹¹ Anggo hona uhum sipanrisai, gabe maruhur do
halak na oto, anggo iajari halak na pentar,
jumpahan habotohon do ia.
- ¹² Mangkawah do halak parpintor hu rumah ni
parjahat; hona dabuh do parjahat ai hu
hamagouan.
- ¹³ Halak na manutup pinggolni dompak doruh-
doruh ni halak na masombuh, ia pe, anggo
dilo-dilo holi, seng dong na mambalosi.
- ¹⁴ Sibere-bere na ponop pahombun ringis, anjaha
siluah na buni mangampogi gila na parah.

- ¹⁵ Malas ni uhur bani halak parpintor, ai ma na mandalankon uhur; tapi habiaran do ai bani halak sihorjahon na masambor.
- ¹⁶ Jolma na kahou humbani dalan hapentaran, bani urung habeguon do ia marianan.
- ¹⁷ Gabe marhahurangan do halak na marosuh marpesta-pesta, anjaha halak na rosuh bani anggur ampa minak, seng anjai bayak.
- ¹⁸ Tobus bani halak parpintor do halak parjahat, anjaha sipangosei-osei do gantih ni halak sibujur uhur.
- ¹⁹ Dearan do marianan i halimisan, ase rap sajabu pakon parinangon sipartinggal ampa sipargila-gila.
- ²⁰ Arta na maharga pakon minak, adong do i rumah ni halak na maruhur, tapi halak na bodoh mintor do iparbois-bois.
- ²¹ Halak siparayak hapintoron pakon habasaron, dapotan hagoluhan ampa hamuliaon do.
- ²² Huta ni puanglima pe ipanangkih halak na pentar do, irumbakkon do benteng, hatengeran ni uhurni ai.
- ²³ Halak na manjaga pamanganni ampa dilahni, iramotkon do goluhni humbani parmaraan.
- ²⁴ Halak sigijang uhur ampa sipangenjeng, margoran do ai sipanrehei, tarlobih do jungkat ni parlahouni.

- ²⁵ Hisap-hisap ni siparrayoh do hamatean bani, ai marayoh do tanganni marlahoan.
- ²⁶ Ganup ari do halak parjahat marsura-surai, tapi halak parpintor layak do, seng maruhur haut.
- ²⁷ Galangan ni halak parjahat, hagigi do ai, tarlobih anggo manggalang ia, hape laho mambahen na jahat do.
- ²⁸ Saksi parladung maningon magou do, tapi na sinahapkon ni na manangar totap do.
- ²⁹ Halak parjahat pajingar-jingar bohini, tapi anggo halak parpintor totap do parlangkahni.
- ³⁰ Seng dong hapentaran, seng dong hauhuron, anjaha seng dong riah, na totap i lobei ni Jahowa.
- ³¹ Pinasirsir pe huda bani panorang porang, tapi anggo hamonangan humbani Jahowa do.

(Sambatni)

- 22** ¹ Harganan do goran na madear ase habayakon na buei, anjaha dearan do anggo gabe harosuh diri humbani pirak atap omas.
- ² Saor do halak na bayak pakon na masombuh, tapi Jahowa do na manjadihon sidea haganup.

- ³ Halak na pantas mangidah parmaraan, jadi marponop ma ia; tapi halak na oto itoruskon do langkahni, gabe manaron.
- ⁴ Upah ni uhur na toruh ampa biar bani Jahowa, ai ma habayakon, hamuliaon ampa hagoluhan.
- ⁵ Duri pakon siding do bani dalan ni halak pargeduk, halak na mangkargahon hosahni, ipadaoh ma dirini hunjai.
- ⁶ Pasomal-somal ma dakdanak mardalan bani dalan sidalanonni, ia dob matua ia, seng manlembang ia hunjai.
- ⁷ Halak na bayak do na manrajai bani na masombuh, anjaha sipanginjam gabe jabolon ni na painjamkonsi.
- ⁸ Halak na manabur hagedukon maningon sabionni do hamagouan, anjaha sai maripuk do tungkot hajungkatonni ai.
- ⁹ Halak na lamlam pangkawahni dapotan pasu-pasu do; ai ibere do humbani sipanganonni hubani na masombuh.
- ¹⁰ Usir siparrisai, jadi lang dong be paringoran, anjaha parsalisihan ampa panreheion pe maronti ma.
- ¹¹ Halak na mangkarosuhkon uhur na pitah, anjaha parsahapni pe basar, raja ma na gabe huan-kuanni.

- ¹² Mata ni Jahowa do na manramotkon
habotohon, tapi ibalikkon do hata ni
sipangeluk.
- ¹³ Hata ni siparrayoh, “Adong do singa i darat ai,
ibunuh holi ahu i dalan ai!”
- ¹⁴ Godung na bagas do sahap-sahap ni naboru
parbangkis, halak na pinapaan ni Jahowa do
madabuh hujai.
- ¹⁵ Haotoon do longkot ibagas uhur ni dakdanak,
tapi hotang sipangajari do palahohon ai hun
bani.
- ¹⁶ Halak na mangodoh-odoh na masombuh laho
paganda untungni, anjaha marsibere-bere
bani halak na bayak, mambahensi
marhahurangan.

Podah ni Halak na Pentar-pentar

- ¹⁷ Paeleng ma pinggolmu anjaha tangihon ma
hata ni halak na pentar anjaha paruhurhon
ma podahku;
- ¹⁸ ai dear do ai, anggo ra ho marimbagaskon ai,
anjaha totap ai marianan bani bibirmu.
- ¹⁹ Andohar martenger ni uhur ho bani Jahowa, ai
do ase hupatugah ai bam sadari on, hubam
tongon.
- ²⁰ Ai lang domma husuratkon bam hata na
maharga, podah pakon habotohon,

- ²¹ laho paidahkon bam na sintong ampa na tongon, ase ibotoh ho sintong marbalos bani halak na marsuruh ho?
- ²² Ulang ma rampas halak na masombuh, halani masombuh ia; anjaha ulang ma odoh-odoh halak na madoyuk i paruhuman;
- ²³ ai Jahowa do siparlulu bani sidea, anjaha la do na mambuat hosah ni sibuat hosah ni sidea.
- ²⁴ Ulang ra ho marhuan-kuan pakon halak siparringis, anjaha ulang ma saorhon dirimu bani halak pargila-gila,
- ²⁵ ase ulang gabe hasomalan ho bani parlahou ni sidea, anjaha itaon ho siding bani dirimu.
- ²⁶ Ulang ma ra ho gabe halak sipanjamini, na ra mananggung pasal utang-utang,
- ²⁷ ai anggo seng dong panggalarmu, podomanmai ma holi ibuat humbam.
- ²⁸ Ulang ma paosor batu parbalogan na dob pinasuk ni ompungmu hinan ijia.
- ²⁹ Halak na pongut bani horjani, boi do marhorja ia i lobei ni raja-raja; seng bani halak na malumat ia marugas.

(Sambatni)

23 ¹ Anggo hundul ho rap mangan pakon sahalak panggomgomi, pangkei ma pardiatei atap aha na i lobeimu;

- ² nahkon ma pisou bani tolonanmu, anggo parhisap ho!
- ³ Ulang ma sir uhurmu bani na mantin-mantinni ai, ai sipanganon na paoto-otohon do ai.
- ⁴ Ulang ma lojai dirimu mangindahi habayakon, padaoh ma pingkiranmu hunjai.
- ⁵ Ai anggo mangkawah ho hujai, jadi lang dong be, ai sompong do marhabong ia, gabe habang songon manuk-manuk nanggordaha hu awang-awang.
- ⁶ Ulang ma pangan indahan ni halak parmata na serleng, ulang ma sir uhurmu bani sipanganonni age naha mantinni,
- ⁷ ai mambahen hira-hira do ia ibagas uhurni. "Mangan anjaha minum ma ham," nini hubam, tapi uhurni seng dompak ho.
- ⁸ Gabe utahkononmu ma holi sisampohul na pinanganmai, anjaha sisoya-soya ganup hatamu na madear ai.
- ⁹ Ulang ma marsahap ho i lobei ni halak na oto, ai mapas do uhurni bani sahapmu na marisi hapentaran ai.
- ¹⁰ Ulang ma osor batu parbalogan sisapari, anjaha ulang ma soluk ladang ni na tading maetek,
- ¹¹ ai gogoh do sipanluluhon sidea; la do mansuhutkon parkara ni sidea dompak ho.

- ¹² Dompakkon ma uhurmu bani pangajaran, sonai pinggolmu bani sahap na gok habotohon.
- ¹³ Ulang ma parontihon pangajaran hubani dakdanak, porini ilonsing ho pe ia, seng pala matei.
- ¹⁴ Ilonsing ho do tongon angkulani, tapi na paluahkon tonduyuni ai do ho hun nagori toruh.
- ¹⁵ Ale anakku, anggo gok hapentaran uhurmu, uhurhu pe malas do.
- ¹⁶ Anjaha marolob-olob do tonduyhu, anggo isahapkon bibirmu hasintongan.
- ¹⁷ Ulang simburu uhurmu mangidah pardousa, tapi marhabiaran ma ho tongtong.
- ¹⁸ Tongon, adong do ari pangapudianan, seng anjai rotap pangarapanmu.
- ¹⁹ Tangihon ma, ale anakku, ase pentar ho, anjaha dompakkon ma uhurmu bani dalan na pintor.
- ²⁰ Ulang ma saor ho pakon halak sisibur anggur atap pakon halak na hisapan bani gulei;
- ²¹ ai halak parmabuk pakon parhisap maningon miskin do, anjaha marhiou rigat-rigat halak na marosuh modom-modom.
- ²² Tangihon ma bapamu na mantubuhkon ho, anjaha ulang mapas uhurmu bani inangmu anggo matua ia.

- ²³ Hasintongan ma boli, anjaha ulang jualhon ai; sonai hapentaran, pangajaran ampa pangarusion.
- ²⁴ Tongon, malas do uhur ni bapa ni halak parpintor; anjaha ise na mantubuhkan anak na maruhur, malas do uurni marhalanihonsi.
- ²⁵ Malas ma tongon uhur ni bapamu ampa inangmu, marolob-olob ma uhur ni na mantubuhkan ho.
- ²⁶ Bere ma, ale anakku, uhurmu bangku, anjaha sai iharosuhkan matamu ma dalanku.
- ²⁷ Ai doskon godung na bagas do boru jalang, anjaha parigi na sompit do naboru parbangkis.
- ²⁸ Tongon, songon panamun do ia manggompangi, anjaha ipabuei do halak sipangeluk i tengah-tengah ni hajolmaon.
- ²⁹ Ise do na hoih-koih? Ise do siparinangoi? Ise do siparingor? Ise do na holsohan? Ise do na ughan seng marhala? Ise do siparmata na gombur?
- ³⁰ Halak na halalaban minum anggur, halak na laho mandai-dai minuman na koras.
- ³¹ Ulang pakawah-kawah anggur halani magerger rupani, halani marlinang idahon ibagas

panginum, halani lamlam panjalirni
hubagas.

³² Dobni mangkarat do ai songon ulog, anjaha
mandoit songon darih.

³³ Idahon ni matamu ma na ganjil-ganjil, anjaha
uhurmu mansahapkon na so marturut.

³⁴ Gabe songon halak na modom i tongah laut
ma ho, anjaha songon halak na modom i
ujung ni tiang layar.

³⁵ Nim, “Ibogbog sidea do ahu, tapi lang maborit,
ibalbal sidea do, tapi lang huahapkon.
Anggo tarjolma ahu, ulakanku do minum.”

(Sambatni)

24 ¹ Ulang ma simburu uhurmu mangidah
halak parjahat, anjaha ulang ma ho ra saor
pakon sidea;

² ai hamagouan do iparanggi-ranggi sidea, anjaha
na masambor do isahap-sahapkon bibirni.

³ Marhitei hapentaran do tarpajongjong rumah,
anjaha marhitei panimbangion do totap ai;

⁴ marhitei habotohon gok ma kamar-kamarni
bani bagei-bagei ni arta na maharga anjaha
na majenges.

⁵ Halak na maruhur do tongon na gogoh, anjaha
na marpambotoh simada kuasa,

- ⁶ ai marhitei pambobai na pentar tardalankon
porang, anjaha marhitei buei ni sipanuturi
dapot hamonangan.
- ⁷ Magijangtu do hapentaran bani halak na bodoh;
bani partumpuan seng onggga mungkab
pamanganni.
- ⁸ Halak na paranggi-ranggi na masambor,
targoran do ai kopala ni parjahat.
- ⁹ Dousa do piningkiran ni halak na oto, anjaha
halak sipanrisai, hagigi do bani jolma.
- ¹⁰ Anggo seng tahan ho bani panorang hasosakan,
ai ma tandani na hurang do gogohmu.
- ¹¹ Sai paluah ma halak na sinarad hu hamatean,
anjaha olat ma halak na itogu hu panayatan.
- ¹² Anggo ihatahon ho, "Tonggor ma, seng
ibagas botohnami ai," mintor ma nani lang
ibotoh sipareksa uhur pasal ai? Siparorot
tonduynima ibotoh do ai, anjaha ibaloskon
do bani jolma domu hubani na binahenni.
- ¹³ Ale anakku, pangan ma manisan, ai dear do ai,
sonai tobu-tobu ni haramah, ai mantin do ai
bani langit-langitmu.
- ¹⁴ Sonai ma hapentaran ai bani tonduymu. Anggo
jumpah ho ai, adong ma pangapudianan
bam, seng soya-soya be pangarapanmu.
- ¹⁵ Ulang ma onggopi, ale parjahat, rumah ni
halak parpintor, ulang ma parseda iananni!

- ¹⁶ Ai pitu hali pe tompas halak parpintor, jongjong
do ia use, tapi anggo halak parjahat,
targompang do lanjar magou.
- ¹⁷ Ulang ho marsombuh-sombuh, anggo
targompang munsumu, anjaha ulang
megah u hurmu mangidah partompasni,
- ¹⁸ ai idahon ni Jahowa do ai, gabe sogam u hur-Ni,
anjaha marbalik ringis-Ni humbani hubam.
- ¹⁹ Ulang milas u hurmu ibagas bani halak
sihorjahon na masambor, anjaha ulang ma
ho marngotngot mangidah parjahat;
- ²⁰ ai bani halak parjahat, seng dong
siarapkononkon, suluh ni halak parjahat
maningon mintop do.
- ²¹ Ale, anakku, sai mabiar ma ho bani Jahowa
ampa raja; ulang ma saor ho bani
sipanggeori,
- ²² ai sompong do sogop hamagouan bani sidea,
anjaha na so niagak ni u hur do mangonai
uhum bani sidea.
- ²³ On pe sahap ni halak na pentar do. Seng dear
martonggor jumbak bani paruhuman.
- ²⁴ Halak na mangkatahon dompak parjahat,
“Pintor do ho!” Hona papa do ia bahenon
ni halak simbuei anjaha hona bura ibahen
bangsa-bangsa.

- ²⁵ Tapi halak na maminsang sidea madear do,
anjaha sogop do pasu-pasu ampa hatuahon
bani sidea.
- ²⁶ Summah-summah na mantin do parsampang
na hona.
- ²⁷ Pungkah lobei horjamu i ladang, torsa bahen
jumamu, dob ai pe ase marrumah tangga.
- ²⁸ Ulang ra ho manaksihon na so sintong dompak
hasomanmu, anjaha ulang marladung ho
marhitei bibirmu.
- ²⁹ Ulang hatahon, “Sonai ibahen hu bangku,
sonai do bahenonku bani. Baloskononku
do hubani domu hubani na binahenni ai
bangku.”
- ³⁰ Montas do ahu hun lambung ni juma ni halak
parrayoh, hun lambung ni pohon anggur ni
halak na hurang uhur.
- ³¹ Tonggor ma, tubuhan suga-suga do haganupan
ai, irungkub hupi-hupi do tanoh ai, anjaha
mareong do tembokni.
- ³² Hukawahkon ma ai anjaha huparimbagaskon,
huidah lanjar dapotan lumba-lumba ma
ahu:
- ³³ Tongkin nari modom, tongkin nari tibal-tibal,
tongkin marlompit tangan;
- ³⁴ jadi roh ma bam hamiskinon songon panamun,
anjaha hahurangan songon halak parsinjata.

Upah ni Hapentaran

- 25** ¹ On pe podah ni Raja Salomo, ai ma na pinahumpul ni juakjuak ni si Hiskia, raja ni Juda.
- ² Hamuliaon ni Naibata do ai mangadongkon rusia, tapi hamuliaon ni raja, ai ma na manulimati.
- ³ Gijang ni langit, bagas ni tanoh ampa pingkiran ni raja-raja seng tardodou ai.
- ⁴ Iambukkon ma humbani pirak, jadi boi ma ai topaon ni tukang gabe parugas.
- ⁵ Padaoh ma halak parjahat hun lobei-lobei ni raja, gabe totap ma paratasni marhitei hapintoron.
- ⁶ Ulang ma pabanggal-banggal dirimu i lobei ni raja, atap hundul ho bani ianan ni halak na sangap-sangap;
- ⁷ ai rahanan do hatahonon ni halak bam, “Hululan ma ham!” Humbani na ipatoruh halak ho i lobei ni na sangap.
- ⁸ Na nididah ni matamu, ulang aduhon ai mapodastu, ai sonaha ma holi ho, anggo bador ho ibahen hasomanmu?
- ⁹ Parkarahon parkaramu dompak hasomanmu, tapi ulang patugah rusia ni halak na legan,
- ¹⁰ ase ulang bador ho ibahen halak na manangar ai, gabe sambor baritamu lalab.

- 11 Doskon jambu omas na i atas ni pinggan
pirak do, hata na niluarhon topat bani
panorangni.
- 12 Doskon tintin omas atap ugas-ugas omas do,
halak siparpodah na pentar bani halak na ra
manangihon.
- 13 Songon bah tubuh na patorsukkon bani musim
sabion, sonai do suruhan hatengeran ni
uhur bani na marsuruhsi, ipahisar do uhur
ni tuanni.
- 14 Songon hambun pakon logou na so
marhasoman udan, sonai do halak na
marbagah sibere-bere, hape seng ipasaud.
- 15 Marhitei hasabaron do dapot uhur ni
na markuasa, anjaha hata na lamlam
mamonggolhon holi-holi.
- 16 Anggo jumpah ho manisan, pangan ma ansa na
porlu bam. ase ulang mabosurtu ho, gabe
iutahkon ho ai.
- 17 Ulang magatitu ho martandang hu rumah ni
hasomanmu, ase ulang sobalan ia bam,
gabe hagigini ho.
- 18 Songon ompong-ompong, podang atap panah
na marot, sonai do halak na manaksihon
ladung dompak hasomanni.
- 19 Songon ipon na mulluk-ulluk atap nahei na
tarlandit, sonai do halak na so hatengeran
bani panorang hasosakan.

- ²⁰ Songon halak na mananggali bajuni bani
musim borgoh, anjaha songon na migar
na mangonai bani ugah, sonai do halak na
mandodingkon doding bani halak paruhur
na seda.
- ²¹ Anggo loheian munsumu, bere ia mangan,
anggo horahan ia, bere ia minum;
- ²² ai na pajunjun narnar do ho bani uluni marhitei
ai, anjaha Jahowa ma na mambalaskon ai
bam.
- ²³ Logou na hun utara paroh udan, tapi hata
tundal mambahen bohi manringis.
- ²⁴ Rahanan do marianan i suhi-suhi ni tayub,
ase rap sajabu pakon parinangon
partinggil-tinggil.
- ²⁵ Songon bah na torsuk hubani halak na
horahan, sonai do barita na madear hun
tanoh na madaoh.
- ²⁶ Songon pansur na gombur atap bah tubuh
na binutakan, sonai do halak parpintor, na
mambahen parsangsan i lobei ni halak
parjahat.
- ²⁷ Seng dear panganon manisan mabueitu, halani
ai asok ma mambere puji-pujian.
- ²⁸ Songon huta na mareong, na so martembok
be, sonai do halak na so boi manrajai dirini.

(Sambatni)

- 26** ¹ Songon salju musim milas, atap songon udan musim sabion, sonai do, seng patut hamuliaon bani halak na oto.
- ² Songon dingis na laho lintun meper-eper, songon hampilis na maporus habang, sonai do bura-bura na so marhala, seng mangonai.
- ³ Bosik-bosik do talup bani huda, rantei bani halode, sonai do hotang bani gurung ni halak na oto.
- ⁴ Ulang ma sampang halak na oto domu hubani haatoonni, ase ulang gabe songonsi ho.
- ⁵ Marbalos ma ho bani halak na oto romban hubani haatoonni, ase ulang iagan na pentar ia.
- ⁶ Halak na martonah marhitei halak na oto, na manrotap naheini do ia ai anjaha manginum na masambor.
- ⁷ Songon nahei na so marguna bani halak na repat, sonai do podah bani pamangan ni halak na bodoh.
- ⁸ Songon halak na mambahen mata intan batu ni umbalang, sonai do halak na mambere hamuliaon bani halak na oto.

- ⁹ Songon dangkah na marduri na dapot tangan
ni halak na mabuk, sonai do hata umpama
bani pamangan ni halak na oto.
- ¹⁰ Songon halak siparsior, na manembaki
haganup, sonai do halak na mangupahi
halak na oto atap halak sipamolus.
- ¹¹ Songon baliang na mangulaki utah-utahni,
sonai do halak na oto mulak-ulak
mangkorjahon haatoonni.
- ¹² Anggo dong ididah ho halak, na mangagan
dirini pentar, bueinan ope pangarapan bani
halak na bodoh ase bani.
- ¹³ Hata ni halak parrayoh, "Adong do begu i darat
ai, adong do singa i dalan ai!"
- ¹⁴ Songon labah na marhusor bani engselni, sonai
do halak siparrayoh bani podomanni.
- ¹⁵ Domma ipohul siparrayoh indahanni, hape
rayohan do ia mannahkon hu pamanganni.
- ¹⁶ Pentaran do halak siparrayoh, ninuhurni,
marimbang pitu halak na pandei
marsampang.
- ¹⁷ Halak na ra manampuri paringoran ni halak na
legan, doskon halak na manangkap pinggol
ni baliang na montas do ia ai.
- ¹⁸ Songon halak na podouan, na manembakkon
panah apuy ampa lingkit na pamatehon,

- ¹⁹ sonai do halak na manipu hasomanni, anjaha
ihatahon ope, “Gurou-guroungku do hansa
ai.”
- ²⁰ Anggo seng dong be soban, miloh do apuy,
anggo seng dong sipanukas-nukasi, maronti
do paringoran.
- ²¹ Arang pagajag narnar, soban pagajag apuy,
sonai do dalahi sipartinggil pagara
paringoran.
- ²² Hata ni si parhusip-husip mantin do ai, anjaha
masuk-masuk hubagas uhur.
- ²³ Songon pirak na nilampiskon bani hudon, sonai
do parbibir na lampot, hape uhurni ibagas
jahat do.
- ²⁴ Halak pardomdom marsipakulah-kulah do
parsahapni, tapi gok pangoto-otoion do
uhurni ibagas;
- ²⁵ age pe basar parsahapni, ulang ho porsaya,
ai adong do pitu lapis hasamboron ibagas
uhurni;
- ²⁶ age pe irungkub-rungkub domdomni marhitei
sipaoto-oto, maningon talar do hajahatonni
ai i tongah-tongah ni humpulan.
- ²⁷ Halak sihurak godung bani na legan, ia
sandiri do madabuh hubagas; halak na
manggulangkon batu bani na legan, ia
sandiri do hona gulangan.

- ²⁸ Dilah parladung mambahen hasedaon,
pamangan na landit parohkon hamagouan.

(Sambatni)

- 27** ¹ Ulang ma pangunsagahkon pasal ari patar,
ai seng ibotoh ho atap aha na boi masa bani
sada ari.
- ² Halak na legan ma na mamuji ho, ulang ma
pamanganmu sandiri, hasoman na lain ma,
ulang bibir sandiri.
- ³ Borat pe batu, sonai homa horsik, tapi boratan
do hunjai borit ni uhur marhalanihon ni
halak na oto.
- ⁴ Parah do gila, anjaha gajag do ringis, tapi ise ma
na tolak manahan parsimburuon?
- ⁵ Rahanan do pinsang-pinsang na talar, humbani
holong na pinonop-ponop.
- ⁶ Ugah halani lonsing-lonsing ni huan-kuan,
holong do ai, tapi summah-summah ni halak
pardomdom, sipakulah-kulah do.
- ⁷ Halak na bosur sobalan do age bani manisn,
tapi halak na loheian matobu do bani age na
mapaet.
- ⁸ Songon manuk-manuk na manadingkon asarni,
sonai do halak na manadingkon tanoh
hatubuhanni.

- ⁹ Minak pakon rium-riuman do mambahen malas uhur, sonai homa do parhuan-kuanon, na marsipodah-podahan.
- ¹⁰ Ulang tadingkon huan-kuanmu atap huan-kuan ni bapamu; anjaha ulang ma tandangi rumah ni saninamu sanggah tarsosak ho. Dearan do simbalog rumah na dohor, marimbang sanina na daoh.
- ¹¹ Maruhur ma, ale anakku, anjaha pamalas ma uhurhu, ase hubotoh marbalos bani na pahiri ahu.
- ¹² Halak na pantas mangidah parmaraan, jadi marponop ma ia, tapi halak na oto itoruskon do langkahni, gabe manaron.
- ¹³ Buat ma hiouni, halani ijamini do halak na legan, gadeihon ma ai, halani iampuni halak sileban.
- ¹⁴ Halak na mamuji-muji hasomanni marsora na maling, girah sogod homa, gabe bura-bura do ai hiraon.
- ¹⁵ Tiris na torus manektek bani musim udan, dos do ai ampa parinangon sipartinggil-tinggil;
- ¹⁶ halak na sihol manjolomisi, doskon na manahan logou do ai, atap na manjolom minak marhitei tangan siamunni.
- ¹⁷ Bosi do pamarot bosu, sonai do jolma marsipadearan samah jolma.

- ¹⁸ Halak sipiara hayu ara, panganonni do buahni,
anjaha halak sipambalosi bani tuanni,
dapotan puji-pujian do.
- ¹⁹ Songon bah mansorminkon bohini bani jolma,
sonai do uhur ai mansorminkon hadirion ni
jolma ai bani dirini.
- ²⁰ Nagori toruh ampa urung habeguon seng
marnabosur, sonai do mata ni jolma seng
marnabosur.
- ²¹ Balanga panlalaan pangujian bani pirak, liang
panloburan manguji omas, tapi sada halak
baritani do pangujian bani.
- ²² Porini pe hona duda halak na oto ibagas
losung rap pakon omei, tapi seng ra sirang
haotoonni ai hun bani.
- ²³ Pangkei ma botoh haadongan ni biribirimu,
anjaha pardiateihon ma hulanamu,
- ²⁴ ai seng manongtong habayakon lalab, anjaha
seng totap hadoharon marsundut-sundut.
- ²⁵ Anggo martubuhan ma poyon-poyon ai,
martumbor simaratah, anjaha ipatumpu
hun dolog-dolog suan-suanan,
- ²⁶ pasirsiron ni biribiri ai ma bam parhiouon
ampa pamboli ni juma humbani hambing ai;
- ²⁷ sungkup homa dadih bahen sipanganonmu,
sipanganon bani parrumahmu ampa
hagoluhan bani jabolonmu.

(Sambatni)

- 28** ¹ Maporus do halak parjahat age pe seng dong na mardakdaksi, tapi anggo halak parpintor marnalom ni uhur do songon anak ni singa.
- ² Anggo masa hajahaton bani sada nagori, pagantih pasoluk ma rajani, tapi marhitei sada halak na maruhur anjaha na marpambotoh totap do mardalan uhum.
- ³ Halak na sangap, na mangodoh-odoh halak na masombuh, songon udan doras, na mangayubkon do ai, siparseda gogoh ni tanoh.
- ⁴ Halak sitadingkon uhum mamuji-muji halak parjahat, tapi halak sidalankon uhum ilawan do sidea.
- ⁵ Halak parjahat seng iarusi aha hasintongan, tapi halak sipindahi Jahowa iartihon do haganupan ai.
- ⁶ Dearan do halak na masombuh, na pitah marparlahou humbani halak na so pintor langkahni, age pe bayak ia.
- ⁷ Halak siramotkon titah, ai ma anak na pantas maruhur, tapi halak na marhuankon siparhisap, pabador bapani do.

- ⁸ Halak na pabuei artani marhitei bunga ni duit
ampa untung na malobihtu, bani halak
sihaholongi na miskin do arta ipatumpuni ai.
- ⁹ Halak na padaohkon pinggolni humbani na
manangihon titah, tonggoni ai pe gabe
hagigi do.
- ¹⁰ Halak na pakahouhon sibujur uhur hubani
dalan hamagouan, hubagas godungni
sandiri do ia madabuh; tapi halak sipitah
maruhur, na dear do teanonni.
- ¹¹ Halak na bayak, pentar do ia ninuhurni, tapi
halak na miskin siparuhur, tardapotsi do
uhurni ai.
- ¹² Anggo marhamonangan halak parpintor,
banggal ma hatuahon, tapi anggo markuasa
halak parjahat, marponop bei ma jolma.
- ¹³ Barang ise na manrongkob panlanggaronni
seng martuah ai, tapi halak na mansopotkon
salahni anjaha itadingkon ai, dapotan idop
ni uhur do.
- ¹⁴ Martuah ma halak na tongtong marhabiaran
bani Jahowa, tapi na pahengkeng uhurni
madabuh do hubagas hamagouan.
- ¹⁵ Songon singa na maraum pakon gipul na
loheian, sonai do panrajai na jahat bani
rayat na miskin.

- ¹⁶ Raja na hurang uhur, ai do sidalankon
odoh-odoh, tapi sihagigihon untung na so
sintong, paganjang ari-arini do ai.
- ¹⁷ Halak na hona sapata ni daroh nijolma,
mompas-ompas do ia ronsi matei, ulang
iurupi be ia.
- ¹⁸ Halak na so panurakon marpalahou, sai na
maluah do, tapi halak na lekluk marparlahou
sai madabuh do hubagas godung.
- ¹⁹ Halak sihorjahon jumanibosuran do ia bani
sipanganon, tapi halak sipindahi na so
marguna, bosuran do ia bani hamiskinon.
- ²⁰ Halak hatengeran, buei do pasu-pasu dapotsi,
tapi halak na tarolos sihol bayak, seng anjai
lang hona uhum.
- ²¹ Seng dear mambuat-buat uhur; halani
sipanganon sampohul pe, ra do halak sipata
mandalankon hajahaton.
- ²² Parmata na mangapian, oji do uhurni bayak,
tapi seng dapot uhurni hamiskinon do sogop
bani.
- ²³ Halak na ra maminsang hasomanni, puji-pujian
do ujungni dapotsi, lobih hambani halak na
pales-lemes parsahapni.
- ²⁴ Halak na manangkoi bapani atap inangni
anjaha ihatahon homani, "Seng dousa ai!"
Dos do ai pakon halak sipanamun.

- ²⁵ Halak paruhur haut, patubuh paringoran, tapi halak na martenger ni uhur bani Jahowa marlobih-lobih do.
- ²⁶ Halak na martenger ni uhur bani pingkiranni sandiri, na oto do ai, tapi halak na pantas marparlahou, sai maluah do.
- ²⁷ Halak parlayak bani na masombuh, seng anjai hurangan, tapi halak na papitpit matani, buei do bura-bura mangonai bani.
- ²⁸ Anggo markuasa halak parjahat, marponop bei ma jolma, tapi anggo masab sidea, lambin tambah ma halak parpintor.

(Sambatni)

- 29** ¹ Halak na gati hona paingat, hape tong ipahengkeng uhurni, sompong do holi maripuk ai, seng hatambaran.
- ² Anggo halak parpintor siparkuasa, marolob-olob ma rayat; tapi anggo halak parjahat manrajai, mangorong ma halak.
- ³ Halak na mangkaholongi hapentaran, pamalas uhur ni bapani, tapi halak na marsaor ampa boru jalang, mambois-boiskon sinari do.
- ⁴ Marhiteihon habonaron do tarpatotap raja sada nagori, tapi na paporsankon balasting maparahtu, ai do na parsedahon.
- ⁵ Halak na mamuji-muji hasomanni, na manaon jarot do ia ai i lobei ni naheini.

- ⁶ Marhitei hajahatonni do halak parjahat
hona siding, tapi anggo halak parpintor
marolob-olob anjaha marmalas ni uhur do.
- ⁷ Iparuhurhon halak parpintor do hak ni halak na
masombuh, tapi anggo halak parjahat seng
ipardulihon ai.
- ⁸ Halak sipanrisai mambahen geor huta, tapi
mandaoh do ringis ibahen halak siparuhur.
- ⁹ Anggo marparkara halak na pentar ampa halak
na oto, manggila anjaha tartawai do halak
na oto ai, seng lalab marhadoban.
- ¹⁰ Halak siuseihon daroh magigi do ia bani halak
na daulat, tapi halak parpintor mangindahi
dalam pagoluhkonsi.
- ¹¹ Halak na oto ipapuas do ganup ringisni, tapi
anggo halak na maruhur itahan do ai.
- ¹² Anggo ra sipanrajai manangihon hata ladung,
haganup gamot-gamotni gabe jahat ma.
- ¹³ Saor do halak na masombuh ampa sipangodoh-
odoh, tapi Jahowa do sibere haliharon bani
mata ni sidea bei.
- ¹⁴ Raja na manguhumi halak na masombuh
ibagas hasintongan, totap do paratasni
lalab.
- ¹⁵ Hotang ampa pangajaran do parohkon
hapentaran, tapi dakdanak na tinurutan
parohkon habadoron bani inangni.

- ¹⁶ Anggo martambah halak parjahat, lambin buei ma hajahaton; tapi idahon ni halak parpintor do pardabuh ni sidea.
- ¹⁷ Ajar ma anakmu, jadi sonang ma ho bahenonni, anjaha ibere sipamalas uhur.
- ¹⁸ Anggo seng dong pangungkabon, geor do bangsa; martuah do halak na mandalankon titah ni Naibata.
- ¹⁹ Marhitei hata tumang seng tarajari jabolon, age pe ibotoh, seng idalankon.
- ²⁰ Anggo ididah ho halak na hertep marsahap, bueinan ope pangarapan bani halak na bodoh ase bani.
- ²¹ Halak na maunjahtu bani jabolonni humbani haetek-etekkonni nari, dobni manlawan do ai.
- ²² Halak pargila-gila patubuh paringoran, anjaha halak parringis mangkorjahon buei dousa.
- ²³ Gijang ni uhurni do patoruh halak, tapi halak sitoruh uhur dapotan hasangapon do.
- ²⁴ Halak na saparbagianan pakon panangko, parseda dirini do, itangar do namin sipamurai, tapi ipasip-sip do.
- ²⁵ Biar dompakjolma mambahen hona siding, tapi hona ondingan do na martenger ni uhur bani Jahowa.

- ²⁶ Buei do halak na mambuat-buat uhur ni sipanrajai, tapi Jahowa do na mamintori ganup halak.
- ²⁷ Hagigi do halak pargeduk bani halak parpintor, tapi halak na pintor parlahouni, hagigi do ai bani halak parjahat.

Podah humbani si Agur

- 30** ¹ Hata ni si Agur, anak ni si Jeke, na hun Massa. Nini halak ai, “Domma loja ahu, ale Naibata, domma loja ahu, angkulangku pe domma hurleh.
- ² Tongon ahu do siotoan humbani jolma, anjaha seng dong panimbangion ni jolma bangku.
- ³ Seng onga huguruhon hapentaran, anjaha seng dong habotohon bangku pasal Na Pansing in.
- ⁴ Ise onga naik hu nagori atas anjaha tuad use hunjai? Ise onga patumpu logou bani tanganni? Ise boi mambaluti bah ibagas hiou? Ise do na pajonamkon haganup tampakan ni tanoh on? Ise do goranni, anjaha ise do goran ni anakni? Ibotoh ho do ai?”
- ⁵ Haganupan hata ni Naibata pitah do, gantar do la bani sagala na marhaporusan Bani.

- ⁶ Ulang tambah-tambahi hata-Ni ai, ase ulang hona pinsang ho, anjaha tardapot ho parladung.
- ⁷ “Dua do na hupindo hun Bamu, ulang ma lang ibere Ham ai bangku, paima lape matei ahu.
- ⁸ Padaoh Ham ma humbangku uhur sipakulah-kulah pakon hata ladung. Ulang ma bere Ham bangku hamiskinon atap habayakon, tapi bere Ham ma bangku sipanganon ansa na porlu,
- ⁹ ase ulang, anggo marlobih-lobih ahu, huporsou Ham, anjaha huhatahon, ‘Ise Jahowa?’ Ase ulang, anggo masombuhtu ahu, manangko ahu, gabe sambor hubahen goran ni Naibatangku.”
- ¹⁰ Ulang ma pasambor-sambor jabolon bani tuanni, ase ulang iburai ho, gabe seda ho.
- ¹¹ Adong do halak na mamurai bapani: anjaha na so pasangap inangni.
- ¹² Adong do halak na mangagan borsih sidea, tapi dungutni pe lang iusah.
- ¹³ Adong do halak parmata na toal, na pamiut-miut salibonni hu atas.
- ¹⁴ Adong do halak paripon na songon podang, parngadol na songon pisou, laho mamondut halak na madoyuk hun tanoh on pakon halak na masombuh hun tongah-tongah ni hajolmaon.

- ¹⁵ Dua boru ni lintah mangkatahon, “Bere, bere.”
Tolu seng tarbosuri; ompat seng ongg
mangkatahon, “Sungkup ma!”
- ¹⁶ Ai ma nagori toruh pakon harambuyon na
lambang, tanoh na so ra bosur bani bah
ampa apuy na so ongg mangkatahon,
“Domma sungkup.”
- ¹⁷ Mata ni halak na mapas bani bapani, anjaha
ipahiri inangni na dob ubanon, paguton ni
kawak na i topi bah do ai, anjaha panganon
ni anak ni haluhuy.
- ¹⁸ Na tolu on halongangan do bangku, anjaha na
ompat on seng tararusi ahu:
- ¹⁹ Ai ma parhabang ni manuk-manuk
nanggordaha i awang-awang, pardalan ni
ulog bani dolog batu, pardalan ni kapal i
tongah laut ampa parsaoan ni dalahi bani
naboru,
- ²⁰ Sonon do parlahou ni boru jalang: Mangan do
ia anjaha iapusi babahni, nini: seng dong
hubahen na jahat.
- ²¹ Halani na tolu masam on do dugur tanoh,
anjaha halani na ompat on seng tahan ia.
- ²² Halani jabolon, anggo gabe raja ia, halani halak
na oto, anggo marlobih-lobih ia;
- ²³ halani naboru na niapasan hape adong na
mambuatsi ampa halani jabolon naboru na
manoluk kuasa ni tuanni.

- ²⁴ Adong do ompat na etek-etek i tanoh on, tapi pandei tumang.
- ²⁵ Ai ma porkis sada hulanan na so margogoh, tapi ipasirsir sidea do bohalni bani musim milas;
- ²⁶ ampodi, ai ma binatang na so margogoh, tapi ipauli do rumahni bani dolog batu;
- ²⁷ balang, seng marraja, tapi atur do sidea marhulan-hulan misir;
- ²⁸ boraspati, na boi tangkapon ni tangan, tapi bani lopou ni raja marianan.
- ²⁹ Adong tolu na tanggung panlangkahni, ompat na jenges pardalanni:
- ³⁰ Ai ma singa, sigogohan humbani sagala binatang, na so onga surut hun lobei ni atap aha pe,
- ³¹ huda panjangan, hambing bajar pakon raja, na manlangkah i lobei ni balani.
- ³² Atap maoto ho, marhitei na ipagijang ho dirimu, barang ipingkiri ho na masambor, tutup ma lah pamanganmu bani tanganmu!
- ³³ Ai dadih na ginunsang-gunsang manjadi mantega, igung na niantuk gabe tarngurngur, anjaha gila na pinuhoan patubuh paringoran.

Podah humbani si Lemuel

- 31** ¹ On do hata ni si Lemuel, raja ni Massa, pinodahkon ni inangni bani,
- ² “Aha do ale anakku hatahononku bam! Aha do, ale sinuan tunas? aha do, ale anak bagah-bagahku?
- ³ Ulang ma bere gogohmu bani naboru, anjaha ulang ma pasaor dirimu bani halak siparseda raja-raja.
- ⁴ Seng patut bani raja-raja, ale Lemuel, seng patut bani raja-raja minum anggur, sonai homa kopala-kopala minum siinumon na koras,
- ⁵ ase ulang halani haru-haru minum sidea, gabe lupa uhum hasintongan, gabe peol panguhumni bani halak na madoyuk.
- ⁶ Bere ma inuman na koras bani halak na magou-magou, ampa anggur bani halak na pusokan uhur,
- ⁷ ase minum sidea, gabe lupa bani hasombuhonni, anjaha seng idingat be hasunsahanni.
- ⁸ Buha ma pamanganmu mangkopkop halak na longah, halani hak ni halak na tading maetek.
- ⁹ Buha ma pamanganmu, anjaha sintong ma panguhummu, ondingi ma hak ni halak na madoyuk ampa na masombuh.”

Puji-pujian bani Parinangon na Madear

- 10 Parinangon na madear, ise ma na dob
jumpahan ai? Harganan do ai daoh humbani
mutiha.
- 11 Ia do tenger ni uhur ni paramangonni. anjaha
pasal na dong pe seng hurangan ia.
- 12 Na dear do ibahen hubani pargotongni, sedo
na masambor, sadokah manggoluh ia.
- 13 Sari do ia bani wol ampa bonang linnen, anjaha
ringgas do tanganni marhorja.
- 14 Songon kapal ni partiga-tiga do ia, humbani na
daoh do iparroh sipanganon bani.
- 15 Girah sogod, golap-golap ope, domma puho
ia, ipatorsa ma panganon bani pangisi
ni rumahni anjaha ibagihon horja bani
juakjuak naboru.
- 16 Iuhurhon do homa pasal juma, gabe dapotsi do
ai; marhitei pansarian ni tanganni ipungkah
pohon anggur.
- 17 Igonditi do binongeini ase margogoh, anjaha
tanganni sihap do tongtong.
- 18 ididah do, manjadi do horjani, anjaha bani na
golap pe seng miloh suluhni.
- 19 Pandeï do tanganni manjamah sorha, anjaha
sihap jari-jarini manangkap tuldak.
- 20 Layak do tanganni bani halak na masombuh,
anjaha buha bani halak na hurangan.

- ²¹ Seng haru uhurni pasal rumahni bani musim
salju, halani hagianup na i rumahni marbaju
wol do.
- ²² Ipauli do salimut bani, hiou linnen na alus
ampa na marpurada do pakeianni.
- ²³ Sangap do pargotongni i partumpuan, sangah
na hundul ia rap pakon pangintuai ni nagori
in.
- ²⁴ Itonun do pakeian linnen, ijuali do ai; gondit do
jualonni bani halak partiga-tiga.
- ²⁵ Tunggung anjaha sangap do ia, tawa do ia
managam ari na roh.
- ²⁶ Ibuha do pamanganni ibagas hapentaran,
anjaha podah halamlamon do i atas ni
dilahni.
- ²⁷ Ipardimata do pardalan ni horja i rumahni,
anjaha seng ibotoh na marayoh.
- ²⁸ Roh do anakni, ipuji do ia, sonai homa
paramangonni, ipatunggung do ia, nini,
- ²⁹ “Buei do parinangon na madear, tapi ham do
siatasan humbani hagianupan ai.”
- ³⁰ Sipaoto-oto do hajengeson, anjaha na lang
do rupa na majenges, tapi parinangon na
mabiar bani Jahowa, ai do sipujion.
- ³¹ Bere ma hu bani buah ni na hinorjahonni,
anjaha lahoanni do mambahen tarpuji ia i
partumpuan.

Parambilar

Haganup na i Tanoh on Sisoya-soya do

- 1** ¹ Hata ni Parambilar ai, anak ni si Daud, raja i Jerusalem.
- ² Sisoya-soya do tongon, nini Parambilar ai, sisoya-soya do haganup.
- ³ Aha ma gunani bani jolma haganup halojaonni, na hinangalutkonni i toruh ni langit?
- ⁴ Salpu sada sundut, roh sundut na legan, tapi tanoh on lalab do totap.
- ⁵ Poltak do mata ni ari, dob ai sundut use, anjaha mangolos mulak bani ianan hapoltakonni.
- ⁶ Mangombus do logou ai dompak dangsina, dob ai mulak dompak utara; marputor-putor do laho logou ai, anjaha mulak use bani habingkatonni.
- ⁷ Haganup binanga ai mabaor dompak laut, tapi laut ai lanjar do lang ra gok. Bani ianan habaoranni, hujai do binanga ai mangulaki mabaor.
- ⁸ Haganup do gok halojaon, seng tarpatugah jolma haganupan ai; seng marnasombuh mata mangidah, anjaha seng marnabosur pinggol manangar.

- ⁹ Aha na dob onnga masa, ai do masa use, anjaha aha na dob onnga ibahen halak, ai do ibahen use, seng dong na baru i toruh ni langit.
- ¹⁰ Ai adong, atap aha pe ai, na boi hatahonon ni halak pasal ai, “Tonggor ma, na baru do on?” Domma adong hinan ai sapari, bani panorang na i lobeita.
- ¹¹ Seng dong be na mardingat bani sisapari ai, sonai homa pasal na sihol masa ope, seng dong be na mardingat pasal ai bani na i pudi ni ai.

Na Mangindahi Hapentaran pe Sisoya-soya do

- ¹² Ahu, Parambilaran ai, onnga do raja bani Israel i Jerusalem.
- ¹³ Iporluhon uhurhu do marhasoman hapentaran, mamareksa ampa manulimati sagala na tarjadi i toruh ni langit. Horja hangaluton do ai, na tinotapkon ni Naibata bani jolma manisia, ase marhangaluton marhitei ai.
- ¹⁴ Domma huidah sagala horja, na hinorjahon i toruh ni langit; tonggor ma, haganupan ai sisoya-soya do, anjaha songon na manangkap logou do.
- ¹⁵ Na geduk seng tarpapintor, anjaha na so ijin seng tarbilang.
- ¹⁶ Ningku ma ibagas uhurhu, “Domma hupabuei anjaha hutambahi namin bangku

hapentaran lobih humbani sagala sipanrajai na i Jerusalem, anjaha buei do hapentaran pakon habotohon i idah uhurhu.

- ¹⁷ Anjaha iporluhon uhurhu do mangarusi hapentaran ampa habotohon, mangarusi haotoon ampa halontongon.” Dapot uhurhu ma, on pe na manangkap logou do hansa.
- ¹⁸ Ai lambin buei hapentaran lambin buei do sitaronon, anjaha barang ise na patambah habotohon, patambah hasunsahanni do.

Hasonangan Dunia pe Sisoya-soya do

- 2** ¹ Jadi ningku ma ibagas uhurhu, “Nai ma, husuba ma lobei marhitei na marmalas-malas ni uhur, anjaha hudai ma haganup na mantin-mantin;” tapi tonggor ma, sisoya-soya do homa ai.
- ² Hubani partatawaan ai huhatahon, “Haotoon do in!” anjaha hubani malas ni uhur ai, “Ai aha do gunani in?”
- ³ Tubuh do uhurhu ibagas, sihol pahisar angkulanku marhitei anggur, tapi uhurhu do sipambobai bangku ibagas hapentaran; sihol homa mandalankon haotoon, ase boi hubotoh, atap aha do na madear sihorjahonon ni anak nijolma in i toruh ni langit, sadokah goluhni na pondok in.

- ⁴ Jadi huhorjahon ma pambahenan na banggal-banggal. Hupauli ma rumah bangku, anjaha hupungkah pohon anggur.
- ⁵ Hubahen ma bangku pohon ampa taman bunga halilian, husuani do ijai bagei hayu na marbuah.
- ⁶ Hubahen homa bangku bongbongan, laho mangarbahi marhitei ai hayu suanan na tabun martumbori ijai.
- ⁷ Huboli do jabolon dalahi pakon jabolon naboru, adong do homa bangku jabolon na dob tubuh i rumahku. Age hulanan ni lombu pakon biribiri dong do bangku, bueinan humbani haganup na i Jerusalem.
- ⁸ Hupajunjun do homa bangku pirak, omas pakon arta na maharga humbani raja-raja ampa nagori-nagori. Hubuat homa bangku pandoding, dalahi pakon naboru, ampa sipamalas uhur nijolma manisias, ai ma naboru-naboru buei.
- ⁹ Jadi timbul ma ahu, anjaha bayakan marimbang haganupjolma na i lobeihu i Jerusalem; anjaha totap do homa hapentaran ai rapkon ahu.
- ¹⁰ Haganup pinarsinta ni matangu seng hulanglangi; anjaha seng hutahan uhurhu humbani malas ni uhur aha pe, ai maningon malas do uhurhu ibagas halani haganup

halojaonku, ai do rupeihi ibagas haganup
halojaonku.

- ¹¹ Tapi dob hukawahkon haganup
pambahenanku, sagala na binahen
ni tanganku, ampa hangaluton, na hudagei
ibagas na mangkorjahon ai, tonggor ma,
sisoya-soya do haganup, anjaha songon na
manangkap logou tumang, seng dong na
marguna i toruh ni langit.
- ¹² Dob ai marhusor ma ahu, laho manimbang
pasal hapentaran, haotoon pakon
halontongan. Ai aha do bahenon ni halak
sipanggantih raja in? Ai ma na dob ongg
binahen ni halak hinan.
- ¹³ Jadi huidah ma, surungan do hapentaran
marimbang haotoon songon surung ni
haliharon marimbang hagolapan.
- ¹⁴ Halak na pentar marhaliharon do mata na
bani uluni, tapi mardalan bani na golap do
anggo halak na oto. Tapi huidah ma, sisada
sitaronon do haduasi ai.
- ¹⁵ Jadi ningku ma ibagas uhurhu, “Anggo songon
pangandungan ni halak na oto do homa
pangandunganku, mase ma sai huparleilei
hapentaran na sain dokah?” Jadi ningku ma
ibagas uhurhu, “Ai pe sisoya-soya do.”
- ¹⁶ Ai seng lalab pardingat ni halak bani halak na
pentar age bani halak na oto; bani panorang

na laho roh, haganupan ai ihalupahon do.
In le, matei do hape halak na pentar usih
songon halak na oto!

¹⁷ Jadi sobalan ma ahu bani goluh on, ai hagigi do
bangku haganup na masa i toruh ni langit, ai
sisoya-soya do haganup, anjaha songon, na
manangkap logou do.

¹⁸ Magigi do ahu mangidah sagala halojaon
na huhalojahon i toruh ni langit, halani
maningon tadingkononku do ai bani jolma
na roh hun pudingku.

¹⁹ Anjaha ise pabotoh-botoh ai atap halak
na pentar ia atap halak na oto? Hape ia
ma siparkuasa bani sagala horja na dob
huhalojahon ibagas hapentaran i toruh ni
langit! Age ai pe sisoya-soya do.

²⁰ Jadi das ma uhurhu hubani na sihol mandolei,
mangidah sagala horja, na dob huhalojahon
i toruh ni langit.

²¹ Ai halak, na dob loja marhasoman hapentaran,
habotohon ampa hapandeian mandalankon
horjani, hape maningon do ai bahen rupei
ni jolma na so pala loja. Sisoya-soya do on
anjaha hamagouan bangga.

²² Ai aha do ulih bani jolma humbani haganup
horjani ampa humbani sinta-sinta ni uhurni,
na hinalojahonni i toruh ni langit?

- ²³ Ai sadokah ia manggoluh marsitaronon do,
anjaha gok hasunsahan do horjani, anjaha
borngin pe seng marhasonangan uhurni.
Sisoya-soya do age ai.
- ²⁴ Seng dong sidearan banijolma humbani
na mangan ampa na minum, anjaha
ipasonang uhurni marhitei na madear
ibagas halojaonni. Ai pe, mangihutkon na
huahap, sibere-bere ni Naibata do ai.
- ²⁵ Ai ise ma boi mangan, anjaha ise
ma marmegah-megah, anggo seng
marhiteihon-Si.
- ²⁶ Ai banijolma hinarosuhkon ni uhur-Ni do
ilayak-layakkon Naibata hapentaran,
habotohon pakon malas ni uhur. Tapi halak
pardousa ipaturut do loja laho patumpuhon
pakon pajunjunkon, ase ibere Naibata
use ai bani halak hinarosuhkon ni uhurni.
Ai pe sisoya-soya do, anjaha songon na
manangkap logou tumang do.

Marpanorang anjaha Marmusim do Haganup

- 3** ¹ Bani sagala na adong, adong bei do musimni,
anjaha bani sagala na masa i toruh ni langit,
adong bei do panorangni.
- ² Adong panorang tubuh, anjaha dong panorang
matei; adong panorang manuan, anjaha
adong panorang mangumpat na dob sinuan;

- ³ adong panorang mangugahi, anjaha adong panorang manambari; adong panorang parsedahon, anjaha adong panorang paulihon;
- ⁴ adong panorang na tangis, anjaha adong panorang tartawa; adong panorang mandoruhi, anjaha adong panorang manortor;
- ⁵ adong panorang mangambukkon batu, anjaha dong do panorang patumpu batu; adong panorang marsisummahan, anjaha dong panorang lang marsisummahan halani padaoh-daoh;
- ⁶ adong panorang mansari, anjaha dong panorang magouan; adong panorang manramotkon, anjaha adong panorang mangambukkon;
- ⁷ adong panorang manrigati, anjaha dong panorang manjarumi; adong panorang sipsip, anjaha dong panorang marsahapi;
- ⁸ adong panorang mangkaholongi, anjaha dong panorang mardomdom; adong panorang marmunsuh, anjaha dong panorang mardamei-damei.
- ⁹ Aha ma untung bani siparhorja humbani na hinangalutkonni ai?

- ¹⁰ Domma huida hangaluton, na nitotapkon ni Naibata bani jolma manis, ase loja sidea marhitei ai.
- ¹¹ Haganupan ipauli do jenges bani panorangni; sonai homa uhur pasal sisadokah ni dokahni ibere hubagas uhur ni sidea, tapi seng tardadap jolma in pambahenan, na binahen ni Naibata humbani mulani das bani ujungni.
- ¹² Halani ai domma dapot uhuru, seng dong sidearan bani jolma in, humbani na marmalas ni uhur ampa na pasonangkon dirini sadokah ni goluhni,
- ¹³ anjaha homa, ai boi pe jolma mangan pakon minum mangidah na madear ibagas sagala halojaonni, ai pe sibere-bere ni Naibata do.
- ¹⁴ Hubotoh do, haganup na binahen ni Naibata, totap do ai ronsi sadokahni dokahni, seng dong be sitambahan hujai, seng dong be sioruan. Ibaheh Naibata pe sonai, ase mabiar jolma in i lobei-Ni.
- ¹⁵ Aha na masa sonari, na dob onggama masa do ai; anjaha aha na sihol masa, na dob onggama masa do ai, ai ipindahi Naibata do use na dob salpu ai.

Salpu do Homa Jolma Usih Songon Pinahan

- ¹⁶ Huida do homa i toruh ni langit: Bani ianan ni uhum, ijai do masa hajahaton; anjaha

bani ianan ni hapintoron, ijai do masa hagedukon.

¹⁷ Ningku ma ibagas uhurhu, “Halak parpintor ampa halak parjahat uhumon ni Naibata do; panorang ni haganup na dong ampa haganup horja domma itontuhon.”

¹⁸ Ningku ma ibagas uhurhu pasal hadirion ni jolma manisialu! luji Naibata do sidea, laho patandahon bani sidea, paboa doskon pinahan do sidea.

¹⁹ Ai sada sitaronon do jolma ampa pinahan; matei do pinahan, jolma pe matei do. Haganup sidea sisoya-soya do, seng dong hasurungan ni jolma manisialu humbani pinahan, ai sisoya-soya do haganup.

²⁰ Haganupan ai laho manuju bani sada ianan: Haganupan marharohan humbani orbuk do, lanjar haganupan ai mulak bani orbuk.

²¹ Ise mambotoh, atap na naik hosah ni jolma hu atas, anjaha hosah ni pinahan turun hu toruh?

²² Jadi huidah ma, seng dong sidearan bani jolma in humbani na marmalas ni uhur ia bani horjani, ai do rupeini. Ise ma na mamboan jolma hujai, ase ididah barang aha na masa dob matei ia?

**Pasal Pangodoh-odohon, Horja Hapandeian, na
Lungunan ampa na Marsurai Kuasa**

- 4** ¹ Dob ai huulaki ma mangidah sagala odoh-odoh na masa i toruh ni langit. Anjaha tonggor ma, iluh ni halak na niodoh-odoh, hape seng dong na mangapohi sidea. Hona paksa do sidea ibahen sipangodoh-odoh, tapi seng dong sipangapoh bani sidea.
- ² Jadi martuahan do halak na dob dokah matei ai nini uhurhu, marimbang halak na manggoluh ope;
- ³ tapi martuahan ope marimbang haduasi ai, halak na so tubuh, ai ma na so mangidah pambahenan na jahat, na masa i toruh ni langit.
- ⁴ Dob ai huidah ma sagala hangaluton pakon horja hapandeian, hape patubuh uhur na marsisimburuan do ai. Ai pe sisoya-soya do, anjaha na manangkap logou tumang do.
- ⁵ Halak na oto lompit-lompit tangan hansa, gabe dagingni sandiri ipangan.
- ⁶ Dearan do sanggolom marhasoman sonang ni uhur humbani dua nangging, tapi gok hangaluton anjaha manangkap logou tumang.
- ⁷ Dob ai huidah ma use na soya i toruh ni langit:

- ⁸ Adong ma sada halak na tarpunjung, na so marniombah, na so marsanina, hape ipukpuk do marhorja, anjaha matani seng marnasombuh mangidah habayakon, dobni sungkun-sungkun bani dirini, “Ai ise do na huhopkop ase lang marsonang-sonang ahu?” On pe sisoya-soya do, anjaha hangaluton na masambor.
- ⁹ Dearan do dua halak humbani na sandirian, ai dapotan upah na madear do sidea bani halojaonni.
- ¹⁰ Ai anggo targompang sidea, boi do sidea marsiurupan; tapi seda do halak na sandirian, ai anggo targompang ia, seng dong na manogusi.
- ¹¹ Sonai homa, anggo rap modom dua halak, jadi marsipamalasan ma sidea; tapi anggo sahalak, sonaha ma boi malas ia?
- ¹² Age pe tartalihan sahalak sada halak na sandirian, tapi dua halak martahan do i lobeini, anjaha tali na tinolu seng urah rotap.
- ¹³ Dearan do sada parana na miskin, tapi na maruhur, humbani sada raja na matua, tapi na botoh anjaha na so ra palumbaon.
- ¹⁴ Ai luar do parana hun tutupon laho bangkit raja, age pe masombuh hinan ia itubuhkon, sanggah raja ope halak na legan.

¹⁵ Huidah do haganup halak na manggoluh na i toruh ni langit, hampit parana ai do, ai ma na manggantihsi ai.

¹⁶ Seng tarbilangi buei ni halak na binobahonni, tapi halak na roh i pudini seng marosuh be bani. On pe sisoya-soya do anjaha manangkap logou tumang.

Lumba-lumba Pasal Hampung ni Uhur Ibagas Parugamaon

5 ¹ (4-17) Jaga ma panlangkahmu laho masuk hu rumah ni Naibata; roh hun dohor laho manangihon, dearan do ai humbani galangan na ginalangkon ni halak na oto, halani seng ibotoh, na sambor do hape hinorjahonni ai.

² (5-1) Ulang Maherteptu Pamanganmu, anjaha Ulang Mapodastu Uhurmu Manluarhon Hata i Lobei ni Naibata, ai Naibata i nagori atas do; tapi anggo ho i tanoh on do; halani ai paotik ma parsahapmu.

³ (5-2) Ai roh do nipi humbani buei ni panarian, anjaha sahap haotoon humbani buei ni sahap-sahap.

⁴ (5-3) Anggo marbagah-bagah ho bani Naibata, ulang ma padokah-dokah pasaudkon ai, ai seng marosuh la mangidah halak na oto. Aha na dob binagahkonmu, pasaud ma ai.

- ⁵ (5-4) Dearan do ulang ho marbagah-bagah
humbani na marbagah-bagah, hape seng
ipasaud.
- ⁶ (5-5) Ulang lopas pamanganmu mambahen
badanmu mardousa, anjaha ulang ma
hatahon i lobei ni suruhan ni Naibata,
“Na silap do in!” Mase ma pala manringis
Naibata halani sahapmu, anjaha iparseda
horja ni tanganmu?
- ⁷ (5-6) Ai anggo buei nipi, buei do na so mararti,
buei do sahap-sahap; tapi anggo ho, habiari
ma Naibata.

**Lumba-lumba Pasal Odoh-odoh
Ibagas Pamarentahan**

- ⁸ (5-7) Anggo ididah ho pandorunon bani
halak na masombuh, hasedaon ni uhum
sonai hapintoron i nagori in, ulang pala
longang uhumu pasal ai, ai adong do na
mardiateihon siparkuasa-siparkuasa ai,
anjaha Na Tang Sitimbulan in do mangatasi
sidea haganup.
- ⁹ (5-8) Ibagas haganupan ai, adong do untung
bani sada nagori, anggo iuhurhon raja
parjuma-jumaon.

Seng Marguna age Habayakon

- ¹⁰ (5-9) Halak na marsinta-sintahon pirak, seng anjai bosur ia humbani pirak; anjaha barang ise na gok uhurni bani habayakon, seng sombuh homa halani pansarianni. On pe sisoya-soya do.
- ¹¹ (5-10) Tambah pansarian, tambah do na mangankon; aha ma laba bani simada ai, sobali na mangidah-idah ai?
- ¹² (5-11) Sinok do modom halak siparhorja, atap otik pe ipangan atap buei, tapi seng tarpodom halak na bayak ibahen habayakonni.
- ¹³ (5-12) Adong do hamagouan banggal, na huidah i toruh ni langit, ai ma habayakon na pinagugun gabe hasedaon bani simadasi.
- ¹⁴ (5-13) Ai magou do habayakon ai, halani na masa; seng dong na tading ibagas tangan ni anak na tinubuhkonni.
- ¹⁵ (5-14) Songon na talanjang ai ia mandarat hun boltok ni inangni, sonai do parmula kni use; seng dong tarbuatsi age aha bahen upah ni halojaonni, na gabe siboanon ni tanganni hujai.
- ¹⁶ (5-15) Anjaha on pe hamagouan banggal do: Sonin parrohni, sonai do parmisirni; aha ma

ulihni, ai lang na manangkap logou do ia na ngalutan ai?

¹⁷ (5-16) Sadokah goluhni golapan anjaha pusok do uhurni; buei do hasunsahanni, boritan anjaha panringisan.

¹⁸ (5-17) Tonggor ma, pasal na madear na huidah ai: Patut do mangan anjaha minumjolma in, anjaha ipasonang uhurni bani na madear ibagas hangalutonni, na hinorjahonni i toruh ni langit, sadokah ni goluhni na pondok in, na binere ni Naibata bani; ai do rupeini.

¹⁹ (5-18) Tongon, anggo ibere Naibata banijolma habayakon pakon arta, ipaturut homa ia mangan ampa marbagian hunjai, anjaha marmalas ni uhur bani horjani, ai pe sibere-bere ni Naibata do.

²⁰ (5-19) Ai seng sadiha be ipingkiri ari-ari ni goluhni na pondok in, halani malas ni uhur na binere ni Naibata hubagas uhurni.

Hadoharon pe Seng Marguna Anggo Seng Marhasoman Pasu-pasu ni Naibata

6 ¹ Adong do hasamboron huidah i toruh ni langit, anjaha na paboratkon do ai banijolma.

² Sada halak, ibere Naibata habayakon pakon arta ampa hasangapon bani, anjaha lang hurangan ia pasal atap aha pe sinta-sintani,

tapi lang ilopas Naibata ia mangan hunjai,
halak na legan do na mamboiskon ai.
Sisoya-soya do on, anjaha naborit na
mabajan.

³ Porini adong saratus niombah ni sada halak,
ganjang umurni pala sayur matua, tapi seng
sonang uhurni ibagas hadoharonni ai, gari
tanomanni pe seng dong, huhatahon ma
pasalsi, “Dearan do na matei tarposo ase
ia.”

⁴ Sisoya-soya do ia roh anjaha ibagas na golap
misir, lanjar hagolapan manrungkub
goranni;

⁵ mata ni ari pe seng sompat ididah anjaha lang
itandai; tapi sonangan do ia humbani halak
ondi.

⁶ Porini manggoluh pe ia dua ribu tahun dokahni,
hape na madear seng onggga ididah, ai lang
sada ianan do hadasan ni haganup?

⁷ Haganup hangaluton ni jolma mansarihon
pamanganni do, tapi lanjar do seng bosur
tonduyni.

⁸ Ai aha do hasurungan ni halak na pentar
humbani halak na bodoh? Aha do gunani
bani halak na madoyuk, na mambotoh
marparlahou i tongah-tongah ni halak na
manggoluh?

- ⁹ Dearan do na nididah ni mata, humbani na manguhurhon na so ijin. On pe sisoya-soya anjaha na manangkap logou tumang do.
- ¹⁰ Atap aha pe na masa, domma dokah hinan igoran pasal ai, anjaha pasal jolma in pe domma binotoh hinan; seng mangasup ia martinggil pakon Sigogohan in.
- ¹¹ Lambin tambah hata-hata, lambin tambah na soya; aha ma gunani ai bani jolma?
- ¹² Ise ma na mambotoh aha na madear bani jolma in ibagas goluhni, na pondok anjaha sisoya-soya in, na laho salpu songon halinoh? Ise tene na boi patugahkon bani jolma in, atap aha na sihol masa i pudini i toruh ni langit?

Pasal Hapentaran na Sintong in

- 7** ¹ Rahanan do barita na madear ase minak na morum, anjaha dearan ari parmatei humbani ari partubuh.
- ² Rahanan do laho hu rumah na marpusok ni uhur ase hu rumah na marpesta-pesta; ai ijai taridah ujung ni sagala jolma manisia, anjaha halak na manggoluh patut ma parimbagaskononni ai.
- ³ Rahanan do na marpusok ni uhur ase na tartawa, ai horu ni uhur do na padearhon paruhuran.

- ⁴ Uhur ni halak na pentar sai i rumah partangisan do, tapi uhur ni halak na oto i rumah parpestaan do.
- ⁵ Rahanan do manangihon pinsang-pinsang ni halak na pentar, humbani na manangar doding ni halak na oto.
- ⁶ Tongon, songon parhuratak ni soban duri-duri i toruh ni hudon, sonai do partawa ni halak na oto. On pe sisoya-soya do.
- ⁷ Tongon, odoh-odoh do mambahen oto halak na pentar, anjaha sisip parseda paruhuran.
- ⁸ Dearan do na mangintehon hadobanni humbani parmulaanni, dearan do paruhur na sabar humbani si gijang uhur.
- ⁹ Ulang maurahtu uhurmu manggila, ai ringis ibagas uhur ni halak na oto do ai marianan.
- ¹⁰ Ulang hatahon, "Mase ma dearan ari sapari humbani sisonari?" Ai seng sungkun-sungkun na pentar na sonai ai.
- ¹¹ Dear do hapentaran marhasoman arta tean-teanan; surungan do ai bani halak na mangidah mata ni ari.
- ¹² Ai tarbahen do marlinggom bani hapentaran age bani pirak; tapi hasurangan ni habotohon: Hapentaran ai do mambere goluh bani halak simadasi.
- ¹³ Papangkei ma horja ni Naibata; ise ma tarbahen papintorhon na dob pinageduk-Ni?

- ¹⁴ Bani ari na madear marmalas ni uhur ma ho;
anjaha bani ari na masambor paruhurhon
ma: Naibata do manjadihon na sada ampa
na legan ai, ase ulang ibotohjolma atap aha
na sihol masa.
- ¹⁵ Haganupan on domma huidah ibagas goluhku
sisoya-soya on: Adong do halak parpintor
magou ibagas hapintoronni, anjaha adong
homa halak parjahat sayur matua ibagas
hajahatonni.
- ¹⁶ Ulang ma mapintortu ho, anjaha ulang ma
mapentartu; mase ma parsedaonmu
dirimu?
- ¹⁷ Ulang ma majahattu ho, anjaha ulang ma gabe
halak na oto ho; mase ma rahanan matei
lape jumpah panorangni?
- ¹⁸ Dear do, anggo ijolom ho na sada on, anjaha
ulang homa maluah tanganmu humbani na
sada ai; ai barang ise na mabiar mangidah
Naibata, bansah do ia humbani haganupan
ai.
- ¹⁹ Hapentaran ai do margogohi halak na pentar,
lobih humbani sapuluh halak puanglima, na
adong ibagas huta.
- ²⁰ Tongon, seng dong halak parpintor i tanoh on,
sihorjahon na madear tumang, anjaha na so
ongga mardousa.

- ²¹ Homa, sagala hata na hinatahon ni halak, ulang ma parimbagaskon ai; ulang ma tangi ho bani juakjuakmu na mamurai ho.
- ²² Ai lang ibotoh ho do homa ibagas uhurmu, na gati do ho mamurai halak na legan?
- ²³ Haganupan on domma huuji marhitei hapentaran, ningku, "Sihol pentar do ahu!" Hape lambin daoh do hapentaran ai humbangku.
- ²⁴ Daoh do sagala na adong ai anjaha bagas tumang; ise ma na boi jumpahan ai?
- ²⁵ Dob ai hupagoling ma uhurhu, sihol mananda, mamareksa pakon mangidah hapentaran pakon panimbangion, anjaha sihol mananda, ia hajahaton ai ma haotoon, anjaha haotoon ai ma podou.
- ²⁶ Jadi jumpah ahu ma: Janginan do humbani hamatean naboru, na dob songon puhot ia, uhurni songon jarot, anjaha tanganni songon tali panangkit; halak harosuh ni Naibata maluah do hun bani, tapi sipardousa hona tangkap do ibahen.
- ²⁷ Tonggor ma, on do na jumpah ahu, nini Parambilar ai, sada-sada huuji, laho mambuat panrimpunanni;
- ²⁸ na dob marulak-ulak hupareksa, tapi seng jumpah ahu: Jumpah ahu do sada dalahi humbani saribu halak, tapi anggo naboru,

seng jumpah ahu i tongah-tongah ni
ganupan ai.

- ²⁹ Tonggor ma, on tumang do na jumpah ahu, ai
ma, bujur do jolma in itompa Naibata, tapi
buei do ranggi-ranggian ni uhurni.

Pasal Pambalosion

- 8** ¹ Ise do doskon halak na pentar in? Anjaha
ise do na mambotoh hatorangan pasal
haganup? Hapentaran ni sada jolma do
mambahen liar bohini, anjaha koras ni
bohini mubah do.
- ² Ahu mangkatahon, dalankon ma parentah ni
raja, ampa hata na dob binulawankonmu
bani Naibata.
- ³ Ulang ma maurahtu ho padaohkon diri hun
bani, anjaha ulang ma magolgoltu ho bani
parkara na so madear, ai aha rosuh ni
uhurni, ai do ibahen.
- ⁴ Ia parentah ni raja gok kuasa do; ise ma na
pag mangkatahon dompaksi, “Aha do na
binahenmu in?”
- ⁵ Ise na mandalankon parentah, seng dageionni
na masambor, ai ibotoh halak na pentar do
pasal panorangni pakon uhumanni.
- ⁶ Ai bani haganup adong do panorang ampa
uhumanni, anjaha hasamboron ni jolma, ai
do sibobanon bani.

- ⁷ Tongon, seng dong na mambotoh atap aha na sihol masa, ai ise ma na boi patugahkon na sihol masa ai bani?
- ⁸ Seng dongjolma na markuasa bani logou na boi mangolat ai; seng donghoma na markuasa bani ari parmateini, anjaha na boi maluah humbani porang; seng tarbahen hajahaton paluahkon na mangkorjahonsi.
- ⁹ Haganupan ai domma huidah anjaha huparuhurhon haganup pambahenan na masa i toruh ni langit, bani panorang nijolma manrajai hasomanni jolma gabe hasedaon bani sandiri.

Panrajaion ni Naibata na So Tardadap

- ¹⁰ Ambah ni ai, huidah do tartanom halak parjahat; tapi halak na mangkorjahon na madear, luar humbani ianan na pansing in, anjaha lupa halak bani ibagas huta. Ai pe sisoya-soya do.
- ¹¹ Halani ai lang mintor podas mardalan uhum bani pambahenan hajahaton, halani ai gok do uhur ni jolma manisialaho mandalankon hajahaton.
- ¹² Age pe ihorjahon si pardousa na masambor saratus hali, anjaha sayur matua homa ia, tapi tangkas do hubotoh, sai na martuah do

halak si habiari Naibata, halani marhabiaran
sidea i lobei-Ni;

¹³ tapi seng anjai dear anggo halak parjahat,
anjaha seng tarpaganjangsi umurni, songon
halinoh do ia, halani seng marhabiaran ia i
lobei ni Naibata.

¹⁴ Sisoya-soya do ai, na masa ai i atas tanoh on:
Adong do halak parpintor, mangonai do bani
sidea, songon na bani pambahenan ni halak
parpintor. Ningku ma, "On pe sisoya-soya
do."

¹⁵ Halani ai hupuji do malas ni uhur ai; ai seng
dong na madear bani jolma i toruh ni langit,
sobali na mangan minum pakon marmalas
ni uhur. Ai boi do ia mangkasomanisi ibagas
halojaonni sadokah ari-ari ni goluhni, na
binere ni Naibata bani, i hasiangan on.

¹⁶ Sanggah na hupabulat uhurhu, laho manandai
hapentaran ampa laho marimbagaskon
sagala na masa i atas tanoh on, ai ma, na so
tarpodom ai halak arian pakon borngin,

¹⁷ jadi huidah ma sagala pambahenan ni Naibata,
tongon, seng tarbahen jolma mambotoh
pambahenan ai, na masa i hasiangan on.
Age sonaha pe loja ni jolma, ase ibotoh ai,
seng anjai jumpahsi ai. Age pe nini halak na
pentar, domma ibotoh, seng tongon ibotoh
ai.

**Sisada Sitaronon do Sagala Jolma. Marmalas ni
Uhur do Sagala Sihabiari Naibata**

- 9** ¹ Tongon, haganupan on domma
huparuhurhon, anjaha domma hupareksa
haganup: la halak parpintor age halak na
pentar ampa pambahenan ni sidea ibagas
tangan ni Naibata do; holong ni uhur pe
atap domdom, seng iarti jolma in. Haganup
na i lobei ni sidea sisoya-soya do:
- ² ai sisada sitaronon do haganup, halak parpintor
ampa halak parjahat, halak sidear uhur
ampa halak na masambor, halak na pansing
ampa halak na mabutak, halak sipanggalang
ampa na so sipanggalang; songon na masa
bani halak na daulat, sonai do bani halak
pardousa, songon na bani halak si parbija,
sonai do bani halak na mabiar marbija. *
- ³ On do hasamboron ibagas haganup na masa i
hasiangan on, ai ma na sisada sitaronon ai
haganup; anjaha halani homa gok hajahaton
do uhur ni jolma manisias, anjaha haotoon
do ibagas uhur ni sidea sadokah manggoluh
sidea, dob ai parayakonni do halak na dob
matei ai. *
- ⁴ Tongon, ise na marianan ope i tongah-tongah
ni halak na manggoluh, na adong ope

pangarapanni, ai baliang na manggoluh,
rahanan do ai humbani singa na matei.

⁵ Ai halak na manggoluh ibotoh do na laho matei
sidea, tapi halak na dob matei, aha pe lang
be ibotoh; seng dong be upah bani sidea,
anjaha seng dong be na mardingat sidea.

⁶ Age holong ni uhur ni sidea, domdomni ampa
simburuni pe masab do; anjaha lalab ma
seng marbagian be sidea bani haganupan
na masa i hasiangan on.

⁷ Ase laho ma, pangan ma rutimu ibagas malas
ni uhur, anjaha inum ma anggurmu ibagas
sonang ni uhur, ai domma iharosuhkon
Naibata pambahenanmu sisonai ai. *

⁸ Sai tongtong ma ho marpakeian silopak, anjaha
ulang ma lang marminak ulumu.

⁹ Sai marmalas ni uhur ma ho rap pakon
parinangonmu, na hinaholongan ni uhurmu
sadokah ari-ari ni goluhmu na pondok in, na
binere ni Naibata bam i hasiangan on, ai do
rupeimu bani goluh on ampa bani horja, na
hinalojahonmu i hasiangan on. *

¹⁰ Atap aha na jumpah tanganmu bahen
sihorjaonkon, dalankon ma ai humbani
gogohmu, ai seng dong be horja atap
panimbangion atap habotohon atap
hapentaran anggo i nagori toruh,
siparayakonmai.

Gati do Suhar na Masa i Tanoh on

- ¹¹ Ambahni ai huidah do i hasiangan on: Seng bani halak na lingkak hape hamonangan maradu, seng puanglima monang bani parporangan, seng halak na pentar na marnah ruti, seng halak na maruhur gabe bayak, anjaha seng halak na pandei gabe harosuh; tapi haganupan sidea tunduk do bani panorang ampa na masa. *
- ¹² Ai seng ibotoh jolma in panorangni: Songon dengke na hona tangkap ibahen jala, anjaha songon manuk-manuk na dapot ibahen siding sonai do jolma manisias hona tangkap sanggah panorang hamagouan, sanggah sogop ai sompong bani sidea.
- ¹³ Hapentaran sisonon pe huidah do i hasiangan on, anjaha banggal do bangku ai:
- ¹⁴ Adong ma sada huta na etek, anjaha otik do pangisini; roh ma sada raja na banggal mamorang ai, ihubu ma huta ai, anjaha ipauli parugas pangkubu inggot.
- ¹⁵ Jadi adong ma sada halak na masombuh, tapi na pentar ibagas huta ai, anjaha tarpaluahsi do namin huta ai marhitei hapentaranni, hape seng dong na mardingat na masombuh ai.

- ¹⁶ Jadi ningku ma, “Dearan do hapentaran ase hagogohon, tapi mapas do uhur ni halak mangidah hapentaran ni halak na masombuh ai, anjaha seng itangihon hata sipaingatni.” *
- ¹⁷ Hata ni halak na pentar, na iluarhon dear-dear, rahanan do manangihon ai humbani surak-surak ni sada raja i tongah-tongah ni halak na oto.
- ¹⁸ Rahanan do hapentaran ase parugas porang, tapi sada pe parjahat bahat do na pinarsedani.

Haotoon na Parsedahon Hapentaran

- 10** ¹ Lanog na matei mambahen marbau minak na misbou ni sipauli morum-moruman sonai do haotoon na otik parseda hapentaran pakon hasangapon.
- ² Uhur ni halak na pentar laho dompak siamun, tapi uhur ni halak na oto laho dompak sambilou do.
- ³ Bani dalan ja pe mardalan halak na oto, taridah do hurang ni uhurni, tapi nini do bani halak haganup, sidea do na oto.
- ⁴ Anggo nahit ringis ni si panggomgomi bam, ulang ma tadingkon iananmu, ai uhur na lamlam do padaohkon buei dousa.

- ⁵ Adong do na masambor huidah masa i
hasiangan on, ai ma halepakon na binahen
ni halak si panrajai.
- ⁶ Halak na oto ipahundul bani ianan na sangap,
tapi halak na bayak hundul bani ianan na
toruh.
- ⁷ Huidah jabolon mangajak huda, hape raja-raja
mardalan nahei songon jabolon.

**Ojur-ojur Mandalankon Hapentaran
anjaha Manlembangi Haotoon**

- ⁸ Ise na mangkurak godung, ia sandiri do
madabuh hubagas; ise na parseda tembok
batu, paguton ni ulog do.
- ⁹ Ise na mangungkit batu, ra do ughan, anjaha
ise na mambolah hayu, ra do marmara.
- ¹⁰ Anggo majol hapak anjaha seng iasah
matani, maningon marbois gogoh do halak
managilhon ai; tapi untung do ai anggo
hapentaran mangkasomani gogoh.
- ¹¹ Anggo domma ipagut ulog paima itabasi, seng
marguna be habotohon ni si panabas.
- ¹² Hata humbani pamangan ni halak na pentar
mambahen ia gabe harosuh, tapi parsahap
ni halak na oto parseda dirini do.
- ¹³ Mungkah ni sahap ni pamanganni haotoon do,
anjaha ujung ni parsahapanni pe podou do.

- ¹⁴ Buei do sahap-sahap ni halak na oto, age pe
seng ibotohjolma in atap aha na sihol masa;
ai ise ma na boi patugahkon bani atap aha
na sihol masa i pudini?
- ¹⁵ Hangaluton do horja bani halak na oto, dalan
hu tiga pe seng ibotoh.
- ¹⁶ Bursik ma ho, ale tanoh, anggo dakdanak
panrajai bam, anjaha halak na sangap-
sangap i tongah-tongahmu girah sogod pe
domma marpesta-pesta.
- ¹⁷ Martuah ma ho, ale tanoh, anggo halak na
marjumbalang panrajai bam, anjaha na
sangap-sangapmu mambotoh marpesta
bani panorangni, songon halak na hormat,
seng songon halak parminum-minum.
- ¹⁸ Halani harayohon masik do parhayu ni rumah,
anjaha halani tangan na galek tiris rumah.
- ¹⁹ Laho marmegah-megah iadongkon halak do
pesta-pesta anggur do sipamalas goluh on,
anjaha duit do na marsahap bani haganup.
- ²⁰ Age ibagas uhur ulang ma burai raja, anjaha
ibagas kamar podomanmu pe, ulang
ma burai halak na bayak, ai padason
ni manuk-manuk na i awang-awang do
soramai, anjaha patugahon ni siparhabong
sahapmai.

**Ojur-ojur Mansarihon Goluh, Age pe
Seng Tontu na Masa-masa**

- 11** ¹ Padalan ma rutimu hu dipar ni laut, ai bani dokah-dokah ni ari, sai na jumpah ho do ai.
- ² Bahen ma ai marbagi pitu atap ualuh, ai seng ibotoh ho atap hasedaon aha do na sihol masa hu atas tanoh on.
- ³ Anggo gok udan ma hambun, iduruskon ma ai hu atas tanoh on; anggo marumbak hayu, dompak dangsina atap dompak utara, bani ianan harumbakanni ai ma ai tibal.
- ⁴ Halak na sai mardiateihon logou, seng saud martidah be ai, anjaha halak na patorih-torih hambun, seng saud be manabi.
- ⁵ Songon na so boi botohonmu sonaha pardalanan ni logou, anjaha sonaha parjadi ni holiholi ibagas boltok ni parinangon na boratan rumah, sonai do homa seng ibotoh ho pambahenan ni Naibata na manjadihon haganup.
- ⁶ Girah sogod ma saburhon bonihmu, anjaha bodari pe ulang mintor marsaran tanganmu, ai seng ibotoh ho atap na ija na dua ai manjadi, atap rap do haduasi ai manjadi.
- ⁷ Matobu do na liar ai, anjaha marosuh do mata mangidah mata ni ari.

- ⁸ Tongon, anggo manggoluh jolma in marpuluh-puluh tahun, marmalas ni uhur ma ibagas haganupan ai; tapi idingat ma homa pasal ari na golap, buei do ai. Haganup na sihol masa, sisoya-soya do ai.

**Patut do na Maposo Marmalas ni
Uhur Sanggah Haposoonni**

- ⁹ Marmalas ni uhur ma, ale garama, sanggah panorang haposoonmu, anjaha megah ma uhurmu bani panorang haparanaonmu. Anjaha bahen ma domu hubani na sininta ni uhurmu, ampa domu hubani harosuh ni matamu, tapi botoh da, bani haganupan ai boanon ni Naibata do ho hu paruhuman.
- ¹⁰ Padaoh ma uhur na sunsah humbagas uhurmu, anjaha paholang ma na masambor humbani angkulamu; ai panorang hadakdanakon ampa haposoon, laho salpu do ai.

**Golpa-golpa bani Jolma, ase Idingat
na Manompasi Paima Roh
Panorang Matua ampa Hamatean**

- 12** ¹ Ingat ma Sitompa ho bani ari haposoonmu, paima lape roh ari na masambor, anjaha lape das panorangni, hatahononmu holi ijai, “Seng marosuh be ahu pasal in!”

- ² Paima lape golap mata ni ari ampa na lihar,
bulan ampa bintang-bintang, anjaha mulak
manorap hambun dob salpu udan.
- ³ Ai bani panorang ai holi hitir-hitir ma si jaga
rumah, anjaha gundung dalahi-dalahi na
margogoh, maronti si panduda manduda, ai
otik mando sidea tading, anjaha gombur ma
si pangkawah hambani jandela;
- ⁴ tartutup ma homa na dua labah na dompak
alaman ai, anjaha lambin nangetni sora
ni losung; masihil ma sora songon sora
ni manuk-manuk, anjaha surut ma homa
sipandoding;
- ⁵ mabiar do bani dalan tangkog, anjaha gobir i
tongah dalan; marurus ma homa bunga na
lopak ai hambani untei hasumba, anjaha
borat manlangkah balang, sir ni uhur pe
miloh ma. Ai laho majolma in marayak
rumahni sisadokah ni dokahni, anjaha halak
si panangisi pe domma marodor i alaman.
- ⁶ Paima rotap tali pirak ai anjaha matapor batil
omas ai; paima lape mabolah gusi i lambung
ni bah tubuh anjaha marosak tahu-tahu na i
sumur;
- ⁷ paima mulak orbuk ai hu tanoh, pambuatanni
hinan, anjaha tonduy ai mulak hubani
Naibata, na mamberehon ai hinan.

- ⁸ Sisoya-soya do tongon, nini Parambilar ai,
sisoya-soya do haganup.

Hata Panutup Pasal Buku Parambilar

- ⁹ Ambah ni na pentar Parambilar ai, iajarhon do
homa habotohon hubani halak na mabuei;
itimbang anjaha ipareksa anjaha ibahen do
buei podah.
- ¹⁰ Ipindahi Parambilar ai do hata na sangkan,
anjaha sintong do isuratkon hata
hasintongan ai.
- ¹¹ Hata ni halak na pentar songon lonsing-lonsing
do, anjaha songon paku na ipakuhon do
podah na ipatumpu ai; marhitei sada
parmahan do iberehon ai.
- ¹² Ambah ni ai, ale anakku, sai ra ma ho
paingaton! Seng ra maronti na mambahen
buku-buku, anjaha halojaon ni angkula do
buei marlajar.
- ¹³ Pangibulan ni haganup na dob binogei ai,
“Habiari ma Naibata, anjaha dalankon ma
titah-Ni, ai do hawajiban ni ganupjolma.
- ¹⁴ Ai boanon ni Naibata do sagala pambahenan
hu paruhuman, haganup na ponop, na dear
atap na sambor pe ai.”

Doding Ni Doding

1 ¹ Doding ni Doding humbani Raja Salomo.

Sihol ni Uhur ni Tunangan hubani Siparunjuk

² Sai isummah ma ahu marhitei summah ni pamanganni! Ai mantinan do holongmu ase anggur.

³ Morum do minakmu, goranmu songon minak na misbou na niuseihon; halani ai do ase rosuh anak boru mangidah ham.

⁴ Togu ham ma ahu, papodas hita ma! Iboan raja ai ma ahu hu kamarni. Marolob-olob do hanami anjaha marmalas ni uhur mangidah ham, ipuji hanami do holong ni uhurmu lobih humbani anggur, patut do holong uhur ni sidea bamu.

⁵ Birong do ahu namin, tapi jenges do, ale boru Jerusalem, songon tenda ni halak Kedar, songon tirei ni si Salomo.

⁶ Ulang ma mapas pangkawahnima bangku, halani na birong ai rupangku, ai mata ni ari do na manlulus ahu. Manggila do anak ni inang bangku, isuruh sidea do ahu manjaga pohon anggur; tapi pohon anggurhu sandiri, seng hujaga.

- ⁷ Pabotohkon ma bangku, ham haholongan ni uhurhu, ija do ham marmahan, ija ipasaran ham hulananmu tongah arian? Ai mase ma songon halak na mampar-ampar ahu i lambung ni hulanan ni hasomanmu?
- ⁸ Anggo seng ibotoh ham ai, ham ale si jengesan i tongah-tongah ni anak boru, irikkon ham ma bokas ni biribiri ai, anjaha parmahan ma hambingmu i lambung ni tenda ni parmahan.

Parsahapan ni Tunangan ampa Hinaholonganni

- ⁹ Usih do ham, ale hinasiholan ni uhurhu, bani huda na manarik garetu ni Parao.
- ¹⁰ Jenges do huyummu marnah ugas-ugas, anjaha borgokmu marsinongkok mutiha.
- ¹¹ Sinongkok omas paulionnami ope bamu, marsimatah bani pirak.
- ¹² Sanggah hundul raja ai mangan, muap do misbou ni minakku.
- ¹³ Haholongan ni uhurhu sasangkutan mir do ai bangku, tibal bani tontonku.
- ¹⁴ Haholongan ni uhurhu satandan bunga henna do ai bangku, na dob tubuh i pohon anggur En-Gedi.
- ¹⁵ Tongon, jenges do rupamu, ale hinasiholanku, jenges tumang do ham, songon asas do matamu.

¹⁶ Tongon jenges do ham, ale haholonganku,
jenges tumang do ham. Marbunga-bunga
simaratah do podomanta.

¹⁷ Hayu ares do tiang ni rumahta, anjaha
dingdingni ilampis bani hayu maranti.

2 ¹ Ia ahu bunga na i Saron do, silundat na i
habungan.

² Songon silundat i tengah-tengah ni duri-duri,
sonai do tongon hinasiholan ni uhurhu i
tengah-tengah ni anak boru.

³ Songon hayu untei manis i tengah-tengah
ni hayu harangan, sonai do tongon
haholonganku i tengah-tengah ni garama.
Marosuh do uhurhu hundul bani linggomni,
anjaha mantin do buahni bani tolonanku.

⁴ Iboan do ahu hubagas rumah anggur ai, anjaha
tandani bangku ai ma holong.

⁵ Ipargogohi do ahu marhitei kuei buah anggur,
ipahisar marhitei untei manis; tongon,
boritan do ahu halani sihol ni uhurhu.

⁶ Tangan sambilouni mangkalang ulungku, tangan
siamunni manrohop ahu.

⁷ Hupabija ma nasiam, ale boru Jerusalem, bani
ursa ampa bani balua boru-boru na i talun.
Ulang ma iganggu atap ipuhoi nasiam na
marsihaholongan paima sombuh uhurni.

- ⁸ Tangar, sora ni haholonganku! Tonggor ma roh do ia, marlintun-lintun bani dolog-dolog, manlumpat-lumpat bani buntu-buntu.
- ⁹ Usih do haholonganku bani balua atap ursa na maposo. Tonggor ma, jongjong do ia i lopah ni tembok ni rumahnami, mangkawah humbani jendela, manorih-norih humbani jaring-jaring.
- ¹⁰ Marsahap ma haholonganku, nini hu bangku, "Jongjong ma ham, ale hinasiholanku, eta ma, ale botou na majenges!
- ¹¹ Tonggor ma, domma salpu musim borgoh, lopus anjaha salpu musim udan.
- ¹² Martumbori ma bunga-bunga i ladang, domma jumpah panorang mandoding-doding, anjaha sora ni anduhur ginti tarbogei do bani tanohta.
- ¹³ Hayu ara pe marmabeian ma buahni, hayu anggur marbungai anjaha misbou uapni. Jongjong ma ham, ale hinasiholanku, eta ma, ale botou na majenges!"
- ¹⁴ Ale asasku, na marianan bani rigat ni dolog batu, bani parponopan na i salahsah, pataridahkon ham ma rupamu bangku, pabogeihon ma soramu, ai dear do soramu, jenges do rupamu.

- ¹⁵ Tangkapi galot in, galot na etek-etek in,
na mandedai pohon anggur, ai domma
marbungai pohon anggurta.
- ¹⁶ Haholongan ni uhurhu, ahu do simadasi,
anjaha ia simada ahu, ia do na marmahan i
tongah-tongah ni bunga silundat.
- ¹⁷ Paima marombus logou sogod-sogod,
anjaha lintun na golap, roh ma ham, ale
haholonganku, usih bani balua ma ham
atap bani ursa na maposo i atas ni dolog
rium-riuman.”

3 ¹ Bani podomanku, borngin-borngin, hupindahi
do haholongan ni uhurhu. Hupindahi do ia,
tapi seng jumpah ahu.

² Puho ma ahu, husiar ma huta in inggot,
dalan-dalan ampa alaman, pindah-pindah
ahu bani haholongan ni uhurhu. Hupindahi
do ia, tapi seng jumpah ahu.

³ Jumpah si panrunda do ahu, sidea na manrunda
i huta ai, “Haholongan ni uhurhu, adong
tarpaidah nasiam?”

⁴ Ai pe lopus ahu humbani sidea, jumpah ahu
ma haholongankai, hutangkap ma ia, seng
be hupaluah, paima hutaruhkon ia hu
rumah ni inangku, masuk hu kamar ni na
mantubuhkon ahu.

⁵ Hupabija ma nasiam, ale boru Jerusalem,
hubani balua ampa hubani ursa boru-boru

na i talun: Ulang ma iganggu atap ipuhoi na marsihaholongan paima sombuh uhurni.

⁶ Aha do in, na tangkog hun halimisan, na songon tiang timus, na iparium marhitei mir ampa dahupa; ai ma bagei ni rium-riuman ni sipartiga-tiga.

⁷ Tonggor ma, ai ma pangusungan bani si Salomo. Onom puluh halak do na manlioti ia, humbani puanglima-puanglima ni Israel,

⁸ haganup sidea marpodang anjaha na somal marporang; ganup do sidea mangkalhal bani binongeini, manlawan na manginggoti borngin-borngin.

⁹ Ipadear Raja Salomo do pangusungan bani ai ma humbani hayu Libanon.

¹⁰ Ibahen do naheini humbani pirak, pangunsandeanni humbani omas, hundulanni humbani hiou hasumba anjaha humbagas ilampis bani hayu sibirong.

¹¹ Luar ma nasiam, ale boru Sion! Tonggor ma Raja Salomo, marsortali, na sinortalihon ni inangni bani, sanggah panorang parunjukonni, bani ari malas ni uhurni.

4 ¹ Tonggor ma, jenges do ham, ale hinasiholanku, jenges tumang do ham; songon mata ni asas do matamu i pudi ni tudung-tudungmu, jambulanmu usih bani hulanan ni hambing tuad hun dolog Gilead.

- ² Iponmu usih bani biribiri na baru ginunting, na
naik humbani paridianni, haganup sidea
marrindu-rindu, seng dong na lambang
humbani sidea.
- ³ Songon bonang na tinubar do bibirmu, lamlam
ia parsahapmu, songon dalima na binolah
do huyummu ipudi ni tudung-tudungmu.
- ⁴ Borgokmu songon manara ni si Daud, na pinauli
bahen ianan ni sinjata; marribu do gantar
margantungan ijai, ganupan ai gantar ni
puanglima.
- ⁵ Adopmu haduasi songon anak silinduat ni
balua, na manggagat i tengah-tengah ni
silundat.
- ⁶ Paima marombus logou sogod-sogod anjaha
lintun na golap, sihol do ahu laho hu dolog
mir ampa hu buntu-buntu hamonan.
- ⁷ Gok do jengesmu, ale hinasiholan ni uhurhu,
seng dong tikasmu age sada.
- ⁸ Rap pakon ahu hun Libanon, ale tunanganku,
susur ma ham rap pakon ahu hun Libanon.
Tuad ma ham hun pakpak ni Dolog Amana,
hun pakpak ni Dolog Senir pakon Hermon,
humbani parponopan ni singa, humbani
dolog ianan ni begu!
- ⁹ Domma tunduk uhurhu ibahen ham botou,
tunanganku, domma ibuat ham uhurhu

marhitei pangkirdop ni matamu tumang,
marhitei sinongkok na bani borgokmu in.

¹⁰ Jengesni in holongmu in, ale botou,
tunanganku! Mantinan do holongmu, lobih
humbani anggur, anjaha moruman do uap
ni minakmu ase haganup minak na misbou.

¹¹ Manisan do mangkatektek humbani bibirmu,
ale tunanganku, manisan pakon susu do i
toruh ni dilahmu, anjaha uap ni pakeianmu,
songon uap ni Libanon do.

¹² Songon pohon na hinondor do ham, ale botou,
tunanganku, songon pansur na nirungga,
anjaha songon bah tubuh na nilak.

¹³ Martumbor do ham, songon pohon na
majenges gok hayu dalima marbuah na
maharga tumang, marbunga-bunga henna
ampa nardus,

¹⁴ nardus ampa huning, hamonan pakon kulit
manis, marbagei hayu na morum, mir ampa
aloe, ronsi haganup hayu rompah.

¹⁵ Songon bah tubuh i pohon do ham, bah tubuh
hagoluhan, na mabaor hun Libanon.

¹⁶ Puho ma, ale logou utara, roh ma, ale logou
dangsina! Mangombus ma bani pohonku,
ase muap uapni na misbou ai! Roh ma
haholonganku marayak pohonni, anjaha
ipangan ma buahni na mantin in.

- 5** ¹ Roh ma ahu hu pohonku, ale botou,
tunanganku! Hubuat do mirhu ampa
minakku na misbou, hupangan asar ni
lobahku ampa manisanni, anjaha huinum
do anggurhu ampa susu: Mangan minum
ma, ale huan-kuanku, marsombuh-sombuh
ma ibagas holong!
- ² Modom do ahu, tapi puho do uhurhu. Tangar
ma, hartuk-hartuk do haholonganku, “Buka
bangku botou, hinasiholan, ham asasku
ampa na majenges! Marnamur-namur do
ulungku, marbah jambulanku ibahen udan
borngin.
- ³ Domma hutanggali bajungku, sonaha ma
pakeianku use ijai? Domma huburihi
naheihu, hubutaki ma use ai?”
- ⁴ Idurdurhon haholongan ni uhurhu do tanganni
hun jaring-jaring, gabe muyun ma uhurhu
ibagas.
- ⁵ Jongjong ma ahu mangungkab bani
haholonganku. Mangkatektek ma mir
humbani tanganku, manjalir mir humbani
jari-jaringku, sanggah na manjolom
pating-pating ai.
- ⁶ Hubuha ma bani haholonganku, hape misir do
haholonganku, seng taridah be. Marosak do
uhurhu na laho ai ia. Hupindahi ma ia, hape
seng jumpah, hudiloi tapi seng marbalos.

- ⁷ Jumpah siparrunda do ahu, sidea na mardalan maringgot i huta ai; ibogbog do ahu pala ughan, ibuat salendangku, sidea siparjaga i tembok ai.
- ⁸ Hupabija ma nasiam, ale boru Jerusalem, anggo jumpah nasiam haholongan ni uhurhu, aha ma hatahonon nasiam hu bani? Boritan do ahu halani sihol ni uhurhu!
- ⁹ Ai aha ma surung ni haholongan ni uhurmu humbani haholongan na legan, ham ale si jengesan i tongah-tongah ni naboru? Ai aha ma surung ni haholonganmu humbani haholongan na legan, ase pala ipabija ham hanami?
- ¹⁰ Lopak anjaha magerger do haholongan ni uhurhu, marhalobihan i tongah-tongah ni halak na marlaksa-laksa.
- ¹¹ Uluni songon omas pitah, jambulanni songon bulung ni halambir, mabirong songon kawak.
- ¹² Matani songon asas na i topi ni bah mardalan, na maridi ibagas susu, marianan bani bah mabuei.
- ¹³ Huyumni songon panampangan ni rompah-rompah, na mantubuhkon suan-suanan na misbou; bibirni songon bunga silundat, na manektekkon mir.

¹⁴ Tanganni songon omas na pinahibul, na tinatah bani mata intan tarsis; angkulani songon na pinauli humbani gading, ilampis bani mata intan sapir.

¹⁵ Hae-haeni hira tiang batu marmar, jonam bani nahei omas; rupani songon Libanon, tarpilih songon hayu ares.

¹⁶ Parsahapni matobu do, siharosuhkonon tumang do ia. Sonai ma haholongan ni uhurhu, sonai ma huankai, ale boru Jerusalem.

6 ¹ Huja do laho haholongan ni uhurmu, ale sijengesan i tongah-tongah ni naboru? Dompak ja laho haholongan ni uhurmu, ase dihut hanami mangindahisi rap pakon ham?

² Domma tuad haudungan ni uhurhu hu pohonni, hu panampangan ni rompah-rompah, laho marmahan ibagas pohon ai, anjaha laho mambuat bunga silundat.

³ Haholongan ni uhurhu, ahu do simadasi, anjaha ia simada ahu, na marmahan i tongah-tongah ni silundat.

⁴ Jenges do ham songon Tirsah, ale hinasiholan ni uhurhu, dear songon Jerusalem, anjaha marjumbalang songon bala.

⁵ Padaoh ma matamu humbangku, ai sunsah do ahu ibahen. Jambulanmu usih bani hulanan ni hambing, tuad hun Dolog Gilead.

- ⁶ Iponmu usih hubani biribiri na baru ginunting,
na naik hun paridianni; haganup sidea
marrindu-rindu, seng dong na lambang
humbani sidea.
- ⁷ Songon dahupa na binolah do huyummu i pudi
ni tudung-tudungmu.
- ⁸ Onom puluh do nasipuang, ualuh puluh na
binuat na legan, anak boru lang habilangan.
- ⁹ Tapi sahalak do asasku, na majenges bangku,
boru sasada ni inangni, kasihan ni na
mantubuhkonsi. Kawah do anak boru hu
bani, iparhatuah do ia, nasipuang ampa na
binuat na legan mamuji-mujisi.
- ¹⁰ Ai ise do ai, na mangkawah songon
simarikkuning, jenges songon bulan, lihar
songon mata ni ari, anjaha jombut songon
bala?
- ¹¹ Tuad do ahu hu pohon hayu pala, laho
manorih bunga-bunga na i habungan, laho
manonggor atap martunasi ma hayu anggur,
atap marbungai ma dalima.
- ¹² Seng panagaman ni uhurhu, ipaosor ma ahu
hubagas gareta odoran ni raja.
- ¹³ Marhusor, marhusor ma, ale Sulamit,
marhusor, marhusor ma, ase ididah hanami
bohimu. Ai aha do kinawahkon nasiam
bani si Sulamit, sanggah na manortor ia i
parsaranan?

- 7** ¹ Dearní in panlangkah ni naheimu marsipatu,
ale anak boru na sangap! Parhibul ni
binongeimu songon ugas si panjagar,
tinukangan ni halak na pandei.
- ² Abinganmu songon panginuman na hibul, na so
ongga hurangan bani siinumon. Boltokmu
songon junjuran gandum, niliotan ni bunga.
- ³ Adoptmu haduasi songon anak silinduat ni
balua.
- ⁴ Borgokmu songon manara gading. Matamu
songon bongbongan na i Hesbon, na bani
horbangan Bat-Rabim. Igungmu songon
manara Libanon, na manatap dompak
Damaskus.
- ⁵ Ulumu i atasmu songon Karmel do, anjaha
jambulan na bani ulumu margerger do;
homa sangkut do uhur ni raja ibahen
dandan ni jambulanmu.
- ⁶ Jengesni in ham anjaha laingan, ale
hinasiholanku, na majenges bangku!
- ⁷ Parangkulaonmu songon halambir, adoptmu
songon tandanni.
- ⁸ Ningku, “hupanangkih ma halambir on, ase
hujolom dangkahni. Sai songon tandan ni
buah anggur do adoptmu, anjaha misbou ni
hosahmu songon untei manis,

⁹ anjaha pamanganmu songon anggur pilihan,
na manjalir lamlam bani tolonan, mabaor
manlopusi bibir ampa ipon.”

¹⁰ Haholonganku do simada ahu, hu bangku do
siholan ia.

¹¹ Roh ma, ale haholonganku, laho ma hita hu
ladang, marborngin bani pohon anggur!

¹² Girah sogod ma hita laho hu pohon anggur,
laho manorih atap martunasi ma hayu
anggur, mangerbang bungani, anjaha
marbungai hayu dalima. Ijai ma bereonku
bam holong ni uhurhu.

¹³ Muap ma misbou ni buah dudaim ai; buei do
buah na maharga bani labahta, na baru
age na madokah, na husimpan bamu, ale
haholongan ni uhurhu.

8 ¹ Porini botouhu ham, na minum humbani
bagod ni inang. Anggo jumpah ahu ham i
darat, summahonku do ham, anjaha ise pe
lang na mangkata.

² Arahkononku ma ham anjaha boanonku hu
rumah ni inang, hubagas kamar ni na
mantubuhkon ahu. Bereonku ma ham
minum anggur na irarui, bah ni buah dalima.

³ Sai tangan sambilouni ma mangkalang ulungku,
tangan siamunni manrohop ahu.

- ⁴ Hupabija ma nasiam, ale boru Jerusalem,
ase ulang iganggu atap ipuhoi nasiam na
marsihaholongan ronsi sombuh uurni.
- ⁵ Ai ise do ai tangkog hun halimisan,
mangunsandei bani haholonganni? I toruh
ni hayu untei manis do hupuhoi ho. Ijai do
inangta mangarou ham, ijai do ia mangarou
mantubuhkan ham.
- ⁶ Bahen ma ahu gabe tintin pansap bani
tontonmu, gabe tintin pansap bani
tanganmu! Gogoh do holong ai songon
hamatean, golgol songon nagori toruh do oji
ni uhur ai. Gajag do ai songon gara ni apuy,
jimburi-jimburi songon jimburi humbani
Jahowa.
- ⁷ Seng tarintopi bah banggal holong, barang
tarayubkon bah mabaor ia. Porini pe ibere
halak ganup arta na adong i rumahni
mambuat holong ai, hona apasan do ia ijai.
- ⁸ Adong do sada botounami na etek-etek, seng
dong ope adopni. Aha do bahenonnamni bani
botounami, anggo roh hata ni halak bani?
- ⁹ Ambit tembok ia, pajongjongonnamni do i
atasni tayub pirak, anjaha ambit labah ia,
runngaonnamni do ia bani papan hayu ares.
- ¹⁰ Tembok do ahu anjaha songon menara do
adopku. Dapot panonggorni do ahu, songon
halak na jumpahan tuah.

- ¹¹ Adong do bani si Salomo sada pohon anggur
i Baal-Hamon, iondoskon do pohon anggur
ai bani halak si parjaga; ganup maningon
mambere saribu sekel pirak boli ni buahni
ai.
- ¹² Ia pohon anggurhu, ahu tumang do
simadasi; bamu ma, ale Salomo,
sisaribu sekel pirak ai, anjaha dua
ratus bani si parjaga buahni ai.
- ¹³ Ham ale na marianan bani pohon ai,
manangi-nangi do huan-kuanku bani
soramu; pabogeihon ma soramu bangku.
- ¹⁴ Papodas ma, ale haholonganku; usih bani
balua ma ham, bani ursa na maposo i atas
ni dolog rium-riuman.

Jesaya

1 ¹ Panonggoran ni si Jesaya, anak ni si Amos, na nididahni pasal tanoh Juda pakon huta Jerusalem bani panorang ni si Usia, si Jotam, si Ahas pakon si Hiskia, raja-raja ni Juda.

Hutuk ni Jahowa bani Bangsa Israel na Dajal ai

² Tangar ma ale langit, bogei ma ale tanoh; ai marsahap do Jahowa, “Hupagodang-godang do anak anjaha Hupatimbul, hape iimbang sidea do Ahu.

³ Itanda lumbu do simadasi, anjaha ibotoh halode do palangka binahen ni tuanni; tapi anggo Israel seng itandai Ahu, anjaha bangsang-Ku seng maruhur.

⁴ Bursik ma bangsa si pardousa, bangsa sibuei hajahaton, ginompar ni halak na jungkat, anak si horjahon na masambor! Itadingkon sidea do Jahowa anjaha iapasi Na Pansing ni Israel, itundali sidea do Ia.

⁵ Bahen aha in sai nunuton lonsingon hanima, ai lambin surut do hanima humbangku? Ganup ulu boritan do, ganup pusu-pusu pe domma galek.

- ⁶ Humbani jampal ni nahei das bani ulu seng dong ijai na jorgit; na butong pakon na marbulistang, ampa uga na mardaroh-daroh; seng hona pisat, seng hona balutan barang hona minakan.
- ⁷ Halong do tanohnima, matutung bani apuy hutanima, gogoh ni jumanima ipangan halak na legan i lobeinima; maseda do ai songon Sodom na matornoh.
- ⁸ Tarpunjung do boru Sion songon sopo-sopo i pohon anggur, songon lampolampo i pohon ansimun, songon huta na hinubu.
- ⁹ Ambit lang itadingkon Jahowa Zebaot banta otik na maluah doskon Sodom pakon Gomora do hita.

**Rosuhan do Jahowa Mangidah
Hamubahon ase Galangan**

- ¹⁰ Tangihon hanima ma hata ni Jahowa ale pambobai ni Sodom! Boge i ma titah ni Naibatanta, ale bangsa Gomora!
- ¹¹ “Benahangku ma galangan sisayatonnima na buei in,” nini Jahowa. “Domma sobalan Ahu bani galangan situtungonnima na humbani biribiri tunggal, ampa bani taboh-taboh ni lombu na pinamombur. Seng iharosuhkon uhur-Hu daroh ni lombu jonggi, atap biribiri atap hambing tunggal pe.

- ¹² Anggo roh hanima Bangku sihol mangidah
bohing-Ku, ise marsuruh hanima mandogei
alaman-Ku?
- ¹³ Ulang be boban hanima galangan na so
marnidok; dahupa hagigi do ai Bangku.
Poltak ni bulan, ari Sabat, na mangadongkon
partumpuan-tumpuan Seng tarharosuhkon
Ahu hajahaton ampa na marpesta-pesta.
- ¹⁴ Poltak ni bulannima ampa pesta-pestanima
ihagigihon Tonduy-Hu do; gabe boban do ai
Bangku, anjaha loja do Ahu pausung-usung
ai.
- ¹⁵ Age pe ipaherbang hanima tangannima,
lingodkonon-Ku do matang-Ku
humbennima; age pe ipagati hanima
martonggo, seng tangaron-Ku ai; ai gok
daroh do tangannima.
- ¹⁶ Maridi ma hanima, manguras ma hanima!
Padaoh hanima ma hajahatonnima hun
lobei ni matang-Ku; parontihon hanima
mangkorjahon na masambor!
- ¹⁷ Parlajari mambahen na madear, pindahi
habonaron, urupi halak na hona tokoh,
ondingi halak na tading maetek, apiti
naboru na mabalu!
- ¹⁸ Roh ma hanima, ase marturiak hita, nini
Jahowa. Age pe gerger dousanima songon
bunga ni dapdap lopak do bahenon-Ku ai

songon salju, age pe gerger songon hiou
hasumba, putih do bahenon-Ku ai songon
kapas.

¹⁹ Anggo ra hanima anjaha pambalosi hanima,
hinadear ni tanoh in ma panganonnima.

²⁰ Tapi anggo mangengkar hanima anjaha
manlawan, podang ma mangankon hanima,
sonai do ihatahon pamangan ni Jahowa.”

Ipapitah Jerusalem Marhitei Uhum

²¹ Sonaha do parjadi ni huta na bujur in gabe
boru jalang? Gok hinan habonaron ijai,
anjaha hapintoron marianan ibagas, hape
sonari gok pamunuh!

²² Pirakmu salih do gabe timah, anggurmu
maragu bani bah.

²³ Pambobai panggeori, hasoman ni panangko,
ganupan sidea mangkarosuhkon sisip anjaha
mangindahi sibere-bere. Seng iapiti sidea
halak na tading maetek anjaha pangaduan
ni parinangon na mabalu seng ijalo sidea.

²⁴ Halani ai nini Tuhan Jahowa Zebaot, Pargogoh
ni Israel do, “Sai marpuas-puas do uhur-Hu
bahenon-Ku mangidah imbang-Ku, anjaha
balaskonon-Ku do munsuh-Ku.

²⁵ Ulakan-Ku do mangonai tangan hubam,
tapi papitahon-Ku do ho songon bosi

buruk-buruk anjaha padaohon-Ku do
humbam timah-timahmu.

²⁶ Anjaha pasuargon-Ku do bam panguhum
songon na bani mulani ampa panuturi
songon sapari; dob ai goranon ma ho huta
hapintoron, huta na bujur.

²⁷ Ai tobuson do Sion marhitei habonaron anjaha
pangisini na paubahkon uhurni marhitei
hapintoron.

²⁸ Tapi siapkononkon do sipanggeori ampa
pardousa rap-rap, anjaha bois do sagala na
manadingkon Jahowa.

²⁹ Ai maningon maila do hanima halani hayu
jabi-jabi, na hinarosuhkonnima hinan,
anjaha maila do hanima halani pohon na
pinilihnama.

³⁰ Ai maningon gabe songon hayu jabi-jabi do
hanima, na melus bulungni, anjaha songon
pohon na so marbah.

³¹ Halak parkuasa gabe songon bonang
hori, pambahenanni songon palian ni
apuy, haduasi rap mosog, seng dong na
mangintopi.”

**Sion, Huta Pamatang ni Harajaon
Hadameion na Sihol Roh in**

2 ¹ Hata na nididah ni si Jesaya, anak ni si Amos
pasal Juda pakon Jerusalem.

(ay. 2-4: Pausih Mik. 4:1-3)

- ² Masa do bani panorang parpudi, totap ma pajonamon dolog ni rumah ni Jahowa bani pakpak ni dolog-dolog, gijangan humbani buntu-buntu; jadi marodor ma sagala bangsa parbegu roh hujai,
- ³ anjaha buei do bangsa-bangsa bingkati hujai, nini, “Eta, tangkog ma hita hu dolog ni Jahowa, hu rumah ni Naibata ni si Jakob, ase iajarhon banta sagala dalan-Ni anjaha mardalan hita bani lapang-Ni. Ai hun Sion do harohan ni titah, anjaha hata ni Jahowa hun Jerusalem.
- ⁴ Jadi la ma manguhum i tongah-tongah ni bangsa parbegu anjaha na padalan uhum bani buei bangsa. Jadi patopahonon ni sidea ma podangni gabe mata ni tinggala, anjaha tanja ni sidea gabe sasabi. Seng be sintakon ni bangsa dompak bangsa podang, anjaha seng be guruhanon ni sidea hamunsuhon.
- ⁵ Ale ginompar ni si Jakob, eta ma, mardalan ma hita bani sondang ni Jahowa.
- ⁶ Tongon, iambukkon Ham do bangsa-Mu, ginompar ni si Jakob, ai igoki partondungan na hun hapoltakan do sidea ampa pangulpukon songon halak Palistim; sariah do sidea pakon halak na legan.

- ⁷ Gok do tanoh ni sidea bani omas ampa pirak,
seng tarhira arta ni sidea; gok do nagori ni
sidea bani huda, anjaha seng tarbilangni
garetani.
- ⁸ Gok do tanohni bani sisombahon; bani
jadi-jadian ni tanganni do sidea manombah,
ai ma na pinauli ni jari-jarini.
- ⁹ Mangunduk jolma, marrogop halak. Ulang ma
marulak-ulakan uhurmu bani sidea.
- ¹⁰ Laho ma hubagas dolog batu, ponopkon ma
dirimu bani orbuk i lobei ni panonggoti ni
Jahowa ampa i lobei ni hamuliaon-Ni na
marhidorat in.
- ¹¹ Mata hagijangon ni jolma sipatoruhon
do, ampa uhur hagijangon ni dalahi
sipatundukon do, pitah Jahowa do na timbul
bani ari ai.
- ¹² Tongon, ari ni Jahowa Zebaot maningon roh
do bani ganup na mangenjeng ampa na
timbul ampa bani sagala na pinagijang, ase
ipatunduk,
- ¹³ age bani sagala hayu ares na i Libanon, sonai
bani hayu jati na i Basan;
- ¹⁴ age bani sagala dolog na gijang ampa bani batu
buntu-buntu na bolon;
- ¹⁵ age bani ganup manara na gijang ampa bani
tembok na toguh;

¹⁶ age bani sagala kapal ni Tarsis ampa bani sagala na madear, na pinauli ni jolma.

¹⁷ Jadi patundukon ma gijang ni uhur ni jolma, ampa pangenjengon ni dalahi, pitah Jahowa do na timbul bani ari ai.

¹⁸ Sagala sisombah-sombahon masab ma.

¹⁹ Jadi masuk ma halak hubagas liang ampa ruang-ruang ni tanoh halani panonggoti ni Jahowa pakon halani jombut ni hamuliaon-Ni, sanggah bingkat la mangkirjati tanoh on.

²⁰ Bani panorang ai iambukkon halak ma gana-ganani na humbani pirak ampa omas, ai ma na pinaulini bahen sisombahonni, igijigkon hubani ubag ampa arip-arip,

²¹ sanggah na laho masuk hubagas liang ni dolog batu ampa bani riga ni dolog-dolog, halani panonggoti ni Jahowa pakon jombut ni hamuliaon-Ni, sanggah bingkat la mangkirjati tanoh on.

²² Paholang hanima ma dirinima humbani jolma si parhosah marhitei igungni! Ai aha ma ia hiraon?

3 ¹ Tonggor ma, paosoron ni Tuhan Jahowa Zebaot ma hun Jerusalem pakon hun Juda panungkoli ampa tungkot, parbohalan ni ruti pakon parbohalan ni bah ganup,

- ² puanglima pakon dalahi si parmunsuh,
panguhum pakon nabi-nabi, si partondung
pakon partua-partua,
³ kopala ni silima-puluh halak, na sangap-sangap
pakon panuturi, parsibalik mata na pandei
ampa si partabas.
⁴ Bahenon-Ku do dakdanak dalahi gabe raja
bani sidea, dakdanak na inumon do na
mamarentah sidea.
⁵ Jadi marsiodoh-odohan ma bangsa in, dalahi
samah dalahi, hasoman samah hasoman; na
maposo pahiri na matua, halak na malumat
mandoruni halak na sangap.”

**Uhum na Binoan ni Ari ni Jahowa
bani Sagala Pangenjengon ampa na
Sangap-sangap si Pardousa i Jerusalem**

- ⁶ Jadi jorotan ni halak ma saninani i rumah ni
bapani, nini ma, “Dong ope mantelmu, ho
ma pambobainami, ho ma na manggomgom
reong-reong ni huta on.
⁷ Jadi bani ari ai nini ma marbalos, ‘Lang tarbahen
ahu gabe panambari, seng dong ruti atap
hiou i jabungku, ulang pabangkit nasiam
ahu gabe pambobai ni bangsa in.’
⁸ Tongon, marumbak do Jerusalem anjaha
Juda madabuh, halani dilah ni sidea ampa
pambahenan ni sidea na mangimbang

Jahowa, laho paboritkon panonggor-Ni na marmulia in.

- ⁹ Rupa ni bohi ni sidea do patandahon sidea, anjaha dousa ni sidea pabotohkon sidea songon par Sodom, seng ihailahon. Magou ma sidea, ai sidea sandiri do parohkon na masambor bani.
- ¹⁰ Martuah do halak parpintor, sonang do ia; tongon, panganonni do buah ni na hinorjahonni.
- ¹¹ Magou do halak parjahat, sunsah do ia, ai balaskononkon do bani domu hubani na hinorjahon ni tanganni.
- ¹² Aih bangsang-Ku! Dakdanak do na mangodoh-odoh sidea, naboru parrajai bani. Aih bangsang-Ku! pambobaimu do na pakahouhon, anjaha sidea do na manggeori dalan sibolusonmu.”
- ¹³ Hehe do Jahowa laho mamorang, jongjong do la laho manguhum bangsa-Ni.
- ¹⁴ Roh do Jahowa laho mandabuh uhum, hubani pangintuai ni bangsa-Ni ampa raja-Ni.
“Hanima, hanima do na mamondut pohon anggur in, ibagas rumahnima do barang rampasan humbani halak na masombuh.
- ¹⁵ Na mahua do hanima, ase idogei-dogei hanima bangsang-Ku, anjaha irojati hanima bohi

ni halak na madoyuk? nini Tuhan Jahowa Zebaot.”

Uhum bani Boru Sion Halani Gijang ni Uhurni

- ¹⁶ Nini Jahowa, “Halani margijang ni uhur boru Sion, ipadirgak-dirgak uluni mardalan, manerep-nerep pangkawahni, mairdit mardalan, anjaha mardiring-diring golang ni naheini ibahen,
- ¹⁷ jadi palpalon ni Tuhan ma ulu ni boru Sion, anjaha pasalangon ni Jahowa na niabitanni.
- ¹⁸ Bani ari ai buaton ni Tuhan ma hajengeson ni tintin ni nahei, alit-alit ni bohi, horungkorung,
- ¹⁹ subang, golang, tudung-tudung,
- ²⁰ bulang, golang bani nahei, gondit, guri-guri ni minak na morum, pagar-pagar,
- ²¹ tintin bani jari-jari, tintin bani igung,
- ²² pakeian na marujuan, baju ganjang, salendang, tas,
- ²³ sormin, baju parbagas, tujung pakon sabing-sabing.
- ²⁴ Jadi masa ma, gantih ni na morum na marbau, gantih ni gondit tali, gantih ni jambulan na kariting hapalpalon, gantih ni pakeian na majenges guni, gantih ni hajengeson habadoron.

²⁵ Sagala anak dalahi bannima rasei do bahenon ni podang, anjaha puanglimanima matei i parmunsuhan.

²⁶ Tangis anjaha marhoru ma horbanganni, lungunan, hundul-hundul ma ia bani tanoh.”

4 ¹ Bani ari ai jorotan ni pitu naboru ma sada dalahi, nini, “Sipanganonnamami pe ipangan hanami, anjaha hanami mansarihon parhiouonnamami, asal ma marpanggorani bamu hanami; padaoh ham ma habadoron hun bennami.” *

Bagah-bagah Pasal Parsuang ni Sion

² Bani ari ai jenges anjaha marmulia ma tunas ni Jahowa, anjaha gogoh ni tanoh in gabe hasangapon ampa hajagaron ma bani na maluah humbani Israel.*

³ Jadi sagala na tading i Sion anjaha na teba i Jerusalem, goranon ma sidea na ma pansing, ai ma sagala halak na dob tarsurat hu hagoluhan i Jerusalem, *

⁴ ai ma dob iburihi Jahowa dungut humbani boru Sion, anjaha iayubkon utang daroh ni Jerusalem hun tongah-tongahni marhitei tonduy panguhumion ampa tonduy na mammosogkon. *

⁵ Jadi adongkonon ni Jahowa na i babou ni sab Dolog Sion ampa i babou ni ganup

partumpuanni hambun arian pakon
timus ampa sondang ni apuy na gara
borngin; tongon, i babou ni haganupan
ai hasangapon ni Jahowa do pangondingi
ampa panlinggomi; *

⁶ gabe parlinggoman ma ai arian humbani
na milas, anjaha gabe haporusan ampa
panisioan humbani haba-haba ampa udan.

Hutuk ni Jahowa bani Pohon Anggur-Ni

5 ¹ Sihol mandoding do ahu pasal na
hinaholonganku, doding ni na
hinaholonganku pasal pohon anggurni. Dong
do pohon anggur bani na hinaholonganku
bani dolog-dolog na lambutan.

² Isangkuli ma ai, ipulliti batuni anjaha isuani
ma bani hayu anggur pilihan; ipajongjong
ma menara panjagaan i tongah-tongahni,
anjaha ipauli homa sada pangilangan.
Mangarap do ia bani buah anggur na dear,
hape simarbuah-buah anggur do ibere bani.

³ “Ai pe ale par Jerusalem ampa halak Juda,
padalan hanima ma partimbangan pasal
Ahu ampa pohon anggur-Hu.

⁴ Aha ope sibahenon bani pohon anggur-Hu, na
so Hubahen hinan hujai? Mangarap do Ahu
bereonni buah anggur na madear, hape
mase ma ibere simarbuah-buah anggur?

- ⁵ Ai pe patugahon-Ku ma bannima atap aha na
sihol bahenon-Ku bani pohon anggur-Hu:
Dokdokon-Ku ma hondorni, ase hona
gagatan ai; parsedaon-Ku ma tembokni, ase
hona lotlotan.
- ⁶ Paturuton-Ku ma ai halong; seng be hona
ranggason ai barang hona sangkul, tubuhan
duri-duri ma ai ampa poyon-poyon.
Parentahkonon-Ku ma hambun, ase ulang
iparoh udan hujai.”
- ⁷ Tongon, ia pohon anggur ni Jahowa Zebaot,
ai ma ginompar ni Israel, anjaha halak na
i Juda, ai ma suan-suanan haudunganni.
Iarapkon do hasintongan hape daroh
maruseian, sonai hapintoron hape na so
uhum do.

Papa ni Jahowa Halani Hasumsamon ni Bangsa ai

- ⁸ Bursik ma, halak na patambah-tambah rumah,
na patambah-tambah ladang, gabe seng
dong be ianan na lumei, jadi hanima tumang
mando mangiankon tanoh in.
- ⁹ Domma ipatangarhon Jahowa Zebaot
bani pinggolhu, “Tongon, maningon
tadingkononkon do rumah na buei in, na
banggal age na jenges, seng be dong na
mangiankon.

- ¹⁰ Sapuluh lambar pohon anggur, mambere gogohni sada tapongan, anjaha sabantei bonih, mambere gogohni sada tumba tumang.”
- ¹¹ Bursik ma halak na pagirahkon puho, laho mangayaki siinumon na pamabukkon, anjaha na hundul-hundul ronsi bagas borngin, marmabuk-mabuk ibahen anggur.
- ¹² Mangan-mangan do sidea marhasoman husapi pakon arbap, tambur ampa sulim, anjaha minum-minum anggur; tapi pambahenan ni Jahowa seng ipardulihon sidea, anjaha jadi-jadian ni tangan-Ni seng ididah.
- ¹³ Halani ai tarbuang ma bangsang-Ku ibagas na so binotohni; matei ma na sangap-sangapni halani gayuran anjaha halak na mabuei matei horahan.
- ¹⁴ Ipangangang nagori toruh do tolonanni, anjaha tanggak tumang babahni ibahen, jadi tuad ma hujai hajengeson ni Jerusalem ampa haramionni, hariahonni ampa olob-olob na ijai.
- ¹⁵ Jadi jut ma uhur ni jolma, tunduk ia dalahi, anjaha mata na mangeljeng i patoruh.
- ¹⁶ Tapi gabe timbul ma Jahowa Zebaot halani uhum ai, anjaha Naibata na pansing in pataridahkon hapansingon-Ni ibagas hapintoron.

- ¹⁷ Jadi manampal ma anak ni biribiri songon na bani sampalan, anjaha hambing manggagat bani na mangkareong ai.
- ¹⁸ Bursik ma halak na mangaitkon hasalahan marhitei tali ni hajahaton, anjaha na mangaitkon dousa songon marhitei tali ni gareta,
- ¹⁹ na mangkatahon, “Ipodaskon, ioloskon ma horjani, ase ididah hita ai; sai roh ma tongon, sai saud ma sura-sura ni Na Pansing ni Israel, ase ibotoh hita.”
- ²⁰ Bursik ma halak na mangkatahon bani na bajan, ai do na dear, anjaha bani na dear ai do na bajan, na mambahen na golap gabe na siang, anjaha na siang gabe na golap, na mambahen na mapaet gabe matobu, anjaha na matobu gabe na mapaet.
- ²¹ Bursik ma halak maruhur ia nini ibagas uhurni, anjaha na pentar ia iagan uhurni.
- ²² Bursik ma halak na beteng minum anggur, anjaha na garang mangagu minuman koras,
- ²³ na paluahkon halak parjahat halani sisip, anjaha na padaohkon hapintoron humbani halak parpintor.
- ²⁴ Halani ai, songon dilah ni apuy na mangankon anggala, anjaha songon poyon na mosog ibahen gajag ni apuy, sonai ma uratni gabe abuan, bungani habang songon orbuk, ai

itulak uhur ni sidea do titah ni Jahowa
Zebaot, anjaha mapas uhurni bani Na
Pansing ni Israel.

**Uhum ni Naibata bani Bangsa-Ni
Marhitei Bangsa na Legan.**

- ²⁵ Halani ai gajag do ringis ni Jahowa dompak
bangsa-Ni, anjaha ipagostong tangan-Ni
mangimbang sidea; ibogbog do sidea, pala
dugur dolog-dolog anjaha radag bangkei
ni sidea songon tompoh-tompoh i dalan.
Sonai pe ganupan ai, seng surut ope gila-Ni,
anjaha tong ope gostong tangan-Ni.
- ²⁶ Anjaha pajongjongon-Ni ma sada partanda
bani bangsa na marianan daoh, anjaha idilo
sidea hun ujung ni tanoh on; anjaha tonggor
ma, podas, doras do sidea roh.
- ²⁷ Seng dong na loja, seng dong na jiris, sahalak
pe seng dong tartunduh atap modom; seng
dong gondit na tanggal barang tali ni sipatu
na rotap.
- ²⁸ Marot do panah ni sidea, anjaha pasang siorni
ganup; tambirik ni huda ni sidea songon
batu, anjaha galapang ni garetani songon
logou sibungkar hasowor.
- ²⁹ Aum ni sidea songon singa, songon anak ni
singa do sidea maraum; maraum do sidea

lanjar manoroh, iluahon ma ai seng dong na
boi paluahkon.

- ³⁰ Marhasak ma sidea roh bani ari ai, songon
parhasak ni laut; anjaha anggo na kawahkon
tanoh in, tonggor ma, golap anjaha gobir,
anjaha na liar, golap do ibahen hambunin.

Pandiloon ni Jahowa bani si Jesaya

6 ¹ Bani tahun parmateri ni Raja Usia, huidah do
Tuhan hundul i atas hotak na gijang anjaha na
marmulia; anjaha rambu ni pakeian-Ni do manggoki
rumah panumbahan.

² Serapim do jongjong i babou-Ni, na marhabong
onom bei; dua marrungkub bohini, dua
marrungkub naheini anjaha dua mangkabangkonsi.

³ Marsitauran ma sidea, nini, “Na Pansing, Na
Pansing, Na Pansing do Jahowa Zebaot, gok
do sab tanoh on bani hamuliaon-Ni.”

⁴ Jadi dugur ma onjolan ni pasihon halani sora ni
na dilo-dilo ai, anjaha gok timus ma rumah
ai.

⁵ Dob ai ningku ma, “Bursik ma ahu! Magou ma
ahu, halanijolma parbibir na mabutak do
ahu, anjaha marianan do ahu i tongah-
tongah ni halak parbibir na mabutak; ai
domma ididah matangu Raja in, Jahowa
Zebaot.

- ⁶ Sada humbani Serapim ai habang ma dompak ahu, mamboan narnar ibagas tanganni, ai ma na binuatni marhitei gansip-gansip humbani anjapanjap.
- ⁷ Ijamah ma marhitei ai bibirhu, anjaha nini, 'Tonggor ma, on do na manjamah bibirmu, sae ma salahmu, sasap ma dousamu.'
- ⁸ Dob ai hubogei ma sora ni Tuhan, na mangkatahon, "Ise do sisuruhon-Ku: Ise do utusannami? Jadi ningku ma, 'Ijon do ahu, suruh Ham ma ahu!'
- ⁹ Jadi ihatahon ma, 'Laho ma ho, hatahon ma bani bangsa on: Tangar, tangar hanima ma, tapi ulang artihon; idah, idah hanima ma, tapi ulang arusi hanima!
- ¹⁰ Patendel ma uhur ni bangsa on, panengel pinggolni, anjaha papitung matani, ase ulang marpangidah ia marhitei matani, anjaha ulang marpanangar marhitei pinggolni; ase ulang mangarti uhurni, anjaha ulang ipaubah uhurni gabe malum ia.'
- ¹¹ Jadi ningku ma, 'Piga dokah on, Tuhan?' Balos-Ni, 'Ronsi halong huta-huta, seng dong na mangiankon; rumah-rumah lang marisi jolma, anjaha ladang salih gabe halimisan;
- ¹² ipadaoh Jahowa jolma, anjaha lungun tumang tanoh in.'

- ¹³ Anjaha anggo adong ope na tading ijai
saparsapuluh, ai pe boiskononkon do, usih
songon hayu jajabi atap hayu baringin, na
jongjong ope martutuhon, sanggah hona
roboh. Bonih na ma pansing do tutuhoni ai.”

Ojur-ojur bani Raja Ahas ase Totap Porsaya la

7 ¹ Sanggah panorang ni si Ahas, anak ni si Jotam,
anak ni si Usia raja ni Juda, tangkog ma si Resin,
raja ni Aram pakon si Pekah, anak ni si Ramalya, raja
ni Israel hu Jerusalem laho marporang, tapi seng
tartaluhon sidea huta ai.

² Jadi dob ibaritahon halak bani ginompar ni si
Daud, “Domma sariah halak Aram pakon halak
Efraim, gabe hitir ma uhurni pakon uhur ni
bangsani, songon hayu harangan na nidugur ni
logou.

³ Jadi nini Jahowa ma dompak si Jesaya, ‘Laho ma ho
manjumpahkon si Ahas, rap pakon anakmu si Sear-
Jasub, hu ujung ni dalan ni bah na hun bongbongan
parhuluan ai dompak dalan hu ladang panjomuran
ai.’

⁴ Hatahon ma hu bani, ‘Marjaga-jaga ma ho, nalom
maruhur, ulang ho mabiar, anjaha ulang ma galek
uhurmu mangidah sipu-sipu na dua na martimus
ai, mangidah parringis ni si Resin, halak Aram ampa
anak ni si Remalya.’

⁵ Halani na jahat iuhurhon halak Aram, halak Efraim
ampa anak ni si Remalya dompak ho, nini,

⁶ “Laho ma hita tangkog hu Juda, parsirak hita ma
ai, anjaha taban hita banta anjaha pabangkit
hita ma si Tabel gabe raja i tengah-tengah ni
sidea,

⁷ tapi sonon do hata ni Tuhan Jahowa, ‘Seng anjai
jadi ai, seng saud ai.’

⁸ Tapi Damaskus do pamatang ni Aram, anjaha
si Resin kopala ni Damaskus. (Onom puluh
lima tahun nari masarsar ma Efraim, seng
be sada bangsa)

⁹ Anjaha Samaria do pamatang ni Efraim, anjaha
anak ni si Remalya kopala ni Samaria. Anggo
seng porsaya hanima, seng anjai totap
hanima.”

Bagah-bagah Pasal Immanuel

¹⁰ Dob ai nini Jahowa ma use bani si Ahas,

¹¹ “Pindo ma bam sada tanda humbani Jahowa
Naibatamu, hun nagori toruh na bagas, atap hun
datas humbani ianan na gijang.

¹² Tapi nini si Ahas ma, ‘Seng mangindo ahu, anjaha
seng ra ahu manlajou Jahowa.’

¹³ Dob ai nini ma, ‘Tangar ma ale ginompar ni si
Daud! Maotiktu do pangahapnima manlajoujolma,
gabe sihol lojaannima age Naibatanku?’

¹⁴ Halani ai bereon ni Tuhan sandiri ma bannima sada tanda, 'Tonggor ma, boratan rumah ma sada anak boru, anjaha tubuhkononni ma sada anak, anjaha bahenonni ma goranni: Immanuel.'

¹⁵ Mantega pakon manisan do sipanganonni, paima ibotoh manulak na jahat ampa mamilih na madear.

¹⁶ Tongon, paima ibotoh manulak na jahat ampa mamilih na madear, tarulang ma nagori ni raja na dua ai, hinabiaranmu sonari."

Hasedaon Sipamasaon ni Jahowa bani Tanoh Juda

¹⁷ Parohon ni Jahowa do bam ampa bani bangsamu ampa bani ginompar ni bapamu panorang na so onggama masa dob sirang Efraim hun Juda ai ma marhitei Raja Assur.

¹⁸ Jadi masa ma bani ari ai: Diloona ni Jahowa ma lanog hun topi ni Bah Masir pakon lobah hun Nagori Assur.

¹⁹ Marrohan ma ai anjaha sogop ganup bani lombang na tungkis ampa bani rigat-rigat ni dolog batu, bani sagala duri-duri ampa bani sagala sampalan.

²⁰ Bani panorang ai, rasipon ni Jahowa ma marhitei rasip na sinewa hun dipar ni Bah Eprat (ai ma raja ni Assur) ulu ai ampa ambulu ni nahei, anjaha buaton ni ai do age jambek.

²¹ Jadi masa ma bani panorang ai, sada halak marmahan pitah sada lombu ampa dua hambing;

²² anjaha halani buei ni dadih na binereni, ipangan ma mantega; tongon, mantega ampa manisan do ipangan sagala na tading bani nagori ai.

²³ Jadi masa ma bani panorang ai, sagala tanoh na adong ijai, saribu kambona hayu anggur, na marharga saribu pirak, salih ma gabe galunggung hatubuhan ni duri-duri ampa suga-suga.

²⁴ Roh ma halak hujai marsior pakon marpanah, halani duri-duri ampa suga-suga do manggoki tanoh in.

²⁵ Anjaha sagala dolog-dolog, na sinangkul hinan, seng be idohori halak halani biarni bani duri-duri ampa suga-suga; jadi gabe panggagatan ni lombu ampa sirojaton ni biribiri ma tanoh in.”

Pasal Parseda ni Damaskus ampa Samaria Ibahen Assur

8¹ Dob ai nini Jahowa ma hu bangku, “Buat ma bam batu panuratan na bolag, suratkon ma hujai marhitei surat ni jolma: Bani si Podas-manrampas Doras-manaban.”

² Jadi hubuat ma bangku saksi hatengeran, ai ma Malim Uria pakon si Sakaria, anak ni si Jeberekya.

³ Jadi hudohori ma nabi naboru ai, gabe boratan rumah ma ia, anjaha itubuhkon ma sada anak dalahi. Jadi ihatahon Jahowa ma hu bangku, “Bahen

ma goranni Mahersalal-hasbas (*Podas-manrampas Doras-manaban*);

⁴ ai paima ibotoh anak ai mangkatahon, ‘Bapa! inang!’ Usungon ni halak ma habayakon ni Damaskus ampa taban-taban na hun Samaria hulobei ni Raja Assur.”

Pasal Parmasuk ni Assur hu Juda

⁵ Dob ai iulaki Jahowa ma marsahap hu bangku, sonon,

⁶ “Halani mapas bangsa on bani Bah Siloa na nanget mardalan, anjaha gobir ia bani si Resin ampa bani anak ni si Remalya,

⁷ halani ai parohon ni Tuhan ma bani sidea Bah Eprat na gogoh anjaha na banggal ai, ai ma Raja Assur pakon sagala balani; sampur ma ai bani sagala bondarni anjaha salpuanni do sagala topini.

⁸ Masukanni ma tanoh Juda, marbanggal ma ai mabaor pala das bani borgok, anjaha habongni na pinaherbangni ai do manggoki tanohmu, o Immanuel.”

Lumba-lumba bani Halak Assur

⁹ Botoh ma ai, ale bangsa-bangsa anjaha gobir ma; tangar hanima ma, ale tanoh na daoh, gonditi hanima ma dirinima anjaha gobir ma.

- ¹⁰ Manriahi ma hanima, tapi seng saud ai, bahen hanima ma ranggian, tapi seng jadi ai, ai Naibata do hasomannami.

Jahowa Hansa Pangguruan

¹¹ Sonon do hata ni Jahowa bangku, sanggah na iJOROTI tangan-Ni ahu, anjaha ipalumba ahu ulang mardalan bani dalan ni bangsa on, nini,

¹² “Ulang ma hatahon hanima partahian bani haganup na hinatahon ni bangsa on partahian, anjaha bani na hinabiaran ni sidea ulang ma hanima mabiar, anjaha ulang gobir.

¹³ Jahowa Zebaot, la ma na ma pansing bannima, la ma sihabiarannima anjaha bani ma hanima hitir-hitir.

¹⁴ la do ianan na ma pansing, batu partolsuan pakon batu gingging, pargompangan bani haduasi ginompar ni Israel, tirangkap pakon siding bani na marianan i Jerusalem.

¹⁵ Buei ma na tartolsu humbani sidea, madabuh anjaha mapuntar, hona siding anjaha tartangkap.

¹⁶ Simpan ma hasaksian in, tartokan ma in ibagas susianku!

¹⁷ Tapi mangarap do ahu bani Jahowa, na dob mamonopkon bohi-Ni humbani ginompar ni si Jakob, la do hupaima-ima.

¹⁸ Tonggor ma, ia ahu ampa dakdanak na binere ni Jahowa bangku, tanda ampa tuduh-tuduh do

hanami bani Israel, humbani Jahowa Zebaot, na marianan i Dolog Sion.”

Uhum bani Parnaibata Sileban

¹⁹ Anggo ihatahon sidea bannima, “Sungkun ma paniaran ampa partondung, si parhusip ampa si partabas! Ai lang patut sungkunun ni sada bangsa naibatani, anjaha marpanungkun ia bani na dob matei, halanijolma na manggoluh?

²⁰ Titah pakon hasaksian ni Jahowa do sisungkunun! Anggo lang romban hubani hata on ihatahon sidea, seng dong be idahon ni sidea na siang,

²¹ mawat-awat mando sidea, marhasunsahan anjaha loheian; halani loheian sidea marah ma sidea anjaha ipapai rajani ampa Naibatani.

²² Itarei dompak datas, ikawahkon hu tanoh, tonggor ma, hasosakan ampa golap, na lotir ampa hamarsikon, bani hagolapan do sidea iambukkon.”

Bagah-bagah Pasal Partubuh ni Raja Damei

9 ¹ (8-23) Tongon, seng lanjar golap nagori na hona odoh-odoh in! Songon na pinaroh ni Jahowa sapari habadoron bani tanoh Sebulon ampa tanoh Naftali, sonai do bani panorang na sihol roh bereon-Ni hasangapon bani dalan na dompak laut, tanoh na i dipar ni Bah Jordan, ampa bani tanoh ni sipajuh begu-begu.

- ² (9-1) Bangsa na mardalan ibagas hagolapan mangidah sada panondang na bolon, halak na marianan bani linggoman ni hamatean, poltak do i babou ni sidea sada panondang.
- ³ (9-2) Ipabuei Ham do bangsa in, itambahi Ham malas ni uhurni; marmalas ni uhur do sidea i lobei ni bohi-Mu, songon malas ni uhur sanggah pariamas, songon halak na marolob-olob sanggah marbagi taban-taban.
- ⁴ (9-3) Ai pasangan na bani tangkuhukni, pakon lanja-lanja na bani abarani ampa lonsing-lonsing ni sipangodoh-odoh, Ham do na mamonggolhon songon bani ari ni Midian.
- ⁵ (9-4) Ai sagala sipatu na mardorob-dorob manlangkah, anjaha sagala pakeian porang na marlapu daroh maningon bois do tutungon, gabe sipanganon ni apuy.
- ⁶ (9-5) Ai domma tubuh banta sada na etek-etek, ibere do banta sada anak, tampei bani abarani do panggomgomion, anjaha ibahen do goran-Ni: Paruhur Halongangan, Naibata Parkuasa, Bapa sadokah ni dokahni, Raja Damei.
- ⁷ (9-6) Parrarat ni harajaon-Ni ampa hadameion-Ni seng marpunsa ai bani hotak ni si Daud ampa bani harajaonni, halani ipatotap

anjaha ipatoguh do ai marhitei uhum pakon
hapintoron humbani sonari nari ronsi
sadokah ni dokahni. Simburu ni Jahowa
Zebaot do mambahen sonai.

**Uhum ni Naibata bani Efraim
halani Hengkeng ni Uhurni**

- ⁸ (9-7) Itongos Tuhan do sada hata bani si Jakob,
anjaha sogop do ai bani Israel.
- ⁹ (9-8) Botohon ni ganup bangsa in do ai, ai
ma halak Efraim ampa halak Samaria, na
mangkatahon ibagas pangenjengon ampa
gijang ni uhur:
- ¹⁰ (9-9) Tembok batu na dob marumbak ai,
paulionnami do marhitei batu gingging;
hayu jetun na dob iroboh ai, gantihonnami
do bani hayu ares.
- ¹¹ (9-10) Jadi isuruh Jahowa ma si Resin
mandorab sidea, anjaha ijuljul munsuh bani
sidea,
- ¹² (9-11) ai ma halak Aram hun hapoltakan,
halak Palistim hun hasundutan, gabe bois
Israel ibonduti. Sonai pe ganupan ai seng
surut ope ringis-Ni, tongtong ope gostong
tangan-Ni.
- ¹³ (9-12) Seng mulak bangsa ai bani na
mambogbogs, seng ipindahi Jahowa
Zebaot.

- ¹⁴ (9-13) Halani ai irotap Jahowa ma humbani Israel ulu pakon ihur, dangkah ni palem ampa arung-arung ibagas na sadari.
- ¹⁵ (9-14) Pangintuai-pangintuai pakon na sangap-sangap, ai ma ulu ai, anjaha nabi na mangajarhon ladung, ai ma ihur ai.
- ¹⁶ (9-15) Ai pambobai ni bangsa on do na mambahen kahou sidea, anjaha na binobahon ni sidea hona bondut.
- ¹⁷ (9-16) Halani ai seng ihamalaskon uhur ni Tuhan anak garama ni sidea, anjaha seng maidop uhurni bani na tading maetek atap naboru na mabalu, ai ganup do sidea parjahat anjaha sibahen na masambor, anjaha ganup pamangan manluarhon haotoon. Sonai pe ganupan ai seng surut ope ringis-Ni, tongtong ope gostong tangan-Ni.
- ¹⁸ (9-17) Tongon, gara hajahaton ai songon apuy, ipangan rimbang pakon hupi-hupi, imosogkon harangan na potpot, martimpul do timusni hu babou.
- ¹⁹ (9-18) Marhitei panomboh ni ringis ni Jahowa Zebaot mosog do tanoh in, anjaha bangsa in doskon soban sipanganon ni apuy; seng marsihaholongan be na marsanina.
- ²⁰ (9-19) Mangkarat halak dompak siamun, tong do loheian ia, mandaub halak dompak

sambilou, tong do seng bosur; ganup marsipangan daging ni hombar rumahni.

²¹ (9-20) Manase mangankon Efraim, Efraim mangankon Manase, dob ai rap sidea mangimbang Juda. Sonai pe ganupan ai, seng surut ope ringis-Ni, tongtong ope gostong tangan-Ni.

10 ¹ Bursik ma halak, na mambahen aturan na so pintor, ampa si panurat, na manuratkon odoh-odoh,

² laho papeletkon pahara ni halak na masombuh, anjaha manrampas hak ni halak na musil i tongah-tongah ni bangsang-Ku, ase naboru na mabalu gabe taban-taban bani sidea, anjaha halak na tading maetek gabe sirampokan ni sidea.

³ Tapi aha ma na sihol bahenonnima bani ari pambalason ampa bani haba-haba na sihol roh humbani na daoh? Bani ise ma hanima maporus mangindo pangurupion? Ija do tadingkononnima habayakonnima?

⁴ On do hansa: Unduk i tongah-tongah ni halak na tartaban, atap tibal i tongah-tongah ni halak na iraseihon. Sonai pe ganupan ai lape surut ringis-Ni, tongtong ope gostong tangan-Ni.

Uhum bani Assur halani Pangenjengonni

- ⁵ Bursik ma Assur lonsing-lonsing ni ringis-Hu
ampa simambu ni ringis-Ku.
- ⁶ Bani bangsa parjahat do ia Husuruh, anjaha bani
bangsa sigilaan-Ku do ia Huparentahkon,
laho manrampas sirampason ampa
manaban sitabanon, laho manrojatise
songon hubang i alaman.
- ⁷ Tapi anggo ia seng sonai sura-surani, anjaha
uhurni seng sonai tujuanni; tapi sihol
marripaskon do uhurni, anjaha mamboiskon
bangsa-bangsa, seng otik,
- ⁸ ai nini do, “Ai lang raja do ganup gamot-
gamotku?
- ⁹ Ai lang songon na bani huta Karkemis do masa
bani Kalno? Barang songon na bani Arpad
masa bani Hamat? Barang songon na bani
Samaria masa bani Damaskus?
- ¹⁰ Songon pangonai ni tanganku bani harajaon na
marsisombah-sombahon, na margana-gana
sibueinan marimbang na i Jerusalem ampa
na i Samaria,
- ¹¹ mintor lang ma bahenonku bani Jerusalem
ampa bani gana-ganani songon na
dob hubahen bani Samaria ampa bani
gana-ganani.”

¹² Tapi dob isaloseihon Tuhan ganup horja-Ni i Dolog Sion ampa i Jerusalem, luluhonon-Ni ma pangenjengon ni Raja Assur ampa mapas ni pangkawahni.

¹³ Ai nini do, “Marhitei hagogohon ni tanganku do hubahen ai anjaha marhitei hapentaranku, ai na pantas do ahu. Ahu do na mammasabkon parbalogan ni bangsa-bangsa anjaha hurampas arta-artani, anjaha songon puanglima hupaturun do sagala na marparatas.

¹⁴ Jumpah tanganku do habayakon ni bangsa-bangsa songon asar ni manuk-manuk, anjaha songon halak na manjomputi tolur na dob tinadingkon, sonai do hupatumpu ganup tanoh on, seng dong na paherbang habong, atap na pangangang pagut atap na marsiok pe.

¹⁵ Mintor manggagah ma tangkei dompak halak na manahahonsi, atap mangunsagah ma sihit dompak halak na manariksi? Tungkot ma gakni mangangkat halak na manjolomsi, atap simambu ma gakni manjomput halak, na so hayu ai?”

¹⁶ Halani ai tongoson ni Tuhan Jahowa Zebaot do tirahap hu tongah-tongah ni halakni na mombur, anjaha pagaraon do pinurun i toruh ni hasangaponni, songon gara ni apuy.

- ¹⁷ Anjaha panondang ni Israel do gabe songon apuy, anjaha na pansing-Ni gabe jirlam ni apuy, laho mangankon anjaha mamboiskon suga-sugani, hupi-hupini ibagas na sadari.
- ¹⁸ Hamuliaon ni haranganni ampa juman boiskononni do, hosah ronsi badan, songon parmerung ni naboritan parmerungni.
- ¹⁹ Hayuni na tading i harangan boi hiraon, dakdanak pe boi ma manuratkon.

Haluahon ni Teba-teba na humbani Israel

- ²⁰ Bani ari ai, teba-teba humbani Israel ampa na maluah humbani ginompar ni si Jakob, lang be mangunsandei bani halak na mambogbogsi, tapi bani Jahowa, Na Pansing ni Israel mando sidea mangunsandei ibagas hasintongan.
- ²¹ Teba-teba do na mulak, teba-teba humbani si Jakob mulak hubani Naibata na gogoh in.
- ²² Age pe songon horsik i topi ni laut bangsamu ale Israel, teba-teba do hansa hunjai na mulak, domma iputuskon hamagouan, marhitei parsampur ni hapintoron-Ni.
- ²³ Tongon hasedaon na dob iputuskon Tuhan Jahowa Zebaot pasaudon-Ni do i tongah-tongah ni sab tanoh on.
- ²⁴ Halani ai sonon do nini Tuhan Jahowa Zebaot, “Ulang hanima mabiar dompak Assur, ale

bangsang-Ku, na marianan i Sion, age pe ibogbog hanima marhitei libas-libas anjaha iondamkon simambuni bam, songon binahen ni Masir.

²⁵ Ai otik nari mando, marpunsa ma ringis-Ku, anjaha marbalik ma ringis-Ku bani sidea laho mamboiskon.”

²⁶ Jadi sintakon ni Jahowa Zebaot ma lonsing-lonsing dampak sidea songon na binahen-Ni manlonsing halak Midian dohorhon Dolog Batu Oreb, anjaha angkaton-Ni do tungkot-Ni i babou ni laut, songon na bani halak Masir ijia.

²⁷ Bani ari ai mosor ma rodi-Ni humbani abaramu, ampa pasangan-Ni laho ma humbani tangkuhukmu.

Parroh ni Munsuh hun Utara ampa Partalu ni Sidea

²⁸ Tangkog do ia hun Rimon, das ma ia hu Ayat, mamontas ma ia hun Migron anjaha i Mikmas ipatumpu ugas-ugasni.

²⁹ Ibontas sidea ma lombang ai, i Geba do sidea marborngin; gobir do Rama, maporus ia Gibeas-Saul.

³⁰ Taur-taur ma ho ale boru Gallim! Tangar ma, ale Laisa! Balosi ma ia, ale Anatot!

³¹ Maporus do Madmena, pangisi ni Gebim lintun mangindahi parbansahan.

³² Sadari on ope das do ia i Nob, iondamkon tanganni dampak dolog ni boru Sion, dampak buntu-buntu ni Jerusalem.

³³ Tonggor ma, Tuhan Jahowa Zebaot do manultuli dangkah marhasoman kuasa na majangin; iroboh do panuntunni anjaha ipatoruh na matabun.

³⁴ limas do tombak marhitei hapak bosì, anjaha Libanon rap pakon hayuni na banggal-banggal ai marumbak ma.

Raja Parpintor na humbani Ginompar ni si Daud ampa Harajaon Hadameion ai

11 ¹ Dob ai mandarat ma sada tunas humbani tutuho ni si Isai, anjaha marbuah sada tumbor na roh humbani uratni.

² Sogop ma hubani Tonduy ni Jahowa, tonduy hauhuron ampa pangarusion, tonduy panuturion ampa hagogohon, tonduy habotohon ampa biar bani Jahowa. Harosuh ni uhurni ai ma marhabiaran bani Jahowa.

³ Seng mangihutkon pangidah ni matani ia manguhumi, anjaha seng mangihutkon pambogei ni pinggolni ia mamutuskon.

⁴ Tapi marhitei hapintoron do uhumanni halak na masombuh, anjaha marhitei hasintongon do dabuhonni timbangan bani halak na madoyuk i nagori in. Marhitei simambu ni pamanganni do libasonni halak sipangodoh-odoh, anjaha marhitei hosah ni bibirni bunuhonni halak parjahat.

- ⁵ Hapintoron do gondit ni binongeini, anjaha hasintongan do bonting ni angkulani.
- ⁶ Jadi rap marianan ma sorigala ampa biribiri, anjaha manggompang begu i lambung ni hambing; rap manggagat ma anak ni lembu pakon anak ni singa, anjaha dakdanak do na marmahan sidea.
- ⁷ Lembu pakon gipul rap manggagat, anak ni sidea rap manggompang, singa mangan poyon-poyon songon lembu.
- ⁸ Dakdanak na inumon marguro-guro i lambung liang ni ulog darih, anjaha dakdanak na sirang minum manjukjukkon tanganni hu ruang ni ulog na marbisa.
- ⁹ Seng be manjahati atap mangagou be sidea bani sab dolog-Ku na pansing in, tongon habotohon pasal Jahowa do manggoki tanoh in, songon bah na manggoki laut.

Parsuang ni Israel ampa Panggomgomion ni Sidea bani Bangsa-bangsa.

- ¹⁰ Bani ari ai roh ma pindah-pindah halak si pajuh begu-begu bani urat ni si Isai, na pinajongjong songon mandera partanda bani bangsa-bangsa, gabe marmulia ma iananni.
- ¹¹ Bani panorang ai ulakan ni Jahowa ma pagostong tangan-Ni, laho manobus

teba-teba ni bangsa-Ni na tading ope i Assur,
i Masir, i Patros, i Etiopia, i Elam, i Sinear, i
Hamat ampa i pulou-pulou na i laut.

¹² Pajongjongon-Ni ma sada mandera partanda
bani bangsa si paju begu-begu, anjaha
patumpuon-Ni ma sagala na binuang
humbani Israel ampa na merap humbani
Juda; ipatumpu do sidea humbani deisa na
ompat i tanoh on.

¹³ Jadi maronti ma parsimburuon ni Efraim,
anjaha iboiskon ma na manosak Juda. Seng
be simburu Efraim bani Juda anjaha Juda
seng be sosakonni Efraim.

¹⁴ Tapi rap ma sidea habang bani raboyon ni halak
Palistim dompak hasundutan, rap do sidea
manrampas dompak halak parhapoltakan.
Edom pakon Moab patundukon ni tangan
ni sidea do, anjaha ginompar ni Amon
mambalosi bani sidea.

¹⁵ Anjaha pahorahon ni Jahowa do laut tador ni
Masir, anjaha ondankonon-Ni tangan-Ni hu
bani Bah Eprat marhitei milas ni hosah-Ni,
anjaha bogbogon-Ni do ai gabe pitu
binanga, gabe boi diparan marsipatu.

¹⁶ Gabe dong ma dalan na bolon sada bani
teba-teba ni bangsa-Ni, na tading hun Assur,
songon na bani Israel sanggah mandarat
sidea hun tanoh Masir.

Doding Puji-pujian ni Halak na dob Maluah

12 ¹ Anjaha hatahononmu ma bani ari ai, “Sihol do pujionku Ham ale Jahowa, ai dob igilai Ham ahu, surut do ringis-Mu anjaha iapohi Ham do ahu.

² Tonggor ma, Naibata do haluahon bangku, tenger do uhurhu anjaha seng mabiar ahu; ai Tuhan Jahowa do gogohku pakon dodingku, anjaha la do gabe hatuahon bangku.

³ Jadi marmalas ni uhur ma nasiam manahui bah humbani bah tubuh haluahon.

⁴ Hatahon nasiam ma bani ari ai, ‘Puji ma Jahowa, dilo ma goran-Ni, patugah nasiam ma pambahenan-Ni i tongah-tongah ni bangsa-bangsa, ingat nasiam ma, timbul do goran-Ni tongon.’

⁵ Mandoding ma nasiam bani Jahowa, ai banggal do na binahen-Ni; sai tarbarita ma on i sab tanoh on.

⁶ Marsurak anjaha marolob-olob ma nasiam na marianan i Sion, ai banggal do i tongah-tongah nasiam Na Pansing ni Israel.”

Parrongrong ni Huta Babel

13 ¹ Pangungkabon pasal Babel, na nididah ni si Jesaya, anak ni si Amos.

- ² Pajongjong hanimma ma mandera partanda bani
dolog na leseng, pagomos ma martaur bani
sidea; hilapkon hanimma ma tangannima, ase
masuk sidea humbani horbangan ni halak
na sangap-sangap!
- ³ Ahu na dob mamarentahkon hubani halak
na Hupapansing, domma Huhara
puanglima-Ku, na roh garang marsurak, laho
padalankon ringis-Ku,
- ⁴ tangar, sora na gosou bani dolog songon sora
ni bala na buei! Tangar, sora na guyu bani
harajaon-harajaon, bangsa-bangsa na roh
martumpu! Jahowa Zebaot patitirhon bala
laho marmunsuh.
- ⁵ Na roh do sidea humbani nagori na daoh,
humbani ujung ni langit, Jahowa ampa
sinjata ni ringis-Ni, laho mamboiskon ganup
tanoh in.
- ⁶ Mandoruh ma hanimma, ai dohor do ari ni
Jahowa, songon hasedaon humbani
Siparkuasa in do parroh-Ni.
- ⁷ Halani ai galek ma sagala tangan, madotei uhur
ni ganup halak, anjaha tarsonggot sidea.
- ⁸ Hajorgongon ampa pangarouon do mandorab
sidea, mangarou do sidea songon naboru na
laho tubuhan tuah, marsinonoan do sidea,
gerger bohini songon narnar.

- ⁹ Tonggor ma, na roh ma ari ni Jahowa, jangin marhasoman gila ampa ringis na gajag, laho mambahen halimisan tanoh in ampa laho mamboiskon pardousa hunjai.
- ¹⁰ Ai sagala bintang na i langit ampa bintang pariama seng be bereonni sinalsalni; golap do mata ni ari bani parpoltakanni, anjaha bulan seng marsinondang.
- ¹¹ Balaskonon-Ku do bani dunia on hajahatonni, ampa bani halak parjahat salahni, parontihonon-Ku ma pangenjengon ni halak si gijang uhur, anjaha patoruhon-Ku do gijang ni uhur ni halak siunsagahkon gogoh.
- ¹² Bahenon-Ku ma jolma jarangan humbani omas pitah, anjaha manisia jarangan humbani omas Opir.
- ¹³ Halani ai dugur ma langit anjaha tanoh on mosor humbani iananni, halani gila ni Jahowa Zebaot bani panorang pargajag ni ringis-Ni.
- ¹⁴ Jadi songon ursa na binuru, anjaha songon biribiri na so marparmahan, mulak ganup sidea bani bangsani anjaha maporus ganup hu nagorini.
- ¹⁵ Sagala na dapot ai itiham, anjaha sagala na tartangkap ai matei ibahen podang.

- ¹⁶ Irosaki do dakdanak ni sidea ididah matani,
hona rampas rumah ni sidea, anjaha na
binuat ni sidea ibutaki.
- ¹⁷ Tonggor ma, pajujuon-Ku ma halak Madai
mangimbang sidea, na so impolan bani
pirak anjaha na so mangkamegahkon omas.
- ¹⁸ Raseihonon ni sior ni sidea do garama-garama,
seng holong uhur ni sidea bani boras ni
boltok, anjaha seng ihargai panonggor ni
sidea dakdanak.
- ¹⁹ Anjaha masa ma bani Babel, bungaran ni
harajaon-harajaon, hamegahon ampa
hamuliaon bani halak Kasdim, songon na
masa bani Sodom ampa Gomora, sanggah
na ibalikkon Naibata ai.
- ²⁰ Seng be iankonon ai lalab atap hundulan ai
marsundut-sundut; seng dong be halak Arab
na marlampolampo ijai, anjaha parmahan
seng be marlampolampo ijai.
- ²¹ Tapi binatang na i halimisan do manggompang
ijai, anjaha langkupa manggoki rumah ni
sidea; marianan do ijai burung unta, anjaha
manortori do ijai setan-setan.
- ²² Baliang harangan do markaing-kaing bani
lopou ni sidea, anjaha sorigala i rumah
bolon ni sidea. Dohor ma roh panorangni,
anjaha seng be paganjangan ari-arini.

Doding Hamegahon Pasal Pardabuh ni Raja Babel

14 ¹ Tongon, marpangulaki do uhur ni Jahowa bani Jakob, anjaha ulakan-Ni mamilih Israel, anjaha pasuangon-Ni sidea hu tanoh ni sidea. Halak panginsolat mangirikkon laho padomu dirini bani ginompar ni si Jakob.

² Anjaha boanon ni sidea ma bangsa-bangsa hubani ianan ni sidea, anjaha ginompar ni Israel ma simada sidea i tanoh ni Jahowa, laho mambahen gabe jabolon dalahi ampa jabolon naboru; sidea do na manahan si partaban ni sidea hinan, anjaha sidea manrajai na mangodoh-odoh sidea hinan.

³ Jadi masa ma bani ari pinasonang ni Jahowa ho, humbani hangalutonmu ampa humbani hasunsahanmu ampa humbani horja rodi na borat, na pinarjabolon ai ho ibagas ai,

⁴ jadi luarhononmu ma salig-salig on dompak raja ni Babel, hatahononmu ma, “Ee! Domma bois si pangodoh-odoh, maronti pangarsik-arsikon!”

⁵ Domma iponggolhon Jahowa tungkot ni parjahat, simambu ni parrajai,

⁶ na mambogbog bangsa-bangsa ibagas gila-Ni, marhitei bogbog-bogbog na so marnamangadi, na manrojati bangsa-bangsa ibagas ringis-Ni, marhitei rojat-rojat na so maralang-alang.

- ⁷ Sonang anjaha mardamei-damei ma sab tanoh on, mariah marolob-olob ma sidea.
- ⁸ Age hayu tusam marmalas ni uhur do pasal ho, sonai hayu ares na i Libanon, nini, “Dobkonsi na gadab in ho, seng dong be na tangkog laho marroboh hanami.
- ⁹ Guyu do nagori toruh halani ho laho mangalo-alo parrohmu; ipuhoi do na dob matei manjalo ho, ipahehe do humbani hotak ni sidea sagala raja ni parbegu.”
- ¹⁰ Ganup sidea marsahap, mangkatahon bani, “Ho pe galek do songon hanami! Gabe doskon hanami do age ho!
- ¹¹ Ipaturun do hamegahonmu hu nagori toruh, hinariah ni husapimu; na masik-masik do podomanmu i toruh, anjaha goya do panrungkubmu.
- ¹² Sonaha do pardabuhmu hun langit, ale bintang parkawas, anak ni buha siang ari! Irobah do ho, marumbak hu tanoh, ho si taluhon bangsa-bangsa!
- ¹³ Ia ho, nim do ibagas uhurmu, ‘Sihol do ahu naik hu langit; i babou ni bintang ni Naibata do pagijangonku paratasku; sihol do ahu hundul i dolog partumpuan, hampit utara sahalian.’
- ¹⁴ Sihol do ahu naik mangatasi hambun, sihol doskon Sitimbulan in do ahu.

- ¹⁵ Hape hu nagori toruh do ho ipatuad, hu luhung tang sibagasan.
- ¹⁶ Halak na mangidah ho, mannonoi ho, anjaha marpingkir pasal ho: Ai on do hape halak na mambahen gobir dunia on, na mandugur harajaon-harajaon,
- ¹⁷ na mambahen dunia on gabe halimisan, na parsedahon huta-hutani, anjaha na so mambere mulak halak na tartaban?
- ¹⁸ Sagala raja-raja ni bangsa parbegu, ganup do tibal marhasangapon, ibagas jeratni bei,
- ¹⁹ tapi anggo ho ibuangkon do, daoh humbani tanomanmu, songon dangkah na hinagigihon, nirungkub ni buei halak na rasei, na hona tikam ibahen podang, na tuad hu godung na nirungkub bani batu, songon bangkei na nirojatan.
- ²⁰ Seng rap pakon sidea ho bani na tartanom ho, halani na dob iparseda ho tanohmu, ibunuh ho bangsamu. Seng be sitarsingatan ronsi sadokah ni dokahni ginompar ni parjahat.
- ²¹ Pasirsir hanima ma bani anakni panayatan halani hasalahan ni bapani; ase ulang mulgap be sidea laho mambuat tanoh in, anjaha igoki sisik ni dunia on bani huta-huta.
- ²² Sihol do Ahu hehe mangimbang sidea, nini Jahowa Zebaot, anjaha sihol do masabkonon-Ku

hun Babel goran ampa teba-teba, tumbor ampa tunas, ihatahon Jahowa.

²³ Bahenon-Ku ma ai gabe parbagianan ni tanggiling ampa tanoh rawang-rawang, anjaha sapuon-Ku ma ai marhitei sapu-sapu hasedaon, nini Jahowa Zebaot.

Bulawan ni Jahowa Mangimbang Assur

²⁴ Domma pala marbulawan Jahowa Zebaot, nini,
“Tongon, songon na Husurahon, sonai do saud, anjaha songon na Hupingkiri sonai do jadi,

²⁵ ai ma sihol ropukon-Ku do Assur i tanoh-Ku, anjaha rojaton-Ku do i atas ni dolog-dolog-Ku, ase tanggal pasanganni humbani sidea, anjaha mosor na pinaporsankonni humbani abarani.

²⁶ Ai ma ranggian na dob iranggihon pasal ganup tanoh in, anjaha ai ma na pinagostong dompak ganup bangsa-bangsa.

²⁷ Ai Jahowa Zebaot do na manranggihon, ise ma na manlangkon ai? Anjaha tangan-Ni na gostong ai, ise ma na manulak ai?

Uhum na Nilumbahon bani Halak Palistim

²⁸ Bani tahun parmatei ni Raja Ahas roh ma pangungkabon on:

- ²⁹ Ulang ma malas uhurmu, ale tanoh Palistim,
hanima haganup, halani maponggol tungkot
na manlonsing ho; ai humbani urat ni ulog
ai luar do upar, anjaha buahni gabe naga na
habang.
- ³⁰ Jumpahan sampalan do bani dolog-Ku halak
na masombuh, anjaha halak na musil
marsonang-sonang marianan, tapi anggo
ginomparmu bunuhon-Ku do marhitei lohei,
anjaha simasimamu raseihonon-Ku do.
- ³¹ Mandoruh ma ale horbangan, mandorak ma
ale huta, gobir-gobir ma, ale tanoh Palistim,
hanima ganup! Ai roh do timus hun utara,
seng dong na pinjil humbani barisanni.
- ³² Naha ma parsampang bani suruhan ni bangsa
parbegu in? Jahowa do na pajonam Sion,
anjaha hujai marhaporusan na sombuh ni
bangsa-Ni.

Lumba-lumba Pasal Parseda ni Moab

15 ¹ Pangungkabon pasal Moab: Tongon,
ibagas saborngin do iparseda Ar-Moab
anjaha iboiskon; tongon, ibagas saborngin
do iparseda Kir-Moab anjaha iboiskon!

- ² Tangkog do boru Dibon hu dolog panombahan,
doruh-doruh; itangisi Moab do huta Nebo
ampa Medeba. Palpalon do ganup ulu,
anjaha isuhur jambek ganup.

- ³ Marhiou guni do sidea mardalani i alaman; i atas tayub ampa i alaman, tangis-tangis do sidea ganup, marsuhap-suhap iluh.
- ⁴ Doruh-doruh do Hesbon ampa Eleale, das hu Jahas tarboge i sora ni sidea; halani ai mandoraki do bala ni Moab, gobir tonduyni ibagas.
- ⁵ Doruh-doruh do uhur-Hu halani Moab; pangungsi ni sidea das do hu Soar, hu Eglat-Selisia; tongon, bani tangkogan Luhit tangis-tangis do sidea manangkogi ai; tongon, bani dalan hu Horonaim doruh-doruh do sidea mardingat hasedaon.
- ⁶ Tongon, bah na hun Nimrim domma halong, poyon-poyon melus, suan-suanan bois, lowoh-lowoh seng dong be.
- ⁷ Ai do ase iusung sidea pansarian na gok ai ampa na pinahumpul-humpul ni sidea mandipari Bah Arabah.
- ⁸ Tongon, sar do tangis-tangis ai hu sab tanoh Moab, das do hu Eglaim doruh-doruh ai, das do hu Beerelim.
- ⁹ Tongon, gok daroh do Bah Dimon, tongon, lobih ni ai ope bahenon-Ku bani Dimon; na maluah hun Moab panganon ni singa do, ronsi teba-teba ni tanoh ai.

Lumba-lumba Pasal Parseda ni Moab (sambatni)

- 16** ¹ Tongos hanima ma guguan na bani raja,
ai ma biribiri, hun huta Sela mamontas
halimisan hu dolog ni boru Sion.
- ² Songon manuk-manuk na margepor-gepor, na
niusir humbani asarni, sonai do boru Moab
bani pandiparan Arnon.
- ³ Bere nasiam podah, bahen haputusan, bahen
linggommumu songon borngin sanggah siang
ni ari; ponopkon nasiam na pinardakdak,
ulang tahihon na maporus,
- ⁴ tondok bani nasiam ma halak na merap hun
Moab, nasiam ma haporusan ni sidea
humbani sipangagou. Anggo seng ijin be
halak sipangodoh-odoh, anjaha maronti ma
hasedaon, anjaha misir sipanrojati humbani
tanoh in,
- ⁵ jadi patotapon ma sada hotak marhitei idop
ni uhur, anjaha hundul ma i atas ni ibagas
hasintongan bani lampolampo ni si Daud
sada panguhum na mangkargai uhum,
anjaha na hinsah mandalankon hapintoron.
- ⁶ Domma ibogei hanami pasal gijang ni
uhur ni Moab, sumbang tumang, pasal
pangenjengonni, pasal hatoalonni, pasal
pangunsagahni ampa sahap-sahapni na
lumei.

- ⁷ Halani ai tangis ma Moab, ganup ma manangisi Moab; tangis ma hanima halani ruti na markismis na hun Kirhareset, sosombopon tumang.
- ⁸ Ai ladang ni Hesbon domma maseda, ampa hayu anggur na i Sibma; raja-raja ni parbegu do marropuki ranting-rantingni; das do ai hu Jaeser, manjuluk i halimisan mangumparpar do ranting-rantingni pala mandipari laut.
- ⁹ Halani ai tangis ma ahu rap pakon par Jaeser, ampa halani hayu anggur ni Sibma; bonsot ma ho hubahen marhitei iluhku, ale Hesbon ampa Eleale, ai domma mangonai surak-surak ni munsuh bani pariamamu ampa buahmu.
- ¹⁰ Anjaha hona buat do malas ni uhur ampa olob-olob hun tongah juma, i pohon anggur seng dong be na marmegah-megah, seng dong na marsurak-surak, seng dong na marhorja ibagas kilang anggur; domma hupasoh surak-surak malas ni uhur.
- ¹¹ Halani ai tangis do tonduyhu songon husapi halani Moab, anjaha uhurhu ibagas halani Kir-Heres.
- ¹² Jadi age pe ipataridahkon anjaha ilojai Moab dirini bani buntu-buntu panombahan, anjaha masuk ia hubagas rumah

panumbahanni laho martonggo, lang dapotan ia.

¹³ Ai ma hata nilumbahon ni Jahowa dompak Moab ijia.

¹⁴ Tapi sonari sonon do nini Jahowa, “Ibagas tolu tahun on, romban hubani tahun ni halak upahan, sipahirion ma hasangapon ni Moab rap pakon hariahonni ganup, anjaha simasimani otik tumang mando anjaha galek.”

Pasal Parseda ni Damaskus ampa Harajaon Israel

17 ¹ Pangungkabon pasal Damaskus, “Tonggor ma, masabkononkon do Damaskus, ase ulang be kota ai, gabe timbunan batu ma ai.

² Tarulang ma huta-huta ni Aroer, gabe ianan ni pinahan-pinahan ma ai, panggompangan bani sidea anjaha ise pe lang be na mangkirjati sidea.

³ Masab ma benteng-benteng hun Efraim ampa harajaon hun Damaskus; anjaha teba-teba ni Aram gabe songon hamuliaon ni Israel ma, nini Jahowa Zebaot.

⁴ Bani ari ai sipaoruon do hamuliaon ni Jakob, anjaha dagingni na mombur ai pamerungan do.

⁵ Sonon ma parjadini, songon panabi na manjormak gandum sisabion anjaha

tanganni manabi buyurni, songon halak na manjomputi buyur i pamah Repaim.

⁶ Tapi dong ope tading turiangni, songon sanggah na mandugur hayu jetun, dua atap tolu daoh i atas, ompat atap lima bani dangkahni, sonai do nini Jahowa, Naibata, pasal Israel.

⁷ Bani ari ai kawahkonon ni jolma in ma na manompasi, anjaha matani mangidah Na Pansing ni Israel.

⁸ Seng be kawahkononni anjapanjap na tinukangan ni tanganni, anjaha na pinauli ni jari-jarini seng be tataponni, ai ma Asera atap gana-ganani mata ni ari.

⁹ Bani ari ai huta na pinatoguhnima ai doskon ianan na tinadingkon ni halak Hefi pakon halak Amori ma ai, ai ma na tinadingkon ni sidea, sanggah maporus i lobei ni halak Israel, gabe tarulang.

¹⁰ Ai ihalupahon ho do Naibata ni haluahonmu, anjaha dolog batu ni hagogohonmu lang idingat ho. Halani ai age ipungkah ho pohon na jenges anjaha isuan ho hujai ranting ni hayu anggur humbani nagori na legan,

¹¹ bani ari isuan ho ai, boi tubuh ibahen ho, anjaha sogod sanggah itidahkon ho ai, marbunga ibahen ho -- tapi magou do pariama ai bani panorang sitaronon ampa pusok ni uhur na so tartambari.”

Partalu ni Assur Ibahen Jahowa

- ¹² Bursik ma! Hageoron ni bangsa-bangsa na buei in, na geor songon pargeor ni laut, pargilumbang ni hajolmaon, na marhasak songon bah marbanggal.
- ¹³ Songon pardorom ni bah marbanggal do pardorom ni bangsa-bangsa, tapi mangonai hata do la bani sidea, gabe maporus ma sidea daoh, mapurpur songon lamlam i buntu-buntu niombus ni logou, anjaha songon orbuk na habang binahen ni halisungsung.
- ¹⁴ Bodari-bodari, tonggor ma, songgot-songgot! Paima siang ari, seng ijin be! Ai ma rupei ni halak na manaban hita ampa parbagianan ni halak na manrampas hita.

Panjahaion Pasal Etiopia

- 18** ¹ Bursik ma tanoh, na gok parngongos na habang, na i dipar ni Bah Kus,
- ² na paingkat suruhanni hun Bah Nil, bani solu hotang mamontas bah! Bingkat ma hanima, ale suruhan na hinsah, bani bangsa parangkula na bolon anjaha na lemes, bani bangsa na hinabiaran ni halak na dohor ampa na daoh, bani sada bangsa na gogoh

anjaha sipartaban, partanoh na binontas ni bah bangga.

³ Hanima haganup pangisi ni dunia on, hanima na marianan i tanoh on, anggo ipajongjong mandera partanda i atas dolog, kawahkon hanima ma ai, anjaha anggo isompul tarompit tangihon hanima ai!

⁴ Ai sonon do hata ni Jahowa hu bangku, “Sipsip do Ahu manorih-norih humbani ianan-Ku, songon milas ni ari bani pardeteng ni mata ni ari, songon hambun na borat musim pariama.

⁵ Tongon, paima pariama, dob salpu panorang marbunga, lape matoras buahni, rotaponni ma dangkahni marhitei pisou pamotong anjaha tagilonni ma ranting-rantingni.

⁶ Tadingkonon ni sidea ma ai ganup bani manuk-manuk panoroh na i dolog ampa bani binatang na i tanoh in. Manuk-manuk panoroh do marianan ijai musim milas, anjaha binatang na i tanoh in do marianan ijai musim borgoh.

⁷ Bani panorang ai marrohan ma sibere-bere bani Jahowa Zebaot, humbani bangsa parangkula na bolon anjaha na lemes, bangsa na hinabiaran ni halak na dohor ampa na daoh, bangsa na gogoh anjaha si partaban, partanoh na binontas ni bah

banggal, hu Dolog Sion, ianan ni goran ni Jahowa Zebaot.”

Panjahaion Pasal Masir

- 19** ¹ Pangungkabon pasal Masir. Tonggor ma, margareta bani hambun na doras do Jahowa, anjaha das ma la hu Masir. Jadi hitir ma si sombah-sombahon ni Masir i lobei-Ni, anjaha malala uhur ni halak Masir ibagas.
- ² Pajobuon-Ku do Masir dompak Masir, ase sidea marsimunsuhan samah sidea sanina dompak sanina, hasoman dompak hasoman, huta dompak huta, harajaon dompak harajaon.
- ³ Sipalumbaon do tonduy ni halak Masir ibagas anjaha georon-Ku do riah ni sidea; jadi sungkun-sungkun ma sidea bani si sombahon ni sidea, ampa bani datu ni sidea, bani paniaran ampa si partondung.
- ⁴ Anjaha ondskonon-Ku do Masir hubagas tangan ni pamarentah na mabisang anjaha raja na koras parrajai bani sidea, nini Tuhan Jahowa Zebaot.
- ⁵ Horah ma bah na bani Nil, marsik anjaha horing ma bah mardalan.
- ⁶ Marbau ma bah hurakan, lambin damok anjaha horah ma bah ni Masir, arung-arung pakon tolong melus.

- ⁷ Sampalan na bani Bah Nil, poyon-poyon na i
topi ni ampa haganup bonih na sinabur ijai,
melus ma, ihabangkon logou gabe seng
dong be.
- ⁸ Marhoru ma si pardengke anjaha marhoih
sagala si pangkail i Bah Nil; anjaha halak si
parjala bani bah ai mangorong.
- ⁹ Jut do uhur ni halak si horjahon tali rami, anjaha
marposi bohi ni si palemes tali rami ampa si
partonun.
- ¹⁰ Marumbak do basikah ni tanoh ai, anjaha
sagala si pangan gaji marhoru.
- ¹¹ Lontong tumang do gamot-gamot na i Soan, ai
ma panuturi na pentar bani Parao, bodoh do
pangajarini. Ija ma boi tarluarhon hanima
bani Parao: Anak ni na maruhur do ahu,
anjaha anak ni raja humbani sapari.
- ¹² Ija do siparuhurnima ai? Ipatugah ma bannima
anjaha ipabotohkon ma, atap aha do
ranggan ni Jahowa Zebaot bani Masir!
- ¹³ Gabe na oto do gamot-gamot na i Soan, anjaha
hona oto-otoan na sangap-sangap na hun
Nop; kahou do Masir ibahen kopala ni
marga-marga.
- ¹⁴ Iuseihon Jahowa do tonduy hakahouon
hubagas uhur ni sidea, gabe ipakahou sidea
do Masir bani sagala pambahenanni songon
si parmabuk na margulu bani utah-utahni.

¹⁵ Gabe seng manjadi horja na hinorjahon i Masir, marhitei ulu atap ihur, marhitei dangkah ni palem atap arung-arung.

¹⁶ Bani panorang ai gabe doskon inang-inang ma halak Masir, gobir anjaha hitir bani tangan ni Jahowa Zebaot, na niondamkon-Ni dompak sidea.

¹⁷ Gabe songgot-songgot ma tanoh Juda bani Masir; anggo itarsingati ai bani, gobir ma ia halani ranggian ni Jahowa, na niranggihon-Ni dompak sidea.

¹⁸ Bani ari ai dong ma lima huta i Masir, na mansahapkon sahap Kanaan anjaha na marbulawan hubani Jahowa Zebaot. Ir-Heres do goran ni sada humbani huta ai.

¹⁹ Bani ari ai dong ma anjapanjap bani Jahowa i tongah-tongah ni tanoh Masir ampa tiang pardingatan bani Jahowa dohorhon parbaloganni.

²⁰ Gabe tanda ampa saksi ma ai bani Jahowa Zebaot i tanoh Masir; anggo doruh-doruh sidea bani Jahowa halani si pangodoh-odoh, jadi tongoson-Ni ma bani sidea sipaluah, anjaha la do marporang laho paluahkon sidea.

²¹ Jadi patandahonon ni Jahowa ma diri-Ni bani halak Masir, anjaha tandaon ni halak Masir ma Jahowa bani ari ai; galangkonon ni sidea ma galangan sisayaton ampa galangan sipanganon, anjaha marbagah-bagah ma sidea bani Jahowa, anjaha suhunan ni sidea do ai.

²² Lonsingon ni Jahowa do Masir, ilonsing tapi itambari; mulak do sidea bani Jahowa, marpangulaki do uhur-Ni bani sidea, anjaha pamalumon-Ni do sidea.

²³ Bani ari ai dong ma pasar hun Masir hu Assur; roh ma Assur hu Masir anjaha Masir hu Assur, rap manombah ma Masir pakon Assur bani Jahowa.

²⁴ Bani ari ai gabe patoluhon ma Israel i lambung ni Masir pakon Assur, jadi pasu-pasu i tongah-tongah ni tanoh on,

²⁵ na pinasu-pasu ni Jahowa Zebaot, nini, “Pinasu-pasu ma Masir, bangsang-Ku, ampa Assur, jadi-jadian ni tangan-Ku, ampa Israel parbagianan-Ku.”

Partalanjangon ni si Jesaya, Tuduh-tuduh dompak na Laho Masa bani Masir ampa Etiopia

20 ¹ Bani tahun parroh ni Tartan hu Asdod, na sinuruh ni si Sargon, raja ni Assur, na mamorang huta Asdod anjaha na patundukkon ai, ² bani panorang ai ma marsahap Jahowa marhitei si Jesaya, anak ni si Amos nini ma, “Laho ma ho, tanggali ma baju guni in humbani binongeimu ampa sipatumin humbani naheimu!” Jadi ibahen ma sonai, mardalan ma ia talanjang anjaha seng marsipatu.

³ Nini Jahowa ma, “Songon juakjuak-Ku si Jesaya, mardalan talanjang anjaha seng marsipatu tolu

tahun dokahni gabe tanda ampa tuduh-tuduh
dompok Masir ampa Etiopia,

⁴sonai ma boanon ni Raja Assur halak na tartaban
hun Masir ampa halak na tarbuang hun Etiopia,
na maposo ampa na matua, talanjang anjaha seng
marsipatu, sae-sae hundulanni, gabe habadoron
bani halak Masir.

⁵Jadi tarsonggot ma sidea anjaha maila halani
Etiopia hatengeran ni uhurni, ampa halani Masir na
pinangunsagahkon ni sidea.

⁶Anjaha halak na marianan i topi laut, hatahononni
ma bani ari ai, ‘Tonggor ma, sonon do hape
na masa bani jolma hatengeran ni uhurta ampa
haporusanta, andohar iurupi anjaha ipaluah hita
humbani raja ni Assur! Sonaha ma tarbahen hita
maluah?’”

Panjahaion Pasal Partalu ni Babel

21 ¹Pangungkabon pasal halimisan laut.
Songon halisungsung na marpuyuh-puyuh
i tanoh dangsina, sonai do parrohni hun
halimisan, humbani tanoh na majangin.

²Pangungkabon na parah do ipatalar bangku,
“Sipanamun manamun, sipanaban
manaban. Tangkog ho, ale Elam! Hubu
ma, ale Madai! Ganup hoih-hoih
parontihononku do!

- ³ Halani ai gok do binongei hu bani na maborit,
pangarouon do mandorab ahu, songon
pangarouon ni parinangon na sihol tubuhan
tuah; mangirput do ahu manangar ai,
malitonduy mangidahsi.
- ⁴ Minggot do huahap, hitir-hitir ibahen songgotni;
panorang bodari na huharosuhkon, gabe
hagobiron do bangku.”
- ⁵ Ipasirsir sidea do sipanganon bani meja,
iamparhon parmadani, mangan minum
sidea. Hehe ma, ale raja-raja! Minaki gantar!
- ⁶ Ai sonon do hata ni Tuhan bangku, “Lao
ho, suruh parjaga marjaga, na nididahni
hatahon ipatugah!
- ⁷ Anggo ididah sipangajak huda na marpasangan
siajak halode, siajak unta, pangkei ma
itangihon ai, pangkei tumang.
- ⁸ Jadi idilohon ma, ‘Bani panungkir-nungkiran do
ahu jongjong, Ham Tuhan, tongtong ari-ari,
anjaha bani parjagaanku do ahu jongjong
ganup borngin.’
- ⁹ Anjaha, tonggor ma, andon roh sipangajak,
huda na pinasang! Jadi ibalosi, itaurhon ma,
‘Domma talu, domma talu Babel, anjaha
sagala gana-gana sisombahon ni sidea
domma irosaki hu tanoh.’
- ¹⁰ Ale bangsangku, na nidogei-dogei anjaha na
nirojatan, na hubogei humbani Jahowa

Zebaot, Naibata ni Israel, ai do hubaritahon bani nasiam.”

Panjahaion Pasal Edom

¹¹ Pangungkabon Pasal Duma. Dong do na dilo-dilo bangku hun Seir, “Ale parjaga, sonaha ma nuan borngin? Ale parjaga, sonaha ma nuan borngin?”

¹² Nini siparjaga, ‘Laho siang ma ari, tapi homa na roh ma borngin.’ Anggo sihol manungkun ope nasiam, roh ma nasiam use laho manungkun.”

Panjahaion Pasal Arab

¹³ Pangungkabon Pasal Arab. Bani harangan ni Arab ma nasiam marborngin, ale partiga-tiga ni Dedan.

¹⁴ Jumpahkon nasiam ma halak na horahan, boan nasiam bah, ale parnagori Tema. Bere nasiam ma ruti bani halak na maporus.

¹⁵ Ai maporus do sidea humbani podang, humbani podang na sinintak, ampa humbani sior na gistang ampa humbani jobu ni parporangan.

¹⁶ Ai sonon do ihatahon Tuhan hu bangku, “Ibagas satahun nari, domu hubani tahun ni anak gajian, jadi bois ma ganup hamuliaon ni Kedar.

¹⁷ Anjaha na teba humbani bilangan ni puanglima siparsior humbani halak Kedar lambin otikni ma, tongon, Jahowa Naibata ni Israel do na mangkatahon ai.”

**Uhum na Mangonai bani Jerusalem
halani Hampung ni Uhurni**

22 ¹ Pangungkabon Pasal Pamah Panonggoran.
Mangaha ho, ase naik ho ganup hu atas tayub,

² ho ale huta na gok surak-surak, na ramei anjaha na marmegah-megah? Na matei ma in, sedo niraseihon ni podang ai, anjaha seng matei i parporangan.

³ Haganup pambobaimu rap do maporus, haganup sidea itangkapi seng pala marsior, ganup do dapot humbam rap-rap do isangkuti, age pe domma daoh sidea maporus.

⁴ Halani ai ningku do, “Padaoh hanima pangkawahnima humbangku. Ulang sai inunut hanima mangapohi ahu pasal hasedaon ni boru ni bangsang-Ku.”

⁵ Ai ari hageoron, hasedaon ampa hasonggoton do ipamasa Tuhan Jahowa Zebaot i pamah panonggoran; tembok na mangkaseda ampa doruh-doruh na maraloling das hu dolog.

- ⁶ Ibuha Elam do parpanahan, ipasirsir gareta pakon huda; ipataridahkon Kir do gantarni.
- ⁷ Habungan pilihanmu igoki gareta porang, anjaha siajak huda mangurup horbanganmu.
- ⁸ Jadi ibuka halak ma onding-onding ni Juda, anjaha bani ari ai mangkawah ma ho bani sinjata na i rumah tombak,
- ⁹ ampa bani rigat ni huta ni si Daud, anjaha ididah hanima ma sonaha bueini; ipatumpu hanima ma bah hun bani
- ¹⁰ anjaha ibilangi hanima rumah na i Jerusalem, iparseda hanima rumah laho patoguhkon tembok.
- ¹¹ Ipauli hanima do bongbongan i holangkolang ni tembok na dua in, partumpuan ni bah humbani bongbongan hinan. Tapi seng mangkawah hanima dompak na mambahensi, anjaha seng ipardiateihon hanima la na mangadongkon in humbani sapari.
- ¹² Bani ari ai idilohon Tuhan Jahowa Zebaot do, ase tangis anjaha doruh-doruh, ase ipalpali uluni anjaha marhiou guni namin,
- ¹³ tapi tonggor ma, malas ni uhur ampa olob-olob, manayati horbou ampa manambolih biribiri, mangan gulei ampa minum anggur, nini sidea: Mangan minum ma hita, ai patar matei ma hita.

- ¹⁴ Domma ipatalar Jahowa Zebaot bangku, “Seng sasapon be hajahatonnima on, paima matei hanima, nini Tuhan Jahowa Zebaot.”

Uhum bani si Sebna

- ¹⁵ Sonon do hata ni Tuhan Jahowa Zebaot, “Laho ma ho mangayaki sijaga arta ai, ai ma si Sebna, kopala ni rumah bolon, anjaha hatahon ma hu bani,
- ¹⁶ ‘Mangaha ho ijon anjaha ise sitanomonmu ijon, ase ihurak ho tanoman bam ijon, ale na mangkurak tanoman bani ianan na gijang anjaha na manuhil ianan ibagas dolog batu?’
- ¹⁷ Tonggor ma, sampakkonon ni Jahowa ma ho gogoh-gogoh, ale halak na bisang. Joroton-Ni ma ho poltik-poltik,
- ¹⁸ parpunukon-Ni ma ho, anjaha gijigkonon-Ni ma ho songon bola hu tanoh na madaoh, daoh tumang. Ijai ma ho matei, anjaha ijai ma gareta hasangaponmu, ho ale sibahen habadoron bani rumah ni tuanmu.
- ¹⁹ Jullakkonon-Ni ma ho humbani hajongjonganmu anjaha humbani hundulanmu dabuhkonon-Ni do ho.”

Bagah-bagah ampa Lumba-lumba bani si Eliakim

- ²⁰ Bani ari ai diloon-Ku ma juakjuak-Ku si Eliakim, anak ni si Hilkia.

- ²¹ Jadi pakeihonon-Ku ma pakeianmu hu bani,
anjaha gonditmu gonditkonon-Ku hu bani;
anjaha kuasamu ondoskonon-Ku hubagas
tanganni, anjaha ia ma gabe bapa bani par
Jerusalem pakon bani ginompar ni Juda.
- ²² Tampeihonon-Ku do anakungsi ni rumah
ni si Daud bani abarani; anjaha ia ma
mangungkab, seng dong na mangkungsi,
anjaha ia mangkungsi, seng dong na
mangungkab.
- ²³ Patotapon-Ku ma ia songon paku bani ianan
na toguh, jadi gabe hotak hamuliaon ma ia
bani ginompar ni bapani.
- ²⁴ Jadi margantung hu bani ma hajojor ganup
ginompar ni bapani, ai ma dangkah pakon
tunas, ganup parugas na etek-etek, pinggan
ampa bongkor.
- ²⁵ Bani ari ai, nini Tuhan Jahowa Zebaot, mullus
ma paku, na dob pinatotap ai bani ianan
na toguh, ponggol anjaha madabuh lanjar
puntar ma boban na bani ai, tongon, sonai
do ihatahon Jahowa.

Panjahaion Pasal Sidon ampa Tirus

23 ¹ Pangungkabon Pasal Tirus: Mandoruhi ma,
ale kapal Tarsis, ai domma iparseda, seng
dong rumah-rumah be. Sanggah mulak hun
tanoh Kittim (*Cyprus*) tarboge ai bani sidea.

- ² Sip ma hanima na marianan i topi laut,
partiga-tiga na i Sidon; suruhanmu do
mandipari laut.
- ³ Manlopusi laut bolag do iboban bam gandum
si Sihor ampa pariama ni Nil, ho do gabe
partiga-tiga ni bangsa-bangsa.
- ⁴ Bador ma ho ale Sidon, ai domma marsahap
laut, benteng ni laut in: Seng be mangarou
anak ahu barang mantubuhkon, seng
pagodang-godang anak garama be ahu atap
anak boru.
- ⁵ Bani na das barita ai hu Masir, tarsonggot ma
sidea songon sanggah na mambogei barita
ni Tirus.
- ⁶ Mandipar ma hanima hu Tarsis, mandoruhi ma
hanima, na marianan i topi ni laut!
- ⁷ Ai on do hutanima na mariah ai, na tinombe
bani na basaia, parbingkatan nasiam laho
manginsolat bani tanoh na daoh?
- ⁸ Ise do na mansurahon sisonai pasal Tirus,
sibagihon sortali-sortali, saudagarni songon
raja-raja, anjaha partiga-tigani halak
pinarsangapan i tanoh on?
- ⁹ Jahowa Zebaot do na mansurahon ai, laho
pahirihon hasangapon na gok hatoalon,
laho patoruhkon halak na banggal i dunia
on.

- ¹⁰ Ornangi ma tanohmu, songon na bani Bah Nil,
ho, ale boru Tarsis; seng dong be kapal.
- ¹¹ Domma ipagostong tangan-Ni hu atas ni laut
in, idugur do harajaon-harajaon, domma
iparentahkon Jahowa pasal Kanaan, laho
mannedahon benteng-bentengni.
- ¹² Anjaha ihatahon do, “Seng be marolob-olob
ho hu lobeian on, ho, ale boru Sidon, na dob
pinadorun. Jongjong ma ho, mandipar ma
hu Cyprus! Ijai pe seng anjai sonang ho.
- ¹³ Tonggor ma, tanoh ni halak Kasdim! In ma bangsa
ai, sedo Assur, na mambahen Sidon gabe ianan ni
sorigala. Ipajongjong sidea do manara pangkubu,
iparseda sidea istana-istana, anjaha mareong do
ibahen sidea huta ai.
- ¹⁴ Mandoruhi ma, ale kapal Tarsis, ai domma
iparseda bentengnima!
- ¹⁵ Bani ari ai, halupahononkon ma Tirus pitu puluh
tahun dokahni songon dokah ni ari-ari ni sada raja.
Tapi dob salpu na pitu puluh tahun ai, masa ma bani
Tirus songon bani doding-doding ni boru jalang.
- ¹⁶ Buat ma husapi, dalani ma huta in, ale boru
jalang na dop hinalupahon! Padear ma
panggiutmu, pabuei ma dodingmu, ase
idingat halak ho use!
- ¹⁷ Ai dob salpu sipitu puluh tahun ai, tohuon ni
Jahowa do Tirus, gabe mulak ma ia marupah
boru jalang; marnriah-riahi do ia pakon

sagala harajaon na i dunia on, na bani sab tanoh on.

¹⁸ Tapi untungni ampa upahni marboru jalang gabe pinapansing do ai bani Jahowa; seng pahumpulon ai atap ponopkononkon, tapi bani na marianan i lobei ni Jahowa do untungni ai, bahen sipanganon marsulei-sulei ampa pakeian na jenges-jenges.”

24 ¹ Tonggor ma, palumeion anjaha parsedaon ni Jahowa ma tanoh in; pabalikon-Ni ma sisikni anjaha pamerapon-Ni pangisini.

² Gabe doskon simbuei ma malim, doskon juakjuak tuan-tuan; doskon jabolon naboru tuan naboru, doskon sipamboli sipanjual; doskon panraih na paraihkon, anjaha na pautangkon dos pakon siparutang.

³ Lungun tumang do tanoh in anjaha bois hona rampas, ai Jahowa do na mangkatahon hata in.

⁴ Horu anjaha melus do tanoh in; mangeruti anjaha hurleh do dunia on; na banggal-banggal,jolma na i tanoh in lambin galek.

⁵ Anjaha butak do tanoh in ibahen pangisini, ai ilanggar sidea do titah, iparnalang aturan anjaha iosei padan sisadokah ni dokahni.

⁶ Halani ai papa do mambondut tanoh in, anjaha pangisini marsitaronon halani panlanggaronni; halani ia imosogkon do

pangisi ni tanoh in, anjaha otik mando jolma na tading.

- ⁷ Marhoru do anggur, melus hayu anggur,
marhoih-koih sagala siparmalas ni uhur.
- ⁸ Mangadi do malas ni uhur binahen ni tambur,
maronti surak-surak ni siparolob-olob,
marsaran megah ni uhur binahen ni husapi.
- ⁹ Seng be mandoding-doding sidea sanggah
minum anggur, siinuman na koras paet do
bani na manginumsi.
- ¹⁰ Domma irumbakkon huta na tarulang in, tutup
do sagala rumah gabe seng tarmasuki.
- ¹¹ Doruh-doruh halani lang dong anggur tarboge
i alaman, sundut do sagala malas ni uhur,
anjaha misir olob-olob na i tanoh in.
- ¹² Hasedaon do tading i huta in, marosak do
horbanganni itondoli.
- ¹³ Ai sonon do sihol masa i tanoh in i tongah-
tongah ni bangsa-bangsa, songon hayu
jetun na nidugur, songon na marturiang dob
salpu pariama buah anggur.
- ¹⁴ Anggo sidea ipagogoh ma sorani marolob-olob,
halani hamuliaon ni Jahowa marsurak-surak
do sidea hun hasundutan.
- ¹⁵ Halani ai pasangap nasiam ma Jahowa, ale
parhapoltakan, nasiam na bani pulou-pulou,
puji nasiam ma goran ni Jahowa Naibata ni
Israel.

- ¹⁶ Humbani ujung ni tanoh on ibogei hanami
do doding puji-pujian: Hasangapon ma
bani Parpintor in. Tapi anggo ahu ningku
do, “Magou ma ahu, bursik ma ahu!”
Halak partahi-tahi mantahihon, tongon
mantahihon do halak partahi-tahi.
- ¹⁷ Hagobiron, godung ampa siding do mangonai
bam, ale pangisi ni tanoh in!
- ¹⁸ Barang ise na maporus halani sora ni
hagobiron, madabuh do hubagas godung,
anjaha atap ise na naik humbagas godung
hona siding do. Ai domma ibuha jandela ni
langit, anjaha idugur onjolan ni tanoh in.
- ¹⁹ Bolah tumang do tanoh in, mangkarigat anjaha
dugur.
- ²⁰ Munjei-unjei do tanoh in songon halak na
mabuk, mambal-ambal songon gayang-
gayang, ai borat do panlanggaronni ai
mardondon bani, gabe dabuh ma ia, anjaha
seng tarjongjongkansi be.
- ²¹ Bani panorang ai marlulu ma Jahowa bani bala
na i atas ai, na i babou, pakon bani raja-raja
ni tanoh on, na i atas tanoh on.
- ²² Rap do sidea patumpuon songon halak na
tartangkap ibagas godung, tutupon do sidea
hubagas tutupan, anjaha dob piga-piga
dokah uhumon do sidea.

- ²³ Jadi maila ma bulan anjaha bador mata ni ari, ai Jahowa Zebaot do Raja i Dolog Sion ampa i Jerusalem, anjaha patalaron-Ni do hamuliaon-Ni, i lobei ni sintua-sintua-Ni.

**Doding Puji-pujian bani Jahowa
Sipasaud Sura-sura-Ni**

- 25** ¹ Ale Jahowa, Ham do Naibatanku; sihol patimbulonku do Ham, sihol pujionku do goran-Mu; ai Ham do sibahen halongangan, sipasaud sura-sura na dob niranggihon humbani sapari ibagas hasintongan ampa habujuron.
- ² Gabe timbunan batu do ibahen Ham huta in, huta na toguh in gabe reong-reong, anjaha istana ni partoloh seng dong be; seng sipaulion be ai lalab.
- ³ Halani ai pasangapon ni bangsa na gogoh ma Ham, anjaha huta ni bangsa na bisang mangkabiari Ham.
- ⁴ Ai Ham do haporusan bani halak na madoyuk, haporusan bani halak na masombuh ibagas hasosakanni, panisioan sanggah haba-haba, parlinggoman sanggah milas ni ari; ai ondaman-ondaman ni halak sipangodoh-odoh doskon haba-haba do sanggah musim borgoh,

- ⁵ doskon milas ni ari bani ianan na horah.
Ipaminop Ham do halutuon ni partoloh,
songon na milas nirungkub ni hambun;
olob-olob ni sipangodoh-odoh ipasip Ham
do.

Pesta Bolon na i Atas Dolog

- ⁶ Jadi bahenon ni Jahowa Zebaot ma bani sagala
bangsa i atas dolog on sada pesta na gok
sipanganon na mataboh, sada pesta na gok
anggur madokah, na gok sipanganon na
mataboh ampa utok-utok, na gok anggur na
madokah anjaha na pitah.
- ⁷ Anjaha pasision-Ni ma i atas dolog on
parrungkub na nirungkubkon bani sagala
bangsa ampa panutup na tinutupkon bani
ganup bangsa parbegu.
- ⁸ Boiskonon-Ni do hamatean ronsi sadokah ni
dokahni, anjaha apusan ni Tuhan Jahowa
do iluh humbani sagala bohi, anjaha
padaohon-Ni do habadoron ni bangsa-Ni
hun sab tanoh on; tongon Jahowa do
mangkatahon in.

Doding Olob-olob halani Pangurupion ni Jahowa

- ⁹ Jadi hatahonon ni halak ma bani ari ai,
“Tonggor ma, on do Naibatanta, na
niarapkonta laho mangurupi hita. On do

Jahowa, na niarapkonta! Marolob-olob anjaha marmalas ni uhur ma hita halani pangurupion-Ni.

¹⁰ Tongon, tampei do tangan ni Jahowa i atas dolog on, tapi sidogeian do anggo Moab bani iananni songon anggala sidogeian ibagas godung parhubungan.

¹¹ Age pe ipaherbang tanganni ibagas ai songon parlanguy na paherbang tanganni marlanguy, tapi patoruhon ni Jahowa do hagijangonni rap pakon hapandeian ni tanganni.

¹² Anjaha batat-batat ni tembokni na gijang ai patoruhon-Ni do ai, ondunon-Ni, sampakkonon-Ni hu tanoh, hubagas orbuk.”

Doding Mangkamalaskon Huta na Niadongkon ni Naibata

26 ¹ Bani ari ai dodingkononkon ma doding on i tanoh Juda: Dong do huta na toguh banta, haluahon do ibahen songon tembokni ampa batat-batarni.

² Buhai nasiam ma horbangan, ase bongkot bangsa parpintor, na manjolom habujuron.

³ Ipatotap Ham do damei bani uhur na marramotkon damei, tongon Bamu do ai marhatengeran.

- ⁴ Martenger ni uhur ma nasiam tongtong bani Jahowa, dolog batu sisadokah ni dokahni do Tuhan Jahowa.
- ⁵ Tongon, ipatoruh do na marianan bani na gijang, bani huta na tinggi. londun do ai, iondun hu tanoh, isampakkon hubagas orbuk.
- ⁶ Dogei-dogeion ni nahei ma ai, nahei ni halak na madorun, langkah-langkah ni halak na masombuh.

**Panramotion ni Naibata bani Bangsa-Ni
ibagas Uhum na Mangonai Tanoh on**

- ⁷ Pintor do dalan ni halak parpintor, hornop do ibahen Ham dalan ni halak parpintor.
- ⁸ Age bani panguhumion-Mu, ale Jahowa, Ham do iarpakon hanami, goran-Mu ampa pardingat Bamu do na hinasiholhon ni tonduynami.
- ⁹ Siholan do tonduyhu Bamu borngin, tonduyhu pe ibagas ahu Ham do tongon ipindahi. Ai anggo ihonai uhum-Mu tanoh on, mintor mangguruhon hapintoron do pangisi ni dunia on.
- ¹⁰ Jumpahan idop ni uhur pe halak parjahat, seng iguruhon hapintoron, i tanoh ni halak parpintor pe mambahen hajahaton do

ia, seng ididah uhurni hatunggungan ni Jahowa.

- ¹¹ Ham Jahowa, timbul do tangan-Mu, tapi seng ididah sidea in; idahon ni sidea ma ai gabe tarbador; pongut ni uhur bani bangsa-Mu ampa apuy sipangan imbang-Mu do mamboiskon sidea.
- ¹² Ale Jahowa, Ham do sibere damei bennami, ai Ham do na mambahen saud sagala pambahenannami.
- ¹³ Ham Jahowa Naibatanami, onggga do irajai tuan-tuan, legan ni Ham hanami, tapi Ham tumang, goran-Mu do idingat hanami.
- ¹⁴ Na matei, seng mulak manggoluh, halinoh seng mulak puho; halani ai do ase marlulu Ham laho mamboiskon sidea, anjaha isasap Ham do ganup pardingatan bani sidea.
- ¹⁵ Itambahi Ham do bangsa in, Ham Jahowa, itambahi Ham do bangsa in; ipatimbul Ham do diri-Mu; ipabolag Ham do parbalogan ni tanoh in.
- ¹⁶ Ham Jahowa, ipindahi sidea do Ham sanggah tarsosak; doruh-doruh do sidea sanggah mangonai ajar-Mu bani sidea.
- ¹⁷ Songon naboru na boratan rumah, na dohor sihol mantubuhkan tuah, na mandodoruh halani mangarou, sonai do hanami halani Ham, ale Jahowa.

- ¹⁸ Boratan rumah do hanami, mangarou do hanami, doskon na mantubuhkon logou do hanami. Haluahon seng tarparoh hanami bani nagori in, anjaha seng dong tubuh siiankon tanoh on.
- ¹⁹ Manggoluh do use na matei-Mu, puho do use bangkei ni sidea. Puho ma anjaha marolob-olob ma, nasiam na marianan ibagas orbuk. Ai namur haliharon do namur-Mu, anjaha padaraton ni tanoh in do use na matei.
- ²⁰ Roh ma, ale bangsangku, masuki ma kamarmu, tutup ma labah i pudimu, ponopkon ma dirimu tongkin paima lopus ringis in.
- ²¹ Ai tonggor ma, luar do Jahowa humbani ianan-Ni, laho manluluhon salah ni halak na mangiankon tanoh on, anjaha patidakkon ni tanoh in ma daroh na madurus bani, anjaha seng rungkubonni na matei tarbunuh i atas ni.

**Parseda ni Parkuasa i Dunia
on ampa Parsuang ni Israel**

27 ¹ Bani ari ai, uhumon ni Jahowa ma marhitei podang-Ni na morsik, na banggal anjaha na gogoh ai, Leviatan, ai ma ulog na lingkai ai, Leviatan, ulog na mangarpei ai, bunuhon-Ni ma naga na i laut ai.

- ² Bani ari ai hatahonon ni halak ma, “Pohon anggur na jenges, dodingkon ma in! Ahu, Jahowa do na marramotkon in, tongtong do Husiram in.
- ³ Ase ulang dong na mansedahonsi, Hujaga do in arian pakon borngin.
- ⁴ Gila seng dong Bangku, tapi anggo jumpah Ahu suga-suga barang hupi-hupi pe, marhitei hamunsuhon, dorabon-Ku ma sidea, mosogkonon-Ku sidea rap-rap,
- ⁵ anggo seng marsijoloman sidea bani pangondingon-Ku, ibahen sidea pardameian Bangku, pardameian ibahen sidea Bangku.
- ⁶ Bani panorang na roh marurat ma Jakob, marbunga Israel anjaha martumbor, gokanni ma sab dunia on bani buah.
- ⁷ Ai ipukul Jahowa do Israel songon pamukul-Ni bani imbang ni sidea? Ai ibunuh do sidea songon pamunuh-Ni bani munsuh ni sidea?
- ⁸ Lang! Marhitei na palahohon, na marsuruh misir sidea, iparingorhon Ham sidea; iusir do sidea marhitei logou-Ni na mapor ai bani panorang ni logou hapoltakan.
- ⁹ Halani ai marhitei on do hona sasap dousa ni Jakob, anjaha on do buahni hasasapan ni dousani: Iropuki ganup batu ni anjapanjap songon batu hapur na nilumatan; seng dong

be na tading jongjong gana-gana ni Asera
ampa tiang panumbahan bani mata ni ari.

¹⁰ Ai huta na pinatoguh domma lungun, gabe
ianan na tarulang anjaha na tinadingkon
songon halimisan; ijai do manggagat lombu,
ijai do ia manggompang anjaha igagati
ranting-ranting.

¹¹ Anggo masak rantingni, iponggoli ma ai;
marrohan ma naboru marsobankon ai. Ai
bangsa na so maruhur do on; halani ai, la na
manompa sidea seng maridop ni uhur bani
sidea, anjaha la na manjadihon sidea, seng
marholong ni uhur bani sidea.

¹² Bani ari ai, dogeion ni Jahowa ma buyur
hun Eprat nari das hu Bah Masir, anjaha
patumpuon ma nasiam marsada-sada, ale
ginompar ni Israel.

¹³ Bani ari ai sompulon ma tarompit na banggal,
jadi mulak ma sidea na magou i nagori
Assur ampa sidea na nierap hu Masir, roh
marsombah bani Jahowa i dolog na ma
pansing i Jerusalem.”

**Uhum na Mangonai bani Samaria, Huta
Pamatang ni Harajaon Parutara ai**

28 ¹ Bursik ma sortali hajengeson ni halak na
mabuk i Efraim, ampa hameluson ni bunga
ni hasangaponni na jagar ai, ai ma na bani

ulu ni pamah na lambutan, ianan ni halak na mabuk binahen ni anggur.

² Tonggor ma, dong do sada na margogoh ampa na markuasa bani Tuhan; songon udan na marambolas do ai, songon halisungsung na mandedahon, songon udan na manalosou, bah na marbanggal, na manimpalhon hu tanoh gogoh-gogoh.

³ Marhitei nahei do lotlotanni sortali hagijangon ni halak na mabuk i Efraim,

⁴ ampa hameluson ni bunga ni hasangaponni na jagar ai, ai ma na bani ulu ni pamah na lambutan, songon buah ni hayu ara na parlobei mabei paima musim milas; anggo adong na mangidah ai, mintor ibondut do daskonsi i tanganni.

⁵ Bani ari ai Jahowa Zebaot ma gabe sortali hamuliaon ampa rudang hajengeson bani na tading humbani bangsa-Ni,

⁶ ampa tonduy habonaron bani halak sidabuh uhum, ampa gogoh bani halak na mangusir munsuh hun horbangan.

**Uhum na Mangonai bani Malim-malim
ampa Nabi na i Jerusalem**

⁷ Age halak on, rebad-rebad do ibahen anggur, anjaha mirdong ibahen siinumon na koras; malim ampa nabi rebad-rebad do ibahen

siinumon na koras, mabuk ibahen anggur;
minggot do sidea halani siinumon na koras,
kahou sidea ibagas na manjahai, anjaha
mugar-ugar uhurni mandabuh uhum.

⁸ Tongon, ganup do meja gok ibahen utah-utah ni
sidea, seng dong ianan na so butak.

⁹ Nini sidea, “Bani ise do sihol ajarhononni
habotohon, anjaha bani ise do sihol
patorangonni pangungkabon? Bani na baru
sirang minum nani, bani na baru ganggang
humbani tadahni?”

¹⁰ Lalab titah, lalab aturan, lalab titah, lalab
aturan, ijon otik, ijai otik.”

¹¹ Tongon, marhitei halak parsahap na so
niarusan ampa parhata na legan do Naibata
sihol marsahap bani bangsa on:

¹² Ia na dob mangkatahon bani sidea, “On do
parsaranan, palopas marsaran na loja in,
anjaha on do ianan hasonangan.” Tapi seng
itangihon sidea.

¹³ Jadi mangonai ma bani sidea hata ni Jahowa
-- lalab titah, lalab aturan, lalab titah, lalab
aturan, ijon otik, ijai otik -- gabe tinggalak
ma sidea sanggah mardalan, maripuk hona
jarot anjaha tartangkap.

¹⁴ Halani ai tangar hanima ma hata ni Jahowa, ale
halak sipanrehei, na marrajai bangsa on, na
marianan i Jerusalem.

- ¹⁵ Ai ihatahon hanima do, “Domma marpadan hanami pakon hamatean, anjaha domma manriah hanami pakon nagori toruh, paboa anggo roh bah marbanggal, seng anjai das ai bennami; ai domma ibahen hanami haporusannami ladung, anjaha pangoto-otoion ibahen hanami parlingodannami.
- ¹⁶ Halani ai sonon do hata ni Tuhan Jahowa, ‘Tonggor ma, Hupatibal do i Sion sada batu onjolan, sada batu na dob niuji, sada batu parsuhi na maharga, bahen onjolan na totap. Barang ise na porsaya Bani, seng anjai tarbador.’
- ¹⁷ Anjaha bahenon-Ku do habonaron gabe bonang arang, anjaha hapintoron gabe tali dondon; anjaha ayubkonon ni udan ambolas do haporusan ladung anjaha bah marbanggal do mambaorhon parlingodan,
- ¹⁸ anjaha masabkononkon do padannima pakon hamatean anjaha seng asi be panriahannima pakon nagori toruh; anggo roh bah marbanggal ai, ropukonni do hanima.
- ¹⁹ Barang piga hali pe ia roh, luahononni do hanima; tongon, siap sogod do ai roh, arian pakon borngin. Anjaha pitah songgot-songgot do mambahen naarusi pangungkabon.

- ²⁰ Ai mapondoktu do podoman sihol tibal
mangintordang ijai, anjaha sabing hurang
bolag parsabingon.
- ²¹ Ai jongjongkonon ni Jahowa ma songon na bani
Dolog Perasim, anjaha gajag ma ringis-Ni
songon na i pamah Gibeon, laho pasaudkon
horja-Ni, tapi ganjil do horja-Ni -- laho
mandobkon lahoan-Ni -- legan humbani na
somal do lahoan-Ni!
- ²² Ai pe, ulang nunut pahiri-hirihon, ase ulang roh
poltikni panangkutnima, ai domma hubogei
hasedaon humbani Jahowa Zebaot, na dob
pinutuskon-Ni bani sab tanoh on."

**Limbaga na Patorangkon Pingkiran
ni Naibata na gok Halongangan ai**

- ²³ Paeleng pinggolmu, tangar sorangku, bogei
anjaha tangar ma hatangku!
- ²⁴ Ai ganup ari do paninggala maninggala laho
martidah? Ai torus do inunut manangkul
pakon manisir tanohni?
- ²⁵ Ai lang sonon do? Dob ipados tanoh ai, ai
lang isaburhon ma longa, itidahkon juragi,
marbaris isuan gandum, anjaha inahkon
jagul bani iananni, anjaha andolei songon
balogni ibahen?
- ²⁶ Sonai do ia ipodahi sintong-sintong, Naibatani
do mangajarisi.

- ²⁷ Tongon, seng marhitei gareta pardogei idogei halak longa, seng galapang ni gareta ibahen halak mardogei juragi, tapi marhitei tungkot do idogei longa, anjaha juragi marhitei bogbog-bogbog.
- ²⁸ Ai iropuki halak do gandum? Lang, seng paturutonni lotlotan ai lalab. Anggo ipadalan galapang ni garetani ampa hudani hunjai, seng iropuk ai.
- ²⁹ Age ai marharorohan humbani Jahowa Zebaot do, halongangan do sura-sura-Ni, anjaha timbul do hapentaran-Ni.

Hona Hubu Jerusalem, tapi Maluah do

- 29** ¹ Bursik ma ho, ale Ariel, ale Ariel, ianan parsaranan bani si Daud hinan. Tambah-tambahi hanima ma tahun pesta in, sai marpestai ma hanima!
- ² Tapi parohon-Ku do hasosakan bani Ariel, gabe masa ma doruh-doruh ampa partangison; gabe doskon Ariel ma ai Bangku.
- ³ Anjaha hubuon-Ku ma ho inggot, sosakon-Ku ho marhitei hubuan, anjaha bahenon-Ku do na mangimbang ho.
- ⁴ Jadi unduk ma ho hun tanoh marsahap, anjaha humbagas orbuk do tarbogei hatamu; soramu songon sora ni begu-begu

humbagas tanoh, anjaha humbagas orbuk
do sahapmu marhusip-husip bogeion.

⁵ Tapi munsuhmu na buei ai gabe songon orbuk
na lumat ma ai, anjaha songon lapa-lapa na
habang ma sipangodoh-odoh na buei ai.
Anjaha sompong, na so panagamon do ai
masa. Jahowa Zebaot do na roh marlulu

⁶ marhitei longgur pakon lalou ampa sora
na banggal, marhitei halisungsung
pakon haba-haba ampa gara ni apuy na
mangankon.

⁷ Gabe songon nipi, songon panonggoran borngin
ma bangsa-bangsa na buei ai, na marporang
dompok Ariel, haganup na marporang
dompaksi ampa dompak batar-batarni
anjaha na manosaksi.

⁸ Songon halak na loheian, na marnipi ia mangan,
hape dob puho seng sombuh loheini iahap,
barang songon halak na horahan, na marnipi
ia minum, hape dob puho, loja ia anjaha
horahni seng miloh: Sonai do bala ni bangsa
ai, na marporang dompak Dolog Sion.

Hapitungon ni Bangsa ai ampa Pambobaini

⁹ Jonong ma hanima anjaha longang, ulang ma
hanima marpangidah, pitung ma! Mabuk
ma hanima, tapi sedo binahen ni anggur,

rebad-rebad ma hanima, tapi sedo halani
siinumon na koras!

¹⁰ Ai domma iuseihon Jahowa bannima tonduy na
pasinok modom, anjaha itutup matanima,
ai ma nabi-nabi ai, anjaha irungkub do
ulunima, ai ma halak na marpanonggoran
ai.

¹¹ Anjaha ganup pangungkabon ai, gabe songon
hata ni buku na nilak do ai bannima, na binere bani
sada halak na mambotoh mambasa, nini, “Basa on!
Jadi ibalosi, ‘Seng tarbahen ahu, ai ilak do in.’

¹² Atap anggo ibere buku ai bani halak na so
mambotoh mambasa, nini, ‘Basa on!’ Jadi ibalosi,
‘Seng hubotoh mambasa surat.’

¹³ Jadi ihatahon Tuhan ma, ‘Halani ipadohor
bangsa on dirini marhitei pamanganni
anjaha ipasangap sidea Ahu marhitei bibirni,
hape uhurni ganggang do hun Bangku,
anjaha biar ni sidea Bangku, domu bani
titah-titah ni jolma, na ginuruhon do hansa,

¹⁴ halani ai, tonggor ma, halongangan do
use bahenon-Ku dompak bangsa on,
halongangan botul-botul; jadi magou ma
hapentaran ni na pentar-pentarni, anjaha
masab hauhuron ni paruhur ni sidea.

¹⁵ Bursik ma halak, na mamonopkon sura-surani
bagas i lobei ni Jahowa, anjaha na
mangkorjahon horjani ibagas hagolapan, na

mangkatahon, 'Ise mangidah hanami? Ise mananda hanami?'

- ¹⁶ Ee hanima sipasuhar haganup! Ai doskon sitopa hudon do tanoh liat ai? Atap hatahonon ni jadi-jadian ma dompak na manjadihonsi: Seng ia manjadihon ahu; atap hatahonon ni na ginana ma dompak na mangganasi: Seng dong hapandeian?''

Habayuon na Banggal ai

- ¹⁷ Ai lang tongkin nari mando ase mubah Libanon gabe juma na lambutan, anjaha juma na lambutan hiraon gabe harangan?
- ¹⁸ Bani ari ai, bogeion ni halak na nengel ma hata na tarsurat, anjaha marpangidah ma mata ni halak na mapitung humbani na golap anjaha na lotir.
- ¹⁹ Anjaha martambah ma malas ni uhur ni halak na martoruh uhur ibagas Jahowa, anjaha halak na masombuh i tengah-tengah ni jolma marolob-olob do marhitei Na Pansing ni Israel.
- ²⁰ Ai bois ma halak sipangodoh-odoh, magou halak sipanrehei ampa haganup na pasura-sura hajahaton,
- ²¹ ai ma na papeol uhum i paruhuman, ampa na manidingi halak sidabuh uhum i horbangan,

anjaha na mandabuhkon halak parpintor
marhitei hasaksian ladung.

²² Halani ai sonon do hata ni Jahowa, na
paluahkon si Abraham, pasal ginompar ni
Jakob, “Seng anjai tarbador be Jakob, seng
anjai marposi be bohini.

²³ Ai anggo ididah sidea jadi-jadian ni tangan-Ku
i tongah-tongah ni sidea, papansingon ni
sidea ma goran-Ku, papansingon ni sidea ma
pakon Na Pansing ni Jakob anjaha habiaran
ni sidea Naibata ni Israel.

²⁴ Anjaha halak na kahou ibagas partonduyon
dapotan uhur pangarusion anjaha
siparungut-ungut ra manjalo podah.”

Hona Pinsang Bangsa ai halani Marhatengeran bani Masir

30 ¹ Bursik ma anak sipanlawan, nini Jahowa,
na mambahen sada sura-sura, na so
marharorohan hun Bangku, anjaha
na mambahen parpadanan, na so
marharorohan humbani tonduy-Hu, gabe
martambah-tambah dousa ibahen,

² na bingkat hu Masir lang palobei marpanungkun
bani pamangan-Ku, laho marlingod bani
pangondingi ni Parao, laho maporus bani
linggom ni Masir.

- ³ Tapi gabe habadoron do bannima pangondingi
ni Parao, anjaha parporusnima bani linggom
ni Masir gabe hahirion.
- ⁴ Age pe domma i Soan raja ni sidea, anjaha
suruhanni das hu Hanes,
- ⁵ ganup do sidea maila marhalanihon ni bangsa
na so marguna bani sidea, na so boi
mambere pangurupion atap untung, tapi
habadoron ampa hahirion do hansa.”
- ⁶ Pangungkabon Pasal Binatang na i Tanoh
Dangsina: Mamontas tanoh na gok habiaran
ampa hasosakan, tanoh harohan ni singa
boru-boru ampa singa tunggal, ulog darih
ampa naga na habang, itaruhkon sidea
do artani i atas gurung ni halode ampa
ugas-ugasni bani gurung ni unta hubani
bangsa na so marguna bani sidea.
- ⁷ Ai pangurupion ni Masir na lang do ai anjaha
sisoya-soya, halani ai do ase hugoran ia:
Binatang na soh-soh.

**Uhum bani Bangsa ai halani Mapas ni
Uhurni bani Hata ni Naibata**

- ⁸ Ai pe, roh ma ho, uhirhon ma ai i lobei ni
sidea bani sada lei, anjaha suratkon ma ai
bani sada buku, ase gabe saksi ma ai bani
panorang na roh ronsi sadokah ni dokahni.

- ⁹ Ai bangsa sipanlawan do sidea, anak siparladung, anak na so ra manangihon pangajarion ni Jahowa,
- ¹⁰ sidea na mangkatahon hubani siparalamat, “Ulang maralamat!” hubani nabi, “Ulang ijahai bennami pasal hasintongan, hatahon ma bennami na madear, jahai bennami na sininta ni uhurnami,
- ¹¹ tadingkon dalan in, lembangi lapang in, ulang be pabogeihon bennami pasal Na Pansing ni Israel!”
- ¹² Halani ai sonon do nini Na Pansing ni Israel, “Halani mapas uhurnima bani hata on, anjaha martenger ni uhur bani pangodoh-odohon ampa haleklukon, anjaha mangunsandei hujai,
- ¹³ halani ai mangonai ma bannima hajahaton on songon rigat na lambin marbolag bani tembok na gijang, na mulai lengleng hu darat, na sihol sompong tompas, ibagas na so panagamon;
- ¹⁴ anjaha parbolahni usih songon parbolah ni hudon tanoh, na iropuki seng maralang-alang, gabe seng jumpah be topik-topik humbani sanga-sangani, ianan mambuat apuy hun tataring atap manahui bah hun bagas parigi.

- ¹⁵ Ai sonon do hata ni Tuhan Jahowa, Na Pansing ni Israel, 'Marhitei na mulak ampa na sip do maluah hanima, marhitei na soh pakon marhatengeran margogoh hanima.' Tapi seng ra hanima,
- ¹⁶ nini hanima, 'Lang!' Rahanan do hanami marhuda lintun, halani ai tongon, maporus ma hanima. Nini hanima ope, 'Huda na doras do ajakonnami, halani ai tongon, doras do na mangayak-ayak hanima.'
- ¹⁷ Saribu halak do hanima maporus halani pangondam ni sada halak; halani pangondam ni lima halak maporus do hanima ganupan, ronsi na tading humbennima ai, songon tiang mandera mando ai i atas dolog, songon alatan i raboyon."

Naibata na Marulak-ulakan Uhur-Ni bani Bangsa-Ni

- ¹⁸ Halani ai paima-imahon do Jahowa, sihol do marulak-ulakan uhur-Ni dompak nasiam; halani ai bingkat do la laho mangidopi nasiam. Ai Jahowa, ai ma Naibata ni uhum, martuah ma ganup halak na martenger ni uhur Bani.
- ¹⁹ Tongon, ale bangsa na i Sion, na marianan i Jerusalem, seng lanjar tangis be nasiam. Maidop do

uhur-Ni mangidah ham mambogei sora ni doruh-doruhmu. Anggo tartangar-Si ai, mintor balosan-Ni do ham.

²⁰ Age pe ibere Tuhan bani nasiam ruti hasosakan ampa bah hasunsahan, tapi seng be ponopkonon ni gurumu be dirini humbani nasiam, tapi idahon ni matamu ma gurumu tongtong.

²¹ Anjaha pinggolmu manangar hata hun pudimu, mangkatahon, “On ma dalan, dalani ma ai! Ulang manimbil hu siamun atap hu sambilou!”

²² Jadi pabutakon nasiam ma ijai gana-gana nasiam na nilampis bani pirak, ampa gana-gana tuangan nasiam na nilampis bani omas. Sampakkonon nasiam ma ai songon ugas na mabutak, anjaha hatahonon nasiam ma, “Misir ma!”

²³ Anjaha bereon-Ni ma udan bani bonih na dob sinaburhonmu hu juma, ampa gandum, gogoh ni juma ai, dear ma anjaha buei. Bani ari ai manggagat ma pinahan nasiam bani sampalan na bolag.

²⁴ Lumbu age halode na mangkorjahon tanoh, panganonni ma gagaton na dob ginaraman, na dob pinaborsih marhitei durung-durung ampa anduri.

²⁵ Anjaha bani ganup dolog na gijang ampa buntu-buntu na banggal dong ma binanga ampa bah mardalan, bani ari pamunuhon bolon, sanggah na mangkarumbak manara-manara.

²⁶ Ambahni ai sondang ni bulan gabe songon sondang ni mata ni ari ma, anjaha sondang ni mata

ni ari pitu hali lompit ma, songon haliharon ni pitu ari ma ai bani ari sanggah Jahowa mambaluti na maponggol humbani bangsa-Ni, anjaha manambari ughani hinorhon ni hona bogbogan.

Uhum bani Bangsa ai

- ²⁷ Tonggor ma, goran ni Jahowa roh humbani na daoh! Gajag do ringis-Ni, parah parjimbun-Ni; bibir-Ni gok do bani gila, anjaha dilah-Ni songon apuy na mangankon;
- ²⁸ hosah-Ni songon bah na marbanggal, na sampur das hu borgok, laho mamiari bangsa sipajuh begu-begu marhitei anduri hamagouan, anjaha mannahkon kokang na pakahouhon bani osang ni bangsa-bangsa.
- ²⁹ Mandoding-doding ma nasiam, songon na marpesta na ma pansing sanggah borngin, anjaha marmalas ni uhur ma nasiam, songon halak na bingkat marhasoman tulila hu dolog ni Jahowa, hu dolog batu ni Israel.
- ³⁰ Anjaha pabogeihonon ni Jahowa ma sora-Ni na marmulia in, anjaha patidakon-Ni do tangan-Ni na tinampulhon-Ni ai marhasoman parah ni ringis-Ni ampa gara ni apuy na mangankon, marhitei haba-haba, udan na manalosou ampa sira-sira.
- ³¹ Gobir ma Assur halani sora ni Jahowa, sanggah na binogbogkon-Ni simambu-Ni bani sidea.

- ³² Anjaha ganup lonsing-lonsing uhum ai,
na nilonsingkon ni Jahowa bani Assur,
ipamasa do ai marhasoman sora ni tambur
ampa husapi, anjaha marhitei tangan na
mawas-awas do iporang sidea.
- ³³ Ai domma dokah hinan sirsir panutungan,
bani raja ai pe ipasirsir do; bagas anjaha
bolag do godung ai, gok tumang bani soban
panutungi; hosah ni Jahowa, na mardalan
songon hirtah na martimpul, ai do na
pagarahon ai.

**Sedo hun Masir, humbani Jahowa
do Harohan ni Pangurupion**

- 31** ¹ Bursik ma halak, na tuad hu Masir
mangindo pangurupion, na marpangajaman
bani huda, anjaha na martenger ni uhur
bani garet a porang halani bueini ai, pakon
bani siajak huda halani gogohni ai; tapi na
so mangkawah bani Na Pansing ni Israel,
anjaha lang marpanungkun bani Jahowa.
- ² Tapi la pe maruhur do, iparroh do hamagouan,
seng mubah la humbani hata-Ni, tapi hehe
do la mangimbang ginompar ni halak
parjahat ampa sibere pangurupion bani
halak sihorjahon hajahaton.
- ³ Jolma do halak Masir, sedo Naibata, daging
do huda ni sidea, sedo tonduy. Anjaha

pagostongon ni Jahowa do tangan-Ni, gabe jiris ma sipanolongi, anjaha targompang ma na tinolongan, anjaha rap do sidea magou.

Uhum bani Assur, tapi Haluahon do bani Sion

⁴ Ai sonon do hata ni Jahowa bangku, “Songon singa atap anak ni singa maraum mandompakkon sisorohonni, anjaha age pe na pahumpul hulanen ni siparmahan manjumpahkansi, seng tarsonggot mambogei surak-surak ni sidea, atap tunduk halani gosou ni sidea, sonai do Jahowa Zebaot susur bani Dolog Sion ampa bani buntu-buntuni laho marporang.

⁵ Songon manuk-manuk na habang, sonai do Jahowa Zebaot laho manjagai Jerusalem, jagaon-Ni do ai anjaha paluahon-Ni, ramotkonon-Ni do ai anjaha pagoluhon-Ni.

⁶ Mulak ma nasiam hu Bani, ale anak ni Israel, na dob tinundalan nasiam ai parah-parah.

⁷ Bani ari ai ganup ma mangambukkon gana-gana pirakni ampa gana-gana omasni, na pinauli ni tangan nasiam laho mambahen dousa.

⁸ Anjaha Assur madabuh ma ibahen podang, seng podang ni jolma; tongon, podang do mangankansi, sedo podang ni manisia; maporus do ia halani podang, gabe halak siparrodi do anak ni sidea.

⁹ Jadi salpu ma batu ginggingni halani biar, anjaha ibagas gobir do pambobaini manadingkon mandera partandani, nini Jahowa simada apuy i Sion ampa simada pamurunan i Jerusalem.”

Pasal Harajaon Hapintoron na Sihol Roh in

32 ¹ Tonggor ma, ibagas hapintoron marrajai sada raja, anjaha pambobai romban hubani habonaron manggomgom.

² Anjaha ganup sidea songon parlingodan humbani logou madoras do, songon panisioan humbani haba-haba, songon bah mardalan bani tanoh na horah, anjaha songon linggom ni dolog batu na banggal i tanoh dorging-dorging.

³ Jadi seng be tutupon mata ni halak na marpangidah, anjaha tangi do pinggol ni halak na marpanangar.

⁴ Uhur na urahtu mambahen haputusan gabe marpartimbangan do, anjaha dilah ni halak na bebet, pandei anjaha torang marsahap.

⁵ Halak na bodoh, seng be igoran halak na sangap, anjaha halak sipangoto-otoi, seng be igoran halak na marmulia.

⁶ Tongon, haotoon do isahapkon halak na oto, anjaha uhurni manguhuri hajahaton, laho mangkorjahon hasamboron, laho

mansahapkon na lepak pasal Jahowa, laho paturutkon holtei-holteian halak na loheian anjaha laho mambuat siinumon humbani na horahan.

⁷ Hajahaton do akal-akal ni siparakal-akal, sai marranggi-ranggi do ia laho mangagou halak na madoyuk marhitei hata ladung, age pe hata sintong ihatahon halak na masombuh.

⁸ Tapi halak paruhur na pitah, hapitahon do ipinghiri, anjaha totap do ia marsijoloman bani na pitah.

Uhum bani Parinangon na i Jerusalem ampa Hasuangon i Pudini ai

⁹ Jongjong ma hanima, ale parinangon na marsonang-sonang, tangar hanima ma hatangku, ale anak boru sipangenjeng, tangihon hanima ma sahapku!

¹⁰ Tar satahun nari hitir-hitir ma hanima ale sipangenjeng, ai salpu ma pambuatan anggur, pariama buah ni hayu seng dong be.

¹¹ Hitir ma, ale parinangon na marsonang-sonang, gobir ma ale anak boru sipangenjeng! Tanggali ma pakeiannima, gabe talanjang ma, gonditi ma binongeinima bani guni!

¹² Marsitompuk tontonni bei ma hanima, halani juma na dear-dear, halani hayu anggur na ramos,

- ¹³ halani tanoh ni bangsangku, na mantubuhkon
hupi-hupi ampa suga-suga, tongon, halani
haganup rumah parmegah-megahan na i
huta na mariah in.
- ¹⁴ Ai tadingkononkon do istana-istana, mangadi
hariahon ni huta, buntu-buntu ampa
manara panjagaan, gabe liang ma lalab,
gabe malas ni uhur bani halode liar,
sampalan bani pinahan,
- ¹⁵ paima iuseihon banta Tonduy na hun datas,
gabe tanoh na lambutan halimisan anjaha
tanoh na lambutan gabe doskon tombak.
- ¹⁶ Marianan ma habonaron i halimisan, anjaha
hapintoron marianan bani tanoh na
lambutan.
- ¹⁷ Buah ni hapintoron ai ma damei, anjaha
pangkorhon ni habonaron ai ma hasonangan
ampa haatokon ronsi sadokah ni dokahni.
- ¹⁸ Jadi marianan ma bangsangku bani ianan
hadameion, bani ianan na sonang, ampa
ianan parsaranan na minop.
- ¹⁹ Anjaha bois do rumbakkononkon harangan ai,
anjaha nepnep tumang do huta ai bahenon.
- ²⁰ Martuah ma nasiam na boi martidah i lambung
ni bah mardalan, anjaha na boi palopaskon
mardalani lembu ampa halode.

**Jahowa do Sipaluah ampa
Raja, na Patorsa-torsa Sion**

33 ¹ Bursik ma, ho na parsedahon, tapi na so pinarseda ope, ampa ho siparrampas, na so hona rampas ope. Anggo salpu ma ho mansedahon, parsedaon ma ho, dob salpu ho manrampas, rampason ma ho.

² Ham Jahowa, maidop ma uhur-Mu bennami, Ham do iarapkon hanami. Sai Ham ma tangan na mangurupi hanami siap sogod, ampa pangurupi bennami bani panorang hasosakan.

³ Halani sora ni hagosouon maporus do bangsa-bangsa, halani parroh-Mu mandorab mambur merap do bangsa sipajuh begu-begu,

⁴ anjaha patumpuon do taban-taban, songon pambuati ni balang, songon parurup ni tamponok, sonai do iurup ai.

⁵ Timbul do Jahowa, ai i babou do la marianan, igoki do Sion bani habonaron ampa hapintoron.

⁶ Sogop ma hubani panorang na sonang, haluahon na marlobih-lobih, hapentaran ampa habotohon, biar bani Jahowa do arta bani Sion.

- ⁷ Tonggor ma, doruh-doruh do i darat halak na i Ariel, suruhan na padameihon tangis sosombopon.
- ⁸ Halong do pasar, maronti pardalanan. Hona osei parpadanan, seng iparduli huta-huta, seng hargajolma.
- ⁹ Horu anjaha melus do tanoh in, maila do Libanon anjaha mangeruti, Saron gabe doskon halimisan, anjaha Basan ampa Karmel mangkatangtang bulungni.
- ¹⁰ Sonari, jongjong ma Ahu, nini Jahowa, sonari, hehe ma Ahu, sonari, bingkang ma Ahu.
- ¹¹ Marhitei anggala do hanima boratan rumah, panabian do itubuhkon hanima, apuy do hosahnima na sihol mangankon hanima.
- ¹² Anjaha tutungon do bangsa-bangsa gabe hapur, anjaha songon suga-suga na nirobok, ipuruni sidea ibagas apuy.
- ¹³ Tangar ma, hanima na daok, pasal na Hubahen, anjaha hanima na dohor, tanda hanima ma gogok-Ku.
- ¹⁴ Mabiak do pardousa i Sion, hagobiron do mandorab halak sipakulah-kulah, nini, "Ise hun banta na boi marianan bani apuy na mamboiskon? Ise hun banta na boi marianan bani gara ni apuy sisadokah ni dokahni?"

- ¹⁵ Ai ma halak na mardalan ibagas hapintoron,
na sintong-sintong marsahap, na
mangkagigihon laba halani odoh-odoh, na
manjaga tanganni, ase ulang ijalo sisip, na
mamitut pinggolni ase ulang ibogei pasal
na manduruskon daroh, na papitpit matani,
ase ulang mangidah na masambor,
- ¹⁶ ai do na marianan bani na gijang, ianan
partahanan bani; ai ma dolog batu, sai
bereon do ruti bani, anjaha bah inumonni
totap do dong.
- ¹⁷ Matamu do mangidah Raja in ibagas
hajengeson-Ni, anjaha tatapon ni sidea do
sada tanoh na lumbang.
- ¹⁸ Dingaton ni uhurmu do hasonggotan ai, nim
ma, "Ija do sipangkira ondi, ija do sijalo
sohei ondi? Ija do sihira manara ondi?"
- ¹⁹ Seng anjai idahonmu be bangsa na jungkat
ai, bangsa siparsahap na ganjil, na so boi
arusanmu, na bebet marsahap, na so boi
artihononmu.
- ²⁰ Kawahkon ma Sion, huta pesta partumpu-
tumpuan banta. Matamu sandiri do na
mangidah Jerusalem, ai ma ianan na
sonang, sada lampolampo na so meser-eser,
pasuk-pasukni pe seng siumpaton ronsi
sadokah ni dokahni, anjaha ganup
parrahutini seng anjai rotaponkon.

- ²¹ Tongon, Jahowa na marmulia in do hasomanta ijai, dong do ijai binanga ampa bah na bolag, seng montas ijai parau silugaan, anjaha kapal na banggal seng mandipar hunjai.
- ²² Tongon, Jahowa do panguhum banta, Jahowa do sibere titah banta, Jahowa do Rajanta, la do na paluahkon hita.
- ²³ Hondur do tali-Ni, seng be ijolomi tiang layar-Ni, seng boi be herbang ibahen layar-Ni. Jadi bagion ma buei taban-taban, gari halak na repat dapotan taban-taban.
- ²⁴ Anjaha sada pe lang pangisini mangkatahon, “Boratan do ahu!” Bangsa na marianan ijai dapotan hasasapan ni dousa.

Uhum ni Naibata bani Edom

- 34** ¹ Roh ma hanima ale sipajuh begu-begu anjaha tangar ma hanima pe, ale bangsa-bangsa, bogei ma! Manangi ma tanoh ampa ganup isini, dunia on pakon sagala na tubuh ijin.
- ² Ai marringis do Jahowa bani ganup sipajuh begu-begu, anjaha manggila bani ganup bala ni sidea. Hona papa do sidea anjaha iondoskon do sidea hu panayatan.
- ³ Marsampakan do halak na rasei humbani sidea, muap do bau ni bangkei ni sidea, anjaha dolog malala ibahen daroh ni sidea.

- ⁴ Masab do haganup bala ni langit, anjaha igulung songon pustaha langit ai, ganup balani hurleh, songon parmelus ni bulung ni hayu anggur, songon parrurus ni bulung ni hayu ara.
- ⁵ Tongon, mabuk do podang-Ku i nagori atas, tonggor ma, turun do ai bani Edom, bani bangsa na pinapaan-Ku laho manguhum ai.
- ⁶ Podang ni Jahowa gok do ibahen daroh, marlimur ibahen taboh-taboh, ibahen daroh ni biribiri ampa hambing tunggal, ibahen taboh-taboh ni piah-piah ni biribiri tunggal. Ai Jahowa do na mangadongkon panggalangan i Bosra ampa panambolihan banggal i Edom.
- ⁷ Anjaha tompas do lembu jalang rap pakon sidea, sonai lembu ampa lembu jonggi, marbah do tanoh ni sidea ibahen daroh, anjaha marlapu-lapu tanohni ibahen taboh-taboh.
- ⁸ Ai Jahowa do na pamasa ari pambalason, tahun marlulu bani Sion.
- ⁹ Mubah do bah ni Edom gabe asal, ladangni gabe hirtah, anjaha tanohni gabe aspal na gara.
- ¹⁰ Borngin age arian seng miloh ai, ronsi sadokah ni dokahni do martimpul timusni; marsundut-sundut do tarulang ai, ronsi

sadokah ni dokahni, seng dong na montas hunjai.

- ¹¹ Sitanda ulog ampa landak do simada ai, langkupa ampa kawak do marianan ijai, ai Jahowa do na pagistang sibar-sibar hasedaon ampa tali dondon halungunon i atas ni.
- ¹² Seng dong be raja sipabangkiton ijai, anjaha ganup na sangap-sangap ni sidea gabe na lang.
- ¹³ Tubuhan tatada do istanani, latong pakon suga-suga do ibagas bentengni; gabe ianan ni sorigala do ai, panggagatan bani burung unta.
- ¹⁴ Pajumpah do ijai binatang halimisan ampa sorigala, anjaha setan-setan samah setan-setan; tongon, begu borngin do marianan ijai, jumpahsi do parsaranan ijai.
- ¹⁵ Marasar do ijai ulog darih, martolur anjaha iposahi bani na linggom; tongon, marurup do ijai kawak, marsiarah-arahan.
- ¹⁶ Pareksa hanimma ma buku ni Jahowa, basa ma: Sada pe lang na tading humbani sidea, sada pe lang na telpang. Ai pamangan-Ni do na mangkatahon ai, anjaha tonduy-Ni do na patumpu-tumpuhon sidea.
- ¹⁷ Ia sandiri do mandabuh ruji-ruji bani sidea, anjaha tangan-Ni do na mambagihon

tanoh ai bani sidea marhitei sibar-sibar;
ronsi sadokah ni dokahni do sidea manean
ai, anjaha marsundut-sundut do sidea
marianan ijai.

Hatuahon ni Bangsa ni Naibata, na dob Pinaluah

- 35** ¹ Marmalas ni uhur ma halimisan pakon
tanoh dorging-dorging, marolob-olob
ma tanoh na lungun anjaha marbunga.
Songon silundat ma ai marbunga, anjaha
marolob-olob; tongon, marsurak-surak
anjaha marolob-olob.
- ² Hamuliaon ni Libanon ibere do bani, sonai
hajagaron ni Karmel ampa Saron. Idahon ni
sidea do hamuliaon ni Jahowa, hajombuton
ni Naibatanta.
- ³ Pargogohi nasiam ma tangan na galek, patotap
towod na rebad-rebad!
- ⁴ Hatahon nasiam ma bani paruhur na galek,
“Tenger ma uhur nasiam, ulang mabiar!
Tonggor ma Naibata nasiam, roh do la
mambalas ampa marlulu; la sandiri do na
roh, laho paluahkon nasiam.”
- ⁵ Bukaon ma ijai mata ni halak na mapitung,
anjaha ungkabon pinggol ni halak na nengel;
- ⁶ manlumpat-lumpat do ijai halak na repat
songon ursa, anjaha marsurak-surak dilah
ni halak na longah; anjaha pultak do bah

i halimisan, sonai age binanga i tanoh
dorging-dorging.

⁷ Gabe tao do horsik na marohop-ohop, anjaha
martubuhan bah i tanoh na horah; ianan
ni sorigala hinan gabe hatubuhan ni tolong
ampa arung-arung.

⁸ Anjaha dong do ijai dalan na bolon, anjaha
igoran do ai dalan na ma pansing; seng
montas hunjai halak na mabutak, tapi
bangsani na mandalani dalan ai do simada
ai; halak na oto pe seng kahou ijai.

⁹ Seng dong singa ijai, anjaha binatang panoroh
seng montas hunjai, seng dong jumpah ai
ijai; tapi halak na pinaluah do mardalan
ijai. Anjaha mulak ma halak na tinobus ni
Jahowa,

¹⁰ roh hu Sion mandoding-doding, malas ni uhur
sisadokah ni dokahni do i atas uluni. Jaloan
ni sidea do hamegahon ampa malas ni
uhur, tapi maporus ma pusok ni uhur ampa
hoih-hoih.

Si Sanherib, Raja ni Assur Mamorang Jerusalem

(Pausih 2 Raj. 18:13-37; 2 Kron. 32:1-19)

36 ¹ Pasapuluhompat-tahunkon dob raja si
Hiskia, tangkog ma si Sanherib, raja ni si
Assur manlawan sagala huta na toguh na i Juda,
anjaha ipatunduk ma ai.

² Jadi isuruh raja ni Assur ma Rabsake hun Lakis hu Jerusalem, laho marayak Raja Hiskia, marhasoman buei bala. Jadi jongjong ma ia bani bondar ni bongbongan na hampit huluan, bani dalan na bolon na laho hu ladang pamurihan.

³ Dob ai luar ma manjumpahkonsi, si Eliakim anak ni si Hilkia, sijaga rumah bolon ai, pakon si Sebna jurutulis ai, ampa si Joah, anak ni si Asap, sipanuturi ai.

⁴ Nini Rabsake ai ma dompak sidea, “Patugah nasiam ma bani si Hiskia, ‘Sonon do hata ni raja na bolon in, raja ni Assur: Ai aha do hatengeran na pinangunsagahkonmin?’

⁵ Nini u hurmu gakni, sungkup ma hata ni bibir tumang gabe haputusan ampa kuasa ibagas hamunsuhon? Ai pe, hubani ise do ho marpangarapan, ase pag ho marbalik humbangku?

⁶ Tonggor ma, mangunsagah do ho bani tungkot tolong na marosak, ai ma Masir, na manolpusi tangan ni jolma na martungkotkonsi. Sonai do pambahenan ni Parao, raja ni Masir, bani sagala na martenger ni uhur bani.

⁷ Tapi anggo porini ihatahon ho hu bangku, “Martenger ni uhur bani Jahowa Naibatanami do hanami,” ai lang ia do ai, na dob iparseda si Hiskia panombahanni na i buntu-buntu ampa anjapanjapni, sanggah na ihatahon bani Juda

pakon Israel: Maningon i lobei ni anjapanjap on do nasiam marrogop?’

⁸ On pe, martaruh-taruh ma ho pakon tuanku, Raja Assur, ‘Hubere ma bam dua ribu huda, atap na boi do tarpasirsir ho na mangajak ai!’

⁹ Ija ma tartahan ho mangimbang sahalak gelah humbani juakjuak ni tuanku sietekan. Martenger ni uhur do ho tene bani Masir, halani gareta pakon bala parhudani?

¹⁰ Ambahni ai, iagan ho na so mangunsagahkon Jahowa do gakni ahu tangkog hu tanoh on, laho parsedahon in? Jahowa do na mangkatahon bangku, ‘Tangkog ma ho hu tanoh in, anjaha parseda ma in!’

¹¹ Dob ai nini si Eliakim pakon si Sebna ampa si Joah ma bani Rabsake, ‘Dearan ma marsahap Aram ham bennami, juakjuakmu on, ai iarusi hanami do in. Ulang ma marsahap Jahudi ham bennami ibogei bangsa in, na i atas tembok in.’

¹² Jadi nini Rabsake ma, ‘Ai hubani tuanmu pakon hu bam gakni ahu isuruh tuanku mangkatahon hata on? Ai lang dihut do bani dalahi na i atas tembok in, na maningon mangankon ginagatni anjaha manginum bah na niinumni rap pakon hanim?’

¹³ Dob ai jongjong ma Rabsake ai ipamaling ma sorani ibagas sahap Jahudi, nini ma, ‘Tangihon nasiam ma hata ni raja na bolon, raja ni Assur!’

¹⁴ Sonon do hata ni raja ai, 'Ulang ma ra nasiam paoto-otoan ni si Hiskia, ai lang tolak ia paluahkon nasiam.'

¹⁵ Anjaha ulang ma ra nasiam ojor-ojuron ni si Hiskia marhatengeran bani Jahowa marhitei na mangkatahon, 'Sai paluahon ni Jahowa do hita, seng anjai ondoskonon-Ni huta on hubagas tangan ni Raja Assur.'

¹⁶ Ulang ma tangihon nasiam si Hiskia, ai sonon do hata ni Raja Assur, 'Mardamei ma nasiam pakon ahu, anjaha luar ma nasiam manjumpahkon ahu, ase ganup nasiam bulih mangan humbani hayu anggurni, ampa humbani hayu arani, anjaha ganup nasiam boi minum humbani parigini,

¹⁷ paima roh ahu mangalop nasiam hu tanoh na songon tanoh nasiam on, hu tanoh hatubuhan ni gandum pakon anggur, hu tanoh na lobihan bani ruti pakon pohon anggur.'

¹⁸ Ulang ma ra nasiam paoto-otoon ni si Hiskia marhitei na mangkatahon, 'Sai paluahon ni Jahowa do hita. Naha, mintor tarpaluah naibata ni bangsa-bangsa ma nagori ni sidea bei humbani tangan ni Raja Assur?'

¹⁹ Ija do naibata ni Hamat pakon Arpad? Ija do naibata ni Separwaim? Ai tarpaluah sidea do Samaria hun tanganku?

²⁰ Ise ma humbani naibata ni nagori ondi na tolak paluahkon nagori ni sidea humbani tanganku?

Mintor tarpaluah Jahowa ma Jerusalem humbagas tanganku?

²¹ Jadi sip ma sidea, seng dong ibalosi age sangkababah hata, ai sonai do parentah ni raja ai, ‘Ulang balosi nasiam ia!’”

²² Dob ai roh ma si Eliakim, anak ni si Hilkia, sijaga rumah bolon pakon si Sebna, jurutulis ai ampa si Joah, anak ni si Asap, panuturi ai, marayak si Hiskia marhiou na marigat, laho patugahkon hu bani, hata ni Rabsake ai.

Parluah ni Jerusalem

(Pausih 2 Raj. 19; 2 Kron. 32:20-23)

37 ¹ Jadi dob ibogei Raja Hiskia hata ai, irigati ma hiouni, isorongkon ma hiou guni, dob ai laho ma ia hu rumah ni Jahowa.

² Dob ai isuruh ma si Eliakim, sijaga rumah bolon, pakon si Sebna, jurutulis ai rap pakon malim situanan, marhiou guni marayak Nabi Jesaya, anak ni si Amos.

³ Nini sidea ma hu bani, “Sonon do hata ni si Hiskia, ‘Ari hasosakan, paminsangon ampa habadoron do ari on. Jumpah ma namin panorangni tubuh na etek-etek, tapi seng dong gogoh laho manubuhkon.’

⁴ Ra ibogei Jahowa Naibatamu do hata ni Rabsake, na sinuruh ni tuanni Raja Assur, laho pahirihon Naibata na manggoluh in, ase ibalaskon hata ai,

na dob binogei ni Jahowa Naibatamu; antong martonggo ma ham mangapiti simasima na tading in ope.”

⁵ Jadi dob das juakjuak ni Raja Hiskia bani si Jesaya,
⁶ nini si Jesaya ma bani sidea, “Sonon ma hatahon nasiam bani tuan nasiam: Sonon do hata ni Jahowa, ‘Ulang ho mabiar pasal hata na dob binogeimu, na dob niapaskon ni juakjuak ni Raja Assur hu Bangku.’

⁷ Tonggor ma, Ahu ma mamberehon bani sada tonduy, ase ibogei barita, gabe mulak hu tanohni, ase Ahu mambahen rasei ia marhitei podang i tanohni sandiri.”

⁸ Mulak ma Rabsake ai, anjaha jumpahsi ma Raja Assur marmunsuh pakon Libna; ai domma ibogei hinan na dob misir raja ai hun Lakis.

⁹ Anjaha dob ibogei si Sanherib pasal si Tirhaka, raja ni Etiopia, “Tonggor ma, domma bingkati ia laho marmunsuh dompak ham, isuruh ma use suruhanni bani si Hiskia, mangkatahon,

¹⁰ ‘Sonon ma hatahon nasiam bani si Hiskia, raja ni Juda: Ulang ma ra ho paoto-otoon ni Naibatamu, na pinangunsagahkonmin, na mangkatahon: Seng ondskononkon Jerusalem hubagas tangan ni Raja Assur.’

¹¹ Tonggor ma, domma ibogei ho na binahen ni Raja Assur hu bani ganup nagori laho marraseihon sidea. Mintor tumaram ma maluah ia ho?

¹² Tarpaluah naibata ni bangsa-bangsa ai do sidea, ai ma bangsa-bangsa na siniapkon ni ompungku: Gosan, Haran, Resep ampa halak na i Eden, na marianan i Telasar?

¹³ Ija do raja ni Hamat, raja ni Arpad, raja hun huta Separwaim, Hena pakon Iwa?"

¹⁴ Jadi ijalo si Hiskia ma surat ai hun tangan ni suruhan ai, anjaha ibasa ma ai, dob ai tangkog ma ia hu rumah ni Jahowa anjaha ipaherbang si Hiskia ma surat ai i lobei ni Jahowa,

¹⁵ anjaha martonggo ma si Hiskia hubani Jahowa, nini ma,

¹⁶ "Ham Jahowa Zebaot, Naibata ni Israel, na marparatas bani herubim! Sahalak Ham do Naibata ni haganup harajaon na i tanoh on! Ham do na manompa langit pakon tanoh on.

¹⁷ Paeleng Ham ma pinggol-Mu, ale Jahowa, anjaha tangar ma! Ungkab Ham ma panonggor-Mu anjaha tonggor ma! Tangar Ham ma haganup hata ni si Sanherib, na tinonahkonni laho pahiri Naibata na manggoluh in.

¹⁸ Tongon do, ale Jahowa, domma iboiskon raja ni Assur haganup bangsa-bangsa ampa nagori ni sidea.

¹⁹ Anjaha domma igijigkon hubagas apuy naibata ni sidea ai, ai seng tongon Naibata ai, tapi jadi-jadian ni tangan ni jolma do, hayu pakon batu, halani ai do ase iparseda sidea ai.

²⁰ On pe, Ham Jahowa, Naibatanami, paluah Ham ma hanami humbani tanganni, ase itanda haganup harajaon na i tanoh on, paboa Ham do Jahowa, Ham tumang.”

²¹ Dob ai isuruh si Jesaya, anak ni si Amos ma na mangkatahon bani si Hiskia sonon, “Sonon do hata ni Jahowa Naibata ni Israel, ‘Domma Hutangihon tonggomu na hu Bangku pasal si Sanherib, raja ni Assur.’

²² On do hata na hinatahon ni Jahowa pasalsi, ‘Pis do uhurni mangidah ho, iapasi anak boru, boru Sion do ho, iupir-upirhon boru Jerusalem do uluni i pudimu.’

²³ Ise do na nirehean pakon na niapasanmin?

Dompak ise do na pinamalingmin soramu, anjaha ipatingkal ho matamu? Dompak Na Pansing ni Israel do.

²⁴ Marhitei juakjuakmu iapasi ho do Jahowa, anjaha ihatahon ho, ‘Rap pakon garetanku na buei in naik do ahu hu atas ni dolog, daoh das hu Libanon; huroboh do hayu aresni sigijangan ampa marantini sidearan; das do ahu bani pakpakni si atasan ampa hubagas haranganni sipotpota.’

²⁵ Huhurak do parigi anjaha huinum do bah na legan; anjaha huarsik do marhitei tapak-tapak ni naheihu ganup bah i Masir.

- ²⁶ Seng ope ibogei ho? Na dob Hutotapkon hinan,
anjaha na dob Huranggihon humbani na
basaia, ai ma na Hupamasa sonari, ase
isiapkon ho huta na toguh gabe timbunan
batu,
- ²⁷ anjaha pangisini ai, na so margogoh ai, gabe
tarsonggot anjaha gaor, anjaha gabe songon
suan-suanan na i ladang, anjaha gabe
songon poyon-poyon na galek, songon
poyon-poyon na i atas tayub anjaha songon
gandum na hahorahan.
- ²⁸ Tapi Hubotoh do parjongjongmu pakon
parhundulmu, pardaratmu pakon
parmasukmu, ampa pangoga-ogamu
Bangku.
- ²⁹ Halani mangoga ho dompak Ahu anjaha
das bani pinggol-Hu hajungkatonmu,
bahenon-Ku ma halihir bani igungmu pakon
rantei bani bibirmu, anjaha paulakon-Ku do
ho humbani dalan harohanmu.
- ³⁰ On ma tanda bam, ale Hiskia, 'Panganonmu
ma omei sagak tahun on pakon bani tahun
paduahon; patolu-tahunkon martidah ma hanima
anjaha marpariama, manuan hayu anggur anjaha
mangankon buahni.'
- ³¹ Anjaha simasima na maluah humbani ginompar
ni Juda, marurat ma use hu toruh anjaha marbuah
hu atas.

³² Ai hun Jerusalem do luar sada simasima, anjaha hun Dolog Sion sada hulanan na pinaluah. Ringis ni Jahowa Zebaot do sibahen in.

³³ Halani ai sonon do hata ni Jahowa pasal raja ni Assur, 'Seng anjai masuk ia hubagas huta on, atap siorhononkon sada lingkit hujon, barang roh ia hu lobei ni huta on margantar atap bahenonni hubuan inggot huta on.'

³⁴ Maningon humbani dalan harohanni ai ia mulak, tapi seng anjai masuk ia hubagas huta on, nini Jahowa.

³⁵ Ai sihol ondingan-Ku do huta on laho paluahkonsi, halani Ahu sandiri pakon halani juakjuak-Ku si Daud."

³⁶ Jadi luar ma malekat ni Jahowa, gabe ibunuh ma i parsaranan ni halak Assur saratus ualuh puluh lima ribu halak. Jadi dob puho sidea girah patarni ai, tonggor ma, domma gabe bangkei ganup.

³⁷ Dob ai bingkat ma si Sanherib, raja ni Assur mulak hu hutani, anjaha marianan ma ia i Ninive.

³⁸ Jadi sanggah na manumbah ia i rumah ni Nisrok, naibatani ai, ibunuh anakni si Adramelek pakon si Sareser ma ia marhitei podang; dob ai maporus ma sidea hu tanoh Ararat, anjaha si Asar-Hadon, anakni ai ma bangkit raja manggantihsi.

**Naborit ni Raja Hiskia, Parmalumni
ampa Hata Puji-pujianni**

(ay. 1-8, 21, 22: pausih 2 Raj. 20:1-11; 2 Kron. 32:24)

38¹ Bani panorang ai boritan ma si Hiskia, narus-narus matei. Jadi roh ma Nabi Jesaya, anak ni si Amos marayaksi, nini ma dompaksi, “Sonon do hata ni Jahowa, ‘Patorsa ma rumahmu, ai matei ma ho, seng manggoluh be.’

² Jadi ipahusor si Hiskia ma bohini dompak dingding, martonggo bani Jahowa;

³ nini ma, ‘Ham Jahowa, ingat Ham ma naha ahu marpangabak i lobei-Mu ibagas hasintongan, ibagas bulat ni uhur, anjaha hudalankon do aha na madear i lobei ni bohi-Mu.’ Anjaha gogoh-gogoh do tangis si Hiskia.

⁴ Dob ai roh ma hata ni Jahowa bani si Jesaya, sonon,

⁵ ‘Laho ma ho anjaha hatahon ma bani si Hiskia: Sonon do hata ni Jahowa, Naibata ni si Daud, ompungmu: Domma Hutangihon tonggomu, domma Huidah iluhmu, tonggor ma, tambahkonon-Ku ma umurmu sepuluh lima tahun nari.

⁶ Paluahon-Ku ma ho pakon huta on humbagas tangan ni Raja Assur, anjaha ondingan-Ku do huta on.

⁷ Anjaha on do tanda humbani Jahowa bamu, paboa pasaudon ni Jahowa do hata na hinatahon-Ni ai.

⁸ Tonggor ma, paulakon-Ku ma dompak pudi sapuluh garis halinoh ni mata ni ari na bani jam ni si Ahas ai.” Jadi mulak ma tongon sapuluh garis dompak pudi halinoh ni mata ni ari na dob turun ai.

⁹ Surat ni si Hiskia, raja ni Juda, sanggah boritan ia anjaha malum ia use humbani naboritni ai,

¹⁰ “Ningku do, bani parsitongahan ni ari-aringku do ahu misir. Bani horbangan ni nagori toruh do ahu iondoskon. Ibuati do ari-ari ni goluhku.

¹¹ Ningku do, ‘Seng be idahonku Jahowa bani tanoh ni halak na manggoluh, seng be idahonkujolma i tongah-tongah ni na mangiankon dunia on.’

¹² Irumbakkon do barung-barungku, ibuat humbangku songon lampolampo ni parmahan; songon partonun, sonai do ibalun goluhku, irotap do ahu humbani tali-Ni. Arian pakon borngin sai ipaturut Ham do ahu. Doruh-doruh do ahu ronsi sogod,

¹³ songon singa do la mamparpongol holi-holingku, arian pakon borngin do ipadob Ham ahu.

- ¹⁴ Songon manuk-manuk layang-layang do ahu
marditit-ditit, marduhur-duhur songon asas.
Loja do matangku mangkawah dompak
babou. Ham Jahowa, hona odoh-odoh do
ahu, Ham ma pangondingi bangku.
- ¹⁵ Aha ma hatahononku? Ai domma isahapkon ai
bangku, anjaha ai do ipasaud. Maporus do
humbangu sura sihol modom, halani pusok
ni uhurhu.
- ¹⁶ Ham Jahowa, maronjolan hujai do goluh
nijolma, anjaha ibagas ai do goluh ni
tonduyhu, sai pajorgit Ham ma ahu, anjaha
pagoluh Ham ma ahu.
- ¹⁷ Tonggor ma, gabe hatuahon do bangku paet
ni pangahapanku; anjaha Ham do na
marramotkon tonduyhu humbani godung
hamagouan, ai isampakkon Ham do ganup
dousaku hu pudi-Mu.
- ¹⁸ Ai pe seng tarpuji nagori toruh Ham, seng
tarpasangap hamatean: anjaha sagala na
dob manuruk tanoman seng tarbahen
mangarap bani hasintongan-Mu.
- ¹⁹ Halak na manggoluh, do mamuji Ham songon
na hubahen sadari on. Bapa hubani anakni
patugahkon hasintongan-Mu.
- ²⁰ Jahowa do sipaluah bangku, halani ai
marhusapi ma hita mamuji-muji sadokah
goluhta i rumah ni Jahowa.

²¹ Dob ai nini si Jesaya ma, ‘Boan ma hujon buah ara na hinarei, lapuhon ma ai bani bayoh ai, ase malum ai.’

²² Anjaha nini si Hiskia ma, ‘Aha ma tanda paboa na tangkog ma ahu hu rumah ni Jahowa?’”

Suruhan na hun Babel

(Pausih 2 Raj. 20:12-19; 2 Kron. 32:25-31)

39 ¹ Bani panorang ai isuruh si Merodak-Baladan, anak ni si Baladan, raja ni Babel ma suruhanni mamboan surat pakon siluah bani si Hiskia, halani ibogei boritan ia anjaha jorgit use.

² Jadi malas ma uhur ni si Hiskia mangidah sidea, gabe ipatuduhkon ma bani sidea rumah parartaanni, pirak, omas, morum-moruman, minak na misbou, rumah parsinjataanni pakon haganup na dong bani i rumah parartaanni. Seng dong na ibagas rumahni ampa na bani sab gomgomanni na so ipatuduhkon si Hiskia bani sidea.

³ Dob ai roh ma Nabi Jesaya marayak Raja Hiskia, nini ma dompaksi, “Aha do hinatahon ni halak in, anjaha hunja do sidea na roh in marayak ham? Nini si Hiskia ma, ‘Hun nagori na daoh do sidea na roh in marayak ahu, hun Babel.’

⁴ Nini ma, ‘Aha do na nididah ni sidea i rumahmu?’ Nini si Hiskia ma, ‘ididah sidea do ganup na ibagas rumahku, seng dong na ibagas rumah parartaanku na so hupatuduhkon bani sidea.’

⁵ Dob ai nini si Jesaya ma dompak si Hiskia, 'Tangihon ma hata ni Jahowa Zebaot.'

⁶ Tonggor ma, na roh ma panorangni, tarboan ma ijai hu Babel sagala na i rumahmu ampa sagala na pinahumpul ni ompungmu ronsi sadari on, seng dong na teba, nini Jahowa.

⁷ Anjaha deba humbani anakmu na tubuh bamu, boanonni do, gabe siparugas i rumah ni Raja Babel.

⁸ Jadi nini si Hiskia ma dompak si Jesaya, 'Dear do hata ni Jahowa na niluarhonmu ai.' Ai nini ibagas uhurni, 'Asal ma sonang anjaha mardamei sadokah goluhku!'"

Apoh-apoh ni Naibata bani Bangsa-Ni, na Tarbuang ai

40 ¹ Apohi, apohi hanim ma bangsang-Ku! nini Naibata nasiam.

² Hatahon hanim ma ibagas halamlamon bani Jerusalem, anjaha dilohon ma hu bani, paboa marpunsa ma parjabolongan bani, domma isasap salahni, domma ijalo humbani tangan ni Jahowa lompit dua gantih ni ganup dousani.

³ Sora na dilo-dilo, 'Pasirsir dalam ni Jahowa i halimisan, bahen pintor dalam na bolon bani Naibatanta i tanoh dorging-dorging!'

⁴ Ganup lombang pagijangon do, anjaha patoruhon ganup dolog ampa buntu-buntu;

tanoh na marholbung-holbung padosdoson
do, anjaha gabe pamah dolog batu.

⁵ Jadi talar ma hamuliaon ni Jahowa anjaha
sagala daging do mangidah ai, haganup ai
pamangan ni Jahowa do mangkatahon ai.

⁶ Sada sora mangkatahon, 'Dilohon ma!'
Jadi ningku ma, 'Aha ma dilohononku?'
Poyon-poyon do sagala daging anjaha ganup
hinajengesni ai usih bani bunga na i talun.

⁷ Melus do poyon-poyon ai, marurus bungani,
anggo mangombus Tonduy ni Jahowa
hunjai; tongon, poyon-poyon do bangsa in.

⁸ Melus do poyon-poyon ai, marurus bungani,
tapi anggo hata ni Naibatanta totap do ronsi
sadokah ni dokahni.

⁹ Bani dolog na gijang ma ho tangkog, ale Sion,
siboan ambilan malas ni uhur! Pamaling ma
soram, ale Jerusalem, siboan Ambilan Na
Madear, sai pamaling ma, ulang ho mabiar!
Hatahon ma bani huta ni Juda, 'Tonggor ma,
andin do Naibatanimi!'

¹⁰ Tonggor ma, Tuhan Jahowa, roh ibagas
hagogohon, anjaha tangan-Ni sandiri do
na mandalankon kuasa Bani; tonggor ma,
irik do hubani upah-Ni anjaha na sinari-Ni
mardalan i lobei-Ni.

¹¹ Parmahanon-Ni do hulanan-Ni songon
parmahan, marhitei tangan-Ni ipatumpu

sidea; iusung do anak ni biribiri ibagas
abingan-Ni, anjaha nanget do itogu-togu na
marmurik.”

Timbul Anjaha Pargogoh Na So Tarimbang do Naibata Sipaluah Israel

- ¹² Ise do na boi manuhati sagala bah marhitei
nangging-nanggingni? Ise do na boi manibar
langit marhitei jongkal-jongkalni? Ise do na
boi marsuhat orbuk ni tanoh on, anjaha
ise do na boi manimbang dolog marhitei
timbangan atap buntu-buntu marhitei
dasing?
- ¹³ Ise do na boi manibar Tonduy ni Jahowa,
anjaha songon sada halak panuturi iajari Ia?
- ¹⁴ Ise panungkunanni laho mambere uhur bani,
anjaha na patuduhkon bani dalan ni uhum,
na mangajarhon bani habotohan anjaha
dalan ni pangarusion ipabotohkon bani?
- ¹⁵ Tonggor ma, sagala bangsa usih do bani
santektek bah na bani ember, anjaha ihira
doskon orbuk na longkot bani timbangan;
tonggor ma, ijomput do pulou-pulou doskon
sangkamata horsik.
- ¹⁶ Hayu ni Libanon seng sungkup bahen soban,
anjaha sagala binatangni seng sungkup
bahen galangan situtungan.

- ¹⁷ Sagala bangsa doskon na lang do i lobei-Ni,
hurang humbani na lang do sidea ihira,
sabonar na lang do.
- ¹⁸ Bani ise do pausihon nasiam Naibata, atap
hubani aha do pausihon nasiam la?
- ¹⁹ Gana-gana ai! Tuhang do na manuang ai,
anjaha tuhang omas manlampiskon omas
hujai, anjaha marrantei-rantei pirak do ai
ibahen.
- ²⁰ Halak na so boi mambere sisonai, ipilih ma
hayu na so ra masik bani, ipindahi ma sada
tukang na pandei laho patureihon sada
gana-gana na so ra miut bani.
- ²¹ Ai seng ibotoh nasiam? Ai seng ibogei nasiam?
Ai lang domma ipatugah ai bani nasiam
humbani mungkahni? Ai lang domma iarusi
nasiam ai humbani parjonam ni tanoh on?
- ²² Ia do marhotak i babou ni tanoh on, anjaha
na mangiankon on doskon balang do. Ia do
na paherbang langit songon hiou anjaha na
paamparhon ai songon lampolampo bahen
siianonkon;
- ²³ Ia do na manlangkon raja-raja, panguhum ni
tanoh on gabe sisoya-soya ibahen.
- ²⁴ Ai pe sidea isuan, ai pe itidahkon, ai pe
mamunkah marurat hubagas tanoh, anggo
roh la manompul sidea, mintor melus

do sidea, anjaha habang sidea ibahen
haba-haba songon lamlam.

²⁵ Bani ise do pausihonnima Ahu, anjaha usih hu
hujai, nini Na Ma Pansing in?

²⁶ Kawahkon nasiam ma hu babou, anjaha
tonggor ma, ise do na manompa in? Ia do
na padarat balani marbilangan, na mandilo
sidea ganup bani goran-Ni. Halani hinagok ni
kuasa-Ni, anjaha habanggalon ni gogoh-Ni,
sada pe lang ai magou.

²⁷ Mase ma isahapkon ham, ale Jakob, anjaha
ihatahon ham, ale Israel, "Ponop do dalanku
humbani Jahowa, anjaha Naibatanku seng
parduli bani parkarangku?

²⁸ Ai seng ibotoh ham, atap seng ibogei ham,
Naibata sisadokah ni dokahni do Jahowa,
sitompa ujung ni tanoh on? Seng ra loja la
atap ngayotan, seng tarsibar pingkiran-Ni.

²⁹ Ia do na mambere gogoh bani halak na loja,
anjaha halak na so margolle ibahen do
hinsah.

³⁰ Loja pe garama anjaha ngayotan, anjaha
mangkatompas halak na maposo,

³¹ tapi halak na martenger ni uhur bani
Jahowa jumpahan gogoh mardapot-dapot,
anjaha marhabong ni haluhuy do sidea
naik; marlintuni pe sidea tapi seng

marnaloja, mardalani pe sidea, tapi seng marnangayotan.”

**Marguru bani Naibata do na
Masa bani Bangsa-bangsa**

- 41** ¹ Sip ma hanima manangihon Ahu, ale sagala pulou, anjaha hanima bangsa-bangsa, pabayu ma gogohnima. Roh ma sidea hun dohor, ihatahon ma, “Rap ma hita marayak paruhuman.”
- ² Ise do na mamuhoisi hun hapoltakan, na jumpahan hamonangan bani ganup langkahni? Ise do na mangondoskon bangsa sipajuh begu-begu hu lobeini, anjaha ibere kuasa bani marrojati raja-raja? Doskon orbuk do sidea ibahen podangni, anjaha songon lamlam na sinaburhon sidea ibahen siorni.
- ³ Ipardakdak do sidea, anjaha sonang do ia montas, bani dalan na so ongganidogei naheini.
- ⁴ Ise do na mambahen pakon na mandalankon ai? Ise do na mandilo sundut ni jolma humbani mungkahni? Ahu do, Jahowa, na parlobei anjaha na parpudi, Ahu do ai.
- ⁵ ididah pulou do ai gabe mabiar, ujung ni tanoh on gobir do; roh ma sidea hundohor anjaha martumpu-tumpu ma.

- ⁶ Ganup sidea marsiurupan, anjaha nini dompak hasomanni, “Tenger ma uhurmu!”
- ⁷ Tuhang bosi pahinsahon tuhang omas, sonai sijolom parpalu bani halak siantuk nanggar, mangkatahon bani pamodi, “Dear ma ai.” Jadi ipatoguh ma ai marhitei paku, gabe seng be miut-iut.

**Iramotkon Naibatani do
Bangsa-Ni halani Goran-Ni**

- ⁸ Tapi ho, ale Israel, juakjuak-Ku ho ale Jakob, na dob Hupilih in, ginompar ni si Abraham, huan-kuan-Ku ai,
- ⁹ ho na dob Hualop hun ujung ni tanoh on, anjaha Hudilo hun tampakanni, anjaha domma Huhatahon bam, “Juakjuak-Ku do ho, Ahu do mamilih ho, anjaha seng ambukkonon-Ku ho.
- ¹⁰ Ulang ho mabiar, ai Ahu do hasomanmu, ulang ho rusak, ai Ahu do Naibatamu. Hupargogohi pe ho, tongon Huurupi pe ho, tongon Hutatang pe ho marhitei tangan-Ku siamun na marhamonangan in.
- ¹¹ Tonggor ma, maningon maila anjaha bador do sagala halak na marah dompak ho; halak na mambahen partinggilan bam, masab anjaha magou do.

- ¹² Pindahanmu do sidea, na manlawan ho ai, tapi seng jumpah ho be sidea; gabe na lang do sidea anjaha magou, sidea na mammunsuhi ho ai.
- ¹³ Ai Ahu, Jahowa Naibatamu do, na manjolom tanganmu siamun; Ahu do na mangkatahon bam, 'Ulang mabiar, Ahu do na mangurupi ho!'
- ¹⁴ Ulang ho mabiar, ale goya Jakob, ale Israel hulanan na etek-etek! Ahu do na mangurupi ho, nini Jahowa; Na Pansing ni Israel do Sipaluah bam.
- ¹⁵ Tonggor ma, bahenon-Ku do ho gabe gareta pardogei na baru, na marot anjaha na maripon; dogeionmu do dolog anjaha parropukonmu do ai, anjaha gabe lapa-lapa do bahenonmu buntu-buntu.
- ¹⁶ Piaranmu do sidea, anjaha luahonon ni logou do sidea, haba-haba do mangerap sidea. Tapi anggo ho marolob-olob do ibagas Jahowa, mamuji-muji ibagas Na Pansing ni Israel.
- ¹⁷ Halak na madoyuk na masombuh mangindahi bah, hape seng dong, horah do dilah ni sidea ibahen horahni, Ahu Jahowa, manangihon sidea, Ahu Naibata ni Israel, seng anjai tadingkonon-Ku sidea.

- ¹⁸ Patubuhon-Ku do bah mardalan bani
buntu-buntu na leseng, anjaha bah tubuh i
tongah-tongah ni habungan; bahenon-Ku
do halimisan gabe tao, anjaha tanoh
dorging-dorging gabe hatubuhan ni bah.
- ¹⁹ Nahkonon-Ku do i halimisan hayu ares, tusam,
sampinur ampa hayu jetun; suanon-Ku
do bani tanoh dorging-dorging sampinur,
jabi-jabi rap pakon maranti,
- ²⁰ ase ididah, itanda, iparuhurhon, anjaha
iartihon sidea, paboa tangan ni Jahowa na
mambahen ai, anjaha Na Pansing ni Israel
do na manompa ai.”

Na Lang do Sagala Sisombahon i lobei ni Jahowa

- ²¹ Boan hanima ma hujon pakaranima, nini
Jahowa, patugah ma tanda-tandani, nini
Raja ni Jakob.
- ²² Roh ma sidea hun dohor anjaha ipatugah ma
bennami aha na laho masa. Na masa bani
mungkahni, aha do ai, patugah hanima ma,
ase iparimbagaskon hanami, anjaha ibotoh
hanami ujungni ai. Atap pabogeihon hanima
ma bennami na sihol masa,
- ²³ patugah hanima ma aha na masa dob on, ase
ibotoh hanami atap Naibata do hanima
tongon. Antong bahen hanima ma na

madear atap na masambor, ase longang
hanami anjaha gobir.

²⁴ Tonggor ma, na lang do hanima, anjaha
horjanima sisoya-soya do; anjaha hagigi do
halak na mamilih hanima.

²⁵ Hupuhoi do sada halak hun utara, anjaha
domma roh ia; hun hapoltakan ni mata ni
ari, idilo do goranku; rojatonna do parkuasa
songon tanoh halampung, songon sitopa
hudon mandogei tanoh hudon.

²⁶ Ise do na patugahkon ai humbani mulani, ase
ibotoh hanami, humbani na hinan, ase
tarhatahon hanami: Sintong do ai? Tapi ise
pe lang na patugahkon ai, ise pe lang na
pabotohkon, sahalak pe lang na manangar
hatanima.

²⁷ Ahu do na parlobei na patalar ai bani Sion,
anjaha Husuruh do hu Jerusalem siboan
ambilan malas ni uhur.

²⁸ Anjaha mangkawah Ahu inggot, tapi sahalak
pe seng dong; sada pe lang humbani sidea
sipanuturi, na boi mambere balos anggo
manungkun Ahu.

²⁹ Tongon, na lang do sidea ganup, anjaha
sisoya-soya do pambahenan ni sidea; logou
anjaha na lang do gana-gana ni sidea.

Juakjuak ni Jahowa, na Manondangi Dunia on

- 42** ¹ Tonggor ma, juakjuak-Ku, na Hutogu in, na Hupilih in, na hinarosuhkon ni Tonduy-Hu. Domma Hupasorap Tonduy-Hu hu Bani, patandahonon-Ni do habonaron hubani sipajuh begu-begu.
- ² Seng marsurak-surak la barang maling sora-Ni ibahen, anjaha seng ipabogeihon sora-Ni i dalan-dalan.
- ³ Arung-arung na dob marosak, seng lanjar ponggolhonon-Ni, anjaha sumbu na mirlop-irlop, seng lanjar intopan-Ni; domu hubani hasintongan do dalankonon-Ni uhum.
- ⁴ Seng anjai miloh ia anjaha seng anjai marosak ia, paima ipajongjong hasintongan i tanoh on anjaha pulou-pulou masihol bani titahni.
- ⁵ Sonon do hata ni Naibata Jahowa, Sitompa langit anjaha na paherbangkonsi, na pajonamkon tanoh on ampa sagala na tubuh hunjai, na mambere hosah bani halak na marianan ijai ampa tonduy bani jolma na mardalan ijai,
- ⁶ “Ahu do Jahowa, na mandilo ho ibagas hapintoron anjaha na manogu tanganmu. Ahu do na parorot ho anjaha Ahu do na

- pabangkit ho gabe parpadanan bani bangsa in, gabe panondang bani bangsa parbegu,
- ⁷ laho mambuha mata ni na mapitung, laho padaratkon na tarsangkut ibagas tutupan, humbagas rumah tahanan halak na marianan ibagas na golap.
- ⁸ Ahu do Jahowa, ai ma goran-Ku, anjaha hasangapon-Ku, seng bereon-Ku bani na legan, sonai hamuliaon-Ku bani gana-gana.
- ⁹ Na dob hinatahon hinan domma saud, anjaha na baru Hupatugah ma sonari; paima martumbor ai, pabogei honon-Ku ma ai bannima.”

**Doding Puji-pujian bani
Jahowa, Sipaluah Bangsa-Ni**

- ¹⁰ Dodingkon nasiam ma bani Jahowa sada doding na baru, hamuliaon-Ni bani ujung ni tanoh on, nasiam na marlayar i laut ampa ganup na mangingani ai, nasiam pulou-pulou ampa na marianan ijai.
- ¹¹ Sai ipamaling halimisan ma sorani ampa na montas ijai, dusun-dusun, na niiankon ni halak Kedar; sai marolob-olob ma halak na marianan bani dolog batu, marsurak-surak ma sidea hun pakpak ni dolog.

- ¹² Ibere sidea ma hasangapon bani Jahowa,
anjaha ibaritahon ma hamuliaon-Ni bani
pulou-pulou.
- ¹³ Bingkat do Jahowa songon puanglima,
songon halak siparmunsuh gajag ringis-Ni;
ipamaling sora-Ni, marsurak porang do la,
anjaha ipataridahkon hapuanglimaon-Ni
bani munsuh-Ni.
- ¹⁴ Hupasip do humbani nahinan, sai soh do Ahu,
hutahan diri-Ku, tapi sonari mandodoruh
do Ahu songon puang-puang na mangarou,
hosah-kosah do Ahu mangalop hosah.
- ¹⁵ Seda do bahenon-Ku dolog-dolog pakon
buntu-buntu, anjaha pameluson-Ku do
suan-suananni; salihkonon-Ku do bah
mardalan gabe tanoh dorging-dorging
anjaha horah bahenon-Ku tao.
- ¹⁶ Togu-toguon-Ku do halak na mapitung bani
dalan na so onga tinandani, bobaan-Ku
do sidea bani dalan na so onga binotohni,
paubahon-Ku do hagolapan na ilobei ni
sidea gabe haliharon, anjaha dalan na
marjuntul-juntul gabe tanoh na rata. Ai
ma na sihol bahenon-Ku anjaha seng anjai
lupahonon-Ku ai.
- ¹⁷ Maningon surut do hupudi anjaha tarbador
sagala na martenger ni uhur bani gana-gana

na niuhir, na mangkatahon bani gana-gana
na tinuang, “Nasiam do Naibatanami.”

Jahowa do Sipaluah bani Bangsa-Ni

- ¹⁸ Nasiam na nengel, tangar ma, anjaha
nasiam na mapitung, mangkawah ma ase
marpangidah nasiam!
- ¹⁹ Ise do na pitung anggo lang juakjuak-Ku,
atap na nengel songon suruhan-Ku na
Husuruh in? Ise do na pitung songon na
Huhaporsayai in, atap na pitung songon
juakjuak ni Jahowa?
- ²⁰ Tongon, buei do na nididahmu, tapi lang
iparimbagaskon ho, buha do pinggolmu,
tapi seng ibogei ho.
- ²¹ Iharosuhkon Jahowa do, halani hapintoron-Ni,
patimbulhon anjaha pasangapkon titah-Ni.
- ²² Tapi on do sada bangsa na nirampok ampa na
nirampas; ganup do sidea targari ibagas
liang, anjaha iponopkon ibagas tutupan;
gabe sisorohon do sidea seng dong na
paluahkon, gabe sirampason, anjaha seng
dong na mangkatahon, “Paulak!”
- ²³ Ise i tengah-tongahnima na manangihon hata
ai, anjaha na marimbagaskon anjaha na
mardiateihon ai bani panorang na roh?
- ²⁴ Ise do na mambere Jakob bani siparrampas
anjaha Israel bani halak panamun? Ai lang

Jahowa do, halani mardousa hita hu Bani?
Seng ra sidea mardalan bani dalan-Ni,
anjaha seng itangihon sidea titah-Ni.

²⁵ Halani ai iuseihon do bani sidea gara ni
ringis-Ni, ampa jobu ni hamunsuhon; ai ma
na mambahen gara sidea inggot, tapi lalab
do seng iarusi; tapi seng iparuhurhon ai.

43 ¹ Tapi sonari, sonon do hata ni Jahowa,
“Sitompa ho, ale Jakob, anjaha na
manjadihon ho, ale Israel, ‘Ulang ho mabiar,
ai Ahu do sipaluah ho, domma Hudilo
goranmu, Ahu do simada ho.

² Anggo ibontas ho bah, Ahu do hasomanmu,
bani na mandipari bah banggal seng
ayubkonon-Ni ho. Anggo mardalan ho
hubagas apuy, seng anjai mosog ho, anjaha
seng matutung ho bahenon ni gara ni apuy.

³ Ai Ahu do Jahowa Naibatamu, Na Pansing ni
Israel, Sipaluah ho. Domma Hubere Masir
gabe partobusmu, Kus pakon Seba do
panggantihmu.

⁴ Halani harga do Huidah anjaha na pinasangap,
anjaha holong do uhur-Hu bam, Hubere do
jolma panggantihmu, ampa bangsa-bangsa
gantih ni hosahmu.

⁵ Ulang ho mabiar, ai Ahu do hasomanmu, hun
hapoltakan do parohon-Ku ginomparmu,
anjaha hun hasundutan patumpuon-Ku ho.

- ⁶ Hatahonon-Ku ma bani utara, “Paulak!”
Dompak dangsina, “Ulang jolomi!” Boan
anak-Ku humbani na daoh, ampa borung-Ku
hun ujung ni tanoh on,
⁷ haganup na marpanggoranan bani goran-Ku,
na Hutempa bahen hasangapon-Ku, na
Hurumang anjaha na Hujadihon.

Israel do Hasaksian Pasal Naibata Jahowa

- ⁸ Boan ma hujon bangsa na pitung, hansi pe dong
matani, anjaha na nengel, hansi pe adong
pinggolni!
⁹ Sagala bangsa parbegu, roh ma marhumpul,
anjaha martumpu ma ganup bangsa-bangsa!
Ise ma humbani sidea na pabotohkon on,
anjaha na pabogeihon na masa hinan hu
banta? Ipajongjong ma saksini mamintori
sidea, ase itangar halak anjaha ihatahon,
“Sintong do!”
¹⁰ Hanima do saksing-Ku, nini Jahowa, anjaha
juakjuak-Ku na dob Hupilih, ase itanda
anjaha ihaporsayai hanima Ahu, anjaha
iarusi hanima: Ahu do in. I lobei-Hu seng
dong Naibata, i puding-Ku pe seng anjai
dong.
¹¹ Ahu, Ahu do Jahowa, anjaha sobali Ahu seng
dong Sipaluah.

- ¹² Ahu do na pabotohkon ampa na paluahkon
ampa na pabogeihon ai, anjaha seng dong
naibata na legan i tongah-tongahnima;
hanima do saksi-Ku, nini Jahowa, Ahu do
Naibata.
- ¹³ Ahu do ai humbani na basaia, seng dong
na boi paluahkon humbani tangan-Ku;
Ahu do mambahen, mintor ise ma na boi
manundatisi?

Jahowa do Sipasuang Israel

- ¹⁴ Sonon do hata ni Jahowa, “Sipaluah bannima,
Na Pansing ni Israel: Halani hanima, Ahu
do marsuruh hu Babel, anjaha Huhatahon
iparseda pating-pating ni tutupannima,
gabe mubah ma olob-olob ni halak Kasdim
gabe tangis-tangis.”
- ¹⁵ Ahu do Jahowa Na pansing bannima, Sitompa
Israel, Rajanima.
- ¹⁶ Sonon do hata ni Jahowa na mambahen pasar
i tongah laut ampa na pauli dalan bani bah
marbanggal,
- ¹⁷ na mambahen ase mandarat gareta porang
ampa huda, bala ampa siparporang;
martibalan do sidea seng tarjongjongkonsi
be, miloh do sidea, mintop songon sumbu.

- ¹⁸ Ulang be dingat-dingat hanima na parlobei ondi, anjaha ulang ma pingkir-pingkiri na dob masa.
- ¹⁹ Tonggor ma, Ahu mambahen na baru, domma martumbor nuan, ai lang ididah hanima ai? Ahu mambahen pasar i halimisan, bani tanoh dorging-dorging bah mardalan.
- ²⁰ Pasangapon ni binatang na i talun do Ahu, sorigala ampa burung unta; ai Ahu do na mambere bah i halimisan ampa bah mardalan i tanoh dorging-dorging, laho mambere minum bangsa-Ku na Hupilih in,
- ²¹ bangsa na Hujadihon Bangku ase ibaritahon hamuliaon-Ku.
- ²² Tapi seng Ahu ipadilo-dilo ho, ale Jakob, anjaha seng ra ho loja marhalani Ahu, ale Israel.
- ²³ Seng iboan ho Bangku biribiri bahen galangan situtunganmu, anjaha seng ipasangap ho Ahu marhitei galangan sisayatonmu. Ai sedo na Huparjabolon ho marhitei galangan sipanganon, atap Hulojai ho marhitei dahupa.
- ²⁴ Seng iboli ho Bangku morum-moruman marhitei pirakmu, anjaha taboh-taboh ni galanganmu seng pabosur Ahu. Tapi domma iparjabolon ho Ahu marhitei dousamu, domma ilojai ho Ahu marhitei hajahatonmu.

- ²⁵ Ahu, Ahu sandiri pasaloseihon
 panlanggaronmu halani Ahu, anjaha
 dousamu seng be padingat-dingaton-Ku.
- ²⁶ Paingat ma Ahu, marsipatorangan ma hita.
 Pajojor ma, pintori dirimu.
- ²⁷ Ompungmu na parlobei ai mardousa do,
 anjaha sipangapiti bam marbalik do hun
 Bangku;
- ²⁸ ipabutak raja-rajamu do rumah-Ku na ma
 pansing in. Halani ai do ase Huondoskon
 Jakob bani hasedaon, anjaha Israel bani
 hahirion.”

**Bagah-bagah ni Jahowa pasal Tonduy-Ni
 Siuseihonon-Ni bani Bangsa-Ni**

- 44** ¹ Tapi sonari, tangihon ma, ale Jakob,
 juakjuak-Ku, ampa ho Israel, na dob Hupilih
 in!
- ² Sonon do nini Jahowa, na manjadihon ho, na
 marrumang ho i partapaan ope, anjaha na
 sihol mangurupi ho: Ulang ho mabiar ale
 Jakob, juakjuak-Ku ampa ho ale Jesurun na
 Hupilih in.
- ³ Ai useihonon-Ku do bah bani tanoh na horah,
 ampa bah mardalan bani tanoh dorging-
 dorging: Useihonon-Ku do Tonduy-Hu bani
 dakdanakmu ampa pasu-pasung-Ku bani
 ginomparamu.

- ⁴ Jadi martumbor ma sidea songon poyon-poyon i lambung ni bah, anjaha songon arung-arung i topi ni bah mardalan.
- ⁵ Hatahonon ni deba halak ma, “Jahowa do simada ahu; na legan marpanggorankon goran ni Jakob, na legan use manuratkon bani tanganni, ‘Rupe i Jahowa, anjaha manggorani dirini marhitei goran Israel.’”

Na Lang do Sisombah-sombahon ni jolma

- ⁶ Sonon do hata ni Jahowa, Raja ni Israel, anjaha na paluahkonsi, Jahowa Zebaot! “Ahu do na parlobei anjaha Ahu do na parpudi; seng dong Naibata sobali Ahu.
- ⁷ Ise ma na songon Ahu? Idilohon ma ai, ipatugah ma, ituri-turiahon ma i lobei-Hu. Ise do na patugahkon humbani mungkahni, aha na sihol masa? Ipabotohkon ma banta aha na sihol roh!
- ⁸ Ulang hanima gobir, ulang mabiar! Ai lang domma humbani nahinan Hupabogeihon anjaha Hupabotohkon ai bannima? Anjaha hanima do saksi-Ku. Ai adong do Naibata sobali Ahu? Seng dong batu gingging, seng dong anggo Hubotoh.”
- ⁹ Sipauli gana-gana, na lang do ganup sidea, anjaha na hinarosuhkon ni sidea seng marguna ai; saksi ni sidea seng

marpangidah, seng marpambotoh, halani ai bador do sidea.

¹⁰ Ai ise do sidea sipauli naibata, situang gana-gana na so marguna ai?

¹¹ Tonggor ma, ganup hasomanni ai tarbador do, anjaha tuhangni jolma do; age pe martumpu anjaha marrohan sidea, sai na tarsonggot do sidea anjaha bador.

¹² Tuhang bosi patureihon hapak, marhasoman milas ni apuy; itopa do ai marhitei parpalu, ipadear marhitei gogoh ni tanganni; pala loheian ia gabe seng margogoh, maradu seng minum bah ia gabe galek ia.

¹³ Tuhang hayu pagistang bonang arang, mambahen martanda marhitei panurat; ihorjai ma ai marhitei hotam, iuhir anjaha ipolas; ibahen ma ai mangusihi dalahi, songon jolma na jenges, laho marianan ibagas rumah.

¹⁴ Adong halak na marroboh hayu ares bani, atap na mambuat hayu maranti atap hoting batu, na pinilihni humbani hayu na i tombak; adong na manuan hayu tusam, ipabanggal-banggal udan ma ai.

¹⁵ Marguna do ai bani jolma gabe soban ibuat ma deba hunjai bahen pandadangan, deba pagara apuy laho pamasak ruti; ipauli do homa hunjai naibata, anjaha isombah ma ai; ibahen do hunjai gana-gana anjaha marrogop ia i lobei ni.

¹⁶ Satongah hunjai panggarai ni apuy, igoreng do gulei marhitei ai, anjaha na ginoreng ai ipangan gabe bosur; mandadang homa ia anjaha ihatahon ma, “Ah, malas huahap, ibahen apuy on!”

¹⁷ Na tading ai gabe naibata ibahen, gabe ganagana, marrogop ma ia hujai laho marsombah; martonggo do ia hujai, nini, “Paluah ham ma ahu, ai ham do naibata bangku.”

¹⁸ Seng dong na binotoh ni sidea, anjaha seng dong na niartihon ni sidea; domma rapit mata ni sidea seng marpangidah, anjaha domma hobal uhur ni sidea, gabe seng marpangartian be.

¹⁹ Seng dong na marimbagaskon seng dong habotohon atap pangarusion, gabe ihatahon, “Satongah hututung ibagas apuy, anjaha hupamasak roti i atas narnarni, hugoreng gulei anjaha hupangan; mintor bahenonku ma na tading ai gabe sisombahon? Mintor manrogop ma ahu i lobei ni samponggol hayu?”

²⁰ Siramotkon abuan, uhurni do na hona tipu anjaha na kahou ijai; seng tarpaluahsi tonduyni atap tarluarhonsi, “Ai ladung do nani na ibagas tangan siamunkon?”

Olob-olob halani Partobus ni Jahowa bani Bangsa-Ni

²¹ Paruhurhon ma on ale Jakob ampa ho ale Israel, ai juakjuak-Ku do ho! Ahu do na

manjadihon ho, juakjuak-Ku do ho, ale Israel, seng anjai lupahonon-Ku ho.

²² Domma Hupasisi salahmu songon hambun, anjaha songon hambun na manorap dousamu. Mulak ma ho hu Bangku, ai Ahu do na manobus ho.

²³ Marolob-olob ma, ale langit, ai Jahowa do sibahen ai! Marsurak ma, ale pusat ni tanoh on! Marmegah-megah ma ale dolog, ampa ho ale tembok, rap pakon sagala hayu na ibagas ai! Ai domma itobus Jahowa Jakob, anjaha marhitei Israel marmulia la.”

Ipakei Naibata si Kores gabe Parugas-Ni

²⁴ Sonon do hata ni Jahowa na manobus ho anjaha na manjadihon ho sanggah i partapaan ope. Ahu do Jahowa, na manjadihon sagala na dong, na paherbang langit marhitei Ahu tumang, anjaha na paamparhon tanoh on marhitei gogoh-Ku sandiri;

²⁵ na manlangkon tanda ni parladung, na mambahen oto partondung, na mambahen surut hu pudi halak na pentar, anjaha na mambahen haotoon hapentaran ni sidea;

²⁶ na mambahen totap hata ni juakjuak-Ni, anjaha na pasaudkon ranggian na ipatugah suruhan-Ni, na mangkatahon bani

Jerusalem, “Ningon ianonkon do; anjaha bani huta-huta ni Juda: Ningon paulion do anjaha reong-reongni pajongjongon-Ku do; ²⁷ na mangkatahon bani bah na bagas: Horah ma, anjaha binangani arsikon-Ku do; ²⁸ na mangkatahon bani si Kores: Ale parmahan-Ku anjaha sagala sura-surang-Ku pasaudonni do; na mangkatahon bani Jerusalem: Paulion do in; anjaha bani rumah panumbahan: Pajonamon do in.”

- 45** ¹ Sonon do hata ni Jahowa dompak si Kores na mininakan-Ni ai, na Hujolom ai tanganni siamun laho patundukkon bangsa-bangsa i lobei ni, mananggali sinjata humbani binongei ni raja-raja, laho mambuha labah i lobei ni, ase ulang boi hona tutup horbangan.
- ² Ahu do mardalan i lobeimu anjaha padosdoskon dolog-dolog; Ahu do na marropuki labah tombaga, anjaha na manrosaki pating-pating bosi.
- ³ Ahu do mamberehon bam arta na ponop, ampa ugas-ugas na buni, ase itanda ho, paboa Ahu do Jahowa Naibata ni Israel, na mandilo ho bani goranmu.
- ⁴ Marhalanohon ni juakjuak-Ku si Jakob pakon Israel na Hupilih in, ase Hudilo ho bani

goranmu, anjaha marmulia Hubahen
goranmu age pe seng itanda ho Ahu.

⁵ Ahu do Jahowa, seng dong na legan, sobali Ahu
seng dong Naibata; Hugonditi do ho, age pe
seng itanda ho Ahu,

⁶ ase ibotoh halak na i hapoltakan pakon
na i hasundutan, na so adong Naibata
sobali Ahu. Ahu do Jahowa, seng dong na
legan, na manjadihon haliharon anjaha na
mangadongkon na golap,

⁷ na mambahen hadameion ampa na
mangadongkon hamagouan. Ahu do Jahowa
sibahen haganupan ai.

⁸ Manekteki ma, ale langit, hun babou, anjaha
hombun iuseihon ma udan hapintoron!
Buha ma tanoh on, ase itubuhkon hatuahon,
anjaha ibahen ma homa hapintoron
martumbor! Ahu do Jahowa na manjadihon
ai.

**Golpa-golpa bani Israel, ase Unduk bani
Panogu-noguon ni Jahowa**

⁹ Bursik ma halak na mambahen paringoran
dompok na manompasi, sada sanga-sanga
dompok sitopa hudon. Mintor hatahonon ni
tanoh halampung ma dompak na manopasi,
“Aha do na binahenmin? atap hatahonon ni
tinopani ai ma, ‘Seng dong tanganmu!’

- ¹⁰ Bursik ma halak na mangkatahon bani bapani,
‘Mase ma manubuhkon ho?’ atap dompak
inangni, ‘Mase ma mangarou ho?’
- ¹¹ Sonon do hata ni Jahowa, ‘Na Pansing
ni Israel anjaha na manompasi: Sihol
sungkunonnima Ahu pasal anak-Ku anjaha
aturonnima Ahu pasal jadi-jadian ni
tangan-Ku?’
- ¹² Ahu do na manjadihon tanoh on, anjaha
jolma na i atas ni, Ahu do manompa; Ahu,
tangan-Ku sandiri do na paherbang langit,
anjaha Ahu do na mamarentah ganup
balani.
- ¹³ Ahu do pabangkitkansi marhitei hapintoron
anjaha Ahu pahornop dalan bani; ia do na
paulihon hutang-Ku anjaha paluahonni do
bangsang-Ku na tarbuang in; seng halani
upah atap halani sisip; nini Jahowa Zebaot.”

**Maningon Mangaku anjaha Tunduk
bani Jahowa do Ganup Tanoh on**

- ¹⁴ Sonon do hata in Jahowa, “Habayakon ni halak
Masir, boniaga ni halak Etiopia pakon halak
Seba, pardaging na ganjang ai, maningon
bam do ai mandipar anjaha ho simada
ai: irikkonon ni sidea do ho, roh do sidea
ibagas gari marrogop i lobeimu, bam do
sidea mangelek-elek: Pitah bamu do dong

Naibata, anjaha seng dong na legan, sobali
la seng dong Naibata.”

¹⁵ Tongon, Ham do Naibata na ponop
marhadirion, ale Naibata ni Israel, Sipaluah
in.

¹⁶ Maila anjaha tarbador do sidea haganup;
madorun do sidea haganup halak sipauli
gana-gana.

¹⁷ Tapi Israel, maluah do marhitei Jahowa,
maluah tongon ronsi sadokah ni dokahni,
seng anjai maila anjaha seng anjai bador
hanima sadokah ni dokahni.

¹⁸ Ai sonon do nini Jahowa, “Sitompa langit in, ai
ma Naibata na manompa tanoh on ampa na
manjadihonsi, ai ma na pajonamkonsi, sedo
ase tarulang ase itompa, bahen ianan do
ase ijadihon ai; Ahu do Jahowa, seng dong
na legan.

¹⁹ Seng bani na ponop marsahap Ahu atap
bani ianan na golap i tanoh on; seng
dong Huhatahon bani ginompar ni si
Jakob: Soya-soya do na pinindahannima
in Ahu! Ahu do Jahowa, na mangkatahon
hapintoron, na patugahkon hasintongan.

²⁰ Martumpu ma, anjaha roh ma hanima hu
Bangku, padohor hanima ma ganup, ale
na pinaluah humbani bangsa-bangsa!
Seng marpangarusion sidea ai, na

mangusung gana-gana hayu ni sidea, ampa na manumbah bani naibata na so boi paluahkon.

²¹ Baritahon ma, pajojor ma; manriah ma hanima samah hanima. Ise do na pabogei hon on humbani na hinan, na pabotohkon humbani sapari? Ai lang Ahu do Jahowa? Seng dong Naibata sobali Ahu, Naibata na pintor anjaha na boi paluahkon, seng dong sobali Ahu.

²² Dompakkon hanima ma Ahu ase ipaluah hanima, ale ujung ni tanoh on. Ai Ahu do Naibata, seng dong na legan be.

²³ Domma marbija Ahu bani diring-Ku, hapintoron do luar humbani pamangan-Ku, hata na so boi mulak: Maningon manowod do sagala towod Bangku, marbija sagala dilah,

²⁴ nini, 'Pitah ibagas Jahowa do adong hapintoron ampa hagogohon bangku.' Haganup na mangimbangsi maningon roh do hubani gabe tarbador.

²⁵ Ibagas Jahowa dapotan hapintoron anjaha mamuji-muji do ganup ginompar ni Israel."

**Pardabuh ni Sisombah-sombahon na i
Babel, ampa Panarihon ni Naibata na
Timbul in bani Bangsa-Ni**

- 46** ¹ Domma tompas Bel, domma gadab Nebo;
bani binatang ampa pinahan ipausungkon
gana-ganani ai; boratan do sidea anjaha
ngayotan, paboan-boan gana-gana na ni
usung-usungnima ai hinan.
- ² Rap gadab anjaha tompas do sidea, seng
tarpaluah sidea sipangusung ai; sidea sandiri
laho hu habuangan.
- ³ Tangihon hanima ma Ahu, ale ginompar ni
Jakob, ampa haganup na tading humbani
ginompar ni Israel, na Huombah humbani
partapaan nari, na Huabing mulai humbani
partubuhni.
- ⁴ Das bani hatuaonnima totap do tong
Ahu, ronsi na ubanon hanima, Ahu do
tong mangombah hanima. Ahu do na
dob mambahen ai, anjaha Ahu ma na
mangombah, Ahu ma na mangusung anjaha
Ahu ma na paluahkon.
- ⁵ Bani ise sihol pausihonnima Ahu anjaha
parbandingkononnima, barang
parumpamahononnima Ahu, paboa
usih Ahu hujai?

- ⁶ Irungrungi sidea do omas humbani ranjutni,
anjaha pirak idasing bani timbangan; iupahi
sidea do tuhang omas, anjaha ipauli sidea
ma sada naibata. Marrogop ma sidea,
marsombah sidea tene hujai.
- ⁷ labarai sidea ma ai, anjaha iusung ma; inahkon
sidea ma ai bani iananni, jadi jongjong ma,
seng meret ia humbani iananni. Anggo
adong na dilo-dilo bani, seng ibalosi ai, seng
ipaluah ia humbani hasosakanni.
- ⁸ Ingat hanima ma ai anjaha parimbagaskon,
ulak-ulak hanima mardiateihon ai, ale
hanima sipanlanggar.
- ⁹ Ingat hanima ma na dob masa humbani
mungkahni: Ahu do Naibata, seng dong na
legan; Ahu do Naibata, seng dong na doskon
Ahu,
- ¹⁰ na pabotohkon na sihol masa humbani
mungkahni, anjaha humbani na basaia na so
masa ope, na mangkatahon, "Sai totap do
sura-surang-Ku, anjaha pasaudkon sagala
ranggian-Ku,
- ¹¹ na mandilo manuk-manuk nanggordaha hun
hapoltakan, humbani tanoh na daoh dalahi
sipasaud sura-surang-Ku. Songon na dob
Huhatahon, sonai do pamasaon-Ku, aha na
dob Huranggihon, ai do bahenon-Ku.

¹² Tangihon hanima ma Ahu, ale na hengkeng maruhur; hanima na ganggang humbani hapintoron.

¹³ Domma Huboan hundohor hapintoron-Ku, seng be daoh, anjaha haluahon na hun Bangku seng dokah be. Bereon-Ku do haluahon bani Sion, ampa hamuliaon-Ku bani Israel.”

Uhum bani Babel

47 ¹ Turun anjaha hundul ma bani orbuk, ho anak boru Babel! Hundulhon bani tanoh, seng marparatas, ho boru Kasdim! Seng be goranon ho naboru na lamlam anjaha na jenges.

² Alop losung, duda nitak! Padaoh tudung-tudungmu, anjaha tanggali baju ganjangmu; marbasahan ho, dipari ma binanga ai!

³ Talar ma hatalanjangonmu anjaha taridah hailaonmu; sihol do Ahu marlulu, jolma pe lang Hulioi,

⁴ nini, “Sipaluah hita, ai ma Jahowa Zebaot, Na Pansing ni Israel.”

⁵ Sip ho hundul, anjaha laho ma hubani na golap, ale boru Kasdim! Ai seng be goranon ho, boru jujungan ni harajaon-harajaon.

⁶ Manggila do Ahu bani bangsang-Ku, Hupaturut do butak parbagianan-Ku; Huondoskon

do sidea hubagas tanganmu, tapi seng marholong ni atei ho bani sidea; bani na matua pe itampeihon ho do pasanganmu na borat ai.

⁷ Nim, “Sadokah ni dokahni do ahu dong, boru jujungon do ahu lalap!” Seng iparuhurhon ho ai atap ipingkiri ho, sonaha ujung ni ai.

⁸ Halani ai tangihon ma on, ale siparmegah-megah, ho na hundul marsonang-sonang, na mangkatahon ibagas uhurmu, “Ahu ma da in, seng dong sobali ahu!” Seng anjai mabalu ahu, seng anjai popor ahu!

⁹ Na dua on maningon mangonai bam, sompong ibagas na sadari: Hapoporon ampa habaluon maningon roh do bam ibagas parsuhatan na gok, age pe buei uti-utiannima anjaha marhagogohon tabas-tabasmu.

¹⁰ Ipangajamkon ho do hajahatonmu, nim, “Seng dong na mangidah ahu!” Hapentaranmu ampa habotohonmu do na pakahouhon ho, gabe ihatahon ho ibagas uhurmu, “Ahu ma da in, seng dong sobali ahu!”

¹¹ Tapi roh ma bam hamagouan, na so boi tulakonmu, mangonai ma bam hasedaon, na so tarlembangi ho; sompong do ho malonglong, na so niagak ni uhurmu.

¹² Nunut ma tongon uti-utianmin ampa hinabuei ni tabasmin, na hinalojahonmin humbani

sietek-etekonmu nari, ra tolapi do ho mangurupi, ra tarpambiar-biari ho do.

¹³ Loja ni in ho ibahen buei ni sipodahi ho, jongjong ma tongon sidea mangurupi ho, sisibari langit ai, na mardiateihon bintang-bintang ai, na pabotohkon aha na sihol roh bam, bani ganup poltak ni bulan.

¹⁴ Tonggor ma, songon tompoh-tompok do sidea siboiskonon ni apuy; seng tarpaluah sidea dirini humbani gara ni apuy. Ai apuy ai sedo bahen pandadangan ai, sedo apuy tataring ai, na boi sidohoran.

¹⁵ Sonon do masa bam humbani halak na hinopkopmu, humbani hasomanmu martiga-tiga humbani sietek-etekonmu nari: Ganup sidea lintun marsitohu dalanni; seng dong na paluahkon ho.

Halani Goran-Ni do ase lidopi Naibata Bangsa-Ni na Tendel Maruhur ai

48 ¹ Tangihon ma on, ale ginompar ni Jakob, na marpanggoranan bani Israel, na luar humbani bah ni Juda, na marbija ibagas goran ni Jahowa, anjaha na manaksihon Naibata ni Israel, tapi seng ibagas hasintongan atap hapintoron.

² Tongon, marpanggorankon huta na pansing ai do sidea, anjaha marpangunsandeian

bani Naibata ni Israel; Jahowa Zebaot do goran-Ni.

³ Na dob masa in, humbani sapari do in Hupatugah, humbani pamangan-Ku do ai luar, anjaha Ahu do na pabogeihon ai. Sompong do ai masa Hubahen, gabe saud do ai.

⁴ Halani Hubotoh, tendel do uhurmu, tangkuhukmu songon urat-urat humbani bosi anjaha pardompakanmu songon tombaga,

⁵ halani ai Hupabotohkon do ai bam humbani na basaia, paima masa ai, domma Hupabogeihon ai bam, ase ulang ihatahon ho, “Sisombahonku do na mambahen ai, gana-gana na huuhir ampa gana-gana na hutuang do na mamarentahkon ai.”

⁶ Domma itangar ho, torih ma ganupan ai! Ai seng baritahononnima ai? Pabotohkonon-Ku do bannima na baru humbani sonari ampa na ponop, na so binotohnima.

⁷ Sonari do ijadihon ai, seng na ijia, seng ibogei ho ai hinan, ase ulang ihatahon ho, “Tonggor ma, domma hubotoh ai hinan.”

⁸ Seng onggga ibogei ho, seng onggga ibotoh ho, humbani sapari seng buha ope pinggolmu. Ai Hubotoh sipangosei-osei do ho anjaha

margoran siparbalik humbani partapaan nari.

⁹ Halani goran-Ku do ase Hutahan ringis-Ku, anjaha halani hamuliaon-Ku do ase marulak-ulakan uhur-Hu mangidah ho, ase lang Huboiskon ho.

¹⁰ Tonggor ma, domma Hupapitah ho, tapi seng songon pirak, domma Huuji ho bani pamurunan hadoyukon.

¹¹ Halani Ahu, halani Ahu do, ase Hubahen sonai, ase ulang sambor goran-Ku; seng Hubere hasangapon-Ku bani na legan.

Jumpah ma Panorang Haluahon ai bani Israel

¹² Tangihon ma Ahu, ale Jakob, ampa Israel, na dob Hudilo in! Ahu do in, Ahu do na Parlobei anjaha Ahu do na Parpudi.

¹³ Tongon, tangan-Ku do na pajonam tanoh on, anjaha tangan siamun-Ku paherbang langit. Dilo-dilo Ahu bani sidea, jadi jongjong ma sidea ganup.

¹⁴ Martumpu ma hanima haganup anjaha tangar ma! Ise humbani sidea na patugahkon ai? Ia, na hinaholongan ni Jahowa, Ia do na pasaudkon rosuh ni uhur-Ni dompak Babel, anjaha tangan-Ni ai do mangimbang halak Kasdim.

- ¹⁵ Ahu, Ahu do tongon na dob marsahap, Ahu do na mandilosi, Ahu do na parohkonsi, anjaha Ahu do na manumpaki dalanni.
- ¹⁶ Padohor hanima ma bangku, tangihon ma on! Humbani mungkahni seng marponop-ponop Ahu marsahap, humbani ari parjadini ai ijai do Ahu. Tapi sonari isuruh Tuhan Jahowa pakon Tonduy-Ni do ahu.
- ¹⁷ Sonon do hata ni Jahowa, na paluahkon ho, Na Pansing ni Israel, “Ahu do Jahowa Naibatamu, na mangajari ho ase martuah ho, na manogu ho bani dalan na patut sidalananmu.”
- ¹⁸ Ambit itangihon ho ma namin titah-Ku, tontu songon bah mardalan ma hatuahonmu, anjaha hapintoronmu songon gilumbang ni laut,
- ¹⁹ anjaha ginomparmu, songon horsik na i topi ni laut, anjaha tunasmu na luar humbani badanmu songon bueini ai; seng sasap anjaha seng magou be goranmu hun lobei-Hu.
- ²⁰ Luar ma hanima hun Babel, maporus ma hun Kasdim! Patugah ma ai marsora olob-olob, pabotohkon ma ai, anjaha sar ma ai bahen hanima das hu ujung ni tanoh on! Hatahon hanima, “Domma ipaluah Jahowa juakjuak-Ni si Jakob.”

- ²¹ Seng horahan sidea sanggah na binobahon-Ni ai sidea hun halimisan. Ibahen do bah mabaor humbani dolog batu bani sidea, batu gingging ibolah, gabe marbaoran ma bah.
- ²² Tapi bani halak parjahat, nini Jahowa, seng dong hadameion.

Juakjuak ni Jahowa, Hatuahon bani Israel ampa Panondang bani Parbegu

- 49** ¹ Tangar hanima ma ahu, ale sagala pulou, anjaha bogei ma, ale bangsa-bangsa bani na madaoh! Jahowa do na mandilo ahu humbani partapaan ope, itarsingati do goranku humbani boltok ni inang ope.
- ² Ibahen do pamanganku songon podang na marot, bani linggom ni tangan-Ni do iponopkon ahu; ibahen do ahu gabe panah na pinapinsur, anjaha ibagas parlingkitan-Ni do ahu ibunihon.
- ³ Ihatahon do hu bangku, “Juakjuak-Ku do ho, ale Israel, parhiteian ase marmulia Ahu.”
- ⁴ Tapi anggo ahu, ningku do, “Soya-soya do ahu na loja in, bani na lang ampa bani na so marguna do huparbois-bois gogohku, tapi Jahowa do na pasintongkon uhum bangku anjaha upahku marguru bani Naibatanku.”

- ⁵ Tapi sonari ihatahon Jahowa, na manjadihon ahu gabe juakjuak-Ni humbani partapaan ope, laho paulakkon Jakob hu Bani, anjaha mambahen Israel martumpu hu Bani, ai marmulia do ahu bani pangidah ni Jahowa, anjaha Naibatangku do gabe hagogohon bangku,
- ⁶ nini do, “Maotiktu do ai ho gabe juakjuak Bangku, pitah pajongjong marga ni Jakob ampa paulakkon simasima ni Israel; tapi Hubahen do ho homa gabe panondang bani bangsa sipajuh begu-begu, anjaha ho do parhiteian ni haluahon das huujung ni tanohon.”

Parsuang ni Israel

- ⁷ Sonon do hata ni Jahowa, Sipaluah Israel, Na Pansing in, dompak halak na niapasan, dompak na hinagigihon ni bangsa-bangsa, dompak na pinarjabolon ni parrajai, “Idahon ni raja-raja ma ai gabe jongjong bei ma laho mangkormati, anjaha na sangap-sangap marrogop laho marsombah, halani Jahowa, hatengeran ai, ampa Na Pansing ni Israel, na dob mamilih ho.”
- ⁸ Sonon do hata ni Jahowa, “Bani panorang paridop ni uhuran do ho Hubalosi, anjaha bani ari haluahon do ho Huurupi,

Huramotkon do ho anjaha Hupabangkit
do ho gabe padan bani bangsa in, laho
patorsahon tanoh in, laho mambagihon
tanoh na dob tarulang in,

⁹ laho mangkatahon bani halak na tartutup, 'Luar
ma!' dompak na ibagas hagolapan, 'Roh ma
bani haliharon!' Dapotan gagaton do sidea
i topi dalan, anjaha buntu-buntu na leseng
do sampalan bani sidea.

¹⁰ Seng loheian sidea anjaha seng horahan, seng
mangonai bani sidea logou na milas atap
mata ni ari pe, ai Parholong bani sidea ai do
na mambobai sidea anjaha itogu-togu do
sidea i lambung ni bah tubuh.

¹¹ Bahenon-Ku do sagala dolog gabe dalan anjaha
dalan na bolon pagijangon do.

¹² Tonggor ma, on roh humbani na daoh, on roh
hun utara ampa hun pastima, on roh hun
Sinim.

¹³ Marsurak-surak ma ale langit anjaha marolob-
olob ma ale langit anjaha marolob-olob
ma ale tanoh on! Marmegah-megah ma
ale dolog! Ai iapoh Jahowa do bangsa-Ni
anjaha maidop do uhur-Ni bani bangsa-Ni
na madoyuk.

¹⁴ Tapi nini Sion, 'Domma itadingkon Jahowa ahu,
domma lupa Tuhan bangku.'

- ¹⁵ Mintor tarhalupahon puang-puang ma anakni na inuman, mintor lang ma holong uhurni bani anak tinubuhkonni? Porini pe tarhalupahonsi sidea, anggo Ahu seng tarhalupahon Ahu ho.
- ¹⁶ Tonggor ma, domma Huuhirhon ho bani tapak tangan-Ku; tembokmu tongtong do i lobei-Hu.
- ¹⁷ Mangolos do roh na paulihon ho, tapi halak siparseda ampa siparreong ho maporus do humbam.
- ¹⁸ Mangkawah ma ho inggot anjaha tonggor ma, 'Ganup do sidea martumpu, roh do sidea bam.' Songon sintongni manggoluh Ahu, nini Jahowa, maningon sorungkononmu do sidea songon panjagar, maningon gonditkononmu do sidea songon pambahen ni tunangan.
- ¹⁹ Tongon, tanohmu na dob maseda, na dob tarulang anjaha na dob mareong, masompittu do ai bani na mangiankonsi, anjaha mandaoh ma na sihol mangagou ho.
- ²⁰ Homa hatahonon ni anakmu do bani pinggolmu ale boru na lambang: Masompittu do ianan on bangku, palumbang ma bangku ase boi huiankon.
- ²¹ Jadi hatahononmu ma ibagas uhurmu, 'Ise na manubuhkon on bangku?' Ai

lambang do ahu anjaha lungunan, tarbuang
anjaha iambuk-ambukkon. Ise do na
pagodang-godangkon on bangku? Tonggor
ma, punjung do ahu, hunja do sidea on roh?

²² Sonon do hata ni Tuhan Jahowa, 'Tonggor ma,
hilapkonon-Ku do tangan-Ku bani bangsa
sipajuh begu-begu, anjaha pajongjongon-Ku
do mandera partanda bani bangsa-bangsa,
jadi boanonni ma anakmu ibagas abinganni,
ampa borumu bani abara ni sidea.'

²³ Raja-raja do gabe parorot bam, anjaha raja
naboru inang na pagodang-godangkon.
Marrogop do sidea das hu tanoh
marsombah bam, anjaha idilat orbuk ni
naheimu. Maningon botohonmu do, Ahu do
Jahowa; seng bador sagala na martenger ni
uhur Bangku.

²⁴ Ai tarbuat do humbani na gogoh taban-taban,
atap tarpaluah do halak tahanan humbani
sipangodoh-odoh?

²⁵ Tongon, sonon do hata ni Jahowa, 'Buaton ma
halak tahanan humbani halak na gogoh,
anjaha paluahon taban-taban ni halak
sipangodoh-odoh, ai Ahu do mangimbang
siimbang ho, anjaha Ahu do na paluahkon
anakmu.'

²⁶ Anjaha bahenon-Ku do halak na mangarsik
ho mangankon dagingni sandiri, anjaha

mabuk do sidea bani darohni sandiri songon na minum anggur. Jadi botohon ni sagala daging ma, Ahu do Jahowa, Sipaluah ho anjaha Sitobus ho, na gogoh bani Jakob.”

**Halani Hajahatonni do ase Magou Israel,
Sedo halani Hurang Gogoh Jahowa**

- 50** ¹ Sonon do hata ni Jahowa, “Ija do surat sirang bani inangnima, tandani na dob Hupaulak ia? Atap ise do parutangan-Ku, panjualan-Ku bannima? Tonggor ma, halani hajahatonmu do ho tarjual, anjaha halani panlanggaronnima do ase isirangkon inangnima.
- ² Mase ma, sanggah roh Ahu, ise pe lang na ijin? Dilo-dilo Ahu, ise pe lang na marbalos? Ai mapondoktu do nani tangan-Ku laho paluahkon, atap na so margogoh do Ahu pabansahkon? Tonggor ma, marhitei ondam-ondam-Ku horah do Hubahen laut, Hubahen do bah mardalan gabe halimisan; marbau do bangkei ni sidea halani seng dong bah, anjaha marmateian halani horahan.
- ³ Marhiou sibirong do Hubahen langit anjaha guni Hubahen sabinngni.”

Juakjuak ni Jahowa na Marsitaranon ai

- ⁴ Domma ibere Tuhan Jahowa Ahu mardilah susian, ase hubotoh marhitei hata ai manungkoli halak na loja. Ipuhoi do ahu ganup sogod, ibahen do pinggolhu torang marpanangar songon susian.
- ⁵ Tuhan Jahowa do na mambuha pinggolhu, seng manlawan ahu, anjaha seng surut ahu hu pudi.
- ⁶ Huberehon do gurungku bani halak sibogbog ahu, sonai age huyumku bani halak na marrintak gumisku; seng huponopkon bohingku dompak hahirion ampa tijur.
- ⁷ Tapi Tuhan Jahowa do na mangurupi ahu, halani ai seng bador ahu; hubahen do bohingku songon batu bosi, ai hubotoh seng anjai ipaturut ahu bador.
- ⁸ Dohor do sipintori ahu. Ise sihol marimbang pakon ahu? Jongjong bei ma hita. Ise lawanku bani parkara on? Ipadohor ma hu bangku.
- ⁹ Tonggor ma, Tuhan Jahowa do na mangurupi ahu, ise do na mansalakhon ahu? Tonggor ma, buruk do sidea songon hiou, ngitngit do mangankon sidea.
- ¹⁰ Ise humbennima na mabiar mangidah Jahowa, itangihon ma hata ni juakjuak-Ni; ise na

mardalan bani na golap, anjaha seng dong
haliharon bani, ihatengerhon ma goran ni
Jahowa, anjaha marpangajaman ma ia bani
Naibatani.

- ¹¹ Tonggor ma, hanima haganup sipagara apuy,
ampa sitembakkon panah na pinagara, laho
ma hanima hubagas gogoh ni apuynima
sandiri ampa hubagas apuy pinagara ni
lingkitnima. Tanganku do na pamasa ai
bannima, maningon tibal-tibal do hanima
marhamarsikon.

Totap do Haluahon na humbani Naibata bani Israel

51 ¹ Tangihon hanima ma Ahu, ale sipindahi
hapintoron, hanima na mandarami
Jahowa! Kawahkon hanima ma dolog batu
pambuatannima, ampa parigi pangkurakan
bannima!

- ² Kawahkon ma si Abraham ompungnima ampa si
Sara na manubuhkon hanima; sahalaksi do
sanggah Hudilo ia, jadi Hupasu-pasu anjaha
Hupabuei ma ia.

- ³ Tongon, apohon ni Jahowa do Sion, apohon-Ni
do ianan na tarulang ai; bahenon-Ni do
halimisan songon pohon Eden, anjaha
tanohni dorging-dorging songon pohon ni
Jahowa. Malas ni uhur ampa hamegahon

do jumpah ijai, puji-pujian ampa sora ni na mandoding-doding.

- ⁴ Tangihon hanima ma Ahu, ale bangsang-Ku, anjaha hanima bangsa-bangsa, pateleng hanima ma pinggolnima Bangku! Ai hun Bangku do harohan ni titah, anjaha Ahu do pajongjong hasintongan-Ku gabe haliharon bani bangsa-bangsa.
- ⁵ Domma dohor hapintoron-Ku, domma bingkat haluahon na hun Bangku; tangan-Ku do na manguhum bangsa-bangsa; Bangku do martenger ni uhur sagala pulou, anjaha bani tangan-Ku do sidea marpangarapan.
- ⁶ Tarei hanima ma dompak langit, anjaha kawahkon hanima ma tanoh on hu toruh! Laho salpu do langit songon timus, anjaha tanoh on pe buruk do songon hiou, anjaha isini marmateian songon rongit. Tapi haluahon na hun Bangku totap do sadokah ni dokahni anjaha hapintoron-Ku seng anjai maronti.
- ⁷ Tangihon hanima ma Ahu, ale sitandai hapintoron, ho bangsa na marimbagaskon titah-Ku ibagas uhurni! Ulang ma habiari hanima parpahiri ni jolma, anjaha ulang ma tarsonggot hanima bani panrisaion ni sidea!
- ⁸ Tongon, songon hiou do sidea bois panganon ni ngitngit, anjaha songon hiou wol gagaton

ni gilok-gilok; tapi hapintoron-Ku totap do
ronsi sadokah ni dokahni, anjaha haluahon
na hun Bangku marsundut-sundut do.

**Apoh-apoh ni Jahowa bani
Bangsa-Ni na Marsitaranon ai**

- ⁹ Puho Ham, puho ma Ham, sorungkon ma
hagogohon. Ham tangan ni Jahowa! Puho
ma Ham songon bani panorang na basaia,
songon bani sundut na parlobei! Ai lang
Ham do na manoktoki si Rahab ampa na
mamantom naga ai?
- ¹⁰ Ai lang Ham do na pahorahkon laut ai, bah ni
luhung na bagas ai, na mambahen laut na
bagas gabe dalan, bahen pandiparan ni na
tinobusmu?
- ¹¹ Anjaha na tinobus ni Jahowa mulak ma, roh hu
Sion marhasoman olob-olob, malas ni uhur
sisadokah ni dokahni do i atas ulu ni sidea.
Malas ni uhur ampa hamegahon do jaloon
ni sidea, tapi maporus do pusok ni uhur
ampa hoih-hoih.
- ¹² Ahu, Ahu do ai na mangapohi hanima! Ise do
ho, ase mabiar ho bani jolma na laho matei
in atap bani anak ni jolma, na laho salpu in
songon poyon-poyon,
- ¹³ gabe lupa ho bani Jahowa, na manompa ho,
na paherbang langit ampa na pajonamkon

tanoh on, gabe tongtong ho mabiar ganup ari, mangidah gila ni sipangodoh-odoh, na marsura-sura laho mangagouhon? Ija do nuan gila ni sipangodoh-odoh ai?

¹⁴ Podas do maluah halak na tarbayang, seng anjai matei ia; masuk hu tanoman, seng anjai hurangan sipanganon ia.

¹⁵ Ahu do Jahowa Naibatamu, na manggunsang laut gabe marhasak gilumbangni; Jahowa Zebaot do goran-Ku.

¹⁶ Ahu do na mannahkon hatang-Ku bani pamanganmu, anjaha na mangondingi ho bani linggom ni tangan-Ku, sanggah na Hupaherbang use langit anjaha Hupajonam tanoh on, anjaha Huhatahon bani Sion, "Bangsang-Ku do ho."

Ipatenger Jahowa do Uhur ni Bangsa-Ni

¹⁷ Hehe ma, hehe ma, jongjong ma ale Jerusalem, ho na dob minum humbani tangan ni Jahowa, humbani panginuman ni gila-Ni, na dob manginum, ronsi mandilati panginuman parmabukon.

¹⁸ Seng dong na manogusi humbani anak na tinubuhkonni, seng dong na manjolom tanganni humbani anak na pinagodang-godangni.

- ¹⁹ Na dua pahara on do mangonai bam, ise ma dong na horu pasal ho? Hasedaon ampa hasosakan, lohei ampa podang, ise ma na mangapoh ho?
- ²⁰ Mandatei do anakmu, martibalan bani ganup topi ni pasar, songon ursa na hona siding; gok do gila ni Jahowa mangonai bani sidea, asup-asup ni Naibatamu.
- ²¹ Halani ai tangihon ma on, ale na madoyuk, ampa na mabuk, tapi sedo binahen ni anggur.
- ²² Sonon do hata ni Tuhanmu, ai ma Jahowa, Naibatamu na marporang mangkopkop bangsamu, “Tonggor ma, buaton-Ku ma humbani tanganmu panginuman hamabukon ai, ai ma panginuman na gok bani ringis-Hu, seng be inumonmu ai.”
- ²³ Berehonon-Ku ma ai hubagas tangan ni na mangarsik ho, na mangkatahon bam, “Paunduk, ase mandipar hanami!” gabe ibahen ho do gurungmu rata songon tanoh, anjaha songon dalan bani halak sipamontas.

Idilohon Jahowa Haluahon ni Bangsa-Ni

52 ¹ Puho ma, puho ma, sorungkon ma gogohmu ale Sion! Pakei ma pakeianmu na jenges, ale Jerusalem, huta na pansing in!

Ai seng malo be masuk bam halak na so marsunat atap halak na mabutak.

² Paspaskon ma humbam orbuk in, jongjong ma, ale Jerusalem na tartangkap in! Tanggali ma sangkut-sangkut in humbani borgokmu, ale boru Sion na tartaban in!

³ Ai sonon do hata ni Jahowa, “Domma tarjual hanima seng marboli, seng marhitei pirak hanima homa tobuson.

⁴ Ai sonon do hata ni Tuhan Jahowa, ‘Hu Masir do ijia tuad bangsang-Ku laho manginsolat ijai, anjaha iodoh-odoh Assur do sidea seng marhala.’

⁵ Tapi sonari, aha do bahenon-Ku ijon, nini Jahowa, ai tarboan do bangsang-Ku lang marhala; na manggomgomsi marmogah-mogah, nini Jahowa, anjaha tongtong ganup ari do goran-Ku iapasi.

⁶ Halani ai, maningon tandaon ni bangsang-Ku do goran-Ku bani panorang ai, anjaha botohon ni sidea do, Ahu do ai na mangkatahon: Ijon do Ahu.”

Ambilan Na Madear

⁷ Jenges ni in i atas dolog nahei ni parambilan na madear, na patangarhon hadameion, na mangambilankon Ambilan Na Madear, na

pabogeihon haluahon, na mangkatahon
bani Sion, “Naibatamu do bangkit raja.”

⁸ Tangar, parjagamu pamaling sorani, rap do sidea
marsurak-surak, ai torang do ididah sidea
parmulak ni Jahowa hu Sion.

⁹ Marsurak anjaha marolob-olob ma hanima, ale
reong-reong ni Jerusalem! Ai iapoh Jahowa
do bangsa-Ni, anjaha itobus do Jerusalem.

¹⁰ Ipatalar Jahowa do kuasa-Ni na pansing in i
lobei ni sipajuh begu-begu, anjaha haganup
do ujung ni tanoh on mangidah haluahon na
humbani Naibata.

¹¹ Misir, misir ma, mandarat ma hunjai,
ulang jamah na mabutak! Luar ma hun
tongah-tongah ni sidea, urasi dirinima,
hanima siusung parugas ni Jahowa.

¹² Ulang pala tarolos hanima mandarat, anjaha
ulang marlintun hanima songon na
laho maporus, ai Jahowa do mardalan
i lobeinima, anjaha Naibata ni Israel do
panjaga i pudinima.

**Panaronon ni Juakjuak ni Jahowa
Mangkopkop Jolma Pardousa**

¹³ Tonggor ma, mardohar do juakjuak-Ku,
pagijangon do ia anjaha patimbulon,
maningon gijang tumang do ia.

¹⁴ Buei do na longang mangidahsi, ai bajan do rupani, legan humbani jolma na somal, anjaha rumangni seng songon anak ni jolma na legan;

¹⁵ sonai do bahenon-Ni longang buei bangsa parbegu, anjaha raja-raja manutup pamanganni i lobei ni; ai na so onggga ope ibaritahon bani sidea, idahon ni sidea ma, anjaha na so onggga ibogei sidea arusan ni sidea ma.

53 ¹ Ise do porsaya bani na pinabogei hon bennami? Anjaha tangan ni Jahowa bani ise do ai talar?

² Dulas do ia tubuh songon taruhup i lobeini, songon tunas hun tanoh dorging-dorging, seng dong hatunggungon bani atap hamuliaon, ase ikawahkon hanami ia, anjaha seng dong hajengesonni ase iharosuhkon hanami ia.

³ Ipahiri anjaha isimbili jolma do ia, dalahi na somal mandagei sitaronon ampa naborit do ia; iponopkon halak do bohini dompaksi, ipahiri do ia anjaha seng masuk hira ia bennami.

⁴ Tongon do naboritta iusung, anjaha hadoyukonta iporsan; tapi nini uhurta, Naibata do na maminsang, mamukul ampa na mangarsik-Si.

- ⁵ Hape halani panlanggaronta do ia hona pantom, binahen ni hajahatonta do la ughan. Tampei hu Bani do pinsang-pinsang parhiteian ni damei banta, anjaha binahen ni ugh-Ni malum iahap hita.
- ⁶ Haganup do hita kahou songon biribiri, ganup do hita marsitohu dalanni; tapi hajahaton ni hita haganup do ihonahon Jahowa bani.
- ⁷ Iarsik do la, tapi ipaunduk do diri-Ni seng ibuha pamangan-Ni; songon biribiri na tinogu hu panayatan, songon anak ni biribiri na sip i lobei ni na marrasipsi, sonai do seng ibuha pamanganni.
- ⁸ Marhitei pangarsikon ampa uhum do la iayob, anjaha na masa bani, ise ma na mamingkirhon ai? Tongon, imasabkon do ia hun tanoh ni halak na manggoluh, anjaha halani panlanggaran ni bangsang-Ku do mangonai hu bani pinsang-pinsang.
- ⁹ Rapkon halak parjahat do ibahen tanoman-Ni, anjaha rapkon halak sihorjahon na masambor do ia sanggah matei, age pe seng dong na jahat ihorjahon, anjaha seng dong tipu ibagas pamangan-Ni.
- ¹⁰ Tapi iharosuhkon Jahowa do parropukni ai mandagei na maborit. Dob na binere ni ai hosah-Ni bahen galangan pardearan, idahon-Ni ma ginompar anjaha roh

ganjangni ari-arini, anjaha saud sura-sura ni Jahowa marhitei tangan-Ni.

- ¹¹ Dob na maluah tonduy-Ni humbani halojaon, idahon-Ni ma na pasabou uhur-Ni; buei do halak pintoran ni juakjuakku na pintor in marhitei habotohon-Ni; ai dousa ni sidea la do na mamorsan.
- ¹² Halani ai, buei do halak berehononku gabe rupei-Ni, anjaha marbagi taban-taban la rap pakon halak na markuasa, halani na binere-Ni ai hosah-Ni hu hamatean, anjaha tarhira la bani halak parjahat, halani na niusung-Ni dousa ni buei halak, anjaha iapiti halak parjahat.

**Ibagahkon Jahowa Panorang Idop ni
Uhur na Baru bani Bangsa-Ni**

54 ¹ Marolob-olob ma ho, ale na lambang, na so onga manubuhkan anak! Maling ma soramu marsurak-surak anjaha marmegah-megah ma ho, na so onga mangarou anak, ai bueinan do anak ni naboru na punjung marimbang anak ni naboru na marhajabuan, nini Jahowa.

- ² Pabolag ma ianan ni lampolampomu, anjaha paherbang ma hirei-hirei ni rumahmu! Ulang pandang, paganjang ma talini anjaha patoguh masuk-pasukni!

- ³ Ai manggargar ma hanima hu siamun ampa hu sambilou, ginomparmu do gabe panean bani sipajuh begu-begu, anjaha sidea do mangiankon huta na tarulang.
- ⁴ Ulang mabiar, ai seng anjai bador ho; ulang maila, ai seng anjai hiranana ho! Ai lupa ma ho bani habadoron ni haposoonmu, anjaha seng be paingat-ingatonmu hahirion ni habaluonmu.
- ⁵ Ai paramangonmu ai ma Sitompa ho, Jahowa Zebaot do goran-Ni; anjaha Sipaluah ho ai ma Na Pansing ni Israel, Naibata ni sab tanoh on do la igoran.
- ⁶ Ai songon naboru na sinirangkon anjaha na marpusok ni uhur do ho idilo Jahowa, anjaha naboru hinaholongan sanggah poso, mintor tarambungkon ma ai? nini Jahowa Naibatamu.
- ⁷ Tongkin do hansa Hutadingkon ho, tapi marhitei holong ni uhur na banggal patumpuon-Ku do ho.
- ⁸ Sanggah pargajag ni ringis-Hu Huponopkon tongkin bohing-Ku dompak ho, tapi marhitei idop ni uhur sisadokah ni dokahni idopan-Ku do ho, nini Jahowa, Sipaluah ho.
- ⁹ Songon panorang ni si Noak do on bangku: Songon na Hubijahon ase ulang be irungkub bah ni si Noak tanoh on, sonai do Ahu

marbija, paboa seng gilaan-Ku be ho, anjaha seng be hataon-Ku ho.

¹⁰ Ai mosor pe sagala dolog anjaha dugur sagala buntu-buntu, tapi idop ni uhur-Hu seng anjai mosor humbam, anjaha padan pardameian na hun Bangku seng anjai morot, nini Jahowa, na maridop ni uhur bam.

¹¹ Ho ale na masombuh, na pinarburu, na so niapohan! Tonggor ma, Ahu do na patibal batumu bani batu intan, anjaha na pajonam onjolanmu bani batu sapir.

¹² Paulion-Ku do anjung-anjungmu humbani kristal, horbanganmu humbani batu rubin, anjaha tembokmu haganup humbani batu na maharga.

¹³ Anjaha haganup anakmu gabe susian ni Jahowa, anjaha banggal do hadoharon ni niombahmu.

¹⁴ Ibagas hapintoron do ho pajonamon, anjaha mandaoh ma ho humbani odoh-odoh, ai seng dong be sihabiaranmu; sonai humbani songgot-songgot, ai seng anjai dohor be ai bam.

¹⁵ Tonggor ma, anggo dong na roh mangimbang ho, seng na Huharosuhkon ai, barang ise na roh mangimbang ho, maningon talu do ia marimbang ho.

- ¹⁶ Tonggor ma, Ahu do na manjadihon tukang bosi, sisompul arang ibagas apuy, anjaha sipauli sinjata marguru hubani habotohonni, tapi Ahu do homa na manjadihon sipangagou laho parsedahon;
- ¹⁷ sinjata na tinopa mangimbang ho, seng anjai mangasi, anjaha dilah na mangimbang ho bani paruhuman, taluhononmu do. Ai ma parbagianan ni sagala juakjuak ni Jahowa, anjaha hapintoron ni sidea hun Bangku do marharorohan, nini Jahowa.

Ontangan ni Jahowa bani Padan Idop ni Uhur-Ni

55 ¹ Ale hanima, sagala na horahan, roh ma bani bah on! Anjaha hanima na so marduit, roh ma, boli anjaha pangan ma! Roh ma hanima, boli ma anggur ampa dadih, lang pala marduit atap marpamboli!

- ² Mase ma mambere duit hanima bani na so sipanganon, atap gogoh bani na so boi pabosurhon, tangihon, tangihon hanima ma Ahu, jadi panganonnima ma na mantin, anjaha bosur ma hanima bani na mataboh!

Ojur-ojur Mulak bani Jahowa, Simada Hata na Marhagogohon ampa Hapentaran na Sumurung

- ³ Pateleng pinggolnima, anjaha roh ma hanima hu Bangku! Tangihon ma, ase manggoluh

tonduynima! Bahenon-Ku do bannima
padan sisadokah ni dokahni, ai ma idop ni
uhur na bani si Daud, na manongtong in.

⁴ Tonggor ma, Hubahen do ia gabe hasaksian
bani bangsa-bangsa, gabe raja pakon
panggomgom bani bangsa-bangsa.

⁵ Tonggor ma, bangsa na so tinandamu maningon
do homa diloonmu, anjaha bangsa parbegu,
na so manandai ho, roh do marayak ho,
halani Jahowa Naibatamu pakon halani Na
Pansing ni Israel, ai la do na pasangap ho.

⁶ Pindahi hanima ma Jahowa, sanggah boi ope la
jumpah! Dilo hanima ma la sanggah donok
ope la.

⁷ Itadingkon parjahat ma dalanni, ampa halak
pargeduk sura-surani! Sai mulak ma ia
bani Jahowa, ase marpangulaki uhur-Ni
mangidahsi, sai mulak ma ia hubani
Naibatanta, ai unjah do la manaloseihon.

⁸ Sedo pingkiran-Ku pingkirannima, anjaha sedo
dalan-Ku dalannima, nini Jahowa.

⁹ Ai songon gijang ni langit humbani tanoh
on, sonai do gijangan dalan-Ku humbani
dalannima, anjaha pingkiran-Ku humbani
pingkirannima.

¹⁰ Ai songon udan pakon salju na madabuh
hun langit anjaha mulak hujai, tapi iarbahi
do tanoh ai, ibahen do ai napu anjaha

- martumbor, laho mambere bonih bani
parjuma ampa sipanganon bani jolma,
- ¹¹ sonai do hatang-Ku na luar humbani
pamangan-Ku: Seng lumei sonin mulak hu
Bangku, tapi bahenonni do domu hubani na
Huharosuhkon, anjaha manjadi huja pe ai
Husuruh.
- ¹² Ai ibagas malas ni uhur do hanima luar anjaha
ibagas hadameion itogu-togu. Dolog-dolog
ampa buntu-buntu marolob-olob i
lobeinima, anjaha sagala hayu na i talun
martopap-topap.
- ¹³ Gantih ni duri-duri tubuh ma hayu ares anjaha
gantih ni latong tubuh bunga na morum;
masa do ai gabe barita bani goran ni Jahowa,
anjaha gabe tanda sisadokah ni dokahni na
so boi masab.

**Boi do Halak na Legan, na so
Israel Parrupei bani Jahowa**

- 56** ¹ Sonon do hata ni Jahowa, “Ramotkon
hanima ma uhum, anjaha horjahon hanima
ma hapintoron, ai barah ma roh haluahon na
hun Bangku, anjaha talar ma hapintoron-Ku!
- ² Martuah ma jolma na mandalankon on, ampa
anak ni jolma na marsijoloman hujai, na
marramotkon ari Sabat humbani habutakon,

anjaha na marramotkon tanganni humbani
na mangkorjahon na masambor.

³ Sai ulang ma ihatahon halak na legan, na
dob padomuhon dirini hubani Jahowa,
'Sirangkonon ni Jahowa do ahu humbani
bangsani; anjaha ulang ma ihatahon halak
na kinasihkon: Tonggor ma, hayu na masak
do ahu.'

⁴ Ai sonon do hata ni Jahowa, 'Bani halak na
kinasihkon, na marramotkon ari Sabat-Ku
anjaha na mamilih na Huharosuhkon,
anjaha na totap manjolom padan-Ku,

⁵ bereon-Ku do bani sidea ibagas rumah-Ku ampa
i tongah-tongah ni tembok ianan pakon
goran, na dearan humbani anak ampa boru.
Goran sisadokah ni dokahni do bereon-Ku
bani sidea, goran na so sisasapon.'

⁶ Anjaha halak na legan na dob padomuhon dirini
bani Jahowa, laho mambalosi-Si anjaha
laho mangkaholongi goran-Ni, ase gabe
juakjuak-Ni sidea, haganup na marramotkon
ari sabat humbani habutakon, anjaha na
totap manjolom padan-Ku,

⁷ sidea do boanon-Ku hu dolog hapansingon-Ku,
anjaha pamalason-Ku do uhur ni sidea
ibagas rumah partonggoan Bangku.
Galangan situtungan ampa galangan
sisayaton ni sidea harosuhkonon-Ku do ai

bani anjapanjap-Ku, ai rumah partonggoan
do goranon rumah-Ku bani sagala bangsa.”

- ⁸ Sonon do hata ni Tuhan Jahowa, na
patumpu halak na merap humbani Israel,
“Patumpuon-Ku ope halak na legan hu bani,
ambah ni na dob tumpu in!”

Hutuk-hutuk dompak Parmahan ni Bangsa in

- ⁹ Sagala binatang na i talun roh ma mangankon,
sonai ganup hanima binatang na i harangan.
- ¹⁰ Parjaga ni sidea mapitung do ganup, seng dong
na binotoh ni sidea; baliang na longah do
sidea ganup, na so mambotoh mangorong;
marnipinipi do sidea tibal anjaha marosuh
modom.
- ¹¹ Tapi baliang on parhisap do, na so ra bosur.
Anjaha homa parmahan na so maruhur do
sidea, ganup sidea marsitohu dalanni bei,
ganup mangindahi paruntunganni,
- ¹² nini sidea, “Eta, hualop pe anggur, bosuri hita
ma dirinta bani siinumon na koras; patar pe
sonai do, songon sadari on, sabasan tene.”

Pinsang-pinsang ni Jahowa dompak Israel Siparbalik ai

- 57** ¹ Bois do halak parpintor, hape seng
dong halak na mamparuhurhon ai; ibuati
halak na daulat, hape seng dong halak

na marimbagaskon ai, tongon, hona alop
hamagouan,

² laho do ia ibagas damei, marsaran do i podoman
ni sidea na bujur marparlahou.

³ Tapi hanima, padohor ma hujon, ale anak
ni naboru partondung, ale ginompar ni
parbangkis pakon boru jalang!

⁴ Ai ise do na pinahirinima? Dompak ise do na
pinangangangnima in babahnima anjaha
ipahurei-hurei hanima dilahnima? Ai lang
hanima do anak ni halak sipanlanggar,
ginompar ni halak sipangoto-otoi,

⁵ na pasombuh hisap-hisapni i lambung ni hayu
banggal, i toruh ni hayu na maratah, na
manayat anakni i lombang-lombang, i
tongah-tongah ni rigat ni dolog batu?

⁶ Bani batu lemes na i binanga do rupeinima,
ai do parbagianannima; hujai do iuseihon
hanima galangan siinumon, anjaha ibere
hanima galangan sipanganon. Mintor
tarharosuhkon Ahu ma ai?

⁷ Bani dolog na gijang ampa na atas do ibahen ho
podomanmu, anjaha hujai do ho tangkog
manggalangkon galangan sisayaton.

⁸ I pudi ni labah ampa tiangni do inahkon ho
tanda sidingaton bam; ai tundal hun Bangku,
ibuka ho podomanmu, naik ho hujai, anjaha

ipalumbang ho ai; manriah do ho rap
modom pakon sidea, ronsi na marbangkis.

⁹ Laho do ho marayak Molok mamboan minak,
anjaha ipabuei ho do minak na morum;
isuruh ho do suruhanmu hu na daoh, isuruh
ho do ronsi hu nagori toruh.

¹⁰ Loja do ho halani daoh ni pardalananmu, tapi
seng ihatahon ho, “Sae ma in,” jumpahan
gogoh do tong ho, ai seng ngayotan ho.”

¹¹ Bani ise do ho gobir atap mabiar, ase
marladungi ho, seng mardingat ho be
Bangku, anjaha seng marparuhuran ho?
Ai lang halani na sip ai do Ahu anjaha
Huponopkon diring-Ku, ase seng mabiar ho
Bangku?

¹² Ahu, sihol pabotohkon hapintoronmu ampa
pambahenanmu, tapi seng dong gunani
bam.

¹³ Anggo dilo-dilo ho, mahua gana-gana na
pinahumpulmin ma namin pangurupi bam!
Hape logou do manluahon sidea anjaha
hosah do na mangombuskonsi. Tapi barang
ise na martenger ni uhur Bangku, ia do
manean tanoh on, anjaha ia do simada
dolog hapansingon-Ku.

Hata Apoh-apoh bani Israel na Pinatunduk ai

- ¹⁴ Anjaha ihatahon ma, “Pabolag, pabolag, padosdos ma dalan in! Padaoh hanima ma partolsuan humbani dalan ni bangsang-Ku!”
- ¹⁵ Ai sonon do hata ni Na Tang Timbul pakon Na Tang Marmulia in, na marhotak sadokah ni dokahni anjaha pargoran Na Ma Pansing, “I nagori atas pakon bani na ma pansing do Ahu marianan, tapi homa i lambung ni halak partonduy na marosak ampa partoruh ni uhur, ase Hupagoluh tonduy ni halak si toruh maruhur ampa halak partonduy na marosak.
- ¹⁶ Ai seng ronsi sadokah ni dokahni Ahu manggila, anjaha seng tongtong Ahu marah, ase ulang mandatei tonduy ni sidea i lobei-Hu ampa hosah na Hujadihon ai.
- ¹⁷ Halani hajahaton ni sidea do Ahu manggila, Hubogbog sidea, Huponopkon diring-Ku anjaha marringis Ahu, tapi marbalik do sidea mangirikkon rosuh ni sidea sandiri;
- ¹⁸ tapi sai pamalumon-Ku do sidea, togu-toguon-Ku anjaha apohon-Ku; anjaha bani na marpusok ni uhur Ahu mambere buah ni bibir.

- ¹⁹ Damei, damei bani na daoh pakon na dohor,
nini Jahowa, anjaha Ahu do na pamalum
sidea.
- ²⁰ Tapi halak parjahat songon laut na gunsang
do; seng tarbahensi soh, ipansampakkon
gilumbangni do hubang pakon tompoh-
tompoh.
- ²¹ Seng dong damei, nini Naibatanku, bani halak
parjahat.”

Parpuasaon na Sintong

- 58** ¹ Dilohon ma, gogoh tumang, ulang
alang-alang! Pamaling ma soramu songon
tarompit, pabotohkon ma bani bangsang-Ku
panlanggaronni, hubani ginompar ni si
Jakob dousa ni sidea!
- ² Tongon, Ahu do ipindahi sidea ari-ari, anjaha
habotohon pasal dalan-Ku iharosuhkon
sidea; hira bangsa na mandalankon
hapintoron do sidea anjaha titah ni
Naibatani seng onggga itadingkon. Ipindo
sidea do hun Bangku panguhumion na
pintor, anjaha pardohor ni Naibata bani
sidea ihasiholi sidea do.
- ³ Nini sidea, “Mase ma marpuasa hanami,
hape seng ikawahkon Ham hanami?
Mase ma ipatoruh hanami dirinami tapi
seng parduli Ham?” Tonggor ma, bani

ari parpuasaonnima, ijai do hanima
mansari, anjaha isosak-sosak hanima ganup
parhorjanima.

⁴ Tonggor ma, laho maringor ampa martinggil do
hanima ase marpuasa, laho mambogbogi
marhitei tenju-tenju. Ulang ma songon
sisonari ai hanima marpuasa, laho padaskon
soranima hu nagori atas.

⁵ Ai mintor on ma parpuasaon na Huharosuhkon
atap panorang banijolma laho paundukkon
uhurni, anggo ipahurleh halak uluni songon
arung-arung, marpakeian guni ia anjaha
tibal bani orbuk? Hatahononmu do ai
parpuasaon ampa ari harosuh bani Jahowa?

⁶ Ai lang on do parpuasaon na Huharosuhkon,
“Mananggali sangkut-sangkut halani
hajahaton, mangkarhari tali ni pasangan,
paluahkon halak na niodoh-odoh ampa
manrosaki sagala pasangan.

⁷ Ai lang on do, mambere sipanganon bani
halak na loheian, mangarahkon halak na
mampar-ampar hu rumahmu, anjaha anggo
ididah ho halak na talanjang iparhioui ho ia
anjaha lang iponopkon ho bohimu dompak
hasomanmu jolma?”

⁸ Jadi poltak ma sondangmu songon buha siang
ari, anjaha podas ma tubuh hamalumon
bam; hapintoronmu mardalan i lobeimu,

anjaha hamuliaon ni Jahowa mangondingi
ho hun pudi.

⁹ Anggo dilo-dilo ho, jadi balosan ni Jahowa ma
ho; anggo doruh-doruh ho, jadi hatahonon-
Ni ma, “Ijon do Ahu.” Anggo ipadaoh ho
hun tongah-tongahmu pasangan, jajari
na tulduk-tulduk ampa na mansahapkon
hajahaton,

¹⁰ anjaha maidop uhurmu bani na loheian,
ipasabou ho uhur ni na madoyuk, jadi poltak
ma sondangmu i tongah-tongah ni na golap,
anjaha hagolapanmu songon tongah ari ma.

¹¹ Jadi Jahowa ma tongtong mangiring-iring
ho, anjaha pabosuron ho age i tanoh
dorging-dorging, anjaha pargogohon-Ni
holi-holimu, gabe songon pohon na
niarbahan ma ho, anjaha songon bah tubuh,
na so marnahorah-horah.

¹² Jadi paulion ni ginomparmu ma reong-reong na
dob madokah ai, anjaha pajongjongonmu na
dob pinajonam ai bani na basaia; goranon
ni halak ma ho, “Sipauli na mabungbung,
sipadear dalan ase tariankon.”

Pasal Papansingkon Ari Sabat

¹³ Anggo ipasoh ho naheimu bani ari Sabat, laho
mangkorjahon horjamu bani aring-Ku na
pansing in, anjaha ihira ho Sabat ari malas

ni uhur, anjaha ari na pansing ni Jahowa
ra ho papansingkon; anggo ipasangap ho
ai, seng dalan-dalan ho, seng ipindahi ho
rosuh-rosuhmu, atap marsahap-sahapi
tumang ho,

- ¹⁴ jadi malas ma uhurmu mangidah Jahowa
anjaha bahenon-Ku ma ho margareta i
atas ni buntu-buntu ni tanoh on, anjaha
parmudu-muduon-Ku ma ho marhitei
parbagianan ni si Jakob, ompungnima,
tongon, pamangan ni Jahowa do na
mangkatahon in.

**Dousa ni Bangsa ai do Mangambat
Haluahon na humbani Jahowa bani Sidea**

- 59** ¹ Tonggor ma, seng na hurang ganjang
tangan ni Jahowa laho mangurupi, anjaha
seng marhapal pinggol-Ni laho manangihon;
² tapi hajahatonnima do tene manirang hanima
humbani Naibat анима, anjaha dousanima
mambahen lingod bohi-Ni hu bannima,
gabe seng itangihon hanima.
³ Ai marsapu daroh do tangannima anjaha
marlapu hajahaton jari-jarinima; bibirnima
mangkatahon ladung, anjaha gok hajahaton
do dilahnima.
⁴ Sahalak pe lang dong be na mansahapkon
hapintoron, anjaha seng dong be na

manguhum ibagas hasintongan; bani na lang do sidea marhatengeran, anjaha ladung do iluarhon; boratan rumah do sidea marhitei hajahaton, anjaha hamagouan do itubuhkon.

- ⁵ Tolur ni ulog darih do ipodomkon sidea, anjaha asar ni lawah-lawah ipauli; ise na mangankon tolur ni sidea, maningon matei do, anjaha humbani tolur na hona dogei luar ulog darih.
- ⁶ Na tinonun ni sidea ai seng marguna gabe hiou, anjaha seng tarbahen jadi sabing na hinorjahon ni sidea. Horja hajahaton do horja ni sidea, anjaha pangodoh-odohon do horja ni tangan ni sidea.
- ⁷ Podas do nahei ni sidea mangkorjahon hajahaton, anjaha tarolos do sidea manduruskon daroh na so marpipot; uhur hajahaton do uhur ni sidea, na parsedahon ampa na mangagou dalan ni sidea.
- ⁸ Dalan hadameion seng itanda sidea, seng dong habonaron bani dalan ni sidea; mareluk-eluk do dalanni ibahen sidea, sagala na mardalan ijai seng marhasonangan.
- ⁹ Halani ai do ase daoh habonaron hun banta, anjaha seng roh hapintoron banta. Mangarap do hita bani haliharon, hape na

golap do, atap bani sinalsal, hape bani na lotir do hita mardalan.

- ¹⁰ Dadap-dadap do hita bani dingding songon halak na mapitung, anjaha jamah-jamah songon halak na so marmata. Mangkatartolsu hita arian songon bani golap ni ari, anjaha songon na matei do hita bani hagogohon ni angkulanta.
- ¹¹ Ganup do hita morong songon gipul, anjaha marduhur-duhur songon asas; sai paima-imahon do hita bani habonaron, hape seng dong; paima-imahon do hita bani haluahon, hape daoh do hun banta.
- ¹² Ai buei do panlanggaronnami i lobei-Mu, anjaha dousanami do mangaduhon hanami; talar do bennami panlanggaronnami, anjaha ibotoh hanami do hajahatonnami.
- ¹³ Marbalik anjaha marnalangkon Jahowa do hanami anjaha itundali hanami do Naibatanami; mansahapkon pangodoh-odohon do hanami ampa parbalikon; iluarhon hanami do hata ladung humbagas uhurnami.
- ¹⁴ Surut do dompak pudi habonaron, anjaha mandaoh-daoh do hapintoron jongjong.
- ¹⁵ Seng jumpah be hasintongan, anjaha barang ise na paholang dirini humbani hajahaton, gabe sirampokan ma. ididah Jahowa do ai,

gabe seda uhur-Ni, halani seng dong be habonaron.

- ¹⁶ Anjaha ididah, seng dong jolma na boi paluahkon; longang do uhur-Ni halani seng dong na mangapiti; jadi tangan-Ni sandiri ma na manumpaki-Si, anjaha hapintoron-Ni na mangurupi-Si.
- ¹⁷ Ipakei hapintoron songon baju partahanan, anjaha inahkon tangkuluk haluahon bani ulu-Ni; hiou pambalason do ipahei, anjaha ihioi diri-Ni bani baju-baju parsimburuon.
- ¹⁸ Romban hubani pambahenan do la mambalas: ringis hu bani imbang-Ni, pambalason bani munsuh-Ni; bani pulou-pulou pe dalankonon-Ni do pambalason.
- ¹⁹ Jadi habiaran ni halak na i hasundutan ma goran ni Jahowa, ampa halak na i hapoltakan mabiar do bani hamuliaon-Ni, ai roh do la songon bah marbanggal na doras, ai ma na jinuljul ni hosah ni Jahowa.
- ²⁰ Jadi roh ma hu Sion Sipaluah, sonai bani halak na i Jakob, na mulak humbani hajahaton, nini Jahowa.
- ²¹ Tapi anggo Ahu, on do padan-Ku bani sidea, nini Jahowa, "Tonduy-Hu, na sorap bam ampa hatang-Ku, na dob Hunahkon bani pamanganmu, seng boi morot ai humbani pamanganmu, age humbani pamangan ni

ginomparmu, age humbani pamangan ni
ginompar ni ginomparmu, nini Jahowa,
humbani sonari nari ronsi sadokah ni
dokahni.”

Hamuliaon ni Sion na Sihol Masa ai

- 60** ¹ Jongjong ma, marsinondang ma ho!
Ai domma roh panondangmu anjaha
hamuliaon ni Jahowa domma poltak i
baboumu.
- ² Ai tonggor ma, na lotir do marrungkub tanoh
on, anjaha hagolapan sagala bangsa;
tapi i baboumu do poltak Jahowa anjaha
hamuliaonni taridah i atasmu.
- ³ Jadi roh ma bangsa sipajuh begu-begu marayak
panondangmu ampa raja-raja roh bani
sinalsal na poltak bam.
- ⁴ Mangkawah ma ho inggot, anjaha tonggor ma:
Ganup do sidea martumpu, marrohan bam.
Roh do anakmu humbani na daoh, anjaha
borumu iboban bani abing-abingan.
- ⁵ Jadi idahonmu ma ai gabe minar ma bohimu;
hinsah anjaha lumbang ma uhurmu, ai roh
ma bam habayakon ni laut ampa arta ni
bangsa-bangsa das ma bam.
- ⁶ Hulanen ni unta do marrungkub tanohmu,
unta na hinsah hun Midian ampa hun Epa;
haganupan sidea na hun Seba roh do. Iboan

sidea do omas pakon hamonan anjaha
iambilankon sidea do puji-pujian ni Jahowa.

⁷ Haganup biribiri na hun Ketar martumpu bam,
biribiri tunggal na hun Nabayot marugas
bam; roh do sidea bani anjapanjap-Ku gabe
galangan harosuh, anjaha pasangapon-Ku
do rumah-Ku na marmulia in.

⁸ Ise do sidea na habang ai songon hambun,
anjaha songon asas na laho bani harangni?

⁹ Ai siholan do sagala pulou Bangku, anjaha
kapal-kapal na hun Tarsis parlobei laho
mamboan anakmu humbani na madaoh,
iboan homa pirak ampa omas ni sidea,
haporluan bani goran ni Jahowa Naibatamu
ampa bani Na Pansing ni Israel, ai la do
mambahen marmulia ho.

¹⁰ Halak na legan ma paulihon tembokmu, anjaha
raja-raja ni sidea marugas bam; tongon
ibagas ringis-Ku Hubogbog ho, tapi marhitei
parontou ni uhur-Hu idopan-Ku do ho.

¹¹ Anjaha horbanganmu manongtong ma ai
buha, arian pakon borngin seng tutup,
ase boi iboban hu bam habayakon ni
bangsa-bangsa, rap pakon raja ni sidea
marodor itogu.

¹² Ai bangsa pakon harajaon na so mambalosi
ho maningon magou do; bangsa-bangsa ai
maningon siapkononkon do.

- ¹³ Habayakon ni Libanon roh do bam, ai ma hayu ares, maranti ampa sampinur, laho pajagarhon ianan ni hapansingon-Ku, ampa mambahen marmulia sidogeian ni nahei-Hu.
- ¹⁴ Roh do marrogop hu bam ginompar ni na mandoruni ho, anjaha sagala na mangapasi ho maningon marsombah do bani naheimu; anjaha goranon ni sidea ma ho, “Huta ni Jahowa, Sion ni Na Ma Pansing ni Israel.”
- ¹⁵ Tembal ni na dob tinadingkon ho anjaha nidomdoman anjaha sinimbilan ni halak, bahenon-Ku ma ho marmulia sadokah ni dokahni, anjaha gabe malas ni uhur marsundut-sundut.
- ¹⁶ Onsoponmu ma dadih ni bangsa-bangsa, anjaha minum ma ho humbani habayakon ni raja-raja; jadi botohonmu ma, Ahu do Jahowa, Sipaluah bam ampa Sipartobus, Sipargogoh bani Jakob.
- ¹⁷ Gantih ni tombaga boanon-Ku ma omas, anjaha gantih ni bosi boanon-Ku ma pirak; gantih ni hayu, tombaga; gantih ni batu, bosi. Bahenon-Ku ma damei panggomgomi bam, anjaha parrajai hapintoron.
- ¹⁸ Seng tarbogei be odoh-odoh i tanohmu, hareongon ampa hasedaon i nagorimu; goranon ma tembokmu Hatuahon anjaha horbanganmu Puji-pujian.

- ¹⁹ Seng dong be mata ni ari bahen panondang bam arian, anjaha sondang ni bulan seng marsinalsal bam; tapi Jahowa ma gabe panondang bam sadokah ni dokahni, anjaha Naibatamu gabe hamuliaon bam.
- ²⁰ Seng sundut mata ni arimu, anjaha seng lingod be bulanmu; ai Jahowa do gabe panondang sisadokah ni dokahni bam, anjaha marpunsa ma panorang pusok ni uhurmu.
- ²¹ Anjaha bangsamu, ganup do sidea halak parpintor, anjaha teanon ni sidea do tanoh on ronsi sadokah ni dokahni; sidea, ai ma tumbor na Husuan, jadi-jadian ni tangan-Ku, bahen hasangapon-Ku.
- ²² Na etek ai gabe saribu, na otik ai gabe sada bangsa na gogoh; Ahu do Jahowa, na papodaskon roh bani panorangni.

Ambilan Na Madear Pasal Hatuahon na Sihol Roh

61 ¹ Tonduy ni Tuhan Jahowa do na sogop bangku, ai domma iminaki Jahowa ahu, laho mangambilankon Ambilan Na Madear bani halak na madoyuk; isuruh do ahu pauli-ulihon halak paruhur na maropuk, maningtingkon haluahon bani halak na tartutup, ampa parharhar ni gari bani halak na tarsangkut;

- ² laho maningtingkon tahun idop ni uhur
humbani Jahowa, ampa ari pambalason
ni Naibatanta; laho mangapoh sagala na
marpusok ni uhur i Sion,
- ³ mamberehon bani sidea sortali gantih ni abuan,
minak malas ni uhur gantih ni hiou pusok ni
uhur, doding puji-pujian gantih ni tonduy na
horu, ase targoran sidea hayu hapintoron,
na sinuan ni Jahowa, bahen puji-pujian Bani.
- ⁴ Paulion do na dob pinarseda; pabayuon ni
sidea do huta-huta na dob mareong, na dob
tarulang marsundut-sundut.
- ⁵ Halak na legan do jongjong-jongjong
marmahani hulanannima, anjaha bangsa
na legan gabe parhorja i jumanima ampa i
pohon anggurnima.
- ⁶ Tapi anggo hanima goranon do malim ni
Jahowa, siparugas bani Naibatanta do
hatahononkon hanima. Habayakon ni
sipajuh begu-begu do panganonnima,
anjaha hasangapon ni sidea solukonnima.
- ⁷ Gantih ni habadoronnima, jaloonnima do
parbagianan sidua lompit i tanohnima;
gantih ni hahirionnima jaloonnima do malas
ni uhur sisadokah ni dokahni.
- ⁸ Ai Ahu do Jahowa sihaolongi hapintoron,
tapi na magigi bani panrampokon ampa na
masambor. Sai berehonon-Ku do upah bani

sidea sintong-sintong, anjaha bahenon do padan sisadokah ni dokahni bani sidea.

⁹ Tarbarita do ginompar ni sidea i tongah-tongah ni sipajuh begu-begu, sonai anak ni sidea i tongah-tongah ni bangsa-bangsa. Sagala na mangidah sidea botohonnima, bangsa na pinasu-pasu ni Jahowa do sidea.

¹⁰ Marmalas ni uhur tumang do ahu ibagas Jahowa, marolob-olob do tonduyhu ibagas Naibatanku; ai iparhioui do ahu bani hiou haluahon, anjaha isabingi do ahu bani hiou hapintoron, songon siparunjuk na manggotongi dirini, anjaha songon tunangan na mamakei ugas-ugasni.

¹¹ Ai songon tanoh na manubuhkon suan-suanan, anjaha songon pohon na mambahen martumbor bonih na sinaburhon hujai, sonai do Jahowa patubuhkon hapintoron ampa puji-pujian i lobei ni ganup bangsa parbegu.

Hamuliaon ni Sion na Sihol Roh in

62 ¹ Halani Sion seng anjai sip Ahu, anjaha halani Jerusalem seng soh Ahu, paima poltak hapintoronni songon sondang ni mata ni ari, anjaha hatuahonni songon rigapan na gara.

- ² Idahon ni bangsa sipajuh begu-begu ma hapintoronmu anjaha sagala raja-raja mangidah hamuliaonmu; anjaha goranon ma ho marhitei goran na baru, ai ma sitontuhonon ni pamangan ni Jahowa.
- ³ Gabe sortali hamuliaon do ho ibagas tangan ni Jahowa, anjaha sortali harajaon ibagas tangan ni Naibatamu.
- ⁴ Lang be goranon ho na tinadingkon, anjaha tanohmu seng be hatahonon na tarulang; tapi goranon ma ho na hinarosuhkonni uhur-Hu, anjaha tanohmu goranon na dob laho; ai marosuh do Jahowa mangidah ho, anjaha tanohmu marhalahoan do.
- ⁵ Ai songon garama mambuat anak boru, sonai do ho buaton ni Sipauli ho; songon malas ni uhur ni siparunjuk bani tunanganni, sonai do malas ni uhur ni Naibatamu mangidah ho.
- ⁶ Bani tembokmu, ale Jerusalem, domma Husuruh parjaga. Arian pakon borngin seng anjai sip sidea. Hanima, na padingatkon Sion bani Jahowa, ulang ma marnasoh!
- ⁷ Ulang sip hanima i lobei-Ni, paima itatap Jerusalem anjaha ibahen ai gabe puji-pujian i tanoh on.
- ⁸ Domma ibijahon Jahowa marhitei tangan-Ni siamun ampa marhitei tangan-Ni na gogoh

in: Seng be bereon-Ku omeimu gabe panganon ni munsuhmu, anjaha seng be inumon ni halak na legan anggurmu, na dob hinangalutkonmu,

⁹ tapi na patumpu-tumpuhon, sidea ma na mangankon anjaha mamuji-muji Jahowa; anjaha na mambuat, sidea ma na manginum bani alaman-Ku na ma pansing in.

¹⁰ Luar ma, luar ma hanima hun horbangan in! Pasirsir dalan bani bangsa in! Palumbang, palumbang dalan in, padaoh batu-batu! Pajongjong ma mandera partanda bani bangsa-bangsa!

¹¹ Tonggor ma, domma itingtingkon Jahowa das hu ujung ni tanoh on: Hatahon ma bani boru Sion, “Tonggor ma, roh do haluahonmu! Mangihut do bani upahni, anjaha i lobei-Ni do na sinari-Ni.”

¹² Goranon do sidea: bangsa na pansing, Na pinaluah ni Jahowa. Anjaha ho goranon do na hinasiholan, huta na seng be sitadingkononkon.

Uhum ni Naibata bani Edom

63 ¹ Ise do in, na roh hun Edom, marhiou sigenger hun Bosra, marmulia marpakeian, luar ibagas hinagok ni gogohni? Ahu

do, sihatahon hapintoron, na margogoh
paluahkon.

² Mase gerger pakeian-Mu, anjaha hiou-Mu
songon hiou ni halak sipardogei anggur
ibagas kilang anggur?

³ Sahalak Ahu do na mardogei ibagas kilang
ai, seng dong humbani bangsa-bangsa
hasoman-Ku. Domma bois Hulotloti sidea
ibagas ringis-Ku, anjaha domma Hurosaki
sidea ibagas ringis-Ku; marbirsak do daroh
ni sidea bani hiou-Hu, gabe butak ganup
pakeian-Ku.

⁴ Tongon, domma Huputuskon ari pambalason,
anjaha roh ma tahun haluahon na hun
Bangku.

⁵ Mangkawah Ahu, hape seng dong na
mangurupi. Longang Ahu, halani seng dong
na ra mangkasomani Ahu. Jadi tangan-Ku
mando pangurupi Bangku, anjaha ringis-Ku
mangkasomani Ahu.

⁶ Domma Hurojati bangsa-bangsa ibagas
ringis-Ku, anjaha mabuk Hubahen sidea
ibagas ringis-Ku; Huuseihon do daroh ni
sidea hu tanoh.

**Tonggo Mansopotkon Dousa ampa
Elek-elek humbani Bangsa ai**

- ⁷ Sai baritahononku do ganup dear ni layak ni Jahowa, pambahenan habanggalon ni Jahowa, domu hubani haganup na binahen ni Jahowa banta, ampa buei ni dear ni layak-Ni hubani ginompar ni Israel, na binahen-Ni bani sidea romban hu bani idop ni uhur-Ni, domu hubani hinagok ni dear ni layak-Ni.
- ⁸ Ai nini do, “Tongon, bangsang-Ku do sidea, anak na so ra marladung.” Jadi la do gabe Sipaluah bani sidea, ibagas sagala hasosakan ni sidea.
- ⁹ Sedo suruhan atap malekat, tapi bohi-Ni do na paluahkon sidea; marhitei holong ni atei-Ni ampa idop ni uhur-Ni do sidea ipaluah; iabing do sidea anjaha iusung tongtong humbani sapari.
- ¹⁰ Tapi marbalik do sidea anjaha isunsahi Tonduy-Ni Na Pansing in; halani ai mubah do la bani sidea gabe munsuh, anjaha la sandiri marporang dompak sidea.
- ¹¹ Dob ai mardingat ma bangsa-Ni bani panorang sapari, bani si Musa juakjuak-Ni ai, nini sidea, “Ija do la, na mambuat humbagas bah siparmahan bani hulananni? Ija do la,

na dob mamberehon Tonduy-Ni marianan
ibagas dirini,

- ¹² na mambahen tangan-Ni na marmulia
in mardalan bani ianan ni si Musa, na
mambolah bah ai i lobei ni sidea, laho
mambahen goran Bani sadokah ni dokahni,
- ¹³ na manogu-nogu sidea mamontas laut
na bagas, songon huda na mardalan i
halimisan, seng tartolsu?"
- ¹⁴ Songon pinahan na tuad hu habungan, sonai
do ibere Tonduy ni Jahowa parsaranan
bani sidea. Sonai do pambobai-Mu bani
bangsa-Mu, laho mambahen Bamu goran
na marmulia.
- ¹⁵ Mangkawah ma Ham hun nagori atas, anjaha
tatap Ham ma humbani ianan-Mu na
pansing anjaha na marmulia in! Ija do
pongut ni uhur-Mu pakon hagogohon-Mu?
Sihol ni uhur-Mu ampa holong ni atei-Mu
mandaoh-daoh do humbangku.
- ¹⁶ Tongon, Ham do Bapanami, ai seng itanda
si Abraham hanami, anjaha si Israel pe
seng ipabotoh-botoh hanami. Ham do ale
Jahowa, Bapanami, humbani sapari do
goran-Mu Sitobus hanami.
- ¹⁷ Ham Jahowa, mase ipaturut Ham hanami
manlembang humbani dalan-Mu? Mase
ipahengkeng Ham uhurnami gabe seng

marhabiaran hanami Bamu? Marulak-
ulkan ma uhur-Mu halani juakjuak-Mu,
halani marga parbagianan-Mu.

¹⁸ Tongkin do bangsa-Mu marrupeï bani
ianan-Mu na pansing in; munsuhanami do
mandogei-dogei ianan hapansingon-Mu.

¹⁹ Gabe doskon bangsa na so onggá ginomgomán-
Mu do hanami, doskon halak na so onggá
marpanggorankon goran-Mu.

64 ¹ Ambit iribakkon Ham ma namin langit
in anjaha susur Ham, gabe dugur ma
dolog-dolog i lobei-Mu,

² songon apuy na mambahen gara soban, anjaha
songon apuy na pagurgur bah, ase tarbarita
goran-Mu bani imbang-imbang-Mu, anjaha
bangsa-bangsa gobir i lobei-Mu.

³ Anggo ibahen Ham halongangan na so tinagam
ni uhurnami, susur Ham tene, gabe malala
dolog i lobei-Mu,

⁴ ai ma na so onggá binogei humbani na basaia.
Seng onggá ibogei pinggol, seng onggá
ididah mata, dong Naibata sobali Ham, na
manumpaki halak na marpangarapan Bani.

⁵ Ijumpahkon Ham do halak na bujur
mangkorjahon hapintoron, halak na
mardingat Ham bani dalan-Mu. Tonggor ma,
manggila do Ham, halani mardousa hanami

hu Bamu humbani sapari anjaha marbalik hanami.

- ⁶ Gabe doskon halak na mabutak do hanami ganup, anjaha hapintoronnami ganup songon hiou gok bani na mabutak. Melus do hanami haganup songon bulung-bulung, anjaha iluahon hajahatonnnami do hanami songon pambahen ni logou.
- ⁷ Sahalak pe seng dong na mandilo goran-Mu, atap na mamorluhon marsijoloman Bamu; ai domma iponopkon Ham bohi-Mu hun bennami, anjaha iondoskon Ham hanami bani kuasa ni hajahatonnnami.
- ⁸ Tapi tene, ale Jahowa, Bapanami do Ham! Tanoh halampung do hanami, anjaha Ham do Sitompa hanami; ganup do hanami jadi-jadian ni tangan-Mu.
- ⁹ Ulang ma mamarah tu Ham, ale Jahowa, ulang ma tongtong mardingat Ham bani hajahaton! Marpanatap ma Ham, ai bangsa-Mu do hanami ganup.
- ¹⁰ Gabe halimisan do sagala huta-Mu na pansing in; gabe halimisan do Sion anjaha tarulang Jerusalem.
- ¹¹ Rumah na pansing anjaha na marmulia bennami, ianan ni ompungnami mamuji Ham, mosog do ibahen apuy; anjaha sagala

ianan hamalasan ni uhurnami bois do mareong.

- ¹² Mangidah ganupan ai, tahan do Ham, ale Jahowa? Sai sip ope Ham, anjaha ompoton-Mu ope mangodoh-odoh hanami?

Ipabali Halak Pardousa, Ijalo Halak na Tarpilih

65 ¹ Sirsir do Ahu pindahan ni halak, na so sungkun-sungkun Bangku, sirsir do Ahu jumpahan ni halak na so mangindahi Ahu. Ningku do dompak bangsa na so mandilo goran-Ku, “Ijon do Ahu, ijon do Ahu!”

- ² Hupaherbang do tangan-Ku ganup ari bani bangsa na manendel, na mardalan bani dalan na so madear, na mangihutkon rosuh ni uhurni sandiri,

- ³ Hubani bangsa na pagara ringis-Ku tongtong, na manggalang ibagas pohon, anjaha na manutung dahupa i atas batu bata,

- ⁴ na hundul bani tanoman, na marborngin ibagas liang, na mangankon gulei babuy, anjaha kuah ni sipanganon sihagigihononkon do ibagas hudon ni sidea;

- ⁵ na mangkatahon, “Padaoh dirimu humbangku, ulang dohori ahu, ai ahu do na papansing ho.” Ningon gabe timus do sidea ibagas igung-Ku, gabe apuy na gara tongtong.

- ⁶ Tonggor ma, tarsurat do i lobeihu, “Seng anjai sip Ahu, tapi sai luluhonon-Ku do, tongon, balaskonon-Ku do bani abingan ni sidea,
- ⁷ hajahaton ni sidea ai ampa hajahaton ni ompung ni sidea, nini Jahowa; halani manutung dahupa sidea i atas dolog anjaha ipahiri Ahu i atas ni buntu-buntu, halani ai suhatkonon-Ku do bani abingan ni sidea upah domu bani pambahenan ni sidea ai.”
- ⁸ Sonon do hata ni Jahowa, “Songon parsahap ni halak, anggo adong ope bahni ibagas buah anggur: Ulang ambukkon in, dong ope pasu-pasu ijin, sonai do bahenon-Ku, halani juakjuak-Ku, seng parsedaon-Ku sidea ganup.”
- ⁹ Parohon-Ku do ginompar humbani Jakob, ampa sada halak sitean dolog-Ku humbani Juda; na pinilih-Ku do manean tanoh in, anjaha juakjuak-Ku marianan ijin.
- ¹⁰ Gabe panggagatan ni biribiri do Saron, anjaha habungan Akor gabe panggompangan ni lombu bani bangsang-Ku, na pindah-pindah Bangku.
- ¹¹ Tapi hanim, sitadingkon Jahowa, na lupa bani dolog-Ku na pansing in, na parsirsirhon meja bani sisombahon Gad, anjaha na manggalangkon galangan siinumon bani sisombahon Men,

- ¹² ondoskonon-Ku do hanima bani podang,
anjaha ganup hanima maningon tunduk i
panayatan; halani sanggah dilo-dilo Ahu,
seng marbalos hanima, sanggah marsahap
Ahu, seng itangihon hanima, tapi ihorjahon
hanima do sogam ni uhur-Hu, anjaha ipilih
hanima na so Huharosuhkon.
- ¹³ Halani ai sonon do hata ni Tuhan Jahowa,
“Tonggor ma, mangan do juakjuak-Ku,
tapi loheian do hanima, tonggor ma,
minum do juakjuak-Ku, tapi horahan do
hanima; tonggor ma, marmalas ni uhur do
juakjuak-Ku, tapi bador do hanima.
- ¹⁴ Tonggor ma, marolob-olob do juakjuak-Ku
halani malas ni uhurni, tapi hanima tangis
ma halani horu ni uhur, anjaha doruh-doruh
halani uhur na maseda.”
- ¹⁵ Tadingkononnima ma gorannima bani halak
na Hupilih gabe hata sipakeion mamurai,
“Sai ibunuh Tuhan Jahowa ma ho songon
sidea.” Tapi anggo juakjuak-Ku diloon do
sidea marhitei goran na legan,
- ¹⁶ ase atap ise na mamasu-masu dirini i tanoh on,
pasu-pasuonni ma dirini marhitei Naibata
na sintong in, anjaha atap ise na marbija
i tanoh on, marhitei goran ni Naibata na
sintong in ma ia marbija; halani domma lupa

humbagas uhur hasosakan na dob salpu,
anjaha lingod ai humbani matang-Ku.

Bagah-bagah Pasal Tanoh na Baru

- ¹⁷ Tongon, tonggor ma, Ahu manompa langit na baru pakon tanoh na baru, anjaha seng be ingaton na parlobei in, barang puho ibagas uhur.
- ¹⁸ Tapi marmalas ni uhur anjaha marolob-olob ma hanima ronsi sadokah ni dokahni marhitei na Hutompa ai; ai tonggor ma, Ahu do manompa Jerusalem gabe parolob-oloban, anjaha bangsa pangisini gabe malas ni uhur.
- ¹⁹ Marolob-olob do Ahu mangidah Jerusalem, anjaha marmalas ni uhur mangidah bangsang-Ku, seng tarbogei be ijai sora na tangis-tangis, atap sora na doruh-doruh.
- ²⁰ Seng dong be ijai dakdanak siotik umur, atap na matua na so gok ari-ari ni goluhni; ai dakdanak ope na matei saratus tahun umurni, anjaha pardousa iuhum bani na marumur saratus tahun.
- ²¹ Pajongjongon ni sidea do rumah anjaha iiankon, suanon ni sidea do hayu anggur anjaha ipangan buahni.
- ²² Seng pajongjong rumah sidea, gabe halak na legan mangiankon, seng manuan sidea, gabe halak na legan mangankon. Songon umur

ni hayu, sonai do umur ni bangsang-Ku,
anjaha na Hupilih ai, panganon ni sidea do
na hinalojahon ni tanganni.

²³ Seng soya-soya sidea marhorja, seng tubuhan
anak ase podas matei; ai ginompar
pinasu-pasu ni Jahowa do sidea, anjaha
ginomparni rap do pakon sidea.

²⁴ Lape sidea mardilo domma Hubalosi, marsahap
ope sidea domma Hutangihon.

²⁵ Sorigala pakon anak ni biribiri rap manampal;
singa manggagat na sinabi songon lembu,
anjaha ulog mangankon orbuk; seng dong
be na manjahati atap na parsedahon bani
sab dolog-Ku na pansing in, nini Jahowa.

Uhum bani Parnaibata na Legan

66 ¹ Sonon do nini Jahowa, “Langit ai do
paratas-Hu, tanoh sidogeian ni nahei-Hu.
Rumah na sonaha do na sihol paulionnima
in Bangku, anjaha aha do in ianan
parsaranan-Kin?”

² Ganupan in tangan-Ku do manjadihon, gabe
tarjadi ganupan in, nini Jahowa. Tapi bani
halak sisonon do Ahu marpanatap: Bani
halak na madoyuk ampa partonduy na
maropuk anjaha na hitir-hitir mambogei
hatang-Ku.

- ³ Halak na manayat lombu, doskon na mamunuh
jolma do ai, halak na manggalangkon biribiri,
doskon na manampul baliang do ia ijai; halak
na manggalangkon galangan sipanganon,
doskon na manggalangkon daroh ni babuy
do ia ijai; atap halak na manutung dahupa,
doskon na mamuji sisombahon do ia ijai.
Tongon, marsitohu dalanni bei do halak
on, anjaha iharosuhkon uhur ni sidea do
mangkorjahon sihagigihononkon.
- ⁴ Ahu pe harosuhkonon-Ku do pangarsikon
bani sidea, parohon-Ku do bani sidea na
hinabiaranni; ai sanggah dilo-dilo Ahu, seng
dong na marbalos, sanggah marsahap Ahu,
seng dong na manangihon, tapi lambin
ibahen sidea do na jahat i lobei-Hu, anjaha
ihamegahkon na so Huharosuhkon.

Habanggalon ni Sion na Sihol
Roh in. Uhum bani Parjahat

- ⁵ Tangar ma hata ni Jahowa, hanima na hitir
mambogei hata-Ni, "Saninanima, na
mardomdom mangidah hanima, na padarat
hanima halani goran-Ku mangkatahon,
'Ipasangap Jahowa ma diri-Ni, ase ididah
hanami malas ni uhurnima!' Tapi sidea ai,
ningon bador do.

- ⁶ Tangar, sora na lutu roh hun huta in! Tangar, sora hun rumah panumbahan! Ai ma sora ni Jahowa, na mandalankon pambalason bani munsuh-Ni.
- ⁷ Paima mangarou ia, domma itubuhkan anak, lape maborit iahapkon, domma itubuhkan anak dalahi.
- ⁸ Ise na dob onnga mambogei na sonai ai? Ise na dob onnga mangidah na sonai ai? Boi do sada nagori tubuh ibagas sadari? Boi do hana sada bangsa ibagas na tongkin? Tapi anggo Sion, tongkin ni in mangarou, mintor itubuhkan do anak.
- ⁹ Mintor ungkabon-Ku ma partapaan, anggo lang paturuton-Ku tubuh? nini Jahowa. Mintor Ahu ma, na dob paturutkon tubuh, manutup ai use? nini Jahowa.
- ¹⁰ Marmalas ni uhur ma hanima rap pakon Jerusalem, anjaha marolob-olob ma mangidahsi, ganup hanima na marholong ni uhur bani! Marmalas ni uhur tumang ma hanima rap pakonsi, ganup hanima na marpusok ni uhur mangidahsi hinan.
- ¹¹ Ai boi ma hanima mangonsop anjaha bosur humbani bagod ni pangapoh ai, ai boi ma hanima minum sombuh anjaha marmegah-megah humbani hasangaponni na tarlobih ai.

- ¹² Ai sonon do hata ni Jahowa, “Tonggor ma, Ahu patuduhkon hadoharon bani, songon bah mardalan bueini, ampa habayakon ni bangsa parbegu, songon binanga na marbanggal; minum ma hanima, abing-abingonni do hanima anjaha titeng-titengonni.”
- ¹³ Songon halak na niapoh ni inangni, sonai do apohon-Ku hanima; maningon apohon do hanima i Jerusalem.
- ¹⁴ Idahonnima ma ai, gabe malas ma uhurnima, hisar ma holi-holinima songon bulung-bulung maratah; jadi botohon ni halak ma, tangan ni Jahowa do mangkasomani juakjuak-Ni, tapi ringis-Ni do mangimbang munsuh-Ni.
- ¹⁵ Ai tonggor ma, na roh do Jahowa marhitei apuy, anjaha gareta-Ni songon haba-haba, laho marlulu ibagas gajag ni gila-Ni, anjaha asup-asup-Ni marhasoman jirlam ni apuy.
- ¹⁶ Ai marhitei apuy do Jahowa manguhumi tanohon, anjaha marhitei podang sagala daging; buei do na binunuh ni Jahowa.
- ¹⁷ Halak na papansing ampa na manguras dirini, na manggalang ibagas pohon, na mangirikkon sada halak na i tongah-tongah ai, halak na mangankon gulei babuy, sihagigihononkon ampa ubag, maningon do bois ganup, nini Jahowa.

- ¹⁸ Ai Hutanda do horja ampa pingkiran ni sidea; anjaha roh do Ahu laho patumpuhon sagala bangsa ampa sahap; jadi roh ma sidea, anjaha idahonni ma hasangapon-Ku.
- ¹⁹ Anjaha pajongjongon-Ku ma sada tanda bani sidea; humbani sidea, na dob maluah ai, paingkaton-Ku do marayak bangsa sipajuh begu-begu, hu Tarsis, hu Put ampa Lud, sisintak sior, hu Tubal pakon Javan, hubani pulou na madaoh, na so onnga mambogei hatang-Ku atap mangidah hamuliaon-Ku; baritahonon ni sidea do hamuliaon-Ku i tengah-tengah ni bangsa-bangsa.
- ²⁰ Jadi boanon ni sidea ma saninanima humbani sagala bangsa-bangsa gabe galangan bani Jahowa, roh mangajak huda, margareta, martandu, mangajak halode ampa unta, marayak Jerusalem, dolog-Ku na ma pansing in, nini Jahowa, usih songon Israel, mamboan galangan sibere-bere ibagas pinggan na ma pansing hu rumah ni Jahowa.
- ²¹ Anjaha humbani sidea pe pabangkiton-Ku do gabe malim ampa halak Levi, nini Jahowa.
- ²² Ai songon langit na baru pakon tanoh na baru sitompaon-Kai, jonam jongjong i lobei-Hu, nini Jahowa, sonai do totap jongjong ginomparnima ampa gorannima.

- ²³ Jadi masa ma bani ganup poltak ni bulan,
bani ganup ari Sabat, roh ma sagala na
manggoluh manombah hu lobei-Hu, nini
Jahowa.
- ²⁴ Jadi luar ma sidea, mangidah bangkei ni halak
na manlawan dompak Ahu; ia gilok-gilok ni
sidea seng matei, anjaha apuy ni sidea seng
mintop, anjaha gabe hagigi do sidea bani
sagala na manggoluh.”

Jeremia

Pandiloon ni Jahowa bani si Jeremia

1 ¹ Hata ni si Jeremia, anak ni si Hilkia, sada humbani malim na i Anatot, na i tanoh Benjamin;

² roh do hata ni Jahowa bani, bani panorang ni si Josia, anak ni si Amon, raja ni Juda, pasapuluhtoluhahunkon dob raja ia.

³ Roh do homa bani panorang ni si Joyakim, anak ni si Josia, raja ni Juda, das bani pasapuluhsadahanunkon dob raja si Sedekia, anak ni si Josia, raja ni Juda, das bani na tarbuang Jerusalem bani bulan lima.

⁴ Roh do hata ni Jahowa hu bangku, mangkatahon,

⁵ “Paima Hutompa ho ibagas partapaan, domma Hutanda ho, anjaha paima itubuhkon inangmu ho, domma Hupapansing ho, anjaha Hupabangkit ho gabe nabi bani bangsa-bangsa.”

⁶ Dob ai ningku ma, “Ham Tuhan Jahowa! Seng hubotoh naha marsahap, ai poso ope ahu.”

⁷ Tapi nini Jahowa ma dompak ahu, “Ulang ihatahon ho, ‘Poso ope ahu.’ Atap huja pe ho Husuruh, maningon laho ho, anjaha

atap aha na Hutonahkon bam, ai do hatahononmu.

⁸ Ulang ho mabiar i lobei ni sidea, ai Ahu do hasomanmu, laho paluahkon ho,” nini Jahowa.

⁹ Jadi isurdukkon Jahowa ma tangan-Ni, anjaha ijamah ma pamanganku; nini Jahowa ma dompak ahu, “Tonggor ma, domma Hunahkon hatang-Ku hubagas pamanganmu.

¹⁰ Tonggor ma, Hupabangkit do ho sadari on mardiateihon bangsa-bangsa ampa harajaon-harajaon, laho mangumpat ampa manreongkon, laho parsedahon ampa mangagouhon, laho padearhon ampa manuan.”

¹¹ Dob ai roh ma hata ni Tuhan Jahowa hu bangku mangkatahon, “Jeremia aha do ididah ho?” Jadi ningku ma, “Huidah do dangkah ni hayu na dulas marbanggal.”

¹² Jadi nini Jahowa ma hu bangku, “Sintong do pangidahmu, ai puho do Ahu marjaga-jaga, laho pasaudkon hatang-Ku.”

¹³ Dob ai roh ma hata ni Jahowa hu bangku paduahalihon, mangkatahon, “Aha do ididah ho?” Jadi ningku ma, “Hudon na gurgur do huidah, lunsat gurgurni, roh hun utara.”

- ¹⁴ Dob ai nini Jahowa ma bangku, “Hun utara do roh ni hasedaon bani sagala pangisi ni nagori on.
- ¹⁵ Ai tonggor ma, diloong-Ku do sagala bangsa, harajaon na i utara,” nini Jahowa, “Jadi roh ma sidea, anjaha ganup sidea pajongjong paratasni i lambung ni horbangan ni Jerusalem, laho manlawan tembokni inggot ampa sagala huta ni Juda.
- ¹⁶ Jadi dabuhon-Ku ma uhum bani sidea, halani hajahaton ni sidea, ai ma na tinadingkon ni sidea ai Ahu, laho manggalang bani naibata na legan, anjaha marsombah bani jadi-jadian ni tangan ni sidea.
- ¹⁷ Tapi anggo ho, gonditi ma binongeimu; misir ma ho, anjaha hatahon ma hubani sidea haganup na Hutonahkon bam. Ulang ma ho tarsonggot mangidah sidea, ase ulang bajoraon ho Hupaturut ibahen sidea.
- ¹⁸ Tapi Ahu sandiri mambahen ho sadari on gabe huta na toguh, gabe basikah bosu, gabe tembok tombaga, laho mangimbang haganup nagori in, mangimbang raja-raja ni Juda, pangintuaini, malimni ampa pangisi ni nagori in.
- ¹⁹ Porangon ni sidea do ho, tapi seng tartaluhon sidea, ai Ahu do hasomanmu,” nini Jahowa, “na paluahkon ho.”

Parbalikon ni Bangsa Israel

2 ¹ Roh do hu bangku hata ni Jahowa nini,
² “Laho ma ho, hatahon ma torang-torang hubani par Jerusalem: Sonon do hata ni Jahowa, ‘Hudingat do habujuronmu, sanggah poso ho, holong ni uhurmu, sanggah tunangan ope ho, sonaha pangirikkonmu Bangku i halimisan, bani tanoh na so boi tidahon.

³ Pansing do ijia Israel bani Jahowa, limbuah ni pariama-Ni do ia. Sagala na sihol mangankon ai marsalah do, sogop do hamagouan bani sidea,’ nini Jahowa.

⁴ “Tangihon ma hata ni Jahowa, ale ginompar ni si Jakob, sonai sagala marga na hun rumah ni Israel.

⁵ Sonon do hata ni Jahowa, ‘Aha dong jumpah ompungnima salah Bangku, ase surut sidea hun Bangku, anjaha iirikkon na so margagan, mambahen gabe na lang sidea?’

⁶ Seng dong ihatahon sidea, ‘Ija do Jahowa, na mambobahon hita tangkog hun tanoh Masir, na mangiring-iring hita i halimisan, bani tanoh dorging-dorging anjaha marlombang-lombang, bani tanoh na horah anjaha na golap tumang, bani tanoh na so onggga binontas ni halak, na so niiankon ni jolma?’

⁷ Huboan do hanima hu tanoh na lambutan, ase ipangan hanima buahni ampa gogohni. Tapi dob das hanima hujin, ibutaki hanima do tanoh-Ku, anjaha parbagianan-Ku ibahen hanima gabe hagigi.

⁸ Malim pe seng dong manungkun, 'Ija do Jahowa?' Siramotkon titah pe seng itandai Ahu. Parmahan ni bangsani marbalik do hun Bangku; nabi-nabi manjahai marhitei Baal anjaha iirikkon na so marguna.

⁹ Halani ai partinggihonon-Ku do torus hanima, nini Jahowa, 'ronsi ginompar ni ginomparnima partinggihonon-Ku do.

¹⁰ Tongon, laho hanima hu pulou ni halak Kittim, anjaha tonggor ma ijai, atap suruh hanima halak hu Kader, anjaha pardiatei ma ijai, atap dong do masa na sonai:

¹¹ Ai dong bangsa, na manggantih naibatani, age pe seng naibata sidea ai? Tapi anggo bangsang-Ku, itukar do hamuliaonni bani sisombahon.

¹² Longang ma hanima ale langit mangidah ahu, tarsonggot anjaha gobir tumang ma,' nini Jahowa.

¹³ 'Dua do salah na binahen ni bangsang-Ku: Ahu bah tubuh hagoluhan itadingkon sidea; ihurak sidea do bani sidea parigi, parigi na marruang, na so marisi bah.

- ¹⁴ Ai jabolon do Israel atap anak ni jabolon do?
Mase ma gabe sisorohon ia?
- ¹⁵ Maraum do singa dompaksi, ipamaling sidea
sorani. Tarulang do ibahen sidea tanohni,
itutung hutani, seng dong be pangisini.
Sonai homa halak na hun Nob ampa
Tahpanhes
- ¹⁶ lepong do ibahen ulumu.
- ¹⁷ Ai lang ho do parohkon ai bam, halani na
tinadingkonmu Jahowa Naibatamu, bani na
tinogu-togu-Ni ai ho bani dalan na sintong?
- ¹⁸ On pe, aha do untungni bam, na laho ai ho hu
Masir sihol minum bah ni Nil? Atap aha do
untungni bam na laho ai ho hu Assur sihol
minum bah ni Eprat?
- ¹⁹ Hajahatonmu do na maminsang ho, anjaha
parbalikonmu mambahen hona uhum
ho. Halani ai botoh anjaha idah ma, naha
janginni ampa paetni bam, manadingkon
Jahowa Naibatamu; seng dong biarmu
dompak Ahu,' nini Tuhan Jahowa Zebaot.
- ²⁰ 'Tongon humbani sapari nari pe sai
ipamponggolhon ho do pasanganmu,
anjaha irotapi ho talimu, anjaha ihatahon
ho, 'Seng ra ahu jabolon!' Tongon, bani
ganup buntu-buntu na gijang ampa i toruh
ni hayu na maratah do ho modom songon
boru jalang.

- ²¹ Husuan do ho songon hayu anggur na dear,
tongon, humbani bonih na pitah. Sonaha do
parsalihmu gabe hayu anggur harangan na
so margagan?
- ²² Age pe iusah ho dirimu marhitei guboh ni
sabun, anjaha buei ipakei ho sabun, sai tong
do tartanda hajahatonmu i lobei-Hu,' nini
Tuhan Jahowa.
- ²³ Mase ma pag ho mangkatahon, 'Seng butak
ahu, seng dong hupaihut-ihut Baal!'
Ingati ma pambahenanmu i habungan,
botoh ma na binahenmu! Mardalan do ho
maringgot-inggot songon unta boru-boru
bani panorang hagarangonni, songon
halode boru-boru i halimisan,
- ²⁴ na unsong-unsong ibagas hisapni. Ise do na boi
manahan hisapni? Sagala na mangindahisi
seng pala loja, bani bulan hahisaponni sai
jumpah do ia.
- ²⁵ Jaga ma naheimu ulang lang marsipatu, ampa
tolonanmu ulang horahan! Tapi ihatahon
ho do, 'Seng tarbahren be, ai domma
huhaholongi halak na legan, sidea do
siirikkononku.'
- ²⁶ Songon panangko na maila anggo tardapot,
sonai do maila ginompar ni Israel rap pakon
raja ni sidea, pambobai, malim ampa nabi ni
sidea,

- ²⁷ ai ma sidea na mangkatahon bani hayu, 'Ho do bapangku,' bani batu, 'ho do mantubuhkon ahu!' Ai gurung ni sidea do idompakkon Bangku sedo bohi ni sidea. Tapi bani panorang hasosakan ni sidea, ihatahon sidea do, 'Jongjong ma Ham, paluah Ham ma hanami!'
- ²⁸ Ai ija do naibatamu, na pinaulimai bam? Sidea ma jongjong, anggo tarbahen sidea do mangurupi ho bani panorang hasosakanmu? Ai songon buei ni hutamu, sonai do buei ni naibatamu, ale Juda?
- ²⁹ Mase Ahu iparingorhon hanima? Haganup do hanima marbalik hun Bangku," nini Jahowa.
- ³⁰ "Soya-soya do na Hubogbogi ai anaknima, seng tarajari sidea, podangnima sandiri do mamboiskon nabinima songon singa na manoroh.
- ³¹ Hanima na sansundut on, parimbagaskon hanima ma hata ni Jahowa! Ai halimisan do Ahu bani Israel atap tanoh na lotir? Mase ma hatahonon ni bangsang-Ku, 'Rosuhnami bennami, seng benahanami mulak Bamu.'
- ³² Ai tarhalupahon anak boru do ugas-ugasni atap tarhalupahon tunangan do gonditni? Hape bangsang-Ku, lupa do ia Bangku, domma dokah tumang.

- ³³ Jengesni in ibahen ho panlangkahmu, laho mangindahi haholonganmu, halani ai do ase ra ho pasomal-somal dirimu mangkorjahon na masambor.
- ³⁴ Bani sisi ni hioumu pe jumpah do daroh ni halak na so marpipot. Sedo halani na martuah jumpah ho sidea, tapi halani na pininsangni ho pasal nongkan ai.
- ³⁵ Ihatahon ho, ‘Seng marsalah ahu, domma surut ringis-Ni humbangku.’ Tonggor ma, dabuhonon-Ku do uhum bam, halani ihatahon ho, ‘Seng mardousa ahu.’
- ³⁶ Urahni in margoling ho anjaha mubah-ubah. Maningon bador do ho bahenon ni Masir, songon na dob bador ho ibahen Assur.
- ³⁷ Hujai pe ningon laho do ho, jujung tanganmu bani ulumu, ai domma iambukkon Jahowa hatengeran-hatengeran ni uhurmu, seng dong be untungmu humbani sidea.”

Seng Tarjalo Bangsa Israel Mangihutkon Aturan

- 3** ¹ Nini Jahowa, “Porini isirangkon sada halak binuatni, gabe misir naboru ai hun bani, anjaha laho ia bani dalahi na legan, ra ope dalahi ai mangulaki mambuatsi? Ai lang gabe butak tumang ma nagori ai? Tapi anggo ho domma marbangkis pakon buei

halak, ai sihol ope mulak ho hu Bangku?”
Nini Jahowa.

² “Mangkawah ma ho dompak sagala buntu-buntu, anjaha tonggor ma! Ija ho na so onggam marbangkis? I topi ni dalan do ho hundul paima-imahon sidea, songon pambahen ni halak Arab i halimisan. Ibutaki ho do tanoh in marhitei parriah-riahonmu ampa hajahatonmu.

³ Halani ai do ase tarambat paroh ni udan pamungkah anjaha tartahan udan pangujungi, tapi songon pardompakan ni boru jalang do pardompakanmu, seng ibotoh ho na maila.

⁴ Ai lang dilo-dilo do ho ronsi sonari hu Bangku, ‘Ale Bapa, Ham do hatengeran ni uhur bani haposoonku?’

⁵ Ai mintor ra ma la manringis lalab? Mintor idingat-dingat ma ai lalab? Tonggor ma, sonai do parsahapmu, tapi ihorjahon ho do na masambor, pala marolom-olom ho.”

**Age pe Sonai Parbalikon ni Israel
Itampin Naibata do Sidea**

⁶ Jadi nini Jahowa ma dompak ahu sanggah panorang ni Raja Josia, “ididah ho do pambahen ni Israel na marbalik in? Laho ia hu atas ni ganup

dolog na gijang ampa hu toruh ni ganup hayu na maratah, laho mandalankon parbangkison ijai.

⁷ Nini uhur-Hu, 'Dob idalankon ganupan ai, tontu mulak do ia Bangku; tapi seng mulak ia.' Anjaha age pe ididah Juda, anggini na marbalik ai,

⁸ sonaha pangambukkonon-Ku bani Israel na mangosei ai halani haganup parbangkisonni, anjaha Hubere bani surat sirang, tapi seng mabiar Juda, anggini na marbalik ai, laho do ia homa mandalankon parbangkison.

⁹ Marhitei parriah-riahonni na so maralang-alang ai, gabe butak do ibahen nagori in; marbangkis do ia rap pakon batu ampa hayu.

¹⁰ Tapi sonai pe ganupan ai, lanjar do seng mulak hu Bangku Juda, anggini siparbalik ai humbani bulat ni uurni; tapi marsipakulah-kulah do hansa," nini Jahowa.

¹¹ Jadi nini Jahowa ma hu bangku, "Pintoran ope Israel na marbalik ai marimbang Juda sipangosei in.

¹² Laho ne, anjaha tingtingkon ma hata on dompak utara, 'Mulak ma ho, ale Israel na marbalik in,'" nini Jahowa. "Lang pe manringis Ahu mangidah hanima, ai paridop ni uhur do Ahu," nini Jahowa; "Seng torus Ahu manggila.

¹³ Asal itanda ho salahmu, paboa na manlawan ho dompak Jahowa Naibatamu, ai ma na

niondoskonmai dirimu bani na legan i toruh
ni ganup hayu na maratah, tapi anggo
hatang-Ku seng itangihon ho,” nini Jahowa.

¹⁴ “Mulak ma, ale anak na marbalik,” nini Jahowa,
“Ai Ahu do tuannima; sihol buaton-Ku do
humbennima, sahalak humbani sada huta anjaha
dua halak humbani sada marga, anjaha boanon-Ku
do hanima hu Sion.

¹⁵ Anjaha bereon-Ku do bannima parmahan
romban hubani rosuh ni uhur-Hu, ai ma na
marmahan hanima marhitei habotohon ampa
hauhuran.

¹⁶ Anjaha anggo martambah anjaha manggargar
ma hanima i nagori in,” nini Jahowa. “Bani ari ai
seng be sahapkonon ni halak pasal poti parpadanan
ni Jahowa, seng be taringat ai ibagas uhur, atap
ingat-ingaton ai, seng be magouan pasal ai barang
paulion ai.

¹⁷ Bani panorang ai goranon ma Jerusalem paratas
ni Jahowa, anjaha martumpu hujai sagala bangsa
sipajuh begu-begu, marsombah hubani goran ni
Jahowa i Jerusalem; seng be ihutkonon ni sidea
uhurni na tendel anjaha na jahat in.

¹⁸ Bani panorang ai ipadomu ginompar ni Juda ma
dirini bani ginompar ni Israel, anjaha rap sidea
mulak hun utara hun tanoh, na dob Hubere gabe
parbagianan ni ompungnima.

- ¹⁹ Nini uhur-Hu, ‘Sonaha ma parpabangkit-Hu bam i tongah-tongah ni anak-Ku, anjaha mamberehon bam tanoh na majenges, parbagianan sijengesan i tongah-tongah ni bangsa-bangsa?’ Anjaha nini uhur-Hu, hatahononmu do hu Bangku, ‘Ale Bapa’ anjaha seng marbalik ho hun Bangku
- ²⁰ tongon, songon puang-puang na so bujur manadingkon paramangonni, sonai do hanima manadingkon Ahu, ale ginompar ni Israel,” nini Jahowa.

**Hamubahon ni Uhur na Sintong do
Mambahen Saud Bagah-bagah ni Jahowa**

- ²¹ Tarbogei do sora bani ianan na gijang, ai ma sora tangis-tangis ampa elek-elek ni ginompar ni Israel, halani sambor ni parlahou ni sidea, anjaha lupa sidea bani Jahowa Naibata ni sidea.
- ²² “Mulak ma, ale anak siparbalik, sihol pamalumon-Ku do panundalionnima in. Tonggor ma, roh do hanami mangayaki Ham, ai ham do Jahowa Naibatanami.
- ²³ Tongon, sipaoto-oto do pangarapan bani buntu-buntu ampa bani halutuon i atas dolog. Tongon, bani Jahowa Naibatanta do hansa haluahon ni Israel.

²⁴ Tapi pambalosion bani sihagigihononkon ai do mamboiskon na hinalojahon ni ompungta humbani etek-etekkon nari, biribiri ni sidea ampa lombuni, anak ni sidea ampa boruni.

²⁵ Tibal do hita ibagas habadoronta anjaha sabling banta hahirion, halani mardousa hita dompak Jahowa Naibatanta, hita pakon ompungta humbani hadakdanakonta das ronsi sadari on; anjaha seng itangihon hita sora ni Jahowa Naibatanta in.”

4 ¹ “Anggo sihol mulak ho, ale Israel,” nini Jahowa, “Hu Bangku ma ho mulak! Anjaha anggo iambukkon ho sihagigihononmai seng anjai mompas-ompas be ho hun Bangku.

² Anjaha anggo ibijahon ho, “Songon sintongni manggoluh Jahowa, ibagas hasintongan, habonaron ampa hapintoron, jadi parhatuahon ni bangsa sipajuh begu-begu ma dirini ibagas ho, anjaha puji-pujionni ho.”

³ Sonon do hata ni Jahowa hubani halak na i Juda ampa pangisi ni Jerusalem, “Tinggala hanima ma juma roba bannima, ulang martidah i tongah-tongah ni hupi-hupi.

⁴ Sunat hanima ma dirinima bani Jahowa, ambukkon hanima ma sibur-sibur ni uhurnima, ale dalahi na i Juda ampa pangisi ni Jerusalem, ase ulang manomboh ringis-Ku

songon apuy, anjaha gajag seng dong na mangasup mangintopi, halani hajahaton ni pambahenannima.”

Munsuh hun Utara na Roh Parsedahon

- ⁵ “Baritahon hanima ma i Juda anjaha pabogeihon i Jerusalem, hatahon hanima ma, ‘Sompul ma tarompit i nagori in, gogoh ma mardilo-dilo, hatahon ma: Martumpu ma, laho ma hita masuk hu huta na pinatoguh in!
- ⁶ Pajongjong ma mandera partanda dompak Sion! Maporus ma, ulang sohsoh! Ai parohon-Ku ma hamagouan hun utara, sada hasedaon banggal.
- ⁷ Mandarat do singa humbani iananni, bingkak do siparseda bangsa-bangsa; luar do ia humbani iananni laho parsedahon tanohmu; mangkareong ma hutamu, seng marpangisi be.
- ⁸ Halani ai marhiou guni ma hanima, tangis anjaha doruh-doruh ma, ai seng surut hun banta gara ni ringis ni Jahowa.
- ⁹ Bani panorang ai,” nini Jahowa, galek ma uhur ni raja-raja ampa na sangap-sangap, tarsonggot sagala malim anjaha hirjat sagala nabi.

- ¹⁰ Jadi nini sidea ma, “Ham Tuhan Jahowa, taroto tumang do bangsa on ampa par Jerusalem, ibahen Ham, nimu, ‘Marsonang-sonang pe hanima, hape podang do na mangonai bani goluhnami.’
- ¹¹ Bani panorang ai hatahonon ma bani bangsa on ampa bani Jerusalem, ‘Logou na milas hun buntu-buntu na leseng i halimisan mangombus dompak boru ni bangsang-Ku, sedo laho marsege atap mamiari, logou na doras tumang,
- ¹² anjaha Ahu do na mamarentahkon ai, laho manguhumi sidea.
- ¹³ Tonggor ma, songon hambun do ia naik, songon halisungsung do garetani; dorasan do hudani ase lali. Magou ma hita, ai bois ma hita!
- ¹⁴ Burihi ma uhurmu humbani hajahaton, ale Jerusalem, ase maluah ho. Piga dokah nari marianan pingkiranmu, na jahat in ibagas uhurmu?
- ¹⁵ Tangar, roh do tugah-tugah hun Dan ampa barita na masambor hun Dolog Efraim!
- ¹⁶ Patugah ma bani Juda, tingtingkon bani Jerusalem. Roh do sipangkubu hun nagori na madaoh, marsurak do sidea mangimbang huta ni Juda.

- ¹⁷ Songon pamurou do sidea manginggoti
Jerusalem, halani manlawan ia dompak
Ahu,” nini Jahowa.
- ¹⁸ “Parlahoumu ampa pambahenanmu do
parohkon ai bam. Halani hajahatonmu
do ase sonai paetni, tongon, ronsi
pusu-pusumu do itolpus.
- ¹⁹ Aih, boritni in, boritni in huahap! Itusuk
do atei-ateihu! Mardojob-dojob do
pusu-pusungku, seng tarbahen ahu sip,
ai hubogei do sora ni tarompit ampa
surak-surak ni siparporang.
- ²⁰ Marnunut do hataluan itingtingkon,
maseda do ganup tanoh in, sompong
do lampolampong-Ku ipareong, tongkin
tumang anggo barung-barung-Ku.
- ²¹ Piga dokah nari idahon-Ku mandera porang in,
anjaha bogeion-Ku sora ni tarompit?
- ²² Tongon, na oto do bangsang-Ku, seng itandai
sidea Ahu, anak na lontong do sidea,
seng dong maruhur; pandei do sidea
mangkorjahon hajahaton, tapi sonaha
mambahen na madear, seng ibotoh sidea.
- ²³ Mangkawah Ahu dompak tanoh in, tonggor,
domma maseda anjaha lumei; Hutarei
langit, magou do haliharonni.

- ²⁴ Mangkawah Ahu dompak dolog-dolog, tonggor ma, dugur do sidea; anjaha buntu-buntu mambal-ambal hujai-hujon.
- ²⁵ Mangkawah Ahu inggot, tonggor ma, seng dongjolma, anjaha manuk-manuk pe domma habur ganupan.
- ²⁶ Mangkawah Ahu, tonggor ma, tanoh na lambutan salih jadi halimisan, anjaha sagala hutani domma mareong i lobei ni Jahowa, halani gajag ni ringis-Ni.
- ²⁷ Ai sonon do hata ni Jahowa, 'Haganup tanoh in maningon tarulang do; tapi seng lanjar bois bahenon-Ku.
- ²⁸ Halani ai marhoru ma tanoh in, anjaha langit na i babou ai golap; ai Ahu do na mangkatahon in, seng Husolsoli uhur-Hu; Ahu do na mamutuskon, seng marulak-ulakan uhur-Hu.'
- ²⁹ Maporus do sagala huta halani sora ni parhuta ampa parpamah; marmasukan sidea hu harangan, manangkihi hu salahsah; sagala huta hona tadingkon, seng dong halak na mangiankonsi.
- ³⁰ Ho, ale na dob tinaluhon, aha do na binahenmin. ase marbaju saholat ho, ase mamakei ugas-ugas omas ho, ase iminak-minaki ho matamu? Soya-soya do na

pinajengesmai dirimu. Magigi do kasihanmu mangidah ho; hosahmu do sihol buatonni.

- ³¹ Tongon hubogei do songon sora ni naboru na mangarou, usih bani doruh-doruh ni naboru laho mantubuhkon bunga tubuhn, ai ma sora ni boru Sion na hosah-hosah pagostong tanganni, nini, ‘Magou ma ahu, ai ondos bani sipamunuh do tonduyhu!’”

Uhum ni Naibata bani Bangsa-Ni halani Haganupan Sidea Marjahat

- 5** ¹ Siari ma dalan-dalan na i Jerusalem, tonggor anjaha papangkei ma! Pareksa ma alamanni laho mangidah, atap dong do jumpah sahalak, sihorjahon na madear, sipindahi hasintongan, ase marpangulaki uhur-Hu bani sidea.

- ² Age pe ihatahon sidea, ‘Songon sintongni maggoluh Jahowa,’ tapi ladung do bijani ai.

- ³ Ham Jahowa, ai lang dompak hasintongan do panonggor-Mu? Ilonsing Ham do sidea, tapi seng mangahap sidea; iboiskon Ham do sidea, tapi seng ra sidea manjalo ajar. Ipamapir sidea do bohini lobih humbani batu gingging, manjua do sidea paubah uhum.

- ⁴ Tapi nini uhurhu, ‘Na masombuh-sombuh do sidea on, anjaha na oto, ai seng itanda sidea

dalan ni Jahowa, sonai age titah ni Naibata ni sidea.'

- ⁵ Laho ma ahu bani halak na bangga-banggal, sihol marsahap pakon sidea; tontu anggo sidea ibotoh do dalan ni Jahowa ampa titah ni Naibata ni sidea. Tapi sidea ai pe dos do, iparpongol do pasanganni, irotapi talini.
- ⁶ Halani ai sorohon ni singa na hun harangan do sidea, boiskonon ni gipul na hun halimisan. Begu do manggompangi huta ni sidea; sagala na mandarat hunjai sorohonni do, ai buei tumang do panlanggaron ni sidea, bangga do panundalini.
- ⁷ Sonaha ma boi marpangulaki uhur-Hu bam? Itadingkon anakmu do Ahu, anjaha marbija do sidea marhitei goran ni na so Naibata. Anggo domma Hubosuri sidea, laho do sidea marbangkisi, marurup do sidea hu rumah ni boru jalang.
- ⁸ Huda panjangan na mombur, na garang do sidea, na mariha-iha dompakjolma ni hasomanni.
- ⁹ Mintor lang ma luluhonon-Ku sidea halani ai? Nini Jahowa. "Mintor lang ma marbalas Ahu hubani bangsa na sonin?"
- ¹⁰ Tangkog ma hanima hu pohon anggurni anjaha parseda ma, tapi ulang mintor bois; tuhtuhi

hanima ma ranting-rantingni, ai sedo
Jahowa simada ai.

¹¹ Tongon, mangeluk do hun Bangku ginompar ni
Israel ampa ginompar ni Juda,” nini Jahowa.

¹² Iparnalang sidea do Jahowa anjaha ihatahon,
“Aha pe lang bahenon-Ni, seng anjai dong
hamagouan roh hu banta, podang atap lohei
pe seng anjai idahonta.”

¹³ Sihatahon na so tongon do nabi-nabi ai; seng
dong tongon hata ni Jahowa bani sidea; bani
sidea sandiri ma masa na sonai ai!

¹⁴ Halani ai sonon do hata ni Jahowa, Naibata
Zebaot, “Halani sonai hata ni sidea, tonggor
ma, bahenon-Ku ma hatang-Ku gabe apuy
ibagas pamanganmu, anjaha bangsa on
gabe soban, gabe bois ma sidea ipangan
apuy ai.

¹⁵ Tonggor ma, parohon-Ku ma bannima, sada
bangsa humbani na daoh, ale ginompar ni
Israel,” nini Jahowa, “Ai ma sada bangsa na
so tartaluhon, bangsa na basaia, bangsa na
so niarusanmu sahapni, na so niartihonmu
atap aha na hinatahonni.

¹⁶ Songon tanoman na ngangang do
parsumbianni, haganup do sidea puanglima.

¹⁷ Bois do panganon ni sidea na pinariamamu
ampa sipanganonmu; panganonni do
anakmu pakon borumu; bondutonni do

biribirimu pakon lombumu; boiskononni
do pohon anggurmu pakon hayu aramu;
huta-hutamu na pinatoguhmu, na
hinatengerhon ni uhurmu, parsedaonni do
marhitei podang.

¹⁸ Tapi age pe bani ari ai,” nini Jahowa, “Seng mintor
bois tumang hanima bahenon-Ku.

¹⁹ Anjaha anggo ihatahon sidea, ‘Mase ma ibahen
Naibata Jahowa Naibatanami haganupan ai
bennami?’ Hatahon ma bani sidea, ‘Songon na
tinadingkonnima Ahu, anjaha ibalosi hanima
naibata na legan i tanohnima,’ sonai do
balosannima halak na legan, bani tanoh na so
nagorinima.

²⁰ Patugah ma on bani ginompar ni si Jakob,
anjaha tingtingkon ma ai i Juda,

²¹ ‘Bogei ma on, ale bangsa na oto anjaha
na so maruhur, na marmata hape seng
marpangidah, na marpinggol hape seng
marpanangar!’

²² Ai seng mabiar hanima mangidah Ahu?” nini
Jahowa. “Ai seng gobir hanima i lobei-Hu?
Ahu do na mambahen buntu-buntu horsik
gabe parbalogan ni laut, gabe olat-olat na
manontong na so boi lopusanni; manggila
pe gilumbangni seng monang sidea,
marhasak pe sidea, seng boi diparanni ai.

- ²³ Tapi bangsa on, paruhur na tendel anjaha na hengkeng do; manlembang do sidea, anjaha inunuti dalanni.
- ²⁴ Seng onggga ihatahon ibagas uhurni, 'Habiari hita ma Jahowa Naibatanta, na mambere udan parmulaan ampa udan pangujungi bani panorangni, na mangatur banta panorang pariama.'
- ²⁵ Tapi hajahatonnima do na papeletkon ai, anjaha dousannima do na mangambat na madear roh hu bannima.
- ²⁶ Tongon, adong do jumpah parjahat i tongah-tongah ni bangsang-Ku; monggop do sidea manggompangi songon halak sisidingi manuk-manuk, laho manangkap jolma.
- ²⁷ Songon harang-harang gok marisi manuk-manuk, sonai do rumah ni sidea gok bani barang tipuan; halani ai do ase sangap anjaha bayak sidea, mombur anjaha tambos do sidea.
- ²⁸ Seng maralang-alang sidea mangkorjahon hajahaton; seng pintor panguhumion ni sidea: Pahara ni halak na tading maetek seng iapiti sidea, anjaha seng ipartahankon sidea hak ni halak na masombuh.
- ²⁹ Mintor lang ma luluhonon-Ku sidea halani ai?" nini Jahowa. "Mintor lang ma marbalas Ahu bani bangsa na sonai ai?"

³⁰ Na majangin anjaha sihagigihononkon do na masa i tanoh in.

³¹ Nabi-nabi manjahai ibagas ladung, malim-malim manrajai uhur-uhur ni sidea; marosuh do bangsang-Ku bani sisonai ai, tapi aha do sibahenonnima, anggo marujung ai?”

Patut do Mangonai Uhum ai

- 6** ¹ “Maporus ma hanima, ale ginompar ni Benjamin, luar hun Jerusalem! Sompul hanima ma tarompit i Tekoa, anjaha pajongjong ma partanda i Bet-Kerem; ai ondam do roh hamagouan hun utara ampa hasedaon banggal.
- ² Sampalan na majenges anjaha na hinarosuhkon do boru Sion, tapi siparsedaon do.
- ³ Roh do hujai parmahan pakon hulanan ni sidea; pasukon ni sidea do lampolamponi inggot Sion ai, ganup sidea marmahan bani iananni bei.
- ⁴ Nini sidea, ‘Marugas ma, marporang dompak sidea! Tangkog ma, dorab ma, sanggah siang ope ari! Aah! Domma bod ari, marganjang ma halinoh.
- ⁵ Eta! Borngin ma dorab hita! Parseda hita ma rumah bolonni.’”
- ⁶ Ai sonon do hata ni Jahowa Zebaot, “Roboh ma hayu-hayuni, bahen ma hubuan dompak

Jerusalem! Ai huta siuhumon do on; ai odoh-odoh tumang do masa ibagas.

⁷ Songon bah tubuh na manjurlak-jurlakkon bahni, sonai do marjurlak-jurlak hajahatonni; odoh-odoh ampa hasamboron do tarbogei ibagas, pamunuhon ampa pangoyaton do tong masa i lobei-Hu.

⁸ Sai ra ma ho palumbaon ale Jerusalem, ase ulang rotap uhur-Hu mangidah ho, ase ulang Hubahen ho gabe halimisan, gabe tanoh na so marpangisi.”

⁹ Sonon do nini Jahowa Zebaot, “Pangkei ma ho marturiak pasal simasima ni Israel songon pambahan bani hayu anggur; papangkei ma marhitei tanganmu ranting-rantingni ai, songon binahen ni sibuat buah anggur!

¹⁰ Bani ise ope ahu marsahap ampa palumbahon ase ibogei sidea? Toggor ma, tutup do pinggol ni sidea, seng marpanangar, tonggor ma, gabe sirisaon do hata ni Jahowa bani sidea, seng iharosuhkon sidea ai.”

¹¹ Halani ai gok do uhur hu bani ringis ni Jahowa, loja do ahu manahan-nahan ai. Useihon ma ai bani dakdanak na i pasar, ampa bani humpulan ni garama homa; dalahi pakon naboru, maningon rap do tangkapon, na matua pakon na sayur matua.

- ¹² Ondos bani halak na legan ma rumah ni sidea, sonai homa jumaní pakon jolmani. “Tongon pagostongon-Ku do tangan-Ku dompak pangisi ni tanoh in,” nini Jahowa.
- ¹³ “Ai haganup sidea na etek ronsi na magodang, ganup do sidea impolan bani pansarian na so tiba dalanni, nabi pakon malim ganup mangkorjahon panipuon.
- ¹⁴ Hampung do panambari ni sidea bani naborit ni bangsang-Ku, marhitei na mangkatahon, ‘Damei do! Damei do!’ hape seng dong damei.
- ¹⁵ Patut do sidea maila, ai sihagigihononkon do ihorjahon sidea. Hape, seng be ibotoh na maila, seng be ibotoh hilaon. Halani ai jurgang do sidea rapkon na jurgang in, anjaha bani paroh-Ku marlulu bani sidea, maningon tompas do sidea,” nini Jahowa.
- ¹⁶ Sonon do hata ni Jahowa, “Jongjong ma hanima bani dalan, tonggor ma, anjaha sungkun ma pasal dalan sapari, atap ija do dalan na dear ai; dalani hanima ma ai, ase jumpah parsaranan tonduynima.’ Tapi nini sidea do, ‘Seng pot hanami mardalan ijai.’
- ¹⁷ ‘Hubahen do parjaga bani sidea, ningku, ‘Pardiatei hanima ma sora ni tarompit ai!’ Tapi nini sidea, ‘Seng benahanami manangihon ai.’

- ¹⁸ Halani ai tangihon ma ale bangsa-bangsa,
anjaha pardiatei ma ale humpulan, atap aha
na sihol pamasaon-Ku bani sidea!
- ¹⁹ Tangar ma, alo tanoh, tonggor ma, parohon-Ku
do hamagouan bani bangsa on, ai ma buah
ni hasamboron ni paruhuranni, ai seng
iparimbagaskon sidea hatang-Ku, anjaha
iambukkon do titah-Ku.
- ²⁰ Benahang-Ku ma dahupa na hun Seba, atap
rompah-rompah na maharga hun nagori
na madaoh? Seng tarharosuhkon Ahu
galangan situtungonnima, anjaha galangan
sisayatonnima pe seng benahang-Ku.'
- ²¹ Halani ai sonon do hata ni Jahowa, 'Tonggor
ma, Nahkonon-Ku do i lobei ni bangsa
on batu partolsuan, na mambahen sidea
mangkatartolsu, bapa sonai age anak,
hasoman romban rumah ampa kawan pe
rap magou do.'
- ²² Sonon do hata ni Jahowa, 'Tonggor ma, roh
do sada bangsa na banggal, bingkak hun
ujung-ujung ni tanoh on.
- ²³ Marsior anjaha martanja do sidea, bisang do
sidea anjaha seng itanda holong ni atei.
Songon parhasak ni laut do parhasak ni
sidea; mangajak huda do sidea, gopas
marsinjata roh marmunsuh dompak ho, ale
boru Sion.

- ²⁴ Ibogei hanami do baritani, gabe galek ma tangannami; biar do mandorab hanami, na maborit songon puang-puang na mangarou.
- ²⁵ Ulang laho hanima hu juma, atap mardalani i pasar; dong do podang ni munsuh ijai, habiaran do inggot.
- ²⁶ Ale boru ni bangsang-Ku, marbaju guni ma ho, anjaha margulu ma ho bani abuan! Tangis ma ho, songon na manangisi anak sasada, ai sompong do sipangagou roh hu banta.”

Ipabangkit Naibata si Jeremia Gabe Sipanguji

- ²⁷ “Domma Hupabangkit ho gabe sipanguji bani bangsang-Ku, ase itanda ho anjaha iuji ho parlahou ni sidea.
- ²⁸ Haganup do sidea sipanlawan, marparlahou panukasion; doskon tombaga pakon bosi do sidea, haganup do sidea sipangagou.
- ²⁹ Ombus-ombus do pangombusan, malala timah ibagas apuy; hape soya horja na papitahkon ai, halani lanjar do seng ra bali na jahat ai.
- ³⁰ pirak na niambukkon do goranon sidea ai, halani domma itulak Tuhan sidea.”

Ambilan ni si Jeremia i Rumah Panumbahan

- 7** ¹ On do hata na roh hubani si Jeremia, humbani Jahowa,

² “Jongjong ma ho bani horbangan ni rumah ni Jahowa, tingtingkon ma hata on ijai, hatahon ma, ‘Tangihon ma hata ni Jahowa, ale ganup halak Juda, na masuk hubani horbangan on, laho marsombah hubani Jahowa.’

³ Sonon do hata ni Jahowa Zebaot, Naibata ni Israel, ‘Padear hanima ma parlahounima ampa pambahenannima, ase Hupalopas hanima marianan bani ianan on.

⁴ Ulang ma porsaya uhurnima bani hata ladung, na mangkatahon, ‘Rumah panumbahan bani Jahowa do on, rumah panumbahan bani Jahowa do on, rumah panumbahan bani Jahowa do on.’

⁵ Tongon, anggo ipadear hanima parlahounima ampa pambahenannima, ibahen hanima na pintor samah hanima,

⁶ seng iodoh-odoh hanima halak panginsolat, na tading maetek ampa naboru na mabalu, seng iduruskon hanima daroh na so marpipot bani ianan on, anjaha seng iihutkon hanima naibata na legan, na gabe hamagouan bannima,

⁷ jadi palopason-Ku ma hanima marianan bani ianan on, bani tanoh na dob Hubere bani ompungnima, sadokah ni dokahni.

⁸ Tapi tonggor ma, tenger do uhurnima bani hata ladung na so marguna,

⁹ Manangko do hanima, mamunuh, marbangkis, mambijahon na so tongon, manggalang bani Baal,

anjaha mangihutkon naibata na legan, na so onggatinandanima hinan,

¹⁰ jadi dob ai roh do hanima jongjong i lobei-Hu i rumah panumbahan on, na marpanggoranan bani goran-Ku, ihatahon hanima, 'Domma ipaluah hita!' -- dob ai inunut hanima mangkorjahon na masambor on.

¹¹ Ai liang ni panamun do rumah on, na targoran bani goran-Ku, nini uhurnima? Ahu pe, tongon, Huidah do ai,' nini Jahowa.

¹² 'Laho ma hanima bani ianan-Ku na i Silo, na parlobei Hubahen gabe ianan ni goran-Ku, anjaha tonggor ma, atap aha na Hubahen ijai halani hajahaton ni bangsang-Ku halak Israel.

¹³ On pe, halani ibahen hanima haganupan ai,' nini Jahowa, 'Anjaha age pe Hununut marsahap bannima, tapi seng itangihon hanima, anjaha Hudilo hanima tapi seng marbalos hanima,

¹⁴ halani ai bahenon-Ku ma bani rumah on, na targoran bani goran-Ku anjaha na pinangunsagahkonnima ai, ampa bani ianan na Hubere bannima pakon bani ompungnima, songon na dob Hubahen bani Silo.

¹⁵ Anjaha ambukkonon-Ku do homa hanima hun lobei-Hu, songon saninanima na dob Huambukkon, ai ma haganup ginompar ni Efraim.'"

**Uhum Lumba-lumba dompak
Parugamaon na Lepak**

¹⁶ “Ia ho, ulang ma tonggohon bangsa on, ulang ma pabogeihon elek-elekmu atap tonggomu mangkopkop sidea, anjaha ulang ma apiti sidea i lobei-Hu, ai seng anjai balosan-Ku age ho.

¹⁷ Ai ididah ho do na binahen ni sidea bani huta-huta ni Juda ampa bani dalan-dalan na i Jerusalem?

¹⁸ Dakdanak patumpu soban, dalahi pagara apuy, naboru mangagu topung laho mambahen kue, bani raja naboru i langit; ambahni ai iuseihon galangan siinumon bani naibata na legan, laho manunsahi uhur-Hu.

¹⁹ Ai Ahu do nani na sinunsahan ni sidea ai?” Nini Jahowa. “Ai lang sidea sandiri do gabe habadoron bani sidea?

²⁰ Halani ai sonon do hata ni Jahowa, ‘Tonggor ma, duruskononkon do gilang-Ku ampa ringis-Ku bani ianan on, bani jolma ampa pinahan, bani hayu na i talun ampa bani gogoh ni juma; maningon gara do ai, seng intopkononkon.’

²¹ Sonon do hata ni Jahowa Zebaot, Naibata ni Israel, ‘Tambahi hanima ma galangan situtungonnima bani galangan sisayatonnima, anjaha pangan hanima ma gulei ai.

²² Ai sanggah Hupatangkok ompungnima hun tanoh Masir, seng dong Huhatahon atap Hutonahkon

pasal galangan situtungon ampa galangan sisayaton bani sidea.

²³ tapi on do Hutonahkon bani sidea, 'Tangihon hanima ma sorang-Ku, ase Ahu gabe Naibatanim, anjaha hanima gabe bangsang-Ku; anjaha marparlahou ma hanima bani sagala dalan-Ku, na Hutonahkon bannima, ase marsonang-sonang hanima!'

²⁴ Tapi seng itangihon sidea, anjaha seng ipateleng pinggol ni sidea laho manangar, tapi marparlahou do sidea domu bani rosuh-rosuh ni uhurni ampa hengkek ni uhur ni sidea na jahat ai; itundali sidea do Ahu, seng idompakkon.

²⁵ Humbani ari pardarat ni ompungnima hun tanoh Masir das ronsi sadari on, marnunut do ganup ari Husuruh bannima juakjuak-Ku, ai ma nabi-nabi;

²⁶ tapi seng itangihon sidea Ahu, atap itareihon pinggol ni sidea, tapi ipajogal sidea do tangkuhukni. Manjahati do sidea lobih humbani ompung ni sidea.

²⁷ Anjaha porini pe ihatahon ho ganup hata on bani sidea, seng anjai tangihonon ni sidea ho, dilo-dilo pe ho bani sidea, seng anjai balosanni ho.

²⁸ Halani ai hatahon ma bani sidea, 'On ma bangsa, na so ra manangihon sora ni Jahowa Naibatani, anjaha na so ra ajaran. Magou do hasintongan, daoh humbani pamangan ni sidea.'

²⁹ Jambak ma jambulanmu, anjaha ambukkon ma ai; mandoruh-doruh ma ho i atas ni

buntu-buntu, ai domma iambukkon anjaha
itadingkon Jahowa sundut na ginilaan-Ni on.

³⁰ Ai ihorjahon ginompar ni Juda do na masambor i
lobei-Hu,” nini Jahowa, “Ai inahkon sidea do gana-
gana hagigi hu rumah panumbahan na targoran
bani goran-Ku, laho pabutakkon ai.

³¹ Anjaha ipajongjong sidea do panggalangan Topet
bani habungan Ben-Hinnom, laho manutung anak
pakon boru ni sidea ibagas apuy, ai ma na so onggga
Hutonahkon atap tubuh ibagas uhur-Hu.

³² Halani ai, tonggor ma, na roh ma arini,” nini
Jahowa, “seng be goranon ni halak ai Topet atap
habungan Ben-Hinnom, tapi habungan Pamunuhon
do anjaha i Topet mando halak mananom na
mateini, halani seng dong be ianan na legan.

³³ Anjaha sagala bangkei ni bangsa on, maningon
do panganon ni manuk-manuk na i awang-awang
ampa binatang na i talun, seng dong na manggora
ai.

³⁴ Anjaha parontihonon-Ku do i huta ni Juda pakon i
alaman ni Jerusalem sora malas ni uhur ampa olob-
olob, sora ni siparunjuk ampa sora ni tunangan, ai
maningon tarulang do tanoh in.”

8 ¹ “Bani panorang ai,” nini Jahowa, “Hurakon ma
humbagas tanoman holi-holi ni raja ampa na
sangap-sangap ni Juda, holi-holi ni malim ampa
nabi-nabi sonai homa holi-holi ni par Jerusalem,

² anjaha erapon do ai i lobei ni mata ni ari, bulan ampa bala na i langit, ai ma na hinaholongan ampa na nibalosan ni sidea, ai ma na niihutkon, na sinungkun ampa na sinombah ni sidea; seng be patumpuon ai atap tanomon, gabe napu mando ai i atas ni tanoh in.

³ Tapi sagala halak na tading humbani sundut na jahat on, bani haganup ianan pambuangan-Ku bani sidea, rosuhan mando uhur ni sidea matei ase manggoluh,” nini Jahowa Zebaot.

Hapitungon ni Bangsa ai ampa Pambobaini

⁴ Hatahon ma bani sidea, sonon do hata ni Jahowa, “Ai adong do halak na targompang, na so sihol jongjong use, atap halak na kahou, na so sihol mulak use?

⁵ Mase ma bangsa na i Jerusalem on torus kahou, marsijoloman sidea bani sipaoto-oto anjaha manjua sidea mulak?

⁶ Hupardiateihon anjaha Hutangihon: Seng sintong parsahap ni sidea; sahalak pe lang na manolsoli hajahatonni, mangkatahon, ‘Aha do na hubahen on?’ Haganup do sidea marsitohu dalanni songon huda na marpojong laho hu parporangan.

⁷ Gari sitanda ulog na i awang-awang, ibotoh do panorangni; kuhuy, hampilis ampa pamal

ingat do bani musim parmula-kni, tapi anggo
bangsang-Ku seng ibotoh aturan ni Jahowa.

⁸ Mase ma ihatahon hanima, 'Pentar do hanami,
anjaha titah ni Jahowa do bennami.' Tapi,
tonggor ma, gabe ladung do ai ibahen
sipanurat.

⁹ Maningon do bador halak na pentar, maningon
tarsonggot anjaha tartangkap do sidea, ai
itulak sidea do hata ni Jahowa. Hapentaran
aha ma na dong bani sidea ai?

¹⁰ Halani ai berehonon-Ku do jolma ni sidea bani
halak na legan, anjaha juma ni sidea bani
halak na manaluhon sidea. Ai haganup
sidea na etek ronsi na magodang, haganup
do sidea impolan bani pansarian na so
tiba dalanni; nabi pakon malim, haganup
mangkorjahon panipuon.

¹¹ Hampung do panambari ni sidea bani naborit
ni bangsang-Ku, nini, 'Damei do, damei do!'
Hape seng dong damei.

¹² Patut do sidea maila, ai sihagigihononkon do
ihorjahon sidea, seng be ibotoh sidea na
maila, seng be ibotoh hilaon. Halani ai
jurgang do sidea rap pakon na jurgang in,
anjaha bani paroh-Ku marlulu bani sidea,
maningon tompas do sidea, nini Jahowa.

¹³ Anggo sihol marpariama Ahu humbani
sidea," nini Jahowa, "Seng jumpah buah

bani hayu anggur, seng dong buah bani hayu ara, bulungni pe melus do; halani ai ondoskonon-Ku do sidea bani na marojati sidea.”

Hagobiron ni Bangsa ai; Horu ni Uhur ni Nabi ai

- ¹⁴ “Mase ma sohsoh hita hundul-hundul?
Martumpu ma, laho ma hita hu huta na pinatoguh ai, ase ijai hita bois; ai Jahowa Naibatanta do mangondoskon hita hu hamagouan, anjaha ipainumkon bah na marrasun banta, halani mardousa hita dompak Jahowa.
- ¹⁵ Mangarap do hita bani hadameion, hape seng dong roh na madear; mangarap do hita bani hamalumon, hape songgot-songgot do roh.
- ¹⁶ Hun Dan tarbogeï do pangunsong ni huda ni sidea, halani pariha-iha ni huda panjangan ni sidea dugur do sab tanoh on. Roh do sidea mangankon tanoh in ampa ganup isini, huta ampa halak na marianan ijai.
- ¹⁷ Ai tonggor ma, Ahu do marsuruh bannima ulog, ulog bisa, na so boi tabas-tabason, jadi pagutonni ma hanima,” nini Jahowa.
- ¹⁸ “Seng hatambaran pusok ni uhur-Hu, borit do uhur-Hu ibagas.
- ¹⁹ Tangar ma, doruh-doruh ni boru ni bangsang-Ku bani sab tanoh in, nini, ‘Ai seng be

nani i Sion Jahowa? Ai seng ijai be raja-Ni? Mase ma ipuhoi sidea ringis-Ku marhitei gana-gana uhiran ni sidea, ampa marhitei sisombahon na legan?’

²⁰ Domma salpu pariama, salosei sisabion, tapi hita lanjar ope seng maluah.

²¹ Maropuk do uhur-Hu ibagas halani ugah ni boru ni bangsang-Ku, marhoru do Ahu, anjaha rusak tumang.

²² Seng be dong nani minak balsem i Gilead? Seng be dong panambari ijai? Mase ma nani lang ra malum naborit ni boru ni bangsang-Ku?”

Tangis-tangis ni si Jeremia Mangidah Bangsa Israel na Jahat ai, na Maningon Siuhumon ai

9 ¹ “Ambit gabe bah ma namin ulungku, anjaha matangku gabe sombul iluh, ase boi ahu manangisi, arian pakon borngin, na rasei humbani boru ni bangsang-Ku.

² Ambit adong ma namin bangku rumah parbornginan i halimisan, tadingkononku ma bangsangku laho bungkas humbani sidea. Ai haganup do sidea parbangkis, partumpuan ni sipangeluk.

³ Mardilah songon sior na sinintak do sidea; ladung do, sedo hasintongan manrajai i tanoh in; marnunut do sidea mangkorjahon

hajahaton, tapi anggo Ahu seng itandai sidea,” nini Jahowa.

- ⁴ Ganup ma marjaga-jaga bani hasomanni, anjaha ulang martenger ni uhur bani sanina; marsioto-otoan do sanina samah sanina, anjaha marsitukasan hasoman samah hasoman.
- ⁵ marsioto-otoan do na marhuan, anjaha sahalak pe lang sihatahon na sintong; ipasomal sidea do dilahni mangkatahon ladung; jahat do sidea, seng ra sidea mubah.
- ⁶ Marompot do sidea mandalankon odoh-odoh ampa akal-akal, manjua do sidea mananda Ahu,” nini Jahowa.
- ⁷ Halani ai sonon do nini Jahowa Zebaot, “Tonggor ma lalaon-Ku anjaha ujion-Ku do sidea, ai aha ma na legan boi bahenon-Ku bani boru ni bangsang-Ku?
- ⁸ Panah na pamatehon do dilah ni sidea, pangoto-otoion do isahapkon pamanganni; ganup do marsahap na damei bani hasomanni, tapi maggompangi do uhurni ibagas.
- ⁹ Mintor lang ma marlulu Ahu pasal on bani sidea,” nini Jahowa, “Mintor ma lang mambalas Ahu bani bangsa na sonon?”
- ¹⁰ Tangisi anjaha doruhi ma dolog-dolog, marhoru ma pasal sampalan na i halimisan,

ai domma tarulang ai, seng dong be na mamontas hunjai, anjaha seng tarboge be umboh ni pinahan; manuk-manuk na i awang-awang ampa binatang-binatang domma lintun, maporus ganup.

¹¹ Bahenon-Ku do Jerusalem gabe timbunan batu, ianan bani sorigala, anjaha mareong do bahenon-Ku sagala huta ni Juda, anjaha seng dong be pangisini.

¹² Ise ma halak na maruhur, gabe iarusi na masa on? Bani ise do marsahap pamangan ni Jahowa, gabe boi patugahon-Ni mase maseda tanoh in, anjaha tarulang songon halimisan, gabe seng dong na montas hunjai?"

¹³ Dob ai nini Jahowa ma, "Halani itadingkon sidea titah-Ku, na Hubere bani sidea, anjaha seng itangihon sidea sorang-Ku, anjaha seng marpangabak sidea romban hujai,

¹⁴ tapi uhurni na hengkeng ai do iihutkon, anjaha Baal do iirikkon, songon niajaran ni bapa ni sidea bani sidea."

¹⁵ Halani ai, sonon do hata ni Jahowa Zebaot, Naibata ni Israel, 'Tonggor ma, 'Bahenon-Ku do bangsa on mangankon na mapaet, anjaha bereon-Ku do sidea minum bah na marrasun.'

¹⁶ Erapon-Ku do sidea hu tongah-tongah ni bangsa na so tinanda ni sidea age ompung ni sidea pe;

suruhon-Ku do podang hun pudi ni sidea, paima bois sidea Hubahen.

¹⁷ Sonon do hata ni Jahowa Zebaot, Ingat da,
mardilo naboru sipanangisi ase roh, suruh
mangalopi ase roh naboru na pandei
martangis-tangis,

¹⁸ papodas ma sidea, ase ipabogeihon tangis
banta, ase marabur-abur iluh humbani
matanta, anjaha mabaor iluh humbani
langkop ni matanta.

¹⁹ Ai tarbogei do sora na doruh-doruh hun Sion,
nini, 'Inangou, domma bois hita! Bador
tumang do hita, ai maningon tadingkononta
do nagori on, ai domma iparseda sidea
iananta.'

²⁰ Tangar ma, ale parinangon, hata ni Jahowa,
anjaha ijalo pinggolnima ma hata na luar
humbani pamanganni; ajarhon hanima
ma tangis-tangis bani borunima, anjaha
ganup mangajarhon bani hasomanni doding
tangis-tangis on:

²¹ Domma manangkih hamatean masuk humbani
jandelanta, domma imasuki rumah bolonta,
laho manraseihon dakdanak na i alaman
pakon garama na i alaman bolag.

²² Marrageian do bangkei songon napu i juma,
songon radean ipudi ni panabi, seng dong
na patumpuhon."

Pamujion Diri na Sintong

²³ Sonon do hata ni Jahowa, “Sai ulang ma ienjengkon halak na pentar hapentaranni, ulang ma iunsagakon siparkuasa kuasani, anjaha ulang ma ihagijangkon na bayak habayakonni.

²⁴ Tapi barang ise, na sihol tarpuji, marhitei on ma ia pujion, ai ma, na maruhur ai ia anjaha itandai Ahu, paboa Ahu do Jahowa na mandalankon idop ni uhur, hasintongan ampa hapintoron i tanoh on; ai halak sisonai do rosuh ni uhur-Hu,” nini Jahowa.

²⁵ “Tonggor ma, na roh ma panorangni,” nini Jahowa, “Jadi marlulu ma Ahu bani haganup ma marsunat bani sibur-siburni tumang, ai ma: bani Masir, bani Juda, bani Edom, bani Amon pakon bani Moab, ampa bani haganup halak na i halimisan, na marlepong jambulanni ibahen; ai haganup bangsa-bangsa on ampa haganup ginompar ni Israel seng marsunat uhurni ibagas.

²⁶ Seng marguna parsunaton pardarat tumang.”

Na lang do Sisombah-sombahon, Pitah Jahowa do Siparkuasa

(ay. 12-16 pausih bd. 51:15-19)

10 ¹ Tangar ma hata, na hinatahon ni Jahowa bannima, ale ginompar ni Israel!

- ² Sonon do hata ni Jahowa, “Ulang ma marguru hanima bani dalan ni sipajuh begu-begu, ulang ma tarsonggot hanima ibahen tanda na i langit, tongon, bangsa parbegu do tarsonggot bani sisonai ai;
- ³ tongon, na lang do naibata ni parbegu: Sada hayu irobok hun harangan, anjaha tuhang manukangi ai marhitei pisou.
- ⁴ Ipajagar ma ai bani omas ampa pirak, ipahat marhitei paku ampa parpalu, ase ulang tarbahen miut.
- ⁵ Songon halak-halak do ai i paransimunan, seng boi marsahap; siusungon do ai, ai seng boi mardalan. Ulang ma habiari hanima sidea, ai seng tarbahensi mambahen na masambor, anjaha mambahen na madear pe seng dong gogohni.”
- ⁶ Seng dong na songon Ham, ale Jahowa. Banggal do Ham, anjaha timbul do goran-Mu marhitei hagogohon.
- ⁷ Ise ma na so mangkabiari Ham, ale Raja ni bangsa-bangsa? Ai sonin do talup i lobei-Mu. Seng dong na songon Ham i tongah-tongah ni sagala na maruhur bani bangsa-bangsa ampa bani sab harajaon ni sidea.

- ⁸ Haganup do sidea lontong anjaha bodoh;
pangajarion ni sisombah-sombahon, seng
marguna ai.
- ⁹ Pirak ialop hun Tarsis anjaha omas hun Uphas;
itukangi ma ai marhitei sipanguhir ampa
tukang omas; mahonda anjaha magerger
do pakeianni ibahen; anjaha jadi-jadian ni
tangan ni tukang do ai ganupan.
- ¹⁰ Tapi Jahowa, ai ma Naibata na sintong; la
do Naibata na manggoluh anjaha Raja
sisadokah ni dokahni. Dugur do tanoh on
ibahen gila-Ni, anjaha bangsa-bangsa seng
tahan i lobei ni ringis-Ni.
- ¹¹ Sonai do hatahononnima bani sidea, 'Naibata-
naibata ai, na so sitompa langit pakon tanoh on,
maningon do bois hun tanoh ampa hun toruh ni
langit.'
- ¹² Jahowa do na manjadihon tanoh on marhitei
hagogohon, la do na pajonamkon dunia on
marhitei hapentaran-Ni, anjaha marhitei
habotohon-Ni ipaherbang do langit.
- ¹³ Anggo ipabogei hon sora-Ni marhasak ma bah i
langit, anjaha marhitei parentah-Ni naik do
hombun hun ujung ni tanoh on. Hilap do
ibahen parohkon udan, anjaha iparoh do
logou humbani rumah panimpanan-Ni.
- ¹⁴ Na bodoh do ganup jolma, seng dong
pangartianni; bador do haganup tuhang

omas halani gana-ganani; ai sipaoto-oto do
gana-gana ai, seng dong hosah ibagas.

¹⁵ Logou do hansa ai, jadi-jadian na pakahouhon;
magou do ganupan ai bani panorang
pambalason bani sidea.

¹⁶ Tapi seng sonai anggo rupei ni si Jakob; Ia do
na manjadihon sagala na dong, anjaha Israel
marga parbagianan-Ni; Jahowa Zebaot do
goran-Ni.”

**Tangis-tangis ni Bangsa na Hona Uhum ai
ampa Tonggo ni si Jeremia**

¹⁷ Patumpu ma ugas-ugasmin, ho ale na hinubu.

¹⁸ Ai sonon do hata ni Jahowa, “Tonggor ma,
ambukkonon-Ku do isi ni tanoh in santorap
on, anjaha parohon-Ku do hasosakan bani
sidea, ase mangahap sidea.

¹⁹ Mogouni in ahu halani ugahkon! Borit do
ugahku! Tapi ningku do, ‘Anggo ningon
sonai ma sitarononku, na taron ma!’

²⁰ Maseda do lampolampongku, mangkarotap
talini; itadingkon niombahku do ahu, seng
dong be sidea; seng dong be na pajongjong
lampolampo bangku, ampa na paherbang
tendangku.

²¹ Ai na oto do siparmahan, seng ipindahi
Jahowa, halani ai seng mardohar sidea,
mambur merap do ganup hulanan ni sidea.

- ²² Tangar ma, roh do sada barita, sada hageoron
banggal roh do hun tanoh parutara, laho
parsedahon huta ni Juda, ase gabe ianan ni
sorigala.
- ²³ Hubotoh do, ale Jahowa, sedo hape guru
bani jolma langkahni, anjaha sedo halak
pardalan-dalan na manontuhon langkahni.
- ²⁴ Pinsang Ham ma ahu, ale Jahowa, asal
marpangantan; ulang ibagas ringis-Mu, ase
ulang bois ahu.
- ²⁵ Useihon Ham ma ringis-Mu bani bangsa
sipajuh begu-begu na so mananda Ham,
ampa bani bangsa na so mandilo goran-Mu,
ai ibondut sidea do Jakob, ibondut sidea
do ia anjaha iboiskon, anjaha tarulang do
ibahen iananni.”

**Hona Uhum Bangsa ai halani losei
Padan ni Jahowa na bani Sidea**

11 ¹ On do hata na roh bani si Jeremia humbani
Jahowa,

² “Tangihon ma hata ni padan on, anjaha hatahon
ma in bani halak Juda ampa bani pangisi ni
Jerusalem.

³ Hatahon ma bani sidea sonon do hata ni Jahowa,
Naibata ni Israel, ‘Hona papa do haganup na so
manangihon hata ni padan on,

⁴ na dob Hutonahkon bani ompungnima, sanggah na Huboan sidea luar hun tanoh Masir, humbani pamurunan bosì, ningku do, ‘Tangihon hanima ma sorang-Ku, anjaha dalankon hanima haganup na Hutonahkon ai bannima, ase gabe bangsang-Ku hanima, anjaha Ahu gabe Naibatanim,’

⁵ ase Hupatotap bulawan na dob Hubulawankon bani ompungnima, ai ma laho mamberehon bani sidea sada tanoh, na marbaoran ijai dadih ampa manisan songon na masa sonari.” Jadi ningku ma mambalosi, “Sonai ma tongon, ale Jahowa!”

⁶ Dob ai nini Jahowa ma dompak ahu, “Tingtingkon ma haganup hata ai bani huta-huta ni Juda ampa bani dalan-dalan na i Jerusalem, ‘Tangihon hanima ma hata ni padan on, anjaha dalankon ma ai!

⁷ Ai Hupalumba do ompungnima humbani ari sanggah na Huboan sidea tangkog hun tanoh Masir, Hupalumba do sidea tongtong ronsi ari on, ningku do, ‘Tangihon hanima ma sorang-Ku!’

⁸ Tapi seng itangihon sidea Ahu, seng itareihon sidea pinggolni Bangku; haganup do sidea marparlahou domu hu bani hengkenng ni uhur ni sidea na jahat in. Halani ai do ase Huparoh bani sidea haganup hata ni padan on, na Hutonahkon bani sidea ase iramotkon, hape seng ihorjahon sidea.”

⁹ Jadi nini Jahowa ma dompak ahu, “Masa do partahi-tahion i tongah-tongah ni halak Juda ampa i tongah-tongah ni pangisi ni Jerusalem.

¹⁰ Domma mulak sidea bani hajahaton ni ompung ni sidea, ai ma sipangengkar manangihon hatang-Ku; iihutkon sidea do naibata na legan laho mambalosi ai. Domma iosei ginompar ni Israel pakon ginompar ni Juda padan na Hubahen bani ompung ni sidea.

¹¹ Halani ai, sonon do hata ni Jahowa, ‘Tonggor ma, parohon-Ku do bani sidea hamagouan, na seng boi lembangan ni sidea; age pe dilo-dilo sidea Bangku, seng Hutangihon sidea.’

¹² Gabe laho ma huta ni Juda ampa pangisi ni Jerusalem, dilo-dilo bani naibata na legan, ginalangan ni sidea ai, hape seng boi iurupi sidea bani panorang hasosakan ni sidea.

¹³ Ai songon buei ni hutamu do buei ni sisombahonmu, ale Juda, anjaha songon buei ni dalan na i Jerusalem do buei ni anjapanjap habadoron, na pinaulinima bahen panggalangan bani Baal.

¹⁴ Tapi anggo ho, ulang ma tonggohon bangsa on, anjaha ulang ma ho ra mangelek mangkopkop sidea, ai seng anjai tangihonon-Ku sidea, age pe dilo-dilo sidea sanggah panorang hasosakan ni sidea.

¹⁵ Ai aha do na hinorjahon ni bangsa kasihan-Ku i rumah-Ku? Mangkorjahon na masambor

do ia. Mintor boi ma salpu hamagouan
humbam halani bagah-bagah ampa gulei na
ginalangkon? Ai boi ope ho marolob-olob?

¹⁶ Igoran Jahowa hinan do ho, 'Hayu Jetun
na maratah, na majenges ramos, marbuah'
marhasoman sora ni logou na mapor pagaraonni
do apuy hujai, anjaha mangkaseda ma dangkah-
dangkahni."

Itahihon Halak Anatot si Jeremia

¹⁷ "Ai Jahowa Zebaot, na manuan ho do
manlumbahon hamagouan bam halani hajahaton,
na binahen ni ginompar ni Israel ampa ginompar
ni Juda, laho parohkon ringis-Ku, marhitei na
manutung dahupa bani Baal.

¹⁸ Jahowa do na pabotohkon ai hu bangku
gabe hubotoh; la do pataridahkon hu bangku
pambahenan ni sidea na jahat ai.

¹⁹ Tapi anggo ahu, songon biribiri na lomuk do, na
tinogu hu panayatan; seng dapot uhurhu, na ahu do
hape tinahihon ni sidea, marhitei na mangkatahon,
'Parseda hita ma hayumu on pakon buahni, boiskon
hita ma ia hun tanoh ni halak na manggoluh, ase
ulang be dong na manarsingati goranni.'

²⁰ Tapi Ham, ale Jahowa Zebaot, panguhum
na pintor do Ham, siuji piah-piah pakon
uhur, pataridahkon Ham ma bangku

pambalason-Mu bani sidea; ai hu Bamu do huondoskon parkarangku.”

²¹ Halani ai sonon do hata ni Jahowa hubani halak na hun Anatot, na manguhurhon hosahku, anjaha na mangkatahon, “Ulang sai manjahai ho marhitei goran ni Jahowa, ase ulang mangonai tangannami bam;

²² sonon do hata ni Jahowa Zebaot, ‘Tonggor ma, nington marlulu do Ahu bani sidea; nington matei do garama bunuhon ni podang, anjaha anak pakon boru ni sidea maningon matei gayuran do,

²³ anjaha seng dong be na tading humbani sidea. Ai parohon-Ku do hamagouan bani halak na i Anatot, bani tahun pambalason bani sidea.”

Adu-adu ni si Jeremia Pasal Hadoharon ni Parjahat

12 ¹ “Pintor do Ham, ale Jahowa porini pe dong hutuk-hutukku Bamu; age pe sonai sihol do marsahap ahu Bamu pasal sada parkara, ‘Mase ma mardohar dalan ni halak parjahat? Anjaha marsonang-sonang halak sipangeluk?’

² Isuan Ham do sidea, anjaha marurat do sidea; marbanggal do sidea anjaha marbuah. Dohor do Ham bani pamangan ni sidea, tapi daoh do humbagas uhurni.

³ Tapi itanda Ham do ahu, ale Jahowa; ididah Ham do ahu anjaha iuji Ham do uhurhu

i lobei-Mu. Tarik Ham ma sidea songon
biribiri na sihol sisayaton, anjaha papulig
Ham ma sidea hubani ari panayatan.

⁴ Piga dokah nari marhoru tanoh in anjaha melus
suan-suanan i talun? Halani hajahaton ni
pangisi ni tanoh in do, ase masab pinahan
ampa manuk-manuk, ai nini sidea, 'Seng
anjai idahonni tongon ujungta!'

⁵ Anggo loja do ho ibahen sidea maradu rap
pakon na mardalan nahei, sonaha ma
pambahenmu maradu pakon huda? Anjaha
anggo seng sonang iahap ho bani tanoh
na mardamei-damei, sonaha ma pasal ho i
harangan ni Jordan?

⁶ Ai gari saninamu pakon parrumah ni bapamu,
sidea pe seng bujur dompak ho; martahi-
tahi do sidea i pudimu. Ulang porsaya ho
bani sidea, age pe basar parsahap ni sidea
bam."

Pusok ni Uhur ni Jahowa Mangidah Tanoh Parbagianan-Ni

⁷ "Domma Hutadingkon rumah-Ku, domma
Huambukkon parbagianan-Ku; domma
Huondoskon haudungan ni uhur-Hu
hubagas tangan ni munsuhi.

⁸ Gabe songon singa na i harangan do
parbagianan-Ku dompak Ahu; ipamaling do

sorani dompak Ahu, halani ai do ase magigi
Ahu hu bani.

- ⁹ Gabe manuk-manuk panoroh sirintik do
parbagianan-Ku Bangku. Manuk-manuk
panoroh do roh inggot mandorabsi. Laho
ma hanima, patumpu ma sagala binatang na
i talun, ase roh mangankon.
- ¹⁰ Buei do parmahan na parseda pohon
anggur-Hu, ilot-loti sidea do jumang-Ku,
gabe halimisan do juma harosuh-Ku ibahen
sidea.
- ¹¹ Gabe halimisan do ai ibahen sidea, marhoru i
lobei-Hu halani maseda, tarulang do tanoh
in ganup, seng dong na mampardulihon.
- ¹² Bani haganup buntu-buntu na leseng, i
halimisan domma roh na parsedahon. Ai
podang ni Jahowa do na mangankon hun
ujung ni tanoh na sada das hu ujung ni
tanoh na sada nari; seng dong damei bani
sagala na tinompa.
- ¹³ Omei do isabur sidea, hape duri do isabi; ilojai
sidea do dirini hape seng marlaba. Seng
tarhamegahkon sidea pariamana ni sidea,
halani gajag ni ringis ni Jahowa.”

**Sura-sura ni Naibata Pasal
Bangsa-bangsa Simbalog ni Israel**

¹⁴ Sonon do hata ni Jahowa, “Pasal haganup simbalog-Ku na jahat in, na mangonai tangan bani parbagianan-Ku, na Hubere gabe siteanon ni bangsang-Ku Israel, ‘Tonggor ma, orbaton-Ku do sidea hun tanoh ni sidea, anjaha ginompar ni Juda orbaton-Ku do hun tengah-tengah ni sidea.’

¹⁵ Tapi anggo domma Huorbat sidea, marpangulaki do uhur-Hu mangidah sidea, anjaha boanon-Ku do sidea use mulak ganup hu bani parbagiananni ampa hu tanohni bei.

¹⁶ Dob torang iguruhon sidea dalan ni bangsang-Ku, ai ma marbija marhitei goran-Ku, ‘Songon sintongni manggoluh Jahowa!’ Songon sidea na mangajari bangsang-Ku marbija marhitei Baal, jadi pajonamon do sidea i tengah-tengah ni bangsang-Ku.

¹⁷ Tapi anggo seng itangihon sidea, orbaton-Ku do bangsa na sonai ai, anjaha boiskonon-Ku, nini Jahowa.”

Pasal Gondit na Pinonopkon, na Gabe Madotei ai

13 ¹ Sonon do hata ni Jahowa hu bangku, “Laho ma ho, boli ma sada gondit linnen, anjaha gonditkon ma ai bani binongeimu, tapi ulang hona bah bahen ai.”

² Jadi huboli ma sada gondit domu hubani parentah ni Jahowa, anjaha hunahkon ma ai bani binongei hu.

³ Dob ai roh ma hata ni Jahowa hu bangku paduahalihan, nini,

⁴ “Buat ma gondit na binolimai, na bani binongeimai, anjaha misir ma ho laho hu Bah Eprat, ponopkon ma ai bani rigat ni dolog batu.”

⁵ Jadi laho ma ahu, huponopkon ma ai i topi ni Bah Eprat, songon na hinatahon ni Jahowa bangku.

⁶ Dob ai bani dokah-dokah ni ari, nini Jahowa ma hu bangku, “Misir ma ho hu Bah Eprat, alop ma hunjai gondit ondi, na Huhatahon ponopkononmu ijai.”

⁷ Dob ai laho ma ahu hu Eprat, jadi huhurak anjaha hubuat ma gondit ai humbani pamonopanni hinan. Tonggor ma, domma madotei gondit ai, seng marguna be atap bahen aha pe.

⁸ Dob ai roh ma use hata ni Jahowa hu bangku,

⁹ “Sonon do hata ni Jahowa, Sonai do usih parsedaon-Ku gijang ni uhur ni Juda ampa pangenjengon ni Jerusalem na banggal ai.

¹⁰ Bangsa na jahat on, na mangengkar manangihon hatang-Ku, na marparlahou mangihutkon uhurni na hengkeng in, anjaha na mangirikkon naibata na legan, laho mambalosi anjaha marsombah hujai, maningon dos do sidea bani gondit on, na so marguna atap bahen aha pe.

¹¹ Songon gondit na longkot bani binongei ni dalahi, sonai do Hulongkotkon Bangku ganup ginompar

ni Israel ampa haganup ginompar ni Juda,” nini Jahowa, “Ase gabe bangsang-Ku sidea. Gabe barita, puji-pujian ampa hamuliaon Bangku, hape seng ra sidea manangihon.”

**Pasal Gusi na Ginokan bani
Anggur ampa na Niropukan ai**

¹² Hatahon ma bani sidea hata on, “Sonon do hata ni Jahowa Naibata ni Israel, ‘Sagala gusi maningon gokan do bani anggur.’ Jadi anggo ihatahon sidea bam, ‘Ai lang ibotoh hanami do maningon gokan sagala gusi bani anggur?’”

¹³ Jadi hatahon ma bani sidea, “Sonon do hata ni Jahowa, ‘Tonggor ma, gok hamabukon do bahenon-Ku haganup pangisi ni nagori on: Raja-raja na hundul bani paratas ni si Daud, malim-malim, nabi-nabi ampa haganup pangisi ni Jerusalem.

¹⁴ Anjaha marsiropukan do sidea bahenon-Ku, ronsi bapa hu bani anakni,” nini Jahowa, “Seng holong atei-Hu, seng manosal Ahu anjaha seng marpangulaki uhur-Hu, maningon bois do sidea bahenon-Ku.”

Ojur-ojur Martoruh ni Uhur i Lobei ni Jahowa

¹⁵ Tangar anjaha tangihon hanima ma, ulang ma mängenjeng, ai Jahowa do na marsahap.

¹⁶ Bere hanima ma hasangapon bani Jahowa Naibatania, sanggah lape iparoh

hagolapan, sanggah lape tartuktuk
naheinima bani dolog na golap, anjaha
sanggah paima-imahon haliharon hanima,
gabe ipaubah ai jadi hagolapan anjaha
ibahen ai gabe na lotir.

¹⁷ Tapi, anggo seng ra hanima, maningon tangis
ma tonduyhu bani na lungun halani gijang
ni uhurnima ai; marbaoran ma iluh humbani
matangku, halani hona buang hulanan ni
Jahowa.

¹⁸ Hatahon ma bani raja in ampa bani inang ni
raja in, 'Patoruh hanima ma parhundulnima,
ai domma matektek sortali hamuliaon
humbani ulunima.'

¹⁹ Huta na i tanoh Dangsina domma tartutup,
sahalak pe seng dong na mangungkab.
Haganup do Juda maningon tarbuang,
tarbuang do sidea haganup.

Hona Butakan do Jerusalem halani Buei ni Hajahatonni

²⁰ Mangkawah ma hanima anjaha idah ma sidea
ai na roh hun utara. Ija do hulanan ni biribiri
na dob niondoskon bam, biribirimu na
jenges-jenges ai?

²¹ Aha ma hatahononku, anggo ipabangkit
panggomgom bam, ai ma sidea, na dob
niajar-ajaranmu gabe hasoman bam? Ai

lang mangonai ma bam na maborit, songon
bani sada naboru na sihol tubuhan anak?

²² Anjaha anggo ihatahon ho ibagas uhurmu,
‘Mase ma mangonai na sonon bangku?’
Halani buei ni salahmu do, ase isintak
hioumu hu atas anjaha hona butakan ho.

²³ Ai boi do ipaubah halak Etiopia hulingkulingni
atap begu jolangjolangni? Sonai ma
sabonar seng tarbahren hanima mambahren
na madear, hanima na dob somal
mangkorjahon na jahat.

²⁴ Halani ai erapon-Ku ma hanima songon
lamlam na niombuskon ni logou, na roh hun
halimisan.

²⁵ Ai ma rupeimu, parbagiananmu na dob
Husuhat bam,” nini Jahowa, “Halani
ihalupahon ho Ahu, anjaha martenger ni
uhur ho bani ladung.

²⁶ Sintakon-Ku do hioumu das hu atas ni bohimu,
ase taridah hailaonmu.

²⁷ Ai ma parbangkisonmu, hagarangonmai ampa
parriah-riahonmu. Huidah do horjamu
sihagigihononkon i atas buntu-buntu ampa i
tongah ladang. Bursik ma ho, ale Jerusalem!
Sadiah dokah nari ase pansing ho?”

**Pangapition na Soya-soya Sanggah Musim
Logou ni Ari ampa Hasosakan Banggal**

14 ¹ On do hata ni Jahowa, na roh bani si Jeremia, pasal logou ni ari maningting.

² Marpusok ni uhur do Juda, anjaha horbanganni hurleh; pangisini hundul tangis-tangis i toruh, anjaha doruh-doruh ni Jerusalem manaik do hu atas.

³ Na sangap-sangap marsuruh juakjuakni mangindahi bah; das ma sidea bani parigi, seng dong bah jumpah sidea; mulak ma sidea, lumei gusini; jut do uurni sidea, hiranani, irungkub sidea do uluni.

⁴ Siholan do tanoh bani bah, halani seng roh udan hu tanoh in; jut do uhur ni parjuma-juma, martudung-tudung horu ni uhur do sidea.

⁵ Age ura boru-boru na i talun, itadingkon do anakni na baru tubuh, halani seng dong be poyon-poyon.

⁶ Jongjong do halode harangan i atas buntu-buntu na palpalon, daup-daup bani logou songon sorigala; gombur do mata ni sidea halani seng dong sigagaton.

⁷ “Ham Jahowa, anggo adu-adu hajahatonnami dompak hanami, sai mangurupi ma Ham, halani goran-Mu; tongon buei do

panundalionnami, dompak Ham do hanami mardousa.

⁸ Ham, ale pangarapan ni Israel, Sipaluah bani panorang sanggah hasosakan, mase ma songon halak na legan Ham i tanoh in, songon halak pardalan-dalan na roh marborngin hansa?

⁹ Mase ma Ham songon halak na jonong, songon puanglima na so boi mangurupi? Tapi i tongah-tongahnami do Ham, ale Jahowa, marpanggorani bani goran-Mu do hanami. Ulang ma tadingkon Ham hanami!"

¹⁰ Sonon do hata ni Jahowa bani bangsa on, "Marosuh do sidea hujai-hujon, seng ra sidea pasohkon naheini. Halani ai seng marosuh Jahowa mangidah sidea, idingat do sonari hajahaton ni sidea, anjaha sihol do balaskonon-Ni dousa ni sidea."

¹¹ Nini Jahowa do hu bangku, "Ulang ma sai martonggoi ho mangapiti bangsa on.

¹² Age marpuasa sidea, seng anjai tangihonon-Ku doruh-doruh ni sidea, age pe igalangkon sidea galangan situtungon ampa galangan sipanganon ni sidea, seng marosuh Ahu bani sidea; tapi boiskonon-Ku do sidea marhitei podang, lohei pakon sampar."

¹³ Dob ai ningku ma mambalosi, "Ham Tuhan Jahowa, tonggor ma, nabi-nabi ai do mangkatahon

bani sidea, ‘Seng anjai idahonnima podang, barang loheian hanima, tapi damei na totap do berehononku bannima bani ianan on.’”

¹⁴ Tapi nini Jahowa ma hu bangku, “Ladung do na hinatahon ni nabi-nabi ai marhitei goran-Ku; seng dong Husuruh sidea, atap martonah Ahu bani sidea, atap marsahap bani sidea. Pangungkabon sipaoto-oto, panjahaion na so marnidok, ampa haotoon ni pingkiran ni sidea do ihatahon sidea bannima.

¹⁵ Halani ai sonon do hata ni Jahowa dompak nabi na manjahai marhitei goran-Ku, age pe lang Husuruh sidea, anjaha na mangkatahon, ‘Seng anjai roh podang atap lohei hu nagori on. Maningon bois do nabi na sonai marhitei podang ampa lohei.’

¹⁶ Anjaha halak na nijahaan ni sidea, maningon radag do i alaman ni Jerusalem, rasei ibahen lohei ampa podang, seng dong na mananom sidea, sidea sandiri, jolmani, anakni pakon boruni. Ai maningon useihonon-Ku do hajahaton ni sidea bani sidea.

¹⁷ Hatahon ma bani sidea hata on, ‘Sai marabur-abur do iluh ni matang-Ku arian pakon borngin, anjaha seng marnamangadi ai, ai parah do uga ni boru ni bangsang-Ku, borat do na mangonai bani ai.

¹⁸ Anggo laho ahu hu ladang, tonggor ma, na mangkamatei binahen ni podang; mulak masuk ahu hu huta, tonggor ma, halak radag binahen ni lohei; tongon, age nabi

ampa malim dalan-dalan do i tanoh in, jut do uhur ni sidea.

¹⁹ Ai domma tongon-tongon iambukkon Ham Juda? Ai domma sogam Ham bani Sion? Mase ma ilonsingi Ham hanami, anjaha seng dong hamalumon bennami? Sai mangarap do hanami bani hadameion, tapi seng dong roh na madear, mangarap do hanami bani panorang hamalumon, hape tonggor ma, hasonggoton do roh.

²⁰ Ham Jahowa, itandai hanami do hajahatonnami ampa salah ni ompungnami; tongon, dompak Ham do hanami mardousa.

²¹ Ulang ma buangkon Ham hanami halani goran-Mu! Ulang ma lopas Ham mahiri hotak ni hamuliaon-Mu! Ingat Ham ma, ulang ubah Ham padan-Mu na bennami.

²² Mintor adong ma humbani naibata ni bangsa-bangsa na boi paroh udan? Atap mintor tarparoh langit ma udan? Ai lang Ham do hansa, ale Jahowa Naibata? Bamu do marhatengeraan hanami, ai Ham do na manjadihon ai haganupan.”

15 ¹ Dob ai nini Jahowa ma hu bangku, “Porini pe roh si Musa pakon si Samuel hu lobei-Hu, seng anjai marulak-ulakan uhur-Hu mangidah bangsa on, palaho ma sidea hun lobei-Hu, suruh ma sidea misir!

² Jadi anggo ihatahon sidea bam, ‘Huja ma hanami laho?’ Hatahon ma bani sidea, “Sonon do hata ni Jahowa, ‘Na dob tinontuhon hu hamatean, hu hamatean ma; na hubani podang, bani podang ma; na bani lohei bani lohei ma, anjaha na hu buangan, hu habuangan ma.’

³ Ai parohon-Ku do ompat masam hasedaon bani sidea,” nini Jahowa, “Podang laho mamunuh, baliang laho mamparsilbak, manuk-manuk na i awang-awang pakon binatang na i talun laho mangankon pakon mandedahon.

⁴ Bahenon-Ku ma sidea gabe songgot-songgot bani haganup harajaon na i tanoh on, halani pambahenan ni si Manase, anak ni si Hiskia, raja ni Juda, i Jerusalem.

⁵ Ise ma na ra marholong ni atei bam, ale
Jerusalem, anjaha ise ma na ra manangisi
ho? Anjaha ise ma na ra tuluy, laho
manungkun atap na horas-horas ho?

⁶ Domma iambukkon ho Ahu,” nini Jahowa,
“Itundalhon ho do Ahu. Halani ai
huondamkon do tangan-Ku dompak ho
laho mandedahon ho; domma loja Ahu na
manganju-anju in.

⁷ Domma Hupiari sidea bani anduri ibagas
huta-huta ni nagori. Domma popor sidea
Hubahen, domma Huparseda bangsang-Ku;

halani seng ra sidea mubah humbani
parlahouni.

- ⁸ Hubahen do na mabalu i tongah-tongah ni sidea bueinan ase horsik ni laut. Huparoh do sipangagou tongah arian bani parinangon ampa niombahni; sompong do Huparoh bani sidea biar ampa songgot-songgot.
- ⁹ Mandatei do parinangon siparanak na pitu, tompas do ia halani galekni; sundut do mata ni ari sanggah arian ope; maila do ia anjaha tarbador. Anjaha na tading ai humbani sidea ondoskonon-Ku do bani podang i lobei ni munsuh ni sidea," nini Jahowa.

**Sangsi ni Uhur ni si Jeremia
bani Jahowa; Balos ni Jahowa Bani**

- ¹⁰ Bursik ma ahu, ale inang, na tinubuhkonmu on, gabejolma sitinggilan ampa silawanon bani ganup nagori on! Seng namin siparidou atap siparutang ahu, hape ganup do sidea mamapai ahu.
- ¹¹ Ham Jahowa, patut ma ai, porini seng onggahuelek-elek Ham mangkopkop sidea, porini seng roh ahu hu lobei-Mu mangapiti munsuh ai bani panorang hasosakan ampa panorang hamagouan?
- ¹² Boi ma ponggolhononkon bosu, bosu na hun utara ai ampa tombaga?

- ¹³ Ondoskonon-Ku ma arta ampa habayakonmu
gabe taban-taban, seng pala marboli halani
dousamu, bani haganup nagorimu.
- ¹⁴ Bahenon-Ku ma ho gabe jabolon ni munsuhmu
bani sada nagori na so tinandamu; ai
domma gara apuy ni ringis-Ku bam,
tongtong do gara ai.
- ¹⁵ Ham Jahowa, ibotoh Ham do; ingat Ham ma
ahu anjaha parayak Ham ma; marlulu ma
Ham pasal ahu, dompak na mardakdak
ahu. Ulang ma masabkon Ham ahu. Ulang
ma marlumbang ni uhur lalab Ham bani
munsuh-Mu. Botoh Ham ma, halani Ham do
ase hona risa ahu.
- ¹⁶ Dob jumpah hata-Mu, hupangan ma ai; gabe
malas ni uhur do bangku hata-Mu ampa
hamegahon bani uhurhu; ai marpanggorani
bani goran-Mu do ahu, Ham Jahowa Naibata
Zebaot.
- ¹⁷ Seng onggah hundul-hundul ahu i tongah-
tongah ni halak sipargereh-gereh, atap
marmalas-malas ni uhur ahu. Suhi do ahu
hundul, halani tangan-Mu na bangku ai; ai
gok ringis do uhurhu ibahen Ham.
- ¹⁸ Mase ma lang maronti naborit bangku, lang
hatambaran ugahku, manjua pamalumon?
Songon bah tubuh na paoto-otohon do Ham
bangku, songon bah horah-horah.”

- ¹⁹ Halani ai sonon do hata ni Jahowa, “Anggo mulak ho hu bangku, pasuangen-Ku do ho, anjaha jongjong ma ho i lobei-Hu; anggo na sintong-sintong iluarhon ho, seng na so margagan, gabe pamangan ma ho Bangku. Maningon ho do dompakkonon ni sidea, tapi anggo ho ulang ma dompakkon sidea.
- ²⁰ Bahenon-Ku do ho bani bangsa on gabe tembok tombaga na so tarpanangkih; porangon ni sidea do ho tapi seng tartaluhon sidea ho; tongon Ahu do mangkasomani ho laho mangurupi ampa paluahkon ho,” nini Jahowa.
- ²¹ “Sai na paluahon-Ku do ho hun tangan ni parjahat, anjaha tobuson-Ku do ho hun tangan ni sipangodoh-odoh.”

**Ihatahon Jahowa si Jeremia Luar
humbani Adat ni Bangsa Siraseionkon ai**

16 ¹Jadi roh ma hata ni Jahowa hu bangku sonon,

²“Ulang ma ho mambuat boru, anjaha ulang ma dong bam anak atap boru bani ianan on.

³Ai sonon do hata ni Jahowa pasal anak ampa boru na tubuh bani ianan on, ampa pasal parinangon na manubuhkon sidea ampa pasal paramangon sisuan sidea bani nagori on,

⁴ ‘Maningon matei do sidea halani sampar; seng dong na manangisi atap na mananom; gabe napu do sidea bani sisik ni tanoh in. Rasei do sidea bahenon ni podang pakon lohei, anjaha bangkei ni sidea gabe sipanganon bani manuk-manuk na i awang-awang ampa binatang na i talun.’

⁵ Ai sonon do hata ni Jahowa, ‘Ulang ma masuki rumah parhoruon, laho tangis ijai atap laho mangapohi sidea, ai domma Hupadaoh damei-Hu humbani bangsa on, nini Jahowa, sonai idop ni uhur-Hu ampa holong ni atei-Hu.’

⁶ Na magodang atap na etek-etek maningon do matei i nagori on, seng dong na mananom atap na manangisi sidea, seng dong na marariki angkulani atap na manlepong uluni halani sidea.

⁷ Seng dong na mamboan ruti, laho mangapoh halak na mateian, anjaha seng dong na mambere panginuman apoh-apoh halani na matei bapani atap inangni.

⁸ Ulang ma masuki rumah parpestaan laho hundul rap pakon sidea, sihol mangan ampa minum.

⁹ Ai sonon do hata ni Jahowa Zebaot, Naibata ni Israel, Tonggor ma, pasohon-Ku do bani ianan on, i lobeinima ampa sanggah panorangnima, sora malas ni uhur, sora olob-olob, sora ni siparunjuk ampa sora ni tunangan.

¹⁰ Anjaha anggo ipadas ho ganup hata on bani bangsa on, anjaha ihatahon sidea bam, ‘Mase

ma ilumbahon Jahowa bennami ganup hasedaon bangga on? Aha do salahnam i ampa dousanami, na binahennami dompak Jahowa Naibatani?'

¹¹ Jadi hatahon ma bani sidea, 'Halani itadingkon ompungnima Ahu,'" nini Jahowa, "Anjaha iihutkon sidea naibata na legan, ibalosi anjaha isombah sidea ai, tapi anggo Ahu itadingkon sidea, anjaha itadingkon titah-Ku seng idalankon.

¹² Anjaha halani samboran ope pambahenannima marimbang ompungnima ai, tonggor ma, ganup do hanima mangihutkon uhurnima na hengkening anjaha na jahat in, manjua ia manangihon Ahu:

¹³ Halani ai buangkonon-Ku do hanima hun
nagori on hu tanoh na so tinandani ampa
na so tinanda ni ompungnima; balosannima
ma ijai naibata na legan, arian pakon
borngin, ai seng idop be uhur-Hu bannima."

**Uhum ampa Hatuahon na Sihol Parohon ni
Jahowa bani Bangsa Israel ampa Bangsa Parbegu**

¹⁴ "Halani ai, tonggor ma, na roh ma panorangni," nini Jahowa, "Seng be hatahonon ni halak ijai, 'Songon sintongni manggoluh Jahowa, na mambobahon halak Israel tangkog hun tanoh Masir,'

¹⁵ tapi sonon do, 'Songon sintongni manggoluh Jahowa, na mambobahon halak Israel tangkog hun tanoh parutara ampa humbani haganup tanoh

pambuangan-Ku bani sidea. Ai paulakon-Ku do sidea hu tanoh, na dob Huberehon hubani ompung ni sidea.'

¹⁶ Tonggor ma, suruhon-Ku ma buei panjala," nini Jahowa, "Jadi jaloonni ma sidea; dob ai suruhon-Ku ma buei parburu, jadi buruonni ma sidea humbani sagala dolog-dolog, humbani sagala buntu-buntu ampa ronggang-ronggang ni dolog batu.

¹⁷ Ai kawah do panonggor-Hu bani haganup dalan ni sidea; seng lingod sidea hun lobei-Hu, anjaha hajahaton ni sidea seng ponop i lobei ni matang-Ku.

¹⁸ Tapi sihol balaskonon-Ku do lobei lompit dua hajahaton ni sidea ampa dousa ni sidea, halani na dob ipabutak sidea tanoh-Ku marhitei sisombahon ni sidea na matei-matei ai, anjaha gok ibahen sidea parbagianan-Ku bani sihagigihononkon.

¹⁹ Ham Jahowa, gogohku ampa batar-batarhu, haporusan bangku bani ari hasosakan! Bamu do sihol roh bangsa sipajuh begu-begu humbani ujung ni tanoh on, anjaha hatahononni ma, 'Sipaoto-oto tumang do hape na adong bani ompungnima, sisombahon na lang, na so margogoh mangurupi.'

²⁰ Ai tarbahenjolma do mambahen Naibata bani? Sedo naibata ai!

²¹ Halani ai, tonggor ma, pabotohkonon-Ku ma santorap on bani sidea pasal kuasang-Ku

ampa hagogohon-Ku; jadi botohon ni sidea ma, Jahowa do goran-Ku.”

Pintor do Pambalason ni Naibata Sitanda Uhur in

- 17** ¹ Dousa ni Juda tarsurat do marhitei pena bosì; marhitei pena intan do iuhirhon ai bani batu panuratan ni uhur ni sidea. ampa bani tanduk ni anjapanjap ni sidea,
- ² ai idingat anak ni sidea do anjapanjap ampa Asera ni sidea, na i toruh ni hayu na maratah ampa bani buntu-buntu na gijang,
- ³ bani dolog-dolog ampa i tongah ladang. Artamu ampa haganup habayakonmu ondoskonon-Ku do gabe taban-taban gabe upah ni dousamu, bani haganup nagorimu.
- ⁴ Jadi tanggalhononmu ma tanganmu humbani pusakamu na Hubere bam, anjaha bahenon-Ku ma ho gabe jabolon ni munsumu bani nagori na so tinandamu. Ai hanimu do pagara apuy ni ringis-Ku, apuy na gara tongtong.
- ⁵ Sonon do hata ni Jahowa, “Magou ma halak na martenger ni uhur bani jolma, na marpangajaman bani gogoh ni manisia, anjaha na pasurut uurni humbani Jahowa.
- ⁶ Usih do ia bani naporon i halimisan, na seng mangahapkon roh na madear; marianan do

ia i tanoh dorging na i halimisan, bani tanoh porad, na so niiankon ni jolma.

⁷ Tapi martuah ma halak na martenger ni uhur bani Jahowa, anjaha na mambahen Jahowa haporusanni.

⁸ Usih do ia hubani hayu na sinuan i topi ni bah, na pajulur uratni dompak bah. Seng mabiar ia age roh na milas, anjaha tongtong do maratah bulungni; seng rusak ia bani tahun logou ni ari, anjaha seng mangadi ia marbuah.

⁹ Sipaoto-oto do uhur ni jolma, lobih humbani haganup na legan; jahat tumang, ise ma na boi mananda in?

¹⁰ Ahu do Jahowa sipareksa uhur ampa siuji piah-piah, na mambalaskon bani jolma romban hubani parlahouni domu hubani buah ni pambahenanni.

¹¹ Songon dayok rimba na mamodomkon tolur na so tinolurhonni, sonai do halak na patumpuhon arta humbani dalan na so dalanni; bani partongahan ni umurni tadingkononni do ai anjaha bani ujung ni goluhni gabe na oto do ia.

¹² Hotak hasangapon, timbul humbani mungkahni, ai ma ianan na pansing bennami.

- ¹³ Ham Jahowa, pangarapan ni Israel, sagala na manadingkon Ham maningon tarbador do; na marbalik hun Bamu, i tanoh do tarsurat goranni, halani itadingkon sidea Jahowa, sumbul ni bah hagoluhan.”

Tonggo ni si Jeremia Sanggah Tarsosak

- ¹⁴ “Pamalum Ham ma ahu, ale Jahowa, ase malum botul ahu, paluah Ham ma ahu, ase maluah ahu tongon, ai Ham do puji-pujian bangku.
- ¹⁵ Tonggor ma, sidea do mangkatahon bangku, ‘Ija do hata ni Jahowa? Sai roh ma ai tongon!’
- ¹⁶ Tapi anggo ahu seng onnga husosak-sosak Ham manuruh na masambor, atap huharosuhkon ari hamagouan ai, ibotoh Ham do ai; aha na luar humbani pamanganku, talar do ai i lobei-Mu.
- ¹⁷ Ulang ma Ham gabe songgot-songgot bangku; Ham do haporusan bangku bani ari hamagouan.
- ¹⁸ Sai bador ma bahen Ham sidea na mangayak-ayak ahu, tapi ulang ma bador anggo ahu; sai tarsonggot ma bahen Ham sidea, tapi ulang ma tarsonggot anggo ahu; paroh Ham ma bani sidea ari hamagouan, lompit dua ma hasedaon ni sidea bahen Ham.”

Ojur-ojur Papansingkon Ari Sabat

¹⁹ Sonon do hata ni Jahowa hu bangku, “Laho ma ho, jongjong ma ho bani horbangan ni anak ni bangsa in, hamasukan ampa pandaratan bani raja-raja ni Juda, ampa bani haganup horbangan ni Jerusalem,

²⁰ anjaha hatahon ma bani sidea, ‘Tangihon ma hata ni Jahowa, ale raja ni Juda, ampa haganup Juda, ampa haganup pangisi ni Jerusalem, na masuk humbani horbangan on!’

²¹ Sonon do hata ni Jahowa, Anggo sihol manggoluh hanima, jaga ma hanima, ulang ma usung hanima sibobanon bani ari Sabat, atap iboan hanima hu horbangan ni Jerusalem.

²² Anjaha ulang ma usung hanima hun rumahnima sibobanon sanggah ari Sabat, atap ilahoi hanima sada horja, tapi papansing hanima ma ari Sabat in, songon na dob Hutitahkon bani ompungnima.

²³ Tapi seng itangihon sidea atap ipaeleng pinggolni; lambin ipajogal do tangkuhukni, ase ulang marpanangar sidea anjaha tarjalo sidea pangajaran.

²⁴ Tapi anggo itangihon hanima Ahu,” nini Jahowa, “Anjaha seng iboban hanima masuk sibobanon sanggah ari Sabat hun horbangan ni huta on, tapi ipapansing hanima ari Sabat in, seng marhorja hanima bani ari ai,

²⁵ jadi sai masuk do hun horbangan on raja-raja na hundul bani paratas ni si Daud, mangkunduli gareta ampa huda, sidea ampa na sangap-sangap ni halak Juda, ampa pangisi ni Jerusalem; anjaha ianonkon do huta on ronsi sadokah ni dokahni.

²⁶ Anjaha marrohan do halak humbani huta ni Juda ampa ianan inggot ni Jerusalem, hun tanoh Benjamin ampa hun tanoh bornoh-bornoh, hun tanoh pardologan ampa hun tanoh Dangsina, mamboban galangan situtungan ampa galangan sisayaton, galangan sipanganon ampa dahupa, sonai homa galangan puji-pujian hu Rumah ni Jahowa.

²⁷ Tapi anggo seng itangihon hanima Ahu, ase ipapansing hanima ari Sabat in, anjaha seng iusung hanima sibobanon laho masuk hun horbangan ni Jerusalem bani ari Sabat, jadi pagaraon-Ku ma apuy bani horbanganni ai, anjaha bois ma istana-istana na i Jerusalem, anjaha seng anjai mintop ai.”

**Pambahenan ni Sitopa Hudon, Usihan
bani Pambahenan ni Naibata**

18 ¹ On do hata ni Jahowa na roh hubani si Jeremia,

² “Jongjong ma ho, anjaha tuad ma ho hu rumah ni sitopa hudon, ijai ma pabogeihonon-Ku hatang-Ku bam.”

³ Jadi tuad ma ahu hu rumah ni sitopa hudon ai anjaha tonggor ma, tudu do ia marhorja manjolom parugasni ai.

⁴ Tapi hudon na sihol paulionni ai humbani tanoh halampung, maseda do ibagas tangan ni sitopa hudon ai; jadi ipauli ma hudon na legan hunjai, sonaha na dear nini uhurni.

⁵ Dob ai roh ma hata ni Jahowa hu bangku sonon,

⁶ “Ai seng tarbahen Ahu gakni bannima, songon pambahen ni sitopa hudon on, ale ginompar ni Israel?” nini Jahowa. “Tonggor ma, songon tanoh halampung ibagas tangan ni sitopa hudon, sonai do hanima ibagas tangan-Ku, ale ginompar ni Israel.

⁷ Marsipota marsahap Ahu pasal sada bangsa atap sada harajaon, laho mangorbat manropuki ampa parsedahon ai;

⁸ tapi anggo mubah do humbani hajahatonni bangsa na dob Hupalumba ai, jadi marpangulaki do uhur-Hu pasal hamagouan na dob Huranggihon ai bani.

⁹ Marsipota marsahap do Ahu pasal sada bangsa atap sada harajaon, laho manuan ampa pajongjongkon ai;

¹⁰ tapi anggo ibahen na jahat i lobei ni matang-Ku, seng itangihon sorang-Ku, jadi solsolan-Ku ma diring-Ku pasal na madear na sihol bahenon-Ku hu bani.

¹¹ Ai pe, hatahon ma hubani halak Juda ampa hubani pangisi ni Jerusalem. Sonon do hata ni Jahowa, 'Tonggor ma, domma Huranggi hinan hamagouan dompak hanima, anjaha Husurahon manlawan hanima. Mulak ma hanima, ganup humbani parlahouni na masambor, anjaha padear hanima ma dalannima ampa pambahenannima.'

¹² Tapi nini sidea ma, 'Sisoya-soya do ai! Domu hubani pingkirannami do hanami marparlahou, anjaha ganup mambahen domu hubani hengkening ni uhurni na jahat ai.'

¹³ Halani ai sonon do hata ni Jahowa, 'Sungkun ma i tongah-tongah ni bangsa parbegu, atap dong do na dob onga mambogei sisonai!'

Sihagigihonon do Tongon-tongon Ihorjahon Boru ni Israel

¹⁴ Ai onga do masab salju humbani batu-batu na i dolog Hermon? Ai onga do horah bah na manorsuk, na torus mabaor hun dolog?

¹⁵ Tapi anggo bangsang-Ku lupa do sidea Bangku, bani sisombahon do sidea manutung dahupa; jomba do sidea bani dalan ni sidea, bani dalan na basaia ai, mardalan bani dalan na so pinauli.

¹⁶ gabe songgot-songgot do sidea ibahen, gabe siapason ronsi sadokah ni dokahni. Ganup

na montas hunjai tarsonggot do anjaha iupir-upirhon uluni.

- ¹⁷ Songon logou na hun purba merap do sidea bahenon-Ku i lobei ni munsuh. Gurung-Ku do patuduhkonon-Ku bani sidea sedo bohing-Ku, bani ari ni hamagouan ni sidea.”

Tonggo ni si Jeremia dompak Imbangni

- ¹⁸ Nini sidea, “Laho ma hita mantahihon si Jeremia, ai seng anjai surut titah humbani malim, podah humbani na maruhur ampa hata ai humbani nabi. Laho ma hita, agou hita ma ia marhitei hatani sandiri, anjaha tangi ma hita pasal sagala hatani.

- ¹⁹ Ham Jahowa, pardiatei Ham ma ahu, tangar Ham sora ni sipanlawan bangku.

- ²⁰ Ai patut do na jahat balos ni na madear? Tongon, ihurak sidea do godung bangku? Ingat Ham ma, sonaha parjongjongku i lobei-Mu laho mangapiti sidea i lobei-Mu, laho palembangkon ringis-Mu humbani sidea.

- ²¹ Halani ai uhum Ham ma anak ni sidea marhitei lohei, anjaha ondoskon Ham ma sidea bani kuasa ni podang. Sai popor majolma ni sidea anjaha mabalu, anjaha dalahi ni sidea marmateian ma ibahen sampar; garama ni sidea pe rasei ma ibahen podang bani parmunsuhan.

- ²² Sai tarbogeï ma doruh-doruh hun rumah ni sidea, anggo iparoh Ham bala sompong mandorab sidea! Ai ihurak sidea do godung laho manangkap ahu, anjaha ponop itaon siding bani naheihu.
- ²³ Ham Jahowa, ibotoh Ham do ganup partahitian ni sidea; laho mamunuh ahu: Ulang ma sasap Ham hajahaton ni sidea ai, anjaha ulang ma masabkon Ham dousa ni sidea hun lobei-Mu. Mardabuhan ma sidea bahen Ham i lobei-Mu. Pasaud Ham ma uhur-Mu bani sidea bani panorang ni ringis-Mu.”

Botol Tanoh na Irosakkon Tuduh-tuduh bani Uhum

19 ¹ Sonon do hata ni Jahowa, “Laho ma ho, boli ma sada botol tanoh humbani sitopa hudon, arahkon ma deba pangintuai ni bangsa in ampa malim situanan.

² Anjaha luar ma ho hu habungan Ben-Hinnom, na i lambung ni horbangan parsanga-sangaan, anjaha tingtingkon ma ijai hata na sihol patugahon-Ku bam.

³ Hatahon ma, ‘Tangihon ma hata ni Jahowa ale raja-raja ni Juda ampa pangisi ni Jerusalem! Sonon do hata ni Jahowa Zebaot, Naibata ni Israel, tonggor ma, parohon-Ku ma hamagouan bani ianan on, gabe mardengeng ma pinggol ni sagala na manangar ai.

⁴ Halani na tinadingkon ni sidea ai Ahu anjaha ibutaki ianan on, marhitei na manutung dahupa ijon bani naibata na legan, ai ma, na so tinanda ni sidea atap ompung ni sidea atap raja-raja ni Juda pe; anjaha halani igoki sidea ianan on marhitei daroh ni halak na so marpipot,

⁵ anjaha ipauli ianan panumbahan bani Baal, laho manutung anak ni sidea bahen galangan situtungan bani Baal, ai ma, na so onga Hutonahkon atap Husahapkon, atap onga taringat ibagas uhur-Hu;

⁶ halani ai, tonggor ma, na roh ma ari,” nini Jahowa, “Lang be goranon ianan on Topet atap habungan Ben-Hinnom, tapi habungan pamunuhon do.

⁷ Ai gabe na lang do bahenon-Ku hauhuron ni Juda pakon Jerusalem bani ianan on, anjaha marrageian do sidea bahenon-Ku marhitei podang i lobei ni munsuh ni sidea, ampa marhitei tangan ni halak siuhurhon hosah ni sidea; berehonon-Ku do bangkei ni sidea gabe panganon ni manuk-manuk na i awang-awang ampa binatang na i talun.

⁸ Anjaha bahenon-Ku do huta on gabe hasonggotan ampa siapason; ai ganup na montas hujai tarsonggot do, anjaha manrisai halani haganup hasedaon na mangonai hujai.

⁹ Papangankonon-Ku do bani sidea daging ni anak ampa boru ni sidea, anjaha ganup sidea marsipangan daging ni hasomanni, sanggah na tarsosak sidea anjaha marhabiaran binahen ni

munsuh ni sidea ampa na manguhurhon hosah ni sidea.

¹⁰ Jadi bolahkon ma botol tanoh ai i lobei ni halak na rapkon ho ai,

¹¹ anjaha hatahon ma bani sidea, sonon do hata ni Jahowa Zebaot, 'Sonai ma rosakkonon-Ku bangsa on ampa huta on, songon halak na marosakkon hudon ni sitopa hudon, gabe seng tarpauli be.' I Topet ma halak mananom na matei, halani seng dong be panimbunan na legan.

¹² Sonai ma bahenon-Ku bani ianan on," nini Jahowa, "Ampa bani pangisini; songon Topet do bahenon-Ku ianan on.

¹³ Rumah-rumah na i Jerusalem ampa rumah-rumah ni raja-raja ni Juda maningon pabutakon do songon ianan ni Topet, ai ma haganup rumah, na onggga tayubni ipakei panutungan ni dahupa bani ganup bala ni langit, anjaha iuseihon ijai galangan siinumon bani naibata na legan."

Iarsik Malim Pashur si Jeremia

¹⁴ Dob ai mulak ma si Jeremia hun Topet, na pinarayakni ai laho manjahai ijai isuruh Jahowa; jadi jongjong ma ia i alaman ni rumah ni Jahowa, anjaha ihatahon ma bani ganup bangsa ai:

¹⁵ Sonon do hata ni Jahowa Zebaot, Naibata ni Israel, "Tonggor ma, parohon-Ku do hu huta on ampa hubani huta na legan haganup hamagouan,

na dob Hulumbahon ai, halani ipajogal sidea tangkuhukni, anjaha manjua sidea manangihon hatang-Ku.”

20¹ Jadi, dob ibogei Malim Pashur, anak ni si Immer, ai ma kopala ni parjaga i rumah ni Jahowa, hata panjahaion ni si Jeremia ai,

² jadi ipukul ma Nabi Jeremia, anjaha inahkon ma ia bani bayangan, na bani horbangan Benjamin parhuluan ai, na bani rumah ni Jahowa.

³ Patarni ai, dob ipadarat si Pashur si Jeremia humbani bayangan, nini si Jeremia ma hu bani, “Lang be si Pashur goranmu diloon ni Jahowa, tapi “Biar Inggot” ma.

⁴ Ai sonon do hata ni Jahowa, ‘Tonggor ma, Ahu do mangondoskon ho hubagas hagobiron, ho ampa haganup hasomanmu. Rasei do sidea bahenon ni podang ni munsuh ni sidea, anjaha matamu sandiri mangidah ai. Ondoskonon-Ku do haganup Juda hubagas tangan ni raja Babel; jadi boanon ma sidea hu Babel, anjaha bunuhonni marhitei podang.’

⁵ Anjaha haganup habayakon ni huta on, haganup pansarianni, haganup ugas-ugasni na maharga ampa haganup arta ni raja-raja ni Juda ondoskonon-Ku do hubagas tangan ni munsuh ni sidea, ai ma na sihol roh manrampas anjaha manangkapi sidea, laho mamboban sidea hu Babel.

⁶ Anjaha ho, ale Pashur, ampa haganup sinrumahmu maningon tabanon do, iboan hu

Babel; ijai do ho matei anjaha ijai do tanomon ho ampa haganup hasomanmu, na nioto-otoanmu marhitei panjahaion ladung.”

Paruntolon ni si Jeremia halani Horja Hanabionni

- ⁷ Isahap-sahapi Ham do ahu, ale Jahowa, anjaha ra do ahu sahap-sahapan-Mu, gogohan do Ham ase ahu, italuhon Ham do ahu. Gabe sipartatawaan do ahu ganup ari; haganup do manrisai ahu.
- ⁸ Ai siap marhata ahu maningon dilo-dilo do ahu, maningon taurhononku do pasal odoh-odoh ampa hajahaton, gabe sirisaon ampa sipahata-hataon do ahu halani hata ni Jahowa.
- ⁹ Anggo huhatahon, ‘Lang be tarsingatanku ai, atap seng be marsahap ahu marhitei goran-Ni,’ jadi songon na adong do apuy na gajag huahap ibagas uhurhu, tartutup ibagas holi-holingku, anjaha loja do ahu manahan-nahan ai, hape seng tolap ahu.
- ¹⁰ Tongon buei do husip-husip hubogei: Habiaran do inggot! Aduhon ma ia! Aduhon hita ma ia! Haganup huan-kuan na sangkan bangku manggompangi ahu, ase dabuh ahu. Ra taroto-otoi hita do ia, anjaha mambahen pambalason ma hita bani!

- ¹¹ Tapi Jahowa do mangkasomani ahu songon puanglima na barani; halani ai maningon targompang do sagala na mardakdak ahu, anjaha seng anjai tartaluhon sidea ahu: Maningon bador tumang do sidea, seng anjai monang: Torus do sidea tarbador, seng halupahononkon ai.
- ¹² Ham Jahowa Zebaot, siuji halak parpintor, sididah piah-piah ampa uhur, paidahkon Ham ma bangku pambalason na bani sidea, ai ondos bamu do parkarangku.
- ¹³ Dodingkon ma Jahowa, puji ma Jahowa! Ai ipaluah do goluh ni halak na masombuh humbani tangan ni parjahat.
- ¹⁴ Hona papa ma namin ari partubuhku. Sai ulang ma hinan namin hona pasu-pasu ari panubuhkonon ni inang bangku!
- ¹⁵ Hona papa ma namin halak na mamboan barita bani bapa, mangkatahon, “Domma tubuh sada anak bamu”, laho mambahen malas tumang uhurni!
- ¹⁶ Sai mangonai ma bani halak ai, songon na masa bani huta na pinarseda ni Jahowa seng maralang-alang. Sai bogeion-Ni ma namin doruh-doruh sogod ampa hasonggotan arian,

¹⁷ halani na so ibunuh ahu, sanggah i partapaan, ase inang ma namin tanoman bangku anjaha boratan rumah lalab ia.

¹⁸ Mase ma mandarat ahu hun partapaan, laho mangidah hangaluton ampa horu ni uhur, gabe bontasonku ari-ari ni goluhku ibagas habadoron?

Ilumbahon si Jeremia Parseda ni Jerusalem bani si Sedekia

21 ¹ On do hata na roh humbani Jahowa bani si Jeremia, sanggah isuruh Raja Sedekia si Pashur, anak ni si Malkia, ampa Malim Sepanya, anak ni si Maaseya hu bani mangkatahon,

² “Sungkun ham ma lobei bennami humbani Jahowa, ai iporang si Nebukadnesar, raja ni Babel do hanami nuan; andohar ra Jahowa mambahen bennami halongangan songon na somal hinan ibahen, ase misir ia hun bennami.”

³ Jadi nini si Jeremia ma hubani sidea, “Sonon ma hatahon hanima hubani si Sedekia.

⁴ Sonon do hata ni Jahowa, Naibata ni Israel, ‘Tonggor ma, pabalikon-Ku do sinjata hamunsuhon na i tangannima, na pinakeinima marmunsuh i darat ni tembok ai dompak raja ni Babel ampa dompak halak Kasdim, na mangkubu hanima, anjaha tarikon-Ku do ai haganup hubagas huta on.’

⁵ Ahu sandiri do marmunsuh dompak hanima marhitei tangan na gostong ampa botohon na gogoh, marhitei ringis ampa gila na parah.

⁶ Anjaha bunuhon-Ku do pangisi ni huta on,jolma, sonai age pinahan; marmateian do sidea halani sampar na parah.'

⁷ Dob ai, nini Jahowa ma, 'Ondoskonon-Ku do si Sedekia, raja ni Juda, ampa gamot-gamotni, halak na mabuei ibagas huta on, na niliouan ni sampar, podang ampa lohei, hu tangan ni si Nebukadnesar, raja ni Babel, ampa hu tangan ni munsuh ni sidea, na manguhurhon hosah ni sidea. Bunuhonni ma sidea marhitei podang; seng maidop uhurni mangidah sidea, atap liouanni sidea, atap malang uhurni mangidah sidea.'

⁸ Ambahni ai hatahon ma bani bangsa on, sonon do hata ni Jahowa, 'Tonggor ma, Ahu do mannahkon i lobeinima dalan hagoluhan ampa dalan hamatean.

⁹ Atap ise na tading ibagas huta on, maningon do matei marhitei podang, lohei ampa sampar; tapi atap ise na mandarat anjaha na lintun hubani halak Kasdim na mangkubu hanima, manggoluh ma ia, bani ma hosahni songon taban-taban.

¹⁰ Ai domma Hudompakkon bohing-Ku dompak huta on laho mangagouhon, sedo laho padearhon," nini Jahowa, "Ondoskononkon do huta on hubagas tangan ni Raja Babel, anjaha tutungonni ma on.

¹¹ Bani ginompar ni raja ni Juda, hatahon ma, ‘Tangihon hanima ma hata ni Jahowa,

¹² ale ginompar ni si Daud!’ Sonon do hata ni Jahowa, ‘Dalankon ma uhum na pintor ganup sogod, anjaha paluah hanima ma na sinamun humbagas tangan ni sipangodoh-odoh, ase ulang roh ringis-Ku songon apuy anjaha gara, seng dong na boi mangintopi, halani hajahaton ni pambahenannima.’

¹³ Tonggor ma, na roh do Ahu manlawan ho, ale huta, na marianan i atas ni dolog batu, na bani habungan,” nini Jahowa, “Hanima na mangkatahon, ‘Ise ma na tuad manlawan hita, anjaha ise ma na boi mammasuk i ananta?’

¹⁴ Luluhonon-Ku do bannima romban hubani buah ni pambahenannima,” nini Jahowa, “Nahitan-Ku do apuy ibagas haranganni, anjaha boiskononni ma haganup na manliotisi.”

Hata Lumba-lumba bani Raja Joahas, Raja Joyakim ampa Raja Joyakin

22 ¹ Sonon do hata ni Jahowa, “Tuad ma ho hu rumah ni raja ni Juda, sahapkon ma ijai hata on.

² Hatahon ma, ‘Tangihon ma hata ni Jahowa, ale raja ni Juda, na hundul i atas hotak ni si Daud, ho

ampa juakjuakmu ampa rayatmu, na masuk hun horbangan on.'

³ Sonon do nini Jahowa, 'Dalankon hanima ma uhum ampa hapintoron, anjaha paluah ma halak na tarsamun hun tangan ni sipangodoh-odoh.' Ulang ma bahen hasunsahan atap paksa bani halak panginsolat, na tading maetek ampa naboru na mabalu, anjaha ulang ma duruskon daroh na so marpipot bani ianan on.

⁴ Anggo tongon idalankon hanima hata ai, jadi sai masuk do humbani horbangan ni rumah on raja-raja, na hundul bani hotak ni si Daud, mangkunduli gareta ampa huda, sidea ampa juakjuak ni sidea ampa rayat ni sidea.

⁵ Tapi anggo seng ra hanima manangihon hata on, domma marbija Ahu bani diring-Ku," nini Jahowa, "Maningon mareong do rumah on.

⁶ Ai sonon do hata ni Jahowa pasal istana ni raja ni Juda, 'Songon Gilead do ho Bangku, songon pakpak ni Libanon, tapi tongon gabe halimisan do ho bahenon-Ku, gabe huta na so marpangisi.

⁷ Pasirsiron-Ku do halak na marsedahon ho, ganup sidea marsinjata; anjaha robohon ni sidea do hayu aresmu sidearan, anjaha gijigkononni do ai hubagas apuy.

⁸ Buei do bangsa mamontas hun huta on, anjaha ganup manungkun bani hasomanni, 'Mase ma sonon ibahen Jahowa bani huta na banggal on?'

⁹ Jadi balosan ni sidea ma, 'Halani na itadingkon sidea do padan na binahen ni Jahowa, Naibata ni sidea, anjaha marsombah sidea bani naibata na legan, anjaha ibalosi sidea ai.'

¹⁰ Ulang ma tangisi hanima ia, na matei in, ulang marhoru pasalsi, tapi gogoh ma tangisi hanima ia, na laho misir in, ai seng mulak be ia laho mangidah tanoh hatubuhanni.

¹¹ Ai sonon do hata ni Jahowa pasal si Salum, anak ni si Josia, raja ni Juda, na mamarentah manggantih bapani, si Josia, na misir humbani ianan on. Seng anjai mulak be ia hujon,

¹² tapi maningon matei do ia bani ianan pambuangan ni sidea bani, anjaha seng idahonni be tanoh on.

¹³ Bursik ma ia, na pajongjong rumahni marhitei hagedukon, ampa na paulihon anjung-anjung ni marhitei na so uhun, na marsuruh hasomanni mangkorja seng margaji, na so mamberehon upahni bani,

¹⁴ na mangkatahon, 'Paulionku ma bangku rumah na banggal, na markamar-kamar na lumbang i atas, anjaha na mambahen marjandela ai, ilapis bani hayu ares anjaha ibahen marset sigenger.'

¹⁵ Nini uhurmu raja ma ho halani marpala-pala
ho marrumah hayu ares? Ia bapamu ai
lang mangan minum do ia? Tapi idalankon
do hasintongan ampa hapintoron, gabe
marsonang-sonang do ia. Sintong do
panguhumionni bani na madoyuk pakon na
masombuh,

¹⁶ anjaha mardohar do. Ai lang sonai parlahou ni
sitandai Ahu?" nini Jahowa.

¹⁷ "Tapi anggo matamu pakon uhurmu, pitah
dompok untung na so pintor do laho,
dompok na manduruskon daroh na
so marpipot, anjaha na mandalankon
odoh-odoh ampa paksa.

¹⁸ Halani ai sonon do hata ni Jahowa pasal si
Joyakim, anak ni si Josia, raja ni Juda, Seng
anjai tangisan ni sidea ia, mangkatahon: 'Aih
saninangku!' atap 'Aih botou!' Seng anjai
doruh-doruh sidea pasalsi, mangkatahon, 'Ham
Tuannami!' Atap, 'Ham, na marsangap, na
marmulia!'

¹⁹ Songon halode do ia tanomon, isarad anjaha
isampakkon hudarat ni horbangan ni
Jerusalem.

²⁰ Tangkog ma ho hu Dolog Libanon, anjaha
mardilo-dilo ma; pamaling ma soramu
i Basan, anjaha doruh-doruh ma hun

Dolog Abarim, ai domma bois sagala na mangkaholongi ho.

²¹ Marsahap do ahu bam sanggah na sonang ho, tapi nim, 'Seng ra ahu manangihon!' Sonai do parlahoumu humbani haposoonmu, seng onnga itangihon ho sorang-Ku.

²² Haganup parmahanmu ombuskonon ni logou do, anjaha haganup na mangkaholongi ho, maningon tarbuang do; jadi bador ma ho, anjaha songgotan halani haganup hajahatonmai.

²³ Ho ale na marparatas i Libanon, na marasar i tengah-tengah ni hayu ares! Sonaha ma nani pangorongmu bani paroh ni na maborit bam, ai ma na maborit songon na bani naboru na mangarou?

²⁴ Songon sintongni manggoluh Ahu," nini Jahowa, "age pe si Konya, anak ni si Joyakim, ai ma raja i Juda, tintin token bani tangan-Ku siamun, sai umpaton-Ku do ho,

²⁵ anjaha ondoskonon-Ku do ho hubagas tangan ni na manguhurhon hosahmu, hubagas tangan ni halak na hinabiaranmu, ai ma hubagas tangan ni si Nebukadnesar, raja ni Babel, ampa hubagas tangan ni halak Kasdim.

²⁶ Anjaha sampakkonon-Ku do ho ampa inangmu na manubuhkan ho, hu tanoh na legan, na so hatubuhanmu, anjaha ijai do hanima matei.

²⁷ Tapi hu nagori na hinarosuhkon ni sidea sihol mulak hujai, seng anjai mulak be sidea hujai.

²⁸ Ai doskon hudon sihagigihonon-Ku anjaha sirosakkonkon do nani si Konya, doskon hudon, na so adong be halak na pot bani? Mase isampakkon anjaha igijigkon ia, hu tanoh na so onnga tinandani?

²⁹ Ale tanoh, tanoh, tanoh, tangar ma hata ni Jahowa!

³⁰ Sonon do hata ni Jahowa, ‘Suratkon ma halak on, songon na so marniombah, halak na so marsangap bani goluhni; ai seng dong be humbam ginomparni, na hundul bani hotak ni si Daud anjaha na mamarentah use i Juda.’”

Bagah-bagah Pasal Tumbor ni si Daud na Pintor ai

23 ¹ “Bursik ma parmahan, na mangagou ampa na mangerap biribiri na Huparmahan,” nini Jahowa.

² “Halani ai sonon do hata ni Jahowa, Naibata ni Israel pasal parmahan, na marmahan bangsang-Ku, ‘Merap do ibahen hanima hulanan-Ku, iusir hanima do sidea, anjaha seng ipardimata hanima sidea. Tonggor ma, luluhonon-Ku do bannima pambahenannima na jahat in, nini Jahowa.

³ Tapi anggo Ahu, pahumpulon-Ku do teba-teba ni hulanan-Kin humbani haganup nagori

pambuangan-Ku bani sidea, anjaha boanon-Ku do sidea mulak hubani sampalanni hinan, ase manggargar anjaha lambin bueini sidea.

⁴Pabangkiton-Ku do parmahan bani sidea, na marmahan sidea, anjaha lang be gobir sidea, barang songgotan, anjaha seng dong magou age sada,” nini Jahowa.

⁵“Tonggor ma, na roh ma panorangni,” nini Jahowa, “Pajongjongon-Ku ma bani si Daud sada Tumbor na pintor; manggomgomi do ia songon raja marhasoman hapentaran, anjaha dalankononni do hasingtongan ampa hapintoron i nagori in.

⁶Bani panorangni ai dapotan haluahon ma Juda, anjaha marsonang-sonang Israel marianan. Anjaha on do goranni hatahonon ni halak, ‘Jahowa do hapintoron banta.’

⁷Halani ai, tonggor ma, na roh do panorangni,” nini Jahowa, “Seng be hatahonon ni halak ijai, ‘Songon sintongni manggoluh Jahowa, na mamboban tangkog halak Israel hun Masir,’

⁸tapi sonon ma, ‘Songon sintongni manggoluh Jahowa, na mamboan ampa na manogu-nogu ginompar ni Israel tangkog hun tanoh par utara ampa humbani ganup nagori pambuanganni bani sidea, laho mambahen sidea marianan bani tanoh ni sidea.’”

Hata Lumba-lumba bani Nabi Siparladung

- ⁹ Pasal nabi-nabi, “Marosak do uhurhu ibagas, hitir-hitir do ganup holi-holingku; songon halak na mabuk do ahu, songon halak na rebad-rebad halani anggur, ai ma marhitei Jahowa ampa hatani na pansing in.
- ¹⁰ Ai gok parbangkis do tanoh on; pangkorhon ni papa, marhoru do tanoh in, anjaha sampalan na i halimisan horah do. Na jahat do situjuon bani sidea, anjaha hagedukon do kuasa bani sidea.
- ¹¹ Nabi, sonai age malim parjahat do, gari ibagas rumah-Ku jumpah Ahu do hajahaton ni sidea,” nini Jahowa.
- ¹² “Halani ai dalan ni sidea gabe dalan na landit anjaha na golap do bani sidea; jiris do sidea ijai anjaha dabuh. Ai parohon-Ku do bani sidea hamagouan bani tahun pambalason bani sidea,” nini Jahowa.
- ¹³ “Bani nabi na i Samaria Huidah adong do na so patut. Manjahai do sidea marhitei Baal, gabe kahou do ibahen bangsang-Ku Israel.
- ¹⁴ Tapi bani nabi na i Jerusalem Huidah do sihagigihononkon, marbangkisi do sidea anjaha marparlahou ibagas ladung; ipargogohi sidea do tangan ni parjahat, gabe seng dong na mulak humbani hajahatonni;

haganup do sidea gabe songon Sodom
Bangku, anjaha songon pangisi ni Gomora.”

¹⁵ Halani ai sonon do hata ni Jahowa Zebaot pasal nabi ai, “Tonggor ma, papangankonon-Ku do bani sidea sipanganon na mapaet, anjaha painumkonon-Ku do bah rasun bani sidea; ai luar do hasamboron humbani nabi-nabi na i Jerusalem hu sab tanoh in.”

¹⁶ Sonon do hata ni Jahowa Zebaot, “Ulang ma tangihon hanima hata ni nabi na manjahai bannima! Na mangoto-otoi do sidea bannima, panonggoran ni uhur ni sidea sandiri do ibaritahon, sedo na humbani pamangan ni Jahowa.’

¹⁷ Sai ihata-hatahon sidea do bani halak na pahiri-hiri hata ni Jahowa, ‘Sai na sonang do nasiam!’ Anjaha bani ganup halak na marparlahou domu hubani uhurni na hengken ai, ihatahon sidea do, ‘Seng anjai roh hamagouan bani nasiam!’

¹⁸ Ai ise dong, na jongjong manriah i lobei ni Jahowa, laho manjalo ampa mambogei hata-Ni? Ise do, na marimbagaskon hata-Ni, ase ibaritahon ai?

¹⁹ Tonggor ma, haba-haba humbani Jahowa! Luar do gila-Ni, ai ma haba-haba sibungkar hasowor; dorabon ni ai do ulu ni parjahat.

- ²⁰ Seng surut ringis ni Jahowa! paima idalankon anjaha ipasaud sura-sura ni uhur-Ni.
Arusannima do ai bani dokah-dokah ni ari.
- ²¹ Seng Husuruh nabi-nabi ai, hape laho do sidea; seng marsahap Ahu bani sidea, hape manjahai do sidea.
- ²² Tapi ambit na dob jongjong sidea manriah i lobei-Hu, jadi baritahonon ni sidea ma hatang-Ku bani bangsang-Ku, laho paulakkon sidea humbani parlahou ni sidea na jahat ai, ampa humbani pambahenan ni sidea na sambor ai.
- ²³ Ai Naibata na dohor do hansa Ahu,” nini Jahowa, “Ai lang Naibata na daoh do homa?
- ²⁴ Anggo marponop halak bani ianan na lingod, ai lang Huidah do ia?” nini Jahowa. “Ai lang Ahu do na manggoki langit pakon tanoh on?” nini Jahowa.
- ²⁵ “Hutangar do atap aha hata na hinatahon ni nabi-nabi ai, na patugahkon ladung marhitei goran-Ku, nini sidea, ‘Marnipi do ahu, marnipi do ahu!’
- ²⁶ Piga dokah nari do sonai uhur ni nabi-nabi ai, na patugahkon sipaoto-oto, na mansahapkon ladung na ibagas uhur ni sandiri,
- ²⁷ na mansurahon, ase lupa bangsang-Ku bani goran-Ku marhitei nipi ni sidea, na hinatahon ni sidea samah sidea, ai ma songon pangkalupahon ni ompung ni sidea bani goran-Ku halani Baal?

²⁸ Nabi na marnipi, ipatugah ma nipini; tapi atap ise na dong hatang-Ku bani, sintong-sintong ma ihatahon hata ai. Ai aha do pardomuan ni lamlam pakon omei,” nini Jahowa.

²⁹ “Ai lang songon apuy do hatang-Ku,” nini Jahowa, “Anjaha songon parpalu, na manropuki batu gingging?

³⁰ Halani ai, tonggor ma, lawanon-Ku do nabi-nabi ai,” nini Jahowa, “Na marsitangkoan bani hatang-Ku.

³¹ Tonggor ma, lawanon-Ku do nabi-nabi ai,” nini Jahowa, “Na somal mangkatahon marhitei dilahni, sonon do hata ni Jahowa,

³² ‘Tonggor ma, lawanon-Ku do nabi-nabi ai, na patugahkon nipi ladung,’” nini Jahowa, “Na mambaritahon ai, sihol pakahouhon bangsang-Ku marhitei ladung ampa sipaoto-oto ni sidea; seng dong Husuruh sidea, atap Huparentahkon; seng dong guna ni sidea bani bangsa on,” nini Jahowa.

³³ “Anggo adong humbani bangsa on, nabi atap malim pe, manungkun ho, ‘Aha do siporsanon humbani Jahowa?’ Hatahon ma hubani sidea, ‘Hanima do siporsanon ai, ambukkonon-Ku do hanima,’” nini Jahowa.

³⁴ “Ia dong nabi, malim atap ise humbani bangsa ai na mangkatahon, ‘Siporsanon humbani Jahowa, uhumon-Ku do ia ampa parrumahni.’

³⁵ Sonon do sihatahononnima ganup bani hasomanni ampa bani saninani, ‘Aha do balos ni Jahowa?’ atap, ‘Aha do na hinatahon ni Jahowa?’

³⁶ Tapi ulang be sahap-sahapkon pasal siporsanon humbani Jahowa, ai hata-Ni sandiri do siporsanon ai bani ganup halak, marhitei na ipabalik hanima hata ni Naibata na manggoluh in, ai ma Jahowa Zebaot, Naibatanta.

³⁷ Sonon ma hatahon hanima bani nabi, ‘Aha do balos ni Jahowa hubam?’ atap, ‘Aha do ihatahon Jahowa?’

³⁸ Tapi, anggo sai ihatahon hanima, ‘Siporsanon humbani Jahowa’, jadi sonon ma hata ni Jahowa, ‘Halani sai ihatahon hanima hata on, Siporsanon humbani Jahowa,’ age pe domma Husuruh na mangkatahon bannima, Seng bulih hatahononnima “Siporsanon humbani Jahowa”,

³⁹ halani ai, tonggor ma, angkaton-Ku ma hanima laho manggijigkon hun lobei-Hu, hanima sonai age huta on, na dob Hubere bannima ampa bani ompungnima.

⁴⁰ Anjaha pasogopon-Ku do bannima habadoron sisadokah ni dokahni ampa hahirion na manongtong, na so boi halupaonkon.”

Pangungkabon Pasal Dua
Karanjang na Marisi Buah Ara

24 ¹ Jadi ipataridahkon Jahowa ma hu bangku, tonggor ma, dua karanjang marisi buah ni hayu ara, inahkon i lobei ni rumah ni Jahowa, ai ma na masa dob ibuangkon si Nebukadnesar, raja ni Babel, si Jekonya, anak ni si Joyakim, raja ni Juda, rap pakon na sangap-sangap ni Juda, ampa tuhang hayu, ampa tuhang bosi anjaha iboan sidea hun Jerusalem hu Babel.

² Sada karanjang marisi buah ara na dear tumang, songon limbuah ni buah ara, tapi karanjang na sada nari marisi buah ara na masambor tumang, seng tarpangan halani samborni.

³ Jadi nini Jahowa ma hu bangku, “Aha do na nididahmin, ale Jeremia?” Ningku marbalos, “Buah ara, buah na jenges ai, jenges tumang; tapi na sambor ai, sambor tumang, gabe seng tarpangan.”

⁴ Dob ai roh ma hata ni Jahowa hu bangku sonon,

⁵ Sonon do hata ni Jahowa, Naibata ni Israel, “Songon buah ara na dear ai, sonai do Huhira halak na tarbuang hun Juda, na dob Huusir humbani ianan on hu tanoh ni halak Kasdim.

⁶ Kawahkonon-Ku do sidea ibagas halamlamon, anjaha boanon-Ku do sidea mulak hu tanoh on.

Pajongjongon-Ku do sidea, seng parsedaon-Ku; suanon-Ku do sidea, seng orbaton-Ku.

⁷ Berehonon-Ku do bani sidea uhur laho mananda Ahu, paboa Ahu do Jahowa; gabe bangsang-Ku ma sidea anjaha Ahu gabe Naibata bani sidea, ai mulak do sidea use hu Bangku humbani gok ni uhur ni sidea.”

⁸ Tapi sonon do nini Jahowa, “Songon buah ara na sambor ai gabe seng tarpangan,” nini Jahowa, “Sonai do bahenon-Ku bani si Sedekia, raja ni Juda, bani na sangap-sangapni, bani simasima ni Jerusalem, na tading i nagori on, ampa bani sidea na marianan i tanoh Masir.

⁹ Bahenon-Ku do sidea gabe songgot-songgot bani haganup harajaon na i tanoh on; gabe sirisaon, umpama, siapason ampa siburaan do sidea, bani haganup ianan pambuangan-Ku bani sidea.

¹⁰ Tongoson-Ku do bani sidea podang, lohei ampa sampar, ronsi bois tumang sidea humbani tanoh na dob Hubere bani sidea ampa bani ompung ni sidea.”

Lumba-lumba Pasal Habuangan Sipitupuluh Tahun ampa Parseda ni Babel

25 ¹ On do hata na roh hubani si Jeremia, pasal haganup bangsa Juda, paompat-tahunkon dob raja si Joyakim, anak ni si Josia, raja ni Juda, bani tahun na parlobei dob raja si Nebukadnesar, raja ni Babel,

² ai ma ihatahon Nabi Jeremia bani haganup bangsa Juda ampa bani haganup pangisi ni Jerusalem, nini,

³ “Mulai humbani pasapuluhtolu-tahunkon dob raja si Josia, anak ni si Amon, raja ni Juda, das bani sadari on, dua puluh tolu tahun dokahni, sai roh do hata ni Jahowa hu bangku, anjaha husahapkon do ai bannima marulak-ulak, tapi seng itangihon hanima.

⁴ Tongtong do isuruh Jahowa sagala juakjuak-Ni, ai ma nabi-nabi ai, bannima, tapi seng ra hanima manangihon, anjaha seng ra hanima paeleng pinggolnima laho mambogei ai.

⁵ Nini sonon, ‘Mulak ma hanima ganup humbani parlahouni na masambor ampa pambahenanni na jahat in, ase totap hanima marianan bani tanoh, na dob binerehon ni Jahowa bannima ampa bani ompungnima, humbani sapari ronsi sadokah ni dokahni.’

⁶ Ulang ma ihutkon hanima naibata na legan, laho mambalosisi ampa marsombah hujai, anjaha ulang ma puhoi hanima ringis-Ku marhitei horja-horja ni tangannima, ase ulang Huparoh hasedaon bannima.

⁷ Tapi seng itangihon hanima Ahu,” nini Jahowa, “Gabe ipuhoi hanima do ringis-Ku marhitei pambahenan ni tangannima, na gabe hamagouan bannima sandiri.

⁸ Halani ai sonon do hata ni Jahowa Zebaot, ‘Halani na so itangihon hanima hatang-Ku,

⁹ tonggor ma, parohon-Ku ma bangsa-bangsa par utara,” nini Jahowa, “Ampa si Nebukadnesar, raja ni Babel, juakjuak-Kai, boanon-Ku ma sidea mandorab tanoh on ampa sagala pangisini ampa dampak ganup bangsa-bangsa inggot; boiskonon-Ku do sidea, bahenon-Ku do sidea gabe songgot-songgot, sipahirion ampa siapason tongtong.

¹⁰ Ambah ni ai, padaohon-Ku do hun tongah-tongah ni sidea sora malas ni uhur ampa olob-olob, sora ni siparunjuk ampa sora ni tunangan, sora ni panduda ampa sinalsal ni suluh.

¹¹ Anjaha tanoh on ganup maningon do tarulang anjaha lungun, anjaha maningon balosan ni bangsa-bangsa on do raja ni Babel pitu puluh tahun dokahni.

¹² Tapi dob salpu na pitu puluh tahun ai,” nini Jahowa, “Marlulu do Ahu dampak raja ni Babel, dampak rayatni ampa dampak tanoh ni halak Kasdim, halani hajahaton ni sidea, anjaha bahenon-Ku do tanoh ai tarulang lalab.

¹³ Parohon-Ku do hubani tanoh ai domu hubani haganup hata na dob Hulumbahon dampaksi, ganup na tarsurat bani buku on, na dob nilumbahon ni si Jeremia dampak sagala bangsa.

¹⁴ Age sidea, buei do bangsa ampa raja-raja na banggal marjabolonkon sidea; balaskonon-Ku do bani sidea romban hu bani pambahenan ni sidea ampa horja ni tangan ni sidea.”

**Panginuman na Marisi Ringis ni
Jahowa bani Haganup Bangsa**

¹⁵ Sonon do hata ni Jahowa, Naibata ni Israel hu bangku, “Buat ma humbani tangan-Ku panginuman on, na gok bani anggur ni ringis-Ku, anjaha bahen ma minum hunjai sagala bangsa, na Husuruh siparayakonmu.

¹⁶ ase minum sidea gabe rebad-rebad, anjaha podoan halani podang na Husuruh hu tongah-tongah ni sidea.”

¹⁷ Jadi hubuat ma panginuman ai humbagas tangan ni Jahowa, anjaha hupainumkon hubani bangsa, na sinuruh ni Jahowa siparayakonku:

¹⁸ Ai ma hubani Jerusalem pakon hubani huta-huta ni Juda, hubani raja-rajani ampa hubani na sangap-sangapni, ase gabe tarulang anjaha lungun sidea, gabe songgot-songgot, sipahirion ampa siburaan, songon na masa sadari on;

¹⁹ hubani Parao, raja ni Masir, gamot-gamotni, na sangap-sangapni ampa haganup rayatni,

²⁰ ampa haganup bangsa na legan, na i tongah-tongah ni sidea; hubani haganup raja ni tanoh Us ampa hubani haganup raja ni tanoh Palistim, ai ma Askalon, Gasa, Ekron pakon teba-teba ni Asdod;

²¹ Edom, Moab ampa halak Amon;

²² hubani ganup raja ni Tirus, haganup raja ni Sidon, raja-raja na i dipar ni laut;

²³ hu bani Dedan, Tema, Bus ampa haganup halak na ilepong jambulanni inggot;

²⁴ hubani ganup raja ni Arab ampa haganup raja ni marga-marga, na marianan i halimisan;

²⁵ hubani haganup raja ni Simri, haganup raja ni Elam ampa haganup raja ni Madai;

²⁶ hubani haganup raja na i utara, na daoh ampa na dohor, marjojor, ampa hubani ganup harajaon na i dunia on, na adong i sisik ni tanoh on. Anjaha dob salpu sidea, raja ni Babel ma minum.

²⁷ Dob ai hatahon ma bani sidea, “Sonon do hata ni Jahowa Zebaot, Naibata ni Israel, ‘Minum ma, mabuk ma anjaha mutah-utah, tompas ma anjaha ulang be jongjong, halani podang na Hutongos hu tongah-tongahnima.’

²⁸ Tapi anggo manjua sidea manjalo panginuman ai humbagas tanganmu laho minum hunjai, hatahon ma bani sidea: Sonon do hata ni Jahowa Zebaot, ‘Maningon inumonima do!’

²⁹ Tongon, tonggor ma, bani huta na targoran bani goran-Ku do Hupungkah mambahen hamagouan, mintor hanima ma lang hona uhum? Seng boi lang hona uhum hanima, ai domma Hudilo podang dompak haganup na mangiankon tanoh on,” nini Jahowa Zebaot.

³⁰ “Tapi anggo ho, lumbahon ma bani sidea haganup hata on, anjaha hatahon ma bani sidea, ‘Morom do Jahowa hun babou, anjaha humbani

ianan-Ni na ma pansing ai do ipabogeihon sora-Ni. Maling do morom la dompak sampalan-Ni; marsurak do la songon halak sipangkorja ibagas kilang dompak haganup pangisi ni tanoh on.'

³¹ Maraloling do ai das hu ujung ni tanoh on, ai marpakara do Jahowa dompak bangsa-bangsa; roh do la manguhum sagala na mardaging, anjaha parjahat ai ondskononni do bani podang," nini Jahowa.

³² Sonon do hata ni Jahowa Zebaot, "Tonggor ma, manrarat do hamagouan humbani bangsa hu bangsa, anjaha roh do haba-haba banggal hun ujung ni tanoh on.

³³ Bani panorang ai rasei do bangkei ni na binunuh ni Jahowa, martibalan humbani tampakan ni tanoh on das hubani tampakan na sada nari. Seng sitangisan sidea, atap sipatumpuon, atap sitanomon; gabe napu do sidea bani sisik ni tanoh on.

³⁴ Mandoruh ma hanima, ale parmahan, anjaha tangis ma; margulu ma bani abuan, hanima pambobai ni hulanan in, ai roh ma ari pambunuhon ampa pangerapan bannima, anjaha marosak ma hanima songon hudon na maharga.

- ³⁵ Seng dong be haporusan bani parmahan barang haluahon bani pambobai ni hulanan in.
- ³⁶ Bogeï ma, partangis ni parmahan ampa doruh-doruh ni pambobai ni hulanan in! Ai Jahowa do na parsedahon sampalan ni sidea,
- ³⁷ anjaha harang na marsonang-sonang ai domma iparseda, halani gajag ni ringis ni Jahowa.
- ³⁸ Itadingkon do parlingodanni, songon pambahen ni sada singa poso-poso, ai domma tarulang tanoh ni sidea halani podang ni Jahowa ampa halani gajag ni ringis-Ni.”

Ambilan ni si Jeremia i Rumah Panumbahan

26 ¹ Bani parmulaan ni harajaon ni si Joyakim, anak ni si Josia, raja ni Juda, roh ma hata on humbani Jahowa:

² Sonon do hata ni Jahowa, “Jongjong ma ho bani alaman ni Rumah ni Jahowa, anjaha hatahon ma bani haganup halak na roh hun huta-huta ni Juda, laho martonggo hu rumah ni Jahowa, haganup on na Hutonahkon bam, sihatahononmu bani sidea; ulang buati age sangkababah hata!

³ Sai andohar ma ra sidea manangihon anjaha mubah uhurni humbani parlahouni na sambor ai,

ase marulak-ulakan uhur-Hu pasal hasedaon, na dob Husurahon hinan sibahenon-Ku bani sidea.

⁴Hatahon ma bani sidea, sonon do hata ni Jahowa, 'Anggo lang itangihon hanima Ahu, ai ma marpangabak hanima ibagas titah-Ku, na dob Hubere i lobeinima,

⁵anjaha itangihon hanima hata ni juakjuak-Ku, nabi-nabi ai, na Husuruh bannima marulak-ulak, hape seng ra hanima manangihon,

⁶halani ai bahenon-Ku ma rumah on songon na bani Silo, anjaha bahenon-Ku do huta on gabe siburaan bani haganup bangsa-bangsa na i tanoh on.'"

⁷Iboge i malim-malim ampa nabi-nabi ampa haganup bangsa ai do si Jeremia mansahapkon hata ai i rumah ni Jahowa.

⁸Jadi dob salpu ihatahon si Jeremia haganup hata na tinonahkon ni Jahowa sihatahononni bani haganup bangsa ai, roh ma malim-malim, nabi-nabi ampa haganup bangsa ai manangkapsi, nini sidea ma, "Maningon matei do ho!"

⁹Mase ma manjahai ho marhitei goran ni Jahowa, nim, 'Maningon songon Silo do rumah on, anjaha maningon tarulang do huta on, seng marpangisi?' Anjaha marurup do ganup bangsa ai dompak si Jeremia, ibagas rumah ni Jahowa.

¹⁰Dob iboge i na sangap-sangap ni Juda barita ai, tangkog ma sidea hun rumah ni raja ai hu rumah

ni Jahowa, anjaha hundul bei ma sidea i labah ni horbangan na baru, na bani rumah ni Jahowa.

¹¹ Dob ai nini malim-malim ampa nabi-nabi ai ma hubani na sangap-sangap ai ampa hubani ganup bangsa ai, “Patut do marutang hosah dalahi on, ai manjahai do ia dompak huta on, songon na binogei nasiam marhitei pinggol nasiam.”

¹² Tapi nini si Jeremia ma dompak na sangap-sangap ai ampa hubani haganup bangsa ai, “Jahowa do na marsuruh ahu manjahai dompak rumah panumbahan on pakon dompak huta on marhitei haganup hata na dob ibogei nasiam.

¹³ On pe, padear nasiam ma parlahou ampa pambahenan nasiam, anjaha tangihon nasiam ma sora ni Jahowa, Naibata nasiam, ase marulak-ulakan uhur ni Jahowa pasal hamagouan, na dob nilumbahon-Ni ai hubani nasiam.

¹⁴ Tapi anggo ahu, tonggor ma, ibagas tangan nasiam do. Bahen nasiam ma bangku, sonaha na dear ampa na sintong ninuhur nasiam.

¹⁵ Tapi botoh nasiam ma torang-torang, anggo ibunuh nasiam ahu, na mambahen marsapata do nasiam bani daroh na so marpipot pakon bani huta on ampa pangisini, ai sintong do, Jahowa do na marsuruh ahu bani nasiam, laho mangkatahon haganup hata on bani pinggol nasiam.”

¹⁶ Dob ai nini na sangap-sangap ampa haganup bangsa ai ma dompak malim-malim ampa nabi-

nabi ai, “Seng patut marutang hosah halak on, ai marhitei goran ni Jahowa Naibatanta do ia manluar banta.”

¹⁷ Deba humbani pangintuai ni tanoh ai jongjong ma, anjaha nini sidea ma hubani haganup halak na martumpu ai,

¹⁸ Bani panorang ni si Hiskia, raja ni Juda, adong do sada nabi, ai ma si Mika na hun Moreset, nini do dompak ganup bangsa Juda: Sonon do hata ni Jahowa Zebaot, “Maningon tinggalaon do Sion songon juma, Jerusalem gabe timbunan batu; anjaha dolog hajongjongan ni rumah panumbahan ai gabe buntu-buntu na marharangan.

¹⁹ Naha, ai ibunuh Raja Hiskia ampa haganup Juda do ia halani ai? Ai lang mabiar do ia mangidah Jahowa, anjaha ielek-elek la, gabe marulak-ulakan uhur ni Jahowa pasal hamagouan on, na dob nilumbahonni bani sidea? Naha hita, parohonta do hamagouan banggal banta?”

²⁰ Adong do homa halak na legan ijia, na manjahai marhitei goran ni Jahowa, ai ma si Uria, anak ni si Semaya, hun Kiriath-Jearim. Manjahai do ia dompak huta on ampa dompak tanoh on, usih songon hata ni si Jeremia.

²¹ Jadi dob ibogei Raja Joyakim ampa haganup puanglimani ampa haganup na sangap-sangap haganup hatani ai, ipindahi raja ai ma dalan laho

mamunuhsi. Dob ibogei si Uria ai, mabiar ma ia, gabe maporus ma ia laho hu Masir.

²² Dob ai isuruh Raja Joyakim ma piga-piga halak laho hu Masir, ai ma si Elnatan, anak ni si Akbor ampa halak na legan mangkasomanisi;

²³ jadi ialop sidea ma si Uria hun Masir, anjaha iboan ma ia hu lobei ni Raja Joyakim; dob ai ibunuh ma ia marhitei podang, anjaha igijigkon ma bangkeini bani tanoman ni halak simbuei.

²⁴ Tapi tangan ni si Ahikam, anak ni si Sapan do mangkasomani si Jeremia, gabe seng iondoskon ia hubani simbuei ai laho mamunuhsi.

lojur si Jeremia Bangsa ai Mangunduk bani Pasangan ni Babel

27 ¹ Bani parmulaan ni harajaon ni si Sedekia, anak ni si Josia, raja ni Juda, roh ma hata on humbani Jahowa hubani si Jeremia.

² Sonon do hata ni Jahowa hu bangku, “Bahen ma bam tali ampa pasangan, tampeihon ma ai bani tangkuhukmu,

³ anjaha suruh ma partonahanmu hubani raja ni Edom, raja ni Moab, raja ni halak Amon, raja ni Tirus ampa raja ni Sidon, marhitei suruhan ni sidea, na dob roh hu Jerusalem mangayaki si Sedekia, raja ni Juda.

⁴ Padas ma bani sidea tonah on, sihatahonon ni sidea bani tuan ni sidea, sonon do hata ni Jahowa

Zebaot, Naibata ni Israel: On ma sihatahononnima bani tuannima.

⁵ Ahu do, marhitei gogoh-Ku na banggal in ampa marhitei tangan-Ku na gostong in manjadihon tanoh on, jolma ampa pinahan na i tanoh on, anjaha Hubere do ai bani atap ise harosuh ni uhur-Hu.

⁶ Anjaha nuan domma Huondoskon ganup nagori on hu tangan ni si Nebukadnesar, raja ni Babel, juakjuak-Ku, anjaha binatang na i talun pe, domma Huondoskon bani laho mambalosisi.

⁷ Anjaha sagala bangsa-bangsa maningon balosan ni sidea do ia, anakni ampa pahompuni, paima roh age ari ni tanohni sandiri; gabe parjabolongan ni buei bangsa ampa raja-raja banggal do homa ia.

⁸ Tapi anggo adong bangsa pakon harajaon, na so ra tunduk hubani si Nebukadnesar, raja ni Babel, anjaha na so ra paundukkon tangkuhukni bani pasangan ni Raja Babel, marlulu do Ahu bani bangsa ai marhitei podang, lohei ampa sampar, nini Jahowa, paima bois sidea Hubahen marhitei tanganni.

⁹ Halani ai ulang ma patangi-tangi hanima hata ni nabinima, partondungnima, sipanorhai nipi, sijaha parhalaan ampa parsibalik mata, na mangkatahon bannima, 'Ulang ra nasiam tunduk bani raja ni Babel.'

¹⁰ Ai ladung do panjahaion ni sidea bannima, laho mambahen hanima tarusir humbani tanohnima,

halani ambukkonon-Ku do hanima, ase magou hanima.

¹¹ Tapi bangsa, na ra paunduk tangkuhukni hu toruh ni pasangan ni raja ni Babel, anjaha ibalosi ia, paturuton do sidea i tanoh ni sidea, laho mangkorjai ai ampa marianan ijai,” nini Jahowa.

¹² “Age hubani si Sedekia, raja ni Juda, marsahap do ahu romban hubani ganup hata ai, ningku do, Paunduk hanima tangkuhuknima hu toruh ni pasangan ni Raja Babel, anjaha balosi hanima ma ia ampa bangsani, ase manggoluh hanima.

¹³ Mase ma rahanan matei ho ampa bangsamu marhitei podang, lohei ampa sampar, songon na nilumbahon ni Jahowa pasal bangsa na so ra tunduk bani raja ni Babel?

¹⁴ Ulang ma patangi-tangi hanima hata ni nabi-nabi na mangkatahon bannima, ‘Seng anjai patundukon ni Raja Babel nasiam!’ Ai ladung do panjahaion ni sidea bannima.

¹⁵ Sedo Ahu na marsuruh sidea, nini Jahowa; ladung do ipatugah sidea marhitei goran-Ku, ase marhitei ai Huusir hanima gabe magou hanima, hanima ampa nabi-nabi na manjahai bannima.

¹⁶ Bani malim-malim ampa ganup bangsa ai pe marsahap do ahu, ningku: Sonon do hata ni Jahowa, ‘Ulang ma patangi-tangi hanima hata ni nabi-nabi, na manjahai bannima sonon: Tonggor ma, podas

ma boanon mulak hun Babel parugas ni rumah ni Jahowa! Ladung do na ipatugah sidea bannima.'

¹⁷ Ulang ma patangi-tangi hanima sidea! Balosi hanima ma raja ni Babel, ase manggoluh hanima. Mase ma rahanan maseda huta on?

¹⁸ Anggo nabi do sidea tongon, anjaha hata ni Jahowa dong bani sidea, roh ma sidea martonggo hu lobei ni Jahowa Zebaot, ase ulang tarboban hu Babel parugas na tading i rumah ni Jahowa, i rumah ni Raja Juda ampa na i Jerusalem.

¹⁹ Ai sonon do hata ni Jahowa Zebaot pasal tiang, bongbongan, parburihan ampa parugas na tading ai ope i huta on,

²⁰ ai ma na so binoban ni si Nebukadnesar, raja ni Babel ope, sanggah na iboban hu habuangan si Jekonya, anak ni si Joyakim, raja ni Juda, hun Jerusalem hu Babel ampa haganup halak na sangap-sangap hun Juda ampa hun Jerusalem.

²¹ Tongon, sonon do hata ni Jahowa Zebaot, Naibata ni Israel, pasal parugas na tading ope bani rumah ni Jahowa ampa i rumah ni raja ni Juda ampa i Jerusalem:

²² Maningon tarboban do ai hu Babel, anjaha tading ijai das bani ari mangkawah Ahu use bani sidea," nini Jahowa. "Dob ai boanon-Ku do sidea mulak, anjaha paulakon-Ku do sidea bani ianan on."

**Si Jeremia Mangimbang si
Hananya, Nabi Parladung ai**

28¹Jadi masa ma bani tahun ai, bani parmulaan ni harajaon ni si Sedekia, raja ni Juda, paompat-tahunkon, bani bulan lima, roh ma si Hananya, anak ni si Azur, nabi na hun Gibeon, marsahap hu bangku i rumah ni Jahowa, i lobei ni malim-malim pakon ganup bangsa ai, nini ma,

²“Sonon do hata ni Jahowa Zebaot, Naibata ni Israel, ‘Domma Huponggolhon pasangan na humbani Raja Babel.

³Ibagas na dua tahun on boanon-Ku do mulak hubani ianan on haganup parugas ni rumah ni Jahowa, ai ma na binuat ni si Nebukadnesar, Raja Babel, humbani ianan on anjaha iboan hu Babel.

⁴Si Jekonya pe, anak ni si Joyakim, raja ni Juda, ampa haganup na tarbuang hun Juda, na tarboan hu Babel, boanon-Ku do mulak hubani ianan on,” nini Jahowa; “Ai ponggolhonon-Ku do pasangan na humbani Raja Babel.”

⁵Jadi nini Nabi Jeremia ma dompak Nabi Hananya i lobei ni malim-malim ampa haganup bangsa ai, na jongjong i rumah ni Jahowa;

⁶nini Nabi Jeremia ma, “Amen! Ibahen Jahowa ma tongon sonai, sai ipasaud Jahowa ma tongon hata na dob ijahahon ho, sai iboban ma mulak hun Babel

hubani ianan on sagala parugas ni rumah ni Jahowa
ampa haganup na tarbuang ai.

⁷ Tapi tangihon ma hata on, na huhatahon bam
ampa hu bani haganup bangsa on,

⁸ 'Nabi-nabi na parlobei humbangku ampa
humbam, humbani sapari nari ilumbahon do
porang, lohei ampa sampar dompak buei nagori
ampa dompak harajaon na banggal-banggal.'

⁹ Pasal nabi, na manjahai pasal hadameion, 'Anggo
tongon ma saud hata ni nabi ai, jadi botohon ma,
Jahowa ma tongon na marsuruhsi.'"

¹⁰ Dob ai ibuat Nabi Hananya ma pasangan ai
humbani tangkuhuk ni Nabi Jeremia, anjaha
iponggolhon ma ai.

¹¹ Ihatahon si Hananya ma i lobei ni ganup
bangsa ai, "Sonon do hata ni Jahowa, 'Sonai
ma ponggolhonon-Ku pasangan na humbani si
Nebukadnesar, raja ni Babel, humbani tangkuhuk
ni sagala bangsa ibagas dua tahun on.'" Tapi inunut
Nabi Jeremia ma dalanni.

¹² Dob iponggolhon Nabi Hananya pasangan ai
humbani tangkuhuk ni Nabi Jeremia, roh ma use
hata ni Jahowa bani Nabi Jeremia,

¹³ "Laho ma ho, hatahon ma bani si Hananya,
sonon do hata ni Jahowa, 'Domma iponggolhon ho
pasangan hayu ai, tapi paulion-Ku do pasangan bosi
bahen gantih ni ai.'

¹⁴ Ai sonon do hata ni Jahowa Zebaot, Naibata ni Israel: Pasangan bosi do tampeihonon-Ku bani tangkuhuk ni ganup bangsa-bangsa on, ase tunduk sidea bani si Nebukadnesar, raja ni Babel, anjaha maningon balosan ni sidea do ia; age binatang na i talun domma Huondoskon hu bani.”

¹⁵ Jadi nini Nabi Jeremia ma dompak Nabi Hananya, “Tangihon ma, ale Hananya! Sedo Jahowa marsuruh ho, ibahen ho do bangsa on martenger ni uhur bani ladung.

¹⁶ Halani ai sonon do hata ni Jahowa, ‘Tonggor ma, usiron-Ku do ho hun sisik ni tanoh on.’ Ibagas tahun on pe matei ma ho, halani iambilankon ho panlawanon dompak Jahowa.”

¹⁷ Jadi matei ma tongon Nabi Hananya ibagas na satahun ai, bani bulan pitu.

Surat ni si Jeremia hu bani Halak na Tarbuang i Babel

29 ¹ On do hata ni surat ni si Jeremia, nabi ai, na tinongosni hun Jerusalem bani pangintuai-pangintuai ni na tarbuang ai, ampa bani malim-malim, nabi-nabi ampa haganup bangsa ai, na binoan ni si Nebukadnesar hu habuangan, hun Jerusalem hu Babel.

² Ai ma dob tarbuang hun Jerusalem Raja Jekonya, inang ni raja ai, juakjuakni, na sangap-sangap ni

Juda ampa Jerusalem, tuhang hayu ampa tuhang bosi.

³ Itongos do surat ai marhitei si Eleasa, anak ni si Sapan ampa marhitei si Gemarya, anak ni si Hilkia, na sinuruh ni si Sedekia, raja ni Juda, hu Babel, hubani si Nebukadnesar, raja ni Babel, hatani,

⁴ “Sonon do hata ni Jahowa Zebaot, Naibata ni Israel, hu bani haganup na tarbuang, na tarboan hun Jerusalem hu Babel,

⁵ ‘Pajongjong hanima ma rumah, lanjar iankon ma; pungkah hanima ma juma, anjaha pangan ma gogohni!’

⁶ Mambuat boru ma, ase maranak marboru hanima; paompo hanima anaknima, anjaha borunima palaho hanima, ase tubuhan anak tubuhan boru sidea; manggompari ma hanima ijin ulang ma manginsurut.

⁷ Porluhon hanima ma hadoharon ni huta pambuangan-Ku bannima, anjaha apiti hanima ma sidea i lobei ni Jahowa, ai ibagas hadoharon ni sidea ai dihut do hanima mardohar.’

⁸ Ai sonon do hata ni Jahowa Zebaot, Naibata ni Israel, ‘Ulang ma ra hanima paoto-otoon ni nabinima atap partondung na adong i tengah-tongahnima, anjaha ulang ma patangi-tangi hanima nipi na niipi ni sidea;

⁹ ai sipaoto-oto do panjahaion ni sidea bannima marhitei goran-Ku; sedo Ahu marsuruh sidea,” nini Jahowa.

¹⁰ Ai sonon do hata ni Jahowa, “Anggo domma gok sipitupuluh tahun ai, na dob Huhatahon bani Babel, parayakon-Ku do hanima, anjaha pasaudon-Ku do bagah-bagah-Ku na bannima ai, anjaha boanon-Ku do hanima mulak bani ianan on.

¹¹ Ai Hubotoh do torang sura-surang-Ku pasal hanima,” nini Jahowa, “Ai ma sura-sura hadearon, sedo hamagouan, laho parsirsirhon bannima parsaud ni na niarapkonnama.

¹² Jadi padilo-dilonnima ma Ahu; roh ma hanima hu Bangku martonggo, gabe tangihonon-Ku do hanima.

¹³ Pindahannima do Ahu, anjaha jumpah hanima do Ahu; anggo ipindahi hanima Ahu humbani gok ni uhurnima,

¹⁴ jadi jumpah hanima do Ahu,” nini Jahowa. “Pasuangon-Ku do hanima, anjaha patumpuon-Ku do hanima humbani haganup bangsa-bangsa ampa humbani ganup ianan pambuangan-Ku bannima,” nini Jahowa, “Anjaha boanon-Ku do hanima mulak hubani ianan habingkatannima hu habuangan.

¹⁵ Ihatahon nasiam, ‘Domma ipabangkit Jahowa bennami nabi i Babel.’

¹⁶ Sonon do hata ni Jahowa pasal raja, na marhotak bani hotak ni si Daud, ampa pasal haganup halak

na marianan i huta on, ai ma sanina nasiam, na so dihut tarboan rap pakon nasiam hu habuangan.

¹⁷ Sonon do hata ni Jahowa Zebaot, Tonggor ma, Hutongos do dompak sidea podang, lohei pakon sampar, anjaha bahenon-Ku do sidea songon buah ara na masuk, na so tarpangan be halani masukni.

¹⁸ Pardakdakon-Ku do sidea marhitei podang, lohei ampa sampar, anjaha bahenon-Ku do sidea gabe songgot-songgot bani haganup harajaon na i tanoh on, gabe siburaan, hagobiron, sipahirion ampa sirisaon i tengah-tengah ni bangsa-bangsa pambuangan-Ku bani sidea,

¹⁹ halani na so itangihon sidea hatang-Ku,” nini Jahowa, “Na Hutonahkon bannima marulak-ulak marhitei nabi-nabi ai, tapi seng ra hanima manangihon,” nini Jahowa.

²⁰ “Halani ai, tangihon hanima ma hata ni Jahowa, hanima haganup na tarbuang in, na dob Hubuangkon hun Jerusalem hu Babel!

²¹ Sonon do hata ni Jahowa Zebaot, Naibata ni Israel, pasal si Ahab, anak ni si Kolaya, ampa pasal si Sedekia, anak ni si Maaseya, na manjahahon ladung bannima marhitei goran-Ku, ‘Tonggor ma, ondskonon-Ku do sidea hubagas tangan ni si Nebukadnesar, raja ni Babel, anjaha bunuhonni do sidea i lobeinima.’

²² Anjaha goran ni sidea ai pakeion ni halak na tarbuang hun Juda, na i Babel ai ma, laho mamurai,

nini sidea ma, 'Sai ibahen Jahowa ma, usih songon na bani si Sedekia ampa na bani si Ahab, na tinutung ni Raja Babel ibagas Apuy!'

²³ halani ibahen sidea hasamboron i tongah-tongah ni Israel, anjaha marbangkisi sidea pakon jolma ni hasomanni, anjaha iluarhon sidea hata ladung marhitei goran-Ku, na so Hutonahkon bani sidea. Ahu do hansa sipabotoh-botoh ampa sisaksihon ai," nini Jahowa.

²⁴ Anjaha bani si Semaya na hun Nehelam, hatahon ma,

²⁵ 'Sonon do hata ni Jahowa Zebaot, Naibata ni Israel, 'Itongos ho do surat marhitei goranmu bani ganup halak na i Jerusalem, ampa hubani Malim Sepanya, anak ni Malim Maaseya, ampa hu bani ganup malim, isini:

²⁶ Domma ipabangkit Jahowa ho gabe malim gantih ni Malim Joyada, laho manramotkon rumah ni Jahowa, ampa mardiateihon halak na podoan na sai manjahai, laho mannahkon sidea hubagas bayangan ampa gari borgok.

²⁷ Ai pe, mase ma lang mangonai hata ho hubani si Jeremia par Anatot ai, na manjahai bannima?'

²⁸ Ai manongos surat do ia hu Babel, mangkatahon, 'Dokah ope nasiam tarbuang, Paturei nasiam ma rumah, anjaha iankon nasiam ma ai; tombei nasiam ma pohon anjaha pangan nasiam ma gogohni.'

²⁹ Jadi ibasa Malim Sepanya ma surat ai i lobei ni Nabi Jeremia.

³⁰ Dob ai roh ma hata ni Jahowa bani si Jeremia sonon,

³¹ “Suruh ma suruhan marayak sagala na tarbuang in laho patugahkon: Sonon do hata ni Jahowa pasal si Semaya na hun Nehelam, Manjahai do si Semaya bannima, hape sedo Ahu marsuruhsi, anjaha ibahen hanima martenger ni uhur bani ladung,

³² halani ai, sonon do hata ni Jahowa, Tonggor ma, marlulu do Ahu bani si Semaya, na hun Nehelam ampa bani ginomparni: Seng anjai dong humbani ginomparni, na marianan i tongah-tongah ni bangsa on, na mangidah na madear, na sihol bahenon-Ku bani bangsang-Ku,” nini Jahowa, “Halani na niambilankon ai panlawan on dompak Jahowa.”

Bagah-bagah Pasal Parmulak hun Habuangan

30 ¹ On do hata na roh hubani si Jeremia, humbani Jahowa,

² “Sonon do hata ni Jahowa, Naibata ni Israel, ‘Suratkon ma haganup hata na dob Huhatahon bam bani sada buku!

³ Ai tonggor ma, na roh ma panorangni,” nini Jahowa, “Pasuangen-Ku ma ijai bangsang-Ku, ai ma Israel pakon Juda, nini Jahowa, anjaha boanon-Ku

do sidea mulak hu tanoh na dob Huberehon bani ompung ni sidea, anjaha teanon ni sidea ma ai.

⁴ On do hata, na hinatahon ni Jahowa pasal Israel ampa Juda.

⁵ Sonon do hata ni Jahowa, Ibogei hanami do sora doruh-doruh; biar do na masa, seng dong hasonangan.

⁶ Sungkun anjaha tonggor ma! Ai boi do paramangon tubuhan anak? Mase ma Huidah sagala paramangon manungkolhon tanganni bani binongeini songon naboru na mangarou? Mase ma marposi ganup bohi?

⁷ Aih! Jangin ni ari on, seng onggga dong na sonai; panorang hasosakan do ai bani Jakob, tapi maluah do ia hunjai.

⁸ Jadi masa ma bani panorang ai,” nini Jahowa Zebaot, “Ponggolhonon-Ku ma pasangan humbani tangkuhuk ni sidea, anjaha rotapon-Ku tali panangkut ni sidea, anjaha seng be parjabolonon ni halak na legan sidea.

⁹ Tapi balosan ni sidea ma Jahowa, Naibata ni sidea, ampa si Daud, raja ni sidea, sipabangkiton-Ku bani sidea.

¹⁰ Tapi anggo ho, ulang ma mabiar, ale Jakob juakjuak-Ku,” nini Jahowa, “Anjaha ulang ma tarsonggot, ale Israel; ai tonggor ma, paluahon-Ku do ho humbani tanoh na madaoh ampa ginomparmu hun tanoh

habuangan ni sidea. Maningon mulak do Jakob, marsonang-sonang ma ia anjaha mardamei-damei, ise pe lang be na manonggotisi.

- ¹¹ Ai Ahu do mangkasomani ho laho paluahkon ho,” nini Jahowa, “Boiskonon-Ku do tongon sagala bangsa-bangsa pambuangan-Ku bannima, tapi anggo ho seng bois bahenon-Ku. Tongon Huajar do ho domu hubani na patut, seng paturuton-Ku ho lang hona pinsang.
- ¹² Sonon do hata ni Jahowa, ‘Seng tartambari naboritmu, parah do ugahmu.
- ¹³ Seng dong tambar bani bayohmu, anjaha seng ra suang ugahmu.
- ¹⁴ Haganup na mangkaholongi ho lupa do bam, seng parduli sidea bam; songon pambogbog ni munsuh sonai do pambogbog-Ku bam, songon panguhum ni munsuh na so maridop ni uhur; ai ma halani bangga ni salahmu, halani buei ni dousamu.
- ¹⁵ Mase ma doruh-doruh ho halani ugahmu ampa halani naboritmu na so tartambari in? Halani bangga ni salahmu do, halani buei ni dousamu do, ae Hubahen na sonai bam.
- ¹⁶ Tapi sagala na mamondut ho, maningon hona bondut do; anjaha sagala na manosak-nosak ho, maningon tarboan do hu habuangan;

sagala halak na manrampok ho, maningon hona rampok do; anjaha sagala halak na manrampas ho, maningon hona rampas do.

¹⁷ Tongon, pasuargon-Ku do ho jorgit, anjaha pamalumon-Ku do ugahmu,” nini Jahowa, “Halani na dob igoran sidea ho, ‘Na niambukkon’ ampa: ‘Sion, na so adong mampardulihon.’

¹⁸ Sonon do hata ni Jahowa, ‘Tonggor ma, pasuargon-Ku do lampolampo ni si Jakob, anjaha marulak-ulakan uhur-Hu mangidah iananni; paulion do use huta ai i atas buntu-buntuni, anjaha rumah bolon ai bani iananni hinan.

¹⁹ Kaluar do hunjai sora puji-pujian ampa sora ni na marmalas ni uhur. Pabueion-Ku do sidea, seng manginsurut be sidea; bahenon-Ku do sidea marmulia, seng be mahiri sidea.

²⁰ Gabe songon sapari ma anak ni sidea, anjaha kuria ni sidea totap do i lobei-Hu; uhumon-Ku do sagala na mangodoh-odoh sidea.

²¹ Humbani sidea do raja bani sidea, anjaha hun tengah-tengah ni sidea do roh na manggomgomi sidea; lopason-Ku do ia roh dohor hu Bangku, ai ise ma na pag marmara goluhni laho mandohori Ahu,” nini Jahowa.

²² “Hanima do bangsa Bangku, anjaha Ahu gabe Naibatanima.

²³ Tonggor ma haba-haba humbani Jahowa.
Luar do gila-Ni, ai ma haba-haba sibungkar
hasowor; dorabon-Ni do ulu ni parjahat.

²⁴ Seng surut ringis ni Jahowa, paima idalankon
anjaha ipasaud sura-sura ni uhur-Ni.
Arusannima do ai bani dokah-dokah ni ari.”

Bagah-bagah Pasal Padan na Baru

31 ¹ “Bani panorang ai,” nini Jahowa, “Ahu ma gabe Naibata ni haganup marga ni Israel, anjaha sidea gabe bangsang-Ku.”

² Sonon do hata ni Jahowa, “Dapotan idop ni uhur do songon na i halimisan ijia bangsa ai, na maluah humbani podang; laho do Israel marayak parsarananni.”

³ Taridah do Jahowa bani humbani na daoh. Nini, “Holong do uhur-Hu bam marhitei holong sisadokah ni dokahni; halani ai Hutogu-togu do ho marhitei idop ni uhur.

⁴ Paulion-Ku do ho use, gabe torsa ma ho, ale boru Israel! Pajagaronmu do use dirimu marhitei arbap, anjaha luar manortor rap pakon na marmalas ni uhur.

⁵ Tombeionmu do use pohon anggur bani dolog-dolog ni Samaria; lanjar sipanuan ai do na mangankon buahni.

- ⁶ Tongon, na roh ma panorangni, dilo-dilo ma ijai halak parjaga i Dolog Efraim: Eta, laho ma hita tangkog hu Sion manjumpahkon Jahowa Naibatanta.”
- ⁷ Ai sonon do hata ni Jahowa, “Gogoh ma hanima mandoding ibagas malas ni uhur bani si Jakob, anjaha marsurak ma mangolobkon pambobai ni bangsa-bangsa! Baritahon, puji anjaha hatahon hanima ma, ‘Jahowa do na paluahkon bangsa-Ni, simasima ni Israel!
- ⁸ Tonggor ma, boanon-Ku do sidea hun tanoh par utara, anjaha patumpuon-Ku do sidea humbani ujung ni tanoh on; rap pakon sidea dihut do na mapitung ampa na repat, naboru na boratan rumah ampa naboru na painumkon; hulanan na banggal do sidea na mulak ai hujon.
- ⁹ Tangis-tangis do sidea roh, tapi marhasoman pangapohon Hutogu-togu do sidea; Huiring-iring do sidea hun lambung ni bah, bani dalan hanopan, ase ulang tartolsu sidea; ai Ahu do gabe bapa bani Israel, anjaha Efraim gabe anak-Ku sikahanan.
- ¹⁰ Tangihon ma hata ni Jahowa, ale bangsa-bangsa, anjaha baritahon ma ai bani pulou-pulou na madaoh; hatahon ma, ‘la, na dob mangerap Israel, la do na patumpuhonsi, anjaha ramotkonon-Ni do

ia songon parmahan na manramotkon
hulanan-Ni.'

- ¹¹ Tongon, Jahowa, do na manobus Jakob, anjaha
na paluahkonsi humbagas tangan ni halak
sigogohan hun bani.
- ¹² Roh do sidea anjaha marolob-olob bani pakpak
ni Dolog Sion, anjaha marmegah-megah
sidea pasal dear layak ni Jahowa, pasal
gandum, anggur ampa minak, pasal biribiri
ampa lembu; songon pohon na marbah
do goluh ni sidea, seng be marhahurangan
sidea.
- ¹³ Marmalas ni uhur do anak boru manontor-
nontor, marmegah-megah garama ampa na
matua. Paubahon-Ku do pusok uhur ni sidea
gabe malas ni uhur, apohon-Ku do sidea,
anjaha pamalason-Ku do uhur ni sidea
gantih ni horu ni uhur ni sidea.
- ¹⁴ Marlobih-lobihan do bahenon-Ku uhur ni
malim-malim bani malas ni uhur, anjaha
bosur bangsang-Ku bani pasu-pasung-Ku,"
nini Jahowa.
- ¹⁵ Sonon do hata ni Jahowa, "Tarbogei do i Rama
sora ni doruh-doruh ampa tangis-tangis
na parah; Itangisi si Rahel do niombahni,
manjua do ia apohon, ai domma bois sidea."
- ¹⁶ Sonon do hata ni Jahowa, "Sip ma ho na tangis
in, anjaha apusi ma iluhmin; ai adong do

- upah bani halojaonmu,” nini Jahowa, “Ai mulak do sidea hun tanoh ni munsuh.
- ¹⁷ Adong do siarapkonon bani na i pudimu,” nini Jahowa, “Mulak do anakmu bani parbagianan ni sidea.
- ¹⁸ Hubogei do Efraim tangis-tangis: Iajar Ham do ahu, songon anak lembu na so onggahona ajar do ahu iajar Ham. Paubah Ham ma uhurhu, ase saud mubah, ai Ham do Jahowa, Naibatanku.
- ¹⁹ Ai dob marbalik ahu, manosal do ahu; dob hutanda diringku, hutompuki do tontonku. Maila do ahu anjaha bador, halani huboan-boan hasamboron ni haposoonku.
- ²⁰ Ai anak kasihan do nani si Efraim Bangku? Anak haudungan ni uhur-Hu do ia nani? Ai age pe Huhata ia, sai Hudingat do ia, Siholan do uhur-Hu bani, tongon, marulak-ulakan do uhur-Hu mangidahsi,” nini Jahowa.
- ²¹ “Pajongjong ma bam tanda sipatuduh dalan, bahen ma bam batu partanda. Kawah ma ho bani dalan na bolon, dalan, na dob binontasmai. Mulak ma, ale boru Israel, mulak ma ho hu Tamon.
- ²² Sadia dokah nari ho maor-aor, ale boru siparbalik? Tongon, domma ijadihon Jahowa sada naboru i tanoh on; ai ma naboru mangondingi dalahi.

²³ Sonon do hata ni Jahowa Zebaot, Naibata ni Israel, 'Sai hatahonon ni halak ope hata on i tanoh Juda ampa ibagas huta-hutani, dob Hupasuang sidea use,' nini, 'Jahowa ma na mamasu-masu ho, ale ianan hapintoron, ale dolog na ma pansing!'

²⁴ Rap ma marianan ijai Juda ampa haganup huta-hutani, parjuma-juma ampa halak na marpindah-pindah mangirikkon pinahanni.

²⁵ Ai Ahu do mambahen sombuh tonduy na mandatei, anjaha Hupabosur do ganup tonduy na loheian.

²⁶ Dob ai tarpuho ma ahua anjaha mangkawah, mantin do na modom ai bangku.

²⁷ Tonggor ma, na roh ma panorangni," nini Jahowa, "Tidakkonon-Ku ma bani ginompar ni Israel pakon bani ginompar ni Juda, jolma pakon pinahan.

²⁸ Jadi masa ma, songon Ahu na dob marjaga-jaga ai bani sidea, laho mangorbat anjaha marreongkon, laho manunggalingkon, parsedahon ampa mangagouhon, sonai do marjaga-jaga Ahu bani sidea, laho paulihon ampa manuan, nini Jahowa.

²⁹ Bani panorang ai lang be hatahonon ni halak, 'Bapa mangankon buah anggur na migar, hape ipon ni anakni ngiluan.'

³⁰ Tapi ganup ma matei halani dousani sandiri; ganup jolma na mangankon buah anggur na migar, iponni sandiri ma na ngiluan.

³¹ Tonggor ma, na roh ma panorangni,” nini Jahowa, “Bahenon-Ku ma padan na baru bani ginompar ni Israel pakon bani ginompar ni Juda;

³² sedo songon padan na Hubahen bani ompung ni sidea, sanggah na Hutogu-togu sidea, laho mamboan sidea luar hun tanoh Masir, ai ma padan na niose ni sidea ai, age pe Ahu tuan ni sidea, nini Jahowa.

³³ Tapi on do padan sibahenon-Ku bani ginompar ni Israel dob salpu panorang on,” nini Jahowa, “Nahkonon-Ku do titah-Ku hubagas atei-atei ni sidea, anjaha suratkonon-Ku do ai bani uhur ni sidea; gabe Naibata ni sidea do Ahu, anjaha sidea gabe bangsang-Ku.

³⁴ Lang be ajaran ni sada halak hasomanni atap sanina mangkatahon bani saninani, ‘Tanda ma Jahowa!’ Ai haganup do sidea mananda Ahu, na etek age na banggal,” nini Jahowa. “Ai sasapon-Ku do hajahaton ni sidea, anjaha lang be ingat-ingaton-Ku dousa ni sidea.”

³⁵ Sonon do hata ni Jahowa, “Na mambere mata ni ari gabe panondang arian, anjaha na manotapkon bulan ampa bintang gabe panondang borngin, na manggunsang laut

gabe marhasak gilumbangni, Jahowa Zebaot do goran-Ni,

³⁶ “Songon paraturan ai seng maronti hun lobei-Hu,” nini Jahowa, “Sonai do ginompar ni Israel seng anjai maronti songon sada bangsa i lobei-Hu sadokah ni dokahni.”

³⁷ Sonon do hata ni Jahowa, “Songon langit na i babou ai seng tarsibar, anjaha onjolan ni tanoh na i toruh ai seng tarpareksa, sonai do seng tarambukkon Ahu ginompar ni Israel, age pe sonai haganup na binahen ni sidea ai, nini Jahowa.

³⁸ Tonggor ma, roh ma panorangni,” nini Jahowa, “Paulion ma huta ai bani Jahowa humbani manara Hananel das hubani horbangan suhi-suhi ai.

³⁹ Torus do tali panibar ai, pintor hu Buntu-buntu Gareb, dob ai marlegot hu Goat.

⁴⁰ Haganup habungan bangkei ampa habungan abuan ai, ampa haganup ladang ai das hu Bah Kidron, das hubani suhi-suhi ni horbangan huda ai, hampit hapoltakan, papansingon do ai bani Jahowa; seng anjai parsedaon atap reongkononkon huta ai ronsi sadokah ni dokahni.”

Iboli si Jeremia Juma i Anatot na Martudu-tudu bani Parsuang ni Tanoh ai

32 ¹ On do hata na roh bani si Jeremia humbani Jahowa pasapuluh-tahunkon dob marrajai

si Sedekia, raja ni Juda, ai ma pasapuluhualuh-tahunkon dob raja si Nebukadnesar.

² Bani panorang ai ihubu tentara ni Raja Babel do Jerusalem, tapi tartutup do anggo Nabi Jeremia bani ianan ni siparjaga, na ibagas istana ni raja ni Juda.

³ Ai ipatutupkon si Sedekia, raja ni Juda do ia, nini, “Mase ma manjahai ho, nim: Sonon do hata ni Jahowa, ‘Tonggor ma, ondskonon-Ku do huta on hubagas tangan ni Raja Babel, anjaha patundukonni do on;

⁴ anjaha si Sedekia, raja ni Juda, seng anjai maluah humbagas tangan ni halak Kasdim, maningon ondskononkon do ia hubagas tangan ni Raja Babel, marsahap do ia padumpar bohi pakonsi anjaha marsikawahan do sidea,

⁵ anjaha boanonni do si Sedekia hu Babel, lanjar ijai ma ia tading paima roh Ahu marlulu hu bani, nini Jahowa. Age pe manlawan hanima dompak halak Kasdim, seng anjai monang hanima.’

⁶ Jadi nini si Jeremia ma, ‘Roh do hata ni Jahowa hu bangku:

⁷ Tonggor ma, na roh ma si Hanamel, anak ni si Salum, bapatuamu marayak ho, hatahononni do bam: Boli ma jumangku na i Anatot ai, ai ho do marhak mamboli ai bahen parbagiananmu.’

⁸ Dob ai roh ma si Hanamel, anak ni bapatuangku, romban hu bani hata ni Jahowa, marayak ahu

hubani ianan ni siparjaga ai, ihatahon ma hubangku, 'Boli ham ma jumangku na i Anatot, na i tanoh Benjamin ai, ai ham do na marhak mamboli laho manean ai; boli ham ma ai bamu.'" Jadi hubotoh ma, hata ni Jahowa do ai hape.

⁹ Jadi huboli ma juma na i Anatot ai humbani si Hanamel, anak ni Bapatuangku, anjaha hutimbang ma pirak bani sapuluh pitu sekel boratni.

¹⁰ Hutandatangani ma surat ai anjaha hubahen marlak, hudilo ma saksi anjaha hutimbang pirak bani timbangan.

¹¹ Dob ai hubuat ma surat pambolian ai, na marlak anjaha na marisi aturan ampa sarat-saratni, sonai homa salinan na buha ai.

¹² Jadi hubere ma surat pambolian ai bani si Baruk, anak ni si Neriya, niombah ni si Maseya, i lobei na si Hanamel, anak ni bapatuangkai, ampa i lobei ni sagala saksi na dihut martanda tangan bani surat pambolian ai, ampa i lobei ni haganup halak Jahudi na hundul bani ianan panjagaan ai.

¹³ Anjaha huhatahon do bani si Baruk i lobei ni sidea, sonon,

¹⁴ "Sonon do hata ni Jahowa Zebaot, Naibata ni Israel, 'Buat ma surat pambolian on haduasi, na marlak ampa salinanni na buha ai, nahkon ma ai hubagas gusi, ase tahan dokah ai.'

¹⁵ Ai sonon do hata ni Jahowa Zebaot, Naibata ni Israel, 'Maningon bolion do use i tanoh on rumah, juma ampa pohon anggur.'"

¹⁶ Dob huberehon surat pambolian ai hubani si Baruk, anak ni si Neriya, martonggo ma ahu hubani Jahowa,

¹⁷ "Ham Tuhan Jahowa! Ham do na manjadihon langit ampa tanoh on, marhitei gogoh-Mu na bangga in ampa marhitei tangan-Mu na pinagostong-Mu! Seng dong na so tarbahen Ham.

¹⁸ Maidop do uhur-Mu bani halak na marribu-ribu, tapi ibalaskon Ham do hajahaton ni bapa bani anakni i pudi ni sidea, Ham Naibata na bangga anjaha na markuasa, na margoran Jahowa Zebaot.

¹⁹ Bagas do pingkiran-Mu anjaha gok kuasa pambahenan-Mu. Ikawahkon panonggor-Mu do sagala dalan nijolma, laho mambalaskon banijolma domu hubani parlahouni ampa domu hubani buah ni pambahenanni.

²⁰ Ham do na dob mambahen tanda ampa halongangan i tanoh Masir anjaha ronsi sadari on bani Israel ampa bani haganupjolma, laho mambahen tarambilan goran-Mu songon na bani panorang on.

²¹ Ibobahon Ham do bangsa-Mu Israel, mandarat hun tanoh Masir marhasoman tanda ampa halongangan marhitei tangan na gogoh ampa

botohon na pinagostong ampa marhitei songgot-songgot.

²² Ibere Ham do bani sidea tanoh on, ai ma dob binulawankon-Mu bani ompung ni sidea, laho mamberehon ai bani sidea, ai ma tanoh habaoran ni dadih ampa manisan.

²³ Imasuki sidea ma ai laho manean ai, tapi seng itangihon sidea sora-Mu, anjaha seng marparlahou sidea ibagas titah-Mu; seng dong ihorjahon sidea humbani haganup na pinarentahkon-Mu bani sidea. Halani ai do ase ipasogop Ham bani sidea haganup hamagouan on.

²⁴ Tonggor ma, domma das hu huta on hubuan laho patundukkonsi, anjaha domma ondos huta on hubagas tangan ni halak Kasdim sipangkubu in, halani podang, lohei pakon sampar. Saud do sagala nilumbahon-Mu ididah ham sandiri do in.

²⁵ Hape, Ham Tuhan Jahowa, ihatahon Ham do bangku, 'Boli ma juma in marhitei duit, anjaha bahen marsaksi! Hape domma ondos huta on hubagas tangan ni halak Kasdim.'

²⁶ Dob ai roh ma hata ni Jahowa bani si Jeremia, sonon,

²⁷ 'Tonggor ma, Ahu do Jahowa, Naibata ni sagala na mardaging; ai adong do na maborattu Bangku?'

²⁸ Halani ai, sonon do hata ni Jahowa, 'Hubere ma huta on hubagas tangan ni halak Kasdim ampa

hubagas tangan ni si Nebukadnesar, raja ni Babel, anjaha patundukonni do on.'

²⁹ Halak Kasdim, na mangkubu huta on, roh ma mammasuk i anjaha manutung huta on; tutungon ni sidea ma rumah-rumah, na ongg a tayubni ipakei panutungan dahupa bani Baal, anjaha iuseihon ijai galangan siinumon bani naibata na legan, laho mamuhoi ringis-Ku.

³⁰ Ai ihorjahon halak Israel pakon halak Juda do sogam ni uhur-Hu humbani haposoonni nari; tongon, sai tong do ipuhoi halak Israel ringis-Ku marhitei pambahenan ni tangan ni sidea, nini Jahowa.

³¹ Tongon, ipuhoi huta on do ringis-Ku ampa gilang-Ku humbani parjongjongni nari ronsi sadari on, gabe maningon ambukkonon-Ku do in hun lobei-Hu,

³² halani haganup hajahaton ni halak Israel pakon Juda, sagala na binahen ni sidea laho mamuhoi ringis-Ku, sidea ampa raja-raja ni sidea, malim-malim pakon nabi-nabi ni sidea, halak Juda ampa pangisi ni Jerusalem.

³³ Gurung ni sidea do idompakkon sidea Bangku, sedo bohi ni sidea; age pe marulak-ulak Ahu mangajari sidea, seng dong ra sidea manangihon laho manjalo pangajarion.

³⁴ Ipajongjong sidea do gana-gana sihagigihononkon ai ibagas rumah na targoran bani goran-Ku, laho pabutakkon ai.

³⁵ Ipajongjong sidea do panggalangan bani Baal bani habungan Ben-Hinnom, laho manutung anak pakon boru ni sidea ibagas apuy bani sisombahon Molok, age pe seng onggga Hutonahkon ai bani sidea, atap taringat ibagas uhur-Hu, bahenon ni sidea habutakon na sonai, laho mambahen Juda mardousa.

³⁶ Tapi age pe sonai, sonon do hata ni Jahowa, Naibata ni Israel, pasal huta on, na dob hinatahonnima, 'londoskon do ai hubagas tangan ni Raja Babel marhitei podang, lohei pakon sampar:

³⁷ Tonggor ma, patumpuon-Ku do sidea humbani haganup nagori pambuangan-Ku bani sidea, ibagas ringis-Ku ampa gilang-Ku ampa banggal ni marah-Ku; boanon-Ku do sidea mulak bani ianan on, anjaha sonang do bahenon-Ku sidea marianan ijin.'

³⁸ Gabe bangsang-Ku ma sidea, anjaha Ahu gabe Naibata ni sidea.

³⁹ Berehonon-Ku do bani sidea sada paruhuran, sada parlahou, ase marhabiaran sidea lalab Bangku, bahen hatuahon bani sidea ampa bani ginompar ni sidea i pudi ni sidea.

⁴⁰ Bahenon-Ku do bani sidea padan sisadokah ni dokahni, paboa seng surut be Ahu mambahen na madear bani sidea; anjaha nahkonon-Ku do biar

mangidah Ahu hubagas uhur ni sidea, ase ulang be marbalik sidea hun Bangku.

⁴¹ Marmalas ni uhur do Ahu mambahen na madear bani sidea, anjaha suanon-Ku do sidea tongon-tongon i tanoh on, humbani gok ni uhur-Hu pakon gok ni tonduy-Hu.

⁴² Ai sonon do hata ni Jahowa, ‘Songon na dob Huparoh haganup hamagouan banggal on bani bangsa on, sonai do parohon-Ku bani sidea haganup na madear, na dob Huparbagah bani sidea.’

⁴³ Bolion ni halak do use juma i nagori on, na hinatahonnima ai, ‘Halimisan do in, na so marisijolma barang pinahan; domma ondos in bani tangan ni halak Kasdim.’

⁴⁴ Bolion do use juma marhitei duit, anjaha ibahen surat pambolian martanda tangan, marlak ampa marsaksi, i tanoh Benjamin, bani tanoh inggot ni Jerusalem, ibagas huta-huta ni Juda, ibagas huta-huta na i pardologan, ibagas huta-huta na i bornoh-bornoh, ampa ibagas huta-huta na i tanoh Dangsina; ai sihol do pasuangon-Ku sidea, nini Jahowa.”

Parsuang ni Jerusalem ampa Juda

33 ¹ Dob ai roh ma hata ni Jahowa paduahalihon hubani si Jeremia, sanggah tartutup ope ia bani ianan ni siparjaga:

² Sonon do hata ni Jahowa na mangadongkon tanoh on, na manjadihon ampa na pajonamkon ai, Jahowa do goran-Ni,

³ “Dilo ma Ahu, jadi balosan-Ku do ho, anjaha pabotohkonon-Ku do bam pasal habanggalon ampa rusia na so binotohmu ope.

⁴ Ai sonon do hata ni Jahowa, Naibata ni Israel, pasal rumah-rumah na i huta on ampa rumah-rumah ni raja-raja ni Juda, na dob pinarseda bahen partahanan dompak munsuh,

⁵ laho manlawan halak Kasdim, ai ma rumah-rumah na gok bani bangkei ni jolma, na dob Hubunuh ibagas ringis-Ku ampa ibagas gilang-Ku, ai domma Hupadaoh bohing-Ku hun huta on halani haganup hajahaton ni sidea.

⁶ Tonggor ma, parohon-Ku do hajorgiton ampa hamalumon bani huta on; pamalumon-Ku do sidea anjaha patalaronku do bani sidea hadoharon ampa hadameion na manongtong.

⁷ Pasuargon-Ku do Juda ampa Israel, anjaha pajongjongon-Ku do sidea songon na bani mulani.

⁸ Urason-Ku do sidea humbani haganup hajahaton ni sidea, na binahen ni sidea ai dompak Ahu, anjaha sasapon-Ku do haganup panlanggaron ni sidea ampa panlawanon ni sidea na dompak Ahu.

⁹ Anjaha huta on gabe goran malas ni uhur ma on Bangku ampa puji-pujian ampa hamuliaon i lobei ni sagala bangsa-bangsa na i tanoh on, na mambogei

sagala na madear na Hubahen bani; tarsonggot anjaha gobir ma sidea halani haganup na madear pakon hadoharon na Hubahen bani huta on.

¹⁰ Sonon do hata ni Jahowa, 'Bani ianan on, na hinatahonnima ai: Domma maseda in, seng dong bejolma ampa pinahan ijin, sonai ibagas huta-huta ni Juda ampa bani dalan-dalan na i Jerusalem, na dob halong ai, anjaha seng marisi jolma be atap pinahan,

¹¹ maningon tarboge do ijai sora olob-olob pakon sora malas ni uhur, sora ni siparunjuk pakon sora ni tunangan, sora ni halak sipandoding, sanggah mamboan galangan puji-pujian sidea hu rumah ni Jahowa: Puji ma Jahowa Zebaot, ai pardear layak do Jahowa, ronsi sadokah ni dokahni do idop ni uhur-Ni.' Ai pasuangon-Ku do tanoh in songon na bani mulani, nini Jahowa.

¹² Sonon do hata ni Jahowa Zebaot, 'Bani ianan on, na dob halong on, na so marisi jolma atap pinahan pe, sonai homa ibagas haganup huta-hutani, maningon dong do use sampalan ni parmahan bahen parmahanan ni pinahan ni sidea.'

¹³ Bani huta na i pardologan, bani huta-huta na i bornoh-bornoh ampa bani huta-huta i Dangsina, bani tanoh Benjamin, bani tanoh inggot ni Jerusalem ampa bani huta-huta ni Juda, maningon montas do ijai hulanan ni biribiri hun toruh ni tangan ni halak sipangkira, nini Jahowa."

**Totap do Sadokah ni Dokahni
Bagah-bagah ni Naibata bani si Daud**

¹⁴ Tonggor ma, na roh ma panorangni, nini Jahowa, pasaudon-Ku ma ijai bagah-bagah na dob Hubahen bani ginompar ni Israel ampa bani ginompar ni Juda.

¹⁵ Bani ari ai ampa bani panorang ai bahenon-Ku do martumbor sada Tumbor na pintor bani si Daud; dalankononni do hasintongan ampa hapintoron i tanoh on.

¹⁶ Bani panorang ai maluah ma Juda anjaha marsonang-sonang Jerusalem marianan. Anjaha on do goranni hatahonon ni halak, "Jahowa parpintoranta."

¹⁷ Ai sonon do hata ni Jahowa, "Seng be rotap humbani si Daud sada halak na hundul bani paratas ni ginompar Israel.

¹⁸ Anjaha humbani malim-malim na humbani marga Lepi pe, seng rotap be humbani sidea halak na mamboan galangan situtungan hu lobei-Hu, na manutung galangan sipanganon ampa na pasirsirhon galangan sisayaton tongtong.

¹⁹ Dob ai roh ma use hata ni Jahowa bani si Jeremia,

²⁰ Sonon do hata ni Jahowa, 'Songon na so boi langkononnima padan-Ku na bani torang ari ampa padan-Ku na bani borngin, gabe seng roh arian

ampa borngin bani panorang na dob tinontuhon bani,

²¹ sonai ma seng tarparontihon padan-Hu na bani si Daud juakjuak-Kai; gabe seng dong bani sada anak na marrajai bani paratasni, sonai homa padan-Ku bani malim-malim na humbani marga Levi, na marugas Bangku.

²² Songon bala ni langit na so tarbilang ai ampa horsik ni laut na so tarsuhati ai, sonai do pabueion-Ku ginompar ni si Daud juakjuak-Kai, ampa halak Levi na marugas Bangku.”

²³ Dob ai roh ma use hata ni Jahowa bani si Jeremia,

²⁴ “Ai lang ibotoh ho do na hinatahon ni bangsa on, ‘Iambukkon Jahowa do na dua suku, na pinilih-Ni in?’ Mapas do uhur ni sidea mangidah bangsang-Ku, sedo bangsa be ai ihira uhur ni sidea.

²⁵ Sonon do hata ni Jahowa, ‘Songon Ahu na manompa arian pakon borngin, anjaha Ahu na manotapkon aturan bani langit pakon tanoh on,

²⁶ sonai do seng anjai ambukkonon-Ku ginompar ni si Jakob ampa ginompar ni si Jakob ampa ginompar ni si Daud juakjuak-Kai, gabe seng be Hubuat humbani ginomparni panggomgom bani ginompar ni si Abraham, si Isak pakon si Jakob.’ Tongon, pasuangon-Ku do sidea, anjaha maidop do uhur-Hu mangidah sidea.”

Tugah-tugah Pasal na Sihol Masa bani si Sedekia

34 ¹ On do hata na roh bani si Jeremia humbani Jahowa, sanggah roh si Nebukadnesar, raja ni Babel, ampa sagala tentarani ampa haganup harajaon na i tanoh on, na masuk hubani gomgomanni, ampa haganup bangsa-bangsa na marporang dompak Jerusalem ampa dompak haganup huta-hutani:

² Sonon do hata ni Jahowa, Naibata ni Israel, “Laho ma ho, anjaha marsahap ma ho bani si Sedekia, raja ni Juda, anjaha hatahon ma bani: Sonon do hata ni Jahowa, ‘Tonggor ma, ondskonon-Ku do huta on hubagas tangan ni raja ni Babel, anjaha tutungonni do on bani apuy.’

³ Ho pe seng anjai maluah humbagas tangan-Ni, tapi maningon tartangkap do anjaha iondoskon hubagas tangan-Ni; maningon marsididahan do ho pakon raja ni Babel, anjaha maningon marsahap do ho pakonsi padumpar bohi; maningon tarboan do ho hu Babel.

⁴ Tapi, tangar ma homa hata ni Jahowa, ale Sedekia, raja ni Juda! Sonon do hata ni Jahowa pasal ho, ‘Seng matei anggo ho marhitei podang,

⁵ sonang do ho matei; songon na itutung dahupa bani ompungmu, ai ma raja-raja na i lobeimu, sonai do tutungon dahupa bam, anjaha tangisan do ho.

Aih tuannami! Tongon, Ahu do na mangkatahon ai, nini Jahowa.”

⁶ Jadi ipadas Nabi Jeremia ma ganup hata ai hubani si Sedekia, raja ni Juda i Jerusalem,

⁷ ai ma sanggah iporang tentara ni raja ni Babel Jerusalem ampa haganup huta-huta ni Juda na tading ai ope, ai ma Takis ampa Aseka; pitah on mando huta na pinatoguh i Juda na tading ope.

Iosei Bangsa ai Parpadanan Pasal Haluahon ni Jabolon

⁸ On do hata na roh hubani si Jeremia humbani Jahowa, dob ibahen Raja Sedekia parpadanan pakon haganup bangsa ai i Jerusalem, ai ma pasal haluahon sitingtingkononkon:

⁹ Paboa ganup halak maningon paluahonni do jabolonni halak Heber, dalahi atap naboru, ase ulang dong be halak Juda, na marjabolonkon hasomanni halak Jahudi.

¹⁰ Anjaha mangaku do haganup pangintuai-pangintuai ampa haganup bangsa ai, na masuk bani parpadanan ai, na mangkatahon, ase ganup paluahkon jabolonni, dalahi atap naboru, ase ulang be iparjabolon sidea; mangaku bei do sidea, anjaha ipaluah do tongon sidea.

¹¹ Tapi margoling do use uhur ni sidea, ialop sidea do mulak jabolonni dalahi atap naboru, na dob

pinaluah ni sidea ai, anjaha ipaksa sidea do use gabe jabolon.

¹² Jadi roh ma hata ni Jahowa, bani si Jeremia sonon,

¹³ “Sonon do hata ni Jahowa, Naibata ni Israel, Ahu do na mambahen padan bani ompungnima, sanggah na Huboan sidea mandarat hun tanoh Masir, hun rumah parjabolonan, ningku do,

¹⁴ Bani tahun papituhon maningon ganup do hanima paluahkon hasomanni halak Heber, na targadei bam anjaha na dob marhorja bam onom tahun; tapi seng itangihon ompungnima Ahu atap itareihon pinggolni Bangku.

¹⁵ Ia hanima ipaubah hanima do uhurnima, anjaha ibahen hanima do na pintor bani uhur-Hu marhitei na maningtingkon haluahon bani ganup hasomanni, anjaha ibahen hanima do parpadanan i lobei-Hu ibagas rumah on na targoran bani goran-Ku,

¹⁶ tapi margoling do use uhurnima, gabe ipabutak hanima goran-Ku, marhitei na ialop hanima haganup use jabolonnima, dalahi atap naboru, na dob maluah mandalankon domu hu bani rosuhni, anjaha ipaksa hanima do sidea use mulak gabe jabolonnima.

¹⁷ Halani ai, sonon do hata ni Jahowa, Seng itangihon hanima Ahu, gabe seng saud itingtingkon hanima haluahon bani ganup hasomanni. Tonggor

ma, tingtingkonon-Ku do bannima haluahon bani podang, bani sampar ampa lohei, nini Jahowa. Anjaha bahenon-Ku do hanima gabe songgot-songgot bani haganup harajaon na i tanoh on.

¹⁸ Anjaha halak, na manlanggar padan-Ku, anjaha na so manjolom hata ni padan ai, na dob binahen ni sidea i lobei-Hu, bahenon-Ku do sidea songon anak ni lembu na dob pinonggol dua ai, songon ponggol-ponggol ai, na dob montas sidea hun tongah-tongah ni ai,

¹⁹ ai ma na sangap-sangap ni Juda, ampa na sangap-sangap ni Jerusalem, siparugas i rumah ni raja, malim-malim ronsi haganup halak na marianan i nagori in, na dob montas hun tongah-tongah ni ponggol-ponggol ni anak ni lembu ai.

²⁰ Ondoskonon-Ku do sidea hubagas tangan ni munsuh ni sidea ampa hubagas tangan ni halak na manguhurhon hosah ni sidea; anjaha bangkei ni sidea ai maningon do panganon ni manuk-manuk na i awang-awang ampa binatang na i talun.

²¹ Anjaha si Sedekia, raja ni Juda, ampa gamot-gamotni ondoskonon-Ku do hubagas tangan ni munsuh ni sidea ampa hubagas tangan ni tentara ni raja ni Babel, na dob mulak namin humbennima.

²² Tonggor ma, martonah do Ahu, nini Jahowa, boanon-Ku do sidea mulak hu huta on; parangonni do huta on anjaha tabanonni, lanjar tutungonni

bani apuy. Bahenon-Ku do tarulang huta-huta ni Juda, seng dong be na mangiankon.”

Habujuron ni Halak Rekab

35 ¹ On do hata, na roh bani si Jeremia humbani Jahowa, bani panorang ni si Joyakim, anak ni si Josia, raja ni Juda,

² “Laho ma ho hubani halak Rekab, marsahap ma ho pakon sidea; boan ma sidea hu rumah ni Jahowa, hubani sada kamar, anjaha bere ma sidea minum anggur.”

³ Jadi hualop ma si Jaasania, anak ni si Jeremia, anak ni si Habasinya, ampa saninani ampa haganup anakni ampa haganup ginompar ni si Rekab.

⁴ Dob ai huboan ma sidea hu rumah ni Jahowa, hu kamar ni anak ni si Hanan, anak ni si Igdalya, juakjuak ni Naibata, na dohor hubani kamar ni kopala-kopala, i atas ni kamar ni si Maaseya, anak ni si Salum, sijaga labah ai.

⁵ Dob ai hunahkon ma i lobei ni halak Rekab panginuman ampa gusi na gok anggur, lanjar huhatahon ma bani sidea, “Inum nasiam ma anggur in!

⁶ Tapi nini sidea ma mambalosi, ‘Seng minum anggur hanami, ai itonahkon si Jonadab, anak ni si Rekab, ompungnami do bennami: Ulang inum hanima anggur, hanima sonai ginomparnima, age antigan pe;

⁷ulang pauli hanima bannima rumah, ulang martidah hanima, ulang manombei pohon anggur hanima atap marnah pohon anggur; tapi marianan bani lampolampo ma hanima sadokah goluhnima, ase dokah hanima manggoluh bani tanoh panginsolatannima.'

⁸Ibalosi hanami do sora ni si Jonadab, anak ni si Rekab, ompungnami ai, pasal haganup tinonahkonni ai bennami, ai ma ase lang minum anggur hanami sadokah manggoluh hanami, parinangonnami, anaknami ampa borunami,

⁹anjaha lang pauli rumah hanami bahen ianannami: Seng marpohon anggur hanami, atap marjuma atap martidah.

¹⁰Tapi marianan bani lampolampo do hanami, anjaha idalankon hanami do romban hubani tonah ni si Jonadab, ompungnami ai, bennami.

¹¹Tapi dob tangkog si Nebukadnesar, raja ni Babel mamorang nagori on, nini hanami do, 'Eta, laho ma hita hu huta Jerusalem, ai roh do tentara ni halak Kasdim pakon halak Aram! Jadi marianan i Jerusalem ma hanami.'

¹²Dob ai roh ma use hata ni Jahowa bani si Jeremia,

¹³Sonon do hata ni Jahowa Zebaot, Naibata ni Israel, 'Laho ma ho, anjaha hatahon ma hubani halak Juda ampa pangisi ni Jerusalem: Ai seng ra hanima ajaran ampa manangihon hatang-Ku? nini Jahowa.'

¹⁴ Hata ni si Jonadab, anak ni si Rekab, na tinonahkonni bani anakni, ase ulang sidea minum anggur, idalankon sidea do; ronsi sadari on seng minum anggur sidea, ai itangihon do tonah ni ompung ni sidea. Tapi, age pe marulak-ulak Ahu marsahap bannima, seng itangihon hanima Ahu.

¹⁵ Husuruh do marulak-ulak juakjuak-Ku bannima, nabi-nabi ai, laho mangkatahon bannima, 'Tadingkon hanima ma ganup parlahounima na jahat in, anjaha padear hanima ma pambahenannima, anjaha ulang ma irikkon hanima naibata na legan, laho mambalosi ai, ase totap hanima marianan bani tanoh, na dob Hulayakkon bannima ampa bani ompungnima. Tapi seng ra hanima manareihon pinggolnima, anjaha seng itangihon hanima Ahu.'

¹⁶ Tongon, ihorjahon ginompar ni si Jonadab, anak ni si Rekab do tonah ni ompung ni sidea, na tinonahkonni ai bani sidea, tapi anggo bangsa on seng itangihon Ahu!

¹⁷ Halani ai sonon do hata ni Jahowa, Naibata Zebaot, Naibata ni Israel, 'Tonggor ma, parohon-Ku ma bani Juda pakon ganup pangisi ni Jerusalem haganup hamagouan na dob Hulumbahon bani sidea; ai marsahap do Ahu bani sidea, tapi seng itangihon, dilo-dilo do Ahu bani sidea, tapi seng ibalosi.

¹⁸ Tapi bani ginompar ni si Rekab, nini si Jeremia ma, ‘Sonon do hata ni Jahowa Zebaot, Naibata ni Israel: Halani itangihon hanima do tonah ni si Jonadab, ompungnima ai, anjaha idalankon hanima ganup tonahni, anjaha ibahen hanima ganup romban hu bani tinonahkonni bannima,

¹⁹ halani ai sonon do hata ni Jahowa Zebaot, Naibata ni Israel, ‘Seng anjai rotap dalahi bani si Jonadab, anak ni si Rekab, na jongjong tong marugas i lobei-Hu.’”

Gulungan Panuratan na Tinutung ni Raja Joyakim

36 ¹ Paompat-tahunkon, dob raja si Joyakim, anak ni si Josia, raja ni Juda, roh ma hata on hubani si Jeremia humbani Jahowa,

² “Buat ma sada gulungan panuratan, suratkon ma hujui haganup hata na dob Hutonahkon hubam pasal Israel pakon pasal Juda ampa pasal haganup bangsa-bangsa, mulai humbani ari Huparsahapkon ho, humbani panorang ni si Josia nari das hubani sadari on.

³ Andohar ra ginompar ni Juda manangihon pasal haganup hamagouan, na dob Husurahon sibahenon-Ku bani sidea, ase andohar ganup sidea mulak humbani dalanni na jahat in, gabe marpamuati uhur-Hu mangidah hajahaton ni sidea, ampa mangidah dousa ni sidea.”

⁴Jadi idilo si Jeremia ma si Baruk anak ni si Neriya, gabe isuratkon si Baruk ma bani gulungan panuratan ai, domu hubani na niluarhon ni si Jeremia hata ni Jahowa, na hinatahon-Ni hu bani.

⁵Jadi ihatahon si Jeremia ma hubani si Baruk, “Hona larang do ahu masuk hu rumah ni Jahowa.

⁶Halani ai ho ma laho hujai, anjaha sanggah ari puasa, i lobei ni bangsa ai, i rumah ni Jahowa, basa ma hata ni Jahowa na bani gulungan panuratan ai, na sinuratkonmu domu hubani na huhatahon bam. Maningon basaonmu do homa ai ibogei haganup halak Juda, na marrohan hun hutani bei.

⁷Andohar ra sidea marrogop i lobei ni Jahowa padaskon elek-elek ni sidea, anjaha ganup sidea ra mulak humbani dalanni na jahat in, ai banggal tumang do ringis ampa gila, na nilumbahon ni Jahowa bani bangsa on.”

⁸Jadi ibahen si Baruk, anak ni si Neriya ma haganup, songon na tinonahkon ni Nabi Jeremia hu bani, ai ma pasal na mambasa hata ni Jahowa humbani gulungan panuratan ai ibagas, rumah ni Jahowa.

⁹Dob ai palima-tahunkon dob raja si Joyakim, anak ni si Josia, raja ni Juda, bani bulan siah, itingtingkon ma ari parpuasaon i lobei ni Jahowa hubani haganup bangsa na i Jerusalem ampa hubani haganup halak na roh hun huta-huta ni Juda hu Jerusalem.

¹⁰ Jadi ibasa si Baruk ma i lobei ni haganup bangsa ai hata ni si Jeremia humbani gulungan panuratan ai ibagas rumah ni Jahowa, ibagas kamar ni si Gemarya, anak ni si Sapan, jurutulis ai, ai ma i alaman parhuluan bani dalan masuk hu horbangan baru, na bani rumah ni Jahowa.

¹¹ Jadi dob ibogei si Mikaya, anak ni si Gemarya, anak ni si Sapan haganup hata ni Jahowa na humbani buku ai,

¹² turun ma ia hu rumah ni raja ai, laho hu kamar ni jurutulis ai; marrapot do ijai haganup kopala-kopala: Si Elisama jurutulis ai, si Delaya anak ni si Semaya, si Elnatan anak ni si Akbor, si Gemarya anak ni si Sapan, si Sedekia anak ni si Hananya ampa kopala-kopala na legan.

¹³ Jadi ibaritahon si Mikaya ma bani sidea haganup hata na binogeini ai, sanggah na ibasa si Baruk buku ai i lobei ni bangsa ai.

¹⁴ Jadi isuruh haganup kopala-kopala ai ma si Jehudi, anak ni si Netanya, anak ni si Selemya, anak ni si Kusi marayak si Baruk, laho mangkatahon, “Boan ma gulungan na binasamai i lobei ni na mabuei in, anjaha eta ma.” Jadi iboan si Baruk, anak ni si Neriya ma gulungan ai, laho ma ia marayak sidea.

¹⁵ Nini sidea ma hu bani, “Hundul ma ho, anjaha basa ma in!” Jadi ibasa si Baruk ma ai bani sidea.

¹⁶ Jadi dob ibogei sidea haganup hata ai, marsikawahan ma sidea halani tarsonggot; nini sidea ma hubani si Baruk, “Maningon patugahonnami do haganup hata on bani rajanta.

¹⁷ Lanjar isungkun sidea ma si Baruk, ‘Patugah ma bennami, sonaha do panuratkonmu bani ganup hata on?’

¹⁸ Balos ni si Baruk bani sidea, ‘Si Jeremia do mangkatahon ganup hata ai bangku, sanggah na husuratkon ai bani buku on marhitei tinta.’

¹⁹ Dob ai nini kopala-kopala ai ma bani si Baruk, ‘Laho anjaha marponop ma ho pakon si Jeremia, anjaha ulang ma adong na mambotoh atap ija hanima.’”

²⁰ Jadi masuk ma sidea hu alaman ni istana ai laho marayak raja ai, dob isimpan buku ai i kamar ni si Elisama, jurutulis ai, ipatugah sidea ma ganup hata ai bani raja ai.

²¹ Dob ai isuruh raja ai ma si Jehudi mangalop buku ai, anjaha ialop ma ai hun kamar ni si Elisama, jurutulis ai; ibasa si Jehudi ma ai ibogei raja ai ampa ganup kopala-kopala ai, na jongjong i lambung ni raja ai.

²² Bulan siah ma ai, gabe hundul do raja ai i rumah musim borgoh Ni; gara do apuy ibagas pandadangan i lobei ni.

²³ Siapkonsi ibasa si Jehudi tolu atap ompat kolom mintor irotap raja ai ma ai bani pisou penani, lanjar

igijigkon hubagas apuy pandadangan ai, ronsi bois haganup gulungan panuratan ai ipangan apuy na i pandadangan ai.

²⁴ Tapi ise pe lang dong na tarsonggot atap na marrigati pakeianni, age raja ai ampa haganup juakjuakni, na manangar ganup hata ai.

²⁵ Age pe ielek-elek si Elnatan, si Delaya ampa si Gemarya raja ai, ase ulang namin itutung buku ai, tapi seng itangihon sidea.

²⁶ Iparentahkon raja ai do Jerahmeel, anak ni raja ai, ampa si Seraya anak ni si Asriel, ampa si Selemya anak ni si Abdeel, laho manangkap si Baruk jurutulis ai pakon Nabi Jeremia, tapi domma iponopkon Jahowa sidea.

²⁷ Dob ai roh ma use hata ni Jahowa bani si Jeremia, dob bois itutungi raja ai gulungan panuratan ai na marisi hata na sinuratkon ni si Baruk ai, domu hubani na hinatahon ni si Jeremia bani.

²⁸ Buat ma gulungan na legan, anjaha suratkon ma hujai haganup hata ondi, na bani gulungan na parlobei ondi, ai ma na dob itutungi si Joyakim raja ni Juda.

²⁹ Anjaha pasal si Joyakim raja ni Juda hatahon ma, “Sonon do hata ni Jahowa, ‘Itutung ho do gulungan ai, nim: Mase ma isuratkon do ijai, paboa na maningon roh do raja ni Babel laho parsedahon tanoh on, ampa laho mamboiskon jolma ampa pinahan?’

³⁰ Halani ai sonon do hata ni Jahowa pasal si Joyakim, raja ni Juda, ‘Seng dong be ginomparni na hundul bani paratas ni si Daud, anjaha maningon sampakkononkon do bangkeini hu darat, milasan arian, borgohan bodari.’

³¹ Anjaha marlulu do Ahu bani pakon bani ginomparni ampa bani juakjuakni halani hajahaton ni sidea; anjaha pasogopon-Ku do bani sidea, bani pangisi ni Jerusalem ampa bani halak Juda haganup hamagouan, na dob Hulumbahon hinan bani sidea, tapi seng ra sidea manangihon.”

³² Dob ai ibuat si Jeremia ma sada gulungan na legan, iberehon ma bani si Baruk, anak ni si Neriya, jurutulis ai; isuratkon ma hujai, domu hubani na hinatahon ni si Jeremia, haganup hata ni buku ondi, na dob tinutung ni si Joyakim, raja ni Juda ibagas apuy; buei ope hata na domu hujai itambahkon hujai.

Tartangkap anjaha Tartutup si Jeremia

37 ¹ Jadi bangkit raja ma si Sedekia, anak ni si Josia, manggantih si Konya, anak ni si Joyakim: Si Nebukadnesar, raja ni Babel do na pabangkitkonsi gabe raja ni tanoh Juda.

² Tapi anggo ia ampa juakjuakni ampa pangisi ni nagori in, seng itangihon sidea hata ni Jahowa, na dob nilumbahon-Ni marhitei Nabi Jeremia.

³Jadi isuruh Raja Sedekia ma si Jehukal, anak ni si Selemya, ampa Malim Sepanya, anak ni si Maaseya, marayak Nabi Jeremia laho mangkatahon, “Tonggohon ham ma hanami bani Jahowa Naibatanta!”

⁴Ia si Jeremia boi ope hujai-hujon i tongah-tongah ni bangsa in, ai seng ope tartutup ia.

⁵Ijia domma bingkak tentara ni Parao hun Masir, anjaha dob ibogei halak Kasdim, na mangkubu Jerusalem barita ai, surut ma sidea hun Jerusalem.

⁶Dob ai roh hata ni Jahowa, bani Nabi Jeremia,

⁷“Sonon do hata ni Jahowa, Naibata ni Israel: Sonon ma hatahon hanima bani raja ni Juda, na marsuruh hanima manungkun Ahu, ‘Tonggor ma, tentara ni Parao na roh laho mangurupi hanima, mulak do ia hu tanohni, hu tanoh Masir.’

⁸Tapi halak Kasdim mulak do roh mamorang huta on; tabanon ni sidea do on anjaha tutungonni do bani apuy.

⁹Sonon do hata ni Jahowa, ‘Ulang paoto-oto hanima dirinima marhitei na mangkatahon: Tontu mulak torus do halak Kasdim hun banta. Tongon, seng lanjar mulak sidea.’

¹⁰Porini pe domma italuhon hanima haganup tentara ni halak Kasdim na marmunsuh dompak hanima, gabe tading humbani sidea pitah na ugahan hansa, maningon jongjong do sidea ganup ibagas lampolampo laho manutung huta on.”

¹¹ Jadi bani na mulak tentara ni halak Kasdim hun Jerusalem, halani parroh ni tentara ni Parao,

¹² luar ma si Jeremia hun Jerusalem, sihol misir hu tanoh Benjamin namin, laho marbagi tean-teanan rap pakon diha-dihani.

¹³ Sanggah das ia hu horbangan Benjamin, roh ma sada parjaga ijai, na margoran si Jeria, anak ni si Selemya, anak ni si Hananya manangkap Nabi Jeremia, nini ma, “Laho marbalik do ho bani halak Kasdim!

¹⁴ Nini Jeremia ma, ‘Seng tongon ai; seng sihol marbalik ahu bani halak Kasdim.’” Tapi seng itangihon si Jeria ia, itangkap ma si Jeremia, lanjar iboan hulobei ni kopala-kopala.

¹⁵ Jadi marah tumang ma kopala-kopala ai bani si Jeremia, ilonsingi sidea ma ia lanjar inahkon hubagas tutupan na i rumah ni si Jonatan, jurutulis ai, ai domma ibahen sidea gabe tutupan ai.

¹⁶ Sonai ma parmasuk ni si Jeremia hubagas lubang sel ai; dokah do si Jeremia itahan ijai.

¹⁷ Jadi isuruh Raja Sedekia ma na mangalopsi. Isungkun raja ai ma ia marponop-ponop ibagas rumahni, nini ma, “Ai adong do bam hata humbani Jahowa? nini si Jeremia ma, ‘Adong do!’ Dob ai nini ma, ‘Ondoskononkon do ham hubagas tangan ni Raja Babel!’

¹⁸ Ihatahon si Jeremia do homa hubani Raja Sedekia, ‘Aha do dousangku bamu, bani

juakjuakmu atap bani bangsa on, ase ipatutupkon ham ahu?’

¹⁹ Ija do nuan nabi-nabimu, na mangkatahon bamu, ‘Seng anjai roh raja ni Babel mangimbang ham age tanoh on?’

²⁰ On pe, tangar ham ma, tuannami anjaha rajanami, sai siat ma bamu pangindoankon, ‘Ulang ma suruh ham ahu mulak hu rumah ni si Jonatan, jurutulis ai, ase ulang matei ahu ijai.’”

²¹ Jadi ibere Raja Sedekia ma parentah, gabe ipadas sidea ma si Jeremia hu alaman parjagaan, ibere ma sada ruti bani ganup ari hun dalam tukang roti ai, das ronsi na bois haganup ruti i huta ai. Sonai ma si Jeremia marianan i alaman parjagaan ai.

Si Jeremia Idabuhkon hubagas Parigi

38 ¹ Tapi sompat do ibogei si Sepatya anak ni si Matan, pakon si Gedalya anak ni si Pashur, pakon si Jukal anak ni si Selemiya, pakon si Pashur anak ni si Malkiya, haganup hata na hinatahon ni Jeremia hubani ganup na mabuei ai:

² Sonon do hata ni Jahowa, “Barang ise na tading i huta on, maningon matei do ia marhitei podang, lohei atap sampar; tapi barang ise na marbalik hubani halak Kasdim, manggoluh ma ia; bani ma hosahni songon taban-taban.

³ Ai sonon do hata ni Jahowa, 'Maningon ondskononkon do huta on hubagas tangan ni tentara ni raja ni Babel anjaha patundukonni do.'

⁴ Jadi nini kopala-kopala ai ma dompak raja ai, 'Nabunuh ma dalahi an, ai ia do mambahen galek tangan ni tentara na tading i huta on ampa haganup bangsa in, marhitei na mangkatahon hata na sonai ai bani sidea. Ia halak on sedo hadearon ni bangsa on ipindahi, tapi hasedaonni do.'

⁵ Nini Raja Sedekia ma, 'Tonggor ma, ondos bani tangan nasiam ma ia; ai aha ma tarbahen raja in dompak nasiam?'"

⁶ Jadi ibuat sidea ma si Jeremia anjaha idabuhkan ma ia hubagas godung ni si Malkiya, anak ni raja ai, ai ma na i alaman parjagaan ai; tali do ibahen sidea manantan si Jeremia hu toruh. Tapi seng dong bah ibagas parigi ai, hubang do hansa, gabe munob ma si Jeremia hubagas hubang ai.

⁷ Tapi dob ibogei si Ebedmelek, halak Etiopia, juakjuak na i rumah ni raja ai pasal ai, ai ma na dob inahkon sidea si Jeremia hubagas parigi ai, *(ia raja ai hundul-hundul do i horbangan Benjamin)*,

⁸ luar ma si Ebedmelek hun rumah ni raja ai, nini ma dompak raja ai,

⁹ "Ham tuannami anjaha rajanami: Na jahat do pambahenan ni halak on bani si Jeremia, ai idabuhkan sidea do ia hubagas parigi ai; tontu matei gayuran ma ia ijai, ai seng dong be ruti i huta on.

¹⁰ Jadi iparentahkon raja ai ma hubani si Ebedmelek, halak Etiopia ai, 'Arahkon ma hunjon hasomanmu tolu halak, anjaha tarik ma Nabi Jeremia humbagas parigi ai, paima lape matei ia.'"

¹¹ Jadi iarahkon si Ebedmelek ma halak ai mangkasomanisi, laho ma ia hu rumah ni raja ai, hu kamar ianan ni pakeian, ibuat ma hunjai sigundal ampa hiou na marigat, anjaha itantan ma ai hu toruh hubani si Jeremia marhitei tali.

¹² Dob ai nini si Ebedmelek, halak Etiopia ai ma dompak si Jeremia, "Nahkon ma sigundal pakon hiou in bani kihikmu, bahen lapit ni tali in." Jadi ibahen si Jeremia ma sonai.

¹³ Dob ai idokdok sidea ma si Jeremia humbagas parigi ai hu atas, gabe marianan i alaman parjagaan ai ma si Jeremia.

Parsahapan ni Raja Sedekia ampa Nabi Jeremia

¹⁴ Jadi isuruh Raja Sedekia ma na mangalopi si Jeremia, ase roh ia hu labah patoluhon, na bani rumah ni Jahowa. Nini raja ai ma dompak si Jeremia, "Dong do sungkunonku humbam; ulang ma porsou atap aha pe hu bangku.

¹⁵ Nini si Jeremia ma mambalosi Raja Sedekia, 'Anggo hupatugah hu bamu, ibunuh ham do ahu! Anjaha anggo hupatugah bamu aha sibahenonmu, seng itangihon ham ahu.'

¹⁶ Jadi marponop-ponop ma Raja Sedekia marbija bani, nini ma, 'Songon sintongni manggoluh Jahowa, na manjadihon tonduyta, seng anjai bunuhonku ho atap ondskononku ho hubagas tangan ni halak on, na manguhurhon hosahmu.'

¹⁷ Jadi nini si Jeremia ma hubani si Sedekia, 'Sonon do hata ni Jahowa Zebaot, Naibata ni Israel: Anggo ra ham mangondoskon dirimu hubani kopala-kopala na pinabangkit ni Raja Babel, maluah ma hosahmu, anjaha huta on pe seng tutungon pala bani apuy; anjaha parrumahmu pe ganupan manggoluh ma rap pakon ham.

¹⁸ Tapi anggo seng ra ham marondos bani kopala-kopala na pinabangkit ni Raja Babel, jadi ondskonon-Ku ma huta on hubagas tangan ni halak Kasdim, anjaha tutungon ni sidea ma in, anjaha ham pe seng anjai maluah humbagas tangan ni sidea.'

¹⁹ Dob ai nini Raja Sedekia ma dompak si Jeremia, 'Mabiar do ahu dompak halak Juda, na dob marbalik bani halak Kasdim, ra ipadas do ahu hubagas tangan ni sidea, gabe dorunan ni sidea ma ahu.'

²⁰ Nini si Jeremia ma, 'Seng anjai padason ham bani sidea. Tangihon ham ma sora ni Jahowa na hutonahkon bamu, jadi sonang ma ham, anjaha maluah hosahmu.'

²¹ Tapi anggo manjua ham marondos, on ma na dob pinatalar ni Jahowa bangku,

²² ‘Tonggor ma, haganup naboru na tading ope i rumah ni raja Juda, tarboan do bani kopala-kopala na pinabangkit ni Raja Babel, anjaha ihata-hatahon sidea do: Ipaoto-oto anjaha ipatunduk huan-kuan hatengeran ni uhurmu do ho; halani na dob losop ibagas hubang naheimu, gabe itadingkon sidea do ho.’

²³ Tongon haganup parinangonmu ampa anakmu maningon boanon do hubani halak Kasdim, anjaha ham sandiri seng anjai maluah humbani tangan ni sidea, tapi maningon tangkapon ni tangan ni Raja Babel do; anjaha huta on maningon tutungon do.

²⁴ Jadi nini si Sedekia ma bani si Jeremia, ‘Ulang ma tarbotoh hata on age bani ise, ase ulang matei ho.’

²⁵ Anggo ibogei kopala-kopala ai, na dob marsahap ahu pakon ho, gabe roh sidea marayak ho, anjaha ihatahon bam, ‘Patugah ma bennami aha parsahamanmu pakon rajanta; ulang porsou bennami, ase ulang ibunuh hanami ho,

²⁶ jadi hatahon ma bani sidea: Na padaskon pangindoanku do ahu bani raja in, ase ulang isuruh mulak ahu hu rumah ni si Jonatan, gabe matei ahu ijai.’”

²⁷ Jadi roh ma tongon, ganup kopala-kopala ai bani si Jeremia lanjar isungkun ma ia, gabe ibalosi ma sidea songon na hinatahon ni raja ai bani. Jadi

sip mando sidea, halani seng dong na mambogei parsahapan ai.

²⁸ Jadi soh i alaman parjagaan ai ma si Jeremia das hubani na tartaban Jerusalem.

Tartaban Jerusalem, Maluah do Anggo Nabi Jeremia

39 ¹ Pasiah-tahunkon dob raja si Sedekia, raja ni Juda, bani bulan sapuluh, roh ma si Nebukadnesar, raja ni Babel ampa haganup tantarani mamorang Jerusalem, anjaha ihubu ma ai.

² Pasapuluhsada-tahunkon, dob raja si Sedekia, bani bulan ompat, ari siah bani bulan ai, bungbung ma huta ai.

³ Sanggah na itaban huta ai, masuk ma haganup kopala-kopala pinabangkit ni Raja Babel, lanjar hundul bani horbangan tongah-tongah, ai ma: Si Nergal-Sareser, raja ni Sinmagir, Rabmag ai, ampa si Nebusasban, Rabsaris ai, ampa kopala-kopala na legan pinabangkit ni Raja Babel.

⁴ Jadi dob ididah Raja Sedekia, raja ni Juda, ampa haganup balani ai, maporus ma sidea, luar hun huta ai borngin, humbani dalan na bani pohon ni raja ai manlopusi horbangan na i holangkolang ni tembok na dua ai; dompak pamah ni Jordan do sidea maporus.

⁵ Tapi iayak tentara ni halak Kasdim ma sidea, gabe dapot ma si Sedekia i pamah ni Jeriko; dob itangkap sidea ia, iboan ma ia hu lobei ni Raja Nebukadnesar, raja ni Babel, hu Ribla, na i nagori Hamat; jadi idabuh ma uhum hu bani.

⁶ Isayati raja ni Babel ma anak ni si Sedekia i Ribla i lobei ni matani; sonai homa haganup na sangap-sangap ni juda isayati raja ni Babel do.

⁷ Ipulsitkon do anggo mata ni si Sedekia, anjaha irantei do ia, laho mamboansi hu Babel.

⁸ Itutungi halak Kasdim do rumah ni raja ai ampa rumah-rumah ni rayat, anjaha ipanepnep tembok ni Jerusalem.

⁹ Teba-teba ni bangsa ai, na tading ope i huta ai, ampa halak na marbalik, ampa na tading ope humbani tukang, iboan si Nebusaradan, kopala ni parjaga ai ma hu Babel, hu habuangan.

¹⁰ Tapi deba halak na masombuh, na so marnadong, itadingkon si Nebusaradan, kopala ni parjaga ai do i tanoh Juda, anjaha lanjar ibere do bani sidea pohon anggur pakon juma.

¹¹ Ia si Nebukadnesar, raja ni Babel, martonah do bani si Nebusaradan, kopala ni parjaga ai, pasal si Jeremia sonon,

¹² “Alop ma ia anjaha ramotkon, ulang bahen na sambor bani, bahen ma bani domu hubani rosuh ni uhurni.”

¹³ Jadi roh ma si Nebusaradan, kopala ni parjaga ai, ampa si Nebusasban Rabsaris ai ampa si Nergal-Sareser Rabmag ai, ampa kopala-kopala na legan, na pinabangkit ni Raja Babel,

¹⁴ marsuruh mangalopi si Jeremia, hun alaman parjagaan ai. Londoskon sidea ma ia bani si Gedalya, anak ni si Ahikam, anak ni Sapan, ase ijalo ia hu rumahni. Jadi marianan i tongah-tongah ni na mabuei ai ma ia.

Bagah-bagah Haluahon bani si Ebedmelek

¹⁵ Sanggah na tartahan ai ope si Jeremia i alaman ni parjagaan ai, roh do hata ni Jahowa bani,

¹⁶ “Laho ma, patugah ma bani si Ebed-Melek, halak Etiopia ai: Sonon do hata ni Jahowa Zebaot, Naibata ni Israel, ‘Tonggor ma, pasaudon-Ku do hatang-Ku na dompak huta on, ai ma hata hamagouan ai, sedo hadearon, anjaha idahonmu do ai bani panorangni.’

¹⁷ Tapi paluahon-Ku do anggo ho bani ari ai, nini Jahowa, anjaha seng padason ho hubagas tangan ni halak na hinabiaranmu.

¹⁸ Tongon, Ahu do na paluahkon ho, seng anjai matei ho bahenon ni podang; maluah do hosahmu songon taban-taban, halani martenger ni uhur ho Bangku, nini Jahowa.”

**Totap do si Jeremia Marianan i Juda; si
Gadalya Ipabangkit Manggomgomi Juda**

40¹ On do hata na roh bani si Jeremia humbani Jahowa, dob maluah ia ibahen si Nebusaradan, kopala ni parjaga ai, hun Rama; tarboan do ia hujai ibagas gari rap pakon tahanan na hun Jerusalem ampa Juda, na sihol buangon hu Babel.

² Isuruh kopala ni parjaga ai ma na mangalop si Jeremia anjaha nini ma dompaksi, “Jahowa, Naibatamu do manlumbahon hamagouan on bani ianan on;

³ ipasaud Jahowa do ai, ibahen do songon na hinatahon-Ni ai. Halani mardousa nasiam dompak Jahowa, anjaha seng itangihon nasiam sora-Ni, ai do ase masa on bani nasiam.

⁴ On pe, tonggor ma, hupaluah do ham sadari on humbani gari na bani tanganmu. Anggo marosuh uhurmu laho hu Babel rap pakon ahu, dear, eta ham ma, ahu pe na patorsahon ham; tapi anggo seng dear ai ninuhurmu, laho hu Babel rap pakon ahu, age ulang. Tonggor ham ma haganup tanoh na i lobeimu in; laho ma ham huja na dear ampa na pintor, nini uhurmu.

⁵ Tapi anggo ijon do ham nini uhurmu, mulak ma ham hubani si Gedalya, anak ni si Ahikam, anak ni si Sapan, na pinabangkit ni Raja Babel manggomgom

huta-huta ni Juda, anjaha marianan ma ham rap pakonsi i tengah-tengah ni na mabuei in; atap laho ham huja na dear, nini uhurmu.” Jadi ibere kopala ni parjaga ai ma bohal ampa sibere-bere bani, anjaha ipaturut ma ia laho.

⁶ Jadi laho ma si Jeremia hubani si Gedalya, anak ni si Ahikam, hu Mispa, lanjar marianan ma ia rap pakonsi i tengah-tengah ni na mabuei ai, na tading i nagori ai.

⁷ Dob ibogei haganup kopala ni tentara ai, na mambur merap ope i tanoh ai ampa tentara ni sidea, na dob ipabangkit raja ni Babel si Gedalya, anak ni si Ahikam manggomgom nagori in, anjaha iondoskon hubani paramangon, parinangon ampa dakdanak, ai ma halak na masombuh, na so hona buang hu Babel,

⁸ jadi roh ma sidea marayak si Gadalya hu Mispa, ai ma si Ismael, anak ni si Netanya, si Johanan pakon si Johanan anak ni si Kareah, si Seraya, anak ni si Tanhumet, anak ni si Epai hun Netopa, si Jesania anak ni halak Maakati ai, sidea ampa pangiring ni sidea.

⁹ Jadi marbulawan ma si Gedalya, anak ni si Ahikam, anak ni si Sapan, hubani sidea pakon hubani pangiring ni sidea, nini ma, “Ulang ma nasiam mabiar unduk bani halak Kasdim. Iankon nasiam ma tanoh in, anjaha balosi nasiam ma raja ni Babel, jadi sonang ma nasiam.

¹⁰ Tapi anggo ahu, i Mispa do marianan, mawakili nasiam i lobei ni halak Kasdim, na roh hu banta; anggo nasiam pariamai nasiam ma buah ni anggur, buah ni hayu ampa minak, anjaha simpan nasiam ma ai; marianan ma nasiam bani huta na tinodoh nasiam.”

¹¹ Sonai homa, dob ibogei haganup halak Juda, na i Moab, na i tongah-tongah ni halak Amon, na i Edom ampa na i nagori-nagori na legan, na ipaturut Raja Babel do tading deba i Juda, anjaha ipabangkit si Gedalya, anak ni si Ahikam, anak ni si Sapan, manggomgomi sidea,

¹² jadi mulak ma haganup halak Juda, humbani haganup ianan hamerapan ni sidea gabe das ma sidea hu tanoh Juda, hubani si Gedalya i Mispa. Anjaha buei do anggur ampa buah ni hayu ipariamai sidea.

¹³ Roh do ijia si Johanan, anak ni si Kareah ampa haganup kopala ni tentara na i darat marayak si Gedalya hu Mispa;

¹⁴ nini sidea ma dompaksi, “Ai seng ibotoh ham, na isuruh si Baalis, raja ni Amon do si Ismael, anak ni si Netanya, laho mamunuh ham? Tapi seng porsaya si Gadalya, anak ni si Ahikam, bani hata ni sidea ai.

¹⁵ Dob ai nini si Johanan, anak ni si Kareah ma dompak si Gedalya marponop-ponop i Mispa, ‘Palopas ham ma ahu laho, ase hubunuh si Ismael, anak ni si Netanya, anjaha ise pe lang na mambotoh

ai. Mase ma ia mambunuh ham, gabe merap halak juda, na martumpu i lambungmu, gabe masab simasima na humbani Juda?’

¹⁶ Tapi nini si Gedalya, anak ni si Ahikam ma dompak si Johanan, anak ni si Kareah, ‘Ulang bahen sonai, seng sintong sahapmu pasal si Ismael ai.’”

Si Gadalya Tarbunuh Ibahen si Ismael

41 ¹ Papitubulankon roh ma si Ismael, anak ni si Netanya, anak ni si Elisama, ai ma sada halak humbani ginompar ni raja in, sada halak humbani kopala-kopala bani raja in, odor rap pakon sapuluh halak, marayak Gedalya, anak ni si Ahikam, hu Mispa; rap mangan ma sidea ijai i Mispa.

² Jadi jongjong ma si Ismael, anak ni si Netanya pakon na sapuluh halak hasomanni ai, gabe ibunuh sidea ma si Gedalya, anak ni si Ahikam, anak ni si Sapan, marhitei podang; ibunuh sidea do ia, na pinabangkit ni Raja Babel ai manggomgomi nagori in.

³ Ibunuh si Ismael do homa haganup halak Juda na rap pakon si Gedalya i Mispa, ampa tentara ni halak Kasdim na tudu adong ijai.

⁴ Patarni ai, dob hona bunuh si Gedalya, sanggah seng dong ope atap ise na mambotoh ai,

⁵ roh ma dalahi hun Sikem, hun Silo ampa hun Samaria, ualuh puluh halak bueini, isuhur bei miseini anjaha marigat pakeianni, irariki angkulani,

mamboan galangan sipanganon ampa dahupa, laho manggalangkon ai i rumah ni Jahowa.

⁶ Jadi roh ma si Ismael, anak ni si Netanya hun Mispa manjumpahkon sidea, tangis-tangis do ia mardalan. Dob jumpah sidea, nini ma dompak sidea, “Laho ma hita marayak si Gedalya, anak ni si Ahikam.”

⁷ Tapi dob das sidea hubagas huta ai, ibunuh si Ismael, anak ni si Netanya, rap pakon hasomanni ai ma sidea lanjar igijigkon hubagas parigi.

⁸ Tapi sapuluh halak humbani sidea mangkatahon humbani si Ismael, “Ulang bunuh hanami, dong do iponopkon hanami i ladang gandum, jagul, manisan ampa minak.” Jadi ipaturut ma sidea, seng saud ibunuh rap pakon hasoman ni sidea ai.

⁹ Ia parigi ai, pambuangan ni si Ismael bani sagala bangkei ni halak na binuhunni ai, ai ma parigi na banggal ai, na tinombei ni Raja Asa bahen partahanan dompak si Baesa, raja ni Israel; igoki si Ismael, anak ni si Netanya do ai bani halak na binunuh ai.

¹⁰ Jadi itangkap si Ismael ma haganup na tading humbani bangsa in, na adong i Mispa, ai ma boru ni raja ai, ampa haganup halak na tading i Mispa, ai ma na dob niondoskon ni si Nebusaradan, kopala ni parjaga ai, hubani si Gedalya, anak ni si Ahikam. Haganup do sidea iboan si Ismael, anak ni si Netanya, anjaha misir ma sidea, marbalik hubani halak Amon.

¹¹ Tapi dob ibogei si Johanan, anak ni si Kareah ampa haganup kopala ni tentara hasomanni ai pasal haganup hajahaton na binahen ni si Ismael, anak ni si Netanya,

¹² jadi iarahkon sidea ma haganup tentara ni sidea, anjaha laho ma sidea mamorang si Ismael, anak ni si Netanya. Jadi dapot sidea ma ia dohorhon bah bolag na i Gibeon.

¹³ Dob ididah bangsa ai, na rap pakon si Ismael ai si Johanan, anak ni si Kareah, ampa haganup kopala ni tentara, na mangkasomanisi ai, jadi malas ma uhur ni sidea.

¹⁴ Haganup halak ai, na binoan ni si Ismael hun Mispa, marbalik ma anjaha mulak marayak si Johanan, anak ni si Kareah.

¹⁵ Tapi anggo si Ismael, anak ni si Netanya, sompat do maporus humbani si Johanan rap pakon hasomanni ualuh halak, anjaha laho ma ia hubani halak Amon.

¹⁶ Jadi iarahkon si Johanan, anak ni si Kareah ampa haganup kopala ni tentara na mangkasomanisi ai ma haganup bangsa na tading ai, ai ma na binoan ni si Ismael, anak ni si Netanya, hun Mispa, dob binunuhni ai si Gedalya, anak ni si Ahikam. Tentara, parinangon, dakdanak ampa juakjuak do na binoan ni si Johanan ai mulak hu Gibeon.

¹⁷ Jadi laho ma sidea, lanjar marsaran i Gerut Kimham dohorhon Betlehem; marsura-sura do sidea laho hu tanoh Masir

¹⁸ halani halak Kasdim; ai mabiar do sidea mangidah sidea, halani ibunuh si Ismael, anak ni si Netanya si Gedalya, anak ni si Ahikam, na pinabangkit ni Raja Babel manggomgomi nagori in.

Ipalumba si Jeremia ase Ulang Bungkas Bangsa ai hu Masir

42 ¹ Dob ai roh ma hun dohor haganup kopala ni tentara ai ampa si Johanan anak ni si Kareah, ampa si Asaria anak ni si Hosaya, ampa haganup bangsa ai na etek ampa na banggal,

² ihatahon sidea ma hubani Nabi Jeremia, “Jalo ham ma pangindoannami anjaha tonggohon ham ma hanami hu bani Jahowa Naibatamu ampa haganup na tading on, ai otik mando hanami tading humbani na buei hinan, songon na nididahmu bennami,

³ ase andohar ipatuduhkon Jahowa Naibatamu bennami dalan sidalanannami ampa na boi sibahenonnam.

⁴ Nini Nabi Jeremia ma dompak sidea, ‘Domma hubogei ai. Tonggor ma, martonggo pe ahu bani Jahowa Naibata nasiam, songon na pinindo nasiam ai, anjaha atap aha balos ni Jahowa bani nasiam, hupatugah pe bani nasiam; seng pe huporsou atap aha hu bani nasiam.’

⁵ Jadi nini sidea ma dompak si Jeremia, 'Jahowa do saksi na bonar anjaha na sintong mangimbang hanami, anggo lang idalankon hanami holi haganup hata na tinonahkon ni Jahowa Naibatamu marhitei ham hu bennami.'

⁶ Atap dear atap sambor, maningon balosannami do sora ni Jahowa Naibatanami, na sinuruh nami parayakonmu, andohar boi sonang hanami, anggo ibalosi hanami sora ni Jahowa Naibatanami."

⁷ Dob salpu sepuluh ari, roh ma hata ni Jahowa hubani si Jeremia:

⁸ Jadi idilo ma si Johanan, anak ni si Kareah ampa ganup kopala ni tentara hasomanni ai, ampa haganup na mabuei in na etek ampa na magodang,

⁹ nini ma bani sidea, "Sonon do hata ni Jahowa, Naibata ni Israel, na dob huparayak isuruh nasiam, laho padaskon pangindoan nasiam hu lobei-Ni,

¹⁰ 'Anggo ra hanima marianan i nagori on, pajongjongon-Ku ma hanima, seng parsedaon-Ku; suanon-Ku ma hanima, lang orbaton-Ku, ai manosal do uhur-Hu pasal hamagouan na dob Hubahen bannima.'

¹¹ Ulang hanima hitir-hitir bani raja ni Babel, na hinabiarannima ai; ulang gobir hanima, nini Jahowa, ai Ahu do hasomannima, laho marramotkon hanima ampa paluahkon hanima humbagas tanganni.

¹² Jumpahan idop ni uhur pe hanima Hubahen, ase maidop uhurni mangidah hanima, gabe ipalopas hanima marianan i tanohnima sandiri.

¹³ Tapi anggo ihatahon hanima, 'Seng ra hanami marianan i nagori on! Marhitei na so ra hanima manangihon sora ni Jahowa, Naibatanimi,

¹⁴ anjaha ihatahon hanima: Lang, maningon laho do hanami hu tanoh Masir, ase ulang ididah hanami porang, atap ibogei hanami sora ni tarompit, atap hurangan ruti hanami; anjaha ijai do hanami marianan,

¹⁵ anggo sonai do, tangihon nasiam ma hata ni Jahowa, ale simasima ni Juda.' Sonon do hata ni Jahowa Zebaot, Naibata ni Israel, 'Anggo sai isurahon hanima do laho hu Masir laho marianan ijai,

¹⁶ jadi podang na hinabiarannima ai ma manjumpahkon hanima ijai, i tanoh Masir; anjaha lohei na hinabiarannima ai ma mardakdak hanima hu Masir; maningon matei do hanima ijai.'

¹⁷ Haganup dalahi na marsura-sura laho hu Masir laho marianan ijai, maningon matei do bahenon ni podang, lohei ampa sampar; seng dong na tading atap na horas humbani hamagouan siparohon-Ku bani sidea.

¹⁸ Ai sonon do hata ni Jahowa Zebaot, Naibata ni Israel, 'Songon ringis ampa gilang-Ku na dob Huuseihon bani pangisi ni Jerusalem, sonai do

useihononkon ringis-Hu bannima anggo laho hanima hu Masir. Gabe siburaan, songgot-songgot, siapason ampa sipahirion do hanima. Seng idahonnima be ianan on.'

¹⁹ Ipatugah Jahowa do bani nasiam, ale simasima ni Juda, 'Ulang hanima laho hu Masir. Torang ma botoh nasiam, na dob Hupalumba nasiam sadari on,

²⁰ paboa hamateihononkon nasiam do, anggo kahou nasiam.' Ai nasiam do marsuruh ahu bani Jahowa, Naibata nasiam, nini nasiam, 'Martonggo ma ho bani Jahowa, Naibatanami, anjaha atap aha na hinatahon ni Jahowa Naibata-nami, patugah ma bennami, sai horjahononnami do ai.'

²¹ Anjaha domma hupabotohkon bani nasiam sadari on, hape seng itangihon nasiam sora ni Jahowa, Naibata nasiam pasal atap aha pe na sinuruh-Ni patugahonku bani nasiam.

²² On pe, ulang lang ibotoh nasiam, maningon matei do nasiam marhitei podang, lohei pakon sampar bani ianan, na sinurahon nasiam laho marianan ijai."

Tarboan si Jeremia hu Masir

43 ¹ Jadi dob ihatahon si Jeremia hubani na mabuei ai haganup hata ni Jahowa, Naibata ni sidea, ai ma songon na tinonahkon ni Jahowa, Naibata ni sidea hu bani, sipadasonni hubani sidea,

² gabe roh ma si Asarya anak ni si Hosaya, ampa si Johanan anak ni si Kareah, ampa sagala dalahi na jungkat, nini sidea ma dompak si Jeremia, “Ladung do na hinatahonmu; sedo Jahowa, Naibatanami marsuruh ho mangkatahon, ‘Ulang hanima laho hu Masir laho marianan ijai!’

³ tapi si Baruk, anak ni si Neriya do marsuruh ho mangimbang hanami, laho mangondoskon hanami hu tangan ni halak Kasdim, ase ibunuh hanami, atap iboban hanami tarbuang hu Babel.”

⁴ Ase seng ra si Johanan, anak ni si Kareah, ampa haganup kopala ni tentara ampa haganup simbuei ai manangihon sora ni Jahowa, ase totap marianan i tanoh Juda.

⁵ Jadi roh ma si Johanan, anak ni si Kareah, ampa haganup kopala ni tentara mangarahkon haganup teba-teba ni Juda, na roh mulak marianan i tanoh Juda humbani haganup bangsa-bangsa pambuangan ni sidea,

⁶ paramangon, parinangon, boru ni raja ampa haganup halak, na tinadingkon ni si Nebusaradan, kopala ni parjaga ai mangkasomani si Gedalya, anak ni si Ahikam, anak ni si Sapan; sonai homa Nabi Jeremia ampa si Baruk, anak ni si Neriya.

⁷ Jadi laho ma sidea hu tanoh Masir, ai seng ra sidea manangihon sora ni Jahowa. Das ma sidea hu Tahpanhes.

**Ilumbahon si Jeremia Parroh ni si
Nebukadnesar Patunduk Masir**

⁸ Dob ai roh ma hata ni Jahowa hubani si Jeremia i Tahpanhes,

⁹ “Boan ma bani tanganmu batu banggal anjaha ponopkon ma ai ibagas tanoh bani dalan masuk hu rumah ni Parao i Tahpanhes, ididah dalahi-dalahi na hun Juda,

¹⁰ anjaha hatahon ma bani sidea: sonon do hata ni Jahowa Zebaot, Naibata ni Israel, ‘Tonggor ma, suruhon-Ku ma na mangalopi si Nebukadnesar, raja ni Babel, juakjuak-Kai, anjaha pajongjongonni ma paratasni i atas batu na Huponopkon on, anjaha paherbangonni do lampolampo harajaonni i atas ni.’

¹¹ Maningon roh do ia anjaha patundukonni do tanoh Masir; ondskononni do hu hamatean na dob tinontuhon hu hamatean, hu habuangan na dob tinontuhon hu habuangan, hubani podang na dob tinontuhon bani podang.

¹² Nahitanni do apuy ibagas rumah ni sisombah-sombahon ni Masir; tutungonni ma ai atap boanonni deba hu habuangan; hutuanni ma Masir, songon pangkutui ni parmahan bani hiouni; anjaha marsonang-sonang do ia mulak hunjai.

¹³ Ropukonni do tiang batu na i Betsemes na i tanoh Masir, anjaha tutungonni do rumah ni naibata-naibata ni Masir.”

Ilumbahon si Jeremia Uhum halani Inunut Bangsa ai Marsombah bani Naibata Naboru na i Langit

44 ¹ On do hata na roh hubani si Jeremia pasal haganup halak juda, na marianan i tanoh Masir, ai ma i Migdol, i Tahpanhes, i Mempis ampa i tanoh Patros, nini,

² “Sonon do hata ni Jahowa Zebaot, Naibata ni Israel, ‘Ididah hanima do haganup hasedaon na Huparoh hubani Jerusalem ampa hubani haganup huta-huta ni Juda. Tonggor ma, halong do ai nuan, seng dong na marianan ijai,

³ halani hajahaton na hinorjahon ni sidea, laho mamuhoi ringis-Ku marhitei na laho sidea manutung dahupa anjaha ibalosi naibata na legan, na so tinanda ni sidea, age hanima, age ompungnima,

⁴ age pe Husuruh marulak-ulak bannima juakjuak-Ku, nabi-nabi ai, mangkatahon: Ulang bahen hanima habutakon, na Huhagigihon in.’

⁵ Tapi seng itangihon sidea, anjaha seng ipaeleng pinggolni, laho surut humbani hajahaton ni sidea, anjaha ase ulang manutung dahupa bani naibata na legan.

⁶ Halani ai durus do gilang-Ku pakon ringis-Ku, anjaha gara i huta-huta ni Juda ampa bani dalan-dalan na i Jerusalem; gabe halong anjaha tarulang do ai ronsi sadari on.

⁷ On pe sonon do hata ni Jahowa, Naibata Zebaot, Naibata ni Israel, 'Mase ma iparroh hanima hamagouan banggal on bannima, gabe bois hun tengah-tongahnima, hun tengah-tengah ni Juda, paramangon ampa parinangon, dakdanak pakon na inumon, gabe seng dong na teba humbennima?'

⁸ Mase ma ipuhoi hanima ringis-Ku marhitei pambahenan ni tangannima, ai ma manutung dahupa bani naibata na legan i tanoh Masir, hadasannima ai, laho manginsolat ijai, gabe bois hanima, gabe siburaan ampa sirisa-risaon i tengah-tengah ni bangsa-bangsa na i tanoh on?

⁹ Ai domma lupa hanima bani hajahaton ni ompungnima, bani hajahaton ni raja-raja ni Juda, bani hajahaton ni jolma ni sidea, bani hajahatonnima sandiri ampa bani hajahaton ni jolmanima, ai ma na binahen ni sidea i tanoh Juda ampa alaman ni Jerusalem?

¹⁰ Seng ipaunduk sidea uhur ni sidea ronsi sadari on, anjaha seng mabiar sidea, anjaha seng mardalan sidea domu hu bani titah-Ku ampa aturan-Ku na Hubere bannima ampa bani ompungnima.

¹¹ Halani ai sonon do hata ni Jahowa Zebaot, Naibata ni Israel, 'Tonggor ma, dompakkonon-Ku do

bohing-Ku bannima, laho mambahen hasamboron, laho mamboiskon ganup Juda.'

¹² Anjaha teba-teba ni Juda, na mandompakkon bohini laho hu Masir, sihol marianan ijai, maningon do bois sidea ganup; i tanoh Masir do sidea marrageian, bois ibahen podang pakon lohei, marmateian sidea, na etek age na magodang, ibahen podang pakon lohei; gabe siburaan do sidea, gabe songgot-songgot, gabe umpama ampa sirisaon.

¹³ Ai marlulu do Ahu age dompak na marianan i tanoh Masir, songon parlulung-Ku bani Jerusalem marhitei podang, lohei pakon sampar,

¹⁴ ase ulang adong na maluah atap na tading humbani teba-teba ni Juda, na laho hu Masir, sihol manginsolat ijai. Seng mulak be sidea hu tanoh Juda, na hinasiholan ni sidea sihol mulak hujai anjaha marianan ijai; tongon, seng dong sidea na mulak, sobali piga-piga halak na maporus."

¹⁵ Dob ai marbalos ma sidea hubani si Jeremia, ai ma haganup dalahi na dob mambotoh manutung dahupa jolma ni sidea bei hu bani naibata na legan, ampa haganup naboru na dihut jongjong ijai, sada humpulan na banggal, sonai homa haganup halak na marianan i Patros, i tanoh Masir, nini sidea ma,

¹⁶ "Hata na hinatahonmu bennami marhitei goran ni Jahowa, seng ra hanami manangihon ai.

¹⁷ Tapi maningon dalankononnami do domu hubani na dob ibagahkon hanami; maningon manutung dahupa do hanami hubani raja naboru na i langit ai, anjaha manguruskon galangan siinumon hu lobeini, songon na dob binahennami, hanami age ompungnami, raja-rajanami ampa kopala-kopalanami, ibagas huta-huta ni Juda pakon bani dalan-dalan na i Jerusalem; ijia sungkupan sipanganon do hanami anjaha marsonang-sonang, seng dong hasedaon ididah hanami.

¹⁸ Tapi dop iparontihon hanami na manutung dahupa bani raja naboru na i langit ai ampa na manggalangkon galangan siinumon i lobeini, marhahurangan do hanami pasal haganup, anjaha bois hanami ibahen podang pakon lohei.

¹⁹ Anjaha naboru-naboru mangkatahon, manutung dahupa pe hanami bani raja naboru na i langit ai, anjaha manggalangkon galangan siinumon pe hanami i lobei ni, ibagas botoh ni paramangonnami do ai, ai ma na binahennami kuei mangusihi rupani, anjaha na ginalangkonnami ai galangan siinumon i lobeini.

²⁰ Jadi nini si Jeremia ma dompak haganup bangsa ai, dompak dalahi ampa naboru, dompak haganup halak na marbalos ondi,

²¹ 'Ia dahupa, na tinutungnima bani huta-huta ni Juda pakon na i dalan-dalan na i Jerusalem, hanima age ompungnima, rajanima age kopalanima ampa

halak na marianan i tanoh ai, ibotoh Jahowa do ai, iparuhurhon do ai.'

²² Seng be tartahan Jahowa uhur-Ni mangidah pambahenannima na masambor in ampa hagigi na nidalankonnima in; halani ai do ase tarulang, halong anjaha hona bura tanohnima, seng dong na mangiankon songon nuan ai.

²³ Halani na manutung dahupa ai, halani na mardousa ai hanima dompak Jahowa, anjaha seng itangihon hanima sora-Ni, seng idalankon hanima titah-Ni, aturan-Ni ampa hasaksian-Ni, halani ai do ase mangonai hamagouan on bannima songon nuan on.

²⁴ Dob ai nini si Jeremia ma hubani ganup simbuei ai ampa hubani ganup naboru ai, 'Tangihon hanima hata ni Jahowa, hanima haganup halak Juda, na adong i tanoh Masir.'

²⁵ Sonon do hata ni Jahowa Zebaot, Naibata ni Israel, 'Hanima ampa jolmanima do na manluarhon ai marhitei pamangannima, anjaha na pasaudkon ai marhitei tangannima, nini hanima: Maningon pasaudonnami do bagah-bagahnami, na dob pinarbagahnami, ai ma manutung dahupa bani raja naboru na i langit ai ampa mamboan galangan siinumon hu lobeini. Pasaud hanima ma tongon bagah-bagahnima ai, suhuni ma tongon ai!'

²⁶ Halani ai, tangihon hanima ma hata ni Jahowa, hanima haganup halak Juda na marianan i tanoh

Masir, 'Tonggor ma, domma marbija Ahu marhitei goran-Ku na timbul in, nini Jahowa, na so malo be goran-Ku diloon ni pamangan ni atap ise pe halak Juda, na marianan i tanoh Masir, mangkatahon: Songon sintongni manggoluh Tuhan Jahowa.'

²⁷ Tonggor ma, mangkawah do Ahu dompak sidea laho mambahen hamagouan, sedo mambahen na madear; haganup halak Juda, na i tanoh Masir, maningon ripas do ibahen podang ampa lohei, bois tumang ganup sidea.

²⁸ Anjaha halak na maluah humbani podang, na mulak hun Masir hu tanoh Juda, otik do bilanganni. Jadi haganup teba-teba ni Juda na laho hu tanoh Masir, sihol manginsolat ijai, botohonni ma atap hata ni ise do na sintong, hatang-Ku atap hata ni sidea do.

²⁹ On do tandani bannima, nini Jahowa, paboa na marlulu do Ahu bannima bani ianan on, ase ibotoh hanima, paboa na tongon do hata na Hulumbahon ai mangimbang hanima:

³⁰ Sonon do hata ni Jahowa, 'Tonggor ma, ondskonon-Ku do Parao Hopra, raja ni Masir, hubagas tangan ni munsuhni ampa hubagas tangan ni halak na manguhurhon hosahni, songon na dob Huondskon ai si Sedekia, raja ni Juda, hubagas tangan ni si Nebukadnesar, raja ni Babel, ai ma munsuhni ai, na manguhurhon hosahni.'"

Hata Lumba-lumba ampa Apoh-apoh bani si Baruk

45 ¹ On do hata, na hinatahon ni Nabi Jeremia hubani si Baruk, anak ni si Neriya, sanggah na sinuratni hata on ibagas sada buku domu hubani pangkatahon ni si Jeremia, ai ma paompat-tahunkon dob raja si Joyakim, anak ni si Josia, raja ni Juda, nini,

² “Sonon do hata ni Jahowa Zebaot, Naibata ni Israel hu bam, ale Baruk,

³ ‘Ihatahon ho: Magou ma ahu! Ai itambahi Jahowa ope pusok ni uhur bani naboritku; loja do ahu halani hoih-hoihku, anjaha seng dapotan parsaranan ahu!’

⁴ Sonon ma hatahon bani, ‘Sonon do hata ni Jahowa: Tonggor ma, na dob Hupauli, Huparseda do, na dob Husuan, Hudokdok do, ai ma haganup tanoh in.’

⁵ Naha ho, pindahanmu ope habanggalon bam? Ulang ma pindahi, ai tonggor ma, parohon-Ku do hamagouan bani sagala daging, nini Jahowa; tapi berehonon-Ku do bam hosahmu songon upah taban-taban bani sagala ianan siparayakanmu.”

Lumba-lumba Pasal Parseda ni Masir

46 ¹ On do hata ni Jahowa na roh hubani Nabi Jeremia pasal bangsa-bangsa.

² Pasal Masir: Pasal tentara ni Parao Neko, raja ni Masir, na marsaran i lambung ni Bah

Eprat, dohorhon Karkemis, na tinaluhon ni si Nebukadnesar, raja ni Babel, paompat-tahunkon dob raja si Joyakim, anak ni si Josia, raja ni Juda,

³ “Pasirsir ma gantar na etek ampa na bangga,
anjaha bingkat ma hu parporangan!

⁴ Palanai ma huda in, naiki ma, ale siajak huda!
Jongjong ma martangkuluk bosi bei,
pamarot tanjanima, sorungkon baju-baju
partahanan!

⁵ Aha do na Huidah ai? Gobir-gobir do sidea,
anjaha surut hu pudi! Talu do puanglima ni
sidea, tarolos maporus; seng mangkawah
dompok pudi, habiaran do inggot, nini
Jahowa.

⁶ Na doras marlintun seng tarbahensi maporus,
age na barani-barani seng maluah; i utara i
lambung Bah Eprat do sidea marjurgangan
anjaha radag.

⁷ Ise do ai, na marbanggal songon Bah Nil, songon
bah bolon na marhasak bahni?

⁸ Masir do ai na marbanggal songon Bah Nil,
anjaha songon bah bolon parhasak ni
bahni. Nini, ‘Marbanggal ma ahu, sihol
do rungkubonku tanoh in, parsedaonku
huta-huta ampa pangisini.’

⁹ Maju ma, ale sagala huta, marpojong ma, ale
gareta! Bingkat ma siparporang! Halak Kus

ampa halak Put sijolom gantar, halak Lud,
na pandei manintak Sior.

¹⁰ Ari ai, ai ma ari ni Tuhan Jahowa Zebaot, sada
ari pambalason, laho mambalas munsuh-Ni.
Bosur do podang mamangani, anjaha
marmabuk-mabuk do ia minum daroh ni
sidea. Ai Jahowa, Naibata Zebaot do na
mangadongkon panayatan i tanoh parutara
i lambung ni Bah Eprat.

¹¹ Tangkog ma hu Gilead, alop ma minak balsem,
ale anak boru, boru Masir! Soya-soya do
na pinakeimin buei tambar, seng tarbahen
malum be ho.

¹² Tarbogei do bani bangsa-bangsa hailaonmu,
gok do tanoh on bani doruh-doruhmu;
ai marsijombaan do siparporang samah
siparporang, rap radag do sidea.”

¹³ On do hata ni Jahowa, na hinatahon-Ni bani Nabi
Jeremia, ai ma pasal parroh ni si Nebukadnesar, raja
ni Babel, laho patunduk tanoh Masir,

¹⁴ “Baritahon ma i Masir, anjaha tingtingkon
i Migdol; pabogeihon ma i Nob ampa i
Tahpanhes! Hatahon ma, ‘Jongjong ma
anjaha marjaga-jaga, ai domma bois ipangan
podang simbalogmu.’

¹⁵ Mase marrageian puanglimamu? Seng
jongjong be! Jahowa do patundukkon sidea.

- ¹⁶ Ibahen do sidea buei mangkatompas, radag do sidea; nini sidea do samah sidea, 'Eta, mulak ma hita hubani bangsanta ampa hu tanoh hatubuhanta halani podang sipangagou in.'
- ¹⁷ Bahen ma goran ni Parao, raja ni Masir: Sibuei hata-hata, siparsoya-soya panorang na madear.
- ¹⁸ Songon sintongni manggoluh Ahu, nini Raja in, na margoran Jahowa Zebaot: Songon Dolog Tabor i tongah-tongah ni dolog-dolog, songon Karmel na i topi laut, sonai do parrohni ai.
- ¹⁹ Pasirsir ma ugas-ugasmu, laho hu habuangan, ale pangisi ni Masir! Tongon, maningon tarulang do Nob, mareong, seng dong na mangiankon.
- ²⁰ Lombu na majenges do Masir, tapi roh ma sipangagou hun utara marayaksi.
- ²¹ Age tentara na niupahan, na i tongah-tongah ni sidea, songon anak ni lombu na mombur do; marbalik do sidea anjaha rap maporus, seng martahan sidea; ai sogop do ari hamagouan bani sidea, panorang pambalason bani sidea.
- ²² Songon parlisik ni ulog do parrohni bogeion; tongon, marhulan-hulan do sidea roh, marsiboan kapakni songon siroboboh hayu.

- ²³ Robohon ni sidea do haranganni, nini Jahowa,
ai seng marsibar sidea; bueinan do sidea ase
balang, seng tarbilangi sidea.
- ²⁴ Maningon bador do boru Masir, maningon
ondoskononkon do ia hubagas tangan ni
bangsa na hun utara.
- ²⁵ Ihatahon Jahowa Zebaot, Naibata ni Israel
do, 'Tonggor ma, marlulu do Ahu dampak
Amon, na hun No, dampak Parao, dampak
Masir, dampak sisombahonni ampa
raja-rajani, dampak Parao ampa dampak
halak na martenger ni uhur bani.'
- ²⁶ Ondoskonon-Ku do sidea hubagas tangan ni na
manguhurhon hosah ni sidea, hubagas tangan ni si
Nebukadnesar, raja ni Babel, ampa hubagas tangan
ni gamot-gamotni. Tapi dob salpu ai ianonkon
do use Masir songon bani panorang sapari, nini
Jahowa.
- ²⁷ Tapi anggo ho, ulang ma mabiar, ale Jakob
juakjuak-Ku, anjaha ulang ma tarsonggot,
ale Israel; ai tonggor ma, paluahon-Ku do ho
hun tanoh na madaoh ampa ginomparmu
hun tanoh habuangan ni sidea. Maningon
mulak do Jakob, marsonang-sonang do ia
anjaha mardamei-damei, ise pe lang be na
manonggotisi.
- ²⁸ Ulang ma ho mabiar, ale Jakob juakjuak-Ku, nini
Jahowa, ai Ahu do hasomanmu. Boiskonon-

Ku do bangsa-bangsa pambuangan-Ku bannima, tapi anggo ho seng bois bahenon-Ku, tongon, Huajar do ho domu hubani na patut; tapi seng paturuton-Ku ho lang hona pinsang.”

Lumba-lumba Pasal Palistim

47 ¹ On do hata ni Jahowa na roh hubani Nabi Jeremia, pasal halak Palistim, sanggah lape ipatunduk Parao Gasa.

² Sonon do hata ni Jahowa, “Tonggor ma, marbanggal do bah roh hun utara, gabe bah bolon na sampur. Landaonni do tanoh in ampa haganup na adong ijin, huta-huta ampa na marianan ijin. Tangis-tangis majolma anjaha doruh-doruh na mangiankon tanoh in.

³ Pangkorhon ni gurojob ni nahei ni huda ampa parhurasak ni gareta porang ampa parputor ni rodani, seng be ikawahkon bapa anakni, sonai ma hagalekon ni sidea,

⁴ halani panorang na roh laho mamboiskon haganup halak Palistim, laho mansiapkon sagala na tading, sipangurupi bani Tirus ampa Sidon. Tongon, Jahowa do na mamboiskon halak Palistim, teba-teba na roh hun Pulou Kaptor.

- ⁵ Hona palpal do Gasa, masab ia Askalon. Ale teba-teba ni halak Enak, piga dokah nari rarikannima dirinima?
- ⁶ Ale podang ni Jahowa! Piga dokah nari pe, ase soh ho? Mulak ma ho hubagas sarungmu, Maronti ma anjaha marsaran ma!
- ⁷ Sonaha ma parsohni, ai Jahowa do na marsuruhsi? Dompak Askalon pakon dompak topi ni laut do ai ihatahon.”

Lumba-lumba Pasal Parseda ni Moab

- 48** ¹ Pasal Moab: Sonon do hata ni Jahowa Zebaot, Naibata ni Israel, “Bursik ma Nebo, ai domma maseda! Bador do Kiriataim, anjaha hona taban; maila do benteng anjaha iparreong.
- ² Sasap do hamuliaon ni Moab. Martahi-tahi do halak i Hesbon pasalsi: Eta, parseda hita ma Moab, ase ulang masuk bangsa be ai! Ho pe, ale Madmen, maningon parsedaon do; podang do mardakdak ho.
- ³ Tarbogei do sora doruh-doruh hun Horonaim: Hasedaon ampa hamagouan banggal.
- ⁴ Maseda do Moab, tarbogei do doruh-doruh das hu Soar.
- ⁵ Tongon, tangis-tangis do sidea tangkog bani tangkogan Luhit; tarbogei do doruh-doruh pasal hasedaon bani tuadan Horonaim.

- ⁶ Maporus ma! Ase maluah hosahnima! Tapi songon tatada ma hanima i halimisan.
- ⁷ Halani martenger ni uhur ho bani batar-batarmu ampa bani artamu, ho pe maningon tarboan do; anjaha Kemos maningon tarbuang do, rap pakon malim-malimni ampa na sangap-sangapni.
- ⁸ Ai roh do sipangagou bani sagala huta, anjaha sada pe lang na maluah; seda do habungan-habungan, anjaha tarulang sagala pamah, songon na hinatahon ni Jahowa.
- ⁹ Bere ma habong bani Moab, ai sihol habang do ia daoh. Maningon tarulang do huta-hutani, seng dong na marianan ibagas.
- ¹⁰ Hona papa ma halak na marayoh pasaudkon horja ni Jahowa, anjaha hona papa ma halak na pasoh podangni manduruskon daroh.
- ¹¹ Marsonang-sonang do Moab humbani haposoonni nari, sonang tibal bani lutokni; seng onga ia ipausei humbani gusi hu gusi, seng onga tarboan ia hu habuangan. Halani ai totap do daini anjaha seng mubah morumni.
- ¹² Tapi, tonggor ma, roh ma panorangni, nini Jahowa, suruhon-Ku ma halak na manguseihonsi, na palumeihon gusi-gusi ai ampa na marrosakisi.

¹³ Maningon bador do Moab halani Kemos, songon halak Israel na bador halani Betel, hatengeran ni uhur ni sidea ai.

¹⁴ Mase ma ihatahon hanima, 'Puanglima do hanami anjaha tentara na barani?'

¹⁵ Tangkog do siparseda Moab ronsi huta-hutani, gabe tuad hu panayatan anak garama pilihanni, nini Raja ai, na margoran Jahowa Zebaot.

¹⁶ Dohor do parseda ni Moab, anjaha mangolos do roh hamagouanni.

¹⁷ Tangisi ma ia, hanima ganup simbalogni, ampa haganup na mambotoh goran-Ni! Hatahon ma, 'Naha do parponggol ni tungkot harajaon in ampa simambu hasangapon in?'

¹⁸ Turun ma humbani hasangaponmu, anjaha hundul ma bani orbuk, ale boru Dibon! Ai domma tangkog mangayak ho, ai ma siparseda Moab; iparseda do batar-batarmu.

¹⁹ Jongjong ma i dalan anjaha kawahkon ma, ale pangisi ni Aroer! Sungkun ma halak na maporus ampa halak na maluah; hatahon ma, 'Aha do na masa?'

²⁰ Domma bador Moab, ai domma maseda; mandoruhi ma anjaha tangis ma! Patugah ma ai i lambung ni Arnon, paboa na dob bois do Moab.

- ²¹ Madabuh do uhum bani tanoh hanopan, bani Holon, Jahas, Mepaat,
²² bani Dibon, Nebo, ampa Bet-Diblataim,
²³ bani Kiriataim, Bet-Gamul ampa Bet-Meon,
²⁴ bani Keriyyot ampa Bosrah ampa bani haganup huta na i nagori Moab, na daoh pakon na dohor.
²⁵ Maponggol do tanduk ni Moab, marosak botokonni, nini Jahowa.
²⁶ Bahen ma ia mabuk, ai do dirini i lobei ni Jahowa, ase margulu ia bani utah-utahni, anjaha gabe sipahirion ia homa.
²⁷ Ai lang gabe sipahirion do Israel bam? Ai adong jumpah ia rap pakon panangko ase iupir-upirhon ho ulumu, anggo taringat ho pasalsi?
²⁸ Tadingkon ma huta in, anjaha marianan
ma i dolog batu, ale pangisi ni Moab!
Songon kuhuy ma hanim na marasar bani liang-liang.
²⁹ Domma itangar hanami pasal pangenjengon ni Moab, mangeljeng tumang do ia ampa pasal hatoalonni, pangunsagahni, jungkatni ampa gijang ni uhurni.
³⁰ Hubotoh do pangenjengonni, nini Jahowa, lumei do sahap-sahapni, anjaha seng sintong pambahenanni.
³¹ Halani ai tangis do Ahu pasal Moab, doruh-doruh pasal haganup Moab; anjaha pasal halak na i Kir-Heres marhoih do Ahu.

³² Lobih humbani partangis-Hu bani Jaeser do partangis-Hu bam, ale hayu anggur na i Sibma! Mandipar laut do rantingmu, das hu Jaeser; roh do sipangagou bani pariamamu ampa buah anggurmu.

³³ Hona buat do malas ni uhur ampa olob-olob humbani tanoh na lambutan ni tanoh Moab; domma Hupangadi anggur roh hun pangilangan; seng dong be na marhorja i pangilangan, seng tarbogei be surak-surak malas ni uhur.

³⁴ Doruh-doruh do Hesbon ampa Eleale; das do hu Jahas tarbogei sora ni sidea, hun Soar das hu Horonaim, ronsi Eglat-Selisia, age bah ni Nimrim domma halong.

³⁵ Parontihonon-Ku ma i Moab, nini Jahowa, ase ulang adong be halak na manggalang i atas buntu-buntu atap manutung dahupa bani naibata ni sidea.

³⁶ Halani ai tangis do uhur-Hu songon sordam mangidah Moab, anjaha tangis do tonduy-Hu songon sordam mangidah halak Kir-Heres, ai magou do habayakon na sinari ni sidea.

³⁷ Ai hona palpal do sagala ulu, hona suhur sagala jambek; hona rarikan do sagala tangan, anjaha hiou guni do bani binongei ni sidea.

³⁸ Bani ganup tayub ni rumah na i Moab ampa bani alaman-alaman pitah tangis-tangis do hansa

tarboge, ai domma Hubolahkon Moab songon hudon na so hinarosuhkon ni halak, nini Jahowa.

³⁹ Ai, parbolahni in! Ai, partangis ni sidea in! Partundal ni Moab in, halani tarbador! Sonai ma Moab gabe sipahirion ampa songgot-songgot bani ganup simbalogni.

⁴⁰ Ai sonon do hata ni Jahowa, 'Tonggor ma, songon manuk-manuk nanggordaha do ia habang, anjaha ipaherbang habongni i atas ni Moab;

⁴¹ ipatunduk do sagala huta, anjaha isoluk sagala huta na pinatoguh.' Uhur ni siparporang ni Moab bani ari ai usih do bani uhur ni naboru na mangarou.

⁴² Maningon bois do Moab, seng hiraon be sada bangsa, halani na mangenjeng ai ia dompak Jahowa.

⁴³ Hagobiron, godung ampa siding do mangonai bam, ale pangisi ni Moab, nini Jahowa.

⁴⁴ Barang ise na maporus halani hagobiron ai, madabuh do hubagas godung; barang ise na luar humbani godung ai, hona siding do. Ai parohon-Ku do ganupan ai bani Moab, bani tahun pambalason-Ku, nini Jahowa.

⁴⁵ Bani linggom ni Hesbon do marsaran halak na maporus, loja tumang; tapi luar do apuy hun Hesbon, gajag ni apuy hun rumah ni si

Sihon; iparseda do pardompakan ni Moab
ampa pakpak ni ulu ni halak sipanggeori.

⁴⁶ Magou ma ho, ale Moab! Magou ma bangsa
ni Kemos; ai tarboan do anakmu hu
habuangan ampa borumu hu parjabolonan.

⁴⁷ Tapi i pudi ni ari pasuargon-Ku do Moab, nini
Jahowa.” Sibar jai ma uhum na bani Moab.

Lumba-lumba Pasal Parseda ni Amon

49 ¹ Pasal halak Amon: Sonon do hata ni
Jahowa, “Ai seng dong nani anak bani
Israel? Ai seng dong sipanean bani? Mase
ma Milkom sipanean bani Gad anjaha
bangsani marianan bani huta-hutani?

² Halani ai, tonggor ma, na roh ma panorangni,
nini Jahowa, pabogei honon-Ku ma
surak-surak porang dompak Rabba, huta
ni halak Amon; gabe timbunan batu do ai,
janah dusun-dusunni bois tutungon ni apuy;
jadi teanon ni Israel ma tean-teanan ni
halak sipambuat tean-teananni hinan, nini
Jahowa.

³ Tangis ma, ale Hesbon, ai maseda ma in!
Doruh-doruh ma, ale boru Rabba! Gonditi
ma dirimu bani hiou guni, tangis ma, anjaha
marlintun ma hujai-hujon, rariki dirimu! Ai
maningon tarbuang do Milkom, rap pakon
malim-malimni ampa na sangap-sangapni.

- ⁴ Mase ma mangenjeng ho pasal habuanganmu, ale boru sipangosei, ho na martenger ni uhur bani arta, na mangkatahon, 'Ise na pag roh hu bangku?'
- ⁵ Tonggor ma, parohon-Ku ma bam songgot-songgot, nini Tuhan Jahowa Zebaot, humbani halak na marianan inggot bam; erapkononkon do hanima ganup marsitohu dalanni, janah seng dong na patumpuhon na maporus ai.
- ⁶ Tapi i pudi ni ai pasuangen-Ku do halak Amon, nini Jahowa."

Lumba-lumba Pasal Parseda ni Edom

- ⁷ Pasal Edom: Sonon do hata ni Jahowa Zebaot, "Ai seng dong be na maruhur i Teman? ai domma magou ranggian ni halak na pentar? Ai domma masab hapentaran ni sidea?
- ⁸ Maporus ma, marhusor, marponop ma bani ianan na bagas, ale pangisi ni Dedan! Ai pasogopon-Ku do hamagouan bani Esau, bani panorang pambalason-Ku bani.
- ⁹ Anggo roh sibuat buah anggur bam, seng tadingkononni age turiang. Anggo roh panangko borngin, parsedaonni ma domu hubani rosuhni.
- ¹⁰ Tongon, Ahu do na pasalang Esau, anjaha Ahu na patidak parponopanni; seng

tarponopkonsi dirini. Magou do ginomparni
ampa saninani ampa simbalogni; seng dong
be sidea.

¹¹ Paturut ma dakdanakmu na tading maetek in,
sihol do pagoluhon-Ku on; martenger ni
uhur Bangku ma na mabalunima!

¹² Ai sonon do hata ni Jahowa, 'Tonggor ma,
gari halak na so patut manginum panginuman in,
minum do hunjin, mintor ho ma lang hona uhum?
Seng tarbahren lang hona uhum ho, maningon
inumonmu do.'

¹³ Ai domma marbulawan Ahu bani diring-Ku, nini
Jahowa, ia Bosra maningon do gabe songgot-
songgot, sipahirion, tarulang anjaha hona bura;
anjaha sagala hutani maningon tarulang do lalab."

¹⁴ Domma hubogei barita humbani Jahowa,
janah domma isuruh sahalak suruhan
hu tongah-tongah ni bangsa-bangsa
maningtingkon, "Marhumpul ma hanima
anjaha dorab ma ia, bingkak ma hanima hu
parmunsuhan!

¹⁵ Ai tonggor ma, paetekon-Ku do ho i
tongah-tongah ni bangsa-bangsa, mahiri i
tongah-tongah ni jolma.

¹⁶ Hagijangon ni uhurmu do paoto-otohon
ho ampa pangenjengon ni uhurmu, ho
ale na marianan ibagas liang ni dolog
batu, na markuasa bani buntu-buntu na

gijang. Age pe ibahen ho asarmu gijang
songon manuk-manuk nanggordaha,
dabuhkonon-Ku do ho hunjai, nini Jahowa.

¹⁷ Maningon gabe songgot-songgot do Edom;
ganup na mamontas hunjai maningon tarsonggot
do mangidah ai anjaha manrisai halani haganup
hasedaonni.

¹⁸ Songon sanggah parseda ni Sodom pakon
Gomora ampa dusun-dusunni, nini Jahowa, sonai
do seng dong bejolma marianan i Edom, seng
dong be halak na manginsolat ijai.

¹⁹ Tonggor ma, songon singa na tangkog hun
harangan ni Bah Jordan dompak sampalan,
sonai ma sompong pamerapon-Ku sidea hun
tanoh ai, anjaha halak na Hupilih pabangkiton-Ku
manggomgom ai. Ai ise ma na songon Ahu? Ise ma
siparhutuk Bangku? Ise ma parmahan na tahan
mandompakkon Ahu?

²⁰ Halani ai, tangihon ma sura-sura ni Jahowa
sidalankonon-Ni dompak Edom ampa pingkiran-Ni
pasal pangisi ni Teman: Tongon, ronsi na etek-etek
humbani biribiri ai, maningon saradon do; tongon,
songgotan do sampalan ni sidea mangidah na masa
bani sidea.

²¹ Halani sora ni pardabuh ni sidea dugur do
tanoh on; tarboge do doruh-doruh ni sidea
ronsi laut arung.

- ²² Tonggor ma, songon manuk-manuk
nanggordaha do ia naik anjaha habang;
ipaherbang do habongni i atas ni Bosra, jadi
songon uhur ni naboru na mangarou ma
uhur ni halak siparporang na i Edom bani
panorang ai.”

Lumba-lumba Pasal Parseda ni Damaskus

- ²³ Pasal Damaskus: Bador do Hamat ampa
Arpad, ai barita hamagouan do ibogei sidea.
Mandolei do uhur ni sidea halani biar, seng
dong hasohan bani sidea.
- ²⁴ Mandolei do pangahap ni Damaskus, marhusor
do ia sihol maporus, hasonggotan do sogop
bani. Rusak ni uhur ampa na maborit
do mangonai bani, songon naboru na
mangarou.
- ²⁵ Hona tadingkon do huta na tarbarita ai, ianan
parolob-oloban ai.
- ²⁶ Rasei do anak garama i alamanni, anjaha
haganup halak siparmunsuh bois do bani
panorang ai, nini Jahowa Zebaot.
- ²⁷ Pagaraon-Ku do apuy bani tembok ni
Damaskus, anjaha boiskononni do
rumah-rumah ni si Benhadad.

Lumba-lumba Pasal Parseda ni Halak Arab

²⁸ Pasal Kedar ampa harajaon-harajaon ni Hasor, na ipatunduk si Nebukadnesar, raja ni Babel: Sonon do hata ni Jahowa, “Jongjong ma, bingkak ma dompak Kedar! Patunduk ma bangsa na i hapoltakan

²⁹ Maningon rampason do lampolampo ampa biribiri ni sidea, tenda ni sidea ampa haganup ugas-ugasni; maningon buaton do homa unta ni sidea, anjaha dilohononkon pasal sidea: Songgot-songgot do inggot.

³⁰ Maporus ma, lintun ma podas, marponop ma bani liang-liang, ale pangisi ni Hasor, nini Jahowa. Ai adong do ranggian ni si Nebukadnesar, raja ni Babel, dompak hanimu, adong do sura-sura sidalankononni bannimu.

³¹ Jongjong ma, bingkak ma dompak sada bangsa na mardamei-damei, na marianan marsonang-sonang, nini Jahowa, na so pala marhorbangan atap maroruk-oruk, na marianan punjung.

³² Sirampason do unta ni sidea, anjaha hulanan ni pinahan ni sidea sitabanon do; paerapon-Ku do sidea bani haganup deisa, sidea ai, na ilepong jambulanni inggot; parohon-Ku do hamagouan bani sidea humbani haganup ianan na inggot, nini Jahowa.

- ³³ Gabe ianan ni sorigala do Hasor, gabe halimisan lalab; sen dong be halak na marianan ijai, seng dong be jolma na manginsolat ijai.”

Lumba-Lumba asal parseda ni Elam

- ³⁴ On do hata ni Jahowa na roh hubani Nabi Jeremia pasal Elam, bani mungkah ni harajaon ni si Sedekia, raja ni Juda.

- ³⁵ Sonon do hata ni Jahowa Zebaot, “Tonggor ma, ponggolhonon-Ku do sior ni Elam, panguntu ni hagogohon ni sidea.

- ³⁶ Parohon-Ku do logou na ompat ai hu bani Elam, humbani deisa na ompat ni langit in, anjaha paerapon-Ku do sidea hubani deisa na ompat in, gabe seng dong be bangsa na so das hujai humbani halak Elam na merap ai.

- ³⁷ Gobir do bahenon-Ku uhur ni halak Elam i lobei ni munsuh ni sidea ampa i lobei ni halak na manguhurhon hosah ni sidea; parohon-Ku do hamagouan bani sidea, gajag ni ringis-Ku, nini Jahowa. Suruhon-Ku do porang mangayak sidea, paima bois sidea hubahen.

- ³⁸ Pajongjongon-Ku do paratas-Hu i Elam, anjaha boiskonon-Ku do raja-raja ni sidea ampa kopala-kopalani nini Jahowa.

- ³⁹ Tapi i pudi ni ari pasuangon-Ku do Elam, nini Jahowa.”

**Lumba-lumba Pasal Parseda ni
Babel ampa Parluah ni Israel**

50 ¹ On do hata na hinatahon ni Jahowa pasal Babel ampa pasal tanoh ni halak Kasdim, marhitei Nabi Jeremia,

² “Pabotohkon ma i tongah-tongah ni bangsa-bangsa anjaha tingtingkon ma; pajongjong ma mandera partanda anjaha pabogeihon ma; ulang ponopkon, tapi hatahon ma: Hona taban do Babel, tarbador do Bel, maropuk do Merodak. Bador do gana-ganani, maropuk naibata-naibatani.

³ Ai tangkog do dompaksi sada bangsa hun utara, na mambahen tanohni tarulang, gabe seng dong be na mangiankonsi; maporus dojolma age pinahan.

⁴ Bani ari ai ampa bani panorang ai, nini Jahowa, Roh ma halak Israel rap pakon halak Juda, tangis-tangis sidea na roh ai; pindahan ni sidea do Jahowa, Naibata ni sidea.

⁵ Sungkun-sungkun do sidea bani dalan laho hu Sion, anjaha hujai do idompakkon sidea, nini, ‘Eta, parapat hita ma dirinta bani Jahowa, marhitei padan sisadokah ni dokahni, seng sihalupahononkon.’

⁶ Biri-biri na dob magou do bangsang-Ku; kahou do sidea ibahen parmahan ni sidea, iboan

sidea manlembang hu pardologan; mampar do sidea hun dolog hu buntu-buntu, lupa do sidea bani harangni.

⁷ Ganup na jumpahan sidea mangankon sidea, anjaha munsuh ni sidea mangkatahon, 'Seng marsalah hanami ijai'; halani na mardousa do sidea dompak Jahowa, Parmahan na pintor in, anjaha pangarapan bani ompung ni sidea.

⁸ Maporus ma hanima hun tengah-tengah ni Babel anjaha luar ma hun tanoh ni halak Kasdim; songon biribiri tunggal ma hanima mardalan i lobei ni hulanan.

⁹ Ai tonggor ma, juljulon-Ku anjaha patangkogon-Ku do dompak Babel hulanan ni bangsa-bangsa na banggal, hun tanoh parutara; patitir do sidea mandorab huta ai, laho manaban ai. Ia panah ni sidea, songon panah ni siparmunsuh do, na totap monang, na so onnga lumei mulak.

¹⁰ Maningon hona rampas do tanoh Kasdim; bosuran do sagala na manrampas ai, nini Jahowa.

¹¹ Age pe marolob-olob hanima, age pe marmalas ni uhur, ale sirampas parbagianan-Ku, age pe marinjak-injak hanima songon anak ni lombu bani sampalan, anjaha mariha-iha songon huda panjangan,

- ¹² maningon bador tumang do inangnima, anjaha maila na mantubuhkon hanima. Tonggor ma, gabe sietekan do ia i tongah-tongah ni bangsa-bangsa, gabe halimisan, tanoh horah, anjaha tarulang.
- ¹³ Halani ringis ni Jahowa seng be ianonkon ai, gabe halimisan botul ma ai. Ganup na montas hun Babel, tarsonggot do anjaha mandoruni halani haganup hasedaonni ai.
- ¹⁴ Titir ma hanima inggot mamorang Babel, ale sagala sisintak sior. Tembak ma ia, ulang marrugi-rugi bani lingkit; halani na mardousa ai ia bani Jahowa.
- ¹⁵ Marsurak ma hanima inggot huta ai! Domma talu ia, mangkarumbak batar-batarni, anjaha maruntas tembokni. Pambalason humbani Jahowa do ai; mambalas ma hanima bani huta ai, bahen ma bani usih songon na dob binahenni.
- ¹⁶ Boiskon ma hun Babel halak sipartidah ampa halak sijolom sasabi sanggah pariamas. Halani podang ni sipangodoh-odoh, ganup do mulak hubani bangsani, anjaha ganup do maporus hu tanohni bei.
- ¹⁷ Biri-biri na mambur merap do Israel, na pinardakdak ni singa. Lobei raja ni Assur do na mangankonsi, dob ai si Nebukadnesar, raja ni Babel do na mangkilhili holi-holini.

¹⁸ Halani ai, sonon do hata ni Jahowa Zebaot, Naibata ni Israel, “Tonggor ma, marlulu do Ahu bani raja ni Babel ampa bani tanohni, songon na dob marlulu Ahu bani raja ni Assur.

¹⁹ Paulakon-Ku do Israel hubani sampalanni, manggagat ma ia use i Karmel ampa i Basan, anjaha bosur ma ia i Dolog Efraim ampa i Gilead.

²⁰ Bani ari ai pakon bani panorang ai, nini Jahowa, pindahan ni halak ma hajahaton ni Israel, hape seng dong jumpah, sonai age dousa ni Juda, hape seng dong dapot, ai sasapon-Ku do dousa ni halak na Hutadingi ai.

²¹ Tangkog ma dompak tanoh Merataim ampa dompak pangisi ni Pekod. Boiskon anjaha pamasab ma ginompar ni sidea, nini Jahowa; ‘Dalankon ma romban hubani na dob Huparentahkon.’

²² Sora ni hamunsuhon do i tanoh ai anjaha hasedaon banggal!

²³ Irosakkon anjaha iponggolhon do parpalu ni haganup dunia on. Gabe songgot-songgot do Babel i tongah-tongah ni bangsa-bangsa.

²⁴ Huta on do tirangkap bam, anjaha tartangkap do ho, ale Babel, seng ibagas botohmu. Dapot do ho anjaha tartangkap, halani imunsuhi ho Jahowa.

- ²⁵ Ibuha Jahowa do rumah parsinjataan-Ni,
anjaha ipadarat sinjata ni ringis-Ni; halani
adong na sihol sidalankonon ni Naibata,
Jahowa Zebaot, i tanoh ni halak Kasdim.
- ²⁶ Roh ma mandorabsi humbani ganup ianan,
ungkab ma parbohalanni; pagugun ma ai
songon luhutan, anjaha bois ma parseda ai,
ulang dong na tading.
- ²⁷ Bunuh ma sagala lembu jonggini, boban hu
panayatan! Magou ma sidea, ai domma
jumpah ari ni sidea, panorang pambalason
bani sidea.
- ²⁸ Boge! Sora ni halak na maporus ampa na
maluah hun tanoh Babel, laho patugahkon
hu Sion pambalason ni Jahowa, Naibatanta,
pambalason halani rumah-Ni.
- ²⁹ Dilo ma mangimbang Babel ai partembak,
haganup halak sisintak sior. Hubu ma ia
inggot; ulang paturut dong na maluah.
Balaskon ma bani rombang hubani
pambahenanni, bahen ma bani romban
hubani na hinorjahonni; ai mangeljeng do
ia dompak Jahowa, Na ma pansing ni Israel.
- ³⁰ Halani ai maningon rasei do anak garamani
bani alamanni, anjaha ripas haganup
tentarani bani panorang ai, nini Jahowa.
- ³¹ Tonggor ma, Ahu do siimbang ho, ale
sipangeljeng, nini Jahowa, Naibata Zebaot;

Ai domma das arimu, panorangni Ahu mambalas bam.

³² Jiris anjaha targompang ma sipangenjeng ai, seng dong na manogusi, pagaraon-Ku do apuy bani huta-hutani, jadi panganonni do ganup na manginggotisi.

³³ Sonon do hata ni Jahowa Zebaot, 'Hona odoh-odoh do halak Israel rap pakon halak Juda; haganup na mambuankon sidea manjolomi sidea, manjua do sidea paluahkon sidea.'

³⁴ Tapi na gogoh do Sipaluah sidea; Jahowa Zebaot do goran-Ni. Ia do martinggilhon partinggilan ni sidea, laho mambahen marsonang-sonang tanoh in, tapi hitir-hitir ia pangisi ni Babel.

³⁵ 'Podang do na roh, nini Jahowa, bani halak Kasdim, bani pangisi ni Babel, bani kopala-kopala ni sidea ampa bani na pentar-pentar ni sidea.'

³⁶ Podang do na roh bani sipartondung, mambahen maoto sidea. Podang do na roh bani puanglima ni sidea, mambahen galek sidea.

³⁷ Podang do na roh bani huda ni sidea ampa bani gareta ni sidea ampa bani haganup bala na legan na i tongah-tongah ni sidea, na mambahen songon naboru sidea; podang do na roh bani arta ni sidea, gabe hona rampas do ai.

³⁸ Podang do na roh bani bah ni sidea, gabe horah do ai. Ai tanoh ianan ni gana-gana do ai, anjaha gabe maoto do sidea halani gana-gana sipanonggoti ai.

³⁹ Halani ai, marianan ma i Babel binatang, sorigala ampa burung unta; seng dong be na mangiankon ai lalab, anjaha seng dong bejolma na marianan ijai.

⁴⁰ Songon sanggah parseda ni Sodom pakon Gomora ampa dusun-dusunni, nini Jahowa, sonai do seng dong be halak na marianan ijai, anjaha seng dong bejolma na manginsolat ijai.

⁴¹ Tonggor ma, roh do sada bangsa hun utara, sada bangsa na bangga, anjaha buei raja-raja bingkat humbani ujung ni tanoh on.

⁴² Mamboan sior ampa tanja do sidea; jahat do sidea, seng itanda holong ni uhur. Songon parhasak ni laut do sora ni sidea; marhuda do sidea roh, gopas marsinjata laho marmunsuh dompak ho ale boru Babel.

⁴³ Ibogei raja ni Babel ma barita ni sidea ai, gabe galek ma tanganni; biar do mandorabsi ampa na maborit songon parinangon na mangarou.

⁴⁴ Tonggor ma, songon singa na tangkog hun harangan ni bah Jordan, marayak sampalan, sonai ma sompong pamerapon-Ku sidea hun tanoh ai, anjaha halak na hupilih pabangkiton-Ku manggomgom ai. Ai ise ma na songon Ahu? Ise ma

siparhutuk Bangku? Ise ma parmahan na tahan mandompakkon Ahu?

⁴⁵ Halani ai, tangihon ma sura-sura ni Jahowa, sidalankonon-Ni dompak Babel ampa pingkiran-Ni pasal tanoh ni halak Kasdim; tongon, ronsi na etek-etek humbani biribiri ai maningon saradon do. Tongon, songgotan do sampalan ni sidea mangidah na masa bani sidea.

⁴⁶ Halani sora na patugahkon partunduk ni Babel, dugur do tanoh on tarbogei do doruh-doruh ni sidea i tongah-tongah ni bangsa-bangsa.”

Sambat ni Lumba-lumba Pasal Hasedaon ni Babel ampa Parluah ni Israel

(ay. 15-19 pausih bd. 10:12-16)

51 ¹ Sonon do hata ni Jahowa, “Tonggor ma, papuhoon-Ku do tonduy na parsedahon dompak Babel ampa dompak pangisi ni Kasdim,

² anjaha paingkaton-Ku do hu Babel pamiari, na mamiari sidea, anjaha palumeion ni sidea do tanohni, sanggah na roh sidea inggot mangkubusi, bani ari hamagouan ai.

³ Ulang paturut parpanah manintak siorni, anjaha ulang ma paturut ia jongjong marbaju-baju partahanan; ulang lioi anak garama ni sidea, bois tumang ma bahen hanima balani haganup.

- ⁴ Maningon radag do sidea tarbunuh i tanoh ni halak Kasdim, anjaha tartikam bani alaman ni sidea.
- ⁵ Tapi seng lalab mabalu Israel pakon Juda ipaturut Naibata ni sidea, Jahowa Zebaot; ai gok hasalahan do tanoh ni halak Kasdim dompak Na Ma Pansing ni Israel.
- ⁶ Maporus ma hanima hun tongah-tongah ni Babel, anjaha marsipaluah dirini bei ma, ase ulang bois hanima bani panguhumon na bani ai. Ai panorang pambalason ni Jahowa do ai, laho mambalaskon domu hubani pambahenan ni sidea.
- ⁷ Panginuman omas do Babel ibagas tangan ni Jahowa, laho mambahen mabuk ganup tanoh on. Minum do sagala bangsa humbani anggurni, halani ai ratou do bangsa-bangsa.
- ⁸ Sompong do marumbak Babel anjaha marosak; tangisi ma ia! Buat ma minak bani ugahni, ra boi ope malum ia.
- ⁹ Sihol pamalumonnami do Babel, hape seng tartambari be. Tadingkon ma ia, laho ma hita ganup hu tanohni bei, ai das ronsi langit do uhum na bani ai, sundol ronsi hambun.
- ¹⁰ Ipatalar Jahowa do hapintoronnami. Eta, baritahon hita ma i Sion pambahenan ni Jahowa, Naibatanta.

- ¹¹ Aroti ma panah! Buat ma gantar! Ipuhoi Jahowa do tonduy ni raja-raja ni Madai, ai dompak Babel do uhur-Ni laho mangagou ai; pambalason ni Jahowa do ai, pambalason halani rumah-Ni.
- ¹² Pajongjong ma mandera partanda manlawan tembok ni Babel. Pangkei ma marjaga-jaga; suruh ma siparjaga; suruh ma sipangonggopi! Ai Jahowa do na marranggihon ampa mandalankon na nilumbahon-Ni pasal pangisi ni Babel.
- ¹³ Ho ale na marianan i lambung ni bah banggal, pararta na mabuei, jumpah ma ajalmu, rotapon ma hosahmu.”
- ¹⁴ Domma marbulawan Jahowa Zebaot bani diri-Ni, “Tongon, gok do bahenon-Ku ho bani jolma, songon balang bueini, marsurak-surak hamonangan do sidea dompak ho.
- ¹⁵ Ia do na manjadihon tanoh on marhitei gogoh-Ni, Ia do na pajonamkon dunia on marhitei hapentaran-Ni; anjaha marhitei habotohon-Ni ipaherbang do langit.
- ¹⁶ Anggo ipabogeihon sora-Ni marhasak ma bah ni langit, anjaha naik do hambun marhitei parentah-Ni humbani ujung ni tanoh on; hilap do ibahen parohkon udan, anjaha ipaluar do logou hun ianan panimpananni.

- ¹⁷ Bodoh do ganup jolma, seng marpangartian;
bador do ganup tukang omas ibahen
gana-ganani; ai sipaoto-oto do gana-ganani
anjaha seng marhosah.
- ¹⁸ Na lang do ai, horja na pakahouhon; magou do
ganupan ai bani panorang pambalason bani
sidea.
- ¹⁹ Seng sonai rupei ni si Jakob, ai la do na
manjadihon sagala na dong, anjaha Israel
do marga parbagianan-Ni, Jahowa Zebaot
do goran-Ni.
- ²⁰ Ho do parpalu Bangku, ale Babel, sinjata hu
parmunsuhan; Huropuki do bangsa-bangsa
marhitei ho, Huparseda harajaon-harajaon.
- ²¹ Huropuki do huda pakon na mangajaksi
marhitei ho, gareta porang ampa
sipargareta porang.
- ²² Huropuki do dalahi pakon naboru marhitei ho,
na matua age na maposo, garama age anak
boru.
- ²³ Huropuki do parmahan ampa hulananni
marhitei ho, parjuma ampa horbou
paninggalani, raja-raja ampa kopala-kopala.
- ²⁴ Tapi balaskonon-Ku do bani Babel pakon
bani haganup pangisi ni Kasdim i lobei ni
panonggornima, haganup hajahaton ni sidea, na
binahen ni sidea bani Sion, nini Jahowa.

- ²⁵ Tonggor ma, Ahu do siimbang ho, ale dolog sipangagou, nini Jahowa, ho ma siagou ganup tanoh on; pagostongon-Ku do tangan-Ku dompak ho, anjaha gulangkonon-Ku do ho humbani dolog batu, anjaha bahenon-Ku do ho gabe dolog na tinutung.
- ²⁶ Seng be tarbuat humbam batu gabe batu parsuhi atap batu onjolan; tapi halong ma ho lalab, nini Jahowa.
- ²⁷ Pajongjong ma mandera partanda i tanoh on, sompul ma tarompit i tengah-tengah ni bangsa-bangsa; pasirsir ma bangsa-bangsa marporang dompaksi, dilo ma harajaon-harajaon mangimbangsi, Harajaon Ararat, Minni pakon Askenas! Pabangkit ma puanglima mangimbangsi, boan ma huda songon balang bueini!
- ²⁸ Pasirsir ma bangsa-bangsa mandorabsi, raja-raja ni Madai, rap pakon kopala-kopalani ampa pambobaini ronsi ganup nagori jajahanni ai.
- ²⁹ Dugur do tanoh in anjaha hitir-hitir, ai saud do sura-sura ni Jahowa pasal Babel, laho mambahen tanoh Babel gabe halimisan, seng dong na mangiankon.
- ³⁰ Iparontihon puanglima ni Babel do marporang, soh do sidea ibagas bentengni; mintop do habaranion ni sidea, gabe songon

naboru do sidea; gajag do ianan ni sidea,
mangkaponggol oruk-orukni.

³¹ Marodor do suruhan roh, sonai age siboan
barita, laho patugahkon bani raja ni Babel,
na dob hona taban hutani inggot;

³² hona soluk do pandiparan, hona tutung
partahanan, anjaha gok biar tentara.

³³ Ai sonon do hata ni Jahowa, Naibata ni Israel,
'Doskon pardogeian na niluntak-luntak do
boru Babel; tongkin nari, roh ma panorang
parpariamaon bani.'

³⁴ Ipangan si Nebukadnesar, raja ni Babel do ahu,
irosaki do ahu; ibahen do ahu gabe hudon
na lumei, ipolgap do ahu songon pambahen
ni naga, igoki do boltokni marhitei na
mantin-mantin, na adong bangku; hona usir
do ahu ibahen,

³⁵ Sai sogop ma bani Babel odoh-odoh
na binahenni hu bangku ampa bani
sindohorhu, sonai ma ihatahon pangisi ni
Sion. Marsapata hubani pangisi ni Kasdim
ma darohku, sonai ma ihatahon Jerusalem.

³⁶ Halani ai sonon do hata ni Jahowa,
'Tonggor ma, Ahu pe na mantinggilhon
paringoranmu, anjaha na mambalaskon
ho.' Pahorahon-Ku do lautni, anjaha marsik
bahenon-Ku parigini.

- ³⁷ Gabe timbunan batu do Babel, ianan ni
sorigala, gabe songgot-songgot anjaha
sipahirion, seng marpangisi.
- ³⁸ Rap maraum do sidea songon singa anjaha
mangorong songon anak ni singa.
- ³⁹ Sanggah na hisapan sidea, pasirsiron-Ku do
pesta bani sidea, pamabukon-Ku do sidea
gabe galek lanjar tarpodom lalab anjaha
seng puho be, nini Jahowa.
- ⁴⁰ Patuadon-Ku do sidea songon anak ni biribiri
hu panayatan songon biribiri tunggal pakon
hambing tunggal.
- ⁴¹ Tartaban do Babel, tartangkap na marmulia
i sab tanoh on; gabe songgot-songgot do
Babel i tongah-tongah ni bangsa-bangsa.
- ⁴² Hona rungkub do Babel ibahen laut, parhasak
ni gilumbangni do manutup ai.
- ⁴³ Gabe halimisan do huta-hutani, gabe
tanoh dorging anjaha lungun, seng dong
marpangisi, seng dongjolma na montas
hunjai.
- ⁴⁴ Marlulu do Ahu bani Bel na i Babel, anjaha
dokdokon-Ku hun babahni, na dob
pinolgapni. Seng be marurup bangsa-bangsa
roh hu bani, domma marumbak tembok ni
Babel.

⁴⁵ Haluar ma hun tengah-tongahni, ale bangsang-Ku! Ganup ma paluahkon hosahni humbani gajag ni ringis ni Jahowa.

⁴⁶ Ulang rusak uhurnima ulang mabiar manangar barita i tanoh in, sanggah na roh barita tahun on, roh use barita bani tahun na sada nari, sanggah na masa odoh-odoh i tanoh in, marsipatundukan siparkuasa.

⁴⁷ Halani ai, tonggor ma, roh ma panorang ni pambalason-Ku bani gana-gana ni Babel, bador ma ganup tanohni, anjaha radag do i tengah-tongahni sagala halakni na tarbunuh.

⁴⁸ Jadi marsurak-surak ma mangidah Babel, langit pakon tanoh ampa ganup isini, ai roh do sipangagou mandorab sidea, hun utara, nini Jahowa.

⁴⁹ Maningon tompas do Babel, halani na tarbunuh hun Israel, usih songon na rasei halak i sab tanoh on i lobei ni Babel.

⁵⁰ Hanima na maluah humbani podang, bingkat ma, ulang soh! Paingat-ingat ma Jahowa humbani na daoh, anjaha siholan ma hanima bani Jerusalem.

⁵¹ Bador do hanami, ai ibogei-bogei hanami do risa-risa; habadoron do marrungkub bohinami, ai masuk do halak na legan hubagas ianan na pansing na i rumah ni Jahowa.

⁵² Halani ai, tonggor ma, na roh ma panorangni, nini Jahowa, marbalas ma Ahu dompak gana-gana ni

sidea, anjaha bani sab tanoh ni sidea morong-orong do halak na ughan.

⁵³ Porini pe naik Babel das hu langit, anjaha age pe ipatoguh tembok na gijang ai, tapi parohon-Ku do sipangagou mangimbangi, nini Jahowa.

⁵⁴ Tangar ma! Doruh-doruh hun Babel ampa hataluon banggal hun tanoh ni halak Kasdim!

⁵⁵ Ai Jahowa do na parsedahon Babel anjaha ipasip hariahonni na banggal ai. Marhasak do gilumbangni songon bah banggal, anjaha maraloling do sora ni dilo-dilo ni sidea,

⁵⁶ ai sipangagou do na roh bani Babel; hona tangkap do puanglimani, iparponggol do sior ni sidea; ai Jahowa, Naibata sipambalas, la do marlulu bani sidea.

⁵⁷ Pamabukon-Ku do raja-rajani, na pentar-pentarni, kopala-kopalani, pambobaini ampa balani; tarpodom ma sidea lalab, seng puho be, nini Raja in, na margoran Jahowa Zebaot.

⁵⁸ Sonon do hata ni Jahowa Zebaot, 'Tembok ni Babel na bolag ai, padosdoson do bani tanoh, anjaha horbanganni na gijang ai tutungon do bani apuy.' Sisoya-soya do jolma mangkorja, anjaha apuy do na mangankon na hinalojahon ni bangsa-bangsa."

⁵⁹ On do hata na tinonahkon ni Nabi Jeremia bani si Seraya, anak ni si Neriya, anak ni si Maaseya,

sanggah na laho ia rap pakon si Sedekia, raja ni Juda, hu Babel, paompat-tahunkon, dob raja ia. Si Seraya do kopala ni kohoman.

⁶⁰ Domma isuratkon si Jeremia hinan bani sada buku sagala hasedaon siparohon hu Babel, ai ma haganup hata on, na isuratkon pasal Babel.

⁶¹ Nini si Jeremia do dompak si Seraya, “Anggo das ho hu Babel, sarihon ma ase ibasahon ho ganup hata on,

⁶² anjaha hatahon ma, ‘Ham Jahowa, Ham do marsahap pasal ianan on sihol mamboiskon in, ase ulang dong be na marianan ijin, jolma age pinahan, maningon gabe halimisan do in lalab.’

⁶³ Siapkonsi ibasa ho buku on, rahutkon ma batu hujin, anjaha gijigkon ma in hu Bah Eprat,

⁶⁴ anjaha hatahon ma, ‘Sonai do manongnong Babel, anjaha seng mulgap be, ibahen hasedaon siparohon-Ku bani.’” Singgan jai ma hata ni si Jeremia.

Parseda ni Jerusalem ampa Pambuangan na hu Babel

(ay. 31-34 pausih 2 Raj. 25:27-30)

52 ¹ Marumur dua puluh sada tahun do si Sedekia, sanggah bangkit ia gabe raja, anjaha sapuluh sada tahun do ia mamarentah i Jerusalem. Goran ni inangni, ai ma si Hamutal, boru ni si Jeremia, na hun Libna.

² Ihorjahon do sogam ni uhur ni Jahowa, usih songon na binahen ni si Joyakim.

³ Ai halani ringis ni Jahowa do ase masa sonai hu Jerusalem ampa hu Juda, gabe iusir sidea hun lobei ni bohi-Ni. Dob ai marbalik ma Raja Sedekia mangimbang Raja Babel.

⁴ Anjaha pasiah-tahunkon dob raja ia, bani bulan sapuluh, ari sapuluh roh ma si Nebukadnesar, raja ni Babel, rap pakon ganup tentarani mandorab Jerusalem; ihubu sidea ma huta ai, anjaha ibahen batar-batar inggot.

⁵ Jadi tarhubu ma huta ai das ronsi pasapuluhsada-tahunkon, dob raja si Sedekia.

⁶ Paompatbulankon ari siah, masa ma lohei maningting i huta ai, seng dong be sipanganon bani bangsa parnagori ai.

⁷ Dob ai ibuha ma sada dalan halopusan ibagas tembok ni huta ai; maporus ma raja ai ampa haganup siparmunsuh borngin-borngin hun horbangan, na i holangkolang ni tembok na dua ai, na dohor bani pohon ni raja ai; tapi ihubu halak Kasdim do huta ai inggot. Laho ma sidea dompak Arabah.

⁸ Tapi iayak tentara ni halak Kasdim ma raja ai, jadi dapot ma si Sedekia i pamah ni Jeriko, anjaha ganup tentarani ai merap ma hun lambungni.

⁹ Itangkap sidea ma raja ai anjaha iboan ma ia tangkog mangadap raja ni Babel hu Ribla, na i tanoh Hamat, lanjar idabuh ma uhum bani.

¹⁰ Ibunuh raja ni Babel ma anak ni si Sedekia i lobei ni matani, anjaha ibunuh do homa haganup kopala-kopala ni Juda i Ribla.

¹¹ Ipadarat do mata ni si Sedekia haduasi anjaha irantei ma ia bani rantei tombaga, anjaha iboan raja ni Babel ma ia hu Babel, lanjar inahkon hubagas tutupan ronsi ari parmateini.

¹² Bani bulan lima, ari sepuluh, ai ma pasapuluhsiah-tahunkon dob raja si Nebukadnesar, raja ni Babel, roh ma hu Jerusalem si Nebusaradan, kopala ni papanriah-riah parriah-riahngawal, siparugas i lobei ni raja ni Babel.

¹³ Itutung ma rumah ni Jahowa, rumah ni raja ai ampa haganup rumah-rumah na i Jerusalem; itutung do haganup rumah na banggal-banggal.

¹⁴ Iparseda haganup tentara ni halak Kasdim, hasoman ni kopala ni pangawal ai ma haganup tembok ai, inggot Jerusalem.

¹⁵ Deba humbani halak na masombuh ni bangsa ai ampa teba-teba ni bangsa ai, na tading ibagas huta ai ampa na marbalik hu bani raja ni Babel ampa halak na tading humbani tuhang, iboan si Nebusaradan, kopala ni pangawal ai do hu habuangan.

¹⁶ Tapi deba humbani halak sisombuhan i nagori ai, itadingkon si Nebusaradan, kopala ni pangawal do, laho mangkorjai pohon anggur pakon juma.

¹⁷ Ia tiang tombaga, na bani rumah ni Jahowa pakon sagala onjolan ampa bongbongan tombaga, na i rumah ni Jahowa iparseda halak Kasdim do, anjaha tombaga ai iboan do ganup hu Babel.

¹⁸ Ibuat sidea do hudon, sonduk, raot, batil ampa haganup parugas tombaga, na pinakei marugas i rumah panumbahan;

¹⁹ sonai homa sagala mangkuk, balanga parapuyan, mangkuk pamispisan, hudon, parsuluhan, batil ampa sambung, haganup na humbani omas ampa na humbani pirak, ibuat kopala ni pangawal ai do.

²⁰ Tiang na dua ai, bongbongan na sada ai ampa na sepuluh dua lombu tombaga, na i toruh ni bongbongan tombaga ai, ampa onjolan ai, na pinauli ni Raja Salomo bani rumah ni Jahowa, sabonar na so tartimbang do buei ni tombaga ni ganup parugas ai.

²¹ Sapuluh ualuh asta do gijang ni sada tiang, anjaha lilitni sepuluh dua asta, hapalni ompat jari anjaha marruang do ai.

²² I atas tiang ai adong do uluni humbani tombaga; lima asta do gijangni. Adong do jala-jala ampa buah ni dalima inggot ulu ni tiang ai, haganup humbani tombaga; usih do hujai tiang na paduahon ai, ampa buah dalimani.

²³ Siah puluh onom kamata do buei ni buah dalima ai margantungan. Haganup saratus kamata do buah ni dalima, ai ma na bani jala-jala ai inggot.

²⁴ Anjaha iboan kopala ni pangawal ai do si Seraya, sintua ni malim ai, ampa si Sepanya, malim paidua ai, ampa sijaga labah sitolu halak ai.

²⁵ Anjaha iboan do homa hun huta ai sada siparpangkat, ai ma na mangopalai halak siparmunsuh ampa pitu halak hasoman sapanriah ni raja ai, na jumpah ibagas huta ai, ampa jurutulis ni kopala ni tentara ai, na marhara parnagori ai jadi tentara, ambahni ai onom puluh halak humbani bangsa parnagori ai, na jumpah ibagas huta ai.

²⁶ Iboan si Nebusaradan, kopala ni pangawal ai ma sidea hu Ribla, hu lobei ni raja ni Babel.

²⁷ Ihatahon raja ni Babel ma sidea bogbogan matei i Ribla, i tanoh Hamat. Sonai ma parbuang ni Juda hun tanohni.

²⁸ In ma buei ni bilangan ni bangsa, na binoan ni si Nebukadnesar hu habuangan: Bani pasapuluhpitu-tahunkon tolu ribu dua puluh tolu halak bangsa Juda.

²⁹ pasapuluhualuh-tahunkon dob raja si Nebukadnesar, iboan do hun Jerusalem ualuh ratus tolu puluh dua halak;

³⁰ dua puluh tolu tahun dob raja si Nebukadnesar, ibuang si Nebusaradan, kopala ni pangawal ai do

pitu ratus ompat puluh lima halak Juda; tumpu haganup: ompat ribu onom ratus halak.

³¹ Tapi patolupuluhpitu-tahunkon dob tarbuang si Joyakin, raja ni Juda, ari dua puluh lima bulan sapuluh dua, iidopi si Ewil-Merodak, raja ni Babel ma si Joyakin, raja ni Juda; bani tahun parlobei dob raja ia ipadarat ma ia hun tutupan.

³² Basar do ia marsahap pakonsi, anjaha gijangan do ibahen hundulanni marimbang raja-raja na rap pakonsi i Babel.

³³ Bulih do ia mananggali pakeian tutupanni ai, anjaha sapanganan do ia tongtong rap pakon raja ai, sadokah manggoluh ia.

³⁴ Anjaha siap arian do ibere Raja Babel bani bohalni, songon na dob tinotapkon bani, barang sadiha na porlu bani, sadokah manggoluh ia das hubani na rotap hosahni.

Tangis-tangis

Tarulang Jerusalem, Seng dong na Mangayakisi

- 1** ¹ Aih, lungunni in hundul huta in, sonin riahni hinan! Gabe doskon na mabalu do ia, na timbul hinan i tongah-tongah ni bangsa-bangsa! Na manggomgomi nagori-nagori hinan, hape gabe sibere sohei.
- ² Sai tangis-tangis do ia borngin, humaridei iluhni bani huyumni; seng dong humbani na mangkaholongisi na mangapohisi, marbalik do ganup hasomanni, gabe munsuh do sidea bani.
- ³ Tarbuang do Juda halani pangarsik-arsikon ampa halani parjabolonon. Marianan do ia nuan i tongah-tongah ni bangsa-bangsa, seng jumpahsi parsaranan; Haganup na mangayak-ayaksi manjumpahisi bani na tarsosak ia.
- ⁴ Marhoru do dalan laho hu Sion, halani seng dong halak na roh marpesta; lungun do haganup horbanganni, marhoih malim-malimni; pusok do uhur ni anak boruni, anjaha ia sandiri paet pangahapanni.

- ⁵ Imbangni do gabe pangopalai bani, mardohar do munsuhni, halani ibahen Jahowa ia marsitaronon binahen ni buei ni hajahatonni; misir do ganup niombahni, hona tangkap i lobei ni imbangni.
- ⁶ Laho do humbani boru Sion ganup hamuliaonni, songon ursa na so dapotan gagaton do kopala-kopalani; mandatei do sidea mardalan i lobei ni na mardakdaksi.
- ⁷ Taringat do Jerusalem bani panorang hadoyukonni ampa hamarsikonni, bani ganup hamuliaonni na adong bani humbani na basaia. Sanggah madabuh bangsani hubagas tangan ni munsuhni, anjaha seng dong pangurupi bani, mangkawah do munsuhni bani anjaha mandoruni halani parboisni.
- ⁸ Banggal tumang do dousa ni Jerusalem, halani ai do ase hagigi ia. Haganup na pasangapkonsi pahirihonsi, halani iidah sidea hailaonni; anggo ia marhoih do anjaha ipadaoh bohini.
- ⁹ Longkot do habutakonni bani rambu ni hiouni, seng ipingkirhon pasal ujungni; bagas do hadabuhanni, seng dong na mangapohisi. Tatap Ham ma ale Jahowa hadoyukonkin, ai mangeljeng do munsuhku.
- ¹⁰ Idurdurhon munsuh do tanganni dompak arta-arta na maharga ijai; tongon, iidah

do parbegu masuk hubagas ianan-Ni
na mapansing ai, ai ma sidea na dob
nilarang-Mu, ase ulang masuk sidea bani
kuria-Mu.

- ¹¹ Haganup bangsani marhoih mangindahi
sipanganon, ibere sidea do ugas-ugasni
halani sipanganon laho mangudut hosahni.
“Tonggor Ham ma, ale Jahowa kawahkon
Ham ma, sonaha hiri ni ahu!
- ¹² Roh ma nasiam sagala pamontas! Kawahkon
anjaha tonggor ma, atap dong do sitaronon
na songon sitaronon na sogop bangku
on, na pinaroh ni Jahowa bani panorang
pargajag ni ringis-Ni.
- ¹³ Humbabou do isuruh apuy, das hubani
holi-holingku do masuk ai. Itaon do jarot
i lobei ni naheihu; itarik do ahu hupudi;
ibahen do ahu marhahurangan, boritan
lalab.
- ¹⁴ Borat do pasangan ni dousangkai bangku, na
isangkutkon Jahowa marhitei tangan-Ni;
inahkon do ai bani tangkuhukku, bois do
gogohku ibahen; iondoskon Tuhan do ahu
hubagas tangan ni halak na so tarimbang
ahu.
- ¹⁵ Ilotloti Tuhan do sagala siparkuasa na i
tongah-tongahku; idilo do sada humpulan
mangimbang ahu, laho manropuki garama

na adong bangku. Irojati Tuhan do anak boru, boru Juda songon bani pangilangan anggur.

¹⁶ Tangis do ahu halani ai, marabur-abur iluh do matangku; ai daoh do humbangku na boi mangapoh ahu, na pasabou uhurhu. Bois do anakku, halani monang munsuh.

¹⁷ Ipaherbang Sion do tanganni, tapi seng dong na mangapohi. Iparentahkon Jahowa do dompak Jakob, simbalogni gabe imbangni, gabe hagigi do Jerusalem i tongah-tongah ni sidea.

¹⁸ Pintor do anggo Jahowa, ai hulawan do hatani; tapi tonggor ma, ale sagala bangsa, idah ma sitarononkin! Tarboan do hu habuangan anak boru ampa garama na dong bangku.

¹⁹ Dilo-dilo do ahu bani na mangkaholongi ahu, tapi itipu sidea do ahu. Malim-malim ampa pangintuaingku ibagas huta in marmateian do; tongon, pindah-pindah do sidea bani sipanganon, tapi seng jumpah sidea.

²⁰ Tonggor Ham ma, ale Jahowa, sonaha sosakku; lutu do tonduyhu ibagas, anjaha rusak do uhurhu, halani manlawan ahu; podang do na mamunuhi i darat, sampar ibagas rumah.

²¹ Tonggor Ham ma hoih-hoihku, seng dong na mangapoh ahu. Haganup munsuhku manangar parsedangku; megah do sidea

halani sonai ibahen Ham bangku. Paroh Ham ma ari na dob nilumbahon-Mu, ase masa bani sidea songon na masa bangku.

- ²² Sai das ma hu lobei-Mu haganup hajahaton ni sidea, anjaha bahen Ham bani sidea songon na binahen-Mu hu bangku, halani haganup panlanggaronku; tongon buei do hoih-hoihku, anjaha mandatei do uhurhu.”

Jahowa do na Palopaskon Masa Hasedaon bani Bangsa-Ni

- 2** ¹ Aih, irungkub Tuhan do bani hambun boru Sion halani ringis-Ni. Isampakkon Tuhan do hun langit hu tanoh hamuliaon ni Israel, seng idingat sidogeian ni nahei-Ni bani ari panggila-Ni.
- ² Iparseda Tuhan do, seng maralang-alang, haganup ianan ni Jakob; anjaha iparreong do ibagas gila-Ni benteng-benteng ni boru Juda; isampakkon do hu tanoh, ipabutak do harajaon ai pakon raja-rajani.
- ³ Iponggholhon do ibagas pargajag ni gila-Ni haganup kuasa ni Israel; itarik do humbani sidea tangan siamun-Ni bani parroh ni munsuh ni sidea; gajag do la i tongah-tongah ni Jakob songon apuy na mangankon inggot.
- ⁴ Isintak do sior-Ni songon munsuh, iondamkon tangan siamun-Ni; songon imbang do la

mambunuh haganup na hinarosuhkon ni
mata-Ni, iuseihon do ibagas lampolampo ni
boru Sion ringisni na songon apuy ai.

⁵ Gabe doskon munsuh do Tuhan, ibondut
do Israel ganup; iparseda do haganup
istanani, iparreong benteng-bentengni;
mardapot-dapot do ibahen sitaronon ampa
pusok ni uhur bani boru ni Juda.

⁶ Idogei-dogei do lampolamponi songon juma,
iparseda ianan parpestaan bani. Maronti do
ibahen Jahowa i Sion pesta ampa ari Sabat,
anjaha iambukkon raja ampa malim ibagas
gila-Ni.

⁷ Iambukkon Tuhan do anjapanjapni, magigi
uhurni bani iananni na mapansing in;
iondoskon do hubagas tangan ni munsuh
tembok ni istana-istana; tarbogei do ibagas
rumah ni Jahowa surak-surak ni sidea
songon bani ari pesta.

⁸ Domma isurahon Jahowa sihol parsedahon
tembok ni boru Sion; isibari do marhitei tali
sibar-sibar, anjaha seng iambat tanganni
laho mansedahon; ipaturut do marhoru
batar-batar ampa tembokni, rap do ai
marsorak.

⁹ Tinob do hubagas tanoh horbanganni, iparseda
anjaha iparponggol do oruk-orukni; rajani
pakon kopala-kopala i tengah-tengah ni

parbegu do; seng dong be titah anjaha
nabi pe seng dapotan pangungkabon be
humbani Jahowa.

¹⁰ Sip do hundul i tanoh pangintuai ni boru
Sion, inahkon abuan bani uluni, anjaha
isorungkon hiou guni; unduk do hu tanoh
ulu ni anak boru ni Jerusalem.

¹¹ Marholok do matangku ibahen tangisku,
lutu do huahap ibagas; usei do hu tanoh
uhurhu parbagas ai halani parbois ni boru
ni bangsangku; ai mandatei do dakdanak
pakon na inuman i dalan-dalan.

¹² Ihatahon bani inang ni sidea: Ija do indahan
pakon anggur? sanggah na mandatei sidea
songon halak na ugahan i dalan-dalan ni
huta in, bani na laho rotap hosahni sidea
ibagas abingan ni inangni.

¹³ Aha ma hatahononku bani, bani aha ma
umpamahononku ho, ale boru Jerusalem?
Aha ma pausihonku bam laho mangapoh
ho, ale anak boru, boru Sion? Ai songon
bolag ni laut do hasedaonmu, ise ma na boi
pamalum ho?

¹⁴ Nabi-nabimu ijahai hubam ladung pakon
tipu; seng ipatalar sidea salahmu laho
pasuangkon ho, tapi ipajahahon do bam
panonggoran ladung ampa na pakahouhon.

- ¹⁵ Martopap tangan do pasal ho sagala sipamontas, mandoruni anjaha iupir-upirhon uluni bani boru Jerusalem: Ai on do huta na ginoran ai, na tang sijengesan anjaha olob-olob ni ganup dunia on?
- ¹⁶ Ipangangang sagala munsuhmu do babahni dompak ho, mandoruni anjaha harat-harat ipon do sidea, nini: Domma maseda ia ibahen hanami. Tongon on ma ari na sinurahonami; domma jumpah hanami, domma iidah hanami.
- ¹⁷ Ipasaud Jahowa do na sinurahon-Ni, idalankon do lumba-lumba-Ni; songon na dob hinatahon-Ni sapari, iboiskon do ai seng maralang-alang. Ibahen do munsuh ai marmalas ni uhur mangidah ho, anjaha ipatimbul do kuasa ni imbangmu.
- ¹⁸ Dilo-dilo ma ho bani Tuhan in! Tangis ma ho ale boru Sion. Paturut ma iluhmu mabaor songon bah arian pakon borngin, ulang ma ho marsaran, ulang pasohkon matamu.
- ¹⁹ Jongjong ma, tangis ma ho borngin, sanggah mulai panorang marjaga; useihon ma uhurmu songon bah i lobei ni Tuhan, paherbang ma tanganmu martonggo Bani pasal goluh ni niombahmu, na mandatei halani lohei i topi ni ganup dalan.

- ²⁰ Tonggor ma, ale Jahowa, anjaha kawahkon Ham ma! Bani ise onnga ibahen Ham sonai? Mase ma panganon ni parinangon ginomparni, dakdanak na pinagodang-godangni? Mase ma hona bunuh malim pakon nabi bani ianan na mapansing ni Tuhan?
- ²¹ Radag do bani orbuk ni dalan-dalan dakdanak age na matua, rasei do ibahen podang anak boru ampa garama; ibunuh Ham do sidea bani panorang ni gila-Mu, isayati Ham do sidea seng maralang-alang.
- ²² Iontang Ham do na manonggoti ahu liot, songon na laho marpesta, seng dong na maluah atap na bansah bani ari parringis ni Jahowa. Sidea na huombah-ombah ampa na hupagodang-godang, bois do ibahen munsuhku.

**Adong do Haluahon humbani Jahowa
halani Hinabuei ni Idop ni Uhur-Ni**

- 3** ¹ Ahu ma sada halak na dihut mangahapkon na maborit marhitei pukul-pukul ni ringisni.
- ² Ialai anjaha itogu do ahu bani na golap, na so dong sinalsal.
- ³ Tongon sai dompak ahu do itujuhon tanganni, marnunut-nunut layur ari.

- ⁴ Royut do ibahen angkulangku pakon
hulingkulingku, anjaha iparpongol
holi-holingku.
- ⁵ Ipajunjun do dompak ahu inggot na mapaet
ampa hasunsahan.
- ⁶ Ibahen do ahu marianan ibagas hagolapan
songon halak na dob dokah matei.
- ⁷ Ibahen do tembok inggot bangku, seng
tarbahen maluah ahu; inahkon do bangku
gari na borat.
- ⁸ Porini pe dilo-dilo anjaha mangelek-elek ahu,
seng hona tangihon tonggongku.
- ⁹ Irungga do dalanku marhitei batu na niongal,
marlegot-legot do ibahen dalanku.
- ¹⁰ Songon gipul na manggompangi do la bangku,
songon singa na marponop.
- ¹¹ Itogu do ahu dompak dalan na kahou,
iparsilbak ahu, ibahen do ahu tarpunjung.
- ¹² Isintak do siorni, anjaha ipajongjong do ahu
songon sasaran ni panahni.
- ¹³ Ibahen do tolpus ronsi piah-piahku, lingkit ni
parlingkitanni.
- ¹⁴ Gabe sipartatawaan do ahu bani ganup
bangsangku, gabe sidoding-dodingkonon ni
sidea ganup ari.
- ¹⁵ Ibosuri do ahu bani na mapaet, ipainum do
bangku raru.

- ¹⁶ Ipaharatkon do bangku batu loting, ipaksahon
do ahu masuk hubagas orbuk.
- ¹⁷ Ipadaoh do tonduyhu humbani hadameion,
gabe lupa ahu bani na madear.
- ¹⁸ Jadi ningku ma: Salpu do hamuliaonku,
pangarapanku bani Jahowa.
- ¹⁹ Mardingat bani sitaronon ampa hasunsahanku,
pogu ampa rasun do ai bangku.
- ²⁰ Tongtong mardingat hujai, gabe unduk do
tonduyhu ibagas.
- ²¹ On do tong huparimbagaskon, halani ai do ase
marpangarapan ahu:
- ²² Idop ni uhur ni Jahowa do na so ra marpunsa,
seng marnarotap holong ni atei-Ni.
- ²³ Mulak ratah do ai siap sogod, banggal do
habonaron-Mu.
- ²⁴ Jahowa do rupeihu, nini tonduyhu, halani ai
Bani do ahu marpangarapan.
- ²⁵ Pardear layak do Jahowa bani halak na
martenger ni uhur Bani, bani tonduy na
mangindahisi.
- ²⁶ Dear do sipsip marpangarapan bani hatuahon
na humbani Jahowa.
- ²⁷ Dear do sada halak anggo mangusung
pasangan ia sanggah poso.
- ²⁸ Punjung ma ia hundul anjaha sip, anggo
itampeihon Tuhan ai bani.

- 29 Ipadohor ma bani orbuk pamanganni, andohar
dong ope pangarapan.
- 30 Itarehon ma huyumni bani halak sipanompas,
ronsi bosur ia bani pandorunion.
- 31 Ai seng ra Tuhan in mangambukkon halak ronsi
sadokah ni dokahni.
- 32 Ai age pe domma marhoru ibahen, holong do
use uhur-Ni romban hubani hinabuei ni idop
ni uhur-Ni,
- 33 ai sedo halani rosuh-Ni, ase iarsik anjaha
ipusoki uhur ni anak ni jolma.
- 34 Mandogei-dogei halak na tartutup i tanoh on,
35 papeletkon hak ni halak i lobei ni Sitimbulan in,
36 mangodoh halak bani parkarani, ai seng
kawahkonon ni Tuhan ai?
- 37 Ise ma, na marsahap gabe jadi ai, anggo sedo
Tuhan na mamarentahkon?
- 38 Ai lang humbani pamangan ni Sitimbulan in do
luar hamagouan ampa hatuahon?
- 39 Mase marungut-ungut jolma na manggoluh
in? Dompok dousani ma ia marungut-ungut.
- 40 Uji anjaha pareksa hita ma parlahouta, mulak
ma hita bani Jahowa.
- 41 Dear ma angkat hita uhurta ampa tanganta
bani Naibata na i surga.
- 42 Domma marbalik hanami anjaha manlawan,
seng iampuni Ham hanami.

- 43 Ringis do irungkubkon Ham Bamu, anjaha
ipardakdak Ham do hanami; ibunuh Ham do
hanami, seng maralang-alang.
- 44 Irungkub Ham do diri-Mu bani hambun, gabe
seng boi tolpus tonggo.
- 45 Ibahen Ham do hanami gabe tompoh-tompoh
ampa sihagigihonon i tongah-tongah ni
bangsa-bangsa.
- 46 Sagala munshunami pangangang babahni
dompak hanami;
- 47 hasonggotan pakon godung do mandorab
hanami, hasedaon ampa hamagouan.
- 48 Marabur-abur iluh do matangku songon
binanga halani hasedaon ni boruni
bangsangku.
- 49 Seng marnamangadi iluhku mabaor, seng
marnasoh,
- 50 paima manatap anjaha mangkawah Jahowa
hun surga;
- 51 matangku mambahen pusok ni uhurhu halani
pangahapan ni haganup boru ni hutangku.
- 52 Hona ayak-ayak do ahu songon manuk-manuk,
ibahen munshuku seng marhala.
- 53 Manggoluh do ahu iunjomkon hubagas
godung, anjaha ipargijig ahu bani batu.
- 54 Isalpui bah do ulungku, gabe huhatahon,
'Magou ma ahu!'

- 55 Dilo-dilo do ahu bani goran-Mu, Ham Jahowa,
humbani parbagasan ni godung ai;
- 56 itangihon Ham do sorangku. Ulang ma tutup
Ham pinggol-Mu dompak dilo-dilongku
ampa elek-elekku!
- 57 Roh do Ham hun dohor sanggah na dilo-dilo
ahu Bamu, nimu, 'Ulang mabiar!'
- 58 Ham do, ale Tuhan, na mantinggilhon
partinggilanku, ipaluah Ham do hosahku.
- 59 lidah Ham do, ale Jahowa, odoh-odoh bangku,
pintori Ham ma ahu.
- 60 lidah Ham do sagala sura-sura pambalason ni
sidea, haganup tahi-tahini sidea dompak
ahu.
- 61 Ibogei Ham do, ale Jahowa, pandorunionni
sidea, pakon haganup tahi-tahini sidea
dompak ahu.
- 62 Sahap-sahap ni imbangku ampa pingkiran ni
sidea roh mandorab ahu ari-ari.
- 63 Sanggah na hundul sidea atap jongjong,
tonggor Ham ma, ahu do gabe doding-
doding bani sidea.
- 64 Ham ma na mambalaskon bani sidea, ale
Jahowa, romban hubaniambahenan ni
tanganni.
- 65 Ham ma na pahengkeng uhur ni sidea,
papa-Mu ma mangonai bani sidea.

⁶⁶ Ham ma na mardakdak sidea ibagas gila-Mu,
anjaha Ham ma na mamboiskon sidea hun
toruh ni langit-Mu, ale Jahowa!”

Borat ni Uhum na Mangonai bani Sion

- 4** ¹ Aih, gabe birong do omas, mubah rupa ni
omas pitah ai! Mambur merap batu na
mapansing ai bani topini ganup dalan!
- ² Anak ni Sion na marmulia ai, na maharga
songon omas pitah, gabe songon hudon
tanoh do sidea ihira, jadi-jadian ni sitopa
hudon.
- ³ Gari sorigala ibere do bagodni, anjaha ipainum
do anakni, tapi anggo boru ni bangsangku
domma gabe jahat, doskon burung unta na i
halimisan.
- ⁴ Longkot do dilahni na inuman bani langit-
langitni halani horahni, mangindo indahan
do dakdanak, hape seng dong na mambere
bani sidea.
- ⁵ Halak sipangan na mantin hinan, matei
gayuran i alaman. Halak sipakei hiou sitora,
martibalan bani tompoh-tompoh.
- ⁶ Dousani boruni bangsangku banggalan do ai
ase dousa ni Sodom, na pinarseda ibagas
sangkidop mata, seng pala dais tangan.
- ⁷ Na sangap-sangap ai, na pitahan humbani
salju, na lopakan ase dadih, na marbadan

- gergeran humbani batu intan, na marrupa
songon batu intan sapir,
- ⁸ tapi sonari birongan do rupa ni sidea ase
tampar apuy, seng tartandai be sidea bani
dalan-dalan; longkot mando hulingkulingni
bani holi-holini, horah songon soban-soban.
- ⁹ Sonangan do sidea ai, na matei binahen ni
podang, ase sidea ai, na gayuran, na matei
marsik, halani seng dong sipanganon hun
ladang.
- ¹⁰ Parinangon siparholong manlompah anakni
sandiri; sidea do gabe sipanganon
bani sidea, sanggah parboisni boru ni
bangsangku.
- ¹¹ Ipadas Jahowa do gila-Ni, iuseihon do gajag
ni ringis-Ni; ipagara do apuy i Sion, na
mamboiskon das ronsi onjolanni.
- ¹² Seng porsaya raja-raja ni tanoh on atap pangisi
ni dunia on ganup, paboa masukan ni
munsuh atap imbang do horbangan ni
Jerusalem.
- ¹³ Halani dousani nabi-nabi ampa hajahatonni
malim-malim do ai, ai ma na manduruskon
darohni halak parpintor ibagas ai.
- ¹⁴ Mawat-awat do sidea, mapitung i dalan-dalan,
marlapu-lapu daroh tumang, gabe seng
dong na pag manjamah hiou ni sidea.

- ¹⁵ Misir! Mabutak! Dilo-dilo halak bani sidea.
Misir! Misir! Ulang jamah! Lintun do sidea
anjaha mawat-awat. Ihatahon halak do i
tongah-tongahni bangsa-bangsa: Seng bulih
be sidea ijon!
- ¹⁶ Jahowa do na mangerap sidea, seng be
idompakkon sidea; seng hona parduli be
malim, seng dong be, na malang dompak na
matua.
- ¹⁷ Tongtong do kawah-kawah matanami
bani pangurupion, tapi soya-soya do;
manatap-natap do hanami dompak sada
bangsa, na so boi mangurupi hanami.
- ¹⁸ Intei do sidea bani parlangkahnami, gabe seng
boi meret hanami i alamannami. Dohor
mando ujungnami, das ma ari-arinami;
tongon jumpah ma ajalnami.
- ¹⁹ Dorasan do na mardakdak hanami ase lali na i
awang-awang. Ipardakdak do hanami i atas
dolog, igompangi i halimisan.
- ²⁰ Hosah hagoluhan bennami, ai ma na mininakan
ni Jahowa, dapot ibagas godung ni sidea.
Nini uhurnami: Itoruh ni linggomni,
manggoluh ma hanami i tongah-tongah ni
bangsa-bangsa.
- ²¹ Marolob-olob anjaha marmalas ni uhur ma,
ale boru Edom, na marianan i tanoh Us!
Tapi age hubam das do panginuman in

gabe mabuk ma ho, anjaha talanjanganmu dirimu.

- ²² Salosei ma uhum halani hajahatonmu, ale boru Sion, lang be paturutonni tarbuang ho; tapi hajahatonmai, ale boru Edom, balaskononni do, patidakonni do dousamu.

Pangindoan bani Jahowa ase Ipasuang Sion

- 5** ¹ Ingat ham ma, ale Jahowa, na masa bennami; idah anjaha mangkawah ma Ham bani habadoronnami!
- ² Ondos bani halak na legan do parbagianannami, rumahnami bani bangsa na legan.
- ³ Tading maetek do hanami, lang marbapa be, gabe hira na mabalu do inangnami.
- ⁴ Maningon manggalar do hanami bani bahnami, anjaha sobannami maningon bolionnami do.
- ⁵ Tampei pasangan bani tangkuhuknami, hona pardakdak do hanami; loja do hanami, seng ipalopas marsaran.
- ⁶ Hu Masir do isurdukkon hanami tangannami, hu Assur, ase sungkupan sipanganon hanami.
- ⁷ Mardousa do ompungnami, anjaha seng dong be sidea; hanami do mamorsan salah ni sidea.
- ⁸ Jabolon do na manrajai hanami, seng dong na paluahkon hanami humbani kuasa ni sidea.

- ⁹ Mangajamkon hosah hanami mangalop
sipanganonnam, halani podang i halimisan.
- ¹⁰ Milas do hulingkulingnam songon tataring,
halani panutung ni milas ni lohei.
- ¹¹ Hona butakan do naboru i Sion, anak boru i
huta-huta ni Juda.
- ¹² Kopala-kopala hona gantung marhitei tangan
ni sidea; partua-partua seng ipasangap.
- ¹³ Ipaksa do garama mangkorja bani pandudaan,
dakdanak mangkatargompang manarui
soban.
- ¹⁴ Maronti do partua-partua martumpu i
horbangan, anjaha na maposo seng be
marhusapi.
- ¹⁵ Mangadi do malas ni uhurnami; mubah
tortornami gabe tangis-tangis.
- ¹⁶ Madabuh do sortali humbani ulunami; bursik
do hanami halani dousanami!
- ¹⁷ Halani ai do ase maborit uhurnami, halani ai
do ase solong matanami,
- ¹⁸ halani Dolog Sion, na dob tarulang ai; sorigala
mando mardalani ijai.
- ¹⁹ Tapi Ham, ale Jahowa, ronsi sadokahni
dokahni do manrajai; totap do paratas-Mu
marsundut-sundut.
- ²⁰ Mase ma lupa Ham lalab bennami, mase ma
sonin dokahni itadingkon Ham hanami?

- ²¹ Boan Ham ma hanami, ale Jahowa, mulak
Bamu, ase saud hanami mulak! Pabayu Ham
ma ari-arinami songon na ijia!
- ²² Mintor mambur sonin ma hanami paturuton-
Mu? Ai seng marsibar gila-Mu bennami?

Hesekiel

Ipatalar Jahowa Hamuliaon-Ni bani Nabi Hesekiel

1 ¹ Bani tahun patolupuluhkon, bani bulan ompat, ari lima bulan ai, sanggah i tongah-tongah ni na tarbuang ai ahu i topi ni Bah Kebar, buha ma langit, gabe huidah ma pangungkabon humbani Naibata.

² Palima-arihon bani bulan ai, ai ma palima-tahunkon dob tarbuang Raja Joyakin,

³ roh ma hata ni Jahowa hubani Malim Hesekiel, anak ni si Busi, i tanoh ni halak Kasdim, i lambung ni Bah Kebar; tampei do tangan ni Jahowa bani ijai.

⁴ Sanggah na mangkawah ahu, tonggor ma, logou na marhaba-haba roh hun utara ampa hambun na banggal marhasoman apuy na marjimbur-jimbura anjaha marsinondang inggot, anjaha i tongah-tongah ni apuy ai adong do songon tombaga na marlinang-linang.

⁵ Anjaha i tongah-tongahni ai adong do usihan ni ompat sipargoluh; sonon do rupa ni sidea: Usih bani jolma do sidea.

⁶ Tapi ompat do bohi ni sidea bei, anjaha ompat bei do habong ni sidea.

⁷ Pintor do nahei ni sidea, anjaha jampal ni sidea songon jampal ni anak ni lembu do; marlinang-linang do ai songon tombaga pinolas.

⁸ I toruh ni habong ni sidea bani lambung ni na ompat ai martangan ni jolma do sidea. Na ompat ai sonon do bohi ampa habong ni sidea:

⁹ Marsiogosan do habong ni sidea; sanggah mardalan sidea, seng marhusor sidea, ganup do sidea manlangkah pintor hu lobei.

¹⁰ Ia rupa ni bohi ni sidea sonon do: Hampit lobei songon bohi ni jolma bani na ompat ai, hampit siamun songon bohi ni singa bani na ompat ai; hampit sambilan songon bohi ni lembu bani na ompat ai, anjaha hampit pudu, songon bohi ni manuk-manuk nanggordaha bani na ompat ai.

¹¹ Herbang dompak datas do habongni sidea ai; dua bei habong ni sidea marsiogosan, na dua nari manrungkub badan ni sidea.

¹² Ganup do sidea laho pintor hu lobei, huja laho Tonduy ai, hujai do laho sidea, seng marhusor sidea sanggah na laho ai.

¹³ I tongah-tongah ni sipargoluh ai adong do na gara songon narnar ni batubara, songon rigapan na hujai-hujon i tongah-tongahni sipargoluh ai. Lihar do apuy ai, anjaha luar do hilap humbagas apuy ai.

¹⁴ Marhujai-hujon do sipargoluh ai, songon hilap na mardejeb-dejeb.

¹⁵ Jadi sanggah na mangkawah ahu bani sipargoluh ai, tonggor ma, adong do sada galapang i tanoh, i lambung ni sipargoluh ai, i lobei ni na ompat ai.

¹⁶ Ia rupa ni galapang ai ampa rumangni songon parlinang-linang ni mata intan Tarsis do, dos do rupani na ompat ai, tapi popouni songon na i tengah-tengah ni galapang na sada do na sada nari idahon.

¹⁷ Dompok deisa na ompat ai do sidea laho, seng marhusor sidea bani na laho ai sidea.

¹⁸ Gijang do giling-gilingni ai, gok mata do ganup giling-gilingni ai inggot bani na ompat ai.

¹⁹ Anggo mardalan sipargoluh ai, mardalan ma galapang ai i lambung ni sidea; anggo naik sipargoluh ai hun tanoh, naik ma homa galapang ai.

²⁰ Atap huja laho Tonduy ai, hujai ma laho sidea, anjaha galapang ai naik rap pakon sidea, ai ibagas galapang ai do Tonduy ni sipargoluh ai.

²¹ Anggo laho sidea, laho ma on; anggo maronti sidea, maronti ma on; anggo naik sidea hun tanoh, naik ma galapang ai rap pakon sidea; ai ibagas galapang ai do Tonduy ni sipargoluh ai.

²² Ibabou ni ulu ni sipargoluh ai adong do na songon langit, marsinondang songon kristal, ipaherbang ibabou ni ulu ni sidea.

²³ Anjaha i toruh ni langit ai do herbang habongni sidea pintor, marsiogosan na sada hubani na sada, dua bei do habongni manrungkub badanni.

²⁴ Sanggah bingkat sidea, hubogei do habong ni sidea mardongos songon parhasak ni bah banggal, songon sora ni Pargogoh Na So Tarimbang, sora na mariah usih songon sora ni bala; anggo sonto sidea, ipahirput sidea ma habongni.

²⁵ Jadi roh ma sora hun langit, i babou ni ulu ni sidea ai; anggo sonto sidea ipahirput sidea do habongni.

²⁶ Anjaha i atas ni langit, na i babou ni ulu ni sidea ai, adong do sada paratas, rupani songon batu intan sapir; anjaha na hundul i atas ni na songon paratas ai, mausih do bani rupanijolma.

²⁷ Anjaha humbani na songon binongeini ai hu atas huidah do marhilap-hilap songon tombaga, songon rupani apuy na hinondor inggot; anjaha humbani na songon binongeini ai hu toruh, huidah do songon apuy, anjaha adong do sinalsal inggot Bani.

²⁸ Songon rupa ni halibitongan bani hambun sanggah roh udan, sonai do rupa ni sondang ai inggot. Ai ma rupa ni usihan ni hamuliaon ni Jahowa. Dob huidah ai, manrogop ma ahu, gabe hutangar ma sora na marsahap.

**Parsuruh ni Naibata bani si
Hesekiel Pasingatkon Bangsa ai**

2¹ Jadi nini ma hu bangku, “Ale anak ni jolma, jongjong ma ho bani naheimu, ase marsahap Ahu bam!”

² Sanggah na marsahap ai la bangku, masuk ma Tonduy ai hu bangku, lanjar ipajongjong ma ahu bani naheihu, jadi hutangihon ma la na marsahap ai bangku.

³ Anjaha ihatahon ma hu bangku, “Ale anak ni jolma, Husuruh do ho bani halak Israel, bani bangsa sipanlawan, na manlawan dompak Ahu; sidea ampa ompungni sidea sai marbalik do hun Bangku ronsi sadari on.

⁴ Hubani anak parbohi na mapir ampa paruhur na hengkung do ho Husuruh, anjaha hatahon ma hubani sidea, “Sonon do hata ni Tuhan Jahowa.

⁵ Atap ra sidea manangihon, atap manjua sidea manangihon (*ai bangsa sipanlawan do sidea*), tapi botohon ni sidea ma na adong do nabi i tengah-tengah ni sidea.

⁶ Tapi anggo ho, ale anak ni jolma, ulang ho mabiar bani sidea, ulang gobir ho mambogei hata ni sidea, age pe liot bam duri pakon tatada anjaha marianan ho i tengah-tengah ni gansip golang; ulang gobir ho mambogei hata ni sidea, anjaha ulang ho mabiar mangidah sidea, ai bangsa sipanlawan do sidea.

⁷ Hatahon ma hatang-Ku bani sidea, atap ra sidea manangihon atap lang, ai bangsa sipanlawan do sidea.

⁸ Tapi anggo ho, ale anak ni jolma, tangihon ma na Huhatahon bam, ulang ma ho manlawan songon bangsa sipanlawan in. Buha ma pamanganmu, anjaha pangan ma aha na Hubere bam.”

⁹ Anjaha sanggah mangkawah ahu, tonggor ma, sada tangan durdur bangku, anjaha ibagas adong sada surat gulungan.

¹⁰ Jadi ipaherbang ma ai i lobeihu, anjaha marsurat do ai angkup lopah; tarsurat do ijai hata tangis-tangis, hoih-hoih ampa bursik-bursik.

3¹ Dob ai ihatahon ma hu bangku, “Ale anak ni jolma, pangan ma na dapot ho in; pangan ma surat gulungan in, anjaha laho ma ho, marsahap ma ho bani halak Israel.”

² Jadi hupatanggak ma babahku, gabe ibere ma hu bangku surat gulungan ai ase hupangan.

³ Ihatahon ma hu bangku, “Ale anak ni jolma, bondut ma gulungan on na Hubere bam, anjaha bosuri ma boltokmu bani in.” Jadi hupangan ma ai, matobu do ai ibagas pamanganku songon manisan.

⁴ Dob ai nini ma hu bangku, “Ale anak ni jolma, laho ma ho marayak halak Israel, anjaha hatahon ma bani sidea hatang-Kin.

⁵ Ai sedo hubani bangsa parhata na legan atap parhata na so niarusan ho Husuruh, tapi hubani bangsa Israel do,

⁶ sedo hubani buei bangsa-bangsa, parhata na legan, parsahap na so niarusan. Tongon, anggo bani sisonai ho Husuruh, ra do sidea manangihon ho.

⁷ Tapi anggo halak Israel seng itangihon sidea ho, seng ra sidea manangihon Ahu; ai parbohi na mapir anjaha paruhur na hengkenng do halak Israel ganup.

⁸ Tonggor ma, Hupamapir do bohimu songon bohi ni sidea anjaha Hupatenger do pardompakanmu songon pardompakan ni sidea.

⁹ Songon batu intan, tengeran humbani batu loting, sonai do Hupatenger pardompakanmu; ulang ma ho mabiar anjaha ulang ho gobir mangidah sidea, ai bangsa sipanlawan do sidea.”

¹⁰ Ambah ni ai nini ma dompak ahu, “Ale anak ni jolma, ganup hatang-Ku, na Huhatahon bam, parimbagaskon ma ai anjaha tangihon.

¹¹ Ase laho ma, parayak ma na tarbuang in, hasoman sabangsamin, anjaha hatahon ma bani sidea, patugah ma bani sidea: Sonon do hata ni Tuhan Jahowa, atap na ra pe sidea manangihon in atap lang.”

¹² Jadi iangkat Tonduy ai ma ahu, anjaha hubogei ma i pudingku sora ni lalou na bolon, ai ma sanggah na tarangkat ai hamuliaon ni Jahowa humbani iananni,

¹³ ai ma sorani habongni sipargoluh ai sanggah na marsiogosan ampa sora ni galapang na i lambung ni sidea, na marsora songon lalou na bolon.

¹⁴ langkat Tonduy ai ma ahu, iluahon ma, anjaha misir ma ahu ibagas uhur na mapaet marhasoman ringis; anjaha tangan ni Jahowa do odoh bangku,

¹⁵ gabe das ma ahu bani halak na tarbuang ai i Tel-Abib, na i topi ni Bah Kebar. Ijai ma ahu hundul jonong i tongah-tongah ni sidea pitu ari dokahni.

Ipabangkit si Hesekiel Gabe Siparjaga Israel

¹⁶ Dob salpu na pitu ari ai roh ma hata ni Jahowa hu bangku,

¹⁷ “Ale anak ni jolma, Hupabangkit do ho gabe siparjaga bani bangsa Israel. Anggo itangar ho sada hata humbani pamangan-Ku, lumbahon ma ai bani sidea ibagas goran-Ku.

¹⁸ Anggo Huhatahon bani halak parjahat, ‘Maningon matei do ho!’ hape seng ipalumba ho ia, anjaha seng marsahap ho palumbahon halak parjahat ai bani parlahouni na masambor ai, andohar manggoluh ia, sai na matei do namin parjahat ai halani hajahatonni, tapi humbam do tungguon-Ku darohni.

¹⁹ Tapi anggo ipalumba ho do parjahat ai, hape seng ra ia manadingkon hajahatonni atap parlahouni na masambor ai, sai na matei do ia halani hajahatonni, tapi maluah do anggo tonduymu.

²⁰ Anjaha anggo itadingkon halak parpintor hapintoronni anjaha ihorjahon hagedukon, gabe hunahkon batu partolsuan i lobeini, jadi matei ia, halani na so ipalumba ho ai ia, matei do ia halani dousani, anjaha seng be ingaton hapintoron na dob hinorjahonni; tapi darohni humbam do tungguon-Ku.

²¹ Tapi anggo ipalumba ho parpintor in ase ulang mardousa, anjaha seng tongon mardousa ia, manggoluh ma ia tongon, halani na ra ia palumbaon; ho pe, ipaluah ho do tonduymu.”

²² Dob ai roh ma ijai tangan ni Jahowa hu bangku, anjaha nini dompak ahu, “Jongjong ma, laho ma ho hu pamah ai, ijai pe Ahu marsahap pakon ho.”

²³ Jadi jongjong ma ahu anjaha laho ma ahu hu pamah ai; anjaha tonggor ma, jongjong do ijai hamuliaon ni Jahowa usih songon hamuliaon na huidah i topi ni Bah Kebar; jadi manrogop ma ahu.

²⁴ Jadi masuk ma Tonduy ai hu bangku, anjaha ipajongjong ma ahu bani naheihu: Marsahap ma la hu bangku, nini ma, “Laho ma, marhurung ma ho ibagas rumahmu!

²⁵ Anggo ho, ale anak ni jolma, tonggor ma, nahkonon-Ku ma bam tali, anjaha sangkuton ma ho marhitei ai, ase ulang ho boi mandarat masuk hu tongah-tongah ni sidea,

²⁶ anjaha longkot ma bahenon-Ku dilahmu bani langit-langit ni pamanganmu, ase longah ho,

gabe seng boi be pinsangonmu sidea, ai bangsa sipanlawan do sidea.

²⁷ Tapi anggo marsahap Ahu use hu bam, buhaon-Ku ma pamanganmu anjaha hatahononmu ma hubani sidea: Sonon do hata ni Tuhan Jahowa, atap ise na ra manangihon, itangihon ma, atap ise na manjua manangihon, manjua ma, ai bangsa sipanlawan do sidea.”

Igambarhon si Hesekiel Pangkubun bani Jerusalem

4¹ “Tapi anggo ho, ale anak ni jolma, buat ma bam sada batu tanoh halampung, anjaha patibal ma ai i lobeimu, anjaha uhirhon ma hujai sada huta, ai ma Jerusalem.

² Bahen ma hubuan dompak huta ai, pauli ma manara pangkubu, bahen homa tembok pangkubu dompak huta ai, sonai age tentara pangkubu ampa parugas sirongrong tembok inggot.

³ Anjaha buat ma sada bosi bolag, anjaha bahen ma ai gabe tembok bosi, parholanganmu humbani huta ai, dompakkon ma bohimu hu huta ai, sonai ma hona hubu huta ai, anjaha dorab ma ai inggot. On ma gabe tanda bani halak Israel.

⁴ Tapi anggo ho, podomi ma soding sambiloumu, anjaha hunahkon ma bam hajahaton ni Israel. Songon buei ni ari ho tibal ijai, sonai ma dokahni porsanonmu salah ni sidea.

⁵ Hutampeihon do hu bam tahun hajahaton ni sidea, bueini ihira marhitei ari, tolu ratus siah puluh ari; sonai ma dokahni porsanonmu hajahaton ni Israel.

⁶ Anjaha dobkonsi dob ibahen ho sonai, patibal ma use dirimu soding dampak siamun, anjaha porsan ma hajahaton ni halak Juda, ompat puluh ari dokahni, sada tahun ihira gabe sadari siporsanon bam.

⁷ Hubani pangkubun ni Jerusalem ai ma dampakkon bohimu marhasoman tangan na talag, anjaha manjahai ma ho dampak huta ai.

⁸ Tonggor ma, hunahkon do bam tali, ase ulang boi ho marhusor hu siamun atap hu sambilou, paima idobkon ho ari pangkubunmai.

⁹ Tapi anggo ho, buat ma bam gandum pakon jagul, kasang pakon dali, bajaurei ampa daua, anjaha nahkon ma ai hubagas sada hudon, anjaha pauli ma ruti hunjai, anjaha ai ma panganonmu sadokah tibal ho soding tolu ratus siah puluh ari dokahni.

¹⁰ Marsibar do sipanganon na boi panganonmu, ai ma dua puluh sekel sadari; marpanorang do ai panganonmu.

¹¹ Bah pe marsuhat do inumonmu, ai ma saparonom hin; marpanorang do ai homa inumonmu.

¹² Pangan ma ai marrupa ruti jagul; masak ma i lobei ni sidea i atas ni ginagat ni jolma.”

¹³ Anjaha nini Jahowa ma, “Sonai ma butak panganon ni halak Israel rutini i tongah-tongah ni sipajuh begu-begu pambuangan-Ku bani sidea.”

¹⁴ Jadi ningku ma, “Ham Tuhan Jahowa, tonggor Ham ma, seng onggga hubutaki diringku; humbani haetek-etekonku ronsi sonari seng onggga hupangan na matei-matei atap na sinoroh, anjaha gulei na mabutak seng onggga masuk ai hubagas pamanganku.”

¹⁵ Jadi nini ma dompak ahu, “Tonggor ma, ginagat ni lembu pe hubere bam gantih ni ginagat ni jolma laho pamasakkon sipanganonmu.”

¹⁶ Ambah ni ai nini ma dompak ahu, “Ale anak ni jolma, parsedaon-Ku ma parbohalan i Jerusalem; marsibar do panganon ni sidea ruti marhasoman biar; bah pe marsuhat do inumon ni sidea marhasoman gobir.

¹⁷ Hubahen pe sonai, ase hurangan ruti pakon bah do sidea, anjaha rusak sidea marsikawahan, anjaha mandatei sidea halani hajahaton ni sidea.”

Igambarhon si Hesekiel Pasal Parseda ni Jerusalem

5 ¹ “Ia ho ale anak ni jolma, buat ma bam sada podang na marot, pakei ma ai songon pisou parjambak, anjaha padalan ma ai bani ulumu pakon jambakmu; dob ai buat ma bam dasing, anjaha bagi ma jambulan ai.

² Sapartolu ma ai bani apuy i tongah-tongah ni huta ai, anggo gok ma ari pangkubun ai; anjaha na sapartolu nari buat ma ai anjaha tampuli ma inggot huta ai; dob ai na sapartolu nari purpurhon ma bani logou, anjaha Ahu manintak podang hun pudi ni sidea.

³ Anjaha buat ma otik hunjai, sangkutkon ma ai bani sisi ni bajumu.

⁴ Anjaha hunjon buat ma use otik, anjaha gijigkon ma ai hubagas apuy, anjaha tutung ma ai; hunjai ma roh apuy bani haganup halak Israel.”

⁵ Sonon do hata ni Tuhan Jahowa, “On ma huta Jerusalem, Hupajongjong do in i tongah-tongah ni bangsa-bangsa, anjaha nagori-nagori manginggotisi. *

⁶ Hape ilawan sidea do titah-Ku, jahatan humbani sipajuh begu-begu, sonai homa aturan-Ku lobih humbani nagori na manlioti sidea, ai mapas do sidea bani sagala aturan-Ku anjaha seng iparlahouhon sidea titah-Ku.”

⁷ Halani ai sonon do hata ni Tuhan Jahowa, “Halani jahatan hanima marparlahou marimbang sipajuh begu-begu na manlioti hanima anjaha seng ihorjahon hanima titah-Ku, anjaha seng idalankon hanima aturan-Ku, anjaha songon paraturan ni parbegu na manlioti hanima pe lang idalankon hanima,

⁸ halani ai sonon do hatang-Ku, Ahu Tuhan Jahowa, tonggor ma, Ahu pe imbangmu do; dabuhon-Ku do uhum i tongah-tongahmu, i lobei ni bangsa-bangsa.

⁹ Bahenon-Ku ma hu bam na so onnga Hubahen ope, anjaha na so bahenon-Ku be halani sagala hasamboron na hinorjahonmu.

¹⁰ Halani ai panganon ni bapa ma anakni i tongah-tongahmu, anjaha anak mangankon bapani; padalanon-Ku ma uhum bam, anjaha na teba ai hun bam, erapon-Ku do ai bani ganup deisa.

*

¹¹ Halani ai, songon sintongni manggoluh Ahu,” nini Tuhan Jahowa, “halani ibutaki ho ianan-Ku na mapansing in marhitei haganup sihagigihononkon ampa hasamboron na hinorjahonmin, Ahu pe jambakon-Ku ma ho; seng maidop be matang-Ku mangkawah bam anjaha lang be marulak-ulakan uhur-Hu. *

¹² Sapartolu humbam matei do buaton ni sampar anjaha matei gayuran i tongah-tongahmu; sapartolu radag ibahen podang inggot bam, anjaha na sapartolu nari erapon-Ku do bani ganup deisa, anjaha podang do Husintak hun pudi ni sidea. *

¹³ Jadi das ma gilang-Ku, mangonai ma ringis-Ku bani sidea, gabe sombuh Huahap; jadi botohon ni sidea ma, paboa Ahu do Jahowa na marsahap ibagas gilang-Ku, bani na Hupasogop ringis-Ku bani sidea. *

¹⁴ Anjaha bahenon-Ku do ho tarulang, anjaha gabe siapason i tengah-tengah ni bangsa-bangsa na manlioti ho, ampa i lobei ni halak na montas hun bam. *

¹⁵ Tongon, gabe siapason ampa sipahirion, gabe lumba-lumba ampa songgot-songgot do ho bani bangsa-bangsa na manlioti ho, bani na Hudabuh uhum bam ibagas gila pakon ringis ampa pinsang-pinsang na parah. (*Ahu, Jahowa do na manluarhon ai*), *

¹⁶ bani na Husiorhon bam panah ni lohei maningting, na laho mandedahon; Ahu do na maniorhon ai laho mandedahon hanima, bani na Hutambahi lohei na parah bennima anjaha Huparseda parbohalannima. *

¹⁷ Tongoskonon-Ku do bannima lohei ampa binatang-binatang, na manoroh hun bannima dakdanaknima; sampar ampa daroh niduruskon do masa bannima; parohon-Ku do podang bannima, Ahu do Jahowa na mangkatahon ai.”

Lumba-lumba Pasal Parseda ni Panumbahan

Sisombah-sombahon ampa Parsombah

6 ¹ Dob ai roh ma hata ni Jahowa hu bangku,
² “Ale anak ni jolma, dompakkon ma bohimu hu dolog-dolog ni Israel anjaha manjahai ma ho dompaksi,

³ hatahon ma, 'Ale dolog-dolog ni Israel, tangihon ma hata ni Tuhan Jahowa. Sonon do hata ni Tuhan Jahowa dompak sagala dolog ampa buntu-buntu, dompak lombang bagus ampa habungan: Tonggor ma, parohon-Ku ma bannima podang, gabe parsedaon-Ku ma panumbahannima bani ianan na gijang.

⁴ Maningon parsedaon do anjapanjapnima anjaha parropukon-Ku anjapanjap pardahupaannima; anjaha rasei bahenon-Ku halak na binunuh humbennima i lobei ni gana-gananima.

⁵ Sampakkonon-Ku do bangkei ni halak Israel i lobei ni gana-gana ni sidea, anjaha erapon-Ku do holi-holinima liot anjapanjapnima.

⁶ Bani haganup ianannima parsedaon do sagala huta anjaha parreongon panumbahannima bani ianan na gijang, ase seda anjaha marumbak anjapanjapnima, maropuk anjaha mangkabolah gana-gananima, hona rumbakkon anjapanjap pardahupaannima, anjaha bois na pinaulinima.

⁷ Radag ma halak na tarbunuh i tongah-tongahnima, gabe botohonnima ma, Ahu do Jahowa.

⁸ Tapi paturuton-Ku do deba manggoluh hun bannima, na maluah humbani podang i tongah-tongah ni bangsa-bangsa, bani na Huerap ai hanima i nagori-nagori ai.

⁹Sidea na maluah ai, ingaton ni sidea ma Ahu i tongah-tongah ni bangsa-bangsa, pambuangan bani sidea, dob Huropuki uhur parbangkison ni sidea ai, na manlembang hun Bangku, sonai mata parbangkison ni sidea ai, na mangkawah bani gana-gana ni sidea; gabe magigi ma sidea mangidah diri ni sidea sandiri, halani hajahaton na hinorjahon ni sidea, halani habutakon ni sidea ai.

¹⁰Anjaha botohon ni sidea ma, Ahu do Jahowa, seng hape na so marhala Hulumbahon hamagouan sibahenon-Kai bani sidea.”

¹¹Sonon do hata ni Tuhan Jahowa, “Martopap ma ho, injak-injakkon ma naheimu, anjaha hatahon ma, ‘Magou ma!’ Halani haganup hasamboron na hinorjahon ni halak Israel ai maningon rasei do sidea bahenon ni podang, lohei pakon sampar.

¹²Ise na daoh matei do bahenon ni sampar, anjaha ise na dohor matei do bahenon ni podang, anjaha ise na tading anjaha na bansah matei gayuran do. Sonai ma padalanon-Ku ringis-Ku bani sidea.

¹³Jadi tandaonnima ma, Ahu do Jahowa, anggo radag ma na rasei humbani sidea i tongah-tongah ni gana-gana ni sidea, inggot bani anjapanjap ni sidea, i atas ni ganup buntu-buntu, bani pakpak ni sagala dolog, i toruh ni ganup hayu na maratah, i toruh ni ganup jajabi na matabun, bani ganup panutungan dahupa i lobei ni gana-gana ni sidea.

¹⁴ Anjaha pagostongon-Ku do tangan-Ku dompak sidea laho mambahen tanoh ai halong anjaha tarulang, bani haganup ianan ni sidea, hun halimisan nari das hu Ribla. Jadi botohon ni sidea ma, Ahu do Jahowa.”

Seng Tarolati be Parroh ni Ujung ni Bangsa ai

7 ¹ Dob ai roh ma hata ni Jahowa hu bangku mangkatahon,

² “Ho ale anak ni jolma, sonon do hata ni Tuhan Jahowa pasal tanoh ni Israel: Na roh ma ujungni, ujung ni suhi-suhi na ompat ni tanoh in.

³ Sonari ma roh ajal ai bam, pasogopon-Ku ma ringis-Ku bam, anjaha uhumon-Ku ho romban hubani parlahoumu; anjaha pinsangon-Ku ho halani haganup hasamboronmu.

⁴ Seng maidop matang-Ku mangidah ho, seng holong atei-Hu, tapi uhumon-Ku do ho romban hubani parlahoumu, anjaha manginsonoh i tongah-tongahmu hasamboronmu, jadi tandaonmu ma, Ahu do Jahowa.”

⁵ Sonon do hata ni Tuhan Jahowa, “Mardapot-dapot do roh hasedaon.

⁶ Na roh ma ujungni, ujungni domma roh; domma puho na mandorab ho. Tonggor ma, roh ma!

⁷ Roh ma hasedaonmu ale pangisi ni tanoh in; domma roh panorangni, domma dohor ari ai, ari hageoron, sedo ari olob-olob, i atas dolog-dolog.

⁸On pe barah ma duruskonon-Ku ringis-Ku bam, anjaha padason-Ku gilang-Ku bam, anjaha uhumon-Ku ho romban hubani parlahoumu, anjaha mangonai bam bahenon-Ku haganup hasamboronmu.

⁹Seng maidop matang-Ku mangidah ho, seng holong atei-Hu, tapi uhumon-Ku do ho romban hubani parlahoumu, anjaha manginsonoh i tongah-tongahmu hasamboronmu. Jadi tandaonnima ma, Ahu do Jahowa sipanlonsing.

¹⁰Tonggor ma, ari ai! Tonggor ma, roh ma! Martunas do hagedukon, marbunga pangenjengon.

¹¹Timbul do siunsagakon gogoh bahen lonsing-lonsing bani hajahaton. Seng dong be na tading humbani sidea, sonai humbani habayakon ni sidea, atap humbani hadoharonni, salpu do haganup hasangapon ni sidea.

¹²Domma roh panorangni, dohor ma ari ai. Ulang ma marmalas ni uhur sipamboli anjaha jundoh sipanjual, ai gajag ni ringis do na mangonai bani haganup hadoharonni.

¹³Seng ulakan ni sipanjual be marjualan, age pe manggoluh ope sidea; ai seng tarolati be ringis dompak hadoharon ni sidea ai, anjaha seng dong be na boi manjolomi goluhni halani hajahaton ni sidea.

¹⁴Isompul pe tarompit, anjaha domma sirsir haganup ibahen, tapi seng dong na borani bingkat

hu parporangan, ai domma sogop ringis-Ku dompak haganup hadoharon ni sidea.

¹⁵ I darat, podang do na manraseihon, i huta, sampar pakon lohei, halak na i juma matei do ibahen podang, halak na ibagas huta bois do bahenon ni sampar pakon lohei.

¹⁶ Anjaha anggo adong na maluah, bani dolog-dolog ma sidea ai, haganup hutur-hutur songon kuhui i habungan, halani hajahaton ni sidea bei.

¹⁷ Haganup do tangan galek, anjaha haganup towod hitir-hitir.

¹⁸ Marhiou guni do sidea, anjaha hagobiron manrongkob sidea; habadoron do bani bohi ni sidea, anjaha hona palpal ganup ulu ni sidea.

¹⁹ Ipansampakkon sidea do pirakni hu alaman, anjaha omas ni sidea ihira songon tompoh-tompoh; ai seng boi pirak ampa omas ni sidea paluahkon sidea bani ari ringis ni Jahowa; seng tarpasombuh sidea loheini atap targoki sidea boltokni marhitei ai. Ai do na mambahen jomba sidea ibagas hajahaton ni sidea.

²⁰ Ugas-ugas ni sidea na jenges ai do mambahen gijang uhur ni sidea, ipauli sidea do hunjai ganagana ni sidea sihagigihononkon ai; halani ai do ase gabe tompoh-tompoh ai bani sidea Hubahen.

²¹ Ondoskonon-Ku do ai bani halak na legan gabe sirampason ampa bani halak parjahat na i tanoh on gabe sitabanon; butakon ni sidea ma ai.

²² Padaohon-Ku do bohing-Ku humbani sidea, ai ibutaki sidea do ianan-Ku na pansing in; jadi masukan ni panamun ma hubagas anjaha pabutakon ni sidea ma ai,

²³ hitir anjaha sursar ma bahenon ni sidea ai. Ai gok panduruson daroh do tanoh ai anjaha gok odoh-odoh do huta ai.

²⁴ Jadi parohon-Ku ma bangsa sijahatan humbani bangsa-bangsa, laho mambuati rumah ni sidea, parontihonon-Ku ma pangenjengon ni sidea ai, anjaha gabe butak ma ianan ni sidea na mapansing ai.

²⁵ Habiaran do na roh, mangindahi haluahon do sidea, hape seng jumpahsi.

²⁶ Mardapot-dapot do roh hamagouan, mardapot-dapot do roh barita na masambor. Manungkun panjahaion do sidea humbani nabi, tapi seng dong be pangajarion bani malim ampa podah bani pangintuai-pangintuai.

²⁷ Marhoru do raja, mandolei kopala-kopala, anjaha margonggong do tangan ni halak na i nagori in halani biarni. Domu hubani parlahouni do Hubahen hubani sidea, anjaha Huuhumi sidea domu hubani na patut jaloonni; jadi botohon ni sidea ma, Ahu do Jahowa.”

Panonggoran Pasal Parnaibataon na Legan na i Huta Jerusalem

8¹ Dob ai bani tahun paonomkon, bani bulan onom, ari lima bulan ai, sanggah hundul ahu i rumahku anjaha sintua-sintua ni Juda hundul i lobeihu, jadi sogop ma hu bangku tangan ni Jahowa.

² Jadi sanggah mangkawah ahu, tonggor ma, adong do sada na marrupa songonjolma, humbani na songonbinongeini ai idahon hu toruh, songon apuy do, tapi humbani binongeini ai hu atas marsinalsal do songon tombaga na marlinang-linang.

³ Jadi isurdukkon ma songon sada tangan, anjaha itangkap ma ahu bani jambulanku; iangkat Tonduy ai ma ahu hu tongah-tongah ni tanoh pakon langit, anjaha iboan ma ahu ibagas pangungkabon na humbani Naibata hu Jerusalem, bani horbangan ni alaman parbagas ai, na hampit utara; ai ma hajongjongan ni gana-gana, na patubuh simburu ni Jahowa.

⁴ Anjaha tonggor ma, jongjong do ijai hamuliaon ni Naibata ni Israel songon panonggoran na huidah i pamah ai.

⁵ Anjaha nini ma dompak ahu, “Ho ale anak nijolma, kawahkon ma dompak utara!” Jadi mangkawah ma ahu dompak utara, anjaha tonggor ma, hampit utara ni horbangan ai, ijai do jongjong

anjapanjap gana-gana, na patubuh simburu ni Jahowa.

⁶Jadi nini ma hu bangku, “Ho ale anak ni jolma, ididah ho do na binahen ni sidea ai? Hagigi bangga do na binahen ni ginompar ni Israel ijon, na mambahen misir Ahu humbani ianan-Ku na pansing in.”

⁷Jadi iarahkon ma ahu hu horbangan ni alaman ai, anjaha sanggah mangkawah ahu, tonggor ma, adong do sada lubang bani dingding.

⁸Dob ai nini ma dompak ahu, “Ho ale anak ni jolma, bahen ma lubang i dingding ai!” Jadi sanggah na mambahen lubang ai ahu i dingding ai, tonggor ma, adong do sada pintu.

⁹Nini ma hu bangku, “Masuk ma ho, anjaha tonggor ma hagigi na binahen ni sidea ijai.”

¹⁰Jadi masuk ma ahu anjaha hukawahkon ma; jadi tonggor ma, gambaran ni bagei-bagei ni sihagigihononkon, gilok-gilok, binatang ampa haganup naibata ni halak Israel, iuhirhon bani dingding ai inggot.

¹¹Anjaha i lobei ni ai, jongjong do pitu puluh halak humbani pangintuai-pangintuai ni Israel, rap pakon si Jaasania, anak ni si Sapan, i tengah-tengah ni sidea. Ganup sidea manjolom pardahupaan ibagas tanganni, anjaha timus ni dahupa ai martimpul do hu atas.

¹² Jadi nini ma dompak ahu, “Ale anak ni jolma, ididah ho do na binahen ni pangintuai-pangintuai ni halak Israel ai ibagas na golap ai, ganup ibagas kamarni na margambaran ai?” Nini sidea, “Seng ididah Jahowa hita, domma itadingkon Jahowa nagori in!”

¹³ Nini ope hu bangku, “Idahonmu ope hagigi sibanggalan na hinorjahon ni sidea.”

¹⁴ Dob ai iarahkon ma ahu bani horbangan parutara ni rumah ni Jahowa, anjaha tonggor ma, adong do ijai naboru-naboru manangisi si Tammus.

¹⁵ Jadi nini ma dompak ahu, “Domma ididah ho ai, ale anak ni jolma? Idahonmu ope sibajankonon ni ai.”

¹⁶ Dob ai iarahkon ma ahu hu alaman parbagas ni rumah ni Jahowa, anjaha tonggor ma, bani labah ni rumah ni Jahowa, i holang-kolang ni surambih ampa anjapanjap ai, adong do ijai hira-hira dua puluh lima halak dalahi, tundal bani rumah ni Jahowa, idompakkon hu hapoltakan, marsombah bani mata ni ari, dompak hapoltakan.

¹⁷ Dob ai nini ma dompak ahu, “Domma ididah ho in, ale anak ni jolma? Hampung ni in uhur ni ginompar ni Juda mambahen na mabajan sonin ijon, gabe igoki sidea do tanoh in bani odoh-odoh, anjaha ipuhoi ringis-Ku. Tonggor ma, inahkon sidea do ranting-ranting bani igung ni sidea.

¹⁸ Halani ai, padalanon-Ku ma ringis-Ku bani sidea; seng maidop be matang-Ku mangidah sidea, anjaha seng be holong atei-Hu; ipamaling sidea pe sorani bani pinggol-Hu, seng tangihonon-Ku be sidea.”

Panonggoran Pasal Uhum ni Naibata bani Pangisi ni Jerusalem

9 ¹ Dob ai ipamaling ma sorani i lobei ni pinggolhu, “Padohor hanima ma ale sidalankon uhum bani huta on, ganup marsinjata sipangagou ibagas tanganni!

² Anjaha tonggor ma, roh ma onom halak humbani horbangan parhuluan na hampit utara, ganup marsinjata sipangagou ibagas tanganni; anjaha rap pakon sidea adong do sada dalahi na marhiou silopak, na marparugas panurat bani binongeini. Jadi roh ma sidea anjaha jongjong ma i lambung ni anjapanjap tombaga ai.

³ Jadi naik ma hamuliaon ni Naibata ni Israel humbani herub ai, hasogopanni ai, hu onjolan ni labah ni rumah ai, anjaha dilo-dilo ma la bani dalahi na marhiou silopak ai, na marparugas sipanurat bani binongeini.”

⁴ Nini Jahowa ma dompaksi, “Dalani ma huta Jerusalem in, anjaha bahen ma tanda bani pardompakan ni halak na morong-orong anjaha na marhoih-koih halani haganup hasamboron na idalankon i tengah-tongahni.”

⁵ Tapi bani halak na legan ai nini do hubogei, “Siari hanima ma huta in, irik i pudini, anjaha bunuhi ma! Ulang maidop matanima, anjaha ulang adong na marholong ni atei!

⁶ Bunuhi ma anjaha boiskon ma: na ubanon, garama, anak boru, anak-anak ronsi parinangon; tapi halak na adong tanda ai, ulang kahua! Pungkah ma humbani ianan-Ku na mapansing in!” Jadi ipungkah sidea ma humbani sintua-sintua na i lobei ni Rumah Panumbahan ai.

⁷ Dob ai nini ma dompak sidea, “Butaki hanima ma Rumah Panumbahan in, anjaha goki ma alaman in bani halak na tarbunuh. Dob ai luar ma, anjaha ibagas huta in ma hanima mamunuhi.”

⁸ Jadi sanggah na mamunuhi ai sidea, anjaha tading sahalak ahu, manrogop ma ahu lanjar doruh-doruh, “Ham Tuhan Jahowa, ai boiskonon-Mu do haganup teba-teba ni Israel bani na niduruskon-Mu in ringis-Mu bani Jerusalem?”

⁹ Jadi nini ma mambalosi ahu, “Buei tumang do salah ni halak Israel ampa Juda; gok daroh na madurus do tanoh in, anjaha gok hagedukon do huta in. Nini sidea do, ‘Domma itadingkon Jahowa tanoh in, seng ikawahkon be in.’

¹⁰ Halani ai, Ahu pe seng maidop matang-Ku anjaha seng holong atei-Hu, tapi balaskonon-Ku do pambahenan ni sidea ai bani ulu ni sidea.”

¹¹ Anjaha tonggor ma, dalahi na marhiou silopak ai, na marparugas panurat ai bani binongeini, mulak ma patugahkon, nini, “Domma hudalankon songon na pinarentahkonmu bangku.”

Hamuliaon na Marianan i Atas ni Herubim ai

10 ¹ Jadi mangkawah ma ahu, anjaha tonggor ma, bani langit na i babou ni herubim ai, adong do songon batu intan sapir, tompati songon paratas, i atas ni ai.

² Dob ai nini ma dompak dalahi na marhiou silopak ai, “Masuk ma ho hu holangkolang ni galapang ai, na i toruh ni herubim ai, goki ma tanganmu bani narnar na gara ai, na i holangkolang ni herubim ai, anjaha sampakkon ma ai hu atas ni huta ai.” Jadi masuk ma ia huidah.

³ Jongjong do herubim ai hampit siamun ni Rumah Panumbahan ai, sanggah na masuk dalahi ai, anjaha igoki hambun do alaman parbagas ai.

⁴ Naik ma hamuliaon ni Jahowa humbani herubim ai hubani onjolan ni labah ni Rumah Panumbahan ai; jadi igoki hambun ma rumah ai, anjaha gok sinalsal ni hasangapon ni Jahowa ma alaman ai.

⁵ Anjaha tarbogei do sora ni habong ni herubim ai das hu alaman pardarat ai usih songon sora ni Naibata pargogoh na so tarimbang, sanggah marsahap la.

⁶ Sanggah na pinarentahkonni ai dalahi na marhiou silopak ai, “Buat ma apuy hun holangkolang ni galapang, hun tongah-tongah ni herubim ai!” Gabe masuk ma ia anjaha jongjong i lambung ni galapang ai.

⁷ Jadi idurdurhon sada herub ma tanganni hun tongah-tongah ni herubim ai dompak apuy na i holangkolang ni herubim ai, anjaha ibuat ma deba hunjai, lanjar ibere hubagas tangan ni dalahi na marhiou silopak ai; ijalo ma ai anjaha luar ma ia.

⁸ Anjaha taridah do bani herubim ai songon rupa ni tangan ni jolma, i toruh ni habong ni sidea bei.

⁹ Dob ai mangkawah ma ahu anjaha tonggor ma, adong do ompat galapang i lambung ni herubim ai, sada galapang i lambung ni ganup herub; ia rupa ni galapang ai, songon batu intan Tarsis na marlinang-linang do.

¹⁰ Dos do rupa ni na ompat ai, tapi popouni songon na i tongah-tongah ni galapang na sada do na sada nari idahon.

¹¹ Anggo bingkak sidea, laho do sidea dompak lobeini bei, seng marhusor sanggah na laho ai; huja galapang parlobei ai laho, hujai do irik laho na legan ai, seng marhusor sanggah na laho ai.

¹² Haganup badan ni herubim ai, gurungni, tangan ni sidea, habong ni sidea ampa galapang ai, gok mata do inggot, haompatsi galapang ai.

¹³ Ia galapang ai, halisungsung do goranni ai hubogei.

¹⁴ Anjaha ompat do bohi ni ganup ai: bohi na parlobei bohi ni herub, na paduahon bohi nijolma, na patoluhon bohi ni singa anjaha na paompatkon bohi ni manuk-manuk nanggordaha.

¹⁵ Anjaha naik ma herubim ai, ai ma pargoluh na dob huidah i lambung ni Bah Kebar.

¹⁶ Anggo mardalan herubim ai, mardalan ma galapang ai i lambung ni sidea; anjaha anggo ipaherbang herubim ai habongni laho naik hun tanoh, seng mosor galapang ai hun lambung ni sidea.

¹⁷ Anggo maronti sidea, maronti ma ai, anggo naik sidea, naik ma ai rap pakon sidea; ai ibagas galapang ai do tonduy ni pargoluh ai.

¹⁸ Dob ai luar ma hamuliaon ni Jahowa hun onjolan ni labah ni Rumah Panumbahan ai, anjaha sogop ma hu atas ni herubim ai.

¹⁹ Ipaherbang herubim ai ma habongni, anjaha naik ma sidea hun tanoh on huidah bani pardarat ni sidea ai; rap pakon sidea do galapang ai; anjaha maronti ma sidea bani horbangan parhapoltakan ni rumah ni Jahowa, anjaha hamuliaon ni Naibata ni Israel do ibabou ni sidea.

²⁰ Ai ma pargoluh na huidah i toruh ni Naibata ni Israel, i topi ni Bah Kebar; anjaha hutanda ma herubim do sidea hape.

²¹ Ompat bei do bohini anjaha ompat bei do habongni, anjaha i toruh ni habong ni sidea adong do tangan songon tangan ni jolma.

²² Ia rupa ni bohi ni sidea, usih do bani rupa ni bohi na huidah i topi ni Bah Kebar; ganup do sidea laho pintor hu lobei.

Uhum hubani Sipambobai na Tading i Jerusalem

11 ¹ Anjaha iangkat Tonduy ai ma ahu, anjaha iboban ma ahu hu horbangan Parhapoltakan ni rumah ni Jahowa. Anjaha tonggor ma, i labah ni horbangan ai, adong do dua puluh lima halak dalahi; anjaha huidah do i tengah-tengah ni sidea si Jeasanya, anak ni si Assur, ampa si Pelatya, anak ni si Benaya, ai ma kopala-kopala ni bangsa ai.

² Jadi nini ma hu bangku, “Ale anak ni jolma, on ma halak na manranggi hajahaton ampa na mambere podah na masambor ibagas huta on.

³ Nini sidea, ‘Ai lang baru ope ipajongjong rumah? Huta on do hudon ai, hita do gulei ai.’

⁴ Halani ai manjahai ma ho dompak sidea, manjahai ma, ale anak ni jolma!”

⁵ Jadi sogop ma hu bangku Tonduy ni Jahowa, anjaha nini ma dompak ahu, “Hatahon ma, sonon do hata ni Jahowa, sonai do ihatahon hanima, ale ginompar ni Israel, ai Hubotoh do na dong tubuh ibagas uhurnima.

⁶ Ipabuei hanima do jolma na tarbunuh ibagas huta on, anjaha igoki hanima do dalan-dalanni ai bani halak na binunuh.”

⁷ Halani ai sonon do hata ni Tuhan Jahowa, “Jolma na binunuhnima, na niraseihonnima i tongah-tongah ni huta in, sidea ma juhut ai, anjaha huta on ma hudon ai; tapi anggo hanima boanon-Ku do mandarat hun tongah-tongahni ai.

⁸ Mabiari do hanima bani podang, jadi podang do parohon-Ku bannima,” nini Tuhan Jahowa.

⁹ “Anjaha padaraton-Ku do hanima hun tongah-tongah ni huta in, anjaha ondoskonon-Ku do hanima hubagas tangan ni halak na legan, anjaha pasogopon-Ku do uhum bannima.

¹⁰ Boiskonon ni podang do hanima; uhumon-Ku do hanima bani parbalogan ni Israel; jadi botohonnima ma, Ahu do Jahowa.

¹¹ Seng gabe hudon huta ai bannima, anjaha seng hanima gabe juhut ibagas; bani parbalogan ni Israel do uhumon-Ku hanima.

¹² Jadi botohonnima ma, Ahu do Jahowa, ai seng idalankon hanima titah-Ku anjaha seng ihorjahon hanima parentah-Ku, tapi marparlahou do hanima songon bangsa-bangsa na inggot bannima.”

¹³ Jadi masa ma, sanggah manjahai ahu, matei ma si Pelaca, anak ni si Benaya. Manrogop ma ahu, hupamaling ma sorangku, anjaha ningku ma, “Ham

Tuhan Jahowa, ai boiskonon-Mu do teba-teba ni bangsa Israel in?”

Bagah-bagah hu bani Halak na dob Tarbuang

¹⁴ Dob ai roh ma hata ni Jahowa hu bangku, mangkatahon,

¹⁵ “Ho ale anak ni jolma, saninamu haganup, hasomanmu samarga ampa halak Israel haganup, sonon do pangkatahon ni pangisi ni Jerusalem pasal sidea, ‘Domma daoh sidea humbani Jahowa; hu banta do iberehon tanoh on gabe parbagiananta.’

¹⁶ Halani ai hatahon ma, sonon do hata ni Tuhan Jahowa, ‘Tongon, Ahu do mambuangkong sidea hu tongah-tongah ni bangsa-bangsa, anjaha Ahu do mangerap sidea hu nagori-nagori ai, tapi Ahu do gabe ianan hapansingon i nagori hamerapan ni sidea ai.’

¹⁷ Halani ai hatahon ma, sonon do hata ni Tuhan Jahowa, ‘Patumpuon-Ku do use sidea humbani bangsa-bangsa ai, anjaha pahumpulon-Ku do sidea humbani nagori hamerapan ni sidea ai, anjaha berehonon-Ku do tanoh Israel bani sidea.

¹⁸ Anjaha dob das sidea ijai, padaohon ni sidea ma hunjai sagala hagigi ampa sagala hasamboron.

¹⁹ Jadi berehonon-Ku ma bani sidea uhur na sada, anjaha nahkonon-Ku do tonduy na bayu hubagas sidea; padaohon-Ku do uhur batu humbani daging

ni sidea, anjaha berehonon-Ku do bani sidea uhur na marpangahapan,

²⁰ ase marparlahou sidea ibagas titah-Ku, iramotkon aturan-Ku anjaha idalankon; gabe bangsang-Ku ma sidea anjaha Ahu gabe Naibata ni sidea.

²¹ Tapi sidea, na marosuh ni uhur bani hagigi ampa na masambor, balaskonon-Ku do bani ulu ni sidea pambahenan ni sidea ai," nini Tuhan Jahowa.

Parmisir ni Hamuliaon ni Jahowa hun Jerusalem

²² Dob ai ipaherbang herubim ai ma habong ni sidea, anjaha mangihut do galapang na i lambung ni sidea ai, anjaha hamuliaon ni Jahowa do i atas ni sidea.

²³ Jadi naik ma hamuliaon ni Jahowa hun tongah-tongah ni huta ai, anjaha sogop ma i atas ni dolog na hampit hapoltakan ni huta ai.

²⁴ Anjaha iangkat Tonduy ai ma ahu, anjaha iboan ma ahu ibagas panonggoran marhitei Tonduy ni Naibata hu tanoh ni halak Kasdim, hubani na tarbuang ai. Dob ai laho ma panonggoran na huidah ai humbangku.

²⁵ Jadi huhatahon ma bani na tarbuang ai haganup hata ni Jahowa, na pinatalarni ai hu bangku.

**Igambarhon Naibata Parbuang ni Bangsa Juda
marhitei Ulah na Binahen ni si Hesekiel**

12 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, i tongah-tongah ni bangsa sipanlawan do ho marianan, na marmata laho mangidah, tapi seng marpangidah, na marpinggol laho mambogei namin, tapi seng marpambogei, ai bangsa sipanlawan do sidea.

³ “Ale anak ni jolma, pasirsir ma bam ugas-ugas hu habuangan anjaha misir ma ho arian ididah sidea. Ra mangahap do sidea, ai bangsa sipanlawan do sidea.

⁴ Padarat ma barangmu arian ididah sidea, songon ugas-ugas laho hu habuangan; tapi anggo ho bodari ma laho ididah sidea, songon na masa bani halak na tarbuang.

⁵ Runtas ma dingding ai ididah sidea, anjaha hunjai ma ho hu darat.

⁶ Usung ma ugas-ugasmu bani abaramu ididah sidea, anjaha dob golap ari boan ma ai; rungkub ma bohimu, ase ulang ididah ho tanoh in; ai Ahu do na pabingkat ho gabe tanda bani halak Israel.”

⁷ Jadi hubahen ma songon na tinonahkon ai hu bangku; hupadarat ma ugas-ugasku arian songon na laho hu habuangan, anjaha bodari huruntas ma dingding ai marhitei tanganku sandiri; anjaha

dob golap ari luar ma ahu mangusung ugas-ugaskai ididah sidea.

⁸ Anjaha patarni ai roh ma hata ni Jahowa hu bangku, Mangkatahon,

⁹ “Ale anak ni jolma, ai seng dong humbani bangsa Israel, bangsa sipanlawan in, mangkatahon hubam, ‘Aha do na binahenmin?’

¹⁰ Hatahon ma bani sidea, sonon do hata ni Tuhan Jahowa, ‘Mangonai bani raja na i Jerusalem do in pakon bani ganup bangsa Israel na i tongah-tongahni ai.’

¹¹ Hatahon ma, ‘Ahu do tanda bennima; songon na Hubahen ai, sonai do mangonai bani sidea, maningon bingkat do sidea hu habuangan.

¹² Anjaha raja na i tongah-tongah ni sidea ai maningon usungonni do ugas-ugas bani abarani sanggah na luar ibagas na golap; dingding do runtasonni laho luar. Rungkubonni do bohini, ase ulang ididah tanoh ai.

¹³ Anjaha paherbangon-Ku do puhot-Ku i babouni, anjaha dapot do ia ibahen siding-Ku. Boanon-Ku do ia hu Babel, hu nagori ni halak Kasdim, tapi seng idahon ni nagori ai, anjaha ijai do ia matei.

¹⁴ Anjaha bani sagala deisa do paerapon-Ku sagala halak na mangkasomanisi, sipangurupi bani ampa haganup balani; sintakon-Ku do podang hun pudi ni sidea.

¹⁵ Jadi tandaon ni sidea ma, Ahu do Jahowa, anggo domma Huerap sidea hu tongah-tongah ni bangsa-bangsa anjaha mambur sidea Hubahen bani nagori-nagori ai.

¹⁶ Tapi paturuton-Ku do deba tading humbani sidea, na maluah humbani podang, humbani lohei ampa sampar, ase sidea ma na mambaritahon sagala hasamboron ni sidea i tongah-tongah ni sagala bangsa, parmerapan ni sidea ai, ase itanda sidea, Ahu do Jahowa.’”

¹⁷ Dob ai roh ma hata ni Jahowa hu bangku, mangkatahon,

¹⁸ “Ale anak ni jolma, pangan ma rutimu hitir-hitir, anjaha inum ma bahmu ibagas na gobir ampa hasosakan.

¹⁹ Anjaha hatahon ma pasal bangsa na i nagori ai, ‘Sonon do hata ni Tuhan Jahowa, pasal pangisi ni Jerusalem, na i tanoh Israel, maningon hitir-hitir do panganon ni sidea ruti ni sidea, anjaha gobir inumonni bah ni sidea, ai halong ma tanoh ni sidea anjaha hona rampas sagala na dongni halani hajahaton ni sagala pangisini.

²⁰ Tarulang ma huta-huta na niiankon, anjaha lungun ia tanoh ai; jadi tandaonnima ma, Ahu do Jahowa.”

**Pinsang-pinsang bani Halak
na Mapas bani Panjahaion**

²¹ Dob ai roh ma hata ni Jahowa hu bangku, mangkatahon,

²² “Ale anak ni jolma, sahap aha do in sinahapkonnama i tanoh Israel, na mangkatahon, ‘Dokah ope ari ai, anjaha seng tongon na hinatahon ni panjahaion.’

²³ Halani ai hatahon ma bani sidea, sonon do hata ni Tuhan Jahowa, ‘Parontihonon-Ku do sahap-sahap ai, anjaha seng be luarhonon ni sidea umpama ai i Israel.’ Tapi hatahon ma bani sidea, ‘Dohor ma ari ai, anjaha saud ma ganup panjahaion.’

²⁴ Ai seng dong be hu lobeian on panonggoran sipaoto-oto atap panjahaion na pakahouhon i tongah-tongah ni bangsa Israel.

²⁵ Tapi Ahu, Jahowa sandiri ma na marsahap, anjaha hata na Huhatahon, maningon saud do ai. Seng be padokah-dokahon ai, tapi bani panorangnima ope, ale bangsa sipanlawan, marsahap Ahu anjaha pasaudon-Ku ai,” nini Tuhan Jahowa.

²⁶ Dob ai roh ma hata ni Jahowa hu bangku mangkatahon,

²⁷ “Ale anak ni jolma, tonggor ma, sidea bangsa Israel Mangkatahon, ‘Panonggoran na nididahni ai, dokah ope ai, anjaha manjahai do ia pasal panorang na daoh ope.’

²⁸ Halani ai hatahon ma bani sidea, sonon do hata ni Tuhan Jahowa, ‘Seng be sipadokah-dokahon hatang-Kin; tapi hata na dob huhatahon in pasaudon ma,’” nini Tuhan Jahowa.

Uhum bani Nabi Sipakulah-kulah

13 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, manjahai ma ho dompak nabi ni Israel; manjahai anjaha marsahap ma ho bani sidea, na manjahai humbani pingkiran ni sidea. Tangihon ma hata ni Jahowa!

³ Sonon do hata ni Tuhan Jahowa, Magou ma nabi-nabi na oto ai, na paihut-ihut tonduyni sandiri, na so tongon dong nididahni.

⁴ Songon sorigala, na marianan bani reong-reong, sonai do nabimu, ale Israel.

⁵ Seng ijaga sidea bungbung ni tembok, atap ipajongjong tembok mangondingi ginompar ni Israel, ase tahan sidea jongjong ibagas paruntolon bani ari ni Jahowa.

⁶ Sipauto-oto do panonggoran ni sidea, pakahouhon do panjahaionni. Nini sidea, ‘Sonon do hata ni Jahowa; hape sedo Jahowa na marsuruh sidea, anjaha mangarap do sidea bani parsaud ni hata ai.’

⁷ Ai lang panonggoran sipauto-oto do na nididahnima anjaha panjahaion ladung do

hinatahonnima, sanggah na hinatahonnima ai: “Hata ni Jahowa”, age pe sedo Ahu na mangkatahon ai?’

⁸ Halani ai sonon do hata ni Tuhan Jahowa, ‘Halani isahapkon hanima sipaoto-oto anjaha ladung do na nididahnima ai, halani ai, tonggor ma, imbang-Ku ma hanima,’ nini Tuhan Jahowa.

⁹ ‘Anjaha tangan-Ku ma na mangonai bani nabi na marpanonggoran sipaoto-oto ai, anjaha na manjahai ladung ai; seng masuk be sidea bani humpulan ni bangsang-Ku, atap tarsurat bani register ni bangsa Israel, anjaha seng masuk be sidea hu tanoh ni Israel, jadi botohonnima ma, Ahu do Tuhan Jahowa.’

¹⁰ Halani tongon, halani pinakahou ni sidea ai bangsang-Ku, Nini, ‘Damei do!’ Hape seng dong damei, anjaha anggo ipauli bangsa ai tembok tanoh, gabe tonggor ma, roh do sidea mangkapur ai,

¹¹ halani ai hatahon ma bani pangkapur ai, paboa maningon marumbak do ai. Roh do udan na mapor, mardabuhan udan sira-sira anjaha mangombus logou na marhaba-haba,

¹² anjaha tonggor ma, marumbak ma tembok ai. Ai lang hatahonon ni halak ma bannima, ‘Ija do hapur, na nilapuhonnima hujai?’

¹³ Halani ai sonon do hata ni Tuhan Jahowa, Parohon-Ku do haba-haba ibagas ringis-Ku, anjaha

pamasaon-Ku udan na mapor ibagas gilang-Ku ampa udan sira-sira na parah ibagas marah-Ku, laho mamboiskon ai.

¹⁴ Anjaha reongkonon-Ku do tembok na dob hinapurnima ai, padosdoson-Ku do ai pakon tanoh, gabe tidak ma onjolanni; anggo marumbak huta ai, bois ma hanima ibagas, jadi tandaonnima ma, Ahu do Jahowa.

¹⁵ Anjaha pasogopon-Ku ma ringis-Ku bani tembok ai ampa bani sipangkapuri ai, anjaha hatahonon ni halak ma bannima, 'Seng dong be tembok ai, sonai homa sipangkapuri ai,'

¹⁶ ai ma nabi-nabi ni Israel, na manjahai pasal Jerusalem, na mangambilankon damei hubani huta ai, hape seng dong damei," nini Tuhan Jahowa.

Uhum bani Naboru Sipakulah-kulah

¹⁷ "Anggo ho, ale anak nijolma, dompakkon ma bohimu manlawan boru ni bangsamu, na manjahai humbani pingkiranni sandiri; manjahai ma ho dompak sidea,

¹⁸ anjaha hatahon ma, sonon do hata ni Tuhan Jahowa, 'Bursik ma naboru, na mambahen balut-balut uti-utian bani pargolongan anjaha na mambahen tudung-tudung bani ulu ni halak na maetek ampa na godang, laho manangkap tonduy ni halak! Ai sihol pamateonnima do tonduy ni halak

humbani bangsang-Ku, anjaha na legan ipagoluh hanima halani labanima?

¹⁹ Mahiri do Ahu ibahen hanima i tongah-tongah ni bangsang-Ku halani gandum sannangging ampa ruti sansayat, marhitei na mamunuh tonduy na so patut bunuhon, ampa marhitei na pagoluhkon tonduy na so patut pagoluhon, marhitei ladungnima bani bangsang-Ku, na ra patangi-tangi ladung ai.'

²⁰ Halani ai sonon do hata ni Tuhan Jahowa, 'Tonggor ma, Ahu do imbang ni balut-balut uti-utiannima, na pinakeini ma manangkap tonduy nijolma; rotapon-Ku do ai humbani tangannima, anjaha paluahon-Ku do tonduy na pinarburunima songon manuk-manuk.

²¹ Tudung-tudungnima ai pe parrigaton-Ku do, anjaha paluahon-Ku do bangsang-Ku hum bagas tangannima, anjaha seng be songon sorohan sidea ibagas tangannima, anjaha tandaonnima ma, Ahu do Jahowa.

²² Halani ipusoki hanima uhur ni halak parpintor marhitei sipaoto-oto hape anggo Ahu seng onggahupusoki sidea, anjaha halani ipargogohi hanima parjahat in, gabe seng surut ia humbani parlahouni na masambor, laho pagoluhkon tonduyni.

²³ halani ai seng be marpanonggoran sipaoto-oto hanima, anjaha seng be manjahai ladung hanima. Paluahon-Ku do bangsang-Kin humbani

tangannima, jadi tandaonnima ma, Ahu do Jahowa.”

**Itulak Jahowa do Halak na
Marpangajaman bani Naibata na Legan**

14¹ Dob ai roh ma deba humbani pangintuai ni Israel marayak ah, anjaha hundul ma sidea i lobeihu.

²Jadi roh ma hata ni Jahowa hu bangku, mangkatahon,

³“Ale anak ni jolma, ia dalahi-dalahi on, marpangajaman bani gana-gana do uhur ni sidea ibagas, anjaha na mambahen madabuh sidea hubagas hajahaton, dohor do ipajongjong sidea i lambungni; mintor ra ma Ahu panungkunan ni sidea?

⁴Halani ai marsahap ma ho bani sidea anjaha hatahon ma bani sidea, sonon do hata ni Tuhan Jahowa, ‘Barang ise humbani ginompar ni Israel na marpangajaman bani gana-gana uhurni ibagas, anjaha ipajongjong i lambungni sibahen pardabuhan bani hubagas hajahaton, age pe sonai iparayak do nabi, jadi Ahu, Jahowa sandiri ma na marbalos bani, halani buei ni sisombah-sombahonni,

⁵ase mangahap Hubahen uhur ni ginompar ni Israel ibagas, halani na marbalik ai sidea hun Bangku, halani gana-gana ni sidea na buei ai.’

⁶ Halani ai hatahon ma bani ginompar ni Israel, sonon do hata ni Tuhan Jahowa, 'Paubah hanima ma uhurnima, tundalhon hanima ma gana-ganima, anjaha padaoh hanima ma humbani haganup hasamboronima.

⁷ Barang ise humbani ginompar ni Israel atap halak na legan, na manginsolat i tongah-tongah ni halak Israel, na paholangkon dirini hun Bangku, na marpangajaman uhurni ibagas bani gana-ganani, anjaha na pajongjong dohor i lambungni sibahen pardabuhan bani hubagas hajahaton, age pe sonai iparayak do nabi, laho manungkun haporluanni hun Bangku, jadi Ahu, Jahowa sandiri ma na marbalos bani.

⁸ Dompakkonon-Ku ma bohing-Ku mangimbang dalahi ai, bahenon-Ku ma ia gabe tanda ampa umpama, anjaha boiskonon-Ku ma ia hun tongah-tongah ni bangsang-Ku, jadi tandaonnima ma, Ahu do Jahowa.

⁹ Anjaha anggo taroto nabi ai, gabe marpodah ia, Ahu, Jahowa do na mambahen taroto ia, anjaha pagostongon-Ku ma tangan-Ku manlawansi, anjaha boiskonon-Ku ma ia hun tongah-tongah ni bangsang-Ku Israel.

¹⁰ Anjaha porsanon ni sidea ma uhum na bani sidea, dos do uhum bani nabi ai ampa uhum bani sipanungkun ai,

¹¹ase ulang be kahou ginompar ni Israel manlembang hun Bangku, anjaha ulang be ipabutak dirini marhitei ganup hajahaton ni sidea ai, tapi ase gabe bangsang-Ku ma sidea, anjaha Ahu gabe Naibata ni sidea,” nini Tuhan Jahowa.

Legan do Pambalason ni Naibata bani Dousa ni Bangsa Parbegu Marimbang Jerusalem

¹²Dob ai roh ma hata ni Jahowa hu bangku, mangkatahon,

¹³“Ale anak nijolma, anggo mardousa sada nagori dompak Ahu, marhitei na mangelukkon padan, gabe Hupagostong tangan-Ku manlawan nagori ai, anjaha Huparseda parbohalanni, Huparoh lohei, Huboiskon hunjaijolma age pinahan,

¹⁴anjaha porini pe ijai sitolu halak on, ai ma si Noak, si Daniel pakon si Job, hosah ni sidea sandiri do hansa tarpaluah sidea marhitei hapintoron ni sidea,” nini Tuhan Jahowa.

¹⁵“Ai anggo Huparoh binatang panoroh mawat-awat i nagori ai, gabe iboiskon pangisini, mambahen tarulang nagori ai, gabe seng dong halak na ra mamontas hunjai halani binatang ai,

¹⁶anjaha porini ijai pe sitolu halak ai (*songon sintongni Ahu manggoluh, nini Tuhan Jahowa*), seng anjai tarpaluah sidea anak atap boru; tapi pitah sidea do maluah, tapi tarulang do anggo tanoh ai.

¹⁷ Atap anggo Huparoh podang hu nagori ai, anjaha ning-Ku, 'Podang ma manraseihon i nagori in!' Gabe ripas Hubahen hunjinjolma age pinahan,

¹⁸ anjaha porini pe ijai sitolu halak ai (*songon sintongni manggoluh Ahu, nini Tuhan Jahowa*), seng anjai tarpaluah sidea anak atap boru, pitah sidea do hansa maluah.

¹⁹ Atap anggo Hutongos sampar hu nagori ai, anjaha Huuseihon ringis-Ku hujai marhitei na manduruskon daroh, laho mamboiskonjolma age pinahan,

²⁰ anjaha porini pe ijai si Noak, si Daniel ampa si Job (*songon sintongni manggoluh Ahu, nini Jahowa*), seng anjai tarpaluah sidea anak atap boru; hosah ni sidea sandiri do hansa tarpaluah sidea marhitei hapintoron ni sidea."

²¹ Ai sonon do hata ni Tuhan Jahowa, "Age pe Husuruh hu Jerusalem uhum-Hu na ompat in, ai ma podang, lohei, binatang panoroh ampa sampar, laho mamboiskon hunjaijolma pakon pinahan.

²² tonggor ma, dong do na tading ijai, na maluah, na mamboan anak ampa boru mandarat. Sidea ai ma na roh bannima, idahonnima ma parlahou ampa pambahenan ni sidea, gabe tarapoh uhornima, age pe Huparoh hamagouan hu Jerusalem ampa haganup na Hupasogop ai hujai.

²³ Jadi tarapoh ma uhornima halani sidea, anggo ididah hanima parlahou ampa pambahenan ni

sidea. Jadi botohonnima ma, paboa sedo na so marhala haganup na Hubahen ai bani Jerusalem,” nini Tuhan Jahowa.

**Songon hayu ni hayu anggur na so
marguna i lobei ni Jahowa**

15 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, aha do hasurungan ni hayu ni hayu anggur marimbang hayu ni hayu na legan atap ranting ni hayu anggur ai i tengah-tengah ni hayu harangan.

³ Ai adong do tarbuat hunjai parhayu? Ai ibuat halak do hunjai sangkotan bahen panangkotan ni ugas-ugas?

⁴ Tonggor ma, ibahen do ai pagara apuy; anggo domma iboiskon apuy tampakanni na dua ai, anjaha tengah-tengahni ai monsong, ai marguna ope atap bahen aha ai?

⁵ Tonggor ma, gari sanggah dear ope ai, seng ipargunahon atap bahen aha pe; samintolah ma dob monsong, mintor marguna ma ai atap aha pe?”

⁶ Halani ai sonon do hata ni Tuhan Jahowa, “Songon hayu ni hayu anggur i tengah-tengah ni hayu harangan Hubahen gabe sipanganon ni apuy, sonai do ondskonon-Ku pangisi ni Jerusalem.

⁷ Dompakkonon-Ku do bohing-Ku mangimbang sidea; age pe maluah sidea humbani apuy ai, tapi

boiskonon ni apuy do sidea; jadi botohonnima ma, Ahu do Jahowa anggo Hudompakkon ma bohing-Ku mangimbang sidea.

⁸ anjaha tarulang hubahen tanoh ai, halani mangosei padan sidea,” nini Tuhan Jahowa.

Jerusalem Ipausih bani Sada Naboru na So Bujur bani Paramangonni

16 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, pabotohkon ma bani Jerusalem sagala hasamboronni,

³ anjaha hatahon ma, sonon do hata ni Tuhan Jahowa bani Jerusalem, ‘Harohanmu ampa hatubuhanmu tanoh ni halak Kanaan do, bapamu halak Amori do anjaha inangmu boru Het.

⁴ Anjaha partubuhmu sonon do: Bani ari partubuhmu seng irotap pusogmu, anjaha seng iparidi ho bani bah laho paborsihkon ho; seng ilapuhon bam garam, barang ibalutkon bam ampan.

⁵ Ise pe lang dong na maridop ni uhur bam laho mambahen na sonai ai bam, halani holong ni uhurni bam, tapi iambungkon do ho hu darat, halani magigi do halak mangidah ho bani partubuhmu.’

⁶ Anjaha sanggah na montas Ahu hun lambungmu, anjaha huidah ho margulu-gulu ibagas darohmu, jadi ningku ma dampak ho na margulu-gulu daroh

ai, 'Manggoluh ma ho!' tongon, Huhatahon do bam, ho na margulu-gulu daroh, 'Manggoluh ma ho!

⁷ Anjaha marbanggal ma ho songon suan-suanan na i ladang. Jadi magodang ma ho, matoras anjaha jenges, punar bagod-bagodmu anjaha marganjang jambulanmu, tapi seng marhiou anjaha talanjang do ho.

⁸ Jadi sanggah na montas Ahu hu lambungmu use, anjaha mangkawah Ahu bam, tonggor ma, jumpah ma panorangni boi ma riridon ho. Jadi Hupaherbang ma hiou-Hu bam, laho manrungkub hatalanjangonmu, marbulawan ma Ahu bam, anjaha marpadan ma Ahu pakon ho,' nini Tuhan Jahowa, 'Jadi Ahu ma simada ho.

⁹ Jadi Huparidi ma ho bani bah, anjaha Huusah ganup daroh ai hun bam, Huminaki ma ho bani minak.

¹⁰ Huparhioui ma ho marhitei pakeian na marbagei rupani, anjaha Hubahen ho marsipatu kulit na maharga; Hubahen ma ho marsabing-sabing na alus ampa martudung-tudung sitora.

¹¹ Hubahen ma ugasmu buei; golang Hubahen bani tanganmu anjaha sinongkok bani borgokmu.

¹² Hubahen ma tintin bani igungmu, anting-anting bani pinggolmu, ampa sortali na majenges bani ulumu.

¹³ Jadi jenges ma ho halani omas ampa pirak ai; pakeianmu humbani hiou na alus, humbani sitora

ampa hiou na marbagei rupani. Mangan topung na alus ma ho, manisan ampa minak. Gabe jenges tumang ma ho, talup tongon gabe raja.

¹⁴ Jadi sar ma baritamu hu tongah-tongah ni bangsa-bangsa halani hinajengesmu, panjagar na Hubahen bam,' nini Tuhan Jahowa.

¹⁵ 'Tapi martenger ni uhur do ho bani hinajengesmu, anjaha mambahen parriah-riahan do ho halani tarmurmur ipabangkiskon ho do dirimu bani ganup halak na mamontas.

¹⁶ Ibuat ho do deba humbani pakeianmu, laho paulihon bam panumbahan bani buntu-buntu, anjaha ijai idalankon ho do parbangkison; na sonai ai seng onggga anjaha seng anjai masa be.

¹⁷ Ibuat ho do homa ugasmu na jenges in, na pinauli humbani omas ampa pirakku, na Hubere bam; ipauli ho do hunjai gana-gana dalahi anjaha marbangkis do ho pakonsi.

¹⁸ Ibuat ho do pakeianmu sibagei rupa ai, laho mangkioui ai, anjaha inahkon ho do minak-Ku ampa dahupang-Ku i lobeini.

¹⁹ Anjaha sipanganon, na Hubere bam, ai ma topung na alus, minak ampa manisan, na Hubere bam bahen sipanganonmu, inahkon ho do ai hu lobeini gabe galangan na misbou,' nini Tuhan Jahowa.

²⁰ 'Ambah ni ai ibuat ho do anakmu pakon borumu, na tinubuhkonmu Bangku, anjaha igalangkon ho do

sidea bani sidea, gabe sipanganonni. Ai hurang ope parbangkisonmai,

²¹ ase isayati ho ope anak-Ku, anjaha iondoskon ho sidea tutungan ibagas apuy laho manombah sidea?

²² Anjaha bani haganup hasamboronmu ampa parbangkisonmai seng idingat ho panorang haposoonmu, ai ma sanggah na so marhiou ampa na talanjang ai ho, na margulu-gulu daroh ai ho.

²³ Anjaha dob ibahen ho sagala hajahaton ai - 'bursik, bursik ma ho,' nini Tuhan Jahowa -

²⁴ ipauli ho do bam anjapanjap ianan marbangkis, anjaha ibahen ho do bam ianan na pinagijang bani ganup alaman.

²⁵ Tongon, bani ganup sirpang ni dalan ipauli ho do ianan na pinagijang, anjaha ibere ho do maseda hajengesonmu, iondoskon ho do dirimu bani ganup pamontas anjaha buei do parriah-riahan idalankon ho.

²⁶ Marriah-riah do ho homa pakon halak Masir, simbalogmu na garang ai; buei do parriah-riahan idalankon ho, mambahen manringis Ahu.

²⁷ Halani ai tonggor ma, Hupagostong do tangan-Ku manlawan ho, anjaha Huorui tanoh parbagiananmu, huondoskon do ho bani munsumu paruhur haut, ai ma boru Palistim, na maila mangidah parlahou hasamboronmu.

²⁸ Marriah-riah do homa ho pakon halak Assur, halani lape sombuh uhurmu, marriah-riah do ho

tene pakon sidea, hape lanjar do seng sombuh uhurmu.

²⁹ Lambin itambahi ho do parriah-riahonmu pakon nagori partiga-tiga ai, ai ma Kasdim, tapi age marhitei ai lanjar do seng sombuh uhurmu.

³⁰ Garang ni ai uhurmu,' nini Tuhan Jahowa, 'gabe ihorjahon ho haganupan ulah ni boru jalang na bolon,

³¹ ipauli ho do anjapanjap ianan marbangkis bani sirpang ni ganup dalan, anjaha ibahen ho do bam ianan na pinagijang bani ganup alaman; tapi sedo boru jalang na somal ho, ai itulak ho do upah.

³² Ale parinangon siparbangkis na manrohop halak na legan ganti ni paramangonni sandiri.

³³ Ibere halak do upah bani boru jalang, tapi anggo ho, ho use marsibere-bere bani hasomanmu marriah-riah, mambere sisip do ho ase roh sidea hunja-hunja mangayaki ho, laho marriah-riah pakon ho.

³⁴ Ase legan do parriah-riahonmu marimbang naboru na legan, sedo halak na mangirik-irik ho, sedo halak na mambere upah bam, tapi ho do na marsibere-bere; halani ai do, ase na legan do ho.'

³⁵ Halani ai, ale boru jalang, tangihon ma hata ni Jahowa.

³⁶ Sonon do hata ni Tuhan Jahowa, 'Halani na dob ipatalar ho hailaonmu anjaha ipatidak ho hatalanjangonmu sanggah na marriah-riah

ho pakon hasomanmu marriah-riah, ampa pangkorhon ni haganup gana-ganamu hagigi in ampa pangkorhon ni daroh ni anakmu, na ginalangkonmu bani sidea,

³⁷ halani ai, tonggor ma, pahumpulon-Ku ma haganup sihaolongi ho, hasomanmu marmalas-malas ni uhur, haganup sidea na hinaholonganmu ampa haganup sidea na hinagigihonmu. Patumpuon-Ku do sidea humbani ganup ianan, anjaha patidakon-Ku do hilaonmu bani sidea, ase ididah sidea ganup hilaonmu.

³⁸ Dabuhon-Ku do uhum bam songon na bani boru jalang ampa bani naboru siduruskon daroh; parohon-Ku do bam ringis ampa parsimburuon

³⁹ Anjaha ondoskonon-Ku do ho hubagas tangan ni sidea, parsedaon ni sidea do anjapanjap parriah-riahanmu, reongkonon ni sidea do iananmu na pinagijang ai; tanggalon ni sidea do pakeianmu, buaton ni sidea do ugasmu na majenges in, anjaha paturuton ni sidea do ho talanjang, seng marhiou.

⁴⁰ Suruhon ni sidea do ho dompak sada humpulan, pargijigon ni sidea ma ho bani batu, anjaha tampulonni do ho bani podang ni sidea.

⁴¹ Tutungon ni sidea ma rumahmu, anjaha dalankonon ni sidea ma uhum bam, i lobei ni buei naboru; parontihonon-Ku ma parriah-riahonmai, gabe seng be padalan sibere-bere ho.

⁴² Jadi sombuh ma ringis-Ku dompak ho, anjaha seng be marsimburu Ahu bam, sonang ma Ahu, seng be manringis.

⁴³ Halani seng idingat ho panorang haposoonmu, tapi ipuhoi ho do ringis-Ku marhitei ai haganup, halani ai, tonggor ma, balaskonon-Ku do pambahenanmu bani ulumu,' nini Tuhan Jahowa. 'Ai lang habutakon do ihorjahon ho tambah ni hasamboronmai?'"

Ipatotap Jahowa do Padan-Ni bani Jerusalem

⁴⁴ "Tonggor ma, haganup halak na marumpamahon ho, mangkatahon, 'Sonai inangni, sonai do boruni.'

⁴⁵ Boru ni inangmu do ho, ai ma na soganan ai bani paramangonni ampa bani anakni; sanina ni saninamu do ho, ai ma sidea na mangambukkon paramangonni ampa anak ni sidea, halani magigi. Boru Het do inangnima anjaha bapanima halak Amori.

⁴⁶ Abangmu do Samaria, ai ma na marianan pakon boruni hampit sambiloumu; anjaha anggimu, na marianan pakon boruni hampit siamunmu, ai ma Sodom.

⁴⁷ Tapi bani mungkahni seng songon parlahou ni sidea parlahoumu, seng ihorjahon ho romban hubani hagigi na hinorjahon ni sidea; tapi lang pala piga dokah, gabe samboran do ho marimbang sidea bani sagala pambahenanmu.

⁴⁸ Songon sintongni manggoluh Ahu,' nini Tuhan Jahowa, 'seng dong ihorjahon Sodom, anggimai pakon boruni songon hasamboron na hinorjahonmai ampa borumu.

⁴⁹ Tonggor ma, on do salah ni Sodom ampa boruni: Margijang ni uhur, marmewah-mewah ampa pasonang-sonangkong diri do ia ampa boruni, tapi halak na miskin ampa na masombuh, seng iurupi sidea.

⁵⁰ Margijang ni uhur do sidea, anjaha ihorjahon hasamboron i lobei-Hu, halani ai do ase Huambukkon sidea songon na ididah ho.

⁵¹ Seng ihorjahon Samaria satongah ni dousamu; bahatan do hasamboron ihorjahon ho ase ia; gabe songon na pintor do abangmai pangkorhon ni sagala hasamboron na hinorjahonmai.

⁵² Ho pe, porsan ma habadoronmai, ho na mambahen moru uhum na bani saninamai; halani bajanan do pambahenanmu ase sidea, gabe pintoran do sidea marimbang ho. Patut ma maila ho, anjaha porsan ma habadoronmin, ai gabe songon na pintor do saninamu halani pambahenanmai.

⁵³ Tapi pasuargon-Ku do sidea, ai ma Sodom pakon boruni, sonai Samaria pakon boruni, anjaha pasuargon-Ku do age ho rap pakon sidea,

⁵⁴ ase iporsan ho habadoronmu anjaha maila ho mardingat sagala pambahenanmu, anjaha

marhiteihon ni ai do sabou pangahap ni sidea ibahen ho.

⁵⁵ Ia abangmu Sodom ampa boruni mulak suang do, Samaria pe pakon boruni mulak suang do; ho pe ampa borumu mulak suang do songon sapari.

⁵⁶ Ai lang gabe umpama do abangmu Sodom ibagas pamanganmu, bani panorang hagijangon ni uhurmu,

⁵⁷ sanggah lape ipatalar hajahatonmu? Sonari gabe doskonsi do ho, gabe sirisa-risaon bani boru Sodom ampa simbalogni inggot, bani boru Palistim, na inggot mapas mangidah ho.

⁵⁸ Habutakonmai ampa hasamboronmai, maningon porsanonmu do ai,' nini Jahowa.

⁵⁹ Tongon, sonon do nini Tuhan Jahowa, 'Bahenon-Ku do hu bam domu songon na binahenmai, ai ma na mapas ai ho bani bulawan, anjaha iosei ho padan.

⁶⁰ Age pe sonai, ingaton-Ku do padan-Ku bam bani panorang haposoonmu, anjaha pajongjongon-Ku do padan sisadokah ni dokahni pakon ho.

⁶¹ Jadi taringat ma ho bani parlahoumu anjaha bador ho, anggo Huain ma abangmu pakon anggimu, anjaha Hubere sidea gabe boru bam, age pe seng maronjolan ai hubani padan na Hubere bam.

⁶² Anjaha pajongjongon-Ku do padan-Ku hu bam, ase ibotoh ho, Ahu do Jahowa,

⁶³ ase tong idingat ho ai, gabe maila ho, anjaha seng be mungkab pamanganmu halani habadoronmu, anggo Husaloseihon ma ganup binahenmai,” nini Tuhan Jahowa.

Umpama na Manggambarhon Parbalikon ni Raja Sedekia hun Babel Laho hu Masir

17 ¹ Dob ai roh ma use hata ni Jahowa hu bangku, mangkatahon,

² “Ale anak ni jolma, marhutinta anjaha marumpama ma ho bani halak Israel,

³ hatahon ma, sonon do hata ni Tuhan Jahowa, ‘Adong ma sada manuk-manuk nanggordaha na banggal bolag habongni, ganjang-ganjang lai-laini, anjaha buei do ambuluni na marrintik-rintik; roh do ia hu Libanon, anjaha ibuat do ujung ni hayu ares ai, ⁴ iputiki do dangkah-dangkahni siatasan, iboan ma ai hu nagori partiga-tigaan, anjaha inahkon ma ai hu huta ni partiga-tiga.

⁵ Ibuat do homa bonih na i nagori ai, anjaha isuan ma ai bani tanoh na lambutan, na sungkupan bani bah; isuankon do ai i topi ni bah.

⁶ Jadi martumbor ma ai gabe hayu anggur na tabun, toruh pardangkahni, surdung do rantingni hu bani, anjaha tading i toruhni do uratni. Gabe hayu anggur ma ai, mardangkahi anjaha marrantingi.

⁷ Tapi adong ma manuk-manuk nanggordaha na legan anjaha na banggal, bolag habongni anjaha

buei ambuluni; anjaha tonggor ma, iegotkon hayu anggur ai ma uratni bani manuk-manuk ai, anjaha surdung ma ranting-rantingni ai hu bani, ase ia ma mangarbahisi, lobih dearan nini uhurni humbani na bani iananni ai;

⁸ hape bani tanoh na lambutan, na sungkupan bah do ia na isuan ai, ase boi mardangkahi ia, ramos marbuahi anjaha gabe hayu anggur na madear namin.'

⁹ Hatahon ma, sonon do hata ni Tuhan Jahowa, 'Ai boi do saud ai? Ai lang hona dokdok ma uratni, anjaha hona parseda bulungni gabe melus bulungni na martumbor ai. Gabe melus ma ia tongon, anjaha seng pala marhitei kuasa na gogoh atap buei halak hona dokdok ma ia rap pakon uratni.

¹⁰ Tonggor ma, dear do ia hona suan, tapi boi do jadi ai? Ai lang mintor melus tumang ma ai, anggo hona ombus ibahen logou na hun hapoltakan, melus bani ianan hatubuhanni ai?'"

¹¹ Dob ai roh ma hata ni Jahowa hu bangku, mangkatahon,

¹² "Hatahon ma bani bangsa sipanlawan ai, 'Seng ibotoh hanima, aha do arti ni ai?' Hatahon ma, 'Tonggor ma, roh do raja ni Babel hu Jerusalem, anjaha itangkapi do rajani ampa kopala-kopalani, anjaha iboan ma sidea hu Babel.

¹³ Anjaha ipabangkit do sada humbani ginompar ni raja ai, marpadan do ia pakonsi anjaha ipabija do ia; tapi na sangap-sangap ni tanoh ai iboan do,

¹⁴ ase mangunduk harajaon ai ulang manlawan, ase ijolom padanni gabe jonam ia.

¹⁵ Tapi marbalik do ia hun bani, marhitei na marsuruh suruhanni hu Masir, ase ibere hubani huda pakon buei bala. Ai tarpasaudsi do ai? Ai maluah do halak na mambahen sisonai? Siosei padan, boi do maluah?

¹⁶ Songon sintongni manggoluh Ahu,' nini Tuhan Jahowa, 'Tongon, bani ianan ni raja ai, na pabangkitkonsi gabe raja, na pabijahonsi, tapi iapasi, na mambere padan bani, tapi iosei, i tongah-tongah ni Babel do ia matei.

¹⁷ Anjaha seng tarurupi Parao ia marhitei buei balani ampa bahatjolma sanggah porang ai, ai ma bani panorang ipadear halak hubuan ampa tembok pangkubu laho manraseihon bueijolma.

¹⁸ Hubani na hampung uhurni bani bijani, anjaha iosei padan ai, halani na dob marjabat tangan ia, tapi idalankon do ganupan ai, seng anjai maluah ia.'

¹⁹ Halani ai sonon do hata ni Tuhan Jahowa, 'Songon sintongni manggoluh Ahu, bija na niapasanni ampa padan-Ku na nioseini ai, maningon mangonai do ai bahenon-Ku bani uluni.

²⁰ Rungkubon-Ku ma puhot-Ku hu atasni anjaha dapot siding-Ku do ia, jadi Huboan ma ia hu Babel

anjaha uhumon-Ku ma ia ijai, halani na mangosei ai ia dompak Ahu.

²¹ Anjaha ganup tentara pilihanni maningon rasei do bahenon ni podang, anjaha na tading ai erapon do bani ganup deisa, ase ibotoh hanima, Ahu do Jahowa, na marsahap ai.'

²² Sonon do hata ni Tuhan Jahowa, 'Ahu sandiri ma na mambuat sada ranting humbani ujung ni hayu ares na gijang ai, anjaha Husuan ma ai; anjaha putikkonon-Ku do sada tumbor humbani dangkahni pardatas ai, anjaha suanon-Ku ma ai bani sada dolog na gijang anjaha na banggal.

²³ Bani dolog ni Israel na gijang ai do suanon-Ku ai, ase mardangkah janah marbuah, gabe sada hayu ares na marmulia; marianan do i toruh ni binatang-binatang anjaha ibagas linggom ni dangkahni marasar do bagei-bagei ni manuk-manuk.

²⁴ Jadi botohon ni sagala hayu na i talun ma, paboa Ahu do Jahowa, na patoruhkon hayu na gijang anjaha na pagijangkon hayu na toruh. Ahu do na mambahen melus hayu na ratah, anjaha na mambahen martunasi hayu na melus. Ahu do Jahowa na manluarhon ai, anjaha Ahu do na pasaudkonsi.'"

**Iuhum Naibata do Ganup Jolma domu hubani
Pambahenanni; lojur Jolma Paubahkon Uburni**

18 ¹ Dob ai roh ma hata ni Jahowa hu bangku,
mangkatahon,

² “Aha do halani ase isahap-sahapkon hanima
umpama pasal tanoh Israel: Bapa mangankon buah
ni anggur na migar, hape ipon ni anakni do ngiluan?

³ Songon sintongni manggoluh Ahu,” nini Tuhan
Jahowa, “seng bulih be sahapkononnima umpama
on i Israel.

⁴ Tonggor ma, Ahu do simada ganup tonduy ni
jolma, tonduy ni bapa age tonduy ni anak, Ahu
do simadasi; ise na mardousa, ia do na maningon
matei.

⁵ Anggo pintor sada halak, ihorjahon uhum ampa
hapintoron,

⁶ anggo seng ipangan na ginalangkon i atas
dolog, seng mangkawah ia dompak gana-gana ni
ginompar ni Israel, seng ra ia pabutak parinangon
ni hasomanni, anjaha seng idohori sada naboru
bani panorang mabutak ia,

⁷ seng dong halak na iodoh-odoh, tapi ipaulak do
bani siparutang gadeianni, seng ra ia manrampas,
ibere do sipanganon bani na loheian, anjaha
iparhioui halak na talanjang,

⁸ seng paanakkon duit ia, seng ra mambuat
untung na malobihtu, ipadaoh tanganni humbani

hagedukon, sintong panguhumni bani halak na marsalisih,

⁹ marparlahou ia ibagas titah-Ku, anjaha jimot ia mandalankon paraturan-Ku, ai ma halak parpintor, maningon manggoluh do ia tongon,” nini Tuhan Jahowa.

¹⁰ “Tapi anggo adong tubuh anak ni siparjahat, siduruskon daroh atap sihorjahon na masambor,

¹¹ na so marparlahouhon parlahou ni bapani parpintor ai, tapi ipangan do na ginalangkon i atas dolog, ibutaki parinangon ni hasomanni,

¹² iodoh-odoh na masombuh ampa na madoyuk, idalankon panrampason, seng ipaulak gadeian bani, mangkawah matani dompak gana-gana, ihorjahon hagigi,

¹³ ipaanakkon duitni anjaha malobihtu pambuatni bani untung, ai sipagoluhon dojolma sisonai ai? Seng bulih manggoluh ia, tapi halani ihorjahon haganup hagigi nongkan ai, maningon matei do ia, marsapata hubani do darohni.

¹⁴ Porini tubuh anakni sada, anjaha ididah anak ai sagala dousa na hinorjahon ni bapani, gabe mabiar ia anjaha seng ihorjahon ai,

¹⁵ seng ipangan na ginalangkon i atas dolog, seng ikawahkon gana-gana ni ginompar ni Israel, seng ibutakijolma ni hasomanni,

¹⁶ seng dong na iodoh-odoh, seng ijalo gadeian, seng idalankon panrampason, ibere sipanganon bani na loheian, iparhioui halak na talanjang,

¹⁷ ipadaoh tanganni humbani hagedukon, seng ipaanakkon duitni atap ibuat untung na mabahattu, idalankon aturan-Ku anjaha ihorjahon do titah-Ku, seng anjai matei ia halani hajahaton ni bapani, sai na manggoluh do ia.

¹⁸ Tapi ia bapani ai, sipangodoh-odoh anjaha siparrampas ai, sihorjahon na so patut i tengah-tengah ni bangsani, tonggor ma, maningon matei do ia halani hajahatonni.

¹⁹ Hape ihatahon hanima, 'Ai mase ma lang mangonai hubani anak dousa ni bapani?' Halani ihorjahon anak ai uhum ampa hapintoron, idalankon haganup titah-Ku, maningon manggoluh do ia.

²⁰ Ise sipardousa, ia do matei! Sedo anak mamorsan hajahaton ni bapani, anjaha sedo bapa mamorsan hajahaton ni anakni. hapintoron ni parpintor hu bani do sogop, anjaha hajahaton ni parjahat sogop hu bani do.

²¹ Tapi anggo itundalhon parjahat ai haganup dousani, na hinorjahonni, anjaha idalankon haganup titah-Ku, anjaha ihorjahon uhum ampa hapintoron, maningon manggoluh do ia, seng matei.

²² Haganup hajahatonni na hinorjahonni ai, seng hiraon be ai bani; manggoluh do ia halani hapintoron na hinorjahonni ai.

²³ Ai marosuh do uhur-Hu nani mangidah hamatean ni parjahat?" nini Tuhan Jahowa, "ai lang marosuh do uhur-Hu bani parmula ni parjahat in humbani dalanni ase manggoluh ia?"

²⁴ Tapi, anggo manlembang parpintor in humbani hapintoronni, idalankon hajahaton anjaha ihorjahon hasamboron, songon na hinorjahon ni parjahat ai, mintor manggoluh ma ia? Haganup hapintoronni na hinorjahonni ai seng hiraon be bani; halani panundalionni ai ampa dousani na hinorjahonni ai, halani ai do ia matei.

²⁵ Tapi hanima mangkatahon, 'Seng sintong dalan ni Jahowa!' Tangihon ma, ale ginompar ni Israel: Mintor lang ma sintong dalan-Ku? Ai lang dalannima do na so sintong?

²⁶ Anggo manlembang parpintor humbani hapintoronni anjaha ihorjahon hajahaton, maningon matei do ia halani ai, maningon matei do ia halani hajahaton na hinorjahonni ai.

²⁷ Tapi, anggo itundalhon parjahat hajahaton na hinorjahonni ai, anjaha ihorjahon uhum ampa hapintoron, na pagoluhkon tonduyni do ia ijai.

²⁸ Halani na dob mangahap ai ia, anjaha itundalhon hajahaton na hinorjahonni ai, maningon manggoluh do ia, lang matei.

²⁹ Tapi ihatahon ginompar ni Israel do, ‘Seng sintong dalan ni Jahowa!’ Mintor ma lang sintong dalan-Ku, ale ginompar ni Israel? Ai lang dalannima do na so sintong?

³⁰ Halani ai, ale ginompar ni Israel, uhumon-Ku do hanima ganup, romban hubani parlahounima,” nini Tuhan Jahowa. “Mulak ma, tundalhon ma haganup hajahatonnima, ase ulang hajahaton ai parohkon hamagouan bannima.

³¹ Ambukkon hanima ma sagala hajahaton na hinorjahonnima ai dompak Ahu, anjaha parayak hanima ma uhur na baru pakon tonduy na baru. Mase rahanan matei hanima, ale ginompar ni Israel?

³² Tongon, seng marosuh Ahu mangidah matei na matei in,” nini Tuhan Jahowa. “Halani ai paubah hanima ma uhurnima, ase manggoluh hanima.”

Doding Tangis-tangis Pasal Raja-raja ni Juda

19 ¹Tapi anggo ho, bahen ma sada doding tangis-tangis pasal panrajai i Israel,

² anjaha hatahon ma, “Songon singa boru-boru do inangmu i tongah-tongah ni singa! Manggompang do ia i tongah-tongah ni anak ni singa, laho pabanggal-banggalhon anakni.

³ Ipagodang-godang do sada humbani anakni ai, gabe singa ajar-ajar do ai; iguruhon do naha manoroh, ibondut dojolma.

⁴ Isuruh bangsa parbegu ma na manlawansi;
hona tangkap ma ia ibagas godung ni sidea,
iboan sidea do ia, ihalihiri hu tanoh Masir.

⁵ Dob ididah inangni hiranani anjaha seng saud pangarapanni ai, ibuat ma sada humbani anakni na legan, anjaha iajar ma ai gabe singa ajar-ajar.

⁶ Mardalani do ia i tengah-tengah ni singa, gabe singa ajar-ajar do ia; iguruhon do naha manoroh, ibondut dojolma.

⁷ Iparseda do bentengni anjaha iparreong huta-hutani; tarsonggot do nagori ampa pangisini halani sora ni paraumni.

⁸ Roh ma marurup bangsa-bangsa mandorabsi inggot; ipaherbang sidea do puhotni i babouni; hona tangkap do ia ibagas godung ni sidea.

⁹ Ihalihiri do ia, ipamasuk hubagas harang, anjaha iboan hubani raja ni Babel; dob ai ipamasuk ma ia hubagas tutupan, ase ulang tarboge be sorani i atas ni dolog ni Israel.

¹⁰ Songon hayu anggur do inangmu ibagas pohon anggur, na sinuan i topi ni bah mardalan; ramos buahni anjaha marrantingi halani buei ni bah.

- ¹¹ Tarpakei do dangkahni bahen tungkot harajaon halani jengesni, manjurjur do ai hu atas i tongah-tongah ni rantingni; taridah do ai humbani na daoh halani gijangni ampa tabunni.
- ¹² Tapi hona orbat ma hayu anggur ai ibagas ringis, anjaha igijigkon hu tanoh; melus ma ai ibahen logou hapoltakan, buahni mangkatangtang; ipansuakkon ma dangkahni na dear ai, gabe sipanganon ni apuy.
- ¹³ Anjaha sonari tarsuan do ai i halimisan bani tanoh dorging-dorging, na so marbah.
- ¹⁴ Luar do apuy humbani dangkahni, bois ipangan ranting ampa buahni, gabe seng dong be tading ijai dangkah na jenges, seng dong be tungkot harajaon laho manrajai.” In ma doding tangis-tangis ai, anjaha saud do ai gabe doding tangis-tangis.

**Panlawanon ni Bangsa ai do Tong Mambahen
Hona Uhum Sidea; age pe sonai lidopi
Naibata do Sidea halani Goran-Ni**

20 ¹ Bani tahun papituhon, bani bulan lima, ari sapuluh, roh ma deba humbani pangintuai-pangintuai ni Israel laho manungkun Jahowa, lanjar hundul ma sidea i lobeihu.

²Jadi roh ma hata ni Jahowa hu bangku, mangkatahon,

³“Ale anak nijolma, marsahap ma ho dompak pangintuai-pangintuai ni Israel, hatahon ma bani sidea, sonon do hata ni Tuhan Jahowa, ‘Laho manungkun Ahu do hanima na roh on? Songon sintongni manggoluh Ahu,’ nini Tuhan Jahowa, ‘seng ra Ahu sungkunonnima.’

⁴Sihol uhumonmu sidea, ale anak nijolma, sihol uhumonmu? Anggo sonai pabotohkon ma bani sidea hasamboron na hinorjahon ni ompung ni sidea.

⁵Hatahon ma bani sidea, sonon do hata ni Tuhan Jahowa, ‘Bani panorang, sanggah Hupilih Israel, marbija do Ahu marhitei tangan na tarangkat hubani ginompar ni si Jakob, Hupatar do diring-Ku bani sidea i tanoh Masir, marbija do Ahu bani sidea, ning-Ku, Ahu do Jahowa, Naibatanima.

⁶Bani panorang ai Hubijahon do bani sidea, paboa paluaron-Ku do sidea hun tanoh Masir hu tanoh na dob Hupilih bani sidea, tanoh habaoran ni dadih ampa manis, tanoh sijengesan humbani sagala nagori.

⁷Anjaha Huhatahon do bani sidea, ganup ma hanima mangambukkon gana-gananima, na manarik panonggornima, anjaha ulang ipabutak hanima dirinima marhitei sisombah-sombahon ni Masir, ai Ahu do Jahowa, Naibatanima.’

⁸Tapi manlawan do sidea dompak Ahu, seng ra manangihon Ahu; seng dong na ra mangambukkon gana-gana sitarik panonggor ni sidea ai, anjaha seng itadingkon sisombah-sombahon ni Masir. Jadi isura uhur-Hu ma manguseihon ringis-Ku bani sidea, anjaha padalankon gilang-Ku bani sidea i tengah-tengah ni tanoh Masir.

⁹Tapi seng Hupasaud ai halani goran-Ku, ase ulang butak ai ididah bangsa-bangsa panginsolatan ni sidea ai, ai domma Hupatalar diring-Ku bani sidea ididah parbegu, marhitei na mambagahkon paluaron-Ku sidea hun tanoh Masir.

¹⁰Jadi Hubobahon ma sidea mandarat hun tanoh Masir, anjaha Huboan ma sidea hu halimisan.

¹¹Hubere ma bani sidea titah-Ku, anjaha Hupabotohkon aturan-Ku bani sidea, sidalankonon ni jolma, ase manggoluh ia.

¹²Hubere homa ma bani sidea ari Sabat-Ku, gabe tanda hun Bangku bani sidea, ase ibotoh sidea, paboa Ahu do Jahowa sipapansing sidea.

¹³Tapi manlawan do dompak Ahu ginompar ni Israel i halimisan; seng marparlahou sidea domu hubani titah-Ku, anjaha itulak do aturan-Ku, sidalankonon ni jolma bahen hagoluhanni, ibutaki sidea do Sabat-Ku. Jadi isura uhur-Hu ma manguseihon ringis-Ku bani sidea i halimisan, laho mambahen bois tumang sidea.

¹⁴ Tapi seng Hupasaud ai halani goran-Ku, ase ulang mahiri ai i lobei ni bangsa parbegu, na mangidah Ahu mambobahon sidea mandarat.

¹⁵ Ambahni ai marbija do Ahu bani sidea i halimisan, paboa na so boanon-Ku be sidea bani tanoh na dob Huberehon bani sidea, ai ma tanoh habaoran ni dadih pakon manisan, tanoh sijengesan humbani sagala nagori,

¹⁶ halani ibuangkon sidea titah-Ku, seng idalankon paraturan-Ku, anjaha ipabutak do ari Sabat-Ku; tongon, sisombah-sombahon ni sidea do ipaihut-ihut uhur ni sidea.

¹⁷ Tapi maidop do matang-Ku mangidah sidea, gabe seng Huboiskon sidea, anjaha seng rasei sidea Hubahen i halimisan.

¹⁸ Jadi ningku ma dompak anak ni sidea i halimisan: Ulang ma marparlahou hanima domu hubani aturan na binahen ni bapanima, anjaha ulang ma paihut-ihut hanima titah-titah ni sidea, anjaha ulang ma butaki hanima dirinima marhitei ganagana ni sidea.

¹⁹ Ahu do Jahowa, Naibat анима; domu hubani aturan-Ku ma hanima marparlahou, titah-Ku ma ramotkon anjaha dalankon hanima!

²⁰ Ari Sabat-Kai, papansing hanima ma ai bahen tanda hun Bangku bannima, ase ibotoh hanima, Ahu do Jahowa, Naibat анима.

²¹ Tapi manlawan do dompak Ahu age anak ai; aturan-Ku seng iparlahouhon sidea, anjaha titah-Ku seng iramotkon sidea, laho mandalankon ai, sidalankonon ni jolma ase manggoluh ia; ibutaki sidea do Sabat-Ku. Jadi isura uhur-Hu ma manguseihon ringis-Ku dompak sidea anjaha padalankon gilang-Ku bani sidea i halimisan.

²² Tapi Hupasurut do tangan-Ku anjaha seng Hupasaud ai halani goran-Ku, ase ulang mahiri ai i lobei ni bangsa parbegu, na mangidah Ahu mambobahon sidea mandarat.

²³ Ambahni ai marbija do Ahu bani sidea i halimisan, laho mangerap sidea hu tongah-tongah ni bangsa-bangsa, anjaha mambahen mambur sidea hu nagori-nagori ai,

²⁴ halani seng idalankon sidea titah-Ku, ibuangkon aturan-Ku anjaha ipabutak do ari Sabat-Ku; tongon, sisombah-sombahon ni sidea do ipaihut-ihut sidea.

²⁵ Halani ai Hubere do bani sidea aturan na so madear ampa titah na so boi manggoluh sidea marhitei ai,

²⁶ anjaha Hubahen do sidea butak marhitei galangan ni sidea, marhitei na igalangkon sidea ibagas apuy sagala bunga-tubuh ni sidea; ase gok songgot-songgot sidea, anjaha ase ibotoh sidea, Ahu do Jahowa.

²⁷ Halani ai, ho ale anak ni jolma, hatahon ma bani ginompar ni Israel, sahapkon ma bani sidea, sonon

do hata ni Tuhan Jahowa, 'Inunut ompungnima ope pahiri Ahu, marhitei pangoseion ni sidea Bangku?'

²⁸ Ai dob das sidea Huboan hu tanoh na dob Hubijahon, laho mamberehon ai bani sidea, jadi ija ididah sidea buntu-buntu na gijang atap hayu na tabun, ijai do igalangkon sidea galangan ni sidea anjaha iondoskon galangan ni sidea sipuhoi ringis-Ku; ijai do inahkon sidea dahupa ni sidea na misbou, anjaha ijai do iduruskon sidea galangan siinumon ni sidea.

²⁹ Jadi ningku ma bani sidea, 'Ai aha do buntu-buntu na pinarayaknima in?' Halani ai do ase ibahen goran ni Bamah (*ianan na gijang*) ronsi sadari on.

³⁰ Halani ai hatahon ma bani ginompar ni Israel, sonon do hata ni Tuhan Jahowa, 'Ai sihol pabutakonnima do dirinima marhitei pambahenan ni ompungnima, anjaha kahou hanima mangihutkon hagigi na hinorjahon ni sidea ai?'

³¹ Anggo isombahkon hanima galangannima, anjaha igalangkon hanima anaknima ibagas apuy, ipabutak hanima do dirinima marhitei sagala gana-gananima ronsi sadari on. Jadi ra ma Ahu sungkunonnima, ale ginompar ni Israel? Songon sintongni manggoluh Ahu, nini Tuhan Jahowa. Seng ra Ahu sungkunonnima.

³² Anjaha sura-sura ni uhurnima pe, seng anjai saud ai, ai ma na sinurahonnima. Songon bangsa na

legan ai ma hita, songon halak na i nagori-nagori na legan ai, na marsombah bani hayu pakon batu.

³³ Songon sintongni manggoluh Ahu, nini Tuhan Jahowa, 'Ahu do Raja bannima marhitei tangan na gogoh, marhitei tangan na pinagostong ampa marhitei ringis na niuseihon.

³⁴ Anjaha boanon-Ku do hanima mulak humbani bangsa-bangsa in, anjaha patumpuon-Ku do hanima humbani nagori hamerapannima marhitei tangan na gogoh, marhitei tangan na pinagostong ampa marhitei ringis na niuseihon.

³⁵ Anjaha boanon-Ku do hanima hu halimisan ni bangsa-bangsa, anjaha ijai do padalan uhum Ahu bannima padumpar bohi.

³⁶ Songon panguhuming-Ku ijia bani ompungnima sanggah i halimisan na i tanoh Masir, usih sonai do uhumon-Ku hanima,' nini Tuhan Jahowa.

³⁷ 'Pabontaskonon-Ku do hanima hun toruh ni simambu, anjaha bilangan-Ku do hanima tulimat.

³⁸ Anjaha padaohon-Ku do hun tengah-tongahnima sipanlawan ampa halak siparbalik hun Bangku; padaraton-Ku do sidea hun tanoh panginsolatan ni sidea, tapi seng anjai masukan ni sidea tanoh Israel. Jadi botohonnima ma, Ahu do Jahowa.

³⁹ Tapi hanima, ale ginompar ni Israel, sonon do hata ni Tuhan Jahowa, 'Laho ma ganup hanima marsisombah gana-ganani bei, halani seng ra be hanima manangihon Ahu; tapi anggo goran-Ku

Na Mapansing in, seng bulih be pabutakonnima marhitei galangannima ampa gana-gananima.

⁴⁰ Ai i atas dolog-Ku Na Mapansing in, bani dolog ni Israel na gijang in,' nini Tuhan Jahowa, 'ijai ma Ahu balosan ni haganup ginompar ni Israel, haganup sidea na i nagori in; ijai ma jaloan-Ku sidea, ijai ma tungguon-Ku humbennima galangannima ampa limbuehannima ampa haganup sibere-bere na pinapansingnima.'

⁴¹ Jaloan-Ku ma hanima songon uap na misbou na hinarosuhkon, sanggah na Huboan hanima mandarat humbani bangsa-bangsa, anjaha Hupatumpu hanima hun nagori-nagori hamerapannima ai; anjaha patalaron-Ku do hapansingon-Ku i tongah-tongahnima ididah bangsa-bangsa.

⁴² Anjaha hatahononnima ma, Ahu do Jahowa, dob Huboan hanima hu tanoh Israel, tanoh na dob Hubijahon mamberehon ai bani ompungnima.

⁴³ Ijai ma taringat hanima bani parlahounima ampa ganup pambahenannima na mambahen mabutak hanima; jadi magigi ma hanima bani dirinima halani haganup hajahaton na hinorjahonnima.

⁴⁴ Anjaha botohonnima ma, Ahu do Jahowa, marhitei na Hubahen bannima halani goran-Ku, sedo romban hubani parlahounima na jahat in ampa pambahenannima na masambor in, ale ginompar ni Israel," nini Tuhan Jahowa.

Limbaga Pasal Harangan na Matutung

⁴⁵ (21-1) Dob ai roh ma hata ni Jahowa hu bangku, mangkatahon,

⁴⁶ (21-2) “Ale anak ni jolma, dompakkon ma bohimu hu dangsina, dilo-dilo ma ho dompak dangsina, anjaha manjahai ma ho dompak harangan na i tanoh dangsina.

⁴⁷ (21-3) Hatahon ma bani harangan na i tanoh dangsina, tangar ma hata ni Jahowa, sonon do nini Tuhan Jahowa, tonggor ma, pagaraon-Ku do apuy ibagas ho, panganonni do bois sagala hayu na masak ibagas ho; seng tarintopi gajag ni apuy na marjimbur in, anjaha mosogkononni do sagala bohi hun dangsina das hu utara.

⁴⁸ (21-4) Botohon ni sagala na mardaging ma: Ahu do Jahowa na pagarahon ai; seng intopkonon-Ku be ai.”

⁴⁹ (21-5) Jadi ningku ma, “Ham Tuhan Jahowa, isahapkon sidea do pasal ahu: Ai lang marlimbaga do tong ia marsahap?”

Podang Pambalason bani Jerusalem ampa Amon

21 ¹ (21-6) Dob ai roh ma hata ni Jahowa hu bangku, mangkatahon,

² (21-7) “Ale anak ni jolma, dompakkon ma bohimu hu Jerusalem, marsahap ma ho pasal ianan na susi ai, manjahai ma ho pasal tanoh Israel,

³ (21-8) anjaha hatahon ma hubani tanoh Israel, sonon do hata ni Tuhan Jahowa: Tonggor ma, Ahu do imbangmu, sintakon-Ku do podang-Ku hun sarungni, anjaha raseihonon-Ku do hun tengah-tengahmu parpintor ampa parjahat.

⁴ (21-9) Halani sihol boiskonon-Ku do hun tengah-tengahmu parpintor ampa parjahat, halani ai do ase mandarat podang-Ku humbani sarungni, manlawan sagala jolma hun dangsina das hu utara,

⁵ (21-10) anjaha botohon ni sagala na mardaging ma, Ahu do Jahowa, na manintak podang-Ku humbani sarungni; seng sarungkonon-Ku be ai.

⁶ (21-11) Ale anak ni jolma, marhoih ma ho; gogoh ma ho marhoih, marhoru tumang i lobei ni sidea.

⁷ (21-12) Anjaha anggo isungkun sidea, 'Mase marhoih ho?' hatahon ma, 'Halani barita ai.' Anggo roh ai, mandatei ma sagala uhur, dabuh sagala tangan, malitonduy sagala jolma anjaha galek sagala towod. Tonggor ma, roh anjaha masa ma ai," nini Tuhan Jahowa.

⁸ (21-13) Dob ai roh ma hata ni Jahowa hu bangku, mangkatahon,

⁹ (21-14) "Ale anak ni jolma, manjahai anjaha marsahap ma ho! Sonon do hata ni Jahowa, 'Podang, podang do iasah, ipungga ase marlinang,

¹⁰ (21-15) iasah laho manraseihon, ipungga ase marhilap itampulhon.' Naha, marmalas ni uhur ma

hita? Ale anak-Ku, mapas do uhurmu bani ganup pukul-pukul ampa bani ganup podah.

¹¹ (21-16) Ibere do podang ai ipapunggahon, ase tarpakei ai; iasah do ai anjaha ipapunggahon, laho mamberehon ai bani tangan ni sipamunuh.

¹² (21-17) Tangis anjaha mandoruhi ma, ale anak ni jolma, ai mangimbang bangsang-Ku do podang ai, mangimbang ganup kopala-kopala ni Israel, iondoskon do sidea bani podang rap pakon bangsang-Ku. Halani ai tompasi ma hae-haemu.

¹³ (21-18) Ai roh do pangujian, ai sonaha ma lang masa ai, halani mapas do uhurmu mangidah pukul-pukul,” nini Tuhan Jahowa.

¹⁴ (21-19) “Tapi ho ale anak ni jolma, anjaha martopap-topap ma ho! Roh ma podang dua hali lompit, tolu hali lompit tene, ai ma podang sipamunuh, podang bani pamunuhon bolon ai, ai do manginggoti sidea,

¹⁵ (21-20) ase malala pusu-pusu ni sidea, anjaha mardabuhan sidea bani sagala horbangan ni sidea. Ahu do na mambere podang na marhilap ai; ibahen do ai marlinang songon hilap, ipungga laho mamunuhi.

¹⁶ (21-21) Marot ma panrotapmu, hu siamun atap hu sambilou, dompak ja matamu itampulhon!

¹⁷ (21-22) Ahu pe martopap-topap tangan do, sihol do pasombuhon-Ku ringis-Ku, Ahu do Jahowa, na mansahapkon ai.”

¹⁸ (21-23) Dob ai roh ma hata ni Jahowa hu bangku, mangkatahon,

¹⁹ (21-24) “Ho ale anak ni jolma, gambarhon ma dua dalan harohan ni podang ni raja Babel, humbani sada nagori do harohan ni ai haduasi. Bahen ma sipatuduh dalan, pajongjong ma ai bani bona ni dalan na manuju dompak sada huta.

²⁰ (21-25) Gambar ma sada dalan bani podang na laho hu Rabba, huta ni halak Amon, ampa na sada nari hu Juda, hu Jerusalem na pinatoguh ai.

²¹ (21-26) Bani sirpang ni dalan ai, bani bona ni dalan na dua ai do jongjong raja ni Babel mandalankon partondungan; ihursuk-hursuk do lingkit, isungkun terapim anjaha ipareksa pangidahan bani atei-atei ni dayok.

²² (21-27) Bani tangan siamunni do pangidahan na dompak Jerusalem ai, gabe ibuha ma pamanganni marsurak-surak, ipamaling sorani, laho padalankon parugas sirongrong horbangan, paulihon tembok sipangkubu, ampa pajongjong manara sipangkubu.

²³ (21-28) Tapi partondungan na so sintong do ai bani sidea, halani dong do bani sidea parbulawanan na toguh nini uhurni. Tapi paingattonni do sidea pasal salah ni sidea, ase mangahap sidea.”

²⁴ (21-29) Halani ai, sonon do hata ni Tuhan Jahowa, “Halani na dob mardingat hanima bani hajahatonnima, marhitei na dob pinatar sagala panlanggaronnima, gabe talar dousanima bani

sagala pambahenannima, tongon, halani na dob mardingat ai hanima, sai mangahap ma hanima.

²⁵ (21-30) Ia ho, ale kopala ni Israel, na mabutak anjaha na jahat, na dob jumpah arini, ai ma panorang hagokok ni uhum bam,

²⁶ (21-31) sonon do hata ni Tuhan Jahowa, 'Padaoh ma gotong in, tanggali sortali in! Seng totap be songon na sain dokah; sipatoruhon do na gijang, anjaha sipagijangon do na toruh.

²⁷ (21-32) Mareong, mareong, mareong do bahenon-Ku in; seng dong be age bokas-bokasni, paima roh ia siparhak ai; hubani do ondoskonon-Ku ai.'

²⁸ (21-33) Tapi ho, ale anak nijolma, manjahai ma ho anjaha hatahon ma, sonon do hata ni Tuhan Jahowa pasal Amon ampa pasal pangapasi ni sidea, anjaha hatahon ma, 'Podang, podang do isintak laho manripaskon; ipungga do ai ase marlinang anjaha marhilap,

²⁹ (21-34) ai ma sanggah marpanonggoran na lepak sidea pasal ho anjaha martondung sipaoto-oto sidea dompak ho, laho mannahkon podang ai bani borgok ni parjahat na mabutak ai, na dob jumpah arini, ai ma panorang hagokok ni uhum bani.

³⁰ (21-35) Sarungkon ma podangmu ale Amon! Bani ianan parjadimu, bani tanoh hatubuhanmu, ijai do uhumon-Ku ho.

³¹ (21-36) Duruskonon-Ku do ringis-Ku bam, anjaha sompulhonon-Ku apuy ni gilang-Ku bam; ondoskoponon-Ku do ho hu tangan ni halak na mabajan, sihorjahon hasedaon.

³² (21-37) Gabe sipanganon ni apuy ma hanima, durus ma darohnima i nagori in; seng be sidingat-dingaton hanima, tongon, Ahu do Jahowa, na manluarhon in.”

Hasamboron ni Jerusalem ampa Pangisini Parohkon Uhum Bani

22 ¹ Dob ai roh ma hata ni Jahowa hu bangku, mangkatahon,

² “Ale anak nijolma, sihol uhumonmu do huta siduruskon daroh in? Pabotohkon ma bani sidea haganup hasamboron ni sidea ai,

³ anjaha hatahon ma: Sonon do hata ni Tuhan Jahowa: Ale huta siduruskon daroh i tongah-tongahni, na parohkon ajal bani, anjaha na paulihon gana-gana bani, mambahen butak dirini!

⁴ Marhitei daroh na niduruskonmai, gabe marutang do ho, anjaha marhitei gana-gana na pinaulimai, gabe butak ho; ipapodas ho do ajalmu, anjaha iparoh ho do ujung ni ari-arimu. Halani ai Hubahen do ho siapason bani bangsa-bangsa, anjaha sipahirion bani ganup nagori.

⁵ Halak na dohor age na daoh pahirihon do, ale parbarita na masambor, na gok hageoron.

⁶ Tonggor ma, haganup kopala-kopala ni Israel, na marianan ibagas ho, ganup sidea mangunsagahkon kuasa laho manduruskon daroh.

⁷ Bapa pakon inang hona apasan do ibagas ho, halak panginsolat hona hilang i tongah-tongahmu; na tading maetek ampa na mabalu hona odoh-odoh do.

⁸ Mahiri do ibahen ho ianan-Ku na mapansing in, anjaha ibutaki ho do ari Sabat-Ku.

⁹ Dong do halak sipanukas-nukas ibagas ho laho manduruskon daroh, anjaha adong do halak na mangankon na ginalangkon i atas buntu-buntu; habutakon do ihorjahon halak i tongah-tongahmu.

¹⁰ Ipatidak sidea do hatalanjangan ni bapa ibagas ho, anjaha ibutaki do naboru bani panorang parroh ni pantang ni hiouni.

¹¹ Habutakon do idalankon halak banijolma ni hasomanni; dong do na mambutaki parumaenni, dong homa na mambutaki botouni, boru ni bapani.

¹² Padalan sisip do halak ibagas ho laho manduruskon daroh; paanakkon duit do ho anjaha mambuat untung na malobihtu; mambuat pansarian do ho humbani hasomanmu marhitei pangilangan; ihalupahon ho do Ahu, nini Tuhan Jahowa.

¹³ Tonggor ma, durdurhonon-Ku do tangan-Ku bani untungmu na so tiba dalanni in, ampa halani daroh na madurus i tongah-tongahmu.

¹⁴ Ai tahan do ho anjaha margogoh do tanganmu bani ari siparohon-Ku bam? Ahu do Jahowa na manluarhon ai anjaha na pasaudkon ai.

¹⁵ Erapon-Ku do ho i tengah-tengah ni bangsa-bangsa anjaha bahenon-Ku do ho mambur merap bani nagori-nagori; bois do bahenon-Ku habutakon na bam ai,

¹⁶ anjaha sipapaan do ho i lobei ni bangsa parbegu, ase itandai ho, Ahu do Jahowa.

Limbaga Pasal Panlalaan na Mangkorhon Uhum, na Mangonai bani Israel

¹⁷ Dob ai roh ma hata ni Jahowa hu bangku, mangkatahon,

¹⁸ Ale anak nijolma, gabe tasik-tasik do bangsa Israel bangku; haganup do sidea songon tombaga, timah, bosi ampa timah sibirong ibagas panlalaan; tongon, mubah do sidea gabe tasik-tasik.

¹⁹ Halani ai sonon do hata ni Jahowa: Halani ganup hanima mubah gabe tasik-tasik, tonggor ma, patumpuon-Ku do hanima hu tengah-tengah ni Jerusalem.

²⁰ Songon halak na patumpu pirak, tombaga, bosi, timah ampa timah sibirong hubagas panlalaan, anjaha ipagara apuy i toruhni laho manlala, sonai do patumpuon-Ku hanima ibagas ringis-Ku ampa gara ni gilang-Ku, anjaha hunahkon do hanima hubagas, laho manlala hanima.

²¹ Tongon, patumpuon-Ku do hanima anjaha pagaraon-Ku do apuy ni ringis-Ku bannima, anjaha malala ma hanima i tongah-tongahni.

²² Songon pirak malala ibagas panlalaan, sonai do malala hanima ibagas ai, jadi botohonnima ma, Ahu do Jahowa, na manduruskon ringis-Ku bannima.

Dousa ni Golongan-golongan na bani Bangsa ai

²³ Dob ai roh ma hata ni Jahowa hu bangku, mangkatahon,

²⁴ Ale anak ni jolma, hatahon ma bani sidea: Ho do sada tanoh na so marudan, na so marbah bani panorang ringis;

²⁵ songon singa na maraum, manoroh sisorohonni do raja-rajani i tongah-tongahni; ibolur sidea do jolma, irampas sidea arta ampa ugas-ugas na maharga, ipabuei sidea do bilangan ni na mabalu i tanoh in.

²⁶ Iparseda malimni do titah-Ku, anjaha ipabutak do ianan-Ku na mapansing in; seng marbolat ibahen sidea na mapansing humbani na mabutak, seng iajarhon parleganan ni na susi pakon na so susi; seng parduli sidea bani ari Sabat-Ku, gabe mabutak do Ahu i tongah-tongah ni sidea.

²⁷ Kopala-kopala i tongah-tongah ni sidea, songon sorigala na manoroh do, laho manduruskon daroh, mangagou goluh ni jolma, laho mambuat pansarian.

²⁸ Anjaha nabi ni sidea mangkapuri hajahaton ni sidea marhitei panonggoran na lepak ampa panjahaion ladung, mangkatahon bani sidea: Sonon do hata ni Tuhan Jahowa! hape sedo Jahowa tongon na mangkatahon.

²⁹ Bangsa parnagori in mandalankon odoh-odoh anjaha manrampasi, iodoh-odoh sidea do halak na madoyuk ampa na miskin, anjaha ipaksa do halak panginsolat marlawanan bani uhum.

³⁰ Hupindahi do halak i tongah-tongah ni sidea, na boi pajongjong tembok atap jongjong bani na maruntas i lobeihu, laho mangkopkop tanoh in, ase ulang huparseda, tapi seng dong jumpah Ahu. tx

³¹ Halani ai Huuseihon do ringis-Ku bani sidea, anjaha Huboiskon do sidea ibagas gara ni gilang-Ku, mangonai hubani ulu ni sidea do Hubahen parlahou ni sidea ai, nini Tuhan Jahowa.”

Limbaga Pasal Habutakon ni Samaria ampa Jerusalem na Marsanina ai

23 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, adong ma dua naboru, sisada inang do sidea.

³ Marriah-riah do sidea i Masir; marriah-riah do sidea sanggah poso; ipaturut do hona pisatan bagod-bagod ni sidea, ipaturut idadapi tontonni bani haposoonni.

⁴ Goran ni naboru sikahanan ai si Ohola, goran ni sianggian ai si Oholiba. Jadi Ahu ma simada sidea haduasi, tubuhan anak tubuhan boru ma sidea. Arti ni goran ni sidea ai: si Ohola, ai ma Samaria, anjaha si Oholiba, ai ma Jerusalem.

⁵ Marriah-riahi do si Ohola sanggah Ahu ope simadasi; oji tumang do uhurni bani na mangkarosuhkonsi, ai ma halak Assur, na mandohorisi ai,

⁶ ai ma na sangap-sangap parhiou sitora, sipanrajai ampa puanglima; haganup sidea poso anjaha majenges, sipangajak huda.

⁷ Iondoskon do dirini marriah-riah pakon sidea, halak Assur jolma pilihan ai; ipabutak do dirini marhitei gana-gana ni ganup halak ojian ni uhurni ai.

⁸ Seng homa itadingkon parriah-riahonni, na dob nidalankonni sanggah i Masir ope, halani bani haposoonni domma modom halak rap pakonsi, ipisati bagod-bagodni, anjaha ipadas rosuhni hu bani.

⁹ Halani ai, Huondoskon do ia hubani halak na mangkarosuhkonsi, ai ma halak Assur, ojian ni uhurni ai.

¹⁰ Ipasalang sidea ma ia, irampas anak pakon boruni, anjaha ia ibunuh marhitei podang; gabe umpama do ia i tongah-tongah ni naboru, sanggah idalankon uhum ai bani.

¹¹ Age pe ididah si Oholiba, anggini ai, na masa ai, garangan ope ia humbani abangni ai, anjaha samboran ope parriah-riahonni marimbang abangni ai.

¹² Oji do uhurni bani halak Assur, raja-raja pakon kopala-kopala ni tentara, na mandohorisi ai, na marpakeian na majenges, siajak huda, haganup sidea poso anjaha majenges.

¹³ Jadi Huidah ma hona butakan ia, dos do ulah ni sidea haduasi.

¹⁴ Tapi inunut do tong parriah-riahonni ai; ididah do dalahi iuhirhon bani tembok, gambaran ni halak Kasdim, na igambar marset sigenger,

¹⁵ margondit bani binongeini, martudung uluni, ganup sidea songon puanglima idahon; ai ma gambaran ni halak Babel, na marhasusuran i tanoh Kasdim.

¹⁶ Anggo ididah sidea, oji ma uhurni mangidah sidea, isuruh ma suruhanni marayak sidea hu nagori Kasdim.

¹⁷ Jadi iparayak halak Babel ma ia, laho rap modom pakonsi, anjaha ibutaki do ia marhitei na marriah-riah; dob ibutaki sidea ia, magigi ma ia mangidah sidea.

¹⁸ Talar do idalankon parriah-riahonni ai, anjaha ipatidak do hailaonni, jadi magigi ma uhur-Hu mangidahsi, songon gigi ni uhuru dompak abangni ai.

¹⁹ Tapi inunut do tong parriah-riahonni, mardingat do ia bani ari haposoonni, na marriah-riah ai ia i tanoh Masir,

²⁰ na oji ai uhurni mangidah na mangkarosuhkonsi, na garang ai songon halode ampa songon huda.

²¹ Tongon masihol do uhurmu bani habutakon ni haposoonmu, sanggah na ipisati halak Masir bagodmu anjaha idadapi tontonmu bani haposoonmu.

²² Halani ai, ale Oholiba, sonon do hata ni Tuhan Jahowa, Tonggor ma, ojuron-Ku do mangimbang ho na mangkarosuhkon ho ai, na dob hinagigihonmai, anjaha humbani ganup ianan do parohon-Ku sidea manlawan ho,

²³ ai ma halak Babel ampa ganup halak Kasdim, halak Pekod, Soa pakon Koa, ampa haganup halak Assur na rap pakon sidea, ai ma halak na maposo anjaha majenges, sipanrajai ampa puanglima do sidea ganup, haganup do sidea siajak huda.

²⁴ Roh do sidea mandorab ho marhasoman garet a porang pakon garet a ampa marhasoman buei bala; hubuon ni sidea ma ho inggot, marhasoman gantar na banggal pakon na etek ampa tangkuluk bosi. Ondoskonon-Ku ma bani sidea panguhumion ai, jadi uhumon ni sidea ma ho domu hubani uhum ni sidea.

²⁵ Dompakkonon-Ku ma bam marah-Ku, jadi padalanon ni sidea ma bam ringis. Sayaton ni sidea

ma igungmu ampa pinggolmu, anjaha halak na tading hun bam rasei ibahen podang. Rampason ni sidea ma anakmu pakon borumu, anjaha sagala na tading bam bois ibahen apuy.

²⁶ Rintakon ni sidea do pakeian-pakeianmu, anjaha rampason ni sidea ugas-ugasmu.

²⁷ Sonai ma parontihonon-Ku habutakonmu ampa parriah-riahonmu, na nidalankonmu hun tanoh Masir nari, ase ulang be kawah matamu dompak sidea anjaha ulang be idingat-dingat ho Masir.”

²⁸ Sonon do hata ni Tuhan Jahowa, “Tonggor ma, ondoskonon-Ku do ho hubagas tangan ni halak sogam ni uhurmu, hubagas tangan ni halak na dob hinagigihonmu,

²⁹ jadi domdoman ni sidea ma ho, anjaha rampason ni sidea sagala na sinarimu; paturuton ni sidea ma ho talanjang seng marhiou, anjaha talar ma hilaon ni parriah-riahonmu.

³⁰ Habutakonmu ampa parriah-riahonmu do na paroh ai bam, halani na marriah-riah ai ho pakon sipajuh begu-begu anjaha ibutaki ho dirimu marhitei gana-gana ni sidea.

³¹ Songon parlahou ni abangmu do parlahoumu, halani ai Hubere do hubam panginuman na niinum ni abangmu.”

³² Sonon do hata ni Tuhan Jahowa, “Maningon inumonmu do panginuman ni abangmu na

bagas anjaha na banggal ai, sipartatawaan
anjaha mahiri ma ho, ai buei do isini ai;

³³ maningon sirnib do ho ibahen hamabukon
ampa pusok ni uhur. Panginuman songgot-
songgot ampa hagobiron do panginuman ni
abangmu Samaria;

³⁴ maningon inumonmu do ai anjaha
palumeionmu; maningon haratonmu
do posah-posahni, anjaha rarikonmu
tontonmu, tongon, Ahu do mangkatahon
ai,” nini Tuhan Jahowa.

³⁵ Halani ai sonon do hata ni Tuhan Jahowa,
“Halani na dob lupa ho Bangku, anjaha
iambungkun ho Ahu hu pudimu, halani ai
porsan ma upah ni habutakonmu ampa
parriah-riahonmu.”

³⁶ Nini Jahowa ma hu bangku, “Ale anak ni jolma,
sihol do uhumonmu si Ohola pakon si Oholiba?
Anggo sonai, patugah ma hubani sidea hasamboron
ni sidea.

³⁷ Tongon, marbangkis do sidea anjaha sab daroh
do tangan ni sidea; rap pakon gana-gana ni sidea
ai do sidea marbangkis; anjaha igalangkon do anak
ni sidea bahen sipanganon ni gana-gana ni sidea, ai
ma anak na tinubuhkon Bangku.

³⁸ Ambah ni ai, on ope ibahen sidea Bangku:
Ipabutak sidea do ianan-Ku na pansing in bani ari
ai, anjaha ipabutak sidea do ari Sabat-Ku.

³⁹ Ai dob isayati sidea anak ni sidea bahen galangan hu bani sisombah-sombahon ni sidea ai, bani ari ai do masuk sidea hubagas ianan-Ku na pansing ai laho pabutakkon ai; tonggor ma, sonai do ibahen sidea ibagas rumah-Ku.

⁴⁰ Isuruh do suruhanni mangalopi halak humbani na daoh, anjaha tonggor ma, dob roh sidea, iparidi ho do dirimu, ipajagar ho matamu, anjaha ipakei ho ugas-ugasmu;

⁴¹ hundul ma ho i atas ni podoman na majenges, meja na dob pinasirsir i lambungni, panampeianmu bani dahupa ampa minak-Ku.

⁴² Lutu do sora ni halak na mabuei i lambungni, ai ma sora ni halak na roh marayaksi hun halimisan; igolangi sidea do tangan ni naboru ai, anjaha inahkon sortali na majenges i atas uluni.

⁴³ Jadi ninuhur-Hu ma: Ai mandalankon parbangkison ope naboru na dob melus in? Ai ra ope halak nani marriah-riah pakonsi?

⁴⁴ Tongon, laho do halak marayaksi, songon marayak boru jalang; sonai ma laho sidea marayak si Ohola pakon si Oholiba, laho mandalankon habutakon.

⁴⁵ Tapi uhumon ni halak parpintor do sidea romban hubani uhum bani siparbangkis ampa uhum bani naboru siduruskon daroh, ai siparbangkis do sidea, anjaha gok daroh do tangan ni sidea.”

⁴⁶ Ai sonon do hata ni Tuhan Jahowa, “Ojur ma simbuei manlawan sidea, anjaha bahen ma sidea gabe siarsik-arsikon anjaha sirampason.

⁴⁷ Pargijigon ni simbuei ai ma sidea bani batu, anjaha tampulon ni sidea bani podang ni sidea; bunuhon ni sidea ma anakni pakon boruni, anjaha tutungonni rumahni bani apuy.

⁴⁸ Sonai ma parontihonon-Ku habutakon i nagori in, ase jora sagala naboru, ulang ihorjahon be habutakon, songon na binahen ni sidea ai.

⁴⁹ Sonai ma honahonon-Ku bannima habutakonnima ai, anjaha porsanonnima uhum halani dousanima na marnaibata na legan ai; jadi botohonnima ma, Ahu do Jahowa.”

Parseda ni Jerusalem ampa Pangisini Ilimbagahon bani Hudon na Martasik

24 ¹ Pasiyah-tahunkon, ari sapuluh bulan sapuluh, roh ma hata ni Jahowa hu bangku, mangkatahon,

² “Ale anak nijolma, suratkon ma goran ni ari on, ari sisadari on, ai sadari on ma ihubu raja Babel huta Jerusalem.

³ Marlimbaga ma ho bani bangsa sipanlawan on, hatahon ma bani sidea, ‘Sonon do hata ni Tuhan Jahowa: Hodohon ma hudon in, tampeihon ma hu atas, anjaha bahen bah hubagas!

⁴ Nahkon ma hubagas gulei na dob tinoktokan in, haganup na madear ni in, tulan pudi ampa tulan tangan, goki ma in bani holi-holi pilihan.

⁵ Buat ma sada biribiri pilihan, pagara ma soban i toruhni; lompah ma toktokni in, sonai homa holi-holi na ibagas hudon in.'

⁶ Halani ai sonon do hata ni Tuhan Jahowa, 'Magou ma huta na gok daroh in, ai ma na usih bani hudon ma martasik, na so mandarat tasikni hum bagas. Buat ma hum bagas toktokni ai sada-sada, ulang pala papilih-pilih.

⁷ Ai i tengah-tongahni ope daroh na niduruskonni ai; bani dolog batu do ai iduruskon, seng bani tanoh iduruskon ai, ase boi rungkubon ai bani tanoh.

⁸ Ase puho ringis-Ku, ase boi mambalas Ahu, Hupaturut do durus daroh ai bani dolog batu, ase ulang boi irungkub ai.'

⁹ Halani ai sonon do hata ni Tuhan Jahowa: Magou ma huta na gok daroh in! Ahu pe pajunjunon-Ku ma soban panutungini.

¹⁰ Tambahi soban in, pagara apuy, lompah-lompah gulei in, useihon kuahni, anjaha paturut ma monsong holi-holini.

¹¹ Nahkon ma hudon ai lumei hu atas ni narnarni, ase milas ai, gerger tombagani, gabe malala kotoranni na ibagas ai, anjaha magou tasikni ai.

¹² Hape, seng ra tanggal tasikni na hapal ai age ibagas apuy.

¹³ Halani habutakonmu marhitei parriah-riahon, anjaha seng ra ho borsih age pe Hupaborsih ho, halani ai seng anjai borsih be ho paima sombuh ringis-Ku dompak ho.

¹⁴ Ahu do Jahowa na manluarhon ai, sai saud do ai, sai bahenon-Ku do ai; seng surut Ahu, seng maralang-alang Ahu, seng manosal Ahu; domu hubani parlahoumu ampa pambahenanmu uhumon-Ku ho,” nini Tuhan Jahowa.

Maseda Jerusalem, tapi Seng Dong na Marhoru

¹⁵ Dob ai roh ma hata ni Jahowa, hu bangku, mangkatahon,

¹⁶ “Ale anak nijolma, tonggor ma, buaton-Ku ma sompong humbam hinarosuhkon ni matamu; tapi seng bulih ho doruh-doruh, mandoraki atap mariluh-iluh matamu.

¹⁷ Boi do marhoih, tapi ulang gogoh-gogoh, ulang bahen na manangisi na matei ai! Martudung ma ho dear, anjaha marsipatu, ulang rungkub gumismu, anjaha ulang pangan ruti pusok ni uhur!”

¹⁸ Jadi marsahap ma ahu sogod hubani na mabuei ai, anjaha bodarini matei ma parinangonku, anjaha patarni ai hubahen ma songon na hinatahon hu bangku.

¹⁹ Jadi nini na mabuei ai ma hu bangku, “Ai seng ra ho patugahkon bennami, aha do arti ni on bennami, ase sonin ibahen ho?”

²⁰ Jadi ningku ma hubani sidea, “Jahowa do mangkatahon hu bangku sonon”

²¹ Hatahon ma hubani ginompar ni Israel: Sonon do hata ni Tuhan Jahowa: Tonggor ma, palopason-Ku do butakan ianan-Ku na pansing in, ai ma na nienjeng-enjengkonnima in, na hinarosuhkon ni matanima ampa na hinasiholhon ni uhurnima; anjaha anak ampa borunima, na tinadingkonnima ijai, maningon rasei do bahenon ni podang.

²² Bahenonnima ma songon na Hubahen in: seng tutuponnima gumisnima anjaha seng panganonnima ruti pusok ni uhur.

²³ Tapi martudung ma hanima dear anjaha marsipatu; seng doruh-doruh atap mandoraki, tapi mandatei ma hanima halani hajahatonnima, anjaha morong-orong i lobei ni hasomanni bei.

²⁴ Sonai ma si Hesekiel gabe tanda bannima, ase ibahen hanima songon na binahenni ai. Anggo masa ma ai, gabe botohonnima ma, Ahu do Tuhan Jahowa.

²⁵ Ho ale anak nijolma, bani ari ai, anggo Hubuat ma humbani sidea benteng ni sidea ampa na hinasiholan ni uhur ni sidea ai, sonai homa anak ampa boru ni sidea,

²⁶ tongon, bani ari ai ma roh sahalak na maporus marayak ho, laho pabotohkon barita ai hubam.

²⁷ Bani ari ai, bani parroh ni halak na maporus ai, boi ma marsahap anjaha seng be longah ho. Sonin ma gabe tanda ho bani sidea, anjaha botohon ni sidea ma, Ahu do Jahowa.”

**Pambalason ni Naibata bani Halak
Amon, Moab, Edom ampa Palistim**

25 ¹Jadi roh ma hata ni Jahowa hu bangku, mangkatahon,

² “Ale anak nijolma, tujuhon ma bohimu dompak halak Amon, anjaha manjahai ma ho pasal sidea.

³ Hatahon ma bani halak Amon: Tangihon ma hata ni Tuhan Jahowa: Sonon do hata ni Tuhan Jahowa: Halani ihatahon hanima: Ha! ha! ha! bani rumah-Ku na mapansing ai, sanggah ibutaki ai, bani tanoh Israel, halani tarulang ai, ampa bani ginompar ni Juda, halani tarbuang sidea.

⁴ Halani ai, tonggor ma, ondoskonon-Ku do ho bani halak na i hapoltakan bahen parbagianan ni sidea, pasukon ni sidea do lampolamponi i tongah-tongahmu, anjaha paulionni do ianan ni sidea ibagas ho; panganon ni sidea do gogoh ni tanohmu, anjaha inumon ni sidea do dadih ni pinahanmu.

⁵ Bahenon-Ku do huta Rabba gabe sampalan ni unta, anjaha tanoh ni halak Amon gabe parsaranan ni biribiri, ase itanda hanima, Ahu do Jahowa.

⁶ Tongon, sonon do hata ni Tuhan Jahowa, Halani martopap-topap ho, anjaha marinjak-injak, anjaha marmegah-megah ho mangidah hasedaon ni tanoh Israel.

⁷ Halani ai, tonggor ma, Hupagostong do tangan-Ku manlawan ho, anjaha Huondoskon do ho gabe taban-taban ni bangsa-bangsa, anjaha raseihonon-Ku hun tengah-tengah ni nagori-nagori; Huboiskon do ho, ase itanda ho, Ahu do Jahowa.”

⁸ Sonon do hata ni Tuhan Jahowa, “Halani ihatahon Moab ampa Seir: Tonggor ma, doskon haganup bangsa parbegu do halak Juda,

⁹ halani ai, tonggor ma, sae-sae do bahenon-Ku raboyon ni Moab, gabe seng dong be huta ijai, i sab nagori ai, ai ma habanggalon bani nagori ai: Bet-Jesimot, Baal-Meon pakon Kiriataim.

¹⁰ Berehonon-Ku do ai rap pakon tanoh ni halak Amon, bani halak na i hapoltakan, bahen parbagianan bani sidea, ase ulang be taringat halak pasal sidea i tengah-tengah ni bangsa-bangsa.

¹¹ Dabuhon-Ku do uhum bani Moab, ase itanda sidea. Ahu do Jahowa.”

¹² Sonon do hata ni Tuhan Jahowa, “Halani maruhur pambalason Edom bani ginompar ni Juda, gabe marsalah banggal sidea halani pambalason ni sidea ai,”

¹³ halani ai sonon do hata ni Tuhan Jahowa, “Hupagostong do tangan-Ku manlawan Edom,

ripaskonon-Ku do hunjai jolma age pinahan, anjaha gabe halimisan do ai bahenon-Ku hun Teman das hu Dedan; maningon rasei do sidea bahenon ni podang.

¹⁴ Dalankonon-Ku do pambalason dompak Edom marhitei bangsang-Ku halak Israel; bahenon ni sidea do dompak Edom romban hu bani ringis-Ku ampa gilang-Ku; jadi ahapkonon ni sidea ma sonaha pambalas-Ku,” nini Tuhan Jahowa.

¹⁵ Sonon do hata ni Tuhan Jahowa, “Halani maruhur pambalason halak Palistim, anjaha marmegah-megah, marhajahaton sidea mambalas, laho mangagou marhalanohon ni parmunsuhon na dob madokah,

¹⁶ halani ai sonon do hata ni Tuhan Jahowa: Hupagostong do tangan-Ku manlawan halak Palistim, anjaha ripaskonon-Ku do halak Kereti, anjaha boiskononku do halak na tading i topi ni laut ai.

¹⁷ Dalankonon-Ku do pambalason banggal bani sidea marhitei paminsangon na gok ringis, ase ibotoh sidea, Ahu do Jahowa, anggo Hupadalan ma pambalason bani sidea.”

Uhum ni Naibata bani Tirus

26 ¹ Pasapuluhsada-tahunkon bani ari sada bulan sada, roh ma hata ni Jahowa hu bangku, mangkatahon,

² “Ale anak ni jolma halani ihatahon Tirus pasal Jerusalem: Ha! ha! ha! domma maropuk horbangan ni bangsa-bangsa, marurup hu bangku ma nuan, gok ma ahu, halani na maseda ai ia!

³ Halani ai, sonon do hata ni Tuhan Jahowa: Imbang-Ku ma ho, ale Tirus, arahon-Ku ma buei bangsa mamboan ho, songon laut na parohkon gilumbangni.

⁴ Parsedaon ni sidea ma tembok ni Tirus, anjaha rumbakkononni ma manarani; padaohon-Ku do ronsi tanohni, gabe tading batuni tumang mando Hubahen.

⁵ Gabe panjomuran ni jala mando ai i tongah-tongah ni laut, ai Ahu do na mansahapkon ai, nini Tuhan Jahowa; gabe taban ni bangsa-bangsa ma ia,

⁶ anjaha dusunni na i daratan rasei do bahenon ni podang, ase itanda sidea, Ahu do Jahowa.

⁷ Ai sonon do hata ni Tuhan Jahowa: Tonggor ma, parohon-Ku do dompak Tirus si Nebukadnesar, raja ni Babel, raja ni sagala raja, hun utara, marhasoman buei huda pakon buei gareta porang pakon jolma siajak huda ampa bala buei tumang.

⁸ Raseihononni ma marhitei podang dusunmu na i daratan; paulionni ma hubuan manlawan ho; pajongjongonni homa tembok pangkubu, anjaha padearonni tayub paronding-ondingan dompak ho.

⁹ Tujuhononni do bam parugas sironsang tembokmu, anjaha reongkononni marhitei parugas bosini.

¹⁰ Halani buei ni hudani gabe rungkubon ni orbukni ma ho, dugur ma tembokmu binahen ni lutu ni siajak huda, gareta ampa gareta porang, sanggah imasuki horbanganmu, songon halak na masuk hubagas huta na dob runtas tembokni.

¹¹ Marhitei tambirik ni hudani luntakonni do ganup alamanmu; raseihononni do bangsamu bani podang, anjaha sagala tiang habanggalonmu rumbakkononni do hu tanoh.

¹² Rampason ni sidea do arta-artamu, anjaha buatonni boniagamu; parreongon ni sidea do tembokmu, anjaha parsedaonni rumahmu na dear-dear in; sampakkononni do hu laut batu-batumu, parhayumu ampa reong-reongmu.

¹³ Parontihonon-Ku do hariahon ni dodingmu, anjaha sora ni arbapmu pe seng tarbogei be.

¹⁴ Bahenon-Ku do ho tading batu tumang, gabe panjomuran ni jala tumang, seng be paulion, ai Ahu, Jahowa do na mansahapkon ai, nini Tuhan Jahowa.

¹⁵ Sonon do hata ni Tuhan Jahowa pasal Tirus: Ai lang gobir ma nagori partopi laut mambogei pardabuhmu ampa orong-orong ni halak na ugahan ampa pamunuhon marhitei podang i tongah-tongahmu?

¹⁶ Jadi susur ma humbani paratasni ganup raja-raja partopi laut, ipangambungkon baju harajaonni anjaha itanggali pakeianni na marrupa-rupa ai. Marbaju pusok ni uhur do sidea hundul bani tanoh, hitir-hitir tongtong anjaha tarsonggot halani ho.

¹⁷ Bahenon ni sidea ma sada tangis-tangis pasal ho, anjaha hatahononni ma pasal ho: Aih, naha do parmagoumu hun tongah laut, ale huta na tarbarita, na markuasa i lautan, ho ampa pangisimu, na mambahen gobir sagala na marianan ijai.

¹⁸ Gobir do sonari sagala pulou bani ari
pardabuhmu, tongon, tarsonggot do sagala
nagori partopi laut halani parmagoumu.

¹⁹ Ai sonon do hata ni Tuhan Jahowa: Bahenon-Ku do ho gabe huta na tarulang, songon huta na so adong mangiankon, anjaha parohon-Ku do laut ai dompak ho, gabe rungkubon ni gilumbang banggal ma ho.

²⁰ Sampakkonon-Ku do ho hu toruh, hubani halak na dob tuad hu lubang ai, ai ma halak humbani sisapari; bahenon-Ku do ho marianan bani nagori partoruh ai, i tongah-tongah ni reong-reong na dob madokah ai, rap pakon halak na dob tuad hu lubang ai, ase ulang dong be na mangiankon ho, anjaha seng dong be iananmu bani tanoh ni halak na manggoluh.

²¹ Sompong do parohon-Ku ajalmu, seng anjai dong be ho, age pe hona pindahan ho, seng anjai jumpah be ho, nini Tuhan Jahowa.”

Doding Tangis-tangis Pasal Tirus

27 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, bahen ma sada doding tangis-tangis pasal Tirus,

³ anjaha hatahon ma bani Tirus, na marianan bani dalan masuk hu laut, partiga-tiga ni bangsa-bangsa bani buei nagori-nagori i topi laut: Sonon do hata ni Tuhan Jahowa: Ale Tirus, ihatahon ho do, kapal na gokan jenges do Ahu.

⁴ Tongah-tongah ni laut do gomgomanmu, jenges tumang do ho ipauli situhanghi ho.

⁵ Humbani hayu maranti Senir do ipauli sidea dasormu, hayu ares do ibuat hun Libanon, bahen tiang ni layarmu.

⁶ Humbani hayu jati Basan do ibahen holemu, anjaha tayubmu humbani hayu ares na hun pulou Kittim do ibahen sidea, ilapis bani gading.

⁷ Humbani hiou linen Masir na marrupa-rupa do layarmu, gabe partanda pasal ho; hiou simahonda ampa sigenger, na hun topi ni laut Elisa do tendamu.

- ⁸ Halak Sidon pakon Arwad do sipanlugai bam;
halak na pandei hun Zamar do ibagas ho,
sidea do gabe jurumudimu.
- ⁹ Partua-partua na hun Gebal ampa na pentar-
pentarni do ibagas ho, padear-dearhon
na maseda bam. Haganup kapal na i laut
ampa parhorja kapal roh do hu bam, laho
mantiga-tigahon boniagamu.
- ¹⁰ Halak Persia, Tud ampa Put do gabe balamu;
ipanggantungkon sidea do gantar ampa
tangkulukni ibagas ho; sidea do gabe
hagijangon bam.
- ¹¹ Halak Arwad do balamu iatas tembokmu
inggot, anjaha halak Gamad bani manaramu,
ipansangkotkon sidea do gantarni bani tembokmu
inggot, sidea do na mambahen gok hajengesonmu.
- ¹² Tarsis do hasomanmu martiga-tiga halani
hinabuei ni barang-barangmu; pirak, bosi, timah
ampa timah sibirong do ibahen sidea tukar ni
barang-barangmu.
- ¹³ Halak Javan, Tubal pakon Mesek martiga-tiga
do pakon ho, jolma ampa parugas tombaga do
itukarhon sidea bani barang-barangmu.
- ¹⁴ Halak Togarma manukarhon huda, huda porang
ampa halode bani tiga-tigamu.
- ¹⁵ Halak Rodus martiga-tiga pakon ho, buei nagori
partopi laut mandalankon partiga-tigaon pakon ho,

gading ampa hayu birong do ibahen sidea galarni bam.

¹⁶ Martiga-tiga do halak Edom pakon ho halani hinabuei ni barangmu; itukarhon sidea do bam mata intan samarag, hiou hasumba, hiou na marrupa-rupa, hiou linnen, simatah ampa mata intan jaspis.

¹⁷ Juda ampa tanoh Israel martiga-tiga do pakon ho; gandum na hun Minit, buah ara, manisan, minak ampa minak balsem do itukarhon sidea bam.

¹⁸ Martiga-tiga do Damaskus pakon ho halani hinabuei ni boniagamu na marbagei-bagei in, anggur hun Helbun ampa wol hun Zahar itukarhon sidea hu bam.

¹⁹ Hun Usal roh do barang-barang bosi, rompah-rompah ampa kulit manis ganti ni boniagamu.

²⁰ Halak Dedan marboniaga palana pakon ho, sihundulan sanggah marhuda.

²¹ Halak Arab pakon sagala kopala-kopala hun Kedar, ai ma partiga-tiga harosuh ni uhurmu pasal biribiri, biribiri tunggal ampa hambing tunggal; ai do tiga-tiga ni sidea pakon ho.

²² Saudagar na hun Seba pakon Raama martiga-tiga do pakon ho; itukarhon do hubani barangmu marbagei-bagei rompah-rompah sijengesan, marbagei-bagei mata intan na maharga ampa omas.

²³ Haran, Kanneh, Eden, Assur ampa Madai martiga-tiga do pakon ho.

²⁴ Itiga-tigahon sidea do hubam hiou pilihan, hiou simahonda, hiou na marrupa-rupa, parmadani na marrupa-rupa ampa tali banggal na pinuyuh.

²⁵ Kapal-kapal Tarsis do marlayar bam, mamboan tiga-tigamu. Sonai ma gabe gok ho, anjaha marmuatan na borat i tengah laut.

²⁶ Halak sipanlugaimu do mamboan ho hu laut bolag, tapi logou na hun hapoltakan do mangkaromkon ho hubagas laut.

²⁷ Habayakonmu, barang-barangmu, boniagamu, anak kapalmu, jurumudimu, tukang-tukangmu, partiga-tigamu ampa haganup balamu na ibagas ho ampa haganup halak na i tengah-tengahmu, harom do hubagas laut bani panorang pardabuhmu.

²⁸ Mambogei pandoruh ni jurumudimu, hitir-hitir do partopi laut;

²⁹ lintun bei ma hun kapalni haganup sijolom hole, anjaha anak kapal ampa haganup jurumudi na i laut turun ma hu darat;

³⁰ itangisi sidea do ho, anjaha doruh-doruh do sidea gogoh; inahkon sidea do orbuk bani uluni, margulu do sidea bani abuan.

³¹ Ipalpal sidea do uluni halani ho, anjaha marhiou guni do sidea; itangisi sidea do ho

humbani uhur na marhoru, gok pusok ni uhur,

³² Halani horu ni ai ibahen sidea do tangis-tangis pasal ho, idoruhi sidea do ho: Ai ise ma onggga iparseda doskon Tirus ibagas laut?

³³ Sanggah na roh boniagamu hun laut, bosur do buei bangsa-bangsa ibahen ho; marhitei hinabuei ni artamu ampa boniagamu, bayak do raja-raja ni tanoh on ibahen ho.

³⁴ Tapi sonari maropuk do ho, harom hubagas laut; boniagamu ampa haganup panumpangmu harom do rap pakon ho.

³⁵ Haganup halak partopi laut tarsonggot do pasal ho; raja-rajani mabiar tumang, marposi do bohi ni sidea.

³⁶ Manihul-nihul do partiga-tiga ni bangsa-bangsa halani ho; jangin do parroh ni ajalmu, seng anjai dong be ho lalab.”

Uhum pakon Tangis-tangis bani Raja ni Tirus

28 ¹ Dob ai roh ma hata ni Jahowa hu bangku, mangkatahon,

² “Ale anak nijolma, hatahon ma bani raja ni Tirus: Sonon do hata ni Tuhan Jahowa: Halani gijang uhurmu, anjaha ihatahon ho: Naibata do Ahu, hundul do Ahu bani hundulan ni Naibata, i tongah-tongah ni laut; hapejolma tumang do ho,

sedo Naibata, age pe ninuhurmu pentar ho songon Naibata.

³ Tongon, pentaran do ho ase si Daniel, sagala rusia seng dong na ponop humbam.

⁴ Marhitei habisukonmu pakon hapentaranmu ipatumpu ho do bam habayakon, janah ipahumpul ho do omas pakon pirak ibagas parartaanmu.

⁵ Halani buei ni akalumu ibagas partiga-tigaonmu ipabuei ho do artamu, gabe mangenjeng do uhurmu halani habayakonmu.

⁶ Halani ai sonon do hata ni Tuhan Jahowa: Halani ninuhurmu dos do ho songon Naibata,

⁷ halani ai, tonggor ma, parohon-Ku ma halak na legan mandorab ho, bangsa na tang sibisangan; sintakon ni sidea do podangni mandedahon hajengeson ni hapentaranmu, anjaha butakanni ma sinalsalmu.

⁸ Dabuhkonon ni sidea do ho hubagas lubang ai, songon halak na tarbunuh do parmateimu ibagas laut.

⁹ Ai hatahononmu ope: Naibata do ahu! i lobei ni halak na mambunuh ho, hape sedo Naibata ho, tapijolma do ibagas tangan ni halak sitikam ho?

¹⁰ Maningon matei do ho songon parmatei ni halak na so marsunat, marhitei tangan ni

halak na legan; ai Ahu do na manluarhon ai,
nini Tuhan Jahowa.”

¹¹ Dob ai roh ma hata ni Jahowa hu bangku,
mangkatahon,

¹² “Ale anak ni jolma, bahen ma sada doding tangis-
tangis pasal raja ni Tirus, anjaha hatahon ma hu
bani: Sonon do hata ni Tuhan Jahowa: Ho do usihan
ni na gokan dear, gok habisukon anjaha gok bani
hajengeson.

¹³ I Eden hinan do ho marianan, ibagas pohon
ni Naibata; bagei-bagei ni batu intan do
na manrungkub ho, ai ma batu intan
sardis, topas diamant, tarsis, soham,
oniks, sapir, rubin ampa samarag; omas
do panlongkotanni ai anjaha ai ma ibahen
panjagarmu; bani ari panompaonmu do
ipasirsir ai.

¹⁴ Ho do herub sipanrungkub hupabangkit, bani
dolog ni Naibata na mapansing ai do ho
hunahkon; i tongah-tongah ni batu na
marapuy do ho mardalan-dalan.

¹⁵ Seng dong sihataon bam bani haganup
dalanmu humbani ari panompaon bam,
ronsi jumpah hajahaton bam.

¹⁶ Ibagas partiga-tigaonmu na buei ai gabe gok
pangodoh-odohon do ho anjaha gok dousa;
halani ai Hupabali do ho humbaniolog
ni Naibata, anjaha Huripaskon do ho, ale

herub sipanrungkub hun tengah-tengah ni batu na marapuy.

¹⁷ Mangerjeng do uhurmu halani hinajengesmu; iagouhon do habisukonmu halani hamuliaonmu. Hu tanoh do ho hugijigkon, anjaha hupatontonkon do ho hu lobei ni raja-raja.

¹⁸ Halani hinabuei ni hajahatonmu marhitei hagedukon ni partiga-tigaonmu, ipabutak ho do ianan-Ku na mapansing in; halani ai Huparoh do apuy hun tengah-tengahmu, ai ma na mangankon ho, anjaha gabe abuan do ho Hubahen i atas tanoh in i lobei ni haganup na mangidah ho.

¹⁹ Haganup halak na mananda ho i tengah-tengah ni bangsa-bangsa, tarsonggot do mangidah ho; jangan do parroh ni ajalmu, seng anjai dong be ho lalab.”

Uhum bani Sidon

²⁰ Dob ai roh ma hata ni Jahowa hu bangku, mangkatahon,

²¹ “Ale anak ni jolma, tujuhon ma bohimu dompak Sidon, anjaha manjahai ma ho pasalsi,

²² anjaha hatahon ma: Sonon do hata ni Tuhan Jahowa: Tonggor ma, imbang-Ku do ho ale Sidon, patalaron-Ku ma, hasangapon-Ku i tengah-tengahmu, ase ibotoh sidea, Ahu do Jahowa,

anggo hudalankon ma uhum-Hu ijai, anjaha hupatuduhkon hapansingon-Ku bani;

²³ ai suruhon-Ku ma sampar hujai ampa pambunuhon bani alamanni; radag ma na tarbunuh i tongah-tongahni, inggot bani, binahen ni podang na mangimbangi; jadi botohon ni sidea ma, Ahu do Jahowa.

Parsuang ni Israel

²⁴ Jadi seng dong be bani ginompar ni Israel suga na manojok atap duri-duri na mangugahi humbani ganup simbalog ni sidea; na marmapas ni uhur mangidah sidea; jadi botohon ni sidea ma, Ahu do Tuhan Jahowa.

²⁵ Sonon do hata ni Tuhan Jahowa: Anggo Hupatumpu ma ginompar ni Israel humbani bangsa hamerapan ni sidea, anjaha Hupatalar hapansingon-Ku marhitei sidea ididah bangsa-bangsa, jadi marianan ma sidea bani tanohni, na huberehon ai hubani juakjuak-Ku si Jakob.

²⁶ Jadi sonang ma sidea marianan ijai, anjaha paulion ni sidea ma rumah, anjaha tombeionni pohon anggur. Tongon, sonang ma sidea marianan ijai, anggo Hudalankon ma uhum bani ganup simbalogni, na mapas bani sidea; jadi botohon ni sidea ma, Ahu do Jahowa, Naibata ni sidea.”

Ilumbahon Uhum dompak Masir

29¹ Pasapuluh-tahunkon ari sapuluh dua, bulan sapuluh, roh ma hata ni Jahowa hu bangku, mangkatahon,

² “Ale anak ni jolma, dompakkon ma bohimu dompak Parao, raja ni Masir, manjahai ma ho pasalsi ampa pasal ganup tanoh Masir,

³ hatahon ma: Sonon do hata ni Tuhan Jahowa: Imbang-Ku do ho, ale Parao, raja ni Masir, naga bolon ai, na gompang i tongah-tongah ni bah bangga ai, na mangkatahon, Ahu do simada Bah Nil, Ahu do sijadihon in!

⁴ Nahkonon-Ku do hait-hait hubagas osang-osangmu, anjaha bahenon-Ku do dengke na ibagas bahmin longkot bani sisikmu; jadi sintakon-Ku ma ho hu darat hun tongah-tongah ni bahmin rap pakon haganup dengke na ibagas bahmin, na longkot bani sisikmu.

⁵ Gijigkonon-Ku do ho hu halimisan, ho ampa haganup dengke na ibagas bahmin; timpal ma ho bani tanoh in, seng dong na mambuat atap na mananom. Bani binatang na i tanoh in ampa bani manuk-manuk na i awang-awang ai do Huberehon ho gabe sipanganon bani;

⁶ jadi botohon ni haganup pangisi ni Masir ma, Ahu do Jahowa. Halani tungkot tolong do ho bani ginompar ni Israel --

⁷ (*anggo ipartungkot sidea ho, maponggol ho, hona tusuk do tangan ni sidea; anggo ipangunsandei sidea ho, maponggol do ho, gabe rebad-rebad do binongei ni sidea*),

⁸ halani ai sonon do hata ni Tuhan Jahowa: Tonggor ma, parohon-Ku do podang mangimbang ho, anjaha raseihonon-Ku do jolma pakon pinahan hun tengah-tengahmu.

⁹ Gabe halimisan anjaha tarulang do tanoh Masir; jadi tandaon ni sidea ma, Ahu do Jahowa. Halani ihatahon ho: Ahu do simada Nil, anjaha ahui do sijadihon ai!

¹⁰ Halani ai, tonggor ma, imbang-Ku do ho, imbang-Ku do age bah banggalmu, anjaha bahenon-Ku do tanoh Masir gabe halimisan botul anjaha tarulang hun Migdol das hu Siene, das hu parbalogan Etiopia.

¹¹ Seng dong be nahei ni jolma na montas hunjai, nahei ni pinahan pe seng dong na montas hunjai, seng be ianonkon ai ompat puluh tahun dokahni.

¹² Anjaha bahenon-Ku do tanoh Masir gabe halimisan i tengah-tengah ni nagori, na dob gabe halimisan, anjaha huta ni sidea pe parsedaon do i tengah-tengah ni huta na dob pinarseda, ompat puluh tahun dokahni. Anjaha erapon-Ku do halak Masir i tengah-tengah ni bangsa-bangsa, anjaha mambur do sidea bahenon-Ku i tengah-tengah ni nagori-nagori.

¹³ Ai sonon do hata ni Tuhan Jahowa: Dob salpu siompat puluh tahun ai, patumpuon-Ku ma halak Masir humbani bangsa-bangsa hamerapan ni sidea ai.

¹⁴ Jadi pasuangon-Ku ma Masir, anjaha boanon-Ku do sidea mulak hu tanoh Patros, tanoh hasusuran ni sidea ai; gabe harajaon na etek ma sidea ijai.

¹⁵ Gabe sietekan do ai marimbang harajaon na legan, anjaha lang be pagijangonni dirini mangatasi bangsa-bangsa; paotikon-Ku do sidea, ase ulang be irajai bangsa na legan.

¹⁶ Anjaha seng marpangajaman bani be ginompar ni Israel; ai taringat ma sidea bani hasalahan ni sidea, anggo iparapat sidea dirini bani Masir. Jadi tandaon ni sidea ma, Ahu do Tuhan Jahowa.

¹⁷ Paduapuluhpitu-tahunkon, ari sada bulan sada, roh ma hata ni Jahowa hu bangku, mangkatahon,

¹⁸ “Ale anak ni jolma, isuruh si Nebukadnesar, raja ni Babel do balani marhorja koras manlawan Tirus; mapalpal do ganup ulu anjaha masapsap sagala abara, tapi age ia, age balani aha pe lang jumpahsi hun Tirus, bahen upah ni halojaonni manlawan huta ai;

¹⁹ Halani ai sonon do hata ni Tuhan Jahowa: Tonggor ma, ondskonon-Ku do tanoh Masir hu tangan ni si Nebukadnesar, raja ni Babel; buatonni do arta-artani, rampason anjaha samunonni do ai, ai ma gabe upah bani balani.

²⁰ Tanoh Masir do Hubere bani, gabe upah ni halojaonni, ai marguna Bangku do na hinorjahon ni sidea ai.

²¹ Bani panorang ai patubuhon ma sada tanduk bani ginompar ni Israel, anjaha ungkabon-Ku do pamanganmu i tongah-tongah ni sidea, ase ibotoh sidea, Ahu do Jahowa.”

Ilumbahon Use Uhum dompak Masir

30 ¹ Dob ai roh ma hata ni Jahowa hu bangku, mangkatahon,

² “Ale anak nijolma, manjahai ma ho hatahon ma: Sonon do hata ni Tuhan Jahowa: Doruhkon ma! Aih, jangin ni ari ai!

³ Tongon, dohor ma ari ai, dohor ma ari ni Jahowa ai, ari na golap do ai, panorang pambalason bani bangsa-bangsa!

⁴ Roh do podang hu Masir, jadi masa ma hagobiron i Etiopia, anggo rasei halak tarbunuh i Masir; iusung halak habayakonni, anjaha iparseda palas-palasni.

⁵ Halak Etiopia pe, Put, Lud, bangsa panginsolat haganup, Libia ampa bangsa siparpadan pakon sidea, maningon rasei do bahenon ni podang.

⁶ Sonon do hata ni Tuhan Jahowa: Maningon rasei do halak na manungkoli Masir, anjaha marumbak do kuasani na timbul in, hun Migdol das hu Siene rasei do sidea ijai ibahen podang, nini Tuhan Jahowa.

⁷ Maseda do ia i tongah-tongah ni nagori-nagori na dob maseda; anjaha huta-hutani pe i tongah-tongah ni huta-huta na dob mareong.

⁸ Jadi tandaon ni sidea ma, Ahu do Jahowa, anggo Hupagara ma apuy i Masir anjaha maropuk ma haganup na mangurupisi.

⁹ Bani ari ai misir ma mangolos suruhan hun lobei marayak Etiopia laho manonggoti ia; hagobiron do sogop bani sidea bani ari parmagou ni Masir. Tonggor ma, roh do ai!

¹⁰ Sonon do hata ni Tuhan Jahowa: Parontihonon-Ku do hariahon ni Masir marhitei tangan ni si Nebukadnesar, raja ni Babel.

¹¹ Ia rap pakon balani, ai ma sibisangan ai humbani bangsa-bangsa, iparoh do hujai parsedahon tanoh ai; sintakon ni sidea do podangni dompak Masir, anjaha gokan ni sidea do tanoh ai bani halak na tarbunuh.

¹² Pahorahon-Ku do Bah Nil ai, anjaha jualon-Ku tanoh ai hu tangan ni halak parjahat; parohon-Ku do hasedaon bani tanoh ai ampa bani haganup na adong ijai, marhitei tangan ni halak sileban; Ahu, Jahowa do na mansahapkon in.

¹³ Sonon do hata ni Tuhan Jahowa: Parsedaon-Ku do sagala gana-gana, anjaha boiskonon sisombah-sombahon hun Wop, seng anjai dong be raja-raja i Masir; pasogopon-Ku do biar i tanoh Masir.

¹⁴ Parsedaon-Ku do Patros, pagaraon-Ku do apuy i Soan, anjaha dabuhon-Ku do uhum i No.

¹⁵ Useihononku do ringisku bani Sin, benteng ni Masir ai, anjaha raseihononku halak simbuei na i No.

¹⁶ Pagaraonku do apuy i Masir, rusak anjaha gobir ma Sin; runtas do tembok ni No, iparreong do tembok ni Nob.

¹⁷ Raseihonon ni podang do garama ni On ampa Pibeset, anjaha tarbuang do anak boru.

¹⁸ Manggolapi do ari i Tahpanhes, anggo Huponggolhon ma ijai tungkot harajaon ni Masir, anjaha marujung kuasani na timbul ai; rungkubon ni hagolapan ma huta ai, anjaha tarbuang pangisi ni dusun-dusunni.

¹⁹ Sonai ma dalankonon-Ku uhum bani Masir, ase itanda sidea, Ahu do Jahowa.

²⁰ Pasapuluhsada-tahunkon, bani ari pitu bulan sada, roh ma hata ni Jahowa hu bangku, mangkatahon,

²¹ Ale anak ni jolma, domma huponggolhon tangan ni Parao, raja ni Masir, anjaha tonggor ma, seng ibaluti ai, seng itambari, seng ililit, ase margogoh namin use manjolom podang.

²² Halani ai sonon do hata ni Tuhan Jahowa: Tonggor ma, imbang-Ku do Parao, raja ni Masir, ponggolhonon-Ku do tanganni haduasi, na

margogoh ai ampa na dob maponggol ai, anjaha dabuhkonon-Ku do podang ai humbani tanganni.

²³ Erapon-Ku do halak Masir hu tongah-tongah ni bangsa-bangsa, anjaha mambur do sidea hu nagori-nagori ai bahenon-Ku.

²⁴ Pargogohon-Ku do tangan ni raja Babel, anjaha nahkonon-Ku podang-Ku hubagas tanganni, tapi ponggolhonon-Ku do tangan ni Parao, gabe doruh-doruh ma ia i lobei-Hu, songon halak na ughan parah.

²⁵ Tongon, pargogohon-Ku do tangan ni raja Babel, tapi galek ma anggo tangan ni Parao; jadi tandaonni ma, Ahu do Jahowa. Berehonon-Ku do podang-Ku hubagas tangan ni raja Babel, tampulhononni do ai dompak tanoh Masir.

²⁶ Erapon-Ku do halak Masir hutongah-tongah ni bangsa-bangsa, anjaha mambur do sidea bahenon-Ku hu nagori-nagori ai; ase itanda sidea, Ahu do Jahowa.”

**Ilimbagahon do Parao hubani hayu ares na
ganjang bolon, na dob nirumbakkon**

31 ¹ Dob ai pasapuluhsada-tahunkon, bani ari sada bulan tolu, roh ma hata ni Jahowa hu bangku, mangkatahon,

² “Ale anak nijolma, hatahon ma bani Parao, raja ni Masir, pakon hubani rayatni: Ise do usihan bam ibagas habanggalonmin?

- ³ Tonggor ma, ai ma hayu ares na i Libanon,
pardangkah na jenges, parbulung na tabun,
gijang tumang, punsuni das hu hambun.
- ⁴ Bah do na pabanggal ai, gijang do ai ibahen
bah na marjullak-jullak hun tanoh, na
mambahen marbaoran bah inggot iananni
ai, anjaha binangani laho hubani sagala
hayu na i talun.
- ⁵ Halani ai gijangan do ai marimbang sagala hayu
na i talun, lambin banggalni dangkahni,
anjaha lambin ganjangni ia rantingni, halani
buei ni bah na pabanggalhonsi.
- ⁶ Sagala manuk-manuk na i awang-awang
marasar do bani rantingni, anjaha i toruh
ni dangkahni do manunas sagala binatang
na i talun; bani linggomni marianan do
bangsa-bangsa na banggal.
- ⁷ Jenges do ai halani habanggalonni, halani
ganjang ni dangkahni, ai mangumparpar do
urat na bani bah mabuei.
- ⁸ Hayu ares na i pohon ni Naibata, seng taratasisi
ai, anjaha hayu tusam seng tardosdosi
dangkahni; hayu harangan seng tarimbangsi
jenges ni ranting-rantingni; seng dong hayu
i pohon ni Naibata na usih hujai ibagas
hajengeson.

⁹ Hubahen do ia jenges marhitei hinabuei ni dangkahni, anjaha haganup hayu na i Eden, na ibagas pohon ni Naibata simburu do bani.

¹⁰ Halani ai sonon do hata ni Tuhan Jahowa: Halani na marganjang ai ia, das punsuni hu hambun, anjaha gijang uurni halani ganjangni ai,

¹¹ halani ai ondskonon-Ku ma ia hubagas tangan ni sada halak na gogoh i tongah-tongah ni bangsa-bangsa; bahenonni do hubani romban hubani hajahaton na hinorjahonni ai, usironni do ia.

¹² Halak sileban, sibusangan humbani bangsa-bangsa do na manrobohsi lanjar itadingkon. Bani dolog-dolog ampa bani sagala habungan do mangkadabuh dangkahni, anjaha marpongolan ranting-rantingni, kerap bani lombang-lombang ni tanoh in; misiran do sagala bangsa na i tanoh on hun toruh ni linggomni, itadingkon do ai.

¹³ Bani batangni na marumbak ai ma sogop sagala manuk-manuk na i awang-awang, anjaha bani dangkahni ai sagala binatang na i talun,

¹⁴ ase ulang adong be hayu na i topi bah, na mangeljeng halani ganjangni, anjaha na das punsuni hu hambun; anjaha ulang adong be hayu na minum bah das sonai gijangni; ai hubani hamatean do sidea iondoskon, hu nagori partoruh ai, usih songonjolma na legan, marayakjolma na dob susur hu lubang ai.

¹⁵ Sonon do hata ni Tuhan Jahowa: Bani ari parturun-Ni hu nagori toruh, hubahen do marhoru bah bangga ai, Huolat do bah bolonni, anjaha soh mabaor buei binangani; marpakeian pusok ni uhur do Libanon hubahen halani-Si, anjaha sagala hayu na i talun madotei iahap halani-Si.

¹⁶ Hitir do Hubahen sagala bangsa halani pardorob ni parrumbakni, sanggah husampakkon ia hu nagori toruh, hubani halak na dob tuad hu lubang ai; sagala hayu na i Eden, ai ma na pinilih ampa sijengesan i Libanon, sagala sionsop bah tarapoh do i nagori toruh.

¹⁷ Ai sidea pe turun do hu nagori toruh rap pakon sidea, mangayaki halak na dob tarbunuh halani podang, ai ma sidea, na marianan i toruh ni linggomni humbani bangsa-bangsa.

¹⁸ Ise do usihanmu ibagas hamuliaon ampa habanggalon humbani hayu na i Eden? Rap pakon hayu na i Eden do ho gijigkonon hu nagori toruh; maningon rap tibal do ho ampa halak na so marsunat, rap pakon halak na binunuh ni podang. Ai ma Parao ampa haganup rayatni, nini Tuhan Jahowa.”

Doding Tangis-tangis Pasal Parao ampa Rayatni

32 ¹ Pasapuluhsada-tahunkon, bani ari sada bulan sapuluh dua, roh ma hata ni Jahowa hu bangku, mangkatahon,

² “Ale anak ni jolma, bahen ma sada doding tangis-tangis pasal Parao, raja ni Masir, hatahon ma hu bani: Ale singa ajar-ajar i tongah-tongah ni bangsa-bangsa, ho na dob pinarseda! Songon naga do ho ibagas laut, unsong-unsong ibagas bah banggalmu; gombur do ibahen ho bahmu marhitei naheimu, anjaha iluntaki ho do bah banggalmu.

³ Sonon do hata ni Tuhan Jahowa: Rungkubkonon-Ku do jalang-Ku hubam, ai ma hulanan ni buei bangsa; dokdokon-Ku do hu atas ibagas jalang-Ku.

⁴ Sampakkonon-Ku do ho hu darat, anjaha hu ladang-ladang in do ho gijigkonon-Ku; parohon-Ku do manuk-manuk na i awang-awang in sogop bam, anjaha bosuran binatang-binatang na i tanoh in halani ho.

⁵ Gijigkonon-Ku do dagingmu i atas ni dolog-dolog, anjaha gokan-Ku habungan-habungan marhitei bangkeimu.

⁶ Pabosuron-Ku do tanoh age dolog-dolog marhitei darohmu na mabaor in, gok do binanga-binanga bahenonni ai.

⁷ Sanggah parboismai, rungkubon-Ku do langit in, anjaha manggolapi hubahen bintang-bintang; rungkubon-Ku do mata ni ari bani hambun, anjaha bulan pe seng marsinalsal.

⁸ Haganup panondang na i langit manggolapi do bahenon-Ku i baboumu, anjaha parohon-Ku do hagolapan hu tanohmu, nini Tuhan Jahowa.

⁹ Gobir do bahenon-Ku uhur ni buei bangsa, anggo Huboan ho tarbuang hu tongah-tongah ni bangsa-bangsa, hu nagori-nagori na so tinandamu.

¹⁰ Songgotan do buei bangsa halani ho, anjaha gobir raja-raja ni sidea pasal ho, anggo Huawas-awaskon ma podang-Ku i lobei ni sidea; rusak do sidea torus, pasal hosahni bei, bani panorang pardabuhmu.

¹¹ Ai sonon do hata ni Tuhan Jahowa: Podang ni raja Babel do na roh mandorab ho!

¹² Rasei do bahenon-Ku balamu marhitei podang ni puanglima, haganup sidea, ai ma sibisangan humbani bangsa-bangsa. Parsedaon ni sidea do hatimbulon ni Masir, anjaha magou do bahenonni rayatni.

¹³ Ripaskonon-Ku do ganup pinahanni na i topi ni bah banggal; seng be gomburon ni nahei ni jolma ai, anjaha tambirik ni pinahan pe seng be luntakonni ai.

¹⁴ Lihou do bahenon-Ku binanga ni sidea, anjaha manjulur songon minak bah banggal ni sidea, nini Tuhan Jahowa,

¹⁵ sanggah na Hubahen Masir gabe halimisan, Huparseda haganup isini, anjaha Huraseihon

sagala na marianan ijai, ase itanda sidea,
Ahu do Jahowa.

¹⁶ Doding tangis-tangis do in, sidodingkononkon;
tongon, dodingkonon ni boru ni bangsa-bangsa do
in, dodingkononni do ai bani Masir ampa bani
rayatni haganup.

¹⁷ Dob ai pasapuluhdua-tahunkon, ari sapuluh lima
bulan sapuluh dua, roh ma hata ni Jahowa hu
bangku, mangkatahon,

¹⁸ Ale anak ni jolma, tangisi ma Parao ampa rayatni,
anjaha suruh ma sidea tuad, ia pakon boru ni
bangsa-bangsa na sangap-sangap in, laho hu nagori
toruh, marayak na dob tuad hu lubang ai.

¹⁹ Ise do na niatasanmu ibagas hajengeson? Tuad
ma ho, ase ipatibal ho rap pakon halak na so
marsunat.

²⁰ I tengah-tengah ni halak binunuh ni podang do ia
tompas, anjaha i lambungni radag sagala rayatni.

²¹ Jadi hatahonon ni puanglima na gogoh-gogoh ai
ma hun tengah ni nagori toruh ai pasalsi ampa na
mangurupisi: Tuad do sidea, radag ijai, halak na so
marsunat ai, hona bunuh ibahen podang.

²² Ijai do Assur, ampa ganup rayatni inggot
tanomanni; haganup sidea tarbunuh, tompas
halani podang;

²³ bani tang parbagas ni lubang ai do tanomanni,
anjaha rayatni inggot bani tanomanni; haganup
sidea tarbunuh, tompas halani podang, ai ma

sibahen songgot-songgot hinan i tanoh ni halak na manggoluh.

²⁴ Ijai do Elam ampa haganup rayatni inggot tanomanni; haganup sidea tarbunuh, tompas binahen ni podang; tuad do sidea, seng marsunat hu nagori toruh; ipausung-usung sidea do habadoronni rap pakon halak na tuad hu lubang ai.

²⁵ Ibahen sidea do podomanni i tongah-tongah ni halak na tarbunuh rap pakon rayatni, inggot tanomanni; haganup sidea seng marsunat, tompas halani podang; sidea do sipasar songgot-songgot i tanoh ni halak na manggoluh, ipausung-usung sidea do habadoron ni sidea rap pakon halak, na tuad hu lubang ai, i tongah-tongah ni halak na tarbunuh ai do sidea radag.

²⁶ Ijai do Mesek ampa Tubal ampa haganup rayatni inggot tanoman ni sidea, haganup do sidea seng marsunat, tompas halani podang, ai ma sibahen songgot-songgot hinan i tanoh ni halak na manggoluh.

²⁷ Seng tibal sidea rap pakon puanglima na dob tarbunuh sapari, na dob tuad hu nagori toruh marpakeian porang, podang ni sidea inahkon i toruh ni uluni, anjaha gantarni irungkubkon bani holi-holini; ai songgot-songgot mangidah puanglima ai do na masa i tanoh ni halak na manggoluh.

²⁸ Tapi anggo ho i tongah-tongah ni na marsunat ai do, marosak anjaha tibal, rap pakon halak na tarbunuh halani podang.

²⁹ Ijai do Edom, raja-rajani ampa na sangap-sangapni, itibalhon ijai, age pe gogoh hinan, rap pakon halak na tarbunuh halani podang; radag do sidea ijai rap pakon halak na so marsunat, rap pakon halak na tuad hu lubang ai.

³⁰ Ijai do raja-raja na hun utara haganup ampa haganup halak Sidon, na tuad rap pakon halak na tarbunuh, na gabe bador ibagas kuasani; tibal do sidea seng marsunat rap pakon halak na tarbunuh halani podang, anjaha ipausung-usung sidea do habadoron rap pakon halak na tuad hu lubang ai.

³¹ Idahon ni Parao ma sidea, gabe tarapoh ma uhurni pasal rayatni; tarbunuh ibahen podang do Parao ampa haganup balani, nini Tuhan Jahowa.

³² Ai ipasar do songgot-songgot i tanoh ni halak na manggoluh; halani ai patibalon do Parao ampa haganup rayatni i tongah-tongah ni halak na so marsunat, rap pakon halak na tarbunuh binahen ni podang, nini Tuhan Jahowa.”

**Tanggung jawab ni Nabi Hesekiel
songon Siparjaga bani Israel**

33 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, parsahapkon ma hasomanmu na sabangsa, anjaha hatahon ma bani sidea: Anggo Huparoh podang hubani sada nagori, jadi roh pangisi ni nagori ai mambuat sada halak hun tengah-tengah ni sidea, anjaha ipabangkit sidea ia gabe siparjaga bani sidea,

³ anjaha anggo ididah roh podang ai dompak nagori ai, gabe isompul tarompit ai, laho palumbahon bangsa ai,

⁴ jadi anggo adong na manangar sora ni tarompit ai, hape seng ra ia palumbaon, gabe roh podang ai anjaha ibunuh ia, marbilang hubani sandiri ma darohni ai.

⁵ Ibogei do sora ni tarompit ai, hape seng ra ia palumbaon, marsapata hubani ma darohni. Tapi halani ipalumba parjaga ai do, jadi maluah ma hosahni.

⁶ Tapi, anggo ididah parjaga ai podang ai roh, hape seng isompul tarompit ai, gabe seng hona palumba bangsa ai, gabe roh podang ai, anjaha dong na tarbunuh humbani sidea: matei do halak ai ibagas dousani, tapi humbani parjaga ai do tungguonku darohni.

⁷ Tapi anggo ho, ale anak ni jolma, domma hupabangkit ho gabe parjaga bani ginompar ni Israel, anggo adong itangar ho sada hata humbani pamangan-Ku, lumbahon ma ai bani sidea ibagas goran-Ku.

⁸ Anggo Huhatahon bani halak parjahat: Maningon matei do ho, ale parjahat tapi seng marsahap ho palumbahon parjahat ai, ase itadingkon dalanni ai, sai na matei do namin parjahat ai ibagas hajahatonni, tapi humbani tanganmu do tungguon-Ku darohni.

⁹ Tapi, anggo ipalumba ho do parjahat ai, ase itadingkon dalanni ai, hape seng ra ia mulak manadingkon dalanni ai, sai na matei do ia ibagas hajahatonni, tapi maluah do anggo hosahmu.

¹⁰ Anjaha ho ale anak ni jolma, hatahon ma hubani ginompar ni Israel: Sonon do sahap-sahapnima: Mangonai bennami do panlanggaronnami pasal dousanami, anjaha lambin masab do hanami ibahen, sonaha ma boi manggoluh ope hanami?

¹¹ Hatahon ma bani sidea: Songon sintongni manggoluh Ahu, nini Tuhan Jahowa, sabonar seng marosuh uhur-Hu mangidah hamatean ni parjahat, tapi ase mulak do parjahat ai manadingkon dalanni, ase manggoluh ia. Mulak, mulak ma hanima humbani dalannima na jahat in; ai mase ma rahanan matei hanima, ale ginompar ni Israel?

¹² Ho ale anak ni jolma, hatahon ma hubani bangsamu: Hapintoron ni halak parpintor seng tarpaluah ia dirini bani panorang panlanggaronni; anjaha pasal hajahaton ni parjahat, seng madabuh ia halani ai, asal itadingkon hajahatonni ai;

halak parpintor seng boi manggoluh ia halani hapintoronni hinan, anggo mardousa ia.

¹³ Age pe domma Huhatahon bani halak parpintor: Maningon manggoluh do ho! Anjaha martenger ni uhur ia bani hapintoronni ai, hape idalankon hajahaton, haganup hapintoronni ai seng be ingaton ai; tapi matei mando ia halani hajahaton na hinorjahonni ai.

¹⁴ Porini domma Huhatahon bani halak parjahat: Maningon matei do ho! Hape itadingkon dousani ai, anjaha idalankon uhum ampa hapintoron,

¹⁵ ai ma, ipaulak parjahat ai sikoram, ipasuang na nirampasni, marparlahou ia ibagas titah hagoluhan, anjaha seng idalankon hagedukon, maningon manggoluh do ia, seng anjai matei ia.

¹⁶ Haganup dousa, na dob hinorjahonni ai, seng be hiraon bani; halani ihorjahon do aturan pakon uhum ampa hapintoron, maningon manggoluh do ia.

¹⁷ Tapi ihatahon bangsamu do: Seng sintong dalan ni Tuhan! Hape dalan ni sidea sandiri do na so sintong.

¹⁸ Anggo manlembang halak parpintor humbani hapintoronni, gabe ihorjahon hajahaton, maningon matei do ia halani ai.

¹⁹ Anjaha anggo itadingkon halak parjahat hajahatonni, anjaha idalankon uhum ampa hapintoron, manggoluh do ia halani ai.

²⁰ Hape ihatahon hanima: Seng sintong dalan ni Tuhan! Ale ginompar ni Israel, domu hubani parlahounima bei do hanima uhumon-Ku.

Barita pasal partalu ni Jerusalem

²¹ Pasapuluhdua-tahunkon, bani ari lima bulan sapuluh, dob tarbuang hanami, roh ma sada halak na maluah hun Jerusalem marayak ahu, mangkatahon, Domma talu huta ai!

²² Ia tangan ni Jahowa domma tampei bangku bodari ni ai, paima roh halak na maporus ai; iungkab do pamanganku bani panorang parroh ni halak ai bangku sogod-sogod; jadi buha ma pamanganku, seng longah be ahu.

²³ Roh ma hata ni Jahowa hu bangku, mangkatahon,

²⁴ Ho ale anak ni jolma, sonon sahap-sahap ni pangisi ni ianan na dob maseda ai i tanoh Israel: Si Abraham, sahalaksi do hansa hape gabe parbagiananni do tanoh in; buei do anggo hita, tontu iberehon do tanoh in gabe parbagiananta.

²⁵ Halani ai hatahon ma bani sidea: Sonon do hata ni Tuhan Jahowa: Ipangan hanima gulei marhasoman daroh, mangkawah do matanima dompak gagananima, anjaha manduruskon daroh do hanima; mintor tarteian hanima ma tanoh in?

²⁶ Marpangajaman do hanima bani podangnima, ihorjahon hanima do na masambor, anjaha ganup

do hanima pabutak jolma ni hasomanni; mintor tarteian hanima ma tanoh in?

²⁷ Hatahon ma sonon bani sidea: Sonon do hata ni Tuhan Jahowa: Songon sintongni manggoluh Ahu, maningon rasei do bahenon ni podang na marianan bani huta na dob maseda ai; anjaha halak na marianan i darat ondskonon-Ku do gabe sipanganonni binatang; anjaha halak na adong bani dolog batu ampa liang-liang maningon matei do bahenon ni sampar.

²⁸ Bahenon-Ku do tanoh ai gabe halimisan anjaha tarulang, anjaha marujung do sagala pangenjengon ai; gabe lungun ma dolog-dolog ni Israel, seng dong be halak na montas hunjai.

²⁹ Jadi tandaon ni sidea ma, Ahu do Jahowa, anggo gabe halimisan anjaha tarulang tanoh ai Hubahen, halani haganup hasamboron na hinorjahon ni sidea.

Hampung ni uhur ni bangsa ai pasal hata na nilumbahon ni si Hesekiel

³⁰ Ia ho, ale anak ni jolma, bangsamai, na mansahap-sahapkon ho i lambung ni tembok ampa bani labah ni rumah-rumah, nini samah sidea, ganup bani hasomanni: Eta, anjaha tangar hita ma hata aha do ai, na roh humbani Jahowa!

³¹ Jadi roh ma sidea marayak ho, marhulan-hulan, lanjar hundul ma bangsangakai i lobeimu, anjaha

tangihonon ni sidea do hatamu, tapi seng dalankonon ni sidea ai; holong do isahapkon pamangan ni sidea, tapi bani untungni bei do sangkut uhur ni sidea.

³² Tongon, songon sipandoding sipamalas-malas uhur do ho bani sidea, silurlur sora ampa na pandei marhusapi, ai itangihon sidea do na hinatahonmu, tapi seng ihorjahon sidea ai.

³³ Tapi anggo masa ma ai, tonggor ma, maningon saud do ai, jadi botohon ni sidea ma, na adong do nabi i tongah-tongah ni sidea.”

**Pinsang-pinsang dompak Parmahan na So
Mansarihon Hulananni; Bagah-bagah
Pasal Parmahan na Madear**

34 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, manjahai ma ho pasal parmahan ni Israel, manjahai anjaha hatahon ma bani sidea, hubani parmahan ai: Sonon do hata ni Tuhan Jahowa: Bursik ma parmahan ni Israel, na marmahan dirini sandiri! Ai lang biribiri do siparmahanon ni parmahan?

³ Taboh-tabohni ipangan hanima, wolni jadi pakeiannima, na mombur isayat hanima; tapi biribiri ai seng iparmahan hanima.

⁴ Na galek seng ipargogohi hanima, na boritan seng itambari hanima, na ughan seng ibaluti hanima;

na kahou seng iboan hanima mulak, anjaha na magou seng ipindahi hanima; koras anjaha bisang do panrajainima bani sidea.

⁵ Jadi mampar ma biribiringku, halani lang adong na marmahani; gabe sipanganon ma sidea bani sagala binatang panoroh.

⁶ Maor do biribiringkai i atas ni sagala dolog ampa bani sagala buntu-buntu na gijang; bani sab tanoh in do mambur merap biribiringku, tapi sahalak pe lang adong na sungkun-sungkun pasal ai atap na mangindahi ai.

⁷ Halani ai, ale parmahan, tangihon ma hata ni Jahowa!

⁸ Songon sintongni manggoluh Ahu, nini Tuhan Jahowa: Halani gabe sisorohon biribiring-Ku, anjaha gabe sipanganon bani sagala binatang panoroh biribiringkai, halani seng dong na marmahani, anjaha halani seng ipindahi parmahankai biribiring-Kai, tapi dirini sandiri do iparmahan, hape biribiring-Kai lang,

⁹ halani ai, ale parmahan, tangihon hanima ma hata ni Jahowa:

¹⁰ Sonon do hata ni Tuhan Jahowa: Tonggor ma, imbang-Ku do parmahan in, anjaha tungguon-Ku do biribiri in humbani sidea, anjaha parontihonon-Ku sidea humbani na marmahan biribiri in. Seng be parmahanon ni parmahan in dirini; paluahon-Ku ma

biribiring-Ku humbani pamangan ni sidea, ase ulang ipangan sidea be in.

¹¹ Ai sonon do hata ni Tuhan Jahowa: Tonggor ma, Ahu, Ahu sandiri sungkun-sungkun bani biribiring-Ku, anjaha pindahan-Ku do sidea.

¹² Songon parmahan na mangindahi biribirini, anggo adong na kahou humbani hulananni ai, sonai do pindahan-Ku biribiring-Ku; paluahon-Ku do sidea humbani ganup ianan hamerapan ni sidea ai, sanggah bonog ari anjaha lotir.

¹³ Boanon-Ku do sidea mandarat humbani bangsa-bangsa, anjaha patumpuon-Ku do sidea hun nagori-nagori ai, anjaha paulakon-Ku do sidea hu tanoh ni sidea sandiri; parmahanon-Ku do sidea bani dolog-dolog ni Israel, bani habungan ampa bani haganup ianan, na tariankon i tanoh ai.

¹⁴ Bani sampalan na mombur do parmahanon-Ku sidea, anjaha dolog-dolog ni Israel na gijang ai do parmahanan bani sidea; ijai do sidea manggompang bani tanoh na dear panggagatan, anjaha manggagat do sidea bani sampalan na lambutan bani dolog-dolog ni Israel.

¹⁵ Ahu sandiri ma gabe siparmahan bani biribiring-Ku, anjaha Ahu mambahen marsaran sidea, nini Tuhan Jahowa.

¹⁶ Pindahan-Ku do na magou in, paulakon-Ku ma na kahou in, anjaha balutan-Ku na ugahan; na galek pargogohan-Ku, tapi na mombur anjaha na

gogoh pardiateihonon-Ku; ibagas hasintongan do parmahanon-Ku sidea.

¹⁷ Tapi pasal hanima, ale biribiringku, sonon do hata ni Tuhan Jahowa: Ahu ma manguhum biribiri samah biribiri, biribiri tunggal ampa hambing tunggal.

¹⁸ Ai lang sungkup bannima manggagat bani sompalan na mombur in, ai dogei-dogeionnima ope teba-teba ni sampalan in? Ai lang sungkup ope minum hanima humbani bah na lihou in, sihol luntakonnima ope in?

¹⁹ Ai mintor na nidogei-dogeinima in ma panganon ni biribiring-Ku, anjaha tor ni luntak-luntaknima in ma inumonni?

²⁰ Halani ai, sonon do hata ni Tuhan Jahowa hubani sidea: Tonggor ma, Ahu sandiri ma na manguhum biribiri na mombur ampa na merung.

²¹ Halani ionjar-onjar hanima marhitei badan ampa abaranima, anjaha na galek ai idugui hanima marhitei tanduknima, ronsi na mambur merap sidea,

²² halani ai urupan-Ku ma biribiring-Kin, seng be sisorohon sidea; Ahu ma na manguhum biribiri samah biribiri.

²³ Pabangkiton-Ku ma sada parmahan bani sidea, ai ma juakjuak-Ku si Daud, anjaha parmahanonni ma sidea. Ia ma na marmahan sidea, anjaha ia gabe parmahan bani sidea.

²⁴ Ahu, Jahowa ma gabe Naibata bani sidea, anjaha juakjuak-Ku si Daud gabe panrajai i tongah-tongah ni sidea; Ahu, Jahowa do na manluarhon ai.

²⁵ Bahenon-Ku ma bani sidea padan pardameian, anjaha usiron-Ku ma binatang panoroh hun tanoh ai, gabe boi sonang marianan sidea i halimisan atap modom i harangan.

²⁶ Bahenon-Ku ma sidea ampa haganup na inggot bani dolog-Ku gabe pasu-pasu; parohon-Ku do udan bani musimni, gabe udan pasu-pasu ma ai.

²⁷ Hayu na i talun mambere buahni, anjaha tanoh ai ibere do gogohni, anjaha sonang do sidea i tanoh ni sidea sandiri; jadi tandaon ni sidea ma, Ahu do Jahowa, anggo Huponggolhon pasangan ni sidea ai, anjaha Hupaluah sidea humbagas tangan ni halak na marjabolonkon sidea.

²⁸ Seng be gabe taban-taban sidea bani bangsa-bangsa, anjaha binatang-binatang na i nagori in seng be atahonni sidea, tapi sonang ma sidea marianan, seng dong be na mangkirjati.

²⁹ Pasirsiron-Ku ma bani sidea sada pohon na madear, gabe seng be magou sidea hun nagori in halani gayuran, anjaha seng be taronon ni sidea apas-apas ni bangsa-bangsa.

³⁰ Jadi botohon ni sidea ma, Ahu do Jahowa, Naibata ni sidea, na mangkasomani sidea, anjaha sidea ginompar ni Israel, bangsang-Ku do sidea, nini Tuhan Jahowa.

³¹ Tongon, hanima do biribiring-Ku, biribiri bani sampalan-Ku; Ahu do Naibatania, nini Tuhan Jahowa.”

Uhum ni Naibata bani Edom

35 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, dompakkon ma bohimu hu Dolog Seir, anjaha manjahai ma ho pasal ai!

³ Hatahon ma hu bani: Sonon do hata ni Tuhan Jahowa: Imbang-Ku do ho, ale Dolok Seir, pagostongon-Ku do tangan-Ku dompak ho, anjaha bahenon-Ku do ho gabe halimisan anjaha tarulang.

⁴ Parreongon-Ku do huta-hutamu, maningon gabe halimisan do ho, ase itanda ho, Ahu do Jahowa.

⁵ Halani humbani sapari mammunsuhi lalab uhurmu, anjaha iondoskon ho halak Israel bani podang, sanggah panorang hasosakanni, bani panorang hagogok ni uhum bani sidea,

⁶ halani ai, songon sintongni manggoluh Ahu, nini Tuhan Jahowa, bahenon-Ku do ho margulu-gulu daroh, seng tarlembangi ho na marlapu-lapu daroh ai; halani marsalah ho marhitei na manduruskon daroh, halani ai maningon durus do darohmu.

⁷ Bahenon-Ku do Dolok Seir gabe halimisan anjaha tarulang, anjaha rotapon-Ku do hunjai sagala na masuk ampa na luar.

⁸ Gok do bahenon-Ku dologmu bani na tarbunuh, radag do halak na tarbunuh bani dolog-dologmu, bani habunganmu ampa bani binanga-binangamu.

⁹ Bahenon-Ku do ho gabe halimisan ronsi sadokah ni dokahni, anjaha hutamu pe lang be ianonkon, ase itanda ho, Ahu do Jahowa.

¹⁰ Halani ihatahon ho: Na dua bangsa on ampa na dua nagori on maningon bangku do ai, maningon ahu do gabe simada ai! (*hape ijai do Jahowa.*)

¹¹ Halani ai, songon sintongni manggoluh Ahu, nini Tuhan Jahowa, maningon bahenon-Ku do bam romban hubani ringismu ampa romban hubani simburumu dompak sidea halani domdommu mangidah sidea; patandahonon-Ku do diring-Ku i tongah-tongahnima marhitei uhum sidabuhon-Ku bannima.

¹² Jadi botohonmu ma, Ahu do Jahowa, na manangar haganup panrisaimu dompak dolog ni Israel, marhitei na mangkatahon, Domma iparseda ai! Sibonduton do ai ibere banta!

¹³ Ipabanggal ho do dirimu dompak Ahu marhitei pamanganmu, ipabuei ho do sahap-sahapmu dompak Ahu; Hubogei do ai.

¹⁴ Sonon do hata ni Tuhan Jahowa: Songon malas ni uhurmu bani tanoh-Ku na tarulang in, sonai do mangonai bam bahenon-Ku.

¹⁵ Songon malas ni uhurmu mangidah parbagianan ni Israel na maseda in, sonai do mangonai bam

bahenon-Ku; maningon gabe halimisan do ho, ale Dolok Seir ampa ho haganup, ale Edom, ase itanda hanima, Ahu do Jahowa.”

Bagah-bagah Pasal Parsuang ni Tanoh Israel

36¹ Ho ale anak ni jolma, manjahai ma ho pasal dolog ni Israel, anjaha hatahon ma, “Ale dolog ni Israel, tangihon ma hata ni Jahowa!

² Sonon do hata ni Tuhan Jahowa: Halani na dob ihatahon munsuh pasal hanima: Ha, ha, ha! Buntu-buntu sisadokah ni dokahni ai, domma gabe parbagiananta!

³ Halani ai, manjahai ma ho, hatahon ma: Sonon do hata ni Tuhan Jahowa: Halani tongon, halani na dob pinarseda ni sidea ai hanima, iparreong inggot, anjaha gabe parbagianan ni bangsa-bangsa na tading ai hanima, anjaha gabe sisahap-sahapkononkon ampa sirisa-risaon ni halak hanima,

⁴ halani ai, ale dolog ni Israel, tangar ma hata ni Tuhan Jahowa: Sonon do hata ni Tuhan Jahowa bani sagala dolog ampa buntu-buntu, bani lombang-lombang ampa habungan, bani na mareong ampa huta-huta na dob tinadingkon, na dob gabe taban ampa sirisa-risaon bani bangsa-bangsa inggot,

⁵ halani ai sonon do hata ni Tuhan Jahowa: Tongon, marhitei gajag ni simburung-Ku do marsahap Ahu dompak bangsa parbegu na tading ai ampa

dompak Edom haganup, na mambuat tanoh-Ku gabe parbagianan ni sidea, ibagas gok malas ni uhur ampa risa-risa, laho parsedahon ampa manrampasi ai,

⁶halani ai, manjahai ma ho pasal tanoh Israel, anjaha hatahon ma bani sagala dolog ampa buntu-buntu, bani lombang-lombang ampa habungan: Sonon do hata ni Tuhan Jahowa: Tonggor ma, marsahap do Ahu ibagas simburung-Ku ampa ibagas ringis-Ku, halani na dob manaron ai hanima binahen ni dorun-dorun ni sipajuh begu-begu.

⁷Halani ai sonon do hata ni Tuhan Jahowa: Hupagostong do tangan-Ku laho marbija, paboa bangsa-bangsa na inggot bannima ai maningon tarononni do dorun-dorun.

⁸Tapi anggo hanima, ale dolog ni Israel, manguhaki do mardangkahi anjaha marbuahi bani bangsang-Ku Israel, ai podas ma sidea mulak hu tanohni.

⁹Tongon, parayakon-Ku anjaha dompakkonon-Ku do hanima, horjahononkon anjaha tidahan do use hanima.

¹⁰Anjaha pabueion-Ku do jolma i atasnima, ai ma ginompar ni Israel haganup; ianonkon do use huta-huta, anjaha padearon ma na mangkareong.

¹¹Pabueion-Ku do i atasnima jolma pakon pinahan, martambah-tambah anjaha manggompari do sidea; marisi do hanima bahenon-Ku songon bani panorangnima sapari; bahenon-Ku do bannima na

madear lobih humbani sapari; jadi botohonnima ma, Ahu do Jahowa.

¹² Bahenon-Ku do mardalani jolma i atasnima, ai ma bangsang-Ku Israel; sidea do manean ho, gabe parbagianan ni sidea do ho, anjaha seng be magouan anak sidea bahenonmu.

¹³ Sonon do hata ni Tuhan Jahowa: Halani ihatahon halak bam: Sipangan jolma do ho, anjaha ibahen ho do popor bangsamu,

¹⁴ halani ai, lang be sipangan jolma ho, anjaha lang be popor bahenonmu bangsamu, nini Tuhan Jahowa.

¹⁵ Lang be palopason-Ku ho manangar apas-apas ni bangsa-bangsa, anjaha seng be tarononmu risa-risa ni bangsa parbegu, anjaha seng be popor bahenonmu bangsamu, nini Tuhan Jahowa.

**Iuras, Ipabayu Naibata do Uhur ni
Israel Sipardousa ai halani Goran-Ni**

¹⁶ Dob ai roh ma hata ni Jahowa hu bangku, mangkatahon,

¹⁷ Ale anak ni jolma, sanggah marianan ope ginompar ni Israel i tanoh ni sidea, ipabutak sidea do ai marhitei parlahou ampa pambahenan ni sidea; parlahou ni sidea i lobei-Hu, ai ma songon habutakon ni naboru sanggah parroh ni pantang ni hiouni.

¹⁸ Jadi Huuseihon ma ringis-Ku hubani sidea halani daroh na niduruskon ni sidea i tanoh in, anjaha ibutaki sidea ai marhitei gana-gana ni sidea.

¹⁹ Huerap do sidea hu tongah-tongah ni bangsa-bangsa, gabe mampar do sidea i nagori-nagori ai; romban hubani parlahou ni sidea ampa pambahenanni do sidea Huuhumi.

²⁰ Jadi das ma sidea hu tongah-tongah ni bangsa-bangsa; tapi huja pe sidea das ipabutak sidea do ijai goran-Ku na pansing in marhitei na hinatahon ni halak pasal sidea: On ma bangsa ni Jahowa ia, hape maningon buhar do sidea hun tanohni!

²¹ Tapi marulak-ulakan do uhur-Hu halani Goranku na pansing in, na pinabutak ni ginompar ni Israel i tongah-tongah ni bangsa-bangsa hadasan ni sidea ai.

²² Halani ai hatahon ma bani ginompar ni Israel: Sonon do hata ni Tuhan Jahowa. Sedo halani hanima, ale ginompar ni Israel, ase sonai hubahen, tapi halani goran-Ku na pansing in do, na pinabutaknima in i tongah-tongah ni bangsa-bangsa hadasannima ai.

²³ Anjaha papansingon-Ku do goran-Ku na timbul in, na dob pinabutak in i tongah-tongah ni bangsa-bangsa anjaha na dob pinabutaknima i tongah-tongah ni sidea; jadi tandaon ni bangsa-bangsa ma, Ahu do Jahowa, nini Tuhan Jahowa, anggo

Hupatalar ma hapansingon-Ku i lobei ni sidea marhitei hanima.

²⁴ Ai padaratonku do hanima hun tongah-tongah ni bangsa-bangsa, patumpuonku do hanima humbani ganup nagori-nagori, anjaha boanon-Ku do hanima mulak hu tanohnima.

²⁵ Anjaha uraskonon-Ku do bannima bah na lihou ase borsih hanima, urason-Ku do hanima humbani ganup habutakonnima ampa humbani gana-gananima.

²⁶ Berehonon-Ku do bannima uhur na bayu, anjaha tonduy na bayu do nahkonon hubagas dirinima; buaton-Ku do uhur batu humbagas angkulanima, anjaha uhur na marpangahapan do berehonon-Ku bannima.

²⁷ Tonduy-Hu do nahkonon-Ku hubagas dirinima, anjaha bahenon-Ku do ase marparlahou hanima ibagas titah-Ku, anjaha bujur idalankon hanima aturan-Ku.

²⁸ Jadi marianan ma hanima bani tanoh na dob Huberehon hubani ompungnima; gabe bangsang-Ku ma hanima, anjaha Ahu gabe Naibatanim.

²⁹ Paluahonku do hanima humbani sagala habutakonnima; marsahap pe Ahu bani gandum anjaha hubahen pe ai marganda-ganda, anjaha lohei seng sogop bannima.

³⁰ Pabueion-Ku do buah ni sagala hayu ampa gogoh ni tanoh in, ase ulang be mahiri hanima ibahen bangsa-bangsa parbegu halani loheian hanima.

³¹ Jadi taringat ma hanima bani parlahounima na jahat in ampa bani pambahenannima na so madear in; gabe magigi ma hanima bani dirinima, halani hajahaton ampa pambahenan hasamboronnima in.

³² Sedo halani hanima ase sonai hubahen, nini Tuhan Jahowa; sai ibotoh hanima ma in! Maila anjaha mubah ma bohinima halani pambahenannima in, ale ginompar ni Israel!

³³ Sonon do hata ni Tuhan Jahowa: Bani ari ai, sanggah na huuras hanima humbani sagala hajahatonnima, marisi ma use bahenon-Ku sagala huta, anjaha ipauli use sagala na mareong.

³⁴ Horjaonkon do use tanoh na dob tarulang ai, na dob halong na sain dokah ipaidah-idah pamontas.

³⁵ Jadi hatahonon ni halak ma: Tanoh on, na halong hinan, gabe songon pohon Eden do sonari; anjaha huta-huta in, na dob maseda, tarulang anjaha mareong, marisi do sonari anjaha ipatoguh.

³⁶ Jadi tandaon ni bangsa-bangsa, na tading in, na inggot bannima in ma, paboa Ahu do Jahowa, na paulihon use sagala na mareong, anjaha na manuani use sagala na dob halong. Ahu do Jahowa na manluarhon ai, anjaha pasaudon-Ku do ai.

³⁷ Sonon do hata ni Tuhan Jahowa: Pasal on pe ra do Ahu sungkunon ni ginompar ni Israel, ase

Hubahen bani sidea, ai ma pabueihonjolma bani sidea songon hulanan ni biribiri.

³⁸ Songon buei ni biribiri sigalanganonkon, songon buei ni biribiri i Jerusalem sanggah pesta, sonai ma marisi bani hulanan nijolma huta-huta na dob maseda in. Jadi tandaon ni sidea ma, Ahu do Jahowa.”

Holi-holi na Pinagoluh ni Tonduy ni Naibata, na Martudu-tudu bani Parpuho ni Israel

37 ¹ Dob ai sogop ma bangku tangan ni Jahowa; jadi iarahkon ma ahu hu darat marhitei Tonduy ni, anjaha ipasoh ma ahu i tongah-tongah ni habungan ai, gok holi-holi nijolma do ai.

² Ipabontaskon ma ahu hunjai inggot, anjaha tonggor ma, buei tumang merap i habungan ai, anjaha tonggor ma, domma horah-horah ganupan ai.

³ Jadi nini ma dompak ahu, “Ale anak nijolma, boi ope manggoluh holi-holi on? Jadi ningku ma mambalosi: Ale Tuhan Jahowa, Ham do na mambotoh ai!

⁴ Dob ai nini ma hu bangku, Manjahai ma ho pasal holi-holi on, hatahon ma bani sidea: Ale holi-holi na horah-horah, tangar ma hata ni Jahowa!

⁵ Sonon do hata ni Jahowa bani holi-holi on: Tonggor ma, Ahu mambere Tonduyhu hu bannima, ase manggoluh hanima.

⁶ Anjaha Ahu mannahkon urat-urat bannima ampa patubuh daging bannima ampa mambahen marhuling-kuling hanima ampa mambahen marhosah, ase manggoluh hanima; jadi tandaonnima ma, Ahu do Jahowa.

⁷ Jadi manjahai ma ahu songon na pinarentahkon ai bangku, anjaha sanggah na manjahai ai ahu, tonggor ma, masa ma sora na mardongos, gabe marsitohuan ma holi-holi samah holi-holi.

⁸ Jadi sanggah na mangkawah ahu, tonggor ma, domma dong urat-urat bani sidea, tubuh daging bani sidea, anjaha marhulingkuling sidea; tapi seng dong ope tonduy bani sidea.

⁹ Dob ai nini ma dompak ahu: Manjahai ma ho pasal tonduy ai, manjahai ma, ale anak nijolma, anjaha hatahon ma bani tonduy ai: Sonon do hata ni Tuhan Jahowa: Roh ma ale tonduy humbani deisa na ompat in, manompul ma ho hubani halak na binunuh on, ase manggoluh sidea!

¹⁰ Anjaha manjahai ma ahu songon na pinarentahkon ai hu bangku, gabe roh ma tonduy ai hubagas sidea, jadi manggoluh ma sidea anjaha jongjong bei bani naheini; hulanan banggal tumang do ai.

¹¹ Dob ai nini ma hu bangku, "Ale anak nijolma, ia holi-holi on, ginompar ni Israel do in ganup. Tonggor ma, nini sidea: Domma masak holi-holinami, seng dong be pangarapannami, bois do hanami.

¹² Halani ai manjahai ma ho, anjaha hatahon ma bani sidea: Sonon do hata ni Tuhan Jahowa: Tonggor ma, ungkabon-Ku do tanomannima, anjaha paluaron-Ku do hanima hum bagas tanomannima, ale bangsang-Ku; anjaha boanon-Ku do hanima mulak hu tanoh Israel.

¹³ Jadi tandaonnima ma, Ahu do Jahowa, anggo Huungkab ma tanomannima, anjaha Hupaluar hanima Humbagas tanomannima, ale bangsang-Ku.

¹⁴ Anjaha nahkonon-Ku do Tonduyhu hubagas dirinima, ase manggoluh hanima, anjaha bahenon-Ku do hanima marianan bani tanohnima; jadi tandaonnima ma, Ahu do Jahowa, na marsahap ai, anjaha pasaudon-Ku do ai, nini Tuhan Jahowa.

**Dua Tungkot Ipadomu Gabe Sada
Manggambarhon Parmulak ni Juda ampa
Israel Gabe Sada Harajaon**

¹⁵ Dob ai roh ma hata ni Jahowa hu bangku, mangkatahon,

¹⁶ Ale anak nijolma, buat ma bam sada tungkot, anjaha suratkon ijai: Juda ampa ginompar ni Israel na sapadan pakonsi. Dob ai buat ma tungkot na legan, anjaha suratkon ma ijai: Josep, tungkot ni Efraim ampa haganup ginompar ni Israel na sapadan pakonsi.

¹⁷ Padomu ma ai gabe sada tungkot, gabe sada ma ai ibagas tanganmu.

¹⁸ Jadi anggo adong hasomanmu sabangsa mangkatahon bam: Ai seng ra ham patugahkon bennami atap aha do tujuanmu marhitei in?

¹⁹ Jadi hatahon ma bani sidea: Sonon do hata ni Tuhan Jahowa: Tonggor ma, Hubuat do tungkot ni si Josep ampa marga ni Israel hasomanni sapadan ai, na ibagas tangan ni Efraim; anjaha Hupadomu ma hujai tungkot ni Juda, anjaha hubahen ma ai gabe sada tungkot, ase gabe sada ai ibagas tanganku.

²⁰ Sanggah ijolom ho tungkot na dob sinuratan ai ididah sidea,

²¹ hatahon ma bani sidea: Sonon do hata ni Tuhan Jahowa: Tonggor ma, arahkonon-Ku do halak Israel hun tongah-tongah ni bangsa-bangsa hadasan ni sidea ai, anjaha patumpuon-Ku do sidea humbani ganup ianan; anjaha boanon-Ku do sidea mulak hu tanoh ni sidea.

²² Bahenon-Ku do sidea gabe sada bangsa i tanoh ai, bani dolog-dolog ni Israel; anjaha sada do raja manggomgom sidea ganup, seng be dua bangsa sidea, anjaha seng be marbagi gabe dua harajaon.

²³ Seng be pabutakon ni sidea dirini marhitei gana-gana ni sidea, marhitei sisombah-sombahon ni sidea ai, atap marhitei ganup panlanggaron ni sidea; anjaha paluahon-Ku do sidea humbani ganup parbalikon ni sidea ai, na mambahen sidea mardousa; urason-Ku do sidea, gabe bangsang-Ku do sidea, anjaha Ahu gabe Naibata bani sidea.

²⁴ Anjaha juakjuak-Ku si Daud do manggomgomi sidea, sada do hansa parmahan bani sidea haganup; marparlahou do sidea ibagas aturan-Ku, anjaha pongkut ma sidea manramotkon titah-Ku.

²⁵ Iankonon ni sidea do tanoh na dob huberehon bani juakjuak-Ku si Jakob, bani tanoh na dob niiankon ni ompung ni sidea; ijai ma sidea marianan, anak ni sidea ampa pahompu ni sidea ronsi sadokah ni dokahni; anjaha juakjuak-Ku si Daud ma lalab panggomgom bani sidea.

²⁶ Bahenon-Ku do bani sidea padan pardameian, padan sisadokah ni dokahni ma ai bani sidea; pasu-pasuon-Ku do sidea anjaha pabueion-Ku; anjaha pajongjongon-Ku do ianan-Ku na mapansing in i tengah-tengah ni sidea ronsi sadokah ni dokahni.

²⁷ I tengah-tengah ni sidea do Ahu marianan; Ahu do gabe Naibata bani sidea anjaha sidea gabe bangsangku.

²⁸ Jadi botohon ni bangsa-bangsa ma, Ahu do Jahowa, na papansingkon Israel, anggo i tengah-tengah ni sidea ma iananku na pansing in ronsi sadokah ni dokahni.”

**Panjahaion Pasal Parroh ni Gog hun Magog
Mandorab Tanoh na Mapansing ai; Hona Uhum ia**

38 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, dompakkon ma bohimu hubani Gog, na i tanoh Magog, ai ma raja ni Ros, Mesek ampa Tubal, manjahai ma ho dompaksi,

³ anjaha hatahon ma: Sonon do hata ni Tuhan Jahowa: Tonggor ma, roh ma Ahu mangimbang ho, ale Gog, raja ni Ros, Mesek ampa Tubal.

⁴ Ahu do na manogu-nogu ho, bahenon-Ku do hait-hait bani osang-osangmu; pabingkaton-Ku do ho ampa haganup balamu, huda ampa siajak huda, haganup sidea marpakeian sinjata na gopas, ai ma sada hulanan bangga, haganup sidea margantar na bolag atap na etek, anjaha manintak podang;

⁵ halak Persia, Kus ampa Put do hasomanmu, haganup do sidea margantar anjaha martangkuluk;

⁶ sonai homa Gomer ampa haganup balani, ambahni ai ginompar ni si Togarma, na hun nagori tang parutara ampa haganup balani, buei do bangsa-bangsa mangkasomani ho.

⁷ Marugas ma, sirsir bei ma, ho pakon haganup bala na martumpu hubam, anjaha ho ma gabe pambobai bani sidea.

⁸ Bani dokah-dokah ni ari arahkonon ma ho; bani ujung ni jaman das ma ho bani sada nagori, na dob maluah humbani podang, bani sada bangsa na ipatumpu hun tongah-tongah ni buei bangsa-bangsa, bani dolog-dolog ni Israel, na dob dokah halong ai, tongon na pinadarat do ai hun tongah-

tongah ni buei bangsa, anjaha na sonang sonari marianan sidea haganup.

⁹ Roh do tangkog songon haba-haba, roh songon hombun manrungkub tanoh in, ho pakon haganup balamu anjaha buei bangsa-bangsa mangkasomani ho.

¹⁰ Sonon do hata ni Tuhan Jahowa: Bani panorang ai, tubuh do pingkiran ibagas uhurmu, anjaha hajahaton do iranggihon ho,

¹¹ nim: Bingkat ma ahu mamorang tanoh na so marbenteng; hudorab ma halak na sonang marianan anjaha na mardamei-damei ai, ai ma haganup sidea na marhuta seng martembok, seng marpating-pating atap marhorbangan,

¹² laho manrampas ampa manaban, laho mardas tangan bani ianan na dob maseda ai, tapi sonari iiankon, ampa bani bangsa na dob ipatumpu ai humbani bangsa-bangsa, na dob marpinahan ampa mararta nuan, marianan i tongah-tongah ni tanoh on.

¹³ Hatahonon ni Seba, Dedan, Tarsis ampa partigatigani do hubam: Ai laho martaban do ham ase roh? Ai laho manrampas do ham, ase ipatumpu ham tentaramu? Laho mambuat pirak ampa omas, laho mambuat pinahan ampa arta-arta, laho mambuat buei taban-taban?

¹⁴ Halani ai, manjahai ma ho, ale anak ni jolma, hatahon ma bani Gog: Sonon do hata ni Tuhan

Jahowa: Ai lang sonon do? Bani panorang ai, sanggah na marsonang-sonang bangsangku Israel marianan, marugas do ho,

¹⁵ anjaha roh ho humbani iananmu, hun utara tumang, ho pakon bangsa na mangkasomani ho, haganup sidea mangajak huda, sada hulanang banggal, sada bala na gogoh;

¹⁶ roh do ho mamorang bangsang-Ku Israel, songon hombun, laho manrungkub tanoh ai. Bani ujung ni jaman, arahkonon-Ku do ho mamorang tanoh-Ku, ase itanda bangsa-bangsa Ahu, anggo Hupatalar ma hapansingon-Ku i lobei ni sidea marhitei ho, ale Gog.

¹⁷ Sonon do hata ni Tuhan Jahowa: Ai lang ho do ai na Husahapkon ai sapari marhitei juakjuakku, ai ma nabi-nabi ni Israel, na manjahai ijia martahun-tahun, paboa suruhon-Ku do ho mandorab sidea?

¹⁸ Bani panorang ai, sanggah roh Gog manlawan tanoh Israel, nini Tuhan Naibata ma, manggila tumang do Ahu.

¹⁹ Ibagas simburu ampa gajag ni ringis-Ku do Huhatahon on: Tongon, bani panorang ai masa do lalou banggal i tanoh Israel;

²⁰ jadi hitir ma i lobei-Hu dengke na i laut, manuk-manuk na i awang-awang, binatang na i talun, sagala na manggulmit, na manjulur bani tanoh ampa haganup jolma na i sisik ni tanoh on; mangkatornoh ma dolog-dolog, mangkabolah

dolog batu, anjaha mangkatompas sagala tembok hu tanoh.

²¹ Diloonku do sagala songgot-songgot dompak Gog, nini Tuhan Jahowa, marsitampulan ma samah sidea.

²² Uhumon-Ku do ia marhitei sampar ampa daroh na madurus; parohon-Ku do udan doras, sira-sira, apuy ampa hirtah hu bani, hubani tentarani ampa hubani bangsa na buei ai, na mangkasomanisi.

²³ Sonai ma patalaron-Ku hatimbulon-Ku ampa hapansingon-Ku, anjaha Hupataridahkon diring-Ku i lobei ni buei bangsa, ase itanda sidea, Ahu do Jahowa.”

Hona Uhum Gog, Timbul Goran ni Jahowa Iddah Bangsa-bangsa

39 ¹“Ale anak ni jolma, manjahai ma ho dompak Gog, hatahon ma: Sonon do hata ni Tuhan Jahowa: Tonggor ma, roh ma Ahu mangimbang ho, ale Gog, raja ni Ros, Mesek ampa Tubal!

² Ahu do na manogu-nogu ho ampa na mangarahkon ho hun nagori tang parutara, anjaha boanon-Ku do ho hu dolog ni Israel;

³ jadi poyutkononku ma siormu hun tangan sambiloumu, ampa lingkitmu hun tangan siamunmu.

⁴ I atas ni dolog Israel do ho rasei, ho ampa balamu haganup ronsi sagala bangsa na niarahkonmu; ondskonon-Ku do ho bani manuk-manuk panoroh ampa haganup siparhabong ampa bani binatang na i talun gabe sibonduton ni sidea.

⁵ I ladang do ho tompas; tongon, Ahu do na mangkatahon ai, nini Tuhan Jahowa.

⁶ Tongoskonon-Ku do apuy bani Magog ampa bani halak na marianan marsonang-sonang i topi laut, jadi tandaon ni sidea ma, Ahu do Jahowa.

⁷ Pabotohkonon-Ku do goran-Ku na pansing in i tongah-tongah ni bangsang-Ku Israel, seng be mahiri paturuton-Ku goran-Ku na pansing in, gabe botohon ni sagala bangsa ma, Ahu do Jahowa, na pansing i tongah-tongah ni Israel.

⁸ Tonggor ma, na roh ma ai, anjaha saud ma ai, nini Tuhan Jahowa; “ai ma ari, na dob Hulumbahon hinan.

⁹ Jadi luar ma halak pangisi ni huta-huta ni Israel, pagaraonni ma apuy anjaha tutungon ni sidea ma sinjata-sinjata, gantar na etek ampa na banggal, sior ampa lingkit, pukul-pukul ampa tanja; tutungon ni sidea ma ai pala pitu tahun dokahni,

¹⁰ seng pala porlu be alopon ni sidea soban hun juma, atap manroboh hayu sidea i harangan, ai sinjata ai ma gabe soban bani sidea; sidea ma partaban bani halak na dob manaban sidea, anjaha

rampason ni sidea ma halak na dob manrampas sidea,” nini Tuhan Jahowa.

¹¹ “Bani panorang ai pasirsiron-Ku do tanoman bani Gog i Israel, ai ma lombang pamontasan hampit hapoltakan ni Laut Matei, gabe tarolat do halak mamontas hunjai. Ijai do itanom Gog ampa haganup balani, anjaha igoran ma ai: Lombang bala ni Gog.

¹² Pala do pitu bulan dokahni ginompar ni Israel mananom sidea, laho manguras tanoh ai.

¹³ Haganup do bangsa na i nagori ai mananom sidea; gabe tarbarita do sidea, bani panorang ai, sanggah na Hupataridahkon ai hamuliaon-Ku,” nini Tuhan Jahowa.

¹⁴ “Papuligon ni sidea do halak sidalani tanoh ai torus, laho mananom bangkei na tading i nagori ai, ase taruras tanoh ai; dob salpu pe sipitu bulan ai, ase idalankon sidea pamareksaan ai.

¹⁵ Jadi isiar halak sipamareksa ai ma tanoh ai, anjaha anggo adong na mangidah holi-holi ni jolma, gabe ibahen ma ijai partanda, das ronsi Lombang Bala ni Gog itanom sipananom ai.

¹⁶ Sonai ma itanom sidea ganup balani ai ijai; sonai ma panguras ni sidea tanoh ai.

¹⁷ Tapi anggo ho, ale anak ni jolma, sonon do hata ni Tuhan Jahowa: Hatahon ma bani manuk-manuk, haganup siparhabong ampa hubani haganup binatang na i talun: Martumpu ma anjaha roh ma,

marurup ma hanima roh humbani ganup ianan hubani pesta panggalangan na Hupasirsir bannima, ai ma sada pesta panggalangan bangga bani dolog ni Israel; pangan hanima ma gulei anjaha inum ma daroh!

¹⁸ Daging ni puanglima do panganonnima, anjaha daroh ni raja-raja ni tanoh on do inumonnima; songon biribiri tunggal ampa anak ni biribiri, hambing tunggal ampa lembu jonggi, pinahan na pinamombur i Basan do sidea haganup bannima.

¹⁹ Panganonnima do taboh-tabohni ronsi bosur hanima, anjaha inumonnima do darohni ronsi mabuk hanima bani pesta panggalangan ai, na Hupasirsir bannima.

²⁰ Bosur do hanima idangan-Ku mangankon huda ampa siajak huda, puanglima ampa buei bala, nini Tuhan Jahowa.

²¹ Patimbulon-Ku do hamuliaon-Ku i tongah-tongah ni bangsa-bangsa; idahon ni sagala bangsa do uhum na Hudabuh bani sidea, ampa kuasa ni tangan-Ku na Hupadalan bani sidea.

²² Botohon ni ginompar ni Israel ma, Ahu do Jahowa, Naibata ni sidea, humbani panorang ai nari.

²³ Botohon ni sagala bangsa ma, ase tarbuang pe halak Israel, ai ma halani hajahaton ni sidea. Halani marbalik do sidea hun Bangku, ase Huponopkon bohing-Ku humbani sidea, anjaha Huondoskon

sidea hubagas tangan ni munsuh ni sidea, anjaha rasei sidea haganup ibahen podang.

²⁴ Hubahen do bani sidea domu hubani habutakon ni sidea ampa panlanggaronni, anjaha Huponopkon bohing-Ku humbani sidea.”

²⁵ Halani ai, sonon do hata ni Tuhan Jahowa, “Bahenon-Ku do suang sonari Jakob, anjaha maidop uhur-Hu bani haganup ginompar ni Israel; marah do Ahu mangkopkop goran-Ku na pansing in.

²⁶ Lang be taringat sidea bani habadoronni ampa bani pangoseion ni sidea Bangku, anggo marsonang-sonang ma sidea marianan i tanoh ni sidea, anjaha seng dong be panonggoti bani sidea,

²⁷ anggo Hupaulak ma sidea humbani bangsa-bangsa, anjaha Hupatumpu sidea humbani nagori ni munsuh ni sidea, anjaha Hupapansing diring-Ku i lobei ni bangsa-bangsa marhitei sidea.

²⁸ Jadi tandaon ni sidea ma, Ahu do Jahowa, Naibata ni sidea, na dob mambuankon sidea hu tongah-tongah ni bangsa-bangsa, tapi na patumpu sidea use hu tanoh ni sidea, anjaha sahalak pe lang humbani sidea na tading Hupaturut i jai.

²⁹ Seng be ponopkonon-Ku bohing-Ku humbani sidea, anggo Huuseihon ma Tonduyhubani ginompar ni Israel, nini Tuhan Jahowa.”

Panonggoran Pasal Rumah Panumbahan ai

40¹ Paduapuluhlima-tahunkon dob tarbuang hanami, bani bona ni tahun ai, bani ari sapuluh, ai ma pasapuluhompat-tahunkon dob tartaban huta ai, bani ari ai ma sogop bangku tangan ni Jahowa,

² anjaha iboan ma ahu ibagas pangungkabon na humbani Naibata hu tanoh Israel, lanjar ipatuad ma ahu i atas sada dolog na gijang tumang; adong do ijai na songon rumang ni huta patontang pakon ahu.

³ Sanggah na iboan ahu hujai, tonggor ma, adong ma sada dalahi na marrupa songon tombaga; adong do tali ampa tungkot sibar-sibar ibagas tanganni, bani horbangan ai do ia ipajongjong.

⁴ Anjaha nini dalahi ai ma hu bangku, “Ale anak nijolma, tonggor ma marhitei matamu, anjaha bogei marhitei pinggolmu, anjaha paruhurhon ma haganup sipatidakonku on bam, ai tarboan pe ho hujon laho patuduhkon on do bam, baritahon ma na nididahmu haganup bani ginompar ni Israel.”

⁵ Tonggor ma, adong do sada tembok i darat ni rumah panumbahan ai inggot; ia tungkot sibar-sibar na ibagas tangan ni dalahi ai, onom asta do ganjangni, ganup asta ai saparapan do ganjangan humbani asta na somal, jadi isibar ma hapal ni tembok ai; ansa tungkot sibar-sibar ai hapalni ampa gijangni.

⁶ Dob ai laho ma ia hu horbangan na hampit hapoltakan, itangkogi ma tangga-tanggani ai, anjaha isibar ma molmolan ni horbangan ai, ai ma sada tungkot sibar-sibar bolagni.

⁷ Anjaha ganup kamar sada tungkot sibar-sibar do bolagni pakon ganjangni, anjaha tiangni ai lima asta do; ia molmolan ni horbangan ai bani surambih ni horbangan ai hampit bagas, sada tungkot sibar-sibar do.

⁸ Dob ai isibar ma surambih ni horbangan ai, ualuh asta,

⁹ anjaha tiangni ai, dua asta; hampit bagas do surambih ni horbangan ai.

¹⁰ Ia kamar ni horbangan na hampit hapoltakan ai tolu bei do palopah-lopah; haganup ai dos do sibaranni, anjaha tiangni na palopah-lopah ai dos do homa sibaranni.

¹¹ Dob ai isibar ma bolag ni horbangan ai, sapuluh asta, anjaha ganjangni sapuluh tolu asta.

¹² Adong do hondor-hondor i lobei ni kamar-kamar ai, ganup sada asta, na dua lopah ai; kamar-kamar ai onom asta bei do, na dua lopah ai.

¹³ Dob ai isibar ma use horbangan ai humbani pudi ni kamar na sada das hupudi ni kamar na sada nari, dua puluh lima asta do bolagni, patontang do labahni.

¹⁴ Isibar ma homa surambih ai, dua puluh asta; das bani tiang-tiang ni horbangan ai do alaman na inggot ai.

¹⁵ Anjaha humbani dalan masuk hu horbangan ai das hu ujung ni surambih parbagas ai, lima puluh asta do.

¹⁶ Adong do jandela na marjaring-jaring bani kamar-kamar ai dompak bagas, bani dalan na i horbangan ai, hadua lopahsi; sonai homa adong do jandela bani surambih ai dompak bagas hadua lopahsi, anjaha bani tiangni ai iuhirhon do dangkah ni palem.

¹⁷ Dob ai ibobai ma ahu hu alaman pardarat, tonggor ma, adong do ijai kamar-kamar ampa dalan na ibatui inggot; tolu puluh kamar mandompakkon dalan na ibatui ai.

¹⁸ Dalan na ibatui ai adong do homa i lambung ni horbangan ai, mangihutkon ganjang ni horbangan ai, ai ma dalan batu partoruh.

¹⁹ Dob ai isibar ma bolag ni alaman ai hun lobei-lobei parbagas ni horbangan partoruh ai das hu lobei-lobei pardarat ni horbangan parbagas ai, ai ma saratus asta.

²⁰ Dob ai mardalan ma ia i lobeihu dompak utara, anjaha tonggor ma, adong do ijai sada horbangan bani alaman pardarat ai, mandompakkon utara. Isibar ma ganjangni ampa bolagni.

²¹ Kamar-kamarni ai pe, tolu palopah-lopah, tiangni ampa surambihni dos do sibaranni songon horbangan na parlobei ai, lima puluh asta ganjangni ampa dua puluh lima asta bolagni.

²² Jandelani, surambihni ampa dangkah ni palemni dos do sibaranni songon na bani horbangan hapoltakan ai; pitu do tangga-tanggani laho tangkog hujai; anjaha hampit bagas do surambihni.

²³ Anjaha tontang ni horbangan parutara ai adong do horbangan laho hu alaman parbagas ai, songon na bani horbangan parhapoltakan; jadi isibar ma horbangan hu horbangan, saratus asta do ai.

²⁴ Dob ai ibobai ma ahu dompak dangsina, anjaha tonggor ma, adong do ijai horbangan dompak dangsina; jadi isibar ma kamar-kamarni, tiangni ampa surambihni; anjaha dos do sibaranni songon na parlobei ai.

²⁵ Adong do jandela bani horbangan ai ampa bani surambih ai inggot, sarupa bani jandela na legan-legan ai; ganjangni ai lima puluh asta do anjaha bolagni dua puluh lima asta.

²⁶ Pitu do tangga-tanggani laho tangkog hujai, anjaha hampit bagas do surambihni; iuhirhon do hayu palem bani tiangni, sada bani ganup lopah.

²⁷ Adong do horbangan dompak dangsina bani alaman parbagas ai, anjaha isibar ma horbangan hu horbangan, saratus asta do ai.

²⁸ Dob ai ibobai ma ahu hu alaman parbagas ai, masuk hun horbangan pardangsina ai, anjaha isibar ma horbangan pardangsina ai, dos do sibaranni songon na legan-legan ai.

²⁹ Kamar-kamarni pe, tiangni ampa surambihni dos do sibaranni ampa na legan ai; adong do jandela bani horbangan ampa bani surambihni ai inggot. Ia ganjangni ai lima puluh asta do, anjaha bolagni dua puluh lima asta.

³⁰ Anjaha adong do surambih-surambih inggot, dua puluh lima asta ganjangni anjaha lima asta bolagni.

³¹ Dompak alaman pardarat ai do surambihni, anjaha tiangni margorga hayu palem do; anjaha ualuh do tangga-tangani laho hu atas.

³² Dob ai ibobai ma ahu hu alaman parbagas ai hampit hapoltakan, anjaha isibar ma horbangan ai; dos do sibaranni ai songon na legan ai.

³³ Kamar-kamarni pe, tiangni ampa surambihni dos do sibaranni songon na legan ai, anjaha adong do jandela bani horbangan ai ampa bani surambihni inggot, ia ganjangni lima puluh asta do, anjaha bolagni dua puluh lima asta.

³⁴ Dompak alaman pardarat ai do surambihni, anjaha tiangni margorga hayu palem do, hadua lopahsi; ualuh do tangga-tangga laho hu atas.

³⁵ Dob ai ibobai ma ahu hu horbangan parutara, anjaha isibar ma ai; dos do sibaranni songon na legan ai.

³⁶ Kamar-kamarni pe, tiangni ampa surambihni dos do sibaranni songon na legan ai; anjaha adong do jandela bani horbangan ai ampa bani surambihni inggot; ia ganjang ni ai lima puluh asta do anjaha bolagni dua puluh lima asta.

³⁷ Dompak alaman pardarat ai do surambihni, anjaha margorga hayu palem do tiang ni ai hadua lopahsi, ualuh do tangga-tanggani laho hu atas.

³⁸ Anjaha adong do sada kamar bani horbangan parhapoltakan ai, anjaha labah ni kamar ai bani surambih ai do; ijai do pamurihan ni galangan situtungan.

³⁹ Bani surambih ni horbangan ai adong do dua meja bani hadua lopahsi; ijai do isayat galangan situtungan, galangan pardousaon ampa galangan parsalahan.

⁴⁰ Anjaha i darat, i lambung ni tembok ai, hampit utara ni halak na tangkog hu horbangan ai, adong do dua meja; anjaha bani lopah na sada nari ni tembok ai adong do homa dua meja.

⁴¹ Ase ompat meja hampit bagas anjaha ompat meja hampit darat i lambung ni tembok ai; haganup ualuh meja, panayatan ni galangan.

⁴² Anjaha adong do ijai homa ompat meja humbani batu na ibarbar, ganjangni sada satongah asta, bolagni sada satongah asta anjaha gijangni sada asta, ai ma hatibalan ni parugas manayat galangan situtungan ampa galangan sisayaton.

⁴³ Adong do topini inggot, saparapan bolagni, tar seder dompak bagas; martayub do meja ai laho manlinggomi gulei galangan humbani udan ampa milas ni ari.

⁴⁴ Jadi ibobai ma ahu hu alaman parbagas ai, anjaha tonggor ma, adong do dua kamar i alaman parbagas ai, sada i lambung ni horbangan parutara mandompakkon dangsina, na sada nari i lambung ni horbangan pardangsina mandompakkon utara.

⁴⁵ Jadi nini ma hu bangku, “Ia kamar on, na dompak dangsina on, bani malim siparugas i Rumah Panumbahan do ai;

⁴⁶ anjaha kamar on, na dompak utara, bani malim siparugas bani anjapanjap do in, ai ma anak ni si Sadok; sidea tumang do humbani ginompar ni si Lepi, na boi roh marugas i lobei ni Jahowa.”

⁴⁷ Jadi isibar ma alaman ai, saratus asta ganjangni anjaha saratus asta bolagni, marompat suhi; i lobei ni Rumah Panumbahan ai do anjapanjap ai.

⁴⁸ Jadi ibobai ma ahu hu surambih ni Rumah Panumbahan ai, anjaha isibar ma tiang ni surambih ai, lima asta ganup lopah; bolag ni horbangan ai sapuluh ompat asta, anjaha tembok parlambung ni horbangan ai tolu asta ganup lopah.

⁴⁹ Ganjang ni surambih ai dua puluh asta do, anjaha bolagni sapuluh sada asta; sapuluh do tangga-tanggani laho hu atas; adong do tiang banggal manrombani tiang-tiang ai, hadua lopahsi.

**Pasal Rumah na Mapansing ai
ampa Rumah Parlambungni**

41 ¹ Dob ai iboan ma ahu hubagas kamar bolag ni Rumah na Mapansing ai; anjaha isibar ma tiang-tiangni, onom asta hapalni ganup lopah.

² Bolag ni dalan masuk ai sapuluh asta, anjaha tembok parlambung ni dalan masuk ai lima asta do ganup lopah. Isibar ma ganjang ni kamar bolag ai, ompat puluh asta, anjaha bolagni dua puluh asta.

³ Dob ai masuk ma ia hubagas kamar tang parbagas ai, anjaha isibar ma tiang-tiang ni dalan masuk hujai, dua asta hapalni; bolag ni dalan masuk ai, onom asta, anjaha tembok parlambung ni dalan masuk ai, pitu asta bei do.

⁴ Dob ai isibar ma ganjang ni kamar ai, dua puluh asta ganjangni, anjaha bolagni dua puluh asta, ansa bolag ni kamar bolag ai, anjaha nini ma hu bangku, “On ma kamar tang na mapansing ai.”

⁵ Dob ai isibar ma tembok ni Rumah na Mapansing ai, onom asta hapalni; anjaha bolag ni kamar parlambungni, ompat asta, inggot rumah ai do ai.

⁶ Martolu tingkat do kamar parlambung ai, tolu puluh kamar satingkat. Adong do tembok panahan inggot kamar parlambung ai laho manungkol kamar parlambung ai, ase ulang be tembok ni Rumah na Mapansing ai, na manahan ai.

⁷ Ia kamar parlambung na martingkat ai, roh lumbangni do hu atas, domu hubani parlambin rampis ni dingding panahan ai bani ganup tingkat inggot Rumah na Mapansing ai; boi do naikan hun tingkat partoruh hu partongah-tongah, laho hu pardatas marhitei tangga.

⁸ Adong do huidah pamispisan na pinagijang inggot Rumah na Mapansing ai. Ia onjolan ni kamar parlambung ai sada tungkot sibar-sibar do, ai ma onom asta.

⁹ Hapal ni tembok pardarat ni kamar parlambung ai lima asta do, anjaha pamispisan ai lima asta.

¹⁰ Holangkolang ni pamispisan ni rumah na mapansing ai ampa kamar-kamar na bani alaman ai, dua puluh asta do inggot rumah na mapansing ai.

¹¹ Adong do labah ni kamar parlambung ai mandompakkon pamispisan ai, sada dompak utara, sada dompak dangsina, anjaha bolag ni pamispisan ai lima asta do inggot.

¹² Ia rumah na bani alaman hampit pudi, hampit hasundutan, pitu puluh asta do bolagni; anjaha hapal ni tembokni inggot lima asta do, anjaha ganjangni siah puluh asta.

¹³ Isibar ma ganjang ni Rumah na Mapansing ai, saratus asta ganjangni; anjaha alaman ai ampa rumah parhasundutan ai pakon tembokni saratus asta do homa.

¹⁴ Bolag ni lobei-lobei ni Rumah Panumbahan ai ampa alaman na hampit hapoltakan ai, saratus asta do.

¹⁵ Dob ai isibar ma ganjang ni rumah parhasundutan na bani alaman pudi-pudi ai, ampa tembokni angkup lopah, saratus asta. Ia kamar bolag ni rumah na mapansing ai ampa kamar tang parbagas ai ampa surambih pardarat ai

¹⁶ ilampis do, anjaha hatolusi ai marjandela na marjaring-jaring do inggot. Bani hayu do ilampis tembok ai ibagas inggot, hun dasorni das hu jandelani (*itirei do jandelani ai*),

¹⁷ das hu atas ni labah ai, ronsi hu kamar tang parbagas ai ampa hampit daratni. Bani dingding ai haganup, i darat ampa ibagas, sonai homa bani kamar bolag ai,

¹⁸ iuhirhon do hujai suman-suman ni herub ampa hayu palem, sada hayu palem i holangkolang ni herub hu herub. Ganup herub dua do bohini.

¹⁹ Bohi nijolma dompak hayu palem na sada, bohi ni singa dompak hayu palem na sada nari. Sonai do iuhirhon inggot Rumah Panumbahan ai.

²⁰ Humbani dasorni das hu atas ni labah iuhirhon do herub ampa hayu palem bani dingding ai.

²¹ Marompat suhi do tiang ni labah ni kamar bolag ai, anjaha i lobei ni kamar tang na mapansing ai adong do na mangusihi

²² anjapanjap hayu; tolu asta gijangni, dua asta ganjangni anjaha dua asta bolagni; marsuhi-suhi do ai, anjaha hayu do naheini ampa dingdingni. Jadi nini hu bangku, On ma meja, na i lobei ni Jahowa.

²³ Ia labah ni kamar bolag ampa kamar tang na mapansing ai dua bei do.

²⁴ Anjaha ganup dua do bulungni, haduasi boi do marputor.

²⁵ Iuhirhon do herub ampa hayu palem bani labah ni kamar bolag ai, songon na bani dingding ai. Adong do hondor-hondor hayu i lobei ni surambih ai hampit darat.

²⁶ Adong do jandela na marjaring-jaring ampa gambaran ni hayu palem bani dingding ni surambihni hadua lopahsi.

Kamar-kamar ni Malim-malim

42 ¹ Dob ai ibobai ma ahu hu darat, hu alaman parbagas ai, mardalan dompak utara, lanjar iarahkon ma ahu hu kamar-kamar tontang ni alaman ni Rumah na Mapansing ai, tontang ni Rumah na Mapansing hampit utara.

² Ganjang ni rumah na hampit utara ai, saratus asta, anjaha bolagni lima puluh asta.

³ I holangkolang ni alaman sidua puluh asta ai bolagni ampa pardarat na ibatui ai, adong do surambih palopah-lopah tolu tingkat.

⁴I lobei ni kamar-kamar ai adong do sada gang (*dalan*) sapuluh asta bolagni anjaha saratus asta ganjangni, dompak utara do labahni ai.

⁵Sompitan do kamar pardatas humbani kamar partongah-tongah ampa partoruh halani surambihni ai.

⁶Ai tolu tingkat do kamar-kamar ai; seng dong tiangni ai songon tiang-tiang na i alaman pardarat ai; halani ai tar hu pudi do ibahen ai marimbang kamar partongah-tongah ampa partoruh.

⁷Anjaha adong do sada tembok i darat patontang ampa kamar-kamar ai, hampit alaman pardarat, lima puluh asta ganjangni.

⁸Ia ganjang ni ganup kamar ai, na mandompakkon alaman pardarat ai, lima puluh asta do, tapi na patontang ampa Rumah na Mapansing ai, saratus asta do.

⁹I toruh ni kamar-kamar ai adong do sada dalan masuk hun lopah parhapoltakan, anggo masuk halak hujai hun alaman pardarat ai,

¹⁰ai ma bani bona ni tembok na i darat ai. Hampit dangsina pe, tontang ni alaman ni Rumah na Mapansing ai, tontang ni Rumah na Mapansing ai, adong do kamar-kamar,

¹¹anjaha adong do sada gang (*dalan*) i lobei ni ai, dos do ai ampa kamar-kamar parutara, dos ganjangni ampa bolagni, dos dalan kaluarni, popouni ampa labah-labahni.

¹² Ia labah ni kamar-kamar pardangsina ai, dompak dangsina do; i toruh ni kamar-kamar ai adong do sada dalan masuk hun lopah parhapoltakan, laho masuk hu gang (*dalan*) ai, na i lobei ni kamar-kamar ai.

¹³ Dob ai nini ma dompak ahu, “Ia kamar parutara ampa kamar pardangsina ai, na patontang pakon alaman ai, kamar-kamar na mapansing do ai: ijai ma panganon ni malim na bulih mandohori Jahowa, galangan tang na mapansing ai; ijai ma patibalon ni sidea galangan tang na mapansing ai; Galangan sipanganon, galangan pardousaon ampa galangan parsalahan, ai na mapansing do ianan ai.

¹⁴ Anggo domma imasuki malim-malim ai ianan na mapansing ai, seng bulih be sidea luar hunjai hu alaman pardarat ai, anggo lape palobei itanggali sidea ijai pakeian marugas ni sidea ai, ai pansing do ai; maningon pakeian na legan do pakeion ni sidea, ase boi hundohor bani halak na mabuei ai.”

¹⁵ Jadi dob siap isibar parbagasan ni rumah panumbahan ai, ibobai ma ahu hu darat hun horbangan parhapoltakan ai, anjaha isibar ma pardarat ni Rumah Panumbahan ai inggot.

¹⁶ Isibar ma lopah parhapoltakan ai marhitei tungkot sibar-sibar ai, lima ratus asta mangihutkon tungkot sibar-sibar ai.

¹⁷ Dob ai marhusor ma ia, isibar ma lopah parutara ai, lima ratus asta mangihutkon tungkot sibar-sibar ai.

¹⁸ Dob ai marhusor ma ia, isibar ma lopah pardangsina ai, lima ratus asta mangihutkon tungkot sibar-sibar ai.

¹⁹ Dob ai marhusor ma ia use dompak hasundutan, anjaha isibar ma, lima ratus asta mangihutkon tungkot sibar-sibar ai.

²⁰ Isibari do ai mangihutkon lopah na ompat ai. Adong do tembok inggot ni ai, lima ratus asta ganjangni anjaha lima ratus asta bolagni, ai ma na manirang ianan na mapansing ai humbani na so pansing ai.

Hamuliaon ni Jahowa Manggoki Rumah Panumbahan

43 ¹ Dob ai ibobai ma ahu hu horbangan ai, ai ma horbangan parhapoltakan ai.

² Tonggor ma, roh do hamuliaon ni Naibata ni Israel hun hapoltakan, anjaha sora ni parrohni ai songon parhasak ni bah marbanggal do; jadi liar do tanoh ai halani hamuliaon-Ni ai,

³ Ia pangungkabon na huidah ai, usih do ai bani pangungkabon na huidah ijia, sanggah roh Jahowa laho mangagou huta ai, anjaha usih bani pangungkabon na huidah i lambung ni Bah Kebar; jadi manrogop ma ahu.

⁴ Masuk ma hamuliaon ni Jahowa hubagas Rumah na Mapansing ai hun horbangan parhapoltakan ai;

⁵ jadi iangkat Tonduy ai ma ahu, lanjar iboan ma ahu hu alaman parbagas ai. Tonggor ma, hamuliaon ni Jahowa do manggoki Rumah na Mapansing ai.

⁶ Sanggah na jonjong ai dalahi ai i lambungku, hutangar ma adong na marsahap hu bangku hun Rumah na Mapansing ai,

⁷ nini ma hu bangku, Ale anak ni jolma, ianan on do hajongjongan ni paratas-Ku ampa sidogeian ni jampal ni nahei-Hu; ijon do Ahu marianan i tongah-tongah ni halak Israel ronsi sadokah ni dokahni. Anjaha seng be pabutakon ni ginompar ni Israel goran-Ku na Mapansing in, sidea age raja-raja ni sidea marhitei parnaibata silebanon ni sidea, atap marhitei bangkei ni raja-raja ni sidea, bani parmateri ni sidea,

⁸ marhitei na pajongjong molmolanni i lambung ni molmolann-Ku, labahni bani labah-Ku, pitah tembok mando holangkolang-Ku humbani sidea. Ibutaki sidea do goran-Ku na pansing in marhitei hasamboron na hinorjahon ni sidea ai, gabe Huboiskon sidea ibagas ringis-Ku.

⁹ Tapi sonari, ipadaoh sidea ma parnaibata silebanon ni sidea ai ampa bangkei ni raja-raja ni sidea hun Bangku, ase marianan Ahu i tongah-tongah ni sidea ronsi sadokah ni dokahni.

¹⁰ Ai pe, ale anak ni jolma, patorang ma bani ginompar ni Israel pasal Rumah Panumbahan on, rupani ampa popouni, ase maila sidea halani hajahaton ni sidea ai.

¹¹ Anggo domma maila sidea halani haganup pambahenan ni sidea ai, patorang ma bani sidea pasal rupa ampa poupou ni Rumah Panumbahan ai, pasal dalan kaluar ampa dalan masuk ampa rumang ni haganupan ai; pabotohkon ma bani sidea haganup pasal aturanni ampa titahni; suratkon ma ai i lobei ni sidea, ase iparuhurhon anjaha idalankon sidea haganup titah ampa aturan-aturanni.

¹² On ma titah pasal Rumah Panumbahan ai: haganup ianan inggot bani pakpak ni dolog ai panging tumang do ai. Tonggor ma, ai ma titah pasal Rumah Panumbahan ai.

Pasal Anjapanjap ampa Pangurasionni

¹³ On do sibaran ni anjapanjap ai, mangihutkon asta na ganjangan santopap humbani asta na somal: Onjolanni saasta gijangni anjaha saasta bolagni, anjaha marbibir inggot, sanjongkal gijangni.

¹⁴ On ma gijang ni anjapanjap ai; humbani onjolanni na bani tanoh das bani tangga partoruh dua asta anjaha bolagni sada asta; humbani tangga sietekan ai hubani tangga sibolagan ai ompat asta do anjaha saasta bolagni.

¹⁵ Tataring panggalangan ai ompat asta do gijangni; humbani tataring ai adong do jurjur hu atas ompat tanduk, saasta gijangni.

¹⁶ Ia tataring ai marompat suhi do, sepuluh dua asta ganjangni anjaha sepuluh dua asta bolagni.

¹⁷ Ia tangga-tangga sibolagan ai sepuluh ompat asta do ganjangni anjaha sepuluh ompat asta do bolagni, ase marompat suhi do. Marbibir inggot satongah asta bolagni, anjaha onjolanni sada asta do inggot. Mandompakkon hapoltakan do tanggani.

¹⁸ Dob ai nini ma dompak ahu, "Ale anak ni jolma, sonon do hata ni Tuhan Jahowa: On ma aturan pasal anjapanjap ai: Bani ari ai, siapkonsi ai, laho manggalangkon galangan situtungon i atas ni ai, anjaha laho mamispiskon daroh hujai,

¹⁹ bere ma sada anak ni lembu bahen galangan pardousaon bani malim-malim halak Levi ai, ginompar ni si Sadok, na bulih roh mandohori Ahu, laho marugas Bangku, nini Tuhan Jahowa.

²⁰ Anjaha buat ma deba humbani darohni ai, anjaha nahkon ma ai bani tanduk na ompat ai ampa bani haompatsi suhi-suhi ni tangga-tangga ai, ampa bani bibirni inggot; sonai ma urasonmu anjapanjap ai, laho mambahen pardearan pasal ai.

²¹ Ningon buatonmu do homa anak ni lembu galangan pardousaon ai, anjaha itutung ma ai bani ianan na tinontuhon hujai, i darat ni ianan na mapansing ai.

²² Anjaha padua-arihon maningon galangkononmu do sada hambing tunggal, na so martikas bahen galangan pardousaon, ase hona uras anjapanjap ai, songon na dob huuras ai marhitei anak ni lembu.

²³ Dob siap iuras ho anjapanjap ai, maningon galangkononmu do sada anak ni lembu na so martikas ampa sada biribiri tunggal na so martikas humbani hulanai ai.

²⁴ Haduasi do ai galangkononmu i lobei ni Jahowa, anjaha maningon tirtirhonon ni malim do garam hu atasni, anjaha igalangkon ai songon galangan situtungon bani Jahowa.

²⁵ Pitu ari dokahni maningon pasirsironmu do ganup ari sada hambing tunggal bahen galangan pardousaon; sonai homa sada anak ni lembu ampa sada biribiri tunggal na so martikas humbani hulanai ai maningon pasirsiron do.

²⁶ Pitu ari dokahni maningon bahenon ni sidea pardearan pasal anjapanjap ai anjaha urasonni ai, sonai ma ipapansing ai.

²⁷ Anjaha dob salpu ari ai, jadi paualuh-arihon ampa torus i pudini ai maningon galangkonon ni malim do bani anjapanjap ai galangan situtungonnima ampa galangan pardameiannima; jadi marosuh ma uhurhu mangidah hanima, nini Jahowa.”

Pasal Halak Siparugas i Rumah Panumbahan

44¹ Dob ai ibobai ma ahu mulak hu horbangan ni ianan na mapansing ai, na mandompakkon hapoltakan; tapi tutup do ai.

² Jadi nini Jahowa ma hu bangku, “Maningon totap do tutup horbangan on; seng bulih buhaon on, ise pe lang bulih masuk hunjon, halani na dob masuk Jahowa, Naibata ni Israel hunjon; halani ai do ase totap tutup on.

³ Pitah raja in do, halani raja ia, bulih hundul ijon, laho mangankon na ginalangkon i lobei ni Jahowa; humbani surambih ni horbangan ai ma ia masuk anjaha humbani dalan na sada ai ma keluar.

⁴ Dob ai ibobai ma ahu hun horbangan parutara ai hu lobei-lobei ni Rumah na Mapansing ai; mangkawah ma ahu, anjaha tonggor ma, hamuliaon ni Jahowa do manggoki rumah ai; jadi manrogop ma ahu.”

⁵ Tapi nini Jahowa ma hu bangku, “Ale anak ni jolma, parimbagaskon ma, kawah ma ho marhitei matamu, anjaha tangi ma ho marhitei pinggolmu pasal haganup sipatugahon-Ku bam mangonai haganup aturan-aturan ni rumah ni Jahowa, ampa haganup titah-Ni; parimbagaskon ma pasal parmasuk hubagas Rumah Panumbahan in ampa pasal parluar hun jin.

⁶ Anjaha hatahon ma hubani ginompar ni Israel sipanlawan in: Sonon do hata ni Tuhan Jahowa: Sungkup ma in, hanima na mangkorjahon ganup hasamboronima in, ale ginompar ni Israel.

⁷ Ai ipaturut hanima do masuk halak na legan, na so marsunat uhurni ampa dagingni, bani ianan-Ku na pansing in, laho pabutakkon rumah-Ku, sanggah na manggalankon ruti, taboh-taboh ampa daroh hanima Bangku; iosei hanima do padan-Ku marhitei haganup pambahenannima na masambor in.

⁸ Seng iramotkon hanima horja ibagas ianan-Ku na mapansing in, tapi halak na legan do ipabangkit hanima mandalankon horjang-Ku bani ianan-Ku na pansing in.

⁹ Sonon do hata ni Tuhan Jahowa: Haganup halak na legan, na so marsunat uhurni pakon dagingni, lang malo masuk hubagas ianan-Ku na pansing in, ai ma ganup halak na legan, na manginsolat i tongah-tongah ni halak Israel.

¹⁰ Tapi halak Levi, na paganggang dirini hun Bangku, sanggah na kahou ai Israel manundalhon Ahu laho mangihutkon gana-gana ni sidea, maningon porsanon ni sidea do hajahaton ni sidea.

¹¹ Gabe siparugas mando sidea bani ianan-Ku na mapansing in, ai ma gabe parjaga bani horbangan ni Rumah Panumbahan, gabe sipangidangi i Rumah Panumbahan; sidea ma na manayat galangan situtungon pakon galangan sisayaton bani halak

simbuei, maningon jongjong do sidea ilambung ni halak na mabuei, laho mangidangi sidea.

¹² Halani ra sidea marugas bani simbuei ai i lobei ni gana-gana ni sidea, gabe sidea parhiteian ni ginompar ni Israel marhajahaton, halani ai do ase Hupagostong tangan-Ku marbija dompak sidea, nini Tuhan Jahowa, paboa maningon porsanon ni sidea hajahaton ni sidea.

¹³ Lang bulih be sidea roh dohor hu Bangku laho mandalankon jabatan hamalimon barang roh hundohor bani na mapansing-mapansing atap bani galangan tang na susi; maningon do porsanon ni sidea habadoron ni sidea ai, halani parbalikon ni sidea ai.

¹⁴ Hubahen do sidea siparjaga bani Rumah Panumbahan, sidalankon horja atap aha silahoan ijai.

¹⁵ Tapi anggo malim-malim, halak Levi ai, ai ma anak ni si Sadok, na totap mandalankon horja ibagas ianan-Ku na mapansing in, sanggah na kahou ai Israel hun Bangku, bulih do sidea roh mandohori Ahu, marugas bangku; bulih do sidea jongjong i lobeihu, laho manggalankon hu Bangku taboh-taboh ampa daroh, nini Tuhan Jahowa.

¹⁶ Bulih do sidea masuk hubagas ianan-Ku na mapansing in anjaha bulih do sidea mandohori mejang-Ku, laho marugas i lobei-Hu, anjaha laho mandalankon horjang-Ku.

¹⁷ Anggo sihol masukan ni sidea horbangan ni alaman parbagas in, maningon pakeion ni sidea do pakeian linnen, seng bulih pakeionni sidea pakeian wol, sadokah marugas sidea bani horbangan ni alaman parbagas in atap ibagas Rumah na Mapansing in.

¹⁸ Maningon margotong linnen sidea, anjaha marsaluar linnen bani binongeini; seng bulih sidea marbontingkon atap aha pe, na mambahen hadogasan sidea.

¹⁹ Anggo laho sidea hu darat, hu alaman pardarat ai, hubani halak simbuei ai, maningon tanggalon ni sidea do pakeian ni sidea sanggah marugas ai, anjaha tibalhononni ai i kamar na mapansing ai; pakeian na legan ma ipakei, ase ulang mandipar na mapansing ai marhitei pakeian ni sidea ai bani halak na mabuei ai.

²⁰ Seng bulih suhuron ni sidea ulu ni sidea, atap paturuton ni sidea ganjang jambulan ni sidea, tapi maningon pangkason do inggot ulu ni sidea.

²¹ Seng bulih minum anggur malim, anggo laho masuk ia hu alaman parbagas ai.

²² Lang bulih ompoanni naboru na mabalu atap naboru na sinirangkon; maningon anak boru do humbani ginompar ni Israel, atap na mabalu na hinabaluhon ni malim ompoanni.

²³ Maningon ajarhonon ni sidea do bani bangsang-Ku parleganan ni na mapansing humbani na so

pansing, anjaha pabotohkononni bani sidea legan ni na susi humbani na mabutak.

²⁴ Bani parsalisihan sidea ma gabe panguhum, anjaha iuhumi ma ai romban hubani uhum na hum Bangku. Maningon ramotkonon ni sidea do homa aturan-Ku ampa titah-Ku bani haganup pestang-Ku na dob Hutontuhon, anjaha maningon papansingon ni sidea do Sabat-Ku.

²⁵ Seng bulih pabutakon ni sidea dirini marhitei na mandohori na matei; tapi bulih do butak sidea halani bangkei ni bapa atap inang, anak atap boru, sanina atap botou na so laho ope.

²⁶ Dob gabe butak ia, hiraon ma bani pitu ari, ai pe ase pansing ia use.

²⁷ Anjaha bani ari parmasukni ai use hu ianan na mapansing ai, ai ma hu alaman parbagas ai, laho marugas bani ianan na mapansing ai, maningon galangkononni do galangan pardousaonni, nini Tuhan Jahowa.

²⁸ Seng dong parbagianan bani sidea, Ahu do parbagianan bani sidea; seng marrupei sidea bahenonnima bani tanoh ni Israel, Ahu do rupei bani sidea.

²⁹ Ia galangan sipanganon, galangan pardousaon ampa galangan parsalahan maningon sidea do mangankon ai; anjaha sagala na pinapulig ni Israel, sidea do simadasi.

³⁰ Anjaha limbuah ni haganup gogoh ni tanoh ampa haganup guguan na ginalangkon, malim do simada ai; maningon bereonnima do homa bani malim limbuah ni nitaknima, ase marianan pasu-pasu bani rumahnima.

³¹ Sagala na matei-matei atap na hona soroh, manuk-manuk atap binatang pe ai, seng bulih panganon ni malim.”

Tanoh Sipapuligon Gabe Tanoh na Mapansing

45 ¹ Anggo domma ibagihon hanima tanoh in marhitei ruji-ruji, papulig hanima ma sabagian ni nagori in bani Jahowa gabe tanoh na mapansing, ganjangni dua puluh lima ribu asta, anjaha bolagni dua puluh ribu asta; pansing do haganup tanoh in inggot.

² Hunjon do buaton sanlambar tanoh na marompat suhi; lima ratus asta ganjangni sonai homa bolagni, bahen ianan ni Rumah na Mapansing ai; ambahni ai lima puluh asta tanoh porei inggotni ai.

³ Humbani tanoh na dob sinibar ai, sibar ma sabagian dua puluh lima ribu asta ganjangni anjaha sapuluh ribu asta bolagni, ai ma ianan bani rumah na mapansing ai ampa ianan tang na mapansing ai.

⁴ Bagian na mapansing do in humbani tanoh in, parbagianan bani malim, na marugas bani ianan na mapansing in anjaha na mandohori Jahowa, laho marugas bani; gabe ianan ni rumah-rumah ni sidea

ma in ampa partapakan na mapansing bani Rumah na Mapansing in.

⁵Bagian na legan, dua puluh lima ribu asta ganjangni anjaha sapuluh ribu asta bolagni, bani halak Levi ma ai, na marugas i Rumah Panumbahan, bahen parbagianan bani sidea, bahen ianan ni huta-huta siiankonon ni sidea.

⁶Anjaha parbagianan bani huta ai, bahen hanima ma sanlambar tanoh, dua puluh lima ribu asta ganjangni, anjaha lima ribu asta bolagni, na saganjang ni tanoh na mapansing, na pinapulig ai, haganup ma ginompar ni Israel simada ai.

⁷Anjaha bani raja, bere hanima ma tanoh parbagianan angkup lopah ni tanoh na mapansing ai ampa parbagianan bani huta ai romban hubani tanoh na mapansing ai ampa parbagianan bani huta ai, hampit hapoltakan ampa hampit hasundutan dos ganjangni ampa parbagianan ni sada marga, marganjang hun balog parhasundutan das hu balog parhapoltakan ni nagori ai.

⁸Ai ma gabe tanoh parbagianan bani raja i Israel, ase ulang iodoh-odoh raja na Hupabangkit in be bangsang-Ku; tapi ase ipaturut ginompar ni Israel marnah tanoh domu hubani parbagianan ni margani bei.

Hawajiban ampa Horja ni Raja

⁹ Sonon do hata ni Tuhan Jahowa, “Sungkup ma in, ale raja-raja ni Israel: Padaoh ma hajahaton ampa odoh-odoh, dalankon uhum ampa hasintongan! Parontihon ma na mangusir-usir bangsang-Kin! nini Tuhan Jahowa.

¹⁰ Pakei hanimma ma timbangan na sintong, epa na sintong ampa bat na sintong.

¹¹ Maningon dos suhatan ni epa ampa bat, ai ma sada bat saparsapuluh homer, anjaha sada epa saparsapuluh homer; homer ai ma onjolan ni suhat-suhata.

¹² Ia sikal ai, dua puluh gera ma ai; lima sikal hot ma ai lima sikal, na sapuluh sikal totap sapuluh; anjaha sada mina bannima lima puluh sikal ma ai.

¹³ On do guguan sibereonnima; saparonom epa humbani ganup homer gandum, anjaha saparonom epa humbani ganup homer andolei.

¹⁴ Ia guguan minak, ai ma saparsapuluh bat humbani ganup kor, sada kor marisi sapuluh bat.

¹⁵ Ambahni ai sada biribiri humbani dua ratus biribiri sibereon ni ganup marga ni Israel; haganupan ai, ai ma bahen galangan sipanganon, galangan situtungon ampa galangan pardameian, laho mambahen pardearan bani sidea, nini Tuhan Jahowa.

¹⁶ Maningon ondoskonon ni haganup bangsa in do guguan on bani raja i Israel.

¹⁷ Horja ni raja ai do mamboan galangan situtungan, galangan sipanganon ampa galangan siinumon sanggah pesta, sanggah poltak ni bulan ari Sabat, ai ma haganup pesta na dob tinontuhon bani ginompar ni Israel. Ia do sibuan galangan pardousaon, galangan sipanganon, galangan situtungan ampa galangan pardameian, laho mambahen pardearan bani ginompar ni Israel.”

Aturan Pasal Pesta ampa Galangan

¹⁸ Sonon do hata ni Tuhan Jahowa, “Bani bulan sada, ari sada bulan ai, maningon buatonnima do sada anak ni lembu na so martikas, laho manguras ianan na mapansing in.

¹⁹ Ibuat malim ma deba humbani daroh galangan pardousaon ai, anjaha inahkon ma ai bani tiang ni labah ni Rumah Panumbahan ai, bani haompatsi suhi-suhi ni tangga-tangga ni anjapanjap ai ampa bani tiang ni horbangan ni alaman parbagas ai.

²⁰ Sonai ma homa bahen hanima bani ari sada bulan pitu, bani halak na mardousa na so tinuntun atap halani haotoon, sonai ma bahenonnima manguras Rumah Panumbahan ai.

²¹ Bani bulan sada ari sapuluh ompat maningon pestahononnima do Paskah ai; pitu ari dokahni maningon panganonnima ruti na so niigaran ijai.

²² I pasirsir raja ma bani ari ai sada anak ni lombu bahen galangan pardousaon, mangkopkop dirini sandiri pakon mangkopkop bangsa na i tanoh in.

²³ Torus bani mata ni pesta na pitu ari ai maningon pasirsiron do siap arian galangan situtungon bani Jahowa, ai ma pitu anak ni lombu ampa pitu biribiri tunggal na so martikas; anjaha sada hambing tunggal bahen galangan pardousaon siap arian.

²⁴ Anjaha maningon pasirsironni do galangan sipanganon, ai ma sada epa pangkasomani ni sada anak ni lombu, anjaha sada epa pangkasomani ni sada biribiri tunggal, anjaha sada hin minak bani ganup epa.

²⁵ Bani bulan pitu, ari sapuluh lima ni bulan ai, torus bani mata ni pesta sipitu ari ai maningon pasirsironni do homa sonai, dos bueini bani galangan pardousaon, galangan situtungon, galangan sipanganon ampa minak.”

Pasal Galangan Sigalangankon ni Raja

46 ¹ Sonon do hata ni Tuhan Jahowa, “Ia horbangan parhapoltakan ni alaman parbagas ai maningon itutup do ibagas sionom ari parhorjaonkon; tapi bani ari Sabat ampa bani bona ni bulan maningon ibuka do.

² Masuk ma raja ai hun darat humbani surambih ni horbangan ai, anjaha jongjong ma ia i lambung ni tiang ni horbangan ai. Dob ai roh ma malim

manggalangkon galangan situtungon ampa galangan pardameian, tapi anggo raja ai manrogop ma bani molmolan ni horbangan ai. Dob ai luar ma ia, tapi horbangan ai seng bulih ai tutupon ronsi bodari.

³ Ia bangsa na i tanoh in maningon manrogop do homa bani dalan masuk humbani horbangan ai i lobei ni Jahowa sanggah ari Sabat ampa bani poltak ni bulan.

⁴ Ia galangan situtungon, sigalangkonon ni raja ai bani Jahowa bani ari Sabat, ai ma onom anak ni biribiri na so martikas ampa sada biribiri tunggal na so martikas,

⁵ anjaha galangan sipanganon pangkasomani ni biribiri tunggal ai sada epa do, anjaha galangan sipanganon pangkasomani ni anak ni biribiri ai haganup, ai ma sadiha na boi tarberesi, ambah ni ai sada hin minak hasoman ni ganup epa.

⁶ Bani poltak ni bulan maningon galangkononni do sada anak ni lombu na so martikas, onom anak ni biribiri ampa sada biribiri tunggal na so martikas.

⁷ Anjaha pasirsironni do galangan sipanganon pangkasomani ni anak ni lombu ai, sada epa; pangkasomani ni biribiri tunggal ai sada epa do homa, anjaha pangkasomani ni anak ni biribiri ai haganup, ai ma sadiha na boi tarberesi, ambah ni ai sada hin minak hasoman ni ganup epa.

⁸Anggo masuk raja ai, humbani surambih ni horbangan ai ma ia masuk, anjaha kaluar pe humbani dalan na sada ai ma.

⁹Anggo roh bangsa parnagori ai hu lobei ni Jahowa bani ari pesta na dob tinontuhon, ise na masuk hun horbangan parutara laho marsombah, hun horbangan pardangsina ma ia luar; anjaha ise na masuk hun horbangan pardangsina hun horbangan parutara ma ia luar; ulang ma adong na mulak hun horbangan hamasukanni ai, tapi ganup ma kaluar torus dompak lobei.

¹⁰Sanggah na masuk ai sidea, masuk ma homa raja ai; anjaha anggo kaluar sidea, ia pe kaluar ma.

¹¹Bani pesta-pesta ampa bani ari raya, galangan sipanganon pangkasomani ni anak ni lembu ai, ai ma sada epa; pangkasomani ni biribiri tunggal ai, sada epa homa; tapi pangkasomani ni anak biribiri ai haganup, ai ma sadiha na tarberesi, ambah ni ai sada hin minak hasoman ni sada epa.

¹²Anggo sihol boanon ni raja ai galangan banggal ni uhur bani Jahowa, ai ma galangan situtungon atap galangan pardameian, humbani banggal ni uhurni, maningon bukaon ma horbangan parhapoltakan ai bani; igalangkon ma galangan situtungonni ai atap galangan pardameianni ai, songon na binahenni bani ari Sabat. Dob ai luar ma ia, anjaha dob luar ia, tutupon ma horbangan ai.

¹³ Maningon pasirsironni do sada anak ni biribiri, na marumur satahun anjaha na so martikas, bahen galangan situtungon ari-ari bani Jahowa; siap sogod do ai pasirsironni.

¹⁴ Anjaha maningon pasirsironni do galangan sipanganon pangkasomani ni ai ganup sogod, ai ma saparonom epa anjaha minak sapartolu hin pangarbahi ni nitak bahen galangan sipanganon bani Jahowa; ai ma aturan na totap sadokah ni dokahni bani galangan siganup ari ai.

¹⁵ Sonai ma pasirsiron anak ni biribiri ai, galangan sipanganon ai ampa minak ai siap sogod bahen galangan situtungon marturut-turut.”

Aturan Pasal Tanoh Parbagianan ni Raja

¹⁶ Sonon do hata ni Tuhan Jahowa, “Anggo sihol marsibere-bere raja ai humbani parbagiananni hubani anakni, gabe anakni ai ma simada ai, gabe tean-teananni ma ai.

¹⁷ Tapi anggo marsibere-bere ia humbani parbagiananni hubani juakjuakni, gabe ia ma simada ai ronsi tahun haluahon hansa; dob ai paulakon do ai bani raja ai; pitah anakni do na boi totap marbagian bani tean-teanan.

¹⁸ Seng bulih buaton ni raja humbani parbagianan ni rayat marhitei na mangusir sidea humbani parbagiananni; humbani bagianni ma ibere hubani

anakni, ase ulang adong humbani bangsang-Ku na hona usir humbani parbagiananni.”

Pasal Dapur Panlompahan

¹⁹ Dob ai ibobai ma ahu humbani dalan hamasukan ai, ai ma na bani lambung ni horbangan ai, dompak kamar-kamar ni malim na mapansing ai, ai ma na hampit utara ai; anjaha tonggor ma, adong do sada ianan ijai tang hampit ujung parhasundutan.

²⁰ Jadi nini ma dompak ahu, “On ma ianan bani malim manlompah galangan parsalahan ampa galangan pardousaon, anjaha ianan ni sidea pamasak galangan sipanganon, ase ulang iboan sidea ai hu alaman pardarat ai, gabe marhitei ai mandipar na mapansing bani halak na mabuei ai.”

²¹ Dob ai iboan ma ahu hu alaman pardarat ai, anjaha ibobai ma ahu hubani haompatsi suhi-suhi ni alaman ai; anjaha tonggor ma, bani ganup suhi-suhi ni alaman ai adong do sada alaman;

²² etek do alaman na bani na ompat suhi-suhi ni alaman ai, ompat puluh asta ganjangni, anjaha tolu puluh asta bolagni; haompatsi ai dos do sibaranni.

²³ Adong do tembok na etek-etek bani na ompat alaman ai inggot, anjaha i toruh ni tembok ai inggot ipauli do tataring.

²⁴ Jadi nini ma hu bangku, “On ma dapur ianan ni siparugas i Rumah Panumbahan manlompah galangan sisayaton ni halak simbuei.”

**Bah Hagoluhan na Luar hun
Rumah na Mapansing ai**

47 ¹ Dob ai ibobai ma ahu use hu labah ni Rumah na Mapansing ai, anjaha tonggor ma, luar do bah hun toruh ni molmolani ni rumah ai dompak hapoltakan, ai mandompakkon hapoltakan do Rumah na Mapansing ai. Mabaor do bah ai hun toruh ni tembok pardangsina ni rumah ai hampit dangsina ni anjapanjap ai.

² Dob ai ibobai ma ahu luar hun horbangan parutara ai, anjaha iarahkon ma ahu mardalan maringgot hampit darat hu horbangan parhapoltakan ai, anjaha tonggor ma, marsual-sual do bah ai roh hun lopah pardangsina ai.

³ Sanggah laho dalahi ai dompak hapoltakan, manjolom tali sibar-sibar ibagas tanganni, isibar ma saribu asta, anjaha itogu ma ahu mandipari bah ai; singgan mata ni ari ni nahei do bagasni ai.

⁴ Dob ai isibar ma use saribu asta, anjaha itogu ma ahu mandipari bah ai, sibar towod do bagasni ai. Isibar use ma saribu asta, anjaha itogu ahu mandipari bah ai; sibar binongei do bagasni ai.

⁵ Dob ai isibar use ma saribu asta, bah bangga do ai, na so boi tardipari ahu; ai bagas do bah ai, silanguyon mando, sada bah bangga na so tardipari.

⁶ Dob ai nini ma hu bangku, “Ale anak ni jolma, domma ididah ho in? Dob ai itogu ma ahu mulak manopi-nopi bah ai.

⁷ Sanggah na mulak ai ahu, tonggor ma, adong do buei hayu bani topi ni bah ai, angkup lopah.

⁸ Jadi nini ma dompak ahu: Ia bah on mabaor do dompak tanoh hampit hapoltakan, dob ai tuad hu pamah ai; dob masuk ai hu laut Matei, hu bah na margaram ai, ibahen ma ai gabe tawar.

⁹ Atap huja pe das bah ai, manggoluh ma ijai sagala na marhosah ampa na manggulmit, anjaha dengke pe buei tumang ma; ai anggo das ma bah on hujai gabe tawar ma bah ni laut ai. Atap huja pe das bah on, manggoluh ma ganup ijai.

¹⁰ Parjala pe jongjong bei ma i topini ai hun En-Gedi das hu En-Eglaim, panjomuran ni jala ma ai; ai buei do dengke, marbagei-bagei songon na ibagas laut bolag.

¹¹ Tapi anggo paya-payani ampa rawang-rawangni seng gabe dear ai, pambuatan ni garam do ai.

¹² Anjaha i topi ni bah ai, angkup lopah ni bah ai, tubuh do ijai bagei-bagei ni hayu bahen sipanganon. Seng ra melus bulungni ai anjaha seng maronti marbuah, tapi marbuah do ai siap bulan halani bahni ai, roh hun ianan na mapansing ai. Gabe sipanganon do buahni anjaha bulungni gabe tambar.

Parbalogan ampa Parbagi bani Tanoh ai

¹³ Sonon do hata ni Tuhan Jahowa, “On ma parbalogan sibahenonnima laho marbagi tanoh ai bahen parbagianan bani halak Israel sisapuluh dua marga ai. Bani si Josep dua bagian.

¹⁴ Dos ma parbagianannima bani tanoh ai; Hupagostong do tangan-Ku marbulawan laho mamberehon on bani ompungnima; halani ai bannima do tanoh on bahen parbagianannima.

¹⁵ On ma parbalogan ni tanoh in: Hampit utara, ai ma hun laut bolag ai, manlopusi Hetlon laho hu Sedad,

¹⁶ hu Hamat, Berota, Sibrayim, na bani parbalogan ai, i holangkolang ni Damaskus ampa Hamat, das hu Hazar-Enon, na bani parbalogan ni Hauran.

¹⁷ Ase parbalogan ai gistang do ai hun laut das hu Hazar-Enon, na bani balog parutara ampa Damaskus, das hu parbalogan ampa Hamat i utara. Ai ma parbalogan hampit utara.

¹⁸ Parbalogan hampit hapoltakan, ai ma hun Hazar-Enon na i holangkolang ni Hauran ampa Damaskus, dob ai Bah Jordan na i holangkolang ni Gilead ampa tanoh Israel das hu laut parhapoltakan hu Tamar. Ai ma parbalogan hampit hapoltakan.

¹⁹ Parbalogan hampit dangsina, ai ma hun Tamar das hu bah partinggilan na i Kades ai, hunjai

manopi-nopi bah Masir laho hu laut bolag. Ai ma parbalogan hampit dangsina.

²⁰ Parbalogan hampit hasundutan, ai ma laut bolag ai das hu tontang ni Hamat. Ai ma parbalogan hampit hasundutan.

²¹ Ase bagi hanima ma tanoh in bannima mangihutkon marga ni Israel.

²² Marjomput na sinurat ma hanima laho marbagi tanoh in, bahen parbagianan bannima ampa bani halak na manginsolat i tengah-tongahnima, na dob tubuhan anak i tengah-tongahnima. Maningon songon halak Israel do sidea hiraonnima; maningon dapotan parbagianan do sidea songon hanima marhitei na manjomput na sinurat i tengah-tengah ni marga ni Israel.

²³ I tengah-tengah ni marga ja panginsolat ai marianan, ijai ma bere hanima bani parbagiananni,” nini Tuhan Jahowa.

Parbagi bani Tanoh ai

48¹ “On ma goran ni marga ai: Mulai hun parbalogan tang parutara, hun laut manlopusi Hetlon laho hu Hamat, das hu Hazar-Enon, ai ma na bani parbalogan parutara ampa Damaskus patontang pakon Hamat, gistang hun hapoltakan hu hasundutan, ai ma parbagianan ni Dan.

² Anjaha sabalog pakon Dan, hun hapoltakan das hu hasundutan, ai ma parbagianan ni Asser.

³ Anjaha sabalog pakon Asser, hun hapoltakan das hu hasundutan, ai ma parbagianan ni Naptali.

⁴ Anjaha sabalog pakon Naptali, hun hapoltakan das hu hasundutan, ai ma parbagianan ni Manase.

⁵ Anjaha sabalog pakon Manase, hun hapoltakan das hu hasundutan, ai ma parbagianan ni Efraim.

⁶ Anjaha sabalog pakon Efraim, hun hapoltakan das hu hasundutan, ai ma parbagianan ni Ruben.

⁷ Anjaha sabalog pakon Ruben, hun hapoltakan das hu hasundutan, ai ma parbagianan ni Juda.

⁸ Anjaha sabalog pakon Juda, hun hapoltakan das hu hasundutan, ai ma tanoh na mapansing sipapuligonnima ai, bolagni dua puluh ribu asta, anjaha ganjangni dos ampa parbagianan ni sada marga, hun hapoltakan das hu hasundutan, anjaha i tengah-tengah ni ai ma ianan na mapansing ai.

⁹ Ase tanoh na mapansing sipaleganonnima ai bani Jahowa dua puluh lima ribu asta do ganjangni, anjaha dua puluh ribu asta bolagni.

¹⁰ Sonon ma parbagi bani tanoh na mapansing ai: Parbagianan bani malim, dua puluh lima ribu asta ganjangni hampir utara, sapuluh ribu asta bolagni hampir hasundutan, sapuluh ribu asta bolagni hampir hapoltakan, anjaha dua puluh lima ribu asta ganjangni hampir dangsina; i tengah-tengah ni ai ma rumah ni Jahowa.

¹¹ Ai ma rupei ni malim, na pinapansing ai, anak ni si Sadok, sidalankon horjang-Ku, ai ma na so dihut kahou rap pakon halak Israel songon halak Levi na kahou ijia.

¹² Ai ma parbagianan bani sidea, parbagianan na pinalegan humbani tanoh na mapansing ai, sabalog pakon halak Levi.

¹³ Anjaha sabalog pakon parbagianan ni malim, ai ma parbagianan ni halak Levi, dua puluh lima ribu asta ganjangni anjaha sapuluh ribu asta bolagni. Haganupan ai dua puluh lima ribu asta ganjangni anjaha dua puluh ribu asta bolagni.

¹⁴ Seng bulih jualon atap tukaron ni sidea ai, ase ulang madabuh ai bani tangan ni halak na legan, ai na mapansing do ai bani Jahowa.

¹⁵ Ia na tading ai, lima ribu asta bolagni anjaha dua puluh lima asta ganjangni, seng pansing ai, sipakeion ma ai bani huta ai, bani rumah-rumah ampa bahen sampalan. I tongah-tongah ni ai ma huta ai.

¹⁶ On do sibaranni: Hampit utara ompat ribu lima ratus asta, sonai age hampit dangsina, hampit hapoltakan ampa hampit hasundutan.

¹⁷ Maningon adong do tanoh porei bani huta ai. Hampit utara dua ratus lima puluh asta, hampit dangsina dua ratus lima puluh, hampit hapoltakan dua ratus lima puluh anjaha hampit hasundutan dua ratus lima puluh asta do.

¹⁸ Na tading ai, humbani ganjangni ai, na romban hubani tanoh na mapansing ai, ai ma sapuluh ribu asta hampit hapoltakan anjaha sapuluh ribu asta hampit hasundutan; ia gogohni ai bahen sipanganon ni sipangkorja i huta ai ma ai.

¹⁹ Anjaha siparhorja na i huta ai, ai ma humbani ganup marga ni Israel, sidea do na mangkorjahon ai.

²⁰ Ase haganup tanoh sipapuligonnima ai, ai ma dua puluh lima ribu asta ganjangni sonai homa bolagni, ase marompat suhi do ai, ai ma tanoh na mapansing ai ampa tanoh na bani huta ai.

²¹ Na tading ai ope, angkup lopah bani tanoh na mapansing ai ampa parbagianan na bani huta ai, raja ma simada ai, ai ma tanoh na ampar idarat ni sidua puluh lima ribu asta ai das hu parbalogan parhapoltakan, sonai homa tanoh na ampar idarat ni sidua puluh lima ribu asta ai das hu parbalogan parhasundutan, na paromban ampa parbagianan ni marga-marga ai; raja do simada ai. I tengah-tengah ni ai ma tanoh na pinalegan ai, ampa Rumah na Mapansing ai.

²² Sobali ni parbagianan ni halak Levi ampa parbagianan na bani huta ai, ai ma na i tengah-tengah ni parbagianan ni raja ai; ia tanoh na i holangkolang ni parbagianan ni Juda ampa Benjamin, raja do simada ai.

²³ Pasal marga na legan ai: Hun hapoltakan das hu hasundutan, ai ma parbagianan ni Benjamin.

²⁴ Anjaha sabalog pakon Benjamin, hun hapoltakan das hu hasundutan, ai ma parbagianan ni Simeon.

²⁵ Anjaha sabalog pakon Simeon, hun hapoltakan das hu hasundutan, ai ma parbagianan ni Isasar.

²⁶ Anjaha sabalog pakon Isasar, hun hapoltakan das hu hasundutan, ai ma parbagianan ni Sebulon.

²⁷ Anjaha sabalog pakon Sebulon, hun hapoltakan das hu hasundutan, ai ma parbagianan ni Gad.

²⁸ Anjaha balog ni Gad hampit dangsina, gistang do ai hun Tamar das hu bah partinggilan na i Kades, hunjai manopi-nopi bah Masir hu laut bolag.

²⁹ Ai ma tanoh sibagihononnima marhitei manjomput na sinurat bahen parbagianan bani marga ni Israel, anjaha ai ma parbagianan bani sidea,” nini Tuhan Jahowa.

Pasal Horbangan ni Huta ai

³⁰ “On ma dalan kaluar humbani huta ai: Hampit lopah parutara, siompat ribu lima ratus asta ai,

³¹ adong do tolu horbangan, ai ma horbangan Ruben, horbangan Juda ampa horbangan Levi; mangihutkon goran ni marga ni Israel do ibahen goran ni horbangan ai.

³² Hampit lopah parhapoltakan, siompat ribu lima ratus asta ai, tolu horbangan homa, ai ma

horbangan Josep, horbangan Benjamin, ampa horbangan Dan.

³³ Hampit lopah pardangsina, siompat ribu lima ratus asta ai, tolu horbangan homa, ai ma horbangan Simeon, horbangan Isasar, ampa horbangan Sebulon.

³⁴ Hampit lopah parhasundutan, siompat ribu lima ratus asta ai, tolu horbangan homa, ai ma horbangan Gad, horbangan Asser, ampa horbangan Naptali.

³⁵ Ia lilit ni huta ai inggot sapuluh ualuh ribu asta do. Anjaha goran ni huta ai hu lobeian on, ai ma: Jahowa do ijai.”

Daniel

Parbangkit ni si Daniel ampa Hasomanni Gabe Siparugas i Lobei ni Raja Nebukadnesar

1 ¹ Patolu-tahunkon dob gabe raja si Joyakim i Juda, roh ma si Nebukadnesar, raja ni Babel, hu Jerusalem, anjaha ihubu ma huta ai.

² Jadi ipadas Tuhan ma hubani tangan ni si Joyakim raja ni Juda, ampa deba humbani parugas na humbani rumah ni Naibata; iboan do ai hu tanoh Sinear, hu rumah ni naibatani, anjaha inahkon ma parugas ai hu rumah parartaan ni naibatani.

³ Dob ai isuruh raja ai ma si Aspenas, ai ma kopala ni juakjuakni ai, ase iboan deba humbani halak Israel, ai ma ginompar ni raja pakon na sangap-sangap.

⁴ na poso, na so marsining, na majenges, na pandei bani haganup hapentaran, na marpambotoh, na maruhur anjaha na talup marugas i rumah bolon, laho mangajari sidea pasal surat pakon hata ni halak Kasdim.

⁵ Jadi itotapkon raja ai ma sipanganon siganup ari bani sidea humbani sipanganon ni raja ai ampa humbani anggur siinumonni. Maningon ajaran do sidea tolu tahun dokahni, anjaha dob salpu pe ai, ase boi sidea marugas i lobei ni raja ai.

⁶ Adong do i tongah-tongah ni sidea ai, na humbani halak Juda, ai ma si Daniel, si Hananya, si Misael ampa si Asarya.

⁷ Jadi igantih kopala ni juakjuak ai ma goran ni sidea: Si Daniel igoran si Beltsasar, si Hananya igoran si Sadrak, si Misael igoran si Mesak, anjaha si Asarya igoran si Abednego.

⁸ Tapi anggo si Daniel domma iputuskon ibagas uhurni, na so ra ia pabutak dirini marhitei sipanganon ni raja ai ampa marhitei anggur siinumonni ai; halani ai ipindohon ma bani kopala ni juakjuak ai, ase ipalopas ia mamantangkon ai, ase ulang butak ia.

⁹ Jadi ibahen Naibata ma si Daniel dapotan idop ampa holong ni uhur humbani kopala ni juakjuak ai.

¹⁰ Nini kopala ni juakjuak ai ma dompak si Daniel, “Mabiar do ahu, anggo ididah tuanku raja ai, na dob manotapkon sipanganon ampa siinumon nasiam, merungan nasiam marimbang garama na legan, hasoman nasiam magodang ai, gabe marutang hosah holi ahu halani pambahenan nasiam.”

¹¹ Jadi nini si Daniel ma hubani siparugas, na dob pinabangkit ni kopala ni juakjuak ai marugas bani si Daniel, si Hananya, si Misael ampa si Asarya,

¹² “Lajou ham ma lobei hanami juakjuakmu on sapuluh ari on; bere ham ma bennami lowoh bahen sipanganon ampa bah bahen siinumon.

¹³ Dob ai pardiateri ham ma rupanami sonai rupa ni garama na mangankon sipanganon ni raja ai; jadi bahen ham ma bennami juakjuakmu on romban hubani na nididahmu.”

¹⁴ Jadi ibalosi ma sidea pasal ai, gabe iuji ma sidea sapuluh ari dokahni.

¹⁵ Dob ai marujung ma na sapuluh ari ai, dearan do rupa ni sidea idahon anjaha momburan marimbang haganup garama, na mangankon sipanganon ni raja ai,

¹⁶ gabe ipadaoh siparugas ai ma sipanganon ampa anggur na dob tinontuhon ai bani sidea, anjaha ibere ma bani sidea lowoh.

¹⁷ Jadi ibere Naibata ma bani garama na ompat ai habotohon pakon pangarusion pasal haganup surat ampa hapentaran. Ia si Daniel adong do homa hapandeianni pasal panonggoran ampa nipi.

¹⁸ Anjaha dob salpu panorang na dob tinontuhon ni raja ai, ase iboan sidea hu lobeini, gabe iboan kopala ni juakjuak ai ma sidea hu lobei ni Raja Nebukadnesar.

¹⁹ Iparsahapkon raja ai ma sidea, anjaha seng dong jumpah i tongah-tongah ni sidea na dos pakon si Daniel, si Hananya, si Misael pakon si Asarya; halani ai sidea ma gabe siparugas i lobei ni raja ai.

²⁰ Pasal haganup hapentaran pakon pangarusion, na sinungkun ni raja ai humbani sidea, sapuluh hali lompit do pentaran sidea jumpahsi marimbang

haganup siparpambotoh ampa sipartondung na bani haganup gomgomanni ai.

²¹ Lanjar ijai do si Daniel das hubani tahun parlobei ni raja Kores.

Nipi ni Raja Nebukadnesar Pasal Harajaon Dunia na Ompat ai

2 ¹ Bani tahun paduahon, dob gabe raja si Nebukadnesar, marnipi ma si Nebukadnesar; rusak tumang do uhurni, gabe lang ra tarpodom be ia.

² Jadi ihatahon raja ai ma mandilo sagala na pentar-pentar, sipartondung, datu-datu ampa halak Kasdim, laho patugahkon bani raja ai pasal nipini ai. Ase roh ma sidea anjaha jongjong i lobei ni raja ai.

³ Nini raja ai ma dompak sidea, “Marnipi do ahu, tarsonggot tumang uhurhu, sihol do botohonku pasal nipi ai.”

⁴ Jadi nini halak Kasdim ai ma dompak raja ai, “Sai manggoluh ma ham rajanami. Pajojor ham ma nipi ai bani juakjuakmu, ase ipatugah hanami aha artini ai.”

⁵ Nini raja ai ma mambalosi halak Kasdim ai, “On do hatangku bannima, anggo seng ipatugah hanima bangku nipi ai pakon artini, maningon toktokon do hanima, anjaha rumahnima ai gabe ianan ni tompoh-tompok do bahenon.

⁶ Tapi anggo ipatugah hanima nipi ai pakon artini, jaloonnima do humbangku sibere-bere, upah ampa hasangapon banggal. Halani ai patugah hanima ma bangku nipi ai pakon artini.”

⁷ Ibalosi sidea ma ia paduahalihon, “Ipatugah raja in ma nipi ai bani juakjuakni, ase ipatugah hanami artini ai.”

⁸ Nini raja ai ma mambalosi, “Torang do hubotoh, na paganjang-ganjang panorang do hanima, halani domma ibotoh hanima haputusan na dob hubahen.

⁹ Ai ma anggo seng tarpatugah hanima bangku nipi ai, sada mando uhuman sipadalanon bannima. Marsada ni uhur do hanima laho mangkatahon hata ladung ampa sipaoto-oto bangku, paima marubah panorang. Patugah hanima ma bangku nipi ai, ase hubotoh atap na boi do tarpatorang hanima bangku arti ni nipi ai.”

¹⁰ Nini halak Kasdim ai ma mambalosi raja ai, “Seng dongjolma i atas ni tanoh on, na tarbahen pasaudkon pangindoan ni raja in, anjaha seng onggadong raja, na timbul atap na markuasa pe, na mangindo sisonai ai humbani na pentar-pentar, sipartondung atap humbani halak Kasdim pe.

¹¹ Pangindoan ni raja in na maholtu do in, anjaha ise pe lang na boi patorangkon in bani raja in sobali naibata-naibata, na so marianan i tongah-tongah nijolma.”

¹² Gabe manggila tumang ma raja ai marhalanihon ni ai, isuruh ma bunuhon sagala na pentar na i huta Babel.

¹³ Jadi mardalan ma parentah ai, maningon bunuhon sagala halak na pentar; ipindahi sidea ma homa si Daniel pakon hasoman-hasomanni ai laho mambunuh sidea.

¹⁴ Jadi marbalos ma si Daniel ibagas torang ni uhur ampa hapentaran hubani si Ariok, kopala ni pangawal ni raja ai, na dob luar, laho mamunuh sagala halak na pentar, na adong i Babel,

¹⁵ nini ma hubani si Ariok, puanglima ni raja ai, “Mase ma sonin koras ni parentah ni raja in?” Jadi ipatugah si Ariok ma pasal ai hubani si Daniel.

¹⁶ Jadi masuk ma si Daniel, ielek-elek ma raja ai, ase ibere panorang bani, andohar boi ia patugahkon arti ni nipi ai bani raja ai.

¹⁷ Dob ai mulak ma si Daniel hu rumahni, anjaha ipatugah ma na masa ai bani hasomanni si Hananya, si Misael, ampa si Asarya,

¹⁸ anjaha ihatahon ma sidea mangindo idop ni uhur humbani Naibata na i surga pasal rusia ai, andohar ulang hona bunuh si Daniel pakon hasomanni ai rap ampa halak na pentar ai, na adong i Babel.

¹⁹ Jadi talar ma rusia ai bani si Daniel marhitei panonggoran sanggah borngin. Jadi ipuji si Daniel ma Naibata na i surga.

²⁰ Nini si Daniel ma, “Pinuji ma goran ni Naibata sadokah ni dokahni, ai la do simada hapentaran pakon hagogohon.

²¹ la do na paubah panorang ampa musim; la do na paturun raja-raja ampa na pabangkitkon; la do sibere hapentaran bani halak na pentar ampa habotohon hubani halak na maruhur.

²² la do na patalarhon na bagas pakon na ponop; ibotoh do atap aha ibagas na golap, anjaha Bani do marianan na lihar ai.

²³ Bamu do, Ham, Naibata ni ompungku, hupadas tarima kasih ampa puji-pujian; ai ibere Ham do bangku hapentaran ampa hagogohon, anjaha ipatugah Ham do bangku nuan, aha na ipindo hanami hun Bamu, ai ipabotohkon Ham do bennami na pinindo ni raja ai.”

²⁴ Dob ai laho ma si Daniel marayak si Ariok, na dob pinarentahkon ni raja ai, laho mamunuh sagala na pentar na i Babel, nini ma dompaksi, “Ulang ma bunuh ham sagala na pentar na adong i Babel; boan ham ma ahu hu lobei ni raja in, ase hupatugah arti ni nipi ai bani raja in.”

²⁵ Jadi tarolos ma si Ariok mamboan si Daniel hu lobei ni raja ai, nini ma hu bani, “Domma jumpah ahu sada halak humbani halak Jahudi na tarbuang in, na boi patugahkon arti ni nipi ai hu bani raja in.”

²⁶ Nini raja ai ma dompak si Daniel, na margoran homa si Beltsasar, “Boi do tongon patugahonmu bangku nipi na huidah ai pakon arti ni ai?”

²⁷ Nini si Daniel ma mambalosi raja ai, “Ia rusia, na sinungkun ni raja in, seng dong na boi patorangkon ai bani raja in, age halak na pentar, age datu-datu, age partondung atap sibotoh parhalaan pe.

²⁸ Tapi adong do Naibata i surga, Sipatar rusia; Ia do na patugahkon bani Raja Nebukadnesar atap aha na sihol masa. Ia nipi ampa panonggoran, na nididahmu bani podomanmu, on do ai:

²⁹ Roh do bamu ale rajanami, sanggah na modom ham bani podomanmu, pingkiran pasal atap aha do na sihol masa; jadi roh ma Sipatar rusia ai pabotohkon bamu, atap aha na sihol masa.

³⁰ Jadi hu bangku ma ipatar rusia ai, sedo halani na pentaran ahu marimbang sagala halak na manggoluh, tapi ase talar do bani raja in pasal artini ai, anjaha ase ibotoh ham pingkiran na marhusor ibagas uhurmu.

³¹ Marpanonggoran do ham, ale rajanami, anjaha ididah ham do sada gana-gana. Ia gana-gana ai, bangga sahalian do anjaha marsinalsal tumang, jongjong do ai i lobeimu anjaha majangin do idahon.

³² Ulu ni gana-gana ai humbani omas pitah do, tontonni pakon botokanni humbani pirak, boltokni pakon binongeini humbani tombaga,

³³ hae-haeni humbani bosi, anjaha naheini deba humbani bosi, deba humbani tanoh liat.

³⁴ Sanggah ikawahkon ham ope ia, ididah ham ma mungkit sada batu hun babou, na so niungkit ni tangan ni jolma, jadi ijombai ma gana-gana ai tontang ni naheini na humbani bosi ampa tanoh liat ai, lanjar maropuk do ai ibahen.

³⁵ Ia bosi, tanoh liat, tombaga, pirak ampa omas ai, maropuk do ai haganup, gabe doskon lamlam hinabangkon ni logou hun pardogeian; seng dong jumpah be iananni. Tapi batu na manjombai gana-gana ai, gabe dolog batu na banggal do ai, anjaha igoki do sab dunia on.

³⁶ Ai ma nipi ai, sonari patugahonnami ma bani raja in artini ai.

³⁷ Ham rajanami, raja ni raja-raja, haondosan ni harajaon, hagogohon, kuasa ampa hamuliaon ibahen Naibata na i surga,

³⁸ anjaha hadasan ni jolma manisia ipabangkit Naibata, binatang na i talun ampa manuk-manuk na i awang-awang, atap ija pe ai marianan, ham na niangkatni manrajai haganup, ham do ulu omas ai.

³⁹ Dob salpu ham roh ma sada harajaon na legan, toruhan marimbang ham; dob ai harajaon na patoluhon, na humbani tombaga, na manggomgom haganup tanoh on.

⁴⁰ Ia harajaon na paompatkon ai, toguh do songon bosi; songon bosi, na manropuki anjaha na

manrosaki haganup, sonai do ropukonni anjaha rosakanni haganupan ai.

⁴¹ Ia nahei pakon jari-jari ni nahei na nididahmu ai, deba humbani tanoh liat, deba nari humbani bosu, tugah-tugah ni harajaon na binagi do ai; tapi deba humbani hatoguhon ni bosu ai tading do ibagas ai, usih songon na nididahmu bosu marsaor pakon tanoh liat ai.

⁴² Songon jari-jari ni nahei ai, deba humbani bosu, deba nari humbani tanoh liat, sonai do harajaon ai, deba togap, deba rampok.

⁴³ Songon na nididahmu ai bosu marsaor tanoh liat, sonai do marsipadomuan sidea marhitei na marsibuatan boru, tapi seng anjai marsada sidea, usih songon bosu na so boi sada pakon tanoh liat ai.

⁴⁴ Tapi bani panorang ni raja-raja ai, pajongjongon ni Naibata na i surga ai ma sada harajaon, na so tarpatunduk ronsi sadokah ni dokahni, anjaha kuasa-Ni ai pe seng padason ai bani bangsa na legan; ropukan-Ni do sagala harajaon ai anjaha boiskonon-Ni do ai, tapi totap do anggo ai ronsi sadokah ni dokahni,

⁴⁵ ai ma usih songon nididahmu ai, mabungkar batu ai hun dolog ai, na so niungkit ni tangan ni jolma, gabe iropuki bosu, tombaga, tanoh liat, pirak pakon omas ai. Naibata na banggal ai do na pabotohkon bani raja in, atap aha na sihol masa. Ia nipi ai sintong do ai, anjaha sintong do homa artini ai.”

⁴⁶ Dob ai manrogop ma Raja Nebukadnesar, marsombah hubani si Daniel, anjaha iparentahkon ma mamboan galangan ampa na misbou bani.

⁴⁷ Nini raja ai ma hubani si Daniel, “Tongon, Naibatamu do Naibata ni sagala naibata, anjaha Tuhan ni sagala raja-raja, Sipatar sagala rusia; ai ham do na boi patalar rusia on.”

⁴⁸ Jadi ipatimbul raja ai ma si Daniel, ibere do hubani buei sibere-bere na bangga-banggal, anjaha ipabangkit do ia gabe panrajai i propinsi Babel ampa gabe kopala ni sagala halak na pentar na adong i Babel.

⁴⁹ Anjaha ipabangkit raja ai do homa si Sadrak, si Mesak ampa si Abednego halani pangindoan ni si Daniel, gabe wakilni manggomgom propinsi Babel. Totap do anggo si Daniel i rumah bolon ai.

Tolu Halak Ibagas Pamurunan

3¹ Isuruh Raja Nebukadnesar ma na pauli sada gana-gana omas, gijangni onom puluh asta anjaha bolagni onom asta; ipajongjong ma ai i pamah Dura, na i Propinsi Babel.

² Dob ai isuruh Raja Nebukadnesar ma na patumpuhon raja-raja, wakil raja, kopala-kopala, puanglima, sijolom parduiton, panguhum, gamot-gamot ni ugama ampa sagala siparpangkat na bani ganup propinsi, ase roh bei hu pesta gana-gana, na pinajongjong ni Raja Nebukadnesar ai.

³ Jadi martumpu ma sagala raja-raja, wakil raja-raja, kopala-kopala, puanglima, sijolom parduiton, panguhum, gamot-gamot ni ugama ampa sagala siparpangkat na bani ganup propinsi, laho mamestahon gana-gana, na dob pinajongjong ni raja Nebukadnesar ai, jadi jongjong ma sidea i lobei ni gana-gana, pinajongjong ni si Nebukadnesar ai.

⁴ Jadi ipamaling sipartingting ai ma sorani maningtingkon: “Nasiam sagala bangsa, marga pakon siparsahap na marbagei-bagei, tangihon nasiam ma tingting on.

⁵ Anggo ibogei nasiam sora ni tarompit, tulila, husapi, arbap, sordam, gonrang ampa parugas musik na marbagei in, maningon manrogop do nasiam laho marsombah bani gana-gana omas in, na dob pinajongjong ni Raja Nebukadnesar.

⁶ Barang ise na so ra manrogop anjaha marsombah, maningon sampakononkon do ia hubagas pamurunan na gajag ai.”

⁷ Halani ai, dob ibogei sagala bangsa-bangsa ai sora ni tarompit, tulila, husapi, arbap ampa parugas musik na marbagei ai, jadi manrogop bei ma sagala bangsa, marga pakon siparsahap na marbagei-bagei ai, marsombah hubani gana-gana omas na dob pinajongjong ni Raja Nebukadnesar ai.

⁸ Bani panorang ai roh ma deba halak Kasdim mangaduhon halak Jahudi,

⁹ nini sidea ma dompak Raja Nebukadnesar, “Sai manggoluh ma ham tongtong rajanami.

¹⁰ Ale rajanami, domma iparentahkon ham, ase sagalajolma na mambogei sora ni tarompit, tulila, husapi, arbap, sordam, gonrang ampa parugas musik na marbagei in, maningon manrogop anjaha marsombah bani gana-gana omas in;

¹¹ barang ise na so ra manrogop anjaha marsombah, maningon sampakkononkon do bani pamurunan na gajag ai.

¹² Adong do nuan piga-piga halak Jahudi, na dob pinabangkitmu manrajai i Propinsi Babel, ai ma si Sadrak, si Mesak pakon si Abednego; ia dalahidalahi ai seng parduli sidea bani parentahmu ale rajanami, seng ra sidea manggalang bani sisombahonmu anjaha seng ra sidea marsombah bani gana-gana, na pinajongjong ai.

¹³ Jadi manggila anjaha manringis ma Nebukadnesar, anjaha iparentahkon ma na mamboan si Sadrak, si Mesak pakon si Abednego hu lobeini. Iboan sidea ma tongon na tolu halak ai hu lobei ni raja ai.

¹⁴ Nini si Nebukadnesar ma dompak sidea, “Ai tongon do, ale Sadrak, Mesak pakon ho ale Abednego, na so ra hanima manggalang bani naibatanku, anjaha na so ra hanima marsombah bani gana-gana omas na dob hupajongjong ai?

¹⁵ Ai pe anggo ibogei hanima holi sora ni tarompit, tulila, husapi, arbap, sordam, gonrang pakon parugas musik na marbagei in, manrogop anjaha marsombah ma hanima bani gana-gana na dob hupaturei ai; tapi anggo seng ra hanima marsombah, mintor do sampakkononkon hanima hubagas pamurunan na gajag ai; dob ai idahon ma tongon atap naibata ja do na boi paluahkon hanima humbagas tanganku.”

¹⁶ Jadi ibalosi si Sadrak, si Mesak pakon si Abednego ma raja ai, “Ale Raja Nebukadnesar, seng pala marbalos hanami bamu pasal ai.

¹⁷ Anggo marosuh Naibata, na binalosannami ai, boi do tarpaluahsi hanami humbagas pamurunan na gajag ai ampa humbani tanganmu, ale rajanami.

¹⁸ Tapi porini pe lang marosuh la, botoh ham ma, ale rajanami, na so ra do hanami manggalang bani naibatamu atap marsombah bani gana-gana omas, na dob pinajongjongmu ai.”

¹⁹ Jadi manggila tumang ma Raja Nebukadnesar, pala do mubah bohini mangidah si Sadrak, si Mesak pakon si Abednego. Ihatahon ma pamilason pamurunan ai pitu hali lompit humbani na somal.

²⁰ Ihatahon ma humbani piga-piga halak tentarani sigogohan manangkut si Sadrak, si Mesak pakon si Abednego, laho manampakkon sidea hubagas pamurunan na gajag ai.

²¹ Jadi isangkut ma na tolu halak ai marmantel, marsaluar, martangkuluk, sirsir marpakeian tene, lanjar isampakkon ma sidea hubagas pamurunan na gajag ai.

²² Halani koras ni parentah ni raja ai ampa milas ni pamurunan ai, jadi ibunuh gara ni pamurunan ai ma dalahi-dalahi ai, na manampeihon si Sadrak, si Mesak ampa si Abednego hu atasni ai.

²³ Ia sitolu halak ai, si Sadrak, si Mesak pakon si Abednego, sangkut do madabuh hubagas pamurunan na gajag ai.

²⁴ Jadi tarsonggot ma uhur ni Raja Nebukadnesar, tarolos ma ia jongjong, anjaha nini ma dompak juakjuakni, “Ai lang tolu halak do tarsangkut isampakkon hita hubagas apuy ai?” nini sidea ma mambalosi raja ai, “Sonai do tongon, ale rajanami!”

²⁵ Balosni, “Tapi tonggor ma, ompat halak do huidah, lang tarsangkut, mardalan-dalan ibagas apuy ai, anjaha seng mahua sidea; rupa ni na paompatkon ai usih do hubani anak ni naibata.”

²⁶ Idohori si Nebukadnesar ma labah ni pamurunan na gajag ai, anjaha nini ma, “Ale Sadrak, Mesak pakon ho ale Abednego, juakjuak ni Naibata Na Tang Sitimbulan in, mandarat ma nasiam, roh ma hujon!” Jadi mandarat ma si Sadrak, si Mesak pakon si Abednego humbagas apuy ai.

²⁷ Jadi martumpu ma raja-raja, wakil raja, kopala-kopala ampa sipanuturi ni raja ai, gabe ididah sidea

ma, na so margogoh apuy ai mangkahua angkula ni dalahi-dalahi ai; seng mosog jambulan na bani ulu ni sidea, seng mahua mantel ni sidea, anjaha bau ni apuy pe seng dong taranggoh bani sidea.

²⁸ Jadi nini si Nebukadnesar ma, “Na puji ma Naibata ni si Sadrak, si Mesak pakon si Abednego, na marsuruh malekat-Ni laho paluahkon juakjuak-Ni, na martenger ni uhur Bani, na pag manjua parentah ni raja, na pag mangajamkon dirini, asal ma ulang mambalosi atap marsombah bani naibata na legan sobali Naibatani.

²⁹ Halani ai huparentahkon ma, barang ise humbani bangsa, marga, parsahap na marbagei-bagei in, na mangkatahon risa-risa dompak Naibata ni si Sadrak, si Mesak pakon si Abednego maningon toktokan do ai anjaha parreongon rumahni; ai seng dong Naibata, na boi paluahkon songon-Si ai.”

³⁰ Jadi naik pangkat ma si Sadrak, si Mesak pakon si Abednego i Propinsi Babel ibahen raja ai.

Nipi ni si Nebukadnesar Patugahkon Pardabuhni

4 ¹ Humbani Raja Nebukadnesar hubani sagala bangsa, halak parsahap na marbagei-bagei in i sab dunia on. “Lambin tambah ma damei bani nasiam ganupan!

² Tanda pakon halongangan na binahen ni Naibata Na Timbul in hu bangku, ipindo uhurhu do sihol patugahonku bani nasiam.

³ Banggal ni ai tanda binahen-Ni ai, jombut ni ai halongangan na pinamasa-Ni ai! Harajaon sisadokah ni dokahni do harajaon-Ni, anjaha marsundut-sundut do panrajaion-Ni.

⁴ Ahu, Nebukadnesar, marsonang-sonang do ibagas rumahku, anjaha mardohar ibagas rumah bolonku.

⁵ Jadi dong ma nipingku, na mambahen tarsonggot ahu; sanggah na tibal ahu i podomanku, gobir do ahu ibahen pingkiran ampa panonggoran na roh hu bangku.

⁶ Dob ai huparentahkon ma ase iboan hu lobeihu sagala halak na pentar na adong i nagori Babel, ase ipatugah sidea hu bangku arti ni nipi ai.

⁷ Jadi roh ma halak na pentar-pentar, sipartondung, halak Kasdim ampa sibotoh parhalaan, hupajojor ma bani sidea nipingku, tapi seng tarpatugah sidea bangku arti ni ai.

⁸ Parpudi roh ma si Daniel hu bangku ai ma na margoran si Beltsasar mangihutkon goran ni naibatanku, anjaha ibagas dirini do tonduy ni naibata-naibata na pansing in, gabe hupajojor ma nipi ai bani, ningku ma,

⁹ 'Ale Beltsasar, kopala ni halak na pentar-pentar, hubotoh do, marianan do ibagas ho tonduy ni naibata-naibata na pansing in, anjaha seng onggajut uhurmu pasal rusia; on do panonggoran na huidah ai ibagas nipingku, sai patugah ma artini ai.

¹⁰ Ia panonggoran na huidah sanggah tibal ahu bani podomanku, ai ma: Mangkawah ma ahu, anjaha tonggor ma, sada hayu jongjong i parsitongahan ni tanoh on, anjaha gijang tumang do ai.

¹¹ Lambin banggal ma hayu ai anjaha lambin toguh, ujungni das hu langit, anjaha taridah do ai hun tampakan ni ganup tanoh on.

¹² Jenges do bulungni, anjaha buahni ramos, boi mambere sipanganon bani haganup. Dapotan parlinggoman do sagala binatang na i talun i toruhni, anjaha marasar manuk-manuk na i awang-awang bani dangkahni, anjaha sagala na manggoluh mangan hunjai.

¹³ Huidah do sanggah na marpanonggoran ai ahu i podomanku, sada siparjaga, sada halak na mapansing susur hun nagori atas.

¹⁴ Marsora na maling do ia mangkatahon, Roboh ma hayu in anjaha tagili dangkahni, rurus ma bulungni anjaha erap ma sagala buahni! Bahen ma maporus sagala binatang hun toruhni ampa manuk-manuk ai hun dangkah-dangkahni.

¹⁵ Tapi anggo tutuho ni uratni ai paturut ma ibagas tanoh, irantei bani bosi pakon tombaga, i tongah-tongah ni poyon-poyon na i sampalan. Paturut ma ai marudan marmilas ni ari, mangan poyon-poyon songon binatang na i sampalan.

¹⁶ Buaton do humbani uhur jolma, anjaha bereon bani uhur binatang, paima salpu bani pitu panorang.

¹⁷ Ia uhum on humbani riah ni siparjaga ai do, anjaha haputusan on marhitei hata ni na pansing ai, ase ibotoh sagala na manggoluh, paboa Na Tang Sitimbulan ai do sirajai sagala harajaon ni jolma manisia. Ibere do ai bani ise harosuh ni uhur-Ni, anjaha ipabangkit do hujai halak sisombuhan humbani jolma.”

¹⁸ Ai ma nipi na huidah, ahu, Raja Nebukadnesar. Ai pe ale Beltsasar, patugah ma arti ni ai bangku, halani haganup halak na pentar, na adong ibagas harajaonku, seng tarpatorang sidea ai hu bangku, tapi anggo ho boi do, ai Tonduy ni naibata-naibata na pansing ai do marianan bam.”

¹⁹ Jadi hundokah do tarsonggot si Daniel, na margoran si Beltsasar ai, pingkiranni do mambahen mabiar ia. Nini raja ai ma, “Ale Beltsasar, ulang ma pala mabiar ho pasal nipi ai pakon artini.” Nini si Beltsasar ma mambalosi, “Ham tuannami, sai mangonai bani munsumu ma nipi ai, sonai homa artini ai bani imbangmu!

²⁰ Ia hayu nididahmu ai, na lambin banggal anjaha na lambin toguh ai, na sundol hu langit anjaha taridah ronsi hun ujung ni tanoh on,

²¹ na jenges mardangkahi, ramos buahni, sibere sipanganon bani haganup, parlinggoman ni

binatang na i talun, anjaha dangkahni parsaranan ni manuk-manuk na i awang-awang,

²² ham do hayu ai, ale rajanami. Lambin banggalni do ham anjaha lambin margogoh; lambin ganda do kuasamu, sundol hu langit, anjaha gongomanmu das ronsi tampakan ni tanoh on.

²³ Ia na nididah ni raja in, ai ma siparjaga, halak na mapansing ai, na susur hun nagori atas, na mangkatahon, 'Roboh ma hayu in anjaha parseda ma ai, tapi anggo tutuhoni paturut ma ibagas tanoh, irantei bani bosi pakon tombaga itongah-tongah ni poyon-poyon ni sampalan in; anjaha paturut ma ai marudan marmilas ni ari, marulah songon binatang na i talun, paima salpu bani pitu panorang.'

²⁴ On do arti ni ai ale rajanami: Haputusan ni Na Tang Sitimbulan ai do na mangonai bani tuannami, raja in.

²⁵ Usiron ma ham hun tongah-tongah ni jolma, anjaha rap marianan ma ham pakon binatang na i talun; mangan poyon ma ham songon lombu, anjaha marudan marmilas ni ari. Pitu panorang do silopusanmu, paima ibotoh ham, paboa Na Tang Sitimbulan ai do sigomgom harajaon ni jolma manisia, anjaha ibere do ai hu bani halak harosuh ni uhur-Ni.

²⁶ Anjaha pasal na hinatahon ni ai, paturuton do tutuho ni urat ni hayu ai, arti ni ai: Maningon

totap do use harajaon ai bamu, dob iparhatongon uhurmu, paboa nagori atas do sipanrajai.

²⁷ Halani ai, ale rajanami, sai ra ma ham manjalo sipaingatku; paholang ham ma dirimu humbani dousamu marhitei na mangkorjahon hapintoron, sonai homa humbani hajahatonmu marhitei na maridop ni uhur bani halak na masombuh, andohar boi lambin dokahni mardohar ham.”

²⁸ Haganupan ai mangonai do bani Raja Nebukadnesar.

²⁹ Dob salpu sepuluh dua bulan, mardalan-dalan do raja ai bani tayub ni rumah bolon na i huta Babel,

³⁰ anjaha nini raja ai ma, “Ai lang on do huta Babel na banggal in, na dob hupadear bahen pematang ni harajaonku marhitei kuasanku na banggal in, bahen hamuliaon ni hasangaponku?”

³¹ Sanggah na sinahapkon ni raja ai ope hata ai, roh ma sada sora hun nagori atas, “On do tugah-tugah bam, ale Raja Nebukadnesar: Mosor ma harajaon in hun bamu.

³² Iusir ma ho hun tongah-tongah nijolma, rap saianan ma ho pakon binatang na i talun; mangan poyon-poyon ma ho songon lembu; pitu panorang do lopusanmu, paima iparhatongon uhurmu, paboa Na Tang Sitimbulan ai do sipanggomgom bani harajaon nijolma manisia, anjaha iberehon do ai bani halak harosuh ni uhur-Ni.”

³³ Mintor bani panorang ai do saud hata ai bani si Nebukadnesar. Iusir halak ma ia hun tongah-tongah ni jolma, anjaha mangan poyon-poyon ma ia songon lombu; marudan marmilas ni ari ma ia, ronsi na marganjang jambulanni songon ambulu ni manuk-manuk nanggordaha, anjaha sisilonni gabe songon sisilon ni manuk-manuk ganjangni.

³⁴ Bani ujung ni panorang ai mangkawah ma ahu, Nebukadnesar, dompak babou, gabe mulak ma ahu maruhur. Hupasangap ma Na Tang Sitimbulan ai, hupuji anjaha hupatunggung ma la na manggoluh sadokah ni dokahni; ai ronsi sadokah ni dokahni do panggomgomion-Ni anjaha harajaon-Ni marsundut-sundut.

³⁵ Haganup pangisi ni tanoh on doskon na lang do hiraon; domu hubani rosuh-Ni do ibahen bani bala na i nagori atas ampa bani pangisi ni tanoh on; sahalak pe seng dong na mangasup manulak tangan-Ni atap na mangkatahon Bani, “Aha dong na binahen-Mu in?”

³⁶ Bani panorang ai mulak maruhur ma ahu, anjaha mulak ma homa hu bangku hasangapon ni harajaonku, hatunggungonku ampa hamuliaonku. Ipindah i juakjuakku ampa na sangap-sangap ma ahu, ipabangkit ma use ahu i harajaonku, anjaha itambahi ope habanggalonku.

³⁷ Halani ai, ahu Nebukadnesar, mamuji anjaha pasangapkon anjaha patimbulhon Raja na i nagori

atas ai; ai sintong do sagala pambahenan-Ni anjaha pintor sagala dalan-Ni, anjaha margogoh do la patoruhkon sigijang maruhur.”

Surat Tangan bani Tembok na Patugahkon Pardabuh ni si Beltsasar

5¹ Ibahen Raja Beltsasar ma pesta mangan-mangan bani saribu halak na sangap-sangap, anjaha minum-minum anggur ma ia rap pakon sisaribu halak ai.

² Sanggah na mabuk ai si Beltsasar ibahen anggur ai, ihatahon ma alopon panginuman omas pakon pirak, na binoan ni bapa ni si Nebukadnesar hun rumah panumbahan na i Jerusalem, ase minum hunjai raja ai ampa na sangap-sangap ai, puangbolon ampa nasipuang.

³ Jadi ialop sidea ma panginuman omas ampa pirak ai, na ibuat hinan hun rumah panumbahan na i Jerusalem, gabe minum ma hunjai raja ai ampa na sangap-sangap, puangbolon ampa nasipuang.

⁴ Sanggah na minum anggur ai sidea, ipapuji-puji sidea ma naibata-naibata omas, pirak, tombaga, bosu, hayu, pakon batu.

⁵ Lanjar bani na satongkin ai taridah ma jari-jari ni tangan ni jolma manurat bani tembok na hinapur, tontang parsuluhan banggal ai, ibagas rumah bolon ai; ididah raja ai do tangan na manurat ai.

⁶Jadi marposi ma bohi ni raja ai, anjaha gobir ipambibiari uhurni; galek ma binongeini anjaha hitir-hitir towodni.

⁷Ipamaling raja ai ma sorani mangkatahon ase ialop na pentar-pentar, halak Kasdim ampa sipartondung. Nini raja ai ma hubani halak na pentar-pentar na i Babel ai, “Barang ise na mambotoh mambasa surat on pakon patugahkon artini ai hu bangku, marbaju saholat ma ia bahenon, marsinongkok omas bani borgokni anjaha gabe raja paitolu ibagas harajaonku.”

⁸Jadi roh ma haganup halak na pentar-pentar ai bani raja ai, tapi seng tarbasa sidea surat ai, atap tarpatugah sidea arti ni ai hubani raja ai.

⁹Gobir tumang ma raja ai, anjaha marposi bohini; bajoraon do homa na sangap-sangap ai.

¹⁰Masuk ma inang ni raja ai hu kamar parpestaan ai halani parsahapan ni raja ai pakon na sangap-sangap ai, nini ma, “Dokah ma manggoluh raja in! Ulang ma ipambibiari uhurmu ham anjaha ulang ma marposi bohimu.

¹¹Adong do ibagas harajaonmu sada halak na niianan ni tonduy ni naibata-naibata na pansing ai. Sanggah panorang ni bapamu jumpah do bani haliharon, habotohon ampa hauhuron, songon na adong bani naibata-naibata, gabe ipabangkit Raja Nebukadnesar, bapamu ondi do ia gabe kopala ni

halak na pentar-pentar, sipartondung, halak Kasdim
ampa sibotoh parhalaan,

¹² halani na jumpah ai bani tonduy na tarsulur,
habotohon ampa hapantason laho manjujur nipi,
laho patorangkon hutinta ampa pajoreihon na
rundut, ai ma si Daniel, na ginoran ni raja ondi si
Beltsasar. Ai pe dear ma idilo si Daniel, ase ipatugah
arti ni ai.”

¹³ Jadi iboan ma si Daniel hu lobei ni raja ai. Nini
raja ai ma dompak si Daniel, “Atene, ho do si
Daniel, sada humbani halak Jahudi na tarbuang ai,
na binoan ni bapa ondi hun Juda?

¹⁴ Hubogei do pasal ho, ai ma na niianan ni
Tonduy ni naibata-naibata na pansing ai do ho,
anjaha jumpah do bam haliharon, habotohon ampa
hapentaran na tarsulur.

¹⁵ Domma iboan hu lobeihu halak na pentar-pentar
ampa sipartondung, laho mambasa surat ai ampa
laho patugahkon bangku pasal arti ni ai, tapi seng
tarpatugah sidea arti ni ai.

¹⁶ Tapi hubogei do boi do ho mambere panorangion
ampa pajoreihon na rundut. Ai pe anggo tarbasa
ho do surat in anjaha tarpatorang ho arti ni ai hu
bangku, marbaju saholat ma ho bahenonku, anjaha
marsinongkok omas bani borgokmu, anjaha gabe
raja paitolu ma ho bahenonku ibagas harajaonku.”

¹⁷ Jadi nini si Daniel ma mambalosi raja ai, “Soh
bamu ma sibere-bere ai, anjaha bani halak na legan

ma bere ham pamuji-mujianmu ai; hubasa pe surat ai bani raja in, anjaha artini ai hupatorang pe bamu.

¹⁸ Ham rajanami, ibere Naibata Sitimbulan ai do bani bapamu si Nebukadnesar harajaon, habanggalon, hasangapon ampa hatunggungan.

¹⁹ Anjaha halani kuasa na binere ai bani, hitir anjaha mabiar do sagala bangsa ampa halak siparsahap na marbagei-bagei ai i lobeini, ai saguru bani uhurni do mamunuh jolma atap pagoluhkon, patimbulhon jolma atap mandabuhkon.

²⁰ Tapi dob na ipagijang ai dirini, mangenjeng anjaha hengkenng uhurni, ipaturun ma ia humbani paratasni, anjaha hona buat humbani hasangaponni ai.

²¹ Hona usir do ia hun tongah-tongah ni jolma manisia, anjaha gabe maruhur songon binatang do ia, anjaha saianan do ia pakon halode harangan. Mangan poyon-poyon do ia songon lombu, marudan marmilas ni ari, paima iparhatongon uhurni, paboa Naibata Na Tang Sitimbulan ai do sigomgom harajaon ni jolma manisia, anjaha ipabangkit sipanrajai atap ise harosuh ni uhur-Ni.

²² Tapi ham, ale Beltsasar, anakni, seng ra ham patoruhkon uhurmu, age pe ibotoh ham haganupan ai,

²³ tapi tene lambin ipagijang ham do dirimu mangimbang Tuhan ni nagori atas. Tarboan do hu lobeimu parugas na hun Rumah-Ni ai,

anjaha minum anggur do hunjai ham, halak na sangap-sangap, jolmamu ampa binuatmu na legan. Ipapuji-puji ham do naibata-naibata pirak, omas, tombaga, bosi, hayu pakon batu, na so marpangidah, marpanangar, atap marpambotoh, tapi anggo Naibata simada hosahmu anjaha siatur sagala dalanmu, seng ipasangap ham.

²⁴ Ia do na manongos tangan ondi ampa na manuratkon surat ai.

²⁵ Anjaha on do surat na tarsurat ijai, ‘Mene, Mene, Tekel, Uparsin.’

²⁶ On do arti ni hata ai, Mene: Domma ibilang Naibata panorang ni harajaonmu anjaha domma itontuhon ujungni ai.

²⁷ Tekel: Domma itimbang ham ibagas timbangan, tapi mahampungtu do ham dapot.

²⁸ Peres: Domma ibagi harajaonmu anjaha iberehon hubani halak Madai pakon Persia.”

²⁹ Dob ai iparentahkon si Beltsasar ma, ase isorungkon baju saholat bani si Daniel, isinongkokkon sinongkok omas bani borgokni, anjaha itingtingkon ia ma raja paitolu ibagas harajaonni.

³⁰ Lanjar bani bornginni ai do matei tarbunuh si Beltsasar, raja ni halak Kasdim ai.

³¹ (6-1) Anjaha si Darius, halak Madai, ai ma gabe raja, sanggah na marumur ia onom puluh dua tahun.

Si Daniel Ibagas Liang ni Singa

6¹ (6-2) Ihadeathon si Darius do mangangkat saratus dua puluh gubernur, ai ma na pinabangkitni bani haganup harajaon ai,

² (6-3) anjaha na mangopalai ai tolu menteri do, si Daniel ma sada hunjai; bani sidea ma mambere partanggungjawaban gubernur ai, ase ulang maborattu urusan ni raja ai.

³ (6-4) Tapi atasan do si Daniel marimbang menteri ampa gubernur ai, ai adong do bani tonduy na tarsulur; jadi isurahon raja ai ma pabangkitkoni gabe haondosan ni ganup harajaon ai.

⁴ (6-5) Jadi ipindahni menteri ampa gubernur ai ma dalan laho mangaduhon si Daniel pasal na mardomu hubani harajaon ai; tapi seng adong jumpah sidea dalan laho mangaduhoni atap hasalahan aha pe; ai bujur do ia, anjaha seng dong jumpah bani halepakon atap na salah pe.

⁵ (6-6) Jadi nini halak ai ma, “Seng anjai jumpah hita dalan laho mangaduhon si Daniel, anggo seng dapot hita ai humbani na marpardomuan bani titah ni Naibatani.”

⁶ (6-7) Jadi sariah ma roh menteri ampa gubernur ai bani raja ai, nini sidea ma, “Ham Raja Darius, sai manggoluh ma ham lalab!

⁷ (6-8) Haganup menteri bani harajaon in, na sangap-sangap, gubernur, sipanuturi ampa

puanglima domma mambahen haputusan, ase ibahen raja in paraturan ampa undang-undang, ase anggo adong halak na mambahen pangaduanni hubani naibata atap jolma ja pe, ibagas tolu puluh ari on, sobali hu bamu, ale rajanami, maningon timpalhononkon do ai hubagas liang ni singa.

⁸ (6-9) Halani ai ale rajanami, bahen ham ma paraturan anjaha totapkon ham ma surat, anjaha ulang mubah be ai domu hu bani undang-undang ni halak Madai pakon Persia.”

⁹ (6-10) Jadi itotapkon Raja Darius ma paraturan ampa surat ai.

¹⁰ (6-11) Ia si Daniel, dob ibogei pasal paraturan na dob tinotapkon ai, laho ma ia hu rumahni; adong do bani kamar pardatas ni rumahni, jandelani buha dompak Jerusalem; manrogop ma ia ijai tolu hali sadari, laho martonggo ampa mangkatahon tarima kasih bani Naibata, songon na somal ibahen na saindokah.

¹¹ (6-12) Jadi roh ma halak ai sariah hu rumah ni si Daniel, gabe dapot sidea ma ia martonggo anjaha marsombah i lobei ni Naibata.

¹² (6-13) Dob ai roh ma sidea hu lobei ni raja ai, anjaha isahapkon sidea ma hubani pasal paraturan ondi, nini sidea ma, “Ale rajanami, ai lang domma itotapkon ham sada paraturan, paboa anggo adong atap ise na mambahen pangindoanni ibagas sitolu puluh ari on hu bani naibata atap jolma ja pe sobali

hu bamu, ale rajanami, ai lang timpalhononkon do ai hubagas liang ni singa?" Nini raja ai ma mambalosi, "Totap do hata ai romban hubani undang-undang ni halak Madai pakon Persia, na so malo ubahon."

¹³ (6-14) Jadi nini sidea ma i lobei ni raja ai, "Ia si Daniel, ai ma sada halak humbani halak Jahudi na tarbuang ai, seng parduli ia bamu ale rajanami age bani surat larangan na dob tinotapkonmu ai; sai martonggo do tong ia tolu hali sadari."

¹⁴ (6-15) Dob ibogei raja ai pasal ai, pusok ma uhurni, anjaha ipingkiri ma dalan laho paluahkon si Daniel; marpala-pala do ia ronsi sundut mata ni ari mangindahi dalan laho paluahkonsi.

¹⁵ (6-16) Jadi sariah ma halak ai roh bani raja ai, nini ma hu bani, "Botoh ham ma, ale rajanami, on do undang-undang bani halak Madai pakon Persia, paboa anggo paraturan atap larangan, na dob pinatotap ni raja, seng malo be paubahon ai."

¹⁶ (6-17) Jadi ipadalan raja ai ma parentah, iboan ma si Daniel anjaha itimpalhon hubagas liang ni singa. Ihatahon raja ai do bani si Daniel, "Naibatamu, na binalosanmu tongtong, Ia ma paluahkon ho!"

¹⁷ (6-18) Ambahni ai iboan halak ma sada batu anjaha ipajongjong ma ai bani labah ni liang ai, anjaha isap raja ai ma ai bani tintin sapni ampa

marhitei tintin sap ni na sangap-sangap ai, ase ulang adong be atap aha marubah pasal si Daniel.

¹⁸ (6-19) Mulak ma raja ai hu rumahni, anjaha marpuasa do ia layur sabornginni ai; seng ipalopas roh hubani halak sibahen halilian, lanjar do seng tarpodom matani.

¹⁹ (6-20) Jadi girah sogod patar ni ai, puho ma raja ai, anjaha tarolos ma ia laho hu liang ni singa ai.

²⁰ (6-21) Dob roh ia hundohor bani liang ai, dilo-dilo ma ia marhasoman sora na marhoru hubani si Daniel, nini ma hu bani, "Ale Daniel, juakjuak ni Naibata na manggoluh in, ai maluah do ho ibahen Naibata, na binalosanmu tongtong, humbani singa in?"

²¹ (6-22) Dob ai nini si Daniel ma mambalosi raja ai, "Sai manggoluh ma ham lalab, ale rajanami!

²² (6-23) Isuruh Naibatanku do malekat-Ni mangkuntam babah ni singa on, gabe seng ikahua sidea ahu, ai seng marsalah ahu i lobei-Ni, anjaha i lobeimu pe, ale rajanami, seng dong hubahen na salah."

²³ (6-24) Jadi malas tumang ma uhur ni raja ai, gabe iparentahkon ma na padaratkon si Daniel humbagas liang ai. Ipadarat ma tongon si Daniel humbagas liang ai, anjaha aha pe seng dong na mahua jumpah bani, halani hatengeran ia bani Naibata.

²⁴ (6-25) Ipadalan raja ai ma parentah, jadi ialop ma haganup halak na mangaduhon si Daniel ai,

anjaha itimpalhon ma hubagas liang ni singa ai, sidea, niombah ni sidea ampa jolma ni sidea. Lape das sidea bani dasor ni liang ai, domma itangkap singa ai sidea anjaha iparripuk holiholini.

²⁵ (6-26) Dob ai manongos surat ma raja Darius bani haganup bangsa ampa halak parsahap na marbagei-bagei ai, na marianan i sab tanoh ai, “Sai lambin martambah ma damei bani nasiam!

²⁶ (6-27) Huparentahkon ma bani nasiam, ase bani haganup gomgomanku gobir anjaha marhabiaran halak i lobei ni Naibata ni si Daniel, ai la do Naibata na manggoluh, na manongtong ronsi sadokah ni dokahni. Harajaon-Ni pe seng anjai maseda ai, anjaha panggomgomion-Ni seng dong ujungni.

²⁷ (6-28) Ia do na paluahkon pakon na mangurupi, ibahen do tanda ampa halongangan, i nagori atas pakon i tanoh on. Ia do na paluahkon si Daniel humbani kuasa ni singa.”

²⁸ (6-29) Jadi lambin mardohar ma si Daniel sadokah panrajaion ni si Darius ampa sadokah panrajaion ni si Kores, halak Persia ai.

Pangungkabon bani si Daniel Pasal Binatang na Ompat ai ampa Pasal Anak ni Jolma in

7 ¹ Bani tahun parlobei dob gabe raja si Beltsasar, raja ni Babel ai, marnipi ma si Daniel anjaha marpanonggoran bani Podomanni. Jadi isuratkon ma nipi ai, anjaha ipatugah pasal rimpunni.

² Nini si Daniel ma, “Huidah do ibagas panonggoranku borngin-borngin, tonggor ma, lutu do laut bolag ai ibahen logou ni langit na ompat in.

³ Anjaha luar ma ompat binatang hun laut ai, palegan-legan bei do rupani.

⁴ Na parlobei songon singa anjaha marhabong do songon manuk-manuk nanggordaha. Hukawahkon ma ai, hona putputan ma habongni, tarangkat ma ai hun tanoh, anjaha ipajongjong bani dua naheini songonjolma; anjaha ibere do hubani uhurjolma.

⁵ Anjaha tonggor ma, binatang na legan, na paduahon, usih songon gipul, hundul bani naheipudini do ia, anjaha adong do tolu rusuk ibagas babahni, i holangkolang ni iponni. Iparentahkon ma hu bani, ‘Bingkat ma, pampangani ma buei daging!’

⁶ Dob ai mangkawah ma ahu, tonggor ma binatang na legan, usih songon begu; adong do ompat habong ni manuk-manuk bani gurungni, anjaha ompat do ulu ni binatang ai, anjaha ibere do kuasa bani.

⁷ Dob ai huidah ma bani panonggoran bornginni ai, tonggor ma, binatang na paompatkon, bajan anjaha majangin anjaha gogoh tumang; adong do bani ipon bosi na banggal, mambonduti anjaha manropropi do ia, anjaha na tading ai iluntak do

bani naheini. Legan do ai humbani binatang na parlobei ai, anjaha sapuluh do tandukni.

⁸Hupardiatei ma tanduk ai, anjaha tonggor ma, tubuh ma tanduk na legan, na etek-etek i holangkolang ni ai; gabe mumpat ma i lobeini tolu tanduk humbani na parlobei ai, anjaha tonggor ma, adong do bani tanduk ai songon mata ni jolma ampa babah na mansahapkon pangenjengon.

⁹Mangkawah ma ahu, gabe ipajongjong ma paratas, anjaha hundul ma hujai sada Na Adong Hun Bani Sapari; pakeian-Ni lopak do songon salju, anjaha jambulan bani ulu-Ni putih do songon ambulu ni biribiri; paratas-Ni apuy na marjimbur-jimbur, anjaha galapangni apuy na gajag.

¹⁰Luar do sada bah apuy, marharorohan hun lobei-Ni. Marribu-ribu do na marugas i lobei-Ni, anjaha marlaksa-laksa jongjong i lobei-Ni. Ipungkah ma paruhuman anjaha ibuka ma sagala buku.

¹¹Jadi mangkawah ma ahu halani hata pangenjengon na hinatahon ni tanduk ai. Anjaha huidah ma hona bunuh binatang ai, iboiskon bangkeini anjaha iondoskon ase itutungi bani apuy.

¹²Ia binatang na legan ai, ibuat ma kuasani, anjaha ibuhul panorang ampa jam ni goluh ni sidea.

¹³Huidah do bani pangungkabon borngin ai, tonggor ma, marhitei hambun ni langit roh do sada na songon anak ni jolma, das do ia hubani

Na Adong Hun Bani Sapari, anjaha iboan do ia hu lobei-Ni.

¹⁴ Ibere ma hubani kuasa, hasangapon ampa harajaon, ase ia ma sibalosan ni sagala bangsa ampa halak siparsahap na marbagei-bagei in; sisadokah ni dokahni do kuasani, seng ra salpu ai, anjaha harajaonni, na so ra seda do ai.

¹⁵ Ia ahu, si Daniel, rusak do uhurhu ibagas, anjaha songgotan halani pangungkabon na huidah ai.

¹⁶ Hudohori ma sada halak na jongjong ijai, anjaha husungkun ma ia pasal arti ni haganupan ai. Jadi marsahap ma ia hu bangku, anjaha ipatugah ma bangku artini ai, nini ma,

¹⁷ 'Ia binatang banggal na ompat ai, ompat harajaon do ai, na sihol jongjong i tanoh on.

¹⁸ Tapi halak Na Mapansing ni Sitimbulan ai do sijalo harajaon ai, anjaha sidea do simada ai tongtong ronsi sadokah ni dokahni.'

¹⁹ Dob ai ipindo uhurhu do sihol mambotoh hasintongan pasal binatang na paompatkon ai, na lain humbani na legan ai, majangin tumang, maripon bosi ampa marsisilon tombaga, na mamonduti anjaha na manropropi anjaha na manluntak-luntak na tading ai bani naheini.

²⁰ Sonai homa pasal tanduk na sepuluh ai, na i atas uluni ai, ampa tanduk na legan, na dob tubuh ai, na mambahen mumpat tolu tanduk ai i lobeini; ai ma tanduk na marmata ai ampa na marbabah, na

mansahapkon pangenjengon, na banggalan idahon humbani na legan ai.

²¹ Huidah do tanduk ai mangadongkon porang dompak halak na pansing ai, anjaha italuhon do sidea,

²² paima roh la Na Adong Hun Bani Sapari, laho mandalankon uhum mangkopkop halak na mapansing ni Sitimbulan ai, anjaha das ma panorangni jaloan ni halak na mapansing ai harajaon ai.

²³ Nini ma mambalosi, 'Arti ni binatang na paompatkon ai, ai ma, sihol roh do harajaon na paompatkon i tanoh on, na lain humbani haganup harajaon na legan ai, anjaha bondutonni do haganup tanoh on, luntakonni do ai, anjaha ropukonni.

²⁴ Arti ni tanduk na sapuluh ai: Humbani harajaon ai timbul do sapuluh raja, anjaha na legan do use jongjong i pudi ni sidea; legan do ia humbani na parlobei ai, anjaha madabuh do bahenonni tolu raja.

²⁵ Hatahononni do hata risa-risa dompak Sitimbulan in, anjaha arsik-arsikkononni do halak na mapansing ni Sitimbulan in, anjaha sihol do ubahonni panorang ni pesta ampa titah ai; anjaha ondskononkon do sidea hubagas tanganni sada panorang, dua panorang ampa satongah panorang.

²⁶ Tapi padalanon ma paruhuman anjaha ibuat ma kuasani ai hun bani, imasabkon anjaha iparseda ma ai tongon.

²⁷ Ia harajaon ai ampa panggomgomion ai ampa kuasa ni harajaon-harajaon na i toruh ni langit in, ondskononkon do ai bani bangsa ni halak na mapansing ni Sitimbulan in, harajaon sisadokah ni dokahni do harajaon ni sidea ai, anjaha sagala kuasa maningon tunduk anjaha pambalosi do bani sidea.’

²⁸ Sibar sonai ma parsahapan ai. Ia ahu, si Daniel, rusak do ahu ibahen pingkiranku, anjaha marposi do bohingku; tapi huparimbagaskon do na masa ai.”

Pangungkabon Pasal Biribiri Tunggal, Hambing Tunggal ampa Tandukni ai

8 ¹ Patolu-tahunkon dob raja si Beltsasar, taridah ma bangku, si Daniel, sada pangungkabon ipudi ni pangungkabon na parlobei ondi.

² Jadi huidah ma ibagas pangungkabon ai (Ia ahu, sanggah na huidah ai, i huta pamatang Susan do, na i nagori Elam, i topi ni Bah Ulai),

³ mangkawah ma ahu, tonggor ma, huidah ma sada biribiri tunggal jongjong i topi ni bah ai, dua do tandukni; gijang do haduasi tanduk ai, tapi gijangan do na sada marimbang na sada nari, anjaha parpudi do sigijangan ai tubuh.

⁴ Huidah do biribiri tunggal ai mandugu dompak hasundutan, dompak utara pakon dangsina; seng

dong binatang na tahan jongjong i lobeini, anjaha seng dong na boi paluahkon humbani kuasani; uhur-uhurni do ibahen, anjaha ipabanggal do dirini.

⁵ Sanggah na hupardiatei ai, tonggor ma, roh ma sada hambing tunggal hun hasundutan mamontas sab tanoh on, seng pala dais naheini hu tanoh; adong do tanduk na matunggung i holangkolang ni mata ni hambing tunggal ai.

⁶ Das ma ia bani biribiri tunggal sidua tanduk ai, na huidah jongjong i topi ni bah ai, jadi idorab ma ai marbois gogoh.

⁷ Huidah ma ia roh mandohori biribiri tunggal ai, marah do ia hu bani, gabe itanduk ma biribiri tunggal ai anjaha iropukkon tandukni na dua ai; seng margogoh biribiri tunggal ai mangimbangi; itompaskon ma ia hu tanoh, anjaha ilotloti; anjaha sada pe lang na boi paluahkon biribiri tunggal ai humbani kuasani.

⁸ Jadi lambin timbul ma hambing tunggal ai, tapi dob markuasa tumang ia, ponggol ma tandukni na banggal ai, anjaha gantih ni ai tubuh ma use ompat tanduk na matunggung dampak deisa na ompat ai.

⁹ Jadi humbani sada tanduk ondi tubuh do sada tanduk na etek, na podas tumang marbanggal dampak dangsina, dampak hapoltakan ampa dampak tanoh na majenges ai.

¹⁰ Lambin timbul do ai, pala do das hu bala na i langit, deba humbani bala ai ampa bintang-bintang

ai isampakkon do hu tanoh, anjaha idogei-dogei ma sidea.

¹¹ Ipatimbul do dirini, pala das hu bani Kopala ni bala ai; ibuat do hun Bani galangan ari-ari ai, anjaha iparreong do ianan-Ni na mapansing ai.

¹² Gantih ni galangan ari-ari ai igalangkon do galangan hagigian; isampakkon do hasintongan hu tanoh, anjaha manjadi do sagala horja ni tanduk ai.

¹³ Dob ai hubogei ma marsahap sada halak na pansing, anjaha nini sada halak na pansing na legan ma dompak na dob marsahap ai, “Sadiha dokah on do pangungkabon pasal galangan ari-ari ai, pasal panlanggaron na parsedahon ai, ampa dokah ni ianan na mapansing ai iondoskon gabe silotlotan?”

¹⁴ Jadi nini ma mambalosi, “Ai ma dua ribu tolu ratus ari; dob salpu pe ai ase mulak suang ianan na mapansing ai.”

¹⁵ Sanggah ahu, si Daniel, mangidah pangungkabon ai anjaha sihol uhurhu mangarusi ai, tonggor ma, jongjong ma i lobeihu sada songon dalahi rupani.

¹⁶ Anjaha hubogei ma sora ni jolma hun dipar ni Bah Ulai ai, na dilo-dilo mangkatahon, “Ale Gabriel, pajojor ma arti ni pangungkabon ai bani halak in!”

¹⁷ Jadi roh ma ia jongjong hu lambungku; sanggah na roh ia tarhirjat ma ahu lanjar manrogop hu tanoh. Tapi nini ma dompak ahu, “Botoh ma, ale anak ni jolma, ia pangungkabon ai pasal ari parpudi do ai.”

¹⁸ Sanggah na marsahap ai ia hu bangku, tompas ma ahu anjaha tarhatos, bohingku dompak tanoh; tapi ijamah ma ahu lanjar ipajongjong.

¹⁹ Nini ma, “Tonggor ma, hupatoguh ma bam, aha na sihol masa bani panorang pangujungi ni ringis ai, ai martuduh-tuduh dompak ari parpudi do pangungkabon ai.

²⁰ Ia biribiri tunggal, na nididahmai, sidua tanduk ai, ai ma raja-raja ni Madai pakon Persia.

²¹ Anjaha hambing tunggal ai, ai ma harajaon Gorik, anjaha tanduk na bangga ai, na i holangkolang ni matani na dua ai, ai ma raja na parlobei.

²² Ia tanduk na maponggol ai, tubuh do use ompat tanduk manggantih ai, ai ma ompat harajaon na sihol tubuh, humbani bangsa ai, tapi seng songon gogoh ni na parlobei ai.

²³ Tapi marayak ujung ni panrajaion ni sidea ai, anggo tarlobih ma hajahaton ni sidea ai, timbul ma sada raja, parbohi na koras, na pandei marakal-akal.

²⁴ Timbul tumang do gogohni, tapi sedo humbani gogohni sandiri, anjaha jangan tumang do pansedaini; monang do ia bani sagala pambahenanni, iboiskon dojolma siparkuasa ampa halak na mapansing ai.

²⁵ Marhitei akal-akal manjadi do pangoto-otoion na niranggihonni ai, marsura-sura habanggalon do ia ibagas uhurni. Buei do halak parsedaonni na so pamotohan; jongjong do ia manlawan Raja ni sagala

raja, tapi maropuk do ia, seng pala marhitei tangan ni jolma.

²⁶ Ia pangungkabon bodari sogod ai, na dob tinarsingatan ai, sintong do ai; ponopkon ma pangungkabon ai, ai marhahonaan bani ari magira do ai.”

²⁷ Ia ahu, si Daniel, mandatei anjaha boritan do ahu piga-piga ari. Dob ai jongjong ma ahu laho mangkorjahon horja ni raja ai. Tapi songgotan do ahu pasal pangungkabon ai, anjaha seng dong na boi patorangkon.

Tonggo Mansopotkon Dousa humbani si Daniel ampa Rusia ni Sipitu Puluh Tahun Minggu ai

9¹ Bani tahun parlobei dob raja si Darius, anak ni si Ahasveros, humbani ginompar ni halak Madai, na bangkit gabe raja manggomgom halak Kasdim,

² bani tahun parlobei ni panrajaionni ai, ahu si Daniel, dapot uhurhu ma ibagas surat-surat in bilangan ni tahun domu hu bani hata na nilumbahon ni Jahowa hubani Nabi Jeremia, ai ma pasal Jerusalem, na maningon tarulang pitu puluh tahun dokahni.

³ Dob ai hudompakkon ma Tuhan Naibata, marsombah marhitei tonggo, elek-elek, puasa, marhiou guni ampa margulu abuan.

⁴ Martonggo ma ahu bani Jahowa Naibatanku, hubahen ma panopotion dousa, ningku ma, “Ham Tuhan, Naibata na timbul anjaha na majombut, siramotkon padan ampa idop ni uhur dompak halak na mangkaholongi Ham ampa na mandalankon parentah-Mu.

⁵ Domma mardousa hanami anjaha marsalah, manjahati anjaha manlawan; manimbil do hanami humbani parentah-Mu ampa humbani titah-Mu.

⁶ Seng itangihon hanami juakjuak-Mu, nabi-nabi ai, na marsahap ibagas goran-Mu hubani raja-rajanami, kopala-kopalanami, ompungnami ampa hubani haganup bangsa na i nagori in.

⁷ Bamu do Tuhan hapintoron in, tapi maila do anggo hanami nuan, hanami halak na hun Juda, pangisi ni Jerusalem ampa haganup halak Israel, ai ma na dohor ampa na daoh marianan bani haganup nagori pambuangan-Mu bani sidea, halani pangoseion ni sidea Bamu.

⁸ Ham Jahowa, patut do hanami tarbador, age raja-rajanami, kopala-kopalanami ampa ompungnami, ai mardousa do hanami dompak Ham.

⁹ Tapi Bamu do Tuhan, Ham Naibatanami, idop ni uhur ampa hasasapan ni dousa. Tongon, sipanlawan do hanami,

¹⁰ anjaha seng itangihon hanami sora ni Jahowa Naibatanami marhitei na mambalosi titah-Ni, ai ma

na pinadas-Ni bennami marhitei juakjuak-Ni nabi-nabi ai.

¹¹ Haganup do Israel manlanggar titah-Mu anjaha marbalik, manjua manangihon sora-Mu. Jadi mangonai ma bennami bura-bura pakon bija na tarsurat bani buku titah ni si Musa, juakjuak ni Naibata, halani na mardousa ai hanami dompak Naibata.

¹² Ipasaud ma hata-Ni, na dob niluarhon-Ni ai bennami ampa bani sipanrajai, na manguhum hanami, marhitei na parohkon hamagouan bangga bennami, ai ma na seng onggga masa i toruh ni langit, songon na masa bani Jerusalem ai.

¹³ Romban hubani na tarsurat bani titah ni si Musa, sogop do haganup hasedaon on bennami, tapi lanjar do seng isubut hanami uhur ni Jahowa, Naibatanami, marhitei na paubahkon uhur humbani hajahatonnami ampa na mardiateihon hasintongan-Mu.

¹⁴ Halani ai do ase isurahon Jahowa hamagouan on anjaha ipamasa bennami, ai pintor do Jahowa Naibatanami bani haganup pambahenan-Ni, na binahen-Ni ai, tapi lanjar do seng itangihon hanami sora-Ni.

¹⁵ Ai pe, Ham Tuhan Naibatanami, na dob mambobahon bangsa-Mu luar hun Masir marhitei tangan na gogoh ampa na pajongjong goran Bamu

ronsi sadari on, sipardousa do hanami anjaha siparjahat.

¹⁶ Ham Tuhan, domu hubani haganup hapintoron-Mu, sai pasurut Ham ma ringis-Mu pakon gajag ni gila-Mu hun Jerusalem, dolog-Mu na pansing ai; tongon halani dousanami ampa halani hajahaton ni ompungnami do, ase gabe umpama Jerusalem ampa bangsa-Mu bani bangsa na inggot hanami.

¹⁷ Ai pe, Ham Naibatanami, tangihon Ham ma tonggo ni juakjuak-Mu pakon pangindoanni, anjaha halani goran-Mu, Ham Tuhan, sondangkon Ham ma bohi-Mu bani ianan na mapansing in, na dob tarulang in.

¹⁸ Ham Naibatanku, sai pateleng Ham ma pinggol-Mu, anjaha tangar Ham ma; mangkawah ma Ham, tonggor Ham ma hasedaonnami on ampa huta in na dob targoran bani goran-Mu! Tongon sedo halani hapintoronnami ase isombahkon hanami pangindoannami on Bamu, tapi halani idop ni uhur-Mu na banggal in do.

¹⁹ Ham Tuhan, tangihon Ham ma! Ham Tuhan, maidop ma uhur-Mu! Ham Tuhan, pardiatei anjaha pasaud Ham ma in! Ulang ma padokah-dokah Ham marhalanipun ni Ham, ale Naibatanku! Ai huta-Mu ai ampa bangsa-Mu in, marpanggorani hu Bamu do.”

²⁰ Jadi sanggah na marsahapi ai ope ahu anjaha martonggo, mansopotkon dousanku pakon

dousa ni bangsangku halak Israel, anjaha hupadas pangindoankai hu lobei ni Jahowa, Naibatangku, ai ma pasal dolog ni Naibatangku na mapansing ai.

²¹ Sanggah na marsahapi ai ope ahu ibagas tonggo, roh ma si Gabriel, ai ma halak na dob huidah ibagas pangungkabon, habang doras manjumpahkon ahu, ai ma bani panorang panggalangonkon bodari.

²² Roh ma ia, nini ma hu bangku, “Ale Daniel, na roh do ahu laho patugahkon bam hatorangan ampa pangarusion.

²³ Bani pamungkah ni tonggomu, luar do sada hata, anjaha roh do ahu laho pabotohkon ai bam, ai haholongan ni uhur ni Naibata do ho; halani ai parimbagaskon ma hata in anjaha artihon pangungkabon in.

²⁴ Pitu puluh tahun minggu do itotapkon pasal bangsamu ampa hutamu na pansing in, ase marujung hajahaton ai, salosei dousa ai, ase ibahen pardearan pasal hasalahan ai, iparoh hapintoron sisadokah ni dokahni, ipasaud pangungkabon ampa panjahaion ai, anjaha iminaki ianan na tang pansing ai.

²⁵ Ase botoh anjaha paruhurhon ma: Humbani panorang dob luar hata ai, ase ipasuang anjaha ipauli use Jerusalem ronsi panorang parroh ni na mininakan ai, raja ai, pitu tahun minggu ampa onom puluh dua tahun minggu do; ulakan do

paulihon huta ai, maralaman ampa marpasar, age pe panorang hasosakan ai.

²⁶ Anjaha dob salpu na onom puluh dua tahun minggu ai, ibunuh ma sada halak na mininakan seng pala mardalan uhum, anjaha iparseda bala ni raja na sihol roh ai ma huta ampa ianan na pansing ai. Roh do ujungni ai marhitei bah banggal, anjaha sai masa do ronsi ujungni hasedaon, songon na dob tinontuhon hinan.

²⁷ Anjaha ibahen ia ma padan na toguh hubani buei halak, sada tahun minggu dokahni; satongah tahun minggu parontihononni do galangan sisayaton ampa galangan sipanganon; anjaha masa do bani ianan ma mapansing ai hagigi na mabajan, paima iuseihon hasedaon ampa hamagouan bani sipangagou ai.”

Tugah-tugah ni Sada Malekat hubani si Daniel Pasal Hasosakan na Sihol Masa bani Bangsani

10 ¹ Patolu-tahunkon dob raja si Kores, raja ni Persia, roh ma sada hata pangungkabon hubani si Daniel, na margoran homa si Beltsasar. Sintong do hata ai, anjaha pasal hasunsahan banggal do ai. Iparuhurhon si Daniel ma ai, gabe iarusi ma pangungkabon ai.

² Bani panorang ai, ahu si Daniel, marhoru do tolu minggu dokahni.

³ Seng mangan sipanganon na mantin ahu, gulei atap anggur pe seng montas hun pamanganku, anjaha tongon seng huminaki diringku paima salpu na tolu minggu ai.

⁴ Bani ari dua puluh ompat bulan sada, sanggah bani topi ni bah banggal ai ahu, ai ma Bah Hidekel,

⁵ mangkawah ma ahu, anjaha tonggor ma, huidah do sada dalahi na marpakeian linnen, anjaha margondit omas do ia bani binongeini.

⁶ Ia badanni songon batu intan Tarsis do, bohini songon rupa ni hilap, matani songon rigapan na gara, tanganni pakon naheini marsinalsal songon tombaga na niogos, anjaha sora ni hatani songon sora ni jolma na mabuei.

⁷ Pitah ahu do, si Daniel, na mangidah pangungkabon ai; ia dalahi na i lambungku seng ididah sidea pangungkabon ai; tapi tarsonggot tumang do sidea, gabe maporus ma sidea laho marponop.

⁸ Jadi tading ma sahalak ahu, anjaha huidah do pangungkabon banggal ai: Seng dong be gogoh tading ibagas ahu, mubah do minar ni bohingku gabe marposi, anjaha seng be margolle ahu.

⁹ Dob ai hubogei ma sora ni hatani; anjaha dob hubogei sora ni hatani ai, gabe tarhatos ma ahu, dabuh tangkob hu tanoh.

¹⁰ Jadi tonggor ma, roh ma sada tangan manjamah ahu, gabe iurupi ma ahu manungkol diringku marhitei towod ampa tanganku.

¹¹ Nini ma hu bangku, “Ale Daniel, na hinaholongan ni Naibata, paruhurhon ma hata na sihol hatahononku bam; jongjong ma, ai na sinuruh do ahu sonari marayak ho.” Sanggah na hinatahonni ai hata ai bangku jongjong ma ahu, hitir-hitir.

¹² Dob ai nini ma hu bangku, “Ulang ho mabiar, ale Daniel, ai humbani ari na parlobei sanggah na isurahon ho sihol arusanmu ai anjaha ipaunduk ho uhurmu i lobei ni Naibatamu, domma itangihon hatamai, anjaha halani hatamai do ase roh ahu.

¹³ Roh do malekat ni harajaon Persia manlawan ahu dua puluh sada ari dokahni; tapi tonggor ma, roh ma si Mikael, sada humbani kopala ni malekat ai, mangurupi ahu, jadi hupaturut ma ia manlawan malekat ni harajaon Persia ai.

¹⁴ Roh do ahu sonari hubam laho pabotohkon bam pasal aha na sihol masa bani bangsamu bani ujung ni panorang; ai marhahonaan bani ari magira do pangungkabon ai.”

¹⁵ Sanggah na hinatahonni ai hata ai bangku, hupaunduk ma bohingku dompak tanoh, anjaha sip do ahu.

¹⁶ Jadi tonggor ma, roh ma sada na usih bani rupa ni jolma manjamah bibirhu. Jadi hubuha ma pamanganku anjaha huhatahon ma bani na

jongjong i lobeihu, “Ham Tuan, boritan do ahu halani pangungkabon na roh bangku ai, anjaha seng be margogoh ahu.

¹⁷ Sonaha ma pambahen ni juakjuak ni Tuanku marsahap pakon Tuanku; ai seng be margogoh ahu sonari, anjaha seng dong be hosah bangku?”

¹⁸ Jadi ijamah parrupa na songon jolma ai ma ahu, anjaha ipargogohi ma ahu.

¹⁹ Nini ma, “Ulang ho mabiar, ale hinaholongan ni Naibata! Damei ma bam, tenger ma uhurmu anjaha margogoh ma!” Jadi sanggah na marsahap ai ia bangku, margogoh ma ahu anjaha ningku ma, “Marsahap ma Tuanku, ai domma ipargogohi ham ahu.”

²⁰ Jadi nini ma, “Ai ibotoh ho ma aha halani ase roh ahu bam? Sonari sihol mulak ma ahu laho marporang dompak malekat ni Persia; anjaha dob salosei ai roh ma malekat ni Tanoh Gorik.

²¹ Anjaha ise pe lang adong hasomanku laho mangimbang sidea ai, sobali si Mikael, malekatnima ai.”

Sambatni

11 ¹ Ia ahu, sanggah tahun parlobei dob raja si Darius, halak Madai ai, jongjong do ahu i lambungni mangurupi anjaha mampargogohisi.

² Sonari pe patugahonku ma bam na tarsurat ibagas buku hasintongan ai, “Tonggor ma, bangkit do use

tolu halak raja i Persia, tapi na paompatkon ai bayakan do ai marimbang haganup sidea ai. Dob gabe margogoh ia halani habayakonni, iharah ma haganup laho mangimbang harajaon Gorik.”

³ Jadi timbul ma sada raja na markuasa, na manrajai sada harajaon na bolag, na mandalankon rosuh-rosuhni.

⁴ Tapi anggo timbul tumang ma ia, mabolah ma harajaonni ai anjaha hona bagi mangihutkon deisa na ompat in; seng bani ginomparni ondos ai, anjaha seng songon gomgoman na ginomgomanni hinan be ai, ai maningon parsedaon do harajaonni ai anjaha halak na legan ma gabe simada ai.

⁵ Dob ai lambin margogoh ma raja na i dangsina ai, tapi sada humbani puanglimani gabe gogohan do hun bani, anjaha gabe banggal do harajaonni ai.

⁶ Dob piga-piga tahun mambahen parpadanan ma sidea; roh ma boru ni raja na hun dangsina ai mangayaki raja na i utara ai mambahen pardameian, tapi seng tarjolomisi kuasani, anjaha ginomparni pe seng manahan; hona ondoskon do ia, sonai homa na pataruhkonsi, anakni sada ampa na mambuatsi.

⁷ Bani panorang ai ipabangkit raja do sada halak humbani sindohor ni boru ni raja ondi manggantih bapani; roh ma ia mamorang bala ai anjaha imasuki ma benteng ni harajaon parutara ai, ipatuduhkon ma gogohni bani sidea lanjar ipatunduk.

⁸ Iboan ma hu Masir naibata-naibata ni sidea rap pakon gana-gana tinuang ni sidea, ugas-ugas pirak ampa omas na maharga gabe taban-taban; anjaha seng be iporang raja parutara ai ibagas piga-piga dokah.

⁹ Dob ai roh ma raja parutara ai mammasuk i harajaon pardangsina ai, tapi mulak sonin do ia hu tanohni.

¹⁰ Dob ai roh ma anakni marugas laho marporang, ipatumpu ma balani marhulan-hulan; laho ma ia, irungkub ma ai songon bah banggal anjaha ilontas; iulaki ma use mamorang ai das bani benteng-bentengni.

¹¹ Marah ma raja pardangsina ai, bingkak ma ia laho marporang dompak raja na i utara ai. Jadi ipatumpu ma balani marhulan-hulan, tapi talu anjaha ripas do balani ai.

¹² Dob hona taluhon na marhulan-hulan ai, gijang ma uhurni; marlaksa-laksa do ibunuh, tapi seng torus monang ia.

¹³ Ai iulaki raja parutara ai do pajongjong bala, bueinan marimbang na parlobei ai; dob salpu piga-piga tahun roh ma ia marhasoman bala na banggal ampa buei parsadiaan.

¹⁴ Bani panorang ai buei ma na marbalik manlawan raja pardangsina ai; halak na jungkat pe humbani bangsamu manlawan do laho manggoki pangungkabon ai, tapi ipatunduk do sidea.

¹⁵ Anjaha roh ma raja parutara ai, ipajongjong ma hubuan anjaha italuhon ma sada huta na pinatoguh. Ia bala pardangsina ai seng manahan sidea, age bala pilihanni ai; tongon, seng adong kuasa na manahan jongjong.

¹⁶ Jadi ibahen na roh mangimbangi ai ma domu hu bani rosuh-rosuhni anjaha seng dong na tahan jongjong i lobeini; imasuki ma tanoh na majenges in, anjaha tunduk ma in hutoruh ni tanganni.

¹⁷ Dob ai isurahon uhurni ma sihol pajonamkon kuasani bani haganup gomgomanni; ibahen ma pardearan hu bani, ibere ma boruni gabejolmani, laho masedahonsi; tapi seng saud anjaha seng jadi sura-surani ai.

¹⁸ Dob salpu ai idompakkon ma hubani nagori-nagori na i topi ni laut, anjaha patundukonni do buei hunjai; tapi roh ma sada puanglima parontihon asup-asupni ai, hubani tene mangonai bahenonni asup-asupni ai.

¹⁹ Dob ai itujuhon ma bohini dompak benteng-bentengni na i tanohni sandiri, tapi jomba ma ia anjaha dabuh, anjaha lanjar seng jumpah be.

²⁰ Dob ai bangkit ma gantihni sada halak, na marsuruh sada halak sipatumpu guguan hu nagori na majenges ai; tapi seng pala piga dokah bois ma ia, sedo binahen ni ringis atap porang.

²¹ Bangkit ma na manggantihsi sada halak na mahiri, na so patut namin haondosan ni harajaon

ai; na so niagak ni uhur do ia roh, gabe ibuat ma harajaon ai bani marhitei akal-akal.

²² Talu do i lobeini sagala bala na roh marhulan-hulan ai mandorabsi, sonai homa kopala ni parpadanan ai.

²³ Anjaha dob ibahen parjanjian pakonsi idalankon ma sipaoto-oto; jadi lambin margogoh ma ia marhiteijolma na otik.

²⁴ Na so panagaman masuk ma ia hu nagori na tang sibayakan, idalankon do na so binahen ni bapani atap ompungni; ibagihon do i tongah-tongah ni sidea rampasan, taban-taban ampa ugas-ugas. Ibahen ranggian mambuat benteng-benteng, tapi tongkin hansa.

²⁵ Jadi ipabulat ma gogohni pakon uhurni mamorang dompak raja na i dangsina marhasoman bala na buei; raja na hun dangsina pe roh ma marporang marhasoman bala na buei anjaha na gogoh, tapi seng tahan ia, halani partahi-tahian na binahen hu bani.

²⁶ Gari halak na tong rap mangan pakonsi parsedahonsi, gabe hona pardakdak ma balani, anjaha buei tumang rasei.

²⁷ Ia raja na dua ai, na masambor do ipingkiri sidea bei; rap mangan pe sidea marsioto-otoan do, tapi seng manjadi; ai ujung ni ai, sihol masa ope ai bani panorang na dob binuhul.

²⁸ Anjaha mulak ma ia hu nagorini mamboan buei arta, tapi uhurni sihol manlawan parpadanan na mapansing ai do. Ipasaud ma ai, dob ai mulak ma ia hu tanohni sandiri.

²⁹ Bani panorang na binuhul mulak ma ia, anjaha imasuki ma tanoh dangsina ai, tapi anggo sahali on seng songon na parlobei ondi be.

³⁰ Ai roh ma kapal hun Kittim manlawansi, gabe mabiar ma ia lanjar mulak; manringis ma ia gabe ipapuas ma ai dompak parpadanan na pansing in, anjaha manriah ma ia pakon halak na dob manadingkon parpadanan na pansing in.

³¹ Roh ma balani pabutakkon ianan na pansing in ampa bentengni, anjaha iparontihon ma galangan ari-ari. Ipajongjong sidea ma gana-gana hagigi, na majangin ai.

³² Ibahen ma marbalik halak silanggar parpadanan ai marhitei hata lemes-lemes; tapi anggo bangsa na mananda Naibata, totap do jongjong anjaha marsijoloman.

³³ Anjaha halak na pentar i tongah-tongah ni bangsa ai mambahen buei halak maruhur, age pe rasei sidea ibahen podang, apuy, tutupan ampa na hona rampas, ibagas piga-piga dokah.

³⁴ Sanggah laho talu sidea dapot partolongan do sidea otik, tapi buei do halak na marsipakulah-kulah mangihutkon sidea.

³⁵ Deba humbani halak na pentar ai rasei do, laho papitahkon sidea, paborsihkon ampa paputihkon, das bani panorang parujungan; ai maningon masa ope na sonai das bani panorang na dob binuhul.

³⁶ Ibahen raja ai do domu hubani rosuh ni uhurni, ipagijang anjaha ipatimbul do dirini i atas ni sagala naibata, anjaha jungkat do parsahapni dompak Naibata Sitimbulan in. Sai monang do ia, paima gok ringis ai, ai barang aha na dob tinontuhon maningon saud do.

³⁷ Seng parduli ia bani naibata ni ompungni, atap naibata na hinaholongan ni naboru; seng parduli ia bani naibata na legan, ai ipagijang do dirini i atas ni haganupan ai.

³⁸ Tapi gantih ni ai, ipasangap do naibata ni benteng-benteng; ipasangap do sada naibata na so tinanda ni ompungni, marhitei omas, pirak, batu intan ampa sibere-bere na maharga.

³⁹ Ibahen ma naibata na legan ai gabe parondosan ni benteng-benteng na toguh ai; halak na mambalosisi ipasangap do ai; ipabangkit do sidea manrajai buei halak, anjaha ibagihon do bani sidea nagori ai bahen upah.

⁴⁰ Bani panorang marayak ujungni marsidoraban ma ia pakon raja na i dangsina; roh ma raja na hun utara ai mandorabsi songon halisungsung, marhitei gareta porang ampa siparhuda ampa buei kapal,

roh ma ia mammasuk i nagori-nagori, irungkub anjaha ilontas ma ai.

⁴¹ Das do ia hu tanoh na marmulia ai. Marlaksa-laksa do halak na rasei bahenonni, tapi maluah do hun tanganni anggo on: Edom pakon Moab ampa sabagian banggal humbani halak Amon.

⁴² Ipagostong do tanganni manlawan nagori-nagori ai, anjaha seng maluah tanoh Masir hun bani.

⁴³ Gok bani do sagala arta omas, pirak ampa haganup arta na maharga i Masir; Libia pakon Etiopia pe mangihut do hu bani.

⁴⁴ Tapi tarsonggot ma ia bahenon ni barita na hun hapoltakan ampa na hun utara, jadi bingkak ma ia ibagas gila laho manraseihon ampa mamboiskon buei halak.

⁴⁵ Jadi ipasuk ma lampolampo harajaonni ai i holangkolang ni laut ai ampa dolog na mapansing na marmulia ai; tapi jumpah ma ajalni, sahalak pe lang dong na mangurupisi.”

Haluahon ni Bangsa ni Naibata dob Salpu Panorang Hasosakan Banggal

12 ¹ “Bani panorang ai jongjong ma si Mikael, kopala ni malekat na banggal ai, sijagai bangsamu. Jadi masa ma panorang hasosakan, na so onnga masa humbani dob dong bangsa-bangsa das bani panorang ai; tapi bani panorang ai maluah

ma bangsamu, sagala na tarsurat goranni bani buku ai.

²Anjaha buei do halak na dob modom ibagas orbuk ni tanoh in puho magira, deba hu hagoluhan sisadokah ni dokahni, deba huhabadoron ampa hadorsaon sisadokah ni dokahni.

³Halak siparuhur marsinondang do songon sondang ni langit, anjaha sidea na manogu-nogu buei halak hu hapintoron marsinondang do songon bintang ronsi sadokah ni dokahni.

⁴Tapi anggo ho ale Daniel, ponopkon ma hata in, anjaha bahen ma sap bani pustaha in, paima dapot panorang parujungan ai; buei do halak na manangkasi hata ai, gabe tambah ma habotohon.”

⁵Jadi mangkawah ma ahu, si Daniel, anjaha tonggor ma, jongjong do dua halak nari malekat, sada hampit dipar on, na sada nari hampit dipar ni bah ai,

⁶anjaha ihatahon sahalak humbani sidea ma hubani dalahi na marpakeian linnen ai, na jongjong i atas ni bah mardalan ai, nini ma, “Andigan pe masa panorang parujungan, na gok halongangan ai?”

⁷Ia dalahi na marpakeian linnen ai, na jongjong i atas ni bah mardalan ai, ipagostong ma tanganni siamun pakon sambilou dompak nagori atas, anjaha marbulawan ma ia hubani Na Manggoluh ai ronsi sadokah ni dokahni: Maningon salpu do lobei sada

panorang, dua panorang pakon satongah panorang; anggo marujung ma kuasa ni siparseda bangsa na mapansing in, ai pe ase saud haganupan ai.

⁸ Hubogei do namin hata ai, tapi seng huarusi, gabe ningku ma, “Ham Tuanku, sonaha do ujungni ai?”

⁹ Jadi nini ma, “Laho ma ho, ale Daniel, ai maningon ponop do anjaha hona sap do hata ai das bani panorang parujungan.

¹⁰ Buei do halak na pauraskon dirini, na paborsihkon anjaha na papitahkon dirini; tapi anggo halak parjahat sai inunut do manjahati; seng dong halak parjahat ai na marpangarusion, tapi anggo halak na maruhur iartihon do in.

¹¹ Humbani panorang iparontihon galangan ari-ari ai anjaha ipajongjong gana-gana hagigi na majangin ai, ai ma saribu dua ratus siah puluh ari do.

¹² Martuah ma halak na tahan ronsi saribu tolu ratus tolu puluh lima ari.

¹³ Tapi anggo ho, tuju ma ujungni ai, marsaran ma ho; puho do ho use laho manjalo rupeimu bani ujung ni panorang.”

Hosea

Parrumahtanggaon ni si Hosea ampa Goran ni Anakni laho Patidakkon Uhur ni Naibata dompak Bangsani

1 ¹ On ma hata ni Jahowa na roh hubani si Hosea, anak ni si Beri, bani panorang ni si Usia, si Jotam, si Ahas pakon si Hiskia, ai ma raja-raja ni Juda, ampa bani panorang ni si Jerobeam, anak ni si Joas, raja ni Israel.

² Sanggah na ipungkah Jahowa marsahap marhitei si Hosea, nini ma hubani si Hosea, “Laho ma ho, buat ma bam sada boru jalang, ase tubuh bam anak humbani boru jalang ai, ai sai inunut nagori in do marbangkisi, marbalik humbani Jahowa.”

³ Jadi laho ma ia anjaha ibuat ma si Gomer, boru ni si Diblaim; boratan rumah ma ia anjaha itubuhkon ma sada anak.

⁴ Jadi nini Jahowa ma hu bani, “Bahen ma goranni si Jesreel; ai tongkin nari mando luluhonon-Ku ma daroh ni Jesreel hubani ginompar ni si Jehu, anjaha parontihonon-Ku ma Harajaon Israel.

⁵ Anjaha bani panorang ai, ponggolhonon-Ku ma sior ni Israel i pamah Jesreel.

⁶Boratan rumah ma use ia anjaha itubuhkan ma sada boru. Dob ai ihatahon Jahowa ma hu bani, “Bahen ma goranni si Lo-Ruhama (*Na so hinaholongan*); ai seng holong be uhur-Hu bani ginompar ni Israel, anjaha seng be marulak-ulakan uhur-Hu mangidah sidea.

⁷Tapi marulak-ulakan do uhur-Hu anggo bani ginompar ni Juda, anjaha paluahon-Ku do sidea marhitei Jahowa, Naibata ni sidea; seng paluahon-Ku sidea marhitei sior atap podang atap porang atap huda atap jolma siajak huda pe.”

⁸Jadi dob sirang minum si Lo-Ruhama, boratan rumah ma use parinangon ai, anjaha itubuhkan ma sada anak.

⁹Dob ai nini Jahowa ma, “Bahen ma goranni si Lo-Amami (*Seng bangsang-Ku*), ai seng be bangsang-Ku hanima, anjaha Ahu pe seng be Naibatanimi.

¹⁰Tapi ia bilangan ni bangsa Israel magira, maningon songon buei ni horsik na i topi ni laut do, seng tarsuhati atap tarbilang. Anjaha gantih ni hata na dompak sidea ai, “Sedo bangsang-Ku hanima”, hatahononkon ma bani sidea, “Anak ni Naibata na manggoluh in!”

¹¹Jadi mardomu ma magira halak Juda rap pakon halak Israel, pabangkiton ni sidea ma bani sidea sada kopala, anjaha tangkog ma sidea hun nagori in, ai banggal do ari Jesreel ai.

2¹ (1-12) Hatahon ma hubani saninamu, 'Ammi' (Bangsangku), ampa hubani botoumu, 'Ruhama' (Na hihaholongan).

**Israel Marbalik humbani Naibata, Tapi
Ijalo Naibata do Sidea Use**

- ² (2-1) "Gilai ma inangnima, gilai ma! ai seng be parinangon-Ku ia, anjaha Ahu pe seng be paramangonni, ase ipadaoh hun lobeini parriah-riahonni ai ampa parbangkisonni ai humbani bagod-bagodni.
- ³ (2-2) Anggo lang Hupasalang ma ia, Hubahen ma ia songon sanggah tubuh ia, Hubahen ma ia songon tanoh halimisan, songon tanoh dorging-dorging, anjaha Hubahen ma ia matei horahan.
- ⁴ (2-3) Bani anakni pe seng holong uhurmu, ai anak salong-salongan do ai.
- ⁵ (2-4) Ai boru jalang do inang ni sidea, situbuhkon sidea ai butak do parlahouni. Nini do, 'Huihut-ihut ma na mangkaholongi ahu, na mambere bangku sipanganonku pakon siinumonku, wol ampa bonang, minak ampa siinum-inumon.'
- ⁶ (2-5) Halani ai runngaon-Ku do dalanni bani duri-duri, anjaha pajongjongon-Ku tembok mangolatsi, ase ulang be ibotoh dalanni.

- ⁷ (2-6) Iparayak do na mangkaholongisi, tapi seng dapotsi, Pindah-pindah do ia bani sidea, tapi seng jumpahsi. Jadi nini ma, 'Laho ma ahu, mulak hubani paramangonku hinan, ai sonangan do ahu ijia ase sonari.'
- ⁸ (2-7) Seng dong ibotoh, paboa Ahu do ai, na mambere bani gandum, anggur ampa minak, anjaha na manlayak-layakkon bani buei pirak ampa omas, ai ma na pinakei ni sidea paulihon Baal.
- ⁹ (2-8) Halani ai buaton-Ku ma mulak gandum-Hu bani panorangni ampa anggur-Hu bani musimni; anjaha wol-Hu ampa hiou pe sontapkonon-Ku do, ai ma na manrungkub hatalanjangonni hinan.
- ¹⁰ (2-9) Anjaha patalagon-Ku do hailaonni i lobei ni na mangkaholongisi, anjaha seng dong na boi paluahkonsi humbani tangan-Ku.
- ¹¹ (2-10) Parontihonon-Ku do haganup malas ni uhurni, pesta-pestani, poltak ni bulanni, ari Sabatni ampa haganup ari rayani.
- ¹² (2-11) Parsedaon-Ku do hayu anggurni ampa hayu arani, ai ma na hinatahonni ai, 'On do upah bangku, na binere ni na mangkaholongi ahu bangku.' Gabe harangan do ai bahenon-Ku, anjaha binatang na i talun ai do manggagati ai.

- ¹³ (2-12) Marlulu do Ahu bani halani pesta-pesta bani Baal, ai ma na manutung dahupa ia bani Baal, ipajagar dirini marhitei tintinni ampa omas-omasni, iirik-irik na mangkaholongisi, tapi Ahu ihalupahon do,” nini Jahowa.
- ¹⁴ (2-13) “Tapi huajar-ajari ma ia anjaha huboan ma ia hu halimisan, anjaha lamlam do parsahap-Ku bani.
- ¹⁵ (2-14) Ijai berehonon-Ku ma bani pohon anggurni, anjaha bahenon-Ku do habungan Ahor gabe horbangan pangarapan. Anjaha ijai tangihononni ma Ahu, songon bani panorang haposoonni, songon sanggah na tangkog ai ia hun Masir.”
- ¹⁶ (2-15) “Bani ari ai,” nini Jahowa, “goranonmu ma Ahu, ‘Paramangonku,’ lang be ‘Baalhu.’
- ¹⁷ (2-16) Padaohon-Ku do goran Baal humbani pamanganmu, ase ulang be isobut-sobut halak goranni ai.
- ¹⁸ (2-17) Bahenon-Ku do bannima bani ari ai padan pakon binatang harangan ampa manuk-manuk na i awang-awang ampa sagala na manjulur i tanoh in; masabkonon-Ku do sior, podang ampa porang hun tanoh in, anjaha Bahenon-Ku do hanima sonang marianan.
- ¹⁹ (2-18) Riridon-Ku do ho gabe tunangan Bangku sadokah ni dokahni; riridon-Ku do ho

marhitei hapintoron, uhur, idop ampa holong ni uhur.

²⁰ (2-19) Riridon-Ku do ho Bangku ibagas habujuron, gabe tandaonmu ma Jahowa.

²¹ (2-20) Bani panorang ai,” nini Jahowa, “tangihonon-Ku ma langit, tangihonon ni langit ma tanoh on,

²² (2-21) anjaha tangihonon ni tanoh on ma gandum, anggur ampa minak, anjaha ganup ai manangihon Jesreel,

²³ (2-22) anjaha tidahkonon-Ku ma ia Bangku i tanoh in. Marholong ni uhur ma Ahu bani si Lo-Ruhama (*Na so hinaholongan*) anjaha hatahonon-Ku ma hubani si Lo-Ammi (*Seng bangsangku*), ‘Bangsang-Ku do ho,’ anjaha ia mangkatahon, ‘Ham do Naibatangku.’”

Holong ni Uhur ni si Hosea bani Naboru Siparbangkis

3 ¹ Dob ai nini Jahowa ma hu bangku, “Laho ma use, haholongi ma sada naboru, na mangkaholongi dalahi na legan, siparbangkis, usih songon Jahowa na mangkaholongi bangsa Israel, age pe marbalik sidea bani Naibata na legan anjaha rosuh bani ruti na maragu buah anggur.”

² Jadi huboli ma ia bangku arga sapuluh lima sikal pirak ampa sada satongah homer andolei.

³ Jadi ningku ma hu bani, “Maningon dokah do ho marianan rap pakon ahu, ulang marbangkis, ulang mardalahii, ahu pe sonai ma bam.

⁴ Ai maningon dokah do halak Israel marianan, seng marraja atap markopala, seng manggalang atap martugu, seng marepod atap marterapim.

⁵ Dob ai mulak ma use halak Israel, anjaha pindahan ni sidea ma Jahowa, Naibata ni sidea, ampa si Daud, raja ni sidea ai, anjaha roh sidea marhabiaran mangayaki Jahowa ampa hatuahonni ai bani panorang parpudi.”

Hata Pinsang-pinsang Dompak Malim ampa Bangsa Siparbalik ai

4 ¹ Tangihon ma hata ni Jahowa, ale ginompar ni Israel, ai adong do paringoran ni Jahowa ampa pangisi ni tanoh in, “Ai seng dong hasintongan, seng dong haholongan, anjaha seng dong habotohon pasal Naibata i tanoh in,

² tapi bija do, ladung, pambunuhon, panangkoon ampa parbangkison; masa do odoh-odoh anjaha marompot mardurusan daroh.

³ Halani ai marhoru do tanoh in, anjaha sagala pangisini hurleh, sonai homa binatang na i talun ampa manuk-manuk na i awang-awang; anjaha dengke na ibagas laut ai pe rasei do.

- ⁴ Tapi ulang ma pala adong atap ise na maminsang, anjaha ulang ma pala adong na mangaduhon, ai ho do imbang-Ku martinggil, ale malim!
- ⁵ Maningon tartolsu do ho arian, nabi pe tompas do rap pakon ho borngin; anjaha inangmu pe bois do bahenon-Ku.
- ⁶ Seda do bangsang-Ku halani hurang ni habotohon; halani itulakkon ho habotohon, tulakkonon-Ku do ho, ase ulang be ho malim Bangku. Halani lupa ho bani titah ni Naibatamu, lupa ma homa Ahu bani anakmu.
- ⁷ Lambin martambah-tambah sidea, lambin mardousai do sidea dompak Ahu. Ubahon-Ku do hasangapon ni sidea ai gabe habadoron.
- ⁸ Manggoluh do sidea humbani dousa ni bangsang-Ku, anjaha marosuh do sidea bani hajahatonni.”
- ⁹ Dos do na sihol masa bani malim ampa bani halak simbuei, “Marlulu ma Ahu bani sidea romban hubani parlahou ni sidea; anjaha mambalas do Ahu bani sidea halani pambahenan ni sidea.
- ¹⁰ Mangan pe sidea, tapi seng bosur, marbangkis pe sidea, tapi seng manggargar, halani

itadingkon sidea Jahowa laho mandalankon parbangkison.

- ¹¹ Anggur ampa minuman koras, ai do na parseda uhur.
- ¹² Marpanungkun bani hayu-hayu do bangsang-Ku, anjaha tungkot ni sidea mambere bani sidea pangungkabon. Tongon, tonduy parbangkison do na pakahou sidea, marbalik do sidea humbani Naibata ni sidea, laho mangkorjahon parbangkison.
- ¹³ Bani pakpak ni dolog do sidea manggalang anjaha bani buntu-buntu manutung dahupa, sonai homa i toruh ni hayu buah, jajabi pakon baringin halani dear ni linggomni ai. Halani ai marriah-riahi do borunima anjaha marbangkisi parumaennima.
- ¹⁴ Tapi seng uhumon-Ku borunima halani na marriah-riahi atap parumaennima halani na marbangkisi ai, ai dalahi-dalahi pe mardomu-domu do rap pakon boru jalang, anjaha rap manggalang ampa boru jalang na i rumah-rumah panumbahan; anjaha bangsa na so maruhur ai maningon seda do.
- ¹⁵ Age pe marriah-riah ho ale Israel, ulang namin dihut Juda marsalah! Ulang ma laho hanima hu Gilgal, ulang ma tangkog hu Bet-Awen, anjaha ulang ma marbija, mangkatahon, 'Songon sintongni manggoluh Jahowa!'

- ¹⁶ Tongon, songon lombu jalang na hengkening,
sonai do hengkening ni Israel; mintor
tarparmahan Jahowa ma sidea songon
biribiri bani sampalan na bolag?
- ¹⁷ Marpardomuan bani gana-gana do Efraim,
paturut ma ia hujin.
- ¹⁸ Siparmabuk-mabuk do sidea, sidalankon
parriah-riahon, holongan do uhur ni sidea
bani habadoron, ase humbani na boi gabe
hasangapon bani sidea.
- ¹⁹ Logou do na manaluhon sidea marhitei
habongni, anjaha gabe bador do sidea halani
panggalangon ni sidea.”

Hona Uhum Bangsa Halani Hasalahan ni Sipambobai

- 5** ¹ “Tangar ma on, ale malim! Parimbagaskon
ma, ale halak Israel! Tangihon ma, ale
sipanrajai! Ai mangonai bannima do uhum
in, ai gabe siding do hanima i Mispa, gabe
puhot na tinaon i Tabor,
- ² anjaha ipabagas hanima do godung hamagouan
na i Sittim, halani ai uhumon-Ku do hanima.
- ³ Hutanda do Efraim, anjaha Israel seng ponop
hun Bangku; tongon, sonari marriah-riah do
Efraim anjaha hona butakan Israel.
- ⁴ Pambahenan ni sidea do mambahen lang boi
be sidea mulak bani Naibata ni sidea. Ai

tonduy parriah-riahon do ibagas uhur ni
sidea, anjaha seng itandai sidea Jahowa.

⁵ Gijang ni uhur ni Israel do saksi na
mangimbangi; maningon tompas do Efraim
halani hajahatonni. Juda pe tompas do rap
pakonsi.

⁶ Roh do sidea mamboan biribiri ampa lembu ni
sidea mangindahi Jahowa, tapi seng jumpah
sidea la; domma surut la humbani sidea.

⁷ Mangosei do sidea dompak Jahowa, tongon
anak salong-salongan do tinubuhkon ni
sidea; halani ai boiskonon ni pesta poltak ni
bulan do sidea ampa juma ni sidea.

⁸ Sompul ma tanduk i Gibe, tarompit ai i Rama.
Pahata ma tingting i Bet-Awen, hirjati ma
Benjamin!

⁹ Gabe halimisan do Efraim bani panorang uhum
ai; na sintong do na Hupabotohkon ai bani
marga ni Israel.

¹⁰ Gabe songon halak siosor parbalogan do
kopala-kopala ni Juda; duruskonon-Ku do
ringis-Ku bani sidea songon bah.

¹¹ Hona odoh-odoh do Efraim, maropuk bani
paruhuman, halani marosuh ia mangihutkon
gana-gana na lang ai.

¹² Halani ai gabe doskon ngitngit do Ahu
bani Efraim, anjaha songon burbur na
parsedahon bani ginompar ni Juda.

- ¹³ Dob ididah Efraim naboritni anjaha ididah
Juda ugahni, laho do Efraim hu Assur,
isuruh do suruhanni bani raja bolon ai. Tapi
seng tarbahensi pamalum hanima atap
tartambarisi ugahnima.
- ¹⁴ Ai gabe songon singa do Ahu bani Efraim janah
songon anak ni singa bani ginompar ni Juda.
Ahu, Ahu tongon manoroh, dob ai lintun
hunjai. Ahu do na manaluhon, seng dong na
boi paluahkon.
- ¹⁵ Mulak ma Ahu use bani ianan-Ku, paima
itanda sidea salahni gabe ipindahi sidea
bohing-Ku, anjaha ibagas hasosakan ni sidea
ai pindahan ni sidea ma Ahu.”

Ojur-ojur ase Sintong Mubah Uhur

- 6** ¹ “Eta, mulak ma hita bani Jahowa! Tongon, la
do na mamparsilbak, tapi la do na pamalum
hita; la do na mangugahi, tapi la do na
manambari hita.
- ² Dob dua ari pagoluhon-Ni do hita, patolu-arihon
ipapuhon do hita, ase manggoluh hita i
lobei-Ni.
- ³ Botoh hita ma anjaha haringgaskon hita ma
na manandai Jahowa; sai na poltak do la
songon buha siang ari, sai na roh do la banta
songon udan, songon udan mula-mula na
mangarbahi tanoh.”

- ⁴ “Aha do tarbahen Ahu bam, ale Efraim? Aha do tarbahen Ahu bam, ale Juda Ai songon hambun sogod-sogod do holongnima, songon namur na podas habang.
- ⁵ Halani ai Hubogbog do sidea marhitei nabi-nabi, Hubunuh marhitei hata na humbani pamangan-Ku ase poltak uhur-Hu songon haliharon.
- ⁶ Ai idop ni uhur do na Huharosuhkon, sedo galangan, panandaion pasal Naibata, sedo galangan situtungan.
- ⁷ Igalar sidea do padan i huta Adam; mangosei do sidea ijai hu Bangku.
- ⁸ Gilead ai ma huta ni halak sihorjahon hajahaton, gok bokas ni daroh.
- ⁹ Songon panamun na manggompangi halak, sonai do hulanan ni malim-malim; mamunuhi do sidea bani dalan na laho hu Sikem, tongon, mangkorjahon hasamboron do sidea.
- ¹⁰ I Betel Huidah do na majangin ijai, ijai do parriah-riahon bani Efraim, hona butakan do Israel.
- ¹¹ Ho pe ale Juda, sisabion ma!”

Pasal Efraim na So Ra Mubah

- 7** ¹ “Sangghah sihol pasuangen-Ku bangsang-Ku, anjaha sihol pamalumon-Ku Israel, gabe

talar ma dousa ni Efraim ampa hajahaton ni Samaria, ai ihorjahon sidea do panipuon, panangko mambongkari rumah, anjaha panrampok manrampasi i dalan-dalan.

² Seng ipingkirhon sidea, na mardingat do Ahu bani ganup hajahaton ni sidea. Sonari iinggoti pambahenanni do sidea, i lobei ni bohing-Ku do ai.

³ Marhitei hajahaton ni sidea ipamalas sidea uhur ni raja, anjaha marhitei sipakulah-kulah ni sidea ipamegah kopala-kopala.

⁴ Haganup sidea unsong-unsong do usih do sidea songon parmasakan ruti na dob pinamalas, tapi na so ginaraan ni tukang ruti lobei paima siap iagu topung anjaha kambang ai marhitei ubat ruti.

⁵ Nini sidea, “Ari bosar ni rajanta!” Marmabuk-mabuk ma kopala-kopala minum anggur; iawas-awaskon raja ai do tanganni rap pakon sipanggeori ai.

⁶ Gajag do uhur ni sidea songon pamurunan laho manggeori; borngin songon na modom do ringis ni sidea, tapi patarni marjimbur ma ai songon gara ni apuy.

⁷ Haganup sidea milas do songon pamurunan, ibonduti sidea do panggomgomini. Haganup do raja ni sidea madabuh, anjaha ise pe lang humbani sidea na dilo-dilo Bangku.

- ⁸ Ipasaor Efraim do dirini hubani bangsa-bangsa; songon roti na so pinagoling do Efraim.
- ⁹ Halak na legan do mamangani gogohni, tapi seng mangahap ia ijai; uban ma bani uluni, tapi seng ibotoh ai.
- ¹⁰ Gijang ni uhur ni Israel do saksi bani na mangimbangi; tapi seng mulak sidea bani Jahowa, Naibata ni sidea, anjaha seng ipindahi la, age pe sonai haganupan ai.
- ¹¹ Songon asas do Efraim, oto anjaha seng maruhur; dilo-dilo bani Masir, sai laho hu Assur.
- ¹² Sanggah na laho sidea, Huhaltupkon do puhot-Ku manangkap sidea; Hutarik do sidea hu toruh songon manuk-manuk na i awang-awang; Huajar do sidea halani hajahaton ni sidea ai.
- ¹³ Bursik ma sidea, ai lintun do sidea hun Bangku; magou ma sidea, ai marbalik do sidea hun Bangku; sihol do namin Ahu paluahkon sidea, tapi ladung do ihatahon sidea Bangku.
- ¹⁴ Seng dilo-dilo sidea hu Bangku humbani uhur ni sidea, tapi bani podoman i panumbahan-panumbahan do sidea doruh-doruh; irariki sidea do dirini halani gandum ampa anggur, manlawan do sidea hu Bangku.

- ¹⁵ Ahu do na mampargogohi tangan ni sidea,
hape na jahat do ipingkiri sidea dompak
Ahu.
- ¹⁶ Dompok Baal do sidea laho, gabe songon
sior sipangoto-otoi do sidea. Rasei do
kopala-kopala ni sidea marhitei podang,
halani hajungkaton ni dilah ni sidea. Ai ma
na mambahen bador sidea i tanoh Masir.”

Maseda do Israel Halani Parbalikonni

- 8** ¹ “Bahen ma tarompit in hu pamanganmu! Ai
adong do songon manuk-manuk sipanoroh i
babou ni rumah ni Jahowa; ai iosei sidea do
padan-Ku, anjaha ilaosi titah-Ku.
- ² Dilo-dilo sidea hu Bangku, ‘Ham Naibatanku,
hanami halak Israel, itanda hanami do
Ham!’
- ³ Itulak Israel do na madear, halani ai
pardakdakon ni munsuh do sidea.
- ⁴ Ipabangkit sidea do raja, tapi seng marhitei
Ahu. langkat kopala-kopala, tapi seng ibagas
botoh-Ku. Humbani pirak pakon omas ni
sidea ipauli do gana-gana bahen hamagouan
ni sidea sandiri.
- ⁵ Sogam do uhur-Hu bani anak ni lombumu, ale
Samaria. Gara do ringis-Ku dompak sidea.
Piga dokah nari nani, ase pitah sidea i Israel?

- ⁶ Tukang omas do mambahen anak ni lembu ai,
sedo Naibata ai. Tongon, anak ni lembu ni
Samaria ai, maningon ropukon do ai.
- ⁷ Logou do itidahkon sidea, jadi habahaba ma
sabionni. Gandum na i juma seng marbuyur,
seng dong dapot topung hunjai. Anggo
mambere gogoh ai, halak na legan do
mamangani ai.
- ⁸ Hona bondut do Israel, domma songon hudon
na so marguna sidea bani bangsa-bangsa.
- ⁹ Ai laho do sidea hu Assur, sasadasi songon
halode liar, igaji-gaji do na mangkaholongisi.
- ¹⁰ Age pe iboli hasoman sariah i tengah-tengah ni
bangsa-bangsa, podas ma erapon-Ku sidea.
Maronti ma sidea lobei pabangkit raja ampa
kopala-kopala.
- ¹¹ Tongon ipabuei Efraim do anjapanjap bani,
gabe mambahen mardousai ai bani sidea.
- ¹² Marlaksa-laksa pe titah-Ku Husuratkon bani,
ihira sidea do ai songon podah na ganjil.
- ¹³ Marosuh do sidea manggalang; igalangkon
sidea do gulei, anjaha ipangan do ai,
tapi seng marosuh Jahowa mangidah ai.
Idingat do sonari hajahaton ni sidea, anjaha
ibalaskon do dousa ni sidea; sai mulak do
sidea hu Masir.
- ¹⁴ Lupa do Israel bani na manompasi, anjaha
ipauli do panumbahan-panumbahan;

ipabuei Juda huta na pinatoguh, tapi tongoson-Ku do apuy bani huta-hutani, jadi bois ma panganonni benteng-bentengni.”

**Magou do Malas ni Uhur hun Israel Halani
Uhum na Mangonai Bani**

- 9** ¹ “Ulang ma marmegah-megah, ale Israel!
Ulang ma marolob-olob songon bangsa-bangsa na legan, ai marriah-riahi do ho, marbalik humbani Naibatamu. Marosuh do ho manjalo upah parriah-riahon bani sagala pardogeian.
- ² Seng be parmudu-muduon ni pardogeian atap kilang anggur sidea, anjaha anggur pe manipu sidea do.
- ³ Lang be i tanoh ni Jahowa sidea marianan, tapi maningon mulak do Efraim hu Masir, anjaha panganon ni sidea do na mabutak i Assur.
- ⁴ Seng be mambere galangan anggur sidea bani Jahowa, anjaha seng be pasirsirhon galangan sisayaton sidea Bani; ruti ni sidea ai gabe ruti pusok ni uhur ma, sagala na mangankon ai gabe butak ma; ai bani sidea sandiri mando rutini ai, seng masuk be ai hu rumah ni Jahowa.
- ⁵ Aha ma sibahenonnima bani ari pesta ampa bani ari raya ni Jahowa?

- ⁶ Ai tonggor ma, na laho ma sidea hu Assur;
patumpu-tumpuon ni Masir ma sidea,
anjaha Mempis do na mananom sidea.
Duri-duri do na manrungkub arta pirak
ni sidea ai, anjaha suga-suga do na
martubuhan i lampolampo ni sidea.
- ⁷ Roh ma ari uhum, roh ma ari pambalason;
ahapkonon ni Israel ma ai. Nimu ma,
‘Na oto do nabi ai, na podoan do dalahi
sipartonduy ai, halani buei ni hajahatonmu
ampa panlawannonmu.’
- ⁸ Manggompangi do Efraim bani lampolampo ni
nabi ai; siding do itaon bani sagala dalanni;
ilawan do ia age i rumah ni Naibatani.”

**Hona Uhum Israel Halani Manlembang la
humbani Pandiloon na Bani Hinan**

- ⁹ Bagas tumang do ipabutak sidea dirini, songon
na masa i Gibeai; halani ai ingaton-Ni do
hajahaton ni sidea ai, balaskonon-Ni do
dousa ni sidea ai.
- ¹⁰ “Songon buah ni anggur i halimisan, sonai
do jumpah Ahu Israel; songon buah
mula-mula bani hayu ara, sonai do Huidah
ompungnima. Hape laho do sidea hu
Baal-Peor, anjaha iondoskon dirini bani
Baal, anjaha gabe hagigi do sidea songon
sisombahon na hinarosuhkon ni sidea ai.

- ¹¹ Hamuliaon ni Efraim maningon habang do ai songon manuk-manuk; seng tubuhan tuah, seng boratan rumah anjaha seng solat be.
- ¹² Age pe pagodang-godangkon anak sidea, popor do sidea bahenon-Ku, gabe seng dong bejolma. Tongon, magou ma sidea, anggo surut Ahu humbani sidea.”
- ¹³ Sanggah na huida Efraim, usih do ai bani Tirus, sangap isuan; tapi sonari maningon boanon ni Efraim ma anakni hu panayatan.
- ¹⁴ Bere Ham ma bani sidea, ale Jahowa! Aha do na sihol bereon-Mu? Bere Ham ma bani sidea harambuyan na lambang ampa bagod-bagod na horah!
- ¹⁵ I Gilgal do junjun sagala hajahaton ni sidea, tongon, ijai do mulai Ahu magigi mangidah sidea. Halani jahat ni pambahen ni sidea usiron-Ku do sidea hun rumah-Ku. Seng be holong uhur-Hu mangidah sidea, panggeori do sagala panrajai ni sidea.
- ¹⁶ Hona bogbog do Efraim, melus do uratni, seng marbuah be. Porini pe tubuhan anak sidea bunuhon-Ku do boras ni boltok ni sidea na pinarsinta ni sidea ai.
- ¹⁷ Ambukkonon ni Naibatanku do sidea, ai seng itangihon sidea la; gabe madou-adou mando sidea i tongah-tongah ni bangsa-bangsa.

**Parseda ni Harajaon Israel
ampa Parnaibataon na Legan**

- 10** ¹ Hayu anggur na tabun do Israel, na mambere buahni. Lambin tambah buahni, lambin ipabuei sidea do anjapanjap; lambin dearni tanohni, lambin ipauli sidea do tuguni.
- ² Seng bulat uhur ni sidea, sonari manginsonoh ma ai bani sidea. Parsedaon ni Jahowa ma anjapanjap ni sidea, anjaha parreongon-Ni tuguni.
- ³ Tongon, ihatahon sidea do sonari, “Seng marraja hita, halani lang ihabiari hita Jahowa; ia sah raja, aha ma na boi bahenonni banta?”
- ⁴ Isahapkon sidea do hata lumei, marhitei bulawan sipakulahkulah ibahen sidea parpadanan; gabe martumbor ma uhum songon suan-suanan na manrasun bani juma na tininggala.
- ⁵ Gobir do pangisi ni Samaria bani gana-gana lombu na i Bet-Awen. Tongon marhoru do bangsani halani ai, anjaha doruh-doruh do malim-malimni, halani hasangaponni na minsah hunjai.
- ⁶ Tongon, anak ni lombu ai pe tarboan do hu Assur bahen parsombahon bani raja bolon

ai. Maningon bador do Efraim anjaha maila Israel halani hapandeionni ai.

⁷ Maningon magou do Samaria, rajani ai mayub songon pangotaman i atas ni bah.

⁸ Maningon bois do buntu-buntu panombahan na i Awen, pardousaon bani Israel. Suga-suga pakon duri-duri do tubuh bani anjapanjap ni sidea. Hatahonon ni sidea ma bani dolog-dolog, “Rungkub hanami!” Anjaha bani buntu-buntu, “Robrobi hanami!”

⁹ “Humbani panorang na i Gibeai nari, sai mardousai do ho, ale Israel. ijai do sidea jongjong manlawan Ahu. Ai lang hona porang do sidea i Gibeai?”

¹⁰ Sai roh do Ahu manjumpahkon anak na jahat ai laho mangajar sidea. Martumpu do roh bangsa-bangsa laho mandorab sidea, anggo ajaron ma sidea halani hajahaton ni sidea sidua lompit ai.

¹¹ Lumbu poso na niajar do Efraim, na marosuh mardogei, anjaha Hunahkon do pasangan bani borgokni na jenges ai, anjaha Hupasang ma Efraim; maningon maninggala do Israel anjaha manisir ia Jakob.”

¹² Tidahkon ma bannima hapintoron, pariamai ma dear layak! pungkah ma juma na baru, ai panorangni ma mangindahi Jahowa, ase roh la anjaha ibere bannima hapintoron.

- ¹³ Tapi hajahaton do itinggalahon hanima, gabe hamagouan isabi hanima, anjaha buah ni ladungnima ipangan hanima. Halani martenger ni uhur ho bani dalanmu, bani hinabuei ni puanglimamu,
- ¹⁴ jadi masa ma hageoron ni parporangan i tongah-tongah ni bangsamu, anjaha haganup benteng-bentengmu maseda do songon si Salman na parseda Bet-Arbel bani panorang porang; marsorak do parinangon rap pakon anakni.
- ¹⁵ Sonai ma bahenon bannima, ale ginompar ni Israel, halani banggal ni hajahatonnima. Girah sogod bois ma raja ni Israel.

**Holong ni Atei ni Naibata
bani Bangsa-Ni Sipardousa**

11 ¹ “Sanggah danak Israel, holong do atei-Hu hu bani; hun Masir do Hudilo anak-Ku.

² Lambin Hudilo sidea, lambin daohni do sidea laho hun Bangku. Sai manggalang do sidea bani Baal, anjaha manutung dahupa bani gana-gana.

³ Ahu do na mangajar Efraim mardalan, Huabing do sidea bani tangan-Ku, tapi seng ibotoh sidea, Ahu do na pamalum sidea.

⁴ Hutogu-togu do sidea marhitei tali idop ni uhur, marhitei panrahut holong; Ahu do na

pahampungkon pasangan bani tangkuhuk ni sidea, Hupaunduk do diringku bani sidea, anjaha Hubere do sidea mangan.

⁵ Maningon mulak do sidea hu tanoh Masir, anjaha Assur do gabe raja bani sidea, halani lang ra sidea mulak hu Bangku.

⁶ Halani ai roh ma podang mandorab huta-huta ni sidea, iparseda ma pating-pating ni horbangan ni sidea, anjaha iboiskon sidea ibagas benteng-bentengni.

⁷ Mandatei do bangsang-Ku mulak hu Bangku. Age pe adong na dilo-dilo bani sidea, seng tarjongjongkoni be.

⁸ Sonaha ma panadingkon-Ku bam, ale Efraim? Sonaha ma parpaturut-Ku bam, ale Israel? Ija ma ra Ahu mambahen bam songon na bani Adma? Ija ma ra Ahu mambahen bam songon na bani Seboim? Marulak-ulakan do uhur-Hu ibagas, nahit do holong ni atei-Hu.

⁹ Seng dalankonon-Ku ringis-Ku na gajag in, seng be parsedaon-Ku Efraim. Ai Naibata do Ahu, sedojolma, ai ma Na Mapansing ai i tongah-tongahnima, seng roh be Ahu mamboiskon.

¹⁰ Irikkonon ni sidea do Jahowa, maraum do la songon singa; tongon, maraum do la, anjaha marrohan ma anakni hitir-hitir hun hasundutan.

- ¹¹ Marrohan do sidea meper-eper songon manuk-manuk hun Masir, anjaha songon asas hun Assur; paulakon-Ku do sidea marianan bani rumah ni sidea,” nini Jahowa.
- ¹² (12-1) “Ilioti Efraim do Ahu marhitei ladung anjaha ginompar ni Israel marhitei pangoto-otoion. Anjaha Juda pe marbalik do humbani Naibata ampa humbani Na Mapansing in, hatengeran ni uhur in.

**Usih do Efraim bani Pargoluhon
ni Ompung ni si Jakob**

- 12** ¹ (12-2) Logou do iparmahan Efraim, anjaha logou hapoltakan do iayak-ayak ari-ari; ipabuei sidea do ladung ampa odoh-odoh. Mambahen parpadanan do sidea pakon Assur, anjaha iboan do minak hu Masir.
- ² (12-3) Anjaha adong do paringoran ni Jahowa pakon Juda; marlulu do la dompak Jakob romban hubani dalanni, anjaha balaskonon-Ni do bani domu hubani pambahenanni.
- ³ (12-4) Bani partapaan ope domma ioto-otoi abangni, anjaha sanggah bani hagogohonni margulgul do ia pakon Naibata.
- ⁴ (12-5) Margumpul do ia pakon malekat anjaha monang do, tangis do ia mangelek-elek idop

ni uhurni. I Betel pajumpah do Naibata pakonsi, anjaha ijai iparsahapkon do ia.

⁵ (12-6) Jahowa, Naibata Zebaot, Jahowa do goran-Ni.

⁶ (12-7) Ai pe, mulak ma ho bani Naibatamu, dalankon ma idop ni uhur ampa uhum, anjaha tongtong martenger ni uhur bani Naibatamu.

⁷ (12-8) Songon partiga-tiga halak Kanaan ijolom Efraim do kilo palsu ibagas tanganni, marosuh do ia manipu.

⁸ (12-9) Nini, 'Tongon, bayak do ahu, dapotan pansarian do ahu. Bani haganup pansariankai seng dong jumpah bangku salah, ai ma dousa.'

⁹ (12-10) Ahu do Jahowa Naibatamu hun tanoh Masir nari, bahenon-Ku do use ho marianan bani lampolampo, songon sanggah panorang na i halimisan.

¹⁰ (12-11) Marsahap do Ahu bani nabi, Ahu do pabuei pangungkabon, anjaha marhitei nabi-nabi marsahap do Ahu marhasoman limbaga.

¹¹ (12-12) Masa do hajahaton i Gilead, gabe bois do sidea; manggalang do sidea bani lombu jonggi i Gilgal, gabe songon timbunan batu ma homa anjapanjap ni sidea i juma na tininggalaan.

- ¹² (12-13) Hu tanoh Aram do maporus si Jakob, marhorja do si Israel ijai halani boru, marmahan biribiri do ia laho mambuat parinangon bani.
- ¹³ (12-14) Marhitei sada nabi iboan Jahowa do Israel mandarat hun Masir, anjaha iparmahan do sidea marhitei sada nabi.
- ¹⁴ (12-15) Sipuhoi ringis do pambahenan ni Efraim, halani ai marsapata hubani do bahenon ni Jahowa utang darohni ai, anjaha balaskononni bani hasamboron na hinorjahonni ai.”

**Efraim Ningon Hona Uhum Halani
Dousani; Ibagahkon Naibata Haluahon
humbani Hamatean Bani**

- 13** ¹ Anggo marsahap Efraim, mabiar do halak, timbul do ia i Israel; tapi halani mardousa ia marhitei Baal, gabe matei ma ia.
- ² Sonari pe, sai inunut sidea do mardousa, ipauli sidea do bani sidea gana-gana tinuang humbani pirak ni sidea, tubuh-tubuh ni uhur ni sidea, jadi-jadian ni tukang do ganupan ai. Nini sidea pasal ai, ‘Manggalang ma hujai! Anak ni lembu do isummahjolma.’
- ³ Halani ai gabe songon hambun sogod-sogod ma sidea, atap songon namur na podas habang; tongon, songon lamlam na hinabangkon ni

logou humbani pardogeian, atap songon
timus na luar humbani jandela.

⁴ Ahu do Jahowa Naibatamu hun tanoh Masir
nari; seng dong Naibata sobali Ahu itanda
ho, anjaha sobali Ahu seng dong Sipaluah.

⁵ Ahu do na mananda ho i halimisan, bani tanoh
na horah-horah;

⁶ Dob dapotan panggagatan sidea Hubahen, jadi
bosur ma sidea; dob bosur sidea, gijang ma
uhurni, gabe lupa ma sidea Bangku.

⁷ Halani ai, songon singa ma Ahu dompak sidea,
songon begu na manggompangi i dalan.

⁸ Songon gipul na magouan anak do Ahu manoroh
bani sidea, parribakon-Ku do tonton ni
sidea; anjaha songon singa boru-boru do
Ahu mamondut sidea ijai, binatang panoroh
na i talun do mamparsilbak sidea.

⁹ Anggo Ahu sipangagou bam, ale Israel, ise ma
na boi paluahkon ho?

¹⁰ Ija do nuan rajamu, na boi mangurupi ho? Ija
do nuan kopala-kopalamu na mamintori ho?
Hubani sidea do ihatahon ho, 'Bere bangku
raja pakon kopala-kopala!'

¹¹ Hubere do bam sada raja ibagas ringis-Ku,
anjaha Hubuat use ibagas gilang-Ku.

¹² Domma hona lak hajahaton ni Efraim, domma
hona simpan dousani.

- ¹³ Pangarouon ni na sihol tubuhan anak do na roh hu bani, tapi anak na so maruhur do ia, age pe roh panorangni seng ra luar ia hun partapaan.
- ¹⁴ Tapi paluahon-Ku do sidea humbani kuasa ni nagori toruh, anjaha tobuson-Ku do sidea humbani hamatean. Ale hamatean, ija do sorodmu? Ale nagori toruh, ija do pangarsik-arsikonmu? Pambalason ponop do humbani matang-Ku.
- ¹⁵ Age marbuahi Efraim i tengah-tengah ni saninani, roh ma logou hapoltakan, ai ma logou humbani Jahowa, naik hun halimisan; gabe horah ma parigini anjaha marsik bah tubuhni; rampason ni ai ma arta-artani, sagala ugas-ugasni na maharga.
- ¹⁶ Maningon manaron do Samaria halani salahni, ai manlawan do ia dompak Naibata. Rasei do sidea bahenon ni podang, hona ropukan na etek-etek ni sidea, anjaha ibolahi boltok ni na boratan rumah.”

Ojur-ojur Bani Hamubahon ni Uhur

14 ¹ Sai mulak ma, ale Israel hubani Jahowa Naibatamu, ai targompang pe ho, halani salahmu do.

² Boan hanima ma hata sihatahononnima anjaha mulak ma bani Jahowa! Hatahon hanima

ma hu Bani, “Sasap Ham ma haganup
hajahatonnami, anjaha bahen Ham ma
na madear bennami, ase iboan hanami
galangan Bamu, ai ma buah ni bibirnami.

³ Sedo Assur sipangurupi bennami, seng be
ra hanami mangajak huda; seng be ra
hanami mangkatahon bani jadi-jadian ni
tangannami: Ham Naibatanami! Bamu do
dapotan idop ni uhur na tading maetek.”

⁴ “Pamalumon-Ku do parbalikon ni sidea. Sihol do
Ahu mangkaholongi sidea, tongon, domma
surut ringis-Ku humbani sidea.

⁵ Songon namur do Ahu bani Israel; marbunga do
ia songon silundat, anjaha marurat songon
hayu na i Libanon.

⁶ Mangerbang do dangkahni; hajengesonni
songon hayu Jetun, anjaha hamisbouonni
songon Libanon.

⁷ Sai mulak do sidea, anjaha marianan i toruh ni
linggom-Hu, gabe songon pohon do sidea,
marbunga songon hayu anggur, anjaha
tarbarita songon anggur na hun Libanon.

⁸ Ale Efraim, bahen aha be bam gana-gana in?
Ahu do na manangihon ampa na manatap
ho; Ahu do songon hayu bolon, Ahu do
harohan ni buahmu.

⁹ Barang ise na maruhur, iparuhurhon ma in!
Barang ise na marpangidah, ididah ma in!

Tongon, pintor do dalan ni Jahowa anjaha
halak parpintor mardalan ijai, tapi anggo
halak parjahat tompas do ijai.”

Joel

Sitaronon Halani Balang Martuduh-tuduh bani Ari ni Tuhan

- 1** ¹ Hata ni Jahowa na roh hubani si Joel, anak ni si Petuel.
- ² Tangihon ma on, nasiam na matua, anjaha pardiateihon ma, nasiam ganup pangisi ni tanoh on! Ongga ma sonon masa bani ari nasiam, atap bani ari ni ompung nasiam?
- ³ Baritahon nasiam ma pasal in hubani anak nasiam, anak nasiam hubani anak ni sidea, anjaha anak ni sidea use hubani sundut na i pudini.
- ⁴ Aha na tinebahon ni tatadu igagat balang, aha na tinebahon ni balang igagat tamponok, anjaha aha na tinebahon ni tamponok igagat hirik.
- ⁵ Puho ma nasiam parmabuk, anjaha tangis ma; mandoraki ma nasiam ganup sisobur anggur, marhalanohon anggur na mantin, ai domma irotap in humbani pamangan nasiam.
- ⁶ Ai domma tangkog dompak tanoh-Ku sada bangsa na gogoh anjaha na so tarhira

bueini; iponni songon ipon ni singa, anjaha
saitni songon sait ni singa boru-boru.

⁷ Domma iparseda hayu anggur-Hu, anjaha
ituhtuhi hayu arang-Ku; domma iorlak
anjaha ipanrumbakkon, domma lopak
sagala rantingni.

⁸ Tangis ma songon boru laho, na marhiou guni
halani tunangan bani haposoonni.

⁹ Domma irotap galangan sipanganon pakon
galangan siinumon humbani rumah ni
Jahowa; marhoru do sagala malim, juakjuak
ni Jahowa.

¹⁰ Domma seda juma, marhoru tanoh, halani
seda omei, horah bah ni anggur anjaha
melus hayu Jetun.

¹¹ Rusak parjuma-juma, mandoraki parpohon
anggur halani gandum pakon bajaurei; ai
magou do partahunan.

¹² Domma melus hayu anggur, anjaha ranggasan
hayu ara; age dalima, kurma, untei ampa
ganup hayu na i talun domma melus;
domma mandaoh homa malas ni uhur
humbani anak ni jolma.

Ojur-ojur Paundukkon Uhur bani Naibata

¹³ Margondit anjaha tangis ma nasiam alo
sagala malim; mandoraki ma nasiam,
nasiam siparugas bani anjapanjap! Roh

ma marborngin, marsabing hiou guni ma nasiam alo juakjuak ni Naibatangku! Ai domma irotap galangan sipanganon pakon galangan siinumon hun rumah ni Naibata nasiam.

¹⁴ Papansing ma sada ari parpuasaon, tingtingkon ma sada ari partumpuan na majombut! Patumpu ma na matua-matua pakon haganup pangisi ni nagori on hu rumah ni Jahowa, Naibata nasiam; anjaha mandoruh ma nasiam bani Jahowa.

¹⁵ Aih, sonaha ma bani ari ai! Ai domma dohor ari ni Jahowa, anjaha songon hasedaon humbani Pargogoh Na So Tarimbang parrohni ai.

¹⁶ Ai lang domma irotap sipanganon hun lobei ni matanta, malas ni uhur ampa olob-olob hun rumah ni Naibatanta?

¹⁷ Domma masik bonih i toruh ni olbakni, domma halong rumah parugasan, mareong tuangan, halani masak omei.

¹⁸ Aih, pangarou ni pinahan in! Humationg do hulanan ni lombu, halani seng dong panggagatan bani sidea; sonai homa hulanan ni biribiri holte-holtean do.

¹⁹ Hu Bamu do ahu, ale Jahowa dilo-dilo. Ai domma bois ipangan apuy sampalan na i

halimisan, anjaha mosog sagala hayu na i talun ibahen gajag ni apuy.

- ²⁰ Sonai homa binatang harangan dilo-dilo do hu Bamu, ai domma horah sagala bah, anjaha domma bois ipangan apuy sampalan na i halimisan.

Domma Lambin Dohor Ari Uhum Banggal

- 2** ¹ Sompul nasiam ma tarompit i Sion, anjaha mardilo-dilo ma nasiam i atas dolog hapansingon-Ku! Hitir ma ganup pangisi ni tanoh on, ai na roh ma ari ni Jahowa, ai domma dohor.
- ² Sada ari na golap marimpot-impot, sada ari na marhombun pakon turun sabun. Songon simarikkuning sogod merap ma i atas dolog in sada bangsa na banggal anjaha na gogoh; seng onggga ope masa sisonin humbani na basaia, anjaha dob ai pe seng dong be masa torus marsundut-sundut.
- ³ Apuy na mangankon i lobeini, anjaha dilah ni apuy na gara i pudini. Songon pohon Eden do tanoh in i lobeini, tapi gabe halimisan na lungun i pudini, anjaha seng dong na maluah humbani sidea.
- ⁴ Songon rumang ni hudu do rumang ni sidea, anjaha songon hudu porang paranjak ni sidea.

- ⁵ Songon pardorom ni garetu porang panlumpat
ni sidea i atas dolog, songon sora ni gajag
ni apuy na mangankon anggala, songon
bangsa na gogoh, na gopas marsinjata hu
hamunsuhon.
- ⁶ Gobir do sagala bangsa i lobeini, marposi bei
ganup bohi.
- ⁷ Marlinton sidea songon puanglima, songon
parmunsuh manangkihi tembok. Ganup
sidea marsitohu dalanni, anjaha seng
manlembang sidea humbani dalan ni sidea
bei.
- ⁸ Seng marsisosak-sosakan sidea, marsitohu
dalanni bei do, iusung sidea do sinjata, seng
marnarotap odoran ni sidea.
- ⁹ Marhujai-hujon do sidea ibagas huta,
marlintuni i atas tembok; ipanangkihi sidea
rumah-rumah, masuk hun jandela songon
panangko.
- ¹⁰ Dugur do tanoh on i lobei ni sidea, langit
mangkutur, manggolapi do mata ni ari pakon
bulan, anjaha bintang-bintang manjolomi
sinalsalni.
- ¹¹ Jadi ipamaling Jahowa ma sora-Ni i lobei ni
bala-Ni; buei tumang do bala-Ni, margogoh
tumang do la pasaudkon hata-Ni. Ai bangga
do ari ni Jahowa anjaha majangin tumang,
ise ma na tolak manahan ai?

Tingting Mangkatahon Paubahkon Uhur

- ¹² Tapi sonari pe nini Jahowa do, “Sai mulak ma nasiam hu Bangku humbani gok ni uhur nasiam marhitei parpuasaon, marhitei partangison pakon marhitei doruh-doruh;
- ¹³ anjaha rigati nasiam ma uhur nasiam, ulang hiou nasiam.” Mulak ma nasiam bani Jahowa, Naibata nasiam, ai pardear layak anjaha paridop uhur do la, parlumbang ni uhur anjaha parholong atei bangga, anjaha marpangulaki do uhur-Ni mangidah hamagouan.
- ¹⁴ Ise mambotoh atap mulak anjaha isolsoli uurni, anjaha itebai sada pasu-pasu i pudini bahen galangan sipanganon pakon siinumon bani Jahowa, Naibata nasiam.
- ¹⁵ Sompul ma tarompit i Sion, papansing ma sada parpuasaon, tingtingkon ma sada partumpuan na majombut.
- ¹⁶ Patumpu ma bangsa in, papansing kuria in; pahumpul ma na matua-matua, patumpu dakdanak pakon na inumon; kaluar ma siparunjuk hun iananni, pakon tunangan hun kamarni.
- ¹⁷ Tangis-tangis ma i holangkolang ni surambih ampa anjapanjap malim pakon juakjuak ni Jahowa anjaha ihatahon sidea ma, “Ramoti

ham ma bangsamu ale Jahowa, anjaha ulang ma ondskon bangsa na tinean-Mu gabe sirisaon, gabe umpama ni bangsa sipajuh begu-begu." Mase ma ihata-hatahon halak i tengah-tengah ni sagala bangsa, "Ija do Naibata ni sidea in?"

Marpangulaki do Uhur ni Jahowa bani Bangsa-Ni

- ¹⁸ Jadi marsimburu ma Jahowa mangkopkop tanoh-Ni, anjaha marpangulaki uhur-Ni mangidah bangsa-Ni.
- ¹⁹ Dob ai nini Jahowa ma mambalosi bangsa-Ni, "Torih ma, tongoson-Ku ma bani nasiam gandum, anggur pakon minak ase bosur nasiam, anjaha seng be bahenon-Ku nasiam sirisaon i tengah-tengah ni sagala bangsa.
- ²⁰ Padaohon-Ku do humbani nasiam munsuh na hun utara, anjaha usiron-Ku do ia hu sada tanoh na horah anjaha na lungun, odoran parpudi hu laut parhasundutan, odoran parlobei hu laut parhapoltakan, maningon masik anjaha marbau ia halani pambahenan hagijangonni.
- ²¹ Ulang ma mabiar ho ale tanoh, marolob-olob anjaha marmalas ni uhur ma ho, ai banggal do pambahenan ni Jahowa.
- ²² Ulang ma mabiar hanima, ale pinahan na i talun, halani martumbor ma use

parmahanan na i halimisan, marbuah ma
use hayu, anjaha bereon ni hayu ara pakon
hayu anggur ma use gogoh ni sidea.

²³ Nasiam anak ni Sion, marolob-olob anjaha
marmalas ni uhur ma nasiam ibagas
Jahowa, Naibata nasiam; ai ibere do
bani nasiam guru bahen hapintoron
nasiam, iparoh do udan na doras bani
nasiam, udan partidahonkon ampa udan
parpariamaonkon songon sapari.

²⁴ Jadi junjun ma omei i pardogeian, anjaha
sampur ma anggur pakon minak hun
pangilangan.

²⁵ Pasuangon-Ku ma bani nasiam partahunan na
ginagat ni balang, tamponok pakon hirik,
tentarang-Ku na buei in, na Hupabingkat
dompok nasiam.

²⁶ Anjaha bosuran ma nasiam mangan, anjaha
pujion nasiam ma goran ni Jahowa, Naibata
nasiam, na mambahen halongangan i
tongah-tongah nasiam; seng be bador
bangsang-Ku sadokah ni dokahni.

²⁷ Botohon nasiam ma, na i tongah-tongah
ni Israel do Ahu, anjaha Ahu do Jahowa,
Naibata nasiam seng dong na legan; anjaha
seng be marhabadoron bangsang-Ku
sadokah ni dokahni.”

²⁸ [[EMPTY]]

29 [[EMPTY]]

30 [[EMPTY]]

31 [[EMPTY]]

32 [[EMPTY]]

Uhum bani Bangsa Sipajuh Begu-begu i Pamah Josapat

- 3** ¹ “Ai tonggor ma, bani ari ai pakon bani
panorang ai, anggo mulak Hubobahon ma
na tarbuang hun Juda pakon Jerusalem,
² patumpuon-Ku ma haganup bangsa parbegu
anjaha patuadon-Ku ma sidea hu habungan
Josapat, jadi uhumon-Ku ma sidea ijai,
halani bangsang-Ku pakon tean-teanan-Ku
Israel, na nierap ni sidea hu tongah-tongah
ni bangsa sipajuh begu-begu, anjaha na
binagini ai tanoh-Ku,
³ halani marsijomput na sinurat sidea pasal
bangsang-Ku, ibere sada dakdanak dalahi
libei ni sada boru jalang, anjaha ijual sada
dakdanak naboru libei ni anggur, anjaha
isobur ma ai. (Nah. 3:10)
⁴ Anjaha hanima pe, ale Tirus, Sidon ronsi
haganup jajahan ni Pilistea, ahanima do
Ahu? Sihol dong paulakonnima hu Bangku,
atap sihol dong balaskononnima hu Bangku?
Podas anjaha barah ma balaskonon-Ku
pambahenannima hubani ulunima.

- ⁵ Ai ibuat hanima do pirak pakon omas-Ku, anjaha
iboan hanima arta hasudungan ni uhur-Hu
hubagas rumah panumbahannima.
- ⁶ Ijual hanima do anak ni Juda pakon Jerusalem
hubani halak Gorik laho paganggangkon
sidea daoh hun tanoh ni sidea.
- ⁷ Torih ma, parohon-Ku ma sidea hun tanoh
panjualannima bani sidea anjaha
balaskonon-Ku ma pambahenannima
hubani ulunima.
- ⁸ Jualon-Ku ma anaknima pakon borunima hu
tangan ni halak Juda, anjaha sidea manjual
ai hubani halak Seba, hubani sada bangsa
na daoh;" ai Jahowa do na mangkatahon ai.

Pasu-pasu ni Jahowa bani Bangsa-Ni

- ⁹ "Tingtingkon nasiam ma in i tongah-tongah ni
bangsa sipajuh begu-begu. Marugas ma
nasiam hu parporangan, puhoi nasiam ma
sagala puanglima, roh ma marporang sagala
dalahi siparporang.
- ¹⁰ Patopahon nasiam ma hudali nasiam bahen
podang, ampa sasabi nasiam bahen tanja;
hatahonon ni na galek in ma, 'Puanglima do
ahu.'
- ¹¹ Papodas anjaha roh ma nasiam sagala
bangsa na inggot, martumpu ma nasiam

hujai.” Ham ale Jahowa, patuad ma hujai puanglima.

¹² “Misir anjaha tangkog ma sagala sipajuh begu-begu hu pamah Josapat, ai ijai do sihol marparatas Ahu laho manguhum sagala bangsa sipajuh begu-begu na inggot in. (ay. 2)

¹³ Sabihon ma sasabi in, ai domma toras sisabion. Roh ma nasiam manluntak, ai domma gok pangilangan. Domma sampur homa sagala tong, ai buei do hajahaton ni sidea.

¹⁴ Marhulan-hulan sidea i habungan pamutusan; ai dohor ma ari ni Jahowa i pamah pamutusan.

¹⁵ Manggolapi do mata ni ari pakon bulan, anjaha ijolomi sagala bintang do sinalsalni.”

¹⁶ Morom ma Jahowa hun Sion, anjaha ipagogoh sora-Ni hun Jerusalem, gabe dugur ma langit pakon tanoh on. Tapi Jahowa do haporusan bani bangsa-Ni ampa batar-batar bani halak Israel.

¹⁷ “Gabe tandaon nasiam ma, Ahu do Jahowa, Naibata nasiam, na marianan i Sion, dolog hapansingon-Kin. Gabe pansing ma Jerusalem, anjaha seng bontason ni halak na legan be in.

¹⁸ Bani ari ai manekteki ma anggur hun sagala dolog, mabaor dadih hun buntu-buntu,

anjaha mardalan bah humbani sagala bah ni Juda. Kaluar ma sada bah tubuh hun rumah ni Jahowa mangarbahi habungan Sittim.

¹⁹ Gabe tanoh dorging ma Masir anjaha gabe halimisan na lungun Edom halani hajahaton na binahen ni sidea hubani halak Juda, na manduruskon daroh ni na so marpipot i tanoh ni sidea.

²⁰ Tapi siianonkon do Juda ronsi sadokah ni dokahni, anjaha Jerusalem marsundut-sundut.

²¹ Anjaha balaskonon-Ku do daroh ni sidea, na so Hubalaskon ope. Jadi marianan ma Jahowa i Sion.”

Amos

Uhum ni Naibata bani Bangsa-bangsa, Sonai Homa bani Juda ampa Israel

1 ¹ Hata ni si Amos, sada halak humbani parmahan na hun Tekoa, ai ma na nididahni pasal Israel bani panorang ni si Usia, raja ni Juda, ampa bani panorang ni si Jerobeam, anak ni si Joas, raja ni Israel, dua tahun i lobei ni lalou ai.

² Jadi nini ma, “Martaur do Jahowa hun Sion, anjaha ipagogoh sora-Ni hun Jerusalem. Jadi marhoru ma sampalan ni parmahan, anjaha melus ma pakpak ni Karmel.”

³ Sonon do hata ni Jahowa, “Halani na tolu panlanggaron ni Damaskus ampa halani na ompat ai seng pasuruton-Ku uhum ai, halani na dob idogei sidea Gilead marhitei pambogbog bosi ni omei.

⁴ Halani ai tongoskonon-Ku ma apuy hubani rumah ni si Hasael, anjaha siapkononni ma benteng-benteng ni si Benhadad.

⁵ Ropukan-Ku ma pating-pating ni Damaskus, anjaha siapkonon-Ku pangisi ni Bikat-Awen ampa sijolom tungkot harajaon na hun

Bet-Eden; anjaha halak Aram tarbuang hu Kir,” nini Jahowa.

⁶ Sonon do hata ni Jahowa, “Halani na tolu panlanggaron ni Gasa ampa halani na ompat ai seng pasuruton-Ku uhum ai, ai ibuangkon sidea do hibul pangisi ni sada nagori, iondoskon hu Edom.

⁷ Halani ai tongoson-Ku do apuy bani tembok ni Gasa, anjaha siapkononni ma benteng-bentengni.

⁸ Anjaha siapkonon-Ku ma pangisi ni Asdod ampa sijolom tungkot harajaon hun Askalon, patoltolon-Ku ma tangan-Ku dompak Ekron, anjaha magou ma simasima ni Palistim,” nini Tuhan Jahowa.

⁹ Sonon do hata ni Jahowa, “Halani na tolu panlanggaron ni Tirus ampa halani na ompat ai seng pasuruton-Ku uhum ai, ai iondoskon sidea do hibul pangisi ni sada nagori hu Edom, anjaha seng idingat padan parsaninaon.

¹⁰ Halani ai tongoson-Ku do apuy bani tembok ni Tirus, anjaha siapkononni ma benteng-bentengni.”

¹¹ Sonon do hata ni Jahowa, “Halani na tolu panlanggaron ni Edom ampa halani na ompat ai seng pasuruton-Ku uhum ai, ai ipardakdak do saninani marhitei podang,

anjaha iintopi holongni, gabe torus marsiraki ringisni, anjaha tongtong isimpan gilani.

¹² Halani ai tongoson-Ku ma apuy hu Teman, anjaha siapkononni ma benteng-benteng ni Borsa.”

¹³ Sonon do hata ni Jahowa, “Halani na tolu panlanggaron ni halak Amon ampa halani na ompat ai seng pasuruton-Ku uhum ai, ai ilapahi sidea do na boratan rumah i Gilead, laho pabolakkon parbalogan ni sidea.

¹⁴ Halani ai pagaraon-Ku ma apuy bani tembok ni Rabba, gabe bois panganonni benteng-bentengni marhasoman surak-surak bani mata ni parporangan, marhasoman habahaba bani panorang hamamasa ni halisungsung.

¹⁵ Anjaha raja ni sidea tarboan hu habuangan, ia rap pakon raja-raja na i toruhni,” nini Jahowa.

2 ¹ Sonon do hata ni Jahowa, “Halani na tolu panlanggaron ni Moab ampa halani na ompat ai seng pasuruton-Ku uhum ai, halani na tinutunganni ai holiholi ni raja Edom bahen hapur.

² Jadi tongoson-Ku ma apuy hubani Moab, gabe panganonni ma bois benteng-benteng ni Keriot, anjaha Moab matei ma ibagas hageoron, i tongah-tongah ni surak-surak ampa sora ni tarompit.

- ³ Anjaha siapkonon-Ku ma panrajai hun
tongah-tongahni, anjaha bunuhon-Ku ma
kopala-kopalani rap pakonsi,” nini Jahowa.
- ⁴ Sonon do hata ni Jahowa, “Halani na tolu
panlanggaron ni Juda ampa halani na
ompat ai seng pasuruton-Ku uhum ai, ai
iambungkon sidea do titah ni Jahowa,
anjaha seng idalankon aturan-Ni, tapi
sisombahon parladung ni sidea ai do
pakahouhon sidea, ai ma na niirikkon ni
ompung ni sidea homa;
- ⁵ halani ai tongoson-Ku do apuy hubani Juda,
gabe panganonni ma bois benteng-benteng
ni Jerusalem.”
- ⁶ Sonon do hata ni Jahowa, “Halani na tolu
panlanggaron ni Israel ampa halani na
ompat ai seng pasuruton-Ku uhum ai, ai
ijualhon sidea do parpintor marhalanihon
pirak, ampa halak na miskin marhalanihon
sipatu sapasang.
- ⁷ Idogei-dogei sidea do ulu ni halak na maetek
ibagas orbuk ni tanoh, anjaha iusir do halak
na masombuh. Rap laho do anak ampa
bapani marayak boru jalang, gabe butak
goran-Ku na mapansing in.
- ⁸ Ipatibal sidea do dirini i lambung ni sagala
anjapanjap, i atas ni hiou gadeian, anjaha

isobur anggur ni halak na hona donda ibagas rumah ni naibata ni sidea.

- ⁹ Ahu do namin na maniapkon halak Amori i lobei ni sidea, na songon gijang ni hayu areg gijangni anjaha songon jajabi Gogohni, Ahu do parsedahon buahni i atas ampa uratni i toruh.
- ¹⁰ Ahu do homa na mangarahkon hanima luar hun tanoh Masir, anjaha Huring-iring do hanima ompat puluh tahun i halimisan, laho manean tanoh ni halak Amori.
- ¹¹ Anjaha Ahu do na pabangkitkon deba humbani anaknima gabe nabi, anjaha deba humbani parananima gabe halak Nasir. Ai lang tongon do sonai, alo nasiam halak Israel?" nini Jahowa.
- ¹² "Hape ipainumkon hanima do anggur bani halak Nasir, anjaha iparentahkon hanima bani nabi, 'Seng bulih hanima manjahai.'
- ¹³ Tonggor ma, odohkonon-Ku ma hanima bani ianannima, songon pangodohkon ni garet, na gok radean.
- ¹⁴ Seng marguna ijai halintunon bani halak na lingk, seng tarunsagahkon halak pargogoh gogohni, anjaha seng tarpaluah halak na borani hosahni;
- ¹⁵ halak parsior pe seng tahan jongjong, anjaha halak na lingk mardalan seng tarpaluahisi

dirini, anjaha sonai homa siajak huda seng tarpaluahisi hosahni.

- ¹⁶ Age paruhur na pag i tongah-tongah ni halak na borani, maningon talanjang maporus bani ari ai,” nini Jahowa.

Humbani Naibata do Hata Panjahaion

3 ¹ Tangar nasiam ma hata on na hinatahon ni Jahowa pasal nasiam, alo nasiam halak Israel, pasal ganup bangsa in, na huarahkon luar hun tanoh Masir,

- ² “Pitah hanima do na Hutandai humbani sagala bangsa na i tanoh on, halani ai balaskonon-Ku ma bannima sagala hajahatonnima ai.

- ³ Mintor tumaram ma odor dua halak mardalan anggo seng parlobei mardos ni uhur sidea?

- ⁴ Mintor tumaram ma maraum singa ibagas harangan anggo seng dong sorohanni? Mintor tumaram ma pamalingon ni anak ni singa sorani humbagas liangni, anggo seng dong na jumpahsi?

- ⁵ Mintor tumaram ma madabuh manuk-manuk bani tirangkap i tanoh, anggo seng dong sigiutini? Mintor tumaram ma tolkas siding ai hun tanoh, anggo seng dong dapotsi?

- ⁶ Mintor tumaram ma hona sompul tarompit ibagas huta, lang gobir halak? Mintor

tumaram ma masa parmaraan ibagas huta,
na so binahen ni Jahowa?

⁷ Tongon tene, seng dong ipamasa Tuhan Jahowa,
anggo lang palobei ipatalar rusia-Ni bani
nabi, juakjuak-Ni ai.

⁸ Maraum singa, ise na so mabiar? Marsahap
Tuhan Jahowa, ise ma na so manjahai?

Uhum Halani Hagedukon ni Israel

⁹ Pabogeihon nasiam ma hubani benteng-
benteng na i Assur ampa hubani
benteng-benteng na i tanoh Masir, anjaha
hatahon ma, “Martumpu ma nasiam hu
atas dolog ni Samaria, anjaha idah nasiam
ma hageoron bolon na ibagas ai, ampa
pandorunon na i tongah-tongahni.

¹⁰ Seng ibotoh sidea be mambahen na
pintor,” nini Jahowa; “Ipajunjun sidea
do panamunon ampa hagedukon ibagas
benteng-benteng ni sidea.”

¹¹ Halani ai sonon do nini Tuhan Jahowa,
“Munsuh ma manginggoti tanoh on, anjaha
patoruhonni ma humbam partahananmu,
anjaha ayobonni ma benteng-bentengmu.”

¹² Sonon do hata ni Jahowa, “Songon parpaluah
ni parmahan hun babah ni singa dua
hae-hae barang sangkibul pinggol, sonai do
paluahon halak Israel, na hundul i suhi-suhi

ni podoman ampa i atas ni tutup podoman
na lambut.

¹³ Tangar anjaha saksihon hanima ma in dompak
rumah ni si Jakob,” nini Tuhan Jahowa,
Naibata Zebaot.

¹⁴ “Bani ari panguhum-Hu bani Israel halani
hajahaton ni sidea ai, uhumon-Ku ma
anjapanjap ni Betel, ponggolhonon-Ku ma
ijai tanduk ni anjapanjap ai anjaha dabuh hu
tanoh.

¹⁵ Parsedaon-Ku ma rumah musim borgoh
ampa rumah musim milas, magou ma
rumah gading, anjaha masabkonon-Ku ma
rumah-rumah bolon ai,” nini Jahowa.

Lumba-lumba Dompok Naboru na Sangap i Samaria

4 ¹ “Tangar nasiam ma hata on, nasiam
lombu na hun Basan, na i Dolog Samaria,
na mandondon halak na musil, na
mandogei-dogei halak na maetek, na
mangkatahon hubani paramangonni, Boan,
ase minum-minum hanami!’

² Domma marbulawan Tuhan Jahowa bani
hapansingon-Ni. Tongon, tonggor ma,
na roh ma ari bannima, saradon ni sidea
ma hanima marhitei hait-kait anjaha
simasimanima marhitei hail.

- ³ Jadi luar ma hanima hun bungbung ni tembok,
ganup marsidompakkon dalanni bei i
lobeini, anjaha saradon ma hanima hu
Dolog Hermon,” nini Jahowa.

Pasal Parugamaon ni Halak Israel

- ⁴ “Roh ma hanima hu Betel anjaha manjahati ma;
hu Gilgal anjaha tambahi ma panlanggaron.
Boan ma galangan sisayatonnima ganup
sogod, ampa parsapuluhannima ganup
patolu-ariankon.
- ⁵ Tutung hanima ma galangan hatarimakasihon
humbani ruti niigaran, anjaha tingtingkon
hanima ma galangan niojur ni uhur,
baritahon hanima ma ai. Ai lang sonai
do rosuhnima sibahenonnima, alo halak
Israel?” nini Tuhan Jahowa.

Paruhuron ni Israel na So Ra Mubah

- ⁶ “Age pe domma Hubahen seng dong sihilhilon
ni ipon ibagas ganup hutanima ampa
hahurangan bani ruti bani ganup ianannima,
tapi lanjar seng ra hanima mulak hu
Bangku,” nini Tuhan Jahowa.
- ⁷ “Sonai homa Hupalogou do udan hun bannima
tolu bulan nari paima pariama. Hutongos
do udan bani huta na sada, bani na sada
nari lang, marudan do juma na sada, anjaha

juma na sada nari na so dapotan udan,
horah ma.

⁸ Jadi madou-adou ma dua barang tolu huta laho
hu huta na legan laho minum bah, tapi
seng sombuh horahni. Tapi, lanjar do seng
ra hanima mulak hu Bangku,” nini Tuhan
Jahowa.

⁹ “Domma Hulibas hanima marhitei antinganou
ampa hameluson, Huparseda pohonnima
ampa pohon anggurnima, anjaha hayu
jambunima ampa hayu jetunnima bois
igagati balang; tapi lanjar do hanima seng ra
mulak hu Bangku,” nini Jahowa.

¹⁰ “Domma Huparoh sampar hu tongah-
tongahnima songon na dompak Masir,
Huraseihon garamanima marhitei podang,
Huluahon ganup hudanima, anjaha
Hupaanggohkon bau ni parsaranannima
hubagas igungnima, tapi lanjar do seng
mulak hanima hu Bangku,” nini Jahowa.

¹¹ “Hupamasa do hasedaon i tongah-tongahnima,
songon na dob pinarseda ni Naibata Sodom
pakon Gomora, gabe songon sipu-sipu na
tinarik hanima humbani apuy, tapi lanjar
do seng ra hanima mulak hu Bangku,” nini
Jahowa.

¹² “Halani ai sonon do na sihol bahenon-Ku
bannima, alo Israel! Halani sonon ma na

sihol bahenon-Ku bam, marugas ma ho
manjumpahkon Naibatamu, alo Israel!

- ¹³ Ai tonggor ma, la na manjadihon dolog, na
manompa logou, na pabotohkon bani
jolma aha pingkiran-Ni, na manjadihon
sibalikkuning gabe hagolapan, anjaha na
mardalan i atas ni buntu-buntu ni tanoh on,
Jahowa, Naibata Zebaot do goran-Ni.”

Tangis-tangis Pasal Halak Israel

- 5** ¹ “Tangar hanima ma hata on, na Hutangiskon
pasal hanima, ale ginompar ni Israel.
² Domma dabuh boru Israel, seng
tarjongjongkorsi be; jorgong tibal ia
i tanohni, seng dong na pajongjongkorsi.
³ Ai sonon do hata ni Tuhan Jahowa, ‘Huta na
pabingkatkon saribu, tading hunjai saratus,
na pabingkatkon saratus, tading hunjai
sapuluh bani ginompar ni Israel.’”

Dalan hu Hagoluhan

- ⁴ Ai sonon do hata ni Jahowa bani ginompar
ni Israel, “Pindahi Ahu, ase manggoluh
hanima!
⁵ Tapi ulang ma pindahi Betel, anjaha ulang ma
laho hu Gilgal barang mandipar hanima hu
Berseba; ai maningon buangkononkon do
Gilgal, anjaha gabe na lang do Betel.

- ⁶ Pindahi nasiam ma Jahowa, ase manggoluh nasiam, ase ulang idorab rumah ni si Josep marhasoman apuy, bois ipangan, anjaha sahalak pe lang adong na mangintopi i Betel.
- ⁷ E nasiam na pagolingkon uhum gabe pogu, anjaha na mangambukkon hapintoron hu tanoh!
- ⁸ Ia, sijadihon bintang pariama ampa bintang sidongdong, na paubahkon na lotir gabe sogod ni ari, na pagolapkon ari gabe borngin, na mandilo bah ni laut laho manguseihon ai hu atas tanoh, Jahowa do goran-Ni.
- ⁹ Ia do na parohkon hasedaon bani halak na gogoh, gabe sogop hasiapon bani benteng.”

Pinsang-pinsang Pasal Hajungkaton ni Israel

- ¹⁰ Ihasogamkon sidea do sidalankon uhum i horbangan, anjaha magigi sidea mangidah halak sihatahon na sintong.
- ¹¹ Halani ai, ibahen na idogei-dogei hanima halak na musil, anjaha iporoh hanima humbani sidea sibere-bere gandum, age pe ipauli hanima rumah humbani batu na binarbar seng anjai ianannima ai; sonai homa, age pe isuani hanima pohon anggur na dear-dear, seng inumonima anggurni.
- ¹² Ai Hubotoh do buei ni panlanggaronnima, ampa sonaha banggal ni dousanima

manosak halak parpintor, manjalo sisip,
anjaha mangodohkon halak na musil i
paruhuman.

- ¹³ Halani ai sip ma halak paruhur bani panorang
on; ai panorang na jahat do on.

Ojur-ojur hu Hamubahon ni Uhur

- ¹⁴ Pindahi nasiam ma na madear, ulang ma na
jahat, ase manggoluh nasiam; ase tongon
ma Jahowa, Naibata Zebaot hasoman
nasiam, songon na hinatahon nasiam.

- ¹⁵ Hagigihon nasiam ma na jahat, haholongi
nasiam ma na madear, anjaha pajongjong
nasiam ma uhum i horbangan, andohar
marpangulaki uhur ni Jahowa, Naibata
Zebaot mangidah simasima ni si Josep.

Lumba-lumba Pasal Ari ni Jahowa

- ¹⁶ Halani ai sonon do hata ni Jahowa, Naibata
Zebaot, Tuhan In, “Bani haganup alaman
masa tangis-tangis; anjaha bani haganup
dalan hatahonon ni sidea, ‘Aih, aih!’ Diloon
ni sidea do parjuma-juma laho manangisi,
ampa na pandei tangis laho manjojori.
- ¹⁷ Anjaha bani haganup pohon anggur masa
doruh-doruh, anggo montas Ahu hun
tongah-tongahnima,” nini Jahowa!

- 18 “Bursik ma hanima na mangkasiholi ari
ni Jahowa! Ai aha do ari ai bannima?
Hagolapan do ai, seng haliharon.
- 19 Songon sada halak na bansah humbani singa,
hape roh gipul manjumpahkonsi; barang
masuk hu rumah anjaha itungkolhon
tanganni bani dingding, hape roh ulog
mamagutsi.
- 20 Ai halotiron do tongon ari ni Jahowa, sedo
haliharon, hagolapon do, seng dong
haliharon ibagas.”

**Gigi ni Uhur ni Naibata Mangidah
Ugama Pardarat Tumang**

- 21 “Sogam anjaha magigi do uhur-Hu mangidah
ari rayanima, anjaha seng iharosuhkon
uhur-Hu tumpuannima.
- 22 Age pe igalangkon hanima Bangku galangan
situtungan ampa galangan sipanganon,
seng marosuh Ahu bani ai, anjaha
galangan pardearan humbani pinahan
na pinamombur pe, seng ra Ahu
mangkawahkon ai.
- 23 Padaoh hun Bangku hageoron ni dodingnima,
anjaha logu ni husapinima pe seng marosuh
Ahu manangar ai.

²⁴ Tapi mabaor ma bahen hanima uhum songon bah, anjaha hapintoron songon bah na totap marbanggal.

²⁵ Ai adong do iboan hanima galangan sisayaton ampa sibere-bere Bangku i halimisan sadokah siompat puluh tahun ai, ale ginompar ni Israel?

²⁶ Halani ai usungonnima ma Sakut, rajanima ai, ampa Kiwun, bintang ni naibatanimai ai, ganagananima, na binahennima bannima.

²⁷ Jadi toguon-Ku ma hanima tarbuang, daoh hu dipar ni Damaskus,” nini Jahowa, na margoran Naibata Zebaot.

Pangarapan Palsu ampa Pangkorhonni

6 ¹ Bursik ma halak na so marpanarian i Sion, ampa halak na mangahapkon aman i Dolog Samaria, ai ma halak na sangap i tongah-tongah ni bangsa sibetengan, tuan-tuan ni ginompar ni Israel.

² Mandipar ma nasiam manorih hu Kalne, dob ai laho ma nasiam hu Hamat, huta na bolon ai; dob ai tuad ma nasiam hu Gat, huta ni halak Palistim. Mintor dearan ma sidea ase harajaon on? Atap bolagan ma tanoh ni sidea ase tanoh nasiam?

³ E nasiam na mangagan daoh ari hamagouan ai, hape lambin ipadohor nasiam do tahun hasedaon ai;

- ⁴ nasiam na martibalan i atas ni podoman
gading, na patordangkon diri i atas ni
podoman-podomanni, na mangankon
biribiri humbani hulanan ampa anak ni
lombu humbani harang;
- ⁵ nasiam na mandoding-doding pairik-irik sora
ni husapi ampa na padomu-domu doding
songon si Daud;
- ⁶ nasiam na manginum anggur simantinan ampa
na mamminaki diri marhitei minak sidearan,
tapi na so mangkaruhon hasedaon ni si
Josep.
- ⁷ Halani ai maningon sidea ma na parlobei
tarbuang humbani na tarbuang, anjaha
maronti ma surak-surak ni halak na
pasonang-sonangkon dirini.

Lumba-lumba Pasal Uhum na Sihol Roh

- ⁸ Domma pala marbulawan Jahowa bani
diri-Ni, nini Jahowa Naibata Zebaot do,
“Magigi do Ahu mangidah gijang ni uhur
ni Jakob, anjaha sogam do uhur-Hu bani
benteng-bentengni, anjaha palopason-Ku
ma tarulang huta ai ampa ganup pangisini.
- ⁹ Anjaha porini tading ope sapuluh halak ibagas
rumah, maningon matei do sidea.
- ¹⁰ Jadi anggo dong sindohorni atap na mananomsi
sihol mambuatsi, laho padaratkon holiholi ai hun

rumah ai, jadi hatahononni ma hubani halak na i kamar parbagas ni rumah ai, ‘Adong ope atap ise rapkon ho?’ Jadi hatahononni ma, ‘Ise pe lang!’ Tapi hatahononni ma, ‘Sip! Seng bulih diloon goran ni Jahowa.’

¹¹ Ai tonggor ma, Jahowa do na mamarentahkon, gabe iropuki halak rumah na bolon, anjaha itahai rumah na etek-etek.

¹² Mintor mardingkal ma huda i atas dolog batu, barang adong ma na maninggala laut marhitei lembu? Tapi ipaubah hanima do hasintongan gabe rasun ampa buah ni hapintoron gabe pogu.

¹³ Hanima na mangkamalaskon Lodebar, na mangkatahon, ‘Ai lang domma italuhon hita banta Karnaim marhitei gogohta?’

¹⁴ Tonggor ma, puhoan-Ku ma sada bangsa ase iimbang hanima, alo ginompar ni Israel,” nini Jahowa, Naibata Zebaot, “jadi sosakonni ma hanima olat ni dalan laho hu Hamat das hu bah na i Araba.”

Panonggoran na Parlobei: Balang

7 ¹ Sonon do ipataridahkon Tuhan Jahowa bangku, “Tonggor ma, manjadihon balang do la bani mulani martumbor poyon-poyon, anjaha tonggor ma, sagak ni panabian ni raja in do ai.”

² Jadi dob bois igagati suan-suanan ni tanoh ai, ningku ma, “Ham Tuhan Jahowa, marpangulaki ma uhur-Mu! Sonaha ma partahan ni Jakob jongjong? Etek tumang do ia.”

³ Jadi marpangulaki ma uhur ni Jahowa pasal ai.
“Seng pala saud be in,” nini Jahowa.

Panonggoran na Paduahon: Apuy na Mangankon

⁴ Sonon do ipataridahkon Jahowa bangku: Tonggor ma, idilo Tuhan Jahowa do apuy laho manguhum, domma pala iboiskon luhung bagas ai, anjaha ipangan homa tanoh ai.

⁵ Jadi ningku ma, Ham Tuhan Jahowa, “Mahua parontihon Ham ma in! Sonaha ma partahan ni Jakob jongjong! Etek tumang do ia.”

⁶ Jadi marpangulaki ma uhur ni Jahowa pasal ai. “On pe seng pala saud be,” nini Tuhan Naibata.

Panonggoran na Patoluhon

⁷ Sonon do ipataridahkon Jahowa bangku: Tonggor ma, jongjong do Tuhan in i atas ni sada tembok, manjolom batu baragu ibagas tanganni.

⁸ Dob ai nini Jahowa ma hu bangku, “Aha do na nididahmin Amos?” Ningku ma, “Sada batu baragu.” Dob ai nini Tuhan ma, “Tonggor ma, Hupagistang do batu baragu i tengah-tengah ni

bangsang-Ku, Israel. Seng marpangulaki be uhur-Hu mangidahsi.

⁹ Maningon tarulang ma paturuton tanoh dolog ni si Isak, anjaha sedaonkon rumah panumbahan ni Israel, anjaha Ahu jongjong mangimbang ginompar ni si Jerobeam marhitei podang.”

Hona Usir si Amos

¹⁰ Jadi isuruh si Amasia, malim ni Betel ma suruhanni hu bani si Jerobeam, raja ni Israel, nini ma, “Martahi-tahi do si Amos dompak ham i tongah-tongah ni ginompar ni Israel, seng tartaron tanoh in hata-hatani ganup.

¹¹ Ai sonon do nini si Amos, ‘Maningon matei si Jerobeam marhitei podang, anjaha maningon tarbuang Israel daoh hun tanohni.’”

¹² Dob ai nini si Amasia ma dompak si Amos, “E, parpanonggoran, laho ma ho, maporus hu tanoh Juda, anjaha ijai ma ho mangan ruti, anjaha ijai ma ho manjahai!

¹³ Ulang ma nunuti manjahai anggo i Betel, ai huta hapansingon ni raja in do in, anjaha rumah panumbahan harajaon.”

¹⁴ Dob ai ibalosi si Amos ma si Amasia, “Seng nabi namin ahu barang anak ni nabi, tapi parmahan do ahu anjaha sipaturei-turei hayu ara.

¹⁵ Tapi ibuat Jahowa do ahu humbani na mangalai biribiri, anjaha ihatahon Jahowa hu bangku, ‘Laho ne, manjahai dompak bangsang-Ku Israel!’

¹⁶ On pe, tangihon ma hata ni Jahowa. Nimu,
‘Ulang ho manjahai dompak Israel, anjaha ulang hatahon hatamu dompak ginompar ni si Isak.’

¹⁷ Halani ai, sonon do hata ni Jahowa, ‘Gabe boru jalang ma parinangonmu ibagas huta, anjaha anakmu pakon borumu rasei ma ibahen podang, anjaha bagion tanohmu marhitei tali sibar-sibar; anjaha ho sandiri matei i tanoh na mabutak, anjaha Israel maningon tarbuang daoh hun tanohni.’”

Panonggoran Pasal Buah na Mabei bani Anjapanjap

8 ¹ Sonon do ipataridahkon Jahowa hu bangku:
Tonggor ma, sada hirang marisi buah na dob mabei.

² Dob ai nini ma, “Aha do na nididahmu Amos?”
Jadi ningku ma, “Sada tapongan marisi buah na dob mabei.” Dob ai nini Jahowa ma dompak ahu,
“Domma jumpah ujung ni bangsang-Ku, Israel, seng marpangulaki be uhur-Hu mangidahsi.

³ Gabe tangis-tangis ma pandoding naboru na
i rumah panumbahan bani panorang ai,”
nini Tuhan Jahowa, “radag ma holi bangkei

bani ganup ianan, panggijingknononkon ma ai sip-sip.”

Pinsang-pinsang Halani Pamoyaton

- ⁴ Tangar ma on, nasiam na mandogei-dogei na musil anjaha na mangodoh-odoh halak na masombuh i tanoh on,
- ⁵ na mangkatahon, “Antigan pe salpu poltak ni bulan, ase manjual omei hita? Antigan salpu homa ari Sabat, ase boi aruhononta omeita laho manjual ai, ase boi paetek-etekonta tumba anjaha panaikonta harga, anjaha boi hita mandalankon sipaoto-oto marhitei timbangan palsu,
- ⁶ ase boi bolionta halak na musil marhitei pirak ampa halak na masombuh marhitei sapasang sepatu, sonai homa manjualhon lapung ni gandum?”

Isurahon Jahowa Mansiapkon Bangsa-Ni

- ⁷ Domma pala marbulawan Jahowa bani hamuliaon ni si Jakob, “Tongon, seng anjai halupahonon-Ku be pambahenan ni sidea ai ganup.
- ⁸ Mintor lang ma dugur tanoh on halani ai, anjaha marpusok ni uhur sagala pangisini? Mintor lang ma sampur ganupan ai songon Bah Nil

anjaha ipalindak-lindak, dob ai surut use songon Bah Masir?

- ⁹ Bani panorang ai,” nini Tuhan Jahowa,
“bahenon-Ku ma mata ni ari sundut tongah ari, anjaha manggolapi tanoh on arian.
- ¹⁰ Paubahon-Ku ma ari rayanima gabe pusok ni uhur, anjaha ganup doding-dodingnima gabe tangis-tangis. Nahkonon-Ku ma guni bani binongeinima ampa hapalpalon bani ganup ulu. Bahenon-Ku ma ai songon pusok ni uhur bani parmatei ni anak sasada, anjaha ujung ni ai songon ari na gok hapaeton.”
- ¹¹ “Tonggor ma, na roh ma arini,” nini Tuhan Jahowa, “tongoson-Ku ma lohei hu tanoh on, sedo lohei bani ruti barang horah bani bah, tapi bani hata ni Jahowa do, sihol tangaronni namin.
- ¹² Jadi madou-adou ma sidea hun laut na sada hu laut na sada nari, anjaha hun utara hu hapoltakan; mardalani sidea hujai-hujon, laho mangindahi hata ni Jahowa, tapi seng anjai jumpah sidea ai.
- ¹³ Bani ari na sada ai mandatei ma anak boru na majenges ampa anak parana halani horahan.
- ¹⁴ Sidea na marbulawan bani Asera ni Samaria, anjaha na mangkatahon, ‘Songon sintongni manggoluh naibatamu, ale Dan, anjaha

songon naibata, parlingodanmu manggoluh do, ale Barseba, maningon ragei do sidea holi, anjaha seng be tarjongjongkansi.”

Panonggoran Pasal Uhum na Maningon Roh

9 ¹ Huidah do Tuhan in jongjong i atas anjapanjap, jadi nini ma, “Palu ma ulu ni tiang in, ase dugur molmolan. Ropukan-Ku ma ulu ni sidea ganup, anjaha bunuhon-Ku do simasima ni sidea marhitei podang, sada pe lang humbani sidea na maluah, sada pe lang humbani sidea na maporus, na boi pabansah dirini.

² Porini pe manrutas sidea das hu nagori toruh, alopon ni tangan-Ku do sidea hunjai; anjaha porini pe manangkih sidea das hu nagori atas, paturunon-Ku do sidea hunjai.

³ Porini pe marponop sidea i pakpak ni Karmel, pindahan-Ku do sidea hujai, anjaha boanon-Ku sidea mulak hunjai; porini pe marponop sidea hun lobei-Hu ibagas luhung ni laut, parentahkonon-Ku do ijai naga mangkarat sidea.

⁴ Porini pe laho sidea hu habungan i lobei ni munsuh ni sidea, parentahkonon-Ku do ijai podang mamunuhi sidea, anjaha dompakkonon-Ku do matang-Ku bani sidea laho mangagou, seng laho padearhon.”

- ⁵ Tuhan Naibata Zebaot na manjamah tanoh on gabe malala, anjaha marhoru ganup pangisini, gabe sampur songon Bah Nil ganup tanoh in, anjaha surut use songon Bah Masir;
- ⁶ Ia na paulihon kamar pardatasni i nagori atas anjaha na pajongjongkon langit-langitni i atas tanoh on, ia na mandilo bah ni laut, anjaha iuseihon use hu atas tanoh on, Jahowa do Goran-Ni.

Parpapitah ampa Haluahon

- ⁷ “Ai lang songon halak Etiopia do hanima Bangku, ale halak Israel?” nini Jahowa. “Ai lang Ahu do na mangarahkon halak Israel luar hun tanoh Masir, anjaha halak Palistim hun Kaptor, anjaha halak Aram hun Kir?
- ⁸ Tonggor ma, sai kawah do mata ni Tuhan Jahowa mangimbang harajaon sipardousa in, anjaha siapkonon-Ku do in hun datas tanoh on; tapi seng siap tumang bahenon-Ku anggo ginompar ni si Jakob,” nini Jahowa.
- ⁹ “Tonggor ma, Ahu mamarentahkon anjaha manogu ginompar ni Israel i tongah-tongah ni ganup bangsa, songon halak na marsege marhitei anduri, tapi sangkamata pe lang dong na porngis maperper hu tanoh.

- ¹⁰ Maningon matei do marhitei podang sagala pardousa hun tongah-tongah ni bangsang-Ku, sagala na mangkatahon, 'Seng tumaram das barang mangonai banta hamagouan ai.'
- ¹¹ Bani ari ai pajongjongon-Ku ma use lampolampo ni si Daud na dob mareong in, paulion-Ku ma tembokni na mangkabungbung, anjaha umbanon-Ku sagala na mangkareong, paulion-Ku do use usih songon na bani mula-mulani, ase sidea manean simasima ni Edom
- ¹² ampa haganup bangsa na targoran bani goran-Ku," nini Jahowa, na mandalankon sonai.
- ¹³ "Tonggor ma, na roh ma arini," nini Jahowa, "marsijaloan ma paninggala pakon siparpariama, parkilang pakon sipanuan, mantektekkon anggur sagala dolog, anjaha linir dolog-dolog ganupan.
- ¹⁴ Pasuangon-Ku ma use hadearon ni bangsang-Ku halak Israel, ase ipauli use huta na dob maseda ai lanjar iiani, ase ipungkah use pohon anggur lanjar inumonni anggurni, anjaha ibahen juman i lanjar daionni gogohni.
- ¹⁵ Suankonon-Ku ma sidea i tanoh ni sidea, anjaha seng be orbaton-Ku sidea hun tanoh

ni sidea, na dob hubere bani sidea,” nini
Jahowa, Naibatamu.

Obaja

Uhum bani Edom Halani Hajungkatonni Dompak Israel

(Pausih Jer. 49:7-22)

- 1** ¹ Panonggoran ni si Obaja. Sonon do hata ni Tuhan Jahowa pasal Edom, domma ibogei hanami sada barita humbani Jahowa, anjaha domma isuruh sada utusan hu tongah-tongah ni bangsa-bangsa, eta, bingkak ma hita marmunsuh dompaksi.
- ² “Tonggor ma, paetekon-Ku ma ho i tongah-tongah ni bangsa-bangsa, mahiri tumang ma ho.
- ³ Gijang ni uhur do na paoto-otohon ho, ho na marianan ibagas liang ni batu, na gijang pariananmu, ho na mangkatahon ibagas uhurmu, ‘Ise ma na boi manjombahon ahu hu tanoh?’
- ⁴ Age pe gijang ho mayap-ayap songon haluhuy, anjaha asarmu ibahen ho i holangkolang ni bintang, sai dabuhonon-Ku do ho hunjai,” nini Jahowa.
- ⁵ “Anggo roh panangko bam, barang sipanrampok borngin-borngin tontu siap ma ho! Ai lang

ansa na sungkup bani sidea do tangkoonni?
Anggo roh sitangko anggur marayak ho, ai
lang tading ope turiang bahenon ni sidea?

⁶ Tapi sonaha do in parsursar ni Esau, hona
sungkapan do arta ponopanni!

⁷ Das hu parbalogan ijuar-juar ganup halak
sisapanriahanmu do ho, ioto-otoi anjaha
ipatunduk hasomanmu do ho, hasoman
hatengeran ni uhurmu do manaon tirangkap
bam. Seng dong pangarusion bani.

⁸ Nai ma, bani ari ai," nini Jahowa, "siapkonon-Ku
ma halak na pentar hun Edom ampa
pangarusion hun dolog ni si Esau.

⁹ Bajoraon ma puanglimamu ale Teman, ase bois
ganup hona bunuh dalahi hun dolog ni si
Esau.

¹⁰ Halani hajahatonmu bani anggimu si Jakob,
maningon rungkubon ni habadoron ma ho,
anjaha siapkononkon ho ronsi sadokah ni
dokahni.

¹¹ Ijia, sanggah na jongjong ai ho dohor hujai,
sanggah na itangkapi halak na legan ai
balani, anjaha imasuki parnagori na legan
ai horbanganni, anjaha mandabuh ruji-ruji
sidea pasal Jerusalem, dihut do ho ijai sada
humbani sidea ai.

¹² Tapi seng patut namin marpuas-puas ho pasal
ari ni anggimu bani ari hamagouanni; seng

patut namin marmalas ni uhur ho mangidah
halak Juda bani parbois ni sidea, anjaha
seng patut namin mangoga-oga ho bani ari
hasosakan ni sidea.

¹³ Seng patut namin masukanmu horbangan
ni bangsang-Ku bani ari parbois ni sidea;
seng patut namin marpuas-puas ho bani
ari hamagouanni; anjaha seng bulih namin
padurduronmu tanganmu mambuat
ugas-ugasni bani ari parsiapni.

¹⁴ Seng bulih namin jongjong ho bani sirpang
ni dalan, laho manraseihon na maporus
humbani sidea; seng bulih namin
tahihononmu sagala na maluah humbani
sidea bani ari hasosakanni.

¹⁵ Dohor mando ari ni Jahowa bani ganup
bangsa-bangsa. Songon na dob binahenmu,
sonai ma bahenon-Ku bam, mulak bani
ulumu ma pambahenanmai.

¹⁶ Ai songon parminumnima i atas dolog
hapansingon-Ku, sonai ma bangsa-bangsa
inggot minum, minum ma tongon sidea
anjaha munjei-unjei; anjaha adong pe sidea,
hira na so adong hinan do.

Bagah-bagah Pasal Haluahon ni Sion

¹⁷ Tapi anggo i atas ni Dolog Sion, adong do
holi haluahon anjaha gabe pansing do ai,

anjaha teanon ni ginompar ni si Jakob do use parbagianan ni sidea ai.

¹⁸ Dob ai gabe apuy ma ginompar ni si Jakob, anjaha gabe dilah ni apuy ginompar ni si Josep, tapi gabe anggala ma ginompar ni si Esau; jadi nahitan ni sidea ma ai anjaha monsongkononni, anjaha seng dong be simasima ni ginompar ni si Esau, ai Jahowa do mangkatahon ai.

¹⁹ Jadi teanon ni sidea ma tanoh dangsina, ai ma dolog ni si Esau ampa pamah ni halak Palistim; teanon ni sidea do homa tanoh ni Efraim ampa tanoh ni Samaria; tapi si Benjamin do manean Gilead.

²⁰ Anjaha na tarbuang humbani halak Israel do manean tanoh ni halak Kanaan das hu Sarpas, anjaha halak na tarbuang hun Jerusalem, na marianan i Separat, sidea do manean huta na i tanoh dangsina.

²¹ Anjaha tangkog ma sipaluah hu Dolog Sion, laho manguhum dolog ni si Esau, jadi ondos bani Jahowa ma harajaon ai.

Jona

Pandiloon bani si Jona ampa Parporusni

1 ¹ Dob ai roh ma hata ni Jahowa hubani si Jona, anak ni si Amitai, nini,

² “Bingkat ma ho laho hu Ninive, huta na banggal ai, anjaha martingting ma ho dompak huta ai; ai domma das Bangku pasal hajahaton ni sidea.”

³ Jadi bingkat ma si Jona laho maporus hu Tarsis hun lobei ni Jahowa. Tuad ma ia hu Joppe, anjaha jumpahsi ma ijai kapal na sihol laho hu Tarsis, igalar ma ongkosni, dob ai masuk ma ia hubagas, laho marlayar pakon sidea hu Tarsis, maporus hun lobei ni Jahowa.

⁴ Tapi iparoh Jahowa ma logou na gogoh hu laut ai, gabe margilumbang ampa marampilaos ma laut ai, gabe laho-laho maripuk ma kapal ai.

⁵ Jadi mabiar ma parkapal ai, anjaha ganup ma marsidilo naibatani bei; ipanggijigkon sidea ma parugas-parugas na adong i kapal ai hubagas laut laho pahampungkon namin. Tapi anggo si Jona domma tuad hu kamar partoruh ni kapal, domma ipapodom bani anjaha sinok tumang.

⁶ Dob ai roh ma kapiten ni kapal ai bani, nini ma dompaksi, “Aha do na masa bam, ase modom-

modom ho? Puho ho, dilo Naibatamu, andohar marulak-ulakan uhur-Ni mangidah hita, ase ulang magou hita.”

⁷ Dob ai nini sidea ma samah sidea, “Baen, marruji-ruji ma hita ase ibotoh hita atap halani ise do ase sogop parmaraan on banta.” Jadi marruji-ruji ma sidea, gabe hona ma si Jona.

⁸ Dob ai nini sidea ma hu bani, “Patugah ma bennami, ise do siparsalah ase sogop parmaraan on banta? Aha do horjamu? Roh hunja do ho? Partanoh ja do ho? Anjaha halak aha do ho?”

⁹ Jadi nini ma dompak sidea, “Halak Heber do ahu, anjaha Jahowa sitompa langit do huhabiari, la do sitompa laut ampa darat.”

¹⁰ Mabiari tumang ma halak ai, jadi nini sidea ma dompaksi, “Ai aha adong ibahen ham?” Ai ibotoh halak ai ma, na maporus do hape ia hun lobei ni Jahowa, humbani na dob pinatugahni ai.

¹¹ Nini sidea ma hu bani, “Aha ma sibahenonnamu, ase minop laut in i lobeita?” Ai lambin parahni do laut ai.

¹² Nini ma dompak sidea, “Angkat nasiam ma ahu lanjar gijigkon nasiam hubagas laut in, ase minop laut in i lobei nasiam. Ai hubotoh, halani ahu do ase roh logou na parah on bani nasiam.”

¹³ Dob ai igogohkon halak ai ma namin manlugahon kapal ai hu pasir, tapi seng tolapi; ai lambin jobuni do laut ai dompak sidea.

¹⁴ Jadi dilo-dilo ma sidea dompak Jahowa, nini ma, “Ale Jahowa, ulang ma lopas Ham hanami magou halani hosah ni halak on, anjaha ulang ma marsapata bahen Ham bennami daroh na so marpipot, ai ibahen Ham do ale Jahowa, domu hubani harosuh ni uhur-Mu.”

¹⁵ Dob ai iangkat sidea ma si Jona lanjar igijigkon hubagas laut ai. Jadi soh ma laut ai humbani na gunsang ai.

¹⁶ Jadi mabiar tumang ma halak ai mangidah Jahowa; manggalang ma sidea bani Jahowa, anjaha marbagah-bagah bei Bani.

¹⁷ (2-1) Dob ai iparoh Jahowa ma sada dengke na banggal laho mamondut si Jona, jadi ibagas bituha ni dengke ai ma si Jona, tolu ari tolu borngin.

Tonggo ni si Jona ampa Parluahni

2 ¹ (2-2) Dob ai martonggo ma si Jona hubani Jahowa Naibata, humbani bituha ni dengke ai,

² (2-3) nini ma, “Dilo-dilo do ahu ibagas hasosakanku hubani Jahowa, jadi ibalosi do ahu; humbani bituha ni nagori toruh do dilo-dilo ahu, itangihon Ham do sorangku.

³ (2-4) Igijigkon Ham do ahu hu na bagas, hu tongah-tongah ni laut, gabe iinggoti bah do ahu; ganup umbakmu ampa gilumbangmu mardalan i babouhu.

- ⁴ (2-5) Anggo ahu, domma huhatahon, domma pinabali ahu hun lobei ni panonggor-Mu. Sonaha ma boi ahu use mangkawah dompak rumah hapansingon-Mu?
- ⁵ (2-6) Bah do rungkub i babouhu, iinggoti bah na bagas do ahu, anjaha limut maralit-alit bani ulungku.
- ⁶ (2-7) Tuad do ahu ronsi bona ni dolog, anjaha pating-pating ni tanoh pe domma tutup i pudingku lalab. Ijia ma ipatangkog Ham goluhku humbagas godung, ale Jahowa Naibatangku.
- ⁷ (2-8) Sanggah mandatei hosahku ibagas, hudingat ma Jahowa; jadi das ma tonggongku Bamu, hu rumah hapansingon-Mu.
- ⁸ (2-9) Tapi halak na mambalosi sisombahon sisoya-soya, na manadingkon haporusanni do sidea ai.
- ⁹ (2-10) Tapi anggo ahu marhasoman sora puji-pujian do ahu manggalang Bamu, galaronku do na dob hubagahkon. Bani Jahowa do haluahon.”
- ¹⁰ (2-11) Dob ai marsahap ma Jahowa hubani sengke ai; jadi iutahkon ma si Jona bani na horah.

Ambilan ni si Jona i Ninive ampa Pangkorhonni

3¹ Dob ai roh ma use hata ni Jahowa paduahalihon hubani si Jona sonon,

² “Bingkat ma ho laho hu huta Ninive, huta na bolon ai, anjaha dilohon ma ijai hata sipatugahon-Ku hubam.”

³ Jadi bingkat ma si Jona laho hu Ninive domu hubani hata ni Jahowa. Huta na bolon tumang do Ninive ai, tolu ari mardalan bolagni.

⁴ Dob ai ipungkah si Jona ma mardalan ibagas huta ai parsadarian. Idilohon ma, “Ompat puluh ari nari mando, jadi marongrong ma Ninive!”

⁵ Jadi porsaya ma halak na i Ninive bani Naibata; itingtingkon sidea ma ase marpuasa, jadi marhiou guni bei ma sidea, humbani halak na magodang ronsi na etek-etek.

⁶ Dob ai das ma barita ai bani raja ni Ninive. Jongjong ma ia humbani paratasni, itanggali ma pakeianni, isorungkon ma baju guni anjaha hundul ma ia bani abuan.

⁷ Dob ai isuruh raja ai ma na martingting paboahon i Ninive, “Songon na pinarentahkon ni raja in ampa hasomanni na sangap-sangap: Jolma barang pinahan, lombu barang biribiri pe, seng bulih mandai atap aha pe, seng bulih manggagat, bah pe seng bulih inumonni.

⁸ Maningon marhiou guni haganup, jolma atap pinahan pe, anjaha gogoh bei dilo-dilo bani Jahowa; anjaha ganup jolma maningon mulak do humbani dalanni na bajan ai ampa humbani hagedukon na hinorjahon ni tanganni.

⁹ Ise mambotoh, andohar marpangulaki uhur ni Jahowa anjaha isolsoli diri-Ni, isalpuhon pargajag ni ringis-Ni, gabe seng magou hita.”

¹⁰ Jadi dob ididah Jahowa pambahenan ni sidea ai, ai ma na mulak ai sidea humbani dalan ni sidea na bajan ai, gabe isolsoli Naibata ma diri-Ni pasal hamagouan, na nilumbahon-Ni sibahenon-Ni bani sidea; jadi seng be saud ibahen.

Ipodahi Naibata si Jona

4 ¹ Tapi sogam do uhur ni si Jona pasal ai, jadi manringis ma ia.

² Jadi martonggo ma ia bani Jahowa, nini ma, “Ale Jahowa, ai lang on do na huhatahon sanggah i tanohku ope ahu? Halani ai do ase tarolos ahu maporus hu Tarsis, ai hubotoh do, Naibata paridop ni uhur ampa pardear layak do Ham, nanget manringis anjaha parholong atei banggal anjaha na ra manolsoli diri-Ni pasal hamagouan.

³ Ai pe ale Jahowa, buat Ham ma rahanan hosahku humbangku, ai dearan ma ahu matei humbani na manggoluh.”

⁴ Nini Jahowa ma mambalosi, “Ai patut ma manggila ho?”

⁵ Dob ai luar ma si Jona hun huta ai, jadi ipahundul ma dirini hampit hapoltakan ni huta ai. Ipauli ma bani ijai sopo-sopo anjaha hundul ma ia ijai marlinggom-linggom, paima ididah barang aha do na sihol masa bani huta ai.

⁶ Jadi iadongkon Jahowa ma sada hayu na dulas ganjang ibabou ni si Jona bahen linggom ni uluni, laho paluahkonsi humbani paruhuranni na seda ai. Malas tumang do uhur ni si Jona mangidah hayu ai.

⁷ Tapi bani parnaik ni sibalikkuning patarni ai, iadongkon Jahowa ma sada gilok-gilok; iruangi ma hayu ai gabe melus ma.

⁸ Bani parpoltak ni mata ni ari iparoh Jahowa ma logou na milas hun hapoltakan. Idoit mata ni ari ai ma ulu ni si Jona pala mandatei iahap. Iparsinta uhurni ma matei, nini ma, “Dearan ma ahu matei ase manggoluh!”

⁹ Dob ai nini Jahowa ma dompak si Jona, “Ai patut ma ho manggila halani hayu in?” Nini ma mambalosi, “Patut do ahu mangila das ronsi na matei.”

¹⁰ Jadi nini Jahowa ma, “Gari ho pusok do uhurmu halani hayu in, na so hinangalutkonmu anjaha na so pinabanggal-banggalmu, tubuh ibagas saborngin anjaha magou ibagas saborngin.

¹¹ Samintolah ma Ahu, mintor lang ma idop uhur-Hu mangidah Ninive, huta na banggal in, na marisi lobih saratus dua puluh ribu jolma, na so mambotoh parleganan ni siamun barang sambilou, ambahni ai pinahan na sain bueini?”

Mika

Uhum ni Naibata bani Israel pakon Juda

1 ¹ Hata ni Jahowa, na roh bani si Mika, par Moreset ai, bani panorang ni si Jotam, si Ahas pakon si Hiskia, raja ni Juda, ai ma na niidahni pasal Samaria ampa Jerusalem.

² Tangar ma, nasiam ganup bangsa! Paruhurhon nasiam ma tanoh ampa pangisini, paboa Tuhan Jahowa do manaksihon mangimbang nasiam, Tuhan in, hun rumah hapansingon-Ni ai.

³ Tonggor ma, luar do Jahowa humbani ianan-Ni, tuad do la, mardalan i atas buntu-buntu ni tanoh on.

⁴ Malala do dolog i toruhni, anjaha mabolah habungan songon pantis i lambung apuy, songon bah madurus bani raboyon.

⁵ Halani panlanggaron ni Jakob do ganupan ai anjaha halani dousa ni Israel. Hunja do hasalahan ni Jakob? Ai lang hun Samaria do ai? Anjaha hunja do dousa ni ginompar ni Juda? Ai lang hun Jerusalem do ai?

⁶ Jadi bahenon-Ku ma Samaria gabe gugunan batu i tongah ladang, gabe pohon panuanan

ni anggur mando; gulangknon-Ku ma
batuni hu habungan, anjaha patidakon-Ku
onjolanni.

- ⁷ Ganup gana-ganani ropukonkon do, anjaha
ganup upah parriah-riahonni mosogkonon
do, anjaha ganup sisombahonni sedahonon-
Ku do; ai humbani upah ni boru jalang do ai
ipatumpu sidea, anjaha maningon mulak do
ai gabe upah ni boru jalang.

Tangis-tangis ni Nabi ai

- ⁸ Halani ai do ase tangis anjaha doruh-doruh ahu,
mardalan seng marsipatu anjaha talanjang
do ahu; dokik-dokik do ahu songon baliang
harangan anjaha doruh-doruh songon
manuk-manuk unta,
- ⁹ ai seng hatambaran ugah ni panlonsingan
ni Jahowa, anjaha torus do ai hu Juda,
das hu horbangan ni bangsangku, das hu
Jerusalem.
- ¹⁰ Ulang patugah nasiam ai i Gat, ulang tangis
nasiam i Akko; i Betleapra ma nasiam
margulu i abuan.
- ¹¹ Bingkat ma nasiam pangisi ni Sapir, talanjang
marhahirion; borani luar ia pangisi
ni Saanan. Tangis-tangis ni Bet-Ezel
manlanglangi nasiam marianan ijai.

- ¹² Hitir do pangisi ni Marot paima-imahon na madear, halani domma turun hamagouan humbani Jahowa age bani horbangan ni Jerusalem.
- ¹³ Pasang nasiam ma huda bani gareta, nasiam pangisi ni Lakis; in do parmulaan ni dousa bani boru Sion, ai bamu do jumpah panlanggaron ni Israel.
- ¹⁴ Halani ai bere ma surat sirang bani Moreset-Gat. Rumah-rumah ni Aksib do gabe sipangoto-otoi bani raja ni Israel.
- ¹⁵ Ambahni ai parohon-Ku ope sipartaban bam, ale pangisi ni Maresa, das ronsi Adullam roh na sangap-sangap ni Israel.
- ¹⁶ Palpali dirimu, marsuhur ma ho halani anak haudungan ni uhurmu; pabolag palpalmu songon haluhuy, ai boanon ma sidea humbam hu habuangan.

Lumba-lumba Hamagouan

- 2** ¹ Bursik ma halak na manguhur-uhurhon hajahaton ampa na manranggi-ranggi hamagouan bani podomanni anjaha na mandalankon ai siangkonsi ari, halani ibagas tangan ni sidea kuasa.
- ² Impol uhur ni sidea bani juma, irampas ma ai; impol bani rumah, jadi ibuat sidea ma ai; banijolma ampa parbagiananni.

- ³ Halani ai sonon do hata ni Jahowa, “Tonggor ma, Ahu pe domma Hupingkir-pingkir hamagouan dompak bangsa on; seng tumaram maluah borgoknima hunjai, anjaha seng be padirgak-dirgak ulu hanima mardalan, ai panorang hamagouan do ai.
- ⁴ Bani ari ai doding-dodingkonon ni halak ma pasal hanima, anjaha tangis-tangiskononni ma, nini, ‘Domma siap botul hanami; iparbagi do parbagianan ni bangsangku, ise pe lang na paulakkon ai bangku; ibagihon do jumanta bani halak sitaban hita.’”
- ⁵ Halani ai seng dong halak na hampit ho, na pagistangkon tali sibar-sibar bani tanoh sirujihononkon, bani kuria ni Jahowa.
- ⁶ “Ulang marambilani! Nini sidea bani ambilanni. Seng ambilankonon na sonai. Seng anjai mangonai bennami hadorunon si sonin.
- ⁷ Bulih ma sonai hatahononkon, alo ginompar ni Jakob? Ai na dob hurang sabar do Jahowa? Ai sonon do pambahenan-Ni? Ai lang dear do hata-Ni bani halak na pintor marpangabak?”
- ⁸ Tapi domma girah hinan bangsang-Ku gabe imbang; irampas hanima do mantel ampa baju-baju ni halak pamolus na nalom maruhur, na so parporang.

- ⁹ Iusir hanima do puang-puang ni bangsang-Ku
hun rumah ni sidea marsonang-sonang;
humbani dakdanak ni sidea ibuat hanima do
hasangapon-Ku ronsi sadokah ni dokahni.
- ¹⁰ Jongjong anjaha laho ma hanima! Ai seng
ianan hasonangan on; halani habutakon
maningon siap tumang ai.
- ¹¹ Nai ma, anggo roh sada halak, na mangkatahon
logou ampa ladung: “Ambilankononku ma
bamu pasal anggur ampa minuman koras”!
parambilan na sonai ma harosuh ni bangsa
on.

Bagah-bagah Haluahon

- ¹² “Sai na patumpuon-Ku do ganup hanima,
ale Jakob, sai na patumpuon-Ku do sidea
simasima ni Israel; bahenon-Ku do sidea
sada, songon biribiri ibagas harang, songon
sada hulanan i sampalan, sada hulanan ni
jolma na buei.
- ¹³ Sitotas dalan mardalan i lobei ni sidea;
bontason anjaha lopusan ni sidea ma
horbangan, laho luar hunjai. Raja ni sidea
mardalan i lobei ni sidea, anjaha Jahowa do
parlobei ni sidea.”

Lumba-lumba bani Pambobai ni Bangsa ai

- 3** ¹ Dob ai ningku ma, “Tangihon ma, nasiam kopala-kopala ni Israel, ampa nasiam sigomgom ginompar ni Israel! Ai lang talup do botohon nasiam uhum?
- ² Nasiam na magigi bani na madear, na marosuh bani na masambor, na manlikliki hulingkuling ni angkula ni sidea, anjaha na mambuati sibuk-sibuk ni sidea humbani holi-holini,
- ³ na mamangani sibuk-sibuk ni bangsangku, na manlikliki hulingkuling ampa na manropuki holi-holi ni sidea, na manggatgati sidea songon gulei ibagas hudon, songon toktokni ibagas balanga.
- ⁴ Dob ai dilo-dilo ma sidea bani Jahowa, tapi seng anjai balosan-Ni sidea lingodkonon-Ni ma bohi-Ni dompak sidea bani panorang ai, halani na jahat ai pambahenan ni sidea.

Lumba-lumba dompak Nabi-nabi

- ⁵ Sonon do hata ni Jahowa dompak nabi, na pakahouhon bangsangku, na mandilo-dilohon “damei”, anggo dong sihilhilon ni ipon ni sidea, tapi na maningtingkon porang dompak halak na so mannahkon atap aha bani pamanganni?

- ⁶ Halani ai roh ma borngin bannima, na so marpanonggoran, ampa hagolapan na so marpanjahaion. Sundut ma mata ni ari bani nabi-nabi on, anjaha gabe halotiron ma arian bani sidea.
- ⁷ Mela ma halak na marpanonggoran, anjaha bador ma halak sipanjahai; haganup sidea manrungkub gumisni, ai seng dong roh balos humbani Naibata.
- ⁸ Tapi anggo ahu gok do bangku kuasa. Tonduy ni Jahowa, uhum ampa hagogohon, laho patugahkon panlanggaronni hubani Jakob ampa dousani hubani Israel.

Hagedukon ni Pambobai i Jerusalem

- ⁹ Tangihon ma on, nasiam kopala-kopala ni ginompar ni Jakob ampa nasiam pambobai ni ginompar ni Israel, na mangkagigihon uhum, tapi na papeolhon sagala na pintor,
- ¹⁰ na paulihon Sion marhitei daroh ampa huta Jerusalem marhitei hagedukon.
- ¹¹ Manjalo sisip do kopala ni sidea mandabuh uhum, malim ni sidea manjalo upah mamodahi, anjaha nabi ni sidea manjalo pirak do manjahai, lanjar mangunsagah ope sidea marhitei Jahowa, nini, “Ai lang Jahowa do i tongah-tongahta? Seng tumaram sogop banta hamagouan!”

- ¹² Ai pe, halani nasiam maningon tinggalaon do Sion songon juma, Jerusalem maningon gabe gugunan batu, anjaha dolog onjolan ni rumah panumbahan ai gabe harangan.

Harajaon Hadameion na Sihol Roh

(ay. 1-3: pausih Jes. 2:2-4)

- 4** ¹ Jadi masa do holi bani ari parpudi: Jonam ma dolog ianan ni rumah ni Jahowa gijangan humbani dolog-dolog, anjaha atasan humbani raboyon. Jadi marurup ma hujai bangsa-bangsa,
- ² anjaha buei bangsa sipajuh begu-begu laho hujai, nini, “Eta, laho ma hita tangkog hu dolog ni Jahowa, hu rumah ni Naibata ni si Jakob, ase iajarhon banta dalan-Ni, anjaha mardalan hita bani dalan-Ni. Ai hun Sion do roh titah anjaha hata ni Jahowa hun Jerusalem.”
- ³ Jadi manguhum ma la itongah-tongah ni buei bangsa, anjaha bahenon-Ni ma haputusan mangonai bangsa-bangsa na bolon das hubani na daoh, jadi patopahonon ni sidea ma podang ni sidea gabe tinggala, anjaha tanja ni sidea gabe sasabi. Seng be sintakon ni bangsa dompak bangsa podang, anjaha seng be guruhanon ni sidea parmunsuhon.

- ⁴ Hundul bei ma sidea i toruh ni hayu anggurni
ampa i toruh ni hayu arani, anjaha seng
dong be na manonggoti sidea, ai pamangan
ni Jahowa Zebaot do mangkatahon in.
- ⁵ Ai ganupan bangsa mardalan ibagas goran ni
naibatani bei, tapi anggo hita ibagas goran
ni Jahowa Naibatanta do mardalan ronsi
sadokah ni dokahni.
- ⁶ “Bani ari ai,” nini Jahowa, “patumpu-
tumpuon-Ku ma halak na tempang, anjaha
pahumpulon-Ku ma halak na dob nierapkon
ampa na dob Hupasipal hinan.
- ⁷ Pagoluhon-Ku ma na mengkat-engkat ai gabe
simasima, anjaha bangsa na dob nierapkon
ai gabe bangsa na gogoh, anjaha Jahowa
raja ni sidea i Dolok Sion olat ni on ronsi
sadokah ni dokahni.
- ⁸ Tapi anggo ho, ale Migdal-Eder, buntu-buntu
ni boru Sion, roh do bam, mulak do bam
panggomgomion sapari, ai ma panrajaion ni
boru Jerusalem.
- ⁹ Tapi nuan, mase sonai gogoh ni pandoruhmu?
Seng dong be raja i tongah-tongahmu?
Ai na dob matei do sipanuturi bam, ase
mangarou ho songon puang-puang na laho
mangintubuh?
- ¹⁰ Odonkon anjaha guaskon ma, ale boru Sion,
songon puang-puang na laho mangintubuh.

Ai maningon luar do ho nuan hun huta in,
anjaha marianan i ladang, maningon laho
do ho hu Babel. Ijai ma ho paluahon, ijai
ma ho tobuson ni Jahowa hun tangan ni
munsumu.

¹¹ Tapi nuan, martumpu do buei bangsa sipajuh
begu-begu dompak ho, na mangkatahon,
“Nibutakan ma in, ase marsombuh-sombuh
matanta mangidah Sion.”

¹² Seng ibotoh sidea pingkiran ni Jahowa anjaha
seng iarusi sidea sura-sura-Ni, ai ma na
patumpuhon sidea songon radean hu
pardogeian.

¹³ “Jongjong ma ho anjaha mardogei ma, ale
boru Sion, ai bahenon-Ku ma tandukmin
gabe bosi anjaha sisilonmu gabe tombaga,
gabe marosak ma bahenonmu buei bangsa,
anjaha papuligonmu ma bani Jahowa
pansarian ni sidea ai, habayakon ni sidea ai
bani Tuhan sigomgom ganup tanoh on.”

5 ¹ (4-14) Ai pe roh ma hanima marhulan-hulan,
ale boru siparmunsuh! Domma hona hubu hita,
anjaha marhitei tungkot ilibas huyum ni siuhum
Israel.

Tugah-tugah pasal Mesias ampa Harajaon-Ni

² (4-1) “Tapi anggo ho, ale Betlehem Eprata,
age pe etek ho i tongah-tongah ni

marga Juda, humbam do roh Bangku na gabe panggomgomi bani Israel, anjaha harorohanni humbani nahinan, humbani ari na basaia.”

³ (4-2) Halani ai ondoskonon do sidea bani munsuh das bani panorangni, paima tubuhan tuah na mantubuhkon ai; dob ai mulak ma simasima ni saninani ai hubani halak Israel.

⁴ (4-3) Dob ai jongjong ma la marmahan sidea marhitei gogoh ni Jahowa, marhitei hamuliaon ni goran ni Jahowa Naibatani ai. Dob ai sonang ma sidea marianan, ai timbul ma la ronsi ujung ni tanoh on,

⁵ (4-4) anjaha la ma gabe hadameion. Anggo roh Assur hu tanohta anjaha imasuki rumah bolonta, jadi bahenonta ma mangimbangsi pitu parmahan ampa ualuh raja humbani jolma.

⁶ (4-5) Jadi gomgoman ni sidea ma Assur marhitei podang ampa tanoh ni si Nimrod marhitei sinjata na sinintak. Anjaha paluahon-Ni ma hita humbani Assur, anggo roh ia hu tanohta anjaha imasuki nagorinta.

⁷ (4-6) Jadi songon namur humbani Jahowa ma simasima ni Jakob i tongah-tongah ni buei bangsa-bangsa, songon udan bani

poyon-poyon, na so bani jolma, barang
marpangajaman bani anak ni jolma.

⁸ (4-7) Ambahni ai, ia simasima ni si Jakob i
tongah-tongah ni bangsa sipajuh begu-begu,
i tongah-tongah ni buei bangsa, gabe
songon singa ma i tongah-tongah ni
binatang harangan, songon singa poso-poso
i tongah-tongah ni hulanan ni biribiri, anggo
roh ia mandorab ampa mamparsilbak, tapi
ise pe lang na paluahkon.

⁹ (4-8) Jadi marhamonangan ma tanganmu
dompok na mangimbang ho, anjaha siap ma
ganup munsuhmu.

¹⁰ (4-9) “Bani ari ai masa ma,” nini Jahowa,
“raseihonon-Ku ma hudamu hun tongah-
tongahmin, anjaha siapkonon-Ku ma gareta
porangmu.

¹¹ (4-10) Parsedaon-Ku ma huta bolon na i
tanohmu anjaha reongkonon-Ku sagala
benteng-bentengmu.

¹² (4-11) Sonai homa tabas-tabas masabkonon-Ku
ma hun tanganmu, anjaha seng dong be
sipartondung bam.

¹³ (4-12) Anjaha siapkonon-Ku ma homa gana-
gananima ampa batu sisombahonnima
hun tongah-tongahnima, anjaha seng
be marsombah ho bani jadi-jadian ni
tanganmu.

- ¹⁴ (4-13) Orbaton-Ku ma homa Aseramu hun
tongah-tongahmu, anjaha siapkonon-Ku ma
homa sisombahonmu.
- ¹⁵ (4-14) Anjaha bahenon-Ku ma pambalason
ibagas gila ampa ringis dompak bangsa
sipajuh begu-begu na so ra mambalosi.”

Pasal na Pinindo ni Naibata humbani Jolma

- 6** ¹ Tangihon nasiam ma na hinatahon ni
Jahowa. Jongjong ma Ham, bahen Ham
ma panguhumon dompak dolog-dolog,
anjaha pabogeihon ma sora-Mu dompak
buntu-buntu.
- ² Tangihon nasiam ma dolog-dolog, pangaduan
ni Jahowa ampa nasiam onjolan ni tanoh na
jonam, ai adong do pangaduan ni Jahowa
dompak bangsa-Ni, sihol marturiak la pakon
Israel.
- ³ “Ale bangsang-Ku, aha do pambahenan-Ku na
lepak bam? Marhitei aha Hulojai ho? Balosi
Ahu!
- ⁴ Halani na Huarahkon ho luar hun tanoh
Masir, anjaha Hupaluah ho hun rumah
parjabolonanmu, anjaha Husuruh si Musa,
si Aron ampa si Miryam mambobahon ho?
- ⁵ Ale bangsang-Ku, sai ingat ma tahi-tahi ni si
Balas, raja ni Moab ampa balos ni si Bileam,
anak ni si Beor ai bani, sonai homa na masa

hun Sittim nari das hu Gilgal, ase itanda ho habujuron ni Jahowa.”

- ⁶ Marhitei aha tarbahen ahu manjumpahkon Jahowa, laho marsombah i lobei ni Naibata na i babou? Marhitei galangan situtungan do gakni tarjumpahkon ahu la, atap marhitei anak ni lombu na marumur satahun?
- ⁷ Marosuh do gakni uhur ni Jahowa mangidah hambing tunggal na marribu-ribu barang mangidah habaoran ni minak na marloksa-loksa? Berehononku ma nani bunga tubuhku halani panlanggaronku, boras ni boltokku halani pardearan ni tonduyhu?
- ⁸ Domma ipabotohkon bam alejolma, barang aha na madear ampa barang aha na pinindahan ni Jahowa humbam, ai ma na mangkorjahon hasintongan ampa na mandalankon halayakon anjaha marparlahou ibagas toruh ni uhur i lobei ni Naibatamu.

Dousa ni Jerusalem ampa Uhum ni Naibata

- ⁹ Dilo-dilo do sora ni Jahowa hu huta ai, anjaha hapentaran do ai mangkabiari goran-Ni.
“Bogei hanimma ma bangsa na marianan i ladang ampa na i huta!
- ¹⁰ Mintor tarhalupahon Ahu ma arta hajahaton na i rumah ni parjahat ampa suhat-suhata na etektu, sihagigihononkon?

- ¹¹ Mintor tarhadeathon Ahu ma simada
timbangan na lepak ampa parranjut-ranjut
na marisi batu timbangan na palsu?
- ¹² Gok hakorason do halak na bayak na i
kota, parladung do pangisini, anjaha
pangoto-otoion do i toruh ni dilah ni sidea.
- ¹³ Ahu pe pungkahon-Ku ma manguhum ho,
siapkonon-Ku ma ho halani dousamu.
- ¹⁴ Mangan pe ho seng anjai bosur, loheian
do ho tong ibagas; aha na niluahkonmu,
seng maluah, anjaha aha na pinaluahmu,
ondoskonon-Ku do ai bani podang.
- ¹⁵ Martidah pe ho, hape seng marpariama,
mardogei buah ni hayu jetun pe ho, tapi
seng bulih minakanmu dirimu bani minak ai;
age pe mangkilang buah ni anggur ho, seng
bulih inumonmu anggur ai.
- ¹⁶ Ai idalankon hanima do aturan ni si Omri ampa
horja-horja ni ginompar ni si Ahab, anjaha
mardalan hanima ibagas sura-sura ni sidea.
Halani ai bahenon-Ku ma hanima tarulang
ampa pangisini gabe sisurak-surakon;
sonai ma hanima mangusung pandorun ni
bangsa-bangsa.

Tangis-tangis Pasal Uhur Magou ni Bangsa ai

7 ¹ Ngalutni in bangku, ai usih do ahu bani na
patumpuhon buah ni hayu, songon na

marturiang buah ni anggur, seng dong be
buah ni anggur panganon, seng dong be
buah ni hayu ara sidingaton ni uhurhu.

² Domma siap halak na daulat hun tanoh on,
anjaha seng dong be halak parpintor
i tongah-tongah nijolma. Ganup sidea
mambahen paronggopan laho manduruskon
daroh; ganup marsitaon tirangkapni bei
dompok hasomanni.

³ Hinsah do tangan ni sidea mangkorjahon na
masambor; igil do halak na sangap-sangap,
panguhum manjalo sisip anjaha halak na
markuasa uhur-uhurni do ibahen; sonai do
pandalankon ni sidea.

⁴ Halak sidearan humbani sidea, songon suga do,
anjaha sipintoran songon tatada. Domma
roh ari parkahapon bam, ari pambalason
bam, dohor ma hasonggoton bani sidea.

⁵ Ulang ma dong na porsaya bani kawanni; ulang
ma marhatengeran bani hasomanni; jaga
homa bibir ni pamanganmu age dompak
naboru na modom bani abinganmu.

⁶ Ai anak pe seng ipasangap bapani, anjaha boru
jongjong manlawan inangni, parumaen
dompok simatuani, ase munsuh ni halak ma
hasomanni sarumah.

Haluahon ni Sion Use

- ⁷ Tapi anggo ahu mangkawah bani Jahowa do, anjaha mangarap do ahu bani Naibata ni haluahonku; sai tangihonon ni Naibatangu do ahu.
- ⁸ Ulang ma ho marmalas ni uhur, alo munsuhku, mangidah ahu; ai jomba pe ahu, sai na jongjong do use, ai hundul pe nuan ahu ibagas hagolapan, Jahowa do panondang bangku.
- ⁹ Usungonku do ringis ni Jahowa, ai hu Bani do ahu mardousa, paima iapiti ahu anjaha ipintori, itogu ahu hu haliharon, gabe huidah hapintoron-Ni.
- ¹⁰ Jadi idahon ni munsuhku ma ai, gabe rongkobon ni habadoron ma ia, ai ma na mangkatahon hu bangku, “Ija do Jahowa Naibatamu?” Marpuas-puas do matangu mangidahsi; idogei-dogei do ia nuan songon hubang i alaman.
- ¹¹ Na roh ma sada ari, paulion ma use ijai tembokmu. Bani ari ai palumbangon ma parbaloganmu.
- ¹² Bani ari ai roh ma sidea bam, hun Assur das hu Masir, hun Masir das hu Bah Eprat, hun laut na sada das hu laut na sada nari ampa hun dolog na sada das hu dolog na sada nari.

- ¹³ Tapi gabe halimisan ma tanoh ai halani pangisini, marhalanihon ni pambahenan ni sidea.
- ¹⁴ Parmahani Ham ma bangsa-Mu marhitei simambu-Mu, biribiri parbagianan-Mu, na marianan pulou i harangan, i tongah-tongah ni tanoh na lambutan; lopas Ham ma sidea manampal i Basan ampa i Gilead songon sapari.
- ¹⁵ Songon bani panorang parpadarat-Mu hun Masir, pataridahkon Ham ma bennami halongangan.
- ¹⁶ Idahon ni bangsa sipajuh begu-begu ma ai, gabe bador ma sidea marhalanihon ni ganup hagogohon ni sidea ai; tutupon ni sidea ma pamanganni bani tanganni, anjaha nengel ma pinggol ni sidea.
- ¹⁷ Dilaton ni sidea ma tanoh songon ulog, songon sagala na manjulur i tanoh; gobir-gobir ma sidea roh humbagas bentengni, hitir-hitir manjumpahkon Jahowa Naibatanta, anjaha marhabiaran ma sidea bam.
- ¹⁸ Ise ma Naibata usih songon Ham, na manasap dousa anjaha na manalpuhon panlanggaron ni simasima ni parbagiananni? Seng lalab itahan-tahan ringis-Ni, ai marharosuh do la bani idop ni uhur.

- ¹⁹ Sai marpangulaki do uhur-Ni maridop ni uhur banta, anjaha dogei-dogeion-Ni do hajahatonta. Nai ma tongon, gijigkonon-Mu do ganup dousanami hubagas laut.
- ²⁰ Sai patidakon-Mu do habujuron bani si Jakob, idop ni uhur bani si Abraham, na dob binulawankon-Mu bani ompungnami humbani sapari nari.

Nahum

Pambalason ni Naibata bani Munsuh-Ni

- 1** ¹ Panjahaion Pasal Ninive. Buku Pangungkabon ni si Nahum, halak Elkos ai.
- ² Naibata parsimburu anjaha pambalas do Jahowa; sipambalas do Jahowa anjaha parringis tumang. Sipambalas do Jahowa dompak imbang-Ni, anjaha totap manggila dompak munsuh-Ni.
- ³ Tongon nanget do Jahowa manringis anjaha paridop ni uhur banggal, tapi sai na marlulu do la. Marhasoman habahaba ampa halisungsung do la mardalan. anjaha hambun do orbuk ni nahei-Ni.
- ⁴ Mangonai hata la bani laut, gabe horah do, anjaha ipahorah do ganup bah mardalan. Horah do Basan ampa Karmel, anjaha melus bunga ni Libanon.
- ⁵ Dugur do dolog i lobei-Ni anjaha malala buntu-buntu; gobir do tanoh on i lobei-Ni, dunia on ampa haganup isini.
- ⁶ Ise ma na tahan jongjong mandompakkon gajag ni gila-Ni? Ise ma na pag manjumpahkon gara ni ringis-Ni? Marjimbur-jimbur do

songon apuy gila-Ni, anjaha mangkatorban
dolog batu i lobei-Ni.

⁷ Pardear layak do Jahowa, benteng bani
panorang hasosakan; anjaha itanda do na
marhaporusan Bani.

⁸ Tapi marhitei bah na sumbang siap tumang do
ibahen na mangimbang-Si anjaha idakdaki
do munsuh-Ni hubagas na golap.

⁹ Aha do na tinahi ni uhurnima dompak Jahowa?
Siap tumang do ai bahenon-Ni, seng pala
dua hali timbul hasosakan.

¹⁰ Songon suga-suga na itagili bois sidea, songon
anggala na horah tene mosog sidea.

¹¹ Ai lang hun tongah-tongahmu do luar halak na
manguhurhon hajahaton dompak Jahowa,
halak na manranggihon na masambor
tumang?

¹² Sonon do hata ni Jahowa, “Age pe gogoh
anjaha buei sidea, maningon sabion do
sidea ase masab sidea. Age pe domma
Hupatoruh ho, seng be patoruhon-Ku ho.

¹³ Sonari pe buaton anjaha ponggolhonon-Ku ma
pasanganmu humbam, anjaha rotapon-Ku
ma garimu.

¹⁴ Tapi dompak ho iparentahkon Jahowa do,
‘Seng be patotapon goranmu; hun rumah
ni naibatamu siapkonon-Ku ma gana-gana
na niuhir ampa gana-gana na tinuang:

Ahu do na pasirsirhon tanomanmu, ai siambukkonon do ho.”

Haluahon ni Israel ampa Parseda ni Ninive

¹⁵ (2-1) Tonggor ma, i atas ni dolog nahei ni siboan Ambilan Na Madear, na maningtingkon damei! Pestahon pestamu ale Juda, galari bagah-bagahmu, ai seng anjai roh be parjahat mangimbang ho, domma siap botul ia.

Tartaban Huta Ninive anjaha Iparseda

2 ¹ (2-2) Domma tangkog dompak ho pamerapkon! Jaga ma benteng ai! Marjaga-jaga ma i dalan, mamonting bei ma, pakei ma gogohmu!

² (2-3) Ai Jahowa do pasuangkon hayu anggur ni Jakob songon hayu anggur ni Israel; ai domma irampok panrampok sidea, anjaha iparseda rantingni.

³ (2-4) Gerger do gantar-gantar ni puanglimani, marbaju hasumba do balani. Marlinang songon apuy gareta-garetani bani ari parbingkatni, anjaha iawas-awaskon tanja.

⁴ (2-5) Marpojong gareta-gareta i dalan, marhujai-hujon i tanoh lapang; rupani songon rigapan, anjaha songon hilap pardetesni.

- ⁵ (2-6) Idingat raja ai ma puanglimani, hape marsijombaan do sidea bani nilangkahkonni bei; tarolos sidea marayak tembok, hape domma sonson onding-onding partahanan.
- ⁶ (2-7) Mungkab ma horbangan na bani bah banggal ai, jadi gobir ma istana ai.
- ⁷ (2-8) Ipasalang ma raja naboru ai anjaha iboan hu habuangan; gabe songon parturtu ni kuhuy ma partangis ni jabolonni naboru, anjaha ibogbogi bei tontonni.
- ⁸ (2-9) Songon bongbongan ma Ninive, na mabaor bahni. "Soh! Soh!" Nini sidea, tapi sahalak pe lang adong be na ra mulak.
- ⁹ (2-10) Buati ma pirak in, buati ma omas in! Ai lang marnabois arta ai, sumbang tumang bagei-bagei ni na maharga.
- ¹⁰ (2-11) Lumei! Halumeion ampa hasiapon! Atei-atei na madotei ampa towod na hitir-hitir! Gobir sagala binongei, anjaha marposi sagala bohi.
- ¹¹ (2-12) Ija do nuan ianan ni singa ondi ampa liang ni singa, ai ma parponopanni, anjaha aha pe lang na mangganggusi ijai?
- ¹² (2-13) Ija do nuan singa ai, na manoroh ase sungkupan anakni, anjaha na mamongkiki sisorohanni bani boru-boruni, na manggoki liangni bani sorohanni ampa iananni bani na pinarsirakni?

¹³ (2-14) “Tonggor ma, marlulu do Ahu dompak ho,” nini Jahowa Zebaot; “martimpul ma bahenon-Ku timus ni garetamu, anjaha bois ma bahenon singa poso-posomu marhitei podang. Siapkonon-Ku ma sorohanmin hun tanoh on, anjaha seng be tarbogei sora ni suruhanmu.”

Panguhumion na Legan bani Ninive

- 3** ¹ “Papa ma bani huta sisopsop daroh, na gok ladung ampa paksa, lang maronti panrampokon!
- ² Boge! Parlisik ni lonsing-lonsing, pargurojob ni galapang! Boge! Huda na marangkat dua ampa gareta na marpojong.
- ³ Siajak huda na rongom roh, podang na marjilam-jilam ampa tanja na mirlak; buei ni halak na tinampul, marjunjun anjaha lang tarhira bangkei, lang marnarotap bangkei gabe mangkatargompang sidea bani bangkei ai.
- ⁴ Anjaha ganupan ai binahen ni hinabuei ni ulah ni boru jalang do, na jenges-jenges na pandei mandari-dari, na manjualhon bangsa-bangsa marhitei parbangkisonni ai ampa marga marhitei uti-utianni ai.
- ⁵ Tonggor ma, marlulu do Ahu dompak ho,” nini Jahowa Zebaot. “Sintakon-Ku

ma hioumin das bani bohimu, anjaha patidakon-Ku ma hatalanjangonmin bani bangsa-bangsa ampa habadoronmu bani harajaon-harajaon.

⁶ Gijigkonon-Ku ma bam na mabutak, pabadoron-Ku ma ho, anjaha bahenon-Ku ma ho gabe sitontonan.

⁷ Anjaha sagala na mangidah ho, maporus ma humbam, anjaha nini ma, 'Domma hansur Ninive, ise ma na manangisi?' Hunja ma pindahan-Ku na mangapohi ai?

⁸ Mintor dearan ma ho hun bani, na marianan bani topi ni Bah Nil, na niinggotan ni bah, na marbatar-batarhon laut anjaha na martembokkon bah?

⁹ Etiopia do hagogohon bani ampa Masir na so marpispis ai: Put ampa Libia sipangurupi bani.

¹⁰ Tapi sidea pe domma hu habuangan, maningon laho hu tahanan; dakdanakni irosaki i suhi-suhi ni ganup dalan. Marruji-ruji do halak pasal na sangap ni sidea, anjaha ganup pambosarni isangkut do bani gari.

¹¹ Ho pe maningon mabuk do, maningon mirdong do, maningon pindahanmu do haporusan i lobei ni munsuhmu.

¹² Sagala bentengmu usih do bani hayu ara na marboras mula-mula; anggo idugur mintor

mardabuhan ma bani pamangan ni na mangankon.

¹³ Tonggor ma, doskon naboru do balamu i tongah-tongahmu. Mungkab do horbangan ni tanohmu jumpahon ni munsumu, anjaha panganon ni apuy do pating-patingmu.

¹⁴ Tahui ma bah managam pangkubu, anjaha patoguh bentengmu! Masuk ma hu tanoh parhalampungan, luntak ma tanoh halampung ai, anjaha buat ma panuangan ni batu!

¹⁵ Sai na bois do ho panganon ni apuy ijai, siapkonon ni podang ma ho. Bondutonni ma ho songon balang. Pabuei ma dirimu songon tamponok, pabuei songon balang!

¹⁶ Bahatan do partiga-tigamu ibahen ho humbani bintang na i langit; ipaherbang balang ai ma habongni anjaha habang ma ia lintun.

¹⁷ Songon balang do gamot-gamotmu, anjaha jurutulismu songon balang na marhulanan, na sogop bani tembok sanggah borgoh ni ari; tapi poltakkonsi mata ni ari habang ma; seng dong na mambotoh, ija hinan iananni.

¹⁸ Munduk-unduk do parmahanmu, ale raja ni Assur, tarpodom na sangap-sangapmu. Merap do bangsamu i dolog-dolog, ise pe lang na patumpuhon.

- ¹⁹ Seng hatambaran luhamu, parah do ugahmu.
Sagala na mambogei baritamu martopap
do halani ho. Ai ise ma na so ihonai
hajahatonmu na so marhinggaan ai?”

Habakuk

Tangis-tangis ni Nabi Pasal Hasosakan ni Bangsa ni

1 ¹ Pangungkabon na nididah ni Nabi Habakuk.
² “Sadia dokah on, ale Jahowa, dilo-dilo ahu, hape seng ra Ham manangihon? Atap hudilohon Bamu pasal odoh-odoh, tapi seng ra Ham paluahkon?”

³ Mase ma pataridahkonon-Mu bangku hagedukon, gabe paidah-idahonku hasunsahan? Pandorunion ampa pambahenan hajahaton do i lobeihu, masa do parsalisihan ampa paringoran.

⁴ Halani ai lambin galekni do titah, anjaha seng mardalan uhum. Ai halak parjahat do mardalan manginggoti parpintor, gabe peol ma mardalan uhum.”

⁵ “Kawahkon nasiam ma hu tongah-tongah ni bangsa sipajuh begu-begu anjaha papangkei ma, ase longang anjaha songgotan nasiam. Ai sihol bahenon-Ku do sada horja bani ari nasiam, lang porsaya nasiam, porini pe ibaritahon ai.

⁶ Tonggor ma, papuhoon-Ku ma halak Kasdim, bangsa na garang anjaha na lingkai, manlontas deisa na ompat ni tanoh on, laho manoluk ianan na so sidea simadasi.

⁷ Sihabiaran anjaha jangin do sidea; luar humbani sidea do uhum ampa hatimbulonni.

⁸ Lingkatan do huda ni sidea humbani begu, garangan humbani sorigala sanggah bodari-bodari; roh do siajak hudani humbani na daoh habang songon haluhuy, mangolos laho mamondut.

⁹ Roh do sidea ganup laho mandalankon paksa; seng tarolat pangonjarni, ipatumpu sidea do na tartangkap songon horsik bueini.

¹⁰ Irehei sidea do raja-raja anjaha sipartatawaan ibahen sipambobai. Ipartatawai sidea do ganup benteng; tanoh do ipajunjun sidea laho manaban ai.

¹¹ Dob ai mangolos ma sidea bingkak mannunuti dalanni songon logou; sidea halak siparsalah, na mambahen gogohni gabe naibatani.”

¹² “Ai lang Ham do humbani nabasaia nari, ale Jahowa. Naibatanku na mapansing bangku? Seng anjai matei hanami. Ale Jahowa, bahen uhum do, ase ipabangkit Ham ia; Ham Batu ginggingku, bahen panjoraan do, ase ipajonam Ham ai.

¹³ Ham, parmata na pitah, gabe seng tarpaidah-idah Ham na masambor, anjaha seng tahan Ham mangkawahkon na so sintong, mase ma ipaidah-idah Ham halak sipangosei hape sip do Ham, ai ma sanggah na binondut ni halak parjahat jolma sipintoran hun bani,

¹⁴ gabe songon dengke na i laut ai ipaturut Ham
jolma in, usih songon gilok-gilok, na so marraja?

¹⁵ Ganup do isintak marhitei hail hu atas, itarik
marhitei jalani, anjaha ipatumpu sidea hubagas
durungni; marmalas ni uhur do ia halani ai anjaha
marolob-olob.

¹⁶ Halani ai do ase manggalang ia bani jalani anjaha
manutung dahupa ia bani durungni, ai halani ai do
buei parbagiananni anjaha mantin sipanganonni.

¹⁷ Sintakonni ope nani podangni torus, anjaha
nunutonni mamunuhi bangsa-bangsa lang
maralang-alang?"

Balos ni Naibata; Uhum bani Halak Kasdim

2 ¹ "Bani manara parjagaanku do ahu sihol
jongjong, bani tembok ai hupajongjong
bangku, laho mangidah atap aha na sihol
hatahonon-Ni bangku, anjaha aha balos-Ni pasal
adu-aduankai."

² Jadi nini Jahowa ma mambalosi ahu, "Suratkon ma
pangungkabon on, anjaha uhirhon ai torang-torang
bani batu panuratan, ase boi ai basaon ni halak age
sangah montas.

³ Ai mangonai panorang na sihol roh ope
pangungkabon ai; tapi mangolos ma ai mangayaki
ujungni, anjaha seng marladung ai. Porini pe
hunlambat, paima-ima ma ai, ai maningon roh do
ai; seng tumaram lang saud.

⁴ Tonggor ma, halak na so pintor uhurni ibagas, sai na hurleh do, tapi halak parpintor, manggoluh do halani haporsayaonni.

⁵ Jaga ma pangapasi sipangosei-osei, halak na jungkat maruhur, na so onnga marnasungkup, na pangangangkon tolonanni songon nagori toruh, na so ra bosur songon hamatean, na patumpuhon sagala bangsa bani anjaha na pasadahon sagala marga bani.

⁶ Ai lang parumpamahonon ni sidea ma ia, doding-dodingkononni salig-salig bani anjaha hatahononni, 'Mulih ma ia, na patumpuhon bani na so ia simadasi (*sadiha dokah nari tumaran?*), anjaha na pajunjun bani dirini buei utang!'

⁷ Ai lang sompong ma tumaram jongjong sidea na maridou bam, anjaha hehe sidea sihol mangarsik ho, anjaha gabe taban ma ho bani sidea?

⁸ Halani na dob tinabanmu buei bangsa, gabe tabanon ni bangsa-bangsa na tading ai ma ho, halani sapata ni daroh ni jolma ampa odoh-odoh bani nagori, bani huta-huta ampa na marianan ibagas ai.

⁹ Magou ma halak na mambuat pansarian na so tiba dalanni hubagas rumahni, sihol mambahen asarni bani na gijang, bahen haluahonni humbani parmaraan!

¹⁰ Na manranggihon habadoron do ho bani rumahmu, marhitei na isiapkon ho buei bangsa; na mambahen tonduymu do ai mardousa.

¹¹ Ai dilo-dilo do age batu ibagas tembok ai, anjaha tiang-tiang ni rumah ai pe mambalosi do.

¹² Magou ma halak na paulihon huta marhitei daroh, anjaha na pajonamkon benteng marhitei hagedukon.

¹³ Tonggor ma, ai lang marharorohan humbani Jahowa do ai? Marhangaluton pe bangsa-bangsa bahen panganon ni apuy do, anjaha ilojai bangsa-bangsa pe dirini, laho mangkopkop na lang do!

¹⁴ Ai maningon gokan do tanoh on bani parbinotohan pasal hasangapon ni Jahowa, songon bah na manrungkub dasor ni laut.

¹⁵ Magou ma halak na painumkon hasomanni humbani panginuman ni ringisni, anjaha na pamabukkonsi laho mangidah hatalanjangonni.

¹⁶ Ho pe maningon pabosuron ma bani habadoron ganti ni hasangapon. Ho pe minum ma ase rebad-rebad ho. Bam ma nuan roh panginuman na bani tangan siamun ni Jahowa, anjaha habadoron ma sogop bani hasangaponmu.

¹⁷ Hajahaton na binahenmu hubani Libanon maningon rungkubonni do ho, anjaha pansedai ni binatang mangkirjati ho, halani sapata ni daroh ampa hajahaton na bani nagori ai, bani huta-huta ampa na marianan ibagas ai.

¹⁸ Ai aha ma guna ni gana-gana na pinaulini ai, gana-gana na tinuang ampa sipartondung sipangoto-otoi, ase marhatengeran hujai tukang ai, anjaha itukangi sisombahon na longah?

¹⁹ Magou ma halak na mangkatahon bani hayu, “Puho ma”! Ampa bani sada batu na longah, “Jongjong ma”! Boi ma ai mambere pangungkabon? Tonggor ma, ilampis do ai bani omas ampa pirak, tapi otik pe seng dong hosah ibagas.

²⁰ Tapi ibagas rumah hapansingon-Ni do Jahowa, sip ma ganup tanoh on i lobei-Ni.”

Sada Psalm: Uhum ampa Haluahon

3 ¹ Tonggo ni si Habakuk, nabi ai,
² “Ale Jahowa, domma hubogei barita-Mu, gabe gok biar do ahu halani horja-Mu ai. Pabayu Ham ma ai bani partongahan ni tahun, bani partongahan ni tahun ma tongon pabotohkon Ham ai; ingat Ham ma maridop ni uhur, age ibagas ringis.

³ Roh do Naibata hun Teman, anjaha Na Mapansing sahalian ai hun Dolog Paran (*Sela*). Irungkub hamuliaon-Ni do langit, anjaha gok tanoh on puji-pujian-Ni.

⁴ Parsinalsal-Ni songon sinalsal ni mata ni ari do, sondang luar hun lambung-Ni; ai do ibahen panrungkub ni hasangapon-Ni.

- ⁵ Mardalan do sampar i lobei-Ni, anjaha irik do i
pudi-Ni mangihut bunrung.
- ⁶ Jongjong ma la anjaha ibahen ma dugur
tanoh on; mangkawah ma la inggot, gabe
ibahen ma mangkalumpat bangsa halani
hirjatni; masarsar ma dolog-dolog na jonam
hinan anjaha marongrong buntu-buntu
sisadokah-dokahni. Dalam humbani nabasaia
la do simadasi.
- ⁷ Huidah do lampolampo ni Kusan hona tipa,
anjaha dugur-dugur tirei ni lampolampo ni
tanoh Midian.
- ⁸ Ai dompak bah bangga, dompak bah bangga
do Ham manringis, ale Jahowa, barang
dompak laut do Ham manggila, ase
ipahundul Ham diri-Mu bani huda-Mu, bani
gareta hamonangan-Mu?
- ⁹ Domma pasang sior-Mu anjaha domma gok
lingkit Bamu. Sela. Ibolah Ham do tanoh on,
gabe marbanggal ma bah.
- ¹⁰ Ididah dolog-dolog Ham, gabe hitir-hitir ma;
bah bangga pe manraja ma; ipabogeihon
luhung ni lautan ma sorani anjaha iangkat
ma tanganni hu atas.
- ¹¹ Soh do mata ni ari ampa bulan bani iananni,
halani sondang ni lingkit-Mu na tolkas
ai, halani mirlak ni lombing-Mu na
marlinang-linang ai.

- ¹² Ilangkahi Ham do tanoh on ibagas ringis-Mu,
anjaha idogei-dogei Ham do bangsa-bangsa
ibagas gila-Mu.
- ¹³ Bingkat do Ham laho mangurupi bangsa-Mu,
laho mangurupi na mininakan-Mu. Irosaki
Ham do tayub humbani rumah ni parjahat,
anjaha iparseda Ham do onjolanni das bani
batu onjolan partoruh. Sela.
- ¹⁴ Itolpus Ham do marhitei panah-Mu ulu ni
pambobaini, na roh songon halisungsung
laho mangerap ahu, na marolob-olob
songon halak na laho mangankon na
masombuh bani na ponop.
- ¹⁵ Ibontas Ham do laut ai marhitei huda-Mu,
margilumbang ma laut na bolag.
- ¹⁶ Dob hubogei ai, gabe hitir ma angkulanku,
bibirhu pe hitir do halani sora ai; masuk
do na masik hubagas holiholingu, anjaha
rebad-rebad panlangkahku. Sip ma ahu
paima-imahon ari hasunsahan, na sihol roh
bani bangsa na manosak hanami.
- ¹⁷ Age pe seng marbunga ijai hayu ara, anjaha
seng marbuah hayu anggur, lambang ia
hayu jetun anjaha seng mambere gogoh age
juma, rasei biribiri humbani iananni, anjaha
seng dong be lombu ibagas harang,

- ¹⁸ age sonai, marolob-olob do ahu ibagas Jahowa, anjaha malas do uhurhu ibagas Naibata ni haluahonku.
- ¹⁹ Naibata Jahowa do hagogohon bangku, ibahen do naheihu usih songon nahei ni ursa; la do manogu ahu manlangkah bani ianan na gijang.” (*Bani sibobahon koor, marhasoman parugas*).

Sepanya

Uhum bani Bangsa-bangsa Sonai Homa bani Juda

1 ¹ Hata ni Jahowa, na roh hubani si Sepanya, anak ni si Husi, anak ni si Gedalya, anak ni si Amarya, anak ni si Hiskia, sanggah panorang ni si Josia, anak ni si Amon, raja ni Juda.

² “Siapkonon-Ku do haganup hun datas ni tanoh on,” nini Jahowa.

³ “Siapkonon-Ku do jolma ampa pinahan; siapkonon-Ku do manuk-manuk na i langit ampa dengke na ibagas laut. Jombahonon-Ku do halak parjahat, siap do bahenon-Ku jolma hun datas tanoh on,” nini Jahowa.

⁴ “Pagostongon-Ku do tangan-Ku mangimbang Juda, ampa mangimbang ganup pangisi ni Jerusalem, siapkonon-Ku do humbani ianan on goran ni Baal ampa goran ni malim-malim ni naibata na legan,

⁵ ronsi halak na marsombah bani bala na i langit i atas tayub, ampa halak na marsombah bani Jahowa, tapi na marbija homa bani Milkom;

⁶ sonai homa halak na marbalik humbani Jahowa, na so mangindahi Jahowa anjaha na so marpanungkun be Bani.

⁷ Sip ma nasiam i lobei ni Jahowa! Ai dohor mando ari ni Jahowa. Domma ipasirsir Jahowa sada galangan sisayaton, anjaha iuras na niontang-Ni.

⁸ Jadi bani ari ni panggalangan sisayaton ni Jahowa ai, marlulu ma Ahu dompak kopala-kopala ampa anak ni raja ampa haganup halak na mamakei pakeian ni nagori na legan.

⁹ Marlulu do Ahu homa bani ari ai dompak haganup halak na manlumpati molmolan, na manggoki rumah ni tuanni bani buah ni paksa ampa panipuon.

¹⁰ Bani ari ai," nini Jahowa, "Tarbogei ma sora ni na tangis hun Horbangan Dengke, ampa doruh-doruh hun huta baru ai ampa pardobur na gogoh humbani buntu-buntu ai.

¹¹ Tangis ma nasiam, na marianan i huta pandudaan! Ai seng dong be partiga-tiga, haganup sitimbang pirak domma bois.

¹² Bani panorang ai Ahu sandiri ma mamareksai Jerusalem marhitei lampu, anjaha marlulu ma Ahu bani halak, na gabe mombur i atas parat ni sidea, halak na mangkatahon ibagas uhurni, 'Seng anjai bahenon ni Jahowa na madear atap na masambor pe.'

¹³ Sirampason ma ugas-ugas ni sidea, anjaha siparsedaon ia rumahni. Age pe ipauli sidea rumah, seng sidea mangiankon ai; age pe ipungkah sidea pohon anggur, seng anjai inumon ni sidea anggur hunjai.

¹⁴ Dohor mando ari ni Jahowa na bolon ai, dohor mando anjaha mangolos roh. Bogeï ma ari ni Jahowa na mapaet ai! Age puanglima mandoruh do ijai.

¹⁵ Ari panringisan do ari ai, ari hasosakan ampa habiaran, ari hasedaon ampa hasiapon, ari hagolapan ampa halotiron, ari na gok hambun ampa na lotir tumang,

¹⁶ ari parsora ni tarompit ampa surak-surak na mandorab huta na pinatoguh ampa manara na gijang.

¹⁷ Tarsosak ma bahenon-Ku jolma, gabe dadapdadap ma sidea songon halak na mapitung, halani mardousa sidea dompak Jahowa; duruskononkon do daroh ni sidea songon orbuk ampa bituha ni sidea songon hubang.

¹⁸ Seng anjai tarbahren pirak barang omas ni sidea paluahkon diri ni sidea bani ari panringison ni Jahowa. Marhitei apuy ni parsimburuonni ai siapkononkon do tanoh on; hasiapon, nai ma tongon, haboison na manompong do bahenon-Ni bani ganup na marianan i tanoh on.”

Golpa-golpa Patoruh Uhur Paima Roh Ari Uhum

2 ¹ Roh ma nasiam martumpu anjaha bahen nasiam ma partumpuan, ham bangsa na so mambotoh na maila,

² paima hona usir nasiam songon dogdog na hinabangkon, paima sogop bani nasiam ari panringison ni Jahowa.

³ Pindahi nasiam ma Jahowa, nasiam ganup na toruh maruhur i tanoh on, nasiam na mangkorjahon parentah-Ni; pindahhi nasiam ma hapintoron, pindahhi ma toruh ni uhur, andohar iondingi nasiam bani ari panringison ni Jahowa.

Uhum Dompak Halak Palistim

⁴ “Ai maningon tarulang do Gasa, anjaha Askalon gabe halimisan. Maningon usiron ni halak do par Asdod sanggah tongah ari, anjaha iurati ia Ekron.

⁵ Magou ma hanima na marianan i tanoh na martopihon laut, hanima bangsa Kereta. Mangonai ma hata ni Jahowa bam, ale Kanaan, tanoh ni halak Palistim; agouhonon-Ku ma ho, ase ulang be dong na mangindahi ho.

⁶ Gabe sampalan ma tanoh na martopihon laut, parmahanan bani parmahan ampa harang bani hulanan ni biribiri.

⁷ Jadi simasima ni bangsa Juda ma simada tanoh ai, sidea ma marmahan ijai, anjaha i rumah na i Askalon sidea marsaran bodari. Ai anjaha pasuangonni do haadongon ni sidea.”

Uhum Dompak Halak Moab ampa Amon

⁸ “Domma Hubogei pangapasion ni Moab ampa panrisaon ni halak Amon, sonaha pangapasi ni sidea bani bangsang-Ku, anjaha mangenjeng sidea pasal tanoh ni sidea.

⁹ Halani ai, songon sintongni manggoluh Ahu,” nini Jahowa Zebaot. “Naibata ni Israel, maningon songon Sodom do Moab anjaha halak Amon songon Gomora, hatubuhan ni latong ampa pambuatan ni garam ampa halimisan lalab, anjaha tabanon ni simasima ni bangsang-Ku do sidea, anjaha na tading humbani bangsang-Ku do manean sidea.

¹⁰ Ai maningon bani sidea do on halani gijang ni uhur ni sidea, halani mangapasi sidea anjaha mangenjeng sidea dompak bangsa ni Jahowa Zebaot.

¹¹ Jombut ma Jahowa bani sidea; ai siapkonon-Ni do sagala naibata na legan i atas tanoh on, gabe marsombah ma hubani ganup halak humbani iananni, ganup tanoh ni bangsa sipajuh begu-begu.”

Uhum bani Etiopia pakon Assur

¹² “Hanima pe halak Etiopia, maningon bunuhon ni podang-Ku do hanima.

¹³ Dob ai pagostongon-Ni ma tangan-Ni dompak utara, anjaha agouon-Ni ma Assur, anjaha tarulang bahenon-Ni Ninive, horah songon halimisan.

¹⁴ Marsaran ma i tengah-tongahni hulanan ni pinahan, bagei-bagei ni binatang na i talun; gabe parbornginan ni sipauk ampa tanggiling ma galapang ni rumah ni sidea; mandoding ma kiung bani jendela anjaha kawak bani molmolan, ai domma iparseda halak parhayu ares ai.

¹⁵ Sonai ma kota na ramei ai, na marsonang-sonang marianan, na mangkatahon ibagas uhurni, ‘Ahu ma da in, sobali ahu seng dong!’ Sonaha do parjadini ai gabe halimisan, ianan ni binatang panoroh! Sagala halak na mamontas hunjai mapas ma anjaha iangkat tanganni manrehei.”

Dousa ni Jerusalem ampa Uhum Halani ai

3 ¹ Bursik ma huta sipanlawan, na butak ampa siunsagakon gogoh!

² Seng itangihon be hata sipasingat anjaha seng ijalo pangajaran. Seng tenger uhurni bani Jahowa anjaha seng ipadohor dirini bani Naibatani.

³ Songon singa na maraum do pambobaini i tengah-tongahni; songon sorigala borngin do panguhum ni sidea, na so mansarihon ari patar.

⁴ Parladung do nabi ni sidea, halak sipangoto-otoi; ipabutak malim ni sidea do na mapansing ai, uhur-uhur ni sidea do ibahen bani titah ai.

⁵ Pintor do Jahowa i tongah-tongah ni sidea, seng dong ibahen na salah; ganup sogod ipatuduhkon do aturan-Ni, seng onnga holang haliharonni; tapi seng ibotoh pargeduk na maila.

⁶ “Domma siap Hubahen bangsa sipajuh begu-begu; domma mareong manara ni sidea; domma Huparseda dalan-dalan ni sidea, gabe sahalak pe lang boi be mardalan hunjai; domma mareong huta ni sidea, seng dongjolma be ijai, seng dong be pangisini.

⁷ Ningku, tontu mabiar ma ia Bangku, tangihononni ma pangajaran; gabe seng siapkononkon rumah ni sidea domu bani haganup na dob Hulumbahon ai bani sidea. Tapi lambin hinsahni do sidea pasambor-sambor pambahenan ni sidea.

⁸ Halani ai managam ma hanima,” nini Jahowa, “Bani ari parjongjong-Ku gabe saksi. Ai domma Huputuskon patumpuhon bangsa-bangsa, patumpuhon harajaon, laho manguseihon ringis-Hu bani sidea, ganup pargajag ni gilang-Ku; ai maningon boiskononkon do ganup tanoh on, marhitei apuy ni parsimburuon-Ku.”

Bagah-bagah Hatuahon

⁹ Tapi berehonon-Ku ma hubani bangsa-bangsa bibir na legan anjaha na pitah, ase ganup sidea boi mandilo goran ni Jahowa, anjaha sauhur sidea mambalosi-Si.

¹⁰ Hun dipar ni bah Etiopia das hu utara parujung boanon ni sidea ma Bangku galangan sipanganon.

¹¹ Bani ari ai seng be bador ho halani haganup pambahenanmu, na hinorjahonmu manlawan Ahu; ai padaohon-Ku ma hun tongah-tongahmin hatoalon ni pangenjengmu, anjaha seng be pagijang-gijang diri ho i atas dolog-Ku na pansing in.

¹² Ai tebahonon-Ku do i tongah-tongahmin sada bangsa na toruh maruhur anjaha na masombuh, na marhatengeran bani goran ni Jahowa.

¹³ Ia simasima ni Israel, seng be horjahononni hagedukon barang hatahononni ladung; seng jumpah be bani pamangan ni sidea dilah sipaoto-oto, tapi sonang ma sidea manampal ampa manggompang, seng dong halak na manonggoti.

¹⁴ Marolob-olob ma ho, ale boru Sion, marsurak ma, ale Israel! Marmalas ni uhur ma ho anjaha marmegah-megah humbani gokni uhurmu, ale boru Jerusalem!

¹⁵ Domma ipadaoh Jahowa uhum-Ni dompak ho, domma isiapkon munsuhmu. Raja ni Israel, ai ma Jahowa, ia do i tongah-tongahmu, seng be habiaranmu hamagouan.

¹⁶ Bani ari ai hatahonon ni halak ma bani Jerusalem, 'Ulang ho mabiar, ale Sion! Ulang palopas tanganmu lambin galek!

¹⁷ Jahowa, Naibatamu do i tongah-tongahmu, puanglima, sibere hamonangan. Marpangulaki do uhur-Ni marholong ni uhur bam.' Malas tumang do uhur-Ni mangidah ho anjaha marolob-olob,

¹⁸ songon bani ari parjumpahan. Padaohon-Ku do hun bam parmaraan anjaha paholongan-Ku do habadoron na mandondoni ho.

¹⁹ Tonggor ma, bani panorang ai marlulu ma Ahu bani na mangodoh-odoh ho. Tapi paluahon-Ku ma na mengkat-engkat, anjaha patumpuon-Ku ma na merap anjaha paubahon-Ku ma habadoron ni sidea gabe puji-pujian ampa hasangapon i sab tanoh on.

²⁰ Bani panorang ai boanon-Ku ma hanima mulak hu tanohnima, bani panorang ai patumpu-tumpuon-Ku ma hanima. Ai bahenon-Ku ma hanima tarbarita anjaha marsangap i tongah-tongah ni sagala bangsa na i tanoh on, sanggah Hupasuang haadongonnima i lobei ni panonggornima," nini Jahowa.

Haggai

Ojur-ojur Laho Pajongjong Rumah Panumbahan Use

1 ¹ Padua-tahunkon dob bangkit raja si Darius, ari sada bulan paonomkon, roh ma hata ni Jahowa marhitei Nabi Haggai bani si Serubabel, anak ni si Sealtiel, panrajai i Juda, ampa hubani Sintua ni Malim Josua, anak ni si Josadak, sonon:

² Sonon do hata ni Jahowa Zebaot, “Bangsa on mangkatahon, ‘Seng roh ope panorangni ase paulion use rumah ni Jahowa.’

³ Halani ai roh ma hata ni Jahowa marhitei Nabi Haggai, sonon,

⁴ ‘Tapi domma roh gakni panorangni bannima mangiani rumahnima na niuhir, tapi anggo Rumah Panumbahan ai mareong ipaturut hanima?’

⁵ Ai pe, sonon do hata ni Jahowa, ‘Paruhurhon hanima ma sonaha na dob iahapkon hanima.

⁶ Buei do itidahkon hanima, tapi otik do ipahuta hanima; mangan do namin hanima, tapi seng bosur; minum do namin hanima, tapi seng sombuh horahnima; marsabing do namin hanima, tapi seng malas angkulanima anjaha ise na marombou, marombou bani parduiton na matolpus do.’

⁷ Sonon do hata ni Jahowa Zebaot, 'Paruhurhon hanima ma, sonaha na dob iahapkon hanima.

⁸ Tangkog ma hanima hu dolog, tarui hanima ma parhayu, anjaha pauli hanima ma Rumah Panumbahan, ase marrosuh ni uhur Ahu ijai, anjaha marsangap Ahu,' nini Jahowa.

⁹ 'Buei do namin iparkirahon hanima, hape tonggor ma, lambin otikni do ai, anjaha ijin ipahuta hanima ai, Hupurpurhon do ai. Mase?' nini Jahowa Zebaot. 'Halani rumah-Ku na mareong ai, hape ganup hanima marsioloskon rumahni bei.

¹⁰ Halani ai do ase ijolomi langit ai namur i atasnima, anjaha ijolomi tanoh in gogohni,

¹¹ anjaha domma Huhatahon roh logou ni ari hu tanoh on ampa hu dolog-dolog, bani gandum, anggur na bayu, minak, bani ganup na tinubuhkan ni tanoh in, banijolma ampa pinahan ampa bani haganup na hinorjahon ni tangan.'"

¹² Jadi itangihon si Serubabel anak ni si Sealtiel, pakon sintua ni Malim Josua anak ni si Josadak, ampa haganup simasima ni bangsa ai ma sora ni Jahowa, Naibata ni sidea ai, ampa hata ni si Haggai nabi ai, domu hubani parsuruh ni Jahowa, Naibata ni sidea ai bani, jadi marhabiaran ma bangsa ai i lobei ni Jahowa.

¹³ Dob ai ihatahon si Haggai, suruhan ni Jahowa ai ma bani bangsa ai, domu hubani tonah ni Jahowa, sonon, "Ahu do hasomannima," nini Jahowa.

¹⁴ Jadi ipuhoi Jahowa ma tonduy ni si Serubabel, anak ni si Sealtiel, panrajai ni Juda, ampa tonduy ni si Josua, anak ni si Josadak, sintua ni malim ai, ampa tonduy ni haganup simasima ni bangsa ai, gabe roh bei ma sidea mangkorjai horja bani rumah ni Jahowa Zebaot, Naibata ni sidea ai,

¹⁵ ai ma bani ari dua puluh ompat bulan onom.

Hamuliaon ni Rumah Panumbahan na Bayu

2 ¹ Padua-tahunkon dob bangkit raja si Darius, bani ari dua puluh sada bulan pitu, roh ma hata ni Jahowa marhitei si Haggai, nabi ai, sonon,

² “Hatahon ma bani si Serubabel, anak ni si Sealtiel, panrajai ni Juda ampa hubani si Josua, anak ni si Josadak, sintua ni malim ai, ampa hubani haganup simasima ni bangsa ai,

³ ‘Adong ope i tongah-tongahnima na manggoluh, mangidah rumah on ibagas hamuliaonni na parlobei ai? Sonaha ididah hanima sonari? Ai seng songon na lang do in bani pangidahnama?’

⁴ Tapi tenger ma uhurmu, ale Serubabel,” nini Jahowa; “tenger ma homa uhurmu, ale Sintua ni Malim Josua, anak ni si Josadak; tenger ma homa uhurmu, ale bangsa na i tanoh in,” nini Jahowa, “nunut marhorja, ai Ahu do hasomannima,” nini Jahowa Zebaot;

⁵ “romban hubani bagah-bagah, na Huhatahon bannima sanggah na luar hanima hun Masir,

‘Marianan do tonduy-Hu i tongah-tongahnima, ulang mabiar!’

⁶ Ai sonon do hata ni Jahowa Zebaot, ‘Sahali nari, seng sadiha dokahni be, duguron-Ku ma langit pakon tanoh pakon laut ampa darat;

⁷ duguron-Ku ma ganup bangsa sipajuh begu-begu, gabe roh ma na maharga ni ganup bangsa sipajuh begu-begu, gabe gokan-Ku ma rumah on bani hamuliaon,’ nini Jahowa Zebaot.

⁸ ‘Ahu do simada pirak anjaha Ahu do simada omas,’ nini Jahowa Zebaot.

⁹ ‘Jadi bueinan ma hamuliaon ni Rumah Panumbahan na parpudi on, ase na parlobei ondi,’ nini Jahowa Zebaot; ‘anjaha bani ianan on bereon-Ku do hatuahon,’ nini Jahowa Zebaot.”

Bagah-bagah Pasal Pasu-pasu

¹⁰ Paduapuluhompat-arihon, bani bulan siah, padua-tahunkon dob manrajai si Darius, roh ma hata ni Jahowa marhitei si Haggai, nabi ai sonon:

¹¹ Sonon do hata ni Jahowa Zebaot, “Sungkun ma malim naha nini titah pasal on,

¹² ‘Anggo porini iboan sada halak gulei na mapansing ibagas suhi-suhi ni hiouni, anjaha igiut marhitei hiouni ai ruti atap lowoh atap anggur atap minak atap sipanganon na ija pe, gabe pansing do ai?” Balosan ni malim ai ma, “Lang.”

¹³ Dob ai nini si Haggai ma, “Anggo adong sada halak na mabutak, halani dais bani sada bangkei, manggiut sada humbani nongkan ai, naha, gabe butak do ai?” Balosan ni malim ai ma, “Gabe butak ma ai tongon.”

¹⁴ Dob ai nini si Haggai ma, “Sonai ma halak on, bangsa on i lobei-Hu,” nini Jahowa, ‘lanjar sonai do homa ganup jadi-jadian ni tangan ni sidea, anjaha atap aha pe ginalangkon ni sidea ijai, butak do ai.

¹⁵ Ai pe, paruhurhon hanima ma olat ni ari on hu atas! Sanggah lape iatur batu bani rumah ni Jahowa,

¹⁶ sonaha do na masa bannima? Anggo roh halak bani luhutan pardua puluh sumpitan, hape pitah sapuluh do; anggo roh halak bani parnahan ni anggur, laho manahui lima puluh gusi hunjai, hape pitah dua puluh gusi hansa.

¹⁷ Domma Hulibas hanima marhitei antinganou, hameluson ampa sira-sira, laho mansedahon ganup na hinorjahon ni tangannima, hape lanjar do seng mulak hanima hu Bangku,’ nini Jahowa.

¹⁸ ‘Paruhurhon hanima ma olat ni ari on hu atas, olat ni ari dua puluh ompat, bulan siah on, olat ni ari dob ipasuk onjolan ni rumah ni Jahowa: ‘Paruhurhon hanima ma!

¹⁹ Atap moru do bonih ibagas sopou, atap seng marbuah hayu anggur pakon hayu ara pakon dalima ampa hayu jetun. Olat ni ari on pasu-pasuon-Ku ma.’”

Bagah-bagah bani si Serubabel

²⁰ Dob ai roh ma hata ni Jahowa paduahalihon hubani si Haggai bani ari dua puluh ompat bani bulan ai, sonon,

²¹ “Hatahon ma bani si Serubabel, panrajai ni Juda, sonon, ‘Sihol do duguron-Ku langit pakon tanoh on,

²² sihol do tunggalingkonon-Ku paratas ni harajaon, anjaha siapkonon-Ku hagogohon ni bangsa sipajuh begu-begu, tunggalingkonon-Ku gareta ampa jolma na mangajak ai, gabe mardabuhan ma huda ampa jolma na mangajak ai, ganup marhitei podang ni hasomanni.

²³ Bani ari ai,” nini Jahowa Zebaot, “buatan-Ku ma ho, ale Serubabel, anak ni si Sealtiel, juakjuak-Kin,” nini Jahowa, “anjaha bahenon-Ku ma ho gabe tintin tokan, ai domma Hupilih ho,” nini Jahowa Zebaot.

Sakaria

Ojur-ojur bani Hamubahon ni Uhur

1 ¹ Bani bulan ualuh, padua-tahunkon dob manrajai si Darius, roh ma hata ni Jahowa bani Nabi Sakaria, anak ni si Berekia, anak ni si Iddo, sonon,

² “Manringis tumang do Jahowa bani ompungnima.

³ Tapi hatahon ma bani sidea, sonon do hata ni Jahowa, ‘Sai mulak ma hanima hu Bangku, ase marpangulaki uhur-Hu dompak hanima,’ nini Jahowa Zebaot.

⁴ ‘Ulang ma hanima songon ompungnima, na niambilanan ni nabi na parlobei in.’ Sonon do hata ni Jahowa Zebaot, ‘Sai mulak ma hanima humbani dalannima na jahat in ampa humbani pambahennima na bajan in.’ Tapi seng itangihon anjaha seng ipardulihon sidea Ahu,” nini Jahowa.

⁵ “Ompungnima, ija do sidea nuan? Anjaha nabi-nabi ai, lalab do sidea manggoluh?

⁶ Tapi anggo hatang-Kin ampa titah-Kin na Hutonahkon bani juakjuak-Ku, nabi-nabi ai, ai lang mangonai do bani ompungnima?” Gabe mubah do uhur ni sidea anjaha ihatahon, “Songon na sinurahon ni Jahowa Zebaot mambahen hu banta,

romban hubani dalanta ampa pambahenanta,
sonai do tongon ibahen hu banta.”

Panonggoran na Parlobei: Siajak Huda

⁷ Bani ari dua puluh ompat bulan sapuluh sada, ai ma bulan Sebat, padua-tahunkon dob manrajai si Darius, roh ma hata ni Jahowa hubani Nabi Sakaria, anak ni si Berekia, anak ni si Iddo sonon,

⁸ “Marpanonggoran do ahu borngin ai, anjaha tonggor ma, sada halak mangajak huda sigerger. Jongjong do ia i holangkolang ni hayu mirtus ibagas sada lombang, anjaha i pudini huda na gerger, na mahuning ampa silopak.

⁹ Dob ai ningku ma, ‘Ai aha do artini in, tuan?’ jadi nini malekat hasomanku marsahap ai ma bangku, ‘Hupatuduhkon pe bamu aha do artini in.’

¹⁰ Dob ai nini dalahi na jongjong i holangkolang ni hayu mirtus ai ma mambalosi, ‘In ma na sinuruh ni Jahowa maniar tanoh on.’

¹¹ Dob ai nini sidea ma mambalosi malekat ni Jahowa na jongjong i holangkolang ni hayu mirtus ai, ‘Domma isiari hanami tanoh on, anjaha tonggor ma, sonang anjaha damei do ganup tanoh on.’

¹² Jadi nini malekat ni Jahowa ai ma mambalosi, ‘Ale Jahowa Zebaot, sadiha dokah nari lang marpangulaki uhur-Mu mangidah Jerusalem ampa mangidah huta ni Juda, na niringisan-Mu ibagas na pitu puluh tahun on?’

¹³ Jadi ibalosi Jahowa ma malekat, na marsahap pakon ahu marhasoman hata na madear ampa hata apoh-apoh.

¹⁴ Dob ai nini malekat hasomanku marsahap ai ma hu bangku: Ambilankon ma: Sonon do hata ni Jahowa Zebaot, 'Gara tumang do uhur-Hu ibagas mangkopkop Jerusalem ampa Sion,

¹⁵ tapi gajag tumang do ringis-Hu dompak bangsa sipajuh begu-begu, na jungkat ai, ai sanggah manggila Ahu otik, gabe inunut sidea manambahi hamagouan ai.'

¹⁶ Halani ai, sonon do hata ni Jahowa, 'Domma marpangulaki uhur-Hu mangidah Jerusalem, maningon paulion do use rumah-Ku ibagas huta ai,' nini Jahowa Zebaot, anjaha pagistangon do tali sibar-sibar bani Jerusalem.

¹⁷ Ambilankon ope: Sonon do hata ni Jahowa Zebaot, 'Sirnip ope sagala huta na dong Bangku bahenon-Ku bani na madear, anjaha ulakan ni Jahowa ope mangapohi Sion, anjaha pilihon-Ni use Jerusalem.'"

Panonggoran na Paduahon: Ompat Tanduk ampa Ompat Panopa

¹⁸ (1-1) Dob ai hukawahkon ma dompak datas, anjaha tonggor ma, adong ma ompat tanduk.

¹⁹ (2-2) Jadi ningku ma dompak malekat na marsahap pakon ahu, "Ai aha do arti ni on?"

Nini ma mambalosi ahu, “In ma da tanduk na paerapkon Juda, Israel ampa Jerusalem.”

²⁰ (2-3) Dob ai ipataridahkon Jahowa ma bangku ompat panopa.

²¹ (2-4) Jadi ningku ma, “Aha do na sihol bahenon ni sidea ase roh?” Nini ma mambalosi, “Ai ma da tanduk na paerapkon Juda, gabe seng dong na boi padirgak uluni; na roh do sidea on laho manonggoti sidea, laho mamunukkon tanduk ni bangsa-bangsa, na pagijang tandukni dompak tanoh Juda, laho pamerapkon ai.”

Panonggoran na Patoluhon: Halak Sijolom Tali Sibar-sibar

2 ¹ (2-5) Dob ai mangkawah ma use ahu dompak datas, anjaha tonggor ma; sada dalahi jolom bani tali sibar-sibar ibagas tanganni.

² (2-6) Dob ai ningku ma, “Laho huja ham?” Nini ma mambalosi ahu, “Laho manibar Jerusalem, laho mangidah barang sadiha do bolagni anjaha sadiha do ganjangni.”

³ (2-7) Jadi tonggor ma, roh ma malekat na marsahap pakon ahu hinan, anjaha roh ma homa sada malekat na legan manjumpahkonsi,

⁴ (2-8) anjaha nini ma dompaksi, “Ne ma, hatahon ma hubani anak garama na ijai ai. Gabe ianan na buha ma Jerusalem halani hinabuei ni jolma ampa pinahan na i tongah-tongahni.

⁵ (2-9) Ai Ahu do,” nini Jahowa, “gabe tembok apuy inggot huta ai, anjaha Ahu do gabe hamuliaon i tongah-tongahni.”

Naibata i Tongah-tongah ni Bangsa-Ni

⁶ (2-10) “Podas! Podas! Lintun ma hanima hun tanoh par Utara,” nini Jahowa, “ai humbani deisa na ompat in do sihol patumpuon-Ku hanima,” nini Jahowa.

⁷ (2-11) “Podas, maporus ma hu Sion, hanima na marianan rap pakon boru Babel.”

⁸ (2-12) Ai sonon do hata ni Jahowa Zebaot pasal bangsa-bangsa na mangayob hanima, “Barang ise na manjamah hanima, anak ni matani do na jinamahni ijai.

⁹ (2-13) Tonggor ma, mardas tangan ma Ahu bani sidea, ase gabe taban-taban sidea bani halak na pinarjabolon ni sidea na sain dokah,” ase ibotoh hanima, paboa Jahowa Zebaot do na marsuruh ahu.

¹⁰ (2-14) “Marolob-olob anjaha marmalas ni uhur ma ho, ale boru Sion, ai tonggor ma, na roh ma Ahu marianan i tongah-tongahmin,” nini Jahowa.

¹¹ (2-15) Jadi buei ma bangsa na pasadahon dirini bani Jahowa bani ari ai, gabe bangsa-Ni ma sidea, anjaha marianan ma sidea i tongah-tongahmin, ase ibotoh ho, paboa Jahowa Zebaot do na manuruh ahu marayak ho.

¹² (2-16) Jadi ainon ni Jahowa ma use Juda bahen parbagianan-Ni i tanoh na mapansing in, anjaha pilihon-Ni ma use Jerusalem.

¹³ (2-17) Sip ma ganup dunia on i lobei ni Jahowa! Ai domma hehe la humbani ianan hapansingon-Ni ai.

Panonggoran na Paompatkon: Sintua ni Malim Josua

3 ¹ Dob ai ipataridahkon ma hu bangku si Josua, sintua ni malim ai, jongjong i lobei ni malekat ni Jahowa, anjaha setan ai jongjong i siamunni, manukas-nukasisi.

² Tapi nini Jahowa ma dompak setan ai, “Papaan ni Jahowa ma ho, ale Setan! Jahowa, na manodoh Jerusalem ma na mamapai ho! Ai lang sipu-sipu do ia on, na nidokdok humbani apuy?”

³ Tapi marhiou na mabutak do si Josua jongjong i lobei ni malekat ai.

⁴ Jadi nini malekat ai ma dompak halak na jongjong i lobeini ai, “Tanggali ma baju na butak ai hun bani.” Tapi hubani sandiri, nini ma, “Tonggor ma, domma hupadaoh hun bamu panlanggaronmu, anjaha sorungkononku ma bamu pakeian pesta.”

⁵ Jadi ningku ma, “Mahua inahkon sidea ma sada gotong-gotong bani uluni ai.” Jadi inahkon sidea ma sada gotong-gotong na borsih hu atas uluni, anjaha

isorungkon ma homa hiou bani; anjaha malekat ni Jahowa ai jongjong i lambungni.

⁶ Dob ai nini malekat ni Jahowa ai ma palumbahon si Josua,

⁷ “Sonon do hata ni Jahowa Zebaot, ‘Anggo mardalan ho bani dalan-Ku, anjaha idalankon ho horja na Huondoskon in bam, jadi ho ma na manggomgom rumah-Ku ampa na manjagai alaman-Ku, anjaha lopason-Ku ma ho marparsaoran ampa sidea na jongjong on ijon.’

⁸ Tangihon ma, ale Sintua ni Malim Josua, ho ampa hasomanmu na jongjong i lobeimin, ai tanda pasal na sihol roh do hanima, ‘Tonggor ma, parohon-Ku ma juakjuak-Ku, si Tumbor.

⁹ Ai tonggor ma, bani batu na dob Hutibalhon ai i lobei ni si Josua (bani batu na sasada ai adong pitu mata), hujai ma uhirhonon-Ku suratni ai,’ nini Jahowa Zebaot, ‘anjaha Ahu manasap hajahaton ni tanoh in ibagas na sadari.

¹⁰ Bani ari ai,’ nini Jahowa Zebaot, ‘ganup hanima marsiontangan ma marlinggom hu toruh ni hayu anggurni ampa hu toruh ni hayu arani.’”

Panonggoran na Palimahon: Parsuluhan Omas ampa Dua Hayu Jetun

4 ¹ Dob mulak malekat, hasomanku marsahap ai, ipuhoi ma ahu, songon sada halak na pinuhoan humbani na modom.

² Ihatahon ma hu bangku: Aha dong ididah ham?" Hubalosi ma, "Huidah do sada parsuluhan, pitah humbani omas, parminakanni i atasni; pitu do lampu i atasni ampa pitu pipa bani lampu na i atasni ai.

³ Anjaha adong do dua hayu jetun jongjong i lambungni, sada hampit siamun ni parsuluhan ai anjaha na sada nari ai hampit sambilou.

⁴ Dob ai ningku ma dompak malekat, na marsahap pakon ahu ai, "Ai aha do artini on, ale tuannami?"

⁵ Dob ai nini malekat hasomanku marsahap ai ma mambalosi ahu, "Ai seng ibotoh ham aha do artini in?" Jadi ningku ma, "Lang, tuanku."

⁶ Dob ai nini ma dompak ahu, "On ma hata ni Jahowa hubani si Serubabel, 'Seng marhitei bala barang marhitei gogoh, tapi marhitei Tonduy-Hu do ase saud,' nini Jahowa Zebaot.

⁷ Ai aha do ho, ale dolog na bolon? Maningon gabe pamah do ho i lobei ni si Serubabel. Angkatonni ma hu atas batu parsuhi ai marhasoman surak-surak, 'Jengesni in, dearni in!'"

⁸ Ambahni ai roh do hata ni Jahowa hu bangku sonon,

⁹ "Tangan ni si Serubabel do na dob mambahen onjolan ni rumah on, tanganni do homa na sihol mandobkon on. Jadi botohon nasiam ma, Jahowa Zebaot do marsuruh ahu bani nasiam.

¹⁰ Ai barang ise na mapas bani ari pamungkah na etek ai, maningon marolob-olob sidea mangidah batu parsuhi, na ibagas tangan ni si Serubabel. Ia na pitu ai, ai ma Tonduy ni Jahowa, ai ma maniar ganup tanoh on.”

¹¹ Dob ai ningku ma hu bani, “Ai aha do arti ni na dua hayu jetun na hampit siamun ampa sambilou ni parsuluhan ai?”

¹² Ningku ma paduahalihon hu bani, “Ai aha do arti ni ranting ni hayu jetun na dua ai, na i lambung ni pipa omas na dua ai panguseian ni minak ai?”

¹³ Dob ai nini ma hu bangku, “Seng ibotoh ham, aha do artini ai?” Balosku, “Lang, tuannami.”

¹⁴ Jadi nini ma, “Sidea ma sidua halak na mininakan ai, na jongjong i lobei ni Jahowa, sigomgom ganup tanoh on.”

Panonggoran na Paonomkon: Buku Ginulung na Habang

5 ¹ Dob ai mangkawah ma ahu use dompak datas, jadi tonggor ma, sada buku ginulung na habang.

² Jadi nini ma hu bangku, “Aha dong ididah ham?” Ningku ma mambalosi, “Huidah do sada buku ginulung na habang; ganjangni dua puluh asta anjaha bolagni sapuluh asta.”

³ Dob ai nini ma hu bangku, “In ma papa na maniar sab tanoh on; ai sagala panangko siapkononkon do domu hujai, hunjon-hujan, anjaha sagala

sibijahon na tongon, siapkononkon do domu hujai, hunjon-hujan.

⁴ Domma Hupaturut laho papa ai,” nini Jahowa Zebaot, “jadi masukanni ma rumah ni panangko ampa rumah ni halak sibijahon na tongon marhitei goran-Ku; marianan ma ai i rumahni anjaha boiskononni ma parhayuni ampa batu-batuni.”

Panonggoran na Papituhon: Naboru na Ibagas Tapongan

⁵ Dob ai roh ma hundohor malekat hasomanku marsahap ai, anjaha nini ma hu bangku, “Kawahkon ma dompak datas, anjaha tonggor ma atap aha do na roh hundohor ai!”

⁶ Jadi ningku ma, “Ai aha do ai tongon?” Nini ma, “Tapongan do na roh hundohor ai.” Anjaha nini ope, “Ai ma hajahaton ni sidea i sab tanoh in.”

⁷ Anjaha tonggor ma, tarangkat ma tutupni humbani simbora ai, anjaha adong do sada naboru hundul ibagas tapongan ai.

⁸ Dob ai nini ma, “In ma hajahaton ai.” Jadi ionjarhon ma naboru ai hubagas tapongan ai, anjaha inahkon ma simbora na sangkimpal ai hu babou ni ai.

⁹ Dob ai mangkawah ma ahu dompak datas, gabe tonggor ma, dua naboru roh hundohor anjaha logou do ibagas habong ni sidea, songon habong ni sitindaalog do habong ni sidea, anjaha iusung

sidea ma tapongan ai i holangkolang ni tanoh pakon langit.

¹⁰ Jadi ningku ma bani malekat hasomanku marsahap ai, “Huja do boanon ni sidea tapongan ai?”

¹¹ Nini ma hu bangku, “Hu tanoh Sinear, laho paulihon sada rumah bani ijai;” siapkonsi ai inahkon sidea ma tapongan ai bani iananni.

Panonggoran na Paualuhkon: Gareta na Ompat

6 ¹ Dob ai mangkawah ma use ahu dompak datas, anjaha tonggor ma, ompat gareta roh hun holangkolang ni dua dolog; ia dolog ai humbani tombaga do.

² Bani gareta na parlobei adong do huda sigenger, bani gareta na paduahon huda sibirong,

³ bani gareta na patoluhon huda silopak, bani gareta na paompatkon huda sibolang.

⁴ Dob ai ningku ma bani malekat na marsahap pakon ahu ai, “Ai aha do arti ni ai, ale tuanku?”

⁵ Jadi nini malekat ai ma mambalosi ahu, “Na bingkak do sidea hu deisa ni langit na ompat in, dob mangadap sidea hu lobei ni Tuhan sigomgom ganup tanoh on.”

⁶ Gareta na marhuda sibirong ai laho dompak tanoh na hampit utara, na lopak ai laho dompak tanoh na hampit hapoltakan, sibolang ai dompak tanoh na hampit dangsina,

⁷ anjaha sigerger ai laho dompak tanoh na hampit hasundutan. Sanggah na roh ai huda ai laho maniari tanoh on, nini ma, “Laho ma, lioti hanima ma tanoh on!” Jadi ilioti sidea ma tanoh on.

⁸ Dob ai idilohon ma hu bangku, “Tonggor ma, na laho dompak tanoh na hampit utara ai, ai ma na pahombun ringis-Ku i tanoh na hampit utara ai.”

Sortali na Bani si Josua; Tugah-tugah Pasal Tumbor

⁹ Dob ai roh ma hata ni Jahowa hu bangku, sonon,

¹⁰ “Jalo ma sibere-bere humbani halak na tarbuang, humbani si Heldai, si Tobia ampa humbani si Jedaya na dob mulak hun Babel; lanjar laho ma ho bani ari ai hu rumah ni si Josia, anak ni si Sepanya.

¹¹ Jalo ma humbani sidea pirak ampa omas, anjaha pauli ma sada sortali anjaha nahkon ma ai bani ulu ni si Josua, anak ni si Josadak, sintua ni malim ai,

¹² anjaha hatahon ma hu bani, ‘Sonon do hata ni Jahowa Zebaot, “Tonggor ma, sada dalahi na margoran si Tumbor. Bani iananni do martumbor anjaha ia do na paulihon rumah ni Jahowa.”

¹³ Ia do tongon na paulihon rumah ni Jahowa; anjaha ia do sijujung hamuliaon; hundul anjaha manrajai do ia bani paratasni. Adong do sada malim i lambung ni paratasni; anjaha masa do pangarusion na mardamei-damei i tongah-tongah ni sidea na dua ai.

¹⁴ Ia sortali ai tading do ai i rumah ni Jahowa, bahen pardingatan bani si Heldai, si Tobia, si Jedaya ampa si Josia anak ni si Sepanya.

¹⁵ Roh do homa halak humbani tanoh na daoh mangurupi laho paulihon rumah ni Jahowa, ase ibotoh nasiam, Jahowa Zebaot do na marsuruh ahu bani nasiam. Maningon jadi do on, anggo sintong itangihon nasiam sora ni Jahowa, Naibata nasiam.”

Parugamaon na Sintong: Seng Parpuasaon, Tapi Pambalosion do

7 ¹ Paompat-tahunkon dob manrajai raja Darius, roh ma hata ni Jahowa hubani si Sakaria, bani ari ompat bulan siah, ai ma bulan Kislev,

² sanggah na isuruh si Betel-Sareser pakon si Regem-Melek suruhanni, laho manungkun Jahowa,

³ lanjar manungkun malim-malim na i rumah ni Jahowa Zebaot ampa nabi-nabi, “Naha, nunutonnami ope tangis-tangis ampa marpuasa bani bulan lima, songon na somal binahennami, domma pala martahun-tahun?”

⁴ Jadi roh ma hata ni Jahowa Zebaot hu bangku sonon,

⁵ “Hatahon ma hubani ganup halak na i tanoh on ampa hubani malim, ‘Ia marpuasa pe hanima anjaha tangis-tangis bani bulan lima ampa bulan pitu ibagas na pitu puluh tahun on, ai Bangku do hanima na marpuasa ai?

⁶ Anjaha anggo mangan ampa minum hanima, ai lang bannima sandiri do hanima na mangan ampa na minum ai?’

⁷ Ai lang sonai hinan do hata na ipatugah Jahowa marhitei pamangan ni nabi na ijia, sanggah niiankon ope Jerusalem anjaha marsonang-sonang rap pakon huta-huta inggotni ai, anjaha adong ope na mangiankon tanoh dangsina ampa tanoh bornoh ai?”

⁸ Dob ai roh ma hata ni Jahowa hubani si Sakaria sonon,

⁹ “Sonon do hata ni Jahowa Zebaot, dalankon ma uhum na sintong, patuduhkon ma dear layak ampa idop ni uhur bani ganup hasomanni.

¹⁰ Ulang odoh-odoh na mabalu, na so marinang, na so marbapa panginsolat atap na musil; anjaha ulang ma adong hun bannima na mamingkirhon na jahat dompak hasomanni ibagas uhurni.”

¹¹ Tapi manjua do sidea manangihon ai, hengkeng do sidea anjaha itutup pinggolni ulang ibogei.

¹² Ipamapir do uhurni songon batu intan, ase ulang ibogei sidea titah ampa hata na tinongos ni Jahowa Zebaot marhitei Tonduy-Ni ampa marhitei nabi na parlobei ai. Halani ai do ase gajag ringis ni Jahowa Zebaot.

¹³ “Songon Ahu na dilo-dilo, hape seng itangihon sidea, sonai ma sidea dilo-dilo, tapi seng tangihonon-Ku,” nini Jahowa Zebaot.

¹⁴ “Halani ai domma Hupurpurhon sidea hu tongah-tongah ni sagala bangsa, na so tinanda ni sidea hinan, gabe tarulang tanoh ai dob itadingkon sidea, seng dong be na marhujai-hujon. Sonai ma tanoh na madear ai gabe halimisan ibahen sidea.”

Bagah-bagah Hatuahon

8 ¹ Dob ai roh ma hata ni Jahowa Zebaot hu bangku,

² “Sonon do hata ni Jahowa Zebaot, ‘Simburu tumang do Ahu mangkopkop Sion, anjaha gila tumang do uhur-Hu mangkopkop sidea.’

³ Sonon do hata ni Jahowa, ‘Mulak ma Ahu use hu Sion anjaha marianan i tongah-tongah ni Jerusalem, anjaha targoran ma Jerusalem: Huta na bujur, anjaha dolog ni Jahowa Zebaot: Dolog Na Pansing.’

⁴ Sonon do hata ni Jahowa Zebaot, ‘Maningon hundul do use dalahi na matua ampa naboru na matua i alaman ni Jerusalem, ganup marsijolom tungkotni bei ibagas tanganni halani tuani.

⁵ Anjaha alaman ni huta ai gok dakdanak dalahi ampa dakdanak naboru na marguro-guro i alaman ai.’

⁶ Sonon do hata ni Jahowa Zebaot, ‘Anggo halongangan ai bani pangidah ni simasima ni bangsa on bani panorang on, mintor halongangan ma gakni ai Bangku?’ Nini Jahowa Zebaot.

⁷ Sonon do hata ni Jahowa Zebaot, 'Tonggor ma, Ahu ma paluahkon bangsang-Ku hun tanoh na hampit hapoltakan ampa hun tanoh na hampit hasundutan,

⁸ anjaha Ahu mamboan sidea mulak marianan i tongah-tongah ni Jerusalem; jadi gabe bangsang-Ku ma sidea anjaha gabe Naibata ni sidea ma Ahu ibagas hasintongan ampa hapintoron.'

⁹ Sonon do hata ni Jahowa Zebaot, 'Pahinsah hanima ma tangannima, hanima na mambogei hata on, bani panorang on humbani pamangan ni nabi-nabi, bani ari ipasukkon onjolan ni rumah ni Jahowa Zebaot, ase boi ipauli rumah ai.

¹⁰ Ai i lobei ni ari on seng dong manjalo upah halak atap upah aha pe humbani pinahan; sonai homa bani halak na marhujai-hujon seng dong hahorason i lobei ni munsuh ai; ai marsilawanan do jolma samah jolma Hubahen.

¹¹ Tapi anggo sonari seng be bahenon-Ku hubani simasima ni bangsa on, songon sapari,' nini Jahowa Zebaot,

¹² 'Ai suankonon-Ku ma damei: Bereon ni hayu anggur ma buahni, tanoh on mambere gogohni, anjaha langit ai mambere namurni; bereon-Ku ma ganupan ai bani simasima ni bangsa on gabe parbagiananni.

¹³ Hanima ginompar ni Juda ampa Israel, songon hanima na dob gabe bangsa sibura-buraonkon na

saindokah i tongah-tongah ni bangsa-bangsa, sonai ma hanima gabe pasu-pasu tumpakon-Ku. Ulang mabiar, tapi pahinsah hanima ma tangannima.'

¹⁴ Ai sonon do hata ni Jahowa Zebaot, 'Songon na dob Husurahon mambahen roh hamagouan bannima, sanggah na pinaroh ni ompungnima ringis-Hu,' nini Jahowa Zebaot, 'anjaha seng marpangulaki uhur-Hu,

¹⁵ sonai do sura-surang-Ku bani panorang on laho mambahen na madear bani Jerusalem ampa bani ginompar ni Juda; ulang mabiar.

¹⁶ Tapi on ma na maningon sibahenonnima: Ganup ma mangkatahon hata hasintongan bani hasomanni anjaha idalankon uhum na bonar bani horbangannima.

¹⁷ Ulang ma ipingkiri atap ise ibagas uhurni hamagouan bani hasomanni, anjaha ulang ma iharosuhkon hanima na so sintong, ai magigi do uhur-Hu mangidah na sonai ai ganup,'" nini Jahowa.

¹⁸ Dob ai roh ma hata ni Jahowa Zebaot hu bangku,

¹⁹ "Sonon do hata ni Jahowa Zebaot, 'Parpuasaon bani bulan ompat, bani bulan lima, bani bulan pitu, bani bulan sepuluh gabe malas ni uhur do ai ampa hasonangan bani ginompar ni Juda, nai ma tongon, gabe pesta parolob-oloban. Halani ai haholongi hanima ma hasintongan ampa damei!'

²⁰ Sonon do hata ni Jahowa Zebaot, ‘Na roh ope bangsa-bangsa ampa pangisi ni huta-huta na bolon,
²¹ pangisi ni huta na sada laho bani na sada nari, mangkatahon: Laho ma hita marsombah bani Jahowa, mangindahi Jahowa Zebaot!’ Ahu pe laho do hujai.”

²² Tongon tene, roh do magira buei bangsa sonai homa bangsa na gogoh mangindahi Jahowa Zebaot i Jerusalem anjaha marsombah i lobei ni Jahowa.’

²³ Sonon do hata ni Jahowa Zebaot, ‘Bani ari ai tangkapon ni sepuluh halak humbani bangsa na marbagei-bagei sahap ai ma sada halak Jahudi bani sisi ni hiouni anjaha ihatahon, “Rap ma hita laho, ai domma ibogei hanami, Naibata do hasoman nasiam.” ’

Hamonangan Marimbang Munsuh

9 ¹ Pangungkabon: Roh do hata ni Jahowa dompak tanoh Hadrah anjaha sogop i Damaskus. Ai Jahowa do simada huta-huta na i Aram ampa ganup marga ni Israel,

² sonai homa Hamat, na marbalog hujai, Tirus ampa Sidon, age pe pentar tumang sidea.

³ Tongon, ipauli Tirus do bani sada benteng anjaha ipajunjun bani pirak songon orbuk ampa omas songon hubang na i alaman;

⁴tapi tangar ma, tabanon ni Jahowa ma huta ai, sampakkonon-Ni ma bentengni ai hu laut, anjaha bois ma huta ai panganon ni apuy.

⁵Idahon ni Askalon ma ai, gabe mabiar; age Gasa, jadi hitir ma; Ekron pe maningon bador do ia pasal siarapkononni ai. Maningon masab do raja hun Gasa, anjaha seng marpangisi ia Askalon.

⁶Anak salong-salongan mando marianan i Asdod, anjaha masabkonon-Ku ma pangenjengon ni halak Palistim.

⁷Buaton-Ku ma daroh ai hun pamanganni ampa hasamboron na hinorjahon ni sidea ai hun holangkolang ni iponni; gabe simasima do age sidea bani Naibatanta, gabe songon sada marga do sidea i Juda, anjaha Ekron gabe songon halak Jebusi.

⁸Ahu sandiri mangawal bani rumah-Ku dompak halak na marhujai-hujon; seng dong be sipanosak-nosak na mandorab sidea, ai matang-Ku sandiri do nuan mangidah ai.

Raja ni Sion

⁹Marmalas ni uhur tumang ma ho, ale boru Sion, marolob-olob ma ho, ale boru Jerusalem! Tonggor ma, na roh do Rajamin marayak ho; parpintor anjaha siparmonang do Ia. Toruh do uhur-Ni anjaha mangajak halode, anak ni halode boru-boru.

¹⁰ Siapkonon-Ni do gareta porang hun Efraim ampa huda porang hun Jerusalem, siapkonon-Ni do homa sior na pinakei marporang. Dob ai ambilankonon-Ni ma damei bani bangsa-bangsa, anjaha gomgoman-Ni hun laut hu laut, hun Eprat das ronsi ujung ni tanoh on.

Haluahon ampa Olob-olob

¹¹ Marhalanohon ni daroh parpadananmu paluahon-Ku do homa halak na tarbuang hun bam, humbani godung, na so marisi bah.

¹² Mulak ma hanima hu bentengnima, hanima na tartangkap, lompit dua do pasuangen-Ku bannima.

¹³ Ai Husintak do Juda Bangku songon sior, anjaha Efraim do Hubahen gabe lingkitni. Diloong-Ku do anakmu, ale Sion, manlawan anakmu ale Tanoh Gorik, anjaha bahenon-Ku ma ho songon podang ni puanglima.

¹⁴ Jadi talar ma Jahowa ibabou ni sidea, anjaha luar lingkit-Ni songon hilap; sompulon ni Naibata Jahowa ma tarompit anjaha bingkak ma la.

¹⁵ Jahowa Zebaot do na mangondingi sidea, jadi monang ma sidea anjaha bois idogei batu ni umbalang; jadi inumon ni sidea ma daroh ni sidea songon anggur, gabe gok ma songon batil panggalangan, songon suhi-suhi ni anjapanjap.

¹⁶ Bani ari ai urupan ni Jahowa Naibata ni sidea ma sidea, ai hulanan ni bangsa-Ni do sidea; ai

songon batu intan ni sortali, sonai do maningon marsinondang sidea i tanohni.

¹⁷ Tongon, dearni in anjaha jengesni in ai! Gandum ampa anggur martumbor ibahen, sonai homa anak parana ampa anak boru.

Jahowa Tumang do Sibere Haluahon

10 ¹“Pangindo nasiam ma udan humbani Jahowa bani panorang mungkah ni parudan; Jahowa do sibahen hambun ampa habahaba, la do sibere udan bani nasiam ampa udan hubani sagala suan-suanan na i juma.

² Ai ladung do isahapkon terapim, anjaha sipartondung manondungi sipaoto-oto; nipi na so tongon do ihatahon sidea, anjaha apoh-apoh na lumei iberehon. Halani ai kahou do sidea songon hulanan ni biribiri, anjaha masombuh do sidea, halani lang adong parmahan.

³ Manringis do Ahu bani parmahan anjaha uhumon-Ku do sipambobai; ai isarihon Jahowa Zebaot do hulanan-Ni, ai ma ginompar ni Juda, anjaha bahenon-Ni do sidea songon huda pinajagar i parporangan.

⁴ Humbani sidea do rohni batu parsuhi, humbani sidea do homa paku ni lampolampo; humbani sidea do rohni panah sipakeion i parporangan, humbani sidea do rohni haganup tene siparkuasa.

⁵ Doskon puanglima do sidea i parporangan, na mandogei munsuhni ibagas hubang na i alaman; nai ma, marporang do sidea, anjaha bador do ibahen sidea bala siparhuda, ai Jahowa do hasoman ni sidea.

⁶ Margogoh do bahenon-Ku ginompar ni Juda anjaha paluahon-Ku ginompar ni si Josep. Boanon-Ku do sidea mulak, ai marpangulaki do uhur-Hu mangidah sidea, anjaha gabe songon na so onggga Huambukkon do sidea holi idahon, ai Ahu do Jahowa Naibata ni sidea, anjaha tangihonon-Ku do sidea.

⁷ Gabe doskon puanglima do ia Efraim, anjaha malas uhur ni sidea songon binahen ni anggur. Idahon ni anak ni sidea ma ai gabe marmegah-megah, anjaha marolob-olob uhur ni sidea ibagas Jahowa.

⁸ Bahenon-Ku ma tanda bani sidea laho patumpuhon sidea; ai domma Hutobus sidea, anjaha pabueion-Ku do sidea songon sapari.

⁹ Age pe Hupamerap sidea i tongah-tongah ni bangsa-bangsa, dingaton ni sidea do Ahu i nagori na madaoh, jadi manggoluh ma sidea rap pakon dakdanak ni sidea anjaha mulak use.

¹⁰ Boanon-Ku do sidea mulak hun tanoh Masir, anjaha patumpuon-Ku sidea hun tanoh Assur; jadi boanon-Ku ma sidea mulak hu tanoh Gilead ampa

hu Libanon, pala seng dong be hasiatan bani sidea ijai.

¹¹ Diparan ni sidea ma Laut Masir; bogbogan ma gilumbang ni laut ai, anjaha pahorahon ganup na bagas i Bah Nil. Reongkonon ma gijang ni uhur ni Assur, anjaha paereton tungkot harajaon ni Masir.

¹² Pargogohon-Ku ma sidea marhitei Jahowa, anjaha mamuji-muji sidea ibagas goran-Ni,” nini Jahowa.

Parseda ni Libanon ampa Basan

11 ¹ Buka ma labahmu ale Libanon, ase iboiskon apuy ni hayu aresmin!

² Mandoruhi ma ho, ale hayu sipres, ai domma maroboh hayu ares, anjaha siap na banggal-banggal ai! Mandoruhi ma, ale jajabi na i Basan, ai domma itobas harangan toras ai!

³ Tangar, doruh-doruh ni parmahan, ai domma siap hasangapon ni sidea! Tangar, paraum ni singa, ai domma siap hamuliaon ni Jordan!

Iondoskon Bangsa ai bani Parmahan na Jahat

⁴ Sonon do hata ni Jahowa Naibatanku, “Parmahani ma biribiri sisayaton in!

⁵ Halak na mamboli sidea manayati sidea anjaha seng marsalah sidea iahap, anjaha sidea na manjualsi mangkatahon, ‘Pinuji ma Jahowa, ai

domma gabe bayak ahu.’ Seng harga sidea bani parmahan ni sidea.

⁶ “Ahu pe, seng be hargaan-Ku pangisi ni tanoh on,” nini Jahowa. “Tonggor ma, Ahu sandiri padaskonjolma in sada-sada hubagas kuasa ni hasomanni ampa hubagas kuasa ni rajani; jadi parsedaon ni sidea ma tanoh on anjaha sahalak pe lang paluahon-Ku humbani tangan ni sidea.

⁷ Anjaha Ahu do na marmahan biribiri sisayaton in bani sipartiga-tiga biribiri. Hubuat ma Bangku dua simambu: Sada Hugoran Haholongan, na sada nari Pardomuan; anjaha Huparmahan ma biribiri in.

⁸ Ibagas sabulan Husiapkon ma parmahan sitolu halak ai. Dob ai lang sabar be Ahu mangidah sidea, sidea pe sobalan ma Bangku.

⁹ Jadi ningku ma, ‘Seng marosuh be Ahu marmahan hanima. Matei hujin na matei in; bois hujin na bois in, anjaha paturut hujin na tading in marsipangan daging ni hasomanni.’

¹⁰ Dob ai Hubuat ma simambu-Hu Haholongan ai, Huponggolhon ma ai, laho manlangkon padan na Hubahen ai bani ganup bangsa-bangsa,

¹¹ masab ma padan ai bani na sadari ai. Jadi mangahap ma sipartiga-tiga biribiri ai, na mardiateihon Ahu ai, paboa hata ni Jahowa do ai hape.”

¹² Dob ai ningku ma bani sidea, “Anggo dear ninuhur nasiam, bere nasiam ma bangku upahku,

anggo lang, paturut nasiam ma hujin. Jadi itimbang sidea ma upahku tolu puluh rupiah.”

¹³ Tapi nini Jahowa ma hu bangku, “Gijigkon ma in hu poti parartaan ai, ai ma harga na jagar, na tinaksir ni sidea Bangku.” Jadi hubuat ma sitolu puluh rupiah ai, anjaha hugijigkon ma ai hu poti parartaan ai, na ibagas rumah ni Jahowa.

¹⁴ Dob ai huponggolhon ma simambuhu na paduahon ai, ai ma Pardomuan ni Juda ampa Israel.

¹⁵ Dob ai nini Jahowa ma hu bangku, “Buat ma sahali nari bam parugas ni sada parmahan na jahat.

¹⁶ Ai tonggor ma, Ahu pabangkit sada parmahan i tanoh on, na so manarison na laho magou in, na so mangindahi na kahou in, na so mangindahi na ugahan in, na so marmuduhon na jorgit in, tapi na mamboiskon daging ni na mombur anjaha na mangkiskisi ronsi holiholini.

¹⁷ Magou ma parmahan-Ku na so margagan, na manadingkon biribiri in! Podang do mangonai bani tanganni ampa bani matani siamun. Sai na laho melus do tanganni, anjaha na laho golap do mata siamunni.”

Hasosakan ni Jerusalem ampa Haluahonni

12 ¹ Pangungkabon humbani Naibata. Hata ni Jahowa pasal Israel. Sonon do hata ni

Jahowa, sipaherbang langit, sipajonam tanoh on anjaha na manjadihon tonduy ibagasjolma in,

²“Tonggor ma, Ahu mambahen Jerusalem gabe panginuman hamabukon bani haganup bangsa inggot; das do ai homa hu Juda sanggah pangkubunon ni Jerusalem.

³Bani ari ai bahenon-Ku ma Jerusalem gabe batu pangujian gogoh bani haganup bangsa; anjaha sagala na sihol mangangkat ai luha ma ia bahenonni; anjaha sagala bangsa na i tanoh on martumpu-tumpu sihol mangimbang huta ai.”

⁴Bani ari ai nini Jahowa, “Hirjat ma bahenon-Ku sagala huda, anjaha ratou na mangkundulisi. Tapi anggo mangidah ginompar ni Juda kawah do matang-Ku; huda ni sagala bangsa ai, pitung do ganupan bahenon-Ku.

⁵Dob ai hatahonon ni kopala-kopala ni Juda ma ibagas uhur ni sidea, ‘Marhagogohon do Jerusalem marhitei Jahowa Zebaot, Naibata ni sidea ai.’

⁶Bani ari ai Ahu mambahen kopala-kopala ni Juda songon hudon parapuyan i tongah-tongah ni soban, songon rigapan i tongah-tongah ni radean; jadi boiskononni ma sagala bangsa inggot hampit siamun ampa hampit sambilou, tapi anggo Jerusalem totap do jongjong bani iananni hinan.

⁷Jadi parlobei ma bereon ni Jahowa hamonangan bani lampolampo ni Juda ase ulang mangenjeng

habanggalon ni rumah ni si Daud ampa habanggalon ni pangisi ni Jerusalem dompak Juda.

⁸ Bani ari ai ondingan ni Jahowa do pangisi ni Jerusalem, gabe doskon si Daud ma sigalekan humbani sidea bani ari ai, anjaha ginompar ni si Daud, songon Naibata, songon malekat ni Naibata i lobei ni sidea.

⁹ Bani ari ai siapkonon-Ku ma sagala bangsa-bangsa na roh mamorang Jerusalem.”

Tangis Panolsolion Mardingat na Tarpantom ai

¹⁰ “Anjaha useihonon-Ku ma bani ginompar ni si Daud ampa bani pangisi ni Jerusalem tonduy paridop ni uhuran ampa partonggoon, gabe patonggor-tonggoron ni sidea ma ia, na dob pinantom ni sidea ai; anjaha tangisan ni sidea ma ia songon panangisi bani anak sasada, anjaha pusok tumang uhur ni sidea manangisi songon panangisi bani anak bunga tubuh.

¹¹ Bani ari ai masa ma partangison bolon i Jerusalem songon partangison pasal Hadad Rimon i habungan Megiddo.

¹² Tangis ma pangisi ni tanoh on, pulig mar sasaompung; ginompar ni si Daud, na saompung pulig, parinangon ni sidea homa pulig; ginompar ni si Natan, na saompung pulig, parinangonni pe pulig;

¹³ ginompar ni si Levi, na saompung pulig, parinangon ni sidea pe pulig; ginompar ni si Simei, na saompung pulig, parinangon ni sidea pe pulig,
¹⁴ sonai homa ginompar ni marga na legan ai ganup pangku pulig bei, anjaha parinangon ni sidea pe pulig bei.

**Paniapkon bani Parnaibataon na Legan
ampa Nabi Sipakulah-kulah**

13 ¹ Bani ari ai adong ma sada bah tubuh ibuha bani ginompar ni si Daud ampa bani pangisi ni Jerusalem laho mamurihi sidea humbani dousa ampa habutakon.

² Bani ari ai, nini Jahowa Zebaot, “Siapkonon-Ku ma goran-goran ni naibata na legan hun tanoh on, ase ulang be taringat halak hujai; sonai homa nabi-nabi ampa tonduy na mabutak usiron-Ku do hun tanoh on.

³ Anggo adong ope atap ise na manjahai songon nabi, hatahonon ni bapa atap inangni na manubuhkon ai ma bani, ‘Seng bulih be ho manggoluh, ai ihatahon ho do ladung marhitei goran ni Jahowa;’ anjaha bapani ampa inangni na manubuhkon ai ma na mamantonsi anggo manjahai ia.

⁴ Bani ari ai maila ma sagala nabi marhitei panonggoranni sanggah na manjahai ia, seng be pakeionni baju na marambulu laho paoto-otohon,

⁵ tapi hatahononni ma, ‘Seng nabi ahu, parjuma-juma do ahu, ai simada juma do ahu humbani haposoonku ope.’

⁶ Porini adong na manungkunsi, ‘Ugah aha do na bani tontonmu in?’ Hatahononni ma, ‘Na hona bogbogan do ahu i rumah ni hasomanku.’”

Hona Bogbog Parmahan Gabe Merap ma Biribiri

⁷ “Misir ma, ale podang, dompak parmahan-Ku, dompak dalahi tang sindohor-Hu,” nini Jahowa Zebaot. “Hubogbog ma parmahan in, ase merap biribiri in, durdurhonon-Ku do tangan-Ku laho manogu halak na maetek.

⁸ Masa ma bani ganup tanoh in,” nini Jahowa, “Siapkonon anjaha agouon-Ku ma dua partolu pangisini, tapi tebahonon-Ku do manggoluh na sapartolu nari.

⁹ Na sapartolu ai pe nahkonon-Ku do hubagas apuy, laho papitahkon songon pirak; anjaha ujion do sidea songon panguji bani omas. Diloon ni sidea ma goran-Ku anjaha balosan-Ku ma sidea. Hatahonon-Ku ma, ‘Bangsang-Ku do in;’ anjaha sidea pe hatahononni do, ‘Jahowa do Naibatanku.’”

Partalar ni Jahowa i Dolog Jetun

14 ¹ Tonggor ma, na roh ma ari ni Jahowa, gabe bagion ma taban-tabanmu i tongah-tongahmin.

² Ai patumpuon-Ku ma ganup bangsa dompak Jerusalem laho marporang, gabe tartaban ma huta ai, rumah-rumah hona ayob, anjaha puang-puang hona butakan. Satongah huta ai tarboan hu habuangan, tapi simasima ni bangsa ai, seng siapkonon-Ku hun huta ai.

³ Dob ai bingkat ma Jahowa mangimbang bangsa-bangsa ai, songon na somal la marporang bani ari parporangan.

⁴ Jadi onjolhonon-Ni ma nahei-Ni bani ari ai i atas ni Dolog Jetun, tontang ni Jerusalem, hampit hapoltakan, anjaha bolah dua ma Dolog Jetun ai hun hapoltakan hu hasundutan, gabe jadi ma sada habungan na lumbang tumang; morot do satongah ni dolog ai dompak utara, anjaha na satongah nari dompak dangsina.

⁵ Itutup ma habungan ni dolog-dolog-Kai; das do ronsi Asel habungan ni dolog-dolog ai; anjaha maningon maporus ma hanima songon parporusnima sanggah lalou bani panorang ni si Usia, raja ni Juda. Dob ai roh ma Jahowa Naibatanku, odor pakon-Si sagala halak na mapansing.

⁶ Bani ari ai seng dong na milas barang na borgoh anjaha bah na himpang pe seng dong;

⁷ anjaha layur ari ai, Jahowa do sibotoh ai, seng songon arian, seng songon borngin; tapi marayak bodari liar ma use.

Panrajaion ni Jahowa

⁸ Bani ari ai luar ma bah hagoluhan hun Jerusalem, satongah dompak laut hampit hapoltakan, satongah dompak laut hampit hasundutan, torus do sonai age sanggah logou ni ari atap musim udan pe.

⁹ Anjaha Jahowa ma gabe Raja i sab tanoh on; bani ari ai Jahowa tumang mando, anjaha goran-Ni tumang mando.

¹⁰ Mubah ma ganup tanoh ai gabe pamah hun Geba das hu Rimon hampit dangsina ni Jerusalem. Tapi gijang do ia huta ai anjaha totap bani iananni hun horbangan Benjamin das hu horbangan na parlobei ai das hu horbangan parsuhi-suhi, anjaha hun manara Hananel das hu kilang anggur ni raja ai.

¹¹ Jadi marianan ma halak ijai, anjaha seng dong be masa papa ijai, anjaha totap ma sonang Jerusalem.

¹² Tapi on do papa sipamasaon ni Jahowa bani haganup bangsa na roh marporang dompak Jerusalem. Masik do bahenon-Ni daging ni sidea, sanggah jongjong ope sidea bani naheini, mata ni sidea masik do ibagas liangni, sonai homa dilah ni sidea ibagas pamangan ni sidea.

¹³ Bani ari ai masa ma hageoron bolon humbani Jahowa i tongah-tongah ni sidea, gabe ganup ma

marsitangkap tangan ni hasomanni, anjaha tangan ni na sada mangimbang tangan ni na sada nari.

¹⁴ Juda pe dihut do marporang mangkopkop Jerusalem, anjaha hona ayob ma habayakon ni bangsa-bangsa inggot, omas, pirak ampa hiou buei tumang.

¹⁵ Papa-papa na sonai ai pe mangonai do homa bani huda, pirah ni halode, unta, halode, bani sagala pinahan na adong bani hulanan ai, usih hubani papa nongkan.

¹⁶ Anjaha ganup na tading humbani ganup bangsa-bangsa ai, na bingkat mangimbang Jerusalem, bingkat ma sidea ai ganup tahun laho marsombah hubani Raja in, Jahowa Zebaot, ampa marpesta lampolampo.

¹⁷ Tapi barang ise humbani bangsa na i tanoh on, na so tangkog hu Jerusalem laho marsombah hubani Raja in, Jahowa Zebaot, seng anjai roh be udan bani sidea.

¹⁸ Porini bangsa Masir na so tangkog ai laho pataridahkon dirini, jadi sogop ma bani sidea papa, na nihonahon ni Jahowa bani bangsa na so tangkog laho mamestahon pesta parlampolampoan ai.

¹⁹ Ai ma na gabe uhum bani Masir ampa uhum bani bangsa-bangsa, na so bingkat marpesta parlampolampoan hu Jerusalem.

²⁰ Bani ari ai tarsurat do age bani giring-giring ni huda: Pinapansing bani Jahowa. Anjaha hudon

i rumah ni Jahowa gabe songon pinggan bolag panggalangan ma ai i lobei ni anjapanjap.

²¹ Anjaha sagala hudon i Jerusalem ampa Juda maningon papansingon do ai bani Jahowa, ase sagala na manggalang boi roh, anjaha ibuat hunjai bahen panlompahanni. Anjaha seng dong be halak partiga-tiga bani ari ai i rumah ni Jahowa Zebaot.

Maleaki

Holong ni Naibata bani Israel

1 ¹ Hata pangungkabon ni Jahowa bani Israel marhitei si Maleaki.

² “Holong do uhur-Hu bannima,” nini Jahowa. Tapi ihatahon hanima, “Sonaha ma pangkaholongi-Mu bennami? Ai lang si Esau do namin abang ni si Jakob,” nini Jahowa, “hape si Jakob do Huhaholongi, ³ tapi sogam do uhur-Hu bani si Esau. Halani ai do ase gabe halimisan Hubahen dolog-dologni, anjaha Huondoskon parbagiananni gabe ianan ni sorigala, na somal marianan i halimisan.”

⁴ Porini nini Edom, ‘Domma tongon iparseda hanami, tapi ulakkononnami do paulihon na mareong ai,’ hatahonon ni Jahowa Zebaot ma, ‘Sidea paulihon, tapi Ahu use manreongkon; goranon ni halak ma sidea, “Tanoh hajahaton, bangsa siringisan ni Jahowa sadokah ni dokahni.”

⁵ Idahon ni matanima ope ai, gabe hatahononnima ma, “Banggal do Jahowa, age i darat ni parbalogan ni Israel.” ’

Sipanggalang na So Talup

⁶ Nini Jahowa Zebaot, “Ipasangap anak do bapani, anjaha ihabiari juakjuak tuanni. Anggo bapa do Ahu, ija do hasangapon-Ku? Anggo Tuhan Ahu, ija do biar dompak Ahu? Hanima malim-malim sipahiri goran-Ku. Hape nini hanima ope, ‘Sonaha, hanami pahiri goran-Mu?’

⁷ Iboan hanima do bani anjapanjap-Ku ruti na mabutak. Anjaha ihatahon hanima do, ‘Sonaha ibahen hanami pabutak ai?’ Marhitei na ipinghiri hanima, ‘Boi do pahirion meja ni Jahowa.’

⁸ Anggo iboan hanima pinahan na mapitung bahen galangan, ai lang na sambor ma ai? Anggo igalangkon hanima na oyangon atap na boritan, ai lang na sambor ma ai? Parsiluah hanima ma ai bani panggomgominima, mintor tumaram ma rosuh uhurni mangidah ho barang layak ia bam?” nini Jahowa Zebaot.

⁹ “Ai pe buat hanima ma uhur ni Naibata marhitei galangan sisonai ai, ase idop uhur-Ni banta! Sonai do pambahenannima, mintor tarbahen ma rosuh uhur-Ni mangidah hanima?” nini Jahowa Zebaot.

¹⁰ “Ambit adong ma namin sada halak hun tengah-tongahnima na ra manutup labah ni Rumah Panumbahan in, ase ulang sisoya-soya pannahitinima apuy bani anjapanjap-Kin. Seng marosuh uhur-Hu mangidah hanima,” nini Jahowa

Zebaot, “anjaha seng tarharosuhkon Ahu galangan hun tangannima.

¹¹ Ai hun hapoltakan das hu hasundutan timbul do goran-Ku i tongah-tongah ni bangsa-bangsa anjaha bani ganup ianan igalangkon do dahupa bani goran-Ku ampa galangan sipanganon na pitah; ai timbul do goran-Ku i tongah-tongah ni bangsa-bangsa,” nini Jahowa Zebaot.

¹² “Tapi anggo hanima ipabutak hanima do in, marhitei na hinatahonnima, ‘Boi do butak bahenon meja ni Jahowa, anjaha mapas uhur bani sipanganon na ijai ai.’

¹³ Nini hanima, ‘Tonggor ma, loja ni in!’ Anjaha mapas do uhurnima Bangku,” nini Jahowa Zebaot. “Iboan hanima do na nirampok, na oyangon ampa na boritan, iboan hanima do ai gabe galangannima. Mintor tarharosuhkon Ahu ma manjalo ai hun tangannima?” nini Jahowa.

¹⁴ “Sai hona papa ma sipangoto-otoi, na marnah pinahan tunggal namin bani hulananni, na dob binagahkonni, hape na martikas do saudni igalangkon bani Tuhan in! Ai Raja na bolon do Ahu,” nini Jahowa Zebaot, “anjaha sihabiaran do goran-Ku i tongah-tongah ni bangsa-bangsa.”

Lumba-lumba bani Malim na So Talup

2 ¹ “Ai pe, hanima malim-malim, mangonai do bannima hata lumba-lumba on.

² Anggo seng ra hanima manangihon, anjaha anggo seng ra hanima marimbagaskon, laho pasangapkon goran-Ku,” nini Jahowa Zebaot, “tongoson-Ku ma papa hu tongah-tongahnima, anjaha gabe papa bahenon-Ku pasu-pasu na bannima in; domma tongon hona papang-Ku ai, halani na so ra hanima marparimbagaskon ai.

³ Tonggor ma, rotapon-Ku do tangannima, anjaha lapuhonon-Ku do kotoran bani bohinima, ai ma kotoran ni galangannima, anjaha saradon do hanima hunjai.

⁴ Jadi botohonnima ma, Ahu do na manongos haputusan on bannima, laho patotapkon padan-Ku na bani halak Levi,” nini Jahowa Zebaot.

⁵ “Ia padan na Hubahen ai bani, ai ma padan hagoluhan ampa hadameion, anjaha Hubere do ai bani, ase unduk ia marhabiaran bani goran-Ku.

⁶ Titah na sintong do bani pamanganni, anjaha seng jumpah hagedukon bani bibirni, ibagas damei ampa hasintongon do ia marparlahou i lobei-Hu, anjaha buei do halak ipaulak humbani hajahaton.

⁷ Ai maningon ramotkonon ni malim do habotohon, anjaha humbani pamanganni pindahan pangajarion, ai suruhan ni Jahowa Zebaot do ia.

⁸ Tapi anggo hanima domma manlembang humbani dalan ai, anjaha buei halak jomba ibahen hanima

marhitei pangajarionnima, iparseda hanima do padan na bani halak Levi,” nini Jahowa Zebaot.

⁹“Halani ai do ase hiri anjaha dorun hanima Hubahen i lobei ni ganup bangsa in, halani na so nidalanannima dalan-Kai, tapi martonggor jumbak do hanima bani pangajarion.”

Pinsang-pinsang Halani Pangoseion bani Partongahjabuan

¹⁰ Ai lang sada do bapa ni hita on ganup? Ai lang sada do Naibata na manompa hita? Mase ma marsioseian hita samah hita, anjaha ibutaki hita padan na bani ompungta?

¹¹ Mosei do halak Juda, anjaha masa do sihagigihononkon i Israel ampa i Jerusalem; ai ibutaki halak Juda do rumah hapansingon ni Jahowa, na hinaholonganni ai, anjaha iompoi do boru ni naibata na legan.

¹² Sai siapkonon ni Jahowa do halak na mangkorjahon na sonai ai, sipangadu ampa sipangapiti, hun lampolampo ni si Jakob, age humbani halak na mamboan galangan bani Jahowa Zebaot.

¹³ Anjaha on do na binahennima. Irungkub hanima do anjapanjap ni Jahowa marhitei iluh-iluh, partangison ampa hoih-hoih, halani na so pinardiateihon-Ni ai be galangan ai, anjaha

na so rosuh ai be uhur-Ni manjalo ai humbani tangannima.

¹⁴ Nini hanima sungkun-sungkun, “Mase sonai?” Halani Jahowa do saksi ni parpadanan na binahenmu ampa naboru bani haposoonmu, na dob nioseimu age pe ia do huanmu ampa parinangonmu mangihutkon padan.

¹⁵ Ai lang Naibata na sasada in do manjadihon ampa patotapkon banta tonduy hagoluhan? Anjaha aha do na pinarsinta-Ni? Bonih ni Naibata. Halani ai marjaga-jaga ma hanima ibagas tonduynima, ulang ma adong na mosei humbani naboru hinaholonganni sanggah poso.

¹⁶ “Ai Huhagigihon do parsirang-sirangon,” nini Jahowa Naibata ni Israel, “ampa na manrungkubkon hiouni bani hajahaton,” nini Jahowa Zebaot. “Halani ai jaga hanima ma dirinima, anjaha ulang be mosei.”

Naibata Roh Mamboan Uhum

¹⁷ Ilojai nasiam do Jahowa marhitei sahap-sahap nasiam. Tapi nini nasiam, “Marhitei aha ilojai hanami la?” Marhitei na mangkatahon, “Sagala sihorjahon hajahaton, dear do uhur ni Jahowa mangidah ai, anjaha rosuh do uhur-Ni bani sidea.” Barang marhitei na manungkun, “Ija do Naibata, sidabuh uhum?”

3¹ “Tonggor ma, suruhon-Ku ma suruhan-Ku, ase ipasirsir dalam i lobei-Hu, jadi sompong ma roh Tuhan, na pinindahannima ai, marayak rumah-Ni; suruhan ni parpadanan, na hinasiholhonnima ai, tonggor ma, na roh ma la,” nini Jahowa Zebaot.

² “Tapi ise ma na boi manahankon ari parroh-Ni ai, anjaha ise ma na boi jongjong, anggo talar ma la? Ai songon apuy ni panopa do la anjaha songon sabun ni panabun.

³ Hundul ma la songon sipanlala ampa sipapitah pirak, jadi urasan-Ni ma halak Levi, anjaha papitahon-Ni ma sidea songon omas ampa pirak, ase boi sidea mamboban galangan na sintong bani Jahowa.

⁴ Anjaha rosuh uhur ni Jahowa bani galangan ni Juda ampa Jerusalem songon sapari ampa bani tahun-tahun na salpu.

⁵ Jadi dohoran-Ku ma hanima laho manguhum, gabe saksi na sihap ma Ahu bani parsibalik mata, bani siparbangkis, bani sibijahon na tongon, bani halak na mangodohkon siparombou ibagas gajini, na mabalu ampa na tading maetek, bani halak na manulak panginsolat, na so mabiar Bangku,” nini Jahowa Zebaot.

Dilo-dilo bani Hamubahon

⁶ “Seng mubah-ubah anggo Ahu, Jahowa, tapi anggo hanima tong pe songon anak ni si Jakob.

⁷ Humbani panorang ni ompungnima, sai manlembang do hanima humbani titah-Ku, anjaha seng iramotkon hanima ai. Mulak ma hanima hu Bangku, ase mulak Ahu bannima,” nini Jahowa Zebaot. “Tapi nini hanima, ‘Sonaha ma hanami mulak?’

⁸ Ai onggga do jolma paoto-otohon Naibata, ase paoto-otoonnima Ahu? Tapi nini hanima, ‘Marhitei aha ma ioto-otoi hanami Ham?’ Marhitei parsapuluhan ai ampa galangan ai!

⁹ Mangonai do papa bannima, halani ioto-otoi hanima Ahu, ganup bangsa in tene.

¹⁰ Boan hanima ma parsapuluhan in, gok, hu rumah parartaan, ase adong bohal i rumah-Ku; dob ai lajou hanima ma Ahu marhitei ai,” nini Jahowa Zebaot, “atap na so buhaon-Ku do bannima jendela ni langit, laho manguseihon bannima pasu-pasu na marlobih-lobih.

¹¹ Jadi tulakon-Ku ma, halani hanima, sipangatah (*balang*) ai, ase ulang be isiapkon gogoh ni tanoh in, anjaha ase ulang mangolang hayu anggur na i juma ai marbuah bannima,” nini Jahowa Zebaot.

¹² “Jadi parhatuahon ni haganup bangsa ma hanima, ai maningon gabe tanoh haudungan ni uhur do hanima,” nini Jahowa Zebaot.

Legan ni Parpintor ampa Parjahat

¹³ “Ipabanggal hanima do hata-hatanima dompak Ahu,” nini Jahowa. “Lanjar nini hanima ope, ‘Sonaha ma parsahapnami dompak Ham?’

¹⁴ Ihatahon hanima, ‘Seng dong gunani balosan Naibata. Aha ma untungnami, halani ihorjahon hanami parentah-Ni, atap na marhoru ai hanami mardalan i lobei ni Jahowa Zebaot?’

¹⁵ Halani ai iparhatuah hanima do halak na jungkat maruhur: Halak parjahat seng pitah mardohar, tapi age pe ilajou sidea Naibata, maluah do sidea.

¹⁶ Tapi marsipasingatan do halak na mangkabiari Jahowa samah sidea, pardiateihon anjaha itangar Naibata do ai. Anjaha tarsurat do i lobei-Ni sada buku pardingatan bani halak na mangkabiari Jahowa ampa na mangkargahon goran-Ni.

¹⁷ Jadi Ahu ma simada sidea,” nini Jahowa Zebaot, “bani ari na sihol marlulu ai Ahu, anjaha idopan-Ku ma sidea, songon sada halak na mangidopi anakni, na mambalosisi.

¹⁸ Ijai use idahonnima ma parleganan ni parpintor humbani parjahat, na mambalosi Naibata humbani na so mambalosi Naibata.”

Ari ni Jahowa

4 ¹ “Tonggor ma, na roh ma ari ai, gara songon pamurunan, jadi gabe doskon anggala ma

ganup halak na jungkat maruhur ampa halak parjahat; tutungon ni ari na sihol roh ai ma sidea,” nini Jahowa Zebaot, “anjaha seng dong tading bani sidea bahenon-Ni urat atap ranting pe.

²Tapi poltak ma anggo bannima, sagala na marhabiaran bani goran-Ku, mata ni ari ni hapintoron, marhasoman hamalumon i toruh ni habongni, songon anak ni lembu na manlumpat-lumpat humbagas harang.

³Jadi dogeionnima ma halak parjahat, ai maningon gabe abuan do sidea i toruh ni tapak ni naheinima bani na marlulu ai Ahu,” nini Jahowa Zebaot.

⁴Sai padingat-dingat hanima ma titah ni si Musa, juakjuak-Kai, titah ampa aturan, na Huondoskon ai bani i Dolog Horeb, sipadason bani haganup Israel.

⁵Tonggor ma, suruhon-Ku ma bannima Nabi Elias, parlobei ni parroh ni ari ni Jahowa na bolon anjaha na majombut ai.

⁶Anjaha ia ma na paulakkon uhur ni bapa bani anakni, anjaha uhur ni anak bani bapani, use ulang roh Ahu mangkonahon papa bani tanoh on.

Mateus

Partuturan ni Tuhan Yesus

(Luk. 3:23-38)

1 ¹ On ma surat partuturan ni Yesus Kristus, anak ni si Daud, anak ni si Abraham.

² Anak ni si Abraham si Isak, anak ni si Isak si Jakob, anak ni si Jakob si Juda ampa saninani ai.

³ Anak ni si Juda si Peres pakon si Sera, humbani si Tamar; anak ni si Peres si Esrom, anak ni si Esrom si Aram.

⁴ Anak ni si Aram si Aminadab, anak ni si Aminadab si Nahason, anak ni si Nahason si Salmon.

⁵ Anak ni si Salmon si Boas humbani si Rahab, anak ni si Boas si Obed humbani si Rut, anak ni si Obed si Jesse.

⁶ Anak ni si Jesse Raja Daud, anak ni si Daud si Salomo, humbani binuat ni si Uria.

⁷ Anak ni si Salomo si Rehabeam, anak ni si Rehabeam si Abia, anak ni si Abia si Asa.

⁸ Anak ni si Asa si Josapat, anak ni si Josapat si Joram, anak ni si Joram si Usia.

⁹ Anak ni si Usia si Jotam, anak ni si Jotam si Ahas, anak ni si Ahas si Hiskia.

¹⁰ Anak ni si Hiskia si Manasse, anak ni si Manasse si Amon, anak ni si Amon si Josia.

¹¹ Anak ni si Josia si Jekonya ampa sanina ai, ai ma bani panorang habuangan hu Babel.

¹² Jadi dob tarbuang sidea, tubuh ma si Sealtiel, anak ni si Jekonya, dob ai si Serubabel, anak ni si Sealtiel.

¹³ Anak ni si Serubabel si Abiud, anak ni si Abiud si Eliakim, anak ni si Eliakim si Asor.

¹⁴ Anak ni si Asor si Sadok, anak ni si Sadok si Akim, anak ni si Akim si Eliud.

¹⁵ Anak ni si Eliud si Eleasar; anak ni si Eleasar si Mattam, anak ni si Mattam si Jakob.

¹⁶ Anak ni si Jakob si Josep, paramangon ni si Maria, na manubuhkon Jesus, na margoran Kristus.

¹⁷ Ase buei ni sundut humbani si Abraham das hubani si Daud ai ma sapuluh ompat sundut, anjaha humbani si Daud das hu habuangan Babel sapuluh ompat sundut, anjaha humbani habuangan Babel das hubani Kristus sapuluh ompat sundut.

Partubuh ni Tuhan Jesus

¹⁸ Ia partubuh ni Jesus Kristus, sonon do: Sanggah tunangan ni si Josep ope inangni, si Maria ai, boratan rumah do ia humbani Tonduy Na Pansing, sanggah lape marsidohoran sidea.

¹⁹ Ia si Josep, paramangonni ai, paruhur na pintor do, anjaha seng sihol uhurni laho pabadorhonsi, gabe tubuh ma uhurni manirangkonsi sip-sip.

²⁰ Tapi sanggah sonai ope sura-sura ni uhurni, ididah ma ibagas nipini malekat ni Tuhan in, na mangkatahon hu bani, “O Josep, anak ni si Daud, ulang ma mabiar ho mangalop si Maria gabe parinangonmu, ai na adong bani ai, ai ma na humbani Tonduy Na Pansing.

²¹ Tubuhan Anak ma ia, anjaha bahen ma goran-Ni Jesus, ai paluahon-Ni do bangsa-Ni humbani dousa ni sidea.

²² Masa pe hagianupan ai, ase jumpah do na hinatahon ni Tuhan in marhitei nabi-Ni, na mangkatahon,

²³ ‘Tonggor ma, boratan rumah ma sada anak boru, anjaha tubuhan anak, anjaha bahenonni ma goranni Immanuel, artini: Hasomanta do Naibata.’”

²⁴ Jadi dob puho si Josep, idalankon ma songon na hinatahon ni malekat ai bani, saud ma ialop parinangonni ai.

²⁵ Tapi seng idohori ia, paima tubuh anak bunga tubuhni ai, anjaha igoran ma Ia Jesus.

Paruhur na hun Hapoltakan

2 ¹ Ase dob tubuh Jesus i huta Betlehem, na i Judea, sanggah panorang ni Raja Herodes, roh ma halak paruhur na hun hapoltakan hu Jerusalem,

² nini sidea ma, “Ija do Raja ni Jahudi na baru tubuh in? ididah hanami do bintang-Ni i hapoltakan, anjaha halani ai do, ase roh hanami sihol manombah-Si.”

³ Jadi dob ibogei Raja Herodes ai, tarsonggot ma ia rap pakon haganup par Jerusalem.

⁴ Jadi ipatumpu ma haganup sintua ni malim ampa sibotoh surat ni bangsa ai, anjaha ipapangkei humbani sidea, atap ija do huta hatubuhan ni Kristus in.

⁵ Jadi nini sidea ma hu bani, “I huta Betlehem, na i tanoh Judea do, ai sonon do tarsurat marhitei nabi ai,

⁶ ‘Ale Betlehem, na i tanoh Juda, sedo ho sietekan i tongah-tongah ni huta na i tanoh Juda, ai ho do huta harohan ni Raja in, na sihol marmahan Israel, bangsang-Kin!’”

⁷ Dob ai idilo Raja Herodes ma paruhur ai marponop-ponop, anjaha ipatae ma humbani sidea dokahni, dob taridah bintang ai.

⁸ Dob ai isuruh ma sidea hu huta Betlehem, nini ma, “Laho ma nasiam hujai, pangkei ma pindahi nasiam Dakdanak ai! Anjaha anggo domma jumpah nasiam la, patugah nasiam bangku, ase dihut ahu roh marsombah hu Bani.”

⁹ Ase dob ibogei sidea hata ni raja ai, misir ma sidea. Anggo bintang ondi, na dob ididah sidea hinan i

hapoltakan, sai mardalan do i lobei ni sidea, paima soh ai i babou ni ianan ni Dakdanak ai.

¹⁰ Mangidah bintang ai, malas tumang ma uhur ni sidea.

¹¹ Imasuki sidea ma rumah ai, gabe ididah sidea ma Dakdanak ai rap pakon si Maria inang-Ni ai. Dob ai manrogop ma sidea marsombah hu Bani, i buka sidea ma artani anjaha isombahkon ma Bani siberebere ni sidea, omas, dahupa ampa mir.

¹² Dob ai roh ma lumba-lumba bani sidea marhitei nipi, ase ulang pala be mulak sidea hubani si Herodes, jadi humbani dalan na legan ma sidea mulak hu nagori ni sidea.

Maporus Dakdanak ai hu Tanoh Masir

¹³ Ase dob laho sidea, roh ma sada Malekat ni Tuhan in ididah si Josep ibagas nipi ni, nini ma, “Jongjong ma ho, boan ma Dakdanak in rap pakon inang-Ni, maporus ma hanima hu Tanoh Masir, anjaha ijai ma hanima lobei, paima roh use hatang-Ku, ai ipindah si Herodes do Dakdanak in, sihol bunuhonni.”

¹⁴ Jadi puho ma ia, iboan ma Dakdanak ai rap pakon inang-Ni bornginni ai, maporus laho hu Tanoh Masir.

¹⁵ Lanjar ijai ma sidea marianan paima matei si Herodes, ase jumpah na hinatahon ni Tuhan in marhitei nabi-Ni, na mangkatahon, “Hun Masir do hudilo Anak-Kin.”

Tarbunuh Dakdanak na i Betlehem

¹⁶ Dob tarbotoh bani si Herodes, na dob itipu halak paruhur ai ia, marah tumang ma ia, jadi isuruh ma hu Betlehem pakon hu nagori na inggot hujai, laho mamunuh sagala dakdanak na marumur dua tahun ampa na i toruh ni ai domu hubani panorang na dob pinapangkeini humbani halak paruhur ai.

¹⁷ Ijai ma jumpah na hinatahon marhitei Nabi Jeremias,

¹⁸ “Tarbogei do i Rama sora partangison pakon doruh-doruh. Itangisi si Rahel do anakni, seng ra ia apohon, ai domma bois sidea.”

Mulak hu Nasaret

¹⁹ Jadi dob matei si Herodes, taridah ma Malekat ni Tuhan in bani si Josep ibagas nipini i tanoh Masir, na mangkatahon,

²⁰ “Jongjong ma ho, boan ma Dakdanak in rap pakon inang-Ni mulak hu Tanoh Israel, ai domma matei na manguhurhon hosah ni Dakdanak in!”

²¹ Jadi puho ma ia, iboan ma Dakdanak ai rap pakon inang-Ni mulak hu Tanoh Israel.

²² Tapi dob iboge, si Arkelaus do hape raja i Judea gantih ni bapani, si Herodes, jadi mabiar ma ia laho hujai. Dob ijalo podah humbani Naibata ibagas nipini, jadi laho ma ia hu Nagori Galilea.

²³ Dob das ijai, laho ma ia marianan bani sada huta na margoran Nasaret, gabe jumpah ma hata ni nabi, na mangkatahon, “Goranon do la halak Nasaret.”

Parambilanon ni si Johannes Pandidi

(Mrk. 1:2-8; Luk. 3:1-20)

3 ¹ Bani panorang ai jongjong ma si Johannes Pandidi, anjaha marambilan ma ia i halimisan Juda,

² nini ma, “Paubah nasiam ma uhur nasiam, ai domma dohor Harajaon nagori atas in!

³ Pasalsi do na pinatugah ni Nabi Jesayas marhitei na hinatahonni, ‘Sora na dilo-dilo i halimisan! Pasirsir nasiam ma dalan bani Tuhan in, papintor nasiam ma sidalanan-Ni!’”

⁴ Ia si Johannes, ambulu ni unta do hiouni, hulingkuling do gonditni, anjaha sipanganonni balang pakon manisan ni lobah.

⁵ Jadi roh ma halak marayaksi hun Jerusalem, hun sab Judea ampa hun haganup pamah Jordan.

⁶ Jadi ididi si Johannes ma sidea i Bah Jordan ai, dob isopotkon sidea bei dousani.

⁷ Dob ididah buei halak Parisei pakon Sadukei marayak pandidionni ai, nini ma hubani sidea, “Nasiam ginompar ni ulog darih! Ise do na mangajari nasiam, boi maluah nasiam humbani ringis na sihol roh?

⁸ Parbuahkon nasiam ma buah na tama, paboa na dob mubah uhur nasiam,

⁹ anjaha ulang ma ninuhur nasiam ibagas, si Abraham do bapanami! Huhatahon ma bani nasiam, tarjadihon Naibata do anak bani si Abraham humbani batu on.

¹⁰ Domma tampei tangkei bani bona ni hayu. Ai pe, sirobohon do sagala hayu na so marbuahkon na madear, anjaha sigijigkononkon hubagas apuy!

¹¹ Ia ahu, bah do hudidihon bani nasiam, mangkatahon paubah uhur, tapi gogohan ope hun bangku na roh hun pudingku, gari mamboan sipatu-Ni seng talup ahu. Didihonon-Ni do bani nasiam Tonduy Na Pansing ampa apuy.

¹² Bani tangan-Ni do pamurpuran, paborsihon-Ni ma pardogeian-Ni, anjaha patumpuon-Ni ma omei-Ni hu tuangan-Ni, tapi lamlam-Ni tutungon do ai bani apuy na so ra mintop.”

Ididi si Johannes Tuhan Jesus

(Luk. 3:21, 22; Joh. 1:31-34)

¹³ Ijia roh ma Jesus hun Galilea hu Bah Jordan, laho padidihon diri-Ni hubani si Johannes.

¹⁴ Tapi manjua do si Johannes, nini ma, “Ahu do namin patut didion-Mu, mase ma Ham roh bangku?”

¹⁵ Tapi ibalosi Jesus ma ia, “Paturut ma sonai lobei, ai sonai do patut hita manggoki sagala hapintoron!” Jadi ibalosi ma.

¹⁶ Ase dob tardidi Jesus, mintor naik ma la humbagas bah ai. Anjaha tonggor ma, mungkab ma langit, anjaha taridah ma susur hun langit Tonduy ni Naibata songon asas, lanjar sogop hu Bani.

¹⁷ Lanjar nini sada sora ma hun nagori atas, “On do Anak, haholongan ni uhur-Hu, marosuh do uhur-Hu mangidah-Si!”

Tuhan Jesus Ibagas Parlajouan

(Mrk. 1:12, 13; Luk. 4:1-13)

4 ¹ Dob ai ibobai Tonduy in ma Jesus hu halimisan, ase ilajou sibolis la.

² Jadi dob marpuasa la ompat puluh ari ompat puluh borngin, loheian ma la.

³ Jadi ijumpahkon sipanlajou ai ma la, anjaha nini ma, “Anggo Anak ni Naibata do Ham, hatahon ma, ase gabe ruti batu on!”

⁴ Jadi nini ma mambalosi, tarsurat do, “Sedo ruti hansa hagoluhan bani jolma, tapi haganup hata ni Naibata, na luar humbani pamangan-Ni.”

⁵ Dob ai iarahkon sibolis ai ma la hu huta na mapansing ai, ipajongjong ma la bani anjung-anjung ni rumah panumbahan ai,

⁶ anjaha nini ma hu Bani, “Anggo Anak ni Naibata do Ham, lumpatkon Ham ma hu toruh, ai tarsurat do, ‘Suruhon-Ni do malekat-Ni manatang-natang Ho, ase ulang antuk nahei-Mu bani batu!’”

⁷ Jadi nini Jesus ma hu bani, tapi tarsurat do homa, “Seng bulih lajouonmu Tuhan Naibatamu!”

⁸ Dob ai iulakkon sibolis ai ma mamboan-Si hubani pakpak ni dolog na gijang tumang, anjaha ipatuduhkon ma hu Bani haganup harajaon na i dunia on ampa hasangaponni.

⁹ Jadi nini ma hu Bani, “Haganupan in hubere pe Bamu, asal ma ra Ham marsombah hu bangku.”

¹⁰ Jadi nini Jesus ma hu bani, “Laho ma ho bolis! Ai tarsurat do, ‘Tuhan Naibatamu do sisombahonmu, sahalak-Si do sibalosanmu!’” ’

¹¹ Dob ai itadingkon sibolis ai ma la, jadi roh ma malekat-malekat marugas Bani.

Tuhan Jesus Mulai Marambilan i Galilea

(Mrk. 1:14-15; Luk. 4:14-15)

¹² Dob ibogei Jesus na dob tartutup si Johannes, laho ma la hu Galilea.

¹³ Lanjar itadingkon ma huta Nasaret, gabe laho ma la marianan hu huta Kapernaum, na i topi ni tao ai, i nagori Sebulon ampa Naptali,

¹⁴ ase jumpah na hinatahon ni Nabi Jesayas, na mangkatahon,

¹⁵ ‘Nagori Sebulon ampa Naptali, na i topi ni tao ai, i dipar ni Bah Jordan, nagori Galilea, ianan ni sipajuh begu-begu,

¹⁶ bangsa na marianan ibagas na golap mangidah Panondang Na Bolon, anjaha poltak do Panondang bani na marianan bani linggoman ni hamatean.’

¹⁷ Jadi olat ni ai mamungkah ma Jesus marambilan, anjaha nini ma, “Paubah nasiam ma uhur nasiam, ai domma dohor Harajaon nagori atas in!”

Ipilih Tuhan Jesus Susian-Ni na Parlobei

(Mrk. 1:16-20; Luk. 5:1-11)

¹⁸ Jadi, sanggah na mardalani Jesus i topi ni Tao Galilea, ididah ma ijai dua halak na marsanina, na manampakkon jala ni sidea hu tao ai, ai pardengke do sidea, ai ma si Simon, na ginoran Petrus, ampa saninani si Andreas.

¹⁹ Jadi nini ma dompak sidea, “Eta, ihutkon nasiam ma Ahu, Hubahen pe nasiam gabe sijalajolma!”

²⁰ Jadi mintor itadingkon sidea ma jala ni sidea, laho mangihutkon-Si.

²¹ Dob laho la hunjai, ididah ma use dua halak na marsanina, ai ma si Jakobus, anak ni si Sebedeus, ampa si Johannes saninani ai, hundul ibagas parau rap pakon si Sebedeus, bapa ni sidea ai, pauli-ulihon jala ni sidea. Jadi idilo ma sidea.

²² Jadi mintor itadingkon sidea ma parau ai pakon bapa ni sidea, laho mangirikkon-Si.

Horja ni Tuhan Jesus i Galilea

²³ Jadi isiar Jesus ma ganup Nagori Galilea, laho mangajari bani parguruan ni sidea, anjaha mangambilankon Ambilan Na Madear pasal harajaon ai, lanjar pamalumkon sagala naborit ampa na niarou ni halak na ijai ai.

²⁴ Jadi tarambilan ma la das hu sab Tanoh Siria, iboan halak ma hu lobei-Ni sagala na boritan ampa na marsitaronon, na siniaran ni setan, na ubagon ampa na oyangon, gabe ipamalum ma sidea haganup.

²⁵ Jadi buei halak na mangirikkon-Si, ai ma hun Nagori Galilea, hun Dekapolis (*Sapuluh huta*), hun Jerusalem, hun Judea ampa hun nagori na i dipar ni Bah Jordan.

Ambilan i Atas Dolog

Parhatuahon na Ualuh in

5 ¹ Anjaha mangidah halak na mabuei ai, tangkog ma la hu sada dolog, dob hundul la, roh ma susian-Ni ai hu Bani.

² Dob ai ibuha ma pamangan-Ni, laho mangajari sidea, nini ma,

³ “Martuah ma na sombuh tonduy, ai bani sidea do Harajaon nagori atas in!

⁴ Martuah ma na pusok uhur, ai siapohon do sidea!

⁵ Martuah ma na lamlam uhur, ai teanon ni sidea do tanoh on!

⁶ Martuah ma na horahan loheian bani hapintoron, ai sipabosuron do sidea.

⁷ Martuah ma na idop uhur, ai siidopan do sidea.

⁸ Martuah ma paruhur na borsih, ai idahon ni sidea do Naibata!

⁹ Martuah ma sibahen damei, ai goranon do sidea anak ni Naibata!

¹⁰ Martuah ma na pinarburu ni halak halani hapintoron, ai bani sidea do Harajaon nagori atas in!

¹¹ Martuah ma hanima anggo irehei halak hanima barang iparburu, barang ipatubuh-tubuh bagei ni hata na masambor, na so tongon dompak hanima halani Ahu!

¹² Malas ma uhurnima anjaha marolob-olob, ai bangga do upahnima i nagori atas, ai sonai do iparburu nabi-nabi na parlobei hun bennima.”

Garam pakon Panondang ni Dunia on

¹³ “Hanima do garam ni dunia on! Tapi anggo mambar in, aha ma bahenon paporadkon? Seng marguna be in, siambukkononkon mando in ase idogei-dogei halak.

¹⁴ Hanima do panondang ni dunia on! Seng boi ponop huta na i atas dolog.

¹⁵ Seng irungkubkon halak tumba bani suluh na pinagarani, tapi hu atas sagakan do ibahen, ase isondangi haganup na i rumah ai.

¹⁶ Sonai ma marsinalsal panondangnima i lobei ni halak, ase ididah horjanima na dear in, ase ipuji sidea Bapanima na i nagori atas in.”

Panorangion ni Jesus Pasal Titah

¹⁷ “Ulang ma iagan uhurnima roh Ahu, laho manrumbakkon titah in pakon hata ni nabi-nabi, seng roh Ahu laho manrumbakkon, tapi laho pajongjongkon do.

¹⁸ Ai na sintong do hatang-Kon bennima, ronsi seda langit pakon tanoh on, na so bulih maseda humbani titah in sada titik atap sada garis pe, paima saud haganupan in.

¹⁹ Ase barang ise na manrumbakkon sada pe humbani titah sietekan in, anjaha ipodahkon sonai banijolma, ai do goranon sietekan i Harajaon nagori atas in; tapi na mandalankon anjaha na mangajarhon in, ai do goranon na banggal i Harajaon nagori atas in.

²⁰ Ai Huhatahon ma bennima, anggo seng daoh dearan hapintoronnima marimbang hapintoron ni sibotoh surat ampa Parisei, sabonar na so boi do hanima masuk hu Harajaon nagori atas in.”

Pasal na Marsogam ni Uhur

²¹ “Ibogeï hanima do hata hubani ompung na lobei, ‘Ulang ho mamunuh! Ia pamunuh siuhumon do.’

²² Tapi Ahu mangkatahon bennima, ise na marah bani sanina, maningon boanon do hu pangadilan. Anjaha ise na mangkatahon bani saninani ‘Na oto,’ maningon boanon do hu pangadilan atas, anjaha na mangkatahon ‘E na gila,’ maningon iuhum ibagas naraka.

²³ Halani ai, anggo iboan ho galanganmu hu anjapanjap, anjaha taringat uhurmu bani sogam ni uhur ni saninamu bam,

²⁴ tadingkon ma galanganmai i lobei ni anjapanjap ai, laho ma ho lobei mardear ampa saninamai, dob ai pe ase roh ho mangondoskon galanganmai!

²⁵ Podas ma ho mardear pakon imbangmai, sanggah rap ope ho pakonsi i pardalanan, ase ulang iondoskon imbangmai holi ho hu panguhum, gabe iondoskon panguhum ai ho bani upasni, anjaha inahkon ho hubagas tutupan.

²⁶ Sintong do na Huhatahon on bam, seng bulih ho maluah hunjai, anggo lape igalar ho haganup utangmu, ronsi sarimis.”

Pasal na Marbangkis

²⁷ “Ibogeï hanima do hata na mangkatahon, ‘Ulang ho marbangkis!’

²⁸ Tapi Ahu mangkatahon bennima, barang ise na mangidah naboru anjaha oji ia, domma marbangkis ia ibagas uhurni.

²⁹ Anggo sangsi ho halani mata siamunmu, pulsitkon ma in anjaha ambukkon, ai dearan do magou sada pagorimu, ulang hibul angkulamu igijigkon hubagas naraka.

³⁰ Anjaha anggo sangsi ho halani tanganmu siamun, rotap ma in anjaha ambukkon, ai dearan do magou sada pagorimu, ulang hibul angkulamu igijigkon hubagas naraka.”

Pasal na Marsirang-sirang

³¹ Ihatahon ope, “Barang ise na manirangkon na binuatni, maningon bereonni do surat sirang.

³² Tapi Ahu mangkatahon bennima, barang ise na manirangkon binuatni, anggo seng halani parbangkison, na pabangkiskonsi do ai. Parbangkis do homa na mambuat na sirang ai.”

Pasal na Marbija

³³ “Ambah ni ai, ibogei hanima do hata hubani ompung na lobei, ‘Seng bulih bijahononmu na so tongon! Na dob nibulawankon bani Naibata, maningon galaronmu do ai!’

³⁴ Tapi Ahu mangkatahon bennima, sabonar na so bulih do hanima marbija barang marbulawan pe, age hu langit, ai paratas ni Naibata do ai,

³⁵ age hu tanoh, ai sidogeian ni nahei-Ni do in, age hu Jerusalem, ai huta ni Raja na Banggal in do ai.

³⁶ Age bani ulumu seng bulih ho marbija, ai seng markuasa ho mambahen lopak atap birong jambulanmu age sada.

³⁷ Sonon ma hatanima, 'Eak, anggo eak, lang, anggo lang.' Lobih hunjai, humbani na jahat ma ai."

Pasal na Mambalas

³⁸ "Ibogeihanima do hata na mangkatahon, 'Mata do gantih ni mata, ipon gantih ni ipon.'

³⁹ Tapi Ahu mangkatahon bennima, ulang imbang hanima na jahat! Anggo adong na manompas huyummu siamun, tarehon homa age huyummu sambilou!

⁴⁰ Anggo adong na mambahen parkara bamu, laho mambuat bajumu, bere ma homa mantelmu bani!

⁴¹ Anggo adong na mamaksa ho mardalan pakonsi sabatu, irikkon ma ia dua batu.

⁴² Bere ma halak na mangindo bam! Ulang tundali na sihol manginjam hun bamu!"

Pasal na Mangkaholongi Munsuh

⁴³ "Ibogeihanima do hata na mangkatahon, 'Holong ma uhurmu bani hasomanmu, tapi sogam ma bani munsuhmu!'

⁴⁴ Tapi Ahu mangkatahon bennima, haholongi hanima ma munsuhnima, anjaha tonggohon hanima ma na marburu hanima,

⁴⁵ ase gabe anak ni Bapanima na i nagori atas ai hanima, ai ipapoltak do mata ni ari-Ni bani parjahat ampa parbujur, anjaha iparoh do udan bani parpintor ampa pargeduk.

⁴⁶ Ai anggo holong uhurnima pitah bani na marholong ni uhur bennima, aha ma upahnima? Ai sijalo sohei pe, ai lang sonai do ibahen?

⁴⁷ Anjaha anggo saninanima do hansa itabi hanima, aha ma hasurungannima? Ai sipajuh begu-begu pe, ai lang sonai do ibahen?

⁴⁸ Ai pe, maningon gokan dear do hanima, songon Bapanima i nagori atas, na Gokan Dear in!”

Pasal na Marsibere-bere

6¹ “Jaga ma hanima, ase ulang idalankon hanima hapintoronnima i lobei ni halak, ase ididah sidea! Anggo sonai, seng adong be upahnima humbani Bapanima na i nagori atas ai.

² Ai pe, anggo marsibere-bere ho, ulang pala tingtingkon, songon pambahen ni halak sipakulah-kulah i rumah parguruan atap i alaman, ase ipuji halak sidea. Na sintong do hatang-Kon bannima, domma ijalo sidea upah ni sidea.

³ Ase anggo marsibere-bere ho, ulang ma pala ibotoh tanganmu sambilou na binere ni tanganmu siamun,

⁴ ase ponop idop ni uhurmu; jadi Bapamu, sididah na ponop ai ma mambalas ai bamu.”

Pasal na Martonggo

(Luk. 11:1-4)

⁵ “Anjaha anggo martonggo hanima, ulang ma songon halak sipakulah-kulah, na mangkarosuhkon jongjong martonggo i rumah parguruan atap bani sirpang-sirpang, ase ididah halak sidea. Na sintong do hatang-Kon bannima, domma ijalo sidea upah ni sidea.

⁶ Tapi anggo martonggo ho, hu kamar ma ho laho, tutup ma labah ai, anjaha martonggo ma ho bani Bapamu, na adong bani ianan na ponop ai, jadi Bapamu, sididah na ponop ai ma mambalas ai bam.

⁷ Sanggah na martonggo ai ulang ma marganjang-ganjang sahapnima songon sipajuh begu-begu, na mangagan tangihonon ni Naibata sidea, halani buei ni sahap ni sidea.

⁸ Ai pe, ulang ma songon sidea hanima! Ibotoh Bapanima do na porlu bennima, sanggah lape ipindo hanima ai hun bani.

⁹ Ase sonon ma tonggonima, ‘Ham Bapanami na i nagori atas. Sai napapansing ma Goran-Mu.

¹⁰ Sai roh ma Harajaon-Mu. Sai saud ma harosuh ni uhur-Mu i nagori tengah on songon na i nagori atas.

¹¹ Bere Ham ma bannami sadari on hagoluan ari-ari.

¹² Sasap Ham ma dousanami songon panasapnami bani dousa ni hasoman, na mardousa dompak hanami.

¹³ Ulang ma bobai Ham hanami hu parlajouan, tapi paluah Ham ma hanami humbani pangagou. Ai Ham do simada Harajaon ampa hagogohon ampa hasangapon sadokah ni dokahni. Amen.'

¹⁴ Ai anggo isasap hanima salah ni halak dompak hanima, sasapon ni Bapanima na i nagori atas ai do age dousanima.

¹⁵ Tapi anggo seng isasap hanima salah ni halak dompak hanima, seng sasapon ni Bapanima age salahnima."

Pasal na Marpuasa

¹⁶ "Anggo marpuasa hanima, ulang ma borjot bohinima songon pambahen ni halak sipakulah-kulah, ai ipasambor sidea do bohi ni sidea, ase ididah halak sidea na marpuasa. Na sintong do hatang-Kon bennima, domma ijalo sidea upah ni sidea.

¹⁷ Tapi anggo marpuasa ho, minaki ma ulumu, anjaha suhapi bohimu,

¹⁸ase ulang tanda parpuasaanmai bani halak, tapi talar bani Bapamu na bani na ponop ai. Jadi Bapamu, sididah na ponop ai ma mambalaskon ai bamu.”

Pasal na Patumpu-tumpuhon Arta

¹⁹“Ulang ma patumpu-tumpu hanima arta bennima i tanoh on, bani ianan na targagat tasik ampa ngitngit, bani ianan na tarhurak anjaha tartangko panangko!

²⁰Tapi patumpu-tumpu hanima ma arta bannima i nagori atas, bani ianan na so targagat tasik ampa ngitngit, bani ianan na so tarhurak anjaha tartangko panangko.

²¹Ai ija artamu, ijai do uhurmu.

²²Palita ni angkula do mata. Anggo dear matamu, lihar ma ganup angkulamu.

²³Tapi anggo sambor matamu, golap ma haganup angkulamu. Golap ni in tene, anggo golap ma panondang na ibagas ho.

²⁴Seng tarbalosi sada halak dua tuan. Sai sogam do uhurni bani na sada, haholonganni na sada nari, hombaranni do na sada, anjaha mapas uhurni bani na sada nari. Seng tarbalosi nasiam Naibata rap pakon Mammon!

Ulang Holsohan

(ay. 25-33: Luk. 12:22-31; 16:13; 2 Kor. 6:15)

²⁵ Ai do ase Huhatahon bannima, ulang ma holsohan hanima pasal goluhnima pasari-sari sipanganon atap siinumon, sonai homa pasal angkulanima pasari-sari parhiouon. Ai lang harganan do hosah ase sipanganon, anjaha harganan angkula ase parhiouon?

²⁶ Tonggor hanima ma manuk-manuk na i awang-awang, na so martidah, na so manabi anjaha na so patumpuhon hu sopou; tong do iparmudu Bapanima na i nagori atas ai sidea. Ai lang buenan ope hasurungannima marimbang ai?

²⁷ Ise ma hanima na mangasup paganjang ari-arini age saasta gelah marhitei na holsohan?

²⁸ Mase ma holsohan hanima pasal parhiouon? Pardiatei hanima ma partubuh ni bunga silundat i talon in, na so pala marhorja barang manorha!

²⁹ Tapi Huhatahon ma bennima, gari Raja Salomo, sanggah hasangaponni ai, seng adong jenges ni hiouni songon sada bunga-bunga ai.

³⁰ Ase anggo sonai iparhioui Naibata poyon-poyon na i talun in, na adong sadari on, hape patar ipuruni, samintolah hanima ma lang parhiouonni? Ee hanima siotik haporsayaon!

³¹ Ase ulang ma holsohan hanima mangkatahon, aha ma panganonnam, aha ma inumonnam, aha ma parhiouonnam?

³² Ai sipajuh begu-begu do na mangkaporluhon sisonai ai. Ibotoh Bapanima na i nagori atas ai do na porlu ai bennima.

³³ Parlobei ma pindahi hanima Harajaon ni Naibata ampa hapintoron-Ni, dob ai tambahkonon-Ni do ganupan ai bannima.

³⁴ Ase ulang ma holsohan hanima pasal ari patar, ai sarihonon ni ari patar do na porlu ijai. Ganup ari sungkup bei do hasunsahanni.”

Pasal na Manguhum-uhumi Hasoman

(Luk. 6:37-42)

7 ¹ “Ulang hanima manguhum-uhumi, ase ulang hona uhum hanima,

² ai panguhumonnam do uhumkononkon bennima, anjaha parsuhatannima do suhatkononkon bennima.

³ Mase ma patorih-torihonnam silbak-silbak na bani mata ni saninamu, hape na satiang na ibagas matamu seng ididah ho?

⁴ Sonaha ma boi hatahononmu bani saninamu, Dia, hupadarat ma lobei silbak-silbak na bani matamin, hape adong na satiang bani matamu?

⁵ Ee sipakulah-kulah! Parlobei ma padarat tiang na bani matamu, dob ai pe, ase uhurhon sonaha

pangumpatmu bani silbak-silbak na bani mata ni saninamu.

⁶Ulang ma bere hanima arta na mapansing bani baliang, anjaha ulang ma amburhon mutiaramu i lobei ni babuy, ase ulang idogei-dogei ai, dob ai marhusor ia laho mandorab ho.”

Pasal na Mangindo

(Luk. 11:5-13)

⁷“Pindo hanima ma, sai na bereon-Ni do bannima, pindahi hanima ma, sai na jumpahan do hanima, hartuki hanima ma, sai na bukaon-Ni do bannima.

⁸Ai sai na manjalo do na mangindo, jumpahan na mangindahi, anjaha ungkabon bani na mangkartuki.

⁹Ai ise ma hun bannima jolma, na mambere batu bani anakni, anggo ipangindo indahan,

¹⁰atap anggo ipangindo dengke, gabe ibere bani ulog?

¹¹Gari hanima parjahat mambotoh mambere na madear bani anaknima, samintolah Bapanima na inagori atas ai ma lang mambotoh mambere arta na madear bani na mangindo hun Bani?

¹²Sagala na pinindo ni uhurnima, sibahenon ni halak bannima, ai ma bahen hanima bani sidea, ai in do hata ni titah ampa nabi-nabi.”

Pasal na Masuk Hubagas Harajaon ni Naibata

¹³ “Masuki hanima ma horbangan na sompit in, ai tahar do horbangan anjaha bolag do dalan hu hamagouan, anjaha buei do halak na masuk hujai.

¹⁴ Tapi sompit do horbangan anjaha etek do dalan na dompak hagoluhan, anjaha otik do halak na jumpahan ai.”

Pasal Nabi Parladung

(Luk. 6:43-45)

¹⁵ “Jaga ma hanima dompak nabi parladung, ai roh do sidea bannima marrupahon biribiri, tapi uhurni ibagas begu panoroh do.

¹⁶ Hun bani buahni do tandaonnima sidea. Ai boi do buaton buah ni anggur humbani rimbang atap jambu humbani latong?

¹⁷ Ai marbuahkon na madear do sagala hayu na madear, tapi sambor do buah ni hayu na masambor.

¹⁸ Seng boi hayu na madear marbuahkon na masambor; sonai homa hayu na masambor seng tarbahen marbuahkon na madear.

¹⁹ Sirobohon do sagala hayu na so marbuah na madear, anjaha iambukkon hubagas apuy.

²⁰ Ase humbani buahni do tandaonnima sidea.”

Pasal na Mandalankon Hata in*(Luk. 6:47-49)*

²¹ “Seng haganup halak na mangkatahon Bangku ‘Tuhan, Tuhan!’ masuk hu Harajaon nagori atas ai, pitah na mandalankon harosuh ni Bapang-Ku na i nagori atas ai do.

²² Bani ari ai buei do halak na mangkatahon Bangku, ‘Ham Tuhan, Tuhan, ai lang manjahai do hanami marhitei goran-Mu? Ai lang iusir hanami do setan-setan marhitei goran-Mu? Ai lang ibahen hanami do buei tanda halongangan marhitei goran-Mu?’

²³ Jadi hatahonon-Ku ma bani sidea, seng onggga Hutandai hanima, misir ma hanima hun lambung-Ku, hanima sihorjahon na ulang.

²⁴ Ase na mambogei hatang-Kin anjaha ihorjahon, sipausihon ma in bani halak na maruhur, na pajongjong rumahni bani batu gingging.

²⁵ Roh pe udan manalosou, marbanggal bah, anjaha doras logou mandorab rumah ai, seng marumbak, ai batu gingging do onjolanni.

²⁶ Tapi na mambogei hatang-Kin, hape seng ihorjahon, usih ma ia bani halak na oto, na pajongjong rumahni bani horsik.

²⁷ Dob ai roh ma udan manalosou, marbanggal bah, anjaha logou pe doras mandorab rumah ai, gabe marumbak ma rumah ai anjaha mareong.”

²⁸ Jadi dob siap ihatahon Jesus hata ai, longang tumang ma halak na mabuei ai mambogei podahni ai.

²⁹ Ai marhidorat do pangajarion-Ni bani sidea, sedo songon pamodahi ni sibotoh surat.

Ipamalum Tuhan Jesus Sada Halak na Gadamon

(Mrk. 1:40-44; Luk. 5:12-14)

8 ¹ Sanggah tuad Jesus hun dolog ai, buei do halak na mangirikkon-Si.

² Jadi roh ma sada halak na gadamon marsombah hu Bani, nini ma, “Tuhan, anggo ra Ham, tarpasusi Ham do ahu!”

³ Jadi isurdukkon Jesus ma tangan-Ni, ijamah ma ia lanjar nini ma, “Ra do Ahu, susi ma ham!” Jadi mintor malum ma gadamni ai.

⁴ Dob ai ihatahon Jesus ma hu bani, “Jaga, ulang patugah ham age bani ise. Tapi laho ma, patidak ham ma dirimu bani malim, anjaha boan ham ma galangan, songon na niaturhon ni si Musa, gabe hasaksian bani sidea.”

Ipamalum Tuhan Jesus Juakjuak ni Kopala ni Tentera

(Luk. 7:1-10; Joh. 4:43-54)

⁵ Dob masuk Jesus hu huta Kapernaum, roh ma hu Bani sahalak kopala ni tentera mangelek-elek-Si, nini ma,

⁶ “Tuhan, tibal-tibal do i rumahku juakjuakku, oyangon do ia, borit do iahap.”

⁷ Nini Jesus ma mambalosisi, “Roh pe Ahu pamalumkonsi.”

⁸ Dob ai nini kopala ni tentera ai ma mambalosi, “Tuhan, seng talup ahu, roh Ham masuk hu rumahku, sangkababah hata gelah hatahon Ham, jadi malum ma juakjuakkai.

⁹ Gari ahu,jolma na i toruh ni parentah, anjaha na mamarentah tentara homa, anggo huhatahon bani sada halak, ‘Laho’, jadi laho ma ia, bani halak na legan ‘Roh’, jadi roh do ia, sonai homa bani juakjuakku, ‘Horjahon on’, jadi ihorjahon do ai.”

¹⁰ Manangar ai, longang ma Jesus, jadi nini ma bani halak na mangirikkon-Si ai, “Na sintong do Hatang-Kon bani nasiam, gari bani halak Israel seng jumpah Ahu haporsayaon na sonin.

¹¹ Tapi Huhatahon ma bani nasiam, buei do halak na roh magira hun hapoltakan pakon hun hasundutan gabe hasoman sapanganan ni si Abraham, si Isak ampa si Jakob ibagas Harajaon nagori atas ai.

¹² Tapi anggo anak ni harajaon in hinan, siusiron do in bani na golap marimpot-impot, ijai ma masa partangison ampa na patungosngoson.”

¹³ Dob ai ihatahon Jesus ma hubani kopala ni tentera ai, “Laho ma ham, jumpah ham ma domu hubani haporsayaonmu ai!” Jadi malum ma juakjuak ai bani panorang ai.

**Ipamalum Tuhan Jesus Anturang ni si
Petrus ampa Buei na Boritan**

(Mrk. 1:29-34; Luk. 4:38-41)

¹⁴ Dob masuk Jesus hu rumah ni si Petrus, ididah ma tibal anturang ni si Petrus, pane-paneon.

¹⁵ Jadi ijamah ma tanganni, lanjar laho ma pane-pane ai hun bani. Hundul ma ia, anjaha iidangi ma la.

¹⁶ Dob golap ari, roh ma halak mamboan hu Bani buei halak na setanon. lusir ma setan-setan ai marhitei hata-Ni, anjaha ipamalum ma sagala na boritan,

¹⁷ ase jumpah na hinatahon ni Nabi Jesayas, na mangkatahon, “Ia do mangusung hasombuhonta anjaha iporsan do naboritta.”

¹⁸ Sanggah ididah Jesus roh halak na mabuei manginggoti-Si, ihatahon ma hubani susian-Ni ai, ase laho sidea mandipar.

Podah ni Jesus bani Halak na Sihol Mangirikkon-Si

(Luk. 9:57-60)

¹⁹ Jadi roh ma sahalak sibotoh surat hu Bani, nini ma, “Guru, sihol do ihutkononku Ham, atap huja pe Ham laho!”

²⁰ Nini Jesus ma dompaksi, “Na marliang do sorigala, anjaha na marasar do manuk-manuk na

i awang-awang, tapi anggo Anak ni Jolma in, seng dong Bani hatibalan ni ulu-Ni.”

²¹ Sada halak na legan humbani susian-Ni ai mangkatahon hu Bani, “Ham Tuhan, lopas Ham lobei laho ahu mananom bapanku!”

²² Tapi nini Jesus ma dompaksi, “Ahu ma ihutkon! Paturut ma na matei in mananom na mateini!”

Jesus Paminopkon Tao

(Mrk. 4:35-41; Luk. 8:22-25)

²³ Dob ai masuk ma Jesus hubagas parau, jadi iihutkon susian-Ni ma la.

²⁴ Jadi roh ma haba-haba na doras i tao ai, pala isangkobi gilumbang parau ai, tapi tarpodom do anggo la.

²⁵ Jadi roh ma sidea mamuhoi-Si, nini sidea ma, “Tuhan, urupi, harom ma hita!”

²⁶ Ihatahon Jesus ma hubani sidea, “Mase mabiar hanima? Otikni in haporsayaonnima!” Jadi jongjong ma la, ihata ma logou pakon tao ai, gabe minop tumang ma.

²⁷ Longang bei do jolma ai, nini, “Ise do halak on, ase logou ampa tao pe mambalosi parentah-Ni?”

Ipamalum Tuhan Jesus Dua Halak Gadara na Setanon

(Mrk. 5:1-20; Luk. 8:26-39)

²⁸ Dob das la i dipar, i tanoh ni halak Gadara, roh ma hun tanoman dua halak na setanon manjumpahkon-Si. Jangin tumang do sidea, pala seng tarbontas atap ise dalan ai.

²⁹ Tonggor ma, mardilo-dilo do sidea mangkatahon, “Mangaha Ham roh bennami, Ham Anak ni Naibata? Roh do Ham hape manunsahi hanami bani na so panorangni ope!”

³⁰ Seng pala daoh humbani sidea adong do sahumanan bolon babuy manggagati.

³¹ Jadi ipindo setan-setan ai ma hun Bani, “Anggo na maningon do usiron-Mu hanami, suruh Ham ma hanami masuk hubagas babuy na sahumanan ai.”

³² Nini Jesus ma hubani sidea, “Misir ma!” Jadi luar ma sidea, imasuki ma babuy ai. Anjaha tonggor ma, mardabuhan ma babuy na sahumanan ai hun salansah ai hubagas tao ai, gabe mogap ibagas bah ai.

³³ Jadi maporus ma siparmahan babuy ai, anjaha dob das sidea i huta, ibaritahon sidea ma haganup, sonai homa na masa bani na setanon ai.

³⁴ Anjaha tonggor ma, kaluar ma haganup parhuta ai manjumpahkon Jesus. Dob pajumpah, ipindohon sidea ma hu Bani, ase misir la hun tanoh ni sidea.

Ipamalum Tuhan Jesus Sada Halak na Oyangan

(Mrk. 2:1-12; Luk. 5:17-26)

9¹ Dob ai masuk ma la hu parau, laho ma mandipar, gabe das ma la hu huta-Ni.

² Jadi iboan halak ma hu Bani sada halak na oyangan, tibal bani podomanni. Jadi dob ididah Jesus haporsayaon ni sidea, nini ma dompak na oyangan ai, “Tenger ma uhurmu ambia, domma sasap dousamu!”

³ Anjaha tonggor ma, deba humbani sibotoh surat marpingkir ibagas uhurni, “Na mangapasi Naibata do Halak on!”

⁴ Tapi ibotoh Jesus do pingkiran ni sidea ai, gabe nini ma, “Mase ma jahat pingkiran nasiam ibagas?”

⁵ Na ija do urahan hataonkon, ‘Domma sasap dousamu’ atap mangkatahon, ‘Jongjong ma ho, mardalan ma ho?’

⁶ Tapi ase ibotoh nasiam, na markuasa do Anak ni Jolma in manasap dousa i tanoh on. Ihatahon ma bani na oyangan ai, “Jongjong ma ho, boan ma podomanmu, mulak ma ho hu rumahmu!”

⁷ Jadi jongjong ma ia, lanjar mulak hu rumahni.

⁸ Mangidah ai na mabuei ai, mabiar ma sidea anjaha ipuji ma Naibata, na mambere kuasa na sonai banggalni bani jolma.

Pandilo ni Tuhan Jesus bani si Mateus

(Mrk. 2; 13-17; Luk. 5:27-32)

⁹ Dob laho ia hunjai, ididah Jesus ma sada halak na margoran si Mateus, hundul i kantor sohei. Nini ma hu bani, “Irikkon ma Ahu!” Jadi jongjong ma ia, lanjar iirikkon ma Jesus.

¹⁰ Jadi sanggah mangan Jesus i rumah ai, buei do sijalo sohei pakon pardousa rap mangan pakon Jesus ampa susian-Ni ai.

¹¹ Mangidah ai, nini Parisei ai ma hubani susian-Ni ai, “Mase ma rap mangan Gurunima rap pakon sijalo sohei ampa pardousa?”

¹² Ibogei Jesus ma ai, gabe nini ma, “Seng porlu doktor bani halak na jorgit, bani na boritan do

¹³ Laho ma nasiam, mangguruhon arti ni hata on, ‘Idop ni uhur do harosuh ni uhur-Hu, sedo galangan.’ Ai roh pe Ahu, sedo mandilo parpintor, halak pardousa do.”

Mase Lang Marpuasa Susian ni Tuhan Jesus?

(Mrk. 2:18-22; Luk. 5:33-39)

¹⁴ Dob ai roh ma hu Bani susian ni si Johannes manungkun, “Mase marpuasa hanami pakon halak Parisei, hape susian-Mu lang?”

¹⁵ Jadi nini Jesus ma hubani sidea, “Mintor tarbahren ma marhoru hasoman-hasoman ni siparunjuk sadokah rap ope siparunjuk ai pakon

sidea? Tapi na roh ma arini, buaton ma siparunjuk ai humbani sidea, jadi ijai ma sidea marpuasa.

¹⁶ Seng dong halak mandungkapkon hiou na baru bani hiou na dob madotei, ai rigatkonon ni hiou na baru ai do hiou na dob madotei ai, gabe roh bangbangni ma na marigat ai.

¹⁷ Seng ipausei halak anggur na baru hubagas gusi hulingkuling na buruk, mapultak holi gusi ai, gabe mambur anggur ai anjaha maseda iananni ai. Hubagas gusi hulingkuling na baru do nahkonon anggur na baru, jadi simpan ma haduasi ai.”

Ipagoluh Tuhan Jesus Boru ni si Jairus

Ipamalum Homa Sada Naboru na Boritan

(Mrk. 5:21-43; Luk. 8:40-56)

¹⁸ Sanggah marsahap la pasal ai hubani sidea, tonggor ma, roh ma sada halak kopala ni sinagoge (*rumah parguruan*), manrogop hu lobei-Ni, lanjar nini ma, “Tongkin on ope matei borungku; tapi roh ma Ham, anjaha tampeihon Ham ma tangan-Mu, ase manggoluh use ia.”

¹⁹ Jadi jongjong ma Jesus, iirikkon ma ia, sonai homa susian-Ni ai.

²⁰ Jadi adong ma sada naboru, na dob sapuluh dua tahun sai roh pantang ni hiouni, idohori ma la hun pudi-Ni lanjar ijamah ma rambu ni hiou-Ni,

²¹ ai ninuhurni ibagas, “Hiou-Ni gelah hujamah, malum ma ahu.”

²² Jadi marhusor ma Jesus, ikawahkon ma ia, lanjar nini ma, “Tenger ma uhurmu inang, haporsayaonmu do na pagoluhkon ham!” Mintor malum ma naboru ai hunjia nari.

²³ Ase dob das Jesus i rumah ni kopala ai, ididah ma gosou siparsulim ampa halak na mabuei,

²⁴ jadi nini ma, “Misir ma nasiam! Sedo na matei dakdanak on, na modom do.” Jadi itartawai sidea ma la.

²⁵ Ase dob ipalaho halak na mabuei ai, masuk ma la, ijolom ma tanganni, gabe jongjong ma dakdanak ai.

²⁶ Jadi sar ma barita ai hu sab nagori ai.

Ipamalum Dua Halak na Mapitung

²⁷ Sanggah laho Jesus hunjai, adong ma dua halak na mapitung mangirikkon-Si, dilo-dilo, “Ham Anak ni si Daud! Idop ma uhur-Mu bennami!”

²⁸ Dob das la i rumah, roh ma na mapitung ai hu Bani. Jadi nini Jesus ma hubani sidea, “Porsaya do nasiam, paboa na margogoh do Ahu mangkorjahon in?” Nini sidea ma hu Bani, “Eak Tuhan, porsaya do!”

²⁹ Jadi ijamah ma mata ni sidea, lanjar nini ma, “Jumpah nasiam ma songon na hinaporsayaon nasiam ai!”

³⁰ Jadi buha ma mata ni sidea. Gogoh ma ipandang Jesus sidea, nini ma, “Jaga ma nasiam, ulang adong na mambotoh in!”

³¹ Tapi ai pe sidea luar, isahap-sahapkon sidea ma pasal-Si hu sab nagori ai.

Ipamalum Sada Halak na Longah

³² Sanggah na laho luar ai sidea, adong ma halak na mamboan hu Bani sada halak na longah, na siniaran ni setan.

³³ Dob iusir setan ai, marsahap ma na longah ai. Jadi longang ma halak na mabuei ai, nini sidea ma, “Seng onggga ope masa na sonin i tanoh Israel.”

³⁴ Tapi halak Parisei mangkatahon, “Marhitei kopala ni setan do iusir setan-setan ai.”

Idop ni Uhur ni Tuhan Jesus Mangidah Halak na Mabuei

³⁵ Jadi isiar Jesus ma sagala huta ampa Dusun, mangajari do la bani parguruan ni sidea, iambilankon do Ambilan Na Madear pasal Harajaon in, anjaha ipamalum do sagala naborit ampa na niarou ni sidea.

³⁶ Jadi mangidah halak na mabuei ai, idop ma uhur-Ni, ai loja anjaha mambur merap do sidea songon biribiri na so marparmahan.

³⁷ Nini ma dompak susian-Ni ai, “Bolag do sisabion, tapi otik do siparhorja.

³⁸ Ai pe, elek-elek hanima ma Simada sisabion in, ase ipaingkat siparhorja bani sisabion-Ni in!”

**Pardilo ni Tuhan Jesus bani
Apostel-Ni na Sapuluh Dua ai**

(Mrk. 3:7-16; Luk. 6:12-16)

10¹ Jadi idilo ma susian-Ni na sapuluh dua ai hu lobei-Ni, anjaha ibere ma bani sidea kuasa dompak tonduy na mabutak, laho mangusir ai, sonai pamalum sagala naborit ampa sagala na niarou ni sidea.

² Ia goran ni apostel na sapuluh dua ai, on ma: Na parlobei, si Simon, na ginoran homa si Petrus, ampa saninani si Andreas, dob ai si Jakobus ampa si Johannes saninani ai, ai ma anak ni si Sebedeus,

³ dob ai si Pilippus ampa si Bartolomeus, si Tomas pakon si Mateus, sijalo sohei ai, dob ai si Jakobus anak ni Alpeus ampa si Tadeus,

⁴ dob ai si Simon, halak Kana ai, pakon si Judas Iskariot, na mantahihon-Si ai.

Parsuruh ni Tuhan Jesus bani Susian-Ni

(Mrk. 6:7-13; Luk. 9:1-6)

⁵ Na sapuluh dua ai ma isuruh Tuhan Jesus, ipodahi ma sidea, “Ulang ma laho hanima hu tanoh ni halak parbegu, anjaha ulang ma masuki hanima huta-huta ni Samaria,

⁶ tapi pitah hubani biribiri na magou humbani Israel ma lah hanima laho.

⁷ Laho ma hanima mangambilankon, paboa domma dohor Harajaon nagori atas in.

⁸ Pamalum hanima ma naborit ni na boritan, pagoluh na matei, pamalum na gadamon, usir setan-setan! Silayak-layak do in bennima, ase layak-layakkon hanima ma!

⁹ Ulang pala pasirsir hanima bennima omas barang pirak barang duit ibagas gonditnima,

¹⁰ barang bohali pardalanan barang hiou dua, sonai sipatu atap tungkot pe, ai patut do dapotan bohali siparhorja.

¹¹ Anggo masuk hanima hubagas sada huta atap dusun pe, pindahhi hanima ma ijai na talup tondokannima, anjaha ijai ma hanima ronsi misir use.

¹² Hatahon hanima ma tabinima, laho masuk hu rumah ai.

¹³ Jadi sogop ma dameinima bani rumah ai, anggo na talup do sidea manjalosi, tapi anggo lang, mulak ma bennima dameinima ai.

¹⁴ Anggo seng ijalo sidea hanima barang seng ra sidea manangihon hanima, tadingkon hanima ma rumah ampa huta ni sidea ai, anjaha pirpirhon hanima ma dompak sidea orbuk na longkot bani naheinima.

¹⁵ Na sintong do hatang-Kon bennima, hampungan do sitaronon ni Sodom pakon Gomora bani ari paruhuman magira marimbang huta ai.”

Podah Sanggah Panorang Pangarsik-arsikon

(Mat. 24:9-14; Mrk. 13:9-13; Luk. 21:12-19)

¹⁶ “Husuruh do hanima songon biribiri hu tongah-tongah ni begu, halani ai maruhur ma hanima songon ulog, anjaha bujur songon asas.

¹⁷ Jaga ma hanima dompakjolma, ai ondoskononni do hanima hu paruhuman, anjaha lonsingonni do hanima bani parguruan ni sidea.

¹⁸ Toguon ni sidea do hanima hu lobei ni pamarentah pakon raja halani Ahu, gabe hasaksian bani sidea age bani sipajuh begu-begu.

¹⁹ Tapi anggo iondoskon sidea hanima, ulang ma pala holsohkon hanima pasal sihatahononnima, ai bereon-Ni do bennima bani panorang ai hata sihatahononnima.

²⁰ Ase, sedo hanima na marsahap ijai, tapi Tonduy ni Bapanima do na marsahap ibagas hanima.

²¹ Ondoskonon ni sanina do saninani hu hamatean, sonai bapa dompak anakni. Manlawan do anak dompak orang tuani, laho mamunuhsi.

²² Domdoman ni haganupjolma do hanima halani goran-Ku, tapi na tahan das hu ujungni, ai do paluahon-Ni.

²³ Anggo iparburu hanima bani sada huta, laho ma hanima hu huta na legan, ai na sintong do hatang-Kon bennima, seng ope ganup isiari hanima huta ni Israel, roh ma Anak ni Jolma in.

²⁴ Seng lobihan susian humbani guruni atap lobihan jabolon humbani tuanni.

²⁵ Dear ma sada susian anggo dos ia songon guruni, sonai jabolon dos pakon tuanni. Anggo igoran tuan rumah Beelsebul, samintolah parrumahni ai ma lang?”

Ojur-ojur Ulang Mabiar Manaksihon

(Luk. 12:2-9)

²⁶ “Halani ai ulang ma mabiar hanima mangidah sidea, ai seng dong na rungkub, na so tarbuka use, anjaha seng dong na ponop, na so tarbotoh use.

²⁷ Na Hupatugah bannima bani na golap, hatahon hanima ma in bani na lihar, na Huhusipkon bani pinggolnima, baritahon hanima ma in hun atas tayub.

²⁸ Ulang ma pala mabiar hanima mangidah sibunuh daging, na so boi mamunuh tonduy; tapi na markuasa mangagou angkula pakon tonduy hu naraka, ai do sihabiarannima.

²⁹ Ai lang ijual halak do dua dingis sasen? Tapi seng madabuh ai age sada hu tanoh, anggo seng ibagas botoh ni Bapanima.

³⁰ Anggo bennima, gari haganup jambulan na bani ulunima in, domma ibilangi.

³¹ Halani ai, ulang ma hanima mabiar, ai harganan ope hanima humbani buei dingis.

³² Ai sagala na manaksihon Ahu i lobei ni jolma, saksihonon-Ku do ia i lobei ni Bapa na i nagori atas ai,

³³ tapi sagala, na marnalang Ahu i lobei ni jolma, parnalangon-Ku do ia i lobei ni Bapa na i nagori atas ai.

³⁴ Ulang ma ninuhurnima, na roh Ahu, laho mamboan damei hu tanoh on. Seng na roh Ahu mamboan damei, tapi podang do.

³⁵ Na roh do Ahu tongon, paingorhon anak dampak bapani, boru dampak inangni, parumaen dampak simatuani,

³⁶ anjaha hasomanni sarumah do gabe munsuh bani Jolma in.

³⁷ Barang ise na mangkaholongi bapani barang inangni lobih hun Bangku, seng talup ai Bangku, anjaha barang ise na mangkaholongi anakni atap boruni lobih hun Bangku, seng talup ai Bangku.

³⁸ Anjaha barang ise na so mamorsan silangni anjaha iirikkon Ahu, seng talup ai Bangku.

³⁹ Na mangkargahon hosahni, ai do na magouan hosah, tapi na magouan hosah halani Ahu, ai do na jumpahan.”

Upah ni Sagala Pambahenan halani Goran ni Jesus

⁴⁰ “Na manjalo hanima, Ahu do jinaloni ai, anjaha na manjalo Ahu, na marsuruh Ahu do jinaloni ijai.

⁴¹ Na manjalo sada nabi, halani nabi ia, jaloonni do upah ni nabi, anjaha na manjalo sada halak parpintor, halani halak parpintor ia, jaloonni do upah ni halak parpintor.

⁴² Anjaha barang ise na mamberehon bah borgoh sasangkir gelah hubani sahalak na etek-etek on, halani susian-Ku ia, na sintong do hatang-Kon bennima, seng anjai magou upahni.”

Sungkun-sungkun ni si Johannes Pandidi Pasal Tuhan Jesus

(Luk. 7:18-23)

11 ¹ Ase dob siap ipodahi Tuhan Jesus susian-Ni na sapuluh dua ai, misir ma la hunjai, laho mangajari pakon marambilan i huta ni sidea.

² Jadi dob ibogei si Johannes ibagas tutupan pasal pambahenan ni Kristus, isuruh ma na manungkun-Si marhitei susianni,

³ “Ham do na sihol roh ia, atap na legan ope sipaimaonnami?”

⁴ Nini Jesus ma mambalosi sidea, “Mulak ma, anjaha patugah nasiam ma bani si Johannes, aha na binogei ampa na nididah nasiam:

⁵ Gabe marpangidah do na mapitung, mardalan na repat, malum na gadamon, marpanangar na nengel, mulak manggoluh na matei, anjaha bani halak na masombuh iambilankon do Ambilan Na Madear.

⁶ Martuah ma halak na so sangsi pasal Ahu.”

Hasaksian ni Tuhan Jesus Pasal si Johannes Pandidi

(Luk. 7:24-35)

⁷ Dob mulak sidea, ipungkah Jesus ma mansahapkon pasal si Johannes hubani halak na mabuei ai, “Aha do na sihol idahon nasiam, ase laho nasiam hu halimisan? Arung-arung na meol-eol do ibahen pangombus ni logou?

⁸ Aha do na sihol idahon nasiam? Sada halak parhiou na lampot do? Tonggor ma, i rumah ni raja do parhiou na lampot.

⁹ Aha do na sihol idahon nasiam? Sihol mangidah nabi? Tongon do na Huhatahon on bani nasiam, lobih do la humbani sada nabi.

¹⁰ Pasalsi do na tarsurat on, ‘Tonggor ma, suruhon-Ku do suruhan-Ku i lobeimu, ase ipasirsir dalam i lobeimu.’

¹¹ Sintong do na Huhatahon on bennima, humbanijolma, na itubuhkon humbani naboru, seng dong na bangkit banggalan marimbang si Johannes Pandidi, tapi halak sietekan pe ibagas Harajaon nagori atas, banggalan do ai hun bani.

¹² Hun bani panorang ni si Johannes nari sigogohan do Harajaon nagori atas ai, anjaha halak na manggogohi do na dapotan ai.

¹³ Ai singgan si Johannes do panjahaion ni sagala nabi ampa titah;

¹⁴ anjaha anggo ijalo nasiam do in, ia do si Elias na sihol roh in.

¹⁵ Barang ise siparpinggol, itangar ma in!

¹⁶ Tapi hubani ise ma pausihon-Ku bangsa on? Usih do sidea hubani sakdanak na hundul i tiga, mardilo-dilo bani hasomanni,

¹⁷ 'Isompul hanami do sulim bennima tapi seng ra hanima manortor, ipabogeihon hanami do tangis-tangis, tapi seng ra hanima tangis.'

¹⁸ Ai roh do si Johannes, seng parmangan, seng parminum, hape ihatahon sidea, 'Na setanon do ia.'

¹⁹ Na roh do Anak ni Jolma in, ra do la mangan anjaha ra minum, hape ihatahon sidea, 'Tonggor ma, halak sipapangan magou ampa sisobur anggur, huan-huan ni sijalo sohei ampa pardousa!' Tapi gabe pintor do Hapentaran in marhitei pambahenan-Ni."

**Papa bani Huta-huta na So Ra Porsaya
anjaha Paubahkon Uhurni**

(Luk. 10:13-15)

²⁰ Dob ai ipapai Jesus ma huta, ianan-Ni sibuenan mangkorjahon hagogohon-Ni ai, halani seng mubah uhur ni sidea, nini ma,

²¹ “Bursik ma ho Korasin! Bursik ma ho Betsaida! Ai ambit i huta Tirus pakon Sidon ipamasa hagogohon songon na masa bannima, seng tarbahen lang mubah do uhur ni sidea, marhiou guni anjaha hundul bani abuan.

²² Tapi Huhatahon ma bennima, hampungan do sitaronon ni Tirus ampa Sidon marimbang sitarononnima bani ari paruhuman ai.

²³ Anjaha ho, ale Kapernaum, ai sipagijangon do ho ronsi langit? Sidabuhkononkon do ho ronsi apuy naraka. Ai ambit i huta Sodom ipamasa hagogohon songon na masa ibagas ho, seng tarbahen lang totap ope huta ai ronsi sadari on.

²⁴ Tapi Huhatahon ma bennima, hampungan do sitaronon ni huta Sodom bani ari uhum ai marimbang sitarononnima!”

**Dilo-dilo ni Tuhan Jesus bani Halak
na Loja anjaha na Boratan**

²⁵ Bani panorang ai ma ihatahon Tuhan Jesus, “Hupuji Ham Bapa, Tuhan sigomgom langit ampa

tanoh on, halani iponopkon Ham do in humbani halak na maruhur ampa na pentar, tapi ipatalar Ham do in bani dakdanak.

²⁶ Eak, Bapa, ai sonin do rosuh ni uhur-Mu.

²⁷ Haganupan in, domma iondoskon Bapa Bangku, seng dong, na mananda Anak in, sobali Bapa in, anjaha Bapa in pe, seng dong na mananda-Si, sobali Anak in, ampa na pinodahan ni Anak in, domu hubani rosuh ni uhur-Ni.

²⁸ Roh ma nasiam hu Bangku, nasiam na loja anjaha na boratan, ase Hupasonang nasiam.

²⁹ Jalo nasiam ma pasangan-Ku anjaha marguru ma nasiam hun Bangku, ai na lamlam do Ahu anjaha na toruh maruhur, ase dapotan hasonangan tonduy nasiam.

³⁰ Ai lamlam do pasangan-Ku, anjaha hampung do na Hupaporsankon.”

Mamutiki Gandum Susian bani Ari Sabat

Iapiti Tuhan Jesus Susian Marimbang Parisei

(Mrk. 2:23-28; Luk. 6:1-5)

12 ¹ Bani panorang ai mardalan ma Jesus mamontas juma-juma na marisi gandum. Halani loheian iputiki susian ai ma gandum ai lanjar iguguti.

² Mangidah ai halak Parisei, nini sidea ma dompak Jesus, “Tonggor ma susian-Mu in! Ihorjahon susian-Mu do na so bulih horjaonkon bani ari Sabat.”

³ Jadi nini ma dompak sidea, “Seng onga gakni ibasa nasiam na binahen ni si Daud, sanggah loheian ia rap pakon hasomanni saodoran?

⁴ Imasuki do rumah ni Naibata, gabe ipangan sidea do ruti galangan na so bulih panganonni barang panganon ni hasomanni pe, pitah malim do hansa.

⁵ Barang na so ibasa nasiam do ibagas buku titah in, na so salah hape malim-malim sanggah ari Sabat i rumah panumbahan ai, age ilaosi titah ari Sabat in?

⁶ Tapi Huhatahon ma bani nasiam, lobihan humbani rumah panumbahan do on!

⁷ Ambit iarusi nasiam, aha arti ni hata on, ‘Idop ni uhur do Huharosuhkon, sedo galangan,’ tontu seng uhumon nasiam sidea, na so marsalah in.

⁸ Ai Anak ni Jolma in do Tuan ni ari Sabat.”

Ipamalum Tuhan Jesus na Matei Lopah Sanggah Ari Sabat

(Mrk. 3:1-12; Luk. 6:6, 11, 17-19)

⁹ Jadi dob misir la hunjai, imasuki ma rumah parguruan ni sidea.

¹⁰ Adong do ijai sada halak, matei tanganni salopah. Jadi isungkun sidea ma la, “Ai bulih do pamalumkon naborit ari Sabat?”

¹¹ Tapi nini ma dompak sidea, “Ise humbani nasiam, na marnah biribiri sada, na so mandorab anjaha manarik ai hu atas, anggo madabuh ai hubagas godung sanggah ari Sabat?

¹² Ai lang daoh do harganan jolma marimbang biribiri? Ase, bulih do mangkorjahon na madear bani ari Sabat.”

¹³ Dob ai nini ma dompak halak ai, “Papintor ma tanganmin!” Jadi ipapintor ma, gabe suang ma malum songon tanganni na sada nari.

¹⁴ Jadi luar ma Parisei ai, manriah ma sidea, atap sonaha do bahenon ni sidea, laho mamunuh-Si.

¹⁵ Dob ibotoh Jesus riah ni sidea ai, surut ma la hunjai. Buei do halak na mangirikkon-Si, gabe ipamalum ma naborit ni sidea haganup.

¹⁶ Tapi ipandang do sidea, ase ulang ipatugah-tugah pasal-Si,

¹⁷ ase jumpah na hinatahon marhitei Nabi Jesayas, na mangkatahon,

¹⁸ “Tonggor ma, juakjuak-Ku na Hupilih in, haholongan-Ku anjaha harosuh ni uhur-Hu do la. Nahkonon-Ku do Tonduy Bani, anjaha ambilankonon-Ni do habonaron hubani bangsa parbegu.

¹⁹ Seng ra la maringor, seng ra la marsurak-surak anjaha seng marosuh la tarbogei hata-Ni bani dalan-dalan.

²⁰ Seng ponggolhononni arung-arung na dob marosak, anjaha seng intopkonon-Ni sumbu na dob mirlop-irlop, paima monang bahenon-Ni uhum.

²¹ Anjaha bani goran-Ni do marpangarapan bangsa-bangsa.”

Parmalum ni Sada Halak na Setanon

(Mrk. 3:22-27; Luk. 11:14-23)

²² Dob ai iboan ma hu Bani sada halak na setanon, na pitung anjaha na longah, jadi ipalum ma ia, gabe marsahap anjaha marpangidah ma na longah ai.

²³ Jadi longang ma halak na mabuei ai haganup, nini sidea ma, “Atap on ma Anak ni si Daud ia?”

²⁴ Mambogei ai halak Parisei, nini sidea ma, “Marhitei si Beelsebul, kopala ni setan-setan do ipangunsagahkon mangusir setan-setan.”

²⁵ Halani ibotoh Jesus do pingkiran ni sidea, jadi nini ma dompak sidea, “Ganup harajaon na marsalisih samah dirini, maseda do, anjaha ganup huta, atap rumah tangga na marsalisih samah dirini, seng totap ai.

²⁶ Ai anggo iusir setan hasomanni setan, na pabolah ma ia ai samah dirini. Sonaha ma boi totap harajaonni?

²⁷ Anjaha, anggo huusir setan marhitei Beelsebul, marhitei kuasa ni ise ma anak nasiam mangusirsi? Ai pe, sidea do na gabe panguhum bani nasiam.

²⁸ Tapi, anggo marhitei Tonduy ni Naibata do Huusir setan-setan, jadi, na dob sogop ma Harajaon ni Naibata bani nasiam.

²⁹ Ai sonaha ma bulih masukan ni sada halak rumah ni sada halak na gogoh anjaha irampas ugas-ugasni, anggo seng palobei isangkut halak na gogoh ai? Dob ai pe, ase tarbuatsi ugas-ugasni.”

Dousa dompak Tonduy Na Pansing

(Mrk. 3:28-30; Luk. 12:43-45)

³⁰ “Na so mangkasomani Ahu, imbang-Ku do in, anjaha na so mangkasomani Ahu patumpuhon, na mangerap do in.

³¹ Halani ai Huhatahon ma bani nasiam, ganup dousa ampa panrisaion ni jolma sasapon do, tapi panrisaion dompak Tonduy in seng sasapon ai.

³² Anjaha barang ise na mangkatahon hatani manlawan Anak ni Jolma in, sasapon do ai, tapi barang ise na manluarhon hatani manlawan Tonduy Na Pansing, seng sasapon ai, age bani dunia sonari, barang magira.

³³ Anggo dear sada hayu, dear ma buahni; anggo sambor sada hayu, sambor ma buahni; ai humbani buahni do tandaon hayu ai.

³⁴ nasiam ginompar ni ulog darih! Sonaha ma tarbahren nasiam mansahapkon na madear, ai na jahat do nasiam? Ai in na manggoki uhur, ai do iluarhon pamangan.

³⁵ Halak na madear padaratkon hadearon humbani artani na madear ai, anjaha halak na masambor padaratkon na masambor humbani artani na masambor ai.

³⁶ Tapi Huhatahon ma bennima, maningon marbalos dojolma magira bani ari uhum ai pasal sagala hata na so margagan, na hinatahonni.

³⁷ Ai marhitei hatamu do ho pintoran-Ni, anjaha marhitei hatamu do ho uhumon-Ni.”

Pasal Tanda ni si Jona

(Mat. 16:1-4; Mrk. 8:11-13; Luk. 11:16, 29-32; 12:54-56)

³⁸ Jadi marbalos ma Bani piga-piga halak sibotoh surat pakon Parisei, nini sidea ma, “Guru, sihol idahonnami do sada tanda hun Bamu.”

³⁹ Tapi nini ma mambalosi sidea, “Bangsa parjahat ampa parbangkis mangindo sada tanda, tapi seng sibereon ai bani, sobali tanda na bani si Jona, nabi ai.

⁴⁰ Ai songon si Jona tolu ari tolu borngin ibagas bituha ni dengke na banggal ai, sonai ma use Anak ni Jolma in tolu ari tolu borngin ibagas tanoh.

⁴¹ Na jongjong do magira halak Ninipe bani paruhuman ai rap pakon bangsa on, anjaha

uhumon ni sidea do ia, ai ipaubah sidea do uhurni mambogei ambilan ni si Jona. Tonggor ma, lobihan do na ijon on marimbang si Jona!

⁴² Na jongjong do magira bani paruhuman ai raja naboru, na hun dangsina rap pakon bangsa on, anjaha uhumonni do ia, ai roh do ia hun ujung ni tanoh on laho mambogei hapentaron ni si Salomo. Tonggor ma, lobihan do na ijon on marimbang si Salomo!”

Parmulak ni Setan-setan bani Jolma

(Luk. 11:24-26)

⁴³ “Anggo luar ma tonduy na butak ai humbani jolma, mawat-awat ma ia bani ianan dorging-dorging, laho mangindahi parsaranan, tapi lang jumpahsi.

⁴⁴ Jadi nini ma, ‘Mulak ma lah ahu hubani ianan, na dob hutadingkon ondi.’ Dob das ia hujai, jumpahsi ma ianan ai lumei, hona sapu anjaha ipajagar.

⁴⁵ Dob ai misir ma ia, laho mangarahkon pitu tonduy na legan, na jahatan hun bani, imasuki sidea ma ia, lanjar marianan ijai. Jadi dobni jahatan ma parlahou ni jolma ai marimbang mulani ondi. Sonai ma masa bani bangsa na jahat on.”

Sindohor ni Tuhan Jesus*(Mrk. 3:31-35; Luk. 8:19-21)*

⁴⁶ Jadi sanggah marsahapi ope la pakon halak na mabuei ai, jongjong do i darat inang-Ni pakon sanina-Ni, sihol marsahap pakon-Si.

⁴⁷ Jadi adong ma na patugahkon Bani, “Tonggor ma, jongjong do i darat inang-Mu pakon sanina-Mu, sihol marsahap pakon Ham.”

⁴⁸ Tapi nini ma dompak na patugahkon ai, “Ise do inang-Ku?”

⁴⁹ Jadi ipaherbang ma tangan-Ni dompak susian-Ni ai, lanjar marsahap, “Tonggor ma, on do inang-Ku ampa saninang-Ku.

⁵⁰ Ai na mangkorjahon harosuh ni Bapa na i nagori atas ai, ai do angging-Ku, ai do botou-Hu, ai do inang-Ku.”

Limbaga Pasal Panabur*(Mrk. 4:1-20; Luk. 8:4-15)*

13 ¹ Bani ari ai itadingkon Jesus ma rumah ai, lanjar hundul ma la i topi ni tao ai.

² Jadi martumpu ma buei halak hu lobei-Ni, gabe inaiki Jesus ma sada parau laho hundul ijai, anjaha ganup halak na mabuei ai jongjong do i pasir ai.

³ Anjaha buei do ihatahon bani sidea marhitei limbaga, nini ma, “Tonggor ma, laho do sada panabur manabur bonih.

⁴ Jadi sanggah na manabur ai ia, adong ma deba na madabuh hu dalan, dob ai roh ma manuk-manuk mamaguti.

⁵ Deba bonih ai madabuh do bani tanoh na batuon, bani na so sadiha hapal tanohni, jadi mintor tubuh ma, halani na so bagus ai tanohni.

⁶ Tapi sanggah na lambin gijang mata ni ari melus ma lanjar matei, halani na so marurat ai.

⁷ Anggo na deba, hu parhupihupian do madabuh, lanjar tubuh do hupihupi ai, gabe ipisat ma bonih ai.

⁸ Tapi na deba madabuh do bani tanoh na madear, gabe saud ma marbuah, saratus lompit do na deba, onom puluh lompit na deba, anjaha na deba nari tolu puluh lompit.

⁹ Barang ise na marpinggol, itangar ma ai!”

¹⁰ Jadi roh ma susian-Ni ai manungkun-Si, “Mase ma marlimbaga Ham marsahap bani sidea?”

¹¹ Ibalosi ma sidea, nini ma, “Hu bennima ibere do habotohon pasal rusia ni Harajaon nagori atas ai, tapi bani sidea lang ibere.

¹² Ai barang ise na marnadong, bereon do bani, ase marlobih-lobih ia. Tapi barang ise na so marnadong, na adong bani ai hinan pe buaton do hun bani.

¹³ Ai do halani ase marlimbaga Ahu marsahap bani sidea, halani marmata pe sidea seng marpangidah, anjaha marpinggol pe sidea seng marpambogei anjaha seng iarusi.

¹⁴ Ase jumpah ma bani sidea panjahaion ni Nabi Jesayas, na mangkatahon, ‘Bogeion ni pinggol nasiam do in namin, tapi seng arusan nasiam, idahon ni mata nasiam do in namin, tapi seng tandaon nasiam.’

¹⁵ Ai na dob hengkenng do uhur ni bangsa on, pinggolni hurang marpanangar anjaha ipapitpit matani, ase ulang marpangidah matani, ulang marpambogei pinggolni, ulang marpangarusion uhurni, ase ulang mulak anjaha malum sidea bahenon-Ku.

¹⁶ Tapi martuah do matanima halani marpangidah, ampa pinggolnima halani marpambogei.”

¹⁷ Tapi sintong do na Huhatahon on bennima, “Buei do nabi pakon halak parpintor na sihol mangidah na dob nididahnima, tapi seng ididah, anjaha na sihol mambogei na dob binogeinima, tapi seng ibogei.

¹⁸ Ai pe, tangar hanima ma limbaga pasal panabur ai!

¹⁹ Anggo adong na manangar hata pasal Harajaon ai, tapi seng iarusi, jadi roh ma parjahat ai manrampas na dob sinaburhon ai hubagas uhurni, ai ma na sinaburhon bani dalan ai.

²⁰ Tapi na sinaburhon bani tanoh na batuon ai, ai ma na mambogei hata ai, anjaha mintor malas do uhurni manjalosi,

²¹ tapi seng marurat ibagas dirini, parsatongkinan do hansa ai. Anggo sogop hasunsahan atap

pangarsik-arsikon halani hata ai, mintor sangsi do uhurni.

²² Ia na sinaburhon bani parhupihupian ai, ai ma na mambogei hata ai, tapi tarpisat do hata ai anjaha seng saud marbuah, halani pangkolsohkon ni uhurni bani na i dunia on ampa halani habayakon sipanipu in.

²³ Ia na sinaburhon bani tanoh na lambutan ai, ai ma na mambogei hata ai anjaha iarusi gabe saud marbuah, adong na saratus, adong na onom puluh, adong na tolu puluh lompit.”

Limbaga Pasal Simaromei-omei i Tongah-tongah ni Omei

(Mrk. 4:30-32; Luk. 13:18-21)

²⁴ Dob ai ihatahon ma use limbaga na legan bani sidea, nini ma, “Usih do Harajaon nagori atas ai bani sada halak na manaburhon bonih na madear hu jumani.

²⁵ Tapi sanggah na modom halak ai, roh ma munsuhni manaburhon simaromei-omei hu holangkolang ni omei ai, lanjar laho hunjai.

²⁶ Tapi domma marbuhu tanoh anjaha sihol boltok omei ai, tanda ma simaromei-omei ai.

²⁷ Jadi roh ma siparhorja ai bani tuanni, nini sidea ma, ‘Tuannami, ai lang bonih na madear do isaburhon ham hu jumamu? Hunja do simaromei-omei ai?’

²⁸ Tapi nini ma dompak sidea, ‘Munsuh do na mambahen ai.’ Nini parhorja ai ma hu bani, ‘Dear do ninuhurmu laho hanami patumpuhon ai?’

²⁹ Jadi nini ma, Lang, tarihut holi omei ai iorbat hanima, sanggah na patumpu simaromei-omei ai hanima.

³⁰ Paturut hanima ma ai rap tubuh paima jumpah sabion. Bani panorang sabion ai huhatahon pe bani sipanabi, ‘Patumpu nasiam ma lobei simaromei-omei in, sangkuti nasiam sasamborkos ase itutung, tapi anggo omei in, patumpu nasiam ma hubagas sopouhu.’”

Limbaga Pasal Batu ni Loharum ampa Ragi

³¹ Dob ai ihatahon ma use limbaga na legan bani sidea, nini ma, “Usih do Harajaon nagori atas ai bani batu ni loharum, na ibuat sada halak laho manaburhonsi hu juman.

³² Ai do sada silumatan humbani masam ni bonih, tapi dob tubuh, gabe banggalan do ai humbani sagala lowoh simaratah, pala do songon hayu, anjaha marrohan do manuk-manuk na i awang-awang marasar bani rantingni.”

³³ Dob ai ihatahon ma use limbaga na legan bani sidea, “Usih do Harajaon nagori atas ai bani ragi, na ibuat sada parinangon, laho mangaguhon ai bani tolu tumba nitak paima migar haganup.”

³⁴ Haganupan ai ihatahon Jesus marhitei limbaga bani halak na mabuei ai, seng marsahap la bani sidea anggo seng marhitei limbaga,

³⁵ ase jumpah na hinatahon ni nabi ai, na mangkatahon, “Ungkabon-Ku do pamangan-Ku mangkatahon limbaga, sahapkonon-Ku do na ponop humbani tombei ni dunia on.”

Hatorangan ni Limbaga Pasal Simaromei-omei

(Mrk. 4:30-32; Luk. 13:18-21)

³⁶ Dob ipalaho halak na mabuei ai, misir ma la hu rumah. Jadi roh ma hu Bani susian-Ni ai mangkatahon, “Patorang Ham ma bennami limbaga pasal simaromei-omei na i juma ai!”

³⁷ Jadi nini ma mambalosi, “la na manaburhon bonih na madear ai, ai ma Anak ni Jolma in.

³⁸ Dunia on do juma ai, ia bonih na madear ai, ai ma anak ni Harajaon ai, tapi anggo simaromei-omei ai, ai ma anak ni parjahat.

³⁹ Munsuh na manaburhon ai, ai ma sibolis, pariama ai, ai ma ajal ni dunia on, anjaha malekat ni Naibata do sipanabi ai.

⁴⁰ Ase songon na ipatumpuni ai simaromei-omei ai anjaha itutung, sonai do masa bani ajal ni dunia on.

⁴¹ Ai suruhon ni Anak ni Jolma in do malekat-Ni, jadi patumpuon ni sidea ma humbani harajaon ai sagala sibahen parsangsian pakon sihorjahon na ulang,

⁴² gabe idabuh ma sidea hubagas liang pamurunan, ijai ma masa partangison ampa na patungosngoson.

⁴³ Tapi anggo halak parpintor marsinalsal do songon mata ni ari ibagas Harajaon ni Bapa ni sidea. Barang ise na marpinggol, itangihon ma!”

Limbaga Pasal Arta na Ponop ampa Mutiara na Maharga

⁴⁴ “Usih do Harajaon nagori atas ai bani arta na ponop ibagas sada juma, na jumpah sada halak gabe iponopkon. Dob ai laho ma ia ibagas malas ni uhurni manjual na dong bani, jadi iboli ma juma ai.

⁴⁵ Usih do use Harajaon nagori atas ai bani sada halak partiga-tiga, na mangindahi mutiara na maharga.

⁴⁶ Jadi dob jumpahsi sada mutiara na maharga tumang, laho ma ia manjual haganup na dong bani, lanjar iboli ma ai.”

Limbaga Pasal Jala na Sinampakkon Hubagas Laut

⁴⁷ “Usih do homa Harajaon nagori atas ai bani jala na sinampakkon hubagas laut, gabe ipatumpu bagei-bagei ni dengke.

⁴⁸ Dob gok, itarik ma ai hu darat. Dob ai hundul ma sidea mamilihi, na madear inahkon hubagas raga, tapi na so madear iambukkon do.

⁴⁹ Sonai do masa bani ajal ni dunia on. Laho do malekat-malekat manirang halak parjahat humbani halak parpintor,

⁵⁰ lanjar idabuh ma sidea hubagas liang pamurunan, ijai ma masa partangison ampa na patungosngoson.

⁵¹ Domma iarusi hanima haganupan ai?" Nini sidea ma hu Bani, "Domma."

⁵² Jadi nini ma dompak sidea, "Halani ai, ganup sibotoh surat, na dob niajaran pasal Harajaon nagori atas ai, usih ma ai bani sada tuan rumah, na boi padaratkon humbani artani na baru ampa madokah."

Halak Nasaret na So Porsaya

(Mrk. 6:1-6; Luk. 4:16-30)

⁵³ Jadi dob ipaujung Jesus pasal limbaga ai, laho ma la hunjai.

⁵⁴ Jadi das ma la hu huta hagodangan-Ni, anjaha iajari ma sidea ibagas rumah parguruan ni sidea. Longang do sidea, nini ma, "Hunja do dapot Halak on hapentaran pakon hagogohon na sonin?"

⁵⁵ Ai lang la do anak tukang kayu in? Ai lang si Maria do goran ni inang-Ni, anjaha anggi-Ni ai ma si Jakobus, si Josep, si Simon ampa si Judas?

⁵⁶ Anjaha botou-Ni, ai lang haganup do i tongah-tongahta? Hunja do dapot-Si haganupan in?"

⁵⁷ Ase sangsi do sidea pasal-Si. Tapi nini Jesus ma dompak sidea, “Seng dong nabi na so ihormati, sobali i huta hagodanganni ampa i rumahni.

⁵⁸ Anjaha seng buei tarhorjahon-Si ijai horja hagogohon, halani na so porsaya, ai sidea.”

Parmatei ni si Johannes Pandidi

(Mrk. 6:14-29; Luk. 3:19-20)

14 ¹ Bani panorang ai tarboge ma barita pasal Jesus bani Raja Herodes,

² gabe nini ma hubani juakjuakni, “Si Johannes Pandidi do ai, domma puho ia humbani na matei, ai do ase tarhorjahonsi horja na marhagogohon ai.”

³ Ai na dob itangkap si Herodes do si Johannes, isangkut, dob ai ipatutupkon halani si Herodias, parinangon ni anggini, si Pilippus.

⁴ Ai ihatahon si Johannes do hu bani, “Seng patut bamu ia!”

⁵ Sihol do namin bunuhon ni si Herodes ia, tapi mabiar do ia bani halak na mabuei ai, ai nabi do ia, ninuhur ni sidea.

⁶ Tapi bani ari partubuh ni si Herodes, manortor do boru ni si Herodias ai i lobei ni tamuei-tamuei, jadi marosuh ma uhur ni si Herodes mangidahsi,

⁷ pala ibagahkon marhitei bija, mamberehon bani atap aha pe sipindoonni.

⁸ Jadi nini ma, dob iajari inangni, “Bere ham ma bangku ijon i atas ni pinggan ulu ni si Johannes Pandidi!”

⁹ Pusok do namin uhur ni raja ai, tapi halani bijani ampa halani tamueini ai, gabe ihatahon ma na mamberehon ai bani.

¹⁰ Isuruh ma na mamonggol ulu ni si Johannes ibagas tutupan ai.

¹¹ Iboan ma uluni ai bani sada pinggan hubani anak boru ai, gabe ibere ma ai bani inangni.

¹² Dob ai roh ma susian ni si Johannes mangalop bangkeini ai, lanjar itanom, anjaha iparayak sidea ma Jesus laho patugahkon ai.

Itamuei Tuhan Jesus Lima Ribu Halak

(Mrk. 6:33-44; Luk. 9:10-17; Joh. 6:1-15)

¹³ Dob ibogei Jesus ai, misir ma la hunjai marparau hubani sada ianan na lungun, sahalak-Si. Anjaha dob ibogei halak na mabuei ai pasal ai, iirikkon sidea ma la mardalan nahei, manlopusi huta-huta ai.

¹⁴ Dob mandarat Jesus, ididah ma halak na mabuei ai, gabe idop ma uhur-Ni mangidah sidea, anjaha ipamalum ma na boritan, na adong i tongah-tongah ni sidea.

¹⁵ Jadi dob bod ari, roh ma susian-Ni ai hu lobei-Ni mangkatahon, “Halimisan do ijon anjaha bod ma ari. Palaho Ham ma halak na mabuei in, ase laho sidea hu huta-huta ai mamboli sipanganon!”

¹⁶ Tapi nini Jesus ma bani sidea, “Seng pala laho sidea, bere hanima ma sidea mangan!”

¹⁷ Dob ai nini sidea ma hu Bani, “Pitah lima ruti ampa dua dengke do adong bannami ijon.”

¹⁸ Tapi nini ma, “Boan hanima ma ai Bangku hujon!”

¹⁹ Jadi isuruh ma halak na mabuei ai hundul bani poyon-poyon ai. Dob ibuat ruti na lima ai ampa dengke na dua ai, mangkawah ma la dompak datas, laho mangkatahon tonggo tarima kasih, ipartopik ma ruti ai, ibere ma bani susian-Ni ai, ase sidea mamberei halak na mabuei ai.

²⁰ Jadi mangan ma haganup anjaha bosur bei, dob ai ipatumpu ma teba-teba ai, gok sapuluh dua bantei.

²¹ Ia buei ni na mangan ai adong do hira-hira lima ribu halak dalahi, naboru pakon dakdanak seng ibilangi.

Tuhan Jesus Mardalan i Atas Bah

(Mrk. 6:45-56; Joh. 6:16-24)

²² Jadi ijuljul Jesus ma susian-Ni ai masuk hu parau laho manlobei-Si hu dipar, anjaha na mabuei ai pe isuruh ma mulak.

²³ Dob isuruh mulak haganup na mabuei ai, tangkog ma sahalak-Si hu dolog laho martonggo. Dob golap ari, sahalak-Si mando ijai.

²⁴ Ia parau ai, domma tar daoh hun topi pasir, anjaha tarsosak do sidea ibahen gilumbang ai, hun lobei do roh logou ai bani sidea.

²⁵ Jadi marayak tahuak dayok na parlobei, roh ma Jesus, manjumpahkon sidea mardalan i atas tao ai.

²⁶ Jadi dob ididah susian ai la mardalan i atas tao ai, bajoraon ma sidea anjaha nini ma, “Begu-begu do in!” Doruh-doruh ma sidea halani biarni.

²⁷ Tapi mintor iparsahapkon Jesus ma sidea, nini ma, “Tenger ma uhurnima, Ahu do on! Ulang mabiar!”

²⁸ Jadi nini si Petrus ma mambalosi, “Tuhan, anggo Ham do in, hatahon Ham ma ahu roh Bamu, mardalan i atas bah on!”

²⁹ Nini ma, “Roh ma!” Jadi tuad ma si Petrus hun parau ai, mardalan i atas bah ai, laho manjumpahkon Jesus.

³⁰ Tapi mangidah logou na doras ai, gabe mabiar ma ia, anjaha sanggah mulai ia mogap, mardilo ma ia, “Tuhan, paluah ahu!”

³¹ Jadi mintor isurdukkon Jesus ma tangan-Ni laho manangkapsi, lanjar nini ma, “Ale siotik haporsayaon, mase bungbang uhurmu?”

³² Anjaha dob naik sidea hu parau ai, minop ma logou ai.

³³ Jadi marsombah ma Bani halak na ibagas parau ai, nini ma, “Tongon do Ham Anak ni Naibata!”

Ipamalum Buei na Boritan i Genesaret

³⁴ Dob das sidea i dipar mandarat ma sidea i Genesaret.

³⁵ Jadi dob itandai halak na ijai ai la, ipatugah sidea ma hu sab nagori ai, gabe ipamboan halak ma hu Bani sagala na boritan.

³⁶ Ipindo sidea do Bani, ase ilopas jamahon ni sidea age rambu ni hiou-Ni gelah, jadi sagala na manjamah-Si malum do.

Podah ni Tuhan Yesus Manlawan Titah-titah na Binahen ni Halak Parisei

(Mrk. 7:1-23)

15 ¹ Jadi roh ma Parisei pakon sibotoh surat hun Jerusalem marayak Jesus, nini sidea ma,

² “Mase ma ilanggar susian-Mu adat na humbani ompung nalobei? Seng iburihi sidea tanganni laho mangan.”

³ Jadi nini Jesus ma mambalosi sidea, “Mase ma ilanggar nasiam titah ni Naibata, halani mardingat adat nasiam ai?

⁴ Naibata do mangkatahon, ‘Pasangap bapamu pakon inangmu!’ ambahni ai, ‘Na mamurai bapani atap inangni, maningon do sipamateion!’

⁵ Tapi nasiam mamodahkon, ‘Barang ise na mangkatahon bani bapani atap inangni, na sahira pamberengku bamu, dearan ma nagalangkon ai!’

⁶ Halak ai, seng pala be pasangaponni bapani atap inangni. Isedai nasiam do titah ni Naibata halani adat nasiam.

⁷ E nasiam sipakulah-kulah! Sintong do panjahaion ni si Jesayas pasal nasiam, na mangkatahon,

⁸ ‘Ipasangap pamangan ni bangsa on do Ahu, tapi anggo uhur ni sidea daoh do hun Bangku.

⁹ Tapi soya do parpasangap ni sidea Bangku, ai podah ni jolma do ipodahkon sidea.”

¹⁰ Jadi idilo ma halak na mabuei ai, nini ma hubani sidea, “Bogei anjaha parimbagaskon nasiam ma!

¹¹ Seng gabe butak jolma halani na masuk humbani pamanganni, tapi na luar humbani pamanganni ai do pabutakkonsi.”

¹² Dob ai iparayak susian-Ni ai ma la, nini ma, “Domma ibotoh Ham, na dob marah do Parisei ai mambogei hata ai?”

¹³ Tapi nini ma mambalosi, “Siorbaton do sagala suan-suanan, na so sinuan ni Bapa na i nagori atas ai.

¹⁴ Paturut hanima ma sidea, pambobai na mapitung do sidea manogu na mapitung. Tapi anggo na mapitung manogu na mapitung, tarrohung ma sidea haduasi.”

¹⁵ Nini si Petrus ma mambalosi-Si, “Patorang Ham bennami limbaga ai!”

¹⁶ Jadi nini Jesus ma, “Ai seng iarusi hanima ope homa?

¹⁷ Ai seng ibotoh hanima, sagala na masuk hubagas pamangan, laho hubagas boltok, dob ai mandarat bani ianan na suhi?

¹⁸ Tapi na luar hun pamangan humbagas uhur do ai roh, anjaha ai do na pabutakkonjolma.

¹⁹ Ai humbagas uhur do tubuh pingkiran na jahat, pamunuhon, parbangkison, parriah-riahon, panangkoon, hata ladung ampa panreheion.

²⁰ Sisonai do na pabutakkonjolma, tapi mangan seng marburih, seng butakjolma halani ai.”

Haporsayaon ni Sada Boru Kanaan

(Mrk. 7:24-30)

²¹ Dob ai misir ma Jesus hunjai, laho hu nagori Tirus pakon Sidon.

²² Jadi roh ma sada boru Kanaan hun nagori ai mardilo-dilo, “Idop ma uhur-Mu bangku, Tuhan, Anak ni si Daud! Parah do iahap borungku, iarsik-arsik setan.”

²³ Tapi seng ibalosi, sangkababah hata pe lang. Jadi roh ma susian-Ni ai hu Bani, nini ma, “Palao Ham ma ia, ai sai iirikkon do hita anjaha dilo-dilo.”

²⁴ Tapi nini ma mambalosi, “Pitah hubani biribiri na magou humbani ginompar ni halak Israel do Ahu isuruh.”

²⁵ Jadi idohori naboru ai ma la, isombah ma la lanjar ihatahon, “Tuhan, urupi Ham ahu!”

²⁶ Tapi nini ma mambalosi, “Seng patut nabuat ruti humbani dakdanak, laho mamberehon ai bani baliang.”

²⁷ Balos ni puang-puang ai, “Tongon, Tuhan, tapi ipangan baliang do rimah-rimah na matektek humbani meja ni tuanni.”

²⁸ Nini Jesus ma mambalosisi, “Inang, bangga do haporsayaonmu, saud ma songon na pinindomu ai! Jadi jorgit ma boruni ai humbani panorang ai nari.”

Ipamalum Buei na Boritan

²⁹ Dob misir hunjai, das ma Jesus hu Tao Galilea, jadi tangkog ma la bani sada dolog, lanjar hundul ijai.

³⁰ Jadi roh ma buei tumang halak hu Bani mamboan halak na repat, na tempang, na mapitung, na longah ampa buei na legan ope, anjaha iparpatibal ma sidea i lobei ni nahei ni Jesus, gabe ipamalum ma sidea haganup.

³¹ Jadi longang ma halak na mabuei ai, halani ididah, marsahap do na longah, malum na martikas, mardalan na repat, anjaha marpangidah na mapitung, gabe ipuji sidea ma Naibata ni Israel.

Itamuei Ompat Ribu Halak

³² Tapi idilo Jesus ma susian-Ni ai hu lobei-Ni, nini ma, “Maidop do uhur-Hu mangidah na mabuei on, ai adong ma tolu ari sidea rapkon Ahu, anjaha seng dong sipanganon bani sidea, anjaha seng ra Ahu palaohon sidea sonin loheian, ase ulang tompas sidea i tongah dalan.”

³³ Jadi nini susian-Ni ai ma hu Bani, “Hunja ma buatonta ruti i halimisan on sungkup pabosur halak na sain bueini?”

³⁴ Nini Jesus ma hubani sidea, “Ai adong do pigu ruti isimpan hanima?” Jadi nini sidea ma, “Pitu ruti ampa dengke otik.”

³⁵ Jadi isuruh ma na mabuei ai hundul bani tanoh,
³⁶ ibuat ma ruti na pitu ai ampa dengke ai, anjaha dob ihatahon tarima kasih, ipartopik ma ai, anjaha iberei bani susian-Ni ai, ase susian-Ni ai mamberei halak na mabuei ai.

³⁷ Jadi mangan ma sidea haganup ronsi bosur; lanjar ipatumpu sidea ma teba-tebani, gok pitu bantei.

³⁸ Ia buei ni na mangan ai, adong do ompat ribu halak dalahi, sobali naboru pakon dakdanak.

³⁹ Jadi dob isuruh mulak halak na mabuei ai, naik ma la hu parau, anjaha laho ma hu Nagori Magdala.

Ipatugah Jesus Use Tanda na Masa bani si Jona

(bd. 12:38-42; Mrk. 8:11-13; Luk. 11:16, 29-32; 12:54-56)

16 ¹ Dob ai roh ma Parisei pakon Sadukei manlajou-Si, ipindo sidea do tanda hun langit sipatidakon-Ni bani sidea.

² Jadi nini ma dompak sidea, “Anggo bod ma ari, nini nasiam do, logou ma ari, ai gerger do langit.

³ Anjaha sogod-sogod, laho roh do haba-haba sadari on, ai gerger do langit anjaha bonog. Ibotoh

nasiam do manimbangi rupa ni langit, tapi tanda-tanda, na masa bani panorang on, seng ibotoh nasiam.

⁴ Bangsa parjahat anjaha parbangkis mangindo tanda; tapi seng sibereon tanda bani sidea, sobali tanda ni si Jona.” Jadi misir ma la, itadingkon ma sidea.

Lumba-Lumba Pasal Ragi ni Parisei

(Mrk. 8:14-21; Luk. 12:1)

⁵ Jadi das ma susian-Ni hu dipar, lupa do hape sidea mamboan ruti.

⁶ Ihatahon Jesus ma hubani sidea, “Pangkei anjaha jaga ma hanima dompak ragi ni Parisei pakon Sadukei.”

⁷ Jadi isahapkon sidea ma ai samah sidea, nini ma, “Halani na so mamboan ruti ai do hita ai!”

⁸ Tapi ibotoh Jesus do ai, gabe nini ma, “E hanima siotik haporsayaon! Mase ma isahap-sahapkon hanima na so mamboan ruti ai hanima?”

⁹ Seng ope iarusi uhurnima? Seng idingat hanima be na lima ruti bani na lima ribu halak ondi, anjaha piga bantei buei ni na teba ipatumpu hanima?

¹⁰ Barang na pitu ruti bani na ompat ribu halak ondi, anjaha piga bantei buei ni na teba ipatumpu hanima?

¹¹ Sonaha, ai lang iarusi hanima, na so pasal ruti hatang-Kai bennima? Jaga ma hanima pasal ragi ni halak Parisei ampa Sadukei!”

¹² Jadi dapot uhur ni sidea ma, paboa sedo hape ragi ni Parisei pakon Sadukei na hinatahon-Ni ai sijagaon, tapi podah ni sidea do.

Hasaksian ni si Petrus: Kristus do Jesus

(Mrk. 8:27-30; Luk. 9:18-21; Joh. 6:66-71)

¹³ Jadi dob das Jesus hu Nagori Kesarea Pilippi, isungkun ma susian-Ni, “Ai ise do Anak ni Jolma in, nini halak?”

¹⁴ Jadi nini sidea ma, “Deba mangkatahon si Johannes Pandidi, na deba si Elias, na legan use si Jeremias barang sahalak humbani nabi-nabi ai.”

¹⁵ Nini ma hubani sidea, “Ia hanima, ise do Ahu, nini hanima?”

¹⁶ Jadi nini si Simon Petrus ma mambalosi, “Ham do Kristus, Anak ni Naibata na manggoluh in!”

¹⁷ Dob ai nini Jesus ma mambalosi, “Martuah do ho, Simon, anak ni si Jona, ai sedo daging pakon daroh patalarhon in bam, tapi Bapang-Ku na i nagori atas ai do.”

¹⁸ Ahu pe Huhatahon ma bam, “Si Petrus (*batu gingging*) do ho, anjaha i atas ni batu gingging ai do pajongjongon-Ku kuriang-Ku, anjaha horbangan ni nagori toruh pe seng boi taluhononni ai.

¹⁹ Hubere pe bam anakkunsi ni Harajaon nagori atas in, anjaha aha na sinangkutmu i dunia on, tarsangkut ma age ai i nagori atas, anjaha aha na tinanggalanmu i tanoh on, tanggal ma ai i nagori atas.”

²⁰ Dob ai ipandang do susian-Ni ai, ase ulang ipatugah-tugah sidea bani halak, paboa la do Kristus.

Ilumbahon Pasal Sitaronon-Ni

(Mrk. 8:31-33; Luk. 9:22)

²¹ Hunjia nari ma ipungkah Jesus patugahkon hubani susian-Ni, na maningon laho do la hu Jerusalem, anjaha na maningon buei do la manaron humbani pangintuai-pangintuai, sintua ni malim ampa sibotoh surat, pala maningon bunuhon do la, tapi papuhoon do bani ari patoluhon.

²² Jadi iarahkon si Petrus ma la, ihata ma la, nini ma, “Idop ma uhur ni Naibata Bamu, Tuhan! Ulang ma masa ai Bamu!”

²³ Tapi marhusor ma Jesus, nini ma dompak si Petrus, “Laho ma ho ne, bolis! Ai partolsuan do ho Bangku, ai seng na porlu bani Naibata iuhurhon ho, tapi na porlu bani jolma do.”

Pasal na Mangirikkon Jesus

(Mrk. 8:34-39; Luk. 9:23-27)

²⁴ Jadi nini Jesus ma dompak susian-Ni, “Barang ise na sihol mangirikkon Ahu, iparnalang ma dirini, iporsan ma silangni, anjaha iirikkon ma Ahu!

²⁵ Ai barang ise na sihol manramotkon hosahni, na mangagouhon do ai, tapi barang ise na agouan hosah halani Ahu, ai do na jumpahan.

²⁶ Ai aha ma gunani bani jolma, age ganup dunia on bani, anggo magou do tonduyni? Aha ma tarbere jolma bahen tobus ni tonduyni?

²⁷ Ai na roh do magira Anak ni Jolma in ibagas hasangapon ni Bapa-Ni rap pakon malekat-Ni, jadi balaskonon-Ni ma bani haganup domu hubani horjani.

²⁸ Na sintong do na Huhatahon on bennima, adong do deba humbani na jongjong ijon, na so mandai hamatean, anggo seng ope ididah sidea roh Anak ni Jolma in ibagas harajaon-Ni.”

Marsangap Tuhan Jesus i Atas Dolog

(Mrk. 9:1-12; Luk. 9:28-36)

17 ¹ Dob salpu onom ari, iarahkon Jesus ma si Petrus ampa si Jakobus ampa si Johannes saninani ai, iboan ma sidea pulig hu sada dolog na gijang.

² Jadi mubah ma rupa-Ni ididah sidea, bohi-Ni marsinalsal songon mata ni ari, anjaha hiou-Ni lopak songon na lihar.

³ Anjaha tonggor ma, taridah ma bani sidea si Musa ampa si Elias, marsahapi pakon-Si.

⁴ Jadi iparsahapkon si Petrus ma Jesus, nini ma, “Sonang ni in ijon! Anggo marosuh Ham, hupauli ma ijon tolu lampolampo, sada Bamu, sada bani si Musa, anjaha na sada nari bani si Elias.”

⁵ Mangkatahon ai ope ia, tonggor ma, roh ma sada hambun na lihar manlinggomi sidea, anjaha tarbogeai ma sada sora hun hambun ai, na mangkatahon, “On do Anak haholongan-Ku, marosuh do uhur-Hu Bani, tangihon hanima ma la!”

⁶ Manangar ai susian ai, manrogop ma sidea anjaha mabiar tumang.

⁷ Jadi roh ma Jesus bani sidea, ijamah ma sidea, nini ma, “Jongjong ma, anjaha ulang ma mabiar!”

⁸ Tapi sanggah mangkawah sidea, seng dong atap ise ididah sidea ijai sobali Jesus tumang.

⁹ Sanggah tuad ai sidea hun dolog ai, iparentahkon Jesus ma hubani sidea, nini ma, “Ulang ma patugah-tugah hanima na nididahnima ai atap bani ise pe, sadokah seng puho ope Anak ni Jolma in humbani na matei.”

¹⁰ Jadi isungkun susian-Ni ai ma ia, “Mase ma ihatahon sibotoh surat paboa maningon roh do lobei si Elias?”

¹¹ Nini ma mambalosi sidea, “Tongon, maningon roh do si Elias, laho patorsahon haganup.”

¹² Tapi Huhatahon ma bennima, “Domma roh si Elias, tapi seng itanda sidea ia, uhur-uhur ni sidea do ibahen sidea bani.”

¹³ Jadi iarusi susian ai ma, si Johannes Pandidi do hape, na hinatahon-Ni ai bani sidea.

Ipamalum Tuhan Jesus Sada Halak na Ubagon

(Mrk. 9:13-28; Luk. 9:37-44)

¹⁴ Dob das sidea hubani halak na mabuei ai, roh ma sada halak marsombah hu Bani, anjaha nini ma,

¹⁵ “Tuhan, idop ma uhur-Mu mangidah anakku.” Ubagon do ia, parah tumang iahap. Gati do ia jomba hubagas apuy, anjaha gati homa hubagas bah.

¹⁶ Domma huboan namin ia bani susian-Mu, tapi seng tarpamalum sidea ia.

¹⁷ Jadi nini Jesus ma mambalosi, “E bangsa, na so porsaya anjaha na jahat! Sadiha dokah nari Ahu rap pakon hanima? Sadiha dokah nari anjuon-Ku hanima? Boan hanima ma ia hujon.”

¹⁸ Jadi isorgang Jesus ma ia, gabe luar ma sibolis ai hun bani, anjaha jorgit ma ia humbani panorang ai nari.

¹⁹ Dob ai pulig ma iparayak susian ai Jesus, nini ma, “Mase ma lang mangasup hanami mangusirsi?”

²⁰ Jadi nini Jesus ma dompak sidea, “Halani otik ni haporsayaonnima do! Ai tongon do na Huhatahon on bennima: Anggo adong haporsayaonnima na sabatu ni losabi, hatahononnima do bani dolog an: Mosor ma hunjon hujai, gabe saud do mosor ai, anjaha seng dong na so boi bahenonnima.”

²¹ Tapi anggo na samasam on, seng ra mandarat, anggo seng marhasoman tonggo ampa parpuasaon.

Ilumbahon Jesus Pasal Sitaronon-Ni Paduahalihan

(Mrk. 9:30-32; Luk. 9:43-45)

²² Sanggah martumpu sidea i Galilea, nini Jesus ma hubani sidea, “Ondoskononkon ma Anak ni Jolma in hubagas tangan ni halak,

²³ gabe bunuhon ni sidea ma la, dob ai pagoluhon do la bani ari patoluhon.” Jadi pusok tumang ma uhur ni sidea.

Igalar Jesus Guguan bani Rumah Panumbahan

²⁴ Jadi dob das sidea hu huta Kapernaum, roh ma situnggu guguan rumah panumbahan hubani si Petrus, nini ma, “Ai seng manggalar guguan rumah panumbahan Gurunima in?”

²⁵ Nini ma, “manggalar do.” Sanggah na masuk ia hu rumah, i lobei Jesus ma manungkun hu bani, nini

ma, “Sonaha do ninuhurmu, Simon? Raja-raja na i tanoh on, humbani ise do sidea manjalo guguan atap balasting? Hun bani anakni do atap humbani halak na legan do?”

²⁶ Dob ihatahon si Petrus, “Hun bani halak na legan do,” gabe ihatahon Jesus ma hu bani, “Ase, seng hona anggo anak!

²⁷ Tapi, ase ulang marah sidea halani hita, laho ma ho mangkail hu tao, dob ai sintak ma dengke na parlobei mangankon, anjaha buha ma babahni, gabe dapot ho ma ijai sada rupiah. Ai ma buat, anjaha bere ma ai bani sidea bahen guguan.”

Martoruh ni Uhur songon Dakdanak

(Mrk. 9:33-37; Luk. 9:46-48)

18¹ Bani panorang ai, roh ma susian ai manjumpahkon Jesus, nini sidea ma, “Ai ise do sibanggalan ibagas Harajaon nagori atas?”

² Jadi idilo Jesus ma sada dakdanak, ipajongjong ma ia i tengah-tengah ni sidea, lanjar nini ma,

³ “Sintong do na Huhatahon on bennima: Anggo lang mulak uhurnima songon sada dakdanak, sabonar na so boi do hanima masuk hubagas Harajaon nagori atas ai.

⁴ Barang ise na patoruh uhurni songon dakdanak on, ai do sibanggalan ibagas Harajaon nagori atas in.

⁵ Anjaha na manjalo dakdanak na sonon, halani goran-Ku, Ahu do na jinaloni ijai.”

Pasal na Mambahen Parsangsian

(Mrk. 9:42-47; Luk. 17:1, 2)

⁶ “Tapi barang ise na mambahen sangsi sada humbani na etek-etek on, na porsaya hu Bangku, dearan ma igantungkon losung batu bani borgokni, laho mannongnongkonsi hubagas laut sibagasan.

⁷ Bursik ma dunia on pangkorhon ni parsangsian! Seng tarbahen lang roh namin parsangsian, tapi bursik majolma na parohkonsi!

⁸ Halani ai, anggo tanganmin atap naheimin do na mambahen mardousa ho, rotap anjaha ambukkon ma in, ai dearan do martangan salopah atap tempang ho masuk hu hagoluhan, humbani na mardua tangan atap mardua nahei iambukkon hubagas apuy sisadokah ni dokahni.

⁹ Anjaha anggo matamu do na mambahen mardousa ho, pulsitkon ma in anjaha ambukkon, ai dearan do marmata sada ho masuk hu hagoluhan, humbani na marmata dua iambukon hubagas naraka.

¹⁰ Jaga ma hanim, ase ulang mapas uhurnima mangidah sada humbani na etek-etek on. Ai Huhatahon ma bennima, “Ididah malekat ni sidea do tongtong bohi ni Bapang-Ku na i nagori atas ai.

¹¹ *(Ai na roh do Anak ni Jolma in paluahkon na magou)."*

Limbaga Pasal Biribiri na Magou

(Luk. 15:4-7)

¹² "Sonaha do ninuhurnima? Anggo adong biribiri ni sada halak saratus, anjaha kahou sada hunjai, ai lang tadingkononni ma na siah puluh siah ai i dolog, laho mangindahi na magou ai?

¹³ Anjaha anggo jumpahsi ma ai, tongon Huhatahon ma bennima, malasan do uurni mangidah na sada ai marimbang na siah puluh siah, na so onggahou.

¹⁴ Sonai ma homa seng marosuh uhur ni Bapanima na i nagori atas ai, anggo magou sada humbani na etek-etek on."

Ruhut Paminsangon

(Luk. 17:3, 4)

¹⁵ "Anggo mardousa saninamu, parayak anjaha ajari ma ia, hanima padua-dua. Anggo itangihon ho, gabe hasomanmu ma ia use.

¹⁶ Tapi anggo seng itangihon ho, arahkon ma hasomanmu sada barang dua halak, ase sinaksihon ni dua atap tolu halak ma parsahapan ai.

¹⁷ Tapi anggo seng itangihon age sidea, patugah ma ai bani kuria; anjaha anggo seng itangihon homa kuria ai, hira ma ia parbegu barang sijalo sohei.

¹⁸ Na sintong do hatang-Kon bennima, ‘Sagala na sinangkutnima i atas tanoh on, tarsangkut do homa ai i nagori atas, anjaha sagala na pinaluahnima i tanoh on, maluah do ai homa i nagori atas.’

¹⁹ Ambahni ai Huhatahon ma bennima, ‘Anggo adong dua hun bannima i tanoh on, na mardos ni uhur manonggohon atap aha pe, sai na bereon ni Bapang-Ku na i nagori atas ai do ai bani sidea.

²⁰ Ai atap ija pe martumpu dua atap tolu halak marhitei goran-Ku, i tongah-tongah ni sidea do Ahu.’”

Pasal na Manasap Dousa ni Hasoman

²¹ Dob ai roh ma si Petrus, nini ma hu Bani, “Tuhan, sibar piga hali do sasaponku salah ni hasomanku na mardousa dompak ahu? Pala do pitu hali?”

²² Nini Jesus ma dompaksi, “Seng Huhatahon bam pitu hali, tapi pitu puluh hali pitu do.

²³ Halani ai tarpausih do Harajaon nagori atas ai hubani sada raja na mambahen parhiraan ampa juakjuakni.

²⁴ Jadi dob ipungkah mambahen parhiraan, tarboan ma hu lobeini sada halak, na marutang sapuluh ribu talenta.

²⁵ Tapi halani seng dong panggalarni, ihatahon tuanni ai ma jalon ia, parinangonni ampa dakdanakni ronsi ganup na dong bani, bahen galar ni utangni.

²⁶ Manrogop ma juakjuak ai i lobeini, nini ma, 'Palumbang ham ma uhurmu, hugalar pe ganupan ai bamu!'

²⁷ Jadi maidop ma uhur ni tuanni ai mangidah juakjuak ai, ipaluah ma ia anjaha ibalihon ma haganup utangni ai.

²⁸ Tapi sanggah na luar juakjuak ai, jumpahsi ma hasomanni juakjuak sahalak, na marutang hubani saratus dinar, gabe itangkap ma ia anjaha isongkik, nini ma, 'Galar utangmu ondi!'

²⁹ Jadi manrogop ma hasomanni juakjuak ai, nini ma, 'Palumbang ham ma uhurmu, hugalar pe ai bamu!'

³⁰ Tapi seng ra ia, laho ma ia anjaha ipatutupkon ma hasomanni ai, paima igalar utangni ai.

³¹ Jadi dob ididah hasomanni juakjuak na masa ai, pusok ma uhur ni sidea, laho ma sidea, anjaha ipatugah ma bani tuan ni sidea ai haganup pasal na masa ai.

³² Gabe idilo tuanni ai ma ia, nini ma dompaksi, 'Ho juakjuak na jahat! Hubalihon do haganup utangmu, halani ielek-elek ho ahu.

³³ Ai lang patut maridop ni uhur age ho hubani hasomanmu juakjuak songon ahu, na dob maridop ni uhur bam?'

³⁴ Jadi manringis ma tuanni ai hubani, gabe iondoskon ma ia hubani sipangarsik-arsik, paima igalar haganup utangni ai.

³⁵ Sonai do bahenon ni Bapang-Ku na i nagori atas ai bennima, anggo lang isasap hanima bei humbagas uhurnima salah ni hasoman.”

Pasal Parrumahtanggaon

(Mrk. 10:1-12)

19 ¹Ase dob ipaujung Jesus parsahapan ai, itadingkon ma Galilea, gabe das ma la hu tanoh Judea, na i dipar ni Bah Jordan.

²Buei tumang do halak na mangirikkon-Si, anjaha ipamalum ma sidea ijai.

³Jadi roh ma halak Parisei hu Bani, nini sidea ma manlajou-Si, “Ai bulih do sirangkonon ni sada dalahi parinangonni, asal adong atap aha halani?”

⁴Jadi nini ma mambalosi sidea, “Ai seng ibasa hanima, paboa na humbani mulani do itompa Panompa in sidea dalahi pakon naboru, anjaha ihatahon,

⁵‘Halani ai tadingkonon ni dalahi do bapani pakon inangni, laho padomuhon dirini hubani jolmani, anjaha gabe sadaging do sidea na dua ai?’

⁶Ase seng be dua sidea ai, tapi sada daging do. Ai pe, na dob pinadomu ni Naibata, seng bulih sirangon ni jolma.”

⁷Jadi nini sidea ma hu Bani, “Anggo sonai, mase ma ititahkon si Musa bereon surat sirang laho mansirangkon?”

⁸ Nini ma dompak sidea, “Halani hengken ni uhur nasiam do, mambahen na ilopas si Musa nasiam paulakkon parinangon nasiam; tapi seng sonai anggo humbani mungkahni.

⁹ Huhatahon ma bani nasiam: Barang ise na mansirangkon parinangonni, anggo seng halani parbangkison, gabe ibuat na legan, parbangkis do ia ai.”

¹⁰ Jadi nini susian ai ma dompak-Si, “Anggo sonai do hape ruhut ni parrumahtanggaon, rahanan ma ulang mompo.”

¹¹ Tapi nini ma dompak sidea, “Seng haganup halak tarbahen manjalo hata on, pitah haondosanni do hansa.

¹² Ai adong do jolma na so boi mompo, sonai humbani partubuhni; adong deba, na kinasihkon ni halak na legan, anjaha adong deba nari, na pakasihkon dirini halani Harajaon nagori atas ai. Barang ise na boi manjalo hata ai, ijalo ma!”

Jesus Huan-huan ni Dakdanak

(Mrk. 10:13-16; Luk. 18:15-17)

¹³ Dob ai iboan halak ma dakdanak hu Bani, ase itampeihon tangan-Ni bani sidea, anjaha itonggohon sidea. Tapi ipinsang susian ai ma sidea.

¹⁴ Tapi nini Jesus ma, “Paturut hanima ma roh dakdanak in hu Bangku, ulang langlangi, ai bani sisonin do Harajaon nagori atas ai.”

¹⁵ Jadi dob itampeihon tangan-Ni bani sidea, misir ma la hunjai.

Garama na Bayak

(Mrk. 10:17-31; Luk. 18:18-30)

¹⁶ Dob ai roh ma sada halak manjumpahkon-Si, nini ma, “Guru, aha do na madear sihorjahononku, ase dapot ahu hagoluhan sisadokah ni dokahni?”

¹⁷ Tapi nini ma hu bani, “Mase ma ahu sungkunonmu pasal na madear? Sada do hansa paruhur na madear. Anggo sihol masuk ho hu hagoluhan, dalankon ma titah in!”

¹⁸ Nini ma dompak-Si, “Na ija?” Gabe nini Jesus ma, “Ulang ho mamunuh! Ulang ho marbangkis! Ulang ho manangko! Ulang ho ra manaksihon hata na so tongon!

¹⁹ Pasangap amangmu pakon inangmu! Anjaha: Haholongi ma hasomanmu songon dirimu!”

²⁰ Nini anak garama ai ma hu Bani, “Domma hudalankon haganupan ai. Aha ope hahuranganku?”

²¹ Jadi nini Jesus ma hu bani, “Anggo sihol uhurmu gok dear ho, laho ma, jual ma haganup na dong bam, pambere ma bani na masombuh, ase mararta ho i nagori atas. Dob ai roh ma ho mangirikkon Ahu!”

²² Mambogei hata ai anak garama ai, laho ma ia ibagas pusok ni uhur, ai buei do artani.

²³ Jadi nini Jesus ma dompak susian-Ni ai, “Payah do halak na bayak masuk hubagas Harajaon nagori atas in.”

²⁴ Huhatahon ma use hu bennima, “Urahan do masukan ni unta pinggol ni jarum, ase halak na bayak masuk hu Harajaon nagori atas in.”

²⁵ Mambogei ai susian ai, tarsonggot tumang ma sidea, nini ma, “Ise mando maluah, anggo sonai?”

²⁶ Jadi ikawahkon Jesus ma sidea, nini ma dompak sidea, “Marhitei jolma, seng boi ai, tapi marhitei Naibata haganupan do boi.”

Pasal Upah ni Susian

(Mrk. 10:28-31; Luk. 18:28-30)

²⁷ Dob ai nini si Petrus ma mambalosi-Si, “Ia hanami, haganup do itadingkon hanami laho mangirikkon Ham, aha ma ulih bannami?”

²⁸ Jadi nini Jesus ma hubani sidea, “Na sintong do hatang-Kon bennima: Magira, bani habayuon ai, bani na hundul Anak ni Jolma in bani paratas hasangapon-Ni ai, dihut ma haniman hundul ijai bani sapuluh dua paratas, laho manguhumi halak Israel, na sapuluh dua marga in.

²⁹ Anjaha barang ise na manadingkon rumahni, saninani, botouni, bapani, inangni, niombahni barang jumani halani goran-Ku, manjalo ma ai marlompit-lompit, ambahni ai teanonni ma hagoluan sisadokah ni dokahni.

³⁰ Tapi buei do na parlobei hinan gabe parpudi, anjaha na parpudi hinan gabe parlobei.”

Pasal Parhorja i Pohon Anggur

20 ¹ Ai usih do Harajaon nagori atas ai hubani sada tuan na bayak, na laho girah sogod mangindahi siparhorja bani pohon anggurni.

² Jadi dob mardos ni uhur ia pakon sidea pasal upah ni sidea, ai ma sadinar sadari, isuruh ma sidea hu pohon anggurni.

³ Anjaha sanggah na luar ia pukul siah, ididah ma halak na legan jongjong sohsoh i tiga ai,

⁴ gabe ihatahon ma bani sidea, “Dihut ma homa nasiam marhorja hu pohon anggurhu! Hubere pe na patut bani nasiam!” Jadi laho ma sidea.

⁵ Jadi laho ma use ia pukul sapuluh dua ampa pukul tolu, lanjar sonai do ibahen.

⁶ Anjaha sanggah na laho ia pukul lima, jadi jumpahsi ma halak na legan sonin-sonin jongjong, gabe ihatahon ma bani sidea, “Mase ma sohsoh tumang nasiam layur sadari on?”

⁷ Nini sidea ma hu bani, “Seng dong na mangarahkon hanami.” Jadi nini ma hubani sidea, “Dihut ma nasiam marhorja hu pohon anggurhai!”

⁸ Ase dob bod ari, nini simada pohon anggur ai ma dompak juru tulisni, “Dilo ma haganup siparhorja ai, galar ma upah ni sidea, mamungkah humbani na masuk parpudi das hubani na parlobei ai!”

⁹ Jadi roh ma na masuk bani pukul lima, ijalo bei ma sadinar.

¹⁰ Dob ai roh ma na masuk parlobei ai, iagan sidea ma lobih jaloon ni sidea, hape age sidea sadinar bei do ijalo.

¹¹ Tapi manjalo ai, marungut-ungut ma sidea dompak tuan na bayak ai,

¹² nini sidea ma, “la halak na parpudi masuk on, na marhorja pitah sajam hansa, ipados ham do sidea pakon hanami, na manaronkon torik ni horja pakon milas ni ari layur sadari on.”

¹³ Tapi nini ma marbalos dompak sahalak humbani sidea, “Ambia, seng dong hubahen bam na so pintor! Ai lang na dob manriah do hita pasal na sadinar in!

¹⁴ Jalo ma bagianmu anjaha laho ma ho! Tapi sihol do uhurhu, mambere bani na parpudi on songon na bam ai.

¹⁵ Ai lang patut, domu hubani rosuhku hubahen pasal na dong bangku? Serleng matamu halani layak ahu?”

¹⁶ Sonai ma gabe parlobei na parpudi hinan, anjaha na parlobei hinan gabe parpudi.

Ilumbahon Jesus Sitaronon-Ni Patoluhalihon

(Mrk. 10:32-34; Luk. 18:31-34)

¹⁷ Sanggah na laho Jesus tangkog hu Jerusalem, iarahkon ma pulig susian-Ni na sapuluh dua ai, anjaha nini ma bani sidea i tongah dalam ai,

¹⁸ “Na tangkog ma hita hu Jerusalem, ondskononkon ma Anak ni Jolma in bani sintua ni malim ampa sibotoh surat, anjaha uhumon ni sidea ma la marutang hosah.

¹⁹ Dob ai ondskonon ni sidea ma la hubani sipajuh begu-begu, ase ipahiri, ilonsingi anjaha iparsilangkon, anjaha bani ari patoluhon papuhoon do la.”

**Pangindoan ni Inang ni si Jakobus pakon
si Johannes Pasal Anakni**

(Mrk. 10:35-45; Luk. 22:24-27)

²⁰ Jadi roh ma inang ni anak ni si Sebedeus rap pakon anakni hu Bani, isombah ma la laho padaskon pangindoanni.

²¹ Jadi nini ma hu bani, “Aha ipindo uhurmu?” Nini ma mambalosi, “Lopas Ham ma hundul anakku na dua on ibagas harajaon-Mu, sada bani siamun-Mu, na sada nari bani sambilou-Mu!”

²² Tapi nini Jesus ma mambalosi, “Seng ibotoh hanima na pinindonima. Mintor tarinum hanima

ma siinumon, na sihol inumon-Ku?” Nini sidea ma, “Tarbahen hanami do!”

²³ Dob ai nini ma dompak sidea, “Tongon, inumonnima do siinumon-Kai, tapi seng saguru Bangku na mambahen hundul i siamun-Ku barang i sambilou-Hu, Bapa do pasirsirhon ai bani haondosanni.”

²⁴ Mambogei ai na sapuluh ai, sogam ma uhur ni sidea mangidah na dua halak na marsanina ai.

²⁵ Tapi ipatumpu Jesus ma sidea, nini ma, “Irajai sigomgomi bangsa do rayatni, anjaha ikuasai na sangap-sangapni do sidea.

²⁶ Ulang ma sonai anggo bennima, tapi barang ise na sihol sangap i tongah-tongahnima, ai ma gabe sipangidangi bennima,

²⁷ anjaha barang ise hanima na sihol parlobei, ai ma gabe jabolon bennima.

²⁸ Songon Anak ni Jolma in pe, seng roh la ase iidangi halak, tapi ase mangidangi do, anjaha iberehon do hosah-Ni bahen tobus ni buei jolma.”

Ipamalum Dua Halak na Mapitung

(Mrk. 10:46-52; Luk. 18:35-43)

²⁹ Sanggah luar sidea hun Jeriko, buei do halak na mangirikkon-Si.

³⁰ Anjaha tonggor ma, adong do dua halak na mapitung hundul i topi dalan, dob ibogei Jesus na

mamontas ai, mardilo-dilo ma sidea, “Ham Tuhan, Anak ni si Daud, idop ma uhur-Mu bennami!”

³¹ Ipinsang na mabuei ai ma sidea ase sip namin, tapi lambin gogoh do sidea dilo-dilo, “Ham Tuhan, Anak ni si Daud, idop ma uhur-Mu bennami!”

³² Jadi maronti ma Jesus anjaha isuruh ma sidea roh hu Bani, nini ma, “Aha ipindo uhur nasiam bahenon-Ku bani nasiam?”

³³ Nini sidea ma hu Bani, “Tuhan marpangidah ma namin matanami!”

³⁴ Jadi maidop ma uhur ni Jesus mangidah sidea, lanjar ijarah ma mata ni sidea, jadi mintor marpangidah ma mata ni sidea, gabe iirikkon ma Jesus.

Parmasuk ni Tuhan Jesus hu Jerusalem

(Mrk. 11:1-11; Luk. 19:28-39; Joh. 12:12-19)

21 ¹ Sanggah roh sidea hun dohor hu Jerusalem anjaha das sidea hu Betpage, na i Dolog Jetun, isuruh Jesus ma dua halak susian-Ni manlobei-Si,

² nini ma hubani sidea, “Laho ma hanima hu Dusun na i lobeinima ai, anjaha mintor dapot hanima do ijai tambat halode sada rap pakon anakni. Tanggali ma, anjaha boan ma hu Bangku!

³ Jadi anggo adong na mangkatahon atap aha bennima, balosi hanima ma, ‘Porlu do in bani Tuhan in!’ Jadi mintor lopasonni do.

⁴ Tapi masa pe sonin, ase jumpah na hinatahon ni nabi,

⁵ na mangkatahon, ‘Hatahon ma bani boru Sion: Tonggor ma, Rajamu roh bam, lamlam maruhur, anjaha mangajak halode boru-boru ampa anak ni halode boban.’”

⁶ Jadi laho ma susian ai, anjaha ibahen sidea ma songon na hinatahon ni Jesus bani sidea.

⁷ Iboan sidea ma halode ai rap pakon anakni ai, itampeihon ma hiou ni sidea hu atasni, anjaha Jesus pe hundul ma i atasni.

⁸ Deba humbani halak na mabuei ai mangamparhon hiouni bani dalan ai, na deba nari managili ranting ni hayu lanjar ierap bani dalan ai.

⁹ Ia halak na mabuei ai, na mardalan i lobei-Ni ampa na mangirikkon-Si hun pudi, nini bei ma mangolobkon, “Hosianna bani Anak ni si Daud! Pinasu-pasu ma na roh ibagas goran ni Tuhan. Hosianna ma i nagori atas.”

¹⁰ Sanggah na masuk ai la hu Jerusalem, guntar ma ganup huta ai, nini bei ma, “Ai ise do in?”

¹¹ Nini halak na mabuei ai ma, “On ma nabi ai, Jesus, na hun huta Nasaret, na i nagori Galilea!”

Jesus Papansingkon Rumah Panumbahan

(Mrk. 11:15-19; Luk. 19:45-48; Joh. 2:13-22)

¹² Jadi masuk ma Jesus hu rumah panumbahan, anjaha iusir ma hunjai sagala siparjualan ampa sipamboli, ipantunggalingkon ma meja ni situkari duit ampa bangku-bangku hundulan ni sijual asas,

¹³ lanjar nini ma dompak sidea, “lhatahon surat in do, ‘Rumah partonggoan do goran ni rumah-Ku, tapi gabe liang ni panamun do in ibahen hanima.’”

¹⁴ Dob ai marrohan ma hu Bani, hu rumah panumbahan ai, na mapitung ampa na repat, gabe ipamalum ma sidea.

¹⁵ Dob ididah sintua ni malim ampa sibotoh surat tanda halongangan na binahen ni Jesus ampa dakdanak na marsurak-surak ai i rumah panumbahan, mangakatahon, “Hosianna bani Anak ni Raja Daud!” Marah ma sidea.

¹⁶ Nini sidea ma hu Bani, “lbogei Ham do na hinatahon ni sidea in?” Jadi nini Jesus ma hubani sidea, “Hubogei do! Ai lang onggga ibasa nasiam, ‘Hun bani pamangan ni dakdanak ampa na inuman do ipasirsir Ham puji-pujian Bamu?’”

¹⁷ Dob ai itadingkon ma sidea, luar hun huta ai laho hu Betania, lanjar marborngin ijai.

Pamurai ni Jesus bani Hayu Ara na So Marbuah*(Mrk. 11:12-14; 20-25)*

¹⁸ Tapi patar ni ai, sogod, sanggah na laho mulak hu Jerusalem, malohei ma iahap.

¹⁹ Ididah ma sada hayu ara i topi dalan ai, jadi laho ma la hujai, tapi seng dong jumpahsi sobali bulung, gabe ihatahon ma bani hayu ai, “Hunjon hujanan seng anjai marbuah be ho!” Jadi mintor melus ma hayu ara ai.

²⁰ Mangidah ai susian ai, longang ma sidea, lanjar nini ma, “Mase ma mintor melus hayu ara in?”

²¹ Jadi nini Jesus ma mambalosi sidea, “Na sintong do hatang-Kon bennima: Anggo porsaya hanima anjaha seng sangsi, seng pitah songon na bani hayu ara in tarbahen hanima, tapi lobih do hunjai, anggo ihatahon hanima bani dolog an: Mosor ma anjaha madabuh hu laut! Gabe saud ma sonai.

²² Anjaha sagala na pinindonima ibagas tonggonima, sai na jaloonnima do, anggo porsaya hanima.”

Sungkun-sungkun ni Pangintuai ni Jahudi Pasa Kuasa ni Jesus*(Mrk. 11:27-33; Luk. 20:1-8)*

²³ Sanggah na masuk ai la hu rumah panumbahan, roh ma sintua ni malim ampa pangintuai-pangintuai ni bangsa ai hu Bani, tudu sanggah mangajari la,

nini sidea ma, “Marhitei kuasa aha do ibahen Ham ganupan in? Anjaha ise do na mambere kuasa in Bamu?”

²⁴ Jadi nini Jesus ma mambalosi sidea, “Ahu ma lobei manungkun nasiam, anjaha anggo domma ibalosi nasiam Ahu, Ahu pe patugahon-Ku ma bani nasiam, atap marhitei kuasa aha do Hubahen ai.

²⁵ Ia pandidion ni si Johannes, na hunja do ai? Hun nagori atas do atap humbanijolma?” Jadi martukar pingkiran ma sidea samah sidea, nini ma,

²⁶ “Anggo ihatahon hita: Hun nagori atas do, hatahonon-Ni ma hu banta, mase lang ihaporsayai nasiam ia? Anggo ihatahon hita, humbanijolma do, sihabiaranta do halak na mabuei in, ai nabi do si Johannes, ninuhur nijolma haganup.”

²⁷ Jadi nini sidea ma mambalosi Jesus, “Seng ibotoh hanami!” Anjaha la pe, nini ma dompak sidea, “Ahu pe, seng patugahon-Ku bani nasiam atap marhitei kuasa aha Hubahen in.”

Limbaga Pasal Dua Anak na So Mambalosi

²⁸ “Tapi sonaha do ninuhur nasiam? Adong ma dua anak ni sada halak. Laho ma ia hubani sikahanan, nini ma, ‘Laho ma ho, anakku, sadari on mangkorja hu pohon anggurta!’

²⁹ Balosni, ‘Dear tuan, tapi seng laho ia!’

³⁰ Dob ai laho ma bapa ai hubani na paduahon ai, anjaha ihatahon ma songon nongkan ai. Nini ma

mambalosi, 'Seng ra ahu!' Tapi manosal do ia use, gabe laho ma.

³¹ Ise do sidea na dua ai na mandalankon ai?" Jadi nini sidea ma mambalosi, "Sianggihian ai!" Gabe nini Jesus ma hubani sidea, "Na sintong do hatang-Kon bani nasiam, 'Lobeian ni sijalo sohei pakon boru jalang do nasiam masuk hubagas Harajaon ni Naibata.'

³² Ai na roh do si Johannes hubani nasiam bani dalan hapintoron, tapi seng porsaya nasiam bani, tapi anggo sijalo sohei ampa boru jalang porsaya do. Ididah nasiam do ai namin, tapi lanjar do seng isololi nasiam uhur nasiam laho mangkaporsayaisi."

Limbaga Pasal Sisewa Pohon Anggur na Jahat

(Mrk. 12:1-12; Luk. 20:9-19)

³³ "Bogei nasiam ma sada limbaga na legan. Adong ma sada tuan na bayak, na mamungkah sada pohon anggur. Ihondor ma ai, inggot, ihurak ma pangilangan ni anggur ibagas, anjaha ipauli ma sada manara. Ipasewahon ma pohon ai hubani piga-piga parjuma-juma, dob ai laho ma ia hu nagori na legan.

³⁴ Dob jumpah panorang mambuat buahni, isuruh ma juakjuakni hubani parjuma-juma ai laho manjalo buahni.

³⁵ Tapi itangkap parjuma-juma ai ma juakjuakni ai, adong na ibogbogi, adong na ibunuh anjaha adong na ipargijig bani batu.

³⁶ Iulaki tuan ai ma use marsuruh juakjuakni, buenan humbani na parlobei ai, tapi sonai do homa ibahen bani sidea.

³⁷ Dob ni isuruh ma anakni bani sidea, ai ninuhurni, tontu malang do uhur ni sidea bani anakkin!

³⁸ Dob ididah parjuma-juma ai anakni ai, nini sidea ma samah sidea, 'On do sitean pohon in! Eta, bunuh hita ma ia, ase banta siteanonni ai.'

³⁹ Jadi itangkap sidea ma ia, isarad hu darat ni pohon anggur ai, lanjar ibunuh.

⁴⁰ Anggo roh simada pohon anggur ai, aha ma sibahenonni bani parjuma-juma ai?"

⁴¹ Nini sidea ma hu Bani, "Tontu bunuhonni ma siparjahat ai, anjaha pohon anggurni ai ondoskononni hubani parjuma-juma na legan, na ra mamberehon buahni bani panorangni."

⁴² Jadi nini Jesus ma hubani sidea, "Ai seng onga ibasa nasiam ibagas Surat in, 'Batu na niambungkon ni tukang rumah, ai do gabe palas parsuhi, pinamasa ni Tuhan do in, anjaha halongangan do in bani matanta?'

⁴³ Halani ai Huhatahon ma bani nasiam, sibuaton ma humbani nasiam Harajaon ni Naibata, anjaha berehonon bani bangsa na legan, na ra mambere buahni.

⁴⁴ Anjaha barang ise, na madabuh bani batu on, mapuntar do, anjaha barang ise nidabuhanni, marosak do.”

⁴⁵ Mambogei limbaga ai mangahap ma malim pakon Parisei, ai sidea do na hinatahon-Ni ijai.

⁴⁶ Jadi ipindahi sidea ma dalan laho manangkap-Si, tapi mabiar do sidea bani halak na mabuei ai, ai nabi do la ninuhur ni sidea.

Limbaga Pasal Pesta Parunjukon ampa Tamuei na So Marpakeian Pesta

(Luk. 14:15-24)

22 ¹ Dob ai iulaki Jesus ma marsahap bani sidea marhasoman limbaga, nini ma,

² “Tarpausih do Harajaon nagori atas ai bani sada raja, na mambahen pesta parunjukon bani anakni.

³ Jadi isuruh ma juakjuakni mandilo na dob niontang ai hinan hubani pesta ai, tapi seng ra roh sidea.

⁴ Isuruh ma use juakjuak na legan, nini ma, ‘Patugah hanima ma bani na dob niontang in. Tonggor ma, domma sirsir pestangku, domma isayat lombu pakon pinahan na dob pinamombur, domma sirsir haganup! Ai pe roh ma nasiam bani pesta parunjukon in.’

⁵ Tapi hampung do uhur ni sidea pasal ontangan ai, gabe laho bei ma, deba hu jumani, na deba nari hu partiga-tigaonni.

⁶Na legan manangkap juakjuakni ai, iarsik ma anjaha ibunuh.

⁷Jadi manggila ma raja ai, gabe isuruh ma tenterani mamboiskon haganup pamunuh ai, anjaha manutung huta ni sidea.

⁸Dob ai nini ma hubani juakjuakni, 'Domma namin sirsir pesta parunjukon in, tapi seng talup na niontang ai.

⁹Halani ai, laho ma hanima bani ganup sirpang ni dalan, anjaha arahkon hanima ma hu pesta parunjukon on sagala halak na jumpah hanima.'

¹⁰Jadi laho ma juakjuak ai hubani sagala dalan, anjaha ipatumpu sidea ma haganup jolma na jumpah sidea, parjahat age na bujur, gabe gok ma parpestaan ai bani tamuei-tamuei.

¹¹Sanggah na masuk raja ai manorih tamuei ai, ididah ma sada halak na so marpakeian pesta,

¹²gabe nini ma hu bani, 'Na sonaha do parmasukmu hujon ambia, ai seng marpakeian pesta ho?' Jadi sip ma ia.

¹³Dob ai nini raja ai ma dompak juakjuakni, 'Sangkut hanima ma naheini pakon tanganni, anjaha usir hanima ma ia hu darat bani ianan na golap; ijai ma masa partangison ampa na patungosngoson.

¹⁴Ai buei do na nidilo, tapi otik do na tarpilih.'"

Pasal Balasting Sibereon bani Kesar

(Mrk. 12:13-17; Luk. 20:20-26)

¹⁵ Dob ai laho ma Parisei manriah samah sidea, atap sonaha do bahenon ni sidea mambahen tardapot la marhitei hata-Ni.

¹⁶ Jadi isuruh sidea ma susian ni sidea rap pakon juakjuak ni si Herodes marayak Jesus, laho manungkun hu Bani, “Ham Guru, ibotoh hanami, na pintor do Ham, anjaha sintong-sintong do dalan ni Naibata iajarhon Ham, seng mabiar Ham age bani ise, ai seng sididah bohi Ham!

¹⁷ Ai pe, patugah Ham ma bennami atap sonaha do pingkiran-Mu: Ai patut do bereon balasting bani kesar atap lang?”

¹⁸ Tapi ibotoh Jesus do jahat ni uhur ni sidea ai, gabe nini ma, “E nasiam sipakulah-kulah! Mase ma ilajou nasiam Ahu?

¹⁹ Patuduhkon nasiam ma hu Bangku duit balasting in!” Jadi ipatuduhkon sidea ma Bani sada dinar.

²⁰ Jadi nini ma dompak sidea, “Gambaran ampa surat ni ise do on?”

²¹ Nini sidea ma, “Gombaran ni kesar!” Jadi nini ma dompak sidea, “Ai pe, bere ma bani kesar, na humbani kesar, anjaha bere ma bani Naibata, na humbani Naibata!”

²² Mamboge ai longang ma uhur ni sidea, jadi laho ma sidea, itadingkon ma la.

Pasal Parpuhoon Simagira

(Mrk. 12:18-27; Luk. 20:27-40)

²³ Bani ari ai, roh ma hu Bani Sadukei, ai ma, na so marhatongonkon adong parpuhoon humbani na matei, jadi isungkun sidea ma la, nini,

²⁴ “Guru, nini si Musa, ‘Anggo adong matei sada halak, lang martinading, parayakon ni anggini ma parinangonni ai, laho pajongjong ginompar bani saninani ai.’

²⁵ Jadi adong ma bannami pitu halak na marsanina; mompo ma sikahanan ai, dob ai matei lang martinading, gabe bani tinodohkonni ai ma parinangon ni ai.

²⁶ Sonai do na paduahon ampa na patoluhon ronsi na papituhon.

²⁷ Parpudi humbani sidea haganup matei ma homa naboru ai.

²⁸ Jadi bani ari parpuhoon ai, ise do humbani sidea na pitu ai simada naboru ai, ai ganup do sidea marjilmahonsi?”

²⁹ Tapi nini Jesus ma mambalosi sidea, “Na kahou do nasiam, ai seng ibotoh nasiam Surat in age hagogohon ni Naibata!

³⁰ Ai bani ari parpuhoon ai seng dong siparunjuk atap na laho, tapi songon malekat do sidea i nagori atas.

³¹ Tapi pasal parpuhoon ni na dob matei, ai seng onga ibasa nasiam, na hinatahon ni Naibata bani nasiam,

³² ‘Ahu do Naibata ni si Abraham, Naibata ni si Isak anjaha Naibata ni si Jakob? Ia Naibata, sedo Naibata ni na matei, tapi Naibata ni na manggoluh do.’”

³³ Jadi longang ma halak na mabuei ai mambogei pangajarion-Ni ai.

Pasal Titah Sibanggalan

(Mrk. 12:28-34; Luk. 10:25-28)

³⁴ Tapi dob ibogei Parisei, na dob ipasip Jesus halak Sadukei, jadi martumpu ma sidea.

³⁵ Anjaha sada halak humbani sidea, ai ma sada sibotoh surat, mambahen sungkun-sungkun Bani laho manguji-Si.

³⁶ “Guru, na ija do titah sibanggalan humbani titah in?”

³⁷ Jadi nini Jesus ma, “Maningon haholonganmu do Tuhan Naibatamu humbani gok ni uhurmu, humbani gok ni tonduymu ampa humbani gok ni pingkiranmu.

³⁸ In ma titah sibanggalan anjaha na parlobei.

³⁹ Na paduahon on pe dos do pakon in: Maningon haholonganmu do hasomanmu doskon dirimu.

⁴⁰ Titah na dua on do manrampung sagala titah pakon hata ni nabi-nabi.”

**Kristus, ai ma Anak ni si Daud
anjaha Tuhan ni si Daud**

(Mrk. 12:35-37; Luk. 20:41-44)

⁴¹ Tapi sanggah na martumpu ai ope Parisei ai, isungkun Jesus ma sidea, nini ma,

⁴² “Sonaha do pingkiran nasiam pasal Kristus in? Anak ni ise do la?” Nini sidea ma hu Bani, “Anak ni si Daud!”

⁴³ Nini ma dompak sidea, “Tapi sonaha ma ai, igoran si Daud do la Tuhan, niajaran ni Tonduy in, ai ihatahon do,

⁴⁴ ‘Nini Tuhan in do dompak Tuhanku: Hundul ma Ho hu siamun-Ku, paima Hubahen munsuhmu sidogei-dogean ni nahei-Mu!’

⁴⁵ Anggo igoran si Daud do la Tuhan, sonaha ma la anakni?

⁴⁶ Jadi ise pe lang na boi mambalosi-Si, anjaha humbani panorang ai nari sahalak pe lang be na pag manungkun-Si.”

**Lumba-lumba Pasal Parlahou ni
Parisei pakon Sibotoh Surat**

23 ¹ Dob ai iparsahapkon Jesus ma halak na mabuei ai ampa susian-Ni,

² nini ma, “Kursi ni si Musa do na hinundulan ni sibotoh surat pakon Parisei.

³ Halani ai, horjahon anjaha irikkon nasiam ma sagala niajarhon ni sidea bani nasiam, tapi ulang ma usihi nasiam pambahenan ni sidea, ai mangkatahon do hansa sidea, seng dong anggo ihorjahon.

⁴ Irahuti sidea do siboanon na borat, anjaha iampeihon ma ai bani abara ni jolma, tapi sidea sandiri marhitei jari-jari pe seng ra manggiut ai.

⁵ Sagala pambahenan ni sidea ihorjahon sidea do, ase ididah jolma. Halani ai ipabolag sidea do tali tonggo ni sidea anjaha ipaganjang rambu ni pakeianni.

⁶ Marosuh do sidea, hundul bani ianan na sangap bani parpestaan, sonai homa bani hundulan lobei-lobei bani parguruan,

⁷ ambahni ai, bani tabi ni halak i tiga, anjaha ase igoran halak sidea rabbi (*guru*).

⁸ Tapi anggo nasiam, ulang ma ra nasiam igoran halak rabbi (*guru*), ai sada do Guru bani nasiam, anjaha na marsanina do nasiam ganup.

⁹ Ulang ma parbapa nasiam atap ise i tanoh on, ai sada do Bapa nasiam, ai ma na i nagori atas ai.

¹⁰ Ulang ma homa ra nasiam goranon pambobai, ai sada do Pambobai nasiam, ai ma Kristus in.

¹¹ Tapi barang ise sisangapan i tongkah-tongkah nasiam, ia ma sipangidangi bani nasiam.

¹² Ai barang ise na pagijang dirini, sipatoruhon do, tapi barang ise na patoruh dirini, ai do sipagijangon.”

**Ipabursik-bursik Jesus Halak
Parisei pakon Sibotoh Surat**

(Luk. 11:37-52)

¹³ “Bursik ma nasiam sibotoh surat ampa Parisei, nasiam sipakulah-kulah, ai itutup nasiam do Harajaon nagori atas in i lobei ni jolma. Nasiam sandiri seng masuk, anjaha halak na sihol masuk ilanglangi nasiam do masuk.

¹⁴ Bursik ma nasiam sibotoh surat ampa Parisei, nasiam sipakulah-kulah, ai ibondut nasiam do rumah ni naboru na mabalu marhitei tonggo sipakulah-kulah na ganjang-ganjang. Halani ai borat do uhum na mangonai bani nasiam.

¹⁵ Bursik ma nasiam sibotoh surat pakon Parisei, nasiam sipakulah-kulah, na mandalani laut ampa tanoh, laho manarik pala sahalak bani ugama nasiam, anjaha dob saud ia masuk, gabe anak ni naraka do ia ibahen nasiam, lompit dua jahatan humbani nasiam.

¹⁶ Bursik ma nasiam pambobai na mapitung, na mangkatahon, ‘Barang ise na marbija hu rumah panumbahan seng mahua ai, tapi barang ise na marbija hu omas na i rumah panumbahan, ai do na hona sibijaon.’

¹⁷ E nasiam na oto anjaha na mapitung! Na ija do sisurungan, omas ai do atap rumah panumbahan na papansingkon omas ai?

¹⁸ Ambahni ai ihatahon nasiam do, 'Na marbija hu anjapanjap seng mahua ai, tapi barang ise na marbija hu galangan na i atasni ai, ai do na hona sibijaon.'

¹⁹ E nasiam na mapitung! Na ija do sisurungan, galangan ai do atap anjapanjap na papansingkon galangan ai?

²⁰ Barang ise na marbija hu anjapanjap marbija do ai hujai ampa hu haganup na i atasni ai.

²¹ Na marbija hu rumah panumbahan, marbija do ai hujai ampa hubani na mangiankon ai.

²² Na marbija hu nagori atas, marbija do ai hu paratas ni Naibata, ampa hubani na mangkunduli ai.

²³ Bursik ma nasiam sibotoh surat ampa Parisei, nasiam sipakulah-kulah! Igalat nasiam do parsapuluhan ni hosaya, humangei ampa huning, tapi tading do ibahen nasiam titah siharganan, ai ma hapintoron, idop ni uhur ampa habujuron. Sihorjahononkon do na sada on, tapi ulang tading na legan.

²⁴ Nasiam pambobai na mapitung! Itapis nasiam do rongit hu darat, tapi anggo unta ibondut nasiam do.

²⁵ Bursik ma nasiam sibotoh surat pakon Parisei, nasiam sipakulah-kulah! Ai ipaborsih nasiam do darat ni mangkuk ampa pinggan, hape ibagas gok do ai marisi panrampokon ampa uhur haut.

²⁶ E Parisei na mapitung! Parbagas ni panginuman in ma lobei borsih, ase borsih age pardaratni ai.

²⁷ Bursik ma nasiam sibotoh surat pakon Parisei, nasiam sipakulah-kulah! Ai usih do nasiam bani tanoman na hinapur, na dear idahon hun darat, tapi ibagas gok holiholi ni na matei ampa sagala na mabutak.

²⁸ Sonai do homa nasiam, pintor idahon ni halak hun darat, tapi gok do sipakulah-kulah ampa hajahaton ibagas.

²⁹ Bursik ma nasiam sibotoh surat pakon Parisei, nasiam sipakulah-kulah! Ai ipauli nasiam do tanoman ni nabi-nabi, anjaha ipajagar nasiam do tugu ni halak parpintor.

³⁰ Nini nasiam, 'Ambit manggoluh hanami bani panorang ni ompung-ompungnami, seng anjai dihut hanami parsalah bani daroh ni nabi-nabi ai!'

³¹ Ase isaksihon nasiam do hape, anak ni sibunuh nabi-nabi ai do nasiam!

³² Ai pe, goki nasiam ma suhat-suhata hajahaton ni ompung nasiam!

³³ Nasiam ulog anjaha anak ni ulog darih! Sonaha ma panlembangi nasiam bani uhuman ni naraka?

³⁴ Halani ai, tonggor ma, Ahu do marsuruh bani nasiam nabi-nabi, halak na maruhur ampa sibotoh surat, deba humbani sidea bunuhon anjaha parsilangknon nasiam do, anjaha deba nari humbani sidea lonsingan nasiam do i rumah parguruan nasiam anjaha parburuon nasiam hun huta na sada hu huta na sada nari,

³⁵ase mangonai bani nasiam ma sagala daroh ni halak parpintor, na madurus i tanoh on, olat ni daroh ni si Abel na pintor ai ronsi daroh ni si Sakaria, anak ni si Barakya, na binunuh nasiam i holangkolang ni rumah panumbahan ampa anjapanjap ai.

³⁶Sintong do na Huhatahon on bani nasiam: Haganupan in mangonai do bani bangsa on!”

Tangis-tangis bani Jerusalem

(Luk. 13:34-35)

³⁷“Jerusalem, Jerusalem, sibunuh nabi-nabi, anjaha sipargijig na sinuruh marayak ham! Domma piga hali sihol patumpuon-Ku anakmu, songon indung ni dayok patumpuhon anakni hu toruh ni habongni, tapi seng ra ham.

³⁸Tonggor ma, maningon tarulang ma rumah nasiam.

³⁹Ai Huhatahon ma bani nasiam, seng idahon nasiam be Ahu humbani sonari nari, paima ihatahon nasiam, ‘Pinasu-pasu ma na roh ibagas Goran ni Tuhan!’”

PARSAHAPAN PASAL PANORANG PARPUDI

(bd. 24, 25; Mrk. 13; Luk. 21:5-36)

Parseda ni Rumah Panumbahan

(Mrk. 13:1, 2; Luk. 21:5, 6)

24¹ Dob ai laho ma Jesus luar hun rumah panumbahan ai. Jadi iparayak susian-Ni ai ma la, anjaha ipatuduhkon sidea ma Bani rumah-rumah na masuk hu rumah panumbahan ai.

² Tapi nini ma hubani sidea, “Ididah hanima do ganupan in? Sintong do na Huhatahon on bennima: Seng paturuton ijai dua batu patindih na so rosakkononkon.”

**Mungkah ni Pangarouon,
Parlobei ni Panorang Parpudi**

(bd. 10:19-22; Mrk. 13:3-13; Luk. 21:7-19)

³ Sanggah hundul la i Dolog Jetun ai, roh ma pulig susian ai hu Bani, nini ma, “Patugah Ham ma bennami, antigan ma masa ai, anjaha aha ma tanda ni paroh-Mu ampa ajal ni dunia on?”

⁴ Jadi nini Jesus ma mambalosi sidea, “Jaga ma, ulang ma ipakahou halak hanima!

⁵ Ai buei do halak na roh marhitei Goran-Ku, na mangkatahon, ‘Ahu do Kristus’ jadi buei ma na kahou bahenon ni sidea.

⁶ Tapi bogeionnima ma pasal porang ampa barita ni porang. Jaga, ulang tarsonggot hanima, ai maningon masa do ai, tapi seng ope ai ujungni.

⁷ Ai marsilawanan do bangsa dompak bangsa, anjaha harajaon dompak harajaon, masa ma lohei ampa lalou bani buei nagori.

⁸ Tapi haganupan ai mungkah ni pangarouon ai ope.

⁹ Ondoskonon ni halak do hanima, ase iarsik anjaha ibunuh; anjaha domdoman ni sagala bangsa do hanima halani Goran-Ku.

¹⁰ Jadi buei ma halak na marbalik, gabe marsitahitahian anjaha marsidomdoman ma.

¹¹ Buei ma marrohan nabi sipakulah-kulah, anjaha buei do na kahou ibahen.

¹² Jadi halani martambah-tambah hajahaton, lambin borgohni ma holong ni uhur ni jolma buenan.

¹³ Tapi barang ise na tahan das hu ujung, ai do na maluah.

¹⁴ Anjaha ambilankononkon do Ambilan Na Madear on pasal Harajaon in i sab dunia on, laho manaksihon bani haganup bangsa, dob ai pe ase roh ujungni.”

Parroh ni Ari Parpudi

(Mrk. 13:14-23; Luk. 21:20-24)

¹⁵ “Halani ai, anggo ididah hanima ma bani ianan na mapansing in hasamboron na majangin ai, na

dob nilumbahon ni Nabi Daniel (iparuhurhon na mambasa on ma ai),

¹⁶ jadi maporus ma halak na i Judea hu dolog.

¹⁷ Halak na i atas ni rumahni, ulang pala be tuad mangalop ugas-ugasni hun rumah ai.

¹⁸ Na i juma ulang be mulak hu rumah mangalop pakeianni.

¹⁹ Tapi bursik ma na boratan rumah ampa na painumkon dakdanak bani panorang ai.

²⁰ Tapi martonggo ma hanima ase ulang ma sanggah musim borgoh atap ari Sabat hanima na maporus ai.

²¹ Ai bangga tumang do haparngiton ai, humbani mungkah ni dunia on ronsi sonari seng onga masa ope na sonai ai, anjaha seng masa be na sonai.

²² Anjaha, ambit seng ipapondok ari ai, sahalak pe seng adong na maluah. Tapi halani na tarpilih in do, ase ipapondok ari ai.

²³ Anjaha anggo adong na mangkatahon bennima, 'Tonggor ma, ijon do Kristus in' atap, 'Ijai do la,' ulang ma porsaya hanima.

²⁴ Ai na roh do kristus siparladung ampa nabi siparladung, mambahen tanda na bangga ampa halongangan, laho pakahouhon na dob tarpilih in, ambit na tarbahen.

²⁵ Tonggor ma, domma Hupalumba hinan hanima.

²⁶ Halani ai, anggo adong na mangkatahon bennima, 'I halimisan do la,' ulang ma laho hanima

hujai. Atap ihatahon sidea, 'I kamar do la,' ulang ma porsaya hanima!

²⁷ Ai songon hilap na mardejeb i hapoltakan anjaha marsinalsal das hu hasundutan, sonai do parroh ni Anak ni Jolma in.

²⁸ Ai ija adong bangkei, hujai do roh marurup haluhuy."

Parroh ni Anak ni Jolma in

(Mrk. 13:24-27; Luk. 21:25-28)

²⁹ "Tapi sompong, salpuhonsi haparngiton na bani panorang ai, manggolapi ma mata ni ari, seng be ibere bulan sinalsalni, mardabuhan ma bintang-bintang hun langit, anjaha dugur ma hagogohon ni parlangitan.

³⁰ Jadi taridah ma i langit tanda ni Anak ni Jolma in, gabe mandoruhi ma ganup bangsa na i tanoh on, ai idahon ni sidea ma Anak ni Jolma in roh i atas ni hambun ni langit, marhasoman hagogohon ampa hasangapon banggal.

³¹ Anjaha suruhon-Ni ma malekat-Ni martarompit na gogoh parsorani, jadi patumpuon ni sidea ma halak na dob pinilih ai humbani desa na ualuh in, hun ujung ni langit na sada das hubani na sada nari.

³² Tapi humbani hayu ara an ma hanima marguru: Anggo martunasi ma anjaha marbulungi ibotoh hanima do, paboa dohor ma partahunan milas.

³³ Sonai ma homa, anggo ididah hanima ma masa ai, botoh hanima ma, paboa dohor ma ai.

³⁴ Sintong do na Huhatahon on bannima: Seng anjai salpu na sasundut on paima masa haganupan ai.

³⁵ Ai na laho salpu do langit pakon tanoh on, tapi anggo hatang-Ku seng anjai salpu.

³⁶ Tapi anggo pasal arini ampa panorangni, seng dong na mambotohsi, age malekat na i nagori atas, age Anak in, pitah Bapa in do.”

Lumba-lumba ase Marjaga-jaga

(Mrk. 13:33-37; Luk. 12:35-40; 17:26-37)

³⁷ Ai songon sanggah panorang ni si Noak, sonai do parroh ni Anak ni Jolma in.

³⁸ Ai sanggah lape roh bah na sumbang ai, marmangan-mangan anjaha marminum-minum do sidea, marunjuk anjaha palahohon, paima jumpah ari parmasuk ni si Noak hubagas parau ai,

³⁹ anjaha lanjar do seng mambotoh sidea pasal ai, ronsi na roh bah na sumbang ai mangogapkon sidea haganup. Usih hujai do parroh ni Anak ni Jolma in.

⁴⁰ Bani panorang ai adong ma dua halak i juma, na sada ijalo, na sada nari itadingkon.

⁴¹ Dua halak rap manduda, na sada ijalo, na sada nari itadingkon.

⁴² Ai pe, jaga ma hanima, ai seng ibotoh hanima ari parroh ni Tuhannima!

⁴³ Tapi ingat hanima ma on: Ambit ibotoh tuan rumah pukul piga borngin roh panangko, tontu marjaga-jaga do ia, anjaha lang palopasonni rumahni hona bongkar.

⁴⁴ Halani ai tagam ma hanima, ai na roh ma Anak ni Jolma in bani panorang na so niagaknima.”

Limbaga Pasal Juakjuak na Madear ampa na Jahat

(Luk. 12:41-48)

⁴⁵ “Ai ise do juakjuak na bujur anjaha na maruhur, na pinabangkit ni tuanni, laho mambere jabolonni mangan bani panorangni?

⁴⁶ Martuah ma juakjuak, na mangkorjahon sonai jumpah tuanni bani parrohni ai.

⁴⁷ Sintong do na Huhatahon on bennima, pabangkitonni ma ia manramotkon haganup na dong bani.

⁴⁸ Tapi anggo juakjuak na jahat do ia, na marsahap ibagas uhurni: Dokah ope ase roh tuankai,

⁴⁹ gabe ipungkah ma mangarsik hasomanni juakjuak anjaha mangan minum rap pakon parmabuk,

⁵⁰ jadi rohkonsi tuanni bani panorang na so niagakni, anjaha bani panorang na so binotohni,

⁵¹ gabe agouhononni ma ia, anjaha bereonni ma bani parbagianan dos pakon sipakulah-kulah. Ijai ma masa partangison ampa na patungosngoson.”

Limbaga Pasal Anak Boru na Sapuluh in

25 ¹ “Anjaha tarpausih do Harajaon nagori atas ai hubani sapuluh anak boru, na bingkat marsiboan suluhni, laho mangalo-alo siparunjuk.

² Lima humbani sidea na oto do, tapi na lima nari maruhur do.

³ Ia na oto ai iboan do namin suluhni, tapi seng mamboan minak sidea.

⁴ Tapi anggo na maruhur ai, iboan do minak bani iananni rap pakon suluh ni sidea.

⁵ Halani dokah ase roh siparunjuk ai, tartunduh ma sidea haganup lanjar tarpodom.

⁶ Tapi tongah borngin, adong ma na dilo-dilo, ‘Tonggor ma, siparunjuk in! Roh ma mangalo-alosi!’

⁷ Jadi puho ma ganup anak boru ai, anjaha ipasirsir bei ma suluhni.

⁸ Nini naboru na oto ai ma bani na maruhur ai, ‘Bere nasiam ma deba minak nasiam in, ai na laho miloh ma suluhnami!’

⁹ Tapi nini na maruhur ai ma mambalosisi, ‘Lang! Seng sungkup holi bannami ampa bani nasiam. Dearan ma boli nasiam bani nasiam humbani panjual minak.’

¹⁰ Tapi sanggah na laho ai ope sidea mamboli minak, roh ma siparunjuk ai, jadi masuk ma na dob sirsir ai hinan rap pakonsi hu pesta parunjukan ai, anjaha itutup ma labah ai.

¹¹ Salpu ai roh ma naboru na legan ai, nini ma, ‘Ham tuan, ham tuan, buha ham ma labah on bennami!’

¹² Tapi nini ma mambalosi, ‘Sintong do hatangkkan bennima, seng hutandai hanima!’

¹³ Halani ai jaga ma hanima, ai seng ibotoh hanima arini pakon panorangni.”

Limbaga Pasal Talenta na Niondoskon

(Luk. 19:11-29)

¹⁴ “Usih do homa ai bani sada halak, na laho mardalani hu nagori na legan, gabe idilo ma juakjuakni, laho mangondoskon artani bani sidea.

¹⁵ Ibere ma bani na sada lima talenta, bani na sada nari dua, anjaha bani na legan use sada, ganup domu hubani gogohni, dob ai misir ma ia.

¹⁶ Mintor do laho sijalo na lima talenta ai, mantiga-tigahon ai, gabe dapotsi ma lima talenta.

¹⁷ Sonai homa sijalo na dua talenta ai, dapotsi do dua talenta.

¹⁸ Tapi anggo na manjalo na sada talenta ai ihurak ma tanoh, laho mamonopkon duit ni tuanni ai.

¹⁹ Dob dokah mulak ma tuan ni juakjuak ai, anjaha ibahen ma parhiraan pakon sidea.

²⁰ Jadi roh ma na manjalo silima talenta ai, anjaha ibere ma na lima talenta nari ai, nini ma, ‘Tuannami, lima talenta do ipadas ham bangku, tonggor ma, lima talenta nari na husari.’

²¹ Nini tuanni ai ma hu bani, 'Dear ma ai, ale juakjuak sidear uhur anjaha hatengeran. Hatengeran ni uhur do ho bani na otik, ondoskononku ma buei hubam. Masuk ma ho hubagas pesta malas ni uhur ni tuanmu!'

²² Dob ai roh ma na manjalo sidua talenta ai, nini ma, 'Tuannami, dua talenta do ipadas ham bangku, tonggor ma, dua talenta nari na husari!'

²³ Nini tuanni ai ma hu bani, 'Dear ma ai, ale juakjuak sidear uhur anjaha hatengeran. Hatengeran ni uhur do ho bani na otik, ondoskononkon ma buei hubam. Masuk ma ho hubagas pesta malas ni uhur ni tuanmu!'

²⁴ Roh ma homa na manjalo sisada talenta ai, nini ma, 'Tuannami, hubotoh paruhur na koras do ham, na manabi na so sinuanmu anjaha na patumpuhon na so tinidahkonmu.

²⁵ Jadi mabiar do ahu, gabe laho ma ahu mamonopkon talentamu ai hubagas tanoh. Nam ma artamu on!'

²⁶ Tapi nini tuanni ai ma mambalosisi, 'E ho juakjuak na jahat anjaha parrayoh! Ibotoh ho do hape, ahu manabi na so sinuanku, anjaha patumpuhon na so tinidahkonku.

²⁷ Anggo sonai, ai lang patut ma namin pasimpankononmu duitkon hubani halak sipabungahon duit, ase hujalo in rap pakon bungani bani parrohku?

²⁸ Ai pe, buat nasiam ma talenta in, anjaha bere nasiam ma hubani simada na sapuluh ai.

²⁹ Ai bereon do bani ganup na marnadong ase marlobih-lobih ia, tapi sibuaton do humbani na so marnadong na adong bani hinan.

³⁰ Anjaha usir nasiam ma juakjuak na so margagan in hubani na golap marimpot-impot! Ijai ma masa partangison ampa na patungosngoson.”

Ari Paruhuman Magira

³¹ Tapi anggo roh ma Anak ni Jolma in ibagas hasangapon-Ni rap pakon haganup malekat-Ni, hundulan-Ni ma ijai paratas hasangapon-Ni ai.

³² Dob ai martumpu ma hu lobei-Ni haganup bangsa, jadi sirangon-Ni ma sidea songon pambahen ni parmahan na manirang biribiri boru-boru humbani biribiri tunggal.

³³ Jadi pajongjongon-Ni ma boru-boru ai hu siamun-Ni, tapi bajar ai hu sambilou-Ni do.

³⁴ Dob ai hatahonon ni Raja ai ma hubani na i siamun-Ni ai, “Roh ma nasiam na pinasu-pasu ni Bapa, jalo nasiam ma harajaon in, na dob pinasirsir bani nasiam humbani mula ni tanoh on!

³⁵ Ai na loheian do Ahu, ibere nasiam do Ahu mangan, na horahan do Ahu, ibere nasiam do Ahu minum; na mampar-ampar do Ahu, iarahkon nasiam do Ahu;

³⁶ seng marhiou Ahu, gabe iparhioui nasiam do Ahu; na boritan do Ahu, gabe itorih nasiam do Ahu, anjaha na tartutup do Ahu, gabe roh do nasiam marayak Ahu.”

³⁷ Dob ai hatahonon ni parpintor ai ma mambalosisi, “Tuhan, nantigan ididah hanami Ham loheian, gabe ibere hanami Ham mangan, barang horahan, gabe ibere hanami Ham minum?

³⁸ Nantigan ididah hanami Ham mampar-ampar, gabe ijalo hanami Ham, barang seng marhiou, gabe iparhioui hanami Ham?

³⁹ Nantigan ididah hanami Ham boritan barang tartutup, gabe iparayak hanami Ham?”

⁴⁰ Dob ai balosan ni Raja ai ma sidea, “Sintong do na Huhatahon on bani nasiam: Haganup na binahen nasiam bani sada halak angging-Ku na etek-etek on, na hu Bangku do in ibahen nasiam.”

⁴¹ Dob ai hatahonon-Ni ma bani na i sambilou-Ni ai, “Misir ma nasiam hun Bangku, nasiam na binuraan, hubani apuy sisadokah ni dokahni, na pinasirsir bani sibolis ampa bani malekatni.

⁴² Ai na loheian do Ahu, seng ibere nasiam mangan, na horahan do Ahu, seng ibere nasiam minum.

⁴³ Na mampar-ampar do Ahu, seng iarahkon nasiam Ahu, na so marhiou do Ahu, seng iparhioui nasiam; na boritan do Ahu anjaha tartutup, seng itorih nasiam.”

⁴⁴ Sidea pe balosan ni sidea ma la, nini ma, “Tuhan, nantigan ididah hanami Ham loheian, horahan, mampar-ampar, seng marhiou, boritan anjaha tartutup, hape lang ipatorsa-torsa hanami Ham?”

⁴⁵ Dob ai hatahonon-Ni ma mambalosi sidea, “Sintong do na Huhatahon on bani nasiam, na so binahen nasiam age aha bani sada halak na etek-etek on, hu Bangku do na so binahen nasiam ijai.”

⁴⁶ Jadi misir ma sidea hubani na maparngit sadokah ni dokahni, tapi halak parpintor ai hu hagoluhan sadokah ni dokahni.

ILUMBAHON TUHAN JESUS SITARONON-NI PAOMPATHALIHON

(Mrk. 14:1-2; Luk. 22:1-2)

26 ¹ Ase dob marujung ihatahon Jesus haganup hata ondi, nini ma dompak susian-Ni,

² “Ibotoh hanima do, haduan ma pesta Paskah, ijai ma ondskononkon Anak ni Jolma in, ase iparsilangkon.”

Manriah Sintua ni Malim ampa Pangintuai Sihol Mamunuh Jesus

³ Martumpu ma ijia sintua ni malim ampa pangintuai ni bangsa ai hu rumah ni Sintua ni Malim Kayapas,

⁴ manriah ma sidea atap akal ja do bahenon, laho manangkap Jesus ampa mamunuh-Si.

⁵ Jadi ihatahon sidea ma, “Ulang ma bani pesta ai, ase ulang geor halak na mabuei in.”

Pamminakion bani Jesus i Betania

(Mrk. 14:3-9; Luk. 7:36-50; Joh. 12:1-11)

⁶ Sanggah i huta Betania Jesus, i rumah ni si Simon, na gadamon ai,

⁷ roh ma hu Bani sada naboru mamboan botol, na marisi minak na maharga tumang, lanjar iuseihon ma ai bani ulu-Ni, sanggah mangan la.

⁸ Mangidah ai susian ai, sogam ma uhur ni sidea, nini ma, “Rugi ni in!”

⁹ Boi do harga jualon in, anjaha bolini ai ibere bani na masombuh.

¹⁰ Tapi ibotoh Jesus do ai, gabe nini ma dompak sidea, “Mase ma isunsahi hanima puang-puang on? Pambahenan na madear do na binahenni in Bangku.

¹¹ Ai tongtong do adong na masombuh rap pakon hanima, tapi anggo Ahu, seng tong-tong rap pakon hanima.

¹² Ai iuseihon pe minak ai bani angkulang-Ku, ibahen do ai na songon pananom-Hu.

¹³ Sintong do na Huhatahon on bennima, ija pe iambilankon Ambilan Na Madear on i sab dunia

on, baritahononkon do age na binahenni on, gabe pardingatan bani.”

Partahi-tahion ni si Judas

(Mrk. 14:10-11; Luk. 22:3-6)

¹⁴ Dob ai laho ma sada halak humbani na sapuluh dua ai, ai ma na margoran si Judas Iskariot, marayak sintua ni malim,

¹⁵ nini ma, “Aha sihol bereon nasiam bangku, ase hupadas la bani nasiam?” Jadi igalar sidea ma bani tolu puluh duit pirak.

¹⁶ Anjaha hunjia nari ipindahi uhurni ma panorang na dearhonsi, laho mantahihon Jesus.

Ipasirsir Panganan Paskah

(Mrk. 14:12-16; Luk. 22:7-13)

¹⁷ Bani ari parlobei ni mangankon ruti na so niigaran, roh ma susian ai bani Jesus, nini ma, “Ija do ipangindo uhur-Mu pasirsironnami Bamu panganon Paskah ai?”

¹⁸ Jadi nini ma, “Laho ma hanima hu huta in, marayak si anu, anjaha hatahon ma hubani hata ni Guru in, ‘Dohor ma panorang-Ku, ibagas rumahmu do Ahu sihol mangan Paskah rap pakon susian-Ku.’”

¹⁹ Jadi ibahen susian ai ma songon na hinatahon ni Jesus bani sidea, iugaskon sidea ma panganon Paskah ai.

Ipatalar Jesus Partahi-tahion ni si Judas

(Mrk. 14:17-21; Luk. 22:21-23; Joh. 13:21-30)

²⁰ Ase dob bod ari hundul ma la mangan rap pakon susian-Ni na sapuluh dua ai.

²¹ Sanggah na mangan ai sidea, nini ma, “Sintong do na Huhatahon bennima: Sada hun bennima sihol mantahihon Ahu!”

²² Jadi pusok tumang ma uhur ni sidea, gabe ipangkatahon sidea bei ma hu Bani, “Sedo ahu ai?”

²³ Jadi nini ma mambalosi, “Na manurdukkon tanganni rap pakon Ahu hubagas pinggan, ai ma na mantahihon Ahu.

²⁴ Tong do namin ujung ni Anak ni Jolma in, songon na dob tarsurat hinan, tapi bursik ma halak na mantahihon Anak ni Jolma in. Rahanan ma namin, ambit ulang tubuh jolma na sonai ai.”

²⁵ Dob ai si Judas pe, na mantahihonsi ai, marsahap ma, “Ai ahu do ai, Guru?” Jadi nini Jesus ma hu bani, “Ho do ai, songon na hinatahonmai.”

Horja Banggal Na Pansing

(Mrk. 14:22-25; Luk. 22:14-20; 1 Kor. 11:23-25)

²⁶ Jadi sanggah na mangan ai sidea, ibuat Jesus ma ruti, ipasu-pasu ma, iponggoli anjaha ibere ma hubani susian-Ni, lanjar ihatahon, “Jalo hanima ma, anjaha pangan ma, daging-Ku do on!”

²⁷ Dob ai ibuat ma panginuman ai, ihatahon ma tarima kasih, ibere ma ai bani sidea, lanjar ihatahon, “Haganup ma hanima manginum hunjin!

²⁸ Ai daroh-Ku do on, daroh parpadanan, na niuseihon mangkopkop buei jolma, bahen hasasapan ni dousa.

²⁹ Tapi Huhatahon ma bennima, seng be inumon-Ku humbani sonari nari humbani buah ni hayu anggur on das hubani panorang ai, ijai ma inumon-Ku na baru rap pakon hanima ibagas Harajaon ni Bapang-Ku.”

Ilumbahon Jesus Pasal Pamorsouon ni si Petrus

(Mrk. 14:26-31; Luk. 22:31-34; Joh. 13:36-38)

³⁰ Jadi dob idodingkon sidea doding puji-pujian ai, luar ma sidea laho hu Dolog Jetun.

³¹ Jadi nini Jesus ma dompak sidea, “Haganup do hanima sangsi Bangku saborngin on, ai tarsurat do, ‘Lonsingan-Ku ma parmahan in, gabe marserak ma biribiri na sahumanan in.’

³² Tapi dob puho Ahu humbani na matei, lobeian-Ku ma hanima hu tanoh Galilea.”

³³ Jadi nini si Petrus ma mambalosi-Si, “Age pe ganup sidea sangsi Bamu, anggo ahu seng anjai sangsi.”

³⁴ Nini Jesus ma hu bani, “Sintong do hatang-Kon bam: Ibagas borngin on, paima martahuak dayok, tolu hali do Ahu parnalangonmu.”

³⁵ Nini si Petrus ma hu Bani, “Age pe ipamatei ahu rap pakon Ham, seng parnalangonku Ham.” Sonai do homa hata ni haganup susian ai.

Jesus i Getsemane

(Mrk. 14:32-42; Luk. 22:39-46)

³⁶ Dob ai das ma Jesus rap pakon susian ai hu sada pohon na margoran Getsemane. Nini ma hubani susian-Ni, “Hundul ma hanima lobei ijon, sadokah laho Ahu martonggo ijai.”

³⁷ Jadi iarahkon ma rap pakon-Si si Petrus ampa anak ni si Sebedeus na dua ai. Sogop ma hu Bani pusok ni uhur ampa habulinsahon,

³⁸ gabe nini ma hubani sidea, “Pusok tumang do uhur-Hu, hira na matei do. Ijon ma hanima, anjaha puho ma hanima rap pakon Ahu.”

³⁹ Laho ma la otik dompak lobei, manrogop ma la martonggo, nini ma, “Ham Bapa, anggo boi, salpuhon Ham ma panginuman on hum Bangku! Tapi seng marguru hubani rosuh-Ku, tapi marguru bani rosuh-Mu do.”

⁴⁰ Dob ai mulak ma la hubani susian-Ni ai, tarpodom do sidea jumpah-Si, gabe nini ma dompak si Petrus, “Seng tarbahen hanima hape puho rap pakon Ahu pala sajam?

⁴¹ Jaga ma anjaha puho ma, ase ulang masuk hanima hu parlajouan. Hinsah do namin tonduy, tapi galek do anggo daging.”

⁴² Dob ai laho ma la paduahalihon martonggo, nini ma, “Ham Bapa, anggo seng boi salpu panginuman on, anggo na maningon inumon-Ku do, sai saud ma harosuh ni uhur-Mu.”

⁴³ Mulak ma la use, gabe jumpah-Si ma sidea tarpodom, ai borat do salibon ni sidea.

⁴⁴ Jadi itadingkon ma sidea, iulakkon ma martonggo patolu halihon, ihatahon ma hata nongkan ai.

⁴⁵ Dob ai laho ma la manjumpahkon susian-Ni ai, nini ma dompak sidea, “Nunutonnima ope modom ampa marsaran? Tonggor ma, domma dohor panorangni, ondskononkon ma Anak ni Jolma in hu tangan ni pardousa.

⁴⁶ Jongjong ma hanima, laho ma hita! Tonggor ma, domma dohor na sihol mantahihon Ahu.”

Tartangkap Tuhan Yesus

(Mrk. 14:43-52; Luk. 22:47-53; Joh. 18:1-2)

⁴⁷ Sanggah na mangkatahon ai ope la, tonggor ma, roh ma si Judas, sada humbani na sapuluh dua ai, rap pakon buei halak na marpodang anjaha manjolom bogbog-bogbog, sinuruh ni sintua ni malim ampa pangintuai ni bangsa ai.

⁴⁸ Ia sipartahi-tahi ai domma ibere hinan tanda bani sidea, nini, “Ia in na husummah, ai ma la, tangkap nasiam ma!”

⁴⁹ Jadi mintor idohori ma Yesus, nini ma, “Tabi ma Bamu, Guru!” Lanjar isummah ma la.

⁵⁰ Tapi nini Jesus ma hu Bani, “Mangaha ho hujon, ambia?” Dob ai marrohan ma sidea, ilaluhon sidea ma tanganni bani Jesus laho manangkap-Si.

⁵¹ Anjaha tonggor ma, sada halak humbani na mangirikkon Jesus palaluhon tanganni, isintak ma podangni, lanjar itampulhon ma ai bani sada halak juakjuak ni sintua ni malim, gabe mistak ma pinggolni.

⁵² Jadi nini Jesus ma hu bani, “Sarungkon ma podangmin! Ai sagala na manampulhon podang, magou do bahenon ni podang.

⁵³ Ai na so tarbahen Ahu do, ninuhurmu, mangindo humbani Bapa, ase ipasirsir Bangku sonari lobih humbani sapuluh dua loksa malekat?

⁵⁴ Tapi sonaha ma saud na hinatahon ni surat in, na mangkatahon, paboa na maningon masa do sonon?”

⁵⁵ Bani panorang ai ma ihatahon Jesus bani halak na mabuei ai, “Songon na laho manangkap panrampok do nasiam roh manjumpahkon Ahu, marpodang anjaha manjолоm bogbog-bogbog. Ari-ari do namin hundul Ahu i rumah panumbahan mangajari, tapi seng itangkap nasiam Ahu.

⁵⁶ Tapi masa do ganup on, ase jumpah na hinatahon ni nabi-nabi.” Jadi haganup ma susian-Ni ai manadingkon-Si, laho maporus.

Jesus i Lobei ni Pangadilan

(Mrk. 14:53-65; Luk. 22:63-71; Joh. 18:12-27)

⁵⁷ Ase dob itangkap sidea Jesus, iboan sidea ma la hubani sintua ni Malim Kayapas, ai domma martumpu ijai sibotoh surat ampa pangintuai-pangintuai.

⁵⁸ Tapi iirikkon si Petrus do la mandaoh-daoh das hu alaman ni sintua ni malim ai. Masuk ma ia hubagas lanjar hundul pakon juakjuak ai, laho mangidah atap sonaha ujungni.

⁵⁹ Tapi anggo sintua ni malim ai ampa haganup anggota ni Pangadilan Tinggi ai mangindahi hasaksian ladung do dompak Jesus, ase boi la marutang hosah.

⁶⁰ Tapi seng dong dapot sidea, age pe buei na mambere hasaksian ladung. Dobni adong ma dua halak,

⁶¹ na mangkatahon, “lhatahon halak on do: Tarbahren Ahu do manrumbakkon Rumah ni Naibata, anjaha pajongjongkon ai use ibagas tolu ari.”

⁶² Jadi jongjong ma sintua ni malim ai, nini ma dompak-Si, “Ai seng balosan-Mu na sinaksihon ni sidea ai dompak Ho?”

⁶³ Tapi sai sip do Jesus. Dob ai nini sintua ni malim ai ma hu Bani, “Hupabija ma Ho bani Naibata na

manggoluh in, ase ipatugah Ho bennami, barang na tongon do Ho Kristus, Anak ni Naibata!”

⁶⁴ Nini Jesus ma hu bani, “Songon na hinatahonmu ai ma tongon! Tapi Huhatahon ma bani nasiam, humbani sonari nari, idahon nasiam ma Anak ni Jolma in hundul i siamun ni Pargogoh in, anjaha roh i atas ni hambun ni langit.”

⁶⁵ Jadi irigatkon sintua ni malim ai ma bajuni, nini ma, “lapasi do Naibata! Pindahan ope saksi? Tonggor ma, domma ibogei nasiam pangapasion-Ni in!

⁶⁶ Naha do ninuhur nasiam?” Jadi nini sidea ma mambalosi, “Maningon marutang hosah do Ia!”

⁶⁷ Jadi itijuri sidea ma bohi-Ni anjaha itenju. Na legan mamastapi-Si, lanjar ihatahon,

⁶⁸ “Manjahai ma Ho bannami, ale Kristus, ise do na mamastap Ho?”

Pamorsouon ni si Petrus

(Mrk. 14:66-72; Luk. 22:54-62; Joh. 18:15-18; 25-27)

⁶⁹ Ia si Petrus hundul do i darat i alaman ai. Jadi roh ma sada naboru manjumpahkonsi, nini ma, “Ho pe hasoman ni Jesus na hun Galilea ai do!”

⁷⁰ Jadi iporsou ma i lobei ni sidea haganup, nini ma, “Seng hubotoh na hinatahonmu ai!”

⁷¹ Sanggah na luar ia hu horbangan ai, ididah sada naboru na legan ma ia, nini ma dompak halak na ijai

ai, “On ma sada hasoman ni Jesus, na hun Nasaret ai!”

⁷² Jadi iulaki ma mamorsou, pala marbija, “Seng hutandai Halak ai!”

⁷³ Tapi tongkin nari, marrohan ma na ijai ai manjumpahkon si Petrus, nini sidea ma dompaksi, “Tongon, dihut do ho sada humbani sidea, ai parsahapmai do patandahon ho!”

⁷⁴ Jadi mamura-murai ampa marbijai ma ia, nini ma, “Seng hutandai Halak ai!” Jadi mintor martahuak ma dayok.

⁷⁵ Gabe idingat si Petrus ma na hinatahon ni Jesus hu bani, “Paima martahuak dayok, tolu hali do porsouonmu Ahu.” Dob ai laho ma ia hu darat tangis sosombopon.

Jesus i Lobei ni si Latus

27 ¹ Siangkonsi ari, manriah ma haganup sintua ni malim pakon pangintuai-pangintuai ni bangsa ai pasal Jesus, laho pamatehon-Si.

² Isangkut ma la anjaha iboan, laho mangondoskon-Si bani si Latus, panggomgomi ai.

Matei Mandolos si Judas

³ Dob ididah si Judas, na mantahihon-Si ai, na hona uhum do hape la, manosal ma ia, ipaulak ma sitolu puluh pirak ondi bani sintua ni malim ampa pangintuai-pangintuai,

⁴ nini ma, “Domma mardousa ahu, daroh ni Halak na so marsalah do hutahihon!” Tapi nini sidea ma, “Seng urusannami ai! Ho ma na pabotoh-botoh ai!”

⁵ Jadi isampakkon ma pirak ai hubagas rumah panumbahan ai, dob ai laho ma ia mandoloskon dirini.

⁶ Tapi ibuat sintua ni malim ma duit ai, nini ma, “Seng bulih pamasukon in hubagas parartaan ni rumah panumbahan, ai boli ni daroh do in!”

⁷ Dob manriah sidea, ibolihon sidea ma ai bani tanoh ni sipauli hudon bahen tanoman ni halak dagang.

⁸ Halani ai do, ase igoran ianan ai tanoh daroh ronsi sadari on.

⁹ Gabe jumpah ma hata ni Nabi Jeremias, na mangkatahon, “Ibuat sidea ma duit pirak na tolu puluh ai, ai ma boli na dob tinontuhon i tengah-tengah ni anak ni Israel,

¹⁰ anjaha ibere sidea ma ai mamboli tanoh ni sipauli hudon, songon na hinatahon ni Tuhan in bangku.”

Iuhumi si Latus Jesus

(Mrk. 15:2-15; Luk. 23:2-5, 17-25; Joh. 18:28; 19:15)

¹¹ Jongjong do Jesus i lobei ni panggomgomi ai, anjaha isungkun panggomgomi ai ma la, nini ma, “Atene, Ham do raja ni halak Jahudi?” Jadi nini Jesus ma, “Songon na hinatahonmu ai ma tongon.”

¹² Anjaha sanggah na mangadu-adu ai sintua ni malim ampa pangintuai ni bangsa ai dampak-Si, seng dong marbalos la.

¹³ Jadi nini si Latus ma hu Bani, “Ai seng itangar Ham buei ni na sinaksihon ni sidea ai dampak Ham?”

¹⁴ Tapi sangkababah hata pe lang ibalosi ia, pala longang tumang panggonggomi ai.

¹⁵ Tapi somal do ipaluah panggonggomi ai bani pesta ai sada halak na tartutup, atap ise na tinodoh ni halak na mabuei ai.

¹⁶ Jadi adong ma ijia sada halak na tartutup na tarbarita hajahatonni, na margoran si Barabas.

¹⁷ Jadi sanggah tumpu sidea, nini si Latus ma dampak sidea, “Ise do iparsinta nasiam paluahonku, si Barabas do, atap Jesus, na margoran Kristus?”

¹⁸ Ai ibotoh do, halani subil ni uhur ni sidea do, ase iondoskon sidea la.

¹⁹ Anjaha sanggah na hundul ai si Latus bani kursi paruhuman ai, martonah ma parinangonni hu bani, nini, “Ulang das ikahua ham Halak na pintor in, ai susah tumang do huahap na borngin ibagas nipingku marhalanohon-Si.”

²⁰ Tapi sai iojur-ojur sintua ni malim ampa pangintuai ni bangsa ai do halak na mabuei ai, ase ipangindo sidea paluahon si Barabas, tapi bunuhon anggo Jesus.

²¹ Nini panggomgomi ai ma mambalosi sidea, “Ise humbani sidea na dua on iparsinta nasiam paluahonku?” Jadi nini sidea ma, “Si Barabas!”

²² Nini si Latus ma hubani sidea, “Jadi, aha ma sibahenonku bani Jesus, na ginoran Kristus?”

²³ Haganup do sidea mangkatahon, “Parsilangkon ma la!”

²⁴ Jadi dob ididah si Latus, na so siat be hatani, lambin tambah tene georni, ia pe ibuat ma bah pamurihi tanganni i lobei ni halak na mabuei ai, anjaha nini ma, “Seng marsalah ahu pasal daroh ni Halak on! nasiam ma na pabotoh-botoh in!”

²⁵ Nini haganup halak na mabuei ai ma mambalosi, “Marsapata bennami ampa bani dakdanaknami pe daroh-Ni ai.”

²⁶ Dob ai ipaluah ma si Barabas, tapi anggo Jesus, dob ilonsingi, iondoskon ma bani sidea, ase iparsilangkon.

Hona Pahiri Jesus anjaha Iparsilangkon

(Mrk. 15:16-32; Luk. 23:26-43; Joh. 19:1-3; 16-24)

²⁷ Jadi iboan tentara ni panggomgomi ai ma Jesus hu rumah paruhuman, anjaha ipatumpu sidea ma ganup pasukan ai hu Bani.

²⁸ Itanggali sidea ma hiou-Ni, anjaha isorungkon ma Bani baju sigerger.

²⁹ Idandan sidea ma duri bahen sortali-Ni, itampeihon ma ai bani ulu-Ni, ibere ma tolong bani

tangan siamun-Ni, dob ai marsombah ma sidea hu lobei-Ni, laho pahirihirihon-Si, nini sidea ma, “Tabi ma Bamu, ale Raja ni Jahudi!”

³⁰ Lanjar itijuri sidea ma la, ibuat ma tolong ai humbani tangan-Ni anjaha ilonsingkon bani ulu-Ni.

³¹ Jadi siapkonsi ipahiri sidea la, itanggali sidea ma baju-baju sigenger ai hun Bani, isorungkon sidea ma use baju-Ni hinan bani, dob ai iboan ma la, ase iparsilangkon.

³² Sanggah na luar sidea, jumpah sidea ma sada halak Kirene, na margoran si Simon, ia ma ipaksa sidea mamorsan hayu parsilang-Ni ai.

³³ Jadi dob das sidea bani sada ianan, na margoran Golgata (*artini: Partangkurakan*),

³⁴ ibere sidea ma la minum anggur na marsaor pogu, dob idai, seng ra be la minum ai.

³⁵ Dob iparsilangkon sidea la, ibagi-bagi sidea ma hiou-Ni marhitei na manjomput na sinurat,

³⁶ lanjar hundul ma sidea ijai manjaga-Si.

³⁷ Ilongkotkon sidea do surat hu atas ni ulu-Ni, na patugahkon salah-Ni. Hatani, “On do Jesus, Raja ni Jahudi!”

³⁸ Rap pakon-Si iparsilangkon sidea do dua halak panrampok, sada hampit siamun-Ni, na sada nari hampit sambilou-Ni.

³⁹ Anjaha halak na mamontas hunjai pahiri-hirihon-Si, anjaha iupir-upirhon uluni, nini,

⁴⁰ “E Ho, na sihol parsedahon rumah panumbahan in, anjaha na sihol pajongjongkonsi ibagas tolu ari! Paluah ma diri-Mu, anggo na tongon do Ho Anak ni Naibata! Turun ma Ho hun hayu parsilang in!”

⁴¹ Usih hujai do parpahiri ni sintua ni malim, sibotoh surat ampa pangintuai ni bangsa ai, nini sidea,

⁴² “Na legan ipaluah, tapi diri-Ni sandiri seng tarpaluah-Si. Raja ni Israel do la, ai pe turun ma la hun hayu parsilang in, ase porsaya hanami Bani.

⁴³ Martenger ni uhur do la bani Naibata: la ma na paluahkon-Si sonari, anggo na tongon do Naibata marosuh Bani, ai nini do: Anak ni Naibata do Ahu!”

⁴⁴ Lanjar sonai do parpahiri ni panrampok ai, na rap iparsilangkon pakon-Si.

Parmatei ni Jesus

(Mrk. 15:33-41; Luk. 23:44-49; Joh. 19:28-37)

⁴⁵ Tapi humbani tongah ari ronsi pukul tolu, golap do sab tanoh in.

⁴⁶ Anjaha hira-hira pukul tolu marsora na gogoh ma Jesus, nini ma, “Eli, Eli, lama sabakhtani?” Artini, “Ale Naibatang-Ku, Naibatang-Ku, mase ma itadingkon Ham Ahu?”

⁴⁷ Mambogei ai, nini deba halak na jongjong ijai ai ma, “Na mandilo si Elias do la ai!”

⁴⁸ Jadi mintor marlintun ma sahalak humbani sidea mangalop limut, isornobkon ma ai bani na migar, anjaha ilongkotkon bani tolong laho painumkon-Si.

⁴⁹ Tapi na legan mangkatahon, “Paturut lobei, ase naidah, atap na roh do si Elias paluahkon-Si.”

⁵⁰ Iulaki Jesus ma use marsora na gogoh, dob ai iondoskon ma Tonduy-Ni.

⁵¹ Anjaha tonggor ma, marigat ma tirei na i rumah panumbahan ai hun datas hu toruh, bolah dua, anjaha tanoh on dugur, batu gingging mangkabolah,

⁵² tanoman mangkabuha, anjaha puho ma buei halak na mapansing, na dob matei,

⁵³ luar do sidea hun tanoman, dob na puho ai la, anjaha laho hu huta na mapansing ai pataridahkon dirini bani buei halak.

⁵⁴ Ase dob ididah kopala ni tentara ai, ampa sidea sijagai Jesus lalou ampa haganup na masa ai, mabiar tumang ma sidea, nini ma, “Tongon do Anak ni Naibata la!”

⁵⁵ Adong do ijai buei naboru, na jongjong manatap-natap humbani na daoh, ai ma na dob mangirikkon Jesus hun Galilea, laho marugas Bani.

⁵⁶ Sidea ai, ai ma si Maria Magdalena, si Maria inang ni si Jakobus ampa si Josep, ampa inang ni anak ni si Sebedeus.

Partanom ni Jesus

(Mrk. 15:42-47; Luk. 23:50-56; Joh. 19:38-42)

⁵⁷ Jadi dob bod ari, roh ma sada halak na bayak, na margoran si Josep, na hun huta Arimatia, na dob gabe susian ni Jesus.

⁵⁸ Laho ma ia hubani si Latus mangindo bangkei ni Jesus, gabe isuruh si Latus ma na padaskon ai bani.

⁵⁹ Jadi ijalo si Josep ma bangkei-Ni, ibaluti ma bani hiou linnen na borsih;

⁶⁰ itibalhon ma ai hubagas tanomanni sandiri, na baru ope, na ipatuhilhonsi bani dolog batu, anjaha dob igulang batu banggal bani babah ni tanoman ai misir ma ia.

⁶¹ Ia si Maria Magdalena ampa si Maria na sada nari, hundul-hundul do ijai, tontang ni tanoman ai.

Ijagai Tanoman ni Jesus

⁶² Patarni ai, ai ma ari, dob salpu ari parugasan ai, martumpu ma sintua ni malim ampa Parisei hu lobei ni si Latus, nini sidea ma,

⁶³ “Ham tuan, idingat hanami do, onnga do ihatahon sipangoto-otoi ondi sanggah goluh-Ni, ‘Na puho do Ahu bani ari patoluhon!’

⁶⁴ Ai pe, suruh ham ma, ase ijaga tanoman ai das hubani ari patoluhon, ase ulang roh susian-Ni ai manangko-Si, gabe ihatahon hubani halak na mabuei in, na dob puho la humbani na matei,

gabe samboran use holi sipaoto-oto na parpudi on humbani na parlobei ondi.”

⁶⁵ Jadi nini si Latus ma dompak sidea, “Adong ma parjaga ai! Laho ma nasiam, jagai nasiam ma ai pangkei-pangkei!”

⁶⁶ Dob ai laho ma sidea, ramot ma ibahen tanoman ai marhitei na manlak ai ampa na mambahen parjaga hujai.

Mulak Manggoluh Tuhan Yesus

Ipatalar Diri-Ni bani Dua Susian Naboru

(Mrk. 16:1-8; Luk. 24:1-12; Joh. 20:1-13)

28¹ Tapi sanggah mulai ope marlangat-langat ari, bani ari parlobei dob salpu Sabat, roh ma si Maria Magdalena ampa si Maria na sada nari manonggor tanoman ai.

² Anjaha tonggor ma, masa do lalou bolon, ai tuad do Malekat ni Tuhan hun nagori atas, idohori ma batu ai, iguling ma ai lanjar hundul i atasni.

³ Ia rupani songon hilap do, anjaha pakeianni putih songon salju.

⁴ Jadi hitir-hitir ma parjaga ai ibahen biar ni uhur ni sidea, hira na matei do.

⁵ Tapi nini malekat ai ma dompak naboru ai, “Ulang mabiar nasiam! Ai hubotoh do, Yesus, na dob pinarsilangkon, ai do na pinindahan nasiam.

⁶ Seng ijon be la, ai domma puho la, songon na hinatahon-Ni hinan. Padohor nasiam ma, tonggor nasiam ge ianan hatibalan-Ni on!

⁷ Podas ma nasiam laho hubani susian-Ni patugahkon na dob puho la humbani na matei. Lobeian-Ni do nasiam laho hu Galilea, anjaha ijai ma idahon nasiam la. Tonggor ma, domma hupatugah ai bani nasiam.”

⁸ Jadi podas ma sidea misir hun tanoman ai, mabiar anjaha marmalas ni uhur tumang, marlintun do sidea laho patugahkon ai bani susian-Ni.

⁹ Tapi roh ma Jesus manjumpahkon sidea, nini ma, “Damei ma bani nasiam.” Jadi idohori sidea ma la, irohoh sidea ma nahei-Ni lanjar manrogop i lobei-Ni.

¹⁰ Jadi ihatahon Jesus ma hubani sidea, “Ulang nasiam mabiar, laho ma nasiam patugahkon bani susian-Ku, ase laho sidea hu Galilea. Ijai ma idahon ni sidea Ahu!”

Isisip Parjaga

¹¹ Sanggah na misir ai sidea, tonggor ma, roh ma piga-piga parjaga ai hu huta, ibaritahon sidea ma haganup na masa ai bani sintua ni malim.

¹² Jadi martumpu ma sidea rap pakon pangintuai-pangintuai ai, anjaha dob manriah, ibere sidea ma buei duit bani tentara ai,

¹³ nini sidea ma, “Hatahon nasiam ma, ‘Borngin, sanggah tarpodom hanami, roh do susian-Ni manangko-Si.’

¹⁴ Anjaha anggo tarbotoh on bani panggomgomi, hanami pe marsahap pakonsi, ase ulang susah nasiam.”

¹⁵ Jadi ijalo sidea ma duit ai, anjaha ibahen sidea ma songon na hinatahon ai bani sidea. Rarat do barita on i tongah-tongah ni halak Jahudi ronsi sadari on.

Parentah Zending ni Jesus bani Susian-Ni

¹⁶ Ia susian na sapuluh sada ai laho do hu Galilea, hu sada dolog, na dob ipatuduh Jesus hinan bani sidea.

¹⁷ Anjaha dob ididah sidea ia, isombah sidea ma ia, tapi adong ope na sangsi.

¹⁸ Jadi roh ma Jesus hun dohor bani sidea, nini ma, “Domma ondos Bangku sagala kuasa na i nagori atas ampa na i tanoh on.

¹⁹ Laho ma hanima, podahi hanima ma sagala bangsa, ase gabe susian-Ku sidea, anjaha didi hanima ma sidea hubagas goran ni Bapa, Anak ampa Tonduy Na Pansing.

²⁰ Ajari hanima ma sidea mangkorjahon sagala na dob Hutitahkon bennima. Tonggor ma, sai na hasomanan-Ku do hanima ganup ari, ronsi roh ujung ni dunia on.”

Markus

Parbangkit ni si Johannes Pandidi

(Mat. 3:1-12; Luk. 3:1-18; Joh. 1:6-28)

1 ¹ On ma mula ni Ambilan Na Madear pasal Jesus Kristus.

² Songon na tarsurat bani Nabi Jesayas, “Tonggor ma, Husuruh ma suruhan-Ku parlobei-Mu, sipatorsa dalan-Mu!

³ Sora ni na mardilo-dilo i halimisan, pasirsir ma dalan ni Tuhan in, pintor ma bahen sidalanan-Ni.”

⁴ I halimisan do si Johannes mandidihon anjaha mangambilankon pandidion hamubahon ni uhur bahen hasasapan ni dousa.

⁵ Jadi roh ma hubani haganup parnagori Judea pakon par Jerusalem, gabe ipadidihon sidea ma dirini hu bani i Bah Jordan, dob isopotkon bei dousani.

⁶ Anggo si Johannes, ambulu ni unta do hiouni, hulingkuling gonditni anjaha sipanganonni balang pakon manisan ni lobah.

⁷ On do ambilanni, “Roh ma hun pudingku sigogohan hun bangku, seng talup ahu paunduk diringku mangkarhari tali ni sipatu-Ni.

⁸ Ia ahu, bah do hudidihon bani nasiam, tapi anggo ia, Tonduy Na Pansing do didihonon-Ni bani nasiam.”

Ididi si Johannes Tuhan Jesus

(Mat. 3:3-7; Luk. 3:21, 22; Joh. 1:31-34)

⁹ Bani panorang ai roh ma Jesus hun Nasaret na i Galilea, jadi tardidi ma la i Bah Jordan, ididi si Johannes.

¹⁰ Mandarat honsi la hun bah ai, ididah ma buha langit, anjaha sogop ma Tonduy ai hu Bani marrupahon asas.

¹¹ Anjaha tarboge i ma sora hun nagori atas, “Ho do Anak na hinaholongan ni uhur-Hu, rosuh do uhur-Hu Bam.”

Tuhan Jesus i Parlajouan

(Mat. 4:1-11; Luk. 4:1-13)

¹² Dob ai mintor ijuljul Tonduy ai ma la hu halimisan.

¹³ Ase i halimisan ma la ompat puluh ari dokahni ilajou sibolis, rap pakon binatang do la ijai, tapi malekat do marugas Bani.

Mamungkah Marhorja Tuhan Jesus

(Mat. 4:12-17; Luk. 4:14, 15)

¹⁴ Dob tartutup si Johannes, roh ma Jesus hu Galilea mangambilankon Ambilan Na Madear ni Naibata,

¹⁵ “Domma jumpah panorangni, domma dohor Harajaon ni Naibata. Paubah nasiam ma uhur nasiam anjaha haporsayai nasiam ma Ambilan Na Madear in!”

Idilo Susian-Ni

(Mat. 4:18-22; Luk. 5:1-11; Joh. 1:35-51)

¹⁶ Sanggah mardalan la i topi ni Tao Galilea, ididah ma si Simon pakon si Andreas, sanina ni si Simon ai mangamburhon jala ni sidea, ai panjala do sidea.

¹⁷ Jadi nini Jesus ma dompak sidea, “Eta, ihutkon nasiam ma Ahu, Hubahen pe nasiam sijalajolma!”

¹⁸ Jadi mintor itadingkon sidea ma jala ai anjaha iirikkon ma la.

¹⁹ Dob idalani hundaoh otik, ididah ma si Jakobus, anak ni si Sebedeus, ampa si Johannes, saninani ai, ibagas parau do sidea paturei-tureihon jala ni sidea.

²⁰ Jadi mintor idilo ma sidea, anjaha itadingkon sidea ma bapa ni sidea, si Sebedeus, ibagas parau ai rap pakon halak upahan ni sidea, lanjar laho ma sidea mangihutkon-Si.

Jesus Marambilan i Kapernaum

Ipamalum Sada Halak na Setanon

(Luk. 4:31-37)

²¹ Jadi laho ma sidea hu huta Kapernaum, mintor masuk ma la hu rumah parguruan sanggah ari Sabat laho mangajari.

²² Longang ma uhur ni halak mambogei pangajaran-Ni, ai marhidorat do pangajaran-Ni, sedo songon sibotoh surat.

²³ Adong ma i rumah parguruan ai sada halak na siniaran ni tonduy na mabutak, mardilo ma ia,

²⁴ nini, “Mangaha Ham roh bannami, Ham Jesus par-Nasaret? Roh do Ham hape laho mangagou hanami. Hubotoh do ise Ham, Na Pansing ni Naibata.”

²⁵ Jadi isorgang Jesus ma ia, nini ma, “Sip ma ho, mandarat ma ho hun bani!”

²⁶ Jadi isarad tonduy na mabutak ai ma ia, anjaha marsora na gogoh luar ma ia hun bani.

²⁷ Jadi longang ma sidea haganupan, pala marsisungkunan samah sidea, nini, “Aha do on? Pangajaran na baru do on anjaha na marjumbalang, ipaksa do tonduy na butak, gabe ibalosi do la.”

²⁸ Jadi mintor sar ma barita-Ni inggot nagori Galilea.

Ipamalum Jesus Anturang ni si Petrus pakon na Boritan na Legan

(Mat. 8:14-17; Luk. 4:38-41)

²⁹ Dob kaluar hun rumah parguruan ai, mintor laho ma la hu rumah ni si Simon pakon si Andreas rap pakon si Jakobus ampa si Johannes.

³⁰ Tibal do anturang ni si Simon, pane-paneon, jadi mintor ipatugah sidea ma ai Bani.

³¹ Idohori ma ia, ijamah ma tanganni laho pajongjongkonsi, jadi itadingkon pane-pane ai ma ia, lanjar marugas ma ia bani sidea.

³² Tapi dob bod ari dob sundut mata ni ari, ipamboan halak ma hubani na boritan pakon na setanon.

³³ Haganup parhuta ai marhumpul do i lobei ni labah ai.

³⁴ Jadi buei do na boritan, na marbagei-bagei naboritni, ipamalum, anjaha buei do setan-setan iusir, anjaha seng ilopas setan-setan mansahapkon, na dob itanda sidea la.

Jesus Marambilani i Galilea

Ipamalum Sada Halak na Gadamon

(Mat. 8:1-4; Luk. 5:12-16)

³⁵ Girah sogod, golap-golap ope, puho ma la, lanjar luar misir bani ianan na lungun laho martonggo.

- ³⁶ Jadi iirikkon si Simon pakon hasomanni ai ma la.
- ³⁷ Dob jumpah sidea la, nini sidea ma dompak-Si, “Haganup halak mangindahi Ham!”
- ³⁸ Tapi ihatahon ma bani sidea, “Laho ma hita bani ianan na legan, hu dusun-dusun na dohor an, ase dihut ijai Ahu marambilan, ai halani ai do, ase roh Ahu.”
- ³⁹ Jadi laho ma la marambilan bani parguruan ni sidea, bani sab nagori Galilea, anjaha iusir do setan-setan.
- ⁴⁰ Jadi roh ma hubani sada halak na gadamon, ielekelek ma la anjaha isombah lanjar ihatahon, “Anggo ra Ham, tarpasusi Ham do ahu!”
- ⁴¹ Jadi maidop ma uhur-Ni, isurdukkon ma tangan-Ni, ijamah ma ia lanjar nini ma hu bani, “Ra do Ahu, susi ma ham!”
- ⁴² Jadi mintor tanggal ma gadam ai hun bani, gabe susi ma ia.
- ⁴³ Ipaingat ma ia pangkei-pangkei, dob ai mintor isuruh ma ia laho,
- ⁴⁴ lanjar ihatahon ma hu bani, “Jaga ham, ulang das ipatugah-tugah ham in age bani ise! Tapi laho ma ham patidakkon dirimu bani malim, galangkon ham ma na tinitahkon ni si Musa, paboa na dob susi ham, gabe hasaksian bani sidea.”
- ⁴⁵ Tapi ai pe ia luar, ipungkah ma mambaritahon ampa pasarhon na masa ai, gabe seng tarbahen Jesus be masuk hu huta bani na talar, tapi idarat

bani ianan na lungun mando la, anjaha marrohan do halak hubani hunja-hunja pe.

Pasal Kuasa ni Tuhan Yesus Manasap Dousa

(Mat. 9:1-8; Luk. 5:17-26)

2¹ Mulakkonsi la hu huta Kapernaum, ai ma piga-piga ari i pudi ni ai, jadi tarboge i ma na dob i rumah la.

² Jadi martumpu ma buei halak, pala seng siat be i lobeini labah ai, gabe iambilankon ma bani sidea Hata ai.

³ Dob ai roh ma halak mamboan na oyangan hu Bani, ompat halak do na marusungsi.

⁴ Tapi halani seng boi idohori sidea la halani na mabuei ai, ibuha sidea ma tayub i babou ni ianan ai, jadi itantan ma hujai podoman hatibalan ni na oyangan ai.

⁵ Mangidah haporsayaon ni sidea ai Jesus, nini ma dompak na oyangan ai, “Ambia, domma sasap dousamu!”

⁶ Tapi dong do deba hundul ijai sibotoh surat, na mangkatahon ibagas uhurni,

⁷ Mase sonai parsahap ni halak on? Manrisai do la! Ise boi manasap dousa sobali Naibata tumang?

⁸ Jadi mintor ibotoh Jesus ma ibagas uhurni, na sonai pingkiran ni sidea ibagas, gabe nini ma dompak sidea, “Mase sonai pingkiran ni uhur nasiam?”

⁹ Na ija do urahan hatahonon bani na oyangon on, ‘Domma sasap dousamu’, atap na hatahon, ‘Jongjong ma ho, boan ma podomanmu, mardalan ma?’

¹⁰ Tapi ase ibotoh nasiam na markuasa do Anak ni Manisia in i tanoh on manasap dousa,” nini ma dompak na oyangon ai,

¹¹ “Huhatahon ma bam, ‘Jongjong ma ho, boan ma podomanmu anjaha mulak ma hu rumahmu.’”

¹² Jadi mintor jongjong ma ia, ibuat ma podomanni lanjar laho hu darat, inonoi haganup sidea, pala longang sidea haganup. Ipuji sidea ma Naibata, nini ma, “Lape onnga ididah hanami na sonin!”

Panjalo ni Tuhan Jesus Bani Pardousa

(Mat. 9:9-13; Luk. 5:27-32)

¹³ Jadi laho ma la use hu darat, hu topi tao, jadi roh ma haganup na mabuei ai hu bani, gabe iajari ma sidea.

¹⁴ Jadi sanggah na mardalan ai, ididah ma si Lepi, anak ni si Alpeus, hundul i kantor sohei, jadi ihatahon ma bani, “Irikkon ma Ahu!” Jadi jongjong ma ia laho mangirikkon-Si.

¹⁵ Jadi masa ma, sanggah na hundul la mangan i rumahni ai, buei do sijalo sohei pakon pardousa mangkasomani Jesus ampa susian-Ni ai mangan, ai buei do sidea na mangirikkon-Si.

¹⁶ Dob ididah sibotoh surat na humbani Parisei, mangan la rapkon pardousa pakon sijalo sohei, nini sidea ma dompak susian-Ni, “Rapkon sijalo sohei ampa pardousa do la mangan tene!”

¹⁷ Tapi dob ibogei Jesus ai, nini ma dompak sidea, “Seng porlu doktor bani na jorgit, bani na boritan do! Seng roh Ahu laho mandilo parpintor, tapi pardousa do.”

Hatorangan ni Tuhan Jesus Pasal Parpuasaon

(Mat. 9:14-17; Luk. 5:33-39)

¹⁸ Anggo susian ni si Johannes pakon halak Parisei siparpuasa do. Jadi roh ma sidea, nini ma hu bani, “Mase susian ni si Johannes pakon susian ni Parisei marpuasa do, hape susian-Mu lang?”

¹⁹ Nini Jesus ma dompak sidea, “Mintor tarbahen halak na marpesta parunjukon ma marpuasa, sadokah rap ope pakon sidea siparunjuk ai? Sadokah rap ope pakon sidea siparunjuk ai, seng tarbahen sidea marpuasa.

²⁰ Tapi na roh ma arini, buaton ma siparunjuk ai humbani sidea; jadi bani ari ai ma sidea marpuasa.

²¹ Seng dong halak, na mandungkapkon hiou na baru bani hiou na dob madotei, ai rigat do use na nidungkapkon na bayu ai hubani na buruk ai, gabe roh bang-bangni ma rigatni ai.

²² Anjaha seng dong halak, na pauseihon anggur na baru hubani gusi hulingkuling na buruk, ai

rigatkonon ni anggur ai do gusi hulingkuling na buruk ai, gabe mambur ma anggur ai, anjaha maseda gusi ai. Tapi anggur na bayu bani gusi hulingkuling na bayu ma.”

Ipasintong Tuhan Jesus Arti ni Titah Pasal Ari Sabat

(Mat. 12:1-8; Luk. 6:1-5)

²³ Jadi santorap sanggah ari Sabat, mamontas ma la hun tongah-tongah ni juma, jadi ipungkah susian-Ni ma mamutiki buyur ni omei sanggah na mardalan ai.

²⁴ Jadi nini Parisei ma dompak-Si, “Tonggor ma, na binahen ni sidea in, na so bulih horjahonon bani ari Sabat!”

²⁵ Jadi nini ma dompak sidea, “Ai seng onga ibasa nasiam nani na binahen ni si Daud, sanggah tarsosak ia anjaha na loheian ai ia rap pakon hasomanni?”

²⁶ Imasuki do Rumah ni Naibata sanggah panorang ni si Abyatar, sintua ni malim ai, anjaha ipangan do ruti galangan ai, na so malo panganon ni age ise sobali malim-malim, anjaha ibere do homa hunjai bani hasomanni.”

²⁷ Anjaha nini ope bani sidea, “Halanijolma do, ase iadongkon ari Sabat, sedo halani ari Sabat ase itompajolma.

²⁸ Halani ai Anak ni Jolma in do Tuhan ni ari Sabat homa.”

Tuhan Yesus Pamalumkon Age bani Ari Sabat

(Mat. 12:9-14; Lah. 6:6-11)

3¹ Dob ai masuk ma la use hubagas sada rumah parguruan. Dong ma ijai sahalak na matei lopah tanganni.

² Igompangi sidea ma la atap ra do la pamalumkonsi bani ari Sabat, ase dong dalan bani sidea mangaduhon-Si.

³ Jadi nini ma dompak halak partangan na matei lopah ai, “Jongjong ma ho hu tengah-tengah on!”

⁴ Lanjar ihatahon ma bani sidea, “Aha do na patut bahenon bani ari Sabat, na madear do atap na jahat, pagoluhkon do atap mamunuh?” Tapi sip ma sidea.

⁵ Jadi ikawahkon ma sidea ibagas marah pakon pusok ni uhur halani tendel ni uhur ni sidea. Anjaha ihatahon ma bani halak ai, “Pagostong ma tanganmu!” Jadi ipagostong ma tongon, jadi malum ma tanganni ai.

⁶ Jadi luarhonsi Parisei ai, mintor ibahen sidea ma partahian pakon halak Herodiani, barang sonaha bahenon ni sidea laho mamunuh-Si.

Ipamalum Tuhan Jesus Buei na Boritan pakon na Setanon

(Mat. 12:15-21; Luk. 6:17-19)

⁷ Jadi surut ma Jesus rapkon susian-Ni dompak tao ai. Buei tumang do halak hun Galilea pakon hun Judea mangirikkon-Si,

⁸ sonai homa hun Jerusalem pakon nagori Idumea pakon na hun dipar ni Bah Jordan pakon na hun Tirus ampa Sidon, buei do halak na roh hu bani, dob ibogei sidea buei ni na binahen-Ni ai.

⁹ Jadi isuruh ma susian-Ni pasirsirhon sada parau Bani halani na mabuei ai, ase ulang isosak sidea la.

¹⁰ Ai buei tumang do sidea ipamalum, gabe marurup ma sagala na boritan roh manjamah-Si.

¹¹ Anjaha sagala partonduy na mabutak, dob ididah sidea la, marsombah ma hubani lanjar dilo-dilo, "Ham do Anak ni Naibata!"

¹² Tapi gomos do sidea ipalumba, ase ulang ipatugah-tugah sidea pasal la.

Ipilih Tuhan Jesus Susian-Ni Sapuluh Dua Halak gabe Apostel-Ni

(Mat. 10:1-14; Luk. 6:12-16)

¹³ Dob ai tangkog ma la hu sada dolog, jadi idilo ma hu lobei-Ni halak harosuh ni uhur-Ni, gabe roh ma sidea hu bani.

¹⁴ Ipabangkit ma sapuluh dua halak bahen hasoman-Ni, sisuruhon-Ni marambilan,

¹⁵ anjaha na markuasa mangusir setan-setan.

¹⁶ Ase ipabangkit ma na sapuluh dua on, Si Simon na igoran homa si Petrus,

¹⁷ si Jakobus, anak ni si Sebedeus, pakon si Johannes, sanina ni si Jakobus ai. Igoran do sidea Boanerges, artini, anak ni longgur.

¹⁸ Ambah ni ai si Andreas, si Pilippus, si Bartolomeus, si Mateus, si Tomas, si Jakobus anak ni si Alpeus, si Tadeus, si Simon halak Kana,

¹⁹ pakon si Judas Iskariot, partahi-tahi ai.

²⁰ Jadi masuk ma la hubagas sada rumah. Marurup ma use roh jolma, pala seng sompat sidea mangan.

²¹ Dob ibogei sindohor-Ni ai, roh ma sidea laho mangalop-Si, halani nini halak, “Na podouan do la.”

Pasal Dousa dompak Tonduy Na Pansing

(Mat. 12:24-32; Luk. 11:15-23; 12:10)

²² Ia sibotoh surat na roh hun Jerusalem, nini sidea do, “Na siniaran ni Belsebul do la, anjaha mangunsagahkon kopala ni setan do iusir setan-setan ai.”

²³ Jadi idilo ma sidea hu lobei-Ni, anjaha marlimbaga ma la marsahap pakon sidea, “Sonaha ma ra setan mangusir hasomanni setan?

²⁴ Anggo marsalisih sada harajaon samahsi, seng anjai totap harajaon ai.

²⁵ Anjaha anggo adong sada rumah tangga marsalisih samahsi, seng anjai totap be rumah tangga ai.

²⁶ Ase anggo marsilawanan setan ai samahsi anjaha marsalisih, seng totap be ia, tapi na laho bois ma ia.

²⁷ Seng boi imasuki halak rumah ni halak na gogoh, laho manrampas ugasni, anggo lang lobei isangkut na gogoh ai, dob ai pe ase tarbuatsi ugas-ugasni.

²⁸ Na sintong do hatang-Kon bani nasiam, tarsasap do sagala dousa ni jolma, ronsi panrisaion ni sidea,

²⁹ tapi halak na mangapasi Tonduy Na Pansing, seng dapotan hasasapan ni dousa ia ronsi sadokah ni dokahni, mangonai do bani utangni ai ronsi sadokah ni dokahni.”

³⁰ Sonai ma ihatahon, halani nini sidea, “Partonduy na mabutak do la.”

Sindohor ni Tuhan Jesus

(Mat. 12:46-50; Luk. 8:19-21)

³¹ Jadi roh ma inang-Ni pakon sanina-Ni, i darat do sidea jongjong, anjaha isuruh sidea ma na mandilo-Si.

³² Hundul do na mabuei ai manlioti-Si, nini sidea ma dompak-Si, “Tonggor ma, i darat an do inang-Mu, sanina-Mu pakon botou-Mu, laho mangindahi Ham!”

³³ Ibalosi ma sidea, nini ma, “Ise do goranon inang-Ku anjaha ise do saninang-Ku?”

³⁴ Jadi ikawahkon ma na hundul manlioti-Si ai, nini ma, “On do inang-Ku, on do saninang-Ku!

³⁵ Ai na mangkorjahon harosuh ni Naibata, ai do saninang-Ku, ai do botou-Hu, ai do inang-Ku!”

Limbaga Pasal Panabur ampa Artini

(Mat. 13:1-23; Luk. 8:4-15)

4 ¹ Jadi iulaki Jesus ma use mangajari i topi tao ai. Martumpu ma buei halak hu lobei-Ni, pala imasuki sada parau na i tao ai, lanjar hundul ma ijai. I topi tao ai do anggo halak na mabuei ai ganup.

² Jadi buei ma iajarhon bani sidea marhitei limbaga, nini ma bani sidea marhitei pangajarion-Ni ai,

³ “Tangar ma! Na laho do sada halak panabur manaburhon bonihni.

⁴ Jadi sanggah na manabur ai ia, madabuh ma deba bonih ai hu dalan, gabe roh ma manuk-manuk mamagutisi.

⁵ Na deba nari madabuh hu tanoh na batuon, na so sadiha hapal tanohni, jadi mintor tubuh ma, halani na so bagus ai tanohni.

⁶ Tapi sanggah na lambin gijang ari, melus ma ai lanjar matei, halani na so marurat ai.

⁷ Ia na deba nari madabuh do hu tongah-tongah ni parhupi-hupian, lambin marbanggal ma ai rap pakon hupi-hupi ai, ipisat ma ai, gabe seng saud marbuah.

⁸ Anjaha na deba nari use, madabuh do hu tanoh na madear; tubuh ma ai, manggargar anjaha marbuah, adong do na tolu puluh lompit ampa na saratus lompit.”

⁹ Lanjar nini ma, “Barang ise parpinggol na marpanangar, itangar ma ai!”

¹⁰ Jadi sanggah sahalak-Si mando tading, isungkun halak na mangkasomani-Si ampa na sapuluh dua ai ma la pasal limbaga ai.

¹¹ Gabe ihatahon ma bani sidea, “Ibere do bannima rusia ni Harajaon ni Naibata, tapi bani halak na i darat, marhitei limbaga do ganup ipadas ai,

¹² ase, age pe ikawahkon sidea ai, seng ididah, anjaha age pe ibogei, seng iarusi, ase ulang mubah uhur ni sidea anjaha sasap dousa ni sidea.”

¹³ Dob ai nini ma dompak sidea, “Seng iarusi hanima limbaga in? Anggo sonai, sonaha ma boi arusannima ganup limbaga in?

¹⁴ Ia sipanabur ai, hata ai do isaburhon.

¹⁵ Ia na bani dalan ai, ai ma halak panaburan ni hata ai, anjaha dob ibogei sidea hata ai, mintor roh do sibolis mambuat hata na dob sinaburhon hubagas uhur ni sidea ai.

¹⁶ Anjaha sonai do homa na sinaburhon bani tanoh na batuon ai, dob ibogei sidea hata ai, mintor malas do uhur ni sidea mambogei ai;

¹⁷ tapi seng marurat ai ibagas uhur ni sidea, tongkin hansa tahan sidea. Ai anggo masa hamarsikon atap parburuon halani hata in, mintor surut do sidea.

¹⁸ Anjaha na deba nari ai ma na sinaburhon hu tengah-tengah ni hupi-hupi ai. Ibogei sidea do hata ai,

¹⁹ tapi masuk ma hubagas uhur ni sidea holsoh-holsoh parduniaon, panarik ni habayakon sipangoto-otoi in, ampa hisap-hisap na legan, jadi ipisat ma hata ai, gabe seng saud marbuah.

²⁰ Tapi na sinaburhon bani tanoh na madear ai, ai ma halak na mambogei hata in anjaha na manjalosi, gabe marbuah, adong na tolu puluh lompit, onom puluh lompit ampa saratus lompit.”

²¹ Dob ai ihatahon ma bani sidea, “Ai adong do halak na pagara palita, ase inahkon ai i toruh ni tapongan atap i toruh ni podoman? Ai lang hu atas ni parpalitaan do ai inahkon?

²² Ai seng dong na ponop, na so talar use, anjaha seng dong rusia, na so tarbotoh use.

²³ Barang ise parpinggol na marpanangar, itangar ma in!”

²⁴ Nini ope dompak sidea, “Paruhurhon hanima ma na binogeinima! Parsuhatan na sinuhatkonnima do suhatkonon bannima, tambahkonon-Ni ope tene bannima.

²⁵ Ai halak na marnadong, bereon ope bani, tapi halak na marnalang, buaton ope na adong bani hinan.”

Limbaga Pasal Partubuh ni Bonih

²⁶ Dob ai nini ma, “Ia Harajaon ni Naibata, ai ma songon pambahen ni halak, na manaburhon bonih hu juman.

²⁷ Na modom do ia borngin, anjaha puho arian. Martumbor do ai, dob ai marbuhu tanoh, na so pamotohan ni parjuma ai.

²⁸ Ai humbani gogohni sandiri ipatubuh tanoh ai do lobei hayuni, dob ai buyurni, dob ai gandum na porngis ibagas buyurni ai.

²⁹ Anjaha dob masak gandum ai, mintor isuruh ma panabi, ai jumpah ma pariama.”

Limbaga Pasal Batu ni Loharum

(Mat. 13:31, 32; Luk. 13:18, 19)

³⁰ Dob ai nini ma, “Hu bani aha ma pausihonta Harajaon ni Naibata? Hu bani aha ma limbagahononta?

³¹ Usih do ai bani batu ni loharum. Sanggah isaburhon ai hu tanoh, ai do silumatan humbani sagala batu ni suan-suanan.

³² Tapi dob isaburhon, podas do ai bangga, gabe gijangan humbani sagala suan-suanan na boi siparlowohon; mardangkahi do ai bangga-

banggal, gabe boi do marasari manuk-manuk na i awang-awang i toruh ni linggomni.”

³³ Isahapkon do hata ai bani sidea, marhitei buei limbaga na sonai, domu hubani na tarjalo sidea.

³⁴ Seng dong ihatahon bani sidea, anggo seng marhitei limbaga, tapi pulig do ipatorang haganupan ai bani susian-Ni.

Ipaminop Jesus Tao na Marhaba-haba

(Mat. 8:23-27; Luk. 8:22-25)

³⁵ Lanjar bani na sadari ai, bodkonsi ari, nini Jesus ma dompak susian-Ni, “Laho ma hita marparau hu dipar ai!”

³⁶ Jadi isuruh sidea ma mulak halak na mabuei ai, anjaha iboan sidea ma Jesus, sonai tumang, ibagas parau ai. Adong do parau na legan mangirikkon sidea.

³⁷ Dob ai roh ma habahaba na doras, anjaha gilumbang pe mangkajomba ma hubagas parau, gabe igoki bah ma parau ai.

³⁸ Tapi modom do anggo Jesus, marbantal, hampit pudi ni parau ai. Ipuhoi sidea ma la, nini, “Ham Guru! Ai seng parduli Ham, age magou hita?”

³⁹ Jadi puho ma la, ihata ma logou ai, anjaha nini ma dompak tao ai, “Sip ma! Soh!” Jadi soh ma logou ai, anjaha minop tao ai.

⁴⁰ Dob ai nini ma dompak sidea, “Mase ma mabiar hanima? Ai seng dong ope haporsayaonnima?”

⁴¹ Jadi mabiar tumang ma sidea, anjaha nini ma samah sidea, “Ai ise do on, ase logou ampa tao pe mambalosi-Si?”

Ipamalum Jesus Sada Halak na Setanon i Gerasa

(Mat. 8:28-34; Luk. 8:26-39)

5 ¹ Dob ai das ma sidea hu dipar ni tao ai, hu nagori Gerasa.

² Jadi sanggah na mandarat ai la hun parau ai, mintor roh ma hun tanoman sada halak na setanon manjumpahkon-Si.

³ I tanoman do ia marianan, anjaha seng dong na manangkutsi, age marhitei rantei.

⁴ Ai domma gati isangkut tangan ampa naheini, tapi irutuskon do rantei na bani tanganni ampa na bani naheini ai, seng dong na boi patundukkonsi.

⁵ Arian borngin sai i tanoman do ia atap i pardologan; sai doruh-doruh do ia, anjaha ibogbogi dirini bani batu.

⁶ Sanggah na tinatapni Jesus humbani na daoh, roh ma ia marlintun, lanjar manrogop i lobei-Ni,

⁷ anjaha marsora na gogoh ma ia dilo-dilo, nini ma, “Mangaha Ham roh bangku, Jesus, Anak ni Naibata, Sigijangan in? Marhitei goran ni Naibata, huelek-elek ma Ham, ulang ma arsik Ham ahu!”

⁸ Halani domma ihatahon Jesus hu bani, “Luar ma ho humbani halak on, ale setan!”

⁹ Dob ai isungkun ma ia, “Ai ise do goranmu?” Jadi nini ma mambalosi, “Legion do goranku, ai buei do hanami.”

¹⁰ Jadi sai ielek-elek ma la, ase ulang iusir sidea hun nagori ai.

¹¹ Jadi adong ma bani raboyon na ijai ai sada hulanen banggal babuy, manggagati.

¹² Jadi ielek-elek sidea ma la, “Suruh Ham ma hanami hubani babuy ai, ase ai imasuki hanami.”

¹³ Jadi ibalosi ma sidea, gabe luar ma tonduy na butak ai, anjaha imasuki ma babuy ai. Anjaha babuy na sahumanen ai pe, adong do ai hira-hira dua ribu, marpojong ma ai hun tolping ai hubagas tao ai, gabe marmateian ma, mogap ibagas tao ai.

¹⁴ Anjaha parmahan ai pe maporus ma, ibaritahon sidea ma ai bani halak na i huta-huta ampa na i juma. Jadi marrohan ma sidea, laho mangidah na dob masa ai.

¹⁵ Jadi das ma sidea bani Jesus, anjaha ididah sidea ma na setanon, na siniaran ni Legion ai hinan, hundul dear marpakeian anjaha torang maruhur, gabe mabiar ma sidea.

¹⁶ Anjaha halak na mangidah na masa ai pe, ibaritahon ma hubani sidea pasal na siniaran ni setan ai ampa pasal babuy ai.

¹⁷ Jadi ielek-elek sidea ma la, ase laho la hun nagori ni sidea ai.

¹⁸ Dob ai sanggah na laho masuk la hu parau ai, ielek-elek na setanon ondi ma Jesus, atap boi do ia mangkasomani-Si.

¹⁹ Tapi seng ipalopas, tapi ihatahon ma hu bani, “Mulak ma ho hu rumahmu, hubani diha-dihamu! Patugah ma bani sidea, buei ni na binahen ni Tuhan in bam, ampa pangidopi-Ni bam.”

²⁰ Ia pe mulak ma hu rumahni, anjaha ibaritahon ma i Dekapolis, banggal ni na binahen ni Jesus hu bani, gabe longang ma halak haganup.

Ipagoluh Jesus Boru ni si Jairus

Ipamalum Homa Sada Naboru na Boritan

(Mat. 9:18-26; Luk. 8:40-56)

²¹ Jadi dob das use Jesus marparau hu dipar ai, marurup ma roh halak na mabuei ai hu Bani, sanggah i topi ni tao ai ope la.

²² Anjaha roh ma homa sada halak kopala ni parguruan ai, goranni si Jairus, jadi dob ididah Jesus, manrogop ma ia i lambung ni nahei-Ni,

²³ anjaha sai ielek-elek ma la, nini ma, “Mangkatarhatos do nuan borungku. Roh ma Ham, tampeihon Ham ma tangan-Mu bani, ase malum ia anjaha manggoluh.”

²⁴ Jadi laho ma Jesus rap pakonsi, anjaha buei do halak na mangirikkon-Si, pala marsiasak-asakan sidea inggot hu bani.

²⁵ Jadi adong ma ijai sada naboru, na dob sapuluh dua tahun sai roh marnunut pantang ni hiouni.

²⁶ Domma buei panaronanni humbani sipanambari, anjaha bois do artani bahen partambarni, tapi seng marnidok, lambin parahni do tene naboritni ai.

²⁷ Jadi dob ibogei barita ni Jesus, roh ma ia rap pakon halak na mabuei ai hun pudi, anjaha ijamah ma hiou-Ni,

²⁸ ai ninuhurni do ibagas, “Hujamah gelah hiou-Ni ai, malum ma huahap.”

²⁹ Jadi mintor maronti ma roh daroh ai, anjaha iahapkon ma bani angkulani, na dob malum ia.

³⁰ Anjaha iahapkon Jesus ma, na luar ai gogoh humbani diri-Ni, gabe marhusor ma la dompak halak na mabuei ai anjaha nini ma, “Ise manjamah hiou-Hu?”

³¹ Jadi nini susian-Ni ai ma hu Bani, “Idah Ham ma panosak ni halak na mabuei in Bamu, mase ma ihatahon Ham, ise manjamah hiou-Hu?”

³² Tapi ikawahkon ma inggot laho mangidah atap ise do na mambahen ai.

³³ Jadi mabiar ma naboru ai anjaha hitir-hitir, ai ibotoh do aha na dob masa bani, gabe roh ma ia manrogop hu lobei-Ni, anjaha ipatugah ma haganup hu Bani sonaha na sasintongni.

³⁴ Tapi nini ma dompaksi, “Haporsayaonmu do na paluahkon ham, inang! Mulak ma ham ibagas damei, anjaha malum ma naboritmu in!”

³⁵ Sanggah na marsahap ai ope ia, adong ma na roh hun rumah ni sintua ni parguruan ai na patugahkon, “Domma matei borumu! Mase sunsahanmu be Guru in?”

³⁶ Tapi seng iparuhurhon Jesus hata ni halak na roh ai, gabe ihatahon ma hubani sintua ai, “Ulang mabiar! Porsaya ma lah!”

³⁷ Anjaha ise pe lang na ilopas Jesus mangirikkon-Si, sobali si Petrus, si Jakobus ampa si Johannes, sanina ni si Jakobus ai.

³⁸ Jadi das ma sidea hu rumah ni sintua ni parguruan ai, gabe ididah ma na gosou, na tangis-tangis anjaha na mandoruhi gogoh-gogoh.

³⁹ Anjaha dob masuk la, nini ma dompak sidea, “Mase ma gosou nasiam anjaha tangis-tangis? Seng na matei dakdanak in, na modom do!”

⁴⁰ Jadi itatawai sidea ma la. Dob isuruh sidea haganup mandarat, iarahkon ma bapa ampa inang ni dakdanak ai, sonai homa na mangkasomani-Si ai, gabe masuk ma sidea hu kamar hatibalan ni dakdanak ai.

⁴¹ Ijolom ma tangan ni dakdanak ai, anjaha nini ma hu bani, “Talita kumi!” Artini, “Ale Boru, Ahu mangkatahon bam, puho ma!”

⁴² Jadi mintor puho ma dakdanak ai, lanjar mardalan, ai domma das umurni sapuluh dua tahun, gabe longang tumang ma sidea.

⁴³ Tapi gomos ma sidea ipandang, ase ulang adong na mambotoh ai, lanjar ihatahon ma ase ibere ia mangan.

Jesus i Huta Nasaret

(Mat. 13:53-38; Luk. 4:16-30)

6 ¹ Jadi bingkat ma la hunjai, laho hu huta hagodangan-Ni, anjaha iirikkon susian-Ni do la.

² Anjaha sanggah ari Sabat mangajar ma la i rumah parguruan. Jadi longang ma halak simbuei na manangar ai, nini sidea ma, “Hunja do in roh Bani? Hapentaran aha do na binere in Bani? Anjaha sonaha do, ase boi jadi halongangan na sonai marhitei tangan-Ni?

³ Ai lang la do tukang in, anak ni si Maria, abang ni si Jakobus, si Joses, si Judas ampa si Simon? Ai lang i lambungta do botou-Ni?” Jadi sangsi ma sidea pasal-Si.

⁴ Tapi nini Jesus ma dompak sidea, “Sabonar na so marsangap do nabi anggo i tanoh hagodanganni, i tongah-tongah ni diha-dihani ampa i rumahni sandiri.”

⁵ Anjaha seng tarhorjahon-Si tanda halongangan ijai, pitah piga-piga halak do hansa tarpamalum-Si, marhitei na manampeihon tangan-Ni bani sidea.

⁶ Jadi longang ma uhur-Ni, halani na so porsaya ai sidea. Lanjar isiari ma huta-huta na i nagori ai, laho mangajari.

Parsuruh ni Jesus bani Susian-Ni na Sapuluh Dua ai

(Mat. 10:5-15; Luk. 9:1-6)

⁷ Dob ai idilo ma na sapuluh dua halak ai, lanjar isuruh ma sidea mardua-dua, anjaha ibere ma bani sidea kuasa dompak tonduy na mabutak.

⁸ Ihatahon do bani sidea, ase ulang iboan atap aha hu pardalanan, barang ruti, barang tas, barang duit ibagas gondit sobali tungkot.

⁹ Boi do sidea marsipatu, tapi ulang ma marbaju dua lapis.

¹⁰ Ihatahon do homa bani sidea, “Anggo masuk hanima hu sada rumah, ijai ma hanima soh, paima bingkat use.

¹¹ Anggo adong sada huta, na so ra manjalo hanima, barang na so ra manangihon hanima, tadingkon hanima ma ai, anjaha pirpirhon hanima ma orbuk na longkot bani naheinima, bahen hasaksian bani sidea.”

¹² Jadi bingkat ma sidea marambilan mangkatahon paubahkon uhur.

¹³ Buei do setan iusir sidea, anjaha buei homa na boritan iminaki, gabe malum iahap sidea.

Parmatei ni si Johannes Pandidi

(Mat. 14:1-12; Luk. 9:7-9; 3:19-20)

¹⁴ Tarbogei ma pasal Jesus bani Raja Herodes, ai domma tarbarita goran-Ni, gabe nini ma, “Domma

puho si Johannes Pandidi humbani na matei, ai do ase sonai marhagogohon Ia.”

¹⁵ Na legan mangkatahon, “Si Elias do in.” Na legan use mangkatahon, “Nabi do Ia, usih songon nabi-nabi na legan ai.”

¹⁶ Tapi dob ibogei si Herodes ai, nini ma, “Si Johannes, na dob hutampul ondi uluni, ai do na puho humbani na matei.”

¹⁷ Ai isuruh si Herodes do ijia na manangkap si Johannes anjaha patutupkonsi halani si Herodias, parinangon ni anggini, si Pilippus, na binuatni ai gabejolmani.

¹⁸ Ai ihatahon si Johannes do hubani si Herodes, “Seng bulih buatonmu nasianggimu!”

¹⁹ Halani ai sogam ma uhur ni si Herodias mangidahsi; sai sihol do bunuhonni ia, tapi seng tarpasaudsi.

²⁰ Ai si Herodes pe mabiar do mangidah si Johannes, ai ibotoh halak parpintor do ia anjaha na susi, gabe iondingi ma ia. Anggo itangar ambilanni, sosak tumang do iahap, tapi marosuh do ia manangarsi.

²¹ Tapi jumpah ma panorang na dear honsi, ai ma ari partubuh ni si Herodes, sanggah na mambahen pesta-pesta ia bani pagawai-pagawai tinggi, panglima-panglima, ampa na sangap-sangap i Galilea.

²² Masuk ma ijia boru ni si Herodias lanjar manortor i lobei ni sidea, gabe malas ma uhur ni si Herodes ampa tamueini ai ibahen. Jadi nini raja ai ma bani anak boru ai, “Pindo ma hu bangku atap aha rosuh ni uhurmu, sai bereonku do ai bam.”

²³ Pala do ibijahon bani, “Atap aha pangindoanmu, ronsi satongah ni harajaonku, sai na bereonku do.”

²⁴ Jadi laho ma ia, isungkun ma inangni, “Aha ma pindoonku?” Jadi nini ma, “Ulu ni si Johannes Pandidi ma pindo!”

²⁵ Jadi tarolos ma ia masuk hu lobei ni raja ai, nini ma mangindo, “Bere ham ma bangku sonari ulu ni si Johannes Pandidi i atas pinggan!”

²⁶ Pusok tumang ma uhur ni raja ai, tapi halani bijani ai bani tamuei ni ai, seng ra ia manulak pangindoanni ai.

²⁷ Jadi mintor isuruh raja ai ma upasni sahalak, ihatahon ma mangalop ulu ni si Johannes. Laho ma halak ai, iponggol ma ulu ni si Johannes i tutupan,

²⁸ iboan ma ai i atas ni sada pinggan, lanjar ibere ma bani anak boru ai, anjaha anak boru ai ma padaskon ai bani inangni.

²⁹ Dob ibogei susianni pasal ai, roh ma sidea, ibuat sidea ma bangkei ni ai lanjar itanom.

Itamuei Jesus Lima Ribu Halak

(Mat. 14:13-21; Luk. 9:10-17; Joh. 6:1-15)

³⁰ Dob ai mulak ma susian ai bani Jesus, ipatugah sidea ma haganup na hinorjahon ampa na niajarhon ni sidea.

³¹ Nini Jesus ma hubani sidea, “Laho ma hita bani ianan na lungun, ase marsaran otik.” Ai buei do halak na laho roh bani sidea, gari mangan seng sompat.

³² Jadi laho ma sidea marparau hu sada ianan na lungun, laho papuligkon diri,

³³ tapi buei do halak mangidah anjaha na mambotoh huja sidea laho, gabe marrohan ma sidea hun huta-huta ai mardalan nahei laho hujai, anjaha i lobei sidea do la.

³⁴ Sanggah mandarat Jesus, ididah ma halak na mabuei ai, jadi maidop ma uhur-Ni mangidah sidea, ai songon biribiri na so marparmahan do sidea, gabe buei ma ipodahkon bani sidea.

³⁵ Jadi marayak bod ari, roh ma susian-Ni hu Bani, nini ma, “Ianan na lungun do on, anjaha domma bod ari.

³⁶ Suruh Ham ma sidea, ase boi sidea laho hu dusun-dusun ampa huta-huta na inggot in, laho mamboli sipanganon bani sidea.”

³⁷ Tapi nini Jesus ma mambalosi sidea, “Bere hanima ma sidea mangan!” Nini sidea ma hu bani,

“Ai maningon laho do hanami mamboli ruti harga dua ratus dinar, laho mambere sidea mangan otik?”

³⁸ Jadi nini ma dompak sidea, “Piga dong ruti bannima? Tonggor lobei!” Dob ipapangkei sidea, nini ma, “Lima ruti ampa dua dengke.”

³⁹ Dob ai isuruh ma sidea hundul ganupan bani poyon-poyon ai, sasaholmouan.

⁴⁰ Jadi hundul ma sidea mar sasaratus ampa marlima-lima puluh saholmouan.

⁴¹ Dob ai ibuat Jesus ma ruti na lima ampa dengke na dua ai, ikawahkon ma hu atas, ipasu-pasu ma ai anjaha ipartopik. Ipambere ma ai bani susian-Ni ai, ase sidea use mamberei halak na mabuei ai. Anjaha dengke na dua ai pe ibagihon ma bani sidea haganup.

⁴² Mangan do sidea haganup, anjaha bosur bei.

⁴³ Ipatumpu sidea ma teba-teba, humbani ruti ampa humbani dengke ai, gok sapuluh dua bantei.

⁴⁴ Ia buei ni na mangan ruti ai, dong do lima ribu dalahi.

Jesus Mardalan i Atas Tao

(Mat. 14:22-36; Joh. 6:16-24)

⁴⁵ Sanggah na palaohon halak na mabuei ai ope la, mintor ijuljul Jesus ma susian-Ni ai masuk hu parau, laho palobeihon hu dipar, hu Betsaida.

⁴⁶ Anjaha dob misir halak ganup, tangkog ma la hu dolog, laho martonggo.

⁴⁷ Dob golap ari domma i tongah tao parau ai, anjaha sahalak Jesus mando i darat.

⁴⁸ Ididah ma sidea sunsah manlugai halani logou na roh hun lobei. Hira-hira tahuak dayok na parlobei roh ma la manjumpahkon sidea mardalan i atas bah, anjaha songon na sihol lopusan-Ni ma sidea.

⁴⁹ Tapi mangidah-Si na mardalan ai i atas bah, iagan sidea ma begu-begu do ai, gabe mandoruhi ma sidea.

⁵⁰ Haganup do sidea na mangidah ai anjaha gobir bei do. Jadi mintor iparsahapkon ma sidea, nini ma, “Tenger ma uhurnima! Ahu do on! Ulang mabiar!”

⁵¹ Lanjar naik ma la manjumpahkon sidea hubagas parau ai, anjaha logou pe minop ma. Jadi lambin longang tumang ma sidea,

⁵² ai na masa pasal ruti ai pe seng ope iartihon sidea, ai mapir ope uhur ni sidea.

Ipamalum Jesus Buei na Boritan

(Mat. 14:34-36)

⁵³ Dob mandipar das ma sidea hu nagori Genesaret, jadi marlabuh ma sidea ijai.

⁵⁴ Anjaha mandaratkonsi sidea hun parau ai, mintor itanda halak do la.

⁵⁵ Jadi idalani sidea ma ganup nagori ai, anjaha ipamboan sidea ma sagala na boritan bani podomanni bei barang ija ibogei sidea adong Jesus.

⁵⁶ Anjaha huja pe la laho, hu dusun-dusun atap hu huta-huta atap hu kota pe, iparpatibal halak ma na boritan i alaman, anjaha ipindo sidea ma bani Jesus, ase ilopas sidea pala manjamah sisi ni pakeian-Ni gelah. Anjaha haganup halak na manjamah ai, malum do.

Podah ni Tuhan Jesus Manlawan Titah-titah na Binahen ni Halak Parisei

(Mat. 15:1-20)

7 ¹ Dob ai, sanggah roh martumpu hu Bani Parisei ampa deba humbani sibotoh surat, na roh hun Jerusalem,

² jadi ididah sidea ma deba susian-Ni mangan ruti marhitei tangan na butak, ai ma, seng palobei marburih.

³ Ia halak Parisei ampa haganup halak Jahudi, seng ra mangan anggo lang palobei tangkas iusah tanganni mangihutkon adat ni nalobei.

⁴ Anjaha anggo mulak hun tiga, seng mangan sidea, anggo lang palobei maridi; anjaha buei ope adat na legan idalankon sidea, songon na mamurihi panginuman, gendi ampa gusi tombaga.

⁵ Jadi isungkun Parisei ampa sibotoh titah ai ma la, “Mase ma lang iihutkon susian-Mu adat ni ompung nalobei, ai mangan ruti do sidea marhitei tangan na butak?”

⁶Jadi nini ma dompak sidea, “Sintong do panjahaion ni si Jesayas pasal nasiam, ale sipakulah-kulah, songon na tarsurat ai, ‘Ipasangap bangsa on do Ahu marhitei bibirni, tapi uhurni daoh do hun Bangku!’

⁷Soya do pambahenan ni sidea pasangapkon Ahu, ai titah-titah ni jolma do ipodahkon sidea.

⁸Tading do titah ni Naibata ibahen nasiam, halani mandalankon adat na humbani jolma.”

⁹Nini ope bani sidea, “Patut ma tongon iparnalang nasiam titah ni Naibata, halani mandalankon adat nasiam.”

¹⁰Ai ihatahon si Musa do namin, “Pasangap ma bapamu ampa inangmu! Ambah ni ai, barang ise na mamurai bapani atap inangni maningon bunuhon do.

¹¹Tapi nasiam mangkatahon, barang ise na mangkatahon bani bapani atap inangni, ‘Korban! Artini, sagala na patut pangurupingku bamu, domma na galangkon.’

¹²Jadi seng be ilopas nasiam ia mambahen atap aha bani bapani atap inangni,

¹³gabe iparseda nasiam do Hata ni Naibata marhitei adat-adat na pinadalan nasiam in. Anjaha buei do na sonin idalankon nasiam.”

¹⁴Dob ai idilo ma use halak na mabuei ai, nini ma dompak sidea, “Nasiam haganup, tangihon ma Ahu anjaha parimbagaskon nasiam ma.

¹⁵ Seng butak jolma halani na masuk hun darat hubagas dirini, tapi na luar humbani jolma ai, ai do na pabutakkonsi.

¹⁶ Parpinggol na marpanangar, itangihon ma in!”

¹⁷ Dob masuk la hu rumah, holang humbani na mabuei ai, isungkun susian-Ni ma la pasal limbaga ai.

¹⁸ Jadi nini ma dompak sidea, “Dihut do hape hanima seng mangarusi ai? Ai seng dapot uhurnima, na so tarbahen butak jolma bahenon ni sagala na masuk hun darat hubagas dirini?”

¹⁹ Ai seng masuk ai hubagas uhurni, hubagas boltokni do ai laho, dob ai kaluar bani ianan na suhi.” (*Marhitei ai torang pansing do sagala sipanganon*).

²⁰ Tapi nini ma use, “Na kaluar humbani jolma, ai do pabutakkonsi.

²¹ Ai humbagas, humbani uhur ni jolma do roh uhur na jahat, parriah-riahon, panangkoon, pamunuhon,

²² parbangkison, pangkauton, hajahaton, panipuon, parsondukbungkason, subil, panreheion, gijang ni uhur ampa pamunuhon.

²³ Haganup hajahaton ai humbagas do rohni, ai do na pabutak jolma.”

Boru Kanaan na Porsaya*(Mat. 15:21-28)*

²⁴ Dob ai bingkat ma la hunjai, laho hu nagori Tirus. Masuk ma la hubagas sada rumah, ninuhur-Ni, ase ulang adong na mambotoh ai, tapi seng tarponopkon.

²⁵ Tapi mintor tarbogei do ai bani sada naboru, adong do sada boruni siniaran ni setan. Jadi roh ma ia, manrogop hu lobei ni nahei-Ni.

²⁶ Ia naboru ai, parbegu do, bangsa Sirofenisia, jadi ipangindo ma hu Bani, ase iusir setan ai humbani boruni ai.

²⁷ Tapi nini ma mambalosisi, “Bosur ma lobei dakdanak, ai seng patut buaton ruti humbani dakdanak, laho mamberehon ai bani baliang.”

²⁸ Jadi marbalos ma ia, nini ma hu Bani, “Tongon do ai Tuhan, tapi ipangan baliang na i toruh ni meja do rimah-rimah ni dakdanak.”

²⁹ Jadi nini Jesus ma hu bani, “Halani hatamu ai, laho ma ham, domma mandarat setan ai humbani borumu ai.”

³⁰ Laho ma tongon ia, jadi jumpahsi ma boruni ai modom-modom i podoman, anjaha setan ai domma luar.

**Ipamalum Jesus Sada Halak
na Nengel anjaha Longah**

³¹ Dob ai itadingkon ma use nagori Tirus, manlopusi Sidon laho dompak Tao Galilea, gabe das ma la hu nagori Dekapolis.

³² Jadi adong ma na mamboban hu Bani sada halak na nengel anjaha longah, anjaha ipindo ma hu Bani, ase itampeihon tangan-Ni hujai.

³³ Jadi iarahkon Jesus ma ia hubani na suhi, holang humbani halak na mabuei ai, ipamasuk ma jari-jari-Ni hubagas pinggol ni halak ai, martijur ma la anjaha ijamah ma dilahni,

³⁴ lanjar mangkawah ma la dompak datas, marhosah ganjang, dob ai nini ma, "Hepata!" Artini, "Mungkab ma!"

³⁵ Jadi mungkab ma tongon pinggolni anjaha harhar sangkut-sangkut ni dilahni, gabe dear ma parsahapni.

³⁶ Ipandang ma sidea, ase ulang ipatugah-tugah na masa ai atap bani ise pe. Tapi lambin ipandang, lambin iompot sidea do mambaritahon ai.

³⁷ Jadi longang tumang ma sidea, nini ma, "Dear do haganup ibahen, gabe marpambogei do na nengel, anjaha marsahap ia na longah."

Itamuei Jesus Ompat Ribu Halak*(Mat. 15:32-39)*

8 ¹ Bani panorang ai, sanggah martumpu use buei halak, anjaha seng dong sipanganon bani sidea, jadi idilo Jesus ma susian-Ni anjaha nini ma dompak sidea,

² “Maidop do uhur-Hu mangidah halak na mabuei on, ai domma tolu ari iihutkon sidea Ahu, anjaha seng dong sipanganon bani sidea.

³ Anggo Husuruh sidea mulak lang palobei mangan, gayuran ma sidea i tongah dalan, ai parhuta na daoh do sidea deba.”

⁴ Jadi ibalosi susian ai ma la, “Hunja ma boi buaton ruti, laho pabosur sidea i halimisan on?”

⁵ Jadi isungkun ma sidea, “Piga do adong ruti bannima?” Nini sidea ma, “Pitu!”

⁶ Dob ai isuruh ma halak na mabuei ai hundul i tanoh. Ibuat ma ruti na pitu ai, anjaha dob ihatahon tonggo tarima kasih, ipartopik ma ai anjaha ipambere bani susian-Ni, ase iidangkon sidea ai bani halak na mabuei ai.

⁷ Dong do homa dengke otik bani sidea. Dob ipasupasu, isuruh ma ase ibagihon.

⁸ Jadi mangan ma sidea bosur bei, lanjar ipatumpu ma teba-teba ai gok pitu tapongan.

⁹ Adong do sidea ompat ribu halak. Dob ai isuruh ma sidea mulak,

¹⁰ anjaha la pe, masuk ma hubagas parau rap pakon susian-Ni ai, gabe das ma sidea hu nagori Dalmanuta.

Parisei Mangindo Tanda hun Langit

(Mat. 16:1-4; Luk. 11:16, 29-32; 12:54-56)

¹¹ Roh ma halak Parisei, jadi ipungkah sidea ma marsual pakon-Si. Ipindo sidea ma tanda hun langit, laho manlajou-Si.

¹² Marhasoman hoih-hoih humbagas uhur-Ni, nini Jesus ma, “Mase ma mangindo tanda na sasundut on? Na sintong do hatang-Kon bani nasiam, seng porlu bereon tanda bani na sasundut on!”

¹³ Jadi itadingkon ma sidea, anjaha masuk ma use hubagas parau, lanjar laho mandipar.

Ragi ni Halak Parisei

(Mat. 16:5-12)

¹⁴ Tapi lupa do susian ai mamboan ruti, anjaha pitah sada do hansa ruti ibagas parau ai.

¹⁵ Jadi ipalumba ma sidea, nini, “Pangkei anjaha jaga ma hanima pasal ragi ni Parisei ampa ragi ni si Herodes.”

¹⁶ Jadi marsahap ma sidea samah sidea, “Ai ma da, halani na so mamboan ruti ai hita.”

¹⁷ Jadi dob ibotoh ai nini ma dompak sidea, “Mase ma isahapkon hanima, na so adong ai ruti bannima?”

Seng ope ibotoh hanima anjaha iarusi hanima?
Tong ope mapir uhurnima?

¹⁸ Ai lang marpangidah hanima, age adong matanima? Ai lang marpambogei hanima, age adong pinggolnima?

¹⁹ Ai seng idingat hanima be sanggah na Hupartopik ondi lima ruti bani na lima ribu halak ondi, anjaha piga tapongan teba-tebani ipatumpu hanima?" Nini sidea ma Bani, "Sapuluh dua."

²⁰ Anjaha na pitu ruti ondi bani na ompat ribu halak ondi, piga tapongan do teba-tebani ipatumpu hanima? Nini sidea ma hu Bani, "Pitu!"

²¹ Jadi nini ma dompak sidea, "Seng ope iarusi hanima?"

Ipamalum Jesus Sada Halak na Mapitung i Betsaida

²² Das ma sidea hu Betsaida. Adong ma na mamboban hu Bani sada halak na mapitung, anjaha ielek-elek sidea ma ia, ase ijamah halak ai.

²³ Jadi ijamah ma tangan ni halak na mapitung ai, iarahkon ma ia hu darat ni huta ai, itijuri ma matani, itampeihon ma tangan-Ni hu bani, anjaha isungkun ma, "Domma adong ididah ho?"

²⁴ Jadi mangkawah ma ia, nini ma, "Huidah dojolma, tapi songon bona ni hayu do huidah sidea mardalan."

²⁵ Dob ai iulakkon Jesus ma mannahkon tangan-Ni bani matani, ia pe mangkawah ma, gabe malum ma, anjaha liar ma ganup ididah.

²⁶ Dob ai isuruh ma ia mulak hu rumahni, nini ma, “Ulang ma masuki huta in.”

Panaksihon ni si Petrus

(Mat. 16:13-20; Luk. 9:18-21; Joh. 6:66-71)

²⁷ Dob ai laho ma Jesus rap pakon susian-Ni hu huta-huta dohorhon Kesarea Pilippi. I tongah dalan nini ma manungkun susian-Ni, “Ise do Ahu ihatahon halak?”

²⁸ Jadi ibalosi sidea ma Ia, “Deba mangkatahon si Johannes Pandidi, na deba si Elias, anjaha na deba nari use, sada humbani nabi ai.”

²⁹ Dob ai isungkun ma sidea, “Ia hanima, ise do Ahu ninuhurnima?” Nini si Petrus ma mambalosi, “Ham do Kristus in!”

³⁰ Jadi ipalumba ma sidea, ase ulang ipatugah-tugah pasal-Si age bani ise.

Ilumbahon Jesus Sitaronon-Ni

(Mat. 16:21-23; Luk. 9:22)

³¹ Dob ai ipungkah ma mangajari sidea, “Ia Anak ni Jolma in, maningon buei do sitaronon-Ni, ambukkonon ni pangintuai-pangintuai, sintua ni malim ampa sibotoh surat do Ia, anjaha bunuhonni, anjaha dob salpu tolu ari mulak manggoluh.”

³² Anjaha torang-torang do ipatugah hata ai. Jadi iarahkon si Petrus ma la, anjaha ipaingat ma la.

³³ Marhusor ma la, ikawahkon ma susian-Ni ai, anjaha ihata ma si Petrus, nini ma, “Laho ma ho bolis hun lambungkon! Ai seng uhur ni Naibata iparuhurhon ho, uhur ni jolma do.”

Pasal na Mangirikkon Jesus

(Mat. 16:24-28; Luk. 9:23-27)

³⁴ Dob ai idilo Jesus ma na mabuei ai rap pakon susian-Ni ai, nini ma dompak sidea, “Barang ise na sihol mangirikkon Ahu, iparnalang ma dirini, iporsan ma silangni, anjaha iirikkon ma Ahu.

³⁵ Ai barang ise na sihol paluahkon hosahni, ai do na magouan hosah, tapi barang ise na magouan hosah halani Ahu ampa halani Ambilan Na Madear, ai do pagoluhkonsi.

³⁶ Ai aha ma gunani bani jolma, age ganup dunia on bani, anggo magou do tonduyni?

³⁷ Ai aha ma tarbere jolma, bahen tobus ni tonduyni?

³⁸ Ase anggo adong na maila halani Ahu barang halani hatang-Kin i lobei ni bangsa parbangkis anjaha pardousa on, Anak ni Jolma in pe maila do pasalsi, anggo roh ma la ibagas hasangapon ni Bapa-Ni rap pakon malekat na mapansing in.”

Marsangap Jesus i Atas Dolog

(Mat. 17:1-13; Luk. 9:28-36)

9¹ Lanjar nini ma dompak sidea, “Na sintong do hatang-Kon bani nasiam, adong do deba humbani na jongjong ijon, na so mandagei hamatean, anggo lape ididah sidea roh Harajaon ni Naibata ibagas hagogohon.”

² Dob salpu onom ari iarahkon Jesus ma si Petrus, si Jakobus ampa si Johannes, iboan ma sidea pulig hu atas dolog na gijang. Mubah ma rupa-Ni ididah sidea.

³ Marlinang-linang ma pakeian-Ni, putih sahalian, seng dong sipanusi na boi mambahen sonai lopakni i atas tanoh on.

⁴ Dob ai taridah ma bani sidea si Elias ampa si Musa, marsahapi pakon Jesus.

⁵ Jadi nini si Petrus ma marsahapkon Jesus, “Guru, dear ni in hita ijon. Ipauli hanami ma ijon tolu sopou, sada Bamu, sada bani si Musa, anjaha sada bani si Elias.”

⁶ Ai seng ibotoh aha sihatahononni, ai mabiar tumang do sidea.

⁷ Roh ma sada hambun manlinggomi sidea, anjaha tarbogei ma sada sora humbagas hambun ai, na mangkatahon, “On do Anak-Ku haholongan ni uhur-Hu, tangihon ma la!”

⁸ Anjaha sanggah na mangkawah sidea inggot, ise pe lang adong ididah sidea sobali Jesus rap pakon sidea.

⁹ Jadi sanggah susur sidea hun dolog ai, ipalumba ma sidea, ase ulang ipatugah na nididah ni sidea bani halak, anggo seng ope puho Anak ni Jolma in humbani na matei.

¹⁰ Iparimbagaskon sidea do hata ai, anjaha marsisungkunan do sidea pasal arti ni hata “na puho humbani na matei ai.”

¹¹ Jadi isungkun sidea ma Jesus, “Mase ihatahon sibotoh surat, maningon parlobei roh do si Elias?”

¹² Nini ma mambalosi sidea, “Tongon, maningon roh do lobei si Elias patorsahon haganup. Tapi sonaha do tarsurat pasal Anak ni Jolma in? Ai lang maningon buei do la manaron anjaha maningon apason do la?”

¹³ Tapi Huhatahon ma bannima, “Domma roh si Elias, jadi uhur-uhur ni sidea do ibahen hu bani, songon na dob tarsurat hinan pasalsi.”

Ipamahum Jesus Sada Dakdanak na Setanon

(Mat. 17:14-21; Luk. 9:37-43)

¹⁴ Sanggah na das ai sidea hubani susian na legan ai, ididah sidea ma buei halak manginggoti sidea, anjaha sibotoh surat marsual pakon sidea.

¹⁵ Dob ididah halak na mabuei ai roh Jesus, longang ma sidea manjumpahkon-Si laho manabi-Si.

¹⁶ Jadi isungkun ma sidea, “Aha do na sinahapkon nasiam pakon sidea?”

¹⁷ Jadi marbalos ma hu Bani sada humbani halak na mabuei ai, “Guru, huboan do anakkon Bamu, ai isiari setan silongah do ia.

¹⁸ Anggo siar ma setan ai bani, anjaha isontak-sontakkon ma ia, gabe marguboh ma pamanganni, derek-derek iponni anjaha jorgong angkulani. Domma hupindo namin bani susian-Mu, ase iusir setan ai, tapi seng mangasup sidea.”

¹⁹ Tapi nini ma mambalosi sidea, “Bangsa na so porsaya! Sadiha dokah nari Ahu pakon nasiam? Sadiha dokah nari paanju-anjuon-Ku nasiam? Boan nasiam ma ia hu Bangku!”

²⁰ Jadi iboan sidea ma ia hu Bani. Ijin ididah setan ai Jesus, mintor ipantompaskon ma ia, gabe dabuh ma hu tanoh, marguling-guling anjaha marguboh babahni.

²¹ Isungkun Jesus ma bapani ai, “Domma sadiha dokah mangonai on bani?” Balos ni bapani ai, “Hun bani sietek-etekonni nari.

²² Domma gati igulangkon ia hubagas apuy ampa bah, sihol mambunuhsi. Tapi anggo dong do kuasa-Mu, holong ma uhur-Mu, urupi Ham ma hanami.”

²³ Jadi ibalosi Jesus ma ia, “Ihatahon ho, anggo adong do kuasa-Mu. Haganup do boi bani na porsaya.”

²⁴ Mintor idilohon bapa ni dakdanak ai ma gogoh, “Porsaya do ahu! Urupi Ham ma ahu na so marhaporsayaon on.”

²⁵ Dob ididah Jesus lambin marurup roh halak na mabuei ai, isorgang ma setan ai, nini ma, “Ale setan silongah anjaha sinengel, Ahu mangkatahon bam, luar ma ho hun bani, anjaha ulang be masuk ho hu bani!”

²⁶ Gabe mandoruh ma setan ai, ipantompaskon ma dakdanak ai lanjar luar ma. Hira bangkei mando dakdanak ai, pala buei halak na mangkatahon, “Domma matei ia.”

²⁷ Tapi itangkap Jesus ma tanganni, itogu ma ia laho pajongjongkonsi.

²⁸ Dob masuk la hubagas sada rumah, isungkun susian-Ni ai ma la pulig, “Mase ma lang mangasup hanami mangusirsi?”

²⁹ Jadi nini ma dompak sidea, “Anggo tonduy na samasam on, seng tarusir, anggo lang marhitei tonggo ampa parpuasaon.”

Ilumbahon Jesus Paduahalihon Pasal Sitaronon-Ni

(Mat. 17:22-23; Luk. 9:44-45)

³⁰ Dob bingkak sidea hunjai, ibontas sidea ma nagori Galilea. Tapi seng marosuh Jesus, ibotoh halak pasal ai,

³¹ ai na mangajari susian-Ni ai do la, anjaha nini ma dompak sidea, “Ondoskononkon do Anak ni Jolma

in hu tangan ni halak, anjaha bunuhon ni sidea ma la; tapi dob ibunuh, puho do la use, dob salpu tolu ari.”

³² Tapi seng iarusi sidea na hinatahon-Ni ai, anjaha mabiar do sidea manungkun hu Bani.

Paruhuran na Patut bani Siirikkon Jesus

(Mat. 18:1-5; Luk. 9:46-48)

³³ Dob ai das ma sidea hu huta Kapernaum, anjaha dob das sidea i rumah, isungkun ma sidea, “Aha do na sinahapkon nasiam i tongah dalan ai?”

³⁴ Tapi sip do sidea, ai isahapkon sidea do i dalan ai, barang ise sidea sibanggalan.

³⁵ Jadi hundul ma Jesus, idilo ma na sapuluh dua ai, ihatahon ma bani sidea, “Barang ise na sihol parlobei, parpudi ma ia bani haganup anjaha juakjuak bani haganup halak.”

³⁶ Jadi idilo ma sada dakdanak, ipajongjong ma ia i tongah-tongah ni sidea anjaha ialehon, lanjar nini ma bani sidea,

³⁷ “Barang ise na manjalo sada dakdanak na sonon halani goran-Ku, Ahu do na jinaloni ijai, anjaha barang ise na manjalo Ahu, sedo Ahu jinaloni ijai, na marsuruh Ahu do.”

Ulang Sompit Paruhuran

(Luk. 9:49-50)

³⁸ Nini si Johannes ma hubani Yesus, “Guru, ididah hanami do sada halak na so mangirikkon hita mangusir setan marhitei goran-Mu, jadi ilarang hanami ma ia halani na so hita ai iirikkon.”

³⁹ Jadi nini Yesus ma, “Ulang ma larang hanima ia, ai halak na mambahen horja hagogohon marhitei goran-Ku, seng tumaram pahirionni Ahu.

⁴⁰ Ai na so manlawan hita, hasomanta do ai.

⁴¹ Na sintong do hatang-Kon bannima, na mambere hanima bah inumon sasangkir ibagas goran-Ku, halani Kristus simada hanima, seng na magou upahni ai.”

Pasal na Mambahen Parsangsian

(Mat. 18:6-9; Luk. 17:1-2)

⁴² Tapi barang ise na mambahen sangsi sada humbani na etek-etek on, na porsaya Bangku, dearan ma igantungkon losung batu bani borgokni, laho mangunobkonsi hubagas laut.

⁴³ Anggo sangsi ho halani tanganmu, rotap ma in. Ai dearan do marsada tangan ho masuk hu hagoluan, humbani na mardua tangan masuk hu naraka, hubagas apuy na so ra miloh,

⁴⁴ bani ianan, na so ra matei gilokni, anjaha na so ra miloh apuyi.

⁴⁵ Anggo sangsi ho halani naheimu, rotap ma in. Ai dearan do tempang ho masuk hu hagoluhan, humbani na marnahei dua iambukkon ho hubagas naraka,

⁴⁶ bani ianan na so ra matei gilokni, anjaha na so ra mintop apuyni.

⁴⁷ Anggo sangsi ho ibahen matamu, pulsitkon ma in. Ai dearan do marmata salopah ho masuk hu Harajaon ni Naibata, ulang mardua mata ho iambukkon hu naraka,

⁴⁸ bani ianan na so ra matei gilokni anjaha na so ra miloh apuyni.

⁴⁹ Ai maningon garamon do haganup marhitei apuy.

⁵⁰ Na marguna do garam ai, tapi anggo mambar daini, aha ma bahenon paporadkon ai? Sai margaram ma hanima, anjaha mardamei samah hanima.

Pasal Parrumahtanggaon

(Mat. 19:1-12)

10 ¹ Dob ai misir ma Jesus hunjai anjaha das ma la hu nagori Judea, na i dipar ni Bah Jordan. Jadi marrohan ma use halak na mabuei ai hu Bani, gabe iajari ma sidea, songon na somal ibahen.

² Roh ma piga-piga halak Parisei hu Bani, anjaha isungkun sidea ma la, laho manlajou-Si, atap na bulih do sirangkonon ni halak parinangonni.

³ Tapi nini ma mambalosi sidea, “Ai aha do ihatahon si Musa bani nasiam?”

⁴ Balos ni sidea, “Ipalopas si Musa do halak mambahen surat sirang, laho paulakkon parinangonni.”

⁵ Jadi nini Jesus ma bani sidea, “Halani hengken ni uhurnima do, ase isuratkon si Musa aturan ai.

⁶ Tapi humbani mungkah ni panompaon pe dalahi ampa naboru do sidea itompa.

⁷ Halani ai tadingkonon ni dalahi do bapani ampa inangni, laho padomuhon dirini hubani parinangonni.

⁸ Gabe sada daging do sidea na dua ai. Ase seng be sidea dua, tapi sada daging do.

⁹ Ai pe, na dob pinadomu ni Naibata, seng bulih sirangon ni jolma.”

¹⁰ Dob mulak sidea hu rumah, isungkun susian-Ni ma la use pasal ai.

¹¹ Jadi nini ma dompak sidea, “Na paulakkon parinangonni, dob ai ibuat na legan, parbangkis do ia ijai.

¹² Naboru ai pe, anggo isirangkon dirini humbani paramangonni, anjaha laho bani halak na legan, parbangkis do.”

Jesus Huan-huan ni Dakdanak

(Mat. 19:13-15; Luk. 18:15-17)

¹³ Dob ai adong ma na mamboan dakdanak hu Bani, ase ijamah, tapi ipandang susian-Ni ai do sidea.

¹⁴ Mangidah ai Jesus, sogam ma uhur-Ni, nini ma dompak sidea, “Paturut hanima ma dakdanak in roh hu Bangku, ulang pandang hanima sidea, ai bani halak sisonin do Harajaon ni Naibata.

¹⁵ Na sintong do hatang-Kon bannima, na so manjalo Harajaon ni Naibata songon dakdanak, seng anjai masuk ia hujai.”

¹⁶ Jadi irohoh ma sidea anjaha itampeihon ma tangan-Ni bani sidea, laho mamasu-masu sidea.

Garama na Bayak

(Mat. 19:16-26; Luk. 18:18-27)

¹⁷ Sanggah na luar la hu dalan ai, roh ma sada halak marlintun hu Bani, lanjar manrogop ma ia manungkun-Si, “Ham Guru, sidear uhur! Aha do sibahenonku, ase dapot ahu hagoluhan sisadokah ni dokahni?”

¹⁸ Jadi nini Jesus ma hu bani, “Mase ma ihatahon ham Ahu sidear uhur? Seng dong sidear uhur sobali Naibata.

¹⁹ Ibotoh ham do titah in, ‘Ulang ho mamunuh! Ulang ho marbangkis! Ulang ho manangko! Ulang ho ra manaksihon hata na so tongon! Ulang

ho manrampok! Maningon pasangaponmu do bapamu pakon inangmu!”

²⁰ Tapi nini ma mambalosi, “Ham Guru! Haganupan ai domma hudalankon humbani sietek-etekonku nari.”

²¹ Jadi holong ma uhur ni Jesus mangidah-Si, nini ma hu bani, “Sada do na hurang bamu. Laho ma ham, jual ham ma haganup na dong bamu, anjaha pamberei ma ai bani na masombuh, ase mararta ham i nagori atas. Dob ai roh ma ham, irikkon ham ma Ahu!”

²² Tapi mambogei hata ai borat ma uhurni, jadi mulak ma ia ibagas pusok ni uhur, ai pararta na buei do ia.

²³ Jadi ikawahkon Jesus ma inggot, anjaha nini ma hubani susian-Ni ai, “Mahol ni ai masuk halak na marnah na dong hubagas Harajaon ni Naibata.”

²⁴ Ia susian ai longang do pasal hata-Ni ai. Jadi nini Jesus ma use bani sidea, “Ale ambia! Maholni ai halak na martenger ni uhur bani arta masuk hubagas Harajaon ni Naibata!

²⁵ Urahan do masukan ni unta lubang ni jarum, ase halak na bayak masuk hubagas Harajaon ni Naibata.”

²⁶ Jadi lambin longang ma sidea, nini sidea ma samah sidea, “Ise ma, anggo sonai, boi maluah?”

²⁷ Ikawahkon Jesus ma sidea, lanjar nini ma, “Seng boi ai bani jolma, tapi bani Naibata boi do! Ai haganup do tarbahen Naibata.”

Pasal Upah ni Susian

(Mat. 19:27-30; Luk. 18:28-30)

²⁸ Dob ai nini si Petrus ma hubani Jesus, “Tonggor ma, haganup do itadingkon hanami, laho mangihutkon Ham!”

²⁹ Nini Jesus ma hu bani, “Na sintong do hatang-Kon bannima, sagala na manadingkon rumahni, saninani, botouni, inangni, bapani, dakdanakni barang jumani pe halani Ahu ampa halani Ambilan Na Madear,

³⁰ Iompit saratus ma nuan jaloonne i tanoh on rumah, sanina, botou, inang, anak ampa juma sonai pakon parburuon, anjaha ambahni ai bani dunia na sihol roh hagoluhan sisadokah ni dokahni.

³¹ Tapi buei do na parlobei hinan gabe parpudi, anjaha na parpudi hinan gabe parlobei.”

Ipalumba Jesus Sitaronon-Ni Patoluhalihon

(Mat. 20:17-19; Luk. 18:31-34)

³² Sanggah mardalan sidea, tangkog hu Jerusalem, Jesus do mardalan i lobei ni sidea, gabe longang ma sidea, anjaha na mangirikkon-Si ai mabiar do. Idilo ma use na sapuluh dua ai, anjaha ipatugah ma bani sidea, aha na laho masa Bani.

³³ “Na tangkog ma hita hu Jerusalem, jadi ondskononkon ma Anak ni Jolma in bani sintua ni malim ampa sibotoh surat. Uhumon ni sidea ma la marutang hosah, anjaha ondskonon ni sidea ma la bani halak parbegu.

³⁴ Pahirion ni sidea, tijuranni, lonsinganni, anjaha bunuhon ni sidea ma la, anjaha dob salpu tolu ari mulak manggoluh do la.”

Pangindoan ni si Jakobus ampa si Johannes

(Mat. 20:20-28; Luk. 22:24-27)

³⁵ Dob ai roh ma manjumpahkon-Si, si Jakobus ampa si Johannes, anak ni si Sebedeus na dua ai, nini sidea ma hu Bani, “Ham Guru, adong pangindoannami, sibereon-Mu bannami namin.”

³⁶ Jadi nini ma hubani sidea, “Ai aha ipindo uhurnima sibahenon-Ku bannima?”

³⁷ Nini sidea ma hu Bani, “Bahen Ham ma hanami hundul bani hasangapon-Mu in, sada hampit siamun-Mu, na sada nari hampit sambilou-Mu.”

³⁸ Tapi nini Jesus ma hubani sidea, “Seng ibotoh hanima na pinindonima in. Mintor tarinum hanima ma panginuman siinumon-Kai? Mintor tarparidi hanima paridian siparidion-Kai?”

³⁹ Jadi nini sidea ma hu Bani, “Tarbahen hanami do.” Nini Jesus ma hubani sidea, “Tongon namin, inumonnnima do panginuman siinumon-Kai, anjaha paridionnima do paridian siparidion-Kai,

⁴⁰ tapi na mambahen hundul i siamun-Ku atap i sambilou-Hu, seng saguru Bangku ai, tapi bani na dob tinontuhon hinan do ai.”

⁴¹ Dob tarbogeai ai bani na sapuluh nari ai, marah ma sidea mangidah si Jakobus pakon si Johannes.

⁴² Jadi idilo Jesus ma sidea, nini ma dompak sidea, “Ibotoh hanima do, irajai sigomgomi bangsa do rayatni, anjaha ikuasai na sangap-sangapni do sidea.

⁴³ Ulang ma sonai anggo bannima! Tapi barang ise hanima na sihol sangap, ai ma gabe juakjuak bennima!

⁴⁴ Anjaha barang ise hanima na sihol parlobei, ai ma gabe jabolon ni haganup.

⁴⁵ Ai Anak ni Jolma in pe, seng roh la ase iidangi halak, tapi laho mangidangi do, anjaha mamberehon hosah-Ni bahen tobus ni buei halak.”

Ipamalum si Bartimeus na Mapitung

(Mat. 20:29-34; Luk. 18:35-43)

⁴⁶ Jadi das ma sidea i Jeriko. Sanggah na misir ai la hun Jeriko rap pakon susian-Ni ampa halak na mabuei ai, adong do na hundul i topi dalan ai, sada halak na mapitung, sipangindo-indo, ai ma si Bartimeus, anak ni si Timeus.

⁴⁷ Dob ibogeai, Jesus na hun Nasaret do ai hape, dilo-dilo ma ia, nini ma, “Ham Jesus, Anak ni si Daud, idop ma uhur-Mu bangku!”

⁴⁸ Buei do na maminsangsi ase sip namin, tapi lambin igogohi do mandilohon, “Ham Anak ni si Daud, idop ma uhur-Mu bangku!”

⁴⁹ Jadi soh ma Jesus, nini ma, “Dilo hanima ma ia!” Jadi idilo sidea ma ia, nini ma hu bani, “Tenger ma uhurmu, jongjong ma ho, idilo do ho!”

⁵⁰ Ia pe ipadaoh ma salimutni, jongjong ma ia, lanjar laho bani Jesus.

⁵¹ Iparsahapkon Jesus ma ia, nini ma, “Aha ipangindo uhurmu bahenon-Ku bam?” Jadi nini na mapitung ai ma hu Bani, “Ham Guru, marpangidah ma namin matangku!”

⁵² Jadi nini Jesus ma hu bani, “Laho ma ho! Haporsayaonmin do na pagoluhkon ho!” Jadi mintor marpangidah ma ia, lanjar iirikkon ma Jesus bani pardalanan-Ni.

Parmasuk ni Jesus hu Huta Jerusalem

(Mat. 21:1-11; Luk. 19:28-39; Joh. 12:12-19)

11 ¹ Sanggah na lambin dohor sidea hu huta Jerusalem, ai ma hu Betpage ampa Betania, na bani Dolog Jetun ai, isuruh Jesus ma dua halak humbani susian-Ni,

² nini ma hubani sidea, “Laho ma hanima hu dusun na i lobeinima in, anjaha masukkonsi hanima hujai, jumpah hanima ma sada anak ni halode tambat, na so onggga ope hona ajak. Tanggali anjaha boan hanima ma ai hujon!

³ Jadi anggo adong na mangkatahon bannima, ‘Aha do na binahennima in!’ Hatahon hanima ma, ‘Porlu do in bani Tuhan in, anjaha podas do in paulakon-Ni hujon.’”

⁴ Jadi laho ma sidea, anjaha jumpah sidea ma anak ni halode ai, tambat bani sada labah hampit darat i alaman ai, gabe itanggali sidea ma.

⁵ Jadi adong ma halak na jongjong ijai, na mangkatahon bani sidea, “Aha do na binahen nasiam in, itanggali nasiam do anak ni halode in?”

⁶ Jadi ihatahon sidea ma songon na hinatahon ni Jesus bani sidea, gabe ipaturut ma.

⁷ Itogu sidea ma anak ni halode ai bani Jesus, ipaherbang sidea ma hiouni bani gurungni, dob ai iajak Jesus ma ai.

⁸ Buei do halak na paherbangkon hiouni bani dalan ai, na deba paserakkon bulung-bulung na maratah, na itagili sidea hun tongah juma.

⁹ Halak na mardalan i lobei ampa na mangihut hun pudi mandilohon, “Hosianna! Pinuji ma na roh ibagas goran ni Tuhan!

¹⁰ Pinuji ma harajaon ni Bapanta si Daud na sihol roh in! Hosianna ma bani ianan na gijang!”

Hona Papa Hayu Ara na So Marbuah

(Mat. 21:18-19)

¹¹ Jadi masuk ma la hu Jerusalem, hu rumah panumbahan ai, anjaha dob ikawahkon haganup

inggot, laho ma la hu Betania rap pakon susian-Ni na sapuluh dua ai, ai domma bod ari.

¹² Anjaha patarni ai, dob misir sidea hun Betania, malohei ma iahap Jesus.

¹³ Anjaha ididah ma humbani na daoh sada hayu ara na marbulung. Laho ma la hujai, laho mangindahi buahni Bani. Tapi dob das la hujai, pitah bulung tumang do jumpah-Si, ai seng ope panorangni marbuah.

¹⁴ Jadi nini ma hubani hayu ai, “Ronsi antigan pe seng panganon ni atap ise be buahmu!” Ibogei susian-Ni ai do na hinatahon-Ni ai.

Ringis ni Jesus

(Mat. 21:12-17; Luk. 19:45-48)

¹⁵ Dob ai das ma sidea hu Jerusalem. Jesus pe masuk ma hu rumah panumbahan ai, anjaha iusir ma siparjualan ampa sipamboli i rumah panumbahan ai. Ipantunggalingkon ma meja ni situkari duit ampa bangku-bangku ni sijual asas.

¹⁶ Seng ipalopas bontason ni halak na marsiboanon hu rumah panumbahan ai.

¹⁷ Jadi iajari ma sidea, nini ma, “Ai lang tarsurat do, rumah partonggoan ni haganup bangsa do goranon rumah-Ku? Hape ibahen nasiam do in gabe liang ni panrampok.”

¹⁸ Jadi ibogei sintua ni malim ampa sibotoh surat ma ai, gabe ipindah sidea ma dalan laho mamunuh-

Si, ai mabiar do sidea, ai ganup do halak na mabuei ai longang mambogei podah-Ni.

¹⁹ Anjaha anggo bod ma ari, luar do sidea manadingkon huta ai.

Hayu Ara na dob Melus

Kuasa ni Haporsayaon

(Mat. 21:18-22)

²⁰ Anjaha sanggah na mamontas sidea patarni ai, ididah sidea ma na dob hangar hayu ai ronsi uratni.

²¹ Taringat ma si Petrus, gabe nini ma hu Bani, “Guru, tonggor Ham ma! Domma hangar hayu ara na pinapaan-Mu ondi.”

²² Jadi nini Jesus ma mambalosi sidea, “Porsaya ma hanima bani Naibata!”

²³ Na sintong do hatang-Kon bannima, “Anggo adong na mangkatahon bani dolog on, ‘Tarangkat ma, madabuh ma hu laut ai’, anjaha seng sangsi ia ibagas uhurni, tapi porsaya do na maningon jadi do ai, sai na saud do ai idahonni.’

²⁴ Halani ai Huhatahon ma bennima, haganupan na pinindonima bani tonggonima, sai na das do ai bannima, asal ma porsaya hanima, maningon jaloonnima do ai.

²⁵ Anjaha anggo jongjong hanima martonggo, sasap hanima ma anggo adong pangkuranginima bani

halak, ase isasap Bapanima na i nagori atas ai age salahnima.

²⁶ Tapi anggo seng isasap hanima, seng homa sasapon ni Bapanima na i nagori atas ai age salahnima.”

Sungkun-sungkun Pasal hunja Roh Kuasa ni Jesus

(Mat. 21:23-27; Luk. 20:1-8)

²⁷ Jadi das ma sidea use i Jerusalem. Anjaha sanggah mardalan-dalan la i rumah panumbahan ai, roh ma hu Bani sintua ni malim, sibotoh surat ampa pangintuai-pangintuai,

²⁸ anjaha nini sidea ma hu Bani, “Marhitei kuasa aha do ihorjahon Ham in? Ise do na mambere kuasa in Bamu, laho mangkorjahon in?”

²⁹ Tapi nini Jesus ma hubani sidea, “Adong do sungkunon-Ku bani nasiam, balosi nasiam ma Ahu, ase Hupatugah bani nasiam, atap kuasa ja Hupangunsagahkon mambahen ai.

³⁰ la pandidion ni si Johannes, na hun nagori atas do ai atap humbanijolma do? Balosi nasiam ma Ahu!”

³¹ Jadi martimbang-timbang ma sidea, nini ma, “Anggo ihatahon hita hun surga, hatahonon-Ni ma, ‘Mase ma lang porsaya nasiam bani?’

³² Tapi porini ihatahon hita, ‘Hun banijolma do?’ Mabiari do sidea bani bangsa ai, ai nabi do si Johannes ninuhur ni bangsa ai haganup.”

³³ Jadi nini sidea ma mambalosi Jesus, “Seng ibotoh hanami!” Jesus pe nini ma hubani sidea, “Ahu pe, seng patugahon-Ku bani nasiam, atap marhitei kuasa aha Hubahen ai.”

Limbaga Pasal Sisewa Pohon Anggur

(Mat. 21:33-46; Luk. 20:9-19)

12 ¹ Dob ai marsahap ma la marhitei limbaga bani sidea, nini ma, “Adong ma sada halak na manombe i pohon anggur, ihondor ma ai inggot, ihurak ma pangilangan, anjaha ipaturei ma sada manara. Ipasewahon ma pohon ai hubani parjuma-juma, dob ai laho ma ia hu nagori na legan.

² Jadi bani panorangni isuruh ma juakjuakni marayak parjuma-juma ai, ase ijalo humbani sidea deba humbani buah ni pohon anggur ai.

³ Hape itangkap sidea do ia, ibogbogi, lanjar isuruh mulak sonin, mangambe i.

⁴ Isuruh ma use bani sidea juakjuak na legan, tapi ibogbogi sidea ma ai anjaha ipahiri.

⁵ Dob ai isuruh ma use na legan, tapi ibunuh sidea ma age ai. Buei ope na legan isuruh, ibogbogi do ai deba, na deba nari ibunuh.

⁶ Adong ope anakni sada hinaholongan ni uhurni. Ai ma parpudi isuruh bani sidea, ai ninuhurni, ‘Tontu malang do uhur ni sidea mangidah anakkon.’

⁷ Tapi nini parjuma-juma ai ma samah sidea, 'On do panean ai! Eta, bunuh hita ma ia, ase banta siteanonni in!'

⁸ Jadi itangkap sidea ma ia, ibunuh ma, anjaha iambukkon hu darat ni pohon anggur ai.

⁹ Aha ma bahenon ni tuan simada pohon anggur ai? Roh ma ia, boiskononni ma parjuma-juma ai, anjaha ondoskononni ma pohon anggur ai bani halak na legan.

¹⁰ Ai seng onga ibasa nasiam hata na tarsurat on, 'Batu, na niambukkon ni tukang rumah, ai do gabe batu palas parsuhi.

¹¹ Tuhan do na mambahen ai, anjaha halongangan do ai bani matanta.'"

¹² Jadi ipindahi sidea ma dalan laho manangkap-Si, tapi mabiar do sidea bani halak na mabuei ai. Ai ibotoh, sidea do tinuju ni limbaga nongkan. Jadi laho ma sidea, itadingkon ma la.

Sungkun-sungkun ni Parisei Pasal na Mambere Balasting bani Kesar

(Mat. 22:15-22; Luk. 20:20-26)

¹³ Dob ai isuruh sidea ma deba humbani halak Parisei ampa humbani juakjuak ni si Herodes, laho manangkap-Si marhitei parsahap-Ni.

¹⁴ Jadi roh ma sidea mangkatahon hu Bani, "Ham Guru, ibotoh hanami, pintor do Ham, seng mabiar age bani ise, ai seng sitonggor jumbak Ham,

anjaha sintong-sintong do ipodahkon Ham dalan ni Naibata. Ai patut do bereon balasting bani kesar atap lang?”

¹⁵ Tapi ibotoh Jesus do sipakulah-kulah ni sidea ai, gabe nini ma dompak sidea, “Mase ma ilajou nasiam Ahu? Bere nasiam ma Bangku dinar sada, ase Huidah!”

¹⁶ Jadi iboan sidea ma. Nini ma hubani sidea, “Gombaran pakon surat ni ise do on?” Jadi nini sidea ma hu Bani, “Gombaran ni kesar do!”

¹⁷ Jadi nini Jesus ma hubani sidea, “Bere ma bani kesar na humbani kesar, anjaha na humbani Naibata bani Naibata.” Jadi longang ma sidea pasal-Si.

Pasal Parpuhoon humbani na Matei

(Mat. 22:23-33; Luk. 20:27-40)

¹⁸ Dob ai roh ma hu Bani halak Sadukei, na so marhatongonkon, adong parpuhoon humbani na matei, jadi isungkun sidea ma la, nini ma,

¹⁹ “Ham Guru! Isuratkon si Musa do banta, ‘Anggo matei sada halak, itadingkon parinangonni lang mardakdanak, maningon pagodangon ni anggini do naboru ai, laho pajongjong ginompar bani abangni ai.’

²⁰ Ase adong ma pitu halak na marsanina, mambuat boru ma sikahanan ai, jadi matei ma ia, lang martinading.

²¹ Jadi ibuat na paduahon ai ma naboru ai, lanjar matei ma ai, lang martinading. Patoluhon ai pe sonai do.

²² Sonai do sidea hapitusi, seng martinading. I pudi ni ganupan ai, matei ma homa naboru ai.

²³ Bani ari parpuhoon ai, ise do sidea simada naboru ai? Ai ganup do na pitu ai onggga marjolmahonsi.”

²⁴ Nini Jesus ma hubani sidea, “Ai lang na kahou ma nasiam in, halani seng iarusi nasiam Surat in, age hagogohon ni Naibata?

²⁵ Ai anggo puho ma sidea humbani na matei, seng be mompo atap laho sidea, tapi songon malekat na i nagori atas ai ma sidea.

²⁶ Anjaha pasal parpuhoon ni halak na dob matei, ai seng onggga ibasa nasiam ibagas buku ni si Musa, ibagas barita pasal naporon ai, na hinatahon ni Naibata hubani si Musa, ‘Ahu do Naibata ni si Abraham, si Isak ampa si Jakob?’

²⁷ Sedo Naibata ni na matei la, Naibata ni na manggoluh do. Kahou tumang do nasiam.”

Titah Sibanggalan

(Mat. 22:34-40; Luk. 10:25-28)

²⁸ Jadi roh ma sada halak humbani Parisei ai, na dob mambogei parsualan ai, anjaha na mangahapkon tongon ni pambalosi-Ni ai bani sidea, nini ma manungkun-Si, “Na ija do sibanggalan humbani titah in ganupan?”

²⁹ Ibalosi Jesus ma, “On do sibanggalan: Bogei ma, ale Israel, Tuhan, Naibatanta, sahalak-Si do Tuhan.

³⁰ Anjaha maningon haholonganmu do Tuhan Naibatamu humbani gok ni atei-ateimu, humbani gok ni hosahmu, humbani gok ni uhurmu ampa humbani gok ni gogohmu!

³¹ Na paduahon, ai ma: Maningon haholonganmu do hasomanmu doskon dirimu. Seng dong be titah na legan sibanggalan hunjon.”

³² Jadi nini sibotoh surat ai ma hu Bani, “Tongon do Guru, domu hu hasintongan do na hinatahon-Mu ai, ai ma, sada do Naibata, anjaha seng dong na legan sobali-Si.

³³ Anjaha mangkaholongi-Si humbani gok ni atei-atei, humbani gok ni uhur ampa humbani gok ni gogoh anjaha mangkaholongi hasoman doskon diri, banggalan do ai humbani ganup galangan situtungan age galangan na legan pe.”

³⁴ Dob ibogei Jesus pandeini ai marbalos, nini ma hu bani, “Seng sadiha daoh nari be ham hun Harajaon ni Naibata!” Anjaha ise pe lang be, na pag marsungkun-sungkun hu Bani.

Sungkun-sungkun Pasal Anak ni Ise do Jesus

(Mat. 22:41-46; Luk. 20:41-44)

³⁵ Sanggah mangajari Jesus ibagas rumah panumbahan ai, nini ma hubani sidea, “Mase ma

ihatahon sibotoh surat, Anak ni si Daud do Kristus in?

³⁶ Si Daud sandiri do mangkatahon marhitei Tonduy Na Pansing, 'Nini Tuhan in do dompak Tuhanku, hundul ma ho hu siamunkon, paima hubahen sagala munsumu sidogeian ni naheimu.'

³⁷ Si Daud sandiri do manggoransi Tuhan, sonaha ma ia anakni?" Marosuh do halak na mabuei ai manangar hata-Ni.

Lumba-lumba ase Marjaga-jaga dompak Sibotoh Surat

(Mat. 23:6, 7; Luk. 20:45-47)

³⁸ Lanjar ihatahon do ibagas pangajaran-Ni ai, "Jaga ma nasiam dompak sibotoh surat, na marosuh mardalani marbaju ganjang, na mangkarosuhkon, ase itabi halak i tiga,

³⁹ na mangkarosuhkon hundulan parlobei i rumah parguruan, ampa hundulan na sangap i parpestaan,

⁴⁰ halak na mambondut rumah ni na mabalu, anjaha na marsipahulah-hulah marhitei tonggo na ganjang. Uhum siboratan do jaloan ni sidea."

Sibere-bere ni na Mabalu

(Luk. 21:1-4)

⁴¹ Jadi sanggah na hundul la tontang ni poti idop ni uhur ai, ikawahkon ma pambahen ni halak na mabuei ai mandabuhkon duitni hubagas poti ai,

anjaha buei do halak na bayak mandabuhkon buei-buei.

⁴² Anjaha roh do sada naboru na mabalu, na miskin, idabuhkon ma hujai dua rimis, ai ma sasen.

⁴³ Jadi idilo Jesus ma susian-Ni, nini ma hubani sidea, “Sintong do na Huhatahon on bannima, buenan do na nidabuhkon ni na mabalu na miskin an, hubagas poti idop ni uhur in, marimbang haganup na mandabuhkon ai.

⁴⁴ Ai humbani lobih-lobihni do idabuhkon sidea bei, tapi anggo naboru an, ibagas hahuranganni idabuhkon do haganup na dong bani, haganup hagoluhanni.”

PARSAHAPAN PASAL PANORANG PARPUDI

(Mat. 24; Luk. 21:15-36)

Parseda ni Rumah Panumbahan

(Mat. 24:1, 2; Luk. 21:5, 6)

13 ¹ Sanggah luar Jesus hun rumah panumbahan ai, marsahap ma hu Bani sada humbani susian ai, “Guru, tonggor Ham ma, sonaha dear ni batu-batu ai ampa rumah-rumah ai!”

² Tapi nini Jesus ma hu bani, “Ididah ho do rumah-rumah na banggal ai? Seng paturuton age dua batu na patindih, na so rosakkonon-Ku.”

Mungkah ni Pangarouon Parlobei ni Ari Parpudi

(Mat. 10:17-22; 24:3-14; Luk. 21:7-19)

³ Anjaha sanggah na hundul la i Dolog Jetun tontang ni rumah panumbahan ai, pulig ma la isungkun si Petrus, si Jakobus, si Johannes pakon si Andreas.

⁴ “Patugah Ham ma bennami, antigan ma masa ai, anjaha aha tandani, paboa laho masa ma ganupan ai?”

⁵ Jadi ihatahon Jesus ma hubani sidea, “Jaga ma hanima, ase ulang ipakahou halak hanima.

⁶ Ai buei ma halak na roh marhitei Goran-Ku, na mangkatahon, ‘Ahu do in!’ Anjaha buei do na kahou bahenon ni sidea.

⁷ Anjaha anggo ibogei hanima porang ampa barita ni porang, ulang ma hanima tarsonggot! Ai maningon masa do ai, tapi seng ai ope ujungni.

⁸ Ai marsilawanan ma bangsa-bangsa anjaha harajaon samah harajaon, masa ma homa lalou mar sasanagori, sonai homa lohei. Pamungkah ni pangarouon ai ma ai.

⁹ Tapi jaga ma hanima bani dirinima! Ai ondoskonon ni sidea do hanima hu pangadilan, lonsinganni do hanima i parguruan, anjaha pajongjongon i lobei ni panguhum ampa raja halani Ahu, gabe hasaksian bani sidea.

¹⁰ Anjaha ambilankonon do lobei Ambilan Na Madear in bani ganup bangsa.

¹¹ Anjaha anggo itogu halak hanima laho ondskononkon, ulang ma sunsah uhurnima pasal sihatahononnima, tapi aha na iberehon bannima bani panorang ai, ai ma hatahon hanima, ai sedo hanima na marsahap ijai, tapi Tonduy Na Pansing do.

¹² Anjaha ondskononkon ni sanina do saninani ase ibunuh, sonai homa bapa dampak anakni. Anjaha anak pe manlawan do dampak namatoriasni anjaha ibunuh sidea.

¹³ Anjaha domdoman ni haganup halak do hanima halani Goran-Ku, tapi na tahan ronsi ujungni do paluahon.”

Parroh ni Ari Parpudi

(Mat. 24:15-25; Luk. 21:20-24)

¹⁴ “Tapi anggo ididah hanima hasamboron na majangin ai, ai ma bani na so patut iananni (iparimbagaskon na mambasa on ma ai), ijai ma maporus na i nagori Judea hu dolog!

¹⁵ Halak na i atas ni rumahni, ulang ma pala tuad ia, anjaha ulang ma pala masuk ia hubagas rumah, laho mambuat atap aha hunjai.

¹⁶ Na i juma pe ulang ma pala mulak mangalop hiouni.

¹⁷ Tapi magou ma naboratan rumah ampa na painumkon bani panorang ai.

¹⁸ Tapi martonggo ma hanima, ase ulang masa ai sanggah musim borgoh.

¹⁹ Ai masa do bani ari ai sitaronon, na so onggama masa olat ni panompaon ni Naibata bani na tinompa-Ni ai ronsi nuan, hu lobeian on pe seng masa be.

²⁰ Anjaha ambit lang iorui Tuhan ari ai, seng anjai maluah age sadajolma. Tapi halani na pinilihni ai do, ase iorui.

²¹ Anjaha anggo adong na mangkatahon bennima, ‘Tonggor ma, ijon do Kristus in!’ atap, ‘Tonggor ma, ijai do la,’ ulang ma haporsayai hanima ai.

²² Ai na roh do Kristus parladung pakon nabi parladung, anjaha bahenon ni sidea do tanda pakon halongangan laho pakahouhon na tarpilih in, ambit na tarbahensi.

²³ Tapi jaga ma hanima, domma Hulumbahon hinan in bannima!”

Parroh ni Anak ni Jolma in Paduahalihon

(Mat. 24:29-36; Luk. 21:25-33)

²⁴ “Tapi bani panorang ai, dob salpu sitaronon ondi, manggolapi ma mata ni ari, anjaha seng marsinalsal be bulan.

²⁵ Mardabuhan ma bintang hun langit, anjaha hagogohon ni parlangitan pe mandugur ma.

²⁶ Dob ai idahon ni sidea ma Anak ni Jolma in roh marhitei hambun marhasoman hagogohon ampa hasangapon banggal.

²⁷ Dob ai suruhon-Ni ma malekat-Ni patumpuhon na pinilih-Ni ai hambani desa na ualuh in, hun ujung ni tanoh das hu ujung ni langit.

²⁸ Tapi hambani hayu ara in ma guruhon hanima usihanni ai. Anggo martunasi ma pusukni anjaha luar bulungni, ibotoh hanima do, dohor ma partahunan milas.

²⁹ Usih hujai, anggo ididah hanima ma masa ondi, botohonnima ma, na dohor ma parroh-Ni ai.

³⁰ Sintong do na Huhatahon on bannima, seng anjai salpu na sansundut on, anggo lang lobei masa haganupan ai.

³¹ Salpu pe langit ampa tanoh on, anggo hatangkin seng anjai salpu in.

³² Tapi anggo ari ampa panorangni seng dong na mambotoh ai age malekat i nagori atas, age Anak ni Jolma in pe, sobali Bapa in.”

Lumba-lumba ase Marjaga-jaga

(Mat. 24:37-44; Luk. 12:35-40; 17:26-37)

³³ “Jaga anjaha puho ma hanima, ai seng ibotoh hanima, sadihari panorangni ai.

³⁴ Usih do ai songon bani sada halak, na laho hu tanoh na legan, itadingkon do rumahni, ibere kuasa

bani juakjuakni, ganup marsihorjahon horjani bei, anjaha sijaga labah iparentahkon, ase marjaga-jaga.

³⁵ Halani ai jaga ma hanima, ai seng ibotoh hanima parroh ni tuan simada rumah ai, barang bod ari, barang tongah borngin, barang tahuak dayok, barang girah sogod.

³⁶ Anjaha ulang ma jumpah-Si hanima tarpodom, bani na roh ai la sompong.

³⁷ Na Huhatahon bannima, bani haganup do ai Huhatahon, ‘Puho ma hanima!’”

SITARONON AMPA PARMATEI NI JESUS

(Mat. 26:27; Luk. 22:23; Joh. 18:19)

Riah ni Sintua ni Malim ampa Sibotoh Surat Laho Mamunuh Jesus

(Mat. 26:1-5; Luk. 22:1, 2)

14 ¹ Dua ari nari marayak pesta Paskah ampa mangan ruti na so niigaran, ipindahi sintua ni malim ampa sibotoh surat ma akal, laho manangkap anjaha mamunuh Jesus.

² Tapi nini sidea ma, “Ulang ma sanggah mata ni pesta ai, ase ulang lutu halak na mabuei in.”

Jesus Iminaki i Betania

(Mat. 26:6-13; Luk. 7:36-50; Joh. 12:1-8)

³ Jadi sanggah i Betania la, i rumah ni si Simon na gadamon hinan ai, sanggah na hundul la laho mangan, roh ma sada naboru mamboan sada botol, na marisi minak nardus na maharga, na so maragu. Ibolahkon ma botol ai, iuseihon ma minak ai bani ulu ni Jesus.

⁴ Tapi adong ma na marungut-ungut samah sidea, “Mase ma iparsoya-soya minak in?”

⁵ Boi hinan do jualon minak in lobih tolu ratus dinar, laho mangidopi na masombuh.” Jadi igilai sidea ma naboru ai.

⁶ Tapi nini Jesus ma, “Paturut ma ia. Mase ma isunsahi hanima ia? Na dear do na binahenni in Bangku!

⁷ Ai tongtong do adong na masombuh i tongah-tongahnima, anjaha sadihari marosuh hanima, boi do bahenonnima na madear bani sidea, tapi anggo Ahu seng tongtong rap pakon hanima.

⁸ Olat ni na tarbahensi do na binahenni in, na manlobei do ia mamminaki angkulang-Ku songon na laho mananom.

⁹ Sintong do na Huhatahon on bennima: Barang ija pe i sab dunia on iambilankon use Ambilan Na Madear on, sahapkononkon do age na binahenni in gabe baritani.”

Partahi-tahion ni si Judas

(Mat. 26:14-16; Luk. 22:3-6)

¹⁰ Ia si Judas Iskariot, ai ma sada humbani na sapuluh dua ai, laho do marayak sintua ni malim, laho mantahihon Jesus bani sidea.

¹¹ Mambogei ai, malas ma uhur ni sidea, lanjar ibagakon sidea ma mambere duit bani. Jadi ipindahi si Judas ma panorang na dearhonsi, laho mangondoskon-Si.

Ipasirsir Panganon Paskah

(Mat. 26:17-19; Luk. 22:7-13)

¹² Bani ari parlobei ni mangankon ruti na so niigaran, ai ma bani ari panayaton ni biribiri Paskah, nini susian ai ma bani Jesus, “Huja ma hanami laho ipindo uhur-Mu, laho pasirsirhon panganon Paskah ai?”

¹³ Jadi isuruh ma dua halak susian-Ni, nini ma hubani sidea, “Laho ma hanima hu huta in, pajumpah ma hanima holi pakon sada halak na mamboban bah sahudon. Irikkon hanima ma ia!

¹⁴ Hatahon hanima ma hubani siparrumah, na nimasukannima ai, ‘Tonah ni Guru in, ija do adong kamar, ianan-Ku mangan Paskah rap pakon susian-Ku?’

¹⁵ Jadi patuduhkononni ma bannima sada kamar pardatas na lumbang, na dob dear ipasirsir. Ijai ma patorsa hanima banta!”

¹⁶ Susian ai pe laho ma, imasuki sidea ma huta ai, jadi jumpah sidea ma songon na hinatahon-Ni ai bani sidea, gabe ipasirsir sidea ma Paskah ai.

Ipatugah Jesus Partahi-tahion ni si Judas

(Mat. 26:20-25; Luk. 22:21-23; Joh. 13:21-30)

¹⁷ Ase dob bod ari, roh ma Jesus ampa susian-Ni na sapuluh dua ai.

¹⁸ Anjaha sanggah na hundul ai sidea mangan, nini Jesus ma, “Na sintong do hatang-Kon bannima, sada hun bannima, na rap mangan pakon Ahu, mangondoskon Ahu.”

¹⁹ Jadi pusok ma uhur ni sidea, sada-sada ma sidea mangkatahon hu Bani, “Sedo ahu ai?”

²⁰ Jadi nini ma hubani sidea, “Sada hun bannima na sapuluh dua, ai ma na rap pakon Ahu manornobkon hubagas pinggan on.

²¹ Tongon, sai na marujung do namin Anak ni Jolma in songon na tarsurat in, tapi bursik ma halak na mangondoskon Anak ni Jolma in. Rahanan ma ambit ulang tubuh jolma na sonai ai!”

Mungkah ni Horja Banggal Na Pansing

(Mat. 26:26-29; Luk. 22:14-20; 1 Kor. 11:23-25)

²² Jadi sanggah na mangan ai sidea, ibuat Jesus ma ruti, ipasu-pasu ma, ipartopik anjaha ibere ma hubani sidea, lanjar ihatahon, “Jalo hanima ma, daging-Ku do on!”

²³ Dob ai ibuat ma panginuman, anjaha dob ihatahon tarima kasih, ibere ma ai bani sidea, gabe haganup ma sidea minum hunjai.

²⁴ Lanjar ihatahon ma bani sidea, “Daroh-Ku do on, daroh parpadanan in, na niduruskon mangkopkop buei halak.

²⁵ Na sintong tumang do na Huhatahon on bannima: Seng anjai inumon-Ku be humbani buah ni hayu anggur in das hubani ari ai, ijai ma inumon-Ku na baru ibagas Harajaon ni Naibata.”

Ilumbahon Jesus Pamorsouon ni si Petrus

(Mat. 26:30-35; Luk. 22:31-34; Joh. 13:36-38)

²⁶ Jadi dob idodingkon sidea doding puji-pujian ai, laho ma sidea hu Dolog Jetun.

²⁷ Jadi nini Jesus ma hubani sidea, “Haganup do hanima laho sangsi Bangku songon na tarsurat ai, ‘Bogbogan-Ku ma parmahan in, gabe mambur merap ma biribiri in.’

²⁸ Tapi dob puho Ahu humbani na matei lobeian-Ku ma hanima hu Galilea.”

²⁹ Jadi ihatahon si Petrus ma hu bani, “Age ganup sidea sangsi, tapi ahu lang.”

³⁰ Tapi nini Jesus ma hu bani, “Na sintong do na Huhatahon on bam: Saborngin on, sanggah lape martahuak dayok paduahalihon porsouonmu ma Ahu tolu hali.”

³¹ Tapi lambin igogohkon do mangkatahon, “Age pe ipamatei ahu rap pakon Ham, seng anjai parnalangonku Ham.” Lanjar sonai do hata ni sidea ganup.

Jesus i Getsemane

(Mat. 26:36-46; Luk. 22:39-53)

³² Das ma sidea bani sada ianan na margoran Getsemane. Ihatahon Jesus ma hubani susian-Ni, “Hundul ma hanima ijon, sanggah martonggo Ahu.”

³³ Dob ai iarahkon ma si Petrus, si Jakobus ampa si Johannes. Jadi mulai ma majangin anjaha bulinsah iahap.

³⁴ Jadi nini ma hubani sidea, “Pusok tumang do uhur-Hu, songon na matei do. Ijon ma hanima lobei soh anjaha puho!”

³⁵ Dob ai laho ma la dompak lobei otik, manrogop ma la i tanoh anjaha martonggo, andohar isalpuhon panorang ai hun Bani anggo tarbahren.

³⁶ Nini do, “Abba, Bapa, haganup do tarbahren Ham! Salpuhon Ham ma panginuman on hun Bangku, tapi sedo saguru rosuh ni uhur-Hu, uhur-Mu do!”

³⁷ Dob ai roh ma la, jadi modom do sidea jumpah-Si, gabe ihatahon ma hubani si Petrus, “O Simon modom do ho hape? Seng mangasup ho puho pala sajam?

³⁸ Puho ma hanima anjaha martonggo, ase ulang masuk hanima hubagas parlajouan. Ai rosuh do namin tonduy, tapi galek do daging.”

³⁹ Dob ai laho ma use la martonggo, lanjar hata nongkan ai do ihatahon.

⁴⁰ Jadi sanggah na roh ai la use, modom do sidea jumpah-Si, ai tartunduh tumang do mata ni sidea. Jadi seng ibotoh sidea be, aha hatahononni Bani.

⁴¹ Dob ai sanggah na roh la patoluhalihon, nini ma dompak sidea, “Nunutannima ope modom anjaha marsaran? Sungkup ma in! Domma jumpah panorangni! Tonggor ma, ondoskononkon ma Anak ni Jolma in hubagas tangan ni halak pardousa.

⁴² Jongjong ma hanima, laho ma hita! Tonggor ma, domma dohor sipantahihon Ahu!”

Tartangkap Tuhan Yesus

(Mat. 26:47-56; Luk. 22:47-53; Joh. 18:1-12)

⁴³ Mangkatahon ai ope la, mintor das ma si Judas, ai ma sahalak humbani na sapuluh dua ai, anjaha rap pakonsi buei do halak na marpodang, na marpukul-pukul, suruhan ni sintua ni malim, sibotoh surat ampa pangintuai-pangintuai.

⁴⁴ Tapi domma ipabotohkon sipantahihon ai hinan tanda bani sidea, nini, “Ia in na husummah, ai ma la. Tangkap nasiam ma la, anjaha pangkei-pangkei ma boan nasiam la!”

⁴⁵ Jadi daskonsi ia, mintor ijumpahkon ma Jesus, anjaha nini ma, “Rabbi!” Lanjar isummah ma la.

⁴⁶ Mardas tangan ma sidea Bani, lanjar itangkap ma la.

⁴⁷ Sada humbani na jongjong ijai ai manintak podangni, itampul ma juakjuak ni sintua ni malim ai, gabe mistak ma pinggolni.

⁴⁸ Jadi nini Jesus ma hubani sidea, “Songon na mandompakkon panamun do parroh nasiam on, marpodang anjaha marpukul-pukul, laho manangkap Ahu.

⁴⁹ Ari-ari do namin Ahu rap pakon nasiam i rumah panumbahan mangajari, seng itangkap nasiam Ahu! Tapi tene maningon saud do na tarsurat in.”

⁵⁰ Jadi ganup ma sidea manadingkon-Si, lanjar maporus.

⁵¹ Adong do sada garama, na marpakeian sanlambar hiou putih tumang, mangirikkon-Si. Itangkap sidea ma ia,

⁵² tapi ihalluskon ma hiouni ai, lanjar lintun seng marpakeian.

Jesus i Lobei ni Pangadilan

(Mat. 26:57-68; Luk. 22:63-71; Joh. 18:12-14; 19-24)

⁵³ Iboan halak ai ma Jesus hu lobei ni sintua ni malim, anjaha ganup sintua ni malim, pangintuai ampa sibotoh surat pe domma martumpu.

⁵⁴ Anjaha si Petrus pe iirikkon do la mandaoh-daoh hun pudi das hu alaman parbagas ni rumah ni sintua ni malim ai, jadi hundul ma ia ijai rap pakon upas-upas ai mandadang.

⁵⁵ Ia sintua ni malim ai ampa haganup Sanhedrin ai mangindahi hasaksian do dompak Jesus, ase boi marutang hosah la, tapi seng dong jumpah sidea.

⁵⁶ Ai buei namin na manaksihon ladung dompak-Si, tapi seng mardomu na sinaksihon ni sidea ai.

⁵⁷ Deba jongjong manaksihon ladung dompak-Si, nini ma,

⁵⁸ “Itangar hanami do la mangkatahon, ‘Parsedaon-Ku do rumah panumbahan, na pinauli ni tangan on, anjaha ibagas tolu ari pajongjongon-Ku ma na legan, na so pinauli ni tangan.’”

⁵⁹ Tapi age pe sonai, seng mardomu hasaksian ni sidea ai.

⁶⁰ Dob ai jongjong ma sintua ni malim ai hu tongah-tongah, nini ma manungkun Jesus, “Ai seng balosan-Mu na sinaksihon ni sidea ai dompak-Ho?”

⁶¹ Tapi sip do Jesus, seng ibalosi age aha. Jadi isungkun sintua ni malim ai ma la use, nini ma, “Kristus do Ho tongon, Anak ni Sipujion in?”

⁶² Jadi nini Jesus ma, “Ahu ma tongon! Anjaha idahon nasiam do Anak ni Jolma in hundul i siamun ni Hagogohon in, anjaha roh marhitei hambun na i langit.”

⁶³ Jadi irigatkon sintua ni malim ai ma pakeianni, anjaha nini ma, “Naha, porlu ope banta saksi?”

⁶⁴ Domma ibogei nasiam pangapasion-Ni ai bani Naibata. Naha do ninuhur nasiam? Gabe ganup ma sidea manguhumi-Si, ase marutang hosah.

⁶⁵ Deba humbani sidea manijuri-Si, manutup bohi-Ni anjaha mamastapi-Si, lanjar ihatahon, “Manjahai ma Ham!” Anjaha juakjuak ai mambogbogi-Si do.

Pamorsouon ni si Petrus

(Mat. 26:69-75; Luk. 22:54-62; Joh. 18:15-18; 25-27)

⁶⁶ Sanggah i toruh si Petrus, i alaman parbagas ai, roh ma sada juakjuak naboru ni sintua ni malim ai,

⁶⁷ anjaha dob ididah si Petrus mandadang, ikawahkon ma ia, lanjar nini ma, “Ho pe nongkan rap do ampa Jesus, halak Nasaret ai!”

⁶⁸ Tapi iporsou si Petrus do, nini ma, “Seng hubotoh anjaha seng huarusi na hinatahonmu in.” Lanjar luar ma ia hu alaman lobei-lobei, anjaha martahuak ma dayok.

⁶⁹ Ididah juakjuak naboru ai ma ia, anjaha nini ma use hubani halak na jongjong ijai, “Hasoman ni sidea do age halak on!”

⁷⁰ Tapi mamorsou ma ia use. Lang sadiha dokah nari nini halak na jongjong ai ma hubani si Petrus, “Tongon do hasoman ni sidea, ai halak Galilea do ho!”

⁷¹ Jadi ipapai ma dirini anjaha marbijai, “Lang hutandai halak, na hinatahon nasiam ai!”

⁷² Dob ai mintor martahuak ma dayok paduahalihon. Jadi idingat si Petrus ma na hinatahon ni Jesus hu bani, “Tolu hali do parnalangonmu Ahu, sanggah lape martahuak dayok paduahalihon.” Jadi tangis-tangis ma ia.

Jesus i Lobei ni si Latus

(Mat. 27:1-26; Luk. 23:1-25; Joh. 18:28-19; 16)

15 ¹ Jadi siangkonsi ari mambahen parriahan ma sintua ni malim rap pakon pangintuai-pangintuai, sibotoh surat ampa Sanhedrin. Isangkut sidea ma Jesus lanjar iboan, ipadas hubani si Latus.

² Isungkun si Latus ma Ia, “Atene, raja ni halak Jahudi do Ham?” Jadi nini ma mambalosisi, “Songon na hinatahonmu ai ma tongon!”

³ Buei do tukas-tukas ni sintua ni malim hu Bani.

⁴ Jadi iulaki si Latus ma manungkun-Si, “Ai seng balosan-Mu ai? Tonggor ma buei ni tukas-tukas ni sidea ai dompak Ham!”

⁵ Tapi aha pe lang ibalosi Jesus, pala longang uhur ni si Latus.

⁶ Tapi sanggah ari pesta, somal do ipaluah bani sidea sada halak na tartutup domu hubani pangindoan ni sidea.

⁷ Anjaha adong ma sada halak na margoran si Barabas, na rap tartutup pakon halak panggeori, na mambunuhjolma sanggah na geor ai.

⁸ Jadi naik ma halak na mabuei ai mangindohon, ase ibahen bani sidea songon na somal.

⁹ Balos ni si Latus hubani sidea, “Dear do uhur nasiam, ase hupaluah bani nasiam Raja ni Jahudi in?”

¹⁰ Ai ibotoh, halani subil ni uhur do, ase iondoskon sintua ni malim la.

¹¹ Tapi ijuljul sintua ni malim ai ma halak na mabuei ai, ase si Barabas ipaluah bani sidea.

¹² Jadi nini si Latus ma use mambalosi sidea, “Anggo sonai, aha ma ipindo uhur nasiam sibahenon-Ku bani halak, na ginoran on: Raja ni Jahudi?”

¹³ Idilohon sidea ma, “Parsilangkon ma la!”

¹⁴ Jadi nini si Latus ma, “Ai aha do na jahat ibahen?” Tapi lambin igogohi sidea ma mandilohon, “Parsilangkon ma la!”

¹⁵ Tapi halani sihol mambuat uhur ni halak na mabuei ai si Latus, gabe ipaluah ma si Barabas, dob hona lonsingan, iondoskon ma Jesus, ase iparsilangkon.

Hona Pahiri Jesus

(Mat. 27:27-31; Joh. 19:1-3)

¹⁶ Tentara ai pe iboan ma la hu emper paruhuman ai (ai ma Pretorion), anjaha ipatumpu sidea ma ganup pasukan tentara ai hujai.

¹⁷ Isorungkon sidea ma hu Bani baju sigenger, anjaha idandan ranting-ranting na marduri-duri bahen sortali, lanjar inahkon sidea ma ai bani ulu ni Jesus.

¹⁸ Dob ai roh ma sidea marsombah-Si, nini ma, “Tabi ma Bamu, Raja ni Jahudi!”

¹⁹ Ipukuli ma ulu-Ni bani tolong, itijuri ma la, anjaha manrogop ma sidea laho manombah-Si.

Jesus Iparsilangkon

(Mat. 27:31-44; Luk. 23:26-43; Joh. 19:16-24)

²⁰ Ase dob ipahiri-hiri sidea la, itanggali sidea ma hun Bani baju sigenger ondi, anjaha isorungkon ma pakeian-Ni hinan. Dob ai iboan ma la hu darat, laho mamparsilangkon-Si.

²¹ Jadi ipaksa sidea ma sada halak, na montas hunjai roh hun juman, laho mamorsan silang ai, ai ma si Simon na hun Kirene, bapa ni si Alexander ampa si Ropus.

²² Iboan sidea ma la hu Golgata (artini Partangkurakan).

²³ Ibere sidea ma hu Bani anggur na marsaor mir, tapi seng ijalo.

²⁴ Dob iparsilangkon sidea la, ibagi sidea ma hiou-Ni, marjomput na sinurat do sidea, laho mambagi ai.

²⁵ Pukul siah do iparsilangkon sidea la.

²⁶ Tarsurat do i atas-Ni pasal halani, ase iuhum ia, ai ma, "Raja ni Jahudi."

²⁷ Rap pakon Jesus adong do iparsilangkon dua halak panrampok, sada hampit siamun-Ni, na sada nari hampit sampilou-Ni.

²⁸ Gabe jumpah ma na hinatahon ni surat in, "Tahrira do la bani halak parjahat."

²⁹ Jadi irisai sagala na montas ai ma la, iupir-upirhon sidea ma uluni, lanjar nini bei, "Pe Ho, na sihol parsedahon rumah panumbahan in, anjaha pajongjongkonsi use ibagas tolu ari!

³⁰ Paluah ma diri-Mu, anjaha susur ma Ho tongon humbani hayu parsilang in!"

³¹ Sonai homa do pangapasi ni sintua ni malim ampa sibotoh surat, nini ma, "la halak na legan ipaluah, hape diri-Ni sandiri seng tarpaluah-Si.

³² Ale Kristus, Raja ni Jahudi! Susur ma Ho tongon humbani hayu parsilang in, ase ididah hanami, ase porsaya hanami!" Anjaha hasoman-Ni na tarsilang ai pe mangapasi do.

Parmatei ni Jesus

(Mat. 27:45-56; Luk. 23:44-49; Joh. 19:28-37)

³³ Mulai pukul sapuluh dua das hu pukul tolu sogop ma na golap hu sab tanoh in.

³⁴ Anjaha pukul tolu gogoh ma Jesus mandilohon, “Eloi, Eloi, lama sabakhtani!” Artini, “Ale Naibatang-Ku, Naibatang-Ku, mase ma tadingkonon-Mu Ahu?”

³⁵ Mambogei ai nini halak na jongjong ai ma, “Bogei ma, idilo do si Elias!”

³⁶ Jadi laho ma sada halak mambuat limut, isornobkon ma ai bani na migar, anjaha ilongkotkon ma ai bani tolong laho mambere-Si minum. Nini sidea ma, “Torih hita ma, atap roh do si Elias patuadkon-Si!”

³⁷ Marsora na gogoh ma Jesus, jadi rotap ma hosah-Ni.

³⁸ Marigat ma tirei na i rumah panumbahan ai, bolah dua hun datas hu toruh.

³⁹ Dob ididah kopala ni tentera, na jongjong ijai, sonai parmateri-Ni, nini ma, “Tongon do Anak ni Naibata halak on!”

⁴⁰ Manatap-natap do humbani na daoh piga-piga naboru songon si Maria Magdalena, si Maria inang ni si Jakobus siposonan, ambah ni ai inang ni si Josep, ampa si Salome.

⁴¹ Sanggah i Galilea ope la, domma iirikkon sidea la, laho marugas hu Bani. Buei do parinangon na legan na tangkog pakon-Si hu Jerusalem.

Tartanom Jesus

(Mat. 27:57-61; Luk. 23:50-56; Joh. 19:38-42)

⁴² Jadi dob bod ari, anjaha halani parugasonkon ma ai, ai ma ari marayak ari Sabat,

⁴³ roh ma si Josep par Arimatea, pagori ni pangadilan tinggi, sada halak na sangap, na paima-imahon Harajaon ni Naibata, ibaranihon ma dirini laho hu lobei ni si Latus mangindo bangkei ni Jesus.

⁴⁴ Longang do si Latus manangar na dob matei Jesus, gabe idilo ma kopala ni tentara ai anjaha isungkun ma ia, atap na dob dokah ma Jesus matei.

⁴⁵ Ase dob ibotoh pasal ai humbani kopala ni tentara ai, iondoskon ma bangkei ni Jesus bani si Josep.

⁴⁶ Ibolu si Josep ma hiou linen na alus, anjaha ipasusur ma bangkei ai humbani parsilang ai. Ibaluti ma la bani hiou linen ai, anjaha ipatibal hubagas tanoman na dob iliang, dob ai igulang ma sada batu bani babah ni tanoman ai.

⁴⁷ Ididah si Maria Magdalena ampa si Maria inang ni si Joses do, atap huja do la itibalhon.

Tanoman na Lumei

(Mat. 28:1-10; Luk. 24:1-12; Joh. 20:1-10)

16¹ Ase dob salpu ari Sabat ai, iboli si Maria Magdalena pakon si Maria inang ni si Jakobus ampa si Salome ma minak na misbou, laho maminaki Jesus.

² Jadi girah sogod, bani ari parlobei dob Sabat ai, laho ma sidea hu tanoman ai, bani poltak ni mata ni ari.

³ Nini sidea ma samah sidea, “Ise ma manggulang batu ai banta hun babah ni tanoman ai?”

⁴ Anjaha sanggah na mangkawah sidea, ididah sidea ma na dob igulang batu ai, borat tumang do batu ai.

⁵ Imasuki sidea ma tanoman ai, jadi ididah sidea ma sada garama, marpakeian na lopak, hundul hampit siamun, gabe mabiar tumang ma sidea.

⁶ Tapi nini ma dompak sidea, “Ulang nasiam mabiar! Ipindahi nasiam do Jesus na hun Nasaret, na dob pinarsilangkon ai. Domma puho la, seng ijon be la. Tonggor nasiam ge ianan hatibalan-Ni on hinan!

⁷ Tapi laho ma nasiam, patugah nasiam ma bani susian-Ni ampa bani si Petrus, ‘Lobeian-Ni do nasiam hu Galilea, songon na dob hinatahon-Ni hinan bani nasiam!”

⁸ Sidea pe luar ma hun tanoman ai, hitir-hitir anjaha tarsonggot. Halani mabiar sidea seng ipatugah sidea ai atap hubani ise pe.

Ipatuduhkon Jesus Diri-Ni bani si Maria Magdalena

(Mat. 28:9-10; Joh. 20:14-18)

⁹ Dob puho la girah sogod, bani ari parlobei ni Minggu ai, ipataridahkon ma diri-Ni parlobei hubani si Maria Magdalena, hun bani do iusir ijia pitu setan.

¹⁰ Ia pe laho ma patugahkon ai hubani halak na mangkasomani Jesus hinan, na marhoru anjaha tangis ai.

¹¹ Tapi dob ibogei sidea, na dob mulak manggoluh la anjaha ipataridahkon diri-Ni bani si Maria Magdalena, seng dong porsaya sidea.

Ipatuduhkon Jesus Diri-Ni bani Susian-Ni

¹² Dob ai ipataridahkon ma use diri-Ni ibagas rupa na legan hubani sua halak humbani sidea, sanggah laho sidea hu huta na legan.

¹³ Jadi laho ma sidea patugahkon na masa ai bani na legan ai, tapi seng porsaya age sidea.

¹⁴ I pudini ai ipataridahkon ma diri-Ni bani na sapuluh sada ai, sanggah na hundul sidea mangan. Ipinsang ma sidea halani hurang porsaya sidea anjaha hengkenng uhur ni sidea, ai seng porsaya sidea bani halak na mangidah-Si, dob puho la.

Parsuruh ni Jesus bani Susian-Ni hu Sab Dunia on**Parnaik-Ni**

¹⁵ Dob ai nini ma hubani sidea, “Laho ma hanima hu sab dunia on, ambilankon hanima ma Ambilan Na Madear in bani sagala na tinompa.

¹⁶ Na porsaya anjaha tardidi dapotan haluahon, tapi na so porsaya hona uhum do!

¹⁷ Anjaha on ma tanda na mangihut bani na porsaya: Marhitei goran-Ku usiron ni sidea do sibolis, anjaha marsahap na baru do sidea.

¹⁸ Jomputon ni sidea do ulog, anjaha age pe iinum rasun hamatean, seng pala mahua sidea, tampeihonon ni sidea do tanganni bani na boritan gabe malum ma sidea.”

¹⁹ Ia Tuhan Jesus, dob marsahap ia pakon sidea, tarangkat ma hu nagori atas, anjaha hundul ma i siamun ni Naibata.

²⁰ Tapi laho ma anggo sidea mangambilankon Ambilan Na Madear in, huja-huja pe. Iurupi Tuhan in do sidea, anjaha ipatotap do ambilan ni sidea ai marhitei tanda na mangihut ai.

Lukas

Lobei ni Hata

1 ¹ Domma buei namin halak na manlajou manuratkon barita ni na masa, na tarjadi i tongah-tongahta,

² songon na pinadas hu banta marhitei sidea na mangidah ai humbani mungkahni, anjaha na dob gabe juakjuak bani Hata in;

³ anjaha ahu pe huputuskon do uhurhu manuratkon ai jozor bamu, ale Teopilus, na pinarsangapan, dob lobei hupareksa ganupan ai humbani mungkahni,

⁴ ase ibotoh ham hasintongan ni sagala pahara, na dob niajarhon bamu.

Tugah-tugah Pasal Partubuh ni si Johannes Pandidi

⁵ Sanggah si Herodes raja i tanoh Judea, adong ma sada malim humbani golongan ni si Abia, na margoran si Sakaria, ampa parinangonni, boru Aron, na margoran si Elisabet.

⁶ Pintor do sidea haduasi i lobei ni Naibata, anjaha iparlahouhon sidea do titah ampa aturan ni Tuhan in, seng dong sipandangan.

⁷ Seng dong anak bani sidea, ai na lambang do si Elisabet, anjaha domma matua sidea haduasi.

⁸ Jadi masa ma, sanggah si Sakaria, mangihutkon horin ni golonganni mandalankon horja hamalimon i lobei ni Naibata,

⁹ gabe ia ma masuk hu rumah ni Tuhan in manutung dahupa, dob marjomput na sinurat sidea mangihutkon hasomalan ni malim.

¹⁰ I darat do anggo halak na mabuei ai martonggo sanggah panorang manutung dahupa ai.

¹¹ Jadi taridah ma hubani malekat ni Tuhan in, jongjong hampit siamun ni anjapanjap pardahupaan ai.

¹² Tarsonggot ma si Sakaria mangidah ai anjaha mabiar.

¹³ Tapi nini malekat ai ma hu bani, “Ulang ho mabiar, ale Sakaria, ai domma hona tangihon tonggomu; tubuhkonon ni parinangonmu ma bam sada anak, anjaha bahen ma goranni si Johannes.

¹⁴ Malas ma uhurmu anjaha marmegah-megah, anjaha buei do halak na marmalas ni uhur halani partubuhni ai.

¹⁵ Ai bangga do ia i lobei ni Tuhan in. Seng siinum anggur ampa sagala minuman na koras ia, anjaha gokan ni Tonduy Na Pansing do ia humbani partapaan nari.

¹⁶ Buei do anak ni Israel pasuangonni bani Tuhan, Naibata ni sidea.

¹⁷ Anjaha ia ma parlobei ni Tuhan ibagas tonduy ampa hagogohon ni si Elias, laho pasuangkon uhur

ni bapa bani anakni, ampa uhur na so ra mambalosi hubani uhur na bonar, laho pasirsirhon bani Tuhan in sada bangsa na torsa.”

¹⁸ Jadi nini si Sakaria ma bani malekat ai: “Hunja ma botohonku ai? Ai domma matua ahu, anjaha parinangonku pe domma matua.”

¹⁹ Nini malekat ai ma mambalosisi, “Si Gabriel do ahu, na jongjong i lobei ni Naibata, isuruh do ahu marsahap pakon ho, ampa mamboan ambilan malas ni uhur on bam.

²⁰ Tapi longah ma ho, seng tarbahen ho be marsahap das bani ari parmasa ni ai, halani na so porsaya ai ho bani hatangkin, ai ma na sihol sipamasaon bani panorangni.”

²¹ Ia halak na mabuei ai, sai paima-imahon do bani si Sakaria, anjaha longang do sidea, mase sonai dokahni ia i rumah panumbahan ai.

²² Dob luar ia, seng be boi ia marsahapkon sidea, gabe mangahap ma sidea, na dob adong do nididahni i rumah panumbahan ai. Marusihan mando ia bani sidea, tapi anggo ia lanjar longah ma.

²³ Ase dob gok panorangni marugas, mulak ma ia hu rumahni.

²⁴ Seng piga dokah nari boratan rumah ma si Elisabet, parinangonni ai; marponop-ponop ma ia lima bulan dokahni.

²⁵ Nini, “Pambahen ni Tuhan do on bangku, sanggah na kinawahkon-Ni ai ahu, laho mambuat habadoronku i lobei ni halak.”

Tugah-tugah Pasal Partubuh ni Jesus

²⁶ Salpu onom bulan isuruh Naibata ma Malekat Gabriel hu sada huta i tanoh Galilea, na margoran Nasaret,

²⁷ marayak sada anak boru, tunangan ni sada dalahi, na margoran si Josep, humbani ginompar ni si Daud; si Maria do goranni.

²⁸ Masuk ma malekat ai marayaksi, anjaha nini ma, “Tabi ma bamu, ale na niidopan! Ihasomani Tuhan do ham!”

²⁹ Tapi tarsonggot do ia pasal hata ai, anjaha iparuhurhon do, atap aha do arti ni hata tabi ai.

³⁰ Jadi nini malekat ai ma hu bani, “Ulang ma mabiar ham Maria, ai dapotan idop ni uhur do ham humbani Naibata.

³¹ Tonggor ma, boratan rumah ma ham anjaha tubuhan anak; bahen ma goran-Ni Jesus.

³² Banggal do la use, goranon do la Anak ni Sitimbulan in; bereon ni Naibata do Bani paratas ni si Daud, bapa-Ni ai.

³³ Rajaan-Ni do ginompar ni si Jakob sadokah ni dokahni, anjaha seng dong ujung ni Harajaon-Ni ai.”

³⁴ Dob ai nini si Maria ma hubani malekat ai, “Sonaha ma parjadi ni ai, ai seng dong hutanda dalahi?”

³⁵ Jadi nini malekat ai ma mambalosisi, “Sogopan ni Tonduy Na Pansing ma ham, anjaha linggoman ni hagogohon ni Sitimbulan in; halani ai Na Pansing do goranon na sihol tubuh in, Anak ni Naibata.

³⁶ Anjaha tonggor ma, si Elisabet pe, sindohormu ai, na dob targoran lambang, domma boratan rumah, paonom bulankon ma nuan.

³⁷ Ai seng dong na so boi bani Naibata.”

³⁸ Jadi ihatahon si Maria ma, “Tonggor ma, jabolon ni Tuhan in do ahu. Sai saud ma hu bangku songon na hinatahonmu in!” Dob ai itadingkon malekat ai ma ia.

Itohu si Maria si Elisabet

³⁹ Bani panorang ai laho ma si Maria, ipapodas ma laho hu tanoh pardologan ai, hu sada huta na i Juda.

⁴⁰ Masuk ma ia hu rumah ni si Sakaria, anjaha itabi ma si Elisabet.

⁴¹ Mambogei tabi ni si Maria ai mangunsal ma na etek-etek, na ibagas partapaanni ai, jadi gok Tonduy Na Pansing ma si Elisabet.

⁴² Marsora na gogoh ma ia, lanjar nini ma, “Ham do na pinasu-pasu i tongah-tongah ni parinangon, anjaha na pinasu-pasu do na pinarorotmu in.

⁴³ Mase ma masa on bangku, inang ni Tuhanku roh marayak ahu?

⁴⁴ Ai tonggor ma, ijin das sora ni tabimu ai bani pinggolhu, mintor mangunsal do dakdanak, na ibagas boltokku, halani malas ni uhurni.

⁴⁵ Martuah ma ham, halani ihaporsayai ham, na maningon saud do na hinatahon ni Tuhan bamu!”

⁴⁶ Jadi nini si Maria ma, “Ipatimbul uhurhu do Tuhan in!

⁴⁷ Marmegah-megah do tonduyhu mangidah Naibata, Sipaluah ahu.

⁴⁸ Ai itatap do haetekon ni jabolon-Ni on. Tonggor ma, ai olat ni on parhatuahon ni sagala sundut ma ahu.

⁴⁹ Ai bangga do na binahen ni Pargogoh in bangku. Na Pansing do goran-Ni ai.

⁵⁰ Ai marsundut-sundut do idop ni uhur-Ni bani na mangkabiari-Si.

⁵¹ Hagogohon do ihorjahon tangan-Ni; mambur merab do ibahen sigijang maruhur.

⁵² Ipaturun do siparkuasa humbani paratas ni sidea, tapi ipatimbul do halak na etek.

⁵³ Na madear do igoki bani na loheian, tapi halak na bayak lumei do ipalaho.

⁵⁴ Iurupi do Israel, juakjuak-Ni in, mardingat idop ni uhur-Ni ai,

⁵⁵ songon na hinatahon-Ni bani ompungta, hubani si Abraham ampa hubani ginomparni sadokah ni dokahni.”

⁵⁶ Hira-hira tolu bulan do si Maria marianan rap pakon si Elisabet, dob ai mulak ma ia hu rumahni.

Partubuh ni si Johannes Pandidi

⁵⁷ Jadi gok ma panorang bani si Elisabet, ase tubuhan tuah ia, gabe itubuhkon ma sada anak.

⁵⁸ Dob ibogei romban rumahni ampa sindohorni, na dob maridop ni uhur banggal Tuhan in hu bani, marmalas ni uhur ma sidea rap pakonsi.

⁵⁹ Bani ari pauluhkon roh ma sidea, laho manunat na etek-etek ai; ibahen sidea ma goranni si Sakaria mangihutkon goran ni bapani.

⁶⁰ Tapi nini inangni ai ma mambalosi, “Lang ai, si Johannes do goranni bahenon!”

⁶¹ Jadi nini sidea ma, “Seng dong na margoran sisonai sindohormu!”

⁶² Marusihan ma sidea mangindo humbani bapani, atap ise do goranni bahenon ipangindo uhurni.

⁶³ Jadi ipangindo ma panuratan, isuratkon ma, “Si Johannes do goranni!” Jadi longang ma sidea ganup.

⁶⁴ Anjaha mintor mungkab ma pamanganni, suang parsahapni, anjaha marsora ma ia mamuji Naibata.

⁶⁵ Jadi mabiar ma ganup romban rumahni, anjaha isahap-sahapkon halak do na masa ai i sab pardologan Juda.

⁶⁶ Anjaha ganup na manangar ai iparuhurhon do barita ai, nini sidea ma, “Na gabe aha ma holi nani dakdanak ai? Ai ihasomani tangan ni Tuhan do ia.”

Doding Puji-pujian ni si Sakaria

⁶⁷ Jadi gok Tonduy Na Pansing ma si Sakaria, bapani ai, gabe manjahai ma ia, nini ma,

⁶⁸ “Pinuji ma Naibata ni Israel, halani itohu do bangsa-Ni anjaha ibahen partobusni.

⁶⁹ Ipajongjong do banta tanduk haluahon i rumah ni si Daud, juakjuak-Ni ai,

⁷⁰ songon na hinatahon-Ni marhitei pamangan ni nabi-Ni na susi in humbani sapari nari, ai ma:

⁷¹ Paluahon-Ni do hita humbani munsuhta, ampa humbani tangan ni sagala na marsogam ni uhur banta;

⁷² idopan-Ni do bapanta, anjaha ingaton-Ni do padan-Ni na mapansing ai.

⁷³ Ai ma bulawan-Ni, na binulawankon-Ni bani si Abraham, bapanta ai,

⁷⁴ paboa bereon-Ni do hu banta, ase hita, dob marhaluahon humbani tangan ni munsuhta, seng marhabiaran boi marugas i lobei-Ni,

⁷⁵ ibagas hapansingon ampa hapintoron, sadokah hita manggoluh.

⁷⁶ Ia ho, ale ambia, goranon do ho nabi ni Sitimbulan, ai parlobei ni Tuhan in do ho, laho patureihon dalan-Ni,

⁷⁷ laho mambere bani bangsa-Ni habotohon pasal haluahon marhitei hasasapan ni dousa ni sidea,

⁷⁸ halani idop ni uhur ni Naibatanta do mambahen roh sinalsal hun datas marayak hita,

⁷⁹ laho manondangi halak na hundul ibagas hagolapan ampa linggom ni hamatean, anjaha patuduhkon langkahta bani dalan hadameion.”

⁸⁰ Ia dakdanak ai lambin banggal do anjaha margogoh ibagas tonduy; anjaha sai i halimisan do ia das bani panorang talar ia bani bangsa Israel.

Partubuh ni Jesus

2 ¹ Jadi roh ma ijia parentah humbani Kesar Augustus, ase isuratkon sagalajolma na ibagas gomgomanni.

² Panuratan na parlobei ma ai, sanggah si Kerenius manggomgomi tanoh Siria.

³ Jadi misir ma haganup, ase isuratkon, ganup hu huta hasusuranni bei.

⁴ Misir ma homa si Josep hun Galilea, hun huta Nasaret, laho hu Judea, hu huta ni si Daud, na margoran Betlehem, halani hun marga ampa humbani ginompar ni raja Daud ia.

⁵ Laho ma ia pasuratkon dirini rap pakon si Maria, tunanganni ai, na dob boratan rumah ai.

⁶ Anjaha sanggah na ijai sidea, jumpah ma panorangni tubuhan tuah ia.

⁷ Jadi itubuhkon ma anak bunga tubuhn, ibaluti ma bani ampan, anjaha ipatibal bani panggagatan, halani seng dong ianan bani sidea i rumah parbornginan.

⁸ Jadi adong ma parmahan marborngin i sampalan na bani ianan ai, manjagai pinahan ni sidea.

⁹ Jadi roh ma sada malekat marayak sidea, anjaha marsinalsal ma sangap ni Tuhan inggot sidea, gabe mabiar tumang ma sidea.

¹⁰ Tapi nini malekat ai ma hubani sidea, "Ulang mabiar hanima! Tonggor ma, ai ambilan malas ni uhur banggal do huboan bannima, parulihan ni ganup bangsa.

¹¹ Ai domma tubuh bannima saborngin on, i huta ni si Daud, Sipaluah in, in ma Kristus Tuhan in!

¹² On ma partinandaan bannima: Jumpahonnima do sada na etek-etek, ibaluti bani ampan, tibal bani panggagatan."

¹³ Jadi sompong adong ma hasoman ni malekat ai, buei bala parnagori atas, ipuji sidea ma Naibata, nini ma,

¹⁴ "Hasangapon ma bani Naibata na i babou, damei ma i tanoh on banijolma hinarosuhkon-Ni in."

¹⁵ Dob laho malekat ai humbani sidea dompak nagori atas, nini parmahan ai ma samah sidea,

“Laho ma hita hu Betlehem mengidah na masa ai, na pinabotohkon ni Tuhan in banta.”

¹⁶ Jadi podas ma sidea laho hujai, anjaha jumpah sidea ma tongon si Maria ampa si Josep ampa Dakdanak ai ibagas panggagatan.

¹⁷ Ase dob ididah sidea la, ipatugah sidea ma sahap na dob ihatahon bani sidea pasal Dakdanak ai.

¹⁸ Anjaha haganup na manangar ai, longang bei do pasal na hinatahon ni parmahan ai bani sidea.

¹⁹ Ia si Maria iparimbagaskon do haganup hata ai, anjaha ipingkir-pingkiri ibagas uhurni.

²⁰ Mulak ma parmahan ondi, ipasangap anjaha ipuji sidea do Naibata halani haganup na tinangar ampa na nididah ni sidea, songon na dob hinatahon hinan bani sidea.

Tarsunat Jesus

Iboan Ia hu Rumah Panumbahan

²¹ Dob jumpah ari pauluhkon ai ma panorang parsunatonkon Bani, jadi ibahen ma goran-Ni: Jesus, songon panggoran ni malekat ai paima solat la.

²² Ase dob gok panorang pangurasion Bani magihutkon aturan ni si Musa, iboan sidea ma la hu huta Jerusalem, laho mangondoskon-Si bani Tuhan in,

²³ songon na tarsurat ibagas titah ni Tuhan in,
“Sagala dalahi bunga tubuh ni inangni, maningon pansing do goranon bani Tuhan in,”

²⁴ lanjar mamboan galangan, songon na niaturhon ibagas titah ni Tuhan in, ai ma dua kuhuy atap dua anak ni asas.

²⁵ Jadi adong ma sada halak i Jerusalem, na margoran si Simeon, halak na bonar anjaha na daulat, na paima-imahon Sipangapoh na bani Israel; marianan do Tonduy Na Pansing bani.

²⁶ Anjaha domma ipabotohkon Tonduy Na Pansing bani, na so idahonni hamatean, anggo seng palobei ididah Kristus ni Tuhan in.

²⁷ Jadi roh ma ia hu rumah panumbahan ijuljul Tonduy ai. Anjaha sanggah na iboan namatoras ni Jesus Dakdanak ai hubagas laho mambahen hu Bani mangihutkon adat na niaturhon ni titah ai,

²⁸ jadi iabing si Simeon ma Dakdanak ai, ipuji ma Naibata, nini ma,

²⁹ “Lopas Ham ma sonari Tuhan jabolon-Mu misir ibagas damei, songon na hinatahon-Mu in,

³⁰ ai domma ididah matangku haluahon na hun Bamu,

³¹ na pinasirsir-Mu i lobei ni sagala bangsa,

³² sada Panondang, na laho manondangi sipajuh begu-begu, anjaha hasangapon bani bangsa-Mu halak Israel.”

³³ Jadi longang ma uhur ni bapa-Ni pakon inang-Ni mambogei hatani ai, ai ma pasal Na Etek-etek ai.

³⁴ Anjaha ipasu-pasu si Simeon ma sidea, nini ma bani si Maria, inang-Ni ai, “Tonggor ma, na tinaktakkon do on gabe pardabuhan ampa parjongjongan bani buei Israel, anjaha gabe tanda silawanon.

³⁵ Anjaha ho pe tolpusan ni podang do tonduymu; masa pe ganupan ai, ase talar pingkiran ni buei uhur.”

³⁶ Anjaha adong do homa sada nabi naboru, na margoran si Hanna, boru ni si Penuel, humbani marga Aser. Domma matua ia, anjaha pitu tahun do ia marparamangon, dob laho.

³⁷ Domma mabalu ia, anjaha ualuh puluh ompat tahun ma umurni. Seng meret ia hun rumah panumbahan ai, sai marpuasa anjaha martonggo do ia mangidangi Naibata arian pakon borngin.

³⁸ Roh do ia homa bani panorang ai, ipuji ma Naibata anjaha isahap-sahapkon do pasal-Si bani haganup na mangkasiholhon haluahon ni Jerusalem.

³⁹ Ase dob idobkon sidea haganupan ai mangihutkon titah ni Tuhan in, mulak ma sidea hu Galilea, hu Nasaret, huta ni sidea ai.

⁴⁰ Ia Dakdanak ai lambin banggalni do, lambin margogoh anjaha maruhur tumang, anjaha ihasomani idop ni uhur ni Naibata do ia.

Jesus Sanggah Marumur Sapuluh Dua Tahun i Rumah Panumbahan

⁴¹ Anjaha siap tahun do laho namatorias-Ni hu Jerusalem marpesta Paskah.

⁴² Jadi dob marumur la sapuluh dua tahun, rap tangkog ma sidea songon na somal hu pesta ai.

⁴³ Dob salosei sidea na marpesta ai sanggah na mulak ai sidea, tading do Jesus, Dakdanak ai, i Jerusalem, seng pamotohan ni namatorias-Ni.

⁴⁴ Iagan sidea, na dob rap la pakon odoran ni sidea, jadi idalani sidea ma parsadarian, laho mangindahi-Si i tengah-tengah ni sindohor ampa na tinanda.

⁴⁵ Jadi halani lang jumpah, mulak ma sidea hu Jerusalem, laho mangindahi-Si.

⁴⁶ Dob salpu tolu ari, jumpah sidea ma la i rumah panumbahan, hundul i tengah-tengah ni guru-guru, manangihon hata ni sidea lanjar manungkun-nungkun.

⁴⁷ Longang do haganup na mambogei-Si, halani torus ni uhur-Ni ampa balos-Ni.

⁴⁸ Jadi dob ididah sidea la, tarsonggot ma sidea. Nini inang-Ni ma hu Bani, “Mase ma sonin pambahen-Mu, Anaha? Tonggor ma, rusak do uhurhu pakon bapa-Mu mangindahi Ho!”

⁴⁹ Jadi nini ma hubani sidea, “Mase ma pala pindahan nasiam Ahu? Ai lang ibotoh nasiam, na patut do Ahu ibagas rumah ni Bapang-Ku?”

⁵⁰ Tapi seng iarusi sidea hata na hinatahon-Ni ai bani sidea.

⁵¹ Jadi mulak ma la rap pakon sidea hu Nasaret, anjaha pambalosi do la bani sidea. Iparimbagaskon inang-Ni do ganup na masa ai ibagas uhurni.

⁵² Anjaha lambin tambah do hapentaran ni Jesus sonai angkula-Ni, anjaha iharosuhkon Naibata ampa jolma do la.

Parambilanon ni si Johannes Pandidi

(Mat. 3:1-12; Mrk. 1:2-8; Joh. 1:6-28)

3¹ Pasapuluh lima tahunkon dob manrajai Kesar Tiberias, sanggah si Pontius Latus manggomgomi Judea, sanggah si Herodes manrajai i Galilea, si Pilipus saninani ai i Iturea ampa Taronitis, si Lusania i nagori Abilene,

² sanggah hasintuamalimon ni si Hannas ampa si Kayapas, roh ma hata ni Naibata hubani si Johannes, anak ni si Sakaria, i halimisan.

³ Jadi laho ma ia hu sab nagori na bani bah Jordan, anjaha iambilankon ma ambilan hamubahon ni uhur, laho pasasapkon dousa,

⁴ songon na tarsurat ibagas buku panjahaion ni Nabi Jesayas, “Sora ni na mardilo-dilo i halimisan, ‘Parsirsir ma dalan bani Tuhan in, pintor ma bahen sidalananni!

⁵ Maningon tambusan do sagala habungan anjaha parondohon sagala dolog ampa buntu-buntu;

maningon papintoron do na mareluk-eluk, anjaha pados-doson do dalan na marholbung-holbung.

⁶ Anjaha idahon ni sagala jolma ma haluahon na humbani Naibata!”

⁷ Jadi ihatahon ma bani halak na mabuei ai na roh padidihon dirini hu bani, “Nasiam ginompar ni ulog! Ise do na mangajarhon bani nasiam, boi nasiam maluah humbani ringis na sihol roh in?

⁸ Parbuahkon nasiam ma buah, tanda ni na dob mubah uhur! Ulang das ihatahon nasiam ibagas uhur nasiam, ‘Si Abraham do bapanami!’ Ai huhatahon ma bani nasiam, tarjadihon Naibata do anak ni si Abraham humbani batu on.

⁹ Domma tampei hapak bani urat ni hayu. Sirobohon do sagala hayu na so madear parbuahni, anjaha sigijigkonon do hubagas apuy.”

¹⁰ Jadi isungkun na mabuei ai ma ia, “Aha ma sibahenonnami?”

¹¹ Nini ma mambalosi sidea, “Ise na marbaju dua, ibere ma sada bani na so marbaju, anjaha na marnah sipanganon pe, sonai ma ibahen.”

¹² Roh do age sijalo sohei padidihon dirini, nini sidea ma, “Guru, aha do sibahenonnami?”

¹³ Jadi ihatahon ma bani sidea, “Ulang ma tunggu nasiam lobih humbani na niaturhon bani nasiam!”

¹⁴ Dihut do tentara roh manungkunsi, “Ia hanami, aha do sibahenonnami?” Jadi ibalosi ma, “Ulang ma sunsahi, anjaha ulang ma dalankon nasiam odoh-

odoh age bani ise! Hasonangkon nasiam ma gaji nasiam!”

¹⁵ Halani ibagas na paima-imahon do bangsa ai, anjaha ganup sidea sungkun-sungkun uhurni ibagas pasal si Johannes, atap ia do Kristus ai,

¹⁶ gabe nini si Johannes ma mambalosi sidea haganup, “Ahu do tongon mandidihon nasiam bani bah, tapi na roh ma sigogohan hun bangku, anjaha mananggali tali ni sipatu-Ni pe seng talup ahu. Didihonon-Ni ma bani nasiam Tonduy Na Pansing pakon apuy.

¹⁷ Bani tangan-Ni do pamurpuran, anjaha paborsihon-Ni ma pardogeian-Ni; patumpuon-Ni ma omei hu sopou-Ni, tapi tutungon-Ni do anggo lamlamni hubagas apuy na so ra miloh.”

¹⁸ Buei ope na legan itarsingati bani bangsa ai, laho mangambilankon Ambilan Na Madear bani sidea.

¹⁹ Ia raja Herodes, hona hata do ia ibahen si Johannes, halani si Herodias, parinangon ni saninani, ampa halani sagala hajahaton na hinorjahon ni si Herodes ai.

²⁰ Tapi tambah ni ganupan ai, ipamasuk ma si Johannes hubagas tutupan.

Tardidi Jesus

(Mat. 3:13-17; Mrk. 1:9-11; Joh. 1:32-34)

²¹ Sanggah na tardidi halak na mabuei ai haganup, dihut do Jesus tardidi. Jadi, sanggah martonggo la, mungkab ma langit.

²² Anjaha susur ma Tonduy Na Pansing marrupa asas hu Bani, anjaha tarbogei ma sora hun langit, na mangkatahon, “Ho do Anak haholongan-Ku, marosuh do uhur-Hu Bam!”

Partuturan ni Jesus

(Mat. 1:17)

²³ Ia Jesus, sanggah mulai mangajari la, adong ma umur-Ni kira-kira tolu puluh tahun, anjaha mangihutkon pingkiran ni halak, la, ai ma anak ni si Josep, anak ni si Eli,

²⁴ anak ni si Mattat, anak ni si Lepi, anak ni si Melki, anak ni si Janai, anak ni si Josep,

²⁵ anak ni si Mattatias, anak ni si Amos, anak ni si Nahum, anak ni si Hesli, anak ni si Naggai,

²⁶ anak ni si Maat, anak ni si Mattatias, anak ni si Semein, anak ni si Josek, anak ni si Joda,

²⁷ anak ni si Johanan, anak ni si Resa, anak ni si Serubabel, anak ni si Sealtiel, anak ni si Neri,

²⁸ anak ni si Melki, anak ni si Addi, anak ni si Kosam, anak ni si Elmadam, anak ni si Er,

²⁹ anak ni si Josua, anak ni si Elieser, anak ni si Jorim,
anak ni si Mattat, anak ni si Lepi,
³⁰ anak ni si Simeon, anak ni si Juda, anak ni si Josep,
anak ni si Jonam, anak ni si Eliakim,
³¹ anak ni si Melea, anak ni si Menna, anak ni si
Mattata, anak ni si Natan, anak ni si Daud,
³² anak ni si Jessei, anak ni si Obed, anak ni si Boas,
anak ni si Salmon, anak ni si Nahasson,
³³ anak ni si Aminadab, anak ni si Admin, anak ni si
Arni, anak ni si Hesron, anak ni si Peres, anak ni si
Juda,
³⁴ anak ni si Jakob, anak ni si Isak, anak ni si
Abraham, anak ni si Tera, anak ni si Nahor,
³⁵ anak ni si Seruk, anak ni si Rehu, anak ni si Peleg,
anak ni si Heber, anak ni si Sala;
³⁶ anak ni si Kainan, anak ni si Arpaksad, anak ni si
Sem, anak ni si Noak, anak ni si Lamek,
³⁷ anak ni si Metusala, anak ni si Henok, anak ni si
Jared, anak ni si Mahaleel, anak ni si Kenan;
³⁸ anak ni si Enos, anak ni si Set, anak ni si Adam,
anak ni Naibata.

Hona Lajou Jesus

(Mat. 4:1-11; Mrk. 1:12-13)

4¹ Gok Tonduy Na Pansing mulak ma Jesus
hun Bah Jordan. Ibobai Tonduy ai ma la hu
halimisan,

²anjaha ilajou sibolis ma la ompat puluh ari dokahni. Seng dong mangan atap aha pe la bani panorang ai, jadi dob salpu ai, malohei ma iahap.

³Jadi nini sibolis ai ma hu Bani, “Anggo tongon do Ham Anak ni Naibata, hatahon Ham ma batu on gabe ruti!”

⁴Tapi ibalosi Jesus ma ia, “Tarsurat do seng pitah ruti tumang hagoluan ni jolma.”

⁵Dob ai ibobai ma la bani ianan na gijang, anjaha ibagas na sangkidop mata ipatuduhkon ma Bani sagala harajaon na i dunia on.

⁶Lanjar ihatahon sibolis ai ma hu Bani, “Bamu pe hubere ganup kuasa on ampa hasangaponni ai, ai domma bangku iondoskon ai, anjaha hubere do ai hubani halak harusuh ni uhurhu.

⁷Anggo ra Ham marsombah bangku, Bamu ma haganupan in.”

⁸Jadi nini Jesus ma mambalosisi, “Tarsurat do, ‘Tuhan Naibatamu do sisombahonmu, anjaha Sahalaksi do hansa sibalosanmu!’”

⁹Dob ai ibobai ma la hu Jerusalem, ipajongjong ma la bani anjung-anjung ni rumah panumbahan ai, anjaha nini ma hu Bani, “Anggo Anak ni Naibata do Ham, lumpatkon Ham ma hunjon hu toruh.

¹⁰Ai tarsurat do, ‘Hatahonon-Ni do malekat-Ni halani Ho, ase ijagai Ho,

¹¹anjaha tatang-tatangan ni sidea ma Ho, ase ulang tarantuk nahei-Mu bani batu!” ’

¹² Tapi nini Jesus ma mambalosisi, “Ihatahon do homa, ‘Seng bulih lajouonmu Tuhan Naibatamu!’”

¹³ Jadi, dob salpu idalankon sibolis ganup parlajouan ai, itadingkon ma la, paima jumpah panorangni use.

Jesus Mulai Marhorja i Galilea

Pangajarion-Ni i Nasaret

(Mat. 13:55-58; Mrk. 6:1-6)

¹⁴ Jadi mulak ma Jesus hu Galilea ibagas hagogohon ni Tonduy ai, anjaha sar ma barita-Ni bani ganup nagori ai inggot.

¹⁵ Mangajari do la bani parguruan ni sidea, anjaha haganup do mamuji-Si.

¹⁶ Jadi roh ma la hu Nasaret, huta hagodangan-Ni ai; mangihutkon hasomalan-Ni, masuk ma la hu parguruan ai sanggah ari Sabat, anjaha jongjong ma la laho mambasa.

¹⁷ Jadi ibere ma hu Bani buku ni Nabi Jesayas; iungkab ma ai, gabe jumpah-Si ma na tarsurat sonon,

¹⁸ “Tonduy ni Tuhan in do sogop hu Bangku, ai iminaki do Ahu, laho mangambilankon Ambilan Na Madear bani halak na masombuh. Isuruh do Ahu laho patugahkon haluahon bani na tartutup ampa mambahen marpangidah use na mapitung, laho paluahkon halak na niodoh-odoh,

¹⁹ ampa patugahkon tahun paridop ni uhuran ni Tuhan in.”

²⁰ Dob ai igulung ma buku ai, ipaulak ma ai bani siparugas, lanjar hundul. Jadi nono ma hu Bani ganup mata ni halak na i parguruan ai.

²¹ Jadi ihatahon ma hubani sidea, “Sadari on ma jumpah na tarsurat in, na binogei nasiam in.”

²² Haganup do sidea marhatongonkon, anjaha longang bei do sidea manangar hata na mantin, na luar humbani pamangan-Ni ai, gabe nini sidea ma, “Ai lang anak ni si Josep do Ia?”

²³ Jadi nini ma hubani sidea, “Hatahonon nasiam do namin Bangku hata ni limbaga on, ‘Ale doktor, pamalum dirimu! Sagala na binogeinami pasal na binahen-Mu i Kapernaum, lanjar ai ma bahen ijon, i huta hagodangan-Mu on!’”

²⁴ Tapi nini ma, “Sintong do na Huhatahon on bani nasiam, seng adong nabi na marsangap i nagorini sandiri.

²⁵ Ibagas hasintongan Huhatahon ma bani nasiam, buei do namin naboru na mabalu i tanoh Israel bani panorang ni si Elias, sanggah na tartutup langit ai tolu tahun onom bulan, sanggah na masa lohei maningting i tanoh on,

²⁶ tapi seng isuruh si Elias atap hubani ise sidea, tapi hu Sarpat do, na i nagori Sidon, hubani sada naboru na mabalu.

²⁷ Anjaha buei do na gadamon i Israel bani panorang ni Nabi Elisa, tapi seng dong humbani sidea na gabe malum, pitah si Naeman halak Siria ai do.”

²⁸ Jadi marah tumang ma haganup na i parguruan ai, dob ibogei sidea ai,

²⁹ gabe jongjong ma sidea, iusir sidea ma la hu darat ni huta ai, das hu salansah ni dolog, hajongjongan ni huta ni sidea ai, laho manggulangkon-Si hu toruh.

³⁰ Tapi laho ma la, montas hun tongah-tongah ni sidea.

Ipamalum Sada Halak na Setanon i Kapernaum

(Mrk. 1:21-28)

³¹ Jadi tuad ma la hu Kapernaum, ai ma sada huta i Galilea, anjaha iajari ma sidea sanggah ari Sabat.

³² Jadi longang ma sidea pasal pangajarion-Ni ai, ai marhidorat do hata-Ni ai.

³³ Anjaha adong do i parguruan ai sada halak partonduy setan na mabutak. Gogoh-gogoh do ia mardilo-dilo,

³⁴ “Ham Jesus na hun Nasaret! Ai roh do Ham sihol mangagou hanami? Hubotoh do atap ise Ham, ai ma Na Pansing ni Naibata!”

³⁵ Tapi isorgang Jesus ma ia, nini ma, “Sip anjaha luar ma hun bani!” Jadi isampakkon setan ai ma ia hu tongah-tongah, anjaha luar ma ia hun bani, tapi seng mahua ia ibahen.

³⁶ Jadi longang ma uhur ni sidea ganupan, anjaha nini sidea ma samah sidea, “Hata na sonaha do on? Ipaksa do tonduy na mabutak marhitei kuasa ampa gogoh, gabe mandarat do.”

³⁷ Jadi sar ma barita-Ni ai bani ganup ianan, bani nagori na inggot hujai.

**Ipamalum Jesus Anturang ni si Petrus
ampa na Boritan na Legan**

(Mat. 8:14-17; Mrk. 1:29-39)

³⁸ Laho ma Jesus hun parguruan ai, anjaha masuk ma la hu rumah ni si Simon. Ia anturang ni si Simon, parah do panei-paneini, gabe itarsingatkon sidea ma pasalsi hu Bani.

³⁹ Jadi roh ma la jongjong hu lambungni, anjaha mangonai hata ma la bani panei-panei ai, gabe laho ma panei-panei ai hun bani. Mintor jongjong ma ia, marugas bani sidea.

⁴⁰ Dob sundut mata ni ari, ipamboan halak ma hu Bani na boritan ni bei, na marbagei-bagei niarouni. Itampeihon ma tangan-Ni bani ganup sidea, laho pamalum sidea.

⁴¹ Kaluar do setan-setan humbani buei halak, lanjar mardilo-dilo, “Anak ni Naibata do Ham!” Tapi isorgangi do sidea, anjaha lang ilopas sidea marsahap, halani ibotoh sidea, la do Kristus ai.

⁴² Tapi dob siang ari, laho ma la hu darat bani ianan na lungun. Ipindahi halak na mabuei ai do la, anjaha

dob jumpah sidea, sihol do jolomon ni sidea la, ase ulang laho la humbani sidea.

⁴³ Tapi Nini ma hubani sidea, “Maningon ambilankonon-Ku do homa Ambilan Na Madear pasal Harajaon ni Naibata age bani huta na legan ai, ai halani ai do ase isuruh Ahu.”

⁴⁴ Jadi laho ma la marambilan bani sagala parguruan ni halak Jahudi.

Panjalaon ni si Petrus

(Mat. 4:18-22; Mrk. 1:16-20)

5 ¹ Bani na sahali, sanggah jongjong Jesus i topi ni Tao Galilea, anjaha halak na mabuei ai marurup roh hu Bani, laho manangar hata ni Naibata,

² ididah ma dua parau i topi pasir ni tao ai; ia pardengke ai domma luar mamurihi jala ni sidea.

³ Jadi imasuki ma sada parau ai, si Simon do ompunganni ai, anjaha ipangindo ma hu bani, ase ilugahon parau ai ganggang otik hun pasir. Hundul do anggo la mamodahi na mabuei ai hun parau ai.

⁴ Ase dob maronti la marambilan, nini ma hubani si Simon, “Lugahon ma hubani sibagasan, anjaha sampakkon hanima ma jalamana, ase jumpahan hanima.”

⁵ Jadi nini si Simon ma mambalosi, “Guru, torus do hanami saborngin on loja manjalai, tapi seng dong dapotan; tapi mangusagahkon hata-Mu ra do ahu mangamburhon jala ai.”

⁶ Jadi dob ibahen sidea sonai, gabe dapot sidea ma buei dengke, pala marigat jala ni sidea.

⁷ Jadi ihilap sidea ma hasoman ni sidea na bani parau na legan ai, ase roh sidea mangurupi. Roh ma sidea, anjaha igoki sidea ma haduasi parau ai, pala narus-narus harom.

⁸ Mangidah ai si Simon Petrus, manrogop ma ia i lobei ni nahei ni Jesus anjaha nini ma, “Laho ma Ham hun bangku Tuhan, ai halak pardousa do ahu!”

⁹ Ai longang do uhurni ampa uhur ni hasomanni halani dengke na dapot sidea ai,

¹⁰ sonai homa si Jakobus ampa si Johannes, anak ni si Sebedeus, hasoman ni si Simon ai. Jadi nini Jesus ma hubani si Simon, “Ulang ho mabiar! Hunjon hujanan gabe sijalajolma ma ho.”

¹¹ Dob itogu sidea parau ai hu darat, itadingkon sidea ma haganupan ai, anjaha iirikkon sidea ma la.

Ipamalum Jesus Sada Halak na Gadamon

(Mat. 8:1-4; Mrk. 1:40-45)

¹² Sanggah bani sada huta Jesus, adong ma sada halak na parah gadamni. Dob ididah Jesus manrogop ma ia mangindohon, “Ham Tuhan, anggo ra Ham, tarpasusi Ham do ahu!”

¹³ Jadi isurdukkon Jesus ma tangan-Ni, ijamah ma ia, anjaha nini ma, “Ra do Ahu, borsih ma ho!” Jadi mintor magou ma gadam ai hun bani.

¹⁴ Ipandang Jesus ma ia, ase ulang ipatugah-tugah ai bani halak. Tapi ihatahon do hu bani, “Laho ma ho, patuduhkon ma dirimu hubani malim. Dob ai galangkon ma na tinitahkon ni si Musa, halani na dob borsih ho, bahen hasaksian bani sidea!”

¹⁵ Tapi lambin sar ma barita-Ni, gabe roh ma martumpu buei halak, laho manangar hata-Ni ampa laho mangindo hamalumon humbani naborit ni sidea.

¹⁶ Tapi surut ma la bani ianan na lungun, anjaha martonggo ma la ijai.

Ipamalum Sada Halak na Oyangan

(Mat. 9:1-8; Mrk. 2:1-12)

¹⁷ Bani na sadari mangajari do la, anjaha adong do hundul ijai Parisei ampa guru siajarhon titah, ai ma na roh humbani huta-huta na i Galilea ampa Judea, age na hun Jerusalem. Anjaha marhorja do kuasa ni Tuhan in Bani laho pamalumkon.

¹⁸ Anjaha tonggor ma, roh do piga-piga halak mamboan sada halak na oyangan, na tibal bani podomanni; iuji sidea do mamboansi hubagas, laho patibalhonsi i lobei ni Jesus.

¹⁹ Tapi seng tarpamasuk sidea ia halani ponjotni, gabe ipanaik sidea ma tayub ai. lungkab sidea ma ai, anjaha itantan sidea ma tibal ia bani podomanni, sangkan hu lobei ni Jesus.

²⁰ Mangidah haporsayaon ni sidea ai Jesus, nini ma, “Domma sasap dousamu ambia!”

²¹ Jadi marpingkir-pingkir ma sibotoh titah ampa Parisei ai ibagas uhur ni sidea, nini ma, “Ise do on? Sipahiri Naibata do on! Ise boi manasap dousa sobali Naibata tumang?”

²² Tapi ibotoh Jesus do na ibagas uhur ni sidea ai, jadi nini ma mambalosi sidea, “Aha do ipinghiri nasiam ibagas uhur nasiam?”

²³ Na ija do urahan hatahonon, ‘Domma sasap dousamu’ atap hatahonon ‘Jongjong ma anjaha mardalan ma ho?’

²⁴ Tapi ase ibotoh nasiam, na markuasa do Anak ni Jolma in i tanoh on manasap dousa,” nini ma hubani na oyangon ai, “Ahu mangkatahon bam, jongjong ma ho, boan ma podomanmin, anjaha mulak ma ho hu rumahmu!”

²⁵ Jadi mintor jongjong ma ia ididah sidea; iangkat ma podomanni ai, mulak ma ia hu rumahni, anjaha ipapuji-puji do Naibata.

²⁶ Gabe longang ma haganup, anjaha ipuji sidea ma Naibata. Gok biar ma sidea, nini ma, “Halongangan na so onnga masa do ididah hanami sadari on.”

Pandiloon bani si Lepi

(Mat. 9:9-13; Mrk. 2:13-17)

²⁷ Dob salpu ai luar ma la, anjaha ididah ma sada halak sijalo sohei, na margoran si Lepi, hundul i kantor sohei. Nini ma hu bani, “Irikkon Ahu!”

²⁸ Jadi jongjong ma ia, itadingkon ma haganup, laho mangirikkon-Si.

²⁹ Ibahen si Lepi ma pesta mangan-mangan na banggal bani Jesus i rumahni, anjaha buei do sijalo sohei ampa halak na legan rap mangan pakon sidea ijai.

³⁰ Jadi marungut-ungut ma Parisei ampa sibotoh surat pasal ai, nini ma hubani susian-Ni, “Mase ma mangan anjaha minum nasiam rap pakon sijalo sohei ampa pardousa?”

³¹ Jadi nini Jesus ma mambalosi sidea, “Seng porlu doktor bani na jorgit, bani na boritan do!

³² Seng roh Ahu mandilo halak parpintor, tapi halak pardousa do, ase ipaubah uhurni.”

Mase Lang Marpuasa Susian ni Jesus?

(Mat. 9:14-17; Mrk. 2:18-22)

³³ Tapi nini sidea ma hu Bani, “Gati do marpuasa anjaha martonggo susian ni si Johannes, sonai homa susian ni Parisei, tapi mangan minum do anggo susian-Mu.”

³⁴ Jadi nini Jesus ma hubani sidea, “Ai tarbahen do marpuasa hasoman-hasoman ni siparunjuk, sadokah rap ope siparunjuk ai ampa sidea?

³⁵ Tapi na roh ma panorangni, buaton ma siparunjuk ai humbani sidea, jadi bani panorang ai ma sidea marpuasa.”

³⁶ Anjaha ihatahon ma sada limbaga bani sidea, “Seng dong halak na ra manrigatkon hiou na baru, laho mandungkapkon ai bani hiou na buruk. Anggo sonai rigat ma hiou na baru ai, anjaha seng homa langkub pandungkap na baru ai bani na buruk ai.

³⁷ Anjaha seng homa ipausei halak anggur na baru hubani gusi hulingkuling na buruk; anggo ibahen sonai, pultakkonon ni anggur na bayu ai ma iananni ai, gabe mambur ma anggur ai, anjaha iananni ai pe seda ma.

³⁸ Tapi anggur na baru hubagas gusi hulingkuling na baru do ipausei ai.

³⁹ Anjaha na somal manginum anggur na madokah seng ipangindo na baru, ai nini do, ‘Dear do anggur na madokah ai.’”

Iapiti Jesus Susian-Ni na Mamutiki Gandum Sanggah Ari Sabat

(Mat. 12:1-8; Mrk. 2:23-28)

6¹ Bani sada ari Sabat, sanggah na mamontas la hun juma, ipamputikkon susian-Ni ma buyur-

buyur ni gandum, ipuyu-puyu ma ai, lanjar ipangan ma.

² Jadi dong ma deba halak Parisei na mangkatahon, “Mase ma ihorjahon nasiam na so patut bani ari Sabat?”

³ Nini Jesus ma mambalosi sidea, “Seng onga ibasa nasiam aha ibahen si Daud sanggah loheian ia, ia ampa hasomanni saodoran?”

⁴ Masuk do ia hu rumah ni Naibata, ibuat anjaha ipangan do ruti galangan, ai ma na so bulih panganon ni atap ise sobali malim, anjaha ibere do deba ai bani hasomanni.”

⁵ Lanjar ihatahon ma bani sidea, “Tuhan ni ari Sabat do homa Anak ni Jolma in.”

Ipamalum Jesus Partangan na Matei Salopah Sanggah Ari Sabat

(Mat. 12:9, 14; Mrk. 3:1-6)

⁶ Bani ari Sabat na legan masuk ma Jesus hu rumah parguruan laho mangajari. Adong do ijai sada halak, matei tangan siamunni.

⁷ Longgopi sibotoh surat ampa Parisei ai do la, ai ma atap ra do la pamalum naborit sanggah ari Sabat, ase adong dalan ni sidea mangaduhon-Si.

⁸ Tapi ibotoh Jesus do pingkiran ni sidea ai, jadi nini ma dompak partangan na matei ai, “Jongjong ma ho hu tongah-tongah on!” Jadi jongjong ma ia hujai.

⁹ Jadi nini Jesus ma dompak sidea, “Aha do na patut horjahonon sanggah ari Sabat, mambahen na madear do atap mambahen na jahat, pagoluhkon hosah do atap parsedahon ai?”

¹⁰ Jadi sanggah na kinawahkon-Ni ai sidea haganup inggot, nini ma dompak halak ai, “Pagostong ma tanganmin!” Ibahen ma sonai, gabe malum ma tanganni ai.

¹¹ Marah tumang ma sidea, lanjar manriah ma sidea atap aha do sibahenon dompak Jesus.

Ipilih Jesus Apostel na Sapuluh Dua ai

(Mat. 10:1-4; Mrk. 3:7-9)

¹² Bani panorang ai tangkog ma Jesus hu dolog laho martonggo; layur saborngin ai martonggo la hubani Naibata.

¹³ Anjaha dob siang ari, idilo ma susian-Ni ai, anjaha ipilih ma sapuluh dua humbani sidea, anjaha igoran ma sidea apostel,

¹⁴ ai ma: si Simon, na ginoran si Petrus, ampa si Andreas saninani ai; si Jakobus ampa si Johannes; si Pilippus ampa si Bartolomeus;

¹⁵ si Mateus ampa si Tomas; si Jakobus anak ni si Alpeus ampa si Simon, na margoran Zelot;

¹⁶ si Judas anak ni si Jakobus, ampa si Judas Iskariot, na gabe sipartahi-tahi ai.

Ipamalum Jesus Sagala na Boritan na Roh hu Bani

(Mat. 12:15, 16; Mrk. 3:7-12)

¹⁷ Jadi tuad ma la pakon sidea, lanjar jongjong ma la bani sada ianan hanopan, rap pakon buei susian-Ni ampa buei halak hun sab Judea ampa Jerusalem, hun topi laut ni Tirus ampa Sidon,

¹⁸ na marrohan, laho manangar hata-Ni ampa ase ipamalum sidea humbani naborit ni sidea; ipamalum do age na niodar-odar ni setan.

¹⁹ Haganup na mabuei ai sihol manggiut-Si, ai luar do gogoh hun Bani, na pamalum haganup.

Parambilanon ni Jesus bani Halak na Mabuei

Hata Parhatuahon ampa Papa-papa

(Mat. 5:1-12)

²⁰ Jadi sanggah na kinawahkon-Ni ai susian-Ni ai, nini ma, “Martuah ma hanima na masombuh, ai bannima do Harajaon ni Naibata!

²¹ Martuah ma hanima na loheian nuan, ai sipabosuron do hanima! Martuah ma hanima na tangis nuan, ai tartawa do hanima use!

²² Martuah ma hanima anggo ihasogamkon anjaha itulak halak hanima, anggo irisai hanima anjaha iambukkon gorannima, halani sambor ninuhurni, halani Anak ni Jolma in.

²³ Malas ma uhurnima bani panorang ai anjaha marolob-olob, ai tonggor ma, bangga do upahnima i nagori atas, ai sonai do ibahen bapa ni sidea bani nabi-nabi.

²⁴ Tapi bursik ma hanima na bayak, ai domma ijalo hanima apoh-apoh na bannima.

²⁵ Bursik ma hanima na marbosur-bosur nuan, ai loheian ma hanima use. Bursik ma hanima na tartawa nuan, ai tangis anjaha doruh-doruh ma hanima use.

²⁶ Bursik ma hanima, anggo haganup halak mamuji-muji hanima, ai sonai do ibahen bapa ni sidea bani nabi sipakulah-kulah ai.”

Titah Holong ni Uhur na Baru

(Mat. 5:43-48)

²⁷ “Tapi Huhatahon ma bani nasiam sipanangi-nangi: Haholongi nasiam ma munsuh nasiam, na madear ma bahen nasiam bani na marsogam ni uhur bani nasiam.

²⁸ Pasu-pasu nasiam ma na mamurai nasiam, tonggohon nasiam ma na mandoruni nasiam.

²⁹ Anggo adong na mamastap huyummu, tarehon ma na salopah nari; anjaha anggo ibuat hioumu, ulang engkar age baju-bajumu.

³⁰ Sagala na mangindo hun bamu, bere; anjaha halak na dob mambuat barangmu, ulang tunggu ai hun bani.

³¹ Songon na pinindo nasiam bahenon ni halak bani nasiam, sonai ma bahen nasiam bani sidea.

³² Ai anggo ihaholongi nasiam na marholong ni uhur bani nasiam, aha ma ulih nasiam ijai? Ai age pardousa ihaholongi do na marholong ni uhur bani sidea.

³³ Anjaha anggo ibahen nasiam na madear hubani sibahen na madear bani nasiam, aha ma ulih nasiam ijai? Ai age pardousa sonai do ibahen.

³⁴ Anjaha anggo papinjamkon nasiam bani halak, laho mangarapkon balas hun bani, aha ma ulih nasiam ijai? Ai halak sipardousa pe painjamkon do hubani hasomanni pardousa, anjaha ijalo do use ulak ni duitni.

³⁵ Tapi haholongi nasiam ma munsuh nasiam, bahen nasiam ma na madear, anjaha papinjamkon nasiam ma, ulang pala mangarapkon balos. Jadi bangga ma upah nasiam, gabe anak ni Sitimbulan in ma nasiam; ai layak do la, age bani halak, na so mambotoh martarima kasih ampa bani halak parjahat.

³⁶ Gabe paridop ni uhur ma nasiam, songon Bapa nasiam, paridop ni uhur in.”

Ulang Manguhum-uhumi ampa Patorih-torih Salah ni Halak na Legan

³⁷ “Ulang ma nasiam manguhum-uhumi, ase ulang hona uhum nasiam! Ulang ma nasiam mamapai,

ase ulang hona papa nasiam! Paluah nasiam, ase ipaluah nasiam!

³⁸ Bere nasiam ma, ase ibere bani nasiam! Parsuhatan na madear, na nionjat, na nidugur anjaha na pinajunjun bereonni bani abingan nasiam; ai parsuhatan, na sinuhatkon nasiam do, suhatkonon bani nasiam.”

³⁹ Ihatahon do homa limbaga on bani sidea, “Mintor tartogu na mapitung ma hasomanni na mapitung? Ai lang rap tarrobung ma sidea haduasi?

⁴⁰ Seng lobih susian marimbang guruni; tapi ganup, anggo gok ma parguruanni, dos ma ia songon guruni.

⁴¹ Mase ma pala patorih-torihanmu silbak-silbak na bani mata ni hasomanmu, hape tiang na bani matamu lang ididah ho?

⁴² Mase ma hatahononmu bani hasomanmu: Mahua huumpat lobei silbak-silbak na bani matamin, ambia, hape tiang na bani matamin lang ididah ho? Ee ho sipakulah-kulah, parlobei ma umpat tiang na bani matamin, dob ai pe, ase ididah ho torang sonaha pangumpatmu bani silbak-silbak na bani mata ni hasomanmu.”

Sonaha Hayu, Sonai do Buahni

⁴³ “Seng dong hayu na madear marbuahkon na bajan, barang hayu na bajan marbuahkon na madear.

⁴⁴ Ai humbani buahni do tartandai ganup hayu. Ai seng tarbuat jambu humbani tatada, anjaha seng tarbuat buah anggur humbani rimbang.

⁴⁵ Halak sidear uhur padaratkon na madear humbagas arta na madear na ibagas uhurni; anjaha halak na jahat padaratkon na jahat humbagas arta na jahat na ibagas uhurni. Ai in na manggoki uhur, ai do iluarhon pamangan.

⁴⁶ Mase ma ihatahon nasiam Bangku, ‘Tuhan, Tuhan! hape lang ihorjahon nasiam na Huhatahon?’”

Limbaga Pasal Rumah na Pinajonam bani Batu Gingging

(Mat. 7:24-27)

⁴⁷ “Sagala na roh hu Bangku, anggo ibogei hatang-Kin anjaha ihorjahon, Hupatugah ma bani nasiam usihanni ai:

⁴⁸ Usih do ia ai bani sada halak na pajongjong rumah, na mangkurak bagas anjaha na pajonamkon ai bani batu gingging. Marbanggal pe bah, anjaha idorab pe rumah ai, tapi seng tardugursi, halani toguh do ipajonam.

⁴⁹ Tapi na mambogei hatang-Kai, tapi seng idalankon, usih ma ai bani halak na pajongjong rumah bani tanoh, na seng maronjolan bani batu; idorab bah ai ma ai, gabe mintor marumbak ma, anjaha jangin do parrumbak ni rumah ai.”

Ipamalum Jesus Juakjuak ni Kopala Tentara i Kapernaum

(Mat. 8:5-13; Joh. 4:43-54)

7¹ Ase dob salpu ihatahon Jesus haganup hata-
Ni ondi bani na mabuei ai, masuk ma la hu
Kapernaum.

² Jadi adong ma ijai sada juakjuak ni kopala ni
tentara, na hinarga ni tuanni, boritan do ia, pala
mangkatarhatos.

³ Dob ibogei kopala ni tentara ai barita ni Jesus,
isuruh ma pangintuai ni halak Jahudi marayak-
Si, laho mangelek-elek-Si, ase roh la pamalum
juakjuakni ai.

⁴ Jadi dob das sidea bani Jesus, gomos ma pangajar-
ajari ni sidea Bani, nini ma, “Patut do tangihonon-
Mu ia.

⁵ Ai holong do uhurni bani bangsanta, anjaha ia do
na pajongjong parguruanta.”

⁶ Jadi laho ma Jesus rap pakon sidea. Tapi sanggah
lang daoh be la hun rumah ai, isuruh kopala ni
tentara ai ma hasomanni mangkatahon hu Bani,
“Tuhan, ulang pala loja Ham! Ai lang talup ahu,
masukanmu pala rumahku.

⁷ Halani ai do homa, ase seng talup huahap
ahu sandiri marayak Ham. Hatahon Ham ma
sangkababah hata gelah, ase malum juakjuakkai.

⁸ Ai halak na i toruh ni parentah do ahu, anjaha i toruhku pe adong do tentara. Anggo huhatahon bani na sada, 'Laho!' gabe laho do ia. Atap hubani na legan, 'Roh!' gabe roh do ia. Atap hubani juakjuakku, 'Bahen ai!' jadi ibahen do."

⁹ Mambogei ai longang ma Jesus, lanjar marhusor ma la marsahap bani halak na mabuei na mangirikkon-Si ai, "Huhatahon ma bani nasiam: Gari bani halak Israel, seng adong jumpah Ahu haporsayaon na sonon."

¹⁰ Jadi mulak ma hu rumah na sinuruh ai, anjaha domma malum jumpah sidea juakjuak ai.

Mulak Manggoluh Garama na i Huta Nain

¹¹ Dob salpu ai, laho ma la hubani sada huta na margoran Nain; susian-Ni do hasoman-Ni saodoran ampa bueijolma.

¹² Marayak horbangan ni huta ai sidea, tonggor ma, iusung halak ma hu darat sada halak na matei, ai ma anak ni sada puang-puang na mabalu; buei do singkuta ai manaruhkon.

¹³ Mangidah na mabalu ai Tuhan in, mabangor ma uhur-Ni, jadi ihatahon ma hu bani, "Ulang tangis ham!"

¹⁴ Lanjar idohori ma batang ai, ijamah ma, jadi sonto ma na mangusung ai, anjaha ihatahon ma, "Ale garama, Ahu mangkatahon bam, puho ma!"

¹⁵ Jadi hundul ma halak na dob matei ai, ipungkah ma marsahap, anjaha iondoskon ma ia bani inangni ai.

¹⁶ Gabe mabiar ma sidea haganup, anjaha ipuji sidea ma Naibata, nini ma, “Domma jongjong i tongah-tongahta sada Nabi Bolon, anjaha itatap Naibata do bangsa-Ni.”

¹⁷ Sar ma barita-Ni ai hu sab nagori Judea, ronsi hu ganup nagori na ingot ai.

Sungkun-sungkun ni si Johannes Pandidi

(Mat. 11:1-9)

¹⁸ Ibaritahon susian ni si Johannes ma ganupan ai hu bani.

¹⁹ Jadi idilo ma susianni dua halak hu lobeini, lanjar isuruh ma sidea marayak Tuhan in, laho manungkun hu Bani, “Ai Ham do na sihol roh in, atap na legan ope paimaonnami?”

²⁰ Ase dob das halak ai hu lobei-Ni, ihatahon sidea ma, “Isuruh si Johannes Pandidi do hanami marayak Ham, laho manungkun ai Ham do na sihol roh ai, atap na legan ope paimaonnami?”

²¹ Bani panorang ai, sanggah pamalumkon buei halak do la humbani bagei-bagei ni naborit, sitaronon ampa tonduy na jahat, anjaha buei do na mapitung marpangidah ibahen.

²² Ibalosi ma sidea nini ma, “Laho ma nasiam mambaritahon bani si Johannes na nididah ampa

na binogei nasiam: Na gabe marpangidah do na mapitung, mardalani na repat, gabe borsih na gadamon, marpanangar na nengel, mulak manggoluh na matei, Ambilan Na Madear iambilankon do bani halak na masombuh,

²³ anjaha martuah ma na so sangsi Bangku!”

²⁴ Anjaha dob laho suruhan ni si Johannes ai, itarsingati ma si Johannes bani halak na mabuei ai, “Aha do na sihol idahon nasiam, ase roh nasiam hu halimisan on? Arung-arung na niombus ni logou do?

²⁵ Na sihol mangidah aha do, ase luar nasiam? Halak parhiou na lampot do? Tonggor ma, i rumah bolon do siparhiou na jenges ampa sipangan na mantin-mantin.

²⁶ Na sihol mangidah aha do, ase luar nasiam? Nabi do? Ai ma tongon. Huhatahon ma bani nasiam, lobihan do ia humbani nabi.

²⁷ Ia do na hinatahon ni surat in, ‘Suruhon-Ku ma suruhan-Ku, parlobei-Mu, sipaturei dalan-Mu i lobei-Mu!’

²⁸ Huhatahon ma bani nasiam, seng dong na tinubuhkon humbani naboru sibanggalan marimbang si Johannes; tapi sietekan pe ibagas Harajaon ni Naibata, banggalan do ai hun bani.”

²⁹ Ia na mabuei ai haganup, na manangar ai, ampa sijalo sohei, pintor do Naibata iahap sidea, ai ijalo do pandidion humbani si Johannes.

³⁰ Tapi anggo halak Parisei ampa sibotoh surat itulak sidea do sura-sura ni Naibata na bani sidea, ai seng ra sidea padidihon dirini hu bani.

³¹ “Ase hubani ise ma pausihon-Ku halak na sasundut on? Usih hubani ise ma sidea?”

³² Usih do sidea hubani sakdanak na hundul i tiga, na marsidiloan: Isompul hanami do sarunei i lobeinima, tapi seng manortor hanima, ipabogei hon hanami do tangis-tangis, tapi seng tangis hanima.

³³ Ai roh do si Johannes Pandidi, na seng mangan ruti anjaha na seng minum anggur, hape ihatahon nasiam, ‘Na setanon do ia.’

³⁴ Roh do Anak ni Jolma in, na mangan anjaha minum, hape ihatahon nasiam, ‘Tonggor ma sipapangan magou ampa siparminum-minum, huan-huan ni sijalo sohei ampa pardousa.’

³⁵ Tapi gabe pintor do Hapentaran in marhitei haganup anak-anakni.”

Jesus Iminaki Sada Naboru Pardousa

(Mat. 26:7-13; Mrk. 14:3-9; Joh. 12:3-8)

³⁶ Dob ai iarahkon sada halak Parisei ma la mangan, jadi masuk ma la hu rumah ni Parisei ai, lanjar hundul ma ijai.

³⁷ Anjaha tonggor ma, roh ma sada naboru pardousa, pangisi ni huta ai, dob ibotoh na dob

hundul la i rumah ni Parisei ai; iboan do sada botol alabaster marisi minak na morum.

³⁸ Mariluh-iluh do ia roh hun pudi mandohori nahei ni Jesus; iarbahi ma nahei-Ni ai marhitei iluhni, iapusi ma ai marhitei jambulanni, isummah ma anjaha iminaki ma nahei-Ni ai marhitei minak na misbou ai.

³⁹ Mangidah ai, marpingkir ma Parisei na mangarahkon-Si ai hu rumahni, “Ambit nabi do halak on, tandaon-Ni do naboru na manjamah-Si on, anjaha botohon-Ni do parlahouni, ai pardousa do ia.”

⁴⁰ Jadi nini Jesus ma mambalosisi, “Ale Simon, adong do sihatahonon-Ku bamu.” Balosni, “Ham Guru, hatahon Ham ma!”

⁴¹ “Adong ma dua halak paridouan ni sada halak sipaanakkon duit; utang ni na sahalak lima ratus dinar, na sada nari lima puluh.

⁴² Halani seng targalar sidea ai, ibalihon ma utang ni sidua halak ai. Ise do humbani sidea siholongan uhurni bani?”

⁴³ Nini si Simon ma mambalosi, “Ninuhurhu, parutang sibuenan, na binalihon ai do.” Balos ni Jesus hu bani, “Sintong do timbanganmu ai.”

⁴⁴ Sanggah na nidompakkon-Ni ai naboru ai, nini Jesus ma dompak si Simon, “Ididah ham do naboru on? Roh do Ahu hu rumahmu, seng ibere ham bah pamurihi ni naheihu, tapi anggo ia, iluhni do

ibahen mangarbahi nahei-Hu anjaha iapusi bani jambulanni.

⁴⁵ Seng isummah ham Ahu, tapi anggo ia, masukkonsi Ahu, seng marparsaranan manummah nahei-Hu.

⁴⁶ Seng homa iminaki ham ulung-Ku, tapi anggo ia, iminaki do nahei-Hu bani minak na misbou.

⁴⁷ Halani ai Huhatahon ma bamu, ‘Domma sasap dousani na buei in, mambahen banggal holong ni uhurni. Halak na otik hona sasap dousani, otik do holong ni uhurni.’”

⁴⁸ Lanjar nini ma hubani naboru ai, “Domma sasap ganup dousamu ai!”

⁴⁹ Gabe nini hasomanni sapanganan ma samah sidea, “Ise do on, ase dihut ampa dousa isasap?”

⁵⁰ Ambahni ai ihatahon Jesus ma bani naboru ai, “Haporsayaonmu do na paluahkon ham. Mardamei ma ham mulak.”

Susian Naboru

8¹ Salpu ai ibontas Jesus ma sagala huta-huta ampa dusun laho marambilan, mamaritahon Harajaon ni Naibata. Na sapuluh dua ai do hasoman-Ni,

² sonai homa deba naboru, na dob pinamalum-Ni humbani tonduy na jahat ampa naborit, ai ma si Maria, na margoran si Magdalena, na tinadingkon ni pitu setan,

³ ampa si Johanna, parinangon ni si Kusa, sijolom anakkunsi ni si Herodes, ampa si Susanna ampa buei halak na legan, na mangurupi sidea marhitei na dong bani.

Limbaga Pasal Panabur ampa Artini

(Mat. 13:1-23; Mrk. 4:1-25)

⁴ Ase dob martumpu buei jolma anjaha marrohan hu Bani halak humbani huta-huta ai, nini ma marhitei limbaga,

⁵ “Laho ma sada halak panabur manaburhon bonih. Jadi sanggah na manabur ai ia, adong ma deba na madabuh hu dalan, gabe tardogei ma anjaha ipaguti manuk-manuk na i awang-awang.

⁶ Na deba madabuh bani batu, tapi dob tubuh, melus ma, halani lang marbah.

⁷ Na deba madabuh hu tongah-tongah ni parhupihupian; rap tubuh ma hupi-hupi ai pakon ai, gabe ipisat ma.

⁸ Ia na legan ai madabuh ma bani tanoh na madear, anjaha dob tubuh iparbuahkon ma saratus lompit.” Dob ihatahon sonai, idilohon ma, “Barang ise na marpinggol, na marpambogei, itangihon ma!”

⁹ Jadi dob isungkun susian ai, atap aha do arti ni limbaga ai,

¹⁰ gabe nini ma, “Ibere do bennima habotohon pasal rusia ni Harajaon ni Naibata, tapi bani halak

na legan pitah marhitei limbaga do, ase ulang ididah age pe ikawahkon, anjaha seng iarusi age pe ibogei.

¹¹ Anjaha on do arti ni limbaga ai: la bonih ai, ai ma hata ni Naibata.

¹² Anggo na bani dalan ai, ai ma na mambogei ai; dob ai roh ma sibolis, ibuat ma hata ai hun bagas uhur ni sidea, ase ulang porsaya anjaha maluah sidea.

¹³ Ia na bani batu ai, ai ma na marmalas ni uhur manjalo hata ai dob ibogei; tapi seng marurat ai, sangombas do sidea hansa porsaya, anjaha bani panorang parlajouan marbalik ma sidea.

¹⁴ Tapi anggo na madabuh hubani parhupi-hupian ai, ai ma na mambogei ai; tapi tarpisat do hata ai ibagas goluh ni sidea halani holsoh, habayakon ampa hisap-hisap ni goluh on, gabe seng saud matoras buahni.

¹⁵ Tapi anggo na bani tanoh na madear ai, ai ma na manimpan hata na binogeini ai ibagas uhur na bonar anjaha na madear, gabe saud ma marbuah ibagas sabar ni uhur.

¹⁶ Seng dong halak na mannahiti palita, dob ai irongkobkon tumba hujai, barang inahkon ai hu toruh ni podoman; hu parpalitaan do ibahen, ase ididah sagala na roh palita ai.

¹⁷ Ai seng dong na ponop, na so talar use; anjaha seng dong rusia na so tarbotoh use anjaha talar.

¹⁸ Halani ai, pangkei ma hanima, sonaha pambogeinima! Ai bani na marnadong, bereon ope bani, tapi na so marnadong, buaton ope humbani na adong ai bani, ninuhurni.”

Sindohor ni Jesus na Sintong

(Mat. 12:46-50; Mrk. 3:31-35)

¹⁹ Dob ai roh ma inang-Ni pakon anggi-Ni marayak-Si, tapi seng tarbahen sidea das hu lobei-Ni halani buei ni jolma.

²⁰ Jadi adong ma na patugahkon hu Bani, “Jongjong do i darat an inang ampa anggi-Mu; sihol idahon ni sidea do Ham.”

²¹ Tapi nini Jesus ma mambalosi sidea, “Ia inang-Ku ampa angging-Ku, ai ma na mambogei ampa na mangkorjahon hata ni Naibata.”

Ipaminop Jesus Tao

(Mat. 8:23-27; Mrk. 4:35-41)

²² Bani na sadari masuk ma la hu parau rap pakon susian-Ni, lanjar nini ma hubani sidea, “Dipari hita ma tao on!” Dob ai laho ma sidea.

²³ Sanggah na marparau ai sidea, tarpodom ma la. Roh ma ampilaos hu tao ai, gabe masuk ma bah hubagas parau ai, jadi tarsosak ma sidea.

²⁴ Ijumpahkon sidea ma la, nini sidea ma mamuhoi-Si, “Guru, Guru, magou ma hita.” Jadi dob puho la,

hona hata ma logou ampa bah na margilumbang ai ibahen, gabe soh ma anjaha minop.

²⁵ Tapi nini ma dompak sidea, “Ija do haporsayaonnima?” Mabiari do anggo sidea anjaha longang, anjaha nini sidea ma samah sidea, “Ise do nani Halak on? Logou ampa bah pe iparentah do, anjaha itangihon do la!”

Ipamalum Sada Halak na Setanon i Gerasa

(Mat. 8:28-34; Mrk. 5:1-20)

²⁶ Jadi marlayar ma sidea hu nagori Gerasa, na padipar-dipar pakon Galilea.

²⁷ Sanggah na mandarat ai la, pajumpah ma la pakon sada halak parhuta ai, na setanon do ia; anjaha domma dokah seng ra be ia marhiou anjaha seng be i rumah marianan, tapi i tanoman mando.

²⁸ Dob ididah Jesus, mandoruhi ma ia lanjar manrogop i lobei-Ni, anjaha nini ma marsora na gogoh, “Mangaha Ham roh bangku, Jesus, Anak ni Naibata Sitimbulan in, huelek-elek ma Ham, ulang arsik Ham ahu!”

²⁹ Ai ihatahon Jesus do luar setan ai humbani jolma ai. Domma gati isoroh setan ai ia, gabe igari anjaha ibayangkon ma ia, laho manjagaisi, tapi irutuskon do gari ai anjaha ialai setan ai ma ia hu halimisan.

³⁰ Jadi isungkun Jesus ma ia, “Ise do goranmu?” Gabe ibalosi ma, “Legiun.” Ai buei do setan-setan siar bani.

³¹ Lanjar ielek-elek sidea ma la, ase ulang ipaksa sidea tuad hu nagori toruh.

³² Tapi adong do ijai, bani raboyon ai, babuy sahumanan bolon manggagati; jadi ipindo ma, ase ilopas sidea masuk hujai, gabe ibalosi ma.

³³ Jadi luar ma setansetan ai humbani jolma ai, anjaha imasuki sidea ma babuy ai, gabe mardabuhan ma babuy na sahumanan ai hun raboyon ai hubagas tao ai, lanjar marmogapan.

³⁴ Dob ididah parmahan ai na masa ai, maporus ma sidea, ibaritahon sidea ma ai i huta ai ampa i ladang.

³⁵ Jadi marrohan ma halak ai, laho mangidah na masa ai. Das ma sidea bani Jesus anjaha jumpah sidea ma halak, na dob tinadingkon ni setansetan ai, marhiou anjaha torang maruhur, hundul i lambung nahei ni Jesus, gabe mabiar ma sidea.

³⁶ Jadi ipatugah halak na mangidah ai ma bani sidea, sonaha parmalum ni na sinieran ni setansetan ai.

³⁷ Jadi ielek-elek haganup pangisi ni nagori inggot ni Gerasa ai ma la, ase surut la humbani sidea, ai mabiar tumang do sidea. Jadi masuk ma la hu parau ai, lanjar mulak ma.

³⁸ Ia halak, na tinadingkon ni setansetan ondi, ipangindo do Bani, atap boi do ia mangkasomani-Si. Tapi isuruh ma ia mulak, nini ma,

³⁹ "Mulak ma ho hu rumahmu, baritahon ma haganup na binahen ni Naibata hu bam!" Jadi laho

ma ia, ibaritahon ma bani haganup huta ai, haganup na binahen ni Jesus hu bani.

Ipagoluh Jesus Boru ni si Jairus

Ipamalum homa Sada Naboru na Boritan

(Mat. 9:18-26; Mrk. 5:21-43)

⁴⁰ Ase dob mulak Jesus, ialo-alo halak na mabuei ai ma ia, ai haganup do sidea paima-imahon-Si.

⁴¹ Jadi roh ma sada halak, na margoran si Jairus; sintua ni parguruan do ia. Manrogop ma ia i lobei ni nahei ni Jesus mangindohon, ase roh ia hu rumahni,

⁴² ai laho matei do boru sasadani, na marumur sapuluh dua tahun. Sanggah na laho hujai ia, iasak-asak halak na mabuei do ia.

⁴³ Jadi adong ma sada naboru, na dob sapuluh dua tahun sai marnunut roh pantang ni hiouni, anjaha seng dong na boi pamalumkonsi.

⁴⁴ Roh ma ia hun pudi-Ni, anjaha ijamah ma rambu ni hiou-Ni, gabe mintor soh ma daroh ai.

⁴⁵ Jadi nini Jesus ma, "Ise do na manjamah Ahu?" Dob haganup mangkatahon lang, nini si Petrus ampa hasomanni ai ma, "Guru, na mabuei in do maronjat-onjat manosak Ham!"

⁴⁶ Tapi nini Jesus ma, "Adong do na manjamah Ahu, ai Huahap do luar gogoh hun Bangku."

⁴⁷ Ase dob ididah naboru ai, na so tarponopkon hape pambahenan ai, roh ma ia hitir-hitir, ipajojor

ma i lobei ni haganup na mabuei ai aha halani, ase ijamah la, ampa parmalumni bani na satongkin ai.

⁴⁸ Jadi nini ma hu bani, “Haporsayaonmu do na pamalum ham inang, mulak ma ham ibagas damei!”

⁴⁹ Mangkatahon ai ope la, adong ma na roh hun rumah ni sintua ni parguruan ai, na mangkatahon, “Domma matei borumu, ulang pala be lojai ham Guru in!”

⁵⁰ Mambogei ai Jesus, ibalosi ma ia, “Ulang ham mabiar, porsaya ma lah, sai manggoluh do ia.”

⁵¹ Dob das la hu rumah ai, seng ilopas barang ise pe masuk sobali si Petrus, si Johannes ampa si Jakobus, ambah ni ai bapa ampa inang ni dakdanak ai.

⁵² Doruh-doruh do haganup manangisi na matei ai, tapi nini Jesus ma, “Ulang nasiam tangis! Ai seng matei ia, na modom do!”

⁵³ Jadi ipartatawai sidea ma la, halani ibotoh sidea, na dob matei do ia.

⁵⁴ Tapi itangkap ma tanganni, idilohon ma, “Puho ma ho, boru!”

⁵⁵ Gabe mulak ma tonduyni, jadi mintor puho ma, anjaha ihatahon Jesus ma bereon ia mangan.

⁵⁶ Longang do namatorasni ai; tapi ihatahon ma bani sidea, ase ulang ipatugah-tugah na masa ai.

Parsuruh ni Jesus Bani na Sapuluh Dua ai

(Mat. 10:5-15; Mrk. 6:7-13; Luk. 10:1-12)

9¹ Dob ai ipatumpu ma na sapuluh dua ai; ibere ma bani sidea gogoh ampa kuasa mangimbang sagala setan-setan ampa pamalum naborit.

² Isuruh ma sidea mamaritahon Harajaon ni Naibata ampa pajorgitkon halak.

³ Nini ma hubani sidea, “Ulang ma boan hanima atap aha pe hu pardalanan, barang tungkot, barang ranjut, barang ruti, barang duit, barang dua baju pe.

⁴ Anggo masuk hanima bani sada rumah, ijai ma hanima tondok, lanjar hunjai ma hanima misir use.

⁵ Anggo adong na so manjalo hanima, pirpirhon hanima ma orbuk na longkot bani naheinima sanggah na laho hanima hun huta ai bahen hasaksian dompak sidea.”

⁶ Jadi laho ma sidea, idalani sidea ma huta-huta ai, laho mangambilankon Ambilan Na Madear, ampa pamalumkon atap ija-ija pe.

Biar ni Uhur ni Raja Herodes

(Mat. 14:1-2; Mrk. 6:14-16)

⁷ Raja Herodes pe, ibogei do haganup na masa ai, gabe mabiar ma ia, halani adong deba halak na mangkatahon, na dob ipapuho do si Johannes humbani na matei;

⁸ na deba nari mangkatahon na dob roh do si Elias, anjaha na legan use, paboa na dob mulak manggoluh do sada halak humbani nabi na basaia. ⁹ Tapi ihatahon si Herodes ma, “Anggo si Johannes domma hutampul uluni, tapi ise do on, na hubogei on baritani?” Anjaha ipangindo uhurni do sihol idahonni la.

Itamuei Jesus Lima Ribu Halak

(Mat. 14:13-21; Mrk. 6:31-44; Joh. 6:1-13)

¹⁰ Dob mulak apostel ai ibaritahon sidea ma hubani Jesus haganup na binahen ni sidea ai, gabe iarahkon ma sidea surut bani sada huta na margoran Betsaida.

¹¹ Dob ibotoh na mabuei ai pasal ai, irikkon sidea ma la; ijalo Jesus ma sidea, ibaritahon ma bani sidea pasal Harajaon ni Naibata, anjaha ipamalum ma sagala na porlu sipamalumon.

¹² Marayak bod ari, roh ma na sapuluh dua ai mangkatahon hu Bani, “Pamisir Ham ma na mabuei in, ase laho sidea hu huta-huta ampa hu parjuma-juma na inggot in, mangindahi tondokan ampa sipanganon, ai halimisan do iananta on.”

¹³ Tapi nini ma hubani sidea, “Bere hanima ma sidea mangan!” Jadi nini sidea ma, “Seng dong banta lobih humbani lima ruti ampa dua dengke, anggo seng laho hanami mamboli sipanganon bani halak na mabuei on ganup.”

¹⁴ Ai adong do ijai hira-hira lima ribu halak dalahi. Anjaha nini ma hubani susian-Ni ai, “Hatahon hanima ma sidea hundul mar sasatumpuan, lima puluh satumpuan.”

¹⁵ Ibahen sidea ma sonai, ipahumpul ma sidea haganup.

¹⁶ Jadi ibuat Jesus ma ruti na lima ai ampa dengke na dua ai, anjaha dob mangkawah la dompak datas anjaha ihatahon tarima kasih, ipartopik ma ai, anjaha iberei ma bani susian-Ni, ase sidea mambagihon bani na mabuei ai.

¹⁷ Mangan ma sidea anjaha bosur bei do haganup; ipatumpu do teba-teba na lobih ai, gok sapuluh dua bantei.

Hasaksian ni si Petrus

Ilumbahon Jesus Sitaronon-Ni

(Mat. 16:13-20; Mrk. 8:27-30; Joh. 6:66-71)

¹⁸ Bani na sahali, sanggah martonggo la sahalaksi, rapkonsi do susian ai. Jadi isungkun ma sidea, “Ise do Ahu, nini halak simbuei?”

¹⁹ Jadi nini sidea ma mambalosi, “Si Johannes Pandidi do,” na legan mangkatahon “si Elias,” anjaha na legan use, “Sada humbani nabi na basaia, na dob mulak manggoluh.”

²⁰ Tapi nini ma hubani sidea, “Ia hanima, ise do Ahu nini hanima?” Jadi nini si Petrus ma mambalosi, “Kristus ni Naibata do Ham!”

²¹ Jadi pangkei ma sidea ipalumba, ase ulang ipatugah-tugah ai age bani ise.

²² Lanjar ihatahon ma, “Ia Anak ni Jolma in maningon buei do sitaronon-Ni, ambukkonon ni pangintuai-pangintuai, sintua ni malim ampa sibotoh surat do Ia, dob ai bunuhonni, anjaha mulak manggoluh do bani ari patoluhon.”

Pasal na Mangihutkon Jesus

(Mat. 16:24-28; Mrk. 8:34-9:1)

²³ Tapi nini ma hubani sidea haganup, “Barang ise na sihol mangirikkon Ahu, iparnalang ma dirini, iporsan ma silangni ari-ari laho mangihutkon Ahu.

²⁴ Ai magouan hosah do na sihol paluahkon hosahni, tapi na magouan hosah halani Ahu, ai do na pagoluhkonsi.

²⁵ Ai aha ma gunani bani jolma, age ganup dunia on dapotsi, anggo magou anjaha hona uhum ia marhitei ai?

²⁶ Ai barang ise na maila halani Ahu ampa halani hatang-Kin, pailaon ni Anak ni Jolma in do ia sanggah na roh Ia ibagas hasangapon-Ni ampa hasangapon ni Bapa in rap pakon malekat na susi in.

²⁷ Tapi tongon do na Huhatahon on bannima, adong do deba na jongjong on ijon, na so mangahap hamatean ope, anggo lape ididah roh Harajaon ni Naibata.”

Marsangap Jesus i Dolog

(Mat. 17:1-13; Mrk. 9:2-12)

²⁸ Hira-hira ualuh ari, dob salpu parsahapan ai, iarahkon Jesus ma si Petrus, si Johannes ampa si Jakobus tangkog hu sada dolog, laho martonggo.

²⁹ Jadi, sanggah na martonggo ai la, mubah ma rupa ni bohi-Ni, anjaha pakeian-Ni pe lopak ma marlinang-linang.

³⁰ Anjaha tonggor ma, adong do dua halak marsahap-sahap pakon-Si, ai ma si Musa ampa si Elias,

³¹ na marhasangapon idahon, anjaha isahapkon sidea do pasal ujung ni langkah-Ni, sidobkonon-Ni i Jerusalem.

³² Tarpodom do anggo si Petrus ampa hasomanni na dua ai. Tapi dob puho sidea, ididah sidea ma Jesus ibagas hasangapon-Ni ampa sidua halak, na jongjong i lambung-Ni ai.

³³ Anjaha sanggah na sihol laho ai sidea humbani Jesus, nini si Petrus ma hu Bani, “Guru, dearni in ijon hita! Ipauli hanami ma tolu sopou-sopou, sada Bamu, sada bani si Musa anjaha sada bani si Elias.” Seng ibotoh, aha na hinatahonni ai.

³⁴ Mangkatahon ai ope ia, roh ma sada hambun manlinggomi sidea, gabe mabiar ma sidea, sanggah na masuk sidea hubagas hambun ai.

³⁵ Jadi roh ma sada sora humbani hambun ai, na mangkatahon, “On do Anak-Ku, na Hupilih in, tangihon nasiam ma Ia!”

³⁶ Dob salpu marhata sora ai, sasada Jesus mando jumpah sidea ijai. Sip do sidea, seng ipatugah sidea na nididah ni sidea ai atap hubani ise pe bani panorang ai.

Ipamalum Sada Halak na Setanon

(Mat. 17:14-21; Mrk. 9:14-29)

³⁷ Patarni ai, sanggah tuad sidea hun dolog ai, roh ma buei halak manjumpahkon-Si.

³⁸ Jadi tonggor ma, adong ma sada dalahi humbani na mabuei ai mandilohon, “Guru, sombahku Bamu, marpanatap ma Ham bani anakkon, sasadasa do anakku.

³⁹ Tonggor Ham ma, anggo irotol setan ai ia, sompong ma ia mandoruh; isontap-sontap do ia ronsi na marguboh pamanganni; igosa-gosa do ia, anjaha mahol do ia surut hun bani.

⁴⁰ Domma huelek-elek namin susianmu on, ase iusir namin setan ai, tapi seng mangasup sidea.”

⁴¹ Jadi nini Jesus ma mambalosi, “Bangsa na so porsaya anjaha kahou! Sadiha dokah nari Ahu rap

pakon hanima, anjaha paanju-anjuon-Ku hanima? Boan ham ma anakmu in hujon!”

⁴² Sanggah na roh ai ia, idorab setan ai ma ia anjaha ipugulhon. Tapi isorgang Jesus ma setan na jahat ai anjaha ipamalum ma dakdanak ai; iondoskon ma ia bani bapani.

⁴³ Haganup do longang pasal kuasa ni Naibata na bangga ai. Sanggah na longang ai haganup halani pambahenan-Ni ai, nini ma hubani susian-Ni ai,

Ilumbahon Jesus Paduahalihon Pasal Sitaronon-Ni

(Mat. 17:22-23; Mrk. 9:30-32)

⁴⁴ “Tangihon hanima ma hatang-Kon, ondohonkon ma Anak ni Jolma in hu tangan ni halak.”

⁴⁵ Tapi seng iarusi sidea hata ai, ponop do ai humbani sidea; anjaha mabiar do sidea manungkun-Si pasal hata ai.

Paruhuran na Patut bani Susian ni Jesus

(Mat. 18:1-5; Mrk. 9:33-37)

⁴⁶ Jadi tubuh ma pingkiran i tongah-tongah ni sidea pasal ise do sidea sibanggalan.

⁴⁷ Tapi ibotoh Jesus do pingkiran ni sidea ai, gabe ialop ma sada dakdanak, ipajongjog ma ai i lambung-Ni,

⁴⁸ anjaha ihatahon ma bani sidea, “Na manjalo dakdanak on ibagas goran-Ku, Ahu do na jinaloni ijai, anjaha na manjalo Ahu, na marsuruh Ahu

do jinaloni ai. Ai barang ise sietekan i tongah-tongahnima, ia do sibanggalan.”

Ulang Sompit Paruhuran

(Mrk. 9:38-41)

⁴⁹ Tapi nini si Johannes ma mambalosi, “Guru, ididah hanami do sada halak mangusir setan marhitei goran-Mu, gabe ipandang hanami ma ia, halani seng siirikkon Ham ia songon hanami.”

⁵⁰ Tapi nini Jesus ma hu bani, “Ulang pandang hanima ia, ai ise na so mangimbang hanima, hasomannima do.”

Itulak Halak Samaria Jesus

⁵¹ Jadi dob lambin dohor ari parbangkit-Ni, idompakkon ma bohi-Ni mardalan hu Jerusalem.

⁵² Isuruh ma suruhan parlobei-Ni. Jadi laho ma sidea, imasuki sidea ma sada huta ni halak Samaria, laho patorsa parbornginan Bani.

⁵³ Tapi seng ra sidea manjalo-Si, halani na laho hu Jerusalem ai la.

⁵⁴ Mangidah ai susian-Ni, si Jakobus ampa si Johannes, ihatahon sidea ma, “Tuhan, dear do uhur-Mu ihatahon hanami turun apuy hun datas, mamboiskon sidea?”

⁵⁵ Tapi marhusor ma la, anjaha ihata ma sidea, nini ma, “Lang ibotoh hanima, atap tonduy aha do na bannima?”

⁵⁶ Jadi hu huta na legan ma sidea laho.

Pasal na Mangirikkon Jesus

(Mat. 8:18-22)

⁵⁷ Sanggah mardalani sidea, nini sada halak ma hu Bani, “Sai irikononku do Ham, barang huja pe Ham laho!”

⁵⁸ Tapi nini Jesus ma hu bani, “Na marliang do sorigala, anjaha na marasar do manuk-manuk na i awang-awang, tapi anggo Anak ni Jolma in, hatibalan ni ulu-Ni pe seng dong.”

⁵⁹ Bani na legan ihatahon, “Irikkon ma Ahu!” Tapi nini ma, “Lopas Ham lobei ahu, laho mananom bapa!”

⁶⁰ Tapi nini hu bani, “Paturut ma na matei mananom na mateini, tapi anggo ho, laho ma mamaritahon Harajaon ni Naibata.”

⁶¹ Sada halak na legan use mangkatahon, “Huirikkon pe Ham Tuhan, tapi lopas Ham lobei ahu martading hata hubani sinrumahku.”

⁶² Tapi nini Jesus ma hu bani, “Na manjamah tinggala anjaha na mangkawah dompak pudi, seng talup masuk ai bani Harajaon ni Naibata.”

Parsuruh ni Jesus Bani Susian-Ni Sipitu Puluh Halak

(Mat. 10:5-16; Mrk. 6:7-11; Luk. 9:1-5)

10 ¹ Dob salpu ai ipilih Tuhan Jesus ope pitu puluh halak nari, anjaha isuruh ma sidea

mardua-dua gabe parlobei-Ni hubani ganup huta ampa ianan, na sihol siparayakon-Ni.

² Ihatahon do bani sidea, “Bolag do namin sabion, tapi otik do siparhorja. Ai pe pindo hanima ma bani Simada sisabion in, ase isuruh siparhorja bani sisabion-Ni in.

³ Laho ma hanima. Songon biribiri do hanima Husuruh hu tongah-tongah ni begu.

⁴ Ulang boan hanima parduitan, barang tas, barang sipatu; anjaha ulang tabi hanima halak i tongah dalan.

⁵ Laho masuk hu sada rumah, parlobei ma hatahon hanima, ‘Damei ma bani nasiam i rumah on!’

⁶ Anjaha anggo adong ijai anak hadameion, sogop ma bani dameinima; tapi anggo seng dong, mulak ma ai bennima.

⁷ I rumah ai ma hanima tondok, mangan anjaha inum hanima ma humbani na adong bani sidea, ai patut do dapotan upah siparhorja; ulang ma mosor-osor tondokannima.

⁸ Anggo masuk hanima bani sada huta, anjaha ijalo do hanima, pangan hanima ma na niidangkon bennima.

⁹ Pamalum hanima ma na boritan, na adong ijai, anjaha hatahon hanima ma bani sidea, ‘Domma dohor Harajaon ni Naibata bani nasiam!’

¹⁰ Tapi anggo imasuki hanimasada huta, hape seng ijalo sidea hanimas, laho ma hanimas hu alaman ni sidea, anjaha hatahon hanimas ma,

¹¹ ‘Age orbuk ni huta nasiam on, na longkot bani naheinami, ipirpirhon hanami ma mulak bani nasiam; tapi botoh nasiam ma, domma dohor parroh ni Harajaon ni Naibata.’

¹² Huhatahon ma bannimas: Hampungan do sitaronon ni Sodom bani ari ai marimbang sitaronon ni huta sisonai.” Bursik-bursik Bani Huta na So Ra Paubahkon Uhur

¹³ “Bursik ma ho Korasin. Bursik ma ho Betsaida! Ai ambit i huta Tirus ampa Sidon ipamasa hagogohon, na dob pinamasa bannimas, girah do paubahon ni sidea uhur ni sidea, marhiou guni, hundul bani orbuk.

¹⁴ Ase hampungan do sitaronon ni Tirus ampa Sidon bani ari uhum ai, marimbang sitarononnimas.

¹⁵ Anjaha ho Kapernaum, ai sipagijangon do ho ronsi langit? Sidabuhkononkon do ho das hu nagori toruh!

¹⁶ Na manangihon hanimas, Ahu do tinangihonni, anjaha na manulak hanimas, Ahu do tinulakni; tapi na manulak Ahu, na marsuruh Ahu do tinulakni ijai.”

Parmulak ni Sipitu Puluh Halak ondi

Tonggo Tarima Kasih ni Jesus

(Mat. 11:25-27)

¹⁷ Ibagas malas ni uhur do mulak sipitu puluh halak ai, nini sidea ma, “Tuhan, tunduk do age setan-setan bannami halani goran-Mu.”

¹⁸ Tapi nini ma dompak sidea, “Huidah do sibolis in madabuh hun langit songon hilap.

¹⁹ Tonggor ma, domma Hubere bannima kuasa mandogei ulog ampa gansip golang, sonai kuasa manlawan sagala hagogohon ni munsuh in; anjaha seng tarkahua sidea hanima.

²⁰ Tapi ulang ma malas uhurnima, halani tunduk setan-setan ai bannima, tapi malas ma uhurnima, halani domma tarsurat gorannima i nagori atas.”

²¹ Anjaha bani panorang ai marolob-olob ma la ibagas Tonduy Na Pansing, nini ma, “Hupuji Ham Bapa, Tuhan sigomgom nagori atas ampa tanoh on, halani iponopkon Ham do in humbani halak na pentar ampa na maruhur, hape ipatalar Ham do in hubani na saluju maruhur. Eak Bapa, sonin do iharosuhkon uhur-Mu.”

²² Haganupan do iondoskon Bapa Bangku, anjaha seng dong na mananda Anak in, sobali Bapa in, anjaha Bapa in pe, seng dong na manandasi sobali

Anak in, ambah ni ai na pinodahan ni Anak in mangihutkon rosuh ni uhur-Ni.”

²³ Dob ai idompakkon ma pulin susian-Ni ai, nini ma, “Martuah ma mata na mangidah na nididahnima.

²⁴ Ai Huhatahon ma bannima: Buei do nabi-nabi ampa raja-raja, na masihol mangidah na nididahnima, hape seng ididah, anjaha na sihol mambogei na dob binogeinima, hape seng ibogei.”

Halak Samaria na Idop Uhur

(Mat. 22:34-40; Mrk. 12:28-34)

²⁵ Dob ai jongjong ma sada sibotoh titah manlajou-Si, nini ma, “Guru, aha do sibahenonku, ase tartean ahu hagoluhan sisadokah ni dokahni?”

²⁶ Gabe nini Jesus ma hu bani, “Aha do tarsurat bani titah in? Sonaha do ibasa ham?”

²⁷ Jadi nini mambalosi, “Maningon haholonganmu do Tuhan Naibatamu humbani putih ni atei-ateimu, humbani gok ni tonduymu, humbani bois ni gogohmu ampa humbani gok ni uhurmu, anjaha hasomanmin songon dirimu!”

²⁸ Dob ai nini ma hu bani, “Sintong do balosmu in; bahen ham ma sonai, gabe manggoluh ma ham!”

²⁹ Tapi sihol do pintoranni dirini, gabe nini ma dompak Jesus, “Ai ise do goranon hasomanku?”

³⁰ Jadi nini Jesus ma mambalosi, “Adong ma sada halak tuad hun Jerusalem, laho hu huta Jeriko,

gabe isamun panamun ma ia. Irampas sidea do ia, ibalbali, dob ai laho, itadingkon ia tarhatos.

³¹ Tudu ma mamontas sada malim hun dalan ai, ididah do ia, tapi ilaosi do.

³² Sonai homa sada halak Lepi, das do bani ianan ai, ididah do ia, tapi ilaosi do homa.

³³ Tapi mamontas ma hunjai sada halak Samaria; dob ididah ia, idop ma uhurni bani,

³⁴ idohori ma ia, ibaluti ma ugahni ai, anjaha idaisi ma ai bani minak ampa anggur. Dob ai ipahundul ma ia bani halodeni sandiri, iboan ma ia hu parbornginan, lanjar ipatorsa-torsa.

³⁵ Patarni ai ibuat ma dua dinar, ibere ma ai bani simada rumah ai, anjaha nini ma, “Patorsa-torsa ham ma ia, anjaha anggo lobih hunjon harugianmu, hugalari pe sanggah mulak ahu.”

³⁶ Ise do humbani sitolu halak ai, hasoman bani na tarsamun ai, ninuhurmu?”

³⁷ Jadi nini ma, “Na maridop ni uhur bani.” Gabe nini Jesus ma hu bani, “Laho ma ham, bahen ma sonai!”

Si Marta pakon si Maria

³⁸ Sanggah na mardalani sidea, masuk ma Jesus hubagas sada huta, anjaha dong ma ijai sada naboru, na margoran si Marta, na manjalosi hu rumahni.

³⁹ Ia anggini na margoran si Maria hundul-hundul do i lobei ni Tuhan in manangihon hata-Ni,

⁴⁰ tapi anggo si Marta, hosei tumang do marugas. Jadi ipadohor ma bani Jesus anjaha nini ma, “Tuhan, ai lang ididah Ham, na ipaturut anggingkin do sahalak ahu marugasi? Hatahon Ham ma ia mangurupi ahu!”

⁴¹ Jadi nini Tuhan in ma mambalosisi, “Marta! Marta! Buei do isarihon anjaha isunsahkon uhurmu!

⁴² Sada do na porlu! Ipilih si Maria do rupei sidearan, seng sibuaton ai hun bani.”

Iajari Jesus Susian-Ni Martonggo

(Mat. 6:5-15; 7:7-16)

11 ¹ Martonggo ma Jesus santorap bani sada ianan, anjaha salpuhonsi ai, nini sahalak susian-Ni ma hu Bani, “Tuhan, ajari Ham ma hanami martonggo, songon na binahen ni si Johannes hubani susianni.”

² Jadi nini ma hubani sidea, “Anggo martonggo hanima, sonon ma hatahon hamina, Ham Bapanami, sai pinapansing ma goran-Mu. Sai roh ma harajaon-Mu.

³ Bere Ham ma bannami hagoluhannami siganup ari.

⁴ Sasap Ham ma dousanami, ai hanami pe isasap hanami do haganup na marsalah dompak hanami. Anjaha ulang ma bobai Ham hanami hu parlajouan.”

⁵ Lanjar nini ma dompak sidea, “Ise hun bennima, na marhuan-huan bani sada halak, gabe laho ia tongah borngin hu bani mangkatahon, ‘Ambia, bere lobei bangku tolu kibul rutimin,

⁶ ai roh do hasomanku hun pardalanan, anjaha seng dong sipanganon berehononku bani.’

⁷ Jadi marbalos ma ia hun bagas, nini ma, ‘Ulang sunsahi ahu! Domma tutup labah, anjaha domma modom dakdanakku rap pakon ahu. Seng tarbahen ahu be jongjong laho mamberehon ai bam.’

⁸ Huhatahon ma bannima: Anggo lang ra puho ia laho mambere ai bani, halani parhuan-huanon, tapi lang tarbahensi lang puho, laho mambere sagala na porlu bani, halani hajungilonni mangindo.

⁹ Halani ai huhatahon ma bannima, pangindo hanima ma, sai na bereon do bannima; pindahi hanima ma, sai na jumpahan do hanima, anjaha hartuki hanima ma, sai na ungkabon do bannima!

¹⁰ Ai sai na manjalo do sagala na mangindo, sai na jumpahan do sagala na mangindahi, anjaha sai na ungkabon do bani sagala na mangkartuki.

¹¹ Ise humbani nasiam bapa, na mambere batu bani anakni anggo ipangindo ruti, atap ulog anggo ipangindo dengke,

¹² atap gansip golang anggo ipangindo tolur?

¹³ Gari nasiam na jahat mambotoh mambere na madear bani anak nasiam, samintolah Bapa nasiam

na i nagori atas ai ma lang bereon-Ni Tonduy Na Pansing bani sagala na mangindo hun Bani?"

Ipamalum Jesus Sada Halak na Setanon

Ipatorang Hunja Roh ni Kuasa-Ni

(Mat. 12:22-30; Mrk. 3:22-27)

¹⁴ Santorap iusir Jesus ma sada setan silongah. Jadi dob mandarat setan ai, marsahap ma na longah ai, gabe longang ma halak na mabuei ai.

¹⁵ Tapi deba humbani sidea mangkatahon, "Marhitei Beelsebul, raja ni setan do iusir setan-setan ai."

¹⁶ Na legan use mangindo tanda hun langit laho manlajou-Si.

¹⁷ Tapi itanda Jesus do pingkiran ni sidea, gabe ihatahon ma bani sidea, "Maseda do sagala harajaon na marsalisih samah dirini anjaha marsirumbakan ma rumahni.

¹⁸ Anjaha anggo marsalisih sibolis samah dirini, mintor sonaha ma pardong ni harajaonni ai? Ihatahon nasiam tene, Huusir setan ai marhitei Beelsebul!

¹⁹ Tapi, anggo Huusir setan-setan mangunsagahkon Beelsebul, ise ma ipangunsagahkon anak nasiam laho mangusirsi? Ai pe sidea ma na manguhumi nasiam.

²⁰ Tapi anggo Huusir setan-setan marhitei tangan ni Naibata, na dob sogop ma Harajaon ni Naibata bani nasiam.

²¹ Anggo ijagai sada halak na gogoh, siparsinjata na sirsir rumahni, sonang ma ugas-ugasni.

²² Tapi anggo roh mandorabsi sigogohan humbani anjaha italuhon ia, buatonni ma humbani sagala sinjata hatengeran ni uhurni ai, anjaha bagi-bagihononni ma ai.

²³ Na so mangkasomani Ahu, imbang-Ku do ai, anjaha na so hasoman-Ku patumpuhon, na mangerap do ai.”

Parmulak ni Tonduy na Butak Bani Sada Jolma

²⁴ Anggo mandarat tonduy na mabutak humbani sada jolma, idalani ma ianan na horah, laho mangindahi parsaranan, tapi halani seng dong jumpahsi nini ma, “Mulak ma ahu bani ianan na dob hutadingkon ondi.”

²⁵ Jadi, dob roh ia, domma isapu anjaha ipajagar jumpahsi.

²⁶ Dob ai laho ma ia, iarahkon ma pitu setan na legan sijahatan hun bani, jadi imasuki ma ai laho marianan ijai, gabe bajanan ma parlahou ni jolma ai bani ujugni marimbang mungkahni.

²⁷ Sanggah na mangkatahon ai la, marsora na gogoh ma sada naboru hun tongah-tongah ni jolma na

mabuei ai, nini ma hu Bani, “Martuah ma na manubuhkon anjaha na painumkon Ham!”

²⁸ Tapi nini ma, “Martuah ma na mambogei hata ni Naibata anjaha na marimbagaskon ai!”

Tanda ni Nabi Jona

Limbaga Pasal Mata

(Mat. 12:38-42; Mrk. 8:11-13)

²⁹ Jadi sanggah na lambin martumpu ai halak na mabuei ai, ipungkah ma mangkatahon, “Na jahat do na sasundut on. Tanda do ipangindo, tapi seng bereon tanda bani sidea sobali tanda ni si Jona.

³⁰ Ai songon si Jona gabe tanda bani parhuta Ninipe, sonai ma Anak ni Jolma in bani na sasundut on.

³¹ Na jongjong do magira bani paruhuman ai raja naboru na hun dangsina dampak bangsa on, laho manguhumi sidea, ai roh do ia hun ujung ni tanoh on, laho mambogei hapentaron ni si Salomo. Tonggor ma, lobihan do on marimbang raja Salomo.

³² Na jongjong do magira bani paruhuman ai halak Ninipe dampak na sasundut on laho manguhumi in, ai ipaubah sidea do uhur ni sidea mambogei ambilan ni si Jona. Tonggor ma, lobihan do on marimbang si Jona.

³³ Seng dong halak na mannahiti lampu anjaha inahkon ai bani ianan na ponop barang hu toruh ni

tapongan, tapi hu atas ni sagakan do ai ibahen, ase ididah halak na roh sinalsalni ai.

³⁴ Palita ni daging do mata. Anggo jorgit matamu, lihar ma ganup angkulamu, tapi anggo sambor do, golap ma angkulamu.

³⁵ Ai pe, jaga ma, ase ulang golap sondang na ibagas ham in.

³⁶ Ase anggo lihar do haganup angkulamu, seng dong na golap ijai, gabe lihar ma haganupan ai, songon sanggah marsinalsal suluh bamu.”

**Ipabursik-bursik Jesus Halak
Parisei ampa Sibotoh Surat**

(Mat. 23)

³⁷ Sanggah na marsahap ai ope la, iarahkon sada halak Parisei ma la mangan; jadi masuk ma la lanjar hundul ma.

³⁸ Tapi longang do Parisei ai, halani ididah, lang palobei marburih la laho mangan.

³⁹ Jadi nini Tuhan in ma hu bani, “Anggo nasiam Parisei, darat ni panginuman ampa pinggan do ipaborsih nasiam; tapi uhur nasiam parbagas ai gok uhur haut do ampa hajahaton.

⁴⁰ Ee, hanima na oto! Sitompa pardaratni, ai lang la do homa sitompa parbagasni?

⁴¹ Tapi bere ma na ibagas ai songon silayak-layak, gabe borsih ma haganup bennima.

⁴² Tapi bursik ma hanima Parisei, ai igalar hanima do parsapuluhan ni hosaya, longa ampa lowoh simaratah, tapi seng parduli hanima bani uhum ampa holong na humbani Naibata. Sihorjahononkon do on, tapi ulang ma tading na legan.

⁴³ Bursik ma hanima Parisei, ai iharosuhkon hanima do hundul bani hundulan lobei-lobei i parguruan ampa bani hata tabi i tongah tiga.

⁴⁴ Bursik ma hanima, ai usih do hanima bani tanoman na so tanda, gabe idoge halak, na so pambotohanni.”

⁴⁵ Jadi marbalos ma sahalak sibotoh titah, nini ma hu Bani, “Ham Guru, marhitei hata-Mu ai dihut do hanami sambor ibahen Ham.”

⁴⁶ Jadi nini ma, “Bursik ma age hanima sibotoh titah, ai ipaporsankon hanima do banijolma siporsanon na so tarboan, tapi hanima sandiri seng ra manggiut ai age marhitei jari-jari tumang.

⁴⁷ Bursik ma hanima, ai ipauli hanima do tanoman ni nabi-nabi, hape ompungnima do mambunuh sidea.

⁴⁸ Ase isaksihon hanima do pambahenan ni ompungnima, anjaha iharosuhkon hanima do pambahenan ni sidea ai; sidea do na mambunuh nabi-nabi ai, hanima paulihon tanoman ni sidea.

⁴⁹ Halani ai nini hapentaran ni Naibata do, ‘Suruhon-Ku do bani sidea nabi ampa apostel,

bunuhon anjaha pardakdakon ni sidea ma deba hunjai,

⁵⁰ ase Hubalaskon bani na sasundut on daroh ni haganup nabi ampa apostel, na dob durus humbani tombei ni tanoh on,

⁵¹ mamungkah humbani daroh ni si Abel das hubani saroh ni si Sakaria, na tarbunuh i holangkolang ni anjapanjap ampa rumah panumbahan.’ Sintong do hatang-Kon bannima, ‘Luluhononku do in bani na sasundut on.’

⁵² Bursik ma hanima sibotoh titah, ai irampok hanima do anakkunsi ni habotohon. Hanima sandiri seng masuk, anjaha halak na sihol masuk, ilanglangi hanima do.”

⁵³ Ase dob misir Jesus hunjai, ipungkah sibotoh surat ampa Parisei ma manggompangi-Si pangkei-pangkei, anjaha marbagei-bagei ma na isungkunkon sidea hu Bani;

⁵⁴ igompangi sidea do la, andohar hona la marhitei hata-Ni.

Lumba-lumba Pasal Ragi ni Halak Parisei

Ojur-ojur ase Ulang Mabiari Manaksihon

(Mat. 10:26-33; 16:5-12; Mrk. 8:14-21)

12 ¹ Sanggah na marrohan halak na mabuei na marribu-ribu ai, pala marsidogeian sidea, gabe ipungkah Jesus ma marsahap bani susian-Ni

ai, nini ma, “Jaga ma hanima pasal ragi ai, ai ma sipakulah-kulah ni Parisei.

² Ai seng dong na rungkub, na so tidak use, anjaha seng dong rusia, na so botohon use.

³ Halani ai sagala na hinatahonnima ibagas na golap, tarbogei do ai use ibagas na lihar, anjaha na hinusipkonnima bani pinggol ibagas kamar, tingtingkononkon do ai use hun tayub ni rumah.

⁴ Tapi Huhatahon ma bannima huan-huan-Ku, ulang ma habiari hanima sibunuh angkula, ai legan ni ai aha pe lang tarkahua sidea be.

⁵ Tapi Hupatuduhkon ma bannima na patut sihabiarannima. Habiari hanima ma la, na markuasa mambunuh anjaha na mambuankon hubagas apuy naraka. Eak, Huhatahon ma bannima, la ma habiari hannima!

⁶ Ai lang ijual halak do lima dingis harga lima sen? Tapi sada pe lang hunjai, na ihalupahon Naibata.

⁷ Gari jambulan na bani ulunima haganup do ibilang. Ulang ma mabiar, harganan do hanima marimbang buei dingis.

⁸ Huhatahon ma bannima, ganup na manaksihon Ahu i lobei ni jolma saksihonon ni Anak ni Jolma in do ia i lobei ni malekat ni Naibata.

⁹ Tapi na marnalangkong Ahu i lobei ni jolma, parnalangon do ai i lobei ni malekat ni Naibata.

¹⁰ Anjaha ganup na mangkatahon hatani dompak Anak ni Jolma in, tarsasap do ai, tapi na mangapasi Tonduy Na Pansing, seng tarsasap ai.

¹¹ Anggo tarboan hanima hu lobei ni parguruan, hu lobei ni kopala-kopala ampa siparkuasa, ulang ma haru hanima pasal balos ampa sihatahononnima.

¹² Ai Tonduy Na Pansing do mangajarhon bannima bani panorang ai pasal sihatahononnima.”

Pasal Halak na Bayak Tapi na Oto

¹³ Adong ma sahalak humbani halak na mabuei ai, na mangkatahon hu Bani, “Guru, hatahon Ham ma saninangku, ase ibagi siteanonnamai ai rap pakon ahu.”

¹⁴ Tapi nini ma hu bani, “Ambia! Ise pabangkit Ahu gabe panguhum barang sibagi tean-teanan bannima?”

¹⁵ Lanjar ihatahon ma bani sidea, “Jaga ma hanima ramotkon hanima ma dirinima dompak sagala uhur haut! Ai age marlobih-lobih halak, seng humbani artani ai goluhni.”

¹⁶ Gabe ihatahon ma sada limbaga bani sidea, nini ma, “Adong ma sada halak na bayak, buei do gogoh ni jumani.

¹⁷ Jadi marpingkir ma ia ibagas uhurni sonon, ‘Aha ma sibahenonku? Ai seng dong be hasiatan ni gogoh ni jumangu.’

¹⁸ Gabe nini ma, 'On ma hubahen, huparseda ma tuanganku, anjaha hupauli ma sibanggalhononni ai, ase hujai hupatumpu ganup omei ai ampa artangku haganup.

¹⁹ Anjaha ningku ma bani tonduyhu: Ale tonduyhu, domma sirsir buei artamu, sungkup piga-piga tahun on. Ai pe, marsaran ma ho, mangan, minum anjaha marmalas ni uhur.'

²⁰ Tapi nini Naibata ma hu bani, 'Ee ho na oto! Saborngin on ma buaton hosahmu hun bamu. Anjaha na pinasirsirmin bani ise ma in?'

²¹ Sonai ma ujung ni halak na patumpu-tumpu arta bani dirini, anggo seng bayak ia bani Naibata."

Lumba-lumba ase Ulang Holsohan

(Mat. 6:25-34)

²² Jadi nini Jesus ma dompak susian-Ni, "Halani ai huhatahon ma bannima: Ulang ma holsohkon hanima hosahnima pasari-sari sipanganon barang angkulanima mansarihon parhiouon.

²³ Ai harganan do hosah humbani sipanganon sonai angkula humbani parhiouon.

²⁴ Tonggor hanima ma kawak ai: Seng martidah sidea, seng manabi, seng margudang anjaha seng marsopou, tapi iparmudu-mudu Naibata do sidea. Ai lang daoh do surungan hanima marimbang manuk-manuk?

²⁵ Ise hanima boi paganjang ari-ari ni goluhni age saasta gelah, marhitei holsoh ni uhurni?

²⁶ Ase, anggo mambahen na otik ai pe lang mangasup hanima, mase ma pala holsohan hanima pasal na legan-legan ai?

²⁷ Papangkei hanima ma partubuh ni silundat in, na so pala manorha atap martonun. Huhatahon ma bannima, gari si Salomo ibagas sagala hasangaponni ai, seng onga marpakeian songon sada humbani bunga-bunga in.

²⁸ Ase anggo sonai iparhioui Naibata poyon-poyon, na dong sadari on i ladang in, hape patar domma ipuruni, samintolah hanima ma lang parhiouan-Ni? E, hanima siotik haporsayon!

²⁹ Ase ulang ma pindah-pindah uhurnima bani sipanganon atap siinumon, anjaha ulang ma bungbang pasal ai.

³⁰ Halak parbegu na i tanoh on do mangindahi sisonai ai, tapi ibotoh Bapanima do, na porlu do ai bennima.

³¹ Asal ma ipindahi hanima harajaon-Ni, dob ai tambahkonon-Ni do ai bannima.

³² Ulang ma mabiar, ale hulanan na etek! Ai na dob iharosuhkon Bapanima do, mamberehon Harajaon-Ni ai bannima.

³³ Jual hanima ma na adong bannima anjaha marsibere-bere ma. Bahen hanima ma bennima ranjut na so ra buruk, arta i nagori atas, na so

ra bois, na so tardohori panangko anjaha na so targagat ngitngit.

³⁴ Ai atap ija artanima, ijai do uhurnima.”

**Lumba-lumba ase Marjaga-jaga
anjaha Hatengeran ni Uhur**

(Mat. 24:37-51; Mrk. 13:35-36)

³⁵ “Sai margondit ma binongeinima anjaha gara ma lampunima.

³⁶ Anjaha usih ma hanima bani jolma na paimahon tuanni, sadihari ia roh hun parunjukan, ase mintor iungkab ia rohkonsi ia mangkartuki.

³⁷ Martuah ma juakjuak ai, na puho jumpah tuanni bani parrohni ai. Na sintong do hatang-Kon bannima, gonditanni ma dirini, hatahononni ma sidea hundul mangan, anjaha jongjong ma ia marugas bani sidea.

³⁸ Anggo roh ia bani runda paduahon atap patoluhon, anjaha jumpahsi sidea sonai, martuah ma sidea.

³⁹ Tapi botoh hanima ma on: Anggo ibotoh tuan rumah, sadihari panorang ni panangko roh, puho do ia, seng palopasonni rumahni hona bongkar.

⁴⁰ Hanima pe, jaga ma, ai na roh do Anak ni Jolma in bani panorang na so panagamannima.”

⁴¹ Jadi nini si Petrus ma, “Tuhan, bannami do ihatahon Ham limbaga ai atap bani haganup do?”

⁴² Gabe ihatahon Tuhan in ma, “Ise ma sijolom anakkunsi hatengeran ni uhur anjaha na maruhur, sipabangkiton ni tuanni manggomgom juakjuakni, laho mambere bohal ni sidea bani panorangni?

⁴³ Martuah ma juakjuak ai, na mangkorjahon sonai jumpahon ni tuanni bani parrohni ai.

⁴⁴ Sintong do na Huhatahon on bennima, pabangkitonni do ia manramotkon sagala na adong bani.

⁴⁵ Tapi anggo ihatahon juakjuak ai ibagas uhurni, ‘Dokah ope, ase roh tuankai,’ gabe ipungkah ma mambogbogi juakjuak dalahi ampa juakjuak naboru ai, anjaha mangan minum ia marmabuk-mabuk.

⁴⁶ Jadi roh ma tuan ni juakjuak ai bani panorang na so panagamanni, ampa bani panorang na so binotohni, anjaha tampulonni ma ia, anjaha bahenonni ma rupeini dos songon na so porsaya.

⁴⁷ Ia juakjuak, na mambotoh harosuh ni tuanni, hape seng marugas ia, anjaha seng ihorjahon harosuh ni uhurni, buei ma lonsing-lonsing tarononni,

⁴⁸ Tapi na so mambotohshi, gabe ihorjahon na patut sihataon, otik do tarononni. Ai buei do situngguon humbani pamberean na buei, anjaha bani ise buei iondoskon, lambin buei do ipindahi hun bani.”

Parlawanon Dompak Harajaon ni Naibata

⁴⁹ “Na roh do Ahu manggijigkon apuy hu tanoh on, anjaha masihol do uhurhu ase gara ai!

⁵⁰ Adong do paridian na maningon siparidihononkon Bangku, anjaha bobor tumang do uhur-Hu paima saud ai.

⁵¹ Ai iagan uhurnima do, roh Ahu, laho mambere damei hu atas tanoh on? Lang, Huhatahon ma bannima, panirangon do tene.

⁵² Ai hunjon hujanan marsilawanan do lima halak ibagas sada jabu, na tolu manlawan na dua, anjaha na dua manlawan na tolu.

⁵³ Adong do parlawanon, bapa dompak anakni anjaha anak dompak bapani, inang dompak boruni anjaha boru dompak inangni, simatua dompak parumaenni anjaha parumaen dompak simatuani.”

Tanda ni Panorang

(Mat. 16:1-4)

⁵⁴ Ihatahon do homa dompak halak na mabuei ai, “Anggo ididah nasiam naik hambun i hasundutan, mintor ihatahon nasiam do, na roh ma udan, jadi saud do sonai.

⁵⁵ Anjaha sanggah marombus logou hun dangsina, ihatahon nasiam do, na roh ma logou ni ari, jadi saud do.

⁵⁶ E, nasiam sipakulah-kulah, ibotoh nasiam do manimbangi rupa ni tanoh on ampa langit ai, tapi panorang on, mase lang iartihon nasiam?”

Lumba-lumba ase Mardear pakon Imbang

(Mat. 5:25-26)

⁵⁷ “Mase ma lang itimbangi nasiam bani nasiam, aha na pintor?

⁵⁸ Sanggah laho ho rap pakon imbangmu marayak pamarentah, porluhon ma mardear pakonsi sanggah i tongah dalan, ase ulang itogu ho hubani panguhum, gabe iondoskon panguhum ai ho bani upas, anjaha upas ai pamasuk ho hubagas tutupan.

⁵⁹ Huhatahon ma bam, seng anjai luar ho hunjai, paima igalar ho ronsi na sarimis.”

Pardomuan ni Dousa pakon Sitaronon

13 ¹ Bani panorang ai adong ma na roh patugahkon hu Bani pasal halak Galilea, na dob madurus darohni ibahen si Latus, anjaha saor bani galangan ni sidea.

² Jadi nini Jesus ma mambalosi sidea, “Na iagan uhurnima do mardousanan halak Galilea ai marimbang haganup halak Galilea, halani sonai mangonai bani sidea?

³ Huhatahon ma bennima: Lang, tapi anggo seng mubah uhurnima, lanjar sonai do hanima haganup magou use.

⁴Barang na iagan hanima do banggalan salah ni sisapuluh ualuh halak ai, na matei idondoni manara na i Siloam ai, marimbang haganup halak na marianan i Jerusalem?

⁵Huhatahon ma bennima: Lang, tapi anggo seng mubah uhurnima, lanjar sonai do hanima haganup magou use.”

Limbaga Pasal Hayu Ara

⁶Dob ai ihatahon ma limbaga on, “Adong ma hayu ara ni sada halak, na sinuanni i pohon anggurni; jadi roh ma ia mangindahi buahni, hape seng dong jumpahsi.

⁷Gabe ihatahon ma hubani sihorjahon pohon anggurni ai, ‘Tonggor ma, domma pala patoluhunkon roh ahu mangindahi buah ni hayu ara on, hape seng dong. Roboh ma in, mase ma soya tanoh in bahenon ni in?’

⁸Tapi nini mambalosi, ‘Tuannami, paturut ham ma lobei in satahun on, ase sompat husangkul tanoh inggot ni in, anjaha hubahen napu hujin,

⁹andohar marbuah hu lobeian on; tapi anggo seng ra be, na roboh ma.”

Ipamalum Jesus Sada Naboru na Suhung Sanggah Ari Sabat

¹⁰Jadi mangajari ma la bani sada parguruan sanggah ari Sabat.

¹¹ Anjaha tonggor ma, adong ma ijai sada naboru na siniaran ni tonduy na jahat. Domma sapuluh ualuh tahun ia boritan, suhung do angkulani, anjaha seng boi ia jongjong dirgak.

¹² Dob ididah Jesus ai, idilo ma ia anjaha nini ma hu bani, “Ham inang, maluah ma ham humbani naboritmu in!”

¹³ Lanjar itampeihon ma tangan-Ni hu bani; gabe mintor dirgak ma ia, anjaha ipuji ma Naibata.

¹⁴ Ia sintua ni parguruan ai, sogam do uhurni, halani na pamalum naborit ai Jesus sanggah ari Sabat, gabe nini ma hubani halak na mabuei ai, “Onom ari do pangkorjahononkon; ijai ma nasiam roh, ase ipamalum nasiam, ulang ma sanggah ari Sabat.”

¹⁵ Jadi nini Tuhan in ma mambalosisi, “Ale sipakulah-kulah, ai lang haganup do nasiam, age bani ari Sabat paluahkon lombuni atap halodeni humbani harang, laho pasiburhon ai?

¹⁶ Ia naboru on, ai ma boru ni si Abraham, na dob sinangkut ni setan sapuluh ualuh tahun dokahni, mintor lang ma patut tanggalan sangkut-sangkut on bani ari Sabat?”

¹⁷ Jadi dob ihatahon sonai, maila ma haganup imbang-imbang-Ni ai, tapi marmalas ni uhur do haganup halak na mabuei ai, halani haganup pambahenan-Ni na marmulia ai.

Limbaga Pasal Harajaon ni Naibata

(Mat. 13:31-33; Mrk. 4:30-32)

¹⁸ Dob ai ihatahon ma, “Usih huja do Harajaon ni Naibata, anjaha huja do ai pausihon-Ku?

¹⁹ Usih do ai hubani batu ni loharum na ibuat halak laho manaburhon ai hu juman. Jadi tubuh ma, anjaha roh do manuk-manuk na i awang-awang marasar bani dangkahni.”

²⁰ Jadi nini ma use, “Huja do pausihon-Ku Harajaon ni Naibata?

²¹ Usih do ai bani ragi, na ibuat sada naboru, laho manaorhon ai bani itak tolu tumba, paima marragi ganupan ai.”

Pasal Labah na Sompit

(Mat. 7:13, 14, 22, 23)

²² Jadi ibontas Jesus ma huta ampa Dusun laho mangajari, sanggah bani pardalanan-Ni dompak Jerusalem.

²³ Jadi nini sada halak ma hu Bani, “Tuhan, otik do gakni na saud maluah?”

²⁴ Tapi nini ma dompak sidea, “Maruntol ma nasiam masuk hun labah na sompit in! Ai Huhatahon ma bani nasiam: buei do namin na manlajou masuk, tapi lang boi.

²⁵ Anggo jongjong ma holi simada rumah ai, anjaha itutup labah ai, i darat ma nasiam jongjong hartuk-

hartuk marsahap, 'Tuhan, ungkab Ham ma!' tapi hatahonon-Ni ma, 'Seng hubotoh na roh hunja nasiam!'

²⁶ Gabe hatahonon nasiam ma, 'Na rap mangan minum do hanami pakon Ham, anjaha iajari Ham do hanami i alamannami.'

²⁷ Dob ai hatahonon-Ni ma, 'Seng Hubotoh na roh hunja nasiam. Laho ma hun lobei-Hu, nasiam ganup sihorjahon na so pintor!'

²⁸ Ijai ma masa doruh-doruh ampa na patungosngoson, sanggah na ididah nasiam si Abraham, si Isak, si Jakob ampa haganup nabi-nabi ai ibagas Harajaon ni Naibata, tapi anggo nasiam tarbuang hu darat.

²⁹ Ijai ma roh na hun hapoltakan ampa hasundutan, na hun utara ampa dangsina, hundul mangan ibagas Harajaon ni Naibata.

³⁰ Anjaha tonggor ma, adong do na parpudi gabe parlobei, anjaha na parlobei gabe parpudi."

Igompangi Raja Herodes Jesus

Itangisi Jesus Huta Jerusalem

(Mat. 23:37-39)

³¹ Bani panorang ai roh ma deba Parisei mangkatahon hu Bani, "Laho ma Ham, misir hunjon, ai sihol bunuhon ni si Herodes do Ham."

³² Gabe nini ma dompak sidea, “Laho ma nasiam, hatahon nasiam ma bani sorigala ai, ‘Tonggor ma, Ahu mangusir setan-setan ampa pamalum na boritan sadari on ampa patar, anjaha ari patoluhon marujung ma langkah-Ku.’

³³ Tapi maningon mardalan do Ahu sadari on, patar ampa bani ari na mangihut hujai, ai seng bulih matei nabi anggo i darat ni Jerusalem.

³⁴ Jerusalem, Jerusalem, sibunuh nabi-nabi anjaha sipargijig bani batu halak na sinuruh marayak ham! Gati do namin sihol patumpuon-Ku anakmu, songon indung ni dayok na patumpuhon anakni hu toruh ni habongni, tapi seng ra ham!

³⁵ Tonggor ma, tarulang ma rumah nasiam. Tapi Huhatahon ma bani nasiam: Seng idahon nasiam be Ahu, paima ihatahon nasiam: Pinasu-pasu ma na roh marhitei goran ni Tuhan!”

Ipamalum Jesus Sada Halak na Busungon bani Ari Sabat

(Mat. 12:9-14; Mrk. 3:1-6; Luk. 6:6-11; 13:10-17)

14 ¹Jadi masa ma, sanggah na masuk la hu rumah ni sada halak sintua ni Parisei bani ari Sabat, laho mangan domma ijai sidea manggompangi-Si.

²Jadi adong ma ijai, i lobei-Ni, sada halak na busungon.

³ Jadi nini Jesus ma manungkun sibotoh titah ampa Parisei ai, “Ai bulih do pamalumon naborit bani ari Sabat atap lang?”

⁴ Tapi sip do anggo sidea. Jadi ijamah ma halak ai, ipalum ma, lanjar isuruh ma mulak.

⁵ Anjaha nini ma hubani sidea, “Ise humbani nasiam, anggo tarrobung hubagas parigi halode atap lombu nasiam, ai lang mintor itarik nasiam do ai hu atas, age bani ari Sabat?”

⁶ Tapi seng tarbalosi sidea hata-Ni ai.

Porlu ni Toruh ni Uhur ampa Uhur na Maidop

⁷ Dob ai ihatahon ma sada limbaga bani na nidilo ai, halani ididah mamilihi ianan situnggunan sidea. Nini ma dompak sidea,

⁸ “Anggo idilo ham hu pesta parunjukan, ulang ma hundul ham bani hundulan ianan sisangapan, atap adong niontangni sangapan hun bamu,

⁹ gabe roh holi suhut ai, na mangontang ham ampa ia, mangkatahon bamu, ‘Bani ma ianan in!’ Jadi maila ma ham hundul bani ianan sitoruhan.

¹⁰ Tapi anggo hona ontang ham, laho anjaha hundul ma ham bani ianan sitoruhan, ase anggo roh na mangontang ham ai, mangkatahon bamu, ‘Hu ataskon ma ham hundul!’ Jadi sangap ma ham idahon ni ganup hasomanmu na niontang ai.

¹¹ Ai sagala na pagijang dirini, patoruhon do, tapi na patoruh dirini, sipagijangon do.”

¹² Ihatahon ma homa hubani na mangontang-Si ai, “Anggo ibahen ham pesta-pesta sanggah arian atap bodari, ulang ma dilo ham huan-huan atap saninamu, hade-hade atap parhutamu na bayak-bayak, ase ulang idilo sidea use ham, gabe ibalas ai use bamu.

¹³ Tapi anggo mambahen pesta-pesta ham, dilo ham ma na masombuh, na marsining, na repat ampa na mapitung.

¹⁴ Gabe martuah ma ham, ai seng tarbalos sidea ai bamu, tapi marbalos do ai bamu bani parpuhoon ni halak parpintor.”

Limbaga Pasal Pesta Banggal

(Mat. 22:1-10)

¹⁵ Sada humbani na mangan ai, dob ibogei ai, nini ma hu Bani, “Martuah ma na mangan i Harajaon ni Naibata!”

¹⁶ Jadi nini Jesus ma mambalosi, “Adong ma sada halak na marpesta banggal; buei do iontang hujai.

¹⁷ Jadi bani mata ni pesta ai isuruh ma juakjuakni mangkatahon bani na dob niontangni ai, ‘Roh ma nasiam, ai domma sirsir haganup!’

¹⁸ Tapi adong bei do sidalian ni sidea haganup. Nini na parlobei ai ma hu bani, ‘Baru mamboli juma do ahu, maningon laho do ahu manorih ai. Ulang pala sonaha uhurmu!’

¹⁹ Na legan mangkatahon, ‘Baru mamboli horbou do ahu lima pasang; laho ma ahu mamareksa ai. Ulang pala sonaha uhurmu!’

²⁰ Na legan use mangkatahon, ‘Baru mambuat boru ope ahu, halani ai seng tarbahen ahu roh.’

²¹ Dob mulak juakjuak ai, ipatugah ma ai bani tuanni ai. Jadi marah ma tuan ai, ihatahon ma bani juakjuakni ai, ‘Laho ma ho podas hu pasar ampa hu dalan na i huta on, arahkon ma halak na masombuh, na marsining, na mapitung ampa na repat.’

²² Jadi, dob mulak, nini juakjuak ai ma, ‘Domma saud na hinatahonmu ai, ale tuannami, tapi lumbang ope.’

²³ Jadi ihatahon tuan ai ma bani juakjuak ai, ‘Laho ma ho hu darat bani dalan na bolon ampa topi ni dalan, gogohkon ma sidea masuk ase gok rumahku!’

²⁴ Tapi huhatahon ma bennima, ‘Sahalak pe lang humbani na niontang hinan bulih mandai sipanganon na hupasirsir in.’”

Na Porlu Laho Mangirikkon Jesus

(Mat. 10:37-38)

²⁵ Sahali sanggah buei jolma mardalan mangirikkon-Si, jadi marhusor ma la mandompakkon sidea, lanjar nini ma,

²⁶ “Barang ise na roh hu Bangku, seng tarbahensi gabe susian-Ku, anggo seng sogam uhurni bani

bapani, inangni, parinangonni, niombahni, saninani, botouni ronsi hosahni sandiri.

²⁷ Seng tarbahen gabe susian-Ku halak na so mamorsan silangni, laho mangirikkon Ahu!

²⁸ Ise ma humbani nasiam na sihol pajongjong sada menara, na so hundul lobei mangetong na porlu hujai, atap na sungkup do laho mandobkon horja ai?

²⁹ Ase ulang holi, anggo domma ipauli onjolanni, hape seng tuk gogohni mandobkon, gabe igora-gora halak na mangidah ai ia.

³⁰ Nini sidea hu bani, 'Ipungkah halak on do pajongjongkon, hape seng tardobkonsi.'

³¹ Atap raja ja ma, na laho marporang pakon raja na legan, na so parlobei hundul marpingkir-pingkir, atap na tardompakkonsi do marhasoman salaksa tentara imbangni ai, na roh mandorabsi marhasoman dua laksa?

³² Tapi anggo seng tarbahensi, tontu suruhonni do suruhan mangindo pardameian, sanggah daoh ope munsuh ai.

³³ Nasiam pe, seng tarbahen atap ise pe humbani nasiam gabe susian-Ku, anggo seng tartadingkonsi haganup na dong bani.

³⁴ Na marguna do garam, tapi anggo mambar daini, aha ma bahenon paporadkon ai?

³⁵ Seng marguna ai hu juma atap bahen napu, siambukkonon mando ai. Barang ise na marpinggol, na marpanangar, itangihon ma ai.”

Limbaga Pasal Biri-biri na Magou

15 ¹ Somal do sijalo sohei ampa sipardousa roh hun dohor hu Bani, laho manangar hata-Ni.

² Jadi marungut-ungut ma halak Parisei ampa sibotoh surat, nini sidea ma, “Ijalo on do sipardousa anjaha rap mangan do la pakon sidea.”

³ Gabe ihatahon Jesus ma limbaga on bani sidea,

⁴ “Ise ma humbani nasiam sahalak parbiribiri saratus, anggo magou sada hunjai, na so manadingkon na siah puluh siah nari ai i parmahanan, laho mangindahi na so taridah ai, ronsi na jumpahsi ai?

⁵ Anjaha dob jumpahsi, itampeihon ma ai bani abarani halani malas ni uhurni.

⁶ Daskonsi ia hu rumahni, idilo ma martumpu huan-huanni ampa romban rumahni, nini ma bani sidea, ‘Marmalas ni uhur ma nasiam rap pakon ahu, halani jumpah ahu do biribiringku na magou ai.’

⁷ Huhatahon ma bani nasiam, usih hujai, buenan do malas ni uhur i nagori atas mangidah sada pardousa, na ra paubahkon uhurni, ase mangidah siah puluh siah parpintor, na so pala paubahkon uhur ni sidea.”

Limbaga Pasal Duit na Magou

(Mat. 18:12-14)

⁸ “Atap dong do nani naboru siparduit sapuluh rupiah, anggo magou sada hunjai, na so pagarahon palita, anjaha manapui rumahni, laho mangindahi duitni na magou ai, paima jumpahsi ai?

⁹ Anjaha dob jumpahsi, idilo ma martumpu huan-huanni ampa romban rumahni, nini ma, ‘Marmalas ni uhur ma nasiam rap pakon ahu, ai domma jumpah ahu duitku na magou ai.’

¹⁰ Huhatahon ma bani nasiam, usih hujai do masa malas ni uhur i lobei ni malekat ni Naibata mangidah sahalak sipardousa, na paubahkon uhurni.”

Limbaga Pasal Anak na Magou

¹¹ Dob ai nini ma use, “Adong ma dua anak ni sada halak.

¹² Gabe ihatahon sianggian ai ma dompak bapani ai, ‘Bapa, bere ham ma bangku humbani arta in, na sahira parbagiananku.’ Jadi ibagihon ma artani ai bani sidea.

¹³ Anjaha seng pala piga ari i pudi ni ai, ipatumpu sianggian ai ma haganup parbagiananni ai, dob ai laho ma ia hu nagori na daoh, anjaha ijai ma iparbois-bois artani ai marhitei goluh na so marrantei.

¹⁴ Dob iboiskon haganupan ai, masa ma lohei maningting i nagori ai, anjaha ia pe mulai ma marhahurangan.

¹⁵ Jadi laho ma ia tondok bani sada halak parnagori ai, gabe isuruh ma ia marmahan babuy hu jumani.

¹⁶ Ipindo uhurni do manggoki boltokni bani hulit-kulit ni indahan ni babuy ai, tapi seng dong na mamberesi bani.

¹⁷ Jadi ipaulak ma uhurni hubagas, nini ma, buei ni in gajian ni bapa, na marlobih-lobih bani sipanganon, hape ahu, matei gayuran do ijon.

¹⁸ Misir mando ahu marayak bapa, huhatahon ma hu bani, 'Ham bapa, domma mardousa ahu hu nagori atas ampa bamu.

¹⁹ Seng talup be ahu goranon anakmu, bahen ham ma ahu songon sada halak gajian bamu.'

²⁰ Jadi misir ma ia marayak bapani ai. Tapi daoh ope ia, domma itatap bapani ai ia, gabe maidop ma uhurni; marlintun ma ia manjumpahkonsi, irohop ma ia anjaha isummah.

²¹ Marsahap ma anak ai bani, 'Ham bapa, domma mardousa ahu hu nagori atas ampa hu bamu, seng talup be goranon ahu anakmu!'

²² Tapi nini bapa ai ma dompak jabolonni, 'Boan hanima ma pakeian sijengesan, anjaha pakeihon hanima ma ai bani! Bahen hanima ma sada tintin bani jari-jarini ampa sipatu bani naheini!

²³ Alop hanima ma anak ni lombu na pinamombur ai, anjaha sayat ma, ase mangan hita anjaha marmalas ni uhur.

²⁴ Ai na dob matei do anakkon gabe mulak manggoluh, na dob magou do ia, gabe jumpah use.' Jadi marmalas ni uhur ma sidea.

²⁵ Tapi i juma do anak ni sikahanan ai. Jadi rohkonsi ia hun dohor hu rumah, ibogei ma sora ni musik ampa na manortor.

²⁶ Gabe idilo ma sahalak humbani jabolon ai, ipapangkei ma atap aha do na masa.

²⁷ Jadi nini ma hu bani, 'Domma roh anggimu, jadi isayat bapanta do lombu pinamombur ai, halani jorgit do ia mulak.'

²⁸ Jadi marah ma ia, anjaha seng ra roh hu rumah, gabe roh ma bapani mangajar-ajarisi.

²⁹ Tapi nini ma mambalosi bapani ai, 'Martahun-tahun ma ahu mambalosi ham, anjaha seng onggahulanggar parentahmu. Tapi anak ni hambing pe lang onggah ibere ham bangku, ase marmalas ni uhur ahu ampa huan-huanku.

³⁰ Hape rohkonsi anakmu, na mamboiskon artamu rap pakon boru jalang, gabe isayat ham do anak ni lombu na pinamombur in.'

³¹ Jadi nini ma hu bani, 'Ambia, tongtong do ho rap pakon ahu, anjaha haganup na dong bangku in, ho do simadasi.

³² Tapi patut do hita marmalas ni uhur anjaha marmegah-megah, ai na dob matei do anggimon gabe manggoluh, anjaha na dob magou do ia, gabe jumpah.” ’

Limbaga Pasal Sijolom Anakkunsi na Geduk

16 ¹ Ihatahon ope homa bani susian-Ni ai, “Adong ma sada halak na bayak, anjaha adong do sada sijolom anakkunsi bani. Tarbogei ma hu bani, na iparbois-bois sijolom anakkunsi ai do artani.

² Jadi idilo ma ia, nini ma hu bani, ‘Aha do in, na hutangar pasal ho? Patuduh ma paretongan ni na hinorjahonmu! Ai seng tarbahen be ho sijolom anakkunsi.’

³ Jadi marpingkir ma sijolom anakkunsi ai ibagas uhurni, ‘Aha ma sibahenonku, ai lopaskonon ni tuanku mando ahu humbani horjangku? Manangkul seng dong gogohku, mangindo-indo mela do ahu.

⁴ On ma tene sibahenonku, ase ijalo sidea ahu hu rumah ni sidea, anggo lopas ahu humbani horjangkai.’

⁵ Jadi sada-sada ma idilo sagala paridouan ni tuanni ai hu lobeini, nini ma hubani na parlobei roh ai, ‘Sadiha utangmu bani tuanta?’

⁶ Balosni, 'Saratus gusi minak.' Jadi nini ma hu bani, 'On ma surat ni utangmu, podaskon hundul anjaha suratkon ma lima puluh!'

⁷ Bani na legan use ihatahon, 'Ia ho, sadiha do utangmu?' Nini ma, 'Saratus sumpit omei.' Ihatahon ma hu bani, 'On ma surat ni utangmu, suratkon ma ualuh puluh!'

⁸ Jadi ipuji tuan ai ma sijolom anakkunsi paruhur na geduk ai, halani pentar ni pambahenanni ai. Ai pandeinan do anak ni dunia on humbani anak haliharon in marsaor pakon hasomanni sauhur.

⁹ Ahu pe, huhatahon ma bennima, pindahi hanima ma bannima huan-huan marhitei mammon na geduk in, ase anggo bois in, ijalo hanima hubagas ianan sisadokah ni dokahni.

¹⁰ Anggo hatengeran ni uhur halak bani na otik, hatengeran ni uhur do ia age bani na buei, anjaha anggo geduk ia bani na otik, geduk do homa age bani na buei.

¹¹ Anggo seng hatengeran ni uhur hanima pasal mammon na geduk in, ise ma na ra mangondoskon bannima arta na tongon ai?

¹² Anjaha anggo seng hatengeren ni uhur hanima pasal barang ni halak na legan, ise ma na ra mamberehon bannima na dong Bennami.

¹³ Seng tarbalosi sada jabolon dua tuan, sogamanni do na sada, haholonganni do na sada nari; hombaranni do na sada, anjaha mapas bani na

sada nari. Seng tarbalosi hanima Naibata rap pakon mammon.”

Pasal Hapintoron ni Halak Parisei ampa Sibotoh Titah

¹⁴ Haganupan ai itangar halak Parisei, na surakah bani duit, gabe irisa-risai sidea ma la.

¹⁵ Jadi nini ma dompak sidea, “la nasiam, ipapintor-pintor nasiam do diri nasiam i lobei nijolma, tapi itanda Naibata do uhur nasiam, ai na timbul banijolma, ai do hagigi bani Naibata.

¹⁶ Sibar si Johannes do titah in ampa nabi-nabi. Hunjai nari iambilankon ma Ambilan Na Madear pasal Harajaon ni Naibata, anjaha haganup do halak marompot sihol masuk hubagas.

¹⁷ Tapi urahan do salpu langit ampa tanoh humbani sada titik ni titah in magou.

¹⁸ Parbangkis do ganup na manirangkon parinangonni anjaha ibuat na legan; parbangkis do homa na mambuat naboru na sinirangkon ni dalahini ai.”

Halak na Bayak ampa si Lasarus na Masombuh

¹⁹ “Adong ma sada halak na bayak, na marpakeian beledu sigenger ampa hiau putih na alus, ari-ari do ia marpesta.

²⁰ Tapi adong ma sada halak na masombuh, na margoran si Lasarus, tibal-tibal i lobei ni labah ni na bayak ai; gok bayoh do angkulani.

²¹ Iparsinta uhurni do mangankon rima-rima, na mardabuhan humbani meja ni halak na bayak ai; tapi baliang do na roh mandilati bayohni ai.

²² Matei ma halak na masombuh ai, anjaha iboan malekat ma ia hu abingan ni si Abraham. Matei ma homa na bayak ai, lanjar itanom ma,

²³ anjaha hun nagori toruh ai, iananni mandagei na parngit ai, mangkawah ma ia hu babou, gabe ididah ma bani na daoh si Abraham ampa si Lasarus i abinganni.

²⁴ Jadi dilo-dilo ma ia, nini ma, 'Ale ompung Abraham! Idop ma uhurmu bangku, suruh ham ma si Lasarus manornobkon ujung ni jari-jarini bani bah, laho palamlam dilahku, ai borit do huahap ibagas apuy on.'

²⁵ Tapi nini si Abraham ma, 'Ingat ma, Ambia, na dob ijalo ho na madear, sanggah manggoluh ho, tapi anggo si Lasarus on na maparngit do. Anggo nuan apohon ma ia ijon, tapi mandagei na parngit mando anggo ho.

²⁶ Ambah ni ai, lombang bagas do holangkolangnami ampa hanim, ase ulang boi halak na hunjon hujin, anjaha na hunjin pe seng boi mandipar bennami hujon.'

²⁷ Nini ma use, ‘Anggo sonai do, hupangindo ma bamu ompung, suruh ham ma ia hu rumah ni bapa,
²⁸ ai adong ope lima nari saninangku, ase ipalumba sidea, ase ulang dihut sidea masuk bani ianan na parngit on.’

²⁹ Tapi nini si Abraham ma, ‘Adong do bani sidea surat ni si Musa ampa nabi, ai ma itangihon.’

³⁰ Jadi nini ma, ‘Lang sonai, ompung Abraham; tapi ambit adong sahalak humbani na dob matei roh marayak sidea, sai na paubahon ni sidea do uhur ni sidea.’

³¹ Tapi ibalosi ma, ‘Anggo seng itangihon sidea si Musa pakon nabi-nabi, seng anjai balosan ni sidea, age adong na puho humbani na matei.’”

Pasal Parsangsian ampa na Marsisasapan Dousa

(Mat. 18:6-10; 15-22; Mrk. 9:42-48)

17 ¹ Ihatahon ma hubani susian-Ni ai, “Seng tarbahren lang roh parsangsian, tapi bursik ma na parohkonsi.

² Dearan do bani halak sisonai ai, igantungkon losung batu bani borgokni anjaha inongnongkon ia hu laut, humbani na sangsi ibahen sahalak na etek-etek on.

³ Jaga hanima ma dirinima! Anggo mardousa hasomanmu, pagolpa ma ia, jadi anggo ipaubah uhurni, sasap ma dousani.

⁴ Anjaha porini pitu hali ia ibagas na sadari marsalah dampak ho, anjaha pitu hali ia roh hubam mangkatahon, ‘Jora ma ahu,’ maningon sasaponmu do ai.”

Pangindoan ni Apostel ase Itambahi Haporsayaon ni Sidea

Limbaga Pasal Jabolon Siparugas

⁵ Dob ai nini apostel ai ma dampak Tuhan in, “Tambahi Ham ma haporsayaonnami!”

⁶ Jadi nini Tuhan in ma, “Anggo adong haporsayaonnima na sabatu ni loharum, boi do hatahononnima bani hayu ara on, ‘Morbat ma ho, anjaha tarsuan ma ho hu laut!’ Gabe balosanni do hanima.

⁷ Porini adong hun bannima na marjabolon, sipaninggala atap siparmahan pe ai, mintor hatahononni ma hu bani, sanggah mulak ia hun juma, ‘Podas ma roh hujon, hundul ma ho mangan!’

⁸ Tapi ai lang hatahononnima do hu bani, ‘Patorsa sipanganonku, mamonting ma, idangi ma ahu mangan ampa minum, dob ai pe ase mangan anjaha minum ho!’

⁹ Mintor martarima kasih ma ia hubani jabolon ai, halani ihorjahon na niaturhoni ai!

¹⁰ Sonai do homa hanima, anggo domma ihorjahon hanima ganup na pinarentahkon bannima, hatahon hanima ma, ‘Jabolon na so margagan do hanami, sibar horja na patut do hansa ilahoi hanami.’”

Ipamalum Jesus Sapuluh Halak na Gadamon

¹¹ Sanggah mardalan la dompak Jerusalem, ibontas ma parbalogan ni Samaria ampa Galilea.

¹² Sanggah na laho masuk la hubagas sada huta, ijumpahkon sapuluh halak na gadamon ma la, na jongjong mandaoh-daoh.

¹³ Ipagomos sidea ma sorani, nini ma, “Jesus, Guru, idop ma uhur-Mu bannami!”

¹⁴ Dob ididah sidea, nini ma, “Laho ma nasiam, patuduhkon nasiam ma diri nasiam bani malim!” Anjaha sanggah na laho ai sidea, gabe susi ma sidea.

¹⁵ Sada humbani sidea, dob ididah na dob malum ia, mulak ma, lanjar ipuji do Naibata marhasoman sora na gogoh.

¹⁶ Marrogop ma ia hu lobei ni Jesus, mangkatahon tarima kasih Bani. Anjaha halak Samaria do ai.

¹⁷ Tapi nini Jesus ma mambalosi, “Ai lang sapuluh do sidea na dob malum ai? Ija do na siah nari?”

¹⁸ Ai seng dong hape na ra mulak pasangapkon Naibata, sobali halak na legan bangsa on?”

¹⁹ Lanjar nini ma hu bani, “Jongjong ma ham, laho ma! Haporsayaonmu do na paluahkon ham!”

Tanda-tanda ni Parroh ni Jesus Paduahalihon

²⁰ Isungkun Parisei ma Ia, “Antigan ma roh Harajaon ni Naibata?” Jadi nini ma mambalosi sidea, “Seng marpanrantam idahon parroh ni Harajaon ni Naibata.

²¹ Anjaha seng tarhatahon, ‘Tonggor ma ijon do!’ atap, ‘ijai do!’ Ai i tongah-tongah nasiam do Harajaon ni Naibata.”

²² Dob ai nini ma hubani susian-Ni ai, “Na roh ma arini, siholan ma hanima sihol mangidah sada ari ni Anak ni Jolma in, tapi seng idahonnima ai.

²³ Anjaha hatahonon ni sidea do bannima, ‘Tonggor ma, ijai do! Tonggor ma, ijon do!’ Ulang ma laho hanima hujai anjaha ulang ma irikken!

²⁴ Ai songon hilap na mardejep, na mambahen siang langit hun ujung hu ujung, sonai do pasal Anak ni Jolma in bani arini ai.

²⁵ Tapi maningon buei do lobei taronon-Ni; ambukkonon ni na sasundut on do Ia.

²⁶ Songon na masa bani panorang ni si Noak, sonai do masa bani panorang ni Anak ni Jolma in.

²⁷ Mangan minum do sidea, mambuat boru anjaha palahohon boru, das bani panorang ni si Noak masuk hubagas parau ai; jadi roh ma bah na sumbang ai mamboiskon sidea haganup.

²⁸ Songon na masa bani panorang ni si Lot: Mangan minum do sidea, mamboli anjaha manjual, manuan anjaha pajongjong rumah.

²⁹ Tapi bani panorang parlaho ni si Lot hun huta Sodom, turun ma udan apuy pakon hirtah hun babou, laho mamboiskon sidea haganup.

³⁰ Sonai ma masa bani ari ai, talarhonsi Anak ni Jolma in.

³¹ Ise bani ari ai i atas tayub, anjaha ugas-ugasni adong ibagas rumah, ulang ma pala ia turun laho mangalop ai; anjaha na i juma pe ulang ma pala mulak.

³² Ingat ma parinangon ni si Lot.

³³ Magouan hosah ma na sihol paluahkon hosahni, tapi na magouan hosah, ai do na pagoluhkonsi.

³⁴ Huhatahon ma bannima, ‘Bani na saborngin ai adong ma dua halak sapodoman, sada ijalo, na sada nari itadingkon do.

³⁵ Rap manduda ma dua naboru, sada ijalo, tapi na sada nari itadingkon do.

³⁶ Adong ma dua halak i juma, sada ijalo, tapi na sada nari itadingkon do.”

³⁷ Jadi nini sidea ma mambalosi-Si, “Ija ma ai Tuhan?” Jadi nini ma bani sidea, “Ija adong bangkei, hujai do martumpu kawak.”

Golgol Martonggo

18¹ Dob ai ihatahon ma bani sidea sada limbaga, laho patorangkon paboa maningon tongtong do sidea martonggo, seng bulih lengah,

² nini ma, “Adong ma sada panguhum ibagas sada huta, seng mabiar ia bani Naibata anjaha seng parduli bani jolma.

³ Anjaha adong do homa i huta ai sada naboru na mabalu, na marnunut roh marayaksi, mangkatahon, ‘Pintori ham ma ahu dompak imbangkai!’

⁴ Dokah do seng ra ia lobei. Tapi nini ma use ibagas uhurni, ‘Tongon, seng huhabiari Naibata, anjaha seng parduli ahu bani jolma,

⁵ tapi huurus ma lah parkara ni naboru na mabalu on, ase ulang roh be ia manunsahi ahu.’”

⁶ Dob ai nini Tuhan in ma, “Tangar hanima ma hata ni panguhum na geduk ai!

⁷ Ia Naibata, mintor lang ma pintoran-Ni na pinilih-Ni, na mandilo-Si arian pakon borngin? Ai padokah-dokahon-Ni ma bani sidea?

⁸ Huhatahon ma bennima, podas ma sidea pintoran-Ni! Tapi anggo roh Anak ni Jolma in, adong do nani jumpahon-Ni haporsayaon i atas tanoh on?”

Dousa Gijang ni Uhur

⁹ Dob ai ihatahon ma sada limbaga pasal halak na martenger ni uhur bani dirini, na mangkatahon pintor sidea, na mapas bani hasomanni, nini ma,

¹⁰ “Adong ma dua halak na tangkog hu rumah panumbahan martonggo, halak Parisei do na sada, anjaha sijalo sohei do na sada nari.

¹¹ Jadi dorgak ma Parisei ai jongjong, anjaha sonon ma tonggoni ibagas uhurni, ‘Ham Naibata, tarima kasih ma huhatahon Bamu, halani seng dos ahu pakon halak na legan, panrampok, pargeduk, parbangkis barang songon sijalo sohei an.

¹² Dua hali saminggu ahu marpuasa, anjaha huparsapuluh do sagala sinaringku.’

¹³ Ia halak sijalo sohei ai mandaoh-daoh do ia jongjong, gari mangkawah dompak nagori atas seng barani ia. Tapi itompas ma tontonni, lanjar nini ma, ‘Ham Naibata, idop ma uhur-Mu bangku pardousa on!’

¹⁴ Huhatahon ma bennima, pintoran do on laho mulak ase na sada an. Ai sipatoruhon do sagala na pagijang dirini, tapi na patoruh dirini sipagijangon do!”

Pamasu-masuon ni Jesus bani Dakdanak

(Mat. 19:13-15; Mrk. 10:13-16)

¹⁵ Iboan sidea do homa dakdanak hu lobei-Ni, ase ijamah sidea. Tapi mangidah ai susian ai, ipandang ma sidea.

¹⁶ Tapi idilo Jesus ma sidea, nini ma, “Lopas hanima ma roh dakdanak in Bangku, ulang ma pandang hanima sidea, ai bani sisonin do Harajaon ni Naibata!

¹⁷ Sintong do na Huhatahon on bennima, ‘Na so manjalo Harajaon ni Naibata songon dakdanak, seng anjai masuk ia hujai.’”

Garama na Bayak

(Mat. 19:16-30; Mrk. 17:31)

¹⁸ Jadi isungkun sada halak sipambobai ma la, nini ma, “Ham Guru, sidear uhur, aha do sibahenonku, ase tarteian ahu hagoluhan na sadokah ni dokahni?”

¹⁹ Jadi nini Jesus ma hu bani, “Mase ihatahon ham Ahu sidear uhur? Seng dong sidear uhur sobali Naibata.

²⁰ Ibotoh ham do titah in: Ulang ho marbangkis! Ulang ho mamunuh! Ulang ho manangko! Ulang ra ho manaksihon hata na so tongon! Pasangap bapamu pakon inangmu!”

²¹ Jadi nini ma, “Haganupan ai domma hudalankon humbani sietek-etekonku nari.”

²² Manangar ai Jesus, nini ma hu bani, “Sada mando na hurang bamu! Jual ham ma haganup na dong bamu, anjaha pambere ma ai bani halak na masombuh, gabe mararta ma ham i nagori atas. Dob ai roh ma ham, irikkon ham ma Ahu!”

²³ Manangar ai pusok ma uhurni, ai na bayak tumang do ia.

²⁴ Mangidah ai Jesus, nini ma, “Mahol ni in masuk halak na bayak hubagas Harajaon ni Naibata!

²⁵ Urahan do masukan ni unta ruang ni jarum, ase sada halak na bayak masuk hubagas Harajaon ni Naibata.”

²⁶ Jadi nini halak na manangar ai ma, “Anggo sonai, ise ma boi maluah?”

²⁷ Nini ma, “Na so tarbahen bani jolma, tarbahen Naibata do.”

²⁸ Jadi nini si Petrus ma, “Itadingkon hanami do na dong bannami, laho mangirikkon Ham.”

²⁹ Gabe ihatahon ma bani sidea, “Na sintong do hatang-Kon bannima: Sagala na manadingkon rumahni barang parinangonni barang saninani barang namatoriasni barang niombahni halani Harajaon ni Naibata,

³⁰ maningon marlompit do jaloonni i dunia on, ambahni ai hagoluhan sisadokah ni dokahni bani dunia magira.”

Ilumbahon Jesus Sitaronon-Ni Patoluhalihon

(Mat. 20:17-19; Mrk. 10:32-34)

³¹ Jadi iarahkon Jesus ma na sapuluh dua ai, nini ma dompak sidea, “Tonggor ma, na tangkog ma hita hu Jerusalem, anjaha saud ma bani Anak ni Jolma in haganup, na dob tarsurat marhitei sagala nabi.

³² Ai ondskonon ma la bani sipajuh begu-begu, gabe apasanni anjaha pahirionni anjaha tijuranni ma la,

³³ lonsingan anjaha bunuhonni ma la, dob ai mulak manggoluh do la bani ari patoluhon.”

³⁴ Tapi otik pe lang iarusi sidea pasal ai; ponop do hata ai humbani uhur ni sidea, seng ibotoh sidea na hinatahon-Ni ai.

Ipamalum Sada Halak na Mapitung

(Mat. 20:29-34; Mrk. 10:46-52)

³⁵ Jadi sanggah na dohor la hu Jeriko, adong ma sada halak na mapitung, hundul-hundul i dalan ai mangindo-indo.

³⁶ Manangar halak na mabuei, na mamontas ai, ipapangkei ma atap aha do na masa.

³⁷ Gabe ipatugah halak ma bani, “Jesus na hun Nasaret montas.”

³⁸ Jadi dilo-dilo ma ia, nini ma, “Ham Jesus, Anak ni si Daud, idop ma uhur-Mu bangku!”

³⁹ Jadi ihata halak na parlobei ai ma ia, ase sip namin. Tapi lambin ipagomos do dilo-dilo, “Ham Anak ni si Daud, idop ma uhur-Mu bangku!”

⁴⁰ Jadi soh ma Jesus, anjaha ihatahon ma, ase iboan ia hu lobei-Ni. Dob dohor ia, isungkun ma ia,

⁴¹ “Aha ipindo uhurmu bahenon-Ku bamu?” Jadi ihatahon ma, “Ham Tuhan, marpangidah ma namin matangku!”

⁴² Jadi ihatahon Jesus ma hu bani, “Marpangidah ma ham! Haporsayaonmu do na paluahkon ham.”

⁴³ Jadi mintor marpangidah ma matani, iirikkon ma Jesus lanjar ipuji ma Naibata. Mangidah ai halak na mabuei ai, ipuji sidea ma Naibata.

Si Sakeus

19 ¹ Masuk ma Jesus hu Jeriko, lanjar montas ma la hunjai.

² Jadi adong ma ijai sada halak, kopala ni sijalo sohei, na margoran si Sakeus; na bayak do ia.

³ Ipindo uhurni do sihol mangidah rupa ni Jesus, tapi seng tarbahensi halani halak na mabuei ai, ai parbadan na pondok do ia.

⁴ Gabe marlintun ma ia dompak lobei, ipanangkih ma sada hayu anak, ase taridahsi la, ai hunjai do dalan sibontason-Ni.

⁵ Dob das Jesus bani ianan ai, mangkawah ma la hu atas, anjaha nini ma hu bani, “Ale Sakeus! Podas

ma susur, ai maningon tondok do Ahu i rumahmu sadari on!”

⁶ Jadi podas ma ia susur, anjaha ijalo ma la ibagas malas ni uhur.

⁷ Jadi mangidah ai, marungut-ungut ma sidea haganup, nini ma, “Tondok do la hape bani sada halak pardousa!”

⁸ Jongjong ma si Sakeus, ihatahon ma bani Tuhan in, “Eak Tuhan, satongah humbani artangku hubere ma bani halak na masombuh, anjaha anggo adong na hutipu, ompat lompit ma ai hupaulak.”

⁹ Jadi ihatahon Jesus ma hu bani, “Jumpahan haluahon do rumah on sadari on, ai anak ni si Abraham do homa ia.

¹⁰ Ai na roh do Anak ni Jolma in mangindahi anjaha paluahkon na magou.”

Limbaga Pasal Pokok na Pinabungahon

(Mat. 25:14-30)

¹¹ Sanggah na tangi ai sidea bani hata-Ni, inunut Jesus ma marlimbaga, halani dohor ma la hu Jerusalem, anjaha iagan sidea, mintor sipatalaron ma Harajaon ni Naibata.

¹² Jadi nini ma, “Adong ma sada halak na sangap, na laho hu nagori na daoh, laho manjalo harajaon bani, dob ai mulak do ia use.

¹³ Jadi idilo ma sapuluh halak juakjuakni, ibere ma bani sidea sapuluh kati pirak, anjaha nini ma hubani

sidea, 'Tiga-tigahon hanima ma on ronsi na mulak ahu!'

¹⁴ Tapi sogam do uhur ni hasoman ni warga negara mangidahsi, gabe isuruh sidea ma suruhan hun pudini, mangkatahon, 'Seng ra hanami, halak on manrajai hanami!'

¹⁵ Ase dob ijalo harajaon ai, mulak ma ia, anjaha isuruh ma na mandilo juakjuakni ai, na dob manjalo duit ai, sihol mambotoh pasal untung ni sidea bei.

¹⁶ Jadi roh ma na parlobei ai, nini ma, 'Ham tuannami, sepuluh kati do untung ni na sakati ondi!'

¹⁷ Gabe nini ma hu bani, 'Dear ma ai, ale juakjuak na madear! Halani hatengeran do ho bani na otik, sepuluh huta ma kuasaanmu.'

¹⁸ Dob ai roh ma na paduahon ai, nini ma, 'Ham tuannami, lima kati do untung ni na sakati ondi!'

¹⁹ Jadi nini ma homa hu bani, 'Ia ho, lima huta ma gomgomanmu!'

²⁰ Dob ai roh ma na legan ai, nini ma, 'Ham tuannami, na ham ma pirakta na sakati ondi, ai hubungkus do in ibagas saputanganku.

²¹ Ai biar do uhurhu mangidah ham, halani halak na koras do ham. Ibuat ham do na so ninahkonmu anjaha ipariamai ham do na so sinuanmu.'

²² Nini ma hu bani, 'Ale juakjuak na jahat, domu hubani hatamin do uhumanku ho! Ibotoh ho do hape halak na koras do ahu, sibuat na so hunahkon anjaha na marpariamai na so husuan.

²³ Mase ma lang ipabungahon ho duitkin, ase hutunggu in rap pakon bungani bani parrohku?’

²⁴ Jadi nini ma hubani na jongjong ijai, ‘Buat hanima ma bagianni ai, anjaha bere hanima ma ai bani parbagian na sapuluh ai!’

²⁵ Jadi nini sidea ma hu bani, ‘Ham tuannami, domma sapuluh kati bani!’

²⁶ Huhatahon ma bennima, ‘Bani ganup na marnadong bereon do, tapi buaton do humbani na so marnadong na adong bani hinan.

²⁷ Tapi anggo munsuhkai, na so ra rajaankai, boan hanima ma hujon, anjaha bunuh ma sidea i lobeihu.’”

Parmasuk ni Jesus hu Jerusalem

(Mat. 21:1-11; Mrk. 11:1-11; Joh. 12:12-19)

²⁸ Jadi dob ihatahon sonai, itoruskon Jesus ma mardalan, laho tangkog hu Jerusalem.

²⁹ Jadi daskonsi la dohorhon Betpage ampa Betania, na bani dolog, na margoran Jetun ai, isuruh ma dua halak humbani susian ai,

³⁰ anjaha nini ma, “Laho ma hanima hu huta na i lobeinima in, anjaha masukkonsi hanima, jumpah hanima ma tambat ijai anak ni halode, na so onggahunduli halak. Tanggali hanima ma ai, lanjar boan ma hujon!

³¹ Jadi anggo adong na manungkun hanima, ‘Mase itanggali hanima in?’ hatahon hanima ma, ‘Na porlu do in bani Tuhan in.’”

³² Dob ai laho ma na sinuruh ai, anjaha jumpah sidea ma songon na hinatahon-Ni ai bani sidea.

³³ Sanggah na mananggali anak ni halode ai sidea, ihatahon simadasi ai ma bani sidea, “Mase itanggali nasiam anak ni halode in?”

³⁴ Jadi ibalosi sidea ma, “Na porlu do in bani Tuhan in!”

³⁵ Jadi itogu sidea ma ai bani Jesus; iamparhon sidea ma hiou ni sidea hu atas ni halode ai, anjaha ipahundul sidea ma Jesus hu atas ni ai.

³⁶ Anjaha, sanggah na montas ai la, iamparhon sidea ma hiou ni sidea bani dalan ai.

³⁷ Tapi laho manjumpahkon tuadan na i Dolog Jetun ai, mamungkah malas ma uhur ni susian na buei ai, ipuji sidea ma Naibata marsora na gogoh halani haganup hagogohon, na dob nididah ni sidea,

³⁸ nini ma, “Napuji ma Raja in, na roh marhitei goran ni Tuhan! Damei do i surga, anjaha hasangapon ma i babou!”

³⁹ Deba humbani Parisei, na adong i tongah-tongah ni halak na mabuei ai, mangkatahon hu Bani, “Guru, pandang Ham ma susian-Mu in.”

⁴⁰ Jadi nini ma marbalos, “Huhatahon ma bani nasiam: Porini sip sidea, dilo-dilo ma batu in!”

Itangisi Jesus Huta Jerusalem

⁴¹ Jadi, sanggah na lambin dohor la, anjaha taridah ma huta ai, gabe itangisi ma ai,

⁴² nini ma, “Ambit itanda ham ma namin bani ari on na padamei ham! Tapi ponop do in nuan humbani matamu.

⁴³ Na roh ma ari bamu, hubuon ni munsuhmu ma ham, inggotanni anjaha sosakanni ma ham liot.

⁴⁴ Anjaha panepneponni ma ham rap pakon anakmu, na i tongah-tongahmu in, anjaha seng paturutonni age dua batu patindih, halani seng itandai ham panorang panohuon bamu.”

Iusir Jesus Partiga-tiga hun Alaman ni Rumah Panumbahan

(Mat. 21:12-17; Mrk. 11:15-19; Joh. 2:12-17)

⁴⁵ Dob ai masuk ma Jesus hu rumah panumbahan ai, jadi iusir ma hunjai siparjualan.

⁴⁶ Nini ma hubani sidea, “Tarsurat do, rumah partonggoan do rumah-Ku, hape liang ni panamum do in ibahen nasiam.”

⁴⁷ Anjaha ari-ari do la mangajari i rumah panumbahan ai. la sintua ni malim ampa sibotoh titah ampa pambobai ni bangsa ai, ipindahi sidea do dalam laho mamunuh-Si,

⁴⁸ tapi seng ibotoh sidea, aha sibahenon ni sidea, ai sai longkot do uhur ni na mabuei Bani, marosuh do sidea mambogei-Si.

Sungkun-sungkun ni Pangintuai ni Jahudi Pasa Kuasa ni Yesus

(Mat. 21:23-27; Mrk. 11:27-33)

20¹ Bani na sadari, sanggah na mangajari halak na mabuei ai la i rumah panumbahan, anjaha mangambilankon Ambilan Na Madear, roh ma marayak-Si sintua ni malim pakon sibotoh surat ampa pangintuai-pangintuai,

² anjaha nini sidea ma hu Bani, “Hatahon Ham ma bannami: Marhitei kuasa ja do ibahen Ham in? Atap: Ise do na mambere kuasa in Bamu?”

³ Jadi nini ma mambalosi, “Ahu pe, adong do sisungkunon-Ku bani nasiam. Hatahon nasiam ma Bangku.

⁴ la pandidion ni si Johannes, na hun surga do ai, atap humbani jolma?”

⁵ Jadi martimbang ma sidea samah sidea, “Anggo ihatahon hita: Hun surga, gabe hatahonon-Ni ma hu banta: Mase ma lang porsaya nasiam bani?

⁶ Tapi anggo ihatahon hita: Hun bani jolma do, pargijigon ni halak na mabuei in ma hita bani batu, ai porsaya do sidea, nabi do si Johannes.”

⁷ Jadi ibalosi sidea ma, “Seng ibotoh hanami, atap na hunja do ai.”

⁸ Jesus pe ihatahon ma bani sidea, “Ahu pe seng patugahon-Ku bani nasiam, atap marhitei kuasa ja Hubahen in.”

Limbaga Pasal Sisewa Pohon Anggur na Jahat

(Mat. 21:33-46; Mrk. 12:1-12)

⁹ Anjaha ihatahon ma limbaga on bani halak na mabuei ai, “Adong ma sada halak na mambuka pohon anggur, jadi ipasewahon ma ai bani piga-piga halak parjuma-juma, dob ai laho ma ia hu nagori na legan, mardokah-dokah.

¹⁰ Bani panorangni isuruh ma juakjuakni bani parjuma-juma ai, ase ibere sidea deba gogoh ni pohon anggur ai bani. Tapi ibogbogi parjuma-juma ai do ia, anjaha isuruh ma ia mulak sonin.”

¹¹ Jadi isuruh use ma juakjuakni na legan; tapi ia pe homa hona bogbog anjaha bador do ibahen sidea, anjaha isuruh ma ia mulak mangambe i tangan tumang.

¹² Isuruh ma use na patoluhon, tapi ia pe hona ughan do anjaha hona usir.

¹³ Dob ai nini simada pohon anggur ai ma, ‘Aha ma sibahenonku? Husuruh ma anak haholongan ni uhurhin, ra malang do sidea bani.’

¹⁴ Tapi dob ididah parjuma-juma ai ia, manriah ma sidea, nini ma samah sidea, ‘On do sipanean ai. Bunuh hita ma ia, ase hita simada parbagiananni ai.’

¹⁵ Jadi isarad sidea ma ia hu darat ni pohon ai, lanjar ibunuh ma. Aha ma nani bahenon ni simada pohon ai bani sidea?

¹⁶ Na roh ma ia mamunuh parjuma-juma ai, anjaha ondoskononni ma pohon anggur ai bani halak na legan.” Tapi manangar ai, nini sidea ma, “Palis ma in!”

¹⁷ Tapi ikawahkon ma sidea, lanjar nini ma, “Ai aha do arti ni na tarsurat on: Batu na niambukkon ni tukang rumah in, ai do gabe batu palas parsuhi-suhi.

¹⁸ Marosak do sagala na dabuh bani batu in, anjaha maropuk sagala na nidabuhanni.”

¹⁹ Jadi ipindahi sibotoh surat ampa sintua ni malim ma dalan, laho manangkap-Si bani panorang ai, ai ibotoh sidea, sidea do tinuju ni limbaga ai, tapi mabiar do sidea bani halak na mabuei ai.

Sungkun-sungkun Pasal Balasting bani Kesar

(Mat. 22:15-22; Mrk. 12:13-17)

²⁰ Laho manggompangi-Si, isuruh sidea ma mata-mata, na maruhur sipakulah-kulah, andohar tartangkap sidea la marhitei parsahap-Ni, ase tarondoskon sidea la bani pamarentah, bani kuasa ni panguhum ai.

²¹ Jadi nini sidea ma manungkun-Si, “Guru, ibotoh hanami pintor do parsahap-Mu ampa pamodahion-Mu, anjaha seng sididah bohi Ham, sintong do tene ipodahkon Ham dalan ni Naibata.

²² Patut do bereonta balasting bani kesar, atap lang?”

²³ Tapi ibotoh Jesus do akal ni sidea ai, gabe nini dompak sidea,

²⁴ “Patuduh nasiam ma Bangku sada dinar! Gambaran pakon surat ni ise do on?” Jadi nini sidea ma, “Gambaran ni kesar.”

²⁵ Gabe nini ma dompak sidea, “Anggo sonai, bere nasiam ma bani kesar na kesar simadasi, anjaha bani Naibata na Naibata simadasi.”

²⁶ Ase seng mangasup sidea, mambahen halilitan la marhitei sahap-Ni i lobei ni halak na mabuei in. Tapi longang do sidea halani balos-Ni ai, lanjar sip mando sidea.

Sungkun-sungkun Pasal Parpuhoon humbani na Matei

(Mat. 22:23-33; Mrk. 12:18-27)

²⁷ Gabe roh ma deba halak Sadukei, ai ma na so marhatongonkon adong parpuhoon humbani na matei, jadi isungkun sidea ma la,

²⁸ “Gurunami, isuratkon si Musa do bannami: Anggo matei sada halak na dob marhajabuan, tapi lang martinading, maningon paganjangon ni anggini do parinangon ai, laho pajongjong ginompar bani saninani ai.

²⁹ Ase adong ma pitu halak na marsanina. Mompo ma sikahanan, dob ai matei ma ia, seng martinading.

³⁰ Dob ai ipaganjang na paduahon ma naboru ai,

³¹ dob ai na patoluhon, sonai torus das bani na papituhon. Seng martinading sidea bani parmateri ni sidea.

³² Dobni naboru ai pe matei ma.

³³ Ai pe, bani parpuhoon ai, ise ma humbani sidea simada parinangon ai, ai hapitusi do sidea marjolmahonsi.”

³⁴ Jadi nini Jesus ma bani sidea, “Anak ni dunia on do na mompo anjaha na laho,

³⁵ tapi halak na dob talup hu hagoluhan simagira ampa hu parpuhoon humbani na matei, seng marunjuk barang laho be.

³⁶ Ai seng tarbahensi be matei, usih ma sidea bani malekat, anjaha anak ni Naibata ma sidea, dob parrupe sidea bani parpuhoon ai.

³⁷ Paboa sipapuhon do magira na dob matei ai, si Musa pe itarsingati do pasal ai, sanggah bani naporon na sampurguk ai, ai igoran do ijai Tuhan in ‘Naibata ni si Abraham, Naibata ni si Isak anjaha Naibata ni si Jakob.’

³⁸ Sedo Naibata ni na matei la, Naibata ni na manggoluh do, ai haganup do sidea manggoluh Bani.”

³⁹ Jadi nini deba sibotoh surat ma mambalosi, “Sintong do hata-Mu ai!”

⁴⁰ Anjaha seng be pag sidea manungkun atap aha pe Bani.

Sungkun-sungkun ni Jesus Atap Anak ni Ise do Kristus in

(Mat. 22:41-46; Mrk. 12:35-37)

⁴¹ Jadi nini Jesus ma dompak sidea, “Mase ma adong na mangkatahon, anak si Daud do Kristus in?”

⁴² Ai si Daud sandiri do mangkatahon bani buku Psalmen, ‘Nini Tuhan in do bani Tuhanku, hundul ma Ho hu siamunkon,

⁴³ paima Hubahen sagala munsuhmu gabe sidogeian ni naheimu.’

⁴⁴ Ase igoran si Daud do la Tuhan, mase ma anakni la?”

Lumba-lumba Pasal Paruhuran ni Sibotoh Surat

(Mat. 23:6-7; Mrk. 12:38-40)

⁴⁵ Jadi sanggah na tangi halak na mabuei ai haganup, nini ma hubani susian-Ni ai,

⁴⁶ “Jaga ma hanima mangidah sibotoh surat, na marosuh medang-edang marbaju ganjang, na sihol hona tabi i tiga, na mangkaporluhon hundul i lobei-lobei i parguruan ampa bani ianan sisangapan i parpestaan.

⁴⁷ Ibondut sidea do rumah ni na mabalu marhitei tonggo sipakulah-kulah na ganjang. Uhum siboratan do jaloan ni sidea use.”

Sibere-bere ni Sada Naboru na Mabalu

(Mat. 12:41-44)

21 ¹ Sanggah mangkawah la, ididah ma halak na bayak mandabuhkon sibere-bereni hubagas poti parartaan.

² Ididah ma homa naboru na mabalu na masombuh mannahkon dua rimis.

³ Jadi ihatahon ma, “Sintong do na Huhatahon on bani nasiam: Buenan do na ninahkon ni na mabalu na masombuh on marimbang haganupan ai.

⁴ Ai haganup sidea humbani lobih-lobihni bei do inahkon sidea gabe sibere-bereni, tapi ia parinangon on, humbani hahuranganni do inahkon haganup na adong bani, na sahira goluhni.”

PARSAHAPAN PASAL PANORANG PARPUDI

(Mat. 24; Mrk. 13)

Parseda ni Rumah Panumbahan

(Mat. 24:1, 2; Mrk. 13:1, 2)

⁵ Adong ma deba halak, na manarsingati rumah panumbahan ai, na dob pinajagar marhitei batu na majenges ampa siluah ni halak, gabe nini Jesus ma,

⁶ “Ididah hanima pe haganupan in, na roh ma arini, seng paturuton be ijin dua batu patindih, na so rosakkononkon.”

**Mungkah ni Pangarouon
Parlobei ni Panorang Parpudi**

(Mat. 10:17-22; 24:3-14; Mrk. 13:3-13)

⁷ Jadi isungkun sidea ma la, nini ma, “Andigan ma masa ai, Guru? Anjaha aha ma tandani, laho masa ai?”

⁸ Jadi nini ma, “Jaga ma hanima, ulang ma kahou hanima! Ai buei ma na roh manoluk goran-Ku, na mangkatahon, ‘Ahu do la,’ ampa, ‘Domma jumpah panorangni.’ Ulang ma iirikkon hanima sidea.

⁹ Tapi anggo ibogei hanima barita ni hamunsuhon ampa hageoron, ulang ma hanima tarsonggot, ai maningon masa do ai lobei, tapi lang ope mintor dapot ujungni.”

¹⁰ Nini ope bani sidea, “Marsiporangan do holi bangsa hu bangsa, harajaon hu harajaon.

¹¹ Masa ma lalou na maparah, sampar mar sasanagori ampa lohei sonai homa panonggoti ampa tanda na banggal hun langit.

¹² Tapi paima masa ai, tangkapon anjaha pardakdakon ni sidea do hanima. Ondoskonon do hanima hu parguruan anjaha masukkonon hubagas tutupan, boanon do hanima hu lobei-lobei ni raja-raja ampa siparkuasa halani goran-Ku.

¹³ Lanjar in ma dalan bennima, laho manaksihon Ahu.

¹⁴ Ingat hanima ma, seng pala sarihononnima pasal sihatahononnima ijai.

¹⁵ Ai Ahu do mamberehon bannima kuasa marsahap ampa hapentaron, na so boi imbangon atap jabapon ni munsuhnima.

¹⁶ Gari namatoras ampa sanina, sindohor ampa huan-huan mangondoskon hanima; anjaha bunuhonni do deba hanima.

¹⁷ Domdoman ni haganupjolma do hanima halani goran-Ku.

¹⁸ Tapi sada jambulan pe lang bulih magou humbani ulunima.

¹⁹ Marhitei hasabaron do maluah hosahnima.”

Pasal Parseda ni Jerusalem

(Mat. 24:15-28; Mrk. 13:14-23)

²⁰ “Tapi anggo ididah hanima huta Jerusalem iinggoti tentara, botoh hanima ma, dohor ma parsedani.

²¹ Ai pe maporus ma hu dolog na i Judea, na ibagas huta in kaluar ma hunjin, anjaha na i juma ulang mulak hu huta in.

²² Ai ari pambalasan do in, ase saud ganup na tarsurat in.

²³ Sunsah ma na boratan rumah ampa ni painumkon bani panorang ai, ai sogop ma

hasosakan bangga hu tanoh on ampa ringis bani bangsa on.

²⁴ Ragei ma sidea bunuhon ni mata ni podang, anjaha hona boan tartaban hu tongah-tongah ni sagala bangsa. Dogei-dogeian ni halak parbegu ma huta Jerusalem, paima gok panorang ni parbegu.”

Parroh ni Anak ni Jolma in Paduahalihon

(Mat. 24:29-36; Mrk. 13:24-32)

²⁵ “Dob ai masa ma tanda bani mata ni ari, bani bulan ampa bani bintang pe, anjaha rusak ma sagala bangsa i tanoh on anjaha bajoraon halani hasak ni laut in ampa gilumbangni.

²⁶ Tarhatos ma jolma in halani biarni managam na sihol masa hu atas tanoh on, ai dugur ma hagogohon ni parlangitan.

²⁷ Dob ai idahon ni sidea ma Anak ni Jolma in roh marhitei hambun ibagas hagogohon ampa hasangapon bangga.

²⁸ Anggo mamungkah masa ma ganupan ai, jongjong ma nasiam, padirgak ma ulu nasiam, ai dohor ma haluahon nasiam.”

Limbaga Pasal Hayu Ara

(Mat. 24:32-35; Mrk. 13:28-31)

²⁹ Jadi ihatahon ma sada limbaga bani sidea, “Tonggor hanima ma hayu ara in ampa hayu na legan in!

³⁰ Anggo marpusuki ma ididah hanima, botoh hanima ma, na dohor ma partahunan milas.

³¹ Usih hujai ma, dob ididah hanima masa ganupan ai, botohonnima ma na dohor ma Harajaon ni Naibata.

³² Tongon do na Huhatahon on bannima, seng anjai salpu na sansundut on, anggo lape masa ganupan ai.

³³ Langit ampa tanoh salpu do, tapi anggo hatang-Kai seng anjai salpu.”

Pasal na Marjaga-jaga

³⁴ “Tapi jaga ma hanima bani dirinima, ulang ma boratan uhurnima halani parminum-minumon ampa parmabukon ampa holsoh-holsoh bani na i dunia on, gabe sompong songon tirangkap roh ari ai mandorab hanima.

³⁵ Ai maningon roh do ai bani haganup na marianan i atas tanoh on.

³⁶ Tapi jaga ma hanima anjaha martonggo ma tongtong, ase margogoh hanima manimbili sagala na sihol roh ai, laho jongjong i lobei ni Anak ni Jolma in.”

³⁷ Arian i rumah panumbahan ai do la mangajari, tapi borngin luar do la, marborngin i dolog, na margoran Jetun.

³⁸ Anjaha girah sogod roh ma halak na mabuei ai manjumpahkon-Si i rumah panumbahan laho manangar hata-Ni.

SITARONON NI JESUS, PARMATEI-NI AMPA PARPUHO-NI

(bd. 22; 23; Mat. 26; 27; Mrk. 14; 15; Joh. 18; 19)

Partahi-tahion ni si Judas

(Mat. 26:1-15; Mrk. 14:1-2)

22 ¹ Tapi dohor ma ari raya mangan ruti na so marragi, na ginoran Paskah.

² Anjaha sai ipingkiri sintua ni malim ampa sibotoh surat do dalan, laho mamunuh Jesus, ai mabiar do sidea bani halak na mabuei ai.

³ Tapi imasuki setan ma si Judas, na margoran Iskariot, ai ma sada halak humbani na sapuluh dua ai.

⁴ Gabe laho ma ia manriah pakon sintua ni malim ampa kopala ni sijaga rumah panumbahan ai, atap sonaha do dalan, laho mangondoskon-Si bani sidea.

⁵ Jadi malas ma uhur ni sidea, anjaha ibagahkon sidea ma mamberehon duit bani.

⁶ Ihadearhon uhurni ma ai, lanjar ipindahi ma panorang na dearhonsi, laho mangondoskon Jesus bani sidea, seng pala ibotoh halak na mabuei in.

Ipasirsir Panganan Paskah

(Mat. 26:17-19; Mrk. 14:12-15)

⁷ Dob ai jumpah ma panorangni mangan ruti na so marragi, ai ma panayatonkon bani biribiri Paskah.

⁸ Jadi isuruh Jesus ma si Petrus ampa si Johannes, nini ma, “Laho ma hanima pasirsirhon Paskah banta, ase mangan hita.”

⁹ Gabe nini sidea ma hu Bani, “Huja ma ninuhur-Mu parsirsironnami ai?”

¹⁰ Dob ai nini ma dompak sidea, “Masukkonsi hanima hu huta in, pajumpah ma hanima pakon sada halak na mamboan gusi na marisi bah; irikkon hanima ma ia hu rumah na minasukanni.

¹¹ Hatahon hanima ma hubani simada rumah ai: Tonah ni Guru in bamu, “Ija do kamar, ianan-Ku mangan Paskah rap pakon susian-Ku?”

¹² Jadi patuduhononni ma bannima sada kamar pardatas na lumbang, na dob niamparan; ijai ma pasirsir hanima.

¹³ Jadi laho ma sidea, jumpah sidea ma na pinatugah-Ni ai bani sidea, gabe ipasirsir sidea ma Paskah ai.

¹⁴ Ase dob jumpah panorangni, hundul ma la rap pakon apostel ai.

¹⁵ Dob ai nini ma dompak sidea, “Masihol tumang do uhur-Hu mangankon biribiri Paskah on rap pakon hanima, paima sogop Bangku sitaronon-Kai.

¹⁶ Ai Huhatahon ma bannima, “Seng anjai panganon-Ku be in, ronsi hagogokni ai ibagas Harajaon ni Naibata.”

¹⁷ Dob ai ibuat ma sada panginuman, anjaha dob ihatahon tonggo tarima kasih, nini ma, “Jalo hanima ma, anjaha bagi hanima ma samah hanima!

¹⁸ Ai Huhatahon ma bannima, mulai humbani sonari, seng inumon-Ku be humbani buah ni anggur, das bani na roh Harajaon ni Naibata.”

Horja Banggal Na Pansing

Ilumbahon Jesus Tahi-tahi ni si Judas

(Mat. 26:20-29; Mrk. 14:17-25; 1 Kor. 11:23-25; Joh. 13:21-30)

¹⁹ Jadi ibuat ma ruti, anjaha dob ihatahon tonggo tarima kasih, itopiki anjaha ibere ma ai bani sidea, lanjar nini ma, “Daging-Ku do on, na binere mangkopkop hanima; bahen hanima ma sonin, gabe pardingatan Bangku.”

²⁰ Sonai homa do panginuman ai, dob salpu sidea mangan, ihatahon ma, “Ia panginuman on, padan na baru do in, marhitei daroh-Ku, na niduruskon mangkopkop hanima.

²¹ Tapi tonggor ma, tangan ni halak na mantahihon Ahu do hape rap pakon Ahu i meja on!

²² Dalanan ni Anak ni Jolma in do namin songon na dob tinontuhon Bani, tapi bursik ma halak na mantahihon-Si.”

²³ Jadi marsisungkunan ma samah sidea, atap ise do humbani sidea na sihol mandalankon ai.

Uhur na Mangindahi Hasurungan i Tongah-tongah ni Susian

(Mat. 20:25-28; Mrk. 10:42-45)

²⁴ Jadi tubuh ma paringoran i tongah-tongah ni sidea, ai ma pasal atap ise do sidea sibanggalan.

²⁵ Gabe nini Jesus ma dompak sidea, “Raja-raja ni bangsa-bangsa do mandalankon kuasa bani rayatni, anjaha na sangap-sangap ni sidea igoran do sidear gabei.

²⁶ Tapi ulang ma sonai anggo bannima! Sibanggalan bannima, ai ma gabe songon siposoan, anjaha na mamarentah, ai ma gabe songon siparugas.

²⁷ Ai ise do sibanggalan, na hundul mangan ai do atap siparugas ai do? Tapi i tongah-tongahnima, Ahu do songon siparugas.”

Upah Sijaloon ni Susian

²⁸ Hanima do na tahan i lambung-Ku ibagas haganup sitaronon-Ku.

²⁹ Anjaha ondoskonon-Ku ma bannima Harajaon in, songon na dob iondoskon Bapa in hu Bangku,

³⁰ ase mangan anjaha minum hanima bani mejang-Ku bani Harajaon-Kai, hundul bani paratas, laho manguhumi halak Israel na sapuluh dua marga in.

Lumba-lumba Pasal Pamorsouon ni si Petrus

(Mat. 26:30-35; Mrk. 14:26-31; Joh. 13:36-38)

³¹ “O, Simon, Simon, domma ipangindo sibolis in, sihol segeonni hanima songon boras.

³² Tapi Ahu do manonggohon ho, ulang miloh haporsayaonmu, anjaha dob mulak use uhurmu, pargogohi ma uhur ni saninamu.”

³³ Tapi nini si Petrus ma, “Tuhan, sirsir do ahu rap tartutup ampa matei ampa Ham.”

³⁴ Nini Jesus ma, “Huhatahon ma bam Petrus: Seng martahuak dayok ope borngin on, domma iparnalang ho tolu hali, na so tinandamu Ahu.”

³⁵ Lanjar nini ma dompak sidea, “Sanggah Husuruh hanima seng marparduitan, seng marranjut anjaha seng marsipatu, onggga do hanima hurangan?” Jadi ihatahon sidea ma, “Lang!”

³⁶ Gabe nini ma dompak sidea, “Tapi anggo nuan, na marparduitan iboan ma ai, sonai homa ranjut, anjaha na so marpodang, ijual ma sabingni, laho mamboli podang.

³⁷ Ai Huhatahon ma bannima, maningon saud do na tarsurat pasal Ahu, na mangkatahon, ‘Tarhira do la bani parjahat!’ Ai na dob tinontuhon pasal Ahu, saud ma nuan.”

³⁸ Gabe ihatahon sidea ma, “Tuhan, adong do dua podang ijon.” Nini ma hubani sidea, “Sungkup ma in!”

Jesus i Getsemane

(Mat. 26:36-46; Mrk. 14:32-42)

³⁹ Dob ai laho ma la hu darat, hu Dolog Jetun, songon na somal; anjaha susian-Ni ai do mangirikkon-Si.

⁴⁰ Ase dob das la hujai, nini ma dompak sidea, “Martonggo ma hanima, ase ulang masuk hanima hubagas parlanjouan!”

⁴¹ Jadi ipapulig ma diri-Ni humbani sidea, tuk gijigon batu daohni; manrogop ma la lanjar martonggo sonon,

⁴² “Ham Bapa, anggo dear uhur-Mu, salpuhon Ham ma panginuman on hun Bangku! Tapi sedo uhur-Hu, uhur-Mu do na saud.”

⁴³ Jadi taridah ma Bani sada malekat hun nagori atas, laho mampargogohi-Si.

⁴⁴ Anjaha bani paruntolon-Ni ai, lambin igogohi ma martonggo, jadi mangkatektek ma songon daroh hadogas-Ni hu tanoh.

⁴⁵ Jadi jongjong ma la humbani na martonggo ai, ijumpahkon ma susian-Ni ai, hape tarpodom do sidea dapot-Si halani pusok ni uhur.

⁴⁶ Jadi nini ma dompak sidea, “Mase modom hanima? Puho ma hanima anjaha martonggo, ase ulang masuk hanima hubagas parlanjouan!”

Tartangkap Jesus

(Mat. 26:47-56; Mrk. 14:43-52; Joh. 18:1-11)

⁴⁷ Mangkatahon ai ope Ia, roh ma buei halak, binobahon ni sada halak, na margoran si Judas, ai ma sada halak humbani na sapuluh dua ai. Ijumpahkon ma Jesus, laho manummah-Si.

⁴⁸ Tapi nini Jesus ma dompaksi, “O, Judas, panummahon do hape ibahen ho mangondoskon Anak ni Jolma in?”

⁴⁹ Jadi dob ididah hasoman ni Jesus na sihol masa ai, nini sidea ma, “Tuhan, itampulhon hanami ma podang on?”

⁵⁰ Jadi itampul sahalak humbani sidea ma juakjuak ni sintua ni malim ai, gabe rotap ma pinggolni siamun.

⁵¹ Jadi nini Jesus ma mambalosi, “Sungkup ma ai!” Ijamah ma pinggol ai, anjaha ipamalum ma ia.

⁵² Jadi nini ma hubani sintua ni malim, kopala upas ni rumah panumbahan ampa pangintuai-pangintuai ai, na roh manangkap-Si, “Songon na manjumpahkon panrampok do parroh nasiam, marpodang anjaha marantuk-antuk.

⁵³ Ari-ari do Ahu rap pakon nasiam i rumah panumbahan, seng itangkap nasiam Ahu. Tapi on ma panorang nasiam ampa kuasa ni hagolapan in.”

Pamorsouon ni si Petrus bani Jesus

(Mat. 26:69-75; Mrk. 14:66-72; Joh. 18:12-18; 25-27)

⁵⁴ Dob itangkap la, iboan sidea ma la hu rumah ni sintua ni malim ai, tapi mandaoh-daoh do si Petrus mangirikkon-Si.

⁵⁵ Ipagara sidea do apuy i tongah ni alaman lanjar hundul ma maringgot, si Petrus pe hundul do rap pakon sidea ijai.

⁵⁶ Ididah sada juakjuak naboru ma ia hundul ibagas sinalsal ni apuy ai, iserleng ma ia, anjaha nini ma, "Hasoman-Ni do age halak on!"

⁵⁷ Tapi iporsou do, nini ma, "Seng hutandai la, inang!"

⁵⁸ Tongkin nari ididah sada halak na legan ma ia, nini ma, "Ai lang hasoman ni sidea do ho?" Tapi nini si Petrus ma, "Lang, dahkam!"

⁵⁹ Dob salpu hira-hira sajam, nini sada halak na legan ma mangonjolhon, "Tongon do ai, dihut do ia hasoman-Ni, ai halak Galilea do ia."

⁶⁰ Tapi nini si Petrus ma, "Seng hubotoh na hinatahonmu ai, dahkam!" Mangkatahon ai ope ia, mintor martahuak ma dayok.

⁶¹ Jadi marhusor ma Tuhan in, ikawahkon ma si Petrus, gabe idingat si Petrus ma hata ni Tuhan in, na hinatahon-Ni hu bani, "Lape martahuak dayok borngin on, domma parnalangonmu Ahu tolu hali."

⁶² Jadi luar ma ia hu darat, tangis gogoh-gogoh.

Jesus i Lobei ni Paruhuman

(Mat. 26:57-68; Mrk. 14:53-65; Joh. 18:13-27)

⁶³ Ia halak na manjolomi Jesus, ipahiri-hiri anjaha ilonsingi do Ia.

⁶⁴ Itutup sidea do mata ni Jesus anjaha isungkun ma, “Jahai ma, ise do na manlonsingi Ho?”

⁶⁵ Buei ope pangkirion na legan ihatahon sidea Bani.

⁶⁶ Anjaha dob siang ari, marrunggu ma pangintuai ni bangsa ai, sintua ni malim ampa sibotoh surat, anjaha tarboan ma Ia hu lobei ni harungguan ni sidea. Nini sidea ma, “Anggo Ho do Kristus in, hatahon ma bennami!”

⁶⁷ Jadi nini ma dompak sidea, “Age Hupatugah ai bani nasiam, seng anjai porsaya nasiam.

⁶⁸ Anjaha anggo manungkun Ahu, seng balosan nasiam.

⁶⁹ Tapi hunjon hujanan hundul ma Anak ni Jolma in hampit siamun ni hagogohon ni Naibata.”

⁷⁰ Jadi haganup ma sidea mangkatahon, “Ase Anak ni Naibata do Ho?” Jadi ihatahon ma dompak sidea, “Songon na hinatahon nasiam, Ahu do in tongon!”

⁷¹ Dob ai nini sidea ma, “Ai pala ope pindahanta saksi? Ai domma itangar hita sandiri ai humbani pamangan-Ni.”

Jesus i Lobei ni si Latus ampa si Herodes

(Mat. 27:1-2; 11-14; Mrk. 15:1-5; Joh. 18:28-38)

23¹ Dob ai misir ma sidea haganup na marrunggu ai, iboan sidea ma la hu lobei ni si Latus.

² Iaduhon sidea ma la, nini ma, “Na dapot hanami do on pakahouhon bangsanami, anjaha ipandang do bereon balasting bani kesar, anjaha ihatahon, Kristus, Raja do la.”

³ Jadi nini si Latus ma manungkun-Si, “Raja ni Jahudi do Ham tongon?” Jadi nini ma mambalosisi, “Songon na hinatahonmu ai ma!”

⁴ Jadi nini si Latus ma dompak sintua ni malim ampa halak na mabuei ai, “Seng dong dapot ahu salah ni Halak on.”

⁵ Tapi lambin igogohi sidea do mangkatahon, “Geor do ibahen bangsa in marhitei pangajarion-Ni i sab tanoh Judea, mamungkah hun Galilea das hujon.”

⁶ Manangar ai si Latus, isungkun ma atap halak Galilea do la.

⁷ Anjaha dob ibotoh, na humbani gomgoman ni si Herodes do la, isuruh ma la hu lobei ni si Herodes, ai tudu i Jerusalem do ia ijia.

⁸ Dob ididah si Herodes Jesus, malas ma uhurni, ai domma dokah hinan sihol idahonni la, dob itangar barita-Ni, anjaha iarap uhurni do, idahonni sada tanda sibahenon-Ni.

⁹ Buei do isungkun hu Bani, tapi seng ibalosi Jesus ia.

¹⁰ Ijai do sintua ni malim ampa sibotoh surat, anjaha gogoh do pangaduhon ni sidea Bani.

¹¹ Ia si Herodes ampa tentarani, ipahiri anjaha iapasi do ia, dob ai isuruh ma ia mulak hubani si Latus marpakeian na harga.

¹² Mulai bani ari ai marhuan ma si Herodes ampa si Latus, i lobei ni ai marsidomdoman do sidea.

Jesus luhum Marutang Hosah

(Mat. 27:15-26; Mrk. 15:1-15; Joh. 18:39, 40)

¹³ Dob ai idilo si Latus ma martumpu sintua ni malim, pangintuai-pangintuai ampa halak na mabuei ai, gabe nini ma dompak sidea,

¹⁴ “Iboan nasiam do bangku Halak on, sipabalik bangsa, nini nasiam. I lobei nasiam do hupareksa ia, tapi seng dong jumpah ahu salah bani Halak on, domu hubani pangaduan nasiam ai.

¹⁵ Si Herodes pe sonai do, isuruh do ia mulak bennami, ase seng dong pambahenan-Ni, na patut mambahen marutang hosah ia.

¹⁶ Halani ai nalonsingi ma ia, ase napaluah.”

¹⁷ Ai aturan do ai, paluahonni sada halak bani sidea sanggah pesta ai.

¹⁸ Tapi sasora do sidea haganup mandilohon, “Bunuh ia! Si Barrabas ma paluah bannami!”

¹⁹ Ia si Barrabas on tartutup do halani pambarontakan ampa pambunuhon na masa i kota ai.

²⁰ Jadi iulaki si Latus ma marsahapkon sidea, ai sihol paluahonni do Jesus.

²¹ Tapi sai dilo-dilo ma sidea, "Parsilangkon ma la, parsilangkon ma!"

²² Dob ai ihatahon ma patoluhalihon bani sidea, "Ai aha do na jahat ibahen? Seng dong jumpah ahu Bani na boi mambahen marutang hosah la. Halani ai nalonsingi ma la, ase napaluah."

²³ Tapi ipagogoh sidea bei ma sorani mangindohon hu bani, ase iparsilangkon la, gabe saud ma surak-surak ni sidea ai.

²⁴ Jadi iputuskon si Latus ma pasaudkon pangindoan ni sidea ai.

²⁵ Ipaluah ma halak na pinindo ni sidea ai, na tinutup ai halani manggeori ampa mambunuh, tapi Jesus ipadas ma bani rosuh-rosuh ni sidea.

Jesus Iboan hu Dolog Golgata

(Mat. 27:31-32; Mrk. 15:20, 21)

²⁶ Sanggah na mamboan-Si ai sidea, itangkap sidea ma sada halak, na margoran si Simon, na hun Kirene, na roh hun juman; hu bani ma ipaporsankon sidea silang ai, laho mamboan ai paihut-ihut Jesus.

²⁷ Buei do halak humbani bangsa ai ampa puang-puang na mangirikkon-Si, na marhoru anjaha na tangis-tangis marhalani-Si.

²⁸ Jadi idompakkon Jesus ma sidea, nini ma, “Nasiam Boru Jerusalem, ulang ma Ahu tangisi nasiam, tapi diri nasiam ma tangisi nasiam ampa anak nasiam!

²⁹ Ai na roh ma arini, hatahonon ni halak ma ijai, ‘Martuah ma na lambang, ampa parinangon na so onga tubuhan tuah, ampa adop na so onga painumkon!’

³⁰ Ijai ma hatahonon ni halak bani dolog, ‘Jobjobi ma hanami!’ ampa bani dolog-dolog, ‘Rungkubi ma hanami!’

³¹ Ai anggo sonon pambahen ni sidea bani hayu na matah, bani hayu na masak, sonaha ma nani?”

³² Adong ope iboan dua halak nari parjahat, sibunuhon rap pakon-Si.

Tarsilang Jesus

(Mat. 27:23-44; Mrk. 15:22-32; Joh. 19:16-24)

³³ Ase dob das sidea bani ianan na margoran Partangkurakan, iparsilangkon sidea ma la ijai rap pakon parjahat na dua ai, na sada hu siamun-Ni anjaha na sada nari hu sambilou-Ni.

³⁴ Jadi nini Jesus ma, “Ham Bapa, marpangulaki ma uhur-Mu, ai seng ibotoh sidea na binahenni ai!” Marjomput na sinurat do sidea marbagi hiou-Ni.

³⁵ Jongjong do ijai halak na mabuei ai manonggor, tapi manrehei do pambobai ni sidea, nini ma, “Na legan ipaluah, mahua diri-Ni ma ipaluah, anggo na tongon do la Kristus, na pinilih ni Naibata!”

³⁶ Tapi dihut do tentara ai mandoruni-Si, ipadohor sidea ma, laho mamberehon na migar Bani,

³⁷ lanjar nini sidea ma, “Anggo raja ni Jahudi do Ho, paluah ma diri-Mu!”

³⁸ Dong do homa tarsurat i babou-Ni: On do Raja ni Jahudi.

³⁹ Tapi sada humbani parjahat na gantung ai manrehei-Si, “Ai lang Kristus do Ho? Paluah ma diri-Mu ampa hanami!”

⁴⁰ Jadi marbalos ma hasomanni ai, nini ma mangkatasi, “Seng ihabiari ho hape Naibata, age pe rap hona uhum hita?”

⁴¹ Uhum na pintor do mangonai banta, ai ijalo hita do upah ni pambahenanta. Tapi anggo la, seng dong ihorjahon na so patut.”

⁴² Lanjar nini ma, “Ham Jesus, ingat Ham ma Ahu, anggo das ma Ham bani Harajaon-Mu.”

⁴³ Jadi nini Jesus ma hu bani, “Sintong do hatang-Kon bam, sadari on rap pakon Ahu ma ho i Paradeiso!”

Parmatei ni Jesus

(Mat. 27:45-46; Mrk. 15:33-41; Joh. 19:28-30)

⁴⁴ Anjaha hira-hira pukul sapuluh dua, sogop ma na golap hu sab tanoh in das hu pukul tolu.

⁴⁵ Ai manggolapi do mata ni ari, anjaha marigat do tirei, na i rumah panumbahan ai, bolah dua.

⁴⁶ Dob ai marsora na gogoh ma Jesus, nini ma, “Ham Bapa! Hubagas tangan-Mu ma Huondoskon Tonduy-Hu.” Jadi dob ihatahon sonai, rotap ma hosah-Ni.

⁴⁷ Mangidah na masa ai kopala ni tentara ai, ipasangap ma Naibata, nini ma, “Tongon do, Halak na pintor do on!”

⁴⁸ Anjaha ganup halak na mabuei ai, na roh hujai, marsitompuk tontonni bei ma mangidah na masa ai, lanjar mulak ma.

⁴⁹ Tapi mandaoh-daoh do jongjong mangidah-Si sagala na manandai-Si, sonai naboru na mangirikkon-Si hun tanoh Galilea.

Tartanom Jesus

(Mat. 27:57-61; Mrk. 15:42-47; Joh. 19:38-42)

⁵⁰ Jadi adong ma sada halak na margoran si Josep, pagori ni rapot bolon, paruhur na bujur anjaha na pintor.

⁵¹ Seng dear uhurni bani riah ampa pambahenan ni sidea ai. Hun Arimatea, na i tanoh Judea do

ia, anjaha dihut do ia paima-imahon Harajaon ni Naibata.

⁵² Laho ma ia bani si Latus mangindo bangkei ni Jesus.

⁵³ Ipaturun ma bangkei ai, ibaluti ma bani hiou putih, anjaha ipatibal ma hubagas tanoman na niliangkon bani batu, seng onggga ope tibal barang ise ijai.

⁵⁴ Ari parugasonkon do ijia, anjaha laho mulai ma Sabat.

⁵⁵ Tapi dihut do deba naboru-naboru, na roh rap pakonsi hun Galilea; ipardiatei sidea do tanoman ai ampa partibal ni bangkei ai.

⁵⁶ Dob ai mulak ma sidea, anjaha ipasirsir sidea ma rium-riuman ampa minak na misbou. Layur ari Sabat ai marsaran do sidea, domu hubani titah in.

Parpuho ni Jesus

(Mat. 28:1-10; Mrk. 16:1-8; Joh. 20:1-18)

24 ¹ Tapi bani ari parlobei dob Sabat ai, roh ma sidea girah sogod hu tanoman ai mamboan rium-riuman, na dob pinasirsir ni sidea ai.

² Tapi domma igulingkon batu ai hun tanoman ai jumpah sidea.

³ Anjaha dob masuk sidea, seng dong be jumpah sidea bangkei ni Tuhan Jesus.

⁴ Anjaha sanggah na jut ai uhur ni sidea pasal ai, jadi jongjong ma i lambung ni sidea dua halak parhiou na marlinang-linang.

⁵ Tapi sanggah tarsonggot ai sidea anjaha unduk mangkawah dompak tanoh, jadi nini halak ondi ma hubani sidea, “Mase ipindahi nasiam na manggoluh bani ianan ni na matei?

⁶ Seng ijon la, domma puho. Ingat nasiam ma na hinatahon-Ni ai bani nasiam, sanggah i Galilea ope la.

⁷ Ai ihatahon do, paboa maningon ondoskonon do Anak ni Jolma in hubagas tangan ni pardousa anjaha parsilangkononkon, tapi mulak manggoluh do ari patoluhon.”

⁸ Jadi idingat sidea ma hata-Ni ondi.

⁹ Mulak ma sidea hun tanoman ai, ibaritahon sidea ma haganupan ai bani na sapuluh sada ai ampa bani haganup na legan ai.

¹⁰ Si Maria Magdalena ma ai, ambahni ai si Johanna ampa si Maria, inang ni si Jakobus, ampa na legan ai na rap pakon sidea, ipatugah sidea ma ai bani apostel ai.

¹¹ Hira turi-turian do ai, ninuhur ni sidea, seng ihaporsayai sidea ai.

¹² Tapi laho ma si Petrus marlintun hu tanoman ai, itungkir ma hubagas, tapi seng dong ididah sobali hiou putih pambaluti-Ni ai. Dob ai mulak ma ia, longang uhurni pasal na masa ai.

**Ipataridahkon Jesus Diri-Ni bani
Susian na Laho hu Emmaus**

(Mrk. 16:12, 13)

¹³ Bani na sadari ai adong ma dua halak humbani sidea na laho hu sada huta, na margoran Emmaus, hira-hira sapuluh sada batu do daohni hun Jerusalem,

¹⁴ anjaha marsahapi do sidea samah sidea pasal na masa ai.

¹⁵ Jadi sanggah na marsahapi ai sidea anjaha marsipatorangan, roh ma Jesus mandohori sidea, rap mardalan pakon sidea.

¹⁶ Tapi mubah do panonggor ni sidea ibahen, ase ulang itanda sidea la.

¹⁷ Jadi nini ma dompak sidea, “Aha do na sinahapkon nasiam in i tongah dalan on?” Sonto ma sidea, anjaha horu do sidea idahon.

¹⁸ Dob ai marbalos ma sada halak, na margoran si Kleopas, nini ma dompak-Si, “Pitah Ham do gakni na marianan i Jerusalem na so mambotoh na masa ijai bani panorang on?”

¹⁹ Jadi nini ma dompak sidea, “Sonaha?” Nini sidea ma mambalosi, “Ai ma pasal Jesus, halak Nasaret in, ai ma nabi na gogoh ibagas horja ampa hata i lobei ni Naibata ampa haganup bangsa in,

²⁰ anjaha sonaha pangondoskon ni sintua ni malim ampa pambobainta Bani ase hona uhum la, marutang hosah anjaha iparsilangkon.

²¹ Tapi mangarap hinan do hanami, la ma na paluahkon Israel. Anjaha patolu-arihon ma sadari on, dob na masa ai.

²² Anjaha adong do deba naboru hun tongah-tongahnami, na mambahen tarsonggot hanami, girah do sidea na sogod laho hu tanoman ai.

²³ Seng dong jumpah sidea bangkei-Ni ai, tapi mulak do sidea patugahkon, na dob ididah sidea do malekat, na mangkatahon, na manggoluh do la.

²⁴ Anjaha dong do deba hun bannami na laho hu tanoman ai; jumpah sidea do tongon songon na hinatahon ni puang-puang ai, tapi anggo la, seng adong ididah.”

²⁵ Jadi nini ma dompak sidea, “E, nasiam, na hurang uhur, anjaha na mahol mangkaporsayai na hinatahon ni nabi-nabi!

²⁶ Ai lang maningon sonai do marsitaranon Kristus in, laho masuk hu hasangapon-Ni in?”

²⁷ Jadi jozor ma humbani si Musa ampa humbani sagala nabi ipatorang bani sidea sagala na tarsurat pasal-Si.

²⁸ Jadi dohor ma sidea bani huta siparayakon ni sidea ai, anjaha ipakulah ma manoruskon pardalanan-Ni,

²⁹ tapi igogohkon sidea ma mangarahkon-Si, nini ma, “Tondok ma Ham bannami, ai laho bod ma ari anjaha manabad ma mata ni ari!” Jadi masuk ma la, tondok bani sidea.

³⁰ Anjaha sanggah na hundul la rap pakon sidea mangan, ibuat ma ruti, ihatahon ma tonggo tarima kasih, dob ai itopiki ma ai anjaha ibere ma bani sidea.

³¹ Ijai ma buka mata ni sidea, gabe itanda sidea ma la; anjaha la pe magou ma humbani pangidah ni sidea.

³² Jadi nini sidea ma samah sidea, “Ai lang gara do uhurta ibagas, sanggah na pinarsahapkon-Ni ai hita i tongah dalan, laho patorangkon banta na tarsurat in?”

³³ Jadi mintor misir ma sidea mulak hu Jerusalem, tumpu do jumpah sidea na sapuluh sada ai ampa hasoman ni sidea.

³⁴ Nini sidea ma, “Tongon do, domma puho Tuhan in, anjaha ipataridahkon do diri-Ni bani si Simon!”

³⁵ Anjaha sidea pe ibaritahon ma na masa i tongah dalan ai, ampa panandai ni sidea Bani, sanggah na manopiki ruti ai la.

Ipataridahkon Jesus Diri-Ni bani Apostel

(Joh. 20:19-23; Mrk. 16:16)

³⁶ Mangkatahon ai ope sidea, jongjong ma Jesus i tongah-tongah ni sidea.

³⁷ Gabe tarsonggot ma sidea anjaha mabiar, iagan sidea begu-begu do na nididah ni sidea ai.

³⁸ Jadi nini ma dompak sidea, “Mase ma tarsonggot hanima? Mase ma sungkun-sungkun uhurnima ibagas?”

³⁹ Tonggor hanima ma tangan-Ku ampa nahei-Hu, paboa Ahu do on. Jamah hanima ma Ahu, anjaha tonggor ma, ai anggo tonduy seng mardaging barang marholi-holi, songon na adong ididah hanima Bangku.”

⁴⁰ Sanggah na mangkatahon ai ipatuduhkon ma tangan-Ni ampa nahei-Ni bani sidea.

⁴¹ Tapi lanjar ope seng porsaya sidea, halani malas ampa longang ni uhur ni sidea, gabe ihatahon ma bani sidea, “Adong do ijon bannima sipanganon?”

⁴² Jadi ibere sidea ma Bani dengke na pinanggung sampongol.

⁴³ Ai ma ijalo, lanjar ipangan ma ai ipaidah-idah sidea.

⁴⁴ Jadi nini ma dompak sidea, “On ma hatang-Ku, na dob Huhatahon bannima, sanggah rap ope Ahu pakon hanima, ai ma, maningon saud do haganup na tarsurat pasal Ahu ibagas titah ni si Musa, buku ni nabi-nabi ampa bani buku Psalm.”

⁴⁵ Jadi ibuhai ma uhur ni sidea, ase iarusi ma na tarsurat ai.

⁴⁶ Ihatahon ma bani sidea, “Sonai do tarsurat, maningon marsitaronon do Kristus in, anjaha mulak manggoluh bani ari patoluhon.

⁴⁷ Anjaha ambilanonkon do marhitei goran-Ni hamubahon ni uhur bahen hasasapan ni dousa, hubani sagala bangsa, mamungkah hun Jerusalem.

⁴⁸ Hanima do saksi pasal ai.

⁴⁹ Anjaha suruhon-Ku do bennima na pinarbagah-bagah ni Bapa in. Tapi soh ma lobei hanima i huta on, paima isorungkon bannima hagogohon na hun datas.”

Parnaik ni Tuhan Jesus

(Lah. 1:9-14; Mrk. 16:19)

⁵⁰ Jadi iarahkon ma sidea hu darat, dohor hu Betania. Jadi ipaherbang ma tangan-Ni laho mamasu-masu sidea.

⁵¹ Jadi sanggah na mamasu-masu ai la, sirang ma la humbani sidea, tarangkat hu surga.

⁵² Manrogop ma sidea manombah-Si, dob ai mulak ma sidea hu Jerusalem, marmalas ni uhur banggal.

⁵³ Anjaha tongtong do sidea i rumah panumbahan mamuji-muji Naibata.

Johannes

Hata In na gabe Daging

1 ¹ Bani mungkahni domma adong Hata in, anjaha rap pakon Naibata do Hata in, anjaha Naibata do Hata in.

² Rap do in pakon Naibata bani mungkahni.

³ Haganup marhiteihon-Si do ase adong, anjaha seng dong na dob dong in, na so marhiteihon-Si.

⁴ Ibagas Hata in do hagoluhan, anjaha hagoluhan in do panondang ni hajolmaon,

⁵ Na marsinondang do panondang in ibagas na golap, tapi seng ijalo na golap in.

⁶ Bangkit ma sada halak, na sinuruh ni Naibata, na margoran si Johannes.

⁷ Laho manaksihon do ia ase roh, ase isaksihon panondang in, ase haganup porsaya marhiteihonsi.

⁸ Seng ia panondang in, tapi sisaksihon panondang in do ia.

⁹ Panondang na sintong in, na manondangi ganup jolma do, na roh hu dunia on.

¹⁰ I dunia on hinan do Ia, anjaha marhiteihon-Si do adong dunia on, hape seng itanda dunia on Ia.

¹¹ Na roh do Ia marayak na dong Bani, tapi seng ijalo na dong Bani in Ia.

¹² Tapi barang piga na manjalo-Si, hujai do ibere kuasa, ase gabe anak ni Naibata sidea, ai ma na porsaya bani goran-Ni.

¹³ Ai ma na so tubuh humbani daroh barang humbani rosuh ni daging barang humbani rosuh ni dalahi, tapi humbani Naibata do.

¹⁴ Gabe daging ma Hata in anjaha marianan i tongah-tongahta; jadi ididah hanami ma hasangapon-Ni songon hasangapon ni Anak Sasada na humbani Bapa in, gok idop ni uhur ampa hasintongan.

¹⁵ Isaksihon si Johannes do la, nini do marsora na gogoh, "On do la na huhatahon ai, na roh hun pudingku; lobeinan do la adong ase ahu, ai parlobei hinan do la.

¹⁶ Hun bani habayakon-Ni do haganup hita manjalo, ai ma idop ni uhur na marnunut.

¹⁷ Marhitei si Musa do ibere titah, tapi marhitei Jesus Kristus do manjadi idop ni uhur ampa hasintongan.

¹⁸ Ise pe lang na onggang mangidah Naibata; Anak na sasada in, na bani abingan ni Bapa in, la do na pabotohkonsi."

Hasaksian ni si Johannes Pandidi Pasal Dirini

(Mat. 3:1-12; Mrk. 1:1-8; Luk. 3:1-18)

¹⁹ On do hasaksian ni si Johannes, sanggah roh hubani malim ampa halak Lepi hun Jerusalem, na

sinuruh ni halak Jahudi na ijai ai, laho manungkunsi, atap ise do ia.

²⁰ Jadi iakuhon do, seng iporsou, nini ma, “Sedo Ahu Kristus in.”

²¹ Isungkun sidea ma ia, “Ise do, anggo sonai? Ai si Elias do ham?” Jadi nini ma, “Seng ahu ai! Ham do nabi na pinarbagah ai?” Balosni, “Lang!”

²² Dob ai nini sidea ma hu bani, “Ise do anggo sonai, ase tarbalosi hanami na marsuruh hanami. Aha do hatahononmu pasal ham?”

²³ Jadi nini ma, “Ahu, ai ma sora na dilo-dilo i halimisan, ‘Papintor ma dalan ni Tuhan in!’ songon na hinatahon ni Nabi Jesayas.”

²⁴ Ia na sinuruh ai humbani halak Parisei do.

²⁵ Jadi nini sidea ma manungkunsi, “Mase ma mandidi ham, anggo seng Kristus ham, atap si Elias atap nabi ai?”

²⁶ Jadi nini si Johannes ma mambalosi sidea, “Ia ahu bah do hudidihon, tapi domma jongjong i tongah-tongah nasiam la, na so tinanda nasiam in,

²⁷ na roh hun pudingku, anjaha na hurang talup do ahu mananggali tali ni sipatu-Ni.”

²⁸ I Betania do ai masa, i dipar ni Bah Jordan, ijai do ianan ni si Johannes mandidi.

Hasaksian ni si Johannes Pandidi Pasal Jesus

(Mat. 3:13-17; Mrk. 1:9-11; Luk. 3:21, 22)

²⁹ Patarni ai ididah si Johannes ma Jesus roh hu bani, gabe nini ma, “Tonggor ma, la do biribiri ni Naibata, na mamorsan dousa ni dunia on!

³⁰ la do ai na huhatahon ai, i pudingku roh do sada halak, na dob parlobei do la adong ase ahu, ai parlobei do la adong ase ahu.

³¹ Ahu pe seng hutanda hinan la, tapi ase talar la bani bangsa Israel, ai do ase roh ahu mandidihon bah.”

³² Dob ai isaksihon si Johannes ma, nini ma, “Huidah do Tonduy in susur songon asas hun nagori atas anjaha marianan Bani.

³³ Ahu pe seng hutanda hinan la. Tapi la na marsuruh ahu mandidihon bah, la do mangkatahon hu bangku, ‘la hubani ise ididah ho susur Tonduy in anjaha marianan Bani, la ma sididihon Tonduy Na Pansing.’

³⁴ Ase domma huidah anjaha husaksihon, ‘la do Anak ni Naibata.’”

Susian ni Jesus na Parlobei

(Mat. 4:18-22; Mrk. 1:16-20; Luk. 5:1-11)

³⁵ Patarni ai jongjong ma use si Johannes ijai rap pakon dua susianni.

³⁶ Jadi sanggah ididahsi Jesus montas, nini ma, “Tonggor ma, la do biribiri ni Naibata!”

³⁷ Dob ibogei susianni na dua ai hatani ai, jadi iirikkon sidea ma Jesus.

³⁸ Marhusor ma Jesus, gabe ididah ma sidea mangirikkon-Si, jadi nini ma hubani sidea, “Aha do na pinindahannima?” Jadi nini sidea ma hu Bani, “Rabbi (*artini: Guru*), ija do Ham marianan?”

³⁹ Nini ma hubani sidea, “Roh ma hanima, ase ididah hanima!” Jadi roh ma sidea, ididah ma ianan-Ni ai, jadi rap ma sidea pakon-Si sadarini ai. Tar pukul ompat ma ai.

⁴⁰ Si Andreas, sanina ni si Simon Petrus do sada humbani na dua ai, na mambogei hata ni si Johannes ai, anjaha na mangirikkon Jesus ai.

⁴¹ Dob ai jumpahsi ma lobei si Simon, saninani ai, jadi nini ma dompaksi, “Domma jumpah hanami Mesias in (*artini: Kristus*).”

⁴² Ibobai ma ia bani Jesus, ikawahkon Jesus ma ia, lanjar nini ma hu bani, “Si Simon do ho, anak ni si Jonas; si Kepas ma ho goranon (*artini: Petrus; batu gingging*)!”

⁴³ Patar ni ai, sanggah na sihol laho la hu Galilea, jumpah-Si ma si Pilippus. Jadi nini Jesus ma hu bani, “Irikkon ma Ahu!”

⁴⁴ Ai si Pilippus ai hun Betsaida do, ai ma huta ni si Andreas ampa si Petrus.

⁴⁵ Jumpah si Pilippus ma si Natanael, jadi ihatahon ma hu bani, “Domma jumpah hanami la, na sinahapkon ni si Musa ibagas titah in, sonai homa nabi-nabi ai ma Jesus, anak ni si Josep, na hun huta Nasaret.”

⁴⁶ Dob ai nini si Natanael ma hu bani, “Mintor tarbahen ma roh na madear hun Nasaret?” Jadi ihatahon si Pilippus ma, “Roh ma ho, ase ididah ho!”

⁴⁷ Ididah Jesus ma si Natanael roh hu Bani, jadi nini ma pasalsi, “On ma sada halak Israel na sintong, na so maruhur lekluk ibagas.”

⁴⁸ Nini si Natanael ma hu Bani, “Hunja itanda Ham ahu?” Jadi nini Jesus ma mambalosisi, “Sanggah lape idilo si Pilippus ho, domma Huidah ho i toruh ni hayu ara ai.”

⁴⁹ Nini si Natanael ma hu Bani, “Rabbi, Ham do Anak ni Naibata, Ham do Raja ni Israel.”

⁵⁰ Jadi nini Jesus ma mambalosisi, “Halani na Huhatahon ai do bam: Huidah do ho i toruh ni hayu ara ai, ase porsaya ho. Sibanggalhonon ni ai ope idahonmu!”

⁵¹ Lanjar nini ma hu bani, “Na sintong tumang do na Huhatahon bannima, idahonnima do mungkab nagori atas anjaha naik turun malekat ni Naibata marayak Anak ni Jolma in.”

Jesus bani Pesta Parunjukon na i Huta Kana

2¹ Anjaha bani ari patoluhon adong ma na marunjuk i huta Kana, na i nagori Galilea, anjaha ijai do inang ni Jesus.

² Jesus pe ampa susian-Ni ai iontang do bani pesta ai.

³ Jadi dob hurangan anggur sidea, ihatahon inang ni Jesus ma hu Bani, “Seng dong be anggur ni sidea!”

⁴ Jadi nini Jesus ma hu bani, “Aha urusanmu Bangku, inang? Seng roh ope panorang-Ku.”

⁵ Nini inang-Ni ai ma hubani siparugas ai, “Barang aha ihatahon bani nasiam, bahen nasiam ma!”

⁶ Mangihutkon adat parburihon ni halak Jahudi, adong do ijai onom gusi siat dua ronsi tolu bat (sada bat ai ma 40 liter).

⁷ Ihatahon Jesus ma hubani sidea, “Goki nasiam ma gusi in bani bah!” Jadi gok tumang ma ibahen sidea.

⁸ Dob ai Nini ma hubani sidea, “Tahui nasiam ma hunjin, anjaha boan nasiam ma hubani kopala ni pesta on!” Jadi iboan sidea ma.

⁹ Dob idai kopala ni pesta ai bah na dob salih gabe anggur ai, seng ibotoh hunja harohanni ai, pitah siparugas na manahui ai do hansa mambotoh ai, idilo ma siparunjuk ai,

¹⁰ anjaha nini ma hu bani, “Haganup halak mambere parlobei anggur sidearan, dob bosur pe,

ase ibere tar na hurang daini. Tapi anggo ham, isimpan ham do anggur sidearan ronsi sonari.”

¹¹ Ase ai ma tanda na parlobei, na binahen ni Jesus i huta Kana, na i Galilea, laho patalar hasangapon-Ni, gabe porsaya ma susian-Ni Bani.

Iusir Jesus Partiga-tiga ampa Situkari Duit hun Rumah Panumbahan

(Mat. 21:12-17; Mrk. 11:15-19; Luk. 19:45-48)

¹² Dob salpu ai, tuad ma la hu Kapernaum rap pakon inang-Ni, ampa sanina-Ni ampa susian-Ni, anjaha ijai ma sidea tar hun dokah.

¹³ Halani domma dohor pesta Paskah ni Jahudi, jadi tangkog ma Jesus hu huta Jerusalem.

¹⁴ Jadi jumpah-Si ma hundul i rumah panumbahan ai partiga-tiga lombu, biribiri pakon asas ampa situkari duit.

¹⁵ Jadi ipauli Jesus ma tali bahen lonsing-lonsing, anjaha iusir ma sidea haganup hun rumah panumbahan ai rap pakon biribiri ampa lombu; isampakkon ma duit ni sipanukari ai, anjaha ipantunggalingkon ma meja ni sidea.

¹⁶ Dob ai nini ma hubani partiga-tiga asas ai, “Boan nasiam ma in hunjon! Ulang bahen nasiam rumah ni Bapa gabe rumah partiga-tigaan!”

¹⁷ Jadi idingat susian-Ni ma hata na tarsurat in, “Ringis mangkopkop rumahmu do mangankon ahu.”

¹⁸ Dob ai nini Jahudi ma mambalosi-Si, “Aha ma tanda patuduhon-Mu bannami, paboa na boi sonin bahenon-Mu?”

¹⁹ Jadi nini Jesus ma mambalosi sidea, “Parseda nasiam ma rumah panumbahan on, dob ai pajongjongon-Ku ma in ibagas tolu ari.”

²⁰ Dob ai nini Jahudi ma, “Ompat puluh onom tahun do dokahni ipauli rumah panumbahan on, ia Ham, ibagas tolu ari nimu pajongjongon-Mu in?”

²¹ Tapi angkula-Ni ai do rumah panumbahan, na hinatahon-Ni ai ijai.

²² Ase, dob puho la humbani na matei idingat susian-Ni ai ma hata ondi, gabe porsaya ma sidea bani hata ni surat in ampa bani hata na hinatahon ni Jesus.

²³ Anjaha sanggah i huta Jerusalem la, bani pesta Paskah ai, buei do na gabe porsaya bani goran-Ni, dob ididah sidea tanda na binahen-Ni ai.

²⁴ Tapi seng ihaporsyai Jesus sidea, halani itanda do sidea haganup.

²⁵ Anjaha seng porlu Bani hasaksian ni atap ise pe pasal jolma in, ai ibotoh do na ibagas uhur ni jolma in.

Jesus ampa si Nikodemus

3¹ Ase adong ma sada halak humbani Parisei, na margoran si Nikodemus, pangintuai ni halak Jahudi.

² Na roh do ia borngin-borngin marayak-Si, anjaha nini ma hu Bani, “Rabbi, ibotoh hanami do Ham guru na roh humbani Naibata, ai seng tarhorjahon atap ise tanda songon na binahen-Mu in, anggo seng Naibata hasomanni.”

³ Dob ai nini Jesus ma mambalosisi, “Na sintong tumang do na Huhatahon bamu, anggo seng tubuh halak paduahalihon, seng tarbahensi mangidah Harajaon ni Naibata!”

⁴ Ihatahon si Nikodemus ma hu Bani, “Sonaha ma tarbahen use tubuh halak, anggo domma matua? Mintor tarulakisi ma masuk hu partapaan, ase itubuhkon inangni use!”

⁵ Nini Jesus ma mambalosisi, “Na sintong tumang do na Huhatahon on bamu, anggo seng tubuh halak humbani bah pakon Tonduy, seng tarmasukisi Harajaon ni Naibata.

⁶ Aha tubuh humbani daging, ai ma daging, anjaha aha tubuh humbani Tonduy, ai ma tonduy.

⁷ Ulang ma longang u hurmu, halani Huhatahon bamu maningon tubuh nasiam paduahalihon.

⁸ Na mangombus do logou dompak rosuh ni uhurni, ibogei ham do pardongosni, tapi seng ibotoh ham hunja rohni atap huja lahoni. Sonai do ganup na dob tubuh humbani Tonduy.”

⁹ Dob ai nini si Nikodemus ma mambalosi-Si, “Sonaha ma parjadini ai?”

¹⁰ Jadi nini Jesus ma mambalosisi, “Ham guru ni halak Israel, lang ibotoh ham in?

¹¹ Na tongon tumang do na Huhatahon on bamu, na binotohnami do ihatahon hanami, anjaha na nididahnami do isaksihon hanami, tapi seng ijalo nasiam hasaksiannami.

¹² Gari na i dunia on Huhatahon bani nasiam, seng porsaya nasiam, mintor porsaya ma nasiam, anggo Huhatahon bani nasiam na i nagori atas?

¹³ Anjaha seng dong na naik hu nagori atas, sobali na susur hun nagori atas in, in ma Anak ni Jolma in.

¹⁴ Anjaha songon na dob pinagijang ni si Musa ulog i halimisan, sonai do pagijangon Anak ni Jolma in,

¹⁵ ase dapotan hagoluhan na sadokah ni dokahni sagala na porsaya Bani.

¹⁶ Ai sonon do holong ni uhur ni Naibata bani dunia on, pala do Anak-Ni na sasada in iberehon, ase ulang magou ganup na porsaya Bani, tapi ase hagoluhan na sadokah ni dokahni bani.

¹⁷ Ai seng isuruh Naibata Anak-Ni in hu dunia on, laho manguhumi dunia on, tapi ase maluah do dunia on marhiteihon-Si.

¹⁸ Seng siuhumon na porsaya Bani, tapi na so porsaya domma hona uhum, halani lang porsaya ia bani goran ni Anak sasada ni Naibata.

¹⁹ Tapi on ma uhum ai, domma roh na liar in hu dunia on, tapi holongan do uhur ni jolma bani na

golap in ase bani na lihar in, ai na jahat do horja ni sidea.

²⁰ Ai ganup na mangkorjahon na masambor, sogam do uurni bani na lihar in, anjaha seng ijumpahkon na lihar in, ase ulang talar horjani ai.

²¹ Tapi na mangkorjahon hasintongan in, ijumpahkon do na lihar in, ase talar horjani ai, ai ibagas Naibata do ihorjahon ai.”

Hasaksian ni si Johannes Pandidi Use Pasal Jesus

²² Dob ai laho ma Jesus rap pakon susian-Ni hu tanoh Judea, anjaha soh ijai lobei rap pakon sidea lanjar mandidi.

²³ Anjaha si Johannes pe mandidi do i Aenon, dohorhon huta Salim, ai buei do bah ijai. Marrohan do halak hujai, laho padidihon dirini.

²⁴ Ai seng tartutup ope si Johannes ijia.

²⁵ Jadi tarjadi ma parsualon bani susian ni si Johannes ampa sada halak Jahudi pasal parburihan.

²⁶ Roh ma sidea bani si Johannes, anjaha nini sidea ma dompaksi, “Rabbi, Halak ondi, na roh hu bamu i dipar ni Bah Jordan, ai ma na sinaksihonmu ondi, tonggor ham ma, mandidihon do la nuan, anjaha marrohan do ganup halak Bani.”

²⁷ Dob ai nini si Johannes ma mambalosi, “Seng tarbuatjolma atap aha pe, anggo seng na binere ai bani hun nagori atas.

²⁸ Hanima sandiri do saksingku, sanggah huhatahon, 'Sedo ahu Kristus in, tapi na sinuruh do ahu parlobei-Ni.'

²⁹ Simada tunangan, ai do siparunjuk. Ia huan-huan ni siparunjuk, na jongjong patangi-tangisi, marmalas ni uhur do halani sora ni siparunjuk ai. Malas ni uhur na sonai do na adong bangku.

³⁰ Anggo la, patut do lambin banggal, tapi ahu lambin etek ma.

³¹ Na roh hun datas, la do na mangatasi haganup. Na hun tanoh on, partanoh on do ai, anjaha pasal na i tanoh on do isahapkon; na roh hun datas, la do na mangatasi haganup.

³² Na nididah-Ni ampa na binogei-Ni do isaksihon, tapi seng dong na manjalo hasaksian-Ni ai.

³³ Halak na manjalo hasaksian-Ni ai, iakui do, paboa parsintong do Naibata.

³⁴ Ai na sinuruh ni Naibata, la do na mansahapkon hata ni Naibata, anjaha seng marsibar la mambere Tonduy-Ni.

³⁵ Holong do uhur ni Bapa in bani Anak in, anjaha haganup do iondoskon hubagas tangan-Ni.

³⁶ Na porsaya bani Anak in, dapotan hagoluhan na sadokah ni dokahni, tapi na so mambalosi Anak in, seng idahonni ai hagoluhan, tapi ringis ni Naibata do totap bani."

Parsahapan ni Jesus ampa Sada Boru Samaria

4¹ Jadi dob ibotoh Tuhan in, na dob ibogei Parisei, buenan do susian ampa na nididi-Ni marimbang si Johannes,

² age pe seng Jesus sandiri mandidihon, tapi susian-Ni do,

³ itadingkon ma Judea, anjaha mulak ma la hu Galilea.

⁴ Tapi maningon bontason-Ni do nagori Samaria.

⁵ Jadi das ma la hu sada huta na i Samaria, na margoran Sikar, dohorhon juma, na binere ni si Jakob bani si Josep, anakni ai.

⁶ Ijai do parigi ni si Jakob. Jadi halani na dob loja Jesus na mardalan ai, hundul ma la i lambung ni parigi ai, anjaha tar tongah arian ma ai.

⁷ Dob ai roh ma sada boru Samaria, laho manahui bah. Jadi nini Jesus ma hu bani, “Bere ham ma Bangku bahmu in otik!”

⁸ la susian-Ni ai, domma laho hu huta mamboli bohal.

⁹ Jadi nini boru Samaria ai ma hu Bani, “Mase Ham, halak Jahudi, mangindo bah inumon hun bangku, boru Samaria? la halak Jahudi seng marparsaoran ai pakon halak Samaria.”

¹⁰ Dob ai nini Jesus ma mambalosisi, “Ambit itanda ham sibere-bere ni Naibata ampa na mangindo bah

inumon hun bamu, gabe ham ma mangindo hun Bani, jadi bereon-Ni ma bamu bah na manggoluh.”

¹¹ Jadi nini naboru ai ma hu Bani, “Tuan, gari tahu-tahu seng dong Bamu, anjaha bagas do parigi on; mintor hunja ma adong Bamu bah na manggoluh?

¹² Mintor banggalan ma Ham ase ompungta si Jakob, na mamberehon parigi on bannami? Ia do na minum hunjin, anakni ampa pinahanni.”

¹³ Dob ai nini Jesus ma mambalosisi, “Sagala na minum humbani bah on mangulaki horahan do,

¹⁴ tapi na manginum bah sibereon-Kai, seng horahan be ia sadokah ni dokahni. Ia bah sibereon-Kai gabe bah tubuh do ai ibagas dirini, na marjullak-jullak ronsi hagoluhan sisadokah ni dokahni.”

¹⁵ Dob ai nini naboru ai ma hu Bani, “Tuan, bere Ham ma bangku bah na sonai ai, ase ulang horahan be ahu, anjaha ulang pala be sai roh hujon laho manahui.”

¹⁶ Ihatahon Jesus ma hu bani, “Laho ma ham, dilo ham ma pargotongmu, dob ai roh ma ham hujon!”

¹⁷ Dob ai nini naboru ai ma mambalosi, “Seng dong pargotongku.” Nini Jesus ma hu bani, “Tongon do hatamu, seng dong pargotongmu.

¹⁸ Ia ham domma lima hali laho, anjaha dalahi na rap pakon ham sisonari ai, sedo pargotongmu ai; ase na sintong do na hinatahonmu ai.”

¹⁹ Jadi nini naboru ai ma hu Bani, “Tuan, huahap nabi do Ham!

²⁰ Ia ompungnami i dolog an do martonggo, hape nasiam mangkatahon, Jerusalem do ianan martonggo.”

²¹ Nini Jesus ma hu bani, “Porsaya ma ham Bangku inang, na roh ma panorangni, seng be i dolog an atap i Jerusalem nasiam marsombah bani Bapa in.

²² Isombah nasiam do na so tinanda nasiam, tapi anggo hanami na tinandanami do isombah hanami, ai halak Jahudi do harohan ni haluahon.

²³ Na roh ma panorangni, anjaha domma roh ai nuan, gabe ibagas Tonduy ampa Hasintongan ma sagala partonggo na sintong martonggo hubani Bapa in, ai partonggo na sonai do ipangindo Bapa in.

²⁴ Tonduy do Naibata, ase sagala na martonggo hu Bani, maningon do martonggo ibagas Tonduy ampa Hasintongan.”

²⁵ Nini naboru ai ma hu Bani, “Hubotoh, ia Mesias in (*ai ma Kristus*), maningon do roh. Rohkansi Ia, baritahonon-Ni ma ganupan ai bannami.”

²⁶ Ihatahon Jesus ma hu bani, “Ahu do in, na marsahap pakon ham!”

²⁷ Dob sonai, roh ma susian-Ni, anjaha longang do uhur ni sidea, halani na marsahapi ai la pakon naboru ai. Tapi sahalak pe seng dong na

manungkun, “Aha sungkunon-Mu?” Atap, “Aha sahapkonon-Mu bani?”

²⁸ Itadingkon naboru ai ma pangalopan ni bahni, mulak ma ia hu huta lanjar nini ma hubani halak na ijai ai,

²⁹ “Eta nasiam! Tonggor nasiam ma sada halak, na patugahkon bangku haganup na dob onggahuhorjahon, atap la do Kristus in.”

³⁰ Gabe luar ma sidea hun huta ai laho marayak-Si.

³¹ Sanggah sonai, nini susian-Ni ai ma mangojur-Si, “Mangan ma Guru in!”

³² Tapi nini ma bani susian-Ni ai, “Adong do sipanganon Bangku, na so binotohnima!”

³³ Gabe nini susian ai ma samah sidea, “Ai adong do nani, na mamboban sipanganon hu Bani?”

³⁴ Ihatahon Jesus ma hubani sidea, “Sipanganon do ai Bangku, mangkorjahon rosuh ni na marsuruh Ahu ampa mandobkon lahoan-Ni.

³⁵ Ai lang ihatahon hanima, ompat bulan nari jumpah ma parinama? Tapi Huhatahon ma bannima, mangkawah ma hanima, tonggor hanima ma juma in, domma gorsing, boi ma sabion.

³⁶ Manjalo upah ma sipanabi anjaha patumpuhon buah hu hagoluhan na sadokah ni dokahni, ase rap marmalas ni uhur sipartidah pakon sipanabi.

³⁷ Ai ijon ma sintong hata, na mangkatahon, ‘Na sada martidah, na legan manabi.’

³⁸ Ahu do marsuruh hanima manabi na so hinalojahonnima. Na legan do mangkorjahon, gabe isambat hanima do horja ni sidea.”

³⁹ Jadi buei ma halak Samaria na i huta ai na gabe porsaya Bani, halani hasaksian ni naboru ai na mangkatahon, “Haganup, na dob huhorjahon ipatugah do bangku.”

⁴⁰ Das honsi halak Samaria ai bani Jesus, ielek-elek sidea ma la tondok bani sidea, jadi ijai ma la dua ari.

⁴¹ Anjaha lambin bueini do na porsaya bani hata ni Jesus.

⁴² Nini sidea ma bani puang-puang ai, “Seng be halani hatamai mambahen porsaya hanami. Domma itangar hanami sandiri, anjaha ibotoh hanami, la do tongon Sipaluah dunia on.”

Ipamalum Jesus Anak ni Sada Pagawai ni Raja

(Mat. 8:5-13; Luk. 7:1-10)

⁴³ Jadi dob salpu na dua ari ai, misir ma la hunjai laho hu Galilea.

⁴⁴ Ai Jesus sandiri do manaksihon, na so marsangap nabi i tanoh hagodanganni.

⁴⁵ Jadi das honsi la i Galilea, ijalo halak Galilea do la, halani na dob ididah sidea haganup na binahen-Ni i Jerusalem bani ari raya ai, ai sidea pe dihut do bani pesta ai.

⁴⁶ Anjaha laho do la use hu Kana, na i Galilea, ianan-Ni ondi mambahen anggur humbani bah. Jadi

adong ma ijai pagawai ni raja, boritan do anakni i Kapernaum.

⁴⁷ Jadi dob ibogei, na dob roh Jesus hun nagori Judea hu nagori Galilea, ijumpahkon ma ia, ielekelek ma, ase tuad ia pamalumkon anakni, na mangkatarhatos ai.

⁴⁸ Jadi ihatahon Jesus ma hu bani, “Anggo seng ididah nasiam tanda ampa halongangan, seng na porsaya nasiam.”

⁴⁹ Jadi ihatahon pagawai ai ma, “Sai tuad ma Ham Tuan sanggah lape matei anakkai.”

⁵⁰ Ihatahon Jesus ma hu bani, “Mulak ma ham, manggoluh ma anakmu ai!” Porsaya do halak ai bani hata, na hinatahon ni Jesus bani, lanjar laho ma ia.

⁵¹ Sanggah tuad ia, ialo-alo jabolonni ma ia, laho patugahkon, na dob manggoluh anakni ai.

⁵² Ipapangkei ma humbani sidea panorangni, barang sadihari malum iahap. Jadi nini sidea ma, “Nantuari, hira-hira pukul sada do surut pane-pane ai hun bani.”

⁵³ Idingat bapani ai ma, pala ai ma tongon panorangni sanggah ihatahon Jesus bani, “Na manggoluh ma anakmu ai.” Gabe porsaya ma ia pakon haganup parrumahni.

⁵⁴ Ase ai ma tanda na paduahon, na binahen ni Jesus use, dob mulak ia hun Judea hu Galilea.

Ipamalum Jesus Sahalak na Boritan i Bethesda Sanggah Ari Sabat

5 ¹ I pudi ni ai adong ma pesta ni halak Jahudi, jadi tangkog ma Jesus hu Jerusalem.

² I Jerusalem, i lambung ni horbangan biribiri ai, adong do sada paridian, na margoran Bethesda bani hata Heber, adong do lima sopou-sopou ijai.

³ Martibalan do ijai buei halak na boritan, na mapitung, na oyangon ampa na matei lopah, na paima-imahon bani pargunsang ni bah ai,

⁴ ai turun do marnombas malekat ni Naibata manggunsang bah ai. Anjaha na parlobei masuk hubagas, dob hona gunsang bah ai, malum ma atap aha pe naboritni.

⁵ Adong do ijai sada halak, na dob tolu puluh ualuh tahun dokahni boritan.

⁶ Dob ididah Jesus ia tibal ijai, anjaha ibotoh, sonai ma dokahni ijai, gabe nini ma dompaksi, "Sihol malum ham?"

⁷ Nini na boritan ai ma mambalosi-Si, "Ham Tuannami, seng dong diha-dihangku, na mangabingkon ahu hu paridian in bani pargunsang ni bah in, ai rohkonsi ahu, domma adong na legan manlobei ahu turun."

⁸ Nini Jesus ma hu bani, "Jongjong ma ham, angkat ma podomanmu in, laho ma ham!"

⁹Jadi mintor jorgit ma halak ai, iangkat ma podomanni, lanjar laho ma ia, tapi ari Sabat do na sadari ai.

Parlawanon humbani Halak Jahudi

¹⁰Jadi ihatahon halak Jahudi ma bani halak na pinamalum ai, “Ari Sabat do arian on, seng bulih boanonmu podomanmu!”

¹¹Nini ma mambalosi, “Halak, na pamalum ahu, la do mangkatahon bangku, ‘Angkat ma podomanmu, anjaha laho ma.’”

¹²Isungkun sidea ma ia, “Ise mangkatahon bam, ‘Angkat ma anjaha laho ma?’”

¹³Tapi seng itandai na boritan ai la, ai domma laho Jesus, halani buei dojolma bani ianan ai.

¹⁴Dob salpu ai, jumpah Jesus ma ia i rumah panumbahan, gabe nini ma hu bani, “Tonggor ma, domma jorgit ham. Ulang be nunut mardousa, ase ulang sogop bamu siparahan.”

¹⁵Jadi laho ma halak ai, ihatahon ma bani halak Jahudi, paboa Jesus do na pamalumkonsi.

¹⁶Jadi iparburu halak Jahudi ma Jesus, halani ibahen sonai bani ari Sabat.

**Ipatorang Jesus na Binahen-Ni ai, ai
ma Halani Parsuruh ni Naibata Bani**

¹⁷ Tapi nini Jesus ma mambalosi sidea, “Na marhorja do Bapa ronsi nuan, Ahu pe marhorja do.”

¹⁸ Halani ai lambin ipindahi halak Jahudi ma dalan laho mamunuh-Si, ai seng be pitah ari Sabat isedai, tapi igoran do homa Naibata Bapa-Ni, anjaha ipados diri-Ni pakon Naibata.

¹⁹ Jadi nini Jesus ma mambalosi sidea, “Na sintong tumang do na Huhatahon on bani nasiam, aha pe lang tarhorjahon Anak in humbani diri-Ni sandiri, pitah na nididah-Ni na dob ihorjahon Bapa in do. Ai aha na hinorjahon ni Bapa in, ai do homa ihorjahon Anak in.

²⁰ Ai holong do uhur ni Bapa in bani Anak in, anjaha haganup do ipatuduhkon Bani na hinorjahon-Ni, anjaha patuduhkonon-Ni ope Bani horja sibanggalan hunjon, ase longang uhur nasiam.

²¹ Ai songon pamuhoi ni Bapa in bani na matei, laho pagoluhkon sidea, sonai do Anak in, ipagoluh do atap ise, na sihol pagoluhon-Ni.

²² Ai seng dong na iuhumi Bapa in, tapi domma iondoskon haganup panguhumon in bani Anak in.

²³ Ase haganup pasangap Anak in, songon parpasangap ni sidea bani Bapa in. Na so

pasangapkon Anak in, ai ma na so pasangap Bapa in, na marsuruh-Si.

²⁴ Na sintong tumang do na Huhatahon on bani nasiam, barang ise, na manangihon hatang-Ku anjaha porsaya bani na marsuruh Ahu, domma das ia bani hagoluhan na sadokah ni dokahni; seng pala be ia hu paruhuman, domma mandipar ia humbani hamatean hu hagoluhan.

²⁵ Na sintong tumang do na Huhatahon bani nasiam, na roh ma panorangni, anjaha domma masa ai nuan, bogeion ni na matei in ma sora ni Anak ni Naibata, gabe manggoluh ma na mambogei-Si.

²⁶ Ai songon Bapa in pargoluh ibagas diri-Ni, lanjar sonai do ibere bani Anak in, ase pargoluh la ibagas diri-Ni.

²⁷ Anjaha ibere do Bani kuasa manguhumi, halani Anak ni Jolma la.

²⁸ Ulang ma longang uhur nasiam pasal ai, ai na roh ma panorangni, bogeion ni haganup halak na i tanoman in ma sora-Ni,

²⁹ jadi mandarat ma, sihorjahon na madear puho hu hagoluhan, tapi sihorjahon na jahat puho bani uhum.

³⁰ Seng tarhorjahon Ahu atap aha pe humbani diring-Ku sandiri, domu hubani na Hubogei do panguhum-Hu, anjaha pintor do uhum-Hu, halani

seng Hupindahi rosuh ni uhur-Hu, rosuh ni na marsuruh Ahu do.

³¹ Anggo Ahu manaksihon pasal diring-Ku, seng na sintong hasaksian-Kai.

³² Adong do na legan manaksihon Ahu, anjaha Hubotoh sintong do hasaksianni ai pasal Ahu.

³³ Domma isuruh nasiam na marayak si Johannes, anjaha domma isaksihon hasintongan ai.

³⁴ Ia Ahu, seng Huporluhon hasaksian ni jolma, tapi Husahapkon pe ai, andohar maluah nasiam.

³⁵ Palita na gara anjaha na marsinalsal do ia, anjaha marosuh do nasiam tongkin marmalas ni uhur ibagas sondangni ai.

³⁶ Adong do hasaksian Bangku na surungan humbani si Johannes; ai horja na niondoskon ni Bapa in Bangku, sidobkonon-Ku, in ma horja na Hubahen in, in do manaksihon paboa na isuruh Bapa in do Ahu.

³⁷ Anjaha Bapa na marsuruh Ahu pe isaksihon do Ahu. Seng onggga ibogei nasiam sora-Ni, anjaha rupa-Ni pe seng onggga ididah nasiam.

³⁸ Hata-Ni pe seng marianan ibagas nasiam, ai seng porsaya nasiam bani na sinuruh-Ni.

³⁹ Ipareksa nasiam do Surat in, ai jumpah nasiam do ijin, ninuhur nasiam, hagoluhan na sadokah ni dokahni. Surat in do tongon na manaksihon pasal Ahu.

⁴⁰ Tapi seng ra nasiam roh hu Bangku, ase dapotan hagoluhan nasiam.

⁴¹ Seng Hujalo hasangapon humbani jolma.

⁴² Tapi Hutanda do nasiam, seng dong holong dompak Naibata bani nasiam.

⁴³ Roh do Ahu ibagas goran ni Bapa, hape seng ijalo nasiam Ahu. Tapi anggo roh na legan ibagas goranni sandiri, ijalo nasiam do anggo ai.

⁴⁴ Sonaha ma tarbahen nasiam porsaya, ai marsijaloan sangap do nasiam samah nasiam; tapi anggo sangap na humbani Naibata na sasada in, seng ipindahi nasiam.

⁴⁵ Ulang ma iagan nasiam, Ahu mangaduhon nasiam bani Bapa in. Adong do na mangaduhon nasiam, ai ma si Musa, hatengeran ni uhur nasiam ai.

⁴⁶ Ai ambit na porsaya nasiam bani si Musa, porsaya do nasiam age Bangku, ai pasal Ahu do isuratkon.

⁴⁷ Tapi anggo seng porsaya nasiam bani suratni, sonaha ma porsaya nasiam bani hatang-Ku?”

Itamuei Jesus Lima Ribu Halak

(Mat. 14:13-21; Mrk. 6:31-44; Luk. 9:10-17)

6¹ Dob salpu ai, idipari Jesus ma Tao Galilea, ai ma Tao Tiberias.

² Buei do halak mangirikkon-Si, halani ididah sidea tanda halongangan, na binahen-Ni bani halak na boritan.

³ Jadi tangkog ma Jesus hu dolog, laho hundul hujai rap pakon susian-Ni.

⁴ Tapi dohor ma Paskah, ai ma ari raya ni Jahudi.

⁵ Sanggah mangkawah Jesus anjaha ididah roh buei halak hu lobei-Ni, jadi nini ma dompak si Pilippus, “Hunja ma bolionta ruti, ase mangan sidea in?”

⁶ Tapi ihatahon pe sonai, na laho manlajousi do, ai ibotoh do aha sibahenon-Ni.

⁷ Ibalosi si Pilippus ma la, “Harga dua ratus dinar pe ruti seng sungkup bani sidea, ase ganup sidea manjalo otik bei.”

⁸ Jadi marbalos ma hubani sahalak humbani susian-Ni ai, ai ma si Andreas, anggi ni si Simon.

⁹ “Adong do ijon sada dakdanak, na mamboan lima ruti pakon dua dengke, tapi sadiha ma in bani na sain buei?”

¹⁰ Tapi nini Jesus ma, “Hatahon hanima ma hundul jolma in!” Adong do bolag sampalan ijai, gabe hundul ma dalahi ijai hira-hira lima ribu halak bueini.

¹¹ Ase ibuat Jesus ma ruti ai, anjaha dob ihatahon tarima kasih, ipamberei ma bani na hundul ai; anjaha sonai do homa dengke ai, atap sadiha ninuhur ni sidea.

¹² Ase dob bosur sidea, nini ma dompak susian-Ni ai, “Patumpu hanima ma teba-teba in, ase ulang soya.”

¹³ Jadi ipatumpu sidea ma, anjaha adong do sapuluh dua bantei teba-teba humbani na lima ruti ai, na so bois na mangan ai.

¹⁴ Ase dob ididah simbuei ai tanda na binahen ni Jesus ai, nini sidea ma, “On ma tongon nabi ia, na sihol roh hu dunia on.”

¹⁵ Dob ibotoh Jesus, na sihol roh sidea manangkap-Si, laho pabangkitkon-Si gabe raja, jadi surut ma sahalak-Si hu dolog.

Jesus Mardalan i Atas Tao

(Mat. 14:22-27; Mrk. 6:45-52)

¹⁶ Ase dob bod ari, tuad ma susian-Ni ai hu tao ai.

¹⁷ Imasuki sidea ma sada parau, anjaha idipari sidea ma tao ai laho hu Kapernaum. Domma pala golap ari, tapi lalab do seng roh Jesus manjumpahkon sidea.

¹⁸ Anjaha mangombus ma logou na gogoh, gabe margilumbang ma tao ai.

¹⁹ Jadi dob marluga sidea hira-hira dua atap tolu paal daohni, ididah sidea ma Jesus mardalan i atas tao ai, roh mandohori parau ai, gabe mabiar ma sidea.

²⁰ Tapi nini ma dompak sidea, “Ahu do on, ulang mabiar!”

²¹ Sihol pamasukon ni sidea ma la hu parau ai; mintor das ma parau ai hu pasir situjuon ni sidea ai.

Jesus do Ruti Hagoluhan

²² Patarni ai ibotoh na mabuei, na i dipar ni tao ai ma, na so adong ijai parau na legan sobali na sasada ai, anjaha na so dihut Jesus masuk hu parau ai rap pakon susian-Ni, pitah susian-Ni ai do na misir.

²³ Tapi marrohan do parau hun Tiberias dohor hu ianan parmanganan ruti, na tinonggohon ni Tuhan in.

²⁴ Ase dob ididah halak na mabuei ai, na so ijai be Jesus, age susian-Ni ai pe, imasuki sidea ma use parau ai, anjaha laho ma sidea hu Kapernaum mangindahi Jesus.

²⁵ Jadi dob jumpah sidea la i dipar ni tao ai, nini sidea ma hu Bani, “Guru, sadihari do Ham hujon?”

²⁶ Nini Jesus ma mambalosi sidea, “Na sintong tumang do na Huhatahon on bani nasiam, ipindah nasiam pe Ahu, sedo halani na dob ididah nasiam tanda in, tapi halani na bosur ai do nasiam mangan ruti ai.

²⁷ Ulang ma sipanganon na laho salpu horjahon nasiam, tapi sipanganon na totap ronsi hagoluhan sisadokah ni dokahni ma, na sihol bereon ni Anak ni Jolma in bani nasiam. Ai la do na tinokankon ni Bapa in, Naibata.”

²⁸ Dob ai nini sidea ma hu Bani, “Aha ma sibahenonnami, ase ihorjahon hanami horja harosuh ni Naibata?”

²⁹ Nini Jesus ma mambalosi sidea, “On do horja harosuh ni Naibata, ase porsaya nasiam bani na sinuruh-Ni.”

³⁰ Dob ai nini sidea ma, “Aha tanda ibahen Ham, ase ididah hanami gabe porsaya hanami Bamu? Aha ihorjahon Ham?

³¹ Ia ompungnami, mangan manna do i halimisan, songon na tarsurat in, ‘Ibere do ruti hun nagori atas panganon ni sidea.’”

³² Jadi nini Jesus ma hubani sidea, “Sedo si Musa na mambere ruti bani nasiam hun nagori atas, tapi Bapang-Ku do mambere ruti na tongon bani nasiam hun nagori atas.

³³ Ai na susur hun nagori atas, in do sibere hagoluhan hu dunia on, in do ruti na humbani Naibata.”

³⁴ Dob ai nini sidea ma, “Tuhan, ruti na sonin ma tongtong bere Ham bannami.”

³⁵ Nini Jesus ma hubani sidea, “Ahu do ruti hagoluhan in. Barang ise na roh hu Bangku, seng anjai loheian be ia, anjaha na porsaya Bangku, seng anjai horahan be ia.

³⁶ Tapi domma Huhatahon bani nasiam, ididah nasiam do namin Ahu, tapi seng porsaya nasiam.

³⁷ Haganup na binere ni Bapa in Bangku, in do na roh hu Bangku, anjaha seng anjai pabalion-Ku na roh hu Bangku.

³⁸ Ai seng susur Ahu hun nagori atas, laho mambahen rosuh ni uhur-Hu, rosuh ni uhur ni na marsuruh Ahu do.

³⁹ Anjaha on do rosuh ni uhur ni na marsuruh Ahu, ase ulang magou Hubahen age sada humbani haganup, na dob niondoskon-Ni in Bangku, ase Hupagoluh in tene bani ari parpudi.

⁴⁰ Ai on do rosuh ni uhur ni na marsuruh Ahu, ase haganup na mangidah Anak in anjaha porsaya Bani, dapotan hagoluhan na sadokah ni dokahni, anjaha papuhoon-Ku do ia bani ari parpudi.”

⁴¹ Jadi marungut-ungut ma halak Jahudi dompak-Si halani hata-Ni ai, “Ahu do ruti, na susur hun nagori atas,”

⁴² Gabe nini sidea ma, “Ai lang la do Jesus, anak ni si Josep, anjaha ai lang itandai hita do bapa-Ni pakon inang-Ni? Mase ma ihatahon, ‘Na susur hun nagori atas do Ahu?’ ”

⁴³ Nini Jesus ma mambalosi sidea, “Ulang nasiam marungut-ungut!

⁴⁴ Ise pe lang na boi roh hu Bangku, anggo seng Bapa in, na marsuruh Ahu, manogusi; anjaha Ahu do na papuhohonsi bani ari parpudi.

⁴⁵ Adong do tarsurat bani buku ni nabi-nabi, ‘Na niajaran ni Naibata do sidea ganupan. Haganup na manangihon Bapa in anjaha marguru hu Bani, in do na roh hu Bangku.’

⁴⁶ Seng dong halak na dob onggang mangidah Bapa in, sobali na roh humbani Bapa in; Ia do na dob mangidah Bapa in.

⁴⁷ Na tongon tumang do na Huhatahon on bani nasiam, barang ise na porsaya, parrupe i do ia bani hagoluan sisadokah ni dokahni.

⁴⁸ Ahu do ruti hagoluan in.

⁴⁹ Na mangan manna do ompung nasiam i halimisan, anjaha matei do.

⁵⁰ On do ruti na susur hun nagori atas, ase ulang matei na mangankonsi.

⁵¹ Ahu do ruti na manggoluh, na susur hun nagori atas. Barang ise na mangan ruti on, manggoluh do ia sadokah ni dokahni. Ia ruti sibereon-Kai bahen hagoluan ni dunia on, in ma daging-Ku.”

⁵² Dob ai marsual ma halak Jahudi samah sidea, nini ma, “Sonaha ma boi Halak on mambere daging-Ni in panganonta?”

⁵³ Jadi ihatahon Jesus ma hubani sidea, “Anggo seng ipangan nasiam daging ni Anak ni Jolma in, anjaha seng iinum nasiam daroh-Ni, seng dapot nasiam hagoluan in.

⁵⁴ Na mangankon daging-Ku anjaha na manginum daroh-Ku dapotan hagoluan na sadokah ni dokahni, anjaha papuhoon-Ku do ia bani ari parpudi.

⁵⁵ Ai sipanganon na tongon do daging-Ku, anjaha siinumon na tongon do daroh-Ku.

⁵⁶ Barang ise na mangankon daging-Ku anjaha na manginum daroh-Ku, ai do na marianan ibagas Ahu anjaha Ahu ibagas ia.

⁵⁷ Songon parsuruh ni Bapa Sipargoluh in Bangku, gabe manggoluh Ahu marhitei Bapa in, sonai do manggoluh marhitei Ahu na mangankon Ahu.

⁵⁸ On do ruti na susur hun nagori atas, tapi seng songon na pinangan ni ompung-ompung ondi, hape matei do. Na mangankon ruti on manggoluh do ronsi sadokah ni dokahni.”

⁵⁹ In ma hata ni Jesus, sanggah mangajari Ia i parguruan i huta Kapernaum.

Surut Buei Susian ni Jesus Manangar Hata ai

⁶⁰ Ase buei ma humbani susian-Ni na manangar hata ai, mangkatahon, “Hata na koras do in, ise ma ra pabogei-bogei in?”

⁶¹ Ibotoh Jesus ma, na dob marungut-ungut susian-Ni ai pasal ai, gabe nini ma dompak sidea, “Mintor halani in ma hanima sangsi?

⁶² Sonaha ma anggo ididah hanima holi Anak ni Jolma in naik hu ianan-Ni hinan?

⁶³ Tonduy in do pagoluhkon, seng marguna anggo daging in. Ia hata na Huhatahon bannima, Tonduy do in ampa hagoluhan.

⁶⁴ Tapi adong do deba hun bannima na so porsaya.” Ia Jesus ibotoh hinan do humbani mungkahni, ise sidea na so porsaya ampa na sihol mantahihon-Si.

⁶⁵ Jadi nini ma, “Halani ai ma ase Huhatahon bannima, paboa na so tarbahren atap ise roh hu Bangku, anggo seng na binerehon ai bani marhitei Bapa in.”

⁶⁶ Buei ma humbani susian-Ni ai na manadingkon-Si hunjia nari, seng be ihasomani sidea la.

Hasaksian ni Susian-Ni

⁶⁷ Jadi nini Jesus ma hubani na sapuluh dua ai, “Ai seng dihut hanima sihol laho?”

⁶⁸ Ibalosi si Petrus ma la, “Hu bani ise ma hanami laho Tuhan? Bamu do hata hagoluhan sisadokah ni dokahni!

⁶⁹ Anjaha domma ihaporsayai anjaha itanda hanami, Ham do Na Pansing ni Naibata!”

⁷⁰ Ibalosi Jesus ma sidea, “Ai lang sapuluh dua do hanima, na dob Hupilih in? Tapi sibolis do sada hun bennima.”

⁷¹ Si Judas, anak ni si Simon Iskariot do, na hinatahon-Ni ai. la do na mantahihon-Si use, ai ma sahalak humbani na sapuluh dua in.

Jesus Laho hu Pesta Lampolampo na i Jerusalem

7 ¹ Dob salpu ai, idalani Jesus ma Tanoh Galilea; seng ra la mardalani i Judea halani sihol do bunuhon ni halak la.

² Anjaha dohor ma pesta lampolampo ni halak Jahudi.

³ Jadi ihatahon sanina-Ni ai ma hu Bani, “Misir ma Ham hunjon laho hu Judea, ase dihut susian-Mu ai mangidah horja na hinorjahon-Mu in.

⁴ Ai seng bani na ponop ihorjahon halak sibahenonni, anggo sihol tarbarita ia. Anggo sapala ihorjahon Ham na sonin, patalar ma diri-Mu bani dunia on.”

⁵ Ai age sanina-Ni ai, seng porsaya Bani.

⁶ Jadi nini Jesus ma hubani sidea, “Seng jumpah ope panorang-Ku, tapi tongtong do sirsir anggo panorang nasiam.

⁷ Sonaha ma boi sogam uhur ni dunia on bani nasiam; anggo Ahu ihasogamkon do, halani Husaksihon na jahat do horjani.

⁸ Nasiam ma tangkog marpesta, anggo Ahu seng tangkog hu pesta ai, halani seng jumpah ope panorang-Ku.”

⁹ Dob ihatahon sonai, soh ma la i Galilea.

¹⁰ Tapi dob tangkog sanina-Ni ai hu pesta ai, la pe tangkog ma, seng talar, tapi ponop do.

¹¹ Ase ipindahi halak Jahudi ma la bani pesta ai, nini sidea ma, “Ai ija do la?”

¹² Jadi buei ma sahap-sahap pasal-Si i tongah-tongah ni halak na mabuei ai. Adong na mangkatahon, “Paruhur na madear do la.” Na legan mangkatahon, “Lang, sipakahou halak na mabuei do la.”

¹³ Tapi seng dong na pag marsahap torang-torang pasal-Si, halani biar dompak halak Jahudi ai.

Sahap ni Jesus Sanggah Pesta Lampolampo ai

¹⁴ Bani partongahan ni pesta ai, tangkog ma Jesus hu rumah panumbahan ai mangajari.

¹⁵ Jadi longang ma halak Jahudi, nini ma, “Sonaha do pambotoh ni On pasal na tarsurat in, ai seng onga marguru la?”

¹⁶ Jadi nini Jesus ma mambalosi sidea, “la podah-Ku seng na hun Bangku ai, tapi humbani na marsuruh Ahu do.

¹⁷ Barang ise na ra mangkorjahon rosuh ni uhur-Ni, botohonni do, barang na humbani Naibata podah-Ku, barang na Huhatahon in humbani diring-Ku sandiri.

¹⁸ Barang ise na mangkatahon humbani dirini sandiri, sangapni do na pinindahanni. Tapi na mangindahi sangap ni na marsuruh-Si, in do parsintong, seng dong na geduk ibagas dirini.

¹⁹ Ai lang domma ibere si Musa bani nasiam titah in? Hape sahalak pe seng dong humbani nasiam na mangkorjahon titah in. Mase ma iuhurhon nasiam sihol mamunuh Ahu?”

²⁰ Jadi nini na mabuei ai ma, “Na isorapi setan do Ham. Mintor ise na mangindahi dalam laho mamunuh Ham?”

²¹ Jadi nini Jesus ma mambalosi sidea, “Hubahen sada horja, gabe longang nasiam haganup halani ai.

²² Ibere si Musa do bani nasiam aturan parsunaton (*seng humbani si Musa namin ai, tapi humbani ompungta do*), gabe bani ari Sabat pe isunat nasiam do jolma.

²³ Anggo boi do sunaton jolma bani ari Sabat, ase ulang hona langgar titah ni si Musa, mase ma manggila nasiam Bangku, halani hibul sada jolma Hupamalum ari Sabat?

²⁴ Ulang ma marguru bani pangidah tumang panguhumion nasiam, tapi pintor ma panguhum nasiam.”

²⁵ Dob ai nini deba halak na hun Jerusalem ma, “Ai lang la do na sihol bunuhon ni sidea in?

²⁶ Tonggor ma, torang ni parsahap-Ni in, anjaha aha pe lang ihatahon sidea Bani. Ai na dob torang do nani ibotoh pambobaita, la do Kristus in?

²⁷ Tapi tene, ibotoh hita do harohan ni Halak on! Anggo roh Kristus in, seng dong na mambotoh atap hunja harohan-Ni.”

²⁸ Dob ai ipagogoh Jesus ma sora-Ni mangajari i rumah panumbahan ai, nini ma, “Tongon, itanda nasiam do Ahu, anjaha ibotoh nasiam do hunja harohan-Ku. Tapi seng humbani diring-Ku sandiri Ahu roh; adong do Parsintong in, na marsuruh Ahu, na so tinanda nasiam.

²⁹ Hutanda do la, ai hun Bani do Ahu, la do na marsuruh Ahu.”

³⁰ Jadi ipindahi sidea ma dalan laho manangkap-Si, tapi ise pe lang na mardas tangan hu Bani, halani lape jumpah panorangni.

³¹ Tapi buei do humbani na mabuei ai, na gabe porsaya Bani, nini sidea, “Anggo roh Kristus, tagamon buenan tanda bahenon-Ni humbani na binahen ni Halak on?”

³² Ibogei Parisei ai ma husip-husip ni na mabuei ai pasal-Si, jadi isuruh sintua ni malim ampa Parisei ma upas laho manangkap-Si.

³³ Jadi nini Jesus ma, “Tongkin nari mando Ahu rap pakon nasiam, dob ai laho ma Ahu marayak na marsuruh Ahu.

³⁴ Pindahan nasiam ma Ahu, tapi seng jumpah nasiam. Seng tarbahen nasiam roh bani ianan-Kai.”

³⁵ Jadi nini halak Jahudi ma samah sidea, “Huja do nani sihol misir la, ase lang jumpah hita be la? Sihol misir la nani hubani hasoman na manrantou i tanoh Gorik, laho mangajari halak Gorik ai?”

³⁶ Aha do arti ni hata, na hinatahonni ai, ‘Pindahan nasiam ma Ahu, tapi seng jumpah. Seng tarbahen nasiam roh bani ianan-Kai?’”

³⁷ Dob ai bani ari parpudi ni pesta ai, bani matani ai, jongjong ma Jesus ijai, ipagogoh ma sora-Ni mangkatahon, “Barang ise na horahan, hu Bangku ma ia roh minum.

³⁸ Songon na hinatahon ni surat in, ‘Bah na manggoluh do mabaor humbani na porsaya Bangku!’”

³⁹ Pasal Tonduy in do na hinatahon-Ni ai, sijaloon ni halak na porsaya, ai seng ope roh Tonduy in, halani seng ipasangap ope Jesus.

Pandapot ni Halak na Mabuei Pasal Jesus

⁴⁰ Deba humbani na mabuei ai, na mambogei hata ai, mangkatahon, “On ma tongon Nabi ai.”

⁴¹ Na legan mangkatahon, “On ma Kristus ai!” Tapi na legan use mangkatahon, “Mintor hun Galilea ma roh ni Kristus in?”

⁴² Ai lang ihatahon Surat in do, ia harohan ni Kristus, ai ma humbani ginompar ni si Daud anjaha hun huta Betlehem, huta ni si Daud?”

⁴³ Masa ma parsalisihan i tongah-tongah ni bangsa in marhalani la.

⁴⁴ Deba humbani sidea sihol manangkap-Si, tapi seng dong na pag mardas tangan Bani.

Ipindahi Parisei Dalan laho Mamunuh Jesus

⁴⁵ Jadi mulak ma upas ai bani sintua ni malim ampa Parisei, gabe ihatahon sidea ma bani sidea, “Mase lang iboban nasiam la?”

⁴⁶ Balos ni upas ai, “Seng onnga ope adong halak na marsahap songon-Si ai.”

⁴⁷ Jadi nini Parisei ai ma bani sidea, “Ai dihut do homa nasiam ipakahou?

⁴⁸ Ai adong do humbani pambobai atap humbani Parisei, na porsaya Bani?

⁴⁹ Tapi pitah halak na mabuei in, na so mambotoh titah in do; bursik ma sidea.”

⁵⁰ Dob ai nini si Nikodemus ma, ai ma sada halak humbani sidea, na roh ijia marayak Jesus,

⁵¹ “Ai iuhumi titahta do halak, anggo lang parlobei nabogei hata-Ni, ase nabotoh atap aha na hinorjahon-Ni?”

⁵² Jadi nini sidea ma mambalosisi, “Ai halak Galilea do homa ham? Papangkei ma, ase ibotoh ham, na so adong bangkit nabi hun Galilea.”

⁵³ Jadi misir ma sidea ganup hu rumahni bei.

Pasal Sada Naboru Parbangkis na Sinasap Dousani

8 ¹ Dob ai laho ma Jesus hu Dolog Jetun.

² Tapi patarni ai laho ma la use hu rumah panumbahan; roh ma halak na mabuei ai hu lobei-Ni, jadi hundul ma la laho mangajari sidea.

³ Jadi iboan sibotoh surat ampa Parisei ma puang-puang, na tarjumpah marbangkis, hu lobei-Ni, ipajongjong ma ia hu tongah-tongah,

⁴ anjaha nini sidea ma hu Bani, “Guru, na tardapot do puang-puang on marbangkis.

⁵ Nini titah ni si Musa, sipargijigon do bani batu halak na sonon; ia Ham, sonaha do nimu?”

⁶ Ihatahon sidea pe sonai, na laho manlajou-Si do, ase adong dalan mangaduhon-Si. Tapi ipaunduk Jesus ma diri-Ni, lanjar manurat-nurat i tanoh marhitei jari-jari-Ni.

⁷ Tapi halani sai inunut sidea manungkun-Si, Jesus pe dirgak ma, anjaha ihatahon ma bani sidea, “Barang ise na so mardousa humbani nasiam, ia ma parlobei manggijigisi bani batu.”

⁸ Dob ai ipaunduk ma use diri-Ni, anjaha manurati bani tanoh.

⁹ Tapi mambogei ai, misiran ma sidea sada-sada, pangintuai parlobei, gabe tading ma sahalak-Si ampa puang-puang ai, na jongjong ijai.

¹⁰ Ipadirgak Jesus ma diri-Ni, nini ma dompaksi, “Ija do sidea inang? Seng dong na manguhumi ham?”

¹¹ Nini ma, “Seng dong Tuhan.” Jadi ihatahon Jesus ma, “Ahu pe, seng uhumon-Ku ham. Laho ma ham, ulang be nunut ham mardousa hunjon hujanan!”

Jesus do Panondang ni Dunia on

¹² Dob ai nini Jesus ma use mangkatahon bani sidea, “Ahu do panondang ni dunia on. Seng anjai mardalan bani na golap na mangirikkon Ahu, bani do tene Panondang hagoluhan in.”

¹³ Jadi nini halak Parisei ma hu Bani, “Ia Ham, diri-Mu do isaksihon Ham; seng sintong hasaksian-Mu in.”

¹⁴ Jadi nini Jesus ma mambalosi sidea, “Age pe pasal diring-Ku Husaksihon, sintong do hasaksian-Kin, ai Hubotoh do, hunja Ahu roh anjaha huja Ahu sihol laho. Tapi anggo nasiam, seng ibotoh nasiam hunja Ahu roh anjaha huja sihol laho Ahu.

¹⁵ Mangihutkon pardagingon do nasiam manguhumi. Anggo Ahu, seng dong Huuhumi age ise.

¹⁶ Anjaha anggo manguhum Ahu, sintong do uhum-Hu, ai seng pitah Ahu na manguhum ai, tapi na marsuruh Ahu do hasoman-Ku.

¹⁷ Anjaha bani titah nasiam pe tarsurat do, ‘Sintong do sinaksihon ni dua halak.’

¹⁸ Ahu do na manaksihon pasal diring-Ku, anjaha Bapa in pe, na marsuruh Ahu, isaksihon do Ahu.”

¹⁹ Nini sidea ma hu Bani, “Ai ija do Bapa-Mu?” Ibalosi Jesus ma, “Ahu atap Bapa pe, seng itandai nasiam. Ambit itandai nasiam Ahu, tandaon nasiam do age Bapa.”

²⁰ Ai ma ihatahon i kamar parartaan, sanggah na mangajari la i rumah panumbahan. Ise pe lang na manangkap-Si, ai seng jumpah ope panorangni.

Lumba-lumba ni Jesus Bani Halak na So Ra Porsaya Bani

²¹ Jadi nini ma use mambalosi sidea, “Na laho ma Ahu, jadi pindahan nasiam ma Ahu, anjaha matei

ma nasiam ibagas dousa nasiam. Anjaha seng boi nasiam roh hu siparayakon-Kai.”

²² Dob ai nini halak Jahudi ma, “Na laho mandolos do la nani, ase ihatahon, ‘Seng boi nasiam roh hu siparayakon-Kai?’”

²³ Jadi nini ma hubani sidea, “Na hun toruh on do nasiam, na hun babou do anggo Ahu. Na hun dunia on do nasiam, seng hun dunia on anggo Ahu.

²⁴ Halani ai do ase Huhatahon bani nasiam, na matei ma nasiam ibagas dousa nasiam. Ai anggo seng porsaya nasiam, Ahu do In, matei ma nasiam ibagas dousa nasiam.”

²⁵ Nini sidea ma hu Bani, “Ai ise do Ham?” Ibalosi Jesus ma sidea, “Songon na dob Huhatahon ai bani nasiam!

²⁶ Buei do sihatahonon-Ku ampa sipinsangon-Ku pasal nasiam. Parsintong do na marsuruh Ahu, anjaha na Hubogei hun Bani, ai do Husaksihon bani dunia on.”

²⁷ Seng ibotoh sidea, Bapa in do na sinahapkon-Ni bani sidea marhitei ai.

²⁸ Dob ai nini Jesus ma hubani sidea, “Dob pe ipagijang nasiam Anak ni Jolma in, ase ibotoh nasiam Ahu do in, anjaha na so adong Hubahen humbani diring-Ku, tapi songon na pinodahkon ni Bapa hu Bangku, sonai do Huhatahon.

²⁹ Anjaha na marsuruh Ahu, Ia do hasoman-Ku. Seng onga itadingkon sahalak Ahu, ai rosuh ni uhur-Ni do tongtong Huhorjahon.”

³⁰ Dob ihatahon sonai, buei ma na gabe porsaya Bani.

**Pitah Jesus do na Boi Paluahkon hun
Bani Parjabolonan ni Dousa**

³¹ Jadi ihatahon Jesus ma dompak halak Jahudi na dob porsaya ai Bani, “Anggo totap nasiam ibagas hatang-Ku, sintong ma nasiam susian-Ku.

³² Tandaon nasiam ma hasintongan in, anjaha paluahon ni hasintongan in ma nasiam.”

³³ Ibalosi sidea ma Ia, “Ginompar ni si Abraham do hanami, anjaha seng onga hanami hona parjabolonan. Mase ma ihatahon Ham, ‘Maningon paluahon do nasiam?’”

³⁴ Ibalosi Jesus ma sidea, “Na sintong tumang do hatang-Kon bani nasiam: Sagala na mangkorjahon dousa, jabolon ni dousa do ai.

³⁵ Anjaha jabolon, seng totap ai i rumah; anak do na totap tongtong.

³⁶ Anggo ipaluah Anak in nasiam, na maluah botul ma nasiam.”

Ipatalar Jesus na hun Bani Sibolis do Jahudi

³⁷ “Hubotoh, ginompar ni si Abraham do nasiam, tapi ipindah i nasiam do dalan mamunuh Ahu, ai seng siat hatang-Ku bani nasiam.

³⁸ Na Huidah bani Bapa, ai do Huhatahon; nasiam pe, na binogei nasiam humbani bapa nasiam, ai do ihorjahon nasiam.”

³⁹ Jadi nini sidea ma mambalosi-Si, “Ia bapanami, ai ma si Abraham.” Nini Jesus ma bani sidea, “Ambit anak ni si Abraham do nasiam, ihorjahon nasiam do horja ni si Abraham.

⁴⁰ Tapi ipindah i nasiam do dalan laho mamunuh Ahu, na patugahkon bani nasiam hasintongan, na Hubogei humbani Naibata. Seng sonai pambahen ni si Abraham.

⁴¹ Horja ni bapa nasiam do na hinorjahon nasiam.” Nini sidea ma hu Bani, “Sedo anak salong-salongan hanami, sada do bapanami, ai ma Naibata.”

⁴² Nini Jesus ma hubani sidea, “Ambit Naibata do bapa nasiam, holong do uhur nasiam Bangku, ai humbani Naibata do Ahu roh hujon; seng humbani diring-Ku Ahu na roh on, Ia do na marsuruh Ahu.

⁴³ Mase ma lang iarusi nasiam hatang-Ku? Ai ma, halani seng tartangihon nasiam hatang-Ku.

⁴⁴ Na marbapa hubani sibolis do nasiam, anjaha rosuh ni bapa nasiam do sihol bahenon nasiam. Sibunuhjolma do ia humbani mungkahni, anjaha

seng jongjong ia ibagas hasintongan, ai seng dong hasintongan ibagas dirini. Anggo ihatahon ladung, domu hubani hadirionni do na hinatahonni ai, ai siparladung do ia anjaha bapa ni ladung.

⁴⁵ Tapi hasintongan do Huhatahon, hape seng porsaya nasiam Bangku.

⁴⁶ Ise humbani nasiam boi mambuktihon, pardousa Ahu? Anggo Huhatahon na sintong, mase ma lang porsaya nasiam Bangku?

⁴⁷ Barang ise na humbani Naibata, tangihononni ai do hata ni Naibata. Halani na so humbani Naibata do nasiam mambahen lang itangihon nasiam Ahu.”

Jesus do Sibere Hagoluhan na Sadokah ni Dokahni

Parlobei do Ia Ase si Abraham

⁴⁸ Jadi nini halak Jahudi ma mambalosi-Si, “Ai lang sintong do hatanami, halak Samaria do Ham anjaha na sibolison?”

⁴⁹ Ibalosi Jesus ma, “Seng na sibolison Ahu; Hupasangap do Bapa in, jadi iapasi nasiam do Ahu.

⁵⁰ Ia Ahu seng Hupindahi sangap-Ku; adong do na mangindahi ai anjaha na manguhumi.

⁵¹ Na sintong tumang do hatang-Kon bani nasiam, barang ise na mangkorjahon hatang-Ku, seng idahonni hamatean sadokah ni dokahni.”

⁵² Nini halak Jahudi ma hu Bani, “Sonari ibotoh hanami ma, na sibolison do Ham. Na matei do si

Abraham ampa nabi-nabi, hape Ham mangkatahon, 'Barang ise na mangkorjahon hatang-Kin, seng dageion ni in hamatean sadokah ni dokahni.

⁵³ Ai banggalan do Ham humbani bapanami si Abraham, na dob matei in? Anjaha nabi-nabi pe matei do. Ai ise do Ham, ninuhur-Mu?"

⁵⁴ Ibalosi Jesus ma, "Anggo Ahu pasangap diring-Ku, na so adong ma sangap-Ku. Adong do Bapang-Ku, na pasangap Ahu, in ma na hinatahon nasiam Bapa nasiam.

⁵⁵ Anjaha seng itanda nasiam la, tapi anggo Ahu Hutanda do. Ambit Huhatahon, seng Hutanda la, parladung ma Ahu songon nasiam. Tapi Hutanda do la, anjaha Hudalankon do hata-Ni.

⁵⁶ Marolob-olob do si Abraham, bapa nasiam in, halani sihol idahonni ari-Kin, jadi saud do ididah, gabe malas ma uhurni."

⁵⁷ Dob ai nini halak Jahudi ma hu Bani, "Lima puluh tahun pe lape das umur-Mu, mintor onggma ma ididah Ham si Abraham?"

⁵⁸ Nini Jesus ma hubani sidea, "Na sintong tumang do na Huhatahon on bani nasiam, lape tubuh si Abraham, domma adong Ahu."

⁵⁹ Jadi ibuat sidea ma batu, laho manggijigi-Si, tapi ponop ma Jesus misir hun rumah panumbahan ai.

Ipamalum Jesus Sada Halak na Mapitung Tubuh Sanggah Ari Sabat

9¹ Dob ai sanggah na montas la, ididah ma sada halak na pitung humbani partubuhni.

² Jadi nini susian-Ni ai ma manungkun-Si, “Guru, ise do na mardousa, halak on do atap namatoriasni, ase pitung ia humbani partubuhni?”

³ Ibalosi Jesus ma, “Sedo halani dousani atap halani dousa ni namatoriasni, tapi ase ipatalar bani horja ni Naibata.

⁴ Maningon horjahonon-Ku do horja ni na marsuruh Ahu, sadokah siang ari; ai rohkonsi borngin, seng tarbahren atap ise pe marhorja.

⁵ Sadokah i dunia on Ahu, panondang ni dunia on do Ahu.”

⁶ Dob ihatahon sonai, martijur ma la hu tanoh, laho pamalhot tanoh otik marhitei tijur-Ni ai, idaiskon ma na malhot ai bani matani,

⁷ lanjar nini ma hu bani, “Laho ma ham marsuhap hu bongbongan Siloam (*artini: na sinuruh*).” Jadi laho ma ia marsuhap, gabe marpangidah ma ia mulak hunjai.

⁸ Jadi nini romban rumahni ma, sonai age na onggang mangidahsi hinan mangindo-indo, “Ai lang on do, na hundul mangindo-indo ondi?”

⁹ Na deba mangkatahon, “Ia do in!” Na deba nari mangkatahon, “Lang, tapi usih do ia hujai!” Ia sandiri mangkatahon, “Ahu do in!”

¹⁰ Nini sidea ma hu bani, “Sonaha do parmungkab ni matamu in?”

¹¹ Nini ma mambalosi, “Sada halak, na margoran Jesus pamalhot tanoh. Idaiskon ma ai bani matangku, anjaha ihatahon ma ahu marsuhap hu bongbongan Siloam. Jadi laho ma ahu marsuhap, gabe marpangidah ma.”

¹² Dob ai nini sidea ma bani, “Ija do Ia?” Balosni, “Seng hubotoh!”

¹³ Jadi iarahkon sidea ma na pitung hinan ai hu lobei ni Parisei.

Sogam ni Uhur ni Halak Parisei

¹⁴ Tapi ari Sabat do tudu, sanggah na pinamalhot ni Jesus tanoh ai, anjaha na niungkab-Ni ai matani ai.

¹⁵ Lanjar isungkun Parisei ai ma ia, atap sonaha do, ase marpangidah ia. Jadi nini ma hubani sidea, “Tanoh na pinamalhot do idaiskon bani matangku, dob ai marsuhap ma ahu, gabe marpangidah ma ahu.”

¹⁶ Piga-piga halak Parisei ai mangkatahon, “Seng na humbani Naibata Halak ai, ai seng ihargahon ari Sabat.” Na legan mangkatahon, “Mintor tarhorjahon pardousa ma tanda na sonai ai?” Jadi marsalisih ma sidea samah sidea.

¹⁷ Dob ai ihatahon sidea ma use bani halak na pitung ai, “Ia ho, sonaha do pangkatahonmu pasal-Si, halani iungkab matamu?” Jadi nini ma, “Nabi do la.”

¹⁸ Seng iparhatongon Jahudi ai, na pitung hinan do ia, dob ai marpangidah use, pala idilo sidea namatorias ni na gabe marpangidah ai,

¹⁹ anjaha isungkun ma sidea, “Anak nasiam do on, na hinatahon nasiam ai pitung humbani partubuhni? Na sonaha do, ase marpangidah ia nuan?”

²⁰ Jadi nini namatoriasni ai ma mambalosi sidea, “Tongon do on anaknami, anjaha pitung do ia tubuh.

²¹ Sonaha, ase marpangidah ia sonari, seng ibotoh hanami, anjaha ise na mangungkab matani in, seng itanda hanami. Ia ma sungkun nasiam, domma sungkup umurni, domma boi ia marsahap pasal dirini.”

²² Ase sonai pe hata ni namatoriasni ai, halani mabiar do sidea mangidah halak Jahudi ai. Ai domma manriah halak Jahudi, maningon sipabalion do hun kuria, barang ise na marhatongonkon Kristus do la.

²³ Halani ai do ase ihatahon namatoriasni ai, “Domma sungkup umurni, ia ma sungkun nasiam.”

²⁴ Dob ai idilo sidea ma paduahalihon na pitung ondi, nini sidea ma hu bani, “Pasangap ma Naibata! Ibotoh hanami, pardousa do Halak ai!”

²⁵ Jadi nini ma mambalosi, “Barang pardousa la seng hubotoh. Pitah on do na hubotoh, mapitung do ahu hinan, tapi marpangidah do nuan.”

²⁶ Dob ai nini sidea ma hu bani, “Ai aha ibahen bam? Sonaha do ibahen mangungkab matamu?”

²⁷ Ibalosi ma sidea, “Domma hupatugah ai bani nasiam, na so ibogei nasiam do in? Sonaha, sihol bogeion nasiam use? Sihol nasiam gabe susian-Ni?”

²⁸ Jadi isuraki sidea ma ia, nini ma, “Ho do susian-Ni, anggo hanami susian ni si Musa do.

²⁹ Ibotoh hanami, na iparsahapkon Naibata do si Musa, tapi anggo Halak on, seng nabotoh, atap na hunja la.”

³⁰ Jadi nini ma mambalosi sidea, “Halongangan ma in tongon na so ibotoh nasiam atap na hunja la, hape iungkap do matangku!

³¹ Ibotoh hita do, na so itangihon Naibata pardousa, tapi na marhabiaran Bani, anjaha sihorjahon rosuh ni uhur-Ni, ai do itangihon.

³² Hun bani sapari, seng onggab nabogei, adong na mangungkab mata ni halak na mapitung tubuh.

³³ Ambit seng humbani Naibata la, seng tarbahensi age aha.”

³⁴ Jadi nini sidea ma hu bani, “Hibul do ho tubuh ibagas dousa, hape sihol ajaranmu hanami?” Jadi ipabali sidea ma ia.

Balos ni Jesus Bani Halak Jahudi

³⁵ Itangar Jesus ma, na dob ipabali sidea ia. Dob jumpah-Si ia, nini ma, “Porsaya do ho bani Anak ni Jolma in?”

³⁶ Jadi nini ma mambalosi, “Ai ise do ai Tuan, ase porsaya ahu Bani?”

³⁷ Nini Jesus ma hu bani, “Na nididahmu, anjaha na marsahap pakon ho, in ma ia.”

³⁸ Jadi nini ma, “Na porsaya do Ahu, Tuhan!” Lanjar isombah ma ia.

³⁹ Dob ai ihatahon Jesus ma, “Mamboan uhum do ase roh Ahu hu dunia on, ase marpangidah na so marpangidah hinan, anjaha na marpangidah hinan gabe mapitung.”

⁴⁰ Ibogei deba halak Parisei na rap pakonsi ai ma ai, gabe nini ma dompak-Si, “Ai dihut do hanami pitung?”

⁴¹ Nini Jesus ma hubani sidea, “Ambit pitung nasiam, seng mardousa nasiam. Tapi halani ihatahon nasiam, ‘Marpangidah do hanami,’ gabe totap ma dousa nasiam.”

Parmahan Na Madear

10¹ “Na sintong tumang do na Huhatahon on bani nasiam, barang ise na so masuk hun labah, laho hu harang ni biribiri, tapi manangkih humbani dalan na legan, panangko do ai anjaha panrampok.

² Tapi na masuk hun labah, ai do siparmahan bani biribiri ai.

³ Ungkabon ni sijaga labah ai ma bani, anjaha itangihon biribiri ai do sorani; idilo do sidea bani goranni bei, anjaha iboan hu darat.

⁴ Dob ipadarat haganup na adong bani ai, sai i lobei do ia mardalan, anjaha iirikkon biribiri ai do ia, ai itanda sidea do sorani.

⁵ Halak na legan nani, seng ra sidea mangihutkon ai, tapi maporus do sidea hun bani, ai seng itanda sidea sora ni na legan ai.”

⁶ Limbaga on ma ihatahon Jesus bani sidea, tapi seng iarusi sidea, na hinatahon-Ni ai bani sidea.

⁷ Jadi nini Jesus ma use bani sidea, “Na sintong tumang do na Huhatahon on bani nasiam, Ahu do labah laho hubani biribiri in.

⁸ Haganup na manlobei Ahu panangko do in anjaha panrampok, tapi seng itangihon biribiri in sidea.

⁹ Ahu do labah in; barang ise na masuk hun Bangku, maluah do, keluar masuk ma ia, anjaha dapotan sampalan.

¹⁰ Roh pe panangko, pitah na laho manangko, na manayati ampa mangagou do hansa. Roh do Ahu ase dong hagoluhan bani sidea, anjaha marlobih-lobih.

¹¹ Parmahan Na Madear do Ahu. Ibere Parmahan Na Madear do hosah-Ni mangkopkop biribiri-Ni.

¹² Tapi anggo sipangan gaji, na so siparmahan, na so simada biribiri in, ididah pe roh begu, itadingkon do biribiri in laho lintun, gabe isoroh begu ai ma biribiri in anjaha mambur merap ibahen,

¹³ ai sipangan gaji do ia, na so mansarihon biribiri in.

¹⁴ Ahu do Parmahan Na Madear, Hutanda do na Bangku, anjaha itanda sidea do Ahu,

¹⁵ songon Bapa mananda Ahu, anjaha Ahu mananda Bapa. Hubere do hosah-Ku mangkopkop biribiring-Ku,

¹⁶ Adong ope biribiring-Ku na legan, na so humbani harang on. Sidea pe dihut do arahkonon-Ku, anjaha tangihonon ni sidea do sorang-Ku, gabe sada hulanan ma ai anjaha sada parmahan.

¹⁷ Halani on do, ase ihaholongi Bapa in Ahu, halani Huberehon hosah-Ku, ase Hujalo ai use.

¹⁸ Seng dong na mambuat in hun Bangku, humbani rosuh-Ku do in Hubere. Na markuasa do Ahu mamberehon, anjaha na markuasa do Ahu use manjalo in. In ma titah na Hujalo humbani Bapa.”

¹⁹ Tubuh ma use parsalisihan i tongah-tongah ni halak Jahudi halani hata ai.

²⁰ Buei do humbani sidea na mangkatahon, “Na sibolison do In anjaha na podouan! Mase ma patangi-tangionnima In?”

²¹ Na legan mangkatahon, “Sedo sahap ni na sibolison in! Mintor tarungkab sibolis ma mata ni na mapitung?”

Sahap ni Jesus Sanggah Pesta Pabayu Rumah Panumbahan

²² Dob ai jumpah ma use pesta pabayu rumah panumbahan i Jerusalem, musim borgoh do ijia.

²³ Mardalan-dalan do Jesus i emper ni si Salomo, na i rumah panumbahan ai.

²⁴ Roh ma halak Jahudi manginggoti-Si, nini sidea ma, “Sadiha dokah on sungkun-sungkun uhurnami bahenon-Mu? Anggo Ham do Kristus in, hatahon Ham ma torang bennami.”

²⁵ Balos ni Jesus bani sidea, “Domma Hupatugah bani nasiam, tapi seng porsaya nasiam. Horja na Huhorjahon marhitei goran ni Bapa, ai do manaksihon pasal Ahu.

²⁶ Tapi seng porsaya nasiam, ai seng masuk biribiring-Ku nasiam.

²⁷ Itangihon biribiring-Ku do sora-Ku, anjaha itanda sidea do Ahu, iirikkon sidea do Ahu.

²⁸ Hubere do bani sidea hagoluhan na sadokah ni dokahni; seng magou sidea sadokah ni dokahni, anjaha ise pe lang boi manrampas sidea humbani tangan-Ku.

²⁹ Banggalan humbani haganup do Bapa, na mamberehon sidea ai Bangku, anjaha ise pe lang boi manrampas sidea humbani tangan ni Bapa.

³⁰ Sada do Ahu pakon Bapa in."

³¹ Dob ai ibuat halak Jahudi ma use batu, laho manggijig-Si.

³² Tapi nini Jesus ma hubani sidea, "Buei do horja na madear humbani Bapa Hupatuduhkon bani nasiam. Halani horja do, ase sihol pargijigon nasiam Ahu?"

³³ Balos ni halak Jahudi, "Sedo halani horja na madear, ase sihol pargijigonnami Ham, tapi halani pangapasi-Mu ai do, ai ipados Ham do diri-Mu pakon Naibata, age pe jolma do Ham."

³⁴ Dob ai ibalosi Jesus ma sidea, "Ai lang adong do tarsurat bani titah nasiam, 'Domma Huhatahon, Naibata do nasiam?'

³⁵ Anggo igoran Naibata, hadasan ni hata ni Naibata, anjaha seng tarkahua Surat in,

³⁶ mase ma hatahonon nasiam hubani na pinapansing ni Naibata, anjaha na sinuruh-Ni hu dunia on, 'Siapasi Naibata do Ham,' halani Huhatahon, Anak ni Naibata do Ahu?

³⁷ Ambit lang Huhorjahon horja ni Bapa, age ulang porsaya nasiam Bangku.

³⁸ Tapi anggo Huhorjahon do, hape lang porsaya nasiam Bangku, bani horja in ma nasiam porsaya, ase ibotoh anjaha itanda nasiam, ibagas Ahu do Bapa in, anjaha Ahu ibagas Bapa in.”

³⁹ Dob ai sihol ma tangkapon ni sidea la, tapi maluah do la hun tangan ni sidea.

⁴⁰ Dob ai laho ma la use hu dipar ni bah Jordan, ai ma hu pandidian ni si Johannes hinan, lanjar marianan ijai.

⁴¹ Anjaha buei do halak na roh marayak-Si, nini sidea ma, “Seng adong namin ibahen si Johannes tanda halongangan, tapi haganup na hinatahon ni si Johannes pasal Halak on, sintong do.”

⁴² Jadi buei do halak, na gabe porsaya Bani ijai.

Mulak Manggoluh si Lasarus

11 ¹ Adong ma sada halak na boritan, si Lasarus, na hun Betania, ai ma huta ni si Maria ampa si Marta saninani ai.

² Ai ma si Maria, na onggam mamminaki Tuhan in, dob ai na mangapusi nahei-Ni marhitei jambulanni. Botouni do si Lasarus na boritan ai.

³ Isuruh botouni ai ma na mangkatahon Bani, “Ham Tuhan, boritan do na hinaholongan ni uhur-Mu!”

⁴ Mambogei ai Jesus, nini ma, “Sedo hamatean ujung ni naborit ai, tapi bahen hasangapon ni Naibata do ai, ase marsangap Anak ni Naibata marhitei ai.”

⁵ Tapi holong do uhur ni Jesus bani si Marta, bani saninani ai ampa bani si Lasarus.

⁶ Anjaha dob ibogei na boritan do ia, soh ope la dua ari nari bani ianan-Ni ai.

⁷ Dob salpu ai, nini ma hubani susian-Ni ai, “Eta, laho ma hita use hu Judea!”

⁸ Nini susian-Ni ai ma hu Bani, “Guru, baru ope sihol pargijigon ni halak Jahudi Ham, ai ulakan-Mu ope hujai?”

⁹ Balos ni Jesus, “Ai lang sapuluh dua jam do sadari? Barang ise na mardalan arian, seng tartolsu ai, ai ididah do panondang ni dunia on.

¹⁰ Tapi barang ise na mardalan borngin, tartolsu do, ai seng dong panondang bani.”

¹¹ Dob ihatahon sonai, nini ma hubani sidea, “Ia si Lasarus, huan-huanta ai, domma modom; tapi na laho ma Ahu hujai mamuhoisi.”

¹² Jadi nini susian-Ni ai ma hu Bani, “Ham Tuhan, anggo na modom do ia, na laho malum do.”

¹³ Pasal parmateini do na hinatahon ni Jesus ai; tapi ninuhur ni sidea pasal na sinok modom do.

¹⁴ Jadi ihatahon Jesus ma torang bani sidea, “Domma matei si Lasarus,

¹⁵ anjaha halani hanima malas do uhur-Hu lang ijai ahu, ase porsaya hanima; tapi laho ma hita marayaksi.”

¹⁶ Marsahap ma si Tomas, na ginoran si Rindu-rindu, hubani hasomanni susian ai, “Eta ma tongon laho, ase rap matei hita pakon-Si!”

¹⁷ Jadi dob das ijai, domma pala ompat ari ia ibagas tanoman jumpah-Si.

¹⁸ Ia huta Betania, dohor do ai hun Jerusalem, hira-hira tolu batu do daohni.

¹⁹ Buei do roh halak Jahudi marayak si Marta pakon si Maria, laho mangapoh sidea halani botou ni sidea ai.

²⁰ Dob ibogei si Marta na dob roh Jesus, laho ma ia mangalo-alo-Si; tading i rumah do anggo si Maria.

²¹ Jadi nini si Marta ma bani Jesus, “Ambit ijon Ham Tuhan, seng matei botouhin!

²² Tapi sonari pe, hubotoh do, atap aha pe ipindo Ham humbani Naibata, sai na bereon-Ni do Bamu.”

²³ Ihatahon Jesus ma hu bani, “Na laho puho do botoumai!”

²⁴ Nini si Marta ma hu Bani, “Eak, hubotoh do, na puho do ia bani parpuhoon simagira.”

²⁵ Ihatahon Jesus ma hu bani, “Ahu do parpuhoon ampa hagoluhan. Sai manggoluh do na porsaya Bangku, age pe matei ia.

²⁶ Anjaha ganup na manggoluh anjaha na porsaya Bangku, seng anjai matei ia sadokah ni dokahni! Porsaya do ho ijai?”

²⁷ Nini ma hu Bani, “Eak Tuhan, porsaya do ahu, Ham do Kristus, Anak ni Naibata, na roh hu dunia on.”

²⁸ Jadi dob ihatahon sonai, laho ma ia mandilo si Maria, anggini ai, ihusipkon ma, “Domma roh Guru in, idilo do ho!”

²⁹ Mambogei ai si Maria tarolos ma ia jongjong, laho manjumpahkon-Si,

³⁰ ai lape das Jesus i huta ai, tapi bani parjumpahan-Ni pakon si Marta ai ope la.

³¹ Ia halak Jahudi na adong i rumah ai rap pakon si Maria, laho mangapohsi, dob ididah sidea tarolos si Maria jongjong laho hu darat, iirikkon sidea ma ia, ai iagan sidea na laho hu tanoman do ia tangis.

³² Das honsi si Maria hu parsaranan ni Jesus, anjaha ijin ididah la, manrogop ma ia hu lobei-Ni, anjaha ihatahon ma, “Ambit ijon Ham Tuhan, seng matei botouhai!”

³³ Dob ididah Jesus ia na tangis ai, sonai homa halak Jahudi hasomanni na roh ai tangis-tangis do, jadi manringis ma ia anjaha bulinsah,

³⁴ lanjar nini ma, “Ija do itibalhon nasiam ia?” Nini sidea ma hu Bani, “Roh ma Ham, anjaha idah Ham ma, Tuhan!”

³⁵ Jesus pe tangis ma.

³⁶ Jadi nini halak Jahudi ma, “Tongor ma, holong ni uhur-Ni in bani!”

³⁷ Tapi deba humbani sidea mangkatahon, “Ia, na mangungkab mata ni na mapitung, seng tarbahen-Si gakni, ase ulang matei halak on?”

³⁸ Jadi manringis ma use Jesus, das honsi Ia hu tanoman ai. Batu na niliang do ai, lanjar batu do tutupni.

³⁹ Nini Jesus ma, “Angkat nasiam ma batu in!” Jadi nini si Marta, botou ni na dob matei ai ma, “Tuhan, domma marbau, ai domma pala ompat ari ia matei.”

⁴⁰ Nini Jesus ma hu bani, “Ai lang domma Huhatahon bam, idahonmu do hasangapon ni Naibata, anggo porsaya ho?”

⁴¹ Jadi iangkat sidea ma batu ai. Mangkawah ma Jesus dompak babou anjaha nini ma, “Ham Bapa, tarima kasih ma Bamu, halani itangihon Ham Ahu!

⁴² Hubotoh do, tongtong do Ahu itangihon Ham, tapi halani na mabuei, na jongjong maringgot on do, ase Huhatahon in, ase porsaya sidea, na sinuruh-Mu do Ahu.”

⁴³ Jadi dob ihatahon sonai, ipagogoh ma sora-Ni mandilohon, “Lazarus, kaluar ma ho!”

⁴⁴ Jadi luar ma tongon na matei ai; lilit ope hiou bani naheini ampa tanganni sonai hiou panrungkub bani bohini. Ihatahon Jesus ma, “Tanggali nasiam ma ia, ase boi ia mardalan.”

⁴⁵ Jadi buei ma humbani halak Jahudi, na roh hubani si Maria ai, na gabe porsaya Bani, dob ididah sidea na binahen ni Jesus.

Sihol Bunuhon ni Sintua ni Malim ampa Parisei Jesus

⁴⁶ Tapi deba humbani sidea laho do marayak halak Parisei, laho patugahkon na binahen ni Jesus ai bani sidea.

⁴⁷ Jadi iadongkon sintua ni malim ampa Parisei ma rapot bangga, ihatahon sidea ma, “Aha ma bahenonta? Ai buei do tanda ibahen Halak in!

⁴⁸ Anggo ipaturut hita la sonin, porsaya ma halak haganupan Bani, gabe roh ma holi halak Rom manrampas tanohta ampa bangsanta.”

⁴⁹ Tapi sada humbani sidea, ai ma si Kayapas, sintua ni malim bani na satahun ai mangkatahon bani sidea, “Na hurang uhur do nasiam!

⁵⁰ Seng ipingkirhon nasiam, paboa dearan do matei sada halak mangkopkop halak na mabuei in, humbani na magou ganup bangsa in.”

⁵¹ Sedo humbani dirini ihatahon ai; tapi halani sintua ni malim do ia bani na satahun ai, ase ijahai, na sihol matei ma Jesus mangkopkop bangsa in.

⁵² Seng pitah mangkopkop bangsa in, tapi sihol patumpuon-Ni do age anak ni Naibata na marserak in ase gabe sada in.

⁵³ Mulai humbani ari ai manriah ma sidea laho mamunuh-Si.

⁵⁴ Jadi lang be talar-talar mardalani Jesus i tongah-tongah ni halak Jahudi, tapi laho ma la hunjai hu sada nagori, dohorhon halimisan, hu huta na margoran Efraim; ijai ma la marianan ampa susian-Ni ai.

⁵⁵ Tapi dohor ma Pesta Paskah ni Jahudi, jadi buei ma halak na tangkog hun nagori ai hu Jerusalem, paima Paskah ai, laho manguras dirini.

⁵⁶ Ipindahi sidea ma Jesus, anjaha marsisungkunan ma sidea, sanggah jongjong-jongjong sidea i rumah panumbahan ai. Sonaha do ninuhur nasiam? Na so roh do la nani hu pesta on?

⁵⁷ Ai domma iparentahkon sintua ni malim ampa Parisei, ase ipatugah anggo adong na mambotoh, atap ija la marianan, ase boi tangkapon ni sidea la.

Iminaki si Maria Tuhan Jesus

(Mat. 26:6-13; Mrk. 14:3-9)

12 ¹ Onom ari nari paima Paskah ai, das ma Jesus hu huta Betania, ianan ni si Lasarus, na pinuhoan ni Jesus humbani na matei.

² Jadi ipasirsir sidea ma ijai sipanganon Bani, anjaha si Marta do marugas; si Lasarus ma sada hasomanni, na mangan ai ijai.

³ Jadi ibuat si Maria ma sakati minak nardus na maharga anjaha na so maragu; iminaki ma nahei ni

Jesus, anjaha jambulanni do ibahen manlapui. Jadi igoki misbou ni minak ai ma rumah ai.

⁴ Sada humbani susian-Ni, ai ma si Judas Iskariot, na sihol mantahihon-Si ai, mangkatahon,

⁵ “Mase ma lang na jual minak in harga tolu ratus dinar, ase naberehon in bani halak na masombuh?”

⁶ Ihatahon pe sonai, sedo na masombuh sinarihonni ijai; panangko do ia tene, anjaha halani ia sijolom parduitan, somal do ia buat-buat hunjai.

⁷ Jadi nini Jesus ma, “Paturut ma ia, ai ibahen do in sahira hubani ari pananom-Ku.

⁸ Ai tongtong do adong na masombuh i tongah-tongahnima, tapi anggo Ahu, seng totap i lambungnima.”

Sihol Bunuhon ni Sintua ni Malim Age si Lasarus

⁹ Jadi buei ma humbani halak Jahudi na mambotoh, na dob ijai la; jadi marrohan ma sidea, sedo pitah halani Jesus, tapi sihol idahon ni sidea do homa si Lasarus na dob pinapuhu ai humbani na matei.

¹⁰ Ia sintua ni malim domma manriah hinan sihol mamunuh si Lasarus homa,

¹¹ ai halanisi buei do halak Jahudi na laho hujai, gabe porsaya bani Jesus.

Parmasuk ni Jesus hu Jerusalem

(Mat. 21:1-11; Mrk. 11:1-11; Luk. 19:28-38)

¹² Patarni ai, dob ibogei halak na mabuei, na roh bani pesta ai, na roh ma Jesus hu Jerusalem,

¹³ jadi ibuat sidea ma bulung-bulung ni palem, laho mangalo-alo-Si lanjar mandilo-dilohon, “Hosianna! Pinasu-pasu ma na roh marhitei goran ni Tuhan in, Raja ni Israel!”

¹⁴ Jadi dapot Jesus ma sada halode ajar-ajar, ai ma iajak domu hubani na tarsurat in,

¹⁵ “Ulang ho mabiar, ale boru Sion. Tonggor ma, Rajamu do na roh, mangajak halode poso-poso.”

¹⁶ Seng dong iarusi susian-Ni ai hinan pasal ai; dob pe marsangap Jesus, ase idingat sidea, na marhahonaan hu Bani do hape na tarsurat ai ampa pambahen ni sidea hu Bani.

¹⁷ Lanjar isaksihon halak na mabuei, na rap pakon-Si ai do, paboa na dob idilo do si Lasarus humbani tanoman, laho mamuhoi-Si humbani na matei.

¹⁸ Ase ialo-alo halak na mabuei ai pe la, halani na dob ibogei sidea do tanda halongangan na binahen-Ni ai.

¹⁹ Jadi nini halak Parisei ma samah sidea, “Tonggor ma, na so marguna do hape na binahen nasiam in, ai ganup do dunia on mangirikkon-Si.”

Sihol Idahon ni Halak Gorik Jesus

²⁰ Adong do deba halak Gorik i tongah-tongah ni halak na tangkog ai, laho martonggo bani ari Pesta ai.

²¹ Jadi iparayak sidea ma si Pilippus, na hun Betsaida, na i Galilea, nini sidea ma, “Tuannami, sihol do idahonnami Jesus.”

²² Laho ma si Pilippus patugahkon ai bani si Andreas; si Andreas pe laho ma rap pakon si Pilippus patugahkon ai bani Jesus.

²³ Jadi nini Jesus ma mambalosi sidea, “Na dob jumpah ma panorangni, ase marsangap Anak ni Jolma in!

²⁴ Na sintong tumang do na Huhatahon on bannima, seng na ganda omei in, anggo seng madabuh hu tanoh anjaha matei, dob pe matei, ase buei buahni.

²⁵ Agouan hosah do na mangkaholongi hosahni, tapi na mangkasogamkon hosahni i dunia on, ai do na manramotkonsi das hu hagoluan sisadokah ni dokahni.

²⁶ Barang ise na sihol mambalosi Ahu, iirikkon ma Ahu; anjaha ia ija Ahu, ijai do juakjuak-Ku. Barang ise na mambalosi Ahu, pasangapon ni Bapa in do ia.

²⁷ Na bulinsah do uhur-Hu nuan. Aha ma sihatahonon-Ku? Ham Bapa, paluah Ham ma Ahu

humbani panorang on. Tapi tene, halani in do ase das Ahu bani panorang on.

²⁸ Ham Bapa, pasangap Ham ma goran-Mu!" Dob ai roh ma sora hun nagori atas, "Domma Hupasangap, lanjar pasangapon-Ku do use!"

²⁹ Ibogei halak na mabuei, na jongjong ijai ma ai, gabe ihatahon sidea ma, "Longgur do ai!" Na legan mangkatahon, "Malekat do na marsahap pakon-Si!"

³⁰ Nini Jesus ma mambalosi, "Sedo halani Ahu ase roh sora ai, halani nasiam do.

³¹ Sonari ma mardalan uhum bani dunia on, sonari ma sipabalion raja ni dunia on.

³² Anggo Ahu, dob ipagijang Ahu hun dunia on, tarikon-Ku do haganup sidea Bangku."

³³ Ihatahon do ai laho patidakkon parmatei-Ni holi.

³⁴ Ibalosi halak na mabuei ai ma la, "Ibogei hanami humbani titah in, na totap do Kristus in ronsi sadokah ni dokahni. Mase ma ihatahon Ham, maningon pagijangon do Anak ni Jolma in? Ise do Anak ni Jolma in?"

³⁵ Jadi ihatahon Jesus ma bani sidea, "Tongkin nari mando Panondang in bani nasiam. Mardalan ma nasiam, sanggah bani nasiam ope Panondang in, ase ulang idorab na golap in nasiam; na mardalan bani na golap, seng ibotoh atap dompak ja do ia laho.

³⁶ Sanggah bani nasiam ope Panondang in, porsaya ma nasiam bani Panondang in, ase gabe anak ni

Panondang in nasiam!” Ai ma ihatahon Jesus, dob ai itadingkon ma sidea laho marponop.

Mase Lang Porsaya Halak Jahudi?

³⁷ Age pe sonai buei ni tanda ibahen i lobei ni sidea, seng porsaya sidea Bani,

³⁸ ase jumpah na hinatahon ni Nabi Jesayas, “Ham Tuhan, ise ma na porsaya bani ambilannami? Anjaha hagogohon ni Tuhan, bani ise ma in talar?”

³⁹ Seng tarbahen sidea porsaya, ai sonon ope hata ni si Jesayas,

⁴⁰ “Ipapitung do mata ni sidea, anjaha ipahengkeng uhurni, ase ulang marpangidah mata ni sidea, anjaha ulang marpangarusion uhur ni sidea; ulang mulak sidea, ulang malum sidea hubahen.”

⁴¹ Sonai do ihatahon si Jesayas, halani ididah hasangapon-Ni ai, anjaha isahapkon pasal-Si.

⁴² Age humbani sipambobai buei do na porsaya Bani, tapi halani biar ni sidea mangidah Parisei, seng ibagas na talar, ase ulang ipabali sidea humbani kuria,

⁴³ ai holongan do uhur ni sidea bani hasangapon na humbani jolma, ase hasangapon na humbani Naibata.

Rimpun ni Pangajaran ni Jesus

⁴⁴ Dob ai dilo-dilo ma Jesus, nini ma, “Na porsaya Bangku, sedo Ahu na hinaporsayaanni ai, tapi na marsuruh Ahu do.

⁴⁵ Na mangidah Ahu, mangidah na marsuruh Ahu do.

⁴⁶ Ahu do Panondang na roh hu dunia on, ase ulang marianan ibagas na golap sagala na porsaya Bangku.

⁴⁷ Anggo adong na manangar hatang-Ku, hape seng ihorjahon, seng Ahu na manguhumisi; ai seng roh Ahu, laho manguhum dunia on, tapi laho paluahkon do.

⁴⁸ Na manulak Ahu anjaha na so manjalo hatang-Ku, domma adong na manguhumsi; hata na Huhatahon ai do manguhumsi bani ari parpudi.

⁴⁹ Ai seng humbani diring-Ku Ahu marsahap, tapi Bapa, na marsuruh Ahu, la do na mangaturhon Bangku pasal sisahapkonon-Ku ampa sihatahonon-Ku.

⁵⁰ Anjaha Hubotoh, hagoluhan sisadokah ni dokahni do titah-Ni in. Ase na Huhatahon in, sonin ihatahon Bapa in Bangku, sonai do Huhatahon.”

Iburihi Jesus Nahei ni Susian-Ni

13 ¹ Paima pesta Paskah ai, dob ibotoh Jesus, na roh ma panorangni manadingkon dunia on,

laho marayak Bapa in, ipataridahkon ma holong-Ni ronsi ujungni na dong Bani i dunia on, songon pangkaholongi-Ni hinan bani sidea.

² Sanggah na mangan ai sidea, domma isuankon sibolis in partahi-tahian hubagas uhur ni si Judas Iskariot, anak ni si Simon.

³ Halani ibotoh Jesus do, na dob iondoskon Bapa in haganup hubagas tangan-Ni, la roh humbani Naibata anjaha mulak ma hubani Naibata,

⁴ gabe jongjong ma la humbani na mangan ai, itanggali ma baju ganjang-Ni, ibuat ma basahan lanjar igonditkon ma.

⁵ Dob ai iuseihon ma bah hu sambung, iburihi ma nahei ni susian-Ni ai, anjaha iapusi ma ai merhitei basahan na ginonditkon-Ni ai.

⁶ Das ma la hubani si Simon Petrus, jadi nini si Petrus ma hu Bani, “Mintor Ham ma Tuhan mamurihi naheihu?”

⁷ Nini Jesus ma mambalosisi, “Seng iarusi ho nuan na Hubahen on, tapi arusanmu do ai use.”

⁸ Nini si Petrus ma hu bani, “Lalab ma lang bulih Ham mamburihi naheihu.” Nini Jesus ma mambalosisi, “Anggo seng Huburihi ho, seng parrupei ho Bangku.”

⁹ Nini si Simon Petrus ma, “Tuhan, ulang ma pitah naheihu, dihut ma tangan pakon ulungku!”

¹⁰ Dob ai nini Jesus ma hu bani, “Halak na dob pinaridi, seng pala burihan be (*sobali naheini*),

ai domma borsih ia ganupan. Na dob borsih do hanima, tapi seng haganup.

¹¹ Ai ibotoh do, na sihol mantahihon-Si, halani ai do, ase ihatahon, “Seng haganup hanima borsih!”

¹² Ase, dob iburihi Jesus nahei ni sidea, ipakei ma use baju ganjang-Ni, hundul ma la, lanjar nini ma bani sidea, ai iarusi hanima do na Hubahen in bennima?

¹³ Igoran hanima do Ahu Guru anjaha Tuhan, anjaha sintong do pangkatahonnima in, ai in do Ahu tongon.

¹⁴ Ase anggo Tuhan anjaha Gurunima mamurihi naheinima, patut ma age hanima marsiburihan nahei!

¹⁵ Ai sitiruon do Hubere bannima, ase ibahen hanima songon na Hubahen in bennima.

¹⁶ Na sintong tumang do na Huhatahon on bannima, seng banggalan juakjuak marimbang tuanni, anjaha seng banggalan na sinuruh marimbang na marsuruhsi.

¹⁷ Anggo ibotoh hanima ma in, martuah ma hanima na mangkorjahonsi.

Ipatalar Jesus Sipartahi-tahi ai

(Mat. 26:20-25; Mrk. 14:17-21; Luk. 22:21-23)

¹⁸ Seng dompak hanima ganupan hatang-Kin, Hutanda do na dob Hutodoh. Tapi ase saud na

tarsurat in, 'Na mangan ruti rap pakon Ahu, in do na manadahkon neheini dompak Ahu.'

¹⁹ Hupatugah hinan in bannima paima masa, ase porsaya hanima, anggo masa ma in, paboa Ahu do in.

²⁰ Na sintong tumang do na Huhatahon on bannima, na manjalo na Husuruh, Ahu do na jinaloni ai, anjaha na manjalo Ahu, manjalo na marsuruh Ahu do."

²¹ Dob ihatahon Jesus ai, bulinsah ma Ia, nini ma manaksihon, "Na tongon tumang do na Huhatahon on bennima: Sahalak hun bennima sihol mantahihon Ahu."

²² Marsikawahan ma susian ai, jut ma uhur ni sidea, atap ise do na hinatahon-Ni ai.

²³ Sada humbani susian ai, na hinaholongan ni Jesus, hundul dohor i lambung-Ni.

²⁴ Jadi ihilap si Petrus ma ia, ihatahon ma bani, "Sungkun ma, ise do na hinatahon-Ni ai!"

²⁵ Ipadohor ma hu lambung ni Jesus, nini ma hu Bani, "Tuhan, ise do ai?"

²⁶ Ibalosi Jesus ma ia, "Hu bani ise Huberehon na santopik on, dob Husornobkon, ai ma ia." Jadi isornobkon ma ruti na santopik ai, iberehon ma ai bani si Judas Iskariot, anak ni si Simon ai.

²⁷ Jadi dob ijalo ai, masuk ma sibolis bani. Ihatahon Jesus ma hu bani, "Podas ma bahen sibahenonmin!"

²⁸ Tapi seng dong humbani sidea na mangan ai, na mangarusi na hinatahon-Ni ai.

²⁹ Ai halani si Judas do sijolom parduitan ai, gabe iagan na deba ma, na ihatahon Jesus do ia mamboli na porlu bani pesta ai, atap marsibere-bere bani na masombuh.

³⁰ Ase dob ijalo si Judas na santopik ai, mintor laho ma ia hu darat, tapi domma bagas borngin.

Titah na Baru Pasal na Marsihaholongan

³¹ Jadi dob laho ia hu darat, ihatahon Jesus ma, “Sipasangapon ma nuan Anak ni Jolma in, anjaha Naibata marsangap marhiteihon-Si.

³² Anggo marsangap Naibata marhiteihon-Si, pasangapon ni Naibata ma la ibagas Dirini, anjaha barah ma la pasangapon-Ni.

³³ Hanima anak-anakku, tongkin nari mando Ahu rap pakon hanima. Pindahannima ma Ahu; songon na dob Huhatahon bani halak Jahudi, sonai do hatahonon-Ku bannima, seng tarbahen hanima roh hubani siparayakon-Kai.

³⁴ Titah na baru do Hubere bannima, ai ma, ase marsihaholongan hanima samah hanima. Songon holong ni uhur-Hu bannima, sonai ma marsihaholongan hanima.

³⁵ Hunjon ma botohon ni ganup halak susian-Ku hanima, anggo marsihaholongan hanima.”

Lumba-lumba Pasal PamarSouon ni si Petrus

(Mat. 26:33-35; Mrk. 14:29-31; Luk. 22:31-34)

³⁶ Nini si Simon Petrus ma, “Tuhan, huja Ham laho?” Balos ni Jesus, “Seng tarihutkon ho ope Ahu bani siparayakon-Kai anggo sonari, use pe ase ihutkononmu Ahu.”

³⁷ Nini si Petrus ma hu Bani, “Tuhan, mase lang tarihutkon ahu Ham sonari? Hosahku pe ra do ahu memberehon mangkopkop Ham!”

³⁸ Balos ni Jesus, “Hosahmu berehononmu mangkopkop Ahu? Na sintong tumang do na Huhatahon on bam, lape martahuak dayok, domma tolu hali Ahu parnalangonmu.”

HATA PARTADINGAN NI JESUS BANI SUSIANNI

(bd. 14-16)

Jesus do Dalan hu Hagoluhan

14 ¹ Ulang ma tonjan uhurnima! Porsaya ma hanima bani Naibata, anjaha porsaya ma homa Bangku!

² Buei do ianan i rumah ni Bapa. Ambit lang sonai, mintor hatahonon-Ku ma bannima, na laho do Ahu pasirsirhon ianan bannima?

³ Anjaha laho pe Ahu pasirsirhon ianan bannima, mulak do Ahu use mangalop hanima, ase rap hanima pakon Ahu.

⁴ Anjaha ibotoh hanima do dalam hu ianan siparayakon-Kai.”

⁵ Nini si Tomas ma hu Bani, “Seng ibotoh hanami atap huja do Ham laho Tuhan! Sonaha ma pambotohnami bani dalam ai?”

⁶ Nini Jesus ma hu bani, “Ahu do dalam in pakon hasintongan ampa hagoluhan. Seng dong na das hubani Bapa in, anggo seng marhiteihon Ahu.

⁷ Anggo itanda hanima Ahu, tandaonnima do age Bapa in. Olat ni on tandaonnima ma la anjaha idahonnima.”

⁸ Nini si Pilippus ma hu Bani, “Tuhan, patuduhkon Ham ma bannami Bapa in, ase sombuh uhurnami!”

⁹ Nini Jesus ma hu bani, “Domma pala na sain dokah Ahu rap pakon hanima, lanjar seng itandai ho ope Ahu, ale Pilippus? Na mangidah Ahu, na mangidah Bapa in do. Mase ma hatahononmu, ‘Patuduhkon Ham ma bannami Bapa in?’”

¹⁰ Seng porsaya ho, Ahu ibagas Bapa in anjaha Bapa in ibagas Ahu? Hata na Huhatahon bannima, seng humbani diring-Ku Huhatahon in. Bapa in, na marianan ibagas Ahu, la do na mandalankon horja-Ni.

¹¹ Porsaya ma hanima Bangku. Ibagas Bapa in do Ahu, anjaha ibagas Ahu do Bapa in. Anggo lang, halani horja in ma hanima porsaya!

¹² Na sintong tumang do na Huhatahon on bannima, horjahonon ni na porsaya Bangku do songon horja na Hubahen in; lobih hunjai ope bahenonni, ai na laho ma Ahu hubani Bapa in.

¹³ Ase barang aha pe sipindoonnima marhitei goran-Ku, bahenon-Ku do, ase marsangap Bapa in ibagas Anak in.

¹⁴ Barang aha ipindo hanima hun Bangku marhitei goran-Ku, bahenon-Ku do ai.”

Bagah-bagah Pasal Tonduy Na Pansing

¹⁵ “Anggo na holong do uhurnima Bangku, dalankononnima do titah-Ku.

¹⁶ Anjaha pindoon-Ku ma bani Bapa in, ase ibere bannima sada Pangapiti na legan, ase la ma mangkasomani hanima lalab,

¹⁷ in ma Tonduy hasintongan in, na so tarjalo dunia on, ai seng ididah anjaha seng itanda. Tapi itanda hanima do la, ai na rap ma la pakon hanima, anjaha ibagas hanima ma la.

¹⁸ Seng tadingkonon-Ku hanima tading maetek; na roh ma Ahu marayak hanima.

¹⁹ Tongkin nari mando, seng be idahon ni dunia on Ahu, tapi idahonnima do Ahu, ai manggoluh do Ahu, hanima pe manggoluh do.

²⁰ Bani na sadari ai ma botohonnima. Ahu ibagas Bapa, hanima ibagas Ahu anjaha Ahu ibagas hanima.

²¹ Barang ise na manjolom titah-Ku anjaha idalankon, ai do na marholong ni uhur Bangku. Ihaholongi Bapa do na marholong ni uhur Bangku, anjaha Ahu pe holong do uhur-Hu bani, anjaha patalaron-Ku do diring-Ku bani.”

²² Ihatahon si Judas ma Bani (*sedo si Iskariot ai*), “Tuhan, aha do halani, ase pitah bannami patalaron-Mu diri-Mu, seng bani dunia on?”

²³ Nini Jesus ma mambalosisi, “Barang ise na marholong ni uhur Bangku, horjahononni in do hatang-Ku, jadi haholongan ni Bapa ma ia, gabe roh ma hanami marayaksi, anjaha marianan bani.

²⁴ Na so marholong ni uhur Bangku, seng dalankononni in hatang-Ku, anjaha hata na binogeinima in, sedo Ahu simada in, tapi Bapa, na marsuruh Ahu do.

²⁵ In ma Huhatahon bennima, sanggah rap ope Ahu pakon hanima.

²⁶ Tapi anggo pangapiti in, sisuruhon ni Bapa in marhitei goran-Ku, ajarhonon anjaha pagolpaon ni In do bannima sagala na Huhatahon in bannima.

²⁷ Damei do Hutadingkon bannima, damei na adong Bangku do Hubere bannima. Seng songon pambere ni dunia on pambereng-Ku bannima. Ulang ma tonjan anjaha ulang ma mabiar uhurnima.

²⁸ Domma ibogei hanima hatang-Ku bannima, na laho ma Ahu, anjaha na roh ma Ahu marayak hanima. Ambit na holong uhurnima Bangku, malas do uhurnima halani laho Ahu marayak Bapa in, ai banggalan do Bapa in ase Ahu.

²⁹ Anjaha sonari Hupatugah hinan ma in bannima, paima masa, ase porsaya hanima masa honsi.

³⁰ Seng be buei sahapkonon-Ku bannima, ai na roh ma raja ni dunia on. Seng dong kuasani Bangku;

³¹ tapi sihol do botohon ni dunia on, na holong do uhur-Hu bani Bapa in, anjaha sonaha ihatahon Bapa in, sonai do Huhorjahon. Ai pe, jongjong ma hanima, laho ma hita hunjon!”

Jesus do Hayu Anggur in

15 ¹ “Ahu do hayu anggur na tongon, anjaha Bapa do sihorjai pohon in.

² Irotap do sagala ranting-Ku na so marbuah, anjaha ipaborsih do sagala na marbuah, ase ganda buahni.

³ Domma borsih hanima halani hata in, na Huhatahon bannima.

⁴ Totap ma hanima ibagas Ahu, songon Ahu ibagas hanima! Songon ranting in, na so tarbahen marbuah humbani dirini sandiri, anggo seng totap bani hayu anggur in, sonai ma hanima, anggo seng totap hanima ibagas Ahu.

⁵ Ahu do hayu anggur in, hanima do ranting in. Na marianan ibagas Ahu, anjaha Ahu ibagas dirini, in

ma na marbuahkon buei, seng tarhorjahon hanima age aha, anggo seng marhasoman Ahu.

⁶Barang ise, na so marianan ibagas Ahu, ambukkonon do ai songon ranting ai gabe masak; ipatumpu ma ai, igijigkon hubagas apuy, jadi mosog ma.

⁷Anggo marianan hanima ibagas Ahu, anjaha marianan hatang-Ku ibagas hanima, Ahu bannima, jumpah hanima do barang aha pe ipindo uhurnima.

⁸Marhitei ai marsangap ma Bapang-Ku, anggo ramos buahnima, anjaha gabe susian-Ku hanima.”

Ojur-ojur Pasal na Marsihaholongan

⁹“Songon pangkaholongi ni Bapa Bangku, sonai do holong ni uhur-Hu bannima. Totap ma hanima ibagas holong ni uhur-Hu.

¹⁰Anggo ihorjahon hanima titah-Ku, marianan ma hanima ibagas holong ni uhur-Hu, songon Ahu na mangkorjahon titah ni Bapa, gabe marianan ibagas holong ni uhur-Ni.

¹¹Ase Huhatahon pe in bannima, ase marianan malas ni uhur-Hu ibagas hanima, anjaha gok malas ni uhurnima.

¹²On ma titah-Ku, ase marsihaholongan hanima samah hanima, songon Ahu na mangkaholongi hanima.

¹³Seng dong holong sibanggalan, anggo iberehon sada halak hosahni mangkopkop hasomanni.

¹⁴ Huan-Ku ma hanima, anggo ihorjahon hanima na Hutitahkon in bannima.

¹⁵ Seng Hugoran be hanima jabolon, ai seng ibotoh jabolon na hinorjahon ni tuanni; huan-huan do hanima Huhatahon, ai domma Hupabotohkon bannima, na Hutangar humbani Bapa.

¹⁶ Sedo hanima mamilih Ahu, tapi Ahu do mamilih hanima, anjaha Hupabangkit do hanima, ase laho hanima marbuah, anjaha ase totap buahnima ai, ase ibere bannima sagala sipindoonnima humbani Bapa in marhitei goran-Ku.

¹⁷ On ma Hutitahkon bannima, marsihaholongan ma hanima samah hanima!”

Lumba-lumba ni Jesus Pasal Pangayak-ayakon Bani Susian

¹⁸ “Anggo idomdomi dunia on hanima, botoh hanima ma, na dob parlobei do Ahu idomdomi.

¹⁹ Ambit na hun dunia on hanima, haholongan ni dunia on do hasomanni, halani seng hun dunia on hanima, tapi Ahu do mamilih hanima hun dunia on, ai do ase idomdomi dunia on hanima.

²⁰ Ingat hanima ma hata na dob Huhatahon bannima, seng banggalan jabolon humbani tuanni. Anggo iparburu sidea Ahu, hanima pe parburuonni do. Anggo idalankon sidea hatang-Ku, dalankononni do age hatanima.

²¹ Tapi haganupan ai bahenon ni sidea do bannima halani goran-Ku, ai seng itanda sidea na marsuruh Ahu.

²² Ambit seng roh Ahu mansahapkon ai bani sidea, seng mardousa sidea ijai; tapi sonari seng dong be sidalian ni sidea manrungkub dousa ni sidea.

²³ Na marsogam ni uhur dompak Ahu, sogam do uhurni homa age dompak Bapa.

²⁴ Ambit lang Huhorjahon horja i tongah-tongah ni sidea, na so onggah hinorjahon ni jolma, seng mardousa sidea ijai; tapi domma ididah sidea in sonari, anjaha sogam do uhur ni sidea Bangku age bani Bapa.

²⁵ Tapi maningon saud do hata na tarsurat ibagas Buku Titah ni sidea, ‘Sogam do uhur ni sidea Bangku, seng dong marhala!’

²⁶ Ase rohkonsi Sipangapiti in, sisuruhon-Ku bannima humbani Bapa in, in ma Tonduy Hasintongan in, na roh humbani Bapa in, la do manaksihon pasal Ahu.

²⁷ Tapi dihut ma hanima manaksihon, ai hasoman-Ku do hanima humbani mungkahni.”

16¹ “Haganupan in Huhatahon bennima ase ulang sangsi hanima holi.

² Pabalion ni sidea do hanima hun rumah parguruan (*sinagoge*), anjaha na roh ma panorangni gabe songon na manggalang bani Naibata do na mamunuh hanima, ninuhur ni sidea.

³ Sonai do bahenon ni sidea halani lang itandai sidea Bapa in, age Ahu.

⁴ Tapi Hupatugah hinan in bannima, ase idingat hanima bani panorangni masa in, paboa na dob Huhatahon do in bannima. Seng humbani mungkahni Hupatugah in bannima, halani rap ope Ahu pakon hanima.

Ulih Halani Parmisir ni Jesus

Horja ni Tonduy Na Pansing

⁵ “Tapi na laho ma Ahu nuan marayak na marsuruh Ahu, anjaha seng dong age ise hun bennima na manungkun Ahu, ‘Na laho huja do Ham?’

⁶ Lambin pusok tene uhurnima, halani Huhatahon in bannima.

⁷ Tapi na sintong do na Huhatahon on bannima, ulihnima do in anggo laho Ahu. Ai ambit seng laho Ahu, seng anjai roh Sipangapiti in bannima, tapi anggo laho Ahu, suruhon-Ku do la bannima.

⁸ Anggo roh la, ajaran-Ni do dunia on pasal dousa, pasal hapintoron ampa pasal uhum.

⁹ Anggo pasal dousa, ai ma na so porsaya sidea Bangku.

¹⁰ Anggo pasal hapintoron, ai ma na laho Ahu marayak Bapa, gabe seng idahonnima be Ahu.

¹¹ Anggo pasal uhum, ai ma na dob hona uhum raja ni dunia on.

¹² Buei ope namin sihatahonon-Ku bannima, tapi seng tarboan hanima ope ai sonari.

¹³ Tapi rohkonsi Tonduy Hasintongan in, arahkonon-Ni do hanima hubagas sagala hasintongan; ai seng adong humbani Dirini sihatahonon-Ni, tapi na binogei-Ni, ai do hatahonon-Ni, anjaha patugahon-Ni do bannima na sihol masa ope.

¹⁴ Pasangapon-Ni do Ahu, ai buaton-Ni do na dong Bangku, laho mangambilankonsi bannima.

¹⁵ Haganup na bani Bapa in, na dong Bangku do in; halani ai do ase Huhatahon, buaton-Ni do na dong Bangku, laho mangambilankon-Si bannima.”

Isahapkon Jesus Pasal Parmisir-Ni ampa Parroh-Ni use

¹⁶ “Tongkin nari mando, gabe seng idahonnima be Ahu, dob ai tongkin nari use, idahonnima ma Ahu.”

¹⁷ Gabe nini susian ai ma samah sidea, “Aha do arti ni na hinatahon-Ni in banta, ‘Tongkin nari mando seng idahonnima be Ahu, dob ai tongkin nari use, idahonnima ma Ahu,’ ambah ni ai, ‘na laho ma Ahu bani Bapa in?’”

¹⁸ Jadi nini sidea ma, “Aha do artini hata, ‘Tongkin nari mando’? Seng ibotoh hita artini ai.”

¹⁹ Ibotoh Jesus ma, sihol roh sidea manungkun-Si, gabe nini ma dompak sidea, “Na marsisungkunan do hanima pasal na Huhatahon in, ‘Tongkin nari

mando seng idahonnima be Ahu,' dob ai, 'Tongkin nari use idahonnima ma Ahu?'

²⁰ Na sintong tumang do na Huhatahon on bannima, na laho tangis ma hanima anjaha mandoruhi, tapi malas ma uhur ni dunia on. Pusok do anggo uhurnima, tapi marubah ma pusok ni uhurnima gabe malas ni uhur.

²¹ Pusok do uhur ni parinangon manubuhkan dakdanakni anggo jumpah ma panorangni. Tapi dob tubuh dakdanak ai, seng be idingat na maborit ai, ibahen malas ni uhurni, halani na dob tubuh sadajolma hu dunia on.

²² Bannima pe nuan pusok ni uhur do, tapi idahon-Ku do hanima use, gabe marmalas ni uhur ma hanima, anjaha ise pe lang boi mambuat malas ni uhur ai hun bennima."

Pasal Tonggo Ibagas Goran ni Jesus

²³ Seng sungkunonnima be Ahu bani na sadari ai. Na tongon tumang do na Huhatahon on bannima, atap aha pe sipindoonnima humbani Bapa in, sai na bereon-Ni do marhitei goran-Ku.

²⁴ Ronsi sonari seng ope mangindo hanima marhitei goran-Ku. Pindo hanima ma, ase manjalo hanima, ase gok malas ni uhurnima!

²⁵ Marhitei limbaga do Husahapkon in bannima. Na roh ma panorangni, seng marlimbaga be Ahu

marsahap pakon hanima, tapi torang-torang ma baritahonon-Ku bannima pasal Bapa in.

²⁶ Bani ari ai ma hanima mangindo marhitei goran-Ku, anjaha seng Huhatahon bannima, Ahu manonggohon hanima bani Bapa in,

²⁷ ai Bapa in sandiri mangkaholongi hanima, halani na dob holong uhurnima Bangku, anjaha na dob porsaya hanima, Ahu roh humbani Naibata.

²⁸ Na bingkat humbani Bapa in do Ahu roh hu dunia on; tadingkonon-Ku ma use dunia on, laho marayak Bapa in.”

²⁹ Nini susian-Ni ai ma, “Sonari pe, ase torang hata-Mu, seng songon limbaga be.

³⁰ Sonari ma ibotoh hanami, paboa ibotoh Ham do haganup, anjaha seng pala porlu Bamu, sungkunon ni atap ise Ham. Halani ai ma, ase porsaya hanami, na bingkat humbani Naibata do Ham.”

³¹ Ibalosi Jesus ma sidea, “Porsaya ma hanima sonari?

³² Na roh ma panorangni anjaha domma roh in nuan, mambur merap ma hanima, ganup marsitohu dalanni, anjaha tadingkononnima ma Ahu punjung; tapi seng punjung Ahu tene, ai Bapa in do hasoman-Ku.

³³ Huhatahon hinan in bannima, ase mardamei hanima ibagas Ahu. Hamarsikon do rupeinima i dunia on, tapi tenger ma uhurnima, domma Hotaluhon dunia on.”

TONGGO HAMALIMON NI JESUS

I. Tonggo-Ni Pasal Diri-Ni Sandiri

17 ¹ In ma ihatahon Jesus. Dob ai mangkawah ma la dompak babou, nini ma, “Ham Bapa, domma jumpah panorangni, pasangap Ham ma Anak-Mu, ase ipasangap Anak-Mu Ham.

² Ai domma ibere Ham kuasa Bani manrajai sagala jolma, laho mamberehon hagoluhan na sadokah ni dokahni bani haganup jolma, na binerehon-Mu Bani.

³ Ia hagoluhan sisadokah ni dokahni, in ma, anggo itanda sidea Ham, Naibata sisada-sada in, na sintong in, ampa Jesus Kristus, na sinuruh-Mu.

⁴ Domma Hupasangap Ham i tanoh on, ai domma Hudobkon horja, na binere-Mu Bangku, sihorjahonon-Ku.

⁵ Sonari pe Bapa, pasangap Ham ma Ahu hu lambung-Mu, songon sangap-Ku sanggah i lambung-Mu Ahu, sanggah lape adong dunia on.”

II. Tonggo-Ni Mangapiti Susian-Ni

⁶ “Domma Hupatar Goran-Mu bani jolma na binere-Mu in Bangku hun dunia on. Ham hinan do simada sidea, anjaha ibere Ham do sidea Bangku; iramotkon sidea do hata-Mu.

⁷ Sonari, domma ibotoh sidea, na hun Bamu do haganup na binere-Mu in Bangku.

⁸ Ai domma Huondoskon bani sidea hata na binere-Mu in Bangku; domma ijalo sidea hata in, anjaha torang ibotoh sidea Ahu bingkat hun Bamu, anjaha domma porsaya sidea, Ham do marsuruh Ahu.

⁹ Hutonggohon do sidea. Sedo dunia on Hutonggohon, sidea on do, na binere-Mu in Bangku, ai Ham do simada sidea.

¹⁰ Anjaha sagala na adong Bangku, na adong Bamu do in, anjaha na adong Bamu, na adong Bangku do in, anjaha domma marsangap Ahu ibagas sidea.

¹¹ Seng be i dunia on Ahu, tapi i dunia on ope sidea, anjaha na roh ma Ahu marayak Ham. Ham Bapa na mapansing, ramotkon Ham ma ibagas goran-Mu, sidea na binere-Mu in Bangku, ase sada sidea songon Hita.

¹² Sadokah rap Ahu pakon sidea, Ahu do manramotkon ibagas goran-Mu, sidea na binere-Mu in Bangku, anjaha Hujagai, gabe seng dong na magou humbani sidea, sobali jolma magou in, ase saud hata ni Surat in.

¹³ Tapi na roh ma Ahu nuan marayak Ham, anjaha ganupan in Husahapkon sanggah i dunia on ope Ahu, ase gok bani sidea malas ni uhur na Bangku in.

¹⁴ Domma Huondoskon hata-Mu bani sidea; sogam do uhur ni dunia on bani sidea, ai seng humbani dunia on sidea, songon Ahu na so hun dunia on.

¹⁵ Seng Hupindo, ase buaton-Mu sidea hun dunia on, tapi ase iramotkon Ham do sidea dompak pangagou.

¹⁶ Seng hun dunia on sidea, songon Ahu na so hun dunia on.

¹⁷ Papansing Ham ma sidea ibagas hasintongan; hata-Mu do hasintongan.

¹⁸ Songon parsuruh-Mu Bangku hu dunia on, sonai do Husuruh sidea hu dunia on.

¹⁹ Hupapansing do diring-Ku mangkopkop sidea, ase gabe pansing sidea ibagas hasintongan.”

III. Tonggo-Ni Mangkopkop Sagala na Porsaya Bani

²⁰ “Sedo pitah sidea Hutonggohon, tapi dihut do na sihol porsaya Bangku, halani hata ni sidea,

²¹ ase sada sidea haganup, songon Ham Bapa ibagas Ahu, anjaha Ahu ibagas Ham, sonai ma age sidea ibagas Hita, ase porsaya dunia on, Ham do marsuruh Ahu.

²² Domma Huberehon bani sidea hasangapon na binere-Mu in Bangku, ase sada sidea, songon Hita na sada.

²³ Ahu ma ibagas sidea, anjaha Ham ibagas Ahu, ase gok dear ni hasadaon ni sidea, gabe ibotoh dunia on, Ham do na marsuruh Ahu anjaha na holong

do uhur-Mu bani sidea, songon holong ni uhur-Mu Bangku.

²⁴ Ham Bapa, sihol do uhur-Hu, ia ijin Ahu, ijin ma pakon na binere-Mu in Bangku, ase ididah sidea hasangapon-Ku, na binere-Mu in Bangku, ai domma holong uhur-Mu Bangku, paima tombei dunia on.

²⁵ Ham Bapa na bonar, ia lang pe itanda dunia on Ham, anggo Ahu Hutanda do Ham, anjaha ibotoh sidea on, Ham do marsuruh Ahu.

²⁶ Domma Hupabotohkon bani sidea goran-Mu, anjaha pabotohkonon-Ku do ope, ase ibagas sidea holong ni uhur-Mu na hu Bangku in, anjaha ase Ahu ibagas sidea.”

Tartangkap Tuhan Yesus i Getsemane

(Mat. 26:47-56; Mrk. 14:43-52; Luk. 22:47-53)

18 ¹ Jadi dob ihatahon Jesus sonai, misir ma la rap pakon susian-Ni hu dipar ni Bah Kidron. Adong ma ijai sada pohon, hujai ma la laho pakon susian-Ni.

² Tapi ibotoh si Judas, sipartahi-tahi ai do homa ianan ai, ai gati do Jesus hujai rap pakon susian-Ni.

³ Ia si Judas, iarahkon ma tentara ampa juakjuak ni malim ampa Parisei, jadi ijumpahkon ma hujai, marrigapan, marsuluh ampa marsinjata.

⁴ Halani ibotoh Jesus do haganupan na sihol masa Bani, roh ma la manjupahkon sidea, nini ma hubani sidea, “Ise do na pinindahan nasiam?”

⁵ Nini sidea mambalosi, “Jesus, na hun Nazaret!” Nini Jesus ma hubani sidea, “Ahu do in!” Dihut do si Judas sipartahi-tahi ai jongjong i lambung ni sidea.

⁶ Sanggah ihatahon hubani sidea, “Ahu do in,” surut ma sidea mangkatompas hu tanoh.

⁷ Dob ai iulaki ma manungkun sidea, “Ise do na pinindahan nasiam?” Jadi nini sidea ma, “Jesus na hun Nazaret!”

⁸ Balos ni Jesus, “Domma Huhatahon bani nasiam, ‘Ahu do in!’ Anggo Ahu do na pinindahan nasiam, palopas nasiam ma laho halak on.

⁹ Ase saud hata na hinatahon in, ‘Seng dong na magou age sada humbani na binere-Mu in Bangku.’”

¹⁰ Ia si Simon Petrus marpodang do, isintak ma ai anjaha itampulhon hubani jabolon ni sintua ni malim ai, gabe rotap ma pinggolni siamun. Si Malkus do goran ni jabolon ai.

¹¹ Ihatahon Jesus ma hubani si Petrus, “Sarungkon ma podangmin! Ai lang maningon inumon-Ku do panginuman, na binere ni Bapa in Bangku?”

¹² Dob ai itangkap tentera ampa kopala ni sidea pakon juakjuak ni Jahudi ai ma Jesus, lanjar isangkut ma.

¹³ Jadi iboan sidea ma ia parlobei bani si Hannas, ai ma tulang ni si Kayapas, sintua ni malim bani na satahun ai.

¹⁴ Ai ma si Kayapas, na mangkatahon hinan bani Jahudi, “Dearan do matei sada halak mangkopkop bangsa in.”

**Pamorsouon ni si Petrus na
Parlobei bani Tuhan Jesus**

(Mat. 26:69-70; Mrk. 14:66-68; Luk. 22:56, 57)

¹⁵ Ia si Simon Petrus pakon susian na sada nari, iirikkon sidea do Jesus. Na marsitandaan do susian na sada ai ampa sintua ni malim ai, jadi masuk ma ia rap pakon Jesus hu alaman ni rumah ni sintua ni malim ai.

¹⁶ Tapi jongjong do si Petrus i darat dohorhon labah. Jadi luar ma susian na sada ai, na marsitandaan pakon sintua ni malim ai, marsahap ma ia pakon naboru sijaga labah ai, gabe iarahkon ma si Petrus hubagas.

¹⁷ Jadi nini naboru sijaga labah ai ma bani si Petrus, “Ai lang ho do sada susian ni halak on?” Balos ni si Petrus, “Sedo ahu in!”

¹⁸ Tapi na jongjong do ijai jabolon pakon juakjuak mandadang bani pandadangan, na pinagara ni sidea halani borgohni. Rap pakon sidea do jongjong si Petrus mandadang ijai.

Tuhan Jesus i Lobei ni si Hannas

(Mat. 26:59-68; Mrk. 14:55-65; Luk. 22:63-71)

¹⁹ Jadi isungkun sintua ni malim ai ma Jesus pasal susian-Ni ampa pasal podah-Ni.

²⁰ Ibalosi Jesus ma ia, “Torang-torang do hatang-Ku bani halak na mabuei. Tongtong do Ahu mangajari i parguruan pakon i rumah panumbahan, ai ma ianan partumpuan ni ganup halak Jahudi, anjaha seng dong marponopan Ahu marsahap.

²¹ Mase Ahu isungkun ham? Sungkun ham ma sidea, na mambogei hatang-Kai! Ibotoh sidea do na Huhatahon ai.”

²² Dob ihatahon Jesus sonai, ipastap sada juakjuak na jongjong ijai ma la, lanjar nini ma, “Mintor sonai ma parbalos-Mu bani sintua ni malim in?”

²³ Nini Jesus ma mambalosisi, “Anggo na salah parsahap-Kai, patugah ham ma salahni, tapi anggo na sintong do, mase ma ipastap ham Ahu?”

²⁴ Ase isuruh si Hannas ma la sangkut hubani sintua ni malim, na margoran si Kayapas.

Parmorsouon ni si Petrus na Paduahalihon pakon na Patoluhalihon

(Mat. 26:71-75; Mrk. 14:69-72; Luk. 22:58-62)

²⁵ Ia si Simon Petrus ijai ope jongjong mandadang. Jadi nini sidea ma hu bani, “Ai lang ho do sada susian-Ni?” Jadi iporsou ma nini ma, “Seng ahu in!”

²⁶ Dob ai roh ma sada halak humbani juakjuak ni sintua ni malim, ai ma sindohor ni parpinggol na tinampul ni si Petrus ai, mangkatahon hu bani, “Ai lang huidah do ho rap pakon-Si i pohon ai?”

²⁷ Jadi iporsou si Petrus ma use, dob ai mintor martahuak ma dayok.

Tuhan Yesus i Lobei ni si Latus

(Mat. 27:1, 2, 11-26; Mrk. 15:1-15; Luk. 23:1-5, 13-25)

²⁸ Jadi girah sogod, iboan sidea ma Jesus hun lobei ni si Kayapas hu benteng ai. Tapi seng masuk sidea hu benteng ai, ase ulang tarpantang sidea, laho mangankon Paskah ai.

²⁹ Jadi luar ma si Latus manjumpahkon sidea, nini ma, “Pasal aha do pangaduan nasiam dompak Halak on?”

³⁰ Nini sidea ma mambalosisi, “Ambit seng siparjahat Halak on, seng anjai ondoskononnami la bamu.”

³¹ Nini si Latus ma hubani sidea, “Boan nasiam ma la, uhumu nasiam ma la domu hubani aturan nasiam.” Nini halak Jahudi ma hu bani, “Seng bulih bunuhonnami atap ise pe.”

³² Ase jumpah ma ijai na hinatahon ni Jesus hinan pasal dalan ni parmatei-Ni.

³³ Jadi masuk ma use si Latus hubagas benteng ai, idilo ma Jesus anjaha nini ma hu Bani, “Atene, Ham do Raja ni Jahudi?”

³⁴ Ibalosi Jesus ma, “Na humbagas uhurmu do na hinatahonmu in, atap hata ni halak do in bamu pasal Ahu?”

³⁵ Ibalosi si Latus ma, “Ai halak Jahudi do ahu? Bangsa-Mu ampa sintua ni malim ai do padaskon Ham bangku. Ai aha dong ihorjahon Ham?”

³⁶ Balos ni Jesus, “Ia Harajaon-Ku seng na hun dunia on ai. Ambit na hun dunia on Harajaon-Ku, seng tarbahren lang manlawan juakjuak-Ku, ase ulang hona ondoskon Ahu hubani halak Jahudi; tapi seng sisonin Harajaon-Kin!”

³⁷ Jadi nini si Latus ma hu Bani, “Ase Raja do Ham?” Balos ni Jesus, “Songon na hinatahonmu in ma tongon. Raja do Ahu! Ase tubuh pe Ahu, anjaha ase roh pe Ahu hu dunia on, laho manaksihon hasintongan in do. Barang ise na humbani hasintongan, tangihononni in do sorang-Ku.”

³⁸ Nini si Latus ma hu Bani, “Aha do hasintongan?” Jadi dob ihatahon sonai, luar ma ia use marayak Jahudi, nini ma hubani sidea, “Seng dong jumpah ahu salah-Ni!

³⁹ Tapi tene, somal do hupaluah sada halak bani nasiam sanggah Paskah. Marosuh do nasiam, ase hupaluah bani nasiam Raja ni Jahudi in?”

⁴⁰ Gabe isurakkon sidea ma use, “Ulang Ia! Si Barabas ma!” Tapi panrampok do anggo si Barabas.

Hona Arsik-arsik ampa Hona Apasan Jesus

(Mat. 27:27-31; Mrk. 15:16-20)

19¹ Dob ai itogu si Latus ma Jesus anjaha ihatahon ma la lonsingan.

² Idandan tentara ai ma sada sortali humbani ranting-ranting na marduri anjaha inahkon ma ai hubani ulu-Ni; ibahen ma la homa marbaju sigenger.

³ Dob ai roh ma sidea hu lobei-Ni, nini ma, “Tabi ma Bamu, ale Raja ni Jahudi!” Lanjar ipastapi ma la.

⁴ Luar ma si Latus, ihatahon ma hubani halak Jahudi, “Tonggor ma, huboan do la hu lobei nasiam, ase ibotoh nasiam, na so adong jumpah ahu salah-Ni.”

⁵ Jadi luar ma Jesus marsotali duri anjaha marbaju sigenger. Ihatahon si Latus ma bani sidea, “Tonggor nasiam ma Jolma in!”

Hona Uhum Tuhan Jesus

⁶ Jadi dob ididah sintua ni malim ampa juakjuak ai la, idilohon sidea ma, “Parsilangkon, parsilangkon ma la!” Ihatahon si Latus ma bani sidea, “Boan nasiam ma la anjaha parsilangkon nasiam ma! Seng dong jumpah ahu salah-Ni.”

⁷ Ibalosi halak Jahudi ma ia, “Adong do undang-undang bannami, anjaha mangihutkon undang-undang ai maningon marutang hosah do la, ai Anak ni Naibata do la,” nini.

⁸ Mambogei ai si Latus, lambin mabiar ma ia,

⁹ gabe masuk ma ia use hu kantorni, ihatahon ma hubani Jesus, “Ai na hunja do Ham?” Tapi seng ibalosi Jesus ia.

¹⁰ Dob ai ihatahon si Latus ma hu Bani, “Mase lang ra Ham marsahapkon ahu? Ai lang ibotoh Ham, na markuasa do ahu paluahkon Ham, anjaha na markuasa do ahu mamparsilangkon Ham?”

¹¹ Balos ni Jesus, “Seng markuasa ham Bangku, ambit lang na ibere ai bamu hun datas. Halani ai banggalan do dousa ni na mangondoskon Ahu bamu.”

¹² Olat ni ai nari ipindahi si Latus ma dalan laho paluahkon-Si. Tapi marsurak-surak ma halak Jahudi, nini sidea ma, “Anggo ipaluah ham la, seng hasoman ni kesar in be ham! Ai barang ise na mangangkat dirini gabe raja, na mangimbang kesar do ai.”

¹³ Ase dob ibogei si Latus hata ai, iboan ma Jesus hu darat lanjar hundul ma ia bani hotak paruhuman, bani ianan na margoran Dasor Batu, bani hata Heber, ‘Gabbatha.’

¹⁴ Ai ma na masa bani ari parugason Paskah, marayak tongah ari. Ihatahon si Latus ma hubani halak Jahudi, “Tonggor nasiam ma Raja nasiam on!”

¹⁵ Tapi mardilo-dilo ma sidea, “Padaoh, padaoh ma la! Parsilangkon ma!” Nini si Latus ma hubani sidea, “Mintor parsilangkononku ma Raja nasiam?” Jadi

ibalosi sintua ni malim ma, “Seng dong rajanami sobali kesar!”

¹⁶ Dob ai iondoskon ma la bani sidea ase iparsilangkon; jadi ijalo sidea ma Jesus.

Iparsilangkon Tuhan Jesus

(Mat. 27:31-44; Mrk. 15:20-32; Luk. 23:26-43)

¹⁷ Lanjar la do mamorsan hayu parsilang ai, laho hu ianan na margoran partangkurakan; Golgata do goranni bani hata Heber.

¹⁸ Ijai ma iparsilangkon sidea la rap pakon dua halak na legan, sada i siamun, sada i sambilou, anjaha Jesus i tengah-tengah ni sidea.

¹⁹ Ibahen si Latus ma sada surat anjaha ilongkotkon ma ai bani hayu parsilang ai. Sonon do hatani, “Jesus, halak Nazaret, Raja ni Jahudi.”

²⁰ Buei do halak Jahudi, na mambasa surat ai, ai dohor do hun huta ai iparsilangkon Jesus, anjaha tarsurat do ai bani hata Heber, hata Rom ampa hata Gorik.

²¹ Dob ai ihatahon pangintuai ni halak Jahudi ma hubani si Latus, “Ulang suratkon ham, ‘Raja ni Jahudi,’ tapi na hinatahon-Ni ai ma, ‘Ahu do Raja ni Jahudi!’”

²² Balos ni si Latus, “Na dob husurat, na dob husurat ma in!”

²³ Ase dob iparsilangkon tentara ai la, ibuat sidea ma hiou-Ni, ibagi ompat ma ai, ganup sidea

sabagian, ambah ni ai baju ganjang-Ni ai. Ia baju ganjang ai seng marpanjaruman, na tinonun do ai torus.

²⁴ Nini sidea ma samah sidea, “Ulang ma rigat hita on, manjomput na sinurat ma hita pasal on, atap bani ise on.” Jadi jumpah ma na tarsurat in, na mangkatahon, “Ibagi sidea do hiou-Hu, anjaha manjomput na sinurat do sidea pasal bajung-Ku.” Ase sonai ma pambahen ni tentara ai.

Iondoskon Jesus Inang-Ni hubani si Johannes

²⁵ Jongjong do i lambung parsilang ni Jesus ai inang-Ni, sanina ni inang-Ni, si Maria parinangon ni si Kleopas, ampa si Maria Magdalena.

²⁶ Anggo Jesus, dob ididah ijai do inang-Ni ampa susian haholongan ni uhur-Ni ai i lambungni, ihatahon ma bani inang-Ni ai, “Andin ma Inang, anakmu!”

²⁷ Dob ai ihatahon ma bani susian-Ni ai, “Andin ma inangmu!” Olat ni ai nari ijalo susian ai ma ia hu rumahni.

Parmatei ni Tuhan Jesus

(Mat. 27:45-56; Mrk. 15:33-41; Luk. 23:44-49)

²⁸ Jadi dob ibotoh Jesus, na dob marujung haganup, ase jumpah na tarsurat ai nini ma, “Horahan Ahu!”

²⁹ Jadi adong ma ijai gusi na marisi anggur na migar. Isornobkon sidea ma limut hubagas anggur

na migar ai, ilongkotkon sidea ma ai bani hayu ni hisop, anjaha isurdukkon ma hubani pamangan-Ni.

³⁰ Dob ijalo Jesus na migar ai, nini ma, “Domma salosei!” Dob ai ipaunduk ma ulu-Ni anjaha iondoskon ma tonduy-Ni.

³¹ Halani ari parugasonkon do ai, anjaha ase ulang bani parsilang ai bangkei ai sanggah ari Sabat (ai ari na banggal do ari Sabat ai), jadi laho ma halak Jahudi hubani si Latus mangindohon, ase iparponggol ma nahei ni sidea anjaha ipasusur.

³² Jadi laho ma tentara ai, iparponggol sidea ma nahei ni sidua halak ai, na tarsilang rap pakon Jesus.

³³ Tapi das honsi sidea bani Jesus, ididah ma na dob matei la, gabe seng be pala iparponggol sidea nahei-Ni.

³⁴ Tapi ipantomkon sahalak humbani tentara ai ma tanjani bani tonton-Ni, gabe mintor luar ma daroh ampa bah.

³⁵ Anjaha na mangidah ai do na manaksihon ai, anjaha sintong do na sinaksihonni ai. Ibotoh do, na sintong do na hinatahonni ai, andohar porsaya age nasiam.

³⁶ Ase masa pe ai, ase saud do na tarsurat in, “Seng bulih ponggolhonon holi-holi-Ni!”

³⁷ Anjaha surat na legan use mangkatahon, “Idahon ni sidea do na pinantom ni sidea in.”

Partanom ni Tuhan Yesus

(Mat. 27:57-61; Mrk. 15:42-47; Luk. 23:50-55)

³⁸ Dob salpu ai ipindohon si Josep, na hun Arimatea ma hubani si Latus, atap boi do pasusuronni bangkei ni Jesus. Dihut do ia susian ni Jesus, tapi ponop do, halani biarni mangidah Jahudi. Jadi ibalosi si Latus ma ai, gabe laho ma ia pasusurhon bangkei ni Jesus.

³⁹ Roh do homa si Nikodemus, ai ma na onnga roh marayak Jesus borngin-borngin, iboan do mir na maragu aloe hira-hira saratus kati.

⁴⁰ Dob ai ibuat sidea ma bangkei ni Jesus, ibaluti ma ai bani hiou putih rap pakon na morum-morum ai, mangihutkon adat pananomom ni Jahudi.

⁴¹ Dohor bani ianan ni Jesus tarsilang ai, adong do sada pohon, anjaha ibagas pohon ai adong do sada tanoman na baru, seng onnga ope inahkon bangkei hujai.

⁴² Ase hujai ma itibalhon sidea Jesus, halani ari parugasonkon ai, ai dohor do tanoman ai.

MULAK MANGGOLUH TUHAN YESUS

Si Petrus ampa si Johannes Roh Manorih Tanoman

(Mat. 28:1-10; Mrk. 16:1-8; Luk. 24:1-11)

20 ¹ Dob ai bani ari parlobei, dob salpu ari Sabat, laho ma si Maria hu tanoman, girah

sogod, golap-golap ope, gabe ididah ma, na dob tarangkat batu ai hun tanoman ai.

² Jadi marlintun ma ia mangayaki si Simon Petrus ampa susian na sada nari, haholongan ni uhur ni Jesus, anjaha nini ma hubani sidea, “Adong do na mambuat Tuhan in hun tanoman, anjaha seng ibotoh hanami, huja la inahkon!”

³ Jadi laho ma si Petrus ampa susian na sada nari, gabe das ma sidea hu tanoman ai.

⁴ Na rap marlintun do sidea na dua ai, tapi hinsahan do susian na sada nari ai humbani si Petrus, gabe parlobei ma ia das hu tanoman ai.

⁵ Jadi ipaunduk ma dirini, ididah ma tibal pambaluti ai, tapi seng masuk anggo ia.

⁶ Roh ma homa si Petrus hun pudini, imasuki ma tanoman ai, jadi ididah ma tibal pambaluti ai.

⁷ Ia hiou pamalut ni ulu-Ni, seng rap ai pakon pambaluti ai, pulig do ai ilompit bani ianan na legan.

⁸ Dob ai masuk ma homa susian na sada nari ai, na parlobei das hu tanoman ai, ididah ma, gabe porsaya ma ia.

⁹ Ai seng iarusi sidea ope hata ni Surat in, na mangkatahon, “Maningon puho do la humbani na matei.”

¹⁰ Dob ai mulak ma susian na dua ai.

**Ipataridahkon Tuhan Jesus Diri-Ni
hubani si Maria Magdalena**

(Mrk. 16:9-11)

¹¹ Ia si Maria, jongjong do idarat ni tanoman ai tangis-tangis, anjaha sanggah na tangis ai ia, ipaunduk ma dirini manonggor hubagas tanoman ai.

¹² Gabe ididah ma hundul dua malekat ijai, marhiou silopak, sada hampit ulu-Ni, na sada nari hampit hatibalan ni nahei ni Jesus.

¹³ Jadi ihatahon sidea ma hu bani, “Mase tangis ham Inang?” Ihatahon ma bani sidea, “Adong do na mambuat Tuhanku, anjaha seng hubotoh huja la inahkon.”

¹⁴ Dob ihatahon sonai, marhusor ma ia dompak pudi, gabe ididah ma Jesus jongjong ijai, tapi seng ibotoh Jesus do ai hape.

¹⁵ Nini Jesus ma hu bani, “Ham Inang, mase tangis ham? Ise ipindahi ham?” Jadi iagan ma, sijaga pohon do la, gabe ihatahon ma Bani, “Anggo Ham do mambuat-Si, tuan, patugah Ham ma bangku, atap huja do la inahkon Ham, ase hualop!”

¹⁶ Dob ai nini Jesus ma hu bani, “Maria!” Jadi idompakkon si Maria ma la, nini ma ibagas hata Heber, “Rabbuni!” (artini: Guru)

¹⁷ Ihatahon Jesus ma hu bani, “Ulang jamah Ahu, ai seng naik ope Ahu hubani Bapa in! Tapi laho

ma ho hubani saninang-Ku, hatahon ma hubani sidea, na laho tangkog ma Ahu hubani Bapang-Ku anjaha Bapanima, hubani Naibatang-Ku anjaha Naibatanimas.”

¹⁸ Jadi laho ma si Maria Magdalena, ibaritahon ma hubani susian ai, “Domma huidah Tuhan in, anjaha on do hata-Ni bangku!”

**Ipataridahkon Tuhan Jesus diri-Ni
hubani Susian-Ni, Seng Dihut si Tomas**

(Mrk. 16:14-18; Luk. 24:36-49)

¹⁹ Jadi dob bod ari, bani ari parlobei dob salpu ari Sabat ai, sanggah tutup sagala labah ni rumah, niiankon ni susian ai, halani biar ni uhur ni sidea mangidah halak Jahudi, roh ma Jesus jongjong hu tongah-tongah ni sidea, anjaha ihatahon ma bani sidea, “Damei ma bannimas!”

²⁰ Jadi dob ihatahon sonai, ipatuduhkon ma tangan-Ni ampa tonton-Ni bani sidea, gabe malas ma uhur ni susian ai, halani na dob ididah sidea Tuhan in.

²¹ Dob ai ihatahon Jesus ma use bani sidea, “Damei ma bannimas! Songon sinuruh ni Bapa in Ahu, sonai do suruhon-Ku hanimas!”

²² Dob ihatahon sonai, manompul ma la dompak sidea, anjaha nini ma hubani sidea, “Jalo hanimas ma Tonduy Na Pansing!

²³ Anggo isasap hanima dousa ni atap ise pe, na dob sasap ma ai, anjaha anggo ipatotap hanima dousa ni atap ise pe, na totap ma ai.”

**Ipataridahkon Tuhan Jesus Diri-Ni
hubani Susian-Ni, Dihut si Tomas**

²⁴ Tapi anggo si Tomas, sada humbani na sapuluh dua in, na margoran si Rindu-rindu, seng rap pakon sidea ia, sanggah na roh ai Jesus.

²⁵ Jadi ihatahon susian na legan ai ma dompaksi, “Domma ididah hanami Tuhan in!” Tapi ibalosi ma sidea, “Anggo seng huidah bani tangan-Ni ai bokas ni paku ondi, anjaha ijamah jari-jaringku bokas ni paku ondi, anjaha anggo seng hujamah tonton-Ni ai, seng porsaya ahu.”

²⁶ Dob salpu ualuh borngin, tumpu ma use susian ai i rumah ondi, rap pakon si Tomas. Jadi roh ma Jesus, sanggah tutup sagala labah, jongjong hu tongah-tongah ni sidea, nini ma dompak sidea, “Damei ma bannima!”

²⁷ Ihatahon ma hubani si Tomas, “Bahen hujon jari-jarimin, anjaha torih ma tangan-Ku! Surdukkon ma tanganmin, manjamah tonton-Hu. Ulang sangsi uhurmu, porsaya ma!”

²⁸ Jadi nini si Tomas ma mambalosi-Si, “Ham Tuhanku anjaha Naibatangku!”

²⁹ Jadi ihatahon Jesus ma hu bani, “Halani ididah ho Ahu, ai do ase porsaya ho. Martuah ma na porsaya age pe lang ididah!”

Tujuan ni Ambilan Na Madear

³⁰ Buei ope tanda na legan, na binahen ni Jesus i lobei ni susian-Ni, na so sinuratkon ibagas buku on.

³¹ Ase nasuratkon pe on, ase porsaya nasiam, Jesus do Kristus, Anak ni Naibata, anjaha marhitei na mangkaporsayai ai dapotan hagoluhan nasiam ibagas goran-Ni.

Ipataridahkon Tuhan Jesus Diri-Ni hubani

Susian i Topi Tao Tiberias

21 ¹ Dob ai ipataridahkon Jesus ma use diri-Ni hubani susian ai i topi ni tao Tiberias. Sonon ma pardalanni.

² Tumpu ma si Simon Petrus pakon si Tomas, na margoran si Rindu-rindu, rap pakon si Natanael, na hun Kana i Galilea, pakon anak ni si Sebedeus ampa dua halak nari humbani susian-Ni ai.

³ Jadi nini si Simon Petrus ma hubani sidea, “Laho ma ahu mardengke.” Ihatahon sidea ma hu bani, “Dihut ma hanami!” Jadi laho ma sidea, masuk ma hu parau, tapi aha pe lang dapot sidea na saborngin ai.

⁴ Anjaha dob siang ari, jongjong ma Jesus i pasir ai, tapi seng itanda sidea la.

⁵ Jadi ihatahon Jesus ma hubani sidea, “Ambia, adong do dengkenima ijin?” Ibalosi sidea ma Ia, “Seng dong!”

⁶ Dob ai ihatahon ma bani sidea, “Dabuh hanima ma jalanima hu siamun ni parau in, ase dapotan hanima!” Jadi idabuh sidea ma, gabe seng tartarik sidea be jala ai halani buei ni dengke ai.

⁷ Jadi ihatahon susian haholongan ni Jesus ai ma hubani si Petrus, “Tuhan in do in!” Jadi dob itangar si Simon Petrus, Tuhan in do ai hape, ialitkon ma hiouni, ai seng marhiou ia hinan, gabe manlumpat ma ia hu tao ai.

⁸ Tapi marparau do anggo susian na legan ai, lanjar manarad jala na marisi dengke ai, ai seng sadiha daoh sidea hun darat, hira-hira dua ratus asta do.

⁹ Das honsi sidea hu darat, ididah sidea ma narnar ijai ampa dengke i atasni, ambah ni ai ruti.

¹⁰ Ihatahon Jesus ma hubani sidea, “Boan hanima ma deba dengke in, na dapot hanima in!”

¹¹ Jadi naik ma si Petrus hu parau ai, isarad ma jala ai hu darat, gok dengke na banggal-banggal, saratus lima puluh tolu bueini, anjaha age pe sonai bueini, seng marigat anggo jala ai.

¹² Dob ai nini Jesus ma hubani sidea, “Roh ma hanima!” Tapi seng dong humbani susian ai, na pag manungkun-Si, “Ise do Ham?” Ibotoh sidea, Tuhan in do ai.

¹³ Ase roh ma Jesus, ibuat ma ruti ai, ipambere ma ai bani sidea, sonai homa dengke ai.

¹⁴ Ai ma na patoluhalihon ipataridahkon Jesus diri-Ni hubani susian-Ni, dob puho la humbani na matei.

Ijalo Tuhan Jesus si Petrus Mulak gabe Susian-Ni

¹⁵ Ase dob mangan sidea, ihatahon Jesus ma hubani si Simon Petrus, “Ale Simon, anak ni si Jonas, holongan do uhur-Mu Bangku ase halak on?” Nini ma hu Bani, “Eak Tuhan, ibotoh Ham do holong ni uhurhu Bamu!” Ihatahon Jesus ma hu bani, “Parmahani ma anak ni biribiring-Ku!”

¹⁶ Ihatahon ma use paduahalihon bani, “Ale Simon, Anak ni si Jonas, holong do uhurmu Bangku?” Nini ma hu Bani, “Eak Tuhan, ibotoh Ham do holong ni uhurhu Bamu!” Jadi ihatahon ma hu bani, “Parmahani ma biribiring-Ku!”

¹⁷ Dob ai ihatahon ma patoluhalihon hu bani, “Ale Simon, anak ni si Jonas, holong do uhurmu Bangku?” Jadi pusok ma uhur ni si Petrus, halani patoluhalihon ma ihatahon hu bani, “Holong do uhurmu Bangku?” Jadi ihatahon ma, “Haganup do, ale Tuhan, ibotoh Ham; ibotoh Ham do holong ni uhurhu Bamu!” Dob ai ihatahon Jesus ma hu bani, “Parmahani ma biribiring-Ku!”

**Ilumbahon Jesus Pasal Sonaha do Ujung ni
Goluh ni si Petrus ampa si Johannes**

¹⁸ Na tongon tumang do na Huhatahon on bam, “Sanggah poso ho, ho do manggonditi dirimu, anjaha laho ho huja rosuh ni uhurmu. Tapi dob matua holi ho, surdukkononmu ma tanganmu, jadi gonditan ni halak na legan ma ho, anjaha boanonni ma ho hubani na so harosuh ni uhurmu.”

¹⁹ Tapi ihatahon pe ai, laho patugahkon parmateini do use, laho pasangapkon Naibata. Jadi, dob ihatahon sonai, nini ma hu bani, “Ihutkon ma Ahu!”

²⁰ Jadi marhusor ma si Petrus, gabe ididah ma mangihut susian haholongan ni uhur ni Jesus, ai ma na hundul darngos bani Jesus, sanggah na mangan ondi sidea, anjaha na manungkun-Si ijia, “Ise do in Tuhan, na sihol mantahihon Ham?”

²¹ Ase dob ididah si Petrus ia, nini ma hubani Jesus, “Ham Tuhan, sonaha ia ambia on?”

²² Nini Jesus ma hu bani, “Anggo marosuh Ahu, totap ia ronsi roh Ahu, mase ma pala pasari-sarionmu ai? Tapi anggo ho, ihutkon ma Ahu!”

²³ Ase sar ma hata ai bani hasoman-hasoman ai, na so matei susian ai. Tapi seng ihatahon Jesus hu bani, na so matei ia, tapi sonon do nini, “Anggo marosuh Ahu, totap ia ronsi roh Ahu, mase ma pala pasari-sarionmu ai?”

Hata Panutup ni Buku on

²⁴ Ai ma susian, na manaksihon pasal on anjaha na manuratkon, anjaha ibotoh hanami, na sintong do na sinaksihonni in.

²⁵ Tapi buei ope na legan, na binahen ni Jesus; ambit nasuratkon ai sada-sada, ninuhurhu, ra seng siat i dunia on buku na sinurat ai.

Lahoan Ni Apostel

Lobei ni Hata

1 ¹ Bani suratku na parlobei in, ale Teopilus, husuratkon do pasal haganup na binahen ampa podah na pinungkah ni Jesus,

² das ronsi na tarangkat la, dob lobei ibere parentah marhitei Tonduy Na Pansing bani apostel-apostel, na dob pinilih-Ni ai.

³ Dob salpu hamarsikon na tinaron-Ni ai, ipataridahkon do diri-Ni manggoluh bani sidea marhitei buei tanda, ai ma ibagas siompat puluh ari na pinataridahkon-Ni ai diri-Ni bani sidea, lanjar mansahapkon pasal Harajaon ni Naibata.

Parnaik ni Tuhan Jesus

⁴ Sanggah na rap la pakon sidea, iparentahkon ma bani sidea, “Ulang ma laho hanima hun Jerusalem, tapi paima hanima ma na binagahkon ni Bapa, na dob ibogei hanima hun Bangku.

⁵ Ia si Johannes bah do ididihon, tapi Tonduy Na Pansing do didihonon-Ku bani nasiam, seng pala piga ari nari.”

⁶Jadi sanggah na martumpu ai sidea, isungkun sidea ma la, nini ma, “Ham Tuhan, pajongjongon-Mu ma sonari use harajaon in bani Israel?”

⁷Nini ma hubani sidea, “Seng urusannima ai mambotoh adanganni atap panorangni, na dob tinontuhon ni Bapa in ibagas kuasa-Ni sandiri.

⁸Tapi jaloonnima ma hagogohon ni Tonduy Na Pansing na sogop bennima, anjaha gabe saksing-Ku ma hanima i Jerusalem ampa i sab Judea ampa i Samaria ampa das hu ujung ni tanoh on.”

⁹Jadi dob ihatahon sonai, tarangkat ma la inonoi sidea, dob ai ilingodi hambun ma la humbani panonggor ni sidea.

¹⁰Sanggah na ituludkon sidea ai la laho hu nagori atas, jongjong ma dua halak parhiou silopak i lambung ni sidea,

¹¹na mangkatahon, “Nasiam halak Galilea, mase ma sai jongjong nasiam kawah-kawah dompak datas? Anggo Jesus ai, na tarangkat hun lobei nasiam hu nagori atas, sonai do roh la, songon na nididah nasiam ai la naik hu nagori atas.”

¹²Dob ai mulak ma sidea hu Jerusalem hun dolog ai, na margoran Dolog Jetun; dohor do ai hun Jerusalem, sada pardalanan Sabat do daohni.

¹³Dob das sidea, tangkog ma sidea hu kamar pardatas ai, ianan ni sidea ai, ai ma si Petrus ampa si Johannes, si Jakobus ampa si Andreas, si Pilippus ampa si Tomas, si Bartolomeus ampa si Mateus, si

Jakobus anak ni si Alpeus, ampa si Simon Selotes, ampa si Judas anak ni si Jakobus.

¹⁴ Sidea ai do haganup na marnunut marsada ni uhur martonggo rap pakon parinangon-parinangon ampa si Maria, inang ni Jesus, sonai homa anggi-Ni ai.

Tarpilih si Matias gabe Apostel Gantih ni si Judas Iskariot

¹⁵ Bani panorang ai ma jongjong si Petrus i tongah-tongah ni sanina-sanina ai, bueini adong do hira-hira saratus dua puluh halak, nini ma,

¹⁶ “Nasiam hasoman sanina, maningon saud do hata ni Surat in, na dob nilumbahon ni Tonduy Na Pansing hinan marhitei pamangan ni si Daud, ai ma pasal si Judas, na gabe pambobai ni sitangkap Jesus.

¹⁷ Masuk hinan do ia hubani bilangannami, anjaha dihut do ia bani jabatan on.

¹⁸ Dapotsi do sanlambar tanoh humbani upah hajahaton ai; anjaha sanggah tungkap ia madabuh, mapultak ma dagingni, gabe mandarat ma ganup bituhani.”

¹⁹ Anjaha haganup do pangisi ni Jerusalem mambotoh ai, mambahen igoran tanoh ai ibagas sahap ni sidea: Akeldamah, artini: Tanoh Daroh.

²⁰ Ai tarsurat do ibagas buku Psalm, “Sai halong ma iananni ai, anjaha ulang ma adong na mangiankon ai!” Ambah ni ai, “Jaloon ni na legan ma jabatanni!”

²¹ Halani ai maningon adong do humbani sidea na mangkasomani hanami, sadokah marhujai-hujon Tuhan Jesus i tongah-tongahta,

²² olat ni pandidion ni si Johannes nari das hubani partarangkat-Ni ai hun banta, na gabe hasomannami manaksihon pasal parpuhoon-Ni ai.

²³ Jadi ipajongjong sidea ma dua halak, ai ma si Josep, na margoran si Barsabas anjaha na ginoran homa si Justus, ampa si Matias.

²⁴ Jadi martonggo ma sidea, nini ma, “Ham Tuhan, sitanda uhur ni haganup jolma, patuduh Ham ma barang ise do humbani na dua on ipilih Ham,

²⁵ gabe sijalo jabatan diakon ampa apostel, na dob tinadingkon ni si Judas, na dob laho marayak siparayakonni.”

²⁶ Lanjar manjomput na sinurat ma sidea, jadi dapot ma si Matias, gabe tarhira ma ia hasoman ni apostel na sapuluh sada ai.

Parroh ni Tonduy Na Pansing

2¹ Jadi sanggah jumpah ari Pentakosta, martumpu do sidea haganup bani sada ianan.

² Jadi roh ma sompong sora hun langit songon parombus ni logou na gogoh montas, gabe igoki ma rumah ianan ni sidea na hundul ai.

³ Jadi taridah ma bani sidea usih hubani silah ni apuy na marjilam-jilam, anjaha sogop ma bani ganup sidea.

⁴ Gabe gok Tonduy Na Pansing ma sidea ganupan, jadi mamungkah marsahap na legan ma sidea ganupan, songon pambere ni Tonduy in bani sidea mansahapkonsi.

⁵ Tapi adong ma halak Jahudi na marianan i Jerusalem, ai ma halak na daulat humbani sagala bangsa na i toruh ni langit.

⁶ Sanggah na masa ai sora ai, martumpu ma na mabuei ai; jadi longang ma sidea, ai ganup do sidea mambogei hata ai ibagas sahapni bei.

⁷ Jadi malitonduy ma sidea anjaha longang, nini sidea ma, “Ai lang halak Galilea do sidea haganup na marsahap in?

⁸ Mase ma ganup hita mambogei ibagas hata ni tanoh hatubuhanta bei?

⁹ Hita, halak Partia pakon Media pakon Elamit ampa na marianan i Mesopotamia, i Judea ampa Kappadosia, i Pontus ampa i Asia,

¹⁰ i Prigia, Pampilia, Masir ampa i nagori Libia na hampit Kirene, ampa halak Rom na marianan ijon, halak Jahudi ampa parguru,

¹¹ halak Kreta ampa halak Arab; ibagas hatanta bei do ibogei hita sidea mansahapkon habanggalon ni Naibata.”

¹² Jadi longang ma sidea haganup, jut bei ma uhurni, nini ma samah sidea, “Ai aha do artini in?”

¹³ Tapi manrisai do na deba, nini ma, “Na bosurtu do in bani anggur na matobu.”

**Ambilan ni si Petrus ampa
Parjadi ni Kuria na Parlobei in**

¹⁴ Jadi jongjong ma si Petrus rap pakon na sapuluh sada ai, ipagogoh ma sorani anjaha iparsahapkon ma sidea, “Nasiam halak Jahudi ampa haganup na marianan i Jerusalem, botoh nasiam ma on, anjaha parimbagaskon nasiam ma hatangku!

¹⁵ Seng na mabuk hanami on, songon pangagan ni uhur nasiam, ai pukul siah ope ari,

¹⁶ tapi na hinatahon ni Nabi Joel do na masa on, ai nini do,

¹⁷ ‘Bani ari parpudi, nini Naibata, useihonon-Ku do humbani Tonduy-Hu bani sagala daging, jadi manjahai ma anak nasiam, sonai boru nasiam, anjaha marnipi ma na matua nasiam.

¹⁸ Age bani jabolon-Ku dalahi ampa jabolon-Ku naboru bani panorang ai, useihonon-Ku do humbani Tonduy-Hu, ase manjahai sidea.

¹⁹ Anjaha bahenon-Ku do halongangan bani langit i babou, anjaha tanda bani tanoh i toruh, ai ma daroh apuy ampa timus na maripul.

²⁰ Mataniari ai gabe golap ma, anjaha bulan gabe daroh, parlobei ni ari parroh ni Tuhan in, na banggal anjaha na marmulia in.

²¹ Jadi sagala na mandilo goran ni Tuhan in, maluah ma.’

²² Nasiam halak Israel, tangihon nasiam ma hata on: Ia Jesus, na hun Nasaret in, in ma na dob pinatandahon ni Naibata bani nasiam marhitei hagogohon, halongangan ampa tanda, na binahen ni Naibata marhiteihon-Si i tongah-tongah nasiam, songon na binotoh nasiam,

²³ na dob niondoskon mangihutkon sura-sura ni Naibata na totap in ampa humbani pamotohan-Ni hinan, Ia do na dob iparsilangkon anjaha ibunuh nasiam marhitei tangan ni na so martitah.

²⁴ Tapi ipapuhu Naibata do Ia, dob itanggali haparngiton ni hamatean, ai seng tarjolomi hamatean in Ia.

²⁵ Ai ihatahon si Daud do pasal ai, 'Huidah do Tuhan in tongtong i lobeihu, ai i siamunku do Ia, ase ulang dugur ahu.

²⁶ Halani ai malas do uhurhu, anjaha marolob-olob dilahku; dagingku pe marsaran do halani pangarapan.

²⁷ Ai seng paturuton-Mu tonduyhu i nagori toruh, anjaha seng lopason-Mu Na Pansing-Mu mangidah hamarsikon.

²⁸ Ipabotohkon Ham do bangku dalan hagoluan, gokan-Mu do bangku malas ni uhur i lobei-Mu.'

²⁹ Nasiam sanina, huhatahon ma bani nasiam torang-torang, ia ompungta si Daud matei do anjaha hona tanom, anjaha i tongah-tongahta do tanomanni ronsi sadari on.

³⁰ Halani nabi do ia, anjaha ibotoh, na dob ibijahon Naibata do bani, pabangkiton sahalak humbani ginomparni bani paratasni,

³¹ ibagas botohni hinan domma isahapkon pasal parpuhoon ni Kristus in, ai ma na so paturuton la i nagori toruh, atap idahon ni daging-Ni hamarsikon.

³² In ma Jesus, na dob pinapuho ni Naibata, haganup do hanami manaksihon ai.

³³ Dob ipagijang la hu siamun ni Naibata, anjaha ijalo Tonduy Na Pansing na pinarbagah-bagah in humbani Naibata, gabe iuseihon ma in songon na nididah anjaha ibogei nasiam.

³⁴ Ai seng si Daud naik hu nagori atas, tapi ihatahon do, 'Nini Tuhan in dompak Tuhanku: Hundul ma ho hu siamunkon,

³⁵ paima Hubahen munsuhmu, gabe sidogei-dogean bani naheimu.'

³⁶ Ase torang ma ibotoh haganup bangsa Israel: la Jesus na pinarsilangkon nasiam in, domma ipabangkit Naibata gabe Tuhan anjaha Kristus."

³⁷ Manangar ai, itorusi ma uhur ni sidea, gabe ihatahon sidea ma hubani si Petrus ampa hubani hasomanni apostel, "Aha ma sibahenonnami, nasiam hasoman?"

³⁸ Ihatahon si Petrus ma hubani sidea, "Paubah nasiam ma uhur nasiam, anjaha padidihon nasiam ma ganup nasiam hubagas goran ni Jesus Kristus,

bahen hasasapan ni dousa nasiam, ase ijalo sibere-bere ni Tonduy Na Pansing.

³⁹ Ai bani nasiam do bagah-bagah in ampa bani anak nasiam ampa bani haganup halak na daoh, sidiloon ni Tuhan Naibatanta ope.”

⁴⁰ Buei ope hata na legan isaksihon, laho mangojur sidea, nini do, “Paluah nasiam ma diri nasiam, humbani bangsa na geduk on!”

⁴¹ Jadi tardidi ma haganup na manjalo hatani ai, anjaha adong do hira-hira tolu ribu halak na tambah bani na sadari ai.

Parsaoran ni Kuria na Parlobei in

⁴² Anjaha totap do sidea bani podah ni apostel ampa ibagas parsaoran, ibagas na manopiki ruti ampa na martonggo.

⁴³ Sogop do uhur na mabiar bani haganup; buei do halongangan ampa tanda ibahen apostel ai.

⁴⁴ Sai sada do ganup na porsaya ai, anjaha parbagianan rup do ihira sidea arta ni sidea.

⁴⁵ Ijuali sidea do arta ampa barang-barang ni sidea, ibagihon ma ai bani haganup, domu hubani haporluanni bei.

⁴⁶ Anjaha ganup ari do sidea sauhur i rumah panumbahan; joor rumah do sidea manopiki ruti, anjaha ibagas malas ni uhur ampa uhur na bulus do ijalo sidea sipanganon ai.

⁴⁷ Ipuji sidea do Naibata anjaha rosuh do uhur ni simbuei mangidah sidea. Anjaha ganup ari do itambahi Tuhan in na dapotan haluahon bani kuria ai.

Ipamalum si Petrus Sada Halak na Repat

3 ¹ Jadi rap tangkog ma si Petrus ampa si Johannes hu rumah panumbahan pukul tolu, bani panorang martonggo.

² Anjaha adong ma sada halak na repat humbani partubuhni iboan halak hujai. Ganup ari do itaruhkon sidea ia hu lambung ni horbangan ni rumah panumbahan ai, na margoran Horbangan Na Jenges, laho mangindo sibere-bere humbani halak na masuk hu rumah panumbahan ai.

³ Jadi sanggah ididah halak na repat ai si Petrus ampa si Johannes sihol masuk hu rumah panumbahan ai, ipindo ma sibere-bere.

⁴ Tapi ikawahkon si Petrus ampa si Johannes ma ia, nini sidea ma, “Tonggor ma dompak hanami!”

⁵ Jadi ikawahkon ma sidea, iarap uhurni adong jaloonni humbani sidea atap aha.

⁶ Tapi nini si Petrus ma, “Pirak pakon omas seng dong bangku, tapi na dong bangku ai ma hubere bam: Marhitei goran ni Jesus Kristus na hun Nasaret in, mardalan ma ho!”

⁷ Lanjar itangkap ma tanganni siamun, laho pajongjongkonsi, jadi mintor totap ma hae-haeni ampa towodni.

⁸ Mintor ijongjongkon ma lanjar mardalan, masuk ma ia rap pakon sidea hu rumah panumbahan ai mangentes-entes anjaha mirjak-irjak lanjar mamuji Naibata.

⁹ Ididah haganup halak na mabuei ai do ia, na mardalan anjaha na mamuji-muji ai bani Naibata.

¹⁰ Tapi ibotoh sidea do, ia do na hundul mangindo-into i lambung ni Horbangan Na Majenges ai; longang do sidea anjaha himong mangidah na masa bani ai.

Ambilan ni si Petrus

¹¹ Tapi halani na sai odor ai ia pakon si Petrus ampa si Johannes, marurup ma roh haganup halak na mabuei ai bani sidea, bani ianan na margoran surambih ni si Salomo, halani longang ni uhur ni sidea.

¹² Mangidah ai si Petrus, nini ma dompak halak na mabuei ai, “Nasiam halak Israel, mase longang uhur nasiam pasal on, mase ma sai hanami ikawahkon nasiam, songon gogohnami sandiri atap hadaulatonnaami mambahen na mardalan halak on?

¹³ Na ipasangap Naibata ni si Abraham, si Isak ampa si Jakob, Naibata ni ompungta in do Jesus juakjuakni in, na iondoskon anjaha na iparsilangkon nasiam

in i lobei ni si Latus, age pe paluahon do la namin mangihutkon timbanganni.

¹⁴ Iparnalang nasiam do Na Pansing anjaha Na Pintor in, tapi ipindo nasiam do paluahon bani nasiam pamunuh in.

¹⁵ Pambobai hu hagoluhan do ibunuh nasiam. In ma na dob ipapuhon Naibata humbani na matei, anjaha hanami do saksi pasal ai.

¹⁶ Halani haporsayaon bani goran-Ni do, ase ipargogohi goran-Ni halak on, songon na nididah, anjaha na tinanda nasiam on; ibere haporsayaon na humbani Tuhan in do hamalumon bani i lobei nasiam haganupan.

¹⁷ Ai pe, nasiam sanina, huahap, na hurang mambotoh do nasiam, ase ihorjahon nasiam in, sonai age pangintuai nasiam.

¹⁸ Tapi na ipasaud do na dob pinatugahni hinan marhitei pamangan ni ganup nabi, ai ma: Sitaron na marsik do Kristusni.

¹⁹ Ase paubah nasiam ma uhur nasiam, anjaha mulak ma nasiam, ase tarsasap dousa nasiam,

²⁰ andohar roh panorang malas ni uhur hun lobei ni Tuhan in, anjaha ase isuruh bani nasiam Jesus Kristus, songon na dob sinurahon-Ni hinan,

²¹ ai ma na dob ijalo nagori atas lobei, paima roh panorang parsuang ni haganup, na dob hinatahon ni Naibata humbani na hinan marhitei pamangan ni nabi-Ni na pansing in.

²² Ai ihatahon si Musa do, ‘Pajongjongon ni Tuhan Naibata do sada nabi humbani sanina nasiam songon ahu on, la do sitangihonon nasiam pasal haganup sihatahononni bani nasiam.’

²³ Tapi sagala na so manangihon nabi ai, boiskononkon do humbani bangsa in!

²⁴ Anjaha sagala nabi na onggga marsahap, mamungkah humbani si Samuel ampa na i pudini ai, pasal ari on do ibaritahon sidea.

²⁵ Nasiam do anak ni nabi-nabi ai anjaha parrupei bani padan na binahen ni Naibata bani ompungta, sanggah na hinatahon-Ni ai bani si Abraham, ‘Anjaha marhitei ginomparmai dapotan pasu-pasu do haganup bangsa na i tanoh on.’

²⁶ Bani nasiam do parlobei ipapuhon Naibata juakjuak-Ni, anjaha isuruh do ia, mamasu-masu nasiam, sagala na mulak humbani hajahatonni bei.”

Tartutup si Petrus ampa si Johannes

4¹ Sanggah na marsahap ai ope sidea bani na mabuei ai, roh ma mandorab sidea malim, kopala ni rumah panumbahan ai ampa halak Sadukei,

² marah halani iajari sidea na mabuei ai, anjaha iambilankon sidea parpuhoon humbani na matei ibagas Jesus.

³ Itangkap ma sidea, anjaha ipamasuk hubagas tutupan ronsi patar ni ai, ai domma bod ari.

⁴ Tapi buei do na manangar ambilan ai, gabe porsaya, anjaha adong do bilangan ni dalahi na gabe porsaya lima ribu halak.

Isaksihon Sidea Haporsayaon ni Sidea i Lobei ni Sanhedrin

⁵ Patarni ai martumpu ma i Jerusalem pangintuai-pangintuai ampa sibotoh surat,

⁶ rap pakon si Hannas, sintua ni malim ai, si Kayapas, si Johannes, si Aleksander ampa haganup sindohor ni sintua ni malim ai.

⁷ Jadi ipajongjong ma sidea hu tongah-tongah anjaha isungkun ma sidea, “Marhitei kuasa aha atap marhitei goran ni ise do ibahen nasiam ai?”

⁸ Jadi gok Tonduy Na Pansing ma si Petrus, ihatahon ma bani sidea, “Nasiam pambobai ampa pangintuai-pangintuai ni bangsa on.

⁹ Anggo pareksaon ma hanami sadari on, halani pambahenan na madear bani sada halak na boritan, atap marhitei aha do ia, ase malum,

¹⁰ botoh nasiam ma haganup ampa haganup bangsa Israel, ‘Marhitei goran ni Jesus Kristus na hun Nasaret ai do, ai ma na pinarsilangkon nasiam, tapi na pinapuhu ni Naibata humbani na matei, marhitei ai do, ase jongjong halak on malum i tongah-tongah nasiam.’

¹¹ Ia do in, batu na niambukkon ni nasiam tukang, na dob gabe batu parsuhi.

¹² Anjaha seng dong haluahon ibagas atap ise na legan, ai seng dong goran na legan i toruh ni langit ibere bani jolma, parhiteianta hu haluahon.”

¹³ Dob ididah sidea hinsah ni uhur ni si Petrus ampa si Johannes ai, anjaha ibotoh homa, sedo halak sijamah surat sidea, tapi jolma na somal do, gabe longang ma uhur ni sidea; itanda do sidea, ai ma na rap pakon Jesus do sidea hinan.

¹⁴ Anjaha ididah sidea do homa jongjong ijai rap pakon sidea halak na dob pinamalum ai, gabe seng tarhatahon sidea be atap aha pe.

¹⁵ Ihatahon sidea ma, ase luar sidea lobei hun parrapotan ai, gabe manriah ma sidea samah sidea,

¹⁶ “Aha ma sibahenonta bani halak on? Ai torang do, talar na binahen ni sidea ai, ibotoh ganup parhuta Jerusalem, seng tarporsou hita.

¹⁷ Tapi, ase ulang lambin rarat ai bani halak na mabuei in, gogoh ma sidea palumba hita, ase ulang be sidea marsahap atap hubani ise pe marhitei Goran ai.”

¹⁸ Dob ai idilo ma sidea, anjaha ilarang ma, na so bulih be sidea marsahap atap mangajari marhitei goran Jesus.

¹⁹ Tapi nini si Petrus ampa si Johannes ma mambalosi sidea, “Nasiam ma manimbangi, atap

na pintor ma ai i lobei ni Naibata, anggo balosan hanami bani nasiam ase bani Naibata.

²⁰ Ai seng tarbahen hanami lang mangkatahon na dob ididah ampa ibogei hanami.”

²¹ Jadi dob ipalumba sidea gomos, ipaluah ma sidea, ai seng jumpah sidea dalan, laho manguhumi sidea halani na mabuei ai, ai haganup do mamuji Naibata halani na masa ai.

²² Ai lobih ma ompat puluh tahun umur ni halak na pinamalum ai marhitei tanda halongangan ai.

Tonggo ni Kuria ai

²³ Dob maluah sidea, laho ma sidea marayak hasoman ni sidea, anjaha ibaritahon ma bani sidea haganup, na hinatahon ni sintua ni malim ampa pangintuai ai bani sidea.

²⁴ Jadi dob ibogei sidea ai, sasora ma sidea martonggo bani Naibata, nini ma, “Ham Tuhan, Ham do manjadihon langit, tanoh pakon laut ampa haganup isini!

²⁵ Ham do marsahap marhitei Tonduy-Mu, humbani pamangan ni ompungnami si Daud, juakjuak-Mu ai, sonon, ‘Mase oga-oga bangsa parbegu, anjaha na so marguna ipingkiri bangsa-bangsa?’

²⁶ Jongjong do raja-raja ni tanoh on, anjaha martumpu do siparkuasa, laho mangimbang Tuhan in, ampa na mininakan-Ni.

²⁷ Ai tongon do, na dob martumpu do i huta on si Herodes, si Pontius Latus, rap pakon bangsa parbegu ampa bangsa Israel, laho mangimbang Jesus, juakjuak-Mu Na Pansing in, na dob mininakan-Mu in,

²⁸ laho pasaudkon, na dob tinontuhon-Mu hinan marhitei kuasa-Mu ampa sura-sura-Mu.

²⁹ Ai pe, Ham Tuhan, tonggor Ham ma asup-asup ni sidea in, anjaha bere Ham ma bani jabolon-Mu hinsah ni uhur, laho mangkatahon hata-Mu!

³⁰ Surdukkon Ham ma tangan-Mu, laho mambahen hamalumon, tanda ampa halongangan marhitei goran ni Jesus, juakjuak-Mu Na Pansing in!"

³¹ Jadi dob martonggo sidea, dugur ma ianan partumpuan ni sidea ai, anjaha gok Tonduy Na Pansing ma sidea haganup, gabe marhinsah ni uhur ma sidea mangkatahon hata ni Naibata.

Parsaoran ni Kuria na Parlobei ai

³² Ia halak na porsaya na satumpuan ai sauhur do anjaha sada tonduy. Seng dong humbani sidea na mangkatahon ia sandiri simada na dong bani, tapi parbagianan rup do ai ihira.

³³ Anjaha marhagogohon banggal do apostel ai manaksihon parpuhoon ni Tuhan Jesus, anjaha igoki idop ni uhur banggal do sidea haganup.

³⁴ Ai seng dong atap ise sidea na hurangan; ai hagianup siparjuma atap siparrumah, ijual do ai, anjaha iboan ma boli ni na jinual ni sidea ai,

³⁵ itibalhon ma ai hu lobei ni apostel ai, dob ai ibagihon hubani na hurangan.

³⁶ Umpamani si Josep, na ginoran ni apostel-apostel ai si Barnabas, artini anak ni pangapohon, sada halak Lepi, hun Pulou Kiprus,

³⁷ ijual do juman, anjaha iboan ma bolini ai lanjar itibalhon ma i lobei ni apostel ai.

Pasal si Ananias ampa si Sapira

5 ¹ Adong ma ijia sada halak na margoran si Ananias, rap pakon parinangonni, na manjualhon tanohni.

² Ibagas botoh ni parinangonni, iponopkon do deba bolini ai, deba iboan anjaha iberehon i lobei ni apostel ai.

³ Tapi nini si Petrus ma, “Ale Ananias, mase ma igoki sibolis uhurmu, gabe iladungi ham Tonduy Na Pansing, anjaha iponopkon ham deba boli ni tanoh ai?

⁴ Anggo ijolomi ham in, ai lang saguru bamu do, anjaha ijual ham pe in, ai lang tong do saguru bamu? Mase ma tubuh uhurmu mambahen na sonin? Sedojolma na niladunganmu ijin, Naibata do!”

⁵ Tapi ijin ibogei si Ananias hata ai, tompas ma ia lanjar rotap hosahni. Jadi mabiar tumang ma haganup na mambogeisi.

⁶ Jadi roh ma halak siposonan, ibaluti sidea ma bangkeini ai, dob ai iusung ma hu darat laho mananom.

⁷ Dob salpu hira-hira tolu jam roh ma parinangonni ai, tapi lape ibotoh na masa ai.

⁸ Jadi iparsahapkon si Petrus ma ia, “Hatahon ma bangku, nasa on do ijual nasiam tanoh ai? Eak, nasa in do,” nini.

⁹ Tapi nini si Petrus ma hu bani, “Mase ma sauhur nasiam manlajou Tonduy ni Tuhan in? Tonggor ma, bokas ni nahei ni na mananom paramangonmu, ham pe usungon ni sidea ma hu darat!”

¹⁰ Jadi mintor tompas ma ia i lobei ni nahei ni si Petrus, lanjar rotap ma hosahni. Jadi sanggah masuk halak siposonan ai, domma matei ia jumpah sidea, iusung sidea ma ia hu darat, anjaha i tanom ma hu lambung ni paramangonni.

¹¹ Jadi mabiar tumang ma haganup na sakuria ai ampa haganup na mambogei ai.

Tanda-tanda Halongangan na Binahen ni Apostel-apostel

¹² Jadi masa ma buei tanda ampa halongangan marhitei tangan ni apostel ai bani na mabuei ai;

sauhur do sidea haganup, martumpu do sidea i surambih ni si Salomo.

¹³ Tapi humbani na legan ai, seng dong na pag pasaorhon dirini hubani sidea; sangap do sidea ididahjolma simbuei.

¹⁴ Anjaha lambin tambah do na porsaya bani Tuhan in, buei dalahi sonai age naboru,

¹⁵ pala ipamboan sidea na boritan hu alaman, anjaha ipatibal bani podoman ampa apei, andohar hona halinoh ni si Petrus sidea sanggah montas ia.

¹⁶ Dihut do hun huta-huta na ingot ai roh buei halak hu Jerusalem, mamboan na boritan ampa na niodar-odar ni tonduy na mabutak, gabe malum ma sidea haganup.

Tartangkap Apostel anjaha Maluah Ibahen Malekat

¹⁷ Jadi martindak ma sintua ni malim ai ampa haganup na mangkasomanisi, ai ma golongan Sadukei, igoki ringis do simburu ni uhur ni sidea,

¹⁸ itangkap sidea ma apostel ai anjaha masukkon ma sidea hu tutupan umum.

¹⁹ Tapi bornginni ai, ibuha sada malekat ni Tuhan in ma labah ni tutupan ai, iboan ma sidea hu darat lanjar nini ma,

²⁰ “Laho ma nasiam hu rumah panumbahan, hatahon nasiam ma bani halak na mabuei ai pasal hata hagoluhan in!”

²¹ Mambogei ai, jadi sogod ma sidea misir hu rumah panumbahan ai laho mangajari. Ia sintua ni malim ampa na mangkasomanisi, iadongkon sidea ma rapot bolon rap pakon pangintuai-pangintuai ni bangsa Israel, anjaha isuruh ma hu tutupan na mangalop sidea.

²² Tapi dob das hujai juakjuak ai, seng adong jumpah sidea ijai, gabe mulak ma sidea patugahkon ai, nini ma,

²³ “Tutup tumang do namin tutupan ai jumpah hanami, anjaha parjaga jongjong i lobei ni labah ai; tapi dob iungkab hanami, ise pe lang jumpah hanami ibagas.”

²⁴ Ase dob ibogei kopala ni rumah panumbahan ampa sintua ni malim ai hata ai, haru ma uhur ni sidea mamingkiri, atap na sonaha do holi dobni ai.

²⁵ Tapi roh ma sada halak na patugahkon bani sidea, “Tonggor nasiam ma, i rumah panumbahan do halak na pinatutupkon nasiam ondi mangajari halak na mabuei!”

Apostel ai i Lobei ni Rapot Bolon

Maluah Sidea Halani Hata ni si Gamaliel

²⁶ Jadi laho ma kopala ni rumah panumbahan ai rap pakon juakjuak ai mangalop sidea, tapi seng marhasoman paksa, halani mabiar sidea ipargijig halak na mabuei ai.

²⁷ Iboan ma sidea anjaha ipajongjong i lobei ni Rapot Bolon ai. Jadi ipareksa sintua ni malim ai ma sidea, nini ma,

²⁸ “Gomos do ilarang hanami hanima mangajari marhitei Goran ai, hape lambin igoki hanima do huta Jerusalem marhitei podahnima, ase marsapata bannami daroh ni Halak ondi, ninuhurnima.”

²⁹ Jadi nini si Petrus ampa apostel-apostel ai ma mambalosi, “Maningon balosan do diri bani Naibata ase banijolma!

³⁰ Ipapuho Naibata ni ompungta do Jesus, na binunuh nasiam marhitei na manggantungkon-Si bani hayu na marsilang.

³¹ Ipagijang Naibata do la hu siamun-Ni gabe Pambobai anjaha Sipaluah, laho mambere hubani Israel hamubahon ni uhur ampa hasasapan ni dousa.

³² Hanami do saksi pasal ai ampa Tonduy Na Pansing, na binere ni Naibata bani na mambalosi-Si.”

³³ Tapi mambogei ai marah tumang ma sidea, gabe iputuskon sidea ma sihol mambunuh sidea.

³⁴ Tapi jongjong ma bani raport ai sada halak Parisei, na margoran si Gamaliel, sada sibotoh titah, na sangap bani uhur ni bangsa ai, jadi ihatahon ma, ase isuruh sidea hu darat tongkin.

³⁵ Dob ai nini ma hubani sidea, “Nasiam halak Israel, pangkei ma nasiam pasal sibahenon nasiam bani halak on!

³⁶ Jongjong do ijia si Toidas, ipabanggal do dirini, pala adong ompat ratus halak na mangirikkonsi. Tapi tarbunuh do ia, gabe merap do ganup na mangirikkonsi, anjaha seng dong be.

³⁷ I pudini ai, jongjong do use si Judas, halak Galilea ai, sanggah panorang sensus ondi, anjaha buei do halak na mamberontak iarahkon; tapi ia pe tarbunuh do, anjaha merap do na mangirikkonsi ai.

³⁸ Ase ai pe, ulang ma kahua nasiam halak on, paturut nasiam ma sidea, ai anggo humbani jolma do sura-sura ampa horja on, sai na maseda do in.

³⁹ Tapi anggo humbani Naibata do, seng tarkahua nasiam sidea, ulang gabe siimbang Naibata nasiam holi.” Jadi iparhatongon sidea ma hatani ai.

⁴⁰ Dob ai idilo sidea ma apostel ai; isuruh ma na manlonsingi sidea anjaha ilarang ma sidea mansahapkon Goran Jesus; salpu ai ipaluah ma sidea.

⁴¹ Tapi malas do uhur ni sidea luar hun rapot ai, halani boi sidea manaron hiri-hiri mangkopkop goran ni Jesus.

⁴² Anjaha seng marnamaronti sidea i rumah panumbahan age marrumah-rumah pe, mangajari ampa mangambilankon Kristus Jesus.

Jabatan Diakon

6¹ Bani panorang ai, dob lambin martambah buei ni susian ai, tubuh ma ungut-ungut ni halak parsahap Gorik dompak parsahap Heber, halani hurang panatapan bani na mabalu humbani sidea ibagas pangurupion ari-ari.

² Jadi ipahumpul na sapuluh dua ai ma haganup susian ai, nini ma, “Seng patut iahap hanami papudionnami parambilanon bani hata ni Naibata, halani na patorsa-torsa idop ni uhur.

³ Ai pe nasiam sanina, pindahhi nasiam ma hun tongah-tongah nasiam pitu halak, na dear baritani, na ginokan ni Tonduy anjaha na pantas maruhur, sipabangkitonta bani horja in.

⁴ Tapi, anggo hanami, tonggo ampa horja parambilannon ai ma horjahononnami.”

⁵ Jadi rosuh ma uhur ni na sakuria ai bani hata ai, gabe ipilih sidea ma si Stepanus, sada halak na gok haporsayaon ampa Tonduy Na Pansing, dob ai si Pilippus, si Porkorus, si Nikanor, si Timon pakon si Parmenas, ambah ni ai si Nikolaos, sada parguru hun Antiokia.

⁶ Ipajongjong ma sidea i lobei ni apostel ai, anjaha dob martonggo sidea, itampeihon sidea ma tanganni bani sidea.

⁷Jadi lambin rarat ma hata ni Naibata, anjaha tambah bilangan ni susian ai i huta Jerusalem; buei do age malim, na gabe porsaya.

Pangaduan Dompok si Stepanus

⁸Ia si Stepanus gok idop ni uhur do ampa hagogohon; boi do ia mambahen halongangan ampa tanda na banggal i lobei ni na mabuei ai.

⁹Jadi roh ma deba halak marsual dompok si Stepanus, ai ma halak na humbani parguruan, na margoran Libertini, ampa na hun Kirene, hun Alexandria, hun Kilikia ampa Asia.

¹⁰Tapi seng tarimbang sidea hapentaranni ampa Tonduy ai, na mangajarisi.

¹¹Jadi ijuljul sidea ma deba halak, na mangkatahon, "Iboge hanami do halak on mangkatahon hata apas-apas dompok si Musa ampa Naibata."

¹²Ipajobu-jobu sidea do halak na mabuei ai ampa pangintuai ampa sibotoh surat, gabe idorab sidea ma si Stepanus, anjaha isarad hu lobei ni Rapot Bolon ai.

¹³Ipajongjong sidea do saksi siparladung, na mangkatahon, "Seng na marnamaronti halak on mangkatai ianan na pansing in age titah in,

¹⁴ai iboge hanami do ihatahon, 'Parsedaon ni Jesus na hun Nasaret ma rumah panumbahan in, anjaha paubahon-Ni do adat, na ijalo hita humbani si Musa.'"

¹⁵ Anjaha ganup do parrapot ai mannonoisi; songon bohi ni malekat do bohini ididah sidea.

Balos ni si Stepanus

7 ¹ Jadi nini sintua ni malim ai ma, “Atene, tongon do sonai?”

² Jadi nini si Stepanus ma, “Nasiam sanina ampa bapa-bapa, tangar nasiam ma lobei! Ipataridahkon Naibata na sangap in do diri-Ni hubani ompungta si Abraham, sanggah i Mesopotamia ia, sanggah lape ope ia marianan i Haran.

³ Ihatahon do hu bani, ‘Bungkas ma ho hun tanohmin ampa humbani sindohormu, laho ma ho hu tanoh sipatuduhonon-Ku bam!’

⁴ Jadi bungkas ma ia hun tanoh Kaldea, marianan ma ia i Haran. Dob matei bapani, isuruh Naibata ma ia pindah hunjai hu tanoh na niiankon nasiam on sonari.

⁵ Seng ibere ope bani parbagianan ijai, sanjongkal pe lang, tapi iparbagah do, berehononni tanoh in bani, ase ia simada in ampa ginomparni, age pe seng dong anakni.

⁶ Ai sonon do nini Naibata, ‘Gabe panginsolat do ginomparmu i tanoh na legan; parjabolonon anjaha arsik-arsikon ni halak do sidea ompat ratus tahun dokahni.

⁷ Dob ai uhumon-Ku do bangsa na binalosan ni sidea ai, nini Naibata,’ salpu ai bungkas ma sidea

hunjai, anjaha sombahon ni sidea ma Ahu bani ianan on.

⁸ Lanjar ibere ma bani sidea padan parsunaton. Dob sonai, tubuh ma bani si Abraham si Isak, bani si Isak tubuh si Jakob, anjaha bani si Jakob ompungta na sapuluh dua ai.

⁹ Halani subil ni ompungta ai bani si Josep, ijual sidea do ia hu tanoh Masir. Tapi ihasomani Naibata do ia,

¹⁰ ipaluah do ia humbani haganup hasunsahanni, anjaha ibere bani idop ni uhur ampa hauhuron i lobei ni Parao, raja ni Masir, gabe ipabangkit ma ia gabe panrajai ni tanoh Masir ampa haganup rumahni.

¹¹ Jadi masa ma lohei i sab tanoh Masir ampa tanoh Kanaan, na mangkorhon hasunsahan banggal, seng jumpahan sipanganon be ompungta.

¹² Anjaha dob ibogei si Jakob adong gandum i tanoh Masir, gabe isuruh ma hujai ompungta, ai ma na parlobei sahali.

¹³ Bani na paduahalihon ipatandahon si Josep ma dirini bani saninani ai, gabe torang ma bani Parao pasal partuturan ni si Josep.

¹⁴ Jadi isuruh si Josep ma na mangalop si Jakob ampa haganup na sapanganan bani, pitu puluh lima bueini.

¹⁵ Ase tuad ma si Jakob hu tanoh Masir, dob ai matei ma ia rap pakon ompungta ai.

¹⁶ Iboan sidea do ia hu Sikem, anjaha inahkon hu tanoman, na binoli ni si Abraham marhitei duit pirak humbani ginompar ni si Hemor i Sikem.

¹⁷ Jadi dob lambin dohor panorang na pinarbagah ni Naibata, ai ma na binulawankon-Ni hinan bani si Abraham, lambin tambah anjaha manggargar ma bangsanta i tanoh Masir,

¹⁸ paima bangkit sada raja na legan, na so manandai si Josep.

¹⁹ Akal do ibahen mangagou bangsanta, gabe tarpaksa do ompungta mangambukkon dakdanak ni sidea na baru tubuh, ase ulang torus manggoluh.

²⁰ Bani panorang ai tubuh ma si Musa, anjaha marosuh do Naibata mangidahsi. Tolu bulan do ia iparmudu-mudu i rumah ni bapani,

²¹ dob ai itaruhkon ma hu darat, tapi ibuat boru ni Parao ma ia, anjaha ipagodang-godang ma songon anakni sandiri.

²² Iajarhon do hubani sagala hapentaran ni halak Masir, gabe margogoh ma ia bani hata ampa pambahenan.

²³ Dob marumur ia ompat puluh tahun, tubuh ma uhurni manonggor saninani, halak Israel.

²⁴ Anjaha sanggah ididah sada halak hona arsik, iurupi ma na hona arsik ai, iluluhon ma ia marhitei na mambunuh halak Masir ai.

²⁵ Iagan, dapot uhur ni saninani ai ma, paboa urupan ni Naibata ma sidea marhitei tanganni, tapi seng dapot uhur ni sidea ai.

²⁶ Patar ni ai, roh use ma ia, tudu sanggah maringori sidea, anjaha iojur ma sidea ase mardamei, nini ma, 'Na marsanina do nasiam, mase maringori nasiam samah nasiam?'

²⁷ Tapi itulak na marsalah ai do ia, nini, 'Ise pabangkit ho gabe panrajai ampa panguhum bannami?'

²⁸ Ai sihol bunuhonmu do ahu, songon na binunuhmu halak Masir nantuari?'

²⁹ Manangar hata ai lintun ma si Musa, laho manginsolat i tanoh Midian, anjaha tubuh ma dua anak bani ijai.

³⁰ Jadi dob salpu ompat puluh tahun, taridah ma sada malekat bani i halimisan ni Dolog Sinai, ibagas jilam ni apuy bani naporon.

³¹ Longang do si Musa mangidah na nididahni ai, anjaha dob idohori laho papangkeihon, tarbogei ma sora ni Tuhan in,

³² 'Ahu do Naibata ni ompungmu, ai ma Naibata ni si Abraham, si Isak pakon si Jakob.' Jadi hitir-hitir ma si Musa, seng pag be ia papangkeihon.

³³ Tapi nini Tuhan in ma hu bani, 'Tanggali ma sipatumin humbani naheimu, ai tanoh na susi do ianan hajongjonganmin.

³⁴ Domma tangkas Huidah hamarsikon na tinaron ni bangsang-Ku i tanoh Masir, domma Hutangar hoih-hoih ni sidea; anjaha turun do Ahu laho paluahkon sidea. Ai pe roh ma ho, sihol suruhon-Ku do ho hu tanoh Masir.'

³⁵ Si Musa, na tinulak ni sidea ai, marhitei na mangkatahon, 'Ise pabangkit ho gabe panrajai ampa panguhum?' Ia do isuruh Naibata, gabe panrajai ampa sipaluah marhitei malekat na nididahni ai bani naporon ai.

³⁶ Iarahkon do sidea bungkas, marhitei halongangan ampa tanda na binahenni ai i Tanoh Masir, i Laut Sigerger ampa halimisan ompat puluh tahun dokahni.

³⁷ Si Musa, ai ma na mangkatahon bani halak Israel, 'Pajongjongon ni Naibata do sada nabi bani nasiam, hun tongah-tongah nasiam songon ahu on.'

³⁸ Ia do ai, bani kuria na i halimisan ai rap pakon ompungta ampa malekat ai, na marsahap pakonsi i Dolog Sinai. Ia do na manjalo hata na manggoluh sipadasonni hu banta.

³⁹ Tapi seng itangihon ompungta ia, itulak sidea do ia, anjaha mulak do uhur ni sidea hu Tanoh Masir.

⁴⁰ Ihatahon sidea do bani si Aron, 'Bahen ma bannami Naibata, na mambobai hanami, ai seng ibotoh hanami, atap aha do na masa bani si Musa, na dob mangarahkon hanami luar hun tanoh Masir.'

⁴¹ Jadi igana sidea ma ijia sada anak ni lombu, iboan sidea ma galangan bani gana-gana ai, anjaha marmalas ni uhur ma sidea halani bahen-bahenan ni tangan ni sidea ai.

⁴² Tapi itundali Naibata ma sidea, ipaturut ma sidea marsombah bani na pinarnaibata ni sidea i langit ai, songon na tarsurat ibagas buku ni nabi-nabi, 'Ai adong do isombahkon nasiam Bangku galangan sisayaton ampa sibere-bere ibagas siompat puluh tahun na i halimisan ai, ale bangsa Israel?

⁴³ Ipausung-usung nasiam do rumah ni Molok ampa bintang ni naibata Rephan ampa gana-gana na binahen nasiam gabe sisombahon nasiam. Hu dipar ni Babel ope buangkonon-Ku nasiam.'

⁴⁴ Adong do bani ompungta lampolampo hasaksian, usih songon na dob niaturhon ni Naibata hubani si Musa marhitei hata-Ni, ai ma, ase ibahen ai domu hubani usihan, na dob nididahni ai.

⁴⁵ Ai ma na ijalo ompungta, lanjar iboan rap pakon si Josua laho patundukkon bangsa-bangsa, na niusir ni Naibata i lobei ni ompungta ai, das hubani panorang ni si Daud.

⁴⁶ Jumpahan idop ni uhur do ia i lobei ni Naibata, gabe ipindo ma, ase ipalopas ia laho pasirsirhon ianan bani Naibata ni si Jakob.

⁴⁷ Tapi si Salomo do saud pajongjong rumah Bani.

⁴⁸ Tapi lang marianan Sitimbulan in ibagas rumah na pinauli ni tangan, songon na hinatahon ni nabi ai,

⁴⁹ ‘Langit do paratas Bangku, anjaha tanoh onjolan bani nahei-Hu. Rumah aha ma in, na sihol paulionmu Bangku,’ nini Tuhan in, ‘atap ianan aha ma na boi gabe parsaranan Bangku?’

⁵⁰ Ai lang tangan-Ku do paulihon in ganup?’

⁵¹ E nasiam sihengken uhur, na so marsunat uhur ampa pinggolni, ilawan nasiam do tongtong Tonduy Na Pansing in; usih do nasiam songon ompung nasiam ai.

⁵² Ise ma humbani nabi ai, na so pinarburu ni ompung nasiam? Ibunuh sidea do na manjaha pasal parroh ni Parpintor in, ai ma na dob tinahihon ampa na binunuh nasiam,

⁵³ nasiam sijalo titah in, na pinadas marhitei malekat, hape seng idalankon nasiam.”

Parmatei ni si Stepanus

⁵⁴ Mambogei ai marah tumang ma uhur ni sidea, harat-harat ipon ma sidea hu bani.

⁵⁵ Gok Tonduy Na Pansing ma si Stepanus; mangkawah ma ia dompak langit, gabe ididah ma hasangapon ni Naibata ampa Tuhan Jesus jongjong i siamun-Ni.

⁵⁶ Jadi nini ma, “Tonggor ma, huidah do mungkab langit, anjaha Anak ni Jolma in jongjong hampit siamun ni Naibata!”

⁵⁷ Jadi marsurak-surak ma sidea anjaha marsitutup pinggolni bei; lanjar rap ma sidea mandorabsi.

⁵⁸ Isarad sidea ma ia hu darat ni huta ai, anjaha ipargijig bani batu. Ia saksi-saksi ai, itibalhon bei do pakeianni i lobei ni sada garama, na margoran si Saulus.

⁵⁹ Sanggah na ipargijig sidea ai si Stepanus bani batu, dilo-dilo do ia, nini, “Ham Tuhan Jesus, jalo Ham ma tonduyhu!”

⁶⁰ Manrogop ma ia anjaha ipagomos ma sorani mangkatahon, “Ham Tuhan, ulang ma hira Ham dousa ni sidea in!” Jadi dob ihatahon sonai, matei ma ia.

Si Saulus Marburu Halak Kristen

8¹ Ia si Saulus rosuh do uhurni pasal pambunuhon ai. Jadi masa ma bani panorang ai pangayak-ayakon banggal dompak kuria na i Jerusalem. Haganup sidea, kerap ma hu nagori Judea ampa Samaria, sobali apostel-apostel ai.

² Itanom halak na daulat maruhur ma si Stepanus, anjaha tangis tumang do sidea halani ai.

³ Ia si Saulus, iparseda do kuria ai; imasuki do rumah-rumah, anjaha isarad ma hunjai dalahi ampa naboru laho padaskon hu tutupan.

Horja ni si Pilippus i Samaria

⁴ Ia halak na merap ai, isiar sidea ma sab tanoh ai lanjar mangambilankon Ambilan Na Madear.

⁵ Anjaha si Pilippus pe tuad ma hu huta Samaria, iambilankon ma bani sidea Kristus in.

⁶ Jadi dob ibogei na mabuei ai ambilan ni si Pilippus, anjaha ididah homa tanda-tanda na binahenni ai, sauhur ma sidea marimbagaskonsi.

⁷ Ai buei do humbani na setanon luar tonduy na mabutak marhasoman sora na mardilo-dilo. Buei do homa na oyangon ampa na tempang ipamalum.

⁸ Jadi malas tumang ma uhur ni sidea na sahuta ai.

Si Simon Parsibalik Mata

⁹ Tapi adong do ibagas huta ai hinan sada halak na margoran si Simon, parsibalik mata, na paoto-otohon halak Samaria ai, ai ihatahon na lobih do ia.

¹⁰ Jadi haganup ma na etek na magodang porsaya bani, nini sidea, "On ma hagogohon ni Naibata, na ginoran, 'Tang na Banggal!'"

¹¹ Ase ipairik-irik sidea pe ia, halani na dob dokah do sidea ipaoto-oto marhitei parsibalik-mataonni ai.

¹² Tapi dob porsaya sidea bani na niajarhon ni si Pilippus, ai ma pasal Harajaon ni Naibata ampa Goran Jesus, gabe tardidi ma sidea dalahi ampa naboru.

¹³ Si Simon pe porsaya ma, anjaha dob tardidi ia, sai ipairik-irik ma si Pilippus, longang tumang ia mangindah tanda ampa hagogohon na banggal, na masa ai.

¹⁴ Anjaha dob ibogei apostel-apostel na i Jerusalem, na dob ijalo halak Samaria ai hata ni Naibata, isuruh sidea ma si Petrus ampa si Johannes marayak sidea.

¹⁵ Tuad ma sidea anjaha itonggohon ma sidea ase ijalo sidea Tonduy Na Pansing,

¹⁶ ai seng ope sogop Tonduy Na Pansing atap bani ise pe sidea, pitah tardidi ope sidea hubagas goran ni Tuhan Jesus.

¹⁷ Jadi itampeihon apostel ai ma tanganni bani sidea, gabe ijalo sidea ma Tonduy Na Pansing.

¹⁸ Dob ididah si Simon, apostel ai mambere Tonduy Na Pansing marhitei na manampeihon tangan, roh ma ia mamboan duit bani sidea,

¹⁹ nini ma, “Bere nasiam ma homa kuasa na sonin bangku, ase manjalo Tonduy Na Pansing halak, anggo hutampeihon tanganku bani.”

²⁰ Jadi nini si Petrus ma hu bani, “Magou ma ho rap pakon pirakmin, ai iagan ho gakni tarboli sibere-bere ni Naibata marhitei duit!

²¹ Seng parrupei atap marhak ho bani kuasa on, ai seng pintor uhurmu dompak Naibata.

²² Ai pe, paubah ma uhurmu humbani hajahatonmin, dob ai pindo ma humbani Naibata, andohar boi tarsasap tahi-tahi ni uhurmin.

²³ Ai huidah gok pogu na paet ampa jorat hagedukon do ho.”

²⁴ Jadi nini si Simon ma marbalos, “Tonggohon nasiam ma ahu hubani Tuhan in, ase ulang mangonai bangku na hinatahonmu ai.”

²⁵ Ase dob isaksihon anjaha ihatahon sidea hata ni Tuhan in, mulak ma sidea hu Jerusalem, lanjar mangambilankon Ambilan Na Madear bani buei huta ni Nagori Samaria.

Tardidi Parpangkat na Hun Etiopia

²⁶ Tapi iparsahapkon malekat ni Tuhan in ma si Pilippus, nini ma, “Jongjong ma ho, laho ma ho marayak tongah ari hu dalan ai, tuadan hun Jerusalem hu Gaza. Ia dalan ai lungun do.”

²⁷ Jadi jongjong ma ia lanjar misir. Anjaha tonggor ma, adong do ijai sada halak Etiopia, sada pegawai istana, manteri ni Kandake, raja naboru ni Etiopia, siramotkon haganup artani. Na laho do ia hu Jerusalem martonggo,

²⁸ anjaha na mulak ma ia nuan, hundul ibagas garetani mambasa buku ni Nabi Jesayas.

²⁹ Ihatahon Tonduy in ma hubani si Pilippus, “Laho ma hujai, dohori ma garetai ai!”

³⁰ Laho ma si Pilippus, ibogei ma ia mambasa surat ni Nabi Jesayas. Nini ma, “Iarti ham do na binasamu in?”

³¹ Jadi nini ma, “Sonaha ma boi huartihon in, anggo seng dong na patorangkonsi bangku.” Lanjar iojur ma si Pilippus naik, hundul i lambungni.

³² Ia hata ni surat, na binasani ai, ai ma, “Itogu do la songon biribiri hu panayatan anjaha songon anak ni biribiri, na sipsip i lobei ni sipanggungtingisi, sonai do la seng ibuha pamanganni.

³³ Ibagas hadorunon salosei do uhum na bani ai. Ise ma na boi mangkira ginomparni? Ai tarangkat do goluhni hun tanoh on.”

³⁴ Dob ai nini pagawei istana ai ma hubani si Pilippus, “Husungkun ma ham, ise do na hinatahon ni nabi ai ijin? Pasal dirini do atap pasal halak na legan do?”

³⁵ Dob ai marsahap ma si Pilippus marbona humbani hata ondi, ibaritahon ma bani pasal Jesus.

³⁶ Anjaha sanggah na mannunuti dalan ai, das ma sidea hubani sada bah; jadi nini pagawei ai ma, “Andon ma bah! Adong ope na manlanglangi ase tardidi ahu?”

³⁷ Jadi nini si Pilippus ma, “Anggo na porsaya do ham humbani gok ni uhurmu, dear do!” Ibalosi ma ia, “Na porsaya do ahu, Anak ni Naibata do Jesus Kristus!”

³⁸ Ihatahon ma marsaran gareta ai, gabe tuad ma sidea haduasi, si Pilippus ampa parpangkat ai hu bah ai, lanjar ididi ma ia.

³⁹ Tapi sanggah na tangkog ai sidea humbani bah ai, jadi iluahun Tonduy ni Tuhan in ma si Pilippus, gabe seng ididah parpangkat ai be ia; marmalas ni uhur ma ia mannunuti sidalanni.

⁴⁰ Ia si Pilippus, i Asdod do ia jumpah; sanggah na montas ai ia, iambilankon do Ambilan Na Madear bani ganup huta-huta ai ronsi na das ia hu Kesarea.

Hamubahon ni Uhur ni si Saulus

(bd. 22:3-21; 26:9-20; Gal. 1:13-24)

9¹ Ia si Saulus sai tong ope iondamkon ondam-ondam ampa pamunuhon dompak susian ni Tuhan in. Laho ma ia hubani sintua ni malim,

² ipindo ma humbani surat, siboanonni hu Damaskus bani parguruan na ijai ai, ase anggo adong jumpahsi siirikkon ugama ai, dalahi atap naboru pe, boi sangkutonni anjaha boanonni ai hu Jerusalem.

³ Tapi sanggah i tongah dalan ia, mandohori huta Damaskus, sompong ma marsinalsal sondang hun langit, inggot hu bani,

⁴ gabe tompas ma ia hu tanoh, anjaha ibogei ma sada sora, na marsahap hu bani, “Saul, Saul, mase pardakdakonmu Ahu?”

⁵ Jadi nini ma, “Ise do Ham Tuhan?” Roh balos, “Jesus do Ahu, na pinardakdakmin.

⁶ Tapi jongjong ma ho, masuki ma huta in, ijai pe patugahon bam sibahenonmu!”

⁷ Ia hasomanni na saodoran ai, jonong do hansa, ai ibogei sidea do sora ai, tapi ise pe lang ididah.

⁸ Jadi jongjong ma si Saulus hun tanoh ai; age pe bodak matani, aha pe lang ididah. Gabe itogu sidea mando ia, laho mambobansi hu Damaskus.

⁹ Tolu ari dokahni seng marpangidah ia, anjaha seng mangan atap minum pe.

¹⁰ Jadi adong ma sada susian i Damaskus, na margoran si Ananias. Ihatahon Tuhan in ma hu bani ibagas sada panonggoran, “Ale Ananias!” Balosni, “Ijon do ahu, Tuhan!”

¹¹ Jadi ihatahon Tuhan in ma hu bani, “Jongjong ma, laho ma ho hu dalan na margoran Dalan Sipintor, anjaha sungkun ma ijai, i rumah ni si Judas pasal sada halak na margoran si Saulus, na hun Tarsus. Jumpah ho do ia martonggo,

¹² anjaha domma ididah masuk sada halak, na margoran si Ananias, manampeihon tanganni bani, ase mulak marpangidah ia.”

¹³ Tapi nini si Ananias ma mambalosi, “Tuhan, hubogei do humbani buei halak pasal buei ni na jahat, ibahen hubani halak na mapansing i Jerusalem.

¹⁴ Ijon pe markuasa do ia humbani sintua ni malim, manangkuti haganup na mandilo goran-Mu.”

¹⁵ Jadi nini Tuhan in ma hu bani, “Laho ma ho, ai ia do parugas pilihon-Ku laho mamboan goran-Ku

hu lobei ni bangsa-bangsa, raja-raja ampa anak ni Israel.

¹⁶ Ahu sihol patuduhkon hubani pasal buei ni sitaronon sidageionni halani goran-Ku.”

¹⁷ Jadi laho ma si Ananias, imasuki ma rumah ai. Itampeihon ma tanganni hu bani, anjaha nini ma, “Ale Saul, saninangku, isuruh Tuhan in do ahu, ai ma Jesus, na nididahmu bani pardalananmu hujon, ase suang marpangidah ho, anjaha gok Tonduy Na Pansing ho.”

¹⁸ Jadi mintor mangkatektek ma humbani matani songon sisik, gabe mulak ma ia marpangidah; dob ai jongjong ma ia lanjar tardidi.

¹⁹ Anjaha mangan ma ia, gabe suang ma gogohni. Soh ope ia piga-piga dokah ijai rap pakon susian na i Damaskus ai.

Parambilanon ni si Saulus i Damaskus

²⁰ Anjaha mintor marambilan do ia ibagas parguruan-parguruan ai, isaksihon do Jesus, paboa Anak ni Naibata do Ia.

²¹ Longang do haganup halak na mambogeisi, nini sidea do, “Ai lang ia do in, na mardakdak i Jerusalem haganup halak na mandilo Goran in? Na nilangkahkonni pe hujon, ai lang laho manangkuti anjaha mamboan sidea do hu sintua ni malim?”

²² Tapi lambin margomos do si Saulus, gabe jut ma ibaen uhur ni Jahudi, na i Damaskus, marhitei hatorangan-hatorangan, paboa Jesus do Kristus in.

²³ Jadi, dob hun dokah, manriah ma halak Jahudi, laho mamunuhsi.

²⁴ Tapi tarboge do hubani si Saulus tahi-tahi ni sidea ai. Gabe ijagai sidea ma sagala horbangan arian pakon borngin, ase boi bunuhon ni sidea ia.

²⁵ Tapi iarahkon susian ai ma ia borngin-borngin, anjaha itantan sidea ma ia ibagas karanjang hu darat ni tembok ai.

²⁶ Ase dob das ia i Jerusalem, isuba ma pasaorhon dirini bani susian ai, tapi haganup do sidea mabiar mangidahsi, ai seng porsaya sidea, na dob gabe susian ia.

²⁷ Tapi ijalo si Barnabas ma ia, anjaha iarahkon ma hubani apostel ai; ibaritahon ma bani sidea sonaha pangidahni bani Tuhan in, na marsahapkonsi, anjaha sonaha torang ni parambilanonna i Damaskus ibagas goran ni Jesus.

²⁸ Dob ai sai rap ma ia pakon sidea mardalani i huta Jerusalem, marhinsah ni uhur marambilan ibagas goran ni Tuhan in.

²⁹ Marsahap anjaha marsual do ia pakon halak Jahudi parhata Gorik; tapi martahi-tahi do sidea, sihol mambunuhsi.

³⁰ Dob tarbotoh ai bani sanina-sanina ai, itaruhkon sidea ma ia tuad hu Kesarea, lanjar isuruh ma laho hu Tarsus.

³¹ Ase mardamei-damei ma kuria ai i sab Judea, Galilea ampa Samaria, anjaha lambin toguhni marparlahou ibagas biar bani Tuhan in, anjaha lambin roh bueini do sidea halani pangojur ni Tonduy Na Pansing.

Ipamalum si Petrus Sada Halak na Oyangan i Lidda

³² Sanggah na mardalani ai si Petrus i tongah-tongah ni haganup sidea, laho do ia homa marayak halak na mapansing na i Lidda.

³³ Jadi jumpahsi ma ijai sada halak, na margoran si Eneas, na oyangan anjaha na tibal-tibal bani podomanni ualuh tahun dokahni.

³⁴ Jadi nini si Petrus ma hu bani, “Ale Eneas, ipamalum Jesus Kristus ma ho! Jongjong ma ho, anjaha patorsa ma podomanmu!” Jadi mintor jongjong ma ia.

³⁵ Anjaha haganup do pangisi ni Lidda ampa Tanoh Saron mangidahsi, gabe idompakkon sidea ma Tuhan in.

Ipagoluh si Petrus si Tabita i Joppe

³⁶ Ia i Joppe, adong do sada halak susian naboru, na margoran si Tabita, artini Balua, na surung

mangkorjahon na madear ampa mambahen idop ni uhur.

³⁷ Boritan do ia bani panorang ai lanjar matei. Dob iparidi ia, inahkon ma bani kamar pardatas.

³⁸ Dohor do huta Lidda hun Joppe; jadi dob ibogei susian ai, na i Lidda do si Petrus, gabe isuruh sidea ma dua halak laho marayaksi, mangindohon bani, ase sapodas-podasni ia roh marayak sidea.

³⁹ Jadi mintor bingkat do si Petrus, mangkasomani sidea, anjaha dob das iboan ma ia hu kamar pardatas ai. Jadi marrohan ma hubani sagala na mabalu, tangis-tangis, anjaha ipatuduhkon sidea ma bani baju-baju ampa mantel, na pinauli ni si Tabita, sanggah rap ope ia pakon sidea.

⁴⁰ Jadi isuruh si Petrus ma sidea hu darat, anjaha manrogop ma ia laho martonggo. Idompakkon ma bangkei ai, lanjar nini ma, “Ale Tabita, jongjong ma!” Gabe ipabodak ma matani, anjaha dob ididah si Petrus, hundul ma ia.

⁴¹ Isurdukkon si Petrus ma tanganni laho pajongjongkonsi. Dob ai idilo ma halak na mapansing ai ampa na mabalu ai, gabe iarahkon ma naboru ai manggoluh hu lobei ni sidea.

⁴² Jadi sar ma barita ai i sab Joppe, gabe buei ma na porsaya bani Tuhan in.

⁴³ Hun dokah do ia marianan i Joppe, tondok bani sada halak, na margoran si Simon, tukang sipatu ai.

Hamubahon ni Uhur ni si Kornelius

10¹ Tapi adong ma i Kesarea sada halak, na margoran si Kornelius, kopala tentara bani pasukan Italia.

² Na daulat do ia anjaha na marhabiaran bani Naibata rap pakon ganup rumah tanggani. Buei do ia marsibere-bere bani bangsa in, anjaha tongtong do ia martonggo bani Naibata.

³ Bani na sadari, hira-hira pukul tolu arian, ididah ma torang bani panonggoranni sada malekat ni Naibata, roh marayaksi anjaha marsahap hu bani, “Ale Kornelius!”

⁴ Ikawahkon ma ia anjaha ihatahon ibagas biar, “Ai aha in Tuhan?” Gabe nini ma, “Ia tonggomu ampa idop ni uhurmu domma das ai hu lobei ni Naibata, anjaha idingat do ai.”

⁵ Ai pe suruh ma halak hu Joppe mangalopi si Simon, na margoran homa si Petrus,

⁶ na tondok bani si Simon, tukang sipatu ai, na marrumah i topi laut.

⁷ Ase laho honsi malekat na marsahap pakonsi ai, idilo ma juakjuakni dua halak ampa sada tentara na daulat maruhur, na mangkasomanisi tongtong.

⁸ Ipatugah ma haganup ai bani sidea, dob ai isuruh ma sidea hu Joppe.

**Pangajari ni Naibata bani si
Petrus Marhitei Panonggoran**

⁹ Patarni ai, sanggah i tongah dalan ope sidea marayak huta ai, naik do si Petrus hu kamar pardatas laho martonggo, ai ma hira-hira tongah arian.

¹⁰ Gabe loheian ma ia, sihol mangan ma ia. Jadi sanggah na pasirsirhon ai sidea bani, marpanonggoran ma ia.

¹¹ Ididah ma buha langit, anjaha turun ma songon hiou bolag, martali bani suhi-suhini na ompat ai, itantan hu toruh.

¹² Ibagas ai adong do bagei ni siompat nahei ampa na manjulur i atas tanoh on ampa manuk-manuk na i awang-awang.

¹³ Dob ai adong ma sada sora na marsahap hu bani, “Ale Petrus, jongjong ma, sayati anjaha pangan ma!”

¹⁴ Jadi nini si Petrus ma, “Pantang Tuhan! Seng onggah hupangan na butak atap na so borsih.”

¹⁵ Dob ai roh ma use sada sora paduahalihon, mangkatahon hu bani, “Na dob pinapansing ni Naibata ulang hatahon butak!”

¹⁶ Tolu hali do masa sonai, dob ai mintor tarangkat ma hiou ai hu langit.

¹⁷ Sanggah sungkun-sungkun ope si Petrus pasal arti ni panonggoran, na nididahni ai, domma

jongjong i lobei ni labah ai suruhan ni si Kornelius, na mangindahi rumah ni si Simon ai.

¹⁸ Idilohon sidea ma manungkun, atap ijai do tondok si Simon, na margoran si Petrus.

¹⁹ Anjaha sanggah na marpingkir ai ope si Petrus pasal na nididahni ai, nini Tonduy in ma hu bani, “Adong do dua halak, na mangindahi ho!

²⁰ Jongjong ma ho, susur ma; laho ma ho rap pakon sidea, ulang sangsi uhumu, ai Ahu do na marsuruh sidea!”

Ambilan ni si Petrus

Parsogop ni Tonduy Na Pansing bani Parbegu

²¹ Jadi susur ma si Petrus manjumpahkon halak ai, nini ma, “Ahu do na pinindahan nasiam ai! Aha do halani ase roh nasiam?”

²² Dob ai nini sidea ma, “Ia si Kornelius, sada kopala ni tentara, sada halak na pintor uhur anjaha sihabiari Naibata, na dear baritani bani haganup halak Jahudi, dapotan parentah do ia humbani sada malekat na mapansing, ase ialopi ham hu rumahni, laho manangihon hata hun bamu.”

²³ Jadi iarahkon ma sidea hu rumah, anjaha itamuei ma. Patarni ai bingkak ma ia rap pakon sidea, anjaha dihut do deba hasoman na hun Joppe mangkasomanisi.

²⁴ Patarni ai das ma sidea i Kesarea. Domma paimahon si Kornelius, anjaha domma ipatumpu diha-diha ampa huan-huanni.

²⁵ Sanggah na masuk ai si Petrus, ialo-alo si Kornelius ma ia, manrogop ma ia marsombah hu bani.

²⁶ Tapi itogu si Petrus ma ia, nini ma, “Jongjong ma ham, ahu pe jolma do.”

²⁷ Anjaha turut marsahapi masuk ma sidea, anjaha domma buei halak tumpu dapotsi ijai.

²⁸ Dob ai nini ma hubani sidea, “Ibotoh nasiam do, pantang do bani halak Jahudi marayak atap marsaor bani bangsa na legan. Tapi domma ipatuduhkon Naibata bangku, na so bulih goranon halak butak atap lang borsih.

²⁹ Halani ai do, ase lang manjua ahu roh, sanggah na ialopi ahu. Husungkun ma sonari, aha do halani, ase isuruh nasiam na mangalopi ahu?”

³⁰ Dob ai nini si Kornelius ma, “Ompat ari na salpu, sangkan sanggah sonari, ai ma pukul tolu, martonggo do ahu i rumah on, jadi jongjong ma i lobeihu sada halak parhiou na marsinalsal.

³¹ Nini hu bangku, ‘Ale Kornelius, itangihon Naibata do tonggomu anjaha idingat do sibere-beremu.

³² Ai pe suruh ma hu huta Joppe na mandilo si Simon, na margoran si Petrus, tondok i rumah ni si Simon, tukang sipatu ai, i topi laut.’

³³ Jadi mintor husuruh ma na mangalopi ham, dear do pambahenanmu in, ai mintor roh do ham. Ai pe, domma tumpu hanami haganup ijon i lobei ni Naibata, sihol manangihon haganup na tinonahkon ni Tuhan in bamu.”

³⁴ Dob ai marsahap ma si Petrus, nini ma, “Domma tangkas ididah uhurhu, na so sididah bohi Naibata.

³⁵ Hun bani sagala bangsa tene, ijalo do sagala na mangkabiarisi anjaha na mangkorjahon hapintoron.

³⁶ Itongos do hata-Ni hubani anak ni Israel, anjaha iambilankon do damei marhitei Jesus Kristus; la do Tuhan ni haganup.

³⁷ Ibotoh nasiam do haganup na masa i sab tanoh Jahudi, mamungkah i nagori Galilea, dob salpu pandidion na binaritahon ni si Johannes,

³⁸ ai ma pasal Jesus, na hun Nasaret, na mininakan ni Naibata marhitei Tonduy Na Pansing ampa hagogohon. Mardalani do la mambahen na madear ampa pamalumkon haganup na siniaran ni setan, ai ihasomani Naibata do la.

³⁹ Hanami do saksi pasal haganup na binahen-Ni i tanoh Jahudi age i Jerusalem. Ibunuh sidea do la, igantungkon bani hayu.

⁴⁰ Ipapuho Naibata do la bani ari patoluhon, anjaha ipatalar do diri-Ni,

⁴¹ Seng hubani haganup, tapi pitah hubani saksi-saksi do, na dob ipilih Naibata hinan, ai ma hanami,

na rap mangan ampa minum pakon-Si dob puho la humbani na matei.

⁴² Iparentahkon do bannami, mangambilankon anjaha manaksihon bani halak na mabuei, paboa la do in, na dob tinotapkon ni Naibata hinan, gabe panguhum bani na manggoluh ampa na matei.

⁴³ Haganup do nabi manaksihon pasal-Si, paboa jaloon ni sagala na porsaya Bani do hasasapan ni dousa marhitei goran-Ni.”

⁴⁴ Jadi sanggah ihatahon si Petrus hata ai, sogop ma Tonduy Na Pansing bani haganup na manangar hata ai.

⁴⁵ Haganup halak na porsaya ai, ai ma halak Jahudi, na roh mangkasomani si Petrus, longang do halani iuseihon do homa sibere-bere ni Tonduy Na Pansing bani halak parbegu.

⁴⁶ Ai ibogei do sidea marsahap bani hata na legan mamuji Naibata.

⁴⁷ Jadi nini si Petrus ma, “Ai pag ma diri mamandang didion halak on, na dob manjalo Tonduy Na Pansing songon hita?”

⁴⁸ Gabe ihatahon ma didion sidea marhitei goran ni Tuhan Jesus Kristus. Dob ai ielek-elek sidea ma ia, ase marianan lobei ia i tengah-tengah ni sidea piga-piga dokah.

Hatorangan ni si Petrus Pasal na Masa i Kesarea

11 ¹Jadi ibogei apostel ampa sanina na i Judea ma, na dob dihut do hape sipajuh begu-begu manjalo hata ni Naibata.

²Gabe ihata na porsaya humbani Jahudi ma si Petrus, das honsi ia i Jerusalem, nini sidea ma,

³“Masuk do ham hape hu rumah ni halak na so marsunat, anjaha rap mangan do ham pakon sidea!”

⁴Jadi jozor ma humbani mulani ipatorang si Petrus na masa ai, nini ma,

⁵“Sanggah martonggo ahu i huta Joppe, huidah ma ibagas panonggoran sada ianan songon hiou na bolag, martali haompatsi suhi-suhini, turun hun langit, itantan hu lobeihu.

⁶Jadi sanggah na hukawahkon ai, laho papangkeihon, huidah ma binatang siompat nahei ni tanoh on, binatang sipanjulur ampa na liar ampa manuk-manuk na i awang-awang.

⁷Anjaha hubogei ma sora na mangkatahon hu bangku, ‘Jongjong ma, Petrus, sayati ma anjaha pangan ma!’

⁸Tapi ningku ma, ‘Lang, Tuhan! Ai lang onggga ope na butak atap na so pansing masuk hu pamanganku.’

⁹Jadi marbalos ma sora ai paduahalihon hun langit, ‘Na dob pinapansing ni Naibata, ulang hatahon ai butak!’

¹⁰ Tolu hali do masa na sonai, dob ai itarik ma haganupan ai hu langit.

¹¹ Bani panorang ai jongjong ma tolu halak i lobei ni rumah ianannami, ai ma na sinuruh hun Kesarea, marayak ahu.

¹² Anjaha ihatahon Tonduy in do bangku, ase ulang sangsi uhurhu mangirikkon sidea. Sanina na onom halak on do mangkasomani ahu, gabe masuk ma hanami hu rumah ni halak ai.

¹³ Ibaritahon do bannami sonaha pangidahni bani malekat ai jongjong i rumahni, na mangkatahon bani, 'Suruh ma hu Joppe na mangalopi si Simon, na margoran si Petrus.

¹⁴ Hatahononni do bamu hata na sihol paluahkon ham ampa haganup sinrumahmu!'

¹⁵ Tapi sanggah mulai ope ahu marambilan ijai, sogop ma Tonduy Na Pansing bani sidea, songon na hu banta mungkahni ondi.

¹⁶ Jadi taringat ma ahu bani hata ni Tuhan in, na mangkatahon, 'Bah do ididihon si Johannes, tapi Tonduy Na Pansing do didihononkon bani nasiam!'

¹⁷ Jadi, anggo ibere Naibata do bani sidea sibere-bere-Ni songon na hu banta, dob porsaya sidea bani Tuhan Jesus Kristus, sonaha ma boi ahu manlanglangi Naibata?"

¹⁸ Ase dob ibogei sidea ai, sip ma sidea. Ipuji sidea ma Naibata, nini ma, "Ase dihut do hape bani

sipajuh begu-begu ibere Naibata hamubahon ni uhur, ase manggoluh.”

Pasal Kuria na i Antiokia

¹⁹ Ia halak na merap ai, pangkorhon ni parburuon marhalanohon ni si Stepanus, laho ma hu Penesia, hu Pulou Kiprus ampa hu Antiokia, anjaha marambilani do sidea, tapi pitah hubani halak Jahudi do hansa.

²⁰ Tapi adong do deba humbani sidea, na marasal hun Kiprus ampa Kirene, na roh hu Antiokia, gabe ibaritahon sidea do homa ijai Tuhan Jesus hubani halak Gorik.

²¹ Anjaha ihasomani tangan ni Tuhan in do sidea; gabe buei do na gabe porsaya, na mandompakkon Tuhan in.

²² Tarbogei ma pasal ai hu kuria na i Jerusalem, gabe isuruh sidea ma si Barnabas hu Antiokia.

²³ Das ma ia hujai, ididah ma idop ni uhur ni Tuhan in, gabe malas ma uurni; iojur ma sidea haganup, ase poltik uhur ni sidea marsijoloman bani Tuhan in,

²⁴ ai halak sidear uhur do ia, gok Tonduy Na Pansing ampa haporsayaon; buei do halak na gabe tartogu bani Tuhan in.

²⁵ Jadi laho ma ia hu Tarsus, mangindahi si Saulus, anjaha dob jumpahsi iboan ma ia hu Antiokia.

²⁶ Anjaha adong do sidea, na rap ai pakon kuria ai, satahun dokahni; buei do halak na iajari sidea. I Antiokia do mulai igoran susian ai halak Kristen.

Ilumbahon Nabi Agabus Lohei Maningting

Pangurupion ni Kuria Antiokia bani Halak Kristen na i Jerusalem

²⁷ Bani panorang ai roh ma nabi-nabi hun Jerusalem hu huta Antiokia.

²⁸ Jadi roh ma sada halak humbani sidea, na margoran si Agabus, gabe ipatugah ma marhitei Tonduy in pasal lohei maningting, na sihol sogop hu sab tanoh on, ai ma na tongon masa sanggah panrajaion ni si Klaudius.

²⁹ Jadi sapanriah ma susian ai manongos tumpak, domu hubani na tarbahensi bei, hubani sanina na i Judea.

³⁰ Saud ma ibahen sidea ai, itongos ma ai hubani sintua-sintua na ijai ai marhitei si Barnabas ampa si Saulus.

Ibunuh si Herodes Agrippa si Jakobus

Hona Tahan si Petrus ampa Parluahni

12 ¹ Hira-hira bani panorang ai ma mardas tangan raja Herodes bani piga-piga halak pagori ni kuria ai, laho mangarsik sidea.

² Ibunuh do si Jakobus, ai ma sanina ni si Johannes, marhitei podang.

³ Anjaha dob ididah, marosuh do Jahudi mangidah ai, gabe inunut ma, itangkap ma pakon si Petrus, ai ma sanggah panorang mangankon ruti na so marragi.

⁴ Jadi dob itangkap, ipamasuk ma ia hubagas tutupan, anjaha iondoskon ma ia jagaon ni ompat bagian siparjaga, ganup bagian ompat halak, ase dob salpu pesta ai, arahkonon ma ia hu lobei ni na mabuei, ninuhurni.

⁵ Ase sonai ma hona jaga si Petrus ibagas tutupan ai; ia kuria ai sai inunut do manonggohonsi bani Naibata.

⁶ Bornginni ai, paima ondoskononkon ni si Herodes ia, modom do ia i holangkolang ni dua tentera, tarsangkut bani dua gari, anjaha adong do homa na manjaga i lobei ni tutupan ai.

⁷ Tapi tonggor ma, roh ma sada malekat ni Tuhan in, anjaha marsinalsal ma sada panondang i kamar ai. Idugur ma i lambung ni si Petrus, laho mamuhoisi, nini ma, "Podas ma puho!" Anjaha mangkatektek ma gari ai humbani tanganni.

⁸ Nini malekat ai ma hu bani, "Marpakeian ma ho!" Jadi ibahen ma sonai. Ihatahon ope bani, "Pakei ma mantelmu, anjaha irikkon ma ahu!"

⁹ Jadi luar ma ia anjaha irikkon ma ia; seng ibotoh atap na tongon do sonai masa bani ibahen malekat ai, ai ninuhurni, na marpanonggoran do hansa ia.

¹⁰ Jadi dob ibontas sidea parjaga na parlobei ampa na paduahon, das ma sidea hu horbangan bosi, dalan dompak huta ai. Jadi buha sandiri ma ai i lobei ni sidea, gabe luar ma sidea bani sada dalan na i huta ai, dob ai malekat ai pe sirang ma hun bani.

¹¹ Jadi tarjolma ma si Petrus, nini ma, “Sonari ma hubotoh torang, na dob isuruh Tuhan in do malekat-Ni laho paluahkon ahu humbani tangan ni si Herodes ampa humbani sura-sura ni halak Jahudi.”

¹² Anjaha dob torang ai bani, laho ma ia hu rumah ni si Maria, inang ni si Johannes, na margoran homa si Markus; buei do ijai na martumpu, anjaha martonggo.

¹³ Anjaha dob ihartuk labah pardarat, laho ma sada juakjuak naboru, margoran si Rode, manangihon ai.

¹⁴ Dob itandai sora ni si Petrus do ai, halani malas ni uhurni, seng mintor ibuka labah ai, tapi marlintun ma ia hubagas anjaha ipatugah ma, na dob i labah ai do hape jongjong si Petrus.

¹⁵ Jadi ihatahon sidea ma bani, “Na podoan do ho!” Tapi sai ionjolhon do hatani ai. Gabe nini sidea ma, “Malekatni do ai!”

¹⁶ Tapi sai inunut si Petrus do mangkartuki. Dob ibuha, ididah sidea ma ia, gabe longang ma uhur ni sidea.

¹⁷ Jadi ihilaphon ma tanganni bani sidea mangkatahon sip, gabe ibaritahon ma, sonaha parpadarat ni Tuhan in bani hun tutupan ai. Ihatahon ma, “Patugah nasiam ma in bani si Jakobus ampa bani sanina-sanina in. Dob ai misir ma ia, laho bani ianan na legan.”

¹⁸ Anjaha dob siang ari, bulinsah tumang ma tentera ai, manguhurhon pasal na masa ai bani si Petrus.

¹⁹ Dob isuruh si Herodes na mangindahisi, hape lang jumpah, ipareksa ma parjaga ai, anjaha iparentahkon ma bunuhon sidea. Dob ai tuad ma ia hun Jerusalem hu Kesarea, anjaha ijai ma ia marianan.

Parmatei ni Raja Herodes

²⁰ Ia si Herodes, sogam do uhurni mangidah halak Tirus ampa Sidon. Gabe sauhur ma sidea roh manjumpahkonsi, anjaha dob jumpah sidea uhur ni si Blastus, manteri ni raja ai, ipindo sidea ma mardamei, halani humbani tanoh ni raja ai do roh ni sipanganon bani sidea.

²¹ Bani ari na dob tinotapkon ipakei si Herodes ma pakeian harajaonni; hundul ma ia bani paratasni anjaha ipadas ma hatani bani sidea.

²² Jadi idilohon na mabuei ai ma, “Sora ni Naibata do in, sedo sora ni jolma!”

²³ Tapi mintor ipukul malekat ni Tuhan in ma ia, halani seng bani Naibata ibere hasangapon; iharati gilok-gilok ma angkulani, lanjar matei.

²⁴ Tapi lambin manrarat do anggo hata ni Naibata.

²⁵ Ia si Barnabas ampa si Saulus mulak ma hun Jerusalem, dob ipadas sidea pangurupion ai. Iboan sidea do si Johannes, na margoran homa si Markus.

PARDALANAN SENDING NI SI PAULUS NA PARLOBEI

(bd. 13 ampa 14)

Parbingkat ni si Barnabas ampa si Paulus hu Nagori ni Parbegu

13 ¹ Adong do i Antiokia, bani kuria na ijai ai, nabi ampa guru, ai ma si Barnabas ampa si Simon, na ginoran si Niger, si Lucius na hun Kirene, si Manahen hasoman magodang ni raja Herodes ampa si Saulus.

² Jadi sanggah martonggo anjaha marpuasa sidea bani Tuhan in, nini Tonduy Na Pansing ma, “Papulig hanima ma bangku si Barnabas ampa si Saulus hubani horja siondoskonon-Ku bani sidea.”

³ Jadi marpuasa ma sidea anjaha martonggo, itampeihon ma tanganni bani sidea, laho paingkatkan.

⁴ Sidea pe, dob isuruh Tonduy Na Pansing, tuad ma hu Seloikia; hunjai markapal ma sidea hu Pulou Kiprus.

⁵ Das honsi sidea hu Salamis, iambilankon sidea ma hata ni Naibata bani rumah-rumah parguruan ni Jahudi; si Johannes do pangurupi bani sidea.

Si Barnabas ampa si Paulus i Pulou Kiprus

⁶ Dob ibontas sidea ganup pulou ai das hu Papos, jumpah sidea ma sada halak Jahudi, parsibalik mata anjaha nabi sipahulah-hulah, na margoran Bar-Jesus.

⁷ Tondok do ia bani panggomgomi Sergius-Paulus, sada halak na pantas maruhur. Idilo ma si Barnabas ampa si Saulus, sihol do bogeionni hata ni Naibata.

⁸ Ia si Elimas, parsibalik mata ai (*ai do arti ni goranni ai*), ilawan do sidea, laho manlanglangi panrajai ai, ase ulang porsaya.

⁹ Gabe inolnol si Saulus, na margoran homa si Paulus, na ginokan ni Tonduy Na Pansing ai ma ia,

¹⁰ nini ma, “Ho, na gok akal-akal ampa hajahaton, anak ni sibolis, imbang ni sagala hapintoron! Seng maronti ope ho, papeolhon dalan ni Tuhan na pintor in?

¹¹ Ai pe, tonggor ma, mangonai ma bam tangan ni Tuhan in! Ai pe pitung ma ho, seng be idahonmu mata ni ari.” Jadi mintor rambon anjaha golap ma ididah, dadap-dadap mando ia mangindahi na mambobaisi.

¹² Jadi porsaya ma panrajai ai, dob ididah na masa ai, anjaha longang do uhurni bani podah ni Tuhan in.

Si Barnabas ampa si Paulus i Asia na Etek

Ambilan ni si Paulus

¹³ Jadi marparau ma si Paulus ampa hasomanni hun Papos, gabe das ma sidea hu Perge, na i Pampilia. Tapi itadingkon si Johannes do sidea, mulak ma ia hu Jerusalem.

¹⁴ Itoruskon sidea do mardalan hun Perge, gabe das ma sidea hu Antiokia, na i Pisidia. Bani ari Sabat, laho ma sidea hu rumah parguruan lanjar hundul ma.

¹⁵ Dob salpu ibasa titah ampa surat ni nabi-nabi, isuruh sintua ni parguruan ai ma mangkatahon bani sidea, “Nasiam sanina, anggo adong hata sihatahonon nasiam bani na mabuei on, hatahon nasiam ma!”

¹⁶ Jadi jongjong ma si Paulus, ihilaphon ma tanganni anjaha nini ma, “Nasiam halak Israel ampa nasiam na mangkabiari Naibata, tangar nasiam ma!

¹⁷ Naibata ni bangsa Israel do mamilih ompungta, anjaha ipatimbul do bangsanta sanggah manginsolat i tanoh Masir, anjaha ipadarat do sidea hunjai marhitei tangan na pinagostong.

¹⁸ Ianju-anju do sidea hira-hira ompat puluh tahun i halimisan.

¹⁹ Dob iboiskon pitu bangsa i tanoh Kanaan, ibere Naibata ma tanoh ni sidea ai bahen parbagianan ni sidea, ai ma hira-hira ompat ratus lima puluh tahun dokahni.

²⁰ Dob ai, ibere ma bani sidea panguhum das bani si Samuel, nabi ai.

²¹ Dob ai mangindo raja ma sidea, gabe ibere Naibata ma bani sidea si Saul, anak ni si Kis, marga Benyamin, dokahni ompat puluh tahun.

²² Jadi dob ipaturun ia, ipabangkit Naibata ma si Daud gabe raja bani sidea, isaksihon do pasalsi, nini, 'Domma jumpah Ahu si Daud, anak ni si Jesse, harosuh ni uhur-Hu, sipadas sura-surang-Ku.'

²³ Hun bani ginomparni do iparoh Naibata bani Israel Sipaluah in, in ma Jesus, na pinarbagah-bagah in.

²⁴ Paima roh Ia, iambilankon si Johannes do pandidion hamubahon ni uhur bani haganup halak Israel.

²⁵ Anjaha laho marujung horja ni si Johannes, nini do, 'Ise do ahu ninuhur nasiam? Sedo ahu Ia,

niarapkon nasiam ai. I pudingku do la roh, hurang talup do ahu mananggali sipatu-Ni.'

²⁶ Nasiam sanina, ginompar ni si Abraham, na mangkabiari Naibata! Hu banta do itongos hata haluahon on.

²⁷ Ia pangisi ni Jerusalem ampa kopala-kopala ni sidea, halani seng itanda sidea la anjaha iarusi hata ni nabi, na binasa ganup ari Sabat, gabe iuhumi sidea ma la, laho pasaudkon ai.

²⁸ Age pe seng dong jumpah sidea halani, ase marutang hosah la, ipindo sidea do humbani si Latus ase ibunuh la.

²⁹ Ase dob ipasaud sidea haganup na tarsurat pasal-Si, ipasusur sidea ma la humbani hayu ai, anjaha ipatibal ibagas tanoman.

³⁰ Tapi ipapuhu Naibata do la humbani na matei.

³¹ Hun dokah do ipataridahkon diri-Ni hubani halak, hasoman-Ni tangkog hun Galilea hu Jerusalem, ai ma sonari, na manaksihon bani bangsa in.

³² Ambilan Na Madear on do iboan hanami bani nasiam, ai ma: Domma ipasaud Naibata bagah-bagah-Ni na bani ompungta, hu banta, ginompar ni sidea, marhitei na ipapuhu Jesus,

³³ songon na tarsurat bani Psalm dua, 'Anak-Ku do Ho, sadari on do Ho Hutubuhkon.'

³⁴ Anjaha, paboa na maningon puho do la humbani na matei, anjaha na so mulak be la hu hamarsikon, sonon do ihatahon, 'Berehonon-Ku do Bam pasu-

pasu na mapansing ampa na totap, na bani si Daud ai.'

³⁵ Anjaha bani Psalm na legan ihatahon do, 'Seng paturuton-Mu Na Pansing-Mu mangidah hamarsikon.'

³⁶ Ia si Daud, dob ipasaud rosuh ni Naibata bani goluhni, matei do ia, anjaha itanom hu lambung ni ompungni, gabe ididah do hamarsikon.

³⁷ Tapi anggo na pinapuhu ni Naibata, seng ididah hamarsikon.

³⁸ Ase nasiam sanina, botoh nasiam ma, na ambilankon do bani nasiam hasasapan ni dousa marhiteihon-Si,

³⁹ anjaha marhiteihon-Si ipintori do sagala na porsaya humbani haganup, na so boi pintor nasiam marhitei titah ni si Musa.

⁴⁰ Ase, jaga nasiam ma, ase ulang mangonai bani nasiam, na hinatahon ni nabi-nabi,

⁴¹ 'Tonggor ma, nasiam sipanrehei, longang ma anjaha magou; ai hubahen do sada horja bani panorang nasiam, sada horja na so hinaporsayaan nasiam, age pe adong na mambaritahon bani nasiam!'"

⁴² Sanggah na luar ai sidea, ipindo halak ai ma, ase ihatahon use hata ai bani sidea bani ari Sabat na mangihut hujai.

⁴³ Dob salpu partumpuan ai, buei ma humbani halak Jahudi ampa parguru na daulat mangihutkon

si Paulus ampa si Barnabas, gabe iambilani anjaha iojur ma sidea, ase totap sidea marianan ibagas idop ni uhur ni Naibata.

Pangayak-ayakon bani si Paulus ampa si Barnabas

⁴⁴ Anjaha bani ari Sabat na mangihut hujai, martumpu ma hira haganup pangisi ni huta ai, laho mambogei hata ni Tuhan in.

⁴⁵ Tapi dob ididah Jahudi buei ni jolma ai, marsimburu ma sidea, iimbang anjaha irehei sidea ma ambilan ni si Paulus.

⁴⁶ Dob ai nini si Paulus ampa si Barnabas ma ibagas hinsah ni uhur, “Patut namin bani nasiam parlobei ambilankononkon hata ni Naibata; tapi halani itulak nasiam do in, anjaha lang talup nasiam ninuhur nasiam parrupe i bani hagoluan sisadokah ni dokahni, jadi hubani halak sipajuh begu-begu ma hanami laho.

⁴⁷ Ai sonon do itonahkon Tuhan in bennami, ‘Hupajongjong do ho gabe panondang bani halak parbegu, ase iboan ho haluahon ronsi ujung ni tanoh on!’

⁴⁸ Mambogei ai marmalas ni uhur ma parbegu, anjaha ipuji sidea ma hata ni Tuhan in, gabe porsaya ma na dob tinontuhon hinan hu hagoluan sisadokah ni dokahni.”

⁴⁹ Gabe rarat ma hata ni Tuhan in hu sab tanoh on.

⁵⁰ Tapi ipajobu-jobu halak Jahudi ma puang-puang na sangap anjaha na daulat, sonai na sangap-sangap ni huta ai, gabe ibahen sidea ma pangayak-ayakon dompak si Paulus ampa si Barnabas, lanjar iusir ma sidea hun nagori ai.

⁵¹ Jadi ipaspaskon sidea ma orbuk na longkot bani nahei ni sidea, lanjar laho ma sidea hu Ikonium.

⁵² Ia susian ai gok do bani malas ni uhur ampa Tonduy Na Pansing.

Si Paulus ampa si Barnabas i Ikonium

14 ¹ I Ikonium pe masuk do sidea hu rumah parguruan ni Jahudi, anjaha sonai do homa ambilanni, gabe buei tumang ma na porsaya, halak Jahudi age halak Gorik.

² Ia halak Jahudi, na so ra porsaya, ipajobu-jobu anjaha ipamilas sidea ma uhur ni halak sipajuh begu-begu dompak sanina-sanina ai.

³ Hun dokah do sidea ijai, marhinsah ni uhur do sidea marambilan, mangunsagahkon Tuhan in, na mambere tanda ampa halongangan sibahenon ni sidea, laho manaksihon hata idop ni uhur in.

⁴ Marbolah dua ma pangisi ni huta ai, na deba hampit halak Jahudi, anjaha na deba nari hampit apostel ai.

⁵ Jadi manriah ma halak sipajuh begu-begu, halak Jahudi ampa kopala-kopalani sihol manggosam ampa manggijigi sidea.

⁶ Dob tarboge ai bani sidea, gabe lintun ma sidea hu huta na i nagori Likaonia, ai ma huta Litra ampa Derbe ampa huta-huta na ingot hujai;

⁷ Ijai pe iambilankon sidea do Ambilan Na Madear in.

Sada na Repat Ipamalum i Litra

Hona Pargijig si Paulus

⁸ Jadi adong ma sada halak i Litra, na hundul-hundul, seng margogoh naheini, repat humbani partubuhni, seng onnga boi ia mardalan.

⁹ Ibogei do si Paulus marambilan. Ikawahkon si Paulus ma ia anjaha ididah, na porsaya do ia, boi malum naboritni ai,

¹⁰ gabe ipagogoh ma sorani mangkatahon, “Pintor ma onjolhon naheimin!” Jadi mintor jongjong ma ia anjaha mardalan.

¹¹ Jadi dob ididah na mabuei ai na binahen ni si Paulus ai, ipagogoh sidea ma sorani, nini sidea ma ibagas hata Likaonia, “Domma susur banta naibata marrupa songonjolma!”

¹² Igoran sidea ma si Barnabas Naibata Sois, anjaha si Paulus Naibata Hermes, halani ia siparsahap.

¹³ Anjaha malim-malim ni Sois ai pe, na pinajongjong bani rumah panumbahan i lobei ni huta ai, iboan sidea ma lombu jonggi ampa bunga

hu horbangan ai, laho manggalang rap pakon halak na mabuei ai.

¹⁴ Mambogei ai Apostel Paulus ampa si Barnabas, irigati sidea ma hiouni, marlintun ma sidea manjumpahkon halak na mabuei ai, anjaha idilohon ma,

¹⁵ “Nasiam hasoman, aha do na binahen nasiam on? Jolma do age hanami, na marpangahapan songon nasiam, na mamboan Ambilan Na Madear bani nasiam, ase mulak nasiam humbani naibata nasiam na lang in hubani Naibata na manggoluh, na manompa langit, tanoh, laut ampa haganup isini.

¹⁶ Ipaturut do bani sundut na dob salpu haganup bangsa-bangsa marsidalani dalanni,

¹⁷ tapi age pe sonai, isaksihon do diri-Ni marhitei dear layak, ai ibere do bani nasiam udan hun langit ampa partahunan na madear, anjaha ipasabou do uhur nasiam marhitei sipanganon ampa malas ni uhur.”

¹⁸ Age sonai hata ai, mahol do tarlanglangi sidea halak na mabuei ai laho manggalang bani sidea.

¹⁹ Tapi roh do hujai halak Jahudi na hun Antiokia ampa Ikonium; iojur-ojur ma halak na mabuei ai, gabe ipargijig sidea ma si Paulus anjaha isarad hu darat ni huta ai, anjaha iagan sidea, domma matei ia.

²⁰ Tapi dob maringgot roh susian ai hu bani, jongjong ma ia, anjaha masuk ma hu huta ai. Patarni ai laho ma ia pakon si Barnabas hu Derbe.

**Mulak si Paulus ampa si Barnabas
hu Antiokia na i Siria**

²¹ Dob iambilankon sidea Ambilan Na Madear i huta ai, anjaha buei do iajari sidea na gabe susian, mulak ma sidea hu Listra, Ikonium ampa Antiokia,

²² laho patoguhkon uhur ni susian ai, anjaha mangojur sidea ase totap marhaporsayaan, nini sidea ma, “Maningon bontasonta do buei sitaronon laho masuk hubagas harajaon ni Naibata.”

²³ Dob ipabangkit sintua bani sidea bani ganup kuria, marhasoman tonggo ampa puasa, iondoskon ma sidea bani Tuhan, na hinaporsayaan ni sidea.

²⁴ Jadi ibontas sidea ma nagori Pisidia, gabe das ma hu Pampilia.

²⁵ Anjaha dob ihatahon sidea hata in i Perge, tuad ma sidea hu Atalia.

²⁶ Hunjai ma sidea marparau hu Antiokia; ijai do hinan iondoskon sidea hubani idop ni uhur ni Naibata, laho mangkorjahon horja na hinorjahon ni sidea ai.

²⁷ Anjaha dob das sidea, ipatumpu sidea ma kuria ai, anjaha ibaritahon sidea ma haganup na binahen ni Tuhan in marhitei sidea, ampa sonaha

pangungkap ni Tuhan in labah haporsayaon bani sipajuh begu-begu.

²⁸ Anjaha hun dokah do sidea ijai rap pakon susian ai.

Rapot ni Apostel-apostel i Jerusalem

Pasal Parmasuk ni Halak Sipajuh Begu-begu

15 ¹Tuad ma piga-piga halak hun Judea, na mangajarhon bani sanina-sanina ai, “Anggo lang tarsunat nasiam mangihutkon aturan, na binahen ni si Musa, seng boi nasiam maluah.”

²Jadi gogoh ma sidea isual anjaha ilawan si Paulus ampa si Barnabas, gabe isuruh ma si Paulus ampa si Barnabas ampa hasoman deba nari hu Jerusalem marayak apostel-apostel ampa pangintuai-pangintuai, laho patorangkon parsalisihan ai.

³Dob ipaingkat kuria ai sidea, idalani sidea ma Tanoh Penisia ampa Samaria, ibaritahon sidea ma ijai parmubah ni uhur ni halak sipajuh begu-begu, gabe malas tumang ma uhur ni sanina-sanina ai ibahen.

⁴Das honsi sidea hu Jerusalem, ialo-alo kuria ai, pakon apostel-apostel ampa pangintuai ai ma sidea, gabe ibaritahon sidea na roh ai ma buei ni na binahen ni Naibata marhitei sidea.

⁵ Tapi jongjong ma deba humbani Golongan Parisei, na dob gabe porsaya, ihatahon maningon sunaton do sidea anjaha ojuron mandalankon titah ni si Musa.

⁶ Dob ai martumpu ma apostel ai ampa pangintuai ai laho mansahapkon parsahapan ai.

⁷ Dob dokah sidea marsual, jongjong ma si Petrus, nini ma bani sidea: “Nasiam sanina, ibotoh nasiam do, na girah do ahu ipilih Naibata i tongah-tongah nasiam, laho patugahkon Ambilan Na Madear in bani halak sipajuh begu-begu, ase porsaya sidea.

⁸ Naibata, sitanda uhur in do manaksihon sidea marhitei na mambere Tonduy-Ni bani sidea, songon na hu banta.

⁹ Seng adong ubah ni hita pakon sidea ibahen Naibata, dob ipaborsih uhur ni sidea marhitei haporsayaon.

¹⁰ Anggo sonai, mase ma lajouon nasiam nuan Naibata, marhitei na manampeihon pasangan bani tangkuhuk ni susian in, na so tarusung bapanta atap hita pe?

¹¹ Marhitei idop ni uhur ni Tuhan Jesus do, ase maluah hita ihaporsayai uhurta; sidea pe sonai do.”

¹² Dob ai sip ma haganup na martumpu ai, manangar hata ni si Barnabas ampa si Paulus, na mambaritahon buei ni tanda ampa halongangan na binahen ni Naibata i tongah-tongah ni sipajuh begu-begu marhitei sidea.

¹³ Ase dob salosei sidea marsahap, marbalos ma si Jakobus, nini, “Nasiam sanina, tangihon nasiam ma hatangkon!

¹⁴ Domma ipatugah si Simon, sonaha baru on panatap ni Naibata, mamilih bani diri-Ni na gabe bangsa-Ni humbani halak sipajuh begu-begu.

¹⁵ Anjaha mardomu do ai bani hata ni nabi-nabi, songon na tarsurat in,

¹⁶ ‘Dob salpu in mulak ma Ahu, laho patureihon use lampolampo ni si Daud na dob marumbak in; ulakan-Ku do padearhon na dob maseda in, pajongjongon-Ku do use in,

¹⁷ ase ipindahi na tading in ma Tuhan, ampa haganup sipajuh begu-begu, na manjujung goran-Ku,’

¹⁸ nini Tuhan, sibahen in, ai ma dob binotoh humbani na basaia.

¹⁹ Halani ai, mangihutkon timbanganku, lang be sisunsahan halak sipajuh begu-begu na mandompakkon Naibata.

²⁰ Tapi naaturhon ma bani sidea, ase ipantangkon ma parnaibataon na legan, parriah-riahon, mangankon daging ni pinahan na matei seng sinayat ampa daroh.

²¹ Ai humbani na basaia pe adong do bani ganup huta na mangambilankon si Musa, ai ibasa do suratni ganup ari Sabat bani parguruan.”

Surat Tongosan bani Halak Kristen na i Antiokia

²² Dob ai iputuskon apostel-apostel, pangintuai-pangintuai ampa haganup kuria ai ma mamilih piga-piga halak hun tengah-tengah ni sidea, sisuruhon hu Antiokia rap pakon si Paulus ampa si Barnabas, ai ma si Judas, na igoran homa si Barnabas, ampa si Silas, si pambobai bani sanina-sanina ai.

²³ Ia hata ni surat, sibonanon ni sidea ai, ai ma: “Hanami sanina nasiam, apostel-apostel ampa pangintuai-pangintuai, manongos tabi do bani nasiam hasoman na humbani sipajuhbegu-begu, na marianan i huta Antiokia, nagori Siria ampa Silisia.

²⁴ Ibogei hanami, adong do piga-piga halak hun tengah-tongahnami, na so sinuruhnami, roh manggeori ampa mambumbangi uhur nasiam marhitei podah ni sidea.

²⁵ Halani ai sauhur do hanami mamilih halak sisuruhon bani nasiam rap pakon si Barnabas ampa si Paulus, na hinaholongan in,

²⁶ na ra marnalangkon hosahni halani goran ni Tuhan Jesus Kristus.

²⁷ Ase isuruh hanami do si Judas ampa si Silas, ase dihut sidea padaskon hata in bani nasiam.

²⁸ Dear ma nini Tonduy Na Pansing ampa hanami, na so paporsanonkon be bani nasiam, sobali na porlu on:

²⁹ Pantangkon nasiam ma galangan bani sisombahon, daroh, daging ni pinahan na matei seng sinayat ampa parriah-riahon. Anggo ibalosi nasiam in, dear ma in. Horas ma!”

³⁰ Ase ipaingkat ma sidea, gabe das ma hu Antiokia; dob ipatumpu sidea na mabuei ai, ipadas ma surat ai bani sidea.

³¹ Anjaha dob ibasa surat ai, malas ma uhur ni sidea, halani hata pangapohon ai.

³² Ia si Judas ampa si Silas, nabi do homa; buei do marsahap sidea ampa sanina ai, laho mapargogohi sidea.

³³ Dob hun dokah sidea ijai, ipaingkat sanina ai ma sidea ibagas damei, mulak hubani na marsuruh sidea.

³⁴ Ia si Silas, marosuh do uhurni tading ijai.

PARDALANAN SENDING NA PADUAHON

(bd. 15:35--18:22)

Marsirang si Paulus ampa si Barnabas

³⁵ Ia si Paulus ampa si Barnabas soh do lobei i Antiokia, gabe iambilankon sidea ma hata ni Tuhan in rap pakon halak na legan.

³⁶ Dob salpu piga-piga ari, nini si Paulus ma hubani si Barnabas, “Laho ma hita use mangidah saninanta

in, bani ganup huta na dob niambilananta bani hata ni Naibata, atap na sonaha do sidea.”

³⁷ Ninuhur ni si Barnabas, sihol ma dihut arahkononkon si Johannes, na margoran si Markus.

³⁸ Tapi ninuhur ni si Paulus, seng dear be dihut ia, halani na dob itadingkon sidea i Pampilia, anjaha seng ihasomani sidea bani horja ai.

³⁹ Gabe tubuh ma paringoran i tongah-tongah ni sidea, pala sirang, gabe iarahkon si Barnabas ma si Markus marparau hu Pulou Kiprus.

⁴⁰ Jadi ipilih si Paulus ma si Silas bahen hasomanni, gabe bingkak ma sidea, dob iondoskon sanina-sanina ai sidea, bani idop ni uhur ni Tuhan in.

⁴¹ Jadi idalani sidea ma Siria pakon Kilikia, laho patoguhkon uhur ni kuria ai.

Iarahkon si Paulus si Timoteus hun Listra

16 ¹ Dob ai das ma sidea hu Derbe ampa Listra. Ijai adong ma sada susian, na margoran si Timoteus, anak ni sada boru Jahudi na porsaya, tapi halak Gorik do anggo bapani.

² Dear do baritani isaksihon hasoman na i Listra ampa Ikonium.

³ Jadi ipangindo uhur ni si Paulus ma ia hasomanni laho. Iboan ma ia anjaha isunat, halani halak Jahudi na ijai ai, ai ganup do mambotoh halak Gorik do bapani.

⁴ Tapi sanggah na isiari sidea huta-huta ai, iondoskon ma bani sidea aturan sidalankonon ai, na dob tinotapkon ni apostel ampa pangintuai-pangintuai ai i Jerusalem.

⁵ Gabe lambin toguhni ma haporsayaon ni kuria ai, anjaha lambin tambah do bilangan ni sidea ganup ari.

⁶ Tapi ibolus sidea ma nagori Prigia ampa Galatia, halani ilanglangi Tonduy Na Pansing sidea mangkatahon Hata in i Asia.

⁷ Jadi dob das sidea hampit Nagori Misia, iuji sidea ma laho hu Bitinia, tapi lang ilopas Tonduy ni Jesus sidea.

⁸ Gabe ilopusi sidea ma Misia, anjaha tuad ma hu Troas.

Si Paulus i Troas

Mandipar hu Makedonia

⁹ Jadi taridah ma bani si Paulus sada panonggoran borngin-borngin. Jongjong ma sada halak Makedonia mangelek-eleksi, nini, “Mandipar ma ham hu Makedonia, urupi ham ma hanami!”

¹⁰ Jadi dob ididah panonggoran ai, mintor iuhurhon hanami ma laho hu Makedonia, ai itimbangi hanami, Naibata do na mandilo hanami, laho mangambilankon Ambilan Na Madear bani sidea.

¹¹ Dob ai marparau ma hanami hun Troas torus hu Samotrake, anjaha sadari patarni ai hu Neapolis.

¹² Hunjai hu Pilippi, ai ma huta pamatang ni Makedonia anjaha jajahan ni Rom. I huta ai ma hanami soh piga-piga ari.

¹³ Sanggah ari Sabat luar ma hanami hu darat ni huta ai, hubani sada bah; hu partonggoan na niarapkon ni uhurnami, anjaha hundul-hundul ma hanami ijai marsahap-sahap pakon naboru na martumpu ijai.

Parmubah ni Uhur ni si Lidia ampa Sijaga Tutupan

¹⁴ Jadi adong ma sada naboru, na margoran si Lidia, partiga-tiga hiau sigenger, hun huta Tiatira, sisombah Naibata. Ibuka Naibata ma uhurni gabe iparimbagaskon ma na hinatahon ni si Paulus.

¹⁵ Ase dob tardidi ia rap pakon parrumahni, iojur ma hanami, nini, “Anggo na tongon do ahu porsaya bani Tuhan in, ninuhur nasiam, roh ma nasiam tondok hu rumahku.” Igogohkon do mangojur-ojur hanami.

¹⁶ Jadi masa ma, sanggah laho hanami hu partonggoan, pajumpah ma hanami pakon sada jabolon naboru sipartondung; buei do untung ni tuanni humbani partondungonni ai.

¹⁷ Ipaihut-ihut ma si Paulus ampa hanami lanjar mardilo-dilo: “Juakjuak ni Naibata Sitimbulan in do halak on, na patugahkon dalan haluahon bani nasiam!”

¹⁸ Sonai ma ibahen ganup ari. Tapi sogam do uhur ni si Paulus mangidah ai, marhusor ma ia, marsahap bani tonduy ai, nini ma, “Huparentahkon ma bam marhitei goran ni Jesus Kristus, luar ma ho hun bani.” Jadi luar ma ia bani na satongkin ai.

¹⁹ Tapi dob ididah tuanni ai, na so adong be pansarian siaraphonon hun bani, itangkap sidea ma si Paulus ampa si Silas anjaha isarad ma hu tiga hu lobei ni pamarentah.

²⁰ Anjaha dob iboan sidea ia hubani panguhum ai, nini sidea ma, “Halak Jahudi do halak on, na manggeori hutanta on.

²¹ Ibaritahon sidea do adat, na so bulih jaloan barang horjahononnami, ai halak Rom do hanami.”

²² Halak na mabuei ai pe marurup do manlawan sidea, gabe ihatahon panguhum ai ma rintakon hiou ni sidea, ase ilonsingi.

²³ Dob dokah sidea hona lonsingan, idabuh ma sidea hubagas tutupan, anjaha iparentahkon ma bani sijaga tutupan, ase pangkei sidea ijaga.

²⁴ Domu hubani parentah, na jinaloni ai, ipamasuk ma sidea hu tutupan parbagas, anjaha poltik ma ibayangkon nahei ni sidea.

²⁵ Tapi marayak tongah borngin, martonggo ma si Paulus ampa si Silas mamuji Naibata ipatangi-tangi na tartutup ai.

²⁶ Tapi sompong ma masa lalou bolon, pala dugur onjolan ni tutupan ai, gabe mintor mangkabuha

ma haganup labah, tanggal ma age gari ni sidea haganupan.

²⁷ Jadi tarpuho ma sijaga tutupan ai, anjaha dob ididah domma buha ganup labah ni tutupan ai, isintak ma podangni laho mamunuh dirini, ai iagan domma maporus ganup na tartutup ai.

²⁸ Tapi ipagogoh si Paulus ma sorani mandilohon: “Ulang bahen ham hasedaon bamu, ai ijon do hanami haganup!”

²⁹ Jadi ipindo ma suluh, marlintun ma ia hubagas, anjaha manrogop ma ia hitir-hitir i lobei ni si Paulus ampa si Silas.

³⁰ Iarahkon ma sidea hu darat, nini ma, “Aha ma sibahenonku, nasiam tuannami, ase maluah ahu?”

³¹ Jadi nini sidea ma, “Haporsayai ma Tuhan Jesus, ase maluah ham pakon parrumahmu!”

³² Anjaha ihatahon sidea ma hata ni Tuhan in bani pakon bani haganup parrumahni.

³³ Anjaha bani panorang ai, bornginni ai, iarahkon ma sidea anjaha iburihi ma uguh ni sidea; dob ai mintor tardidi ma ia ampa haganup sidea na satangga.

³⁴ Iboan ma sidea hu rumahni, anjaha ipatorsa ma sipanganon bani sidea. Jadi malas ma uhurni ampa haganup sidea na sarumah, halani na dob porsaya ai sidea bani Naibata.

³⁵ Jadi dob siang ari, isuruh panguhum ai ma upas na mangkatahon, “Paluah ma halak in!”

³⁶ Jadi ipadas sijaga tutupan ai ma hata ai bani si Paulus, nini ma, “Domma isuruh panguhum ai na mangkatahon, ase paluahon nasiam. Ai pe hu darat ma nasiam, anjaha laho ma ibagas damei!”

³⁷ Tapi nini si Paulus ma bani sidea, “Halak Rom do hanami, hape ilonsingi do hanami i lobei ni halak na mabuei, seng palobei ipareksa, dob ai idabuh hu tutupan. Mintor sonai ma marponopponop sidea, sihol paluahkon hanami? Lang sonai, maningon sidea do roh padarat hanami!”

³⁸ Jadi ipatugah upas ai ma hata ai bani panguhum ai, gabe mabiar ma sidea dob ibogei halak Rom do hape sidea.

³⁹ Jadi roh ma sidea, mangelek ma sidea bani apostel ai. Dob iarahkon hu darat, iojur ma sidea, ase itadingkon huta ai.

⁴⁰ Ase dob mandarat sidea hun tutupan ai, laho ma sidea hu rumah ni si Lidia. Jadi dob ididah anjaha iapohi sanina-sanina ai, laho ma sidea.

Si Paulus pakon si Silas i Tessalonika ampa Beroa

17 ¹ Anjaha ibontas sidea ma Ampipolis ampa Apollonia, gabe das ma sidea hu Tessalonika. Adong do ijai rumah parguruan ni halak Jahudi.

² Jadi songon na somal, masuk ma si Paulus hujai, anjaha marsahap ma ia bani sidea tolu ari Sabat tuntun humbani surat in,

³ patugahkon ampa patorangkon, paboa na maningon marsitaronon anjaha puho do use Kristus in humbani na matei, anjaha ihatahon, “Jesus, na hubaritahon in bani nasiam, in do Kristus in.”

⁴ Deba humbani sidea marhatongonkon ai, gabe mardomu hubani si Paulus ampa si Silas; sonai homa halak Gorik sihabiari Naibata, buei tumang, age naboru na sangap pe humbuei do.

⁵ Tapi subil do uhur ni halak Jahudi, gabe iarahkon sidea ma piga-piga jolma na jahat laho pajobu-jobu halak na mabuei ai, gabe geor ma haganup huta ai. Martumpu ma sidea i lobei ni rumah ni si Jason laho mamboan si Paulus ampa si Silas hu lobei ni sidang rayat.

⁶ Tapi halani seng jumpah sidea, isarad ma si Jason ampa piga-piga hasoman ai hu lobei ni pamarentah kota ai, lanjar mardilo-dilo: “Roh do homa hu banta on sigeori sab dunia on,

⁷ anjaha si Jason do manjalo sidea ibagas rumahni. Haganup do sidea siimbang aturan ni Kesar, ai ihatahon, adong do raja na legan, ai ma Jesus.”

⁸ Geor do ibahen sidea halak na mabuei ampa pamarentah kota pabogei-bogei ai.

⁹ Dob ijalo sidea pe jaminan humbani si Jason ampa halak na legan ai, ase ipaluah sidea.

¹⁰ Jadi mintor ipabingkat sanina ai ma si Paulus ampa si Silas, bornginni ai hu Beroa, anjaha dob das hujai, laho ma sidea hu rumah parguruan ni Jahudi.

¹¹ Bujuran do halak na ijai ai ase na i Tessalonika, ai malas do uhur ni sidea manjalo hata in, anjaha ganup ari do itangkasi Surat in atap na sintong do sonai.

¹² Buei do humbani sidea na gabe porsaya, nai homa buei humbani halak Gorik, na sangap naboru age dalahi.

¹³ Tapi dob ibotoh halak Jahudi na i Tessalonika, na dob ibaritahon si Paulus homa hata ni Naibata i Beroa, roh ma sidea hujai, laho pajobu-jobuhon ampa manggeori halak na mabuei ai.

¹⁴ Jadi mintor ipaingkat hasoman ai ma si Paulus laho dompak laut; tading ma anggo si Silas ampa si Timoteus ijai.

¹⁵ Das do si Paulus itaruhkon sidea ronsi Aten, anjaha dob ai mulak ma sidea, dob ijalo sidea tonahni bani si Silas ampa si Timoteus mangkatahon, ase roh sidea sapodas-podasni mangkasomanisi.

Ambilan ni si Paulus i Aten

¹⁶ Sanggah na ipaima-ima si Paulus sidea i Aten, gok ringis tumang ma uurni ibagas, mangidah buei ni gana-gana i huta ai.

¹⁷ Jadi sai iparsahapkon do i rumah parguruan halak Jahudi ampa sihabiyari Naibata, sonai homa ari-ari i tiga halak na roh hujai.

¹⁸ Marsual ma deba parpilsapat Epikurei ampa Stoiki pakonsi. Deba mangkatahon, “Aha do na sihol hatahonon ni sibuei sahap in?” Na deba mangkatahon, “Siambilankon naibata na legan do gakni on, ai ibaritahon do Jesus ampa parpuhoon humbani na matei.”

¹⁹ Jadi ialop sidea ma ia, iboan ma hu Areopagus, anjaha nini sidea ma, “Boi do botohonnamami atap podah baru aha do na hinatahonmin?”

²⁰ Ai songon na legan do podah na binobanmin bennami, sihol botohannami do pasal in.”

²¹ Ia halak Aten haganup ampa halak na legan na ijai, seng dong panorangni dompak na legan sobali na mansahapkon ampa na mambogei pingkiran baru.

²² Ase jongjong ma si Paulus i tongah-tongah ni Areopagus ai, nini ma, “Nasiam halak Aten, huidah bani haganup, pongkut do nasiam bani parugamaon.

²³ Ai sanggah na mardalani ahu, paidah-idah sisombahon nasiam, gabe jumpah ahu ma sada anjapanjap na marsurat, ‘Bani Naibata na so tinanda.’ Jadi na so tinanda, na sinombah nasiam ai, in do na sihol baritahononku bani nasiam.

²⁴ Ia Naibata, sitompa dunia on ampa haganup isini, in ma Tuhan ni langit ampa tanoh, seng marianan la i rumah pinauli ni tangan.

²⁵ Seng hurangan la, mambahen pala idangan ni tangan nijolma la, ai la do sibere bani ganup na tinompa hagoluhan ampa hosah ampa haganupan ai.

²⁶ Hun bani sadajolma do ijadihon bangsa ni manisia, ase iiani haganup sisik ni tanoh on. Itotaphon hinan do panorang ni ganup bangsa ampa parbalogan ni ianan bani sidea,

²⁷ ase ipindahi sidea Naibata, andohar tardadap sidea la, anjaha jumpahsi, ai seng daoh la humbani ganup hita.

²⁸ Ai ibagas diri-Ni do hita manggoluh, miut anjaha marhosah, songon na hinatahon ni deba pandoding nasiam, 'Ginompar-Ni do tongon hita.'

²⁹ Ai pe, anggo ginompar na marasal humbani Naibata do hita, ulang ma iagan uhurta, usih Naibata bani omas, barang bani pirak, barang bani batu na tinukangan atap na piningkiran ni uhur nijolma.

³⁰ Domma isalpuhon panonggor ni Naibata tahun haotoon, tapi anggo nuan ihatahon do bani haganup hajolmaon, ija-ija pe, ase ipaubah uhurni,

³¹ ai domma itontuhon sada ari paruhuman bani dunia on, ibagas hapintoron, marhitei sada halak na pinilih-Ni. Anjaha ibere do bani haganupjolma

dalan ase boi porsaya Bani, marhitei na ipuhoi la humbani na matei.”

³² Tapi dob ibogei sidea hatani ai pasal parpuhoon, manrisai ma na deba, anjaha na deba mangkatahon, “Sihol bogeionnami ope hatamu sahali nari pasal ai.”

³³ Dob sonai, laho ma si Paulus hun tongah-tongah ni sidea.

³⁴ Tapi adong do deba na mangihutkonsi, na gabe porsaya, songon si Dionisius, sada pagori ni Areopagus ai, ambah ni ai sada naboru, na margoran si Damaris, ampa deba nari hasoman ni sidea.

Si Paulus i Huta Korint

18 ¹ Dob ai bingkhat ma si Paulus hun huta Aten laho hu huta Korint.

² Jadi jumpahsi ma ijai sada halak Jahudi, na margoran si Akila, tubuh i Pontus, na roh baru hun Italia rap pakon parinangonni, si Priskilla, halani iparentahkon si Klaudius, maningon haganup halak Jahudi bungkas hun huta Rom.

³ Bani sidea ma ia marianan anjaha rap marhorja pakon sidea, halani sada hapandeian do sidea, ai ma martonun hiou tenda.

⁴ Marambilan do ia ganup ari Sabat i rumah parguruan, andohar marhatongon halak Jahudi ampa Gorik.

⁵ Ase dob roh si Silas ampa si Timoteus hun Makedonia, igogohi si Paulus ma marambilan, laho manaksihon bani Jahudi, paboa Jesus do Kristus in.

⁶ Halani manlawan sidea anjaha manrehei, ipaspaskon si Paulus ma hiouni, anjaha nini ma bani sidea: “Marsapata bani nasiam ma daroh nasiam! Borsih do anggo ahu. Hunjon-hujanan bani halak sipajuh begu-begu ma ahu laho.”

⁷ Lanjar misir ma ia hunjai, tondok ma ia bani sada halak na margoran si Titius Justus, sihabiar Naibata; rombankon rumah parguruan ai do rumahni.

⁸ Ia si Krispus, kopala ni rumah parguruan ai, porsaya do bani Tuhan in sonai haganup parrumahni; anjaha buei do halak Korint, dob ibogei ai, gabe porsaya anjaha tardidi.

⁹ Jadi nini Tuhan in ma bani si Paulus borngin-borngin marhitei sada panonggoran, “Ulang ho mabiar, tapi hatahon ma, ulang ho sip!

¹⁰ Ai Huhasomani pe ho, sahalak pe lang dong na mangkahua ho, na sihol mangagou ho; ai buei do halak Bangku i huta on!”

¹¹ Ijai ma ia marianan satahun onom bulan dokahni, mangajarhon hata ni Naibata bani sidea.

¹² Tapi sanggah si Gallio panggomgomi i Akaya, sapanriah ma halak Jahudi manlawan si Paulus, anjaha iboan ma ia hu paruhuman.

¹³ Nini sidea ma, “Isahap-sahapi halak on do jolma mambalosi Naibata marsilawanan bani titah in.”

¹⁴ Jadi sanggah sihol marsahap si Paulus, nini si Gallio ma dompak Jahudi, “Nasiam halak Jahudi! Ambit halani parkara hasalahan atap hajahaton, patut do bantuanku nasiam.

¹⁵ Tapi halani parsalisihan pasal podah ampa goran ampa titah nasiam do in, uhur nasiam ma ijin; seng ra ahu manguhumi na sonin.”

¹⁶ Jadi ipalaho ma sidea hun paruhuman ai.

¹⁷ Gabe roh ma sidea haganup manangkap si Sostenes, kopala ni rumah parguruan ai, ibogbogi sidea ma ia i lobei ni paruhuman ai, tapi seng isampuri si Gallio ai.

Pardalanan ni si Paulus Tiba Epesus hu Antiokia na i Siria

¹⁸ Tapi hun dokah ope si Paulus ijai; dob ai mamuhun ma ia humbani sanina-sanina ai, anjaha marparau ma ia hu Siria rap pakon si Priskilla ampa si Akilla. I Kenkerea, ipasuhurhon do jambulanni halani adong bagah-bagahni.

¹⁹ Das ma sidea hu Epesus anjaha itadingkon ma sidea ijai; ia sandiri laho do hu rumah parguruan, laho marsahap pakon halak Jahudi.

²⁰ Ipindo sidea do, ase hun dokah ia ijai, tapi seng ra ia.

²¹ Tapi sanggah na laho marsirang humbani sidea, ihatahon do, “Anggo marosuh Naibata, mulak do

ahu bani nasiam.” Dob ai misir ma ia marparau hun Epesus.

²² Dob das hu Kesarea, tangkog ma ia hu Jerusalem, anjaha dob itabi kuria ai, tuad ma ia hu Antiokia.

PARDALANAN SENDING NI SI PAULUS NA PATOLUHALIHON

(bd. 18:23--21:17)

²³ Ase dob hun dokah ia ijai, bingkak ma ia; ibontas ma nagori Galatia ampa Prigia, laho patoguhkon uhur ni haganup susian ai.

Si Apollos i Epesus

²⁴ Tapi roh ma hu huta Epesus sada halak Jahudi, na margoran si Apollos, tubuh i huta Aleksandria; halak na pentar do ia, na torang mambotoh surat in.

²⁵ Domma iajari ia pasal dalan ni Tuhan in, hinsah do uhurni marsahap anjaha torang do pamodahionni pasal Jesus; tapi pitah pandidion ni si Johannes do ibotoh.

²⁶ Ipungkah ma ibagas hinsah ni uhur marsahap ibagas rumah parguruan. Ibogei si Akilla ampa si Priskilla ma ai, gabe iarahkon sidea ma ia, anjaha ipatorang sidea ma bani tulimat pasal dalan ni Naibata.

²⁷ Jadi sanggah na sihol laho ia hu Akaya, ihadearhon sanina-sanina ai do ai, anjaha

manongos surat do sidea, mangkatahon, ase ijalo sidea ia. Anjaha dob das ijai, gabe pangurupi na banggal do ia bani halak na porsaya, marhitei idop ni uhur ni Naibata,

²⁸ ai torang-torang do italuhon halak Jahudi i lobei ni halak na mabuei, marhitei na mambuktihon humbani surat in, paboa Jesus do Kristus in.

Si Paulus i Huta Epesus

19 ¹ Tapi sanggah i huta Korint si Apollos, ibontas si Paulus ma bagian pardologan ni tanoh ai, anjaha das ma ia hu huta Epesus, gabe jumpahsi ma ijai deba susian ai.

² Ihatahon ma hubani sidea, “Domma ijalo nasiam Tonduy Na Pansing sanggah na gabe porsaya nasiam?” Jadi nini sidea ma hu bani, “Seng onggga ibogei hanami adong Tonduy Na Pansing!”

³ Isungkun ma sidea, “Ai pandidion aha do ijalo nasiam?” Balos ni sidea, “Pandidion ni si Johannes do.”

⁴ Nini si Paulus ma, “Ia pandidion ni si Johannes, na mangkatahon paubahkon uhur do, ai iojur do halak na mabuei mangkaporsayai na sihol roh hun pudini, ai ma Jesus.”

⁵ Mambogei ai, ipandidihon sidea bei ma dirini hubagas goran ni Tuhan Jesus.

⁶ Anjaha sanggah itampeihon si Paulus tanganni bani sidea, sogop ma Tonduy Na Pansing bani sidea, jadi marhata na legan ma sidea anjaha manjahai.

⁷ Adong do sidea haganup tarsapuluh dua halak na martumpu ai.

Ambilan ampa Halongangan na Binahen ni si Paulus i Epesus

⁸ Laho do ia hu rumah parguruan anjaha marambilani ma ia ijai tolu bulan dokahni, laho patorangkon ampa mangajarhon pasal Harajaon ni Naibata.

⁹ Tapi halani ipahengkeng na deba do uhurni, anjaha lang ra porsaya, ipabajan-bajan ope tene ugama ai i lobei ni na mabuei ai, gabe itadingkon ma sidea; iarahkon ma susian ai jadi i sikolah ni si Tiranus ma ia marambilan ganup ari.

¹⁰ Adong do dua tahun masa sonai, gabe haganup ma na marianan i Asia, mambogei hata ni Tuhan in, halak Jahudi age halak Gorik pe.

¹¹ Hagogohon na sumurung do ibahen Naibata marhitei tangan ni si Paulus,

¹² pala do saputanganni atap gonditni humbani angkulani iboan halak bani na boritan, gabe laho ma naborit ai humbani sidea anjaha luar tonduy na mabutak.

Halak Siusir Setan na i Epesus

¹³ Tapi adong ma deba halak Jahudi, na mardalandan, halak siusir setan, na mansuba manobut goran ni Tuhan Jesus bani na setanon, nini, “Huusir ma hanima marhitei Jesus, na niambilankon ni si Paulus!”

¹⁴ Ai adong do pitu halak anak ni sada malim ni Jahudi, na margoran si Skoia, na mambahen sisonai ai.

¹⁵ Tapi nini tonduy na butak ai ma mambalosi sidea, “Hutanda do Jesus, pasal si Paulus pe hubotoh do, tapi ise do hanima?”

¹⁶ Anjaha halak partonduy na butak ai pe, idorab anjaha magosam tumang ma sidea haganupan ibahen, gabe lintun ma sidea hun rumah ai, talanjang anjaha mangkaluha.

¹⁷ Ia na masa ai, tarbotoh do ai bani haganup halak Jahudi ampa halak Gorik, na marianan i huta Epesus, gabe roh ma biar bani sidea haganup, anjaha tunggung ma goran ni Tuhan Jesus.

¹⁸ Gabe roh ma buei halak na dob porsaya, mansopotkon anjaha patugahkon horja ponopan ni sidea.

¹⁹ Anjaha buei do sihorjahon hadatuon hinan, mamboan pustaha-pustahani, lanjar itutung ma ai i lobei ni halak na mabuei; hargani, adong do itaksir lima ribu duit pirak.

²⁰ Sonai ma lambin rarat hata ni Tuhan in anjaha lambin margogoh.

Sura-sura ni si Paulus

²¹ Dob salpu na masa ai, isurahon si Paulus ma mandalani nagori Makedonia ampa Akaya, dob ai laho hu Jerusalem, nini, “Dob hunjai ahu, maningon dihut do huta Rom idahonku.”

²² Jadi isuruh ma deba halak siparugas bani, ai ma si Timoteus ampa si Erastus, hu Makedonia; ia sandiri soh ope tongkin i Asia.

Hageoron na i Epesus

²³ Tapi tubuh ma ijia hageoron banggal halani ugama ai.

²⁴ Ai adong ma sada halak tukang pirak, na margoran si Demetrius, sipauli rumah-rumah ni naibata Artemis; buei do untung iparoh bani tukang-tukang ai.

²⁵ Ipatumpu ma tukang ai ampa parhorja ni sidea, jadi nini ma, “Ibotoh nasiam do, humbani horja on do pansarianta.

²⁶ Ididah anjaha ibogei nasiam do, seng pitah i Epesus on, tapi bani haganup Asia do, iojur lanjar ipagoling si Paulus buei halak. Nini: ‘Sedo na tongon naibata na pinauli ni tangan.’

²⁷ Anjaha seng pitah pansarianta marmara laho seda, dihut do naibata Artemis na banggal in, na

sinombah i sab dunia on, gabe hiri ma rumahni anjaha magou hamuliaonni.”

²⁸ Mambogei ai gok marah ma uhur ni sidea, anjaha mardilo-dilo, nini ma, “Na banggal do Artemis ni halak Epesus!”

²⁹ Jadi lutu ma huta ai, anjaha marurup ma sidea, laho hu ianan panontonan, lanjar isarad ma hujai si Gayus ampa si Aristarkus, halak Makedonia ai, hasoman sapardalanan ni si Paulus.

³⁰ Sihol do si Paulus laho hu tongah-tongah ni halak ai, tapi seng ilopas susian ai.

³¹ Pala do deba pangintuai na hun Asia, na marhuan pakonsi, marsuruh na mangkatahon hu bani, ase ulang laho ia hu panontonan ai.

³² Palegan-legan do hata ni surak-surak ni sidea, ai lutu tumang do partumpuan ai, anjaha buenan do sidea na so mambotoh, atap halani aha do sidea martumpu.

³³ Domu hubani ojur ni halak Jahudi, ipalobei ma si Aleksander humbani halak na mabuei ai, anjaha ia pe, ihilaphon ma tanganni laho mambere hatorangan bani halak na mabuei ai.

³⁴ Tapi dob ibotoh sidea, halak Jahudi do ia hape, rap marsurak-surak ma sidea, hira dua jam dokahni, “Banggal do Artemis ni halak Epesus!”

³⁵ Jadi ipasonang jurutulis ni huta ai ma halak na mabuei ai, nini, “Nasiam halak Epesus, ise na so mambotoh, paboa huta Epesus on do siparugas

bani naibata Artemis na bangga in, ampa bani gombarani, na madabuh hun langit?

³⁶ Halani na so tarparnalang do ai, ai pe sonang ma nasiam, anjaha ulang ma tarolos atap mambahen aha pe.

³⁷ Iboan nasiam do halak on hujon, seng sirampok rumah panumbahan sidea, atap pe sipahiri sisombahonta.

³⁸ Ai pe anggo adong pangaduan ni si Demetrius ampa hasomanni tukang dompak atap ise pe, adong do paruhuman atap panguhum; sidea ma marsiadian.

³⁹ Tapi anggo adong pangaduan nasiam na legan, bani pangadilan ma ai iputuskon.

⁴⁰ Ulang das hona aduhon hita halani halutuon sisadari on, ai seng dong tarbere hita alasan pasal halutuon on.”

⁴¹ Anjaha dob ihatahon ai, ipalaho ma tumpuan ai.

Paulus Laho hu Makedonia pakon hu Tanoh Gorik

20 ¹ Dob maronti na lutu ai, idilo si Paulus ma susian ai, anjaha dob marhata partadingan ia hubani sidea, bingkak ma ia hu Makedonia.

² Dob idalani nagori ai anjaha ipatoguh uhur ni sidea marhitei hatani, jadi das ma sidea hu tanoh Gorik.

³ Tolu bulan do ia soh ijai, anjaha halani ionggopi halak Jahudi ia, sanggah na laho marparau hinan

ia hu Siria, gabe ipaputus ma uhurni mulak hun Makedonia.

⁴ Na mangkasomanisi ai ma si Sopater, anak ni si Pirus hun Beroa, si Aristarkus ampa si Sekundus, halak Tessalonika, si Gayus hun huta Derbe pakon si Timoteus, si Tikikus, pakon si Tropimus na hun Asia.

⁵ Hun lobei do sidea laho, anjaha i Troas do hanami ipaima sidea.

⁶ Dob salpu pesta Paskah, bingkak ma hanami marparau hu Pilipi, anjaha palimaarihon pajumpah ma hanami pakon sidea i Troas, anjaha soh ma hanami ijai pitu ari dokahni.

Ipagoluh si Paulus si Oitikus

⁷ Bani ari parlobei ni minggu ai, sanggah martumpu hanami manopiki ruti, marambilan ma si Paulus bani sidea anjaha ipaganjang do ambilanni ai pala das tongah borngin halani sihol misir ia patarni ai.

⁸ Buei do suluh bani kamar pardatas ai, ianannami martumpu ai.

⁹ Jadi adong ma sada garama, na margoran si Oitikus, na hundul bani jandela; tartunduh do ia, sanggah na inunut si Paulus marambilan, gabe madabuh hu toruh humbani loteng patoluhon, anjaha domma matei sanggah hona angkat.

¹⁰ Jadi turun ma si Paulus, ijomba ma ia lanjar iabing, anjaha nini ma, “Ulang nasiam lutu, ai ibagas dirini ope tonduyni!”

¹¹ Dob ai mulak ma ia hu atas, itopiki ma ruti, lanjar mangan ma; dokah ope ia marsahap-sahap pakon sidea, ronsi marayak siang ari, dob ai pe ase misir.

¹² Manggoluh do garama ondi mulak hu rumahni, gabe tarapoh ma uhur ni sidea.

¹³ Parlobei do hanami masuk parau laho marlayar hu Assos, ijai do ia jaloonnami masuk parau; ai sonai do iaturhon, halani sihol mardalan darat ia.

¹⁴ Anjaha dob jumpahsi hanami i Assos, ijalo hanami ma ia masuk parau, gabe misir ma hanami marlayar hu Mitelene.

¹⁵ Dob marlayar hanami hunjai, das ma hanami patarni hu Pulou Kios, patarni ai dohorhon Pulou Samos, dob ai patarni ai use das ma hanami hu Miletos.

¹⁶ Ai domma iputuskon si Paulus manlopusi Epesus, ase ulang magou panorang i Asia, ai tarolos do ia, andohar das ia i Jerusalem bani ari Pentakosta.

Marhata Partadingan si Paulus bani

Sintua-sintua na hun Epesus

¹⁷ Tapi isuruh do hun Miletus hu Epesus na mandilo sintua-sintua ni kuria ai.

¹⁸ Jadi dob das sidea hu bani, nini ma hubani sidea, "Ibotoh nasiam do parlahouhu, sadokah rap ahu pakon nasiam, olat ni ari parlobei dob hudogei Asia.

¹⁹ Hubalosi do Tuhan in ibagas toruh ni uhur, mariluh-iluh manaron parlajouan na roh hu bangku halani tahi-tahi ni Jahudi.

²⁰ Seng adong huponopkon barang aha na marguna, na so niambilankon barang pinodahkon bani nasiam i lobei ni halak na mabuei atap marrumah-rumah pe.

²¹ Tongtong do husaksihon bani halak Jahudi age bani halak Gorik, hamubahon ni uhur bani Naibata ampa haporsayaon bani Tuhanta Jesus Kristus.

²² Anggo sonari, songon na tarsangkut do ahu ibahen Tonduy in laho hu Jerusalem, anjaha seng hubotoh, barang aha na sihol masa bangku ijai.

²³ Pitah on, bani haganup huta ilumbahon Tonduy in do, paboa tali ampa hamarsikon do sitagamonku ijai.

²⁴ Tapi seng pala harga huhira hosahku, asal ma boi hupaujung langkahku ampa horja na dob hujalo humbani Tuhan Jesus, ai ma na manaksihon Ambilan Na Madear pasal idop ni uhur ni Naibata.

²⁵ Anjaha sonari, hubotoh do lang idahon nasiam be bohingku, haganup nasiam na huparayak laho mangambilankon Harajaon ni Naibata.

²⁶ Halani ai husaksihon ma bani nasiam sadari on, na dob borsih do ahu humbani sapata ni daroh nasiam,

²⁷ ai seng dong hubuati age aha, hupabotohkon do bani nasiam ganup rosuh ni Naibata.

²⁸ Halani ai jaga nasiam ma diri nasiam ampa haganup hulanan in, ai na dob ipabangkit Tonduy Na Pansing do nasiam mardimata in, ase iparmahani nasiam kuria ni Tuhan in, na tinobus-Ni marhitei daroh-Ni sandiri.

²⁹ Ai hubotoh, anggo dob laho ahu, masuk ma bani nasiam begu panoroh, na so manarihon hulanan in.

³⁰ Gari hun tengah-tengah nasiam jongjong do halak na mamodahkon na lepak, laho mangojur-ojur susian in mangirikkonsi.

³¹ Halani ai jaga ma nasiam, ingat nasiam ma, na so marnamaronti ahu arian pakon borngin tolu tahun dokahni pagolpahon nasiam marhasoman iluh.

³² Ai pe huondoskon ma nasiam hubani Naibata ampa hubani hata idop ni uhur-Ni, na margogoh patoguhkon uhur anjaha mambere siteanon bani haganup na mapansing in.

³³ Seng onggga ipindo uhurhu omas atap pirak ampa hiou humbani atap ise pe.

³⁴ Ibotoh nasiam do, tanganku do mansarihon na porlu bangku ampa bani na mangkasomani ahu.

³⁵ Bani haganup do hupatuduhkon bani nasiam, maningon sonai do hita laho mangurupi halak na so margogoh, mardingat hata ni Tuhan Jesus, ai la do mangkatahon, 'Martuahan do na mambere ase na manjalo.'"

³⁶ Dob ihatahon sonai, manrogop ma ia martonggo rap pakon sidea haganup.

³⁷ Anjaha tangis ma sidea haganup, irohop anjaha isummah sidea ma si Paulus.

³⁸ Na parahni ipusokkon uhur ni sidea, ai ma hatani na hinatahonni, na so idahon ni sidea be bohini. Lanjar itaruhkon sidea ma ia hu kapal.

Pardalanan ni si Paulus hun Miletus hu Kesarea

Panjahaion ni si Agabus

21 ¹ Dob sirang hanami humbani sidea, marlayar ma hanami torus hu Kos, anjaha patarni ai hu Rodus, hunjai hu Patara.

² Anjaha dob dapot hanami kapal na laho hu Penesia, ai ma imasuki hanami, lanjar marlayar ma hanami.

³ Dob ai ididah hanami ma Pulou Kiprus, ilopusi hanami ma ai hampit sambilounami, anjaha marlayar ma hanami dompak Siria, gabe das ma i Tirus; ai ijai do bongkaron muatan ni kapal ai.

⁴ Iparayak hanami ma susian ai anjaha marsaran ijai pitu ari dokahni. Marhitei Tonduy in ipalumba sidea do si Paulus, ulang tangkog namin hu Jerusalem.

⁵ Dob salpu arini hanami ijai, misir ma hanami manoruskon pardalanan. Haganup do sidea manaruhkon hanami hu darat ni huta ai, parinangon age dakdanak. I topi laut ai manrogop do hanami anjaha martonggo.

⁶ Anjaha dob marjabat tangan, masuk ma hanami hu kapal, anjaha sidea pe mulak ma.

⁷ Hun Tirus marlayar ma hanami hu Ptolomais; anjaha ijai ma ujung ni parlayarannami; isalami hanami ma hasoman-hasoman ai, anjaha ijai ma hanami marsaran sadari.

⁸ Patarni ai bingkak ma hanami, anjaha das ma hu Kesarea. Masuk ma hanami hu rumah ni si Pilippus, evangelis ai, ai ma sada humbani na pitu ai, gabe tondok bani ma hanami.

⁹ Adong ompat boruni, sipanjahai.

¹⁰ Sanggah na marsaran ai hanami piga-piga ari ijai, tuad ma hun Judea sada halak, na margoran si Agabus.

¹¹ Ijumpahkon ma hanami, ibuat ma gondit ni si Paulus, anjaha isangkutkon ma ai bani tanganni ampa naheini, lanjar ihatahon ma, “Sonon do simada gondit on sangkuton ni halak Jahudi i Jerusalem, anjaha ondoskononkon hubagas tangan ni sipajuh begu-begu.”

¹² Mambogei hata ai, ielek-elek hanami ma rap pakon halak na ijai ai, ase ulang tangkog ia hu Jerusalem.

¹³ Tapi nini si Paulus ma, “Aha do na binahen nasiam in, tangis mambahen galek uhurhu? Sirsir do ahu sangkuton ronsi matei i Jerusalem halani goran ni Tuhan Jesus.”

¹⁴ Halani seng ra ia ojuron, sip ma hanami, nini hanami ma, “Sai saud ma harosuh ni Tuhan in!”

Apostel Paulus i Jerusalem

¹⁵ Ase dob salpu ari ai, marugas ma hanami, laho tangkog hu Jerusalem.

¹⁶ Anjaha dihut do deba susian na hun Kesarea mangkasomani hanami, anjaha ibobai do hanami tondok hubani si Manason, na hun Kiprus, ai ma sada halak na dob dokah gabe susian.

¹⁷ Das honsi hanami i Jerusalem, malas do uhur ni sanina-sanina ai manjalo hanami.

¹⁸ Anjaha patarni ai laho ma si Paulus rap pakon hanami marayak si Jakobus, anjaha roh do ganup sintua-sintua.

¹⁹ Jadi dob ipadas tabini bani sidea, ipajojo ma na binahen ni Naibata bani halak sipajuh begu-begu marhitei horjani.

²⁰ Mambogei ai ipasangap sidea ma Naibata. Dob ai ihatahon sidea ma bani, “Ididah ham do sanina, marribu-ribu do halak Jahudi na dob porsaya, anjaha haganup do sidea mampongutkon titah in.

²¹ Ibogei sidea, ipodahi ham do halak Jahudi, na i tongah-tongah ni sipajuh begu-begu, ase itadingkon si Musa, anjaha ihatahon ham bani sidea, seng pala be sunaton anak ni sidea atap dalankonon adat-adat in.

²² Ai pe sonaha ma? Tontu ibogei do na dob roh ham.

²³ Halani ai bahen ma songon na hinatahonnami on bamu! Adong do bannami ompat halak, na marutang bagah-bagah.

²⁴ Arahkon ma sidea, uras ma dirimu rap pakon sidea, anjaha harugihon ma papangkaskon jambulan ni sidea, gabe botohon ni haganup halak ma, na so tongon do hape barita pasal ham ai, anjaha na dihut do homa ham mangkorjahon titah in.

²⁵ Ia sipajuh begu-begu, na dob gabe porsaya, domma iputuskon hita anjaha na parentahkon, ase ijaga bei dirini dompak galangan bani sisombah-sombahon, daroh, na matei seng sinayat ampa parriah-riahon.”

²⁶ Jadi patarni ai iarahkon si Paulus ma halak ondi, anjaha dob iuras dirini rap pakon sidea, laho ma sidea hu rumah panumbahan, laho patugahkon sadihari marujung panorang pangurason ai, anjaha sadihari padason galangan ni sidea bei.

Manlutui Halak Jahudi

Tartangkap si Paulus

²⁷ Tapi sanggah na laho marujung sipitu ari ai, ididah halak Jahudi na hun Asia ma ia i rumah

panumbahan, jadi ipajobu-jobu sidea ma haganup halak na mabuei ai, itangkap ma ia,

²⁸lanjar idilo-dilohon, “Nasiam halak Israel, urupi nasiam ma hanami on! On ma halak ia, na mangajar-ajari halak ija-ija pe manlawan bangsanta, ampa titah in ronsi ianan on. Ambahni ai dihut do halak Gorik iarahkon hu rumah panumbahan on, anjaha ibutaki do ianan na pansing on!”

²⁹Ai ididah sidea do si Tropimus, na hun huta Epesus rap pakonsi i huta ai, gabe iagan na dob iarahkon si Paulus do ia hu rumah panumbahan ai.

³⁰Jadi lutu ma ganup huta ai, anjaha martumpu ma ganup halak na mabuei ai; itangkap sidea ma si Paulus, isarad ma ia hu darat ni rumah panumbahan ai, anjaha mintor itutup ma sagala labah.

³¹Anjaha sanggah na sihol bunuhon ni sidea ia, das ma hata hubani kapiten, na dob lutu do huta ai.

³²Jadi mintor iarahkon ma tentara ampa letnan, laho mandorab sidea; dob ididah sidea kapiten ai ampa tentarani, iparontihon sidea ma mambalwali si Paulus.

³³Laho ma kapiten ai hujai, itangkap ma si Paulus, anjaha ihatahon ma garion ia bani dua gari; ai ipareksa ma atap parja do ia ampa aha do na binahenni.

³⁴ Tapi marsihatahon hatani do na mabuei ai; anjaha halani seng jumpahsi hatorangan na sintong, halani na lutu ai, ihatahon ma boanon ia hu tangsi.

³⁵ Anjaha dob das ia bani andar ai, tentara ai mando mangusungsi, halani parurup ni halak na mabuei ai,

³⁶ ai sai mangihut do halak na mabuei ai, lanjar dilo-dilo, “Bunuh ia!”

³⁷ Sanggah na sihol arahkonon ni sidea ia hubagas tangsi ai, ihatahon ma hubani kapiten ai, “Boi do ahu manluar bamu?” Gabe nini ma, “Ibotoh ho do hape hata Gorik?”

³⁸ Sedo ho hape halak Masir ai, na manlutui baru-baru on anjaha na mangarahkon ompat ribu halak gerombolan hu halimisan?”

³⁹ Jadi nini si Paulus ma, “Halak Jahudi do ahu, marasal hun Tarsus na i nagori Silisia, warga kota na tarbarita ai. Hupindo atap na boi do ahu marsahap hubani halak na mabuei in!”

⁴⁰ Jadi halani ilopas do, jongjong ma si Paulus bani andar ai, anjaha ihilaphon ma tanganni bani halak na mabuei ai. Jadi dob sip bei, marsahap ma ia bani sidea ibagas hata Heber, nini ma,

Sahap ni si Paulus Bani Bangsa ai

22 ¹ “Nasiam sanina ampa bapa, tangar nasiam ma sonari pangapition diri na huhatahon i lobei nasiam!”

² Ase dob ibogei sidea, na iparsahapkon ai sidea ibagas hata Heber, lambin sip ma sidea.

³ “Halak Jahudi do ahu, tubuh i Tarsus na i Silisia, tapi magodang i huta on; i lobei ni si Gamaliel do ahu iajari domu hubani hatulimaton ni titah ni ompungta, pongkut do ahu mangirikkon Naibata, songon haganup nasiam sadari on.

⁴ Huparburu do ronsi matei parugama on, husangkut anjaha hupatutupkon do dalahi age naboru,

⁵ anjaha pasal ai, sintua ni malim ampa harungguan ni pangintuai-pangintuai do saksi bangku. Hun bani sidea do hujalo surat siboanon hubani sanina-sanina ai, anjaha laho ma ahu hu Damaskus, sihol manangkapi na ijai ai homa, anjaha mamboan sidea ibagas gari hu Jerusalem, ase iuhumi.

⁶ Tapi masa ma, sanggah i tongah dalan ahu, dohorhon Damaskus, hira-hira tongah arian, sompong ma marsinalsal hun datas, inggot hu bangku, sinalsal na lihar tumang.

⁷ Tompas ma ahu hu tanoh, anjaha hubogei ma sora na mangkatahon hu bangku, ‘Saul! Saul! Mase ma pardakdakonmu Ahu?’

⁸ Jadi ningku ma mambalosi, ‘Ise do Ham Tuhan?’ Nini ma hu bangku, ‘Jesus do Ahu, na hun Nasaret, na pinardakdakmin!’

⁹ Ididah hasomanku do namin sinalsal ai, tapi anggo sora ai, na marsahap pakon ahu, seng ibogei sidea.

¹⁰ Jadi ningku ma, 'Aha ma sibahenonku, Tuhan?' Jadi ihatahon Tuhan in ma hu bangku, 'Jongjong ma ho, laho ma ho hu Damaskus, ijai ma patugahon bam haganup na patut sihorjahononmu.'

¹¹ Tapi seng marpangidah be ahu ibahen sinalsal ni sondang ai, gabe itogu hasomanku mando ahu das hu Damaskus.

¹² Anjaha dong ma ijai sada halak na margoran si Ananias, halak na daulat domu hubani titah in, dear do baritani bani haganup Jahudi na marianan ijai.

¹³ Roh do ia hu bangku nini, 'Ambia Saul, marpangidah ma ho!' Jadi mintor marpangidah ma ahu anjaha huidah ma ia.

¹⁴ Dob ai nini ma, 'Domma ipilih Naibata ni ompungta ham, ase itanda ham rosuh ni uhur-Ni, ididah ham Parpintor in anjaha ibogei ham sandiri sora-Ni,

¹⁵ ase gabe saksi-Ni ham bani haganup jolma pasal na nididah ampa na binogeimu.'

¹⁶ Ai pe, mase ma sonai sangsi-sangsi uhurmu? Jongjong ma anjaha tardidi, paburihkon dousamu marhitei na mandilo goran-Ni.'

¹⁷ Dob mulak ahu hu Jerusalem anjaha martonggo i rumah panumbahan, marpanonggoran do ahu.

¹⁸ Huidah do la mangkatahon bangku, 'Papodas ma misir hun Jerusalem, ai seng ra sidea manjalo hasaksianmu pasal Ahu.'

¹⁹ Jadi ningku ma, 'Ibotoh sidea do Tuhan, na hupatutupkon anjaha hulonsingi do na porsaya Bamu bani ganup rumah parguruan.

²⁰ Anjaha sanggah na hona duruskon daroh ni si Stepanus, saksi-Mu ondi, jongjong do au homa ijai, huhadearhon do ai, anjaha ahu manjaga pakeian ni na mambunuhsi.'

²¹ Jadi nini ma dompak ahu, 'Laho ma, ai hubani na daoh do ho suruhon-Ku, ai ma hubani sipajuh begu-begu.'"

²² Das hubani hatani on, itangihon sidea do ia; dob ai ipagogoh sidea ma sorani, nini ma, "Padaoh ma jolma sisonin hun tanoh on, seng patut ia manggoluh!"

²³ Tapi sai mardilo-dilo do sidea, ihilap-hilapkon pakeianni anjaha ipansaburhon orbuk hu atas.

²⁴ Jadi ihatahon kapiten ai ma ia boanon hubagas tangsi, anjaha isuruh ma pareksaon ia marhitei na manlonsingisi, ase ibotoh mase sonai parsurak-surak ni sidea dompaksi.

²⁵ Tapi dob isangkut sidea ia bani tali hulingkuling, nini si Paulus ma dompak letnan na jongjong ijai, "Ai bulih do lonsingan nasiam warga negara Rom, age lape napareksa parkarani?"

²⁶ Mambogei ai letnan ai, laho ma ia bani kapiten ai, patugahkon ai, nini ma, "Ai aha do na sihol bahenonmu? Halak Rom do hape halak ai."

²⁷ Jadi roh ma kapiten ai hu bani, nini ma, “Patugah bangku, halak Rom do ho tongon?” Balosni, “Ai do!”

²⁸ Dob ai marbalos ma kapiten ai, “Anggo ahu, buei do rugi mamboli hak warga negara in.” Tapi nini si Paulus ma, “Anggo ahu, humbani partubuhku do sonai.”

²⁹ Jadi mintor surut ma halak na sihol mamareksa ai. Kapiten ai pe mabiar ma, dob ibotoh halak Rom do hape si Paulus, na dob sinuruhni sangkuton.

³⁰ Patarni ai sihol ma torang botohonni, aha halani mambahen na iaduhon halak Jahudi ia; ipadarat ma ia, ihatahon ma martumpu sintua ni malim ampa rapot bolon ai, anjaha si Paulus pe itogu ma hu tongah-tongah ni sidea.

Si Paulus i Lobei ni Rapot Bolon

23 ¹ Jadi ikawahkon si Paulus ma rapot bolon ai, nini ma, “Nasiam hasoman, na marparlahou do ahu humbani gok ni uhurhu i lobei ni Naibata ronsi sadari on.”

² Tapi ihatahon Sintua ni malim Ananias ma halak na jongjong ijai mamastap babahni.

³ Jadi nini si Paulus ma hu bani, “Pastapon ni Naibata ma ho, ale dingding na hinapur! Na hundul do ho manguhumi ahu marguru hubani titah, hape ihatahon ho do ahu pastapon marlawan bani titah!”

⁴ Dob ai nini halak na jongjong ijai ma, “Ai pahirion do sintua ni malim ni Naibata?”

⁵Jadi nini si Paulus ma, “Lang na hubotoh, ale hasoman, ia sintua ni malim. Ai tarsurat do, ‘Seng bulih pahirionmu sintua ni bangsamu.’”

⁶Tapi ibotoh si Paulus ma deba humbani sidea, ai ma Sadukei, na deba nari halak Parisei, gabe idilohon ma i raport ai, “Nasiam sanina! Halak Parisei do ahu, anjaha anak ni Parisei. Halani pangarapan ai ampa parpuhoon humbani na matei do, ase hu paruhuman on ahu.”

⁷Jadi dob ihatahon sonai, marsalisih ma halak Parisei pakon halak Sadukei, gabe marbolah ma raport ai.

⁸Ai ihatahon Sadukei do, paboa seng dong parpuhoon humbani na matei, sonai age malekat, age tonduy. Tapi anggo Parisei, iparhatongon do haduasi.

⁹Gabe lutu tumang ma. Tapi jongjong ma deba sibotoh surat humbani golongan ni Parisei manlawan, nini ma, “Seng dong jumpah hanami na jahat bani halak on. Atap na tongon do iparsahapkon Tonduy ia atap malekat ni Naibata?”

¹⁰Tapi lambin bangga ni ma paringoran ai, jadi mabiar ma kapiten ai, atap sonaha iparsirak sidea si Paulus, gabe ihatahon ma tuad tentara ai laho manariksi hun tongah-tongah ni sidea, anjaha ase iboan hu tangsi.

¹¹Anjaha bornginni ai jongjong do Tuhan in i lambungni, nini ma, “Tenger ma uhurmu! Songon

na dob sinaksihonmu Ahu i Jerusalem, sonai do saksihononmu Ahu i huta Rom.”

Marbulawan Jahudi Laho Mambunuh si Paulus

¹² Dob siang ari, mambahen panriahan ma halak Jahudi, marbulawan ma sidea, seng mangan atap minum sidea, anggo lape hona bunuh si Paulus.

¹³ Adong do lobih ompat puluh halak sidea, na mambahen parbulawanan ai.

¹⁴ Iparayak sidea ma sintua ni malim ampa pangintuai-pangintuai, nini ma, “Domma marbulawan hanami, na so bulih daionnami age aha, anggo seng ibunuh hanami ope si Paulus.

¹⁵ Ai pe, rap ma nasiam pakon raport in mangindohon bani kapiten ai, ase iboan ia hu lobei nasiam, songon na laho mamareksa parkara ai hun torang, anjaha hanami pe marsiap-siap ma mambunuhsi sanggah i tongah dalan ope.”

¹⁶ Tapi tarbogei do partahi-tahian ai bani panogolan ni si Paulus, gabe laho ma ia hu tangsi, patugahkon ai bani si Paulus.

¹⁷ Jadi idilo si Paulus ma sada letnan, anjaha ihatahon ma dompaksi, “Arahkon ham lobei parana on bani kapiten ai, ai adong do sipatugahonni bani.”

¹⁸ Jadi iarahkon ma ia, anjaha iboan ma bani kapiten ai, nini ma, “Na idilo si Paulus na tartutup ai do ahu; ipindo hu bangku, ase huboan parana on bamu, halani adong sihatahononni bamu.”

¹⁹ Ijolom kapiten ai ma tanganni, iarahkon ma ia bani na suhi, anjaha isungkun ma ia, “Ai aha do sipatugahonmu bangku?”

²⁰ Jadi nini ma, “Na dob manriah do halak Jahudi, mangindohon bamu, ase boanon patar si Paulus hu lobei ni rapot bolon, songon na laho mamareksa parkarani in huntorang.

²¹ Ai pe, ulang ma balosi ham sidea, ai lobih do ompat puluh halak humbani sidea, na dob marbulawan, seng mangan atap minum pe, anggo lape ibunuh sidea ia; domma marsiap-siap sidea, pitah na paimahon hatamu mando.”

²² Dob sonai isuruh kapiten ai ma parana ai mulak, ihatahon ma bani, “Ulang patugah atap bani ise pe, na dob ipadas ho on bangku.”

Iboan si Paulus hu Kesarea

²³ Jadi idilo ma dua letnan hu lobeini, nini ma, “Pasirsir nasiam ma dua ratus tentara laho hu Kesarea, rap pakon pitu puluh halak tentara siajak huda, ambah ni ai dua ratus sipartanja, pukul tolu borngin.

²⁴ Pasirsir homa huda siajakon ni si Paulus, laho mamboansi horas-horas hubani Gubernur Feliks.”

²⁵ Lanjar ibahen ma surat sonon isini,

²⁶ “Klaudius Lisias hubani na pinarsangapan Gubernur Feliks.

²⁷ Na itangkap halak Jahudi do halak on sanggah sihol bunuhon ni sidea ia, roh do ahu ampa tentera paluahkonsi, dob hubotoh halak Rom do ia.

²⁸ Laho mambotoh atap halani aha do, ase isalahkon sidea ia, gabe huarahkon ma ia hu lobei ni raport ni sidea.

²⁹ Jadi jumpah ahu ma, halani parsalisihan pasal titah ni sidea do ase iaduhon sidea ia; seng dong alasan mambahen marutang hosah ia atap tartutup.

³⁰ Tapi adong ma na patugahkon bangku pasal partahi-tahian ni sidea dompak halak on, gabe mintor husuruh ma ia bamu, anjaha huhatahon homa bani sipangadu, ase bamu ma isahapkon sihatahononni.”

³¹ Ase iboan tentara ai ma si Paulus domu hubani parentah ai, iarahkon ma ia bani na saborngin ai das hu Antipatris.

³² Patarni ai isuruh ma siparhuda manaruhkonsi torus; mulak hu tangsi ma anggo sidea.

³³ Jadi das ma sidea hu Kesarea, ipadas sidea ma surat ai hubani gubernur ai, anjaha si Paulus pe iarahkon ma hu lobeini.

³⁴ Jadi dob ibasa surat ai, isungkun ma, barang hun nagori ja do ia. Anjaha dob ibotoh na hun Silisia do ia, nini ma,

³⁵ “Hupareksa pe ho, anggo roh na mangaduhon ho ai.” Jadi ihatahon ma, ase itahan ia i rumah paruhuman ni Raja Herodes.

Si Paulus i Lobei ni Gubernur Feliks

24 ¹Ase dob salpu lima ari, tuad ma si Ananias, sintua ni malim ai, rap pakon deba pangintuai ampa sada siparhata, na margoran si Tertullus; jadi ipadas sidea ma pangaduanni pasal si Paulus bani gubernur ai.

²Jadi dob idilo ia, ihatahon si Tertullus ma pangaduanni, nini ma,

³“Paboa na dapotan damei na buei do hanami marhitei usahamu, anjaha marhitei panarihonmu buei ma tambah hadearon bani bangsa on, pasal ai iakui hanami do tongtong atap ija-ija pe marhasoman tarima kasih bangga, ham Feliks, na pinarsangapan.

⁴Tapi ase ulang madokahtu hanami patangitangionmu, hupangindo ma bamu, ase ra ma ham, domu hubani rosuh ni uhurmu, manangihon hanami tongkin.

⁵Jumpah hanami do halak on songon sampar ampa panggeori bani haganup halak Jahudi i sab dunia on, anjaha pambobai ni sekte Nasarani do ia.

⁶Luji do homa pabutakkon Rumah Panumbahan, halani ai do, ase itangkap hanami ia, ase iuhumi hanami ia domu hubani titahnami.

⁷ Tapi roh ma Kapiten Lisias, anjaha ibuat ma ia marhasoman paksa hun bennami,

⁸ anjaha iparentahkon sagala sipangadu roh mangadap ham. Anggo isungkun ham ia, boi do botohonmu, paboa sintong do pangaduannami in.

⁹ Halak Jahudi pe dihut do mambahen pangaduan, anjaha ionjolhon sidea do, paboa sonai do tongon parkara ai.”

Balos ni si Paulus

¹⁰ Jadi dob ihilaphon gubernur ai tanganni mangkatahon, ase marsahap ia, gabe nini si Paulus ma mambalosi, “Halani hubotoh, domma dokah ham panguhum bani bangsa on, hinsah do uhurhu mansahapkon hata pangapition bani diringku.

¹¹ Boi do patangkasonmu, paboa sepuluh dua ari ope salpu, dob tangkog ahu hu Jerusalem laho martonggo.

¹² Seng dong jumpah sidea ahu marsual pakon atap ise pe, barang manlutui halak na mabuei, age i Rumah Panumbahan, age i Rumah Parguruan barang ibagas huta pe.

¹³ Anjaha seng tarbuktihon sidea bamu pasal pangaduan ni sidea ai dompak ahu.

¹⁴ Tapi pasal on huakui do bamu, na hubalosi do Naibata ni ompung, mangihutkon podah ai, na ginoran ni sidea sekte, anjaha huhaporsayai do

haganup na tarsurat bani titah atap marhitei nabi-nabi pe.

¹⁵ Na marpangarapan do ahu bani Naibata, paboa mulak manggoluh parpintor ampa pargeduk, songon na niarapkon ni sidea ai.

¹⁶ Halani ai do mambahen huhabujurhon, ase maruhur na borsih ahu tongtong i lobei ni Naibata ampa i lobei ni jolma.

¹⁷ Tapi dob salpu piga-piga tahun, roh ma ahu mamboan sibere-bere ampa galangan bani bangsangku.

¹⁸ Anjaha sanggah na hudalankon ai, dob salosei pangurasion, jumpah piga-piga halak Jahudi na hun Asia ma ahu, tapi seng adong marhasoman halak na mabuei barang ibagas na geor pe.

¹⁹ Sidea do na patut mangadap ham laho mangaduhon, anggo adong pangaduan ni sidea dompak ahu.

²⁰ Age sidea on pe ihatahon ma barang aha do salahku jumpah sidea, sanggah na jongjong ahu i rapot bolon ai.

²¹ Pitah hata on do na husahapkon, sanggah na jongjong ahu i tongah-tongah ni sidea, 'Halani parpuhoon humbani na matei do, ase jongjong ahu i lobei ni paruhuman nasiam sadari on.'"

²² Tapi ilalab-lalabi si Feliks ma sidea, halani torang tumang do ibotoh pasal podah ai, nini ma, "Dob

tuad pe Kapiten Lisias, ase huputuskon parkara nasiam on.”

²³ Jadi iparentahkon ma hubani kopala ni tentara, ase itahan si Paulus, tapi bebas otik, anjaha seng bulih larangon hasomanni marugas bani.

²⁴ Dob salpu piga-piga ari, roh ma si Feliks ampa parinangonni si Drusilla, boru Jahudi; isuruh ma na mangalopi si Paulus, laho mambogei hatani pasal haporsayaon bani Kristus Jesus.

²⁵ Tapi sanggah na marsahap ia pasal hapintoron, na manrajai diri ampa uhum magira, mabiar ma si Feliks, gabe nini ma, “Mulak ma ho lobei; anggo adong panorangku use, hudilo pe ho.”

²⁶ Mangarap do ia, ra si Paulus mambere duit bani, halani ai gati do isuruh na mangalop si Paulus, lanjar marsahap-sahap pakonsi.

²⁷ Tapi dob salpu dua tahun, roh ma si Porkius Festus manggantih si Feliks. Anjaha halani sihol do uhurni mambuat uhur ni halak Jahudi, gabe ipaturut si Feliks ma si Paulus tartahan.

Si Paulus i Lobei ni si Festus

25 ¹ Dob adong tolu ari si Festus manjolom pamarentahan, tangkog ma ia hun huta Kesarea hu Jerusalem.

² Jadi roh ma hu lobei ni sintua ni malim ampa kopala-kopala ni halak Jahudi mangaduhon si Paulus.

³ Ipindohon sidea ma hu bani, songon idop ni uhurni bani sidea manlawan si Paulus, ase isuruh ia hu Jerusalem, tapi domma iranggihon sidea hinan manggompangisi i tongah dalan, laho mambunuhsi.

⁴ Tapi nini si Festus ma mambalosi, “Na dob tartahan do si Paulus i Kesarea, ahu pe podas ma mulak hujai.”

⁵ Ai pe, rap tuad ma na sangap-sangap nasiam pakon ahu, anjaha anggo adong na salah bani halak ai, ase sidea ma mangaduhonsi.

⁶ Ase dob adong ia i tongah-tongah ni sidea ualuh ronsi sapuluh ari, tuad ma ia hu Kesarea; anjaha patarni ai hundul ma ia bani kursi paruhumanni, anjaha ihatahon ma boanon si Paulus hu lobeini.

⁷ Ase dob roh ia, iinggoti halak Jahudi, na roh hun Jerusalem ma ia, anjaha ipangkatahon sidea ma dompaksi pangaduan na borat, tapi seng tarbuktihon sidea.

⁸ Tapi nini si Paulus ma bani hata pangapition dirini, “Seng mardousa ahu dompak titah ni Jahudi, barang dompak Rumah Panumbahan barang dompak Kesar pe.”

⁹ Tapi laho mambuat uhur ni Jahudi, nini si Festus ma mambalosi si Paulus, “Ra do ho tangkog hu Jerusalem, ase ijai ho huuhumi pasal haganupan ai?”

¹⁰ Jadi nini si Paulus ma, “Na jongjong do ahu nuan i lobei ni paruhuman ni Kesar, anjaha ijon do

ahu patut iuhumi. Hu bani halak Jahudi seng dong marsalah ahu, songon na torang ibotoh ham.

¹¹ Ai pe, anggo adong huhorjahon na jahat, na patut mambahen marutang hosah ahu, seng manjua ahu matei; tapi anggo seng tongon na tinukaskon ni sidea ai bangku, ise pe lang boi na padas ahu bani sidea. Naik apel do ahu bani Kesar.”

¹² Ia si Festus, dob manriah ia pakon hasomanni sapanriahan, nini ma mambalosi, “Mangindo apel do ho bani Kesar, ai pe bani Kesar ma ho laho!”

Si Festus Manriah pakon Raja Agrippa Pasal Parkara ni si Paulus

¹³ Dob salpu piga-piga ari roh ma Raja Agrippa pakon si Bernike hu Kesarea, laho mangkormat si Festus.

¹⁴ Sanggah na ijai sidea barang piga-piga ari, ipatugah si Festus ma bani raja ai pasal parkara ni si Paulus, nini ma, “Adong do ijon sada halak na tartutup, itadingkon si Feliks.

¹⁵ Sanggah na i Jerusalem ahu, mangadap do hu bangku sintua ni malim ampa kopala-kopala ni halak Jahudi, ipindo ase hona uhum ia.

¹⁶ Jadi ningku ma mambalosi sidea, ‘Seng adat ai bani halak Rom mangondoskon sada halak, anggo lang palobei mardumpar bohi nabahen na niaduhon ampa sipangadu, anjaha nabere panorang mangapiti dirini dompak pangaduan ai.’

¹⁷ Halani ai dob tumpu sidea ijon, seng hupadokah-dokah be; patarni ai mintor hundul ma ahu bani paruhuman, anjaha huhatahon ma boanon dalahi ai.

¹⁸ Sanggah jongjong sipangadu ai, seng adong age sada salahni tarbuktihon sidea, songon niagan ni uhur hinan.

¹⁹ Tapi adong do parsalisihan ni sidea pasal ugama ni sidea pakon pasal sada halak, na margoran Jesus, na dob matei gabe mulak manggoluh, nini si Paulus.

²⁰ Tapi sanggah na sosak ahu pasal parkara ai, husungkun ma, atap na marosuh do ia laho hu Jerusalem, ase ijai ia iuhumi pasal ai.

²¹ Tapi ipindo si Paulus do ramotkononkon ia, paimahon haputusan ni na marmulia in; jadi huhatahon ma jagaon ia, paima husuruh ia bani Kesar.”

²² Tapi nini si Agrippa ma hubani si Festus, “Sihol do bogeionku hata ni halak ai.” Jadi nini ma, “Anggo sonai, patar ma bogei ham ia!”

²³ Jadi patarni ai, roh ma si Agrippa ampa si Bernike marhasangapon bangga, masuk ma sidea hu kamar paruhuman rap pakon panglima-panglima ampa na sangap-sangap i huta ai, anjaha ihatahon si Festus ma boanon si Paulus hujai.

²⁴ Jadi ihatahon si Festus ma, “Ham Raja Agrippa ampa haganup na adong ijon rap pakon hanami, tonggor nasiam ma halak in! Halani ia do ase

iparayak halak Jahudi ahu, i Jerusalem age ijon, anjaha sai idilo-dilohon, na so patut be manggoluh ia.

²⁵ Tapi torang do hubotoh na so adong do salahni mambahen patut marutang hosah ia. Halani naik apel do ia bani Kesar huputuskon ma marsuruhsi hu bamu.

²⁶ Tapi seng dong tarsuratkon ahu pasalsi bani tuanku; halani ai do ase huboan ia hu lobei nasiam, tapi tarlobih ma ai hu lobeimu, ale Raja Agrippa, ase adong sisuratkononku, dob napareksa ia.

²⁷ Ai haru do huahap, suruhon na tartahan, lang napatugah hasalahanni.”

Sahap ni si Paulus i Lobei ni Raja Agrippa

26 ¹ Dob ai ihatahon si Agrippa ma hubani si Paulus, “Dear ma marsahap ho pasal dirimu!” Jadi iangkat si Paulus ma tanganni, lanjar marsahap ma ia mangapiti dirini:

² “Na martuah do ahu huahap, ham Raja Agrippa, halani boi ahu sadari on mambahen pangapition pasal diringku dompak sagala pangaduan ni Jahudi,

³ halani botoh tumang do ham pasal adat ampa parsalisihan ni halak Jahudi; halani ai mangindo ma ahu bamu, sabar ma ham manangihon hatangku!

⁴ Ibotoh halak Jahudi do ganup parlahouhu humbani haetek-etekonku nari i tongah-tongah ni bangsangku i Jerusalem.

⁵ Tongon domma dokah itandai sidea ahu, anjaha ambit ra sidea, tarsaksihon sidea do, paboa na huirikkon do golongan Parisei, ai ma situlimatan pasal ugamanta.

⁶ Anjaha sonari jongjong do ahu i paruhuman, halani pangarapan ni uhur bani bagah-bagah, na binere ni Naibata bani ompungta.

⁷ Sihol das hujai do na niarapkon ni bangsanta na sapuluh dua morga in, mambahen na ibalosi sidea Naibata arian pakon borngin humbani bois ni gogoh ni sidea. Halani pangarapan ai do, ale Rajanami, mambahen na iaduhon halak Jahudi ahu.

⁸ Sonaha ma, ase adong i tengah-tengah nasiam na so mangkaporsayai, paboa pagoluhon ni Naibata do na matei?

⁹ Ahu sandiri huagan do lobei, maningon patut do lawanon goran ni Jesus na hun Nasaret in sagogoh-gogohni.

¹⁰ Anjaha sonai do hubahen i Jerusalem. Seng pitah hupatutupkon buei humbani halak na mapansing ai, marhitei kuasa na humbani sintua ni malim, tapi anggo tarbunuh sidea, huhadearhon do ai.

¹¹ Gati do huarsik sidea bani haganup Rumah Parguruan, andohar ra sidea manrisai; halani gila ni uhurhu, huparburu do sidea ronsi huta sidaohan.

¹² Sonai homa laho do ahu hu Damaskus marhitei kuasa ampa parpaingkat ni sintua ni malim.

¹³ Tapi sanggah i tongah dalan, ham Rajanami, sanggah tongah arian, huidah ma sinalsal na liharan marimbang mata ni ari roh hun langit, manondangi ahu inggot ampa hasomanku saodoran.

¹⁴ Jadi martompasan ma hanami haganup hu tanoh, anjaha hutangar ma sada sora ibagas hata Heber, 'Saul, Saul! Mase pardakdakonmu Ahu? Sunsah ma ho manandaki suga-suga!'

¹⁵ Tapi ningku ma, 'Ise do Ham, Tuhan?' Jadi nini Tuhan in ma, 'Jesus do Ahu, na pinardakdakmin!

¹⁶ Tapi jongjong ma ho! Ase Hupataridahkon pe diring-Ku bam, on do sura-surang-Ku, ai ma pabangkit ho gabe juakjuak ampa saksing-Ku, laho manaksihon na dob nididahmu ampa na sihol pataridahon-Ku ope bam!

¹⁷ Hupaluah pe ho humbani bangsa on ampa humbani bangsa sipajuh begu-begu, ai hubani sidea do ho suruhon-Ku,

¹⁸ laho mambuka mata ni sidea, ase mulak sidea humbani hagolapan hubani haliharon, anjaha humbani kuasa ni sibolis hubani Naibata, ase ijalo sidea hasasapan ni dousa ampa rupei rap pakon halak na pansing, halani haporsayaon Bangku.'

¹⁹ Halani ai, ale Raja Agrippa, seng mangengkar ahu bani panonggoran na hun nagori atas ai,

²⁰ gabe huambilankon ma parlobei bani halak na i Damaskus, dob ai bani na i Jerusalem, sonai homa bani haganup na i Judea ampa halak sipajuh begu-

begu, ase ipaubah uhur ni sidea anjaha mulak bani Naibata, anjaha iparlahouhon na patut domu bani uhur na dob mubah.

²¹ Halani ai do ase itangkap Jahudi ahu i rumah panumbahan, anjaha domma sihol bunuhon ni sidea ahu.

²² Tapi iurupi Naibata do ahu ronsi sadari on, mambahen boi ahu jongjong marambilan bani na etek-etek ampa na magodang, anjaha seng dong na huhatahon na so domu hubani na jinahaan ni nabi-nabi ampa si Musa,

²³ paboa na maningon manaron do Kristus, anjaha la parlobei puho humbani na matei, laho mamaritahon haliharon bani bangsa in ampa bani bangsa sipajuh begu-begu.”

²⁴ Halani sonai pangkatahonni mambela dirini, nini si Festus ma marsora na gogoh, “Na podoan do ho Paulus! Parbinotohanmu na buei in do mambahen podoan ho.”

²⁵ Nini si Paulus ma, “Seng na podoan ahu, ham Festus, na pinarsangapan, tapi hata na tongon anjaha na torang do na huhatahon.

²⁶ Halani torang do in ibotoh raja in, mambahen na hinsah uhurhu mansahapkon ai bamu; ai tenger do uhurhu seng adong age sada hunjai na lingod i lobeimu, ai seng masa ai bani na ponop.

²⁷ Ham Raja Agrippa, porsaya do ham bani nabi? Hubotoh na porsaya do ham!”

²⁸ Jadi nini si Agrippa ma hubani si Paulus, “Tongkin nari mando ase gabe Kristen ahu ibahen ho.”

²⁹ Jadi nini si Paulus ma, “Ipangindo uhurhu humbani Naibata, tongkin atap dokah, seng pitah ham, tapi haganup halak na adong ijon na mambogei hatangku, gabe songon ahu on ma namin sobali gari on.”

³⁰ Jadi jongjong ma raja ai ampa gubernur ai ampa si Bernike ampa hasoman ni sidea,

³¹ anjaha dob holang sidea, nini sidea ma samah sidea, “Seng dong ihorjahon ia, na mambahen marutang hosah ia barang tartutup pe.”

³² Lanjar nini si Agrippa ma hubani si Festus, “Na boi do namin maluah halak ai, ambit lang apel ia bani Kesar.”

Si Paulus Tarboan hu Huta Rom

27 ¹ Dob iputuskon, na maningon marlayar ma hanami hu Italia, gabe iondoskon ma si Paulus ampa deba hasomanni na tartutup hubani sada letnan, na margoran si Julius, humbani pasukan ni Kesar.

² Masuk ma hanami hubagas sada kapal na hun Adramitium, na laho hu pelabuhan na i Asia; dob ai bingkai ma hanami, ihasomani si Aristarkus, halak Makedonia, na hun Tessalonika ai.

³ Patarni ai mandarat ma hanami i Sidon; basar do si Julius hubani si Paulus, ilopas do ia marayak hasoman, ase itamuei sidea ia.

⁴ Hunjai marlayar ma hanami manopi-nopi Pulou Kiprus, halani manuhar logou,

⁵ anjaha dob nabontas laut tontang Silisia ampa Pampilia, das ma hanami hu Mira na i Likia.

⁶ Ijai jumpah letnan ai ma sada kapal Aleksandria, na sihol marlayar hu Italia, gabe hujai ma hanami ipamasuk.

⁷ Piga-piga ari nanget do parlayaronnami, anjaha mahol do hanami das hu Knidus. Anjaha, torus do manuhar logou bannami; i laut ni Salmone marlayar ma hanami manopi-nopi Pulou Kreta.

⁸ Anjaha dob marhasunsahan hanami na manopi-nopi ai das ma hanami bani sada ianan, na margoran Palabuhan Na Majenges, dohorhon Huta Lasea.

⁹ Domma buei bois panorang parlayaron ai anjaha domma homa salpu panorang puasa, halani ai marmara ma manoruskon parlayaron ai, gabe ipaingat si Paulus ma sidea, nini ma,

¹⁰ “Nasiam hasoman, ia parlayaronta on huidah marhasunsahan anjaha marharugian banggal do, seng pitah bani muatan ampa kapal on tumang, tapi dihut do pakon bani hosahta.”

¹¹ Tapi porsayaan do letnan ai bani jurumudi ai ampa bani simada kapal ai, ase bani hata ni si Paulus.

¹² Halani hurang dear do palabuhan ai ianan pasalpuhon musim borgoh, sihol marlayar ma sidea hunjai ninuhur ni sidea buenan, andohar boi sidea das i Penike pasalpuhon musim borgoh, ai ma sada palabuhan i Kreta, na buha dompak nariti ampa manabia.

¹³ Anjaha, sanggah jenges parombus ni logou hun dangsina gabe tarpasaud ma sura-sura ai ninuhur ni sidea, jadi iangkat sidea ma sauh, anjaha marlayar ma sidea manopi-nopi Pulou Kreta.

¹⁴ Tapi seng pala piga dokah roh ma hun pulou ai habahaba bolon, na margoran haba-haba Irisanna.

¹⁵ Iluahon ma kapal ai; halani seng tardompakkonsi logou ai gabe ipaturut hanami mando, lanjar iboan ma hanami mumbang-umbang.

¹⁶ Sanggah mayub-ayub hanami i topi ni sada pulou na etek, na margoran Klauda, ikuasai hanami ma sikosi ai, tongon marhasonam buei hasunsahan.

¹⁷ Anjaha dob iangkat sikosi ai hu atas kapal, iusahahon sidea ma manlilit kapal ai bani tali. Anjaha halani mabiar sidea tardempar hu Sirtis, ipaturun mando layar, jadi sonai mando hanami mumbang-umbang.

¹⁸ Halani sosak tumang hanami ibahen habahaba ai, patarni ai ibuang ma muatan ni kapal ai,

¹⁹ anjaha bani ari patoluhon iambukkon sidea ma homa parugas-parugas ni kapal ai marhitei tangan ni sidea sandiri.

²⁰ Anjaha halani domma piga-piga ari seng taridah mata ni ari barang bintang pe, anjaha torus do homa gogoh habahaba, putus ma arapannami boi hanami maluah.

²¹ Anjaha halani dokah ma sidea lang mangan, jongjong ma si Paulus i tongah-tongah ni sidea, nini ma, “Nasiam hasoman, ambit ma namin itangihon nasiam ahu, ulang laho hun Kreta, lang pala manaron hasunsahan ampa harugian on hita!

²² Ai pe, huojur ma nasiam marhinsah ni uhur, ai sahalak pe lang hun banta on na mahua, pitah kapal on do hansa.

²³ Ai na jongjong do na borngin i lambungku malekat ni Naibata, simada ahu anjaha na hubalosi,
²⁴ nini, ‘Ulang ho mabiar, ale Paulus, ai maningon jongjong do ho i lobei ni Kesar, anjaha domma iondoskon Naibata bam haganup hasomanmu na sakapal in.’

²⁵ Halani ai, tenger ma uhur nasiam hasoman, ai porsaya do ahu bani Naibata, maningon saud do na hinatahonni ai bangku.

²⁶ Tapi maningon tardempar do hita bani sada pulou.”

Tardempar i Pulou Malta

²⁷ Pasapuluh-ompat-bornginkon na mumbang-umbang ai hanami i Laut Adria, hira-hira tongah borngin, iahap uhur ni parkapal ai ma dohor daratan.

²⁸ Jadi idabuh sidea ma tali panibar, gabe dapot ma dua puluh holag bagasni; dob maju otik hunjai iulakkon ma use isibar, gabe dapot ma sapuluh lima holag.

²⁹ Halani mabiar tombom holi hanami bani batu karang, gabe idabuh ma ompat sauh hampit pudipudi ni kapal ai, paima siang ari.

³⁰ Dob ai sihol lintun ma anak kapal ai hun kapal ai, ipatoruh ma sikosi ai hu laut, iparsidalian sihol mandabuh sauh hun lobei-lobei ni kapal ai.

³¹ Jadi ihatahon si Paulus ma hubani letnan ai ampa hubani tentara ai, “Anggo seng soh sidea i kapal on, seng tarbahren nasiam maluah.”

³² Jadi irotap tentara ai ma tali ni sikosi ai, lanjar ipaturut mayub.

³³ Tapi marayak siang ari, iojur si Paulus ma sidea mangan, nini ma, “Pasapuluhompatarihon ma sadari on, nasiam paima-imahon, seng mangan, aha pe lang idai nasiam.

³⁴ Halani ai huojur ma ase mangan nasiam, ai panumpak do in bani haluahon nasiam, ai sada

jambulan pe lang marurus humbani ulu nasiam bei.”

³⁵ Ase dob ihatahon sonai, ibuat ma ruti ai, ihatahon ma tarima kasih bani Naibata i lobei ni sidea ganup, iponggoli ma ai, lanjar ipungkah ma mangankon.

³⁶ Jadi hinsah ma uhur ni sidea lanjar mangan bei ma.

³⁷ Ia bueinami i kapal ai, dua ratus pitu puluh onom halak do.

³⁸ Dob bosur sidea idabuh ma gandum ai hu laut laho pahampung parau ai.

³⁹ Dob torang ari, ididah sidea ma daratan, tapi lang itanda sidea. Ididah sidea ma sada teluk na marpasir, gabe hujai ma isura sidea padason kapal ai, anggo tarbahen.

⁴⁰ Jadi irotap sidea ma tali-tali ni sauh ai, ipaturut i laut ai, anjaha itanggali ma homa tali ni amudi ai; ipasang ma layar lobei-lobei dompak logou, ase iboan sidea hu pasir ai.

⁴¹ Jadi tarlanggar ma kapal ai bani sada gosong, lanjar ipaturut tardempar ijai. Longkot ma lobei-lobei ni kapal ai ijai, seng miut be, anjaha pudi-pudi ni kapal ai maseda ibahen gilumbang.

⁴² Sihol do tentara ai mambunuh sagala halak tahanan, ase ulang lintun sidea marhitei na marlanguy,

⁴³ tapi ilang-langi letnan ai do sura-sura ni sidea ai, halani sihol do pagoluhonni si Paulus. Iparentahkon

ma na pandei marlanguy manlumpat hu laut, ase parlobei hu darat,

⁴⁴ anjaha na legan ai hun pudi martilampung papan-papan ampa ponggol-ponggol ni kapal ai. Sonai ma boi sidea ganup maluah hu darat.

Tolu Bulan i Pulou Malta

28 ¹ Dob das hanami hu darat, ibogei hanami ma Malta do goran ni pulou ai.

² Basar tumang do parpulou ai bannami. Halani roh udan anjaha borgoh homa ari, ipagara sidea ma apuy banggal anjaha isuruh hanami hundul maringgot.

³ Jadi sanggah na patumpuhon ranting-ranting si Paulus, laho mannahkon ai hubagas apuy, luar ma hunjai sada ulog darih halani milasni, lanjar ipagut ma tanganni.

⁴ Mangidah ulog ai gantung-gantung bani tangan ni si Paulus, nini parpulou ai ma samah sidea, “Tontu pamunuh do halak on. Ai age pe maluah ia hun laut in, seng ipalopas sipambalas in ia manggoluh.”

⁵ Tapi ipirpirhon ma ulog ai hubagas apuy, anjaha seng pala mahua ia.

⁶ Tapi anggo sidea iagan do maningon butong ma ia barang mintor matei jurgang, anjaha dob dokah ipaima sidea, tapi seng mahua ia ididah, mubah ma pingkiran ni sidea, gabe ihatahon ma, naibata do ia.

⁷ Lang daoh humbani ianan ai, adong do kobun ni kopala ni pulou ai, na margoran si Publius. Dear do panjaloni bannami, anjaha itamuei do hanami tolu ari dokahni.

⁸ Bani panorang ai tibal-tibal do bapa ni si Publius, pane-paneon anjaha disentrion. Jadi masuk ma si Paulus marayaksi, anjaha sanggah martonggo, itampeihon ma tanganni hu bani, gabe malum ma.

⁹ Dob sonai, roh ma na boritan na legan i pulou ai, jadi malum bei ma.

¹⁰ Gabe sangap tumang ma hanami ibahen sidea, anjaha sanggah na misir hanami marlayar, ipasirsir sidea do na porlu bennami.

Hun Malta hu Rom

¹¹ Jadi dob salpu tolu bulan, bingkhat ma hanami marlayar bani sada kapal Aleksandria, na martanda Silinduat, na dob pasalpuhon musim borgoh i pulou ai.

¹² Das ma hanami hu Sirakusa, anjaha marsaran ma ijai tolu ari dokahni.

¹³ Hunjai manopi-nopi pasir ma hanami, anjaha das ma i Regium. Patarni marombus ma logou dangsina, gabe das ma hanami ari paduahon i Putioli.

¹⁴ Ijai pajumpah ma hanami pakon sanina-sanina, anjaha iontang do hanami rap pakon sidea pitu ari dokahni. Dob sonai, bingkhat ma hanami hu huta Rom.

¹⁵ Dob ibogei sanina-sanina na ijai ai pasal hanami, roh ma sidea mangalo-alo hanami hu Appiiporum ampa Tres Taberne. Mangidah sidea ai, mangkatahon tarima kasih ma si Paulus bani Naibata, anjaha lambin tenger ma uhurni.

¹⁶ Anjaha dob das hanami hu huta Rom ilopas do si Paulus, marianan sandirian rap pakon sada tentera na manjagaisi.

Si Paulus i Huta Rom

¹⁷ Dob salpu tolu ari, idilo si Paulus ma kopala-kopala ni halak Jahudi, anjaha dob roh sidea, nini ma hubani sidea, “Ia ahu, nasiam hasoman, seng dong hubahen barang aha bani bangsanta barang bani adat ni ompungta, hape isangkut do ahu i Jerusalem anjaha iondoskon bani halak Rom.

¹⁸ Dob ipareksa sidea ahu, sihol paluahon ni sidea do ahu, halani seng dong jumpah salahku, na mambahen marutang hosah ahu.

¹⁹ Tapi halani sai manlawan do halak Jahudi ai, gabe tarpaksa ma ahu mangindo apel bani Kesar, sedo halani adong siaduhononku dompak bangsanta.

²⁰ In do halani, ase hudilo nasiam, ase huidah anjaha huparsahapkon, ai halani pangarapan ni bangsa Israel do mambahen na hona gari ahu.”

²¹ Jadi nini sidea ma dompaksi, “Seng dong ijalo hanami surat ni sidea pasal ham, anjaha hasoman

na roh hunjai pe, seng dong patugahkon atap aha pe na jahat pasal ham.

²² Tapi sihol do bogeionnami pingkiranmu, halani ibotoh hanami ia sekte in jumpahan parlawanan do atap ija-ija pe.”

²³ Ase dob itontuhon sidea arini rap pakonsi, roh ma sidea buei marayaksi hubani iananni ai. Jadi ipatorang anjaha isaksihon ma bani sidea humbani sogod das hubani bodari pasal Harajaon ni Naibata, anjaha ilajou ma mambahen marhatongon sidea pasal Jesus maronjolan bani titah ni si Musa ampa nabi-nabi.

²⁴ Deba porsaya do marhitei na hinatahonni ai, tapi na deba lang porsaya.

²⁵ Jadi marsalisih ma sidea samah sidea, gabe laho bei ma, dob lobei ihatahon si Paulus bani sidea, “Sintong ma na hinatahon ni Tonduy Na Pansing marhitei Nabi Jesayas bani ompung nasiam,

²⁶ ai nini do, ‘Laho ma ho bani bangsa in, anjaha hatahon, sai na bogeionmu do in, tapi lang arusanmu, anjaha sai na idahonmu do in, tapi lang tandaonmu.

²⁷ Ai domma mapir uhur ni bangsa on, anjaha pinggol ni sidea borat marbinogei; mata ni sidea itutup sidea, ase ulang marpangidah mata ni sidea, ulang marpanangar pinggolni, ulang mangarusi uhurni anjaha mulak sidea Bangku, gabe Hupamalum sidea.’

²⁸ Botoh nasiam ma, domma itongos Naibata haluahon on bani halak sipajuh begu-begu, anjaha tangihonon ni sidea do in.

²⁹ Ase dob ihatahon ai laho ma Jahudi ai hunjai; buei do parsualan ni sidea samah sidea.

³⁰ Dua tahun do si Paulus marianan bani rumah sewaanni ai, ijalo do sagala na roh hu bani.

³¹ Marhinsah ni uhur do ia mangambilankon Harajaon ni Naibata, ampa mangajarhon pasal Tuhan Jesus Kristus, anjaha seng dong na mangambat.

Rom

Hata Tabi Bani Kuria Rom

- 1** ¹ Ahu Paulus, juakjuak ni Jesus Kristus, na tardilo gabe apostel, na pinapulig mangambilankon Ambilan Na Madear na hun bani Naibata,
- ² na pinarbagah-Ni ai hinan ibagas Surat Na Pansing in marhitei nabi-nabi-Ni,
- ³ pasal Anak-Ni, na dob tubuh humbani ginompar ni si Daud ia daging-Ni,
- ⁴ anjaha na pinabangkit gabe Anak ni Naibata ibagas hagogohon, mangihutkon Tonduy Na Pansing, marhitei na puho hun bani na matei, ai ma Jesus Kristus, Tuhanta in.
- ⁵ Hun Bani do ijalo hanami idop ni uhur ampa jabatan apostel, laho manuankon haporsayaon ampa pambalasion bani goran-Ni, i tongah-tongah ni bangsa sipajuh begu-begu,
- ⁶ humbani sidea do homa nasiam, nasiam na dob nidilo ni Jesus Kristus.
- ⁷ nasiam haganup, na i huta Rom, na hinaholongan ni Naibata, na mapansing anjaha na tardilo: Idop ni uhur ma bani nasiam ampa damei humbani Naibata Bapanta ampa Tuhan Jesus Kristus!

Sihol ni Uhur ni si Paulus Marayak Kuria Rom

⁸ Parlobei huhatahon ma tarima kasih bani Naibatanku marhitei Jesus Kristus halani nasiam haganup, ai tarambilan do haporsayaon nasiam i sab dunia on.

⁹ Naibata, na hubalosi ibagas tonduyhu marhitei na mangambilankon Ambilan Na Madear ni Anak-Ni in, la do saksingku, paboa na so marnamaronti ahu mardingat nasiam.

¹⁰ Tongtong do hupangindo ibagas tonggongku, andohar boi ahu marayak nasiam, atap antigan pe, domu hubani rosuh ni Naibata.

¹¹ Ai masihol do uhurhu mangidah nasiam, andohar tarbere ahu deba bani nasiam sibere-bere partonduyon, laho patoguhkon haporsayaon nasiam,

¹² artini ai, ase dapotan gogoh age ahu humbani nasiam halani haporsayaonta rombang.

¹³ Tapi sihol ma botohon nasiam, ale hasoman, na dob gati do husurahon marayak nasiam, ase marbuah ahu bani nasiam songon na bani bangsa na legan, tapi tarlanglang do ronsi sonari.

¹⁴ Parutang do ahu bani halak Gorik age bani bangsa na legan, bani halak na pentar-pentar age bani halak na bodoh,

¹⁵ halani ai do ase husurahon mangambilankon Ambilan Na Madear in age bani nasiam i huta Rom.

Kuasa ni Ambilan Na Madear

¹⁶ Ai seng huhailahon Ambilan Na Madear in, ai hagogohon ni Naibata do in paluahkon sagala na porsaya, halak Jahudi parlobei, dob ai halak Gorik.

¹⁷ Ai ipatalar do ijin hapintoron ni Naibata, humbani haporsayaon hubani haporsayaon, songon na dob tarsurat in, “Na manggoluh do parpintor in halani haporsayaonni.”

Ringis ni Naibata Dompak Sipajuh Begu-begu Halani Hajahatonni

¹⁸ Ai ipatalar do ringis ni Naibata hun nagori atas dompak sagala jolma na so daulat anjaha na geduk, na mangambat hasintongan in marhitei hagedukon.

¹⁹ Halani pambotoh pasal Naibata, torang do bani sidea, ai Naibata sandiri do pabotohkon ai bani sidea.

²⁰ Ai boi do taridah biak ni Naibata na ponop in, ai ma hagogohon-Ni na manongtong in ampa hanaibataon-Ni, timbangon ni uhur humbani pambahenan-Ni ai, dob itompa dunia on, ase ulang adong sidalian ni sidea.

²¹ Halani age pe ibotoh sidea adong Naibata, seng ipasangap sidea la songon Naibata, anjaha seng ipuji, gabe ipaoto-oto pingkiranni ma sidea, anjaha golap ma pingkiran ni sidea na so marpangarusion ai.

²² Iagan na maruhur sidea, hape na oto do.

²³ Itukar sidea do hasangapon ni Naibata na manongtong in bani gana-gana ni jolma na laho salpu in, bani manuk-manuk, binatang ampa sipanjulur.

²⁴ Halani ai iondoskon Naibata do sidea ibagas hisap-hisap ni uhur ni sidea hu habutakon, pala ipabutak sidea dagingni samah sidea.

²⁵ Itukar sidea do hasintongan ni Naibata gabe ladung, gabe isombah anjaha ibalosi sidea ma na tinompa gantih ni Panompa, sipujion ronsi sadokah ni dokahni. Amen.

²⁶ Halani ai iondoskon Naibata ma sidea bani hisap-hisap habadoron; iubah parinangon ni sidea do hasomalan na patut hu bani ulah na so somal.

²⁷ Sonai homa dalahi, itadingkon do ruhut pardomuan bani parinangonni, gabe garang ma sidea ibagas hahisapon, pala dalahi samah dalahi mambahen habadoron, gabe sonai ma ijalo sidea upah ni hakahouon ni sidea bani dirini bei.

²⁸ Halani lang iporluhon sidea na mananda Naibata, gabe iondoskon Naibata ma sidea bani paruhumon na so margagan, ase ihorjahon na so patut.

²⁹ Gok do sidea bani masam ni hagedukon, hajahaton, hasamboron, uhur haut, latei, pamunuhon, paringoran, uhur sipahulah-hulah ampa akal-akal.

³⁰ Sidea, ai ma sipangkata-hatai, munsuh ni Naibata, sipanrisai, na jungkat, sigijang uhur, sibuei hata, paruhur na masambor, silawan na matoras,

³¹ na so maruhur, siosei padan, na so mambotoh holong ampa idop ni uhur.

³² Ibotoh sidea do namin aturan ni Naibata, na mangkatahon patut do marutang hosah na mangkorjahon sisonai, hape tong do ihorjahon, tapi seng pitah ihorjahon sidea, marosuh do sidea tene bani na mangkorjahon ai.

Halak Jahudi pe Pardousa do

2 ¹ Halani ai seng tarapiti ho dirimu, ale jolma sipanguhum, atap ise pe ho. Ai marhitei na manguhum halak na legan, iuhum ho do dirimu sandiri, ai na sonai do homa idalankon ho, ale sipanguhum!

² Ai ibotoh hita, domu hubani hasintongan do mangonai uhum ni Naibata hubani na mangkorjahon na sonai ai.

³ Ai iagan ho, ale jolma, tarsimbili ho uhum ni Naibata, anggo iuhum-uhumi ho na mangkorjahon na sonai, hape dihut do ho mambahensi?

⁴ Atap na mapas do uhurmu bani dear ni layak-Ni na buei in, bani panganjuon-Ni age lumbang ni uhur-Ni? Seng ibotoh ho, dear layak ni Naibata sihol manogu ho bani hamubahon ni uhur?

⁵ Tapi halani hengkeng ni uhurmu ampa uhurmu na so ra mubah in, ipajunjun ho do bam ringis bani ari parsogop ni ringis ai ampa partalar ni uhum ni Naibata na pintor ai,

⁶ na mambalaskon bani ganup domu hubani horjani bei:

⁷ Ai ma hagoluhan na sadokah ni dokahni bani halak na golgol mangkorjahon na madear, anjaha na mangindahi hasangapon, hamuliaon ampa na manongtong ai,

⁸ tapi ringis ampa gila do bani halak sipanlawan anjaha na so ra mambalosi hasintongan in, ai ma sipambalosi bani hagedukon.

⁹ Hamarsikon ampa biar do sogop bani uhur ni sagalajolma, na mangkorjahon hajahaton, bani halak Jahudi parlobei, sonai homa bani halak Gorik.

¹⁰ Tapi hasangapon, hamuliaon ampa damei do bani sagala na mangkorjahon na madear, halak Jahudi parlobei, sonai homa halak Gorik.

¹¹ Ai seng sididah rupa Naibata.

Seng Marhasurungan Jahudi Halani Titah Tumang

¹² Ai sagala sipardousa, na so martitah, magou do homa lang martitah; anjaha sagala na mardousa, sipartitah, uhumon ni titah do.

¹³ Ai seng na mambogei titah in pintor i lobei ni Naibata, tapi na mangkorjahon titah in do pintoranni.

¹⁴ Ai sipajuh begu-begu pe, na so martitah in, ihorjahon do humbani biakni na pinindo ni titah in; ase sidea sandiri ma gabe titah bani sidea na so martitah in.

¹⁵ Hunjai ma taridah, paboa na dob tarsurat do na pinindo ni titah in ibagas uhur ni sidea. Anjaha panggora ni uhur ni sidea pe dihut do manaksihon, anjaha pingkiran ni sidea marsiaduan atap marsiapitan,

¹⁶ ai ma bani ari, roh konsi Naibata manguhumi sagala na ponop bani jolma in marhitei Kristus Jesus, domu hubani na huambilankon in.

¹⁷ Igoran ho do dirimu Jahudi, marhatengeran do ho bani titah in, anjaha Naibata ipangunsagahkon ho.

¹⁸ Ibotoh ho do rosuh-Ni, anjaha ibotoh ho do manimbangi na malo ampa na so malo, niajaran ni titah in.

¹⁹ Talup do ho, ninuhurmu pambobai na mapitung, panondang bani halak na ibagas hagolapan,

²⁰ pamodahi bani na hurang uhur, sipangajari bani na etek, ai dong do bam habotohon ampa hasintongan pasal titah in.

²¹ Hape halak na legan ipodahi ho, tapi dirimu sandiri lang ipodahi ho. Ho do mangkatahon, “Seng bulih manangko.”

²² Ihatahon ho, “Ulang marbangkis,” hape ho do marbangkis. Magigi do ho bani gana-gana, hape panrampok do ho i rumah panumbahan.

²³ Ipangunsagakon ho do titah in, tapi ipahiri ho do Naibata marhitei panlanggaronmu bani titah in.

²⁴ Songon na tarsurat in, “Mahiri do goran ni Naibata i tengah-tengah ni sipajuh begu-begu halani nasiam.”

Seng Marhasurungan Jahudi Halani Parsunaton Tumang

²⁵ Marguna do parsunaton in anggo idalankon ho titah in. Tapi anggo panlanggar do ho bani titah in, gabe seng marguna be parsunaton in bam.

²⁶ Ase anggo idalankon na so tarsunat in pinindo ni titah in, ai lang hiraon ma ia, na so tarsunat ai, songon na tarsunat?

²⁷ Ai lang na so marsunat ai ma, anggo idalankon titah in, na manguhumi ho, simada hata ampa parsunaton in, anggo ilanggar ho titah in?

²⁸ Ai sedo pardarat ai Jahudi na sintong, anjaha sedo bani daging ai parsunaton na tongon.

²⁹ Tapi Jahudi na sintong, ai ma Jahudi parbagas ai, anjaha parsunaton na botul, ai ma na ibagas uhur ai, marhitei Tonduy sedo marhitei surat ni titah. Sisonai ma dapotan puji-pujian, sedo humbanijolma, tapi humbani Naibata do.

Adong do Hasurungan ni Jahudi

3 ¹ Ase aha ma hasurungan ni Jahudi, anjaha aha ma gunani parsunaton ai?

² Buei do, ibagas haganup. Parlobei, ondosan ni hata ni Naibata do sidea.

³ Ai sonaha? Anggo seng porsaya deba, mintor halani na so porsaya ai ma sidea gabe seda habujuron ni Naibata?

⁴ Seng sonai. On do tene, parsintong do Naibata, tapi parladung do haganupjolma, songon na tarsurat in, "Ase pintor Ham bani hata-Mu, anjaha monang Ham ibagas panguhumon-Mu."

⁵ Tapi anggo hagedukonta mambahen jongjong hapintoron ni Naibata, aha ma sihatahononta? Ai na so adil ma Naibata, anggo ipadalan ringis-Ni? Sahap hajolmaon do sahapkai.

⁶ Seng sonai. Ambit sonai, ija ma taruhum Naibata dunia on?

⁷ Tapi anggo ladungku pabanggal habonaron ni Naibata gabe hasangapon-Ni, mase uhumon-Ni ope ahu songon pardousa?

⁸ Ai lang dearan ma horjahon hita na masambor ase roh na madear? Patut do hona uhum halak sisonai ai.

Haganup do Jolma Pardousa

⁹ Ase sonaha ma? Marhasurungan do hita? Otik pe lang. Domma hupatorang: Halak Jahudi pe atap halak Gorik, rap ginomgoman ni dousa do,

¹⁰ songon na tarsurat in: Seng dong na pintor, sahalak pe lang.

¹¹ Seng dong na maruhur, seng dong na pindah-pindah bani Naibata.

¹² Haganup do manlembang, rap na so margagan do sidea; seng dong sihorjahon na madear, sahalak pe lang.

¹³ Tanoman na ngangang do tolonan ni sidea, dilah ni sidea mansahapkon ladung; bisa ni ulog darih do i toruh ni bibir ni sidea.

¹⁴ Gok do babah ni sidea bani bura-bura ampa hata podou.

¹⁵ Hinsah do nahei ni sidea manduruskon daroh.

¹⁶ Hamagouan ampa hamarsikon do ibagas dalan ni sidea,

¹⁷ ia dalan hadameion in, seng ibotoh.

¹⁸ Seng dong biar dompak Naibata ibagas pangidah ni sidea.

¹⁹ Tapi ibotoh hita do, bani na ginomgoman ni titah in do haganup hata ni titah in, ase sip sagala pamangan, anjaha marsalah ganup sindunia on i lobei ni Naibata.

²⁰ Ai marhitei na mangkorjahon titah seng adongjolma na dapotan hapintoron i lobei ni Naibata. Ai marhitei titah panandaion bani dousa do roh.

Pamintorion ni Naibata Marhitei Haporsayaon

²¹ Tapi sonari domma torang hapintoron ni Naibata, sedo hun bani titah, songon sinaksihon ni titah in ampa nabi-nabi,

²² ai ma hapintoron ni Naibata, na das marhitei haporsayaon bani Jesus Kristus hubani haganup na porsaya.

²³ Ai seng dong ubahni, sabonar haganup do sidea mardousa, anjaha seng dong sipujion i lobei ni Naibata.

²⁴ Gabe ipintori do sidea marhitei silayak-layak halani idop ni uhur-Ni, hinorhon ni panobusion na ibagas Kristus Jesus.

²⁵ Ia do ipajongjong Naibata gabe hitei pardearan marhitei haporsayaon bani daroh-Ni ai, laho patalar hapintoron-Ni, halani domma isalpuhon dousa sapari ibagas sabar ni uhur-Ni,

²⁶ laho patalar hapintoron-Ni bani panorang sonari, ase pintor Ia, anjaha ipintori na porsaya bani Jesus.

²⁷ Ase adong ope siunsagahononkon? Seng dong be ai. Marhitei titah ja do? Marhitei titah horja do? Lang, tapi marhitei titah haporsayaon in do.

²⁸ Ase on do ijolom uhurta: Marhitei haporsayaon do ipintori jolma, sedo marhitei na mangkorjahon titah.

²⁹ Ai pitah Jahudi do simada Naibata? Ai lang dihut do bangsa sipajuh begu-begu? Nai ma tongon, dihut do bangsa sipajuh begu-begu!

³⁰ Ai sada do Naibata na mamintori na tarsunat marhitei haporsayaon ni sidea ampa na so marsunat halani haporsayaon ni sidea.

³¹ Ase na manrumbakkon titah do hita halani haporsayaon in? Seng sonai, tapi na pajongjongkon titah in do hita.

Si Abraham pe Marhitei Maporsayaon do Ipintori

4 ¹ Jadi aha ma hatahononta, na dapot si Abraham, ompungta ai mangihutkon pardagingon?

² Porini ipintori si Abraham halani horjani, adong do sipangunsagahkononni, tapi seng dompak Naibata.

³ Aha do na hinatahon ni Surat in? “Na porsaya do si Abraham bani Naibata, gabe ai ma ihira gabe hapintoronni.”

⁴ Bani halak siparhorja, upah do ai ihira, sedo songon idop ni uhur, tapi songon hakni do.

⁵ Bani halak na so marhorja, tapi na porsaya bani Sipintori halak na jahat in, haporsayaonni ai do ihira gabe hapintoronni.

⁶ Sonai homa si Daud, iparhatuah do halak na gabe pintor ihira Naibata, seng humbani horjani,

⁷ “Martuah ma halak na dob sinasap salahni, anjaha na dob nirungkub dousani!

⁸ Martuah ma halak, anggo lang ihira Tuhan in dousani bani!”

⁹ Ise do na iparhatuah ijai? Halak na marsunat do hansa, atap dihut do na so marsunat? Ai ihatahon hita do, “Ihira do haporsayaon ni si Abraham gabe hapintoronni.”

¹⁰ Ai sonaha do iparhirahon bani? Dob marsunat do ia, atap lape marsunat? Sedo dob marsunat, tapi sanggah lang marsunat ope.

¹¹ Ijalo do parsunaton ai songon tanda atap lak ni hapintoron na humbani haporsayaon ai, sanggah lape tarsunat ia, ase bapa ia bani sagala na porsaya na so marsunat, gabe iparhirahon homa bani sidea hapintoron ai.

¹² Bapa do ia homa bani na marsunat, tapi seng asal tarsunat, sihol ma iirikkon haporsayaon ni si Abraham, bapanta ondi, sanggah lape marsunat ia.

¹³ Ai seng marhitei titah in roh bagah-bagah bani si Abraham atap bani ginomparni, paboa ia do sitean dunia on, tapi marhitei hapintoron na humbani haporsayaon in do.

¹⁴ Ai ambit sihorjahon titah in do gabe sipanean, seng marguna be haporsayaon in, anjaha seng be asi bagah-bagah in.

¹⁵ Ai ringis do ihorjahon titah in, tapi anggo seng dong titah, seng dong panlanggaron.

¹⁶ Ase humbani haporsayaon in do in, ase maronjolan bani idop ni uhur, totap bagah-bagah in bani haganup ginomparni, seng pitah bani na humbani sipartitah, tapi dihut do bani na porsaya songon si Abraham. Ia do bapa ni hita haganup,

¹⁷ *(songon na tarsurat in, "Hubahen do ho gabe bapa ni buei bangsa")* i lobei ni Naibata, na

hinaporsayaanni ai, Sipagoluh na dob matei anjaha na mandilo na so adong hinan gabe adong.

¹⁸ Marimbang sagala pangarapan do haporsayaonni na mangarap ai, ase gabe bapa ni buei bangsa ia, domu hubani hata ai, “Sonai ma magira ginomparmu.”

¹⁹ Anjaha seng roh galekni haporsayaonni paidah-idah angkulani na matei-matei ai, age pe domma hira-hira saratus tahun umurni, sonai age mangidah si Sara na dob hasayoban ai.

²⁰ Seng ra bungbang uhurni manadingkon haporsayaonni bani bagah-bagah ni Naibata, tapi lambin toguhni do tene haporsayaonni anjaha ipasangap do Naibata.

²¹ Tenger tumang do uhurni, paboa tuk do kuasa ni Naibata pasaudkon bagah-bagah-Ni.

²² Halani ai do ase ihira ai gabe hapintoronni.

²³ Hata “iparhirahon bani,” seng pitah halani ia tumang, ase tarsurat ai,

²⁴ tapi dihut do halani hita, anjaha iparhirahon do ai banta, na porsaya bani Sipapuho Jesus, Tuhanta in, humbani na matei.

²⁵ Ai iondoskon do la halani panlanggaronta, anjaha ipagoluh halani pamintorion banta.

Buah ni Hapintoron na hun Bani Haporsayaon

5 ¹Ase, dob ipintori hita halani haporsayaon, mardamei ma hita pakon Naibata, marhitei Tuhanta Jesus Kristus.

²Marhiteihon-Si do boi masuk hita hubani idop ni uhur halani haporsayaon, ai ma hajongjonganta nuan, anjaha megah do hita halani pangarapan bani hasangapon ni Naibata.

³Tapi seng pitah ai, megah do homa hita ibagas hamarsikon, ai ibotoh hita, ihorhon hamarsikon ai do hasabaron;

⁴hasabaron ai mangkorhon hatalupon, anjaha hatalupon ai mangkorhon pangarapan.

⁵Anjaha pangarapan ai seng paroh haboron, ai domma iuseihon hubagas uhurta holong ni uhur ni Naibata marhitei Tonduy Na Pansing, na dob binere-Ni banta.

⁶Ai sanggah galek ope hita, ijai ma tongon matei Kristus mangkopkop parjahat.

⁷Ai payah do dong na ra matei mangkopkop parpintor; ra, adong do na barani matei mangkopkop halak na bujur.

⁸Tapi Naibata, domma ipatar holong ni uhur-Ni ai banta, ai ma marhitei na matei Kristus mangkopkop hita, sanggah pardousa ope hita.

⁹ Ase lambin maluah ma hita nuan humbani ringis in marhiteihon-Si, dob ipintori hita ibagas daroh-Ni ai.

¹⁰ Ai anggo ipadamei hita pakon Naibata sanggah munsuh-Ni ope hita, marhitei parmateri ni Anak-Ni in, ai lang lambin maluah ma hita, na dob pinadamei-Ni in, dob manggoluh la?

¹¹ Tapi seng pitah ai, megah do homa hita ibagas Naibata, marhitei Tuhanta Jesus Kristus, ai marhiteihon-Si do ijalo hita nuan pardameian in. Dousa pakon hamatean roh marhitei si Adam, tapi idop ni uhur ampa hagoluhan roh marhitei Kristus

¹² Halani ai, songon na masuk dousa in hu dunia on marhitei sada halak, anjaha marhitei dousa in roh hamatean, anjaha sonai ma das hamatean in bani haganupjolma, halani haganup sidea mardousa.

¹³ Ia dousa domma i dunia on hinan, age seng roh hinan ope titah in, tapi dousa seng ihira, anggo seng dong titah.

¹⁴ Tapi hamatean in domma manggomgomi humbani si Adam nari das hubani si Musa, age pe seng dos pardousaon ni sidea hubani panlanggaron ni si Adam; usihan ni na sihol roh do ia.

¹⁵ Tapi silayak-layak ai seng songon panlanggaron ai. Ai anggo halani panlanggaron ni sada halak matei na mabuei in, daoh do surungan das bani na mabuei in idop ni uhur ni Naibata ampa silayak-

layak, marhitei pangidopi ni sada jolma, in ma Jesus Kristus in.

¹⁶ Anjaha silayak-layak ai pe seng songon pangkorhon ni dousa ni na sada halak ai. Ai ihorhon uhum halani sada panlanggaron do hamagouan, tapi ihorhon silayak-layak ai do pamintorion humbani buei panlanggaron.

¹⁷ Ai anggo manggomgomi hamatean marhitei na sada halak ai halani panlanggaronni ai, lobihni ai ma halak na manjalo idop ni uhur na marlobih-lobih ampa silayak-layak hapintoron in, manggoluh anjaha manggomgomi marhitei na sada in, in ma Jesus Kristus.

¹⁸ Ase songon panlanggaron ni sada halak mangkorhon uhum hamagouan bani haganup jolma, sonai do marhitei pamintorion ni sada halak das hapintoron na pagoluhkon bani haganup jolma.

¹⁹ Ai songon marhitei panlawan on ni sada jolma gabe mardousa simbuei in, sonai do marhitei pambalosion ni na Sada in bahenon-Ni pintor simbuei in.

²⁰ Jadi roh ma titah in patambah panlanggaron; tapi tambah pe dousa, lambin tambah do idop ni uhur.

²¹ Ase, songon na manggomgomi lobei dousa marhitei hamatean, sonai do age idop ni uhur in manggomgomi marhitei hapintoron na

mangkorhon hagoluhan na sadokah ni dokahni marhitei Jesus Kristus Tuhanta in.

Matei Bani Dousa, Manggoluh Ibagas Kristus

6¹ Ase, aha ma hatahononta? Nunutonta ma mardousa, ase lambin tambah idop ni uhur?

² Seng sonai! Hita, na dob matei bani dousa in, sonaha tarbahen hita be manggoluh ibagas in?

³ Na so ibotoh nasiam do, haganup hita, na tardidi ibagas Kristus Jesus, hubagas hamatean-Ni do hita tardidi?

⁴ Jadi na dob rap tartanom do hita rap pakon-Si marhitei pandidion in, ase songon Kristus Jesus, na dob pinapuhu humbani na matei marhitei hasangapon ni Bapa-Ni, sonai homa hita mardalan ibagas goluh na baru.

⁵ Ai anggo domma sangkabona hita pakon-Si ibagas na songon parmateri-Ni ai, sada do homa hita pakon-Si ibagas parpuho-Ni ai.

⁶ Ai ibotoh hita, na dob tarsilang do hajolmaonta na buruk in rap pakon-Si, ase iparseda badan pardousaon, ase ulang ra be hita parjabolongan ni dousa,

⁷ ai barang ise na dob matei, maluah do ia humbani dousa.

⁸ Tapi, anggo domma matei hita rap pakon Kristus ihaporsayai uhurta, rap manggoluh ma hita homa pakon-Si.

⁹ Ibotoh hita, ia Kristus, dob puho la humbani na matei, seng matei be; seng irajai hamatean in be la.

¹⁰ Ia matei pe la, sahali ai do matei halani dousa; ia manggoluh nuan, manggoluh bani Naibata do.

¹¹ Sonai ma hira nasiam diri nasiam: Matei bani dousa, tapi manggoluh bani Naibata ibagas Kristus Jesus.

¹² Ase, ulang be dousa ai manrajai ibagas badan nasiam na ra matei in, laho mambalosi hisap-hisapni.

¹³ Anjaha ulang ma ondskon nasiam pagori nasiam bani dousa in, gabe sinjata ni hajahaton, tapi ondskon nasiam ma diri nasiam bani Naibata, songon na dob pinagoluh humbani na matei, anjaha pagori nasiam pe, bani Naibata ma in, gabe sinjata ni hapintoron.

¹⁴ Ai seng rajaani ni dousa in be nasiam, ai seng titah be manggomgomi nasiam, tapi idop ni uhur do.

¹⁵ Ase, sonaha do? Mardousai ma hita, halani seng be titah manggomgomi hita, tapi idop ni uhur do? Seng sonai!

¹⁶ Ai lang ibotuh nasiam, bani ise iondskon nasiam diri nasiam gabe jabolon pambalosi, jabolon ma nasiam bani na binalosan nasiam ai, atap jabolon ni dousa hu hamatean, barang pambalosi bani hapintoron.

¹⁷ Tapi tarima kasih ma bani Naibata, ai age pe jabolon ni dousa hinan nasiam, tapi gabe pambalosi

do nasiam sonari hun bani gok ni uhur nasiam bani ruhut ni pangajarion, na dob das bani nasiam.

¹⁸ Ai dob lopas nasiam humbani dousa in, gabe pambalosi do nasiam bani hapintoron.

¹⁹ Ruhut ni jolma ma huhatahon halani hagalekon ni daging nasiam. Ai songon na dob niondoskon nasiam pagori nasiam pambalosi bani habutakon ampa na so uhum, laho mangkorjahon na so uhum in, sonai ma nuan ondskon nasiam pagori nasiam bani hapintoron, laho papansingkonsi.

²⁰ Tongon sanggah jabolon ni dousa nasiam, bebas do nasiam humbani hapintoron.

²¹ Tapi aha do buahni jumpah nasiam? Sihailaonkon anggo sonari bani nasiam, ai hamatean do ujungni.

²² Tapi sonari, dob bebas nasiam humbani dousa, dob gabe pambalosi nasiam bani Naibata, adong do buah nasiam hu hapansingon; anjaha ujungni ai ma hagoluhan na sadokah ni dokahni.

²³ Ai upah halani dousa, ai ma hamatean, tapi silayak-layak ni Naibata do hagoluhan na sadokah ni dokahni marhitei Kristus Jesus Tuhanta in.

Seng be Titah Simada na Porsaya, Tapi Kristus do

7 ¹ Ai lang ibotoh nasiam, nasiam sanina (hubani na mambotoh titah do hatangkon), na igomgomi titah do jolma, sadokah manggoluh ia?

² Sada naboru, na dob tarsangkut do ia marhitei titah bani paramangonni, sadokah manggoluh

dalahi ai, tapi anggo domma matei dalahi ai, bebas ma naboru ai humbani titah dompak dalahi ai.

³ Halani ai parbangkis do ia goranon, anggo laho ia bani dalahi na legan, sanggah manggoluh ope paramangonni. Tapi, anggo domma matei dalahi ai, bebas ma ia humbani titah, seng be parbangkis ia goranon, anggo laho ia bani dalahi na legan.

⁴ Sonai ma nasiam, ale hasoman, domma matei nasiam bani titah in marhitei daging ni Kristus, ase na legan simada nasiam, ai ma na dob puho humbani na matei in, ase marbuah hita bani Naibata.

⁵ Ai, sanggah ibagas daging hita, margogoh do hisap pardousaon in ibagas pagorinta halani titah in, gabe naparbuahkon hamatean.

⁶ Tapi sonari domma sirang hita humbani titah in, matei bani sipanjolomi hita hinan, ase pambalosi hita ibagas habayuon ni Tonduy in, ulang be ibagas haburukon ni surat ni titah in.

Titah na Dear in Gabe Sihorhon Dousa

⁷ Ase sonaha ma hatahononta? Dousa do titah in? Seng sonai! Tapi seng na hutanda dousa, anggo seng marhitei titah in. Ai seng na hubotoh hisap-hisap in, ambit lang ihatahon titah in, "Ulang ho marhahisapon."

⁸ Marbona humbani titah in, ipuhoi dousa in do ibagas ahu bagei ni hisap-hisap; ai matei do dousa, anggo seng adong titah.

⁹ Manggoluh do ahu hinan, seng martitah. Tapi roh ma titah in, gabe manggoluh ma dousa in.

¹⁰ Tapi anggo ahu matei do, ase gabe hamatean do bangku titah in, sihorhon hagoluhan namin.

¹¹ Ai marbona hunjai, ipaoto-oto anjaha ipamatei dousa in do ahu marhitei titah in.

¹² Ase na pansing do titah in, pansing do tonah ni Naibata, pintor anjaha dear.

¹³ Ai gabe hamatean do bangku na madear in? Seng sonai! Tapi dousa in do paroh hamatean bangku marhitei na madear, ase talar dousa in, anjaha tidak jahatni na tarlobih in marhitei titah in.

Kuasa ni Dousa Ibagas Diri ni Jolma

¹⁴ Ai ibotoh hita, partonduyon do titah in; tapi paruhur daging do ahu, na dob tarjual bani dousa.

¹⁵ Ai seng huarusi na hubahen in; ai seng na huharosuhkon ai huhorjahon, tapi na huhagigihon ai do hulahoi.

¹⁶ Tapi anggo huhorjahon na so huharosuhkon, na husatujui ma hadearon ni titah in.

¹⁷ Ase sedo ahu na mangkorjahon ai, tapi dousa ai do na marianan ibagas ahu.

¹⁸ Ai hubotoh do, seng dong na madear marianan ibagas ahu, ai ma ibagas dagingku. Ia sihol ni uhur

jumpah do namin bangku, tapi na mandalankon na madear seng dong jumpah.

¹⁹ Ai seng huhorjahon na madear, na hinarosuhkonkai, tapi na sambor, na so huharosuhkon do hubahen.

²⁰ Jadi anggo hubahen na so huharosuhkon, seng ahu na mangkorjahon ai, tapi dousa ai do na marianan ibagas ahu.

²¹ Ase on ma titah na jumpah ahu ibagas diringku: Na madear do husurahon sihol bahenonku, tapi na masambor do huhorjahon.

²² Ai ihamalaskonjolma parbagas na bangku ai do namin titah ni Naibata,

²³ tapi huidah do titah na legan ibagas pagori ni dagingku, na marmunsuh dompak titah na ibagas uhurhu, gabe ipatunduk do ahu bani titah ni dousa, na adong ibagas pagoringku.

²⁴ Aih, ahujolma na masombuh on. Ise ma na paluahkon ahu hun bani angkula hamatean on?

²⁵ Tarima kasih ma bani Naibata marhitei Jesus Kristus Tuhanta in. Ase, sonai ma nuan: Ahu sandiri mambalosi titah ni Naibata marhitei uhurhu ibagas, tapi marhitei daging, titah ni dousa do.

Pasal Goluh Partonduyon ni Halak na Porsaya

8 ¹ Ase, seng mangonai be nuan uhum bani halak na ibagas Kristus Jesus, *(na so marparlahou*

marguru hubani saging, tapi marguru bani Tonduy do).

² Ai titah ni tonduy hagoluhan na ibagas Kristus Jesus do na mamardekahon ahu humbani titah ni dousa ampa hamatean.

³ Ai dob seng margogoh be titah in, pinagalek ni daging, isuruh Naibata ma Anak-Ni sandiri marrupa daging pardousaon, marhalanohon ni dousa. Gabe sonai ma ihonahon uhum bani dousa in, ibagas daging ai,

⁴ ase jumpah ma hapintoron na pinangindo ni titah in banta, hita na marparlahou mangihutkon Tonduy, seng mangihutkon daging.

⁵ Ai pardagingon do iparuhurhon na mangihutkon daging, tapi partonduyon do iparuhurhon na mangihutkon Tonduy in.

⁶ Ai hamatean do hauhuron ni daging, tapi hauhuron ni Tonduy ai ma hagoluhan ampa hadameion.

⁷ Ia hauhuron ni daging ai ma hamunsuhon dompak Naibata; seng ra tunduk in bani titah ni Naibata, ai seng tarbahensi.

⁸ Halak na ibagas daging seng tarbahensi pamalas uhur ni Naibata.

⁹ Ia nasiam, seng ibagas daging, tapi ibagas Tonduy do, anggo tongon Tonduy ni Naibata marianan ibagas nasiam. Tapi anggo seng Tonduy ni Kristus banijolma, seng Kristus simadasi.

¹⁰ Tapi anggo Kristus ibagas nasiam, matei do tongon badan halani dousa, tapi manggoluh do tonduy halani hapintoron.

¹¹ Tapi anggo marianan ibagas nasiam Tonduy ni na mamuhoi Jesus humbani na matei, pagoluhon ni Sipuhoi Jesus humbani na matei in do age badan nasiam na ra matei in, marhitei Tonduy-Ni na marianan ibagas nasiam.

Pasal Haanakon ni Halak na Porsaya

¹² Ai pe ale hasoman, parutang do hita, tapi sedo bani daging, ase marparlahou marguru hubani saging.

¹³ Ai anggo marguru hu daging nasiam marparlahou, maningon matei do nasiam; tapi anggo ipamatei nasiam horja ni daging marhitei Tonduy in, manggoluh ma nasiam.

¹⁴ Ai sagala na binobahon ni Tonduy ni Naibata, ai ma anak ni Naibata.

¹⁵ Ai seng ijalo nasiam tonduy jabolon ase mangulaki biar, tapi tonduy anak do ijalo nasiam; marhitei in do hita mardilo: "Abba, Ham Bapa!"

¹⁶ Tonduy in do manaksihon rap pakon tonduyta, paboa anak ni Naibata do hita.

¹⁷ Ai anggo anak hita, dihut ma panean, panean bani Naibata, hasoman panean ni Kristus. Anggo hasoman-Ni hita manaron, gabe hasoman-Ni ma homa hita ibagas hasangapon.

¹⁸ Ai huhira, sitaronon bani panorang sisonari seng satimbang in marimbang hasangapon, na sihol sipatalaron ope banta.

**Pangarapan Ampa Hatotapon ni
Uhur ni Halak na Porsaya**

¹⁹ Ai masihol do sagala na tinompa in paimahon panorangni, ase ipatalar anak ni Naibata.

²⁰ Ai bani na lang do ipatunduk na tinompa in, seng humbani rosuhni, tapi halani na patundukkonsi do, ase dong pangarapan,

²¹ ai simardekahononkon do age na tinompa in, humbani parjabolonan ni hamagouan hu hamardekaon hasangapon ni anak ni Naibata.

²² Ai ibotoh hita do, rap marhoih anjaha mangarou do sagala na tinompa in ronsi sonari.

²³ Ambah ni ai, age hita, na dob manjalo limbuah ni Tonduy in, marhoih do ibagas uhurta, paimahon haanakon, ase maluah pamatangta.

²⁴ Ai ase marpangarapan do, ase ipaluah hita. Ai anggo naidah na niarapkon in, seng pangarapan be ai; ai anggo domma naidah, mase arapkonon be ai.

²⁵ Tapi, anggo mangarap do hita bani na so nididah ope, sabar ma hita paimahonsi.

²⁶ Tapi age Tonduy in, iurupi do hita bani hagalekonta. Ai seng ibotoh hita, barang aha do na patut sipindoonta, gabe iapiti Tonduy in do hita marhitei hoih na so tarhatahon.

²⁷ Tapi ibotoh Sitanda uhur in do paruhuron ni Tonduy in, ai marguru bani rosuh ni Naibata do pangapiti-Ni bani halak na mapansing in.

²⁸ Ai ibotoh hita do, haganup do manumpak hubani na madear bani sagala na marholong ni uhur bani Naibata, na nidilo-Ni hun bani sura-sura-Ni hinan.

²⁹ Ai na tinanda-Ni hinan, ai do itodoh, ase usih sidea hu bani rupa ni Anak-Ni in, ase la ma na parlobei tubuh humbani sanina na buei in.

³⁰ Ai na tinanda-Ni hinan, ai do idilo, anjaha na nidilo-Ni, ai do ipintori, anjaha na pinintoran-Ni, ai do ipasangap.

³¹ Ai pe, aha ma hatahononta pasal ai? Anggo Naibata hasomanta, ise ma imbangta?

³² Seng ilioi Anak-Ni sandiri, tapi iondoskon do mangkopkop hita haganup; mintor lang ma layak-layakkonon-Ni rap pakon-Si haganupan ai banta?

³³ Ise ma na mangaduhon na pinilih ni Naibata? Naibata do na mamintori.

³⁴ Ise ma na mandabuh uhum? Domma matei Kristus Jesus, lobih ni ai ope tene, domma mulak manggoluh, i siamun ni Naibata do la mangapiti hita.

³⁵ Ise manirang hita humbani holong ni uhur ni Kristus? Hamarsikon do atap hasosakan, parburuon do atap lohei, hatalanjangon do atap mara atap podang do?

³⁶ Songon na tarsurat in, “Halani Ham do hanami ibunuhi layur ari, songon biribiri sisayaton do hanami ihira.”

³⁷ Tapi ibagas haganupan ai monang do hita halani na mangkaholongi hita ai.

³⁸ Tenger do uhurhu, seng tarbahen sirang hita humbani holong ni uhur ni Naibata, na ibagas Kristus Jesus Tuhanta in, barang bahenon ni hamatean, barang hagoluan, barang malekat, barang siparkuasa, barang na masa sonari, barang na sihol masa, barang hagogohon pe,

³⁹ barang bahenon ni na i atas age na i toruh, ronsi sagala na tinompa na legan pe.

Pusok ni Uhur ni si Paulus Halani Hona Padarat Bangsa Jahudi

9 ¹ Sintong do na huhatahon on ibagas Kristus, seng marladung ahu, dihut do panggora ni uhurhu manaksihon marhitei Tonduy Na Pansing,
² paboa pusok tumang do uhurhu anjaha tongtong marborit ni uhur ibagas.

³ Ipangindo uhurhu do age bali humbani Kristus halani saninangku, hasomanku sabangsa mangihutkon pardagingon.

⁴ Bangsa Israel do sidea, simada hak haanakon, hasangapon, parpadanan, titah, parugamaon, bagah-bagah,

⁵ ampa ompung ni bangsa in, anjaha humbani sidea do roh Kristus mangihutkon pardagingon, Naibata na mangatasi haganup, na tarpuji ronsi sadokah ni dokahni. Amen.

**Totap do Bagah-bagah ni Naibata, Tapi Lang
Bani Haganup Halak Israel Mangasi ai**

⁶ Tapi sedo na gabe lang asi hata ni Naibata. Ai seng haganup na marasal humbani Israel, margoran Israel ai.

⁷ Anjaha seng haganup ginompar ni si Abraham anak ni si Abraham, tapi: Na susur humbani si Isak do goranon ginomparamu.

⁸ Artini ai: Sedo anak ni daging anak ni Naibata, tapi anak na pinarbagah-bagah ai do ihira anak na tongon.

⁹ Ai sonon do hata ni bagah-bagah ai: Sonon musimni use, roh do Ahu, anjaha adong ma ijai sada anak bani si Sara.

¹⁰ Seng pitah ai buktini, tapi dihut do si Rabekka, na boratan rumah humbani sada halak, ai ma si Isak, ompungta ai.

¹¹ Ai sanggah lape tubuh ope sidea, lang ope ihorjahon na madear barang na masambor, ase totap sura-sura ni Naibata domu hubani pamilihon-Ni.

¹² Seng marguru bani pambahenan, tapi pitah bani na mandilo tumang do, ihatahon do hu

bani: “Maningon sikahanan do pambalosi bani sianggian.”

¹³ Songon na tarsurat ai homa, “Holong do uhur hubani si Jakob, tapi sogam do bani si Esau.”

**Ipahengkeng Naibata do Deba Halak
Jahudi Domu hu Bani Sura-sura-Ni
Laho Paluahkon Sipajuh Begu-begu**

¹⁴ Ai pe, aha ma hatahononta? Ai lang songon na geduk ma Naibata? Seng sonai.

¹⁵ Ai ihatahon do hubani si Musa, “Maidop do uhur-Hu bani na Huidopi, anjaha marontou do uhur-Hu bani siontouan ni uhur-Hu.

¹⁶ Ase seng marguru bani rosuh ni jolma atap horjani, tapi bani idop ni uhur ni Naibata do.”

¹⁷ Ai sonon do nini surat in hubani siarao, “Halani on do ase Hupabangkit ho, ase Hupatalar kuasang-Ku marhitei ho, ase tarambilan goran-Ku hu sab dunia on.”

¹⁸ Ase iidopi do na sihol siidopan-Ni, anjaha ipahengkeng do na sihol sipahengkengon-Ni.

¹⁹ Ra ihatahon ham do bangku: Mase mansalahkon ope la? Ai ise boi manlawan harosuh-Ni?

²⁰ Ale jolma, ai ise ma ho, na pag manjabab Naibata? Mintor hatahonon ni na pinauli ma bani na paulihonsi: “Mase ma sonon ahu ibahen ham?”

²¹ Ai lang markuasa sitopa hudon, laho manjadihon humbani sangkimpal tanoh halampung, deba

parugas bani na sangap anjaha deba nari bani na dorun?

²² Tapi sonaha ma, laho pataridahkon ringis-Ni anjaha pabotohkon kuasa-Ni, marsabar ni uhur do Naibata manganju parugas siringisan, na pinasirsir hinan hu hamagouan,

²³ ase ipabotohkon habayakon ni hasangapon-Ni bani parugas siidopan, ai ma na pinasirsir-Ni hinan bani hasangapon,

²⁴ ai ma hita, na dob nidilo-Ni, seng pitah humbani Jahudi tumang, tapi dihut do homa humbani sipajuh begu-begu?

²⁵ Songon na hinatahon-Ni ai bani surat ni si Hosea, "Goranon-Ku ma na so bangsang-Ku hinan bangsang-Ku, anjaha na so hinaholongan hinan haholongan-Ku."

²⁶ Anjaha, bani ianan ai, dob ihatahon bani sidea, "Seng bangsang-Ku hanima," pala ijai ma sidea goranon anak ni Naibata na manggoluh in.

²⁷ Ai idilohon si Jesayas do pasal bangsa Israel: "Age pe nasa buei ni horsik na i topi ni laut buei ni anak ni Israel, pitah teba-tebani do na maluah."

²⁸ Ai pasaudon ni Tuhan in do hata-Ni i tanoh on gok anjaha podas.

²⁹ Songon na dob jinahaan ni si Jesayas hinan: "Ambit lang itebai Tuhan Zebaot bonih banta, usih do hita bani Sodom ampa Gomora."

³⁰ Ase aha ma hatahononta? Sipajuh begu-begu na so mangindahi hapintoron, manjalo hapintoron, ai ma hapintoron na humbani haporsayaon.

³¹ Tapi Israel, na mangindahi titah hapintoron in, seng das hujai.

³² Halani aha? Ai ma halani seng humbani haporsayaon, tapi humbani horja do, gabe tartolsu sidea bani batu partolsuan in,

³³ songon na tarsurat in: “Tonggor ma, hupatibal do i Sion sada batu partolsuan ampa sada batu gingging parsangsan, anjaha seng sipabadoron na porsaya Bani.”

Hamagouan ni Bangsa Israel:

Haondosan ni Ambilan Na Madear do Sidea, Hape Sai Ipindahi do Hapintoron na hun Bani Titah

10 ¹ Ale hasoman, ipindo uhurhu do anjaha hutonggohon do sidea bani Naibata, andohar maluah.

² Ai husaksihon ma pasal sidea, paboa na pongkut uhur ni sidea dompak Naibata, tapi seng maruhur.

³ Ai seng itanda sidea hapintoron ni Naibata anjaha ipindahi sidea do, pajongjongkon hapintoron ni sidea sandiri, seng unduk sidea bani hapintoron ni Naibata.

⁴ Ai Kristus do ujung ni titah in, laho mamintori sagala na porsaya.

⁵ Ai isuratkon si Musa do, paboa jolma na mangkorjahon hapintoron, na maronjolan bani titah, ai do na manggoluh marhitei ai.

⁶ Tapi hapintoron na humbani haporsayaon mangkatahon sonon: Ulang ma hatahon ibagas uhurmu: Ise ma na manaik hu nagori atas, ai ma, mangalop Kristus hunjai?

⁷ Atap: Ise ma tuad hu nagori toruh, ai ma, mangarahkon Kristus humbani na matei?

⁸ Tapi sonon do ihatahon, “Dohor do bamu hata in, ibagas pamanganmu anjaha ibagas uhurmu.” Ai ma hata haporsayaon, na niambilankonnami.

⁹ Ai maluah ma ham, anggo isaksihon ham marhitei pamanganmu Tuhan Jesus, anjaha ihaporsayai ham ibagas uhurmu, na dob ipuhoi Naibata la humbani na matei.

¹⁰ Ai marhitei uhur do halak porsaya laho hu hapintoron, anjaha marhitei pamangan manaksihon laho hu haluahon.

¹¹ Ai ihatahon surat in do, “Sagala na porsaya Bani, seng pabadoron.”

¹² Ai seng dong ubahni halak Jahudi age halak Gorik, ai sada do Tuhan ni haganup, na manlayak-layakkon habayakon-Ni bani haganup na mandilo-Si.

¹³ Ai sagala na mandilo goran ni Tuhan in, sai paluahon do.

¹⁴ Tapi sonaha ma pardilo ni sidea bani na so hinaporsayaon ni sidea? Tapi sonaha ma

pangkaporsayai ni sidea bani na seng onnga ibogei sidea? Sonaha ma pambogei ni sidea, anggo seng dong na mangambilankon?

¹⁵ Sonaha ma marambilan sidea, anggo lang adong na marsuruh? Songon na tarsurat in: “Jenges ni in langkah ni siambilankon na madear.”

Israel na So Porsaya

¹⁶ Tapi seng haganup na mambalosi Ambilan Na Madear in, ai nini si Jesayas do: “Ham Tuhan, ise ma na porsaya bani ambilannami?”

¹⁷ Ai humbani na manangar ambilan do roh ni haporsayaon, anjaha ambilan ai roh humbani hata ni Kristus.

¹⁸ Tapi on ma hatahononku: “Ai na so ibogei sidea do nani?” Domma namin! “Na dob das do sora ni sidea hu sab tanoh on, anjaha ronsi ujung ni dunia on do barita ni sidea.”

¹⁹ Tapi ningku use, “Seng nani ibotoh Israel ai?” Parlobei si Musa do na mangkatahon, “Bahenonku ma hanima marsimburu mangidah na so bangsa in, anjaha papuhoonku ma ringisnima dompak bangsa na so maruhur.”

²⁰ Pag do si Jesayas mangkatahon, “Na so mangindahi Ahu, ai do jumpahan, anjaha talar do Ahu bani na so sungkun-sungkun Bangku.”

²¹ Tapi bani Israel ihatahon do, “Layur-layur ari do hupaherbang tanganku bani bangsa na so mambalosi anjaha na manlawan.”

Otik Tumang do Jahudi na Porsaya

11 ¹ Ase husungkun ma, “Ai na iambukkon Naibata do bangsa-Ni?” Seng sonai! Ai halak Israel do age ahu, humbani ginompar ni si Abraham, marga Benjamin.

² Seng iambukkon Naibata bangsa-Ni, na dob tinanda-Ni hinan. Na so ibotoh nasiam do na hinatahon ni surat in pasal si Elias, sanggah na mangadu-adu ia bani Naibata pasal halak Israel:

³ “Ham Tuhan, domma ibunuhi sidea nabi-nabi-Mu, iparreong anjapanjap-Mu, anjaha sahalak ahu mando na tading manggoluh, anjaha hosahku pe sihol do buaton ni sidea.”

⁴ Tapi aha do balos ni Naibata na roh hu bani? “Husarihon do Bangku pitu ribu halak, na so marsombah bani naibata Baal!”

⁵ Sonai homa bani panorang sonari, adong do teba-teba na tading, na pinilih marhitei idop ni uhur.

⁶ Tapi anggo humbani idop ni uhur, seng be humbani horja, ai ambit sonai, seng goranon be ai idop ni uhur.

⁷ Ase sonaha do? Na pinindahan ni halak Israel, seng jumpah sidea, tapi halak na pinilih ai jumpahsi do ai; ia na legan ai domma ipahengkeng uhurni,

⁸ songon na tarsurat ai, “Ibere Naibata do bani sidea tonduy na tarpodom, mata na so marpangidah ampa pinggol na so marbinogei ronsi sadari on.”

⁹ Anjaha si Daud pe ihatahon do, “Meja ni sidea gabe tirangkap ampa siding ma bani sidea, gabe partolsuan ampa pambalason ma tene!

¹⁰ Ipagolap ma mata ni sidea, ase ulang marpangidah, anjaha tanggurung ni sidea gundung ma tongtong!”

Tarbuang Jahudi Gabe Tarjalo Sipajuh Begu-begu

¹¹ On do na huhatahon, “Na sihol tompas do sidea, ase tartolsu? Seng sonai! Tapi panlanggaron ni sidea do gabe haluahon bani halak sipajuh begu-begu, ase marsimburu sidea pasal ai.

¹² Tapi, anggo panlanggaron ni sidea gabe habayakon ni dunia on, anjaha hahurangan ni sidea ai gabe habayakon ni sipajuh begu-begu, ai lang lobih ni ai ma, anggo masuk sidea haganup?

¹³ Hu bani nasiam sipajuh begu-begu do hatangkon: Halani apostel bani sipajuh begu-begu do ahu, sangap do hubahen jabatankin,

¹⁴ andohar marsimburu hubahen hasomanku sabangsa, andohar maluah deba humbani sidea.

¹⁵ Ai anggo gabe pardameian do bani dunia on na tarbuang ai sidea, ai lang hagoluan humbani na matei ma in, anggo tarjalo use sidea?

¹⁶ Ai anggo pansing ruti na parlobei igalangkon ai, pansing ma age aguan na tading ai; anjaha anggo pansing uratni, pansing ma age dangkahni.

**Limbaga Pasal Hayu Jetun Harangan
ampa Hayu Jetun na Sinuan**

¹⁷ Tapi anggo irampingkon deba rantingni, ase boi ho, na marasal humbani hayu jetun harangan hinan, isumbatkon hujai, gabe parrupe i ho bani hayu jetun, na gok minak ai,

¹⁸ ulang ma gijang uhurmu dompak ranting ai. Anggo gijang uhurmu, ingat ma, sedo ho na mangusung urat ai, tapi niusung ni urat ai do ho.

¹⁹ Sihol hatahononmu, "Irampingkon pe ranting ai, ase ahu do isumbatkon hujai!"

²⁰ Dear! Halani na so porsaya do sidea ase irampingkon, tapi halani haporsayaon do ase jongjong ho. Ulang ma gijang uhurmu, tapi mabiar ma tene!

²¹ Ai anggo seng ipaturut Naibata ranting hinan, ho pe sabonar seng paturuton-Ni.

²² Ai pe, tonggor ma layak ni Naibata ampa koras-Ni: Koras do la dompak na dob tompas ai; layak do la dompak ho, anggo tetap ho ibagas halayakon-Ni in, anggo lang, rotapon-Ni do age ho!

²³ Sidea pe, anggo seng martahan sidea ibagas na lang porsaya ai, sumbatkononni do; margogoh do Naibata manumbatkon sidea use.

²⁴ Ai anggo irampingkon ho humbani hayu jetun harangan hinan, gabe isumbatkon ho hubani hayu jetun na sinuan, marlawanan hubani biak hinan, lambin sidea ma lang tarsumbatkonsi bani hayu jetun hinan? Dob masuk sipajuh begu-begu, jumpahan haluahon do age Jahudi na tading ai

²⁵ Seng marosuh uhurhu, ale hasoman, seng ibotoh nasiam pasal rusia on, ase ulang mangunsagah nasiam bani pambotoh nasiam. Na dob sogop do lobei hahengkengon bani deba bangsa Israel, paima gok bilangan ni sipajuh begu-begu masuk,

²⁶ anjaha marhitei na sonai maluah haganup Israel, songon na tarsurat in, “Na roh ma hun Sion Sipaluah, padaohon-Ni ma hajahaton hun Jakob!”

²⁷ Anjaha on ma padanku pakon sidea, anggo hubuat ma dousa ni sidea.

²⁸ Ase domu hubani Ambilan Na Madear in, munsuh do sidea halani nasiam, tapi domu hubani pamilihon in, haholongan do sidea halani ompung na lobei.

²⁹ Ai seng onggga manosal Naibata pasal sibere-bere-Ni ampa pandiloon-Ni.

³⁰ Ai hinan seng sibalosi Naibata nasiam, tapi sonari jumpahan idop ni uhur do, halani na so porsaya ai sidea.

³¹ Sonai ma sidea sonari seng pambalosi, gabe dapotan idop ni uhur nasiam, ase jumpahan idop ni uhur homa sidea.

³² Ai domma iondoskon Naibata haganup hubani uhur na so mambalosi, ase idopan-Ni use haganup.

Pujian-pujian Pasal Dalan Halongangan ni Naibata

³³ Bagasni in tene habayakon, hapentaran ampa habotohon ni Naibata! Na so tarpareksa do uhum-Ni, anjaha na so taririk-irik do dalan-Ni!

³⁴ Ai ise ma na mambotoh pingkiran ni Tuhan in? Ise do sipanuturi Bani?

³⁵ Ise do na parlobei mambere Bani, ase la mambalas use bani?

³⁶ Ai hun Bani, marhiteihon-Si anjaha hu Bani do haganupan in. Bani ma hasangapon sadokah ni dokah ni, Amen!

Goluh Hakristenon na Sintong

12 ¹ Ai pe, hupaingat ma nasiam sanina marhitei idop ni uhur ni Naibata, ondoskon nasiam ma angkula nasiam gabe galangan na manggoluh, na susi anjaha na hinarosuhkon ni Naibata, in ma parsombahon nasiam na maruhur!

² Anjaha ulang ma sarupa nasiam pakon dunia on, tapi mubah ma marhitei habayuon ni uhur, ase boi nasiam manimbangi atap aha do rosuh ni uhur ni Naibata, ai ma na madear, harosuh ampa na gokan dear.

**Bagei ni Sibere-bere Partonduyon
Ampa na Mandalankon ai**

³ Ase marhitei idop ni uhur na binere-Ni hu bangku, huhatahon ma bani ganup nasiam, “Ulang ma gijang hira nasiam diri nasiam lobih humbani na patut, tapi pandei ma nasiam maruhur, ganup ma domu hubani banggal ni haporsayaon, na binagihon ni Naibata bani.”

⁴ Ai songon hita marpagori na buei do bani sada badan, tapi seng sahorja pagori ai haganup,

⁵ sonai do homa hita, na buei ai, sada badan ibagas Kristus, tapi pagori bei do hita samah hita.

⁶ Palegan-legan do sibere-bere banta domu hubani idop ni uhur na binere banta. Anggo panjahaion, sihol ma domu hubani haporsayaon.

⁷ Anggo horja marugas, horja marugas ma; anggo pangajarion, mangajari ma!

⁸ Anggo horja mamodahi, ai ma; anggo na marsibere-bere, ibagas bulus ni uhur ma; anggo na mambobahon, marringgas ni uhur ma; anggo na marsilayak-layak, humbani malas ni uhur ma.

**Ojur-ojur Mandalankon na
Madear Maronjolan Bani Holong**

⁹ Ulang ma marsipahulah-hulah holong ni uhur in! Hagigihon nasiam ma na jahat in, parayak ma na madear!

¹⁰ Marsihaholongan ma nasiam ibagas holong parsaninaon! Marsilobei-lobeian ma nasiam marsipasangapan!

¹¹ Ulang ma surut ringgas ni uhur nasiam, hinsah ma ibagas tonduy, sisir ma mambalosi Tuhan in!

¹² Marmalas ni uhur ma nasiam mangarap, sabar bani hamarsikon, golgol bani tonggo!

¹³ Sarihon nasiam ma na porlu bani halak na mapansing; haporluhon ma partamueion!

¹⁴ Pasu-pasu nasiam ma na marburu nasiam, pasu-pasu ma, ulang burai!

¹⁵ Marmalas ni uhur ma nasiam rap pakon na marmalas ni uhur, tangis ma pakon na tangis!

¹⁶ Sada ma uhur nasiam samah nasiam; ulang ma hagijangon ai pingkiri nasiam, tapi hatoruhon ma parayak; ulang ma na pandei nasiam iagan uhur nasiam!

¹⁷ Ulang ma balaskon nasiam na jahat balas ni na jahat; porluhon nasiam ma na madear i lobei ni haganup halak.

¹⁸ Anggo tarbahen, sibar na tarhorjahon nasiam, mardamei ma nasiam pakon haganup halak.

¹⁹ Nasiam na hinaholongan, ulang ma nasiam mambalas, tapi padas nasiam ma ringis in bani Naibata, ai tarsurat do, "Bangku do pambalason, Ahu pe mambalaskon, nini Tuhan in."

²⁰ Ai pe, anggo loheian munsuhmu, bere mangan ia; anggo horahan ia, bere minum! Ai anggo ibahen ham sonai, na pajunjun narnar do ham bani uluni.

²¹ Ulang ma talu ham ibahen na jahat, tapi taluhon ham ma na jahat in marhitei na madear.

Parjongjong Dompok Pamarentah

13 ¹ Unduk ma ganup halak bani pamarentah na markuasa. Ai seng dong pamarentah anggo seng na humbani Naibata, na dong ai pe Naibata do manotapkon ai.

² Ase, na manlawan aturan ni Naibata do na manlawan pamarentah. Anjaha na manlawan ai, jaloonni do uhum bani.

³ Ia pamarentah seng sihabiaran ai bani sihorjahon na madear, tapi bani sihorjahon na jahat do. Marosuh ham seng mabiar bani pamarentah? Na dear ma horjahon, ase dapotan puji-pujian ham hun bani sidea.

⁴ Juakjuak ni Naibata do sidea, laho mambahen na madear bamu. Tapi, anggo na jahat ihorjahon ham, patut do mabiar ham, ai seng gurou-gurou podang na binoanni ai. Juakjuak ni Naibata do sidea, laho mangkonahon uhum bani sihorjahon hajahaton.

⁵ Halani ai patut do unduk hita, seng pitah halani ringis ai, tapi homa halani panggora ni uhur in.

⁶ Halani ai galar nasiam ma balasting. Pagawei ni Naibata do sidea na tongtong mardiateihon pasal in.

⁷ Galar nasiam ma bani ganup halak na patut situngguonni. Balasting bani na patut manjalosi, sohei bani haondosanni, biar bani na patut habiaran anjaha sangap bani na patut pasangapon.

Holong do Rimpun ni Sagala Titah

⁸ Ulang ma marutang nasiam age bani ise pe, sobali na marsihaholongan, ai na mangkaholongi hasoman, in do na manggoki titah in.

⁹ Ai titah na mangkatahon, “Ulang ho marbangkis, ulang ho mamunuh, ulang ho manangko, ulang ho manguhur-uhuri,” ronsi titah na legan pe, on do rimpunni: “Haholongi ma hasomanmin songon dirimu!”

¹⁰ Ia holong in seng ibahen na jahat dompak hasoman; ase holong do hagogok ni titah in.

Ojur-ojur Margoluh Hapansingon

¹¹ Ambah ni ai, ibotoh nasiam do, sonaha panorang on, paboa na jumpah ma panorangni puho humbani na modom, ai domma lambin dohor haluahonta nuan, marimbang mulai porsaya hita.

¹² Na laho salpu ma borngin, na dohor ma siang ni ari. Ai pe, tanggali hita ma pambahenan hagolapan, anjaha pakei hita ma sinjata haliharon!

¹³ Tipak ma parlahounta songon na patut arian, ulang marmangan-mangan ampa marminum-minum, ulang marhabutakon ampa uhur na so maila, ulang maringor ampa marsimburu!

¹⁴ Tapi pakei nasiam ma Tuhan Jesus Kristus, anjaha ulang ma balosi nasiam daging nasiam, laho mamuhoi hisap-hisapni.

Pasal na Marsianju-anjuan

14 ¹ Anju nasiam ma na galek marhaporsayaon, ulang ma marsalisih pasal pingkiran.

² Porsaya do na sada boi panganonni haganup, tapi na galek ai sayur-sayuran do hansa ipangan.

³ Na mangankon ulang ma mapas uhurni bani na so mangankon; anjaha na mangorom pe ulang ma iuhum-uhumi na mangankon, ai na dob ijalo Naibata do age ia.

⁴ Ai ise do ham, mambahen na iuhumi ham jabolon ni halak na legan? Marguru bani tuanni do ia, atap na jongjong ia barang na tompas. Tapi totap do ia, ai tarpatotap Tuhan in do ia.

⁵ Bani uhur ni na deba, marsisurungan do ari, bani uhur ni na legan, dos do ari in. Ganup ma marsijoloman bani hatengeran ni uhurni bei.

⁶ Napapansingkon ari in, bani Tuhan in ma ipapansing in: na mangankon, halani Tuhan in ma ipangan, ai bani Naibata do ia martarima kasih; anjaha na mangorom, halani Tuhan ma ia

mangorom, anjaha bani Naibata ma ia martarima kasih.

⁷ Ai ganup hita seng manggoluh bani dirinta, anjaha ganup hita seng matei bani dirinta.

⁸ Ai manggoluh pe hita, manggoluh bani Tuhan in do, anjaha matei pe hita, matei bani Tuhan in do. Ase manggoluh barang matei pe hita, tong do bani Tuhan in hita.

⁹ Ai ase matei pe Kristus anjaha mulak manggoluh, ase la do Tuhan ni na matei age na manggoluh.

¹⁰ Ia ham, mase ma uhum-uhumonmu hasomanmu, anjaha mase ma mapas uhurmu bani hasomanmu? Ai lang hagianup do hita maningon jongjong i lobei ni paratas ni Naibata?

¹¹ Ai tarsurat do, "Na manggoluh do Ahu, nini Tuhan. Bangku do manrogop sagala towod, anjaha sagala dilah mangakui Naibata."

¹² Ase ganup do hita marbalos pasal dirinta bei i lobei ni Naibata.

Ulang Sangsi Hasoman Nabahen

¹³ Ase ulang be hita marsiuhum-uhuman! Tapi dearan ma naputuskon, ulang be nabahen partolsuan atap parsangsian bani sanina.

¹⁴ Torang do hubotoh marhitei Tuhan Jesus, na so adong na butak hinan, tapi gabe butak do ai bani na mangahapkon ai butak.

¹⁵ Ai anggo ipusoki ham uhur ni hasomanmu marhitei na pinanganmu, seng be mardalan ibagas holong ham. Ulang ma magou hasomanmu halani sipanganon, ai na dob matei do Kristus mangkopkopsi.

¹⁶ Ulang ma na madear ai bani nasiam gabe sirisaon ni halak.

¹⁷ Ai sedo sipanganon barang siinumon Harajaon ni Naibata, tapi hapintoron ampa damei ampa malas ni uhur do ibagas Tonduy Na Pansing.

¹⁸ Ai anggo pambalosi ham bani Kristus pasal ai, harosuh ni Naibata ma ham anjaha harga banijolma.

¹⁹ Halani ai parayak hita ma na padameihon ampa na patorsa-torsahon hita samah hita!

²⁰ Ulang ma parseda horja ni Naibata halani sipanganon. Haganup do namin pansing, tapi gabe hasedaon do ai bani sada halak, anggo sangsi ia ibagas na mangankon ai.

²¹ Dearan ma ulang mangan gulei, ulang minum anggur, atap mangkorjahon aha pe, anggo mambahen parsangsi do ai bani hasomanmu.

²² Ia adong pe haporsayaonmu, bamu ma ai i lobei ni Naibata. Martuah ma halak, na so mansalahkan dirini be, pasal na dob hinadearhon ni uhurni.

²³ Ise na sangsi, tapi ipangan do, domma hona uhum, halani seng humbani haporsayaon ai. Ai

sagala na so tubuh humbani haporsayaon, dousa do.

**Pasal Parjongjong ni Halak
na Gogoh Dompok Halak na Galek**

15 ¹Tapi hita na margogoh in, patut do manganju hagalekon ni na hurang gogoh, anjaha ulang ma rosuhta sandiri pindahi hita.

²Ganup ma hita mambahen rosuh ni uhur ni hasoman, gabe hadearonni, laho pauli-ulihonsi.

³Ai Kristus pe seng rosuh-Ni sandiri ipindahi, songon na tarsurat in, "Risa-risa ni na manrisai Ham mangonai do hu Bangku!"

⁴Ai sagala na tarsurat hinan, bahen podah banta do ai, ase tarsurat ai, ase marpangarapan hita halani hasabaron ampa apoh-apoh na ibagas Surat in.

⁵Tapi Naibata, simada hasabaron ampa apoh-apoh ma mambere bani nasiam hasadaon ni uhur samah nasiam mangihutkon rosuh ni Kristus Jesus,

⁶ase sahur anjaha sasora ma nasiam mamuji Naibata, Bapa ni Tuhanta Jesus Kristus.

**Ojur-ojur Marsada ni Uhur Samah Jahudi Ampa
Kristen na hun Bani Sipajuh Begu-begu**

⁷Halani ai marsijaloan ma nasiam, songon panjalo ni Kristus banta, bahen hasangapon ni Naibata.

⁸Ai huhatahon ma bani nasiam, na dob gabe pambalosi do Kristus bani na tarsurat halani

hasintongan ni Naibata, laho patotapkon bagah-bagah, na hubani ompung na lobei,

⁹ anjaha sipajuh begu-begu pe pasangapkon Naibata do halani idop ni uhur-Ni, songon na tarsurat in, “Halani ai pujionku do Ham i tongah-tongah ni sipajuh begu-begu, anjaha dodingkononku do goran-Mu.”

¹⁰ Anjaha ihatahon use, “Marmalas ni uhur ma nasiam sipajuh begu-begu rap pakon bangsa-Ni!”

¹¹ Dob ai use, “Puji ma Tuhan in, nasiam haganup sipajuh begu-begu, anjaha haganup ma bangsa mamuji-Si.”

¹² Anjaha si Jesayas pe nini do, “Adong ma urat ni si Jesse, anjaha jongjong ma na manggomgom sipajuh begu-begu. Bani do mangarap sipajuh begu-begu.”

¹³ Tapi Naibata, simada pangarapan in ma manlayak-layakkon bani nasiam hagogok ni malas ni uhur ampa damei marhitei haporsayaon, ase lambin tambah nasiam marpangarapan marhitei gogoh ni Tonduy Na Pansing.

Hatorangan ni si Paulus Ase Itongos Surat on

¹⁴ Ahu pe torang do hubotoh, nasiam saninangu, paboa na dob gok do nasiam bani na madear, marisi bani haganup habotohon, anjaha boi marsipodah-podahan samah nasiam.

¹⁵ Tapi sonai pe, mapagtu do ahui manurat bani deba suratku bani nasiam, songon na pasingatkon

nasiam, halani idop ni uhur na binere ni Naibata bangku,

¹⁶ ai gabe siparugas bani Kristus Jesus ampa gabe malim ni Ambilan Na Madear na humbani Naibata bani bangsa sipajuh begu-begu, ase gabe galangan na hinarosuhkon ni Naibata sidea haganup, na pinapansing ibagas Tonduy Na Pansing.

¹⁷ Ibagas Kristus Jesus, adong do na mambahen megah uhurhu pasal horjangku i lobei ni Naibata.

¹⁸ Ai seng barani ahu mangkatahon atap aha pe, sobali na binahen ni Kristus marhitei ahu, ai ma laho manogu-nogu sipajuh begu-begu hu pambalosion ibagas hata ampa pambahenan,

¹⁹ marhasoman hagogohon ni tanda ampa halongangan, ibagas hagogohon ni Tonduy Na Pansing, gabe das huambilankon Ambilan Na Madear na humbani Kristus, mamungkah hun Jerusalem ampa nagori inggotni ai das ronsi Iliria.

²⁰ Hasangaponku do huhira na mangambilankon Ambilan Na Madear in bani ianan, na so tarboge i ope ijai goran ni Kristus, ase ulang ahu songon na pauli rumah bani onjolan ni halak na legan,

²¹ tapi songon na tarsurat in ma, “Marpangidah ma na so dapotan barita pasalsi, anjaha mangarusi ma na so onnga mambogeisi.”

²² On do halani mambahen gati tarabat ahu marayak nasiam.

²³ Tapi anggo nuan, seng adong be sihorjahononku i nagori ai; anjaha domma piga-piga tahun hinan ihasiholi uhurhu marayak nasiam, bani pardalananku na laho hu Spania.

²⁴ Ai arap do uhurhu, idahonku nasiam sanggah na montas ahu, anjaha itaruhkon nasiam ahu hujai, dob lobei sombuh uhurhu otik mangidah nasiam.

²⁵ Tapi hu Jerusalem ope langkahku sonari, laho marugas bani halak na pansing ai,

²⁶ ai iputuskon kuria na i Mekedonia ampa na i Akaya do, mambahen tumpak pangurupion bani hasoman na mapansing na hurangan i Jerusalem.

²⁷ Domma sonai iputuskon sidea, ai parutang do sidea tongon bani sidea ai. Ai anggo gabe parrupei sipajuh begu-begu bani arta partonduyon na adong bani sidea, patut do sipajuh begu-begu mangurupi sidea pasal na porlu bani pardagingon.

²⁸ Anggo domma husaloseihon ai anjaha hupadas buah ai bani sidea, sihol do ahu bingkak hu Spania, anjaha singgah bani nasiam.

²⁹ Tapi hubotoh do, anggo roh ahu bani nasiam, ibagas hagogok ni pasu-pasu ni Kristus do ahu roh.

³⁰ Tapi ojur-ojur hubani nasiam, ale hasoman, marhitei Tuhanta Jesus Kristus ampa marhitei holong ni uhur ni Tonduy in: Hasomani nasiam ma ahu maruntol marhitei na manonggohon ahu bani Naibata,

³¹ andohar ipaluah ahu humbani halak na so porsaya i Judea, anjaha iharosuhkon halak na mapansing ai horjangku na hu Jerusalem ai,

³² andohar marmalas ni uhur ahu das bani nasiam, domu hubani rosuh ni Naibata, boi marsaran bani nasiam.

³³ Naibata Pardamei in ma mangkasomani nasiam ganup. Amen.

Ondos-ondos Pasal si Poibe

Hata Tabi Ampa Lumba-lumba Bani Kuria ai

16 ¹ Huondoskon ma bani nasiam botouta si Poibe, siparugas i kuria Kenkerea,

² ase ijalo nasiam ia ibagas Tuhan in, songon na patut bani halak na mapansing, anjaha iurupi nasiam ia bani sagala horja, anggo porlu urupan. Ai na dob gabe sipangurupi do ia bani buei halak, age bangku pe.

³ Padas nasiam ma tabingku bani si Priska ampa bani si Akila, hasomanku parhorja ibagas Kristus Jesus,

⁴ na ra mamberehon borgokni laho mangkopkop ahu, gabe seng pitah ahu martarima kasih bani sidea, tapi haganup kuria na hun bani sipajuh begu-begu.

⁵ Tabingku homa bani kuria na martumpu i rumahni. Tabingku bani si Epenetus,

haholongankin, bunga tubuh bani Kristus i Asia.

⁶Tabingku bani si Maria, na buei mangkalojahon nasiam.

⁷Tabingku bani si Andronikus ampa si Junias, hasomanku samarga anjaha hasomanku tartutup, sidear barita bani apostel-apostel in, anjaha na parlobei ibagas Kristus ase ahu.

⁸Tabingku bani si Ampliatus, na huhaholongi ibagas Tuhan in.

⁹Tabingku bani si Urbanus, hasomanta sahorja ibagas Kristus, sonai bani si Stakis, haholongankin.

¹⁰Tabingku bani si Apelles, na tahan ibagas Kristus. Tabingku bani hasoman sarumah ni si Aristobulus.

¹¹Tabingku bani si Herodion, hasomanku samarga. Tabingku bani hasoman sarumah ni si Narkissus, na adong ibagas Tuhan in.

¹²Tabingku bani si Tripena ampa si Triposa, na ra loja halani Tuhan in. Tabingku bani si Persis, haholongan in, na ra loja tumang halani Tuhan in.

¹³Tabingku bani si Rupus, na pinilih ni Tuhan in, sonai bani inangni, na songon inang homa bangku.

¹⁴Tabingku bani si Asinkritus, si Plegon, si Hermes, si Patrobas, si Hermas, age bani sanina na rap pakon sidea.

¹⁵Tabingku bani si Pilologus, si Julia, si Nereus ampa botouni ai, bani si Olimpas ampa bani haganup hasoman ni sidea na pansing in.

¹⁶ Marsitabian ma nasiam marhitei summah na mapansing. Padas tabi do bani nasiam ganup kuria ni Tuhan in.

¹⁷ Hupaingat ma nasiam, saninangku, jaga ma nasiam bani halak na mambahen parsalisihan ampa parsangsian marhitei na manlawan podah, na dob jinalo nasiam. Padaoh nasiam ma diri nasiam hun bani sidea.

¹⁸ Ai halak na sonai, sedo Tuhanta Kristus in na binalosanni ai, tapi boltokni do, anjaha marhitei sahap na lampot-lampot ampa na mantin-mantin ipaoto-oto sidea do halak paruhur na saluju.

¹⁹ Na tarbarita do age ija pambalosion nasiam, anjaha malas do uhurhu pasal ai. Tapi huparsinta do ase pentar ma nasiam pasal na madear, anjaha pitah dompak na masambor.

²⁰ Tapi Naibata Pardamei in podas do ropukan-Ni sibolis hu toruh ni nahei nasiam. Idop ni uhur ni Tuhanta Jesus Kristus ma mangkasomani nasiam!

Hata Tabi hun Bani Hasoman Sahorja ni si Paulus

²¹ Manongos tabi do bani nasiam si Timoteus, hasomanku sahorja, sonai si Lusius, si Jason ampa si Sosipater, hasomanku samarga.

²² Mangkatahon tabi bani nasiam ibagas Tuhan in, ahu si Tertius, sisurat surat on.

²³ Mangkatahon tabi bani nasiam si Gayus, na manamuei ahu ampa haganup kuria in, sonai homa

si Erastus, bendahara kota in, ampa si Kuartas, sanina in.

²⁴ Idop ni uhur ni Tuhanta Jesus Kristus ma mangkasomani nasiam ganup! Amen.

Hata Puji-pujian Bani Naibata

²⁵ Tapi Bani ma, na boi margogohi nasiam, domu hubani Ambilan Na Madear na huambilankon ampa barita pasal Jesus Kristus, domu hubani pangungkabon ni rusia in, na iponopkon hun bani na basaia,

²⁶ tapi domma ipatalar anggo nuan, anjaha marhitei surat ni nabi-nabi ipabotohkon bani sagala bangsa, domu hubani tonah ni Naibata na manongtong in, laho mamboan sidea hu haporsayaon ampa pambalosion:

²⁷ Bani Naibata parhapentaran na sasada in ma hasangapon ronsi sadokah ni dokahni marhitei Jesus Kristus! Amen.

1 Korint

Tabi ampa Tarima Kasih ni Apostel Paulus

1 ¹ Hun bani si Paulus, na tardilo gabe apostel ni Kristus Jesus mangihutkon rosuh ni Naibata, ampa si Sostenes sanina in,

² hubani kuria ni Naibata na i Korint, na dob pinapansing ibagas Kristus Jesus, halak na mapansing, na tardilo rap pakon haganup halak na mandilo goran ni Tuhanta Jesus Kristus atap ija pe Tuhan ni sidea ampa Tuhanta:

³ Idop ni uhur ma bani nasiam ampa damei humbani Naibata Bapanta ampa humbani Tuhan Jesus Kristus!

Hata Tarima Kasih Halani Idop ni Uhur ni Naibata

⁴ Mangkatahon tarima kasih do ahu tongtong bani Naibata halani nasiam, mardingat idop ni uhur ni Naibata na binere-Ni bani nasiam ibagas Kristus Jesus.

⁵ Ai na dob bayak do nasiam ibagas la pasal haganup ibagas ganup hata in ampa bani ganup pangarusion,

⁶ halani hasaksian pasal Jesus domma totap bani nasiam,

⁷ gabe seng marhahurangan be nasiam pasal haganup masam ni sibere-bere partonduyon ibagas na paimahon nasiam bani partalar ni Tuhanta Jesus Kristus.

⁸ Patotapon-Ni do nasiam ronsi ujungni, gabe seng sihataon be bani ari ni Tuhan Jesus Kristus.

⁹ Haposan do Naibata, na mandilo nasiam hu parsaoan pakon Anak-Ni Jesus Kristus Tuhanta in.

Lumba-lumba Pasal na Marbolah-bolah

¹⁰ Tapi hupodahi ma nasiam, nasiam saninangku, marhitei goran ni Tuhanta Jesus Kristus, ase sahata ma nasiam haganup, ulang ma adong parbolah-bolahan bani nasiam, tapi totap ma nasiam sada marhitei sada ni uhur ampa sada ni pingkiran.

¹¹ Ai das do hu bangku marhitei parrumah ni si Kloe pasal nasiam, saninangku, paboa adong do paringoran i tongah-tongah nasiam.

¹² On do na huhatahon: Ganup do nasiam mangkatahon, "Ahu susian ni si Paulus! Ahu susian ni si Apollos! Ahu susian ni si Kepas! Ahu susian ni Kristus!"

¹³ Ai na binagi do Kristus in? Ai na dob tarsilang do si Paulus mangkopkop nasiam? Ai hubagas goran ni si Paulus do nasiam tardidi?

¹⁴ Tarima kasih ma huhatahon, halani seng dong hudidi humbani nasiam sobali si Krispus ampa si Gayus,

¹⁵ ase ulang adong na mangkatahon hubagas goranku sandiri nasiam tardidi.

¹⁶ Tapi dihut do tene parrumah ni si Stepanas hudidi; na legan, seng hubotoh atap adong ope na dob hudidi.

¹⁷ Ai seng isuruh Kristus ahu mandidihon, tapi mangambilankon Ambilan Na Madear do, anjaha ai pe seng marhata hapentaron, ase ulang lumei kuasa ni silang ni Kristus.

Hapentaron ni Naibata na Mangimbang Hapentaron ni Dunia on

¹⁸ Ai haotoon do hata pasal silang in bani halak na laho magou, tapi hagogohon ni Naibata do in banta, na jumpahan haluahon.

¹⁹ Ai tarsurat do, “Huparseda do hapentaron ni na pentar, anjaha huambukkon do uhur ni siparuhur.”

²⁰ Ija do halak na pentar? Ija do sibotoh surat? Ija do siparsual-sual ni dunia on? Ai lang gabe haotoon do hapentaron ni dunia on ibahen Naibata?

²¹ Ai halani ibagas hapentaron ni Naibata, seng itanda dunia on Naibata marhitei hapentaron, gabe iharosuhkon Naibata ma paluahkon na porsaya in marhitei ambilan haotoon.

²² Ai na mangindo tanda do halak Jahudi, anjaha mangindahi hapentaron halak Gorik.

²³ Tapi anggo hanami, Kristus na tarsilang in do iambilankon hanami; parsangsian do in bani Jahudi anjaha haotoon bani halak sipajuh begu-begu.

²⁴ Tapi bani na dob tardilo ai, halak Jahudi age halak Gorik, Kristus, ai ma hagogohon ni Naibata ampa hapentaron ni Naibata.

²⁵ Ai haotoon ni Naibata, pentaran do ai asejolma in, anjaha hagalekon ni Naibata, gogohan do ai asejolma in.

²⁶ Tonggor nasiam ma pandiloon-Ni in bani nasiam, saninangku, seng piga nasiam na pentar mangihutkon pardagingon, seng piga na markuasa, seng piga na sangap.

²⁷ Tapi na oto ninuhur ni dunia on, ipilih Naibata laho pailahon na pentar, anjaha na galek ninuhur ni dunia on, ipilih Naibata laho pailahon na gogoh.

²⁸ Na toruh anjaha na mahiri i dunia on ipilih Naibata, na lang in do tene, ase langkononni na adong hinan,

²⁹ ase ulang adong hajolmaon na mangunsagah i lobei ni Naibata.

³⁰ Tapi marhiteihonsi do ase ibagas Kristus Jesus nasiam, ai la do gabe hapentaron banta humbani Naibata, hapintoron ampa hapansingon ampa haluahon,

³¹ ase saud na dob tarsurat in, “Na mamuji dirini, ibagas Tuhan in ma ia mamuji!”

Jesus na Tarsilang in do lambilankon si Paulus

2¹ Ahu pe, nasiam sanina, sanggah na roh ahu bani nasiam, seng roh ahu mangambilankon hasaksian pasal Naibata marhitei hata hamaloon atap hapentaron pe.

² Ai huputuskon do ibagas uhurhu, aha pe lang sihol botohonku i tongah-tongah nasiam sobali Jesus Kristus, ai ma na dob tarsilang ai.

³ Ia ahu, ibagas hagalekon, biar ampa hagobiron do i tongah-tongah nasiam.

⁴ Hatangku ampa parambilananku pe, seng marhata hapentaron na manarik ai, tapi marhasoman hagogohon pakon Tonduy do,

⁵ ase maronjolan haporsayaon nasiam bani hagogohon ni Naibata, ulang ma bani hapentaron ni jolma.

Hapentaron na humbani Naibata

⁶ Tapi hapentaron do na sinahapkonkami ai bani halak na dob matoras, tapi sedo hapentaron ni dunia on atap hapentaron ni pambobai ni dunia on, na laho salpu in.

⁷ Tapi hapentaron na sinahapkonkami ai, ai ma hapentaron ni Naibata, gok rusia anjaha ponop, na dob tinotapkon ni Naibata, paima dong dunia on bahen hamuliaonta.

⁸ Ai ma na so tinanda ni pambobai ni dunia on, ai ambit itandai, tontu seng parsilangkononni Tuhan ni hamuliaon in.

⁹ Tapi songon na tarsurat in, “Na so onggga nididah ni mata, na so onggga binogei ni pinggol, anjaha na so onggga tubuh ibagas uhur ni jolma, ai do ipasirsir Naibata bani na mangkaholongi-Si.”

Tonduy Na Pansing do Sipatalar Hapentaron ni Naibata

¹⁰ Tapi ipatalar Naibata do ai banta marhitei Tonduy in. Ai haganup do idadap Tonduy in, ronsi na ibagas uhur ni Naibata.

¹¹ Ai ise jolma mambotoh na bani jolma in, sobali tonduy ni jolma na ibagas dirini? Sonai ma homa, seng dong na mananda na bani Naibata, sobali Tonduy ni Naibata.

¹² Tapi seng ijalo hita tonduy ni dunia on, tapi Tonduy na humbani Naibata do, ase ibotoh hita na nilayak-layakkon ni Naibata banta.

¹³ Anjaha in do na hinatahonnami, seng ibagas hata hapentaron ni jolma na targuruhon, tapi na pinodahan ni Tonduy do, laho patorangkon partonduyon bani halak na dob igoki Tonduy.

¹⁴ Ia jolma pardunia on, seng tarjalosi na humbani Tonduy ni Naibata, ai haotoon do ai bani, anjaha seng tartandasi, ai marhitei Tonduy do hansa boi dadapon ai.

¹⁵ Tapi sipartonduy idadap do haganupan ai, tapi ia sandiri seng tardadap atap ise pe.

¹⁶ Ai ise ma na mananda pingkiran ni Tuhan in, ase ia ma mangajari-Si? Tapi uhur ni Kristus do banta.

Uhur na Marpartei i Kuria Korint

3 ¹ Ahu pe, nasiam sanina, seng tarbahen ahu hinan marsahap bani nasiam songon bani partonduy, tapi songon dompak pardaging do, anjaha poso-poso ibagas Kristus.

² Dadih do hupainumkon bani nasiam, sedo sipanganon hinan, ai seng tarjalo nasiam ope in; gari sonari, seng tarjalo nasiam ope,

³ ai tong ope nasiam pardaging. Ai anggo masa bani nasiam parsimburuon ampa parsalisihan, ai lang pardaging do nasiam, anjaha marparlahou domu hubani biak hajolmaon?

⁴ Ai anggo adong na mangkatahon, “Susian ni si Paulus do ahu,” anjaha na legan use mangkatahon, “Susian ni si Apollos do ahu,” ai lang paruhur hajolmaon do nasiam ai?

Juakjuak ni Naibata do Hansa Siparambilan na Madear

⁵ Ai ise do si Apollos? Ise si Paulus? Juakjuak do sidea, parhiteian nasiam gabe porsaya, anjaha ganup domu hubani pambere ni Tuhan bani.

⁶ Ahu do manuan, si Apollos mangarbahi, tapi Naibata do patubuhkon.

⁷ Sedo sipanuan atap sipangarbahi na penting, tapi Naibata, na patubuhkon ai do.

⁸ Dos do sipanuan ampa sipangarbahi, anjaha ganup manjalo upahni domu hubani horjani bei.

⁹ Ai hasoman parhorja ni Naibata do hanami; juma ni Naibata anjaha rumah ni Naibata do ia nasiam.

Kristus do Onjolan ni Kuria in

¹⁰ Domu hubani idop ni uhur ni Naibata na binere-Ni bangku, hupauli onjolan ai, songon binahen ni tukang na pandei, tapi na legan do na pajongjongkon i atasni. Tapi ganup ma mardiateihon, sonaha parpajongjongni i atas ni ai.

¹¹ Ai seng tarpauli onjolan na legan, sobali na dob pinajonam in, ai ma Jesus Kristus in.

¹² Ase anggo adong halak na paulihon i atas ni ai, omas, pirak, batu na maharga, hayu, lamlam atap anggala pe,

¹³ hinorjahon ni ganup halak maningon talar do ai. Ai ari simagira ai do patandahon ai, halani marhitei apuy do ai roh, anjaha apuy ai do manguji barang sonaha horja ni ganup halak.

¹⁴ Anggo totap horja ni atap ise pe, na pinajongjongni i atas ni ai, jaloonne do upah.

¹⁵ Tapi anggo bois mosog hinorjahonni, rugi ma ia; maluah do anggo ia sandiri namin, tapi songon na manlopusi apuy ma.

Rumah ni Naibata do Ganup na Porsaya

Lumba-lumba Dompok Hapentaron Dunia

¹⁶ Ai seng ibotoh nasiam, rumah ni Naibata do nasiam anjaha Tonduy ni Naibata marianan ibagas nasiam?

¹⁷ Anggo adong na parsedahon rumah ni Naibata, parsedaon ni Naibata do ia, ai na pansing do rumah ni Naibata, ai ma nasiam.

¹⁸ Ulang ma adong na paoto-otohon dirini. Anggo adong i tongah-tongah nasiam na mamingkir na pentar ia i tanoh on, gabe oto ma ia lobei, andohar pentar use.

¹⁹ Ai hapentaron ni dunia on, haotoon do in i lobei ni Naibata, ai tarsurat do: "Itangkap do halak na pentar ibagas akal ni sidea."

²⁰ Dob ai use, ibotoh Tuhan in do, sisoya-soya do pingkiran ni halak na pentar.

²¹ Ase ulang ma adong na mangunsagah banijolma. Ai haganup in nasiam do simadasi,

²² barang si Paulus, si Apollos, si Kepas, dunia on, hagoluan, hamatean, na masa sonari ampa na sihol masa, haganup do bani nasiam,

²³ tapi Kristus do simada nasiam anjaha Naibata do simada Kristus.

Surung ni Jabatan Apostel

4 ¹ Ihira jolma in ma hanami juakjuak ni Kristus anjaha sijolom anakkunsi ni rusia ni Naibata.

² Na parlobei ipindo humbani sijolom anakkunsi, ai ma ase haposan sidea jumpah.

³ Anggo bangku, parkara na hampung do ai, ia iuhumi nasiam pe ahu, atap pangadilan ni jolma pe, tapi ahu pe, seng huuhumi diringku.

⁴ Ai seng dong salahku, anggo na hubotoh, tapi seng pintor ahu halani ai, Tuhan in do na manguhumi ahu.

⁵ Halani ai ulang ma nasiam manguhumi i lobei ni panorangni, i lobei ni parroh ni Tuhan in, na manondangi sagala na ponop ibagas na golap, anjaha na patalarhon sagala sura-sura ni uhur. Jadi ganup ma bani panorang ai dapotan puji-pujian humbani Naibata.

Toruh ni Uhur ampa Sitaronon ni Apostel

⁶ Tapi hu bangku ampa hubani si Apollos do, nasiam sanina, hutarik hata ai, halani nasiam, ase marhitei hanami iguruhon nasiam, ulang ma nalobihi na tarsurat in: Ulang ma adong humbani nasiam na pabanggal dirini mangkasomani na sada, laho mangimbang na sada nari.

⁷ Ai ise mambahen marhasurungan ham? Ai aha na adong bamu, na so jinalomu? Anggo na manjalo do, mase ma mangeljeng ham songon na so manjalo?

⁸ Domma bosur nasiam, domma bayak. Domma gabe raja nasiam, hanami lape. Ambit ma namin gabe raja nasiam, ase dihut hanami raja rap pakon nasiam!

⁹ Ai ninuhurhu, na dob ibahen Naibata do hanami apostel, gabe sitoruhan, songon na dob ipadas hu hamatean; gabe sitontonan do hanami bani dunia on, bani malekat ampa jolma.

¹⁰ Na oto do hanami halani Kristus, tapi nasiam, na pentar do ibagas Krisdo ibagas Kristus. Hanami na galek, tapi nasiam na gogoh. Hanami na dorun, tapi nasiam na sangap.

¹¹ Ronsi panorang on loheian anjaha horahan do hanami, hurang bani parhiouan, hona bogbogan anjaha seng marianan na totap,

¹² loja marhorja marhitei tangannami sandiri. Anggo hona parpahiri, mamasu-masu do hanami, anggo hona parburu, sabar do hanami,

¹³ anggo ipahata-hata, basar do hanami. Gabe songon tompoh-tompoh ni dunia on do hanami, songon apus-apus ni nahei ni haganup halak ronsi sonari.

Sihol Roh Apostel ai Marayak Sidea

¹⁴ Sedo na laho pailahon nasiam ase husurat on, laho paingat nasiam do songon anak na hinaholongan.

¹⁵ Ai age pe adong salaksa pangajari bani nasiam marhitei Kristus, seng piga anggo bapa, ai ahu do manubuhkon nasiam ibagas Kristus Jesus, marhitei Ambilan Na Madear.

¹⁶ Halani ai huojur ma nasiam, gabe sitiru ahu ma nasiam!

¹⁷ Halani ai do ase husuruh bani nasiam si Timoteus, ai ma anak bangku, na hinaholongan anjaha hatengeran ni uhur ibagas Tuhan, ase ia ma paingatkon nasiam pasal dalanku ibagas Kristus Jesus, songon na huajarhon ija-ija pe bani haganup kuria in.

¹⁸ Adong do deba na pabanggal-banggal dirini, songon na so roh be ahu bani nasiam.

¹⁹ Tapi podas do ahu roh marayak nasiam, anggo marosuh Tuhan, anjaha botohonku ma ijin gogoh ni na pabanggal-banggal dirini, sedo hata ni sidea.

²⁰ Ai sedo ibagas hata Harajaon ni Naibata, tapi ibagas hagogohon do.

²¹ Aha do ipangindo uhur nasiam? Marlonsing-lonsing do ahu roh bani nasiam, barang ibagas holong atap lamlam ni uhur do?

Sipabalion do Siparriah-riah hun Kuria

5 ¹ Tongon, tarbogei do, masa parriah-riahon bani nasiam, anjaha gari bani sipajuh begu-begu parriah-riahon na sonai seng masa, ai ma, pala iparjolma parinangon ni bapani.

² Anjaha sonai pe, ipagijang nasiam do diri nasiam. Ai lang dearan ma namin marpusok ni uhur nasiam, ase ipabali hun tengah-tengah nasiam na mangkorjahon na sonai?

³ Anggo ahu, age pe daoh pamatangku, i tengah-tengah nasiam do mangihutkon partonduyon; domma songon na i tengah-tengah nasiam ahu mandabuh uhum bani na mangkorjahon sisonai ai, ⁴ ibagas goran ni Tuhan Jesus. Anggo martumpu nasiam, anjaha tonduyhu rap pakon nasiam, marhasoman hagogohon ni Tuhanta Jesus,

⁵ padason ma halak na sonai bani setan, laho mangagou dagingni, andohar maluah tonduyni bani ari ni Tuhan Jesus.

⁶ Seng dear pangenjengon nasiam in. Lang ibotoh nasiam, otik pe na migar in, iigari do ganup niagu in?

⁷ Borsih ma padarat nasiam na migar na dob dokah in, ase na niagu na baru nasiam, halani seng niigaran nasiam. Ai domma ibunuh Biri-biri Paskah banta, in ma Kristus.

⁸ Ai pe marpesta ma hita, ulang marhitei na migar na dob madokah, ulang marhitei na migar hajahaton atap hasamboron, tapi marhitei ruti na so niigaran ma ibagas hasusion ampa hasintongan.

Lumba-lumba Pasal Parsaoran pakon Hasoman na Sambor Parlahouni

⁹ Domma husuratkon bani nasiam, na so bulih saor nasiam pakon parriah-riah.

¹⁰ Seng huhatahon ganup parriah-riah na i dunia on atap paruhur haut atap panrampok atap sisombah gana-gana; ambit sonai, maningon mandarat ma nasiam hun dunia on.

¹¹ On do tene na huhatahon bani nasiam bani surat in. Ulang ma saor nasiam bani halak na margoran sanina, hape parriah-riah do, atap bani paruhur haut atap sisombah gana-gana atap sipanrisai atap siparmabuk atap sipanrampok. Gari rap mangan pakon halak sisonai ai seng bulih.

¹² Ai mase ma uhumonku na i darat ni kuria? Ai lang nasiam siuhumi na ibagas kuria?

¹³ Na i darat, Naibata do na manguhumi ai. Padarat nasiam ma siparjahat in hun tongah-tongah nasiam!

Pasal na Marpakara

6 ¹ Anggo adong humbani nasiam na marpakara dompak hasomanni, pag do ia pauhumkon

dirini bani halak sipargeduk, anjaha sedo bani halak na mapansing?

² Ai lang ibotoh nasiam, halak na pansing do na sihol manguhum dunia on? Jadi, anggo nasiam do na manguhumi dunia on, ai lang talup do homa nasiam manguhumi parkara na sonin etekni?

³ Ai lang ibotoh nasiam, malekat pe uhumonta do? Lambin pasal pargoluhon ari-ari on ma lang?

⁴ Hape anggo adong parkara nasiam pasal pargoluhan ari-ari, mase ma ipauhumkon nasiam in bani halak na madorun bani kuria in?

⁵ Na pailahon nasiam do hatangkon, na so adong do na maruhur bani nasiam, age sahalak, na boi manguhumi sanina samah sanina?

⁶ Na marpakara do hape sanina samah sanina, anjaha i lobei ni na so porsaya?

⁷ Tongon, hataluon nasiam do in, anggo marpakara nasiam samah nasiam. Mase ma lang rahanan itaron nasiam na so pintor? Mase ma lang rahanan balosan nasiam hona rampas?

⁸ Hape nasiam sandiri do mambahen na so pintor anjaha manrampasi, anjaha samah na marsanina.

⁹ Ai lang ibotoh nasiam, na so sitean Harajaon ni Naibata do halak pargeduk? Ulang nasiam kahou! Seng sitean Harajaon ni Naibata parriah-riah atap sisombah gana-gana atap parbangkis atap na marjolmahon dalahi,

¹⁰ atap panangko atap paruhur haut atap parmabuk
atap panrisai atap panrampok pe.

¹¹ Anjaha sisonai do nasiam deba lobei. Tapi
domma nasiam iburihi, domma ipapansing, domma
ipintori marhitei goran ni Tuhan Jesus Kristus ampa
marhitei Tonduy ni Naibatanta.

Lumba-lumba Dompok Habutakon

¹² Haganup do bulih bangku, tapi seng haganup
marguna. Haganup do bulih bangku, tapi seng bulih
palopasonku diringku patundukon ni atap aha pe.

¹³ Bani boltok do sipanganon anjaha boltok bani
sipanganon, tapi rap parontihonon ni Naibata do in.
Tapi anggo angkula in, ulang bani parriah-riahon,
bani Tuhan ma in, anjaha bani angkula in do Tuhan.

¹⁴ Naibata do na dob papuho Tuhan in, anjaha
papuhoon-Ni do age hita marhitei hagogohon-Ni ai.

¹⁵ Ai lang ibotoh nasiam pagori ni Kristus do angkula
nasiam? Mintor pakeionku ma pagori ni Kristus in
gabe pagori ni boru jalang? Lang ale!

¹⁶ Ai lang ibotoh nasiam, na padomu dirini bani
boru jalang, na gabe sada angkula do ai? Ai nini do,
“Na gabe sada daging do na dua ai.”

¹⁷ Tapi na padomu dirini bani Tuhan in, gabe sada
tonduy do ia pakon-Si.

¹⁸ Maporus ma nasiam humbani parriah-riahon!
Sagala dousa na hinorjahon ni jolma, i darat

ni angkulani do ai, tapi na manriah-riah, bani angkulani do ia na mardousa ai.

¹⁹ Ai lang ibotoh nasiam, angkula nasiam do rumah ni Tonduy Na Pansing, na adong ibagas nasiam, na dob jinalo nasiam humbani Naibata, anjaha sedo nasiam simada nasiam?

²⁰ Ai harga do nasiam itobus, halani ai pasangap nasiam ma Naibata marhitei angkula nasiam.

Pasal na Marhajabuan ampa na So Marhajabuan

7 ¹ Tapi pasal na sinuratkon nasiam, on ma balosku: Dear do bani dalahi, ulang manjamah naboru.

² Tapi laho manlembangi parriah-riahon, dear ma ganup dalahi adong parinangonni sandiri, anjaha ganup naboru adong paramangonni sandiri.

³ Idalankon paramangon ma hawajibanni bani parinangonni, sonai homa parinangon dompak paramangonni.

⁴ Seng saguru bani parinangon in angkulani, tapi bani paramangonni do; sonai homa, seng saguru bani paramangon angkulani, tapi bani parinangonni do.

⁵ Ulang ma marsipadaohan nasiam, anggo seng humbani dos ni riah anjaha marpanorang, ase sompat martonggo; dob ai marsipadohoran ma use, ase ulang ilajou sibolis in nasiam, halani seng tahan mangorom.

⁶Tapi huhatahon pe sonai, na mambere partimbangan do ahu, sedo na mamarentah.

⁷Huparsinta do ase ganup jolma songon ahu on, tapi bani ganup do adong silayak-layak humbani Naibata, na sada sonon, na sada nari sonin.

⁸Tapi on ma hatangku bani na so mompo ampa bani naboru na mabalu: "Dear ma bani sidea, totap songon ahu on."

⁹Tapi anggo seng tarrajai sidea diri ni sidea, marhajabuan ma; ai dearan do marhajabuan humbani na garang.

Pasal na Marsirang-sirang

¹⁰Bani na dob marhajabuan huparentahkon ma, sedo ahu tene, tapi Tuhan do: Seng bulih sirang naboru ai humbani paramangonni,

¹¹tapi anggo domma sirang, ulang be laho, atap mardomu ma use bani paramangonni hinan. Anjaha dalahi pe, seng bulih sirangkononni parinangonni.

¹²Bani na legan ai ahu mangkatahon, sedo Tuhan in: Anggo adong sada sanina na marparinangon na so porsaya, anggo marosuh do uhur ni naboru ai rap pakonsi, ulang ma isirangkon ia.

¹³Anjaha anggo seng porsaya halahoan ni sada naboru, anggo marosuh do dalahi ai rap pakonsi, ulang ma itadingkon ia.

¹⁴ Ase gabe pansing do dalahi na so porsaya ai marhitei parinangon ai, anjaha gabe pansing do naboru na so porsaya ai marhitei sanina ai. Ambit lang, butak ma niombah nasiam, tapi tongon pansing do sidea.

¹⁵ Tapi anggo isirangkon na so porsaya ai dirini, paturut ma sirang. Seng sangkut sanina atap botou na dob Kristen bani na sonai ai, tapi bani pardameian do idilo Naibata nasiam.

¹⁶ Ai sonaha ma ibotoh ham inang, atap na tarpaluah ham do paramangonmu? Ham bapa, ai sonaha ma ibotoh ham, atap na tarpaluah ham do parinangonmu?

¹⁷ Tapi ganup ma marpalahou domu hubani na binere ni Tuhan bani, domu hubani pandilo ni Naibata bani. Lanjar in do bani ganup kuria in hutaurchon.

Na Marsunat Atap na So Marsunat,

Jabolon Atap na So Jabolon,

Seng Dong Ubahni ibagas Kuria

¹⁸ Anggo domma tarsunat sada halak tardilo, ulang ma ipaubah ai; na so tarsunat, sanggah tardilo ia, ulang ma ipasunatkon dirini.

¹⁹ Ai na marsunat atap na so marsunat seng adong harga ni ai, tapi na mandalankon titah ni Naibata do.

²⁰ Ganup ma totap songon sanggah na tardilo ai ia.

²¹ Anggo jabolon ham sanggah na tardilo ai, ulang ma haru uhurmu pasal ai. Tapi anggo boi do maluah ham, dearan ma maluah.

²² Ai jabolon na tardilo ibagas Tuhan in, halak na maluah do ai bani Tuhan in; sonai homa, halak na maluah na tardilo ai, jabolon ni Kristus do.

²³ Harga do nasiam itobus, ulang ma ra nasiam parjabolonon ni jolma.

²⁴ Ganup ma nasiam sanina, sonin ia tardilo, sonai ma ia totap i lobei ni Naibata.

Pasal na So Marhajabuan

²⁵ Ia pasal anak boru, seng adong bangku parentah ni Tuhan in. Tapi pingkiranku ma huhatahon songon sada halak hatengeran, halani idop ni Tuhan in.

²⁶ Ninuhurhu, mangidah hasunsahan na masa sonari, dear ma sada halak totap ia songon sisonari ai.

²⁷ Domma sangkut ham bani sada naboru? Ulang pindahi dalan sirang! Seng sangkut ham bani sada naboru? Ulang pindahi naboru!

²⁸ Anggo mompo ham, seng mardousa ham ijai, anjaha anggo laho anak boru seng mardousa ia. Tapi marhasunsahan do halak sisonai bani daging, anjaha sihol do uhurhu maluah nasiam hunjai.

²⁹ Tapi on do na huhatahon, nasiam sanina: Pondok mando panorangni. Sonon ma hu

lobeian on: Songon na so marparinangon ma na marparinangon,

³⁰ anjaha na tangis songon na so tangis, anjaha na marmalas ni uhur songon na so marmalas ni uhur, anjaha na mamboli songon na so marnah,

³¹ anjaha na mamorluhon dunia on songon na so mamorluhon, ai na laho salpu do ruhut ni dunia on.

³² Tapi sihol do uhurhu ulang sunsah nasiam. Isarihon na so marhajabuan do na porlu bani Tuhan in, ai ma, sonaha mambahen rosuh ni Tuhan in.

³³ Tapi na marparinangon mansarihon na porlu i dunia on, sonaha ia boi mambuat uhur ni parinangonni, jadi mardua uhur do ia.

³⁴ Anjaha puang-puang na so marparamangon pakon anak boru isarihon do na porlu bani Tuhan in, ai ma sonaha ase pansing sidea bani angkula age bani tonduy. Tapi na dob marparamangon isarihon do na porlu i dunia on, sonaha ase boi ia mambuat uhur ni paramangonni.

³⁵ Tapi huhatahon pe sonin, ase marguna do bani nasiam, sedo na laho manidingi nasiam, tapi ase porman do nasiam anjaha totap bani Tuhan in, seng manirpang-nirpang.

³⁶ Tapi anggo hurang patut do iahap sada halak paturutonni sonin boruni, na dob anak boru, na dob torasan, anggo maningon do laho, ipasaud ma rosuhni ai; seng mardousa ia ijai, marhajabuan ma sidea.

³⁷ Tapi barang ise na dob martotap ni uhur, sedo na tarpaksa, tapi humbani rosuhni do sura-surani ai, anjaha domma iputuskon ai ibagas uhurni torus manramotkon boruni ai, dear do pambahenni ai.

³⁸ Ase, atap ise na palaho boruni na dob anak boru, dear do pambahenni ai, tapi dearan do pambahen ni na so palahohonsi.

Pasal na Mabalu

³⁹ Sangkut do naboru na dob laho sadokah manggoluh paramangonni, tapi anggo matei paramangonni, maluah ma ia anjaha boi laho atap bani ise harosuh ni uhurni, asal ma ibagas Tuhan in.

⁴⁰ Tapi ninuhurhu, sonangan ma ia, anggo sonai totap ia, anjaha porsaya do ahu adong do homa bangku Tonduy ni Naibata.

Pasal Gulei na dob Ginalangkon

8 ¹ Tapi pasal gulei na dob ginalangkon, ibotoh hita do, paboa haganup do hita marnah habotohon. Na pabanggal-banggalhon diri do habotohon, tapi na padear-dearhon do holong ni uhur.

² Anggo adong na mangagan, na dob dong binotohni, seng ibotoh ai ope sonaha habotohon na sasintongni.

³ Tapi barang ise na mangkaholongi Naibata, ai do na tinanda ni Naibata.

⁴ Pasal na mangankon gulei na dob ginalangkon, ibotoh hita do, paboa seng dong naibata-naibata i dunia on, anjaha seng adong Naibata sobali Sisada-sada in.

⁵ Ai age pe dong igoran naibata i langit sonai i tanoh on, ai buei do tongon iparnaibata ampa ipartuhan, ⁶ tapi banta sada do Naibata, Bapa in, parmulaan ni haganup anjaha hita hu Bani; anjaha sada do Tuhan, in ma Jesus Kristus, parhiteian ni haganup, anjaha marhiteihon-Si do hita adong.

Ulang Parsangsian Diri bani na Galek

⁷ Tapi seng haganup simada habotohon ai, adong ope na mangankon ai songon galangan tongon, halani somal iparhatongon naibata-naibata ronsi nuan, gabe butak ma panggora ni uhur ni sidea na hurang toguh in.

⁸ Tapi seng ipadohor sipanganon hita bani Naibata. Anggo seng napangan ai, seng harugian hita, anjaha napangan pe seng maruntung hita.

⁹ Tapi jaga ma, ulang ma kuasa nasiam in gabe parsangsian bani halak na galek.

¹⁰ Ai anggo adong na mangidah ham, simada habotohon ondi, hundul mangan i rumah panumbah-numbahan, ai lang na mangojur panggora ni uhur ni na galek ai ma ai, mangankon gulei sigalangkononkon bani naibata-naibata?

¹¹ Gabe magou ma na galek in halani habotohonmu in, ai ma sanina, na hinopkop ni Kristus marhitei parmatei-Ni.

¹² Anggo mardousa nasiam sonai bani sanina ai, anjaha isedai nasiam panggora ni uhur ni na galek ai, mardousa do nasiam homa ijai bani Kristus.

¹³ Halani ai, anggo sangsi do saninangku halani sipanganon, sabonar lang be panganonku gulei lalab, ase ulang sangsi saninangku hubahen.

Seng Ipangunsagahkon Apostel Hakni Laho Manganju Kuria

9 ¹ Ai lang bebas do ahu? Ai lang apostel do ahu? Ai lang domma huidah Jesus, Tuhanta in? Ai lang horjangku do nasiam ibagas Tuhan in?

² Anggo lang apostel ahu bani halak na legan, tapi apostel do anggo ahu bani nasiam, ai nasiam do lak ni haapostelonku ibagas Tuhan in!

³ On ma balosku bani halak na sihol mamareksai ahu.

⁴ Na so marhak do hanami mangan ampa minum?

⁵ Na so marhak do hanami ase adong na gabe sinrumah pangkasomani bennami, songon apostel na legan ai, pakon anggi ni Tuhan in ampa si Kepas?

⁶ Ai pitah ahu ampa si Barnabas do na maningon marhorja laho mansarihon goluhnami?

⁷ Ija ma adong tentara, na mambalanjai dirini sandiri? Ise ma na mambahen pohon anggur,

na so mangankon humbani buahni? Ise ma na marmahan pinahan, na so minum dadih humbani na pinarmahanni?

⁸ Domu hubani hasomalan ni jolma do na huhatahon in? Ai lang sonin do homa hata ni titah in?

⁹ Ai bani titah ni si Musa pe tarsurat do, “Seng bulih huntamonmu babah ni lombu na mardoge!” Ai lombu do sinarihon ni Naibata ijai?

¹⁰ Ai lang hu banta do hata ai? Ai halani hita do ase tarsurat, “Patut do mangarap paninggala humbani na tininggalaanni, anjaha pardoge! mangarap bani parbagiananni.”

¹¹ Anggo isuan hanami bani nasiam partonduyon, ai banggal ma ai anggo marpariama hanami humbani nasiam na porlu bani pardagingon?

¹² Ai anggo marrupe! na legan humbani nasiam, samintolah hanami ma lang? Seng ipakei hanami hak in, tapi sabar do hanami bani haganup, ase ulang tarambat Ambilan Na Madear ni Kristus ibahen hanami.

¹³ Ai lang ibotoh nasiam, na mangkorja i rumah panumbahan mangan hun rumah panumbahan, anjaha na marugas bani anjapanjap, dapotan hunjai?

¹⁴ Lanjar sonai do iaturhon Tuhan in bani siparambilan na madear, “Hun bani Ambilan Na Madear in ma sidea manggoluh.”

¹⁵ Tapi anggo ahu, sada pe lang hudalankon ai; anjaha seng husuratkon on, ase ipadalan in bangku. Ai rahanan do matei ahu, humbani na maseda hasurungankai.

¹⁶ Ai anggo huambilankon Ambilan Na Madear in, seng hasurungan in bangku, ai na maningon do in bangku. Bursik ma ahu, anggo seng huambilankon Ambilan Na Madear in.

¹⁷ Ai anggo huhorjahon in humbani rosuh ni uhurhu, marupah ma ahu. Tapi anggo seng humbani rosuh ni uhurhu, na niondoskon ma jabatan in bangku.

¹⁸ Ase aha do upahku? Ai ma, huambilankon do Ambilan Na Madear in, seng pala marupah, ase ulang hupakei hakku na mardomu bani Ambilan Na Madear in.

¹⁹ Ai age pe bebas ahu humbani ganup halak, huparjabolon do diringku bani haganup, ase hunbuei sidea dapot ahu.

²⁰ Gabe songon Jahudi do ahu bani Jahudi, ase dapot ahu Jahudi. Bani na ginomgoman ni titah in, songon na ginomgoman ni titah do ahu, age pe lang ginomgoman ni titah in ahu, andohar dapot ahu na ginomgoman ni titah in.

²¹ Bani na so martitah songon na so martitah, age pe sedo na so martitah ahu humbani Naibata, tapi i toruh ni titah ni Kristus do, ase jumpah ahu na so martitah.

²² Bani na galek, gabe songon na galek do ahu, ase dapot ahu na galek in. Huparomban do diringku bani haganup, andohar siotikanni maluah deba hubahen.

²³ Tapi haganupan in huhorjahon halani Ambilan Na Madear, andohar dihut ahu marrupe i bani pasu-pasu-Ni.

²⁴ Ai lang ibotoh nasiam, ia na marlumba haganup do namin na marlintun, tapi sada do na manjalo upah hamonangan. Sonai ma bujur nasiam marlintun, ase dapotan nasiam.

²⁵ Tapi sagala siparlumba mangorom do bani haganup. Ibahen sidea do sonai, ase ijalo sidea sortali rudang na ra seda, tapi hita na so ra maseda.

²⁶ Ia ahu, sedo na so martujuan parlintononku, sedo songon na manenju logou ahu martenju.

²⁷ Tapi hupukpuki do angkulanku anjaha hupatunduk, ase ulang halak na legan huambilani, hape ahu magou.

Bahen Lumba-lumba do ase Isuratkon na Mangonai bani Israel

10 ¹ Seng dear uhurhu lang ibotoh nasiam, nasiam saninanku, ia ompungta haganup do sidea nilinggoman ni hambun ai, anjaha ganup do sidea mandipari laut ai,

² anjaha haganup do sidea tardidi hubani si Musa ibagas hambun ai ampa ibagas laut ai,

³anjaha haganup do sidea mangan sipanganon partonduyon na samasam ai,

⁴lanjar haganup do sidea manginum siinumon partonduyon na samasam ai. Ai minum do sidea humbani dolog batu partonduyon na mangirikkon sidea ai, anjaha Kristus do dolog batu ai.

⁵Tapi seng marosuh Naibata bani buenan humbani sidea, ai rasei do sidea i halimisan ai.

⁶Tapi gabe panjoraan ma ai banta, ase ulang hisapan hita bani na masambor songon sidea na hisapan ai.

⁷Anjaha ulang ma sibalosi naibata na legan nasiam songon deba humbani sidea, ai tarsurat do: “Hundul ma bangsa ai mangan ampa minum, anjaha jongjong ma sidea manortori.”

⁸Ulang ma hita manriah-riah songon deba humbani sidea na manriah-riah ai, gabe rasei ibagas sadari dua puluh tolu ribu halak.

⁹Ulang ma lajou hita Tuhan in songon deba humbani sidea na manlajou ai, gabe marmateian sidea ibahen ulog ai.

¹⁰Ulang ma nasiam marungut-ungut songon deba humbani sidea na marungut-ungut ai, gabe magou sidea ibahen sipangagou.

¹¹Gabe usihan do na masa bani sidea, tapi isuratkon do ai bahen lumba-lumba banta, na manggoluh ibagas panorang ni ujung ni dunia on.

¹² Halani ai, halak na mangagan jongjong ia, pangkei ma, ase ulang tompas ia.

¹³ Parlajouan na somal bani jolma do masa bani nasiam, hatengeran do Naibata, seng paturuton-Ni nasiam lajouon lobih humbani gogoh nasiam, tapi rap pakon parlajouan ai bahenon-Ni do homa hadobanni, ase tartaron nasiam.

Lumba-lumba ase Ulang Marnaibata na Legan

¹⁴ Halani ai, nasiam na huhaholongi, maporus ma nasiam humbani parsombahon bani sisombah-sombahon.

¹⁵ Hu bani na maruhur do hatangku. Timbangi nasiam ma aha na huhatahon.

¹⁶ Panginuman pasu-pasu, na tinarimakasihkonta in, ai lang parsahiran pakon daroh ni Kristus do in? Anjaha ruti na ipartopik hita in, ai lang parsahiran pakon badan ni Kristus do in?

¹⁷ Halani sada do ruti ai, gabe sada daging do hita buei, ai hagianup do hita parrupe i bani ruti na sada ai.

¹⁸ Tonggor nasiam ma Israel mangihutkon pardagingon! Ai lang gabe marpardomuan do sidea, na mangan humbani galangan ai ampa anjapanjap ai?

¹⁹ Aha do na huhatahon? Na marnidok do gulei na ginalangkon, atap na margogoh do sisombah-sombahon?

²⁰ Ai lang ginalangkon ni sidea ai, bani tonduy na jahat do igalangkon sidea ai, sedo bani Naibata? Tapi seng dear uhuru saor nasiam bani tonduy na jahat.

²¹ Seng tarbahen nasiam minum humbani panginuman ni Tuhan in, sonai homa humbani panginuman ni tonduy na jahat. Seng tarbahen nasiam parrupe i humbani meja ni Tuhan in, sonai homa humbani meja ni tonduy na jahat.

²² Puhoanta ma simburu ni Tuhan in? Ai gogohan do hita hun Bani?

²³ Haganup do boi, tapi lang haganup marguna. Haganup do boi, tapi lang haganup padearhon.

²⁴ Ulang ma marsisarihon na bani dirini bei, tapi na bani hasoman ma.

²⁵ Pangan nasiam ma haganup na jinual i pajak gulei, ulang pala martimbang-timbang halani panggora ni uhur in,

²⁶ ai gok bani Tuhan in do tanoh on ampa isini.

²⁷ Anggo iontang na so porsaya nasiam, anjaha marosuh do uhur nasiam laho, pangan nasiam ma haganup na pinatibal i lobei nasiam, ulang pala martimbang-timbang halani panggora ni uhur in!

²⁸ Tapi anggo adong na mangkatahon bani nasiam, "Gulei na ginalangkon do on," ulang ma pangan nasiam ai, halani halak na mangkatahon ai, ampa halani panggora ni uhur in.

²⁹ Sedo panggora ni uhurmu na huhatahon ai, tapi panggora ni uhur ni na legan ai do. Ai mase ma uhuman ni panggora ni uhur ni na legan ahu, bani hamardekaonku?

³⁰ Ai anggo hupangan ai marhasoman tarima kasih, mase ma pala hona risa ahu, halani na dob hujalo marhasoman tarima kasih?

³¹ Ai pe, atap na mangan atap na minum nasiam, atap aha pe ihorjahon nasiam, bahen nasiam ma haganup ai pasangapkon Naibata.

³² Ulang ma bahen nasiam parsangsian bani halak Jahudi, barang bani halak Gorik, barang bani kuria ni Naibata pe.

³³ Songon ahu pe, hubuat do uhur ni halak bani haganup, ai seng hupindahi na marguna bangku, na marguna bani na mabuei in do, andohar maluah sidea.

Aturan Sidingaton bani Partumpuan

11 ¹ Usihi nasiam ma ahu, songon ahu na mangusihi Kristus.

² Tapi hupuji do nasiam, halani idingat nasiam do ahu bani haganup, anjaha ijolom nasiam do aturan in, songon na dob huaturhon bani nasiam.

³ Tapi sihol ma botohon nasiam, ninuhurhu, “Kristus do ulu ni haganup paramangon, paramangon ulu ni parinangon, anjaha Naibata do ulu ni Kristus in.”

⁴ Sagala paramangon, na martangkuluk martonggo atap manjahai, pahiri uluni do ai.

⁵ Tapi sagala parinangon, na martonggo barang manjahai, seng marpanrungkub uluni, na pahiri uluni do ai, ai doskon na jinambak do sidea ai.

⁶ Ai anggo seng irungkub parinangon ai uluni, dearan ma ipaguntingkon. Tapi, anggo mahiri iahap parinangon igunting atap ijambak, irungkub ma dearan.

⁷ Ia paramangon, seng pala irungkub uluni, ai usihan ampa sinalsal ni hasangapon ni Naibata do ia. Tapi parinangon ai, sinalsal ni hasangapon ni paramangonni do.

⁸ Ai seng humbani naboru roh ni dalahi, tapi humbani dalahi do roh ni naboru.

⁹ Anjaha sedo halani naboru tartompa dalahi, tapi naboru halani dalahi do.

¹⁰ Halani ai, patut do marpanrungkub hasangapon parinangon bani uluni, halani malekat-malekat in.

¹¹ Tapi age sonai, ibagas Tuhan parinangon marguru bani paramangon do, anjaha paramangon marguru bani parinangon.

¹² Ai songon naboru marharohan humbani dalahi, sonai do homa dalahi marharohan humbani naboru, tapi haganup marharohan humbani Naibata do.

¹³ Nasiam sandiri ma manimbang, atap na patut do naboru martonggo bani Naibata seng marpanrungkub uluni?

¹⁴ Ai lang biak pe iajarhon do bani nasiam, anggo marjambulan ganjang dalahi, hadorunon do ai bani?

¹⁵ Tapi anggo marjambulan ganjang naboru, hasangapon do ai bani, ai jambulan ganjang ai do ibere bani sidea gabe panrungkub.

¹⁶ Tapi anggo adong na sihol manlawan ai, adat na sonai seng adong banta, sonai age bani kuria ni Naibata.

Horja Banggal Na Pansing

¹⁷ Tapi ibagas na sihol mangaturhon on, seng hupuji nasiam, ai seng lambin dearni, tapi lambin samborni do anggo martumpu nasiam.

¹⁸ Parlobei hubogei, anggo martumpu nasiam ibagas kuria in, adong do parbolah-bolahan i tengah-tengah nasiam, anjaha huparhatongon do ai deba.

¹⁹ Ai maningon do adong golongan-golongan, ase talar paruhur na totap bani nasiam.

²⁰ Anjaha sanggah martumpu nasiam, seng tongon nasiam mangankon parpadanan ni Tuhan in.

²¹ Ai sanggah na mangan nasiam, mintor marsipangan panganonni bei do nasiam, gabe loheian ma na deba, mabuk na deba nari.

²² Ai na so adong do rumah nasiam, ase ijai nasiam mangan anjaha minum? Atap na mapas do nasiam bani kuria ni Naibata, gabe ipaila nasiam na marhahurangan? Aha ma hatahononku? Pujionku do nasiam? Pasal on seng hupuji nasiam.

²³ Ai na hujalo humbani Tuhan, ai do hupadas bani nasiam. Ia Tuhan Jesus, bani borngin sanggah hona partahian Ia, ibuat ma ruti,

²⁴ ihatahon ma tarima kasih, ipartopik, anjaha ihatahon ma: "Daging-Ku do on, na mangkopkop nasiam. Bahen nasiam ma sonin, gabe pardingatan Bangku!"

²⁵ Lanjar sonai do homa panginuman ai dob salpu na mangan ai, nini: "Ia panginuman on, padan na baru ma on ibagas daroh-Ku. Bahen nasiam ma sonin, gabe pardingatan Bangku, ganup hali iinum nasiam in."

²⁶ Ai ganup hali ipangan nasiam ruti na sonin, anjaha iinum nasiam humbani panginuman in, parmateri ni Tuhan in do iambilankon nasiam, ronsi roh Ia.

²⁷ Ase anggo adong na mangankon ruti in, anjaha na minum humbani panginuman ni Tuhan in ibagas na so talup, parsalah do ia bani badan ampa daroh ni Tuhan in.

²⁸ Tapi ipareksa jolma in ma dirini, dob ai pe ase ipangan ruti in, anjaha iinum humbani panginuman in.

²⁹ Ai barang ise na mangankon anjaha na manginum in, uhum bani dirini do na pinangan anjaha na niinumni ijin, anggo seng itimbangi daging in.

³⁰ Halani in do ase buei na galek anjaha na boritan bani nasiam, anjaha hundong ma na dob modom.

³¹ Tapi anggo iuhumi hita dirinta, seng siuhumon be hita.

³² Tapi hita na niuhuman ni Tuhan in, hona ajar do hita marhitei ai, ase ulang hona uhum hita rap pakon dunia on.

³³ Halani ai, nasiam saninangku, anggo martumpu nasiam laho mangan, marsipaimaan ma nasiam.

³⁴ Anggo dong na loheian, i rumahni ma ia mangan, ase ulang paroh uhum partumpuan nasiam. Ia na legan ai, dob roh pe ahu ase huatur.

Bagei ni Sibere-bere Partonduyon

12 ¹ Anjaha pasal sibere-bere partonduyon, nasiam sanina, seng dear uhurhu lang marpambotoh nasiam.

² Ibotoh nasiam do, sanggah sipajuh begu-begu ope nasiam, na dob itogu anjaha isarad do nasiam bani gana-gana na longah.

³ Halani ai hupabotohkon ma bani nasiam, seng adong halak, na marsahap marhitei Tonduy ni Naibata mangkatahon, “Hona papa ma Jesus,” anjaha seng adong na boi mangkatahon, “Jesus ai ma Tuhan,” anggo lang marhitei Tonduy Na Pansing.

⁴ Bagei do sibere-bere partonduyon, tapi sada do Tonduy.

⁵ Bagei do horja pangidangion, tapi sada do Tuhan.

⁶ Bagei do hagogohon, tapi sada do Naibata, na mangkorhon haganupan ai ibagas haganup.

⁷ Bani ganup do ibere partalar ni Tonduy in bahen hadearon ni ganup.

⁸ Bani na sada ibere marhitei Tonduy in hata hapentaran, bani na sada nari hata habotohon romban hubani Tonduy na sasada in.

⁹ Bani na legan use haporsayaon marhitei Tonduy na sada in, bani na legan sibere-bere pamalumkon marhitei Tonduy na sada in.

¹⁰ Bani na legan hagogohon mambahen halongangan, bani na legan panjahaion, bani na legan panimbangion pasal bagei ni tonduy, bani na legan marsahap ibagas hata na legan, anjaha bani na legan use patorangkon sahap ai.

¹¹ Tapi haganupan ai ihorjahon Tonduy na sada in, palegan-legan ibagihon bani ganup romban bani rosuh ni uhur-Ni.

Buei do Pagori Tapi Sada do Badan

¹² Ai songon badan, sada do in, anjaha marpagori buei, tapi haganup pagorini in, age pe buei in, sada badan do in; sonai do age Kristus.

¹³ Ai ibagas sada Tonduy do haganup hita tardidi hubagas sada badan, age Jahudi, age Gorik, age

jabolon age halak na bebas, anjaha sada do Tonduy ipainumkon bani hita haganup.

¹⁴ Ai badan in pe, seng sada pagori, tapi buei do.

¹⁵ Porini ihatahon nahei: “Halani seng tangan ahu, seng masuk ahu bani badan, mintor lang masuk badan ma ai halani ai?”

¹⁶ Anjaha porini ihatahon pinggol: “Halani seng mata ahu, seng masuk ahu bani badan, mintor lang ma masuk badan ai halani ai?”

¹⁷ Anggo mata haganup badan, ija ma parbinogeian? Anggo haganup pinggol, ija ma panganggoh?

¹⁸ Tapi iatur Naibata do pagori in, ganup bani iananni bei bani badan, domu hubani rosuh ni uhur-Ni.

¹⁹ Porini sada pagori haganup, ija ma badan?

²⁰ Ase age pe buei pagori, sada do badan.

²¹ Ase seng boi hatahonon ni mata bani tangan: “Seng benahangku ho;” atap ulu mangkatahon bani nahei: “Seng benahangku ho!”

²² Tapi tene, pagori na tar hurang idahon, ai do siporlunan,

²³ anjaha pagori ni angkulanta, na hurang harga ninuhurta, ai do sangapan ibahen hita, anjaha na hurang sangap ninuhurta sarinan do hita pasal ai.

²⁴ Tapi seng pala porlu ai bani pagori na sangap hinan. Ia Naibata, iatur do angkula in, anjaha sangapan ibahen pagori na dorun hinan,

²⁵ ase ulang adong parbolah-bolahan ibagas badan, tapi ase marsiurupan pagori samah pagori.

²⁶ Anggo mangarou sada pagori, rap mangarou do haganup pagori in, anjaha anggo ipasangap sada pagori, rap marmalas ni uhur do ganup pagori in.

²⁷ Nasiam do badan ni Kristus in, anjaha pagori do nasiam samah nasiam.

²⁸ Anjaha ipabangkit Naibata do ibagas kuria in parlobei apostel, paduahon nabi, patoluhon sipangajari, dob ai hagogohon mambahen halongangan, dob ai sibere-bere pamalumkon, gogoh laho mangurupi, hapentaran mambobai, marsahap na legan.

²⁹ Ai haganup do gabe apostel? Ai haganup do gabe nabi? Ai haganup do gabe sipangajari? Ai haganup do margogoh mambahen halongangan?

³⁰ Ai haganup do dapotan sibere-bere pamalumkon? Ai haganup do marhata na legan? Ai haganup do pandei patorangkon?

³¹ Tapi pindahi nasiam ma sibere-bere sibanggalan. Anjaha patuduhononku ope bani nasiam dalam sisurungan.

Pasal Holong ni Uhur

13 ¹ Porini pe husahapkon sagala sahap ni jolma ampa malekat pe, anggo seng adong holong bangku, songon ogung na marolol do ahu atap giring-giring na mardiring.

² Porini pe adong bangku sibere-bere panjahaion, anjaha hubotoh haganup rusia ampa haganup habotohon, anjaha porini pe parhaporsayaon na botul ahu gabe tarpaosor ahu dolog, anggo seng adong holong bangku, na lang do ahu.

³ Anjaha porini hulayak-layakkon haganup artangku anjaha huondoskon badanku ase itutung, anggo seng adong haholongon bangku, sabonar na so marguna do ai bangku.

⁴ Na sabar do haholongon in anjaha na basar, seng subil haholongon in, seng mangunsagah anjaha ipajuntul-juntul dirini.

⁵ Hormat do haholongon in, seng ipindahi na bani sandiri, seng urah marah, anjaha seng ipadingat-dingat na jahat.

⁶ Seng malas uhurni mangidah hagedukon, tapi malas do uhurni bani hasintongan.

⁷ Bani haganup do ia tahan, haganup do ihaporsayai, haganup do iarapkon, sabar do ia manaron haganup.

⁸ Seng na ra salpu haholongan in. Ia panjahaion maronti do, mangadi do age sahap, habotohon pe maronti do.

⁹ Ai mardeba-deba do habotohonta, anjaha mardeba-deba do age panjahaionta.

¹⁰ Anggo roh na gokan dear ai, parontihonon ma na mardeba-deba.

¹¹ Sanggah dakdanak ahu, danak do parsahapku, danak paruhuronku, danak pingkiranku, tapi dob mangodang ahu, hutadingkon do biak hadanakan ai.

¹² Anggo sonari, mangkawah do hita songon bani sormin, samak hansa, tapi use padumpar bohi ma. Mardeba-deba do panandaionku nuan, tapi anggo use gok ma panandaionku, songon na dob tinandani ahu.

¹³ Ase tolu do na totap, ai ma haporsayaon, pangarapan ampa holong, tapi holong ai do sibanggalan.

Pasal Marsahap na Legan ampa Panjahaion

14 ¹ Parayak nasiam ma haholongon in, porluhon nasiam partonduyon, tapi siporlunan, ai ma panjahaion.

² Ia na marhata na legan, sedojolma na pinarsahapkonni, tapi Naibata do. Ise pe lang na mangarusi, ai rusia do ihatahon ibagas tonduy.

³ Tapi na manjahai, jolma do iparsahapkon, laho pauli-ulihon, mamodahi ampa mangapohi.

⁴ Na pauli-ulihon dirini do na marhata na legan, tapi kuria in do ipauli-uli na manjahai.

⁵ Marosuh do uhurhu namin, anggo haganup nasiam marhata na legan, tapi harganan do na manjahai. Halak na manjahai surungan do ai

humbani na marhata na legan, anggo seng lanjar ipatorang, laho pauli-ulihon kuria in.

⁶ Ai pe, nasiam sanina, anggo roh ahu bani nasiam marhata na legan, aha ma gunani ai bani nasiam, anggo seng huhatahon bani nasiam pangungkabon atap habotohon atap panjahaion atap pangajarion?

⁷ Umpamani parugas na so manggoluh, songon sordam atap husapi, anggo samak sorani, sonaha ma boi botohon atap na isordamkon atap na ihusapihon?

⁸ Anjaha anggo seng torang sora ni tarompit, ise ma na ra marugas laho hu parporangan?

⁹ Sonai ma nasiam pasal sahap na legan ai. Anggo isahapkon nasiam hata na so torang, sonaha ma boi botohon na hinatahon nasiam? Ai lang songon na marsahap bani logou mando in?

¹⁰ Buei do tongon bagei ni sahap i dunia on, anjaha sada pe lang na so adong artini.

¹¹ Anggo lang hubotoh arti ni hata ai, gabe bangsa na legan ma ahu bani na marsahap ai, anjaha na marsahap ai pe gabe bangsa na legan ma bangku.

¹² Anjaha sonai ma nasiam, halani ihaporluhon nasiam do partonduyon, pindahi nasiam ma hasurungan, laho pauli-ulihon kuria in.

¹³ Halani ai martonggo ma parhata na legan ai, ase tarpatorangsi.

¹⁴ Anggo martonggo ahu ibagas hata na legan, tonduyhu do na martonggo soh do anggo pingkiranku.

¹⁵ Ase sonaha ma bahenon? Martonggo ma ahu ibagas tonduyhu, tapi sihol martonggo do ahu homa ibagas pingkiranku. Mandoding ma ahu ibagas tonduyhu, tapi sihol mandoding do ahu homa ibagas pingkiranku.

¹⁶ Ai anggo mamuji ham ibagas tonduymu, sonaha ma tarbahen halak na dihut ijai mangkatahon amen bani hata tarima kasihmu ai, anggo seng iarusi?

¹⁷ Dear do namin hata tarima kasih ai, tapi seng paulihon ai bani hasoman.

¹⁸ Tarima kasih do uhur hubani Naibata, halani pandeinan ahu marhata na legan marimbang nasiam haganup.

¹⁹ Tapi anggo ibagas kuria in, rosuhan do uhurhu mangkatahon lima hata na tararusi humbani saloksa ibagas hata na legan, ase tarajari ahu na legan.

²⁰ Nasiam sanina, ulang ma dakdanak nasiam ibagas paruhuron, dakdanak ma nasiam pasal hajahaton, tapi matoras ma bani paruhuron.

²¹ Bani titah in tarsurat do, "Marhitei parhata na legan ampa marhitei bibir ni halak na legan sihol marsahap do ahu bani bangsa in, tapi age pe sonai, seng tangihonon ni sidea Ahu," nini Tuhan in.

²² Ase tanda do sahap na legan, sedo bani na porsaya, tapi bani na so porsaya do, tapi anggo panjahaion sedo bani na so porsaya, tapi bani na porsaya do.

²³ Ase anggo martumpu haganup kuria in, anjaha marhata na legan haganupan, anjaha adong masuk parguru atap na so porsaya, ai lang hatahonon ni sidea ma na gila nasiam?

²⁴ Tapi anggo haganup manjahai, anjaha adong masuk na so porsaya atap parguru, gabe haganup ma marsipaingat bani, anjaha haganup ma manguhumi na ibagas uhurni,

²⁵ gabe talar ma ponopan na ibagas uhurni, gabe manrogop ma ia, marsombah bani Naibata, anjaha marhatongonkon, na tongon do Naibata i tengah-tengah nasiam.

Aturan Sidingaton bani Partumpuan

²⁶ Ase sonaha do, nasiam sanina? Anggo martumpu nasiam, adong do bani na sada doding, bani na sada pangajarion, bani na sada pangungkabon, bani na sada sahap na legan, bani na sada hatorangan, tapi haganupan ai laho pauli-ulihon kuria in ma namin.

²⁷ Anggo adong na marhata na legan, sungkup ma dua atap sibuenan ma tolu halak, anjaha sada-sada ma, anjaha sahalak ma na patorangkon.

²⁸ Tapi anggo seng adong na patorangkon, sip ma ia i lobei ni kuria in; bani dirini ampa bani Naibata ma ai ihatahon.

²⁹ Anggo nabi, dear ma dua atap tolu halak manjahai, anjaha na legan ai manimbangi.

³⁰ Tapi anggo dapotan pangungkabon sada halak na hundul ijai, sip ma na parlobei ai.

³¹ Ai bulih do nasiam haganup manjahai sada-sada, ase haganup dapotan podah ampa sipaingat;

³² anjaha pambalosi do tonduy ni nabi bani nabi in,

³³ ai seng iharosuhkon Naibata na geor, tapi damei do. Songon bani haganup kuria ni halak na mapansing in,

³⁴ parsip ma naboru ibagas kuria in; ai seng patut mangkatahon hata sidea, tapi pambalosi ma, songon na hinatahon ni titah in.

³⁵ Tapi anggo adong na sihol sibotohon ni sidea, isungkun ma i rumah paramangonni, ai pantang do bani parinangon marsahap i kuria in.

³⁶ Ai humbani nasiam do luar hata ni Naibata? Atap hubani nasiam do hansa das in?

³⁷ Ganup ma mamingkir, nabi atap partonduy ia ibotoh ma, ia na husuratkun bani nasiam, in ma parentah ni Tuhan.

³⁸ Tapi anggo adong na mangakui in, seng siakuan ia!

³⁹ Ai pe, nasiam sanina, haporluhon nasiam ma na manjahai, tapi ulang ma pandang nasiam na marhata na legan.

⁴⁰ Asal ma haganup mardalan dear anjaha maratur.

PASAL PARPUHOON HUN BANI NA MATEI

Saksi-saksi Pasal Parpuhoon ni Kristus

15 ¹ Nasiam sanina, hupaingat ma nasiam pasal Ambilan Na Madear, na dob huambilankon bani nasiam, na dob jinalo nasiam, na gabe hajongjongan nasiam,

² anjaha parhiteian nasiam maluah, anggo poltik panjolom nasiam bani na dob huambilankon bani nasiam; anggo na so soya do nasiam porsaya.

³ Ai parlobei do hupadas bani nasiam, na dob hujalo sandiri, ai ma, na dob matei do Kristus halani dousanta domu hubani na tarsurat in.

⁴ Na dob tartanom do la, anjaha ipapuhu bani ari patoluhon, domu hubani na tarsurat in.

⁵ Anjaha ipataridahkon do diri-Ni bani si Kepas, dob ai bani na sapuluh dua ai.

⁶ Dob ai ipataridahkon do diri-Ni sahali bani lobih lima ratus sanina; buenan ope hunjai na manggoluh ronsi nuan, deba do na dob modom.

⁷ Dob ai ipataridahkon do diri-Ni bani si Jakobus, dob ai bani haganup apostel in.

⁸Tapi i pudi ni haganupan ai, ipataridahkon do diri-Ni bangku, na tarhatahon tubuh bani na so panorangni.

⁹Ai ahu do sietekan humbani apostel in, na seng talup namin goranon apostel, halani na dob huparburu kuria ni Naibata.

¹⁰Tapi halani idop ni uhur ni Naibata do, ase sonon ahu nuan, anjaha seng soya idop ni uhur-Ni na hu bangku in, ai buenan do na huhorjahon humbani sidea haganup; sedo ahu tene, tapi idop ni uhur ni Naibata do na mangkasomani ahu.

¹¹Atap ahu pe atap sidea, sonin do parambilanonnami, anjaha sonin do nasiam gabe porsaya.

Pangkorhon ni Parpuhoon ni Kristus

¹²Tapi anggo domma naambilankon Kristus, paboa na dob puho do la humbani na matei, mase ma adong deba i tongah-tongah nasiam na mangkatahon, na so adong parpuhoon humbani na matei?

¹³Tapi, anggo seng adong parpuhoon humbani na matei, Kristus pe seng puho humbani na matei.

¹⁴Tapi, anggo seng puho Kristus humbani na matei, jadi lumei ma ambilannami, anjaha lumei ma homa haporsayaon nasiam.

¹⁵Tardapot ma age hanami saksi palsu ni Naibata, halani isaksihon hanami pasal Naibata, na dob

papuhō Kristus, hape seng ipapuhō, anggo na tongon do seng mulak manggoluh na matei.

¹⁶ Ai anggo seng ipapuhō na matei, seng tongon puhō age Kristus.

¹⁷ Tapi, anggo seng ipapuhō Kristus in, soya ma haporsayaon nasiam, anjaha tong ope nasiam ibagas dousa nasiam.

¹⁸ Anjaha na dob matei pe ibagas Kristus magou ma.

¹⁹ Anggo sanggah manggoluh on do hansa mangarap hita bani Kristus, hita ma sisombuhan humbani haganup.

²⁰ Tapi domma puhō Kristus humbani na matei, la do parlobei ni sagala na dob modom in.

²¹ Ai songon marhitei sada jolma roh hamatean, sonai do marhitei sada jolma adong parpuhoon humbani na matei.

²² Ai songon ibagas si Adam haganup matei, sonai do ibagas Kristus haganup ipagoluh.

²³ Tapi ganup ma mangihutkon parjojorni; parlobei Kristus, dob ai na bani Kristus bani parroh-Ni ai.

²⁴ Dob ai roh ma ujungni; ijai ma ondoskonon-Ni harajaon in bani Naibata anjaha Bapa, dob iparontihon sagala pamarentahan, kuasa ampa hagogohon.

²⁵ Ai maningon manrajai do la, ronsi ipatunduk haganup munsuh in hu toruh ni nahei-Ni.

²⁶ Munsuh na parpudi siparontihonon-Ni, ai ma hamatean.

²⁷ Ai haganup do patundukon ni Naibata hu toruh ni nahei-Ni. Tapi anggo ihatahon haganup do ipatunduk, torang ma ijai seng dihut la, na patundukkon haganup hu Bani.

²⁸ Tapi dob tunduk haganup ai hu Bani, gabe dihut ma Anak in sandiri unduk hubani sipatunduk haganup Bani, ase Naibata gabe haganup ibagas haganup.

²⁹ Anggo seng sonai, aha do guna ni pambahenan ni halak na padidihon dirini mangkopkop halak na matei? Ai anggo sabonar na so puho do na matei, mase ma padidihonon ni sidea dirini mangkopkop na matei?

³⁰ Anjaha hanami pe, mase ma pala tarononnami parmaraan ganup panorang?

³¹ Narus-narus matei do ahu ganup ari; tongon, nasiam sanina, halani hamegahonku pasal nasiam, na adong bangku ibagas Kristus Jesus, Tuhanta in.

³² Ai anggo mangihutkon hajolmaon do maringor ahu ampa binatang panoroh i Epesus, aha ma gunani ai bangku? Anggo seng puho na matei, mangan minum ma lah hita, ai matei do hita patar.

³³ Ulang nasiam kahou! Magou do biak na madear, anggo nahombari na masambor.

³⁴ Patut ma nasiam tarjolma, ulang be mardousa, ai adong do deba na so mananda Naibata. Laho pailahon nasiam do na huhatahon.

**Pasal Badan ni Jolma na dob
Puho humbani na Matei**

³⁵ Tapi nini halak deba, “Sonaha ma parpuho ni na dob matei? Marbadan na sonaha ma sidea na roh ai?”

³⁶ E, ham na oto! Na sinaburhonmu ai, seng manggoluh ai, anggo seng matei lobei.

³⁷ Anjaha sanggah manabur ham, seng badan ni na sihol roh ai isaburhon ham, tapi sangkamata gandum do atap na legan.

³⁸ Tapi Naibata do mambere badan hujai, domu hubani rosuh ni uhur-Ni, bani ganup bonih ibere badanni bei.

³⁹ Seng sarupa ganup masam ni daging in, tapi legan do na bani jolma, legan na bani pinahan, legan na bani manuk-manuk, anjaha legan na bani dengke.

⁴⁰ Adong do badan parnagori atas anjaha adong do badan parnagori tongah on, tapi legan do sangap ni na i nagori atas, legan na i tanoh on.

⁴¹ Legan do sondang ni mata ni ari, legan do sondang ni bulan, anjaha legan do homa sondang ni bintang-bintang. Ai bintang pe palegan-legan do sinondangni.

⁴² Sonai do homa bani parpuhoon ni na dob matei. Isaburhon do na ra maseda, tapi ipapuho na so ra maseda.

⁴³ Tarsabur do ibagas hahirion, tapi ipapuhu do ibagas hasangapon. Tarsabur do ibagas hagalekon, tapi ipapuhu do ibagas hagogohon.

⁴⁴ Na isaburhon, ai ma badan pardagingon, ipapuhu badan partonduyon. Anggo adong pardagingon, adong do age badan partonduyon.

⁴⁵ Domu hubani na tarsurat in, “Jolma na parlobei, ai ma si Adam, gabe hosah na manggoluh do. Si Adam na parpudi gabe Tonduy na pagoluhkon.”

⁴⁶ Tapi sedo badan partonduyon na parlobei, badan pardagingon do, dob ai pe ase badan partonduyon.

⁴⁷ Jolma na parlobei ai ma hun tanoh on, anjaha marbiak tanoh on,jolma na paduahon hun nagori atas do.

⁴⁸ Domu hubani biak ni na hun tanoh on do sagala na i tanoh on; anjaha domu hubani biak ni na hun nagori atas do sagala na i nagori atas.

⁴⁹ Anjaha songon na dob ipakei hita rumang tanoh on, sonai do pakeionta rumang na hun nagori atas.

Hasangapon ni Parpuhoon na Sihol Masa ampa Ojur-ojur

⁵⁰ Nasiam sanina, on do na huhatahon, seng tarbahren daging ampa daroh manean Harajaon ni Naibata, seng tartean na ra salpu on na totap ai.

⁵¹ Tonggor ma, hupatugah ma bani nasiam sada rusia: “Seng haganup hita matei, tapi haganup do hita paubahon.”

⁵² Sompong ibagas sangkidop mata, bani parsora ni tarompit na parpudi ai, ai marsora ma tarompit, gabe puho ma na matei hu hatongtongon, lanjar paubahon-Ni ma anggo hita.

⁵³ Ai maningon na totap ai do solukkononkon bani na ra salpu on, anjaha goluh na totap ai solukkononkon bani na ra matei on.

⁵⁴ Tapi dob isolukkon na totap ai bani na ra salpu on, anjaha dob isolukkon goluh na totap ai bani na ra matei on, ijai ma jumpah hata na tarsurat in, “Domma tarbondut hamatean hubagas hamonangan.”

⁵⁵ O hamatean, ija do hamonanganmu? O hamatean, ija do sorodmu?

⁵⁶ Sorod ni hamatean ai ma dousa, anjaha gogoh ni dousa ai ma titah.

⁵⁷ Tapi tarima kasih ma bani Naibata, na pamonang hita marhitei Tuhanta Jesus Kristus.

⁵⁸ Ai pe, nasiam sanina na hinaholongan, totap ma nasiam, ulang mubah-ubah, anjaha lambin surung ma ibagas horja ni Tuhan in, ai ibotoh nasiam, sedo na soya halojaon nasiam ibagas Tuhan in.

Tumpak bani Kuria na i Jerusalem

16 ¹Ia pasal tumpak na hubani halak na mapansing ai, bahen nasiam ma, songon na dob huaturhon bani kuria Galatia.

² Siap ari Minggu ma ganup nasiam papuligkon sibar na tarbahensi, anjaha isimpan ma ai, ase lang pala be patumpuhon tumpak rohkonsi ahu.

³ Anjaha rohkonsi ahu, suruhonku ma hasoman na patut ninuhur nasiam, marhasoman surat hu Jerusalem, laho padaskon tumpak idop ni uhur nasiam ai.

⁴ Tapi anggo hun bangga do, gabe pala dihut ahu misir, rap pakon ahu ma sidea laho.

Ranggi ni Pardalanan

⁵ Roh do ahu bani nasiam, dob hudalani Makedonia; ai dalananku do lobei Makedonia,

⁶ tapi ra soh do ahu bani nasiam, atap pasalpuonku do musim borgoh ai rap pakon nasiam, ase boi taruhkonon nasiam ahu barang huja ahu laho.

⁷ Ai seng marosuh uhurhu asal tuluy bani nasiam sahali on, tapi arap do uhurhu marianan hun dokah rap pakon nasiam, anggo ilopas Tuhan in.

⁸ Tapi i Epesus do ahu soh, das ronsi pesta Pentakosta.

⁹ Ai mungkab do bangku labah na bangga, na marpangkorhon tumang, tapi buei do homa imbang.

Hata Parujungan ampa Hata Tabi

¹⁰ Tapi anggo roh si Timoteus, jaga nasiam ase ulang mabiar ia i tongah-tongah nasiam. Ai horja ni Tuhan in do ihorjahon, usih songon ahu.

¹¹ Ulang ma adong na mapas bani. Tapi taruhkon nasiam ma ia ibagas damei, ase roh ia marayak ahu, ai hupaima-ima do ia rap pakon sanina in.

¹² Tapi anggo saninanta, si Apollos, domma gogoh namin huojur, ase itohu nasiam rap pakon sanina on. Seng ra ope ia sonari, tapi sihol roh do ia, anggo adong panorang na dear bani.

¹³ Puho ma nasiam, totap ma jongjong ibagas haporsayaon, gopas songon dalahi anjaha margogoh.

¹⁴ Dalankon nasiam ma haganup pambahenan nasiam ibagas holong.

¹⁵ Ibotoh nasiam do, nasiam sanina, ia si Stepanas ampa keluargani, ai ma limbuah ni nagori Akaya, anjaha iondoskon sidea do dirini marugas bani halak na mapansing in.

¹⁶ Huojur ma, ase marunduk ni uhur nasiam bani halak sisonai, age bani haganup halak na dihut marhorja anjaha loja.

¹⁷ Malas do uhur hubani parroh ni si Stepanas, si Fortunas ampa si Akaikus; ai sidea do manggoki na lang tarbahen nasiam,

¹⁸ ai tarapoh do tonduyhu ibahen sidea, tontu age tonduy nasiam. Harga ma bahen nasiam halak na sonin.

¹⁹ Manongos tabi do bani nasiam kuria na i Asia. Manongos tabi na buei do bani nasiam ibagas Tuhan in, si Akila ampa si Priska rap pakon kuria, na martumpu i rumah ni sidea.

²⁰ Das ma tabi ni haganup sanina in bani nasiam. Marsitabian ma nasiam samah nasiam, marhitei summah na mapansing.

²¹ Ahu, si Paulus, manuratkon hata tabi on marhitei tanganku sandiri.

²² Hona papa ma na so marholong ni uhur bani Tuhan in! Maranata (Na roh ma Tuhanta)!

²³ Ihasomani idop ni uhur ni Tuhan Jesus ma nasiam!

²⁴ Ihasomani holong ni uhurhu ma nasiam haganup ibagas Kristus Jesus!

2 Korint

Hata Parlobei ampa Tabi ni Apostel

1 ¹ Hun bani si Paulus, apostel ni Kristus Jesus, marhitei rosuh ni Naibata, pakon si Timoteus, saninani hubani kuria ni Naibata na i Korint, ampa hubani haganup halak na mapansing na i sab Akaya. ² Idop ni uhur ma bani nasiam ampa damei humbani Naibata Bapanta ampa humbani Tuhan Jesus Kristus.

Hata Tarima Kasih ni Apostel

³ Puji-pujian ma bani Naibata, Bapa ni Tuhan Jesus Kristus, Bapa paridop ni uhur ampa Naibata sipangapoh in,

⁴ na mangapoh hanami ibagas sagala sitarononnami, ase tarapoh hanami hasoman na ibagas bagei ni sitaronon, hinorhon ni apoh-apoh na jinalonami sandiri humbani Naibata.

⁵ Ai songon surung ni sitaronon ni Kristus sogop bannami, sonai do homa surung ni pangapohon bannami marhitei Kristus.

⁶ Ia marsik pe iahap hanami, bahen apoh-apoh ampa huluahon do in bani nasiam; ia tarapoh hanami, gabe apoh-apoh bani nasiam do in, ase

margogoh nasiam manaron sitaronon nasiam, na dos songon tinaronnami.

⁷ Anjaha pangarapannami pasal nasiam totap do, ai ibotoh hanami, songon na dihut nasiam parrupei bani sitaronon, sonai do homa bani apoh-apoh.

⁸ Ai seng marosuh hanami, nasiam sanina, lang ibotoh nasiam sitaronon na mangonai bannami i Asia borat tumang, lobih humbani na tarporsan, pala putus ma pangarapannami manggoluh.

⁹ Tongon, matei mando hanami ninuhurnami, ase ulang dirinami ihatengerhon hanami, tapi Naibata ma, sipuhoi na dob matei.

¹⁰ Ia do na paluahkon hanami humbani hamatean, anjaha paluahon-Ni ope, anjaha tenger do uhurnami Bani, paluahon-Ni do age hunjon hujanan,

¹¹ marhitei na iurupi nasiam homa hanami marhitei tonggo, andohar buei hasoman na mangkatarimakasihkon idop ni uhur na jinalonami, pangkorhon ni tonggo ni sidea na buei ai.

Totap do Paruhuron ni Apostel bani Kuria ai

¹² On do onjolan ni puji-pujiannami, isaksihon panggora ni uhurnami do, na marparlahou hanami i lobei ni dunia on, tarlobih ma i lobei nasiam, ibagas hapansingon ampa hapolinon na humbani Naibata, sedo ibagas hapentaron pardagingon, tapi ibagas idop ni uhur ni Naibata do.

¹³ Ai seng legan arti ni suratnami humbani na binasa ampa na niarusan nasiam. Anjaha huarapkon do, ase gok ma pangarusion nasiam,

¹⁴ songon na dob mamungkah iarusi nasiam hanami, paboa hanami do puji-pujian bani nasiam anjaha nasiam puji-pujian bannami bani ari ni Tuhanta Jesus.

¹⁵ Mangunsagahkon in, adong hinan do sura-surangku marayak nasiam, ase lompit idop ni uhur jaloon nasiam,

¹⁶ Sihol tuluy do ahu hubani nasiam laho hu Makedonia, anjaha dob hun Makedonia, mulak use bani nasiam, ase nasiam paingkatkon ahu laho hu Judea.

¹⁷ Marhampung ni uhur do ahu marsura-surahon in? Atap marguru hubani saging do sura-surangkin, gabe rap jumpah bangku hata eak ampa hata lang?

¹⁸ Tapi songon Naibata hatengeran ni uhur, seng marhata eak anjaha marhata lang hanami bani nasiam.

¹⁹ Ai Jesus Kristus, Anak ni Naibata, na iambilankon hanami bani nasiam, ai ma ahu, si Siluanus ampa si Timoteus, seng rap dong Bani hata eak ampa hata lang, tapi hata eak do hansa adong Bani.

²⁰ Ai sagala bagah-bagah ni Naibata marhiteihon-Si do ai saud. Halani ai, marhiteihon-Si do hita mangkatahon Amen, bahen hasangapon ni Naibata.

²¹ Tapi Naibata do na patotapkon hanami pakon nasiam ibagas Kristus, anjaha iminaki do hanami.

²² Lanjar la do mambahen lak bannami, anjaha ibere do Tonduy-Ni hubagas uhurnami songon jaminan.

²³ Tapi Naibata do hudilo saksi bani tonduyhu, halani manimbangi nasiam do, ase lang roh ope ahu hu Korint.

²⁴ Ai sedo na laho manrajai haporsayaon nasiam hanami, tapi hasoman parhorja do hanami bani malas ni uhur nasiam, ai na dob jongjong do nasiam ibagas haporsayaon.

Sijaloon do Pardousa dob Mubah Uhurni

2 ¹ Domma hupaputus ibagas uhurhu, na so ulakanku be roh bani nasiam ibagas pusok ni uhur.

² Ai anggo hupusoki uhur nasiam, ise ma na boi pamalas uhurhu, ai lang na hupusoki in do?

³ Anjaha husurat pe on, ase ulang, anggo roh ahu, marpusok ni uhur ahu humbani na patut pamalas uhurhu; ai tenger do uhurhubani nasiam haganup, paboa malas ni uhurhu, malas ni uhur nasiam do homa ai.

⁴ Ai ibagas buei sitaronon ampa pusok ni uhur do hubahen surat on bani nasiam, marhasoman buei iluh-iluh, sedo ase pusok uhur nasiam, tapi ase

ibotoh nasiam do holong ni uhurhu na tarlobih in bani nasiam.

⁵ Tapi na mambahen pusok ni uhur ai, sedo ahu tumang pinusokanni, tapi hinaotikni, ase ulang salputu parsahapku, nasiam haganup do tene.

⁶ Sungkup ma bani halak sisonai ai pinsang-pinsang humbani halak simbuei.

⁷ Tapi suharni ai, dearan ma sasap nasiam salahni, anjaha apoh nasiam ma ia, ase ulang ibondut pusok ni uhur na tarlobih in ia.

⁸ Halani ai huojur ma nasiam, manotapkon holong ni uhur bani.

⁹ Lanjar in do tujuan ni suratku bani nasiam, laho manguji nasiam, ase hubotoh atap pambalosi do nasiam bani haganup.

¹⁰ Barang ise na dob isasap nasiam salahni, ahu pe husasap do. Anjaha ahu pe, barang aha na husasap, halani nasiam do husasap ai i lobei ni Kristus,

¹¹ ase ulang iakali sibolis in hita, ai sedo na so ibotoh hita uhurni ai.

Pardalanan hu Makedonia

¹² Tapi dob das ahu i Troas, laho mangambilankon Ambilan Na Madear ni Kristus, mungkab do labah bangku ibagas Tuhan in,

¹³ tapi seng sonang uhurhu, halani seng jumpah ahu si Titus, sanina in ijai. Jadi mamuhun ma ahu hubani sidea, anjaha laho ma ahu hu Makedonia.

¹⁴ Tapi tarima kasih ma bani Naibata, na tongtong manogu-nogu hanami ibagas hamonangan-Ni marhitei Kristus, anjaha ipatalar do misbou ni habotohon pasal-Si marhitei hanami bani haganup ianan.

¹⁵ Ai uap na misbou ni Kristus do hanami i lobei ni Naibata bani halak na maluah, age bani halak na laho magou,

¹⁶ bani na deba ai uap hamatean hu hamatean, bani na deba nari uap hagoluhan hu hagoluhon. Anjaha ise do na talup hujai?

¹⁷ Ai seng usih hanami songon na mabuei in, na mambuat untung bani diri sandiri marhitei hata ni Naibata, tapi humbani pitah ni uhur do, sinuruh ni Naibata, ihatahon hanami in i lobei ni Naibata ibagas Kristus.

Halak Korint do Surat Hasaksian bani si Paulus

3 ¹ Ai na mamuji-muji diri do hanami use? Atap na porlu do bannami surat hasaksian bani nasiam atap humbani nasiam, songon bani na deba?

² Nasiam do suratnami, na dob sinurat ibagas uhurnami, na tinanda anjaha na binasa ni haganup halak,

³ anjaha tanda do nasiam surat ni Kristus, na sinuratnami, na sinurat sedo marhitei tinta, tapi marhitei Tonduy ni Naibata na manggoluh in do;

seng bani panuratan batu, tapi bani panuratan daging do, ai ma pusu-pusu.

**Surung ni Padan Na Baru
Martimbangkon Padan Na Basaia**

⁴ Sonai do tenger ni uhurnami marhitei Kristus bani Naibata.

⁵ Seng mangasup hanami humbani dirinami mamingkiri atap aha pe humbani dirinami, tapi Naibata do na mambahen mangasup hanami.

⁶ Ia do na mambahen mangasup hanami gabe siparugas bani padan na baru, sedo bani surat, tapi bani Tonduy in do, ai na mamunuh do surat, Tonduy in do na pagoluhkon.

⁷ Ai gari parugason hamatean, na marsurat, na niuhir bani batu, marhasangapon do, pala seng tarbahen halak Israel mangkawahkon bohi ni si Musa halani sangap na ra salpu na bani bohini ai,

⁸ ai lang sangapan ma parugason bani Tonduy in?

⁹ Ai anggo sangap parugason na bani uhum, ai lang sangapan ma parugason na bani hapintoron?

¹⁰ Tongon, seng sangap be na marsangap hinan ijai, halani surung ni hasangapon on.

¹¹ Ai anggo sangap na ra salpu, jadi lobihan ma sangap ni na manongtong.

¹² Halani adong bannami pangarapan na sonai, pag tumang do hanami,

¹³ seng songon si Musa, na mambahen panrungkub bani bohini, ase ulang tarkawahkon halak Israel ujung ni na laho salpu ai.

¹⁴ Tapi gabe hengkenng do uhur ni sidea. Ai ronsi sadari on, anggo ibasa sidea padan na basaia, tong do rungkub ai; lanjar seng ibuha ope, halani marhitei Kristus do hansa tarpadaoh ai.

¹⁵ Tongon, ronsi sadari on, tibal do panrungkub ai i atas uhur ni sidea, anggo ibasa surat ni si Musa.

¹⁶ Tapi sadihari mulak uhur ni sidea bani Tuhan in, ibuat ma panrungkub ai.

¹⁷ Ia Tuhan in Tonduy do in; anjaha ija Tonduy ni Tuhan in, ijai do haluahon.

¹⁸ Tapi hita haganup, marbohi na so marpanrungkub, mangidah hasangapon ni Tuhan in songon ibagas sormin, gabe salih songon rupa-Ni, humbani hasangapon hu hasangapon, halani Tuhan, Tonduy in.

Pandalankon ni Apostel Paulus bani Jabatanni

4 ¹ Ai pe, halani na dob ijalo hanami jabatan on humbani idop ni uhur, seng marnaloja hanami.

² Iambukkon hanami do na ponop-ponop, sihailahononkon; seng marakal-akal hanami, anjaha seng ipalsuhon hanami hata ni Naibata, tapi marhitei na mambaritahon hasintongan in talar-talar, gabe ipataridahkon hanami do dirinami

bani haganup uhur panimbangion ni jolma i lobei ni Naibata.

³ Anjaha anggo tartutup Ambilan Na Madear, na niambilankonnami, bani na laho magou do in tartutup.

⁴ Ai ipapitung naibata ni dunia on do pingkiran ni na so porsaya, ase ulang ididah sidea sondang ni Ambilan Na Madear pasal hasangapon ni Kristus, ai ma usihan ni Naibata.

⁵ Ai sedo dirinami iambilankon hanami, tapi Kristus Jesus, Tuhan in do; ia hanami juakjuak nasiam do halani Jesus.

⁶ Halani Naibata, na dob mangkatahon, “Marsinalsal ma na lihar humbani na golap, la do paliharhon uhurnami, papoltak habotohon pasal sangap ni Naibata, na ibagas bohi ni Kristus.”

Gogoh na humbani Naibata do Sipatotap

Apostel Paulus ibagas Haganup Sitarononni

⁷ Tapi ibagas ianan na urah mabolah do iboan hanami arta on, ase Naibata simada hagogohon na sumurung in, ulang hanami.

⁸ Ibagas haganup do hanami hona odoh-odoh, tapi lang tarpisat; marhabiaran, tapi lang putus pangarapan.

⁹ Hona ayak-ayak, tapi lang itadingkon; ipatompaskon, tapi lang maropuk.

¹⁰ Tongtong do iboan-boan hanami parmateri ni Jesus bani angkulanami, ase talar homa goluh ni Jesus ibagas angkulanami.

¹¹ Ai tongtong do hanami na manggoluh ope, iondoskon hu hamatean halani Jesus, ase talar homa goluh ni Jesus bani dagingnami na ra matei on.

¹² Ase hamatean do marhorja ibagas hanami, tapi hagoluhan do ibagas nasiam.

¹³ Tapi halani adong do bannami Tonduy haporsayaon in, songon na tarsurat in, “Na porsaya do ahu, halani ai do ase husahapkon,” hanami pe porsaya do, ai do ase marsahap age hanami,

¹⁴ halani ibotoh hanami, paboa Sipuhoi Jesus in, papuhoon-Ni do age hanami rap pakon Jesus in, anjaha pajongjongon-Ni rap pakon nasiam hu lobei-Ni.

¹⁵ Tapi haganupan in halani nasiam do, ase lambin ganda ni idop ni uhur in, gabe marhitei buei jolma lambin surungni homa hatarima kasihon bahen hasangapon ni Naibata.

¹⁶ Halani ai seng marnaloja hanami, ai lambin roh burukni pe hajolmaonnami pardarat on, tapi parbagas ai, ari-ari do ipabayu.

¹⁷ Ai sitaronnami sisonari anjaha na hampung porsanon, in do manjadihon bannami hasangapon na tarsulur, na tarlobih hamuliaon-Ni sadokah ni dokahni,

¹⁸ halani ikawahkon hanami na so taridah in, sedo na taridah in; ai tongkin do na taridah in, tapi totap do ronsi sadokah ni dokahni na so taridah in.

**Pangarapan ampa Sihol ni Uhur ni si
Paulus bani Angkula na Baru**

5 ¹Ai ibotoh hanami do, anggo irumbakkon lampolamponami na i dunia on, adong do bannami rumah humbani Naibata, rumah na so pinauli ni tangan, na totap sadokah ni dokahni i nagori atas.

²Ai sadokah ijon marhoih do hanami, anjaha masihol manolukkon ianannami na hun nagori atas ai,

³ase marhitei na manolukkon ai, seng talanjang hanami dapot.

⁴Ai sanggah i parlampolampoan on hanami, marhoih do hanami anjaha boratan, halani sihol uhurnami, ase ulang itanggali, tapi isolukkon ma lah, ase ibondut hagoluhan ai na ra matei on.

⁵Tapi na pasirsirhon hanami hujai, ai ma Naibata, na mambere bannami Tonduy in songon sikoram.

⁶Ase tenger do uhurnami tongtong, anjaha ibotoh hanami, daoh ope hanami humbani Tuhan in, sadokah marianan hanami ibagas angkula on,

⁷ai ibagas haporsayaon do pardalanannami, lape ibagas na mangidah.

⁸ Tenger do uhurnami, anjaha malasan do uhurnami pindah humbani angkula on, laho marianan rap pakon Tuhan in.

⁹ Halani ai iporluhon hanami do, ase harosuh-Ni hanami, atap sanggah ibagas angkula atap dob tanggal humbani angkula.

¹⁰ Ai maningon talar do hita haganup i lobei ni paruhuman ni Kristus, ase ijalo bei domu hubani na hinorjahonni, sanggah ibagas angkula, atap na madear atap na masambor.

Jabatan Pardearan

¹¹ Ai pe, halani ibotoh hanami, biar bani Tuhan in, iojur hanami dojolma in ase porsaya, talar do hanami bani Naibata, anjaha arap do uhurnami, talar do homa hanami ibagas panggora ni uhur nasiam.

¹² Sedo na mangulaki hanami na mamuji-muji dirinami i lobei nasiam, tapi mambere dalan do bani nasiam, ase adong pamujion nasiam pasal hanami marimbang hasoman, na mamuji-muji diri pasal pardarat sedo pasal paruhuran.

¹³ Ai anggo siaran hanami, halani Naibata do ai; anjaha anggo maruhur hanami, halani nasiam do.

¹⁴ Ai holong ni uhur ni Kristus do na mangatur hanami, halani ibotoh hanami, anggo domma matei Na Sada in mangkopkop haganup, na dob matei do sidea haganup.

¹⁵ Anjaha mangkopkop haganup do la matei, ase ulang manggoluh bani dirini bei na manggoluh in, tapi ase manggoluh sidea Bani, na dob matei anjaha mulak manggoluh mangkopkop sidea.

¹⁶ Halani ai seng itanda hanami be atap ise mangihutkon pardagingon; anjaha anggo itanda hanami pe na ijia Kristus mangihutkon pardagingon, tapi seng be sonai panandaionnami sonari.

¹⁷ Ase barang ise ibagas Kristus, na tinompa na baru ma in. Domma salpu sisapari, tonggor ma, domma gabe na baru.

¹⁸ Haganupan ai humbani Naibata do; ai la do padearhon hita Bani marhitei Kristus, anjaha ibere do bannami jabatan pardearan in.

¹⁹ Ai ipadear Naibata do dunia on Bani ibagas Kristus, marhitei na so ihira bani sidea panlanggaron ni sidea, anjaha iondoskon do bannami ambilan pardearan in.

²⁰ Ase utusan ni Kristus do hanami, sahira Naibata do mangojur marhitei hanami. Ganti ni Kristus do hanami mangelek: "Sai ra ma nasiam padearon bani Naibata!"

²¹ On do ibahen Naibata: Mangkopkop hita gabe dousa do la, na so mananda dousa, ase gabe hapintoron ni Naibata hita ibagas la.

Pandalankon ni Apostel Paulus bani Jabatanni

6¹ Songon hasoman parhorja, ipalumba hanami ma nasiam, ase ulang soya panjalo nasiam bani idop ni uhur ni Naibata,

² ai nini do, “Bani panorang idop ni uhur do ho hutangihon, anjaha bani panorang haluahon do ho huurupi. Tonggor ma, sonari ma panorang idop ni uhur, tonggor ma, sonari ma panorang haluahon.”

³ Seng mambahen partolsuan hanami atap bani aha pe, ase ulang hona risa jabatannami

⁴ Ibagas haganup do ipatuduhkon hanami dirinami songon juakjuak ni Naibata: Ibagas hasabaron banggal, ibagas hamarsikon, ibagas hasunsahan, ibagas hasosakan,

⁵ ibagas na hona pukul, ibagas na tartutup, ibagas hageoron, ibagas halojaon, ibagas mangkar ni mata, ibagas parpuasaon,

⁶ ibagas hasusion, ibagas habotohon, ibagas lumbang ni uhur, ibagas habasaron, ibagas Tonduy Na Pansing, ibagas holong ni uhur na so marsipahulah-hulah,

⁷ ibagas hata hasintongan, ibagas hagogohon ni Naibata, ai ma marhitei sinjata hapintoron i siamun ampa i sambilou;

⁸ marhitei na tarpuji ampa na hona parpahiri, marhitei hata-hata na masambor ampa hata na

madear; songon halak na pakahouhon, hape parsintong do;

⁹ songon na so tinanda, hape na tinanda do; songon na laho matei, hape tonggor ma manggoluh do; songon halak na niarsik-arsik, hape seng tarbunuh;

¹⁰ songon na marhoru, hape tongtong do marmalas ni uhur; songon na miskin, hape buei do na ipabayak; songon na so marnadong, hape haganup do adong bani.

Ipangindo si Paulus Holong Pambalason humbani Kuria Korint

¹¹ Torang-torang do panluarnami bani nasiam, halak Korint, ungkab do uhurnami

¹² Seng sompit uhurnami mangidah nasiam, tapi uhur nasiam do na sompit

¹³ Songon na bani anakku do hatangkon, “Balos na dos hujai ma homa bahen nasiam: Palumbang nasiam ma homa uhur nasiam!”

Pasal Goluh Hapansingon

¹⁴ Ulang ma sapasangan nasiam pakon na so porsaya! Ai aha ma pardomuan ni hapintoron ampa na so uhur, anjaha aha ma pars Moran ni haliharon ampa hagolapan?

¹⁵ Aha ma pardomuan ni Kristus ampa Belial? Aha ma hasadaon ni na porsaya ampa na so porsaya?

¹⁶ Mintor ra ma mardomu rumah na mapansing ni Naibata ampa sisombah-sombahon? Ai hita do rumah na mapansing ni Naibata na manggoluh in, songon na hinatahon ni Naibata, “Sihol marianan do Ahu i tongah-tongah ni sidea anjaha mardalani, gabe Naibata ni sidea ma Ahu, anjaha sidea gabe bangsang-Ku.”

¹⁷ “Halani ai, luar ma hanima hun tongah-tongah ni sidea, anjaha paholang hanima ma dirinima,” nini Tuhan in, “Ulang ma jamah hanima na butak, ase Hujalo hanima!”

¹⁸ “Jadi gabe Bapa ma Ahu bannima, anjaha hanima gabe anak ampa boru Bangku,” nini Tuhan, Sigomgom haganup.

7 ¹ Halani adong banta bagah-bagah na sonai, nasiam hinaholongan, paborsih hita ma dirinta humbani sagala na pabutakkon daging ampa tonduy, laho marayak hapansingon ibagas biar dompak Naibata.

Ipindo si Paulus Use Holong ni Uhur ni Halak Korint bani Sidea

² Jalo nasiam ma hanami, seng adong na ijahati hanami, seng adong na iparseda hanami, anjaha seng adong na iuhur-uhuri hanami.

³ Seng na laho manguhumi nasiam ase huhatahon in, ai domma huhatahon, na dob ibagas uhurnami

do nasiam, ase rap matei anjaha rap manggoluh hita.

⁴ Banggal do tenger ni uhur hubani nasiam, banggal do age pamujingku bani nasiam; tarapoh tumang uhurhu, marmalas ni uhur tumang do uhurhu ibagas haganup sitarononnam.

**Tarapoh Uhur ni Si Paulus Mambogei Barita
Hamubahon ni Halak Korint Marhitei si Titus**

⁵ Ai age bani parrohnami hu Makedonia, seng marparsaranan dagingnami, tapi sosak do ibagas haganup, parlawanan hun darat, biar humbagas.

⁶ Tapi Naibata, Siapoh na toruh maruhur. Ia do mangapoh hanami marhitei, parroh ni si Titus,

⁷ seng marhitei parrohni tumang, dihut do marhitei pangapohon, na jinaloni humbani nasiam; ai ibaritahon do bannami sihol ni uhur nasiam, partangis nasiam, ampa ringgas ni uhur nasiam mangkopkop ahu, gabe lambin malas ma uhurhu

⁸ Ai pusok pe uhur nasiam hubahen marhitei surat ondi, seng husolsoli uhurhu. Anggo husolsoli pe lobei uhurhu, ai huidah pusok uhur nasiam tongkin ibahen surat ondi,

⁹ sonari nani malas do uhurhu, sedo halani na dob pusok ai uhur nasiam, tapi halani hamubahon ni uhur, pangkorhon ni pusok uhur ai do. Ai humbani Naibata do pusok ni uhur nasiam, ase ulang rugi nasiam halani hanami ibagas atap aha pe

¹⁰ Ai ihorhon pusok ni uhur na humbani Naibata do hamubahon ni uhur hu haluahan, seng marpanosalan, tapi pusok ni uhur dunia on mangkorhon hamatean.

¹¹ Tanda nasiam ma pusok ni uhur na humbani Naibata, na mangkorhon ibagas nasiam sonai buei ni ringgas ni uhur, pangapition, ringis, biar, sihol ni uhur, pongkut ni uhur, ampa paminsangon. Ibagas haganupan ai domma ipatuduhkon nasiam, paboa borsih do nasiam ijai

¹² Ase hutongos pe surat ai bani nasiam; sedo halani parjahat ai, atap halani na jinahatanni, tapi ase talar do bani nasiam i lobei ni Naibata, ringgas ni uhur nasiam mangkopkop hanami

¹³ Halani ai tarapoh do hanami. Ambah ni pangapohon na bannami ai, lambin malas do uhurnami halani malas ni uhur ni si Titus, ai sonang do tonduyni ibahen nasiam haganup

¹⁴ Ai seng tarmela ahu, na hupapuji-puji ai nasiam dompaksi, tapi songon na ihatahon hanami haganupan in bani nasiam sintong-sintong, sonai do homa gabe sintong pamujinami dompak si Titus

¹⁵ Anjaha lambin banggalni do holong ni uhurni bani nasiam, mardingat pambalosion nasiam haganup, sonaha panjalo nasiam bani ibagas biar ampa hitir.

¹⁶ Malas do uhurhu, halani boi ahu martenger ni uhur bani nasiam ibagas haganup.

Ojur-ojur Patumpu Tumpak bani Kuria na i Jerusalem

8 ¹ Tapi nasiam sanina, ipabotohkon hanami ma bani nasiam pasal idop ni uhur ni Naibata, na binere-Ni bani kuria-kuria na i Makedonia.

² Ai age pe ibagas parlanjouan ampa sitaronon banggal sidea, tapi ibagas haganupan ai malas tumang do uhur ni sidea, gabe surung do halayakon ni sidea, age pe miskin tumang sidea

³ Ibere sidea do domu hubani na tarbahen sidea, husaksihon do ai, lobih humbani na tarbahen sidea tene, humbani rosuh ni sidea

⁴ Gogoh do ipindo sidea hun bannami, ase boi dihut sidea mandalankon horja idop ni uhur, laho mangurupi halak na mapansing ai.

⁵ Anjaha lobih humbani na niarapkonnam, ai diri ni sidea do parlobei ibere sidea bani Tuhan in, pakon hu bannami, domu hubani rosuh ni Naibata,

⁶ gabe iojur hanami ma si Titus, ase itoruskon i tongah-tongah nasiam horja idop ni uhur on, songon na dob pinungkahni hinan

⁷ Tapi songon bani haganup marhasurungan nasiam, ai ma bani haporsayaon, bani hata, bani habotohon, bani sagala haringgason, bani holong dompak hanami, sihol ma sonai hasurungan nasiam age bani horja idop ni uhur on.

⁸ Sedo songon parentah hatangkon, tapi laho manguji sintong ni holong ni uhur nasiam do marimbang habujuron ni halak na legan

⁹ Ai ibotoh nasiam do idop ni uhur ni Tuhanta Jesus Kristus, na bayak hinan, gabe miskin halani nasiam, ase bayak nasiam halani sombuh-Ni ai.

¹⁰ Ibagas pahara on sonon do pingkiranku, sihatahononku, “Dear ma ai bani nasiam, ai domma ipungkah nasiam tahun na salpu, sedo pitah na mandalankon, tapi dihut do na mansurahon.”

¹¹ Ase sonari pe dalankon nasiam ma homa in, ase songon porlu ni uhur laho manriahkon, sonai ma homa mandalankon, domu hubani na tarbahen

¹² Ai anggo adong porlu ni uhur, sihamalaskononkon do ai domu hubani na adong, seng domu hubani na so adong.

¹³ Artini ai sedo ase sonang na legan, hape susah nasiam; marsipadosan ma namin

¹⁴ Anggo sonari na lobih bani nasiam ma manggoki na hurang bani sidea, ase na lobih bani sidea manggoki na hurang bani nasiam, ase dos,

¹⁵ songon na tarsurat in, “Na marnah na buei seng marlobih-lobih, anjaha na marnah na otik seng hurangan.”

Parsuruh bani si Titus

¹⁶ Tapi tarima kasih ma bani Naibata, na mamberehon ringgas ni uhur na sonin hubagas uhur ni si Titus, laho mangkopkop nasiam

¹⁷ Na ra do ia ojuron, anjaha lambin hinsah do uhurni roh marayak nasiam humbani rosuhni sandiri

¹⁸ Anjaha rap pakonsi isuruh hanami do sanina in, na tarpuji bani ganup kuria in, halani Ambilan Na Madear in

¹⁹ Anjaha seng pitah ai, tapi na ipabangkit kuria in do ia mangkasomani hanami bani horja idop ni uhur on, na idalankon hanami bahen hasangapon ni Tuhan in ampa laho patuduhkon ringgas ni uhurnami.

²⁰ Ibahen hanami sonai, ase ulang adong na mangkata-hatai hanami pasal tumpak na banggal, na nidalankonnami,

²¹ ai ipingkiri hanami do na madear, seng pitah i lobei ni Tuhan in, tapi dihut do homa i lobei ni jolma

²² Anjaha rap pakon sidea isuruh hanami do saninanami na legan, dob gati iuji hanami ringgas ni uhurni ibagas buei pahara, anjaha sonari lambin tambah do ringgas ni uhurni, halani banggal ni tenger ni uhurni bani nasiam

²³ Ia si Titus, ai ma hasomanku anjaha hasoman sahorja bani nasiam, anjaha hasomannami ai, ai ma suruhan ni kuria-kuria, sipasangap Kristus.

²⁴ Ai pe, pataridahkon nasiam ma bani sidea holong ni uhur nasiam ampa pamujinami bani nasiam, i lobei ni kuria in!

Tumpak hu Jerusalem

9 ¹ Ia pasal pangurupion na bani halak na mapansing, seng porlu be suratkononku ai bani nasiam.

² Ai hubotoh do ringgas ni uhur nasiam, na dob pala hupapuji-puji i lobei ni halak Makedonia, paboa na dob marugas Akaya humbani na tahun in ope, anjaha haringgason nasiam ai do manjuljul sibueian hasoman ai.

³ Tapi husuruh do sanina in, ase ulang lang mararti pamujinami bani nasiam pasal ai, ase sirsir ma nasiam tongon, songon na dob huhatahon hinan;

⁴ ase ulang, anggo roh halak Makedonia rap pakon ahu, jadi jumpah nasiam lang sirsir, gabe maila hanami, ulang ma lobei nasiam ihatahon hanami, halani tenger ni uhurnami in

⁵ Halani ai porlu do ninuhurhu, marsuruh sanina in parlobei bani nasiam, laho pasirsirhon sibere-bere hatarimakasihon, na dob ipadankon nasiam, ase sirsir ma in, songon sibere-bere na unjah, ulang ma na hinolit

⁶ Tapi ingat nasiam ma on: Na mantidahkon otik, otik do sabionni; na mantidahkon buei, buei do sabionni.

⁷ Ganup ma jinuljul ni uhurni, ulang ma humbani borat ni uhur atap halani paksa, ai ihaholongi Naibata do halak na malas uhur mambere.

⁸ Ai markuasa do Naibata mambere unjah sagala pasu-pasu bani nasiam, ase sungkupan nasiam tongtong bani haganup, anjaha marlobih-lobih nasiam bani ganup horja na madear,

⁹ domu hubani na tarsurat in, “la do na mambagihon, ibere do bani na miskin; totap do hapintoronni ronsi sadokah ni dokahni.”

¹⁰ Anjaha na pasirsirhon bonih bani sipanabur ampa indahan bani na mangankon, pasirsiron anjaha pagandaonni do bani nasiam sisaburhononkon anjaha pabueionni buah ni hapintoron nasiam.

¹¹ Ase bani haganup nasiam ipabayak, laho mandalankon halayakon, na mangkorhon tarima kasih bani Naibata, marhitei hanami.

¹² la horja panumpakion on seng pitah na manungkupi hahurangan ni halak na mapansing ai in, tapi surung do pangkorhon ni ai homa marhitei buei martarima kasih bani Naibata.

¹³ Ai marhitei habujuron nasiam bani horja panumpakion on ipuji sidea do Naibata, halani ibalosi nasiam do Ambilan Na Madear ni Kristus marhitei hasaksian nasiam, anjaha halani unjah

nasiam marsibere-bere ibagas parsaoran nasiam pakon sidea ampa haganup halak na legan

¹⁴ Anjaha itonggohon sidea do nasiam ibagas sihol ni uhur bani nasiam, mardingat idop ni uhur na tarsulur, na humbani Naibata bani nasiam

¹⁵ Tapi tarima kasih ma bani Naibata halani sibere-bere-Ni, na so tarpajojor in.

Ipartahankon si Paulus Dirini Dompak Imbang-imbangi

10 ¹ Ahu, si Paulus, hupodahi ma nasiam marhitei halamlamon ampa hasabaron ni Kristus, ahu na toruh maruhur dompak nasiam anggo dumpar bohi bei, tapi na barani anggo padaoh-daoh,

² ahu mangindohon, ase anggo padumpar bohi holi, ulang pala tarpaksa ahu patuduhkan habaranionku, songon na dob husurahon martindak koras dompak deba halak, na mangkira hanami manggoluh mangihutkon pardagingon.

³ Tongon ibagas daging ope hanami, tapi seng mangihutkon pardagingon hanami marporang.

⁴ Ia sinjatanami marporang sedo sinjata pardagingon, tapi gok hagogohon do humbani Naibata, laho manrumbakkon benteng-benteng.

⁵ Irumbakkon hanami do sura-sura ampa uhur hagijangon na manlawan habotohon na humbani

Naibata, anjaha itaban hanami do sagala pingkiran, ase pambalosi ai bani Kristus.

⁶ Anjaha sirsir do hanami maminsang sagala na so mambalosi, anggo domma gok pambalasion nasiam.

⁷ Tonggor nasiam ma na talar i lobei nasiam in! Anggo adong na mangahap, Kristus do simadasi, iuhurhon ma on homa, paboa songon Kristus simadasi, sonai do homa hanami.

⁸ Ai anggo hutambahi pe pamujingku bani kuasa, na binere ni Tuhan in bannami, laho pauli-ulihon do, sedo laho parsedahon nasiam, seng maila ahu ibagas ai.

⁹ Ulang ma adong na mangagan, na mambiar-biari nasiam do ahu marhitei surat in

¹⁰ Ai adong do na mangkatahon, “Koras anjaha margogoh do suratni in, tapi anggo dumar, galek do ia anjaha seng maharga hatani.”

¹¹ Ipingkiri halak ai ma on, paboa sonin hadirionnami ibagas hatanami marhitei surat sanggah daoh, sonai do homa ibahen hanami sanggah dumar

¹² Seng barani hanami padoskon atap pausihkon dirinami bani halak na pajuntul-juntulhon dirini, na mangukur dirini marhitei ukuran ni sidea sandiri, na pausihkon dirini marhitei dirini sandiri homa. Seng dong pangarusion ni sidea.

¹³ Tapi seng ra hanami mamuji-muji dirinami ibagas na so marukuran, tapi mangihutkon ukuran na dob tinontuhon ni Naibata do bannami, na das ronsi bani nasiam homa.

¹⁴ Seng na manalpui hawajibannami hanami, songon na so onga bani nasiam. Ai lang hanami do na roh mamboan Ambilan Na Madear pasal Kristus bani nasiam?

¹⁵ Anjaha seng tarlanjur hanami, gabe ipuji hanami dirinami marhitei buah ni horja ni halak na legan. Tapi arap do uhurnami lambin toguhni ma haporsayaon nasiam ibagas nasiam, ase lambin bolagni ma parhorjaan, na itotapkon bannami,

¹⁶ laho mangambilankon Ambilan Na Madear bani nagori-nagori sidaohan ope humbani nasiam, tapi lang pala manalpui balog parhorjaan ni halak na legan, anjaha mangkamegahkon buah ni horja ni sidea.

¹⁷ Tapi na mamuji dirini, marhitei Tuhan in ma ia mamuji!

¹⁸ Ai sedo halak na mamuji dirini, na totap botul, tapi na niuji ni Tuhan in do.

**Ipatidak Apostel Paulus Paruhuron ni
Imbang-imbangni na Hurang Dear ai**

11 ¹Sai ra ma nasiam otik manganju habodohonku! Nai ma tene, anju nasiam ma ahu!

² Ringis ni Naibata do na adong bangku mangkopkop nasiam; ai domma hupatunangankon nasiam bani sada dalahi, anjaha hupasirsir nasiam bani Kristus songon sada anak boru na so haliaban.

³ Tapi biar do uhurhu songon si Hawa nasiam, na pinaoto-oto marhitei akal-akal ni ulog, gabe seda pingkiran nasiam, anjaha manirpang humbani bulus ni uhur dompak Kristus.

⁴ Halani ihadearhon nasiam do, anggo adong na roh mangambilankon Kristus legan humbani na iambilankon hanami, anjaha ijalo nasiam do tonduy na legan, na so jinalo nasiam hinan, barang ambilan na madear na legan, na so jinalo nasiam hinan.

⁵ Tapi ninuhurhu, seng etekan ahu marimbang apostel na bangga in.

⁶ Tapi anggo hurang pandei pe ahu bani hata, tapi lang anggo bani habotohon; tongtong do ipataridahkon hanami ai bani nasiam ibagas haganup.

⁷ Atap na mardousa do ahu, halani hupatoruh diringku, ase ipagijang nasiam, ai ma, halani huambilankon Ambilan Na Madear na humbani Naibata bani nasiam, seng pala mangindo upah?

⁸ Hun bani kuria na legan do hubuati, hujalo upah humbani sidea, laho marhorja bani nasiam.

⁹ Anjaha ia hurangan pe ahu i tongah-tongah nasiam, seng husunsahi age ise; ai sanina na roh hun Makedonia, ai do patukkon na hurang bangku.

Tongtong do hujaga diringku, ase ulang husunsahi nasiam, sonai do homa hu lobeian on.

¹⁰ Halani hasintongan ni Kristus na ibagas ahu, puji-pujian on seng bulih langlangon bangku i nagori Akaya.

¹¹ Halani aha? Halani na so holong do uhur hubani nasiam? Naibata do mambotohsi

¹² Tapi na hubahen nuan, age hu lobeian on pe bahenonku do, laho manlanglangi paruhuran ni halak do, na marsura-surahon ase dos hanami pakon sidea bani pamujion in

¹³ Ia sidea, apostel parladung do, parhorja sipakulah-kulah, na pausih-usihkon dirini bani apostel ni Kristus.

¹⁴ Seng pala longang uhur ijai, ai age sibolis ipausih-usih do dirini bani malekat haliharon

¹⁵ Seng pala ganjil ai, anggo juakjuakni pausih-usihkon dirini bani juakjuak ni hapintoron. Domu hubani horjani do ujung ni sidea bei.

Ipatugah si Paulus Hasurunganni Halani Munsuhni

¹⁶ Huulaki ma mangkatahon, ulang ma adong na mangagan na bodoh ahu. Tapi anggo sonai do, jalo nasiam ma ahu songon na bodoh, ase tarpuji-puji ahu diringku otik.

¹⁷ Ia na huhatahon on, seng huhatahon in mangihutkon pingkiran ni Tuhan in, tapi songon

na bodoh do, domu hubani pambahen ni na mamuji-muji diri

¹⁸ Halani buei na mamuji-muji diri mangihutkon pardagingon, dihut ma ahu mamuji-muji diri

¹⁹ Ai lang malas do uhur nasiam manganju halak na bodoh, halani pentar nasiam?

²⁰ Tongon sabar do nasiam, anggo iparjabolon halak nasiam, anggo ionsop daroh nasiam, anggo ibuati parbagianan nasiam, anggo adong na pagijang-gijang dirini, anggo ipastap nasiam

²¹ Hamelaon do namin hatangkon, ra na galek do hanami ijai. Tapi, anggo adong barang ise na pag mangunsagahkon atap aha pe, ahu pe barani do mangunsagah. Haotoon do namin hatangkon

²² Halak Heber do sidea? Ahu pe homa. Halak Israel do sidea? Ahu pe homa. Ginompar ni si Abraham do sidea? Ahu pe homa.

²³ Juakjuak ni Kristus do sidea? Haotoon do hatangkon, lobihan do ahu. Lobihan manaron torik ni horja, gati tartutup, gati hona bogbog, gati ibagas parmaraan hamatean.

²⁴ Lima hali ma ahu ilonsingi halak Jahudi, ompat puluh pukul hurang sada.

²⁵ Tolu hali ma ahu ibogbogi, sahali ipargijig bani batu, tolu hali harom, sadari saborngin mumbang-umbang i laut bolag,

²⁶ gati i pardalanan anjaha marmara i bah bangga, marmara ibahen panrampok, marmara humbani

bangsangku sandiri, marmara humbani bangsa sipajuh begu-begu, marmara ibagas huta, marmara i halimisan, marmara i laut, marmara i tongah-tongah ni sanina sipakulah-kulah

²⁷Loja do ahu anjaha sunsah, gati mangkar matanku, loheian anjaha horahan, gati marpuasa, marborgoh anjaha hurangan hiou.

²⁸Sobali ai, adong ope na mandondon ahu ari-ari, ai ma na mansarihon haganup kuria in.

²⁹Ise na galek, seng dihut ahu galek? Ise na gabe sangsi ibahen halak, seng dihut milas uhurhu?

³⁰Anggo maningon mamuji diri ahu, hagalekonkin ma hupapuji-puji.

³¹Ia Naibata, Bapa ni Tuhan Jesus, na tarpuji ronsi sadokah ni dokahni, ibotoh do na so marladung ahu.

³²I Damaskus, ijagai wakil ni raja Aretas do huta Damaskus, laho manangkap ahu

³³Jadi ibagas karanjang ma ahu itantan humbani jandela hu darat ni tembok, gabe maluah humbani tanganni.

Pangungkabon na Bani Apostel ai Ampa Sitaronon na Sogob Bani

12 ¹Maningon mamuji diri, age seng marguna namin; ase patugahonku ma panonggoran ampa pangungkabon na humbani Tuhan in

² Hutanda sada jolma ibagas Kristus; sapuluh ompat tahun ma dob salpu ai (atap na ibagas angkula ia seng hubotoh, atap na idarat ni angkula ia seng hubotoh, Naibata do mambotohsi), na tarangkat do halak ai ronsi lapis patoluhon ni nagori atas

³ Anjaha hutanda do jolma ai (tapi atap na ibagas angkula ia ijia, atap sirang humbani angkula, seng hubotoh, Naibata do mambotohsi),

⁴ na tarangkat do ia ronsi Paradeiso, anjaha ibogei do hata na so tarhatahon, na so boi tarsahapkon jolma

⁵ Pasal halak ai mamuji-muji ma ahu, tapi pasal diringku seng mamuji-muji ahu sobali halani hagalekonkin.

⁶ Ai anggo hupapuji-puji pe diringku, seng na so maruhur ahu ijai, ai na sintong do hatangku. Tapi huhorom mando ai, ase ulang lobih ahu ihira halak humbani na nididahni bangku ampa na binogeini hun bangku.

⁷ Anjaha, ase ulang huhagijangkon pangungkabon na tarsulur na hu bangku ai, ibere do bangku sada duri ibagas dagingku, ai ma suruhan ni sibolis, na mangkantam ahu, ase ulang hupagijang diringku.

⁸ Tolu hali ma hupangindo humbani Tuhan in, ase tanggal in hun bangku

⁹ Jadi nini ma hu bangku, “Sungkup do idop ni uhur-Hu bam, ai ibagas hagalekon do gabe gok

hagogohon.” Ase dearan ma hupuji diringku halani hagalekon, ase sogop bangku hagogohon ni Kristus¹⁰ Halani ai sonang do uhurhu ibagas hagalekon, hahirion, hasunsahan, parburuon ampa hasosakan halani Kristus, ai sanggah galek ahu, ijai do ahu margogoh.

Pitah ni Uhur ni si Paulus Mangkopkop Kuria Korint

¹¹ Na dob gabe maoto do ahu hape! Nasiam do na mamaksa ahu sonai. Patut do namin palobeion nasiam ahu. Ai seng adong tadingku humbani apostel na banggal in, age pe na lang ahu.

¹² Napamasa do namin tanda ni apostel i tongah-tongah nasiam ibagas sagala hasabaron, marhitei tanda ampa halongangan pakon hagogohon.

¹³ Ai aha ma adong hatadingan nasiam marimbang kuria na legan in, sobali na so husunsahi in nasiam? Sasap nasiam ma hasalahankin!

¹⁴ Tonggor nasiam ma, domma pala patoluhalihon sirsir ahu marayak nasiam, anjaha sedo na laho manunsahi ahu. Ai sedo na adong bani nasiam sihol pindahanku, tapi nasiam sandiri do. Ai seng patut anak patumpu-tumpu arta bani namatorasni, tapi namatorasni do bani anakni.

¹⁵ Tapi malas do uhurhu mambere, lanjar mamberehon diringku mangkopkop tonduy nasiam. Anggo lobih pangkaholongingku bani nasiam, mase ma hurang ahu ihaholongi?

¹⁶ Sonai pe ai, seng husunsahi nasiam, tapi halani parakal ahu, gabe hubuat do uhur nasiam ibagas akal

¹⁷ Ai adong mambuat untung ahu humbani nasiam, marhitei halak na husuruh bani nasiam?

¹⁸ Huojur do tongon si Titus anjaha husuruh sanina in mangkasomanisi. Ai adong do mambuat untung si Titus humbani nasiam? Ai lang ibagas sada Tonduy do hanami marparlahou? Ai lang sada do bokas iirikkon hanami?

¹⁹ Domma ipingkir uhur nasiam hinan, na mamintori diri do hanami i lobei nasiam? I lobei ni Naibata, ibagas Kristus ihatahon hanami, "Haganupan ai, nasiam hinaholongan, laho pauli-ulihon nasiam do."

²⁰ Ai mabiar do ahu, atap lang dapot ahu nasiam bani parrohku, domu hubani na pinindo ni uhurhu, anjaha ahu pe seng jumpah nasiam songon na pinindo ni uhur nasiam, anjaha mabiar do ahu, atap adong do i tengah-tengah nasiam paringoran, parsimburuon, ringis, uhur haut, hata tundal, panrisaon, uhur hagijangon ampa hageoron.

²¹ Sai ulang ma ipatoruh Naibatanku ahu i tengah-tengah nasiam bani parrohku use, gabe pala tangis ahu halani buei halak na mardousa hinan, na so manolsoli uurni pasal habutakon, parriah-riahon ampa hasumsamon, na hinorjahon ni sidea.

**Lumba-lumba, Sura-sura ampa
Pangarapan ni Apostel ai**

13 ¹ Patoluhalihon ma ahu roh sonari marayak nasiam. Sipaputusan do sagala parsahapan marhitei hasaksian ni dua atap tolu halak saksi.

² Songon na dob hupatugah bani parrohku paduahalihon ijia, sonai age sonari, age pe lang ijin ahu, ahu patugahkon use bani sidea na mardousa hinan, sonai homa bani haganup halak na legan, paboa rohkonsi ahu holi, seng maralang-alang ahu atap bani ise pe

³ Ipangindo nasiam do tene tanda, atap na tongon do marsahap Kristus marhitei ahu, na seng galek bani nasiam, tapi marhagogohon do i tengah-tengah nasiam

⁴ Ai tarsilang pe la halani hagalekon, tapi manggoluh do la marhitei hagogohon ni Naibata. Anjaha hanami pe galek do ibagas la, tapi manggoluh do rap pakon-Si marhitei hagogohon ni Naibata i tengah-tengah nasiam.

⁵ Lajou nasiam ma diri nasiam, atap na ibagas haporsayaon do nasiam, pareksa nasiam ma diri nasiam. Ai na so ibotoh nasiam do bani diri nasiam, paboa na ibagas nasiam do Jesus Kristus? Anggo lang, na so talup ma nasiam.

⁶ Tapi arap do uhurhu, botohon nasiam do, paboa sedo na so talup hanami

⁷ Tapi martonggo do hanami bani Naibata, ase ulang ihorjahon nasiam na jahat, sedo ase talup hanami idahon, tapi ase ihorjahon nasiam do na madear, hanami na songon na so talup idahon

⁸ Ai seng adong gogohnami mangimbang hasintongan in, tapi mangkopkop hasintongan in do

⁹ Ai malas do uhurnami anggo galek hanami, tapi margogoh ia nasiam. Lanjar in do tonggonami, ase lambin toguh uhur nasiam

¹⁰ Husurat do on, sanggah holang ope ahu, ase ulang rohkonsi ahu, koras ahu mamakei kuasa na binere ni Tuhan in bangku. laho pauli-ulihon, sedo laho parsedahon.

Tabini

¹¹ Ambah ni ai, nasiam sanina, malas ma uhur nasiam, sai ra ma nasiam patorsaon, sai ra ma nasiam palumbaon, sauhur ma nasiam, sai mardamei ma nasiam, anjaha ihasomani Naibata parholong anjaha pardamei in ma nasiam.

¹² Marsitabian ma nasiam marhitei summah na mapansing.

¹³ Idop ni uhur ni Tuhanta Jesus Kristus pakon holong ni uhur ni Naibata ampa parsoran ni Tonduy Na Pansing ma mangkasomani nasiam haganup!

¹⁴ (13:13)

Galatia

Tabi ni Apostel ai

1 ¹ Hun bani si Paulus, ai ma apostel, sedo humbani jolma atap marhitei sada jolma, tapi marhitei Jesus Kristus anjaha marhitei Naibata Bapa do, na dob papuhohon-Si humbani na matei,
² rap pakon sanina in haganup, na mangkasomani ahu, hubani kuria-kuria na i nagori Galatia.
³ Idop ni uhur ma bani nasiam ampa damei humbani Naibata Bapa pakon humbani Tuhanta Jesus Kristus,
⁴ na dob mamberehon diri-Ni halani dousanta, laho paluahkon hita humbani dunia sisonari, na jahat on, mangihutkon uhur ni Naibata Bapanta.
⁵ Bani ma hasangapon ronsi sadokah ni dokahni. Amen.

Longang ni Uhur ni Apostel Paulus Halani Parbalikon ni Halak Galatia

⁶ Longang do uhurhu, halani sonin podasni nasiam marbalik hun Bani, na dob mandilo nasiam marhitei idop ni uhur ni Kristus, laho mangihutkon Ambilan Na Madear na legan,

⁷ ai seng adong na legan. Tapi adong do halak na manggeori uhur nasiam, anjaha na sihol paubahkon Ambilan Na Madear ni Kristus.

⁸ Tapi porini hanami, atap malekat na hun nagori atas pe, mangambilankon Ambilan Na Madear bani nasiam, legan humbani na dob niambilankonnami, hona papa ma ia.

⁹ Songon na dob ihatahon hanami hinan, sonari pe sonai do huhatahon, “Anggo adong na mangambilankon Ambilan Na Madear bani nasiam, legan humbani na dob jinalo nasiam, hona papa ma ia.

¹⁰ Rosuh-rosuh ni jolma do na hupindahi ijai, atap rosuh ni Naibata do? Na mantin bani pinggol ni jolma do na hupindahi? Ambit sonai, seng sintong ahu juakjuak ni Kristus.”

Ipatorang si Paulus na humbani Naibata do Haapostelonni

¹¹ Ai hupatugah ma bani nasiam sanina, ia Ambilan Na Madear na huambilankon in, sedo na humbani jolma in.

¹² Ai seng hujalo atap huguruhon in humbani jolma, tapi marhitei pangungkabon ni Jesus Kristus do.

¹³ Ai domma ibogei nasiam parlahouhu sanggah ibagas hajahudion ope ahu, sonaha parahni parburungku bani kuria ni Naibata, laho parsedahon ai.

¹⁴ Surungan do ahu humbani buei hasomanku magodang mangkorjahon hajahudion, ai na tarlobih do pongkut ni uhurhu mangkaporluhon aturan-aturan na humbani ompungnami.

¹⁵ Tapi ipapulig Naibata do ahu humbani parnaibataan nari, anjaha idilo do ahu halani idop ni uhur-Ni,

¹⁶ anjaha marosuh do la patalarhon Anak-Ni in bangku, ase huambilankon la bani halak sipajuh begu-begu. Seng lobei marguru ahu ijia bani daging ampa daroh,

¹⁷ anjaha seng tangkog ahu hu Jerusalem marayak apostel, na dob parlobei hun bangku; tapi hu tanoh Arab do ahu laho. Dob ai use mulak ma ahu hu Damaskus.

¹⁸ Dob salpu tolu tahun, tangkog ma ahu hu Jerusalem, laho marayak si Kepas, anjaha tondok ma ahu bani sapuluh lima ari dokahni.

¹⁹ Tapi seng adong huidah apostel na legan sobali si Jakobus, sanina ni Tuhan in.

²⁰ Ia na husurat on bani nasiam, i lobei ni Naibata do on, paboa sedo na marladung ahu.

²¹ Dob ai laho do ahu hu nagori Siria ampa Silisia.

²² Tapi seng itanda kuria ni Kristus na i nagori Judea anggo bohingku.

²³ Pitah na tarboge do bani sidea, "Na marburu hita ijia, ia do sonari mangambilankon haporsayaon, na pinarsedani ijia."

²⁴ Jadi ipasangap sidea ma Naibata halani ahu.

Iakui Apostel na Legan do Ambilan Na Madear na Binoan ni si Paulus bani Halak Sipajuh Begu-begu

2¹ I pudini ai, dob salpu sapuluh ompat tahun, tangkog ma ahu use hu Jerusalem rap pakon si Barnabas; anjaha huboan do homa si Titus.

² Tapi mangihutkon pangungkabon do na tangkog ai ahu. Anjaha hupatorang ma bani sidea Ambilan Na Madear na huambilankon bani halak sipajuh begu-begu, tarlobih ma ai hubani na sangap-sangap ai, ase ulang soya parlintunonku hu lobeian on age na dob in.

³ Gari si Titus, hasomankin, halak Gorik in, seng ipaksa ase tarsunat.

⁴ Tapi adong do deba sanina na so haru sanina, na pasamak-samakkon dirini, na roh masuk bannami, laho manggompangi hamardekaon na adong bannami ibagas Jesus Kristus, laho patunduk hanami bani parjabolonon.

⁵ Tapi tongkin pe lang tunduk hanami bani sidea, ase totap bani nasiam hasintongan ni Ambilan Na Madear in.

⁶ Tapi sidea na marsangap ai (*atap ise sidea hinan, seng penting bangku ai, ai seng sididah bohi Naibata*), seng adong itambahi sidea bani na adong bangku hinan.

⁷ Tapi suharni ai do, ididah sidea do, na dob iondoskon do bangku Ambilan Na Madear hubani halak na so marsunat, songon si Petrus hubani halak na marsunat.

⁸ Ai la, na pabangkitkon si Petrus gabe apostel bani halak na tarsunat, lanjar la do pabangkitkon ahu bani halak na so marsunat.

⁹ Anjaha dob ididah sidea idop ni uhur na dob binere bangku, ai ma si Jakobus, si Kepas ampa si Johannes, na songon tiang iahap hasoman, gabe ijabatangani sidea ma ahu pakon si Barnabas, ai ma tanda ni parsauran, paboa hanami hubani sipajuh begu-begu, tapi sidea hubani na marsunat,

¹⁰ asal ma iingat hanami halak na masombuh; anjaha saud do huporluhon mandalankon ai.

Ihata si Paulus si Petrus Halani Hasintongan ni Ambilan Na Madear

¹¹ Tapi sanggah roh si Kepas hu Antiokia, dumpar do hulawan ia, halani torang adong salahni.

¹² Ai paima roh piga-piga halak suruhan ni si Jakobus, rap mangan do ia pakon sipajuh begu-begu, tapi dob roh sidea, surut ma ia anjaha ipaholang ma dirini, halani biar ni uhurni bani sidea na marsunat ai.

¹³ Anjaha halak Jahudi na legan ai pe dihut do marsipahulah-hulah, pala do age si Barnabas dihut bani hasipahulah-hulahon ni sidea ai.

¹⁴ Tapi dob huidah, na so pintor be langkah ni sidea domu hubani hasintongan ni Ambilan Na Madear in, ningku ma dompak si Kepas i lobei ni sidea haganup, “Anggo ham, sada halak Jahudi, manggoluh mangihutkon adat ni sipajuh begu-begu, sedo adat ni Jahudi, sonaha ma boi paksaonmu halak sipajuh begu-begu, mangihutkon adat Jahudi?

¹⁵ Halak Jahudi do hanami mangihutkon partubuh, sedo pardousa humbani sipajuh begu-begu.

¹⁶ Tapi ibotoh hanami do, na so dapotan hapintoron jolma marhitei na mangkorjahon titah, tapi marhitei haporsayaon bani Jesus Kristus do. Halani ai, hanami pe, marhaporsayaon do bani Kristus Jesus, ase ipintori hanami marhitei haporsayaon bani Kristus, sedo marhitei na mangkorjahon titah, ai marhitei na mangkorjahon titah, seng adong na dapotan hapintoron.

¹⁷ Tapi anggo pardousa do jumpah age hanami, na sihol pintor marhitei Kristus, ai lang juakjuak ni dousa ma age Kristus? Lang ale!

¹⁸ Tapi anggo hupauli use na dob huparseda, hupajongjong do diringku sipanlanggar.

¹⁹ Ai domma matei ahu bani titah in marhitei titah in, ase manggoluh ahu bani Naibata. Rapkon Kristus in do ahu tarsilang.

²⁰ Seng be ahu na manggoluh in nuan, tapi Kristus do manggoluh ibagas ahu. Ia manggoluh

pe ahu nuan ibagas daging, ai ma manggoluh ibagas haporsayaon bani Anak ni Naibata, na mangkaholongi ahu anjaha na mamberehon diri-Ni mangkopkop ahu.

²¹ Seng hutulak idop ni uhur ni Naibata, ai ambit adong hapintoron marhitei titah, soya ma parmatei ni Kristus.”

Haporsayaon do na Mamintori Jolma, Sedo na Mangkorjahon Titah

3 ¹ E nasiam, halak Galatia na so maruhur! Ise do na mandormai nasiam? Ai domma pala targambar bani panonggor nasiam Jesus na tarsilang in.

² Pitah on sihol botohonku humbani nasiam, humbani horja titah do ijalo nasiam Tonduy in, atap humbani ambilan haporsayaon do?

³ Sonin ma hape nasiam maoto? Ibagas Tonduy do ipungkah nasiam, hape sonari ibagas daging do pangujungini ibahen nasiam?

⁴ Mintor soya ma panaronon nasiam na buei in? Eak, anggo tongon soya-soya.

⁵ Ia, na mambere Tonduy in bani nasiam, anjaha na mangkorjahon hagogohon ibagas nasiam, ai sonaha, marhitei horja titah atap marhitei ambilan haporsayaon do in?

⁶ Songon si Abraham, “Porsaya do ia bani Naibata, jadi ai do ihira bani gabe hapintoronni.”

⁷ Ase botoh nasiam ma, halak na porsaya, ai do anak ni si Abraham.

⁸ Surat in pe domma ibotoh hinan, paboa marhitei haporsayaon do pintoron ni Naibata sipajuh begu-begu, gabe ibaritahon do hubani si Abraham, “Marhitei ho do pasu-pasuon haganup bangsa.”

⁹ Ase, halak na porsaya in do ipasu-pasu rap pakon si Abraham na porsaya in.

¹⁰ Ai haganup halak, na sihol manggoluh humbani na mangkorjahon titah, ikuasai papa do, ai tarsurat do, “Hona papa do ganup, na so totap ibagas haganup na tarsurat ibagas buku titah in, ase ihorjahon ai.”

¹¹ Tapi torang do, paboa seng adong na pintor i lobei ni Naibata bahenon ni titah in, ai “Parpintor humbani haporsayaon do na manggoluh.”

¹² Tapi seng humbani haporsayaon anggo titah in, ai na mangkorjahonsi, ai do na manggoluh bahenonni in.

¹³ Itobus Kristus do hita humbani papa ni titah in, marhitei na hona papa la mangkopkop hita, ai tarsurat do, “Hona papa do haganup na targantung bani hayu,

¹⁴ ase ibagas Kristus Jesus sogop bani halak sipajuh begu-begu pasu-pasu na bani si Abraham, ase marhitei haporsayaon ijalo hita Tonduy na pinarbagah-bagah in.”

Seng Soya Bagah-bagah in Halani Titah, Tapi Siparorot do in Paima Roh Kristus

¹⁵ Nasiam sanina, hasomalan na masa bani jolma ma huhatahon, “Parpadanan ni jolma, anggo domma totap ai, seng iosei ai, atap itambahi.”

¹⁶ Ia bagah-bagah ai, hubani si Abraham ampa hubani ginomparni do ihatahon. Seng ihatahon, “Ampa bani sagala ginomparni,” songon hubani na buei, tapi hubani sada halak do, “Ampa hubani ginomparmu,” ai ma Kristus.

¹⁷ On do na huhatahon ijai, “Ia padan, na dob pinatotap ni Naibata, seng boi sundat in bahenon ni titah, na roh ompat ratus tolu puluh tahun i pudini in, gabe lumei bagah-bagah in ibahen.”

¹⁸ Ai anggo humbani titah do paneanon in, seng be humbani bagah-bagah in, tapi marhitei bagah-bagah do ibere Naibata in bani si Abraham.

¹⁹ Ase bahen aha do titah in? Itambahkon do in halani panlanggaron, paima roh Ginompar, simada bagah-bagah in, iparentahkon marhitei malekat-malekat marparhiteian sada siholang.

²⁰ Ia siholang sedo na paturei-tureihon salopah tumang, tapi sada do anggo Naibata.

²¹ Ase na mangimbang bagah-bagah ni Naibata do titah in? Lang ale! Ai ambit ibere titah na margogoh pagoluhkon, humbani titah in ma tongon hapintoron.

²² Tapi itutup Surat in do haganup hubagas dousa, ase marhitei haporsayaon bani Jesus Kristus ibere bagah-bagah in bani na porsaya.

²³ Tapi paima roh haporsayaon, tartutup do hita ibagas kuasa ni titah, anjaha ikunsi managam haporsayaon, na sihol sipatalaron ope.

²⁴ Ase siparorot do titah in banta, paima roh Kristus, ase humbani haporsayaon hita ipintori.

²⁵ Tapi dob roh haporsayaon in, seng be ibagas kuasa ni siparorot in hita.

²⁶ Ai haganup do nasiam anak ni Naibata marhitei haporsayaon bani Kristus Jesus.

²⁷ Ai haganup nasiam, na tardidi hubagas Kristus, Kristus do iparhiouhon nasiam.

²⁸ Seng dong be ijai Jahudi barang Gorik, jabolon barang halak na mardeka, dalahi barang naboru, ai sada do nasiam haganup ibagas Kristus Jesus.

²⁹ Tapi anggo Kristus simada nasiam, ginompar ni si Abraham do nasiam, anjaha panean mangihutkon bagah-bagah in.

Haluahon humbani Parjabolonan ni Titah Marhitei Kristus

4 ¹ Tapi on do na huhatahon, “Sadokah danak ope panean in, seng dong leganni humbani jabolon, age pe ia tuan simada haganup,

² tapi i toruh ni kuasa ni sipanramoti ampa sijolom anakkunsi do ia, das bani panorang na tinontuhon ni bapani hinan.”

³ Sonai do homa hita: Sadokah danak hita, iparjabolon kuasa ni unsur-unsur ni dunia on do hita.

⁴ Tapi dob gok panorangni, isuruh Naibata ma Anak-Ni, tubuh humbani naboru, gabe ginomgoman ni titah,

⁵ ase itobus na ginomgoman ni titah in, ase ijalo hita hak haanakon.

⁶ Tapi halani anak nasiam, isuruh Naibata do hubagas uhurta Tonduy ni Anak-Ni in, na mandilohon, “Abba, Bapa!”

⁷ Ase, seng be jabolon ham, tapi anak do. Tapi anggo anak, lanjar panean ma, marhitei Naibata.

Ulang be Ra Parjabolonon ni Titah

⁸ Tapi ijia, sanggah lape itandai nasiam Naibata, ibalosi nasiam do naibata-naibata, na so Naibata mangihutkon hadirionni.

⁹ Tapi sonari, domma itanda nasiam Naibata, atap sasintongni, Naibata do na mananda nasiam. Mase ma nasiam marbalik use, mulak hubani kuasa ni unsur-unsur na so margogoh anjaha na lumei, ase balosan nasiam ai use?

¹⁰ Gabe siramotkon ari, bulan, panorang na tinontuhon pakon tahun do nasiam.

¹¹ Mabiari do uhuru pasal nasiam, atap na soya do halojaonku mangkopkop nasiam.

¹² Nasiam sanina, hupindo ma bani nasiam, songon ahu ma nasiam, ai ahu pe songon nasiam do. Seng onga na so pintor ibahen nasiam bangku.

¹³ Tapi ibotoh nasiam do, ibagas hagalekon ni daging do huboan Ambilan Na Madear bani nasiam bani mulani ondi.

¹⁴ Anjaha sanggah na tarlajou nasiam halani pardagingonku, seng magigi barang mapas uhur nasiam pasal ai, tapi songon malekat ni Naibata do ijalo nasiam ahu, songon Kristus Jesus do tene.

¹⁵ Ija do nuan hatuahon nasiam in? Ai husaksihon ma bani nasiam, sihol buaton nasiam do ijia mata nasiam, laho mambere ai bangku, ambit na tarbahen.

¹⁶ Ai na gabe imbang nasiam do ahu, halani huhatahon bani nasiam hasintongan?

¹⁷ Seng pitah haringgason ni sidea ai bani nasiam, tapi sihol padaraton ni sidea do nasiam, ase ringgas nasiam mangkopkop sidea.

¹⁸ Dear do tongtong marringgas ni uhur nasiam dompak na madear, anjaha ulang ma pitah sanggah i lambung nasiam ahu.

¹⁹ Nasiam niombahku, na dob huarou use, paima manjadi rupa ni Kristus ibagas nasiam.

²⁰ Iparsinta uhurhu do, ase i tongah-tongah nasiam ahu sonari, anjaha tarpadear-dear ahu sorangku, ai jut do uhurhu pasal nasiam.

²¹ Nasiam na marosuh gomgoman ni titah in, hatahon nasiam ma bangku, “Ai lang domma ibogei nasiam titah in?”

²² Tarsurat do ijai, “Dua do anak ni si Abraham, sada humbani jabolonni naboru anjaha na sada nari humbani boru mardeka ai.”

²³ Tapi mangihutkon daging do partubuh ni na humbani boru jabolon ai, tapi humbani bagah-bagah do na humbani boru mardeka ai.

²⁴ Limbaga na mararti do in. Ai padan na dua in do sidea: Na sada hun Dolog Sinai, na manubuhkan anak gabe jabolon, ai ma si Hagar.

²⁵ Ai Hagar ai ma Dolog Sinai i tanoh Arab, anjaha usih ma ai bani Jerusalem sisonari, ai jabolon do ai rap pakon niombahni.

²⁶ Tapi Jerusalem na i atas ai, ai do boru mardeka ai, anjaha ai do inang banta.

²⁷ Ai tarsurat do, “Marmalas ni uhur ma ho na lambang, na so tubuhan tuah; marolob-olob ma ho anjaha marsora na gogoh, na so mangarou anak. Ai buei do niombah ni na punjung in, buenan humbani na marparamangon.”

²⁸ Tapi nasiam sanina, anak bagah-bagah do nasiam mangihutkon si Isak.

²⁹ Tapi ijia age sonari, iparburu na tinubuhkan mangihutkon daging do na tinubuhkan mangihutkon Tonduy.

³⁰ Tapi aha do nini Surat in? “Usir ma boru jabolon in rap pakon anakni, ai seng bulih anak ni boru jabolon in rap manean pakon anak ni boru mardeka in.”

³¹ Ase, nasiam sanina, sedo anak ni boru jabolon hita, tapi anak ni boru mardeka do.

Ojur-ojur Ase Totap gabe Jolma na Pinaluah

5 ¹ Ase mardeka hita, ai do ase imardekahon Kristus hita. Totap ma nasiam jongjong, anjaha ulang be ra nasiam patundukon ni pasangan parjabolonon!

² Ahu si Paulus mangkatahon bani nasiam, anggo ipasunatkon nasiam diri nasiam, otik pe lang marguna be Kristus bani nasiam.

³ Huulaki ma manaksihon bani haganup jolma: Na pasunatkon diri, maningon horjahononni do haganup titah in.

⁴ Na dob sirang do nasiam humbani Kristus, anggo sihol pintor nasiam marhitei na mangkorjahon titah, domma madabuh nasiam humbani idop ni uhur.

⁵ Ai na paima-imahon do hita bani hapintoron siarapkonon ai marhiteihon Tonduy, maronjolan bani haporsayaon.

⁶ Ai ibagas Kristus Jesus marsunat atap lang marsunat, seng dong gogoh ni ai, tapi haporsayaon sihorjahon holong ai do.

⁷ Dear hinan do pardalan nasiam, ise do na manlanglangi nasiam, gabe seng be pambalosi nasiam bani hasintongan in?

⁸ Pangojur-ojuron na sonai, seng humbani na mandilo nasiam rohni ai.

⁹ Ragi na otik mambahen migar ganup itak na niagu.

¹⁰ Tenger do uhur hubani nasiam marhitei Tuhan in, seng na margoling uhur nasiam. Tapi barang ise pe na manggeori nasiam, sai porsanonni do uhum na hu bani.

¹¹ Anjaha ahu, nasiam sanina, ambit huambilankon parsunaton, mase ma pala parburuon ahu? Ambit sonai, maronti ma parsangsian halani silang in.

¹² Ikaasih ma namin na manggeori nasiam.

Marparlahou Marguru hubani Tonduy

¹³ Ai hu hamardekaon do nasiam tardilo, nasiam sanina, tapi ulang ma pakei nasiam hamardekaon nasiam in gabe bonsir mambalosi daging, tapi marsibalos-balosan ma nasiam ibagas holong.

¹⁴ Ai haganup titah in ibagas hata na sangkababah on do rimpunni, "Haholongi ma hasomanmin songon dirimu!"

¹⁵ Tapi anggo marsiharatan anjaha marsipanganan nasiam samah nasiam, jaga ma nasiam, ase ulang marsisedaan nasiam.

¹⁶ Tapi on do na huhatahon, “Marguru bani Tonduy in ma nasiam marparlahou, anjaha ulang ma suhun-suhuni nasiam hisap-hisap ni daging in.

¹⁷ Ai na mangimbang Tonduy do sura-sura ni daging, anjaha na mangimbang daging do sura-sura ni Tonduy, na marsilawanan do in, ase lang tarpasaud nasiam pinindo ni uhur nasiam.

¹⁸ Tapi, anggo Tonduy do na mambobahon nasiam, seng be ginomgoman ni titah in nasiam.

¹⁹ Tapi talar do horja ni daging, ai ma: Parriah-riahon, habutakon, goluh na so marrantei,

²⁰ marnaibata na legan, hadatuon, parmunsuh-munsuhon, partinggilan, parsimburuon, ringis, uhur haut, parbolah-bolahon, parlegan-leganon,

²¹ subil, parmabukon, marpoyapoya ampa na usih hujai. Songon na dob huhatahon bani nasiam ijia, sonai do age sonari, ‘Sihorjahon na sonai, seng teanon ni ai Harajaon ni Naibata.’

²² Tapi on do buah ni Tonduy: Holong, malas ni uhur, damei, lumbang ni uhur, habasaron, halayakon, haporsayaon, halamlamon, ampa panrajaion diri.

²³ Seng marlawan titah dompak na sonai ai.

²⁴ Tapi halak na ginomgoman ni Kristus Jesus, iparsilangkon do dagingni, hisap-hisapni ampa rosuh-rosuhni.

²⁵ Anggo domma ipagoluh Tonduy in hita, mardalan ma hita homa mangihutkon Tonduy in.

²⁶ Ulang ma parayak hita hasangapon na lumei, ulang ma marsipagila-gilaan, anjaha ulang ma marsilateian.”

Ojur-ojur ase Marsipadear-dearan

6 ¹ Nasiam sanina, anggo dong tardapot halak ibagas sada panlanggaron, nasiam na marpartonduyon ma patorsa-torsahonsi marhitei tonduy halamlamon, tapi jaga dirimu, ase ulang dihut ham tarlajou.

² Marsiurupan ma nasiam mamorsan na borat in, ai marhiteihon ni in idalankon nasiam do titah ni Kristus.

³ Ai anggo ipajuntul-juntul halak dirini, hape aha pe lang ia, na paoto-otohon dirini do ai.

⁴ Tapi ganup ma mamareksa horjani bei; jadi halani dirini tumang ma ia mamuji-muji diri, sedo halani na legan,

⁵ ai ganup do adong siporsanonni bei.

Ulang Rayohan Mambahen na Madear

⁶ Tapi patut do na niajaran bani Hata ni Naibata mambere humbani sagala artani bani na mangajarisi.

⁷ Ulang ma kahou nasiam, seng ra Naibata apasan! Ai ia in itidahkon halak, ai do sabionni.

⁸Na manidahkon bani dagingni, manabi do humbani dagingni hamagouan, tapi na manidahkon bani tonduy, manabi do humbani tonduy hagoluhan sisadokah ni dokahni.

⁹Tapi ulang ma marnaloja hita mambahen na madear, ai na manabi do use hita bani panorangni, anggo seng gabe galek hita sonari.

¹⁰Ai pe, halani sompat ope, horjahon hita ma na madear bani haganup halak, tapi buenan bani hasomanta sahaporsayaon.

Sipaingat Parpudi

¹¹Tonggor nasiam ma, sonaha bangga-banggal ni huruf na husurat bani nasiam marhitei tanganku sandiri.

¹²Haganup na marsura-sura sangap bani pardagingon, ai do na mamaksa nasiam ase tarsunat, pitah ase ulang marsitaronon sidea halani silang ni Kristus.

¹³Ai gari sidea siparsunat ai seng idalankon titah in, tapi ihasiholhon sidea do, ase tarsunat nasiam, ase boi sidea mamuji diri marhitei daging nasiam.

¹⁴Tapi daoh ma hun bangku na mamuji diri, anggo lang halani silang ni Tuhan Jesus Kristus! Marhiteihon-Si domma tarsilang dunia on bangku, anjaha ahu bani dunia on.

¹⁵ Atap na marsunat atap na so marsunat, seng dong age aha artini ai, tapi na tinompa na baru ai do.

¹⁶ Anjaha haganup na marparlahouhon ruhut sisonai ai, damei ampa idop ni uhur ma bani sidea, sonai homa bani Israel ni Naibata.

¹⁷ Hu lobeian on ulang adong be na manlojai ahu, ai hupaboan-boan do tanda ni ugah ni Jesus bani angkulanku.

¹⁸ Idop ni uhur ni Tuhanta Jesus Kristus ma mangkasomani tonduy nasiam, nasiam sanina! Amen.

Epesus

Tabi ni Apostel Paulus

1 ¹ Hun bani si Paulus, apostel ni Kristus Jesus, humbani rosuh ni uhur ni Naibata, hubani halak na pansing i Epesus, na porsaya bani Kristus Jesus. ² Idop ni uhur ma bani nasiam ampa damei humbani Naibata Bapanta pakon Tuhan Jesus Kristus.

Hata Puji-pujian Halani Bagei ni Pasu-pasu

³ Napuji ma Naibata, Bapa ni Tuhan Jesus Kristus, na dob mamasu-masuhon banta bagei ni pasu-pasu partonduyon hun nagori atas ibagas Kristus.

⁴ Ai ipilih do hita ibagas Ia, sanggah lape itombei dunia on, ase pansing hita anjaha lang panurakon i lobei-Ni, ibagas holong ni uhur.

⁵ Itotapkon hinan do hita Bani, gabe anak niain-Ni marhitei Jesus Kristus, mangihutkon rosuh ni uhur-Ni,

⁶ gabe puji-pujian bani idop ni uhur ni na marmulia in, na niidopkon-Ni banta ibagas na hinaholongan-Ni in.

⁷ Ibagas la do dapot hita haluahon marhitei daroh-Ni, ai ma hasasapan ni panlanggaron, domu hubani habayakon ni idop uhur-Ni,

⁸ na unjah binerehon-Ni banta ibagas hapentaron ampa hauhuron.

⁹ Ipabotohkon do banta rusia ni sura-sura ni uhur-Ni domu hubani haputusan ni uhur-Ni, na dob tinotapkon-Ni hinan ibagas Diri-Ni.

¹⁰ Isurahon do bani gok ni panorangni, pasadahon haganup, na adong i nagori atas ampa na i atas tanoh on, i toruh ni sada ulu, ai ma Kristus.

¹¹ Ibagas la do ipilih hita, na dob tinontuhon-Ni hinan domu hubani sura-sura-Ni, ai ma Naibata sipasaud haganupan ai, domu hubani rosuh ni uhur-Ni,

¹² ase tarpuji hasangapon-Ni marhitei hita, na dob mangarap hinan bani Kristus in.

¹³ Anjaha ibagas la do nasiam dob ibogei nasiam hata hasintongan in, ai ma Ambilan Na Madear pasal haluahon nasiam, anjaha ibagas la dob porsaya nasiam Bani, ilak nasiam marhitei Tonduy Na Pansing na pinarbagah-bagah in,

¹⁴ ai ma sikoram ni siteanonta in, bahen haluahon ni na hinopkop-Ni, ase tarpuji hasangapon-Ni in.

¹⁵ Ase ahu pe, dob hubogei pasal haporsayaon nasiam bani Tuhan Jesus ampa holong ni uhur nasiam bani haganup halak na pansing in,

¹⁶ seng maronti ahu mangkatahon tarima kasih halani nasiam, mardingat nasiam, sanggah na martonggo ahu,

¹⁷ andohar ibere Naibata ni Tuhanta Jesus Kristus, Bapa ni hasangapon in bani nasiam Tonduy hapentaron ampa pangungkabon, laho mananda-Si.

¹⁸ Sai ipalihar Naibata ma mata ni uhur nasiam, ase ibotoh nasiam aha do arta siarapkononkon halani pandiloon-Ni ai, anjaha sonaha surung ni hasangapon, siteanon na hun Bani, bani halak na mapansing in;

¹⁹ anjaha sonaha sulur ni habanggalon ni kuasa-Ni in banta na porsaya halani horja hagogohon na surung in,

²⁰ na hinorjahon-Ni bani Kristus, sanggah na pinapuhon-Ni ai la humbani na matei, anjaha ipahundul hu siamun-Ni i nagori atas,

²¹ hu atas ni sagala harajaon ampa kuasa ampa hagogohon ampa hamuliaon, ampa haganup goran na targoran, seng pitah i dunia on, tapi dihut do bani na roh magira.

²² Haganup do ipatunduk hu toruh ni nahei-Ni, anjaha ipabangkit do la gabe kopala ni haganup, bani kuria in,

²³ in ma angkula-Ni, hagogok-Ni, na manggoki haganup ibagas haganup.

Ipagoluh Naibata Jolma na Matei Ibagas Dousani

2¹ Nasiam pe, na dob matei hinan halani panlanggaron ampa dousa nasiam,

² ai ma na hinorjahon nasiam hinan mangihutkon panorang ni dunia on, mangihutkon rosuh ni na markuasa i awang-awang ai, ai ma tonduy na marhorja nuan ibagas jolma na so siat hata.

³ Rapkon sidea do hinan age hita haganup mangkorjahon hisap-hisap ni dagingta, ai ma ibagas na ipaihut-ihut hita sura-sura ni daging in hinan ampa rosuh-rosuhni; jadi jolma sigilaan do hita humbani biakta hinan, songon na legan ai.

⁴ Tapi Naibata, na bayak bani idop ni uhur, halani holong-Ni na banggal in banta,

⁵ ipagoluh do hita rapkon Kristus, sagala na dob matei ibagas panlanggaron (halani idop ni uhur do, ase maluah nasiam).

⁶ Anjaha rap pakon Kristus Jesus do hita ipapuhon, anjaha ipabangkit do hita hu gomgoman nagori atas ibagas Kristus Jesus,

⁷ ase ipatuduhkon bani panorang na sihol roh ope, surung ni habayakon-Ni marhitei banggal ni habasaron-Ni banta ibagas Kristus Jesus.

⁸ Ai humbani idop ni uhur do ase maluah nasiam, marhitei haporsayaon; sedo binahen nasiam, sibere-bere ni Naibata do.

⁹ Sedo humbani horja, ase ulang adong na mamuji diri.

¹⁰ Ai jadi-jadian-Ni do hita, na tinompa ibagas Kristus Jesus, bani horja na madear; hujai do hita ipasirsir Naibata hinan, ase ibagas ai hita marparlahou.

Jahudi ampa Sipajuh Begu-begu Gabe Sada do Marhitei Kristus

¹¹ Halani ai, nasiam sipajuh begu-begu hinan ibagas pardagingon, nasiam na so siparsunat igoran halak siparsunat ibagas daging marhitei tangan, ingat nasiam ma,

¹² “Ijia sirang do nasiam humbani Kristus; i darat ni warga Israel do nasiam, seng marulih bani padan bagah-bagah, seng marpangarapan, anjaha seng adong Naibata bani nasiam i tanoh on.

¹³ Tapi anggo sonari, ibagas Kristus Jesus do nasiam; anjaha daoh pe nasiam ijia, gabe ipadohor daroh ni Kristus do nasiam sonari.

¹⁴ Ai la do pardameian banta, na pasadahon na dua ai, anjaha na parsedahon dingding bolat-bolat ai, ai ma hamunsuhon ai.

¹⁵ Ai ibagas daging-Ni do iparseda titah in rap pakon tonah-tonah ampa aturan-aturanni, ase itompa ibagas diri-Ni na dua ai, gabe sadajolma na baru, bani na pinajongjong-Ni damei.

¹⁶ Anjaha ipadear do na dua ai ibagas angkula na sada ai bani Naibata marhitei silang ai; ai ijai do ibunuh hamunsuhon ai.

¹⁷ Dob roh la, ibaritahon do damei bani nasiam na daoh, damei homa bani na dohor.

¹⁸ Ai marhiteihon-Si adong do dalan marayak Bapa in, banta haduasi ibagas sada Tonduy.

¹⁹ Ase lang be panginsolat atap partoloh nasiam, tapi hasoman saharajaon ni halak na mapansing do, anjaha hasoman sarumah ni Naibata.

²⁰ Ipauli do nasiam i atas ni onjolan ni apostel ampa nabi; Kristus Jesus sandiri do batu parsuhi ijin.

²¹ Ibagas la do mardomu ganup rumah in anjaha lambin banggalni, gabe rumah panumbahan na mapansing ibagas Tuhan in.

²² Ibagas la do homa nasiam ipauli-uli, gabe ianan ni Naibata ibagas Tonduy in.”

Paulus, Apostel bani Sipajuh Begu-begu

3 ¹ Halani ai, ahu si Paulus, na tarrantei halani Kristus Jesus, halani nasiam sipajuh begu-begu.

² Tontu domma ibogei nasiam pasal jabatan mandalankon idop ni uhur ni Naibata, na dob pinadas-Ni ai hu bangku, laho paturei-tureihon nasiam.

³ Marhitei pangungkabon do ipabotohkon bangku rusia ai, songon na dob husuratkon hinan otik pasal ai.

⁴ Bani na mambasa ai, boi ma botohon nasiam sonaha pangarusionku bani rusia ni Kristus.

⁵ Seng ipabotohkon ope ai bani anak ni jolma bani sundut sapari, tapi domma ipatalar ai nuan bani apostel-Ni na pansing in ampa nabi-nabi-Ni ibagas Tonduy,

⁶ paboa dihut halak sipajuh begu-begu hasoman panean anjaha hasoman saangkula anjaha hasoman parrupe i bani bagah-bagah na ibagas Kristus Jesus marhitei Ambilan Na Madear in.

⁷ Na dob gabe siparugas ni ai do ahu domu hubani idop ni uhur na binere ni Naibata hu bangku, domu hubani pangkorhon ni hagogohon ni ai.

⁸ Hu bangku, sietekan humbani haganup halak na mapansing in, ibere idop ni uhur on, ai ma mangambilankon bani sipajuh begu-begu habayakon ni Kristus na so tardadap in,

⁹ anjaha patorangkon sonaha dalan parsaud ni rusia ai, na ponop humbani mulani ibagas Naibata, Sitompa haganup,

¹⁰ ase ipatandahon ma sonari marhitei kuria in buei ni masam ni hapentaron ni Naibata bani siparrajai anjaha na markuasa i nagori atas,

¹¹ domu hubani na sinurahon-Ni humbani mula ni mulani, gabe ipasaud ibagas Kristus Jesus, Tuhanta in.

¹² Marhiteihon-Si jumpah hita do hinsah ni uhur ampa dalan masuk ibagas tenger ni uhur halani haporsayaon Bani.

¹³ Halani ai, hupindo ma bani nasiam, ase ulang mandolei nasiam mangidah sitarononku mangkopkop nasiam, ai hasangapon nasiam do in.

Tonggo ni si Paulus Mangkopkop na Niajaranni

¹⁴ Halani ai, manrogop do ahu i lobei ni Bapa in.

¹⁵ Marpanggorani hu Bani do sagala bapa ni bangsa-bangsa, na i nagori atas age na i tanoh on,

¹⁶ ase, domu hubani habayakon ni hasangapon-Ni in, ibere gogoh ampa kuasa marhitei Tonduy-Ni bani jolma parbagas nasiam,

¹⁷ ase marianan Kristus marhitei haporsayaon ibagas uhur nasiam, gabe totap nasiam marurat anjaha maronjolan bani holong,

¹⁸ ase boi nasiam rap pakon haganup halak na pansing in mangarusi sonaha ganjangni ampa bolagni, bagasni ampa gijangni,

¹⁹ anjaha mananda holong ni uhur ni Kristus, na mangatasi sagala pangarusion, ase das ma bani nasiam haganup hagogok ni Naibata.

²⁰ Tapi tarbahen-Si do lobih humbani na pinindonta barang na piningkiranta, domu hubani hagogohon na marhorja ibagas hita.

²¹ Bani ma hasangapon ibagas kuria in ampa ibagas Kristus marsundut-sundut ronsi sadokah ni dokahni. Amen.

Pasal Hasadaon ni Kuria Ibagas Tonduy ampa Holong

4 ¹ Ase ahu, na tarsangkut halani Tuhan in, huelek-elek ma nasiam. Parlahouhon nasiam ma na talup, domu hubani pandiloon na dob das bani nasiam!

² Martoruh ni uhur botul ma, marlamlam anjaha marlumbang ni uhur, marsianjuan ma nasiam ibagas uhur na holong!

³ Haporluhon nasiam ma manramotkon hasadaon ni tonduy marhitei panrahut ni damei.

⁴ Sada daging anjaha sada tonduy, songon nasiam na tardilo ibagas sada pangarapan bani pandiloon ai,

⁵ sada Tuhan, sada haporsayaon, sada pandidion,

⁶ sada Naibata, ai ma Bapa ni haganup, sigomgomi haganup, sitorusi haganup ampa siiani haganup.

⁷ Tapi bani ganup do hita ibere idop ni uhur ai domu hubani ukuran ni pambere ni Kristus.

⁸ Ai do ase nini, “Naik do la hu atas, iboan rapkon-Si na tartaban; ibere do sibere-bere banijolma.”

⁹ Tapi naik ma la, ai lang mararti ma ai, paboa na dob tuad do la lobei hubani ianan na i toruh ni tanoh?

¹⁰ Ia, na dob tuad ai, lanjar la do na naik hu atas ni haganup nagori atas, ase igoki haganup.

¹¹ Lanjar la do mambere deba gabe apostel, deba nabi, deba evangelis, deba use parmahan, ampa pangajari,

¹² laho pasirsirhon na mapansing in bani horja diakoni, laho pauli-ulihon daging ni Kristus in,

¹³ ase das hita haganup hu hasadaon ni haporsayaon ampa habotohon bani Anak ni Naibata, gabe jolma na gok, matoras anjaha gok songon Kristus,

¹⁴ ase ulang be hita danak, na pinalindak-lindak anjaha na binoan-boan ni ganup logou ni ajaran, marhitei horja akal-akal ni jolma, marhitei sipaoto-oto na laho pakahouhon.

¹⁵ Gabe parhasintongan hita tene ibagas holong anjaha lambin magodang ibagas haganup, mangayaki la, Ulu in, in ma Kristus.

¹⁶ Hun Bani do haganup angkula in ipadomu anjaha iparapat marhitei ganup urat-urat pangurupi, gabe lambin magodang daging in domu hubani horja ni ganup pagori bani bagianni bei, pinauli-uli ibagas holong.

Parlahou na Baru

¹⁷ On do hatangku anjaha husaksihon ibagas Tuhan in, “Ulang ma nasiam marparlahou songon halak

sipajuh begu-begu, na mangihutkon pingkiran sisoya-soya.

¹⁸ Paruhur na golap do sidea, holang humbani goluh ni Naibata, halani haotoon ni uhur ni sidea, pakon halani mapir ni uhur ni sidea.

¹⁹ Lang be ibotoh sidea na maila, gabe iondoskon ma dirini hubani na marpoya-poya anjaha ihorjahon sagala habutakon marhasoman uhur haut.

²⁰ Tapi anggo nasiam, seng sonai iguruhon nasiam pasal Kristus.

²¹ Ai lang domma ibogei nasiam barita-Ni, anjaha iajarhon pasal-Si domu hubani hasintongan na adong ibagas Jesus?

²² Tanggali nasiam ma jolma na buruk in, ai ma parlahou sisapari ai, ai laho magou do in hinorhon ni hisap-hisap sipaoto-oto.

²³ Anjaha gabe bayu ma nasiam ibagas tonduy ni uhur nasiam.

²⁴ Anjaha pakei nasiam ma jolma na baru, na tinompa usih hubani Naibata, ibagas hapintoron ampa hapansingon na botul.

²⁵ Halani ai ambungkon nasiam ma ladung in anjaha hatahon nasiam ma na sintong, ganup dompak hasomanni jolma, ai pagori do hita samah hita.

²⁶ Anggo manggila nasiam ulang ma mardousa! Ulang ma sundut mata ni ari, lang mintop ringis nasiam.

²⁷ Ulang ma pasiat nasiam sibolis in!

²⁸ Sipanangko hinan, ulang be manangko, tapi ra ma ia loja, anjaha ihorjahon tanganni ma na madear, ase adong siberehononni bani na hurangan.

²⁹ Ulang ma luar hata na mabutak humbani pamangan nasiam, tapi na madear ma, na boi pauli-ulihon na hurang, ase dapotan ulih, na mambogeisi.

³⁰ Anjaha ulang ma pusoki nasiam Tonduy Na Pansing ni Naibata, na dob tinokankon bani nasiam bani ari haluahon in.

³¹ Sagala riting ni uhur, gila, marah, sorgang-sorgang, panrisaon ampa sagala hajahaton, sai ipadaoh ma humbani nasiam.

³² Tapi basar ma nasiam samah nasiam, paridop ni uhur, anjaha sirsir marsisasapan dousa, songon panasap ni Naibata bani dousa nasiam ibagas Kristus.”

Parlahou Haliharon

5 ¹ Ai pe, sitiru Naibata ma nasiam, songon anak na hinaholongan!

² Anjaha marparlahou ma nasiam ibagas haholongan, songon Kristus na mangkaholongi nasiam, anjaha ibere do diri-Ni mangkopkop hita, gabe siluah ampa galangan bani Naibata, gabe uap na misbou.

³ Tapi parriah-riahon ampa bagei ni habutakon atap uhur haut pe, ulang ma tarsobut bani nasiam, songon na patut bani halak na pansing.

⁴ Sonai homa sihamelahononkon, hata sumsam, atap huria-huria na so patut, tapi sidearan ma sahap tarima kasih.

⁵ Ai botoh anjaha ingat nasiam ma, anggo bani harajaon ni Kristus ampa Naibata, seng dong siteanon ni siparriah-riah, barang halak na mabutak, barang paruhur haut, ai sibalosi na so Naibata do in.

⁶ Ulang ma ra nasiam paoto-otoon ni atap ise pe marhitei hata-hata na lumei, ai halani ai do mangonai ringis ni Naibata bani halak na so mambalosi.

⁷ Halani ai, ulang ma nasiam ra marhasomankon sidea!

⁸ Ai golap hinan do nasiam, tapi sonari liar do nasiam ibagas Tuhan in; marparlahou ma nasiam songon anak haliharon;

⁹ ai buah-buah ni haliharon ai ma sagala halayakon, hapintoron ampa hasintongan.

¹⁰ Paruhurhon nasiam ma, atap aha do harosuh ni Tuhan in!

¹¹ Ulang ma saor nasiam bani horja hagolapon, na so adong buahni, tapi patalar nasiam ma ai rahanan.

¹² Ai gari manarsingati na hinorjahon ni sidea ibagas na ponop, hamelaon do ai.

¹³ Tapi maningon talar do ai haganup, pinatar ni haliharon in, ai sagala na pinatar, liar ma ai.

¹⁴ Halani ai, nini do, "Puho ma ho na modom in, anjaha puho ma humbani na matei, gabe sondangan ni Kristus ma ho."

¹⁵ Halani ai paruhurhon ma, sonaha patut parlahou nasiam, ulang ma songon halak na so maruhur, tapi songon halak siparuhur ma,

¹⁶ pangkei manggunahon panorang, ai ari hasunsahan do nuan.

¹⁷ Halani ai ulang ma maoto nasiam, tapi arusi nasiam ma, atap aha harosuh ni Tuhan in.

¹⁸ Anjaha ulang ma mabuk nasiam halani anggur, ai hamagouan do ibagas ai, tapi gok Tonduy ma nasiam!

¹⁹ Marsahap ma nasiam samah nasiam marhitei doding Psalm, doding puji-pujian ampa doding partonduyon, dodingkon anjaha puji nasiam ma Tuhan in ibagas uhur nasiam!

²⁰ Tongtong ma nasiam mangkatahon tarima kasih halani haganup bani Naibata Bapa, ibagas goran ni Tuhanta Jesus Kristus!

²¹ Marsibalosan ma nasiam ibagas biar mangidah Kristus!

Parrumahtanggaon ni Halak Kristen

²² Nasiam parinangon, balosi nasiam ma paramangon nasiam, songon pambalosi nasiam bani Tuhan in.

²³ Ai paramangon in do ulu ni parinangonni, songon Kristus ulu ni kuria in, sipaluah angkula, (*kuria in*).

²⁴ Songon pambalosi ni kuria in bani Kristus, sonai ma pambalosi ni parinangon bani paramangonni ibagas haganup.

²⁵ Nasiam paramangon, haholongi nasiam ma parinangon nasiam, songon Kristus na mangkaholongi kuria in anjaha ibere diri-Ni mangkopkopsi,

²⁶ ase ipapansing in, marhitei na ipaborsih marhitei na mandidihon bah ibagas Hata in,

²⁷ ase la sandiri pasirsir kuria in Bani, sangap, seng martikas, seng marringut barang marhahurangan atap aha pe, tapi ase pansing tene anjaha seng dong sihataon.

²⁸ Sonai do patut haholongan ni paramangon parinangonni bei, songon angkulani sandiri. Na mangkaholongi parinangonni, dirini do hinaholonganni ijai.

²⁹ Seng onga isogamijolma dagingni, tapi iparmudu-mudu anjaha isarihon do ai, songon pambahen ni Kristus bani kuria in,

³⁰ ai pagori ni angkula-Ni do hita.

³¹ Halani ai tadingkonon ni halak do bapani ampa inangni, laho mangkasomani parinangonni, anjaha gabe sada daging do sidea na dua ai.

³² Ia rusia on bangga do, tapi bani Kristus ampa kuria in do hulimbagahon in.

³³ Ase ganup ma nasiam marsihaholongi parinangonni bei songon dirini sandiri, anjaha parinangon pe ihabiari ma paramangonni.

**Parlahou na Talup bani Anak,
Bapa, Jabolon, ampa Kopala**

6 ¹ Nasiam dakdanak, balosi nasiam ma namatoras nasiam ibagas Tuhan in, ai in do na pintor.

² Pasangap bapamu pakon inangmu! In do titah na parlobei marhasoman bagah-bagah,

³ ai ma ase martuah ho anjaha dokah manggoluh i tanoh on!

⁴ Nasiam bapa, ulang pasoru-soru nasiam dakdanak nasiam; pagodang-godang nasiam ma sidea ibagas ajar ampa podah ni Tuhan in!

⁵ Anjaha nasiam jabolon, balosi nasiam ma kopala nasiam na i tanoh on, marhasoman biar ampa gobir ibagas bujur ni uhur, songon bani Kristus.

⁶ Ulang ma pambalosi sanggah ididah tuan nasiam tumang, songon na mambuat-buat uhur nijolma, tapi songon jabolon ni Kristus ma horjahon nasiam rosuh ni Naibata humbani gok ni uhur nasiam.

⁷ Hun bani bujur ni uhur ma nasiam mambalosi, songon bani Tuhan in, sedo bani jolma.

⁸ Ai ibotoh nasiam do, suang do jaloan ni ganup humbani Tuhan in, anggo adong na madear na hinorjahonni, barang jabolon ia atap jolma na bebas pe.

⁹ Anjaha nasiam kopala-kopala, sonai ma bahen nasiam bani sidea, anjaha parontihon nasiam ma na sorgang-sorgang in, ai ibotoh nasiam do, i nagori atas do Tuhan ni sidea ampa Tuhan nasiam, anjaha seng sididah bohi la.

Sinjata Partonduyon

¹⁰ Ambahni ai, lambin margogoh ma nasiam ibagas Tuhan in ampa ibagas gogoh ni kuasa-Ni in.

¹¹ Pakei nasiam ma pakeian sinjata na humbani Naibata, ase boi tahan nasiam dompak akal-akal ni sibolis in.

¹² Ai seng maruntol hita manlawan daroh pakon daging, tapi dompak sipanrajai do, siparkuasa, sigomgomi dunia hagolapan on, tonduy hajahaton na i awang-awang ai.

¹³ Halani ai, jalo nasiam ma pakeian sinjata na humbani Naibata, ase tarbahen nasiam manlawan bani ari na jahat ai, anjaha totap jongjong, dob italuhon nasiam ganupan in.

¹⁴ Ase, jongjong ma nasiam, margondit hasintongan bani binongei nasiam, marbaju bosu hapintoron,

¹⁵ anjaha nahei marsipatu ringgas ni uhur, laho mangambilankon Ambilan Na Madear, pardameian in.

¹⁶ Ambah ni ganupan in, jalo nasiam ma gantar haporsayaon in, ai tarintopi nasiam do marhitei in haganup panah apuy ni parjahat in.

¹⁷ Jalo nasiam ma homa tangkuluk bosi haluahon ampa podang ni tonduy, ai ma hata ni Naibata.

¹⁸ Martonggo ma nasiam barang sadihari pe ibagas Tonduy in, ibagas tonggo ampa elek-elek, anjaha puho ampa golgol manonggohon haganup halak na susi in,

¹⁹ age ahu pe, ase ibere bangku hata-Ni, anjaha iungkab pamanganku laho pabotohkon rusia ni Ambilan Na Madear in marhasoman hinsah ni uhur,

²⁰ (*halani in do ase marhorja ahu songon suruhan na tarrantei*), ase marhinsah ni uhur ahu mangkatahonsi, songon na patut.

Hata Parujungan

²¹ Tapi, ase ibotoh nasiam na masa bangku ampa horjangku, patugahon ni si Tikikus do bani nasiam ganupan in, ai ia do sanina na hinaholongan anjaha siparugas hatengeran ni uhur ibagas Tuhan in.

²² Halani in do ase husuruh ia marayak nasiam, ase boi botohon nasiam na masa bannami, anjaha ase iapohi uhur nasiam.

²³ Damei ma bani sagala sanina ampa holong rapkon haporsayaon humbani Naibata Bapa in ampa humbani Jesus Kristus.

²⁴ Idop ni uhur ma mangkasomani haganup na marholong ni uhur bani Tuhanta Jesus Kristus, na totap sadokah ni dokahni.

Pilippi

Tabi bani Kuria ampa Pambobaini

1 ¹ Hun bani si Paulus ampa si Timoteus, juakjuak ni Kristus Jesus, bani haganup halak na pansing ibagas Kristus Jesus, na marianan i Pilippi, rapkon sintua ampa siparugas,

² “Idop ni uhur ma bani nasiam ampa damei humbani Naibata Bapanta ampa humbani Tuhan Jesus Kristus.” Hata Tarima Kasih ampa Tonggo Mangkopkop Kuria

³ Mangkatahon tarima kasih do ahubani Naibatangku siap huingat nasiam.

⁴ Tongtong ibagas ganup tonggongku pasal nasiam ganup, ibagas malas ni uhur do ahu na martonggo ai,

⁵ mardingat saor nasiam bani Ambilan Na Madear in humbani mungkahni ronsi nuan.

⁶ Anjaha tenger do uhurhu, la na dob mamungkah horja na madear ibagas nasiam, dobkonon-Ni do in das ronsi ari ni Kristus Jesus.

⁷ Patut do sonin uhurhu pasal nasiam haganup, halani ibagas uhurhu do nasiam, ai parrupe i do nasiam ganup bani idop ni uhur na hu bangku, sanggah na tartutup ai ahu age sanggah na

mampartahankon ampa na pajonamkon Ambilan Na Madear ai.

⁸ Ai Naibata do saksingku pasal bangga ni siholhubani nasiam haganup marhitei holong ni atei ni Kristus Jesus.

⁹ Anjaha on do hutonggohon, ase lambin marbanggal holong ni uhur nasiam marisi habotohon ampa pangarusion na gok,

¹⁰ gabe boi nasiam mananda na ija siporlunan, ase pitah nasiam, anjaha seng dong sihataon bani ari ni Kristus,

¹¹ gok bani buah-buah hapintoron na roh marhitei Jesus Kristus, bahen hasangapon ampa puji-pujian bani Naibata.

Mangkorhon Pasu-pasu do Age Tartutup Apostel

¹² Ipangindo uhuru do, nasiam sanina, ase ibotoh nasiam, paboa lambin manumpak bani hamajuon ni Ambilan Na Madear do na masa bangku,

¹³ pala do tarbotoh bani ganup pangisi ni tangsi ai ampa bani haganup na legan ai, paboa halani Kristus do na targari ai ahu,

¹⁴ gabe roh tengerni do uhur ni buenan sanina ai bani Tuhan in, anjaha roh boranini mangkatahon hata ni Naibata seng mabiar-biar.

¹⁵ Deba dong homa manaksihon Kristus humbani uhur subil ampa paringoran, tapi deba nari humbani bujur ni uhur do.

¹⁶ Hun bani jinuljul ni holong ma anggo on, halani ibotoh sidea, halani na mampartahankon Ambilan Na Madear do, ase tartutup ahu.

¹⁷ Tapi na legan ai nani mangambilankon Kristus humbani uhur na maringor, seng humbani uhur na pitah, ase tambah ninuhur ni sidea sitaronon bangku na targari on.

¹⁸ Ase sonaha do? Atap na sonaha pe pardalan ni ai, marsipahulah-hulah atap maruhur na sintong, asal ma tarambilan Kristus; pasal ai malas do uhurhu.

¹⁹ Tongon, malas do uhurhu, ai hubotoh gabe marujung bani hatuahon do on bangku halani tonggo nasiam ampa halani pangurupi ni Tonduy ni Jesus Kristus.

²⁰ Ai in do na huhasiholhon anjaha mangarap ahu seng anjai tarmela ahu ibagas atap aha pe, tapi marhasoman hinsah ni uhur, songon nasaindokah age sonari, maningon marsangap Kristus marhitei angkulangku, marhitei goluhku barang parmateihu.

²¹ Ai Kristus do hagoluhan bangku, anjaha untung do hamatean.

²² Tapi anggo marbuah do horjangku hinorhon ni goluh ni daging on, gabe lang hubotoh barang aha do sipilihonku.

²³ Haduasi do manosak ahu: Masihol do uhurhu misir, ase rap pakon Kristus, ai daoh do dearan ai,

²⁴ tapi porlunan do marianan ibagas daging halani nasiam.

²⁵ Anjaha marhatengeran hujai, hubotoh do, paboa manggoluh ope ahu anjaha marianan pakon nasiam haganup, laho pamajuhon ampa pahinsah haporsayaon nasiam,

²⁶ ase lambin tambah pamuji nasiam bani Kristus Jesus marhitei ahu, rohkonsi ahu use bani nasiam.

Sipaingat ase Totap Marhaporsayaon

²⁷ Hansa, marparlahou ma nasiam domu hubani Ambilan Na Madear ni Kristus, ase barang sanggah na roh ai ahu, huidah bani nasiam, barang age sanggah padaoh-daoh, hubogei bani nasiam, totap nasiam jongjong ibagas hasadaon ni tonduy, marsada ni uhur, marporang mangkopkop haporsayaon bani Ambilan Na Madear in.

²⁸ Anjaha ulang ma ra nasiam pabiar-biaran ni imbang pasal atap aha pe, ai ma tanda ni hamagouan bani sidea, tapi bani nasiam tanda ni haluahon do, anjaha humbani Naibata do in.

²⁹ Ai domma ibere bani nasiam, seng pitah porsaya bani Kristus, tapi dihut do marsitaronon halani-Si.

³⁰ Maruntol do nasiam nuan, songon na nididah nasiam ijia bangku, anjaha na binogei nasiam nuan bangku.

Martoruh ni Uhur songon Kristus

2 ¹ Anggo adong apoh-apoh ibagas Kristus, pakon ojur-ujur ibagas holong ni uhur, pakon

parsaoran ni Tonduy, pakon ontou ni uhur, ampa idop ni uhur,

²goki nasiam ma malas ni uhurhon: Sada ma paruhuron nasiam, sada ma haholongon nasiam, sauhur, sapingkiran ma nasiam!

³Ulang ma maruhur haut atap marhasangapon na lumei, tapi ibagas toruh ni uhur hira nasiam ma hasoman nasiam lobihan humbani nasiam sandiri!

⁴Ulang ma na porlu bani nasiam paruhurhon nasiam, tapi dihut ma na bani hasoman!

⁵Songon paruhuron ni Kristus Jesus ma paruhuron nasiam!

⁶Age pe marrupa Naibata la, sedo songon nirampas ihira uhur-Ni usih-Ni ai bani Naibata,

⁷tapi ipalumei do diri-Ni anjaha ipakei rupa ni jabolon, gabe usih banijolma do la, anjaha rumangjolma jumpah Bani.

⁸Ipatoruh do diri-Ni, na gabe pambalosi do la ronsi matei, pala matei tarsilang.

⁹Halani ai do ase ipagijang Naibata la, anjaha ilayak-layakkon Bani sada goran na mangatasi sagala goran,

¹⁰ase manowod anjaha marsombah ibagas goran ni Jesus sagala na i nagori atas pakon na i atas tanohon, age na i toruh ni tanoh,

¹¹anjaha sagala pamangan marhatongonkon, Jesus Kristus do Tuhan, bahen hasangapon ni Naibata Bapa.

Mamorluhon Goluh Partonduyon

¹² Ai pe nasiam na hinaholongan ni uhurhu, songon totap ni pambalosion nasiam na saindokah, lang pitah sanggah i lambung nasiam ahu, tapi tarlobih ma nuan, sanggah daoh ahu. Marhasoman biar pakon gobir ma haporluhon nasiam haluahon nasiam,

¹³ ai Naibata do mangkorjahon ibagas nasiam sura-sura ampa na pasaudkon ai mangihutkon rosuh ni uhur-Ni.

¹⁴ Bani sagala pambahen nasiam, ulang ma nasiam marungut-ungut barang maruhur sangsi,

¹⁵ ase ulang adong sihataon bani nasiam, tapi pitah ma, gabe anak ni Naibata, na so martikas i tengah-tengah ni sundut na geduk anjaha siparbalik, ijin ma nasiam marsinondang songon bintang i dunia on,

¹⁶ marsijoloman bani hata hagoluhan in, bahen puji-pujian bangku bani ari ni Kristus, paboa na so soya parlumbaonku anjaha sedo na so marguna halojaonku.

¹⁷ Ai porini iduruskon darohku gabe galangan ampa parsombahon mangkopkop haporsayaon nasiam, malas anjaha megah do uhurhu rap pakon nasiam haganup.

¹⁸ Sonai ma homa malas ma uhur nasiam, anjaha marmalas ni uhur ma nasiam rap pakon ahu.

Ibagahkon si Paulus Marsuruh si Timoteus

¹⁹ Tapi arap do uhurhu ibagas Tuhan Jesus, podas ma si Timoteus suruhonku bani nasiam, andohar marhinsah ni uhur age ahu, anggo domma hubogei sonaha pasal nasiam.

²⁰ Ai seng adong be hasomanku na marparuhuron songonsi, na ra mansarihon nasiam humbani uhur na bujur.

²¹ Ai haganup do sidea mangindahi na porlu bani dirini bei, seng be na porlu bani Kristus Jesus.

²² Pasal hataluponni ibotoh nasiam do, songon anak rap pakon bapa marhorja do ia pakon ahu bani Ambilan Na Madear in.

²³ Arap do uhurhu mintor suruhonku do ia, ijin hubotoh, sonaha pasal langkahku.

²⁴ Tapi tenger do uhurhu ibagas Tuhan in, ahu sandiri pe podas do roh.

²⁵ Anjaha domma huputuskon porlu do marsuruh bani nasiam si Epaproditus, sanina in, hasomanku sahorja ampa saparuntolon, na sinuruh nasiam mamboan na porlu bangku,

²⁶ ai masihol do ia bani nasiam haganup, anjaha rusak do ia, halani tarbogei bani nasiam naboritni ai.

²⁷ Anjaha tongon parah hinan do naboritni, pala narus matei; tapi maidop do uhur ni Naibata mangidahsi, seng pitah mangidahsi tene, dihut do

mangidah ahu, ase ulang mardapot-dapot pusok ni uhurhu.

²⁸ Domma hupapodas marsuruhsi, ase marmalas ni uhur nasiam mangidahsi, anjaha ahu pe hun lumbang uhurhu.

²⁹ Ai pe, malas ma panjalo nasiam bani ibagas Tuhan in, anjaha sangap ma bahen nasiam halak na sonin.

³⁰ Ai halani horja ni Kristus narus do ia matei, anjaha iajamkon do hosahni laho manggoki pangidangion nasiam bangku.

Lumba-lumba dompak Pambobai Palsu

Hamuliaon ni Panandaion bani Kristus

3 ¹ Ambah ni ai, nasiam sanina, marmalas ni uhur ma nasiam ibagas Tuhan in! Manuratkon in hun gati bani nasiam, seng borat uhurhu, ai patotap uhur nasiam do in.

² Jaga ma nasiam bani baliang, jaga bani parhorja na jahat, jaga bani parsunaton na lepak!

³ Ai hita do siparsunat na tongon, siparsombah ibagas Tonduy ni Naibata, siparmegah-megah ibagas Kristus Jesus, na so martenger ni uhur bani daging,

⁴ porini pe adong do namin sipangunsagahkononku ibagas daging. Ai anggo adong halak na legan, na mangagan adong sipangunsagahkononni ibagas daging, ahu buenan:

⁵ Tarsunat bani ari paualuhkon, marasal humbani halak Israel, humbani marga Benjamin, halak Heber anjaha tubuh humbani halak Heber, halak Parisei mangihutkon titah in,

⁶ garang mardakdaki kuria in, seng dong sihataon ibagas hapintoron mangihutkon titah.

⁷ Tapi paruntungan hinan pe bangku, harugian do in huhira halani Kristus.

⁸ Tongon haganup do harugian huhira marimbang hamuliaon ni panandaion bani Kristus Jesus, Tuhankin. Marhalani-Si harugian do bangku ganupan ai, anjaha tompoh-tompoh do ai huhira, ase bangku Kristus,

⁹ ase ibagas la ahu jumpah, seng marhapintoron sandiri marhitei titah, tapi marhitei haporsayaon ibagas Kristus do, ai ma hapintoron na humbani Naibata, maronjolan bani haporsayaon,

¹⁰ ase hutanda la ampa hagogohon ni parpuhoon-Ni ai ampa hasadaon bani sitaronon-Ni ai, gabe songon-Si ibagas parmatei-Ni,

¹¹ andohar das ahu hubani parpuhoon humbani na matei.

¹² Seng ope na dob jumpah ahu ma ai, atap na dob gokan dear ma ahu, tapi sai huparayak do ase jumpah ahu, halani na dob tinangkap ni Kristus Jesus ahu.

¹³ Nasiam sanina, lape huhira, na dob jumpah ahu ai, tapi on do tene: Huhakupahon do na i pudingku, huparayak na i lobeihu,

¹⁴ dompak tujuan ai do hupojong, dompak upah hamonangan ni pandiloon na hun babou, na humbani Naibata ibagas Kristus Jesus.

¹⁵ Barang piga hita na gokan dear, in ma paruhurhon hita; anjaha anggo legan ope pingkiran nasiam pasal atap aha pe, age ai patalaron ni Naibata do bani nasiam.

¹⁶ Asal ma torus dalani hita dalan na dob nidalananta.

Mangkagoluhkon na Niarapkon

¹⁷ nasiam sanina, usihi nasiam ma ahu, anjaha pardiateri nasiam ma na marparlahou songon hanami, siusihan nasiam.

¹⁸ Ai buei do na marparlahou gabe munsuh ni silang ni Kristus; anjaha pasal sidea domma gati huhatahon bani nasiam, anjaha anggo sonari marhasoman iluh do huhatahon bani nasiam.

¹⁹ Hamagouan do ujung ni sidea, boltokni do iparnaibata, sihamelahononkon do ihasangapkon, anjaha na i tanoh on iparuhurhon.

²⁰ Ai warga nagori atas do hita, hunjai do ipaima-ima hita Sipaluah hita, in ma Tuhanta Jesus Kristus in.

²¹ Paubahon-Ni do angkulanta na dorun on gabe doskon angkula-Ni na sangap in, domu hubani hagogohon-Ni, na boi patundukkon haganupan ai Bani.

Sipaingat Pangujungi

4 ¹ Halani ai, nasiam sanina, na huhaholongi anjaha na huhasiholi, malas ni uhur bangku ampa sortalingku, sai sonin ma nasiam totap ibagas Tuhan in, nasiam hinaholongan.

² Nasiam Oiodia ampa Sintike, hupaingat ma nasiam marsada ni uhur ibagas Tuhan in.

³ Anjaha hupindo homa bamu, ham hasomanku sahorja na botul, urupi ma parinangon in, in ma hasomanku marporang mangkopkop Ambilan Na Madear in, rap pakon si Klemens ampa hasomanku sahorja na legan ai, na dob ibagas buku hagoluhan in goran ni sidea.

⁴ Marmalas ni uhur ma nasiam tongtong ibagas Tuhan in, huulaki ma mangkatahon, marmalas ni uhur ma!

⁵ Habasaron nasiam ai, sihol ma talar ai bani haganup halak! Dohor do Tuhan in.

⁶ Ulang ma haru uhur nasiam pasal atap aha pe, tapi pabotohkon nasiam ma pangindoan nasiam bani Naibata marhasoman tonggo, elek-elek ampa tarima kasih.

⁷ Anjaha damei ni Naibata, na mangatasi haganup paruhuron, in ma manramotkon uhur ampa pingkiran nasiam ibagas Kristus Jesus!

⁸ Ambahni ai, nasiam sanina, paruhurhon nasiam ma sagala na sintong, na hormat, na pintor, na borsih, na jenges, na dear bogeion atap biak na madear atap na patut sipujion.

⁹ Anjaha aha na ginuruhon nasiam, na jinalo, na binogei ampa na nididah nasiam hun bangku, ai ma horjahon nasiam, anjaha Naibata Sipardamei in ma mangkasomani nasiam.

Malas ni Uhur ni si Paulus Halani Sibere-bere na Jinaloni

¹⁰ Malas tumang do uhurhu ibagas Tuhan in halani mangulaki use nasiam nuan mansarihon na porlu bangku. Tongtong do ipingkirhon nasiam pasal ai, tapi na so adong do hasompatan bani nasiam.

¹¹ Seng halani hurangan ahu ase huluarhon ai, ai domma huguruhon, mangkadearhon na adong.

¹² Hubotoh do manggoluh ibagas na hurang, hubotoh do ibagas na marlobih-lobih; domma ilatih ahu bani haganup, bosur pakon loheian, marlobih-lobih pakon hurangan pe.

¹³ Haganup do tarhorjahon ahu marhiteihon la, na margogohi ahu.

¹⁴ Tapi tene, dear do pambahenan nasiam in, ai itatap nasiam do hasosakanku.

¹⁵ Ai ibotoh nasiam halak Pilippi do, na so adong, sobali nasiam, kuria na hubahen hasomanku, mambahen parhiraan pasal na binere pakon na nijalo, sanggah na mamungkah mangambilankon Ambilan Na Madear in, dob na hutadingkon Makedonia,

¹⁶ ai hu Tessalonika pe domma itongos nasiam na porlu bangku sahali dua hali.

¹⁷ Sedo sibere-bere ai na hupindahi, tapi buahni ai do na hupindahi, na gabe idou bani nasiam.

¹⁸ Domma hujalo haganup anjaha marlobih-lobih do ahu. Marlobih-lobih tumang do ahu nuan, dob hujalo tinongos nasiam marhitei si Epaproditus, ai ma uap na misbou, galangan na hinamalaskon ampa hinarosuhkon ni Naibata.

¹⁹ Tapi gokan ni Naibatanku do sagala na porlu bani nasiam, domu hubani habayakon-Ni na sangap ai ibagas Kristus Jesus!

²⁰ Anjaha hasangapon ma bani Naibata, Bapanta in, ronsi sadokah ni dokahni. Amen.

Hata Tabi pakon Pasu-pasu

²¹ Padas nasiam ma hata tabi hun bangku bani ganup halak na mapansing in ibagas Kristus Jesus! Manongos tabi do homa bani nasiam sanina-sanina, na rap pakon ahu.

²² Manongos tabi do haganup halak na mapansing in bani nasiam, tarlobih ma ai na hun rumah ni kesar.

²³ Idop ni uhur ni Tuhan Jesus Kristus ma mangkasomani tonduy nasiam.

Kolosse

Tabi ni Apostel Paulus

1 ¹ Hun bani si Paulus, apostel ni Kristus Jesus marhitei rosuh ni Naibata, ampa si Timoteus sanina in,

² marayak halak na mapansing na i Kolosse ampa sanina na porsaya bani Kristus in, idop ni uhur ma bani nasiam ampa damei humbani Naibata, Bapanta in.

Tarima Kasih ni Apostel Pasal Sidea ampa Tonggoni

³ Mangkatahon tarima kasih do hanami tongtong bani Naibata, Bapa ni Tuhanta Jesus Kristus, ibagas tonggonami bani nasiam,

⁴ ai ibogei hanami do pasal haporsayaon nasiam bani Kristus Jesus ampa holong ni uhur nasiam dompak haganup halak na mapansing in,

⁵ halani pangarapan, na dob pinasirsir bani nasiam i nagori atas. Domma ibogei nasiam hinan pasal in marhitei hata hasintongan in, in ma Ambilan Na Madear in.

⁶ In ma na dob adong bani nasiam, age i sab dunia on; na marbuah do in anjaha lambin marbanggal, songon na bani nasiam, mulai humbani panorang,

dob ibogei nasiam anjaha itanda nasiam idop ni uhur ni Naibata ibagas hasintongan.

⁷ Sonin do iguruhon nasiam humbani si Epapras, hasomannami juakjuak, na hinaholongan, ia do parugas hatengeran ni Kristus mangkopkop nasiam, ⁸ anjaha ia do patugahkon bannami holong ni uhur nasiam ibagas Tonduy.

⁹ Halani ai, mulai humbani panorang dob ibogei hanami in, seng maronti hanami manonggohon nasiam anjaha mangindo, ase igoki bani nasiam panandaion pasal rosuh ni uhur-Ni, marhasoman sagala hapentaran ampa pangarusion partonduyon,

¹⁰ ase marparlahou na talup nasiam bani Tuhan in, gabe harosuh tumang Bani, marbuah nasiam bani sagala horja na madear, anjaha martambah bani nasiam panandaion pasal Naibata,

¹¹ gabe ipargogohi tumang nasiam domu hubani gogoh ni hasangapon-Ni in, mangkorhon hasabaron ampa hatahanon marhasoman malas ni uhur,

¹² martarima kasih bani Naibata, na dob patalupkon nasiam marparbagianan bani siteanon ni halak na mapansing ibagas haliaron.

¹³ Ia do na paluahkon hita humbani kuasa ni hagolapan, anjaha ipapindah do hita hubagas harajaon ni Anak na hinaholongan ni uhur-Ni in.

¹⁴ Ibagas Ia do adong banta haluahon, ai ma hasasapan ni dousa.

Hatimbulon ampa Horja Pardearan na Binahen ni Kristus

¹⁵ Anjaha la do usihan ni Naibata na so taridah in, na parlobei tubuh humbani sagala na tinompa,

¹⁶ ai marhiteihon-Si do itompa haganup, na i nagori atas ampa na i tanoh on, na taridah pakon na so taridah, atap paratas pe ai atap harajaon atap gongoman atap kuasa. Haganupan ai itompa marhiteihon-Si anjaha marhadoban hu Bani.

¹⁷ Parlobei do la humbani haganup, anjaha ganupan in marhiteihon-Si do torus adong.

¹⁸ la do ulu ni badan in, in ma kuria in. la do parmulaan, na parlobei tubuh humbani na matei, ase la na parlobei bani haganup.

¹⁹ Ai ibagas la do itontuhon Naibata marianan hagogok-Ni in,

²⁰ anjaha padear haganup marhiteihon-Si bani diri-Ni, na i tanoh on age na i nagori atas, dob ipajongjong damei marhitei daroh-Ni na madurus in bani hayu pinarsilang.

²¹ Anjaha nasiam na daoh hinan anjaha munsuh marhitei paruhuron ampa horja hajahaton,

²² ipadear Jesus nuan ibagas daging hajolmaon-Ni, marhitei parmateri-Ni, laho pajongjongkon nasiam ase pansing, lang dong sihataon anjaha sipinsangon i lobei-Ni.

²³ Asal ma marianan nasiam jonam anjaha toguh ibagas haporsayaon, anjaha lang ra mosor humbani pangarapan na binogei nasiam ibagas Ambilan Na Madear na binaritahon bani haganup na tinompa, na i toruh ni langit, anjaha ahu, si Paulus, do gabe siparugas bani in.

**Sitaronon ampa Horja ni si
Paulus Mambalosi Kristus**

²⁴ Malas do uhurhu nuan ibagas sitaronon mangkopkop nasiam, anjaha ibagas dagingku hugoki na so jumpah ope bani na tinaron ni Kristus, laho mangkopkop angkula-Ni, in ma kuria in.

²⁵ Na dob gabe siparugas-Ni in do ahu, domu hubani jabatan, na pinadas ni Naibata bangku halani nasiam, laho padaskon hata ni Naibata,

²⁶ in ma rusia in, na ponop marabad-abad ampa marsundut-sundut; tapi sonari ipatalar do bani halak na mapansing-Ni in.

²⁷ Hu bani sidea do pabotohkonon ni Naibata surung ni hamuliaon ni rusia on, i tongah-tongah ni sipajuh begu-begu, ai ma, Kristus ibagas nasiam, pangarapan in bani hasangapon.

²⁸ Ia do ibaritahon hanami, ipaingat anjaha iajari hanami do sagala jolma pasal sagala hapentaron, laho pajongjongkon ganup jolma gokan dear ibagas Kristus.

²⁹ Halani in do ase loja anjaha maruntol ahu, domu hubani hagogohon-Ni na marhorja gogoh ibahen ibagas ahu.

Golpa-golpa ase Totap Ibagas Haporsayaon

2 ¹ Tapi ipangindo uhurhu do, ase ibotoh nasiam, sonaha bangga ni halojaonku mangkopkop nasiam ampa sidea na i Laodikea, ampa haganup na so onga mangidah bohingku ope,

² ase tarapoh uhur ni sidea, ase marpardomuan ibagas holong, ase bayak bani pangarusion na gok, anjaha ase itandai sidea pasal rusia ni Naibata, in ma Kristus in.

³ Ibagas la do ponop sagala arta na marisi hapentaran ampa habotohon.

⁴ Huhatahon pe in, ase ulang adong na mangoto-otoi nasiam marhitei pandei ni parsahap.

⁵ Ai padaoh-daoh pe ibagas pardagingon, rap pakon nasiam do ahu ibagas tonduy, marmalas ni uhur mangidah partorsani bani nasiam ampa partotap ni haporsayaon nasiam bani Kristus.

⁶ Ai pe, songon panjalo nasiam bani Kristus Jesus, Tuhan in, sonai ma marparlahou nasiam ibagas la,

⁷ marurat anjaha ipauli-uli ibagas la, jonam marhaporsayaon, songon na dob niajarhon bani nasiam, anjaha lambin martarima kasih.

**Lumba-lumba ase Marjaga-jaga
dompok Parpodah na Kahou**

⁸ Jaga ma nasiam, ase ulang adong halak na mangagou nasiam marhitei hapentaron dunia ampa sipaoto-oto na lumei, na maronjolan bani tonah-tonah ni jolma, bani kuasa ni unsur-unsur dunia on, seng bani Kristus.

⁹ Ai ibagas la do marianan haganup hagogok ni hanaibataon marrupahon angkula,

¹⁰ anjaha ibagas la do gabe gok nasiam, la do kopala ni sagala pamarentahan ampa kuasa.

¹¹ Lanjar ibagas la do nasiam tarsunat, sedo binahen ni tangan, ai ma mananggalhon daging pardousaon, marhitei parsunaton na ibagas Kristus.

¹² Ai tartanom do nasiam rap pakon-Si ibagas pandidion in, anjaha ibagas ai do homa nasiam ipapuhon rap pakon-Si marhitei haporsayaon bani hagogohon ni Naibata, na papuhohon-Si humbani hamatean.

¹³ Ase nasiam, na matei hinan ibagas panlanggaron ampa ibagas daging na so tarsunat in, rap pakon-Si do nasiam ipapuhon, dob isasap sagala panlanggaronta,

¹⁴ marhitei na isasap surat utang dompak hita, ai ma paraturan na mangimbang hita, anjaha ipadaoh do ai hun tongah-tongahta, ipakuhon bani silang ai.

¹⁵ Irampas do sinjata humbani siparkuasa ampa sipargogoh; talar do ipatontonkon sidea, marhamonangan do la dompak sidea.

¹⁶ Ai pe, ulang ma iuhumi halak nasiam halani sipanganon ampa siinumon barang halani pesta barang poltak ni bulan barang halani ari Sabat pe.

¹⁷ Halinoh ni na sihol roh ai do in, tapi Kristus do anggo badanni.

¹⁸ Ulang ma ra nasiam rampason pasal upah hamonangan nasiam marhitei halak, na mangkarosuhkon parnalangon diri ampa parsombahon bani malekat, na mangunsagah bani na nididahni ibagas alatan ni tonduyni, na pabanggal-banggal diri, lang maralasan, marhitei pingkiran pardagingon,

¹⁹ tapi lang totap marsijoloman bani ulu in, ai ma na mansarihon angkula in anjaha padomuhon marhitei urat-urat ampa ringring, gabe marbanggal domu hubani ranggian ni Naibata.

²⁰ Anggo domma matei nasiam rap pakon Kristus dompak kuasa unsur-unsur ni dunia on, mase ma ra nasiam paksaon marhitei paraturan-paraturan, songon halak na manggoluh i dunia on:

²¹ Ulang jamah on, ulang pangan, ulang giut!

²² Haganupan ai magou do anggo domma hona pakei. Titah ampa podah-podah nijolma tumang do ai.

²³ Tongon, songon na marisi hapentaran do ai idahon, ai ionjolhon do hadaulaton, na marnalangkon diri, na mangarsik-arsik angkula; tapi seng na marguna ai manlawan hisap ni daging.

Na i Nagori Atas do Siparuhurhononkon

3 ¹ Ase anggo domma ipapuhon nasiam rap pakon Kristus, pindahi nasiam ma na i atas ai; ijai do Kristus hundul i siamun ni Naibata.

² Na i babou ai ma paruhurhon nasiam, ulang ma na i atas tanoh on.

³ Ai domma matei nasiam, anjaha ponop do goluh nasiam rap pakon Kristus ibagas Naibata.

⁴ Tapi, anggo talar ma Kristus, hagoluhanta in, ijai ma talar age nasiam rap pakon-Si ibagas hasangapon.

Pasal Goluh na Baru

⁵ Ai pe, bunuh nasiam ma pagori nasiam na i tanoh on, parriah-riahon, habutakon, hisap-hisap, sura-sura jahat ampa uhur haut, ai ma parnaibataon na legan,

⁶ ai halani ai do roh ringis ni Naibata.

⁷ Anjaha ai do idalankon nasiam hinan, sanggah ibagas ai ope goluh nasiam.

⁸ Tapi sonari, ambukkon nasiam ma haganupan in, ringis, gila hajahaton, panrisaon ampa hata sumsam humbani pamangan nasiam.

⁹ Ulang ma marsiladungan nasiam, ai domma itanggali nasiamjolma na buruk in rap pakon pambahenanni,

¹⁰ anjaha domma ipakei nasiam na baru in, na pinabaru domu hubani rupa ni na manompasi, ase marpangarusion.

¹¹ Ijai seng dong ubah ni halak Gorik atap halak Jahudi, na marsunat atap na so marsunat, bangsa na legan atap na so maju, jabolon atap halak na bebas, ai Kristus do haganup ibagas haganup.

Pasal na Marsihaholongan

¹² Ai pe, nasiam na dob pinilih ni Naibata, na mapansing anjaha na hinaholongan, pakei nasiam ma biak paridopniuhuran, habasaron, toruh ni uhur, halamlamon, ampa lumbang ni uhur,

¹³ marsianju-anjuan anjaha marsisasapan dousa, anggo marpangkurangi uhur ni na sada dompak hasomanni; songon na dob isasap Kristus dousa nasiam, sonai ma homa nasiam marsisasapan.

¹⁴ I atas ni ganupan ai dalankon nasiam ma holong, ai in do rahut-rahut ni sagala hadearon.

¹⁵ Anjaha damei ni Kristus ma manrajai ibagas uhur nasiam, ai hujin do nasiam tardilo gabe sada angkula. Gabe sipartarima kasih ma nasiam.

¹⁶ Gugun ma hata ni Kristus marianan i tongah-tongah nasiam; marhasoman gok hapentaron ma nasiam marsiajaran anjaha marsipaingatan

marhitei doding Psalm, doding puji-pujian ampa doding partonduyon; dodingkon nasiam ma Naibata ibagas uhur nasiam maruhur tarima kasih.

¹⁷ Anjaha sagala horja nasiam, marhitei hata atap pambahenan, horjahon nasiam ma haganup in ibagas goran ni Tuhan Yesus, anjaha martarima kasih bani Naibata, Bapa in, marhiteihon-Si.

**Sidingaton ni Parinangon, Paramangon,
Dakdanak, ampa Jabolon**

¹⁸ Nasiam parinangon, balosi nasiam ma paramangon nasiam, songon na talup ibagas Tuhan in.

¹⁹ Nasiam paramangon, haholongi nasiam ma parinangon nasiam, anjaha ulang ma kasar dompak sidea.

²⁰ Nasiam dakdanak, balosi nasiam ma namatoras nasiam ibagas haganup, ai in do rosuh ni Tuhan in.

²¹ Nasiam bapa, ulang ma makorastu nasiam dompak niombah nasiam, ase ulang mandolei sidea.

²² Nasiam jabolon, balosi nasiam ma tuan nasiam na i tanoh on ibagas haganup, ulang ma pambalosi bani mata nasiam, songon na mambuat uhur ni jolma, humbani bulus ni uhur ma, halani biar bani Tuhan in!

²³ Hun bani gok ni uhur ma horjahon nasiam sagala horja nasiam, songon na bani Tuhan in, sedo banijolma,

²⁴ ai ibotoh nasiam, jaloon nasiam do humbani Tuhan in siteanon ai balos ni in, sibalosi Kristus Tuhan in ma nasiam.

²⁵ Ai na mangkorjahon hagedukon, jaloonni do pambalason bani hagedukon, na hinorjahonni ai, ai seng dong na martonggor jumbak ijai.

4 ¹ Nasiam tuan-tuan, bahen nasiam ma na pintor ampa na patut bani jabolon nasiam, ingat nasiam, adong do homa bani nasiam Tuhan i nagori atas.

Golpa-golpa Pasal na Martonggo, Marsahap, ampa Marparlahou na Madear

² Tongtong ma nasiam martonggo, anjaha puho ma pasal ai marhasoman tarima kasih.

³ Tonggohon nasiam ma homa hanami, ase ibere Naibata labah na ungkab bannami mangambilankon hata in, mangkatahon rusia pasal Kristus, ai halani in do ahu targari,

⁴ ase hupatalar in, songon na patut pangkatahonku.

⁵ Marpantas ni uhur ma nasiam marparlahou dompak halak na i darat; pargunahon nasiam ma panorang.

⁶Sai tongtong ma jenges hata nasiam, songon na ginaraman, ase ibotoh nasiam, sonaha patut marbalos bani ganup halak.

Hata Parujungan pakon Tabi

⁷Patugahon ni si Tikikus do bani nasiam haganup na masa bangku; sanina na hinaholongan do ia, siparugas na bujur, anjaha hasoman sahorja ibagas Tuhan in.

⁸Husuruh do ia bani nasiam, ase ibotoh nasiam na masa bannami, anjaha ase iapoh uhur nasiam.

⁹Dihut do homa si Onesimus, sanina na hinaholongan, na bujur in, ai ma na roh humbani nasiam. Patugahon ni sidea ma bani nasiam sagala na masa bannami.

¹⁰Manongos tabi do bani nasiam si Aristarkus, hasomanku tartutup, ampa si Markus, panogolan ni si Barnabas. Domma ijalo nasiam hata pasalsi, ase anggo roh ma ia bani nasiam, jalo nasiam ma ia.

¹¹Sonai homa si Jesus, na margoran si Justus. Pitah sidea do humbani halak Jahudi hasomanku sahorja ibagas Harajaon ni Naibata; na gabe apoh-apoh do sidea bangku.

¹²Manongos tabi do bani nasiam si Epapras, na roh humbani nasiam, juakjuak ni Kristus Jesus; tongtong do ia maruntol manonggohon nasiam, ase gokan dear nasiam jongjong anjaha atok ibagas haganup, na hinarosuhkon ni Naibata.

¹³ Ahu ma manaksihon pasalsi, paboa buei tumang do halojaonni mangkopkop nasiam ampa hasoman na i Laodikea pakon na i Hierapolis.

¹⁴ Manongos tabi do bani nasiam si Lukas, doktor in.

¹⁵ Padas nasiam ma tabingku bani sanina na i Laodikea ampa bani si Nimpas ampa bani kuria na martumpu i rumahni.

¹⁶ Dob ibasa surat on i tongah-tongah nasiam, ibasa ma homa on i kuria Laodikea; anjaha surat na hu Laodikea ai pe basa nasiam ma homa.

¹⁷ Hatahon nasiam ma hubani si Arkippus, jaga ma, ase tohonan na dob jinalomu ibagas Tuhan in, torsa idalankon ho in!

¹⁸ On ma tabi hun bangku, si Paulus, na sinurat ni tanganku. Dingat nasiam ma ahu, na tarrantei on. Idop ni uhur ma bani nasiam.

1 Tessalonika

Tabi bani Kuria

1 ¹Hun bani si Paulus, si Silpanus pakon si Timoteus, hubani kuria na i Tessalonika, na ibagas Naibata Bapa pakon Tuhan Jesus Kristus: Idop ni uhur ma bani nasiam ampa damei!

Tarima Kasih ni Apostel Halani Haporsayoan ni Kuria

² Mangkatahon tarima kasih do hanami tongtong hubani Naibata halani nasiam haganup, anjaha itarsingati hanami do nasiam ibagas tonggonami.

³ Idingat hanami do totap i lobei ni Naibata horja haporsayaon nasiam, horja holong nasiam ampa hatotapon ni pangarapan nasiam bani Tuhanta Jesus Kristus.

⁴ Ai ibotoh hanami do, nasiam na hinaholongan ni Naibata, na dob pinilih-Ni do nasiam,

⁵ ai pangambilankonnami bani Ambilan Na Madear in bani nasiam seng pitah ibagas hata masa ai bani nasiam, tapi homa ibagas hagogohon ampa ibagas Tonduy Na Pansing do, marhasoman atok ni uhur na gok. Ibotoh nasiam do, sonaha marparlahou hanami i tongah-tongah nasiam halani nasiam.

⁶ Ase domma gabe sipaniru nasiam bannami ampa bani Tuhan in, ai ibagas buei sitaronon do ijalo nasiam hata in, marhasoman malas ni uhur na humbani Tonduy Na Pansing,

⁷ gabe siusihan do nasiam bani sagala na porsaya i Makedonia ampa i Akaya.

⁸ Ai humbani nasiam do tarambilan Hata in, seng pitah i Makedonia ampa Akaya, tapi bani ganup ianan do sar haporsayaon nasiam bani Naibata, gabe seng pala be taringatannami pasal ai.

⁹ Ai sidea sandiri do mambaritahon pasal sonaha parmasuknami bani nasiam, anjaha sonaha parmubah nasiam humbani sisombah-sombahon hubani Naibata, laho mambalosi Naibata na manggoluh ampa na sintong in,

¹⁰ anjaha paima-imahon bani Anak-Ni roh hun nagori atas, na pinapuhu-Ni humbani na matei, ai ma Jesus, na paluahkon hita humbani ringis na sihol roh.

Pangkopkopon ni Apostel bani Kuria

2 ¹ Ai ibotoh nasiam sandiri do, nasiam sanina, na so soya parrohnami bani nasiam.

² Ai age pe marsitaronon hinan anjaha hona arsik hanami i Pilippi, songon na binotoh nasiam, marhinsah ni uhur do hanami ibagas Naibata, mangambilankon bani nasiam Ambilan Na Madear na humbani Naibata ibagas buei parlawanan.

³ Ia pamodahionnami, sedo ibagas hakahouon ai barang hasipahulah-hulahon barang akal-akal,

⁴ tapi songon na dob niakuhon ni Naibata hanami gabe haondosan ni Ambilan Na Madear in, sonai do ihatahon hanami, sedo ase harosuh hanami banijolma, tapi bani Naibata do, siuji uhurnami.

⁵ Ai seng onggga hanami marhata lemes-lemes, songon na binotoh nasiam, barang marakal-akal laho mambuat arta, Naibata do saksi pasal ai;

⁶ barang mangindahi sangap hanami humbanijolma, atap humbani nasiam, atap humbani na legan pe, age pe songon apostel ni Kristus boi hanami namin marhatunggunon.

⁷ Tapi basar do hanami i tongah-tongah nasiam songon parinangon patorsa-torsa niombahni.

⁸ Sonai ma, halani masihol hanami bani nasiam, ihamalaskon uhurnami do mamberehon bani nasiam, sedo pitah Ambilan Na Madear in, tapi dihut do hosahnam, halani na dob holong uhurnami bani nasiam.

⁹ Ai idingat nasiam do, nasiam sanina, halojaon ampa hasunsahannami, arian pakon borngin do hanami marhorja, ase ulang marhaboratan age ise nasiam. Sonin do pangambilankonnami bani nasiam Ambilan Na Madear na humbani Naibata.

¹⁰ Nasiam do saksi, Naibata homa, paboa daulat, pintor anjaha seng panurakon parlahounami dompak nasiam na porsaya,

¹¹ ai ibotoh nasiam do, sonaha hanami songon bapa hubani niombahni mamodahi nasiam sada-sada, mangojur anjaha pabijahon nasiam,

¹² ase marparlahou na patut nasiam dompak Naibata, na dob mandilo nasiam hubagas harajaon-Ni ampa hasangapon-Ni.

**Dear ni Panjalo ni Kuria ai
bani Ambilan Na Madear**

¹³ Halani ai mangkatahon tarima kasih do hanami tongtong bani Naibata, ai ijalo nasiam do hata ni Naibata na binogei nasiam hun bennami, ijalo nasiam do in, sedo songon hata ni jolma, tapi songon hata ni Naibata do, ai in do in tongon, gabe marpangkorhon ibagas uhur nasiam na porsaya.

¹⁴ Nasiam sanina, na dob gabe paniru do nasiam bani kuria ni Naibata na i nagori Judea, na ibagas Kristus Jesus, ai manaron na parngit do nasiam humbani hasoman nasiam sabangsa, songon sidea na niarsik-arsik ni halak Jahudi,

¹⁵ na mambunuh Tuhan Jesus ampa nabi-nabi, na mangayak-ayak hanami anjaha na mambahen sogam ni uhur ni Naibata, imbang ni haganup jolma,

¹⁶ na manlarang hanami mangambilankon Ambilan Na Madear bani sipajuh begu-begu, ase andohar maluah sidea. Sonai ma tongtong igoki sidea suhat-suhat ni dousa ni sidea. Jadi sogop ma bani sidea ringis ai bani ujungni.

Sihol ni Uhur ni si Paulus bani Kuria ai

¹⁷ Ia hanami, nasiam sanina, dob lingod nasiam tongkin hun bannami lingod bani panonggor, tapi sedo bani uhur, lambin ihaporluhon hanami do marhasoman uhur na masihol tumang sihol mangidah bohi nasiam.

¹⁸ Halani ai, sihol roh do hanami marayak nasiam, ahu tene si Paulus, sahali barang dua hali, tapi tarlanglang do hanami ibahen sibolis in.

¹⁹ Ai ise do pangarapan bannami, malas ni uhur ampa sortali puji-pujian sobali nasiam i lobei ni Tuhanta Jesus Kristus bani parroh-Ni ai?

²⁰ Tongon, nasiam do hasangapon ampa malas ni uhur bannami.

**Barita na Madear humbani
si Timoteus Pasal Kuria ai**

3 ¹ Jadi halani lang be tartahan hanami siholnami, gabe isurahon hanami ma, ase pitah hanami ma lobei tading i Huta Aten,

² anjaha isuruh hanami ma si Timoteus, sanina in, anjaha juakjuak ni Naibata bani Ambilan Na Madear ni Kristus, laho patotapkon nasiam ibagas haporsayaon nasiam anjaha pagolpa-golpa nasiam,

³ ase ulang adong na madabuh halani hamarsikon on. Ibotoh nasiam sandiri do, in do rupeita.

⁴ Ai sanggah rap ope hanami pakon nasiam, domma ilumbahon hanami hinan bani nasiam, na maningon sogop do sitaronon banta, songon na dob masa torang ibotoh nasiam.

⁵ Jadi halani seng tartaron ahu be, gabe husuruh ma, ase boi botohonku pasal haporsayaon nasiam, ai mabiar do ahu, atap na dob hona lajou do nasiam ibahen sipanlajou in, gabe soya ma halojaonnami.

⁶ Tapi sonari, dob mulak si Timoteus humbani nasiam, anjaha iboan barita na madear pasal haporsayaon nasiam pakon holong ni uhur nasiam, anjaha ipatugah habujuron nasiam mardingat hanami ampa sihol ni uhur nasiam mangidah hanami, songon sihol ni uhurnami bani nasiam,

⁷ gabe tarapoh ma hanami halani nasiam, nasiam sanina, halani haporsayaon nasiam, ibagas haganup hasunsahan ampa sitarononnam,

⁸ ai na manggoluh ma hanami sonari, anggo totap nasiam jongjong ibagas Tuhan in.

Tonggo, Andohar Boi
Marsididahan Use ampa Kuria ai

⁹ Ai tarima kasih na sonaha ma boi hatahononnam bani Naibata, bahen balos ni haganup malas ni uhur na iahap hanami i lobei ni Naibata mardingat nasiam?

¹⁰ Borngin ampa arian gomos do hanami martonggo, andohar boi idahonnam bohi nasiam

anjaha gokannami atap aha na hurang bani haporsayaon nasiam.

¹¹ In pe, Naibata Bapanta ampa Tuhanta Jesus ma na parandang langkahnami bani nasiam!

¹² Anjaha Tuhan in ma na manggoki ampa na manambahi holong ni uhur nasiam samah nasiam, age bani haganup, songon hanami mangkaholongi nasiam.

¹³ Sai ipatoguh ma uhur nasiam, gabe boi nasiam jongjong i lobei ni Naibata Bapanta, pansing anjaha seng panurakon bani parroh ni Tuhanta Jesus rap pakon haganup na pansing-Ni.

Golpa-golpa ase Marparlahou na Pansing

4 ¹ Ambah ni ai, nasiam sanina, ipangindo anjaha ipodahi hanami ma nasiam ibagas Tuhan Jesus, songon na dob ibogei nasiam hun bennami, ai ma pasal sonaha nasiam patut manggoluh anjaha gabe harosuh bani Naibata, anjaha songon na nidalankon nasiam nuan ai, lambin martambah ma nasiam ibagas la.

² Ai ibotoh nasiam do aturan na binerenami bani nasiam marhitei Tuhan Jesus.

³ On do harosuh ni Naibata, ase pansing ma nasiam, ase daoh ma nasiam humbani parriah-riahon,

⁴ ase ganup ma nasiam mambotoh marbinuat ibagas hapansingon ampa hahormaton,

⁵ulang ma mangihutkon hisap-hisap na garang, songon sipajuh begu-begu, na so mananda Naibata, ⁶ase ulang adong na manlanggar, anjaha irugii saninani ibagas pahara ai (pansarian), ai parlulu do Tuhan in pasal haganupan ai, songon na dob ipatugah anjaha isaksihon hanami hinan bani nasiam.

⁷Ai seng hu habutakon hita idilo Naibata, tapi bani hapansingon do.

⁸Halani ai, barang ise na manulak ai, sedojolma na tinulakni, tapi Naibata do, na mambere Tonduy-Ni Na Pansing bani nasiam.

⁹Tapi pasal holong ni uhur dompak sanina, seng pala porlu be pasingaton nasiam marhitei surat, ai Naibata sandiri do mangajari nasiam marsihaholongan,

¹⁰anjaha tongon idalankon nasiam do sonai bani haganup sanina na i Makedonia. Tapi ipodahi hanami do, nasiam sanina, ase lambin sonai ibahen nasiam.

¹¹Anjaha haporluhon nasiam ma ase parsip nasiam marsiurus urusanni bei anjaha marhorja ma tangan nasiam, songon na dob iparentahkon hanami bani nasiam.

¹²Ase marparlahou na patut ma nasiam idahon ni pardarat, anjaha ulang mangarap humbani halak.

Podah ampa Apoh-apoh Pasal Halak na dob Matei

¹³ Seng marosuh hanami, nasiam sanina, seng dong pambotoh nasiam pasal halak na dob modom in, ase ulang pusok uhur nasiam songon halak na legan, na so marpangarapan.

¹⁴ Ai anggo porsaya hita, na dob matei do Jesus anjaha puho, sonai ma homa marhitei Jesus, arahkonon ni Naibata do na dob modom in rap pakon-Si.

¹⁵ Ai Hata ni Tuhan in do na ihatahon hanami bani nasiam, “Hita, na manggoluh, na tading ronsi parroh ni Tuhan in, seng lobeianta sidea, na dob modom in.”

¹⁶ Ai Tuhan in sandiri ma tuad hun nagori atas marhasoman surak-surak, parentah pakon hata ni raja ni malekat, anjaha tarbogei ma tarompit ni Naibata. Jadi puho ma parlobei na matei ibagas Kristus.

¹⁷ Dob sonai, hita na manggoluh in, na tading in ope, tarikon-Ni ma hita rap pakon sidea ibagas hambun, laho mangalo-alo Tuhan in hu awang-awang, jadi tongtong ma hita rap pakon Tuhan in.

¹⁸ Ase marsiapohan ma nasiam marhitei hata in.

Tongtong Puho bani Parroh ni Tuhan

5 ¹ Tapi anggo pasal panorangni atap musimni, nasiam sanina, seng pala suratonnami bani nasiam.

² Ai ibotoh nasiam sandiri do torang, paboa songon panangko borngin do parroh ni Ari ni Tuhan in.

³ Anggo ihatahon halak, "Damei do anjaha sonang," jadi sompong ma roh hamagouan ai bani sidea, songon pangarouan bani na boratan rumah, anjaha seng dong haporusan.

⁴ Tapi nasiam sanina, seng ibagas na golap nasiam, ulang ma hasiangan nasiam songon panangko.

⁵ Ai haganup do nasiam anak ni na lihar anjaha anak arian, seng borngin atap na golap simada hita.

⁶ Ase ulang ma hita tarpodom songon halak na legan, tapi puho ma hita anjaha torang maruhur.

⁷ Ai borngin do modom na modom in, anjaha borngin do mabuk na mabuk in.

⁸ Tapi, halani humbani na siang hita, torang ma uhurta, anjaha pakei hita ma baju bosu haporsayaon ampa haholongan ampa tangkuluk pangarapan bani haluahon.

⁹ Ai seng, ase sigilaan hita itotapkon Naibata, tapi ase jumpahan hagoluhan do marhitei Tuhanta Jesus Kristus,

¹⁰ na dob matei mangkopkop hita, ase barang na puho hita, barang na modom, manggoluh hita rap pakon-Si.

¹¹ Halani ai marsipodahan ma nasiam anjaha marsipauli-ulian, songon na binahen nasiam.

Hata Sipaingat ampa Tabi

¹² Tapi ielek-elek hanami ma nasiam sanina, “Hormat ma bani na mangkalojohon nasiam, bani na mambobahon nasiam ibagas Tuhan in,” bani na mamodahi nasiam,

¹³ anjaha sangap tumang ma bahen nasiam sidea ibagas holong halani horja ni sidea. Mardamei ma nasiam samah nasiam.

¹⁴ Anjaha iojur hanami do nasiam sanina, palumba nasiam ma halak na so torsa marparlahou, apohi nasiam siotik uhur, anju bani na galek, marlumbang ni uhur dompak haganup.

¹⁵ Jaga ma nasiam, ase ulang adong mambalaskon na jahat balas ni na jahat, tapi na madear ma parayak nasiam tongtong samah nasiam, age bani haganup halak.

¹⁶ Tongtong ma nasiam marmalas ni uhur,

¹⁷ totap martonggo,

¹⁸ martarima kasih pasal haganup, ai in do na pinindo ni Naibata humbani nasiam marhitei Kristus Jesus.

¹⁹ Ulang ma intopi nasiam Tonduy in,

²⁰ ulang ma marhampung ni uhur pasal panjahaion,
²¹ tapi uji nasiam haganup, jolom nasiam ma na
madear,

²² anjaha simbili nasiam ma sagala masam ni na
masambor.

²³ Naibata Sipardamei in ma mambahen tang
pansing nasiam, anjaha la ma manramotkon
tonduy, uhur ampa daging nasiam, ase pansing,
seng panurakon bani parroh ni Tuhanta Jesus
Kristus!

²⁴ Hatengeran ni uhur do la, na mandilo nasiam,
anjaha pasaudon-Ni do in.

²⁵ Nasiam sanina, tonggohon nasiam ma hanami.

²⁶ Padas nasiam ma tabi bani haganup sanina in
marhitei summah na mapansing.

²⁷ Hupindo ma bani nasiam halani Tuhan in,
pabasahon nasiam surat on bani haganup sanina.

²⁸ Idop ni uhur ni Tuhanta Jesus Kristus ma
mangkasomani nasiam!

2 Tessalonika

Tabi bani Kuria ai

1 ¹Hun bani si Paulus, si Silpanus, ampa si Timoteus, hubani kuria Tessalonik, na ibagas Naibata Bapanta ampa Tuhan Jesus Kristus.

²Idop ni uhur ma bani nasiam ampa damei humbani Naibata Bapanta ampa Tuhan Jesus Kristus.

Tarima Kasih ampa Tonggo

ase Lambin Totapni Kuria ai

³Patut tumang do hanami, nasiam sanina, tongtong mangkatahon tarima kasih bani Naibata halani nasiam. Patut do sonai, ai lambin ganda tumang do haporsayaon nasiam, anjaha martambah do holong ni uhur ni ganup nasiam samah nasiam.

⁴Hanami sandiri mamuji-muji dirinami halani nasiam i lobei ni ganup kuria ni Naibata, halani hatotapon ampa haporsayaon nasiam ibagas sagala parburuon ampa hamarsikon, na tinaron nasiam.

⁵ In ma na patandahon pintor ni paruhuman ni Naibata, gabe talup nasiam ihira masuk hu Harajaon ni Naibata; halani ai do manaron nasiam nuan.

⁶ Pintor do in tongon, ninuhur ni Naibata, mambalaskon hamarsikon bani na mangarsik-arsik nasiam,

⁷ tapi hasonangan bani nasiam, na niarsik-arsik, rap pakon hanami, bani partalar ni Tuhan Jesus tuad hun nagori atas rap pakon malekat ni hagogohon-Ni,

⁸ ibagas apuy na marjilam-jilam, laho mandabuh uhum bani na so mananda Naibata, anjaha na so ra mambalosi Ambilan Na Madear ni Tuhanta Jesus.

⁹ Hona uhum ma sidea, ai ma hamagouan sisadokah ni dokahni, humbani bohi ni Naibata ampa humbani hasangapon ni hagogohon-Ni,

¹⁰ sanggah roh la bani ari ai, ase marsangap la humbani na mapansing-Ni anjaha longang sagala na porsaya bani, ai porsaya do nasiam tongon bani hasaksian na binoannami bani nasiam.

¹¹ Jadi martonggo do hanami tongtong pasal nasiam, ase Naibatanta ma na patalup nasiam domu hubani pandiloon-Ni ai, anjaha ipasaud ma ganup sura-sura na madear ampa ganup horja haporsayaon marhitei hagogohon-Ni,

¹² ase marsangap ma goran ni Tuhanta Jesus Kristus ibagas nasiam, sonai homa nasiam ibagas la, domu

hubani idop ni uhur ni Naibatanta ampa Tuhan Jesus Kristus.

Parroh ni Kristus ampa na Masa Parlobeini

2¹ Tapi anggo pasal parroh ni Tuhanta Jesus Kristus ampa pardasta hu Bani, mangindo ma hanami bani nasiam sanina,

² ase ulang urah idugur nasiam humbani totap ni paruhuron, anjaha rusak ibahen marhitei tonduy ni sipartonduy atap hata, barang marhitei surat na ihatahon roh hun bennami, na patugahkon, paboa na dob roh do ari ni Tuhan in.

³ Ulang ma adong na paoto-otohon nasiam atap marhitei aha pe. Ai seng anjai roh ari ai, anggo seng masa lobei parbalikon, anjaha ipatalarjolma na so parduli bani titah in, ai ma anak hamagouan ai,

⁴ na manlawan anjaha na pabangkit dirini dompak haganup na targoran naibata ampa sisombahon, na pahundul dirini i Rumah ni Naibata, na maningtingkon, paboa ia do naibata.

⁵ Ai lang idingat nasiam, na dob hupatugah in hinan, sanggah rap ope ahu pakon nasiam?

⁶ Ambahni ai, ibotoh nasiam do, aha na mangambatsi nuan, paima roh panorangni patalaron ia.

⁷ Ai domma marhorja nuan gogoh ni rusia ni hajahaton ai, paima ipadaoh na mangambatsi nuan.

⁸ Dob ai pe ase patalaron siparjahat ai, tapi ripaskonon ni Tuhan Jesus ma ia marhitei hosah ni pamangan-Ni, anjaha siapkonon-Ni ma ia talarhonsi la bani parroh-Ni ai.

⁹ Hun bani kuasa ni sibolis do parroh ni parjahat ai, marhasoman haganup bagei ni hagogohon ampa tanda ampa halongangan ladung,

¹⁰ ambahni ai marhasoman haganup bagei ni hajahaton sipaoto-oto bani halak na laho magou, halani lang ijalo sidea holong na humbani hasintongan in, ase maluah namin sidea.

¹¹ Halani ai isuruh Naibata do bani sidea tonduy na pakahouhon, ase porsaya sidea bani ladung,

¹² ase hona uhum sagala na so porsaya bani hasintongan in, na marosuh bani hagedukon.

Ojur-ojur ase Martotap ni Uhur

¹³ Tapi na patut do hanami mangkatahon tarima kasih tongtong bani Naibata halani nasiam, sanina na hinaholongan ni Tuhan in, ai ipilih Naibata do nasiam humbani mulani, ase saud nasiam maluah marhitei pangurasion ni Tonduy in ampa haporsayaon bani hasintongan in.

¹⁴ Ai hujai do nasiam idilo marhitei Ambilan Na Madear, na niambilankonnami, ase parrupei nasiam bani hasangapon ni Tuhan Jesus Kristus.

¹⁵ Ase nasiam sanina, totap ma nasiam jongjong anjaha marsijoloman bani podah na niajarhonnami bani nasiam, marhitei hata atap surat pe.

¹⁶ Ase Tuhanta Jesus Kristus pakon Naibata Bapanta na mangkaholongi hita anjaha na mambere banta apoh-apoh na manongtong ampa pangarapan na madear marhitei idop ni uhur,

¹⁷ Ia ma mangapohi anjaha patotaphon uhur nasiam bani sagala horja ampa hata na madear.

Pangindoan ni si Paulus ase Itonggohon Kuria ai Ia

Sipaingatni bani Kuria

3 ¹ Ambahni ai, nasiam sanina, tonggohon nasiam ma hanami, ase rarat hata ni Tuhan in anjaha marsangap songon na bani nasiam,

² anjaha hanami maluah humbani halak na jungkat anjaha na jahat, ai seng haganup halak porsaya bani Ambilan Na Madear.

³ Tapi hatengeran ni uhur do Tuhan in, pargogohan-Ni do nasiam anjaha ondingan-Ni dompak hajahaton.

⁴ Anjaha tenger do uhurnami bani Tuhan in pasal nasiam, paboa horjahonon nasiam do na hinatahonnami bani nasiam, sonari age hu lobeian on.

⁵Sai itogu-togu Tuhan in ma uhur nasiam marholong songon Naibata, ampa marhasabaron songon Kristus.

⁶Tapi ibagas goran ni Tuhanta Jesus Kristus, nasiam sanina, ipaingat hanami ma nasiam, sai surut ma nasiam humbani sanina na so torsa marparlahou, na so mangihutkon podah, na jinalo nasiam hun bennami.

⁷Ai ibotoh nasiam sandiri do, sonaha patut usihan nasiam hanami, ai sedo na so torsa marparlahou hanami i tengah-tengah nasiam,

⁸seng dong ipangan hanami ruti ni atap ise pe seng margalar, tapi loja anjaha sunsah do hanami marhorja arian pakon borngin, ase ulang adong humbani nasiam na isunsahi hanami.

⁹Sedo na so marhak hanami namin pasal ai, tapi mambere usihan do hanami bani nasiam marhitei parlahounami ibagas ai.

¹⁰Ai age sanggah rap ope hanami pakon nasiam, domma iaturhon hanami bani nasiam, "Barang ise na so ra marhorja, ulang ma ia mangan."

¹¹Ai tarbogei do bannami, paboa adong do deba humbani nasiam, na so torsa parlahouni, na so ra marlahoan, tapi mangkorjahon na so horja do.

¹²Bani halak sisonai ai iparentahkon anjaha ipalumba hanami ma ibagas Tuhan Jesus Kristus, marhorja ma sidea nunut, sinarini ma ipangan!

¹³ Tapi nasiam sanina, ulang ma marnaloja nasiam mambahen na madear!

¹⁴ Anggo adong na manjua mambalosi hatanami na tarsurat on, pardiatei nasiam ma ia, ulang ma ra nasiam marsaor pakonsi, ase maila ia.

¹⁵ Ulang songon munsuh ia ihira nasiam, tapi palumba nasiam ma ia songon sanina.

¹⁶ Tuhan Sipardamei in ma mambere damei bani nasiam tongtong marhitei haganup pambahenan-Ni! Tuhan in ma mangkasomani nasiam!

¹⁷ Ahu, si Paulus, manurat hata tabi on marhitei tanganku sandiri. Sonon do tanda tanganku bani sagala suratku, sonon do suratku.

¹⁸ Idop ni uhur ni Tuhanta Jesus Kristus ma mangkasomani nasiam haganup!

1Timoteus

Tabi bani si Timoteus

1 ¹ Hun bani si Paulus, apostel ni Kristus Jesus, marhitei parentah ni Naibata Sipaluah hita ampa Kristus Jesus Pangarapanta,
² hubani si Timoteus, anakku na botul ibagas haporsayaon, idop ni uhur, holong ni uhur ampa damei ma bamu humbani Naibata Bapa ampa Kristus Jesus Tuhanta!

Golpa-golpa Manjaga Hapansingon ni Ambilan Na Madear

Pasal Tujuan ni Titah

³ Sanggah na bingkat ahu hu Makedonia, domma huhatahon bamu, ase soh ham lobei i Epesus, laho palumbahon deba halak, ase ulang ipodahkon pangajaran na legan,
⁴ ulang ra saor bani turi-turian barang bani tarombo-tarombo na so marbona marujung, na patubuhkon buenan parsalisihan marimbang parsombahon bani Naibata ibagas haporsayaon.

⁵ Ia tujuan ni titah in, in ma holong na roh humbani uhur na borsih ampa panggora ni uhur na madear ampa haporsayaon na pitah.

⁶ Deba halak, halani manlembang hunjai, marbalik do bani hata-hata na lumei,

⁷ marsura-sura do gabe guru bani titah in, age pe seng iarusi na hinatahon ni sidea atap na sinaksihon ni sidea pe.

⁸ Tapi ibotoh hita do, dear do titah in, anggo domu hubani tujuanni ipargunahon in,

⁹ marhitei na mambotoh, sedo bani halak parpintor ibere titah in, tapi bani na so martitah ampa na so pambalosi do, bani na so marnaibata ampa pardousa, bani halak na so pansing ampa na mabutak, bani halak sibunuh bapani ampa sibunuh inangni, sibunuhjolma,

¹⁰ bani panriah-riah, na marjolmahon dalahi, pamangus, parladung, sibijahon na so tongon, ampa haganup na legan na marlawanan dompak pangajaran na sintong in,

¹¹ na maronjolan hubani Ambilan Na Madear, na niondoskon bangku, ai ma pasal hasangapon ni Naibata na martuah in.

Pasal Pangidopi ni Naibata bani si Paulus

¹² Mangkatahon tarima kasih do ahu bani na margogohi ahu, in ma Kristus Jesus Tuhanta in, ai

ihira do ahu hatengeran ni uhur, gabe ipabangkit do ahu bani horja parugason on,

¹³ ahu, sipanrisai, siparburu ampa siunsagahkon gogohku hinan. Tapi jumpahan idop ni uhur do ahu, ai ibagas na so hubotoh do huhorjahon ai, ibagas na so parsaya,

¹⁴ anjaha linir do bangku idop ni uhur ni Tuhanta rap pakon haporsayaon ampa holong na ibagas Kristus Jesus.

¹⁵ Hatengeran ni uhur do hata on anjaha talup jaloan, “Domma roh Kristus Jesus hu tanoh on, laho paluahkon pardousa, anjaha ahu ma pardousa sibanggalan.”

¹⁶ Tapi halani on do ase jumpahan idop ni uhur ahu, sihol parlobei ibagas diringku patidakon ni Kristus Jesus lumbang ni uhur-Ni na gok in, gabe usihan bani na sihol porsaya Bani, ase bani hagoluhan na sadokah ni dokahni.

¹⁷ Hamuliaon ampa hasangapon sisadokah ni dokahni ma bani Raja na marmulia in, Naibata na manongtong, na so boi idahon, na Sasada in! Amen.

Ojur-ojur hubani si Timoteus

¹⁸ Tonah on huondoskon do bamu, ale anakku Timoteus, romban hubani hata panjahaion hinan pasal ham, ase domu hujai iporangkon ham porang na madear in,

¹⁹ ibagas haporsayaon ampa panggora ni uhur na borsih. Marhitei na mangambukkon ai, adong do deba na harom ibagas haporsayaon,

²⁰ songon si Himeneus ampa si Aleksander, na dob huondoskon hubani sibolis, ase marhitei ai hona ajar sidea, gabe seng be manrisai sidea.

Pasal Tonggo Pangapition

2 ¹ Ai pe, on do sipaingatku parlobei humbani haganup. Sihol ma dalankononkon pangindoan, partonggoon, pangapition ampa hatarimakasihon mangkopkop haganup jolma,

² mangkopkop raja-raja ampa haganup siparkuasa, ase boi hita sonang anjaha mardamei-damei manggoluh, daulat anjaha hormat ibagas haganup.

³ Dear do in, anjaha harosuh ni Sipaluah hita, ai ma Naibata,

⁴ na mangkarosuhkon, ase haganup jolma maluah anjaha das mananda hasintongan in.

⁵ Ai sada do Naibata, anjaha sada do siholang ni Naibata pakon jolma, ai ma Jolma Kristus Jesus in,

⁶ na mamberehon diri-Ni gabe tobus mangkopkop haganup, in ma sisaksihononkon bani panorang na dearhonsi.

⁷ Hujin do ahu ipabangkit gabe parambilan ampa apostel, guru bani sipajuh begu-begu ibagas haporsayaon ampa hasintongan, sintong do hatangku, seng marladung ahu.

Pasal Hahormaton Ibagas Partumpuan

⁸ Ai pe iparsinta uhuru do, sihol ma martonggo sagala dalahi bani ganup ianan, manombahkon tangan na pansing, ulang ibagas ringis atap paringoran.

⁹ Anjaha naboru-naboru pe, hormat anjaha bulus ma pamakeini, ulang ma marjambulan na marpanjagar na malobihtu, barang irungkub dirini bani omas atap mata intan atap pakeian-pakeian na maharga-maharga,

¹⁰ tapi marhitei pambahenan na madear ma, songon na patut bani naboru, na mangaku, na daulat ia i lobei ni Naibata.

¹¹ Masip ma naboru ibagas na marguru, marunduk ni uhur tumang.

¹² Seng hulopas naboru mangajari barang manrajai dalahi, tapi sip ma ia.

¹³ Ai parlobei do si Adam itompa, dob ai pe ase si Hawa;

¹⁴ anjaha sedo si Adam hona paoto-oto; naboru ai do hona paoto-oto, gabe manlanggar.

¹⁵ Tapi maluah do ia marhitei na mantubuhkan anak, anggo totap ia ibagas haporsayaon ampa holong pakon hapansingon marhasoman hahormaton.

Pasal Jabatan Parmahan Ibagas Kuria

3¹ Hata na sintong do on, “Halak na sihol gabe parmahan ibagas kuria, sipindahi horja na madear do ai.

² Halani ai, ia parmahan ibagas kuria, ulang ma adong sihataon bani, pargotong ni sada naboru, torang maruhur, pandei, hormat marparlahou, sipartamuei, na pandei mangajari,

³ ulang parminum, ulang parringis, tapi parlamlam ma, ulang siparingor, anjaha ulang simata duit.

⁴ Halak na pandei mangatur rumah tanggani ma ai, pardakdanak sibalosi ajar, hormat ibagas haganup.

⁵ Ai anggo seng ibotoh manrajai rumah tanggani, sonaha ma boi ia patorsahon kuria ni Naibata?

⁶ Ulang ma halak na baru masuk Kristen, ase ulang gabe gijang uhurni jadi madabuh hubagas uhum ni sibolis.

⁷ Maningon dear baritani bani halak pardarat, ulang madabuh ia jadi sirisaon ampa hubagas siding ni sibolis.”

Pasal Jabatan ni Siparugas

⁸ Sonai homa siparugas maningon hormat do, seng sipardua hata, seng parminum, seng simata duit.

⁹ Maningon marsijoloman sidea bani rusia ni haporsayaon in ibagas panggora ni uhur na borsih.

¹⁰ Maningon siujion do homa lobei sidea; dob torang nani, seng dong sihataon bani sidea, ai pe ase boi sidea gabe siparugas.

¹¹ Sonai homa parinangon ni sidea maningon hormat do, ulang sihata-hatai hasoman, torang maruhur anjaha bujur bani haganup.

¹² Ia siparugas, maningon paramangon ni sada naboru do, na mambotoh manrajai anakni ampa rumah tanggani.

¹³ Sidalankon horja parugason ai dear-dear, tontu lambin marsangap do, anjaha lambin martenger ni uhur ibagas haporsayaon bani Kristus Jesus.

Rimpun ni Haporsayaon

¹⁴ Mangarap do ahu, podas do ahu roh marayak ham, tapi husuratkon do on bamu, ase,

¹⁵ porini hun dokah ahu roh, gabe ibotoh ham sonaha patut marparlahou ibagas Rumah ni Naibata, in ma kuria ni Naibata na manggoluh in, tiang ampa onjolan ni hasintongan in.

¹⁶ Banggal do tongon rusia ni hadaulaton in, domma talar ibagas daging, iparhatongon hapintonni marhitei Tonduy, taridah bani malekat, iambilankon bani sipajuh begu-begu, ihaporsayai i dunia on, tarangkat hu hasangapon.

Parpodah na Kahou

4 ¹Tapi torang do ihatahon Tonduy in, paboa bani panorang parpudi adong ma deba na marbalik humbani haporsayaon in, marhitei na mambalosi tonduy sipangoto-otoi ampa podah-podah ni sibolis,

² marhitei hasipahulahkulahon ni sihatahon ladung, na pinapaan ni panggora ni uhurni,

³ ilarang sidea do marhajabuan anjaha iparentahkon mangorom sipanganon, na jinadihon ni Naibata, na patut sijaloon ni halak na porsaya ampa na dob mananda hasintongan in namin marhasoman tarima kasih.

⁴ Ai sagala na jinadihon ni Naibata dear do ai anjaha seng pantang, anggo marhasoman tarima kasih najalo ai,

⁵ halani gabe pansing do ai marhitei hata ni Naibata ampa tonggo.

⁶ Anggo in ipodahkon ham bani sanina in, juakjuak na madear ma ham bani Kristus Jesus, manggoluh humbani hata haporsayaon ampa humbani pangajaran na madear, na niirikkonmin.

⁷ Turi-turian na so margagan, na hinarosuhkon ni naboru-naboru na matua, tulakkon ma ai. Pasomal-somal ma dirimu mangkorjahon hadaulaton.

⁸ Ai otik do guna ni latihan badan, tapi hubani haganup do marguna hadaulaton in, ai hagoluhan sisonari ampa simagira iparbagah.

⁹ Hatengeran do hata in, anjaha talup jaloon ni haganupjolma.

¹⁰ Ai do ase loja hita anjaha maruntol, halani mangarap hita bani Naibata na manggoluh in, Sipaluah bani haganupjolma, tarlobih bani na porsaya.

¹¹ In ma titahkon anjaha ajarhon!

¹² Ulang ma adong na marmapas ni uhur bam halani haposoonmu, tapi gabe siusihan ma ham bani na porsaya, ibagas hata, parlahou, holong ni uhur, haporsayaon age hapormanon.

¹³ Nunuti ma mambasa surat na mapansing in, mamodahi ampa mangajari paima roh ahu.

¹⁴ Ulang ma hampung uhurmu pasal sibere-bere idop ni uhur na adong bam in, na pinadas hu bam marhitei panjahaion ampa na manampeihon tangan marhitei sintua-sintua.

¹⁵ Dalankon ma in anjaha parlahouhon, ase talar hasurunganmu bani ganup halak.

¹⁶ Jaga ma ham bani dirimu ampa bani pangajaran in, totap ma ham ibagas in, ai anggo ihorjahon ham in, na paluahkon dirimu do ham ijin sonai age na manangihon ham.

Sidingaton dompak na Matua ampa na Mabalu

5 ¹Ulang ma sorgangi na matua, tapi paingat ma ia songon bapa, anjaha na maposo songon sanina,

²naboru na matua songon inang anjaha naboru siposonan songon botou, ibagas sagala hahormaton.

³Pasangap ma naboru na mabalu, na botul mabalu.

⁴Tapi, anggo marniombah atap marpahompu do na mabalu ai, iparlajari sidea ma lobei mansarihon ibagas hadaulaton parrumah ni sidea sandiri, mambahen pambalason dompak toras-toras ni sidea ai, ai do harosuh ni Naibata.

⁵Anggo na mabalu na botul, na seng mardiha-diha, mangarap do ia bani Naibata, anjaha torus do ia mangindo ampa martonggo arian pakon borngin,

⁶tapi sihorjahon hisap-hisap, na dob matei do ai, age manggoluh ope ia.

⁷In ma parentahkon, ase ulang sihataon sidea.

⁸Tapi, anggo adong barang ise, na so mansarihon diha-dihani, tarlobih ma parrumahni sandiri, na dob marnalangkon haporsayaon do ia ai, anjaha jahatan do ia marimbang na so porsaya.

⁹Naboru na mabalu, na boi sidaftarhononkon, ai ma na dob marumur onom puluh tahun, sahali ope hansa laho,

¹⁰ na dear horjani isaksihon halak, na pagodang-godangkon anakni dear-dear, malas uurni martamuei, ra mamburihi nahei ni halak na mapansing, sipangurupi bani halak na tarsosak, anjaha iporluhon sagala horja na madear.

¹¹ Tapi ulang ma daftarhon naboru na mabalu na poso, ai anggo oji tumang sidea holi, ai ma na manirang sidea humbani Kristus, sihol do ase sidea marhajabuan,

¹² gabe hona uhum, marhitei na iosei sidea padanni ai hinan.

¹³ Ambah ni ai, parrayoh do sidea, martandangi hun rumah hu rumah; seng pitah parrayoh, tapi hertep do sidea anjaha mangalop manaruhkon hata, mansahapkon na so patut sihatahononkon.

¹⁴ Halani ai, ipangindo uhurhu do ase marhajabuan na mabalu na poso ope, tubuhan tuah, iurus rumah tanggani, ase ulang adong dalan bani imbang, laho manrisai hita,

¹⁵ ai domma adong deba na marbalik mangirikkon sibolis in.

¹⁶ Tapi anggo adong naboru na mabalu bani sada halak naboru na porsaya, ia ma lobei patorsat-sahonsi; ulang ma iborati kuria in, ase tarpaturei-turei na mabalu na botul.

Sidingaton dompak Sintua-sintua

¹⁷ Sintua-sintua na bujur mandalankon hasintuaonni, lompit do hiraon hasangapon hubani sidea, tarlobih hubani na mandalankon parambilanon ampa pangajarion.

¹⁸ Ai ihatahon surat in do, “Seng bulih tutupon babah ni lembu na mardoge,” anjaha, “Na patut do marupah siparhorja.”

¹⁹ Ulang tangihon pangaduan dompak sada sintua, anggo seng sinaksihon ni dua atap tolu halak.

²⁰ Pinsang ma sipardousa i lobei ni sagala hasoman, ase mabiar halak na legan.

²¹ I lobei ni Naibata, ampa Kristus Jesus, ampa malekat na tarpilih in, huparentahkon ma bam marramotkon haganupan in, ulang maralangalang, ulang manonggor jumbak.

²² Ulang mapodastu ham manampeihon tangan bani halak, anjaha ulang saor ham bani dousa ni na legan, ramotkon dirimu, ase borsih ham.

²³ Ulang be pitah bah inum, tapi inum ma anggur otik-otik, halani boltokmu, ai gati do ham boritan.

²⁴ Bani na deba halak, talar do dousani, sanggah lape sogop uhum; tapi bani na legan mangihut hun pudi.

²⁵ Sonai homa horja na madear talar do, anjaha age na so talar ai ope, seng boi ponop ai.

Sipaingat bani Jabolon

6¹ Sagala halak na marhorja songon jabolon, ihira ma tuanni patut sipasangapon ibagas haganup, ase ulang hona risa goran ni Naibata ampa ajaran in.

² Tapi jabolon, na martuankon halak na porsaya, ulang ma moru parpasangapni bani, halani sanina ia; tapi lambin ibalosi ma ia, halani na porsaya ia anjaha sanina na hinaholongan, na buei marsilayak-layak. In ma ajarhon anjaha podahkon.

Podah na Kahou

Ulih ni Uhur na Sabar

³ Barang ise na mangajarhon ajaran na legan, na so romban hubani hata hasintongan ni Tuhanta Jesus Kristus ampa ajaran na mardomu hubani hadaulaton in,

⁴ na pajuntul-juntulhon diri do ai, anjaha na so marpambotoh, na gila marsual-sual do ai ampa martongkar, na parohkon subil, paringoran, risa-risa, tukas-tukas na jahat,

⁵ ampa parsalisihan na manorus humbani halak na dob seda uhurni, na dob magouan hasintongan in, na mangagan pansarian do hadaulaton in.

⁶ Pansarian banggal do tongon hadaulaton in, anggo marhasoman uhur na sonang.

⁷ Ai seng adong iboan hita hu tanoh on anjaha aha pe lang tarboan hita laho luar.

⁸ Halani ai, anggo adong banta sipanganon ampa parhiouon, hasonangkon hita ma in.

⁹ Ia halak na sihol bayak, madabuh do hubagas parlajouan ampa siding ampa bagei ni hisap-hisap haotoon, na mangagou anjaha na mandabuhkanjolma in hubagas hamagouan ampa hasedaon.

¹⁰ Ai urat ni sagala hajahaton do uhur na holongan bani duit, in do isura-surahon na deba, mambahen kahou humbani haporsayaon, gabe iaikkon buei sitaronon bani dirini.

Podah bani si Timoteus

¹¹ Tapi ham, siminik ni Naibata, maporus ma ham hunjai. Parayak ma hapintoron, hadaulaton, haporsayaon, holong ni uhur, hasabaron ampa lamlam ni uhur.

¹² Habujurhon ma porang haporsayaon na madear in, tangkap hagoluhan sisadokah ni dokahni, ai hujai do ham idilo, anjaha ibahen ham do pangakuan na madear in i lobei ni buei saksi.

¹³ Huparentahkon ma bam i lobei ni Naibata, sipagoluh haganup, ampa i lobei ni Kristus Jesus, na mambahen hasaksian na madear i lobei ni si Pontius Latus:

¹⁴ Dalankon ma titah in, seng martikas, seng panurakon, ronsi talar Tuhanta Jesus Kristus.

¹⁵ Ai jumpahkonsi panorangni, talar ma la bahenon ni Na Martuah in, Pargogoh Sisada-sada in, Raja ni sagala raja anjaha Tuhan ni sagala tuan,

¹⁶ na sada in, na so ra matei, siiani haliharon na so tardohori, na so onggga nididah nijolma, anjaha seng boi idahon. Bani ma hasangapon ampa hagogohon sadokah ni dokahni. Amen.

¹⁷ Hatahon ma bani na bayak i dunia on, ulang gijang uhur ni sidea, ulang marhatengeran bani habayakon na so totap in; tapi bani Naibata ma martenger ni uhur, na unjah mamberehon banta sihamalaskononta.

¹⁸ Mangkorjahon na madear ma sidea, bayak bani horja na madear, paruhur na unjah anjaha ringgas marsilayak-layak,

¹⁹ ai ma parhiteian bani sidea, patumpuhon arta na madear bani panorang na sihol roh, ase itangkap sidea goluh na sintong.

²⁰ Ale Timoteus, ramotkon ma na dob jinalomu; lembangi parsahapan na so daulat ampa parsual-sualan, na salah ginoran “habotohon.”

²¹ In do iirikkon deba halak, gabe manlembang humbani haporsayaon. Idop ni uhur ma mangkasomani nasiam!

2 Timoteus

Tabi bani si Timoteus

1 ¹ Hun bani si Paulus, apostel ni Kristus Jesus marhitei rosuh ni Naibata, domu hubani bagah-bagah hagoluhan na ibagas Kristus Jesus.

² Hu bani si Timoteus, anakku na hinaholongan, idop ni uhur, holong ampa damei ma bamu humbani Naibata Bapa ampa Kristus Jesus, Tuhanta in.

Hata Tarima Kasih ampa Ojur-ojur bani si Timoteus

³ Mangkatahon tarima kasih do uhurhubani Naibata, na huidangi humbani borsih ni panggora ni uhur, songon pangidangi ni ompung-ompungta, sanggah na hudingat ham tongtong ibagas tonggongku, arian pakon borngin.

⁴ Anggo hudingat iluh-iluhmu, masihol do ahu mangidah ham, ase dapotan malas ni uhur na gok ahu.

⁵ Ai hudingat do haporsayaonmu na so sipahulahkulah in, haporsayaon, na marianan hinan homa ibagas uhur ni ompungmu naboru, si Lois, ampa inangmu, si Oinike, anjaha tenger do uhurhu, marianan homa bamu.

⁶ Halani ai, hupagolpa do ham, ase iparatah-ratah ham sibere-bere ni Naibata na bamu in, marhitei na hutampeihon tanganku bamu.

⁷ Ai seng tonduy biar ibere Naibata banta, tapi tonduy hagogohon, holong ampa panrajaion diri do.

⁸ Ai pe, ulang ma ham maila manaksihon Tuhanta, anjaha ulang homa maila ham pasal ahu, na tartutup halani-Si, tapi dihut ma ham tene manaron halani Ambilan Na Madear in ibagas gogoh na humbani Naibata.

⁹ Ai ipaluah anjaha idilo do hita marhitei pandiloon na mapansing, sedo halani pambahenanta, tapi mangihutkon sura-sura ampa idop ni uhur-Ni do, na binere-Ni banta ibagas Kristus Jesus, humbani mulani nari,

¹⁰ sonari nani, ipatidak marhitei partalar ni Sipaluah hita, Kristus Jesus, na parontihon hamatean, anjaha na paulgapkon hagoluan ampa biak na so ra matei marhitei Ambilan Na Madear in.

¹¹ Hujin do ahu ipabangkit gabe siparambilan, apostel ampa guru,

¹² anjaha halani in do ase manaron ahu sonon, tapi seng maila ahu, ai hutanda do la, na huhaporsayai, anjaha tenger do uhurhu, margogoh la manramotkon na pinasimpankon-Ni in bangku das hubani ari simagira.

¹³ Marsijoloman ma ham bani hata hasintongan, na binogeimu hun bangku, ai ma tiru marhitei haporsayaon ampa holong bani Kristus Jesus.

¹⁴ Ramotkon ma arta na madear, na pinasimpankon in bam marhitei Tonduy Na Pansing, na marianan ibagas hita.

Pasal si Onesiporus

¹⁵ Ibotoh ham do, na dob itadingkon haganup halak na hun Asia do ahu, deba humbani sidea ai ma si Pegelus ampa si Hermogenes.

¹⁶ Sai maidop ma uhur ni Tuhan in bani rumah tangga ni si Onesiporus, ai gati do malas uhuru ibahen, anjaha seng maila ia halani garingku.

¹⁷ Ai sanggah roh ia hu huta Rom, iporluhon do mangindahi ahu, ronsi jumpahsi ahu.

¹⁸ Sai ibere Tuhan in ma, ase jumpahan idop ni uhur ia humbani Tuhan in bani ari simagira. Anjaha ibotoh ham do torang, sonaha pangidangini bangku i huta Epesus.

Sirsir Marsitaranon songon Tentara ni Kristus Jesus

2¹ Ham pe, ale anakku, margogoh ma ham marhitei idop ni uhur ni Kristus Jesus,

² anjaha na binogeimu hun bangku i lobei ni buei saksi, ai ma padas hubani hasoman hatengeran ni uhur, na boi mangajari halak na legan.

³ Ra ma ham marsitaronon, songon tentara ni Kristus Jesus na bujur.

⁴ Sada tentara na mandalankon tugas, seng ra ia taralit bani urusan-urusan goluh siganup ari, ase harosuh ia bani kopalani.

⁵ Halak siparlumba pe, seng boi jumpahan sortali rudang ia, anggo seng pambalosi ia bani paraturan-paraturanni.

⁶ Siparjuma, na torik marhorja, ai do na patut parlobei jumpahan gogoh ni juma ai.

⁷ Paruhurhon ma na huhatahon in, ai bereon ni Tuhan in do bam hauhuron ibagas haganupan in.

⁸ Padingat-dingat ma Jesus Kristus, na dob pinapuhu humbani na matei, na humbani ginompar ni si Daud, domu hubani na huambilankon in.

⁹ Marhalanohon-Si do ase marsitaronon ahu, pala hona garihon songon parjahat, tapi hata ni Naibata, seng targarihon.

¹⁰ Tapi hutaron do haganupan in halani na tarpilih in, ase dihut sidea marulih bani haluahon na ibagas Kristus Jesus ampa bani hasangapon sisadokah ni dokahni.

¹¹ Hatengeran ni uhur do hata on: Anggo rap matei hita pakon-Si, rap manggoluh ma homa hita pakon-Si.

¹² Anggo sabar hita manaron, rap manrajai ma hita pakon-Si, anggo iparnalang hita la, parnalangon-Ni ma age hita.

¹³ Ia lang pe hatengeran ni uhur hita hatengeran ni uhur do anggo ia, ai seng tarparnalang-Si diri-Ni.

Siparlahouhonon ni Siparhorja

¹⁴ In ma pasingat anjaha lumbahon i lobei ni Naibata, ase ulang marsual-sual na so marguna sidea, gabe hasedaon bani na mambogeisi.

¹⁵ Haringgaskon ma patuduhkon, paboa na bujur ham i lobei ni Naibata, songon sada parhorja na so tarbador, na padalankon hata hasintongan in pintor-pintor.

¹⁶ Tapi simbili ma parsahapan na so marisi, na so margagan, ai lambin tambah do hajahaton ni sidea pangkorhonni ai,

¹⁷ ai songon kanker do panggagat ni podah ni sidea ai inggot, si Hemeneus ampa si Piletus ma deba sidea ai.

¹⁸ Na kahou do sidea humbani hasintongan in, ai ihatahon sidea do, domma masa parpuhoon in, gabe seda ibahen haporsayaon ni deba halak.

¹⁹ Tapi totap do onjolan na humbani Naibata na toguh in, anjaha hata on ma surat ni lakni, "Itanda Tuhan in do halak, na ia simadasi, anjaha barang ise na mandilo goran ni Tuhan in, maningon sirang ma ia humbani hajahaton."

²⁰ Ibagas rumah na banggal, seng pitah parugas omas barang pirak adong, dihut do parugas hayu

ampa tanoh, deba bani horja na sangap, na legan bani horja na so sangap.

²¹ Halak na paborsih dirini humbani nongkan ai, ai ma gabe parugas na mapansing, na bani horja hasangapon, na marguna bani simada rumah ai, sirsir bani sagala horja na madear.

²² Lembangi ma hisap-hisap haposoon, tapi parayak ma hapintoron, haporsayaon, holong ampa damei, rap pakon halak na mandilo goran ni Tuhan in humbani uhur na borsih.

²³ Tapi parsual-sualon haotoon ampa na so patut, simbili ma ai, ai ibotoh ham, na paroh paringoran do ai.

²⁴ Seng patut paringor-ingor anggo juakjuak ni Tuhan in, tapi parbasar do dompak haganup, pandei mangajari, sabar manaron na jahat,

²⁵ parlamlam mamodahi sipanlawan, andohar ibere Naibata bani sidea hamubahon ni uhur, laho mananda hasintongan in,

²⁶ ase tarjolma sidea, maluah humbani siding ni sibolis in, na dob manangkap sidea, laho pasaudkon rosuh-rosuhni ai.

Parlahou Hasamboron ni Jolma bani Panorang Parpudi

3 ¹ Tapi botoh ma, na roh ma ari hasunsahan bani panorang parpudi.

² Ai mangkaholongi dirini ma jolma ijai, paruhur duit, parhata toal, paruhur gijang, panrisai, seng pambalosi bani na matorasni, na so mambotoh martarima kasih, parhabutakon,

³ seng parholong, na so ra mardear, na so ra mardamei, sipanukas-nukasi, seng ibotoh mangorom, parringis-ringis, magigi bani na madear,

⁴ sipartahi-tahi, na hampung maruhur, na pajuntul-juntulhon diri, na holongan bani hisap ni daging ase bani Naibata.

⁵ Songon-songon na daulat do sidea, tapi iparnalang sidea do gogoh ni ai. Ai pe simbili ma sisonai ai.

⁶ Halak sisonai do na ra marponop-ponop mammasuk i rumah ni halak, mandormai naboru, na dob boratan ibahen dousa, na niarsik-arsik ni bagei ni hisap-hisap,

⁷ na tongtong marlajar, tapi lanjar seng boi mananda hasintongan in.

⁸ Songon si Jannes ampa si Jamberes panlawan bani si Musa, sonai do homa sidea panlawan bani hasintongan in, ai ma halak, na dob seda pingkiranni anjaha na talu ibagas haporsayaon.

⁹ Tapi seng anjai tarpasaud sidea ai torus, ai idahon ni ganup halak do haotoon ni sidea ai, songon na bani sidea halak ondi.

Marsijoloman bani Hata ni Naibata

¹⁰ Tapi iihutkon ham do ahu bani podah, parlahou, tujuan, haporsayaon lumbang ni uhur, holong ampa hasabaron,

¹¹ bani parburuon, sitaronon, na mangonai bangku i Antiokia, Ikonium ampa Listra. Ai ma pangayak-ayakon na hutaron, tapi ipaluah Tuhan in do ahu humbani haganupan in,

¹² tapi sagala na sihol daulat marparlahou ibagas Kristus Jesus, hona parburu do.

¹³ Ia halak parjahat ampa sipangoto-otoi sai na lambin jahat do, na mangoto-otoi do sidea anjaha hona oto-otoan.

¹⁴ Tapi anggo ham, totap ma ham bani na dob ginuruhonmu ampa na hinaporsayaanmu, ai ibotoh ham do ise na mangajarhonsi bamu,

¹⁵ anjaha ibotoh ham do humbani haetek-etekonmu nari, Surat Na Pansing in do, na margogoh papentarhon ham, ase marulih ham bani haluahon marhitei haporsayaon bani Kristus Jesus.

¹⁶ Ai sagala Surat in sinahapkon ni Naibata do, anjaha marguna mamodahi, maminsang, pauli-ulihon ampa manogu-nogu hu hapintoron,

¹⁷ ase gokan dear siminik ni Naibata, mangasup bani sagala horja na madear.

Ojur-ojur ase Bujur Mandalankon Tohonan

4 ¹ Huparentahkon ma bamu i lobei ni Naibata ampa Kristus Jesus, na sihol manguhumi na manggoluh ampa na matei, ampa halani partalar-Ni ampa harajaon-Ni:

² Ambilankon ma hata in, haringgaskon ma bani panorang na dear atap na lang dear pe, pinsang, paingat, podahi marhitei lubang ni uhur banggal ampa pangajarion.

³ Ai roh ma panorangni, seng tartahan halak be ijai pangajaran na sintong in, tapi domu hubani rosuh ni sidea diloonni ma buei guru bani sidea, laho mambogei na mantin-mantin tangaron,

⁴ anjaha pagolngon ni sidea ma pinggolni humbani hasintongan hubani turi-turian.

⁵ Tapi anggo ham, torang ma uhurmu pasal haganup, tahan ibagas hasunsahan, dalankon horja parambilanon anjaha gok dalankon tugasmu.

Pasal Parmatei ni Apostel ai

⁶ Ia ahu, galangkononkon ma, domma roh panorangku laho matei.

⁷ Domma hudobkon parlawanan na madear in, hupaujung parlumbaonku anjaha ramot hubahen haporsayaon in.

⁸ Domma sirsir i lobeihu sortali hapintoron in, sibereon ni Tuhan, Panguhum na pintor in bangku

bani ari simagira; tapi seng pitah bangku, bani haganup do, na mangkasiholi partalar-Ni ai.

⁹ Papodas ma roh marayak ahu!

¹⁰ Ai domma itadingkon si Demas ahu, halani na dob holong uhurni bani dunia on, lanjar laho hu Tessalonik; si Kreskens laho do hu Galatia, si Titus hu Dalmatia.

¹¹ Sahalak si Lukas mando hasomanku. Arahkon si Markus, boan ia hasomanmu, ai porlu do ia marugas bangku.

¹² Si Tikikus, husuruh do hu Epesus.

¹³ Anggo roh ham, boan ma baju panas, na hutadingkon bani si Karpus, Huta Troas; sonai homa buku-buku in, siporlunan ai ma pustaha (*perkamen*) in.

¹⁴ Buei do hajahaton ibahen si Aleksander, tukang bosi ai, bangku; Tuhan in ma mambalaskon bani domu hubani pambahenanni ai.

¹⁵ Ham pe, jaga ma ham bani, ai gomos do panlawanni bani hatanami.

¹⁶ Bani na mampartahankon diringku na parlobei ahu, sahalak pe lang adong na mangurupi, haganup do manadingkon ahu; ulang ma ibalaskon in bani sidea.

¹⁷ Tapi Tuhan in do mangkasomani anjaha margogohi ahu, ase mardalan parambilanon in marhitei ahu, gabe haganup sipajuh begu-begu

mambogeisi, anjaha maluah do ahu humbani babah ni singa ai.

¹⁸ Paluahon ni Tuhan in do ahu humbani haganup hajahaton, anjaha pamasukon-Ni ahu hubagas harajaon-Ni na i nagori atas ai. Bani ma hasangapon ronsi sadokah ni dokahni. Amen.

Hata Parujungan

¹⁹ Padas ma tabingku bani si Priska ampa si Akila, sonai hubani keluarga ni si Onesiporus.

²⁰ Tading do si Erestus i Korint; tapi boritan do hutadingkon si Tropinus i Milete.

²¹ Podas ma ham roh paima musim borgoh. Tabi bamu humbani si Oibulus, si Pudens, si Linus, si Klaudia ampa haganup sanina.

²² Ihasomani Tuhan in ma tonduy nasiam! Idop ni uhur ma bani nasiam!

Titus

Tabi bani si Titus

1 ¹ Hun bani si Paulus, juakjuak ni Naibata anjaha apostel ni Jesus Kristus, laho manogu-nogu halak na pinilih ni Naibata hubani haporsayaon ampa pangarusion bani hasintongan in, na mardomu hubani hadaulaton,

² maronjolan hubani pangarapan bani hagoluhan na so ra bois, na dob humbani mulani iparbagah Naibata, na so siparladung in,

³ anjaha ipatalar do hata-Ni in bani panorangni, marhitei parambilanon na dob niondoskon-Ni bangku, romban hubani pangkatahon ni Naibata, Sipaluah hita,

⁴ marayak si Titus, anakku na tongon, marhitei haporsayaon riap in. Idop ni uhur ma bamu ampa damei humbani Naibata Bapa ampa humbani Kristus Jesus, Sipaluah hita.

Siparahouhonon ni Sada Sintua

⁵ Ase hutadingkon pe ham i Kreta, ai ma, ase ipatorsa ham horja na tading ope, anjaha ipabangkit ham sintua bani ganup huta, songon na dob huaturhon bamu,

⁶ai ma dalahi na so dong sihataon bani, paramangon ni sada naboru, pardakdanak na porsaya, na so adong pamandangan bani parlahou anjaha seng jungil.

⁷la parmahan, sijolom anakkunsi ni Naibata, ulang ma panurakon; ulang sihorjahon uhur-uhurni, ulang pargila-gila, ulang parmabuk, ulang paringor, ulang na marpansarian humbani na so dalanni,

⁸tapi sipartamuei ma, na malas uhur bani na madear, siparuhur, na bonar, na pansing, sirajai diri,

⁹na marsijoloman bani hata na sintong in, domu bani pangajaran in, ase margogoh ia, mangojur marhitei pangajaran na pintor in, age maminsang sipanlawan.

Parpodah na Kahou i Kreta

¹⁰Tapi buei do halak, na jungil, sibuei sahap ampa na pakahouhon, tarlobih humbani parugama Jahudi.

¹¹Maningon pasipon do pamangan ni sidea, ai igeori sidea do bulat-bulat rumah tangga marhitei na mangajarhon na so patut, laho mambuat duit sihailahononkon.

¹²Sahalak humbani sidea, ai ma nabi ni sidea sandiri, mangkatahon, “Halak Kreta, parladung do ai tong, binatang panoroh, sitahar boltok.”

¹³ Sintong do hasaksian ai, halani ai gomos ma paminsangmu bani sidea, ase dear sidea ibagas haporsayaon,

¹⁴ anjaha ulang be ipatangi-tangi sidea turi-turian ni halak Jahudi pakon titah-titah ni jolma, na marbalik humbani hasintongan in.

¹⁵ Borsih do haganup bani halak na borsih, tapi bani halak na butak, na so porsaya, seng dong na borsih, ai domma butak uhur ni sidea ampa panggora ni uhur ni sidea.

¹⁶ Ihatahon sidea, domma itanda Naibata, tapi iparnalang do la marhitei horja ni sidea; ai hagigi do sidea anjaha seng sipambalosi, seng tarpakei bani atap aha pe horja na madear.

Tugas ni Halak na Matua, Paramangon na Maposo, ampa Jabolon

2 ¹ Tapi anggo ham, hatahon ma na domu hubani pangajaran na pintor in.

² Ojur ma dalahi na matua maruhur na torang, daulat, porman, sintong ibagas haporsayaon, ibagas holong pakon ibagas hasabaron.

³ Sonai homa naboru na matua, marparlahou ma sidea songon halak na mapansing, ulang sipanukas, ulang homa hatagihan bani anggur, tapi sipodahkon na madear ma,

⁴ ase tartogu-togu sidea naboru na poso ope mangkaholongi paramangonni ampa dakdanakni,

⁵ porman, sopan, bujur mamorluhon horja i rumah, unduk dampak paramangonni bei, ase ulang hona risa hata ni Naibata.

⁶ Podahi homa dalahi na maposo, ase marhahormaton.

⁷ Ia ham, ibagas haganup, maningon sitiruan ma ibagas horja na madear, pitah anjaha ringgas bani pangajarion;

⁸ sihatahon podah na sintong, na seng dong sihataon, ase maila sipanlawan ai, halani seng dong na bajan sihatahononni dampak hita.

⁹ Jabolon pe maningon balosanni do tuanni, pamalasonni uhurni ibagas haganup, ulang manlawan-lawan,

¹⁰ ulang manangko, tapi ipatuduhkon ma haganup habujuron, ase marsangap pangajaran na humbani Naibata, Sipaluah hita, ibagas haganup.

Idop ni Uhur ni Naibata

¹¹ Ai domma mulgap idop ni uhur ni Naibata bahen haluahon ni haganupjolma.

¹² Iajari do hita marhiteihon idop ni uhur-Ni marnalangkon uhur na so daulat ampa hisap-hisap dunia on, ase iparlahouhon hita hapormanon, hapintoron, ampa hadaulaton i dunia on,

¹³ sanggah na paima-imahon hita bani hatuahon na niarapkonta in pakon partalar ni hamuliaon ni

Naibata na bangga in ampa Kristus Jesus, Sipaluah hita,

¹⁴ na mamberehon diri-Ni mangkopkop hita, laho manobus hita humbani haganup hajahaton, anjaha urason-Ni bani diri-Ni sada bangsa, ase la simadasi, na mangkaringgaskon sagala horja na madear.

¹⁵ In ma hatahon, podahkon anjaha akimkon hubani halak humbani gok ni uhurmu. Ulang ma dong na mapas bam.

Golpa-golpa ase Pambalosi bani Pamarentah anjaha Parlamlam bani Haganup

3 ¹ Paingat ma sidea ase unduk anjaha pambalosi bani pamarentah ampa siparkuasa, janah sirsir bani sagala horja na madear,

² ulang sipanrisai atap bani ise pe, ulang siparingor, basar anjaha lamlam bani haganup halak.

³ Ai dihut do hita hinan halak na oto, seng sipambalosi, na kahou, pinarjabolon ni bagei ni hisap-hisap ampa rosuh-rosuh, ibagas hajahaton ampa subil, jolma hagigi do hita anjaha na marsidomdoman.

Pasu-pasu Hinorhon ni Pandidion

⁴ Tapi talarhonsi halayakon ampa holong ni uhur ni Naibata, Sipaluah hita,

⁵ ipaluah do hita, sedo halani horja hapintoron na binahenta, tapi halani idop ni uhur-Ni do, marhitei

pandidion pangulakion tubuh ampa habayuon marhitei Tonduy Na Pansing,

⁶ na dob niuseihon-Ni banta unjah, marhitei Jesus Kristus, Sipaluah hita,

⁷ ase gabe pintor hita halani idop ni uhur-Ni, anjaha gabe sitean hagoluhan na sadokah ni dokahni, domu hubani pangarapan in.

⁸ Hatengeran ni uhur do hata in, anjaha ipindo uhurhu, ase gomos ma panaksihonmu bani hata in, ase sidea na dob porsaya bani Naibata, ra mangkaringgaskon horja na madear; in ma na madear anjaha na marguna bani jolma.

Manlembangi Parsual-sualon

Manulak Parpodah na Kahou

⁹ Tapi lembangi ma soal-soal haotoon ampa pasal tarombo-tarombo, parsalisihan ampa paringoran pasal titah in, ai seng marguna in anjaha sisoya-soya do.

¹⁰ Siparpodah na kahou, dob ipaingat ham ia sahali dua hali, tulak ma ia,

¹¹ ai ibotoh ham do, na dob marbalik do halak sisonai anjaha mardousa, anjaha ia sandiri mamapaisi.

Golpa-golpa Parpudi

¹² Ia dob husuruh si Artemas ampa si Tikikus bamu, papodas ma roh manjumpahkon ahu hu Nikopolis, ai ijai do ahu sihol soh sanggah musim borgoh.

¹³ Si Semas, sibotoh titah in, ampa si Apollos, porluhon ma pabingkatkon sidea, ase ulang hurangan sidea atap bani aha pe.

¹⁴ Hasomanta pe iguruhon ma mampongkutkon horja na madear, laho mansarihon na porlu pakeion, ase ulang lang marbuah sidea.

¹⁵ Manongos tabi do bamu haganup na rap pakon ahu. Padas tabinami bani na mangkaholongi hanami ibagas haporsayaon. Idop ni uhur ma mangkasomani nasiam haganup!

Pilemon

Tabi bani si Pilemon

1 ¹ Hun bani si Paulus, na tartutup halani Kristus Jesus, ampa si Timoteus, sanina in, hubani si Pilemon, na hinaholongan ampa hasoman sahorjanami,

² ampa hubani si Appia, botounami, ampa hubani si Arkippus, hasomannami maruntol, ampa hubani kuria na martumpu i rumahmu:

³ Idop ni uhur ma bani nasiam ampa damei humbani Naibata Bapanta, ampa humbani Tuhan Jesus Kristus.

Holong ampa Haporsayaon ni si Pilemon

⁴ Mangkatahon tarima kasih do ahu tongtong bani Naibatanku, siap hudingat ham bani tonggongku.

⁵ Ai hubogei do holong ni uhurmu ampa habujuronmu bani Tuhan Jesus pakon dompak haganup halak na mapansing.

⁶ Anjaha hutonggohon do, ase parsoraanmu ibagas haporsayaon in mangkorhon panandaion ma in bani haganup na madear na adong banta ibagas Kristus.

⁷ Holongmu ai, ham saninangku, ihorhon do bangku buei malas ni uhur ampa apoh-apoh, ai ipahinsah ham do uhur ni halak na mapansing in.

Pangindoan Pasal si Onesimus

⁸ Halani ai, age pe barani do namin ahu ibagas Kristus, mamarentahkon bamu mambahen na patut,

⁹ tapi dearan ma halani uhur holong ahu mangindo bamu, ahu, si Paulus, sada halak na dob matua, na targari nuan halani Kristus Jesus.

¹⁰ Ase huelek-elek ma ham pasal si Onesimus (na marguna), anakku ibagas Kristus, na hutubuhkan sanggah na tartutup on ahu.

¹¹ Seng marguna hinan ia bamu, tapi sonari marguna ma bamu age bangku.

¹² Husuruh do ia mulak bamu, tampuk ni atei-ateihu do ia.

¹³ Sihol do namin jolomanku ia, ase gantihmu ia laho patorsa-torsahon ahu, na tartutup on halani Ambilan Na Madear in.

¹⁴ Tapi seng ra ahu mambahen age aha pe, anggo seng humbani dear ni uhurmu, ase ulang ma songon paksaan dear ni layakmu, tapi humbani rosuh ni uhurmu ma.

¹⁵ Ra, ase sirang pe ia tongkin hun bamu, ase lalab do ia bamu,

¹⁶ seng be songon sada jabolon, tapi lobih ma humbani jabolon, ai ma sanina na hinaholongan, tarlobih hu bangku, tontu lobihan ma bamu, ibagas daging ampa ibagas Tuhan in.

¹⁷ Ase anggo huanmu do ahu ihira ham, jalo ham ma ia songon ahu.

¹⁸ Tapi, anggo adong salahni atap utangni bamu, hu bangku ma ai parkirahon ham.

¹⁹ Ahu, si Paulus, manuratkon on marhitei tanganku sandiri. Ahu ma manggalar ai; seng pala tarsingatanku, na marutang do ham namin pasal dirimu hu bangku.

²⁰ Ham saninangku, sihol do hun bamu maruntung ahu ibagas Tuhan in; pahinsah ham ma uhurhu ibagas Kristus.

Hata Parujungan

²¹ Tenger do uhurhu, sanggah na manurat on, balosanmu do na hupindohon, lobih tene humbani na huhatahon.

²² Ambah ni ai pasirsir ham ma ianan bangku, ai mangarap do ahu, halani tonggo nasiam bereon-Ni do mulak ahu bani nasiam.

²³ Manongos tabi bamu, si Epapras, hasomanku tartutup ibagas Kristus Jesus,

²⁴ sonai homa si Markus, si Aristarkus, si Demas ampa si Lukas, hasomanku sahorja.

²⁵ Ihasomani idop ni uhur ni Tuhan Jesus Kristus ma tonduy nasiam.

Heber

Sahap ni Naibata Marhitei Jesus, Anak-Ni in

1 ¹ Gati anjaha bagei do sapari dalan ni Naibata mamparsahapkon ompungta marhitei nabi-nabi in,

² tapi bani panorang parpudi on iparsahapkon do hita marhitei Anak-Ni, ai ma na pinabangkit-Ni gabe sitean haganup, parhiteian-Ni homa manompa sagala na adong.

³ Sinalsal ni hasangapon-Ni ampa usihan ni hadirion-Ni do la, anjaha la do na manatang haganup na adong in marhitei hata-Ni na marhagogohon in. Dob iadongkon haborsihon humbani sagala dousa, laho do la hundul hu siamun ni Hamuliaon in, na i babou ai.

⁴ Songon lobih ni goran na tinean-Ni ai humbani goran ni sagala malekat, sonai do surung ni hasangapon-Ni humbani sidea.

Lobih ni Kristus Martimbangkon Malekat

⁵ Ai hubani malekat na ija ma onggga ihatahon, “Anakku do ho, sadari on do ho hutubuhkon?” Dob ai use, “Ahu do gabe Bapa bani, anjaha la anak Bangku?”

⁶ Anjaha, sanggah na sihol arahkonon-Ni hu dunia on Anak-Ni, na parlobei tubuh in, ihatahon do, “Maningon do manrogop hu lobei-Ni sagala malekat ni Naibata.”

⁷ Tongon, ihatahon do pasal malekat, “la mambahen logou malekat-Ni, apuy na marjimbur-jimbur do juakjuak-Ni.”

⁸ Tapi ihatahon do pasal Anak in, “Ronsi sadokah ni dokahni do paratas-Mu, Ham Naibata, tungkot hapintoron do tungkot ni harajaon-Mu.

⁹ Holong do uhur-Mu bani hapintoron anjaha magigi bani na salah, halani ai do ase iminakkon Naibata-Mu minak malas ni uhur Bamu, Ham Naibata, lobih humbani hasoman-Mu.”

¹⁰ Ihatahon do homa, “Ham do, ale Tuhan, na pajonam tanoh on bani mulani, anjaha jadi-jadian ni tangan-Mu do langit in.

¹¹ Magou do ganupan in use, tapi totap do anggo Ham, laho buruk do in ganup songon hiou.

¹² Sorpohon-Mu do in ganup songon baju mantel, gabe mubah ma, tapi anggo Ham, totap do, anjaha tahun-Mu pe seng marujung.

¹³ Tapi bani malekat na ija ma onggah ihatahon, “Hundul ma ho hu siamunkon, paima hubahen munsuhmin sidogeian ni naheimu?”

¹⁴ Ai lang tonduy siparugas do sidea haganup, na sinuruh mangidangi halani sitean haluahon in?

Lumba-lumba ase Ulang Lansei bani Haluahon in

2¹ Halani ai, maningon lambin poltikni do panjolomta bani hata na dob binogeita, ase ulang mayub hita.

² Hata na hinatahon ni malekat totap do, anjaha sagala panlanggaron ampa pangengkaron dapot pambalason na pintor.

³ Tumaram ma boi maporus hita anggo lansei hita bani haluahon na sain bangga? Tuhan in sandiri do mangkatahon haluahon ai lobei, anjaha na mambogei ai manaksihon banta hasintonganni ai,

⁴ anjaha isaksihon Naibata ope ai marhitei tanda, halongangan, bagei-bagei ni hagogohon ampa Tonduy Na Pansing, na binagihon-Ni domu hubani rosuh ni uhur-Ni.

Hagijangon ni Jesus dob Ipatoruh Ia Tongkin

⁵ Ai seng malekat ibahen Naibata panrajai bani dunia na sihol roh ai, ai ma dunia na sinahapkonta on.

⁶ Tapi adong do isaksihon ibagas Surat in, “Aha do jolma in, ase idingat Ham ia, barang anak ni jolma in, ase itatap Ham ia?”

⁷ Ipatoruh Ham do ia tongkin toruhan marimbang malekat, hasangapon ampa hamuliaon do isortalihon Ham bani.

⁸ Haganup do ipatunduk Ham hutoruh ni nahei-Ni. Marhitei na pinatundukni ai haganup hu Bani, seng adong na tading ibahen na so unduk hu Bani, tapi anggo sonari lang ididah hita ope, na dob tunduk hu Bani haganup.

⁹ Tapi la, na pinatoruh ai tongkin i toruh ni malekat, ai ma Jesus, ididah hita do marsortali hasangapon ampa hamuliaon, halani na dob itaron hamatean, ase marhitei idop ni uhur ni Naibata ihopkop haganup marhitei hamatean na tinaron-Ni ai.

¹⁰ Ai patut do, la parmulaan ampa na mandobkon haganup, ibagas na sihol boanon-Ni buei anak hu hasangapon, pajongjongon-Ni gokan dear marhitei sitaronon pambobai in, na mamboan sidea hu haluahon.

Jesus gabe Sintua ni Malim Laho Paluahkon Jolma

¹¹ Ai la, na papansingkon ai ampa na pinapansing-Ni ai, sada do harohan ni haganup. Halani ai, seng maila la manggoran sidea sanina-Ni,

¹² ai nini do, “Ambilankononku do goran-Mu hubani saninangku; i tongah-tongah ni kuria in do dodingkononku Ham.”

¹³ Dob ai use, “Ia do bahenon-Ku hatengeran ni uhur-Hu.” Ambah ni ai, “Ijon do Ahu ampa dakdanak in, na binere ni Naibata hu Bangku”

¹⁴ Ase, songon dakdanak parrupei bani daging ampa daroh, sonai do homa la parrupei ijai, ase

marhitei hamatean ai iparseda do sibolis in, na markuasa bani hamatean,

¹⁵ ase ipaluah haganup na pinarjabolon ni biar bani hamatean sadokah manggoluh.

¹⁶ Ai sedo malekat na sinarihon-Ni, tapi ginompar ni si Abraham do.

¹⁷ Halani ai maningon gabe dos do la pakon sanina-Ni pasal haganup, ase gabe paridop ni uhur la ampa Sintua ni Malim hatengeran ni uhur i lobei ni Naibata, laho pasaloasihon dousa ni bangsa in.

¹⁸ Halani na dob marsitaronon la anjaha tarlajou, margogoh do la mangurupi sagala na tarlajou.

Jesus Lobihan humbani si Musa

3 ¹ Halani ai, nasiam sanina na mapansing, siparrupe i bani pandiloon na hun nagori atas, tonggor nasiam ma Apostel anjaha Sintua ni Malim in, na sinaksihonta in, ai ma Jesus.

² Hatengeran ni uhur do la bani na pabangkitkon-Si, songon si Musa ibagas ganup rumahni ai.

³ Tapi bueian do hasangapon ibere Bani ase hubani si Musa, domu hubani surung ni hasangapon bani na pajongjong rumah marimbang rumah na pinajongjong ni ai.

⁴ Ai ganup rumah, adong do na paulihonsi, tapi Naibata do na mangadongkon haganup.

⁵ Ia si Musa tongon, haposan do ia i rumah ni Naibata, songon siparugas, laho manaksihon na sihol sisahapkononkon ope use,

⁶ tapi anggo Kristus haposan do songon Anak, na manggomgomi rumah ni Naibata, anjaha hita do rumah-Ni ai, anggo poltik ijolom hita ronsi ujungni hinsah ni uhur ampa tenger ni uhur bani na niarapkon ai.

**Lumba-lumba dompak Uhur na So
Porsaya ampa na Marbalik**

⁷ Halani ai, songon na hinatahon ni Tonduy Na Pansing, “Sadari on, sanggah na binogei nasiam sora-Ni,

⁸ ulang ma pamapir nasiam uhur nasiam, songon sanggah ari parlawanon ai, sanggah ari parlajouan ai i halimisan.

⁹ Ijai ilajou anjaha isuba ompung nasiam do Ahu, age pe ididah sidea na Huhorjahon ompat puluh tahun dokahni.

¹⁰ Halani ai manggila do Ahu bani na sasundut ai anjaha Huhatahon, ‘Tongtong do kahou uhur ni sidea, seng itanda sidea dalan-Ku,’

¹¹ pala marbija Ahu ibagas ringis-Hu, sabonar seng bulih masuk sidea hu parsaranan-Ku.

¹² Nasiam sanina, jaga ma nasiam, ase ulang adong paruhur na jahat, na so porsaya humbani nasiam, na manundali Naibata na manggoluh in.

¹³ Tapi marsipagolpaan ma nasiam ganup ari, sadokah hata ‘Sadari on’ marlaku ope, ase ulang adong humbani nasiam, na gabe mapir uhurni halani dousa na paoto-otohon in.

¹⁴ Ai domma parrupehi hita bani Kristus, anggo poltik ijolom hita tenger ni uhur, na dob adong banta bani mulani ronsi ujungni.

¹⁵ On do na hinatahon ni Surat in, ‘Sadari on, sanggah na binogei nasiam sora-Ni, ulang ma pamapir nasiam uhur nasiam, songon sanggah ari parlawan ai.’

¹⁶ Ise do sipanlawan ai, age pe ibogei sora-Ni? Ai lang haganup do sidea, na mandarat hun Masir, binobahon ni si Musa?

¹⁷ Ise do na ginilaan-Ni ai pala ompat puluh tahun dokahni? Ai lang sidea na mardousa ai do? Radag do bangkei ni sidea i halimisan ai.

¹⁸ Dompak ise do la marbija, paboa na so bulih sidea masuk hu parsaranan-Ni ai? Ai lang dompak sidea na so sipambalosi ai do?

¹⁹ Jadi ididah hita ma, halani na so porsaya do sidea ase lang tarbahen sidea masuk.”

Parsaranan Sabat bani Bangsa ni Naibata

4 ¹ Halani ai, sadokah adong ope bagah-bagah boi masuk hita hu parsaranan-Ni ai, marhabiaran ma hita, ase ulang adong atap ise hun banta na tading.

² Ai dihut do hu banta roh Ambilan Na Madear, songon na hubani sidea, tapi seng marguna bani sidea hata na binogei ni sidea ai, halani sanggah ibogei sidea ai, seng ijalo sidea ai marhasoman haporsayaon.

³ Ia hita, na dob gabe porsaya, masuk do hu parsaranan ai, songon na hinatahon-Ni ai, “Songon na Hubijahon ibagas ringis-Hu, sabonar seng bulih masuk sidea hu parsaranan-Ku, age pe horja ai domma siap humbani partombei ni dunia on.”

⁴ Halani onggga do ihatahon pasal ari na papituhon ai, “Jadi marsaran ma Naibata bani ari papituhon in humbani ganup horja-Ni.”

⁵ Dob ai use, “Na so bulih do masukan ni sidea parsaranan-Kin!”

⁶ Ase adong ope deba na boi masuk hu parsaranan ai, tapi na parlobei niambilanan ai lang masuk, halani seng mambalosi.

⁷ Halani ai itotapkon ma use sada nari “Sadari on” ibagas na ihatahon marhitei si Daud, dob sonai dokahni i pudini ai, songon na dob hinatahon nongkan, “Sadari on, sanggah na binogei nasiam sora-Ni, ulang ma pamapir nasiam uhur nasiam songon sapari.”

⁸ Ai ambit si Josua na pamasukkon sidea hu parsaranan ai, seng hatahononni be i pudini ai pasal ari na legan.

⁹ Ase, adong ope parsaranan Sabat bani bangsa ni Naibata.

¹⁰ Ai barang ise na masuk hu parsaranan ni Naibata, marsaran do homa humbani horjani, songon Naibata na marsaran humbani horja-Ni.

Gogoh ampa Marot ni Hata ni Naibata

¹¹ Halani ai, porluhon hita ma masuk hu parsaranan ai, ase ulang adong na tompas, mangihutkon usihan ni sidea na so sipambalosi ai.

¹² Ai na manggoluh do hata ni Naibata anjaha marhagogohon, marotan humbani ganup podang sidua mata, anjaha torus masuk hubagas, isirang do tonduy pakon pingkiran, sonai homa ringring ampa utokutokni, lanjar iuhumi do na piningkir ampa sura-sura ni uhur.

¹³ Anjaha seng dong na tinompa, na lingod hun lobei-Ni, haganup do tene tidak anjaha ungkab bani pangidah-Ni, hu Bani do hita martanggung jawab.

Jesus, Sintua Ni Malim na Bolon

¹⁴ Ai pe, halani adong do banta Sintua ni Malim na bolon, na dob torus das hu nagori atas, ai ma Jesus, Anak ni Naibata, poltik ma jolom hita hata haporsayaonta in.

¹⁵ Ia Sintua ni Malim na adong banta, sedo na so tarbahen ia hasoman mangahap bani hagalekonta,

na tarlajou do la bani haganup songon hita, tapi seng mardousa.

¹⁶ Ase marhinsah ni uhur ma hita marayak paratas idop ni uhur ai, ase dapotan parontou ampa idop ni uhur hita bahen pangurupion bani panorang haporluanni.

Sintua Ni Malim na Tongon do Kristus

5 ¹ Ai sagala sintua ni malim, na pinilih humbani jolma, ipabangkit do halani jolma, laho marugas i lobei ni Naibata, ase igalangkon sibere-bere ampa galangan halani dousa.

² Na tarbahen do ia mangahapkon ahap ni na oto ampa na kahou, ai ia pe ibagas hagalekon do.

³ Halani ai maningon mamboan galangan pardousaon do ia, sedo halani bangsa ai hansa, tapi dihut do halani dirini.

⁴ Anjaha seng adong na mambuat hamuliaon na sonai bani dirini, tapi na nidilo ni Naibata do ia hujai songon si Aron.

⁵ Sonai do homa Kristus in, seng la pasangap diri-Ni gabe Sintua ni Malim, tapi Naibata do, na dob mangkatahon hu Bani, “Anak-Ku do Ho, sadari on do Ho Hutubuhkon.”

⁶ Bani ianan na legan homa ihatahon do, “Malim do Ho ronsi sadokah ni dokahni mangihutkon orde ni si Melkisedek.”

⁷ Sanggah jolma la, igalangkon do pangindoan-Ni ampa elek-elek-Ni marhasoman doruh bangga ampa iluh hubani na boi paluahkon-Si humbani hamatean, anjaha itangihon do la, gabe maluah humbani habiaran ai.

⁸ Ai age pe Anak la, iguruhon do pambalosion marhitei na tinaron-Ni ai.

⁹ Anjaha dob gabe gokan dear la, jadi bona ni haluahon sisadokah ni dokahni do la bani haganup, na mambalosi-Si.

¹⁰ Igoran Naibata do la Malim mangihutkon orde ni si Melkisedek.

Lumba-lumba ase Ulang Marbalik

¹¹ Buei ope namin sihatahononnam i pasal ai, tapi payah do patorangkon ai bani nasiam, halani na so marpangarusion ai nasiam.

¹² Ai marimbang dokahni ai domma patut jadi guru nasiam, hape maningon porlu ope ajarhonon bani nasiam humbani pangajaran pamungkah ni hata ni Naibata, gabe dadih mando porlu bani nasiam, sedo sipanganon na koras.

¹³ Ai sagala siinum dadih, seng marpambotoh ope ai bani ajaran na sasintongni, halani dakdanak ope ai.

¹⁴ Tapi sipanganon na koras, ai ma bani na dob matoras, na dob pasomal-somalhon dirini,

gabe ibotoh parleganan ni na madear ampa na masambor.

Hasedaon ni Halak na Marbalik humbani Haporsayaon

6 ¹ Halani ai tadingkon hita ma lobei podah pamungkah pasal Kristus, anjaha toruskon hita ma hubani podah bani halak na dob matoras. Ulang be naulaki pauli onjolan pasal na paubahkon uhur humbani horja hamatean ampa na mangkaporsayai Naibata,

² podah pasal pandidion ampa na manampeihon tangan, pasal parpuhoon ni halak na dob matei ampa paruhuman sisadokah ni dokahni.

³ Anjaha bahenonta do ai, anggo ilopas Naibata.

⁴ Ia sidea, na dob onggga santorap ipalihar, idai sibere-bere parnagori atas ai, gabe parrupe i bani Tonduy Na Pansing,

⁵ na dob idai hata na mantin na humbani Naibata ampa hagogohon ni dunia simagira,

⁶ anggo marbalik sidea, sabonar na so tarpabayu be sidea, ase mubah use, ai na dob mangulaki mamparsilangkon Anak ni Naibata do sidea ijai anjaha ipabador, gabe hamagouan ni sidea sandiri.

⁷ Ai tanoh, na mangonsop bah udan, na sai roh hujai, anjaha itubuhkan suan-suanan na marguna bani na mangkorjahonsi, ai do na dapotan pasu-pasu humbani Naibata,

⁸tapi tanoh na manubuhkan hupihupi ampa duri-duri, seng na marguna ai, sipapaan ma ai podas, anjaha mosogkonon bani ujungni.

Golpa-golpa ase Totap
Marsijoloman bani Bagah-bagah ai

⁹Tapi age pe sonai hatanami, nasiam na hinaholongan, tenger do uhurnami sidearan ai do bani nasiam, ai ma na mamboan hu haluahon.

¹⁰Ai sedo na geduk Naibata, gabe lupa la bani pambahenan nasiam ampa bani holong ni uhur nasiam, na pinatuduhkan nasiam bani goran-Ni, marhitei pangidangi nasiam hinan ampa sorani bani halak na mapansing in.

¹¹Tapi ipindo uhurnami do, ase ganup ma nasiam patuduhkan porlu ni uhur na sonai, ai ma marsijoloman botul bani pangarapan in ronsi ujungni,

¹²ase ulang gabe rayohan nasiam, tapi tiru nasiam ma sidea, sitean bagah-bagah ai, marhitei na marhaporsayaon ampa marsabar ni uhur.

¹³Ai sanggah na mambere bagah-bagah-Ni Naibata bani si Abraham, halani seng dong be sibanggalhononni parbijaan-Ni, hubani siri-Ni sandiri do la marbija,

¹⁴nini, “Tongon pasu-pasuon-Ku do ho, anjaha tongon pabueion-Ku tumang do ho.”

¹⁵ Jadi, halani sabar ia paima-imahon, gabe dapotsi do bagah-bagah ai.

¹⁶ Ia jolma, sibanggalhonni do ibahen parbijaanni, anjaha bija ai do mangujungi sagala parsalisihan lanjar songon jaminan do ai.

¹⁷ Halani ai, Naibata pe, bija do ipakei manjamin, laho patuduhkon bani sitean bagah-bagah ai sura-sura-Ni na so ra mubah ai,

¹⁸ ase marhitei na adong banta dua fakta na so mubah-ubah in, ibagas ai seng boi Naibata marladung, adong do banta apoh-apoh na margogoh, banta na marhaporusan hujai laho marsijoloman hubani pangarapan na i lobeita ai.

¹⁹ Ia pangarapan in, ai ma songon sauh bani tonduyta, na totap anjaha na toguh, na masuk das hubagas hirei-hirei ai.

²⁰ Hujai do masuk, gabe parlobeita, Jesus, na dob gabe Sintua ni Malim sadokah ni dokahni, mangihutkon aturan ni si Melkisedek.

Malim Malkisedek Martuduh-tuduh bani Kristus

7 ¹ Ia si Melkisedek, ai ma raja ni Salem, malim ni Naibata na Timbul in, ialo-alo anjaha ipasu-pasu do si Abraham sanggah mulak, dob italuhon raja-raja,

² anjaha ibere si Abraham do bani saparsapuluh ni haganup na adong bani. Parlobei arti ni goranni ai,

“Raja Hapintoron”, dob ai “Raja Salem”, artini, Raja Hadameion.

³Anggo ia, seng marbapa, seng marinang, seng marpartuturan, seng dong parmulaan ni arini barang ujung ni goluhni, anjaha halani hadosanni pakon Anak ni Naibata, ia pe malim do tongtong ronsi sadokah ni dokahni.

⁴Tapi tonggor nasiam ma sangapni in, si Abraham, ompungta parsadaan ai pe, mambere do bani saparsapuluh humbani taban-tabanni.

⁵Tongon, ginompar ni si Levi pe, na manjalo jabatan hamalimon in, adong do bani sidea aturan mangihutkon titah in manjalo parsapuluhan humbani bangsa in, ai ma humbani sanina ni sidea, age pe ginompar ni si Abraham homa.

⁶Tapi si Melkisedek, na so adong partuturanni hubani sidea, manjalo parsapuluhan do humbani si Abraham, anjaha ipasu-pasu do haondosan ni bagah-bagah ai.

⁷Anjaha seng tarparnalang on, sisangapan do na mamasu-masu sietekan.

⁸Ambahni ai, ia halak Levi, na manjalo parsapuluhan ai, jolma na ra matei do, tapi pasal na legan ai isaksihon do, manggoluh do ia.

⁹Ase tarhatahon ma, ibagas si Abraham sibere parsapuluhan do age si Levi, sijalo parsapuluhan ai namin,

¹⁰ ai ibagas angkula ni ompungni si Abraham ope ia, sanggah na roh si Melkisedek mangalo-alosi.

**Lobihan do Hamalimon ni Kristus
humbani Hamalimon ni Halak Levi**

¹¹ Ambit domma dapot hadearon na gok marhitei hamalimon ni halak Levi (*ai maronjolan hujai do ijalo bangsa ai titah in*), mase ma pala pajongjongon malim na legan, mangihutkon aturan ni si Melkisedek, na so mangihutkon aturan ni si Aron.

¹² Ai anggo marubah hamalimon, tontu maningon marubah ma homa titah.

¹³ Anjaha la, na tinarsingatan ni hata on, masuk marga na legan do; seng onga adong na humbani marga ai na marugas bani anjapanjap in.

¹⁴ Ai torang do, humbani marga Juda do marharorohan Tuhanta, anjaha seng adong itarsingati si Musa hamalimon ni na samarga on.

¹⁵ Lambin torangni ma homa ai, halani ipabangkit do sada Malim na legan, na usih hubani si Melkisedek,

¹⁶ na so marhitei aturan pardagingon gabe malim, tapi marhitei gogoh ni goluh na so marpunsa do.

¹⁷ Ai isaksihon do pasal-Si, "Malim do Ho ronsi sadokah ni dokahni mangihutkon orde ni si Melkisedek."

¹⁸ Marhitei ai iparontihon ma titah na parlobei ai, halani seng margogoh anjaha marguna.

¹⁹ Ai aha pe lang na pinajongjong ni titah in na gabe gokan dear. Halani ai ipamasuk ma pangarapan sidearan, parhiteianta mandohori Naibata.

²⁰ Anjaha seng masa ai, anggo lang marhitei bija. Sidea tongon, gabe malim do, seng pala marbija,

²¹ tapi anggo on, marhitei bija do, na binijahon ni na mangkatahon ai hu Bani: Domma marbija Tuhan in, anjaha seng solsolan-Ni diri-Ni, "Ho do malim sadokah ni dokahni."

²² Mardomu hujai, surungan do padan, na jinalomin marhitei Jesus.

²³ Anjaha buei do sidea na gabe malim, halani seng torus sidea malim pambahen ni hamatean.

²⁴ Tapi anggo la, halani totap do ronsi sadokah ni dokahni, seng boi mandipar hamalimonni bani halak na legan.

²⁵ Halani ai, tarbahensi do mambere haluahon na totap bani sagala na mandohori Naibata marhiteihonsi, ai na manggoluh do la tongtong laho mangapiti sidea.

²⁶ Sintua ni malim na sonin do patut banta, na pansing, na so onga marsalah, na so martikas, sirang humbani pardousa, na dob gabe gijangan humbani nagori atas,

²⁷ na so pala songon sintua ni malim na legan, padaskon ganup ari parlobei galangan halani

dousani sandiri, dob ai pe halani dousa ni bangsa ai, ai sahali do ihorjahon in, sanggah ginalangkon-Ni ai diri-Ni.

²⁸ Ai ipabangkit titah in dojolma na galek gabe sintua ni malim, tapi bija, na pudinan humbani titah in do na pabangkitkon Anak in, na dob gabe gokan dear ronsi sadokah ni dokahni.

Sintua ni Malim bani Padan na Baru

Sidearan humbani Sintua ni Malim Hinan

8 ¹ Ia siporlunan bani na dob hinatahon ai, ai ma: Adong do banta Sintua ni Malim, na dob laho hundul hu siamun ni paratas ni Hamuliaon in i nagori atas,

² siparugas bani ianan na tang pansing, ai ma lampolampo na sintong ai, na pinauli ni Tuhan in, sedo jolma.

³ Ai sagala sintua ni malim ipabangkit do, laho manggalangkon sibere-bere ampa galangan, ase maningon adong do age Bani sigalangkonon-Ni.

⁴ Ambit i dunia on la sonari, tontu seng malim la, ai adong ijin malim, na manggalangkon sibere-beere mangihutkon titah.

⁵ Parugason ni sidea ai ma usihan ampa halinoh ni na i nagori atas ai, songon na dapotan parentah si Musa hun babou, sanggah sihol paulionni rumah panumbahan in, “Ingat ma,” nini mangkatahon,

“Paulihon ganupan in domu hubani usihan, na dob pinatuduhkon bam i atas dolog in!”

⁶Tapi Jesus, dapot-Si do jabatan hamalimon sisurungan, ai la do siholang bani parpadanan sidearan, na itotapkon maronjolan bani bagah-bagah sidearan.

⁷Ai ambit lang adong sihataon bani padan na parlobei ai, tontu seng pala porlu na paduahon on.

⁸Tapi hona hata do sidea, nini, “Tonggor ma, nini Tuhan in, na roh ma ari, pajongjongon-Ku ma ijai padan na baru bani ginompar ni Israel pakon Juda!

⁹Seng songon padan na Hubahen bani ompung ni sidea, sanggah na Hutangkap tangan ni sidea, laho mamboan sidea luar hun tanoh Masir; ai seng totap sidea bani padan-Kin, anjaha Ahu pe seng Husarihon be sidea, nini Tuhan in.”

¹⁰“Tapi on do padan, sibahenon-Ku hubani ginompar ni Israel, dob salpu panorang ai,” nini Tuhan in, “Hubagas uhur ni sidea do nahkonon-Ku titah-Ku, anjaha hubani atei-atei ni sidea do suratkonon-Ku ai, gabe Ahu do Naibata ni sidea, anjaha sidea gabe bangsang-Ku.

¹¹Anjaha seng pala be ajaran ni sada halak hasomanni sabangsa barang hatahononni hubani saninani, ‘Tanda ma Tuhan in,’ ai haganup do sidea manandai Ahu, na etek age pe na magodang.

¹² Marpangulaki do uhur-Hu pasal panlanggaran ni sidea, anjaha seng be paingat-ingaton-Ku dousa ni sidea.”

¹³ Marhitei na isahapkon padan na baru, ihira Naibata do padan na parlobei ai domma matua. Anjaha sagala na dob buruk anjaha matua, podas ma laho salpu ai.

**Parugamaon bani Padan Na
Basaia Martuduh-tuduh bani
Parugamaon na i Padan Na Baru**

9 ¹ Adong do tongon age bani padan na parlobei ai aturan-aturan parugamaon ampa rumah panumbahan marbiak dunia.

² Ai ipauli do ianan lobei-lobei ai, ijai do parsuluhan ai ampa meja ampa ruti sigalangkonon ai, ai ma na margoran kamar na mapansing.

³ I pudi ni hirei-hirei na paduahon ai do ianan na margoran kamar na tang sipansingan.

⁴ Ijai do anjapanjap pardahupaan omas ampa poti parpadanan ai, na ilampis haganup bani omas, na marisi gusi omas, ianan ni manna ai, ampa tungkot ni si Aron na martunas ai, sonai homa batu panuratan ni padan ai.

⁵ I atas ni poti parpadanan ai Herubin na marmulia, na manlinggomi tutup pardearan na i atas ni poti parpadanan ai, seng tarpajojo ai haganup nuan sada-sada.

⁶Dob ipauli sonai haganup, gabe masuk ma tongtong malim hu ianan lobei-lobei ai, laho mandalankon horja parsombahon ai.

⁷Tapi bani ianan na paduahon ai, pitah sintua ni malim do hansa, sahali satahun, anjaha seng tarbahren lang mamboan daroh, sigalangkononni halani ia sandiri ampa halani dousa haotoon ni bangsa in.

⁸Anjaha marhitei ai ipatuduhkon Tonduy Na Pansing do, paboa na so ungkab ope dalan hubani na mapansing ai, sadokah totap ope rumah panumbahan na parlobei ai.

⁹Na martuduh-tuduh hubani sisonari do ai, ai igalangkon do ijai sibere-bere ampa galangan na so tuk pasonangkon botul panggora ni uhur ni halak na marsombah ai.

¹⁰Pitah mangonai pasal paraturan-paraturan pardagingon do hansa ai, ai ma pasal sipanganon, siinumon ampa bagei ni pamurhion, na itotapkon paima roh panorang ni paraturan na sintong.

¹¹Tapi roh do Kristus, Sintua ni Malim ni arta na sihol roh in. Anjaha sahali do imasuki ianan na mapansing ai, dob ibontas ianan panumbahan sibanggalan anjaha sidearan ai, ai ma na so pinauli ni tangan, na so humbani panompaon on;

¹²seng marhitei daroh ni hambing tunggal pakon anak ni lembu, tapi marhitei daroh-Ni sandiri do, gabe dapot haluahon sadokah ni dokahni.

¹³ Gari daroh ni hambing tunggal ampa lembu jonggi ampa abuan ni anak ni lembu, na pinispiskon bani na mabutak mangkorhon hapansingon ni parangkulaon do;

¹⁴ ai lang lobihan ma daroh ni Kristus in paborsihkon panggora ni uhurta humbani horja hamatean, laho mangidangi Naibata Sipargoluh in? Ai igalangkon do diri-Ni seng martikas bani Naibata, marhitei Tonduy na manongtong in.

¹⁵ Anjaha in do halani, ase gabe Siholang la bani padan na baru, ai ma, ase ijalo na tardilo in na binagahkon ai, in ma siteanon na so ra mubah in, dob lobei matei la, laho pasaloseihon panlanggaron na tarjadi bani padan na parlobei ai.

¹⁶ Ai anggo adong padan (testament), maningon torang do lobei matei sibahen testament ai, ase sah ai.

¹⁷ Ai dob matei pe halak ai, ase totap testament ai, seng margogoh ai sadokah manggoluh ope na mambahensi.

¹⁸ Ai padan na parlobei ai pe, marhitei daroh do isahkon.

¹⁹ Ai dob ihatahon si Musa hubani ganup bangsa ai sagala parentah domu hubani titah ai, ibuat ma daroh ni anak ni lembu ampa hambing tunggal marhasoman bah, wol na gerger ampa hisop, anjaha ipispisi ma marhitei ai buku ai ampa haganup bangsa ai,

²⁰ lanjar ihatahon, “On do daroh ni parpadanan, na niaturhon ni Naibata bani nasiam.”

²¹ Sonai homa lampolampo panumbahan ai ampa haganup parugas na mapansing ai ipispisi do bani daroh ai.

²² Anjaha hira haganup do iuras marhitei daroh domu hubani titah in; anjaha seng adong hasasapan ni dousa, anggo seng madurus daroh.

²³ Ase maningon sonai ma iuras tiruan ni na hun nagori atas ai, tapi na i nagori atas ai, marhitei galangan na surungan hunjai.

²⁴ Ai seng masuk Kristus hubagas na mapansing na pinauli ni tangan, gambaran ni na sintong ai, tapi hu nagori atas sandiri do, laho patuduhkon diri-Ni nuan i lobei ni Naibata mangkopkop hita,

²⁵ anjaha seng homa laho manggalangkon diri-Ni gati, songon sintua ni malim ai, na mammasuk ianan na mapansing ai siap tahun marhitei daroh ni na legan.

²⁶ Ambit sonai, maningon gati do la marsitaronon olat ni partombei ni dunia on, tapi sahali tumang do talar la bani ujung ni panorang, laho parontihon dousa in, marhitei galangan diri-Ni.

²⁷ Songon na dob itotapkon bani jolma, matei sahali dob ai uhum ai,

²⁸ sonai do age Kristus, dob hona galangkon sahali, laho mamorsan dousa ni jolma na mabuei in, paduahalihon talar ma la, sedo halani dousa,

tapi laho mamboan haluahon do bani na paima-imahon-Si.

10¹Jadi halani halinoh ni parulihan na sihol roh do hansa titah in, sedo anggo badanni sandiri, halani ai seng tarbahen titah in mambahen gokan dear sagala na roh hujin, mamboan galangan na dos torus siap tahun.

²Ai ambit sonai, parontihonon ma na manggalang ai, halani seng adong be dousa idingat sidea siparsombah ai, anggo domma borsih hinan sidea santorap.

³Tapi halani galangan ai, puho do pardingat bani dousa ai ganup tahun.

⁴Ai seng tarbahen daroh ni lembu jonggi atap hambing tunggal pasaloseihon dousa.

⁵Halani ai, nini do bani parmasukni hu dunia on, “Seng ihasiholhon uhur-Mu galangan atap sibere-bere, tapi badan do ipasirsir Ham bangku.

⁶Seng marosuh uhur-Mu bani galangan situtungon barang bani galangan pardousaon.”

⁷Jadi ningku ma, “Tonggor ma, na roh ma Ahu mangkorjahon rosuh ni uhur-Mu, ale Naibata; bani buku gulungan in do tarsurat pasal Ahu.”

⁸Ase, anggo ihatahon lobei, “Seng ihasiholhon uhur-Mu anjaha seng marosuh uhur-Mu bani galangan, sibere-bere, galangan situtungon barang galangan pardousaon, age pe igalangkon namin ai romban hubani titah,”

⁹ anjaha dob ai use ihatahon, “Tonggor ma, na roh ma Ahu mangkorjahon rosuh ni uhur-Mu, ijai ma iparontihon na parlobei ai, laho pajongjongkon na paduahon ai.”

¹⁰ Anjaha marhitei rosuh-Ni ai gabe pansing do hita, halani badan ni Jesus Kristus, na dob ginalangkon-Ni ai, torus lalab marhitei na sahali ai.

¹¹ Ia malim-malim, ganup do jongjong ari-ari marugas, laho manggalangkon galangan na sarupa marnunut, na so boi onga tongon pasaloseihon dousa.

¹² Tapi anggo Ia, sada galangan hansa iboan laho pasaloseihon dousa; dob ai laho ma Ia hundul sadokah ni dokahni hu siamun ni Naibata.

¹³ Na paima-imahon ma Ia hunjai nari, ronsi ipatunduk munsuh-Ni gabe sidogei-dogean ni nahei-Ni.

¹⁴ Ai marhitei sada galangan, gok do dearni ipajongjong ronsi sadokah ni dokahni, sagala na ra papansingon-Ni.

¹⁵ Dihut do Tonduy Na Pansing manaksihon ai banta, ai ihatahon do lobei,

¹⁶ “On do padan sibahenon-Ku bani sidea, dob salpu panorang ai,” nini Tuhan in, “Nahkonon-Ku do titah-Ku hubagas uhur ni sidea, anjaha suratkonon-Ku do ai hubagas atei-atei ni sidea.”

¹⁷ Dob ai use, “Anjaha seng be ingaton-Ku dousa ni sidea pakon hajahaton ni sidea.”

¹⁸ Ase anggo domma sasap ai, seng be masa galangan pardousaon.

Golpa-golpa Mangkagoluhkon Haporsayaon

Lumba-lumba ase Ulang Marbalik

¹⁹ Ai pe nasiam sanina, halani domma adong banta hinsah ni uhur laho masuk hubagas ianan na mapansing ai ibagas daroh ni Jesus,

²⁰ humbani dalan na baru anjaha na manggoluh ai, na ibuka banta, manlopusi hirei-hirei ai, ai ma daging-Ni ai,

²¹ anjaha domma adong homa banta malim bolon, na manggomgom Rumah ni Naibata,

²² halani ai, dohori hita ma Naibata, maruhur na sintong, ibagas haporsayaon na gok, maruhur na dob hona uras humbani panggora ni uhur na sambor ampa ibagas angkula na dob pinapansing marhitei bah na borsih.

²³ Poltik ma jolom hita pangarapan na dob niakuhonta in, ai hatengeran ni uhur do na marbagahkonsi.

²⁴ Pardiateihon hita ma samah hita, ase marsiojuran hita mandalankon holong ampa horja na madear,

²⁵ anjaha ulang ma tadingkon hita partumpuanta, songon na dob somal bani deba halak, tapi lambin marsipagolpaan ma hita, halani na lambin dohor ma ari ai ididah nasiam.

²⁶ Ai anggo ituntun hita mardousa, dob sompat ijalo hita panandaion bani hasintongan in, seng adong be dapot galangan pasaloseihon dousa.

²⁷ Uhum mando sipaimaon ibagas biar ampa apuy ringis, na mangagouhon sagala sipanlawan.

²⁸ Na manlanggar titah ni si Musa, maningon do matei, seng dong be idop ni uhur, anggo adong dua barang tolu halak na manaksihon ai.

²⁹ Timbang nasiam ma, ai lang boratan ma uhum mangonai bani jolma, na mandogei-dogei Anak ni Naibata anjaha na so mangkargai daroh parpadanan in, na dob papansingkonsi, anjaha na pahirihon Tonduy Paridop ni uhur in?

³⁰ Ai itanda hita do Ia, na mangkatahon, “Ahu do simada pambalason, sai na balaskonon-Ku do!” Dob ai use ihatahon do, “Uhumon ni Tuhan in do bangsa-Ni.”

³¹ Jangin ni in, madabuh hu tangan ni Naibata na manggoluh in!

³² Tapi ingat nasiam ma panorang na dob salpu ondi. Ijia, dob ipalihar nasiam, tahan do nasiam ibagas buei paruntolon na marhamarsikon.

³³ Deba nasiam gabe sitontonan halani apas-apas ampa hamarsikon, na deba nari dihut manaron homa halani halak na manaron ai.

³⁴ Ai rap manaron do nasiam pakon halak na tartutup, anjaha age hona rampas arta nasiam, malas do uhur nasiam ijai, halani ibotoh nasiam,

adong ope bani nasiam arta sidearan anjaha na totap.

³⁵ Ai pe, ulang ma ambukkon nasiam hinsah ni uhur nasiam, ai bangga do upah balas ni in!

³⁶ Hasabaron do na porlu bani nasiam, laho mandalankon rosuh ni uhur ni Naibata, ase dapot nasiam bagah-bagah in.

³⁷ Ai tongkin nari tumang mando, roh ma na sihol roh, anjaha seng padokah-dokahonni.

³⁸ Tapi humbani haporsayaon do manggoluh parpintor in, anjaha seng marosuh uhur hubani halak na surut.

³⁹ Tapi seng surut anggo hita ase hu hamagouan; na porsaya do laho paluahkon tonduy.

Pasal Haporsayaon ampa na Marhaporsayaon

11 ¹ Ia haporsayaon, ai ma tenger ni uhur bani siarapkononkon, ampa na mambahen torang pasal na so nididah.

² Marhitei haporsayaon ai do dapotan hasaksian na madear ompung-ompungta hinan.

³ Marhitei haporsayaon do tararusi hita, paboa marhitei hata ni Naibata do ijadihon dunia on, gabe manjadi na taridah on humbani na so taridah.

⁴ Marhitei haporsayaon do igalangkon si Abel hubani Naibata galangan sidearan marimbang si Kain, gabe isaksihon ia parpintor marhitei ai, ai isaksihon Naibata do galangan ai sanggah na ijalo

ai, matei do ia, tapi marsahap ope ia marhitei haporsayaonni ai.

⁵ Marhitei haporsayaon do tarangkat si Henok, gabe seng ididah hamatean, seng jumpah be ia, halani domma iangkat Naibata. Ai paima tarangkat ia, isaksihon do pasalsi, paboa rosuh do uhur ni Naibata bani.

⁶ Tapi anggo seng porsaya halak, seng tarbahen harosuh ia bani Naibata, ai halak na sihol mandohori Naibata, maningon porsaya do ia adong Naibata, anjaha la mambere upah bani na mangindahi-Si.

⁷ Marhitei haporsayaon do ipauli si Noak ibagas biar parau bahen haluahon ni sidea na sajabu, dob ijalo pangungkabon pasal na so boi idahon ope; marhitei ai iuhum si Noak do dunia on, anjaha gabe itean ma hapintoron na humbani haporsayaon.

⁸ Marhitei haporsayaon do mambalosi si Abraham, sanggah na idilo ia, bungkas hu tanoh sijaloonni gabe tean-teanan; anjaha bungkas do ia, age pe lang ibotoh siparayakonni ai.

⁹ Marhitei haporsayaon do ia manginsolat i tanoh na dob pinarbagah in, songon i tanoh na legan, marianan ibagas tenda rap pakon si Isak ampa si Jakob, hasomanni panean bani bagah-bagah na sada in.

¹⁰ Ai ipaima-ima do huta na maronjolan na totap, na niranggi ampa na pinauli ni Naibata.

¹¹ Marhitei haporsayaon do ijalo si Sara gogoh manubuhkon, age pe domma matua ia, halani hatengeran ni uhur do ihira na marbagahkonsi.

¹² Halani ai, tubuh do humbani na sada halak ai, na dob matei tarhatahon, ansa buei ni bintang na i langit, ansa buei ni horsik ni na i topi ni laut, na so tarbilangi.

¹³ Ibagas haporsayaon do sidea matei haganup, seng sompat ijalo na pinarbagah ai; humbani na daoh mando itatap anjaha ihamalaskon sidea ai, anjaha iparhatongon sidea: Halak na legan anjaha panginsolat do sidea i tanoh on.

¹⁴ Ai marhitei na mangkatahon sisonai ai, ipatuduhkon do, na mangindahi do sidea bani tanoh hasusuran.

¹⁵ Ambit idingat sidea tanoh habungkason ni sidea ai, sompat do sidea mulak hujai.

¹⁶ Tapi sidearan do ihasiholhon sidea, ai ma na i nagori atas ai. Halani ai, lang maila Naibata bani sidea, ra do la goranon Naibata ni sidea, ai domma ipauli bani sidea sada huta.

¹⁷ Marhitei haporsayaon do igalangkon si Abraham si Isak, sanggah na tarlajou ai ia, tongon anakni na sasada ai do igalangkon, sijalo bagah-bagah ai.

¹⁸ Hu bani do ihatahon hinan, "Ibagas si Isak do targoran bam ginompar!"

¹⁹ Ihira uhurni do, markuasa Naibata mamuhoi age dob matei, anjaha halani ai do ia ijalo songon usihan.

²⁰ Marhitei haporsayaon do ipasu-pasuhon si Isak hubani si Jakob ampa hubani si Esau pasal na sihol masa ope.

²¹ Marhitei haporsayaon do, sanggah laho matei ia, ipasu-pasu si Jakob anak ni si Josep sada-sada, marsijoloman bani tungkotni marsombah do ia bani Naibata.

²² Marhitei haporsayaon do itarsingatkan si Josep, bani na laho matei ia, pasal parluar ni halak Israel, anjaha martonah ia pasal holi-holini.

²³ Marhitei haporsayaon do si Musa, dob tubuh ia, iponopkon namatorasni, tolu bulan dokahni, halani anak na jenges ia ididah, anjaha seng mabiar sidea bani parentah ni raja ai.

²⁴ Marhitei haporsayaon do, dob magodang, manjua si Musa goranon anak ni boru ni Parao.

²⁵ Rahanan do ia manaron na marsik rap pakon bangsa ni Naibata humbani na marsonang-sonang tongkin ibagas dousa.

²⁶ Manaron hadorunon ni Kristus, ai do ihira habayakon sibanggalan humbani arta na i tanoh Masir, ai pambalason ai do itonggor.

²⁷ Marhitei haporsayaon do itadingkon tanoh Masir, seng mabiar bani ringis ni raja ai; ai totap do

ia marsijoloman bani na so taridah ai, songon na dob ididah.

²⁸ Marhitei haporsayaon do idalankon Paskah ai ampa na mamispiskon daroh ai, ase ulang mahua bunga tubuh ni sidea ibahen sipangagou ai.

²⁹ Marhitei haporsayaon do ibontas Laut Sigerger songon tanoh na horah, iuji halak Masir ma ai, gabe matei mogap ma sidea.

³⁰ Marhitei haporsayaon do mareong tembok ni huta Jeriko, dob pitu ari dokahni iinggoti.

³¹ Marhitei haporsayaon do ase lang matei si Rahab boru jalang ai rap pakon na so mambalosi; ai ibagas damei do ijalo parkahap ai.

³² Aha ope hatahononku? Seng dong be panorang bangku, laho mambaritahon pasal si Gideon, si Barak, si Simson, si Jepta, si Daud, si Samuel pakon nabi-nabi ai.

³³ Marhitei haporsayaon do italuhon sidea harajaon, ihorjahon hapintoron, ijalo bagah-bagah, itutup babah ni singa,

³⁴ iintopi gogoh ni apuy, maluah humbani mata ni podang, suang margogoh humbani hagalekon, gabe margogoh i parporangan anjaha ibahen maporus tentara ni bangsa na legan.

³⁵ Ijalo puang-puang do na mateini mulak manggoluh. Tapi deba na legan ai iarsik-arsik do, seng saud maluah, ase marulih bani parpuhoon sidearan.

³⁶ Na deba nari manaron risa-risa ampa lonsing-lonsing, seng pitah sonai, tapi isangkut do anjaha itutup,

³⁷ ipargijig, ilajou koras, igargaji, matei hona bunuh ibahen podang, minsah-insah marhiou bobak ni biribiri atap hambing pe, marhahurangan, hona odoh-odoh ampa hona jahatan.

³⁸ Seng maharga be dunia on bani sidea, gabe laho sidea hu halimisan, hu dolog, hu liang-liang ampa lombang-lombang ni tanoh on.

³⁹ Anjaha haganup sidea, age pe dapotan hasaksian na madear marhitei haporsayaon ni sidea, seng ijalo ope na pinarbagah-bagah ai,

⁴⁰ ai sidearan do isurahon Naibata bereon-Ni banta, ase ulang das sidea hubani na gokan dear, anggo lang rap pakon hita.

Mangkawah dompak Jesus

Sabar ibagas Parlajouan

12 ¹ Ase, halani domma songon hambun buei ni saksi manginggoti hita, tadingkon hita ma sagala na paboratkon ampa dousa na manrahuti hita, anjaha marsabar ni uhur ma hita marlintun bani parlumbaan na adong i lobeita.

² Ibagas ai mangkawah ma hita dompak Jesus, sipungkah ampa sidobkon haporsayaon in, na manaronkon parsilang ai, gantih ni malas ni uhur na

i lobeini, anjaha seng ihira hailaon ai, gabe hundul i
siamun ni paratas ni Naibata.

³ Ingat nasiam ma la, na manaronkon parlawanon
na sonai dompak-Si humbani pardousa, ase ulang
marnaloja nasiam, mandolei uhur nasiam.

⁴ Bani paruntolon nasiam mangimbang dousa, seng
ongga ope tiris daroh nasiam maruntol.

⁵ Ai domma lupa nasiam bani sipaingat, na
hinatahon bani nasiam songon na bani anak,
“Ale anakku, ulang ma hampung uhurmu bani
pangajarion ni Tuhan in, anjaha ulang ma mandolei
anggo ipinsang,

⁶ ai iajar Tuhan in do na hinaholongan ni uhur-Ni,
anjaha ilonsing do anak na niain-Ni.

⁷ Sabar ma nasiam, gabe pangajarion do on bani
nasiam, ai anak-Ni do nasiam ijai ihira Naibata. Ai
ija ma adong anak na so niajar ni bapani?

⁸ Ai anggo seng hona ajar nasiam, songon na dob
mangonai ai bani haganup, anak salong-salongan
ma nasiam ai, seng anak na botul.

⁹ Ambah ni ai, bapanta pardagingon do sipangajar
banta, anjaha mabiar do hita bani sidea; ai lang
patut ma lambin marunduk ni uhur hita bani Bapa
ni Tonduy, ase manggoluh hita?

¹⁰ Ai anggo sidea, tongkin do hita iajar domu hubani
partimbangan ni sidea, tapi la, hubani na marguna
banta do, ase parrupei hita bani hapansingon-Ni.

¹¹ Sagala pangajaran tongon, sanggah hamamasani seng malas ni uhur, tapi pusok ni uhur do ai ahapkonon, tapi use ihorhon ai do buah hapintoron na marisi damei bani sagala na dob tarlatih ibagas ai.”

Mangkaporluhon Damei ampa Hapansingon

Halani Mardingat Bagah-bagah ai

¹² Halani ai, pagostong nasiam ma tangan na galek-galek, anjaha patotap nasiam ma towod na hitir-hitir.

¹³ Papintor nasiam ma dalan sidalanan ni nahei nasiam ase ulang puhei nahei na repat in, tapi malum ma namin.

¹⁴ Porluhon nasiam ma ase mardamei nasiam hubani haganup halak anjaha margoluh na mapansing, halani anggo seng sonai, seng boi idahon ni atap ise Tuhan in.

¹⁵ Jaga nasiam ma ase ulang adong na liah bani idop ni uhur ni Naibata, ase ulang martumbor urat na paet, na mangkorhon hasunsahan anjaha buei halak butak ibahen.

¹⁶ Ulang ma adong siparriah-riah atap na marhabutakon songon si Esau, na manjualhon hak sikananan halani sipanganon na otik.

¹⁷ Ai ibotoh nasiam do dobni, sanggah na sihol teanonni pasu-pasu ai namin, itulak do ia; ai seng

jumpahsi be panorang paubahkon uhur age pe mariluh-iluh ia mangindohon.

¹⁸ Ia sijumpahkonon nasiam ai sedo na tarjamah, apuy na gajag, barang na golap, barang na lotir, barang haba-haba,

¹⁹ barang parhata ni tarompit ampa sora ni hata, pala mangelek-elek na mambogeisi, ase ulang hubani sidea ipadompak hata ai;

²⁰ ai seng tartahan sidea parentah ai, na mangkatahon, "Age pinahan, anggo dais hu dolog ai, maningon matei do pargijigon."

²¹ Pala do ihatahon si Musa halani jangin ni na nididahni ai, "Mabiar do ahu anjaha hitir-hitir."

²² Tapi Dolog Sion in do iparayak nasiam ampa huta ni Naibata na manggoluh in, ai ma Jerusalem na i nagori atas ai, ampa malekat na marlaksa-laksa ai, ampa humpulan pesta,

²³ ampa kuria ni na parlobei tubuh ai, na dob tarsurat i nagori atas, ampa Naibata, siuhum haganup, ampa tonduy ni parpintor na dob gokan dear ai,

²⁴ ampa Jesus, Siholang ni parpadanan na baru ampa daroh, na pinispiskon ai, parsora sidearan humbani daroh ni si Abel.

²⁵ Jaga ma nasiam, ulang das itulak nasiam Ia, na marsahap in. Ai anggo seng maluah sidea, halani ijua sidea na palumbahon sidea i tanoh on, lambin

sonaha ma hita, anggo itundali hita la, na hun nagori atas in?

²⁶ Tanoh on do idugur sora-Ni ijia, tapi sonari marlumba-lumba do la, “Duguron-Ku do sahali nari, seng pitah tanoh on, dihut do nagori atas.”

²⁷ Hata na mangkatahon “Sahali nari” patuduhkon na mubah ma na tardugur on, in ma na tinompa on, ase totap na so tardugur ai.

²⁸ Halani ai, mangkatahon tarima kasih ma hita, ai ijalo hita do harajaon na so tardugur, anjaha ibagas ai iidangi hita ma Naibata domu hubani rosuh-Ni, marhasoman hormat ampa biar,

²⁹ ai apuy na mangankon do Naibatanta.

Golpa-golpa Mandalankon Holong

Lumba-lumba dompak

Habutakon ampa Uhur Haut

13 ¹ Holong ni uhur bani sanina, sai totap ma ai.
² Ulang ma halupahon nasiam partamueion, ai marhitei na sonai onggga do itamuei halak malekat seng ibagas botohni.

³ Ingat nasiam ma na tartutup, songon na dihut nasiam tartutup, sonai homa na hona arsik-arsik, ai nasiam pe ibagas angkula do.

⁴ Sangap ma parunjukon bani haganup halak, ulang butak podoman, ai uhumon ni Naibata do parriah-riah ampa parbangkis.

⁵ Ulang ma mata duiton parlahou nasiam, hasonangkon nasiam ma na adong, ai la sandiri do mangkatahon, “Sabonar na so tadingkonon-Ku do ho, sabonar na so paturuton-Ku do ho!”

⁶ Halani ai, tenger do uhurta mangkatahon, “Tuhan in do pangurupi bangku, seng mabiar ahu, aha ma boi bahenon nijolma bangku?”

**Golpa-golpa ase Bujur Marhaporsayaon
anjaha Pambalosi bani Sipambobai**

⁷ Dingat nasiam ma na mambobahon nasiam, na mangkatahon hata ni Naibata bani nasiam; ujung ni pardalanan ni sidea ma tonggor nasiam, anjaha tiru nasiam ma haporsayaon ni sidea.

⁸ Ia Jesus Kristus totap do, sonai nantuari, sonai do sadari on, lanjar sonai do ronsi sadokah ni dokahni.

⁹ Ulang ma ra nasiam taruyun halani podah na marbagei-bagei anjaha na legan. Dear ma gabe toguh uhurta marhitei idop ni uhur, sedo halani aturan-aturan pasal sipanganon, na so marguna bani na mandalankonsi.

¹⁰ Adong do banta anjapanjap; seng marhak mangankon hunjai siparugas na i lampolampo ai.

¹¹ Ai idarat ni parsaranan ai do itutung daging ni pinahan, dob iboan sintua ni malim daroh ai hubagas kamar na pansing ai, halani dousa.

¹² Halani ai Jesus pe idarat ni horbangan ai do la marsitaronon, ase ipapansing bangsa-Ni marhitei daroh-Ni sandiri.

¹³ Ase, laho ma hita hubani Jesus hударат ni parsaranan ai, mamorsan hadorunon-Ni ai.

¹⁴ Ai seng dong banta ijon huta na totap, tapi ipindahi hita do na sihol roh ai.

¹⁵ Anjaha marhiteihon-Si ma galangkon hita tongtong bani Naibata galangan puji-pujian, ai ma buah ni bibir, na mangakui goran-Ni in.

¹⁶ Mambahen na madear ampa na marsibere-bere, ulang ma halupahon nasiam ai, ai galangan na sonai do iharosuhkon Naibata.

¹⁷ Tangihon nasiam ma na mambobahon nasiam, anjaha balosi nasiam ma sidea. Ai sidea do manjagai tonduy nasiam, anjaha martanggung jawab pasal ai. Sihol ma marmalas ni uhur sidea mandalankon ai, ulang ma marhoih-hoih, ai seng marguna ai bani nasiam.

Hata Parujungan ampa Tabi

¹⁸ Tonggohon nasiam ma hanami. Ai tenger do uhurnami, paboa borsih do panggora ni uhurnami, halani ihaporluhon hanami marparlahou na madear ibagas haganup.

¹⁹ Lambin iojur hanami do nasiam mangkorjahon ai, andohar lambin podasni ahu ipaulak bani nasiam.

²⁰ Tapi Naibata Sipardamei in, na mangarahkon humbani na matei Siparmahan bolon ni biribiri in, marhitei daroh parpadanan sisadokah ni dokahni, in ma Tuhanta Jesus.

²¹ Ia ma pasirsirhon nasiam bani sagala na madear, laho mangkorjahon rosuh ni uhur-Ni, anjaha manjadihon ibagas hita, rosuh ni uhur-Ni marhitei Jesus Kristus! Bani ma hasangapon ronsi sadokah ni dokahni! Amen.

²² Tapi huojur ma nasiam sanina, jalo nasiam ma hata podah in ai pondok do husuratkon bani nasiam.

²³ Botoh nasiam ma, na dob maluah do saninanta si Timoteus, ai ma hasomanku mangidah nasiam, anggo podas ia roh.

²⁴ Padas nasiam ma tabinami bani haganup na mambobahon nasiam ampa haganup halak na mapansing. Manongos tabi do bani nasiam hasoman na hun Italia.

²⁵ Idop ni uhur ma bani nasiam haganup!

Jakobus

Hata Tabi

1 ¹ Hun bani si Jakobus, juakjuak ni Naibata ampa Tuhan Jesus Kristus, marayak na sapuluh dua marga na merap in, “Tabi ma bani nasiam!”

Ojur-ojur ase Totap Marhaporsayaon age ibagas Sitaronon

² Nasiam sanina, hira nasiam ma in malas ni uhur tumang, anggo madabuh nasiam hubagas bagei ni parlajouan,

³ anjaha botoh nasiam ma, na mangkorhon hasabaron do parlajouan na hubani haporsayaon nasiam.

⁴ Anjaha hasabaron ai mangkorhon horja na gokan dear, ase gabe gokan dear nasiam, seng dong sihataon anjaha seng marhahurangan.

⁵ Tapi anggo adong i tongah-tongah nasiam na hurangan bani hauhuron, ipindo ma ai hubani Naibata, na layak mambere bani haganup, anjaha seng marpangayah, jadi bereon-Ni ma ai hu bani.

⁶ Tapi ibagas haporsayaon ma ia mangindo, ulang bungbang, ai halak na bungbang uhur usih do

ai hubani gilumbang ni laut, na pinalindak-lindak anjaha nionjar ni logou.

⁷ Ulang ma iagan uhur ni halak sisonai, adong jaloonne atap aha humbani Tuhan in,

⁸ ai halak na mardua uhur, na geor do ai bani haganup dalanni.

⁹ Ipuji sanina na toruh uhur in ma dirini halani hagijangonni,

¹⁰ tapi na bayak in halani hatoruhonni; ai na laho salpu do ia songon bunga ni poyon-poyon.

¹¹ Ai na poltak ma mata ni ari rap pakon milasni, jadi melus ma poyon-poyon ai, marurus bungani, anjaha rupani na jenges ai pe magou ma. Sonai ma laho melus na bayak in ibagas langkah-langkahni.

¹² Martuah ma halak na tahan bani parlajouan, ai dob monang ia bani parlajouan ai, jaloonne ma sortali hagoluhan, na dob pinarbagah ni Naibata bani na marholong ni uhur Bani.

¹³ Ulang ma adong na mangkatahon sanggah na tarlajou ia, "Na tarlajou do ahu humbani Naibata!" Ai seng boi hona lajou Naibata laho mangkorjahon na jahat, anjaha la sandiri seng adong na ilajou.

¹⁴ Tapi hona lajou do halak, anggo itarik-tarik anjaha iompan-ompani hisap-hisap ni uurni sandiri ia.

¹⁵ Jadi anggo marbanggal ma hisap-hisap ni uhur ai, itubuhkon ma dousa, anjaha dob gok dousa ai, itubuhkon ma hamatean.

¹⁶ Ulang ma nasiam kahou, nasiam sanina na hinaholongan.

¹⁷ Haganup sibere-bere na madear, anjaha haganup silayak-layak na gokan dear, ai ma na roh hun datas, humbani Bapa ni na lihar, seng ra mubah la anjaha seng dong na golap Bani halani partukaran.

¹⁸ Marhitei sura-sura ni uhur-Ni itubuhkon do hita marhitei hata hasintongan in, ase hita gabe limbuah ni sagala na tinompa-Ni.

¹⁹ Ingat nasiam ma, nasiam sanina na hinaholongan: Ganup halak, ringgas ma ia manangi-nangi, asok marsahap anjaha lambat marringis.

²⁰ Ai seng ihorhon marah ni jolma hapintoron i lobei ni Naibata.

²¹ Halani ai ambukkon nasiam ma sagala na mabutak ampa sagala masam ni hajahaton, anjaha jalo nasiam ma ibagas halamlamon hata na sinuan ibagas uhur nasiam, na tarbahen paluahkon tonduy nasiam.

²² Gabe sihorjahon hata in ma nasiam, ulang panangi-nangi tumang, na paoto-otohon dirini sandiri.

²³ Ai panangi-nangi bani hata in anggo seng ihorjahon, usih ma ai bani halak na patonggor-tonggor rupa ni bohini bani sormin.

²⁴ Ididah do namin rupani, dob ai laho ma ia, gabe mintor lupa ma ia, atap sonaha do rupani ai.

²⁵ Tapi na manorih torus hubagas titah hamardekaon na gokan dear ai, anjaha totap ijai, seng sipanangi-nangi na urah lupa ia, tapi sihorjahon hata in ma ia tene, martuah ma ia ibagas na mandalankon ai.

²⁶ Anggo adong na mangkatahon ibagas uhurni, na daulat ia, hape lang irantei dilahni, ipaoto-oto uhurni do ia ai, na parsuma do parugamaonni ai.

²⁷ On do parugamaon na borsih anjaha na so dong sihataon bani uhur ni Naibata, Bapa in, ai ma manorih na tading maetek ampa na mabalu ibagas hamarsikonni, anjaha manjagai diri ulang butak marhitei dunia on.

Lumba-lumba dompak Halak Sididah-idah Bohi

2¹ Nasiam saninangku, ulang ma ibagas na mangidah-idah bohi nasiam marhaporsayaon bani Tuhanta Jesus Kristus, na marmulia in.

² Umpamani, roh ma sada halak partintin omas ampa na marpakeian na majenges hu parguruan nasiam, anjaha roh homa sada halak na miskin marhiou na marigat-rigat,

³ jadi dob ididah nasiam parhiou na majenges ai, gabe ihatahon nasiam hu bani, “Hundul ma ham ijon, bani sidearan on,” tapi bani na miskin ai ihatahon nasiam, “Ijai ma ham jongjong barang hundul ijon i lambung ni naheihon,”

⁴ai lang domma mambahen parlegan-leganan nasiam ijai i tongah-tongah nasiam, anjaha manguhumi nasiam marhitei pingkiran na jahat?

⁵Tangihon nasiam ma, ale sanina na hinaholongan, ai lang na masombuh i dunia on do ipilih Naibata, ase bayak sidea ibagas haporsayaon anjaha panean bani harajaon, na dob pinarbagah-Ni hinan bani na marholong ni atei Bani?

⁶Tapi idoruni nasiam do na masombuh in. Ai lang halak na bayak in do na mangarsik-arsik anjaha na manarad-narad nasiam hu paruhuman?

⁷Ai lang sidea do na pasambor-samborhon Goran na dear in, na dob ipartigorankon bani nasiam?

⁸Sibahen na madear ma nasiam tongon, anggo gok idalankon nasiam titah ni Harajaon in, domu hubani hata ni Surat in, “Haholongi ma hasomanmin songon dirimu!”

⁹Tapi, anggo sididah-idah bohi nasiam, na mardousa do nasiam ijai, gabe patalaron ni titah in ma nasiam songon sipanlanggar.

¹⁰Porini pe idalankon sada halak haganup titah in, hape ilanggar sada, parsalah do ia bani haganup.

¹¹Ai la na mangkatahon, “Ulang ho marbangkis!” lanjar la do mangkatahon, “Ulang ho mamunuh!” Ase porini pe seng marbangkis ham, hape mamunuh do, panlanggar do ham bani titah in.

¹² Bani parsahap atap horja pe ingat nasiam ma, siuhumon do nasiam bahenon ni titah hamardekaon in.

¹³ Ai uhum na so maridop ni uhur do bani na so mandalankon idop ni uhur, tapi monang do idop ni uhur marimbang uhum.

Pardomuan ni Haporsayaon ampa Horja

¹⁴ Aha ma gunani, nasiam saninangku, anggo ihatahon sada halak, adong bani haporsayaon, tapi seng dong pangkorjahonni?

¹⁵ Porini dong sanina atap botou na so marhiou anjaha hurangan bani sipanganon ari-ari,

¹⁶ gabe adong humbani nasiam na mangkatahon hu bani: “Laho ma nasiam ibagas damei, malas ma pangahap nasiam anjaha bosur ma nasiam,” hape seng dong ibere nasiam bani, aha ma gunani ai?

¹⁷ Haporsayaon in pe sonai do. Anggo seng dong horjani, na dob matei do ai ibagas dirini.

¹⁸ Tapi ra do adong halak na mangkatahon, “Bamu ma haporsayaon, bangku parhorjaan! Patuduhkon ham ma bangku haporsayaonmu, na so pala adong horjani, ase hupatuduhkon bamu haporsayaon in marhitei horjangku.”

¹⁹ Na porsaya do ham, sada do hansa Naibata. Dear ma ai. Setan-setan pe porsaya do anjaha hitir-hitir.

²⁰ Tapi sihol ma botohonmu, ale jolma na oto, na so marguna do haporsayaon, anggo seng adong horjani.

²¹ Ai lang humbani horja do ipintori ompungta si Abraham, dob na binoanni ai si Isak, anakni ai, hu panggalangan?

²² Ididah ham ma ijai, na rap marhorja do haporsayaonni ampa pangkorjahonni, anjaha marhitei horja ai gabe gokan dear haporsayaon ai.

²³ Jadi jumpah ma na hinatahon ni Surat in, “Ihaporsayai si Abraham do Naibata, anjaha ai ma ihira bani gabe hapintoronni, anjaha igoran do ia huan-huan ni Naibata.”

²⁴ Ase idah nasiam ma, “Hun bani horja do ipintori jolma, seng humbani haporsayaon tumang.”

²⁵ Sonai do age si Rahab, boru jalang ai, ai lang humbani horjani do ia ipintori, dob na jinaloni ai suruhan ai, anjaha isuruh sidea humbani dalan na legan?

²⁶ Ai songon badan na so martonduy, matei do, sonai do matei age haporsayaon na so marhorja.

Dousa ni Dilah

3¹ Nasiam sanina, ulang ma buei nasiam na ra gabe guru, ai ibotoh hita, uhum na lobih borat do jaloonta.

² Ai ganup hita gati marsalah; anggo adong na so marsalah bani sahap, ai ma halak na gokan dear, na boi manrantei haganup angkulani.

³ Anggo ibahen hita rantei bani babah ni huda, ase ibalosi hita, gabe marguru hu banta do ganup badanni ai.

⁴ Tonggor ma, age kapal ai, na sonai banggalni, anjaha nionjar-onjar ni logou na gogoh, ipatontang-tontang do marhitei amudi na etek tumang, atap dompak ja uhur ni pangamudi ai.

⁵ Sonai do homa dilah in, pagori na etek do in, tapi buei do sahap-sahapni. Tonggor ma, etek pe apuy, boi do mosog ibahen harangan na bolag.

⁶ Apuy do age dilah in. Dunia na gok hagedukon do dilah in i tengah-tengah ni pagorinta, ipabutak do haganup dagingta anjaha ipagajag panggulmiton ni goluhta, marhitei apuy na roh hun naraka.

⁷ Ia sagala bagei ni binatang, manuk-manuk, ulog ampa dengke tarpalomuk do, anjaha domma lomuk ibahenjolma,

⁸ tapi seng tarpalomuk age sadajolma pe anggo dilah in, panjahati na so ra soh do in, gok bisa hamatean.

⁹ Marhitei in do hita mamuji Tuhanta, Bapa in; lanjar in do ipakei hita mamuraijolma, na tinompa domu hubani rupa ni Naibata.

¹⁰ Hun bani sada pamangan kaluar pasu-pasu ampa papa-papa. Nasiam sanina, ulang ma sonai!

¹¹ Mintor adong ma sada bah tubuh, na marjullak-jullakkon na matobu ampa na mapaet?

¹² Nasiam sanina, mintor tarbuahkon hayu ara ma buah ni hayu jetun, atap hayu anggur marbuahkon buah ni hayu ara? Sonai do homa, seng tarjullak-jullakkon bah tubuh na porad bah na matobu.

¹³ Ise humbani nasiam na maruhur anjaha na pentar? Ipatuduhkon ma horjani marhitei parlahouni na madear, ibagas halamlamon ni hapentaran.

¹⁴ Tapi anggo ijolom-jolom nasiam ibagas uhur nasiam parsimburuon na mapaet ampa paringoran, ulang ma puji nasiam diri nasiam anjaha marladung nasiam dompak hasintongan.

¹⁵ Sedo in hauhuron na roh hun datas, na hun tanoh on do in, humbani uhur nijolma, humbani sibolis.

¹⁶ Ai ijin adong parsimburuon ampa paringoran, ijai ma adong hageoron ampa haganup bagei ni horja hajahaton.

¹⁷ Tapi ia hauhuron na hun babou ai sabonar borsih do ai, ambah ni ai ra mardamei, lamlam, pambalosi, gok idop ni uhur ampa buah-buah ni hadearon, seng singapit-apit ampa lang marsipahulah-hulah.

¹⁸ Anjaha buah ni hapinton ibagas damei do ai isaburhon bani halak na mangkorjahon hadameion.

Hasedaon do Parhuan-huanon pakon Dunia on

4¹ Hunja do roh ni parmunsuhon ampa partinggilan na bani nasiam? Ai lang humbani hisap-hisap nasiam do, na marsilawanan ibagas pagori nasiam?

² Na marsura-sura do nasiam, tapi lang dapotan, mamunuh nasiam anjaha marsimburu, lanjar seng marulih nasiam. Na marsiimbangan do nasiam anjaha marporang, tapi seng dong bani nasiam, halani seng ipindo nasiam.

³ Mangindo do namin nasiam, tapi seng manjalo, halani salah pangindo nasiam, ai sihol parbois-boiskonon nasiam do ai marhitei hisap-hisap nasiam.

⁴ Nasiam parbangkis, ai lang ibotoh nasiam, ia parhuan-huanon dompak dunia on hamunsuhon dompak Naibata do in? Ase, na sihol huan-huan ni dunia on, ipajongjong do dirini gabe munsuh ni Naibata.

⁵ Atap iagan nasiam, gurou-gurou do na hinatahon ni Surat in, "Parsimburu do Tonduy in, na dob ibahen marianan ibagas hita?"

⁶ Tapi lambin bueini do idop ni uhur ibere. Halani ai do ase ihatahon, "Ilawan Naibata do sigijang uhur, tapi ibere do idop ni uhur bani na toruh maruhur."

⁷ Ai pe, ondoskon nasiam ma diri nasiam bani Naibata; lawan nasiam ma sibolis in, jadi maporus ma ia humbani nasiam.

⁸ Padohor nasiam ma bani Naibata, jadi padohoron-Ni ma bani nasiam. Paborsih nasiam ma tangan nasiam, nasiam pardousa, anjaha papitah nasiam ma uhur nasiam, nasiam na mardua uhur!

⁹ Marhoru ma nasiam, tangis anjaha doruh-doruh. Mubah ma tawa nasiam gabe partangison, malas ni uhur nasiam gabe pusok ni uhur!

¹⁰ Patoruh nasiam ma uhur nasiam i lobei ni Tuhan in, jadi pagijangon-Ni ma nasiam.

Ulang Manguhum-uhumi

¹¹ Ulang ma nasiam marsipahata-hataan, nasiam sanina! Barang ise na mangkatai anjaha na manguhum-uhumi hasomanni, na mangkatai anjaha na manguhum-uhumi titah in do ia ai. Tapi anggo iuhumi ham titah in, seng be sihorjahon titah in ham, tapi panguhum do.

¹² Sada do Sibere titah anjaha Panguhum, na boi paluahkon ampa mangagou. Tapi, ise ma ham, ase uhumonmu hasomanmu?

Lumba-lumba Ulang Martenger ni Uhur bani Diri Sandiri

¹³ Ee nasiam, na mangkatahon, “Sadari on atap patar laho ma hanami hu kota ai, ase ijai hanami soh pala satahun on, martiga-tiga ampa mansari-sari.”

¹⁴ Hape pasal ari patar pe seng ibotoh nasiam. Ai aha do goluh nasiam in? Usih do nasiam bani timus, na taridah tongkin, dob ai seng taridah be.

¹⁵ Gantih ni ai, sonon ma patut hatahonon nasiam, “Anggo marosuh Tuhan in anjaha manggoluh hanami, bahenonnami ma on atap ai.”

¹⁶ Hape mangeljeng do nasiam anjaha sombong; na jahat do pangeljengon na sonai ai.

¹⁷ Ase, na mambotoh mambahen na madear, hape seng ihorjahon, na mardousa do ia ijai.

Lumba-lumba bani Halak na Bayak

5 ¹ Ee nasiam na bayak, tangis anjaha doruh-doruh ma nasiam halani sitaronon na sihol roh bani nasiam.

² Domma busuk habayakon nasiam, domma ngitngiton hiou nasiam.

³ Domma tasikon omas ampa pirak nasiam, anjaha tasik ai, saksi ma ai dompak nasiam, anjaha gagatonni ma daging nasiam songon apuy. Na patumpu-tumpu arta do hape nasiam sanggah panorang parpudi.

⁴ Tonggor ma, upah ni halak siparhorja, na manabi i juma nasiam, na ijolomi nasiam ai, doruh-doruh do, anjaha dilo-dilo ni sipanabi ai domma das bani pinggol ni Tuhan Zebaot.

⁵ Marmewah-mewah anjaha marlobih-lobih do goluh nasiam i tanoh on. Ipamombur-mombur nasiam do diri nasiam hubani ari pamotongan.

⁶ Iuhum anjaha ibunuh nasiam do halak parpintor; seng dong ilawan sidea nasiam.

Sabar anjaha Martonggo

⁷ Ai pe, nasiam sanina, sabar ma nasiam das hubani ari parroh ni Tuhan in! Ai parjuma pe, ipaima-ima do buah na maharga hun tanoh in, anjaha sabar do ia paima-imahon udan partidahonkon ampa udan paima pariama.

⁸ Nasiam pe sabar ma, patotap nasiam ma uhur nasiam, ai dohor ma parroh ni Tuhan in.

⁹ Ulang ma nasiam marsiungut-ungutan samah nasiam, nasiam sanina, ase ulang hona uhum nasiam. Tonggor ma, domma jongjong Panguhum in bani labah.

¹⁰ Nasiam sanina, nabi-nabi na marsahap ibagas goran ni Tuhan in, sidea ma bahen nasiam tiruan ibagas sitaronon ampa hasabaron.

¹¹ Iparhatuah hita do halak na sabar. Ibogei nasiam do hasabaron ni si Job, anjaha ididah nasiam do

sonaha dobni ibahen Tuhan in, ai parontou ni uhur banggal do Tuhan in anjaha paridop ni uhur.

Pasal na Marbija

¹² Tapi i lobei ni haganup, nasiam saninangku, ulang ma nasiam marbija, barang hubani langit barang hubani tanoh barang hubani na legan. Hatahon nasiam ma “Eak” anggo eak ma, atap “Lang” anggo lang ma, ase ulang hona uhum nasiam.

Pangabak Sanggah Marsitaronon ampa Malas ni Uhur

¹³ Anggo adong na marsitaronon i tongah-tongah nasiam, martonggo ma ia. Anggo adong na marmalas ni uhur, idodingkon ma doding puji-pujian.

Gogoh ni Tonggo

¹⁴ Anggo adong na boritan i tongah-tongah nasiam, idilo ma sintua ni kuria in, ase itonggohon anjaha iminaki ia ibagas goran ni Tuhan in.

¹⁵ Jadi paluahon ni tonggo haporsayaon in ma na boritan ai, anjaha pajongjongon ni Tuhan in ma ia; anjaha sasap ma dousani, anggo adong ihorjahon.

¹⁶ Ai pe, marsisopotkon dousani bei ma nasiam anjaha marsitonggoan, ase malum nasiam. Na margogoh tumang do pangkorhon ni tonggo ni halak parpintor, anggo ihabujurhon.

¹⁷ Jolma do si Elias, sabiak pakon hita; pongkut do ia martonggo, ase ulang roh udan, gabe seng roh udan i tanoh in tolu tahun onom bulan dokahni.

¹⁸ Dob ai iulaki ma martonggo, gabe ibere langit in ma udan, anjaha ipantubuhkon tanoh in buahni.

Mambobai na Kahou Mulak

¹⁹ Nasiam sanina, anggo adong humbani nasiam na kahou humbani hasintongan in, hape adong na mambobansi mulak,

²⁰ ibotoh ma, barang ise na mamboan pardousa mulak humbani hakahouonni, na paluahkon tonduyni do ia humbani hamatean anjaha manrungkub buei dousa.

1 Petrus

Hata Tabi

1 ¹ Hun bani si Petrus, apostel ni Jesus Kristus, hubani sagala panginsolat, na merap i Pontius, Galatia, Kappadosia, Asia ampa Bitinia, na dob tarpilih in,

² domu hubani panandaion ni Naibata Bapa hinan, marhitei na pinapansing ibagas Tonduy Na Pansing, ase pambalosi bani Jesus Kristus, anjaha iuras marhitei pamispison bani daroh-Ni in. Sai martambah-tambah ma idop ni uhur ampa damei bani nasiam.

Puji-pujian halani Pangarapan ampa Haluahon

³ Pinuji ma Naibata, Bapa ni Tuhanta Jesus Kristus, na dob manubuhkon hita paduahalihon, domu hubani bangga ni idop ni uhur-Ni, marhitei parpuhoon ni Jesus Kristus humbani na matei, ase marpangarapan na manggoluh hita,

⁴ ase banta siteanon na so ra seda, na so martikas, na so ra melus, na sinimpan banta i nagori atas.

⁵ Iramotkon do hita hinorhon ni gogoh ni Naibata, marhitei haporsayaon, ase das hita hu haluahon, na dob sirsir sipatalaron bani panorang parpudi.

⁶In do ihamalaskon nasiam, age pe marhoru nasiam tongkin sonari, anggo porlu ibagas bagei ni parlajouan,

⁷ase taridah ma pitah ni haporsayaon nasiam, na harganan marimbang omas na ra seda, age pe domma iuji ibagas apuy, bahen puji-pujian, hasangapon ampa hamuliaon bani partalar ni Jesus Kristus.

⁸Ihaholongi nasiam do la, age pe seng ididah nasiam la, ihaporsayai nasiam do la, age pe seng ididah nasiam la sonari, gabe marolob-olob do nasiam ibagas malas ni uhur na marhasangapon, na so tarpajojor pamangan,

⁹halani dapot nasiam tujuan ni haporsayaon nasiam, ai ma haluahon ni tonduy nasiam.

¹⁰In ma haluahon, na pinindahan anjaha na pinapangkei-pangkei ni nabi-nabi, na dob manjahai pasal idop ni uhur na bani nasiam in.

¹¹Ipapangkei-pangkei sidea do barang sadihari panorangni ai, anjaha sonaha do ai, domu hubani na pinatalar ni Tonduy ni Kristus, na ibagas sidea, na manaksihon hinan pasal sitaronon, na sihol sogop bani Kristus, ampa hamuliaon na ipudi ni ai.

¹²Ipatalar pe ai bani sidea, sedo bani sidea sandiri, nasiam do na sinarihon ni sidea ijai. Lanjar in do ipatugah parambilan na madear nuan bani nasiam marhitei Tonduy Na Pansing, na sinuruh hun nagori

atas. Masihol do malekat-malekat mangkawah hubagas ai.

Ojur-ojur Margoluh na Mapansing

¹³ Halani ai, gonditi nasiam ma uhur nasiam, torang ma uhur nasiam, anjaha sabonar mangarap ma nasiam bani idop ni uhur na sihol bereon bani nasiam bani partalar ni Jesus Kristus.

¹⁴ Songon dakdanak sipambalosi, ulang be paihut-ihut nasiam hisap-hisap, na binalosan nasiam hinan sanggah haotoon nasiam,

¹⁵ tapi songon Sipandilo nasiam pansing, sonai ma homa nasiam pansing ibagas haganup parlahou nasiam.

¹⁶ Ai tarsurat do, “Pansing ma nasiam, ai na pansing do Ahu!”

¹⁷ Anggo Bapa igoran nasiam la, na so sididah-idah bohi manguhumi ganup jolma pasal pambahenanni bei, marhasoman biar ma nasiam marparlahou sanggah panginsolatan nasiam on.

¹⁸ Ai ibotoh nasiam do, sedo marhitei arta na ra maseda, omas barang pirak, ase maluah nasiam humbani pargoluhon nasiam na so margagan in, na tinean nasiam humbani bapa nasiam,

¹⁹ tapi marhitei daroh ni Kristus na maharga in do, na songon daroh ni biribiri na so martikas, na so marsining.

²⁰ Na dob ipilih do la, sanggah lape jonam dunia on, anjaha ipatalar bani ujung ni panorang halani nasiam.

²¹ Marhiteihon-Si do nasiam porsaya bani Naibata, na papuhohon-Si humbani na matei, anjaha na mamberehon hasangapon Bani, ase bani Naibata nasiam porsaya anjaha marpangarapan.

²² Halani domma ipapansing nasiam diri nasiam marhitei na mambalosi hasintongan in, laho mandalankon holong na so sipahulah-hulah bani hasoman, sai marsihaholongan ma nasiam humbani gok ni uhur.

²³ Ai domma mangulaki tubuh nasiam, sedo humbani bonih na ra maseda, tapi humbani na so ra maseda do, ai ma marhitei hata na manggoluh anjaha na totap in, na humbani Naibata.

²⁴ Ai sagala daging songon poyon-poyon do, anjaha sagala hasangaponni ai songon bunga ni poyon-poyon ai. Meluskonsi poyon-poyon ai, bungani pe marurus ma.

²⁵ Tapi anggo hata ni Tuhan in, totap do ronsi sadokah ni dokahni. In ma hata na niambilankon bani nasiam.

Gabe Batu na Manggoluh i Rumah ni Naibata

2 ¹ Ai pe, ambukkon nasiam ma sagala hajahaton, sagala pangoto-otoion, hasipahulah-hulahon, subil ampa sagala tukas-tukas.

² Songon dakdanak na baru tubuh, horahan ma nasiam bani tadah partonduyon na pitah, ase lambin magodang nasiam halani ai anjaha maluah,
³ anggo na tongon ma domma idai nasiam dear layak ni Tuhan in.

⁴ Hu Bani ma nasiam roh, batu na manggoluh in, na niambukkon ni jolma tongon, tapi na pinilih anjaha na maharga bani Naibata.

⁵ Sai ra ma nasiam paulion songon batu na manggoluh, jadi rumah partonduyon ampa hamalimon na mapansing, laho mamboan galangan partonduyon, harosuh ni uhur ni Naibata, marhitei Jesus Kristus.

⁶ Ai tarsurat do bani Surat in, “Tonggor ma, hupatibal do i Sion sada batu parsuhi na pinilih anjaha na maharga, sabonar seng tarbador na porsaya Bani.”

⁷ Anjaha harga do la bani nasiam na porsaya. Tapi bani na so porsaya: Batu na niambukkon ni tuhang ai, ai ma na gabe batu parsuhi ai,

⁸ anjaha batu partolsuan ampa batu parsangsian. Ai tartolsu do sidea hujai, halani seng porsaya sidea bani hata in, age pe hujai do sidea namin ipasirsir.

⁹ Tapi marga na pinilih do nasiam, harajaon hamalimon, bangsa na mapansing, bangsa ni Naibata sandiri, ase iambilankon nasiam dear ni hauhuron-Ni, na dob mandilo nasiam humbani na golap hu haliharon-Ni, na gok halongangan in.

¹⁰ Hinan seng bangsa ni Naibata nasiam, sonari nani bangsa-Ni ma, hinan seng dapotan idop ni uhur nasiam, sonari nani dapotan idop ni uhur ma.

**Manggoluh songon Juakjuak
ni Naibata ibagas Haganup**

¹¹ Nasiam na hinaholongan, huojur ma nasiam songon panginsolat ampa halak dagang: Horom nasiam ma hisap-hisap pardagingon, na marlawan dompak tonduy.

¹² Marpangabak na madear ma nasiam i tongah-tongah ni sipajuh begu-begu, ase anggo adong na pahata-hata nasiam songon parjahat, gabe ipasangap sidea Naibata bani ari parroh-Ni, dob ididah sidea horja nasiam na madear in.

¹³ Unduk ma nasiam dompak sagala paraturan na tinotapkon nijolma halani Tuhan, age dompak raja, parkuasa sigijangan,

¹⁴ age dompak siparrajai, ai ma sinuruh-Ni, laho maminsang sibahen na jahat, tapi laho mamuji sihorjahon na madear.

¹⁵ Ai on do rosuh ni uhur ni Naibata, sihol ma marhitei horja na madear pasipon nasiam haotoon ni halak na hurang uhur,

¹⁶ songon halak na bebas, tapi ulang ma napakei habebason ai, laho manrungkub na masambor, songon juakjuak ni Naibata ma tene.

¹⁷ Hormat ma nasiam bani haganup, marholong ni uhur bani hasoman, mabiar bani Naibata anjaha pasangap ma raja.

Siusihan do Jesus na Marsitaronon

¹⁸ Unduk ma nasiam juakjuak bani tuan nasiam, marhasoman biar, ulang pitah dompak paruhur na dear ampa na basar, tapi dihut do dompak paruhur na jungkat.

¹⁹ Ai idop ni uhur do ai, anggo tahan halak manaron na marsik ampa pambahenan na so patut, halani ingat ia bani Naibata.

²⁰ Ai aha ma sipujion ijai, porini sabar pe nasiam hona lonsingan anggo halani salah nasiam do? Tapi anggo sabar nasiam manaron halani pambahenan na madear, ai ma na hinarosuhkon ni Naibata.

²¹ Ai hujin do nasiam tardilo, ai Kristus pe manaron na marsik do halani nasiam, mambere siusihan bani nasiam, ase iirikkon nasiam bokas ni nahei-Ni.

²² Seng dong dousa ihorjahon, anjaha seng dong jumpah akal-akal ibagas pamangan-Ni.

²³ Seng manrisai la sanggah na hona risa; seng asup-asup la sanggah manaron na marsik, tapi iondoskon do ai bani Panguhum na pintor in.

²⁴ Iporsan do dousanta ibagas angkula-Ni hubani hayu ai, ase matei hita bani dousa, gabe manggoluh bani hapintoron. Anjaha marhitei uga-Ni ai do malum nasiam.

²⁵ Ai songon biribiri na kahou do nasiam ijia, tapi domma idompakkon nasiam nuan Parmahan anjaha Sijaga tonduy nasiam in.

Pasal Parrumahtanggaon

3 ¹ Sonai homa nasiam parinangon, unduk ma nasiam bani paramangon nasiam, ase porini adong deba na so pambalosi bani Hata in, gabe tartarik uhurni marhaporsayaon marhitei parlahou ni parinangon ai, seng pala marhasoman hata,

² anggo ididah sidea nasiam marparlahou ibagas hasusion ampa biar dompak Naibata.

³ Ulang ma ipajagar-jagar rupani hun darat, marhitei na mangkariting-karitingkon jambulan, na mamakei-makei omas barang na pajenges-jenges pakeian.

⁴ Tapijolma parbagas na ponop ai, na tongtong martonduy na lamlam anjaha na mardamei, ai do na harga bani Naibata.

⁵ Sonin do sapari parinangon na mapansing, na mangarap bani Naibata, somal pajengeskon dirini anjaha unduk bani paramangonni.

⁶ Umpamani si Sarah, ibalosi do si Abraham, anjaha igoran do ia “tuanni.” Anjaha gabe boruni ma nasiam, anggo ihorjahon nasiam na madear, anjaha seng mabiar bani asup-asup aha pe.

⁷ Paramangon pe sonai ma, maruhur ma nasiam mangkasomani sidea, halani galekan do hadirion

ni parinangon. Sangap ma bahen nasiam sidea, halani dihut do sidea hasoman panean bani siberebere hagoluhan na humbani Naibata, ase ulang tarlanglang tonggo nasiam.

Marsitaronon halani Hapintoron

⁸ Na songon rimpunni: Sauhur ma nasiam haganup, sapangahapan, parholong ni uhur bani hasoman, paridop ni uhur, anjaha partoruh ni uhur.

⁹ Ulang ma balaskon nasiam na jahat imbang ni na jahat, risa-risa imbang ni risa-risa, lambin mamasu-masu ma nasiam, ai sihol teanon nasiam do pasu-pasu, ase tardilo nasiam.

¹⁰ Ai ise na holong uhur bani hosahni, anjaha sihol mangidah ari na sonang, iparontihon ma dilahni humbani na jahat, age bibirni ulang ma isahapkon ladung.

¹¹ Isimbili ma hajahaton anjaha ihorjahon na madear; ipindahi ma damei, ai ma iparayak.

¹² Ai hubani paruhur na pintor do pangkawah ni Tuhan in, anjaha bani pangindoan ni sidea do pinggol-Ni; tapi iimbang bohi ni Tuhan in do sihorjahon na jahat.

¹³ Anjaha ise do na manjahati nasiam, anggo na madear iporluhon nasiam?

¹⁴ Tapi anggo manaron nasiam halani hapintoron, na martuah do nasiam ai. Ulang ma mabiar nasiam

bani pambibiari ni sidea, anjaha ulang ma gobir uhur nasiam.

¹⁵ Tapi papansing nasiam ma Kristus Tuhan in ibagas uhur nasiam, tongtong ma nasiam sirsir patorangkon bani haganup halak na manungkun nasiam pasal onjolan ni pangarapan nasiam, tapi marhasoman lamlam ampa hormat ma.

¹⁶ Anjaha marpanggora ni uhur na borsih ma nasiam, ase maila sidea na manukas-nukasi nasiam, na manrisai parlahou nasiam na madear ibagas Kristus.

¹⁷ Ai rahanan ma nasiam manaron na marsik halani horja na madear, anggo sonai rosuh ni Naibata, ulang ma halani horja na masambor.

¹⁸ Ai Kristus pe matei do sahali halani dousa, la parpintor ai halani pargeduk, ase iboban hita hubani Naibata. Na tarbunuh do la ibagas pardagingon, tapi ipagoluh do ibagas partonduyon.

¹⁹ Ibagas tonduy laho do la marambilan bani tonduy na ibagas tutupan ai,

²⁰ ai ma na so mambalosi ijia, sanggah na paimahon lumbang ni uhur ni Naibata bani panorang ni si Noak, sanggah na paulihon parau ai. Halak na otik i parau ai, ualuh halak haganup, maluah do marhitei na manlopusi bah ai.

²¹ Ai do usihan ni pandidion in, na paluahkon nasiam nuan, sedo ai songon na mangambukkon na mabutak humbani angkula, tapi ipindo hita do

ijin humbani Naibata panggora ni uhur na borsih, marhitei parpuho ni Jesus Kristus.

²²I siamun ni Naibata do ia hundul dob laho hu nagori atas; tunduk do hu Bani haganup malekat, kuasa, ampa hagogohon.

Ojur-ujur na Legan ase Margoluh Hadaulaton

4 ¹Ai pe, halani na dob marsitaranon Kristus ibagas pardagingon, uhur sisonai ma gabe sinjata age bani nasiam, ai barang ise na manaron bani pardagingon, maronti do ia mangkorjahon dousa,

²ase ulang be nasiam manggoluh marguru hubani hisap-hisap ni hajolmaon, tapi marguru bani rosuh ni Naibata ma, barang sadiha dokah nari nasiam ibagas goluh on.

³Ai sungkup ma panorang na dob salpu in marpambahenan nasiam domu hubani harosuh ni sipajuh begu-begu, ai ma marparlahou ibagas goluh na so marrantei, hahisapon, parmabukon, parmangan-manganon, parminum-minumon, ampa pambalasion bani gana-gana sihagigihonon ai.

⁴Ai na ganjil ma ai ninuhur ni sidea, na so dihut ai be nasiam mandalankon pambahenan ni sidea na butak anjaha na so margagan ai, gabe manrisai ma sidea.

⁵ Tapi maningon martanggung jawab do holi sidea bani Naibata, na sirsir manguhum na manggoluh ampa na matei.

⁶ On do halani ase iambilankon Ambilan Na Madear age bani na dob matei, ase manggoluh sidea ibagas partonduyon halani Naibata, age pe hona uhum ibagas pardagingon mangihutkon hajolmaonni.

⁷ Tapi domma dohor ujung ni haganup. Ai pe maruhur ma nasiam, anjaha torang ma uhur nasiam martonggo.

⁸ I lobei ni haganup, marsihaholongan botul ma nasiam, ai irungkub holong ni uhur in do buei dousa.

⁹ Marsitamueian ma nasiam, ulang ibagas ungut-ungut.

¹⁰ Marsipadear-dearan ma nasiam marhitei siberebere idop ni uhur na jinaloni bei songon sijolom anakkunsi na bujur bani bagei-bagei ni idop ni uhur ni Naibata.

¹¹ Anggo adong na marsahap songon pangkatahon ni Naibata ma, anggo adong na marugas, domu hubani gogoh na binere ni Naibata ma, ase bani haganupan ai ipasangap Naibata marhitei Jesus Kristus. Bani ma hasangapon ronsi sadokah ni dokahni. Amen.

Marmalas ni Uhur ma age ibagas Pangayak-ayakon

¹² Nasiam hinaholongan, ulang ma pala longang nasiam pasal hamilason in, na roh manguji nasiam, ulang ma pala songon na ganjil in, ninuhur nasiam.

¹³ Tapi malas ma uhur nasiam, anggo saor nasiam bani sitaronon ni Kristus in, ase bani partalar ni hasangapon-Ni ai marmalas ni uhur homa nasiam anjaha marolob-olob.

¹⁴ Martuah do nasiam, anggo hona risa nasiam halani goran ni Kristus, ai sogop do bani nasiam Tonduy Hasangapon, Tonduy ni Naibata.

¹⁵ Ulang ma adong hun tengah-tengah nasiam na manaron halani mamunuh, barang manangko, barang marjahat, barang halani mangurus na so siurusonni.

¹⁶ Barang ise na marsitaronon halani halak Kristen ia, ulang ma maila ia, tapi ipasangap ma Naibata marhitei goran in.

¹⁷ Ai jumpah ma panorangni madabuh uhum, mamungkah humbani Rumah ni Naibata. Ai anggo parlobei hun banta, sonaha ma ujung ni na so mambalosi Ambilan Na Madear, na humbani Naibata?

¹⁸ Ai anggo narus lang maluah halak parpintor, huja ma gakni halak na so daulat anjaha sipardousa ai?

¹⁹ Halani ai, na marsitaronon halani rosuh ni Naibata, iondoskon ma tonduyni hubani

Sipanompa hatengeran in, marhitei na mangkorjahon na madear.

Ojur-ojur bani Sintua

5 ¹ Ase, hupaingat ma sintua-sintua na i tongah-tongah nasiam, songon hasoman sintua anjaha saksi pasal sitoronon ni Kristus, homa siparrupei bani hasangapon na sihol sipatalaron ope,

² “Parmahani nasiam ma hulanan ni Naibata na bani nasiam, ulang songon paksaan, tapi humbani malas ni uhur ma, domu hubani rosuh ni Naibata; ulang ma halani uhur haut, tapi humbani porlu ni uhur ma.

³ Ulang ma songon na mamaksa dompak hasoman na niondoskon bani nasiam, tapi gabe siusihan ma bani na pinarmahan in.

⁴ Jadi, jaloon nasiam ma sortali hasangapon na so ra melus ai, talarhonsi Parmahan Bolon in.

Sipaingat ase Toruh anjaha Totap Maruhur

⁵ Lanjar sonai ma homa nasiam na maposo, unduk ma nasiam bani partua-partua. Haganup ma nasiam margonditkon toruh ni uhur samah nasiam, ai iimbang Naibata do sigijang uhur, tapi ibere do idop ni uhur bani na toruh maruhur.

⁶ Halani ai patoruh nasiam ma diri nasiam hu toruh ni tangan ni Naibata na gogoh in, ase ipagijang nasiam bani panorangni.

⁷ Ompaskon nasiam ma haganup na hinolsohkon nasiam hu Bani, ai isarihon do nasiam.

⁸ Torang ma uhur nasiam anjaha puho ma nasiam, ai mawat-awat do imbang nasiam, sibolis in, songon singa na maraum mangindahi sibondutonni.

⁹ Imbang nasiam ma ia marhitei haporsayaon na toguh, ai ibotoh nasiam do, age haganup sanina nasiam na i sab dunia on ihonai sitaronon na sonai do.

¹⁰ Tapi Naibata, paridop ni uhur in, na mandilo nasiam ibagas Kristus Jesus hu hasangapon-Ni na manongtong in, pauli-ulion-Ni, patotapon-Ni, pargogohan-Ni anjaha pajonamon-Ni do nasiam, dob manaron nasiam tongkin.

¹¹ Bani ma hagogohon ronsi sadokah ni dokahni. Amen.”

Hata Pangujungi ampa Tabi

¹² Marhitei si Siluanus, na huhira hasoman hatengeran ni uhur, hubahen do surat na pondok on bani nasiam, laho pagolpahon anjaha manaksihon, in do tongon idop ni uhur ni Naibata na sintong in, hajongjongan nasiam in.

¹³ Manongos tabi do bani nasiam kuria na i Babel, na tarpilih songon nasiam, sonai homa anakku si Markus.

¹⁴ Marsitabian ma nasiam marhitei summah holong ni uhur. Damei ma bani nasiam haganup na ibagas Kristus.

2 Petrus

Hata Tabi

1 ¹Hun bani si Simon Petrus, juakjuak anjaha apostel ni Jesus Kristus, hubani sagala na dob manjalo haporsayaon, na dos hargani songon na jinalonami, marhitei hapintoron ni Naibatanta ampa Jesus Kristus, Sipaluah in.

²Sai lambin martambah ma bani nasiam idop ni uhur ampa damei, marhitei panandaion nasiam bani Naibata ampa Jesus, Tuhanta in.

Ojur-ojur Marparlahouhon Goluh Hakristenon

³Ibere hagogohon ni hanaibataon-Ni ai do banta sagala na porlu bahen hagoluhon pakon hadaulaton marhitei na itandai hita la, na mandilo hita marhitei hasangapon-Ni ampa hadearon-Ni sandiri.

⁴Marhitei ai ibere do banta bagah-bagah-Ni na maharga ampa na banggal tumang, ase marhitei ai boi nasiam maporus humbani hamagouan na i dunia on, pinaroh ni hisap-hisap, anjaha gabe parrupe i nasiam bani hanaibataon-Ni.

⁵Halani ai, haringgaskon nasiam ma humbani sagala gogoh pataridahkon dear ni parlahou ibagas

haporsayaon nasiam, dob ai hapentaron ma ibagas parlahou na madear ai;

⁶dob ai panrajaion diri ma ibagas hapentaron ai, dob ai hasabaron ma ibagas panrajaion diri ai, dob ai hadaulaton ma ibagas hasabaron ai;

⁷dob ai holong ni uhur bani hasoman ma ibagas hadaulaton ai, dob ai holong bani haganup ma ibagas holong ni uhur bani hasoman ai.

⁸Ai anggo jumpah in bani nasiam anjaha martambah-tambah, seng paturuton-Ni nasiam rayohan anjaha seng marbuah, laho mananda Jesus Kristus, Tuhanta in.

⁹Tapi, bani ise seng jumpah ai, halak na mapitung ma ai, anjaha parpangidah na sompit, na dob lupa bani haborsihon humbani dousa-dousani hinan.

¹⁰Halani ai, nasiam sanina, lambin ringgasni ma nasiam patotapkon pandiloon-Ni ampa pamilihon-Ni bani nasiam, ai anggo ihorjahon nasiam in, seng ra be nasiam tompas.

¹¹Jadi sonin ma unjah bereon-Ni bani nasiam hamasukan hubagas harajaon ni Tuhanta, Jesus Kristus Sipaluah in, na totap sadokah ni dokahni.

¹²Halani ai, tongtong do husurahon pasingatkon ganupan in bani nasiam, age pe domma ibotoh nasiam in, anjaha maronjolan nasiam totap ibagas hasintongan, na dob adong bani nasiam.

¹³ Ai patut do, ninuhurhu, sadokah ibagas lampolampo on ope ahu, pagolpaonku nasiam marhitei singat-singat,

¹⁴ ai hubotoh, podas ma tadingkononku lampolampo on, songon na dob pinabotohkon ni Tuhanta Jesus Kristus bangku.

¹⁵ Halani ai huporluhon do, ase tongtong tarbahen nasiam mardingat in, dob misir ahu.

Hasaksian ni Apostel ai Pasal Kristus

Maronjolan bani na Nididahni ampa Hata Panjahaion

¹⁶ Ai seng turi-turian na piningkiran ni halak na pentar iirikkon hanami, sanggah ipabotohkon hanami bani nasiam hagogohon ampa parroh ni Tuhan Jesus Kristus; tapi ididah matanami sandiri do hasangapon-Ni.

¹⁷ Ai ijalo do hamuliaon ampa hasangapon humbani Naibata Bapa, sanggah na roh Bani humbani hasangapon na majombut ai sora on, "On do Anak-Ku, haholongan ni uhur-Hu, marosuh do uhur-Hu Bani."

¹⁸ In ma sora na ibogei hanami roh hun nagori atas, sanggah rap hanami pakon-Si i dolog na mapansing ai.

¹⁹ Jadi lambin totap ma hata panjahaion in bannami; anjaha dear ma marsijoloman nasiam

hujin songon bani sada lampu na marsinalsal ibagas ianan na golap paima siang ari, anjaha poltak bintang buha siang in ibagas uhur nasiam.

²⁰ On ma parlobei botoh nasiam: Seng jumpah hatorangan ni sagala panjahaion na tarsurat, anggo humbani uhur ni jolma sandiri.

²¹ Ai seng onggga humbani rosuh ni jolma harohan ni panjahaion; tapi binobahon ni Tonduy Na Pansing do, ase marsora jolma in, isuruh Naibata.

Lumba-lumba Pasal Parpodah na Kahou

2 ¹ Tapi adong do hinan nabi sipahulah-hulah i tongah-tongah ni Bangsa Israel, sonai homa i tongah-tongah nasiam adong do guru sipahulah-hulah, na mamboan marponop-ponop podah na parsedahon, pala do parnalangon ni sidea Tuhan na manobus sidea. Marhitei ai iparoh sidea do hamagouan na podas bani sidea sandiri.

² Anjaha buei do na mangihutkon hasumsamon ni sidea, anjaha halani sidea hona risa do pangajaran na sintong in.

³ Anjaha halani uhur haut ni sidea, buaton ni sidea do untung humbani nasiam marhitei hata tipu; humbani sapari nari seng maronti uhum mangonai bani sidea, anjaha seng ipadokah-dokah hamagouan roh bani sidea.

⁴ Ai age malekat na mardousa seng ipaturut-turut Naibata, tapi idabuh do sidea hu nagori

toruh, hu luhung na golap, pajagahon sidea paima paruhuman.

⁵ Anjaha dunia sisapari ai pe seng ipaturut Naibata; tapi iramotkon do si Noak, parambilan hapintoron ai, rap pakon pitu halak nari, sanggah na pinaroh-Ni ai bah na sumbang manrungkub dunia na jahat ai.

⁶ Age huta Sodom ampa Gomora imonsongkon do, laho manguhumi ai, marhitei hasedaon, bahen lumba-lumba bani siparjahat i pudini ai,

⁷ tapi ipaluah do si Lot na pintor ai, na sai marhoru tong ibahen goluh hasumsamon ni parjahat ai.

⁸ Ai marhitei na nididahni ampa na binogeini ari-ari, sai ihoruhon tonduy ni parpintor in do pambahenan ni sidea na so maradat in, sanggah na marianan ia i tongah-tongah ni sidea.

⁹ Ase ibotoh Tuhan in do paluahkon na daulat humbani parlajouan, halak parjahat nani ipajagahon do laho manguhumi ai magira,

¹⁰ tarlobih ma ai halak na mambalosi hisap-hisap pardagingon ni sidea na mabutak ai anjaha na mapas bani si parkuasa. Na garang do sidea, seng hitir anjaha seng maralang-alang manrisai siparhasangapon.

¹¹ Gari malekat-malekat, age pe surungan bani hagogohon ampa kuasa, seng mansahapkon uhum panrisaion dompak sidea i lobei ni Tuhan in.

¹² Ia sidea on, songon binatang na so maruhur do, na laho sitangkapon anjaha sibunuhon ase tubuh.

Sai manrisai do sidea pasal na so niartihon ni sidea, gabe magou songon binatang ai;

¹³ ase ijalo sidea do balos ni pambahenan hajahaton ni sidea ai. Layur-layur ari mangan-mangan, ai do harosuh ni sidea; gok habutakon ampa sihagigihononkon do sidea, marmabuk-mabuk ibagas hisap-hisap ni sidea, sanggah na rap mangan sidea pakon nasiam.

¹⁴ Gok parbangkison do pangkawah ni sidea, seng marnamaronti mambahen dousa. Iompan-ompani do uhur ni halak na galek, maruhur haut do tong sidea. Halak na hona papa do sidea.

¹⁵ Itadingkon sidea do dalan na pintor in, gabe kahou mangirikkon dalan ni si Bileam, anak ni si Beor, na mangkarosuhkon upah na geduk,

¹⁶ tapi na hona ajar halani panlanggaron ni ai, ai marsahapjolma do sada halode na longah, laho manlanglangi sura-sura ni nabi ai.

¹⁷ Bah tubuh na so marbah do sidea, hambun na niombus ni halisungsung; na golap marimpot-impot do iparsirsir bani sidea.

¹⁸ Ai marhitei na mangkatahon hata burnang na lumei, iompan-ompani sidea do halak na baru ope manundalhon halak na marparlahou ibagas hakahouon, marhitei pambalosion bani hisap-hisap pardagingon na so marrantei.

¹⁹ Ibagahkon sidea do hamardekaon, tapi sidea sandiri do jabolon ni hamagouan; ai in na patunduk halak, ai do na marjabolonsi.

²⁰ Ai halak na dob maluah humbani habutakon ni dunia on, marhitei na tinanda ni sidea Tuhan Jesus Kristus, Sipaluah in, hape taralit use hujai anjaha talu, janginan ma hadoban ni ai humbani mungkahni hinan.

²¹ Ai dearan do bani sidea, seng onggga hinan mananda dalan hapintoron in, humbani dobkonsi itanda sidea in, marbalik use humbani titah na mapansing in, na dob pinadas bani sidea.

²² Jumpah do bani sidea hata ni limbaga na sintong on, “Mulak do baliang hubani utah-utahni, anjaha babuy na dob pinaridi mulak do margulu hubagas hubang.”

Parroh ni Tuhan Jesus na Paduahalihon

3 ¹ Nasiam na hinaholongan, on ma surat na paduahon, na husurat bani nasiam, laho mamuhoi uhur na borsih bani nasiam marhitei hata sipaingat,

² ase idingat nasiam hata na dob hinatahon ni nabi-nabi na mapansing in ampa titah ni Tuhan anjaha Sipaluah in marhitei apostel nasiam.

³ On ma na parlobei botohon nasiam: Na roh ma bani ari parpudi sipanrisai, na mansahapkon risa-risa, na mambalosi hisap-hisapni sandiri,

⁴na mangkatahon, “Ija do bagah-bagah pasal parroh-Ni ai? Ai dob matei ompung-ompungta, totap do haganup songon humbani panompaon ni dunia on.”

⁵Tapi ponop do bani sidea, ibagas na sonai pingkiran ni sidea ai, paboa marhitei Hata ni Naibata do ase adong langit sapari, anjaha tanoh on humbani bah anjaha marhitei bah,

⁶lanjar marhitei ai do magou ijia tanoh on, manongnong ibahen bah ai.

⁷Anjaha langit pakon tanoh sisonari, iramotkon do marhitei hata nongkan ai bahen panganon ni apuy, iramotkon do das hubani ari paruhuman pakon hamagouan bani halak parjahat.

⁸Tapi na sada on, ulang ma ponop humbani nasiam, na hinaholongan, “Sada ari bani Tuhan in ai ma doskon saribu tahun, anjaha saribu tahun doskon sadari.”

⁹Seng ipadokah-dokah Tuhan in bagah-bagah-Ni, songon hinatahon ni na deba, tapi lumbang do uhur-Ni mangidah nasiam, ai ipangindo uhur-Ni ulang ma magou namin atap ise pe, tapi das ma haganup tene hu hamubahon ni uhur.

¹⁰Tapi na roh ma ari ni Tuhan in songon panangko, mardorob ma ijai langit in laho maseda, anjaha masarsar ma unsur ni tanoh on halani apuy ai, sonai age tanoh in ampa horja na i atasni mosog ma.

Pangabak na Patut Managam Ari ai

¹¹ Ai pe, anggo na sihol maseda do hape haganupan in, ai lang patut ma goluh nasiam lambin pansing anjaha daulat,

¹² bani na paima-imahon anjaha na siholan nasiam bani parroh ni ari ni Naibata, bani na masarsar ai langit ibahen apuy, anjaha na malala ai unsur-unsur ai ibagas hamilason ai?

¹³ Tapi na paima-imahon do hita bani langit na baru pakon tanoh na baru, ianan ni hapintoron in, domu hubani bagah-bagah-Ni.

¹⁴ Ai pe, nasiam na hinaholongan, halani ai do na pinaima-ima nasiam, porluhon nasiam ma, ase jumpah-Si nasiam seng martikas, lang dong sihataon, ibagas damei.

¹⁵ Hira nasiam ma lumbang ni uhur ni Tuhanta in haluahon bani nasiam, songon na dob sinuratkon ni si Paulus, hasoman haholonganta ai bani nasiam, domu hubani hapentaran na dob binere bani.

¹⁶ Isahapkon do pasal on ibagas haganup suratni. Adong do tongon deba ibagas ai na payah arusan, ai ma na pinalepak ni deba na so maruhur anjaha na so toguh, sonai age bani surat na legan, gabe hamagouanni sandiri do pambahenanni ai.

¹⁷ Ai pe, nasiam na hinaholongan, halani domma ibotoh nasiam hinan in, jaga ma nasiam, ase ulang taruyun nasiam halani hakahouon ni halak

na so martitah in, anjaha madabuh humbani
hajongjongan nasiam na toguh hinan.

¹⁸ Tapi lambin marbanggal ma nasiam ibagas idop ni
uhur ampa panandaion bani Tuhanta Jesus Kristus,
Sipaluah in. Bani ma hasangapon, sonari age ronsi
sadokah ni dokahni!

1 Johannes

Hata Hagoluhan Sinaksihon ni si Johannes

1 ¹Na dob adong humbani mulani, na dob binogeinami, na dob nididah ni matanami, na dob kinawahkonnami, anjaha na dob jinamah ni tangannami, ai ma pasal hata hagoluhan in.

² *(Na dob talar do hagoluhan in, anjaha domma ididah hanami in, gabe isaksihon anjaha ibaritahon hanami bani nasiam hagoluhan na sadokah ni dokahni in, na dob adong hinan i lobei ni Bapa in anjaha ipatalar do bannami).*

³Na nididahnami anjaha na binogeinami ai, in do ibaritahon hanami age bani nasiam, ase marparsaoran homa nasiam rap pakon hanami. la parsauranta in, ai ma parsauran pakon Bapa in ampa pakon Anak-Ni Jesus Kristus.

⁴Anjaha isuratkon hanami pe on bani nasiam, ase gok do malas ni uhurta.

Marparlahou ibagas na Lihar

Pasal Hasasapan ni Dousa

⁵Anjaha on do barita na dob binogeinami hun Bani anjaha binaritahon bani nasiam, “Panondang do

Naibata, anjaha aha pe lang dong na golap ibagas la.”

⁶Anggo ihatahon hita, domma saor hita hu Bani, hape mardalan hita ibagas na golap, parladung do hita ai, anjaha seng ihorjahon hita hasintongan in.

⁷Tapi, anggo marparlahou hita ibagas haliharon, songon la ibagas na lihar in, saor do hita samah hita, anjaha ipaborsih daroh ni Jesus, Anak-Ni in do hita humbani sagala dousa.

⁸Anggo ihatahon hita, seng dong dousanta, ipaoto-oto hita do dirinta, anjaha seng ibagas hita hasintongan in.

⁹Anggo isopotkon hita dousanta, hatengeran ni uhur anjaha bonar do la manasap dousanta ampa paborsih hita humbani haganup hagedukon.

¹⁰Anggo ihatahon hita, seng dong dousanta, parladung do la ibahen hita, anjaha seng ibagas hita hata-Ni.

Kristus do Sipangapiti Banta

2¹Nasiam anakku, husuratkon do on bani nasiam, ase ulang mardousa nasiam. Anggo adong na mardousa, adong do Sipangapiti banta bani Bapa in, in ma Jesus Kristus, Parpintor in.

²Ia do pardearan pasaloseihon sagala dousanta, tapi seng pitah dousanta, tapi dihut do dousa ni haganup dunia on.

Tanda ni na Mananda Naibata

³ Hunjon do botohonta, na dob itanda hita la, anggo ihorjahon hita titah-Ni.

⁴ Na mangkatahon, “Hutanda do la,” tapi seng ihorjahon titah-Ni, parladung do ai, anjaha seng dong hasintongan in ibagas ia.

⁵ Tapi na marramotkon hata-Ni, na dob tongon ma gok holong ni Naibata ibagas diri-Ni. Hunjin ma ibotoh hita, na dob ibagas la hita.

⁶ Na mangkatahon, marianan ia ibagas Naibata, maningon iparlahouhon ma songon parlahou-Ni ai.

⁷ Nasiam na hinaholongan, sedo titah na baru na husurat on bani nasiam, tapi titah na dob dokah do, na dob adong bani nasiam humbani mungkahni. Titah na dob dokah do hata na dob binogei nasiam.

⁸ Sonai pe, titah na baru do na husuratkon bani nasiam, anjaha sintong do in ibagas Kristus ampa ibagas nasiam, ai na salpu ma na golap in, anjaha domma marsinalsal Panondang na Sintong in.

⁹ Halak na mangkatahon, ibagas na lihar in ia, hape idomdomi hasomanni, ibagas na golap in ope tong ia.

¹⁰ Halak, na mangkaholongi hasomanni, ai do na marianan ibagas na lihar in, seng parsangsian ia.

¹¹ Tapi halak na mardomdom ni uhur bani hasomanni, ibagas na golap do ai, mardalan ibagas

na golap do ia ai, anjaha seng ibotoh na laho huja do ia, ai ipapitung na golap in do matani.

Sirang hun Dunia on

¹² Hubahen surat on bani nasiam dakdanak, halani domma sasap dousa nasiam halani goran-Ni in.

¹³ Hubahen surat on bani nasiam bapa, halani domma itanda nasiam Ia, na adong humbani mulani in. Hubahen surat on hubani nasiam anak garama, halani domma italuhon nasiam parjahat in.

¹⁴ Hubahen surat ondi hubani nasiam dakdanak, halani domma itanda nasiam Bapa in. Domma hubahen surat ondi hubani nasiam bapa, halani domma itanda nasiam Ia, na adong humbani mulani in. Domma hubahen surat ondi bani nasiam anak garama, halani margogoh nasiam, anjaha marianan hata ni Naibata ibagas nasiam, anjaha halani domma italuhon nasiam parjahat in.

¹⁵ Ulang ma haholongi nasiam dunia on, age na ibagas dunia on. Anggo ihaholongi halak dunia on, seng dong ibagas ia holong ni uhur ni Bapa in.

¹⁶ Ai sagala na i dunia on, ai ma rosuh-rosuh ni daging, rosuh-rosuh ni mata ampa na mangeljengkon haadongan, seng humbani Bapa in ai, tapi humbani dunia on do.

¹⁷ Anjaha na laho salpu do dunia on ampa rosuh-rosuhni, tapi sihorjahon rosuh ni Naibata, totap do ronsi sadokah ni dokahni.

Lumba-lumba Pasal Antikristus

¹⁸ Nasiam dakdanak, panorang parpudi ma nuan; anjaha songon na dob ibogei nasiam, na roh ma Antikristus, anjaha sonari domma buei Antikristus; hunjin boi botohonta panorang parpudi ma nuan.

¹⁹ Hun tongah-tongahta do harohan ni sidea, tapi seng hasomanta sidea; ambit hasomanta sidea, rap pakon hita ma sidea tongtong. Tapi maningon talar do, na so hasomanta sidea haganup.

²⁰ Anjaha na dob niminikan ni Na Pansing in do nasiam, anjaha haganup do nasiam mambotoh in.

²¹ Hubahen pe surat hubani nasiam, sedo halani na so ibotoh nasiam hasintongan in, tapi halani domma ibotoh nasiam in, anjaha halani sagala ladung seng humbani hasintongan in.

²² Ise do siparladung, anggo lang halak na marnalangkon, paboa sedo Kristus in Jesus? In ma Antikristus, na marnalangkon Bapa in ampa Anak in.

²³ Sagala na marnalangkon Anak in, seng adong bani Bapa in, halak na mangakui Anak in, adong do bani Bapa in.

²⁴ Totap ma marianan ibagas nasiam, na dob binogei nasiam humbani mulani in. Anggo totap marianan ibagas nasiam na binogei nasiam humbani mulani in, totap ma marianan age nasiam ibagas Anak in ampa ibagas Bapa in.

²⁵ Anjaha ia bagah-bagah, na pinarbagah-bagah-Ni ai banta, in ma hagoluhan na sadokah ni dokahni.

²⁶ Husuratkon do on bani nasiam, ai ma pasal halak na pakahouhon nasiam.

²⁷ Anjaha pasal nasiam, marianan do totap ibagas nasiam pamminakion, na dob jinalo nasiam hun Bani. Anjaha seng pala porlu bani nasiam, ase ajaran ni atap ise pe nasiam. Sintong do na niajarhon ni pamminakion in haganup bani nasiam, seng dong ladung ijin, anjaha songon na niajarhon ai bani nasiam, totap ma nasiam ibagas la.

²⁸ Ai pe, nasiam dakdanak, totap ma nasiam ibagas la, ase talar honsi la marmalas ni uhur hita, ulang ma maila dompak-Si bani parroh-Ni ai.

²⁹ Anggo ibotoh nasiam na pintor do la, botoh nasiam ma, paboa sagala na mangkorjahon hapintoron, ai ma na dob tubuh hun Bani.

Partinandaan ni Anak ni Naibata Marimbang Anak ni Sibolis

3 ¹ Tonggor nasiam ma bangga ni holong ni uhur na binere ni Bapa in banta, gabe targoran do hita anak ni Naibata, anjaha in do hita tongon. Halani ai, lang itanda dunia on hita, halani seng itanda la.

² Nasiam hinaholongan, anak ni Naibata do hita nuan, anjaha seng talar ope, barang na gabe aha do hita, tapi ibotoh hita do, anggo dob talar la,

usih ma hita songon-Si, ai idahonta ma la, sonaha la sasintongni.

³ Anjaha ganup, na marpangarapan sonin Bani, ipapansing ma dirini, songon la na pansing ai.

⁴ Ganup na mangkorjahon dousa, panlanggar do ai homa bani titah, ai dousa, ai ma panlanggaron bani titah.

⁵ Ibotoh nasiam do, laho mambuat dousanta do la ase roh; seng adong dousa ibagas la.

⁶ Ganup na marianan ibagas la, seng mardousa; ganup sipardousa lape onggga ididah la, anjaha itanda pe lang la.

⁷ Nasiam dakdanakku, ulang ma ipaoto-oto halak nasiam. Na mangkorjahon hapintoron, ai do na pintor, songon la na pintor ai.

⁸ Halak sihorjahon dousa ai ma humbani sibolis, ai humbani mulani do mardousa sibolis in. Halani on do ase ipatar Anak ni Naibata, ai ma laho mantedahon horja ni sibolis.

⁹ Ganup, na dob tubuh humbani Naibata, seng mardousa, ai marianan do totap bani bonihni ai. Seng tarbahensi mardousa, ai na dob tubuh do ia humbani Naibata.

¹⁰ Hunjon do boi tandaon anak ni Naibata pakon anak ni sibolis, ganup na so mangkorjahon hapintoron seng humbani Naibata ai, sonai homa na so marholong ni uhur bani hasomanni.

Holong do Padiparhon Hita hu Hagoluhan

Domdom Mambahen Totap ibagas Hamatean

¹¹ Ai on do barita na binogei nasiam humbani mulani, ase marsihaholongan hita.

¹² Ulang ma songon si Kain, na roh humbani na jahat ai, gabe ibunuh anggini. Aha do halani ase ibunuh ia? Halani jahat horjani, tapi horja ni anggini ai pintor.

¹³ Ulang ma longang uhur nasiam sanina, anggo idomdomi dunia on nasiam.

¹⁴ Ibotoh hita do, na dob mandipar hita hun hamatean hu hagoluhan, halani holong uhurta bani hasoman. Na so parholong ni uhur, marianan do totap ibagas hamatean.

¹⁵ Barang ise na mardomdom bani hasomanni, sibunuhjolma do ai, anjaha ibotoh nasiam do, na so marianan totap hagoluhan na sadokah ni dokahni bani sagala sibunuhjolma.

¹⁶ Hunjon do itanda hita holong ni uhur in, ai ma marhitei na binere-Ni ai hosah-Ni mangkopkop hita. Hita pe patut do bereonta hosahta mangkopkop hasomanta.

¹⁷ Anggo adong halak na bayak, anjaha ididah hurangan hasomanni, hape itutup labah ni uurni dompaksi, ija ma boi totap marianan holong ni uhur ni Naibata ibagas ia?

¹⁸ Nasiam dakdanaku, ulang ma hatanta pakon dilahta mangkaholongi, tapi marhitei pambahenan ma ampa hasintongan.

**Malas ni Uhur na Roh humbani
Tenger ni Uhur bani Naibata**

¹⁹ Hunjon ma botohonta, paboa humbani hasintongan hita, anjaha ipatenger hita uhurta i lobeini,

²⁰ sanggah na manosal uhurta ibagas, “Banggalan do Naibata humbani uhurta anjaha ibotoh haganup.”

²¹ Nasiam hinaholongan, anggo seng isalahkon uhurta hita, marhinsah ni uhur do hita i lobei ni Naibata.

²² Anjaha barang aha pe ipangindo hita, jaloonta do hun Bani, halani iramotkon hita titah-Ni, anjaha ihorjahon hita rosuh ni uhur-Ni.

²³ Anjaha on do titah-Ni, ase porsaya hita bani goran ni Anak-Ni Jesus Kristus, anjaha marsihaholongan hita, songon na dob tinonahkon-Ni ai banta.

²⁴ Halak na manramotkon titah-Ni, ai do na marianan ibagas la, anjaha Naibata ibagas ia. Anjaha hunjon do ibotoh hita, na dob marianan la ibagas hita, ai ma humbani Tonduy in, na dob binere-Ni banta.

**Partinandaan ni Tonduy ni Naibata
Marimbang Tonduy ni Antikristus**

4¹ Nasiam hinaholongan, ulang ma haganup tonduy haporsayai nasiam, tapi uji nasiam ma tonduy in, atap na humbani Naibata do in, ai domma buei nabi sipahulah-hulah roh hu dunia on.

² Hunjon ma tandaon nasiam Tonduy ni Naibata, “Ganup tonduy, na mangakuhon, na dob roh Jesus Kristus ibagas daging, ai ma na humbani Naibata.”

³ Anjaha ganup tonduy, na so mangakui Jesus, seng humbani Naibata in. In ma tonduy ni Antikristus, na dob ibogei nasiam pasal parrohni, anjaha domma i dunia on ia nuan.

⁴ Nasiam dakdanakku, humbani Naibata do nasiam, anjaha domma italuhon nasiam sidea, ai banggalan do la na ibagas nasiam, humbani na ibagas dunia on.

⁵ Hun dunia on do sidea, halani ai sahap parduniaon do sahap ni sidea, anjaha itangihon dunia on do sidea.

⁶ Hita nani humbani Naibata do. Halak na mananda Naibata, ai do na manangihon hita, ise na so humbani Naibata, ai do na so manangihon hita. Hunjon do tandaonta Tonduy Hasintongan ampa tonduy sipaoto-oto.

Holong ni Uhur do Padohorhon Jolma bani Naibata

⁷ Nasiam hinaholongan, marsihaholongan ma hita, ai humbani Naibata do haholongan in, anjaha ganup na marholong ni uhur, ai ma na dob tubuh humbani Naibata anjaha itanda do Naibata.

⁸ Halak na so marholong ni uhur, seng itanda Naibata; ai Naibata ai ma haholongon.

⁹ Hunjon do gabe talar holong ni uhur ni Naibata banta, ai ma humbani na dob sinuruh-Ni Anak-Ni na sasada in hu dunia on, ase manggoluh hita marhiteihon-Si.

¹⁰ Ibagas on do haholongan ai, ai ma, sedo hita na mangkaholongi Naibata, tapi la do na mangkaholongi hita, anjaha isuruh do Anak-Ni bahen pardearan pasaloseihon dousanta.

¹¹ Nasiam na hinaholongan, anggo sonin ma holong ni uhur ni Naibata banta, maningon do age hita marsihaholongan samah hita.

¹² Seng dong atap ise na onga mangidah Naibata. Anggo marsihaholongan samah hita, marianan ma Naibata ibagas hita, anjaha gok ma holong-Ni in ibagas hita.

¹³ Hunjon ma ibotoh hita, na marianan hita ibagas la, anjaha la ibagas hita, ai ma halani na dob binere-Ni ai banta humbani Tonduy-Ni in.

¹⁴ Domma ididah anjaha isaksihon hanami, paboa domma isuruh Bapa in Anak-Ni, ai ma Sipaluah dunia on.

¹⁵ Barang ise na mangakui, Jesus do Anak ni Naibata, totap ma marianan Naibata ibagas ia anjaha ia ibagas Naibata.

¹⁶ Anjaha domma ibotoh anjaha ihaporsayai hita pasal holong ni uhur ni Naibata banta. Naibata do haholongan in, anjaha halak na totap ibagas holong, ai do na totap ibagas Naibata, anjaha Naibata ibagas ia.

¹⁷ Ijai ma gok dear ni holong ai ibagas hita, pala marhinsah ni uhur hita bani ari paruhuman ai, ai songon-Si sonai do homa hita i dunia on.

¹⁸ Seng dong biar ibagas holong, tapi ipadaoh holong na dob gokan dear ai do biar, ai marisi uhum do biar, anjaha halak parbiar, seng gokan dear ibagas holong ni uhur.

¹⁹ Maruhur holong ma hita, ai parlobei do la mangkaholongi hita.

²⁰ Anggo adong halak na mangkatahon holong uhurni bani Naibata, hape idomdomi hasomanni, parladung do ai. Ai anggo seng ihaholongi hasomanni na nididahni, Naibata na so nididahni pe, seng boi haholonganni.

²¹ On do titah na ijalo hita hun Bani, “Na mangkaholongi Naibata, maningon haholonganni do homa saninani.”

Haporsayaon do na Manaluhon Dunia on

5 ¹ Ganup na porsaya, Jesus do Kristus, ai ma na dob tubuh humbani Naibata, anjaha ganup na mangkaholongi la, na manubuhkon-Si, holong do homa uhur-Ni bani halak na dob tubuh hun Bani.

² Hunjon do ibotoh hita, na dob holong uhurta bani Anak ni Naibata, anggo holong uhurta bani Naibata anjaha ihorjahon hita titah-Ni.

³ Ai on do holong ni uhur bani Naibata, anggo idalankon hita titah-Ni, anjaha seng borat titah-Ni in.

⁴ Ai sagala na dob tubuh humbani Naibata, ai do na manaluhon dunia on. Haporsayaonta, in do na dob monang manaluhon dunia on.

⁵ Ise do na manaluhon dunia on, anggo lang na porsaya, paboa Jesus do Anak ni Naibata?

Hasaksian ni Naibata Pasal Jesus, Anak-Ni in

⁶ Ia do in, na dob roh marhitei bah pakon daroh, ai ma Jesus Kristus, seng pitah ibagas bah, tapi ibagas bah ampa daroh do. Anjaha Tonduy in do na manaksihon, ai Tonduy in do hasintongan.

⁷ Ai tolu do na manaksihon,

⁸ ai ma Tonduy in, bah in ampa daroh in, anjaha sada do na tolu in.

⁹ Ia hasaksian humbani jolma ijalo hita do, tapi banggalan do hasaksian na humbani Naibata,

ai hasaksian na humbani Naibata do on, na sinaksihon-Ni pasal Anak-Ni in.

¹⁰ Na porsaya bani Anak ni Naibata, ijolom do hasaksian in. Na so porsaya bani Naibata, ibahen do la parladung, halani lang porsaya ia bani na sinaksihon ni Naibata pasal Anak-Ni in.

¹¹ Anjaha on do na sinaksihonni ai, ai ma, na dob ibere Naibata do banta hagoluhan na sadokah ni dokahni, anjaha ibagas Anak-Ni in do hagoluhan in.

¹² Simada Anak in, bani do hagoluhan in, na so simada Anak ni Naibata, seng bani hagoluhan in.

¹³ Ase husurat on bani nasiam na porsaya bani goran ni Anak ni Naibata, ai ma, ase ibotoh nasiam, na dob bani nasiam do hagoluhan na sadokah ni dokahni.

Pasal Tonggo ampa Parsaoran pakon Naibata ibagas Jesus Kristus

¹⁴ Anjaha on do hinsah ni uhurta na dong banta i lobeini, "Anggo ipindo hita atap aha domu hubani rosuh ni uhur-Ni, itangihon do hita.

¹⁵ Anjaha, anggo ibotoh hita, itangihon do hita pasal atap aha pe na pinindonta, jadi ibotoh hita ma, na tongon ma jumpah hita na pinindonta ai hun Bani.

¹⁶ Anggo ididah sada halak hasomanni mardousa, na so marujung hu hamatean, martonggo ma ia, jadi bereon-Ni ma bani hagoluhan, ai ma bani sipardousa, na so marujung hu hamatean ai.

Adong do dousa, na marujung hu hamatean, seng huhatahon, ase itonggohon anggo ai.

¹⁷ Sagala hagedukon, dousa do ai, anjaha adong do dousa, na so marujung hu hamatean.

¹⁸ Ibotoh hita do, na so mardousa sagala halak na dob tubuh humbani Naibata, tapi marsijoloman bani Naibata do halak, na dob tubuh hun Bani, anjaha seng tarkahua parjahat in ia.

¹⁹ Ibotoh hita, na humbani Naibata do hita, anjaha ganup dunia on ibagas kuasa ni hajahaton do.

²⁰ Tapi ibotoh hita do, na dob roh do Anak ni Naibata, anjaha ibere do uhur banta, ase itanda hita la na sintong in. Anjaha ibagas la na sintong in do hita, ibagas Anak-Ni Jesus Kristus. Ia do Naibata na sintong in ampa hagoluhan na sadokah ni dokahni.

²¹ Nasiam dakdanakku, jaga nasiam ma diri nasiam dompak sisombahon na lepak.”

2 Johannes

Hata Tabi bani Inang na Porsaya ampa bani Dakdanakni

1 ¹ Hun bangku, sintua in, hubani inang na tarpilih in, ampa dakdanakni, na huhaholongi ibagas hasintongan, seng ahu tumang tene, tapi dihut do haganup na dob mananda hasintongan in,

² halani hasintongan na marianan ibagas hita, anjaha na mangkasomani hita ronsi sadokah ni dokahni.

³ Ihasomani idop ni uhur, parontou ni uhur ampa damei ma hita, humbani Naibata Bapa ampa humbani Jesus Kristus, Anak ni Bapa in, marhitei hasintongan ampa haholongon.

Parlahou ibagas Hasintongan

⁴ Malas tumang do uhurhu halani jumpah ahu i tongah-tongah ni anakmu na marparlahou ibagas hasintongan domu hubani titah, na dob ijalo hita humbani Bapa in.

⁵ Anjaha sonari, mangindo ma ahu bamu inang na pinarsangapan, sedo songon titah na baru husuratkon bamu, tapi na dob dong banta humbani mulani do, “Marsihaholongan ma hita samah hita.”

⁶ Anjaha on do holong ni uhur in, ase marparlahou hita domu hubani titah-Ni in. On ma titah in, songon na dob ibogei nasiam humbani mungkahni, ase ibagas ai nasiam marparlahou.

Lumba-lumba dompak Parpodah na Kahou

⁷ Ai domma bingkat buei parpodah na kahou roh hu dunia on, na so mangakui Jesus Kristus roh ibagas daging. In ma parpodah na kahou anjaha Antikristus in.

⁸ Jaga nasiam ma diri nasiam, ase ulang magou humbani nasiam na dob hinorjahon nasiam, tapi jumpahan upah na gok ma nasiam.

⁹ Ganup na manadingkon na so totap ibagas pangajaran ni Kristus, seng parrupe ai bani Naibata. Na totap ibagas pangajaran in, in do parrupe ai bani Bapa in ampa Anak in.

¹⁰ Anggo adong na roh bani nasiam, na so mamboan pangajaran on, ulang ma jalo nasiam ia hu rumah, anjaha ulang ma tabi nasiam ia.

¹¹ Ai barang ise na manabisi, na dihut ma ai bani horja hajahatonni ai.

¹² Buei do namin na sihol suratkononku bani nasiam, tapi seng marosuh uhurhu marhitei kortas ampa tinta tumang, huarap do boi ahu roh manjumpahkon nasiam, ase boi dumpar bohi bei marsahap, ase gok malas ni uhurta.

¹³ Manongos tabi do bamu anak ni saninamu, na tarpilih in.

3 Johannes

Tabi bani si Gayus

1 ¹Hun bangku, sintua in, hubani si Gayus, na hinaholongan, na huhaholongi ibagas hasintongan.

²Ham na hinaholongan, iparsinta uhurhu do, ase horas anjaha jorgit ham ibagas haganup, domu hubani hajorgiton ni tonduymu.

Pasal Partamueion

³Malas tumang do uhurhu, sanggah na roh hasoman-hasomanta, anjaha isaksihon sidea do pasal hasintongan na adong bamu, sonaha ham marparlahou ibagas hasintongan.

⁴On do malas ni uhurhu sibanggalan, ai ma, anggo hubogei marparlahou anakku ibagas hasintongan.

⁵Ham na hinaholongan, dear do pambahenmu in bani hasoman-hasoman ampa bani halak na legan.

⁶Isaksihon sidea do holong ni uhurmu i lobei ni kuria in. Dear ma in anggo ipabingkat ham sidea bani pardalanan ni sidea, domu hubani rosuh ni Naibata.

⁷ Ai halani goran in do sidea bingkat, anjaha seng dong ijalo sidea atap aha pe humbani halak sipajuh begu-begu.

⁸ Halani ai, patut do jaloonta halak sisonin, ase hasoman parhorja hita bani hasintongan in.

⁹ Manongos surat do ahu otik bani kuria in, tapi lang ijalo si Diotrepes hanami, ai ma na sihol sigijangan ai humbani sidea ninuhurni.

¹⁰ Halani ai, anggo roh ahu, tarsingatanku ma pambahenanni ai, ai ma na pasambor-samborhon hanami marhitei hata-hata, anjaha seng sonang uhurni singgan sonai tumang, manjua do ia manjalo sanina in, anjaha ilanglangi na sihol manjalo, ipabali humbani kuria in.

¹¹ Ham na hinaholongan, ulang ma tiru na masambor, tapi na madear ma. Hun bani Naibata do halak na mangkorjahon na madear, tapi sihorjahon na masambor seng onga ididah ai Naibata.

¹² Jumpahan hasaksian do si Demetrius humbani haganup, ampa humbani hasintongan in sandiri, sonai homa hun bennami, anjaha ibotoh ham do, sintong do hasaksian na hun bennami in.

Hata Tabi Parujangan

¹³ Buei do namin sisuratkononku bamu, tapi seng marosuh uhurhu manurat bamu marhitei tinta ampa panurat.

¹⁴ Tapi arap do uhurhu podas ham boi idahonku, jadi boi ma hita padumpar bohi marsahapi. (13-15) Damei ma bamu. Manongos tabi do bamu hasoman-hasoman in. Padas ham tabingku bani hasoman-hasoman in sada-sada!

Judas

Lobei ni Hata

1 ¹ Hun bani si Judas, juakjuak ni Jesus Kristus, sanina ni si Jakobus, hubani na tardilo in, na hinaholongan ibagas Naibata Bapa, anjaha na niramotkon bani Jesus Kristus.

² Lambin igoki ma bani nasiam idop ni uhur, damei ampa holong!

Lumba-lumba dompak Parpodah na Kahou

³ Nasiam hinaholongan, sanggah na marponkut ni uhur ahu mambahen surat bani nasiam pasal haluahon parriapanta in, huahap tarpaksa do ahu pagolpa nasiam marhitei surat, ase maruntol nasiam mangkopkop haporsayaon in, na dob sah iondoskon hubani halak na mapansing.

⁴ Ai adong do deba halak, na dob padomuhon dirini sip-sip bani nasiam, ai ma halak, na dob dokah hinan itontuhon bani uhum on, na dob tarsurat hinan, “Na so daulat, na paubahkon idop ni uhur ni Naibata hubani goluh na so manrantei, anjaha na marnalangkon Jesus Kristus, Raja ampa Tuhanta sisada-sada in.”

⁵ Sihol do pasingatonku nasiam, age pe domma torang ibotoh nasiam ganupan in, “Tuhan in, na dob paluahkon bangsa-Ni hun Tanoh Masir, iboiskon do use na so porsaya ai.

⁶ Malekat-malekat pe, na so manramotkon jabatanni, na manadingkon iananni hinan, ipajagahon do ibagas hagolapan marhitei gari na manongtong das hubani ari uhum na banggal in.

⁷ Usih songon Sodom ampa Gomora ampa huta na inggot hujai, na marhabutakon songon sidea, anjaha na mandalankon hisap-hisap bani na tinompa na legan, gabe usihan lumba-lumba marhitei na bois sidea ibahen apuy sisadokah ni dokahni.

⁸ Anjaha sonai do homa sidea on, marhitei nipi-nipini ibutaki do dagingni, mapas uhurni bani siparkuasa anjaha irisai na sangap-sangap.”

⁹ Ia si Mikael, sintua ni malekat in, sanggah na maringor anjaha marsual ia pakon sibolis pasal bangkei ni si Musa, seng pag ia mandabuh uhum paminsangon dompak sibolis in, tapi ihatahon do, “Tuhan in ma na maminsang ho.”

¹⁰ Tapi anggo sidea, manrisai do pasal na so binotohni, tapi pambotoh ni sidea, songon na adong bani binatang na so maruhur in, na roh humbani biakni hinan, ai do mangagou sidea.

¹¹ Bursik ma sidea, ai idalani sidea do dalan ni si Kain, ai mayub do sidea halani upah sipaoto-oto ni

si Bileam, anjaha magou marhitei panlawanon na usih hubani panlawanon ni si Kora.

¹² Songon tikas do sidea sanggah marsipanganon haholongan nasiam, na so maila hisapan mangan rap pakon nasiam, na pamombur-mombur dirini sandiri, hambun na so marbah, na sinompul ni logou do sidea, hayu na melus, na so marbuah, na dob dua hali matei, na dob mabungkar;

¹³ doskon gilumbang ni laut na liar do sidea, na margubohkon hilaonni sandiri, bintang na kahou, golap na marimpot-impot do ipasirsir bani sidea ronsi sadokah ni dokahni.

¹⁴ Pasal sidea do homa manjahai si Henok, papitusundutkon humbani si Adam, nini, "Tonggor ma, roh do Tuhan in marhasoman Na Pansing-Ni, marlaksa-laksa,

¹⁵ manguhumi haganup ampa maminsang haganup halak na so daulat halani pambahenan ni sidea na so daulat ai ampa halani haganup hata panlawanon ni sidea na so daulat dompak-Si."

¹⁶ Sidea, ai ma halak na marungut-ungut, na mamurai sombuh ni pargoluhonni, na mansuhun-suhuni hisap-hisapni, parhata sumbang, na pamantin-mantin parsahap laho mambuat untung.

Ojur-ojur Sipatoguh Uhur

¹⁷ Tapi nasiam, hinaholongan, ingat nasiam ma hata na dob nilumbahon ni apostel ni Tuhanta Jesus Kristus.

¹⁸ Nini sidea do bani nasiam, “Bani panorang parpudi adong ma sipanrisai, na mambalosi hisap-hisapni na jahat ai.”

¹⁹ Sidea ai ma sipamolah-molah, jolma pardunia on, na so sipartonduy.

²⁰ Tapi, nasiam na hinaholongan, pauli-uli nasiam ma diri nasiam i atas ni haporsayaon nasiam na panging sahalian in, anjaha martonggo ma nasiam ibagas Tonduy Na Panging.

²¹ Ramotkon nasiam ma diri nasiam ibagas holong ni uhur ni Naibata, anjaha paima-ima nasiam ma idop ni uhur ni Tuhanta Jesus Kristus, na mamboan nasiam hu hagoluhan na sadokah ni dokahni.

²² Maridop ni uhur ma nasiam bani na ganggu maruhur,

²³ anjaha paluah nasiam ma sidea marhitei na manrintaksi humbani apuy, na legan use idopi nasiam ma marhasoman biar, magigi age bani hiou na dob mabutak halani dagingni.

²⁴ Tapi Bani ma, na margogoh manramotkon nasiam ase ulang tompas, ampa na pajongjongkon nasiam marolob-olob, lang martikas i lobei ni hasangapon-Ni ai,

²⁵ ai ma Naibata na sasada in, na paluahkon hita marhitei Jesus Kristus, Tuhanta in, Bani ma hasangapon, hamuliaon, hagogohon ampa kuasa humbani mula ni mulani, age nuan, ronsi sadokah ni dokahni. Amen.

Pangungkabon

Hata Parlobei

1 ¹ On ma pangungkabon ni Jesus Kristus, na binerehon ni Naibata hu bani, laho patuduhkon hubani juakjuak-Ni na laho podas masa; jadi isuruh ma malekat-Ni pabotohkon ai bani juakjuak-Ni, si Johannes.

² Isaksihon do hata ni Naibata pakon hasaksian pasal Jesus Kristus, ai ma haganup na dob nididahni.

³ Martuah ma na mambasa pakon na mambogei hata ni panjahaion on, na marimbagaskon na tarsurat ibagas on, ai dohor ma panorangni.

Tabi ni si Johannes bani na Pitu Kuria

⁴ Humbani si Johannes hubani na pitu kuria i Asia, Idop ni uhur ma bani nasiam pakon damei hun Bani, na dong sonari, na dob dong hinan ampa na laho roh, pakon humbani tonduy na pitu na i lobei ni hotak-Ni,

⁵ ampa humbani Jesus Kristus, saksi na bonar in, na parlobei tubuh humbani na matei, sigomgom sagala raja ni dunia on. Ia, na mangkaholongi hita anjaha na paluahkon hita humbani dousanta marhitei daroh-Ni,

⁶ na manjadihon hita gabe harajaon hamalimon bani Naibata Bapa-Ni: Bani ma hasangapon pakon hagogohon ronsi sadokah ni dokahni! Amen.

Tongon do Roh use Tuhan Jesus

⁷ Tonggor ma, na roh ma la marhasoman hambun, anjaha idahon ni sagala mata ma la, sonai homa sidea na mamantom-Si; jadi mandoruh ma sagala bangsa na i tanoh on marhalani-Si. Sonai ma tongon. Amen.

⁸ ‘Ahu do Alpa pakon Omega, Bonani pakon Ujungni,’ nini Tuhan Naibata, ‘Na dong sonari, na dob dong hinan pakon na laho roh, Pargogoh Na So Tarimbang.’

Pangungkabon bani si Johannes i Pulou Patmos

⁹ Ahu si Johannes, sanina nasiam anjaha hasoman nasiam ibagas sitaronon pakon ibagas harajaon ampa ibagas hasabaron ibagas Jesus Kristus; i Pulou Patmos do ahu ijia halani hata ni Naibata pakon halani panaksihon bani Jesus.

¹⁰ Ibagas Tonduy do ahu bani ari ni Tuhan in; jadi hubogei ma i pudingku sora na maling songon sora ni tarompit,

¹¹ na mangkatahon, “Atap aha na nididahmu, suratkon ma in bani sada buku anjaha tongoskon ma bani kuria na pitu ai, ai ma Epesus, Simirna,

Pergamon, Tiatira, Sardes, Piladelpia, pakon Laodikea.”

¹² Jadi marhusor ma ahu dompak sora na marsahap pakon ahu ai. Sanggah na marhusor ai ahu, huidah ma pitu parsuluhan omas.

¹³ Anjaha i tengah-tengah ni parsuluhan ai adong ma sada songon Anak ni Jolma, na marbaju ganjang das hu nahei-Ni anjaha na margondit omas bani tonton-Ni.

¹⁴ Lopak do ulu-Ni pakon jambulan-Ni songon ambulu ni biribiri silopak, songon salju, anjaha songon gara ni apuy do ia mata-Ni.

¹⁵ Nahei-Ni songon tombaga na ilala ibagas panloburan, sora-Ni songon parhasak ni bah banggal.

¹⁶ Ijolom do pitu bintang ibagas tangan-Ni siamun, anjaha humbani pamangan-Ni luar do podang sidua mata na marot, anjaha bohi-Ni marsinalsal songon mata ni ari sanggah hadetenganni.

¹⁷ Sanggah huidah la, tompas ma ahu songon na matei i lobei ni nahei-Ni. Jadi itampeihon ma tangan siamun-Ni hu bangku, nini ma, “Ulang mabiar! Ahu do Na Parlobei pakon Na Parpudi,

¹⁸ anjaha na manggoluh. Na dob matei do Ahu, anjaha tonggor ma, na manggoluh do Ahu ronsi sadokah ni dokahni, anjaha Bangku do anakkunsi ni hamatean pakon nagori toruh.

¹⁹ Ase suratkon ma na ni idahmu, ai ma na masa sonari, age na laho masa ope i pudi ni on.

²⁰ Anjaha on do rusia pasal bintang na pitu, na nididahmu bani tangan siamun-Ku pakon parsuluhan omas na pitu in: la bintang na pitu in, in ma malekat ni kuria na pitu in, anjaha na pitu parsuluhan in, in ma na pitu kuria in.”

Surat hubani Kuria Epesus

2 ¹ “Suratkon ma bani malekat ni kuria Epesus: On do hata ni na manjolom bintang na pitu bani tangan siamun-Ni, anjaha na mardalan-dalan i tengah-tengah ni parsuluhan na pitu in:

² Hubotoh do sagala horjamu pakon paruntolonmu ampa hasabaronmu, anjaha na so tarpataron-taron ham halak parjahat. luji ham do na mangkatahon, apostel sidea, hape sedo na tongon; parladung do sidea jumpah ham.

³ Marsabar ni uhur do ham, manaron do ham halani goran-Ku, anjaha seng marnaloja ham.

⁴ Tapi adong do pangkurangi ni uhurhu dompak ham, ai ma, ‘Itadingkon ham do holong ni uhurmu na bani mungkahni ondi.’

⁵ Ingat ma, hunja ham madabuh, paubah ham ma uhurmu, anjaha horjahon ma horjamu songon na bani mungkahni! Anggo lang, roh ma Ahu hu bamu, Hupadaoh ma parsuluhanmu in humbani iananni, anggo lang ipaubah ham uhurmu.

⁶ Tapi on adong do bamu, 'lhagigihon ham do pambahenan ni halak Nikolai. Ahu pe huhagigihon do ai.'

⁷ Itangihon na marpinggol ma na hinatahon ni Tonduy in hubani kuria in, 'Na monang in do bereon-Ku mangan humbani hayu hagoluhan, na i Paradeiso ni Naibata.'"

Surat hubani Kuria Simirna

⁸ "Suratkon ma bani malekat ni kuria Simirna: On do hata ni na Parlobei pakon na Parpudi, na dob matei anjaha na dob mulak manggoluh:

⁹ Hubotoh do hamarsikonmu pakon hasombuhonmu, tapi na bayak do ham, ampa parpahiri ni halak na mangkatahon Jahudi sidea, hape seng tongon, tapi tumpuan ni sibolis do.

¹⁰ Ulang habiarhon sagala sitaronon, na sihol roh bamu. Tonggor ma, dabuhon ni sibolis ma atap piga nasiam hubagas tutupan, ase iuji nasiam anjaha marsik ma nasiam sapuluh ari dokahni. Sai bujur ma ham ronsi matei, dob ai berehonon-Ku ma bamu sortali hagoluhan ai!

¹¹ Sagala na marpinggol itangihon ma na hinatahon ni Tonduy in bani kuria in. Na monang in seng anjai mahua ia bahenon ni hamatean na paduahon in."

Surat hubani Kuria Pergamon

¹² “Suratkon ma bani malekat ni kuria Pergamon: On do hata ni na manjolom podang sidua mata na marot ai:

¹³ Hubotoh do, ija ham marianan, ai ma dohor bani hotak ni sibolis in. Marsijoloman do ham bani goran-Ku, seng iparnalang ham haporsayaonmu Bangku, age sanggah panorang ni si Antipas, saksing-Ku hatengeran ni uhur-Hu, na dob ibunuh i lobei nasiam bani ianan ni sibolis in.

¹⁴ Tapi adong do otik pangkurangi ni uhur-Hu dompak ham, adong do deba nasiam na mangihutkon podah ni si Bileam, na mangajari si Balas mambahen jarot bani halak Israel, gabe ipangan sidea na ginalangkon bani sisombah-sombahon anjaha manriah-riahi.

¹⁵ Sonai homa, adong do deba nasiam na mangihutkon pangajaran ni halak Nikolai.

¹⁶ Paubah ham ma uhurmu! Anggo lang, podas ma Ahu roh, marmunsuh dompak sidea marhitei podang ni pamangan-Ku.

¹⁷ Sagala na marpinggol itangihon ma na hinatahon ni Tonduy in bani kuria in. Bani na monang in ma bereon-Ku manna na ponop in, anjaha bereon-Ku ma bani batu putih ampa goran na baru, na tarsurat bani batu ai, na so binotoh ni atap ise sobali na manjalosi.”

Surat hubani Kuria Tiatira

¹⁸ “Suratkon ma bani malekat ni kuria Tiatira: On do hata ni Anak ni Naibata, na marmata songon gara ni apuy anjaha nahei-Ni songon tombaga:

¹⁹ Hubotoh do sagala horjamu pakon holong ni uhurmu pakon haporsayaonmu pakon pansarihonmu pakon hasabaronmu ampa pambahenanmu na parpudi on, na bueinan humbani na parlobei ai.

²⁰ Tapi adong do pangkurangi ni uhur-Hu dompak ham, ipaturut ham do si Isebel, naboru ai, na mangkatahon nabi ia, gabe iajari anjaha ipakahou do juakjuak-Ku, ase manriah-riahi sidea anjaha ipangan galangan, na ginalangkon bani sisombah-sombahon.

²¹ Domma Hubere panorang bani, ase ipaubah uhurni, tapi seng ra ia paubahkon uhur humbani panriah-riahonni ai.

²² Tonggor ma, bahenon-Ku ma ia boritan i atas podomanni, anjaha hasomanni marbangkis ai dabuhon-Ku do hu hamarsikon bangga, anggo lang ipaubah sidea uhurni manadingkon horjani ai.

²³ Anjaha dakdanak ni sidea bois do bahenon-Ku matei, ase ibotoh ganup kuria in, paboa Ahu do sipareksa piah-piah pakon atei-atei, anjaha Hubalaskon bani ganup nasiam romban hubani horjani bei.

²⁴ Tapi bani nasiam na legan ai i Tiatira, na so mangirikkon pangajaran ai, anjaha na so mambotoh rusia ni setan na bagas-bagas ai, songon na hinatahon ni sidea, Huhatahon ma bani nasiam, seng be tampeihonon-Ku siporsanon na legan bani nasiam.

²⁵ Tapi, aha na dong bani nasiam, jolom nasiam ma ai poltik, ronsi roh Ahu.

²⁶ Bani na monang in pakon bani na mangkorjahon horjang-Ku das hu ujung, bereon-Ku do kuasa bani, manrajai bangsa parbegu.

²⁷ Parmahanonni ma sidea marhitei tungkot bosi anjaha rosakonni do sidea songon hudon tanoh, songon Ahu na dob manjalo kuasa in humbani Bapang-Ku,

²⁸ anjaha berehonon-Ku do hubani bintang buhasiang.

²⁹ Sagala na marpinggol itangihon ma na hinatahon ni Tonduy in bani kuria in.”

Surat hubani Kuria Sardes

3 ¹ “Suratkon ma bani malekat ni kuria Sardes: On do hata ni Partonduy na pitu na humbani Naibata pakon Parbintang na pitu in: Hubotoh do sagala horjamu, na targoran do ham manggoluh, hape na matei do ham.

² Puho ma ham, anjaha pargogohi ham ma hasomanmu na tading in, na laho matei in; ai seng

dong jumpah Ahu horjamu na gokan dear i lobei ni Naibatang-Ku.

³ Halani ai ingat ma aha na jinalomu anjaha aha na binogeimu, ramotkon ham ma ai, anjaha paubah uhurmu. Anggo lang ham puho, roh ma Ahu songon panangko, anjaha seng botohonmu panorangni, sadihari parroh-Ku bamu.

⁴ Tapi dong do piga-piga halak bani nasiam i Sardes, na so pabutakkon pakeianni; sidea ma na sihol mardalan rapkon Ahu marpakeian putih, ai sidea do na talup.

⁵ Bani na monang in do hiouhononkon pakeian putih, anjaha seng sasapon-Ku goranni humbani buku hagoluhan in. Saksihonon-Ku do goranni i lobei ni Naibata ampa i lobei ni malekat-Ni.

⁶ Sagala na marpinggol itangihon ma na hinatahon ni Tonduy in hubani kuria in.”

Surat hubani Kuria Piladelpia

⁷ “Suratkon ma bani malekat ni kuria Piladelpia: On do hata ni Na Pansing anjaha Na Sintong in, na manjolom anakkunsi ni si Daud, na mangungkab, anjaha seng dong na boi manutup, na manutup, anjaha seng dong na boi mangungkab.

⁸ Hubotoh do sagala horjamu. Tonggor ma, domma Huungkab i lobeimu labah, na so boi tutupon ni barang ise pe. Ai age pe otik gogohmu, idalankon

ham do hatang-Ku, anjaha seng iparnalang ham goran-Ku.

⁹ Tonggor ma, Huboan ma halak humbani tumpuan ni setan, na mangkatahon Jahudi sidea, hape seng tongon, parladung do sidea. Tonggor ma, parohon-Ku do sidea marsombah bani jampal ni naheimu, ase ibotoh sidea, paboa na holong do uhur-Hu bamu.

¹⁰ Halani iramotkon ham do hata hasabaron na hun Bangku, Ahu pe ramotkonon-Ku ma ham bani ari parlajouan, na sihol roh hu sab dunia on, laho manlajou sagala na mangiankon tanoh on.

¹¹ Barah ma Ahu roh! Jolom ham ma na dong bamu, ulang dong na mambuat sortalimu!

¹² Na monang in do bahenon-Ku gabe basikah ibagas rumah ni Naibatang-Ku, seng anjai mandarat be ia hunjai; anjaha suratkonon-Ku ma goran ni Naibatang-Ku bani pakon goran ni huta ni Naibatang-Ku, ai ma Jerusalem na baru, na susur hun nagori atas humbani Naibatang-Ku, sonai homa goran-Ku na bayu in.

¹³ Sagala na marpinggol itangihon ma na hinatahon ni Tonduy in hubani kuria in!"

Surat hubani Kuria Laodikea

¹⁴ "Suratkon ma bani malekat ni kuria Laodikea: On do hata ni si Amen, Saksi na bujur anjaha na bonar, mula ni panompaon ni Naibata.

¹⁵ Hubotoh do sagala horjamu, seng sai ngilu, seng sai milas ham. Ambit ngilu ma namin atap milas!

¹⁶ Tapi, halani danggol-danggol sisilon ham, seng ngilu seng milas, utahkonon-Ku ma ham humbani pamangan-Ku.

¹⁷ Ihatahon ham, 'Na bayak do ahu anjaha marnah na dong, seng hurangan ahu.' Seng ibotoh ham, na madoyuk do ham hape anjaha na masombuh, na musil, na mapitung anjaha na talanjang.

¹⁸ Hupodahi ma ham mamboli omas hun Bangku, na dob pinapitah bani apuy, ase tongon bayak ham, sonai age pakeian putih sihiouhononmu, ase ulang taridah hailaonmu halani hatalanjangonmu, sonai age minak maminaki matamu, ase marpangidah ham.

¹⁹ Ai sagala na Huhaholongi, ai do Hupinsang anjaha Huajar. Ase pongkutkon ma, anjaha paubah ham ma uhurmu!

²⁰ Tonggor ma, na jongjong do Ahu i lobei ni labah in mangkartuki. Atap ise na mambogei sorang-Ku anjaha iungkab labah ai, masuk ma Ahu hu bani, mangan ma Ahu rap pakonsi, anjaha ia rap pakon Ahu.

²¹ Bani na monang in do berehonon-Ku hundulan bani hotak-Ku rap pakon Ahu, songon Ahu, dob monang, hundul rap pakon Bapang-Ku bani hotak-Ni ai.

²² Sagala na marpinggol itangihon ma na hinatahon ni Tonduy in hubani kuria in.”

Hajombuton ni Naibata na Marparatas i Nagori Atas

4 ¹ Dob salpu ai, mangkawah ma ahu, jadi tonggor ma, tarbuka ma sada labah i nagori atas. Anjaha sora na hubogei bani mulani ai, na marsora songon sora ni tarompit hu bangku, nini ma, “Naik ma ho hujon, ase Hupatuduhkon bam na maningon laho masa, dob salpu on.”

² Jadi mintor ibagas Tonduy ma ahu, anjaha tonggor ma, adong do sada paratas i nagori atas, anjaha adong do na hundul bani paratas ai.

³ Ia rupa ni na hundul ai songon intan jaspis pakon sardis do. Dong do sada halibitongan manlioti paratas ai songon intan samarah rupani.

⁴ Inggot paratas ai adong do dua puluh ompat hotak, hundulan ni dua puluh ompat sintua, na marhiou silopak anjaha marsortali omas bani ulu ni sidea.

⁵ Anjaha luar do humbani paratas ai hilap ampa sora pakon longgur. Gara do pitu suluh i lobei ni paratas ai, ai ma na pitu Tonduy ni Naibata.

⁶ I lobei ni paratas ai adong ma songon laut kasa usih songon kristal. I tongah-tongah ni paratas ai pakon inggotni ai, adong do ompat pargoluh, parmata na buei i lobei ampa i pudi.

⁷ Pargoluh na parlobei ai usih do songon singa, pargoluh na paduahon songon lembu jonggi, pargoluh na patoluhon marbohi songon jolma, anjaha na paompatkon usih songon manuk-manuk nanggordaha na habang.

⁸ Ganup pargoluh na ompat ai marhabong do onom bei; marmata na buei inggot ampa ibagas. Seng marsaran sidea arian borngin mangkatahon, “Na panging, na panging, na panging do Tuhan Naibata, Sigomgom haganupan, na dob dong hinan, na dong nuan pakon na laho roh.”

⁹ Siap hali, sanggah ibere pargoluh ai hasangapon pakon hamuliaon pakon tarima kasih bani na hundul i atas paratas ai, na manggoluh ronsi sadokah ni dokahni,

¹⁰ manrogop ma na dua puluh ompat sintua ai i lobei ni na hundul bani paratas ai, isombah ma la na manggoluh sadokah ni dokahni, itibalhon ma sortali ni sidea hulobei ni paratas ai, anjaha ihatahon ma,

¹¹ “Ham Tuhan Naibatanami, na talup do Ham manjalo hasangapon, hamuliaon pakon hagogohon, ai Ham do na manompa sagala na dong; humbani rosuh-Mu do ase manjadi in haganup anjaha tartompa.”

**Anak ni Biri-biri ai hansa na
Boi Mangungkab Buku na Marlak ai**

5 ¹ Dob ai huidah ma bani tangan siamun ni na hundul bani paratas ai sada buku, na marsurat hun darat pakon humbagas, na ilak marhitei pitu lak.

² Anjaha huidah ma sada malekat na gogoh, na mandilohon maling, “Ise ma na talup mangungkab buku in pakon mananggali lakni in?”

³ Tapi seng dong barang ise i nagori atas, age i tanoh, age i toruh ni tanoh, na boi mambuka buku ai atap manonggor hubagas.

⁴ Gabe tangis-tangis ma ahu, halani seng dong na talup mangungkab buku ai atap manonggor hubagas.

⁵ Jadi nini sada humbani sintua ai ma hu bangku, “Ulang ham tangis! Tonggor ma, domma monang singa na humbani marga Juda, urat ni si Daud. Ia do na boi mambuka buku in pakon mananggali lakni.”

⁶ Anjaha huidah ma i tongah-tongah ni paratas ai pakon pargoluh na ompat ai ampa sintua ai jongjong sada Anak ni biribiri, songon na dob isambolih, pitu do tandukni anjaha pitu do matani, ai ma na pitu Tonduy ni Naibata, na dob isuruh hu sab tanoh on.

⁷ Jadi roh ma Anak ni biribiri ai, ijalo ma buku ai hun tangan siamun ni na hundul i atas paratas ai.

⁸ Jadi dob ijalo buku ai, manrongop ma pargoluh na ompat ai ampa sintua na dua puluh ompat ai i lobei ni Anak ni biribiri ai; haganup do sidea manjolom husapi pakon pinggan omas gok bani na misbou, ai ma tonggo ni halak na pansing.

⁹ Idodingkon sidea ma doding na bayu, nini ma, “Na talup do Ham manjalo buku in pakon mambuka sagala lakni; ai na dob tarbunuh do Ham anjaha marhitei daroh-Mu itobus Ham do bani Naibatajolma humbani ganup morga, hata, pangku, pakon bangsa,

¹⁰ anjaha ijadihon Ham do sidea bani Naibatanta gabe sada harajaon ampa malim-malim, anjaha manrajai sidea i atas tanoh in.”

¹¹ Jadi sanggah mangkawah ahu, gabe hubogei ma sora ni buei malekat inggot paratas ai ampa pargoluh ai ampa sintua-sintua ai; ia bilangan ni sidea marlaksa-laksa anjaha marribu-ribu do.

¹² Marsora na maling do sidea mangkatahon, “Na talup do Anak ni biribiri, na dob tarsambolih in, manjalo kuasa, habayakon, hapentaron, hagogohon, hasangapon, hamuliaon, ampa puji-pujian.”

¹³ Jadi hubogei ma sagala na tinompa na i nagori atas, i tanoh pakon i toruh ni tanoh ampa ibagas laut, haganup na ibagas ai mangkatahon, “Puji-pujian, hasangapon, hamuliaon ampa hagogohon

ronsi sadokah ni dokahni ma bani na hundul i atas paratas in pakon bani Anak ni biribiri in!”

¹⁴ Anjaha ihatahon pargoluh na ompat ai ma, “Amen!” Anjaha manrogop ma sintua-sintua ai anjaha marsombah.

Ibuha Anak ni Biri-biri ai do Onom Lak humbani na Pitu ai

6 ¹ Dob ai huidah ma, ibuha Anak ni biribiri ai ma sada lak humbani na pitu ai. Jadi hubogei ma sada humbani pargoluh na ompat ai marsora songon longgur mangkatahon, “Roh ma!”

² Mangkawah ma ahu, gabe huidah ma sada huda putih. Marsior do na mangajak huda ai, ibere do bani sortali, anjaha misir ma ia songon parmonang laho marhamonangan.

³ Jadi dob ibuha lak na paduahon, hubogei ma pargoluh na paduahon mangkatahon, “Roh ma!”

⁴ Jadi luar ma sada huda na legan, gerger songon apuy. Ibere do bani na mangajak huda ai kuasa mambuat damei hun tanoh on, ase marsibunuhan sidea; lanjar ibere do bani sada podang na bangga.

⁵ Sanggah ibuha lak na patoluhon, hubogei ma sora ni pargoluh na patoluhon mangkatahon, “Roh ma!” Jadi huidah ma adong sada huda sibirong, anjaha adong do sada timbangan bani tangan ni na mangajak ai.

⁶ Anjaha hubogei ma sora hun tongah-tongah ni pargoluh na ompat ai mangkatahon, “Satumba boras hargani sadinar, tolu tumba andolei hargani sadinar! Tapi ulang ma parseda minak pakon anggur.”

⁷ Jadi dob ibuha lak na paompatkon, hubogei ma sora ni pargoluh na paompatkon mangkatahon, “Roh ma!”

⁸ Mangkawah ma ahu gabe huidah sada huda silabu; ia goran ni na mangajak huda ai Hamatean do, anjaha nagori toruh do mangihutkonsi. Ibere do bani sidea kuasa bani saparompat ni tanoh on, ase ibunuh marhitei podang, lohei, sampar ampa binatang panoroh na i tanoh on.

⁹ Jadi dob ibuha lak na palimahon, huidah ma i toruh ni anjapanjap ai tonduy ni sagala na sinayat halani hata ni Naibata ampa halani panaksihon ni sidea.

¹⁰ Marsora na maling do sidea mardilo-dilo, nini ma, “Piga dokah nari do, Ham Tuhan Na Pansing anjaha Na Sintong, ase manguhumi Ham anjaha iluluhon Ham darohnami dompak na marianan i tanoh in?”

¹¹ Jadi ibere ma bani sidea hiou putih sada bei, anjaha ihatahon ma bani sidea ase sabar tongkin nari, paima gok bilangan ni juakjuak hasoman ni sidea ampa sanina ni sidea, na laho bunuhon ope songon sidea.

¹² Jadi huidah ma, sanggah na ibuha lak na paonomkon, masa ma lalou bolon, gabe marbirong ma mata ni ari songon guni horu anjaha ganup bulan ai songon daroh.

¹³ Anjaha bintang na i langit ai mardabuhan ma hu tanoh, songon pardudur ni buah ni hayu ara, sanggah idugur logou na mapor.

¹⁴ Masab ma langit songon surat ginulung, anjaha sagala pulou pakon dolog mosor humbani iananni hinan.

¹⁵ Anjaha sagala raja ni tanoh on pakon na sangap-sangap pakon puanglima pakon halak na bayak pakon na markuasa, sagala jabolon ampa halak na mardeka, marponop bei ma sidea hubagas liang pakon batu na i dolog.

¹⁶ Nini sidea ma bani dolog ampa batu, “Jombai ma hanami anjaha rungkub ma hanami humbani bohi ni na hundul bani paratas in ampa humbani ringis ni Anak ni biribiri in,

¹⁷ ai domma roh ari ni ringis-Ni na banggal in; anjaha ise ma na boi manahan in?”

Hona Sap Halak na Porsaya

7 ¹ Dob ai huidah ma ompat malekat jongjong bani na ompat suhi-suhi ni tanoh on, manjolom na ompat logou ni tanoh on, ase ulang mangombus logou hu tanoh, laut ampa haganup hayu.

² Anjaha huidah ma homa sada malekat na legan, naik hun hapoltakan ni mata ni ari, manjolom sap ni Naibata na manggoluh in. Maling do ia mardilo-dilo bani malekat na ompat ai, na dob manjalo kuasa laho mandedahon tanoh pakon laut in,

³ nini ma, “Ulang parseda nasiam lobei tanoh pakon laut, age hayu pe, paima isap hanami sagala juakjuak ni Naibatanta bani pardompakanni.”

⁴ Anjaha hubogei do buei ni sagala na dob marsap ai: Saratus ompat puluh ompat ribu humbani haganup marga ni Israel.

⁵ Hun bani marga Juda sapuluh dua ribu na dob marsap, humbani marga Ruben sapuluh dua ribu, humbani marga Gad sapuluh dua ribu,

⁶ humbani marga Aser sapuluh dua ribu, humbani marga Naptali sapuluh dua ribu, humbani marga Manasse sapuluh dua ribu,

⁷ humbani marga Simeon sapuluh dua ribu, humbani marga Lepi sapuluh dua ribu, humbani marga Isasar sapuluh dua ribu,

⁸ humbani marga Sebulon sapuluh dua ribu, humbani marga Josep sapuluh dua ribu, humbani marga Benjamin sapuluh dua ribu, na dob marsap.

Halak na Tinobus humbani Bangsa-bangsa

⁹ Dob salpu ai, huidah ma humpulan na banggal, na so boi bilangan ni atap ise, humbani ganup bangsa, suku, marga, ampa hata jongjong i lobei ni paratas

ai pakon i lobei ni Anak ni biribiri ai, marhiouhon hiou putih anjaha manjolom bulung ni palem.

¹⁰ Maling do sora ni sidea mardilohon, “Bani Naibatanta, na hundul bani paratas in do haluahon, ampa bani Anak ni biribiri in!”

¹¹ Anjaha jongjong ma sagala malekat inggot paratas ai ampa ingot sintua ampa pargoluh na ompat ai, anjaha manrogop ma sidea i lobei ni paratas ai marsombah bani Naibata,

¹² nini ma, “Amen! Puji-pujian pakon hasangapon, hapentaron pakon tarima kasih, hamuliaon pakon hagogohon ampa kuasa ma bani Naibatanta in ronsi sadokah ni dokahni! Amen.”

¹³ Jadi marsahap ma sada humbani sintua ai, nini ma dompak ahu, “Ise do siparhiou putih in, anjaha hunja do in roh?”

¹⁴ Jadi huhatahon ma dompaksi, “Ham tuanku, ham do mambotohsi.” Jadi nini ma dompak ahu, “In ma na dob roh humbani hamarsikon banggal ai; domma iburihi sidea hiou ni sidea anjaha ipaputih ibagas daroh ni Anak ni biribiri in.

¹⁵ Halani ai sai i lobei ni paratas ni Naibata do sidea marugas Bani arian pakon borngin ibagas rumahni, anjaha la, na hundul bani paratas ai ma, paherbangkon lampolamponi i atas ni sidea.

¹⁶ Seng be loheian sidea, lang be horahan, lang be hona milas ni ari sidea atap aha na milas pe;

¹⁷ ai parmahanon ni Anak ni biribiri na i tongah-tongah ni paratas ai do sidea, anjaha arahkononni do sidea hubani bah tubuh hagoluhan, anjaha apusan ni Naibata ma sagala iluh humbani mata ni sidea.”

Tarungkab Lak na Papituhon: Pitu Malekat na Martarompit

8 ¹ Sanggah ibuha lak na papituhon ai, sip ma haganup i nagori atas tar satongah jam dokahni.

² Jadi huidah ma malekat na pitu ai, na jongjong i lobei ni Naibata, anjaha ibere ma bani sidea pitu tarompit.

³ Dob ai roh ma sada malekat na legan jongjong hu lambung ni anjapanjap panggalangan ai, manjolom sada pardahupaan omas. Ibere ma bani buei dahupa, ase igalangkon ai mangurupi tonggo ni halak na pansing bani anjapanjap omas ai i lobei ni paratas ai.

⁴ Gabe naik ma timus ni dahupa ai mangurupi tonggo ni halak na pansing, humbani tangan ni malekat ai hu lobei ni Naibata.

⁵ Dob ai ibuat malekat ai ma pardahupaan ai anjaha igoki ma ai bani apuy na humbani anjapanjap ai, anjaha igijigkon ma ai hu tanoh; jadi masa ma longgur, sora, hilap pakon lalou.

⁶ Jadi marugas ma sipitu malekat ai, na manjolom tarompit na pitu ai, laho manompul ai.

⁷Gabe isompul malekat na parlobei ai ma tarompitni, jadi masa ma sira-sira pakon apuy marsaor daroh; iuseihon ma ai hu tanoh, gabe mosog ma sapartolu ni tanoh pakon sapartolu ni hayu, anjaha mosog ma homa haganup poyon-poyon na maratah.

⁸Dob ai isompul malekat na paduahon ai ma tarompitni, gabe adong ma songon dolog na banggal anjaha na gara igijigkon hu laut; gabe daroh ma sapartolu ni laut in,

⁹lanjar matei ma sapartolu ni na tinompa na manggoluh i laut, anjaha maseda sapartolu ni sagala kapal.

¹⁰Dob ai isompul malekat na patoluhon ai ma tarompitni, gabe madabuh ma hun langit sada bintang na banggal, na gara songon suluh, lanjar idabuhi ma sapartolu ni bah mardalan pakon bah tubuh.

¹¹Ia goran ni bintang ai Apsintos (*Hapaeton*) do; gabe paet ma sapartolu ni bah in, lanjar matei ma bueijolma ibahen bah na gabe mapaet ai.

¹²Dob ai isompul malekat na paompatkon ai ma tarompitni, gabe hona bogbog ma sapartolu ni mata ni ari pakon sapartolu ni bulan ampa sapartolu ni bintang, gabe golap ma sapartoluni bei, gabe seng marsinondang be sapartolu ni arian, sonai age borgin.

¹³ Dob ai mangkawah ma ahu, gabe hubogei ma sada manuk-manuk nanggordaha habang i tongah langit, na marsora na maling mangkatahon, “Bursik, bursik, bursik ma sagala na mangiankon tanoh in, pangkorhon ni sora na tading ai ope, ai ma tarompit ni malekat na tolu nari, na sihol manompul tarompit ope.”

Tarompit na Palimahon: Hona Arsik Jolma Manisia

9 ¹ Dob ai isompul malekat na palimahon ai ma tarompitni, gabe huidah ma madabuh sada bintang hun langit hu tanoh; ibere ma hubani anakkunsi ni ruang partoruh ai.

² Jadi ibuha ma ruang partoruh ai, gabe naik ma timus humbani ruang ai, songon timus ni pamurunan banggal, gabe golap ma mata ni ari pakon awang-awang ibahen timus na humbani ruang ai.

³ Anjaha mangkaluar ma balang humbani timus ai hu tanoh in, anjaha ibere ma bani sidea kuasa songon kuasa ni gansip golang na i tanoh in.

⁴ Jadi iparentahkon ma bani sidea, ase ulang ikahua poyon-poyon na i tanoh in, sonai sagala na maratah atap hayu aha pe, tapi pitah jolma hansa, na so marsap bani pardompakanni humbani Naibata.

⁵ Seng ipalopas sidea mambunuh jolma, pitah mangarsik-arsik hansa lima bulan dokahni;

pangarsik ni sidea ai usih songon pambahen ni gansip golang sanggah idoitjolma.

⁶ Bani panorang ai pindahan ni jolma ma hamatean, tapi seng jumpahsi; sihol do namin uhur ni sidea matei, tapi lintun do hamatean in humbani sidea.

⁷ Ia rupa ni balang ai, usih do songon huda na sirsir laho hu parmunsuhan; adong do bani uluni sortali na songon omas, anjaha bohini songon bohi ni jolma do.

⁸ Marjambulan do sidea songon jambulan ni naboru, anjaha iponni songon ipon ni singa.

⁹ Marbaju-baju porang do sidea usih hubani baju-baju bosi; ia sora ni habong ni sidea songon sora ni buei garetaporang do, tinarik ni buei huda na marpojong hu parmunsuhan.

¹⁰ Marihur do sidea songon ihur ni gansip golang anjaha marsorod. Bani ihur ni sidea ai do kuasa ni sidea laho mangarsik-arsik jolma lima bulan dokahni.

¹¹ Dong do sada raja bani sidea, ai ma malekat hun ruang partoruh, na margoran Abaddon bani hata Heber anjaha Apollion (Sipangagou) bani hata Gorik.

¹² Domma salpu bursik-bursik na parlobei; tonggor ma, roh ope dua nari ipudi ni on.

**Tarompit na Paonomkon:
Marmateian Jolma Manisia**

¹³ Dob ai isompul malekat na paonomkon ma tarompitni, jadi hubogei ma sada sora hun tanduk na ompat na bani anjapanjap omas, na i lobei ni Naibata.

¹⁴ Ihatahon ma dompak malekat na paonomkon, na martarompit ai: “Paluah ma malekat na ompat ai, na sangkut i lambung ni Bah Eprat na banggal ai!”

¹⁵ Jadi ipaluah ma malekat na ompat ai, na dob pinasirsir bani jamni, arini, bulanni pakon tahunni laho mamunuh sapartolu ni manisia.

¹⁶ Ia bilangan ni tentara na marhuda ai dua ratus juta do; hubogei do bilangan ni sidea.

¹⁷ Sonon do huidah huda pakon na mangajaksi ibagas panonggoranku: Ipakei sidea do baju-baju bosi na gerger songon apuy, mahonda tumang anjaha magorsing songon hirtah. Ulu ni huda ni sidea songon ulu ni singa, anjaha kaluar do humbani babahni apuy, timus pakon hirtah.

¹⁸ Marhitei pangarsikon na tolu in matei tarbunuh do sapartolu ni manisia, ai ma pangkorhon ni apuy, timus pakon hirtah, na kaluar humbani babah ni sidea.

¹⁹ Ai ibagas babah pakon ihur ni sidea do gogoh ni huda ai; ai usih hubani ulog do ihur ni sidea

na marulu ai, marhitei ai do sidea mambahen hasedaon.

²⁰ Ia jolma na tading ai, na so binunuh ni hamarsikon ai, lanjar do seng ipaubah sidea uhurni humbani na hinorjahon ni tangan ni sidea, ase ulang be namin marsombah bani setan-setan pakon bani gana-gana na humbani omas, pirak, tombaga, hayu atap batu, na so tarbahen mangidah, manangar atap mardalan pe.

²¹ Seng ipaubah sidea uhur ni sidea manadingkon pamunuhon, uti-utian, habutakon pakon panangkoon ni sidea.

Buku na Niondoskon ni Malekat bani si Johannes

10 ¹ Dob ai huidah ma sada malekat na legan, na gogoh, turun hun nagori atas, marhiouhon hambun, halibitongan i atas uluni, bohini songon mata ni ari anjaha naheini songon basikah na humbani apuy.

² Ijolom do bani tanganni sada buku etek-etek na buha. Anjaha idogeihon do naheini siamun hu atas laut, anjaha nahei sambilouni hu tanoh.

³ Mardilo-dilo ma ia maling songon singa na maraum; sanggah na mardilo-dilo ai ia, marhata ma na pitu longgur ai.

⁴ Dob marhata longgur na pitu ai, sihol manurat ma ahu; tapi hubogei ma sora hun nagori atas

mangkatahon, “Lak ma na hinatahon ni longgur na pitu in, ulang suratkon!”

⁵ Dob ai ipagostong malekat na huidah jongjong i atas laut pakon tanoh ai ma tanganni dompak datas.

⁶ Marbija ma ia marhitei Naibata na manggoluh ronsi sadokah ni dokahni, na dob manompa langit pakon isini, tanoh pakon sagala na i atasni ampa laut pakon na dong ibagas: Seng paganjangan be panorang,

⁷ tapi bani panorang ni sora ni tarompit na sihol sompulon ni malekat na papituhon ai, ijai ma gok rusia ni Naibata, songon na dob hinatahon-Ni bani juakjuak-Ni, nabi-nabi ai.

⁸ Ia sora na dob hubogei ai hun nagori atas, marsahap do use bangku, nini ma, “Laho ma, buat ma buku na buha ai, na i tangan ni malekat ai, na jongjong i atas laut pakon tanoh ai.”

⁹ Dob ai huparayak ma malekat ai, huhatahon ma hubani ase ibere bangku buku ai. Jadi nini ma hu bangku, “Na ma, pangan ma, gabe paet do in bani boltokmu, tapi tobu do songon manisan ni lobah anggo bani pamanganmu.”

¹⁰ Jadi hubuat ma buku ai hun tangan ni malekat ai anjaha hupangan ma ai; anjaha tobu do ai bani pamanganku songon manisan, tapi dob hupangan ai, gabe paet ma ibagas boltokku.

¹¹ Jadi ihatahon ma dompak ahu, “Maningon ulakanmu ope manjahai dompak suku pakon bangsa ampa hata age dompak buei raja-raja.”

Isibar Rumah Panumbahan

11 ¹ Dob ai ibere ma bangku sada buluh songon tungkot sibar-sibar anjaha nini ma, “Jongjong ma ho, sibar ma rumah ni Naibata pakon anjapanjap in ampa na marsombah ibagas in.

² Tapi alaman pardarat ni rumah panumbahan in ulang sibar, laosi ma in, ai domma iondoskon in bani bangsa sipajuh begu-begu. Dogei-dogeian ni sidea ma huta na pansing in ompat puluh dua bulan dokahni.”

Dua Saksi na Hona Bunuh Tapi Manggoluh Use

³ Anjaha bereon-Ku do kuasa bani saksing-Ku na dua ai, ase manjahai sidea saribu dua ratus onom puluh ari dokahni, marhiouhon guni.

⁴ Sidea ma na dua hayu jetun pakon na dua parsuluhan, na jongjong i lobei ni Tuhan simada tanoh on.

⁵ Anggo adong na sihol mansedahon sidea, kaluar ma apuy humbani babah ni sidea mamboiskon munsuhni; anggo dong na sihol mansedahon sidea, sonai ma maningon matei sidea.

⁶ Na markuasa do sidea mangkungsi langit, ase ulang roh udan sadokah panorang manjahai sidea. Na

markuasa do sidea paubahkon bah gabe daroh anjaha mangkonahon bagei sitaronon bani tanoh in, atap sonaha hotopni ninuhur ni sidea.

⁷ Anggo domma idobkon sidea hasaksian ni sidea, tangkog ma binatang ai hun ruang partoruh ai, laho marmunsuh dompak sidea, taluhononni ma sidea anjaha bunuhonni.

⁸ Ragei ma bangkei ni sidea i alaman ni huta na banggal in, na margoran mangihutkon partonduyon Sodom pakon Masir, ijai do homa Tuhan ni sidea tarsilang.

⁹ Jadi idahon ni buei bangsa, suku, hata pakon marga ma bangkei ni sidea tolu satongah ari dokahni, anjaha seng ilopas sidea tanomon bangkei ni sidea ai.

¹⁰ Jadi sagala na mangiankon tanoh on, marmalas ni uhur ma anjaha marmegah-megah mangidah sidea, pala marsitongosan siluah samah sidea, halani nabi na dua on do sipangarsik-arsik hinan bani na mangiankon tanoh on.

¹¹ Dob salpu tolu satongah ari, sorap ma Tonduy hagoluhan na humbani Naibata bani sidea, jongjong ma sidea, jadi mabiar tumang ma sagala na mangidah sidea.

¹² Ibogei sidea ma sora na maling hun nagori atas, na mangkatahon bani sidea, “Naik ma hujon!” Jadi naik ma sidea hu nagori atas ibagas hambun, ididah munsuh ni sidea.

¹³ Bani panorang ai masa ma lalou banggal, marumbak ma saparsapuluh ni huta ai, matei ma bani lalou ai pitu ribu halak, mabiar ma sagala na tading, anjaha ipasangap sidea ma Naibata na i nagori atas.

¹⁴ Domma salpu bursik-bursik na paduahon; tonggor ma, barah ma roh hamagouan na patoluhon.

**Tarompit na Papituhon: Puji-pujian
bani Naibata na Bangkit gabe Raja**

¹⁵ Dob ai isompul malekat na papituhon ai ma tarompitni, jadi masa ma sora na gogoh i nagori atas, na mangkatahon, “Domma ondos bani Tuhanta pakon bani Kritus-Ni harajaon ni dunia on, manrajai ma la ronsi sadokah ni dokahni.”

¹⁶ Ia sintua na dua puluh ompat ai, na hundul bani hotakni bei i lobei ni Naibata, manrogop ma marsombah bani Naibata.

¹⁷ Nini sidea ma, “Na mangkatahon tarima kasih do hanami Bamu, Ham Tuhan Naibata, Sigomgom haganup, na dong sonari ampa na dob dong hinan, halani na dob ijalo Ham kuasa-Mu na banggal in anjaha bangkit Raja Ham.

¹⁸ Manringis do sagala bangsa, gabe roh do ringis-Mu, jumpah ma panorangni, ase hona uhum sagala na dob matei lanjar mambere upah bani juakjuak-Mu, nabi-nabi ai, pakon halak na pansing ronsi

sagala na mangkabiari goran-Mu, na etek ampa na banggal, sonai homa laho mandedahon siparseda tanoh in.”

¹⁹ Dob ai ungkab ma rumah panumbahan ni Naibata i nagori atas, gabe taridah ma poti parpadanan-Ni ibagas rumah panumbahan ai, anjaha masa ma hilap, sora pakon longgur ampa lalou pakon sira-sira na banggal-banggal.

Sada Naboru na Laho Tubuhan Tuah ampa Naga na Banggal ai

12 ¹ Dob ai taridah ma sada tanda na banggal i nagori atas: Sada naboru marhiou mata ni ari, bulan i toruh ni naheini anjaha sapuluh dua bintang sortali ni uluni.

² Na boratan rumah do ia anjaha mandoruhi ibahen boritni ampa pangarouon laho mantubuhkon anak.

³ Dob ai taridah ma tanda na legan i nagori atas: Sada naga na banggal songon apuy, pitu do uluni, sapuluh tandukni anjaha pitu sortali harajaon bani uluni.

⁴ Isarad ihurni do sapartolu ni bintang na i langit anjaha idabuhkon ma ai hu tanoh. Jadi jongjong ma naga ai i lobei ni naboru na laho tubuhan tuah ai, laho mambondut dakdanakni ai tubuhkonsi.

⁵ Jadi itubuhkon ma sada anak, na sihol marmahan sagala bangsa sipajuh begu-begu marhitei tungkot

bosi. Jadi tarangkat ma anakni ai hu lobei ni Naibata pakon paratas-Ni ai,

⁶ anjaha maporus ma naboru ai hu halimisan bani sada ianan na pinasirsir ni Naibata, ase ijai ipatorsa-torsa ia saribu dua ratus onom puluh ari dokahni.

Partalu ni Naga ai

⁷ Anjaha masa ma porang i nagori atas; marporang ma si Mikael rap pakon sagala malekatni marmunsuh dompak naga ai. Jadi naga ai pe rap pakon sagala malekatni roh ma marporang.

⁸ Tapi seng tahan sidea, anjaha seng dong be ianan bani sidea i nagori atas.

⁹ Jadi idabuhkon ma naga na bolon ai, ulog na basaia ai, na margoran sibolis pakon setan, na pakahouhon haganup dunia on; hu tanoh do ia idabuhkon rap pakon sagala malekatni.

¹⁰ Dob ai hubogei ma sada sora na maling i nagori atas, na mangkatahon, “Domma das sonari haluahon pakon hagogohon pakon Harajaon ni Naibatanta ampa kuasa ni Kristus-Ni; ai domma idabuh sipanukasi, na manukasi saninanta arian borngin i lobei ni Naibata.

¹¹ Domma italuhon sidea ia marhitei daroh ni Anak ni biribiri in pakon marhitei hata na sinaksihon ni sidea, anjaha seng ihargahon sidea hosahni ronsi matei.

¹² Halani ai marmalas ni uhur ma ham nagori atas pakon sagala na marianan ibagas! Tapi bursik ma tanoh pakon laut in, ai domma susur sibolis in bennima, marah tumang, ai ibotoh pondok mando panorangni.”

Naga Mangayak-ayak Naboru ai

¹³ Tapi dob ididah naga ai, na dob idabuhkon ia hu tanoh, iayak-ayak ma naboru na mantubuhkon anak ai.

¹⁴ Jadi ibere ma bani naboru ai dua habong ni manuk-manuk nanggordaha na banggal, ase habang ia bani iananni hu halimisan, ase ijai ma ia ipatorsa-torsa sada panorang, dua panorang pakon satongah panorang daoh humbani panonggor ni ulog ai.

¹⁵ Jadi ibursikkon ulog ai ma bah humbani babahni songon bah banggal hun pudi ni naboru ai, ase iayubkon bah banggal ai ia.

¹⁶ Tapi iurupi tanoh ai do naboru ai, ipatanggak ma babahni anjaha ibondut ma bah banggal ai, na binursikkon ni naga ai humbani babahni.

¹⁷ Jadi manringis ma naga ai dompak naboru ai, gabe laho ma ia marmunsuh dompak ginomparni na tading ai, sagala na mandalankon Titah ni Naibata pakon na manjolom hasaksian pasal Jesus.

13 ¹ (12-18) Jadi jongjong ma ia i topi ni laut ai.

**Binatang na Mandarat hun Laut (13-1) Jadi
huidah ma mandarat humbagas laut ai sada
binatang, sapuluh do tandukni anjaha pitu uluni.
Bani tandukni ai adong do sapuluh sortali anjaha
goran-goran panrisaion do bani uluni ai.**

² Ia binatang na huidah ai songon begu do rupani, naheini songon nahei ni gipul anjaha babahni songon babah ni singa. Ibere naga ai ma gogohni bani, sonai age hotakni ampa kuasa banggal.

³ Huidah do sada humbani uluni ai ugahan, sihamateihononni namin; hape malum do ugahni sihamateihononkonni ai. Jadi longang ma ganup tanoh on mangidah binatang ai.

⁴ Isombah sidea ma naga ai, sibere kuasa bani binatang ai; binatang ai pe isombah sidea ma, nini, “Ise ma na doskon binatang in, anjaha ise ma na mangasup mangimbangsi?”

⁵ Ibere ma bani sada babah, na mangkatahon hata pangenjengon pakon panrisaion; ibere ma kuasa bani mandalankon ai ompat puluh dua bulan dokahni.

⁶ Ibuha ma babahni manrisai Naibata, manrisai goran-Ni pakon ianan-Ni pakon na marianan i nagori atas.

⁷ Ibere ma kuasa bani mammunsuhi halak na panging pakon mantaluhon sidea; ibere do homa hubani kuasa manggomgomi sagala marga, suku, hata pakon bangsa.

⁸ Anjaha sombahon ni haganup pangisi ni tanoh on ma ia, sagala na so tarsurat goranni humbani mula ni dunia on bani buku hagoluhan ni Anak ni biribiri ai, na dob tarbunuh ai.

⁹ Sagala na marpinggol, itangihon ma!

¹⁰ Sagala sipanaban maningon tartaban do; sagala sipamunuh marhitei podang maningon matei do bunuhon ni podang. Ibagas ai sabar anjaha porsaya do halak na mapanging.

Binatang na Mandarat hun Tanoh

¹¹ Dob ai huidah ma sada binatang na legan mandarat hun tanoh, dua do tandukni songon tanduk ni biribiri, anjaha songon parsahap ni naga ai do parsahapni.

¹² Idalankon do sagala kuasa ni binatang na parlobei ai i lobeini. Isuruh do tanoh on pakon sagala na marianan ibagas manombah binatang na parlobei ai, simada uga hamatean na dob malum ai.

¹³ Ibahen do tanda na banggal, pala ipaturun apuy hun langit hu tanoh i lobei ni jolma.

¹⁴ Ipakahou do sagala na marianan i tanoh in marhitei tanda halongangan, na ibere hubani sidalankononni ilobei ni binatang ai; ai ihatahon do

bani sagala na mangiankon tanoh in, mambahen gana-gana bani binatang ai, na dob ugahan hinan ibahen podang, hape manggoluh do.

¹⁵ Ibere do kuasa bani mambere hosah bani gana-gana ni binatang ai, gabe boi marsahap gana-gana ni binatang ai, anjaha isuruh do na mambunuh sagala na so manambah gana-gana ni binatang ai.

¹⁶ Anjaha isuruh ma haganup, na etek ampa na magodang, na bayak ampa na musil, halak na mardeka pakon jabolon, mambahen tanda bani tanganni atap bani pardompakanni,

¹⁷ ase ulang boi atap ise mamboli atap manjual, anggo seng dong bani tanda ai, ai ma goran ni binatang ai atap bilangan ni goranni.

¹⁸ Ibagas on porlu hauhuron. Barang ise na maruhur, ietong ma bilangan ni binatang ai: Bilangan ni sadajolma do ai, anjaha onom ratus onom puluh onom do bilangan ai.

Anak ni Biri-biri ai Rap pakon Tinobus-Ni i Atas ni Dolog Sion

14 ¹ Jadi mangkawah ma ahu, anjaha tonggor ma, jongjong do Anak ni biribiri in i atas Dolog Sion anjaha rap pakon-Si saratus ompat puluh ompat ribu halak; tarsurat do goran-Ni pakon goran ni Bapa-Ni bani pardompakan ni sidea.

² Hubogei ma sora hun nagori atas songon parhasak ni buei bah bangga anjaha songon pardobur ni

longgur na maling; ia sora na hutangar ai, songon sora ni husapi na giniut ni parhusapi do.

³Idodingkon sidea do doding na baru i lobei ni paratas ai ampa i lobei ni pargoluh na ompat ai ampa sintua ai; sahalak pe seng dong na boi mangguruhon doding ai, sobali sisaratus ompat puluh ompat ribu halak ai, na tinobus hun tanoh in.

⁴Sidea do na so pabutakkon dirini bani naboru; songon anak boru na so haliaban do sidea. lirikkon sidea do Anak ni biribiri in, atap huja pe la laho. Sidea do na dob tinobus humbani hajolmaon, limbuah bani Naibata pakon bani Anak ni biribiri in.

⁵Seng dong dapot ladung bani pamangan ni sidea. Seng dong tikas bani sidea.

Lumba-lumba humbani Tolu Malekat

⁶Huidah ma sada malekat na legan habang i tongah langit; adong do bani Ambilan Na Madear sisadokah ni dokahni, siambilankononni bani na mangiankon tanoh in, bani haganup bangsa, marga, hata pakon suku,

⁷anjaha maling do sorani mangkatahon: “Habiari nasiam ma Naibata anjaha pasangap ma la, ai domma jumpah panorang ni panguhumon-Ni! Sombah nasiam ma la, Sitompa langit pakon tanoh pakon laut pakon sagala bah tubuh!”

⁸Jadi mangihut ma malekat na legan, ai ma na paduahon, ihatahon ma: “Domma madabuh,

domma madabuh Babilon na banggal in, na mambahen mabuk sagala bangsa marhitei anggur sipagarang uhur parbangkison.”

⁹ Dob ai mangihut ma bani sidea malekat na legan, ai ma na patoluhon, na mangkatahon maling, “Barang ise na manombah binatang ai ampa gana-gana ni, anjaha na manjalo tanda ai bani bohini atap bani tangani,

¹⁰ maningon inumonni do anggur hamarahon ni Naibata, na dob pinasirsir seng maragu ibagas panginuman hamarahonni; siarsik-arsikon do ia ibagas apuy pakon hirtah i lobei ni sagala malekat na pansing in ampa i lobei ni Anak ni biribiri in.”

¹¹ Naik ma timus ni hamarsikon ni sidea ronsi sadokah ni dokahni. Seng jumpahan parsaranan arian borgin sagala na manombah binatang ai pakon gana-ganani, sonai sijalo tanda ni goranni ai.

¹² Ibagas on sabar do uhur ni halak na pansing, siramotkon titah ni Naibata pakon haporsayaon bani Jesus.

¹³ Jadi hubogei ma sora hun nagori atas, na mangkatahon, “Suratkon ma: Martuah ma na matei ibagas Tuhan in humbani sonari nari. Tongon,” nini Tonduy in, “na marsaran ma sidea humbani halojaon ni sidea, ai na mangihut ma bani sidea na hinorjahon ni sidea.”

**Panorang Paruhuman
Igambarhon Marhitei Pariama**

¹⁴ Dob ai mangkawah ma ahu, anjaha tonggor ma: Sada hambun na lopak, anjaha i atas hambun ai hundul sahalak na usih hubani Anak nijolma in, marsortali omas bani uluni anjaha sasabi na marot bani tangan-Ni.

¹⁵ Jadi haluar ma sada malekat na legan hun rumah panumbahan ai, na mardilo-dilo marhitei sora na maling hubani na hundul i atas hambun ai: Sabihon ma sasabimu anjaha sabi ma, ai jumpah ma panorang sabion, ai masak tumang ma sisabion na i tanoh in.

¹⁶ Jadi isabihon na hundul i atas hambun ai ma sasabini hu tanoh in, isabi ma tanoh in.

¹⁷ Luar ma homa malekat na legan hun rumah panumbahan na i nagori atas in, ia pe manjolom sasabi na marot do.

¹⁸ Anjaha luar ma hambani anjapanjap ai sada malekat na legan na markuasa pasal apuy, na mandilohon marhitei sora na maling hubani na manjolom sasabi na marot ai, nini: Sabihon ma sasabimu na marot in, buati ma haganup buah ni hayu anggur na i tanoh in, ai domma mabei buahni.

¹⁹ Jadi isabihon malekat ai ma sasabini hu tanoh in, ibuati ma sagala buah ni hayu anggur na i tanoh

in, anjaha igijigkon ma ai hu kilang hamarahon ni Naibata na banggal ai.

²⁰ Idarat ni huta ai do idogeai buah anggur ai, gabe mandarat ma daroh humbani pangilangan ai pala das hubani kokang ni hudu, saribu onom ratus stadia daohni.

Doding ni Sagala na dob Monang i Nagori Atas

15 ¹ Dob ai huidah ma sada tanda na legan i nagori atas, banggal anjaha halongangan: Pitu malekat manjolom pitu sitaronon na parpudi, ai marhiteihon ai ma marpunsa ringis ni Naibata.

² Jadi huidah ma na songon laut kasa marsaor apuy, anjaha i topi ni laut kasa ai jongjong do sagala na dob monang mangimbang binatang ai ampa gaganani ampa bilangan ni goranni, manjolom husapi ni Naibata.

³ Anjaha idodingkon sidea do doding ni si Musa, juakjuak ni Naibata, pakon doding ni Anak ni biribiri in, nini, “Banggal anjaha halongangan do sagala horjamu, Ham Tuhan Naibata, Sigomgom haganup; pintor anjaha sintong do sagala dalan-Mu, Ham Raja ni sagala bangsa!

⁴ Ise ma na so mangkabiari Ham, ale Tuhan, janah na so pasangapkon goran-Mu? Ai Ham do hansa na pansing, anjaha sagala bangsa roh ma marsombah Bamu, ai domma talar panguhum-Mu na pintor in.”

Ijalo Sipitu Malekat ai Batil Omas na Pitu ai

⁵ Jadi dob salpu ai mangkawah ma ahu, anjaha mungkab ma rumah panumbahan, lampolampo hasaksian ai, i nagori atas.

⁶ Jadi kaluar ma hun rumah panumbahan ai sipitu malekat, na manjolom sitaronon na pitu ai, anjaha hiou putih na marlinang-linang do pakeian ni sidea anjaha margondit omas bani tontonni.

⁷ Jadi roh ma sada humbani pargoluh na ompat ai mambere hubani sipitu malekat ai pitu batil omas, na gok bani ringis ni Naibata, na manggoluh ronsi sadokah ni dokahni.

⁸ Jadi gok timus ma rumah panumbahan ai ibahen hasangapon ni Naibata pakon hagogohon-Ni; seng boi age ise masuk hu rumah panumbahan ai, paima marujung na pitu sitaronon na humbani sipitu malekat ai.

**Iuseihon Batil Omas na Pitu ai, na
Gok bani Ringis ni Naibata**

16 ¹ Dob ai hubogei ma sora na maling hun rumah panumbahan ai hubani malekat na pitu ai, “Misir ma nasiam, useihon nasiam ma batil na pitu in, ianan ni ringis ni Naibata, hubani tanoh in.”

² Jadi misir ma na parlobei ai, iuseihon ma batilni hu tanoh in. Jadi masa ma bayoh na bajan anjaha

na sambor bani jolma, na dob manjalo tanda ni binatang ai anjaha sisombah gana-ganani.

³ Dob ai iuseihon na paduahon ai ma batilni hu laut; jadi gabe daroh ma ai songon daroh ni na matei, lanjar matei ma sagala na manggoluh i laut ai.

⁴ Dob ai iuseihon na patoluhon ai ma batilni hubani bah banggal pakon bah tubuh, anjaha gabe daroh ma ai.

⁵ Jadi hubogei ma malekat sigomgom bah mangkatahon, “Na pintor do Ham, na dong sonari ampa na dong hinan, Ham na mapansing, halani sonai panguhum-Mu;

⁶ ai iuseihon sidea do daroh ni halak na pansing pakon nabi-nabi, gabe daroh do ipainumkon Ham bani sidea; patut do ai bani sidea.”

⁷ Anjaha hubogei do humbani anjapanjap ai sora na mangkatahon, “Tongon, Ham Tuhan Naibata, Sigomgom haganupan, sintong anjaha pintor do uhum-Mu in.”

⁸ Dob ai iuseihon na paompatkon ai ma batilni hubani mata ni ari; ibere ma bani mata ni ari kuasa mammosogkon jolma in marhitei apuy.

⁹ Jadi mosog ma jolma in ibahen milas ni na parah ai, gabe irisai sidea ma goran ni Naibata, na markuasa bani sagala sitaronon ai; lanjar do seng ipaubah sidea uhumni laho pasangapkon-Si.

¹⁰ Dob ai iuseihon na palimahon ai ma batilni bani hotak ni binatang ai, gabe golap ma harajaonni

ai, anjaha marsiharat dilahni bei ma sidea halani boritni,

¹¹ gabe irisai sidea ma Naibata ni nagori atas ai halani boritni ampa bayoh niarou ni sidea ai, tapi lanjar do seng ipaubah sidea uhurni manadingkon parlahou ni sidea ai.

¹² Dob ai iuseihon na paonomkon ai ma batilni hu Bah Eprat na banggal ai, gabe horah ma bahni, ase ipasirsir dalam ni raja-raja na hun hapoltakan ni mata ni ari.

¹³ Jadi huidah ma kaluar humbani babah ni naga ai pakon humbani babah ni binatang ai pakon humbani pamangan ni nabi sipakulah-kulah ai tolu tonduy na mabutak songon tiktikan.

¹⁴ Ai ma tonduy ni setan-setan na mambahen tanda-tanda, na bingkat marayak raja-raja ni sab dunia on, laho patumpuhon sidea hu parporangan bani ari na banggal ai, ari ni Naibata, Sigomgom haganupan.

¹⁵ Tonggor ma, na roh ma Ahu songon panangko. Martuah ma na jaga anjaha na manramotkon hiouni ase sirsir, ase ulang talanjang ia mardalan, gabe taridah hailaonni.

¹⁶ Jadi ipatumpu ma sidea bani sada ianan, na margoran Harmagedon bani hata Heber.

¹⁷ Dob ai iuseihon na papituhon ai ma batilni hu awang-awang, jadi tarbogei ma sora na maling

hun rumah panumbahan ai, humbani paratas ai, mangkatahon, “Domma saud!”

¹⁸ Dob ai masa ma hilap, sora pakon longgur, masa ma homa lalou bolon, songon na so onnga masa, sadokah dong jolma manisia i tanoh on, lalou na sonai bolonni.

¹⁹ Jadi mabolah ma huta na banggal ai bolah tolu, mangkarumbak ma huta ni bangsa-bangsa, anjaha Babel na banggal ai pe seng ihalupahon Naibata laho painumkon hubani panginuman, na gok anggur hamarahon-Ni na banggal ai.

²⁰ Magou ma sagala pulou, anjaha dolog pe seng dong be jumpah.

²¹ Anjaha madabuh ma sira-sira na banggal, boratni satalenta, hun langit bani jolma, gabe irisai jolma ma Naibata halani sitaronon humbani sira-sira ai; ai parah do sitaronon ai.

Pasal Hadirion ampa Ujung ni Babel

17 ¹ Dob ai roh ma sada humbani malekat na pitu ai, na manjolom batil na pitu ai, marsahap ma ia hu bangku, nini ma, “Roh ma, ase hupatuduhkon bam uhum bani boru jalang na banggal ai, na hundul bani bah na mabuei ai.

² Hasomanni marbangkis do raja-raja ni tanoh in, anjaha mabuk do ganup pangisi ni dunia on ibahen anggur parbangkisonni ai.”

³ Jadi iboan ma ahu ibagas tonduy hubani sada halimisan. Jadi huidah ma sada naboru, hundul bani sada binatang sigerger, na gok bani goran panrisaion, pitu do uluni anjaha sapuluh tandukni.

⁴ Ia pakeian ni naboru ai hiou saholat pakon hiou hasumba do, na ilampis bani omas, intan pakon mutiha; adong do bani tanganni panginuman omas, gok marisi hagigi pakon habutakon ni parbangkisonni.

⁵ Bani pardompakanni tarsurat do sada goran na marrusia: Babel na banggal in, inang ni sagala parbangkison pakon hagigi na i tanoh on.

⁶ Jadi huidah do naboru ai mabuk ibahen daroh ni halak na mapansing ampa daroh ni saksi-saksi ni Jesus. Longang tumang do uhurhu mangidahsi.

⁷ Gabe ihatahon malekat ai ma dompak ahu, "Mase longang uhurmu? Hupatugah ma hu bamu rusia ni naboru on pakon rusia ni binatang na mambobansi ai, na marulu pitu anjaha na martanduk sapuluh ai.

⁸ Ia binatang na nididahmai, na manggoluh do ai hinan, sonari lang be, anjaha naik ma ai use hun ruang partoruh ai, laho masuk hu hamagouan; anjaha sagala pangisi ni tanoh in, na so tarsurat goranni bani buku hagoluhan humbani tombei ni dunia on, longang ma mangidah binatang ai, na dob dong hinan, sonari seng dong be, hape roh use.

⁹ Ibagas on porlu do pangarusion na marhasoman hauhurun! Na pitu ulu ai, ai ma pitu dolog, na hinundulan ni naboru ai, anjaha pitu raja do ai.

¹⁰ Lima hunjai domma madabuh, na sada adong ope, na sada nari lang roh ope; anjaha anggo roh, tongkin do hansa ia adong.

¹¹ Ia binatang na adong hinan, anjaha sonari seng dong be, ai do na paualuhkon, anjaha humbani na pitu ai do ai, anjaha na laho ma ia hu hamagouan.

¹² Ia na sapuluh tanduk nididahmai, ai ma sapuluh raja, na so manjalo harajaonni ope. Tapi jaloan ni sidea do kuasa songon raja-raja sajam dokahni rap pakon binatang ai.

¹³ Sauhur do sidea anjaha ibere sidea do gogoh pakon kuasa ni sidea bani binatang ai.

¹⁴ Marmunsuh ma sidea dompak Anak ni biribiri in, tapi taluhononkon ni Anak ni biribiri in do sidea; ai ia do Tuhan ni sagala tuan anjaha Raja ni sagala raja. Halak na rapkonsi ai pe monang do, ai ma sagala na nidilo, na pinilih anjaha na porsaya.”

¹⁵ Dob ai nini ma dompak ahu, “Ia sagala bah na nididahmai, na hinundulan ni boru jalang ai, ai ma bangsa-bangsa, halak simbuei, suku pakon hata.

¹⁶ Ia tanduk na sapuluh ai, na nididahmai, pakon binatang ai, domdoman ni sidea ma boru jalang ai, lungunan ma bahenon ni sidea ia anjaha talanjang, panganon ni sidea ma dagingni, anjaha tutungan ni sidea ma ia bani apuy.

¹⁷ Ai ipuhoi Naibata do uhur ni sidea, laho pasaudkon sura-sura ni uhur-Ni, laho pasadahon sura-sura ni sidea, laho mangondoskon harajaon ni sidea bani binatang ai, ronsi saud hagogok ni hata ni Naibata.

¹⁸ Ia naboru na nididahmai, ai ma huta na banggal in, na manggomgomi raja-raja na i tanoh on.”

Parseda ni Huta Babel ampa Hata Tangis-tangis Pasalsi

18 ¹ Dob salpu ai huidah ma sada malekat na legan, susur hun nagori atas, na markuasa na banggal, jadi isondangi hasangaponni ma tanoh in.

² Jadi mardilo-dilo ma ia marhitei sora na maling, nini ma, “Domma madabuh, domma madabuh Babilon na bolon in, domma gabe ianan ni setan-setan ai ampa parponopan ni sagala tonduy na mabutak, pakon harang ni sagala manuk-manuk na mabutak, sihagigihononkon.”

³ Ai na dob minum do sagala bangsa humbani anggur parbangkisonni, na pagarangkon ai, anjaha raja-raja ni tanoh in marriah-riahi do pakonsi, anjaha gabe bayak do partiga-tiga ni tanoh in marhitei banggal ni hadoharonni.

⁴ Dob ai hubogei ma use sora na legan hun nagori atas mangkatahon: “Kualar ma nasiam, ale bangsang-Ku, hun tongah-tongahni, ase ulang saor

nasiam bani dousani, anjaha ulang dihut nasiam ihonai sitarononni.

⁵ Ai domma sundol ronsi langit sagala dousani, anjaha idingat Naibata do sagala hajahatonni.

⁶ Balaskon nasiam ma hubani romban hubani pambahenanni bani nasiam, marlompit ma balaskon nasiam na binahenni ai; marlompit ma saorhon nasiam bani panginuman, na sinaorni bani nasiam.

⁷ Honahon ma hubani na maborit ampa hamarsikon ansa buei ni hamuliaon ampa hamantinonni hinan. Ai nini do ibagas uhurni, 'Marparatas do ahu songon raja naboru, sedo na mabalu ahu seng anjai idahonku pusok ni uhur.'

⁸ Halani ai ibagas sadari do roh bani sitarononni: Hamatean, pusok ni uhur ampa lohei, dob ai tutungon ma ia bani apuy, ai na gogoh do Tuhan Naibata, na manguhumsi.

⁹ Tangisan anjaha doruhan ni raja-raja ni tanoh in ma ia, ai ma hasomanni marbangkis anjaha marhabutakon sanggah na ididah sidea timus ni apuy, na manutungsi ai."

¹⁰ Mandaoh-daoh mando sidea jongjong halani biar mangidah sitarononni ai, nini, "Aih, aih, ale huta Babel na bolon in anjaha na toguh in! Ibagas sajam do mangonai uhum bam."

¹¹ Tangis anjaha marhoru do partiga-tiga ni tanoh on mangidahsi, halani seng dong be na mamboli boniaga ni sidea,

¹² ai ma boniaga omas pakon pirak, mata intan, mutiara, hiou putih, hasumba, sitora, hiou sigenger pakon sagala hayu na misbou-misbou, pakon masam ni parugas na pinauli humbani gading, pakon parkakas na pinauli humbani hayu na maharga, humbani tombaga, bosu ampa batu marmar,

¹³ ambah ni ai kulit manis pakon minak na morum, hamonan, mir pakon dahupa, anggur, minak jetun, topung pakon gandum, lembu pakon biribiri, kuda pakon gareta, jabolon pakon jolma.

¹⁴ Buah ni hayu pe, na hinarosuhkon ni u hurmu, mosor do hun bamu, anjaha sagala hajengeson ampa hajombuton magou do hun bamu, seng anjai jumpah be ai.

¹⁵ Halak na mantiga-tigahon ai, na dob bayak marhitei ai, jongjong do mandaoh-daoh, halani mabiar mangidah sitarononni, tangis anjaha mandoruhi, nini,

¹⁶ “Aih, aih, huta na banggal in, na marhiou hiou putih, saholat ampa hasumba, nilampis bani omas, mata intan pakon mutiara! Ibagas sajam do mahansur habayakon na sonai!”

¹⁷ Anjaha haganup kapiten ni kapal ampa halak siparlayar, halak siparhorja i kapal ampa na

marpansarian hun laut, jongjong do sidea mandaoh-daoh,

¹⁸ anjaha doruh-doruh mangidah timus ni apuyni ai, nini, “Huta ja ma na songon huta na banggal an?”

¹⁹ Inahkon sidea ma orbuk bani uluni, sanggah na tangis-tangis anjaha na mandoruhi ai, nini, “Aih, aih, huta na banggal in, na mambahen bayak sagala siparkapal na i laut marhitei artani! Ibagas sajam do seda haganupan ai!”

²⁰ Marmalas ni uhur ma pasalsi, ale nagori atas, ale halak na mapansing, apostel ampa nabi-nabi! Ai domma idabuh Naibata uhum bani halani nasiam.

²¹ Jadi roh ma sada malekat na gogoh mangangkat sada batu na salosung banggalni, anjaha idabuhkon ma ai hu laut, nini ma, “Sonai ma sampakkononkon huta Babel na banggal in, anjaha seng anjai jumpah be.

²² Seng tarbogei be ibagas ho sora ni parhusapi pakon sipandoding, sipartulila, pakon sipartarompit; seng jumpah be ibagas ho situkangi atap aha pe, anjaha sora hun losung pe seng tarbogei be ibagas ho;

²³ anjaha sinondang ni sada palita pe lang be marsinalsal ibagas ho, anjaha sora ni siparunjuk pakon tunanganni seng tarbogei be i tongah-tongahmu. Ai partiga-tigamu do gabe halak na sangap-sangap i tanoh on, anjaha sagala bangsa kahou do ibahen uti-utianmu;

²⁴ anjaha ibagas huta ai do jumpah daroh ni nabi-nabi pakon halak na mapansing, sonai homa daroh ni haganup na dob binunuh i atas tanoh in.”

**Doding Puji-pujian ni Parnagori Atas
Halani Uhum na Mangonai bani Babel**

19 ¹ Dob salpu ai hubogei ma sora na gogoh humbani humpulan banggal i nagori atas, mangkatahon, “Haleluya! Haluahon pakon hasangapon ampa hagogohon, Naibatanta do simada ai.

² Ai sintong anjaha pintor do uhum-Ni, ai domma iuhumi boru jalang na banggal ai, na dob mangagou tanoh in marhitei panriah-riahonni, anjaha ibalaskon do hubani saroh ni juakjuakni.”

³ Dob ai ihatahon sidea ma paduahalihon, “Haleluya! Anjaha naik do timusni ai ronsi sadokah ni dokahni.”

⁴ Jadi manrogop ma sintua na dua puluh ompat ai pakon pargoluh na ompat ai marsombah bani Naibata, na hundul bani paratas ai, nini, “Amen! Haleluya!”

⁵ Anjaha roh ma sada sora humbani paratas ai, mangkatahon, “Puji nasiam ma Naibatanta, nasiam haganup juakjuak-Ni, na mangkabiari-Si, na etek age na banggal!”

Pesta Parunjukon ni Anak ni Biribiri in

⁶Jadi hubogei ma songon sora ni jolma mabuei, songon sora ni buei bah banggal, songon sora ni longgur na gogoh, mangkatahon, “Haleluya! Ai domma manrajai Tuhan Naibatanta, Sigomgom haganup.

⁷Marmalas ni uhur ma hita anjaha marolob-olob, anjaha bere hita ma hasangapon Bani! Ai jumpah ma pesta parunjukon ni Anak ni biribiri in, domma sirsir parinangon-Ni.

⁸Domma ibere hubani hiou putih na borsih sipaheion-Ni. Ia hiou putih ai, ai ma horja hapintoron ni halak na mapansing.”

⁹Anjaha nini ma hu bangku, “Suratkon ma, ‘Martuah do na niontang bani pesta parunjukon ni Anak ni biribiri in.’” Dob ai ihatahon ma hu bangku, “Hata on tongon do hata humbani Naibata.”

¹⁰Jadi manrogop ma ahu i lobei ni nahei-Ni laho manombah-Si, tapi nini ma dompak ahu, “Ulang sonin, hasomanmu juakjuak do ahu anjaha hasoman juakjuak ni saninamu, na manjolom hasaksian ni Jesus. Naibata do sisombahonmu! Ai hasaksian ni Jesus, ai ma tonduy ni panjahaion.”

**Jesus Kristus Siparmonang
Manaluhon Binatang ampa Balani**

¹¹ Dob ai huidah ma mungkab nagori atas, anjaha tonggor ma, sada huda na putih, anjaha na mangajak ai margoran do Haposan anjaha Parsintong, anjaha ibagas hapintoron do la manguhumi anjaha mamorang.

¹² Songon gara ni apuy do mata-Ni, anjaha buei do sortali bani ulu-Ni, adong do goran-Ni tarsurat, na so binotoh ni age ise, sobali la sandiri.

¹³ Ipakei do hiou na nironjamkon bani daroh anjaha goran-Ni ai ma, "Hata ni Naibata."

¹⁴ Mangihut do Bani sagala bala na i surga mangajak huda putih. Hiou na putih anjaha na borsih do pakeian ni sidea.

¹⁵ Mandarat do humbani pamangan-Ni podang na marot, sitampulhonon-Ni bani bangsa-bangsa. Parmahanon-Ni ma sidea marhitei tungkot bos, anjaha la do mandogei pangilangan anggur ni ringis banggal ni Naibata, Sigomgom haganup.

¹⁶ Tarsurat do goran-Ni bani hiou-Ni pakon binongei-Ni, "Raja ni sagala raja anjaha Tuhan ni sagala tuan."

¹⁷ Dob ai huidah ma sada malekat jongjong ibagas mata ni ari, anjaha mandilohon marhitei sora na gogoh bani manuk-manuk na i awang-awang na

gijang in, “Roh ma hanima martumpu bani pesta mangan-mangan bolon ni Naibata,

¹⁸ laho mangankon daging ni raja-raja, daging ni puanglima pakon halak na gogoh, daging ni sagala hudu pakon daging ni na mangajaksi, daging ni sagala halak na mardeka pakon jabolon, age na etek age na banggal.”

¹⁹ Jadi huida ma binatang ai ampa raja-raja ni tanoh on rap pakon bala ni sidea martumpu laho marmunsuh dompak na mangajak hudu ai pakon balani.

²⁰ Gabe tartangkap ma binatang ai rap pakon nabi sipahulah-kulah ai, na dob mambahen tanda-tanda i lobeini, parhiteianni paoto-otohon sagala na manjalo tanda ni binatang ai pakon na manambah gambaranni. Manggoluh do na dua ai idabuhkon hu laut apuy na gajag marhasoman hirtah.

²¹ Ia na tading ai ibunuh do marhitei podang na kaluar humbani pamangan ni na mangajak hudu ai, gabe bosur ma sagala manuk-manuk ibahen daging ni sidea.

Igarihon Sibolis Saribu Tahun Dokahni

20 ¹ Dob ai huida ma sada malekat susur hun nagori atas, na manjolom anakungsi ni ruang partoruh anjaha gari banggal do bani tanganni.

² Jadi itangkap ma naga ai, ulog na basaia ai, ai ma sibolis pakon setan, anjaha igarihon ma ia saribu tahun dokahni.

³ Idabuhkon ma ia hu ruang partoruh, itutup anjaha ilak ma i atasni, ase ulang be ipakahou sagala bangsa, paima gok na saribu tahun ai. Dob salpu ai maningon paluahon do ia tongkin.

Pasal Harajaon Sisaribu Tahun

⁴ Jadi huidah ma buei paratas anjaha adong do na hundul i atasni, ibere ma bani sidea kuasa manguhumi. Anjaha huidah ma tonduy ni sagala na hona tampul uluni halani na manaksihon Jesus pakon halani hata ni Naibata, sagala na so manombah binatang ai atap gambaranni pe, anjaha na so manjalo tanda bani pardompakanni atap bani tanganni. Mulak manggoluh do sidea anjaha manrajai rap pakon Kristus saribu tahun dokahni.

⁵ Ia na matei na legan, seng mulak manggoluh, paima salpu na saribu tahun ai. Ai ma parpuhoon na parlobei.

⁶ Na martuah anjaha na pansing do halak na marrupe i bani parpuhoon na parlobei ai. Seng markuasa be hamatean na paduahon ai bani sidea, gabe malim ni Naibata pakon Kristus do sidea anjaha mamarentah rap pakon-Si saribu tahun dokahni.

Uhum bani Sibolis

⁷ Dob salpu na saribu tahun ai, ipaluah ma sibolis ai humbani tutupanni.

⁸ Jadi luar ma ia pakahouhon sagala bangsa na bani na ompat deisa ni tanoh on, ai ma Gog pakon Magog, laho patumpuhon sidea hu parmunsuhan; ia bilangan ni sidea songon horsik na i topi laut do.

⁹ Jadi tangkog ma sidea hu hanopan na bolag ai, anjaha ihubu ma bala ni halak na pansing pakon huta na hinaholongan ai; gabe madabuh ma apuy hun nagori atas, ai ma na mamboiskon sidea.

¹⁰ Anjaha sibolis ai, na pakahouhon sidea ai, idabuh ma hu laut apuy pakon hirtah, hu ianan ni binatang pakon nabi sipahulah-kulah ai, ase iarsik-arsik arian pakon borgin ronsi sadokah ni dokahni.

Paruhuman na Parpudi

¹¹ Dob ai huidah ma sada paratas na banggal anjaha na putih ampa na hundul i atasni ai. Mandompakkon bohini maporus do tanoh pakon langit, seng dong be jumpah ianan bani sidea.

¹² Dob ai huidah ma sagala na matei, na banggal pakon na etek, jongjong i lobei ni paratas ai; jadi iungkab ma buku-buku. Dob ai iungkab ma sada buku na legan, ai ma buku hagoluhan ai, gabe iuhum ma na matei ai mangihutkon na tarsurat

ibagas buku-buku ai, romban hubani horja ni sidea bei.

¹³ Jadi ibere laut ai ma sagala na matei ibagas ai, anjaha hamatean pakon nagori toruh ai pe ibere ma sagala na matei na ijai ai; jadi iuhum ma ganup sidea domu hubani horja ni sidea.

¹⁴ Ia hamatean pakon nagori toruh ai idabuh ma hubagas laut apuy ai. Ai ma hamatean na paduahon, laut apuy ai.

¹⁵ Barang ise na so jumpah tarsurat bani buku hagoluhan ai, idabuhkon ma ia hubagas laut apuy ai.

Langit na Bayu pakon Tanoh na Bayu

21 ¹ Dob ai huidah ma langit na bayu pakon tanoh na bayu; ai domma salpu langit na parlobei ai pakon tanoh na parlobei ai, laut ai pe seng dong be.

² Anjaha huidah ma huta na pansing ai, ai ma Jerusalem na bayu, susur hun nagori atas, humbani Naibata, na pinasirsir songon tunangan na pinajagar marayak paramangonni.

³ Dob ai hubogei ma sada sora na gogoh humbani paratas ai, mangkatahon, “Tonggor ma, on ma ianan ni Naibata i tongah-tongah ni jolma; marianan ma la i tongah-tongah ni sidea, anjaha sidea ma bangsa-Ni anjaha Naibata sandiri saor bani sidea.

⁴ Anjaha apusan-Ni ma sagala iluh humbani mata ni sidea, seng dong be hamatean, age pusok ni uhur, age partangisan, age halojaon seng dong be, ai domma salpu na parlobei in.”

⁵ Dob ai nini na hundul bani paratas ai ma, “Tonggor ma, bayu do Hubahen haganup. Ambah ni ai ihatahon do: Suratkon ma in, hatengeran anjaha sintong do hata in.”

⁶ Lanjar ihatahon ma hu bangku, “Domma saud! Ahu do Alpa pakon Omega, Bonani pakon Ujungni. Bereon-Ku do minum halak na horahan humbani bah tubuh hagoluhan, seng pala marpamboli.

⁷ Na monang in do manean ai haganup, Ahu ma gabe Naibata bani, anjaha ia ma gabe anak Bangku.

⁸ Tapi halak siparbiar, na so porsaya, na butak, pamunuh, panriah-riah, partabas-tabas, parnaibata na legan ampa sagala parladung, parrupeai do bani laut na gara ibahen apuy pakon hirtah. Ai ma hamatean na paduahon.”

Jerusalem na Bayu

⁹ Dob ai roh ma sahalak humbani na pitu malekat ai, na manjolom batil na pitu ai, na marisi hamarsikon parpudi na pitu ai, marsahap ma ia dompak ahu, nini ma, “Roh ma, ase hupatuduhkon bam tunangan ai, parinangon ni Anak ni Biri-biri in.”

¹⁰ Jadi iboan ma ahu ibagas tonduy hubani sada dolog na banggal anjaha na gijang, anjaha

ipatuduhkon ma hu bangku huta na pansing ai, ai ma Jerusalem, na susur hun nagori atas, humbani Naibata,

¹¹ ibagas hasangapon ni Naibata. Sinalsalni usih hubani mata intan na maharga, songon mata intan jaspis na marlinang-linang.

¹² Banggal janah gijang do tembokni, horbanganni sapuluh dua do anjaha sapuluh dua malekat i atasni; anjaha tarsurat do goran-goran ijai, ai ma goran ni marga ni halak Israel na sapuluh dua ai.

¹³ Dompak purba tolu horbangan, dompak utara tolu horbangan, dompak dangsina tolu horbangan anjaha dompak pastima tolu horbangan.

¹⁴ Sapuluh dua do batu onjolan ni tembok ni huta ai, anjaha tarsurat do ijai goran ni na sapuluh dua apostel ni Anak ni biribiri in.

¹⁵ Ijolom na marsahapkon ahu ai do sada tungkot sibar-sibar na humbani omas, laho manibar huta ai, horbanganni ampa tembokni.

¹⁶ Marompat suhi do popou ni huta ai, dos do ganjangni pakon bolagni. Isibar ma huta ai marhitei sibar-sibar ai: Sapuluh dua ribu stadia. Dos do ganjangni pakon bolagni pakon gijangni.

¹⁷ Isibar ma homa tembok ni huta ai: Saratus ompat puluh ompat asta; sibar-sibar ni jolma do sibar-sibar ni malekat ai.

¹⁸ Ia onjolan ni tembok ni huta ai mata intan jaspis do, anjaha huta ai sandiri omas pitah do, lihar songon kasa.

¹⁹ Ipajagar do onjolan ni tembok ni huta ai marhitei bagei ni batu na maharga: Onjolan na parlobei jaspis do, na paduahon sapir, na patoluhon kalsedon, na paompatkon samarah,

²⁰ na palimahon sardonik, na paonomkon sardion, na papituhon kerisolit, na pauluhkon beril, na pasiahkon topasion, na pasapuluhkon kerisopras, na pasapuluhsadahon kiasin, na pasapuluhduahon ametis.

²¹ Ia na sapuluh dua horbangan ai, sapuluh dua mutiha do, ganup horbangan ipauli humbani sada mutiha; ia alaman ni huta ai omas pitah do songon kasa na lihou.

²² Seng dong huidah rumah panumbahan ibagas huta ai, ai Tuhan Naibata, Sigomgom haganup do na gabe rumah panumbahan ijai, rap pakon Anak ni biribiri in.

²³ Seng porlu bani huta ai mata ni ari atap bulan laho manondangisi; ai hasangapon ni Naibata do na paliharhonsi anjaha Anak ni biribiri in do panondangni.

²⁴ Mardalani ma bangsa-bangsa ibagas sinalsalni, anjaha boanon ni raja-raja ni tanoh on ma hamuliaon ni sidea hubagas.

²⁵ Seng pala itutup horbanganni arian, ai seng masa ijai borgin.

²⁶ Boanon ni sidea ma hasangapon pakon hamuliaon ni sagala bangsa hubagas huta ai.

²⁷ Tapi seng anjai masuk hubagas huta ai sagala na mabutak, na mangkorjahon hagigi pakon ladung, pitah na dob tarsurat bani buku hagoluhan ni Anak ni biribiri ai do hansa.

Bah Hagoluhan pakon Hayu Hagoluhan

22 ¹ Dob ai ipatuduhkon ma hu bangku sada bah banggal hagoluhan, lihou songon kasa, na luar humbani paratas ni Naibata pakon Anak ni biribiri in.

² I tengah-tengah ni alaman ni huta ai pakon angkup topi ni bah ai, dong do hayu hagoluhan, na marbuah sapuluh dua hali satahun, na mamberehon buah siap bulan; ia bulung ni hayu ai gabe hamalumon do ai bani bangsa-bangsa.

³ Seng be dong na hona bura ijai. Paratas ni Naibata pakon Anak ni biribiri in do jongjong ijai, anjaha juakjuak-Ni marugas Bani.

⁴ Idahon ni sidea ma bohi-Ni, anjaha goran-Ni tarsurat bani pardompakan ni sidea.

⁵ Seng masa be ijai borngin, seng porlu be bani sidea sondang ni suluh atap sondang ni mata ni ari, ai sondangan ni Tuhan Naibata ma sidea, anjaha manrajai ma sidea ronsi sadokah ni dokahni.

Sipaingat Parujungan

⁶Jadi ihatahon ma hu bangku, “Ia hata on hatengeran ni uhur do anjaha sintong; isuruh Tuhan Naibata, simada tonduy ni nabi-nabi do malekat-Ni, laho patuduhkon hubani juakjuak-Ni na laho barah masa.

⁷Tonggor ma, barah do Ahu roh! Martuah ma na manramotkon hata ni panjahaion na ibagas buku on!”

⁸Ahu, si Johannes, do na mambogei anjaha na mangidah na masa in. Jadi dob hubogei anjaha huidah, manrogop ma ahu anjaha marsombah hu lobei ni nahei ni malekat, na patuduhkon ai hu bangku.

⁹Jadi nini ma dompak ahu, “Ulang sonai! Ai hasomanmu juakjuak do ahu anjaha hasoman juakjuak ni saninamu, nabi-nabi ai, ampa na manramotkon hata ni buku on. Naibata ma sombah!”

¹⁰Dob ai nini ma dompak ahu, “Ulang ma lak hata panjahaion ni buku on! Ai dohor ma panorangni.”

¹¹Halak sihorjahon hajahaton inunut ma mambahen na jahat, anjaha halak na butak lambin mambutaki dirini; tapi halak parpintor mangkorjahon hapintoran, anjaha halak na pansing papansing dirini.

¹² Tonggor ma, podas do Ahu roh! Huboan do upah, laho mambalas hubani ganup halak romban hubani na hinorjahonni bei.

¹³ Ahu do Alpa pakon Omega, Na Parlobei pakon Na Parpudi, Bonani pakon Ujungni.

¹⁴ Martuah ma sagala na mamburihi hiouni, gabe marhak sidea marrupei bani hayu hagoluhan ai, anjaha boi masuk hun horbangan ai hubagas huta ai.

¹⁵ I darat ma anggo baliang pakon sipartabas pakon parbangkis pakon pamunuh pakon parnaibata na legan ampa sagala na mangkarosuhkon anjaha na mangkorjahon ladung.

¹⁶ Ahu, Jesus, marsuruh malekat-Ku bani nasiam, manaksihon on bani kuria in. Ahu do Urat pakon Marga ni si Daud, Bintang buha siang, na marsinalsal in.

¹⁷ Jadi ihatahon Tonduy pakon tunangan ai ma, “Roh ma Ham!” Anjaha na mambogei ai pe ihatahon ma, “Roh ma Ham! Barang ise na horahan, roh ma; na marhasihol, ijalo ma bah hagoluhan in seng pala marpamboli.”

¹⁸ Ahu manaksihon bani sagala na mambogei hata ni panjahaion na bani buku on, “Anggo adong na manambahi hujin, tambahan ni Naibata ma bani hamarsikon na tarsurat ibagas buku on.

¹⁹ Anggo adong halak na mambuati hata na ibagas buku panjahaion on, buaton ni Naibata ma rupeini

na bani hayu hagoluhan in ampa na bani huta na pansing in, na tarsurat ibagas buku on.”

²⁰ Ihatahon sisaksihon on, “Tongon, barah do Ahu roh!” Amen! Roh ma Ham, Tuhan Jesus!

²¹ Idop ni uhur ni Tuhan Jesus ma mangkasomani nasiam haganup!

Alkitab

=====

Bahasa Batak Simalungun

LAI - 2007 Edition

Website:

www.bible.com

© 2007 LAI

<https://www.bible.com/versions/34>